







~~24~~=1. 9A=2

Int 209
w 92

THESAURVS
ANTIQVITATVM
ET
HISTORIARVM
ITALIAE,
MARI LIGVSTICO & ALPIBVS VICINAE.

TOMI TERTII PARS PRIOR.



THESE AVRS
ANTIOVITVM

ET

HISTORIARVM

ITALIAE.

MARI LIGASTICO & ALPIBUS VICINAE

TOMI TERTII PARS PRIMA

THE SAVRVS
ANTIQTITATVM
ET
HISTORIARVM
ITALIAE

MARI LIGVSTICO & ALPIBVS VICINAE
TOMI TERTII PARS PRIOR



LVGD. BATAV.
APVD
PETRVM VAN DER AA.
MDCCIV.

J. Goeree In.



THESE
ANTIOVITVM

INSTITVTVM
ITALIAE

INSTITVTVM
LIGVRVM ET INSVLRVM

GENVTIVM ET MEDIOLANENSIVM
IOANNIS GEORGII GRAEVII

TOMI TRITII PARS PRIOR



MDCLV

THESAVRVS
ANTIQVITATVM

ET

HISTORIARVM

ITALIAE,

MARI LIGVSTICO & ALPIBVS VICINAE;

quo continentur

Optimi quique Scriptores,

Qui

LIGVRVM ET INSVBRVM,

Sen

GENVENSIVM ET MEDIOLANENSIVM,

Confiniumque Populorum ac Civitatum Res Antiquas, aliasque vario tempore gestas, memoriae prodiderunt:

Collectus Cura & Studio

JOANNIS GEORGII GRAEVII.

Accefferunt

Variae & accuratae tabulae Geographicae, aliaeque, ut & Indices ad singulos Tomos locupletissimi.

TOMI TERTII PARS PRIOR.

Scriptores hujus Tomi proximo folio reperientur.



LVGDVNI BATAVORVM,

Excudit PETRVS VANDER AA, Bibliop.

M D C C I V.

ANTHONY

STORY
OF THE

REIGN OF

CHARLES

THE FIRST

OF GREAT

BRITAIN

AND

WELSH

BY

JOHN

WILKINS

ESQ.

OF THE

MIDDLE

TEMPLE

AND


OF THE

BAR

LONDON

S E R I E S S C R I P T O R V M,
Qui in tertio Tomo Thesauri Antiquitatum Italiae
inveniuntur.

P A R S P R I O R.

eorgii Merulae, Alexandrini, *Antiquitates Vicecomitum, Libri x.* Pag. I
Pauli Jovii, Novocomensis, Episcopi Nucerini, *Vitae Duodecim Vi-*
cecomitum, Mediolani Principum, singulorum veris Imaginibus illu-
stratae. 241


Jo. Ant. Castellionaei, Vicarii perpetui Abbatiae S. Vinc. in Prato,
Mediolanenses Antiquitates, ex Urbis Paroeciis collectae, ichnographicis ipsarum ta-
bulis, recentibus rerum memoriis, variis Ecclesiasticis ritibus auctae & illustra-
tae. 337

Bernardi Sacci, Patritii Papiensis, *Historiae Ticinensis Libri x. in quibus multa scitu*
digna recensentur de Italiae Populorum vetustate, dominio, & mutatione: Item de
Provinciarum proprietate, & Rom. Ecclesiae amplificatione, &c. 577

Jo. Chrysostomi Zanchi, Bergomatis, Canonici Ord. D. Augustini, *de Orobiorum,*
sive Cenomanorum, origine, situ, ac Bergomi rebus antiquis Libri tres. 777

Joannis Baptistae Villanovae, *Laudis Pompejæ, sive Laudæ (nunc Lodi) Urbis*
historia. Dedicata Illustrissimis ejusdem Urbis Decurionibus. Ex Italico in Lati-
num Sermonem transtulit Alexander Dukerus. 841

P A R S P O S T E R I O R.

thonis Morenae, Laudensis, & Acerbi Othonis F. *Historia rerum Laudensium,*
tempore Federici AEnobarbi Caesaris, cum Notis & Emendationibus Felicis Ofii.
Ad Amplissimos Urbis Decuriones. 945

Erycii Puteani, Mediolan. Profess. Eloquent. *Historiae Cisalpinæ Libri duo: quibus*
continentur Res potissimum circa Lacum Larium à Jo. Jacobo Medicaeo gestæ. 1137

Alex. Dukeri Comi *Urbis historia, & descriptio.* 1197

Camilli Ghilini, Mediolanensis, *Descriptio Lacus Larii & Vallis Tellinae.* 1203

Pauli Jovii *Descriptio Lacus Larii, sive Comensis.* 1209

Galeatii Capellæ *de Bello Musiano Liber adoptivus.* Ex Bibliotheca Ambrosia-
na. 1225

Ludovici Cavitelli, Patritii, Cremonenses *Annales: quibus res gestas memorabiles a*
Patriæ suæ origine usque ad ann. salut. 1583. breviter ille complexus est. Auctio-
res & Emendatiores. 1251

Vmberti Locati Placentini, *de Placentinae Urbis origine, successu, & laudibus, se-*
riosa narratio. 1. in fine voluminis.

THE NEW YORK PUBLIC LIBRARY

ASTEN LENOX TILDEN FOUNDATION

500 N. 5TH ST. NEW YORK, N.Y.

1891

RECEIVED

THE NEW YORK PUBLIC LIBRARY

ASTEN LENOX TILDEN FOUNDATION

500 N. 5TH ST. NEW YORK, N.Y.

1891

RECEIVED

THE NEW YORK PUBLIC LIBRARY

ASTEN LENOX TILDEN FOUNDATION

500 N. 5TH ST. NEW YORK, N.Y.

1891

RECEIVED

GEORGII MERVLAE
ALEXANDRINI,
ANTIQUITATIS
VICECOMITVM
LIBRI X.

ILLVSTRISSIMIS VIRIS,
ALPHONSO VICECOMITI

P R A E F E C T O,

E T

S E X A G I N T A

Generalis Urbis Mediolanensis Concilii

D E C V R I O N I B V S,

Marchio Jo. Maria, & Comes Antonius,

Vicecomites,


FELICITATEM.



N secundam, Illustrissimi Cives, delati nobis muneris partem. superiore anno ex umbra, in qua integrum amplius seculum inglorius latuit, in præclaram vestri nominis lucem eduximus Tristanum Calchum de Mediolanensi historia optime meritum. quo ex opere quantum communi patriæ splendoris, tantum huic ordini auctoritatis accessit. Hic annus (ne nullum vobis attulerit nostræ sollicitudinis fructum) GEORGII MERVLAE editione notabitur. Is sub VICECOMITVM ANTIQVITATE Urbis totius res gestas ante Tristanum complexus est: eumque iuvit non modo exemplo scribendi; sed etiam verbis, ac rebus locupletavit adeo, ut ceu senior Nisus Eurialo juniori videatur edixisse:

Hæc ego vasta dabo, & lato te limite ducam.

Itaque præposterè fortasse factum videatur, ut qui tempore, styloque præcessit, in scenam secundus prodeat: nisi maluissemus nascenti tunc primum Calcho obstetricari, quam male tornatum Merulam incudi reddere. Nempe non hoc primum Merula passus est prælum, sed ferebatur typis adeo incaustigatis, ac rudibus, ut delicatiore lectorum seculo jaceret carie damnatus, ac situ; nisi urbanum & ipsi cultum vestra munificentia comparasset. Tristanus, ne sub alea pereundi diutius in incerta lateret chirographorum luce, quam solam viderat, propero prælo educendus fuit. Fecit etiam Merulae moras nescio quis pudor noster, ac timor, ne unius Vicecomitum generis antiquior nobis fuisse, quam totius Urbis dignitas videretur, si à Merula potius, qui unius nostræ gentis nomen titulo præfert, quam à Tristano, qui totius rei Mediolanensis historiam profitetur, demandatæ nobis provinciæ procurationem auspicaremur. Sed cunctari nos diutius non est passus Illustrissimus Senator Paulus Raudensis: qui ut præclari operis suscipiendi toti olim ordini auctor fuit; ita nobiscum illud hodieque urgere pergit. Merulanæ Vicecomitum historiae, vix justo alioqui volumini, adjungendos curavimus Duodecim JOVII Vicecomites, & PETRI CANDIDI Philippum Mariam: ut eodem clauderentur volumine, qui eodem in argumento versati sunt. Quod reliquum est nostrarum partium subinde à nobis nihilo minore studio, majore fortasse temporis compendio habebitis. Vos interim Rempublicam, ut facitis, in dies illustrate, vestrisque haud imparem nominibus, ac procurationibus effcite, ac Valet. Dat. Mediolani. Idib. Augusti M. DC. XXIX.





Nomina Illustrissimorum

SEXAGINTA DECVRIONVM CONCILII GENERALIS MEDIOLANI.

Hieronymus Pusterla, J. C.
 Marchio Alexander Vistarinus.
 Co. Jo. Baptista Vicec. Co. Coriolani F.
 Marchio Cæsar Brippius, Quæstor.
 Hieronymus Marcus Antonius Brebia.
 Comes Octavius Vicecomes.
 Comes Balthasar Bilius.
 Joannes Abbiatus Forerius.
 Eques Carolus Vicecomes.
 Marchio Joannes Maria Vicecomes.
 Co. Hieronymus Plattus, Eques S. Jac.
 Alexander Castillioneus, J. C.
 Petrus Martyr Aliprandus.
 Paulus Raudensis, Senator.
 Paladinus Cribellus.
 Horatius Affandrius.
 Comes Octavius Archintus.
 Comes Constantius Taberna.
 Comes Carolus Rasinus.
 Comes Ubertus Pirovanus.
 Comes Aloysius Marlianus.
 Ludovicus Meltius, J. C.
 Comes Antonius Vicecomes.
 Franciscus Gallaratus.
 Marchio Franciscus Maria Vicecomes.
 Balthasar Barzius.
 Comes Joannes Serbellonus.
 Antonius Rainoldus.
 Comes Bartholomæus Caimus.
 Scipio Tonfus.

Alexander Siccus, J. C.
 Comes Joannes Ambrosius Pecchius.
 Ludovicus Cribellus.
 Joseph Raverta.
 Marchio Cæsar Vicecomes.
 Comes Philibertus Somalia.
 Alphonfus Befutius.
 Joannes Baptista Arcimboldus.
 Jo. Paulus Sfortia Marchio Caravagii.
 Galeatius Arconatus.
 Comes Hieronymus Barbovus.
 Comes Antonius Corius.
 Mutius Foppa.
 Jacobus Maria Stampa.
 Julius Sclafenatus.
 Paulus Camillus Abdua.
 Hieronymus Advocatus, J. C.
 Alexander Vicecomes.
 Comes Carolus Franciscus Serbellonus.
 Franciscus Castillioneus.
 Comes Jacobus Mandellus Eques S. Jac.
 Joannes Petrus Negrolus.
 Comes Paulus Simonetta.
 Comes Bartholomæus Aresius.

✦
 ✦
 ✦
 ✦
 ✦
 ✦

A D L E C T O R E M.



*N*E forte, prudens Lector, à Tristano Calcho nuper edito præoccupatus, alienum ab hujus scri-
 ptore historiae animum attuleris, ejusque tum diligentiam, tum fidem identidem suspectam ha-
 beas; queso te, ut omni deposito præjudicio, de totius controversia summa incorruptè judices.
 Tristanus Calchus cum bonarum artium stipendia in juventute sub Merula meruisset, historia
 Vicecomitum, quam ille decem jam libris magnam partem texuerat, absolvenda admotus,
 non satis se posteritati commendatum iri existimavit, si Præceptori suo aquatus in ejusdem ope-
 ris, & gloria societatem veniret. Itaque non modò retexere maluit rei Mediolanensis histo-
 riam, quam Merulanam producere; sed unius Vicecomitum familie splendori totius Urbis cla-
 ritudinem prætulit. Quin etiam Merulam, cen ejusdem æmulum gloria, quod in eadem cau-
 sa versaretur, minùs amare cœpit, & observare, quam ii soleant, qui suis aliquid modo præceptoribus acceptum fe-
 runt. & quasi nomen suum non nisi in alterius litura posset inscribere, frequenter illi allivit atrum transversò calamo
 signum, carpit voces, & studium politioris sermonis vitio vertit. Ne diligentiam quidem, ac fidem, qua vel una,
 vel prima historiae laus est, illi reliquam facit. non observasse illum apud veteres Romanos scriptores multa hujus urbis
 propria, quibus suam poterat historiam locupletare: recentes quoque finitimarum civitatum, quarum res geste nostris
 plerumque conserta sunt, annales, & publicas tabulas non legisse: denique Vicecomitum, quibus locaverat stylum,
 glorie usque adeo servire, ut dum ejus amplificande studio ubique prurit, præclara quæque, & à poetis conficta pro
 veris habuerit. Utque animorum nostrorum erga amicos, & rivales motus affinia quoque contingunt, in Tristano facile
 sentit lector nescio quam animi in Vicecomitum genus obliquitatem. Hoc ego loco non recolo prudentissimum Josephi di-
 ctum, falli vehementer historicos, qui se veraces visum iri arbitrantur, si, quod ab aliis memoriae præditum est, ipsi
 reprehenderit; aut aliter, quam ceteri scripserint: cum id potius efficiant, nullius ut certa esse videatur assertio, &
 tota rei veritas nutet: quod mendacis historiae argumentum sit, si de eisdem rebus non eadem omnes conscribant. Non
 commemoro Polybium historiam cum regula, & norma eo conferentem, quod utraque dum variè distracta torquetur,
 enormis ubique, ac prava esse censeatur. Ita enim Merula succurro, ut Calchum de patria historia optimè meriti
 nullius criminis reum velim. Eadem utrique fuit causa rerum à Vicecomitum gente præclare gestarum posteritatis me-
 moria commendanda. Quare æquum est, ut quod de se ab aliis credi vult Calchus, idem ipse de Merula opinetur,
 nullius illi hominis gratiam fuisse historica veritate antiquiorem. At quæ de Angleria Comitibus tradit Merula, eos

AD LECTOREM.

ante Mediolani novissimum sub Friderico I. excidium inter Longobardos proceres dignitate, & potentia facile principes extitisse; & ab eodem, cujus potentia prater ceteros fuissent adversati, urbe capta, securi percussos, uno Viviano, vel Galvaneo, cujus precipua jam tum esset in Urbe autoritas, superstite, ac profugo; qui deinde reversus vindicanda libertatis, tum instauranda sub Vicecomitum appellatione stirpis, author fuerit: hac, inquam, & alia ejusdem generis, quae nec ignorari potuerunt, nec negligi, quippe non scriptis modò, verum etiam theatri digna, à nullo umquam probata fidei aliarum gentium scriptore commemorata sunt. Habent verò authores non magni nominis, duos scilicet nostrates Theologos Stephanardum Vicomercatum, & Calvaneum Flammam, quorum alter Vicecomitum stirpem à Jove, & Venere per Anchisen deducens, Anglumque Ascanii filium Liviana historia, Virgilianisque inventis adjiciens, quem Angleria fundamentis inscriberet; alter metro, ut circa, & ultra veritatem historicam liberius vagaretur, abutens, ejus gentis seriem parum seriam, ac fabula similem reddiderunt. Audio. Sed quae est ista Calchi ratio, domesticos, & rerum conscios testes repudiare, abrogare illis fidem; ab externis summam rerum nostrarum memoriam, ac diligentiam repetere? quae est ista rara inter homines sapientia, contemnere sua, aliena admirari? quae recondita eruditionis ostentatio, nihil probare, nisi peregrinum, & apud externos natum? cujusmodi illud est, Vicomercato, ac Flammæ non satis habere fidei, quoniam uterque Theologus est? Et Flammam cur poetice potius, quam Latine, atque historice de Vicecomitum origine loquentem facit? An quòd non modò Vicecomitum gentem in Angleria Comites revocat, sed & hos per Ascanium ab Aenea, Venere, ac Jove derivat? Quid ergò non historico pariter igne, atque aqua interdictum est Livio, qui poeticis magis decora fabulis, quam incorruptis gestarum rerum monumentis tradidit, miscuitque humana divinis, quò primordia Urbis augustiora faceret, & Romanae gentis cunabula consecraret? Scilicet si quid paulò liberius ad vulgi opinionem dixerit historicus, non continuo quiddam ab illo fluxerit, historia finibus eliminandum erit; neque si Romulus, ac Remus falsò Deorum proles dicti fuere, mendo sè quoque fratres appellati sunt, & Roma conditores. Licuerit Flammæ Liviano exemplo quod de Comitibus Angleriae supra fidem acceperat non resellere, illud propterea Calchi suffragio ne damnetur, quod Vicecomites docuerit ab Angleriae Comitibus propagatos. Sed ne tota hujus rei fides Vicomercato, ac Flammæ stet testibus, primùm non recusat ipse Tristanus, quo minùs compertum sibi literis, allatoque ex Germanis testimonio fateatur, Vivianum, seu, quod alii malunt, Galvaneum Angleriae Comitem unum in Mediolani excidio suorum omnium stragi superstitem à Friderico Urbis expugnatore in Germaniam abductum esse, ibi in vinculis habitum, donec vel sororis interventu, quae sacris Magorum cadaveribus indicatis, meriti pretium vitam fratris, ejusdemque libertatem ab Imperatore retulerit; vel elusis arte custodiis in patriam reversus fuerit, ubi & stirpem instauravit, & eam, pressa Comitum appellatione ad invidiam tituli demittendam, avito gentis cognomine Vicecomites dici voluerit. Deinde ut apud nullos probati nominis authores quidquam de Angleriae Comitibus in Vicecomites migrantibus viderit Calchus, profectò nemo æquus estimator dubia statim pronunciet, quae ab illo contigerit ignorari. Sed extat Peiri de Castelletto Heremitarum Ordinis Magistri testimonium, qui & de superiore loco vir, ut per ea tempora, eruditionis aequè, ac pietatis eximia, Vicecomitum originem ab Angleriae Comitibus totis palàm urbibus docuit, & eam stylo, ac voluminibus consignatam transmisit ad posteros; ac ne solis viveret caracteribus, ducto per seriem gentis penicillo, expressis eleganter imaginibus animavit. asservatur hodieque illud opus antiquissima, ne antiquari possit, veritatis obses, & cum eo anonimus alius, seu potius injuria temporis acephalus ejusdem author veritatis, cui nihilo minorem pretiosa caracterum caries fidem pariat. Demum si qua parte Merulana narratio de Vicecomitum origine labaret, non ei ad stipulatos haberemus Bernardinum Corium, & Joannem Tarcagnetam oculatissimos historicos, quorum ille Mediolanensium res, hic omnium gentium, & nationum toto orbe gesta non minore fidei, ac diligentiae laude, quam nominis celebritate complexus fuit. Nunc qui Vicecomitum originem in Merula reprehendat, par illud, quod laudavi, simul historicorum sugillet. Sed quae diximus satis, opinor, superque omnem Tristano, omnem Lectori religionem in Merula probanda fide possunt evellere.

IMPRIMATUR.

Fr. Vincentius Aqueus Provicarius S. Officii Mediol.
Hieronymus Septala Can. Ord. Pœnit. pro Illustrissimo Card. Archiep.
Visa pro Excellentiss. Senatu.

S V M M A R I A

A C

CONTENTA LIBRORVM,

Qui in hoc GEORGII MERVLAE, de Antiquitatibus Vicecomitum, Volumine continentur.

LIBER I.

- C**ontinet brevem expositionem ab origine Urbis usque ad extinctos Longobardorum Reges; à quibus Angleria Comites, qui postea Vicecomites.
- II. Cum progenies Caroli defecisset; Berengarii, & Othones per vim imperant. Ex lege per suffragia Germani Proceres Imperium: Romani autem Pontifices Sacerdotium, & Regnum obtinent.
- III. Obsidente Gottofredo Hierosolyma, Otho Vicecomes provocantem Barbarum singulari certamine occidit, Viperamque retulit. Fridericus armis Alexandrum persequitur, atque Mediolanum evertit.
- IV. Dum junior Fridericus Pontifices perpetuo bello vexat, per contraria in urbibus studia permiciales seditiones & bella civilia exorta: quo mortuo, moxque occiso Actioli no, Turrianus rerum potitur.
- V. Repetitur Vicecomitum origo. Nobiles patria fugati erant. Otho Vicecomes, tandem debellatis Turrianis, Pontificatum urbis cum regno obtinuit.

- VI. Bella, & conjunctio in Othonem: prodigia in ortu Matthaei: Gulielmi captivitas: nuptiae Galeacii: Matthaei exilium, & origo factionum referuntur. Henricus summa rerum designatur.
- VII. Henricus in Italiam descendens Mediolani ornamenta regia capit: ejectisque Turrianis, & Matthaeo in procuratorem restituto Laudem Pompejam recipit.
- VIII. Cremona, & Brixia subacta, in Ligures Henricus concessit. Inde Pisas mari delatus Romam petit: ubi repugnante Roberti factione, non in Petri, sed in Lateranorum templo coronatur: mox in Hetruscos reversus moritur.
- IX. Henrici factionem cis Apenninum Baucius infestat. Matthaeus Papiam, & Alexandriam recipit, ad montem Catinum Guelphus occisione debellatur.
- X. Res in Liguribus gesta Philippo Valesii, Henrici Austria Ducis, atque Raymundi Cardani in Italiam transitus: Pontificis dira, & Matthaei mors referuntur.

GEOR-

GEORGII MERVLAE, ALEXANDRINI, ANTIQUITATIS VICECOMITVM LIBER I.

Continet brevem expositionem ab origine Urbis usque ad extinctos Longobardorum Reges; à quibus Angleria Comites, qui postea Vicecomites.



Anno
post or-
bem con-
ditum
3453. an-
te Chri-
stum
600.

MEDIOLANUM à Gallis conditum cum alii historici, tum Livius Romanæ historiæ auctor illustris tradit. Nam per Tarquinii Prisci tempora Ambigatus Celtarum Rex, ut Regnum prægravante populo exoneraret, Sigovefum, & Bellovesum ex sorore genitos magno hominum excito numero ad sedes novas quærendas è finibus Galliarum emisit. Alteri eorum forte data Hercynii saltus obtigere. Bellovesus Italiam petiit. Hic ubi Alpes per Taurinos saltus transcendit; quos antea alius non superaverat, haud longè à Ticino fluvio Thuscos fudit; moxque cum in agrum Insubrium venisset cognominem Insubribus (qui pagus erat Heduarum) urbem condidit, quam Mediolanum appellavit. Quidam scribunt, Duce Brenno eos in Italiam descendisse Gallos; à quibus Mediolanum conditum fuit; cum inter omnes scriptores constet ducentos prope annos antea Gallos Alpes transivisse, atque eas occupasse terras; quæ inter Padum, & Alpes jacent: Brennum verò Ducem eorum Gallorum fuisse; qui Romam deleta ad Alliam exercitu cepere. Strabo Geographus *Mediolanum vicum jampridem fuisse* refert, quod *vicatim omnes habitarent; sed tempestate sua eximia dignitatis civitatem; quippe quæ Insubrium Metropolis esset.* Insubres appellari video ab idoneis historicis quicquid terrarum clauditur inter Larium, atque Verbanum, Ticinum, & Abduam fluvios; per quos lacus ipsi in Padum se exonerant: quanquam Ptolemæus Novariam inter Insubres annumeret. Est, & in hoc tractu lacus non ignobilis; quem *Eupilim* Plinius appellat: hic Lambrum amnem transmittit. Contendunt quidam in *Liguribus Mediolanum possum*; cum Liguria Padum non excedat, eoque fluvio terminentur Ligures. De urbis nomine nihil equidem apud idoneum scriptorem legi. Fama est vetus, atque percelebris, à *Sue lanata* nomen urbi inditum: quod etiam Claudianus ingeniosus pariter, & eruditus Poëta innuere videtur. Facit hic *Venerem relicta Cypro ad nuptias Honorii & Mariæ Genuam navigare, atque inde per Apenninum in patentes Gallie campos descendere*

— ad mœnia Gallis

Condita lanigera suis ostentantia pellem.

Crediderim hunc Poëtam, aut gravem aliquem habuisse auctorem, aut continentem famam secutum; quæ plerunque testimonii vim habet. Nobilis sanè regio tum cœli temperie, tum soli fertilitate, & affluenti rerum copia; unde civitas ipsa suo abundans populo, & propriis nitens viribus, semper Gentis caput fuit: & quotiens everfa, post excidium restituta, ubertate agri, & propinquitate Alpium; ex quibus hominum copia affluit, potentior surrexit.

A Possẽm hoc loco refutare non fabulas; sed magis fœmnia eorum, qui à Noë originem repetunt: sed cum impudenter, & stultè ab infantibus, & fatuis hominibus tradita sint, ea nec refellemus, nec auctores nominabimus. Opes, & vires Gentis quantæ fuerint, ex hoc maximè cognoscimus. Nam confecto primo Punico bello, cum Romana arma finitimis omnibus formidosa essent; *Insubres*, auctore Floro, non solum laceffere bello Romano ausi; sed id virum sibi superesse existimarunt, ut jurejurando Duce Britomaro se astringerent; non prius soluturos baltea; quàm Capitolium conscendissent: factum & est: in Capitolio Æmilius discinxit. Mox vovere de Romanorum manubiis Marti suo torques: intercepti Jupiter votum; nam de torquibus eorum aureum trophæum Jovi Flaminio erexit. Viromaro Rege Romana arma Vulcano promiserant: aliorum vota cecidere: occiso enim Rege, Marcellus Feretrio Jovi tertia post Romulum arma suspendit. Hoc bello, Plutarchus scribit, *Mediolanum amplissimam, & populosissimam Gallie urbem fuisse, quippe Metropolim, pro qua strenuè pugnabant Galli, & obsidione Cornelium circumvenerant.* Deductæ sunt in agro à Gallis capto Placentia, & Cremona coloniæ. Ergo adempti agri injuria Insubres adjunctis Cenomanis, Bois, & Ligustinis populis, Duce Amilcare Pœno, Placentiam invasere; qua direpta, & ex parte incensa, trajecto Pado, Cremonam obsident: à L. Furio fusi, & fugati cum ingenti cæde sunt: occisa enim, & capta supra quinque, & triginta millia hominum referuntur. Furius de Gallis triumphavit. Rursùm ferox populus accitis Bois, atque Cenomanis arma cepit: victi à Cornelio, & à Minutio Consulibus in deditionem venerunt. Rebellarunt item: depugnavit L. Valerius Proconsul circa Mediolanum cum Gallis Insubribus, & Bois collatis signis: transiverant enim Padum Boi cum Duce Dorulacho ad concitandos Insubres: cecidere in ea pugna decem Gallorum millia. Pugnatum deinde inter Insubres, & Romanos variâ victoriâ: semper enim ad rebellionem Galli spectabant, adeoque duas colonias cædibus, & incendiis crebrò populabantur; ut multi colonorum tædio accolarum Gallorum colonias relinquerent, coactusque fuerit Senatus familias Romanas in supplementum & rescribere, & mittere. Erant tunc bella juncta Bojorum, Ligurum, & Insubrium: nam hæ Gentes inter se fere ex propinquo mutua auxilia ferebant: & quamvis sæpe fusi, atque fugati eorum exercitus forent, cæsa multa hominum millia, agri vastati, atque populati: non tamen ita infracti animi fuere, ut prælio abstinerent; immò magis illis opes, & spiritus ad redintegrandum bellum manebant: debellati tandem, atque devicti à Claudio; qui de eis magnificè triumphavit, in jus, ditionemque Pop. Rom. coacti sunt. Pacatissima deinde Insubrium, & finitimorum populorum omnia manserunt; atque longa pace cuncta refovente, sub tutela Rom. Pop. & Cæsarium acquiescentes, terrestribus magis, quàm maritimis fructibus, & multitudine populi mirum

A. M.
3832.
ante Ch.
221.

A. M.
3836.
ante Ch.
217.

in modum civitas excrevit : in quam five aëris clementiâ, five cultu agrorum, dignatione morum, & opum amplitudine Rom. Cæsares, quotiens otiosi forent, vel bella cum Germanis, atque Gallis essent, divertere. Cæsar Mediolani ab hospite familiariter invitatus, cum oleum conditum pro viridi appositum foret, respondit excusanti; *non putabam me tibi adeo familiarem.* Trajanus non solum urbem frequentavit; sed nobilissimum Palatium ædificavit in ea urbis parte; quæ adhuc nomen Palatii fervat. Maximianus, Hercules quondam dictus, amplissimum templum Herculi excitavit, quod posteriores *Laurentio martyri* dicaverunt. Scribit Mamertinus in Panegyrico, *redeuntes è Galliis Diocletianum, & Maximianum Cæsares in Mediolanensi primum Palatio ab iis adoratos; qui ex ordine dignitatis admissi fuerant: cum verò egressi limine per mediam urbem veherentur, ab ingenti populo in publicum proriente salutatos: quin ipsa Roma Gentium domina, ubi advenire Cæsares cognovit, lumina Senatus sui misit, beatissima illi per eos dies Mediolanensiam civitati similitudinem majestatis libenter impertiens;* ut ibi tunc esse sedes videretur, quò uterque venerat Imperator. Theodosius senior Mediolani mortuus est. Valerianus etiam & ipse ibidem excessit è vita. Notant Eusebius, atque Hieronymus *Julianum Galli fratrem Mediolani Cæsarem appellatum.* Tradunt Herodianus, & Dion *Julianum Didium Mediolanensem fuisse, atque cum pecuniis, quas ingentes habebat, turpiter expenderet, novis semper rebus studens, in Patriam à Commodo relegatum:* hic idem post cædem Pertinacis Cæsaris Imperium Romæ licitando adversus Sulpitianum adeptus est. Mediolani nuptias illas à Claudiano decantatas Honorius fecit. Novellus quoque Torquatus, qui ab epoto vino Tricongii nomen invenit, & mox ad Proconsulatum ex Prætura, honoribusque gestis progressus est, Mediolanensis fuit. *Statium Cacilius*, cui primas in Comœdia partes Nigidius statuit, *Insubrem Gallum, & Mediolani gentium* quidam auctores sunt. In hac item urbe cultæ fuere liberales omnes disciplinæ: nam & Virgilius Mediolani literis operam dedit. Albutius quoque Novariensis Rhetor non obscurus causas Mediolani apud L. Pisonem Proconsulem peroravit. Augustinus Romæ accitus oratoriam artem professus est. Publicis operibus, & templis adornata fuit civitas. Durat in nostra usque tempora appellatio ædis Divæ Mariæ ad Circum, quo in loco subterranei fornices à fossoribus aliquando inventi sunt. Hoc idem etiam ubi Monasterium Majus nunc habetur quotidie spectatur, ad ludos videlicet Circenses, & Theatrales extructum utrunque opus. Templum est non incelebre Pauli ad Compitum, ubi Compitales lares olim cultos, & Compitalitios ludos concelebratos colligere possumus. Patet adhuc area; quam Viridarium dicunt, deducto scilicet nomine à nemoribus, & viridariis; quæ plerunque Principes, & Potentes Populi intra mœnia tum animi, tum venationis, & aucupii gratia fecerunt. Præterea Templata fuere Deum ampla, & operosa; quæ postea in appellationes nostrorum Martyrum conversa fuere: nam ædes Sancti Vitalis, Fausta jam pridem dicta fuit, & Sancti Martini ad corpus, Portiana, de duobus videlicet Philippi filiis Fausto, & Portio; qui eas magnificè struxerunt. Extant sexdecim striatæ columnæ, operis antiqui vestigium, five propylæi, five peristyli ejus templi; quod Maximianus (ut suprà diximus) Herculi consecravat. Occurrunt frequenter urbem peragranti- bus lapides vetustis literis inscripti, & signini operis fragmenta. Atque ne longior sim in his recensendis; per quæ pulchritudo, opulentia, atque majestas urbis quanta olim fuerit, cognosci possit, epigrammate Ausonii contenti erimus. Hic Gratiani Cæsaris præceptor, amœno profecto vir ingenio, & eruditione vetere, atque multiplici catalogum urbium nobilium versu composuit, & de Mediolano hæc inquit:

*Et Mediolani mira omnia: copia rerum;
Innumera, cultaque domus; facunda virorum
Ingenia; antiqui mores; tum duplici muro
Amplificata loci species; populique voluptas,
Circus, & inclusi moles cuneata Theatri;
Templa, Palatineque arces, opulensque Moneta;
Et Regio Herculei celebris sub honore lavacri;
Cunctaque marmoreis ornata Peristyla signis;
Mœniaque in valli formam circumdata labro
Omnia; quæ magnis operum velut amula formis
Excellunt: nec juncta premit vicinia Roma.*

Ingenti incremento res Mediolanensis aucta tunc erat, & maxima accumulata diuturnâ felicitate bona. Nam quingentos & amplius annos, neque ab externo hoste, nec intestino bello Insubres vexati fuere. Græci quidam scriptores uno verbo abundè urbis amplitudinem exprimere mihi videntur, hoc est *πολιάνθρωπον*, Mediolanum multorum hominum civitas. Duravit innumerabilis illa populi multitudo usque ad Ambrosii tempora. Nam Augustinus in ultimo de Civitate Dei libro narrans *miraculum precibus Ambrosii ad sepulcra Gervasii, & Prothasii factum, rem dicit esse celebratissimam; tum quia perquam frequens populo foret civitas; tum quod in ea forte per eos dies Imperator erat.* Sed sub Ambrosio Episcopo cum pestifero Arii dogmate infecta laboraret Italia; & Ambrosius fortissimè rectam fidem defenderet, Mediolanum adeò contaminatum est, ut intrâ urbem ipsam gliscente hæresi, ceu diversarum factionum Duces, duo Episcopi armis repugnarent. Pluribus tunc in locis Ambrosius in trophæi modum aras, atque sacella erexit; quæ hodie visuntur, & religiosè salutantur. Pulsus tamen urbe fuit Ambrosius; & victore mox Auxentio, velut civili bello, civitas afflicta est: post cujus seram mortem, revocato in patriam Ambrosio, omnis Italia ad benè sentiendum de Christo convertitur. Quievit per aliquot annos ab omni motu, & bello civitas. Sed jam tunc instabat Romæ fatum, & Italiæ clades. Postquam enim Mediolani mortuo seniore Theodosio, non sine pernecie R. P., summa rerum ad Archadium, & Honorium ejus filios delata est; Gothi, qui patrium solum ante reliquerant, tandem Duce Alarico Italiam invasere; urbemque Romam, populatis, vastatisque finitimis locis obsident: quam, quia jam deses, & imbellis erat Italia, desuetaque armis, parvo negotio cepere. Tunc urbs rerum diutius potita imperare desiit, fœdæ Barbarorum libidini postea obnoxia: quod eo tempore futurum supra quingentos annos Mathematicus Varroni prædixerat. Tradit Censorinus *supputato diligenter urbis natali, & ex duodecim vulturbus, qui Romulo augurium petenti apparuerant, duraturum Romanum Imperium dixisse ad duodecim secula, quod tempus duodecim vultures denuntiassent.* Agebatur annus Romæ sexagesimus quartus, & centesimus supra millesimum, cum illam Barbari evastarunt. Jam urbes, & populi rapinis, incendiis, & cædibus permiscebantur; cum Attila per Noricos Italiam ingressus, multitudine exercitus omnibus terribilis, Aquileiam per triennium obsessam cœpit, atque subruit; Venetiam diripuit; tum Transpadanos reliquos cædibus, & populationibus divexavit. Mediolanum tunc capitur, ac directum incenditur. Substitit ad ripas Padi Attila, & five precibus Leonis Pontificis, five minis Apostolorum, qui oculis ejus obversati fuerant, in patrios fines rediit. Tunc res militaris adeò jacebat, nostrorumque hominum animos amissis semel armis is pavor inceserat, ut de Romano Imperio occupando penitissimi Barbari, & à sedibus suis profugi, de Italia opprimenda consilia agitent. Nam Ostrogothorum Reges, & Eruli conjunctis viribus, & armis, cum Gallias, atque Germanias direptis urbibus, non sine magna cæde pervastassent, in Italiam arma converterunt. Quin etiam Genetloricus Vandalorum, & Africæ Rex,

Rex, ingenti multitudine transmissa, urbem Romam occupat; qui item deprecante Leone Pontifice templis pepercit; tecta quoque incendi, atque dirui vetuit. Post hæc Ostrogothorum Rex Theodoricus Italiam ingreditur; Odoacrem prælio victum Ravennæ obsidet; quem cum filio cœpit, atque utroque interfecto ad Ticinum usque perveniens Italia potitur; quam antea per quatuordecim annos Odoacer ipse tenuerat. Regnaverunt post hunc Theodoricum Gothi annos circiter centum, & quinquaginta: in quo tempore multa non libidinosè solum, & crudeliter egere; sed homines lingua, & moribus plurimum distantes, atque in ipsa victoria efferati, urbes multas direptis bonis, ejectisque civibus, aut evertere, aut Barbaris habendas concessere. Fœdissima quæque, & indignissima patientes populi nil aliud, quam vastationem, populationemque agrorum, & desolatas urbes deplorabant: præcisa erat omnis opitulandi spes; nulla consilia de libertate inibantur. Constantinopolitani Cæsares; in quibus aliquid opis repositum erat, aut domestico bello semetipsos conficiebant, aut ab externo hoste pressi, magis fines suos tueri, quam aut alios defendere, aut oppressos sublevare volebant. Ergo cum nullum deploratis jam rebus foret remedium, omniaque diutius sub jure, & arbitrio insolentium Tyrannorum agerentur; deformata tot cladibus Italia fortunam vertit, & Deo Optimo Maximo sic volente, humana quoque consilia res affectas juvere. Nam Justinianus, sive miseratione quadam in consanguineos, sive ex indignitate facti motus, de liberanda Italia cogitavit. Hic compositis rebus in Oriente; Bellisarius virum fortem, ducem impigrum, atque ad omnia belli munera obeunda patientissimum; cujus item magnanimitatem, & imperatorias virtutes in debellandis Persis expertus fuerat, cum delectis militibus primùm in Siciliam transmisit; quam nullo resistente confestim recepit; mox Africam occiso Strozza Tyranno sibi subjecit; tum in Siciliam renavigavit, atque Lucanis se dedentibus Neapolim pervenit; quam diutius obsessam per aquæductum cœpit. Creaverant tunc sibi Gothi Victigitem Regem, virum humili genere, strenuum alioquin, & rei militaris scientissimum. Hic ubi Bellisarius Neapoli potitum cognovit, urbem Romam præsidio firmat; Præfectum relinquit Inderim cum quatuor millibus militum. Ipse Ravennam profectus, dispersos per Italiam Gothos in unum contraxit. Ad centum, & ampliùs pugnatorum millia habuisse Victigitem quidam tradunt; atque ubi audivit Græcum præsidium ultrò à Civibus in urbe receptum, Romam properè contendit; quam Bellisarius cum quinque millibus militum tuebatur. Reliquum exercitum diviserat is per urbes Hetruuriæ. Dum hæc geruntur, Datus, qui tunc fortè Ecclesiæ Mediolanensi præerat, cum Civibus aliquot ad Bellisarium venit: Mediolanum in potestate Imperatoris promittunt, si vel parvum præsidium eò mittatur: superesse præterea opes, non solum ad Gothos à se ejiciendos; sed planè ex omni Cisalpina Gallia submovendos; deesse autem, qui ex Imperatoris auctoritate res gerat. Hos Bellisarius libenter audivit, & collaudatos dimisit; pollicitus, ubi tempus foret, eam rem sibi curæ futuram. Victigis in dies magis urbem urgebat. Sed posteaquam cognovit Ariminum à Bellisarii Ducibus receptum, Romam obsidere desiit. Tunc Mediolanensibus legatis auxilia concessa. Præfectus est copiis Mundilas, vir animi magnitudine, & militari scientia præstans, atque cum eo Fidelis quidam Mediolanensis, Regiæ olim domus Præpositus. Ex urbe solventes Genuam navigant. Indè terrestri itinere per Apenninum ad Padum perveniunt; quem protinus trajiciunt ad Ticinum, quam nunc Papiam dicimus. Obvii fuere Gothi; qui tunc valido præsidio munitissimam oppidi arcem tenebant, ubi pre-

tiosa multa servabantur. Commisso levi certamine, compelluntur intrà urbem Gothi. At Mundilas, & copiae per pontem urbi vicinum transire. Fidelis, cum de via salutandi templi causâ divertisset, excussus ab equo interficitur. Hujus viri morte jactura aliqua facta est. Mundilas à Mediolanensibus recipitur; atque Comum, Bergomum, Novaria, & cætera ejus regionis oppida exemplum secuta, pulsis Gothis Imperatoris præsidia accipiunt. Victigis, ubi ea rescivit, quæ ad Mediolanum facta erant; Vrajam fratris filium in Insubres dimisit; ut Civitates, quæ à Gothis defecerant, recuperaret; quæ verò nondum desciverant, eas in fide contineret. Petivit à Theodeberto Rege Francorum ex fœdere nuper percussio auxilia. Hic Vrajæ decem millia Burgundionum misit; quibus copiis auctus Barbarus non procul à Mediolano castra posuit, diligentissimè vias omnes obsidens; ne frumentum, aut alii commeatus comportarentur. Mundilas haud magnum numerum equitum habebat; diviserat enim metu hostium præsidia; dispersi erant etiam milites per loca finitima. Urbem oppidani, qui concordēs erant, satis defendebant. Difficultas erat annonæ, & fames in urbe populosissima timebatur, si Barbari diutius, quæ infederant loca, tenuissent. Hæc ubi Bellisarius cognovit (accersebantur enim subsidia) Duces alios cum majoribus copiis ad Mundilam misit. Hi ad Padum descendere; quem præ multitudine hostium trajicere non sunt ausi. Jam longinqua obsidione ad ultimum inopiæ ventum erat; nulla re abstinuere, quæ mandi posset. Ferunt *præ rabie matrem, alimentis omnibus defectam, filium absumpsisse.* Quare, cum propter similitudinem inter Narsetem & Bellisarium obortam, res negligentius agerentur, minuereturque in dies expectatio opis, Mundilas pactus; ut cum peregrino milite sibi incolumi abire liceret; præsidia ab Mediolano, & reliquis oppidis deduxit. Tunc Gothi urbem ingressi; neque à cædibus, neque ab incendiis temperarunt. Interficiuntur sine discrimine puberes, & impuberes, senes, & qui arma ferre non possent; Burgundionibus concessæ mulieres; mœnia ad solum æquata. Cæsa fuere in ea vastitate supra triginta hominum millia. Excidio pulcherrimæ, & populosissimæ urbis; qui secuti Mediolanensium defectionem fuerant; metu tantæ cladis ad pristinum statim Imperium Gothorum rediere. Sed Bellisarius, quanquam in luctu maximo esset; revocato in Græciam Narsete, Victigitem Picentes, & Hetruuriam infestantem, Ravennæ obsessum fame ad deditionem compulit; urbeque, ac thesauris potitus Constantinopolim petiit; quem Justinianus lætissimè suscepit. Interea, qui in Italia erant Gothi, Papiæ sub Idovado Rege arma resumunt. Urbes avaritiam, & rapinas eorum, qui acerbius tributa exigebant, non ferentes, partim novandarum rerum consilia capiebant, partim ad Idovadam transire: quare justo contracto exercitu, & populis nutantibus, non dubitavit acie adversus Vitalem; qui tunc Imperatoriis copiis præerat, dimicare: victorque Gothos ad Regnum denuò parandum erexit. Cæso Idovado, Totilæ Imperii summa traditur; qui Venetiam tunc fortè tenebat. Hic Rex appellatus confestim Papiam concessit, atque universa Gallia ad obsequium redacta, id copiarum comparavit; ut Italiam omnem direptionibus, & incendiis pervastaret; Romam quoque per summam rerum inopiam devicerit: nec potuit Bellisarius cum novo exercitu reversus, & classè instructissima, aut Romam obsidione eximere, aut hostem ferocius sevientem reprimere: Quare Constantinopolim is repetit, relicta Italia Barbaris. Inter hæc Narsetem, de quo supra diximus, Justinianus cum copiis, & pecunia ingenti ad conducendum militem in Italiam remittit: accessere auxilia Longobardorum, Herulorum, & Hunnorum, Persarum, & Ge-

A. 534.

A. 547.

A. 542.

A. 547.

A. 755. phus, dum venatui nimis indulget, ictus ab Apro occiditur. Hujus morte regnavit Desiderius: hic aliquot annos pacem, & foedera cum Ecclesia servavit; verum sive augendi imperii cupidine, sive quod ferox animus neque quiescere, nec pacem colere posset, Faventiam, Ferrariam, Comaclum de Exarchatu Ravennae coepit: quae res Pontificem commovit, tum verò per speciem salutandi Apostolorum templum Romam profectus, cives gravissimè vexavit, Pontificem Hadrianum imposito tributo stipendiarium sibi fecit: tum Hadrianus pro libertate populi, & Ecclesiae dignitate tuenda, ad Carolum legatos mittit. Hic recens factum patris secutus, superatis Alpibus, continuo apud Ticinum cum Desiderio conflixit; quem fufum, & è fuga Ticinum petentem persequitur: incluserat se Rex cum valido praesidio urbi munitae: quare cum obsidio longa foret, relicto Rolando, & Oliverio, qui castris praesent, ipse Romam ad salutandum Pontificem contendit: Papiam postquam obsideri coepta erat, sexto mense capitur, Desiderius cum uxore & filiis in Gallias relegatur, thesauri à Regibus congesti dissipantur. At Longobardi, Rege capto, partim se suaeque Carolo dedunt. Algisius cum de patre Desiderio, & Regno actum videret, ad Constantinum Imperatorem in Graeciam abiit. Carolus rebus compositis Romam petiit, Pontificem adoraturus; à quo amplexus ad aras deducitur, peractaque re divina non solum quae Longobardorum Reges, & deinde Pipinus pater Gregorio tertio concesserat, ea affirmavit; sed illum ampliori Imperii jure donavit: ex eo Pontifex multarum Urbium dominus, & qui antea Religionis majestate res tenebat, mox Imperio, & potentia metuendus fuit: etsi quidam historiarum ignari, & temporum nescii, ignorato rerum gestarum ordine, à Constantino Sylvestro Pontifici datum referant. Hic finis Longobardorum Regum, qui ducentos, & amplius annos maxima parte Italiae potiti sunt: gens quamvis peregrina, tamen locorum cultu, nostri victus consuetudine, & bonarum artium studio, deposita in totum feritate mitiores facti, ut planè in incerto sit, magis è re Italica fuerit, post sublatum Gothicum nomen, urbes suis legibus, suisque Magistratibus vixisse; an unius Imperio paruisse. Profectò enim dum imperare singuli vellent populi, in mutuum exitium proruisissent, aut seditionibus se confecissent, & cum diversa forent studia, dissidentibus animis (quod postea accidit) nostri homines accitis barbaris, semel accepto iugo miseram & foedam servitutem habuissent: nam Longobardi propterea quod imperaturi populis venerant, cum occiso Alboino jam multitudinis Imperantium pertaesum esset, Regem constituere, cui caeteri parerent Duces: nec fuit Regnum crudele, aut intolerandum: injuriis parcentes, furta, latrocinia, caedes, & rapinas severissimè vindicabant; rem quisque suam quietus possidebat: tanta securitas temporum, ut sive domi, sive peregrè, noctu, aut interdiu, ubicunque libitum fuerat, quisque requiesceret: atque ut Reges majestatem Regiam tueri, & fines proferre possent, pro sustentandis exercitibus, tuendisque finibus caeteri Duces dimidium rerum, & fortunarum suarum ei pendebant, quem Regem constituissent: hinc nomen Regium popularibus reverendum, finitimis formidololum erat. *Disciplinas praeterea omnes tractavere Longobardi;* cujus rei documento sunt codices permulti illorum manibus conscripti; qui adhuc extant: hoc nec Gothi fecerunt, nec qui post Longobardos Italiam magis diripere, quam habuerunt. Religionem nostram magnifico, & pio cultu profecuti, Rom. Pontificem etiam aliquoties bello laceffiverint, primi tamen omnium urbes illi, & populos, quibus

A imperaret, concessere. Columbanum à Gothis pro-
genitum, integritate vitae reverendum, & in quo
Divinitatis aliquid elucescebat, benignè suscipere,
acceptisque donis opulentum coenobium is inter Alpes
Cottias extruxit; quod postea in civitatem traductum
Bobii nomen habuit. Lex etiam Longobarda cele-
bratur, cujus praecipue auctor Rotharis, & caeteri
Reges perhibentur. Quare minimè mirandum, si
post extinctos Reges, quidam Duces imperaverint,
& Longobardi à civitatibus in partem juris, & liber-
tatis conditione, qua ipsi erant, recepti sine discrimi-
ne, seu indigenae semper habiti fuerint. *Ab his
Regibus prognatos Angleriae Comites,* qui postea VI-
B CE COMITES, recentiores historici tradunt. Legi-
mus Fridericum Aenobarbum gente Suevum, cui
Barbarus cognomen fuit; ubi Mediolanum ever-
tit, Angleriae Comites ut funditus tollerentur, in
primis laborasse; sive quia Regiae gentis reliquiae cæ-
teros genere, & opibus anteirent; sive id veritus,
quod post aliquot annos evenit, ne ex stirpe Regia na-
sceretur aliquis, qui ad auctores generis respiciens,
Regnum avorum aliquando assereret. Est igitur (Ge-
nerosissime, & Invictissime Ludovice Maria Sfortia
Vicecomes) in genere tuo Regum sanctitas; qui o-
lim in Italia plurimum polluere, & per Theudelinda-
dam, quae & ipsa in Coelum relata habetur Deorum
C caeremonia, quorum in potestate praecipue sunt Re-
ges: neque haec conficta, aut à vano auctore edita,
ut primordia gentis augustiora fiant: nam belli glo-
ria, & perpetuum per bis centum fere annos Regnum
à Regibus profectum, genus abundè testantur: ne-
que Otho Vicecomes in pago Decii Canonicus ad Ar-
chiepiscopatum promotus, aliquot etiam annos exul,
dominium urbis vel affectasset, vel obtinuisset adver-
sus Turrianorum opes, qui divitiis magnis, affinita-
tibus, clientelis, & plebis studio potentes erant; si
peregrinà, aut humili stirpe oriundus fuisset, nec fi-
nitimi Populi rem Vicecomitum crescere æquo animo
passi forent; cum hoc natura comparatum habeamus,
D ut rebus suis quisque timentes, novum Dominum jux-
tà nos constitui minimè patiamur; ac ne opes crescant,
armis, & bello enixissimè repugnemus, nisi vetustas
gentis, & Regum proles popularium animos ad acci-
pienda imperia invitasset, perinde ac illis parerent,
qui Regnum velut haereditarium reposcerent. Sedes
autem, & domicilium Regum Ticinum, quae post-
ea annos multos fuit, jam inde delecta, ex quo post
Duces res ad unius potestatem pervenit; sive quia
urbs sit domina fluviorum, quibus intersecta, &
proinde munita regio; sive propter fructuosos cam-
pos, & maximè frumentarios, quorum fructibus ex-
ercitus, & populi copiose ali possint, ut is demum
E Italiae imperet, qui arcem tenuerit: *Arx autem, &
flos Italia,* ut Cicero dixit, *est Cisalpina Gallia.* Se-
cuti sunt & in hoc Gothi, qui Papiam velut in muni-
tissima Regni parte thesauros habuere; ubi & Re-
ges suos aliquando crearunt: nam Mediolanum à re-
centi strage, & ruina deformatum non visum est
majestati Regiae convenire: quanquam restituta ur-
be legimus Agilulphum voluisse Adcaldum adhuc
impuerem, quem Theudelinda susceperat, in cir-
co Mediolani Regem à populo salutari: & Aripertus
moriens duobus filiis Regnum ita diviserit, ut Me-
diolanum alter teneret, Ticinum alteri pareret.
Quam divisionem Joannes Galeatius proavus tuus se-
F cutus (Ludovice Illustrissime) nulli Longobardo-
rum Regum, vel magnitudine Imperii, vel rerum
gestarum gloria cedens, cum è vita decederet, Joan-
ni Mariae Mediolanum, & Philippo Papiam regen-
dam testamento legavit.

GEORGI MERVLAE, ALEXANDRINI, ANTIQUITATIS VICECOMITVM LIBER II.

*Cum progenies Caroli defecisset, Berengarii, & Othones per vim imperant. Ex lege
per suffragia Germani Proceres Imperium: Romani autem Pontifices
Sacerdotium, & Regnum obtinent.*

CAROLUS, cui res magnæ celeriter, & feliciter gestæ cognomen Magni fecere post sublatos ex Italia Reges, Papiam, & Mediolanum Præfectis Francorum subjecit: ipse in expeditiones varias proficiscitur. Romam revertitur à Leone Pontifice, populo acclamante, Imperator appellatur; sed cum durum, crudele, atque inhumanum videretur, eam gentem funditus perdere, ex qua tot Reges continuâ serie fuissent, cum jam longa consuetudine cum nostris, externo deposito more, parum à lingua & institutis nostris differrent: accedebant vetusta connubia, ac veteres cum Italiæ populis necessitudines, placuit Pontifici, & novo Imperatori quicquid Longobardi nominis relictum erat, in eas demigrare regiones, ubi diutius imperassent, & sedes Regia fuisset: ex hoc pars illa Italiæ, quæ inter Apenninum, & Alpes à cæteris terris Athesi, Pado, & Rheno Bononiensi amne discluditur, Longobardia primùm appellari cœpit: Ravennæ Exarchatus, & quæ olim Flaminia dicta fuit, Romandiolæ nomen habuit: abiere continuò universi Longobardi in fines sibi præscriptos. At Carolus priusquam naturæ concederet, Ludovicum filium Aquitaniæ Regem Augustum dixit, quem mox Stephanus Pontifex in Gallias profectus corona, & ornamentis Augustorum ornavit. Hic Bernardum patruelem, quem pater Italiæ præfecerat; quod cum Episcopis quibusdam, & primoribus urbium adversus se conjurasset, prælio victum, quamvis supplicem, securi percussit. Tum Lotharium filium regnare in Italia voluit, qui à Paschali Pontifice Imperator appellatur; sed patre mortuo, de Imperio filii certavere: inter quos post pugnas, & clades utrinque acceptas, ita demum bellorum finis factus est, ut Lotharius teneret Imperium, Carolus in Galliis, Ludovicus in Germania regnaret. Lothario successit Ludovicus, quem pater adhuc vivens socium assumpsit, ut hoc nomine post eum imperaret. Per hæc tempora invenio, Afros in litus Hetruriæ transmissos: cum direptâ Româ, onustis præda navibus in Africam renavigarent, vi tempestatis undis obrutos fuisse; & cum resecta classe iterum Italiam petivissent, secus Ostiam urbem occurrentibus Romanis, ingenti cæde edita in naves compulso. Lotharius jam ætate confectus, ne filii de Regno decertarent, penes Ludovicum primogenitum Imperii, & rerum summam esse voluit, tum reliquis filiis Regna partitus, quod residuum vitæ fuit, otiosè in Religione exegit. Post Ludovicum Carolus, cui cognomen *Calvo*, quæsitum pecunia Imperium tenuit. Hic cum Gallias repeteret, in transitu Alpium veneno interiit. Certatum inde de Imperatore deligendo. Joannes Octavus, qui tunc summum Sacerdotium gerebat, ut Ludovicus Calvi filius, quem *Balbus* cognomine dicebant, Franciæ Rex, Imperator crearetur, enixissimè laborabat: contra Romani nobiles Carolo, quem *Craffum* dictitabant, Pontifice in vinculis cu-

A stodito, summam rerum deferunt. Uterque per biennium imperavit: tandem solus Carolus, enecto per venenum Ludovico Imperio potitur. Hic post multa bella confecta, animo pariter, & viribus defectus, abdicato Imperio sub Arnulphi patruelis custodia, & arbitrio conquevit; sed Arnulphus, annuentibus primoribus Franciæ, ex custode Regio, & Regni procuratore Imperium usurpat. Dum hæc geruntur, Longobardi limites olim à Pontifice, & Carolo datos egressi Romanos bello laceffunt, quibus cum milites non essent ad propulsandum hostem, suæque tuenda, frustra opem ab Arnulpho petissent, pars Berengarium Foro-Julienfium Ducem, Roma tamen oriundum Imperatorem faciunt: pars Vuidoni Duci Spoletano Regnum deferunt: certavere pro Imperio: victor fuit Berengarius ope Arnulphi, qui mox præmissa auxilia subsecutus, diadema, & jura Imperii à Pontifice accipit, tum in Franciam reversus, fœdo Phthiriasis morbo obiit. In hoc defecit Carolorum progenies. Arnulpho Ludovicus filius succedit; sed in Italia Lotharius Rex creatur. Per hæc tempora Hungari Foro-Julienfium fines ingressi, fuso Berengarii exercitu, Tarvisium, & maritima Venetiæ oppida diripiunt: nec cessare Italia, nisi acceptis à Berengario obsidibus, & pace pecuniis redempta. At in altera Italiæ parte Saraceni Apulos, Calabros, Salentinos, & proximos Romæ agros excursionibus vastabant. Urbem Albericus Joannis Pontificis frater repulsis Barbaris tuebatur, qui Româ ejectus, ut ab ingratis pœnas expeteret, externa arma quæsit, accitis Hungaris, qui violato fœdere, quod cum Berengario fecerant, Italiam intrantes, non Romanos, quos in primis Albericus ulcisci cupiebat; sed Hetruscos diripiunt, atque onusti præda, tum mares, & foeminas in fœdam servitutem abduxere: deinde dulcedine lucri, & magnitudine prædæ gens rapinis assueta, cum populi inermes essent, anniversaria arma moventes, si quid fortunarum reliqui erat, id totum auferebant. Duo tunc Barbari Italiæ incubabant; alter Apulos, & Calabros, & Campaniæ urbes premebat: alter per Venetiam effusus usque in Hetruriam passim omnia populabatur. Berengarius eam duntaxat Italiam tenebat, quæ Lombardia dicitur. Tunc primùm vici permulti fossis, & vallo cincti fuerunt; & si quis locus patentibus syivis, paludibus, collibus, aut natura quomocunque munitus fuisset, in eum naturali præsidio freti confugiebant, sua eodem conferentes. Vuido quidam, cum Saracenos repulisset, Pontificem Joannem occidit: cui sufficitur Leo; quo haud multò post mortuo, Stephanus summus Sacerdos creatur. Berengarius interim à Rodulpho Burgundionum Rege devictus, Hungaros, ad quos profugerat, in Italiam evocavit: qui in patentibus campos effusi, ferro, & incendiis omnia vastantes, Papiam usque perveniunt, eamque expugnatam crudelissimè diripiunt. Interea Itali, Rodulphi præsidio parum tuti, Hungonem

gonem Arelatensem Comitem in Italiam vocavere, cui statim sine certamine Rodolphus cedens, in Burgundiam rediit; sed Hugo, ut pacatum Regnum sine metu prodicionis teneret, in exilium eos potissimum egit; quibus auctoribus in Italiam descendit: qui ad Arnoldum Bavarorum Ducem confugientes persuasere, ut Italiam cum exercitu peteret: hunc Veronenses in urbe receptum Regem Italiae vocaverunt; sed Hugo devicto Arnoldo Veronam recipit. Interea mortuo secundo Berengario, tertius ejusdem nominis primi ex filia nepos in Italiam venit, & Saraceni ex Africa solvantes, Hetruriae maritima adorti, populationibus, & incendiis omnia vastant, atque oram Ligusticam praetervecti, Genuam urbem per vim capiunt, caesis omnibus, qui arma ferre poterant, cum ingenti praeda impuberes, & foeminas abducunt; qui mox liberati in patriam reducuntur. Invenio apud scriptores, *post restitutum Genuae populum, muros urbis Mediolanensis impensa, & opera extructos fuisse.* Morte Stephani Leo Pontificatum excipit; post quem Agapitus. Tunc fame profundâ laboravit Italia. Reversus Berengarius occurrentem sibi Hugonem Arelatensem cum ingentibus copiis, priusquam manus conferent, in colloquium evocat, atque conditionibus certamen dirimunt: convenire, ut Lotharius Hugonis filius pari potestate, & aequo jure cum Berengario res Italiae administraret. Igitur consociato Regno, pater in Gallias, unde venerat, revertitur. Sed inter Reges neque sancta fides, nec diuturna amicitia, atque societas diu stetit: siquidem Berengarius Lothario contempto, omnia pro suo consilio, atque imperio gerebat. Hoc tempore Hungaros Italiae imminentes Henricus Bavariae Dux duobus praeliis superat, atque repentina excursione ab Aquileia Ticinum usque omnia populatus, praeda in naves imposita, per Padum in Patavinorum fines rediit: diffidens verò copiis, si cum Berengario certandum fuisset, qui cum exercitu obviam veniebat, in Austriam se recepit. Hungaros in Italiam denuò impetum facientes Berengarius, missa eorum Regi pecunia, ut finibus cederent, effecit. Moritur interea Lotharius Papiae, Rex magis nomine, quam re; cujus uxorem Alundam, mulierem sanè generosam Berengarius, ne per secundas nuptias urbem dotalem alteri viro traderet, Mediolani in vinculis habuit: usurpato Imperatoris nomine, filium Albertum Italiae Regem nuncupavit: quam rem Pontifex, & quidam Italorum proceres aegre ferentes, Othonem Germaniae Regem accersivit, qui magno cum exercitu per Transpadanos veniens, Berengarium, atque Albertum refugientes ad Ticinum defecutus, eos praelio superat; quibus tamen veniam dedit, & Longobardorum urbes, praeter Veronam, & Aquileiam, illis regendas permisit, rebusque in praesens ita compositis, in Germaniam rediit, liberata Alunda, cum qua nuptias fecit, & de ea filium genuit, cui postea Othoni secundo nomen fuit: tum in Franciam profectus, populos, & gentis Principes, qui à Ludovico Rege desciverant, ad obsequium coegit, pacataque Gallia in patriam reversus, Hungaros Germaniae urbes evastantes, nunquam intermissis praeliis propè ad internecionem delevit: mox in Italiam accitus, Berengarium pugna devictum cum Alberto filio relegavit, atque ita Regno potitus Joannem Duodecimum, qui per opes patris, & factione suorum Agapito suffectus fuerat, Sacerdotio dejecit, propterea quod per nimiam licentiam lasciviret, Ecclesiam dilaceraret, sacra pollueret; & subinde admonitus, ut vitam, & mores pro majestate Pontificatus componeret, minimè correctus, in vitio, & sententia permaneret. Romae per ea tempora ex prisco velut instituto annui Consules creabantur, & Praetor urbanus ex nobilitate in urbe jus dicebat. Erant duodecim Decuriones, qui in consilium, quotiens inciderat gravioris rei deli-

beratio, adhibebantur. Ergo post Joannem Pontificatu submotum, de creando Pontifice discordiae oboriuntur: alium Imperetor; plebs, & patres alium deposcebant. Quare, cum diversa forent studia, Leo, & Benedictus Pontificatum per vices aliquantum temporis tenuere. Tandem Joannes Tertiusdecimus Pontifex fit, qui favente Othone vel invitis Romanis, & subinde cum insectantibus, in Pontificatu tamen constituitur. Sunt qui scribant, *huic Othoni jus, & arbitrium creandi Pontificis, quem vellet, datum,* cum id jampridem penes clerum, & populum fuisset: quanquam Carolo permissum inveniam, ut non solum Romanum Pontificem is crearet, sed civitatibus Episcopos pro arbitrio suo praeficeret. Per haec tempora Saraceni, qui Calabros, & Apulos gravi & foeda tyrannide premebant, urbibus primum pulsi, deinde supervenientibus Hungaris occisione deleti fuere. Joannes Pontifex juniorem Othonem, ut patri gratiam pro merito referret, Imperatorem appellat. Mox mortuo Joanne, duo Benedicti, alter alteri succedentes, Pontificatum excipiunt. Otho devicto Henrico Bavarorum Duce in Italiam vocatus, praelio à Græcis victus, Romae, quod se ex fuga receperat, obiit. Pontifex quoque resolutis membris attonitus repente moritur. Tunc Romani proceres, qui fortè id tempus frequentes in urbem venerant, pars Othoni Secundi Othonis filio; alii Henrico Bavarorum Duci summam rerum deferri studebant: fuere etiam ex Italis, qui Imperium affectarent: quare in Othonem Tertium consensere. Hic absumptis aliquot annis in componendis Germaniae rebus, serò in Italiam venit; accersitus scilicet adversus vim, & opes Crescentii, qui ex Consule urbis dominium coeperat, Pontifici maximè infestus. Ergo restitutus in Sacerdotium Gregorius Quintus, legem ex Pontificia auctoritate de Imperatore eligendo, atque creando sanxit, quæ ad nostra usque tempora per quadringentos, & amplius annos servata est, ne in Imperium veluti hæreditarium filii à parentibus excipiantur, aut qui opibus, & armis plus possit, illud usurpet; sed paucorum procerum suffragiis designatus, mox auctore Pontifice justum, & legitimum is Imperium possideat: delecti item sunt Principes. His temporibus Saraceni ex Sicilia, quam obsessam tenebant, Guilielmi Northmanni armis pelluntur. Moritur interea Gregorius Quintus, cui sufficitur Benedictus Octavus. *Otho etiam Romæ, ut quidam tradunt, veneno rapitur.* Mediolani posteaquam Carolus, & filii deinceps, atque nepotes Italiam tenuerunt, regnare in ea Berengarii, & tres deinde Othones imperarunt: nihil plane gestum invenio, quod memoratu dignum sit. In urbe auctoritate, & opibus Antistites plurimum pollebant. Discors populus gravi odio, & interim intestino bello ardescebat: hinc Patricii, illinc Plebei insensis animis, & infestis armis se invicem dilacerabant. Praeful magis in partes Nobilium inclinabat. Quidam sunt auctores, à Bonicione quodam Carcani oriundo, corruptis pecunia Sacerdotibus, & favore Othonis Pontificatum urbis Landulpho fratri quaestum; qui mox fratres, & propinquos opibus, honore, & potentia auxit: eorum quippe ditioni oppida quædam subjecit, & intrà urbem jura, & gentilitia commoda elargitus est. Hinc Carcanorum, Pirovenerorum, Melignanorum, Landrianorum profectæ familiae de nominibus oppidorum, quibus denominabantur, appellatae. Ex eo Capitaneorum orta sunt nomina, civilium discordiarum, & odiorum seminaria. Hinc etiam Patriciorum opes plus nimio crescere, & indè superbiae, atque in tenuiores injuriæ. Quare Plebs commota in Praefulem facto impetu, illum cum fratribus, cognatis, & clientulis urbe ejecit. Tum primum duæ ex una civitates factæ, nam Plebeji intrà urbem se continebant: vicos, & oppida Patricii infesti Patriæ habebant. Ergo cum nulla inter cives concordia esset, res suas miseri

miseri perdere, Capitaneorum tyrannide plerique opprimi, cuncta factiosorum procillis agitari. Archiepiscopi, novandarum rerum avidi, Germaniae Reges plerunque ad se vocabant, ut scilicet peregrinis opibus adjuti, per causam Sacerdotii Regnum inter cives compararetur. Praeficiebatur tunc Mediolanensi Ecclesiae is duntaxat, quem Populus suis suffragiis creasset: quod si plures competitores de Sacerdotio pugnassent, tunc Imperatoris arbitrio Praeful dabatur. Mortuo Tertio Othone, cum res summum Imperium non haberent, Ardoinus Eporedienfis Marchio, convocatis finitimarum urbium Principibus, atque Episcopis Imperator creatur; cui velut legitime imperanti plurimi Populorum paruerunt. Interea Germanorum Proceres pro jure sibi à Gregorio Pontifice dato, Henricum Bavavorum Ducem Imperatorem designant. Hic in rebus Galliae componendis diutius occupatus, adventum suum in Italiam remoratus, ex itinere cum Ardoينو pugnam conferuit, atque praelio victus in Germaniam refugit. Brevi reparato exercitu, ab Heritperto Archiepiscopo accitus, Ardoinum denuò dimicans acie superavit, sumptoque mox supplicio de iis, qui capita conjurationis fuerant, Romam proficiscitur: ubi auctore Stephano Pontifice Caesar primum appellatus; mox Imperii ornamenta accepit. Saracenos Capua expulit, & in Apulis urbem Trojam Gracis colonis se deditibus recepit. A quibusdam scriptoribus *Henricus Gibellinus hic nuncupatur de nomine oppiduli, ubi ortus. Traditur continentia singularis, utpote qui extra Sinegundam uxorem, usum veneris non habuerit.* Quare post mortem miraculis utrique editis inter Deos culti fuere. Quidam sunt auctores, ab hoc Henrico ceptam consuetudinem ferreae Coronae, quam Mediolani is demum accipit, qui in Germania Caesar designatus sit: alii primum Othoni hujusmodi ornamenta data ferunt: sunt qui à Carolo factum repetant: ego cum incerta tradantur, nec satis firmum originis auctorem habeam, quando res coeperit, minime affirmare ausim. Verum cum per quingentos ferme annos continuatum hoc sit, unde morem hunc ortum putem, quantum conjecturis assequi possum, breviter exponam. Occidentale Imperium à Carolo Pipini filio post extinctos Longobardorum Reges coeptum satis inter omnes constat, qui multarum gentium victor, tunc demum Imperio dignus haberi potuit, cum eam Italiae partem subegit, in qua Reges diutius dominati, & Regia sedes fuisset. Ergo Populi Regio assueti more peregrina imperia haud pati, nisi apud ipsos, si non Regnum, saltem Regiae dignitatis species aliqua mansisset, ut parere magis, quam servire viderentur. Profectò enim tunc gravis, & intolerabilis servitus, & infensi Domino Populares; ubi nec in consilium, nec in partem dignitatis, & publicorum commodorum admittuntur, sed velut victi superbè praetereuntur, & parum necessarii negliguntur. Externi itaque Reges, cum in legitimi Regni titulum, tum ut aliquin contumaces animos mollirent, Italiam ingressi, Mediolanum primum divertebant; ubi plausu & laetitia gratulantis Populi excepti, ferreaque insigniti Corona, jam Caesares facti, urbium Primores aut donis locupletabant, aut Praefectura, & nova dignitate decorabant, aliis immunitates, & privilegia largiebantur: qua Caesarum liberalitate, atque munificentia nostri Populi illecti, etsi peregrini Reges rarò in Italiam venirent; tamen cum se honoratos, & à dominis benignè amplexos viderent, minime novandarum rerum consilia inibant; sed sub externo Regno fidem, ac officium colebant: & quamvis in urbe odia crescerent, cunctaque à Capitaneis repugnante Plebe agitantur, tamen adventante Caesare à certaminibus, & civili bello urbs temperabat. Ergo tum deliniendae multitudinis gratia, & ut infensum minus Regnum foret; tum simulacro veteris Imperii Mediolani, atque interim Moguntiae ferreo

ornatu justè imperaturi decorantur. Post Henrici mortem Conradus gente Suevus, qui sub illo stipendia Princeps ordinum honestissime meruerat, Caesar per suffragia Procerum designatur: novarum rerum auctores in Germania primum repressit: tum in Longobardos exercitum duxit, qui finibus egressi latius effusa populatione finitimos vastabant, Mediolanum Gentis caput circumfidet: jam moenibus inharebat, jam procedebat obsidio, & oppidani per eruptionem, ubi occasio aderat, in Germanorum stationes impetus facere, contra ab hoste repulsi intra urbem compelli, & pugna interim committi. Tum fortè Baverius miles, viribus ferox, & propinqua Caesaris cognatione inflatus, jurejurando palam omnibus se astrinxit, non prius cibum sumpturum, quam aut hastam intra urbem jaceret, aut portas configeret. Ergo muris obequitans portis occurabat, probra identidem ingerens, non tulit insolentis Barbari minas, & magnifica verba HERIPRANDUS VICECOMES Regia stirpe progenitus: hic relicta statione portae, cui praesidebat, armatus hosti ferocissimo occurrit; rem gladiis cominus gerunt: tandem Heriprandus pugione suffosum Barbarum humi sternit, recisumque gerens caput protinus ad suos gratulantes revertitur: cecidit & tunc Guido Comes Italiae, & Imperatoris Signifer: exacerbatus graviore ira Conradus, suburbana succendi jussit; antè enim agrorum tecta exusta fere fuerant: tandem sive tædio longinquae obsidionis, sive viribus, & patientia obsessorum fatigatus, sive ex eo deterritus, quod Agrippiensis Coloniae Archiepiscopus inter sacrificandum Ambrosium viderat potentissimae Civitatis Patronum stricto gladio terribilem Conrado, & exercitui cladem minitari, relicto Mediolano Papiam concessit: mox Germaniam repetens Sclavos, & Hungaros, qui promissis auxiliis Italiae Populos ad arma, & defectionem sollicitaverant, ex itinere debellavit, Regnumque Burgundionum seditionibus, & intestino motu afflictum, Rodolpho Regi pacatum reddidit. Dum Conradus Longobardos urget, hostiliter cuncta populatus, saepe spoliati Populi ut res suas aliquando defenderent, nec velut in perpetua servitute precarium victum haberent, seque in libertatem ab intoleranda tyrannide eximerent, defueta tunc arma homines imbelles retractare coeperunt; atque ut signum haberent, quo sublato arma caperent, exercitum cogerent, in bella prodirent, castra locarent, rem excogitare alioquin ridiculam; nisi tempora insignem fecissent, & multa ignoscenda miseris forent, quorum mentes ea formido, atque ignavia coeperat, ut Barbarico servitio semel pressi nec scirent, nec discere possent, quae in bello majorum vires, & artes fuissent. Carrocium ergo veteris militiae penitus nescii, & antiqua instituta ignorantes, ad hunc modum non Mediolanenses solum, sed ceteri Populi fabricarunt: carrus erat editior coccineo obvolutus panno, in cuius medio procera pertica statuebatur, ab cuius fastigio quoquoersum deducti funes manibus virorum tenebantur interim carro subnixi: in summo Crux aurea, à qua vexillum album in Crucis figuram rubro interfectum dependebat: juncti boves, & albo instrati panno, interfecante concolori Cruce, currum trahabant: Carrocio praeficiebatur vir, ut illa ferebant tempora, bello egregius, qui ut in magisterio reverendus esset, lorica, & ense publico donabatur: Sacerdos additus, tum rei divinae gratia, tum ut mortifero vulnere ictis, & jam animam agentibus, sacra ministraret: sequebantur octo tibicines: hi omnes publica impensa, & dato salario alebantur: hoc signo freti Populi alacres in bellum prodire: ubi figebatur, illic Praetorium; hinc signum pugnae petere, atque siquando premente hoste in castra refugissent, ad Carrocerium conferti, tanquam resumptis viribus pugnam renovabant; & jam nulla spe post relicta in hostem incedebant; cui id erat sanè

quàm formidolosum, cum resumptas vires ab iis, quos insequutus fuerat, repentè velut novam aciem exurgere cerneret. Morte Conradi ab armis, & peregrino hoste quievit Italia. Sed Mediolani discordia continuatur, & domesticæ seditiones agitantur, tantumque odii, & iræ inter Plebejos, & Patritios venerat, ut minimè concors, & quieta foret civitas. Interim in Germania Henricus Conradi filius Imperator creatur: hic, cum de Pontificatu quidam ambigerent, Romam properè contendit, ut Sacerdotum lites componeret, ubi & coronatus est. Sed cum Pontifices crebrò raperentur, brevi tempore complures Pontificatum administrant. Et Henricus puer sub tutela tamen Matris regnare cœpit.

A. 1039. Summum Sacerdotium Romæ per ea tempora Benedictus Decimus menses octo tenuit: in quo creando cum pecunia fortè versata esset, atque deinde non solum largitione palàm profusa, sed factionibus armatorum succincti Pontificatum quidam peterent, ad tollenda certamina, & coercendos in urbe tumultus, castigandamque avaritiam eorum, qui muneribus capiebantur, Nicolaus Secundus inito statim Sacerdotio, ne Pontifices aut Populi studio, aut ex Cæsarum arbitrio crearentur, jura descripsit, & ritus tradidit creandi Pontificis paucorum Sacerdotum suffragiis: quæ Decreta in nostra usque tempora Primores Sacerdotum, qui Cardinales appellantur, servavere. Mediolanenſis Ecclesia, quæ ducentos, & amplius annos libera, & sui juris fuerat, tunc primum Rom. Pontifici se regendam permisit: cujus exemplum cæteræ ferè Occidentis Ecclesiæ sequutæ sunt, atque ex eo Romani Sacerdotii jura latè patuerunt, & opes longè amplificatæ. Mortuo Nicolao sufficitur Alexander Secundus, Mediolani ortus ex Badagiorum familia, Lucensis Episcopus, Anselmus antea dictus; sed Longobardorum Sacerdotes agrè ferentes Pontificem non sui corporis factum, Cadalum quendam Parmensem contra creant: tunc Mathildis generosissima mulier, quæ Regiolepidi, Mutinæ, Mantuæ, & urbibus Hetruriæ dominabatur, illorum adversata studiis, Alexandrum fovebat: cæterum Cadalus potentia, & opibus suorum fretus, Romam contendit: nutabant Cives, atque in quem inclinarent, incertum erat: armatus itaque Pontificis nomen usurpat, & haud ita multo post prælio victus urbe cessit. Tum verò Henrico procurante, & opera Mathildis, quæ Cadalo infensa erat, Patres in Concilium Mantuæ coguntur, quorum jussu Cadalus Sacerdotio dejicitur; atque ita Alexander Pontificatum quietum habuit. Circa hæc tempora Mediolani vis Nobilium, miseriæque Plebis in dies crescebant: hinc seditio, atque discessio Populi in duas partes; & inde irritatis animis utrinque armis sumptis pugnabatur: Optimates adversus Patriam, quam sola Plebs incolebat, incursiones exercebant; nam cum impares viribus essent, in oppida vicina concesserant, atque coacta manu tumultuaria rusticorum, atque clientum urbem ingressi, injuriis, & gravissimis detrimentis Plebejos affecere; alios violare, alios spoliare, hos cædere, ex libidine animi multa moliri: quin etiam lex de vi, & cæde lata fertur, quæ paucò ære illatas injurias dilueret, & cædis reos absolveret: provocati profectò magis sunt, quàm deterriti à maleficio animi: quare cum nullus poenæ metus foret, & scelerum impunitas, nullusque superbiæ, atque libidini Pa-

A triciorum obviam iret, Lancio Curtius Nobilitati apprimè infensus, miserorum causam adversus vim, & opes Potentiorum suscepit, improbitati Nobilium fortissimè repugnans: quo facto Plebis defensor unicus à tenuioribus Capitaneus creatur: hunc Nobiles urbe ejiciunt, bona publicant, multaque in ignominiam, & perniciem Plebejorum moliti dominabantur: jam in urbe Plebs serviebat, nec inveniebat, quo pacto jugum excuteret; destituti ope, & patrocinio passim trucidabantur. Quidam tradunt, hunc Lancionem, sive in pugna captus, sive dolo circumventus in potestatem Nobilium cum venisset, excruciatum crudelem in modum morte foedissima affectum. Deserta igitur tutore Plebs, & contumeliæ obnoxia Herlembaldum Cottam, quamvis de gente Patricia, defensorem parat: hic Plebis custos Nobilium libidini occurrens, Popularis maximè est habitus; sed quasi parùm odia flagrant, & veteri similitudine turbulenta civitas non foret, res gravis sequitur indignitatis plena, & quodammodo detestanda. His fortè temporibus Sacerdotes Mediolani conjugati vivebant, adversus quos quidam insurrexere, qui dicerent *calibatam in Sacerdote, si non necessarium, honestum tamen esse; ut puris scilicet, & incontaminatis manibus sacra tractet; quæ ab homine conjugato pollui & inquinari videntur*: quando nulla virtus æquè religiosum hominem commendet, quàm Veneris abstinentia: reclamabat Guido Archiepiscopus, sive ut studia, & gratiam Presbyterorum captalet, sive quòd Plebem alioquin sibi infensam magis morbo animi, quàm justa de causa, Sacerdotum nuptias improbare, & insectari cognosceret: certatum est intra urbem non solum studiis, & dissensione, sed & ferro: quidam cæsi sunt, alii urbe pulsi: tum verò gliscente certamine, exacerbatisque animis, nullum non contumeliæ genus in conjugatos est editum: quare cum licentiam gladiatorum, & furorem vulgi Præsul extimesceret, Suffraganeos in Concilium vocat, in quos cum multa tentaret Herlembaldus, ubi secundum se pronunciatum cognovit, Populo convocato legem tulit adversus Sacerdotes, quorum nuptias velut inconcessas Pontifex damnaverat: protinusque impetu facto Gottofredum Præfulem, qui Guidoni successerat, urbe ejiciunt: hic comitatus multitudine Nobilium, in oppidum, cui Castillionum nomen est, se recepit: quem coacto exercitu Herlembaldus persequutus obsidet. Per quæ tempora repentino incendio conflagrarunt in urbe tam privata, quàm publica opera, atque ædes Divi Laurentii agrè defensa, ambusta mansit: appellatus hic ignis Castillioneus ab obsidione videlicet oppidi, in quo tunc armata Plebs Præfulem circumsedebatur. Reversus in Patriam Herlembaldus Nobiles multos proscrispsit, quorum publicata sunt bona. Interim Thedaldus Castillioneus Ecclesiæ præficitur: enimverò tunc erecta Nobilitas, ac statim congregati, duce Gulielmo Landriano, quem parti suæ præposuerant, sumptis armis Patriam ingressi, Thedaldum in Episcopali sede constituunt: moxque tum literis Rom. Pontificis, qui Cives suos ad pacem, & concordiam hortabatur, tum procurante Thedaldo discordiæ mitigantur, atque paulatim sanata propè similitudine, depositisque odiis civitas ante divisa in unum revertitur: multi ex infensis amici sunt redditi, & reconciliata jam gratia Cives ab intestino malo aliquandiu quieverunt.

GEORGII MERVLAE, ALEXANDRINI, ANTIQUITATIS VICECOMITVM LIBER III.

Obsidente Gottofredo Hierosolyma, Otho Vicecomes provocantem Barbarum singulari certamine occidit, Viperamque retulit. Fridericus armis Alexandrum persequitur, atque Mediolanum evertit.

POST Alexandri mortem, Summum Sacerdotium Hildebrando studiis, & clamore Populi demandatur: Septimus Gregorius nuncupatus est. Duo tunc in Italia Archiepiscopi Romano Pontifici maximè adverbantur; Guibertus Ravennatis Ecclesiae Antistes, & Thedaldus Castillioneus. Ad compescendos igitur motus, cohibendosque Sacerdotum quorundam spiritus, Lateranense Concilium indicitur, in quo Pontificatu Gregorius potitur. Guibertus, & quidam ex Conjuratis dignitatibus, & honore multantur. Dum hæc geruntur, Henricus rebus adversus Saxones prosperè gestis, Pontifici rebellavit, conventuque edicto cum multis Episcoporum in suam sententiam traxisset, contumaciùs omnia agere, Pontificalibus edictis repugnare: qua indignitate motus Gregorius, injectis diris Henricum Imperatoria dignitate privat, sed deprecante Mathilde, petita etiam venià Pontifici reconciliatur. Verùm impius, & malè animatus homo iterum in perniciem Sacerdotum multa parat, Majestatem Romanam minimè veritus, nec iras Apostolorum timens; cui ceu impio, & nefario sacris iterum interdicit. Enimverò tunc Henricum filium in Italiam misit, qui haud procul Ferrarià Mathildis copias devicit, novumque Pontificem creat, quem Romam deducit. Urbi tunc præerat fortè Guiscardus accersitus à Gregorio: hic cum se imparem Henrico viribus, & multitudine militum animadverteret, disiecto muro, quo Pontifex velut obsessus occludebatur, Romam cedens, Salernum contendit: quo in loco Gregorius moritur, cui successit Victor Tertius. Hoc quoque intra paucos dies defuncto, Urbanus Secundus Sacerdotum Princeps creatur. Hic cum animos civium parùm quietos cognosceret, & subinde in tumultu omnia esse, Romam relinquit. Revertitur iterum in Italiam Henricus haud cum magna militum manu. Defecerat jam ab eo Conradus filius; quare ab exercitu Mathildis, qui ei occurrerat, facile rejicitur. Sed Urbanus augendæ Religionis, & Christiani nominis illustrandi maximè cupidus, sive ita volente fato, sive ingenti quodam spiritu ductus, indignè ferens ea loca, ex quibus exordia nostræ Religionis profecta erant, Barbaris parère, de recuperanda Judæa, potiundisque Hierosolymis consilia agitare cepit: ter in Italiam Episcopos magnæ deliberationis gratiâ, frustra convocavit: in Galliam tandem profectus est, indictoque Concilio apud Clarummontem Arvernorum urbem, concivit Primores Sacerdotum, & Christiani nominis Principes cohortatus, ut arma sumerent, nec impensæ prægravarent, nec difficultatis viarum pigeret, aut quod maria trajecturi essent, deterrerentur; quando nihil in vita gloriosius, aut Deo acceptius, & ad sedes Cœlitum, æternæque gaudia promerenda efficacius foret, quam si sacra illa loca, quæ jussu divino Judæi jampridem incoluissent, & ex quibus deinde salus rerum nata foret, de Barbaris erepta, Christianis

A Regibus, & nostris Sacerdotibus restituerentur. Tantum igitur Pontificis preces, & autoritas valere, & in Deum Optimum pietas in animis hominum effecit, ut ad trecenta, & ampliùs bellatorum millia in expeditionem nobilissimam cogerentur: Cruce signati omnes incedebant, & proinde Cruciarum appellati: Petrus cognomine Heremita, ardore Religionis, & integritate vitæ celeberrimus, expeditionis auctor à quibusdam perhibetur; nam & maximam exercitus partem coëgit, & se ducem professus est: assumpsit etiam fratres duos Comites Gottofredum, & Eustachium, quibus cognomen tunc erat Bullionis. Exciti igitur propriis sedibus, **B** pro viarum compendio quisque Constantinopolim pervenere: longè erant suspectissimi Alexio: tandem Bosphorum Thracium transmissi, feracissimos illos Minoris Asiæ agros populantur, opulentas urbes per vim capiunt, atque diripiunt, expugnataque Antiochiâ, Syriam, Palæstinam ingressi, Hierosolymis castra admovent, urbeque ipsa undequingagesimo die posteaquàm circumfideri coëpta fuit, potiuntur Idibus Junii Anno ab Salvatore nato, saluteque terris data nonagesimo nono supra millesimum. Tunc victor exercitus plaudens, & venerabundus urbem ingressus, religiosissimum Sepulcrum, prædæ oblitus, primum adiit, tunc Aras, & Sacella, in quibus vestigia, aut nati, aut peregrinantis, aut docentis Domini extarent, læti, ac supplices salutarunt; nullum denique præterire locum, aut insalutatum, aut inadoratum, in quo priscae Religionis memoria aliqua maneret. Tum universus exercitus Gottofredum Hierosolymorum Regem creat. Ad Barbaros è Palæstina, Syria submovendos, Mediolanenses demum Nobiles, viribus, & opibus præstantes profectos legimus: qui tum acie dimicando, tum in expugnandis Hierosolymis, egregia facinora edidere. Joannem Raudensem, & Rotium de Cortesella quidam scriptores celebrant, qui inter primos mœnia Solymorum ascenderint. Cæterum Rotius in memoriam longinquæ, & præclaræ peregrinationis, ædem sub appellatione Dominici Sepulcri ædificavit; quæ adhuc Mediolani reverenter salutatur. Sed OTHO VICECOMES rem gessit in *Annalibus libris* valdè memorandam: illustre virtutis specimen, & Regii generis, à quo prognatus traditur, argumentum certissimum, & quod jam tunc ei Regnum portendit. Fortè dum Hierosolyma obsidetur, pugnae multæ cum hoste geruntur, qui suis auxilio venerat: processit Barbarus viribus ferox, armorum, & corporis specie inter ceteros eminens, & proinde terribilis; nostrosque despiciens venire jubet, & congregi, si quis pugnare secum de Christianis auderet. Enimverò tunc universus obstupescere exercitus, certamen cuncti abnuere, neque quisquam ex ea multitudine fortem tanti periculi adire: nam magnitudo, & immanitas faciei omnes perterrefecerat: tunc Otho Vicecomes, in quo eximiae vires, animus intrepidus,

dus, & Regii spiritus aliquid hærebat; cum catera turba partim defixi, partim ambigui starent, armatus adversus provocatorem accessit, initoque protinus certamine, superbum Barbarum, & Insigni horrido ferocius exultantem, primo congressu vicit, interfecitque: detraxit non arma tantum, sed & nobile spoliū retulit: VIPERA stabat sinuosa, nudum infantem seminecem, gementi similem, & suffuso cruore turgidum dentibus tenens; gestamen profectò fœdum, & barbaricæ crudelitatis documentum; nisi quòd hostium spolia, quò magis ab humanitate recesserint, eò speciosius sunt victoriæ monumentum. Insignis igitur tam memorabili factò ad suos reversus Otho, parta trophæa more hieronicarum Patriæ donat, à qua non minus honoris, & nominis accepit, quam quod donaverat. Dicavere Cives legionibus Viperam; ut quotiens in hostem prodiretur, Signa urbis non figerentur, nisi prius Vipera staret, qualem hosti detractam Otho de Syria reportaverat; sive perpetuo Regiæ familiæ gentilitio; sive magnis auspiciis, & certa præsumptione victoriæ, quasi eo signo conterritus hostis, victori Populo statim terga daret; sive ut in posteros victoria redundaret, qui aliquando libertatem nobis à peregrina tyrannide vindicarent, & Italiæ incolumitatem suis armis afferrent. Celebrant Romanarum rerum scriptores Corvinum, ostendent Torquatum, quòd hic Gallo torquem abstulit, unde sibi, & posteris cognomen, ille auxiliarem habuit Corvum, à quo postea Corvini: Noster profectò majore laude dignus; quippe qui in expeditione felicissima, in qua à barbaris, & impiis Dominis possessa diutius Judæa erepta fuit, nostris Regibus tradita, atque Sacerdotibus concessa: res præterea non in Italia, aut propius Patriam, sed in alio terrarum Orbe, alioque Sole trans maria gesta fuit. Cæterum Henricus cum Romam denuò venisset, Paschalem Pontificem, à quo honorificè exceptus fuerat, cum Principibus Sacerdotum in vinculis, & custodia tenuit. Jura postulabat Pontifex conferendorum beneficiorum sibi restitui, & super eos arbitrium, & potestatem dari, qui velut obnoxii Romano Pontifici tributa penderent. Moritur per hæc tempora Mathildis Regina, quæ in Æmia, Flaminia, & Hetruria latè imperabat: huic cum nulla soboles esset, Regnum, & opes testamento ad Romanum Pontificem, velut æternum Petri Patrimonium pervenire; atque in nostra usque tempora pars Hetruriæ hoc nomen servat. Successit Imperio Henricus Quartus, qui Patrem viventem in carcere usque ad mortem excruciauit; impietatem tamen paternam æmulatus, eundem Pontificem crudeliter tractavit, Sacerdotum bona dilanians: tandem facti pœnitens, Callisto erepta ab antecessoribus eligendorum Episcoporum jura restituit, simulque agri, & cætera Pontificiæ potestati reddita sunt. Per Henrici Quarti tempora conflagrasse iterum magnam Mediolani partem apud quosdam invenio: facillè tunc fuit, oborto semel incendio proxima quæque aduri; propterea quòd, sæpius eversa urbe, restituta subinde ædificia stramine, cratibus, & levi materia constabant, quæ flamma facillè comprehenderet. Ergo incendiorum metu lege vetitum fuit: *ut spirante vento nemo unus ignem domi, sive ad cibaria coquenda, sive ad alios vitæ usus accenderet.* Quare nonnunquam vento perseverante, vix panis, aut obsonia in urbe decocta inveniebantur. Agebat tunc in civitate Principem Sacerdotum Jordanus Clivius. Jamque cives foris bello lacerati odia remiserant: in finitimos arma conversa sunt, qui civili dissidio elati erant: ita sedato tumultu domestico, sibi, & fociis illatas injurias acrius ulciscabantur. Fortè bello Brixiani, & Cremonenses se invicem evastabant, atque succumbens Brixianus, impetrato à Mediolanensibus auxilio, exercitum confestim instaurat, hostem exultantem

A invadit, & refugientem ad Olii ripas persequitur: atrox pugna editur, atque cæde ingenti facta, amnis ipse sanguine spumescens effluxit. Tunc Mediolanensis victor Laudem circumfedit, pridem à Magno Pompejo, post purgata maria, devictosque Piratas, conditam: ergo crebris incursionibus vexati Mediolanenses, & Sociorum injuriis commoti, paulò diuturniore obsidione urbem ipsam cœpere: graviter in victos sævitum: nuri dejecti, abductus populus, vicatim habitare jubetur; ne scilicet congregati mala servitutis, & injurias conferendo, aut de recuperanda Patria, aut de rebus novis consilia agitent: prohibiti insuper, ne conciliabula, aut mercatus haberent, sublata inter eos commercia, adempta connubia, nulla concessa concilia: misera profectò servitus, & calamitiosa conditio: inter contrahentes id demum ratum erat, *quod is annuisset, qui loco præerat:* quòd si quispiam rem suam Præfide non auctore abalienasset, is patrimonio multatus in exilium agebatur: eadem quoque pœna is affectus erat, qui noctu, aut clam præscriptos fines excessisset, aut quicquam suarum rerum extulisset: sedibus propriis pulsi, hujusmodi servitutem novem, & quadraginta annos Laudenses servivere. Mortuo Jordano Antistes divinæ rei creatur Bernardus Monachus, tum ob vitæ integritatem, tum ob sacram Scripturarum scientiam; qui cum non ignoraret, quid oneris subiturus, & quantæ curæ Præfide essent ob graves Civium discordias, perniciofa certamina, & quotidie cum finitimis emergentia bella; maluit repudiato Sacerdotio otiosam, & quietam vitam agere procul ab administratione magnarum rerum; atque in studium quietum se tradens, tum docendo, & sacras literas interpretando, atque subinde scribendo, aberrantes à divinis institutis, rectisque moribus mentes veris præceptis instruxit: otio item, & saluti hominum prospiciens, qui tumultuosâ, & turbulentâ vitâ quò profugerent sæpe quærebant, ampla & opulenta cœnobîa ædificavit, plurimosque statim sectatores habuit, qui relicto seculo sub sanctissimis institutis vitam peregrere, atque tum summa virtute, tum etiam autoritate, quæ illi ex studio, & scientia amplificata fuerat, unicum exemplum erat ejus ingrediendæ viæ, & colendæ vitæ, per quam tutò ad cœlestes sedes iretur: concelebravit maximè per otium rectissima, & honestissima nostræ fidei studia: reliquit etiam præclarissima ingenii monumenta pietatis plena, & meditationis rarissima: nam illi in usu fuit ex terrestribus cœlestia meditari; & quamvis literæ nostræ obsolevisent, tamen nec inelegans, nec infacundus Bernardus habetur. In Henrico Quarto Gibellina domus cessavit. Cæterum Germani Proceres summam rerum, & Imperium Lothario Duci Saxonum demandant, qui familiæ Gibellinæ infensissimus, Conradum, & Fridericum fratres ex Henrici sorore progenitos armis insectatur: tandem pace facta in Italiam proficiscitur: Mediolanum primum petiit. Anselmus Pusterleus, qui tunc fortè Mediolanensi Ecclesiæ præerat, ferreum Diadema imposuit: Romam deinde contendit, ubi Regio ornatu, & Imperatorio nomine ab Innocentio decoratur: hunc Sacerdotio pulsum in sedem restituit: mox Germaniam repetens ex itinere, petente Cremonensi, Cremonam obsidet: sed ubi cognovit insidias fraude Cremonensium sibi paratas, relicta Cremâ illorum agros populatur, atque haud ità multò post Veronæ Lotharius moritur. Interea Anselmus comparato exercitu Novumcomum obsidet. Occiderant Novocomenses Clientem Anselmi Carcano oriundum: eoque ira, & dolor Præfide erupit, ut urbem captam crematis ædificiis funditus deleverit, Civibus verò vallem habitandam concessit, & quæ olim in editiore loco condita fuit, alieno loco restituitur nobilissima Colonia, quam Populus Rom. ad Larium lacum per Strabonem Pompejum emiserat; nec Romanis

A. 1109.

A. 1123.

A. 1126.

A. 1137.

A. 1138.

Romanis tantum, sed etiam Græcis Colonis celebrata, Cæcilio Poëta, & duobus Pliniis maxime illustres. Hoc etiam tempore Mediolanensis Præfulis potestas, & jurisdictio accidit. Genua Ligurum novum habuit Archiepiscopum, cujus imperio Bobiensis Ecclesia, & tres Corsicæ Episcopi, velut Metropolitano parvire: credo Pontifices, atque Cæsares hoc in primis veritos; ne tam lata jurisdictioe patenti novandarum rerum materia oriretur, quotiens violentior Præful Mediolanum teneret. Papiensis Pusterlei ductu, & auspiciis vincitur, & haud longè à Mediolano velut suburbium quoddam monasterium Claravallis Bernardo procurante ædificatur: quò primum numerosa Monachorum fraternitas, qui in medium viverent, coivit. Frequentavit hic homo Mediolanum, cum ob urbis magnitudinem, & Civium opes, tum quia in regione, quam Orientalem portam vocant, religiosè educatus, fundamenta inibi societatis inseparabilis jecit. Sublato ex rebus humanis Lothario, duo Scophii fratres, qui Henricum (ut supra diximus) arctissima propinquitate contingebant, Imperium excepere. Duces profectò impigri, & quotiens prælio dimicandum, bellatores haud ignavi, & fortes; atque ut exercitum servarent, nulla pericula unquam refugere. Conradus itaque prior justu Procerum imperat, à quo auctores quidam tradunt *Gibellina factionis orta nomina; essi non protinus per Italiam dispersa fuere.* Invenio in quibusdam annalibus,

A. 1147. *Martinum Turrianum*, quem ob corporis magnitudinem, & eximias vires Gigantem quidam appellaverunt, *in Asia sub Conrado stipendia fecisse*: hic in pugna captus, dum à feris hominibus crudelissime in opprobrium nostri Dei dilaceratur, tormenta omnia hilari vultu subinde perpeffus, Christi nomine sæpius invocato, expiravit. Ceterum Conradus omni fere exercitu in Syria amisso, reversus in Italiam, vel ut alii tradunt, in Germaniam, moritur. Post quem Fridericus frater Electoribus magis non repugnantibus, quam consentientibus, Rex Romanorum creatur; statimque per Taurinum saltum Alpes transcendens, Astam coloniam per vim coepit: inde Derthonam rogatu Papiensium subruit: tum Mediolanum petiit; ubi ab Uberto Antistite, læto, & plaudente Populo, ferreo insigni coronatur: mox ab Hadriano Pontifice titulum, & nomen Imperatorum accepit. Sed cum is graviora à Romano

A. eodem 1155. Populo tributa exigere tentaret, oborto tumultu, urbe cum Germanis Proceribus pellitur: ferro quoque certatum est; cæsi utrinque multi, complures capti, qui haud ita multò post, deprecante Hadriano relaxantur. Tum Fridericus per Picenum in Umbriam, atque inde in Transpadanos transmissus, in Germaniam rediit. At Mediolanensis Derthonam reficit, Papiensem graviter infestans: ferro, & igne utriusque agri vastabantur: Papiensi majora detrimenta, utpote viribus, & armis longè impari, illata. Interim Hadrianus moritur, atque Alexander maximum Sacerdotium tenet suffragiis eorum, penes quos potestas creandi Pontificis erat. Hic Friderico minimè gratus, atque adeo ab inito Pontificatu infensus, ubi adventare in Italiam Barbarum audivit, sibi timens, relicta Româ ad Francos profugit. Tunc Octavianus Cardinalis Romæ Pontificatum usurpat, seque Victorem nuncupat: cui magna Italiae pars, & Germanorum civitates metu Cælaris confestim parvere. Alexander Victorem sacris interdicat. Jam Fridericus Italiam ingressus erat, cujus imperata Longobardorum urbes fecere. Soli Mediolanenses adversati sunt: quia scilicet Alexandrum Pontificem unice venerati, partes Ecclesiæ pertinaciter tuebantur: manebat adhuc vetus odium, & antiqua simulas, & proinde infensi animi: fovebat Fridericus Urbium intestinas discordias: Papiensium studiis maxime obsequabatur; ad quem velut ad Dominum, atque domesticum disceptatorem

A legati Civitatum convenere. Expostulabat Laudensis Urbis ruinam, servitutem miserandam, & fœda exilia: Novocomensis excisa mœnia, & solo æquatas domos conquerebatur: reliquæ item finitimæ Urbes detrimenta, & intoleranda tributa deplorabant. Horum querimoniis motus Fridericus, sub specie liberandorum Sociorum, Mediolanum aggreditur: quam urbem diutiùs obsessam, atque demum urgente fame subactam ad solum evertit: Cives decimo ab urbe milliario pro numero portarum divisi, relicto patrio solo habitare coguntur. Sunt auctores; Angleria Comites, qui inter cæteros Longobardos nobilitate, opibus, honore, & potentia pollebant, & quotiens Germaniæ Reges Mediolanum diverterent, Præfuli assidentes ferream Coronam capiti illorum imponebant, ab Patritiis proditos fere ad unum occisos fuisse. Hanc gentem studuit in primis Fridericus penitus tollere: quippe Alexandri perseverantes in partibus Patriam defensabant, Barbaro semper adversati: duo, & viginti securi percutiuntur, quorum bona, & fortunas omnes his divisas accepimus, qui à Friderico adversus Patriam steterant: superfuit tanta clade unus, cui VIVIANO nomen fuisse ferunt, restituendæ Patriæ, & vindicandæ libertatis auctor. Juvit maxime Fridericum Gulielmus Marchio Montisferrati; tum ob recentem cum illo affinitatem; tum quia salva, & incolumi re Mediolanensi, fines Regni proferre minimè poterat. Tradunt alii, *Opicionem Malaspina familia Marchionem cum cæteris conjurasse in excidium Mediolani*; quod parum compertum habeo: illud verò constat, hunc Opicionem ingentis spiritus virum, & potentem in Liguribus fuisse; cujus honorifice meminit uterque Imperator Pater, & Filius in conventionibus pacis Constantiæ. Dum hæc geruntur, Octavianus, qui (ut supra diximus) paucorum suffragiis Pontificatum usurpaverat, Papiam, ubi indictus conventus fuerat jussu Imperatoris, venit, salutatus à Populo, & ab ipso Friderico ut verus Pontifex adoratus fuit. Alexander, ubi hæc rescivit, utrumque execratum sacris etiam privat; atque literis, & nunciis Sacerdotium sibi legitime collatum, impietatem præterea, atque injuriæ Barbari quantæ forent, Christianos Principes docet. Jam Friderico fere nullus in Italia repugnare audebat; nam ad Philippum Francorum Regem Alexander navibus Siculorum navigaverat. At Enobarbus, subverso Mediolano, in Veronenses duxit; ad quos defendendos Socii cum exercitu venire: retrocedens itaque Barbarus Papiam se recepit. Alexander verò in Concilium venire recusat; quòd se auctore indictum non foret, quanquam locus medius inter Germanos, & Gallos delectus esset. Interea nova conflatur in Italia Societas multarum Civitatum, quæ Pontificis partes sequutæ, fortissimè Friderico adversari coepere: harum opibus, & armis confusus Alexander ex Francis in Siciliam renavigavit, atque inde Romam repetit. Moritur interea Octavianus, in cujus locum statim Guido Cremen-

B

C

D

E

F

A. 1162.

A. 1164.

A. 1167.

C

five

five quòd Metropoli carentes caput non haberent, nec urbem, ad quam potissimum consilia sua referrent, Mediolanum communiter restituunt: mirandum profecto quàm brevi tempore populo, & opibus Civitas auctior facta fuerit. Præerat tunc Ecclesiæ, mortuo Uberto Piroveneo, Galdinus Salensis: *hunc* quidam annales tradunt, *Romani Pontificis jussu Mediolani primum tenuisse Sacerdotium, qui modò Urbis mœnia reficeret, privatasque domos, & templa instauraret, & utique posset erigeret, Circum, & Theatrum demolitur; quæ duo maxima opera fuerant ab excidiis Urbis servata, & à quibus Gothi, deinæ Longobardi, & reliqui immanes Barbari, & fera Gentes temperaverant, atque ita subruta sunt, ut vix vestigium appareat.* Videmus tamen passim in fossis, muris, & templis siliceos lapides antiqui operis, & priscae elegantiae. Fridericus post restitutum Mediolanum relicta Anconâ Romam contendit, quem ubi Alexander appropinquare cognovit, in privatas quorundam nobilium ædes se recepit: ad hunc pecunias, & triremes Gulielmus à Sicilia misit; sed Pontifex in ea difficultate rerum magis consilio, quàm opibus indigebat; nam Fridericus quibuscunque oblatis conditionibus Rom. Populum à Pontifice avertere tentabat, siquidem ita demum se pacem dare, & ablata restituere promittebat, si Romano Populo disceptante de Sacerdotio duo Pontifices causam dicerent: in hanc conditionem cum Romanus bello defatigatus inclinaret, noctu Alexander Circejos abiit, Cajetam, Beneventumque concessit. Fridericus quoque peste conflictatus, multis suorum amissis, Romam reliquit; atque in Longobardos, qui adversus se conspiraverant, arma convertens, ingenti territus eorum apparatu, in Germaniam properè concessit, hoste usque ad Alpes persequente. Tunc Confœderati Populi haud longè à via Æmilia juxtà Tanarum flumen urbem condiderunt: Commigravere in vicum, cui *Roboreto* nomen est, octo vicina Statiensium oppida: Cæsarea primum dicta ad quindecim millia virorum constat, quare ipso, quo ædificari cœpta est anno, fossa, aggere, & vallo cincta fuit. Moritur Guido, in cujus locum sufficitur Abbas quidam ex Pannonia. Per hæc tempora in Britannis Thomas Episcopus occiditur; atque Henricus, qui tunc Britanniae imperabat, per legatos se excusat, quòd se infcio cædes facta fuisset; cui venia promittis militibus adversus Barbaros datur, & five ad expiandum nefas, five in emendationem damni, quod Ecclesiæ passæ fuerant, Insula omnis Romano Pontifici vestigialis facta tunc fuit: hunc virum, cum ad tumultum ejus miranda fierent, Alexander exploratis miraculis in Sanctorum numero annotavit. Cæterum Fridericus, cum rejectum ab Urbe Alexandrum intellexisset, neque ullis conditionibus à Civibus recipi; petebat enim tantum sibi curam rei Ecclesiasticæ concedi, cætera jussu Populi administrarentur, in Italiam Alpes Julias transgressus venit, statimque Segusienis civitatem, quæ illi prima se objecerat, per vim cœpit; nec contentus præda, mœnia & domos evertit: exterriti excidio vicinæ Urbis Astenses, illi continuo se dedunt. Resisterunt Alexandrini nec vastitate proximorum, nec Germaniæ viribus perculsi: substitit tunc hostilis impetus; & quamvis hyems instaret, nihilo tamen secius Alexandriam circumfidet, per intoleranda frigora operibus, & munitionibus obsessos urget, atque ædificatis tabernaculis hyemando bellum continuat; sub pellibus, & tentoriis durabant, nive interim, & pruinis obrui, dura & intolerabilia omnia pati, nulla mulieribus quies, utriusque juxtà erat; nunquam deposita arma: quare patientiâ, & constantiâ oppidanorum frustratus Barbarus, jam appetente vere ad fraudes vertitur; nam pactis induciis per cuniculos in urbem milites clam immittuntur, qui nocte portas refringerent: hos Populus interceptos trucidat, & protinus eruptione fa-

cta tantis incommodis, & damnis Germanum afficit, ut in die celeberrimo Resurrectionis Domini obsidionem turpiter solverit: magna profecto Alexandrini populi virtus, magnaque sui fiducia, quippe qui primi furenti Barbaro pertinaciter resisterint, diutius obsessi in summa rerum inopia totam hyemem sustinuerint, neque conditionibus parère hosti voluerint: docuere certè, præferocem hominem, & secundis præliis elatum posse patientia, & viribus debellari. Relictâ Alexandriâ ad Papienses Æno-barbus concessit. Tunc induciæ quoque datæ sunt utrinque; ut commodius de pace agi posset. Sociæ urbes Alexandro inconsulto, aut non assentiente conditiones omnes ab hoste oblatas repudiavere. Tunc Fridericus novum ex Germania militem accivit, instauratoque exercitu proximos fines evastat, Alexandro, & Sociis petitam pacem negavit. Mediolanenses, cum hostem implacabilem viderent, undique milites, & majores vires contrahere, iras atque odia vicinorum magis exardescere, Papiensium, atque Novocomensium agros, qui in Friderici partibus perseverabant divisim copiis depopulantur. Alexander pro opera egregiè in bello navata, simul ut aliquando honesto munere diuturnæ obsidionis damna emendaret, urbi novæ Episcopum dedit, quam de suo nomine pro Cæsaria Alexandriam appellavit. Interea novæ Friderici copiæ per saltum, cui *Domossula* nomen est, Comum perveniunt. Agebatur jam septimus, & decimus Pontificatus Alexandri annus: ingens tunc formido Longobardos cœpit; nutabant Sociorum animi: solus Mediolanensis plenus fiduciæ, & animi interritus, Tyranni impetum sustinuit, à quo septimo ante anno patriâ subactâ, & funditus deletâ, velut captivus certis in locis relegatus fuerat, tum prælio dimicare minimè timuit: extimulabant animos Patriæ excidium, atque exilium, libertatis, & vindictæ cupido, violata Pontificis potestas, quem tot annos impunè Barbarus crudeliter, & impiè persequeretur: egressi igitur urbem, cum jam Brixianorum, Veronensium, Novariensium, & Vercellensium auxilia accersissent, sublatis signis in vicum veniunt, qui Barillanus dicitur in via, qua Comum itur: hora erat fere diei tertia; atque extemplo collatis signis manus conserunt: præmissi septingenti Longobardorum Equites primi pugnam ineunt; hos Germani ad Carro-cium usque repellunt; quo in loco instauratis viribus aliquandiu atrociter pugnatum est: nam utrique prælium cientes vulnera pariter & accipiebant, & conferebant: stabant obnixi & armis, & animorum ardore: de summa rerum agebatur, & proinde ingens & in Barbaro, & in Mediolanensi metus erat; nihil a summo certamine remissum est, nemo pedem referebat, in eodem vestigio aut mori, aut vincere decretum erat; æquo Marte res agebatur: tandem Mediolanensis irâ accensus in hostem se concitat, cadunt frequentes, signifer Imperatoris occiditur, captaque est Aquila: Fridericus inclinari suos in fugam conspiciatus, ex Imperatore Pugnator fit acerrimus, & ut aciem restitueret, equo in hostes fertur; at dum obvium quemque aut cædit, aut sternit, dulcedine cædis periculum velut cæcus minimè cavens, equo suffosso in terram sternitur; quem cæsum major pars rati terga protinus dant: cecidere in ipso certamine Germanorum multi, plures in fuga aut cæsi, aut capti: occidio plurima Papiensium, & Novocomensium facta: castra eodem impetu capiuntur; præda ingens militi concessa: spoliis Barbarorum opulentus domum Mediolanensis rediit: Friderici uxor Comi relicta, virum pro clamato luxit, atque oratores Mediolanum misit, qui corpus humanum peterent: sed is quinto, posteaquam malè pugnaverant, diei ornatu Imperatorio conspicuus per Papiam incessit. Hoc prælio res Germanorum ita fractæ fuerunt, ut in omnibus jam circulis fremere, & mox palam Proceres vociferare, minimè

minimè mirum cladem eam acceptam, si homo impius profano, & diutino bello Summum Pontificem in Dei contemptum infectaretur: tum Episcoporum major pars imperia detrectare; quippe dictitantes, nisi Alexandro reconciliato adversa omnia ventura, atque Deum Optimum Maximum nunquam prospera daturum, nisi pax daretur Ecclesiæ, & Pontifici sua jura restituerentur: quando Sacerdotio violato præsto semper vindicta foret, proinde pacificatum legati mitterentur: evidentibus lignis tanta victoria, qua prope debellatus Tyrannus & injuriis, & bello finem fecerit, significata fuit: agebatur fortè dies festus sub nomine trium Martyrum *Sisnii, Martirii, & Alexandri*, de quorum sepulcris inter sacrorum solennia tres Columbas profectas super Carrocii fastigium consedissee quidam viderunt; quem diem in Fastos relatum deinceps Mediolanensis religiosè coluit. Sed inter omnes Scriptores hoc constat, *prosperis Majorum tuorum* (Ludovice Maria Sfortia Vicecomes) auspiciis felicissimè pugnatum; nam inter reliqua signa, sub quibus Populus stetit, & victor evasit, fuit eo statu posita Vipera, quo ab Othone Vicecomite supra septem, & septuaginta annos in Syria partam retulimus, longè ea princeps cæteris signis antestabat. Matthæus Palmerius in chronicis, & M. Antonius Sabellicus magis incuriosus, quam inelegans Venetarum rerum scriptor, *classe pugnatum, & mari profligatum bellum* referunt, *captumque Othonem Friderici filium, qui postea Venetias deportatus pacis inter Imperatorem, & Pontificem componenda auctor fuerit*; quod ab hominibus parùm circumspectis temerè confectum, & memoriæ proditum redarguendum profecto est: simul etiam quia hujus mendacii assertores jam pridem illustres viri habentur, quos potissimum hi scriptores sequuti sunt. Agunt Veneti diem maximè solemnem, qua vicini populi ad salutandum templum nostra, & illa tempestate inclytum concurrunt, quod in memoriam recuperati juris, hoste devicto, celeberrimum Pontifex fecerit; & proinde navalem pugnam, captivum Othonem, supplicem Patrem, & Alexandrum hosti insultantem, velut publico monumento testata & habent, & ostentant. Sed his hominibus hoc genus omnia facile ignoscenda sunt, qui domesticæ quieti, & civium otio consulentes, ne qua exoritur seditio, quæ plerumque à pusillo, & eodem inopinato nata initio, maximas urbes, & potentes populos evertit, vel in minimis libertatem, & concordiam inter se communiunt: *contra enim quam cæteras gentes fecisse, & sapientissimos viros præcepisse* legimus, historias Patriæ non solum negligunt, sed Decemvirali decreto, quod maximè formidolosum apud eos habetur, obliterare, & delere penitus student: ne scilicet discernantur inter se majorum, minorumve gentium Patritii, & proinde posteris ingenua dignitatis, & honoris æmulatio pestiferæ similitudinis, & perniciosi odii origo fiat. Dicat quæso Palmerius, vel recentior quicumque historicus, *filiusne Otho Friderico fuerit?* Ego, quod equidem legerim, *duos tantum ab Anobarbo mares genitos comperio Henricum, qui & cum Patre, & post illius obitum imperavit, atque Philippum, qui in Germanis Regnum tenuit: Othonem nullum à Scophiis genitum legimus.* Sed cur tantopere de Othone Filio, & re commentitia sollicitus sum, quando nulla Friderico classis, nec in illius ditione maritimæ urbes fuerint, apud quas naves ædificare, intruere, & parare potuerit? Nam duntaxat terrestribus copiis succinctus Germanos tenebat, & Longobardos interim rebellantes armis infestabat. Præterea jam tantæ Venetorum opes mari tunc patebant, ut non temerè faceret quisquam (de his loquor, qui mare Ionium, & Adriaticum sinum circumcolunt) qui non amicitiam, quam bellum Venetorum maluisset: siquidem per ea tempora Vitalis Michaël Dux Venetiæ triremes centum habuit instructissimas, & naves onerarias viginti; cui per tumultum

A occiso, Sebastianus Zianus cognomine Dives suffectus fuit. Profugum præterea Alexandrum fovebat Gulielmus Rex Siciliae, cujus navibus in Gallias ad Regem profugerat, & rursus repugnantibus Sociis, & fortiter Friderico resistentibus, in Italiam redactus est; & cum Anagnina exularet, ubi commodum illi erat, Siculorum classe commeabat. Tra-
B dunt item scriptores, *ea tempestate pacem inter Anobarbum, & Venetos factam, fœdusque cum eodem Gulielmo percussum sive quia rebus suis timerent, sive ut alio non impliciti bello liberius gravem, & indignam Emanuelis Graci Imperatoris contumeliam ulcisci possent; qui Henricum Dandolum fortè apud se legatum agentem, atque licentius loquentem, violato jure gentium, candenti lamina oculis admota excacaverat.* Ergo nec filius Otho nomine, nec item classis, & opes maritima Friderico fuerunt, neque erat e re Veneta bello Germanum hostem laceßere. Omnis igitur laus, & gloria debellati Friderici, & restituti Pontificis gratia penes Mediolanensem est: suppetias tulere Veronenses, Brixiani, Novarienses, ac Vercellenses: nec Alexandrini fraudandi sunt gloria sua, à quibus fugatus primum fuit Anobarbus: sed Veneti illis æquales temporibus, nihil alienæ laudis usurpantes, factum ipsum castè, verè, ac simpliciter testati sunt. Positum est sepulcrum Sebastiani Ziani in majori æde
C Divi Georgii, cum elogio inepto, atque ineleganti; quia scilicet latinæ nullæ tunc literæ, & doctrina perexigua erat, & post enumeratas victorias, quas Zianus de hoste retulisset, hæc subjunguntur: *Binos conjunxit gladios quasi sequester pacis: duos gladios, hoc est, Pontificem, & Imperatorem, inter quos divinum bellum intercesserat, concordēs fecerit.* Picturam verò, quæ in atrio spectatur, poeticum potius argumentum, quàm fidem historiæ dixeris: ficta res hinc fuit, quod in templo opulentissimo provolutus Barbarus supplex veniam accepit, & quod multos post annos cum Juniore Friderico pecuniâ Pontificis classe instructâ pugnatum fuit. Quare cum aliquid
D veritatis subesset, à posteris recepta res fuit, & credita perinde atque vera foret, & quam nullus redargueret, atque refelleret, facilè inveteravit. Cætera, quæ de Pontifice vulgus celebrat, fabulosa planè sunt, & vix anicularum lucubratione digna. Sed diem festum agunt pridie nonas Aprilis, atque venerabundus populus templum Caritatis adit, velut una salutatione crimina expiaturus: quod inde profectum arbitror, quia illo in loco forsitan Pontifex magnificè exceptus, atque diversatus fuerat, benignissimusque mox Pater templum muneraturus plenaria expiatione ad illud salutandum homines pelle-
E xerit. Abundè Longobardorum opibus constat, & in primis Mediolanensium armis defensum Pontificem: neque in recentioribus annalibus, atque etiam in fœderibus pacis Constantiæ, *Venetis nominatus est*: credo, quia nullæ illi vires terra erant, & Græco bello implicitus rerum suarum satagebat. Cæterum Fridericus re malè gesta, sermone populorum, vociferatione militum, & Procerum tacita rebellione perterritus non armis, aut instaurato exercitu, & prælio ampliùs dimicandum ratus, supplex à Pontifice veniam petere constituit: legatos igitur de pace misit, sed locus deerat, in quem tuto convenirent. Bononiæ primum conventus indicitur, sed ea velut suspecta repudiatur: mox delecta Ferraria, hæc quoque parùm visa idonea: quare ex utriusque consensu Venetiæ deliguntur, propter inclytam tunc Gentis justitiam, & Urbis amplitudinem; sive quod terrestri exercitui Pontifex, & Fridericus suffulti, unde vim uterque alteri inferret, in mediis aquis non haberent: prior in locum conductum Alexander per Siculorum triremes defertur, victoriam Mediolanensi ante omnia gratulatus, facultates Ecclesiæ pollicetur, hortatus subinde ne arma deponerent, neque paterentur impium Barbarum post tantam cladem se colligere, aut respirare, nisi reconciliatus

A. 1177. Pontifici damna emendaret, tributa remitteret, libertatem Populis daret, ut suis legibus, peregrinâ exempti tyrannide, viverent: hæc eo consilio Longobardis promissa, ut stante adhuc bello in quæcunque voluisset foedera hostis venisset: hac igitur Pontificis pollicitatione, & hortatu, proximaque clarus victoria Mediolanensis, sumptis denuo armis, propius Papiam exercitum admovit, pecorum, & hominum prædam agit, ferro, & igni cuncta spectante Barbaro absomit; qui curarum plenus, & damnis Sociorum permotus, ut Pontifici quamprimum reconciliaretur, per Ticinum, atque Padum Venetias navigavit, ibique ad genua Pontificis procumbens dirus homo supplici voce veniam impetravit: tunc primum omnium Mediolanensi in decem annos induciæ datæ, multaque in emendationem damnorum, & everse Urbis instaurationem elargitus est Ænobarbus. Cæterum ut aliquo piaculo exilium Pontificis lueret, injunctum illi fuit, ut cum exercitu in Syriam trajiceret, depositoque Imperiali titulo & ornamento, quam dignitatem longinqua rebellionem polluisse videbatur, Romam usque Pontificem privato similis prosequeretur: ubi restituto in sedem Alexandro, iterum humi stratus calcandam cervicem palam omnibus præbuit. Sunt qui scribant, *prostrato hosti insultantem Alexandrum*, hæc Divini Vatis verba protulisse: *Super aspidem, & Basiliscum ambulabis, & conculcabis leonem, & draconem*: non continuit linguam Barbarus, statimque percussit. *Non tibi, sed Petro*. Ita expiato jam scelere, ut dignus Imperio verè Christianus Cæsar nuncupatur. Tradunt alii, dictum Pontificis, & responsum Tyranni Venetiis, non Roma datum. Cæterum Fridericus rebus in Italia compositis, reconciliatoque Pontifice, in Germanos revertitur. Quæta tunc erant Mediolani omnia, fides utrinque inviolata. Moritur interim Alexander: succedit Lucius, hic pacem, & amicitiam cum Friderico in primis quæsit, illi obsequens, adversus nunquam: quem ut singulari aliquando beneficio promereretur, enixissimè elaboravit, ut Henricus filius Alemannorum Rex designaretur: quam rem jam senior Pater in primis optabat, & ut efficeret omni studio, & conatu procurabat. Socius ergo in Imperio favore Pontificis Patri Filius: durabant cum Mediolanensibus induciæ: ratus itaque juvenis id, quod forsan futurum esset, ne post Parentis mortem, sive ubi induciarum tempus exivisset, bellum rebellantibus Longobardis grave, & periculosum oriretur; sive beneficiis populorum provocatus, pacem confici ante omnia procuravit: quod illi haud difficile factu fuit; nam feriato per aliquot annos ferro, cum jam diu injuriæ nullæ intercessissent, deposita odia, & mitigati quodam modo erant animi, longo præterea bello afflictæ urbes pacem, & quietem exoptabant, quando honestis conditionibus, & ex utilitate communi pax futura esset: accedebat Filius pro commodis Longobardorum efficax apud Patrem deprecator. His itaque rationibus cum foedera, & otium bello, atque inimicitis præverterent, Societatis Italianæ Oratores in Germaniam convenere. Horum nomina generatim in formula Pacis Constantiæ annotata continentur. Primi sunt Mediolanenses, quippe caput, & Gentis Principes. Inter conditiones hæc fere primæ fuerunt: *Longobardi, seu stipendiarii Friderico, & Henrico filio tributa pendunt. Regi Alemannia Longobardiam intranti, aut inde Romam petenti, urbes sine fraude, & bona fide itineri necessaria, & copias ad viandum pro instituto præbent. Primores urbium dignitates, munera, & privilegia à Caesaribus donata tenent. Societatis Italia saluum, & incolume privilegium: Immunitates præterea, fura viarum, pontium, ac fluviorum privatim cuique populo Cæsares servant. Longobardia unum imposito de Proceribus aula, qui lites cognoscat, jus dicat, conventus peragat, quem omnes in Italia duntaxat appellant, & à quo deinceps provocatio nulla esto.*

A. *Quinquennio quoque exacto, fidem cum sacramento à Populis Nuncius Cæsaris exigit. Rata atque firma in triginta annos pax maneto.* Aliæ leges, & conventiones, quas recensere longum esset, in eadem pace leguntur. Quidam tradunt, tunc primum præpositos universæ Provincia Præsides fuisse, qui Vicarii Cæsarium appellarentur, & summos urbibus magistratus concessos esse, quos Potestates dixerunt. Ubi placuere conditiones, privatim à civitatibus Nuncii venire, qui acta confirmarent & pacem ipsam ratam facerent: inter quos PETRUS VICECOMES à Mediolanensi missus fuit. Rebus in hunc modum compositis, tranquilla, & tuta ab externo hoste omnia erant. Longobardi suis legibus vivebant, suosque habebant Prætores, quorum non urbana tantum jurisdictio erat, sed pro commodis Civium excubantes etiam de his, quæ foris agerentur, solliciti quotiens hostis ingrueret, aut populabundus fines intrasset, convocatis ad arma civibus, tum scriptis, & centuriatis militibus in morem justi exercitus illi obviam ibant, Romanos imitati Consules, qui juri dicundo, & bello gerendo occupati ex usu publico erant. Hac in parte non videbitur alienum, aut narrationi rerum inconveniens, proponere quibus institutis, & legibus populi tot bellis invicem fatigati, perpetuis Germanorum armis protriti, tot cladibus obruti, ac penè exhausti Rempubl. administraverint. Urbibus annui Consules præficiuntur, hi curam Reipublicæ habebant, ex quorum sententia, & arbitrio bellum, & pax potissimum agebatur, prout commoditas, & utilitas Urbis postulabat: capebant alii sine discrimine honoris, generis, atque census publica negotia, rebus gerendis intererant, sententiasque rogati nonnunquam dicebant: huic hominum generi Creditæ nomen erat, quod scilicet taciturni audita servarent, & arcana minimè enunciarent: nihil enim taciturnitate, & silentio in publici negotii administratione conducibilis habetur: ergo qui in Concilium abhibiti fuerant, hoc nomine fidei, & taciturnitatis admonebantur: hujus Factionis, sive Collegii meminere Cæsares in edictis, & legibus pacis: hoc etiam nomen usurpat nostra tempestate Venetus, quotiens abeuntibus de curia Patribus silentium eorum indicitur, quæ prodere capitale est: celebris est regio Mediolani, in qua Turris spectatur ejus nominis, quia, credo, in eum locum deliberaturi de magnis rebus cõerent. Interim sive publicæ alicujus dignitatis gratia, sive ut rem, & dignitatem suam à vi, & injuria potentiorum tuerentur, novam Factionem constituebant magis, quàm Curiam, etsi Consules suos sibi crearent. Archiepiscopus annum Vicarium, quem Vicecomitem appellabant, juri reddendo præficebat: hujus præcipue erat, quæstiones exercere, supplicia, & poenas capitalis noxæ ultor irrogabat. Ex Consularibus in annum Quæstores fiebant, penes quos tributa depensa, & ex portoriis redacta pecunia reponebatur: horum fides, & integritas in custodiendis publicis redditibus jurejurando exigebatur, & ne rem projicerent, ad disquisitionem expensæ pecuniæ plerumque vocabantur: hos posteriores Thesaurarios à servandis thesauris appellaverunt. Publicarum rationum duo erant Præfecti, erogandæ duntaxat pecuniæ in urbanos usus Domini: hi copias exterarum gentium Oratoribus, & peregrinis, qui publico exciperentur hospitio, præbenda item Legatis, & Magistratibus ab urbe proficiscentibus expediebant: horum igitur opera, & arbitrio sumptus intrâ urbem fiebant, clementiæ, & liberalitatis publicæ ministri erant, quos possis Romano more Quæstores, seu Copiarios appellare. Durabant factiones perpetuæ jam inde cæptæ, posteaquàm extinctis Longobardorum Regibus ad Germaniæ Dominos res devenit: divisa erat bifariam Civitas; quippe Nobiliores & potentia, & opibus tenuem turbam, velut servitio perpetuo dicatam habebant, quæ ideo in clientelam Principum

pum se dabat, ut ab injuria, & vi ditionum tuta foret: sed per causam patrocini, ut fere usu evenire solet, eò authoritatis, & potentiae in civitatibus quidam pervenerant, ut dum injuriam, & vim propulsarent, authoratam plebem ita haberent, ut post longam clientelam servilem in modum tributa dependerent: quare ut quisque vel nobilitate, vel opibus pollebat, ita illi velut in servitutem dicati pluri erant: hinc dixerim nata Capitaneorum imperia, quibus ceteri essent Stipendiarii, Vasallos, ac Deditiosos vocabant: parebant etiam Capitaneis Valvafores, qui ab inopi multitudine hoc distabant, quòd illi jus, & potestatem in alios obtinebant; hæc verò semper alienæ libidini subiecta erat: nihil Capitaneis exceptum stabat, quorum licentiam, atque superbiam quidam non ferentes, quamvis partis Nobilium forent, illorum tamen improbitati, & insolentiae occurrere conabantur, & miseros sublevabant, injurias propulsando; quo nomine popularitatem, & famam inter suos compararunt: verebantur etiam, ne per impunitatem improbi homines injurias, & maleficia in se converterent. Verùm cum remedia malis nulla essent, passimque tenuior turba dilaceraretur, defecere ab Nobilioribus non pauci, quorum opes haud mediocres erant, atque in unum coeuntes medium quendam Ordinem fecere. Hoc igitur facto ab improbitate, & scelere Factiosorum se vindicarunt; ac interim oppressos erexere: de Mota dicebantur, nominis interpretatio incomperta adhuc mihi est: ceterum qui novissima Feudorum jura Cæsares describere, ante omnes Curiam Mediolanensem celebrant, ut plane significare videantur hoc sive tributi, sive magis perpetuæ servitutis genus Mediolani primum cepisse: nam quotiens de obærat in dominos, & rursus de jure dominorum in obæratos certabatur, *cognoscenda causa, & dijudicanda liris arbitrium Consulibus, & Patribus Curia Mediolanensis Cæsares delegasse* legimus: ut non solum sine provocatione eorum judicium foret, sed quod hi statuisent, id à cæteris receptum vim legis quodammodo haberet. Multa quoque instituta pro sententia Jurisconsultorum Mediolanensium non tantum extant, sed quotidie celebrantur Responso Uberti Hortani, & Girardi Cagapilli, quibus aut consuetudinis, & morum Provinciae, aut recentiorum legum prudentiores alios haud temerè inveneris. Et quando de institutis, & Magistratibus Longobardorum loquimur, fremant licet cæteræ Gentes, vel magis patienter, quæ dicturi sumus, audiant. Reges Longobardorum eos fuisse, qui legibus, & armis universam penè Italiam jam à Majorum virtute degeneratam, sublevaverint, erexerint, & exornaverint: nam posteaquam Regnum in ea occuparunt, in publicam utilitatem leges condiderunt breves; quippe quæ hominum scelera castigarent, & emendarent, atque utinam non obsolevisent, suppliciis, & poenis à crimine, & noxa nos arcent adeò apertè, & absolutè, ut parum interpretis indigeant, & omnia ita complectuntur, ut nihil ferè relinquunt in cognoscantis ingenio, atque solertia, sive in universum præcipiant aliquid, & vetent, sive particulatim pro genere delictorum poenas irrogent; ita nihil impunitum relinquitur: quapropter non possum non laudare quasdam Italiae Urbes, quæ in hanc usque diem judicia sua ex Edictis Longobardorum magis, quam ex Decretis Imperatoriis exercent. Jura quoque Feudorum, de quibus paulò supra diximus, au-

A ctores habuere Angleriae Comites, quorum vera, & generosissima proles Vicecomites nostri, Regno Majorum asserto, rem militarem jacentem, ac propè desitam in lucem, ac nomen revocarunt, constitutoque imperio externam vim repulere, & leges salubres tulere: Longobardis igitur multa debet Italia, vel quòd in eam primi Regnum, & Regiam dignitatem inducere, ut qui ante externis servientes, liberati servitio suis imperarent, leges non solum rectè vivendi, sed etiam regnandi dedere: & ne in Civitatibus promiscua, & confusa omnia forent, concessa in infirmos potestate, Plebem à Nobilioribus discrevere; sed pax Constantiae quid alienigenis Dominis pendendum esset, præscripsit, & quam obnoxia foret, jus tamen Populorum non sustulit: Majestatem Imperatoriam qua sine observari, & coli oporteat, declaravit: minimè igitur mirum, si confirmandi Imperii particeps Gens facta fuit, & penes Mediolanensem populum multa reposita sint jura, quem vicina omnes Gentes revereantur, & timeant, ceu pacis, & belli arbitrum, legum moderatorem, præsensque auxilium, & tutelam; quotiens in discrimen res vocantur. Sed ut unde digressi sumus, redeamus, Fridericus jam bellis, & senio confectus, cum sibi, atque Filio reconciliatos Mediolanenses, ceterosque Longobardos haud malo in se animo esse cognosceret, atque Nepote ex Constantia, & Filio auctus esset, in Syriam, sicut cum Alexandro convenerat, expiandi sceleris gratia trajicere statuit. In tuendis Hierosolymis tunc maxime nostri laborabant, quam urbem proximè ceperant: captus item in pugna fuerat Gulielmus Marchio Montisferrati Friderici Gener, quem vincitum in custodia Saladinus Damasce asservabat. Expeditionem igitur festinavit, atque in Ciliciam delatus dum fufos hostes insequitur, cedentibusque instat, in fluvium juxta Iconium urbem pugnam ciendo submersus interiit; & hic Friderici finis: post cujus mortem Galliae, & Britannorum Reges in Judæam cum exercitu transmissi, Acrim, quæ olim Ptolemais dicta fuit, per vim capere, Ascaloniam quoque expugnant, atque subvertunt, tum naves, quas Saladinus in terrorem Christianorum serpentibus opplevrat, demerguntur. Ceterum Henricus post Patris mortem Fridericum filium jam quadrimum Regem Alemannorum designari fecit; mox ipse cum Uxore, & Filio Mediolanum venit, tum Genuam proficiscitur, atque inde solvens classe in Apuliam, & Siciliam defertur, confestimque utraq; terrâ potitur; hæres enim Gulielmi erat Constantia. Opibus itaque, & titulo duplicis Regni subnixus Neapolim expugnat, Margaritam Reginam in custodia habuit, ac omnes, qui dicto minùs audientes erant, & sumptis armis jam rebellionem parabant, penitus debellavit; in Insula verò non solum Episcopos, & Sacerdotes, quos ceu novarum rerum molitores timebat, trucidari fecit, sed & templa spoliavit, Thesaurosque Sicularum in Germaniam secum transtulit. Cædes igitur, & sacrilegia immanissimi, ac rapacissimi hominis Coelestinus Pontifex diris execrationibus primum persequitur; tum illum velut abominatum Christiana communione privat. At Henricus ad Italos iterum, & in Siculos transgressus, Filio adhuc impuberi, velut legitimè regnaturo, utpote Avunculo succederet, Regia ornamenta tradit, Regemque apud Siculos constituit, atque haud multò post Messanæ fato concessit, & peregrina in terra sepelitur.

GEORGI MERVLAE, ALEXANDRINI, ANTIQUITATIS VICECOMITVM LIBER IV.

*Dum junior Fridericus Pontifices perpetuo bello vexat, per contraria in urbibus
studia perniciales seditiones & bella civilia exorta: quo mortuo,
moxque occiso Actiolino, Turrianus rerum potitur.*

1198.

MORTE Henrici rerum summa Philippo illius fratri, annitente Rege Franciæ, defertur: quanquam, ut supra demonstratum est, puer in Imperium designatus foret. Post pacem Longobardis datam Mediolani aliquantulum remissa odia, domesticique motus quiescere: nam & Potestates publico intenti commodo æquo jure omnia partiebantur, & proinde discordias & seditiones cavebant: vicinæ quoque urbes, dum se invicem bellis laceffunt, implorato sæpe auxilio, populum minime de novitate rerum cogitare permittebant, sed quies domi haud diutina fuit; nam cum duo, ut supra exposuimus, hominum genera in aliquo numero Capitanei, & Valvasores essent, plebes fervorum prope loco, nullo consilio adhibita ducebatur. Quapropter agrè ferentes tenuiores, quod velut servituri potentioribus parerent, denuo congregati veterem factionem renovant, novo addito cognomine; nam Divi Ambrosii *Credentiam* appellarunt: locus quoque delectus, in quem sublato versicolori signo, velut in concilium Lanii, Piscatores, Fartores, Sutores, Tonsores & id genus sellularii opifices coirent. tunc multitudo, ceu jam exauktorata foret, sub juris tuendi, & propulsandi incommodi titulo non solum injuriis potentiorum intercedere, sed illis vim asferre tentabat: ægre itaque domi ex multiplici factione, diversisque studiis seditiones compefci poterant; quanquam mercatores, quibus paulo majores opes erant, Consules affectati, medii inter plebem & patricos, horum violentiam, & arrogantiam, illorum temeritatem, atque audaciam reprimere conarentur. at vicini populi, ubi per discordias potentissimam Civitatem a se confici cognovere, quasi liberati eorum metu, quorum viribus in officio continebantur, & pacem inter se colebant, sumptis armis in mutuas clades ruere, populationibus agrorum, & cædibus omnia permiscere. Cremonensis Bergomensis quantis maxime poterat, incommodis, & maleficiis afficiebat. rursus Bergomensis, expectatâ occasione, cum non essent qui fines defenderent, nihil moratus, hostium agros depopulatur, vicos & ædificia, quæ adiri poterant, incendit. Mediolanensis quoque, quanquam domestico conflictaretur odio, ubi finitimos vidit in armis esse, neque à maleficiis temperare, Ticinum transgressus, agros, qui ad Padum usque pertinent, fructuosos admodum invasit; neque prius abiit, quàm ingentem hominum, & pecorum prædam abduceret, vicos & in agris tecta succenderet, arbores recideret, nec solum repentina incurfione talia moliebantur, sed iusto cum exercitu oppida obsidebant, tormentis, ac machinis concussa evertabant. Vastati erant quam latissimè urbium fines, inculta, deserta, & situ squalentia cuncta gentili quodam furore, & impetu stabant. Per hæc tempora, circiter annos Domini M CC X

1210.

Dominicus Hispanus genere, per quietem à Virgine gloriosissima admonitus, Religionis novæ auctor

A fuit, quæ brevi per universam Europam diffusa, mirandum in modum coaluit. In Græcia quoque de Regno Constantinopolitano quidam inter se certavere: nam mortuo Emmanuele Imperatore, qui ingentes pecunias, ut quidam tradunt, Mediolanensi ad instaurandam patriam elargitus fuerat, filiamque Raynerio Montisferrati Marchionis filio cum Regno Thessalonicensi in matrimonium dederat, forte Isacium cum Alexio filio adhuc impuberi per insidias, & fraudem oppressos Alexius tyrannus in custodia tenebat: sed puer de vinculis in Germaniam profugit, opem & auxilia à Philippo Friderici filio cognationis gratiâ imploravit, cujus jussu Flandriæ Comes, & Bonifacius Marchio Montisferrati, contractis copiis, adjuncta etiam Venetorum classe, quæ tunc forte rebellantem in Illyriis Jaderam expugnaverat, puerum cum patre in Regnum reducunt. Alexius senior cum uxore, & filiis capitur, atque in Montemferratum abducti in carcere moriuntur. Verum cum Isacius, & filii parùm gratos in Latinos homines se præberent, Regno rursus ejiciuntur, moxque Balduinus Imperator creatur. Quo in expeditione apud Adrianopolim occiso, Henricus frater Regnum obtinuit: quod factum ægre ferens Bonifacius Marchio in Thessaliam statim proficiscitur, atque Raynerio fratri, qui sine prole virili decesserat, succedit. hic moriens sic Regna partiti est, ut Gulielmus major è filiis in Monteferrato regnaret, Thessalia sub ditione & imperio Demetrii foret. hoc quoque sine stirpe defuncto, Gulielmus frater Thessalia potitur: quod tamen Regnum per nuptias ad Constantinopolitanos dominos rediit, tradita Violantide Gulielmi filia Andronico Imperatori, de qua natus Theodorus, qui deinceps ex Joannis avunculi testamento in Monteferrato regnavit. Per hæc tempora, ceu parum odii & dissensionis, divisâ ut supra diximus civitate, conflatum foret, Conjuratorem quidam fecere, quæ Valentium, sive Robustorum cognomen habuit: nam juvenus patricia in unum conveniens sibi Potestates creat, multitudini audacter atque intrepide resistens. interim domi & foris impetu quodam magis quam consilio, & seditione facta, telis, quæ fors obtulerat, decertarunt. rixa sane potius quàm pugna. Quare furor ille protinus refedit, neque diutius male facta gratia duravit: appellatio tamen Robustorum mansit, quasi per eam alacrior juvenus nomina in militiam daret. Hac tempestate Franciscus, genere Picens, paupertatis unicus amator, sectatores habere cœpit, qui sæculo renunciantes, inopes, & egeni, potu atque cibo emendicato contenti, extemporalem, & proinde ærumnosam vitam ducerent. Cæso Philippo, qui per inconstantiam procerum Regnum fratris filio, cum adhuc maturus imperii non esset, eripuerat, Otho dux Saxonum Rex Germaniæ creatur. hunc statim Mediolanenses in Italiam ad ornamenta, & Imperatoria nomina captanda evocarunt. quo propius adven-

1207.

tante, ad ejus occursum tota civitas effunditur, ferroque coronatus insigni, prosequentibus urbis primoribus, Romam petiit; ubi per Innocentium Pontificem nomen, & auctoritatem Caesarum accepit. salutaris fuit Othonis adventus; siquidem civitates quædam inter se bellum gerentes jussu illius arma deponere: recepti quoque sunt exules, qui urbes tranquillas esse non sinebant. liberi tunc populi tam à peregrinis armis, quam à motu, atque contentione civili fuere. Sed cum Pontifice pax haud diuturna fuit: nam Otho debellatis oppidis in Longobardiam reversus, Actium Estensem, qui tunc forte Ferrariam, & Veronam obtinebat, propterea quod Imperatori parere recusasset, & qui cum eo conspiraverant, ceu rebelles persequitur, probris & damnis afficiens. quare non passus Innocentius, ferocem Barbarum in Italos debacchari, illum sacris & Imperii titulo privat. Tum Junio-rem Fridericum Henrico progenitum jam armis fir-
 1210. mum, & materno Regno potentem ad se vocat, summam rerum, & ereptum Imperium promittit, modò in Germanos adversus opes & arma Othonis transeat. Juvenis cupiditate recuperandi Regni inductus, & Pontificis pollicitationibus oneratus, simul etiam paterna, & avi auctoritate confusus, qui multos annos Regnum in Germanis, & in Italia Imperium obtinuerant, Genuam quamprimum navigat; atque inde Papiam pervenit. huic præsto fuere Actius Estensis, Comes sancti Bonifacii, Marchio Montisferrati: quorum obsequio atque auxilio, nemine interveniente, Cremonam, & Mantuam protinus venit; mox per Veronenses in Germaniam transgreditur. interea Mediolanenses, qui in partibus Othonis perseverabant, pecuniam & auxilia illi adversus æmulum, & insensum juvenem polliciti, crebris incurfionibus eos primum infestabant, qui Fridericum sublevaverant, atque studiosius juverant, & frequenti cæde evasunt. tum flagrante ira; cum nullus obviam iret, agros populantur, vicos & ædificia succendunt, oppida diripiunt; finis damnis & injuriis nullus. erat potentior Mediolanensis, etsi quidam icto foedere inter se milites congregassent, vicina tamen omnia perdere conabatur. Cremonensis, & Papiensis invicem pertinacissime bellum persequabantur, neque aut suorum cæde, aut detrimentis deterri ab armis poterant. Mediolanensis tunc maxime, ut cæperat, ingentibus damnis adversarum partium populos agitabat, sive ut acceptas injurias ulcisceretur, sive ut cladibus afflicti à Barbaro deficerent: præcipue eam Liguriæ partem, quam Montemferratam appellant, bello fatigavit. Indignabatur enim studiis suis Marchionem enixissime adversari: quod ubi Pontifici denunciatum fuit, Mediolanensi primum mandat, ut Othonis partes deferat, temperetque ab injuriis, & maleficiis in finitimos. recusavit mandata: atque statim perseverantem in proposito Pontifex detestatur, ac sacris privat. enimvero tum irritatus populus, gravius defavire in proximos cæpit, subitoque Ticinum, & Padum transgressi, tractum fere omnem illum, qui inter Padum, & Apenninum jacet, ferro & igni evasunt: nihil quod lædi posset, intactum reliquit. Inter duos annes constituti, cum accolæ sustinere vim non possent, atque in oppida munitissima concessissent, ædificia, & vicos igne absument. pugnabatur tunc non de imperio, sed uter esset. vassa erant omnia: atque bello internecino miseræ urbes se conficiebant: reduxit tandem exercitum Mediolanensis, postquam nihil reliquum in agris erat, quod aut incendi, aut subruere posset. Per hæc tempora Innocentius moritur: cui successit Honorius. Hic surgentem à Divo Dominico religiosam Fraternitatem, & instituta comprobavit. tum procurante Henrico Septariensi Archiepiscopo, ædes Divi Eustorgii hujus viri sectatoribus habitanda conceditur. In Longobardis

A maxime omnia bello flagrant. Mediolanum fere vicini populi infestabant; propterea quod ab Othone minime discederent. quare collecto exercitu, Aduam transgressus Mediolanensis Cremam oppidum obsidet. quicquid agri usque ad Olum pertinet, latius effusi populantur. ingens numerus captus pecoris, magna abducta præda: fines incolumes neque Brixianus, nec Cremonensis servavit: inclusi mœnibus continebantur. tunc Mediolanensis victor, ubi fatis sævitum fuit, legiones reduxit, minime tamen otiosus; nam confestim trajecto Pado, cum nullus agros defenderet, Parmensem, Mutinensem, & Regiensem damnis gravissimis afficit; atque ur-
 B gente ira nullum sævitæ genus omisit. quam populorum calamitatem miseratus Honorius, pacem componi, ut ab armis discederetur, in primis laborabat. sed altius infederant odia, & magnitudine maleficiorum offensæ civitates neque arma deponere, neque capta restituere, & reconciliare gratiam volebant; erant enim qui opem & peregrina auxilia ad ulciscendas injurias, reponendaque Mediolanensi damna expectarent. cæterum Fridericus, ubi satis virium adversus Othonem comparatum vidit, in Italos se convertit, socios & amicos defensurus, quorum præcipue querimoniis evocatus fuerat: sed Mediolani, quanquam hostis adventaret, manebant
 C odia, & vetere similitate, recentique ira cuncta fervebant. Septariensem Præsulem, qui Clara-Valis templum dedicaturus erat, indignata plebes, honorem eum ab homine patricio desumptum, illum urbe pellere statuit. seditio protinus coorta est. Capitanei, & Valvassores ab Henrico stabant: Plebei ducem sibi Androgetum Marcellinum fecerant. jam proxime ad certamen res venerat: sed priusquam congredierentur, Henricus, à quo dissidium profectum erat, intervenit: quare statim sacerdotii auctoritate, & quod in gente patricia non infimum locum is tenebat, remissæ sunt iræ, arma deponuntur, atque de Republica solliciti, defendendæ patriæ curam unanimes suscipiunt. descenderat in Italiam cum ingentibus copiis Fridericus: illum Honorius Pontifex trans maria mittere tentavit. ex Ravenna Cremonam Tyrannus petiit, in quem locum, velut in concilium, proceres convenerant: pacem & amicitiam in primis cum Mediolanensi facere cupiebat: sed cladis ab avo acceptæ memor populus, ne avi superbiam atque sævitiam nepos velut hæreditariam servaret, ferociter respondere, conditiones oblatas quasque aspernari, bellum quam pacem querere. ergo ubi nihil pacatum apud Mediolanensem, sed hostilia omnia cognovit, Veronam protinus revertitur: Acciolinum de Romano socium, & amicum facit, quem ea tempestate unice dilexit: contra Accio Estensi, & Mediolanensi maxime infestus. magno deinde conscripto exercitu de his gentibus, quæ Syriacæ expeditionis gratia multæ in Italiam confluxerant, ad Appulos transmittitur. Decessit per hæc tempora Honorius, cui Gregorius successit. Hic iniquo animo ferens, Barbarum juvenem mercenariis succinctum catervis, 1226. Appuliam subegisse, & ceu Ecclesiæ insensum Pontificiis opibus inhiare, illum de grege fidelium, & numero piorum exterminat. Sed Barbarus, ne videretur eorum vota frustrari, qui bellum Syriacum deposcebant; simul etiam ut transmarinum tyrannum sibi conciliaret, in Siciliam trajicit, atque sacerdotum jura violat: tum quicquid in Insula Pontifex possidebat, usurpat, relictaque maxima illic exercitus parte, ipse in Syriam cum triremibus quinquaginta transit: protinusque cum hoste ita fœdus inivit, ut concessa illi Ægypto, Regnum Siciliæ quietus ipse possideat. quod fœdum atque exitiosum religioni fœdus posteaquam Gregorius intellexit, quem paulò ante devoverat, illum pro hæretico pronunciat: & subinde auxilium adversus nefarium tyrannum postulavit. sine mora Placentini, & Me-

Mediolanenses militem dedere. Per ea tempora, publicâ pecuniâ Mediolani emptus est locus ad duo fora facienda, reddendoque juri substructa Basilica: subter qua esculenta & poculenta fere divenderentur. Vicina porticus Jurisconsultorum sedes, conjuncta scribarum atque notariorum septa; quos nunc Cancellos appellant. utrinque area, quarum una mercatoribus, altera frumentatoribus, ac vinariis concessa: res urbi perutilis, qua & annonæ & commercii inter cives prospectum. Insculpta effigies Oldradi, qui forte ea tempestate Præturam in urbe agebat. tunc ad res inter se contrahendas, vendendo, emendo, mutuum dando populus coire cœpit. potens & opulenta illis temporibus erat civitas; quippe quæ non solum fines suos à vi, & injuria defenderet, sed propinquos, & amicos incolumes servaret. ea propter viribus, & armis præpotentis populi Fridericus permotus, pacem à Pontifice petit, quam & impetravit. Interea Mediolanenses Ligures omnes, qui cis Apenninum accolunt, congregato exercitu invadunt; quorum agros hostiliter prædantur, præcipue Montisferrati dominum vexant: qui magnitudine belli oppressus, cum vix respirare posset, etiam parum æquis conditionibus pacem quærebat, quam pro dignitate & commodo à Mediolanensi accepit. sed ille, sive studio in Germanos, & arctissima propinquitate Friderici, sive quod in armis frequenter versatus foret, neque pacem, nec bellum pati poterat. quare haud ita multo post, instauratis viribus, rebellavit. præfecere tunc exercitui Mediolanenses Ubertum Ogenatem, qui ex templò rebellantes populos excursionibus vastat, magnam prædam agit, ferro & igni omnia perturbat, nec solum in Montemferratum arma movit, sed Salassios, Taurinos, & ceteras Alpibus subjectas gentes vexat; quæ & ipsæ gravitate tributorum detecerant, & vicinum dominum ad arma sollicitaverant. captus forte in ea pugna fuit Ubertus, quem crudelissimè excruciatum populi, velut ulturi injurias enecarunt. hujus morte permoti milites, quamvis ducem non haberent, tamen ductore tumultuario constituto, denuo populabundi hostium agros vastant. classẽ, qua transitus fluminis prohibebantur, capiunt, fabricatoque ponte ingentem numerum captivorum abducunt, quæcunque in agris inventa sunt, adurunt, aut subruunt; oppida quoque situ & operibus munita expugnantur atque diripiuntur, graves pœnas cæsi hominis & rebellionis repetunt. Interea cum adventare Fridericum nuntiatum esset, urbes quædam foedere inter se percussio arma conficiant, Legatosque ad Pontificem mittunt rogantes, Barbarum moneat, ne exercitum in Longobardos ducat: quod si fecerit, & fortunam & vires populorum experietur. quorum oratione motus Pontifex, Legatos Bononiam mittit, qui de pace agerent. sed eos elusit Barbarus ad Venetos abiens, atque inde velut tergiversando Aquilejam concessit. avertit autem eum ab Italia, captoque fere bello defectio filii, qui cum Mediolanensi consilia novandarum rerum agitabat. quare propere in Germaniam reversus, illum custodia asservari jussit: quo mortuo, Conradum ex altera uxore genitum Regem in Alamannis constituit. eo sane anno hyems egelida atque nivosa fuit, viæ clausæ: & Padus usque ad hostia maris innavigabilis fuit, ut merces ab Adriatico sinu plaustribus & vesterinis devehrentur: glacies adeo solida, ut per alveos fluviorum currus & jumenta commearent: fluxus aquarum ita compressi, ut molæ ad frangenda frumenta circumagi minime possent: vina in subterraneo servata loco concreta sunt: præ magnitudine item frigoris vites, olivæ, ficus, & id genus frugiferæ arbores exaruerunt; famis & pestilentia, quæ insecta fuit, causa & signum evidentissimum. Misit fortè per ea tempora Imperator Cremonam Elephantem, Camelos, & Dromedarios, peregrina sane animalia, & raro

A apud nos visa; atque rogante Acciolino, & Veronensi Italiam repetens, Mantuanum omnem agrum usque ad urbis mœnia, succensis ædificiis & vicis, evastat; Brixiam pari clade afficit, atque fugato Accii Estensis exercitu, Vincentiam per vim captam crudelem in modum diripit, ac prope funditus delevit, impositoque in Italia procuratore in Germanos revertitur. his temporibus Mediolani Prætor erat Petrus Teupolus; hujus pater Venetiarum Princeps Jaderæ summum magistratum antea tenuerat: hoc duce Mediolanensis fretus exercitum congregat, circumpadanis omnibus bellum intulit, nihil intactum in Lomelino agro mansit, omnia incendiis & direptione afflictæ fuere. quæ ubi Friderico nuntiata sunt, statim in Longobardos exercitum ducere statuit. tentavit prius quorundam animos, quos ubi in perniciem finitimorum paratos, & proinde secum arma juncturos cognovit, minimum moratus, Brixianos fines ingreditur, in prædam omnia ad Olum usque evertit. Mediolanensis ubi vidit Accium Estensem, & Comitem sancti Bonifacii, qui tunc Mantuæ dominabatur, in partes adversarii transivisse, impetumque omnem barbaricum, & molem belli in se venturam animadvertit, erecto Carotio, congregatoque milite obviam hosti proficiscitur, & haud longe ab Olio castra locat. substitit tunc Barbarus, satisque habuit in præsentia vada fluminis custodire, ut hostem transitu prohiberet, cui cum & numero, & virtute militum impar foret; tum quod etiam beneficio loci tutus esset Mediolanensis; quippe palustribus in locis castra habens, nunquam potestatem pugnandi fecit, & si sepius educto agmine provocatus ad pugnam foret, ad insidias se convertit. exercitum Cremonam ducere simulat, ipse in silvis, quæ campo junctæ erant, cum delectis & expeditis militibus subsedit. egressi castris Germani nullo cum ordine neque imperio, magis fugere quam proficisci videbantur. quos vere fugientes Mediolanensis ratus, inexplorato & incomposito agmine persequitur. ubi ventum in eum locum est, in quo paratæ erant insidiæ, Fridericus nihil tale timentes aggreditur. tum trepidatio magna; visoque hoste consilii inopes in fugam repente versi præcipientes ire: terror & formido tanta, ut se colligere non possent. pallatos Barbarus acriter insequutus, tergo instare. ingens tunc cædes facta. Elatus successu Barbarus in signa convertit agmen. vim & impetum Germanorum sustinuerunt ii milites, qui à virtute Valentes, sive Robulti dicebantur (Dux eorum Henricus Moguntiacus) animosius pro signis decertarunt, prementemque Barbarum repulere; pugnatumque est usque ad noctem; superveniente pluvia prælium dirimitur: beneficio tenebrarum usus Henricus, currum dilacerat, malum cum Cruce aurea & ceteris ornamentis in urbem desert. Imperator, ubi illuxit, spolia hostium tolli jubet, & quod reliquum è Carocerio superfuera, id Veronam misit, in trophæi modum publico in loco statuendum. magna profectò virtus Valentium tunc fuit, qui plenum triumphum exultanti hosti non permiserunt. vulneratus fuit; atque etiam in pugna captus Teupolus, qui Prætor in armis, & sub signis populum habebat. hunc in custodia diutius asservatum Fridericus gravissimè excruciauit. Mediolanensis collectis iis, qui à pugna & cæde superfuerant, Borgomensẽ invadit; à quo proditus, & Barbaro data auxilia fuerant. patuit ad inferenda damna aditus, operâ maxime atque etiam impensis Pagani Turriani. nepos hic fuit Martini illius, quem in tormentis necatum supra memoravimus. indignabatur, proditorem impunitum manere: simul etiam, quia propinquos Borgomensis viros & agros habebat, verebatur, ne quandoque classẽ in se vicini verterent. sive igitur à se suisque malum avertere conaretur, sive quod jam tunc non solum amicitiam, sed gratiam etiam in præpotenti urbe

urbe quæreret, per vallem, cui Saxinæ nomen est, in fines Borgomensium hostem transmittit: fovit præterea, quantum in se fuit, spoliatos & egenos, pecunias, vestes, & frumenta benignè præbens. itaque reparatis pro tempore viribus, post captum magnum pecoris & hominum numerum, exultisque agrestium tectis in agrum Cremonensem exercitus ducitur. Cremonæ tunc agebat Fridericus, qui in dimicationem, nec crebris convitiis, nec excursionibus perlici unquam potuit. tandem cum Barbarus mœnibus centineretur, nec copiam pugnae, etiam tumultu & præliis laceffitus faceret, Mediolanensis cis Aduam exercitum reduxit. locus abest haud longe à fluvio, quò primum deducta colonia fuit. hunc *veterem Laudem* appellant. confedit illic Mediolanensis, castraque communiit. tutus erat exercitus tum suapte natura, tum levi opere. Per tres igitur menses hosti objecti, illum velut frustrando ingressu *novæ Laudis* prohibent: tandem oppidanorum quorundam dolis urbe potitur. Eos, quorum opera & armis receptus fuerat, liberaliter amplexus muneribus & honoribus prosequutus est, adversarios in Appulis relegat. arcem deinde portæ, qua Cremonam itur, inædificat, moxque ut socios aut defenderet, aut sublevaret, quos Mediolanensis gravissimis detrimentis affecerat, Papiam petiit. ad quem finitimæ urbes Legatos confestim mittunt, auxilia pollicentes. soli Mediolanenses, nisi æquo jure, amicitiam recusarunt. Barbarus coactis copiis in Brianorum fines contendit, urbemque ipsam omni circum populato agro menses tres obsidet. Interea Papiensis cum belli detrimenta minime ferre posset, deditio in Mediolanensium potestatem venit. quo facto exterritus imperator, soluta obsidione Veronam se recepit. Interim Mediolanensis, recentis injuriæ non immemor, iterum Borgomenses infestat; ac studio vindictæ quoscumque nactus erat, spoliat, oppida diripit, vicos succendit. non defuit iræ fortuna. fortè grando non temere aliàs visa arbores omnes frugiferas contudit, & disjecit, fata evertit, pecora & armenta interfecit. Ceterum Fridericus, ubi jurejurando fidem à Patavino, & cæteris Venetiæ populis exegit, ferox animi militum robore, & sociorum fide, atque armis præpotens, evertendi Mediolani, & tollendi Pontificis consilia agitare cepit. Hoc ubi Pontifici compertum fuit, illum palam solemni die velut rebellem, & Apostolici imperii everforem excommunicat. Legatum rebus in Italia gerendis constituit: nuncios in Hispanias, Gallias, & Britanniam dimisit, qui eos homines docerent, quæ foret Barbari impietas, & quam fœdum & nefarium facinus in perniciem religionis aggrediretur: quippe qui minime ab avita iniquitate & ferocia discedens, Romanum Sacerdotium violaret, majestatem Pontificiam perdere tentaret. Horum oratione multi, qui à Barbaro steterant, simul etiam metu poenæ, & religionis reverentiâ, mutato consilio ad Pontificem transeunt. Fridericus ubi à se eos defecisse animadvertit, quorum opibus rem tantam moliebatur, mercenarium militem variarum gentium conducit. erant tunc fortè in Italia conductitiæ catervæ Germanorum, Appulorum, Sardorum, & Siculorum. quare haud difficile illi fuit brevi exercitum numerosum comparare. Primum Bononiensem aggreditur, qui in Pontificis partibus perseverabat, aliquotque ejus agri oppida expugnat: deinde Padum transgressus, per Cremonenses traducto exercitu, trajectaque Adua, in Insubribus confedit. primo impetu capit Marlianum, Landrianum, Petri basilicam, & alia non ignobilia ejus tractus oppida. Appropinquante hoste trepidatum in urbe fuit, atque ad arma discursum. Fridericus ubi juventutem in armis esse audivit, minime ultra progreditur: sed cum tumultus inter cives metu hostium gravior coortus esset, atque diversa quædam & sentirent, & loquerentur, res ad

A consilium defertur. erant qui intra urbem tenendum civem censerent, satisque sibi in præsentia esse, si promœnibus dimicantes hostem propellerent, quando per inopiam rei frumentaria, & jam deficiente commeatu perseverare diutius in obsidione Germanus non posset, atque ita sine vulnere & cade patriam liberatum iri: periculosissimum sane pugna decertare, & fortunam belli experiri: inclinabant in hanc sententiam plurimi; sed Otho Mandellus vir gravis & intrepidus, atque, ut patiebantur tempora, gerendi belli minime imprudens, labantes animos etiam ignavia, & torpore occupatos excitat, & confirmat: *Fortium non esse muro & fossa se defendere, & nem hostem formidare, aut congressum extimescere, perinde ac inexpertus, aut incognitus foret. clypeus & hasta, non vallum aut fossa nos tegant. in dextra nostra defensio. audendum profecto est, quando & manus & arma nobis adsint. in hostem suis superque cognitum, & sepe à nobis fuscum alacres & minime trepidi ruamus; præstat enim in patenti campo congregari, & mortem oppetere, quam mœnibus, circumfideri, & inopia atque fame domitos barbaræ libidini, & crudelitati subijci.* Hoc sermone ingens alacritas, & pugnae ardor inter cives factus est, prælium & pericula omnes deposcere, nihil ii detrectare, qui per vires & aetatem arma ferre poterant, sine discrimine cives obarmari. sacerdotibus concessa arma adversus nefarium hominem, in quo nullus Dei metus esset, quique sacra pollueret, templa spoliaret, amplitudinem Pontificiam violaret. Erat tunc in urbe Gregorius de Montelongo missus à Pontifice, hunc potissimum sequuti cives, socia agmina cum præfecturis finitimis jungunt. stupuit Imperator, ubi tantam populorum vim in armis, & simul coivisse conspexit. appropinquantes acies statim pugnam ineunt, & dum utrique loco cedere turpissimum putant, cædes magna editur. Saraceni, quos Fridericus hosti objecerat, cum prementes sustinere non possent, primi terga dant: tum cæteri Barbari, sanguine & fuga suorum perterriti, in castra ad Fridericum refugientes passim cæduntur, viæ cadaveribus impletae, equi ac milites captivi multi fuere. sic amissa suorum parte Imperator propinquum clivum occupat, ibique castra locat. affuit postridie Cremonensis quippe recentes ulturus injurias, quas poterat opes, Barbaro suggerebat, qui sociorum auxilio adco elatus est, ut proximæ pugnae eventum nihili faciens, certam fortunam sibi sponderet, & presumptione victoriæ vincula & carcerem identidem adversariis minaretur. at Mediolanensis, ubi exultantem supra modum Barbarum, & præsidio loci, novo præterea milite addito ferocius agentem cognovit, fontium aggeres intercidit, atque protinus per inciles fossas, quibus agri irrigabantur, vicina omnia castris diluit. stagnantibus aquis ne obrueretur exercitus, aut diluvio interclusus per inopiam commeatum conficeretur, stativa Fridericus mutat. digredientem Mediolanensis defequitur, sub occasum Solis in eum castra metantem continuo per emissarium Ticini partem (proximus enim erat fluvius) derivat. ubi vero illuxit, circumcursare, arbores & trabes dejicere, vias obstruere, quacunque Barbarus evadere tentabat, occurrere. Inter hæc Novocomensis, nec fidus socius, nec bonus amicus ad Germanos transiit, cujus defectione, atque imminente hoste, quem circumfusæ aquæ magis in pugnam irritabant, quàm intercluderent, consilio rem geri placuit, ut Barbarum dolo & fraudibus circumveniant. Nemus erat insidiis aptum: in hoc expediti milites occultantur, tum in fugam cæteri convertuntur, quos vere fugientes Fridericus existimans, fossam, quæ nullo præsidio tenebatur, transilit, cedentes urget. repugnabat novissimum agmen, ne fraudem is suspicaretur: ita in insidias facile pertracti Barbari fuere. lætus tunc successu Otho fugientes revocat suos, signumque pugnae dat. extemplo conversi prorudentem excipiunt, exiliunt



liunt è lateribus alii, hostem adoriuntur. perculsi eo terrore Germani quamvis non haberent, quo se tutò recipere possent, tamen diffugiunt. instantibus nonnulli repugnant. retro, maxima pars ad fossam fertur. hos confectatus Mediolanensis magnum numerum interfecit. Papiensium & Cremonensium ingens cædes facta. doli & clades barbaro repositi fuere, cui stagnantes aquas deducere conanti, accolæ Ticini intercessere. ita multis amissis fraude præterea petitus, jamque tumultu in castris oborto, cum apertum discrimen cerneret, in Appuliam relictis Longobardis, sive illic hyematurus, sive proditores, ut ipse identidem jactabat, ulturus Fridericus abiit. at Mediolanensis victor domum revertitur, beneficii utique non immemor, quod à Pagano Turriano acceperat. Nam cum de Prætoris creando ad populum relatum foret, suffragatione eorum, quos sua indulgentia post adversam pugnam recreaverat, & cura attentissima servaverat, is præturam obtinet. *Hunc Paganum primum in hac familia solemnem magistratum gessisse; supra quem neque domi neque foris alius claruisse in annalibus legitur, præter eum Martinum, quem crudelissimè necatum supra commemoravimus:* in quo scriptores variant; nam alii patrem, alii avum, sunt qui proavum hujus scribant. commentitia, ne dicam secum pugnantia, à scriptoribus traduntur, dum quisque pro ingenio suo magis quàm diligenter, & verè res gestas memoriæ mandare studet: sed quæ nunc exponimus, ea veri maxime similia, & non admodum discordare in eis scriptores invenio. vallis est Saxinæ in Comensi Italia, ubi officina habetur ejus lapidis, qui ad esculenta vasa cavatur, tornaturque in hac divitiis, & potentia cæteris etiam finitimis Turriani pridem excelluere. Hos plebes Mediolanensis in urbem deduxit, non tam ut jurisdictionem haberent, quàm contra factionem, atque insolentiam potentiorum, qui licentiùs in fortunas & corpora tenuiorum desævirent. Receptus à populo cum potestate Paganus, jura omnibus mansuete & magnifice dicere, neminem violare, temeritati improborum fortiter resistere, pro commodis urbis excubare. gratiam igitur & studia plebis hoc pacto captans, viam ad regnum sibi & suis affectavit; stabat enim officiorum memoria, & prompta remunerandi voluntas, in his scilicet, qui, ut supra diximus, à periculo & cæde elapsi, benigne accepti, & humanissime habiti fuerant, & subinde liberali patrocinio à vi & audacia improborum tuti erant. Perseverabant patricii in superbia, & crudelitate, quibus plebes, ceu ad tollendas injurias nata, ludibrio & contemptui erat: jactabatur à plerisque lex vetus, plena odii & invidiæ, qua major in dies patriciorum libido accendebatur: flagrabant animi fœdo Landriani patricii flagitio. Hic creditorem, à quo sæpius appellabatur, quasi debitum soluturus, ad se in villam vocavit, interfecitque, mox paleis & foeno, ne cædes cognosceretur, obruit. ergo summi tunc in urbe magistratus auctoritate vallata plebs, qui communia commoda propugnaret, & ab injuria defenderet, jam vetere & gravi famulatu libera, audacius superbiæ patriciorum resistere, illorum votis adversari, rerum participare, vires & opes potentiorum nihili facere. Paganus item omnia prospicere, quæ miseris salutem allatura essent, frumentum gratuitum dividere, nudos vestire, egenos suis impensis alere. at patritii, qui violare, auferre, rapere pro libidine cuncti soliti erant, cum illorum jussis parere oporteret, quos despectissimos habuerant, veriti insuper, ne infimæ multitudinis licentia eò progrediretur, ut superbo dominatu in communem perniciem tam privata quam publica verterent, & acceptæ injuriæ ultores vicem nobilitati redderent, suos & ipsi sibi magistratus, & defensorem parant, qui Sacerdotio venerandus, aut alia dignitate potens in urbe esset. Opportuna igitur

A tur ad hæc mors præfulis fuit: & cum de successore certaretur, seditiosa & tumultuosa erant omnia. Res aliquandiu dissidentibus animis, & præ metu extracta est; dum utrique plebes & patricii timent, ne parti suæ inimicum & infestum in sacerdotio constituent, post contentiones atque certamina eligendi Præfulis, potestas & arbitrium Leoni de gente Peregorum defertur. Hic ab adolescentia recenti tunc in Francisci disciplina enutritus, salutiferisque præceptis institutus, in congregatione & fraternitate Minorum vitæ & moribus clarus habebatur: quem Archiepiscopum minime recusant; utpote salutis animarum, & publico commodo sine discrimine aut factionis, aut ordinis consulturum. hoc spondere videbatur vita in religione probatissima procul ab his omnibus acta, per quæ mortalium plerique ambitione, & odio affecti discordias ferere, & seditiones, dum opitulari suis quisque necessariis cogitat, provehere student. Verùm, quod à natura nobis institutum est, id fere nulla cultura mitescere, aut evelli & extirpari penitus potest. nam Leo sub alterius olim arbitrato educatus, adepta dignitate ceteris major, ubi non per vices interpolatum, sed perpetuum obtinuit imperium, pro arbitrio rem gere, eorum studiis primum obsequi, qui tenuiores opprimere adnitebantur, & divitiis pollentes cæteros sibi obnoxios habere. contra improbitati nobilium, & potentiae novi Antistitis Turrianus intrepide resistere, contumeliam à miseris propulsare, eorum causas suscipere, in contentionibus superior esse: ita gliscente turba ad certamen deveniunt. Stabat à plebe Paganus, quo patrono tantum animorum & fiduciæ plebeji conceperant, ut non contradicere, & repugnare voluntatibus opulentium auderent, sed supplicia & poenas anteaكتورum scelerum exigere. Leo contra omni ope nitebatur, nihil non cogitare, atque moliri, quod ad jura & dignitatem patriciorum defendendam pertineret. Indignum sane & turpe existimabat, atque ignominiosum, primores urbis, qui genere & opibus reliquos anteirent, eos multitudinis imperio & sellulariorum jussis parere. His certaminibus cum utrique duces satis virium compararent, major in dies seditio gliscebat: neque propinquo hoste, aut jam agros populante, remitti ira, & reconciliari animi poterant. quod si vis arcenda, aut maleficia prohibenda, suspensis rebus, atque irritatis animis, velut dimisso munere, arma capebant, nunquam sub iisdem signis & eodem ductore militantes. Plebes, patritio bella gerente, inermis domi desidebat. Patricius contra, plebe in expeditionem profecta, de statu urbis parum curans, & belli securus intra muros feriato ferro se continebat. Sed quamvis in diversas voluntates distracti essent cives, atque militia pertita foret, publicas injurias haud inultas relinquebant. desertoris Novocomensis agrum invadunt, quem omnem graviter populantur, ferro & igni cuncta subvertunt, arbores etiam excidunt. nec integri à calamitate Papienses fuere. cum his quoque acriter pugnatum est, cædes utrinque facta, atque magnus captivorum numerus abductus, parique Marte discessum est. Sed cum absumpti longiore bello agri, deserti vici, & inculta propè omnia manerent, permutatis captivis inter utrumque populum pax conficitur. Dum hæc geruntur, Gregorius Pontifex moritur, cui Celestinus sufficitur ^{1241.} Mediolanensis genere ex familia Castelleonea. hoc quoque intra decimum octavum diem raptò, Innocentius Quartus Pontifex creatur. Ligur erat de ^{1243.} Fliscorum genere progenitus. primus instituisse traditur, ut Cardinales rubro galero, & concolori dependente spirâ ornati incederent, quasi hoc gestamine à cæteris Episcopis discreti internotescerentur. Cæterum Fridericus posteaquam summum Sacerdotium ei demandatum cognovit, quem sui studiosissimum expertus fuerat, neque inter Principes Sacerdotum alium

alium temere magis amicum, & benevolentiorum habuerat, hilarem vultum, dissimulato dolore, & lætitiā palam omnibus ostendit: per noctem cum gemitu & lachrymis ad cubicularios, & amicos conversus, *amisimus inquit amicum; non enim fere potest Pontifex Romanus, & idem Gibellinus esse.* erat Friderico Egentius filius, qui ea tempestate in Sardis regnabat. hic, sive iubente patre, sive quod videret, Longobardorum civitates Mediolanensium consiliis & pollicitationibus ad arma & rebellionem sollicitari, illorum fines, transmissis per Ligures exercitu, aggreditur; nihil tamen memoratu dignum egit: vastandis agris aliquot dies absumpsit: confectum repulsus est, & ne cedentem persequerentur, pestilentia gravior impedimento fuit. inter hæc Innocentius contumelias & nefaria Friderici facinora indignè ferens, quem implacabilem, & ad omne molendum scelus promptum & instructum videret, neque esset in Italia quem sacrilego homini, & impotentissimo tyranno opponeret, in Gallias transire statuit. Genuam primum navibus defertur, inde protinus per Padanos, Ligures, & Taurinos Alpes transgressus, Lugdunum pervenit, quem in locum primores patrum in concilium vocavit. mox Fridericum Rogerium, cum citatus parere recusasset, insolentissimum tyrannum, & Ecclesiarum direptorem titulo Regio, & nomine Imperatorio privat, dirisque injectis Christianæ religionis exortem facit. agebat forte tunc in Alpinis Barbarus, cui præter horrendas imprecationes hoc etiam accessit. nam Fridericus Castulonensis Regis filius, qui Papiæ in carcere custodiebatur, effractis vinculis profugit. redeuntem prope in Longobardos Fridericum Egentii filii res egregiè gestæ non nihil recrearunt. expulerat hic de civitatibus eos fere omnes, quos patris inimicos noverat; jam enim per Hetruriam, Flaminiam, & Longobardos duarum factionum diversa studia, & perniciofa nomina vulgata erant: iidemque cives flagrante domestico odio, non solum animo dissentiebant, sed ferro diversa festabantur. Gibellini à Germano Cæsare stabant. Guelphum nomen Pontificis partes tuebatur. res sane perniciofa: ex qua populorum excidia, & subinde urbium ruinæ profectæ fuerunt, adeoque in animis nepotum hæc mali labe, & perniciofa appellatio propagata est, ut in nostra usque tempora ista dominante peste, violato sanguinis jure, cædes passim per urbes fiant, bona diripiantur, domus ad solum æquantur, cives in exilium alii agantur, trucidentur alii: & dum quisque sibi, aut parti suæ reponi injurias, & maleficia formidat, in eam plerumque ætatem gladios distringit, cui immanissimus quisque barbarus parceret. hujus domestici furoris, & inexplebilis feritatis vis, origo, & nomen à juniore Friderico capit, qui avi crudelissimo exemplo Mediolanum excidere parabat, gentem suis votis perpetuò adversantem. Ticini primum accolas aggreditur. occurrit Mediolanensis: castra secus fluminis ripam locat, transitu primum Barbaros prohibens, mox vero viribus fidens, retrocedendo transeundi fluvii copiam hosti fecit. cupiebat acie congredi. tum Imperator filium Aduam versus cum parte copiarum dimisit, ut incursionibus, & assidua populatione eos homines afficeret, quorum damnis necesse esset Mediolanensi copias dividere: & proinde viribus impar cum hoste prælio dimicare non auderet. Sed præfecturæ, quæ ad Aduam pertinent, concita ejusdem tractus juventute, manus cum juvene conferunt, atque captum Mediolani in publica custodia servant. qui haud ita multo post è vinculis ad patrem venit: cui cum haud prosperæ res forent, pertinaxque & odium & bellum in eum Longobardorum vigeret, in Appuliam recedere commodius visum fuit. interea Conradus adversus patrem res novas molitur, atque procurante Pontifice Rex in Alamannis creatur, sed brevi raptus, pa-

rentem gravi cura, & metu novi belli exoneravit. De morte juvenis apud scriptores non eadem invenio. scribunt quidam, *aliquot menses in Italia post obitum patris eum regnasse.* Veneti per hæc tempora foedus cum Gregorio adversus Barbarum percutiunt, classisque, suggerente Pontifice pecunias, Venetiis instructa est: quâ statim apud Sipuntum duodecim Friderici longæ naves cum oneraria, in qua mille homines impositi fuerant, capiuntur. amissa classe satius Friderico visum fuit in Taurinos reverti propter cæptas factiones, & perseverantia odia. filius præterea Egentius, comparato quem potuit exercitu, missisque auxiliariis militibus ab his populis, qui Pontifici infensi erant, & contrariæ partis opes imminui studebant, patris inimicos penitus tollere curabat. Brixianos bello vexat, nixus præcipue Cremonensium auxilio: hi commeatus benignè præbebant. sed dum omni ope Cenommanorum fines infestat, diutius etiam urbem ipsam oppugnat, Parmenses, quos ob cognationem Pontificis Fridericus ceu adversarios patria expulerat, devictis contrariæ partis civibus, Parmam recipiunt. quæ res de Taurinis Tyrannum revocat, accersitaque ingenti sociorum juventute, conductis quos undique potuit militibus, Parmam continuo obsidet. Jam conveniant ingentes copię de his populis missæ, qui Barbaro infensi, Pontificis partes sequebantur. urbs valido erat munita præsidio, nec nisi magno apparatu capi poterat. oppidani, & peregrini milites eo erant animo, ut nonnisi per vim, aut alimentorum inopia coacti, deditionem facerent. castra itaque Fridericus haud longius ab urbe aggere, & vallo munivit, domos item, cum paulò longior obsidio duraret, & templa in civitatis modum ædificat, ut non solum hyemare sub tectis milites commodè possent, sed etiam haberent, quò tuto ab excursionibus se reciperent, prædamque asservarent. nomen celebre, sed haud auspicato Victoriæ tanquam urbi indidit, monetamque feriri jubet, quam *viçtorios* appellavit. assidebant Parmæ Germani, præliis subinde obsessos laceßebant, & crebris incursionibus vicina infestabant. continuata est biennium obsidio auxiliis duarum factionum; nam quasi rerum summa illic verteretur, utrique vires intendebant. Guelphi, ne Parma caperetur, suos Gibellini contra Imperatori milites & arma subministrabant, qui velut in regia constitutus, jura illic populis dabat, legationes exterarum gentium audiebat. frequentes ad eum legati venerant cum muneribus, peregrina ducentes animalia, aliàs raro à nostris hominibus visa. tunc in castris omnia convertuntur; nam somnum, vinum, epulas, scorta, otium, delicias ita Fridericus & milites adamarunt, ut relanguescerent in castris septa extruerent, in quibus speciosæ puellæ concluderentur: viridaria animi, & voluptatis gratia haberent: negligentius ita omnia fieri, quæ militaris disciplinæ ratio exigebat: ingens institutorum numerus confluerat. nimia indulgentiâ omnia corrupta erant. ergo cum per luxuriam atque licentiam ea negligenter, per quæ virtus militum firma & erecta stare solet, Fridericus fortè contempto hoste in aucupium egressus, longius à castris venandi studio progreditur. Germani, qui præsidio Victoriæ relictæ erant, Parmam usque populabundi excurrunt, vagè quidam per agrum effusi prædam agunt, alii propius urbem accedentes in pugnam oppidanos provocabant. Legatus Pontificis, qui intra moenia præsidio præerat, temere vagantes sine imperio cum nulla militari disciplina hostes conspiciens, solvendæ obsidionis occasionem arripuit; nam ex templo quicquid copiarum habebat emisit: qua eruptione ex imperato hostes circumveniuntur. nihil prope certaminis fuit. non erant signa, ad quæ se reciperent: non duces, qui ordines instruerent, aut fugam sistere possent. ingens fugientium per agros facta cædes. intra munitiones

refugiunt alii : sed præ multitudine irrumpentium cum fores portarum occludi non possent, eodem impetu Victoria capitur, ibique non minor occisio edita fuit. Scribunt quidam *in pugnam & eadem mulieres procurrisse, acutas sudes, & ferro præfixas perticas cum uncis, alia pectines ferreos longis asseribus alligatos gestabant. ha vallum & fossam transgressa ab ira & studio vindictæ, cujus is sexus avidissimus est, alios jugulant, alios trucidant, corpora dilacerant, semineces, & humi jacentes saepe repetito vulnere confodiunt.* Stimulabat eas truculentissimorum immanitas Barbarorum, & crudelitas ignaudita; namque captivos persape Barbari, & qui cum eis militabant, excruciatos ac laceros per tormenta intra moenia ante ora suorum projecerant. exactæ sunt poenæ sceleratorum operum. castra deinde diripiuntur. reperta est in thesauris Regiis corona magni pretii. militi fere omnia concessa sunt. cecidere Cremonensium plerique. hi Victoria præsidebant: quorum Currus siue Carrotium, quod sub nomine Bertaciolæ pro signo habebant, captum, Parmam deportatur. spoliis hostium Parmenses multi ditati sunt. Lego in quibusdam annalibus, à Mediolanensi missa ad Parmensem auxilia, qui strenuam operam in profligandis Germanis, expugnandaque Victoria navaverunt. Nam quamvis inexpiabile maneret in urbe odium, tamen ob recentia, & gravia accepta à Barbaro detrimenta in exitium tyranni universa civitas conspiravit. Imperator ex sylvis venationi intentus, cum sumum prospexisset, captam Victoriam prius intellexit, quam nuncius ad eum veniret. tum strage suorum, & spoliis perterritus, retro in fines Cremonensium abiit. urbem ipsam, ob trucidatos cives, & amissa signa moestam & consternatam, ingredi veritus vicinis in oppidis substitit, ibique collectis iis, qui à cæde & incendio castrorum superfuerant, conscriptoque novo milite contrariæ partis oppida infestare capit. Placentinos quoque cladibus & incendiis vexavit: nec ipse expers calamitatis fuit. transiverat in Æthruscos, ut ibi suæ factionis opes firmaret, in Appuliam mox profecturus. interim filius Egentius exercitum cogit, atque ex agro Faventino in fines Bononiensium invadit. sed dum loca obequitat, Regio habitu deposito, & gregarii militis veste majestatem occultans, explorabat diligenter metandis castris locum ab insidiis tutum, aquationi & pabulationi idoneum, & minime difficilem, à Bononiensi milite cognitus intercipitur, Bononiamque perductus est. tunc eruptione facta exercitus omnis à Bononiensibus profligatur. Rex aliquot annos in vinculis custoditus fuit. tandem præ tædio longinquæ captivitatis & carceris custodia moritur, atque in æde Divi Dominici sepultus est: cujus conditorium adhuc manet, ac spectatur. Fridericus in *Appulis*, vel ut alii tradunt, in *Sicilia decessit, fraude Manfredi filii, quem ex nobili concubina suscepit.* convalescentem à morbo parentem injecto in os pulvino suffocavit. Hunc finem habuit nefarius homo, sive tyrannus, perpetuus sacerdotum hostis, templorum spoliator, majestatis Pontificiæ elusor, quietis Italicæ perturbator, & exitialis discordiæ auctor: à quo deinceps cruentæ seditiones, & cædes in mediis urbibus non cessavere. Traditur à rerum scriptoribus, *Matthæum Vicecomitem* eo anno, qui millesimus ducentessimus quinquagesimus ab nato Christo numeratur, quo *Fridericus* teterrima morte affectus fuit, natum fuisse. Institutus fuerat à patre Conradus ex legitimis nuptiis hæres, qui bello à Guilielmo Rege in Alamannia vexatus in Italiam demum transgreditur. juvit eum Acciolinus tyrannus quibuscunque rebus potuit, transportatoque in Appuliam exercitu inimicas urbes expugnat, ac diripit, quo terrore rebelles cæteros populos edomuit. Siciliam biennium possidet; neque ita multo post per insidias Manfredi occiditur. duplici hic parricidio patris atque fratris regnum com-

A parare studebat. Per hæc tempora Mediolani stabat in armis juvenus, ad fines tuendos parata: & ut socios à vi, & injuriis defenderet, ea omnis ex valetudine, quam nimius calor fecerat, pene absumitur. ex morbi genere Calidarius exercitus denominatus fuit. cæterum Innocentius Pontifex, post mortem tyranni in Italiam revertens, Mediolanum à populo invitatus divertit. incredibile dictum est quo amore atque honore tam publice quam privatim exceptus fuerit. portæ, & viæ, quæ Pontifex iturus erat, perpetuo ornatu renidebant. obviam cum liberis & conjugibus effusa multitudo, Pontificem salutantes, & ejus nomen identidem invocantes, B ovantium voces, & plausus gestientis populi pro miraculo Pontifici erant: qui pietate, & prompto obsequio motus, urbem ipsam in tutelam accipit, Prætoresque imposuit, qui populo jus redderet; nam posteaquam rebellis Barbarus, numinis violator, Romanum sacerdotium fæda ignominia affecit, & in concilium Patrum vocatus ad emendanda scelera, contumax parere noluit, Lugduni appellatione & potestate Imperatoria multatus fuit, aliquot annos nullus legitimè imperavit: ea propter Pontificalibus jussis Longobardi subiecti fuere. sed C Laudenses pro eo, quod præsidia Acciolini & Bossii Doariensis receperant, qui illo fortè tempore Cremonam tenebant, sacris interdicuntur, obsequiaque urbs fuit, quæ in duas divisa partes diversa præsidia Mediolanensium, & Cremonensium accepit. noctu atque interdium atrociter intra moenia pugnatum est. Verum Cremonensis, quia diffideret, viribus, & armis adversariorum vim sustinere posse, five motus vetere in Laudenses odio, per occultum colloquium Mediolanensem hortatur, ut quam urbis regionem uterque possideret, eam everteret: ad hæc responsum: *Mediolanenses esse socios, qui fidem, & auxilium suum implorassent, eos servare, non perdere.* Deducunt præsidia Acciolinus, & Bossius, Vistarinus dehinc dominationem urbis per decennium habuit. D Cæterum Innocentius ex Longobardis Perusiam petiit, atque inde in Appuliam profectus, eos populos ditioni & potestati suæ subicere parat: turbatae civitates in Germaniam nuncios mittunt. Conradinum avus, ut alii, patruus hæredem fecerat. Indoles egregia in puero erat, jamque in eo Gibellinae factionis primores non parum spei reponebant: atque plerique ad iter & expeditionem opportuna pollicebantur, si quando regni maturus in Italiam descenderet, ut quæ juris & ditionis avorum fuerant, ea reciperet. Annus à partu salutari millesimus ducentessimus quinquagesimus secundus effluxerat, Leone Archiepiscopo, & Petro Advocato Novocomensi Mediolani Prætores. triplex per hæc tempora pravæ hæreseos secta populum in perniciosam opinionem distrahebat, Catari, Concoregii, & Gazari. convictos Cataros Oldradus Dresanus Prætor viginti ante annis concremandos pronunciaverat. Extat, ut supra diximus, hominis lapidea in Mercatorum foro effigies, & eulogium, quo posteris judicium & impiorum supplicia testata manent. Cataros flammis Oldradus tradidit, sub anno Domini M. CC. XXXII. sed semel inquinatæ mentes à prava opinione, malisque erroribus non desistebant, five quia nullus ad rectam fidem aberrantes deduceret, five quod ea tempestate civili discordia Itali homines Romanis Pontificibus, & juniore Friderico diversa studia fovente, in perniciem propriam ruerent. ita gliscente hæresi, Petrus Veronensis, nefarii sacri, & abominatæ opinionis Inquisitor Mediolanum venit. hic pro magistratu & imperio diligentius de impio crimine inquirere cepit. vita, mores, & doctrina per populos admirationi erant. convicti plurimi poenas publico judicio dabant. resistere scientiæ non poterant; miranda opera edebat: ita relictâ malâ opinione bene sentire multi coeperant. conjuratum est in hominis necem.

necem. hi, quorum opinio stare non poterat, percussorem subornant, qui fortem rectæ fidei propugnatores, tertio Kal. Majas à Novocomo Mediolanum repetentem, in nemore apud Barlassinam duplici vulnere confodit. *Conjuratōnis auctores Cataros* quidam tradunt, quorum opinioni assentior. opulenta erat illa factio, quæ promissâ pecuniâ facile percussorem invenire potuit: versus item leguntur sub inscriptione *Thomæ Aquinatis*, in quibus Catarorum gladio *martyrem occubuisse* testatum manet. cæterum de loco factæ cædis, & latronis cognomine non idem proditum memoriæ est. *qui eadem in nemore apud Barlassinam factam* scribunt, de *Porrorum familia Acharinum* nominant: at qui juxta Medam *occisum* tradunt, *Balsamum* appellant; nam & in actis Inquisitorum invenio, *auctorem conjurationis fuisse Balsamum, qui pecuniam pactus fuit*: ita uterque vicus, & utraque familia infamis in nece hominis habetur. comprehensus sicarius decem dies in vinculis habitus est; verum dato pretio, corruptisque custodibus effugit. tunc indigne ferens civitas, detestandam cædem inultam manere, continuo in prætorium accurrit, hisque direptis, quæ in eo erant, Prætores cum apparitoribus, & tribus iudicibus ad tribunal Archiepiscopi fraudis reos statuunt. ægre vita concessa: magistratu Prætor ejicitur, mox primores urbis delecti Perusiam petivere: Pontificem docent, quantum miraculorum invocato martyris nomine fieret, religiosam populorum venerationem, quantus concursus eorum foret, qui sepulchrum salutare, & vota subinde persolverent. in concilio patrum relata omnia fuere, statimque virum, quo apud Deum deprecatore miranda opera in terris ad salutem gentium gererentur, cælo dicaverunt, & in numerum sanctorum, destinata die, qua cædis memoria recoleretur, ascribi jussere: præcipua dehinc religione cultus cognomen Martyris tenuit, propterea quod recentissimo affectus martyrio fuisset. eximio studio, & cura singulari Innocentius Pontifex Prædicatorum fraternitatem fovit, ad ædificanda templa, sustentandosque fratres multa benignissime præbens; & ut promptius emendicatam stipem populi conferrent, privilegia & immunitates remissâ scelerum poena concessit. ferox interea populus in proferendis finibus & ulciscendis injuriis occupatus, raro arma deponebat: trajecto Ticino turre propinquas subruit. Mortarium oppidum invadit, quod per vim ad deditionem compellit. arx stabat egregie munita, ea tormentis, & machinis quassata destruitur. per hæc tempora Innocentius post Appuliam subactam Neapoli moritur. substituitur in Pontificatu Alexander Quartus. Regium nomen Manfredus usurpaverat, Pontificem Neapoli pellere parat, qui relictâ urbis custodiâ Octaviano Cardinali Ubaldina gente progenito, ipse Romam profectus est. In Hetruscis domestico furore, & odio incitatissimo omnia agitabantur; nam divisus semel per factiones civitibus, cædibus & exilio nullus modus erat: sed civilia arma, discordiasque populorum, & publicam Hetruriæ stragem missis auxiliis Manfredus provehebat, hoc etiam nomine Pontificem bello lacefens. verum Florentiæ adeo intestina pestis exarsit, ut cæde, & fuga pene exhausta, & deserta civitas in potestatem Manfredi sine pugna pervenerit, illique diutius paruerit: nec transpadanæ gentes integræ manserunt. invaserat eas communis Italiæ labe, & exitiale odium, nihilque domi tranquillum erat. bellis, & mutuis cladibus se conficiebant: hinc nactus occasionem Acciolinus tyrannus cum ab his staret, qui Cæsarum rebus studebant, diversarum verò partium opes affligeret, non pauca oppida partim expugnata, partim deditione facta subegit; mox iusto exercitu comparato, res Pontificis vexare acriter cepit. ea tempestate Ubertus Palavinus Cremonæ, & Placentiæ ex præfectura do-

A minatum obtinuit: Gibellinum nomen & hic festabatur, pro quo ampliando multum adnixus. utrique igitur, foedere inter se icto, arma conjungunt, bellum adversus Pontificem, & Guelphum nomen profitentur. redegerat in potestatem Ubertus Cremam, & aliquot Brixianorum oppida. Legatus Pontificis ingentes transierat copias, his opem laturus qui pro dignitate & Imperio Pontificis stabant, domoque pulsi, & bonis mulctati fuerant; & ad Olum fluvium, quo limite Brixianorum fines à Cremonensibus discernuntur, uterque exercitus confedit. Legatus Pontificis numero & virtute militum confusus, negligentius, quamvis propinqui hostes essent, agere cepit. hunc invadunt Acciolinus & Ubertus, atque statim commisso prælio fugientes, & nihil resistentes profligant. capti multi fuere, occisi plurimi: Guelphæ factionis principes fere aut cæsi aut captivi fuere. Archiepiscopus Ravennas Pontificii exercitus ductor, & Brixianæ ecclesiæ Antistes capiuntur. mox victores Acciolinus & Ubertus, divisâ prædâ, copias abducunt, atque hic Cremonam rediit, ille Brixiam contendit, quam oppugnare parat: sed oppidani posteaquam captivum Episcopum, & tot generosos homines victos in custodia teneri cognoverunt, continuo deditionem faciunt. Tyrannus urbe potitus, nihil indignatus adversus se arma sumpta fuisset, contra quam ingenium & mores, & experta in alios sævitia & impietas poscere videbantur, in victoria paulò clementior adversariis veniam dedit. exardecebant Mediolani odia, & ex longinqua simultate nobilioribus infima turba contumeliose insultabat. tunc Capitanei & Valvassores auctore Archiepiscopo Paulum Seresinatem sibi Potestatem faciunt, quem signiferum ad contundendas plebejorum vires, ac debilitandam Creditæ auctoritatem habuere. Plebes contra Martinum Turrianum cum imperio esse jubet, ut in magistratu constitutus insolentiam patriciorum reprimeret, & libertatem publicam tueretur. sic per discordiam ordinum accensis animis, dum suos quisque sublevat, & adversarios deprimere studet, eò contentionum, & certaminum rem perduxere, ut in armis, & viribus urbana omnia negotia reposita forent, & vix à sanguine invicem temperarent. Ad componendas igitur seditiones, & jus æquabile servandum, placuit unum Prætores esse, qui æqualiter omnibus, procul ab omni morbo animi jura daret: quare de publico consensu jus & arbitrium deligendi Prætoris religiosus quatuor viris vitæ probatissimæ defertur. ex templo peregrinum hominem, à studiis factionum abhorrentem, urbi præficiunt; quo facto à domestico motu quies facta fuit. Sed Martinum interea patriciorum querelæ sollicitabant, qui per longam licentiam, & quandam regnandi consuetudinem, parum iusti suæ potentæ aestimatores, se in ordinem redactos æquato jure cum cæteris querebantur; neque à solita libidine, & violentia abstinabant, domi & foris per impotentiam grassati omnia permiscebant, nihil ab eorum vi & injuria tutum erat. quare tot malis afflictis inopes arma capiunt, nobilitatem omnem cum Leone Præsule urbe ejiciunt, atque proposito edicto bonis & urbe mulctant. Soresinas ad tutum receptum Seprium oppidum præsidio munierat, huic Novocomenses opitulantur. Leo quoque, posteaquam plebem in se concitam vidit, Varesium se recepit. majore tunc cura Martinus angi, quippe qui verebatur, ne expulsi adversarii ex tuto receptu patriam gravius infestarent, & magnitudine damnorum motus in urbe surgerent, continuo armatam plebem in profugos induxit. Pugnatum extra urbem atrociter fuit, & civili sanguine cruentati sunt agri; nec prius cædibus finis factus fuit, quam Pontifex intercessit, cujus jussu reconciliata gratia, Leo & patricii in urbem recipiuntur: relegati tamen quidam

fuere : sed ut concordia diuturnior & stabilior, odiumque alioquin inextinguibile mitigaretur, ceu offensarum acerbitas omnis deposita foret, duo in urbe Principes pignore necessitudinis sese astringunt. Martino Pauli soror in matrimonium datur, *qua affinitate rediisse in amicitiam ordines, & deposita odia, duraturamque tranquillitatem* plerique existimabant. cæterum plebes, quæ pertinacissime tunc odium servat, & injurias minime dissimulat, quotiens libidinosæ & avare magistratus in eam defæviunt, Bonum Toranium patriâ Bononiensem gravioris olim tributi auctorem, quique imperatas pecunias acerbius exigendo, multos bonis spoliaverat, depositâ præturâ repetundarum reum facit. convictus cum erepta restituere, aut noxæ satisfacere non posset, fœde occiditur, abjectusque in fossas urbis insepultus jacuit. Capitanei & Valvassores in patriam recepti, ceu recuperato jure imperiosius omnia facere, vix à vi, & contumelia quiescere, diutius urbana negotia tractare, ad ea spectare, quibus præscas vires reciperent, & cæteris imperarent, & qui domi odia & arma exercere non valebant, extra pugnando ferrum, & discordias renovarunt. forte Novocomenses in factiones divisi de imperio urbis inter se certabant. Rusco Capitaneos in auxilium accersit, qui haud cunctanter adsunt, oppidumque ingressi adversarios prosternunt. partem oppidi Vitanus, alteram pars diversa obtinebat, quibus plebes Mediolanensis Capitaneorum cæptis repugnans propere opem tulit. depræliati sunt utrique acerrime. tandem Vitanus vicit, atque pulsus adversariis urbi præficitur. Per hæc tempora diffidebant inter se Germani procures, quorum suffragiis Cæsares designari solent; atque per dissensionem animorum duo ad Imperium electi fuere, Alphonsus Castulonensis Rex, & Ricardus Britanorum regis filius : sed in transpadanis Acciolinus jam comparato regno, dum Cæsaris amicos fovet, contra Pontificis socios armis, & maleficiis laceffit, atrociam & execranda facinora edidit. reduxerat relictâ Mantuâ, quam expugnare summa ope adnitebatur, in Veronenses exercitum, eos mox expugnaturus, quos studiosiores rei Romanæ videbat : tunc Patavini immanis tyranni feritatem, & scelerata facta perosi, recepto præsidio, ab Acciolino deficiunt. quod ubi is rescivit iræ impatiens, & cæco furore effervescens, Patavinos, quos secum in expeditionem adduxerat, ad duodecim millia obtruncari statim jussit : qua horrenda inhumana crudelitate fere omnium popularium animi ab eo alienantur. nefarium præterea & dirum hominem sublata cruce, arreptisque armis populi insectabantur : neque diutius cum Palavicino amicitia stetit. nam quæ fidum socium, aut perpetuum amicum sibi eum speraret, qui tanto popularium cruore conspersus, nefarium quoque bellum cum eo pastore geres, cui Christus in gregem suum parem Deo potestatem in terris concessisset? In hoc animorum habitu oderant finitimi omnes, atque exhorrescebant Acciolinum, atque ab eo dissociati novos amicos conciliabant. quare suadente Bosio Doario, qui ea tempestate inter Cremonenses nobilitate, & divitiis præpotens erat, dissoluto fœdere Uberrus Palavicinus vires & arma cum Turriano communicat, qui per speciem tuendæ libertatis hac societate viam ad regnum affectabat : quod sibi haud difficile videbat propter insolentiam & improba patriciorum facta, quos plebes violata tolli cupiebat. sed Martini consilia patricos minime latuere. nudi præsidio Acciolinum supplices adeunt, & sortem suam calamitosam miserando rogant & obtestantur, uti se à libidine & crudelitate factionum tueatur. Arma & opes adversus seditiosos & violentos cives Tyrannus promittit, hortatus bono essent animo, & haud diutius exulatos, benigne multa pollicitus affirmat, comparandum quacumque via militem monet.

A cupiebat hic uno conatu atque labore profugos patriam domum reducere, & Palavicinum omnino perdere post dissolutam societatem studebat. Ceterum Martinus, novo socio atque præsidio succinctus, cum acie dimicandum esset, propterea quod adversariis propugnatorem impigrum accessisse videbat, eorum animos lenire, & metu servitutis exonerare statuit, qui peregrino auxilio perculsi magis jugum imponi, quam infensum hostem arcere à finibus putarent. Ad concionem igitur multitudinem opificum, & id genus ceteros, qui victum opera, & manu quærebant, in ædem Divæ Theclæ convocat. multa ibi ad conciliandam populi amicitiam, levandamque curam, qua pleriqueangebantur, quod dominus appellaretur, præfatus, jurejurando fidem obstrinxit, quæcumque aut domi aut foris agi deberet, ea omnia ad consilium Credentiæ relaturum: sine quorum permisso nihil quicquam negotii acturus esset. facile illi fuit hoc sermone tumultuantem plebem temperare, cum propter antiquam, & adhuc flagrantem in patricos similitudinem, tum quod ipse mansuetus & miti ingenio præditus foret. nihil illi præter titulum ad regnum decrat. præterea à cædibus & sanguine averfus habebatur: clemens admodum, utpote qui capitali noxæ nunquam subscripserit, etiamsi de inimico, vel exule supplicium sumendum fuisset. cur enim agebat *hominem occidi jubeam, qui adhuc neminem progeneraverim? Sterilis illi uxor fuisse* traditur. Erat in civitate tunc Acciolinus adolescens, de Marcellina gente procreatus, ingentis spiritus, nec animorum urbis imprudens, popularis admodum. huic jam ab initio suspectum erat, quorsum cum externis Martini fœdera & simulatæ conciones tenderent. in multitudine liberiùs surgentem Turriani potentiam, ceu fraudis, & tyrannidis suspectam accusabat. hunc hi potissimum lætati sunt, qui paulo opulentiores de Mota dicebantur. ita plebe divisa, cum alii pro Martino, primus à Marcellino staret, in certamina deveniunt: nec incruenta seditio stetit, siquidem adolescens gladio suffossus occubuit. Martinus sublato æmulo ex præside Credentiæ, dominus palam nuncupatur. at patricii posteaquam adversariorum res auctas videre, & ducem Domini nomen usurpassè, rebus suis diffidentes, eos sibi in primis conciliare student, qui à Marcellino steterant, & rem Turrianam oppugnaverant: atque ne ducem intra muros desiderarent, Gulielmum Sorefinatem factionis suæ caput faciunt, cujus virtute & opibus subnixi, tenuioribus insultare, & vim nonnumquam inferre cœperunt. Martinus contra suos à vi defendere, cohortes armatorum secum habere, in via cum adversariis interim decertare, vulnerari alii, complures occidi, frequentes in urbe cædes fieri: exarserat inter cives simulas. Hanc miseratus calamitatem Romanus Pontifex, ne domesticum bellum latius procederet, iratos animos mitigare, & metu novæ tyrannidis levare tentat. Philippum Ravennatem Archiepiscopum in Longobardos mittit. hic ut certamina tolleret, & concordēs cives depositis armis extra omnem metum faceret, eos ablegavit, qui inter factiosos eminere videbantur. dejicitur tunc regno Martinus, & patria profugus mendicare cogitur. in exilio amicos & propinquos monere, & orare non cessabat, ut exulis misererent, & securitati, & otio suo consulerent. proponebat patriciæ gentis insolentiam, quotidianas injurias commemorabat, quos legibus ita demum obtemperaturos agebat, si in metu forent: & se ita ablegatum, ut servitus injungatur, & velut defensore privati æterno in servitio perinde, ac mancipia libidini & imperio patriciorum serviant. hoc sermone incitati quidam, clandestina consilia ineunt; tum certam diem constituunt, qua propius urbem accedat; futurum enim, ut periculum in quo constituti sint multi conspicientes, res novas

aggre-

aggrediantur. nihil cunctatus Turrianus statuto tempore advenit, cui in æde Divi Dionysii præsto haud pauci fuere, quos discriminis & imminentis periculi ita admonet, ut pro certo habeant, nobilitatem nihil non in servitutem & perniciem plebis moliri, atque de salute, & opibus eorum actum, nisi continuo præsidia adversariorum invadant. Conveniant armati in fere patricii, qui domo pulsi haud longius ab urbe vagabantur: quippe veriti, ne mœnibus inclusos inimici circumvenirent. ita fatius visum, ancipiti metu adversarios fatigari. ea propter in regione Orientali summa ope pugnatur. Baldus Giringellus tumultuariam manum contraxerat, atque in ipso templi limine adversarios invadit. prælium factum est acre. resistebat Martinus, quamvis tunc viribus impar: sed adjuncto subsidio, prostrato inimicorum agmine, in urbem victor introducit, cui nemo unus repugnare ausus de hinc fuit. in exilium eos egit, quos adversæ partis studiosos noverat, quique in concionibus graviter loquuti subinde in certaminibus arma contra se tulissent: præcipue Gulielmum Sorefinatem nobilitatis protectorem fugari voluit. hic enixissime patriciam gentem defendebat. Non imprudens rerum Turrianus erat: & quamvis propensos plebejorum animos haberet, non tamen confestim principatum in urbe occupavit. Exules patricii & errabundi ad Acciolinum profugiunt, afflictas res, violenta inimicorum facta, & inopiam suam conqueruntur, rogant, & obtestantur, quando ejus spe ducti exilium magis quam conditiones ab hoste oblatas acceperint, eos ne deserat, sed, quod pollicitus erat, auxilio dato in domum, & in patriam reducat. docent præterea, quanta illi fiet nominis & imperii accessio, si nobiles viros per vim & contumeliam sedibus pullos susceperit, atque ab injuria & maleficiis vindicaverit. Tyrannus sociorum audita calamitate, ne supplicum vota frustrari videretur, exercitum contrahit: tum Cremonam versus pergere coepit. conveniant eo Bosius, & Palavicinus: milites conscripserunt. supervenerat cum auxiliari turba Accius Bonifacientis comes. substitit aliquantisper tyrannus. erant præterea in armis oppidani. quare ex itinere Urciolos obsidet: verum ab Capitaneis vocatus, dissoluta obsidione Mediolanum versus contendit: ponte ad Cassianum oppidum Aduam trajecit. præsto illi fuisse *Valvassores* quidam tradunt. alii contra neminem occurrisse. perculsus tunc animi, & rerum dubius Acciolinus, perinde atque aut illus, aut proditus ab iis foret, quibus auxilio venerat, Moguntiam, ne irritus captorum existimaretur, expugnare parat. Interea certior per suos Martinus fit (jam enim Soncinum usque duxerat exercitum) de transitu tyranni: qui ne frustra subsidio veniret, magis quam quod ipem potiundi oppidi haberet, Moguntiam circumfedit. extemplo is ire pergit, atque eodem ponte copias trajicit. fluvium Palavicinus atque Estensis & Bonifacientis observabant, ne regredi hostis valeat. tunc Acciolinus Moguntiam relinquit, atque Tricium contendit. arx erat oppidi inexpugnabilis. hanc capere cum minime posset, vicina omnia ædificia succendit, protinusque Vicomercatum (hoc oppido & præfecturæ nomen est) concessit. nihil hostile in eo tractu fecit. Difficilis erat commeatus, & proinde omnibus innoxius, beneficio potius quam metu, aut maleficio commeatus & frumenta ad se deduci in primis studebat. Martinus interea Mediolanensem populum sub signis habebat, vias obstruere, quacunque commeatus duci oporteret, eosque sæpe intercipere. extimuerunt tunc Germani & Itali milites, ne per inopiam frumenti ancipiti hoste circumclusi debellerentur. tunc Acciolinus cum res suas in angusto sitas videret, aciem instruit, atque Cassianum repetit. occurrunt illi ex adverso dispositi hostes. a tergo Mediolanensis instabat. proelium ineunt. certa-

A tur totis viribus. Transierat ad Martinum Brixiana juvenus; nihil tamen inde deterritus, pugnam invadit, vociferans, Brixianos fidem in lacinia gere-
 re. jam circumventus erat, atque dum per confertissimos hostes erumpere conatur, sinistrum crus tragula trajicitur. accepto vulnere ferocior ad flumen evasit, vada explorans. tetigit tunc animum vicinæ arcis nomen, protinusque exclamat: *Hec Cassan, Assan, Bassan, hic mihi fatalis hora.* ita vado amnem transgressus capitur, vivusque Soncinum, altero telo in caput impacto, perducitur, ubi ab ira & rabie cibum, & remedia respuens, inter minas, & atrocia verba defecit. ita eventum maternæ prædictionis fidem affirmavit. Monuerat illum mater, siue astorum prudens, siue veneficiis, & responsis umbrarum docta, *id genus desinentia terras caveret, quod illic fati suis terminus daretur.* Hic patre natus sacrilego insidioso & fallaci, matre venefica, à pueritia odio religionis, & sacerdotum imbutus: quanquam ubi adolevit, statim rationem aliam vitæ iniit ad tempus, ut postea cognitum fuit, ferociâ, crudelitate, & perfidiâ depositâ fidem colere, amicos constantissime juvare, hosti gravis, ceteris neque insuavis nec ineffabilis, promissis stare, bella feliciter & prudenter tractavit. Dux rei militaris expertissimus, pericula ut forti animo deposcebat, ita non incaute obibat. tolerandus sane homo, dum privatus vixit: verum ubi imperare coepit, jam magna transpadanæ regionis parte in potestatem per vim redacta, in eo omnia conversa fuere. torva facies, terribilis incessus, sermo gravis, superbus, rapax, violentus, perfidus, crudelitatis inhumane, in omnem ætatem sævissimus, Dei contemptor, Sacerdotum hostis perpetuus. sacrilegia, & violatam fidem, velut sancta & minime formidanda, prædicare, templorum thesauros furripere, eorumque vestigalia intercipere, Sacerdotes spoliare. Quibus rebus ab Innocentio Pontifice publice detestatus, excommunicatusque fuit, velut rebellis sacrosanctæ Ecclesiæ æternis suppliciis devotus, efferatam crudelitatem truculentissimo genere vesaniæ exercuit. Veteres & splendidae familias de pluribus urbibus non ejecit solum, sed pene delevit. Oderat eos, quibus timori erat, ac deinde crudelius excruciatos aut lacerari, aut jugulari jubebat: Vix mihi credibilia ea videntur, quæ scriptores quidam memoriæ prodiderunt: *Infantes ab gremio matrum raptos, atque adeo in conspectu parentum erutis oculis, & genitalibus excisis, stando, vigilia, atque inedia pariter enecabatur; quidam continuo suis tractu, cum non haberent, unde arentes fauces recreare possent, urinam propriam bibere compulsi fuere: sed quasi tot virorum cadibus parum satiatum esset, matronas nobiles prostitui, speciosa atque pudica virgines passim constuprari. neque adhuc tanta injuria expleta feritas fuit: post raptam pudicitiam, vulgatumque corpus easdem in teterrimo carcere diutius custoditas, gemitu, lachrymis, & mœnore confectas fæde & miserabiliter mortuas legimus: & cum civitates tot viduas civibus, & nefando scelere perculsas videret, & proinde, ne conjurarent adversus se etiam domesticos, & propinquos extimesceret, illos omnino tolli curavit. parricidiorum igitur magnitudine, & atrocitate scelerum materiam uberem scribendi fabulæ præbuit. Extat Musati Patavini tragicum carmen, non admodum inelegans, in quo atrocia hominis facinora, violentus spiritus, & feritas plusquam barbara representantur, ut plene omnium nocentissimus, quos terra sustineret, dici possit. Nunquam profecto de sceleribus suis tam bene sensit, ut sperare potuerit simplicem mortem, & tragulæ ictum: dignus qui excarnificaretur, & eos vivens cruciatus sustineret, quos ira hominum, & feritas ad luendas cupiditatis & sævitiae poenas excogitavit. Occiso tyranno, civitates spoliis, & continuis funeribus exhaustæ, jam à nefario, & libidinoso dominatu liberæ, gratulabundæ primum in*

in aliquot dies supplicationes decernunt; frequens supplicantium, & vota Deo reddentium turba in templa coibat. tum libertatem capiunt, popularemque statum per annuos magistratus, perpetuo sublato imperio, instituunt. Tarvisani, atque Patavini, in quos crudelissime saevitum fuerat, nequid stirpis & sanguinis tyranni superesset, Aldericum fratrem (is audita fratris caede clam ex Tarvisio se subtraxerat) armis persequuntur. in arcem sancti Zenonis, tuta erat situ, & operibus, confugit. Tarvisani, Vincentini, & Patavini, conjuncto Estensi, & Venetorum primoribus, arcem corona oppugnant. ex inopia victus seditio inter custodes oritur. ita arx nullis certis conditionibus deditur. è tribus filiis maribus, unus sub patru nomine ferociam adhuc infans gentilem ostendebat; hic sub oculis parentum occiditur, transfixi pueri proprio in cruore natabant. efferaverat rabies illorum animos, quorum parentes, atque propinqui crudelissime necati fuerant: mortuos dilacerant, jecur alii mandunt. Aldericus, & uxor revinctis manibus, laqueo per terram distrahuntur: puellæ quoque à gremio matris raptæ, fulis crinibus, certatim turbâ vulnera inferente, contrucidantur. ita cadente tyranno universum genus à stirpe extinctum est. Martinus victorem exercitum, & præda opulentum Mediolanum reduxit, tuncque clarus, & potens habitus. Invenio in quibusdam annalibus, post eadem Acciolini renovatas pristinas societates inter Longobardos fuisse: princeps autem inter socios, omnium consensus, Martinus declaratur, tum ob urbis amplitudinem, tum propter recentem de communi hoste victoriam. jam is vim, & speciem dominationis assumpserat. nihil amplius de Credentiæ sententia agere, opificum subjecta collegia, se uno contentus, nihil in administratione urbana, aut ratione belli cum aliis communicare; multavit & patria, & bonis eos fere omnes, quos suspectos, aut invisos servabat. extorres patricii à Summaripis, quæ familia Laude nec inops, nec ignobilis erat, excipiuntur, atque benignius tractati sunt. Martinus periculosum existimans inimicos, quos domo profugos odiis, & bello exercere studebat, etiam longius à finibus summovere, vicino in loco foveri, conscripto milite Laudensem agrum invadit. statim oppido pelluntur adversarii: ita in potestatem Turriani oppidani, graviora detrimenta veriti, devenere. hoc facto, ut minùs negotiosus ab urbanis seditionibus foret, & tyrannidem affectanti nullus contradicere auderet, Paulum uxoris fratrem, quo ducem patricii maxime nitebantur, omnibus officiis prosequitur: fatigabat quoque Paulum soror precibus, & magnis pollicitationibus, ne surgentem mariti potentiam aut refringere conaretur, aut impe-

direct. Remissus ille beneficiis, & oratione sororis, tunc omnia agere, nihil prospicere, quo eos à vi defenderet, aut protegeret, qui illi & se & sua crediderant. Quare proditas partes suas patricii existimantes, Soresinatem repudiant, & in tutelam Jordani, qui Rusconæ familiæ primus in Novocomo dominatum obtinuerat, se tradunt. Commovit hæc res maxime plebem, quæ eò intentius voluntati Turrianorum obsequi, illorum partes juvare, vim & impotentiam patriciorum magis extimescere, ne scilicet per novam amicitiam detrimentum aliquod rebus suis afferrent. Cæterum qui domi remanserant, occulta primum colloquia cum exulibus habere, eorum fugam, quoad vires patiebantur, pecunia sublevare, alios ab amicitia Turriani avertere, clandestina consilia de reducendis profugis struere. Hæc ubi Martino cognita fuerunt, Palavicinum, quem, ut supra diximus, socium fecerat, protinus pacto quinquennii stipendio ad se accivit. Mediolanum is comparato mercenario milite, & voluntariis eum sequentibus ingreditur. Tunc peregrinâ ope satis sibi fidens Turrianus, quietiore animo esse, minus de hostium potentia sollicitari; interim dies festos agere, ea fere cum Palavicino communicare, quæ ad stabiliendum regnum, & fines proferendos pertinere videbantur. Tradunt *Ubertum*, ut erat bellicis artibus instructus, & civilis usus experiens, ingenio præterea acris, & exercitato, contemplatum urbis amplitudinem, populi ingentem numerum, & rerum affluentiam, ad amicos dixisse: Regnum facile Mediolani constitui posse, si modo penes unum summa imperii foret, qui sua potentia intestinas discordias cohiberet, seditiones componeret, ne continuis certaminibus de potentia plebes, & patricii inter se discordarent. Hoc sermone Martinus maxime adductus, ut omnia sui arbitrii faceret, nihilque de alterius consilio gereret, Credentiam populi in totum sustulit. neque vanum fuit Palavicini iudicium, falsaque virium potentissimæ urbis æstimatio; nam hoc usque in tempus res Longobarda sæpius periclitata de summa imperii fuit, incerta, & vagæ vires, dum timidus atque diffidens sibi quisque sive genere, & amicitiiis polleret, sive divitiis & factionibus abundaret, in vicinos populos imperium aggredi minime ausus fuit: atque unius urbis dominationem usurpans, sive populi jussu princeps creatus foret, metu atque invidia popularium fines extendere non poterat; sed inter suos regnare contentus à vi & rapinis domesticorum non abstinens, finitimos latrociniis infestabat: inter tot mala cum jam continuatione laborum, cædibus, vetere similitate, & recenti duarum factionum impotentia, universa fere Italia attenuata & plane exhausta foret, Vicecomites surrexere, de quibus deinceps dicemus.

GEORGII MERVLAE, ALEXANDRINI, ANTIQUITATIS VICECOMITVM LIBER V.

Repetitur Vicecomitum origo. Nobiles patria fugati erant. Otho Vicecomes, tandem debellatis Turrianis, Pontificatum urbis cum regno obtinuit.

VICECOMITUM gentem à Regibus Longobardorum prognatam satis constat; nam, ut supra memoravimus, capto Desiderio, regiaque appellatione, ac potestate penitus extincta, quicquid Longobardi nominis per Italiam dispersum erat, cum liberis, fortunis, atque conjugibus in eas commigrarunt regiones, quas reges eorum incoluerant; & quamvis deinde per Carolum, & nepotes, moxque per Germanos Cæsares, & eorum procuratores, quos universales Vicarios vocant, Longobardorum civitates administrarentur, tenuit tamen consuetudo, ut Angleriae Comites, quæ reliqua proles Regum supererat, Archiepiscopo subservientes, regia ornamenta designatis Cæsaribus imponerent, quasi ita demum Regni titulus legitimus, & coronatio solemniter haberetur, si regia ministrante stirpe tradita fuisset. Magnum profecto indicium splendoris familiae, atque vetustatis, quæ regiae vicis non expers, ministerium tantæ rei velut hæreditarium obtinuerit: sed in eo bello, quo per quatuordecim annos Alexandrum profugum, atque errabundum Fridericus primus Pontificatu dejicere conatus est, opeque ecclesiæ violato atque polluto summi Sacerdotii jure gravissime affixit, & rebellantes Longobardos perpetuis cladibus vexavit, Angleriae Comites, qui à Pontifice stabant, & ceteros in partibus ejus continebant, dum Barbaro fortiter resistunt, à suis proditi simul cum patria interiire: & si qui elapsi periculo fuere, ad invidiam mitigandam, quam appellatio Comitum præ se ferebat, Vicecomites deinceps, quasi superadditis litteris odium imminueretur, appellari voluerunt. quamquam Heriprandus, & Otho, quorum egregia facta supra commemoravimus, multos annos & Fridericum, & cladem patriæ antecesserint, & Vicecomitum, non Comitum cognomen habent, nisi forsan scriptores, qui recentius res memoriarum prodiderunt, quoniam eadem erat familia iisdem orta majoribus, posteriorem duntaxat appellationem, quasi celebriorem, relictâ primâ, usurpare maluerunt. sed Constantiæ Petrus Vicecomes, cum acceptæ utrinque conditiones fuissent, Mediolanensem jussu, velut publici auctor pacem ratificasse traditur. Quidam juris, & legum interpretes recentissimus, historiæ, & veritatis parum curiosus, Vicecomitem hoc in loco magistratus, non gentis, nomen esse contendit: quod ego vix crediderim; quando legati Constantiam missi de generosis familiis, atque indidem oriundi fuere, unde venerant, neque peregrino homini, ut fere hi sunt, qui magisteria municipalia gerunt, res tanti momenti, & publica auctoritas demandari debuit: sed non equidem contenderim, restitutâ patriâ, & pace compositâ, gentem nobilem sub eodem nomine coaluisse, eamque tenuisse appellationem, velut auspiciatorem, quæ à victoria cœpisset. Trium Vicecomitum mentio celebris habetur, quorum in confesso sunt opera, neque fides generis ambigua, sed à Petro usque ad

A Othonem Archiepiscopum, qui diversæ partis opes affixit, & gentem patriciam ab exilio, & fuga in patriam revocavit, regnumque Matthæo fratris filio deinde tradidit, anni paulo minus centum interfuerunt: per quod tempus nullus claruisse de Vicecomitum familia memoratur, sive quia tot suorum cædibus afflicti, & Germanis Regibus infensi, publica gubernacula abnuerint, sive quod perseverantem in animis multorum invidiam, humili sorte contenti, nihil magni appetendo, obliterare magis, quam refringere voluerunt. Laudanda hujusmodi consilia, ingentesque Deo agendæ gratiæ, qui regiam prolem servaverit, donec vindicandæ libertatis, sanandæ patriæ, & asserendi regni opportunitas daretur; neque enim aliud domesticis malis, civili incendio, & peregrinæ injuriæ remedium asferri poterat, nisi unius arbitrio res administrarentur, qui concordiam procuraret, militiæ studiosus exercitus cogeret, sumptus bellorum impensis suppeditaret, prolatos fines ab impetu inimicorum, & à maleficio integros custodiret; prope enim ad discrimen summum ventum erat; nam funesta recentum factionum nomina, & perpetuum illud, ac familiare Italici venenum per hominum mentes disseminatum, non solum animis, & studiis à se ipsis dissentire, sed ferro decertare populos cgebant. Ita nulla publicæ salutis, & augendæ patriæ in universum cura erat; nam quamvis metu Friderici Primi iusto fœdere civitates ad externam vim propulsandam conspirassent, constans tamen non fuit societas, nisi dum hostis propinquus illorum capitibus imminabat, quo summo, aut pace data, dissoluta statim fœdera, dissociati populi fuere. coibant interim duæ, tresve civitates, ut communi periculo occurrerent. quidam perseverante implacabili ira, quamvis proxima incendia ad se transire viderent, obviam hosti prodire nolebant: sic facile cum singuli incurrenti hosti se opponerent, universi vincebantur. Neceffe igitur fuit ad quietem rerum, sistendasque ruinas, unum aliquando dominum constitui. sed alio in loco regnum commodius, aut magis ex auctoritate imperantis, & usu militari locari haud potuit: sive quia vetus sit gentis metropolis, cui pro vetere amore, ac imperio ceteri minime contumaces parere dedignarentur: sive ob ingentem populi multitudinem, opificumque turbam, unde facile sit numerosum exercitum conscribi, & instrui. Soli præterea ubertas ad sufficiendos commeatus, quotiens longius à patria in expeditionem proficisci oporteat: accedit urbis opulentia, quamvis ea in mediterranea sita, in qua tamen per industriam civium, & artium novarum officinas mercatura non mediocriter exercetur, vectigalia porro, atque portoria dependunt, & imperata tributa sine detrimento exigi possunt. Quod si vera fateri volumus, non alia debuit familia cæteris imperare, quam quæ regio progenita semine, avorum regna repeteret, mitis atque benigna, in qua humanita-

E

tis,

tis, & clementiæ plurimum fuerit, crudelitatis, & vindictæ minimum; quippe hæcenus in hostem sæviens, ut aut injurias ulta, aut depositis armis omnes suos putaret, à cædibus & sanguine abhorrens; ut scilicet haberet quibus imperare posset; Regum vera proles, & cui fata iuste imperium restituere. fremant licet cæteræ gentes, quæ posteaquam à peregrinis armis Romanæ opes oppressæ fuerunt, dominationem aliquam inter Italos obtinere: nullam profecto inveneris gentem, cui plura nostri homines debeant. Hæc libertatis arx, & columen rerum fuit, regnum apud Barbaros supra quingentos annos relegatum, velut postliminio ad Longobardos reduxit, rem militarem jam pridem desitam in exercitationem & gloriam revocavit, patriam à dominatu multitudinis eripuit, & ex tumultuosa, atque turbulenta quietam reddidit, ac tranquillam: quos vero populos in potestatem suam redegit, eos aut ab externa tyrannide, aut ab improbis, & domesticis dominis liberavit, ne servilem vitam perpetuò exigerent. Sed nimirum potentissimæ urbis, & veteris, ac amplissimæ familiæ, concordia fata, & ita amica sydera fuere, ut neque altera sine alterius auspicio, atque opibus aut regnare, aut vigere potuerit; neque enim Vicecomes res avorum asserere, fines proferre, & cæteris id locorum formidolosus esse potuisset, nisi patriæ vires, & potentia affuisset; neque rursus urbs maxima, eademque opulentissima tam diu incolumis maneret, & Longobardorum domina appellaretur, nisi ductu, atque auspicio eorum hominum, quos Regia familia, principum mater, & fortissimorum virorum alumna genuit, ac educavit. Ergo, quando ita potenti iustitiæ & Parcis placitum est, quicunque rem Longobardam salvam, & sui imperii esse voluerit, is Vicecomitem amplectatur, illi obedienter & prompte pareat, illum sedulo colat, & tueatur, nec minus Mediolanum amet, reveretur, & enixissime in eo servando laboret: sed jam ad institutum revertamur. Cum duæ factiones diversis jampridem opibus, & patrociniis nixæ de potentatu inter se contendunt, una populi causam agere simulabat, altera potentia optimatum studebat. in hac Sorefinas princeps erat: adjungitur ei Otho Vicecomes. plebes, quæ suæ libertatis, & commodorum custodem Turrianum fecerat, dulcedine quadam vindictæ jugum in cervices accipit. in urbe certari cœptum. sed multitudini impar nobilitas, domo excessit, haud tamen à maleficiis quiescit: nam agros urbi propinquos, per excursiones hostiliter direptis vicis, populatur. tunc certamini & hujusmodi injuriis assuetus populus, confestim arma capit, adversarios finibus summovet: qui Bergomum confugientes, non solum in urbem recepti fuere, sed foedere arma cum oppidanis conjungunt, protinusque Aduam transmissi vicum Locarni expugnant, atque succendunt. Martinus haud cunctanter obviam profectus, retrocedentes profugos in Bergomeneses persequitur, illorum agros ad mœnia usque populatur. Quo detrimento moti oppidani, cum ad hostem repellendum vires non superessent, conditionibus pacem redimere tentant, ejectis his, quorum causa bellum conflatum erat. hostilis ita exercitus Mediolanum abducitur. dimissi exules, quibus domi omnia inimica, extra quoque vix quicquam tutum erat, minime longius à patria oberrabant. eos clam pecunia & armis patricia gentis studiosi juvare non cessabant: itaque inimicorum agros per latrocinia deprædabantur. Tabiagi arcem occupant, opportunum ad excursiones locum, quo terrore cives maxime perculsi sunt. Martinus, subito delectu habito, in populatores invehitur: quibus in arcem compulsis, expugnare eam adortus est, munitionibusque circumdat. Sed penuriâ aquæ tolerari diutius obsidio non potuit; per vim Martinus arcem obtinet, in captivos gravissime de-

A sæviit. Catenati fere omnes Mediolanum perducti, mox in teterrimo carcere crudeliter excruciatii concluduntur. Qua facti atrocitate, *quicquid patriciorum nominis erat longius à patria fugam, & inopiam perferre decreverunt*: frustrati scilicet præsidio, amissæque reditus omni spe, partim Parmam, & Regium, alii Mantuam exulatum abiere. Quingenti, & eo amplius suis propriis impensis equo meruerant, cæterorum ingens numerus, qui domo fugati cum virtute, & amicorum beneficio, propterea quòd haud parvo usui his futuri videbantur, à quibus recepti fuerant, ita calamitatem sustinebant, ut etiam adversarios de regno, & fortunis parum quietos facerent. Moritur interea Leo Archiepiscopus, plebi & Turriano nomini longe infensissimus, cui cum nihil fortunarum ab odio adversariorum & longinquo exilio reliqui foret, in vico, quem Legnanum appellant, parum religiose, & sine pompa funeratur. Statim de Præfule creando inter cives certatum est; neque enim ea dignitas, quæ plurimum in ea urbe pollebat, sine populari strepitu, & concertatione demandari poterat. Duo ad Pontificatum aspirabant, Ramundus Martini frater, & Franciscus Septariensis. Turrianus prærogativa suorum, multa præterea largiendo, pollicitando, atque interim minis, fratrem Archiepiscopum creari fecit. Septariensis contra suffragatione eorum, quibus suspecta Martini potentia erat, ceu moderationis egregiæ, & tanto ferendo oneri magis idoneus, summus in urbe Sacerdos designatur. In hac animorum dissensione, intestinaque discordia Urbanus Pontifex maximus, procurante & summa vi adnitente Octaviano Ubaldino Cardinale, qui tunc *ulciscendæ contumeliæ tempus advenisse videbat*, Othonem Vicecomitem Mediolanensis Ecclesiæ Antistitem facit. fortè cum è Galliis legatione obita Romam Octavianus repeteret, in ædem divi Ambrosii divertit: benigne à sacerdotibus templi acceptus fuit. is dum singula quæque diligentius perscrutatur, in donaria & thesauros incidit. Abundabat ea tempestate fanum religiosissimum auro, argento, gemmis, & fabrefactis vasis, atque supellectile, qua in sacrorum carimoniis, festisque diebus aræ Deum magnifice exornari solent. Gemma tunc fulgoris eximii, & inde pretii ingentis adeo Legatus exarsit, ut eam protinus de altari auferre tentaverit. Templi vim æditui timent, atque statim Legati desiderium, & quid in animo concitaret, Martino renuntiant. qui haud cunctanter consensu equis, & cum magno suorum comitatu in arcem, quæ pro templo patet, accurrit. stupefactus repentino concursu, & tanta civium frequentia Octavianus, æde progreditur. hunc prior Martinus ab equo salutatur, seque officii causâ advenisse inquit; ne scilicet quem ad iter paratum intellexerat, is non prosequente procerum multitudine, urbe cederet. Simulata verba quo tenderent Legatus cognovit, atque statim Martino deducente urbe cessit. post id factum nihil non cogitare, meditari, atque aggredi, ne tam insignem contumeliam Turrianus inultam ferret: neque prius quievit, quam æmulum infensissimum invenit, qui inimicam gentem à stirpe everteret. Tradunt quidam, neque à fide multum abhorret, *non ideo cum turba & armatis ad ades sacras Turrianos concurrisse, ut thesaurum & gemmas servarent; sed magis, quòd in comitatu Ubaldini Otho Vicecomes esset, illi longe charissimus*; verebantur siquidem, ne ad res novas populum excitaret; tum quia & ingentis spiritus ferebatur, tum quod natales generosissimos præ se ferebat, quanquam humili sacerdotio Decii (hoc pago nomen est) fungeretur: quippe ea dignitate contentus non existimabatur, qui primoribus Sacerdotum se addixisset. Cæterum Martinus posteaquam inclinasse in partes adversariorum Pontificem cognovit; neque alio consilio eò dignitatis atque imperii Othonem promotum, nisi ut a-

quando

quando illius præsidio ejecta gens patricia domum reduceretur, interesse rerum existimavit animum & studia Pontificis metu armorum ab exilibus ad se avertere. continuo Palavicinum ad se cum his copiis, quas conductitias habebat, vocat, eorumque agros invadit & populatur, qui per amicitiam Pontificis securi à vi fuerant, & gravissimis cladibus afflixit. Enimvero tunc detrimentis suorum irritatus Urbanus, Othonem magis fovere, illi omnia suppeditare, quæ ad obtinendum sacerdotium, & exules sustentandos idonea videbantur. ex Pontificio ritu illum consecrat, & his ornamentis donat, quæ adeundo sacerdotio legitima erant. Dimissus à Pontifice Otho, ut facilius dignitatem caperet, simulque eorum vires retunderet, si qui adversari conarentur, exules ex itinere congregat: deinceps in eam regionem contendit, ubi inimicorum opes minus possent. ad Verbanum lacum progressi, confestim nudam præsidio Aronam capiunt. Turrianus ubi occupatam arcem cognovit, quæ receptaculum ex fuga & præda, atque etiam causa gravioris excursionis foret, & subinde urbanos motus excitaret, tumultuarium militem contraxit, atque in hostem propere contendit. resistebat Otho, interim extra munitiones prælio dimicans: tandem circumfessus, cum alia via integer nisi pactione abire non posset, servatis suis arcem tradidit, quæ continuo subversa fuit. duorum deinde vicorum arces demolitæ fuerunt, ne aliquando ab adversariis occupatæ, proximum tractum infestassent, & ad nova consilia quosdam in urbe excitassent. sic defensis finibus, hosteque pulso Martinus postridie nonas Septembres gravi morbo corripitur: timens inde Philippus, ne languente fratre, quidam affectandi regni consilia caperent, priusquam is expiraret, sine ullo publico consilio dominium arripuit. paulò post Martinus extinctus est, anno post natum Christum millesimo ducentesimo sexagesimo tertio, duodecimo Kal. Decembres, & in templo Clarevallis tumulatur. tunc opes suas Philippus magnis affinitatibus munit. filiam Guilielmo Putterleo in matrimonium dat: ipse alteram duxit uxorem ex Biragorum familia. Novum deinde Comum per factionem Vitanorum, expulso Ruscione, obtinuit. nuptiis, & debellato adversario elatus, qui Comi potens captis acerrimè repugnabat, quasi satis domestica arma ad res defendendas valerent, Ubertum Palavicinum cum peregrino milite missum facit, ærarii inopiam ad toleranda militiæ impendia causatus. Exierat jam illud quinquennium, per quod tempus ex fœdere, & conventis illi sive socio, sive mercenario stipendia soluta fuerant. haud sane potuit incolumitati rerum quicquam, & securitati suorum pejus Turrianus consulere: Regnum adhuc non stabiliverat; perseverabant in urbe odia, occulta præterea novarum rerum consilia quidam inter se agitabant, multorum animi præcipue ad rebellionem erecti erant, posteaquam sui corporis designatum Episcopum videre. Igitur cum res adhuc in discrimine verterentur, fœdera, & amicitia renovandæ, novi conquirendi milites erant, effundendæ pecuniæ, quibus minime parcere debemus, quotiens nondum satis firma sunt imperia, & hostili timore exempti non sumus. Sed cum in omni re fortuna plurimum valeat, tunc profecto vires suas exercet ubi regna jactantur, & ita mentes obtenebrat, ut ingruentia mala nec ludere, nec cavere valeamus; nam qui novas copias conducere, & undique auxilia contrahere debuit, is ceu satis domivirum & armorum haberet, ac diversa pars debellata, extinctaque esset, eum à se hominem dimisit, quo socio atque amico vim & insidias inimicorum facile sustinisset. Peropportune igitur ad perturbandum Turrianæ gentis statum, exulesque restitutos ea societas dissoluta fuit. indignatus Ubertus nihil prius quæsit, quam ut primo quoque tempore superbo, & avaro tyranno desiderium sui

A faceret, in societatem & amicitiam Othonis & exulum transtulit, quos nihilominus fovere & defendere Pontifex perseveravit: quamvis iusto cum Uberto fœdere, eorum agri vastarentur, qui in ditione & potestate Ro. sacerdotii erant. Per hæc tempora Urbanus Pontifex crebris & magnis Manfredi tyranni injuriis laceffitus, ut à vi, & importuno sacrilego se liberaret (non desistebat is vicinas urbes ad rebellionem sollicitare, discordias civiles excitare, atque in Sicilia præcipue templa, & Sacerdotes expoliare) ad peregrina auxilia confugit. Erant tunc in Italia externi, & indigenæ milites, voluntariam militiam sublata cruce professi, Africanæ expeditionis residuum: hi prompti pro defendenda majestate Rom. Sacerdotii discrimina omnia libenter subiissent; sed deerat dux, cujus auspiciis arma nefario homini inferrent. egit itaque Urbanus cum Ludovico Francorum Rege, ut Carolum consobrinum, eundemque generum Narbonensis Galliæ Comitem, quam nunc Provinciam appellamus, in Italiam cum exercitu mitteret, qui conjunctis utriusque gentis copiis Tyrannum ferocius exultantem invaderet; quo debellato regnum Siciliae pollicetur. hac conditione minime cunctatus Gallus Romam mari devehitur, atque protinus de communi Sacerdotum consensu Rex Siculorum declaratur. sequuta virum uxor ipsa quoque Regina salutatur. Descenderant interea in Longobardos magnæ Gallorum copiae, quarum duces Guelpham factionem in primis conciliare studuerunt. ita fœdus & amicitiam cum Turriano faciunt, qui benigne commeatu & vestibus eos juvit; timebat enim minas & arma Palavicini. nec fuit societate contentus, quin ut aliquo justo titulo Carolus eos protegeret, Narbonensem hominem Emberram nomine illius jussu prætorem Mediolani accipiunt. quo factò mirum in modum externum Regem sibi devinxerunt: hinc vires & consilia adversariorum aliquantulum fracta. Ceterum Palavicinus novæ societatis anxius, ne diversæ factionis studiosi incolumes à detrimentis forent, Mediolanenses, qui per Padum negotiantes commeabant, succensus ira spoliatur, atque prædam militibus partitur. obmurmuraverunt cives, conqueri spoliati liberius cœpere; sed Philippus jacturam à suis acceptam neque ulcisci, nec res repetere voluit: sollicitabant ejus animum majores curæ; neque sibi satis quietis & otii tum propriis viribus, tum peregrina amicitia videbat. Arces in finibus Novocomensium, atque Novariensium stabant, sedes belli, & ad inferenda damna locus opportunus, si ab adversariis occupatæ forent: eas vir animorum urbis, & quid in bello locorum commoditas valeat non imprudens, ante omnia tollere curavit. post hæc Bergomenses adortus eos in potestatem & ditionem redegit. in confini agro oppidula quædam expugnat, tum augendi imperii, & conciliandarum gentium studiosus, Novariam & Laudem Pompejam brevi recepit; quarum civitatum dominio auctus arma Palavicino inferre statuit. In Placentinos igitur, & Cremonenses prædatum copias mittit, defendendis finibus Palavicinus intentus populatoribus occurrit, satisque habuit qua hostis ingruerat illi obviam ire. Philippus interim ad defectionem Brixianos sollicitat, qui statim ejecto Palavicini præsidio ad illum transeunt. Erant in Philippo indoles animi, & queritandi regni artes: accedebant factionis pertinacissima studia, ut si diutius vixisset, bello, & consilio, metu præterea, & beneficiis finitimorum plebrosque aut amicos, aut subditos habuisset. repentina morte magno suæ gentis damno præventus fuit ad annos MCCLXIII. & in eodem templo, ubi Martinus conditur. Post hunc Napus Mediolanum & cæteras urbes, quæ sub patrum ditione fuerant nemine repugnante statim obtinuit. Hic, ut populares ad parendum promptiores redderet, & vicinos metu armorum à vi comprimeret, ne item otio

miles languesceret, trans Olivum flumen copias induxit; Palatiolum oppidum expugnat, diripitque: ita exterriti vicini partim Turrianorum imperium acceperunt, partim in amicitiam veniunt. Dum hæc geruntur, Carolus ubi de Longobardis Romam milites pervenisse cognovit, adjunctasque esse auxiliares factionis Guelphæ copias, in Samnites transiit. imposuerat præsidia his locis Manfredus, quæ opportuna arcendo hosti noverat, montanas fauces munitionibus, ac præsiidiis, & præcipue Casinatem saltum firmaverat. Carolus præsidia dejecit, atque angustias occupat. deduxit in patentes campos exercitum Manfredus: ad Beneventum castra castris conjunguntur; nulla dimicandi mora facta est. confligunt acies, præliumque inter utrosque atrox committitur. Carolus postquam suos cedere vidit, in adversam aciem invehitur, fugam suorum sistit; sed dum incautius urgenti hosti resistit, in terram prostermitur: occisum quidam clamitant, atque perturbatis ordinibus, terga dant Galli: fugientes Manfredus insequitur, atque extra ordines depugnat. Carolus, qui pro mortuo habebatur, inter suorum fugam repente, & præter spem comparuit, atque Manfredum dispallatos consecrantem occidit. ita desperata non solum victoria, sed etiam vita, superior Gallus evasit. cecidere in ea pugna utrinque viri non ignobiles. Post tam præclaram victoriam Guelphum omne nomen Carolo adhæsit, cujus præsidio in Hetruria adversæ factionis duces in exilium pulsi fuere, restituti que sunt exules: & subinde novi magistratus fovendæ factionis gratia creantur. Perturbata erant in Hetruscis omnia propter contraria studia, & animorum differentiam. bellum intestinum per Italos exarserat: cædis & vindictæ cupidine flagrabant cives. Legitime nullus post cædem Conradi imperabat: curam, & administrationem rerum in Italia duntaxat Clemens Pontifex capeffiverat, & Carolum, quem cædes Tyrannorum clarum, & metuendum fecerat, Appulisque in potestatem reductis, Siculi imposito stipendio regem acceperant, ad procurationem rerum in Hetruriam misit. trepidi vicis suæ Gibellini per nuncios Conradinum adolescentem, qui in Germania summam rerum hæreditario jure sibi debitam affectans, exercitum instructum paratumque habebat, in Italiam accersunt. maturavit adolescens; sed sive tædio viarum, sive amœnitate urbis captus Veronæ menses tres desedit: nihilo tamen secius à bello cessatum fuit; nam Fridericus Hispanus illius nomine, & auspicio Siculorum potitus erat. tunc per Longobardos Conradinus iter faciens Papiam venit: ad eum Gibellini concurrunt, quorum ope & auxilio ad Ligusticum mare superato Apennino, transiit. affuere Pisani, quorum navibus in Hetruriam defertur: resistunt adversæ factionis duces, quos parvo negotio fudit. Lucensium dehinc fines devastat. occurrit ei regii exercitus ductor, quem Marefscum appellant: hunc prælio superatum interficit. ita subactis Hetruscis ab Henrico vocatus Viterbium venit, inde Romam petens à populo & Senatore, qui obviam prodierant, Imperator consalutatus, deinde in Capitolium deducitur. Guidonem Feretranum cum auxiliari milite dimisit: ipse reliquam exercitus partem in Marfos secum duxit; quo in loco expeditas Carolus copias habebat: atque haud longe ab Alba Marforum castra castris junguntur. manus extemplo conferunt. Carolus admonitus Germanos facile circumveniri posse, Marefscum in habitu regio cum parte copiarum in hostes præmisit; ipse collem sago militari indutus cum fortissimis & expeditis militibus substitit. Depugnare Galli cum Germanis atrocissimè horas ferme tres: plurimi utrinque cæsi: Marefscus occiditur. inde in fugam vertuntur Galli. tunc Germanus fusum hostem ratus palantes desequitur, occisos spoliat, cædibus & spoliis intentus sine metu vagatur. Carolus incompo-

fitos conspicatus de colle digreditur: dispersos, atque divisos aggressus est. in unum coire, conglobari, aut ad signa reverti non poterant. ita dispersi passim interficiuntur. superato tanto exercitu, & ducebatur non ita multo post captis, atque occisis, regnum Appuliæ Carolus recipit. Hetrusci post duplicis pugnae felicem eventum statim imperata faciunt. Ceterum Emberra, quem supra Mediolani præfectum diximus, victoriis Caroli elatus, & ferox, exules contumeliis & cædibus divexat, qui longinquo attenuati atque fracti exilio, tamen quomodo insolentem & acerbum barbarum ulcisci statuunt. Paganinum Emberra forte Novariæ præfecerat: hunc in via, qua Vercellas itur, crebris vulneribus exulum manus confodit: relictum cadaver, & suo cruore conspersum quidam Turrianorum ad sancti Dionysii deferunt, ibique sepeliunt. tum barbarus prætoris cæde exasperatus, primores urbis de vindicta deliberaturus convocat; sed iræ, & dolori dum nimis indulget, atque temerarius, & furibundus inexpectata facti veritate, ceteros in ultionem provocat, animum ad rem atrocissimam adiecit: cognatos & propinquos eorum, qui Paganini cædem fecisse dicebantur, eos sine discrimine comprehensos occidi jussit; cruentata corpora, & repetitis vulneribus dilacerata plaustris imposita, per mediam urbem ad sepulchra efferuntur. quatuor & quinquaginta fœdissimè trucidati jacebant adolescentuli juvenes, & seniores in acervo positi. Atrox facinus, & miserandum spectaculum! Qua supplicii fœditate non solum barbaro; sed consiliorum locis invidia magna conciliatur. In urbe fere nemo unus fuit, qui caput, & fortunas fœvissimi hominis detestatus, execratusque non sit. ipse quoque Napus, qui cæde adversariorum letari alioquin debuerat, adversus domesticos: *utinam sim falsus vates*, inquit: *Sanguis iste in filiorum & nepotum nostrorum capita recasurus est*. Mox levandæ invidiæ gratia, simul etiam ut luctum eorum mitigaret, quorum propinqui interempti fuerant, funestum prætorem magistratu dejecit, atque etiam ex urbe expulit. jurisdictionem annuam, & quæ interim semeltris fuerat, trimestrem esse voluit; sive quia nimiam potestatem juridicundo, & perinde multis odiosam per annum existimaret; sive quo plures summi magistratus participaret, eo plus gratiæ apud externos sibi conciliaret. hic eo anno quatuor prætores divisim temporibus jura in civitate reddiderunt. Verum ne expulso Emberra, Carolus fœdera rupta, & alienatam gentem à se existimaret, Franciscus Turrianus in Appuliam cum honestissimo comitatu mittitur, regi victorias, & partum nuper regnum gratulaturus: præterea ut fœdera, quæ cum patruo, & patruelibus facta fuerant, renovaret. Hunc Carolus comiter excepit, & apud se aliquot dies magnificè habuit: tum imaginaria militia, & magnis muneribus à se abeuntem donavit, qui regiæ dehinc liberalitatis, & lautitiæ æmulus, domi, & inter suos magnificentius, quam res, aut mos patrius pati videretur, vixit. Quidam scribunt, *Napo dominante censa fuisse Mediolani civium capita circiter triginta millia; eorum videlicet, qui arma ferre possent*. Manebant in urbe odia, & quamvis dissensiones animorum armis Napi compressæ viderentur; tamen in agris furta, rapinæ, & homicidia crebra fiebant: ad quæ exturbanda mala peristereonas, in quibus varii generis columbi nidificabant, statim subruj jussit. Stabant hæc frequentia, nec intuta furum, & grassatorum receptacula, in quibus alii pernoctabant; tum, ubi commodum videbatur, in cædes & latrocinia prodibant: alii congesta furta, & spolia asservabant, loca armati defendentes, si quispiam ad sua vindicanda accessisset. ita Napus publicam utilitatem paucorum redditibus prævertit. Ceterum Clemens Pontifex designatum ab Urbano Archiepiscopum impensius fovebat, neque precibus & magnis pollicitationibus à proposito dimo-

dimoveri aut deflekti poterat: quin etiam antecessoris exemplum sequutus Mediolanensem populum publice detestatur, sacrisque interdicat, praescripta die, ante quam Othone recepto, in gratiam sine fraude, aut piaculo redire liceret. Habebat pro indignissimo, praesulem, quem princeps Sacerdotum dedisset, eum in sedem non admitti, & patria expulsum alienae opis indigentem precariam, & ærumnosam vitam agere. Non sine immortalis Dei consilio Pontifices duo eodem tenore, & animo constanti Othonem juvere: nihil potentia, & armis Caroli deterriti, quem ea tempestate florentem, ac bello felicissimum, praeterea adversariorum protectorem noverant. Ecclesiam Mediolanensem praerogativa suae factionis repugnante Pontifice Raymundus invaserat; nam Septariensis civiles discordias perosus, & quod impar æmulo foret, sponte sacerdotio cessit: quo facto quosdam ad Pontificis sententiam, & Othonis factionem avertit; ita qui contra tendere soliti erant, hi mutato studio, tumultus in urbe movere, gravius fremere: alii per fora, & conciliabula identidem injuriam, atque contemptum conqueri immortalis Dei, cujus iram placare, nisi sacra urbi restituerentur, nemo posset; imo graves expectandas pœnas ab iis, qui ejus Sacerdotis, quem in terra Christus alterum Deum esse voluisset, auctoritatem, & honorem violarent; & ita jussa Dei aspernarentur, quasi ejus ope mortales non indigerent. his vocibus, ac talibus querimoniis permotus Napolis legatos Romam mittit, qui populum religione solverent, & interdictis liberarent, causamque sacerdotii disceptante Patrum sacrario agerent: eos nec moenibus recipi, nec audire Clemens voluit. rejecti ad Carolum contendunt, ut eo deprecante admittantur: Rex benigno vultu excepit, quorum postulata postquam intellexit pro salute, & dignitate fidelium sociorum defendendas opes regni pollicitus, legatos insuper suos cum Turrianis Romam mittit: utrosque Pontifex Regis respectu admisit, accersitoque Othone in consistorium introducuntur. tunc regii priores in hunc modum disseruere. Si pro sociis atque amicis, quorum nunc opes, & fortunæ in apertum discrimen veniunt majestatem tuam Pontificum Maxime deprecaturi venimus, non equidem mirari te existimamus: imo vero magis proditos, atque desertos eos putares, quibus cum foedus & amicitia jam pridem juncta fuit. neque Rex noster dignos patrociniis, & favore eos duceret, si contumaces tibi reluctarentur: utpote qui nec venerationem apostolicam, nec immortalem Deum esse in animo haberent: aut in eo perseverarent, quod pontificiam majestatem imminuere, & violare videretur; sed cum titulum sacerdotii ita quidam appetant, ut sopita odia accendant, & jam languescientes similitudines per seditiones, atque discordias domesticas excitent, atque nutrant, non edictis tuis odio, aut superbia reclamant; verum otii, & securitatis civium studiosi, cum de summa rerum periclitentur, illud duntaxat exposituri veniunt; salubriusne, & ex commodo publici status sit Raymundum, an Othonem ecclesiae inter Longobardos clarissimae Antistitem imponi. neque tanta est in eorum animis vecordia, ut tibi legem praescribere velint, aut in eo contendant, non des eis quem praesulem placuerit. non ita longe à reverentia, & cultu nostrorum sacrorum absunt, ut ignorent, tantum potestatem tuam in terris pollere, & humana divinaque omnia jura in majestate tua ita reposita, ut à censura, sententiaque tua, qualiscunque ea fuerit, nulla deinceps sit appellatio; sed dicet aliquis, cur non continuo imperata fecistis? Praesulem in urbem admisistis? Illius dicto de more ecclesiastico obediens non fuistis? Facta hæc omnia nempe forent, nisi ab diuturno odio, & domestica discordia perpetuae in urbe seditiones orirentur, & per civiles motus caedem, ac sanguinem, & interim per exilia

A civium frequenter pars altera dominaretur. dicant quæso, certaminis, & sanguinis, an potius concordiae, & pacis gratia? sacerdotii magisteria inter gentes constituta sint; & qui praefecturas gerunt, five ad religionem, caerimoniasque sacrorum, five ad jura reddenda, & ad rem populi tractandam spectent, nunquid in primis pestes in animis hominum insitas, & interim latius serpentes ita excidere, & penitus tollere debent, ne aliquid resideat, ex quo furori domestico incrementa fiant. Exitiale igitur bellum, & cladem patriæ avertentes imperiis tuis beatissime Sacerdos repugnare visi sunt, verbis, atque studio hæcenus reluctati, ne vim, & arma tibi, aut tuis inferrent. Non itaque aut superbia, aut odio imputandum est, quod contra sententiam tuam tendere videntur: potius tranquillitatis, & publicæ salutis ratio subest: an alienatos abs te, & amplitudine apostolica Turrianorum animos, aut non potius in auctoritate Pontificis, & à te stare dixeris? Caroli copias, quem è Galliis magnis propositis conditionibus excivisti, ut aliquando improbi hominis, & nefarii tyranni malefacta ulciscerentur, ab alpihus descendentes in finibus suis læti exceperere, affatim omnia ad iter tutum, & expeditum præbuerere, frumento, commeatu, & hospitio benigne prosequuti: tum percussio foedere arma confociaverunt, qui si in ipso Italiae limine nobis sese opposuissent, aut cum hostibus consilia agitaissent; profecto enim difficilimus transitus foret; & haud à damno, & clade integris per infestas terras commeare licuisset. jam erectæ gentes ad bellum erant, & externum exercitum velut hostilem ferro laceßere parabant. Omnes tunc sine certamine quiescere, & velut pacati, atque amici nihil nobis denegantes Romam usque transmiserunt. hinc nimirum celeris illa, & insperata victoria: his focis, atque amicis acceptum referri oportet quicquid juris, & imperii post casum & debellatum Tyrannum Pontificis potentiae accessit. Appuli, & Siculi in ditionem, & imperium redacti non forent, nisi ab Ecclesia Romana Turrianus stetisset, & pro sacerdotibus arma accepisset, rapinae & sacrilegia à templis & Deorum aris summotæ non forent. Audias igitur clementissime Pater eorum oratores, qui tui juris esse volunt, ut non nihil Regi invictissimo concessisse te ostendas: simul etiam ne qui optimus & sanctissimus Sacerdos haberis, idem indicta causa, adversus reos pronunciasse dicaris. Cum regius finem dicendi fecisset, & mitigatus Pontifex aliquantulum esset, Turrianus ita exorsus est:

E „Nisi tibi Romane Pontifex parere decretum esset, majestatemque apostolicam summo opere coleremus; cujus nomen tanti facimus, ut eo violato nihil prospere mortalibus cessurum ducamus; à te profecto spreti, atque repulsi, aut domum, aut nova consilia, aut ad amicitias, & foedera concilianda, denique ad inimicos tuos accessissemus, ut externa ope subnixi arma, & bellum ostenderemus; sed in eo perseverantes, quid saluberrimum erat; quippe venerationem amplissimæ Sedis aucturi, deprecatores Regem paravimus, in quo spes omnes nostræ sitæ sunt: & qui de sacerdotibus maxime omnium sit promeritus; eo scilicet sublato tyranno, cujus contumelias & sceleratam avaritiam perferre nemo poterat, deinceps regno potitus, regioque nomine honoratus, ita dicto tuo audiens regnat, ut ad arcendas injurias, defendendaque sacerdotum jura armatus & promptus existat. Hunc adivimus, rogavimus, hortatique sumus, non ut arma pro societate & amicitia capiat, aut partes nostras ita suscipiat, ut veterem tuam amicitiam violet; sed ut eo intercessore nos æquo animo audire velis, nostramque causam ita demum accipias, si justa, & patriæ tranquillitatem allatura videbitur; neque enim aliter à vobis, qui in hoc apostolico sacrario confiditis, petendum est, nisi

„ut ex æquo, & bono controversia decidatur, &
 „execrationes maneat, si ambitione, & factioni-
 „bus Sacerdotium Raymundo, potius quam consen-
 „su, & ex utilitate communi deferri studemus: ne-
 „que ab re hoc in loco erit Sanctissime Patrum fa-
 „ctum ipsum, de quo ambigitur, atque viribus non
 „nunquam certatum est, breviter exponere. Mor-
 „tuo Leone, qui per omne Sacerdotii tempus nihil
 „prius duxit, quam in civitate ira odioque ardente,
 „certamina perniciosâ ferere, & patricios in contu-
 „meliam plebis obarmare, ut velut mancipia foedæ
 „& perpetuæ servituti addicta libidini & licentiæ
 „patriciorum resistere non auderent; plebs ipsa quæ
 „in tutelam Turriani se tradiderat, confirmans præ-
 „rogativam eorum, qui pro vetere jure & consue-
 „tudine præfulem rei divinæ facere solebant, Ray-
 „mundum Archiepiscopum designat, quem fratres,
 „& propinqui non tam jure sanguinis amplexi tuta-
 „tique sunt, quam quod cernebant, eo pastore per-
 „petuam inter cives concordiam fore; atque ita ex
 „æquo utrumque ordinem degere: sed ut magno in
 „populo, & contentione civili diutius exercito, u-
 „su plerumque evenit, Franciscus Septariensis pau-
 „corum suffragiis Sacerdotio præficitur. Inter hæc
 „Urbanus Pontifex antecessor tuus neutri parti sub-
 „scribens medium quandam de numero eorum de-
 „legit, qui domi continuos motus, certamina, &
 „cædes fecerant. tum urbe pulsi latrocinii, atque
 „rapinis in excidium patriæ conspirantes omnia per-
 „turbarunt. Contradiximus, fateor, edicto Pontifi-
 „cis: designatum Antistitem longe summovimus;
 „nescilicet excidium patriæ sub nomine, & potesta-
 „te Sacerdotii moliretur. An ignoras Pontifex, quan-
 „tum cladis gens superba, & ferox semper civibus
 „suis intulerit? Quid dedecoris, atque calamitatis
 „etiam Romanæ Majestati importaverit? Satis te-
 „stata est eorum impietas, & violenta arma. cum
 „Acciolino sævissimo tyranno per causam recupe-
 „randæ patriæ foedus, & amicitiam fecere. hoc in
 „pugna occiso, Palavicinum sectati in amicos tuos
 „quid non injuriarum & maleficii ediderunt? Ita de-
 „mum in foedere, & amicitia perseverantes, si u-
 „trique infesti rebus fuissent; cum enim Philippus
 „stipendia subduxit, & hominem bello pernecessa-
 „rium à se dimisit; nempe quia videbat illo socio,
 „atque amico nullam cum Sacerdotibus perpetuam
 „gratiam fore, in quorum perniciem impius, &
 „durus homo ex innato odio adhuc spirat, nun-
 „quam mitior sane factus. Sed novus iste Antistes
 „non sacerdotium, sed regnum invadere parat: e-
 „xulum ac latronum manum collegit, Aronam op-
 „pidum oppugnare adortus est. inde turpiter non si-
 „ne cæde, & sanguine multorum pulsus, ubi co-
 „natus vanos animadvertit, per auctoritatem hujus
 „sacratissimi ordinis, & per execrationes, jus, ut
 „ait, sacerdotii vindicare sibi, ceu successor Am-
 „brosii contendit. Dicat, quæso, vir arrogans, &
 „factiosus, sitne ejus, qui rei divinæ administrati-
 „nem deposcat, multitudinem latronum obarmare?
 „Hostilem in modum fines patrios populari? Arma
 „in cives convertere? Nescit profecto, nescit assue-
 „tus imperiis, atque rapinis homo, etiam ubi de
 „jure disceptatur, nisi violenter, & injecta manu,
 „quod suum putat aut reposcere, aut vindicare. à
 „majoribus certe, & minoribus earum gentium,
 „quarum factionem fovere eum videmus, minime
 „degenerat. hi spreto æquabili jure, vi, & armis,
 „potiusquàm legibus, & judiciis decertarunt. Sed
 „hæc, ut præsentia tempora postulant, homini in-
 „solentissimo, & magnis natalibus elato condone-
 „mus: illud ante omnia miramur, quod sacrarum
 „rerum moderationem, & gubernacula is assumere
 „velit, qui alioquin ab re divina abstinere, & velut
 „ignarus è medio cedere, procul à jure, & con-
 „suetudine virorum vivere deberet: nisi forte illi a-
 „nimos uterque parens à recta fide abhorrentes; imo

A „in totum diversa sentientes faciunt. Notum profe-
 „cto est quid opis, & favoris iis palam, & occultè
 „contulerint, qui veram religionem disputationibus,
 „& vario certamine oppugnare conati sunt. Quid e-
 „go sororis nuptias commemorem, quæ homini hæ-
 „retico, & Ecclesiæ rebeli in matrimonium data
 „est: quasi parum fida inter dispares, & varios ami-
 „citia, & minime constans affinitas foret, nisi idem
 „de Deo sentirent, & eodem cultu tenerentur; tan-
 „tum enim abest ut nostra sacra, nostrasque cari-
 „monias Antistes Otho capeßere debeat, ut nullus
 „magis hoc ministerio arcendus, atque in ultimas
 „terras velut abominatus, & detestabilis deportan-
 „dus sit. Quæso abstineat templis, & in occulto re-
 „sipiscens quid publica sacra, nostrique sacerdotes
 „velint ediscat; quando salvis cærimoniis, & inco-
 „lumi Ecclesia, hujusmodi præfecturam ab homine
 „impuro, & perversa sentiente geri nefas sit. An il-
 „lud palam non est, Mediolanensem ecclesiam, si
 „pravum Antistitem semel ea nacta fuerit, non tan-
 „tum Italiam, sed universam prope Europam in fal-
 „sas opiniones, & perniciosam labem deducere. ve-
 „tera commemorare libet, quando recentiora om-
 „nibus fere nota sunt. Ambrosius sua tempestate
 „doctrina, moribus, & sanctitate vitæ populos ad
 „veræ religionis dogmata instituit. idem perniciosas
 „hæreticorum sententias confutare, & pro salute
 „commissi gregis fortiter decertare, discrimina, &
 „pugnas omnes intrepidus subire; tantum tamen in-
 „genio, & studiis impiorum confisum legimus Au-
 „xentium, ut adversus rectæ fidei magistrum pelli-
 „feram doctrinam per Italiæ civitates disseminave-
 „rit, atque identidem bello, & armis veræ fidei cul-
 „tores fatigaverit: multi nefario scelere, & profani
 „hominis doctrina contabuere. Ingravescens mor-
 „bus adeo agras mentes invaserat, ut vix acerbò
 „remedio adhibito, revocari ad sanitatem potuerint.
 „Interest non tam publicorum sacrorum, quàm Ro-
 „manæ religionis qualem Præfulem nostra fortia-
 „tur Ecclesia; quo enim se Pastor noster inclinaverit,
 „illic Sacerdotum imperia, reverentia, & opes ce-
 „teris minime reluctantibus, steterunt. Romano Sa-
 „cerdoti reliquæ Occidentis Ecclesiæ haud gravatim,
 „ubi Mediolanensis succubuit, paruerunt. Galliæ, &
 „Hispaniæ non contradixerunt: fera, & immanis
 „Germania libens obtemperavit: in altero orbe fe-
 „roces Britanni annumerantur; hi tamen jugum ac-
 „cepere, & ceu vestigales facti, perpetua tributa
 „pendunt: denique secundum Romana jura nostri
 „Præfulis edicta valere. Te igitur, sanctissime pa-
 „trum, publico nomine, & ex religionis, & no-
 „strorum sacrorum utilitate rogamus, & obsecra-
 „mus, ut omnium circumspèctissimus maturato stu-
 „dio, quæ ad publicos usus, & Christi Salvatoris
 „pietatem faciunt, atque in commune conducunt,
 „ea omnia solertissime circumspicias, eumque Præ-
 „fulem nobis des, qui miti sit ingenio, procul à
 „morbis animi, sincera, & recta sit mente, pro-
 „cul ab imperandi cupiditate, & ulciscendi libi-
 „dine, publicam utilitatem amplectatur: urbanæ
 „quietis, & concordiae studiosus pro omnium otio,
 „atque salute, die noctuque invigilet, minimum iræ,
 „& odio indulgens; neque studio partium teneatur,
 „veræ & sinceræ fidei cultor, ne forte ubi salus
 „rerum, & animarum nutat, & fides pollui, &
 „contaminari videtur, illic prudentia, & solertia
 „ejus defuisse videatur, cujus numine in terris om-
 „nia geruntur.

Sub hæc dicta obmurmuravere Patres, visque sunt
 Turriani oratores acerbis in Othonem invehi, &
 superbius, quàm detestabiles deceret causam agere:
 adversus quos jussus Otho dicere mansuetè, & ma-
 gnificè respondit:

„Nec novum, nec inopinatum mihi est summe
 „Sacerdotum: vosque ceteri Patres religionis prin-
 „cipes, rerumque nostrarum arbitri, ab seditiosis
 „ho-

"hominibus, improbisque tyrannis talia nunc ob-
 "ci, qui posteaquam in Civitatem recepti fuere, ve-
 "teres, & illustres Familias implacabili odio, tum
 "patria pulsos, atque fugatos cives bello, & armis
 "infectari numquam desisterunt. sed optarem ut hu-
 "jus sacrosancti Consistorii rationem aliquam habu-
 "issent, cujus amplitudinem sua ista petulantia pro-
 "fecto non parum læsisse existimari possunt. Quare il-
 "lud me in primis sollicitum facit: ne si causam di-
 "cere, & objecta paulo liberius diluere voluero,
 "perinde ac sacratissimi loci, & Apostolicæ maje-
 "statis nescius videar: & quamquam graves contu-
 "meliae, & acerbissima facta me admodum torque-
 "ant; illa tamen injuriarum differentia me gravif-
 "simè angit, & cruciat, quod parentum manes, af-
 "finesque meos à flagitiosis, & impuris hominibus
 "per supremam ignominiam exagitari sentio. atque
 "utinam jurgiis tantum, & contentione hujusmodi
 "ad augustissimum hoc tribunal certaretur! injuriis,
 "& ferro intra fines, atque etiam extorrem me per-
 "sequuntur: nomen omne patricium pariter, & ex
 "professo perosi exitiabili odio, & continuis malefi-
 "ciis prætextum hunc apponunt, quod gens patri-
 "cia, quasi regnum in patria teneat, plebem longo,
 "& continenti servitio oppressam habeat, ceu non
 "satis constet, si quid potestatis in tenuiores nobili-
 "tas habeat, id aut vetere, & gentilitio jure com-
 "paratum, aut Cæsarium indulgentia, & benignita-
 "te datum esse; qui, ut promeritis gratiam refer-
 "rent, aut suis beneficiis externa, peregrinaque au-
 "xilia quærerent, indiscretum populum manere no-
 "luerunt, sed velut discrimine quodam inter amicos,
 "& inimicos facto, cives gradu, honoribus, & sua
 "amicitia distinxere. sic civitates opulentiores, at-
 "que illustriores fuere; sic veteres conservatæ fami-
 "liæ; sic novitii cives in patriciatum assumpti di-
 "gnatione regum in ordinem honestum pervenere:
 "ita qui dignitate, & opibus eminebant, iis humi-
 "lior turba addicta, stipendia etiam persolvit. Nul-
 "la profecto foret Cæsarium beneficentia, aut cur
 "tantopere pro regibus, atque principibus, aut in
 "potentioris gratiam dimicaretur, si divitias, com-
 "moda, & honores non speraremus, aut fortiter,
 "& rectè facta irremunerata starent. Quare non satis
 "intelligere possum, quæ tanta rabies mentes isto-
 "rum in perniciem nobiliorum, & opulentiorum
 "invaserit: quos lacerant, domo ejiciunt, bonis spo-
 "liant, & porro fugatos quiescere non permittunt.
 "Superbia profecto intolerabilis, & inaudita arrogan-
 "tia, pati non posse primores civium in urbe splen-
 "descere, & immunitates, privilegia, atque opes
 "penes eas gentes non stare, quibus ea potentissimi
 "principes aut concessere, aut elargiti sunt. nisi for-
 "te dicant, pares opes, paremque potentiam liber-
 "tatem appellari debere: quod tantum à libertate,
 "& populari civitatum statu abest, ut nisi Senato-
 "res, Decuriones, & quicumque publica munera
 "curant ex genere, censu, & ætate eos delegeris,
 "multitudo incondita dominetur necesse sit; cujus
 "turbido, ac temerario dominatu non solum res pu-
 "blica, sed privatorum negotia labefactari, & everti
 "semper soleant. Pernicies profecto, & clades urbi-
 "bus parata est, quotiens ex æquo, & pari jure cives
 "degunt, & meliori, atque potentiori parere recu-
 "saveris. Sed cur nunc hæc commemoro? Ceu in
 "ambiguo sit, civitatem sine Senatu bene admini-
 "strari, & Senatum nisi ex primoribus urbis consti-
 "tui posse. Quod tamen cum ita sit, res, & vitam
 "nobiliorum isti funditus sacrilego, & nefario cona-
 "tu perditum ire student. Patieris obsecro æquo a-
 "nimo, clementissime Pater, si verbosius calamita-
 "tem nostram conquerar; & quanta adversariorum ira
 "atque crudelitas sit exposuero. Hi non imperare ce-
 "teris, aut suo nutu cuncta in urbe regi postulant:
 "sanguinem miserorum sitiunt, & exhauriunt. om-
 "nia permiscet, perturbant, & rapiunt. nemo à

A "vi, & injuria liber, nemo à damno, & contume-
 "lia intactus, nemo patientia, pretio, amissisque
 "bonis à vexatione tutus erat. spes una reliqua in Sa-
 "cerdotii reverentia, & Præfulis præsidio stabat; sed
 "homines cæci, crudelitate immanes, furore vecor-
 "des facto tumultu, sacrorum Præfulem armis domo,
 "& urbe ejiciunt. Vide, quæso, quo superbiæ, &
 "temeritatis novi homines, & haud ita pridem in ci-
 "vitatem asciti evasere: vel magis attende, maxi-
 "me, atque optime, partium dolos, perfidiam;
 "tum qua fraude regnum usurpaverint. manebant in
 "urbe multos jam annos constituta inter cives colle-
 "gia, ut invicem inopiam sublevarent, mutuaque
 "ope à potentiorum violentia tuti viverent. hæc om-
 "nia sub specie tollendæ conspirationis Martinus su-
 "stulit. Restabat populi Credentia; sic enim infimo-
 "rum civium, & sellulariæ turbæ conciliabulum ap-
 "pellant, quod olim plebes tutandæ potissimum li-
 "bertatis gratia adversus licentiam improborum com-
 "paraverat: cujus ordinis potestas, & auctoritas tan-
 "ta fuit, ut id demum sive bello, sive pace ratum
 "foret, quod Credentia jussisset. Audite, rogo, qui-
 "bus artibus Martinus ex Præfecto Credentiæ omnia
 "ditioni suæ subjecerit. Primum voluntati eorum
 "numquam adversari, qui gentem patriciam quo-
 "cumque modo lacefferent: pro illorum sententia,
 "atque votis judicia reddere. quo studio, atque ob-
 "sequio illecta multitudo illi perpetuam potestatem,
 "velut publici consilii auctori, urbisque domino de-
 "ferunt. tunc magis, atque magis in optimates sæ-
 "vitum. Suspecta interim Turriana audacia, atque
 "potentia plebi erat. qua curâ, quoque metu ut ci-
 "vitatem in præsens exoneraret, continuo cives in
 "concionem advocat, jurejurando affirmat, se ni-
 "hil de suo consilio, suæque sententiæ facturum: sed omnia
 "ad primores populi relaturum. Tunc nihil de viribus
 "Martini plebes extimescere, & securâ privatæ dun-
 "taxat rei, & commodo proprio intenta esse. Non
 "defuit sibi impotentissimus Tyrannus, causatusque
 "D Acciolini vires, & odium, qui in Venetia, & Ce-
 "nomanis dominabatur, foedus, & arma cum Pala-
 "vicino, quem nobis nunc objiciunt, iniit, con-
 "junctoque protinus exercitu, intoleranda damna a-
 "micis tuis, Beatissime Pater, inferunt. mox occi-
 "so Tyranno, & nova societate, atque victoria sub-
 "nixus plebi illudens nomen, & imperium Creden-
 "tiæ abrogat; solus rempub. tenet, & gubernat:
 "dominus deinde salutari, & appellari voluit. inter-
 "ea oppressa nobilitas, quæ etiam servire pro tem-
 "pore recusabat, cum rapinis, ferro, & cædibus
 "modus non esset, minus calamitosum duxit exula-
 "re, & longè à finibus patriæ vitam agere, quàm
 "E domi per libidinem, & intemperantiam adversari-
 "orum atrocissimè dilacerari. Perseverabat nihilomi-
 "nus animus, & cupido gentis extinguendæ, quos
 "insidiis, & armis infectari non desisteabant. Obsti-
 "nata profecto feritas, & infesta ira! quam conti-
 "nuatæ rapinæ, civium cædes, exilia, & denique
 "servitus patriæ imposita exaturare non potest. Sed
 "numquid Sacerdotii dignitas inviolata ab istorum
 "nefario ausu mansit? Minime. Leonem, quem sua
 "fraternitas singulari cultu, & egregia reverentia et-
 "iamnum prosequitur; quia intrepidus constanti pa-
 "trocinio Pontificatus jura defendenda suscepit, pa-
 "miserorum causam sublevabat, atque interim à pa-
 "F triciis detrimenta, & contumelias propulsabat, sa-
 "cerdotio privant: egenum deinde, atque mendi-
 "cum in summa inopia mori coëgere. post cujus o-
 "bitum dignatione hujus sacratissimi consistorii Præ-
 "sul, & sacrorum Antistes designatus fuit. Pontifi-
 "cia tunc jussa per contumaciam, & parendi dedi-
 "gnationem aspernantes, non solum urbe me non re-
 "cipiunt; sed vix fines ingressum hostili modo per-
 "vim arcere tentaverunt. Non equidem; cum nul-
 "la reverentia, nullusque metus, aut auctoritas Pon-
 "tificis, me defenderet, amicorum manu succinctus
 "Aro-

"Aronam cepi, non sane ut detrimenta patriæ infer-
 "rem, sed ut quocumque modo in dioecesi mea con-
 "stitutus non jura in totum præfulis amisisse, aut
 "possessione omnino summotus existimarer. Subito
 "audaces, & impii homines tumultuarium militem
 "contrahunt, oppidum obsident, Pastorem operi-
 "bus, & machinis oppugnant. Frustra sæpius auxi-
 "lium, & fidem tuam, sacratissime Pater, invoca-
 "vi. nihil majestas tua, nihil jura Pontifici alia ju-
 "vare potuerunt. tandem fame ad deditionem com-
 "pulsus vita mihi, & meis concessa, arcem tradidi.
 "Tam insignem contumeliam, & apostolicæ aucto-
 "ritatis contemptum ne impunitum nefarii homines
 "ferrent, diras decessor tuus in eos injicit, sacris ci-
 "ves omnes interdicit; ut scilicet sacramentis mul-
 "ctati ad venerationem, & obsequium reducerentur.
 "sed nihil is profecit. an hi metu futuræ poenæ, &
 "sacris interdictis obedientes essent, in quibus nulla
 "religio, nullus Dei metus, nihil sancti manet? &
 "qui nec rectè factis præmia, nec sceleri supplicia,
 "quasi nullus post mortem ultor criminis existat, spe-
 "rent? Sed cur nunc, dicet aliquis, venerabundi,
 "& supplices pacem exposcunt? Ad genua procum-
 "bunt? Liberæ populi voces, acres eorum quærimo-
 "niæ, qui diutius sacris carere non possunt, gravis
 "occupati regni invidia, & perpetuæ rebellionis in-
 "famia illos hæc facere cogunt. Non imperata fa-
 "cturi huc venire; sed magis ut ex hac disceptati-
 "one odium levent, & qui pertinacissime recusant,
 "parere simulent. Vesani profecto homines: quasi
 "non intelligamus, quid sibi simulata oratio velit.
 "Quid non pugnantia postulare, & loqui se vident:
 "promptos ad imperia tua se ostendunt qui tantum
 "jam sibi arrogat, tantumque licentiæ sumpserunt,
 "ut jam Romano Pontifici creandi Sacerdotis libe-
 "ram potestatem non permittant. Sub conditione,
 "inquiunt, Præfulem dabis: quieti, & concordiæ
 "consulas. cur non dicitis; arma cape Pontifex, e-
 "xules, & qui in profundo miseriarum jacent, tu
 "funditus perde, humanitatem omnem exue, jura
 "Pontificatus projice; & tu nobiscum eos dilaniabis,
 "qui miseri in exilio victum mendicant: alioquin de-
 "sententia, & judicio tuo cognosci, & statui apud
 "majorem magistratum requiremus. Vecordes sanè,
 "atque inaudite superbiæ, & temeritatis homines,
 "velitis, nolitisve, semper Mediolanensis Ecclesia
 "sub jure, & arbitrio Romani Pontificis stabit. Illi
 "sine provocatione obtemperabitis, illi velut singu-
 "lari, & perpetuo domino servietis. Et me, atque
 "parentes hæreseos insimulant. Sint quæso per vos
 "quieti meorum cineres: pax sit cum mortuis: par-
 "cite manibus; satis enim constat, eos piè, & re-
 "ctè de fide sensisse, qui ex ultima voluntate Christi-
 "ano ritu sacro loco sepulti fuere: qui enim moriens
 "religiosè funerari mandat, & cujus ossa non à pro-
 "fanis, sed religiosis viris palam componuntur, eum
 "neque pertinacem in mala opinione, nec in hæresi
 "persistentem dixeris. Dicite, quæso, quis eos no-
 "taverit, aut eorum nomina detulerit: proferte cri-
 "minis, & impietatis testem, sub quo iudice revicti,
 "quid deinde pronuntiatum fuerit. Sororis autem
 "maritum, quem ejusdem sceleris arguunt, non est
 "meum in præsentia defendere. Vivit ille in loco
 "celebri; neque potest cuiquam esse occultum, quæ
 "dogmata sequatur, quorum sententiam profiteatur,
 "& quorum hominum fautor, studiosusque sit: in
 "quo tuendo, atque excusando longior, atque soli-
 "citus non ero. Desinant tandem manifesti sacri-
 "legiorum, & rebellionis adversus Pontificem, tem-
 "plorum expilatores, iniqui, & intemperantes ho-
 "mines, in quorum superbiam, crudelitatem, & a-
 "varitiam universi Longobardorum populi clamare
 "non cessant, tam magnificè de se prædicare, & si
 "quæ Carolo contulerunt, ea non in Pontificis gra-
 "tiam; sed ut illo socio, atque amico, ejusque favo-
 "re, & armis subnixi regnum per cædes, & exilia

A "civium comparatum ita stabilirent, atque firmarent,
 "ut filii deinceps, & nepotes illud per manus acci-
 "perent, & patrum intemperantiam, atque libidi-
 "nem sequuti, patriam scelere lacerarent. & istuc il-
 "lorum consilia, atque facta omnia spectasse arguit
 "efferata Emberræ carnificis, non prætoris sævitia,
 "qui non tam iræ, & dolori suo indulgens, quam
 "nimia istorum cupiditati extinguendæ tollendi ini-
 "micos obsequutus, nefariè sub fratris vindicta gla-
 "dios distrinxit, amplius quinquaginta cives nihil
 "commeritos, propinquos, & cognatos eorum, qui
 "cædem fecisse arguebantur, uno edicto, atque una
 "præconis denunciatione perniciosus alieni odii, &
 B "execrabilis feritatis fatelles contrucidari jussit. &
 "quasi parum ira, & dolor expiatus esset, cum viæ
 "cadaveribus confatræ starent, & miseri suo cruore
 "innatarent, illos in plaustra imponi, & per ora vul-
 "gi ad sepulcra pertrahi voluit. Qui tunc gemitus,
 "qui luctus, quæ lachrymæ, quam lamentabiles
 "queritatus in urbe fuere; quæ porro detestationes,
 "& execrationes in eorum capita, & fortunas, quo-
 "rum consilio, atque ministerio atrocissima cædes &
 "facta, & spectata esset! & tamen funesti homines
 "cecu nondum iræ, & feralibus animis per tot cædes,
 "& tam longa exilia satisfactum sit, in medium pro-
 "cedunt, interdicta deprecantur, & de pace, Sa-
 C "cerdotio, & concordia civium tam insolenter in
 "cœtu divorum agunt.

Non passus est causam ultra perorari unus prosci-
 "ptorum civium, qui tum forte aderat. Hic dum atro-
 "cissima illa cædes in urbe edita foret, crebris confi-
 "xus vulneribus morienti similis inter acervos occiso-
 "rum jacens cruentus, & semianimis à morte, atque
 "immanitate se inimicorum subtraxerat. Conversus
 "in Pontificem, & reliquos, qui in sacrario confide-
 "bant, intersectorum nomina, & numerum crebro
 "commemorando, respersam cruore humum, tum
 "distracta cadavera, & diras insultantium voces repe-
 "tendo, tantum odii, & irarum in Turrianos con-
 D "gessit, ut de consistorio abire confestim Legati ju-
 "berentur. Nec longior inter Patres consultatio fa-
 "cta; nam decretum statim fuit, *ut tantisper sacris in-*
 "terdicta maneret civitas, dum Pontifici deductio facta, at-
 "que in sedem suam receptus Otho foret. Cur tam per-
 "tinaciter duo Pontifices eodem tenore Othonis par-
 "tes susceperint, & constanter defenderint, cum nul-
 "la, quod sane à scriptoribus tradatur, merita inter-
 "cessissent, haud equidem dixerim: nisi quia data fi-
 "des, & auctoritas pontificia agi videbatur; neque æ-
 "què facturum Turrianum Patres censebant, si Me-
 "diolanensem ecclesiam, quæ non ita pridem ditio-
 "nis, & potestatis Romanæ se fecisset, eam sua vi,
 E "& ex arbitrio magis, quam nutu, & voluntate pon-
 "tificia regeret: quasi hoc nomine semel acceptum
 "jugum excussisset, ac reliquæ deinceps occidentis ur-
 "bes exemplum sequutæ minime Romano Antistiti
 "obnoxia, pro suo jure, & arbitrio suos sibi Sacer-
 "dotes crearent. Revocantur mox in consistorium Le-
 "gati, qui cum imperiosius Pontificem verba facere,
 "& ceteros Patres obmurmurare adversus se viderent,
 "sive rebus diffidentes, sive ne graviolem iram aba-
 "lienatis Patrum animis in suos concitarent, *deductio-*
 "nem, & *imperata Pontificis se facturos* dixerunt. Ita
 "de concilio dimissi, hi ad Carolum; alii, unde ve-
 "nerant Mediolanum abiire. Ceterum Otho non igna-
 F "rus, metu magis, & popularium querelis, quam re-
 "verentia religionis legatos consensisse, & proinde
 "Tyrannos vix promissis mansuros, unum è numero
 "Cardinalium deligi curavit, qui eum in sedem re-
 "duceret. Per hæc tempora Gulielmus Marchio Mon-
 "tisferati Ferdinandi regis Hispaniæ filiam uxorem
 "duxit. Quo conjugio elatus, foci præterea auxi-
 "lio, atque opibus subnixus finitimos armis laceßere
 "coepit, brevique tanti momenti vires ejus fuere, ut
 "quos defendendos suscepisset, hi in omni certamine
 "superiores evaderent. Et haud ita multo post fati-
 "gatis

gatis adversariis, regnum inter suos obtinuit. Ceterum Napus quamvis intelligeret adversus se Pontificem palam loquutum, & eos qui in concilio fuerant alienatos esse, nihilo tamen fecius rebellem animum gerebat, prætores, quos patricia genti inimicos cognoverat urbi dare, opes regni undecumque poterat emunire, omnia diligentius circumspicere, quibus & suorum insidias cavere, & externum impetum arcere posset. inter hæc Legatus à Pontifice adventare nunciatur. huic Turrianus cum multitudine Sacerdotum, & civium turba venerabundus occurrit. Honorificè exceptum in urbem deducit. postridie Sacerdotum primores, & qui in finitimis locis Sacerdotiis præerant in concilium vocantur. Mandata Legatus exponit; quibus si parere voluerint, reconciliari Pontifici statim possent, & populus ab execrationibus liber esset. Nihil recitavit Napus; utpote qui videret diutius interdictis sacris mæstam, atque attonitam civitatem ad motus, & arma spectare. Deditionem itaque secundum Legati postulata facit; *ut posthac subiecta, atque obnoxia summo Sacerdoti res Mediolanensis maneat, utque ex illius nuni, atque imperio in Longobardis cuncta de cetero gerantur.* De Othone item recipiendo actum: & jurisdictione illi tradenda, hoc est, *ut arces, oppida, agri, & quicquid antiqui juris antecessores possederant, id omne ille inviolatum habeat.* Confirmari præterea Cæsarum, & Pontificum decreta voluere; *ut scilicet immunitas templorum rata maneat: ne dehinc tributa Sacerdotes Tyranno dependant, neu liceat divina rei additum violare, aut patria, & bonis multare: quod si quippiam detrimenti id genus hominibus illatum foret, id pro æstimata injuria, & dato damno rependeretur.* Quas condiciones, etsi duræ essent, & in perniciem suam Vicecomitis potentiam comparatam satis cerneret, haud tamen gravatè in præsentia Turrianus accepit. Per obsides præterea fidei conventiones firmantur. Legatus, quamquam ab timore ea nasci cerneret, posteaquam omnia ob rem Pontificis, & dignitatem religionis facta vidit, urbem ab interdicto sacrorum, & ignominia detestationum liberat. Tunc statim templa patuere, & pro Christiano more statis, atque solemnibus cærimoniis frequens opera datur. Confluxit ingens mortalium turba: sacræ ædes continuo repleti, thura incendi, aræ omnes saluari, ubique omnipotenti Deo laudes, gratesque cantari, quod tandem à diris, & imprecationibus finis esset, atque in gratiam cum Pontifice reditum foret. Legatus interea traditis oppidis præsidia imponit, ut sub nomine Pontificis, & sponsione adversariorum Othoni pacata omnia maneant. Forte per ea tempora moritur Clemens Pontifex, atque ex diffensione Patrum creatio summi Sacerdotis extracta est. Ita aliquandiu sine Antistite Romana Ecclesia stetit. Enimvero tunc Turriani morte Clementis elati; ut est fluxa hominum fides quotiens à metu liberi sumus, promissa abnuere, conventis non stare, Othonem & à patria arcere, & contumeliis afficere. Exercitum præterea Napus contrahit, Viglevanum trajecto Ticino, per vim capit; tum oppidanos jure perpetuæ servitutis Mediolanensi populo subditos facit. Fovebat interea proscriptos Ubertus Palavicinus, qui tum illius armis, & viribus, tum propinquitate locorum, & continuis damnis in metu adversarios habebant. Napus igitur, ut ea cura se exoneraret, atque vicinum hostem longe à finibus submoveret, Palavicinum Cremona conspiratione quorundam civium ejici curavit. Per ea tempora Florentini eos fere omnes patria expellunt, qui Germanorum Cæsarum partes sequebantur. Pisanorum quoque res classe à Genuensibus superata, afflictæ mirum in modum fuere. Ceterum Napus cum Carolum regem sibi propensum cognosceret; morte vero Clementis patriciorum animos confternatos, ac Othonem, in quo spei multum pars diversa reposuerat, amisso præsidio in-

A pem aliena in terra exulare; Laudem Pompejam ingressus Vistarinam gentem, quæ ea tempestate gratia, & opibus inter ceteros eminebat, oppido ejicere contendit. Pugnatum est acriter. comparaverant Vistarini ingentem amicorum, & clientum manum: fortiter resistebant. In dimicatione Napus equo prostrernitur; & cum urgentes adversarios sustinere non posset, in prætorium pedes refugit, atque ægrè ab irruente multitudine defensus Mediolanum non sine dedecore revertitur. Quam repulsam vir nec civilis scientiæ inscius, & gerendarum rerum minime imprudens impatientius ferens, confestim quantas maximas potuit copias contrahit. Laudensium fines iterum hostiliter invadit, & propius urbem confedit: neque solum ignominiam abolere studebat; sed dominium oppidi expetebat. Oppidani cum viderent quanto in discrimine res sitæ essent, neque bellum trahi, aut quisquam vicinorum opem ferre posset, ad deditionem haud difficulter compulsi fuere. In Vistarinam gentem ab dolore recentis injuriæ sævitum. Nam Succius ejus familiaris princeps cum duobus filiis Mediolanum victus perducitur, qui in custodia macerati enecantur. ceteris graviora tributa imposuit; & ne detrimentis obruti aliquando in dominum confurgere, & à tyrannide eximere se tentarent, arces duas Napus ædificat: tum Fisiragam familiam Vistarinis infensam, & quæ in certamine civili ab eo steterat, honore, & opibus cumulat. Ita nova excitata factione, & præsidio arcibus imposito, procul ab omni defecti-
C onis cura urbem obsequentem, atque obedientem in reliquum habuit. Interea extorris, & vaga nobilitas, cum omnis fere spes restituendæ patriæ morte Clementis, & Palavicini adempta esset; ne sine duce dispersi oberrarent, adversariis, qui potentes erant, ludibrio futuri, Squarcinum Burrum opulentum hominem, & in gerendis rebus minime ignavum, sibi principem constituunt. Filiam hic Matthæo Bonacosam nomine protinus uxorem dedit: quibus nuptiis satis superque in præsens sublevati pro-
D fugi fuere, nataque mox proles generosissima, quorum virtute, & armis devictis adversariis, civitas ante lacerata, atque divisa in unum coivit, & deinde dominari cœpit. Ergo Burrus, ne timido, atque imbelli res suas patricii tuendas commisisse dicerent, extemplo vicinorum auxilia quærit. Cum Montisferrati domino de focero in Italiam accersendo, in cujus tutelam, & administrationem res Mediolanensis deinde traderetur, agere cœpit. Consilium Gulielmus approbat, atque Squarcinum magnis pollicitationibus oneratum in Hispaniam ut maretur, hortatur. Non ignarus erat foceri auctoritate, & viribus regnum in Longobardis, si ad eum
E nobiles domo profugi aliquando inclinassent, facile obtineri posse. Profectus in Hispaniam Burrus regem docet, quam levi præsidio res magna confici possit: tum propter generi vicinas opes, tum quod inter se certantes populi jam ad omnia subeunda, ut acceptas injurias invicem infensis animis ulciscerentur parati essent. Consilium Ferdinandus minimè aspernatur, statimque militaribus decoratum insignibus hominem generosum in Italiam datis quingentis equitibus remittit. Divisi in finitima loca barbari alii Papiæ; partim Novariæ commorati sunt, atque inde crebris excursionibus agrum omnem, qui ad
F Ticinum vergit populantur. Interim usque ad urbis mœnia excurrabant. Erant quidam eorum ex levi armatura agiles magis ad agendas prædas, quam ad pugnam idonei. Ergo cum direpti vici permulti forent, & in agris tecta succenderentur, ingensque hominum, & pecorum præda ageretur, agrestes partim in urbem, alii in montes; & munita loca, ut se, & sua servarent, confugiunt: jam prope tumultum cives venerant. Tunc Napus eam juventutem, quam metu adversariorum in armis habebat repente in unum contrahit, atque in eam protinus

nus regionem ducit, quam barbarus deprædabatur. Pallantes prædatores nactus tantum cædibus, & spoliis intentos aggreditur, fuditque. Interfecti complures, capti permulti: à cæde qui fuga se subtraxerunt, posteaquam in tutum locum recepti sunt, adeo perterriti fuerunt, ut statim in Hispaniam reversi sint. Post hæc Napus Gulielmum Marchionem pro infensissimo habuit: tum patriciam gentem acrius premere, his omnibus arma inferre, qui inimicorum necessitates pecunia, aut commeatu sustentassent. ita defecti plerumque alimentis in summa miseria, atque inopia illi vitam trahebant: nihilo tamen res Turriano tranquilliores erant; nam Comenses, qui in illius ditione, & potestate decem annos fuerant, sive insolentiam hominis non ferentes, sive ab studiosis diversarum partium sollicitati animum novandis rebus intendunt. Præfecerat oppido Turrianus Acursum Cuticum. hunc oppidani comprehenderunt, atque vinctum in custodia tenuerunt: neque carcere liberatus est, nisi reddito Simone Locarnensi, quem Turriani in ferrea cavea conclusum Mediolani sub gradibus Prætorii acerbissime cruciabant. Duæ per idem tempus veteres, & generosæ familiæ relicto Napo, in partes patriciorum Biragenses, atque Castellionei transitionem faciunt: nec movit Castellioneos cognatio, quæ cum Francisco Turriano intercedebat. Haud cunctanter Napus copias contrahit, Castellioneos aggreditur, vicos & agros rebellantium diripit, ædificia succendit. Deinde Castellionum (hoc oppido nomen est) per vim captum diruit. Dum hæc geruntur Cardinales longius interregnum pertæsi, tum etiam gravioribus convitiis fatigati; quod per dissensiones animorum in factiones divisi rei Christianæ principem non crearent, & proinde diutius Romana Ecclesia gubernatore careret. Tandem Gregorium genere Placentinum in maximo Pontificatu constituunt. ad hunc, posteaquam peractis cærimoniis, jura Pontificis administrare coepit, Otho proficiscitur petens quod per mortem antecessoris sibi negatum fuerat, id jussu, & auctoritate ejus consequeretur. Othonis postulata, & si iusta erant, non statim tamen exequi Gregorius voluit: neque illum à se rejecit. Indictum forte erat Lugduni Concilium, festinabatque in Gallias. Satiùs itaque duxit litem, & certamina in re præsentī componere, quam severiore edicto feroces homines, aut metu execrationum non ad officium, sed arma compellere. Sequutus venientem in Longobardos Gregorium Otho substitit Placentiæ. Promiserat Pontifex confecto Concilio, ubi in Italiam reversus esset, Ecclesiæ Mediolanensis vel invitis adversariis, & titulum, & imperium se illi daturum. Turriani adventanti Gregorio longius à patria occurrunt: quem supplices, & venerabundi, ut alterum in terris Deum, & rerum dominum excipiunt, atque muneribus ampliter donant. Retulit aliquam pro obsequio, & liberalitate sine alterius offensa gratiam Gregorius: nam Raymundum propinquis, & fratre petente, Aquilejensi Sacerdotio præficit, inde in Gallias ire pergit. Turrianus propinquo adversario percussorem proposito præmio subornat. Verum Otho cognitis insidiis, & quo in discrimine, atque periculo versaretur, Lugdunum contendit. ita elusis inimicis, vitæ, & incolumitati consuluit. Sunt qui tradant *Pontificem nefandi consilii conscium fuisse*. Napus iterum adversus Castellioneos arma movet: Sepriensem omnem agrum, & in primis ejus familiæ amicos, & clientes quantis potest damnis vexat. indignissimè & gentis, & præfecturæ rebellionem ferebat. timebat præterea, ne si defectionem impunitam tulissent, alii in patriciorum partes transfirent. Sed Novocomenses, cum viderent successu prælii Turrianum inolescere, & ulciscendæ injuriæ studiosum, veriti ne in se arma is converteret, milites comparant, quibus Simonem præficiunt, quem, ut supra diximus, à cruciatu, & ignominia liberave-

rant. Hic statim adjuncta exulum, & patriciorum manu, fines Mediolanensium deprædatur. Ita Napus à direptionibus & populatione vicinorum ad domestica defendenda avertitur. Summittebant quotidie subsidia Novocomenses. ita bellum paulo diutius fuit: opportunitate locorum gravia incommoda utrique pertulere. Per hæc tempora scribunt quidam *Edoardum Britannorum regem, cum in Italiam venisset, urbis opibus, & amplitudine permotum Mediolanum divertisse*. Interea Gregorius jam Concilio peracto, in Italiam revertitur. Instabat Otho, ut in patriam, atque designatum Sacerdotium reduceretur. Pontifex, sive quòd non sine armis, & sanguine per contumaciam Napi res confici posset, sive quòd videret per amicitiam Turrianorum quietiorem statum Romanæ Ecclesiæ futurum, Othonem ipsum cum reliquo comitatu spernere visus est, mandavitque ut Bugelæ commoraretur. Secessit statim in præscriptum locum Archiepiscopus turbatus valde, atque moerens, quòd cum Pontifex frustraretur, atque ab his fere omnibus desertus esset, qui ei adhæserant: aliquantulum temporis velut deposita recuperandi Sacerdotii cura, quievit. Duo tunc paribus suffragiis ad imperium designati fuere, Alphonfus Castulonensium rex, & Rodolphus comes, & cum de summa rerum certandum inter eos foret, jus omne imperii rogatu Pontificis Rodolpho conceditur. Moritur interea Gregorius, cui sufficitur Petrus Tarentasius, quem quintum Innocentium ex ritu religionis appellarunt. Hoc intra paucos dies defuncto, Adrianus pontifex creatur, qui summum Sacerdotium vix quadraginta dies tenuit. Successit illi Joannes hujus nominis primus & vigesimus, qui haud ita multo post moritur. Galaranus deinde summam Christianæ rei capeffit, cui tertio Nicolao nomen inditum fuit. Jam Carolus plus nimio potens erat, & novo Pontifici valde suspectus, ne aliquando succedentibus rebus, per discordias, atque intestina populorum bella regnum in Italia affectaret: neque videbatur in tanta rerum occasione aut quieturus, aut in officio mansurus, nisi contra eum comparatæ vires forent. Igitur duos ex fratre nepotes his populis præposuit, quos seditionibus agitados facile peregrinum dominum accersere, & res novas moliri existimabat: alteri eorum Ethruria gubernanda traditur: procuracionem Exarchatus, & rei Bononiensis alter suscepit. Ceterum Ethruriæ procurator Gibellinos extorres in patriam restituit, atque sub Pontificis nomine præsidia, & magistratus urbibus imposuit. Nicolaus quoque senatoriam potestatem, quæ antea penes populum fuerat, usurpavit, & quæcumque muneris, & officii senatorii erant, Romæ per se, & ex suo arbitrio administravit. Forte per eos dies Veneti ad Picens latus appulsa classe, oram omnem maritimam populantur, protinusque Ancenam obsident, Legatosque subinde Romam bellum, quasi iuste susceptum, excusantes mittunt. hos Pontifex ingressu urbis prohibuit, tum vero abeuntes accersivit. Sed cum liberius increpiti in defendendo bello, quod laceffiti Picentibus intulissent, perseverarent, Pontifex neque audire, nec respondere quicquam voluit. Imo statim è conspectu suo non sine ignominia rejecit. Urgebantur nihilominus obsessi, sed etiam qui obsidebant difficultate commeatum, & eruptione oppidanorum detrimenta sustinebant. Quare cum utrique fessi essent, æquo fœdere pacem composuere. Ceterum Nicolaus sive rem Italicam à vi, & dominatu externo defenderet, sive ut per speciem arcendi hostis, & tuendorum finium regnum suis pararet, duos de Ursina gente ad regiam dignitatem promovere in animo constituit, quorum alter in Longobardis dominaretur, qui munitione alpium, ac valido præsidio Germanos coerceret. Alter in Ethruria regnaret, cujus armis Galli Siciliæ domini ab ora maritima summoventur, siquando Italiam invadere tentarent. Decrevit item,

ne quispiam regio prognatus genere, aut regia appellatione insignitus senatoriam dignitatem intra urbem gereret. Hoc enim titulo quidam regii sanguinis homines honorati non magisterium urbicum se gerere existimabant; sed viam ad tyrannidem factam sibi persuadebant. Cum talia Pontifex meditaretur, membris repente attonitis, è vita discessit. Interea Napus Rodolpho in Germanis sine æmulo regnanti oratores mittit, qui dominium Mediolani Romanis Regibus jam diu stipendiarium pollicerentur; seque libenter omnia præstiturum, quæ ad ingrediendam Italiam, & imperii dignitatem, atque nomen assequendum idonea duxerit. Legatorum verba libenter Rodolphus audivit; tum Napum pro vetere jure, atque potestate Procuratorem in Longobardis facit: equites adhuc, & pedites non paucos ex Germania cum oratoribus Mediolanum transmisit. Peregrino præsidio Napus Casonum filium juvenem forma, & viribus egregium ad fines tutandos præposuit. Hoc anno, qui fuit quartus & septuagesimus supra ducentissimum & millesimum post Deum ex Virgine natum, ex Britannis, Hispania, & Galliis Reges ipsi, adjuncto Carolo Rege, ingentem exercitum ex Sicilia in Africam adversus Saracenos transmiserunt. *Aulorem tanta expeditionis quidam tradunt fuisse Ludovicum Francorum Regem, qui ceteros principes ad pia bella vocaverit, & primus omnium de finibus copias eduxerit.* Interim gens patricia partim diuturno, & gravi exilio fatigata, partim tributis exhausta, cum nihil superesset, quo fugam, atque inopiam tolerarent, vicinique ferè omnes, in quibus spem aliquam redditus, & præsidii collocaverant, absumpti essent: adversarii contra favore, & peregrino auxilio res suas firmas haberent, ad Gotofredum Langusci comitem, qui forte id temporis divitiis, clientelis, & magnis affinitatibus Papiæ Princeps erat, adeunt, exilium, calamitatem, inimicorum odia, & rabiem, quæ cædibus, & fuga miserorum expleri adhuc non possit, subinde commemorant, supplicesque orant, eorum partes suscipiat, furorem improborum, & crudelium hominum compescat. Dux omnium consensu constituitur, atque dominium urbis promittitur, ut perpetuo sub illius ditione & gens patricia, & populus futurus sit. Hoc sermone Gotofredus permotus, haud cunctanter milites quoscumque potuit, contrahit; existimabat enim, quod factum iri non admodum difficile videbatur, si profugos in patriam reduxisset, summam rei penes se futuram. quod si de potentatu contendendum foret, eorum ope, & auxilio, à quibus accersitus esset, superiorem facile futurum. In fines igitur Mediolanensium impetum facit, atque populabundus in regionem Verbanum lacui finitimam pervenit. Confestim montani homines, & qui Verbanum lacum circumcolunt, cum superba, & crudelia Turrianorum imperia sustinere diutius non possent, ad Languscum deficiunt: Arona, & Angleria sine certamine capitur. Otho quoque assumpta secum parte exercitus, Seprium oppidum primo impetu ad deditionem compellit: in tumultu omnia erant: confugerat intra moenia ingens rusticorum turba, quorum tecta succensa, populatique agri fuerant. Minime cunctandum in tanto discrimine ratus Turrianus filium cum externo præsidio Angleriam versus præmisit. Ipse cum urbano exercitu in hostes progreditur. Gotofredus ubi ad Angleriam Germanum agmen confedisce cognovit, ad fluvium, quem Gualeram dicunt, contendit, ut opem suis, qui in oppido inclusi tenebantur, ferret: in hostem castra munientem Germanorum continuo manus transmittitur: atrox prælium in ripa fluminis committitur: Stabat inter Germanos equites unus præ ceteris viribus, & animo excellens, hic ante omnes pugnae, & cædis cupidus in hostem defertur: quem conspicatus Gotofredus admissò equo, hasta transfixit: sed equus clamore, & ictibus certantium trepidans in voraginem

A cœnosam prolapsus, è tenaci limo evadere minimè potuit. ita irruentibus barbaris, infelix capitur: captivo duce, ceteri terga dant, passimque fusi cæduntur. Non minor cædes fugientium, quàm in pugna facta fuit. ex fuga Novariam alii, pars Papiam pervenere. Strages ferè circa primores itetit; siquidem duo & viginti nobilissimi viri capti fuere, qui Gallaratum perducti palam jussu Napi cum Gotofredo percutiuntur. Hoc prælio quasi subacti adversarii forent, triumphanti similis cum exercitu victore Turrianus domum revertitur. Sed Langusci cædes multum irarum, & odii in animis cognatorum ingeneravit: sanguinis quoque invidia multorum studia à Turriano avertit: nec dehinc in gratiam Turrianus cum Langusca familia redire potuit. Theobaldus item Vicecomes decollatus fuit. Archiepiscopi hic frater erat; vel, ut alii, *fratris filius*, in obcundis periculis minimè ignavus: ex muliere nobili Pirouanæ gentis filios duos susceperat, Matthæum, atque Ubertum. Ceterum profuga nobilitas suorum audita clade, Vercellas ad exulantem Othonem proficiscitur. Convenere etiam eo quicumque ab adversa pugna superfuerant: rogant, & obtestantur, *quamvis fugatus exercitus, totque clari viri occubuerint, non putet tamen adeo res fractas esse, ut non sperandum etiam sit, eas in melius aliquando reponi posse: modo reliquias exercitus colligat, atque eos evocet, si qui à clade integri manent, ut denuo cum hoste congregiantur, ne per metum, ac desperationem Turriano omnia concedant.* Commemorabant identidem ærumnosa exilia, tot patriciorum indigna funera: sed ante omnia recentis crudelitatis admonebant, & contumeliosæ eorum mortis, qui tam foedè velut latrones, aut proditoris rei capite mulctati forent. „Ad ea Otho, intelligere se, ait, quantis demersis malis essent; quantopere ab adversariis premerentur, quam illorum nefaria amentia, qui miserorum bona, & sacerdotis jura occupassent; & demum, quos domo, & patria semel expulissent, eos infidiis, & perpetuo bello vexare non desisterent. Quod si jacturam reparare, & res ruentes sistere volumus, duce eo opus est, qui quidem intrepidus etiam sua virtute hosti terribilis sit. Quod cum à me abesse videam; totque nobiles viros amiserimus jam præliis adversis, magnisque calamitatibus fracti, abstineamus, quæso, paululum à certamine, dum partes nostras ita muniamus, ut si fortuna belli denuo tentanda sit, superiores evadere possimus. Neque tamen ego hæc dico, quod detrectare pericula velim, qui pro restituenda nobilitate, sedeque recuperanda mortem ipsam libens oppeterem. Atque utinam pro animo vires suppetere: certe jam fugæ, & miseriarum finis foret. Quod si me duces vultis, hac lege arma sumamus, atque cum adversariis ita congregiamur, ut non de vita; sed de potentatu certemus. Hactenus ferrum stringemus, tela vibrabimus, vulnus inferemus dum hostis armatus adversus nos stabit: si arma fugiens abjecerit, veniamque petierit, parci jubeo, nec ultra victoriam ira, aut ferro grassetur. Temperantiam, moderationem, & clementiam vel ducis, vel pastoris imitemini, qui sine dissimulatione, remisso odio, illi ignoscere paratus est, suum qui fratrem occidi jusserit. Vindicta sit penes Deum omnipotentem, qui flagitia, & scelera pulchrè ulciscitur: nec mites, & mansuetos unquam deferit. Post hunc sermonem Novariam versus ire pergit. Sequuta est eum multitudo exulum: convenere deinde frequentes eo, quicumque Turriano nomini infensissimi ad partes, & amicitiam Vicecomitis accesserant: & cum haud exigua manus videretur, Ticinum trajiciunt, atque Seprium usque effusi, oppido, & arce primo impetu potiuntur. Napus ubi occupatum oppidum ab hoste intellexit, filium cum peregrino equitatu obviam Vicecomiti præmittit; non tam ut cum hoste confligeret,

fligeret, quam ne latius populatores se effunderent. Accessere interim utriusque auxilia. Quicquid exulum sive de Mediolani, sive de vicinis urbibus foret, ex quo Turriani regnare coeperant, ii omnes domo per injuriam pulsi, spe recuperandae patriae injecta, ad Othonem confluebant. Exciverat Turrianus partim mercede, partim ex foedere, aut beneficio de proximis civitatibus multos. Ita cum utrique affatim copiarum adesset, propiusque confediscent, levibus praeliis se invicem lacebabant. Ceterum Napus domestici, & peregrini militis fiducia; quamquam numero haud multum superior foret, arcem, quam hostis praesidio munitam habebat, oppugnare tentavit. Huic se continuo cohors exulum opponit, & ne propius accedat, fortiter resistunt. Interim obsessi patefacta porta in eos erupere, qui oppugnationem apparabant; quos cum longius summovissent, superveniente hostili subsidio, intra moenia, & arcem nonnumquam compellebantur. sic aliquantisper uterque exercitus levi pugna, atque incursionibus decertavit: neque tamen altero superior erat. Otho cum suos ad praelium comparatos haberet; nec temere certaminis avidos continere intra vallum posset, congregi in patenti campo constituit. copias itaque castris educit. Turrianus contra aciem instruit. nulla pugnandi mora facta est: tela conjiciunt, tum collato pede, gladiis rem gerunt. plurimi vulnerantur: multi cadunt. In civili sanguine, & caede inimicorum Otho minime mansuetudinis, & humanitatis oblitus est. Nam cum vim adversarii tolerare non possent, in ipso ardore animorum, acrique pugna gladios reponi, ac civibus parci iussit, quos servare, non perdere cupiebat. Opportune igitur pro voto Othonis nox supervenit. ita a praelio, & caede cessatum est. Postero die Turrianus cum somno refectioni milites forent, novaeque auxilia accessissent, Vicecomitem ex successu prioris diei paulo negligentius agentem agmine facto adortur. Otho in aciem, ut in tumultuaria pugna fere usu evenit, copias sine ordine duxit. anceps certamen aliquamdiu fuit siquidem Othoniani foedum, & periculosum existimabant urgenti hosti cedere: & eo magis, quod pridie per clementiam ducis occasionem profligandi belli amisissent. contra Turrianus instabat suos hortans, & segnitiam adversarii accusans, cui in ipsa victoria quiescendum non fuerat. ita & metu periculi, & indignatione animorum acrius inter se pugnabant. Cadebant utrinque multi, dum quem cepisset locum quisque tueri nitetur; summa enim belli in eo certamine verti videbatur. Napus cum adversarii dimicationem vix ferre possent, agmen, quod subsidio laborantibus servabat, qua pugna acrior erat, immisit. tum impressione facta, inclinata acie, terga Othoniani protinus dant. Diffugere alii in propinquos montes, alii silvas petivere: pars ab his capiuntur, qui ubi fusos adversarios viderant, ad eos consecrandos a ceteris divisi itinera obsidebant, qua recursuri ad tutiora loca sperabantur. Aegre servatus Otho cum paucis Novocomum contendit. quem oppidani, atque eos, qui a fuga, & caede superfuerant intra urbem recipere noluerunt. Secundum duas adversas pugnas proscripta nobilitas non satis tutam etiam in ambigua fide Comensium extra oppidum moram existimantes, alpes versus abiit. Ad oppidum devenit, quod incolae Lurangum dicunt: quo in loco aliquandiu etiam in summa inopia subsistere. Otho cum fugam, atque necessitates nemo victu, aut pecunia sublevaret, ceu desperatis rebus, Canobium petiit, hoc oppido nomen est. continuo portae clausae sunt. Tunc aegre ab oppidanis, ut biduum saltem in finibus eorum commoraretur impetravit: per quod sane tempus saepius habito cum primoribus colloquio, tum precibus, & magna pollicendo eos ad se traxit: nec solum oppido receptus; sed milites pro opibus, & copia loci, tum cetera ad instaurandum bellum

A idonea accepit. Vagantes, & inopes profugi, posteaquam in locum tutum receptum Othonem cognoverunt, eo convenerunt. Accessit Simon Locarnas Turrianæ genti maxime infestus: Gulielmus quoque Marchio Montisferrati Turrianorum opibus invidens cum exulibus conjungitur. Justus erat exercitus, naves, quibus accolæ per Verbanum commeant cum delectis militibus Otho conscendit, atque noctu Angleriae arcem per vim cepit. divisas deinde copias Aronam contendunt. eam partem, quæ lacum contingit, classe appulsa, Simon Locarnas, quem navibus Otho praefecerat, oppugnare admotis machinis aggreditur. à terra vero Gulielmus Marchio cum mercenario milite propius muros subit. Anticipi oppugnatione arx, quamquam valido praesidio tenebatur, summo in discrimine posita erat, atque obsessi aegre à mœnibus oppugnantes propulsare poterant. Cassonus cognito arcis, & praesidii periculo, expeditum Germanorum agmen secum agens, extemplo hostem ab oppugnatione avertit. praelium ineunt. Mediolanensis juvenus Cassonum celeriter sequuta subsidio affuit. Longius certamen factum. Nam Turrianus, si tot copias denuo congregatas fuisset, debellatos propè adversarios existimabat. Otho, & extorris nobilitas reditum sibi in patriam ea victoria sperabant, suoque fuso exercitu, unde bellum repararent non satis cognoscebant. Mercenarii præterea milites cum duce velut ex professo odio dimicabant. In pugnam igitur utrique ruentes eadem ingentem edebant. Conferti & inferebant vulnera, & excipiebant. Tandem sustineri germanorum impetus non potuit. passim in fugam Othoniani vertuntur: & qua tutus receptus videbatur, diffugiunt. Otho, & Simon, ubi terrestrem exercitum fugatum novere, & Gulielmum cum paucis mercenariorum Ticinum versus fugere, relictis navibus, hic Comum, ille Novariam contendit. Præda major, quam caedes facta fuit. Qui desiderati sunt, ii fere in pugna cecidere. Nam potitus castris Turrianus, spoliis contentus captivos inermes, atque nudos dimisit. Ad Othonem reliquæ exercitus, & quicunque factionem nobilitatis fovebant protinus conveniunt: quos in concionis modum circumfusus alloquitur ea primum enumerans, quæ in exilio sustinerent. „ Quid deinde calamitatis, & funerum profugi à patria perpassi forent, quanta inimicorum ira, & rabies, à quibus nihil humani expectandum esset. „ Quare respiciat quisque non in commune tantum; „ sed ea etiam, quæ ad quemque privatim pertineant. Quod si suas, hostiumque vires aestimare voluerint, adeo recenti clade se depressos non dixerint, ut nulla erigendi reliqua spes sit. Martem „ communem ducant, & eam esse bellorum varietatem, ut nonnumquam ex inopinato, desperatissime rebus victoria reportetur. finem profecto exilii, & incommodorum adesse. arma iterum „ compararent: quicquid praesidii haberi potest, id „ omne contrahant: profecto enim cum adversariis „ lætioribus, ut puto, auspiciis dimicabimus. Hoc sermone recreati aliquantulum nobiles ad veteres hospites, atque amicos revertuntur. Interim Novocomenses, etsi à Turriano rebellaverant, illiusque fines hostilem in modum vastarent, exules tamen iacturæ exhaustos oppido recipere recusabant. quin etiam commeatus, & arma pernegabant. & erant in oppido non pauci, quos defectionis jam poeniteret, atque redire in amicitiam cum Turrianis velent. Instabat Locarnas, ut Othonis partes susciperent, eorum miserescerent, qui diuturna fuga ad summum inopiae compulsi essent; & ceu omnibus contumeliis opportunos adversarii armis persequi non desisterent. Metuendos vicinis civitatibus Turrianos, quorum ea esset insolentia, atque crudelitas, ut nullis conditionibus recipere patricos vellet, peregrinoque militi non in acie ferire, aut sternere, sed victos trucidare, atque morientes dilaniare jubeant: quippe

quippe sanguine magis, quam victoria gaudentes, sacrorum præterea Præfulem per contemptum Pontificiæ auctoritatis sede, & finibus arceant: eos dumtaxat in urbe patiantur, qui odii, & scelerum satelites sint, quique exulum bona possideant. His, atque talibus verbis pars oppidanorum ad Simonem coire, in occulto colloqui, consilia ad res novas agitare, sollicitare ceterorum animos. Suspecta res fuit, qui Turriano nomini favebant. iurgia primum; tum vero dissensio, atque seditio inter cives facta: inde ad arma concursus. Duces factionum cum armatis in publicum prodeunt. Episcopus urbis pro his stabat, qui Othonem iuvandum censebant. Huic Locarnas se adjungit, atque diversa sentientes invadunt. certamen mox crevit. vulnerari multi; plurimi cadere: pugna nequaquam partim virtute Ducis, tum multitudine eorum, qui Episcopum affectabantur diu esse: in Prætorium pars altera confugit, quod præsidio, & munitionibus firmat. inde noctu, atque interdium, velut ex firmo propugnaculo tela in adversarios mittere; ac interim descendentes cominus decertare. Tandem, cum non ultra vim oppugnantium sustinere possent, relicto præsidio, urbe cedunt. Simon devictis adversariis, factum omne Archiepiscopo significat, & urbem, & cives, qui domi remanserant omnes in voluntate, & partibus ejus manere significat. Haud cunctatus Otho patricos, & amicos de vicinis locis excivit, coactoque tumultuario milite Comum proficiscitur, atque in oppidum receptus magis profligandi, quam instaurandi belli consilia capit. Tantique momenti adjuncti Comenses fuere, ut Otho, sive mutata fortuna, sive quod majoribus viribus bellum reparaverat, in omni pugna dehinc superior factus, adversarios tandem debellaverit. Hoc anno, qui fuit millesimus ducentessimus septuagesimus septimus ab Christi natali, Lambertini gens vetus, & opibus potens cum clientibus, & amicis Bononia pulsi fuere. Thomas item Aquinas subtilis philosophus, & sacrarum litterarum interpres minimè contentiosus, cum multa, & spatiosa volumina *de ratione differendi, rerum natura, moribus, atque de religione nostra* omnium accuratissimè, & verissimè conscripisset, è vita discessit, & haud ita multo post in divos relatus tanti inter recentiores scriptores nominis fuit, ut in hanc usque diem frequentissimi illius doctrinam capebant, & sectam fortissimè à ceteris discrepantes tueantur. Hoc eodem anno Innocentius Quintus ab ordine Prædicatorum ad Romanum Pontificatum assumptus est. Interea Otho Comi, ut supra diximus, bellum renovare, eos ad se accersere, qui ad amicitiam venerant, aut aliquo beneficio affecti erant. Conspiraverant cum eo finitimarum civitatum Principes. hi partim imperio, & gratia; partim mercede magnas copias secum duxere. Juventus quoque Comensis frequens, & alacris nomina dedit. Majore coacto numero, quam sperabatur, in oram Verbanum exercitus inducitur. agros populantur, vicos diripiunt. Accolæ lacus magnitudine detrimentorum deditionem faciunt. Ad Larium traductæ mox copię tractum omnem usque ad Adduæ hostium una excursione subigunt. Leucum oppidum, & Clavate in potestatem, & ditionem Othonis deveniunt. Napus, cum adversarios tantam vim militum coëgisæ præter opinionem videret, atque undique auxiliares accedere, ac terrore periculi vicos deserui, & oppida deditionem facere, ad salutem suorum pertinere ratus, ne hostis latius populando vagaretur, filium cum externo præsidio Canturium usque præmittit. Otho sive odio civilis sanguinis, sive quia arma civilia non satis pia; quamquam sedem, & dignitatem jure collatam recuperare nisi certando posset, à bello tamen, & certaminè abesse voluit. Ricardo itaque Langusco homini veteris familiæ, & exercitato belli gerendi summam tradidit. ipse vero inermis, sed reverentia Sacerdotii venera-

A bundus, quo plus auctoritatis inter suos haberet, Pontificio indutus amictu, & ceteto ornatu pro majestate religionis insignis, aurea cruce antecedente, stipatus præterea longo Sacerdotum ordine Archiepiscopum se dici, & ita salutare voluit. subsequebatur exercitus. Ad eum frequentes non exules tantum, sed & veteres amici, aut adversariorum potentie æmuli conveniebant. Non cessabat rebus suis undique vires, & præsidium quærere. Principibus civitatum post victum hostem pecunias, & imperia in suos polliceri, omnes benignè excipere, si quos insensos arbitrabatur, eos humaniter alloquendo magnis pollicitationibus sibi conciliare, nonnullos in partibus, ut perseverarent hortabatur. sic non modo populares; sed etiam externos homines in fide, & officio continere, tum ad subeunda pericula promptos, & ad opem paratos reddere. Hoc animorum habitu, rebusque ita firmatis, insignia sacerdotii proferens ad oppidum, cui Decimo nomen est, pervenit. Napum sollicitabat appropinquans Otho. præterea domesticos tumultus verebatur. Quare ne ancipiti hoste & domi, & foris circumveniretur, non solum in urbe ad majores copias cogendas aliquamdiu commoratus est, sed; ut res urbicæ custode non carerent, cum Magistratus unus, & reddendo juri, & armis tractandis sufficere haud posset, duos Mediolani Prætores constituit, Pontium Amatium Cremonensem genere, & Oldradum Tangentium Brixianum: ut partito munere, prout res, & tempus exigeret, alter in expeditiones proficisceretur, urbana negotia alter curaret: in primisque caverent, ne qui motus inter cives orirentur. hæc illi sollicitudo, hic timor erat. satis sibi incursiones hostium arcere in præsens videbatur; nam eo numero militum, quos secum duxerat, manu decertare periculosum existimabat. Pontius interea cum equitatu, atque peditatu Decimum versus pergit. Napus cum Francisco patruele subsequitur; nam uterque, & principatum inter suos, & velut ex æquo rempublicam tenebant. Progressi in conspectum hostium venere. Insolentius tunc, atque audacius verbis, & conjectis telis se invicem continuo laceffunt. ira, & cupido vindictæ utrosque accenderat. factionum Duces, & quibus cura exercitus data erat, hi ordines circumire, atque suos hortari coepere, *alacres pugnam ineant, atque intrepidi congregiantur: & quando prælio res committatur fortissimè quisque depugnet.* Adhortatione Ducum acriter concurrunt. Pugnatum est atrocissimè. neque studium, nec virtus ad pugnandum deerat. non milites tantum telis, aut gladiis se confodiebant; sed Duces ipsi, ubi aciem inclinatam videre, de summa rerum desperantes in confertissimos hostes procurrunt. Dimicando alii interficiuntur; captivi alii in manus inimicorum deveniunt. Pontius in prima acie pugnam ciebat quicumque se ingerens. hic equo prostratus occubuit. Franciscus item Turrianus gladio suffoditur. Napus etsi desperatæ jam res essent, fugientium tamen agmen sistere conabatur. Equo perterrefacto, turba præterea, ac multitudine fugientium oppressus sine vulnere in terram decedit, quem jacentem, & pulvere foedatum inimici circumfistunt, atque studio vindictæ obtruncare parant. Sæviebat Ricardus Gotosfredi necem ulturus: interfectusque fuisset, nisi Otho in ipso ardore pugnæ, & inter micantia arma instituti sui minimè oblitus intercessisset. Plus clementiæ, quam iræ, & vindictæ indulgit: minimè insultans eum servavit, à quo supplicium sumere debuerat. Cæde, & captivitate procerum universus dissipatur exercitus, eoque prælio, eaque strage gens Turriana debellata est. Post eam victoriam, & Urbem, & Sacerdotium Otho obtinuit. Atque ut facti memoria perpetua staret, diem qua profligatum bellum fuit solemnem, & maxime religiosum celebrari dehinc voluit. Mediolani posteaquam nuntiatum fuit fuscum exercitum, clademque acceptam à

Turriano, & ita res afflictas esse, ut de cetero nulla salutis spes, nedum reparandi belli consilia relinquerentur, tantus terror cives invasit, ut palam de facienda deditione loquerentur. Pauci arma capiunt, quamvis custodiendæ, defendendæque urbis ratio vix constaret. Erant qui dicerent *perseverandum in bello minime esse: & satis fidei, & beneficiis, quæ populus à Turriano accepisset, satisfactum esse: nec perturbari fortunas civium pertinacia oportere.* Alii, quorum animi ab anteactis cædibus, atque rapinis agitabantur, metu vindictæ iterum fumenda arma censebant: *satiùs esse in prælio mortem oppetere, quam ad libidinem inimicorum inermes, atque supplices gravissima quæque sustinere, atque pati: experienda omnia non studio partium; sed ne perpetuo efferatis, & truculentis dominis serviant.* Accendebat irritatas mentes Oldradus: *non temperare à sanguine, & cadibus victores; quocumque modo exilii detrimenta, & armorum jacturas emendare: odium, & iram in tempus repositam, ut acerbius deserviant: eam hominum naturam, qui diuinius patria expulsi fuere, & hunc esse bellorum civilium exitum; ut qui victores evasere, nec rapinis, nec cadibus finem faciant, modo incolumitati suæ prospiciant.* Inter hos tumultus, & hujusmodi querimonias Cassionus (non enim prælio interfuerat) relicto oppido, omnique deducto præsidio, Mediolanum contendit. Clausæ portæ ex terrore adversi prælii stabant: quas custodes aperire cum nollent, per vim juvantibus paternis amicis eas refregit. Alienatos, & infensos complurium animos cognoscebat: nihilominus relicto ad custodiam portæ præsidio, ipse cum paucis in forum mercatorium, quod Burletum novum appellant, pervenit. „Ibi in armis populus stabat: supplex, & cum lachrimis fidem, & auxilium implorare coepit: multa, & vetera suorum beneficia identidem commemorans: quantum plebi indulgissent, pro cuius libertate nihil incommodorum detrectassent. Jam tres & viginti annos continenter cum illis pugnatum, qui miseram plebem improbo quodam dominatu premerent: & meliore conditione, atque imperio fuisse sub Turriano, quam cum olim principatum gens patricia obtineret, à cuius vi, & injuria nemo tutus erat. Neque tantopere adversam pugnam expavescant: quippe memores plus cladium inimicis illatum, quam ipsi acceperint: neque subsidii spem præcisam, aut res adeo debilitatas, ut repari non possint. Quod si non aliud ad sustinendas calamitates belli moveat, exemplo ducantur adversariorum, quos tot jacturæ exilii, & adversæ pugnae numquam ita fregere, ut non etiam adversus victorem insurrexerint, arma paraverint, vel iniussissimo anni tempore. ne putent una dimicatione de rebus, & imperio actum. Sustineri posse paucis opibus, & modico præsidio adversariorum potentiam. Hæc, & alia hujusmodi cum dixisset, quæ ad movendas mentes pertinere videbantur, nemo unus lachrimis, aut precibus calamitatem miseratus opem promisit. Ita repudiatus ab his, pro quibus acriter contra factionem, & potentiam paucorum pugnaverat, clam patria cedens in Laudem Pompejam contendit. Ingressu oppidi prohibitus in suburbanis pernoctavit. Postridie Cremonam petit: inde quoque convitiis affectus non sine dedecore fugatus Parmam se recipit: quo in loco *benignè exceptus fuisse* traditur. Ceterum Mediolanenses cum res Turriana sine spe jaceret, constaretque Cassionum Parmam potius exulatum, quam ad opes quærendas abiisse: ut venia Populo, pax, & salus aliqua afflictis rebus daretur, armis, dissensionibusque civilibus finis tandem fieret, *non amplius repugnare Pontifici, aut exules, & Pastorem patria, & sede arcere* constituunt. Igitur de publico omnium consensu oratores ad Othonem mittuntur, qui dicerent: *reditum in patriam de voluntate civium patere, locumque, & dignitatem sacerdotii Antistiti concessam: hoc stare in animis cunctorum, ut divisa civitas, & tot intestinis discor-*

diis dilacerata in unum tandem coeat. Hoc tantum rogare, ut laboribus publicis, & civili sanguine parcatur: sitque victoria salus, & tutela tam publicis, quam privatis negotiis; ut scilicet quies à similitate, & vetere illo odio fiat, ut meliore conditione in pace permaneant. Sciat denique urbem, divinaque omnia in sua potestate esse. Pauca de lenitate sua is primum locutus est, quo minore in metu ii essent, qui arma adversariorum secuti fuerant. „Consolatur, & recreat supplices: & quando victoriam publico nomine gratulatum veniunt, „jamque urbs in potestate præfulis foret, conservare se omnes velle, daturumque operam, ne qui eorum violarentur. Gratias agendas Deo, quod „uno conflictu peracta res sit, jamque expiatis dolores, & finita odia: ne aut iras, aut studia vindictæ timeant. Ab hoc sermone collaudato civium animo, & obsequio, legatos domum remittit: tum ut pro dignitate Religionis, & reverentia Sacerdotii extra omnem tumultus, & novandarum rerum metum, depositis etiam armis recipi à civibus posset, nobiles captivos Comensibus custodiendos tradidit. In arce Baradelli in vinculis durius habitum Napus, Musca, Heroch, Lombardus, Caverna. Horum quidam tetro carcere macerati, ac tædio longinquæ captivitatis miserandum vitæ exitum habuere. Napum annales quidam tradunt *squalore, & illuvie putrescente corpore, natisque subinde pediculis foedissime absumptum.* Nec cessavit in morte eorum ira, quos in superbo dominatu is contumeliis, & cladibus affecisset. siquidem de carcere per terram pedibus tractus, ut fera in silvis sine ullo funeris honore sepelitur. Ita turbæ, & seditionis popularium securus Otho, priusquam viam ad urbem ingrederetur, ab ira, & impetu patriciorum præcavendum existimavit. Advocata igitur concione, conversus præcipue ad eos, qui patria, & bonis mulctati, exilio, & cæde propinquorum exasperati cupidine vindictæ exardescabant, in hunc modum verba fecit: „Quotiens exilium grave, & diuturnum, gesta cum civibus bella, acceptas subinde clades, & post continuata damnis damna, tot duces, militaresque viros amissos, unam hanc pugnam, qua propè debellati hostes fuere intueor, hoc vobis affirmare aui sum, omnipotentem, & iustissimum Deum semper ab iis stare, qui mitiore ingenio iustiora arma tractant. Nam quamvis de imperio certetur, & pro recuperandis bonis, atque patria arma sumpta sint, hæc tamen in hostem stringere gladios, vulnera inferre convenit, dum armatus in acie reputat: ut scilicet pugnando superiores fiamus. In prostratum adversarium, & qui abjectis armis veniam petat, sæviendum minime est: neque infestum animum, nisi dum manus conferuntur, excitare oportet. si terga dat hostis, sanguine, atque cadibus parcendum est. Post victoriam armatum animum, & cruoris avidum gerere ejus profecto est, qui nihil humanitatis in se contineat, bellorum vices ignoret, aut Deum criminum, & crudelitatis vindicem non putet: qui eos in primis ex alto respicit, ac protegit, atque in omni pugna victores, etiam cum afflictæ opes videntur, facit, qui in prostratos, & victos desævire nesciunt, & mansuetudinem potius, quam immanitatem sectantes ignoscere magis, quam ulcisci cupiunt. Quod si fortè quispiam tam vecors, aut adeo aversus à religione, & à superiorum cultura manet, ut non credat Deum mortalia curare, atque pro misericordia, & clementia nihil nobis gratiæ reponi: is quamquam vel dictante in contrarium conscientia dissimulare metum Dei, & ingentem impietatem non possit, obsecro, quæ dura, & calamitosa per tot annos sustinuerimus, & proximæ pugnae eventum consideret. Nam, per immortalem Deum, quis sibi tantum polliceri aut sua, aut militum fiducia, & numero auxiliorum ausus foret, ut post rem totiens malè gestam, tot exercitus fusos, & spo-

„spoliata castra, tot cohortibus caesis, iniquissimo
 „anni tempore, cum non tantum de possessione Sa-
 „cerdotii; sed de vita, & libertate dimicaremus, u-
 „no congressu, atque uno, ut ajunt, ictu patriam,
 „dignitatem, & opes recuperaverimus, tantumque
 „poenarum ab inimicis expetitur, ut expiatus pla-
 „ne dolor, atque injuriis latus sit. Hoc non
 „patientia in rebus adversis, non vigore, & con-
 „stantia animi, non robore militum; sed beneficio
 „divino effectum est; quia scilicet justius arma sum-
 „psimus, contenti potius injuriam propulsare, quam
 „inferre. Adversarii ante potentissimi crebris infla-
 „ti victoriis de nostra servitute, & universae gentis
 „excidio cogitabant: nunc partim in acie caesi ja-
 „cent; alii catenati custodiuntur. Deo nimirum hæc
 „accepta referre debemus: illi gratias agamus: ille
 „scelera, latrocinia, rapinas, & mortes ulciscatur:
 „nos jam odii, & simultatum finem facere decet.
 „neque insolenter, & crudeliter victoriam in adver-
 „sarios exerceamus: injurias victis condonemus. pel-
 „latur ex animis nostris omnis vindictæ cupido: pa-
 „triam reconditis gladiis, benigneque animo ingre-
 „diamur: tecta, & domos, in quibus nati, educa-
 „tique fuimus, incruenti revisamus: satis, superque
 „tot peremptis (quod dicere horreo) parentavimus:
 „plus nimio gladii cruore maduerunt: nimis multa
 „vidimus funera: Deum ignoscendo, & miserando
 „propitium nobis reddamus. An Divinum numen
 „amicum, aut prospera eventura nobis putatis, si
 „in furore domestico, & publica clade perseverabi-
 „mus adversus eam charitatem, quam in nobis na-
 „tura, patria, & lex sanguinis ingeneravit? Ego a-
 „troces, & indignas injurias, propinquorum cædes,
 „& quicquid maleficii editum in nos fuit, libens ad-
 „versariis ignosco: & quando in patriam, qua diu
 „caruimus, & pro qua penè ad internecionem pu-
 „gnavimus victores revertimur, non ut hostes, aut
 „exitiabiles tyranni cædibus, & rapinis inhiantes
 „portas ingrediamur; sed mites, atque clementes,
 „nihil in perniciem alterius moliti auspiciis tran-
 „quillitatis, & perpetuæ pacis faciamus. Pacata sint
 „omnia: nihil importunum appareat: omnes se pa-
 „cati ostendent velim. Plaudat populus: secura nos
 „civitas spectet; haud enim fas est mansuetum, &
 „vigilantem pastorem nisi servato, & exultante gre-
 „ge, Sacerdotium accipere. Hac oratione mitigati
 „animi, remissaque ira fuit. Acclamavere omnes: *cum*
 „*armis deponenda esse odia: & quod benignus Pastor suade-*
 „*ret, id libenter facturos esse.* Tunc Otho ex Religio-
 „nis instituto, & cærimoniarum ritu mitra, & pasto-
 „ricio ornatus pallio, antecedente aurea Cruce cum
 „lituo, quo populis venerabilior foret, Mediolanum
 „versus ire pergit. Univerfa protinus effusa est civi-
 „tas: sacerdotes primi generatim quisque pro habitu
 „sacrorum, & animorum psalmos, & hymnos Deo om-
 „nipotenti concinebant. Subsequebantur cives oliva-
 „rum ramos gestantes; quasi pacem perpetuam, &
 „tumultus, ac seditionis jam finem pacifera fronde
 „portendentes. Succlamavere omnes, & qui præce-

A | debant, & qui prosequerentur *servatorem advenisse.*
 Multis manare præ gaudio lachrimæ, ubi venientem
 Archiepiscopum in clarissimo pacis habitu ad se con-
 spiciebant: terram herbis quidam insternere: & pro-
 cumbentes religiosè salutare: lætitia, & exultatione
 civitas plena erat. In ædem Divi Ambrosii, hoc est
 in sedem suam Otho deducitur. Aræ frequentes ac-
 censis odoribus fragrant: ingentes erant precanti-
 um, & gratulantium voces: suscepta pro salute, &
 concordia civium vota persoluta magnificè fuerunt.
 Tum his peractis, quæ ineundo Sacerdotio ex institu-
 tione divina conveniebant: *ad populum præteritis malis*
affectum pacem, quietem, atque otium attulisse, inquit.
 B | *jam Dei benignitate cadibus, & praliis finem factum: et-*
iam iis omnibus malis, quæ civiles dissensiones afferre so-
lent: si modo sibi invicem reconciliati verè in gratiam ul-
tro, citroque præteritorum facinorum data, acceptaque ve-
nia, redierint. Nemo posthac per conscientiam contractæ,
paratæque noxæ aut sibi metuat; aut alteri fraudem molia-
tur. Cæterum de urbis statu solliciti servanda concordia,
& privato commodo animos intendatis. Deo tamen ante
omnia laudes, & grates jugiter agamus, ut à metu, & ve-
xatione liberi in amore, & otio vitam traducamus. Ab
 hoc sermone à templo in prætorium transivit, con-
 vocatisque in curiam primoribus populi, ex sacrorum
 præfide de omnium consensu dominus urbis consti-
 tuitur: ut is suo jussu, atque nutu urbana negotia ad-
 ministraret, quibus Sacerdotum jura disponderet. Sed
 ne diei memoria inhonorata maneret, & velut ingra-
 ti nihil decernerent, quo acceptam victoriam Deo
 optimo maximo testarentur, constitutum lege fuit,
ut qua die Turrianus pralio devictus fuit, atque deinceps
latiora evenissent, ea sancta, & religiosa apud eos mane-
ret. Duratque dici religio, & observantia: siquidem
 Agneti virgini dicata ara fuit non Mediolani tantum;
 sed per urbes, & oppida, quæ sub potestate, & di-
 tione Vicecomitis fuere, cui publicitus solemnia mu-
 nera offerrentur. Festusque dies *in commemorationem*
tormentorum, & cadis sanctissima puella foret: qua de-
 D | precante is victor evasisset, qui justiora bella tracta-
 ret. Jura præterea non dat prætor: neque lege agi
 ea die licet: publico ferè omni munere abstinetur:
 quin etiam plerique à privato opere cessant. Hæc
 est diei reverentia, hic sacrorum cultus, hoc perpe-
 tuum victricis familiæ monumentum. neque hac tan-
 tum pietate Deum prosequutus est; sed item muneribus
 ex honore eos affecit, qui relictis adversariis, et-
 iam armati ad eum transiverant, sperantes ex victoria,
 & liberalitate præmia. *Tres familia in annalibus le-*
guntur Marcellini, Mirabiles, & Castoni. Hi bene-
 E | ficio Othonis in patriciatum, & curiam venerunt:
 Cataneorum appellationem deinde fortiti. Qua di-
 gnatione perpetua illa factio Vicecomitum fuit. Ge-
 sta sunt hæc anno post natum Christum millesimo du-
 centesimo septuagesimo octavo, Rodolpho Roma-
 norum Rege. Per quod forte tempus, post duos
 Pontifices intra quindecim menses raptos, Romana
 Ecclesia non habebat summum Sacerdotem.

GEORGII MERVLAE,
ALEXANDRINI,
ANTIQUITATIS VICECOMITVM
LIBER VI.

*Bella, & conjuratio in Othonem : prodigia in ortu Matthæi : Gulielmi captivitas :
nuptiæ Galeacii : Matthæi exilium, & origo factionum referuntur.
Henricus summæ rerum designatur.*

SACERDOTIO, & rerum potitus Otho, cum ii ferè urbe nullo cogente cessissent, qui in Turrianorum partibus perseverabant, & se proinde suspectos, atque invisos victori existimarent: quamquam illius lenitas, & clementia nota omnibus esset, quasi tutiores foris, & in aliena terra, quàm domi, & in patria viverent, ipse ad statum civitatis componendum animum convertit. Eos primùm urbe, & magistratu summovet, quos adversarii reddendo juri præfecerant. Administratio rerum urbanarum Ricardo Langusco traditur, cujus fidem, & egregiam operam in debellando hoste is expertus fuerat: Magisterii tempora contraxit, Præturam, quæ ferè annua fuerat, semestrem constituit, diesque solemnes Kal. Januarias, atque Quintiles designavit, quibus Prætor magistratum acciperet. Ita judicia petentibus ex æquo sine vi, & injuria reddebantur. Jam tempus præturæ exierat, atque Albertus Fontanæ urbi præficitur. Otho interim nihil magis quærens, quàm beneficio, & clementia opes firmare; plurimum enim spei in charitate civium reponebat, neminem eorum, qui cum Turriano aut fenserant, aut militaverant in exilium egit, aut bonis multavit: & si quos averfos, & alienatos à se noverat, necessitates domesticas, & inopiam sublevando, multa insuper largiendo, alios in pristinum statum restituendo eos sibi conciliabat, ut facile quivis diceret, illum nec ambitiosum, nec studio vindictæ duci; sed humanissimi pastoris, & moderati gubernatoris munera exequi. Nihilo tamen secius propinquas civitates in amicitia continere, primores vicinarum gentium honorificè appellare, præmiis interim afficere, & quibuscumque poterat officiis sibi adjungere. Exacto anno in prætura idem Albertus reficitur. Sed quamvis in vicinis conciliandis; augendisque amicorum opibus plurimum eniteretur Otho, tamen Turriani quidam, quamvis longius summoti forent, ad societatem, & rerum novitatem principes populorum sollicitabant: Comi Advocatos, Brixiaë Maciones, Laudæ Antegachos, Cremonæ Cavalcaboves. Hos omnes beneficiis, & adhuc multa pollicendo; eorum quoque cognatos, & amicos Otho sibi devinxit. Una erat Cremonæ Amatorum familia divitiis, & affinitatibus potens. eam semper Otho insensissimam sibi habuit. Sed quamvis undecumque res muniret, non tamen à cura bellorum liber erat. arcem Montorfani valido præsidio Turrianus tenebat finitimis infestus: animos etiam ad spem turbandæ civitatis iis faciebat, qui veteris offensiæ memores parum sincera fide reconciliati Vicecomiti erant. Hanc in primis Otho obsidere, atque expugnare parabat. Desederant Cremonæ reliquiæ Turriani nominis. Ratus itaque minimè duraturam fidem, & amicitiam cum ea civitate, in qua adversarii quotidie versarentur, Turrianos inde ejici curavit. Sed dum nimis amicos fovet, & bene meritis præmia tribuere studet, adeo iram, & odia irritavit, ut per vicinæ

A urbis rebellionem instauratæ sint adversariorum vires, & de summa rerum periclitatus fuerit. Duæ veteres, atque potentes familiæ ceteros cives in Laude Pompeja anteibant Vistarini, & Antegachi: hos velut dominos inter suos constituere parat: atque ut metu, & armis ad ea, quæ imperassent, cives cogerent, his Bergagi arcem; hoc enim oppido nomen est, custodiendam cum magno præsidio tradidit. Qui continuo agros adversariorum passim populantur, nisi, graviora minantes, jugum accipiant. Quare populationibus, & minis laceffiti cives, simul etiam quod pro indignissimo habebant, iis parere, quibus pares forent, Cassionum Parmæ exultantem ad se accersunt, qui haud cunctatus cum Germano milite quantas potuit copias secum duxit. Propinquo non contenti Laudenses auxilio, Raymondum Turrianum, quem supra diximus Aquilensi Ecclesiæ præfectum fuisse, de Venetis evocant. ita duo patruales cum exercitu Laudem ingrediuntur. Multitudo erat ingens, ducesque strenui: & cum non solum prohibere populationibus hostem, sed etiam acie decertare possent, Bergagum oppugnare aggrediuntur, quod, pulso adversariorum præsidio, primo impetu capiunt. Deinde Lambrum transmissi Melegnanum, & Landrianum, cum nemo resisteret, occupant. Inde ad Adduæ ripas reversi quicquid locorum à Tricio usque ad plebem Uncini pertinet ferro, & igni permiscunt: ingentem hominum, ac pecudum prædam abducunt: nemo finibus arcere, aut obviam ire audebat. Transgressi deinde fluvium arma iis inferunt, quos eo in tractu amicos Otho habebat. Trivilium, & Caravagium haud ignobilia oppida ad deditionem compellunt. inde Cremam adorti capiunt, diripiuntque, atque injecto igne, funditus prope absumunt. Rursus cis Adduam regressi, atque effusius excurrentes Papiam usque perveniunt. Ager erat opulentus, unde præda major facta: incendiis cuncta vastabantur. Rustici, atque agricolæ, ut se, & sua servarent, in urbem confugiunt. Oppidani, cum milites ad fines defendendos, aut ad hostem procul arcendum non suppeterent, conclusi intra moenia, atque per stationes dispositi stabant. Servata fuit amnis beneficio pars agri incolumis; eo enim velut limite ab incursionibus distinebantur prædatores. Insula est trans Adduam Fulcheria nomine, hanc invadunt, direptamque omnem præter Ripam altam tenent. Vagabatur impunè hostis: deserta præsidiis omnia erant. Othoni satis in præsentia videbatur, si clausis portis ab hostili vi, atque impetu cives defenderet. Turrianus propius Mediolanum deprædatum progreditur, magis ut animos civium tentaret, quam quod prædam, cum res suas in tutum cives comportassent, agere speraret. Infedit haud longè à moenibus speculaturus quid intra urbem pararetur. Ubi pro portis excubias, & stationes in muris dispositas conspexit, & ita territòs adversarios, ut ne acie quidem dimicare

auderent : ferocior paulo ab metu, & ignavia obfessorum infesto cum praesidio in Ticinensis portae suburbana invehitur, atque subverso vallo, fores templi Divi Eustorgii coniecta hausta percussit. Proximus erat furnus, de quo panes rapuit: tum ferocius insultare obsessis coepit, ut eos per ignominiosa verba in pugnam provocaret. Otho patienter injurias, superbiam, & temeritatem hominis ferre: cives vero detrimenta belli non admodum aegre pati: quamvis non temere alias graviores vastationes perpessi essent. Ceterum Cassionus, posteaquam nec tumultus in urbe fieri, nec pellici ad pugnam posse oppidanos cognovit; ne tempus inter timidos, & qui vallo, & stationibus se tuebantur sine praeda, extra spem potiundae urbis tereret, cum loca alia, & opimos campos petere posset, omissa oppugnatione urbis, Bergomum versus cum exercitu ire pergit. Ex itinere Bergnanum oppidum aggreditur, in quo expugnando aliquot dies consumpsit. Per quod tempus hoste paulo longius amoto, jam vi, & tempestate belli aliò conversa, aliquantulum Otho respiravit, tumultuariumque militem congregans Adduam versus contendit: non ut praelio decertaret; sed ne in tanto rerum discrimine clausus, obsessusque desideret: Cassianum se recepit fretus maximè fluvii opportunitate. Jam Bergnano Turrianus potitus erat: inde agmen adversus hostes movet. Vix se ostenderat cum repente praesidio Othoniani cedunt. tunc Otho abundante adversariorum multitudine, & fuga suorum perterritus relicta Cassiani arce, Mediolanum revertitur. Fugientes Turrianus insequi noluit. Satiùs illi visum est desertam ab adversario arcem praesidio munire, & fluvii accolae in potestatem redigere, quam vagos, & transverso itinere diffugientes consecrando caedibus indulgere. Vaprium per deditionem recipit: victor deinde passim agros vastat, & populationes perpetuas effusius exercet. intoleranda erant belli damna: nihil integrum circa urbem manebat: in summo periculo, atque discrimine res versabantur. Ad peregrina igitur auxilia Otho cogitur, quando domestico milite injuriosum, & potentem hostem propulsare, & populationibus prohibere, & patriam a tantis incommodis suis armis tutari non posset. Erat Gulielmus Montisferrati dominus vetus nobilitatis amicus, cujus fidem, atque animum pridem etiam adversus eundem hostem expertus fuerat. hunc pacto quinquennali stipendio, ad se evocat. Accepta pecunia ex suis, & finitimis urbibus milites conscribit. Mediolanum continuo petit: quem adventantem cum plausu, & clamore universus populus excepit. Ingens erat laetitia, quasi advenisset is, qui hostem finibus arceret, & patriam à tanta calamitate, & obsidione liberaret. Accidit laetæ civitati aliquid adversi: casu equi contractis cruribus, Gulielmus Pusterleus moritur, cujus desiderio mœsta, velut in publico luctu, civitas fuit. Aggregato mercenario milite, & duce strenuo, atque amico, Otho statim urbem egreditur, atque in eas regiones contendit, quas adversarii deprædati fuerant, & praesidiis tenebant. Tricium aggrediuntur, ac sine mora capiunt; deinde Vaprium obsident. Raymundus cognita obsidione oppidi, cujus opportunitas in trajiciendo flumine magna erat, cum expeditis cohortibus illuc festinat. Superveniente adversario obsidionem solvit Otho, nec tamen longè digreditur. castra utrique in propinquo locant acie quamprimum decertaturi. Abstinerunt tamen pugna: satius visum est conditionibus rem componi, quam Martis fortunæ se committere. Induciæ inter eos factæ: arx Vaprii Conrado Castellioneo, & mercatoribus, velut sequestro custodienda traditur. Disceptator, & arbiter pacis Gulielmus in hunc modum conditiones dixit: *Quicquid injuriarum, & maleficia longinquum bellum importasset, id omne remittatur: captivi ab utraque parte gratis li-*

berentur: erepta bona sive agri, sive res moventes sint, quæ compareant Turriano restituantur: arces, & oppida, quæ in finibus Mediolani haberet, communes amicis suo praesidio custodiant. Acceptis conditionibus ab armis discessum est. Verum haud diuturna pax fuit: exulceratis vetere, ac infesto odio animis, cum de principatu, & dominio urbis uterque contenderet. ita ludificati Turriani possessione veteris agri, & arcibus fraudantur. Post hæc cum quidam abalienati hac perfidia viderentur; alii vero sibi timentes iis locis se continerent, in quibus amicorum praesidio à vi tuti essent: quoquo modo eos tollere parat, quos dubiæ fidei, & novi alicujus consilii suspectos habebat. Convivium magnificè instruit. invitat amicos simul, & eos, quos inclinatos ad defectionem, & fraudem suspicabatur. eo scilicet consilio, ut inter epulas trucidarentur. haud occulta fraus fuit. Duo Conradus Castellioneus, & Ubertus Uncinas, quos in primis perdere cupiebat, cognitis insidiis, cædi se subtrahunt. Hic in castrum Uncini profugit, quam arcem munitissimam habebat: recepit Gotofredum insuper Turrianum cum praesidio quingentorum militum. Castellioneus in Laudem abiit. Non defuit Ubertus ulciscendæ proditioni; nam statim Gotofredum ad finitima loca evastanda emisit, qui latè excurrrens intoleranda detrimenta usque sub moenia urbis inferbat: nonnumquam cum adversariis pugnans multos eorum cepit. Missi sunt Laudem captivi Mediolanensis juventutis milites circiter quingenti, qui vincti custodirentur. Per id tempus Papienses aegrè ferentes tantum prædæ ab agris abductum iri, magis ulciscendi studio, quàm ut spoliatione Laudensium accepta incommoda refarcirent, fines illorum deprædantur: præda onustos Turrianus juxta Albrate adortus (hoc vico nomen est) dimicando fudit, stragemque non parvam de his fecit. Non erat sine metu insidiarum Otho, abalienatis quorundam à se animis, qui etiam cum inimicis sentire dicebantur, eoque gravius bellum adversus se reparari videbat. Pecuniam igitur Gulielmo haud parvam, ut novos conscriberet milites misit. Hic continuo mercenarios, quoscumque potuit contrahit: Castrum Uncini circumfidet, quod haud ita multo post per vim captum solo æquavit. Interim Otho, quamvis vacuus à bello non esset, urbanam tamen jurisdictionem non in postremis habebat. Prætores, ut jura pro tempore, & legibus æqualiter omnibus tribuerent, atque ex forma, & consuetudine judiciorum negotia civilia expedirent hortabatur. Sed mercaturæ summum studium illi erat, tum privatae utilitatis gratia, tum ut vectigalia, & portoria urbis uberiora fierent, ne tot bellorum incommodis exhaustos cives novo tributo prægravari oporteret. Per hæc tempora Comes Casates Mediolanensis Ecclesiæ Archidiaconus in collegium Cardinalium assumptus est. Sed Gulielmum cupido quædam invadendi regni cepit: pulchrè hic noverat utriusque factionis vires, & opes jam defecisse, ut consilio, & dolis magis, quam armis oppressa parte altera, cum novos dominos plerique jam indignarentur, ipse rerum potiretur. In Hispaniam igitur ad focerum extemplo proficiscitur, docetque quid spei, & fiduciæ ad regnum occupandum habeat: quingentos equites cum pecuniis ad iter, & persolvenda stipendia accipit. In Italiam properè revertitur, ac statim quoscumque potest milites scribit. Ticinum trajicit, atque in hostes profectus Laudem veterem statim expugnat: inde contractis propin quarum urbium auxiliis iusto cum exercitu progressus Laudem alteram obsidet, in qua urbe praesidia erant Turrianorum; & ii ferè milites, qui vel amicitia, vel foedere Turrianis conjuncti erant, portis erumpunt. Sed statim, atque levi certamine intra moenia, amissis aliquot militaribus signis, compelluntur. Vexillum urbis

G

Medio-

Mediolanum deportatur, ut scilicet fuga hostium testata maneret: simul etiam ut amissis signis, hostis instare cladem sibi cognosceret: cui deinceps adversa omnia accidere. Ceterum Cassionus, ad custodiam oppidi relicto praesidio, cum reliqua militum parte Vaprii arcem aggreditur, eamque primo adventu recipit. Tunc Gulielmus, cum videret bellum ab iis fieri, & arces capi, quos moenibus conclusos obsidebat, obsidionem solvit, conductitias cohortes, & tumultuarium militem, quique gratuitam militiam per gratiam Vicecomiti praestabant, eos secum trahens haud longè ab oppido properè occurrit eo animo, ut cum adversariis, priusquam castra munirent, congredieretur. Cassionus item ubi hostilem aciem appropinquantem cognovit, nihil cunctatus in pugnam contendit. Infensis animis decertabatur: atque eo atrocius certamen erat; quod pro summa rerum dimicabant. Suos igitur uterque in tela, & vulnera urgebat, tantoque ardore pugnatum: & uterque alterius impetum ita sustinuit, ut nemo capto loco cederet, aut vestigio dimoveretur: adeoque obstinati erant animi, ut mallent pugnando vitam amittere, quam terga adversario dare. Tandem cum Vicecomitum vires intolerabiles essent, Turrianorum acies inclinatur, fusique protinus fuere. *Occubere quingenti*, ut traditur, *militēs, obtingenti capti, qui Mediolanum omnes missi fuere*. Sed caedes gravior, & illustrior victoria Cassioni morte facta est; quo occiso, dispersi, dissipatique Turriani sunt. Nam Raymundus ceu planè desperatis rebus, cum paucis, qui ab adversa pugna, & fuga superfuerant Aquilejam rediit. Laudenses ea clade percussi continuo oratores foederum, & pacis gratia ad Othonem mittunt. Sed cum victis conditiones dare Otho vellet, ne recusando quæ is imperasset calamitatem patriæ afferrent, iis primum urbe summotis, qui Turrianorum opes fovebant, & proinde defectionis auctores fuerant, patriam, & agros Archiepiscopo dedunt. tum in verba, & leges illius juravere. Deditione Laudensium, & recenti victoria elatus Marchio, quasi suo ductu, suæque virtute devicti, & subacti adversarii, finibusque fugati procul à patria abiissent, eo superbiæ, & arrogantiae progreditur, ut qui ante mercenariam militiam agebat, & sub alterius nutu, & imperio viveret, potentiae æquas partes, ut regni focus affectaverit. Quare ut pari jure acceptus in regni societatem videretur, prætorem & ipse urbi imponit, ut suo scilicet arbitrio, atque mandato res civitatis administrarentur. Laborabat in primis, ut aliquo præfecturæ titulo gradum, atque aditum ad dominatum pararet. Otho sollicitus maximè hoc facto erat, atque perturbatus infidam societatem Gulielmi habebat: præferocem animum extimescebat, jamque insidias prospiciebat: nihil non regnandi causa ausurum hominem pro comperito habebat. Sed quamvis tot gravia, intoleranda, & periculosa ingruerent, maluit tamen in præsentia ea dissimulare, quam cum æmulo, cui peregrini, & conductitii milites parebant, & res feliciter gestæ, conciliatis quibusdam civium, animos dabant, aperto bello decertare. Ceterum Gulielmus nihil non cogitare, tentare, & moliri, quod ad Vicecomitum potentiam convellendam, opprimendumque Othonem idoneum videretur: labefactareque in primis urbanas opes statuit. Ergo intestinum hostem Vicecomiti comparat. Soresina gens vetustate generis, & magnis opibus pollebat: eam quibuscumque potest officiis amplectitur; annitebaturque, ut inter ceteros emereret: & velut in dominatu æmula Othoni infesta secum in illius perniciem conspiraret, & sentiret. Bossium præterea Doariensem patria pulsum Othoni, & ceteræ nobilitati longè infensissimum Soncini dominum constituit. Hæc, & talia ad quærendam in urbe gratiam, opprimendamque nobilitatem Gulielmus cum

A faceret, aliquos à factione Othonis avertit; ita nobilitati maxime infensus erat. Adversus illius insidias, gliscentemque in urbe potentiam domesticas opes per novas amicitias Otho opposuit; nam Guidonem Castellioneum primum sibi adjungit: Mandellos præterea, Pusterleos, Carcanos, & eos, qui de Moguntia appellantur multa pollicendo ab æmulo ad partes suas traxit. Conspiravere subinde omnes, ut Gulielmum regni affectatorem, cum primum occasio daretur, urbe, & finibus pellerent. Circumacto præfecturæ tempore, idem Joannes jussu Marchionis Urbi præficitur. Tunc Gulielmus, quasi continuato magistratu, jam sub ditionem, & potestatem Urbem redegressus, nihil de novitate rerum timens in Montemferratum revertitur. Otho vero, ne quam opportunitatem bene gerendæ rei, & recuperandi imperii fortuna dedisset, eam per metum, & ignaviam amitteret, continuo equum conscendit: amicos, & eos in primis, cum quibus consilia novandarum rerum communicaverat adit, rogat, & obtestatur in proposito perseverent: monet advenisse tempus, quo patriam ab externo dominatu, improbo, atque fallaci tyranno eximant. Indignum profecto esse, mercenarium hominem velle his imperare, quorum sæpius stipendia meruerit. An scilicet externo serviemus: aut illius jussis obtemperabimus, qui per insidias, & fraudem dominari ei urbi paret, cui vicinos omnes populos non ægrè obedire videamus? Quod si virtute, & armis regnum comparare vellet, profecto enim, ut est hominum natura regnandi avida, minus iniquum videretur. sed quis ferat hominem fallacem magis fraudibus, quam viribus nixum talia in aliena patria moliri? Cædis identidem, exilii, atque injuriarum, quas ante sub novis dominis pertulerant, admonerebat: neque mitiorem sperarent Gulielmum, si semel jugum acceperant, quam Turrianos experti essent. His, atque hujusmodi verbis ad arma multitudo concitatur. In prætorium contendunt: Præto-
D torem novitate rei percussum circumstant: vim minantur, nisi intra præstitutam diem magistratu, & urbe cesserit. Gulielmum præterea nuntiis, & literis monent, ne Mediolanum veniat. ex eo inter Othonem, & Montisferrati principes implacabile odium, & perpetuæ inimicitiae mansere, novumque mox Præto-
E rem Jacobum Sumaripam genere Laudensem Otho urbi præfecit. *Per hæc tempora inter Genuenses, & Venetos navibus decertatum fuisse apud quosdam scriptores invenio, & Lignum, profligata Venetorum classē, longè superiorem evasisse.* Guido item Turrianus sive corrupto, sive decepto custode, de arce Baradelli, in qua victus tenebatur, aufugit.
F Ceterum Otho inimico, & infenso Gulielmo, durum, & periculosum ratus sine peregrino favore, atque præsidio regnum nuper partum tueri posse; nam & hostis consilia frueretur, ut ignominiam tolleretur, ereptumque regnum recuperaret, non cessabat: & civitas adhuc à domesticis odiis libera non erat: legatos in Germaniam ad Rodolphum novum Cæsarem mittit, qui etsi ante Turriano favisset, tamen cum Longobardorum principes in primis beneficio, & pro jure imperii sibi obnoxios parare studeret, libens legatorum postulata audivit, & icto subinde foedere, equites centum, & sagittarios sexaginta Mediolanum misit. Ita Otho, quamvis vicini hostes illum lacefferent, tamen novi regis amicitia, peregrinoque præsidio satis opes in præsentia firmaverat. Novocomensis interea Leucum, & Clivate invadit. Hostis erat inopinatus, & vicinus: cujus debellandi negotium uni mandare & invidiosum, & parum tutum videbatur. Matthæum copiis Otho præfecit, duosque collegas illi addidit Guidonem Castellioneum, & Thomam Origionum, qui confestim adversus hostem profecti non agros solum tutati sunt, sed castra expugnant, atque diripiunt, capta oppida recipiunt, atque exercitum præda

præda onustum cum multitudine captivorum domum reducere. Lætatus supra modum fuit hac victoria Otho; rebellem enim populum priusquam latius per fines excurrisset, opprefferat. Matthæi quoque virtus jam eminebat, ut scilicet hoc felici auspicio, lætoque belli eventu rerum administrationem is capefferet, qui mox princeps in patria foret, omniaque deinceps obiret, quæ regiæ potestatis essent. Ita ceteris à magistratu summotis, uni Matthæo gubernandam urbem permittit. Hoc anno qui fuit ab nato Domino quartus & octogesimus supra millesimum & ducentesimum, Carolus, quem supra diximus regnum in Appulis, atque Siculis obtinuisse, moritur. Ceterum Gulielmus, cum propriis viribus, externoque præsidio Vicecomitem obnixum videret, alio bellum conferre statuit. Derthonam in Liguribus capit, atque repugnantem episcopum sive palam, sive clam (hoc enim parum constat) continuo jugulari mandavit. Cæde sacerdotis, & nova urbis adeptione major Othoni cura, atque molestia hæsit, plurimumque Marchionis opes timere. domi res præterea haudquaquam tutæ erant. Quare ne ancipiti bello eodem ferè tempore vexaretur, Soresinatem gentem Gulielmo amicam, & obnoxiam ad se avertere, & in partes suas transferre in primis studuit. Novocomensis vero sive à Gulielmo sollicitatus, sive quod ægrè ferret non solum erepta sibi oppida, & spoliata castra, sed tot captivos Mediolani in custodia detineri: Muscam Turrianum, quem supra in pugna apud Decimum captum diximus, vinculis liberat, atque subinde contracta juventute, quæ ulciscendæ injuriæ cupida erat, ducem belli facit. arcem Seprii statim capit. Graviore tunc in metu Otho esse: Comensem sibi infensissimum, & prostratum hostem, & planè debellatum adversus se erectum videbat: & præterquam quod ægrè fines à maleficiis defenderet, intestini certaminis reliquias tollere, & nova popularium consilia cavere, si Musca vicinorum studio, & opibus fretus in bello perseverasset, vix poterat. Consilio igitur, & conditionibus cœptum incendium à se propulsare, & reslinguere tentavit. Gens Ruscona ea tempestate Comi potens erat: hanc magna pollicendo sibi conciliat, quorum opera, & armis oppido primum Musca ejicitur, tum oppidani in amicitiam cum Othone redeunt. Et ne homini ingrato beneficium collatum diceretur, simul etiam, si gratia pro merito relata foret, ceteri in res Vicecomitum propensiores essent: Petrus Rusconus jubente Othone in prætura Mediolanensi constitutus fuit. Hoc facto Turriani, ceu nulla spes eis relicta esset, (deserti enim ab his erant, quorum odium inextinguibile adversus Vicecomitem existimabatur) neque ad renovandum bellum opes suppeterent, nullusque suppetias ferret: tentare conditionibus, potiusquam armis finibus cedere. Aliquantulum temporis utrinque ab armis, atque detrimentis cessatum est: pacemque deinde in hunc modum inter se paciscuntur, ut bona, fortunæque erepta Turriano restituantur: quæ ita demum is possideat, si Ravennam exulatum irit. Dura sanè conditio: graveque erat tam longè à patria exulare: tamen quando ex magno, & uberi prædiorum proventu inopes extra solum patrium vivere non possent, in præscriptas terras abire. Verum conventis haud diu Otho itetit. Turriano paterna vectigalia ampla erant, quibus facultates magnas comparare, largitionibus novos amicos conciliare, & veteres ad novitatem rerum provocare posset: præterea suo sumptu milites alere, quos & circum se haberet, & prout res posceret, ad excitandos motus emitteret. Ita metuebat Otho, ne aliquando reparatis utcumque viribus, civitatis status perturbaretur. Prævertit igitur incolumitatem regni ei honestati, quam fides exigere videbatur. Exulum itaque bona, contra quam convenerant, intercepta fuere: quæ subinde partim pu-

A blicata, partim diversæ factionis civibus, & ante omnes Vicecomitum amicis contributa fuere. Sic Turriani finibus pulsi, & agris, ac fœnore fraudati, cum nihil haberent, unde vitam agere possent, in Venetiam, relicto Ravennati solo, demigrarunt; ubi apud Raymundum Aquilejensis ecclesiæ antistitem aliquot annos vixere. Durant in eis locis illorum nepotes ex veteri nobilitate, & diuturnis opibus adhuc in factione potentes. Per hæc item tempora Opicius Estensis Marchio fines ampliavit Regio Lepidi potitus: Mutinam vicinam urbem occupavit; & haud ita multo post Faventia, & Forum Livii in illius ditionem, & potestatem devenere. Jam B popularium studia in Turrianos consensuisse, & ex loci distantia cessisse illorum nomen de mentibus videbatur: conversique cives ad curam rerum domesticarum, & in suis quisque negotiis occupati dominatum Vicecomitis non iniquè ferre. Tunc Otho posterorum potentia, & constituendo inter suos regno prospicere statuit: quod ita demum in nepotes perseveraret, si Matthæum administrationi reipub. designasset, qui jam tunc populum dicto obedientem haberet, ne scilicet eo mortuo, sive per discordiam, & contentionem popularium, sive jure quodam gentilis imperii cognati inter se decertarent. C Gravis præterea erat ætas, quæ utrumque munus, & rei divinæ, & urbicæ administrationis obire vix posset. Ad curanda igitur sacra conversus, urbana gubernacula Matthæo tradidit, cujus potentia ut minus invidiosa esset, annuos ante dumtaxat collegas addiderat: hoc idem rursus instituit. De omni nobilitate præfectos quattuor urbi deligit: Matthæum ipsum, Henricum Moguntiacum, Othone Mandellum cum eo, ut extra annum magistratus non procederet. Ita exacto anno, ceteri jurisdictione, & publico abstinerunt, atque uni Matthæo urbis præfectura, & regni procuratio per quinquennium jubente patruo, cessit, rebusque in hunc modum compositis, se totum venerabilis sacerdos facris, & cærimoniis tradidit. Habent quidam annales: *statim atque urbica negotia solus administrare Matthæus cœpit; sive quia domi legibus, & moribus jura redderet, proculque à vi, & injuria res urbis agerentur; sive quod in omni militari negotio pro sententia cuncta succederent, Magnum appellari cœpit*: quod cognomen non solum dum viveret celebratum est; sed deinde ab omni ætate, omnibusque scriptoribus notatum, & memoriæ proditum manet. Patruum tamen in primis coluit, & quoad ille inter homines egit, tamquam ad dominum, quæcumque ad statum urbis pertinebant, semper retulit, ex illius consilio, atque nutu omnia gerens. Sanè Vicecomitum res ea tempestate satis stabilitæ, & firmæ existimabantur Matthæo dominante, Othone antistite, suffragante Rodolpho novo Cæsare. Gens tamen Castellionea (credo quia ægrè ferebat quod in mandandis honoribus, & præfecturis Otho eam præterisset) ut aliquando intelligeret Vicecomes, eos minimè in ordinem reductos esse; animum præterea, atque vires ad pellendam hujusmodi injuriam superesse, amicos, & clientes continuo colligunt: aggregantur item eis hi fere omnes, quibus Matthæus invisus, & opes timori erant, comparataque multitudine, Seprii arcem, quæ paulo plus decem millibus passuum à Castellione abest, invadunt: validoque imposito præsidio, excursionibus vicinos vicos agitare cœperunt. F quo metu fere universa præfectura à Vicecomite defecit. Minimè cunctatus in amicorum, atque suorum discrimine, & damnis est Matthæus. Latè patet Sepriensis præfectura; nullus enim inter Insubres tractus habetur, aut opulentior, aut qui frequentius habitetur. Hinc ferè profecta est vetus urbis nobilitas, & hi præcipuè, qui semper factionis Vicecomitum fuere. Profectus itaque obviam Matthæus, hostili fugato præsidio, arcem recipit, victorque opinione celerius domum cum ingenti gloria revertitur.

tur. *Huic viro*, quantum memoriae proditum est, jam ab ortu multa victorias, & regna portenderant. *Forse qua natus est die armenta, qua ligata in stabulis continebantur, eodem temporis puncto refractis vinculis passim per vias, & campos mugitus graves, & insolitos edidere.* Ad cuius rei miraculum cum multi concurrissent, clamore excitus pater: *hic puer*, inquit, *si vixerit, subsidium aliquando, & lumen genti nostrae jam pridem aurata, ac prope extincta daturus est.* Tum prodigio latus filium his artibus erudiri voluit, quibus ingenia ad magnas opes, rerumque fastigia excitari solent. Per omne autem pueritiae tempus alacris, & sui fidens terribili voce à ceteris discretus, Brugia, velut à rugitu appellabatur. Cum adolevisset ex foemina nobilissima prolem sustulit generosam, & felicitatis alias inaudita. Tanta in juvene virtutis indoles, adeoque coeptis ejus fortuna aspirabat, ut illum cives colerent, & miro affectu venerarentur. Ad rempub. ubi accessit, interno, externoque bello composito, jam dignus imperio videbatur. Igitur à patruo, qui animo futuram nepotum amplitudinem praesagebat, ita rebus praefectus est, ut penes eum unum urbis, & regni universa jurisdictio foret: neque inviti tam cives, quam peregrini illi paruerent. Judicia ut ex aequo sine metu, aut gratia cognoscentis, ac sine fraude legum semper redderentur in primis curavit: quin etiam priscorum regum exemplo ex praetura jus dixit, & quae ordinarii juris erant, ipse cognovit, atque extra praeturam apud se, *ut de controversiis disceptaretur* mandabat. Ita sine provocatione judicia exercebat. Quo facto multitudini admodum gratus extitit, quae nihil magis optat, quam ut lites, & controversiae magis ex cognitione, & arbitrio principis tollantur, quam ex forma, & legum praescripto pronuncientur: quando haud facile falli, aut corrumpi queat, qui legibus praest, nec inopi injuria fieri, aut vis, & fraus legi sub cognitione principis possit. Religionem vero in primis coluit, sacerdotem quotiens sacra facturus erat, amictu, & sacerdotali habitu ipse ornabat, & sacrificanti subinde palam ministrabat, domesticos, & familiares ita instituerat, ut Deum cum primis timerent, & pie colerent; quae lex Divina mandaret, ea & cognoscerent, & inviolata fervarent, ecclesiasticos autem ritus procul ab omni superstitione tenerent: denique ut de Christo optimo maximo recte sentirent, & reverenter, ac pie loquerentur, minime eorum opinionibus adhaerentes, quibus Catholica, & vera Fides pollui, aut bene de Deo sentientium mentes contaminari possent. Salutis animarum crebro eos admonebat, ut nihil eorum negligerent, quae ad propitiandum Deum pertinere viderentur. Per jejunii dies ut operam sacrarum litterarum doctoribus darent, ut inde divina mandata perdiscerent, & quo pacto iratum Deum mitigare possent, qui una re maxime hominibus crimina remittit, si scelerum poenitentiam proprio ore sacerdoti exposuerint. Diligens proinde exactor eorum, quae quisque gessisset, vitae, ac morum severus, & inexorabilis censor in eos graviter animadvertibat, qui praepudore flagitii, aut metu piaculi confessionem peccatorum refugientes sacerdotes supplices non adirent, mallentque per contemptum legis in scelere perseverare, quam aliquando confessio crimine veniam caelestis irae expectare. In maximarum rerum deliberatione gentis patriciae potissimum seniores, & quicumque per aetatem, & usum rerum paulo prudentiores haberentur, eos in consilium adhibebat: illorum sententias crebro rogare, benemomenti numquam contradicere, amicorum libera consilia non invitatus audire. In cognoscendis, atque puniendis criminibus minime truculentus, aut saevus, lenior, quam durus peccantes etiam minus legitima poena castigabat: capitalia crimina numquam solus cognovit, raro sceleris, aut maleficii convictum capite, aut bonis mulctavit: & tamen haud inultum

A scelus erat: à fontibus, & noxiis exilio, aut carcere, potiusquam morte, & sanguine poenas expetebat. *Nulli vim in tanta fortuna attulisse, aut potentia abusus traditur: facilis, temperatus, & clemens.* Praeturae urbicam, & oppidorum praefecturas nobilioribus non ultra annum dabat, ne scilicet longa, & continenti potestate animi inolescèrent: simul etiam ut quo plus honoris, & commodi publici impertiretur, eo plus gratiae apud suos quaereret, quorum studio, & opibus in novitate regni maxime tutus erat. Commendabant praeterea hominem eximia vires, ne dicam ostentationis prodigiosa. Ferreas equorum soleas manibus in diversa distractas nonnumquam refregit. Quid igitur miramur si his naturae dotibus praeditus, tot rebus fortiter, & gloriose gestis, homo invictissimus fundamenta ejus imperii jecit, quod ducentos, & amplius annos in Longobardis durat: cujus deinceps filii, atque nepotes barbara imperia, peregrinaque arma ab Italia ita propulsarunt, ut incolumes, & florentes patria, nostrisque finibus perfruamur. Jam finitimis Mediolani opes, & Matthaei arma timori erant: partimque à vi, & injuria quiescebant; alii foedere, & societate crescens Vicecomitis regnum juvabant. Unus Gulielmus quiescere minime poterat. Stimulabat ingentis spiritus virum proferendarum finium cupido, & dolor dominationis ereptae. Multa itaque cogitare, atque moliri, copias contrahere, & expedire, ut Othonem, & Matthaeum principatu exturbaret. Spem haud dubiam debellandi hostis recens Papiae receptio faciebat: qua urbe fraude, & dolo domesticorum militum potitus fuerat. Perseverabat per ea tempora in Longobardis genus urbanae militiae; quae tum coeperat, cum Federicus primus Pontificem Alexandrum Urbe, & Italia pulsum infectaretur, eos omnes atrociter infestans, qui in partibus Alexandri fuerant. Ergo ex vetere instituto urbana juvenus nomen in militiam dabat: equos, & arma quidam publicitus accipiebant: frumenta, atque stipendia modo menstrua, modo annua praebantur, ut semper instructi in procinctu belli starent. Accedebant immunitates, & commoda plurima, ut militares labores alacrius tolerarent. ita suos milites populi alebant, qui fere intra moenia continebantur. Interim longius à patria, ut hostes summovent, rapta repeterent, injurias ulciscerentur pro jure foederum progrediebantur. Interim sine publici consilii venia latrocinii, & praedae assueti homines sub externo duce merebant: & augendi stipendii causa juvenus, conversis in suos armis, patria alios expellebant, alios accersere, locupletum bona diripere, & quem voluissent dominum etiam popularibus imponebant. Quae Papiensi per ea tempora acciderunt. namque ab hujusmodi milite Marchioni Batiennorum Augusta prodita fuit. Hanc Papiensis conjunctionis, & fraudis suorum nescius, congregato domestico milite, recipere intendit. dumque versus Padum properat, fit ad Laumellum obviam Gulielmus. Statim manus conferunt: miles, sicut convenerat, populares relinquit: qui circumventi, cum hinc tyrannus urgeret; illinc fugientes miles ferro exciperet, & confoderet; oppidum, & sua (jam enim in manus inimicorum venerant) tyranno dedunt. Ita per insidias regno auctus ceteris finitimis maxime formidolosus erat. Convenere statim apud Cremonam legati populorum, qui paulo ante foedus, & societatem inter se conflagrant, ut pro communi salute, & incolumitate adversus vires, & insidias Marchionis communiter bella gererent. Tunc milites decernunt, quos civitas quaeque pro copia, & facultate instructos, & ornatos haberet, in eumque subinde locum mitteret, quem opportuniorem, magisque idoneum ad propulsandas hostis injurias, suaeque tuenda existimaret. Non sinebat Gulielmus vicinos quietos esse: & nunc solus, nunc inito cum aliis foedere alienos fines infestabat, atque in primis

Astenses laceſſebat: ad quos defendendos focii ſupra mille & trecentos tum equites, tum pedites miſere. Enimvero tunc Gulielmus magis elatus eſt: & cum videret ab adverſariis principem Matthæum designatum, ut illius potiſſimum ductu, & viribus arma tractarent, Vicecomitem bello aggredi ſtatuit. quoſcumque poteſt milites conducit, & catervas popularium, qui (ut ſupra oſtendimus) domeſtico ſtipendio militabant, in unum cogit. Additi ſunt quidam Turrianæ gentis, quorum factione domi res Vicecomiti majore in periculo eſſent. His comparatis copiis, plurimum animi, & fiduciæ illi aderat debellandi adverſarii five acie decertare, five agros deprædari uſque ſub urbis mœnia oporteret. Ticinum trajicit, latiusque excurrendo ingentem hominum, & pecorum prædam abducit. vici direpti, ædificiaque ruſtica ſuccenſa ſunt. Pervæſtatis agris, Mediolanum verſus pergit. Rivus eſt ad irrigationem agrorum à Ticino derivatus, quem accolæ Ticinellum appellant. Hic Gulielmus ſtativa habuit. Matthæus item cum exercitu tumultuario ibidem obviam illi fit: pugnam utrique continuo ineunt. atrociter depugnatur. Marchionis agmen aliquamdiu reſtitit: verum cum ſuperante adverſariorum turba, ſuſtinere impetum, & arma vix poſſet, ſatius eſſe duxit Gulielmus acie cedere, quam ſi in certamine perfeveſſet, occidione vinci. Ita ſervata plurima exercitus parte, Papiam ſe recipit, ubi novum conſcripſit militem, & quantas maximas potuit pro fœdere, & amicitia ab omnibus copias comparavit, atque acrius de integro reparatis viribus, Vicecomitem aggredi parabat. Et certe ſi dimicatum foret, in dubio erat, uter eorum Gulielmus an Vicecomes è certamine victor abiſſet. Interea ad defectionem ſollicitati Alexandrini, qui ſub imperio, & ditione Marchionis erant, motus in urbe faciunt: cujus rei nuncio percuſſus Gulielmus Alexandriam cum his ferè copiis, quas paratas habebat, protinus contendit. Exterriti oppidani magnitudine exercitus, veriti item ne per iram, ſi armatus, & cum multitudine urbem dominus ingreſſus eſſet, gravius in eos deſaviret, quos novitatis ſuſpectos, & conjurationis auctores haberet; latiusque ira graſſaretur, niſi cum paucis illum intra mœnia recipiunt, atque poſtridie oborto tumultu, domum, in quam Gulielmus diverſerat, circumdant, proditos, & excidium ſibi imminere clamitant. Quid enim, niſi ut eos perderet, quos dubiæ fidei, & in ſe conjuraſſe exiſtimaret, urbemque ipſam diriperet, tantum copiarum propius mœnia duxiſſet? & quando ſatis illi compertum foret, ſub ejus ditione Alexandrinos invitos vivere, ad unum eos occideret, qui in urbe opibus, & dignitate pollerent: mox reliquos pro libidine, & ira in univerſum populum aut domo pelleret, aut fœdæ, & graviori ſervituti addiceret. Hæc, atque talia clamitantes in ædes irrumpunt, manus injiciunt, & vinctum in privata cuſtodia biduum tenere: deinde in vetere urbis prætorio caveam ligneam ædificant, & in ea conſuſus Princeps duodeviginti menſes, contra quam vetus gentis nobilitas, & regii nominis decus poſcebat, vitam idibus Februarii finivit. Clades per ſomnum illi denuntiata fuit; ſiquidem, ut annales tradunt, pridie quam ferox populus impetum in eum faceret per quietem viderat ſe à multitudine mugientium jumentorum humi ſterni, & ſubinde proculcari. Hujus Gulielmi, & Alexandrinorum Dantes Florentinus novi, ſed non inelegantis, neque injucundi carminis apud nos auctor mentionem facit in ſeptima ejus oda poëmatis, in quo circulos deſcripſit animarum, quæ penitus eluto ſcelere, ad beatorum ſedes aliquando tranſituræ ſunt. Habeo auctores, qui ſcribant conſilio, & pollicitationibus Aſenſum Alexandrinos ad defectionem concitatos, pactamque primoribus urbis pecaniam, ſi in perniciem Tyranni conjuraſſent. Ceterum capto, & mortuo Gulielmo, animi Alexandrinorum in nomen,

A & prolem illius tanto odio flagrarunt, ut ediſto populi cedere de Monteferrato Alexandrinus cogeretur, ne quiſquam de cetero ſub filiorum, ac nepotum jurisdictione ſtaret. Extat adhuc decretum ad abolendam nominis, & gentis memoriam. Nam Caroli Siculorum regis, & Gulielmi ſupradicti, atque nepotum nomina ubicumque ſcripta inveniantur abradendi, & in totum deleri jubentur. Geſſerat fortè Alexandria magiſterium populi Nicolinus quidam de Monteferrato, qui & ſi ſpurius eſſet, tamen quia cognatus Gulielmi erat, illius nomen de omni publico monumento ſublato fuit. Et quando Montisferrati, quæ pars eſt Liguriæ cis Appenninum meminimus, non inconveniens erit ejus regionis ſitum, fines, urbium præterea, & populorum nomina etſi ſtriſtim, paulo tamen inquiſitiuſ, quam ceteri fecerunt, exponere. Nam priſci geographi nuda tantum nomina tabulis ſubnotarunt; quidam contra quam magni, & eruditi viri regiones ipſas diſcreverint, & terminaverint, urbes, & populos enumerare contenti, modum, & ordinem perturbavere. Poſteriorum item quidam nimis indiligenter, ne dicam temerè, de ea gente nonnulla tradiderunt. Mons itaque perpetuo fertilis, & habitabilis dici ferè ſpatio ab Alpibus diviſus, atque diſcretus per patentes interim campos collibus magis, quam jugis attollitur, ac proinde nihil incultum, aut inaratum colonus relinquit. Hunc à dextra parte Tanarus, à ſiniſtra Padus urgent; nec ultra progredi ſiunt. & quatenus à fluviis diſcedit, & quodammodo ſubducitur, ferax admodum planicies interjacet. Hanc terram poſſumus Meſopotamiam appellare; gemino enim amne clauditur. Mons ipſe quæ fluvii confluunt haud longè ab Auguſta Batiennorum deſinit, quam poſteriores, parum detortis litteris, *Baſſignanam* nominant. Sublicio ponte illic noſtro tempore Padus jungebatur: ſed illum vis increſcentis fluvii diſſolvit, funditusque ſubvertit. Supra Auguſtam Valentium eſt, vetus fanè oppidum, quod aliquando (ut Plinius tradit) *Forum Fulvii* dicebatur. in tumulo ſitum eſt Pomarium, cujus arx natura, & operibus valida habetur: tum Fraxinetum, & Caſale ſancti Evafii, opulentum fanè, & frequens oppidum, quod ætate noſtra Gulielmus Theodori Paleologi abnepos bello, & armis inclytus, idemque princeps pace generoſus, atque magnificus in urbis dignationem tranſtulit: & de nomine Pontificis, qui epiſcopum loco dedit, *urbem Sixti* appellari voluit. Hinc natus Facinus Canis patrum memoria gerendi belli exercitiffimus, ductorque impiger, & animoſus. Interjacent campi uberes, oppida quoque ſunt aliquot, quorum præcipua Burgum ſancti Martini, & Ocimianum, quæ aliquando Marchionum ſedes fuit. Nam *illuc ad Federicum conveniſſe eos* lægimus, quorum conſilio, & hortationibus *Mediolanum obſedit, atque evertit*. Procurrunt haud longè à Caſali diviſi colles, velut rami, quibus mons lancinatur. Circumluit eos fluvius, caſtella, & vici haud ignobiles in collibus, & vallibus poſita ſunt, Pons Sturæ à fluvio nomen trahens; tum Gabienum à Gabienis Liguribus aut conditum, aut nominatum. *Incoluiſſe eam oram hos Ligures* ſignificare videtur Plinius ſic ſcribens: *Padus è gremio Veſuli montis celſiſſimum in cacumen Alpium elati ſinibus Ligurum Gabienorum viſendo fonte fluens*. Tum Verrucula, Bruſaſchum, Sanctus Raphaël, Gratium, Mons Calvus, Cherium, Mons Calerius: unde initium Ferratus Mons habet, ad Tanarum inde vergens, in quem torrentes per Aſtenſum fines influunt. *Aſta eſt colonia malo uſura quaſtu*, (ut Blondus ait) *maloque modo quaſtus divitiis opulenta*. In eo tractu veſtigia adhuc remanent, & *turris Polentia* à ſcriptoribus olim celebratæ præcipue ob nativum velleris colorem. Hinc enim Polentinæ lanæ, de quibus Martialis:

Non eſt lana mihi mendax, nec mutor aeno:

Si placeant Tyria; me mea tinxit ovis.

G 3

Silvius

Silvius in tertio Punici belli libro : *fusci villi Polentiam feracem* cantat : & Plinius *præcipuas nigri velleris opes habere Polentiam* tradit. Fuit etiam & Industria oppidum, juxta quod *Bondigomagum* ita appellatum, quod illic incipiat præcipua altitudo Padi. Nam Ligurum lingua Bondingum significat *amnem fundo carentem*. Miror in hac parte Blondum haud indiligentem illustratorem Italiæ affirmare in *dextra Padi decem à Ferrara millibus passuum positum Bondigomagum*, quod posteriores *Bondinum* dixere ; atque eo magis, cum eo in loco definat altitudo Padi, qui bifariam supra Bondinum dividitur. Totus enim Stel latam usque defluit amnis, atque, ne hyemantibus aquis agros inundet, aggeribus magnis, atque perpetuis coercetur : quippe immensus, atque profundus multum terrarum interlabitur, augmentum accipiens post Taurinos. Quod si dum apertos errores coarguimus joco venia datur : Dicat quæso aliquis, quibus architectis, & machinis, quorumve hominum viribus moenia, atque domos ab Alpium radice ducenta, & amplius millia transportaverit : nisi forsan amne secundo, & altius intumesciente adjutus chorographus fuit. Post Astam recurvatur mons, & usque in Tanarum flexum agit, in cujus summo arx est Annoni, atque ex adverso trans fluvium arx altera etiam in colle posita est, quam Aratii dicunt : *Tanari* scilicet *claustra* : Felicianum item non ignobile oppidum in Alexandrinorum, & Astenium confinio. Rursum mons se colligit, pauloque laxiores sunt campi, in quibus vetusta oppida Solerium, & Quadringentum à depravato quadraginta familiarum vocabulo vocitatum. Durat in oppidanis insita quædam ab antiquo ferocia, seque Romanos jactant. Quare cum tractum illum Romani ferè coloni tenuerint, cum locum quadraginta Romanarum familiarum sedem fuisse existimare possumus. Interfecat deinde Alexandriam Tanarus, in quem vix mille post passus Burmida influit. Pugnant rursus fluvius, & procurrentes colles, in quorum altero Pavonum habetur ; in alterius cacumine Castellum Montis positum est. Terga montis multis, & opulentis oppidis nitent. Sanctus est Salvator cum arce firmissima : Castelletum, Lugum, Vignale, Mons Magnus. Cetera longum esset enumerare, quæ etiam fileri sine jactura descriptionis possunt. Hanc omnem terram à qualitate montis, qui à se ipso confurgit ab alpihus separatus, recentiores *Montem Ferratum* dixerunt, in qua quadringentos circiter abhinc annos Gulielmus cognomento Longaspata, tum Conradus filius, Bonifacius, atque nepotes continua serie usque ad Joannem superscripti Gulielmi filium regnaverunt, cui stirps nulla erat. Theodorum itaque Paleologum ex forore genitum à Byzantio accivit, atque moriens illi regnum reliquit. *Tanarum*, si Plinium sequimur, *Apenninus* emittit. Si Decimum Brutum, atque Strabonem, ab *Alpinis Liguribus* ortum habere dicimus. Albam Pompejam à dextra perluit, in qua natus fuit, & educatus (ut Dion auctor est) *Pertinax*, qui duos menses post occisum *Comodum* Romæ imperavit : quamquam idem historicus non *Pompejam* ; sed *Ligurum Albam* vocat. Hinc Apennini juga, & non iniqui colles incipiunt, seque paulum subtrahunt, quibus feraces Statiensium campi, & aquæ subsunt. Civitas à *calidis aquis*, quæ illic erumpunt, appellata : & quia salubres, & morborum præsentia sunt remedia, à Græcis, & Latinis scriptoribus celebrantur. Durant etiamnum earum potentia, & naturæ benignitas. *Conditores fuere Statieli, Gens Alpina* ; quantum ex Plinio colligimus, cujus verba, quæso, paulo diligentius eruditi viri aspicere, & cernere velint : quamquam *Statiensium non Statiolorum fines* Decimus Brutus in quadam ad Ciceronem epistola scribat, cum fugam Antonii nuntiat : tum quibus legionibus, quoque itinere latronem in Gallias festinantem persequatur. Hic ego Straboni succurram, quem interpres indiligens magis, quam ignarus mutilasse vide-

A tur : & quod nostris hominibus tradendum erat, superfluum id fuit. Græcè sic legitur in quinto geographiæ volumine καὶ ἀνδισατέλλα μικρὸν ἐν παρὶδι, quod nos ita interpretamur : *haud longe à via*, hoc est *Æmilia Aqua sunt Statiolorum*. Quidam vero hoc solum convertit : *paululum in transitu sunt Aqua*. Sed hujus urbis diœcesis olim latè patuit. Univerfus ferè tractus contributus ei fuerat. Vetusta manent pontificum diplomata, in quibus eos omnes populos, qui in una mœnia apud Roboreti vicum edificanda urbis gratia pridem convenere, jurisdictionis Aquensis fuisse : & illinc sacra petisse constat. Hinc Merula, ut vetustatem gentis penè oblitteratam repræsentet, simul etiam eruditioni studens, se *Statiensem* nuncupavit. Erigitur per campos patentes Æmilia via, quam post devictos à se Ligures Æmilius Scaurus muniri voluit : & à Placentia Ariminum usque, ut Flaminia committeretur, perduxit. Hanc recentissimi rerum scriptores antiquitatis ignari *sublatam* pro sermone vulgatissimo appellant : secus quam duo sunt oppida memoratu digna : *Castellatum*, & quod prisca Ligures *Gamondium* dixere. Hinc relictis sedibus, secum traducto templorum jure, coloni Alexandriam demigrarunt, moxque urbe condita, tantum populi deserto in loco crevit, ut vix credibile sit, inde progressos, qui Alexandriam ædificavere. Boscum amisso imperio, titulum adhuc veteris nobilitatis servat. Hinc marchiones aliquando dicti, sub quorum ditione vicina aliquot oppida fuere. Leguntur fœdera, & societates cum his à finitimis facta. Genuensis præterea cum eisdem diuturna bella gessit, à quibus oppida partim per vim cepit, partim pecuniis emit. videntur vestigia Castrorum, vel, ut posteriores, *Maringi*. Abest vix duo passuum millia ab Alexandria, atque secundum Tanarum villa est fori : pervetus uterque desertus nunc vicus : floruit dum Alexandria conderetur. spectantur delubra diruta, tessellata pavimenta, filicei antiqui operis lapides cum epigrammatis : evidens sanè testimonium. Perseverant adhuc in ea gente Romana verba, observationes, & ritus antiqui : *strena, topiarium, prosa, restibilis ager, amula vas* ad vinum, & aquam gerundam, & *mastra*, in qua conspergitur, vulgo dicuntur. Cives pagatim rempublice gubernant, templeque Deum sacrata habent : nec in vicinia Sacerdos jus suum exercet, aut sacris operatur ; sed pro vetere, & gentilitio pagorum instituto res divina, atque civilis geritur. Nuptiæ præterea per confarreationem solemnnes, hoc est libo inter nubentes, & affines, atque cognatos partito, fiunt : & ut poëticum usurpemus :

E *Insulaque in geminos discurrit candida postes :
Et veteres lufere sales, & more Sabino
Excipit hic tristis convivia festa maritus :*

F Observant alii solis ad tertium Idus Novembres occasum : & qualis is fuerit, talem hyemem augurantur : nubilo pluviosam, sereno asperam, augentque identidem, aut minuunt non lacernarum, aut reliquarum vestium ; sed universarum pellium pretia. Ast ii, quorum vites in collibus ab injuria frigoris, & gelu tutæ sunt, occidens sydus spectantes promercali vino pretium faciunt. Quin etiam anicularum est observatio, & religiosa quidem : *Pulegium per brumale solstitium florescere* Plinius, & Gelius tradunt. Verum, quasi illud miraculo fiat, pervigilant plerique intentiore cura observantes quæ hora in florem aridus colliculus turgescat. Non in celebres inter Statienses nostra, & patrum ætate Marchiones de Incisa fuere : quod oppidum geographus quidam non indiligens *Libernam* putat à Plinio, & Ptolemæo olim appellatum. Juga ipsa fluvii quatuor aperiunt : Burmida, per cujus vallem ad Alpinos, & Ingaunos Ligures itur, atque Cassinos perluit : tum Urba notabile, & certum discrimen Apennini, & Alpium Vada perlabitur, quod

quod oppidum idem ad Ciceronem Brutus in confinio montium positum tradit : Lemorus Gabium præterlabitur, *cujus incolæ Marchionum appellatione dignatos legimus. tenues profecto, sed perennes sunt fluvii, atque Lemorum Urba, Urbam Burmida, Burmidam Tanarus excipit, qui illorum aquas, & famam aufert. Scrivia magno hiato montes dividit, quem Paulus Diaconus Iriam appellare videtur : scribit Majorianum haud procul Derthona juxta Iriam fluvium occisum.* Ita beneficio fluviorum cum maritimo Ligure commercia continua, & facilia habentur : & Genua vetus, & dives emporium perpetua, & magna mercatura celebratur : sarcinariique jumentis merces ultro, citroque pro compendio viarum comportantur. Qua vero Iria in plana exit, in supercilio montis, ceu faucium custos est Serravalle, *ab re nomen habens, supra quod mille passus Antiria intercidit, cujus vestigia, & ruinæ visuntur : nomen adhuc durat. Forſan in hanc Tiberius Cæſar, ut Tranquillus ſcribit, equeſtris ordinis virum, maris familiarē, & cui moriens curam funeris demandarat, condemnavit : niſi forte magis Iria ea ſit fluvii cognominis.* Nam Ptolemæus Iriam civitatem haud procul Derthona locat. Poſſumus conjicere, & forſitan non malè interpretamur Antiriam ex anti præpoſitione Græca, & Iriam dictionem compoſitam eſſe ; proſpicit enim vetus in monte edito arx confluentes ex adverſo fluvios. In flexu Appennini, velut in cubito Derthona eſt colonia Romana, & memoratu (ut Strabo refert) digna : & quamvis eam Ænobarbus ſupra trecentos abhinc annos evertit, veteres tamen adhuc ſuperſunt portarum fornices, & ſemirutæ cloacæ, ex quibus quantæ fuerint urbis opes facile deprehendimus. In Æmilia via Pons eſt Curoni à torrente nomen fortitus. Deinde Vicheria, quæ in antiquis monumentis Vicus Iria appellatur : & ſecus montem Claſtidium olim Hannibalis barreum, cum ad Trebiam deſedit. Ligustica gentis eſſe Livius in tertio belli Macedonici libro confirmat. Inter Æmiliam, & Padum Sale, & Caſtrum Novum Gotorum opus, qui Derthonæ commorabantur. *Illic non temporaria, ſed perpetua ſtativa (ut in quadam Caſſiodori epiſtola ſcriptum eſt) habuere : ne dum irruente hoſte congregarentur, moram rebus afferrent, ſimul etiam ne per hyberna diviſi carptim opprimerentur.* Sub Placentinorum fines hi Ligures protendunt. Gens cæli clementia, terrarum ingenio mitior, & magis ſocialis ſemper habitata, quam montani, atque maritimi. *Durum ſanè, & aſſuetum malo, ut Virgilius inquit, genus hominum!* Sed antequam ab hac deſcriptione diſcedamus errorem magni coſmographi coarguemus. Attribuit Ptolemæus Auguſtam Batiennorum, & Derthonam Taurinis, qui ſub Salaffis ſunt ; quod apertè falſum eſt, ſi certus, & perpetuus Italicarum gentium limes Padus regiones diſterminat. multum enim Salaffi ab initio, & flexu Appennini abſunt. In hoc autem auctore reſellendo minus ſollicitum me facit Padi ortus ignoratio, quem à Lario naſci is tradit. Ciſalpinæ præterea Galliæ lacus, populos, & flumina ; etſi pro ſiderum ratione cuncta metiatur, & dividat, confundere, & perturbare magis, quam diſcernere mihi videtur. Sunt alia in hac regione oppida, quæ non commemoravi, nullum aut famæ, aut antiquitatis diſpendium erit. Cannabensis terra tota trans Padum etiam nunc à feracitate, & copia Cannabis nomen inditum ſervat. inter Taurinos, & Vercellenſes poſita eſt. Hieronymus tamen in quadam epiſtola Ligusticam urbem Vercellas ſcribit, & ſuo tempore penè habitatore vacuum, quod, niſi de Levis Liguribus intellexit gente veteri, atque potenti, ut Livius tradit, & à quibus Ticinum conditum fuit, non video cur ad Ligures Vercellæ pertineant. Trans utrumque flumen Padum, atque Tanarum Montisferrati domini & nunc, & pridem prolatis finibus imperavere. Sed jam ad initutum revertamur. Matthæus potenti hoſte, & pertinaci æmulo

A ſublato, Vercellis ſtatim potitur. Papienſi nihil incommodi dedit. Satis illi tunc viſum fuit, ſi ejectione homine, quem Gulielmus urbi præfecerat, liberi viverent. Conceſſit item Alexandrinis, *ut pro ſuis legibus, liberisque ſuffragiis ſuos ſibi magiſtratus crearent :* atque anno poſt Gulielmum captum, qui fuit alter à nonageſimo poſt mille & biſcentum annos à partu Virginis, Ubertus ab Alice, & Nicolinus Merulanus unus ex atavis noſtris, qui triennium antea magiſter populi domi fuerat, Mediolori ex prætura jus reddidere. Moritur per ea tempora in Germania Rodolphus : nondum in Italiam venerat, quæ tunc maximè Cæſaris præſentia ad inteſtina bella tollenda, civilesque diſcordias ſanandas indigebat. Quare in illum velut ignavum, & imperatorii muneris negligentem idem Poëta eadem in oda acerbius invectus eſt. *Licuiſſet ſanè vulnèra Italia ſanare, quæ diuturno attrita morbo recreari vix poterat.* Sufficitur deinde procerum ſuffragio Arnulphus Boëmorum Rex, ad quem legati mittuntur, qui regnum, & imperialem titulum illi gratularentur : tum vero procuratorum in Longobardis Mattheo demandari poſtulerent. Haud invitus poſtulat ſi novus Cæſar annuit ; ſatis enim compertum illi erat, utcumque Longobardos obnoxios ſibi haberet, ceteras Italiæ gentes haud invitas in obſequio manſuras, atque antecēſſores ſuos, ut primum ad imperii celſitudinem designati fuere, nulli rei æquè ſtudiſſe, quam ut adminiſtratio rerum Italicarum ex illorum auctoritate penderet. Procurator igitur, ſive (ut vulgatiſſimum verbum uſurpemus) Imperialis Vicarius Matthæus delegatur : quæ dignitas, ut ſplendidior foret, ſimul etiam ut opinione, & amicitia Arnulphi popularibus metuenter, ceteris autem venerabilior eſſet, cum Cæſare fœdera profeſſus eſt : & quaſi illo auctore cuncta gerere videretur, Aquilam Imperii ſignum tunc primum ſuſtulit, quam deinceps filii, & nepotes geſſavere. Ita ſpreto prætoris, & capitanei vocabulo, Cæſaris procurator nuncupari cœpit : atque ex eo fines latius proferre inſtituit. Virium itaque, & armorum fidens eos ſibi ſubjicere ſtatim aggreſſus eſt, qui pro ferocia aliquando rebellaverant, inviſumque novum regnum habebant. Novocomenſes itaque juris, & ditionis ſuæ facit : & haud ita multo poſt Ticinum trajicit, in Montemferratum deinceps arma illaturus. Gens erat inſenſiſſima ; & Joannes patri ſuperſtes, quamvis impubes eſſet, principem agere cœperat, opeſque paternas tutorum fide, & amore popularium integras tuebatur. Ad illum præterea ſi fere confluxerant, qui ſtudio partium imperia Matthæi pati non poterant. Puerum itaque bello aggreditur, & avorum regno evertere tentat. Hoſtiliter fines ingreſſus Tridinum oppidum primo impetu capit. Arx muro, ſoſſa, & valido præſidio munitiſſima ſtabat. eam diutius circumſedit : & tandem admotis ſcalis, magnaque defendentium parte caſa, expugnat. Quod poſteaquam divulgatum fuit, continuo plerique, quaſi nulla ſalus alia, niſi fuga comparata eſſet, cum liberis, & uxoribus, ac omnibus, quæ ſecum ferre poterant, longè à domo in denſas ſilvas demigrant : alii in ſaltus, & montes hoſti inacceſſos auſugere. Matthæus ultra progreſſus cuncta latè populatur, vicos diripit, ſuccenditque, caſtella per vim capit : nullus vaganti obviam ire. Joannes ob recentem patris mortem ſui dubius, nec propulſandæ injuriæ potens, fugiendo, & latitando ſe hoſti ſubducere, & periculis eximere. Oppidum (ut ſupra demonſtravimus) eſt Pons Sturæ. Hoc, exercitu trans Padum miſſo, Vicecomes repente capit. Inde ad Montem Calvum contendit, quem oppidani præſidio deſtituti conſpecto hoſte, dedunt. Jam omnia latius evaſtabantur : nulla ſpes opis oſtendebatur : ingens terror omnium mentes concuſſerat. Ita univerſa Montisferrati ora per conditiones

ditiones Matthæo traditur. Ab injuria, & detrimento intacti plurimi fuere. Præfectus devictæ genti imponitur: & tributa annua tria fere millia librarum Astenfis monetæ imperantur. Non parum ad Matthæi laudem accessit, quod adversarium debellasset, tantum terrarum subegisset, exercitum præda onustum domum reduxisset. Amplior itaque in dies apud populares esse: vicini virtutem, & fortunam maximè admirari. Hoc forte tempore Petrus Crassus, qui aliquot ante annos inter primores sacerdotum cooptatus fuerat, Mediolani moritur, amplissimoque funere elatus fuit: quod foeminarum lachrimæ, & ejulatus quodam modo dehonefate visa sunt. Lege itaque cautum fuit, *ne mulieres dehinc funera prosequerentur*. Insignem annum lætæ Matthæi res, & compressus matronarum luctus fecere. Sed eum præcipue insignem, & memorandum mors Othonis fecit, quæ, etsi immatura non erat, plurimum tamen acerbitatis civitati præbuit. Vir fuit in omni rerum statu facile unicus, siue sacerdotii curam gereret, siue urbana negotia administraret, bello pariter, & pace clarus; sed in exilio longè clarior vel virtute, vel patientia. sexdecim ferè annis patria, focis, & aris extorris, armis adhuc, & inexpiabili adversariorum odio affiduè fatigatus est, acie sæpe devictus, amissis propinquis, ambiguisque sociis perseverarentne in partibus, an magis ad hostem transirent? rerum, & auxilii inops, animo semper interrito, & contra adversa erecto stetit. Numquam ad pacem, & fœdus cum victore venit. Tandem profligato hoste, sacerdotio recuperato, & urbis gubernatione suscepta, in ipsa victoria mitis, clemens, atque temperatus fuit. Injuriarum in primis oblitus gentem patritiam ita domum reduxit, ut nemini diversarum partium injuria fieret. Patriam ipsam diuturno odio, & perniciosis dissensionibus agitatum, tum rapinis, cæde, & civili cruore exhaustam, & prope everfam, pace omnibus data, penè in integrum reposuit. Parem deinde per totidem ferè annos domi, cum sanata adhuc civium mentes non forent, atque vicini populi infesti essent, animi magnitudinem, prudentiam, pietatem, atque clementiam reipub., & sacris operatus ostendit. Multa in commune bonum, ad opera publica, & templorum ornamenta constituit. Aræ Agnetis ad quotidianum sacrificium proprium sacerdotem designavit, annuo stipendio ad sacerdotum, & magistrum alimenta comparato, qui sacras litteras publice interpretaretur, ad sublevandos, curandosque inopes; quotiens morbis afficerentur, medico pro opera in ægrotos salarium annuum de proventu prædiorum dependi voluit. Secesserat senio confectus pastor, relicta rerum cura Matthæo, in Monasterium Claræ vallis, ibique morbo correptus è vita migravit pridie nonas Augusti quinto, & nonagesimo post ducentos & mille annos, ex quo Deum, & Hominem Virgo genuit. Magnificè pro Sacerdotii amplitudine, tum suorum cura, & opibus, civiumque amore funeratus in Pontificali æde, & lapideo sepulchro conditus fuit, in quo sexaginta post annos Joannes Matthæi filius Sacerdotum potentissimus sepultus est. *Floruit per Othonis tempora* (ut quidam tradunt) *populi multitudine, & rerum copia civitas; etsi numquam otiosa ab externo bello, & seditione domestica mansit*. Ingens erat opificum copia, peditum, equitumque innumerabilis turba; qui civilem scientiam tenerent, & proinde aut responderent de jure, aut de causis judicarent supra centum numerabantur. In rationem annonæ amplius centum & quinquaginta millia civium capita venisse constat. Duo tunc cives viribus, & naturali prudentia maximè pollebant, Ubertus de Cruce, & Gulielmus Pusterleus, currentes ille equos manu comprehensos, quamvis contraherentur, retentabat, & morabatur. Jumenta pistrinorum faccis onusta sustinebat: & interim pon-

A dera ipsa humeris contra scalas ferebat: altero instantem pede nemo unus vestigio dimovere poterat. Pusterleus vero vix litteris primis imbutus prudentissimus suæ ætatis habebatur. Hunc in prætura Bononiensi jurisperitissimi, & qui leges interpretabantur in primis admirati sunt, quod prudentissimè de causis, controversisque omnibus, nullo adhibito jurisconsulto, judicaret. Matthæus post patris mortem prætorias domos habitare instituit, quas repentino igne deflagratas majores, & magis speciosas restituit. Jam illius liberi ad puberem ætatem venerant, quorum indole motus vicinarum urbium dominia appetere statuit. Novariam occupat, Galeatiumque primogenitum subinde prætorem urbi imposuit. Et quamvis Arnulphus, cujus nutum Mediolanensem administrare videbatur, ab Alberto Rodulphi filio occisus esset, nihil tamen ab his deterritus fuit, quæ animo conceperat. Pecunias imperare, & durius exigere à popularibus cepit. Honore, & commodis, quibuscumque poterat, eos prolequi, si qui à se steterant, partesque propugnaverant. Contra eos deprimere, ipoliare, atque contemnere, quorum suspecta fides pro veterem in adversarios studio, cepit. Cremonenses paulo inclementius tractare cepit: quo nomine cum Laudensibus statim jurant. Utraque tunc civitas gravioris tributis exactione, & civium exilio, atque fuga exhausta erat. Statim itaque à Matthæo deficiunt, quem ut etiam domi perturbarent, & ad pristinas seditionum procellas traducerent, reliquias Turrianæ gentis è Venetia accersunt. Aggregantur eis aliquot Mediolanensium familiæ, siue ob veterem cum Vicecomite similitudinem, siue crescentis potentia invidia, initoque inter se foedere, quas quisque poterat, copias comparant. Castellionum circumfident. Gens Castellionea, & Franciscus Carcanus in excidium Matthæi multa moliebantur. Maximè tunc anxius Vicecomes erat duarum urbium defectione, conjuratione popularium, & adversariorum adventu. Cernebat præterea animo id, quod res erat, si Castelliono inimici potiti forent, bellum grave diutius in visceribus manurum, atque agrè fines defendi posse, quando haberent adversarii, quo se tuto à latrociniis, & excursionibus cum præda reciperent. Ergo tumultuarium militem contrahit, atque Castellionum protinus contendit. Stabat tunc forte instructa hostilis acies: nec mora; manus conferunt, atrociterque pugnatur. Verum Turriani duces numero hominum, & viribus impares servata suorum parte, de certamine abiere. cedentes Matthæus, quatenus loci natura permisit, ardentibus suorum animis insecutus est. ita levi pugna victor exercitum domum reduxit. Duo illum præcipue per ea tempora angebant: quis sacrorum summam in urbe teneret. Othoni successor Ruffinus Lucensis genere designatus fuerat; sed is prius, quam sacerdotium iniret, raptus est. In demortui locum Franciscus Parmensis sufficitur. Incertum erat quo is animo in Vicecomites esset: nihilo præterea minus torquebatur, quod Arnulpho occiso, nulli adhuc procerum suffragiis imperium demandatum esset: quippe non pauci, ceu procuratio inanis foret, quando summæ rerum nullus præesset; ad nova consilia, agitandasque seditiones jam mentem, & animum adjecerant, qui ab hujusmodi consiliis facile quiescerent, si Cæsaris nutu res in Longobardis administrarentur. His curis anxius satius in præsentia existimavit ignoscendo, dissimulando, aliquo præterea beneficio iratos animos placare, atque reconciliare, quam graviore vi urgere, aut detrimentis afficere. Continuo Cremonenses, & Laudenses clementia, & benignitate moti in gratiam redeunt, atque ut bona fide reconciliatos animos Matthæus crederet, Turrianos à se protinus dimittunt. Ita consilio, & lenitate magis, quam viribus, aut injuriis bellum vicinum, & periculosum Matthæus

Matthæus sopivit. Multorum præterea animi, & præcipue popularium, qui abalienati erant, hac mansuetudine rursus in amicitiam convertuntur. Interea Suardi vetus, & ea tempestate gens divitiis, & clientelis potens Bergamo pelluntur. timuit Matthæus: erant Suardi Vicecomitis potentia studiosi, atque illorum opibus Bergomenfes in amicitia Matthæi perseverabant, qui alioquin diversas partes secuti arma inferre videbantur. Veritus igitur Matthæus, ne proximos agros Bergomenfis invaderet, qui ab hostili injuria Addua fluvio tuti videbantur, Leucum oppidum cis Adduam transferri jussit. Ita adempta obtinendæ ripæ facultate, cum exercitus vix possent transmitti, satis vicinis castellis, atque vicis, ut integri ab excursionibus, & damno manerent prospectum fuit. Per hæc tempora Opicius Estensis moritur, cujus Actius primogenitus quæ paterni juris, & ditionis fuerant, ea statim obtinuit. In Germania item Albertus Dux Austriæ ad Romanum Imperium designatur. Non erat hic nescius Vicecomitis potentiam magni ad utrumque momenti esse; siue Romam nominis, & imperatorii juris habendi gratia petere constituisset; siue civitates, quæ pro eo quod diutius designati Cæsares aut morte præventi, aut domesticis, & vicinorum bellis impliciti in Italiam non venissent, jam contumaces imperia detrectabant, ad fidem, & obsequium redigere pararet. Hic ergo Matthæum pro antecessorum instituto negotia Insubrium procurare voluit. Allectus forte per id temporis fuit inter primores Sacerdotum Nicolaus Tarvisanus genere nostræ theologiæ peritissimus, & prædicatoriæ fraternitatis magister, & rector. proficiscens ad titulum, nomenque cardinalis capeßendum, Mediolanum tunc divertit: quem Matthæus, propterea quod Apostolico fastigio proximus haberetur, honorifice, & comiter excipit: nec spes, & opinio falsa fuisset, si in pontificatu is diutius vixisset. Ceterum cum in novitate regni, & hoste circumstante uno, eodemque tempore fines tueri, motusque domesticos comprimere plerumque oporteret, ne quando hosti occurrendum foret, civitas sine custode, & præfecto velut deserta flaret; Matthæus Galeatium, quem Novariæ præfectum diximus, Mediolanensis populi magistrum, & rectorem constituit. Ipse cetera pacis, ac belli munera majore animo, atque expeditus sub domini titulo exequabatur. Res tunc urbis satis quietæ existimari poterant patre ad hostiles incurfus prohibendos parato, & filio ad civium negotia, rei que publicæ curam delegato. Sed minimè diuturna quies fuit. Nam haud pauci tam Guelphæ, quam Gibellinæ factionis, ut Matthæum domo, & regno pellerent, conjuravere. Invidebant gloriæ hominis, neque illius imperia, quamvis civilia ferre poterant. Audita popularium conspiratione, Joannes Marchio Montisferrati, quem (ut supra demonstratum est) Matthæus post patris captivitatem, & mortem avorum opibus, paternoque regno spoliaverat; ratus advenisse tempus, quo sua vindicare, & acceptas injurias hosti reponere posset: continuo patris amicos convocat, hortatur, orat, & admonet; si velint ad priscos, atque legitimos dominos reverti, eoque tributo liberari, quod inviti annum Vicecomiti penderent, arma sumant, seque sequantur. Regii juvenis exhortatione excitati, simul etiam veterum dominorum memoria permoti, cum Matthæus infidiis, & armis suorum ita implicaretur, ut vix tutus foret, nedum longius arma inferre posset, haud cunctanter insurgunt, arma capeßunt, in Vicecomitis præfectum impetum faciunt, atque finibus, & oppidis cum præsidio propellunt, Joannemque dominum suscipiunt, & appellant. Recuperato regno, confestim pro opibus, & fide popularium milites congregat, duasque vicinas civitates, Vercellenses, & Novarienses siue metu damni, siue

A magnis pollicitationibus à Vicecomite avertit. quorum rebellione Novocomensis permotus, simul etiam promissis auxiliis ad Joannem defecit. qui trium populorum novo auctus imperio quantas magnas potest copias comparat; atque ad Ticinum populabundus pervenit. Conceperat animo juvenis Mediolanensem agrum pervasitare; tum Matthæum compluribus invisum, defectione urbium lacerum, & debilitatum in conspiratione popularium patria, & regno exturbare. Jam annem trajiciebat: cum subito Galeatius pro ripis obstitit: delectam juventutem duxerat. hostem transitu continuo prohibet. tum cedentem persequens in Montemferratum redire coëgit. Accidit eo anno Raymundi mors ejus, qui Aquilejensi Sacerdotio præerat, rebus Matthæi minimè importuna. siquidem illius ope, atque impensis cognati, & clientes exilium tolerabant: tum veterum amicorum suffragio, & opera, tum præfulis auctoritate, atque præsidio Vicecomitem aut proditis oppidis, aut civilibus armis quiescere non sinebat. Ceterum fugato Marchione in spem Matthæus venerat recipiendarum urbium, quæ paulo ante defecerant. quin etiam finitimi à motu, & armis quieturi existimabantur. Verum Cremonensis precibus, & magna pollicendo Actium Estensem ad se vocat. Hic properè cum exercitu Cremonam petiit: nec prius urbem ingressus est, quam nova adoptione ab oppidanis se, & sua dedentibus in dominio constitutus fuit. Rebellione Cremonensem, propinquoque tyranno, qui bello, & minis finitimos partim territaret, partim ad motus, resque turbandas excitaret, quidam inter se consilia adversus Vicecomitem ineunt, atque cum Actio, quas contrahere potuerunt copias consociant. Henricus Moguntiacus, & Bergomensis populus ad Estensem transeunt, statimque pontem haud longè à vico Casiani super Adduam fabricant, transmissoque exercitu, vicos, & agros populantur, testæ succendunt, prædas agunt. Magno in metu tractus, qui ad Adduam pertinet, erat. Diffugiebant alii in loca paulo munitiora: alii collectis iis, quæ secum ferre poterant in urbem confugiebant. res in periculo positæ erant. Tunc Matthæus subitario milite contracto, prædatoribus occurrit, qui in castra propere redeunt. Constitit haud longè Matthæus. Actius congregi minimè ausus est, atque aliquantulum à pugna se continuit. Verum ne ignavus, & timidus à suis existimaretur, utpote qui cum hoste decertare minimè auderet, levi inito certamine, seque potius defendens, quam adversarios premens in tutiorem locum copias suas reduxit. Tum vero relicta Cremona non sine dedecore, nulla re illustri facta, Ferrariam, unde digressus fuerat, revertitur. Fugere tunc, qui dicerent: *Si federe, & amicitia Vicecomes, & Estensis jungerentur, facile reliquas Longobardorum civitates illis obtemperaturas.* Quis enim conjunctas duorum dominorum opes non formidaret? aut quis arma inferat? quando alterius jam tantæ vires essent, ut laceratus adversarios debellaret: quisve clam, aut palam duplici consociato regno insurgere auderet. Fœdus igitur inter utrosque continuo percutitur: neque eo contenti affinitatem contrahunt. Traditur Galeatio Vicecomiti Matthæi filio in matrimonium Beatrix Actii soror; sed in mulieris nomine, atque stam scriptores variare video: alii *Beatricem*; quidam *Agnetem* nominant. Utrique virginem fuisse referunt: *Dantes viduam; utpote quæ ex Nino Gallura filiam genuisset.* In Hetruria sub ea tempora avorum opibus, & factione popularium largiter Gallura poterat: & cum Pisis princeps factionis suæ foret, in Sardis agris ditissimus, aliquot etiam oppidorum dominus erat. Pulsus deinde patria ab Ugolino avunculo, & Rogerio Archiepiscopo cum uxore, liberis, amicis, atque clientibus in propinquam calcinariæ arcem confugit: moxque addito Florentinorum, atque Lucenium præsidio, con-

fluentibus etiam profugis, Pisanum omnem agrum excursione, & populatione vastabat. Mortuo Nino, ad fratrem Beatrix reversa secundo nupsit. Ego viduam crediderim: atque ut quæ Dantes tradit, vera affirmem, cum hominis auctoritas, tum mulieris sepulchrum facit, quod adhuc Mediolani in æde Divi Francisci marmoreum extat. Insculpta est supplicantis feminæ effigies: atque in ipso fastigio *hinc vipera, illinc gallus* conspicitur: duorum fanè maritorum insignia. Et quamquam prioris viri appellatio per secundas nuptias aboleri debuit; tamen sive hoc moriens Beatrix in lapide insculpi voluerit, sive filius superstes hoc fecerit, ut testamentum posteris maneret, matrem bis nupsisse; & proinde per eas nuptias plures cognatos, amicosque sibi conciliatos fuisse, duarum familiarum insignia videntur. Præterea sunt auctores, *Galeatium domo profugum Tarvisi honorifice exceptum, atque ibidem aliquot annos judicia reddidisse*: illa siquidem prætura privatam vitam agere non videbatur, & exilii incommoda compensabat. Nec diuturnior magistratus fuisset, qui ferè annuis vicibus mutari solet, nisi Joanna privigna intercessisset. Nupserat ea Ricciardo Caminati, qui tunc factionis Gibellinæ studio, & amicitia Germanorum Cæsares in Tarvisanis principem locum tenebat, atque imperia, & procurationem rerum peregrino nutu exercebat. Ergo ne profugus, & egens mendicaret aliena in terra, privignæ beneficio vitam cum dignitate egit. Poëtæ præterea enarratores *Beatricem viduam, & filiam Caminati in matrimonium datam* referunt: quos ego secutus ea haud ambigam affirmare, quæ Dantes dicat. Quamquam vatis petulantiam nescio, an livorem mirer, qui apud inferos sub pristini conjugis persona Vicecomitum gentem nobilitate, & nomine Gallurarum familiæ longè cedere palam prædicet. Mandata sunt Nini ad filiam, ut prece, & piaculis in maturanda expurgatione se juvet: quando is animæ status sit, ut expiato scelere felices sedes sperare possit. Nam mater prioris mariti immemor, jam mutatis vittis, aliò mentem, & animum pro foeminarum ingenio transfudit. Exprobrat, illam viperæ monumento, sub cuius signo Mediolanenses bella gerant, numquam tam fore illustrem, quam Galluræ nomine clavisset. Sed cur hæc Dantes? aliquando cogitavi. Longè nobilior Galeatius, tum opibus potentior, & urbis amplitudine illustrior, quam Gallura. Quis enim Mediolanum Pisis cedere, aut Vicecomitem Galluræ dixerit? nisi forsitan quo tempore vates talia tractabat, regno, & patria pulsus Vicecomes eo calamitatis, & miseriæ dejectus erat, ut nulla reditus, & recuperandi regni spes reliqua foret. quod ego vix crediderim. Nam quamvis quo tempore Matthæus exulabat, comœdias ille conficeret; decem, & amplius annos post restitutos Vicecomites Dantes vixit. Et quamquam morte Henrici septimi Gibellina factio multum jacturæ accepisset; res tamen Vicecomitis munitæ stabant. Tradunt quidam *morbo animi potius, quam quod ita sentiret, vatem locutum*. Id quod minime affirmaverim; quamquam Leonardus in historia illius epistolam velut ab irato, & vindictæ avido homine potius, quam à prudenti, & temperato scriptam redarguat. Ego ut semel, quid super hoc sentiam, proferam: neque temerè, nec mentis vitio Vates hæc dixit. Rapto Henrico, in contrarias factiones divisæ Hetruscorum, & Longobardorum civitates atrociter inter se decertabant: & quidam patria fugati, ut injurias, & rapinas ulciscerentur, & amissa recuperarent, externis armis adjuti in adversarios acerbissime desæviebant. Joannes præterea hujus nominis Vigessimus secundus auro ditissimus, ex quo Romani Pontifices regnum tenere; Matthæum, & filios diris execrationibus agitabat, pecunias factioni Pontificiæ assatim suppeditabat: potentissimos reges in perniciem Vicecomitis exci-

taverat: denique procurationem Italiæ Roberto regi mandaverat. Quo facto maximè Longobardorum animi in mutuas clades accensi erant. Coiverat Guelfum nomen, ut funditus Matthæum tolleretur. Ad hæc, & hujusmodi alia respiciens Vates, ceu desperatæ res essent, Galluræ Gallum Mediolanensi Viperæ præposuisse videtur. Forsitan pro affectu personæ secundas nuptias indignantis verba alius accipiet: si credendum est cineres, & sepultos manes id curare. Sunt qui *nec ad natales, nec ad opes respexisse, sed potius mulieris pudicitiam sugillatam* dicant: *Quod videlicet, quæ bis nupsisset, ea pudicitia corona donari non posset, quæ olim semel nuptis dabatur*.
 B Longè repetita expositio: & licentior poëmatis loco ineptior nescio, an argutior existimari debeat. Non desunt qui *divinasse umbram* exponant: quando annos circiter septem post Dantis obitum Ludovicus Bavarorum Dux paribus suffragiis cum Federico ad Romanum Imperium designatus, debellato mox, & capto æmulo, quasi ea victoria titulum, & nomen Imperatorium obtinuisset, Italiam adversus Pontificis voluntatem ingressus, captivis ceteris fratribus, Galeatium in Heturiam abduxerat, ubi profugus, & egens è vita decessit: atque iterum vidua mulier secundi conjugii poenitens priores vittas optaverit. Absurda hæc commenta, & somnia hominum, qui rerum gestarum nescii, ubi fides laborat, paulo audacius, ne dicam impudentius fatua multa proferre solent. Verum ut ad nuptias revertamur: pacta Beatrice, amplissimi utrinque apparatus facti sunt. Matthæus, ut Galeatius dignus patre, & imperio ad uxorem accederet, principum civitatis liberos splendide ornatos illi comites dedit. Actius item festo sponsalium die in conspicuo procerum, ac matronarum conventu Galeatium militariis ornamentis donavit. Traducitur subinde Mediolanum mulier: lautissime omnes excepti: epulæ multifariam exquisitæ, sumptuosa convivia exhibita, pretiosæ vestis, tum auri, atque argenti magna copia, ingentia munera comitibus data, ut magnificentiae nihil astrui posset. Matthæo nova foedera, nova amicitia, atque affinitas animos dabant, ut eos ulcisceretur, qui cum hoste sensissent, arma inferre pararent, aut rebellionis suspecti essent. Papienses igitur, qui ad Joannem Marchionem inclinasse ferebantur, primum aggreditur: agros ad urbis usque moenia hostiliter vastat. Muris oppidani se continuere, populatores arcere finibus minime aucti, aut illatam vim propulsare. Tum Vicecomes, cum nemo obfisteret, propius accedens suburbana diripit, succenditque; quo igne correptæ portæ conflagrarunt. Indignè ferebat agros vastari Philipponus Languscius, qui ea tempestate princeps inter Ticinenses erat: & ne tam insignem contumeliam, illataque damna Matthæus inulta haberet, insidiis, & domesticorum dolis illum adortus est. Jam nuptiæ Galeatii invisæ propinquis, & cognatis erant: & proinde ad res novas tendebant. cum his Languscius conjurat. *Detectis insidiis, Matthæus Petrum Vicecomitem patruelem fratrem, sive, ut alii tradunt, patrum conjurationis participem, & ad Alpes festinantem revocavit, & in libera custodia in arce Segorani servari jussit*. Uxor Archiochia, ut virum liberaret, arreptis armis, accersitisque amicis, & clientibus, Seprii præfecturam hostiliter invadit. captivitate foci, & mulierum lachrimis Conradus Ruffa inter Comenses ea tempestate opibus, & factione potens in perniciem Matthæi cum æmulis conspirat. Hæc fuit conjurationis origo, qua fraude suorum, adjunctis etiam externorum viribus Matthæus paulo post regno deturbatus fuit. Ergo ut domesticorum insidias, & hostium arma devitaret, res urbanas diligentius administrare, & si quid ad regni defensionem, tuendos fines, arcendamque vim pertinere videbatur, id omne studiosius obire. Præfecturam populi Galeatius filius, ut supra diximus,

mus, gerebat. Reddendo juri Brachium Pistorien-
sem, mox sexto circumacto mense, Bernardum Pol-
lentanum Ravennatem præficit. Annus agebatur
alter post mille & tercentum ab ortu Domini. Jam
Petro in vinculis detento, cognatorum plurimi, de-
inde popularium à Matthæo abalienantur. In co-
gnatorum odio, atque ira, incitatisque ad vindi-
ctam animis, ratus Languscus parvo negotio Mat-
thæum regno dejici posse, ne in tanta opportunita-
te sibi deesset, vicinarum urbium principes in so-
cietatem traxit. Avidus erat Languscus cum recen-
tissimæ injuriæ, tum etiam veteris ulciscendæ con-
tumeliæ. Forte biennio ante Matthæus, ne inul-
tam fraudem, & avaritiam Manfredus Beccharia
haberet, qui aliquot ante annos, ingenti accepta à
Vicecomite pecunia, Gulielmum Marchionem in
procinctu pugnæ deferuerat, cum Langusco, & no-
bilitate Papiensi, quæ patria, & finibus factione,
& armis Manfredi pulsa erat, societatem iniit, re-
ductisque in patriam nobilibus, Manfredus cum ple-
be ejectus: inde Veronam militatum sub Cane Sca-
ligero abiit. Ceterum ut sanctiora fœdera, firmior-
que amicitia, & diuturnior societas inter utrosque
maneret, Matthæus filiam Ricardo Philipponi de-
spondet: quo conjugio fides, & amor perpetuus
sperari poterat. Verum, ut sunt variæ hominum in
parandis regnis voluntates, & dum magna appeti-
mus, concidit fides, nullaque fœdera aut inviolata,
aut integra servantur: Matthæus statim Papiæ do-
minatum affectat. Inde tantum iræ, & odii Phi-
lipponus concepit, ut nuptiis, & affinitati cœptæ
protinus renunciaverit; atque adeo animi exarsere,
ut deinde in gratiam redire numquam potuerint.
Antonius itaque Fisiraga, Simon Advocatus, & Gu-
lielmus Brusatus in fœdus, & societatem cum Lan-
gusco sub specie tuendæ libertatis, quamvis Mat-
thæo re ipsa ruinam, & exitium pararent, deveni-
unt. In tanto rerum motu, vario animorum habi-
tu, & procerum conspiratione Albertus Scottus ad
conjuratos accessit ingentes copias secum ducens.
Huic statim gerendi belli imperium tradunt. No-
bilitate, & opibus ceteros anteibat: neque quiesce-
re poterat, nisi Vicecomiti parem gratiam redderet.
Eluserat forte Matthæus Scottum, dum Beatricis
nuptiæ tractarentur. Studebat Albertus fœdus, &
societatem cum Estensi inire: quam etiam rem Ac-
tius cupiebat. Parmenses debellare, & ditionis suæ
quacumque via facere is adnitebatur: quod facile so-
cio, & amico Scotto, futurum intelligebat. Nam
Albertus res Placentinorum administrabat; tum fa-
ctione, & opibus familiæ inter finitimas gentes lar-
giter poterat. Hujus filio sororem Beatricem col-
locare statuerat: & jam per internuntios de nuptiis
agebatur. Inter hæc Scottus, sive nimio futuræ nu-
rus gaudio elatus, sive ut Matthæum ab iis deter-
reret, quæ magna animo concipere videbatur, eum
ad se vocat, tum affinitatis, & nuptiarum consilia
aperit. Movit ea res Vicecomitis mentem; cogno-
scebat enim, si majores opes Scotti fuissent, illum
in tantis viribus à vicinorum injuria nequaquam tem-
peraturum. Verum, ut animo vaser erat, multa
dissimulare, nuptias, & societatem cum Estensi
haud improbare; *Circumspici tamen omnia accuratius
oportere*, inquit, *ne novi conjugii aliquando peniteat.*
Ab hoc sermone Albertus, dum circumspectius cun-
cta agere studet, rem in longius extrahit. Mat-
thæus nuntios Ferrariam properè mittit. Jam enim
de fœdere, & affinitate actum fuerat. expertus
præterea Actius erat, quid Matthæi vires possent,
& quantopere incolumitatis utriusque referret, si
nuptiarum vinculo in societatem, & amicitiam coi-
rent. Ergo mutata sententia Beatrix Galeatio de-
spondetur. quod factum Scottus ægerrimè tulit:
& magis, atque magis indignatus nihil deinde para-
bat, & moliebatur, nisi quod Matthæo cladem, &
exitium afferret. Opportunè igitur Scottus ardente

A in vindictam animo imperator idoneus creatur: qui,
ut erat gerendi belli peritus, cum res ipsa cuncta-
tionem non reciperet, suas, & conjuratorum copias
in fines Mediolanensium confestim duxit. Populan-
te agros hoste, trepidatum in urbe est: atque haud
pauci, quos à se Matthæus stare sperabat, jam mu-
tata voluntate, palam ad conjuratos transeunt. Ci-
ves in ambiguo positi prout res aut lætæ, aut adver-
sæ accidebant, ita studia sua modo in hanc, modo
in illam partem convertebant. Matthæus undique
circumventus continuo eos rogat, & accersit, qui
studio partium, aut pro fœdere, & amicitia opem
afferre debebant. Itaque statim periclitanti de sum-
ma rerum Vicecomiti subsidia adfunt. Confluxere
præterea ii ferè omnes, quorum res, & opes à Vi-
cecomite pendebant. *Corvisse* quidam tradunt *circi-
ter quindecim armatorum millia*: neque Matthæus nu-
mero militum adversariis multum impar erat. Du-
bium, & rebus diffidentem faciebant Urbani tumult-
us, fides ambigua, & renovata odia, quæ in mul-
tis consensuisse videbantur. Illud sæpe secum, &
etiam adhibitis amicis deliberavit: satiusne esset in-
tra mœnia milites continere, quorum metu in offi-
cio, & fide hi tenerentur, si qui novis imperiis stu-
derent; atque in uno labore, unisque copiis nutan-
tem civitatem firmaret: an magis patente in campo
acie dimicare. Interea Venetus, & Genuensis au-
dito, quod Matthæus in summo discrimine, atque
periculo esset, memores pacis, quæ inter utrumque
populum Matthæo disceptatore, & arbitro confecta
fuerat, legatos Mediolanum de paciscenda pace in-
ter Matthæum, & conspiratos mittunt: nam quam-
vis in armis essent, & instructæ utrinque starent a-
cies, uterque tamen fortunam belli experiri vereba-
tur, malebatque cunctando bene gerendæ rei occa-
sionem expectare, ut certam, & incruentam victo-
riam reportaret: & ut de pace commodius agi pos-
set, induciæ fiunt. Tunc statim nuntii ultro, ci-
troque commeare cœperunt, conditionesque propo-
sitæ sunt. Postulabant conjurati, ut exules primum
in patriam reciperentur, quibus etiam sua, quæ
comparerent, restituerentur: in ceteris pro æstima-
tione, & arbitrio prioris domini pecunia lueretur.
præterea non posse ex æquo in civitate degi, nisi
regno Vicecomes renunciaverit. res sanè dura erat.
non poterat Vicecomes in ordinem cogi, qui per-
petuam urbis præfecturam gesserat. aut qua via se-
curus, & incolumis versari inter æmulos, & hostes
posset, quos dominatu exturbarat, & cum quibus
totiens de vita, & imperio dimicasset. Aliquantif-
per uterque substitit. Posteaquam vero exivere indu-
ciæ, desperata jam pace, prælio decernere statuunt.
E Non erat commodum Matthæo longius à patria cum
hoste confligere: sed dubia popularium fides, suo-
rum insidiæ eum urgebant, ut fortunæ martis rem
committeret: quasi uno conflictu decerneretur, quis
in Longobardis supremum imperium habiturus esset.
Quid enim mœnibus, & muro clausus sperare de-
bebat, nisi circumstante hoste, perpetuo metu ma-
cerari? in cujus potestatem, & arbitrium, absum-
ptis per ignaviam viribus, aliquando veniret. Ga-
leatio itaque filio cum aliquot cohortibus ad custo-
diam urbis relicto, exercitui Bernardum Ravennæ
Dominum, qui superiore anno prætor in urbe fue-
rat, præficit. Jam Albertus in ripis Adduæ con-
federat, convenerantque eo Languscus, Fisiraga, &
ceteri omnes, quibus Matthæi potentia invisæ erat,
quique illum funditus evertere conabantur. Ubi
Scotto appropinquare Matthæum nuntiatum est,
F Fisiragam continuo copiis præponit. Ita uterque
ductor, legato in castris constituto, cetera belli mu-
nera alacrius obibat. Scribunt quidam *secus Adduæ
ripas utrumque ducem constituisse, & interventu fluvii fa-
ctum, quo minus manus conferrent.* Ego magis eum
sequor, qui *exilium Matthæi, & filiorum versu* con-
scripsit. Hic tradit *Vicecomitem, & Scottum juxta*
H 2 *Lambrum*

Lambrum castra habuisse. Cur enim debuit Matthæus in citeriore ripa stativa locare, præsidia disponere, vada observare, ut hostem transitu prohiberet, si Laus Pompeja sub potestate, & arbitrio Fisiragæ erat, qua tuto exercitus transmitti poterat? quid? non Scotto trajiciendi Padi facultas erat, ut inde per patentem campos liberè se effunderet? Ita Lambro dirempti jactu telorum, & levi pugna se identidem laceffebant. At Scottus numero militum fretus noctu amnem trajicit. Matthæus ubi illuxit hostem propius signa inferentem conspiciens, ad Meltium recessit. fossa, & aggere oppidum munitum erat. oppidani Matthæi partes tuebantur. Campi lata, & præcipiti fossa scissi erant: inter quam, & oppidum Matthæus castra redegit. ita facilius hostilis vis, & impetus sustineri, & repelli poterat: neque aut incautum opprimere, aut munimenta supervadere licebat. Scottus fossam, quia parum profunda videbatur, complanare, & munitiones subvertere parat. Matthæus contra aggerem attollere, propugnacula frueri, oppugnanti resistere: & si quid disiectum, & interruptum videbat, id reficere, & refarcire: nihilo tamen fecius de foedere, & componendis rebus sermones utrinque fieri. Ita aliquot dies in tuendis alter munitionibus; alter in oppugnandis castris absumpsere. Interim graviores Mediolani motus excitari: multi non clam, aut per occulta colloquia nova consilia inire, sed in cœtu, & palam de Matthæo obloqui: Turrianos identidem recipiendos in urbem vociferari: *populum tandem servitio, & tyrannide liberari oportere.* Ad hujusmodi motus compescendos idonea præsidia Galeatio non erant: ut orientem tamen tumultum quadamtenus comprimeret, Petrum, quem nova imperia molientem pater servari jusserat, teterrimo in carcere clausit. Quo facto magis irritata uxor generum lachrimis, & obtestationibus non prius fatigare desistit, quam Comensium juventute armata, bellum Vicecomiti intulit. Moguntiaci item audito, quod Mediolani populus in excidium Matthæi surrexisset, tum etiam Comenses averfi essent, ipsi conjuratis aggregantur. Hæc Matthæus componendis rebus intentus ignorabat, qui ubi minimè convenire cum adversariis potuit, armis decernere constituit. Aggeres castrorum dejecit, & fossam, quatenus milites educi in certamen commodius possent, replet. Jam duæ equitum turmæ propius hostium castra pervenerant: cum subito Galeatius oriente sole patri nuntiat in urbe omnia inimica esse: populum in fide contineri non posse: palam, & apertè arma inferri: Comenses, & Moguntiacos ad hostes transivisse, magnitudine tot ingruentium malorum obrutus Matthæus, cum nullum afflictis rebus remedium circumspiceret; etsi spes foederum, & pacis sæpe eum frustrata fuisset, iterum condictis induciis per nuntios Scottum in colloquium vocat. Die dicta ad colloquium veniunt. Tunc prior Scottus: *Vides, Matthæe, quem in locum domesticorum insidiis, & conspiratione vicinorum res deducta sit. Satius ego existimo conditionibus bellum componi, quam armis, & viribus decertare. Quid armorum adversus te conflatum sit vides. Flagrant animi in cladem, & exitium tue gentis. si obstinatus fueris, præsens est calamitas, quam propulsare nullo pacto potes. illud tamen non despero pro auctoritate, & armorum imperio, intestinam discordiam, & mota bella, etiam non mala conditione componi posse; quando adhuc vires integra: nec filius urbe pulsus, aut ipse proelio fusus sis. Non patria, & focus extorris, amissisque bonis profugus, & inops errabis: dominatu patria liberanda est. Quo facto iratas mentes mitigari, & gratiam popularium reconciliari posse video. Perpetua imperia perosi cives numquam se liberos, & à vi, atque maleficio tuos putabunt; nisi urbana negotia pro annua vice præfectus jussu populi administraverit. Sed neque tibi, aut tuis, deposito summo magistratu, quicquam periculi, aut noxæ metues: etiam si exules recepti in urbem*

fuerint. namque perpetuum urbis regimen numquam Turriano deferetur. annua, & semestres fient præfectorum vices: aquè Turrianus, & Vicecomes populo invisus, si magisteria urbana continuare voluerint. Quare censeo regnum penes me, tamquam sequestrum, & foederum sponsores deponas. Ita servitio liberatos se cives putabunt: & tibi, atque tuis tuto, & sine metu damni vivere licebit. Ad hæc Matthæus quid responderet, incertus erat. Angebatur animo, quod olim ceteris majori sibi iis æquato jure parendum esset, quos antea dicto obedientes habuisset: præterea se parum securum inter eos versari posse videbat, cum quibus tot annos de potentatu contendisset: quique exilio exhausti, & inopes, omnia facturi essent, ut crepta recuperarent, tum etiam cædibus, & exilio inimicorum incolumitati, & propriæ salutis confulerent. Sed quid faceret? nihil pacatum circumspiciebat: vicinos omnes inimicos: viribus, & dolis se premi, majoresque in dies copias adversus se coire: & si certandum fuisset, adversarios planè victores cognoscebat. Tot prægravatus curis animum despondet: subindeque inconsultis filiis, atque amicis, regnum postredie idus Junias, velut fiduciarium cum sceptra, quod procurationis insigne erat, Scotto pacis auctori, & conventionum sponsori tradit. Partem exercitus dimisit, atque Placentiam concessit. *Hoc, ceu nimis celeri desperatione factum, quidam damnant.* Potuisset oblatis variis conditionibus, tempus protrahere, donec majoribus auctus copiis hosti resistere valuisset. Nondum ab Estensi missa auxilia Adduam trajecerant: quæ ubi Matthæum abjecisse rerum procurationem cognovere, domum protinus per Cremonensium fines revertuntur. Sed dum agros populantur Cremonæ novi motus excitati fuerunt: & nisi primores civium restitissent, facile Estensis Cremona potitus foret. In tumultu, haud pauci occisi ex Actianis fuere. Sed cum per errorem in agros hostiliter invecos dicerent, ut per fines sine maleficio cohortes transirent, permissum est. Cesserat agro patrio Matthæus: omnia Mediolani in tumultu, & trepidatione adhuc erant: nullus præfecturam urbis susceperat. Scottus in hoc rerum statu, & inter dissidentia populi studia dominium urbis usurpare tentat. Et sanè voti compos fuisset, nisi Conradus Rusca, qui forte Mediolani cum præsidio erat, Scotto regnum affectanti fortiter restitisset. Gens item patricia magna de spe dejecta est. Nam qui pulso, & fugato Matthæo, utpote liberi, administrationem civitatis penes se futuram, atque ita in libertatem redire sperabant, mutatis dominis, in graviores servitutes devenerant. Turrianorum reliquæ Aquilejæ exulabant. Ii sive vocatu Scotti, sive audita Matthæi fuga, juvante Alberto Scaligero, qui ea tempestate Veronæ imperabat, ad Insubres contendere. iis primum portæ clausæ. Itaque passuum millibus tribus ab urbe triduum constiterunt. Quarto tandem die populus arreptis armis, expugnata porta, quam novam dicunt, refractisque claustris, Turrianos proceres, qui supra quinque & viginti annos patria, & focus extorres fuerant, domum reducunt, publicisque negotiis præficiunt. Tunc civilia deposita arma: agri, & cetera bona exulibus restituuntur. Turrianus continuo firmandarum rerum, & muniendi regni gratia novas amicitias facit, novasque affinitates contrahit: majorum amicos novis officiis, summaque liberalitate prosequitur. siquidem Turriano Guidoni Languscius filiam uxorem dat: Scottus Franciscus Turriano neptem filiam collocat: Simonino item Petri Vicecomitis filia despondetur. Ceteræ item familiæ, quæ genere, & opibus in civitate pollebant, Turrianus per nuptias ut sibi arctissime conjungerentur magnopere studuit. Sed fides, & gratia haud diuturnior inter cos stetit. Namque Musca (hoc Turriano tyranno nomen erat) sive gentis odio, veterisque offensæ memor, sive ut plebis

bis voluntatem, & studia propensiora in se redderet, haud ita multo post universam nobilitatem patria expulit, populique praefectum Gulielmum Brutatum genere Novariensem facit. Matthaeus interea Placentiae exulabat, qui ubi cognovit Muscam, & ceteros Turrianos in urbem receptos, rerumque potiri, irrita foedera, nullasque conventiones fervari, primum injuriam cum Alberto exostulare, fraudem sibi factam vociferari, multo etiam gravius, quod per fidem interpositam regno spoliatus fuerit, conqueri; Scottus hominem lenire mollioribus verbis coepit: quasi plebes fuerit, quae veteres dominos receperit. se tamen omnia tentaturum, ne mendicus, & vagus oberret. Enimvero tunc accensus Matthaeus, ne inimici, & proditores fraudem inultam habeant, relicta Placentia, Padum trajicit, amicos congregat, eosque milites accersit, qui nondum arma deposuerant. Cum non exiguas copias comparasset, Orium primum, qui vicus agri Laudensis est, pervenit. inde in fines Comensium ingressus populabundus ad Comi usque moenia contendit. Ferro, & igni omnia foedata erant. Multa praeterea dictu acerba adversus oppidanos jactabantur, ut eos scilicet in dimicationem, & pugnam perlicerent. sed neque ignominia, & verbis asperioribus irritati, neque populatione agri, aut incendiis tectorum moti in proelium prodire voluerunt. Matthaeus, ne cum iis bella gereret, qui moenibus, & fossa se defendebant, in patriam arma convertit. Tres illius filii Joannes, Luchinus, & Marcus vix dum puberes apud patris amicos, commutatis saepe latebris, aliquandiu manserant: deinde cum se parum tutos cernerent, in aedes Divi Eustorgii cum matre demigrarunt. Ita majestate templi, tum deprecantibus bonis, & religiosis viris aliquantisper ab injuria, & vi servati fuere. Sed posteaquam pater agros vastare coepit, tecta agrestium succendere: neque tam praedam ageret, quam perdere omnia cuperet: detrimentis populo ad ultionem irritato, monentibus amicis, pueri patria cesserunt. Scribunt quidam ducentos mercenarios equites, qui Galeatium, & uxorem, ubi Matthaeus regnum deposuit, Bergomum incolumes deduxerant, non statim finibus cessisse, sed proxime suburbana diutius oberrasse, ut rei exitum expectarent. Horum etiam praesidio tres fratres cum matre periculo elapsi fuere. Beatrix, & si à Bergomensis honorifice suscepta fuisset; ea tamen ad Actium fratrem proficisci voluit. Gravida erat mulier, & Ferrariæ septimo idus Decembres filium peperit, quem de avunculi nomine Actium appellarunt. *Pulsam omnino finibus, & regno Matthaeum secundo post mille & trecentos annos omnes ferè scriptores consentiunt.* Nam biennium conspiratione suorum, & finitimorum armis jactatus variè fuit. Sed cum res Mediolanensis in jura, & ditionem Turrianorum rediisset, deplorataque omnia essent, dimisso mercenario, & voluntario milite, Veronam Matthaeus petiit: sive affinitate cum Scaligero fretus; nam cum res illi prosperae essent, *filiam nuptum Bartholomeo Scaligero dederat; sive quod (ut Franciscus Petrarcha tradit) Canis Magnus ea tempestate unus esset, qui exules, & inopes exciperet: neque eos à se excluderet, qui claro genere nati amissis opibus, atque fortunis Veronam confugissent.* Interea Musca Turrianorum major regnum capeffit, eosque duntaxat urbi praeficit, & praefecturae titulo illustrat, qui pridem factionis Turrianæ studiosi fuissent. *Repugnasse Albertum Scottum quidam tradunt, ne statim Musca suum nutu, suaque voluntate publica negotia ordinaret, atque biennium praeiores ab eo constitutos Bernardum Scottum, Antonium Fisiragam, Pinnum Vernatiam, qui Mediolani jus dicerent.* Per hæc tempora Bonifacius Octavus, qui novas constitutiones veteri juri pontificio addiderat, centesimo quoque anno Romam petentibus, si piè, & religiose sacras aedes salutassent, expiationem scelerum concesserat, à Sarra Colum-

A nensi per insidias capitur, & in vincula conjicitur. *Mortuum illic quidam scribunt; alii solum vinculis Romam profugisse tradunt, ubi paucos post dies praemore, & indignatione, aut injecta manu interiisse dicitur.* Benedictus Undecimus genere Tarvisanus illi suffectus fuit: qui si diutius in apostolico fastigio stetit, profecto enim in antiquum imperium Matthaeum restituisset. Non erat immemor voluntatis, & officiorum, quibus Vicecomes redeuntem è Galliis prosequutus fuerat; sed in Pontificatu non perennavit. Vacavit Summo Sacerdote per discordiam, & contraria patrum studia annum ferè Romana Ecclesia: tandem Clemens Quintus Burdegalaë natus Princeps Sacerdotum creatur. Hic primus in Gallias Romanas opes, Latinosque Sacerdotes traduxit, ut Italia, & urbe Roma relicta, publica Christianæ Religionis negotia in terra Gallia tractarentur. Quæ res non solum de potentia, & opibus Itolorum plurimum imminuit; sed cladem, atque perniciem universæ ferè Italiae attulit. Musca interea Vicecomitis amicos, & eos omnes, qui in exturbandis avis opem adversariis praestiterant, partim occidi imperat; alios bonis multatos in exilium egit. Frequentia eorum nomina deferebantur, qui aut propinqui, aut studiosi Vicecomitis fuissent. Quare crudelitate, & avaritia tyranni multi in voluntarium exilium abiere. nonnulli latronum insidiis excepti occubere. Jam invisus Musca omnibus esse, saevitiam, rapinas, & gravia tributa populus ferre haud poterat. Et quamvis nobilitas ferè ex civitate pulsa foret: haud tamen pauci hominis crudeli avaritia ad nova consilia incitabantur. sed illum iræ popularium, & imminenti vindictæ mors eripuit. Filios reliquit Castonum, Paganum, Rainaldum, Odoacrem, Napum, Muschinum. Guidetus fratri in gubernatione rerum successit: vir sane paulo civilior, & haud immiti ingenio, utpote qui cædibus, & sanguine civium minimè lætaretur; injurias persequi nesciebat, inimicis non admodum gravis. una dumtaxat plus habendi cupiditate ferebatur. cujus imperia sustineri potuissent, nisi nova vectigalia, atque portoria constituisset, tributaque graviora imperasset. Pecunias undecumque is conficere, thesauros ingentes cogere, ex quibus mercenario militi stipendia persolverentur: metu videlicet peregrini praesidii firmas opes durare, atque in fide, & officio civitatem contineri sibi persuaserat. Per ea tempora facinus tetrum, & memorabile in Longobardis accidit. Dulcinus homo nefarius, & supra quam dici possit temerarius, atque audax cum Margarita, sive ea uxor, sive amica erat, criminari primum Sacerdotum divitias, & abundantes voluptates coepere: tum privatim ab illorum principibus maledicta orsi, sine discrimine nobiles, & humili loco natos non per virtutem, aut popularium suffragiis, & alio quovis merito; sed largitione, & gratia Sacerdotia capeffere. Sordidissimum quemque nunc divitiis, atque interim lænocinio, & flore ætatis primoribus Sacerdotum conciliari: atque inde ad summas dignitates, & honorum fastigia promoveri: tum per luxum, atque libidinem ingentes Sacerdotii redditus ad templorum ornamenta, sustentandosque pauperes olim designatos, turpiter dissipari, atque absumi. Hæc atque talia identidem jactantes, ceu novi sacri, & perfectioris cujusdam religionis Antistites, multorum animos erroribus imbuere. Ubi vero vulgata res fuit, viri, ac mulieres innumerabiles coivere. Voluptates tunc habitæ non solum vini, & epularum; sed promiscui, & nefandi concubitus: mares passim foeminis miscebantur: nullum pudoris discrimen erat: omnia concessa, quæ ad exsaturandam libidinem convenire videbantur. Jamque multitudine ipsa defensi propalam disciplinam profiteri: conventicula in urbibus, & agris haberi: denique in omnibus conciliabulis multa in contumeliam Sacerdotum jactari. Secta dein-

deinde excitatur, legesque sectatoribus propositæ, magna non morum tantum, sed etiam sacrorum corruptela. Finitimi hac velut contagione infecti; tum etiam licentia, & illecebris adducti Romano sacerdoti fortiter, & palam contradicere cœperunt. Ad novos ritus, nefariaque instituta tollenda, Clemens Quintus Pontifex primum per nuntios nefandi facti auctores, & pestiferæ sectæ magistros, & disseminatores admonuit: tum gravius increpare cœpit, & propositis diris execratus, ad sanitatem reducere conatus est, ut scilicet relictis propudiosis sacris, Romano Pontifici se obnoxios, & dedititios profiterentur. Ingens erat turba, atque eo vecordia, & temeritatis ventum, ut nisi vi, & armis coacti, ad reverentiam Romani Sacerdotis, patrumque recta instituta converti vix possent. Quare iussu Pontificis sublata crux fuit. ad quod signum innumerabilis multitudo arma continuo capit. Nam plerique omnes Alpini, quique Padum, atque Ticinum accolunt Christianam fidem pollui, nefandos ritus induci, & majestatem Pontificiam violari indignè ferebant. Expectavere nefarii, & audacissimi homines venientem adversus se exercitum: tandem abundante cruciferorum multitudine exterriti in montana Novariensium refugiant, ut angustiis montium, & difficultate viarum, impeditoque saltu se aliquamdiu tegerent. sed undique circumfessi, neque inopia rei frumentariæ, nec urgente fame ad deditiorem compelli potuerunt. Vix credibile quantâ patientia, & constantia, quæ animi magnitudine Alpina frigora, & diuturnam inedia pertulerint, omnibus tandem alimentis defecti, occisione miserandum in modum interire maluerunt, quam poenitentes facti in manus Pontificis, etiam promissa venia, devenire. Dulcinus, & uxor vivi capti sunt, Vercellasque perducti, atque membratim discerpti cremantur. in quorum cineres etiam saxum fuit. Post nefandi sacri sublato sacerdote, extinctisque iis, qui conscii sacrilegi conatus fuerant, Clemens tunc in Lugdunensi Gallia agens Arnaldum cognomine Pellaguram in Italiam ad componendas civiles discordias, motusque sedandos, qui in Longobardis, & Hetruscis quotidie oboriebantur, mittit. Multæ enim civitates per tyrannidem oppressæ erant. nam populorum capitanei municipali continuato magisterio, dominium inter suos quisque obtinuerant. Sub servitio, & ditione Scalligerorum stabat Verona: Passarini Mantuam, Paduam Carrarienses occupant. Mutinæ, & Regio Lepidi Estensis imperabat: cujus gentis per ea tempora opes tantæ fuerunt, ut Carolus Secundus, cui cognomen Claudio erat, Neapolitanorum, & Apulorum Rex non infra nobilitatem gentis, & regii nominis amplitudinem existimaverat, si Beatricem filiam Actio Estensi in matrimonio conjungeret: *Quas nuptias à Dante sub persona Ciapeta, seu nobilitati familia, & majestati Regiæ parum convenientes, damnari enarratores poetæ dicunt: quod videlicet Carolus nimis se demiserit, sanguinem suum vulgaverit, veterem nobilitatem contaminaverit, denique crudelior in filiam fuerit, quam in servas, & captivas barbari pirata inventi sint.* Non fuit illud Beatricem nuptum dare, sed potius vendere: quando ad Caroli opes, quæ latè patebant si quis respexerit, vilis, & maxime ignobilis Estensis existimari possit. Avaritiam Caroli, & parum honestas nuptias vates acerbius taxat: nomen generi supprimit: Carolum apertè lacerat. Estensem Actium enarratores explicant: quamquam parum felices nuptiæ fuere. Nam Fliscus, quem Actius ex alia muliere susceperat, agrè ferens super sibi novercam inductam, dolo circumventum patrem necat, statimque Veneto opem ferente, pontem, quo Padus jungebatur, occupat: tum arcem Thealdi in altero pontis capite ex adverso urbi appositam expugnat. At oppidani parricidium perosi, hominem crudelem, atque fœdum,

A quovis supplicio dignum sibi dominari indignè ferentes, arreptis armis, & urbis parte occupata, Romanum Pontificem dominum conclamant. Descendere in aciem, ac dimicare de regno cum popularibus Fliscus ausus non est: ne tamen rebellionem ultam Ferrariensis haberet, ignem in tecta injicit: quo incendio ferè dimidia pars urbis conflagravit. Cæde Actii, succensisque domibus permoti cives, Fliscum urbe, & principatu pellunt. patriam vero, & sua omnia Veneto dedunt. Legatum Pellagura Cardinalis tunc agebat. hic Veneto mandat, ut à Ferrariensi abstineat: quando in ditionem, & potestatem Pontificis urbs venisset. Venetus imperata contempsit. hunc diris, & execrationibus, quæ nisi pontificia potestate expiari possent, agitare Clemens cœpit. Potitur interea arce Thealdi Venetus: & cum minas, & abominationes floccifaceret, denunciatio crucis adversus eam gentem facta est: expiatione criminum pro auctoritate summi Sacerdotis iis proposita, qui arma adversus contumacem populum tulissent. Quo edicto multi mortales Bononiam coivere. Quin etiam Clemens ipse, ut vires Venetorum comminueret, de Narbonensi Gallia equites in Italiam misit: atque in proposito perseverantes sacris interdicit, publicèque abominatur. Magnam, & amplam mercaturam non solum per universam Europam; sed etiam per Africæ, & Asiæ loca maritima gens Veneta exercebat: horum bona, & merces prædæ exposuit; mercatorum autem familias perpetuæ servituti addixit, ut, ceu bello captos, divendi liceret, libertatemque pretio redimerent. Quo nomine in Galliis, atque Britannis Veneti ingenti detrimento affecti fuere. Per eadem tempora bellum civile in Hetruscos flagrabat. Urbes partim se ipsas cæde, & exilio civium exhaurire; aliæ finitimo bello vexatæ in mutuas clades ruerent. Clemens Pontifex ad incendia extinguenda Cardinales in Italiam misit. Hetruscos Gibellinos Robertus Neapolitanus Rex, accepta à Florentino pecunia agitabat. Guelphi Pistoriam obsessam acius premebant. Cardinales gravia minari, eosque detestari, & execrari, qui partes Roberti, & Florentinorum sequebantur, constituta die, qua sine periculo arma deponere, & ab obsidione discedere liceret: neve diversarum partium urbes, & oppida injuria, aut armis lacerarent. Robertus metu dirorum Legatorum edicto statim paruit: ceterique Hetrusci ab armis, & injuria finitimorum quieverunt. soli Florentini, & Lucenses in obsidione diutius perseverarunt. utrique populo sacris interdicitur. Jam longior obsidio, asperæque res propter inopiam victus erant. Coactus Pistoriensis deditiorem ea conditione paciscitur, ut exuli Florentino, & cuicumque Gibellino incolumi, & sine injuria Pistoria cedere liceret. Promissa impunitate urbs deditur: & ut convenerat, à re, & maleficio peregrini milites liberi cum exulibus abiere. Muri ad solum diruti sunt. agrum inter se duo populi divisere. fossæ complanantur. Ita Pistoria mœnibus subversis, amissoque urbis titulo, in duorum populorum servitute, & ditione aliquantisper mansit. Ceterum Florentinus possessione Lucensem fraudat. Namque ea multitudo, quæ custodiæ loci relicta erat, noctu, atque interdum numquam intermisso opere fossam oblimatam repurgat, muros reficit, portas instaurat. Ita Florentinus solus Pistoria potitur. Per eos dies Curtius Donatus opibus, & factione potens; quia in defendenda patria sedulo laboraverat, in dissensione populi, & cæde civium Florentia ejectus, in fuga subinde confossus interiit. In suspicionem affectati regni venerat; quod cum exulibus adversus factionis suæ commoda sentiret. Spectum novandarum rerum, & suis infensum maxime hoc fecit, quod Ugotioni Fassiolani filiam, qui nomini Guelpho infestissimus erat, augendæ potestatis gratia in uxorem accepisset. Verum Curtii cæ-

dem haud inultam inimici habuere. Nam focer ad obterendas Guelphorum opes Tarlatos Aretio pul-
 fos, ut in patriam reciperentur enixissimè iuvit. In-
 terea Pellagura contracta ingenti multitudine eorum,
 qui cruce insigniti partes Pontificis ex professo tue-
 bantur, acceptoque à Florentinis equitatu Ferrariam
 aggredi statuit. Oppidani adventu Legati, & in-
 genti multitudine perterriti, cum præsidium arcen-
 do hosti non sufficeret, metu etiam execrationum
 permoti, in Pontificis gratiam redeunt, validumque
 Legati præsidium recipiunt. Ad Castellum Thealdi
 atrox pugna facta est, in qua maiorem cladem Ve-
 netus accepit, ut neque vires, nec arma Pellaguræ
 sustinere posset. Decedente Veneto, deductoque
 præsidio, arx Legato deditur: & haud ita multo
 post Ferraria in arbitrium, & ditionem Pontificis
 universa rediit. Recepta Ferraria mitior fit Cle-
 mens. Ita Veneto culpam ignoscit, moxque diris
 liberat, atque pace supplicibus data, ecclesiastica
 etiam sacramenta restituit. Invenio *Galeatium Vice-*
comitem Matthæi filium in hoc bello sub Pellagura stipen-
dia meruisse, ac fortiter, & cum magna gloria cum hoste
dimicasse, haud umquam accepto vulnere à pugna deter-
ritum: sed gravior semper adversus hostes insurge-
 bat, & quod vix credibile videtur, in certamine
 duobus, & viginti equis suffossis, numquam capti-
 vus, sed victor semper evasit. Viri probitatem, &
 animum admiratus Pellagura illum carum, & in
 summo honore, & pretio apud se habuit. Guido
 interea exemplum patrui sequutus, eos ferè urbico
 magistratu impertiebat, qui inter finitimos gratia,
 & opibus pollerent, Vicecomitisque potentia æmu-
 li, infestique fuissent. Undecumque amicitias fo-
 cillare, factionis studia renovare, socios gratia, &
 beneficiis ad officium, & fidem servandam provo-
 care. amicitiam tamen in primis Scotti colebat.
 Scottus item, ut perpetua gratia cum Turriano fo-
 ret, evidentique signo finitimi existimarent, sine-
 ram fidem, sanctamque inter utrumque societatem
 esse, domum cum factione sua reversus, simul ut
 diversæ etiam partis vires diminueret, largiusque in-
 ter suos posset, ante omnia curavit ut custodia Pla-
 centinorum, & urbana administratio biennium Gui-
 doni Turriano committeretur. In tutelam igitur,
 & arbitrium Guidonis Placentia traditur, Passari-
 nusque Turrianus Prætor urbi præficitur. Res satis
 firmatæ erant, nisi domo profugi, dum redditum in
 patriam quærunt, Scottum perturbassent. Nam U-
 bertus Landus, Vicecomes Pallavicinus, & Lance-
 lottus Anguissola, ceterique cives, qui ex domesti-
 co certamine Bobium paulo ante perfugerant, co-
 acta exulum manu, civitatem acrius premebant. Ce-
 terum Guido ad otium urbis, & concordiam civium
 multa procurabat. quamquam ab armis civilibus
 cessari non poterat; nisi in urbem profugi recipe-
 rentur, ut sine discrimine factionum ex æquo cives
 viverent. Utrique igitur, & qui domi agebant, &
 qui patria ejecti fuerant componendi dissidii, atque
 belli arbitrium Guidoni permittunt. Hic statim e-
 xules in civitatem recipi statuit. Quam rem agrè
 ferens Scottus, suos in arma convocat. Præfecerat
 urbi Tignagam Pallavicinum Guido: accomodave-
 rat se prætori Gibellinæ factionis quidam: peregrini
 præsidium Scotto aversum erat: impetum tamen
 Albertus in prætorem facit. atrox pugna edi-
 tur. in ea opes, & libertas factionum vertebantur.
 mortem oppetere, quam loco decedere utrique ma-
 lebant, atque pro domibus, & focis concidere,
 quam denuo fugati extra fines oberrare. Prætor cum
 præsidio instantibus adversariis fortiter resistere. In-
 terficitur Rolandus Barbarubia de gente Landorum:
 ea cæde prætor conterritus statim fugatur: ita pul-
 so de principatu Guidone, post tres menses, & an-
 num, ex quo imperium urbis illi permissum fuerat,
 Scottus iuvante factione, dominium urbis rursus ob-
 tinuit. Exules intra fines patrios oberrantes, accer-

A fitis auxiliis, vicos, & agrestium tecta ferro, & igni
 impune pervastabant. arma, & milites focii, & a-
 mici in contraria studia divisi utrisque suppeditabant:
 loca populationibus obnoxia fossa, & vallo munie-
 bantur; sic Placentinus gravi detrimento diutius af-
 flictus est. Demissæ etiam per Padum naves pon-
 tem, quo fluvius iunctus erat, discutunt, multi-
 que mortales dum hi hostilem impetum arcere; illi
 tela conjicere, & vim inferre parant, miserabiliter
 periere. Interea Franciscus Archiepiscopus mori-
 tur, cui extemplo prærogativa suorum, tum suf-
 fragante plebe, Caltonus Turrianus successus fuit:
 sacerdotiumque annuente Neapolione Urfino, quem,
 ut supra ostendimus, sanandis simultatibus, & tol-
 lendis intestinis discordiis Pontifex ad Italos mise-
 rat, occepit, statimque Bononiam usque cum ho-
 nestissimo comitatu profectus est, ut Pellaguram fa-
 lutaret, illique gratias ageret, quod sibi in confir-
 mando sacerdotio favisset. Lætus salutatione, &
 officio Archiepiscopi Legatus, illum benignè exce-
 pit, & aliquamdiu honestè apud se habuit. quæ
 res suspectum Guidoni patruo Caltonum reddidit.
 Verebatur quorsum Legati liberalitas tenderet. Ad
 quam suspicionem certius quiddam accessit; *clam e-*
nim, atque palam colloquia cum Galeatio Vicecomite eum
habuisse quidam Guidoni nuntiant. ita ex eo fides,
 & gratia apud patruum diminui cœpit. Ceterum
 Guido nuper partum regnum non tantum domesti-
 co; sed externo etiam milite in primis munire, &
 defendere annitebatur. Per ea tempora habebat con-
 ductitias catervas alter Guido Delfini Gallici filius,
 qui Turrianum genus se contingere iactabat. Hunc
 tum cognitionis opinione, tum etiam quod dux im-
 piger, & militaris negotii non imprudens diceba-
 tur, pacto stipendio evocat. Exulante Matthæo,
 in Longobardis, & Liguribus intestina odia, do-
 mesticæ seditiones, civilis rabies, & crudelia arma
 jam pridem inde cœpta, dum Romani Pontifices
 cum Germanis Cæsaribus graves discordias, & te-
 tra bella, divisim in factiones civitatibus, gerunt, ex-
 arserunt. Quare visum est hoc loco quædam paulo al-
 tius, de factionum scilicet origine, repetere; tum
 quibus auctoribus importuna, & funesta prodierint
 nomina, unde cives in excidium propriæ suæ gentis
 proruerint; tum gentili similitudine, avitæque duran-
 te rabie, miseri filii, atque nepotes ferro, cædibus,
 igni, atque rapinis funditus penè sese exhaurerint.
 Res non sanè vetus propinquum est malum; & graf-
 tante ulciscendi, & regnandi libidine, velut per ma-
 nus acceptum: quamquam nullis certis monumentis
 res tradita sit. Credo maiores, cum litteræ, etsi
 inelegantes, tamen aliquæ forent, tædio subeuntium
 malorum, neve ea ad posteros transirent, minus
 curiosos in re tetra, & funesta extitisse. Ita forsan
 putavere posteritatis otio, concordia civili, & ur-
 bium tranquillitati consuli potuisse, si nulla certa,
 & constans facti detestabilis memoria maneret. Nam
 quæ Bartholus, & alter legum interpret de factio-
 num origine tradunt, ea non solum falsa, sed inep-
 tissimè commenta fuisse dicimus. Differant, & re-
 spondeant, si diis placet, de facti jure civilis scien-
 tiæ studiosi: quotiens vero de facto ambigitur, id
 alii exquirant, & explicant. *Discordasse miseros ci-*
ves, & arma in se ipsos convertisse sub primo Federico,
posteaquam is Romanos Pontifices injuria laceßere cœpit,
recentiores historici tradunt. tunc plebem ab optima-
ribus discessisse. Ea ut vim, ac maleficia à se propel-
 leret, Romano pontifici se totam dicavit. Ita hu-
 milior turba majestate sacerdotii à vi, & contume-
 lia potentiorum tuta stabat. qui vero nobilitate,
 magnis divitiis, aut armis, & longis clientelis in ur-
 bibus eminentiores erant, hi, ut ceteros obnoxios
 sibi facerent, popularibusque interim imperarent,
 & sine metu judiciorum, aut pœnæ quicquid libi-
 tum foret agere possent, ad recentiorum Cæsarum
 vires, & gratiam respiciebant. Porro ea factio, quæ
 præ-

præsidio Pontificis incolumitatem, & salutem suam tuebatur, Guelpha appellata fuit. qui vero opinione, & potentia Cæsarum eminere, & regnare studebant, hi Gibellinos se appellare voluere: quæ appellatio ab eo Henrico, qui primus Germanorum procerum suffragiis ad imperium evectus est, fluxit. Gibellinus enim dictus est Henricus, de vico videlicet, ubi ortus erat. Qui deinceps secuti sunt Cæsares, præter Lotarium, ab hoc Henrico aut progeniti fuere, aut eum cognatione legitima contigere. Lotarius Gibellinæ familiæ hostis fuit. Nomen, & appellatio gentis consensuissè per undecim Lotarii annos existimabatur: nisi eam renovasset, & instaurasset in Italia Federicus Junior, qui Gibellinos omnes palam coluit, quotquot à se adversus edicta, & opes Pontificias steterunt. *Guelphos nuncupatos* quidam tradunt *ab eorum duce, qui Secundo Conrado in Sicilia primum, tum alibi restitissent.* Huic Guelpho nomen erat. *Quo casu, siqui descendentes in Italiam Cæsares, Romamque subinde petentes non modo intra urbes non reciperent; sed finibus quoque arcerent, eos Guelphos appellari invenio.* Verum (ut supra diximus) juniores historici multa falso, & secum dissidentia memoriæ mandant. Quare vix certi quicquam de origine, & nomine factionum affirmare aulam. Res durat Italiæ calamitosa, & funerum plena. Illud tamen subjiciam, me longè ab iis dissentire, qui pestiferæ dissensionis Federicum Ænobarbum auctorem faciunt. Nam etsi infestus Pontifici Federicus foret; nulla tamen erant inter populos contraria studia, nullæ diversæ voluntates: neque factionibus inter se decertabant; sed populariter hi à Pontifice stabant; illi Cæsarum partes sectabantur. Quam rem sic esse abunde testatur formula Constantiæ pacis, quam juniores jurisconsulti instar legis receperunt. Societatem, & amicitiam unanimes, & idem sentientes sine differentia ordinum, & factionum Longobardi universi, Papiensi duntaxat excepto, servabant: atque paciscendæ pacis gratia in Constantiam convenire, qui triginta antea annis foedus inter se percusserant, Federicumque ipsum aciem, & inexorabilem Alexandri hostem acie aliquando vicerant, & trans Alpes fugaverant. Neque post mortem Alexandri dissolvi ea societas, aut dissociari animi potuerunt. Sed in Annalibus, & Actis urbium hæc nomina imperante Ænobarbo nequaquam legimus. Designatus ad imperium vivente, & annuente patre Henricus Siciliam, quam dotalem per Constantiam uxorem habuerat, libidinose, & crudeliter vexare coepit. Deum templa ornamentis spoliavit, Cælestinoque Pontifici infestus filium reliquit quadrimum, quem Rogerium Federicum nominavit, ut videlicet duplici nomine maternum, paternumque avum unde progenitus erat testaretur. Mortuo Henrico Philippus primum, tum Otho ad Imperium designantur. Honorius Pontifex Othoni iratus Rogerium Federicum jam Imperio maturum, deposito Othone, regni titulo, & imperialibus ornamentis exornat, qui simul atque imperium adeptus est, ab Avo non degenerans, Honorium armis, & gravi contumelia lacessit: mox insolens, & gravis tyrannus paterni sacrilegii hæres templorum jura, & redditus usurpat. Gregorium, Cælestinum, & Innocentium bello, & quibus potuit injuriis affecit. immanis sanè Barbarus: quippe qui amplitudinem Pontificiam violare numquam destitit. Tunc viguere odia: coepta dissidia aucta sunt: & recenti injuria irritatis animis, eo domesticus furor, atque sævitia progressa est, ut miseri mortales abjecta ea charitate, quam sanguis, & patria ingeneravit, humanitatis penitus obliti atrocius, quam feræ inter se dimicarent: non victoria contenti, aut inimicorum exitio satiati, nisi iis cum tota prole extinctis, qui diversa sensissent. Tunc ferox, & impotens Barbarus quocumque in populo eos discerni voluit, qui suæ, quive Pontificiæ factionis forent. unde con-

A fuetudo tenuit, ut in omni negotio publico nihil citra factionum discrimina geratur. Quæ exitialis consuetudo ferè in urbibus, oppidis, & præfecturis Italiæ in hæc usque tempora durat. Hæc autem pestis, & pertinax hic animorum habitus ab Hetruricis primum coepit. Gens ea seditionibus, & domesticis armis jam inde agitata, ex quo Romanus Populus bella in Hetruria fecit. Scribit Livius in decimo ab urbe condita, *Hetruscos ab Aretinorum seditionum exorto motu de rebellionem cogitasse.* Tunc Aretio genus Licinium præpotens ob divitiarum invidiam armis popularium patria ejectum fuit: neque Hetruria ipsa prius ab Romano dictatore pacari, Aretinorumque seditiones componi potuere, quam gens Licinia cum plebe in gratiam reducta fuit. Sed Pistorii post mille, & quingentos ferme annos, Cancellarii, & Pancratici auspiciosa in cladem Italiæ seminaria (quod equidem nollem) dissensionum, & civilium armorum dedere. Quo furore Volaterrani, Miniateses, Aretini, & Lucenses acti qui contraria sensissent, eos patria eiecere: tum præ impotenti ira efferati, & vicinorum, cognatorumque sanguine semel inquinati, nulli ætati parcentes domos ad solum diruerunt. nihil tam crudele, & atrox erat, quod ad internecionem adversariorum non aggrederentur. Jam morbus per universam sparsus Italiam dominabatur. tunc velut digladiantium par utraque factio vires suas experiretur, ad Parmam veluti in arena congregi, & depugnare voluerunt. Superior fuit Gregorius Montelongus. Superbus, & crudelis Barbarus ex insperato victus turpiter ex Longobardis fugatur. Hoc loco Mediolanensi jure gratulari licet. In contrarias voluntates ceteræ civitates distractæ erant, & pro diverso animorum habitu arma tractabant. Soli Mediolanenses unanimes per ea tempora nulla domestica dissensione agitati, propriæ salutis, & libertati operati, nullis conditionibus Barbaro conciliari potuerunt. immo vero his se applicabant, qui ferum, & sacrilegum hominem intensum habuissent. memores erant cladis ab Avo acceptæ, cujus ferociam, & immanitatem in Nepote agnoscebant. Ergo tum recenti patriæ excidio, tum exultantis juvenis superbia subsidia obfesso Legato Mediolanensis submisit. Sed numquid per fraudem filii in Appulis enecto Federico, simulates, & intestina odia quievire; aut ad concordiam, & sanitatem reversi sunt Itali? Minimè sanè. Gravior tunc domi discordia oborta, in reponendaque injuria magis mentes exarsere. In Italiam descendit Conradus, ut Patris videlicet opes reciperet: atque in Apulos transmissus per insidias à fratre occiditur. ita duplici parricidio Manfredus Siculis, & Calabris potitur. Ad hujus fidem, atque præsidium Gibellini ex Hetruria Guelphorum armis fatigati confugiunt. hos primum à se cum exiguis copiis dimisit. Verum, cum in suos sævitum fuisse ægerrimè ferret, majora auxilia protinus summittit. Guelphi acie victi Florentiam deferunt. Gibellini patriam defensore vacuam ingressi, de illa evertenda consultarunt. tunc animum & ab odio, atque ira invictum Farinata Ubertus præstitit. in vindictam, & exilium direpta bona ab adversariis exacuebant. civili præterea sanguine commaculatus in ruinam urbis ruere debuit. Prævaluit tamen patrius amor, uniusque intercessit, quominus pronis, & accensis ad excidium exulibus pulcherrima Hetruscorum civitas subverteretur. In Manfredi potestatem, & ditionem Hetruria omnis devenit. Regis præsidio nixi Gibellini in nomen Guelphum debacchabantur. nullus damnis, & exiliis modus. ipse quoque Manfredus ea victoria, & novo regno elatus, pro Patris, & Avi licentia, atque avaritia templa spoliavit, & sine ullo pudore, aut numinis reverentia redditus usurpat. contempta adhuc summi Pontificis auctoritate, sacerdotia, quatenus suæ ditionis erant, administrare voluit, & nisi res ecclesiastica ad nutum,

& ad voluntatem suam omnis facta fuisset, exempla, & cruciatus in eos edere, qui imperia detestassent. Temerarii hominis, & impii tyranni injurias, & sacrilegia Urbanus Tertius (ut supra diximus) non ferens, simul etiam factioni pontificiae metuens, quæ in dies, crescentibus æmulum viribus, minui existimabatur, ad peregrina arma convertitur, Carolumque Ludovici Francorum Regis fratrem, magnis oblatis conditionibus, ad se vocat. Jam de Narbonensi Gallia copiae in Hetruriam pervenerant: moritur inter hæc Urbanus: cui successus Clemens itidem Carolum hortatur, ut in hostem publicum invehatur. Confluxere reges: Manfredoque in pugna occiso, regnum Siciliae, & Calabrorum Carolus statim obtinuit: Mox Conradinus Federici nepos vocatus Gibellinorum Alpes transgressus, Romam annitente Avi factione deducitur, invitoque Pontifice Imperator consalutatur. tum in Carolum inductus prælio vincitur, & sine ullo majorum respectu mox securi percutitur. In victoris Caroli tutelam, & fidem omnis pontificia factio se dedit. Siculi interea superbiam, avaritiam, & solutiorum Gallicæ gentis cupiditatem non ferentes, constituta die Gallos nihil tale timentes singuli suos adorti ad unum obtruncant, insulamque, & sua Petro Aragoniæ regi, cui Constantia Manfredi filia nupsit, dedunt. De regno Insulæ certatum est diutius. Pontifices à Carolo stabant. Petrus quod uxoris hæreditarium erat, id se vindicare aiebat. Tandem convenere, ut singulari certamine controversia, & bellum tolleretur. Locus pugnae ad Burdegalam deligitur. Arago cum suspecta, & infida omnia cerneret, de conditione loci multa causatus in certamen non prodiit. Capitur interea Junior Carolus. Martinus pontifex indignum ratus Petrum pontificalibus jussis non parere, illum non modo publice execratus est; sed pro auctoritate, & jure sacerdotii alterum Carolum ex Francorum rege progenitum Aragoniæ dominum creat. Carolus captivitate filii moestior, dum in comparando milite intentius operatur, interiit. Post mortem patris Carolus cognomine Claudus regnat, eosque omnes, qui sub patrocinio, & protectionem parentis se tradiderant quibuscumque rebus potest, in perniciem adversariorum juvat. Quo tempore Bonifacius Octavus recentium legum conditor Gibellini nominis ex professo hostis, contra quam sacerdotii præfectura, & religionis pietas exposcebat, verba pestifera protulit. Initio magni jejunii, cum genibus nixi, atque cernui miseriam nostram, insperso super capite cinere recogitamus, Summus ille Pontifex, pulvere ob Porchetæ Spinolæ oculos (hoc Genuensi Archiepiscopo nomen erat) infuso, hæc subjecit: *memento homo quod Gibellinus es, & cum Gibellinis in pulverem reverteris.* Sub hoc sacerdotum principe ad annos mille tercentum, idem Pistoriensis populus discordiarum civilium, ac malorum sator, & auctor, iterum nova concitata seditione, Hetruriam in contraria studia, discordesque voluntates impulit, novisque inditis nominibus, hi Albi, illi Nigri in tumultu civili vocitati sunt. Gliscente domi certamine, Florentiam utrique venerunt, ut scilicet pro arbitrio potentis populi, quem communem amicum putabant, domesticæ controversiæ componerentur. Verum ut noster animus in cognitione causarum, & dum lites adjudicamus, modo huic, modo illi est propensior, disceptator ille populus contagione infectus bifariam & ipse scinditur. ita funesta orta dissensio, crudeleque certamen inter cives suscitatur. Domo, & patria pelluntur Albi, quorum etiam bona publicata fuere. Novi exules partim profugo Gibellino adhæserunt; alii in propinquas urbes, vicinæque oppida demigrantes, quærendæ dumtaxat rei, tuendæque vitæ occupati, factionis, atque civilis ambitionis obliti quievere. Caroli Philippi Francorum regis frater, cui cognomen *sine terra*, Romam

A petens Florentiam forte diverterat: & dum furorem domesticum sedare tentat, Nigros secutus, ut pars altera patria ejiceretur auctor fuit. Hujus perfidiam Dantes conqueritur, & accusat: (In numero Alborum fuit poeta, & proinde domo fugatus plus viginti annos errabundus, & egens alienis impensis vitam egit.) Unum ego hic subijciam, quod forsitan in aliam partem, atque dicam plurimi accipient, me non parum mirari duos integerrimos homines Dominicum Calagurritanum, Franciscum Picentem, sive Umbrum divino suffragante spiritu duarum fraternitatum fundatores, & principes, cum suo tempore hæ pestes pullularent, sævoque urgente tyranno urbes rapinis, fuga, & cæde civium exhaurirentur, nascenti malo non intercessisse. & ut erant intrepidi morum censores, & graves criminum objugatores, eos in primis etiam coram animosè corripere debebant, qui civili sanguine commaculati miseras civitates funditus perdere nitebantur. Hoc perfectionis Christianæ intererat: hoc animos infectos, & semper novo vulnere exacerbatos mitigasset. His interpretibus, & (ut sic dicam) arbitris in sinceram, & perpetuam gratiam reditum foret. Hoc denique charitatis erat opus, quam Christus humani generis redemptor in primis ut colerent, discipulis mandavit: profecto enim excisæ penitus radices morbi funestissimi fuissent. Sed ideo deteritos sanctissimos viros puto, ne, quod officii sui erat, apertè, & propalam factiosos criminarentur, propterea quod religionis principes, & rerum domini, dum uterque suæ ditionis Italiam facere tentat, civitates in domesticas dissensiones, funestaque bella impellebant. ita necesse erat alterutrum offendere: atque interim Romano pastori liberius contradicere; quod non sine piaculo, & religionis macula tentassent. Hæc, & talia veriti, officio se satisfacturos putavere, si bonorum conventicula, & fraternitates, sive collegia excitassent, sectatores hortati, ut sæculo renuntiantes nudi, & inopes Christum amplecterentur. ita salutaris exemplo vel taciti ad concordiam, & charitatem miseros tunc mortales in se ipsos desævientes à cædibus, & vindictæ studio avertissent. Sed pro dolor, religiosi postea viri, qui à turba secesserant, remoti videlicet à rerum commercio partim velut contagio quodam correpti ad civilia certamina animos applicarunt; alii ut longius à conspectu tot malorum, & seditionum procella se subducerent, in tranquillissimo portu trans Alpes philosophantes non tam speculationi altissimarum rerum, quam frivolis quæstionibus, & captiunculis quibusdam vacabant. Quanto conducibilis fuisset, si extirpandis odiis, domestico furori sanando operati fuissent, à quorum institutis, & inveterata corruptela duo integerrimi viri, & usque in senium acres etiam scelorum objugatores, tum indefessi rectè vivendi præceptores Vincentius Hispanus, & Bernardinus Senensis longè abfuerunt. Non solum lapsas, & umbratiles religiones aliqua ex parte ad bonos mores, & vera patrum instituta hi revocarunt; sed quo magis efferati animi cædibus, & rapinis gaudebant, eo viri sanctissimi fortius, & constantius repugnabant. Inter gladios cruore adhuc madidos incurrentes sine metu supplicii, aut mortis in eos invehebantur, qui per sanguinem, & suorum cædes regnum quærent. Fremant licet ceteri, qui contemplandis cælestibus se totos dicavere: Si veri rerum æstimatores esse volumus, exutam feritatem, mites animos, tranquillitatem domesticam, civilem concordiam, & eam religionem, qua Deum piè, & sincera mente colimus, tum si quæ sine fraude reconciliata inter populos gratia, hæc omnia Bernardino, & Vincentio accepta facere debemus. Digni cælo viri, & velut Dei à posteris colendi! Sed ad institutum revertamur. Post Juniorem in Appulis sublatum Federicum designati in Germania Cæsares partim præ ignavia oscitantes,

partim vicinorum bellis impliciti, neglecta Italia, umbra, & imagine imperii fruebantur. Romani vero Pontifices Galliis oblectati, rem pontificiam per procuratores administrari in Italia contenti erant. Pastore destituti, & regni moderatore Itali homines domestica arma semel capientes in se ipsos ubique ruere, atque favere. Duo Caroli pontificiam factionem enixissime defendebant. Tum Robertus Patris, & Avi regno potitus Guelphi nominis signifer, atque protector; Pontificis etiam auctoritate vallatus, magnisque copiis succinctus ea tempestate Ligures, & Longobardos longa discordia, & perpetuis incommodis domi exagitatos sollicitabat. In alteram factionem minacem, & infestum animum gerens, triginta, & amplius annos civitates ab intestinis malis, & externo vulnere quietas esse non permittebat. Hujus vires, & impetus Matthæus Vicecomes primum sustinuit: tum filii, & nepos ex omni Liguria, Longobardorumque finibus expulsi. Consenuerat vetus societas, qua Cisalpini populi externam vim propulabant, libertatemque suam tuebantur. Dissolutæ confederationes erant. nihil in medium ob contraria studia, diversasque voluntates confulebatur. peregrino regi omnia obnoxia. fugerat ille consularis magistratus, cui ceteri focii parerent: & cujus nutu, atque jussu rapta repeti, bellaque raptori indici solebant. Duo interim, aut quatuor, & quinque ad summum vicini populi societatem inter se constituebant, magis ut factionis vires, & opes foverent, quam ut mutuo præsidio incolumes essent. Post Constantiæ temporariam pacem, qua Longobardi se dedititios priori Federico, atque Henrico filio ad tempus professi sunt, durabat adhuc vetus illa societas: Prætores tunc primum urbibus impositi jussu populi, & ex municipalis jure, & ordine disceptantes judicia litiganti ex æquo reddebant. deinde Magister populi ad libertatem videlicet, & commoda plebis procuranda creabatur. Hunc Capitaneum dixere: ita triplici magistratu consulibus duobus, prætore, & populi præfecto publica negotia administrabantur. militiam tamen summopere colebant: domesticum magis, quam peregrinum præsidium domi alentes, cui ex vectigalibus, portoriis, & aliunde confecta pecunia stipendia persolvebantur. semper in armis stabant tuendis finibus appositis. Verum ut castrensis est frivola fides, mobilesque militantium animi, & plus habendi cupiditate in rapinas, & injuriam proni, in patriam sæpe conjurarunt, atque interim vicino tyranno auro libertatem prodidere, mœnibus, & patria cedentes, hostiliaque ausi agros tantisper populabantur, donec aucto stipendio, vel nova conditione cum popularibus reconciliarentur. Secundi erant urbani milites in omni publica administratione nomen ab eo Divo fortiti, in cujus tutela civitas posita foret. Hinc Mediolani Robustorum societas Ambrosii, Alexandria Petri appellationem fortita fuit. In omni civili dissidio, atque certamine magni momenti erat hic miles. Triplex itaque erat in urbibus ordo. nobilitas, miles, & plebes. gens scilicet infima, & sedentaria multitudo. Non abfimilis fuit hæc rerum procuratio Græciæ Amphictyonibus: nunc etiam Antiates, Seduni, Veragri, & id genus Alpinae gentes hoc statu rerum, & pertinaci societate, atque amicitia libertatem suam tutantur adversus vicinorum regum impetus, & arma semper invicti, formidolosi cæteris, finitimos plerumque sine dimicatione ad quasvisque voluerint conditiones compellunt. Sed foedera antiqua, & sanctum societatis nomen, ac indissolubile illud vinculum primus labe factavit, concussit, atque dissolvit, & concordēs, atque idem sentientes Longobardos in domesticas dissensiones, civiliaque odia, & arma traduxit, ut supra diximus, Federicus Junior sub Constantia matre educatus, impietatis, atque sævitiae, tum paternæ superbiæ, atque rapinæ hæres. tunc obortis seditionibus, in bella impia proruentes miseræ civi-

tates, Romano etiam Pontifice intestina damna fervente exhaustæ penè sunt. Florentinus hujus pestis fons, & origo universos penè Hetruscos ad partium studia, intestinaque certamina cæde, & exilio civium lætatus compulit. Carolus, quem Urbanus, ut supra diximus, adversus Manfredi arma acciverat, duplici victoria eo superbiæ, & arrogantiae progressus est, ut deditione Hetruscorum non contentus, Longobardos, Ligures, Salassos, & ceteras Subalpinas gentes aggressus fuerit. Conciliaverat sibi eorum gentium principes jam inde, cum ex Alpibus copias in Appulos transmitteret; nam ex itinere Caroli ductores ei factioni auxilio fuerant, quæ Casarum votis, & potentiae adversabatur. præterea haud pauci ex urbium præfectura, dum magistratus continuant, viam ad regnum paravere. Hi Regis præsidio nixi, cum potentatus æmulos patria ejicerent, Regis amicitia res firmare conabantur. ita plerique discordes populi, & domestica contentione jactati, ut quietem ab intestinis incommodis compararent, aut Carolis se dederunt, aut in eorum fidem, & amicitiam sua committebant. Florebat ea tempestate inter eos Ligures, qui cis Apenninum accollunt, Gulielmus Marchio Montisferrati. vetus erat illi nobilitas, affinitates splendidissimæ, armis, & rebus magnificè gestis celebris, & finitimis omnibus metuendus, Caroli opibus perpetuo, & fortiter resistens. hic de imperio cum Vicecomite aliquando prælio dimicavit. Vercellas, Alexandriam, Derthonam, Novariam, & postremo Papienses ditionis suæ fecerat. Foedus, & arma metu Tyranni quidam consociaverant: & nisi ab Alexandrinis circumventus fuisset; profecto enim regnum in Longobardis is obtinuisset. Actiolinus in Venetis sævissimam tyrannidem exercuit, Junioris Federici commilito, expeditionum socius, & post illius mortem Gibellinae factionis assertor, etiam defensor sævus, & acer fuit. qua tempestate Bossius Douariensis Cremonam, Ubertus Pallavicinus Parmam, & Placentiam opprefferant: neque satis tuti sibi, nisi per diversa popularium studia, civilesque furores videbantur. Comites, qui de Sancto Bonifacio appellantur, Guelpham factionem amplexati partes pontificis sectabantur. hos Verona, & principatu Scaligeri exturbaverunt: quorum Mastinus, posteaquam regnum adeptus inter Veronenses fuit, Guelphis infestus non prius ab exilio, cæde, rapinis, domorum subversione destitit, quam eos ferè omnes sustulit, qui divitiis, potentia, & majorum opinione, & nomine inter ceteros pollerent. Succedere Albertus, & Bartholomæus utrique Scaligeri. hi partium studio, & muniendæ tyrannidis gratia fugandis civibus, & cædibus modum nullum fecere. Non minor fuit sub Pinamonte tyranno Mantuanorum calamitas. usum equorum iis interdixerat, qui diversa sensissent. Capitale erat equos conscendere: & nisi ad ejus nutum, atque arbitrium cuncta tam privata, quam publica gesta fuissent, continuo horrendos cruciatus in advertarios edere. ita Gibellina factio Mantuam obtinuit. Post Tyranni obitum, dum fratres regnum obtinere conantur, in mutuas cædes proruerunt. In hoc ferè Longobardorum Annales consentiunt: & ita esse Gulielmus Ventura, qui civilibus, & externis per ea tempora bellis interfuit, tradit. Cremonam hic morbus atrociter invasit: gravia fuere intestina vulnera, incredibilis profugorum multitudo: nam ejecto Bossio Douariensi sub annos Domini mccc. x. Gibellini nominis circiter decem millia patria emigrare, qui alias sedes, aliudque domicilium quaererent. Horum filii, atque nepotes aris, & focis extorres post annos quinquaginta sub Henrico Septimo in patriam restituti sunt. neque satiari cæde, & exilio tot virorum rabies potuit, nisi arces, & relictæ in agris adversariorum succenderent, ad solumque diruerent. Bononiensium calamitates per domesticas contentiones, intestinaque arma gravissimæ fuerunt.

re. tandem pulsus Lambertinis, & Afinellis penes plebejos, qui Guelphum nomen profitebantur, summa rerum mansit. Ceteræ ferè Longobardorum civitates, & oppida, in quibus inextinguibile vigeat odium; cum Caroli submissis auxiliis in dissensionem, & pugnam urgerent, exitiali furore, armisque domesticis detrimenta undecumque penè ad excidium acceperunt. Astam civitatem aut juris, & potestatis suæ ut faceret, aut amicam, & sociam haberet Carolus in primis laborabat. Inter Astenses duæ veteres, & opulentæ familiæ de principatu urbis contententes gentili sanguine, & cædibus foedatæ, ad ulciscendas injurias irritatis animis in novas societates coibant. Gutuarius Solariis impar, eos secum pertraxit, quibus opes timori, & invidiæ erant. conflata societati inditum nomen *Bechintinere*. intra mœnia continuo decertatur, atque in area Divi Secundi, quem urbis patronum Astensis magnificè colit, ingens strages, dum cedere loco uterque turpe, & periculosum putat, peracta est. consuetudine armorum, & multitudine cædum efferati animi à detrimentis, & atrocitate maleficiorum desistere nequaquam poterant. Sociorum calamitatem miserati Papienses legatos mittunt, quorum oratione, & opera primum mitigatæ mentes fuere; mox remissis injuriis in gratiam reditum est. Opulenta tunc Asta mercatura, & diuturno transalpes fœnore erat. sic domi instructos milites paratos semper habebat, externumque præsidium copiosè effusa pecunia conducebat: atque interim fœdera, & inducias auro ab regibus, & hoste redimere. Albenes injuriis vicinorum laceffiti, & damnis, tum etiam armis à Rege vexati in Caroli fidem, & potestatem deveniunt. Albæ præfectus regius cum valido præsidio plurimum agebat. vicinas urbes in Regis amicitiam sollicitabat. si qui vero populi civili contentione agitantur, iis primum suppetias ferre, quos ad Regis arma, & opinionem respicere animadvertisset. tum aut fugatis adversariis, aut per causam componendi certaminis alios in jura, & arbitrium Caroli traducebat. Alexandrini, nova civitas ex Romanorum coloniis ædificata, pro veteri Romanæ gentis diffidio plebe à patribus dissentiente primum agitati sunt: tum per impia Junioris Federici arma ipsi quoque, ut ceteri Longobardi, in factiones divisi. ita duplici discordia, & bifariam pugnantibus animis inter ordines de administranda repub., hoc est plebejine, an nobiles res urbis gubernarent: tum vero de principatu per factiones crudelissimè decertatum fuit. Exules Alexandrinos Astensis pecuniis, commeatu, & militibus magis in excidium patriæ, quam ut fugatis adversariis, in sua restituerentur, juvabat. magni momenti Alexandrinus imperia inter suos quærenti erat: civitas populo frequens, ut quævis alia: & quia fines angusti erant, continenter cum vicinis bella gerebant: paucis jugeribus contentus quisque satis videbatur sibi locuples, si prædiolum, quod majores in divisione agri acceperant, id servasset. *In omni veteri Longobardorum societate Alexandrinus coivisse* legitur. atque utinam externo implicitus semper bello fuisset! numquam in se miseri cives totiens, & tam crudeliter manus, & impia arma obvertissent. Papiensi civiles motus, gentiliaque incommoda primum domestici milites importarunt: & per eos in plebem arma mota fuere. Tunc dissidentes à patribus plebeji Joannonum Becchariam sibi præfectum faciunt: quo ductore cum militibus continuo decertarunt, quos patria ejiciunt. Qua injuria gravius irritati milites, atque finibus oberrantes adversarios, quoscunque nacti erant, alios spoliare, alios pulsare, & occidere: vicis præterea, & castella invadentes hostiliter diripiebant, ferro, & igni cuncta vastantes. Astenses, ut gratiam benemeritis sociis referrent, per legatos & discordiam, & civilia certamina componere tentarunt. sed plebes viribus, & armis superior numquam bona fide in gratiam cum

A milite redire potuit. *Ingentem multitudinem stipendiis Papiensium meruisse tunc* legimus. Scribit idem Ventura Astensis, *se vidisse aliquando quinque hominum milia, quos sua pecunia Papiensis conductos in armis haberet*: & five domo fugati, five novandarum rerum gratia adversus populares conjurassent, intolerabili detrimento Papiam afficiebant. per quæ item tempora Astenses, & Papienses metu Caroli regis, qui bello, & injuriis Gulielmum Marchionem laceffebat, vires cum eodem, & arma confociant. Verebantur siquidem ne, debellato Gulielmo, ipsi deinde in ditionem, & servitutem Regis compellerentur. Non permittebat quietos vicinos esse Carolus, quos si non armis palam fatigabat, fraudibus, & dolis adoriebatur. Maritimi Ligures gens discordiosa tunc maximè inter se contendebant, jam inde factionibus decertantes, ex quo Federicum Juniores Innocentius Quartus propter continentes injurias, & perpetua maleficia, vocatis in concilium patribus, Lugduni imperiali jure, & Cæsarium ornamentis privavit. Tunc qui Federici partes sectabantur, Genuæ *Mascharati*; pars illis opposita *Rampini* appellati. quamquam sunt, qui tradant, *post Federici mortem Innocentium elaborasse, ut Genua profugi in patriam restituerentur*: quorum damna ut emendaret, pecunias etiam liberaliter exposuit. Et quia Ligures in nostra usque tempora perpetuo motu, domesticisque armis jactantur, non ab re erit quibus magistratibus, atque præfecturis publica illorum negotia administrata fuerint: tum vero grassante intestino morbo, peregrino quamquam hoste vexati, ab domestico certamine numquam cessaverint, exponere. Ad annos Domini mcc sub consulari imperio res Genuensium stetit. in magistratu urbico quatuor annui præficiuntur consules: circumactio consulationis, totidem delecti cives sufficiebantur. horum præcipuum munus erat litigantes audire, causas cognoscere, & de controversiis statuere. Penes consules procuratio reipub. annos ferè nonaginta mansit: peregrinum prætorem annuente Federico Primo acceperunt: id quod universis Longobardorum civitatibus idem concesserat. Prætoris supremum jus erat, abs quo provocatio nulla. unde credo prætoribus potestatis nomen inditum: quamquam olim sub Romanis Cæsaribus id nomen legamus. Ceterum hic magistratus, & hoc urbicum imperium instabile, & nonnumquam intermissum, variè quoque jactatum fuit, ut nunc consules, interim prætores jus dicerent. sub annos mcccxviii potestates in magistratum perpetuum, quatenus annuæ vices patiebantur, venerunt. & haud ita multo post indigenam præsidem, qui libertatem tueretur, & commoda populi procuraret, crearunt. Invenio *potestates duos Genuenses de gente duntaxat patricia domi, & foris publicis negotiis aliquando præfectos*. Sub adventum Henrici Septimi; five quia prætorum, & capitaneorum pertaxaret; five quia annuæ magistratum ambitiones discordiarum causa essent, duodecim viris, quorum sex nobiles, & totidem plebeji erant, res summa committitur. His additur unus, quem *Abbatem, sive custodem populi* dixerunt. Post Henrici obitum duplicatur regentium numerus: ex utraque gente viginti quattuor delecti, qui urbem regerent. rursus ad pristinos magistratus reditum est. Prætor peregrinus erat: patricii duo Præsides. Civilia tunc aucta sunt odia. armis universa ora Ligustica conflictata est. pulsus Genua Spinolæ, & Auriæ. mox qui domi erant, ab exulibus obsessi Genuam Pontifici Joanni ita dederunt, ut procuratio penes Robertum Regem foret. Rege deinde ejecto, tædio præfectorum, quorum vices gubernationi obesse videbantur; quidam vero ita magistratus peterent, ut cum imperio libertatem patriæ adversus plebis commoda usurparent, Ducem plebes sibi creat. Primus Dux Simon Bucanigra. quindecim post annos, à Venetis accepta clade, Joanni Vicecomiti Archiepiscopo se

Genuenses subjecere. Vix biennium Archiepiscopus, tum Galeatius, atque Bernabos fratre progeniti Genua potiuntur: & inde sub Ducum imperio Respub. iterum rediit. Duæ opulentæ familiæ inter se discordes plebejum hominem in summo magistratu statuunt, popularitati plus, quam patriciis conveniret indulgentes. & sanè parum quieti, & otio civitatis prospexere, qui ducem non per suffragia populi; sed per factionum vires, & arma creari voluere. Placentini per discessum militaris turbæ, mox per contrarias voluntates in seditiones delapsi sunt. Denique dominante civili ira, & gliscente discordia, nullum non fuit in Gallia Cisalpina oppidum, nulla civitas, nulla denique gens, quæ dissentientibus civium studiis, gravia detrimenta non sustinuerit. Exulante Matthæo moritur Joannes Marchio Montisferrati ejus Gulielmi filius, qui Alexandriæ (ut supra diximus) mortem obierat. nulla illi aut virilis, aut foeminea stirps fuit. Ergo moriens unum Violantidis sororis filium, quemcunque Andronicus pater voluisset, successorem regni fecit. *Per codicillum*, scribit Ventura, *Gracum adolescentem ab Avunculo heredem institutum, atque subinde consensu procerum legatos Constantinopolim missos*. Jam Andronicus Theodorum filium primum ab ultimo in Italiam mittere parabat: nisi illum nuntii retardassent, qui à Monteferrato venientes, affirmarunt Joannis uxorem post viri obitum aliquid in utero ferre; & proinde filium Constantinopoli retineret: quando legitimus rerum successor sperari posset. Ad hæc dubius, & suspensus animi Andronicus jam legatos sine filio dimissurus erat. tunc Jacobus, cui cognomen de Sancto Stephano erat: *artes sunt hæc*, inquit, *Thoma Salutiensis, qui te commentitio partu detertere, novaque fabula eludere nos cogitat, ut videlicet regnum herede vacuum invadat, & ceu caducum excipiat. Ego tantisper hos oratores his commorari censeo, dum eat nuntius, qui iterum Reginae diligentius exploret, atque inde redierit*. Placuit consilium Andronico. mittuntur in Italiam legati, qui celeriter in Thraciam reversi, ementita de conceptu Reginae omnia renunciant. tunc latus Andronicus, iis omnibus comparatis, quæ ad iter necessaria videbantur, Theodorum filium in Ligures transmittit. Genuæ prætor Ubertus de Petra Papiensis genere erat: Capitanei duo Barnabas Auria, & Opicinus Spinola: uterque splendidis conjugii, & magnæ affinitati inhiabat. Barnabas filiam Thomæ Salutiensi in matrimonium dat: Opicinus Theodoro Paleologo Argentinam à se progenitam despondet. Haud parva ex his nuptiis peregrino homini ad hæreditatem adeundam accessio facta est. Inter Genuenses Opicinus ea tempestate opibus, gratia, & hospitii florebat. oppida præterea, & vicos in Liguribus possidebat. Quare foceri opibus, & armis adjutus in Montemferratum Theodorus proficiscitur, primumque Casale pervenit. adjungitur Theodoro Philipponus Langusci. Usurpat Salutorum Marchio, ad quem Asta profugi confugerant, priusquam Theodorus in Italiam veniret; cum in tumultu omnia forent; Clavasse, Montem Calvum, tum aliquot oppida quæ sub ditione Joannis fuerant. Græco igitur intercedunt, atque omni vi, ne regnum obtineat, repugnant. Theodorus milites conducit: atque ubi justum exercitum coivisse videt, Pontem Sturæ obsidet: neque prius discessit, quam oppidum, atque arcem in potestatem redegit: & haud ita multo post Mom-bello potitur. Philippus Achaia princeps forte per ea tempora Subalpinis populis imperabat, cujus etiam nutu, atque arbitrio plurimum Albæ, & Astæ publica negotia gerebantur. hic Theodorum in colloquium ad locum, quem Ruptæ Pontem appellant vocavit, & primum, ut erat in omni re dissimulatus, & proinde fallax, juvenem amplexus exosculetur: multa deinde, quæ Theodoro ad recuperandum regnum, firmandasque eorum opes, qui Astam

A tenebant subjecit, foederaque inter se faciunt. Astensis milites Theodoro, ut Marchionatu potiatur, ipse vero præsidia adversus vires Salutiensis, exulique arma, qui fines patriæ infestabant, promittit. postmodum ad ratificanda foedera, eaque omnia exequenda, quæ pacti fuerant, Astam itur. tum convocatis in concionem Decurionibus, de ineunda societate cum Theodoro, ut pridie actum fuerat, refertur. Inclinati erant ad societatem animi, nisi Philippus, contra quam & senserat, & loquutus fuerat, Theodorum minimè socium adjungi debere suavisset. nullam cum illo fidam, & diuturnam societatem mansuram, quando eo sit patriæ natus, qui pro ingenio, & moribus gentis numquam fidus socius, aut amicus verus fuerit. *An violare*, inquit, *vultis jusjurandum, quo foedera priora sancivimus? Ita enim convenimus, quo tempore ad communem salutem, atque incolumitatem consociati fuimus, nisi communi consensu nova societas nulla ineatur. Proinde si vultis duratura foedera, omnino à vobis Theodorus Græcus, & peregrinus homo repudietur*. Turbati admodum fuere eorum, qui aderant animi; nam qui ex pridiano complexu, blandoque Philippi fermone sanciri foedus expectabant, unde tam subito mutata voluntate, Theodoro Philippus adversaretur mirabantur. Dimissa concione, Astenses secundum ea, quæ ad Pontem Ruptæ convenerant, cum Theodoro societatem firmant. ita Græcus juvenis novo subnixus socio Montem Calvum aggreditur. Tuebantur Oppidum exules Astenses, nec nisi obsidione capi poterat. castra itaque circum locantur, & ad subvertendos muros tormenta, & machinæ admotæ. obsidio paulo longior processit. Per Octobrem mensem partem Oppidi noctu Theodorus ingreditur, sperans, oppidanos ad deditionem compelli; sed in irritum res cecidit; triduum enim illic frustra commoratus, relicta parte, quam ceperat, abiit. Per Decembrem autem mensem Clavassi arcem, nocte deceptis custodibus adortus, Oppidum obtinuit. tunc sine certamine vicina quædam oppida in potestatem Theodori venere. Anno insequenti MCCCVII Theodorus idem, adjuncto Comite Philippono Langusci Lugum obsidere aggreditur. Oppidani, cum obsidionem tolerare nequirent, deditionem intra quindecim dies, nisi subsidio Carolus affuerit, paciscuntur. Audito sociorum discrimine Reinaldus regios milites contrahit: adjungitur ei Princeps, & haud longè à Vignale (hoc oppido nomen est) castra locant, opemque obsessis ferre tentant. Philipponus castris cedere Theodorum, & in propinquam arcem ire persuasit, ipse temere in hostem invehitur. Gallici milites vim, & impetum adversariorum fortiter sustinent, graveque certamen editur. Prementem Gallum Languscus cum ferre non posset, terga dat, acies continuo dissipatur, dux ipse capitur, atque victus in Narbonensem Galliam transmittitur, aliquotque dies in vinculis habitus est. Liberavit eum Opicinus Spinola per conditiones; nam Carolo Siculos debellare cupienti triremes, remiges, & epibatas Ligusticos, Rege stipendia suppeditante, pollicitus est: qua item conditione Mons Calvus, & Vignale Montisferrati oppida eidem Opicino traduntur, quæ is nomine dotis filia authorata aliquamdiu possedit. Oppido potitus Spinola eos omnes statim domum reduxit, qui Generi partes sequuti, patriaque ejecti, bona quoque amiserant. Urgebat Carolus Subalpinas gentes, novumque Legatum principio veris Raimundum nomine in Italiam cum præsidio transmisit. Regi primum Albenfes, tum Astenses parvere. per Septembrem majores in Italiam copiae à Galliis descendere, quarum metu Salutiensis Marchio confestim oppida, quæ Carolo patri eripuerat, restituit, seque Regis dedititium professus est. Timere Astenses Caroli vim, quam illi obediens essent. Quare nova foedera cum regio Præfecto, interposito jurejurando, in-

eunt. Convenere ut eos pro hoste uterque haberet, qui alteri infesti essent. ita Astenfes profugi iis locis continuo cessere, quæ regiæ ditionis essent. Rebus in hunc modum compositis, Rainaldus præmissis copiis, ad Regem revertitur. Philippus paulo ante ex Peloponeso in Italiam cognomen principis Achajæ reportaverat: foedera, ut supra diximus, cum vicinis populis ita faciebat, ut per speciem ferendæ opis eorum libertati insidiaretur. Sed hominem dolum, & plurimis invisum per Ægidium Legatum Carolus principatus parte mulctatum sibi subjecit. Non erat tunc simplex in animis Longobardorum, & Ligurum habitus. terrebat alios Carolus gravis, & assiduus hostis: horrebant quidam Principis dolos, & artes, quem agnoscebant nihil non moliri, atque tentare, ut amissarum rerum jacturam vicinorum detrimentis, & servitute emendaret. Studebant nonnulli Theodori rebus, ut avitum regnum, quod etiam avunculus legaverat, aliquando recuperaret: & quamquam peregrinus foret, cognatio tamen, & matris genus illi non solum studia, & favores procerum; sed etiam popularium amorem conciliaverat. Apparebat in eo indoles magni; justique regis, neque populos accersiti successoris poenitebat. Dum hæc in Liguribus, & Longobardis geruntur, erectique essent ad nova imperia animi, in Germanis Albertus ad fastigia rerum designatus juxta Rheni ripas à fratris filio interficitur. Coivere subinde proceres, ut Cæsarem novum crearent. Discordes erant animi, studiaque contraria, nec quem unum rebus præponerent fatis inter se conveniebant. Fuere qui dicerent Philippum Francorum Regem

A imperio dignum esse, jamque in eum quidam inclinabant. res tamen aliquamdiu, non idem sentiente collegio, extracta fuit. Interea Nicolaus Pratenfis Cardinalis Gibellinæ factioni metuens, quam tegere, & defendere non cessabat, Clementem Pontificem periculi, & ingruentis calamitatis commonefecit, si Philippo, *cujus animus per recentem Bonifacii offensam, & contumeliam irritatus fuerat, rerum summa deferatur, neque eum, qui potentissimus esset, à vi, & maleficio temperaturum, donec opes, & auctoritatem Romani Sacerdotii ita diminueret, & extenuaret, ut de hinc filii, atque nepotes majestati, & potentia Pontificum impune illudere, & adversari possent. Quare si securitati suæ cavere, resque sacerdotum incolumes esse vellet, summum imperium à Philippo avertat, intercedatque illorum studiis, qui ad potentissimum alioquin tyrannum inclinent.* Ubi persuasum Clementem vidit, de Henrico Lucemburgi Comite subjecit: *Hinc paternæ opes haud magnæ sanè erant, justitia, prudentiaque, tum rerum gestarum gloria, quam natalibus, aut gentili regno illustrior. quod si quæ sit voluntas Pontificis proceres noverint, consensu omnium facile Henricum Cæsarem creatum iri, qui pontificum imperata obedienter facturus esset.* Prudens, & salutare visum consilium, atque confestim per internuntios suffragiorum dominos hortatur, & monet, ut Henrico rerum gubernacula tradant. qui ut Pontificis votis obsequerentur; tum etiam quia dignitatis Germanæ, & veteris retinendi juris magnopere intererat, indigenam potius, quam advenam rerum potiri, Henricum Romanorum regem creant.



GEORGII MERVLAE, ALEXANDRINI, ANTIQUITATIS VICECOMITVM LIBER VII.

*Henricus in Italiam descendens Mediolani ornamenta regia capit, ejectisque Turrianis,
& Matthæo in procurationem restituto Laudem Pompejam recipit.*

1302.

A GEBATUR annus à salutifero Virginis partu millesimus trecentessimus octavus, cum Henricus pro vetere instituto argenteo diademate in Germania insignitus statim viros partim illustri genere editos, alios sacerdotio venerandos ad Clementem ea tempestate Avinione agentem legatos mittit, qui peterent, ut quod Germani Principes iussissent, ejus Pontifex auctor esset, atque ita cum bona illius venia in Italiam Henricus transiret, Romanique Imperatoris titulum, atque nomen eodem auctore acciperet. Postulatis libens Clemens annuit, biennio præscripto, intra quod in Italiam veniret: quando Cæsareæ majestatis, & salutis Italarum plurimum referret quam primum eas invisere civitates, quæ Germanis Cæsaribus obnoxia forent. Fervabant per populos discordiæ, vetera, & intestina vulnera graviora in dies renovari, quæ nisi Cæsarum præsentia vix sanari possent. Quattuor è primoribus patrum designantur legitimæ coronationis ergo, qui novum regem alpihus appropinquantem magnificè exciperent, Romamque deducerent. Ceterum Henricus cognito quod Clemens electioni annuisset, minime cunctandum ratus; etsi res graves eum urgerent, veritus tamen, ne paulo diutius in Germania commorari eum oporteret, Legatos ad Longobardos, & Hetruscos mittit, qui monerent, ut à vi, atque domesticis armis desisterent: quando hoc in primis curet, ut Italia civitates deposito civili odio, injuriarumque oblita, exules suos recipiant, atque domo fugati cum popularibus in gratiam redeant: iisque promittebat auxilia, qui mandatis paruissent, adversus eos qui plus viribus possent. Respondisse Florentinos superbius nescio, an imprudentius ferunt: videri sibi non convenire ei principi, qui pacem, & otium Italia promittat, cum barbaro exercitu ab alpihus descendere. de recipiendis autem exulibus tunc commodius tractari ubi Cæsar advenerit. Aretinos vero, quos Florentini urgerent, & injuriis lacefferent, bello liberari non convenire, nisi acceptis Guelphis, qui in tutelam Florentini populi se tradiderant: neque hoc agrè ferre debet Imperator, cujus presidio, & auctoritate patria fugati in propria sua reducti sepe fuere. quare Aretinorum agros, & urbem numquam à maleficiis, & detrimentis externorum vacaturam, nisi exules, qui ad fidem, & opem Florentini populi confugerant, in domum restituerentur. Imprudenter responsum Dantes vates haud illepidus in quadam epistola scribit: & Florentinos homines alioquin non improvidos, cacos appellavit. Haud in totum cassæ, & vanæ ceciderunt ab Henrico denunciationes: siquidem Tarlati gens Aretina, dum externum subsidium expectant, & propinquo Cæsaris adventu confisi, prælio nonnumquam cum hoste decertantes, hostilem exercitum finibus cedere coegerunt. Sed Mediolani longior, & gravior consultatio fuit. Res Turrianorum in summo periculo, & discrimine verti videbatur, si, quod Constantiæ Episcopus petebat, Henricus intra urbem receptus foret; quid enim si ferrea corona negata fuisset? Invidiam profectò, & odium

A Longobardorum subire Turrianus videbatur. præterea metuebat diversæ factionis vires, quæ & si longo exilio imminutæ videbantur, tamen multorum animi ad nova consilia erecti stabant. Incompertum item illi erat, se, an Vicecomitem magis Henricus susciperet, atque defenderet, atque ita receptus Cæsar, si urbe fugatos secum duxisset principatu Turrianum dejiceret. His, & talibus curis agitatus vicinarum urbium proceres in concilium accersit. Sententiæ variæ tunc; ac dissidentes dictæ. Philippus Languscus quæ magna; & perpetua Cæsarum beneficia in gentem suam fuissent commemorare, tum quantaque incommoda, & detrimenta acciderent, si Cæsari non paruerint, cujus nutu, atque jussu multos annos res Longobardorum procurata foret. *Quid non, inquit, majores nostri stipendiarii Cæsaribus fuere? Leges ab eis accepimus: honores & dignitates nobis contulere. Quid non magnam profecto injuriam nobis Casareo faciemus, si Henricum Romam petentem cum honore reverenter non exceperimus?* Contra sentiebant alii, atque Languscum parum libertati populorum, & incolumitati factionis suæ consulere. *Quid enim extorres magis optant, quam ut cuncta Germanis regibus, quibus Guelphi invisi sunt subjiciantur? Ut scilicet Cæsarum presidio subnixi in principatum restituantur, atque ita acceptas ab inimicis injurias crudeliter ulcisci valeant.* In hunc ferme modum altercantes proceres concilio cedunt. Guido inter pugnantes voluntates, & contrarias sententias Procerum saluti rerum metuens, modo in hunc, modo in illum obvertens oculos, hæc identidem succlamabat: *Cur in medium non consulitis? cur privata commoditati tantum indulgetis? non iratum nobis caeleste numen conspicio, Fortuna mentes occacat.* Duo deinde religiosi viri, invito Guidone, in Germaniam per speciem gratulationis profecti sunt, qui voluntatem Henrici explorarent, atque dicerent: ita demum à cunctis incredibili honore, atque reverentia exceptum iri, si omnibus æquus veniat, nulli spem, aut causam novandarum rerum faciat. esse nonnullos, qui præoccupare animum, & gratiam novi Cæsaris inire studeant, ut ex illius opinione, aut si honorificè appellati fuerint, viam ad regnum inter suos comparandum faciant, atque ita tam publicæ quam privata rei detrimenta importent. Ab Henrico hoc in primis peti vere: ne patiat Longobardorum quemquam, duobus duntaxat exceptis Turriano, atque Langusco, se amicis Cæsaris palam profiteri. Ceterum Henricus, cognita Pontificis sententia, pertentatisque Etruscorum, & Longobardorum animis, priusquam biennium exiret, quod præscriptum a Clemente fuerat, duo sibi in primis proposuit: ea comparare, quæ unum cum dignitate peragendo idonea forent; alterum, ut domesticas opes, quæ mediocres erant, & perinde infirmæ, muniret: tum vero fines affinitate aliqua latius proferret. Ad filii itaque nuptias animum intendit. Erat forte Vincislao Boëmorum regi filia unica Elisabeth nomine. Gens hæc trans Danubium incolunt: Albi fluvio discreti ad Oceanum septentrionalem pertinent. desponde-

spondetur puella Joanni Henrici primogenito. Reges autem ita nuptias paciscuntur, atque convenere: *ut quando nulla virilis proles Vincislao esset, regnum Boëmorum Lucimburgensis juvenis per uxorem dotale possideret.* Novarum opum adeptione, splendidoque conjugio magna virium accessio facta. Quo autem plus opum, atque potentiae quævisse novus Cæsar nunciabatur, eo majore in metu Turrianus, atque Italiae Guelphi erant. Sollicitabatur item Vicecomes: qui, etsi inops & exul erat, congressusque hominum præ pudore fugeret, tamen multa cogitare, atque etiam circumspicere, quo Cæsar absentis amicitiam, & gratiam iniret. itaque utriusque, Vicecomitis, & Guidonis dispar votum, dissimilisque conatus maximo in negotio erat. Anno qui fuit millesimus trecentessimus nonus calendis Octobris Guido Turrianus facinus aggressus est novum, & sibi, gentique suæ exitiale. Castonus Archiepiscopus ambigua fide, ex his, quæ supra diximus, erat. fratres quoque omnes novandarum rerum suspecti. in unius potestate, & custodia arx Tritii tenebatur: ceteri cum Archiepiscopo nescio quid novi consilii tractare videbantur. opportunos suspicioni eos appropinquans in Italiam Henricus, & invidia perpetuæ præfecturæ faciebant. Igitur ut opes firmaret, securusque insidiarum, & propinquorum foret, Archiepiscopum, & tres cum eo fratres, qui pontificali in æde erant, capi jussit, atque victos nocte, quæ infequuta est, in arcem Angleriae misit. Napinus fratrum minimus in aucupium forte prodierat, hic ubi fratres à patruo captos audivit, Tritium versus contendit. Guido fugientem persequi mandavit. expectiti equites, Leone duce, ad vicum, cui Cinuscule nomen est, desequuti fuere. nobiles medici quominus interciperetur restitère. ita juvenis, uno duntaxat ministrorum saucio Tricium profugit. Guido oppidum continuo obsideri jubet. Arx erat munitissima, & validum in ea præsidium. commodum præterea erat Borgomeni amico commeari, tum propinquitate fluminis, frumentum, arma, & cetera tolerandæ obsidioni opportuna comportare. captivitate, & vinculis Archiepiscopi, tum obsidione duorum fratrum Antonius Fissiraga, & Philipponus Languscus, tum ceteri factionis studiosi Mediolanum continuo veniunt, Guidonem rogant, & obtestantur, *iram remittat, captivos relaxet, obsidionem solvat, ne Turrianorum opes funditus perditum eat.* Parere recta monentibus is noluit, imo magis in vindictam accendi. Tunc veritus Fissiraga, ne furens homo in pueros desæviret, impulit res mares Paganus, & Moschini filios, quos Guido in vinculis habebat, secum in Laudem duxit. obsidio procedebat, arxque oppugnabatur. Inter ea Paganus alter Patavini Sacerdotii præfectus Mediolanum venit. Iterum Fissiraga, & Languscus redeunt, Guidonem obsecrant, & obtestantur: *hanc ulciscendi cupiditatem deponat: aliquid juri sanguinis, & natura donet. nefarium esse, etiam regnandi causa in eos sevire, quos natura conjunctissimos nobis fecit, tum reverentiam tanti Sacerdotii contemnere: immane vero, & detestabile Sacrorum Antistitem, seu capitis reum in teterrimo carcere contineri.* His precibus, ne dicam objurgationibus, magis ad ultionem accendi Guido. *hoc commoverisse Archiepiscopum, & fratres, qui in suam, & filiorum necem, & perniciem conjurassent, nec se, & filios salvos, regnumque tutum, & incolume futurum, nisi Castonem, & Germanos fratres captivitate ad omne facinus irritatos, perpetuo in vinculis teneat.* Exacerbaverant alioquin implacabilem hominem Pelaguræ execrationes: qui ut nefarium conatum ulcisceretur, urbem sacris interdictionibus minabatur, nisi Archiepiscopus vinculis liberaretur. pertinax stabat in sententia Guido, nihil propinquorum precibus, & amicorum consiliis dabat, gravia Legati mandata aspernari. Tandem timentes Paganus, & Fissiraga, ne præ impotenti ira, & metu conjurationis asperius quiddam in suos is sta-

tuaret, ita convenerunt: *ut recepta Tritii arce Guido Castonem, & fratres relaxaret, sponsore, sive sequestro Zonfredo Turriano.* Arce tradita, Episcopus cum fratribus liberantur. Potitus Tritii Guido arcem subruere fecit: Archiepiscopus Laudem primum ad Fissiragam, inde Bononiam petiit. apud Pelaguram aliquot menses commoratus id egit, ut patruus sacrilæ rabies, & temeritas damnata, impunita non esset. Religio non solum afflictæ, sed plane præsentis infamia in æternum polluta videbatur. Mandavit Pelagura continuo vicinarum urbium Episcopis, *ut Guidonem Mediolani Capitanem, & duos filios, pro eo quod in Archiepiscopum violentas manus injecissent, apostolicisque mandatis non paruissent, ab aris, focis Deorum, & Christianis carimoniis excluderent.* sævos homines, atque feros religiosi patres adire non sunt ausi, vincula, cruciatus, & publicationem bonorum his minabatur: si qui Legati litteras, & mandata in concione recitassent. Verum, ut satisfecisset mandato Pontificis viderentur, Comi, Marliani, & ceteris in vicis, atque oppidis, quæ Mediolano finitima sunt, palam non solum patrem & duos Turriani filios, sed quicumque consilium, & operam in capiundo Archiepiscopo præstiterant, diris sempiternis, atque execrationibus obligavere. diras Guido contempsit, resque Turriana ex eo labi cœpit, semperque studium ulciscendæ injuriæ in animis viguit, donec Castonus consociato Vicecomite patruum potentatu dejecit. Ceterum Guido cum violato Sacerdotio, & cognatorum fuga se invisum civibus videret, ut ægras mentes leniret, atrium in dextra palatii parte ædificat, quod duodecim appellationem habuit, quia forsitan illuc duodecim viri publici negotii curatores, seu ædiles conveniant. arcem item Montorfani pridem à Matthæo subversam instaurari voluit. Loci opportunitate, tum valido præsidio imposito defendi fines poterant. quod si aliorum fides ambigua, aut suspecta arma eo in tractu fuissent, facile in officio contineri, aut comprimere poterant. Ceterum Matthæus longo jam exilio exhaustus, & egens v. tam alienis impensis, & amicorum liberalitate ægre sustentans nihil gravius ferre, quam quod præ inopia is deesset, quem in Germaniam ad Henricum mitteret. plurimum interesse in opes recuperandas, adversarios debellandos cognoscebat, si Henricum, priusquam ad Italos adventaret, aut promisso obsequio, aut significatione prompti animi conciliasset. quiescere in rerum occasione, quamvis finibus pulsus, non valebat. indefessus & erectus adversus omnem impetum fortunæ animus stabat. sperabat in calamitate aliquid supra ceterorum fortem: filiorum, atque nepotum fortuna, quam propria egestate incertior: *cujus patientia quanta foret, & quid calamitosus senex spei haberet, tentasse aliquando Guido fertur.* Post fugam, & relictos fines Matthæus ad Veronensem Canem profugerat: mox turbam & congressum hominum devitans, graviore urgente cura, forsitan & meditationis gratia in angulum Benaci lacus recessit. desertus erat locus. senem miserum, & inopem domesticum, & propinqui deseruerant. jam ludibrio cunctis esse, dies integros Benaci ripis solus oberrare, retia interim texere, atque piscari. Calamitate, & inopia adversarii elatus Guido unum è domesticis, ut inopi, & profugo illuderet, in Veronensem fines mittit, qui solo in loco Matthæum nactus, scire, inquit, cupit Guido, quidnam solus hic mediteris, & agas. respondit senior. *Retia tendo ideo solus, ne quis piscanti obstrepat.* tum ille: *en qua via, & quando redire in patriam speras?* tum Matthæus: *eadem, qua pulsus sum; sed non priusquam illius flagitia nostro, si quod est, scelere præponderaverim.* In præceptis tunc ille forsitan agitur, ego vero sublimia repetam. Scribit alius, senem hæc subjecisse: *Tempori me accommodo: quam rem Guido tuus agere in tanta calamitate nesciret.* Hæc prudentissimi senis responsa ubi Turriano Mediolani renunciata fuer-

fuerunt, exclamasse unus ex astantibus fertur: omnia Matthæus amisit, spem meram, atque sensum retinuit, proinde minime contemnendus: spirat adhuc ad principatum, & regna. Sapienter ad utrumque respondit, & futurorum Vates fuit: siquidem secretum magna meditantem procul ab hominum frequentia agere oportuit. Postea vero, exuperante Guidonis scelere, qui in rerum felicitate temperare sibi nesciebat, ut infra dicemus, Matthæus in patriam, & regnum restituitur. Ingravefcebat ætas ultima, senem circumstantibus incommoda: non tamen eum adversa ita quassaverant, ut ad recuperandas opes animum non erigeret; Vir autem deerat, qui novi Cæsaris ingenium tractaret, illumque Vicecomiti subinde, & exulibus conciliaret. Forte dum peregrinatur Franciscum Garbagnatem offendit. hic Mediolano pulsus, accepta à Turriano gravissima injuria, cæde etiam suorum ad ultionem irritatus, vitam pro tempore docendo jus civile Patavii sustentabat. hunc Matthæus adit, & quando, inquit, Franciscus calamitates, miserieque nostræ finem habebunt? Opes, honores dignitatesque omnes cum patria amisimus, inopes, & egeni in aliena terra peregrinamur, dura vita, & acerba conditio nobis est, inimici regnant, nobis insultant, & miseria illudunt. De reductu actum est, nisi adventantem in Italiam Cæsarem praoccupaverimus. adhuc in ambiguo est, nos, an adversarios magis suscipiat, ac foveat. duce, & moderatore in re tanta nobis opus est. noster erit Cæsar, si primi eum occupabimus, cujus favore & auctoritate sine cæde, & sanguine domum redibimus. Sic communem sortem miserando virum vindictæ aliquin avidum ut in Germaniam proficisceretur, impulit. Deerant viatica, Matthæus omnium inops nihil suppeditare valebat. ne tamen in tanta bene gerendæ rei opportunitate suæ propriæ, & exulum salutis Franciscus deesset, vestes, & libros, qui sibi à fuga, & exilio supererant; ut pecunias ad iter necessarias conficeret, divendit. Tradunt quidam, equos, & comites à Riciardo Caminate, qui in Trivisanis potentissimus erat Garbagnati, ut securus per feras gentes incederet, Galeacio rogante, datos. Apud Henricum exulum causam sapienter hic egit. Nemo Longobardorum procerum Henrico, & aulicis præter Guidonem, Languscum, & paucos nominis Guelphi principes notus erat. nam religiosi viri, quos supra in Germaniam profectos diximus, hos dumtaxat in Longobardis dominari dixerant. De Gibellinorum opibus mentio nulla facta. hoc idem exploratores affirmabant ex Italia reversi. Franciscus Gibellinorum vires, & quæ essent eorum in Romanos reges studia, exposuit, & quantopere designati Cæsaris in Italiam adventum expeterent. Guelphos vero maximo in metu esse, arma parare, nova foedera inire, ut finibus Cæsarem summoveant. quod ita esse facile cognoscet, si in Italiam nuncios miserit. Hæc lætus Henricus audivit. Reversî Oratores Turrianum, & Languscum principatum inter Longobardos tenere renunciant, popularibus tamen invidiosos. contra exules domoque fugatos nullam aliam spem redditus, aut reconciliandæ cum adversariis gratiæ, nisi in Cæsaris adventu habere. Ex eo Henricus Franciscum apud se carum habuit, atque in consilium magnarum rerum semper adhibuit. Hac primum via Gibellini adversariorum viribus, & armis oppressi sublevari, & respirare cæperunt. Quo hæc gerebantur anno Carolus secundus moritur. Sunt tamen qui tradant, illum priore anno vita defunctum. ego Palmerio, & ceteris scriptoribus magis assentior, qui decessisse Carolum MCCCVM litteris prodiderunt. Id quod sic esse Regis diplomata, tum etiam foedera, & deditionum condiciones, quibus Robertus subscripsit, satis testantur. Post patris iusta Robertus in Narbonensem Galliam transcendit, ut avorum regna inviseret, simul ut Clementem Pontificem religiose salutaret, cui se dedititium profiteretur. Pergratus fuit Clementi in Gallias Regis

A Roberti transitus, cui haud gravatim Pontificiæ ditionis regna, quæ pater, & avus in Italia obtinuerant, concessit: & haud ita multo post, cum fama appropinquantis Henrici factionem Pontificiam admodum territaret, ad firmandos sociorum animos, factionisque opes defendendas per montanos Ligures in Sallastos Robertus descendit. Huic statim Mons vici five Regalis, Savilianum, Carascum, & Alba Pompeja, tum aliquot ejus tractus oppida paruere. Inter hæc Philippus Sabaudia comes, cum tot populi in jus, & potestatem Regis se permisissent maxime motus est. Verebatur siquidem, ne Astenfes, qui se patrono, & defensore ad propulsandas exulum injurias usi fuerant, regiæ ditionis fierent. Cives in concionem convocat, tum etiam per urbis conventicula, atque vicinorum conciliabula, quæ suæ cum Carolo patre, Robertoque filio inimiciæ fuissent, exposuit. ab Astenfibus jusjurandum exigit, quo modo astricti Regi numquam ut domino parent. Erat tunc Astæ Opicinus Spinola domo, & magistratu pulsus, hic Genuam Roberto se traditurum pollicebatur, si in patriam reductus foret. Venerant etiam per ea tempora Astam ab Henrico Legati, qui in frequentissima concione nunciaverant, Cæsarem in Italiam ad Calendas Septembres perventurum; & proinde quod Imperatoribus obnoxii forent, nequaquam in fidem, & potestatem alterius domini se traderent. in primis autem foedera cum Roberto repudiarent. Respondit legatis haud acerbè, tum vero Philippo audiente, palam dixere, se Imperatoris dedititios esse, cum uni quoad viverent semper obedirent. Deinde Legati Cuneum, ubi Robertus erat; inde Savonam, Genuam, & Pisas petivere eadem Imperatoris nomine nunciantes. Vix Legati abierant, cum de omnium consensu oratores ad Robertum deliguntur, qui foedus & societatem cum eo ineant. Tunc Philippus gravia Legatis minari, si ad regem irent, aut de societate verba facerent. Minis deterriti homines accedere ausi non sunt. res Astenfis per duos Consules administrabatur. hi præter Philippi voluntatem Albam Pompejam pergunt, quo in loco Robertus, & uxor mulierum ea ætate pulcherrima erant, & cum eo circiter quingenti equites ad pugnam instructi, atque parati quotiens opus esset. Legatos Rex benigne vidit: quos etiam mensa sæpius dignatus est, illud identidem in conviviis jactans; inter omnes Longobardos Astenfes, qui tunc urbem obtinebant, caros sibi esse, quorum societatem & amicitiam in primis cuperet. Tunc consules jurisconsultos domo accersiverunt, quorum consilio foedera conficerentur: sed metu, & denunciatione Philippi Asta cedere consulti juris ausi non fuerunt: Robertus tamen his fere conditionibus foedera cum Consulibus percussit: ut eis, qui domi erant, adversus exulum injurias opem subministraret, denique Astenfes omnes in tutelam suam reciperet, quos ubique à vi, & injuria defenderet. Contra vero Astenfes Regi, & heredibus quotannis quattuor, & sexaginta argenti puri pondo se depensuros paciscuntur. Placere utrisque condiciones, confirmataque societas fuit. Rex deinde quinto idus Augusti cum uxore, & firmo præsidio Astam venit, viri atque mulieres obviam progressi, ita honorifice receptus in urbe fuit. Postridie epulum magnificum in æde minorum fratrum exhibuit, in quo auri, & argenti modus ingens, nulli discumbentium epulæ nisi vase argenteo appositæ, vina quoque aut aureo, aut argenteo poculo effusa. Quæ res ingentes Roberti divitias indicabat. Die insequenti cum sibi animos civium satis conciliatos cognosceret, Alexandriam petivit. Lunam tunc notabiliter antelucano tempore defecisse traditur, eodemque anno pridie Kalendas Januariarum circiter horam diei nonam sydus solis hebetatum est. Ceterum Alexandrini jam diu dissensionibus, fuga, & exilio suorum invicem conflictati, numquam bona fide in gratiam redierant: nunc, oborta inter ordines discordia certabant. interim,

motis

motis per factiones armis cruentam pugnam in urbe edebant. ita qui viribus, & potentia minus poterant, hi urbe cedentes, finibusque oberrantes, perpetuis detrimentis patriam, & adversarios laceffebant. tunc forte utraque factio ad quietem urbis, tollendaque certamina Roberto Regi urbem dedunt; obliti videlicet odii veteris, quo Carolum Roberti patrem persecuti fuerant. *Insensissimum fuisse Alexandrinis Carolum* declarant vetera, ut supra diximus, Alexandrinorum decreta, quibus nomen regis de publicis monumentis tolli, & deleri iubetur. Veruntamen ad urbis concordiam, & otium sub ditione, & imperio Regis se dedunt. Discedens ab urbe Robertus Ugonem Bautium, cui etiam regiae ditionis ceteri cis alpes populi parebant Alexandrinis praefecit. Henricus inter hæc Italiae appropinquabat, jamque populi nova consilia inter se iniquabat. Itaque veritus Ugo ne adversus Regem Alexandrini conjurarent arces praesidio regis custodiendas, vocato in concionem populo, postulavit: sic enim posse in fide, & officio eos contineri aiebat, si qui nova consilia struerent. Regem praeterea liberalius pecunias, & opem daturum. Mussare primum quidam, tum paulo apertius praesidi contradicere. agnoscebant inimicorum ingenia, & artes: velut ex compacto res ageretur, ut tradita Regis custodiae arce, non quies domestica, sed perpetua servitus nasceretur. tunc diversae factionis principes palam dicere, penes Bautium non solum arces, sed portas urbis ponendas. tum quicquid is imperasset obedienter facturos esse. Glisciente tumultu, Regius Praefectus exilium, publicationem bonorum, mortem denique his comminari, qui dicto obedientes non forent. Gulielmus Inviciatus Praefectus populi Alexandrini erat: is ubi vidit, ad Ugonem multorum animos inclinatos è concione primum abiit. Exterriti Gibellini, & in primis Lancevegiae, iis collectis, quæ secum ferre poterant, in propinquos vicos, vicinaque oppida, in quibus factio sua praevaleret, abiere: neque tamen fugatis adversariis, qui domi manserant res lætas habuere; siquidem extorres, conjunctis focis, atque amicis populabundi usque ad patriæ mœnia progressi cuncta ferro, & flamma crudeliter foedabant: deditioe Alexandrinorum Henrico, quando ab alpibus descendisset occurri posse videbatur. Dum hæc in Liguribus ad augendas Guelphorum vires, & constituenda locis praesidia parantur, Florentini, & focii, qui regnum inter suos occupaverant, ut incolumes essent, etiam supra facultates milites conducere, veteres socios, & amicos novo foedere, honestisque conditionibus confirmare; eos vero, quos infensos Germanis Regibus noverant, confociare. tum missis Legatis, non solum Longobardos, sed etiam Venetos sollicitavere, ut secum contra novum Casarem conspirarent; verébantur enim, ne pacatis Longobardis exercitum ad se Henricus duceret; praeterea Etruscorum exules spem reditus certam, & magnam in Henrico posuerant. Mittuntur ad Venetos societatis, & foederis gratia oratores. Veneti beneficio aestuariorum tuti, tum etiam quia ex usu suo non erat Henricum nova societate inita adversus se provocare, foedera cum Florentino aspernati sunt. verum qui externum hostem metuebant, peregrinaque bella vitabant, domesticis armis, & conjuratione intestina periclitati, quod minime verebantur, de summa rerum pene sunt. In Venetis ea tempestate duæ familiae magnis opibus, vetere nobilitate, potentia, atque affinitatibus, Teupoli, atque Quirini pollebant. Hi ægre ferre ceteris pares vivere, urbana magisteria quia nulla, sola, & perpetua in urbe essent querebantur, in libertate servire se aiebant. Jam illud indignum, ab origine urbis claras, illustresque familias nihil ab ea turba differre, qui haud ita pridem convenissent, moxque in patriciatum ascripti fuissent. tum crescente numero, se à commodis, &

A honoribus publicis quodammodo excludi; hæc molestè ferentes contra libertatem patriæ conjurant. Ubi ea multitudo coivit, quæ opprimendæ patriæ sufficere existimabatur, in forum mercatorium, cui vicinas domos habebant, primum armati prodeunt: inde per vicum, qui à mercibus celebre nomen sortitus est, ad ædem divi Marci, sublati signis, contendunt. Convenerant eo cum armis hi fere patricii, quibus salus, & libertas patriæ cara erat. In faucibus vici acris, & atrox pugna facta; eo enim in loco potissimum victoria vertebatur. Inibi conjuratorum signifer dejecto à fæmina lapide ictus concidit: quo casu consternati qui sequebantur aliquantulum substitère. existimavere plerique, non fortuito ictu; sed telo à resistentibus demisso signiferum concidisse. tunc acrius adversarii instare, & facto agmine occurrentes repellere. conjuratos angustiae loci juvere, ne retrocedentes, superante multitudinem, opprimerentur. ita paucis suorum amissis, Boëmundus seditionis auctor, cum ceteris, qui impia arma moverant, in domos se recipiunt, quas valido praesidio firmant, ut videlicet ingruentem turbam propulsare possent. Primores patrum cum cernerent, non sine multorum cæde expugnari domos posse, consilio potius quam viribus tetrum facinus vindicare statuunt. ita depositis armis civilibus, fluctuantem statum tranquillum reddere parant. summo opus esse magistratu à quo provocatio nulla futura sit. Tunc primum Venetis Decemviri creantur, qui non statim in conjuratos grave aliquid edidere; sed in leniendis animis, placanda ira reconciliandaque inter cives gratia aliquantulum operati sunt. ita sedato tumultu, cives ad negotia sua quisque revertuntur idemque quietis & tuendæ libertatis omnibus studium erat. & haud ita multo post Boëmundus, & conjurationis conscii in vincula Decemvirorum jussu conjiciuntur: moxque indicta causa, capite mulctantur. Utrique familiae ignominia addita est. Erat Teupolæ gentis insigne coccinea arx. ea Decemvirorum decreto, in obtortum cornu, quod etiamnum durat, conversa fuit. De gente Quirina creare ad certa tempora Ducem non licet. Domus eorum, qui capita nefarii facinoris fuerant, partim ad solum æquatae: aliæ ad fordidos usus, & opera illiberalius edenda addictæ sunt. *Area, in qua pisces, farcimina, casei, salsamenta, olera, & cetera id genus esculenta venduntur, complanata, & facta ex ruinis domorum* traditur. quæ mansere ædes, eas partim puellæ vulgati corporis prostantes, & scorta vulgarissima incolunt; in ima alterius domus parte mensæ fixæ sunt lanienæ: superiora tenues quidam magistratus tenent, regionum circitores, qui vim, & fraudem nocturnam inquirunt. Tum triumviri, quorum est aurum, & argentum probum, an improbum sit explorare, atque publica nota signare: alii solventes è portu naves paulo accuratius exquirunt: his ne instructæ sint armis, quæ navigationi, & propulsandæ injuriæ necessariae sunt. Sed neque dies, qua conjuratio oppressa fuit, incelebrata manet. namque supplicatione quotannis indicta, altero postridie idus Junias die Dux, & Patres gratulabundi ædem divi Viti temporario ponte ad commoditatem trajiciendi facto, reverenter salutant. mox Princeps in Prætorium reductus eos fere omnes Senatores, qui in curiam ingrediuntur, prandio lautissimo accipit; publico item actu, & privato opere abstinetur. Conspiratione in hunc modum sopita, Decemvirale consilium æternum mansit; quod mercuriale à die, qua in atrium coeunt, appellare possumus. horum præcipuum est cavere, ne quid detrimenti res publica capiat. læsæ majestatis severissimi ultores, adulterinæ monetæ, & perversæ veneris inquisitores, & vindices asperi: cruenta ferè sunt hujus magistratus imperia, cui diuturnam libertatem, rerum tranquillitatem, civium concordiam, imperii incolumitatem accepta facere Venetus debet. Quare parum


verè Antoninus Archiepiscopus per factiones depugnatum scribit, & Gibellinos à Gradenico Duce stetit. contra vero Tempolos, atque Quirinos, adjunctis Guelphis, totis viribus, ut principatu illum deicerent, enixos esse. Nam si certamen aut ordinum, aut factionum, & non pro libertate patriæ fuisset, profectò enim memoria tam nefarii conatus neque solemnis, nec tanto tempore replicaretur. Nulli rei curiæ proceres æque student, quam ut omnis penitus domestici diffidii memoria aboleatur, ne aliquando in mentibus nepotum perniciofa avorum certamina renoventur. De Legatorum cæde, quos in tumultu trucidatos Antoninus refert, alterum de gente Adimanda, alterum Siccum fuisse: si vera tradit. Forsan ardens pro libertate tuenda patricius participes novi consilii illos existimavit, quando conjurati rerum potiti societatem cum Florentino non abnuissent. nimis loquax, ne dicam fatuus, & improbè mendax in omni recentium rerum expositione est iste Antoninus. Ceterum Robertus è Longobardis abiens Bononiam petiit. quo forte tempore Ferrarienses, inita cum Polletanis fratribus societate, arcem in Padi ripa occupant, atque Venetos ad bellum provocaverant. Ferrariam Roberto Pelagura regendam ita tradidit, ut dominium urbis penes Pontificem foret. Sub regia custodia ii comprimi videbantur, qui novas res molirentur. Degus Catelanus cognomine De rata, cujus opes in Beneventanis haud mediocres erant, Ferrariæ cum cohorte regia præficitur. Vix Robertus Bononia cesserat, cum oppidani superbiam, avaritiam, & contumelias barbari hominis non ferentes, alii populare imperium affectabant, alii libertatis & munificentiae priorum dominorum recordati, reducendos Estenses conclamabant. proinde oborto tumultu, in Deghum invehuntur. In arcem Barbarus fugit: unde statim præsidium in armatam turbam emittitur. inter oppidanos, & peregrinos acris pugna editur. cecidere utrinque multi. oppidani vincuntur, è quibus circiter triginta capti laqueo interempti: alii in custodia habiti grandi pecunia vitam redemere. Etrusci interea, quamquam regis præsentia sublevati, & recreati aliquantulum essent, exules tamen metuebant, quorum magna copia ad Henricum confluebat. Robertus nova fœdera, promisso ad omnem hostium incursum auxilio, percutit, atque dehinc Neapolim profectus est. Jam Henricus per nuptias regna conduplicaverat, novaque affinitate, & imperii majestate fines tutos habebat. Venerant ad eum Germanorum proceres, & Sacerdotum primores, qui illum Romam usque deducerent. Occurrit illi juxta alpes Joannes Molianus scholasticus, Ecclesiæ Tulentis Pontificis, ut scribitur, Capellanus. Hunc Clemens miserat, ut iterum jusjurandum ab Henrico in hunc modum exigeret: *Romane Ecclesiæ dedititius Henricus esto. majestatem Pontificum defendito. Catholicam fidem purè, & reverenter colito. prave de religione sentientes insectator: quoscumque hæreseos fautores, & defensores Pontifex abominatus fuerit, eos bello, & armis fatigato; donec ad rectam fidem conversi Pontificum jussis paruerint. fœdus præterea, amicitiam, & affinitatem cum barbaro disparis cultus, aut qui armis, & injuriis Christianum nomen divexet, nullam contrahito.* Plura à Cæsare Scholasticus exegit, quæ ideo præterimus, quia ridicula sunt, & commentitia. Indigna profectò quæ inter Pontificalia responsa, atque decreta annumerentur. Henricus libens in verba Joannis juravit. Clementi obsequi, & parere in primis statuerat. Verebatur Clemens, ne antecessorum superbiam, & impietatem Henricus secutus, Pontifici Italiam ingressus adversaretur. Quare non satis habuit uno juramento fidem astringere: tum quo is animo in defendendas pontificis opes esset explorare. Hoc forte anno per Juliiensem, pulso Alberto Scoto, Placentini diuturno bello fatigati Guidoni se dedunt. Scotus in castrum Arquati cum amicis, & clientibus aufuge-

A rat. sub Septembris finem Henricus alpes Julias transgressus Segusionem primum: mox ad Augustam Taurinorum, inde tertio Kalendas Octobres Astam pervenit. Sunt qui tradant, Segusionem illum usque sub idus Novembres commoratum: atque hi fere accessere, qui cis alpes, & Apenninum opibus & potentatu pollerent, tum etiam qui Ligurum principes essent. Eporedienses primi se, & urbem Henrico subjecere. Astenses, ut supra diximus, fœdere in fidem & tutelam Roberti se permiserant: Cæsari tamen parere, quem etiam intra urbem recipiunt; quamvis secum Castellanos duceret: quæ factio domo, & patria aliquot ante annos pulsa fuerat. B ægre Solariensi id fuit. resistere autem venienti Cæsari periculosum erat. Henricus ab oppidanis deditionem, fide interposita, & sacramento, postulavit; id quod majores Germanis Cæsaribus præstiterant. In concione certi creantur, quibus deditionis faciendæ formula datur. rursusque ex suggestu Nicolaus Senensis *Non satis Henrico inquit ad justam deditionem esse, quod pauci de publico consensu fecissent, nisi Astenses universi se, & sua in jus, & potestatem Henrici dedant.* hoc plurimis molestum. Quare sententias separatim exquirere commodum non erat. novo itaque more quid quisque vellet exploratur: ut qui se, sua, & patriam in potestatem, & jus Henrici tradi vellent, ii stantes; qui vero contra sentirent humi sedentes sententiam suam significarent. Fremere tunc omnes, contrariæque voces exaudiri. clamitare alii: *Fiat deditio.* plures palam reclamare. nihilo tamen fecius Henricus in tumultu deditionis formulam confici, & in codicem ex tabula transcribi mandavit. Præficitur deinde Astensibus Nicolaus; hic novis legibus populum astrinxit, peregrinoque præsidio arces, & castella Astensium custodiri voluit: tum pecunias pro libitu imperavit, quas etiam acerbius exigere, ut præsidia, & peregrinum militem aleret. agerrimè hoc Astenses ferre. majus erat tributum quam quod dependi à populo opulento posset. In omni cætu, foro, & templis querelæ palam audiebantur. hinc veritus Nicolaus, ne si crebri cives coirent ob acerbam coactionem nova consilia caperent, edicto vetuit: *Ne plusquam tres viri unum in locum convenirent.* Ad Henricum Astæ commorantem primi è Longobardis accedunt, Tibaldus Brusatus Brixia fugatus, Philipponus Languscus, & Antonius Fisiraga: hic Laudem Pompejam per vim obtinebat. Papiensis Langusco parebat. uterque imperata Cæsaris se facturos dixere. duarum nobilium civitatum dominatum illi pollicentes: res novo Cæsari grata: quippe ad reliquos Longobardorum, si obsequium abnuissent, coercendos maxime idonea. E quo nomine Fisiraga, & Languscus Henrico cari fuere: quos etiam benignius tractavit. Dum Astæ disceptante Henrico, exilii, & fugæ causas hi agunt, ut illius cognitione, & jussu, invitis adversariis, in patriam recipiantur, alii magna pollicendo, Cæsaris gratiam, atque favorem aucupari student: Matthæus, relicto Benaco, in oppidum, cui Nogarolæ nomen est, concessit. omnia cogitare, & circumspicere, quæ tutum iter per inimicas gentes præstare possent. Adversarii exulis consilia, & quam ingrederetur viam observabant. dispositi erant per loca custodes, qui gradientem interciperent. Ubi autem Henricum fines Italiæ attigisse is comperit, F deposito civili apparatu, sumptoque gregarii militis habitu, non luce, aut palam, neque per publicum iter incedens; sed noctu ignotas vias, occultosque calles ingressus, quicumque occurrissent, eos timere: quotiens illum strepitus pedum, arborum crepitus, & fragor terruit, & subsistere fecit: noverat, in rerum novitate jugulum suum, proposito præmio, peti. Tandem, mutato saepe habitu, & beneficio noctis tutus, nulli cognitus, vili circumtectus amictu, uno comite contentus Astam intravit, protinusque ad Franciscum Garbagnatem divertit.

vertit. vix salute ab equo data, Ad Regem, inquit, pergas. aditus tibi patet: cui me venisse nuncies. importunum tempus Franciscus ait. Omnia silent. Rex quiescit. instare tamen Matthæus, ut Cæsarem adeat. ita Francisco internuncio, per intempestam noctem in cubiculum Henrici deducitur. Impatiens erat moræ Matthæus. desiderium ultra ferre non poterat. In conspectum Regis ubi venit, caput aperuit, rejectaque in tergum penula, tum cancellatis manibus ad genua procumbens, subinde dixit: *Tunc es illa periclitantium salus? Tunc, quem ego jamdiu, sive vigilem, sive dormiam protectorem exspecto: qui ejectos, & exules reconciliata cum inimicis gratia, in patriam, & domum restituas? Amplectorne, & osculor illius pedes, qui opem fessis, & exhaustis nobis allaturus est?* Tum pauca pro communi exulum causa locutus, in hospitium abiit. Nox, ut diximus, obscura, & cæca: peregrinus habitus, vestis, & ornatus virum occultabant. nemo tamen unus fuit, qui generosam faciem non miraretur, in qua plurimum priscae fortunæ, & amplitudinis adhuc inesset. Nam & paucis ante horis juxta Alexandriam cæsaries, & oris majestas in servili ministerio, & mendici habitu illum quis esset prodidit. sitiens forte, & de via fessus, ut puer ego a senioribus accepi, aquam à muliercula petivit. illa benigne vinum præbuit. mox manus, & faciem lavit. majestate vultus mota foemina in homine regios spiritus, & animum in tenui vestitu magna molientem agnovit. continuo nuncii cursitantes per Gibellinorum hospitia, advenisse Matthæum dictitant: cujus adventu adversarum partium quidam lætati sunt, quibus domi, & in regno beneficia is contulerat. ubi illuxit ad magni exulis ædes totis viis concurrunt. læti salutant, domo educunt, in publicum progredientem sectantur. centum equites Gibellini nominis longo ordine, & agminatim illi occurrunt. princeps Riciardus Ticionus erat. Matthæum suspiciunt, & præ gaudio lachrymantes in regias ædes deducunt. Germani proceres repentinum, & frequentem concursum eorum obstupescunt, qui tam studiose hominem affectarentur: & quo magis procedebat, eo magis advolare, & complecti. alii Regi nunciant, velut monstrum apparuisse, ad quod spectandum tam peregrini, quam cives undique confluerent. Henricus, cui Matthæi adventus notus erat, rem dissimulans subrisit. Forte Antonius Fissiraga ad Henricum primo mane venerat: hic studio & multitudine deducendum, tum etiam sermone aulicorum percussus: *Hic, inquit, Cæsar, de quo tanta nunc dicuntur, Longobardorum olim pestis fuit, factiones fovit, & auxit: & cum de potentatu certaretur, civilia arma excitavit, diuturnoque & grandi detrimento, ceu gravis tyrannus civitates affectit.* Ad Regem introductus ubi fuit, illum reverentissime salutavit. Stabat haud longe à regis latere Philipponus. hunc Matthæus patentibus brachiis, si pateretur, amplexurus erat. in contrariam partem Languscus avertitur: nihilo tamen minus Matthæus refugientis latus complectens: *tempus nunc, inquit, & anteaكتورum malorum oblivisci, ut in pace, remissis injuriis, communi utilitati inserviamus; quid enim in pacifici Regis adventu aliud debemus, nisi omni simultate abjecta, sincero animo in gratiam redire?* Humiles Matthæi voces, atque mansuetum animum Fissiraga procaci subinde sermone incescit. *Ecquis tam patiens non indignabatur, sevos in pulcherrima Italia parte Tyrannos, qui injuriis, rapinis, & cadibus omnia fedaverunt, bella intestina profeminarunt, nunc de pace, concordia, remittendisque injuriis verba facere?* Matthæus nihil perturbatus tempus est, inquit, discordiis, & ira finem dare. ad hæc subridens Rex, Certe jam dimidia pax facta inter vos integra conficienda est. abnuere utrique Fissiraga, & Languscus: neque à gravibus, atque criminosis verbis præ impotenti ira temperarunt. Ex eo Henricus Matthæum prudentem, & miti ingenio præditum existimavit, quem etiam inter omnes

A Longobardos præcipuum habuit. Doluere admodum Fissiraga, & Languscus quod Astam venissent, atque obsequium externo Regi præstitissent. Inter hæc Castonus Archiepiscopus cum Napino fratre Astam veniunt. vincula, carcerem, ereptas de manibus arces, & insignem Sacerdotii contumeliam impunitam manere pati non poterant. præterea patrimonio spoliati, patruo infenso, ac finibus summoti in perpetua egestate se victuros videbant. Propositum illis erat quacumque via amissa recuperare. Opportune igitur Matthæus advenit: cum quo si conjungi possent, accedente Henrici auctoritate, & imperio, facile, vel invito, & repugnante patruo, in patriam redirent. tum si quid controversiæ foret, id parvo labore sub magno arbitro, sapientique disceptatore tolli posse. Venerant adhuc ad Matthæum Mediolanenses alii, quos Guido fugaverat. nobilitatem omnem invisam is habuit, neque se satis incolumem, aut securum ducebat, si patricius paulo opulentior domi mansisset. Sic Astam profugerant & qui de potentatu certaverant, & quos novandarum rerum suspectos Guido patria ejecerat, omnes communis commodi gratia inter Matthæum, & Castonum foedus, & amicitiam consilari optabant. ita pronis ad societatem animis, statim amici, & socii Matthæus, & Castonus facti foedus inter se solemniter paciscuntur. Tabulæ adhuc durant, quarum exemplum Isidorus Turrianus vir sane generosus, atque magnificus ex Foro-Juliansibus, cum hæc scriberem, ad me misit. Igitur pro instituto patriæ primores exulum constituti, pacificandi, reconciliandæ gratiæ, cognoscendæ controversiæ, atque transigendæ litis Matthæo arbitrium, & potestatem in omnibus demandavere. Solemni stipulatione res indigebat, & communi consensu peragenda erat. Constituentium nomina hæc: *Uberty Vicecomes Matthæi frater, Cressonus Cribellus, Lodrisius Vicecomes Petri filius, Amiragus, Osnagus, Franciscus Garbagnates, Villanus Cribellus, Habitabat tunc Matthæus domum Simonis Roveri.* Tabulis mandatoque confecto, Castonus cum fratre Napino ad conditum locum veniunt. postulavere utrique, filios, fratres, & propinquos conventionibus adesse. Archiepiscopi fratres Mosca patre progeniti *Napinus, Paganus, Rainaldus, Odoardus, & Moschinus.* Matthæi filii *Galeacinus, Joanninus, Luchinus, Balatronus, & Stephanus.* Hæc summa conventio-

nium.
„Inurias, rapinas, damna, cædes, tum quicquid detrimenti ex fuga, & exilio sustinuerunt, si bi invicem sub abolitione utrique condonarunt, ut bona fide, sine fraude in concordiam, & gratiam redisse existimarentur. quod si discordiæ, & controversiæ inciderint, arbitrium decidendæ litis, & pacis componendæ penes Archiepiscopum sit. neque de cetero Matthæus, quique cum eo sentiunt quicquam moliantur, & tentent palam, vel occulte adversus præsentium rerum statum Mediolani, Bergomi, Comi, Cremonæ, Novariæ, Vercellarum, Laudis, Derthonæ, Papiæ, & Castri Cremæ nisi prius consulto Archiepiscopo. si qui in amicitiam, & societatem cum Archiepiscopo coiverint, eos Vicecomes tueatur, & defendat. dominium Mediolani Matthæus neque aggrediatur, neque titulum, aut nomen usurpet, nisi annuente, & consentiente Archiepiscopo. Renuntiavit præterea Matthæus præfecturæ urbis, & cuicumque administrationi reipublicæ, ut neque Galeatinus filius præfecturam aliquam in supradictis locis quærat, aut usurpet. cuicumque obviam adhuc ibunt: si quis perpetuos magistratus, aut dominia supradictis in populis affectaverit. iisdem item legibus Napinus, & ceteri fratres teneantur. Publicum urbis consilium præfecti collegiorum, & ordinum, milites, & qui in præsidio erunt pronutū, & voluntate duntaxat Archiepiscopi deli-



„gantur. denique nulla sit in urbe custodia, quam
 „ Archiepiscopus recusaverit. Dimidia pars militum
 „ Castrorum custodiat, & defendat: qui tamen quo-
 „ tiens ratio publici commodi exiget, rempub. tue-
 „ antur. Praefecti urbis, & qui jus dicent, sortito
 „ magistratum accipiant: neque ad opinionem pri-
 „ vati cujusquam curatores reipub. designentur. Op-
 „ pida, vici, & castella jurisdictionis Archiepisco-
 „ pi, ea extra sortem sunt. Nulla sortitio de ma-
 „ gistratu fiat; neque eis Matthæus publico, aut
 „ privato nomine vim fieri sinat. Matthæus item
 „ consilium, & opem Archiepiscopo ad recipien-
 „ dam Angliæ arcem dato. tum quicquid Sacer-
 „ dotii juris fuerit defendito. jus Archiepiscopus de-
 „ rivandi aquam de fluminibus Ticini, & Adduæ ir-
 „ rigandorum agrorum ergo habeto. Castrum Tri-
 „ cii, Vaprii, Brignani, & Castelleti Napini, &
 „ fratrum extra sortes publicas esto, semperque Ar-
 „ chiepiscopus, & fratres arcem, & Turrem Tricii
 „ possidento. agros siquis in finibus Mediolani post
 „ captivitatem Castroni per commutationem obtinuit:
 „ etiam si juris ecclesiastici forent, eos Archiepisco-
 „ pus, & fratres, & eorum hæredes recipiant. Mat-
 „ thæus itidem quæ ad eum, & cognatos pervenê-
 „ re, ea teneat. ne vero de finibus ambigant; &
 „ proinde lites & certamina, excitent: vicinos agros
 „ neque emito, nec Matthæus acquirito, qui ad duo
 „ millia passuum Turriano propinqua sint. Hoc an-
 „ te omnia, interposito jurejurando, à Matthæo ex-
 „ egere, ut Romanum Pontificem observet, & re-
 „ vereatur: neque summi Sacerdotii amplitudinem
 „ laadat, aut cum his sentiat qui Pontifici rebelles
 „ fient. Archiepiscopo pareat, cujus etiam impera-
 „ ta libens faciat. proscriptorum, aut damnatorum
 „ utriusque gentis, si qui pacis conditiones abnue-
 „ rint, Matthæus cognatorum, & propinquorum
 „ bona habeto, Archiepiscopo, & Napino super
 „ suos jus esto. Archiepiscopum, & fratres indem-
 „ nes, si quid detrimenti ex hujusmodi concordia
 „ acceperint, Matthæus præstato. Nuptias ita u-
 „ traque gens contrahito, ut siquid in finibus Bri-
 „ gnani dotis nomine detur, id uterque pecunia lue-
 „ re valeto. quæcumque controversiæ inter utram-
 „ que gentem, siue privato, siue publico nomine in-
 „ ciderint, Archiepiscopus earum iudex esto: cujus
 „ etiam arbitrio affinitates contrahantur. Dotes fa-
 „ cerdos pro fortunis, & opibus nubentium confici-
 „ to. Rata hæc, & firma, & bona fide uterque
 „ servato. de lite, & controversia Archiepiscopus
 „ etiam feriarum tempore cognoscat, & pronunciet.
 „ uterque quod alteri promisit servato. Fidem si quis
 „ violaverit, aut pacta non servaverit, ei triginta
 „ millia aureorum multa esto. à iudicio, & senten-
 „ tia Sacerdotum neuter discedito; neque forum de-
 „ vitato. Si compromissum factum fuerit, sine exce-
 „ ptione servato.

Hæc omnia testibus vocatis, per solemnem stipu-
 lationem inter Castronum Archiepiscopum, & Mat-
 thæum Astæ confecta fuerunt, in regione Bergo-
 nionum, in ædibus Valeriani Bergonioni, quas tunc
 inhabitabat Episcopus Basilienfis, consiliarius Hen-
 ricus Cæsaris anno post salutem humano generi da-
 tam millesimo trecentesimo decimo pridie nonas De-
 cembres. Archiepiscopus fratrum, Matthæus filio-
 rum sponsores fuere supradictorum. Prudens sane
 in dandis, accipiendisque legibus Matthæus fuit ita
 obsecutus Castrono, atque Napino, ut alioquin ir-
 ritatos homines in perniciem patrui magis inflamma-
 ret. sic suo quodam nimio obsequio Turrianos mi-
 nus providos ad ea cavenda, quæ in consiliis regno-
 rum accidere solent, reddidit. His confectis, Mat-
 thæus Henrico suadere in primis cæpit; uti quam
 primum Mediolanum peteret, neque Germanos mi-
 lites expectandos esse. Alpes Henricus cum haud
 magno comitatu transcenderat. sequuti fuerant pro-
 ceres quidam, & Sacerdotes. militare præsidium

A exiguum habebat. substitit Astæ, partim, quod su-
 pra diximus, ut publicas controversias, atque diffi-
 dia civitatum componeret, partim ut validiore com-
 parato præsidio, siqui in via restitissent, eos per vim
 ad obsequium cogeret. Cæsari consilium Matthæi
 placuit. Noverat, Philipponum Languscum hoc æ-
 grè ferre, quod se facilem, & benignum Vicecomi-
 ti præberet, quem etiam in consilia magnarum re-
 rum adhiberet. Dubius erat Henricus, Papiam, an
 Mediolanum prius peteret. insidias Turriani time-
 bat: ceteræ præterea civitates recusassent nisi prius
 per deditionem Mediolanensis, titulum, & corona-
 tionem Regni assequutus foret; & proinde rebellio-
 nem paratam videbat. B Usus est igitur Matthæus ea
 monere, quæ securum facerent, & metum rebel-
 lantibus afferrent. hoc suadebant Pisanorum Legati,
 qui ingentem vim auri secum detulerant, atque Hen-
 rico donaverant. Postridie itaque idus Decembres
 Casale Sancti Fualii, quod oppidum paulo ante
 Theodorus Paleologus obtinuerat, profectus est. in-
 de, trajecto pado, Vercellas, & Novariam petiit.
 Prosequebatur officii, & obsequii gratia adhuc Ita-
 licorum procerum multitudo. populi libentissimis a-
 nimis excepere; neque solum obedienter quæcum-
 que is imperasset facere; sed pro avorum deditione
 C adhibito jurejurando, se Cæsaris dedititios profite-
 bantur, munera, & ad victum necessaria affatim ex-
 hibentes. Erant videndi Cæsaris perquam cupidi;
 sexaginta enim, & amplius annos designati ad Im-
 perium in Italia visi non fuerant. commoratus ali-
 quantisper Novariæ, dum Mediolanensium studia
 explorat, ingeniaque tractat. Leves videbantur ani-
 mi, & fides eorum nutare, qui adventu, & favore
 Henrici, vires Guelphi nominis diminui, & gra-
 tiam, atque auctoritatem Pontificis convelli provi-
 debant; & proinde ab obsequio averti. Matthæus
 Henricum hortari quippe dicens, *paucos futuros, qui*
non cupiant quæ is iusserit facere. ita Ticinum traji-
 cit. Continuo accolæ fluminis adsunt magnis voci-
 bus Regem consalutantes. D Maciente constitit. in
 occasum sol vergebat, egelidus erat dies. ibi perno-
 ctavit. ubi illuxit occurrere illi nobiles quicumque
 in urbe relictæ fuerant. plebeji quoque visendi studio
 egrediuntur. Conterritus Guido jam pro populi a-
 nimo præsidium disponit, milites convocat, Cæsari
 in via intercessurus. Talia meditantem amici cir-
 cumfistunt, orantque, salutis suæ, & suorum juxta
 consulat. Docent, *impares esse vires, & frustra Ca-*
sari oblectari, in quem tam promptè Mediolanensis incli-
net. satius esse, odium, & iram in adversarios dissimu-
lare, quando mitis, & clemens Cæsar id in primis cura-
turus sit, ut in concordiam, & pacem cives coeant. In-
 solens erat serviendi Guido, verebaturque ne recep-
 to Henrico, in ordinem cogeretur, atque ex Prin-
 cipe in privati formam decideret. Legati Florenti-
 norum per ea tempora aderant; ingruens periculum,
 & imminens discrimen rerum cernebant. Hi per-
 suasere, obsequium Regi præstaret. *interesse reipub.,*
& propria salutis verbis potius disceptare, quam armis cer-
tare, atque populi studiis repugnare. Tunc Guido vel
 invitatus cum præsidio, & prosequente amicorum,
 atque clientum ordine Regi occurrit, non impe-
 rata facturus; sed magis ut dominum se osten-
 taret. Aquilas, & imperatoria signa cuncti venera-
 bantur, Henricum dominum consalutabant. signa,
 F & imagines Imperii propinqua, & super caput Gui-
 do conspicatus iræ moderari nequivit; quin ea de
 manu ferentis raperet, humique sterneret. Super-
 bum id omnibus, & indignissimum videri: attamen
 Regi appropinquans ab equo descendit, pronusque
 pedes exosculatur. Henricus in præfens contume-
 liam dissimulavit, illumque hilari vultu excepit: sub-
 jecit tamen; *Jam Guido adversariis ignosces, pacique,*
& concordia operam dabis. agnosces tandem eum, cui non
parere nefas sit. fidelis esto: de compositione rerum, &
concordia in civitate ageitur. Ita ad suburbana Vercel-
 linæ

linæ portæ sine ornatu imperatorio biduo ante natale Domini deveniunt. in vetus prætorium Henricus, Regina in ædes Archiepiscopi divertere. Nondum expiata ab captivitate Archiepiscopi erat civitas; neque licebat sine piaculo sacris operari. Imperator suo privilegio nixus in æde Divi Eustorgii solemne sacrificium confici voluit. postridie in campo, qui pro æde Divi Ambrosii late patet, Matthæus Vicecomes, Caltonus Archiepiscopus, Paganus Patavinus Episcopus, & alii Sacerdotes dedicationem Henrico faciunt. Accessit etiam per eos dies Mediolanum Isnardus Thebanus Episcopus Prædicatoriæ fraternitatis Præfectus designatus, & cum eo Romani Populi oratores splendidissime ornati. misere item Genuenses Bernabam Auriam Sardiniae tunc Dominum, quattuor & viginti legatos is secum de publico nomine agebat. Purpurati omnes incedebant. statores, & administri plus quinquaginta, qui in ministerio domestico, & in via subservirent. Fremere interea ii, quibus rediisse in patriam exules grave erat, passimque vociferari, *non retinendos domi Malexardos*; sic enim profugos tunc appellabant: propius seditionem ventum erat, nisi Henricus intercessisset. Hic statim Matthæum, & Guidonem, tum eorum cognatos, & amicos ad se vocat; quibus concordiae, & futurae pacis leges dixit.

„ Ut de cetero nulla inter eos injuriarum mentio fiat; sed ante actorum obliti sincero animo in gratiam redeant: quod si quis offensæ nomine sibi satisfieri postulet, illi ex sententia, & jussu Cæsaris satisfiat. in patriam revertantur omnes, qui domo, cum de regno dimicaretur, pulsi fuere: id habeant in civitate regis juris, quod ante habuerant: nec quisquam veterem noxam ultra præscriptum Cæsaris emendari, & refarciri postulet: nullus profugo contumeliam exilii exprobet: sua exules, etiam ultra præscriptionis tempus, vindicent. remittatur omnis multa ex quo ab urbe exularunt; siue contumaces adversus edicta fuerint; siue offensa intervenerit. imperatas pecunias, & tributa per exilii tempora, etiam quocumque nomine damnatus poenas non solvat: nemo unus conditiones violet. si quis sententiam Principis non servaverit mille librarum auri obrizi poena esto. præterea iratum Regem sibi sciat: iisdem conditionibus, & edictis teneantur amici, & sectatores utriusque familiae. pacem, & concordiam veram amplexu, & osculo, Rege spectante, Principes confirmant. Declaratio, atque interpretatio conditionum, & legum, quotiens ambigent, sit penes Henricum: & quodcumque is statuerit, id ratum sanctumque esto.

His conventionibus, atque decretis in concordiam, & pacem convenere; & ante divisa civitas in unum coivit. Turrianorum complurium nomina subijcere non absonum videtur; quorum principes fuere *Castonus Archiepiscopus Mediolani, Paganus Episcopus Patavinus, Guido, & Simoninus*. Amici Turrianorum *Zaveterii, Calices, Vedani, Paravesini, Jacobus Morigius, Jacobus Judex, Zobius, & Thomas Bernadigii, Barinii duo Zacharinus, & Beltraminus*. Vicecomitum nomina, Matthæus sponsor filiorum Galeacii, Joannis, Stephani, atque nepotum, Præsentes fuere Moschinus, & Marcus filii, Ubertus Vicecomes pro Vercellino, & Otholino filiis absentibus spondit: Joanninus etiam filius, Ludovicus Vicecomes quondam Petri sponsor fratris absentis. hi præsentem Rege, conditionibus, & legibus annuere: quas ut observarent bona sua cum poena obligarunt: fides quoque, & iuramentum intervenit. Ita palam injurias, & quancumque noxam, tum siquid damni fieri oporteret, sibi invicem condonantes, ad evidens concordiae, & reconciliatae gratiae signum se invicem complectuntur, & exosculantur. testes fuere sacerdotes venerandi atque illustres viri.

A Redintegrata in hunc modum civitate, vocantur in consilium Decuriones, & ceteri qui negotiis publicis præerant. De re frumentaria, cogendaque pecunia refertur. obmurmurantes qui aderant diversa censuere. intercessit tamen prætor, ne sententias quidam corrigerent. ita descendantibus de curia Patribus, ad arma discursum est. tumultum imperialis militiae præfectus edicto sedavit. Henricus pro templo Divi Ambrosii è suggestu paucis Mediolanensem populum alloquitur. post quem Astensis his verbis: *Legitimum Imperatorem Henricum esse, quem Germani proceres delegere, & Romanus Pontifex confirmavit: proinde regni in Longobardis jura, & insignia illi, & coronarium aurum cum munere dari oportere*. Ex ea concione Recuperatus prætura abdicatur, atque Henricus novum prætorem genere Gallicum, cui Joanni Calciae nomen erat, urbi imposuit. huic regiae vires demandantur. Statim quattuor, & viginti cives creari petit, qui supremam potestatem de publico consilio super regia coronatione, & munere discernendo haberent. Fuere qui Prætoris postulata probarent: alii dividendam sententiam censebant; ut videlicet ex viginti quattuor duodecim de plebe, & totidem Catanei, siue Valvaffores deligerentur. Evicit hæc sententia; atque ita decretum est. Tunc Prætor Matthæum Vicecomitem, & Guidonem C Turrianum ad se vocat, mandatque ut de viginti quattuor civibus deligendis quod senatus jufferat id efficiant. Delecti confestim in curiam coeunt; tertio calendas Januarias coronandi Cæsaris dies constituitur. Postridie nonas Januarias celebris erat dies adorantium Magorum, & stellæ ducentis replicata memoria. de munere, coronarioque auro primum conticuere qui in consilio erant: alios privati commodi ratio premebat: illos ira, & vetus in Cæsarem odium agitabat. paucos publica utilitas, & inopia tenuiorum movebat. ita quamvis regius Præfectus ut munus constitueretur instaret; nullus tamen sententiam dicere audebat. Conjecere cuncti in Gulielmum Pusterleum oculos; hic erat generosus, & potens, minime ambitiosus, vita, atque moribus integer, & proinde popularis. rogant, ut palam dicat *quid pecuniarum Regi donandum sit*. Invidiosum erat quod rogabatur. Rursus conclamant *quacumque fuerit Gulielmi sententia, eam nemo aut infringat, aut calumniatur*. Tunc surgens Pusterleus sine præfatione *quinquaginta aureorum millia donari censuit*. Assensum est continuo. Ceterum Matthæus *Numquid Reginam indonatum relinquemus inquit? Rege dignum est munus. Regine decem millia nummum dari cenfeo*. Magna visa est largitio. Guido hoc ferre non potuit, & in rationem publici commodi surgens: *Bonine viri, & civis est intolerabili tributo patriam exhaustire? & de concilio abiens præ indignatione magis quam quod ita sentiret, subjecit: Cur non potius centum millia donamus?* identidem clamitans *absolutus est hic numerus*; atque ceu de consilio ejectus foret, domum contendit: secuti permulti aperte sententiam laudabant: utpote qui tenuioris turbæ, & publicæ inopiæ rationem habuisset: quamquam hac velut popularitate dominatum urbis, à quo dejectus fuerat, is recuperare sperabat. At nobiles qui quorsum verba Guidonis tenderent prospiciebant, secundum Gulielmi sententiam munus decerni postulabant. frustra tamen elaborarunt: quod enim per iram Guido dixerat; quia major summa erat, id à regio scriba exceptum, jubente prætore, ex urbis consuetudine in acta relatum fuit; quamquam viginti quattuor viris non placeret; quippe qui videbant, tantum invidiæ, & odii se subire, si alienam rem, atque fortunas popularium projecissent. Postulantur deinde pro vicis portarum quattuor, & viginti viri: hi continuo ex regionibus pridie calendas Januarias in statutum locum coeunt. Ubi de pecunia agi captum, una omnium sententia, & vox fuit: *Promissum munus ab his esse, penes quos potestas* nulla,

nulla, qui neque satis norunt unde tantum auri excudi possit: solvant qui adeo alieno ere liberales, in suo non. instante magis, & increpare Gallicus Prætor, ab huiusmodi sermone desisterent; numquid ab eorum sententia provocari liceat, quibus permessa semel potestas foret? sed potius de inveniendi argento consultetur. Mœsti Patres in atrio Prætorii usque sub occasum solis de conficienda pecunia consultantes steterunt. tandem ita dimissi sunt, ut per noctem de re pecuniaria cogitent, tam postredie redeant. Res per urbem divulgatur. mercatores Regem adeunt fere quinquaginta. collationem pecuniæ non modo difficilem; sed impossibilem exponunt: liberius eos accusant, qui ea largitione urbem perditum eant, neque jus decernendi habuerint. Vocandos in consilium septingentos viros, qui in omni magna, & difficili consultatione fere coire solent. Responsum est de amplitudine, & jure imperii multum hoc nomine detractum iri, si quod semel decretum est turba corrigeret. improbos præterea, & ingratos eos esse. An ignoratis quid Cæsari debeatis, qui patriam vestram ex dissensione, & certamine civili diutius vexatam, quietam reddiderit, tot cives profugos, & errabundos domum reduxerit, concordisque fecerit? numquid muneris poenitet? largitionem hanc profecto sponte facere debuissetis. quare satius erit de redigendo auro tractare, quam inopiam causando tempus terere. ita mercatores dimissi sunt. Divulgabatur interea, tumultum in urbe excitari, atque in omnibus vicis, castellis, & conciliabulis adversus Cæsarem homines gravia loqui, ut de conspiratione tumendum esset. Tunc Henricus nescio quid mitius dixit: Sua mentis non esse ut quisquam civium muneris nomine prægrevetur. Itidem responsum est jureconsultis. Exposuere, & ipsi civium inopiam: & quantis malis, atque perpetuis incommodis ex intestino bello civitas afflictæ foret; & magis regiæ amplitudinis referre, si ex arbitrio bonorum pecuniam, & munera acceperit, quam si ex paucorum voluntate universos cives affecerit. Inexorabilis stare Henricus, neque precibus, nec lachrimis flecti poterat: nihil mercator, nihil jureconsultus, nihil ceteri lachrimantes cives exorare poterant. Magna animo is conceperat, quæ nisi ingenti pecunia efficere non valebat: ideo nihil ex his, quæ semel promissa fuerant, precibus, & inopiæ condonare voluit. perstabat in sententia, atque increpare, quod qui olim in externo, civilique bello non centum, sed biscentum millia dependissent; nunc pacata civitate, centum millia donare ei domino pernegent, à quo tranquillitas, & salus urbis pendeat. Non est hæc inopia, sed avaritia, atque quædam in Cæsarem mala mens, malusque animus. excudatur argentum; atque huiusmodi verbis aliquando finem facite. Responsum est: vestigalia, atque portoria Rex licetur, atque à redemptoribus eam pecunia summam, quæ promissa est, exigat. representent argentum cives, inquit, quod in tempus exacturi sunt. presenti pecunia Regi opus est. Magis obdurati hoc responso animi fuere, atque liberius conqueri, & ceu desperata res esset, fame, & jejuniis nos conficiat, ajunt; numquam quod ab aliis promissum fuit, id per nos conficietur. Fortiter resistentes, & licentius obloquentes ita dimittuntur, ut rursus quattuor, & viginti viri, qui pro suprema potestate concessa munus statuerant, in consilium vocarentur. Advenerat coronationis dies: ad solemne sacrum alii officii causa, alii rei visendæ, quam nunquam alias viderant, sacerdotes Itali, atque peregrini convenerant. affuit etiam Dux Austriæ, Delphini Gallici duo, Theodorus Paleologus, & Manfredus; hic Salutarum; ille Montisferrati Marchio. civitatis item Longobardorum Legatos, ut se dedititios Cæsaris profiterentur, misere: præter Alexandrinos, & Albenfes, qui nuper in dedicationem Roberti venerant. Castonus Archiepiscopus, sacris in æde Divi Ambrosii rite peractis, eaque subinde præfatus, quæ pro recenti instituto legitimam coronationem facerent, & Cæsari, atque Regno felici-

tatem portenderent, ferream coronam super caput imposuit. ita Henricum Longobardorum Regem declaravit, sceptrumque tradidit aureo præfixum pomo, in quo brevis Asiæ, Europæ, & Africæ inerat descriptio: Fastigium crux ex solido auro decorabat. Assidebat Regina solutis crinibus, cujus item caput aureum insigne illustrabat; ferream coronam Theologus quidam, & jureconsultus, quorum nomini parco, ideo designato Cæsari dari scribunt, propterea quod Longobardi gens bellicosa sit, quæ iuga pati non velit, & nisi ferro domari, & in officio contineri non possit. Ego hanc illorum opinionem neque refutare, nec approbare ausim: illud autem dico, puerile hoc videri talia litteris mandasse, quæ vix risus captandi, & somni arcendi gratia dormitantibus ancillis aniculæ narrarent. In ea perstamus sententia, quam supra diximus. Ceterum ut memoria facti celebrior ad posterum transfret, sive ut obsequentiores populos nostros Cæsar haberet, octoginta ex proceribus, qui adstabant, militaribus ornamentis donavit. Primos Matthæum, & Gulielmum Pusterleum parazonio tribunitio accinxit, muneribusque ampliter profectus est: qua liberalitate in factionem Cæsarium multos pertraxit. jam cives mandatis regiis parebant. Gallicus homo invisus omnibus, durus erat, inelegans, atque difficilis. ita magistratu summovetur. controversiæ atque lites statim obortæ. repetebant exules bona: at qui possederant, ea sine judicio reddere nolabant, conventionesque spernere. ad tribunal regium itur. Henricus pœnam centum libras ei constituit, si qui exuli sua repetenti non restituisset. quod si judicio certari oporteat, de causa regius Vicarius cognoscat. Tum, audita utraque parte, actorem si injuste petiverit, æstimata lite, ad impensas reo solvendas condemnnet. Reus contra, si rem petitam denegaverit, mulctetur. Hanc Regis sententiam sine contradictione quidam accepere. Venisse ad Henricum tunc Opicinum Spinulam, sellamque argenteam, quæ tres caperet, illi donasse apud auctorem idoneum invenio. Interea Moguntiæ ad Henricum gratulatum venere. intelligere, sese debito, & vetusto honore fraudari. Cæsares recentiores Reges demum appellari, si opulentissimi regni insignia in æde Baptista Joannis sumpsissem: ædes manet pretiosis ornamentis, & thesauro ditissima. Carolus cognomento magnus Francorum Rex Desiderium debellavit: tertio illo titulo non prius designatus fuit, quam Regnum Longobardorum adeptus est. Extant adhuc apud nos privilegia, & diplomata sub hac inscriptione. Carolus divino suffragio Francorum, Longobardorumque Rex, ac Romanus Patricius. Lege pontificum decreta, si vana non sunt; profecto enim invenies regni Longobardorum appellationem patriciatus Romano, & imperatorio nomine priorem fuisse. Ceteri quoque Cæsares deinceps hoc titulo ornati fuere. Indignissimum profecto est, & ut liberius loquamur, legitimus ille non erit Imperator, qui coronationis ordinem perturbaverit. Vetus est consuetudo à Cæsaribus servata. Cur nos hoc honore, & veluti jure fraudas? Nihil adhuc Henricus. verum, ut inani quodam honore dignatos Moguntiacos reconciliaret, jus coronandi Regis restituit. quod beneficium haud gratuitum fuit: quinque millibus aureorum privilegium eos redemisse constat. Reduntem in urbem Henricum cives adeunt. iterum inopiam exponunt; tum quam difficilis sit pecuniarum coactio: rogant præterea, ut urbis calamitosa miseretur. Nihil effecere. Avidus erat pecuniæ Cæsar. belli, & itineris impendia ad corrogandas undecumque pecunias urgebant. Superbè respondet, Ingratos esse homines, qui Cæsaris beneficia non agnoscant, qui domestica arma sustulerit, civitatem quietam reddiderit, suprema dignitate illustraverit; quod voluerit Mediolani potius quam Moguntia ferreo diademate insigniri. Reclamabant cives, Insignia regni illustriora, & Cæsari amplissimum inter Longobardos Mediolani potius quam alibi regio nomine insigniri. Ceterum Henricus, ne civitas

civitas magistratu careret, apud quem cives de causis, & lite certarent, Nicolaum Senensem Prætoris urbi constituit. improbus hic vir, arrogans, & insolens domi in mercaturæ magisterio æs alienum grande conflaverat, quod cum dissolvere non posset, solum verterat. in prætura constitutus, ceu dominus, non Prætor, cives acerbius tractare cæpit; cruciatus, & supplicia levem ob culpam minari, poenasque statim sumere, si quis contradicere, aut iussis intercedere ausus foret. ita metu poenæ conterriti cives quæcumque is mandasset confestim faciebant. vocat hic continuo eos vigintiquattuor, qui condendis novis legibus, ut supra diximus, delecti fuerant. Plerique novas leges ceu libertatem expetebant. Miseri plane, ne dicam stulti, qui non intelligerent *quorsum vocatio tenderet, & quid condendarum legum potestas data damni allatura foret.* Estimabant se liberari servitute, ut æquo jure degerent, ne semper paucorum imperio parerent. Resistebat Paganus Moschæ filius: sive quia hominis contumeliosam superbiam ferre non posset; sive quod videret, per causam novandarum legum, graviores servitutes afferri. Prætor acerbius comminatus est Pagano; utpote qui ne salutare leges conderentur, impedimento esset, neque promissis stare. Hoc sermone percussus qui in consilio erant nihil contradicere. Surgens tandem Stephanus Vicecomitatus; Nos, inquit, *unum habemus dominum, qui & idem est legum conditor: jurisdictionem ille tibi in omni negotio publico tradidit: illius vices obibis, tantum tibi deferimus potestatis; & iidem sicut rerum domino parebimus.* quid enim tibi polliceri, aut præstare de nobis Paganus potest? Numquid illi soli condere leges novas, aut veteres antiquare licet? Nicolaus iræ impatiens: Vix me contineo, inquit, *quin manu mea caput recidam, te truncum ignobilem faciam: quod nisi è vestigio sponsore caveris, te quæcumque iussero obedienter omnia facturum, capite mulctaberis.* Expavere qui in consilio erant, ceu uno sævi hominis nutu trucidari omnes possent. Unus Paganus verba collegæ intrepidus laudavit, subiecitque, *Non unius Stephani; sed omnium qui confidemus hæc est sententia. communis agitur causa: commune periculum pariter subibimus. numquid putas, nos adeo ignavos, ut tibi velut domino serviamus? & ne putes nos vilia mancipia, quasi adversus minas tuas insurgere non audeamus: en ego Stephani vadem me constituo.* Tunc ceteri se idem facturos dixere. Timorem tamen, & ignaviam Prætor agnoscebat: quamquam talia dicerent: atque id potestatis sibi dari deposcit, quod retro Prætoribus concessum de publico consilio fuisset. sine provocatione alii leges violabant, & pro arbitratu tollebant, quorum libidini obviam numquam itum est. Hæc acerba verba, & gravia imperia cunctos ita perterrere, ut servitus morte potior visa fuerit. ita præ timore libertatem, & opes publicas projecere: neque post hac resistere, aut luctari mandatis, & imperio Præfecti ausi sunt. Tunc summa petita pecuniæ, ut exactio tolerabilior fieret, ad quinquaginta nummum millia in præsens dividitur. Nullus in urbe census: neque bona aut fortunæ civium descriptæ erant. Certus pecuniarum habitus non habebatur. taxandæ pecuniæ hic modus inventus est: *ut summa major quinque, & viginti aureos non excederet; altera pensio quindecim; tertius ordo decem conferret.* Ita trifariam divisa coactione, tria hominum millia describuntur, & pro triplici milliariorum quinquaginta millia nummum quæstori pernumerantur. *partiendi oneris, & exigenda in hunc modum pecunia auctorem Neapolionem quendam fuisse invenio.* Iniquum videbatur, ex paucorum arbitrio id exigere, aut in solos tenuiores à divitibus tributa averti. pecuniæ tamen asperius exigebantur. nulli venia. nihil inopi remittebatur actione facta, agri, domus, & res moventes divendebantur. passim præco sub hasta, & arbitrio quæstoris ad emenda bona turbam

A vocabat. Vix exacta quinquaginta nummum millia erant, ecce Philippus Sabaudienfis, quem Henricus, ut uxori morem gereret (huic Reginae soror nupta erat) procurandis rebus præfecerat, ne Cæsaris commoda negligere existimaretur, centum, & viginti cives (legitimus hic numerus in publicis negotiis curandis habebatur) vocat. in atrium conveniunt. hos primum Regis nomine hortatur, ut quod reliquum muneris foret id expediant. Defixi stare cives; nam qui se immunes una depensa pecunia estimabant, ubi rursus tributum imperari, neque laxamenti quicquam exactionibus dari vident, ad Henricum confugiunt, gementes, & lachrymantes huius pensionis gratiam petere, clamare, *exhaustam priori exactione urbem, bona multorum venundata, domos spoliatas, & eorum videlicet, quibus pecuniæ copia non erat.* Conquestio gravis erat, lachrymæ manabant, inopiam quanta foret ostendebant. Nihil miseratus est Henricus. sic mœstiores discessere. Postridie iterum in consilium veniunt. tunc nova habendæ pecuniæ ratio excogitatur, ut per capita civium, & ex descriptione census ad perficiendum munus pecunia exhiberetur. Indicitur trigesima universis pariter civibus, sive urbem, sive agros incolerent. hi dumtaxat exempti fuere, qui paucos ante dies quinquaginta millia nummum persolverant. querelæ multorum passim audiebantur. avaritiam alienigenæ gentis omnes accusare, aliter quam speraverant accidisse. Adventus Cæsaris, quem ante expetebant, omnibus invisus. accidisse sibi aliter quam speraverant. domestico domino serviebant, & si quid extortum erat, id omne in patria remanebat. nunc externos tyrannos rapinis ditatos, spoliis onustos abire, quæ secum in longinquas terras abducant. homines implacabiles, feros, atque inclementes, quos nullæ lachrymæ, nullæ querelæ, nullæ denique supplicum voces commovere, aut flectere queant. Nulla profecto speranda libertas, imo intolerabilis, & calamitosa semper habenda servitus, à qua liberari quidem nepotes possint. stipendiarii Cæsari stipendia non inviti pendimus. Hic novus Cæsar munera graviora stipendiis exigit, nostræque urbis principes antea discordes, secumque pugnantes nostro sanguine gratiam, & amicitiam à Germano Rege modo ineunt, minime ad inopiam patriæ respiciunt; Triumvirum ingenti largitione tam divites quam inopes exhauriuntur. Si florentissimæ nobis res essent, vix quod pecuniæ petitur expedire possemus; nedum longinquo dissidio, diuturnoque bello fere assumpti. perpetua sub ditione, & imperio esse non recusamus; modo prædæ avarorum hominum subiecti non simus, nostræque fortunæ arbitrio paucorum non diripiantur. His querimoniis nihil imperiosus, & egens dominus donavit. imo argentum paulo acerbius exigebatur. Fremere tamen cives, & graviora de Cæsare obloqui non cessabant. ita timens Henricus, ne ob extortas pecunias quidam rebellionis consilia facerent, sub specie officii utriusque factionis principes secum Romam ducere constituit, centumque nominavit; ut scilicet honorificentior, & splendidior eo comitatu incederet: citati nominatim fuere Matthæus Vicecomes, Galeacius, Lodrisius, Ubertinus Vicecomites: ejusdem præterea sectæ quinque alii Gulielmus Pusterleus, Cresonus, Cribellus, Landolphus, Burrus. Turrianæ familiæ Guido, & filii, Paganus, & frater. Gaudere tunc plebes, quasi civilibus malis defuncta, his abductis, qui antea certaminis, & dissensionis auctores fuerant; *quis enim posthac discordias serere, aut intestina certamina movere audebit? Gratulari Deo in templis humilior turba cæperat, ceu hac via otio urbis consultum fuisset.* Nobiles contra de cætu, & conspectu popularium se subducere, publico abstinere, infrequentes in aula versari. Quæ ubi Henrico nota fuere, continuo ad se vocari patricos jubet. *Pauci accedere, alii imperia detrectare, quidam clandestina consi-*

consilia iniisse, & contra Henricum conjurasse dicebantur. Tunc is anxius, consilia quæ forent nobilium, & quid in urbe ageretur exquirere diligentius cœpit. Multas agnoscebat conjurandi causas; primum quod molestè cives ferrent *tantum pecuniæ extortum fuisse*; deinde quod *Guelphus à Roberto, & Florentinis sollicitaretur*, qui partim videbant, si diutius Germani in nostra Gallia versati fuissent, *opes suas opprimi, & debellari posse*; partim levitate eorum, qui semper novis imperiis studerent. Rumore, & his rationibus Henricus optimum factu ratus Matthæo, & Guidoni qua se ad iter accingerent, diem præscribit. Hoc ubi divulgatum fuit Galeacius Vicecomes, & Francischinus Turrianus in communi discrimine ingeniosi videbant, Henricum, amandatis primoribus, patriam occupaturum, extra Ticinensem portam proxime pontem cretarium in pratis eunt; remotisque arbitris, longiorem sermonem de novandis rebus habuere; quippe à colloquio discedentes dextras taciturni junxere. Hoc circumstantes observare; etenim, nisi de rebellionem tractavissent, desertum in locum non venissent; neque tantopere fidem porrecta manu astrinxissent. Postremo ex gestu, & Francischini verbis deprehensa conjuratio fuit. gestiens hic, & lætitiæ plenus nescio quid enunciavit; unde *consensisse urbis principes adversus Germanos* appareret: quamquam contra Galeacius omnia dissimulare, & silentio tegere, nihil ex vultu, aut ex sermone demonstrare, unde super novo consilio suspectus esset. *Guidonem filio referenti quid secreto cum Galeacio tractasset dixisse ferunt, consilia summa rei cum eo iniisti, qui ex usu rerum plura te novit.* Interim plerique eorum, quos Henricus comites delegerat, Regem adeunt, se paratos dicunt quocumque voluerit ire; neque quicquam, & si longius sit iter, recusare; modo viatica adsint. Indignum profecto esse, suis sumptibus eos tantum via conficere; proinde ut dignus Casare, & urbe comitatus progrediatur, de publico copia prabeantur. Iusta poscere visi sunt: nam five nascentes motus sopire, five magnificentius Rex incedere velit; quando id publicæ salutis, communisque utilitatis intersit, publicitus etiam pecuniæ exhibendæ sunt. Sed quid Rex faceret? inops erat; populum intolerabile tributum exinaniverat. negotium tamen pecuniæ Nicolao, de quo supra diximus, dedit. Hic continuo Decuriones, tum eos omnes, qui urbicis negotiis præerant, in curiam vocari jubet: sententiam Regis de argento his erogando, qui Romam cum eo profecturi essent, exponit. Ad hunc sermonem conticescunt omnes, nihil rogando, hortando, denique minando is proficiebat. tunc clausis foribus, ad Henricum progressus; *elinguës, inquit, & muti sunt qui in concilium venere. se me audies, inedia eos macerabis, tum verò comites via in vinculis tenebis: tibi, mihi crede, illudunt. an ignoras, Galeacium, & Francischinum occulta colloquia inter se habuisse? consilia qua fuerint nemo novit: rebellionis, & infidelitatis signa dederunt. tu pacem urbis, & civium concordiam procuras: redintegratis animis, principem pati nolunt: adversus te conjurant, in cujus manu libertas, & salus sua posita est: te avaritia, atque rapina insimulant, ut obiter tumultus causas faciant.* Henricus magnificè, neque inclementer respondit: *Rumoribus non decere Regem credere, & ita animadvertere in eos, si qui prodicionis, aut conjurationis insimulantur. exploratores nostri vicatim quid loquantur homines observant. hi nunciant, plebem, & infamam turbam adversus nos gravia loqui: & proinde conspirationis suspectos esse; Matthæum vero, & qui cum eo consentiunt contra nos nihil fraudis moliri. exploratus quiddam in tanto facto expectamus. proinde dimitti eos volumus, qui clausi jejuni macerantur; ita brevi utrius sit ambigua; plebis, an patriciorum fides comperiemus.* Mox constricti Decuriones relaxantur. lenitatem, & clementiam Henrici plerique laudaverunt: quippe ignorantes unde constans paulò ante Henricus, tam subito lenis fa-

ctus esset; nam haud ita multo post ficta fabula fuit, *reum mortis igne combustum iri.* In publicam aream extemplo ingens Germanorum multitudo armata concurrat; ita locus, cui Brolio nomen est, valido præsidio munitur. urbanæ cohortes velut subsidariæ in foro stabant. Sic paratis in statione militibus, equitatus imperatorius per urbem discurrere cœpit: vicos, & domos nobilium invisere; si quis palam, aut clam armatos haberet. *Mane acta hac fuisse pridie idus Februarias* quidam scribunt. Matthæus ubi appropinquare Germanos audivit, potentiorumque domos obire, in penitioræ ædium parte Galeacium cum juventute delecta occultat; ipse in vestibulo cum paucis familiaribus, ceu facti ignarus deambulabat; interim sedebat: introgressi equites nihil armorum vident: & si qui cum Matthæo erant inermes esse: utpote qui salutandi gratia venissent. Matthæus quasi omnia placata forent, placido vultu, quid quærant rogat, vinumque afferri jubet. Bene potiti Germani continuo ad Turrianorum ædes pergunt. complures in armis offendunt: illuc enim tamquam ad factionis nidum ii advolaverant, quibus cum Francischinus consilia conjurationis communicaverat: hoc ipso decepti, quòd pridie constitutum diem arma sumpserant. Post meridiem per vicos ad arma clamatur, ingens tumultus excitari, cursitantes quidam per urbem amicos, & vicinos, ut arma adversus Barbaros caperent, concitare: clamitare alii, *Vicecomitem, & Turrianum in gratiam, & fœdera venisse, conjunctosque esse utrosque in excidium Germani Regis: signa consociata pro Turrianorum domibus visa.* voces præterea audiebantur frequentes: *nimum patientem fuisse populum, qui tantam rapinam sustinuerit. summovendos ex urbe Germanos: alii edocti à Guelphis, qui Mediolanum venerant, ut majorem turbam suscitarent, persanctè jurabant, Galeacium Vicecomitem, & Francischinum pro Turrianis domibus armatos sese exosculari; quod scilicet in eadem Germanorum concordessent: quid ergo otiosi sumus? cur Barbaros non aggredimur? Deleatur omnino gens rapax, & infida: quid nos timere debemus, si Principes nostri concordessent?* His vocibus etiam qui mediis stabant sumptis armis, in societatem prodeunt. nobiles quoque nonnulli; & si res mira videbatur, in concordiam Matthæum & Guidonem venisse, qui de vita, & imperio tot annos dimicassent, tamen frequenti acclamatione commoti, Turrianis se applicant. Germani equites in regionem novam, unde & porta nomen habet, agmine facto, contendunt. obstat Turrianus; nam tum beneficio vici, tum multitudine armatorum barbari agminis impetum sustinebat: atque interim urgentes repellere. Henricus laborantibus suis ex turmis, quas paratas habebat, subsidium emittit. pugna acris facta est. complures interfecti. constituti in præsidio equites locum deserunt. Interea hi nobiles qui, ut supra diximus, initio tumultus falsis vocibus moti Turriano se aggregaverant; cum nullum factionis suæ principem viderent; sed Turrianorum satellites, atque clientes dumtaxat arma tractare: *numquid & nos duces, quos sequamur habemus? Cur nemo ex nostris concordiam, & pacem nunciat? Cur pauci, vel plane nulli de nobilitate ad tumultum accedunt?* Ante Turrianas ædes armis res geritur. nisi forte quisque & domum, & viciniam tuam tuetur. talia inter se jactantes à pugna abstinere. Duo fratres Riciardus, & Philippus ex ea familia progeniti, quæ Petrasanctæ nomen habet, arctissima propinquitate Castonum Archiepiscopum, & reliquos fratres contingebant, patrum nobilitate, atque propria virtute nobiles. hi ubi audire, *concordes Guidonem, & Matthæum esse, confestim arreptis armis, nimium crudele, coacta amicorum manu, Germanos adorti ad domos usque Turrianas insequuntur; quo in loco cum neque Viperam, neque ulla insignia nobilitatis viderent, se deceptos clamant: atque obversis equis in regiones suas revertuntur.* vicina

cinia est Braidæ populo frequens, & Turrianis domibus contermina. hi five metuentes, ne Germanus victor præda Turrianorum non contentus in se arma converteret; five quod factionis Turrianæ nimium studiosi forent, universa ad Barbaros debellandos accurrit. ex omnibus denique novæ portæ vicis in pugnam itur. ceteri Gibellini, relicto Turriano, quem per errorem sequebantur, abiere. Decubabat tunc forte Zonfredus Turrianus: is strepitu, & clamore excitatus; quamvis morbo gravaretur, de fenestra quanta voce potuit exclamans: cur, inquit, insani hæc armia tentastis? cur pugnam hujusmodi cietis? an hoc certamine vobis, & mihi: tum propinquis, & patriæ cladem ingruentem non cernitis? nihil talia identidem clamando proficiebat. Occæcaverat seditionis auctores vindictæ, & regnandi cupido. Zonfredus hic minime factiosus erat, odii civilis, & contentionis juxta expertus, his semper adversus, quicumque imperium in urbe quærerent. Ad tumultum, & certamen duo primi accurrere, Joannes Calcia, quem primum urbi Rex præfecerat, & Henricus aulae magister, cum haud magno equitatu. Jam porticum, & aream, quæ pro templo Divi Fidelis patet, pertransiverant. Proximæ erant templo Turrianorum ædes. viso hoste, utrique subsistunt. Tunc hippotoxotæ Germani in oppositum agmen contento arcu irruunt; multi vulnerantur. cives pugnae alioquin inexperti, fluente sanguine, trepidarunt, atque perturbati, ut fagittarum ictus devitarent pone ædem sinistro lateri propinquam refugiant. dextrum latus nudaverant; finitrum paries defendebat, quos inermes Germanus eques conspicatus cursitando confodit. ita faucii in fugam convertuntur. instans tergo hostis magnam peditum occidionem fecit. Franciscus, & Simon conjurationis, & pugnae auctores de periculo, & imminente cæde fuga se subtrahunt. equorum ornamenta, ne fugientes retardarent, recisis vinculis dejiciunt urbe decedentes. in arcem Montorfani jam præ nimio cursu deficientibus equis, se recipiunt. ceteri equites qua tutior, & brevior via ad fugam videbatur, eam evadunt. Redierant in pugnam Riciardus, & Philippus cognatorum precibus victi. hi dum irruentem Barbarum sustinere conantur, salutis suæ parum prospexere. Philippum lethali vulnere transfixum, & semianimem Barbarus expoliavit. Riciardus, occupato in spoliis hoste, de pugna recedens in Guidonis domum abiit: atque occlusis foribus, trepidus, & exanimatus Guidoni in cubiculo decubanti, *abundum*, inquit, est; *succubere tui: fugientium terga premis hostis; restituere non potest: sola fuga servari possumus.* Nec plura locutus infirmum hominem è lecto sustulit. vicinam maceriam transgressi per hortos religiosarum mulierum in interiorum ædium partem penetrant. ibi quoque cum parum tutus esset Guido, transmutatis latebris, ad Jacobum magnæ Virginis tribunal transivit. distabat domus longius; & proinde minus suspecta, & inquisitoribus parum obvia. In tanto rerum turbine, & civium strage Matthæus consilium prudens, & sibi, & suis salutare capit. Domi, ut supra diximus, Galeacium cum magna amicorum manu occultum habebat, mandaveratque ne in publicum, nisi vim, & injuriam repulsurus prodiret, si quam civis aut Barbarus sibi, & viciniæ inferret: ipse per posticum inermis, & cum tenui comitatu in propinquum Tridentini Episcopi hospitium contendit. hic unus secretorum Regis particeps, & ab epistolis magister erat. Ad Henricum, inquit, me deducas, ad cuius imperium vivimus; pro quo vel libens mortem optem. vim, & arma eorum metuo, qui voti, & studii nescii sunt. Quare nisi te deducente, accedere non amsim. ita Episcopo duce, Matthæus inter frequentem Germanorum cohortem, quæ pro ædibus excubabat, ad cubiculum Regis deducitur. Habitus, & facies hominis spem magnam dubiis Germanis de-

A dit; statimque conclamant, *Matthæum fidelem, & Cæsari obsequentissimum esse.* Rex viso Matthæo admodum gavissus; & quid, inquit, ubi Galeacius tuus est, quem affirmavere quidam cum Turriano arma conjunxisse, nobisque pariter infestum esse? de te jam nihil metuo; & in fide, atque obsequio, quamvis titubes, manere certum habeo: suspectum conspirationis vulgi sermo fecit. ego autem vix credidi, te in nos conjurasse, & nova consilia cum his communicasse, qui nos insensissimos ideo habent, quod te exulem, & egenum in patriam restituerim. Sed cur, obsecro, tam sero huc venisti? quid non pugnantium clamor per universam fere urbem sublatus, & discursantium fremitus te movit, atque excitavit? Ad hæc Matthæus. Regum maxime, me tuo præsidio servatum, & tua benignitate honoratum, siquid nunc sum, profiteor. hoc idem sentiunt, & prædicant, qui me sequuntur. à te stamus quacumque imperaveris facturi. quod nisi pro salute tua, & majestate Imperii extrema quæque pericula subirem, grande profecto admitterem nefas; quid si cum adversariis adversus te consensissem? serius ad te, nempe veritus ne peregrini milites per vicos discursantes me, quem non satis norant, pro hoste transfixissent: ita, ut tutus, & securus accederem Sacerdotis hospitium adivi, rogavi, & obsecravi, ut me ad te deduceret. Hic, si quid mentior, coarguere potest. Episcopus, ut Matthæum sublevaret, atque defenderet, illum apud se in initio certaminis fuisse affirmavit. ita moræ causam facile Rex credidit. Interea Galeacius contra patris mandatum arma capit, in publicum cum ea manu, quam secum habebat progressus in vicinitate quoscumque nobilitatis studiosos convocat: ex templo in aream, quæ Piscinæ nomen habet, ingens armatorum turba advolat; tum quod regio opulentior foret; tum quod incolæ aut nobiles essent, aut Gibellinum nomen profiterentur. Accessere de Ticinensi porta ad signa Galeacii plurimi in unum glomerati; quid agerent, & quos sequerentur ambigui erant. levitas, & avaritia Barbarorum invisâ omnibus ne Germanis equitibus adjungerentur faciebat. verebanturque ne tributis non pridem depensi jacturam præda emendarent, atque ita promiscuè cives prædarentur, & occiderent. Dum talia secum tractant, de Ticinensi, & Vercellina regione altera manus ad Viperina signa accurrit, Galeaciumque ducem facit. instructa acie, in locum descendunt, quem ducis curiam appellant. Stabant illic Germanorum cohortes, quo se verterent haud satis certæ, quoscumque in armis aspiciebant extimescentes. frontem aciei Boschinus Mantegatius servabat: quem nuper ab exilio in patriam Henricus restituerat. propius Germanos accessit. Hunc Barbarus cum sermonem nostrum non intelligeret ceu hostem gladio verberabat: atque transfixisset, nisi sublata galea, vultu hilari, & subridenti ore, se amicum significasset. ita cum eo ad Germanorum agmen accessit, quos per interpretem edocuit, Galeacium Vicecomitem Matthæi filium, & ceteros armatos Regis dedititios esse, pro quo vel mortem non inviti obirent. Nos ille patria profugos, inopes, & errabundos domum reduxit. nostra servare, & incolumes ab omni injuria, & detrimento esse, nisi Rege incolumi, & dominante non possumus. tunc læti & alacres hoc sermone fuere Germani. Boschinus deinde ad Galeacium revertitur: eoque internuncio Vicecomiti Germani reconciliantur, dextrasque firmandæ amicitiae, & fidei gratia contingunt: atque è vestigio utrique consociati per vicos prædabundi discursant. Turrianorum amici à Vicecomite se proditos, & quod in conjuratione fidem non servasset clamitabant. illorum domus direptæ; permulti quoque obtruncati sunt. Invenio, tunc primum terra, & perniciofa factionum vocabula Mediolani audita: Gibellini à Vicecomite stabant. hi ut Germanos sanguini, & prædæ alioquin imminentes in adversarios magis incitarent, eos Guelphos dictitabant. Guelphum nomen Cæsari invisissimum ea societas & amicitia red-

debat, quam illa factio cum Roberto Rege fecerat. jam in campum pervenerant, qui de Ponte Veteri nomen habet. agmen anteibant Galeacius, & Episcopus Germanus. hunc quid agendum sit rogat Galeacius. At ille Austriae Dux in Comensi Suburbano haud parvas copias habet; Divi Simpliciani cœnobium tenet: fossa, & muro interclusus distinetur, quominus subsidio nobis esse possit: porta milite nostro firmanda est, ne Guelphus illam occupet. Portæ Cressio Cribellus cum peditatu custos imponitur. hunc fidum rebus suis, & Turriano inimicissimum existimavere propter cædem patris, quem Turrianus juxta torrentem Guazam pugnando interfecerat. Ex eo, quamvis nunc Turrianam domi haberet, ardens tamen in vindictam erat. Galeacius paulo post ad portam contendit, & quingentos equites introduxit. hi de salute ducis admodum solliciti, adolescens incolumis ne esset statim exquirunt. Vix puberem egressus ætatem Henrico Italiam petenti comes datus fuerat. Sequuti sunt adolescentem nutritii: his salutem filii, & vitam mater commendaverat. Ex suburbano paulo ante tumultum ad Regem venerat, à quo discedens pene interemptus fuit. ob-equitantis secus templum Divi Marcellini injectum missile inerme latus hausisset, nisi accurrens nutritius telum subiisset, vulnusque repulisset. ora vestimentorum dumtaxat perstricta fuit, nulla corporis parte fauciata. Trepidavere Germani ob periclitantis Reguli casum; atque confestim alacres in pontem veterem redeunt. Magna profecto fuit nutritii charitas, qui pro salute alumni in apertam mortem incurrerit. Ceterum furens Cribellus ubi fusos Guelphos vidit ad Galeacium, & Theutones voce alta clamitat: *Perdatur penitus in urbe Guelphus*. Excipientes Germani verbum gladios stringunt, ostentantque subinde dicentes, *his vestra res agitur: hi à vi, & injuria adversariorum securos vos facient*. Barbarorum sententiam plerique omnes, atque in primis ductores ordinum probabant. At Galeacius ceteris natu minor cives miseratus, quos perituros crudeliter videbat, ita audientibus cunctis, clara voce inquit, *in locum ubi certatur properemus: ita siquid periculi reliquum est, id totam nostris armis tolletur; simulque eos confirmabimus, quorum fides in ambiguo certamine nutat. prodicionis capita, & eos, qui inimica arma adversus Regem movent puniendos censeo*. Mutavere consilium extemplo armati, & subinde parendum Galeacio ajunt: *utpote qui mitiora, & salubriora moneret*. sic protinus in agmen coacti ad regiones Turrianorum contendunt. cæcos, & cruentos humi jacentes complures offendunt. pars magna à cæde fugiendo substracta erat. Germani, cum deessent cum quibus dimicarent, domos ingressi quoscumque obvios habuere trucidant, alios spoliant; neque solum Turrianorum bona diripiunt; sed etiam eorum, qui procul à studio partium, & à certamine aberant. Lanificio magnas opes Sagazoni quæsierant. horum domos Barbarus irrupit, diripitque. Jure belli omnia sua dictitabat; neque eos servavit Galeacius, quamvis bonos cives, & imbelles esse homines, quibus parcendum foret, inclamaret. Magnitudine prædæ captus Barbarus abduci non poterat, ita crescente in dies damno, domos, & quæ in eis erant, pacto pretio redemere. Sex dies à direptione, & rapina cessatum non est. Guidonis domus succenditur, & qui contigui erant detrimenta acceperere: quamvis medii, & neutro inclinarent. Venerat, ut supra diximus, Mediolanum Paganus Patavinus Episcopus, ut discordias inter cognatos, & certamen ob recentem injuriam obortum componeret, ubi tumultuari captum est, clamore pugnantium attonitus, sacerdotali ornatus amictu, dextra pastoralis lituum gestans ante Zonfredi fratris aedes constitit. à consilio cognatorum uterque semper abfuit, ab omni civili seditione averfi. Aderant quidam Gibellini nominis, ut sua præsentia Sacerdotis, & fratris bona

defenderent: sed nihil venerandus ornatus, lituus, & pastoralis apex juvere: irrumpens in aedes Barbarus equos, vestes, pretiosa, & sacra vasa diripit. Cæterum ut primum ad arma concursum fuit, accitu Cæsaris Castonus, & tres fratres ad illum veniunt. ad hos Cæsar; *& cur armati cives concurrunt? quid iste vult tumultus?* Respondent se insciis rem tantam actam fuisse, & quæ causâ motus excitaverit penitus ignorasse: eos quamquam non invitos apud se Henricus habuit. Interea Matthæus, permissu Cæsaris domum reversus, equum protinus conscendit, atque in eas fertur regiones, ubi tumultus major audiebatur, magisque Barbari desavire nunciabantur: suos hortari, ut in partibus perseverarent, cædibus parcerent, tam cives, quam peregrinos ut à præda, & vindicta abstinerent hortari: forte ad Jacobum accessit, in cujus domum, ut supra diximus, Guido delitescerat; quamquam id ignoraret. Fores famuli pulsant: accurrit Jacobus: servis, & domesticis minime credebat; ne scilicet quisnam in domo lateret, manifestarent. Viso Matthæo, haud parum timuit. anxius ejus vicem erat, qui fidei suæ se commiserat. verum dissimulato metu, placidoque vultu, quidnam, inquit, *Matthæe quæris? domus tua est*. tunc ille: *ut te, & tua servos istuc veni*, protinusque famulos armatos ostendit. tuum, Jacobus, *præsidium*, inquit, *non repudio*. verum illud te rogo quando tuo consilio, tuaque opera furor iste civilis, & tanta civitatis clades finem habere potest, innocentiam servas, iratos hominum animos mitiges, ferri licentiam corripas, Barbarorum arma comprimas. Salubria verba, mansuetum, ac mite Matthæi ingenium erat. Ceterum Barbari dulcedine prædæ à vi, & direptione nihilo minus abstinebant. omnium bona promiscuè diripiebantur, iique spoliati sunt, tam qui in Cæsarem conspiraverant, quam qui pro majestate Imperatoria depugnabant: neque tantum in urbe intestinum malum vagabatur; sed in suburbanis, & urbi propinquis oppidis, atque vicis pro libidine, & avaritia Barbarorum omnia misceri. Permittebatur cuique injurias, & accepta damna aut emendare, aut inimico reponere. Ceterum Henricus Guidonem, & filios, tum circiter viginti, quos novarum rerum, & armorum auctores cognoscebat, conqueri jussit. his diem dixit, qua, datis sponforibus, urbe cederent; finesque terminavit, quos egredi non liceret. Riciardus Petrasancta edicto paruit, & quo imperatum erat, dato sponfore, abiit. Francischinus, & Simoninus contumaces in arce Montorfani cum aliquot suæ factionis se continuere. Guido Alexandriam proficiscitur. In exulum tabulas relati sunt qui imperia detractaverunt, aut nullo spondente, urbe cesserunt. Post hæc exilium publico præconio iis indicitur, qui pro censu descriptas pecunias non solvissent. Interea Venturinus, Bencionus Fori novi Comites, tum alii, qui antea Crema exulaverant, ultro Othorinum Sorelinam Cæsaris Vicarium deligunt; id quod Henricus comprobavit. ita illo Præ-tore aliquot dies Cremenfes pacata omnia habuere. Res perturbavit Fori novi Comites, dum sua vindicare student, quæ ipsis exulantibus erepta fuerant. ita denuo certamen civile excitatur. Venturinus, convocatis amicis, Comitibus occurrit, quos dimicando vicit, atque ejecit. Prætor sine noxa oppido cedens Mediolanum venit, Cremenfium motus, & arma Henrico exponit, rem ad proceres is refert. Statuere, ut duo Mediolanenses Cremam legarentur. delecti Gulielmus Pusterleus, & Cavalchinus Moguntiacus. hos Cremenfes haud inviti excipiunt. Rogavere quidam, ut in magistratum Othorinus rediret, jura, ut coeperat, regio nomine dicturus. Bencionus contradixit, Legatisque respondit, *se non Cæsaris tantum amicitiam colere; sed cujuscumque finitimi amicum esse; at nequaquam se passurum, ut peregrinus quisquam in oppido cum imperio sit*. Factioni suæ hic metuens contumax ideo adversus mandata fuit. eum sæpe

sæpe ad se Cæsar frustra vocavit. ceterum haud ita multo post is Crema pellitur. Per eisdem dies Vitani à Rusconibus, quos pridem domo eiecerant, Como pelluntur. exules Prætor, & peregrinum præsidium in oppidum introduxerant. Studebat Henricus civitatem redintegrare, & concordem facere: quod haud effici poterat nisi domo fugati in patriam redirent. Ceterum Guidonis reditus ad quietem, & pacem perneccarius existimabatur. Philipponus itaque Languscius Simonem Colobianum, Gulielmum Brusatum ad se accersit, mandatque ut Guidonem ubique is sit inveniant, protinusque ad se deducant. Forte Cremonæ inventus est Guido; illuc enim ab Alexandria profectus erat. De reditu longa consultatio dies ferme octo habita. Henrico renunciant, Guidonem ita demum revertentur, si obside idoneo, à vi, & noxa securus, & tutus fuerit: præterea ita fidem Imperatoris exigere, ut Valerianus illius germanus frater seu fidei obses in arce Montorfani à filiis servetur. Majestate Cæsar's res indigna visa fuit; ita Guido in patriam non rediit. Ergo sub Idus Martias Nicolaus urbis Præfectus Zonfredinum, & Zaninum fratres tum Angefosium, & Jacobinum Turrianos, & alios circiter septem de eadem familia accersit. his mandat, ut sponforibus caveant, se illuc ituros quo Cæsar relegaverit. sponfione continuo fidem firmant, viaticaque præparant. præscriptum ut ante solis occasum patria cedant. Postulavere de Cæsar's familia comites, ut indemnes eant. datur à Nicolao unus ex Præfectis prætorianæ cohortis. jam ad portam, quæ Romana appellatur, venerant; Germani milites, qui eos observabant, impetum faciunt, jumenta apprehendunt, sarcinas dissolvunt, cunctaque diripiunt. prætoriani resistere, & repugnare acrius. Turpe erat eos non defendere, qui fidei, & custodiæ suæ traditi fuerant, ut incolumes patria cederent. Barbaros præda stimulat. gladios utrique stringunt, depræliantur acrius: superat Germanus: Turriani amisiss omnibus, alii in prætorias ædes; quidam ad vicinos amicos confugiunt. In hoc rerum motu, civilique pugna Mediolani renovatur ea societas, cui, ut supra diximus, Credentiæ Ambrosii nomen erat. Convenere mille, & ducenti cives mercatores; & si qui alii à studiis factionum procul essent. fustulare signum ex nigro, & albo, in cuius medio aquila viscebatur. Factio hæc Imperatoria appellata fuit: jurejurando adacti, quatenus Imperatoris partes defenderent, atque tuerentur. tum eos accusarent, si qui de Henrico obloquerentur, aut aliquid novi consilii inirent. Præficitur huic ordini Legienfis Episcopus. Matthæo Vicecomiti, Gulielmo Pusterleo, & magnæ parti nobilium ægre hoc fuit. videbant Motæ factionem pridem ad frangendas patriciorum vires initam, hoc nomine instaurati. itaque Imperatorem adeunt; & quo plures discordi in populo Cæsarum defensionem profiteantur, eo quietiorem urbem futuram, novisque consiliis neminem operam daturum; & proinde munitiores Henrici opes futuras. Ita altera societas conflatur; cum hoc tamen, ut nullus de gente Vicecomitum, aut Turriana nomen in eam daret. Signum erexere pannum croceum, in cuius medio passis alis stabat aquila. Constituta in hunc modum duplici factione, iterum jussu Imperatoris Turrianis, gravi indicta poena, ut urbe abeant edicitur: ea loca petiuri, quæ Henricus voluerit. de fuga item per sponsores caveant. quod si fecissent in relegatorum non exulum numero haberentur. Postridie item Matthæus, & Galeacius relegantur. hic Tarvisii; pater vero Astæ: five hoc elevandæ invidiæ gratia fecerit Henricus, ne partem civium fovere, & amplecti, alteram vero aspernari, & deprimere diceretur; five ut his morem gereret, qui adversus Matthæum cum Turriano senserant, parum constat. Urgebat Henricum pecuniæ inopia. principes viri dona deposcebant. ita undique argentum conficiebat. Fœnore agrorum di-

tissima est ea Religio in Longobardis, qui *Humiliatorum* cognomen habet. à præfectis Cœnobiorum nomine mutui argentum petivit. pernegavere Fratres & mutuum, & si quicquam tributi ab eis peteretur: audax responsum indignatus Cæsar continuo egenos, & latrones in possessiones illorum immittit. tecta agrestium prædantur, & subinde everunt. agros vastabant; undique ad prædam concurrebatur. damno, & detrimento affecti, vix pecunia clam data, veniam redemerunt. Dum hæc Mediolani geruntur Macioni vetus, & potens familia cum Episcopo Brixia pelluntur. Sacerdos vix quintum, & vigesimum annum attigerat Bartholino Madio progenitus: *Brixianos, & Bergomenses maxime omnium Longobardorum perniciosos seditionum nominibus commaculatos, & infectos fuisse* scribit Blondus: & quod plerique gentium obtestantur, & execrantur, duo hi populi pertinacissime tenere gloriantur; & ne unquam longo tempore sanari possit hic morbus, filios, & nepotes ad pernicialia studia parentes instituunt. Publica negotia aliter quam sub titulo factionis administrari apud eos nefas est: & quod abominandum omnibus, publica signa, quotiens in prælium prodeunt, factionem indicant. Herbar, arbores, terræ fructus, colores vestium, habitus, incessus hominum, digitorum crepitus, oris hiatus suam propriam partis, quam quisque sectetur, significationem habent. *Interfectos fuisse ab hospite advenas viatores, qui allium, quod natura divisisset, cultello scinderent, seu diversarum partium forent*, hæc Blondus vidit: alius de hac gente duos in sacratissimo, & maxime venerando die mysticum panem cum manducassent, per transversum ova rescindere; cum ceteri, qui in mensa erant in oblongum scinderent: correpti, saltem ea die perniciosos affectus, & odia dissimularent, gestientes respondere, *ab institutis patrum discedendum non esse, & qua domi didicissent, ea pertinacius seu maternos amictus custodienda esse*. Petebant ab Henrico Brixia profugi, ut in Sacerdotium, & patriam restituerentur. Cesserat paucis ante diebus Brixia Matthæus Madius Episcopi patruus, quem Henricus honorificè apud se habebat. ita, juvante patruo, Cæsar præsidium ad Episcopum, & exules reducos decrevit. Deligitur Mediolani juvenis, præficiuntur Comes Sabaudia, & Episcopus Legienfis. Abduam trajiciunt. extemplo his aggregatur magna transabduanorum manus; Olum quæ vadari licebat pedibus transeunt, Urceos primum perveniunt, inde vicum, quæ arcem liberam vocant, invadunt, atque diripiunt: vicina omnia ferro, & igni vastare; Romanum per vim capiunt, oppidanos spoliunt, & quantis maxime possunt detrimentis afficiunt: inde in Cremonensium fines reversi, Soncinum oppugnant, cuncta præter arcem populantur, tecta succendunt. Brussatorum factio Brixia potiti diversæ partis homines partim domo, & aris eiecerant, invinculis alios conclusos habebant, suis, & vicinorum damnis conterriti cum premente Henrico de Imperio, & vita periclitarentur; neque enim ad sua tuenda vires suppetebant; captivos relaxant, atque Imperatori urbem dedunt. Prætor imponitur Marullus Marchio Malaspina. hunc Brusati honorifice suscipiunt. Per ea tempora Mediolanum accitu Cæsar's Reinaldus Concoritius Ravenas Archiepiscopus venerat. Exulante Matthæo, Henricus eos in consilium vocat, quibuscum arcana communicare solitus erat. consultant de iis ad obsequium redigendis, qui imperia detrectassent, ne alii, quibus invisus procures Germani erant, rebelles fierent. Itaque dies octavus à resurrectione Domini constituitur, quo auxilia fociorum, & amicorum in certum locum coirent. Venere Mediolanum sexcenti equites, quos desultorius equus sequebatur. his mandatum ut *seu in procinctu expeditionis instructi, atque armati starent*. ita comparato equitatu, Papiam ad solemne festum Henricus proficiscitur. Sabaudia

Comes custos Mediolani relinquitur. hic instabat vehementer, ut iumenta, & plaustra ad frumenta convehenda quam primum cogerentur: quosdam grandi pecunia mulctavit, qui ad constitutum tempus non venissent, aut negligentius mandata curassent. Interim Austriæ Duces Mediolani, ut sacris diebus populus lætior esset, convivium magnificum apparent, generosæ matronæ, virique nobiles invitati, ut celebratior memoria epuli duraret. Circiter duodeviginti ex familiaribus, & domesticis ad militiæ auspicatius tyrocinium gladio, atque hasta militari donantur. Per eisdem dies Franciscus Garbagnates, & ceteri nobiles apud Regem instare, ut Matthæus, & Galeacius in patriam redirent. In evidenti erat utrumque odio magis ex vetere similitate, tum quorundam invidia, quam quod publicum commodum projicerent, aut conscii conjurationis fuissent: sed, ut in magnis urbibus fere accidere solet, potentes viros tenuioribus invisos fuisse. Hæc ita esse Rex credit, atque confestim exulantes patrem, & filium per litteras ad se vocat. Revocatus ab exilio Matthæus Papiam venit, quem Imperator placido vultu excepit, prandioque dignatus est. Discumbenti Lompoldus Austriæ Dux ferculum obtulit, subinde inclamans, *hoc tibi promotionis magnæ signum Matthæe sit.* Vera sane Regulus ominatus fuit. Peractis sacris, postridie idus Apriles Henricus Mediolanum reversus Matthæum reduxit. Tunc anno difficilis Mediolani erat; propterea quod agricolæ undique comparata frumenta in castra conducere cogebantur; quanquam segetes maturæ messi essent: triticum tamen, zea, & fœnum, quod raro alias acciderat, caro vendebantur. Archiepiscopus Ravennas rebellionis suspectas civitates, ut Henrico se se dederent, magnopere laborabat. tres præcipue vicinæ civitates Laus Pompeja, Cremona, & Brixia, urgentibus factionum principibus obsequium palam abnuebant. Ceterum fugatis domo, & patria Turrianis, Henricus formidolosus universæ Italiæ esse: contra anxii vicem suam ii potissimum erant, qui pridem Germanis Cæsaribus obstitissent. Venere Mediolanum ea tempestate duo Pontificis Legati Archiepiscopus Salernitanus; alter de collegio eorum, qui sacris operanti Pontifici subserviunt, & proinde Capellani dicuntur. Erat apud Henricum Antonius Fissiraga cum de subigendis rebellibus consultaretur: is clam de consilio digressus Laudem contendit, quid rei frumentariæ in urbe foret exquirat, horrea tam publica, quam privata invisit. inopia frugum deterritus; videbat enim brevi fame rebellem populum ad deditionem compelli, consilium defectionis omisit. Regem, quem offenderat, per advocatum, & precatorem lenire, & placare tentavit: ita à Comite Sabaudia per litteras, & nuncios patrociniū adversus iratum Cæsarem deposcit: neque nisi accepta à Comite fide, Mediolanum venire ausus est. Ad iram Cæsaris mitigandam Legatos secum duxit, qui in conspectu Cæsaris humi strati, genibusque nixi, obortis lachrymis, de publico nomine petita venia, claves portarum, velut certissimum deditionis signum, in medium jactant: magis indignatus tunc Cæsar nihil supplicibus respondit. Severus erat aspectus; de vindicta cogitabat. Comes, ut ei patrocineretur, qui in fidem, & tutelam suam se permiserat, Fissiragam exanimem ad Regiam deduxit. hujus soror Comiti nupserat. Clemens mulier, mitique ingenio prædita humi jacentem, & lachrymantem sublevat, ad virum deinde conversa; rogo, inquit, *supplicibus culpam ignosce, certissimumque venia signum in nobilissima corona dabis, ut timenti bene sperare liceat.* Comes in patrociniū perstabat. ita conjugis, & Comitibus precibus Rex non nihil donavit, & conversus ad Antonium inquit, *Longe te ea fallit Longobardorum opinio, qui te ideo in factione principem fortem, & animosum vocant, quia pertinax mandata nostra detrectas: fidem tuam, & an*

dictis mansurus sis experiemur: etiam animos civium tentabimus, si obedienter, te procurante, urbem tradiderint. Hoc si effeceris, non modo salvus eris, sed inter aulicos egregium locum promittimus: sin vero aliter animati cives nobis non paruerint, quas meritis es perfidie pœnas dabis. Ab his vocibus Henricum aulæ, & militiæ præfectum ad se vocat: quæ agi velit exponit. Tum Bassianum Fissiragam Antonii germanum fratrem, & alterum Antonium cognomine de Laqua custodiendos tradidit, donec Laudensis imperiale præsidium portis receperit. Henrico cum equitatu appropinquanti portæ clauduntur. aliquantulum is substitit. armati pro mœnibus dispositi stabant, quæ rebellionis, non deditionis manifesta signa erant. tunc commotus Henricus arborem suspendio deligit, Legatosque subinde, superiore detracta veste, sic allocutus est: *si vel amicus, vel alius hic adest, cujus sermoni populares credant, hic in patria nunciet; vos, atque alterum Antonium, cum ceteros, qui relictī apud Regem sunt, nisi nobis continuo porta patuerint, supplicia gravia passuros atque demum morte ignominiosa affectum iri: agrum præterea, vicos, & castella ferro, & igni statim evastabimus.* Post hæc conversus ad ministros: *Lictor, inquit, laqueum collo injice.* Conterritus Laqua cruento imperio, plurimum tamen constantis, & generosi animi exhibuit; quippe qui prudenter, & libere respondit: *Non hac via urbe poteris. longe is fallitur quicumque putat, nostra nece, nostroque sanguine civitatis portas aperiri. imo vero magis hac fœditate supplicii animos irritabis. obstinatus profecto cen desperata salute pugnabunt, extrema omnia potius sustinebunt, quam deditionem faciant. quos in stationibus armatos conspicias, eos non inhumana crudelitas, aut conspersa nostro cruore arbor; sed lenitas, atque clementia Regis ab armis ad deditionem avertet. Hoc mihi credas velim: quanquam in acerbissimo casu miseris vix credendum sit. in patriam me mittas; quicumque enim alius apud deditionis contumaces verba fecerit, is profecto omnia frustra tentaverit. solus ego sum, qui male animatos, & obstinatos cives placare, tum ad deditionem sine armis redigere possim: utcumque autem cives responderint, ad vos redibo, neque fidem elusero: Regis voluntatem & mandata efficere in primis percipio. Haud ea incredibilia videri. ita jurejurando attritus Antonius in patriam dimittitur: qui simul ac ingressus est hilari vultu obviis bonam spem obtulit, mitigatum Regis animum nuncians. Hoc uno sermone cunctos lætos reddebat, propinquis, & familiaribus eorum, quos velut obfides Henricus tenebat, quam calamitosa fors foret enarrare. jam quisque ad flectendos multitudinis animos pro salute suorum operam pollicebatur. tamen quia efficacior illius oratio videbatur in frequenti concione hujusmodi verba habuit.*

„Quid cladis Guido Turrianus & ceteri novi con-
„filii adversus Henricum populares acceperint, ne-
„minem vestrum latere potest. res aspera nunc, nu-
„per in vicina Metropoli edita est. hi præterea bo-
„nis, & fortunis spoliati, principatu dejecti, pa-
„tria, & finibus pulsi sunt, quibuscum foedus &
„arma conjuncta erant. Temeritas sua, & incon-
„siderata tanti facinoris susceptio illis cladem, &
„excidium attulit. Non vires suas novère, non sa-
„tis voluntates popularium periclitati fuere; eo sci-
„licet dementiores, quod exulibus, & Henrico in-
„tra urbem recepto, non prius exploraverint, qua
„fide cum æmulis, & inimicis reconciliati forent,
„quam conjuratio iniretur, & an occultè quicquam
„fraudis subesset: quod si de potentatu rursus dimi-
„cari oportuisset, utri Rex propensior futurus es-
„set. ita dum properantius, parumque instructi Ger-
„manos adoriuntur Cæsari rebelles, quem fide, &
„obsequio alioquin conciliare debuerant, superbæ
„nunc dementiæ pœnas luunt. Nihilo tamen secius
„vos rebellionem ostenditis haud ita multum cani-
„bus absimiles, qui silvas, & nemora perlustrantes
„ad

ad aprum allatrant, quem propinquum, & irruentem expectare minime sustinent. In tanto fororum discrimine, ne dicam clade, ceu opes adhuc, & vires supersint, ferrum retractatis; nisi forte Turriano prudentiores ii sunt, qui Guidonis viso excidio, veriti scilicet, ne de propinquo arma in se obverterentur nescio an magis de rebellione cogitarent, clam domum refugerunt; quid rei frumentariae, quid armorum in urbe, quæ multitudo arma ferre posset, exquisivere. tunc iis omnibus fere defecti, quæ tolerandæ obsidioni, summovendoque à mœnibus, & finibus hoste idonea sunt, temerarii consilii poenitentes ad Cæsarem nos mittunt; ut videlicet nova consilia diffinulando deditionem faceremus. Infensus Rex nobis vindictam de rebellionem cogitabat: remolliendus, & placandus erat. ita deprecatores paravimus Philippum Sabaudia Comitem, cui per arctissimam affinitatem Rex multa concessurus existimabatur. Reginae soror illi nupta est. causam Philippus suscipit. ad regem deducimur, ut Laudenti ignosceretur oramus: veniam denegat; in deditione spes una reposita erat. Dedititiosaversatus est, supplices, & gementes contempsit, atque eo irritatior sæva, & horrenda minatus est. Perculsi tunc animi: pavor consilium omne de petore excusserat, quid potissimum tentaremus inter minas iratissimi Principis incertum erat. Verum, si hoc fortunæ vestræ, si consilii alicuius fuerit ad Reginam deducimur. Hinc initium bene sperandi. humi stratos, & lachrymarum plenos clemens, & misericors Domina erigit, spem dat, ad virum deduxit. Implacabilis atque truculentus acerbè in primores nostræ urbis invehitur, Antonii Fissiragæ tum fidem, tum inconstantiam vehementius accusans: rursus infimis precibus, & fluentibus lachrymis ad genua provolvimur, veniam petimus. duriorum & magis ferocem in nos Regem invenimus. Quid hic referam Reginae studium, iteratas preces; virum quodam modo arguere visa est, quod tantis lachrymis nihil concederet. Verum ille in proposito acerbior, & duro perseverans tristissima quæque identidem nobis minari, Fissiragæ perduellem postulare: generosissima Domina virum mollire, & mitigare precibus non desisteat. Mitior is aliquanto factus benignius nos sic alloquitur: *fidei pariter, & salutis vestra vos admoneo; si imperata obedienter feceritis, si in fide, & officio manseritis, si quod verbis nunc dicitis re ipsa egeritis, tunc pacem dabimus, magnaque populo non reluctanti pollicemur: contra vero & urbis everisionem, & internecionem gentis promittimus: perfidiam Fissiragæ nobis opprobare non cessabat, illud subinde jactans: Experiar tandem aliquando Antonii deditionem facturum ne sis; ut scilicet urbs, Deum templa, humanaque omnia in Cæsaris jus, & potestatem, ut par est, deveniant. Imperia nostra contumax populus detrectat: poenas profecto fraudis, & perfidia statim dabit: numquid præsentem videtis exercitum, & militem nihil aliud expetentem, nisi ut bona vestra diripiat? Porro quam pertinax, & rationibus tuis Fissiraga inimicus es? Obsequium abnuis? An quæ tibi pro fide, & officio promissimus oblitus es? Fortunas salvas, & honestissimum in aula locum quo tandem animo aestimas? Hæc ceu vilia, ut video, respicis, beneficiaque nostra aspernaris, iram denique, & bellum paci, & amicitia prævertis. Sub hæc Præfecto aulae custodiendi, veluti fidei pignora, tradimur, ut si appropinquanti ad urbem portæ non patuerint sub oculos rebellantis turbæ, ab ea, quæ prima occurrerit arbor, suspendamur: deinde per agrum discurrens hostis vicos, ædificia, rusticorumque tecta diripiat, ferro atque igni omnia evastet, prædas abducatur, nulli rei parcat, quæ dirui, evertique possit, ut vestra clade Cæsaris populi, si qui ad conjurationem forsan inclinarunt, ii discant quid*

A fit Cæsari resistere, illius imperata non facere. Ardet in vindictam hac recentissima provocatus injuria, fidei ruptores impunitos manere non patitur. Inexpiabile est odium, & sanè justum. si funditus subvertere urbem non dabitur, in Legatos devasturus est: quorum fors quam tristis, & acerba sit numquid ignoratis? Barbarus catenatos habet, crudelissima quæque minitendo excruciat, & forsan præsentia supplicia pro gentis feritate intentat. hos pertinacia vestra, & rebellio non Regis indignatio enecabit. quod si atrox Legatorum nex, qui nihil commeriti sunt, non movet, at duo imminet mala, fames, & pestis vos moveant. Fames macerabit obsessos: altera, grassante morbo, fere ad unum interficiet. in strage ruentium, & multitudine funerum fero deditionem facietis. Oratores vestri interea, tum alii non ignobiles cives ob contumaciam, & rebellionem vestram excruciantur, mortem immeritam forti animo sustinebimus, quando fraus aliena, nulla in nobis causa cædis: illud autem longe miramur, unde hoc vel rebellionis, vel contumaciæ consilium, ceu salutare tam repens obortum sit. Heri vacua horrea aspexitis; nihil defendendæ urbi, aut summovendo periculo provisum erat. frumenta, arma pugnae idonea deerant: numquid divino aliquo beneficio repleta horrea fuere? aut unde nova juvenus advenit, novaque soboles succrevit? Unde quæso ad bellum animi tam subito erecti? ego, ne mecum fidei non servatæ agatur, quamvis paratum sit supplicium, ad Regem tamen redibo. par discrimen, atque periculum Legatorum est: malo clementiam externi Regis experiri, quam inter perfidos annumerari, & abeuntem circumspiciatis? Non veniet vobis in mentem supplicii, quod iratus Imperator sumpturus de nobis est? An ignoratis in quæ fata nos projeceritis? Latronum more stragulamur. jam video: placet. vestrâ pertinaciâ, ne dicam perfidiâ peribimus. penes vos omnis culpa. Utinam ante hanc diem mortui essemus! quanquam in acerbissima morte illud nos solabitur, quod ruinam patriæ non spectabimus, non stragem civium, non famem, atque pestem, quæ mala in mortis limine ita ominamur, ut ea Deus Omnipotens à vobis avertat; defectionis, & conjurationis veniam desperatis? ceu iratus dominus leniri non possit. Faceat hic obsecro metus, mansuetum Cæsarem vobis pollicemur, si in illius fidem, & veniam vestra permiseritis. ignoscere novit ubi ex animo venia petitur. Aderit generosissima matrona. ea, si mutatam mentem cognoverit, causam nostram apud lacesitum virum fortiter agget. ita incolumitas, & vita certa est. Foran alter metus vos exagitat, ne peregrinus miles maleficiis, & prædæ assuetus à vi, & rapinis temperare nequeat? Vos incolumes futuros, & ab injuria tutos spondeo. jam edixit Henricus, ut nemini vis fiat, nihil hostile in quemquam miles aggrediatur. hospitum domus tutæ, mulieres & pueri servati ab injuria erunt: victui necessaria exponite; ea miles non rapiet; sed emet: nisi forte inopem, aut egentem Germanum putatis. Mediolanensi auro plenas zonas gerit: pecunia loculos vestros replebitis.

Hæc eo dicente, stupor omnes qui aderant, defixit. tum manantibus lachrymis subjicit: *statuite nunc utrum fædo, & crudeli supplicio corpora nostra dare, patriamque simul perdere velitis; an magis per deditionem nos, & patriam simul servare.* Oratione, & lachrymis victi cives portas extemplo pandunt; Imperiale præsidium recipitur. extorres quoque reducti, quorum plerique ob longinquum exilium vix domos, & agros proprios agnoscebant. Ceterum nova soboles aliena in terra progenita patrum, & avorum bona, quæ numquam vidisset perlustrare gestiebat.

GEORGII MERVLAE, ALEXANDRINI, ANTIQUITATIS VICECOMITVM LIBER VIII.

*Cremona, & Brixia subacta, in Ligures Henricus concessit. Inde Pisas mari delatus
Romam petit: ubi repugnante Roberti factione, non in Petri, sed in Late-
ranorum templo coronatur: mox in Hetruscos reversus moritur.*

REDACTA, five metu, five voluntate in deditionem Laude, Venturinus Bencionus, qui paulo ante jugum detrectaverat, fratrem cum clavibus ad Henricum mittit, qui in jus, & arbitrium Cæsaris Cremam oppidum subjecit. Cremonenses, & Brixiani in rebellionem perseverabant. Cæsarem duæ civitates angabant, quod adeo contumaces jussis contradicerent. Thebaldus Bruffatus beneficio Regis in patriam nuper receptus Brixianos ad defectionem sollicitabat. in utrumque populum Cæsar ducere constituit. Ceterum Regis magna clementia fuit, qui Laude potitus rebellionem populo ignovit; in facti quoque auctores nihil quicquam succensuit. at Valeranus longe à fratrīs mansuetudine, & clementia absuit: diversabatur forte is apud honestum civem minime factiosum. minister in interiorem domus partem penetraverat: aquila appicta parieti inerat, de cujus collo laqueus carbone signatus pendeat. Improbus, ne dicam iniquus famulus, dominum illuc pertrahit, & heus, specta quæso quam malignus, & perfidus sit hospes: vix agnosci crimen, vel agnitum risu absolvi debuit: extra culpam is erat; forte Cremonensis, qui in famulatio legatorum venerat, colum devinxerat; sic enim postea cognitum fuit. in obscurum, & tetrum locum ceu læsæ majestatis reus hospes demittitur, concurrunt propinqui, & amici morum laudatores, & innocentiae testes. nihil testimonia, & laudatio profuerunt quominus absolutionem ceu perpetrati criminis quingentis aureis redimeret. Mediolani interea regionatim milites scripti, & sub vexillis ordinatim concenturiantur. vexilla crux rubra interfecabat, in cujus medio passis alis Aquila inerat, ut sic conjuncto signo juncta majestas Imperatoria, & urbis dignitas ostenderetur. Ceterum Henricus plaustra, & jumenta ad commectatus, atque frumenta comportanda ex urbe, & agris contrahit, atque Matthæum expeditioni præficit, mandatque, ut Abdum versus copias ducat. ipse cum Regina, assumpto Antonio Fissiraga, quem in libera custodia habuerat, ne si ante dimissus foret, rursus populares ad arma concitasset, Laudem petit. Post discessum Imperatoris Germani milites, qui in præsidio relictī Mediolani erant, licentius per urbem vagari, in vicos etiam sæpius prodire, prædas quarumcumque rerum frequentius agere; omnibus promiscue vis inferri. rapiebant, spoliabant, verberabant, maleficia, & rapinas hoc nomine importunissimi Barbari prætexebant, quod Guelphorum, qui Cæsaris hostes forent, bona & fortunas diriperent. Interim tamen leno, aleator, aut ignobilis aliquis fur, ne omnia impunita haberentur, suspendebatur. Ceterum opulentior quispiam vinculis astrictus quasi Guelphus vitam auro redimere cogebatur. oppressis non licebat suam calamitatem conqueri. postulati injuriarum, & rapinæ aut absolvebantur, aut contumaces Prætorem non adibant. quod si quis vel injustè damnatus esset, poena ab eo exi-

Agebatur. ita mulctatitia pecunia plenos loculos Germanus habebat. tunc etiam fartores, caupones, piscatores, & id genus homines, si quid esculenti, aut poculenti venale proposuissent, id eripiebatur. Pretia repetenti, ceu omnia Cæsaris essent, nihil raptor impendere, atque interim gravia minari. duo collegia, quæ ad libertatem populi conflata diximus, magis injuriam fovere, quam vim propulsare, qui sub Imperatoris titulo conveniebant, hi Credentiæ sancti Ambrosii in omnibus adversari. Postremo contumeliosius, si in conventicula coivissent, minari. ita libidini, & avaritiæ Barbarorum omnia patebant, atque impunè cives violari, spoliari, atque interim verberari. Jam centuriati domestici milites, atque urbe digressi Abduæ ripas contigerant, quem in locum plerique etiam Papiensium, Placentinorum, Bergomenium, & eorum fere, qui Imperatori deditionem sponte fecerant, convenerant. accesserant ad Henricum Brixia, & Cremona fugati. Thebaldus Bruffatus factionis princeps, quamvis hostis Cæsaris esset, auxilia misit. Magnitudine exercitus in se comparati, factio, quæ Cremonam tenebat, admodum trepidavit, satiusque existimarunt precibus, & supplicum modo petita venia, & deditione facta iratum Cæsarem lenire, quam pertinaci rebellionem illi obsistere: quanquam aperta esset conjuratio. **C** Nam cum finitimis, quos Cæsaris hostes noverant, in illius contumeliosum excidium societatem, & amicitiam composuerant. Post pulsos atrociter ex Cremona Gibellinos, finibusque fugatos, duæ familiæ nobilitate, & opibus pares potentatum in urbe diversis moribus, diversaque via affectabant. Cavalcaboves, & Amati, uterque Guelphus. Gulielmo Cavalcabovi divitiæ ad quæcumque tentasset suppetebant. hic inopes primum sublevare, alios juvare, criminis, & capitalis noxæ reos defendere, judicia perturbare, in negotiis amicorum diligens, & intentus nihil cuiquam denegare, cujus industriam, & operam sibi aliquando commodam agnovisset. **D** Sic inter suos largiter poterat, quamvis tenuioris turbæ invisus à majorum instituto non discederet, qui cives quacumque vi, atque injuria sibi subicere studebant. Contra vero Supermons (hoc Amato nomen) mansuetiore erat ingenio. nihil cum nobilitas, & opes efferebant, publici commodi à juventute studiosus, quos potentiores opprimebant, eos sublevare; & quamvis una, eademque factio urbi dominaretur, tamen ita cum factioso certabat, ut miseros, & oppressos erigeret, & à vi defenderet. ita multitudini maxime gratus, & parti nobilium non invisus erat. Temperare à maleficiis Cavalcaboves nesciebant; quamvis Amatus constanter resisteret. **E** Pulchrum eis videri per injuriam crescere, atque per vim ceteris plus posse. Amatus in propulsanda injuria popularis erat. Interea lex lata est, qua Gulielmus, & ceteri Cavalcaboves urbem dumtaxat cedere coguntur. ita velut tyrannis exonerata civitate, cum nullus metus ab exule Gibellino esset,

esset, conversis ad rem quærendam cunctorum studiis, Cremonensium opes florere. Ceterum posteaquam Matthæus Vicecomes apud Melcium tædio bellorum civilium procuratori renunciavit, Turrianus in urbem receptus, ut factionis vires firmaret, cum Gulielmo foedera fecit. Cavalcabos externis opibus, & nova societate subnixus legem, de qua supra diximus, abrogavit. foedus inter se Guido, Cavalcaboves, & ceteri Guelphi nominis principes ita ineunt; ut Henrico in Italiam descendenti fortiter resisterent, neque paterentur regia insignia Mediolani accipere; alii Romam petenti occurrerent, atque ita regio, & imperatorio titulo dejectus apud Germania proceres, quasi Caesarum majestatem ludificatus, contemptui, atque despectui maneret. Justam ergo Regis iram in se Cavalcabos agnoscebat. domo præterea profugi, cades majorum, & spolia, nec non etiam graves contumelias ulcisci magnopere cupiebant. hi Regem quotidie ut communes hostes aliquando ulcisceretur instigabant. Ergo conscientia scelerum tactus Gulielmus, desperataque venia, cum ingentes copias in se armatas videret, patria profugit. sequuta est fugientem studio partium ingens popularium turba. At Supermons Amatus, & complures non ignobiles viri, tum etiam plebeji Guelphi nominis propugnatores, qui in pellendis domo, & urbe Gibellinis minus acerbi fuerant, neque adversus Caesarem consilia inivissent, fordibus, & squallore obfiti, Regi adventanti occurrunt. plurimis laqueus è collo pendebat. fluentibus lachrymis urbem vix egressi, humi miserandum in modum procumbunt. flebilis erat vociferatio; vitam sibi donari poscebant. ad Padernum usque (id vico nomen est) hoc habitu progrediuntur. debuit Rex supplicibus, & casum suum miserantibus aliqua in parte veniam dare. inclementior fuit, gemitus, & lachrymas non respexit, humilia verba, & preces audire, aut moestos vultus spectare noluit, veniam exposcentes custodiendos tradidit. ita in duabus arcibus Castellioni, & Paderni conclusi multi miserabiliter periire. Ceterum qui domi manserant nihil clade popularium deterriti, appropinquanti Henrico occurrunt, umbellam, & cetera ornamenta proferentes. quæ omnia Caesar alpernatur, ira accensus, & avidus vindictæ Cremonam cum Mediolanensi milite ingreditur. Exulum ingens numerus erat, quorum major pars in exilio suorum procreata fuerat. Jacobus Radenafcus quærendis opibus intentus prædives factus mercatura erat. hunc Gibellinus Cremonæ, quia divitiis affluebat, principem factionis habuit. Henricus aliquantisper Cremonæ desedit. expectabat ab iis auxilia, qui imperii vectigales erant. exules interea illum orare, atque hortari, ut inultas injurias non fineret: ita Rex ut rebellionis scelus, & clades amicorum suo damno hostes lucrent, privatorum turres, & urbis moenia dirui mandat: nihilo tamen fecius quotidie rei multi fiebant; quasi non bona fide deditionem fecissent, neque sincero animo cum adversariis in gratiam rediissent. Iterum exules exemplo eorum, qui rem Turrianam funditus evertant, ab Henrico petunt, liceret sua recuperare, atque occidione adversariorum ita opes firmare, ut posthac maleficii, & exilii securi forent. Henricus, quia imperii, & majestatis referebat veteres amicos sublevare, atque tueri, plurimum exuli Gibellino permisit; ita nova soboles in reponendis injuriis, faciendisque detrimentis modum servare nescivit. namque tam Italus, quam externus miles cuncta sive discrimine diripiebat; & qui aliquid habuisset, quod rapi posset, is pro Caesaris inimico habebatur. Deinde Henricus aspera pro concione locutus, ducentos ex iis, qui aderant, in compedibus teneri iussit: eorum vero, qui patria cesserant, incensæ domus ad solum diruuntur. Multam centum millia aureorum Cremonensi statuit, portoria, & vectigalia, quæ juris populi fuerant, Imperatorio fisco in perpetuum

A addixit; jus præterea sanguinis, & cædis, etiam per leges faciendæ, sustulit, omnia ademittit, ex quibus urbana jurisdictio continetur. Nimis atrociter in eos sævitum est, qui ad clementiam Caesaris confugerant. namque si impunita non erat relinquenda conjuratio, satis erat de iis supplicium sumere, qui auctores facti fuissent; reliquos servare oportuit, neque civitatem penitus perdere; ut videlicet haberet, unde annuos redditus exigeret, neque ceteros, qui illi in Italia obsistebant, eo desperationis induceret, ut extrema quæque pati mallent, quam ad fidem, & veniam illius confugere. namque horribili sævitia, & immani vindicta perterriti qui sponte domo aufugerant, Brixiam petentes in obstinatissimam rebellionem Brixianos, alioquin male animatos, impulerunt. Recepta Cremona, Brixianorum fines hostiliter invadit. Erant in exercitu cum Henrico Brixiana auxilia, ut supra diximus, his imperatur, ut aut domum abeant, aut in patriam cum ceteris arma inferant. Brixianus ubi ingressum fines Henricum cognovit, pacisci deditionem tentat. Caesar conditiones non accepit, de facienda deditione tunc agi posse dixit, cum peregrinum præsidium recepisset. responsum est, *numquam in civitatem Germanos milites receptum iri.* Marolus Malaspina, quem Henricus Brixia præfecerat, propalam rebellante populo, urbe abiit, cujus discessu perterriti oppidani sunt. Censebant in desperato veniam esse, & iusta in se, seu in hostes, arma inferri licere. Caesari perspectissimum à Brixianis in se odium erat, quos nisi maximis detrimentis, & obsidione subigere nequiret. Vicos igitur, & castella, concessa militi præda, diripit, & evertit. Oppidum *Romanum* nomine, vel, ut alii tradunt, *Rosale* primum adoriuntur, obsident, atque oppugnant. Cecidit in pugna Germanus homo, quem Caesar ob egregiam virtutem militari honore, atque ornamento dignatus fuerat; cujus cæde conterriti qui præsidio erant, noctu ex oppido profugiunt. Postero die oppidani defensoribus destituti deditionem faciunt, atque portis egrediuntur. Pendebant è collis lora, moesti vultus, voces querulæ, cancellatim manus junctæ erant: quo sane habitu veniam, si quid peccassent, mereri potuerunt. Verum immanis Barbarus quoscunque obvios promiscuè trucidat, neque pueris, aut feminis pepercit: nec à cæde destitisset, nisi spes ingentis prædæ oblata fuisset. ita oppidum ingressi omnium rerum prædam, nihil Italo militi impertientes, egere. impuberes, & foeminae ab ira, & immanitate barbarica in stativa Mediolanensium profugientes servati fuerunt. Post hæc Henricus Brixiam versus proficiscitur. adventanti nulli aut privatim, aut publico nomine obviam venere: propius castra admovit: Oppidani vicinorum clade perterriti obsidionem, quantacumque ea foret, sustinere statuerunt. sic continuo muros reficere, propugnacula struere, ea omnia parare, quæ summoveniendo ab oppugnatione hoste usui forent. Accesserant vicinarum urbium Guelphi, qui studio factionis magis quam injuria lacesiti in Henricum conjuraverant: neque se satis tutos domi putabant, prævalente diversâ factione; hi, ut impetum, & arma Germanorum sustinerent hortabantur.

F „Maxime autem populares Brussatus in odium „Henrici concitabat, atque etiam obarmabat, ut „æquo scilicet animo detrimenta ferrent; nam & si „grave, acerbumque sit colonos abduci, vicos diripi, atque incendi, ædificia subverti, denique „quicquid in agris esset corrumpi, atque destrui: „illud multo gravius æstimarent liberos, & conjuges in libidinem Barbarorum dari, domos non spoliarum, sed ad solum everti, patriam muris denudari, denique se ipsos aut in carcere teterrimo mori, turos, aut crudeliter à Barbaris, & à domestico „inimico trucidari; neque duraturum in obsidione „peregrinum Regem posse, cui non admodum ea suppetant

„suppetant in externa terra, quæ alendo exercitui
 „opus sunt. urbem præterea naturali situ, & opere
 „munitissimam esse, & à vi, atque periculo tutam.
 „Non poterant nisi cum magno dolore ferre incen-
 „dia, quæ in omnibus partibus conspiciebant, fu-
 „gam agricolarum, & rusticorum, prædam ingen-
 „tem abduci. tamen hoc se solabantur, quod si à
 „moenibus repulsus hostis, re infecta à Longobar-
 „dis recederet, celeriter amissa se recuperaturos
 „confidebant. Ceterum Henricus pertinacissimam
 „in rebellionem urbem obsidere coepit, cui tam diu-
 „tius assidendum esset, undique milites accersit:
 „pecunias quoque imperat. Primum Episcopos,
 „& ceteros sacerdotes paulo opulentiores, tum Ca-
 „taneos, & Valvafores, & id genus homines, qui
 „stipendiarii, & vectigales Cæsarum essent, ad se
 „vocat, diemque præscripsit Idus Junias, qua in
 „castra venirent. Archiepiscopus continuo paruit.
 „ceteri Sacerdotes avaritiam agnoscebant. ita forti-
 „ter mandata detrectantes contradicunt. non egere
 „subsidiis Regem, pecunias quoque suppetere. Ve-
 „rum ut sub specie novi conscribendi exercitus, re-
 „ligiosos patres, quorum redditus abundantes es-
 „sent, si contumaces forent, sacris ædibus extur-
 „baret, & proinde expoliaret, præterea mille, &
 „ducentos homines urbis præsidio relictos esse,
 „quibus stipendia de publico solvantur; neque inco-
 „lumem existimari patriam, si longius illi abierint.

Hoc sermone Regius Præfectus de pecunia in al-
 liud tempus agi satius existimavit. tum urbanos mi-
 lites ita partitur, ut vicibus, ne incustodita staret
 civitas, ad Regem commearent. Per eadem tem-
 pora Papia ii pelluntur, qui Manfredi Beccariæ par-
 tes defendebant, quo nomine Mediolani trepidat-
 um est: præcipue autem extimere qui favore Hen-
 rici rerum quodammodo potiebantur. Præfectum
 adeunt, contentiosius petunt, ut novi milites in pa-
 tria retineantur. Discrimen, & periculum à novi-
 tate Papiensium imminerebat. Verum tamen ut inco-
 lunitati sociorum consulerent, novum equitem, at-
 que peditem deligunt, quos Novariam mittunt.
 Tumultuabantur Novarienses, civileque bellum in-
 ter se agitabant; atque ex oppido Brussati, & Ca-
 vallacii veteres familiæ oppido pulsi erant. instabat
 Præfectus, ut milites novi ad Regem irent. contra
 Catanei, & Valvafores *numquam in castra se ituros*
 dicere: quod si tantopere novo milite opus esset,
 vicarios ex iis, qui ad custodiam electi erant, pro-
 mittunt. Aegrè assensus Præfectus extemplo man-
 dat, ut expediti vicarii trans Abdum eant. proce-
 debat obsidio. pro muris frequentes pugnae fieri:
 alii capti; complures cæsi: obsidionis, bellicque ma-
 la utrosque urgebant. Thebaldus Brussatus omnia
 circumspicere, & moliri, ne Brixia Henricus poti-
 retur. Mons Brixiae imminet rupe & impedito sal-
 tu alioquin inaccessus, ex quo urbs omnis, & ho-
 stilia pariter castra spectari poterant. hunc Thebal-
 dus cum haud paucis militibus, qui præsidio essent,
 conscendit. Conspicati in cacumine montis adver-
 sarios Barbari, confestim propius ad montem acce-
 dunt; neque radices tantum obsident, sed in juga
 evadunt. prælium committitur. Germanus victor
 superiora tenet. diffugiunt Brixiani quacumque ad
 salutem, & ad fugam via ostendebatur. Thebaldus
 in pugna ictus prostratur. Germani, hoste deje-
 cto, atque fugato, in castra se recipiunt. pauci, ut
 cæsos spoliarent, remanserant. hi inter cadavera
 Thebaldum adhuc spirantem offendunt. se mortuum
 simulabat, ut è manibus hostium elaberetur. hunc
 ad Regem ducunt, quem acerbissimis verbis ita in-
 cessit: *Sceleri, & proditori assæte, servanda fidei ne-
 scius, omnium porro ingratus, nefaria bella adver-
 sus eum concitasti, cujus armis, & favore restitutus in
 patriam eras? quid tibi profuit ad Turrianos confugisse?
 Nunquid illorum ope, & auxilio perditas opes recupera-
 sti? minime sane. Regnabant Brixia Macioni; tu ve-*

A ro exulabas. Hi jussu nostro, te, & sceleris populares
 in civitatem recipientes etiam in regenda republica soci-
 um admiscere; ut tecum scilicet æquo jure viverent. re-
 cens erat beneficium, nuperrime gratia reconciliata. tu
 perfidus, & nefarius homo minime Deum, quem jura-
 veras, veritus quos in pacis, & concordie signum nostro
 in conspectu amplexus, & exosculatus esses, patria, do-
 mibus, & aris ejicis. jam tuo supplicio homines credent,
 ea sancta esse, quæ violasti, neque in populares atrociter
 deservient. Vulnus lethale erat. quare veritus Cæ-
 sar, ne superveniente morte supplicio eriperetur,
 illum diligentissime curari voluit. Deposcebant ad
 crudele, & immane supplicium exules Thebaldum.
 B atrox, atque nefarium facinus illius commemoraba-
 tur, qui in Federicos propinquos, & filiarum conjugio
 sociatos aliquando sævissimus, generum, & ejusdem
 gentis aliquot ad se vocavit; epulas apponit, ex-
 turratos nihil cognationis jura, & sacra mensæ veri-
 tus, in convivio obtruncat. contrucidatur etiam ge-
 ner, qui bene monenti uxori infelix non paruerat.
 discedentem virum mulier perfidiæ, & crudelitatis
 paternæ haud ignara deprecabatur, ne ad lethale
 convivium accederet. Instabant itaque exules, ne
 tot parricidia, proditam fidem, & exilia Henricus
 inulta relinqueret. Octavus jam dies post captum
 C Thebaldum erat. remedia corpus aliquantulum fir-
 maverant. illum Cæsar equo alligari jubet. ita per-
 fidus per exercitum raptatur. in quattuor deinde par-
 tes dissectus est. tum ex adverso urbis perticæ lon-
 giores defixæ sunt, in quarum fastigio caput, pe-
 des, & manus deligantur. Triste sane & luctuo-
 sum suis spectaculum! Eadem etiam hora Brixiani
 quattuor aliquot ante dies capti bobus alligati dila-
 cerantur. Oppidani nece suorum exacerbat, por-
 tis egressi, sine spe salutis, frequenter hostem lace-
 sere, atque ne Thebaldi cædes inulta esset quinquaginta
 cives diversæ partis, quos in vinculis tenebant de
 moenibus suspendunt. Dum hæc ad Brixiam ge-
 runtur Henricus Matthæo Vicecomiti in universum
 D sine provocatione rem procurandam tradit, qui ma-
 gistratu inito per præconem edixit: *ut quicumque per
 atatem arma ferre possent, se ad exercitum sequerentur:*
 poenam quoque iis statuit, si qui præsto non fuisset,
 aut imperia detrectassent; & haud ita multo
 post mercatoribus mandat: *ut certam pecuniam consi-
 ciant.* Verum hi priore tributo exhausti, simul etiam
 quod videbant finem nullum petendæ pecuniæ
 futurum, nisi ex vinculis tribuere quicquam volue-
 re. ad octo millia nummum confecta sunt. Sed
 cum ea summa non sufficeret, ab Turrianorum ami-
 cis duodecim millia nummum exiguntur. ita Mat-
 thæus cum magno equitum, & peditum numero ad
 E Henricum proficiscitur. Brixiani magnitudine co-
 piarum fossa, & vallo circumventi opera, & muni-
 tiones aliquando evertere tentarunt. turres duas li-
 gneas Valeranus Henrici frater ad moenia promo-
 vebat. in eas oppidani erumpentes ignem injiciunt,
 aggeremque subvertere conantur. Germani contra
 ne opera absumerentur obsistere. Oppidani acrius
 instare: & quo difficilius incendia à turribus repel-
 lebantur, eo majore vi hostem premebant. Jam
 fusi Germani, atque à munitionibus fugati erant,
 turres, & castella defensore vacua flagrabant. Va-
 leranus dum fugientes suos sistere, atque incendia
 F avertere studet, sicut erat inermis in confertissimos
 hostes incurrit. sequuta est juvenus Germana, præ-
 liumque restituitur. Oppidani retrocedere cape-
 runt. suos Valeranus, *ut fugientes premerent*, hor-
 tatus, gladium lateri comitis inhaerentem deripit:
 neque prius refugientes insectari destitit quam
 propius moenia compulsi fuere. ibi ceu victor dum
 exultat, & quasi rem magnam fecisset incaute agit,
 forte emissâ ex oppido sagittâ lethale vulnus accepit.
 Germani percussio duce, subsistunt. spatium retro-
 cedendi hosti datur. cecidere in ea pugna permulti
 Theutonici. Valeranus Veronam deferitur, ibique
 paucos

paucos post dies moritur, atque honorifice sepultus est. Per eos dies Legati tres Mediolanum veniunt, quos Pontifex ad Henricum legitimæ coronationis gratia mittebat. inde Brixiam versus pergunt. Henricum præterquam quod longioris stationis tædia, & non servata à Brixiano fides, quem non vulgari beneficio affecerat, in ultionem concitabant, fratris cædes plurimum exacerbavit, propiusque mœnia castra admovit. Muri præalti erant, dispositaque tormenta stabant, defensores aderant: urbem tamen ab omni parte aggressus milites hortari; *ne violatam fidem, majestatem imperatoriam illisam, demum fratris mortem inultam sinerent.* Proditores identidem Brixianos appellabat, cæcos, & in sua damna pertinacēs; utpote quacumque poena non defuncturos: vix etiam si universi obtruncarentur; neque tot hominum cruore fratris manibus parentari posse. Miseratione, & luctu Regis permoti milites à lachrymis non temperabant, identidem & ipsi expectantes pugnam, ut in ulciscenda fratris cæde quæ sua foret alacritas aliquando cognosceret. Mons ab alpibus divisus in vallem, quam Camonicam dicunt, porrigitur, in cujus summo planicies extenditur, vertice urbem supereminet. per hunc commeatus, & frumenta importare licebat. Si Rex priusquam oppidani vallo, & munitionibus circumdeditissent, illum occupasset, quod facile erat, omni commeatu, subsidio, & ceteris rebus, quæ producendæ obsidioni usui sunt, Brixianos interclusisset. Montem itaque aggreditur: vallum, quod ab radicibus ad urbem usque perductum erat, Matthæus Vicecomes, adjunctis Ligusticis sagittariis, qui nuper in castra venerant, subvertere parat: Oppidani contra pro vallo, & fossâ pugnare: nihil reliqui utrique faciebant; propterea quod si Barbarus vallum subvertisset, civitas capta foret. ita prompti in apertam mortem incurrere, & munimenta tutari. Contra instabat Henricus: suos in pugnam urgebat. jam videbat, si monte potitus foret, rebellem populum debellatum esse. Genuenses sagittarii pro vallo stare neminem sinebant. multi cecidere. ita multitudine sagittarum obruti defensores locum, & vallum deferuere. In urbis medio turris erat ingens, ex qua quid hostis moliretur, & faceret prospici poterat. in ea speculator positus perticam linteo præfixam in eam partem jactabat, qua premente hoste sui cederent. ita momento temporis quo mitti subsidia oporteret cognoscebatur. Dato signo, continuo oppidani illuc convolant, unde sagittarum ictibus defensores depulsi erant, jamque ascendentes ab aggere deturbant, alios occidunt. pugna denuo renovatur. utrinque sub vallum plurimi cecidere. Oppugnabant, ex altera parte Albinus, & Canis grandis Scaligeri fratres. habebant domesticum, & voluntarium præsidium. accesserant etiam mercenarii milites. hi latus montis adoriuntur. ascendentes oppidani dejiciunt. Inaccessus alioquin erat locus: ita cum frustra ascensum tentassent, signo receptui dato, in castra revertuntur. Hoc velut successu elati oppidani recedenti hosti plausu, & sublato clamore insultant. Interim in diversa parte, defensore pulso, victor Germanus fossam transgressus vallum interrumpere: res in extremo periculo verti. Insultabat Barbarus: *resistite clamant obsessi. Deestne animus, ac fiducia? quos integros superavimus, numquid eos pugnando fessos, atque saucios non dejiciemus? in hac die fortunarum nostrarum eventus constat; quid reliqui ad conandum videtis? Salus patriæ in manibus, & virtute vestra posita est.* His vocibus confirmati præsidium constituunt, ne redintegrata pugna Scaliger ascensum montis obtineret; tum in agmen coacti ad vallum perveniunt. Jam Mediolanensis ascenderat, atque ex editiore loco repugnantes dejecerat. in hunc velut de improvviso impetum oppidani faciunt, tunc comminus pugnatur, cædes in ipso vallo facta ingens. ex vallo complures dejecti, atque suorum

A strage obruti. cruor è fossâ manabat. Genuenses sagittarii ne major cædes fieret effecere parum: namque tuti ab ictu sagittarum oppidani de vallo descendunt; satis enim ea die se fecisse existimarunt, si hostem prope victorem & à monte, & à vallo deturbassent. In hac pugna Rebella Grimaldus fortissime se gessit, ultimus à certamine discedens clara voce suos increpabat, si terga darent. Mediolanensis quoque in oppugnando vallo virtus spectata fuit. In Matthæum Vicecomitem Brixianus invehebatur; propterea quod non solum Turrianos potentatu, & patria expulisset: sed quod Langusco, & Fissiragæ excidium pararet. Interea Matthæus in periculo fuit. Nellum is quendam cognomine de Massâ familiarem, & militaris negotii non expertum cum mercenario milite in statione collocarat: ut scilicet excubaret, ne incauti aut de improvviso sui opprimerentur. Ceterum Nellus nihil ab obsessis timens securo somno se tradidit. speculatores castra obeuntes, ubi negligentius se habere vigiles, & custodes cognoverunt, cives docent, facile somniculosos hostes opprimi posse. tunc agmine erumpentes in Mediolanensium castra perrumpunt, dormientes opprimunt, inermes occidunt, ignes injiciunt; tenebræ magis quam hostis timori erant: timor major quam periculum; quippe nesciebant quo fugerent, aut quonam in loco hosti se opponerent. saluti fuit rivulus per Mediolanensium castra defluens. hunc transivere quidam: propiusque Matthæi tentoria progressi sentiunt illuc armatos concurrere: nam in trepidatione, & repentino tumultu ad prætorium ducis fere confluere milites solent. ita veriti, ne transitu prohibiti, insurgente hoste, ex adversum, atque a tergo circumvenirentur, injecto in multas partes incendio, in patriam se recipiunt, illud identidem clamitantes, *haud inultam quam intulisset Mediolanensis cladem stetisse.* Obsidente Henrico Brixiam Franciscus Petrarcha scribit, *prodigia multa & in Italia, & apud exterarum gentes spectata fuisse.* In Galliis Sol, & Luna notabiliter defecit. insoliti fideris terribilis facies apparuit. Luna tergemina. facies præterea variæ. circuli cœlo sparsi cum crucis imagine inspecti. In Italia Septentrionis partes deflagrarunt: puro & sereno cœlo sine ullo fulgure horrendum intonuit. in Patavinorum finibus equa *pulum novem pedes habentem* progeniit. in Cisalpina Gallia insuetæ aves devolarunt, quarum cristatum erat caput, pluma cinericio colore sanguineis maculis distinguebatur, quamquam grandiores natu quo tempore secundus Fridericus seditionibus, & impio bello Italiam vastabat, ea specie alites visas dicerent. Per idem etiam tempus intra vestibulum Matthæi Vicecomitis prodigium in admirationem homines convertit. Vir supra usitatam magnitudinem equo, qui excederet naturalem habitum, insidens prima vespera per horæ spatium armatus obambulavit, attonitis prodigio qui aderant raptim ex oculis aufertur: interjecto deinde triduo, eodem habitu, pari mole corporum, eodem in loco, atque tempore horam fere unam duo depugnarunt. Novitate monstri consternati omnes: sed magis ubi similiter uterque evanuit. res vix credibilis, nisi Franciscus testem prodigii Musatum Patavinum afferret. Ergo igitur ne existimatio facti in ancipiti foret, quod alius tradidit, ipse repetit. proinde fides penes curiosum novarum rerum inquisitorem, quæ suo tempore acciderunt, maneat. Ceterum Henricus, ubi munitionibus, longa obsidione, & cædibus ad deditionem compelli Brixia non potest, frumento, commeatu prohibere obsessos in totum studuit: fossam itaque ab monte ad urbem perduxit. tum perpetuas munitiones facit, ne quo loco intrare subsidia possent. ita circumvallata Brixia ab inopia rei frumentariæ plurimum premebatur. proinde Henricus existimabat, fame confectos sine conditionibus deditionem facturos. inedia plurimi deficiebant. fuere qui cum non haberent

rent unde viverent ad hostes profugerent, quos non adeo crudeles existimabant, ut si panem famescienti minus porrigerent, saltem liberam fugam concederent. sed miseris aliter accidit. deprehenso ante urbis portas laqueo enecabantur: neque tamen saevo suorum supplicio esuriens turba, quae defendendae urbi minus idonea erat, contineri intra moenia poterat. minus malum ducebant iram victoris subire, & manibus hominum perire, quam domi, deficiente cibo miserabiliter confici. ita in dies languescens ingens numerus in castra veniebat. demum Rex ipse in esurientes saevire desiit. Venerant ad Henricum, ut supra diximus, duo Cardinales. hi necessitate obsessorum moti pacisci deditioem frustra tentare: quibus discedentibus, Lucas Fliscus intervenit. hunc etiam Clemens in Italiam miserat. adventu Flisci Cardinales in castra redeunt. processerat obsidio sub Octobrem. necessitates omnes pertinacissimè obsessi non solum indigenae Guelphi; sed, ut supra meminimus, externi tolerabant, qui metu Henrici illuc velut ab armis, & vi adversariorum tuti confugerant. hi propositis eorum cladibus, in quos saevitum fuerat, ne per conditiones deditio fieret, suadebant. postremo spe, & alimentis defecti dedendae urbis negotium tribus Cardinalibus dedere. ita ex arbitrio Sacerdotum Brixia Henricus potitur: quanquam continuo urbem non ingressus est. sex dies, valido tamen praesidio imposito, in castris egit: per quod tempus Guelphi fere omnes, quibus invisus Imperator erat, in montana refugere, post quorum fugam muros subruere, & ad solum æquari is iussit; sive ut magnificentius existimaret, complanata fossa, disiectisque moenibus, ingredi; sive quod saepius dum Brixiam obsidet, iactasset, se nunquam per portas intraturum. *Venisse ad Henricum invenio per eos dies Gibertum Corrigiam cum Parmensi auxilio.* secum is tulit coronam, quam, ut supra scripsimus, Parmensis, capta victoria, secundo Friderico eripuerat, eamque Henrico donavit, qui munere, & insigni Caesareo recepto, Giberto Guardastalam ejus curiae, rem praeterea Parmensem procurandam tradidit. Ceterum cum quidam apud Caesarem de Corrigio obloquerentur, clamque cum proditoris insimularent, veritus ne Imperator obtrektoribus obsequens illum in vinculis teneret, clam Caesare Parmam revertitur. Potitus Brixia Henricus sexaginta millia aureorum nummum ad sustinenda belli impendia dependi ab oppidanis voluit: tum sexaginta, & amplius cives delegit, qui se Romam usque officii gratia prosequerentur. his peractis, Cremonam rediit; inde Placentiam petiit. Placentini statim imperata fecere. Praetorem Lambertum Ciprianum urbi imposuit. *ex Placentinis per Appennini partem, qua Cotia alpes dicuntur, Genuam profectum* quidam scribunt. Ego contra invenio *Papiam de Placentinis venisse.* Civili contentione agitantur Papienses. ejecto, ut supra diximus, Manfredo Becharia, Languscu urbe potiebatur. Henricus, quod juri suo conveniret controversias componere, Papiæ paucos dies egit. futurum videbat, ut inter se Manfredus, & Languscu armis decertarent: nisi se disceptatore contentiones compositae forent. Matthæum Vicecomitem, & Manfredum ad se vocat. uterque amicos, & mercenarios milites secum habebat. Papiæ appropinquantibus, multitudine copiarum perterritus Philipponus ingressu urbis prohibuit. veruntamen ne Henrico adversari existimaretur, eos ingredi cum parva manu permisit. triduum commoratus Papiæ Henricus est. venit ad Languscu per id tempus Gibertus, gentiles, & conductitios equites secum ducens. foedus, & amicitiam facere cum Langusco is affectabat. Languscu Giberto filiam nuptum dedit. ita per nuptias publicum, & privatum foedus firmatur. Tunc Henricus studium, & fidem in se Matthæi pulchrè cognovit, laudavitque hominem, quod copiis succin-

A ctus venisset. Ambigua erat Langusci fides: quem infensum sibi ob restitutos in regnum, & patriam Vicecomites, pullosque Turrianos crediderat. milites praeterea amiserat, dum Brixiam obsidet, & oppugnat. ita Langusco facile fuisset Henricum moenibus clausum perdere, aut quicquid libuisset in illum moliri & perpetrare, nisi Matthæi praesidia vicina fuissent. Discedens Papiæ Henricus, ut comiti Sabaudiae morem gereret, Philippum illius ex fratre nepotem titulo dumtaxat tenuis Achajæ Principem, Papiæ, Novariæ, & Vercellis praesse voluit. mox Genuam versus ire pergit. Matthæus Mediolanum reversus, ne Henrico Romam profecturo, B Mediolanensis officium cessaret, duodecim viros deligit, qui illum comitarentur; pecunia deerat. vocati Decuriones, quos sapientes appellabant, trium mensium viatica constituunt. Hoc item tempore sexcentis civibus arma, & equi de publico data sunt. impensis plerique gravabantur. his optio datur, ut centum tertiorum libris equestri militiae dispendia luerent. Mutui nomen habebat hæc summa, quam si quis sponte exposuisset, is ab omni belli onere liber esset, donec ea restituta foret. Triduum solvendae pecuniae praescribitur. Tunc haud pauci conditionem accipientes pecunias repraesentavere. verum quia, ut ille dixit, bellum non ordinata solum, & decreta comedit; sed etiam extraordinaria deposcit: C in urbe vicatim, & extra per dioecesim, atque praefecturas omnes census descriptus est: coactioque ita indicta est, ut pars decima ejus summae, quam census quis fuisset, exhiberetur: cum hoc tamen ut qui centum antea libras dependisset, ei pro rata parte decima detraheretur. sic nova certe, & haud ita multum importuna extorquendi argenti excogitata ratio fuit. Henrico petente interim Genuam, Philippus Achajæ Princeps eas civitates, quibus praerat ad novitatem rerum concitat; quanquam Novarienses in fide Caesaris constanter mansere. Ceterum Guido Comitum Flandriae filius, cujus praecleara fuerant facinora; in eo enim bello, quo Philippus Francorum Rex Belgas gravissimè premebat, is regnum defendit, & patrem à foeda captivitate post cadem procerum liberavit; demum qua potuit conditione pace facta, descendente in Italiam Henricum prosequutus, contracto ad Brixiam morbo, Papiæ moritur. Interdicta sacris erat urbs; & ne sepulturae honore careret, iussu Henrici Derthonam cadaver defertur, ibique magnificè, & religiosè funeratur. Placentini tumultuantes ab Henrico deficiunt. Guelphi opulentiores cum praefecto Gibellinos de urbe expulere; & haud ita multo post Gibellini Albertum Scotum in castro Arquati exulantem vocant; E cujus ope, & armis Guelphos ejiciunt. ita rursus Placentia sub arbitrium Imperatoris rediit. paucos autem post menses Albertus Scotus, fugato Ubertino Lando cum iis omnibus, qui partes illius tuebantur, Dominus Placentiae factus est. In Liguriis intestina certamina ob civiles discordias gravissima fiebant. Grimaldus, Aurei, atque Fliscus Genuam in medium tenebant. Opicinus Spinula exulabat. Hic congregata exulum multitudine, simul etiam Theodori Paleologi generi ope nixus, Ligusticum tractum, qui Padanos Ligures contingit, evastat. vicos, castella, & agros adversariorum diripit, tecta succendit, magnoque detrimento eo F afficit, quorum armis domo ejectus fuerat: neque hi finem damnis, aut pacem ab Opicino, nisi auro dato impetrare valuerunt. verum quia is novarum rerum appetens erat; ut longius à patria cederet inter conditiones explicatum imprimis fuit. Decertabant Spinola, & Aurei de potentatu. Flisci, & fere Liguria Guelphum omne nomen Aureos juvabat. Hi Henrico dum Brixiam obsidet sagittarios etiam miserant: cum ad Appenninum venisset obviam Legati venientes Genuam, & omnem Ligusticum tractum, quatenus sub ditione Genuensis esset, juris,

juris, & potestati Henrici subjiunt. Venerat Derthonam Opicinus. hunc Rex munere antea delinitus benigne excepit. accessit & Bernabas Aureus. ita utroque deducente, tum Gibellinae factionis studio, Henricus Genuam maximo cum apparatu honorificentissime ingreditur. Hiemis sævitia & maris asperitas tres amplius menses eum in Liguribus remorata est. per quod sane tempus uxorem illic amisit: in cuius morte multum jacturæ Rex ipse, & religiosi viri passi sunt. Rei divinæ nobilissima matrona apprime studiosa sacerdotes liberalitate, & munificentia fovebat, egenos, & mendicos datis alimentis sustentabat, aulae proceres, & qui à Rege honores, & dignitates expetebant, juvare, si quos abalienatos, & infensos Cæsaribus agnoscebat, eos bonaspe, aut beneficio, & interim liberali opera viro conciliare: virum Romam petentem sequuta, felix profecto fuisset, si illum imperatoris ornamentis insigniri vidisset. in aede minorum fratrum sepulta est. nomen Margaritæ fuit. Hic illud subijciam haud sane absolum narrationi rerum. Riciardus quidam Marlianus fatidicos libros, ceu à Sibilla editos domi diligenter asservabat, utpote qui à majoribus ad se per manus venissent. in his contineri jactabat, *Henricum, priusquam à Liguria solveret, moriturum.* hic ubi Regem incolumem Pisas delatum cognovit, fortibus iratus, libros combussit. illud subinde dictitans; *ista profecto vaticinia alium posthac non fallent: quanquam, si eventum spectasset, moriente Regina in Liguribus prædictio in totum vana non fuit.* Ceterum ad Henricum Genuæ agentem peregrini milites, & si qui in Italia Gibellini nominis paulo opulentiores erant, partim voluntarii venere: alii mercenarios misere, ut facile eorum desideria, qui in Cœnomanis occubuerant, is supplere posset. Omnibus pro liberali obsequio, atque opera Rex honorificam gratiam retulit: quippe nova hos dignitate, & munere ditavit: illos comitatu, & famulatio regio nobilitavit. Gulielmo Pulterleo insulæ Fulcheriæ, quam nunc Abduæ glaream vocant, Cressoni Cribello Leuci, & viciniæ, quæ emissarium Larii attingit, jura contulit: Ludovico Vicecomiti, quem postea Lodrisium appellavere, Seprium, & jura in præfecturam tradidit. Jam tempus Mediolanensibus Legatis præscriptum abierat. Princeps erat Luchinus Matthæi. Quare ne populus Legatorum impena plus æquo prægravaretur, octo ex eis Imperator à se dimisit; quattuor duntaxat retinuit, qui illum Romam usque prosequerentur. Interea Antonius Fissiraga, data abeundi venia, dum *Laudem* repetit *Vicheriæ*, vel, ut alii scribunt, *Bassignanæ* à filio Manfredi Bechariæ, qui præsidio ea oppida tenebat, captus in vinculis conjicitur. Tunc Philipponus Languscius Sabaudiensem Præfectum docet: Fissiragam inter Laudenses cognatione, & opibus majorum largiter posse; quem eximi è vinculis quocumque modo oporteret. hoc facile factu esse, si Manfredum, qui tunc forte Papiæ erat, in custodia servari jufferit; quippe filius ut patrem liberaret Antonium relaxabit. ita Manfredus in vinculis continetur. Enimvero tunc primores factionis Gibellinae, qui Henricum affectabantur, palam Philippum Cæsari, & Cæsareæ factioni insensum dictitare: quippe qui eos insectaretur, quos studiosos Cæsarem cerneret. Aderat forte Petrus Sabaudia comes. hic ægerrimè ferens, cognatum apud Cæsarem gravius accusari, Franciscum Garbagnatem, qui paulo acerbius in Philippum invehebatur, alapa percussit. Interea à novis consiliis factionis Guelphæ principes vix & ægre quiescebant. nam qui olim inter suos potentes fuerant, ii amissa dominia recuperare, & acceptas injurias ulcisci cupiebant. ita Guelphum omne nomen in Longobardis, Hetruscis, tum etiam in Flaminia adversus opes Henrici conspiravit. Urgebant Gibertus Corrigia Regienfes, Bononienfes Cavalcaboves, postremo ii fere omnes, qui Cre-

mona, & vicinis oppidis per Henricum ejecti fuerant. ita instante Turriano, atque Florentino Robertus compositæ societatis, & conjurationis Princeps, & Dux creatur; ut scilicet Henrico Romam petenti intercederet. Interim novæ conjurationis opibus Gibertus Corrigia, & Gulielmus Cavalcabos adjuti Cremonensium fines invadunt. Vastatione agrorum oppidani permoti deditionem ad tempus, nisi subsidia affuerint, paciscuntur. Galeacius Vicecomes sero venit: ita Cremonâ Cavalcabos potitur. In Gibellinos sævitum fuit. Jacobus Radenascus occiditur. Ceterum Galeacius Cremam profectus, Cremonenses, quos Henricus per arces Cremonæ vicinas custodiendos distribuerat, eos omnes in continenti Mediolanum deduci jubet, qui teterimo in carcere diu macerati misèrabiliter mortem obiere. Enimvero tunc ii magis, quod fortunis, & bonis spoliati fuerant, patriæque ejecti, res novas quotidie moliri non cessabant. ad quietem itaque populorum Henricus Philippum Sabaudiensem ambiguae fidei hominem, qui nova consilia cum hostibus inire ferebatur, præfectura primum privat. tum vero Guarnerio Aspurgensi procuracionem universam in Longobardis mandat, ut penes eum summa publici negotii sine provocatione foret. ita contumaces animos per hominem peregrinum Imperatoriæ majestati subijci posse confidebat. nihil tamen de Matthæi potestate, & jurisdictione diminuit. confirmavit præterea quicquid juris & potestatis antecessores Mediolanensi populo contulissent. Papienses vero rebelles, & imperii hostes pronunciat, ut si quis rebellem civitatem expugnasset, is in eam, & fines imperium perpetuo haberet. Cremæ Simonem Philippi Pistoriensis filium: Laude Henricum Flandriensem sine provocatione præficit. è plebe quibusdam Cataneorum titulum concessit. Ex Genua, eodem jubente, Florentiæ mercatores ejecti sunt, quorum merces, & opes, ceu rebellium, partim prædæ expositæ; partim confiscatæ fuere. Multa ad Florentini populi contumeliam ibidem Cæsar statuit. Interea Guarnerius cum haud magna manu per Martium mensem in Laudem primum venit, ibique denunciat quid juris & auctoritatis sibi Cæsar delegasset. per quod tempus Soncinates, pulso Cæsaris præfecto, oppidum Gulielmo Cavalcabovi dedunt. Præfectus in arcem profugit. arx in oppidi angulo posita manu, & operibus munitissima stabat, ita qui in ea continebantur à vi defensi oppugnantibus fortiter resistebant. Matthæus ut obsessos liberaret, militem Mediolanensem summittit. Guarnerius item Bergomenfes, & Cremenfes, qui Cæsaris beneficio reducti in patriam fuerant, ad se convocat, Soncinumque protinus pergens illud oppugnare aggressus est. Defendebant mœnia Bergamo, & Crema fugati: hos, & oppidanos, ceu in præclarum facinus, si hostem repulissent, hortari, & urgere Gulielmus non desistebat; quippe si oppidum servassent, illos liberos à metu ætatem acturos: se vero Cremonæ perpetuo potiturum. Forte inter oppugnandum speculatores ab arce cohortem peditum ab Cremona venientem prospiciunt. clamatur subsidium adventare. circiter centum, & quinquaginta pedites erant: in quos investus Guarnerius eos extemplo fudit. Germani equites cæde gaudentes multos occidunt. Victor Guarnerius Soncinum revertitur. Cæde Cremonensium Soncinates perterrefacti, tum qui pro vallo, & munitionibus stabant, relictis stationibus, in domos quisque suas diffugiunt. Cavalcabos ubi mœnia deserta defensoribus vidit, portam continuo aperiri jubet: suos in agmen cogit ut ferro per stationes hostium evaderet. Admonitus fuit Guarnerius; eo cum equite Germano properat. jam egrediente præsidio in porta pugnam facit. Cavalcabos in cæde suorum ad Guarnerium supplex accessit: quis hic foret petit: ubi Cavalcabovem intellexit, rebellionis, & novarum rerum

auctorem: illum statim obtruncari jubet. Cecidere in eo certamine Cremonensium permulti: cæde Cavalcabovis, & sævitia Germanorum, qui nemini parcebant, perterrefacti Bergomo exules ad populares suos, qui auxilio Guarnerio venerant, accurrunt, rati eos mitiores inter Barbaros quam si domi fuissent. Hoc idem fecere qui Crema pulsi fuerant. ita miseratione popularitatis complures servantur. Bencionus vivus capitur. hunc supplicem, & ut sui miseresceret rogantem, Nazarius Quinzonus in factione altera potens jugulari voluit. Guarnerius in vindictam pronus ceteros captivos sine discrimine obtruncari mandaverat, & eos in primis, qui subsidio Cavalcabovi venerant. hos etiam precibus popularium donavit. cur enim vita mulctandi minime rebelles? Cæsaris præfectos receperant; neque per malitiam ita domo cesserant, ut bellum Cæsari inferrent: sed factionis nomine fugati, iis se applicaverant, quorum viribus in sua reduci, & patriam recuperare confiderent. ita Guarnerius, sive ut sociis, & amicis gratificaretur; sive quia non admodum injusta arma movissent, culpam ignovit: cum hoc tamen ut in custodia servarentur. Captivi Soncinates supra triginta strangulantur; & haud ita multo post Galeacius Vicecomes cum Mediolanensi equitatu adveniens Cremona, atque Bergomo, adjunctis exulibus, castrum Bassani in finibus Cremonensium adortus, illud per conditiones recipit. Invenio in quibusdam Annalibus, *præquam Henricus Genua solveret, comitem sancti Bonifacii, procurante Imperatore, acceptis centum millibus librarum minuti æris, quicquid ditionis, & gentilitii juris Verona possidebat, id omne Scaligera genti tradidisse.* quod factum Henricus subinde confirmavit. Interea Brixianus fines perpetuis latrociniiis exules infestantes, falem, merces, & cetera, quæ plaustris vehebantur incipiunt, prædamque inter se dividunt. jacturam haud parvam Mediolanensis, & Bergomenis; horum enim ferme merces erant, accepere. Ceterum Guarnerius Laudem Pompejam versus venit: Matthæum Vicecomitem, & ceteros urbium principes veluti in concilium advocat: dolis, & insidiis se fatigari videbat: nam qui obsequium præstiterant, partim imperia recusabant; mutare fidem alii, & proinde omnes defectionis suspecti erant; postremo injuriæ, & maleficia popularium complures ad nova consilia irritabant. Guarnerio perexiguæ erant copiæ. peregrinus miles locorum, & sermonis juxta nescius: ad hæc ferox pluribus insensus erat. Ducem igitur indigenam omnes expetebant, qui consilio, & clementia hos in fide, & officio contineret, illos ad servitium traduceret pro ingenio, & factionis commodo. Sententiæ dictæ sunt; omnium tamen una vox fuit, *neminem Matthæo Vicecomiti antefereendum esse*: sive nobilitatem hominis, prudentiam, & populorum studia spectaveris: sive quod amicitias Cæsaris semper bona fide is coluerit, à quibus numquam desciverit; quippe qui & ex illorum auctoritate, atque opinione rem Mediolanensem procuraverit. ita Matthæus publico consensu Guarnerio socius datur. Post hæc Laudem ingressi, vocato in concionem populo, è primoribus partim Soncinum custodiendos mittunt, quorum unus Zanonus Trafonus fuit: relegantur alii. ejecti etiam Mediolano quidam fuere; & haud ita multo post Henricus Galeacium Vicecomitem Placentinis præficit. Matthæus, comparato novo exercitu, Papiensi bellum infert, quorum fines, temporario ponte super Ticinum fabricato, ab omni parte populatur. Profectus est primum illuc Galeacius cum mercenario milite: deinde Actius Malaspina prætor subsequitur. ducebat hic urbanos milites. haud procul Abiate Papia profugi cum eis conjunguntur, trajectoque amne, Laumellum primo impetu capiunt. Langusci comites quos possunt milites primum populares contrahunt, & peregrinos accerfunt. Ve-

nere Alexandrini, & Astenfes auxilarii; Laumellum protinus circumveniunt, frustra que dies decem oppugnant. tandem soluta obsidione, abeunt. Ceterum Galeacius inter utrumque fluvium late effusus cuncta deprædatur. Tunc diversæ factionis Principes iterum in foedus, & societatem coeunt. aggregatur eis Regius Præfectus, cui Alexandrini parebant. Gibertus Corrigia cum Parmensi, & Turriani, si qui nondum finibus cesserant, opibus amicorum sustentati conveniunt. Astenfis, Cremonensis, & Vercellensis ab exulibus laceffiti in societatem trahuntur. Henricus cum adhuc in Liguribus ageret Veronam Albonio, & Cani Scaligeris fratribus, Tarvisium Riciardo Caminati, Mutinam Francisco à Mirandula gubernandas ita demum tradidit, ut procuratio illorum dumtaxat foret, dominium penes se maneret. Derthonenses, & Astenfes, ejectis Gibellinis, Roberto Regi se subjiciunt. Parere imperatori Guelpha factio in Longobardis nesciebat; & proinde ad Robertum respiciens nova consilia adversus illum agitabat. Robertus, qui in fidem, & ditionem suam se permiserant, eos adversus Henricum excitabat. urebant illum Henrici successus, quo bene rem in Italia gerente, Pontificis factio neque tuta, neque salva esse poterat. Papienses exulum injuriis, & armis laceffiti fatigabant. hi in protectionem Roberti confugiunt, atque palam bellum adversus Henrici socios, & amicos parant, quorum consilia, & arma Guarnerius ut oppugnaret, & frangeret, iterum copiis contractis, Papiam aggreditur. Tunc in Taurinos Philippus ire pergit, hoc discessus suspicionem nomine elevans, quod sibi uxor ducenda esset: quæ nuptiæ ut celebriores fierent duodecim de primoribus Papiæ, & totidem Vercellensium ut se officii gratia prosequerentur postulavit. Riciardinus Philipponi præ ceteris abeuntem Taurinum usque comitatur. Simulatæ erant nuptiæ, ut videlicet argentum extorqueret. namque nobiles viri ut Taurinum pervenire continuo in vincula conjiciuntur, quos non prius se dimissurum is dixit, quam stipendium præfecturæ solverent: ita duorum populorum primores per fraudem diutius asservati fuere. Interim milites Mediolani conscribebantur. hi ducente Galeacio, Ticinum denuo trajiciunt. Carlasum oppidum invadunt, & obsident. Theodorus Marchio Montisferrati, & item Philippus, ut erat ingenio mobili, cum Galeacio sociatur. oppidum oppugnant. è Papia supra triginta expediti pedites, cum in occasu sol esset, venire; rati beneficio tenebrarum vigiles fallere propius oppidum penetrant: sed, ut fere evenit, deprehensi ad unum suspenduntur; quo supplicio oppidani deterriti extemplo se, & sua Galeacio dedunt. *Pactam pecuniam, & spe præmii majoris proditum oppidum quidam tradunt.* Posthæc Guarnerius in Vercellenses ducere statuit. Vercellas Collobianus favore, & opibus Advocatorum obtinebat. hanc gentem dominatu urbis evertere; quippe Cæsaris adversantem Guarnerius parabat. Igitur propius urbem cum copiis secreto festinat; verum imparatos minime offendit. Noverant Advocati ad se versus exercitum pergere. ita cum expeditos, & instructos milites, atque amicos in armis haberent, irruentem hostem fortiter sustinent. dimicatum in urbe est. Interim Guarnerius Philippum prodicionis suspectum stricto ense impetit, qui nisi constanti animo vim illatam repulisset, obtruncatus profecto foret. Intercedentes famuli partim cæsi, vulnerati alii fuerunt. Philippus in evidenti discrimine ad Simonem Collobianum transiit: cui fugæ causam quarenti respondit: *ut fugerem iratus Guarnerius fecit. in me enim gladios armatus intentavit: quod nisi domesticorum ope defensum forem, crudelem in modum occubissem.* Collobianus ut bona in spe esset, neque minas, aut vim Barbari extimesceret apud se inquit: *nihilò tamen secius Guarnerius Vercellenses urgebat.* Ticionis de potentatu

tentatu cum Advocatis certantes enixissime Guarnerius juvabat. ita aliquot dies in urbe ipsa inter cives certatum fuit. Gravis erat Mediolanensi militi mora: præ inopia haud pauci dilabebantur. Matthæus Vicecomes, cognito suorum discessu; impendia enim militiæ prægravabant, ad Guarnerium, & Prætorem ut exercitum domum reducant scribit. Vix Guarnerius Mediolanum redierat, cum Ticiones externo præsidio destituti domo, & patria cesserunt. per quod tempus Germani equites, qui Guarnerii, atque Vicecomitis stipendia merebant, natura ad prædā proni nulli parcebant: modo aliquid rapere possent: senes pariter, & pueros occidebant. ad hæc sacerdotibus vim inferre, templa violare, superbe, crudeliter, atque etiam libidinosè in urbibus, atque vicis cuncta agere. In Laudenfes præcipue gens ea defæviit, in quorum liberos, & uxores contumeliæ edebantur. illatas injurias ulcisci Guarnerius non curabat. ita libidini, & avaritiæ Barbarorum in Longobardis nihil exceptum erat. Inter hæc Franciscus Turrianus oppidum Montorfani adhuc cum præsidio tenens, cum in adversariorum potestatem omnia venissent, illud Novocomensi Episcopo tradit: apud quem aliquot dies commoratus, inde Cremonam petiit; ubi Guidonem patrem graviter ægotantem offendit. quo mortuo, atque honorifice funerato Florentiam profectus inde ad Robertum Regem accessit. Uterque Rex, & Florentinus nimiopere Turrianas reliquias, & gentis factionem fovebant. revertentem in Longobardos Franciscum latrones in via spoliavere; quamvis ut à latrocinantium injuriis tutus foret, in comitatum pontificalis nuncii se dedisset: sarcinulis direptis, prædaque divisa Comes Panagi, qui insidias fecerat cum uxore, & liberis Mediolanum se recepit; moxque accepto stipendio cohorti præficitur. Jam in Hetruscos Henricus navibus applicuerat, cum Astenses urbem Ugoni Bancio Procuratori regio solemniter dedunt, atque in Roberti potestatem vectigalia, & portoria publica subjiciunt. Castellanos Gibellinæ illic factionis principes à domo, & patria profugos Philippus Sabaudia comes exceperat, opeque implorantibus suggerebat. ita veriti Solarienses, ne viribus externis Gibellini adjuti domum reducerentur, ad fidem, & opes Roberti confugerent: sub cujus tutelam, atque præsidium universi in Italia Guelphi se permiserant. In conditionibus de vicinorum defensione discretè additum fuit: ut scilicet iis omnibus Rex bellum inferret, qui Guelphos aut armis lacefferent, aut domo fugassent. hinc multi animos ad novam fortunam erexere; quippe regio favore freti popularibus redire in gratiam magnis conditionibus oblati recusarunt. Papienses, hortatu Langusci, ne exules, qui, comparato ab amicis subsidio, propius patriam omnia populabantur, aliquando à popularibus in urbem reciperentur, Ugoni Baucio patriam dedunt, & velut dedititii vectigalia, & portoria publica; tum arbitrium administrandæ reipub. illi permittunt: videlicet ut eos amicos, & inimicos haberent, quos Rex jussisset. cum hoc tamen ne adversus Romanum Pontificem, aut eos, si qui partes illius sequerentur, arma inferret, & urbani milites plus triginta millia passuum ab urbe in expeditionem abducerentur, neque ultra viginti dies impensis gentilium mererent. Philippono Langusco primus locus datur inter eos, ut is publici consilii princeps foret. Magisteria urbana in speciem libertatis pauca populo relicta sunt. Notarii, & annonæ præfecti, & curatores viarum suffragiis civium, aut sorte deligebantur. Monopolium salis penes Regem fuit: cui item quotannis pro censu in urbe, & finibus descripto pecuniæ viritum penderentur. summa pensio in capita sex soldi fuere: media quattuor: qui vero minimum census fuisset, foldos duos is dabat. De reficiendis Ticini pontibus, instauratione fori, & prætorii in primis

A mentio facta est. Sex plebeji, totidem ordinis militaris negotio urbano ita præficiuntur, ut Langusci, aut unus filiorum constituti collegii principes essent. magistratus dumtaxat bimestris statuitur. De Alexandrinis in conditionibus honorifice actum fuit. juris & ditionis Roberti tunc Alexandria. De Philippono Langusco, & Guelphis defendendis à Rege in primis multa præscripta fuere. Exulabant ea tempestate Papiæ duæ veteres familiæ Becharia, & Curtii. hos ceu perduelles in exilio perpetuo manere jusserunt, ut numquam in amicitiam, & tutelam Regis venirent, aut super eis, gratiave cum plebe reconcilianda sine consensu Langusci, & majoris partis eorum, qui rempub. curarent, potestas ulla foret. Duo ante omnia nominatim explicata sunt: primum ut à vi, & armis novi Cæsaris Papiensis populus defenderetur. alterum de relaxandis civibus, & Ricardino Philipponi filio; quos ut supra diximus, per causam nuptiarum Sabaudienfis abduxerat; neque nisi accepto præfecturæ stipendio, relaxare statuerat. Intererat regiæ auctoritatis, & Guelphi status eos captivos liberari: tum vero ita rem transigi, ut deinde neque stipendii nomine, aut alia quavis de causa à Papiensi Philippus quicquam ceu debitum repeteret. Conditiones à procuratore acceptas ut ratas, perpetuas populus speraret, Rex per litteras Neapoli missas, affixo aureo sigillo confirmavit. Quattuor tunc urbibus Robertus Ugonem Baucium multis titulis honoratum Prætorem imposuerat: ut simul jus diceret, arma tractaret, pacem cum quibus vellet nomine Regio faceret. Ceterum Henricus & si probe norat quos homines Robertus foveret, atque defenderet, illum tamen ad se invitat; quod si Genuam venire recuset, saltem Romæ futuræ coronationi interesset. Magnificentior, atque illustrior ea fore Regis præsentia videbatur. Robertus cur interesse non posset multa causatus Joannem fratrem cum equitatu subinde misit. hic simul urbem ingressus est, multa largiri, atque majora pollicendo primores populi ad se trahere tentavit. Gens Ursina armis, & viris opulentior statim illi adhæsit. Columnenses contra vetus, & potens familia amicitiam, & societatem cum Rege abnuere; quamvis magnis pollicitationibus onerarentur, à Cæsaris olim ea steterat. hos aggreditur, ut quos conditionibus conciliare non poterat, eos vi, & armis cogeret. Henricus nuncios ad Robertum mittit, qui cum eo fraudem, & dolos expostularent: quod sub specie officii Romanos proceres in conjurationem adversus se, & civilia arma concitaret; idque moliretur ne in augustissimo Petri templo coronaretur. Mirabitur hic aliquis forsā, cur Henricus Robertum Gibellino nomini infestum sibi amicum sperare posset; hoc faciebat Clemens Pontifex, qui per nuptias foedus, & amicitiam componi inter Reges curabat: ita Pontificis persuasum Petrum Friderici Siciliae Regis filium per oratores filiam in matrimonium petentem repudiaverat: igitur pro indignissimo habebat Cæsar adversus se illum conjurasse, cujus fratrem alteri prætulisset. Præmiserat Henricus, ut Longobardos partim ad deditionem redigeret, partim discordes componeret, Romam Ludovicum Sabaudiensem. hunc populus haud invitatus respectu Cæsaris excepit, eique protinus Præfecturam urbis, quam Senatoriam vocant, demandavit. qui haud ita multo post, constituto Vicario, ad Henricum tunc Brixiam obsidentem rediit. Interim in urbe odia, & inimicitia gliscebant: certamina majora oboriebantur. ita Columnenses adversariorum armis fatigati per nuncios Henricum rogant, ut rursus cum præsidio Ludovicus eat, qui captos tumultus opinione Cæsaris comprimat: ratus Henricus ideo magistratum contemni quod apparitorum, atque Statuorum numerus exiguus foret, quinquaginta dumtaxat Germanos equites, qui Ludovico apparerent, Romam misit. Ceterum is urbem ingressus majorem

1312.

rem tumultum offendit, quam qui reverentia Cæsaris, & jussu magistratus sedari posset: arma undique movebantur. belli consilia alii agitare, & palam dicere, *Henrico resistendum, ne urbem introeat*. Corrupti præterea erant quos abiens juridicundo præfecerat: ita capitolio excluditur. Dum hæc Romæ geruntur Henricus Genuensium navibus Pisas defertur, ubi duos amplius menses commoratus est. Disposuerant in Appennino Florentini præsidia, ut discedentem è Longobardis Henricum transitu prohiberent. Tunc cognito quod Henricus mari Pisas devectus esset, continuo suas, & suorum copias in Lunenses reducant. Ceterum Henricus Hetruscos, qui aditus obstruxerant, paratos quacumque is incederet illi occurrere, integros à vi, & maleficio esse voluit. Marchiones dumtaxat Malaspinæ Miniatensium, & Lucensium fines populabantur. Nulla memorabilis pugna edita, nullus opulentior vicus, nulla castella expugnata, aut in deditionem per conditiones recepta. major in dies Pisis fama de conjuratione Romæ facta crescebat. Validius Roberti præsidium erat, quo subnixus Urfinus adversus æmulos gravior insurgebat. qua re comperta, Stephanus à Columna, maturato itinere, Romam proficiscitur. Existimabat hic sua præsentia, & Regis opinione surgentes tumultus sedari posse. Inter hæc ex eorum numero, quos arcanorum participes Henricus habebat, ad Clementem quidam legantur, qui pacem, & foedera per nuptias nutu Pontificis cum Roberto paciscerentur. Duo item Episcopi Romam missi, qui Henricum adventare dicerent, gratiasque Joanni agerent, quod officii gratia cum magno comitatu venisset: quem etiam rogarent, ut à maleficiis, & injuriis in Columnenses desisteret: quod si in gratiam redire inter se cives nollent, saltem ab domestico certamine tantisper cessarent; donec legitima coronatio conficeretur: quando non magis in hanc, quam in illam factionem Cæsar inclinet: id quod liquido perspicui ex iis posset, quæ alibi fecisset; quippe qui in eos tantummodo desævii, qui rebelles palam obsequium abnuissent: pacem vero cum Roberto bona fide paciscerentur, cujus amicitiam tanti fecerit, ut fratrem in conjugio filiae alteri prætulit; etiam ex illius voluntate hosti veniam daturus sit. Jam Italorum militum ingens turba, partim pro studio in factionem Cæsaris voluntarii; alii accepto ab his stipendio, qui ab injuria nisi Henrici favore tuti esse non poterant, accesserant. ita cum satis præsidii comparasset, Pisis digrediens, celeri, & nunquam intermisso itinere sub Kalendas Majas Viterbium pervenit, quam urbem, pulsus diversæ partis oppidanis, ingressus est. motus civiles pridem oborti, tunc maxime aucti. Urbeveterani, appropinquante Henrico, in mutua arma proruunt. imperatoria factio in pugna succubuit, & priusquam præsidia adessent, urbe pulsi sunt. Ita adventus Henrici amicos spe sublevabat; alios contra metu sollicitos, & anxios rerum suarum faciebat. ita, dum saluti suæ quisque prospicit, adversariorum vero opes affligere conatur, tetra certamina excitabantur. Scribit Ventura, *occulte per oram Hetrusci maris cum paucis equitibus Henricum Pisis decedentem noctu iter egisse, biduumque in vicis, & castellis Comitum Floræ commoratum, donec Comites, & sociorum copia applicuere*. Potuissent Guelphorum duces tum locorum angustiis, tum commoditate fluviorum facile Henricum intercludere, transituque prohibere, belloque laceßere, & aliquandiu remorari. Ergo cum nullæ inimicorum copiarum obviæ essent, per incustoditos aditus Romam venit. quam tumultuantem domesticis armis, & peregrino milite se conficientem offendit; nam, ut supra diximus, Joannes Roberti accessiones odii, & injuriarum fecerat. Conveniebant quotidie magnæ copiarum; namque Florentini, ne factioni deessent, quingentos equites; pedites vero mille egregie ornatos, & instructos summissere. Lucensium præ-

A terea, & Senensium, tum ceterorum ejusdem partis, quantum opes suppetebant, auxilia acceperant. Romanus populus pro studio partium partim Roberto Regi studebant; alii adventum Henrici propugnabant. principes factionum erant Columnenses, & Urfini. ita uterque colles, regiones, & domos occupaverat, atque muniverat; unde adversus vim, & arma utriusque se tueri valeret. nam Joannes Roberti, atque Urfinus, & ejusdem factionis populares Capitolio vicina, Janiculum, Molem Adriani, quam posteriores arcem sancti Angeli appellaverunt, Vaticanum præterea, & quæ trans Tyberim sunt cum ingenti manu tenebant; Henrico scilicet intercessuri, ne urbem ingrederetur. Contra vero Columnenses, & imperatorio nomini addicti Aventinum, Celium, Quirinalem, Exquilias præterea, cum Viminali, & Suburra habebant. Tres fere totos menses Urfinus, & Columnensis domi, adjuncto externo præsidio, inter se atrocissime decertant. Roberti factio contendebat, ne in æde Divi Petri, quæ in Vaticano sita est, rite coronaretur: altera factio nihil non contra moliebatur. Adversariorum munimenta perumpere, turres vetustis ædificiis impositas disturbare, præsidia dejicere, viarum angustias aperire, ut novo Cæsari ad augustissimum templum aditus pateret. ita Romæ perpetua bella, & cædes fieri. Pugna acris juxta pontem facta fuit, & in ea potissimum urbis parte, quam Saracenorum munimenta appellant. Firmaverant interim præsidio locum Urfini, & pro ripa stantes hostem telis laceßere, atque transitu arcere. Tunc indignum existimans Henricus, præter Pontificis voluntatem sibi repugnari, in campum prodiit acie conflicturus: Cardinales intercessere, ne Germani equites in hostem inveherentur. Romani pro Cæsare in aciem progressi, refugientibus adversariis, Capitolium invadunt. Campum Floræ occupant; inde ad Adriani molem perveniunt. Erupere de munitionibus Urfini; manus conferunt: prælium atrox factum est. occubuere in ea pugna Legiensis Episcopus, & Petrus Sabaudienfis, qui per affinitatem fratris Henricum sequutus fuerat. Missi in Gallias oratores Clementem edocent, quantum odii, & certaminis in Romano populo vigeret: tum etiam quæ cædes, flagrantibus in ultionem animis, passim ederentur. Pertinacissima erant utriusque gentis studia: recusabant alteri Imperatorem; propterea quod in manu, & potestate sua templum erat: alter, ut diximus, omnia moliebatur, ut legitima ornamenta essent. Ceterum Clemens, ut tot malis, & domesticis cladibus finem imponeret, mandat, *ut in Lateranensi templo sollemnis coronatio fieret; neque ideo existimaret quisquam de amplitudine Cæsarei nominis quicquam diminutum iri; quando illius jussu id fieret, quem penes novitium hoc jus situm esset*. Ita Kalendis Sextilibus Petri vinculorum celebri die in æde Lateranorum Henricus insignia imperii accepit, sollemnemque titulum sortitus *Romanorum Imperator*, & semper *Augustus* nuncupatur. Exegere ab eo iterum jusjurandum Cardinales, ut Pontificum jus, & potestatem tueretur, & defenderet adversus eos, qui Romanum Sacerdotium armis laceßerent: neque Sacerdotum jurisdictionem ullo tempore violari pateretur. Ceterum in formula jurisjurandi altius multa repetuntur, quæ nunc referre supersedeo, utpote commentitia, ne dicam fatua, & ridicula. Illud autem miror, cur Blondus ambigat, Villanum an Ptolomæum sequi debeat, qua via Henricus Romam profectus; quæ populi discordia, & quæ certamina fuerint: tum quid moræ Henricus in urbe fecerit. hæc omnia parum expedite narrat. exactam præterea, interposito sacramento, fidem: imperatum in civili dissensione tributum, quæ etiam vix vera existimo: nam si divisus in contraria studia armis Romanus decertabat, debuit potius liberalitate, & munificentia pars diversa conciliari, quam odio servo-

servitutis vinculo onera imponendo magis abalienari. Repugnat & illud, *ad ludos, & epulum eos convnisse, qui Casari maxime infesti fuissent, obsitissentque, ne in Petri templo solemniter exciperetur.* Postremo super civili certamine, peregrinoque præsidio haud satis idem scriptor sibi constat. nos gentis nostræ Annales, quamvis circumcisos, & admodum breves; tum etiam civitatum Acta, & privatas Annotationes legimus, & eorum præcipue, quorum intererat Henricum rerum potiri; quique illum Romam sequuti fuerant. hi ceu in ephemeridem quæcumque accidebant memoriæ prodiderunt. Ceterum Henricus, titulo, & corona accepta, Tibur emigrat. frumenta, & commeatus deficiebant. nam Raynerius Grinaldus Roberti classis Præfectus hostiensi littori obnavigans Pisanorum naves frumento onultas interceperat; quanquam Genuensium triremes prædonem observarent. Ergo difficultate victus, simulque ut civilia certamina remitterentur, Roma Henricus cessit: quam rem etiam Cardinales in primis curabant. Ceterum ne Robertus fraudem, & contumeliam inultam haberet, Friderici filio, quem generum repudiaverat, filiam hac conditione despondet; *ut in propinquo Calabrorum littore loca ditonis Roberti depopularetur;* & ne quid maritimæ oræ tutum ab injuria foret, conjunctis Genuensium, & Pisanorum navibus, Appulos, & Campanos infestari mandat. Jam miles longo itinere, & pugna non campo, & acie; sed in regionibus urbis per diffidentes cives, proditione, & dolis facta defessus erat: neque sine periculo frumentatio, aut pabulatio fiebat. Vicinus erat Roberti exercitus, difficilesque commeatus. ad Hetruriæ igitur amicas urbes regredi instituit. ita protinus per fines Sabinorum, Umbrorum, atque Perusinorum Aretium pervenit. Incredibili amore, atque honore adventum Henrici Aretini exceperat: vici, & castella fecus superiorem, ut ajunt, Arnun à defensoribus deserta Henrico protinus se dedunt. Convenere ad eum exules Hetruscarum civitatum, & in primis Gibelini pridem, tum Albi, mox Florentia pulsi, atque fugati. horum consilio, & opera adversus Florentinos bellum facere coepit. ita universæ copiæ illuc Henrici, & amicorum; tum etiam Guelphi nominis conveniunt. Novos conscripserat Florentinus milites: quos vero Romam miserat; quique aditus, & saltus Apennini observabant, eos ad se vocat, atque intra moenia continet. Imperator interea ab ea parte, quæ montes attingit, urbem aggreditur: muro nudata erat fossa, & vallo tantum communita. ingens materia ad munitiones faciendas parata erat. advenerant insuper Lucensium, Miniatiensium, & Senensium auxiliares copiæ. Robertus etiam præsidarios equites de Bononiensium, & Ferrariensium finibus illuc acciverat. Quare & si magni interesse videbatur ad Robertum, & conjuratos debellandos, oppugnando Florentia potiri: tamen rejecta oppugnatione, satius existimavit obsidione, & inopia Florentinum macerare, ut fame ad deditionem compelleretur. ita tribus ab urbe stadiis castra locare instituit. prætorium delegit ædem divi Salvi: Mongilanos, & Crescentinates nullo alio onere pergravavit, nisi ut frumenta, & commeatus in castra comportarent. Jam hyems ingravescibat. in arido, & loco sterili populatio nulla: præterea de hostili agro præda agi non poterat: ita defectus iis omnibus Henricus, quæ alendo exercitui idonea erant, per Novembrem mensem castra movet, octavoque milliario à Florentia discedens, ad oppidum, cui Donatiano nomen est, pervenit. Ceterum ne præsidio deserta castella Florentinus reciperet, duobus exulibus cum Germano equitatu Scarparia, & Incisa custodiendæ traduntur. opportunus uterque vicus; five ea defenderet, quæ de Florentinis cepissent; five excursionibus vicina vastare vellent. Duos fere menses eo in loco Imperator desedit: jam semen-

te amissâ, spes messis futuræ nulla erat. Obsidebantur fere omnes aditus, per quos frumenta comportarentur. moenibus inclusos fame debellatum iri Henricus dictitans ad Bonitium accessit, arcemque restituit, quam antea Carolus subverterat; atque sæviente frigore, ibidem hyemavit, vicinos populos imperia detrectantes populationibus vexans, atque interim oppido erumpentes cædibus agitabat. Florentinus à fame timebat: remedia malo nulla prospiciens, quominus ob inopiam victus futura ætate in ditionem Henrici cogeretur. ita ad Robertum confugientes eum rogant, & obsecrant, *amicis opem ferat, qui nisi præsentis auxilio defensi fuerint, barbaro homini, & libidini inimicorum subjiciantur necesse erit.* Commemorabant identidem quid cladis in se edituri essent, qui domo, & patria pulsi, fortunæ quoque spoliati in vindictam accensi essent. Robertus bellum suscipere recusat; quippe qui iram magis, quam arma Henrici timeret. Sed quid facerent? ad portas insensus erat hostis; deserti agri; in civitatem rustici confluxerant; fame laborabant. tot circumventi malis patriam Roberto dedunt. in conventionibus dumtaxat exceptum illud fuit; *ne qua urgente necessitate, etiamsi multum detrimenti civitas passura esset, exules in patriam reducerentur.* Recepta Florentia, Robertus eo præsidio contentus, quod à Bononia, & Ferraria acciverat, fuit; namque Fridericus ex Siculo in Calabros trajecerat, receptoque Rhegio vicina deprædabatur. Genuensis, & Pisanorum classis in anchoris instructa stabat, illuc adnavigatura, quo Imperator jussisset: ita undique circumventus Robertus rerum suarum satagebat. Interim Pisas Henricus petiit: Pisanos præ ceteris amabat: nobilis, & dives civitas ingentem vim auri Henrico, ex quo in Italiam descenderat, ad omnes usus impenderat: illuc Robertum quasi cum eo lege acturus venire jubet. suspectum primo locum Robertus causatus est. deinde adjecit, *imperatorii juris quæ possideret regna non esse: ubi autem locus dicendæ causæ idoneus daretur, eo se ad Henricum accessurum.* Jam Lucensis, Miniatiensis, & ceteri Pisis contermini populi, amissis castellis, direptis vicis, & agro pervastato, super deditione consultabant: quo successu elatus Henricus Robertum propterea quod non paruisset, neque etiam nuncios, qui causam dicerent, misisset, Romani imperii rebellem pronunciat, & proinde Campano, & Appulo regno privat. Florentinos autem honoribus, & omni dignitate mulctat; quibus potestatem reddendi juris ademit, ut Florentiæ neque judicia reddere, neve notariis, & scribis pro auctoritate imperatoria stipulationes facere, & tabulas in contractum rerum consignare liceret. Populi primores, tum publici negotii curatores ceu rebelles capitis condemnat, ut eos occidere, etiam bona, & fortunas diripere quivis impune posset. edixit præterea, *ne ex auro, & argento monetam dehinc Florentinus feriret.* Contra vero Opicino Spinulæ, & Theodoro Paleologo potestatem fecit monetæ sub nota Florentini populi percutiendæ. ita deinceps magna licentia adulterandi denarii facta est. Hac ignominia Florentinus irritatus plures milites scribere, sociosque omnes Guelphi nominis adversus communem hostem excitare. ita fere quicquid virium Pontificia factio habuit ad hoc exposuit, ut Henrico Hetruriam vastanti se opponeret. Videbant, multum de auctoritate, & potentia Casaris diminutum iri, si frustra Hetruscos Guelphos armis tentasset. Interea Clemens Pontifex publicis litteris, quæ in pontificalia responsa relata sunt, Robertum ab imperio, & jure Henrici eximit: quasi nihil potestatis in eum Casar haberet, cujus pater, & avus jussu Pontificum regna in Italia obtinuissent, perpetuæque bella adversus Romani Sacerdotii hostes gessissent; Pisas vero locum idoneum non esse, in quo Robertus causam diceret; propterea quod eo Imperator divertisset, ut conjuratos

1313. ratos debellaret. Postremo tot profugos, qui ad illum confugerant, à vi non temperaturos. Quare excusari Robertum debere, si in locum de perfidia, & vi suspectissimum, atque ad Regem voluntati inimicorum obsequentem non venisset. ita pontificalibus edictis sublevatus est Robertus. Altero post anno, qui trecentessimus tertius decimus ab ortu Dei ex Virgine fuit, magnam ætatis partem Pisis Cæsar exegit. Siciliensis interea, & Ligustica classis, ut ab Henrico constitutum fuerat, maritimas urbes, quæ Roberti ditionis erant, aggressa populabatur. Friderici terrestres copię in propinqua littora transmissæ Calabros prædabantur. Interea Henricus parum prospera valetudine Pisis conflictabatur. digressus tamen inde Miniateses, & Florentinum agrum invadit: tum Senarum mœnia prætervectus secus montem, quem apertum vocant, castra locat: celebrem locum parta de Florentinis aliquando victoria fecit. ingravescebat morbus: remedia ægotantem non juvabant. Macerateses balneas ex medicorum jussu petiit. Ceterum, salubres alioquin aquæ cum morbum nihil levarent, rursus, monente medico, locum mutat; quæ res conclamatis etiam morbis remedio esse solet. Itaque Bonum conventum deferitur. Evicerat morbus medentium auxilia. ita in flore magnarum rerum, & spe certa potiundæ Florentiæ rapitur. *Veneno obiisse, & fraude Florentinorum opinio fuit, ministerio, & opera cujusdam Bernardi Prædicatorum instituta servantis, qui venenum in mystico pane dederit; quando Florentino non bo-*

A no, sed saluti plane foret, *Henricum quovis modo tolli.* Negat scriptor non admodum contemnendus, *nefarium facinoris Bernardum ministrum fuisse;* quippe sexagenarius, & Gibellini nominis studiosus à Montisfeltri Dominis in familiarem Henrici amicitiam insinuatus fuerat. Non Florentino tantum populo, sed ceteris in Hetruria Guelphis, & in primis Roberto Regi insperata, sive magis præcipitata Henrici mors salutem attulit. Periclitabatur de summa rerum Robertus ancipiti hoste terra, & mari oppressus: neque, nisi sublato Henrico, liberari poterat. Cæsaris morte universus exercitus dilabitur. Pisana, & Genuensis classis domum extemplo rediit. B Friderici copię, relictis Calabris, in Siciliam revertuntur. Henrici cadaver Pisas deferitur, atque in æde majoris Mariæ sepelitur. Luctum id simul Germanis, qui in Italiam venerant, simul Gibellinis pavorem ingentem fecit. namque ejus factionis vires, & opes non aliter corruiere visæ sunt, quam nostra corpora deficere, & perire, capite lethaliter icto, videmus. Verum, ut magnus Imperator dixit, *nulla in re minus eventus respondet, quam in bello:* quippe propinqui terrores in irritum plerumque cadunt: ut qui superiorem se putat, jamque victoriam præsumit, is maximis detrimentis obruatur. ita victor ex insperato Guelphus in Hetruria, & Longobardis multiplices clades accepit: iique casus mortem C Henrici sequuti sunt; ut nescias, meliusne cum Guelpho agi potuerit Henricum vixisse.



GEORGII MERVLAE,

ALEXANDRINI,

ANTIQUITATIS VICECOMITVM

LIBER IX.

Henrici factionem cis Apenninum Baucius infestat. Matthæus Papiam & Alexandriam recipit. ad montem Catinum Guelphus occidione debellatur.

CUM intempestivam Henrici mortem Gibellinus fideri, & invidiæ factorum imputaret; Guelphus vero ne in beneficio fortunæ sibi deforet, ad opprimendam contrariam factionem novos milites conscriberet, novasque societates iniret, Pisani ita comparatis viribus inimicorum, memores quod jam inde Henrico ab alpihus descendenti multum auri ad subvertendam Florentinorum, & Roberti potentiam contulissent; & proinde veriti ne omnium in se arma converterentur, Ugutionem Fassiolum bellici negotii prudentem, & proelio strenuum hominem, quem discedens è Liguribus Henricus Genuæ præfecerat, ad se evocant, pecuniasque ad conducendos milites affatim præbent. Erat Ugutio Guelphi nominis hostis acerrimus. Applicantur ei Germani equites, qui Henricum Romanam petentem secuti fuerant; qua multitudine succinctus finitimos invadit, atque ab ira, & odio gravia damna, atque detrimenta iis intulit, qui Henrico restiterant. jam formidolosus omnibus erat. Quare Gibellini in Hetruria eum Ducem, & defensorem sibi constituunt. In Annalibus Ligurum comperio, *agre Pisanis Ugutionem concessum*: resurgebant Genuæ civiles motus, & proinde tetra certamina timebantur, quæ facile illo præsentē comprimere, & sedari potuissent. Ceterum Ugutio perpetuis incursionibus Lucenses primum evasat. prodire in campum, castra ponere, aut aciem instruere nolebat. intra mœnia se continens quotiens commodum videbatur cum prædatoria manu incursans, vicus, & ædificia in agris diripiebat. ita cum ingenti præda domum redibat: non temere alias aut ab domestico, aut externo hoste maiore clade Lucensis affectus fuit. Robertus in propulsandis sociorum injuriis negligentius se gerebat: subsidia aut nulla, aut rara in Hetruriam veniebant. ita Lucensis auxilio destitutus his legibus, quas Ugutio dixit, pacem cum eo composuit. Reducuntur in patriam Gibellini, & mox Alborum factio Luca fugati. Locipotitus Ugutio justum exercitum comparat, protinusque ea loca infestare acerbius cœpit, quæ ditionis Florentinæ erant, adversariis insultans, quod spe regii præsidii frustrati injuriis, & damnis expositi essent, quosque Robertus magis eluderet, quam defenderet, atque victor; cum nullus ei obviam iret, incursando, atque deprædando, omnibus ingentia damna edebat, qui Roberto se addixerant. Interea tumultus Lucæ obortus Ugutionem à detrimentis Florentinorum avertit. reducti exules agros, & res moventes ab adversariis ereptas repetebant. Ceterum qui ea paulo diutius possederant, superbe, & contumeliose, sua vindicare volenti repugnabant. ita jurgii primum, & conviciis, mox armis certabatur. Adventante Ugutione, Gibellini insurgentes adversariorum domos diripiunt. primores Guelphi partim delitescere; alii patria emigrant. Urbem ingressus Ugutio vultus austeritate, & vocis acrimonia suos à certamine, & rapina deterruit; &

ceus æquis omnibus venisset, neminem suspiciosius intueri. Guelphi tamen Gibellino Duci, & factionis iræ plurimum obsequenti non satis fidebant; ita populariter in fugam versi patriam relinquunt. Gibellinus, fugiente æmulo, sua primum obtinet, tum domos custode vacuas invadit: Pisanorum milites, & Germani equites omnia promiscue Guelphorum, sive Gibellinorum forent, diripiunt. Præda erat opima. Ita prædabundi per omnes urbis vicos discurrent: quorum licentiam neque torvo vultu, nec minis Fassiolum cohibere valuit. neuter expers detrimenti fuit. demum, parte altera ejecta, in jus, & arbitrium Pisanorum Luca devenit. Guelphi fugati propinquos vicos, & castella, quæ nondum Fassiolum ceperat, petunt. his Florentinus præsidia etiam ultra vires summisit. Tarlati Aretina familia Ugutioni studebant: illius favore, & auxilio in patriam reducti erant; & ad illius præscriptum omnia gerere. Sic Aretium juris, & ditionis Fassioli factum est. Ceterum Robertus Rex, ne socios deseruisse existimaretur, quos Ugutio injuriis, & damnis laceßere non desisteat; sollicitatus item Florentinorum precibus Petrum fratrem Tarenti principem, & Carolum filium in Hetruscos cum mille equitibus mittit. stipendia plurimum factio Guelpha suppeditabat. Petrus adolescens erat, cui congregandi acie cum hoste non satis tutum videbatur. attenuatæ erant Florentinorum, & ceterorum opes; attritæ domesticis malis vires. ita conditione, & magnis pollicitationibus satius visum est, quam armis hostem insultantem reprimere, & à detrimentis suorum avertere. Guido Petramala Aretii Episcopus, quamvis Gibellinus foret, Tarlatos tamen ejusdem factionis ægre ferebat principem locum in urbe habere. Hos Ugutionis amicitia, & favore subnixos, nisi pace, & societate cum Florentinis inita, principatu dejicere difficile erat. regnandi hominem cupidum Petrus tentat, cui regnum inter populares, & liberam administrandi Aretii potestatem promittit: ea dumtaxat loca Roberti ditionis esse postulavit, quæ Henricus de Florentinis, & sociis cepisset: ita Aretini, mutato statu civitatis, ab Ugutione alienantur. Tunc Ugutio, ne alii ab se deficerent, majoribus detrimentis, atque injuriis inimicos laceßere cœpit, agroque late populato, usque sub mœnia Florentinæ progressus præda onustum exercitum agebat. Pistorienles, & Miniatenles, propterea quod Luca profugos exceperant, quanta potuit clade affecit. altero post Henrici obitum anno Clemens Pontifex principes Christianorum Sacerdotum ad 1314. Viennam Allobrogum in concilium vocat: ibi cum alia multa ad majestatem, & jura Pontificum pertinentia tractata fuissent, tum illud in primis decretum fuit ad augendam Romani Pontificis potestatem, *ut designati in Germania Cæsares quamvis Romani Regis appellationem sortirentur, tamen à Summo Sacerdote imperii jura, & nomen acciperent*: super quo & si antecessores multa decrevisset, ut rata deinceps forent,

forent, ea omnia renovando confirmavit. De Regno etiam Siciliae actum est, ut Pontifici obnoxium foret. illud autem novum statuit, quod antea jussu Pontificum factum non fuit, ut, mortuo Imperatore, per omne interregni tempus Italicarum urbium, quae Caesari stipendiariae sunt, arbitrium, & potestas penes Romanum Pontificem foret. Edictis subscribere Patres. ita res Italiae quatenus sub ditione Imperatoris essent, Roberto procurandae traduntur. quae res in Longobardis, & Hetruscis graves motus, & perniciofa certamina excitavit: quippe Robertus, praeterquam quod omnibus inimicus, & infestus esset, qui Henrico in Italia adhaeserant, eos Pontificia auctoritate, & vi armatus palam ceu Pontifici invisos, & rebelles acerbius vexare coepit. Renovata sunt odia, civiliaque suscitata bella, quae consensisse videbantur. Nam Robertus ad odia civileque motus, urbes; alios ad inferendas injurias: hos ad seditiones, novandasque res vindictae causa concitabat. ita domestico furori, atque malo nullus modus esse: edita fuere in eo concilio pontificalia recentiora decreta, quae de auctoris nomine Clementina appellantur. Idem etiam Pontifex edicto Templarios sustulit, eorumque bona, & fortunas partim Philippo Regi, partim hospitalariis divi Joannis concessit, ex quibus ingens vis auri in Pontificium fiscum redacta fuit. Opulenta erat illa fraternitas, invidiosaeque opes: & proinde Ventura tradit ob iram, & cupiditatem plus habendi ab Rege eos proditoris insimulatos, quod in excidium christianae rei cum Saracenis conjurassent. Agitatum item in eodem concilio de transmarina expeditione; moxque in Lugdunensi Gallia apud Parisios publici duo conventus facti. Interfuere reges Philippus Francorum cum duobus filiis, quorum Ludovicus Novariae Regnum in Hispanis possidebat, Carolus junior Valesii comes erat. Eduardus Britannis imperabat. uterque ultro in arma adversus impios barbaros jurejurando se devovit: tum, ceu votis damnati, rubra cruce insigniti per populos incedebant. Verum nobilissimae expeditionis consilia, & apparatus morte Pontificis, quae brevi subsequuta est, in irritum cedere: & haud ita multo post Philippus Francorum Rex moritur. patri Ludovicus in Regnum successit. Ceterum in Longobardis, audita Henrici morte, ad obruendas Vicecomitis opes Guelphus erigitur. In Placentinis incerti motus primum fuere. Albertus Scotus modo hos, modo illos juvabat; utrisque infidus, & importunus: aegre is ferebat, Galeacium, quem Henricus Placentiae praefecerat, ex procuratore dominium usurpare: & proinde abeuntem in Ligures Henricum, patria decedens, illum Papiam usque sub officii specie prosequutus fuerat: ratus itaque, morte illius Galeacium urbe, & procuratore exturbare posse, in patrios fines reversus, adjuncto exulum praesidio, oppida, quae avorum fuerant, adiit: tum hostiliter adversariorum vicos, & agros invadit, praedamque ingentem Arquate egit. opportunus videbatur locus faciendis populationibus, sive sustinere, vel frustrari irruentem hostem voluisset. ita oppido vallum, & fossam circumjacit, illudque valido praesidio, & omni telorum genere munit: tum excursionibus, & populatione cuncta usque sub moenia urbis evastat. Praetor Placentinis Petrus Delmefa Veronensis genere datus erat. hic trepida civitate metu domestici hostis, Albertum Scotum hostem patriae adjudicari fecit, cui etiam ceu perduellionis dies dicta fuit. nihilo deteritus Albertus agros, & villas diruere, & incendere, ut caeperat, ferro, & igni omnia vastare. Summovetur interea magistratu Petrus: ita solus Galeacius custodiam, & defensionem urbis habuit; qui Scoto obviam profectus, expecta, inquit, populationem in agris tuis; in oppido vero obsidionem, excidium quoque gentis; nisi quamprimum per vim occupata loca restituas, ab excursionibus desistas; postremo, si quos in-

A *juris laceffis, relinquo.* Conterritus hac denunciatione Albertus; imparem enim se Galeacio cernebat, ab inferendis injuriis tantisper superfedit, dum Matthaeo quid filius in se moliretur, significaret. veteris erat amicitiae memor; recentis vero offensae oblitus. Matthaeus acceptam injuriam dissimulare, opes nuper recuperatas firmare studebat. Albertum tamen per litteras monet, *ut in munitionem aliquem locum secedat, ubi à vi, & injuria tutus sit, donec civibus reconcilietur.* Interim filium inexpiabilis odii, & perfidiae Scoti in se admonet. Prodiderat, ut supra memoravi, Albertus opes, quas fiduciaras Matthaeus illi dederat: proinde omnia tentaret, & faceret, ut acerbus, & perpetuus hostis patria, & finibus pelleretur. hac admonitione Galeacius iratum se patri simulat, propterea quod Albertum defendere velit: milites tamen parat, & instruit, & machinas secum ferens propius Arquate progreditur. occurfat illi Albertus, manus conferunt, in pugna validior erat Galeacius. ita Albertus retrocedens intra aggerem, & fossam praesidia reduxit: refugientes inlequutus Galeacius intra munitiones irrupit, atque ab aggere sagittis, & missilibus telis eos vulnerat, qui pro muro stabant: haerentem moenibus Galeacium, vicinaque populantem in colloquium Scotus vocat. hunc primum benignè salutat: tum vero quantopere patrem coluerit, quaeve beneficia in gentem Vicecomitum contulerit commemorat. ita non parum mirari, quod contra patris voluntatem se armis aggrediatur, & oppugnet: tum gravius increpare, quasi grande nefas sit pro beneficio malum reddere. Ad haec Galeacius, ita se Placentinis praefectum esse, ut cives concordesset, & à domestico hoste servaret: exules praeterea se ita demum in civitatem recepturum, si cum popularibus in gratiam redierint; respectu tamen veteris cum patre amicitiae à populatione se temperaturum: quod si Arquate dediderit, facile & sibi, & popularibus reconciliari posse: sin vero id facere nolit, persistetque in ea sententia, ut cum praesidio illud tenere velit, jurejurando adjecto, nunquam se ab obsidione discessurum promissit. instanti periculo, & minaci denunciatione conterritus Albertus alias conditiones offerre coepit, ut à libidine potiundi loci Galeacium flagrantem leniret. Verum ubi frustra multa tentata sunt, ita deditonem paciscitur: *ut sibi in patriam accedere, tum explorata popularium voluntate, tum abeundi potestas foret.* Postulatis Galeacius annuit: quamquam cognoscebat ex praesenti periculo magis quam bona fide illum ad condiciones venire. post conventiones initas Albertus in patriam profectus est. loci Galeacius potitur omnium rerum munitionissimi. Ceterum ingressio patriam Scoto, continuo motus in urbe oboriuntur. timebat adversa factio ingenium, & opes Scoti. ita quotidie suspiciosius utrique aut consilia, aut arma adversus alterum tractabant. in tumultu omnia esse; & interim caedes fieri: jamque propius seditionem ventum erat. Tunc Galeacius quieti civium prospiciens, principes factionum patriam summovere constituit Albertum Scotum, & Ubertinum Landum: ita utrumque cum primoribus urbis quattuordecim Mediolanum relegat. Albertus cum duobus liberis Matthaeum adiit: existimabat illius jussu, & opera, pace cum adversariis composita, domum redire posse: ita à Matthaeo sapius petere, *ut reditum sibi in patriam faceret.* contra Landus, & populares Matthaeum rogare, *ne redire Scotum in patriam sineret;* quamvis se victurum domi aequo jure is promitteret, & à vi, & à seditione temperaturum diceret: neque unquam quieturos. ita desperata concordia cum aemulis, Scotus Matthaei fraudem, & simulatam filii in patrem iram agnovit. Jam sex menses Mediolani defederat: gravis illi, & molesta mora erat; quippe e-gens, & profugus unde vitam duceret vix habebat. interim

interim contentiosius à Matthæo abeundi veniam sibi dari poscebat. excandescens blandioribus verbis Matthæus ludificare, nihil injuriarum in mora fieri; quid non ita à filio pacem pepigisset, ut finitis discordiis domum rediret: adhuc in motu, atque tumultu cives esse; neque filium quæ pater imperaret facturum, nisi urbem pacasset: ad inopiam victus levandam pecunias ostentat, faciendoque sumptui necessaria promittit. enimvero ira magis flagrare Scotus, leniri nullis pollicitationibus poterat. Vana spe reditus hominem Matthæus non tam pascebat, quam illudebat, cui velut per consolandi speciem illud identidem objiciebat, se regno olim, & fortunis omnibus pulsum, miserisq; coopertum octo amplius annos à conspectu hominum semotum miserandam vitam degisse: ecquid illi tantopere grave, si sex menses in opulentissima urbe victitet? sibi verba dari Scotus tandem intellexit, atque Matthæum veteris injuriæ haud immemorem se pulchre ulcisci: illum tamen supplex, & lachrymis orare, & obsecrare non desinebat, *ut sui miseresceret, opibusque insuper spoliato contumeliam fieri, quod Landus in patriam remissus foret.* tunc Matthæus veniam discedendi facit. Scotus clam Mediolano digrediens, convocatis amicis, & iis, quos partis suæ studiosos agnoscebat, Placentiam versus ire pergit. Galeacius intercessit quominus in urbem introiret. tunc is palam se circumventum vociferari, & conqueri, quod de cive primario extorris, & egens factus foret. Quidam scribunt, *ab amicis illum exceptum, & rursus illorum auxilio Arquate recepisse:* alii, *Cremam exulatum abiisse.* qui veriora tradant paulo post dicam. Inter hæc Philipponus Langusci ægre ferens Scotum circumventum, Vicecomitemque Placentiæ potiri copias continuo contrahit. accessere ad eum Simoninus, & Paganus Turriani: præterea ii, quibus Matthæi opes invisæ erant. namque exilio Scoti haud parum attritæ Guelphorum opes existimabantur. Quare cum haud exiguæ copiæ essent, ad Placentiam versus pergunt. sperabant in urbem receptum; complures enim ex iis, qui Scoto studebant, domi remanserant. hos ad defectionem à Vicecomite sollicitabant. Per eos forte dies comes Guarnerius de Salimbrun Placentiæ præsidium habebat. hic Galeacium hortatur, *ut adventanti hosti occurrat, ne si moribus appropinquaret, iis, qui suspecti proditoris erant, novandis rebus animos faceret.* ita instructa acie portis erumpentes adversariis obviam eunt, & haud ita multo post prælium committitur. præstabat Galeacius. ibi Philipponus, dum refugientes suos continere conatur, circumventus ab hoste est. agmen alterum ducebat cognatus Ilius de ea familia, quæ de *Sancto Nazario* cognomen habet. Hic ubi undique telis peti Langusci vidit, haud cunctatus in confertissimos hostes incurrit. pugna aliquantisper restituta est. perrumpere tamen ad eos non potuit, qui Langusci circumsteterant. tandem superante Galeacio, & comite acies inimicorum prosternitur. cæsi permulti sunt. Langusci cum cognato vivi capiuntur. Utrumque Galeacius ad patrem misit, *quos Mediolani in vinculis diutius habitos* quidam scribunt. De captivitate itidem Langusci magis in tempore, quam in negotio variare scriptores invenio. Interea procerum paribus suffragiis in Germania summa rerum duobus defertur Ludovico, & Friderico. Hic Austria; ille Baviaræ Dux erat. Ludovicus in urbe, quæ Franchfort appellatur; alter in Agripinensi Colonia per Episcopos prima imperii insignia suscepit; & cum per communes amicos componi res non posset; nisi enim unus imperia rerum capeßere poterat, & uterque alteri de re maxima cedere pro indignissimo ducebat, acie, & armis decidere causam placuit. ita comparatis copiis, in certamen progressi manus conferunt. Fridericus succubuit, atque in libera custodia servatur. Profligato hostili exercitu, captivoque æmulo, Ludovicus quasi rerum iuste po-

A tiretur, extemplo sine permisso Pontificis, Imperatorem se nuncupari voluit, moxque in Italiam ad legitimos imperii titulos descendere constituit. victori aditus patebant. Itali, qui Cæsaribus obnoxii, & amici erant, imperata facturi libenter videbantur. Ceterum Robertus pro ea potestate, quam nuper à Clemente acceperat, juvante etiam factione Guelpha, eos admodum sollicitare non cessabat, qui Cæsarum partes sectabantur: novos item milites adversus Ludovicum comparare. quod ubi Ludovicus rescivit, eam factionem in Italia sibi conciliare, & fovere in primis voluit, quæ antecessoribus obsequens fuerat. ita Matthæum Vicecomitem beneficiis primum prosequutus est; nam posteaquam vi, & armis Romani Regis appellationem sortitus est, Galeacio procuracionem perpetuam Placentiæ, Cremonæ, & Cremæ tradidit. quo facto patrem, & filios sibi mirum in modum devinxit. Ceterum urbes, ex quibus Roberti factio præstabat, ejectionis iis, qui diversarum partium habebantur, adversus Vicecomitem conspirant. Princeps conjurationis Franciscus Turrianus erat. venerat hic Papiam, jam inde ubi decessisse Henricum novit post captivitatem Langusci. eo item venere Thomas Neapolitanus Schiraci comes, & Baucius. contracta sunt equitum circiter duo millia; peditum vero decem millia.

C Namque voluntarii complures accesserunt ex his populis, qui in fide, & amicitia cum Roberto perseverabant. hi continuo Ticinum trajiciunt. Abiate primum aggrediuntur. sustinere impetum milites, qui in præsidio oppidi erant; donec à Mediolano auxilia supervenire. accessit & Theodorus Montisferrati Marchio. pugna confestim commissa est. Mediolanensis vincitur. Theodorus ubi inclinatam aciem vidit, fuga sibi consuluit. Salabruga Comes, qui stipendia Vicecomitum merebat, equo dejectus cum filio capitur. Mediolanenses quoque aliquot capti Papiam perducuntur. hac victoria ceu debellatum foret, Francischinus cum haud parva manu prædabundus Lignanum usque procurrit. obvius fit illi Vicecomes, finibusque summovit. Schiracius comes die insequenti fugientes persecutus vicos diripit; dulcedine prædæ illecti milites longius progressi, cum vias & aditus ignorarent, facile ab indigenis opprimuntur. mille, & amplius capti fuere. ceteri palantes, quamvis nemo persequeretur, Papiam usque diffugere. turpis erat fuga; ita Papiensis hos vulnerat, alios occidit, & spoliat. Thomas ipse amissa suorum magna parte, Astam tristis profugit, novoque comparato milite, vicina oppida, in quæ extorres recepti patriam subinde injuriis laceßebant, per vim cepit, exules partim in vinculis tenuit; alios suspendit. Per eos forte dies Ugo Delphinus alpes transgressus trecentos secum equites habebat, quos Attenium pecuniis conduxerat. Papiam is venit: accessit & Ugo Baucius. jam ad duo millia equitum convenerant. Castonus item sacerdotio, & patria ejectus his additur. Mediolanum versus ire pergunt. Opponitur in via Galeacius. non ausi fines Mediolani invadere, ad Placentiam versus eunt, atque propius suburbana perveniunt. omnia præsidio firmata offendunt. ita multis frustra tentatis, Papiam redeunt. inde Delphinus, & Baucius Derthonam proficiscuntur. Ea civitas sub imperio Roberti tunc erat. excitatur tumultus, Bauciumque conjurati circumstunt. sed is sive præsidio derensus; sive quod aditus ad fugam parum diligenter observarentur, periculo elapsus est. Regium procuratorem hoc facto infensissimum timens Derthonensis palam à Roberto deficit. Invenio apud alium scriptorem, *Galeacium properato itinere, & pene vestigiis fugientium instantem cum exercitu Derthonam venisse, atque pro moribus explicata acie, Gallicum ducem in certamen provocasse.* Cæterum Barbarus religionem diei objecit, quem inauspicatum ob cædem Joannis Baptistæ vulgus cavet. ita à pugna supersedit. ter-

giverantem Galeacius, ne frustra tempus tēreret, reliquit. Quod si Galeacius haud cunctatus in persequendo hoste fuit, crediderim post illius discessum Derthonenses adversus Baucium conjurasse. Per ea tempora gens Rivola in adversa factione princeps Bergomo exulabat. hi, collecta manu amicorum, conjunctis etiam iis, qui domo pulsi fuerant, patriam ingressi in Luchinum, qui urbem obtinebat, impetum faciunt: sed is repentina rebellionē, & conjuratorum impetu parum perterrefactus cum praesidio haud tenui illis obviam it. manus intra mœnia conferunt, pugnaque acris editur. tandem Guelphi funduntur. plurimi cæsi; alii urbe cædentes fuga sibi consulere. ita rursus in ditionem Vicecomitis Bergomum redigitur. In quibusdam annalibus invenio *pro Luchino Ludovicum Matthæi patruelem, quem Henricus Bergomensibus praefecerat, à Guelpho circumventum, victoremque profligatis adversariis, urbem recepisse.* Interea Galeacius, juvante Gibellino, Derthona potitur. ægre id Baucius ferre, congregatisque sociorum auxiliariis copiis, eos populos, qui nuper ad Vicecomitem transiverant, gravibus detrimentis per excursiones afficit. Intolerabilis erat populatio; quippe peregrinus eques prædæ appetens nunc hos, nunc illos adoriebatur. Gentilis miles ulciscendæ injuriæ occasionem nactus, ut erat locorum peritus, dissipatos populares, qui se remotis in locis abdiderant, cunctatus aut cecidit, aut coepit. Interim prædatoria navigia ripis oberrantia Padii accolae quietos esse non sinebant: cædibus & incendiis cuncta fædata erant. cultores fluvio propinqua castella deseruerant, & cum nullus prædatoribus se opponeret, conjuncta exulum multitudine, in Mediolanensem agrum interim prædabundi irrumpere. Ergo Matthæus, ne hostis navigare libere posset, illumque à populatione cohiberet, simulque ad sua tuenda averteret, postremo ne Ligures auxiliarii commeare tuto possent, munimenta fluvio imponere instituit, atque qua Padus, & Iria confluent arcem exædificat. Ut vero Gibellini promptiores, & intentiores ad faciendum opus essent, simul etiam si quando hostis ingrueret, alacrius defenderent, de factionis nomine Gibellinum castrum appellat: illud hyemantibus aquis fluvius exundans subvertit. quod Matthæus comparata materia reficere continuo coepit. Incesserat gravior cura Baucium, ne arce in sociorum visceribus excitata, ab fide, & imperio Regis quidam abalienarentur; multum enim de Roberti auctoritate diminutum iri videbat: præterea interclusi erant commeatus, qui opportunitate fluvii tuto pro usu belli comportabantur. itaque Alexandrinorum, Aftensium, Papiensium, & Vercellensium auxilia accersit, fluviales naves evocat, classemque instruit: tum copias partitus equites, & partem peditatus terra præmittit: fluvio reliqui subvecti. utrinque arcem aggrediuntur. Opifices, & operum ministri, tum etiam milites qui excubabant, primo impetu intra munitiones se recipiunt. Baucius suos ut murum conscenderent hortando, & minis urgebat. contra qui operi, & custodiæ designati erant, ascendentes dejicere: ita utrinque fatigati oppugnando, & defendendo diem absumpsere. Marcus Vicecomes Derthonæ praesidium validum habebat. Hic audito quod arcem nondum perfectam Baucius oppugnaret, & nisi confestim succurrisset in evidenti periculo suos esse, quas potuit copias coëgit. supervenit pater cum Guarnerio, quem non socium, sed praefectum expeditionis esse voluit: ut videlicet ex opinione Caesarum bella gerere existimaretur: castra haud longe ab hoste locant, pugnamque statim ineunt. Baucius circumventus erat; nam à tergo qui obsidebantur, ex adversum Matthæus premebat, atque interim acie dimicabat. erupere obsessi, majoreque nixu in adversarios ruerunt. sustinere impetum vix Baucius poterat. erat cum eo Ugo Delphinus, & Turriani. per-

A tinacius utrique; quippe de summa rerum periclitantes, æquo Marte aliquot horas pugnare. vetus odium, & recens amissarum opum ira Baucium, & Turrianum stimulat. Vicecomes ut nuper receptum regnum tueretur, atque defenderet in omne periculum incurrere: non temere alias major cædes facta, aut gravius res Guelpha afflicta fuit. cecidit Zonfredus Pagani Episcopi: Odoardus Muscæ frater capitur. captivi item fuere circiter octoginta viri haud ignobiles suis, parentumque gestis percelebres. Eodem anno à Vicecomite bis acie Guelphus debellatus est. Per idem tempus Ferrariensis ægre ferens, nobilis adolescentis cædem inultam manere, tumultu populari pristinos dominos ad se evocat. conjurati regionem sublicio ponti contiguam adoriuntur. eam Degus praefectus praesidio firmaverat. tunc erumpentes de munitionibus Gotolani oppidanos rejiciunt. jam Estensis subsidio conjuratis venerat; in peregrinos milites invehitur, qui longius à munitionibus progressi instantem hostem cum sustinere non possent, ut à cæde se eriperent, in naviculas ripis hærentes sine respectu salutis se dejiciunt. prægravante pondere multi obruuntur. Degus enecta magnarum parte, praesidium omne deduxit, atque ad Bononienses profectus est. ita Estensis avorum regnum recepit. Post Regis, & sociorum copias ad Iriam profligatas, Matthæus Papiam aggressus est. Profugerant eo ii fere omnes, qui à clade apud Gibellinum castrum, accepta fuga, servati fuerant, & proinde latrocinii finitimos quietos esse non sinebant. furtim diluculo postridie idus Novembres Ludovicus Vicecomes, & Stephanus cum Mediolanensi praesidio urbem invadunt. occurrit Ricardinus Languscius cum ea multitudine popularium, quæ ad illum in trepidatione concurrerat. committitur intra mœnia prælium. acriter depugnatum est. Languscius captivitas patris; & quod opibus se spoliari cernebat, si patria pulsus fuisset, incendebat. dum fortiter impetum sustinet, occiditur. Occubuerunt cum illo quindecim illustres viri; quibus cæsis, ceteri perterriti diffugere. duo Guidonis filii, Amorus, & Guidetus capiuntur. Intra Languscium, & quos supra diximus, clades stetit; neque quicquam detrimenti oppidani, præter cædem, & captivitatem supradictorum accepere. Potitus loci Matthæus ditionem legitimam, & quæ solemniter fieri solet, postulavit: ut scilicet perpetuo Vicecomiti Papiensis, ceu jure belli, subjectus, & obnoxius foret. tributa etiam imposuit. Erant in vinculis amici quidam Matthæi. hi omnes soluti, & liberati confestim fuere. Scribunt quidam; quod minime credo, *illam equestrem statuam, quam vulgus historiae, & veritatis expers dicatam Soli nominat, tunc à Mediolanensi dum urbem victor licentius pervadit, humi dejectam, atque confractam fuisse, & subinde fragmenta arrepta in varios usus conflata.* hi velim dicant, quo pacto restituta ea fuerit. Centum, & septuaginta aguntur anni ex quo hæc gesta fuere. Evanuerat jam pridem sculpendi, & fingendi ars, cessarantque opifices; quod si quid affabrè factum, & id genus spectabile signum habemus, id antiqui est operis, & à prisca artificibus elaboratum. Pervetus est imago, quam ex comparatione numismatum, in quibus Antonini Pii imagunculae leguntur, ejus Caesaris esse deprehendimus: idem est oris habitus; figura, & lineamenta eadem; militare quoque paludamentum. Invenio in quibusdam annalibus, *Odoarchi Gothorum Regis esse effigiem, quam ex Ravenna Reges Longobardorum cum spolia devicta gentis Papiam transportarunt.* Quare non ab narratione rerum multum aberit, ut si auctores non habeam, quorum scriptis assentiar, famam, sive magis fabulam, quæ inveterata per populos celebratur, si non falsam coarguere, tamen unde natam putem, ne in totum commentitia res videatur, exponere. Ferunt *duas veteres urbes, Papiam, & Ravennates de potentatu aliquando inter se certasse.*

certasse, & Papienses Pado deuectos Ravennam aggressos esse: contra vero Ravennates terrestribus copiis Papiam pervenisse. ita expugnata utraque urbe, victor in monumentum scilicet victoriae aliquid asportavit. Valvæ templi cancellatim auro subærato confectæ Ravennam delatæ: alter Regis equestrem statuam Papiam tulit, & in media urbe collocavit. Narratio profecto magis fatua, quam commentitia fabula. De potentatu duos populos decertasse nusquam legimus. at *Gothorum Reges utrobique regiam sedem habuisse* memoriae proditum est. quibus debellatis, & ab Italia pulsis, Ravennæ Exarchatus constitutus fuit. Erat Exarchus, ut supra demonstravimus, supremus magistratus, quem Constantinopolitani Cæsares Italiae ita dabant, ut illi sine provocatione populi parerent. Ab Atheniensibus hujus præfecturæ nomen, quantum colligere possum, profectum est. Scribit Pollux quo tempore ea civitas rerum potiebatur, *summam omnem publici negotii penes Exarchum fuisse*. Obibat in Italia Exarchus ea omnia, quæ regiae vicis erant; per quæ tempora de imperio Longobardorum Reges & Exarchi dimicavere; & forsitan victor Longobardus equestrem statuam in eam urbem, ubi domicilium Reges habebant, transportari voluit. Hæc autem ideo hac in parte commemoro, non ut credi postulem, quando nullus idoneus scriptor ea tradat: sed ut siue fabulæ, siue magis impudentis mendacii origo unde effluerit aperiam. Ceterum Philippo Maria Vicecomite Mediolani tertio Duce, annos abhinc duos & quinquaginta, claustra illa portarum inaurata Nicolaus Picininus reportavit, quæ templo affixa adhuc visuntur. Ceterum Matthæus urbi devictæ Prætozem filium Luchinum imposuit. hic ad reprimendos eorum animos, & spiritus, qui novandis rebus inhæbant, arcem ædificat, præsidioque munit. Quidam à Vicecomite Manfredinum Bechariam, & Curtios, tum ceteros ejus factionis extorres domum reductos fuisse scribit. Simon Turrianus fuga à captivitate, & periculo elapsus est: in ædes minorum fratrum Amorus, & Guido adhuc impuberes confugiunt: religiosorum auctoritate, & precibus se servari existimabant. Verum Luchinus ab inquisitoribus captos ad patrem cum deprecatoribus dimisit. Superba, & periculosa postulabant: pueros liberari, bona, & fortunas iis restitui, cum quibus de regno certatum foret, & quorum infestissimum odium in Vicecomites perseverabat. itaque Matthæus ratus, in novitate regni hostem potius longè summovendum, quam intra fines foveri, & ali oportere, nihil deprecatoribus concessit. Exulaverat aliquot ante annos Sacerdotio pulsus frater Inardus: hunc in pontificalem sedem Matthæus, recepta Papia, restituit. Duplici victoria recenti urbis adeptione, maxima erat in Longobardis Matthæi auctoritas. ita vicinæ urbes diffidio, & domesticis armis agitatae in illius potestatem, & fidem se permittebant: partim ut illatas injurias ulciscerentur, damnaque emendarent; alii ut domesticæ scilicet liti, & seditionibus finem facerent. In affectando regno prudens, & mitis, &, quod nulli ante contigerat, popularis Matthæus erat. mores præterea, & ingenia Longobardorum ex longo usu callebat. Alexandrini urbem, ut supra diximus, & sua Roberto dederant; eos Rex fovebat, & quibuscunque commodus persequeretur, quorum studiis & opera Alexandriam receperat. Adversa factio, insultante æmulo, periclitabatur. quare cum conjugibus, & liberis, & iis, quæ secum ferre poterant, patria cesserunt. Divertère primum in ea oppida, in quibus factio sua viris, & armis opulentior erat, quorum præsidio inimicorum, & æmulorum agros prædabantur, & cum gentilium auxilia ad recuperandas opes parum valerent, ad Vicecomitem Gibellinus confūgit, ut illius ope, & viribus aliquando, devictis adversariis, in patriam reduceretur: ita externis adjuti armis moenia omnia

A exules vastabant. tædio civilis diffidii, tum magnitudine damnorum Guelphus fessius in gratiam redire cum adversariis constituit. uterque pacata patria frui cupiebat. acie extra mœnia dimicare neuter poterat. infirmæ erant utrique copiae; neque ille circumvenire muros; neque hic longius propulsare vim valebat. ita conditionibus potiusquam armis res transigenda fuit. Matthæo itaque Vicecomiti, & Marco filio arbitrium, & potestatem faciendæ concordiae, & publici negotii constituendæ formulæ tam exules, quam qui urbem tenebant, concessere. dimittitur ab urbe regius procurator. Hac in parte defendendus est Alexandrinus, in quem Gulielmus Ventura, quem crebro testem in expositione rerum Merula citat, intemperanter, & acerbè invehitur: mutabilitatem gentis, atque fraudem infectatur, quos omnibus vitiis coopertos dicitat; utpote quorum mobilia forent ingenia, & proinde pulchrum videretur perpetuis seditionibus conflictari, datamque fidem prodere. Paulo amplius quinquennium vocatus in concionem populus, interposito jurejurando, se, & sua ita Roberto dederat, ut nullum posthac dominari in urbe pateretur: *prodita fidei, & defectionis auctores duos potissimum scribit Thomam Puteum, & Bonifacium ab Alice*: ingratos profecto homines! utrumque Robertus equestribus ornamentis honestaverat. hi publico nomine Baucio nunciarunt, *ut quam primum Alexandria, & finibus cederet*. Hic velim respondeant qui factum Alexandrinorum accusant; cum domi parum tuti domesticis armis essent, evastatique agri forent, debuerintne fidem ad perniciem colere; an potius fortunis suis consulere? Tantum certe abest, ut Alexandrinos proditoris, aut mutabilitatis condemnari existimem, ut in illa Longobardorum flamma ad extinguenda odia, reducendamque inter cives concordiam nihil opportunius agi potuerit. Matthæus rerum arbiter concordiam inter exules, & cives sub abolitione antea actarum injuriarum ita composuit.

D *Quodcumque reipub. curatores, servato judiciorum ordine, statuerunt, id ratum esto. reducti exules contumelias, & damna adversariis condonanto. à sententia Matthæi nulla provocatio esto. Decuriones hoc est publici negotii præfecti sortitio eligantur.* Exulaverunt patria fere quinquennium tres familiæ Lanciavegiæ, Merlani, & Inviati, tum filii Ruffini, qui Ferruffini dicuntur. hi cum amicis, & iis omnibus, qui illorum partes sequebantur, in patriam recipiuntur. Trium honesta in conventionibus mentio facta fuit Bonifacii ab Alice, Belengii Merlani militis accincti, & Gulielmi Inviati. sed Belengii in municipalibus decretis adhuc honorifica mentio durat: huic creditas scilicet pecunias Marcus Matthæi ad integrum persolvi statuit. Ceterum in compositione discordiæ, ne ex suo arbitrio Matthæus omnia facere existimaretur, nobiles Mediolanenses, & jurisperitos in consilium adhibuit, quorum hæc nomina sunt: Lodovici Vicecomes, Ottolanus, à Castelletto, Mutius à Moguntia. Facius Bruscius, Matthæus Alciatus, Stephanus Vicomercatus, Francinus Vicecomes, Diomedinus Boscius, Henricus Bernardigius. qua popularitate acceptus, & proinde amplius Matthæus fuit: utpote qui ad proceres urbis cuncta referret. Deinde secus Tanarum ad Trinitatis Decuriones urbis, quos Antianos vocant, venire. accessit & Roffinus Guastavinus: huic exules paciscendæ concordiae libera mandata dederant: mox urbem ingressi in æde Divi Joannis à Caputio fœdera solemnī stipulatione approbant. In præfatione, post invocatum Dei numen, Virginis Matris, Apostolorum, & Ambrosii adscripta nomina, ad amplitudinem sacerdotii testificandam, Cardinalium mentio adjuncta fuit: quia videlicet ob discordia Patrum studia nullus adhuc Romanæ Ecclesiæ Princeps declaratus erat. Pluribus verbis causam Alexandrinorum ideo egit Merula, ne vel tacens, vel pauca loquutus de

N 3 mori-

moribus, & ingenio gentis cum Ventura in totum consentire existimari possit. In hac autem Alexandrinorum ad Vicecomitem transitione multum de opinione, & opibus Roberti detractum fuit: quippe momenta rerum in hujus gentis statu constabant, tum propter suppetias Genuensi tuto ferendas; tum quia descendente in Italiam Franco, intercedere, & obviam ire opportunè liceret. Post reconciliatam inter Alexandrinos gratiam, adeptumque urbis dominium, Alexandriae, & Derthonae Matthaeus Marcus Praetorem constituit; ut scilicet is utrobique judicia petentibus redderet. Ceterum, Alexandrini ne otiosi à domesticis incommodis denuo in discordias laberentur, oppidum cui Varisio nomen est, adorti, arcem, suffosso muro, expugnant: custodes capti Alexandriam perducuntur. Alexandrinorum rebellio vicinorum animos ab Rege alienatura videbatur. ita regii procuratores, cum jam sibi socii consultarent, Regis praesidia, quae cis alpes erant, confestim contrahunt. Descenderat nuperrime in Italiam Ricardus Gambatersa cum sagittariis, quos Asteni pecunia è Narbonensi Gallia conductos habebat. Praefectus his Baucius cum equitibus circiter quingentis Alexandrinorum fines invadit: castella, & vici, partim metu, alia voluntate protinus illi se dedunt: Ovilis quadraginta familiarum vicus, Solerium, Boscum, & Castellatium, Fibernasque expugnant, funditusque subvertunt. Cessant Alexandria duae familiae Trotti, & Putei: hi Baucio conjuncti injuriis, & gravibus detrimentis eos, qui in patria remanserant, afficiebant. Hac re cognita, Matthaeus confestim equites plus mille Alexandriam mittit. Marcus novo praesidio subnixus Boscum, & Castellatium diripit, atque adurit. Capti fuere de Puteorum gente viginti nobiles viri supra centum ex iis, qui illorum arma sequuti fuerant, quos omnes vinctos Mediolanum misit. Post hanc cladem domestici milites, qui Alexandria partim sponte cesserant, partim fugati fuerant, per Octobrem forte mensem latronum more usque ad moenia urbis cuncta populantur: cives occurrant: pro portis pugna acris inita: repulsi cives insequuti exules ad quinquaginta pro moenibus capiunt. duodecim occidunt, *è quibus Ventura quindecim de gente Merlanorum, & Lanciavegiarum annumeratos tradit.* Hac caede, & captivitate elatus Astensis continuo colles transgressus Casale Sancti Evasii hostiliter invadit. occurrant oppidani: hi primo impetu funduntur: plus sexaginta ex eis capti. Astam milites reducti: ibi relicta praeda, Moncalerium usque excurrentes pecoris ingentem vim, & captivos aliquot abducunt. Per hac tempora cum Vicecomiti multa secunda obtigissent, Baciensi Matthaeo se permittunt. Servabatur illic Antonius Fissiraga: hunc Matthaeo tradidere, qui mox Mediolanum deductus in carcere, & vinculis mortem obiit. Hoc item anno Ubertus Vicecomes germanus Matthaei frater proelio strenuus, & proinde militaribus ornamentis decoratus moritur, & in aede Divi Eustorgii honorifice sepelitur. Interim Matthaeus, cum à civili motu, externoque hoste aliquid otii nactus foret, ad urbis ornamenta convertitur. aedes praetorias foro mercatorio adjecit, in quas duodecim coirent viri urbicis negotiis, & mercaturae praefecti; pro quorum arbitrio esculentis, & poculentis pretia quotidie statuuntur. de mensura, & ponderibus jus dicunt, fraudes opificum cavent, & castigant, publici commodi provisores appellantur; *agoronomos* Graeci vocant, Plautusque nomen usurpat. ita multitudini sellulariae, & mercenariis, qui in diem victitant, probe consultum fuit; & quia nonnunquam juris disceptatio oritur, civilis scientiae consultus alienigena huic collegio datus fuit. duplicem item excitavit porticum. In superiore pro tribunali Praetor capitalem noxam exilio, aut capite, & graviore multa vindicat: levioris criminis reos loris caedi imperat, aut

are multat. semestris perseverabat magistratus. Quare eo anno, qui fuit sextus decimus post trecentum & mille à Nativitate Domini ex Praetura Jacobus Cornacianus, & Bonifacius ab Alice, hic Alexandrinus, ille Parmensis jus Mediolani dixerunt. Post Clementis mortem ferme biennium per interregnum Pontificiae vices ob contrarias Cardinalium voluntates gerebantur: neque solum in coenaculo primores Sacerdotum de electione Pontificis contendebant; sed illorum familiares atque ministri, gliscente rixa, decertarunt. confauciabant se invicem, & interim quidam occidebantur. Interea Ludovicus Francorum Rex ad tollenda certamina, simulque ut tandem aliquando Romani Sacerdotii praefectura, uni traderetur, fratrem Lugdunum mittit: hic moram, & dilationem creandi Pontificis gravissimè principibus Sacerdotum objecit, graviterque corripuit; quasi auctoritas his concessa jam ludibrio gentis foret: ad generale concilium eam potestatem rejici oportere minitans; nihilo tamen secius in diversa studia pertinaces erant. Duplex erat factio: altera Gallicum deposebat. Itali contra suae gentis, & sui corporis Pontificem creari volebant. tandem sive moram, & contentiones pertasi; sive minae, & liberae quærimoniae eos deterruerunt, ne si de conclavi re infecta abiissent, divisa in factiones Curia, varii Pontifices summam Christianae rei obtinerent, Jacobum Cadurcensem Episcopum Romano Sacerdotio praeficiunt, cui Joanni vigesimo secundo nomen indiderunt: hic statim inito pontificatu, tria potentiae, & majestatis pontificiae amplificandae gratia, quae ante Clemens sanxerat, confirmat: *ut designati ad Imperium Principes, priusquam insignia, & nomen imperatorium assumerent, Romano Pontifici sacramento se auctoratos profiterentur, fidesque ab eis in verba Pontificis exigeretur: alterum ut si quando, defuncto Imperatore, electio successoris extraheretur, per omne interregni tempus res Italia, qua juris, & ditionis imperatoria forent, nutu Pontificis administrarentur:* tertio Siculos extra Caesarum jus, & ditionem esse voluit; quando Romani Pontifices eam insulam in Regni formam, & appellationem redegerint. Ludovicum quoque Bavariae Ducem, quem supra diximus, acie æmulo devicto, summam rerum usurpasse, titulo imperatorio privat; ut scilicet, deposita ea potestate, quam armis quæsierat, in privati modum viveret, neque sine permisso Pontificis Romam peteret. Non solum contumax, sed rebellis Ludovicus hac denunciatione factus fuit. Inter hac Robertus, quanquam in discrimine sociorum, & eorum in primis, qui in fidem, & ditionem suam se tradiderant, negligentius se gereret, Philippum tamen fratrem, qui Tarentinus Princeps nuncupabatur, Florentiam cum equitatu mittit. Major erat hic numerus eo, quem Petrus alter frater secum duxerat. Ugutio post receptam Lucam, pulsisque his, qui novandarum rerum suspecti erant, vicinos, qui exules receperant, armis laceßere coepit. nullus illi obviam ire, aut populatibus occurrere audebat. impunè vagari, & omnia diripere. Confluxerant ad eum per multi, partim spe lucris; alii ut acceptas injurias ulciscerentur, damnaque emendarent: ita magnis comparatis copiis, Catinum montem quem Florentinus valido praesidio tenebat, obsidere instituit; atque ut eodem tempore, & una fere opera inimicorum vicinos diriperet, obsessosque urgeret, castra aggere, & vallo munit. Mons erat obsessus, & sine hostili metu egressus miles proximos vicinos depopulabatur. Interim è castris procurrens ingentem praedam abducere. Diuturna obsidione; tum etiam oppugnatione, & victus inopia qui montem custodiebant macerabantur. Superveniunt interea nova à Roberto auxilia. duo Regii fratres copiis praefecti erant, quorum virtus, & auctoritas in gerendo bello magna ferebatur. alacritatis, & fiducia Florentinus plenus erat. magnitudo copiarum, & strenui Duces animos dabant.

dabant. & jam præsumpta victoria, hostem quodammodo contemnebant. Tradunt quidam, *quatuor equitum millia, & peditum ad quadraginta contra-cta fuisse*. Ugutionis quoque, & Pisanorum copiae haud multo impares erant: imperium gerendi belli Philippo; quia major natu erat Petrus, etsi prior in Hetruscos venerat, concessit; ita credo volente fato, ut qui Dux esse debuerat, locorum pariter, & animorum provinciæ gnarus, is fratri bellici negotii prope nescio pareret. Ad nonas itaque sextiles Florentia digressi ad montem contendunt, ut obsidione illum eximerent. in conspectu hostium castra locant. excitatae erant utrinque turres, & quid in alterius castris Duces agerent uterque ex vallo, & turribus prospiciebant. Ugutio suos intra munitiones continebat; nullo proelio castra metantes lace-
 fere; satis efficere sibi videbatur, si ancipiti hoste circumventus illos obsideret; hos metu intra munimenta cohiberet. Interim tamen agmine depugnabant. neuter superior abibat; quippe acie conflagrare, & fortunam belli experiri uterque verebatur. ita levi pugna animos, & vires experiebantur. Interea Ugutioni nunciatur *per longiorem ejus absentiam quosdam novandis rebus Luca operam dare, propiusque tum multum ventum esse*. Itaque is timens, ne conjurationis auctores Lucam obtinerent, obsidionem solvere, & Lucam redire; quatenus clam hoste id facere posset, instituit. quod si abeuntem Regii lace-
 rent, tunc acie pugnare, & congredi totis castris oportere. ita milites noctu vasa colligere jubet, instructaque acie, atque diluculo succensis tabernaculis, iter ingreditur. Qui obsidebantur extemplo clamor in regis castris oritur, *multitudine auxiliorum Ugutionem perterrefactum. turpe, & ignominiosum esse duobus Regulis, in tanto sociorum subsidio illum incolu-
 mem à calamitate abire*. Ab hoc clamore confurgitur, & agmine facto discedentes laceessere coeperunt. Ugutio militaris negotii expertissimus, ubi paulo effusus in se ruere regias copias conspexit, signa convertit: Senensium, & Collensium auxilia primum aggreditur; forte ea adversus hostem in statione posita stabant. consternati ne primum quidem impetum sustinuerunt; in castra refugiunt: homines erant pugnae quodammodo expertes, tractandorum armorum insueti. intra munitiones terga cædendo insequutus irrupit in castra. ad prætorium postquam ventum fuit, ibi robur erat exercitus: concurrerat in trepidatione ad duces major pars militum, pertinacius pugnatum est. obsistebant regii, præsidia locum tueri, instantes fortiter tolerare, conferti imprimentes rejicere. Ugutio contra suos urgere, & si quorum terga viderat, eos pugnam repetere co-
 gebat. cædes ab ira gravior edebatur. Tunc concipicatus Ugutio hostes in globum coactos, totisque castris decertari, neque densos gladiis cominus perfringi posse, Germanos equites procurrere jussit, quorum impetu regia, & socialis multitudo dissipatur; ipse cum reliquis cohortibus subsequitur. dissipati non statim funduntur: sustinebant irruentes quatenus vires patiebantur; ita fortissimus quisque aut prostratus, aut faucius fuit. atrox facta cædes; quod nisi Ugutio quadratum agens agmen repugnantes, & acrius obsistentes fudisset, pugnam profecto regii restituiscent. sed tum ab equitatu oppressi; tum ab urgente Ugutione ita dissipantur, ut neque se colligere, neque in aciem coire possent. ab omnibus fuga facta est, solutisque ordinibus passim cæduntur. *Cecidisse in eo conflictu supra duo Florentinorum, & sociorum milia* quidam scribit: alii *septem* tradunt. viri quoque illustres occisi sunt, Petrus Roberti frater, & Carolus Philippi filius. Florentini non pauci nobiles in castris occumbere, quam fuga sibi consulere maluerunt. timebant, ne si in manus inimicorum venissent, ab ira, & studio vindictæ gravissimos cruciatus sustinuissent. Ceterum fugien-

tibus pestis major, quam si eos hostis adeptus foret, obtigit. Proximæ erant paludes, in quas complures, dum insectantem devitare conantur, se dejicientes undis obruti fuere. Philippus forte ea die febri tentatus proelio abstinuit. is ubi inclinatum suorum aciem, fratremque, & filium circuitos ab adversariis vidit, in fugam conversus evasit. Ceterum Ugutioni haud incruenta victoria stetit. Franciscum filium, qui antesignanos ducebat, amisit, & cum eo fere universum agmen oppressum est. post malam suorum pugnam qui obsidebantur montem victori protinus dedunt. *Spoliis captivorum locupletatos Pisanos* quidam scribunt. exercitus deinde cum ingenti præda domum ab Ugutione reducit. muli, & id genus jumenta, ad commeatus, & cibaria comportanda, quæ vix numerari possent, capta. Pugnatum fuit quarto Calendas Septembres, quem diem religiosum, & proinde inauspicatum vulgus cavet. Fuere qui palam Regem accusarent, quod auxilia idonea non misisset: alii præfectorum culpa acceptam cladem dicere. Ceterum Robertus in tanta suorum cæde segnius, atque remissius se gessit, id quod plerique non existimabant; oppressos enim socios quodammodo destituere visus fuit. afflictæ in Hetruria Guelphorum opes erant. Florentiam ea calamitas mirum in modum consternavit, fractique adeo animi omnium fuere, ut, ceu desperata auxilii spe, etiam parum tolerandis conditionibus petendam pacem censerent. Scribit quidam, quod sane à vero non abest, *Ugutioni ad debellandos hostes à Vicecomite auxilia missa fuisse*. Luchinus ducentis Mediolanensibus equitibus præerat, in eoque conflictu egregiam operam is navavit. Pendebant res Hetruriæ à Vicecomite. una, & eadem erat factio, communeque periculum. quare non poterat salvus esse Matthæus si in Hetruscis Gibellina factio oppressa fuisset. insultanti præterea Matthæo, ceu profligatæ res forent, Philipponus Robertum paulo acerbius taxans respondit: *utinam qui adversus Gibellinum nomen arma moverat, contrariamque factionem defendendam suscepit, is pro viribus, & quantum pericula exigebant, opem ad Hetruriam Guelphos misisset*. Per eadem tempora duplici Matthæus conjugio opes communiit: duobus filiis uxores Ligusticas nobilibus familiis procreatas dedit. Stephanus filiorum minimus Valentiam de Spinolarum gentem uxorem duxit. Luchino Isabella conjuncta fuit. ea soror Joannis Flischi erat. Castonus item Turrianus perosus bella, exilio, & cædibus suorum fessus Mediolanensi Sacerdotio se abdicat. huic Romanus Pontifex Aquilejensem Pontificatum contulit. ita procul à patria otiosus à gravi, & importuna molestia opulento Sacerdotio frui voluit. Per idem tempus Joannes quartus Matthæi filiorum, patris, atque factionis prærogativa, Mediolani Archiepiscopus deligitur. Joannes Pontifex electioni adversatus est. designaverat is Præsidem Aycardum Prædicatoriæ fraternitatis Principem, & recentioris Theologiæ doctissimum. Filii repulsam, ceu rationibus suis importunam, & turpem ægrè Matthæus ferens Aycardum ad Sacerdotium venientem ingressu urbis prohibuit, finibusque summovit. tunc Pontifex indignissimum existimans, eum non recipi Antistitem, quem is sacris delegisset, Vicecomitem execratur, detestaturque. Pontificale hoc est fulmen, quo plerique omnes Christiani perterrefacti imperata Pontificum, vel inviti faciunt. Enimvero tunc Matthæus magis, atque magis resistere, ne is, quem urbe repulisset, & proinde inimicum gravissimum habiturus esset, sacerdotio fungeretur. Decreverat, ut supra diximus, Joannes Pontifex, ea videlicet confirmans, quæ Clemens ad potentiam Roberti augendam statuerat, ut ditionis, & arbitrii Roberti urbes Italiæ, & populi tantisper forent, dum novus Cæsar crearetur: ita Cæsarum imperium, & ditionem omnem abrogaverat. Quare Matthæus, ne pon-

pontificalibus decretis palam repugnare videretur, si imperiali nomine res procuraret, Vicarii titulum deposuit, seque populi Capitaneum, ceu libertatis patriæ defensores dehinc nuncupari voluit. Quod factum Pontifex indignatus; propterea quod videretur Matthæus majestati, & potentia Pontificum illudere, ne ceteri exemplum illius sequuti regnum ex procuratore facerent, per litteras publicas iis omnibus mandat, qui iussi Henrici imperia, & jurisdictiones in populos habebant, *nihil de cetero pro opinione, atque nomine Caesarum gerant, pontificiaque majestati se subjiciant, & pareant; donec verus Caesar creetur; quando Ludovicus legitimo titulo summam rerum non obtineret.* Matthæus interea amplas domos ædificat, quas uxores principum deinceps incolerent. Sub hæc tempora quidam scribunt, a Galeacio, evastato prius omni circum agro, Arquate receptum fuisse; tum castrum sancti Joannis, & alterum à Valle Tari amnis appellatum in deditionem venisse. Albertum vero Scotum ad Matthæum missum, qui haud ita multo post Cremam velut exulatum cum abiisset, præ ægritudine, & dolore amissarum rerum è vita migra-

vit. Verum cum scriptores non in negotio: sed in tempore, & gestione rei dissentire videam, ego magis iis assentior, qui, *biennio ante Vicecomitem Arquate potitum, & Scotum à Matthæo elusum finibus patriæ cessisse* scribunt. Inter hæc Baucius Castrum montis, & Cuvium obsidet: muros tormentis discutit, & quassat. Frustra Manfredus Salucienfis, & Philippus à Sabaudia, contracto subitario milite, cum opem obsessis ferre tentassent, Ugo loca pactione cepit. Brixia item intestina odia, & similitudines in summum excreverant. ita, oborto tumultu, Gibelina factio, & sacrorum Antistes domo fugantur. cædes magna facta est, profugorum bona, & fortunæ direptæ. Marchiones item à Rocheta cognominati, Tanari accolæ extorres Astenses susceperant. profugerant item eo haud pauci, quos adversa factio domo, & patria ejecerat. hi coacta manu, vicos, & agros adversariorum infestabant, & proidentibus quibusdam oppidula capiunt; & quamvis ea cultores ad primum impetum deseruissent, prædam tamen, & captivos haud paucos abduxere.



GEORGII MERVLAE, ALEXANDRINI, ANTIQUITATIS VICECOMITVM LIBER X.

Res in Liguribus gestæ Philippi Valesii, Henrici Austriae Ducis, atque Raymundi Cardani in Italiam transitus: Pontificis diræ, & Matthæi mors referuntur.

CUM Joannes Pontifex, ad convellendam Germani Cæsaris potentiam, procuratorem Italiae Robertum constituisset, Ligures, gens discordiosa, pro vetere similitudine, & intestino facinore in funesta bella exarserant, dissipatoque incendio non solum Ligurum omne nomen contlagravit; sed universa prope Italia, dum quisque auxilia suæ parti sumministrat, magnas clades accepit. Terra, marique, ad extrema usque pericula, amplius duodecim annos cives continenter inter se decertarunt. In ea gente omnia erant, quibus bellum produci posset. montana loca, & aspera, vicinum mare, copiae maritimæ, mercaturam præterea exules per suburbana, in patria adversarii exercebant. hinc belli damna haud intoleranda. Denique cum propriæ vires ad se conficiendos deficerent, peregrinos dominos, externaque auxilia utrique accersivere. Pontificis accessit impotens ira, qui alteri factioni undecumque opem petebat: Gallorum Reges, & Germanos proceres in Italiam immisit; diris postremo, & execrationibus perpetuo eos infectatus atque abominatus, qui adversus Robertum arma tulissent, illiusque imperata non facerent. quæ diritate plerique mortales, ceu hoc nomine Deum propitiarent, in domesticos foedam crudelitatem exercuere. Duæ factiones Genuam, & gentem omnem Ligusticam, ut supra diximus, per impia, & nefanda junioris Friderici bella in Italia disseminatæ agitabant, Mascaratæ, & Rampini. hi Guelphi; illi Gibellini deinde appellati: & quamvis Henricus pacem, & concordiam inter eos composuisset, tamen nunquam constans, & sincera fides fuit; namque mortuo Henrico, cum Pisani metu Florentinorum Ugutionem ad se revocassent, vetera renovata sunt odia, auctæ similitudines; & quia regnum inter populares uterque affectabant, gravissime inter se sub mœnibus patriæ dimicavere. Spinolæ, & Aurii, assumpta plebe, Mascarata, atque excluso Rampino urbis custodiam & reipub. administrationem capeffunt. Decuriones duodecim de gente patricia, & totidem plebeji nominis reipub. negotiis præfecti fuere. Vix hic rerum status perennavit; namque plebe impellente, ob æmulationem potentatus inter se utraque familia acerbissime pugnavit. ipsi etiam Spinolæ in duplicem appellationem divisi: namque hi ab Luculo; alii à platea nuncupati sunt. cum Auriis utrique in gratiam redeunt. Verum, ut sunt mobilia Ligurum ingenia, & per ambitionem in discordiam, & pugnam prœconi animi, denuo in certamen utraque gens venit, ingentique cæde edita, rursus concordēs sunt. Ceterum haud ita multo post Spinolæ, adjuncta plebejorum manu, sub cœnæ tempus Auriōs in area pro templo Divi Matthæi invadunt. quod nisi celeriter amici, tum etiam plerique Guelphi nominis opem tulissent, occisione deleti fuissent. ita pernicioso odio, & funesta æmulatione duarum inter se familiarum universa civitas ad arma concitatur. Non desistebant Luculi à studio vin-

A dictæ; neque solum cædibus adversarios perdere conati sunt; sed illorum domos subvertunt; pars etiam ædium Prædicatoriæ Fraternitatis destructa fuit. Accessere Auriis subsidia; namque Guelphi fere omnes pro illis arma sumunt. ita affluente multitudine, perterrefactus Spinola patria excedit. Opicinus Buzalam, & Serravalle cum haud parvo præsidio tenebat. Aurii, & Grimaldi cum patriam obtinuissent, Dominicum Aurium, qui loca Genuensis ditionis trans Apenninum custodiebat, ad se revocant, militesque ei tradunt, ut exules à populatione & excursionibus cohiberet. Vexabat adversarios Opicinus, habebatque inter Buzalam, & Catrum novum externos equites, atque etiam pedum ingentem numerum, & quotiens commodum videbat, vicos & castella adversariorum deprædabatur. Jam irruperat ad Arquate usque Dominicus, occurrit illi Opicinus; in valle Iriæ manus conferunt; Dominicus occubuit, & cum eo supra centum tum cæsi, tum capti fuere. Novum deinde militem Aurii, & Grimaldi conducunt, reparatisque viribus Manfredinum à Carreto cum exercitu adversus Opicinum & exules mittunt. sequebantur tumultuarii milites. inter Appennini juga pugna facta est. superabat multitudo tumultuaria; terga dant exules. dissipatos Carretus persequutus ad centum & ultra pedites in fuga occidit. exules Buzalam ingredi non sunt ausi. desertum à præsidio, & cultoribus vicum Carretus occupat. Ingens vis frumenti erat, & abundans commeatus: omnia direpta; tum vindictæ studio vacuas domos succendunt. ita eadem die Buzala direpta, adusta etiam fuit. postmodum vero in divisione prædæ inter Germanos equites, & Ligures acriter pugnatum est. majorem prædæ partem Genuensis tenebat. Germanus ferox, & lucri avidus duas partes sibi dari, aut duplicem mercedem persolvi petebat; propterea quod ab equitatu Germano exules fusi fuissent. contra Genuensis, quod pugna & in direptione cepisset, id sibi vindicabat. ita dum uterque pro præda certat, Germani equites Genuensem invadunt, atque hos interficiunt; alios capiunt. Manfredinus, & Lamba Aurius cum duobus filiis, ceu captivi, Litavium, atque Gaviūm perducti fuere; nec nisi pacto persoluto stipendio, captivos relaxare Barbarus voluit. ita septem millibus aureorum liberantur. Ceterum Spinola etiam ab externo præsidio vim, & injuriam acceperat. Merebant Buzalæ sub stipendiis Spinolarum ducenti Germani equites. Forte jurgius primum, tum vero ferro Italus cum Barbaro certavit. ictus in certamine eques Teutonicus occubuit. Irritati ea cæde Germani per vicum discurrentes juvenem Spinolam, quamvis inermem, & tumultus ignarum occidunt. timere magnopere Germani, ne à cognatis ejus, quem occiderant opprimerentur. Ceterum Spinola, quia sine peregrino præsidio res suas vix tueri poterat, eadem gentilis inultam reliquit. Per idem tempus Pisani adversus Ugutionem conjurantes erant

erant illius invidiosæ opes; quanquam Florentini populi superbiam compressisset, viresque ita attrivisset, ut inter Hetruscos Princeps Pisanus foret. Jam gravis erat Fassiolani potentia, quem velut tyrannum timentes urbe pellere constituunt. Vastabat tunc Florentinorum fines Ugutio: is ubi intellexit, nobilitatem omnem Pisis ad res novas animum adjecisse, prope Pisas contendit. ibi multa dissimulando, blandiusque alloquendo super novitate rerum suspectos lenire cœpit: ubi autem cognovit, exulceratas esse omnium mentes, animosque ad defectionem ita impulsos, ut ad obsequium redigi nulla via possent, Nerium filium Lucam cum præsidio mittit: ipse Pisis constitit. Jam Lucensium primores cum Pisanis adversus Ugutionem consenserant, ut utriusque urbis dominio momento temporis is exturbaretur. Erat Nerio familiaris consuetudo cum Castruccio adolescente nobili, & divite, quem egregia animi, & corporis indoles ita popularibus conciliabat, ut aliquando in patria principem locum sperare posset. hunc precibus, & multa pollicendo; denique per longam amicitiam obtestando ab conjuratis abstrahere tentat: perseverantem in proposito in custodiam, ceu reum furti conjici jubet; subinde dictitans *de convicto supplicium sumi oportere*. Movit ea res Lucensium animos, hominem innocentem falso insinulatum ceu manifesti furti pœnas daturum. palam plurimi se intercessuros, quominus infons negaretur. Hæc ubi Ugutio recepit cum equitatus parte, properato itinere, Lucam petiit. occasionem arripiunt Pisani: vix urbe cesserat; portas claudunt, suoque præsidio muniunt. nuncios extemplo Lucam mittunt, qui dicerent, Pisis Ugutionem ejectum, urbemque præsidio custodiri. Hoc nuncio plebes ad arma accurrit, ædes publicas invadit, carcerem effringit, neque solum juvenem supplicio eripit; sed sive occulta fatorum vis; sive indignitas immeriti supplicii id effecerit, solutum vinclis Castrucium multitudo ardens dominum appellat. Nerius tumultuanti populo restitit: sed cum ægre sustinere vim posset portas ad patris usque adventum obtinere conatur. Premebat multitudo. Quare inter conjuratos vix elapsus, qua Pisas itur, haud longe ab Luca patrem obvium habuit, eodemque in loco duorum populorum insperatam, & repentinam rebellionem intelligunt. ita vir in militari negotio egregius vix triennium duarum urbium potitus fuit. *pejus autem sibi quam Ugutioni qui in illum conspirare consuluisset traditum est*. Ugutio Lucam prætergressus ad Malaspinæ proceres pervenit. inde per Apenninum fauces, & anfractus ad paterna oppida revertitur, ibique consenuit. ita præter spem, & omnium opinionem Castrucius capitis reus per tumultum Lucam obtinuit. Exulante Spinola, peregrini quidam, & inquilini ad gubernacula publica admittuntur. tunc Flisci, Grimaldi, & Aurii ita fœdus, & amicitiam inter se fecere, *ut publica negotia illorum nutu, & imperio administrarentur*. Spinola ex confederatione trium gentium reditus præcisam sibi omnem spem ratus, ut & ipse in societatem fœderis reciperetur sub abolitione injuriarum petiit; ut scilicet civitas ante divisa sanari, & in unum coire tandem posset. Conradus Auria fortiter contradixit: domestici tumultus, intestinique belli, Spinola admisso, nunquam finem futurum; neque cives pacatos vivere, aut quietem, & otium ab conjuratione civili sperari. Ceterum Spinolæ, clam Aurio, cum Grimaldo, & Flisco inito fœdere, in patriam redeunt. Timuere tunc Aurii; nihil enim Spinolæ fidere, atque se patria cessuros palam prædicare. præterea in area, quæ illius familiæ nomen habet, congregati de fuga consultabant. convenere eo statim Grimaldi, & ceteri factionis Guelphæ principes; hortantur, *bono sint animo, neque solliciti vicem suam sint, quod Spinola reductus domum sit; quando publico bono, & quietis gratia id factum fuerit, ne semper exu-*

les, & bella civilia habeant: prudens, & salutare consilium; sed Aurii veteris simultatis ardore, civilique odio dominante, nihil bene monenti obtemperantes, cum iis fere omnibus, qui studiosi partis erant, urbem relinquunt. Discedente Aurio, Guelphi arma arripiunt, populoque in concionem vocato, Carolum Fliscum, & Gasparem Grimaldum præfides in multos annos creant. hos Capitaneos vocare. extimere magis, atque magis Spinolæ, ne domi ab æmulis, & qui regnum affectabant circumvenirentur. Quare primores ejus familiæ cum uxoribus, liberis, & omnibus iis, quæ secum ferre poterant, patria confestim abeunt: paucisque post diebus cetera omnis familia in spontaneum exilium cefcit: ita Genua in potestatem Guelphi nominis venit, atque continuo utriusque littoris accollæ; tum etiam trans Apenninum si quid Genuensis ditionis erat, duobus Capitaneis subjectum fuit. Deinde ab Genua Rebella Grimaldus cum non parva militum manu Savonam, atque Albingaunum profectus est; in utroque populo, omnique maritima ora accuratius disquirat qui Guelphæ, quive Gibellinæ parti se addictos profiterentur. hanc disquisitionem multi Gibellini nominis ægre ferentes Præsidi palam contradicunt. ex eo factionum nomina late disseminantur in ea gente. Rebella Gibellinos Albingauno ejicit. C. Episcopus Petræ erat Reinaldi Spinolæ filius. hic ejectos Gibellinos excipit. Tum Reinaldus, & Conradus Auria, adjunctis compluribus suæ factionis, accedente Carretorum subsidio Albingaunum obsidere cœpit. Concurrere illico Gibellini nominis vicini, atque octo post dies quam Rebella Albingaunum obtinuerat, exules domum reducti sunt. Rebella Genuam revertitur. nondum inter Spinolas, & Aurios quamvis uterque profugus patria esset, satis solida gratia intervenerat. Interim Savonenses ad arma profiliunt, Prætorem, & præsidii præfectum capiunt, urbemque Odoarcho Auria, & Spinolæ Andalo tradunt. Gibellini extorres in patriam reducti: arces stabant tres valido Guelphorum præsidio munitæ; eas expugnant, regiones urbis mari contiguas muro muniunt, & propugnacula exstruunt. ita deinceps in eam civitatem Genua exules tuto se receperunt, atque ex eo Spinolæ & Aurii in perpetua conspiratione adversus vim, & opes Guelphorum manere. Patriam, ut supra diximus, Flisci, & Grimaldi obtinebant: opulentior erat factio, quam quæ domesticis armis vinci, & debellari posset. Ad externa itaque auxilia exules confugiunt. fœdus, & amicitiam primum cum Matthæo Vicecomite, & ea societate, quæ Gibellinam factionem tuebatur, ineunt, ut adversarios Regno & patria exturbarent. Matthæus eo anno per vim ad dedicationem Cremonenses compulerat, jamque magnum nomen, magnasque opes sibi comparaverat. Dominabatur Mediolano, Bergamo, Laudæ, Placentiæ, Novariæ, Vercellis, Aquis, Alexandria, Derthonæ, & Papiæ. Præterea in societatem, & amicitiam ejus venerat Joannes Quiricus, cui cognomen de Sancto Vitali, & Orlandus Rubeus. hi Vicecomite auxilia subministrante, pulso Giberto Corrigha, res Parmensium sub imperio habebant: accesserat item in fœdus, & societatem Canis Scaliger. Scaligeri in eis regionibus opibus & potentia pollebant. Simon Turrianus, post pulsum Sacerdotio, & patria Episcopum Brixianis imperabat. congregati undique ad Matthæum Gibellini de reducendis Genuam exulibus consultarunt, auxiliaque communiter constituunt. expeditioni Marcus Vicecomes Matthæi filius præficitur. Nullus erat tantæ rei magis idoneus: tum ob patris auctoritatem; tum quia duabus urbibus, quæ Apennino proximæ sunt, præerat, perpetuæque bella adversus Regios procuratores gessisset; nam Matthæus in Liguribus, qui cis Apenninum incolunt, præfidiarios equites & pedites habebat, quibus Marcum filium præfecerat, ut

ut eos, qui ditioni, & fidei suæ se permiserant, à vi, & injuriis adversæ factionis defenderet. Hic hostem populationibus, & excursione cuncta vastantem sæpe proelio devicerat, & interim præda onustum spoliaverat. Stephanus item frater Baucium, & Gambateriam à populatione represserat, ita summa gerendi belli adversus Ligusticos Guelphos Marco communi omnium consensu demandatur. Sub idem fere tempus Ugo Baucius Cavalerium Cuneo exulantem, qui suburbana Montisvici populatus insidias pluribus in locis illi paraverat, à speculatoribus interceptum decollari fecit. supplicium item sumpsit de Simone Laurentii: namque is tortus cum Matthæo, & exilibus de nece illi inferenda conjurasse fassus est. Ceterum castella in tumulis fecerant Astenses, montesque præsidio munierant, ut incursum adversariorum arcerent. ad ea demolienda cum exules accurrissent, permulti faxis, quæ locus subministrabat, interficiunt. Per Septembrem mensem hyemantibus aquis, Tanarus, & proximi torrentes adeo inundarunt, ut non agros tantum diluerint; sed propinquos vicos, & ædificia subverterint: quo diluvio viri, foeminae, & pueri passim obruti fuere. Marcus interea, adjunctis exilibus, per Decembrem mensem noctu Astam usque progressus est: sperabat, populares factionis portam, quæ à Petro nomen habet, adventanti prodituros, atque ita urbe potiri. agebat præter exulum manum equites quingentos, & pedites plus mille. irritum fuit inceptum: jam ver appetebat. ad Marcum Derthonæ agentem sociorum copiarum, ut constitutum fuerat, venere. Gavius exercitus ingens coivit. jugum Apennini inde transgressi in vallem, quam Porciferam fluvius interlabitur, vallique nomen dat, descendunt; ut autem Genuam à terra corona obsiderent, copias dividere placuit: ita pars in vallem, quæ à confluentia duorum amnium Bisamnis dicitur, mittitur. Forte agebatur dies festus, quo divinitus salutata, Virgo Deum, & hominem concepit: Marcus Virgini apprime devotus sanum augurium, & maxime religiosum, ad quod in nostra usque tempora permulti, ut pro beneficio vota solvant, accedunt, religiosè ingressus est. data rei divinæ opera, ex collatitia stipe ornamenta templo dedit. tum universus exercitus, sublati vocibus, præfens Mariæ nomen adversus hostem invocavit. Appropinquante Marco, Guelphi primum urbem muro muniunt, opere, & munitionibus suburbana ad turrim usque Phari complexi. turrim exules duos fere menses constanti oppugnatione subvertere conati sunt. ingentia saxa machinis injicientes testæ, & partim muri perforaverant. custodes obsidione, & fame macerati vix durare. ita nunc speculatione ignis; nunc magnis vocibus subsidia, aut cibaria afferri deposebant. bis Guelphi, acie instructa, per suburbana propius turrim veniunt. occurrant Gibellini, majorique vi impetum sustinent, quam adversarii imprimerent. ita frustra multa conati, compluribusque occisis, nihil quicquam alimenti præbere obsessis valuerunt. Verum quotiens rerum summa in periculo posita est, domesticaque odia urgent, paulo solertiores sumus: quando à terra nulla via ferendæ opis, aut levandæ famis pateret, à mari succurrere constituunt. Rem haud magni sane operis excogitare; namque in promontorium, quod caput Phari vocant, quidam noctu exponuntur; excubitores enim negligentius aditus observabant, vel obdormitabant; funem crassorem conclusis porrigunt, quo ad præaltam fenestram religato, alterum caput tenentes ad navim longam redeunt: funi vas ligneum inferitur, quod suspensum sursum trahi, & ad navim retrahi facile posset. in vase inclusus homo cum iis, quæ victui necessarii erant, à navi ad obsessos commeabat; atque ne vis maris, & ventorum ictus triremen obruerent, aut longius submoverent, navim onerariam, defectis anchoris, adjiciunt. hoc modo, invito hoste,

alimenta comportabantur. Ceterum Marcus ubi fame pervincere conclusos non potest; turrim ab imo, effosso inter duas rupes specu, suffodere instituit. ad turre fundamenta subter viam publicam fossiles cum penetrassent, tigna supponunt; ut qua vellent ea procumberet. jam turre ruinæ proxima nutabat: custodes imminentem mortem agnoscebant: ad præfectos urbis per vas hominem demittunt. sævum forte fluctibus, etiam ventis agitabatur mare. jam medium transierat diei, dum descensum is molitur; & cum transmitti non posset, in turrim reneat: deditionem mox custodes ita paciscuntur, *ut sine fraude abirent.* sic Marcus turrim obtinuit. Ceterum atrocissime in custodes sævitum fuit. vix urbem ingressi Præfectis excrucianti traduntur. Una, & constans erat omnium vox *morianatur, moriantur, qui rempublicam tradiderunt.* in tormentis multa mentiti, ceu proditiis convicti; septem enim erant, in machinam ligneam impositi duobus in locis ex muro ante oculos exulum jactati fuere. post crudele, & miserandum supplicium Guelphi templum sub nomine Divæ Mariæ de Petra minuta præsidio firmant. at Marcus Vicecomes Gibellinorum cohorte, & proprio milite subvectus suburbana Prædis per vim capit; tum ad alterum suburbanum populandum, quod Sanctæ Agnetis nomen habet, se convertit. qui in præsidio erant multitudo ingruentium perterrefacti, servata vita, suburbanum hosti tradidit. præda ingens inventa est; nam præter arma, salem, & merces, domestica ornamenta, pretiosam etiam suppellectilem eo in loco servabant, imminente muris Gibellino, Guelphi contigua moenibus ædificia ab Fidei templo ad Castelletum usque primum succendunt, deinde ad solum diruunt; una duntaxat pro hostio templi domus intacta fuit, ut à missili tormento, atque sagittis urbanum vicum defenderet. Sublimem præterea pontem inædificant, per quem ab urbis porta ad domum tuto transire liceret: pari opere, & munitione altera domus ex adversum portæ Vaccarum firmatur: nihilo tamen secius exules urgebant munimenta, & opera circumducentes, ne ab urbe exitus, neve aditus foris ad auxilia intromittenda esset. nulla relicta spes obsessis erat; moenia vix tueri ab adversariis poterant. In deditione nihil tutum cognoscebant; etiam si quas hostis tulisset conditiones accepissent. Ad peregrinam igitur opem confugiunt. Robertus Rex ea tempestate multum mari, plurimum terra pollebat: Narbonensi Galliarum, Calabris, Appulis imperabat; Subalpinas etiam gentes, quæ Pedemontanæ dicuntur, sui imperii, & ditionis fecerat; quippe opulentissimus, cui amplæ & certissima vectigalia penderentur, pace magnificus, & bello præclarus. Præsentem itaque subsidio eos juvare, & defendere facile poterat, quicumque in illius fidem, & potestatem venissent. ad hunc oratores mittuntur, qui auxilia peterent, deditionemque subinde pollicerentur. Rex, nullo foedere facta, statim mille, & ducentos equites ab Neapoli dimittit, qui Genuam devecti obsessos sublevant, atque nutantes ita firmant, ut bene sperare inciperent. Contra vero Gibellini veriti, ne adversarii regio equitatu subnixi in stationes obsidentium, eruptione facta, invaderent, relicto Bisamne, in suburbanum Prædis, & montem Bernardi, atque Peraldi stativa transferunt. Inter hæc Robertus quinque, & viginti triremes agens advenit. Erant cum Rege uxor, & duo fratres: honestus præterea procerum ordo prosequatur. ex adversum portus classis constitit. exceptus magnifice Robertus in æde Prædicatoriæ Religionis diversatur. Paucos post dies Prætor urbis, & Præfecti duo Carolus, & Gaspar, convocato in concionem pro templo divi Laurentii populo, jurisdictioni, & potestati, quam pro auctoritate magistratus gerebant, renunciant. delinguntur subinde publici mandati domini, quos syndicos appellant. Consentientibus ad unum civibus, de-

ditio urbis Joanni Pontifici cum hoc facta fuit, ut urbici negotii omnis procuratio penes Robertum esset. æquius visum fuit disceptante potenti, & peregrino Rege causas cognosci, & lites decidi, quam ab domesticis judicia reddi: tum etiam minus invidiosum, atque salubrius rempub. ab externo administrari, quam præfecturam urbis civibus, etiam per annuas vices, committi. Decem anni præscripti fuere, ne perpetua forent imperia: quod si ante exactum decennium, aut Pontifex, aut Rex de vita decederet, qui superstes alteri foret, is in demortui vices obiret: duo videbantur in Regno constituti: re autem ipsa omne publici negotii jus, & arbitrium unius Roberti erat. *Post Regis adventum à Florentino, & reliquis, qui in fide regia societatis manebant, super mille, & centum equites advenisse comperio.* Gibellinos defendebant, & tuebantur imprimis Matthæus Vicecomes, Canis Scaliger, Pisani, & Veneti. ambiguus erat Lucensis. Ceterum Robertus, suscepta urbis administratione, atque custodia, cum auxiliares copiae accessissent, communicato cum primoribus factionis consilio, exules aggre-
di statuit, atque triduo post nonas Sextiles ad quattuor millia peditum diluculo in montem Bernardi mittit. Sensere fremitum qui proxime montem excubabant, suosque ex composito per signa admonent, hostem advenisse. confluunt illico cum ingenti præsidio Gibellinorum Duces: pugna committitur: sagittis, lanceis, atque missilibus res geritur; locus item lapides pro telis suggerebat. Sustinere impetum regii non potuere; ita terga dant; quos cadendo usque ad urbis portas exules prosequuti ceciderunt ex iis triginta equites, & pedites trecentos. Ligures haud multi occubere: nam exules in victoria popularibus parcentes in externum plurimum defæviere. repulsis intra moenia adversariis, domum extra portam Agnetis munitionibus, & præsidio firmatam subvertere parant: propinquam foveam, in quam aqua defluebat, primum altius effodiunt; tum fundamenta concutiunt, atque perfringunt: robustos stipites, & tigna supponunt, ut procidens domus adversarios obrueret. Sensere Guelphi ex urbe, terram effodi: supposita ligna, & arietibus fundamenta discussa ignorabant: cuniculum & ipsi occultum agere instituunt. tunc exules, ut illos in insidias, & exitium traherent, pugnam cientes propius moenia prodire, & asperioribus verbis lacessere, quod moenibus ceu ignavi atque imbelles se continerent. Rex indignum ratus, Vicecomitem ferocius insultare, coacto agmine, ad Agnetis portam accurrit: fossiles etiam circiter sexaginta adduxit. ædem equites, dimissis equis, supra quinquaginta ascenderant speculaturi, quid adversarii molirentur. Emittitur interim ab machina lapis, cujus ictu exterriti; tum etiam missilium copia faucii quidam ad ima descendunt. jam domus replebatur quod conspicati exules alterum lapidem emittunt, lignaque supposita subtrahunt: tunc lapsa domus corruit, qua ruina mortales amplius trecenti obruti fuere. induciæ mox ad eruenda cadavera factæ. Post hanc cædem ad templum sancti Bernardi eruptione Guelphi pugnare; & quanquam multi utrinque caderent, superiores fere à certamine exules recedebant. Interea Robertus à fœdere, & amicitia Vicecomitis Canem Scaligerum, magna pollicendo, ad se avertere tentat: dominium ejus terræ, quæ inter Padum, & Alpes posita est, illi promittit. Internuncius erat Franciscus Turrianus. hic, quia ex usu suo erat Matthæum à fociis destitui, illud opulentum Aquilejæ Sacerdotium, quod instar Regni erat, uni Scaligerorum spondet; aliquot enim annos illius Sacerdotii perpetua administratio penes Turrianos fuerat. oblatas condiciones Canis abnuvit. Ubi Matthæus sollicitari ad defectionem locum, & amicum rescivit, extemplo Gibellinæ factionis procures in concilium vocat. coivere Soncinum omnes. ibi Mat-

A thæus quanta Roberti ira, quantum odii in universum Gibellinum nomen foret, refert: novas amicitias, novosque socios illum quærere, ut Ligure subacto, & edomito, mox reliquos debellaret. post hæc privatim quemque sui periculi admonet: *quod si incolumes esse volunt, Duce opus esse, quem inimico, & armato Regi opponant.* Comprobavere qui in concilio erant Matthæi sententiam, consensuque omnium Scaliger Gibellinæ militiæ Magister, & Præfectus creatur. tum pecuniæ ad conducendos milites in medium haud gravatim expositæ: mille præterea aurei mensuri pro victu, & cultu illi decernuntur. ita Gibellinorum res in præsens satis firmæ adversus Regis insidias, & arma existimabantur. Ceterum Robertus cum societatis & fœderis cum Cane spes frustrata cum esset, exules quibuscunque conditionibus reconciliare cum adversariis tentat. reditum in patriam, fortunas, & bona restitui, & quem voluerint locum apud se pollicetur: ad quæ omnia futura, perpetuoque mansura se fidei, & fœderum sponsorem exhibet. Regi insensissimo præ studio levandæ obsidionis, liberandorumque sociorum fallaci nihil fidentes oblatas condiciones omnino respuere. tunc Robertus invisus Transpadano, & Liguri infidus, Marco portis imminenti Mediolanum se invasurum minatur; nisi quam primum obsidionem solverit: quem Marcus ita percussit: *quid me his verbis territas? tunc Insubres aggredieris, & vastabis cum Genuam liberaveris?* Interea sociæ civitates tum pro studio partium; quia multum ab auctoritate, & potentia Roberti, & Guelphi nominis diminutum iri videbant; nisi Vicecomitem à finibus Ligurum summovissent, copias novas summittunt. Conveniunt ad quattuordecim peditum, equitum fere duo millia. tunc adversarios & à mari, & à terra aggredi Robertus constituit. Simon Turrianus Genuæ forte erat: hunc cum parte copiarum navibus ad Segestum oppidum transmisit. Locus adoriendis hostibus opportunus unus erat; nam vicini littoris fauces, & saltus fere Gibellinus ita muniverat, ut nullus ad invadendum aditus daretur. Rex indigenam Guelphum cum ingenti equitum, & peditum multitudine agens ad Bernardi ædem, & Peraldi montem progreditur. Descenderat post meridiem in littus arenosum Simon. occurrit ei Marcus cum equitibus fere trecentis, quorum impetum cum Simon agrè sustineret in naves rediit, resumptoque milite in hostem iterum invehitur. proelium committitur, atque urgente equitatu, rursus in naves Guelphi refugiunt. ancipiti Marte depugnabant utrique. Interea emissa de navibus ingens sagittariorum turba pugnam invadit, & cum haud pauci fauciantur, de arena cedere Gibellini coacti præsidio, & subituario opere regionem vici muniunt, quam Castellionum vocant. tum descendens Guelphorum equitatus, sublato clamore, in hostem invehitur claustra continenti impetu transcendit. in fugam Gibellinus vertitur: cædes ingens facta est: plurimi gladio comminus repugnantes; alii in fuga occisi. fugientes Guelphus Cornilianum usque persequitur; finem persequendi superveniens nox fecit. Ceterum Marcus veritus, ne hac clade accepta quidam à se deficerent, cedere de suburbanis constituit; nondum enim duarum familiarum sanati ab injuriis animi, & vetere similitudine videbantur. Conradus Spinola Regii exercitus ductor suspectos gentiles faciebat. ita noctu neque conclamatis, neque colligatis vasis abiit Marcus. sequuti sunt abeuntem exules cum uxoribus, & liberis, & omni familia. *Nonis Februarii in littore, & suburbanis pugnatum fuisse traditur.* per quod tempus nivibus, & glacie circumtectus Apenninus erat. Quare multi mortales tum metu constantis hostis; tum sæviente hyeme periire: præsertim pueri, & foeminae miserandum in modum absumpti sunt. Buzalam plurimi petivere; inde, ne ab adversariis opprimerentur, Litavium, & Gavium, quæ

quæ duo oppida fidi, & fortes amici incolebant, se recipiunt. In stativis, & suburbanis arma, & pretiosa multa inventa; namque exules septem menses, quo tempore adversarios obsederant, à navigatione, commutandisque mercibus nunquam destitère. Victor Guelphus, ingenti præda potitus, ab odio, studioque vindictæ ædificia omnia Buzalam usque succendit, protinusque lætus cum exercitu præda onusto domum revertitur. Genuæ pro rebus prospere gestis omnia lætitiæ plena, & gratulatione erant. supplicationes indictæ. Rex, & uxor cum primoribus factionis Deum templa piè, & reverenter salutarunt. procedebant Religiosorum chori psallentium, & grates Deo agentium. cineres Baptistæ Joannis, & liquid reliqui Divorum in urbe colitur, id omne ex ordine pompæ circumlatum per urbis regiones, & sana fuit. Summoto ex obsidione Marco, Aurius, & Spinola, omni penitus simultate deposita, concordēs fiunt. Trepidabat & in Longobardis, & Liguribus Gibellina factio. *in supremum discrimen res venisse: Regem ab victoria insolentem, & elatum trans Apenninum copias ingentes missurum, atque in patente campo acie cum Vicecomite dimicaturum. Si Marcum superasset, aut illum in custodiam ex vinculis Genuam mitteret, aut Padum transgressus omnia Mediolanum usque populaturum; nullasque esse copias, quæ illi resistere possent: populos Circumpadanos, cum profligatum bellum foret, respectu pristini imperii ad Robertum defecturos. ita Matthæum, & socios in suis defendendis occupatos, nequaquam de sublevando, aut restituendo in patriam exule vires, aut animum habere.* Dum his sermonibus talia jactantur, Legati, externæ opis gratia implorandæ in Siculos, & Constantinopolim mittuntur. Perstabat in animo Friderici ira, & ulciscendi Roberti cupido: quamvis dum bella componuntur sororem illi in matrimonium tradidisset. societatem, & amicitiam cum Andronico patre iniri in primis curabat Theodorus, qui nuper ex testamento avunculi Montem Ferratum obtinuerat. ita duo Reges Fridericus, & Andronicus haud inviti in societatem gerendi belli adversus Robertum veniunt. Præterea Joannes Henrici filius, idemque Boëmorum Rex: tum quicumque in Italia Henricum sequuti fuerant. hi omnes Matthæum, & extorrem Ligurem fovebant. *Peritiam à Venetis pecuniam communiter ab Andronico, & Matthæi, & oratoribus invenio: siquidem in actis Senatus adhuc responsum manet, quod Patres Veneti dedere religioso viro Cisterciensium religionem professio, quem Matthæus cum Paleologi oratoribus Venetias miserat; Venetos ob antiquam, & magnam cum Matthæo amicitiam illi morem gesturos, in iis præcipue, quæ ad Regnum tuendum pertinerent. Ceterum, pecunia si qua publicitus servaretur, eam ita obstrictam esse, ut nisi sæpius in curiam vocatis Patribus, rogatisque sententiis erogari extra usus publicos non posset: neque pati erarium in præsens aut largitionem, aut pensionem aliquam pecunie: & si vectigalia, & portoria urbis magna forent: tamen quia Turcæ, trajecto Hellesponto, oram Thraciæ, & Græciæ continuis excursionibus atque populationibus vastarent: assatim militibus, & classiariis stipendia ad eam tuendam persolvere oportere. quare ignoscant Matthæus, & Imperator si pecuniam denegamus.* Honorifice in eo Senatus decreto Veneti de Matthæo loquuntur; quippe significantes aliquid beneficii intercessisse. Quid enim tantum honoris illi deferrent, aut ambitiosa excusatione uterentur; nisi eos Vicecomes singulari beneficio promeritus foret? Ut supra memoravi, sub annos Domini ducentos nonaginta sex Venetus, & Genuensis navalibus præliis pene ad occisionem decertarant: componendæ inter eos pacis Bonifacio Pontifici, & Philippo Francorum Regi arbitrium primum permittitur. sed flagrantibus ira animis, frustra à Pontifice, & à Rege de pace actum fuit. Matthæus mox inter eos disceptator assumitur, qui, ut erat utriusque animorum prudens, extemplo haud ini-

A) quis conditionibus finem armis imposuit. ita deinceps Ligur, & Venetus prudentiam Matthæi maxime admiratus illum præcipuo in honore habuit. Levata obsidione Genuâ, Marcoque trans Apenninum summoto, res Guelpha in Liguribus satis à vituta existimabatur. Ergo dum exules auxilia implorant, novasque faciunt societates, Robertus in Gallias proficisci constituit: triremes septem parantur, tum onerariæ aliquot naves ad commeatus devehendos; si præsidia adversus hostilem classē comportari oportuisset. Tertio calendas Majas ab Ligustico littore solvit Avenionem petiturus, relicto custode urbis, & defensore factionis cum ingenti equitatu, & peditatu Ricciardo Gambateisa, quem supra transcendisse Alpes narravimus. Scribit quidam, *classē multarum navium à Roberto, post Marcum, & exules fugatos, imposita multitudine mercenariorum militum de portu Genuensi ad obsidendam Savonam emissam*, atque inter navigandum oppidulum quoddam exules, qui Savonæ erat accurrentes continuo recipiunt. ita classis nulla re edita, & sine effectu Genuam reversa est. Gibellini vero, navigante in Gallias Roberto, Savonæ triremes sex parant, & instruunt. Conveniunt eo littoris accolæ factioni addicti. diluculo solventes Genuæ portum invadunt. Stabat forte in anchoris oneraria navis mercibus plena, in Britannos, & ad Rheni hostia navigatura: eam intercipiunt, & ad Illicis castrum in orientale littus deducunt. Interea Marcus eorum fines populatur, qui cis Alpes ditionis, & imperii Roberti erant. noctu Astenes aggressus est. In fossam urbis jam quidam sub ortu solis descenderant, valloque refracto, urbem ingrediebantur. accurrere oppidani, moeniaque ascendentes dejiciunt. Erant cum Marco exules, cum quibus conjuraverant cives quidam, Marcumque vocaverant, ut illius præsidio domo pulsi in patriam reducerentur. detectis insidiis, atque dolis, Marcus in Alexandrinos revertens Gamalerium (hoc oppido nomen est) per vim cepit. D) jam ad Matthæum Veronensem auxilia venerant, ceterique Gibellini proceres, pro facultate, & opibus, milites miserant. iustus erat exercitus, reparatæque vires. Marcus Dux eligitur, & haud cunctanter superato Apennino in Porciferæ vallem descendit. Obarmaverant Savonæ, & in propinquo littore extorres duodeviginti triremes, quibus Conradum Aurium præfecerant. Tertio nonas Sextiles solventes ex adversum portus in anchoris consistere. adversarii naves instructas etiam, & ornatas habebant. eadem utriusque classis signa; ex muris quoque eadem vexilla cum imagine Divi Georgii ostendebantur. tunc ancipiti hoste ab terra Vicecomite, à mari ab exulibus Genua premebatur: & quod atrocissimum erat, miseri cives inexprabili odio agitati, de vita potius quam de principatu, & statu rerum dimicabant. Suburbana ad promontorium usque Phari pertinentia Marcus cum peregrino auxilio, & manu exulum obtinuerat. Guelphi turrim, quam disjectam diximus, opere, & munitione temporaria reparaverant, ut in eam recepti ingruenti adversario resistere valerent. ita munitionibus ad repentinos incursus uterque defensio, alterum telis laceſcebat. Inter hæc classē in littore urbano Guelphus instruit, cui Gaspar Grimaldus præficitur. hic statim sublati signis, ad extremam molis partem, ubi flatio ab Euro, & Austro tuta habetur progreditur. onerariæ fere erant triremes, quas catenis ita obligaverant, ut connexæ adversariorum incursus sustinerent. oneraria præterea dejicitur navis ingentis magnitudinis, quam sagittariis, & navali turba oppleverant. tali modo parata classē, appropinquantes hostes postredie adoriri statuerant. Præoccupavere consilia, & conatus Gibellini: namque pridie ejus diei sex celeres naves longas instruunt, expeditosque propugnatores imponunt: tum à cetera classe digressi, tres hostium triremes invadunt.

Impetum regimes, & navales focii ægre sustinebant; jamque opprimebantur: ita partim in mare se præcipitant, quorum major pars in propinquum littus evasit: alii cum navibus capti ad hostilem classem adducuntur. obfuit concatenasse naves. distabant paulo longius; neque expediri, aut à remigibus incitari absque molimine, & mora potuere. amissis navibus, cetera classis in angulum portus reducitur; & ne repentino incurfu opprimi posset, circumcluditur. eadem item die terra pugnatum fuit. juga, & arcem Prædis; tum propinqua prætoria aggrediuntur exules. loca præsidio munita erant. post acrem pugnam Gibellinus, amissis multis, rejectus est. inde turrim quam nuper à Guelpho instauratam diximus, oppugnare nititur. defendebant eam Guelphi. constans erat obsidio. nulli commeatus importari, aut remedia vulneratis afferri poterant. præterea solvenda obsidionis nulla via erat. ita custodes magna ex parte faucii, alimentisque defecti, turrim per conditiones Gibellino dedunt. tunc Guelphi in jugis Peraldi supra templum Divi Barnabæ castellum excitant, quod Castellatium dixere, nomenque usque in hæc tempora durat. exules quoque ex adversum intra conjectum sagittæ in imo jugi ligneum castellum extruunt, opportunoque præsidio muniunt. ita tutus uterque præsidio loci utrumque sagittis, & saxis infestare non desistebat. Quod è ligno confectum erat castellum, lapide deinde constructum Bastiæ appellationem tenuit. ita fere per Septembrem mensem in Suburbanis, & valle Bisamnis Ligures tum gentili, tum adjuncto mercenario milite se conficiebant: ædificia præterea, & operosa prætoria, ardentibus in vindictam animis, subversa fuere. ad portum Delphini per eos dies cædes facta est. Portum Guelphus occupaverat, ibique duas naves frumento, ac commeatu onustas habebat, navigationi tempus opportunum expectans. Exules cum id rescivissent, naves, expugnato portu, intercipiunt. cecidere utrinque plurimi. domus circa portum positæ spoliatur, atque incenduntur. ita per totam fere hyemem à mutuis detrimentis Ligur non vacavit. Dum in littore Ligustico Marcus Vicecomes Genuam, & regale præsidium obsidet, Baucius, quem Rex Cisalpinis amicis, & subditis præfecerat, suo præsidio, & voluntariorum multitudine nixus oppidum in radicibus montis, quod Novas appellant, incertum vi, an voluntate colonorum? obtinuit. tum vero postridie calendas Decembres eam partem Alexandriæ, quæ trans Tanarum accolitur, prodente Bonifacio ab Alice, recepit, Bergolium dicitur; de nomine videlicet veteris vici, quem ante conditam Alexandriam coloni tenuerant. Gravior in dies Genuam obsidio premebat. Circumventi erant ab terra, & classe Guelphi; atque præ inopia victus; cum absumpta cetera essent, equis, mulis, & id genus sarcinariis jumentis vescabantur. Levare famem difficillimum erat; repellere exules, aut viam ad convehendos commeatus aperire non licebat. auxiliarii milites ad exules undique confluebant. Mittitur interim Simoninus Turrianus Valentium cum sexcentis equitibus. nullus illi obviam ire, Bergolio recepto, poterat: tum per pontem trajecto exercitu, Lomellinum omnem agrum, & eos vicos, qui inter Padum, & Ticinum accolluntur, excursibus populatur. Hoc ideo faciebat, ut Marcum ab opprimendo Ligure ad sua tuenda averteret. Ceterum Luchinus Matthæi filius in prædatores effusius omnia vastantes irruit, multoque præda onustos cecidit; alios spoliatur. Turrianus fugiens Bergolium repetit. Baucius occubuit, de cujus cæde scriptores variare video. In annalibus Mediolanensium proditum est, *cum Padum Regii trajecissent, & à populatione prohibiti ad fluvium cessissent, Baucius Bergolium se recepit.* Inopia tunc Ignorum laborabant oppidani. in lignationem itaque ad propinqua nemo-
ra is exiit. Forte Luchinus Vicecomes adversus li-

gnatores profectus erat: pugna committitur, humi prostratus Baucius occiditur. Captus est Bartomolus illius nepos, qui mox Mediolani in custodia diutius retentus fuit. Ceterum Ventura scribit, à *Marco Regio devictos, dum ad Montem castelli, sive populationis, sive lignationis gratia Bergolio egressi forent.* Agebat tunc forte Marcus Alexandriæ; & priusquam Baucius propinquos colles conscenderet, campestri in loco pugna facta: ibi amplius viginti vulneribus is confossus cecidit. petenti Astensi corpus concessum. Luxere hominem viri pariter, & mulieres; namque exulum, & adversariorum vim, & injurias frequenter is propulsaverat, & à populatione coercuerat. Ergo honorificè ob virtutem, & beneficia, quæ populis contulerat, Astæ sepultus fuit. Ego magis illis assentior, qui à *Luchino casum hominem* scribunt: nam Marcus in obsidione Genuæ persistebat, quam relinquere ex usu tantæ expeditionis non erat; præsertim cum id temporis fame urbs laboraret, & sub ipsis mœnibus assidentes Gibellini adversarios acriter premerent. pugnae item, erumpente in stationes Guelpho, frequentes fieri. Ad montem Bernardi, & Peraldi pedites Guelphorum ascenderant, jamque juga tenebant. irruente adversariorum equite, & pedite multis occisis, dejiciuntur; & haud ita multo post octo exulum triremes urbano littori continenter obnavigantes duas naves in portu aggrediuntur, quarum alteram injecto incendio, cremavere; altera absumi non potuit. propinquæ triremes, & cetera navigia præ metu ingruentium adversariorum à remige, & defensore desertæ capiuntur. Hac ignominia maxime irritata plebes fuit; quod sub oculis naves consumptæ, aliæ etiam captæ forent. damni præterea impatiens Spinolarum, & Auriorum domos invadit, direptasque succendit. Atrox visâ est ultio, vel magis crudelitas: ita plerique ad extinguenda incendia accurrere. Verum priusquam remedium malo afferri posset, domus conflagrarunt. Scribit Ventura, *ruina, & direptione adium non exsaturatam plebem ad proscribendos cives animum convertisse;* quo furore circiter duomillia civium proscripti fuere. Mari per ea tempora potius prædonum, quam hostili more damna sibi invicem Ligures inferebant; nam nunc per littora excurrentes, prout naves, aut triremes nacti erant, eas expugnabant, prædam secum auferentes: alias adurebant. Advenere per ea tempora decem Guelphorum triremes mercatoriæ à Bisantio, quæ præter merces frumenta etiam, & commeatus advexere. ea res plurimum obfessos sublevavit: premebantur inopia rei frumentariæ. vix octoginta frumenti modii ex descriptione in urbe reperti erant. adjiciuntur decem triremibus sex & viginti, quarum Præfectus Raynaldus Grimaldus Savonam versus navigat. Exules classem instructam habebant, portumque, nescientibus adversariis, ingressi ex adversum urbis consistunt, mœnia oppugnant. spem conceperant per vim potiundæ urbis. resistebant fortiter urbani: ita ab oppugnatione discedentes naves sale onustas diripiunt. mare infestum omnibus erat. maritimam oram domestica classis populabatur. Externus prædo Liguri consociatus, & in altum profectus quancumque navim obviam habuisset, eam sine discrimine diripiebat: neque cessabant à terra pugnæ, dum edita montium ille expugnare, hic defendere nititur. flagrabant in vindictam animi, & nisi cæde ingenti facta, à certamine discedere neuter volebat. Per ea tempora ex auro nummus percutitur, qui tertiam partem, & interim quartam ejus valeret nummi, qui Florenus à Florentini populi nota dicitur. ita denarius aureus in tres partes, magno ex usu solvendæ mercedis, emendarumque rerum divisus fuit. asses præterea ex ære, quibus minimum argenti mixtum esset, feriuntur. nota griphorum ex una parte: inde griphoni dicti: ex altera vero crux expressa; hodieque, quantum accipio,

pio, in Appuanis Liguribus pueri, ceu ad casum aleæ, asses in sublime iactantes crucem, aut griphem exclamant. Inter hæc Fridericus pro societate cum Vicecomite, & sociis instituta, in Sicilia quadraginta naves longas instruit, atque parat, quæ ad oram Ligusticam Gibellino auxilio venirent. exules item Savonæ viginti triremes instruxere, quæ adventanti Siculo conjungerentur; debellataque, si quam in mari hostilem navim nacti forent, quicquid littoris Guelpho studeret popularentur, & propius Genuam accedentes adversarios per iniquas condiciones ad deditionem compellerent. Ceterum qui in urbe erant rati, magis ex usu suo inimicam classem longius à littore patrio summovere, naves partim onerarias, alias actuarias expediunt, impositoque Præfecto, ut in Siciliam versus navigaret mandant. Insula est ex adversum Campani littoris Pontia nomine. huc forte utraque classis applicuit. facile erat congregi. à pugna utrique abstinere: quippe periculum navalis certaminis facere non ausi. Gibellinus numero navium, & virtute militum præstabat. Ad suburbanum itaque littus, & in ipso portu graviores cladem inimicos accipere existimavit. ita subblatis anchoris, vela facit, protinusque in conspectum patriæ adnavigat. Insequi Guelphus noluit: namque remigibus, tum navalibus sociis adhuc stipendia soluta non erant: cibaria præterea deerant: quare Apulus, & Calaber qui in classe merebant, in terram expositi ad suos quisque dilabuntur. nudata classe, metu hostium Guelphus Genuam non rediit. Inter hæc Matthæus, ut opes Roberti, & Guelphorum undique oppugnaret, Castrutium Intermellum, qui nuper Lucam per tumultum obtinuerat, magna pollicendo, etiam respectu factionis, ad bellum concitat. hic continuo tum tumultuariis copiis, tum etiam milite conscripto, quantum maturari potuit contra foedus, & conventiones cum Florentino initas, primum vicinos Hetruscos, qui in foedere, & amicitia Roberti erant, hostiliter invadit, ferro, & igni cuncta evastans: mox in Ligures Apuanos arma convertit. Jam oram omnem maritimam, quæ ad Orientem vergit, & si quos repugnantes offendisset, eos primo impetu debellaverat. agebat secum ultra duodecim peditem millia: equites vero quingentos. in extremo discrimine Ligures Guelphi erant, si propius Genuam Castrutius accessisset, & Marco Vicecomiti, atque cum exulibus conjunctus foret. Genuæ trepidatum tunc legimus: nam præsidium intra moenia haud validum erat. conscenderat juvenus triremes; in muris, & urbano milite spes parum firma erat. ita fauces montium, qua hostis irrupturus erat, munitionibus firmare, & interim obstruere parant. ad maturandum opus accessere nobiles matronæ, & Sacerdotes. ita brevi calce, & lapide murus exstruitur. propugnacula circa urbem, & in portu; tum etiam turres excitatæ. excubiæ in moenibus, & ad custodiam portus dispositæ. Interea Florentinus ne plus hostium, afflicto in Liguribus Guelpho, adversus se fieret; neve socios, & amicos; quando conjuncta pericula forent, deseruisse videretur, milites comparat. accessere vicinarum urbium auxiliares. ita cum iustus exercitus esset, Lucenses fines adortus ingentia damna pupulatione, & excursionibus infert. Castrutius, relicto Ligure, ad sua tuenda revertitur. Inter hæc Siculorum, & exulum classis ad Bisamnis littora appropinquavit, expositisque in terram militibus, munitiones subvertere aggrediuntur. secum ferebant tabulas, ligna, arundines, & id genus materiam, quæ complendis fossis idonea existimabatur. Duplices, atque interim triplices erant fossæ; quarum primam, injecta materia, transgrediuntur. occurrentes adversarii fortiter resistunt. præfens periculum viros, & mulieres obarmat: religiosi viri etiam pro patria arma sumunt: pugna nunquam intermissa ab hora diei tertia usque in solis oc-

A casum fuit. urgebat uterque alterum cedenti terribilis, ultimam fatigationem, aut noctem expectabat. anceps certamen stabat; neque ab ulla parte recurrebatur. In eo momentum pugnae positum videbatur: nam qui superior fuisset, is aut patria potitus foret, aut compulso ad quas voluisset condiciones adversario, finem armis fecisset. Multitudine sagittariorum superior erat Guelphus. confodiebantur sagittis Siculi, qui multis suorum faucibus, atque amissis, postridie naves conscendunt in Siciliam versus renavigaturi. tunc Guelphus diu obsessus gratulundus totam diem Deum templa salutavit, vota solvit, plausu, atque lætitia, tum piis vocibus gratias Deo agens; moxque Carignanum, quatenus ad Bisamnam pertinet, munitionibus, & operibus cinxit, atque castellis firmavit. Interea Robertus auditum quod suæ, & Guelphorum triremes cum exulibus configere ausæ non essent, pecunias exponit, novasque triremes armat. sexdecim numero erant. eas ab Narbonensi Gallia in Ligusticam oram mittit, quæ iis conjunctæ, quæ præ metu hostium retrofugerant, Genuam versus maturavere, Ligusticumque omnem tractum excurrentes, si quid Gibellino favebat, id omne diripiunt, & succendunt. Claverum oppidum cultores adversariis impares deserunt: inde ad orientale littus navigantes munitiones, & opera, quæ Gibellinus ad arcendos hostes fecerat, demoluntur. Marcus interea milites, atque exules à pugna, & à certamine ad opera traducit; videbat, obsidionem novo præsidio, & classe aucta, diutius tolerari posse. Templum sub nomine Divæ Sabinæ muros attingit: inde clam cuniculum agere instituit; jam aliquot dies, & noctes cum in opere essent terram egerentes, propius urbem accesserant. Re cognita, Guelphi expavere, ita veriti, ne subruto muro, facta in urbem via foret, fossam & ipsi intra murum è regione ejus operis, quod adversarii egerant, ducere instituant: & cum ad eam altitudinem pervenissent, quanta cuniculi esse poterat, pluribus locis admotis auribus, sonitum fodientium captabant: quem ubi acceperunt, aperiunt rectam in cuniculum viam: neque id fuit magni operis: muros suffoderat Gibellinus, atque subjectis tignis, fundamenta suspenderat: ibi cum opera commissa essent, atque à fossa ab urbe in cuniculum adversariorum pateret iter, primo ipsis ferramentis, quibus in opere usi erant, deinde, cum celeriter armati subiissent, occultam sub terram edidere pugnam, quæ tamen segnior deinde facta fuit: nam Guelphi, ut sine vulnere, & sanguine instantem adversarium conficerent, aquam per fossam in cuniculum deducunt, rati, futurum ut diluvio opera subverterentur, magnæque pars pugnantium obrueretur. Cessere continuo inundationi qui in cuniculo erant. furculas tamen succendunt; ita murus absumptis sustentaculis, rectus, & integer desedit, quali propugnaculum eorum, qui in civitate erant, atque oppugnantibus oppositus. illum continuo Gibellini disjicere aggrediuntur; & haud ita multo post divisus, atque discussus procubuit. Prostrato ea in parte muro, trepidavere Guelphi. aditus in urbem adversariis factus erat. statim in agmen coacti exulibus se opponunt, ascendentes dejiciunt. urgebant adversarii: acius eo in loco sine respiratione pugnabatur. In suo quisque loco obnixus urgentes sustinebat; uterque debellatum in ea oppugnatione cernebat. Guelphus fortissime resistit, neque à certamine cessit priusquam murus alter pro diruto obstructus fuit: nihil arcendo hosti prætermisum fuit. Jam superior in prælio Guelphus erat: ita ab oppugnatione exules desistere. *Obrutos aquis, & cæco mare multis exulum occubuisse* traditur, fuitque inceptum illud conatu, quam effectu gravius. Marcus cum frustra multa tentasset, re infecta, exercitum cis Appenninum reduxit. Scribunt quidam, *post hunc discessum à Matthæo cum Andronico, & Siculorum Rege* foedus,

foedus, & societatem initam fuisse. Ego magis iis assentior, qui superiore *jactura ad nova foedera, peregrinaque auxilia Matthaeum confugisse* tradunt. Hac in parte nescio, indiligentiae Blondum, an magis invidiae arguam. Delibat nescio quid de dissidio, & intestino certamine Ligurum; & item de adventu Roberti ad socios. De Marco Vicecomite, cujus ductu bellum illud Ligusticum gestum fuit, nullum verbum facit: sed magis videtur gloriae Vicecomitum invidisse. verba adducit Francisci Petrarcae ex epistola ad Ducem Genuensem, in qua mentio clara, & aperta de auxilio Mediolanensi habetur: ita excusari non potest, cum semet facti ipse admoneat. sed majus erratum deprehendimus. confundit tempora, & rerum ordinem pervertit; tum etiam omnia in transcurso enarrat, ut vix queas discernere, quibus Ducibus, quibusve locis gestae res fuerint: vix res simul coherent inter distantia temere: & adeo abruptus sit transitus, ut lector fere in omni expositione ambigat. praeterea de foedere inter Gibellinos isto nihil loquitur. in Matthaeo autem, & filiis peregrinus videtur: & dum sibi non constat, fidem conscriptioni suae abrogat. scribit, *hanc pugnam in specu factam, cum Robertus Genua esset; qua victoria Regem elatum Savonam navigasse, urbemque, Gibellinis pulsas, obtinuisse:* cum multo ante Robertus in Gallias profectus foret ad Pontificem Joannem, neque Gibellini mari cesserant; imo onerariis navibus, atque triremibus quocumque libitum fuisset adnavigabant, adversarios consecrantes: Savona in exilium potestate erat: mutuis quoque detrimentis uterque, nunc praedonum more, nunc aperto in mari certamine se conficiebant. Haec particulatim referre à praesenti expositione non admodum alienum foret, nisi ad finem propositae narrationis festinaremus. Interea Robertus instare apud Pontificem, ut Genua obsidione liberaretur; nam etsi mari, terraque aliquando superiores Regii fuissent; aegrè tamen obsessos adversus Marcum, & exules durare posse: ita quacumque via succurrendum illis esse: Pontifici melius visum, ex auctoritate Apostolica, & metu execrationum, potiusquam armis Vicecomitem ab obsidione amoveri. Mittitur Beltrandus, cui cognomen à Porreto erat, sub titulo sancti Marcelli Presbyter Cardinalis in Cisalpinos Gallos. Astam cum venisset, confestim Matthaeo, & filiis execrationes horribiles minari coepit, nisi Genua, & finibus abstineant. adhuc Matthaeus, ecquid rei Pontifici in Liguribus; quando Genua, & ceteri Ligures Imperatoriae potestatis, & ditionis, non Pontificii juris essent. Tunc Pontifex Regulum de Galliis ad Italos mittere constituit. Regis Francorum frater erat, Philippo nomen. hic accepta à Roberto pecunia milites conduxit, Alpesque transgressus Astam primum venit. octingentos equites secum ducebat. substitit aliquantisper in Subalpinis, donec Carolus Caroli fratris filius, & Bardus Margolius Comes Rosii (Gallicas hi catervas agebant) Alpes transcendissent. Forte per id tempus Vercellenses gravi odio, & civilibus armis agitabantur. Simon Advocatus, cui Collobiano cognomen ab oppido erat, inter Guelphos princeps, & domi potens Ticioni infestus alteram factionem patria, ac finibus pellere annitebatur. Gibellinos Matthaeus Vicecomes adversus impetum, & arma Simonis defendebat. Inter haec Florentini, cognito, quod ab Alpibus copiae Francorum adversus Vicecomitem descendissent, milites conducunt. accessere sociorum praesidia, supra mille equites coacti erant; peditum major numerus. hi ad invadendum ab Apennino Vicecomitem mittuntur, aut Philippo, si possent, conjungerentur. Ceterum Philippus, petente Guelpho, qui Ticioni resistere non poterat, Vercellas, non expectatis sociorum, & praecipue Hetruscorum auxiliis, contendit: jam enim copiae ex Hetruria iter ingressae erant. Homo natura alioquin fe-

rox, & audax; tum robore fretus non satis explorata locorum natura, atque situ, inter Novariam, & Vercellas in loco, quem Marceram vocant, castra locat. Oppugnabat Matthaeus Advocatos; venerant ad eum auxiliae copiae Calstrutii, Aretinorum, atque etiam si qui Caesarum partes sequuti fuerant, hi quos possunt milites summittunt. Erant tunc in Italia Germani, qui sub Henrico stipendia fecerant. hos Matthaeus ad se traxit. Luchinum, & Stephanum exercitui praeficit, atque obviam Gallo mittit. Galeacius, ne in discrimine patris cessaret, Placentinorum juventutem raptim armat, & quos potest milites contrahit, atque ita subitario comparato exercitu, Vercellas verius ad fratres maturat. Philippus ubi adventare hostem cognovit, ultra progressus, aciem continuo patente in campo explicat, statim conficiendus, nisi certamen Vicecomites detrectarent. biduum sine proelio uterque peregit. Praestabat Vicecomes militum numero, locorum praeterea prudens, armorumque exercitatio illi major. facile erat, peregrinum exercitum, rerum inopem, fame, & inedia confici: satius tamen visum fuit, conditionibus bellum componi, quam fortunam tentare, aut nudum, atque lacerum Barbarum dimittere. jam commeabant nuntii, per quos de foedere, & pace agi coeptum: conditiones satis tolerabiles utrinque offerebantur: quanquam Philippo deterior res esset. In colloquium itaque Duces veniunt. tunc prior Galeacius:

„Cur patrem, & nos armis laceffas, regnoque exturbare pares, nihil causae subesse video. nulum est odium, nullae similitudines. non res raptae repetuntur; non injuriarum; non maleficium intercessit, quod bello ulcisci velitis. imo longa jam amicitia nunquam intermissa, sed beneficiis aucta. Reges Gallorum pater, & nos filii summopere coluimus: tum vero quam gratum Regi fuerit, quod, ceu ex illius opinione, atque observantia res nostrae penderent, in Gallias ad illum salutandum venerim, declarant munera, & militaria ornamenta, quibus à patre, spectante fere universa Gallia, donatus fui. Fratrem Carolum, qui nunc regnat, amplius viginti abhinc annos Romam piaculi gratia petentem, quo scilicet tempore primum venia criminis & expiatio scelerum templa Apostolorum religiosè salutantibus à Bonifacio Pontifice concessa fuit, pater Mediolani honorifice, & comiter excepit, muneribus abeuntem prosequutus: ad iter quoque opportuna abunde suppeditavit: cur arma inferas, inimicis auxilio sis, finesque nostros hostiliter invadas; quando nullo nostro crimine ad hoc concitatus fueris, quod hic cum tua bona venia dixerim, injurius profecto es, & iniquus: nisi forte dicas, Pontifici summo parendum esse, quo jubente Alpes superaveris, nos quoque adoriaris. Sed quam injusta sint arma, quamque ab justitia, & foederum jure Pontifex absit, attende quaeso. Affectat hic Italiae Regnum, nullum honestum titulum cupiditati praetendens, atque per civilem sanguinem, nefariaque arma nos domo, patria, & principatu evertere conatur. procuratorem in Longobardis Henricus Imperator nobis tradidit, Caesarum ornamentis legitimo, & solemniter titulo Romae per Legatos, annuente Pontifice, insignitus. Mortui acta idem Clemens Henrico amplius annum superstes nunquam rescidit. Ita permissu Pontificis, & jussu Caesaris rem Mediolanensem, & ceteras urbes procuramus. Genua ex torres, quos popularium insidiae, & maleficia domo ejecerant, opem nostram implorantes juvimus: ad peregrinum Regem, externaque auxilia altera factio confugerat. pro dominatu hi: exules pro recuperandis suis, atque domo certabant, tot caesis in suburbano littore, & in mari, tot cladibus, uterque Ligur se affecit, ut magis de vita, quam de potentatu dimicatum dicas. Durat insanabile odium.

odiu. dominandi amor, & rabies tot cædibus, tantis detrimentis saturari non potest. Postremo execrationes detestandas nobis ille Pontifex minatur; & qui pastor in Sede Petri sibi commissum gregem custodire, & servare debet, is nos ab se rejicit, & à congregatione piorum velut abominatos exterminat. parere illius mandatis parati sumus: si inimicorum libidini nos subicere, principatu deijcere, nomen fortunæque nostras perdere non studeret. Hanc infestam Pontificis iram, & sævam dominandi cupiditatem non urbes cædibus, & exilio civium fere exhaustæ, non funesta bella, in quæ populos concitare non desistit, non denique quod supplices aliquando veniam, & pacem petiverimus mitigare, aut lenire possunt. illi obtemperare parati sumus: modo tuto domi vivere liceat; & ne in ordinem deducamur ad eorum ludibria, qui patrio solo nos evolvere conantur: atque ut credas, quæ nunc dico re ipsa præstare velle, jam fratres, aut te disceptatore de iis, quæ in controversia cum Pontifice sunt, uti volumus: auctoritatem vestram nunquam diffugiemus, statuti eo quod censueritis. & de impotenti Pontificis ira satis dictum. Ad te nunc Philippe me convertito. An non vides, in quæ te pericula præcipitaveris, dum fociis properantius opitulari studes? In terram magis inimicam, quam pacatam venisti. castra parum curiose posuisti. infesta habes omnia. nostræ circumstant acies altero tanto majores, quam tuæ. rerum te premit inopia. nobis commeatus abunde suppetunt; neque mandati, neque abeundi copia tibi adest. licuit ut primum in conspectum venimus, si acie decertatum foret, exercitum profligare, castra expugnare, atque diripere, denique tuos istos, quos ignavos, & tumidos loca ignara faciunt, partim contrucidare, alios captivos ducere possumus etiam sedendo, & sine ferro bellum conficere. sed respectus gentis, & observantia in fratrem nos reprimit. nihil hostile adversus te molimur: satis superque effectum ducimus periculi te admonere, ut nostro beneficio milites, & te servatum dicere possis.

Agnovit Philippus generosum, & mitem Vicecomitis animum, & quanti amicitiam Gallorum faceret, seque, & suos omnes ad occidionem periclitari; neque nisi in Vicecomitis mansuetudine, atque clementia servari posse. Satiuste itaque visum est, in Gallias nullo suorum amisso, regredi, quam cum eo acie dimicare, cujus facilis, & certa victoria foret. Ita superbus Barbarus, nulla re insigni edita, relictis Vercellensibus, trans Alpes abiit. interfecti tamen plures fuere: nam juvenus de finitimis urbibus erumpens, alii eos premendo, qui errore viarum ad iniqua loca pervenerant, alii novissimos carpando, hos spoliaverunt, illos interfecerunt. Scribit quidam, quod certè haud multum à vero abest, *muneribus, & auro captum Barbarum potiusquam quod sibi, & copiis diffideret, retro in Gallias cessisse.* Gens sane natura auri avida, spe prædæ, & rapinarum libidine in Italiam descenderat. opinio etiam exiit, fraude Bernardi Margolii Philippum impulsam, ut laboranti Guelpho, non expectatis sociorum auxiliis, succurreret. prospiciebat is utique, alterutrum futurum, ut aut succumberet, si cum hoste manus confervisset, aut cladis metuens, & circumventus turpiter abiret. Exulaverat paulo ante patria, & finibus, jubente Carolo, Margolius: quare recentis contumeliæ memor, ut primum vindictæ copia oblata fuit, in fraudem, & ultimum discrimen Philippum induxit. Proditum est litteris, cum paulo acerbius Philippus increparetur, quod nulla commissa cum hoste pugna, imo vero quod ne hostilem quidem terram attigisset, trans Alpes cessisset, hoc tantum eum respondisse, *non advenisse ad tempus sociorum auxilia, pecuniam præterea ad solvenda militibus stipendia non datam; ea propter coactum inimica terra*

A discedere, magisque ex usu belli, & Pontificis dignitate fuisse, servato exercitu, retro abire, quam ad incertum eventum conflixisse. Discedente Regulo, Simon Advocatus peregrina ope destitutus Colobianum oppidum armis, commeatu, & valido præsidio munit, ut esset quo tuto ab hoste se reciperet. Matthæus Ticionem enixius juvabat: Advocatorum domos, & regionem quam illi incolebant, circumfederant Ticiones. Interfecta erat urbs, clausique aditus, neque foris ingredi, neque egredi quisquam valebat. Famem sentiebant obsessi, vix amplius durare poterant. forte id temporis Astam Gotolani equites venerant: acceperunt Guelphi, qui à popularibus domo ejecti erant. frumenta, & cibaria undique corrogantur: ea plaustris, & jumentis imposita Vercellas ducere parant. fit eis obviam Vicecomes cum expeditis militibus. pugna acris commissa est. annitebantur Gotolani, ut languescens fociis, & inedia maceratis, alimenta afferrent. Contra resistebat Vicecomes, ne frumento, atque commeatu in oppidum recepto, longior obsidio frustra foret. cædes facta est ingens. trecenti, & amplius ex Gotolanis ceciderunt. complures capti: hoc prælio Colobianorum animi adeo infracti sunt. qui circumfessi erant auxilia ab externis non sperabant, ut statim partem oppidi, quam munitam tenebant, Luchino, & Stephano pactione tradiderint. Erant cum Simone, & Episcopo mille, & quingenti viri; ex his duodecim vincti Mediolanum cum Simone adducti in arctam custodiam traduntur. Episcopus in Prætorio urbis conclusus novo commento elabatur. sub noctem, vino largius epoto, custodes obdormiverant. tunica paleis, & stramento oppleta inter dormientes collocatur. ipse per latrinam, fopitis custodibus, evasit: amici descendentes lintre excipiunt, atque incolumem Bugellam (hoc oppido nomen est) perducunt. Potitus loci Matthæus Ticioni plurimum indulgit. ea gens in eam rabiem prorupit, ut muros urbis diruerit, altas Advocatorum domos solo æquaverit: ita sæviente ira magna ex parte urbs deformata fuit. Ceterum Galeacius, fugato trans Alpes Barbaro, receptisque Vercellis, Placentiam versus revertitur. Florentinorum, & sociorum copiarum, quamvis Philippus nihil clari edidisset, tamen ne nihil egisse viderentur, in fines Placentinorum irrumpunt. Ducebat Jacobus Cavalcabos. oppidum, cui Bardo nomen est, circumfident, atque oppugnant. Turrianus Patriarcha ab Aquileia veniens propius Padum confederat. haud parvam manum tumultuariorum militum secum agebat; & nisi fluvio interclusus fuisset, Galeacium ad sua tuenda avertisset, aut Hetruscorum copiis conjunctus populationibus Placentinos vexasset. Galeacius interim, ne duplici hoste premeretur, obsidentes Bardum aggreditur. Sustinere aliquandiu impetum Hetrusci, verum, superante multitudine, terga dant. haud pauci in ea pugna cecidere. Cavalcabos occiditur. Leonardus Arcellus captivus Mediolanum mittitur. ab hac victoria Galeacius statim cum victore exercitu Padum trajicit, ac protinus Cremonam aggreditur. ducenti equites, qui in præsidium missi erant, ubi circumveniri se ab hoste viderunt, continuo fuga sibi consulere. Galeacius paucos post dies, prode fatione Poncini, urbe potitur; & haud ita multo post Crema in ditionem Vicecomitis venit.

F Interea Pontifex, cum denunciatio execrationum nihil proficeret, perseveraretque Vicecomes in iis oppugnandis, qui in fidem, & ditionem Roberti se dediderant, illum per Beltrandum citari jubet. accessere Mediolanum Sacerdotes Præfecturis templorum clari, Matthæoque denunciant, ut aut in Gallias, aut Astam proficiscatur, causam coram dicturus; quando gravius sit negotium, quam quod per nuncium aut procuratorem agi possit. dies quoque præstituta fuit, intra quam sine fraude, & piaculo Pontificem, aut Legatum adire liceret. Minas Mat-

thæus, & filii contemnere, atque diversam factionem armis persequi. inter hæc peregrinum hostem Pontifex adversus Matthæum sulcat. in certamine de imperio, ut supra diximus, Fridericus succubuerat. Ludovicus nomen, & titulum imperatorium, invito Pontifice, usurpaverat. quam rem Joannes ægre ferens Fridericum hortatur, ut quando in paribus suffragiis penes Pontificem gratificandi regni utri velit potestas sit, nullumque jus in rebus æmulus habeat, in Italiam adversus Vicecomitem descendat: fratri præterea opulentissimum Moguntiae sacerdotium promittit. his promissis motus Fridericus, Henricum cum armatorum multitudine in Italiam mittit. Aggregati sunt pollicitatione veniæ voluntarii milites ad duo millia. cum his copiis Brixiam venit eo forte die, quo rami palmarum populis distribuuntur: accessere vicinarum urbium extorres, & reliquæ Turrianorum, qui in Transpadanis, & Venetia exulantes scœnore Sacerdotiorum sustentabantur. pertimuit Matthæus, quod externus & inexpectatus hostis fines invasisset. præterea fremebant populi, quod externo supplicio devoti nullo piaculo, nisi reconciliata cum summo Pontifice gratia, liberari ac resolvi possent. Inter tot curas Matthæus consilium prudens, suis salubre, servandisque rebus idoneum cepit. Nuncios ad Beltrandum, qui de compositione, & concordia agerent, mittit; deinde Fridericum per Legatos monet, „Pontificem „nihil aliud conari, nisi ut Germanos Cæsares ab „Italia amoveat; atque si quid juris in Italos illi teneant, id totum amittant, & pro Germanis dominis Itali mutatos Gallos habeant; id quod rerum procuratio Roberto delegata demonstrat. nam „si Mediolanum caput Gentium ex jussu Pontificis „alius obtinuerit, quam qui Germanorum procerrum suffragiis rerum potiatur, jam majestas, & „jura imperii circumscripta sunt. nullæ civitates, „sive Longobardorum, sive Hetruscorum ad fidem „Cæsaris redigi poterunt. quis debellato Vicecomite, non continuo, aut metu, aut voluntate Roberto parebit? Dic obsecro, ubi ornamenta Augustorum designatus Cæsar accipiet? quis illi se obnoxium profitebitur? quis tributa dependet? „quis adventantem dominum salutabit, & venerabitur? denique quis vestras leges accipiet? quid „non vides, eam factionem, cujus vires, & opes „Pontifex, & Robertus defendunt, & fovent adversus eos, qui Germanorum Regum dedititii sunt, „hoc unum moliri, & facere, ut reges vestri penitus ab Italia moveantur. ita dum iræ indulges, & „vindicare imperium studes, in excidium potestatis vestrae, imperatorique tituli abolitionem pro-ruis.” Movit hæc oratio Fridericum, statimque indicto concilio, quæ Legati dixerant ad proceres refert. Universi dixere, *res, & jura gentis servari oportere, neque Caesarum vires, & amplitudinem projiciendas esse, quas majores auxissent, neque violari passi forent.* Omnibus tunc videri, debellato Vicecomite, ita dimisso concilio, confestim per nuncios fratrem Fridericus monet, ut sub probabili aliquo prætextu exercitum in Germaniam reportet. Scribit quidam, *non tam metu dignitatis diminuenda, aut imperatorii juris amittendi, quam quod ingentia munera à Matthæo recepisset, Fridericum consilium mutasse: pecuniam item Henrico pactam, si in Germaniam regressus foret.* jam Aquileiæ Patriarcha fines Bergomensium hostiliter invaserat, magnamque partem peragrandò populaverat. Oppidani novo hoste territi rebus consulere parabant; nisi Henricus à Brixianis postulasset, urbem sibi dedi; neque prius quam deditio facta foret, in Bergomenses arma illaturum. contradixere Brixiani, urbem sub ditione, & imperio Caesarum esse. Ita, cum nullus adhuc summæ rerum præsit, Friderico urbem tradi non oportere; quando ea ditione ei, qui postea legitime imperaret, fraus fie-

ret. Detrectante Brixiano imperia, Henricus, contractis copiis, Veronam petiit, quem Scaliger comiter, & cum honore maximo suscepit, ditcedentemque amplis muneribus donavit. Magna certe fuit Matthæi prudentia; sive auro pacem à Barbaro redemerit; sive bene monendo illum à Pontifice averterit. inclinare ad fœdera, & pacem Matthæus ferebatur: sed locus obstabat, in quem accedere tuto posset; nam Astæ adversa factio potens erat. quare æquius, atque honestius visum est per nuncios ea à Matthæo postulare, quibus si annuisset, is reconciliari Pontifici, & civitas execrata resecurari posset. Nuntii Mediolanum missi postulant, *ut Matthæus dominationi renunciet, civitas in jus, & imperium Roberti veniat: neque quisquam indignum hoc ducat; quando nutu Pontificis Robertus in Italia vice Imperatoris fungatur, donec is rebus præsit, quem Germani Procere creaverint, & Pontifex auctor fuerit. solvi præterea, & reddi urbibus suis captivos, qui Mediolani custodiebantur. postremo exules Turrianos in sua restitui, eosdemque in administrationem publici negotii consortes admitti.* Conditiones Matthæo non placuerunt: animos præterea primorum offendeabant: ea postulare, & exigere Pontificem, quæ præstare periculosum, & iniquum foret. quod ita Matthæus regno cederet, quod legitimum permisso Henrici obtineret. Tum magis indignari, sub imperium externi Regis, & invisi domini subjici. iniqua Pontificem facere, qui ea usurpet, quæ alterius ditionis, & potestatis forent. in fraudem, & contumeliam Caesarum novum procuratorem in Italia constitui: captivos relaxari sine consensu popularium non licere. recipi in urbem exules nil aliud esse, quam intra viscera bellum geri, defunctasque intestinis discordiis, & certaminibus urbes iterum in cædes, & clades concitari; quando eo malignitatis, & injuriarum ventum sit, ut nulla concordia, nullaque constans pax manere possit: infidam societatem regni, neque bonis spoliatis, & fortunis, domo pulsos, ab infidiis, & fraudibus cessare adversus eos, quibuscum de potentatu dimicassent. Hæc, & talia cum plerique civium obmurarent, nihil certi de compositione, & pace respondetur. Inter hæc Raimundus Cardonus cum equitatu pridie idus Majas Astam venit. Confluxere eo de propinquis urbibus mercenarii milites, & ea juvenus, quæ pro tuenda factione in armis erat. Matthæus adventu novi hostis excitus, continuo Marcum filium Alexandriam cum magno præsidio mittit, qui trajecto Tanaro, oppidum Quadraginta familiarum recipit, Solariensiumque agros conteminos. deprædatur. Cardonus quingentos equites Valentium præmittit, qui in adversariorum fines immissi cuncta pervasunt. oppidum quod Montis castellum dicitur direptum succendunt: diversæ partis puberes juxta & impuberes abducunt. in mulieres, atque infantes quidam defecere. subsequutus haud ita multo post Cardonus, ex itinere Quadraginta familias expugnat, Germanos equites, qui in præsidium loci erant, abduxit; neque prius dimisit, quam merces ingens data fuit. Accessere inter hæc Gallici equites, quos Robertus conduxerat. Ita Cardonus majoribus auctis copiis montem transgreditur, atque statim Occinuanum per ditionem recipit. inde ad Alexandrinos versus, agros omnes, quatenus Tanarus non arcebat, populatur. vicinos deinde Derthonenses adortus magnis detrimentis afficit. trepidabant oppidani: magnitudine detrimentorum nova consilia capere ferebantur. Marcus ab Alexandria excitus quas potuit subito copias contrahit. dilationem vicinus hostis, & dubia populorum fides pati non poterat: ita comparato exercitu, populabundo hosti occurrit, castraque proxime locat. verum acie congregi, & fortunam belli experiri neuter voluit: ita velut se invicem refugientes abiere. Ceperat Cardonus oppidum, quod circiter quinque millia passuum à Derthona abest, Pontem Curoni dicunt,

dicunt, à torrentis nomine, qui ab Apennino diffluens viam Æmiliam interfecat. ponte olim junctum fuisse ruinæ ostendunt. huc loci in præsidium equites, & pedites immisit: simul etiam ut his se opponerent, si quos Galeacius de Placentinis subsidio fratri mitteret. ipse in Vercellenses copias duxit, atque populabundus cuncta, etiam muris circumjecta devastat. urbem Stephanus ex filiis Matthæi minimus cum valida manu custodiebat. egressus portis effusus populanti se objicit. prædam magnam portabant; tum ingentem pecoris, & hominum numerum abducebant. inuictus in prædatores Stephanus prædam, & captivos recipit, longiusque à finibus Cardonum summovet: qui Valentium reversus id Baccienni agri, immixtis prædatoribus, quod inter Padum, & Tanarum est, populatur. tumultus in oppido factus. Oculentior erat in Bacciennis ea factio, quæ Regi studebat: ita sine pugna Raimundus Augusta potitur. in arcem altera factio confugit. Stephanus, cognita Baccienorum rebellionem, ne sui auxilio destituti arcem Raimundo traderent, atque ita Padi accolæ à patre deficerent, copias continuo contrahit suas, & sociorum auxilia evocat. Tumultuarius erat exercitus. quare veritus Matthæus, ne si cum hoste filius conflixisset, in pugna succumberet, Jacobum Isæum, qui tunc forte Præturam Mediolani agebat, cum urbanis militibus ad filium mittit. conjunctis copiis, ambo in citiore ripa confident. jam Raimundus claustra peregerat, ne si qui auxilio obsessis venissent, ingredi valerent: ea Stephanus perrumpere frustra conatus tandem retrocessit. in discrimine sociorum, atque filii periculo Matthæus haud cunctatus Gerardinum Spinulam, qui ea tempestate magnum usum in militari habere ferebatur, ad se accersit, summumque imperium in expeditione adversus Cardonum illi tradit. In Baccienos versus Spinula ire pergit, conjuncto Stephano, & Isæo pugnam initurus, nisi hostis detrectasset. Ceterum Cardonus virtute, & scientia novi Ducis, tum multitudine copiarum perterritus, quamvis sæpe in certamen provocatus esset, rem prælio committere noluit: satis in præsentia actum existimavit, si ita munitiones defenderet, ne hostis perrumperet: tum si qui fluvium transire adniterentur, eos transitu prohiberet. Dum instructa utraque secus Padum staret acies, Raimundus eos Ligures, qui cis Apenninum ab Rege defecerant, immixtis prædatoribus, latè populatur. Matthæus novos milites scribere, & ab iis, qui ad fidem & societatem accesserant, auxilia exigere. eodem tempore pluribus in locis occurrendum hosti erat. coercendus à populatione Cardanus: insidendi præsidio saltus, ne de improvviso Gibellini in Suburbanis circumventi opprimerentur: præterea circumfessos in arce defendere: copiarum vix adhuc suppetebant. veriti itaque Gibellini, ne Cardonus, firmatis præsidio ripis, aliisque adversus Marcum relictis, qui excursions arcerent, ipse de improvviso Genuam accederet: tum, erumpente ab urbe adversariorum manu, ancipiti hoste premente, ad occidionem proderentur, validissima parte præsidii ad tuenda suburbana, defendendasque munitiones relictas, cum uxoribus, filiis, & iis etiam omnibus arreptis, quæ cara habebant, partim navibus, alii terrestri itinere Savonam petivere. post quorum discessum rati Guelphi, & regiarum classis Præfecti suburbana defensore vacua expugnari posse, illa continuo invadentes, restant custodes, vim atque impetum sustinentes, hostemque à munitionibus repellunt: vehemens pugna à tertia diei hora in vespem usque facta est. montem ascendere, castella dejicere, obstructas fauces aperire, in suburbana irrumpere Guelphi enitebantur. contra exules munimenta enixissime defendere: irrudentibus obstare, claustra objicere; ne si Guelphus aut munitiones evertisset, aut præsidia dejecisset, ad comæatus recipiendos via obsessis facta foret.

ret. pertinacissime pugnatum fuit. discedentes ab oppugnatione adversarios infectati exules magnam caedem inter montes edidere: ita non sine magna jactura in urbem Regii revertuntur. *Genua per eos dies tumultuatum comperio; nam plebeji, tum qui mercaturæ, & opificio operam dabant, sæpius ab iis pulsabantur, qui in factione regia potentiores erant, aut illorum studiis obsequerentur. spoliari permulti; tenuiorum bona, & fortunæ interim à valentioribus diripi; palam injuriæ ab opulentioribus fieri, quas ulcisci nemo unus poterat: nullus debitum exigere: appellanti creditori debitor minari, idemque ad tribunal vocatus non accedere: judicia nulla nisi ex arbitrio potentiorum reddi: leges, & magistratus in factione potens contemnere; querelæ graves passim audiri. ad tuenda plebis commoda, cohibendamque factionum licentiam primum tenuior turba in conventicula coit; injurias simul conqueri: quanta foret factionum licentia, quibus nihil exceptum esset, conclamare. conspirat deinde ingens fellulariorum, ac opificum numerus, collegiumque institunt, quod Motam populi dixere. ex eo decem eliguntur, qui ei assiderent, quem Magistrum, sive Abbatem populi vocant; ut quotiens de creditis pecuniis, aut de mercede jus dicerent, provocatio nulla esset: inde judicia abscessa exerceri cœpta; neque litigantes per dilationes se invicem atterere. nullus vel nobilitate, vel magnis affinitatibus, aut clientulorum multitudine subnixus intercedere, quominus judicia ex æquo redderentur. intra triduum, quod pro tribunali pronuntiandum erat, id iudicum ministri libere exequabantur. si quispiam reclamasset, aut adversus sententiam oblectatus foret, continuo ad sonum æris multitudo convocata quod Abbas, & Decemviri statuisent, id ut efficeretur mandabant. ita sine injuria jus in urbe dicer. Creditæ pecuniæ solvebantur. nihil in injuriam creditorum vertebatur; operario pacta merces dabatur, omnes decreto iudicum obediebant. hanc multitudinis licentiam, salubreque tenuioribus collegium Robertus de Gallia reversus ad gratiam potentiorum sustulit. Interea à Beltrando Aicardus, quem Vicecomes à Mediolanensi Pontificatu submoverat, ad urbes Longobardorum delegatur, ut eos fortunis, carcere, & exilio anquireret, qui Pontifici palam contradicerent. Hic quatuor assumptis religiosiis viris, qui pro instituto recentiore eos ad rectam fidem minis, & poena traducerent, qui prava religione populos imbuerent, cæpit quæstiones paulo asperiores de iis habere, qui malæ hæreseos suspecti essent. sed in primis adversus eos gravissima edicta exiere, qui Pontifici non obtemperantes in defendendo Matthæo, & filiis perseverabant. execrationes detestandæ in populos immittuntur: unde quidam cruce rubra signati incedebant: quasi ea nota imperata Pontificum se facturos profiterentur. verum cum minæ, & horribiles detestationes parum proficerent, Beltrandus religiosos Patres, qui Mediolani perpetua Sacerdotiorum magisteria habebant ad se vocat. hi continuo Matthæum adeunt: quis vocet exponunt, abeundique veniam petunt. Matthæus, ne per insolentiam, & superbiam videretur Principi Sacerdotum non parere; simul etiam ut in amicitia, & fide eos retineret, si qui grande nefas putassent Pontifici in eo non obsequi, cum mandatis eos dimittit: quorum hæc summa erat: *Si quid pro tuendo regno, & salutis causa cum offensa Roberti agat, egeritve, id in contumeliam suam Pontifex non vertat. semper Romani Sacerdotis auctoritatem, & imperia privata cuicumque necessitati prævertisse. satis intelligere, quam impium, & nefarium sit illius jussu non sequi, qui secundum Deum non hominibus tantum; sed inferis imperaret: & ne nihil actum execrabili denunciatione Pontifex putet, omnia se facturum, ut insons crimine rebellionis, & impietatis probari possit. Astam profecti Patres quæ Matthæus mandaverat Beltrando renunciant.**

ciant. grata illi ea fuere, benigniusque Patres excepit. inclinasse ad pacem, & imperia Matthæum existimabat. Ceterum ad explorandam illius mentem, & an re ipsa id efficere vellet, quod per alios nunciabat, Parmensem Episcopum Mediolanum legat, qui metu interdictorum urbem ingredi ausus non est; quippe veritus ne contactu loci palam devoti, & abominati se, & eos juxta, qui in comitatu erant, pollueret. Matthæus urbe egressus illum adiit, reverenterque salutat. cui Episcopus conditiones narrat; quarum eadem fere erat summa, quæ superiorum. *Potestati Pontificia rem Mediolanensem permitti oportere: Pontificem equa petere; quando morte Caesaris illius juris, & ditionis universa Italia facta sit, Regnumque, & opes beneficio Pontificum Vicecomes debeat: quid enim Otho patruus Sacerdotium, & Præfecturam urbis obtinere potuisset, nisi Pontifices adversus amulos sua arma intentassent; quare obtemperandum mandatis esse. Civitas præterea ab execrationibus libera sacra recipiet, finemque civilium malorum habebit.* Adstabant primores urbis, quorum plerique tædio execrationum parendum Pontifici aiebant. unus Franciscus Garbagnates adversus postulata liberius disseruit, cui Episcopus crucem, & ignominiosam vestem minatus est, qua indutus ceu nefarii sceleris, & rebellionis auctor per populum traduceretur. Tunc Garbagnates adeo minas expavit, dejectusque animi fuit, ut qui ante nihil ratus minus factiosi esse, quam Sacerdotibus non parere, deinde opes Gibellinorum qua solitus erat libertate non defenderit. Postulata offendebant complures: diversi erant animorum habitus: & proinde obmurmurari contraria: desperatam animarum salutem, nisi pax, & venia à summo Sacerdote impetrata foret; contra si Roberto odium profitenti, subjecti fuissent, reciperenturque in urbem exules, crudeliora ab iratis dominis, quam ab immanissimis Barbaris pati, & sub specie paciscendæ pacis, faciendæque concordie fraudem parari. ita re infecta, Episcopus Astam revertitur. Beltrandus cum sine exitu Mediolani disceptatio facta fuisset, & conditiones pacis, atque obsequium Matthæus abnueret, iterum illum, & filios ad causæ dictionem Valentium vocat: locus suspectus erat, in quem securus periculi, & noxæ accedere posset: verumtamen ne in totum summi Sacerdotis mandata spernere videretur, nuncium ad Legatum de suo, & publici consilii nomine, ad res disceptandas, & componendas mittit. Causa gravis erat; utpote quæ per unum hominem vix tractari, nedum transigi posset: duodecim itaque ex primoribus deliguntur Gulielmus Pusterleus, Mutius à Moguntia, Gulielmus Cafates; hi accincti parazonio illustres erant: Franciscus Vicecomes, Andreas ab Orto, Franciscus Garbagnates, Stephanus Vicomercatus. hi civilis scientiæ consulti, Ricciardus Pyrouaneus, Othorinus Burrus, Lucas Cribellus, Imblavadus Mandellus, Bellinus à Petra-sancta. Alexandriam primum proficiscuntur: erat ibi Marcus cum præsidio: inde Valentium petivere. Franciscus metu adversariorum oppidum ingredi ausus non est: cognoscebat eos, & si Legatus fidem dederat, ab injuria, & vi minime temperaturos. Legatus adventantibus ab oppido occurrit. moverat eum viro- rum numerus, & nobilitas. postridie, astantibus sex sacerdotibus, qui paucis ante diebus ad eum venerant, quid juris, & potestatis Pontifex in Italiam haberet præfatur, cujus ditionis etiam civitates Caesaribus stipendiariæ forent; tum postulat, ut Matthæus, deposito regno, procurationem ei tradat, quem Pontifex delegaverit, redire in patriam Turrianos, & in sua restitui; relaxari captivos, quos nominatim expressit, Philipponum Languscum, Antonium Fisiragam, Simonem advocatum, Ammoratum Turrianum. De liberandis Alexandrinis præcipue actum fuit. custodiebantur in vinculis complures de gente Puteorum, quos haud ita multo ante

A excursuionibus fines patriæ infestantes Marcus ceperat. Hæc si Matthæus fecisset, pacem illi, & urbi Pontificem daturum. Ab hac oratione dimissi Legati Matthæo quæ forent postulata Beltrandi renunciant. his Matthæus, & si eadem erat summa, quæ superiorum, minus tamen placide respondit, *Periniquum sibi videri, Pontificem eas urbes usurpare, quæ Caesaribus supra ducentos annos vestigalia, & stipendia dependissent: quid enim magis convenit Pontifici ea loca invadere, & obtinere, quæ Caesaris juris sunt, quam Casari ipsi vel vi, vel dolo ea occupare, quæ Pontifices tenuissent: divisa esse imperia, & quatenus utriusque jurisdictionis pertendat, satis notum esse: descriptos item populos, qui summo Sacerdoti, quive Caesarum ditioni contributi sint. rem Mediolanensem, & ceteras urbes se ita ab Henrico accepisse, ut eas illi restitueret, qui post illius obitum legitime imperaret: pendeant licet ab summo Pontifice novi Caesares; indignum tamen esse, illorum amplitudinem isto commento, & insidioso prætextu circumscribi. de liberandis captivis sibi liberum non esse. hoc idem de exulibus recipiendis in urbem, quibuscumque totiens, & tam diu de potentatu pene ad internecionem dimicatum esset: referre ad quietem, & popularium pacem eos longius à patria, & finibus distineri: ne si recepti fuerint, denno civiles discordias, & perniciose certamina suscitent: se paratum quocumque piaculo, si quid erroris, & peccati commiserit, expiare.* Hæc Matthæi responsa approbavere cuncti, qui aderant; & si reconciliari cum Pontifice in primis cuperent. Moritur per hæc tempora Matthæi uxor Bonacossa de gente Burrorum progenita; in æde divi Eustorgii honorifice sepelitur: aliquot post annos Joannes Archiepiscopus ad annua matris parentalia reditus ex prædiis tam rusticis, quam urbanis Prædicatoriæ Fraternitati constituit. Moritur item Ubertus Matthæi frater vir bello, & armis insignis. Ceterum cum peregrina arma nihil, aut parum adversus Vicecomitem effecissent, neque horribiles execrationes à studio in eam gentem, & fide socios, & amicos deterrent, Pontifex ad Legatum litteras minaces, in quibus execrationes, & diræ continebantur, mittit; pro indignissimo habebat Joannes, imperia sua nullam vim habere, & tam confidenter, & obstinate adversus factionem suam arma inferri. videbat multum dignitatis, & auctoritatis sibi detractum: ita plenus irarum, & indignationis Matthæum, & filios, tum ceteros, qui in partibus erant, ceu probrosos, sceleratos, & nefarios publicari, & cuicumque probro, ac injuriæ exponi: Astæ primum litteræ ad populum recitatae, detestationesque actæ, quales nunquam legimus, quarum formulam Gulielmus Ventura, qui facto interfuit, subnotavit, & in codicem retulit: namque idibus Januariis cum ingens mortalium multitudo in aream convenisset, quæ pro æde Pontificali late patet, mercatum Astensis appellat, sublimem suggestum conscendere Beltrandus Cardinalis, Aicardus Archiepiscopus, & alii Sacerdotum Principes. Assidebant frater Barnabas Prior Provincialis Fratrum Prædicatorum in superiore, ut ajunt, Longobardia: Pax de Vedano, Jordanus à Montecucho, & Honestus Papiensis. hi inquisitores mali criminis, pravæque religionis erant: indidem alta voce illud præfati. *Exurgat Deus, & dissipentur inimici ejus: subinde acerbè, & execrabiliter in Matthæum, & quinque filios nominatim invecti, ceu non cum hominibus; sed cum omnipotente Deo, atque superis bella gererent, ad dictionem causæ eos vocavere. præscripta die, intra quam non per procuratorem, aut nuncios; sed præsentem ea purgarent, & diluerent, quæ crimini dabantur, qui si contumaces edicto non paruissent, pro perfidis, & impiis haberentur, atque comprehensos lacerari, & aduri liceret.* Illud etiam constitutum fuit, ut quotidie per vicinas urbes inter solemnia sacrificia identidem execrationes pro omnibus aris repeterentur ante mysticum panem,

in quem Christus per verba Sacerdotum de cælo elicitur, ejusdem cum præfatione Psalmi: si neque execrationum metu, nec interdictis ad sanitatem converterentur. deinde postridie Calendas Februarias, quem diem Purificatio partus Virginis sacrum, & solemnem facit, ex eodem suggestu vexillum attollitur, in quo claves cancellatim inscriptæ inerant. inibi cum multa in opprobrium, & ignominiam Vicecomitis prædicatione devenisset, pronuntiatur, ut quicumque opes pontificis salvas esse vellet, is armatus signa illa sequeretur. Provocati tam mares, quam foeminae ad tampiam, & sanctam expeditionem; quippe expiaturi quicquid supplicii pro quacunque commissa noxa commeruissent. Post hæc sub finem Februarii Valentium cum honestissimo Sacerdotum comitatu, & valido præsidio, ne vim in itinere, & violentas manus qui abominati fuerant inferrent, Beltrandus proficiscitur. iteratæ fuerunt in eo loco detestaciones, denunciaturque, ut Vicecomites in numero impiorum, & sceleratorum haberentur, quibus omnes decederent, aditum, sermonemque defugerent; ne quid ex contagione incommodi acciperent. multantur præterea omni jurisdictione, magistratu, & præfectura, ne jus populis dicant; neve ex eorum nutu, aut imperio pro tribunali Prætor judicia reddat: nullus denique honor cum illis communicaretur, quæ poena etiam nepotes tenerentur. in vinculis si capti forent tantisper custodirentur, donec libertatem, & vitam auro redimerent: & quisquis in eam militiam nomina daret, id veniæ promereretur ad expianda crimina, quod iis concedi solet, qui Christianum nomen ab immanibus Barbaris defendunt. Genuæ, ut in Annalibus gentis proditum est, pro æde Divi Laurentii primo solemnis jejunii die ad populum denunciata fuit detestabilis execratio, & signum crucis iublatur. Litteras tabellis affixas, & pro moenibus expositas plerique sagittis confixere; quippe edicta, & promissam expiationem aspernati: certum enim illis erat, illa denunciatione, & immortalis Dei religione adversarios armari. perlata ad Pontificem litteræ illum ad ultionem tam insignis contumeliæ magis exacerbarunt. Obsessi haud parvo gaudio affecti sunt: putavere, divinam iram in contemptores provocatam. Dimittuntur interea ad eas urbes inquisitores, in quibus Roberti factio prævalebat; ibi quoque Matthæus, & filii; tum quicumque ab illis stabant à grege piorum, & fidelium ejiciuntur; sed inter execrationes, & maledicta multi mortales erga Matthæum alacriores, & constanter facti sunt. Erat in evidenti, Matthæum falso insinuari, & illos criminis infontes esse, atque execratione terribili Regnum Roberto comparari: quam Pontificis impotentem iram, & inexpiabile odium Florentinus recens Vates per suppositam personam acerbius taxat. Petrus enim in successores invehitur, qui saluari aqua regeneratos pari amore, eademque charitate non complectantur; & potens clavis his salutis, illis vero exitio foret. Hic nemo mihi opponat, Dantem paucis mensibus ante publicatas execrationes mortem obiisse: namque triennium amplius ob prohibitum Sacerdotio Aicardum sacris interdictum Mediolanensi populo fuerat; tum semel, atque iterum repetitæ execrationes in favorem Roberti fuerunt: quare haud ambigam, à Petro livorem & malignitatem Pontificis designari; quanquam Dantes pro instituto poetico nomen Sacerdotis supprimat; ut scilicet habeat enarrator in quo ingenium exerceat, & diligentiam ostendet. quid si forsitan extimuit ne infensum Pontificem magis in se irritasset? Ceterum Franciscus Petrarcha, quam iniqua res fuerit, & prodigio similis tanto studio perdendæ Italiæ, & urbis maximæ subvertendæ Pontificem flagrare, quodam in loco aperte scribit. Parum illi videbatur pecunias, & milites suggerere, ut acie & prælio decertaretur, nisi per exe-

craciones, seu profanos, & violatores religionum expugnare tentasset. Verum Deus omnipotens pro iis stetit, qui iustiora arma ceperant; ut ab eventu ea causa melior judicari debeat, quam Deus Optimus Maximus jovit: quæ ne ex affectu, ut præsentium gratiam aucupari velim, me scribere quivis existimet, ipsa Francisci verba subijciam, quem advocatum adversus obrectatores paravi, sumpta de eo libro, cui titulum, & nomen non inscripsit, propterea quod Romanos Sacerdotes paulo asperius incessit. Eo tempore, quo ille Pontifex maximus, qui sibi provinciam Italiam, atque in primis urbem hanc Mediolanensem evertendam sacerdotalis militiæ servili expeditione delegerat, & sic in utramque Christianam Christianorum pater perfecto odio sæviebat, quasi non Italia hæc, sed Syria, vel Ægyptus; non Mediolanum, sed Damascus esset, aut Memphis: cum ad hoc sanctum, piumque opus unum è sacro Patrum collegio, filium (ut multi dixerunt) suum, & famam similitudo ingens, morumque ferocitas adjuvabat; non apostolicum, sed prædonis in morem; neque signis virtutum, ac miraculis, sed signis castrorum, & miris instructum legionibus in has terras, quasi alterum non Petrum, sed Hannibalem, destinasset; in quo bello Deus omnipotens suo more, & superbix rellitit, & favit humilibus, & palam pro iustitia decertavit. Fuit unus ex eodem illo grege vir in nos & ipse inexplebilis odii, infinitæque superbix; cujus ego tunc & faciem puer noram, & quantum poterat ætas invalida animum execrabar. is Pontifici ante omnes casus die quodam in secretarium ingressus cum rumoribus consternatum, atque anxium invenisset; hærebant enim belli impetus præter spem hujus urbis in limine, quæ tunc quidem muris nuda erat: at, quod optimum muri genus est, & militia insigni, & ducibus armata fortissimis: itaque sæpe jam obfessores suos acie fuderant obsessi; jam captivorum turbis carceres redundabant: jam castrorum pinguescebant arva visceribus. In hoc igitur rerum itatu cum solito mœstior cerneret, familiaritate intima fretus sic aggreditur: *miror, inquit, Pater sanctissime, quod est quare acutissimus in ceteris, in eo uno, quod est summum nobis, ac præcipuum parum vides? ad hæc Pontifex gravibus pressum curis caput extulit; & perge, inquit, quid rei est? tunc ille consultor egregius, scio, ait, te nihil tam optare, quam Italia vastitatem: in hoc vires, opes, consilia expendimus: in hoc Ecclesia thesauros jam pene omnes effudimus, inextricabilem rem aggressi: nisi alia teneatur via: ecce tuus ille tantus bellorum apparatus, illa nostrarum virium cuspis in ipsis Mediolani portis obtunditur. quam tibi adulatoribus uni alicui nostrarum urbium similem asserabant, re ipsa superior omnibus est inventa; quando Italiam viceremus, ab una Italica civitate vincimur. sed si velis alia longe facilius via, quamam, inquit Pontifex, dic ocus: hoc enim molior, hoc cupio: hoc est unum, pro quo velim corpus; & animam pacisci. ille autem; potes, inquit, omnia, & quicquid jusseris ratum est. cur igitur & Papatum, & imperium urbi Rome, & Italia non eripis, & illud in Canturcum patriam vestram; hoc in Germaniam transferis? non magnus est labor. dic, & fiet. non armis opus est, quibus longe impares sumus: verbo de hostibus triumphabis: sic & nos ornaveris novis insignibus ad vos translato rerum apice, & gemino lumine in visum genus orbaveris. His erectus Pontifex, ex irarifu oborto, fefellisti me, inquit, hætenus. nondum te delirare cognoveram. an ignoras inscie, hac via, quam stravisse subtiliter visus es tibi, & me, & qui mihi successerint Episcopos Canturcenses fieri, & imperatorem, quisquis is fuerit, Germania præfectum; illum vero, qui Roma præfuerit; si quidem spiritaliter, Papam; sin temporaliter, Imperatorem fore? sic Italum nomen, dum evertere putas, attollis, & in antiquam restituas dignitatem. nos ergo dum datur desuper Romani Pontificatus frena teneamus, & in hoc omni studio intenti simus,*

ne quando forte suum jus Italica manus arripiat: quod ipsum quamdiu prohiberi possit, incertum est. de titulis non certemus: velimus, nolimus enim, rerum caput Roma erit. His auditis, argutus ille stultus erubuit. Hæc Petrarcha. Si forsan quæret aliquis quid hic scribat muris tunc nudatum Mediolanum, is sciat, à Luchino Vicecomite, qui post Accium Regnum tenuit, interiorum urbis murum extructum fuisse. Bis cruenta pugna, in qua multi mortales occubuerunt, captivorum quoque numerus in vincula coniectus fuit. Primum pro mœnibus patriæ; tum vero ad Moguntiam principem, & ductorem primo Galeacio edita est. Post execrationes, horrendaque edicta Asta, & Valentii publicata quidam tradunt in Gallias, poscenda pacis gratia, nuncios missos. Alii scribunt eos duodecim Oratores Valentium ad Beltrandum accessisse; & cum intolerandæ conditiones pacis, & veniæ oblata forent, trans Alpes ad Pontificem profectos. Hanc scriptorum varietatem iteratæ parvo temporis intervallo execrationes fecere; & cum ad iram implacabilis esset Pontifex, sapius nuncii, & oratores commearunt. Interea Derthonenses, & Alexandrinos crebris excursionibus, & fœda populatione Cardonus infestabat; vicos, & castella, quæ Vicecomitis erant, diripiebat, arbores succidens, ædificia incendens, frumenta corrumpens, ut magis cum agris, quam cum hoste bellum gereret. Accesserant quingenti sagittarii: vicum Derthonæ vicinum, Vigifonum nomine, per vim capiunt, quod Marcus haud ita multo post expugnat, multis eorum, qui in præsidio erant occisis. nihilo tamen secius tecta, & agros adversariorum Raimundus populabatur. Campi sunt patentes, quos fluvii interfecerant, qui fere ubique vadari possunt. ita difficile erat à populationibus Barbarum arcere. Inclinabant in eo tractu ad Robertum permulti: ad Padum bellum constitit. reposcebat Robertus Derthonam, & Alexandriam, quas urbes pridem, deditibus oppidanis, receperat: Vercellas, & Novariam sui juris esse aiebat; propterea quod administratio earum iussu Pontificis sibi cessisset: id Matthæus contemnere dictitans, iniquum esse externum Regem sub procurationis titulo, regno Germanos Reges intervertere. Inter hæc Galeacius veritus, ne pater tædio execrationum, & querelis populorum, qui interdicta sibi sacra graviter ferebant, pacem sub iniquas leges cum Pontifice faceret, Mediolanum petere constituit. Convocatis itaque in concionem Placentinis, & iis præcipue, quorum favore, & opera urbem obtinuerat, in hunc fere modum verba facit: *Quæ causa nunc in patriam me trahat, nemo vestrum est qui nesciat. Bellum à Pontifice indictum, immissi ad devastandos fines exercitus, tum detestationes adversus nos publicata patrem exagitant, qui quamvis senio confectus sit, viget tamen in eo vis animi, & consilii: neque ita senectus degravat, ut etiam remedia malis invenire non possit. sed cum bellum in dies majus finitimus, & potentissimus Rex paret, populosque passim concitet, Mediolanum petere statui: ut socius tantorum laborum patris sim, simulque mea presentia novandarum rerum si qui consilia ineunt, ab iis desistant: simul etiam ut majores copias ad vim propulsandam, summovendosque longius hostes commodius comparemus. urbem vobis relinquo pacatam. In nostra potestate sunt vici, castella, & arces. unus dumtaxat Vergisus, quia imperia nostra pro ingenua superbia pati non potest, in exilio vivere constituit; ut scilicet mihi, & vobis insidias struere possit. Accius filius cum haud magno præsidio urbem custodiet. tanta est in vobis, & prono obsequio fiducia, ut etiam sine præsidio in officio vos permansuros putem. Illud autem horror, & moneo, ne milites nostros longius abire sinatis, etiamsi insperatus hostis fines invaderet, ferro & igni cuncta devastans. Ad hæc Manfredus Landus: Consilium tuum, Princeps Illustrissime, probamus omnes. perge, Deo bene juvante, quocumque libuerit. de fide nostra nihil dubites, tibi persuadeas, in omnem eventum nos promptos, & alacres fore; ne-*

que solum quæ imperaveris facturos; sed sive fines tuos, sive regnum prolatare volueris, omne nos periculum atque discrimen subituros. Accio ita parebimus atque tibi: pro quo juvando, atque defendendo fortunas omnes nostras & vitam (si oportuerit) exponere non recusabimus. Gratias illis Galeacius pro fide, & liberali animo, atque obsequio magna insuper pollicitus egit: atque statim Mediolanum versus ire pergit. Jam Cardonus Augustæ arcem opere, & munitionibus circumvallaverat; machinis, & tormentis muros discutiens: naves præterea acciverat ad custodiendum, ne quis qua fluvius alluebat commeari ad obsessos posset. deinde cum plus militum ad eum accessisset, Padum trajicit, atque in loco, qui non amplius mille passus à fluvio abest, Baccianorum vicum appellant, confedit. Perculsi accolæ; nam opportunitate loci circumjacentia omnia facile Barbarus deprædari poterat, ad Spinolam, & Marcum protinus concurrunt; rogant, ut hosti se opponant. continuo copias hi contrahunt: tum socios, & amicos accerunt. Ingens advenerat voluntariorum peditum multitudo: ita, comparato majore exercitu, Cardono occurrunt, atque haud longe ab hoste castra muniunt: equitatu pene pares utrique erant: præstabat Vicecomes peditum numero: paucos dies prælia sine ullo certo eventu faciunt; namque Cardonus ubi sustinere impetum, & vim hostis non poterat, in vicum se recipiebat. à feroci Barbaro munitionibus castrorum Spinola, & Marcus se tuebantur. jam Galeacius Mediolanum accesserat. dies Joannis Baptistæ aderat natalis. Matthæus salutandi templi gratia, quod sub Joannis nomine religiosum, & opulentum habetur, Moguntiam profectus est: ibi in languorem incidit, jamque vires deficiebant. in monasterium propinquum Crasenzagi deferretur. accessere ad eum filii, quos vix hortatus, ut pacem, & veniam à Pontifice exposcerent, moritur septuagesimo & secundo ætatis anno, ut fere in omnibus Annalibus proditum est. quamquam sunt qui scribant duodecoginta annos natum. mors ejus tantisper cæcata, donec ea filii compararent, quæ muniendo Regno, firmandisque opibus idonea erant. sepultus est sine pompa funeris Crasenzagi, vel, ut alii, in Clare vallis templo. sepulchrum ignotum mansit ob iram Pontificis, & metu execrationum: nam, quod in Actis inquisitorum adhuc extat, in mortuum Joannes Pontifex desævit per litteras, quarum exempla legimus: populis præcipit, ut illius ossa de sepulchro eruta dispergant, eos detestatus atque execratus, qui quominus id fieret, repugnassent. Ceterum si candidi rerum judices iusta æstimare voluerimus, Matthæum cuicumque Græco, aut Romano, absit invidia verbo, comparabimus: & tam ignoscant mihi illorum manes, quam nemo dicat ut viventibus blandiar, me hæc scribere: nostrum non est mentiri, aut, quod plerique faciunt scriptores, aliquid famæ affingere, aut nudæ narrationi addere. Regia progenitus stirpe, cujus majores metu exterorum Regum inglorii, & ignoti vixere, majoris patris in exilio, & militiæ comes, laborumque socius, reducta in patriam nobilitate, illius primus auspicio, tum suo ductu bella cum finitimis prospere gessit. procuratione rerum accepta, rempub. magnifice ac moderate administravit; & quamvis armis assuetus foret, nunquam tamen ferox, aut sævus fuit. parta securitate mitis. factionibus adhuc cives agitantur. insidiæ suberant; domesticorum invidia, suspecta fides; inimica erant domi arma: omnia hæc sicut prudenter cavit, ita civili animo tulit. præteritas injurias vix agnovit, raro ultus, & dum nimis concordia civium indulget, impia arma perosus, ab eo, cui fiduciarium Regnum tradiderat, patria, & fortunis ejicitur. Conspiraverant propinqui, cognati, & finitimarum urbium principes. domo profugus, egens, & mendicus in peregrina terra primum alienis impensis cum vitam degeret, nemini unquam

unquam infra dignitatem supplex fuit. jam deplorata omnia cernebat. numquid votis adversarios interfecit? Minime sane: namque turbam, & conspectum hominum declinans in abdito secessu retibus, & piscatione calamitatem suam consolans, intrepidus semper, & contra adversa erectus numquam spem recuperandi Regni abiecit: id quod nobili, & celebri responso, quod Guidoni per nuntium illudenti dedit, testatum manet. Extrema illum mala obruerant, exilium, & egestas fatigabant, filii domo fugati, cognati, & partium studiosi in summo periculo, atque discrimine oberrantes. emerfit tandem de profundo miseriarum fortis, constans, & prudens senex, quem alterna revisens lusit, & in solido rursus fortuna locavit. Declamator quidam mutationem fortunæ in Mario admiratus inquit; *quis crederet Marium super crepidinem sedentem aut fuisse, aut futurum Consulem: qui minus declamare licet? quis existimaret, Matthæum in intimo Benaci angulo retia texentem, & subinde piscantem aut fuisse Mediolani Dominum, aut mox recuperatis opibus, late regnaturum?* Certasse in hoc viro virtus, & fortuna mihi videntur: ut quantum illa de opibus, & potentia auferret, tantum altera in animi magnitudine, & constantia reponeret: donec utraque amice conjuravit. Ergo peregrino favore, & factionis opibus in patriam restitutus, cum detecta conjuratione, & Barbaro cædibus gaudente, licuisset in æmulo potentatus desævire, Germanico furori intercessit: cives inter cruentos gladios humanitatis admonere, & ut finem cædibus facerent hortari, ne dulcedine vindictæ patriam perditum irent. Vix eorum bona, & fortunas diripi passus, cum quibus de potentatu, & salute dimicasset: & cum in ditionem, & imperium suum opulentissimam civitatem, vicinosque populos redegisset, invidioso Domini nomine abstinuit, Procuratoris appellatione contentus. Agente adhuc in Longobardis Henrico, paululum remissa erant odia, resque pacatiores sperabantur. illo mortuo, rursus ad intestina certamina, funestaque bella Hetrusci, Ligures, & Longobardi redeunt. Factio Pontificia, ingruente exulum multitudine, succumbebat. ea Roberto Regi se addixit, in cuius armis, & opibus spem omnem Guelphi per universam Italiam reposuerant: socios, & eos omnes, qui in fidem, & ditionem suam venerant Matthæus sublevavit, atque tutatus est: vires, & arma adversariorum acie, tum suo, tum filiorum auspicio, & ductu sæpius profligavit, quo pacto debellari Rex posset, ostendit. Gallorum, & Germanorum Reguli accitu Pontificis, & magnis pollicitationibus onerati adversus Vicecomitem descenderant: auro, & prudenti consilio ut trans Alpes exercitum reducerent, nulla re egregie gesta, effecit. Duo Pontifices Clemens, & Joannes Roberto post Henrici obitum ad imperium sub procuratoris titulo viam affectabant. quo tempore urbem, per causam violati Sacerdotii, Joannes sacris interdixerat. Restitit Matthæus: ne scilicet Germani Cæsares suo jure fraudarentur, suæque factionis vires, & opes affligerentur; neve ipsæ in servitutem caderet. iratus Pontifex, quia parum hominum vires, & arma proficerent, diris execrabilibus Matthæum infectatur, populos, promissa criminum venia, ad illius, & gentis excidium provocabat. exterminatus cum ignominia è grege, & numero piorum erat semel, atque iterum. per urbes Italiæ horrenda edicta publicabantur. nunquid Matthæus tot contumeliis affectus, & in periclitatione rerum auctoritatem Pontificis contempsit? Minime sane. per Legatos pacem petivit ab Joanne, qui factus irator, quasi potestati illuderet, illum indicta causa de impio, & nefario crimine condemnat. O mira Matthæi in Præsidem Sacrorum reverentia! o patientia nunquam alias cognita! o mite, & mansuetum hominis ingenium! nihil aut cogitavit, aut molitus

A est, quo majestas Summi Sacerdotis lædi videretur. non redditus Sacerdotiorum intercepti; non templa spoliavit; non vim ullam religiosi viris, & iis, qui Pontifici obsequebantur, intulit. pie semper, ac cum metu de primoribus Sacerdotum loquebatur. impotentem Pontificis injuriam onerabat invidia: invisum Joannem faciebat: summum illud in augendo Roberto studium intolerabile erat exemplum. degeneraverat ab ea charitate, quæ propria, & peculiaris Pontificum fuerat. quo nomine factum credo, ut plerique mortalium in partibus contra Pontificis edicta perseveraverint, neque militiam, quam sub Vicecomite semel professi fuerant, ejurarint: quin etiam foeminae Deum metuentiores minas irati Pontificis non expavere. Sed quid non facit vel rerum inscitia, vel magis livor? Est quædam innata malignitas, quæ partium studio bonum alioquin hominem à recto, & justo judicio plerumque avertit. Antonius Florentini Sacri Antistes gloriæ Vicecomitum infestissimus, acerbius quam bono viro conveniat, Matthæum lacerat, & ceu expiabilis noxæ reum, non capitis, sed æternæ poenæ condemnat. de cujus obitu in spatiosis illis voluminibus hæc scribit. *Dominus Matthæus Vicecomes vigesimo sexto Junii die moritur, cujus anima sepulta est in inferno; mortuus est enim schismaticus, & hereticus.* Odiosa sane verba, & ab improbo homine prolata. Nunquid Matthæus vir alias bonus, & pietatis eximius, facti poenitens veniam criminis demereri non potuit? Quid non? si quam noxam dum Pontifici adversatur commisit, eam expiare, & mercede magna luere paratus tentavit. *Filius*, ut apud idoneum scriptorem invenio, *moriens mandavit, ut iratum Pontificem lenirent, illique obtemperarent.* Sprevit expiationem, & poenitentiam facti Joannes, repetitaque execratione, acerbius in mortuum, & filios desævit; propterea quod Vicecomites ad necessitatem deponendi Regni subigere adnitebatur. Præterea Joannes Archiepiscopus cum Barnaba, & Galeacio à Stephano progenitis, ut publicis monumentis testatum manet, nuncios legitime institutos, & procuratores cum mandatis ad Innocentium Sextum misere, qui affirmarent, planumque facerent, Matthæum semper de fide recte sensitse, sinceroque animo, & pure mente Deum omnipotentem coluisse, neque quicquam aut fecisse, aut dixisse, in quo vera religio polluta, aut Pontificium numen læsum existimari posset; hætenus Pontifici reluctatus, dum opes servat, Regnumque defendit, ne principatu dejectus denuo exularet, aut in manus inimicorum veniret. quod autem ad dictionem causæ vocatus neque in Gallias ad Pontificem, neque Astartem ad Legatum accesserit; non per contumaciam id fecit, aut quod auctoritati Pontificis non obtemperare vellet: sed quia senio confectus in longinquas terras venire vix posset, eaque loca petere oporteret, in quibus adversa factio, & ii plurimum præstarent, quibuscum de imperio, & vita dimicasset. sub mortem vero, quod boni viri & Christiani foret, evidenti confessione veniam, & absolutionem eorum petisset, si quæ adversus voluntatem, & edicta Pontificis commisisset; atque ita illius ossa, & cineres sacrum in locum recipi debere. Sed cur Antoninus in damando Matthæo tam curiosus, & petulans eam expiationem non commemorat, quæ adhuc Mediolani, Papiæ, Cremonæ, Bergomi, & Novariæ quotannis repræsentatur? ut quod equidem legerim, aut audiverim Regum nullus, aut quicumque alius populis imperaverit, obedientius, & suppliciter magis sacerdotum imperata fecerit. Theodosium celebrant, quod ingressu templi à divo Ambrosio prohibitus nihil quicquam irati animi ostenderit. Vicecomitum procures jam supra centum, & quinquaginta annos patiuntur æquo animo commemorationem in æde divi Ambrosii fieri. duobus in locis extructa est ara; designati redditus ad alimenta Sacerdotum piacularis

ris item panis esurienti turbæ XII. Calendas Aprilis diluculo erogatur. Peregrini quidam nescii, quantum ad regna defendenda referat Deum pie colere, & principibus Sacerdotum parere, multum de amplitudine imperii tolli putant. Frustrantur alii reverentiam Sacerdotii. nostri duces quorum inclita est religio, honori, & gloriæ hoc ducunt. Quid obsecro ad propitiandum Deum efficacius, quam pati sub oculis nostris talia fieri? Cur hæc suppresserit Antoninus, livore, an injuria haud facile dixerim. utinam intra cancellos Philosophorum, & Theologorum se continuisset, neque historiam attigisset. forsan famæ, & quieti populorum melius consulisset. Sopita odia excitat, senescentes discordias renovat, dum causas, & origines civilium dissensionum, & certaminum longius repetit, & uberius explicat; vulnera refricat, & ad vindictæ studium mentes injuriarum oblitæ fuscitat, & accendit. sed nimis de Antonino. Ad te Matthæe revertor, cui recentiores Europæ Proceres à te progeniti assurgere debent. filii etiam, atque nepotes, quorum præclara facinora continenti quodam tenore per tot annos edita fuere, faciunt, ut præscos heroas æquare, imo vero antecire possis. Galeacius ab Gallorum cantu, qui Othoni victoriam portenderunt, appellatus, unde auspiciatissima regnantium nomina. Marcus exultantium Ligurum defensor, & indefessus Roberti oppugnator, Luchinus Soloni, aut Pompilio jure comparandus. leges hic condidit, ad quarum præscripta nobilissimæ Italiæ partes publica negotia administrant, & Prætores in hæc usque tempora judi-

A cia reddunt, & quæstiones exercent; & proinde cognomen justî tenet: Joannes Archiepiscopus, quo nullus Sacerdos in Italia opulentior, & potentior unquam fuit: Stephanus, à quo invicti nostri duces. qua generosa, & fortunata prole ductus Facius Ubertus Priamo, & Matthatiæ te opponere, & quinque tuos filios decem heroibus magis antepone, quam comparare audeat. Franciscus Petrarcha tuæ ætatis te prudentissimum prædicat, & si bene conjecto, Mario te comparat. in privatis, & publicis multarum urbium monumentis prudentiæ palma tibi datur. ita duo cognomina Magni, & Sapientis sortitus es; quod cui contigerit, haud equidem legi. B denique te patres, & avi incomparabilem habuere: sed nostra ætas unum tulit Franciscum Sfortiam, quem in contentionem adducere non verebor; siue prolem nobilissimam respexeris; siue quia Regnum, quod in Longobardis constituisti, Franciscus Sfortia morte foci amissum recuperavit; ut alter Regni conditor, rerumque salus altera vocari mereatur. Vos autem illustres animæ haud equidem ambigo, quin continuis nepotum successionibus capiamini, supremaque sit vestra beatitas, quotiens ab iis, qui ad vos veniunt, nomen, genus, & amplitudinem Regni durare discitis. Sed hoc tempore quanto C gaudio in Beatorum sedibus vos frui credo, quo Ludovicus Maria Sfortia Vicecomes res ita gubernat, ut Italiæ Dux, & moderator celebretur, memoriæque vestram obscuram, & pene intermortuam tenebris in lucem, & vitam ita revocat, ut semper clara æternaque futura sit.

F I N I S.



PAVLI JOVI,
NOVOCOMENSIS,
EPISCOPI NVCKERINI,
VITAE
DVODECIM VICECOMITVM,
MEDIOLANI PRINCIPVM,
SINGVLORVM VERIS IMAGINIBVS
ILLVSTRATAE.

PAVLVS IOVIVS,

EPISCOPVS NVCERENS,

HENRICO,

GALLIAE DELPHINO,

S. P. D.



QVVM ad Nicæam in spem exoptatæ pacis adductus, Carolo fratri tuo Vicecomitum origines & principatus initia, brevi commentario me perscripturum promississem, nihil inde mihi antiquius fuit, quam ut id, quod susceperam, mature perficerem. Arbitrabar enim non multo post futurum, ut is summæ spei adolescens, cum optimo jure suo, tum præclara Cæsaris Augusti liberalitate, Cisalpinae Galliæ imperio potiretur. Quamobrem non modo mihi honestum, sed illi etiam maxime decorum atque jucundum fore providebam, si tantorum Principum res gestæ in arctum volumen referrentur. Nam eos bellica laude, & magnificentia operum, & splendore vitæ cum clarissimis Græcorum & Romanorum comparari posse, sine controversia judicamus. Ab hac Vos nobilissima stirpe maternum genus Regiæ Valesiorum domui insertum deducitis, unde hæc Vobis Mediolanensis regni hæreditas petitur, tot cruentis jactata litibus, nec ullis unquam immitis Fortunæ terroribus intermissa. Regnare autem ex hac illustri familia duodecim Principes centum & septuaginta annis: tot enim sunt ab Othone ad Philippum, in quo Principum progenies defecit, quum is sine legitima prole decesserit. Cæterum confecto libro, quum offerendi hujus muneris votum novus ex violatis induciis renati belli tumultus aliquandiu fefellisset, tandem id totum Carolus ipse atroci fato nobis ereptus interruptit; graviore quidem nostro luctu, quod juvenis spectata virtute florentissimus, in ipso partæ pacis limine conciderit. Id igitur quod ei debebam, tibi rerum omnium hæredi integra fide persolvo. Tu vero sapienter generoseque feceris, ac plane regie, si eo animo librum evolves, ut repudiatis vitiis summos tantum virtutum flores decerpas. Id porro tibi haud difficile fuerit, quæ paternæ laudis æmulus, atque avitæ constantiæ præclarus imitator, ita diversas miro temperamento in unum virtutes misces, ut jam Gallia minime dubitet, quin sis duobus longe maximis Regibus major atque felicior evasurus. Vale. Romæ, iv. Kal. Aprilis MDXLVII.

P A V L I J O V I I ,

NOVOCOMENSIS,

I N V I T A S

DVODECIM VICECOMITVM,

MEDIOLANI PRINCIPVM,

P R A E F A T I O.



ET VSTATEM nobilissimæ Vicecomitum familiæ qui ambitiosus à præalta Romanorum Caesarum origine , Longobardisque Regibus deducto stemmate , repetere contendunt , fabulosis pene initiis involvere videntur. Nos autem recentiora illustrioraque , uti ab omnibus recepta , sequemur : contentique erimus insigni memoria Heriprandi & Galvanii nepotis , qui eximia cum laude rei militaris , civilisque prudentiæ , Mediolani principem locum tenuerunt. Incidit Galvanus in id tempus , quo Mediolanum à Federico Ænobarbo deletum est , vir summa rerum gestarum gloria , & quod in fatis fuit , insigni calamitate memorabilis : captus enim , & ad triumphum in Germaniam ductus fuisse traditur : sed non multo post carceris catenas fregit , ingentique animi virtute non semel cæsis Barbaris , ultus injurias , patriam restituit. Fuit hic (ut Annales ferunt) Othonis nepos , ejus qui ab insigni pietate magnitudineque animi , canente illo pernobili classico excitus , ad sacrum bellum in Syriam contendit , communicatis scilicet consiliis atque opibus cum Guliermo Montisferrati Regulo , qui à proceritate corporis , Longa spatha vocabatur : voluntariorum enim equitum ac peditum delectæ nobilitatis viginti millia ad Boemundum à Brundusio transfretantem adduxere , ne Itali vel studio religionis , vel bellica laude Gallis inferiores esse viderentur. Cæterum Otho jam duobus asperrimis ad Nicæam atque Orontem præliis , spectatæ virtutis famam consequutus , oppugnante demum Hierosolymas Gothifredo , gloriosa totius exercitus acclamatione , coronam promeruit , quum Volucem Saracenorum Ducem medio in campo ad singulare certamen , fortissimum quenque ex Christiana acie provocantem , ipse unus ante alios , nihil ejus immanis Barbari ferocia , vel terribili insignium armorum specie permotus , fortiter atque feliciter devicit , retulitque de confossi hostis galea opimum plenumque immortalis gloria spoliū , auritam scilicet viperam complicatis spiris minaciter à cono cassidis erectam , & puerum passis manibus devorantem : quod unum auspiciatæ virtutis argumentum , non modo gentilitiæ laudis gestamen fuit , sed & posteris id insigne audacter usurpantibus , & imperia , & opes , & late gloriam portendit. Fuere qui existimarent , Volucem ex stirpe Alexandri Magni progenitum , tulisse pro insigni viperam , ex Olympiadis fabula , puerum parturientem , quod ea à dracone se compressam fuisse Jovis imagine prædicaret.

P A V L I J O V I I ,
 NOVOCOMENSIS,
 EPISCOPI NVCERINI,
 V I T A E
 DVODECIM VICECOMITVM,
 MEDIOLANI PRINCIPVM.

O T H O ,
 MEDIOLAN. PRINCEPS I.

*Vera ejus effigies , qualem hic exhibemus , ad Angleriam spectatur in eo
 testudinato conclavi , quod est in arce , ubi victoriam de Turrianis ad
 Decimum prælio superatis depictam cum elogiis Latinis videmus.*



NOBILISSIMI Principatus fun-
 damenta feliciter Otho je-
 cit, Uberti filius, qui ab
 Asiatico Othone proavo
 nomen acceperat. Natus
 est Invorio in pago ad Ver-
 banum lacum, magnis qui-
 dem natalibus, sed patri-
 monio tenui, & tum adeo
 afflictis totius familiæ for-
 tunis, ut quatuor tantum & plane ignobilium vi-
 corum ditione, tot gentiles Proceres Majorum suo-
 rum nomen tuerentur. Hi fuere, Invorium, Mas-
 finum, Vergantum, & Olegium: fundos etiam
 sat amplos Mediolani extra portam Joviam à Sul-
 tano Vicecomite emptos constat. Frequentibus
 enim Barbarorum irruptionibus, & civili præser-
 tim bello, cuncta apud Insuabres conturbata pro-
 strataque erant, ut non mirum sit, tantas opes in
 publica calamitate corruisse. Sunt qui ex genitura,
 propter admirabiles siderum concursus, imperium
 ei à Mathematicis prænuntiatum fuisse asseverent.
 Verum ipse repudiatis prorsus Astrologis, id unum
 pro insigni ostento jocabundus accepit, quod Vi-
 cecomite Placentino, Mediolani Prætor, (qui
 tum erat supremæ potestatis Magistratus) & Otho-
 ne Cæsare imperante, in lucem esset editus. Eni-
 tuit satis mature in adolescente ingenium alacre,
 præaltum, ardens, & (quod mirabile erat) gravi
 prudentia temperatum: accesserat corporis atque
 oris dignitas maxime excellens: itatura enim erat
 excelsa, & nexu nervorum longe firmissima, pe-
 ctore autem lato atque exstanti, & radiosus præ-
 grandibusque oculis: eloquentia vero illustri, ex-
 quisitisque literis, quum oporteret, ad jucundita-
 tem exornata, adeo ut quum omnibus magnope-
 re placeret, etiam sibi meliore fortuna dignus vi-
 deretur.

Itaque ardente civili bello Gallia Cisalpina do-
 mo egressus, Romam se contulit ad Octavianum
 Ubaldinum Cardinalem, auctoritate atque opibus
 florentem; à quo benigne susceptus, adscribitur fa-
 miliæ inter honestissimos. Nec multo post, quum

in ea domo aliquamdiu virtutis eximie, perurba-
 næque comitatis, & naturæ nequaquam fallacis vel
 insidiosæ testimonia passim reliquisset, Octaviano
 præalta semper agitati, in otio pariter atque nego-
 tio comes esse cœpit: adeo ut munera legationum
 obeuntem, & trans Alpes accitum, inter præci-
 puos sequeretur: hisque maxime temporibus extra
 ordinem necessaria domesticæ disciplinæ officia, cæ-
 teris languentibus aut occupatis, diligenter adim-
 pleret, abnuenti semper & coacto similis, ne am-
 bitione potius, quam obsequio, amicorum munia
 suscipere videretur. Literas enim scite atque expé-
 dite exarabat, dictabat eleganter, in omni que oc-
 casione œconomicarum rerum, cuncta ad pietatem,
 ad decus & temperantiam revocabat. Quibus maxi-
 me rebus, ita appetente Cardinalis ingenio, cer-
 tissima laus pararetur, honesta quidem sibi in primis
 ad promerendam ampliorem gratiam, & demum
 ipsi Cardinali decora & utilis, ad petitionem sum-
 mi Pontificatus contendenti. In unam enim cam-
 curam amplissimos Senatores haud dissimulanter in-
 cumbere, uti aulæ artium peritus, facile intelli-
 gebat.

His moribus jam abunde claro, & prospera vi-
 gentifama, Leo Peregus, Mediolanensis Antistes,
 in exilio apud Legnanum mortuus nuntiatur: hunc
 Martinus Turrianus tanquam patronum ducemque
 Nobilitatis urbe pepulerat, quum ipse jam popu-
 li causam adversus Patricios suscepisset, perturbata-
 que Republica, statum popularem, cælis disjectis-
 que Nobilibus, induxisset. Oderat Octavianus Tur-
 rianos tanquam Nobilitatis hostes: erat enim è vetu-
 sta ac illustri apud Etruscos Ubaldinorum familia:
 & privati quoque odii causæ intercedebant, parum
 quidem honestæ, sed ob id validiores. Nam ei
 Martinus paucis ante annis notam nefariæ cupi-
 ditatis inusserat, quum forte in Galliam iter ha-
 bentem, hospitioque susceptum, in templo Divi
 Ambrosii ne carbunculum mirabili fulgore & rara
 magnitudine conspicuum è donariis auferret, ar-
 matus prohibuisset. Dicebat enim Cardinalis cupi-
 de inspiciendo tractandoque eam gemmam, omni-
 no dignam videri, quæ ad ornamentum sacrorum
 so,



OTHO ARCHIEPISCOPVS
et
Vicecomes Mediolanensis.

*H. v. A. Del.
et Sculp.*



solennium, in summa Pontificis Maximi tiara conspiceretur. Hic est ille Ubaldinus præalto ambitioneque ingenio, & magnis opibus potens, Danthis poetæ carminibus obliquo probro simul & laude celebratus.

Itaque ad excidium Turrianæ domus, & ad condendum in Vicecomitum familia principatum, fatali eventu Otho Mediolanensem Archiepiscopus ab Octaviano declaratur, qui amplissima ad id potestate, jure, munereque legationis fungebatur. Idque approbavit Urbanus Pontifex, vel ob id quod duos fœda diffensione Mediolanensem defuncto Leoni suffectos audiebat, Raimundum scilicet Turrianum, Martini patruelis potentia armisque potius quam liberis suffragiis provectum, & Franciscum Septariensem, quem virtutis commendatione populus Tribusque omnes in invidiam Martini, veluti impotenter & superbe dominantis extulerant. Favebat Othoni Urbanus, ut majestatis Pontificiæ jura tueretur. Itaque cum rite consecratum, insignitumque mitra & lituo pastoralis, ad sacerdotii munus obeundum in Cisalpinam Galliam dimittit, eo etiam cupidius, quod Turrianis infensus erat. Nam forte per id tempus magno Othonis commodo Ubertus Pallavicinus Turrianorum copiarum Dux, Placentinorum agros Pontificiæ ditionis populabundus affixerat. Erepsierant Turriani paucis ante annis ad summam potentiam, ab initio in Republica popularem auram optimis artibus aucupantes. Postremo autem dominandi libidine accensum, totius publici consilii formam, Prætoris arbitria, & suffragiorum denique omnium jura libertatemque sustulerant. Fuere illis magnæ opes in Saxina valle, quæ est ad Larium lacum, creverantque plurimum hæreditate Tacii Reguli, qui geminos è Belgica Gallia profugos Turrianos fratres militaris indolis sibi generos adsciverat, atque adoptarat in filios. Ab his progenitum ferunt superiorem Martinum, cognomine *Gigantem*, qui post egregiæ virtutis facinora, ad Antiochiam multis in præliis edita, à Saracenis captus & miserabili supplicio affectus fuisse traditur. Hujus nepos fuit Paganus, vir excellenti virtute prudentiaque, qui multa cum laude liberalitatis & pietatis Mediolanenses à Federico secundo Cæsare ad Cohortis novæ oppidum, cruento prælio profligatos, ad se recepit, incredibilique benignitate, omni humana ope adjutos fovit, domumque dimisit: cui non multo post optime de se merito gratiam retulere, demandato ei Præturæ magistratu, ipsoque cum universa familia civitate donato. Paganus ita gessit magistratum, ut nemo temperantia, æquitate, atque industria potior videretur, nisi populi ac infimæ plebis defensorem se professus, paulo acerbius Patritios, tanquam superbe ac petulanter minores ordines divexare solitos, patria exturbandos suscepisset. Hunc fato functum, & ad Claræ valis templum funere publico elatum, omnes ordines diu luxerunt, honestaruntque marmoreo sepulchro, insculptis carminibus, cum titulo magnifice atque feliciter administratæ Republicæ. Pagano successit Martinus frater, vir ingenio perspicaci, erecto ad laudem, ac imperii & gloriæ maxime cupido: cæterum, quæ ad id opportunæ erant artes, multa civili clementia & lenitate temperato: hunc populus defensorem suum, patriæque patrem appellavit: Paulum enim Soresinam, Leonemque Peregrum urbis Archiepiscopum, Patritiorumque Duces expulerat, bonis exuerat, exsilioque mulctarat, contuderatque adeo Nobilitatis animos, ut Respublica numerofo prævalente infimorum hominum consilio, in speciem libertatis, non obscure autem ad unum ipsius arbitrium regeretur.

Eo modo Nobilitate in ordinem redacta, & grassante plebe in Patritium sanguinem, Pontifex

A Romanus affectam laceratamque civitatem miseratus, Ravennatem Antistitem Mediolanum misit, qui Christianæ pietatis officio cædes tolleret, odia mitigaret, statumque perturbatæ urbis componeret. Is capita factionum ablegavit, & ante alios Martinum. Sed is non multo post evocatus studio veterum amicorum, hostibusque ad Divi Dionysii templum tumultuario certamine profligatis, in urbem est receptus. Exinde Martinus usurpato imperio, cuncta regere, plebisque præcipue commoda tueri, & novis & sellulariis hominibus præsidio esse: contra vero Nobilitatem asperimis edictis armisque persequi, & late undique summovere. Confugerant Patritii ad Actiolinum à Romano, quem Ecelinum perperam aliqui nominant, qui rei militaris peritia, & immanitate crudelis ingenii, Duces omnes atque Tyrannos anteibat. Is Cæsarianarum partium Princeps erat, Federicoque secundo Dux & miles operam navarat. Itaque magnis coactis copiis, adversus Turrianos bellum suscepit, transgressusque Abduam, in agrum Mediolanensem sese effudit, Patritios in patriam reducturus, ulturusque eorum injurias sanguinaria manu, nisi Dii eam diræ pestis cladem avertissent. In eo enim metu & trepidatione Martinus constanti animo populum sub signis eduxit, interclusumque Tyrannum amne Abdua, quum à tergo Ubertus Pallavicinus, & Actius Ateslinus, Bosiusque Dovaria, fœderati Principes instarent, commissa pugna superavit, tanta felicitate, ut ipse Tyrannus Nerone crudelior, suo atque alieno cruore perfusus, quum sese incitato insigni equo eripere conaretur, vivus in potestatem hostium devenerit, nec multo post in tabernaculo Bosii repudiatis remediis expiravit: quum nullis vel benignis precibus adduci posset, ut bene speraret, & obligari vulnera pateretur: torvis enim oculis ferociam spirans, neminique respondens, tot scelerum poenas effugere accersita morte properabat, ne turpi incertæ vitæ desiderio, ludibriis ac ignominia superesset.

Cæterum eo prælio Nobilitas prostrata fugataque est, & Martinus auctoritate, gloria atque opibus adauctus, soluto pudore, dominatum arripuit, abolevitque ejus Concilii nomen, quod populus sub *Credentia* nomine instituerat, cujus decretis ipse dudum solenni sacramento adactus se statutum juraverat. Sed ea moderatione & temperantia Martinus utebatur, ut nullum omnino superbum aut insolens dictum ore vel gestu prorsus excideret: studebat tranquillitati, copiarumque ac ubertati rerum omnium: Paulique Soresinæ adversarum partium Principis filiam matrimonio sibi copularat, ut & inimicis Ducem opulentum detraheret, & pacem atque otium se maxime cupere ostenderet. At Patritii ab his nuptiis repudiato Paulo ad Jordanem Ruscæ Comensem se contulerunt: quamobrem Martinus majorem in dies gratiam, exactæque prudentiæ opinionem est consequutus. Ad confirmanda quoque populi studia, declinandamque invidiam, quum sumptuosius ædificare diceretur, omnes operas ad Ticinum conduxit, ut non procul ab Abiato oppido emissarium navigabile derivata parte amnis ad urbem perduceret, ad facillimas subvectiones importandorum ex agris fructuum: qua incomparabili commoditate populus in quotidianos usus perpetuo frueretur. Sub id tempus variæ Patritiorum manus ab exsilio, latebrisque remotiorum oppidorum ad Othonem pervenerunt, patriam & Sacerdotii sedem ex auctoritate Pontificis repetentem. Hi nanque in novam spem (quæ exsules & miseros nunquam destituit) erecti, undique coibant, parabant arma, veteres amicos & propinquos, qui domi remansissent, nuntiis ac literis sollicitabant.

Itaque Otho crescentibus viribus, confecto noctu itinere, ad Verbanum, clientelaeque suas contendit, Aronamque occupat, ut ea bello certa sedes foret, & firmiores demum copias tuto cogeret, ad bellum Turrianis inferendum. His rebus cognitis, Martinus quanta maxime potuit celeritate copias ex oppidis deducit, Pallavicinum evocat, quem in quinque annos perampla mercede conduxerat, Ticinumque transgressus, ad Aronam castrametatur. Horum adventu Otho quum diu terrestribus & navalibus copiis obsessus & oppugnatus, nihil vel repugnando, vel erumpendo proliceret, Fortunæ cessit, deditoque oppido, noctu profugit, ne in conspectum hostis deveniret, & suos ex pactione servavit incolumes. At Turrianus Aronæ, Angleriae, Brebiaeque arces demolitur, ut nihil, in quo hostis tuto consisteret, omnino relinqueretur. Exsulante autem Othone, Martinus moritur, Philippoque fratri administrandæ Reipublicæ gubernacula committuntur. Verum ille confirmatis opibus ad Principatum aperte contendens, se Prætorem in decem annos creat, certantibusque etiam Comi intestino bello Vitanis atque Rulcanis urbe potitur, Prætoremque ibi de Vitanis creat: adversarios expellit, in Volturenamque vallem usque persequitur. Sed tanta vis erat Patritiorum exsulum, Duce præsertim Othone, ut occulto metu plurimum angeretur, atque ob id parandas sibi omnino novas amicitias affinitatibus atque conjugis existimaret, ut aliquorum Nobilium assensu atque studio, stabilire opes, retinere vim Prætorii juris, ac imperii auctoritatem Majorum virtute collectam tueri posset. Itaque Guliermo Pusterlæ Patritio filiam nuptui dat: ipse tum cælebs uxorem ex Biraga nobili familia ducit: traditur etiam uxor Francisco Turriano, Jacobo patruelis filio, ex gente Castillionea: qua cognatione subnixus, dispersis jam atque attritis exsulum viribus, ut impensæ parceret, Ubertum Pallavicinum, exacto stipendii quinquennio, missum facit, singulari Turrianæ gentis incommodo: nam ille contumelia accensus, per occasionem quantis maxime potuit artibus, Patritiis adhærens, Turrianos semper oppugnavit.

Sub id tempus Carolus Andegavensis è Narbonensi Gallia in Italiam venit, evocatus ab Urbano Pontifice adversus Manfredum, Pontificiæ majestatis auctoritatem, patris & proavi more, convellentem. Hujus amicitiam quum Turrianus magnopere appeteret, copias ejus intra fines recepit, & commeatu, veste, armis liberaliter adjuvit, ut Gallorum præsidio firmior factus, Pallavicini nobiliumque exsulum vim propulsaret: & quo præclarior studium ejus erga Regem ostenderetur, Emberram natione Gallum, Regis familiarem, Prætura civitatis ornavit. Philippus interea moritur, repente correptus morbo: hic vir belli pacisque artibus abunde instructus, Principis & Domini spiritus gerebat, virtute Martino par, sed astu & ambitione superior. Accepit imperium statim Napus, quem Napoleonem aliqui appellant, Pagani filius, vir militaris, callido Tyranno quam moderato Principi similior: etenim nihil illi antiquius fuit quam Patritios cedere, proscribere, omnibusque contumeliis atque injuriis exagitados ad internicionem delere. Erat Laudi Pompejæ certus miseris & profugis receptus, benignitate Vistarianæ familiæ, cujus princeps erat Succius. Hunc Napus, obsessa & capta urbe, periculoso certamine vivum cepit & interfecit, necatis etiam in carcere ejus gentilibus atque amicis. Fisiragam vero familiam Vistarianæ ex adverso æmulam, quæ Turrianæ factionis nomen tueretur, adversariorum opibus ditat, & principem in urbe constituit: utque Guliermo Montisferrati Regulo, ad quem

A forte mortuo Pallavicino Patritii exsules confugerant, rerum suarum metum incuteret, trajecto Ticino, & admotis ingentibus copiis, Viglebanum expugnavit.

Iisdem diebus Urbano vita functo Clemens Pontificatum adeptus, enixe contendit, ut Otho à Turrianis reciperetur, ut sua in sede sacra populis id expetentibus administraret, prædiisque Templo dicatis, & tota divini juris possessione potiretur. Cæterum Napus, qui ad Othonis nomen fatali quodam metu expergisci, ac sermone & vultu inhorrescere erat solitus, Pontificis literas, & preces, atque item minas superbe contemnebat. Itaque indignante Pontifice, tanquam rebellis & impius, sacris interdicatur: Mediolani templa omnia clauduntur, sacrificiorum solennibus intermissis: populus dolet & angitur, neque tamen timore conterritus, postulare audet, ut admissio Antistite ira Pontificis leniatur, simulque civitas his imprecationibus expietur. Hærebat imperii finibus Otho, ad eumque exsules undique confluerant: erat enim in eo præclara auctoritas, atque ex honestissima repetendæ patriæ belli causa, magna spes omnibus proponebatur. Quid enim æquius aut honestius, quam pro libertate sacratæ Antistitis, contra Tyrannum impotentem, sævum, inferiorumque furis, sacrosancti Pontificis execratione devotum, arma ferre, crudelique dominatu detru-
dere?

Quum in his consiliis Nobilitas omnis versaretur, ob idque in agro Vercelleni sæpius coiret, Napus Paganinum fratris filium, acri ingenio juvenem, & Nobilium cædibus assuetum, Vercellen-
E sium Prætorem designat: petit à primoribus civitatis, ut eum recipiant, in magistratuque constituant. Ea res delata ad Patritios, qui Vercellis erant, omnium animos metu concussit, doloreque succendit: nemo enim vel ignarus rerum non providebat eo consilio Turrianum, & eum quidem
D cruentum ferocemque hominem, Vercellis Prætorem imponi, ut Patritios suæ gentis hostes urbe pelleret, passimque opprimeret, atque omnibus in locis persequeretur. Itaque exsulum principes, coacta armatorum manu, adventantem cum Prætoris insignibus Paganinum in itinere obruncant: quo nuntio Napus & Emberra adeo in vindictæ cupiditatem exarsere, ut immani eorum jussu, omnis sexus & ætatis exsulum propinqui, quum Paganini cadaver ad Divi Dionysii templum atrata familia convexisset, ad ejus tumulum tanquam hostiæ mactarentur: & quod miserabile spectaculum fuit, ad sepulchra Majorum plaustris in urbem referrentur. Scribit Tristanus Calchus, adeo vesana
E rabie Napum fuisse correptum, ut Musca filius, ad quem postea ex diuturno carcere recuperati imperii laus pervenit, comprehenso Medico, cui salutem ex lethali morbo acceptam referebat, vitam vix impetrare potuerit: quum gravissime juraret juvenis, dolore atque inedia sibi vitæ exitum inventurum, nisi vir sibi salutaris & innocens ab crudeli supplicio servaretur. Napus tamen ubi totam immanis vindictæ libidinem explevit, iraque deferbuit, id execrabile facinus detestari, in Emberræ scæviti-
F am cum externi repentini hominis, tum etiam raro sobrii, culpam referre, prorsus multa verborum ac vultus simulatione, facti atrocitatem lenire. Nec multo post, ubi id populum gravius tulisse animadvertit, ad mitigandam invidiam Gallus Prætura dejicitur, atque urbe ob iram civium excedere jubetur. Nihil fecius tamen Carolo Regi, de interfecto hoste Manfredo Rege, partoque Apulie regno, victoriam gratulatur, missò ad id munus Francisco fratre, cum ornatissimo comitatu, donisque regalibus: qui alacriter susceptus, & donatus balthco militari, Regiæque militiæ honoris causa

causa adscriptus, ita demum Mediolani vitam egit, ut ad imitationem Gallici luxus, splendore & domesticarum rerum apparatu Napum Principem antiret.

Erat res Turriana in summo aridentis fortunæ fastigio, cruciaturque ingenti cura Antistes Otho, mœstaque & extorris Nobilitas errabat, ab infimo quoque Regulo opem implorans, uti consumptis opibus atque amissa dignitate, quando toties repetita patria, bellum grave & ærumnosum improspere & diis haud dubie invitis renovasset. Vigeant tamen in Othone mira constantia, & spes incredibilis adipiscendi imperii Sacerdotalis: & proinde infracto animo Patritii eo duce, qui iustissimam præferret causam, omnia sibi ad reditum atque victoriam faciliora fore existimabant. Erat inter extorres Squarcinus Burrus, vir apprime nobilis & opulentus, vigoreque animi ac armorum peritia illustris: cujus filia nomine Bonacosa, virtute, forma & fecunditate insigni, Matthæo Magno nupserat. Huic Otho Patritiiq; Pallavicino per eos dies morte surrepto, imperium militare detulerant, iniurantque fœdus cum Guliermo Montisferrati Marchione, Ferdinandi Hispaniæ Regis genero, eo consilio, ut maiore belli mole Turrianos oppugnarent. Destinabat enim sibi Guliermus, si id bellum suscipere, multo maiores opes, multoque majus sibi in dies imperium. Verum externis foceri auxiliis sibi opus esse judicabat, ut eximie virtutis gentem, bellicarumque artium maxime peritam, Germanis & Gallis opponeret. Remanserant enim aliquot Gallorum turmæ apud Turrianos, ex his quos Flandrius Comes, Caroli Dux, in Italiam adduxerat: ipso enim in ea pugna interfecto, qua Pallavicinum & Gibellinos superarat, plerique ex ejus equitatu, postquam debellatum esse videbatur, orbatu Duce, subsistere in Circumpadana regione, quam Neapolim usque ad Regem contendere maluerant.

Itaque ad Ferdinandum ipse Burrus in Hispaniam mittitur, ut legationi major inesset auctoritas. Is uti erat gravi facundia, explicatis partium pariter ac hostium viribus, terminatisque consiliis, à Rege copias impetravit, impositisque in naves sexcentis equitibus, & aliquot jaculatorum & sagittariorum cohortibus, in Liguriam est reversus. Nec multo post ab Savona, superatis Apennini jugis, cum ea manu ad Guliermum pervenit. Rex enim generum suum existimatione atque opibus adaugere, & prorsus efferre in spem ingentem amplioris imperii magnopere cupiebat. His confirmati auxiliis cum Othone Burrus & Guliermus ad Viglebanum, quod Turrianus præsidio tenebat, processere. Tentata est per quatuor dies oppugnatio, promotis scallis, & in coronam circumpositis funditoribus & sagittariis, ita ut murus continenter propugnatoribus nudaretur. Sed Turrianus miles pluteos ex crassiore materia pinnis coaptarat, quibus protectus magnam vim lapidum devolvebat, vulnerabanturque subeuntes, neque spes ulla expugnandi oppidi, nisi ingentibus balistis & machinis, longo laboriosoque opere ædificatis, relinquebatur: quod tum minime conandum existimabat Burrus, ne ultra Ticinum oppugnando eo oppido hærens diutius distineretur, quum superare amnem, & quamprimum oppidis Mediolano proximis bellum & pavorem inferre cogitaret. At Viglebanenses irritum hostium conatu, & felici suorum successu elati, quum Burrus milites ab oppugnatione revocaret, contineri minime potuerunt, quin ad aperta porta protinus erumperent. Hos temere incumbentes, insolentiusque proVectos, Hispani suo more refugiendo, & late pavorem simulando, opportune ludificati, à porta longius abstraxere, adeoque celeriter in gyrum reflexis turmis circumvenire, ut hostes, quum se pene ab oppido interclusos cernerent, & in receptu

A multis confixi jaculis laborarent, admixtis Hispanis intra portam refugere cogerentur: ac nisi impeditis atque occupatis valvis, demissa repente cataracta, densato ordine irrumpentes exclusissent, Hispani proculdubio sine vulnere oppidum cepissent. Ex Viglebanensibus aliqui occisi, plures capti. Periere & intus aliquot equites Hispani, superne tegulis oppressi: cæteri, permutatione facta cum his qui exclusi fuerant, in castra redierunt. Erat tum Ticino amni sublicius pons ad Turbicum vicum impositus, munitusque ad capita lunato aggere & ligneis castellis, in quibus binæ utrinque Mediolanensium & Comensium cohortes ad custodiam excubabant. Decreverat forte per eos dies Ticinus, ita ut expediti equites certis vadis haud magno cum periculo tranare posse viderentur. Itaque Othoniani equites ferme omnes, & in primis Hispani confessores, totidem pedites in equorum clunibus transportantes, in adversam ripam evaserunt, & utrinque sub auroram improvise aggeres adorti, magno tumultu magnisque clamoribus subire cœperunt. Tanta celeritas Hispanorum fuit, ut in ea parte præsidium pene prius deicerent, quam alterum à tota mole pedestris exercitus expugnaretur. Paucis interfectis, omnes Burrus, potius ponte, inviolatos conservavit; & quum liberaliter etiam dimitteret, rogavit, ut ad referendam ejus beneficii gratiam jam tandem à Patritio sanguine temperarent, & sacrosanctum Antistitem templo sedeque sua, ac ipsos denique Nobiles patria atque penatibus dignos existimarent. Ob eam humanitatem Burri nomen Mediolani & Comi clarissimum fuit, & magna quoque pars ejus laudis ad Othonem referebatur, vel invitis & negantibus Turrianis, qui plebis animos his humanioribus officiis, pietateque hostium deliniri posse metuebant. Hujus Burri monumentum in peristyllo ad ædem Eustorgianam nuper vidimus, exesis literis, & superstante scutata equestri statua cum sceptro imperatorisq; insignibus ad veram oris effigiem depicta.

Cæterum Burrus & Guliermus diffuso per Laumellinum agrum equitatu, atque inde cum magna agricolarum trepidatione Sepriensem ingressi regionem, ac demum transversis itineribus Comensem pariter & Ticinensem secantes viam, vicos Mediolano proximos invasere. Erat ad Caratum oppidum in æstivis Narbonensium Gallorum equitum ala, ad eam reliquæ Italarum turmæ atque item cohortes, uti conscriptæ instructæque erant, Mediolano mittebantur. Napus interea, quanto maximo conatu poterat, suas ac externas copias colegebat, ut iusto exercitu cum hoste patenti in campo congregaretur. Sed dum à Parmensibus auxilia exspectantur, Carrociumque cum signis militaribus & Valentes Prætoriani instruuntur, (sic enim eos spectatæ virtutis milites vulgo appellabant, qui ad tuenda signa delecti erant) Otho fit certior, Gallos negligentius, ut in nullo metu, vigilias obire, atque eos noctu opprimi facile posse, si expedita cum parte copiarum, Hispani equites mitterentur. Nec mora, re ad consilium delata, expeditionem suscepit Burrus, paucisque horis confecto per noctem itinere, Caratum pervenit. Forte Gallos Italosque, simul ea nocte liberalius epulatos, altior somnus oppresserat, & vigilas rari in statione segnius agebant, quum Caratenfes exacerbati hospitum injuriis, Burro faciliores aditus ostenderunt. Itaque magnis clamoribus occupato oppido, nequicquam tentata defensione, inermes discinctique equites capti, Italiciæque turmæ eandem fortunam tulere. Sed quum victores ingenti potiti præda, captivis indulgerent & non arcte custoditis, corpora & equos curarent, affuit instructo agmine Napus, Othoque & Guliermus eodem fere temporis puncto super-

pervenere. Commissa est extra oppidum pugna, Burro atque Othone inopinantibus, foeda utrinque militum concursatione: nam & oppidum Germani equites irruperant, & captivi resumebant arma: foris vero Turriani equites, & Mediolanensis legio, Valentiumque cohortes, Guliermi copias adeo perturbant, ut disiectae in fugam verterentur. Hispani quoque equites, qui satis mature equos conscendere, atque arma expedire coeperant, angusto in loco confertae Germanorum alae impetum non tulere, uti magna ex parte inermes, & Maurorum praeliis affueti: sua tamen agilitate eo profecerunt, ut primis suorum interfectis, celeriter sese explicantes, evaderent. Napus primi successus victoria contentus, suorum agmina in acie continuit, sive quod dolum ab insidiosa gente suspicaretur, sive quod in ea admodum repentina utriusque exercitus perturbatione, quum nihil pro certo explorari posset, liberatis praesertim Gallis, legionis dissolutionem periculosam existimaret. Otho, Guliermus & Burrus, cum integro ferme equitatu, & magna parte peditum evadentes, continuatis itineribus, ultra Ticinum se receperunt. Ita Napus sua celeritate & opem oppressis suis opportune tulit, & felici casu de hoste victoriam est consequutus. Hujus rei gestae seriem tempusque Corius Scriptor confundit, falsoque asserit, ea die Theobaldum Magni Matthaei patrem fuisse captum. Merula quoque, utpote eam Annalium copiam, qua nos utimur, minime nactus, de Hispanis angustissime perscripsit. Ab hac victoria Napum constat odium suum iramque violenter exercuisse, in eas praesertim familias, quae ad hostes inclinassent, aut com meatum ex itinere praebuissent: Castellionumque in primis diruisse, quoniam ejus oppidi Nobiles (licet Turrianis affinitate conjuncti) in Othonis partes transferant.

Interea Otho ad Clementem, qui Urbano vita functo successerat, proficiscitur: orat, ut ejus ope in sedem suam patriamque restituatur. Favebant Othoni plerique Cardinales, hortabanturque Pontificem, ut sacrosanctae majestatis jura, in ipso Principatus initio, fortiter atque magnifice tueretur. Itaque Clemens gravibus literis Turrianos adhortatur, ut Antistitem recipiant: abnuentes sacris interdicit, dirisque execrationibus adjectis, civitatem inferorum poenis devovet. Ita clausis templis, sacrorum expers populus de Turrianis conqueritur; consternatusque eo piaculi metu, à Napo religionis jure postulat, ut pertinaciae suae finem imponere velit: æquum enim esse Othonem recipi, postquam uti civis spectatae probitatis nomine, à summo sacrorum Principe, praesulatu dignus esset existimatus. In ejus ancipitis curae deliberatione aliquandiu fatigatus Napus, ut religione tangi, & populi precibus permoveri videretur, Legatos Romam misit, ut Pontificem magis ac magis aversum atque infensum Turriano nomini, explicatis ejus contumaciae rationibus, mitigaret. Sed eos Clemens Christiana severitate, tanquam pollutos & execrabiles, urbis Romae ingressu prohibet, praecipitque ut mature Pontificii imperii finibus decedant. Ita Legati urbe exclusi, continuo Neapolim ad Carolum perrexerunt, ut ab amico Rege, atque eo quidem Patrono & assertore Pontificiae libertatis, opem implorarent. Carolus re cognita haud multum cunctatus, Turrianorum causam suscepit, paucisque inde diebus, Turriani Rege deprecante, simulque Legatos suos Romam mittente, recipiuntur in urbem, statimque in Senatum introducuntur. Regius primo Legatus postulavit pro communi jure gentium, ut Turriani, qui supplices ad dicendam causam venissent, æquis animis audirentur: eos enim esse in fide atque amicitia sui Regis, ad cujus dignitatem

A maxime pertineret socios tueri, vel ob id praecipue, quod semper Caesaribus Pontificio nomini infestissimis hostes exstitissent, Regemque in primis Pontificum injurias vindicantem sequuti, ejus victoriae participes esse voluissent, & videri quoque procul a benignitate aequitateque sanctissimi omnium parentis, eos sacerdotiis atque opibus ornare, qui cum nefariis Tyrannis consilia atque arma miscuerint, & tum maxime pacis & otii tranquillitatem perturbare contenderent: ipsos vero Pontificiae dignitatis defensores, & ob praestitam fortem fidelemque operam vel ampla praemia meritos, hostiliter persequi, impositoque ipsorum urbi Antistite, saevo atque aeterno hoste, ipsoque Duce exsulum maxime factioso, exagitandos ac opprimendos praebere. Orantis Galli Turrianus Legatus verba excepit, adeoque acerbe in causam Othonis est invehitus, ut quum vehementi & plane rabido ore modestiam omnem exueret, tanti confessus oblivisceretur, praesentisque Othonis famam maledictis atque inusitatis criminationibus lacerando, fervore intemperantis linguae provectus, magnam partem Senatus sibi ac Turrianis averteret.

Ea omnia Otho Antistes ex adverso consurgens, moderata quidem, sed plane illustri & generosa oratione confutavit: repetitisque alte contentionum initiis, ostendit, Turrianos omnium praeteritorum temporum Tyrannos, astu, impietate, saevitiaque superasse: quando Mediolanensium insigni beneficio in urbem adsciti, & ex praclaro tuenda plebis titulo, summis honoribus honestati, ipsum demum urbis imperium, imperitis hominibus deceptis, uti perjuri ingratisque homines arripuissent. De sacerdotii autem ratione, & de calamitate Nobilitatis exsulantis, deque statu ipso deformatae urbis, ita accurate graviterque disseruit, ut facto Senatus decreto, Pontifex responderit, se quamprimum Cardinalem Legatum in Cisalpinam Galliam missurum, ut ex ejus auctoritate controversiae componerentur, hominem ea virtute atque industria, ut brevi rationem inventurus sit, qua Othoni pariter ac Napo certis praescriptis legibus caveatur: atque ita futurum esse, ut Othone recepto, & de more divini juris dicundi facultate potito, civitati sacra redderentur. Nec multo post Legatus Othonem reducturus Mediolanum venit: actum subinde est de compositione ex formula Romani Senatus, omniaque pollicente se facturum Napo, & excolente omnibus officiis ac largitionibus Legatum, civitas expiatur, nec tamen Otho recipitur, magnoque ejus incommodo, dum Napus novas perficiendo negotio difficultates inserit, sensimque inde tempus extrahitur, eluditurque Legatus, Clementem morbus repentinus oppressit.

E Nuntiata Pontificis morte, Turrianus vel ob id etiam voti compos est effectus, quod Patres foeda dissensione in diversa studia proclinales, in comitio aliquot menses contenderant. Peropportune igitur Napus, excluso summotoque Othone, ad firmandas imperii vires conversus, Rodolpho Caesari Legatos cum amplissimis donis in Germaniam misit, obtulitque ultro studium suum atque opes ingredienti Italiam, ad coronam Longobardici regni de more suscipiendam. His pollicitationibus latus Caesar, Napum suo Augustali jure Praesidem, Procuratoremque in Insubribus constituit, alamque Germanorum equitum mirificam ad eum praesidii causa misit; cui Cassionus Napi filius, juvenis decore formae & militari virtute conspicuus, praeficitur.

F Interim Othone in omnem occasionem excubante, Cardinales Theobaldum Vicecomitem Placentinum, indito Gregorii decimi nomine, Pontificem creant: quum is infimi ordinis sacerdos, sed virtute insignis, nunquam de toga candida cogitans,

taffet. Magno quidem Senatorum probro, qui neminem è corpore suo in ea pertinaci contentione, Pontificatu dignum existimassent, nolentibusque similes, & casu quodam suffragiis ludentes, probitatem ex alio eoque humili ordine quævisissent. Ad hunc Otho profectus, de reditu in patriam sedemque suam diu agitavit, adhæsitque ei in Galliam ad Concilium contendenti, quum ille & Urbani & Clementis acta se defensurum in ea sacerdotii causa prolixè polliceretur. Sed Napus tanto cum honore apparatuque Pontificem Mediolani suscepit, tantaque liberalitate abeuntem in Galliam est prosequutus, ut Pontifex ejus sacerdotii controversiam non prius se cogniturum diceret, quam peracto Lugduni Concilio, in Italiam reverteretur; Raimundumque subinde in gratiam Napi fratris, totiusque Turrianæ domus, Aquilejensem Patriarcham creavit. Hic erat Episcopus Comensis, multa morum gravitate, sed profunda ambitione & nefaria simulatione insignis: ab eo enim, in id scelus tota familia conspirante, summissos percussores ferunt, qui Othonem Placentiæ in aula Pontificis obversantem, observatis vestigiis, obtruncarent: sed ille per servum ex cauponariæ mulieris indicio, insidias subodoratus, noctu iter arripuit, Lugdunumque contendit. Refert Stephanus Flamma, qui eam historiam carmine conscripsit, Pontificem ipsum (quod vix credibile est) nefarii consilii conscius fuisse: & quod fortasse pro falso esset omittendum, nisi & tum & postea quantum vita superfuit, Othoni animum plane hostilem, & quo lethalius noceret, insidiosis honestorum verborum coloribus convelatum ostendisset. Ita his Othonem à gladiis Turrianorum fortuna conservavit, semel in æde Ambrosiana, dum Octaviano Cardinali adesset, quærantibus eum Turrianorum satellitibus, usque ad latrinarum recessus: iterum ad Placentiam.

Peracto Lugduni Concilio, & composita duorum Cæsarum controversia, decretoque novarum copiarum supplemento, ad instaurandum in Asia bellum, Gregorius in Italiam est reversus, comitante Othone, qui spei optimæ plenus ex præclara ejus pollicitatione, diu exoptatum æquissimis postulatis suis exitum expectabat. Sed Pontifex jam plane Turrianæ factionis effectus, Othonem occulte oderat tanquam creditorem & æqua poscentem, palam tamen multo cum verborum honore, veluti gentilem benivolumque suum, uti bene speraret, hortabatur. Accurrerant ad Othonem viri Patritii, magnusque amicorum, ac affinium, clientumque numerus in dies apud eum augebatur: quo illustri comitatu, Pontificis aula frequentior atque ornatiores reddebatur: nemoque jam exsulum erat, qui non plane speraret propensione studioque Pontificis, Turrianos Archiepiscopum esse recepturos. Jam enim Franciscus Septariensis, quem populus delegerat, ut Turrianorum potentiam auctoritatemque minueret, tædio turbulentæ contentionis, sponte se abdicans, ad religiosi otii quietem se contulerat. Cæterum Gregorius ab Alpibus descendens, Othoni nihil tale expectanti præcepit, ut Bugellæ Vercellensis agri oppido subsisteret, ne ejus adventu ad urbem Mediolanum, ea omnia, quæ de compositione paceque exsulum prolixè tractata fuerant, nova Turrianorum suspicione aut iracundia turbarentur. Paruit Otho extrema compulsus necessitate, in occulto gemens & sæpe suspirans, nec tamen animum despondens.

Paucis inde diebus Pontifex, ipso Patriarcha Raimundo ornatissime lætissimeque excipiente, cum Mediolanum ingrederetur, festa fronde atque aulæis convestitiæ erant regiones. Napus & Franciscus, qui honoris causa ab equis defilerant, adstantes fre-

no Pontificis equum deducebant; umbella serica denis hastis à Turriana juventute præferebatur. Quibus obsequiis, aliisque muneribus Pontifex haud dubie traductus in partes, & ab Othone diductus, ita demum Mediolano excessit, ut cum multa præfatione inanium verborum, æquissimam sibi videri Othonis causam dictitaret: sed ejus controversiæ judicium in aliud tempus esse differendum: quod nequaquam è Republica Christiana fore videretur, si Turrianarum rerum statum, reducto potentiæculo perturbaret: quando ii potentia virtuteque animi, magnis Regibus æquarentur, quæis fœdere & amicitia essent conjuncti; colerentque singulari officio ac pietate Pontificiæ majestatis nomen, idque armis impigre defenderent adversus Gibellinos, quorum inter principes Otho præcipuus esse censeretur.

Res enim tum in Italia adventu Caroli Regis eo deductæ erant, detestabili populorum omnium infania, ut cunctæ civitates diris factionibus laborarent. Guelphi à Pontificibus stabant, quorum defensores erant Galli: Germanis vero Cæsaribus alteri studebant, qui Gibellini vocabantur. Hi magna ex parte nobiliores familias ad se pertraxerant: populares vero familiæ, & plebs ipsa, novique homines Romanorum Pontificum jura tuebantur. At Patritii superiorum Cæsarum militiæ adscripti, post emerita stipendia, clari potentisque evaserant, quum Imperatorum benignitate, prædiis, oppidis, portoriis, aquarumque juribus donarentur, speciosisque nominibus acceptis, Aurati Equites, Valvasores, Capitanei, & Comites appellarentur. His, uti Cæsarum beneficiariis, mos erat pro insigni Romanam aquilam gestare, ingredienti Italiam novo Cæsari adesse, præstare operam militarem, novosque honores perpetuis officiis promereri. Ita honestati privilegiis, & exempti ab communi foro juris dicundi, inferiores populi classes, plebemque ipsam servilem in modum despectui atque ludibrio habere, & sæpe, si iusta tarde facesset, contumeliis atque verberibus mulctare consueverant: & quo nihil acerbius videbatur, vigeat iniqua lex, haud dubie ad injuriam populi promulgata: qua lege, si quis è plebe à Patritio esset interfectus, paucis assibus ea capitis poena solveretur. Hujus legis iniquitas aliquandiu tolerata, ad extremum plebis animos adeo vehementer exstimulavit, ut vi atque armis eam rescinderet, & Nobiles Ducibus Turrianis persequeretur. Nihil deinde medium aut æquabile plebs volebat, quum arma teneret, & vindicandas superiorum temporum injurias arbitraretur; frustra etiam Patritiis priorem licentiam suam moderantibus. Ea enim impotenter dominari, quam ex æquo injurias propulsare malebant. Ea contentio Turrianos, (uti supra docuimus) in civitate Prætores & Principes, ac demum recrudescente intestino malo, belli Duces & Dominos fecit: tantaque demum fuit imperitiæ plebis infania, ut odio Nobilitatis, quam urbe pepulerat causa recuperandæ libertatis, novæ demum & præduræ quidem servitutis jugum æquo animo perferret: quum jam Turriani sublata publici consilii potestate, cuncta pacis & belli munia ad arbitrium suum revocassent, & ut imperii opes validius confirmarent, in partes Caroli Regis & Pontificum concesserant, mutisque fœderibus initis, in eam curam jugiter evigilabant, ut Germani Cæsares Italiæ finibus arcerentur, Gibellinos ubique perderent, infirmarentque eorum vires, qui à Cæsaribus opem implorarent. Per hunc modum Roma, Neapoli, Florentia atque Mediolano exacta proscriptaque Nobilitas errabat, consilii inops, perculsa metu, attrita opibus. Ex adverso autem Pontificii imperii majestas, percolente

ruenteque Carolo, atque adjuvantibus Turrianis, auctoritate viribusque florebat. Sed necesse erat sacrosanctos Principes, qui uti omnium parentes Christiana professione ad componendam pacem medii æquissimique arbitri esse deberent, factiones sequi, & quod prope impium videri poterat, sese Guelpharum partium principes profiteri. His de causis Gregorius, ut temporibus serviret, præsenti- que otio consuleret, Othonis & totius Nobilitatis obliviscendum existimavit. Verum ad inanem justitiæ speciem postulavit, ut Archiepiscopatus jura, atque item oppidorum & agrorum redditus, ad exsilii solatium Othoni redderentur. Vix credibile videri poterat, Othonem, qui eximia Urbani liberalitate creatus Præful, singularique demum Clementis studio in repetenda dignitatis sede, usus fuisset, ab eo demum, qui & gentilis esset, & amicissimus putaretur, deserere & eludi penitus, hostiliterque traduci.

Sed in Othone ea vis constantiæ virilis, exactæque prudentiæ erat, asperrimarum rerum usu, & provectæ jam ætatis cursu confirmata, ut tum maxime sperare inciperet, quum cæteri exsules animum despondere viderentur. In summis enim egregie educati hominis dotibus reponebat, non frangi animo in adversis, putare Fortunam vivida virtute inferiorem; eamque contemnere uti penitus instabilem; atque ideo quum averfa tam diu esset, non multo post in complexum commutata libidine redituram. In eo animi habitu quum aliquandiu ad Bugellam substitisset, intentusque in omnes rerum novarum motus, aliquam effere- rendi sese & renovandi belli occasionem circum- spectaret, Gregorius Aretii decessisse nuntiatur. Nec mora, ad eam famam Patritia gens circum- quaque ex infelicitate belli dissipata, ad Othonem coit; in communi consulitur: & quum Duce militari atque opulento, qui afflictas res atque hu- mi prostratas erigeret, maxime opus esset, Gothofredus Languscus deligitur. Hic erat nata- lium atque opum claritate apud Ticinenses facile princeps, gloriæ atque imperii avidus, & , quo maxime placebat, Turriano nomini apprime in- fensus. Nemo enim è Cisalpina Gallia non sus- pecebat Napi opes, uti in immensum adauctas, conjunctasque Apulo Regi, Romanoque Pontifici, quodque finitimos terrere poterat, novetiam Cæsaris amicitia atque præsidio confirmatas. Bergomum enim, Cremam, Comum, Laudemque Pompejam, Turriani certo jure in potestatem redegerant; in- terque Ticinum & Abduam, atque in propinqua Rhætici Alpibus Volturena valle, expugnatis & excisis Nobilium arcibus, cuncta subegerant.

Itaque Languscus amplissimis Patritiorum pol- litationibus oneratus, (eum enim Mediolani Prætorem cum militari imperio, opimisque sti- pendii designabant) & suo fatali judicio inductus, se partium Ducem futurum profitetur: evocat un- dique veteranos, & è Laumellino agro loricatas cohortes, sagittariosque item ex Liguria mercede conducit: ante omnia equitatu studet, ut Ger- manorum turmis resistat. Paucis diebus in eo ap- paratu consumptis, & sublati signis ad Verba- num lacum proficiscitur. Nullum fuit in ea Præ- fectura oppidum, quod non statim aperiret por- tas. Erat enim in eo tractu Vicecomitum fami- lia admodum potens & illustris, & jam erat cun- ctis invisa Turrianorum acerbitas, qui superiore bello, præda & cæde adversariorum non contenti, etiam in ipsa tecta & segetes igne sævierant. Ita- que Arona & Angleria statim recipiuntur: Otho ipse cum valida manu in Sepriensem regionem ir- rumpit; ea, intercincta Ticino atque Olona amni- bus, ad Verbanum usque vicis atque oppidis florens extenditur, ab oppidoque Seprio nomen ducit.

A Hoc Othoniani facile expugnant, & eo capto late undique excursionem fiunt, magnusque timor fini- timis pagis incutitur.

Tum vero Napus à fœderatis sociisque civitati- bus auxilia parare; equos militares mutuo acce- ptos, & è domestico stabulo fidis & fortibus amicis distribuere; urbanam legionem ad Carroccii tu- telam ea severitate atque eo ordine describere, ut octo Tribus (tot enim erant urbis portæ) suffra- gio suo totidem, quos maxime putarent acres & impigros, singularum cohortium Tribunos pro- nuntiarent, Tribuni eligerent Centuriones; hi ve- ro eos, qui pari delectu Decurias sacramento roga- tas, multa imposita, ad vexillum vocarent. His

B celeriter administratis, Cassionum filium cum Ger- manorum turmis præmittit, qui effuso & vaganti hosti protinus occurrat; ac confestim urbe cum Carroccio paludatus egreditur, cura urbanarum rerum Francisco fratri demandata. Is diligenter urbem novo præsidio munivit, suspectos relegavit, dubiis obsides imperavit, circumscriptis etiam me- tu & poena nonnullos, qui spiritu, gratia, opibus- que valebant. Interim Napus cum gravi peditum agmine Angleriam ire pergens, quartis castris ad Guasseram amnem pervenit. Labitur is ex proxi- mis vallibus in Verbanum, saxoso passim impedi- toque alveo, & quum imbribus intumescit, mini- me vadoso. Jam Gothofredus, cognito hostium adventu, in adversa ripa aciem direxerat, prove- ctusque equo, ut cuncta oculis perlustraret, in eun- di prælii occasionem expectabat, eo animo ut ho- stes vadum petris atque virgultis impeditum ingre- dientes adoriretur. Non dubitavit Cassionus, qui

C tribus ferme stadiis subsequenter cum pedestribus copiis patrem anteibat, Germanos per se pugnandi avidos cohortari atque incitare, ut contra hostes confertis turmis provolarent. Erat in prima fron- te præmio excitus à Cassione Antius Laufer, Ger- manorum Dux, armis cristisque conspicuus: hunc insolenter trajecto alveo ante alios pugnam cientem, Languscus ipse pari alacritate concitato equo inva- sit, hastaque transfixit. Quo strato Languscani clamore sublato victoriam ingeminant, tumultua- rioque procursu in Germanos deferuntur. Fit acre in vado certamen humili tum admodum profluente:

D Balistarii Ligures in densatos hostes sagittas excu- tiunt; equites peditesque miscuntur. Erat jam de Germanis magna ex parte vulneratis parta victo- ria, quum Languscus terrefacto equo in tenacem alvei voraginem abreptus, ab hostibus capitur: nec mora, Germani commutata fortuna conglobantur: Languscanis amisso Duce animus concidit. Ap- propinquat Napus, totaque mole copiarum impres- sionem facit. Funduntur Othoniani viribus atque animis impares: insequitur fugientes recens equi- tatus: magna cædes editur: Nobilium ala, Theo- baldus Vicecomite acriter depugnante, aliquandiu restitit, & dum se in æquiores locum subducere properat, circumventa à Cassione cæditur. In ea receptus iniquitate Theobaldus ipse, & cum eo vi- ginti duo Patritii capiuntur. Ferunt Napum filii virtute lætantes, præ gaudio lachrymas tenere ne- quivisse: quando ea victoria unius horæ momento parta, magno timori, summisque periculis, & præduris laboribus finem attulisset.

E Franciscus Turrianus, qui Mediolani ipso ple- bis Tribunatu superbus, & populi & libertatis de- fensor appellari volebat, quum rei feliciter gestæ nuntium accepisset, essetque rogatus sententiam de captivis, crudelissime rescripsit, asserens cuncta si- mul Hydræ capita ense recidenda, ne renata vene- num rursus effundant. Contra Cassionus generoso consilio in victoria, nobili virtute parta, clementiæ laudem quærens, ne supplicium de Patritiis jure bel- li captis sumeretur, obnixè deprecari. Sed Napus

F iam-

jampridem Emberræ sævitia, extra aciem patri-
tio sanguine cruentatus, laudata, sed elusa filii
lenitate, in duriorē partē inclinavit, depo-
scentibus præsertim Germanis truci cum fremitu,
ut in vindictam interfecti eorum Ducis, Gotho-
fredus necaretur. Nec multo post Napus, ut le-
ge capitali ageretur, dira voce pronuntiavit; at-
que ita ad Galaratum oppidum duo & viginti in-
signes Patritii, ante alios & Languscius Dux ipse
& Theobaldus, nefariorum hominum more, se-
cui percutiuntur: & quod invidiam adauxit, cer-
vicibus tantorum Procerum ad plautri temonem
ludibrio quodam appositis, atque ibi repetito sæ-
pe ictu sævissime detruncatis. Erat Theobaldus
Andreoccio Othonis fratre genitus, sua virtute
& specie corporis, sed multo magis felici prole
clarissimus: reliquit enim Matthæum filium, qui
postea ob virtutem, *Magni* cognomen adeptus,
imperium ab Othone acceptum cum admirabili
laude in posteros propagavit. Id execrabile faci-
nus non lege militari, sed immani patrum ra-
bie, nobilissimos quosque, & inter primos Lan-
gusciæ familiæ Proceres, adversus Turrianos vehe-
mentissime concitavit; adeo ut non toto plane ex-
acto triennii spatio, parem omnino cladem Turrianis
funesta admodum illata calamitate rependerint.

Otho mœstus, uti domestico publicoque ictus
vulnere, è Seprio in Vercellensem refugit agrum,
diu indignam Theobaldi necem lachrymis prose-
quutus: toto autem tempore nunquam animo sese
demittens, sed hilari vultu acceptæ cladis mœro-
rem semper occultans, gravi oratione Patritiis o-
stendebat, Deos immortales nefario Turrianorum
scelere permotos, occasionem renovandi feliciter-
que conficiendi belli proculdubio præbituros. Nec
multi menses effluxere, quum ad excitandos ani-
mos initium præbuit populus Comensis, acerbita-
te Prætoris ad arma concitatus. Is erat Accursius
Cutica, vir ingenio rapaci, factioso, & quod à
liberis hominibus ferri non poterat, agresti qua-
dam ferocia superbo: eum sibi in Prætura suffe-
cerat Napus, idque facile impetrarat pro amicis-
simo homine, & Patritiis maxime infenso: in
hoc etiam Comenses pari obsequio remuneratus,
quum pariter Corradinum Lavizarium Vitana-
rum partium principem, Mediolanensi Prætura
eodem tempore ornasset. In hunc avare atque inso-
lenter jus dicentem, quum forte juveni è Ru-
fona familia ad tribunal liberius loquuto, manus
injiceret, populus impetum fecit, fugatumque &
in prætorio obsessum cepit. Post id factum De-
curiones ad Napum scripsere, ut si Accursium in-
columem & dimissum vellet, ipsis honesta per-
mutatione Simon Locarnas remitteretur. Hunc
civili bello captum Turriani ad ignominiam &
cruciatum clathrata in cavea, feræ bestię more,
concluserant, septimumque jam annum tetro squal-
lore & foeda illuvie deformem ac miserum adser-
vabant. Erat Simon è Muralta familia Comi admo-
dum nobili, quæ originem à Locarno Verbani
lacus oppido deducebat; ob id à Corio Merulaque
Scriptoribus *Locarnas* appellatus: vir ingentis pro-
fecto animi, & proceri robustique corporis, atque
utraque fortuna sua clarus, sed injuriæ vindicta
maxime illustris. Visitur hodie Comi lapideum e-
jus sepulchrum, superstante equestri imagine, ad
vestibulum Abundianæ Basilicæ. Porro Napus
amicissimi hominis periculo permotus, Simonem
cavea eduxit, uti etiam contracto jam morbo non
multo post aliqua vitæ aut aeris intemperie mori-
turus; improbane plurimum Francisco, & præ-
dicante, Simonem suo astu viam aliquando reper-
turus, qua diuturni carceris contumeliam ulci-
fceretur. Cæterum ea conditione Simon est edu-
ctus, ut solenni sacramento juraret nunquam se

A adversus Turrianos arma laturum: sed ejus juris-
jurandi fidem, uti summa expressam necessitate,
non multis inde diebus penitus elusit; & quum
inhumani carceris memoriam animo deponendam
minime existimaret, gravibus apud veteres ami-
cos habitis consiliis ad Othonem est profectus. E-
jus viri adventu erexit sese in novam spem Otho,
coivereque subinde Patritiæ gentis reliquiæ: nam
hominem per se divitiis & clientelis validum, ef-
feratoque animo studii sui vires omnes ad oppu-
gnandos Turrianos effundentem, magna exsulum
multitudo sequebatur. Apparebat enim Comenses
Simone auctore in Patritiorum partes esse transi-
turos, quando jam à Turrianis singulari ejus bene-
ficio rebellassent.

B Dum arma, equi, militesque parantur apud Ver-
cellas, Otho per speculatores didicit, castrum Se-
prium, de quo toties pugnatum fuerat, exiguo
præsidio & nulla prope cura custodiri: nam to-
ties devictis profligatisque hostibus, Turriani, u-
ti in nullo metu alendi præsidarii militis sumptum,
custodes vero excubiarum diligentiam & ipsi re-
miserant. Itaque maturandum ratus Otho, Tici-
num trajicit, delatusque intempesta nocte ad por-
tas, & oppidum & arcem cepit. Paucis inde die-
bus aucto exercitu, totam eam regionem perva-
gatus, finitimis Mediolano vicis magnam, uti ex
improviso hoste, trepidationem intulit. Ad ejus
rei gestæ nuntium Napus cum sua vetere urbana
legione, Cassioque filio, & Germanorum alis
urbe egreditur; cæteras auxiliares copias subsequi
jubet. Cæterum dolore simul atque ira angebatur,
quod hostes toties superati, cæsi que, adeo insolent-
ter sese efferrent, nec superioris cladis exemplo ex-
trema supplicia formidarent: sed in Othonem toto
animo erat intentus: quem si aliquo casu Fortuna
defereret, eo semel oppresso, Patritios facile de-
bellari delerique posse judicabat. Appropinquante
Napo, summa, & ea quidem opportuna, belli ra-
C tione Othoniani ad signa revertuntur: juxta op-
pidum Seprium castra muniunt; murum oppidi
atque item arcem præsidio firmant, eo consilio,
ut freti Sepriensium commeatu, & tuti vallo, præ-
ferocis hostis impetum frustrentur. Quum aliquot
diebus minutis præliis laceßendo, levem armatu-
ram exercuissent, Napus è proximis castris ad op-
pugnandam arcem scalas & machinas protulit, in-
structaque legione, & equitatu in præsidiis col-
locato, moenibus successit, ratus se potiturum ar-
ce: aut si Otho, ferendæ opis causa, castris egre-
deretur, æquo in loco justa acie certaturum. Quum
aliquot horis utrinque acerrime certatum esset ad
E murum, comminutisque scalis, & multis vulne-
ribus acceptis, Turriani decidentium lapidum ti-
gnorumque pondera vix sustinerent, visa est O-
thoni occasio rei bene gerendæ; communicato-
que consilio, cunctisque approbantibus, oppido
& castris in hostes erupit tanto impetu, ut pul-
sis & perturbatis primis, tota Mediolanensium
legio in fugam verteretur; eaque vis repentini ti-
moris apud fessos fauciosque, & de arcis expu-
gnatione desperantes, fuit, ut neque Napus, ne-
que Cassionus, conturbato à fugientibus equitatu,
opem fusis atque perterritis afferre potuerint. In
ea fuga Otho clementiæ nomen quærens, orabat
F suos, ut à sanguine civium temperarent. Sed haud
facile continere frænareque eorum ferociam pote-
rat, qui amicos propinquosque suos crudeliter ex-
tra aciem interfectos ulcisci properabant. Conserva-
vit tamen multos: nam nisi maturius receptui ceci-
nisset, quam nox instaret, usque ad castra foedæ fu-
gæ & trepidationis plena, iratorum Patritiorum gla-
dii cum magna hostium cæde pervenissent. Agno-
vere Mediolanenses lenitatem Antistitis sui.

Sed Napus, ejus fugæ ignominiam animo minime
R 2 ferens,

ferens, ubi perterritos confirmavit, cohortante Cassio, ut amissum decus celeritate atque audacia sarciretur, præcepit Præfectis, ut corpora atque animos ad pugnam pararent: statuisse enim intra paucas horas hostem inopinantem, & ab recenti rerum successu incautum adoriri. Ita ea nocte infomnis Napus inalbescente cælo ad hostes contendit tanta celeritate, ut Othoniani vix arma induere, equosque frænare potuerint. Dimicatum est aliquandiu ad vallum, irrumpente undique hoste, & repugnantibus satis constanter, qui pro custodia castrorum in fronte excubabant; sed reliquas cohortes ægre sustinentes, nec satis conglobatas, ex transverso Germani densatis cuneis facile perriperunt. Quo conspecto reliquus peditatus, itemque equites effusi castris atque oppido, protinus in fugam se conjecere. Ita prope sine vulnere perrupta & direpta castra, plurimi capti, cæsi pauci, adeo ejus fugæ fædo eventu, ut non facile appareret, utrisnam Fortuna, humanis cœptis illudens, intra spatium septem horarum, plus dedecoris, aut militaris laudis attulisset. Otho premente undique hoste inter tela volantia periculo elapsus, cum magna parte equitatus ex fuga Comum pervenit. Eum Comenses neque intra urbem recipere, neque ut diu in suburbanis ædificiis subsisteret, pati voluerunt, ne Turrianus victor, à quo jam plane defecerant, admoto exercitu per causam persequendi hostis, ipsorum agros evastaret. Præbuere tamen benigne & largiter commeatum, atque item sarcinaria jumenta, & peritos itinerum duces. Quorum fideli opera usus Otho, ad septimum lapidem, Luragum castellum primo petiit, atque inde profectus superato Lugani lacu, ad Zornigium Subalpinum pagum contendit. In eo loco admodum tuto & sylvestri aliquot dierum quiete recreatus, ad amicos literas dedit, ut de sua salute receptuque certiores redderentur. Sed non multo post inopia & egestate impulsus, deflexit ad Canobium, insigne & opulentum in ripa Verbani oppidum. Ibi Otho, admirabili facundia sua opportune usus, oppidanos claudentes primo portas, & mox bidui tantum moram fessio agmini concedentes, adeo apposite feliciterque permulsi, ut repræsentata hostium suorum crudelitate in amicitiam eos suam foedusque pertraxerit.

Nec multo post coivere rursus Patritii exsules ferme omnes: nam ubi fama perlatum est, Othonem benigne amiceque acceptum Canobii constitisse, unusquisque vel inermis vel seminudus ex fuga & ab hostium castris ad eum contendebat: nam Turriani captivos, contenti spoliis, statim dimiserant, ne qui felicitate in paranda victoria præstissent, humanitate vinci viderentur. Affuit & Simon Locarnas inusitato tramitem flexu ex fuga servatus: agitatumque subinde est de renovando bello, & majore quidem spe, majoreque apparatu: adeo ut vix credibile videatur, Othonem tantos gessisse spiritus, neque unquam tot adversis casibus succubuisse; qui jam quinque bello victus, tot propinquis & clientibus sævitia hostium amissis, summaque pecuniæ & rerum omnium inopia circumventus, neque ipse conquiesceret, neque hostes otio frui diuque victoriis lætari pateretur. Erat enim jam plane quinque & sexaginta natus annos, sed viridi admodum vivacique senecta, atque adversus omnem algoris & æstus contumeliam indomita. Sed fatale ei erat Fortunam, vel improbe semper cœptis illudentem, patientia & magnitudine animi superare, exercereque se perenni vigilia iis cogitationibus atque consiliis, quibus dignitatem & patriam recuperaret, & posteris cum insigni gloria late imperium traderet.

Invenio apud ineptum quidem, sed non injucundum, versibus rerum scriptorem, ab his fa-

miliis, quæ in Apennini atque Alpium tractu nobilitate divitiisque florebant, Othonem temperantia, altitudineque ingenii, & pietate maxime venerabilem, benigne ac liberaliter fuisse adjutum. Fuere inter cæteros Solarii, Rotarii, Malaspinæ, Scarampi & Valpergæ, qui in apparatus belli, equos, arma, tela, quadrigas, commeatum omnis generis, vestem, & denique pecuniam contulerunt. Apud generosas enim gentes quodam misericordiæ genere, animos permovebat ea Fortunæ iniquitas, qua tot Patritii diu extorres, acerbeque proscripti, ad luctuosam egestatem pervenerant; quando jam nihil eis usquequaque afflictijs, præter spem rubiginosæque arma supererat. Nec defuere voluntarii milites ab Asta colonia, Taurino, Eporedia, Augusta prætoria, Vercellis atque Novaria. Guliermus quoque Montisferrati Regulus in societatem certo foedere accitus est: quo Duce superioribus annis Hispanorum adventu Othonem & Burrum cum Turrianis infelicitate dimicasse demonstratum est. Subegerat hic in Montisferrati regione complura oppida, Albam, & Aquas Statiellas, & Alexandriam, postremoque Derthonam imperio suo adjecerat: potens æque atque impiger habebatur; bella ex bellis libenter ferebat, ut is, qui apud eum erat, exercitus, ex reliquijs Hispanorum (eorum enim aliquot in Italia remanserant) & ex fortissimo quoque confectus, perpetuis stipendijs aleretur.

Comparatis autem copiis, terminatisque consilijs statuere, ut Simon Locarnas navalibus præesset copiis, Guliermus cum terrestri exercitu ad Verbanum progrediretur. Exornarat classem validam Simon, totamque oram ad Othonis studia converterat. Stabat à Turrianis Angleria; ad eam Otho & Simon devehuntur: oppidani, refugiente in arcem præsidio, se dedunt: arx, uti ex ruinis temere & negligenter resecta, quum machinas non perferret, certa passione recipitur. Tum vero ad Aronam navalibus terrestribusque simul admotis copiis bellum transfertur. Arona & Angleria, interjacente Verbano ab ea parte, qua Ticinus effunditur, Sestianæ atque Abydenæ arcium in Hellesponto similitudinem reddunt. Sed Arona sicuti nobilitate inferior, ita opportunitate loci, situsque munitione celebrior existimatur. In ea oppugnanda quum aliquot dies contrivisset Guliermus, agendis majoribus balistis, quibus testæ introrsus lapidum cumulis prorueret, & è classe Otho & Locarnas ædificatis more maritimarum triremium in summitate mali amplioribus caveis, atque inde scorpionum ingentium verutis, muris pinnas defensoribus nudarent, præsidii milites & periculo suo, & oppidanorum lachrymis permoti, ea conditione deditionem fecerunt, ut nisi triduo opem ferret Turrianus, ipsi arcem atque oppidum relinquerent. Vixdum confectæ erant deditionis tabulæ, obsidesque recepti, quum Cassius Ticino superato, quadrato peditum agmine & præmissis Germanis adventare nuntiatur. Tum vero impigre aciem instruit Guliermus, è classe promptissimi propugnatores terrestribus copiis se conjungunt, editiorem occupant locum, frontemque maxime veterano atque armato milite firmant. Sed Cassius conjectura judicans validiores cohortes, equitumque turmas in fronte fuisse constitutas, ex duabus Germanorum alis, alteram in dextra conjunctam legioni consistere jubet, in qua Musca ejus frater, & Andreas atque Herceus patrueles curabant: alteram ipse obliquo flexu in latus & terga hostium duxit: hæc inlixas ignobilesque manipulos in vecta, magnum tumultum ab tergo excitavit, adeo ut Germani cædendo, sternendoque obvios, in interiora castrorum

rum penetrarint; coactusque sit Guliermus nondum contracta in fronte pugna, equitatum suum convertere, opponereque Germanis, qui foeda strage cuncta compleverant. Sed dum Germanorum audacia reprimatur, praeliumque atrox in medio miscetur, tota acies respectare, ac mox nutantibus vexillis circumagere sese trepidanter coepit. Non defuit occasione Cassionus, statimque iussit, ut altera ala relicta legione in frontem procurreret: ea vis irrupentium fuit, ut priusquam Turriani pedites appropinquarent, Guliermus anticipi acie circumventus funderetur, atque universi terga darent: ex fugientibus complures classis peropportune appulsa littori excepit, minoreque ob id caede Turrianus victoria est potitus, quod pedestres copiae tardius appropinquantes, in vacua castra impetum fecerant: praedam autem, quae alioqui exigua non erat, nobilitavit Guliermi tentorium Maurisiaco opere acu pictum, cum instrumento militari admodum luculento, quo olim à focero Hispaniae Rege donatus fuerat. At Guliermus perumpens cum equitatu Ticinum iter intendit: Otho & Simon diversis itineribus cum reliquis profligati exercitus, hic Comum, ille Novariam se receperunt.

Rebellarant (ut diximus) à Turrianis Comenses, capto Accursio Cutica Praetore, Simoneque recepto, neque tamen ad Patricios defecerant: medios enim se gerere, & neutris studere malebant, quam Turrianos jam plane victores, gravioribus injuriis atque offensionibus adversum se concitare: & magnopere Turrianis favebat Vitana factio, quae jampridem Philippo opem ferente, Rusconam armis devictam, principatu dejecerat. Ubi igitur Simon advenit concionando passim, coepit Othonem & Patritios primoribus civium obnixae commendare, uti indigne pulsos domo, proscriptosque, & crudelissime à plebejis hominibus divexatos: *Quem, inquit, exitum consiliis nostris expectamus, posteaquam defecimus? nisi ut aut acre bellum geramus, aut insolentissimo Tyranno serviamus, & ab his trucidemur, qui Majoribus nostris patria expulsi tecta hujus urbis & moenia in cineres redegerunt. Concordia nunc maxime opus est, Cives, ut libertatem cum dignitate tuamur. Otho supplex & Patritia gens orant, ut nostra ope in patriam reducantur: ad id vires abunde supersunt, ut omnia mature atque feliciter confici posse speremus, dum Turrianus debellatum esse putat, & solutus metu victoria sua superbe latatur.* Erat Simon vehementi eloquentia, & ea quidem auctoritati atque opibus aequali, ipsaque carceris calamitate clavior evaserat, cujus indignitas multorum animos ita permoverat, ut Turriani non mediocri invidia deflagrarent. Eo modo Comenses tumultuario studio, & subita quadam acclamatione, Othone Patritiisque adharendum decernunt: sed statim ne per Decuriones decretum scriberetur, ambo urbis Consules vehementer obstitere, Henricus scilicet Advocatus, & Gaspar Ficanus Vitanae principes factionis. His sese opposuit Joannes urbis Episcopus, qui Othonem studiose admodum colebat, Patritiorumque exsulum causam insigni pietate ardoreque suscipiendam arbitrabatur. Ita tumultu exorto, divisus in duas factiones populus arma corripuit; mediaque in urbe atrociter est dimicatum. Lucterius Rusca & Simon adversarios è foro multis illatis vulneribus in Praetorianas aedes compulerunt; continuatoque certamine, Praetorio atque urbe, captis Consulibus, ejecerunt.

Nec multo post constituta ad arbitrium Republica, & excisis Vitanorum turribus, Otho è Novaria publicis literis est evocatus. Is primus dies Othoni è tantis calamitatibus felix illuxit: nam ab eo dehinc die (uti rerum scriptores referunt) Fortuna Turrianis nusquam arridens, eos è tanto

A fastigio continenter detraxit. Exceptus est Otho à Joanne Comensi Episcopo, singulari cum honore, privatimque pecunia ad exornandas copias est adjutus. Ceterum Lucterius & Simon conquestis undique equitibus, atque item sagittariis & scutatis cohortibus è Verbano & Lario, Luganoque juvenute, justum prope exercitum coegere. Interea Otho exsulesque Patritii ad se Comum accivere Ricardum Langusum Laumelli Comitem, virum bello acerrimum, & Turrianis ex Gothofredi fratris nece vehementer infensum. Adduxerat is veteranam cataphractorum alam ex his, qui sub fratre meruerant, statimque ei omnium copiarum imperium magno assensu delatum est. His comparatis, Otho concionatus ad Comenses, gratias cunctis eorum ordinibus humaniter egit, quod liberali & egregia voluntate defendendas ipsius injurias opportune suscepissent, militaremque operam promptissimis animis praestarent adversus Turrianos impios execrabileque homines, atque ob id toties à summis Pontificibus inferorum poenis & cruciatibus devotos: cujus studii immortalisque beneficii memoriam nunquam esset è memoria delaturus. Joannes urbis Episcopus ad haec totius populi nomine respondit, ea mente Comenses ejus optimae causae studio adductos sumpsisse arma, ut proficiscentem ad patriam sacratamque sedem suam eductis vexillis sequerentur, fierentque ejus victoriae socii atque participes, quam Dii justitiae defensores, ultoresque nefariae tyrannidis, adversus impios & iniquos homines pollicerentur: proinde laeto animo in hostes contenderet. Ipsos enim, si bellum extraheretur, societatis inita fidem atque amicitiam constantissime servaturos.

Nec multo post Otho profectus, ad Liciniforum posuit castra. Ea urbs quondam insignis & nota Ptolemaei temporibus, in minores abiit pagos, dilapso, uti videre est, Eupyli piscoso lacu, in cujus ripa peramoenae fertilitatis Liciniforum adiacebat: ejus regionis tractum corrupto vocabulo *Incini Plebem* vocant, asseruntque nonnulli ex vehementi terrae motu Eupylum caeco hiatu terrae haustum subsedis, profundioribusque inaequalis alvei locis, reliquisse exiguos quinque lacus, è quibus Lamber amnis emittitur. Ejus incolae Othonianos laetis animis exceperunt. At Napus, ubi nuntiatum est Othonem à Comensibus receptum, vehementique Simonis & Ruscorum studio adjutum, instaurare bellum, dixisse fertur ad convivas superbo saevoque ore, quum è mensa discederet, *Parvo, ut arbitror, labore nostro, magnum certe negotium agasionibus nostris afferemus: sunt enim nobis horum manibus, & exsules, & ipsi rebelles, infidique Comenses, latronum more laqueis puniendi.* Atque ita properantius atque turbidius quam solet, veluti rapiente fato, in hostem porta Jovia copias eduxit. Pridie enim Cassionum fatali errore praemiserat cum Germanis equitibus, qui Canturium quinto ab urbe Como lapide opportunum oppidum praecoccuparet, ne eo ad excursions facien-
das hostis potiretur, & ut inde ipse proximos Comensium agros evastaret. Posuere vitiferis in colibus urbem Caturiges, antiquissimi populi, auctore Strabone, sed ea demum, mutante cuncta aeo consenescentes, in oppidum abiit. Turrianorum hic erat ordo: Praecedebat Pontius Amatus Praetor cum legione urbana & mercenariis equitibus: ipse Napus relicto ad urbis custodiam Olodrado Tangentio, insequentis anni Praetore designato, propinquos omnes, amicosque & familiares citato & disjuncto agmine secum trahebat. Eodem die, quo Cassionus Canturium est profectus, Othoniani ad Caracam nobilem olim urbem supra Lambrum deflexere: ea Ptolemaeo nota, ho-

die defectis ultimis literis, antiquum nomen retinet.

Quum ibi de inferendo bello à Ducibus in consilio sententiæ dicerentur, è Decimo vico sacerdos quidam, pernici equa devectus, ad Othonem pervenit. Erat enim Decimi præclarum Othonis nomen: nam ab adolescentia sacris initiatus, summum in eo pago sacerdotium à Pontifice impetravit; unde postea, & in æde maxima Mediolani, & in divi Ambrosii templo canonicas dignitates fuerat consequutus. Is sacerdos, singulari usus officio, Othoni nuntiavit, Mediolanensium copias cum Prætoribus, ipsosque Turrianos principes sub occasum solis Decimum pervenisse; cuncta ibi militari strepitu compleri, & tumultuosius atque acerbius, quam pro sociorum consuetudine, milites tecta, cubilia, stabula, pulsatis hospitibus, eiectione jumentis, occupare, nec adesse Germanos, qui pridie ad Canturium præcessissent: proinde Turrianos ea nocte posse deleri, si improvisus, confecto per noctem itinere, dispersos atque sopitos adoriretur. Hoc nuntio maxime lætatus Otho, *Dii*, inquit, *qui à Decimo dignitatis initia præbuerunt, non inani proculdubio loci omine, promissam nobis de hostibus victoriam dabunt.* Atque ita tota re ad consilium delata, singulari omnium alacritate decernitur, non prætermittendam rei bene gerendæ occasionem, & eo quidem ardentius atque audacius, quod & antea per exploratores de Cassoni consilio atque itinere certius cognoverant. Nihil enim æque metuebant, quam aperto in campo manus conferere cum Germanis equitibus, quorum vim atque impetum, Duce præsertim Cassono, jam tribus in præliis ferre nequiverant. Otho, ut à cædibus impollutas servaret manus, Ricardo Langusco copiarum imperium dedit, superinduitque sibi linream stolam, sacerdotali habitu multis striatam rugis, præferrique sibi iussit argenteam crucem, veluti pacato itinere sacri imperii sui sedem aditurus. Magno demum silentio de secunda vigilia Ricardus castra movit, tribusque ferme horis ad Serenium vicum est perventum: inde præmissi speculatum expediti equites ducibus agricolis, non multo post renuntiavere apud hostes, ut in ipso conticinio accidit, cuncta quieta, nocturnique silentii plena; conspici tantum semiextinctorum ignium fulgorem, nec exaudiri castrorum fremitum; ita ut nec ad ipsos quidem pagi aditus frequentium vigilum stationes esse judicarent. His diligenter exploratis, & instructis ordinibus, priusquam dilucesceret, in conspectum oppidi se dedere, oppressis aliquot excubantium: id sine facibus iter, & silenti quidem luna, confecerant, ne ab alta sacrae turris specula, patentibus in campis, vaga lumina cerneantur. Eo inopinato hostium adventu exterritus Napus, vix spatium habuit ad induenda arma: tubarum tamen clangore & pulsû tympanorum cuncti excitantur. Pontius Prætor legionem nondum plane instructam in apertiore locum educit; equites aggregantur; magnis clamoribus pugna committitur: pugnabat in hac parte Langusca admirabili virtute; interfectoque Pontio Prætoribus, stratisque vexillis, legionem cum multa cæde pepulerat, quum altero egressu & angustiore quidem viâ provectus in aciem Napus irrumpentibus Comensibus occurrit, ut eum Fortuna Simoni infensissimo hosti objicere videretur. Eo in loco summa contentione aliquandiu dimicatum, quum Turriani Proceres in prima acie, de imperio, de vita, fortunisque omnibus dimicarent: ex adverso autem Simon & Lucterius Rusca incitati efferatique diuturno inimicæ gentis odio, in adversos vesano impetu deferrentur. Inalbescente jam cælo Andreotus Turrianus interficitur; Franciscus, qui hosti, equi frenum comprehen-

A dere auso, dextram ingenti gladio detruncarat, multosque huc & illuc concitato equo vulnerarat, cuspide in inguen coniecta confoditur: Napus ipse equo deturbatus, quum in purpurea trabea, cœnoso in loco volutaretur, à Ruscono milite capitur, servaturque ægre ab irati Langusci gladio, deprecante Othone, & trepidum perhumano sermone consolante. Capiuntur quoque in ea adversi prælii fuga, summæ spei adolescentes, Conradus cognomento Musca, & Guido, Turriani: hic Franciscus, ille Napo genitus erat: quibus aliquot post annos carcere eductis, paterni imperii decus Fortuna restituit. Itemque Hereccus superioris Pagani ex Hermanno pronepos, Lombardusque ejus patruus, & Caverna pater Pagani junioris Patriarchæ Aquilejensis, & Napi germanus frater. Hos omnes Simon atque Lucterius, tanquam peculiari ipsorum sorte, Comensiumque militum felici virtute superatos & captos, Comum deducendos curavere, ut in Baradelli arce custodirentur. Ea est edito in monte, excelsa turre insignis, à Luithprando Longobardorum Rege ante octingentos annos ædificata, ut late speculam in subiectos campos ad tutelam urbis præberet. Ferunt Simonem, quod ejus animi ferociam victoria mitigasset, non aliter insultasse Napo, quam ut diceret, *Non reposcam à te sanguinem & opes, Nape, postquam Dii me voti compotem fecerunt, sed æquo jure penam talionis: experieris enim tantum, quale cruciatus & contumelia sit genus, in cavea ferarum more custodiri: & vir certe sapiens & egregie fortis inter paucos numeraberis, si ea, quæ ego diu miser & non semper infelix tuli, pari patientia feres.* Napus constanti animo fabrefactam cancellatis trabibus caveam intrans, *Nihil pro se, sed tantum pro Guidone & Musca deprecari: se meritis luere pœnas sinerent: eos vero, qui vita innocentia nihil durius mererentur, humaniter custodirent.* Non caruit scribendi legendique solatio Napus: cæterum adeo acerbe custoditus est, ut ei neque cultelli, neque forfices concederentur, quibus sibi mortem consciscere posset: unde illi ad deformitatem prælongi ungues, promissaque cæsaries, & illuvie turpis barba provenerant. Reliqui, & ante alios Musca & Guido decori juvenes, cum Lucterii generosi viri humanitate, tum pacati jam Simonis indulgentia, liberalius asservati.

Otho memorabili potitus victoria, ante omnia apud Duces militesque graviter atque humaniter egit, ut moderate victoria uterentur, cædi vindictæque finem imponerent, spoliis contenti essent, captivosque dimitterent. Agendas jure Diis immortalibus gratias, quod toties bello profligati, atque omnibus exsilii, fugæ, atque egestatis oppressi malis, septies acie victores hostes, tantisque subnixos opibus, ad internicionem eorum nominis, unius horæ momento debellassent. Remisere impetum Patriitii, condidereque extemplo gladios. Commoverat enim generosos quorundam animos Francisci cadaver, lutulento in solo fœde proculcatum: cuius etiam caput gregarius miles ob fratris necem decisum trunco, hastæque præfixum, victoribus pariter & captivis ostentabat. Fuerat Franciscus Napo fratre lævior & asperior, utpote qui nutantem in consilio Napum ad sumendum de captivis, Theobaldoque præsertim, supplicium, vehementibus literis impulsisset, semperque acerbissime grassatus in nobiles cives, plebem, satis superque sua temeritate concitatam, ad audenda facinora intemperanter accendisset.

Tum vero Oldradus Prætor, clade Mediolani nuntiata, advocare in consilium cives, plebem ad arma vocare. At civium optimus quisque ejus imperia contemnere, de pace & de concordia plurimum loqui; in virtute pietateque Othonis Antistitis spem reponere: proptereaque sanandæ civitatis & pa-

parandæ quietis occasionem divinitus oblatam arbitrari, postquam universi fere Proceres Turriani, qui renovare bellum possent, aut in acie essent cæsi, aut in fuga capti, ad manus hostium pervenissent. Quibus rebus Oldradus valde contreritus, ac sibi admodum timens, in Prætorium se recepit.

Interim Cassionus de adverso prælio certior factus, è Canturio Mediolanum pervenit, ratus aut patrem, aut patrum, aut certe reliquos familiæ principes ex fuga in urbem se recepisse. Sed ibi de suorum calamitate certior factus, non deserit sese; & quum non statim admitteretur, refractis portis, introductoque armato agmine, in forum contendit. In eo tumultu suburbani incolæ Comensis portæ, postremos ex Cassionianis equitibus invaserunt: ex his multi vulnerati, exstique armis & equis in diversa diffugerunt. Porro Cassionus urbem percurrens, & veteres amicos, plebemque præsertim, ad arma evocans, & crebro libertatem se adversus veteres Tyrannos defensurum repromittens, quum nemo commoveretur, desperatis rebus, Romana porta se proripuit: adeo enim ex eventu ejus pugnæ apud omnes populi classes, veteris studii & favoris ardor territis mentibus exciderat, ut nemo vel egregie factiosus in medium prodiret, qui proferre vexillum auderet, aut Turriani imperii nomen se defensurum profiteretur. Hinc videre licuit, quantam rerum animorumque mutationem adversæ pugnæ casus attulerit, adeo ut facile judicari possit, in toto tuendi principatus negotio, nihil omnino esse populari præsidio incertius aut inanius. Cassionus continenti cursu Laudem Pompejam pervenit; ubi quum minime reciperetur, Cremonam atque inde Parmam ad veteres amicos confugit.

Eodem die Mediolanenses ad Othonem Legatos miserunt, qui omnia amica pacataque ingressuro urbem pollicerentur. Ita haud multo post insigni pompa in speciem triumphi Mediolani receptus, cunctos, qui adversarum partium fuerant, metu liberavit, habuitque orationem civili clementia & Christiana pietate plenissimam: pacatisque omnium animis, Respublica ad ejus nutum constituta est. Creantur quoque Prætor quidem Ricardus Languscus, & Magister equitum Simon Locarnas; quorum illustri virtute se victoria potitum Otho gratissimo animo prædicabat. Dedicavit subinde aram in templo maximo divæ Agneti, quam in prælio voverat, addiditque agros in alimenta sacerdotum, qui quotannis ejus diei memoriam celebrarent: idque adhuc singulis in urbibus Mediolanensi imperio contributis, Prætores Decurionesque ad tubarum cantum instauratis sacris, religiose repetere post ducentos & sexaginta annos videmus. Pugnatum est duodecimo Calendas Februarii, anno à nativitate CHRISTI millesimo & ducentesimo septuagesimo septimo. Ejus vero summæ victoriæ historiam Otho pingendam curavit in Angleriana arce, regio sumptu ab se ædificata: exstantque adhuc in maximo testudinatoque conclavi incorruptæ præliorum cum veris Ducum vultibus imagines, Latinis elogiis passim singula rerum argumenta indicantibus. Quamquam Musca Turrianus postea victor, recenti calce maculare potius quam obliterare ejus infaustæ historiæ memoriam contenderit. Auxit ejus diei lætitiā Bonacosæ Burræ partus: ea enim nocte, qua ad Decimum pugnatum fuerat, Magno Matthæo filium peperit, cui ob galli cantum Galeacio nomen inditum ferunt. Hic est ille, qui postea omnes ejus seculi Principes & Duces magnitudine animi, liberalitate atque imperatoria laude superavit.

His confectis rebus, Otho ad expugnandam mon-

A tis Orphani arcem copias misit, in quam Turrianorum reliquæ confugerant; vexabantque inde, diurnis nocturnisque decursionibus, sociorum agros. Ea arx ad tertium à Como lapidem imposita est monti, qui ob id Orphanus appellatur, quod undique discretus atque abjunctus à cæteris, ab implanitie molli fastigio in nemorosam cautium metam assurgit, insidetque viæ militari ad Coxia torrentis vallem, qua iter est ad Liciniforum. Hæc quum machinis capi non posset, operibus circumvallata, sexto demum mense fame domita est. Desæviit in muros Otho, sed non plane totam diruit; ita ut Guido è carcere elapsus, rerumque potitus, eam post viginti annos facile restituerit. B Everfa montis Orphani arce, Turriani finibus excessere, & veteres eorum clientes, quum Othonis clementiæ salutem minime committendam judicarent, in Cremonensi Parmensique agro, & in Venetia ad Aquilejam familiæ Proceribus aggregabantur. Tum vero Otho à belli studiis ad pacis civilisque administrationis munia conversus, cives de se bene meritis locupletare; omnibus justitiæ atque humanitatis officiis novas amicitias parare; procurare res divinas; singulæque moderatione Principis simul, sacrique pastoris officia implere.

C Quum in his rebus esset occupatus, renatum est repente bellum, initio à Laudensibus exorto: nam Othone mirum in modum Vistarini favente, qui (uti diximus) principatu pulsi redierant, æmuli eorum quum neminem civem dominatu potiri pati vellent, ad se Cassionum & Gothofredum, atque item Raimundum ab Aquileja cum magnis copiis acciverunt, indeque auxiliis Cremonensium & Parmensium adaucti, in agros Mediolanensium sese effuderunt. Cassionus, multis expugnatis direptisque oppidis, Tritio & demum Vaprio in ripa Abduæ occupatis, Lambrum trajecit, conflixitque collatis signis cum Mediolanensi legione & urbano equitatu, qui cum Carroccio temere usque ad sanctum Donatum Romana porta processerant. In hac pugna Cassionus, paucis cæsis, supra viginti septem spectatæ nobilitatis Centuriones cepit, & in his Mutium Soresinam, Gasparem Vicecomitem, & Antifossiam Vercellinum, & præter hos magnum numerum peditum & equitum. Invenio apud quosdam auctores, Othonem cum expedita manu ad Cassianum usque processisse in ripa Abduæ situm, ut primis hostium incursibus occurreret; majoreque conspecto hostium exercitu, refugisse ad Gorgonciolæ vicum, superventuque hostium non aliter servatum quam munitione sacrae turris, in quam nemini cognitus ascenderat. At Cassionus E ejus pugnae successu elatus, per suburbana ad Ticinensem portam adequitavit, terroremque ostentatis copiis ad fossas undique circumtulit. Tum vero Otho in tam gravi periculo mira usus constantia, fidis cohortibus portas firmare, Prætozem in foro cum signis militaribus excubare, suspectos cives apud se habere, eoque vultu cuncta administrare, ut in multa dissimulatione pavoris, excellens fortitudo & providentia singularis eminere viderentur. Nec multo post Cassionus, nemine ex veteribus amicis, uti speraverat, ad se concurrente, retro vertit agmen, transgressusque Abduam, ad oppugnandum Bregnanum contendit.

F Discessu acerrimi hostis Otho recreatus, nihil potius aut expeditius existimavit, quam è Monteferrato Guliermum veterem socium & militari laude florentem evocare: quo Duce vim imminens hostis propulset, & insigni apparatu, conatuque egregio bellum conficeret. Nec ita multo post Guliermus accepta ingenti pecunia Mediolanum venit, statimque liberali stipendio ad quinque annos, Mediolanensium Othonianarumque partium, adversus Turrianos eorumque socios imperator deli-

ligitur. Nec mora, cum eo Prætores Antonius Langus Ticinensis, & Lucterius Rusca Comensis, exercitum instruunt, Carroccium educunt. Duo autem Prætores erant, quod coarctarat Otho Præturæ tempus, ut pluribus honorem impartiretur, eoque beneficio plures civitates atque familias sibi conciliaret: nam qui annuus fuerat Magistratus, semestris effectus est, ea lege, ut qui designatus esset Prætor, dignitatis insignibus uteretur: sed exclusus urbana jurisdictione, bello tantum collegæ operam navaret.

Cæterum promotis castris, ad Vaprium recto itinere perventum est: habebat id oppidum cum arce trajiciendi fluminis opportunitatem: itaque arx magnis utrinque viribus oppugnata defensivaque est, bellumque protractum, ita ut nihil præter vastationem agrorum, incendiaque villarum, memorabile gereretur. Verum Guliermus novi consilii rationem susceperat, ut refecto ad Tricium ponte, ultra Abduam bellum transferret. Erat in castris Otho, & ab alia parte Raimundus Turrianus: ab his, uti decuit à sacris viris, Bergomates Legati, impulsus ab optimis utriusque partis civibus, impetrarunt, ut de pace liceret loqui; eoque res, interpositis aliquot dierum induciis, deducta est, ut deposito metu, singulari familiaritate utrinque milites amicos & propinquos convenirent, adeo ut una castra ex duobus facta viderentur. Sed quum à multis ex illustri ordine Mediolanensium Turrianos milites salutari, studiosiusque appellari Guliermus conspiceret, invehens equo in comitantium turbam, ferrea clava minabundus, colloquia militum diremit. Paulo post tamen Raimundus, Cassionus, & Gothofredus Melenianum venire; affuitque ad conditum Guliermus cum Othonianis, in quibus erat Conradus Castellionus Jureconsultus insignis; brevique, disceptatore & arbitro Guliermo, pax his conditionibus dicta confecta que est: scilicet, *Vt in summa, Bipriana & Vapriana arces ipsi Conrado & mercatorum collegio custodienda traderentur: agri porro paternaque possessiones, castella, domus Turriani redderentur: loca tamen munita his civibus, qui neque harum, neque illarum partium censerentur, custodienda relinquerent; potestasque his esset, uti luberet, habitare in agro Mediolanensi: utque utrinque captivi sine pretio dimitterentur.* Tabulis rite confectis Turriani captivos Guliermo ea conditione tradiderunt, ut non prius solverentur, quam ii, qui in Baradelli arce erant, dimissi forent. Id vero facturos Comenses Lucterius & Simon pernegabant, qui jure belli captos, peculiaresque hostes suos, ad alienum nutum & commodum minime dimissuri viderentur. Nihilo secius Guliermus, quanquam id à Comensibus, quod Turriani petebant, non impetraret, Mediolanenses captivos omnes dimisit. Sed Otho cæteris pacis conditionibus non diu stetit, & sua sponte, & impulsu clarissimorum civium, qui privato quodam inito fœdere adversus Turrianos conspirarant. In his fuere Vicecomites ferme omnes, Soresinæ, Mandellii, Pusterulæ, atque item Cribelli. Ita Turrianis neque redditæ res, neque restituti agri, neque permixtus in patriam reditus, neque captivi à Baradello custodia liberati sunt: magna quidem cum Othonis invidia, qui securitatem imperii, fide & jurejurando potior habuisse dicebatur. Providebat enim amicos clientisque suos, quibus Turrianorum bona dono data fuerant, ex lege & conditione pacis, omnibus victoriæ præmiis ad contumeliam spoliari: quæ res ad conturbandas multorum fortunas, abalienandosque animos, manifeste pertineret. Igitur Turriani à Guliermo atque Othone decepti, eo cum dolore animi late finibus excesserunt, ut injuriam violatæ pacis ad civitates passim, Regulosque deferrent; ab his opem implorarent; focia

A & mercenaria arma pararent, quibus acceptas injurias ulcisci, & patriam repetere possent.

B Sub id tempus in Baradello moritur Napus, fœda illuvie, & enatis subinde pediculis consumptus. Fuerat in eo squallore & vitæ tædio annum unum, menses septem, & dies viginti tres. Corius & Merula attractum pedibus, & in sylva sepultum tradunt: sed nos Tristano Calcho potius assentimur, qui Comensem Episcopum agenti animam adstitisse scribit; collatisque Christiano more sacramentis defunctum, in ædícula Divi Nicolai pie atque honeste tumulasse. Eundem vitæ exitum tulerunt Lombardus & Caverna biennio post, ex morbo ægritudineque animi Napum sequuti.

C Interea Raimundus ex Venetia, Foro-Julio atque Histria, & ex Carnis & semi-Illyricis gentibus, ad duo millia equitum, peditum quatuor millia, sacerdotii opibus armavit: quibus Cassionus veteres Germanos, & Parmensium, Cremonensiumque, & Laudensium auxilia adjunxit. Accessere etiam plerique Mediolanenses, qui Othoni principatum invidabant, ægerrimeque ferebant Turrianorum injuriam, & communem patriam fructu pacis & otii fraudatam querebantur: proptereaque sponte in exilium abierant, & Turrianorum signa sequuti, quantis maxime artibus poterant, per affines & propinquos suos Othonis auctoritatem in Republica convellebant. At Otho in eam curam experrectus, ex fidiissimo & fortissimo genere militum exercitum parare; à locis civitatibus auxilia accire; & veluti in supremo conatu, supremaque spe conficiendi belli, omnem armorum apparatus, ingentemque pecuniam proferre. Cunctabatur autem Guliermus pravis atque insidiosis artibus, nec adduci poterat, ut rebus celeriter administratis, in hostem copias educeret; utpote qui pericula adaugeri, confirmari hostium vires, terrerique magis ac magis Othonem magnopere cupiebat, ut operam suam ampliore pretio, periculo & necessitate circumventis vendicaret. Erat quidem Guliermus animo ingenti, & in omni bellico munere prorsus intrepido, sed auri atque imperii fœda cupiditate corrupto. Adduxerat enim Mediolanum superiore anno Beatricem uxorem, quæ mirifico apparatu atque insigni liberalitate suscepta, ornataque regalibus donis ab Othone, atque ab Decurionibus: & demum introducta in Nobilium domos, admirari lautitiam, magnitudinem atque opulentiam urbis, invidere fortunæ Othonis, & demum Hispania cupiditate id imperium affectare cœpit. Hæc quum impense laudaret apud virum, *Quintu*, inquit, *si plane vir es, hac urbe potiri non contendis? Pater certe meus tibi non deerit, si pro te potius, quam pro aliis imperitis, belli peritissimus pugnare decreveris.* In hanc spem Guliermus ab inani & cæca, ut plerunque accidit, ambitione facile prolapsus, in Hispaniam enavigarat: ubi communicatis cum Rege consiliis, quum voti cupiditatisque suæ Fortunam tentare decrevisset, galeatos amplius trecentos equites, & levem armaturam equitum & peditum in naves sustulit, & in Italiam est reversus.

F His de causis Otho profunda prudentia & solerti ingenio probe agnoscens, quantis animi recessibus Guliermi consilia conderentur, nihil antiquius aut validius habuit, quam parum sinceri Ducis animum amplis pecuniæ muneribus expugnare: sed Matthæus Vicecomes, jam plane bello & pace spectatis operibus magnus, dies mora extrahentem jocabundus incitabat: *An*, inquit, *Gulierme, illam vim bellici vigoris, qua una laude maxime flores, hac infami cunctatione amittes? ut & tu, & nos tecum militaris nominis dignitate spoliemur? Convenere jam undique auxilia, tanteque nobis adsunt copia, ut hoc tempus, quod tibi segniter deperit, morari de hoste*

victoriam videatur. Advenerant jam Simon Advocatus à Vercellis, à Novaria Guliermus Brufatus, Antonius Languscus à Ticino, & Lucetius Rufca, Simonque Locarnas è Como, qui suarum civitatum magni roboris auxilia adduxerant. Itaque Guliermus compressa aegritudine animi, nec minus accepto auro quam pudore devictus, Carroccium eduxit, & ad Vaprium, ubi hostes constiterant, contendit. Fuere in ejus exercitu, uti aliqui auctores scribunt, ad triginta millia peditum, & sex millia equitum, in quibus supra duo millia cataphractorum equitum censebantur. Invasit Cassonum insolitus pavor tanto conspecto exercitu, ita ut ei, semper antea intrepido atque pugnaci, expediendi consilii vis omnis excideret. Non putarat enim Mediolanenses publica Carroccii signa adversum se adeo celeriter educturos, remque sibi tantum fore cum Guliermo Othonianisque clientibus, bona victoriae spe plenus, existimarat. Appropinquante itaque hoste, in id discrimen erat deductus, ut si ultra annem se recipere, exercitumque fervare vellet, id nedum commode, sed ne sine ingenti quidem perturbatione, summoque periculo facere posset; relinquebatur ut audacter irrumpendo, iniqui certaminis aleam subiret, aut se ad oppidum circumvallari atque obsideri pateretur: quod quum indecorum ac miserum fore judicaret, uti dignum erat fortissimo Duce, totiesque victore, instructa acie conflixit, ediditque supremo virtutis conatu egregium facinus. Nam quum undique circumventa acie à tanta hostium multitudine caderetur, Germanos equites cohortatus, ut honesta nec inulta morte conciderent, conglobato cuneo, ad Guliermi vexillum prostratis Hispanis penetravit; occisoque signifero, illud arripiens discerpit, atque ibi demum interclusus à legione, interfectusque est. Tum vero Turriana acies, undique pulsa, trucidataque, ad flumen se convertit: ibi quum plerique natando metu mortis, mortem non timerent, magna ex parte summersi sunt. Perit & in vado Gothofredus Turrianus Cavernae filius, deletaque sunt penitus Raimundi auxilia; ipse enim Laudi Pompejæ substiterat: Cremonensium vero & Laudensium Duces capti. Pugnatum est ad Vaprium septimo Kalendas Junias, anno quarto ab Decumana victoria, quæ sicuti Principatum Othoni dederat, ita hæc cum sublato undique metu confirmavit. Honestatus est Cassonus sepulchro non ignobili, quod adhuc extra Vaprium in ædícula conspicitur: retinetque adhuc proximus ager ejus prælii memoriam, quum ab incolis Turrianæ cladis nomine vocitetur.

Nec multo post Laudensibus bellum indictum, depopulatusque est eorum agros Guliermus tanta acerbitate, ut Laudenses villarum castellorumque vastatione perdomiti, de pace Legatos ad Othonem miserint. Inde Guliermus in Cremonenses duxit, multisque detrimentis illatis, bellum aliquandiu est productum: nam Placentini, Parmenses, Mantuani, Rhegieneses Cremonensibus opem attulerant. Ad extremum inter eos inita pax, & in centum annos proclamata, ea conditione, ut captivi utrinque dimitterentur, & Turriani, eorumque ex professio fautores, his urbibus exfularent. Interea Comenses Guliermum in decem annos Imperatorem suum declararunt, concessaque est ei suprema potestas condendi atque antiquandi municipales leges: sed id unum omnino est cautum, ut de captivis Turrianis, qui in Baradelli arce erant, jus omne Comensi populo relinqueretur: atque ita à Comensibus liberaliter susceptus, juravit se populi Ruscannonumque partium jussu, adversus eorum hostes,

A uti res posceret, bellum egregia fide gesturum. Inde frequenti comitatu Mediolanum rediens, tot rerum secundo successu elatus, ad infana consilia reverti, secreto hostilia moliri, & cogitare denuo cœpit, quibusnam artibus Othonis existimationem convellere, circumvenire hominem jam plane senem, & denique urbis imperium posset invadere. Homo ingenio procaci, avido, inexplebili, Reipublicæ accumulatis tot sumptibus gravis, invisus esse omnibus cœperat, quum sibi arroganter adscriberet recentis prælii victoriam, & Othoni, & civibus pacis ab se partæ beneficium objectaret: ob id inflatus atque superbius quam antea sese gerebat, ut non omnino dissimulanter ad principatum aspirare videretur. Ante omnia Bosium Doariam veterem adversæ factionis Ducem, Cremonensiumque Tyrannum, in cujus tabernaculo Actiolinum exspirasse docuimus, Soncino oppidi dominum Othone frustra reclamante constituit; utque familiam illustrem atque opulentam imperii utique æmulam Othoni opponeret, Soresinas incitavit, ut sese efferrent, & his civibus æquarentur, qui nobilitate pares, vel omnino virtute & divitiis superiores, libertatem opprimere niterentur. Postremo postulavit, ut Joanni Pogio, ipsius familiari, Prætura conferretur, inde sibi gradum facere ad dominatum maturans. Itaque Pogio Prætor duæ sunt exortæ factiones: magna pars civium Othoni favebat; in altera erant Guliermus ipse & Pogius Prætor, atque item Soresina familia: & quanquam occulte Castellioni Duce Guidone, cujus opera per id tempus auro corrupti custodes è carcere Baradellæ arcis Guidonem Turrianum eduxerant, Musca & Hereccus eripi nequiverunt. Ea res Othonem quidem gravissime pupugit; sed ferentes id iniquiore animo Comenses, sibi à Mediolanensibus capitalem injuriam indigne sibi fieri querebantur. In id grave salutis ac imperii discrimen intestini hostis perfidia conjectus Otho, dissimulatione in præsens opus esse existimabat; adeo ut cuncta iniqua & immoderata petenti, perblando & familiari ore condonaret. Cæterum intentissime vigilabat, ut consilia & progressus ejus notaret, multaue pollicendo, amicos hosti detraheret, & sese à repentina vi domestici hostis tueretur.

Interim Guliermus domestico bello in Montemferratum revocatus, Vercellas proficiscitur. Ita celeriter adhibitis in consilium amicorum fidelissimis, non deest occasione Otho; quid faciendum sit Matthæum admonet, correptisque armis ipse equo provectus, ad Prætorianas aedes contendit: Pogius domo, magistratuque, & urbe excedere cogitur: creatur novus Prætor Ubertus è Becharia familia, five (ut ait Merula) Jacobus Summaripa Laudensis, in reliquos scilicet menses, ut conjectari lubet. Ita brevi in tutiorem statum restituta Republica, & depulso omni metu, Jacobus & Carolus Soresinæ in exilium aguntur: nonnulli porro ex Terzaghis & Balbis, qui cum Guliermo consilia miscuerant, extra decimum lapidem relegantur; & Soresinarum domus, quam illi ex ruinis Turrianarum ædium condiderant, incursum plebis solo æquatur.

F His confectis rebus Otho, ut sese adversus vim acerrimi & potentis hostis confirmaret, in Germaniam ad Rodolphum Cæsarem Legatos cum muneribus amplissimis misit, obtulitque ei amicitiam, liberalemque operam venturo in Italiam ad recipiendam Romani Imperii coronam. Cæsar tametsi Turrianis antea faverat, ex usu tamen rerum suarum, cum Othone certo amicitiae fœdere conjungi maluit, quam profligatorum partium, quarum Principes cæsi captique essent,


inane nomen tueri. Itaque Othonem, missis ad eum more Caesarum amplissimis literis, in clientelam fovendum ac tuendum recepit; misitque ad eum Germanos equites, qui in speciem Prætorianæ alæ corporis custodiæ adessent. His de causis Guliermus bellum, quod parabat, facile avertit in Derthonenses & Alexandrinos.

Sed non multo post Turriani in spem renovandi belli, repetendæque patriæ sunt erecti, initio à Comensibus exorto: qui quum veteres laxiores agri terminos sibi reddi, uti antea ex avorum memoria possedissent, à Mediolanensibus postulerent, & ab his nequaquam pro jure foederis & amicitiae benigne responderetur, armata juventute agros Leucensium & Clivatenensium expugnatis castellis occuparunt, finesque eos protulerunt victricibus armis, uti ex jure & æquo antea petierant. At Mediolani quum hæc essent nuntiata, Senatusque Comenses arroganter ac hostiliter fecisse judicasset, in eos numerosus exercitus est eductus, cui præfuit Matthæus Magnus; à quo Comenses superati & castris exuti sunt, multisque caesis, compluribus captis, onusti Comensium præda Mediolanenses domum redierunt. Hanc cladem gravissime tulit Comensis, quod in se vicinum & focium atrocius quam in barbarum hostem Mediolanenses gladium exercuissent: isque potissimum & dux & auctor cladis extitisset, qui paulo ante civitatis ipsorum Prætor & imperator fuisset; cujus recentis beneficii memoriam uti superbus & sævus amisisse videretur. Itaque in eo dolore gravius decernitur: adversus enim Vicecomites repente conjurant; vinculis exolvunt Muscam & Hereccum Turrianos; eos Præturæ dignitate exornant; pecunia armisque infuunt, & bellum vehementibus animis in Matthæum ac Othonem parant. Ad id etiam ipse Guliermus, eo Comensium decreto magnopere lætatus, opes atque operam pollicebatur: cujus viri vim, tanquam pugnacis & ab recenti injuria concitati, gravem & periculosam Othoni futuram intelligebant. Eo modo Turriani juvenes peracerbo carcere post septimum annum & mensem undecimum educti, acre bellum, & tum Othoni, & Matthæo deinde, eo pulso & in exilium acto, variis successibus intulerunt: quæ, quoniam ductu Magni Matthæi gesta sunt, in *ejus Vita* aptius ac illustrius perscribentur. Jam enim in eum ab eximia virtute & rebus feliciter bello gestis, præclaris Ducibus parem, Otho senex omnia humana jura contulerat, adeo ut utrumque magistratum unus occuparet & impleteret. Nam & gerebat bellum uti Dux atque equitum Magister, & è Tribunali Prætorio patientissime jus dicebat, ut ipse omnium litium disceptator & judex ex arbitrio judicaret, & omnis subinde provocatio tolleretur, res gravi civium incommodo ad ferendas lites excogitata. Sed mirum in modum ejus nomen atque potentiam adauxit Guliermi inexpectata calamitas; qui Turrianis & Comensibus conjunctus, tam Othoni grave bellum intulerat, atque id tum vehementiore studio reparaturus esse videbatur; quod & Guido Castellionus Turrianis adhæserat, vir inter primores consilio, clientelis, atque opibus insignis: erat is Guidonis Turriani, qui è Baradello effugerat, avunculus. Igitur Guliermus quum nefario scelere

A Derthonensem Episcopum necasset, in manus Alexandrinorum ex insidiis captus devenit, apud quos ferrata in cavea atrocibus corporis atque animi tormentis excruciatum interiit.

Gratias igitur Otho Diis immortalibus agens, quod se votorum omnium compotem fecissent, uti justam ab omni labore vacationem nactus, apud Claræ vallis cœnobium religiosa quiete fruebatur, apprime confusus præcellenti prudentiæ virtutique Matthæi Magni: hunc enim ipse à tenera ætate severe & diligenter educarat, institueratque his moribus, quibus in omni bellica vel civili actione ad certam laudem semper illustris, tanto imperio dignus esse videretur. Magnitudine quippe animi, patientia, humanitate, religioneque & domestico splendore cunctos anteibat: nemo ei corporis aut ingenii vigore par erat; altitudine vero consilii, facundia, & oris atque habitus dignitate, antiquis heroibus æquabatur. Nec eo quicquam prole felicior fuit: in quaque enim ejus filiis Otho ipse peracri judicio, miram certamque indolem ad propagandum imperium quasi divinis providebat: & jam ex his Galeacius & Marcus, cui *Balatroni* cognomen fuit, ad militarem ætatem pervenerant; & in Joanne atque Luchino optimorum Principum indoles elucebat. Postremus Matthæi liberorum Stephanus fuit, cæteris prole quam vita felicior, quum ad hunc filii, nepotisque, & qui novissime imperarunt pronepotes, recta serie respiciant. Eo modo quum ad Claram vallem amœnissimis in hortis Otho tuendæ valetudini operam daret, frequentique comitatu insignium philosophorum & sacrorum virorum oblectaretur, sæpe de divinis humanisque rebus jucundissime disputans, senio potius quam morbo confectus, è vita discessit, Augusto mense ejus anni, qui fuit à partu Deiparæ Virginis nonagesimus quintus supra mille & ducentos. Impleverat septimum & octogesimum annum, nullis paulo molestioribus morbis obnoxius: ita ut mihi procul dubio omnium Principum longe felicissimus decessisse videatur. Usque eo enim, paucis concessio, fati munere vixit, ut summa gloria plenus, quod ambigua cupidaque mortalitas maxime optat, posteritati suæ lætissimus interfuisse videatur. Tumultus est in templo maximo ad majorem aram marmoreo sepulchro, in cujus fronte hæc carmina leguntur:

Inclutus ille pater patria, lux, gloria patrum,
Fulgor justitiæ, fidei basis, arca sophiæ,
Largitor veniæ, portus pietatis egenis,
Intrepidus pastor, quem moles nulla laborum
Ardua devicit, populo latura quietem:
Ille pius Princeps, & Præsul amabilis, in quem
Altus virtutum splendor convenerat omnis,
Quo Mediolanum radiabat lampade tanta,
Totaque fulgebat regio: nunc pallet adempto.
Clara Vicecomitum proles, venerabilis Otho,
Oh dolor, oh vulnus, cinis est hoc marmore factus!
CHRISTE pater vite requiescat spiritus in te.
Annis undenis, ter senis, terque diebus
Præfuit Ecclesiæ pastor bonus Ambrosiana,
Mille ducenteno, quinto, noviesque deceno,
Quarto hic Augusti bis liquit gaudia mundi.





MATTHAEVS MAGNVS
Vicecomes.

MATTHAEVS MAGNVS,

MEDIOLAN. PRINCEPS II.

*Imago ipsius, prout hic habetur, in habitu purpureo Vicarii imperialis
Modætiæ in templo maximo conspicitur, effigiem templi à se instaurati
Divo Joanni Baptistæ offerens.*



NEMO, si Fortunæ ludos spectare lubet, certiore utriusque sortis merito, MAGNI cognomen adeptus est, quam hic ipse MATTHAEVS Vicecomes, cujus imagini ad veram oris effigiem ductæ, insignes etiam excelsi animi dotes brevi elogio expressas appendimus. Nec titulus (uti reor) vel summæ virtutis atque potentiae Regibus insolens & gravis, huic ad invidiam cesserit; quum illi superiores, Alexander, Pompejus & Carolus, tanquam humanæ virtutis modum supergressi, inter Heroes referantur: hic vero intra patriæ fines parta laude contentus, id tulerit, quod cives post invidiam morte extinctam, præclara etiam hostium confessione detulerunt. Natus est Masino in pago ad Verbanum lacum, eo forte insigni die, quo Federicus secundus, dirus Italiæ Cæsar, à filio Manfredi Rege, coniecta in os stragula veste, suffocatus interit. Tradunt autem non insulsi Annalium Scriptores, armenta ejus vicci sponte soluta, proripientiaque se magno tumultu è stabulis, domum, in qua Anastasia mater infantem noctu enitebatur, inusitato mugitu edito quasi salutasse, adeo ut experrecta tota vicinia, puerperæ magnus timor incuteretur. Sed id Theobaldus pater pro lætissimo ostento accepit, gratulatus vel ob id uxori felicem partum, quod miræ magnitudinis infantem ad ingentis spei fortunam edidisse videretur. Erat Anastasia Uberti Pirovani nobilis ac optimi Mediolanensium Antistitis ex fratre neptis. Hæc puerum rara inter matronas charitate propriis uberibus aluit, adultumque usque adeo diligenti & plane virili cura honestissimis moribus instituit, ut Otho nescio quid egregium & vere magnum in pueri indole se conspiciere fatetur.

Cæterum Matthæus jam plane vir, quanquam impubes, orbatus patre viro fortissimo, ærumnosque exilii Othoni patruo contes, ita corpus pariter atque animum exercuit, ut utrumque viriliter adversus rerum omnium contumelias indomitum, invictumque voluptatibus præstaret; & duris atque asperis gaudere, nec adversis unquam frangi, nec secundis efferrî videretur, quod nihil unquam aut demissum aut insolens ore gestuque ejus excideret, præaltaque semper atque ardua ad imperium & gloriam intentus agitaret. Summum adeo decus in clementia & moderatione reponebat, quibus virtutibus Turrianos omnino caruisse, ideoque celeriter excidisse principatu, prædicare erat solitus: oderat enim gladios extra aciem cruentos, quum in neminem Turriani sanguinis, vel nunquam, paternæ cædis oblitus, sævierit, neminemque ex infensissimis hostibus bello captis occiderit: uti videre licuit, quum omnes fere adversarum partium summi Duces, atque ej capitali odio inimicissimi, mira perpetuæ victoriæ felicitate in potestatem ejus devenissent. In his fuere Simon Advocatus, Guliermus Brusatus, Philippus Languscus, Antonius Fisiraga, Albertus Scotus, qui Vercellis, Novariæ, Ticini, Laudi Pompejæ & Placentiæ, Gibellini nominis hostes, tyrannidem

exercebant. Ad hanc quoque generosi & clementis animi laudem, moderati nomen addiderat, quum in omni bellicarum & civilium rerum actione, cupiditatum excessus fugeret, & nusquam timore aut superbia præpeditus, cuncta consilia certis temperantiæ finibus terminaret; & id quidem eo diligentius, quod vel in speciem religiose pius existimari vellet. Sed ei inter sæva arma nato atque educato nihil potius unquam fuit quam augere factionis opes, adversarios persequi, & late imperium proferre, etiamsi id non facile sine cædibus atque incendiis patraretur: plura tamen se tectis consiliis & occulta largitione, quam vi & cruenta manu confecisse, & plura denique auro quam ferro feliciter expugnasse diserebat; ut scilicet prodigis atque ad inanem sumptum facile effusis, & natura pugnacissimis filiorum ingeniis utiles frenos imponeret. Henricum jam Cæsaris fratrem ab inimicis adversum se è Germania in Brixianum agrum cum ingentibus copiis evocatum, multo auro aggressus averterat: parique felicitate Philippum Valesium, qui postea Galliæ regnum tenuit, Pontificis impulsu formidolosum exercitum ad Vercellas adducentem, multis legationum artificijs, & denique magnis muneribus pervicerat, ut amicus quam hostis esse mallet, in Galliamque rediret; quum Galeacius filius, pugnae quam pacis avidior, viginti peditum & septem galæatorum equitum millibus transituro hosti objectis, quin prælii aleam subiret, paternis monitis ægerrime paruisset.

Imperavit Matthæus ab Othonis morte septem annos, novem in exilio toleravit; quum malignitate propinquorum & subita Nobilitatis conspiratione, ac Alberti Scoti perfidia circumventus, ut invidia cederet, Mediolano excessisset. Sed eum post patriam frustra armis sæpe repetitam, deformis exilii incommoda constantissime tolerantem, nec unquam despondentem animum, in spem non dubiam erexit Henrici Cæsaris adventus. Fatali tum insania Turriani inter se dissidere coeperant, & Guido patrueli Muscæ morte extincto succedens, consanguineis & civibus usque adeo superbia intolerandus evaserat, ut Muscæ liberos, ad quos paterni avitque imperii hæreditas redibat, custodiæ traderet. His cognitis Matthæus agresti habitu, aviisque itineribus Asiam ad Cæsarem contendit, ubi Cassionus Turrianus Mediolanensis Antistes cum Napino fratre, atque item principes Guelfarum partium convenerant. Quis crederet sexagenarium senem, venerabili canitie, & male tecto frontis honore, ipsoque præsertim arduæ cervicis habitu conspicuum, sed pedibus iter habentem, tot infidantium oculos fallere potuisse? Projecto ad pedes, & ex jure & æquo opem imploranti, admiratus facundiam & oris decus Cæsar, spem dedit ut reduceretur, atque id egregia fide præstitit, Philippo Langusco & Antonio Fisiraga, qui aderant, atroci oculo intuentibus, acerbæque voce eum totius pacis & quietis turbatorem appellantis. Sed Matthæus frequenti concursu, liberalique studio veterum amicorum & clientium, qui prodeuntem ornatissimo comitatu deducebant, jam pristinae fortunæ suæ persimilis, pacificatore Cæsare, cum Turrianis foedus percussit his legibus, *Ut beneficio Cæsaris reducti in patriam antiquæ libertati res-*

stitutam aequo jure viverent, & paternis bonis civili actione partis utraque factio potiretur.

Nec multo post Henricus Mediolanum venit, eique obviam egressus Guido cum insigni ordinum omnium pompa, & ab equo defiliens, Cæsarem salutavit, sed vultu non occulta bile perturbato, quod Germani equites Turrianum vexillum signifero vi extortum, solo affixerant, indignati quod aliud insigne quam Romana Aquila præfente Cæsare præferretur. Cæsar cum humaniter allevans, & equum conscendere jubens, renidentiore, Guido, inquit, *noli contra stimulum calcitrare*: atque ita medius inter Matthæum & Guidonem, urbem intravit, Guidone de Principatu plane desperante, quum adspectu tanti hostis, qui dextrum Cæsaris latus tegebat, & propinquorum qui aderant rebellionem conterritus, omnem vim expediti consilii penitus amisisset.


Cæterum Henrico de more coronato, atrox in urbe tumultus (casu an fraude incertum) exortus est, quum populus arma caperet, excitique ad arma Germani fora & compita cohortibus & turmis occuparent, & Galeacius cum globo equitum discurrens, & veteres clientes ad arma vocans, Germanos ut nihil timerent hortaretur. Sed ea vis armatæ plebis, quum nec causa, nec auctor tanti motus exstaret, repente versa est in Turrianos nihil tale timentes; momentoque temporis eorum domus expugnata direptæque sunt. Guido equum nactus, ægre profugit: Cassionus Antistes per hortos vix ereptus est: reliqui Turrianæ factionis inter se dissidentes, eandem improvisi mali fortunam tulerunt. Jam prope reum patrati facinoris apud iratum Cæsarem rumor Matthæum fecerat, nisi senem quietum pacata familia domi epulum parantem Prætoriani Cæsaris invenissent, ipseque digressus ad Cæsarem falso credita multiplici testimonio diluisset. Relegavit tamen eum Cæsar Ticinum, ut de ea re certius cognosceret, & Turrianis per summum populi scelus, omni honore omnique lauta suppellectile spoliatis, æqui iudicis officium præstare videretur. Sed ea disceptatio hunc habuit exitum, ut Matthæus singulari Cæsaris studio Mediolani præficeretur. Henricum enim, ut Romam ire pergeret, Cæsariani nominis studiosi in Etruria, frequentibus literis evocabant, & ipse quantum Guelphis fidendum foret, præclare intelligens, certo fidelique præsidio factionis opes confirmandas arbitrabatur.

Itaque Matthæus summa potitus potestate, iterum decem annis imperavit: quo spatio aliquot subactæ urbes, capti hostium principes, Turrianorumque opes attritæ deletæque sunt. Ipse domi ab inveterata prudentia consilio pollens, & foris filiorum ductu (ii enim clarissimi Duces evaserant) multis præliis victor ad consummatam gloriæ laudem pervenerat: ita prorsus ut jure *Magni* pariter atque felicitis nomen mereretur. Sed qui longa infracti animi patientia, rerum omnium difficultates egregie superarat, invidiam veræ virtutis comitem superare non potuit. Præcipui enim amicorum gloriæ ejus splendore offensi, ab eo desciverant, quum Robertus, Neapolitanus Rex, Guelpharum partium suscepta causa in Liguriam venisset, Beltrandusque Vasco Cardinalis, Pontificis Legatus, Matthæum diris persequeretur. In eam nanque unam curam animos intenderant, ut comminuta Cæsaris auctoritate, Guelphos tot adversis præliis profligatos contra Gibellinos erigerent; Matthæusque in primis, tamquam maxime validus adversarum partium imperator, dominatu pelleretur. Dimicant superioribus annis in Etruria ad campum Aldinum semel, iterum ad Arbiæ flumen, novissime autem ad montem Catinum, Guelphi cum Gibellinis funesto illis eventu: quo prælio Roberti

Regis frater fuerat interfectus, & Luchini Matthæi filii paternorum auxiliorum Ducis mira indoles enituerat; ipseque demum Robertus à Marco Matthæi filio pro Spinulis atque Auris exulibus depugnante, Genuæ obsessus & misere circumvallatus, in multo rerum discrimine multum dignitatis amiserat: quibus de causis acerbissimo consensu bellum atrox Matthæo parabatur. Ipse porro Beltrandus conflato ingenti exercitu, & receptis ad se Turrianorum Proceribus, divini juris tela contorquens, Matthæum tanquam impietatis reum æternis inferorum cruciatibus devovit, & Mediolanensibus eo nomine sacra ademit, ut populum, diro piaculo consternatum, in auctorem tantæ labis concitaret. Nec Legatum ea res fefellit: nam hæc emissâ tela aliquanto graviore mole, quam promoti ad portas ingentes exercitus, hostibus inciderunt. Clausis itaque templorum foribus, expers sacrorum populus, duodecim Legatos ad Beltrandum decrevit, ut expiationem accuratis precibus impetraret. Sed in eo delectu de industria plures fuere Matthæo infensi, & ante alios ex amicis veteribus effecti novi hostes, atque ideo acerbiores maximeque pestilentes, Leodisius Vicecomes patruelis, & Franciscus Garbagnatus, quo auctore Matthæus in amicitiam Cæsaris fuerat receptus, & Simon Cribellus numerosa familia potens, vir atrox & inquietus, propterea alienati, quod minime paria ingentibus meritis præmia retulissent. Ad hoc superbos animos naturaque pronos ad levitatem atque perfidiam, invidia alienæ felicitatis invaserat; ut perinque ferrent, quod non jam secus atque ex merito speravissent, ipsis Matthæi filiis dignitate atque opibus æquarentur. Verum Matthæo alioqui moderato, tardanteque senectute parum expedite liberali præcipua cura inerat, liberos eximie virtutis Duces amicis & propinquis omnibus anteferre, augere divitiis, ac bellicis honoribus honestare, quum cæteris propinquis & amicis proximas spes maturæ liberalitatis relinquendas existimaret. Itaque Legati à Beltrando redeuntes referunt, nihil à viro acri, iracundo, & validis copiis instructo impetrari potuisse, nisi Matthæus ob conceptam hæresim aqua & igni interdictus urbe pelleretur: eo pulso civitatem expiatam fore, & creatis Decurionibus, qui æquo jure gubernent, ad pristinae libertatis decus, deletis factionum odiis, continuo redituram. Nec mora, inconditæ plebis fremitus auditur, pacem atque concordiam postulantis; & conjurati ad augendum tumultum idoneos homines subornant, qui specie religionis inducti exclament, non esse omnibus propter unum devotum caput æternas poenas apud inferos subeundas.

His vocibus Matthæus & perpetuis inimicorum insidiis circumventus, ad consilium summæ prudentiæ, quod ei supremum & ad salutem expeditum fuit, extemplo decurrit, ut à Galeacio filio, qui tum Placentiæ imperabat, licet ab se ex æmulatione Marci fratris alienato, opem imploreret: nec differt ille vir impiger de summo rerum periculo certior factus, quin statim coactis veteranis equitibus ad patrem advolet. Ejus adventu inimici maxime perterrentur, dubii depravatique ad antiquam fidem redeunt: confirmantur clientium animi: duodecim etiam Legati, occupante metu tecti primo latebris, mox intempesta nocte elapsi urbe diffugiunt. Nam Galeacius bellici vigoris plenus, nobilique facundia insignis, uti erat propter memoriam editorum toties ludorum, & totius Regiæ magnificentia, populo charus, popularique humanitate percelebris, advocata passim concione, civium prope omnium studia, quæ forte nutabant, ad se converterat.

Quam





Quum praeclare doceret unam eam esse mentem Pontificis atque Roberti Regis, ut Guelpho nomini latum atque stabile imperium in Italia oppressis Gibellinis adstruerent, quod facile consequi possent, si Turrianos viros crudeles, implacabilique odio omnibus iratos, in urbem reducerent.

Confirmatis eo modo civium animis, ac accitis undique veteranis militibus, sedatoque tumultu, Matthaeus duorum & septuaginta annorum senex, uti administrando bello viribus impar, & ut plerunque accidit in concursu asperrimarum rerum, mente perturbatus, sed virtuti filiorum plurimum fidens, Principatu sponte se abdicat, Galeacioque militaris imperii vexillum tradit, deducique se ad templum maximum jubet: inustam enim sibi vir contumeliae insolens, & egregie pius, haereticis notam ferre non poterat; ita ut ad aram advocatis sacerdotibus, Christianae fidei Symbolum praeclara voce recitaret, testareturque iurando sibi immerenti sacra eripi, quod nusquam a sacrosancto dogmate discessisset: itidemque Dei maximi ultoris numen invocabat, postquam iniquissima factiosi Legati sententia condemnatus, patria excedere cogeretur. Sequenti porro die Morguntiacum, quod hodie Modetia dicitur ad Divi Joannis Baptistae templum, ob memoriam Longobardicae pietatis venerabile, & a se multis donariis exornatum, contendit, ibique eadem professus, in febrem incidit. Accurrerunt illico filii,

A quum ad Crescentiacum coenobium lectica deferretur: id enim templum triginta fere stadiis Mediolano distat. Suprema autem morientis verba ad circumstantes quinque liberos haec fuere: *Stabit incolume vobis, charissimi atque optimi filii, hoc imperium quod relinquo, si concordibus animis cum virtute, tum fortuna vestra utemini; si vero dissideritis omnis quamlibet eximia vestra virtus frustra erit, & a vobis ad hostes illico Fortuna transfugiet.* Nec ejus praedictioni tanquam veri vatis eventus defuit, uti mox dicitur. Exinde quum omnibus manarent lachrymae, integris quidem sensibus, sed collabente cervice, supremum osculum liberis dedit: moxque inter amplexus eorum exspiravit; eique tot superstites liberi (uti maxime optarat) oculos clausere. Defunctum autem secreto ignobilique in loco tumularunt, celata etiam aliquamdiu morte, ne cadaver in adversa forte belli fortuna, saevi Legati contumeliis esset obnoxium. Sed destinata iusti funeris pompa, & toto vel operosi sepulchri honore facile carere potuit, qui publico consensu illud perenne lateque diffusum decus excelsa virtute meruerat. Tumulo ejus hoc carmen affixum est:

*Matthaeus factis merito cognomine Magnus,
Tempore tam belli summus quam tempore pacis,
Mortuus est, & nullum habuit sublime sepulchrum:
Clandere nanque illum non marmora sufficiebant.
Sed nunc propterea tellus est tota sepulchrum,
Et totum volitat Matthaei fama per orbem.*

GALEACIVS PRIMVS,

MEDIOLAN. PRINCEPS III.

Ejus effigies spectatur in templo ad vicum Boldonum Romana via, sexto ab urbe Mediolano lapide, flexis genibus ante Christum crucifixum.



GALEACIVS Matthaeo Magno genitus, novum id nomen, quod postea manavit ad posterum, primus familiae intulit, a matre Burra joco inditum, quum ea forte in multo gallorum cantu enixa puerum, apertis oculis alte vagientem, Gallacium appellasset, idque arridentes ancillae saepe repeterent; nec abnueret pater, tanquam praeclaro ab ave Martia militari augurio jucunde accepto, idque praesertim insigni eventu Fortuna comprobante; quod ea nocte puerum nasci contigisset, qua felici praelio ad Decimum interfectis aut captis Turrianae familiae Proceribus, ab Othone parta est ea insignis victoria, quae & Principatus initium fuit. Nec vero sine ullis delitiis educatus puer augurii fidem fefellit, quum singulari vigilantia, generoso spiritu, atque indomito vigore pugnacis animi, superbum & ferocem gallum aemularetur, & conspicua quaedam alludentis naturae dona hos mores adornarent; multo quippe rubore suffusa facies, flagrantis oculi, subscripta fulvaeque caefaries, & lato in pectore erecta cervix, maximi futuri Ducis speciem reddebant. Ipse porro vel plane puer tanta equorum atque armorum cupiditate erat incensus, ut aliquanto maturius quam aetas ferre posset, thoracatus galeatusque ludicra certamina, equestresque ludos inter puberes agitare; querereturque admirante Otho-

D ne, tanquam par obeundis militiae laboribus, quod adhuc neque patris castra, neque hostium aciem vidisset. Ab hac indole novum quotidie maturae virtutis specimen praebens, per omnes bellici muneris ordines pluribus aditis superatisque periculis decurrit, sic ut in dies ab insigni aliquo facinore laude cumulatus, patri pariter ac militi charior evaderet. Facile enim accidit impigro juveni, ut multis expeditionibus exerceretur, quod ea tempestate nullum bello vacuum, aut ab hoste propinquo otiosum tempus esset, vigentibus odiis inter factiosas civitates, atque ob id redivivis Turrianorum studiis, quibus Guelpharum partium Duces nitebantur.

E Caeterum ei ad praeterea contendenti, quum saepe egregii militis & strenui equitum Praefecti nomen tulisset, summus honos militaris imperii decerat: sed Fortuna ad id mature januam aperuit. Quum enim ex praetura Novariam obtineret, repentina Guelphorum conjuratione expulsus, summa celeritate coacto exercitu adversarios profligavit; confugientesque Mortariam, magna vi expugnato oppido, penitus delevit, tanto terrore hostibus illato, ut Matthaeo patre Dux acrior atque felicior crederetur. Nec multo post patre, Alberti Scoti perfidia Mediolano ejectione, eandem exilii fortunam sequutus, in maxima pericula se conjecit, quum senem, invicto animo irrita arma circumferentem, minime deferendum arbitraretur. Sed patre demum fractis opibus animum despondente, in ulteriorem Galliam transiit, fortemque

operam adversus Britannos navans Carolo Philippi Regis patri, militari baltheo ab eo donatus est, quod est equestris dignitatis insigne maxime decorum, ubi spectato insigni aliquo in acie facinore, imperatoris iudicio paratur. Inde autem in Italiam reversus, eo bello, quo Pelagura Cardinalis, oppugnata Ferraria, Atestini Actii opes maxime contuderat, multis inusitatae virtutis operibus editis, vehementer inclaruit. Constat enim uno praelio per multas horas crescentibus urrinque subsidii saepius instaurato, tres equos acerrime depugnanti fuisse suffossos: eumque postremo, quum vexilliferum adacto per inguen mucrone ab ephippio deturbasset, insiliisse in equum prostrati hostis, atque ita impetu facto, perruptaque adversa acie ad suos, cum suo tum alieno cruore oblitum, rediisse: cuncta enim pericula, ut inde claresceret, praesertim extorris atque exsul audacissime contemnebat. Erat etiam Actio summa propinquitate conjunctus, ut vel hinc ostendendae virtutis studio vehementer accenderetur; nam Beatricem ejus sororem in matrimonio habebat, susceperatque ex ea biennio ante filium, qui de nomine avunculi Actius, summæ postea virtutis Princeps, appellatus est. Hæc Beatrix præstanti quidem forma, sed novem annis Galeacio major, antea nupserat Nino Pisano Galluræ in Sardinia Regulo, antiqua stirpe & multis divitiis claro; ex eoque genitam nubilem puellam Mediolanum adduxerat, ut ludis nuptialibus interesset; qui Regio sumptu editi, totius Italiæ urbes inusitatae magnificentiae fama compleverunt. Nam & simulachra certaminum, & castellorum expugnationes, quæ armatis cohortibus & turmis inter se concurrentibus edebantur, & publici epuli apparatus, & matronarum saltationes, quæ ad spectacula convenerant, vehementer omnes admirati sunt. Mille siquidem per tres classes discumbentibus convivis singulae vestes cum sericæ, aureæque, tum laneæ, coccineæque, aut acu pictæ, dono datæ sunt; Burra focu eas miro ordine, perspicacique iudicio sublatis mensis distribuite. Tot vero novæ nuptæ collata munera gemmarum atque monilium, cælatique argenti & purpuræ textilis à Legatis sociarum urbium Patritiisque civibus, ut opulentissimorum Regum divitiis æquarentur. Et hercle vel hinc mirari juvat tam malignum, quam postea falsum, Danthis poetæ iudicium, quum ex hoc conjugio Viperam Gallura inferiorem putarit.

Cæterum Galeacius confirmatis Actii opibus, Tarvisii Præturam obtinuit à Gerardo Caminate ejus urbis Domino, cui ex Beatrice privigna nupserat: gessit autem eum honorem summa cum dignitate, ita ut nulla in re exsulis vultum præferret, profitereturque se brevi ad veteris fortunam imperii rediturum. Nec id votum diu fefellit, Henrici Cæsaris adventu, quo dissidentium inter se Tyrannorum opes vehementi ruina prostratæ sunt. Aderat Matthæo patri Galeacius ex paterno consilio uti oporteret arma expediens, & felici virtute semper dimicans: nam paternis auspiciis adversæ factionis vires attriverat, Ducesque belli, & Guelphi nominis Principes in potestatem redegerat. Quibus sublatis, singulae Cisalpinæ Galliæ urbes ad Magni Matthæi auctoritatem se contulerant. Ipse quoque proprio utens consilio, & suis subnixus copiis, quum ad augendam ditionem potentiamque per se bella gereret, Guelphis formidandus esse cœperat, vel ob id quod Placentiam, Alberto Scoto vetere patris proditore armis ejecto captoque, suæ ditionis fecisset: nec multum inde Jacobo Cavalcabove, Cremonensium Tyranno, ad Bardum vicum acie profligato atque interfecto, Cremonam valida classe & magnis copiis circumvallatam, fer-

A roque demum & fame perdomitam subegisset. Nec minore virtutis fama Marcus frater à patre rei Ligusticæ præpositus, adversus Robertum Regem bellum gerebat: & Luchinus bellica laude nulli fratrum inferior, Guelphoque nomini vehementer infensus, præcipue terrori erat, quod ab eo ad Tanari pontem Ugo Baucius, Roberti Regis equitum Magister, commissio praelio victus atque interfectus fuisset.

B Quibus de causis Guelphi nominis Principes admonebantur, ut accisis in Etruria partium viribus, & tum in Cisalpina Gallia maxime profligatis majora præsidia compararent, quibus Matthæi potentiae obviam iretur. Itaque renovatis inter se foederibus, Pontifex, Robertus, & Florentini peritos rei militaris Duces, & validas bellicosarum gentium copias à Narbonensi Provincia, Burgundis scilicet, Allobrogibus, ac Helvetiis, in Italiam adduxerunt, usque adeo ingenti conatu sumptuque, ut transmissa grandi pecunia Henricum Austrium designati Cæsaris fratrem è Germania, è Gallia vero Philippum Valefium, qui postea Rex fuit, adversus Vicecomites in Italiam evocarint. Sed Germanos Matthæus multa largitione mature avertit; Gallos vero Galeacius & Marcus ostentato exercitu ita terruerunt, ut multa verborum humanitate, multisque item muneribus superati, trans Alpes nusquam districtis gladiis redierint.

C Descenderat Philippus ingenti cursu ad Sesthem amnem præter Vercellas, juvenili quodam vigore animi hostem contemnens, nec sociorum auxilia exspectans, ita ut in insidias præceps datus esse videretur, nisi Galeacius paternæ gravitatis æmulus, vel in multa spe exploratæ victoriæ, à conferenda pugna, invito etiam fratre, par fere cum eo imperium habente, temperasset. Nolebat enim validam atque propinquam gentem, nulla prope de causa, nulloque odio, sed levi admodum D bellicosæ juventutis alacritate ad bellum excitam, ipsumque præsertim regium sanguinem inexpiabili in se odio concitare: uti necesse erat, si conferto praelio totius fere Galliæ Nobilitatem profligari atque interfici contigisset. Impetrato siquidem colloquio, & per inducias ostentatis miro ordine universis copiis, quas vallatis è castris eduxerat, facile Gallorum Proceribus demonstravit, quam stultum foret, pro alieno commodo, propriæ dignitatis & vitæ periculosam aleam subire. Ea quoque res Galeacii fidem facundo ore hæc differentis confirmabat, quod veteris beneficii memoriam præferebat, quo à Carolo Rege balthei militaris honore fuisset honestatus: tum producebat præter numerosum peditatum, quinque millia utriusque armaturæ equitum, in quibus sexcentorum fere nobilium cataphractorum ala, decoro simulatque terribili corruscantium armorum cultu stupentes Gallos permovit, ut auctore Ebrardo equitum Magistro, viro æque prudenti ac strenuo, certam pacem potius quam anceps bellum optarent. Cum hac ala Marcus Galeacii frater, cum specie ipsa excelsi corporis, tum felicium præliorum fama inclutus, explicatis turmis decurrerat. Gestabant singuli equites in cono cascidis, & in lacinia, Phrygii operis squamosam F viperam, cruenti pueri crura dentato ore devorantem, Vicecomitum familiæ vetus insigne: quam inusitata specie Gallos, utpote non intellecto argumentum, vehementer commotos fuisse, moxque magnis muneribus excultos, utili consilio potius quam decoro, Villanus Florentinorum Annalium scriptor in Galliam rediisse perscribit.

Sed Matthæo patre vita functo graviora demum Pontificis & Roberti Regis arma, conspirantiumque Patrijorum vim, ac Germani militis per-

perfidiam, summo cum discrimine salutis expertus est. In eo enim vetere decreto foederati hostes permanserant, ut pulsus Principatu Matthæi liberis, res Mediolanensis, sub inani libertatis nomine, Guelpharum partium auspiciis nutuque regeretur. Itaque Leodrisius, & Garbagnatus, atque Cribellus cum suo livore atque odio perciti, tum honoris maximi atque potentiae non dubia spe inflati, in id incumbabant, ut cives depravarent, atque diducerent, Pontificique Legati nomine Germanos, divisa inter eos pecunia optimisque stipendiis propositis, ad defectionem impellerent. Primi omnium Rogerius & Anechinus, Vindelici Centuriones, soluto pudore defecerunt; nec civitas per se instabilis dubitavit, quin Germanorum exemplum sequeretur. Qua repentina veteranorum defectione circumventi Galeacius & Marcus, quum atrociora timerent, Laudem Pompejam ad Vistarinos veteres amicos se receperunt: eorum autem discessu civitas, creatis ex unaquaque Tribu Decurionibus, libertatem arripuit. Cæterum immutatus in urbe status hunc habuit eventum, ut factiosi ad arma excitati, Duce quodam Burro, Guelpharum partium vexillum attollerent; admirantibusque primo, & mox non temere sibi metuentibus Gibellinis, tumultuose per urbem deferrentur: Guelphi quoque ex Martiana Abduani agri regione, & Brigantinis montibus, Licinifororum præsertim, Tignaca Paravicino Duce, homine turbulento, Modœtiam occuparent. Id facinus Mediolanensis Reipublicæ Decuriones magnopere commovit, quod novi imperii majestas seditiosorum temeritate fugillari contemni videretur. Ipsos porro Gibellinos admonuit, ut armata præsidia compararent. Mittitur ergo Leodrisius cum exercitu, qui Modœtiam, si dicto audiens esse Tignaca nolit, admotis machinis expugnet. Nec mora, Guelphis majore pertinacia quam vi resistentibus, Leodrisius diffracto muro atque incitatis ad prædam Germanis, opposita munimenta perumpit; multisque cæsis capitur Tignaca, oppidumque diripitur.

Hinc jam non obscure animadversum est, non aliam ob causam Galeacium fratresque ejus Mediolano expulsos fuisse, quam ut Guelpharum partium dominatus induceretur. Nam veteres hostes semperque antea exsules Turriani revocabantur, & Legatus hominem natione Burgundum, quod esset e Turriana familia, urbi præfecerat: nec Germani, (quanquam mercenarii milites) vel Roberti Regis, vel Pontificis nomen Cæsaribus infensum, pacatis auribus accipiebant: & tum forte stipendia à Legato Cardinale Regiisque Præfectis largissime promissa, nequaquam liberali manu solvebantur. Quibus de rebus Germani Henrico Grunistenio homine nobili concionante, sublati dextris Galeacium continuo revocandum censent, decernuntque adeum Legatos summæ dignitatis Centuriones, qui condonatae veniæ fidem accipiant, ut Rogerio & Anechino, cæterisque recentis infidæ levitatis auctoribus caveretur. Grunistenius enim virtutem, fidem, munificentiam, atque animi magnitudinem, quæ in Galeacio spectabantur, eximius laudibus extulerat, usque adeo studiose, ut se vadem obsidemque præstaret. Marcus quoque opportune in urbem noctu regressus, Leodrisium inexpectata Guelphorum audacia perturbatum, animadversoque periculo consilii sui non obscure poenitentem cum lachrymis exorarat, ut jure sanguinis ad familiæ salutem pariter ac dignitatem cum Galeacio in gratiam rediret, nec veteres Vicecomitum hostes ipsorum intestino malo lætari pateretur. Itaque postridie Galeacius non secus ac si ex venatione suburbanoque secessu, non ab exsilio, domum rediret, læta civitate in urbem est reductus. Ejus adventu Garbagnatus & Cri-

A bellus ad Legatum arrepta fuga perfugerunt: Burgundisque Turrianus urbis Præfectus cum Guliermo Ruramonte Regio Legato pariter evasit.

Sed non multo post Pontificæ Regiæque copiae adjunctis Florentinorum auxiliis, & Pagano Turriano Aquilejensis Patriarcha cum gentilibus suis ad id bellum evocato, ad Abduam contenderunt; eo consilio, ut superato amne, recta Mediolanum contenderent. Imperii militaris nomen penes Gastonem erat, Legati ex fratre nepotem. Cæterum Raimundus Cardonius Hispanus, Henricusque Flandrius, & Simon Turrianus, clarissimi Duces, gerendi belli munia susceperant: censebanturque in eorum exercitu quadraginta millia peditum, & decem millia galeatorum equitum, ex omnibus fere Europæ gentibus mercede collecta. Ubi ad flumen perventum est paulo supra Tritium, vado reperto cum primis equitum agminibus Garbagnatus & Cribellus transivere: tum vero Marcus, qui ad id vadum advolarat, ita primos urgendo cædendoque perturbavit, ut ambo Duces intercepti atque agniti, sæviente in eos Marco, protinus interficerentur. Sed repulsis in amne primis, Florentinorum turmae eodem vado tranantes, quominus reliqui ad unum interirent, mature opem tulerunt. At Marcus acerbissimorum inimicorum cæde contentus, uti impar viribus, Mediolanum se recepit. Nec multo post ipse Marcus atque Luchinus cum hostibus ad Tricellam pagum, sexto ab urbe lapide, dimidio minore, sed aliquanto promptiore exercitu freti, audacissime, insigni cruentoque prælio, contenderunt, nec dubia quidem victoria, nisi grave Luchini vulnus, incumbentis in obversa jam plane hostium terga, Marci impetum retardasset. Exinde hostes, promoti ad Comensem portam castris, Mediolanum per aliquot menses obsederunt.

Interim Galeacius à Ludovico Bavaro Cæsare auxilia equitum impetravit, venitque Mediolanum Bertoldus Guiffes cum quingentis galeatis equitibus; strenueque adversus obsidentes multis prosperis eruptionibus res gesta est. Sed hostes quum vera vi nihil proficerent, ad insidias versi Helveticam cohortem multa pecunia corruerunt, ut quum in statione esset, Galeacius revisens custodias interficeretur. Sed detecto scelesto consilio, primus omnium Joannes frater, tametsi sacris erat initiatus, militari animo captis armis Helvetios adortus, conceptæ perfidiæ poenas ab eis exegit. Hic est ille, qui Archiepiscopus Mediolanensis factus, secundissima virtutis fama, Majorum suorum imperium late propagavit, atque auxit. Post detectam & continuo vindicatum Helvetiorum conjurationem, Gastone morbo absumpto, Cardonius & Flandrius desperata victoria, noctu, nec conclamatis quidem vasis, Modœtiam sese receperunt, nova auxilia à Legato, qui Placentiæ confederat, expectantes. Eam enim urbem Vergusius Landus, expulso ex insidiis Actio Galeacii filio, acceptaque pecunia, Legato tradiderat: propterea Cardonius & Flandrius Modœtiæ plane obsessi, ad Vaprium vicum Abduam ponte constraverant, per quem tutus & expeditus recipiendis comitatibus venturisque auxiliis transitus præberetur. Quo cognito hostium consilio, Galeacius eum pontem omnino sibi præcidendum statuit, conjectura judicans, si eo properaret, nihil hostium Duces cunctaturos, quin educto exercitu ad tuendum pontem convolarent, & quam ipse omnibus artibus quærebat conferendæ pugnae occasionem, non iniquo loco præberent; quod in ejus pontis beneficio, & obtinendi comitatus, & parandæ demum victoriae spes omnis posita videretur. Nec sua cum opinio fefellit; Cardonius enim e Modœtia progressus Vaprium, quam hostis optabat nobili prælio

prælio facultatem præbuit. In dextro cornu, ubi Burgundiones Belgæque erant, Henricus curabat; lævo Simon & Passarinus Turriani, Vergusius item Landus cum Florentinæ alæ Ducibus præerant; mediam aciem tenuit ipse Cardonius, Cathelanis, & Narbonensibus, atque Apulis turmis septus; peditatum vero omnem, qui ex Italis & Transalpinis gentibus constabat, ita diviserrant, ut invalidis strenui, inermibus loricati miscerentur. Cæterum Cardonio copias ex Vaprio in patentem campum educente, instruyenteque acies, Galeacius à diversa parte vacuum ab hoste vicum invadi atque incendi protinus iussit; quo incendio averfus hostis adeo perturbatus est, ut respectare & de insidiis intestinaque perfidia dubitare cogeretur, quum ex adverso vexilla Aquilis Viperis fulgentia pleno passu appropinquare conspiceret. Nec mora, Galeacius & Marcus hostem sarcinas suas atque impedimenta ingenti incendio in vico pereuntia deplorantem, utrinque invadunt: Marco primam aciem perrumpente Flandrius aliquandiu resistit; sed eo strato, tota ejus acies fusa profligataque est. Nec ab altero cornu Galeacii impetum Turrianæ Florentinæque alæ diu tulerunt: media quoque acies à Gaudentio Marliano (is nobilis & vetus miles & dux impiger peditatui præerat) à fronte loco mota, turbatis ordinibus in fugam versa est: & Cardonius ad primum incursum magno à sagittariis, & mox ab irruentibus cataphractis detrimento accepto, quod flammæ deflagrantis vici receptum eriperent, & in utrunque latus victores fratres vehementer inveherentur, & præaltus amnis ex fuga vadum tentantes primis vorticibus abriperet, vivus in potestatem hostium devenit; Præfecti Florentinæ alæ pariter capti. Simon Turrianus, Guidonis, qui Mediolani imperium tenuerat, filius, interit: ex minoribus Ducibus promptissimus quisque aut occubuit, aut in manus hostium devenit: vexilla quoque majora Roberti Regis, atque Pontificis, & Florentinorum Turrianorumque relata sunt. Unus fere Henricus Flandrius à Germano equite captus, temereque dimissus, quum pedes exutis armis totam noctem per sylvas errabundus effugisset, prima luce Modœtiam pervenit, quo Vergusius extremi supplicii poenam timens, quod Actium Placentia pepulisset, ab initio adversæ pugnæ cum reliquiis profligati exercitus perfugerat. Ab his Ducibus instauratum est bellum, & Modœtia per aliquot menses fortiter defensa; sed magnis demum operibus circumvallatam oppugnatamque acriter, Vergusius ea conditione dedit, ut nisi justis auxiliis à Legato missis obsidio solveretur, ipse cum præsidio salvis rebus exiret. Jam enim Flandrius desperatis auxiliis noctu ex oppido profugerat, & Passarinus Turrianus quum opem obsessis afferre maturaret, à Marco ad Tiniosam turrem equestri prælio fuerat profligatus: à quo etiam paulo ante eadem belli fortuna, Narbonensium equitum manus ad Caracam supra Lambrum, dum ibi negligenter excubaret, oppressa est.

Sed tantis hostium copiis aut ferro aut pestilentia deletis, victor Galeacius, præcellenti judicio vir, sibi omnino pacem parandam esse constituit, quod inexhaustis redivivisque potentissimorum hostium opibus se imparem cerneret, sæpeque dimicando vires experiri, atque instabilem Fortunam toties lacescere periculosum arbitraretur. Erat in custodia Raimundus Cardonius, Dux hostium, vir solerti gravique ingenio præditus: hunc idoneum existimans, per quem à Pontifice pacem impetraret, carcere emisit, usque adeo egregie simulata fuga, ut duo ex intimis familiaribus intigni nobilitate juvenes Becalcus Landrianus & Phœbus Con-

tes, elabentem comitati prodidisse custodiam putarentur, singulari quidem cum infamia & summo cum dolore propinquorum, quum Galeacius eos tanquam admissi sceleris reos per præconem exilio mulctavisset. At Hispanus (uti generosum decebat) sincera fide causam egit, Placentiæ primo apud Legatum, & mox Avenionem contendens apud Pontificem, Landriano & Phœbo arbitris & peculiari oratione prolatisque mandatis suppliciter pacem petentibus. Nec abnuvit Pontifex, quodeam Cardonius omnino utilem fore diserebat, videreturque ex commodo dignitateque Pontificii nominis, si Christiana benignitate clementiaque inductus, eos in clientelam fidemque reciperet, qui ab eximia virtute Diis & Fortunæ cordi essent, & uti bellis omnibus invicti, non temere ab his, qui virium periculum fecissent, insuperabiles crederentur. Petebat autem Pontifex ex consilio Roberti Regis, qui super ea re consultus fuerat, ut postquam Galeacius converso studio amicum fidelemque clientem Romani Pontificis se fore profiteretur, etiam gerendo bello socius esse, eisdemque hostes habere vellet. Sed is, unum Cæsarem beneficiariosque ejus excipiens, adduci non potuit, ut quicquam polliceretur, quod familiæ suæ antiquissimo studio indignum censeretur.

Cæterum eo modo confecta pace, Cardonius iterum magnis exercitibus à Pontifice Robertoque Rege præfectus est, postulantibus eum Florentinis, qui à Castruccio vehementer exagitati, veteribus innixi studiis, Guelpharum partium nomen magnis opibus tuebantur. Itaque Cardonius ab ostio Rhodani triremibus Telamorem devectus, Florentiæ militaris imperii sceptrum ac solenne vexillum accepit, & contra Castruccium ad Phocensium paludes castrametatus est: Phœbus autem & Landrianus ab eo humaniter dimissi ad Galeacium contenderunt, quibus protinus pristinæ famæ decus restituit; quam confecti negotii arcana tum minime nudanda viderentur. Eos enim non obscure de se benemeritos liberali gratoque animo tota ea simulata perfidiæ suspitione liberandos existimabat, qui nihil subeundæ infamiæ nomen veriti, modo iussis fideli obsequio parerent, periculosi officii munus implevisent. Nec demum Galeacius vel Castruccio, sibi privato publicoque nomine conjunctissimo, vel ipsis Etruriæ Gibellinis defuit, quin mature transmissis auxiliis opem ferret. Actius enim filius per Apuanos Ligures Lucam descendere iussus cum septingentis cataphractis equitibus, magna ex parte Germanis, ad Castruccium in castra pervenit, usque adeo opportune atque feliciter, ut commissa ad Alpium nobili pugna, Cardonius iterum caperetur, & Florentinorum vexilla cum Legatis & Ducibus, cæso profligatoque toto exercitu, in Castrucci potestatem venirent. Cæterum Galeacius, qui tantos conjurantium hostium exercitus, totque vario eventu commissis præliis, & parta demum memorabili victoria, invicto animo cuncta superarat, ad extremum jam undique victor & felix, propinquorum insidias effugere non potuit. Leodrius enim & ante adversus Matthæum, & nuper perfidiosa malignitate infamis, atque ideo semper inquietus, ex intervallo, ut plerunque accidit, validior ad infamiam redierat, adauctoque scelere Marcum Galeacii fratrem facile depravarat, plenum quidem bellica laude, sed ob id multa superbia, multaque occulti livoris bile redundantem. Hic ingenii captu supra æquum turbidus & ferox, tanquam periculorum omnium socius, & totius victoriæ præclarus adjutor, fratrem rerum dominum ferre non poterat, vel natu maximum, &

& prudentiæ auctoritate potiore : & quum regnum duos non caperet, quibus modis id assequeretur violentus & vecors agitabat. Præbuit autem occasionem maturando flagitio Ludovici Bavari Cæsaris adventus, qui evocante Galeacio, ut Pontificis, Robertique Regis, & Florentinorum adauctæ potentiæ obviam iretur, Veronam pervenerat. Itaque Marcus & Leodrisius officii simulatione Cæsari obviam euntes, Veronæ Galeacium multis oneratum calumniis, Majestatis reum fecerunt, connivente ad id scelus Cane Scaligero, qui ex aliena discordia turbatis rebus obventura sibi commoda vir astutus atque ambitiosus expectabat : verum Ludovico Cæsare à præcuntibus, iterque monstrantibus, Marco & Leodrisio, per Camonicos tramites Comum perducto, Galeacius affuit cum ornatissimo comitatu dona ferens, novo nec admodum opulenter instructo Cæsari gratissima. Ibi de fraternis insidiis certius didicit, Franchinumque Ruscum, Comensium Tyrannum, ab se Scaligeri Canis exemplo diductum sensit. Accusabatur atrociter, quod intempestive parandæ pacis cupiditate adductus, Gibellinarum partium gravi damno cum Pontifice transgisset, Cardonio præsertim tanto Duce iniqua plenaque perfidiæ simulatione hostibus restituito : Mediolani vero sublata libertate, propinquis amicisque veteribus plane contemptis, impotenter superbeque regnaret. His quoque summæ offensionis criminationes addiderant ; quibus diluendis Galeacius quum vehementer æstuarer, gravi admodum voce dixisse fertur, *Dum me Marcus frater impie ferit, sese temere consauciat.* Id vero deferentibus amicis audiens Marcus, acute respondit, *De hoc quid in fatis futurum sit Galeacius viderit, qui adeo fratrem non habet, quum solus regnet.*

Sed eam disceptationem Cæsar distulit, Comoque profectus per Modætiam Mediolanum pervenit, quo Galeacius præcesserat, ut quæ ad solennis pompæ ornatum pertinebant, magnifice atque celeriter appararet. Itaque liberali sumptu & plane regio splendore Cæsar exceptus est, & Kalendis demum Juniis in templo Divi Ambrosii ferreo diademate coronatus, tradente insignia Guidone Tarlato Aretinorum Antistite : is in Italia Gibellinarum partium principem agebat. Interfuit & Canis Scaliger, qui mille equites galeatos, & delectorum peditum aliquot cohortes, ad ornandum augendumque Cæsaris comitatum adduxerat, ut studium suum erga eum ostentaret. Hic profunda ambitione incensus, oblata ingenti pecunia, petebat à Cæsare, ut Mediolani Augustali jure Princeps diceretur : etenim magno astu apud Proceres Germanorum, Galeacium vel nullo certo indicio Majestatis reum, nec adhuc ad dicendam causam ad tribunal Cæsaris vocatum, maligno infamique judicio prædamnabat. Sed Cæsar gravi admodum ancipitis consilii suspensus cura, quid sibi decernendum foret non videbat. Ita Scaligero respondit, ut spem ei non præcideret, & præsentibus ejus copiis ad patrandum facinus uteretur. Interea dabat operam, ut Germanici sanguinis vetus miles perpetuis stipendiis & beneficiis Galeacio obstrictus, vel ab ipsa Matthæi Magni Othonisque memoria fidem mutaret, novumque sibi, rejecto superiore, sacramentum diceret : æquum enim postulare videbatur, quum pro sua & Germanicæ gentis dignitate saluteque peteret, ut firmissimo consensu Aquilam Romani Imperii signum respicere, idque tueri, & se proficiscentem Romam sequi vellent : futurum enim brevi, ut & opima stipendia, & digna ipsorum fide præmia consequerentur. Nec mora, Germa-

A nis gravi scelere, nisi id præsentia Cæsaris elevarer, fidem occulte mutantibus, concilium solenne Proceribus indicitur, vocaturque ad id Galeacius cum fratribus Actioque filio. Tum vero Marcus prodit, venenumque dirum domui fibique demum lethale evomens, petit supplex, ut æqui juris libertatem civitati restituat, oppressam & plane extinctam inusitata tyrannide superbi fratris. Idque si æquissimus Cæsar impetrari à miseris pateretur, Mediolanenses quantam oporteret in stipendium pecuniam præbituros, nec à fide atque amicitia Cæsaris ullo unquam tempore discessuros. Aderat forte persolvendi stipendii dies, & eam pecuniam Galeacius exhausto jam plane aërio, cui per tres menses Cæsar aviditate insatiabili gravis & importunus exstiterat, non nisi cunctanter expediebat, quam sine gravi discrimine tanta oneratus calumnia imperare non poterat, Patritiis jam plane Marci & Leodrisii malignitate depravatis, populoque per se cupido rerum novarum, ad spem libertatis erecto.

Cæterum Galeacium generosa oratione objecta crimina refellentem, nec talem omnino injuriam veritum, ex composito Prætorii præfectus, itemque Luchinum Joannemque fratres, Actiumque filium, in proximum cubiculum deducit, quasi Cæsar remoto reo liberius loqui vellet. Sed jam ad eum modum captis Cæsar capitale supplicium comminatur, nisi triduo Modætianam arcem tradi jubeant. Id autem à forti fidelique custode vix multis cum lachrymis impetratum est ; quum in tanto conjugis periculo trepida Beatrix uxor Modætiam pervolasset, missus est, qui deditam arcem reciperet, novumque præsidium imponeret, Guido Tarlatus ; biduoque post Nonis Juliis Galeacius cum Actio filio, Luchinoque & Joanne fratribus, in ea arce duræ custodiæ traditur ; non omnino iniqua sorte, ut fabrefacti paulo ante ab se tetri carceris furnum, ita à depressa testudine vocatum, primus experiretur, quem adversarum partium captivis ad pœnam paravisset. Verum eam illis calamitatem vehementer auxit custodiæ præfectus è Norico Antius Rizaccus, ingenio ita immiti erga miseros tantæ modo fortunæ Principes, ut nec quotidianis muneribus emollitus, quicquam de inhumana feritate remitteret. Mirum id profecto fuit, quum rerum Domini tantis muniti præsidiis dolo caperentur, neminem se commovisse : pauci enim ex his, qui aderant, id factum senserunt. Etenim quis perpetuum atque acerrimum Cæsariani nominis defensores, ab ipso Cæsare summis precibus in Italiam evocato, tantisque officiis atque muneribus exulto, in eam calamitatem detrudi potuisse credidisset ? cum præsertim nulla in Cæsare vel alienati animi, vel commutati vultus signa præcessissent : nec in damnato verius quam reo ullus omnino metus ex conflata calumnia (si ingenuum æstuantis animi ruborem demeres) conspiceretur ? Sed potiundi auri dira cupiditas, quæ in Ludovico profunda infinitaque demum apparuit, accusante Marco & immodica pollicente, vehementer excitata, & veteris clientelæ, & recentis officii, & hospitalis amicitiae jura facile dissolvit. Sequenti enim die astuto Cæsaris consilio, viri insignes viginti quatuor è singulis Tribubus regendæ Reipublicæ creati sunt ad imaginem antiquæ libertatis : sed imperata subinde est pecunia honorarii subsidii nomine, & ea quidem multo amplior quam à Galeacio poposcisset. Nec multo post qui summæ rerum publicoque consilio & tutelæ urbis præesset, cum delecta manu Germanorum delectus est Guiliemus Monfortius.

His rebus Mediolani constitutis, Cæsar Urceos Brixiani agri oppidum contendit, ubi concilium

indixerat, evocatis undique sociarum urbium Tyrannis. Ibi ad leniendam invidiam atrocis facti, literas protulit concepti cum Pontifice foederis indices, captis (ut dicebat) Galeacii tabellariis interceptas; quas tamen plerique commentitias & falsas existimarunt, ut Villanus Florentinorum Annalium ejus ætatis Scriptor, vel ex professio Vicecomitum nomini infensus, scriptum reliquit. Jam Gibellinæ factionis principes, inexpectata Galeacii calamitate tanquam communi malo atque periculo consternati, Cæsarem non obscure oderant, ingenio suspicaci, ac sævo, maximeque rapaci, partium nervos atrocissime convellentem. Verum paucos post dies impetratis à Scaligero, & Atestino, Passarinoque Mantuano equitum auxiliis, Romam iter intendens in Etruriam descendit. Pisani ei portas claudere, nec Cæsaris expilantis socias urbes dicto audientes futuri videbantur, nisi Castrucci, à quo Cæsar amicissime receptus, pecuniaque adjutus fuerat, novo adjuncto exercitu Pisani, nisi Cæsarem reciperent, extremas suburbanæ agri clades denuntiasset. Cæterum Cæsar, Pisani pecunia multatus, adscitoque sibi Castruccio, via Aurelia, quæ maritima dicitur, Romam contendit. Nec mora, insigni studio Sarre Columnæ, Jacobique Sabelli in Vaticano coronatur, tradente diadema Petro Corvario, quem cœnobio educatum, Pontificiaque tiara exornatum, Nicolai quarti nomine Pontificem appellarent, ut in urbe Joannis legitimi Pontificis auctoritas aboleretur. Ludovicum enim Bavarum Joannes, Roberto Regi fœdere conjunctus, tanquam Gibellinarum partium præcipuus hostis, pseudo-Cæsarem appellabat, quem & anathemate perculerat. Romanus quoque populus præsentem Pontificem colere quam venerari absentem malebat, vel ob id invisum, quod multis legationibus evocatus, Avenionem sacrosanctæ Urbi prætulisset.

Dum hæc fierent, Castrucci, quem antea Lucensium, & Pistoriensium, Lunensiumque Ducem Cæsar appellarat, accumulatis honoribus, Senator Urbis, Comes Lateranus, & Cæsareæ Aquilæ vexillifer effectus est. In eo tum uno Cæsaris spes & opes sitæ erant; quoniam nemo eo vel acumine ingenii, vel consilii gravitate validior fuit: quum etiam cæteris ejus ætatis Ducibus, in omni gerendi belli negotio fortuna felicior haberetur. Is maximis officiorum vinculis familiæ Vicecomitum obligatus, nullam prætermittebat occasionem, quin Galeacium Cæsari commendaret, oraretque supplex, ne diutius Guelphos, Romani Imperii capitales hostes, præstantissimi viri calamitate lætari pateretur. Verum Cæsar, ne in fontibus injuriam temere fecisse videri posset, æquo durius respondebat, quanquam Sarre & Sabelli maximæ auctoritatis & gratiæ Procerum continuæ preces adderentur: & Marcus admissi sceleris poenitentia adductus, castigante atque exorante Castruccio, à vetere diri odii insania discessisset, peteretque excussis ingenuo pudore lachrymis, ut exutis imperio fratribus saltem cum libertate vita redderetur, quæ in eo carcere brevissima censeretur, nisi Cæsar clementiæ nomine satis poenarum eos pro vetere superbia, ex beatissimis factos mortalium omnium miserrimos, dedisse existimaret.

Dum Romæ tantis deprecatoribus ad misericordiam Cæsar inducitur, Castruccio nuntiatum est, Florentinos Pistorium urbem paucorum civium prodicione in potestatem redegisse. Qua re vehementer perturbatus, nec obscure Cæsari succensus, quod aliquanto gravior hostis Gibellino quam Guelpho nomini præposteris consiliis evasisset, abducto suo milite ad recuperandam amis-

A sam urbem magnis itineribus Lucam contendit. Ejus viri discessu permotus Cæsar, quod pecuniæ inopia premeretur, nec Romani in ea expedienda prompti essent, & propinquæ Urbi civitates intestino bello laborarent, Robertique Regis exercitus ab Aquila & Latio Romanis finibus immineret, animi sententiam mutavit; perscriptisque literis Antio Rifaceo Modætiæ arcis custodi, Guliermoque Monfortio Mediolanensi Reipublicæ præposito, Vicecomites custodia educi, pristinaque libertati restitui jussit. Itaque Galeacius cum fratribus filioque, quum à Nonis Juliis ad sextum Kalendas Apriles in prædura custodia fuisset, incredibili veterum amicorum lætitia, Modætiæque insigni gratulatione liberatus est; ea conditione, ut discedenti ab Urbe Cæsari, honoris causa Pisis occurrerent. Sed Galeacius curato corpore instructaque ad profectorem vetere familia, atque adscitis ex numero veteranorum lectissimis Centurionibus, equitumque Præfectis, nihil antiquius habuit, quam ut ad Castrucium, tanquam salutis partæque libertatis præcipuum auctorem, ad agendas gratias, communicandaque consilia in Etruriam contenderet. Is tum Pistorium circumvallatum præaltis aggeribus gravi obsidione premebat: ea belli ratione, ut imitatus Cæsarem Dictatorem ad Alexiam, retento intra munitiones exercitu, utrinque vallo fossaque munitus, eruptiones facile sustineret; nec exteriores hostium copiæ, quanquam essent amplissimæ, adoriri munitiones auderent: ubi ingentes balistæ, quæ tum erant pro æneis tormentis, atque item majores scorpiones, in editis aggerum propugnaculis peritissime collocarat. Is venientem Galeacium arctissime complexus, quod eum unice adamaret, atque in eo ex tot rebus bellicis fortiter atque feliciter gestis animi magnitudinem admiraretur, omnibus copiis ac absolvendis operibus præfecit: donec ipse ad explicandas ararii difficultates Lucam profecturus, confecto ibi negotio, in castra reverteretur. Eo itaque non multos post dies reverso, munitiones mirifice adauctas laudante, ita inter se compararunt, ut Galeacius interiores munitiones adversus erumpentes circumpositis nocturnis diurnisque stationibus tueretur; ipse exteriores, obvertendo urbi terga, cum multo maxima copiarum parte defenderet. Nam Florentini Duce Philippo Sanginetto Gallo, qui Pistorium ex insidiis ceperat, ac Beltrone Baucio, qui erat Pontificiorum equitum Magister, supra numerosum peditum, septem millia galeatorum equitum in conspectum obsessæ urbis adduxerant, assiduo tubarum clangore Castrucium ad pugnam provocantes, quod subire aggeres aut perumpere conari, à peritissimis ejus ætatis Ducibus defensos, tum aulicis, tum eventu luctuosum fore existimabant. Nec multo post Florentini inde copias in Pisani & Lucensem agrum vertentes, discesserunt, ut Castrucci vicorum suorum incendiis permotus, Lucensibus opem ferre cogeretur. Sed degeneris consilii conatum irridente Castruccio, atque identidem ignaviam exprobrante, Pistorienses ita animis conciderunt, ut desperatis omnibus auxiliis se dederent, ea conditione, ut nisi sociorum exercitus intra quintum diem, aut justam commeatu copiam inferret, aut prælii fortunam expectaretur, ipsi continuo vita incolumes salvoque præsidio portas aperirent.

Dum hæc agerentur, vehemens atque lethalis morbus Galeacium invasis, exustum scilicet Augusti mensis solibus, perpetuisque laboribus diurnæ obsidionis fatigatum: nihil autem de sævo impetu febre remittente, ut commodius opportuna remedia pararentur, ad Pisciam oppidum lectica





lectica delatus est. Ibi eum triduo post absumpsit morbus, quum impleisset alterum & quinquagesimum ætatis annum. Videri hercle potuit infelix, ex tanta utique fortuna collapsus, nisi viro ad victorias nato, vel exsuli, in ipsa victoria mori contigisset. Funeratus est Lucæ miro studio in eum supremos honores conferente Castruccio. Tumulum autem hoc epigrammate poeta, eo rudi sæculo non insulsus, honestavit:

*Hic jacet in parva (majori dignus at) urna,
Sanguinis Anguigeri Galeaz & gloria belli:
Magnanimus, contemptor opum, formaque decorus.
Extulit hunc virtus, mala fors mox fortiter urfit,
Quam rursus vincens, simul & virtute refringens,
Victor decedit, felix & in astra recedit.*

Nec ipse quidem Castruccius diu victoriæ suæ gloriæque superfuit: ingruente enim pestilenti autumno ex hisdem Pistoriensis belli laboribus ac-

A cerfita febre, intra vigesimum diem Galeacii fatum est consequutus: vir haud dubie antiquis Ducibus bellica virtute comparandus, nisi Tyranni nomen ex atrocibus factis invidiæ expositum, vel præcellentis virtutis famam facile prægravaret. Excessit è vita tribus annis Galeacio minor, ita ut ad consummati Imperatoris existimationem, nisi præmatura fata vitæ cursum præcidissent, perventurus esse crederetur: quanquam Machiavellus Florentinus, improbe corrupta historiarum fide, in eum præferocem patriæ suæ hostem impudentissime jocatus, dum ejus vitam commentitiæ lasciveque contra veritatem ad risum nauseamque perscriberet, id unum maligne contenderit, ut Nicolai Tegrini Lucensis sincerissime cuncta de Castruccio Latine enarrantis, spectata auctoritas interposito mendacio apud posteros elevaretur.

A C T I V S, MEDIOLAN. PRINCEPS IV.

Actius egregii artificis manu depictus in templo Divi Gothardi ad lævam introeuntibus conspicitur. Videmus etiam parem ejus effigiem in templo Divi Marci, extra Beatricem portam: sed statua eximie celsitudinis ex Lunensi marmore sepulchro imposita, depictæ similitudinem exacte reddit, quæ hic exhibetur.



ACTIVS, vigore bellico & præalto constantis ingenii spiritu patri Galeacio facile par, efficaci vero prudentia & longa in fracti animi fortitudine avo Matthæo persimilis, collapsam familiæ fortunam admirabili virtute restituit; tanta quoque felicitate, ut recuperato dominatu, imperii fines paucis annis late protulerit. Sed ab initio multa ei adversa obvenire: nam in exsilio natus & educatus, pueritiam simul & adolescentiam nulla certa cum laude transiegit. Postremo jam plane vir Placentiæ in præsidio à patre relictus, quum is, perditis prope rebus opem ferens, Mediolanum convolasset, eam urbem tantis laboribus partam, unius horæ momento infeliciter amisit, occupante Vergusio Landa, qui valida Legati Cardinalis ala equitum, & magna exsulum manu fretus, irruperat, vitatis quidem diverso itinere Actianis copiis, quæ adversus adventantem exierant. Tanta porro irrumpentis Vergusii celeritas fuit, ut Actius breve ad fugam spatium nactus, ægre hostium manus evaserit, adjuvante præsertim matre, quæ tam subito quam salutaris consilio, effusis in limine domus aureæ monetæ facculis, intrantes, dum eam avidè colligerent, aliquandiu morata fuerat. Erat Vergusius vir bello acer, sed ab ingenio maxime turbido semper inquietus: qui tametsi Gibellinæ factionis erat princeps, commutata voluntate ad Legatum perfugerat, quod Galeacius uxoris ejus pudicitiam procacius pertentasset.

Verum Actius collectis copiis suis, & Ferrariensium Mantuanorumque opibus adauctus, Sancti Domnini oppidum in potestatem redegit, accurateque bellicis operibus id muniens, adversus hostes egregie defenso oppido bellum gessit, usque ad id tempus, quo Galeacius post devictum ca-

ptumque Cardonium, & delatas ejus copias, Modetiamque receptam, Castruccio opem imploranti auxilia in Etruriam transmisit. Florentini enim novas equitum alas ex ulteriore Gallia mercede conduxerant, conjunctisque Roberti Regis & Pontificis copiis, Cardonium, qui nuper dimissus à Galeacio ad Pontificem pervenerat, ingentis exercitus imperatorem effecerant, ita ut Castruccius sibi timere, & opem à sociis, Galeacioque imprimis, & Passarino Mantuano, Caneque Scaligero implorare cogeretur. Quam ob rem coactis jam auxiliis Actium parantem sibi iter ad Apenninum, ut in Etruriam transenderet, in Sancti Domnini oppido aliæ atque aliæ Florentinorum & Legati copiarum acriter obsederant, ut dejectus spe auxiliorum Castruccius, priusquam ei succurri posset, à Cardonio circa Phocensium paludes opprimeretur. Sed magno cum dedecore obsidentium illatus est in oppidum commeatus, & recentes demum cohortes & sociorum equites intrarunt; Actiusque eductis signis, detrectante certamen hoste, cum octingentis galeatis equitibus per Apuanos Ligures ad Castruccium contendit, usque adeo opportune, ut quum collatis castris prælium differri ultra non posset, Castruccius ejus adventu magnopere lætaretur, & Cardonius triste omen acciperet, quum fatales sibi Viperas in vexillis fulgentes adspexisset. Tum quoque lætum de ea victoria augurium Actio obvenit, sicuti à Francisco Petrarca his verbis scriptum legimus: Actius Vicecomes, qui postea Mediolani dominium obtinuit, juvenis nempe victoriosus, antequam à podagris vinceretur, jussu patris profectus cum exercitu Apenninum transit, & victis hostibus apud Altopassum, Duce quidem Castruccio, sed egregia opera ejus adjuto, ad vincendum Bononienles pari impetu fortunæ se convertit. In ea expeditione, dum forte equo descendens requiescit, ingens vipera nullo comite adveniente in galeam juxta positam irrepsit, quam quum mox capiti reponeret, sinuoso quidem & horribi-

ribili, sed prorsus innocuo lapsu per decoras interriti Ducis genas illa descendit. Eam à nemine lædi passus animosus adolescens ad omen geminæ victoriæ traxit, hinc præcipue quod ipse pro signo bellico vipera uteretur. Nec multo post commissâ est ea nobilis pugna ad Altopassum, in qua victor Castrucci præclara virtute Actii adjutus, universas hostium copias delevit, captis ferme omnibus Ducibus, ipsoque Cardonio imperatore cum filio in potestatem redacto, & direptis castris; quibus captivis & spoliis aliquanto post splendidissimum Romano more triumphum adornavit: qua in pompa ducti ante currum Cardonius, Urlimbacæque Germanus, & Guliermus Narsejus Gallus, & plerique illustres Gotholani & Narbonenses equitum Præfecti cum Legatis Florentinis, gratissimum Lucensi populo spectaculum præbuerunt.

Sed Castrucci statim ab Altopassò victoria utendum ratus, victrices copias Florentiæ mœnibus admovit, suburbanas delitias in oculis hostium evastans, & pleraque ædificia incendens. In ea expeditione Actius Florentinis è muro spectantibus, ludos equestres in Arni insula edidit, proposito ad præmium velo serico purpurei coloris, ut reddito contumeliæ talione Florentinis illuderet, qui similes decursiones Mediolano obsessio ante Comensem portam jactanter ediderant. Inde vero Actius spoliolum parte magnifice donatus, Etruriæ finibus excedens, in Mutinensi agro Passarini Mantuani, Attestinique Ferrariensis copiis se conjunxit, adversus Bononiensium exercitum, Legati auspiciis, Mutinæ Rhegioque imminentem. Nec multo post circa Scultemnam profligatis hostium copiis, alteram Etruscæ pene patrem victoriam est consecutus: atque inde ad patrem geminata cum laude Mediolanum contendit.

Insecutus est demum annus, diro Ludovici Bavari Cæsaris adventu, Vicecomitum familiæ, & toti pene Italiæ infaustus, quo Actius eandem, quam pater patruique indigne subierunt, carceris fortunam tulit. Cæterum expiata invidia cum patre patruisque libertati restitutus, quanquam immaturo Galeacii patris interitu, atque importuna Castrucci morte angeretur, accisæque spes prope omnes nova atque inopinata calamitate conspiceret; nihil tamen (uti Magni Matthæi nepotem decebat) sese animo demisit, quin ad fortunam pertinaci virtute sublevandam cuncta experiretur. Summa consilii hæc fuit, ut datæ fidei non deesset, ab unoque Cæsare, à quo vulnus acceperat, præsentis remedii opem suppliciter peteret, postquam Marcus patruus infami suo consilio deceptus, perosusque non obscure Cæsarem, non dubie Imperii decus, Gibellinique nominis opes, vel parva ab hostibus accepta pecunia, passim evertentem, ad sanitatem rediisset: eo enim deprecante Cæsar post subirati Castrucci ab Roma discessum, fratres carcere eduxerat, territus utique adversarum partium secundis successibus, & non obscuro conscientie pudore vehementer timens, ne focii clientesque deficerent. Itaque Actius cum Joanne patruo ad Cæsarem Pisas profectus, post multa colloquia, egregie navante operam Marco, Cæsaris animum inflexit, promissæque pecunia ad summam quindecim myriadum, ut paterni imperii Princeps appellaretur, impetravit. Erat enim tum Cæsar multis adversis rebus, & super hæc, extrema pecuniæ inopia circumventus. Roberti tum Regis copię, Bertholdo Ursino Duce, Cæsarianos Præfectos urbe Roma expulerant: Joannis Pontificis auctoritas studio Jacobi Columnæ apud populum vigeat: Gibellinorum studia magna ex parte refrixerant,

A quod Sylvestrum Chattum Viterbii partium principem indigne torfisset, ut ejus pecuniis, quæ ingentes esse dicebantur, summa cum injuria potiretur. Sed Cæsarem gravis metus incefferat, quod Germani Saxones, & Chatti validissima pars exercitus, consternati animis & stipendia debita flagitantes, à Vindelicis & Suevis secesserant, cum quibus antea apud Velitras cruenta seditione armis contenderant: & tum forte renovato odio, spretoque Cæsaris imperio, Pisatorum & Lucensium agros impune prædabantur, castrisque demum in Cæruleo monte positis, (qui supra Vivianum jampridem à Castruccio permunitus, ad B agendam prædam magnas habet opportunitates) eo terroris & foedæ calamitatis circumjectam regionem adduxerant, ut incolæ, incendiorum metu, commeatum, vestem, & castrensia instrumenta conferre cogerentur. Nam paulo ante in Lucensi Camajoris oppidi incolas, quod irrumpentibus aliquandiu resistissent, direpto incensoque oppido crudelissime trucidarant. Timebat quoque Cæsar, ne ea manus, quæ octingentis armatis equitibus constabat, utpote quæ nullo pudore defecisset, tanquam plane venalis ad Florentinos opima stipendia pollicentes deficeret: quibus de causis facile cum Cæsare transactum est, ut Marcus ad Saxones mitteretur: is Actianæ pecuniæ dimidiam partem ex præteritis stipendiis à Cæsare debitam promitteret; interim apud eos datæ fidei obsequeretur: altera pars Cæsaris Procuratoribus Mediolani certis pensionibus numeraretur. Non abnuvit conditionem Marcus, ut prioris maleficii invidiam novo officii genere deliniret: avidæque à Saxonibus tantæ pecuniæ vades receptus est. Addidit quoque Cæsar perscriptis obsignatisque codicillis novum munus, ut magis ac magis Vicecomites sibi obstringerentur, quum veteres injurias accumulatis beneficiis expiandas existimaret. Joannes enim Actii patruus à pseudo-Pontifice Nicolao, D suffragante Cæsare, in Senatu Cardinalis creatus est: sed vir ille summæ gravitatis atque prudentiæ gratias agens, beneficium quidem agnovit, ne spernere videretur, verum usum purpuræ galericque honore semper abstinuit, non obscure in gratiam Joannis legitimi Pontificis, insigni quidem ipsius cum laude commodoque: nam ei Episcopatum Novariensem postea contulit: quo permutato demum cum Aycardo Camedoio, Mediolanensis Archiepiscopus effectus est.

E Actius & Joannes Pisas profecti, diplomata Cæsaris Modætiæ detulerunt, quod eos Guliermus Monfortius livoris plenus, magnis obviam euntium civium gratulationibus passim exceptos, Mediolano recipere noluisse; sed ejus cunctationem præbita pecunia celeriter resolvit: atque ita Monfortius dolore amissæ præfecturæ percussus, in Germaniam reversus est. Exinde Actius à veteribus amicis clientibusque, & ex publico civitatis ærario pecuniam mutuo sumpsit, quæ præsentis Cæsaris Procuratori solveretur. Is erat Conradus cognomento Porcarius, rapaci ingenio, togatus miles, atque ob id facile fidei pudori- que pecuniæ lucrum anteponebat. Accepta enim quarta fere promissæ totius pecuniæ parte, in Germaniam perfugere, quam ad Cæsarem reverti maluit. F Ejus potiundæ pecuniæ spe dejectus Cæsar, exacerbatisque propterea Saxonibus, efferrato animo ut undique corraderet pecuniam, grave auripondus Pisani imperat: Raimundum Cardonium auro se redimentem, pretioque Nobiles aliquot Florentinos è custodia educit: Castrucci uxori pretiosa mundi muliebris ornamenta aufert: Castrucci filios Pisarum dominatu spoliatos Luca extrudit; & Francisco Intelminello, accepta ab eo grandi pecunia, urbis principatum adjudicat: Pisique

fisque discedens Mediolanum contendit. At Mediolanenses immanis avaritiæ Tyrannum se recepturos negant. Eo modo exclusus, ad Modætiæ iter vertit. Id oppidum Actii præsidio tenebatur: quamobrem oppidani fortunæ suis Mediolanensium exemplo non temere timentes, venienti portas occludunt; nec per arcem aditus in oppidum datur, quod Lambrus amnis intumuerat, & si qui vadum tentarent, profuente mergebantur. Eo modo Cæsar ludibrio habitus, quum infamis avaritiæ poenas daret, Papiam deflexit, ubi ab Actio collata pecunia facile delinitus est. Nec multo post quum per socias urbes prædabundo similis vagaretur, nec consiliis suis dignum Cæsaris nomine exitum reperiret, Gibelinis pariter & Guelfis odiosus, in Germaniam rediit.

Interea Saxones in monte Cæruleo Marcum audaci ingenio fortia quæstuosaque consilia, atque ob id grata militibus, explicantem, admiratione virtutis ex obside captivoque Ducem sibi creaverunt. Is ante omnia Henricum & Valerianum Castrucci filios gravi ingrati Cæsaris injuria Luca pulsos, & in proximo exulantes, Germanis conciliat, & per eos occupandæ Lucæ consilium init. Ab his Augustæ arcis custodes, quod erant Germani, veteres Castrucci milites facile oblati præmiis corrumpuntur, ut improvisus in urbem pateret introitus. Nec mora, Marcus ad constitutam diem à Cæruleo monte cum Saxonibus Lucam noctu pervolat: urbs capitur: Franciscus Intelminellus à Cæsare ad Principatum evehctus, profligato ejus præsidio adversa porta profugit: contrariæ factionis civium domus in prædam vertuntur; sedatoque mox tumultu per novæ acclamations, Castrucci filiis paterna sedes restituitur. Tanta re feliciter patrata, ditatisque militibus, Marcus fortuna utendum ratus, cum Fatio Donoratici Regulo, qui Pisana Nobilitatis erat princeps, consilium suscepit restituendæ Pisanis libertatis, & uti inde Cæsariani Præsides pellerentur. Nec voto defuit eventus: Marcus enim cum valida manu equitum Luca profectus, Pisis à Fatio recipitur: ingens prælium excitatur; continuoque ponte vetere, Cæsariani in ulteriorem urbis partem protruduntur: libertatis nomen armati populi vocibus attollitur. Ipse Tarlatus Aretinus à Cæsare Pisis præfectus, ubi se à Saxonibus circumventum suosque profligatos videt, pontes occupatos expugnare conatus, cum ea præsidii manu, quæ supererat, desperatis rebus urbe excessit. Tum vero Pisani à Joanne Pontifice interdicti sacris, expiari promeruerunt, quod à Cæsare ab eo damnato defecissent: traditusque est ab eis consensu publico Nicolaus pseudo-Pontifex, quem discedens Cæsar Fatio commendarat. Is demum Pontificiis triremibus Avenionem devehctus infelix, & alieno potius quam suo crimine miser, in tetra custodia periit.

At Marcus à Pisanis Fatioque, uti præclarus auctor libertatis, magnis muneribus liberaliter donatus, ubi se honesto eventu è manibus Saxonum explicatum videt, majora sibi agitata ratus, accepta fide Florentiam contendit. Offerebat Octoviris, qui Reipublicæ præerant, Saxonum nomine Lucam urbem, si octuaginta millia aureorum nummum persolverent, ea conditione, ut sub fide publica Castrucci liberis honestus in patria locus relinqueretur. Interim ut bona fide pecunia præsentari posset, Saxones in Augustam arcem Florentini milites præsidium acciperent, & ex numero Præfectorum insignium obsides darent. Erat ejus comparandæ tantæ urbis facultas Florentino populo longe gratissima; sed quo minus decretum fieret, factiosi cives Simone Tosa principe vehe-

menter impediabant, obrectatione eorum laudis inducti, qui eam occasionem minime prætermittendam suadere conabantur; quum supra ærarii difficultates Marco tanquam veteri infensoque hosti, atque ipsis præsertim fluxa fide Germanis, tanto amittendæ pecuniæ periculo, minime fidentum differerent: nec Tyranni liberis, qui atrocissimi nuper hostes exstitissent, parcendum arbitrarentur. Sed non deerant cives uti publicæ dignitatis augendæ studiosi, amantesque patriæ, qui eam pecuniam ex privatis opibus, in ejus urbis coemptionem liberaliter offerrent, modo ipsis Lucensium vectigalia non iniqua licitatione in triennium addicerentur. Interim à Marco acciti primores Saxonum Florentiam venerunt, & in his Bambergus Regulus, & Arnaldus castrorum Magister, ut coram Octoviris de obsidibus & pecuniæ summa transigeretur. Verum invidia & conceptus inter altercantes Patritios importunus livor, populi votum, decora procul dubio atque utilia cupientis, interrupt. Nec multo post Saxones irrita tum & mox punita Florentinorum cunctatione, urbem Lucam, ipsamque Augustam arcem, integrumque in civitate dominatum Gerardino Spinulæ Liguri vendiderunt: tanto cum dolore indignantis populi Florentini, ut in Simonem Tosam pene conjectis lapidibus omnes ordines inveherentur.

At Marcus jam non obscure Actio subiratus, quod ad se redimendum pecuniam nequaquam liberaliter atque diligenter expendisset, ad fatalem veteris odii ac infestæ ambitionis insaniam redierat, usque adeo ut se Pontificis, Robertique Regis, & Florentinæ Reipublicæ clientem futurum juraret, si ad pellendum Actium auxiliis atque pecunia juvaretur. Sperabat enim Saxones, qui jam plane à Ludovico Cæsare defecissent, nomen ejus omnibus bellis illustre, ad opima stipendia novamque prædam continuo secuturos. Hoc concepto scelere, foedereque percussio, quum per triginta dies Florentiæ viros nobiles & militiæ claros quotidianis epulis liberaliter excepisset, & uti erat excelsio corpore, præaltoque animo, & facundia insigni, dignus paterno imperio videretur, pro lautis mille aureis liliatis publice donatus, Bononiam contendit: proficiscenti autem additus est comes Prætoris filius, qui civis erat Bononiensis: hunc juvenem Octoviri ingenio apprimè validum delegerant, ut ab eo Marcus ad Legatum deduceretur; eoque arbitro cuncta ordine, quæ Florentiæ promissa constitutaque fuerant, iterata sacramenti fide confirmaret. Itaque magna spe inflatus à Legato Bononia discedens Marcus Mediolanum pervenit, exceptusque est ab Actio & fratribus multo cum honore & lætis utique vultibus. Sed dum in rem suam novandis rebus clientelas exploraret, tentaretque veteres amicos, & turbido atrocique animo consilia aspera ad invadendum dominatum agitare, ab Actio & Luchino Joanneque nefariæ temeritatis cogitationes facile deprehenduntur: jam enim velano vultu orequè identidem querebatur, quod se tam diu contra fidem datam apud barbaros sævosque homines reliquissent: & forte tum seipso amarior atque turbidior erat effectus, quo adamatam nobilem foeminam, è matrimonio Othorini Vicecomitis impudenter abreptam, subita concitatus iracundia apud Rosatum in profunda arcis fossa demerserat, quod illam levitate muliebri mentitam partum, sibi alieni ventris puerum supposuisse didicisset. Sed eam ab eo flagitio ita oderat, ut necatam impotenti amore percitus, fera deinde præcipitis vindictæ poenitentia deploraret, indeque novus perturbatæ menti furor adderetur. Eo modo Actius patriuique ex multis indiciis quid Marcus agigaret


molireturque non obscure divinantes, quum in unum summo consensu conspirarent, vitandam omnino diræ belluæ rabiem, vindicandumque prioris perfidiæ immane facinus statuerunt. Nec mora, Marcus in Arenæ curia post epulas in cubiculum colloquendi simulatione deductus, à delectis aliquot prætorianis comprehenditur, elisisque linteis faucibus strangulatur, nullo ex ejus nece tumultu exorto, quum projectum cadaver è fenestra in publicum nemo lugeret, & tanquam sponte præceps datus, sumptuosus honestatus exsequiis, ad Eustorgium sepulchro Majorum inferretur. Florentini vero Prætoris filius vel totius consilii conscius, & funesti exitus spectator, ab Actio benigne dimissus est.

Nec multo post Joannes Bohemiæ Rex, qui Henrici Cæsaris filius & Caroli quarti Imperatoris pater fuit, cum valido exercitu in Italiam descendit, neque Ludovico Bavaro Cæsari plane hostis, neque Guelpharum partium amicus. Bergomates primi eum receperunt: nec Actius dubitavit, quin amicitia, quæ Majoribus suis cum Henrico patre præclara fuerat, renovandæ causâ, ad Bohemum trans Abduam contenderet, munera deferens utroque dignissima. Auxit existimationem Bohemo id Actii officium; & Actius ex eo colloquio confirmatæ potentia apud socios pariter atque hostes opinionem retulit, eo eventu, ut à Vercellensibus ad civitatis imperium vocaretur. Nec multo post Bergomates à Bohemo præsidii injuriis exagitati, ad Actium defecerunt. Joannes enim ingenti cursu Brixia, Cremona, Pavia, Parma, Rhegio, atque Mutina potitus, superato Apennino Lucam occupat, Gerardino urbe ejecto, & Florentinis copiis, quæ Beltramone Baucio Duce Lucam obsederant, longe summotis. Is rerum successus Gibellinos non secus ac Guelphos magnopere conterruit; coque vehementius, quod Bohemus cum Legato Pontificio in colloquium devenerat: fama que ferebatur Philippum Gallia Regem cum Pontifice occulto inito foedere conspirasse, ut Bohemo Duce cuncta subigerent, atque inter se Italiae urbes partirentur. Erat enim Bohemus Gallica pecunia instructus. Quibus de causis Florentini tanquam à Roberto Rege plane deserti, metu novi hostis, cum veteribus inimicis communi commodo foedus inire coacti sunt. Itaque Actius, Mastinus Scaliger, Passarinus Mantuanus, Obitiuss Ferrariensis cum Florentino populo foedera percusserunt, ea pactione, ut conjunctis viribus bellum gereretur; subactæque urbes, Actio Cremona, Parma Scaligero, Rhegium Mantuano, & Obitio Mutina redderentur; Luca Florentinis cederet.

Nec multo inde quum Bohemi Regis exercitus Ferrariam oppugnaret, ingenti prælio edito fusus profligatusque est, Pinalla Aliprando Actii Duce felicissime operam navante. Nec fortuna victoriæ cursum diu morata sociorum votis defuit; pulsoque Ponzono Joannis Præfecto Actius Cremona potitus est, Papiamque mox in ditionem recepit, quum in Urbeculam compulsos hostes, desperatis auxiliis deditionem facere coegisset. Placentiam demum à Francisco Scoto pecunia coemptam recuperavit. Postremo Franchinum Rusciam, Comensium Tyrannum, multis illatis detrimentis eo adegit, ut accepto Bellizone oppido ad solatium amissi dominatus ultro urbem dederet. Cæterum paulo ante id tempus quum pedibus ager decumberet, maximum rerum suarum discrimen subiit, Leodrisii perfidia circumventus. Is antea Matthæi Magni gloriæ invidens, quanquam esset patruelis, primas partes legationis ad Pontificis Legatum susceperat, ut sub inani libertatis nomine, cum Marco demum adversus Galeacium atrocissime conjurarat. Nec animus iniquis ambitioneque mu-

tabilis ullis omnino donis ac honoribus collatis evinci mitigarique poterat, ut Actium rerum dominum imperio potiri pateretur. Itaque correptus vetere infamia, inopinato transfugio abducta Germanorum ala, ad Franchinum Rusciam, & mox ad Mastinum Scaligerum Veronam contendit, conductisque Rhætorum Helvetiorumque cohortibus, & Germanis equitibus, magna manu exsulum passim collecta, ad Abduam profectus est: nec transitu prohiberi poterat, quanquam diversa vada amnis Aliprandus Pinalla tueretur. Ea improvisa externæ gentis irruptione agricolarum foeda & plane miserabilis fuga facta est per totum fere Insubrum agrum, quod tunc præaltæ nives herbidi soli campos integerent, nec pecoribus armentisque in loca tutiora refugientibus deserto pabulo pascendi facultas daretur.

Porro Actius, quanquam pedibus ager, nihil de celeritate diligentiaque remittit, quin ex omnibus locis milites cogat, munitioraque oppida subitario præsidio confirmet, donec auxilia convenient. Aliquot enim diebus antequam hostes Abduam transirent, quid Leodrisius Veronæ moliretur, per exploratores cognoverat; ita ut auxilia opportune implorata transmissaque à propinquis sociisque principibus singulis horis exspectarentur. Igitur coactis in unum è Liguria, Ferraria atque Placentia magnis auxiliis, Luchinus patruus Dux vetus & multis præliis felix Mediolano totius Nobilitatis equitatum, & delectam ex promptissimis civium legionem educit, ad hostesque progreditur. Confederat Leodrisius ad Nervianum vicum, duodecimo ab urbe lapide: nec mora, ad conspectum hostis ineundæ pugnae signum dat, ordinesque componit. Verum irruente Luchino, prima Leodrisii acies sternitur; sed ex adverso Rhæti Germanique more suo conglobati secundum impetum excipiunt, Luchinique equitatum primis cæsis intemperanter proVectum vehementer urgent: multi utrinque cadunt; cruentum & atrox undique prælium editur. Cæterum Actianis ægre sustentibus & jam plane profligatis, Luchinus, dum reparare percussam aciem ingenti animo contendit, interfecto equo Helvetiorum securibus sternitur atque capitur. Tum vero Barbari clamorem attollunt, & legionem Insubrum armis animisque imparem adoriuntur, tantaque vi Placentinas cohortes propellunt, ut Dondatio Malvicino viro fortissimo, Lancilottoque Anguisola Ducibus interfectis, universa acies ad fugam respueretur, Leodrisioque parta victoria videretur; nisi Divus Ambrosius, Mediolanensium tutelare numen, in nube equestri effigie à multis conspectus opem plane perditis rebus attulisset. Supervenit enim Hector Panicus cum ala cataphractorum Allobrogum à Ludovico Sabaudio Actii socero transmissa. Hæc Rhætos intempestive exsultantes, & cædi prædæque solutis ordinibus incumbentes, ita protrivit atque cæcidit, ut instaurata pugna, & fortissimo quoque ex novo eventu desumente vires ac animos, Leodrisiani terga darent; Luchinusque ad arborem deligatus Helvetiis custodibus eriperetur, & Leodrisius effugiens in manus hostium incideret. Eo die interfecta sunt supra quatuor milia hominum; sed minus lætam Luchino victoriam fecit Joannes Fliscus, Fusca uxoris frater, Ligurum Præfectus, in prima acie occisus. Externus Leodrisii miles agricolarum sævitia dum vagatur, & frustra effugium quaerit, hyeme media, frigore, vulneribusque consumptus, ferme omnino interiit. Leodrisius cum liberis in arce Divi Columbani custodia est traditus, ut post Actii & Luchini mortem, Joannis Archiepiscopi clementia servaretur. In eo autem campo, ubi pugnatum est, inter Parabiacum & Nervianum, Luchinus & Joannes templum in arce Divo Ambrosio votum, ad rei gestæ memoriam condiderunt: ubi





ubi quotannis insigni pompa, effuso Mediolanensi populo cum Prætoribus & Decurionibus, altero & vigesimo Februarii die, sacra solennia celebrant. In eo templo ad lævam spectatur effigies Hectoris Panici cum armata Allobrogum ala perditis rebus opem ferentis, quod facile dignoscitur, quum in purpureis equitum laciniis albæ cruces Sabaudiani Principis insignia discernantur.

Secundum eam victoriam confirmato imperio, Actius Mastino Scaligero grave bellum intulit, atque ei demum, injuriam probe ultus, Brixiam ademit. Exinde pacatis rebus Mediolani mœnia, jam cœpta antiquitus, ad justam altitudinem educta sunt, additis per intervalla altioribus propugnaculis, in quibus marmoreæ ingentes viperæ visuntur. Perduxit etiam in urbem fluviolos duos everrendis urbanis fordibus, ad salubritatem opportunos, Lirom nem scilicet & Cantaranam, qui jam pene defecerunt, quum negligentia publica sensim oblimati jam pridem alvei curatoribus caruerint. Eum quoque admirandæ magnificentiæ Curiam in arena priscorum temporum juxta frontem templi maximi ædificasse constat, addito Divi Gothardi templo, cujus sacram turrem nobili fastigio insignem cum admiratione suspicimus: id ille multis admodum pretiosis divini apparatus instrumentis refererat. Mortuus est Augusto mense, octavo & trigesimo ætatis anno, quum integros novem annos regnasset, usque adeo improbe urgente fato, & articulorum doloribus assidue laceffit, ut ne lodicibus quidem in lectulo sine intolerabili cruciatu volveretur. Ex Catharina autem Sabaudia uxore pudicissima nul-

lam suscepit prolem. Erat Actius facie candida lætaque, naso autem fimo, quod nemini superiorum gentilium contigerat: coma item barbaque ad patris similitudinem, ænei coloris, valde crispa; sed cæruleis oculis, atque intempestivo calvitio, non deformante quidem frontem, sed eximie decorante. Existimatus est ex toto actionum eventu, egregie bello fortis & consilio summe prudens, & quod ad popularem gratiam plurimum intererat, aditu facilis, & alloquio perhumanus, publice & private cum ratione liberalis. In feriis porro sine fastu gravis, & in ferendis jocis omnium suavissimus evadebat; cætamen temperie, ut cuncta ad Christianam pietatem revocaret, sic ut Dii atque homines, perfidiosi & turbulenti patrui necem facile condonarint. Tumulatus est marmoreo insigni sepulchro ad aram Divi Gothardi, in quo cælato inauratoque opere ejus jacentis effigies spectatur: pari artificio circumseptus est marmoreis tabulis sepulchri locus, in quibus scite sculpta Ludovici Cæsaris solenni habitu imago conspicitur, quum supplici ingeniculatoque Actio Mediolanensis imperii insignia largiretur.

Epitaphium Actii, qui eo rudi seculo Azo dicebatur.

Hoc in sarcophago tegitur vir nobilis Azo,
Anguiger, imperio placidus, non levis & asper:
Urbem qui muris cinxit, regnumque recepit:
Punivit fraudes, ingentes struxit & ades.
Dignus longa vita, in satis si foret ita,
Ut virtus multos posset durare per annos.

L V C H I N V S,

MEDIOLAN. PRINCEPS V.

Ejus armati effigies, prout hic habetur, in templo Divi Ambrosii ad vicum Parabiacum, post aram maximam, quam prælio voverat, & parta demum victoria dedicarat, conspicitur.



Actio immatura morte sublato, quod sine virili prole decessisset, duo patrui Luchinus atque Joannes Insuabrum omnium consensu successerunt. Sed Joannes æquitate liberali motus, uti sacratum Antistitem decebat, divini juris potestate contentus fuit, quo fratri bellica laude illustri, & in administranda Republica ingenio gravi constantique prædito, integra exercendi imperii cura relinqueretur. Is initio statim suscepti Principatus, quod confirmandæ potentiæ parandæque summæ gratiæ apud cives plurimum conferebat, à Benedicto duodecimo per Legatos impetravit, ut interdicta sacris civitas, tum vere supplex clementia & benignitate æquissimi sacrorum Principis expiaretur. Recepit quoque pari Pontificis indulgentia veteres thesauros, qui è templo Modætiæ, turbulentis superiorum bellorum temporibus, Avenionem asportati fuerant.

Cæterum quum ad arma vocaretur, per Legatos fere semper bella gessit, tametsi antea longe acerrimus bellator fuisset, utpote qui in omnibus fere justis præliis honesta vulnera suscepit: in illa enim nobili cruentaque ad montem Catinum pugna, qua Uguccio Fagiolanus victor Guelpharum partium vires vehementer contudit, paterna auxi-

lia ductanti, investoque in medios hostes, finistrum crus valida cuspide trajectum est. Ad Alexandriam vero, quum in Tanari ponte cum Ugone Baucio, Roberti Regis equitum Magistro, conflingeret, ita Baucium invasit atque prostravit, ut multo suo ac interfecti hostium Ducis cruore fœdatus, opimo spolio & præclara victoria potiretur. Ad Tricellam quoque oppositus ingentibus externarum gentium copiis, quæ Pontificis & Roberti Regis auspiciis sub Gastone Aquitano, Raimundoque Cardonio ad Mediolanum obsidendum ire maturabant, maxime pugnacis & periti Ducis laudem tulisse fertur, quum terribili longoque certamine edito, reparataque sæpe acie honesta in facie vulnera suscepisset. Postremo ad Nervianum acriter dimicans, Helvetiis securibus perfracta galea, suffossoque equo, prostratus captusque est, & manante per nares multo sanguine, ad juglandis arborem tam diu nexus & semianimis jacuit, donec recentis Allobrogum alæ superventu, cæsis Helvetiis atque Germanis, & Leodrisio hostium Duce capto, è vinculis eriperetur.

Sed qui tot bellis summa pericula evaserat, ex principatu demum oborta statim invidia, amicorum & propinquorum sævas manus vix effugit. Conjuravere enim in ejus necem Franciscus Pusterla ex ordine Patritio avitis divitiis potens, & ante alios duo Aliprandi fratres Martinus atque Pinalla, qui Actianis copiis præfuerant, neglectique

que à Luchino, ad alios scilicet, uti meliores, translatis honoribus, amiciorem liberalioremque Dominum quærebant; conjectis utique oculis in Galeacium & Barnabam ex Stephano ejus fratre filios, qui decore juventæ & jam plane matura militari indole florentes, intempestiva atque nefaria ambitione, quæ semper domui Vicecomitum fatalis fuit, ad imperium adspirare dicebantur. Sed dum Aliprandi fratres, pertentatis amicorum intimis, conjurationi vires addere contendunt, à Ramengo Casato inita consilia produntur. Nec mora, Martinus atque Pinalla capti diuque torti, in carcere fame necantur, cæteris in furca, latro- num more, strangulatis. De Pusterla autem, qui profugiens ex Etruria retractus fuerat, in foro supplicium est desumptum, eo quidem atrocius at- que miserius, quod duobus filiis adolescentibus in conspectu parem pœnam subeuntibus, scelestus pater, paulo ante inter cives maxime felix, supre- mæ calamitati suæ domus interfuit. Nec multo post Margarita uxor, quod non conscia modo suscepti ejus immanis consilii, sed ad id mature pa- trandum peracerba concitatrix fuisset, perpetui tantum carceris pœna damnatur, quod Othorino Vicecomite genita Luchinum artissima propin- quitate contingebat. Cæterum ex damnatorum quæstione compertum est, Galeacium & Barna- bam non ignaros initæ conjurationis, paratosque ad excipiendam Principatus fortunam, tanti faci- noris eventum expectavisse. Sed Luchinus ne su- pra Marci fratris necem, familiæ decus, vel ma- xime nocentium juvenum cruore macularet, de- precante Joanne Antistite, exsilii pœnam non ex- cessit; ita tamen ut eos perfidiæ impietatisque igno- minia notatos, ad Oceanum in extremos Belgas & Batavos relegaret.


Exinde Luchinum natura subtristem, planeque severum solito amariorem ac duriorum factum Scri- ptores tradunt: usque adeo, ut nec in joco, pal- lidam semper obducens frontem, ridere sit visus, quod ad animi ægritudinem, articulorum quoque dolores accessissent. Sed non inanis rumor de ux- oris impudicitia per urbem excitatus, mœrorem us- que adeo cumulavit, ut in affecto tot malis sene, nondum maturo fato viam aperiret. Nupserat ei Isabella cognomento Fusca, è Fliscorum gente apud Ligures apprimè nobili, duobusque præfer- tim Pontificibus, Innocentio atque Hadriano, pur- puratisque supra triginta Senatoribus longe claris- sima, unde illa fastum, atque inde luxuriam pa- rum verecundo gestu oreque præferbat. Hæc no- biles Insulam matronas forma, lepore, mundi- ciis, atque una præsertim uteri fecunditate, qua Luchinus felix videri potuit, anteibat: primo enim partu Luchinum Novellum, secundo Vrsinam, & mox tertio gemellos mares eximie indolis Bor- sium, & Forestinum rara quidem felicitate pepe- rerat, nisi tantam prolem ex incesto concubitu concepisset. Galeacium enim formæ dignitate cun- ctos mortales superantem lascive adamatum ab ea constat, uti aliquot post annos, defuncto jam vi- ro, in extremo vitæ actu pie ingenueque confessus est, ut animum eo piaculo liberaret, vel cum cer- to infaustæ prolis exsilio, tantique subinde imperii hæreditas ad legitimos successores verteretur.

Cæterum suoapte ingenio procax & levis mulier, exsulante Galeacio, & viro ex podagra decum- bente, quum spectare Venetias cum litu stupen- das, tum celebri festo die Ascensionis CHRISTI, navalibus ludis & privatarum publicarumque opum ostentatione mirabiles, concupisset, importunæ u- xori Luchino cuncta concedente, haud difficulter

A impetravit, ut ornatissima classis per Padum devehe- retur, delectis in comitatu sceminarum nobilissi- mis, quibus & ambiguus inesset pudor, nec vi- ri earum tuendæ pudicitie cura tangerentur. Ve- rum luxuriosissimæ navigationis exitus fuit, ut cum insigni probro prostratæ pudicitie apud U- golinum Gonzagam, Dandulumque Veneti Se- natus principem, redierit; pari infamia deflagran- tibus nonnullis illustribus sceminis ex comitatu, quum à pudicis pariter atque in eodem crimine ma- culosis levitate muliebri per mutuas delationes, singularum adulteria proderentur. Hoc tanto in- expiabilis infamie vulnere percussus Princeps, B ita flagitii injuriam tulit, ut non obscura parati ad vindictam animi signa, contractæ frontis que- rela, demorsisque sæpe unguibus ostenderet.

Itaque Fusca expedito ingenio non impudica mo- do, sed etiam truculenta mulier, pœnæ metum celeriter antevertit, ægrumque adhuc conjugem veneno lento atque tabifico præoccupat, nullo tum sceleris existente vestigio, quum plane matu- ratus ægri senis obitus ad novum insurgentis mor- bi impetum facile referretur. Vixit annos sexaginta duos, imperavit novem. Tumultus est in æde Divi Gothardi juxta Actium, regio sumptu cele- bratis exsequiis. Luxere elatum veris lachrymis C cuncti civium ordines: nam summa æquitate jus dicere, oblivisci factionum, tueri ab injuria infi- mos; & (quod maxime populare videbatur) sin- gulari providentia annonam curare erat solitus; bella quoque, quod opulentæ tranquillitatis inter- erat, extra fines semper gessit, eo animi decreto, ut & sua strenue defenderet, & socios constantissime tueretur. Parmam imperio adjecit sexaginta milli- bus aureis coemptam ab Obitio Atestino, ægre eam urbem adversus Gonzagas atque Scaligeros de- fendente. Pisanis porro ea conditione pacem dedit, ut honorarii tributis nomine binos equos, milita- rem unum, alterum asturconem album, quo do- mina veheretur: itemque binos ad aucupium fal- cones peregrinos quotannis penderent. Novissime Ligures fluxa fide antiqua fœdera violantes, ma- gnis copiis invaserat, Brutio filio Duce Genuam gentis caput obsessurus, nisi exitum ei properantia fata vetuissent. Magnificentie monumenta nulla fere reliquit, Actiana domo contentus, quum an- tea in Ticinensi regione præaltas ædes contra divi Georgii templum Palatii nomine vocatas habitasset. Foris autem validam arcem in edito monte ædifi- catam, cui à vetere delubro Capellæ nomen est, Bergomatibus imposuit. Delectatus est, tuendæ E valetudinis causa, suburbano secessu, non tam a- mœno quam salubri, ad septimum lapidem Co- mensi via sinistrorsum, ubi tenuis est pagus, qui Sanus aer verissimo nomine nuncupatur. Liberos reliquit, Brutium ex concubina, qui quum Lau- di Pompejæ præferoci ingenio aliquandiu tyranni- dem exercuisset, conjurante civitate expulsi ob- scuro in pago in Euganeis inops & merito miser interiit. Borsius autem & Forestinus detecto Fu- scæ matris incestu, tanquam ex damnato nati con- cubitu, hic tetro in carcere, ille vero fuga cla- psus exsilio perierunt. Eandem exsilii fortunam tulit Novellus, qui nequaquam animo degeneri militie assuetus, propinquorum suorum hostibus semper adhæsit. Luchini autem tumulo hoc ru- de carmen inscriptum est:

*Justitia cultor, scelerumque acerrimus ultor,
Pauperibus charus, nunquam, dum vixit, avarus:
Egregiis factis, & cladibus ante peractis.
Insignem bello laudem meruit, nisi fraudem
Sors mala struxisset, crudeliter & periisset.*






IOANNES VICECOMES
Archiepiscopus Mediolanensis.

JOANNES ARCHIEPISCOPVS,

MEDIOLAN. PRINCEPS VI.

Joannes Archiepiscopus se pingi iussit in sacello domus Archiepiscopalis à se condita, ante imaginem Divæ Mariæ Virginis: spectaturque in majore Ecclesia Mediolan. ejus statua rubro marmori incisa, sepulcro superstans.



Dost elatum Luchinum, totius imperii summa ad Joannem Archiepiscopum, germanum fratrem, absolutæ virtutis Principem, rediit: nam in omni eximie prudentiæ & perfectæ pietatis officio, moderataque regendi imperii disciplina, Othoni majori patruo par fuit, quum & ipso censu generosæ stirpis Matthæum patrem, & magnitudine constantis animi referret: nec Galeacio fratri de nobilitate liberalis ingenii, vel decore formæ, vel studio promerendæ gratiæ quicquam concedere censetur: & Actium perhumana illa, nusquam tamen nisi gravi, ad faciles aditus atque sermones comitate, atque magnificentia operum facile superaret; præclaraque demum clementiæ laude (paucissimis Regum concessa, quæ Luchino uti nimis duro militarique, quamquam viro aliqui summo, defuit) omnium opinione potiretur. Is inito statim Principatu, nihil antiquius duxit, quam Galeacium & Barnabam ab exsilio revocare. Redire illi Belgarum more brachato habitu, sicuti videre est in incolumi adhuc pictura in templo Divi Joannis ad Concham, Cosmæ & Damiano divi tutelaribus votum solventes, præferentesque eximium bellicæ virtutis specimen, quum Belgicis atque Britannicis bellis parta non obscura laude militassent.

Nec multo post Johannes propagandæ soboli, firmandoque imperio, validas finitimorum Principum propinquitates præstanti judicio quæsit; sic ut Blancam Sabaudiam, Aymonis Allobrogum Reguli filiam, Galeacius uxorem duceret, & Beatrix Mastini Scaligeri filia, à fastu superbisque moribus Reginæ cognomen adepta, Barnabæ matrimonio jungeretur; binasque deinceps nuptias sumptuosos ludorum equestrium spectaculis celebraret. Cæterum Joannes Ligustici belli causam secutus, Murtham Genuensium Ducem adeo armis teruit, ut abdicato Principatu, sese civitatemque ad ejus auctoritatem contulerit, & præsidium Prætorumque à Joanne delectum acceperit. Sed non multo post defuncto Murtha, populus, uti semper factiosus & mutandis consiliis repentinus & levis, Valentem Ducem creavit. Ea contumelia permotus Joannes arma parat, & bellum indicit; quo periculo Ligures territi, vel ob id maxime quod tum magnis classibus cum Venetis & Catalanis contendentes, circa Sardiniam infelichter conflixerant, supplices & opem implorantes, ad pristinam fidem redierunt. Valens quoque suscepto temere Principatu se abdicare cogitur: recipiturque Genuæ Gulielmus Palavicinus, qui Reipublicæ præsit, cum præsidio equitum & peditum. Nec mora, Genuenses novam classem exoriant, Joanne in eam delectos milites, pecuniam, & comæatum abunde conferente, addenteque duodecim triremes suo sumptu suoque milite e-

Bgregie instructas. Eam classem Paganus Auria Præfectus, quum Viperæ insignia in vexillis præferret, ad Sphragiam insulam, quæ Sapientiæ nomen habet, contra Methonen, cum Venetis feliciter confligit; devictaque hostium classe, Nicolaus Pisanus, qui Sardōo in mari cladem Liguribus intulerat, cum quinque millibus Venetorum militum captus, Genuam in triumphum ductus est. Genuenses autem singulari ope Joannis se victoria potitos grato animo confidentes, novo decreto deditæ civitatis jura, quæ Joannis morte finiebantur, ad Galeacium pariter & Barnabam transfulerunt; ita ut totius Liguriæ urbes à Corvo Lunensi promontorio ad Herculis Monœci portum imperio Vicecomitum subderentur.

C Per id quoque tempus Bononiam in potestatem redegit: Pepulus enim vir nobilitate opibusque insignis, qui patriæ libertatem invaserat, Pontificiis oppugnatus armis, à Joanne matura ope implorata, validisque Insuorum auxiliis egregie defensus, eo demum descendit, ut acceptis Crepacorio Novantulaque castellis, ac multo insuper auro, patriam vendere, quam suscepti Principatus nomen tueri mallet. Bononia parta Joannes finitimis terrori esse cœpit, usque adeo ut Florentini antiquæ injuriæ, & Veneti recentis acceptæ cladis memores, Pontificiis copiis vires adderent; initoque fœdere cum Pontifice, confestim impetrarent, ut dirum illud religionis telum interdicendis sacris in Joannem vibraretur. Sed Olegiano Duce Bononiæ imposito, ita felicibus armis urbem defendit, ut Clementis Pontificis iras facile mitigarit: nec multo post per Guliermum Grisantem Pontificis Legatum, qui postea Urbani quinti nomine desumpto Pontifex factus est, quum is Mediolanum venisset, transactum est, ut tanquam beneficiario jure concessam à Pontifice urbem retineret, & quotannis sexaginta pondo auri tributum nomine solverentur.

E In Florentinos demum intestino malo laborantes, tanquam in veteres & recentes hostes, arma vertit, concitantibus Ubaldinis, Ubertisque, & Pactiis exsulibus, qui aucti viribus Tarlatorum & Casaliorum, Aretii Cortonæque Principum, à Joanne Antistite, tanquam Gibellinæ factionis principe patronoque certissimo, opem assiduis precibus implorabant. Olegianus, qui ex eadem Vicecomitum ortus familia, ipsius Joannis Antistitis filius putabatur, ab Olegioque (is ad Verbanum lacum pagus est) cognomen ferebat, è Bononia profectus Apenninum superat, ac Sambucum vicum in Pistoriensibus Alpibus capit; pervagatusque montanum agrum ad oppugnandam Scarpariam ad duodecimum ab urbe Florentia lapidem descendit. Erant in exercitu, supra ingentem peditum numerum, decem millia galeatorum equitum; exsules quoque ab Arni valle armatis agrestibus opportune in suburbanum agrum irrumpentes, insensis sævisque animis tecta obvia crudeli incendio deformabant: quare mœsta & trepida

civitas, uti viribus impar, à sociisque deserta, vel non æquam pacem appetebat. Nec Joannes à pace abhorrebat, modo sociis Gibellinarum partium honesta conditione caveretur. Itaque proclamatis induciis indictus est locus Sergiano in oppido Lunensis agri, quo convenientibus totius Etruriæ Umbriæque Legatis, querelæ omnis neglecti aut prætermissi juris, duobus disceptatoribus, Guliermo Palavicino pro Joanne, & Carolo Strozza pro Florentinis, deferrentur. Ferunt supra sexaginta urbium illustriumque Regulorum legationes coivisse, pacemque moderatis legibus singulis datam, summa quidem cum laude Joannis, qui clementi ingenio, detrimenta belli innoxii ac immerentibus illata populis perosus, susceptum bellum optima pace quam cruenta victoria finire maluerit.

Nec obiter prætermittendum videtur magnanimi Præfulis factum inter multa memorabile, quo Pontificium summæ severitatis imperium facetissimo obsequii genere magni fecit, simul & elusit. Paulo enim ante id tempus quum à Pontifice expetentibus Florentinis Avenionem sub anathematis poena citaretur, lætissima fronte respondit, *Se eo uti fidelem dictoque parentem servum dederet, instructa mature profectione, venturum, ut præsentis obsequio provolutus ad pedes sacrosanctum Pontificem veneretur.* Cæterum Legatos præmisit, qui per omnes urbis regiones, amplissimas domos perfoluta ejus anni pensione conducerent, ingentemque omnis generis commeatus copiam compararent, qua numerosus comitatus aleretur. Porro Quæstor multa onustus pecunia adeo in id profuse operam intendit, ut & mirum in modum annona in foro cresceret, & peregrini negotiosique homines ex omni Europa Avenionem ad Pontificiam Aulam confluentes, nullum omnino tectum aut hospitium, Insubri omnia occupante, vacuum reperirent; & propalam populus & inquilini de annonæ caritate quererentur. Quibus vocibus permotus Pontifex Mediolanenses Legatos cuncta prodigè coementes vocat: causam quærit, cur tantum commeatus accumularent, totque passim amplissimarum ædium hospitia inani sumptu ad querelam publicam conducant? Legati ita parare se jussos à Joanne Præfule respondent, qui septem millia armatorum equitum, totidemque peditum, præsidii & comitatus causa sit adducturus. Intellexit illico Pontifex quo rerum suarum periculo Joannes tantis instructus viribus foret expectandus; leniterque subridens, tanti itineris laborem Præfule, tanquam occupato & præclare Pontificii nominis studioso, benigne se remittere dixit. Legati autem quum dimitterentur, honestissimis viris virtutis nomine aut parum ditibus conductas domos gratuito concesserunt, ita ut commeatum quoque omnem aut sacratissimos cœnobiis, aut

plebe miseris & egentibus largirentur, tanta cum laude, ut nemo esset qui Joannis causam non studiosissime tueretur.

Sed non multo post crescente potentia, ut plerumque fit, invidia virtutis & felicitatis comes pariter crevit: formidabilis enim vel amicis veteribusque sociis apparebat, usque adeo ut consternati metu Ateftini, Gonzagæ, Scaligerique Principes, foedus inter se percuterent; coactoque numeroso exercitu, castra fossis ac aggeribus vallata, prope Mutinam adorirentur, sustinenteque impetum præsidio fortiter repulsi, in Crémonensem agrum cuncta vastantes irrumperent. Hæc castra muniti instar oppidi Joannes adversus Rhegenses construxerat; videbaturque inde non Rhegium modo, sed etiam Mutinam invasurus, ut à Bononia Placentiam suæ ditionis continuum iter pararet. Hæc agitantem, & septimum regnantem annum, Augusto mense concepta febris, & lentis demum accessionibus producta in Septembrem, climacterico ætatis anno leniter exstinxit. Conditus est marmoreo tumulo juxta Othonem ante sacrarium templi maximi, ubi hæc carmina rubro lapidi incisâ leguntur; quæ ex ejus rudis seculi memoria ad jucundam ingeniorum æstimationem præterire noluimus:

*Quam fastus, quam pompa levis, quam gloria mundi
Sit brevis, & fragilis humana potentia quam sit,
Collige ab exemplo qui transis, perlege, differ,
In speculo speculari meo lachrymabile carmen,
Qui sim, qui fuerim licet, qui marmore claudor.
Sanguine clarus eram Vicecomes stirpe Joannes.
Præful eram, pastorque fui, baculumque gercham,
Nomine, nullus opes possidebat latius orbe:
Imperio tituloque meo mihi Mediolani
Urbs subjecta fuit, Landense solum, Placentia grata,
Aurea Parma, bona Bononia, pulchra Cremona,
Bergoma magna satis lapidosus montibus altis,
Brixia magnipotens, Bobiensis terra, tribusque
Eximius dotata bonis Derthona vocata,
Cumarum tellus, novaque Alexandria pinguis,
Et Vercellarum tellus, atque Novaria, & Alba,
Ast quoque cum castris Pedemontis jussa subibant,
Januaque ab antiquo quondam jam condita Jano
Dicitur, & vasti narratur Janua mundi,
Et Savonensis Rex, & loca plurima, quæ nunc
Difficile est narrare mihi, mea jussa subibant,
Tristia tota meum metuebant languida nomen.
Per me obsessa fuit populo Florentia plena,
Bellaque sustinuit tellus Perusina superba,
Et Pisa & Sena timidum reverenter honorem
Præstabant: me me metuebat Marchia tota.
Italia partes omnes timere Joannem.
Nunc me petra tenet, saxoque includor in isto,
Et lacerant vermes, laniant mihi denique corpus.
Quid mihi divitiæ, quid & alta palatia prosunt?
Quum mihi sufficiat quod parvo marmore claudor.*





MATHAEVS SECVNDVS,

MEDIOLAN. PRINCEPS VII.

Ejus effigies, qualem hic cernis, spectatur ad Seronum oppidum in domo ab se edificata.



Ex testamento Joannis universum imperium æquissima ratione trifariam divisum, tribus Stephani liberis cessit, ea conditione, ut Mediolanum & Genua communis essent ditionis, ab unoque tantum Prætorum regerentur, quem pari judicio delegissent: reliquæ porro urbes nobilioraque oppida à gravissimis Jureconsultis amicisque communibus fideliter æstimata, digestaque in tres portiones, sortem ex urna sequerentur: Matthæo Bononia obvenit, quæ ex solenni transactione quatuor urbes tanquam sua membra secum trahebat, Laudem scilicet Pompejam, Placentiam, Parmam, & Bobium, in Apennini vallibus situm: item Lucam & Massam Togatæ Galliæ, Pontemque tremulum supra Macram amnem, Apuanorum Ligurum caput, & Sancti Domnini oppidum, quod in Æmilia via à Tarro amne septem millibus passuum distat. Sed Matthæus nequaquam diu Bononia potitus est, Olegiano ejus urbis imperium occupante. Is enim sub id tempus, quo Joannes Archiepiscopus suprema tentatus valetudine decumbebat, cum rebellantibus Patritiis, atque arma capientibus, in foro prospere conflixerat, conjurationisque principes captos, securi percusserrat; in quibus nonnulli ex Blanchis, Gozadinis, Bentivolisque & Sabadinis fuerant.

Post id factum, quum edificatam à Joanne Antistite veterem arcem egregie permunisset, invasit eum libido arripiendi imperii, cujus ipse præcipuus defensor exstitisset. Itaque fortuna nefarius cœptis adspirante, Prætorem militareque præsidium Matthæi, insigni composita fraude, urbe expulit, Bononiensesque armis terribiles in nomen suum jurare coegit. Erat Matthæus ingenio civili potius quam militari, nec ideo ad vindicandam injuriam parato, utpote qui nihil ex magno avo, si speciem corporis demeres, præter nomen referret; ignobili enim otio delectatus, nequaquam bellica laude ducebatur; eique summæ curæ summæque voluptati erant accipitres, atque ea omnis venatio, quæ vel foeminas admittens

prorsus sine sudore exerceretur: has autem diurnas exercitationes, nocturnæ libidines excipiebant, quibus adeo intemperanter corpus atque animum effœminaverat, ut inter duas sæpe concubinas enervatis viribus cubitans, instillaret (ut Corius in *Historiis* auctor est) muliebribus locis unguenta peregrina, quibus intermortuæ Veneris segnitiam prodigiosa titillatione fuscitaret. Per hunc modum fractis lateribus, quum ad Seronum oppidum, ubi munitam pinnis domum ædificarat, medio itinere inter Mediolanum & Comum secessisset, diuturna febricula tabefactus interiit, anno secundo post Joannis patris mortem: Valentina matre multis cum lachrymis, à fratribus veneno sublatum usque adeo constanter asseverante, ut Galeacio & Barnabæ diras imprecaretur. Matthæum enim ex sermone quodam invidiæ pleno apud fratres exitiale odium parasitæ referebat, quod Crescentiaco in vico, ubi avum obiisse retulimus, quum forte in cœna Galeacius & Barnabas tanti imperii à Majoribus conditi amplitudinem atque opulentiam laudarent, omniumque pulcherrimum fortunæ munus Principatum esse faterentur, Matthæus incaute subjunxisset, *Id quidem sine controversia verum esse, incomparabileque videri, modo Principatus socio consorteque careret*: adeo ut non obscure Joannem patrem perstrinxisset videretur, qui secus ac magnus avus fecisset, non unum; Galeacii primi atque Actii exemplo, sed tres simul iniquo jure divisi imperii hæredes instituisset. Id dictum subamaro sale, scommatistique nomine prolatum, usque adeo in pectus fratrum alte descendit, ut sequenti cœna suillos lumbos, cujus obsonii Matthæus erat appetentissimus, toxico illitos apposuerint. Duas habuit filias absque ulla virili prole, ex Liliola Gonzaga, Philippi Mantuæ Principis filia, susceptas, Catharinam scilicet & Urfinam: hanc Balthasari Pusterlæ Patritio valde opulento, illam vero Ugolino Gonzagæ bellica virtute illustri, nuptui dedit. Tumultuatus est ad Eustorgii templum justis exsequiis à Serono Mediolanum usque perductis; sed sepulchri marmorei honore, tituloque epitaphii caruit, tanquam fratribus invisus, & nihil laudis à literatis promeritus, quos in ea turpi supinæ vitæ desidia contempnisset.

GALEACIVS SECVNDVS, MEDIOLAN. PRINCEPS VIII.

Ipsius imago varii gestus atque habitus in arce Ticinensi multis in locis repetita conspicitur. Illam autem tanquam verissimam & jœcundissimam excerpimus, quæ redeuntis ex victoria ad triumphum sequente exercitu solennem pompam ostendit, in ea porticu, quæ ad orientem solem vertitur.



GALEACIO secundo cuncta prope, quæ expeti mortali-
bus possunt, cum naturæ,
tum fortunæ rarissima dona
contigerunt: corporis enim
dignitate & decore formæ
lectissimos juvenes super-
gressus, tum maxime se-
ipso celsior & pulchrior e-
vadebat, quum novo more
comam aurei coloris promitteret, complicatam-
que sæpe in tricas, & nonnunquam diffluentibus
cincinnis per humeros expansam reticulato pileo-
lo, aut florea corona, castigaret: id enim eum
decebat alioqui lacteo colore atque ænea barba con-
spicuum, uti videre est ex multis ejus imaginibus,
unaque præsertim equestri thoracata, quæ Tici-
ni in arce ad sinistram porticum spectatur. Balthei
militaris dignitatem Hierosolymis promeruit, quum
religionis causa CHRISTI sepulchrum invisurus, in
Judæam navigasset. Belgico item bello, (non se-
cus ac Otho familiæ Princeps superiore seculo in
Syria Viperam, perpetuum gentis insigne, ob-
truncato barbaro hoste detraxisse traditur) prostra-
to nobili Belga, novum gestamen insigni aquæ &
ignis argumento, tanquam opimum spoliū re-
tulit. Ex ipsa enim clypei pictura ardentes bini
torres, pendentibus totidem aquariis situlis, con-
trariæ potestatis facultatem exprimebant, usque
adeo specioso argutoque emblemate, ut id ad po-
steros ipsosque Sfortianos in Vicecomitum familiam
adoptatos manarit. A Carolo autem quarto Cæ-
sare, qui Mediolanum advenerat, solennibus co-
dicillis rite confectis in Cisalpinæ Galliæ atque Li-
guriæ imperio Vicarius Cæsaris est appellatus, pa-
ri dignitatis beneficio fratri Barnabæ communicato;
interque sacra solennia Cæsar Ambrosiano in
templo, utriusque filios, quanquam plane pueros,
militari baltheo cinxit, Joannem scilicet Galea-
cium, qui demum totius imperii hæres potentia
formidabili supra cæteros Italiæ Principes evectus
est, quum ex nomine nequaquam temere indito
duos summæ virtutis atque prudentiæ patruos re-
ferret, & Marcum Barnabæ, qui male auspiciatum
infelicis patris nomen sortitus, ad frugem non per-
venit.

Cæsare itaque multa pecunia magnisque mune-
ribus jam donato, & in Germaniam redeunte,
multo certior quam antea nominis auctoritas ambo-
rum crevit, quæ demum perpetuo benevolentiae
studio & fraterna charitate adeo stabilita est, ut
concordibus animis usque ad vitæ exitum (quan-
quam diviso imperio) regnarint, mutuisque opi-
bus bella gesserint, communem eum ducentes ho-
stem, qui in ipsorum alterum arma moliretur. Ea
enim æquitate defuncti Matthæi fratris hæredita-
tem inter se diviserant, ut urbem Mediolanum
ab ortu solis ad occasum per regiones ducta linea
partirentur, & in urbe singulas arces ambo con-
derent, Galeacius ad Joviam portam, quæ Co-
mum ducit, Barnabas ad Romanam; quod huic

B Conchana domus, illi Actiana curia, sicuti Mat-
thæo antea Antistitis Joannis ædes, sorte obvenis-
sent. Cesserat Barnabæ Bononia, quæ quum vehe-
mentibus armis repeteretur, Olegianusque Pon-
tificiis adjutus copiis strenue resisteret, diuturni
gravissimique belli causam præbuit. Nam plerique
Principes, & cum his Florentini, Pisanique, qui-
bus odio atque timori consentientium fratrum opes
erant, Conradum Landum, Germanorum Ducem,
& Marcoaldum cum Bohemis à Carolo Cæsare Pisis
impositum, præbita in triplex stipendium ingenti
pecunia, adversus Vicecomites concitabant.

C Ea tempestate validæ externarum gentium ma-
nus, ut tum aiebant, fortunæ auspiciis militan-
tes, per Italiam prædabundo agmine vagabantur,
hisque cupide omnium regionum exsules spe præ-
dæ se commiscebant. Itaque Landus & Marcoal-
dus mira celeritate confectis itineribus, superato
Pado in agrum Insuubrum pervolarunt. Eorum ad-
ventus cuncta ferro atque igne vastantium, magnam
trepidationem Mediolanensibus incussit. Pertulere
eas clades tantisper Galeacius & Barnabas, donec
accitæ undique copiæ in una castra cogerentur:
nec multo post instructo exercitu contra hostes
progressi ad Casæ auratæ pagum signis collatis con-
fluxerunt; eo quidem eventu, ut Marcoaldo cap-
to, Landus ipse post sauciatus, ferme toto ejus
exercitu cæso captoque, effugeret, in quo sex mil-
lia equitum & quattuor peditum fuisse narratur.
Secundum eam victoriam Barnabas ad oppugnan-
dam Bononiam profectus validiores, quam puta-
rat, hostes inveniens, multis acceptis illatisque de-
trimentis, longo & difficili bello implicatur: nam
Florentini, Pisani, & Principes, Ferrarientis,
Mantuanus & Veronensis, communicatis consiliis,
cum Egidio Pontificis Legato foedus renovant,
ea mente, ut defensa Bononia, duorum præpo-
tentium fratrum vires non paterentur nimio plus
crescere: parte alia Joannes Marchio Montisferrati
à foederatis incitatus, Galeacio grave bellum infer-
ret, cum capta ex insidiis Alba Pompeja, & Ti-
eino urbe prodentibus Guelphis occupata, Anglo-
rum validam manum in Italiam exciret. Ea gens
ex Britannia insula in continentem Galliæ transve-
cta, confectis Belgicis bellis in Provinciam sese
effuderat, stipendia & prædam passim quærens.
Sed ea fuit Galeacii felicitas, ut ab Anglis Albam
reciperet, & Ticinum variis præliis fameque per-
domitum in potestatem redigeret, capto Busilala-
rio cucullato sacerdote, qui nefariis concionibus
Ticinensem populum circumducens, miseræ ur-
bis crudelis Tyrannus evaserat.

F His rebus prospere gestis Galeacius coactis un-
dique copiis, Barnabæ vires attenuatas duobus
adversis præliis facile restituit: quibus auctus vir
acer & indomitus, tanto impetu Bononiensium a-
grum populatus est, ut Olegianus, desperatis re-
bus, urbem temere occupatam Egidio Legato tra-
dere cogeretur, Firmum, Picensi agri urbem,
perfidiosæ pactiois præmium accipiens. Sed quum
Barnabas iratus Egidio non secus atque Olegiano
nihil





nihil de belli apparatu remittendum arbitaretur, foederatæ civitates ingentes copias Ugolino Gonzaga imperatore in agrum Insubrum miserunt, rati Barnabam, fraterno periculo adductum, Bononiensi agro detrahi, & trans Padum revocari posse. Sed Barnabas Ugolinum trajecto Pado, & Novaria capta, magnam perturbationem Galeacii rebus afferentem, paribus belli artibus avertit: infesto enim exercitu Mantuanorum fines ingressus, perruptoque Serrallio, (quæ est munitio ab amne Pado ad Mutinam perpetuis aggeribus suburbanum agrum complectens) Mantuanos Duce præsidioque nudatos adeo perculit, ut Ugolinus vel in ipso felici speratæ ingentis victoriæ cursu, de imperio saluteque civium suorum magnopere sollicitus, pacem petere cogeretur, cognationemque novo foedere confirmaret.

Eo modo pace parta, & Barnaba nihilo secius pertinaci studio Bononiæ principatum, tanquam sibi fraude ereptum, validis armis repetente, Galeacius externas affinitates, decoras quidem regio fastu, sed sibi & posteris damnosas & fere exitiales quæsit, Isabella scilicet, Caroli Galliarum Regis sorore, Joanni Galeacio filio expetita, Leonatoque Clarentio, Britanniarum Regis filio, in generum adscito: huic enim ex nuptiis Violantis, quum ducenta millia aureorum nummum dotis nomine recepisset, Mons etiam Regalis atque Alba Pompeja urbes cesserunt. Isabella autem, quæ Mediolanum venerat, usque adeo focero gravis fuit, ut ducentis millibus aureorum constiterit; quanquam Virtutis oppidi ditio, honestissimæque appellationis titulus, novo sponso nomine dotis accessisset. Leonati porro adventu tantæ opes admirabili liberalitate profusæ sunt, cum & nuptiale epulum daret, & equestres ederet ludos, & Britannos ex generis comitatu supra ducentos eximiis donis adornaret, ut opulentissimorum Regum splendorem superasse censeretur. In convivio enim, in quo Franciscus Petrarcha inter principes convivæ discubuit, singulos ferculorum missus, qui supra triginta fuere, totidem inusitatæ magnificentiae munera sequebantur: ea omnia Joannes Galeacius, delectæ juventutis Princeps, ad mensam perducens Leonato obtulit. Fuere in uno tantum missu septuaginta equi insignes argenteis & sericis ephippiis strati: in aliis vero vasa argentea, hierosalcones, venatici canes, equestria arma, nobiles loricae, solidoque ferro splendidi thoraces, galeæque item & cassides præaltis conis exornatæ, indumenta margaritis picta, balthei militares; postremo præstantes aliquot gemmæ aureis emblematis insertæ, & aureæ purpureæque telæ ad viriles vestes vis ingens. Is porro convivii apparatus fuit, ut relatæ à mensa dapes, decem millibus hominum abunde sufficerent. Sed non multo post Leonatus quum novæ nuptiæ operam daret, intempestivique convivii ad patrii moris disciplinam, alieni cæli ignarus, intemperantius uteretur, ad Albam morbo consumptus interiit. Violantes demum Othoni Marchioni Montisferrati nuptui data est, sed nihilo felicioribus auspiciis, quum Otho in montibus Parmensium ab agresti agasone confossus, ignobili fato perierit.

Cæterum Galeacius diu antea sævissimis articulorum doloribus jactatus, quum filius præalta indole, militaris imperii munia capeffens, Asta recepta, Vercellisque defensis, Subalpinum bellum felicissime confecisset, in supremum incidit morbum, Nonisque Sextilibus defunctus est, anno à partu Virginis septuagesimo octavo supra millesimum & trecentessimum, vitæ quinquagesimo nono, imperii autem vigesimo secundo. Delectatus est in toto vitæ cursu, quum ex bellicis occupationibus subciviva otia furaretur, nobilioribus lite-

ris, historiisque præsertim; habuitque in honore præstantibus disciplinarum omnium & nobilium artium studiis insignes; ex hisque præcipue Franciscum Petrarcham amœna ingenii fertilitate florentem, cujus hortatu bibliothecam condiderat, quum munere beneficioque Caroli Cæsaris Ticini celebre Gymnasium instituisset. In puniendis reis etiam si natura plane lenis & exorabilis videretur, ita clementiam cum severitate miscebat, ut præscriptas leges non temere præteriret. Magno autem incorruptæ justitiæ exemplo fuit Picardonus Vassallius è Vercellis in furca latronum more strangulatus. Hunc Belgici exilii comitem, propterea quæ ex humili fortuna ad præfecturam ærarii promotum, indeque sævi prædonis more, nullo metu pudoreve immensas opes congerentem, repetundarum & peculatus reum populus fecerat, iudicesque damnarant, ita ut Princeps nihil omnino ex damnati bonis neque in fiscum, neque in ærarium se reducturum testaretur, libereque responderet, sibi lege agendum videri, atque eo quidem severius, quod supra furti noxam, gravioris flagitii nomen ferret, quando mortalium ingrattissimus fuisset. Nimia quoque & pene crudeli severitate in Prætorem ad vicum Iriæ animadvertit, quod præscriptos ex indice quosdam exsules factiosos atque ficarios persequi, captosque statim laqueo necare jussus, propinquorum precibus poenam tandiu suspenderat, donec Ticini princeps adiretur. Ex ea enim cunctatione Galeacius quod lege actum credebat, amicis supplicantibus facile damnatorum vitam quidem concessit; sed mox Prætor, tanquam officii oblitus, fontibus servatis, atque his ante carceres inspectantibus, securi ictus est.

Sumptuoso autem ædificandi studio, magnificisque operibus, Romanæ potentiae monumenta luculenter imitatus, Mediolani arcem Portæ Jovis mira celeritate construxit, quum antea è regione templi maximi, anteriorem curiam vastis porticibus atque cœnaculis, & media latissima area ad equestres ludos admirandam Actianis ædibus adjunxisset. Pontem vero lapideum Ticino amni Papiæ imposuit, usque adeo mirabilis structuræ, ut perpetuæ contignationis tectum adversus soles & pluvias, sustinentibus ab utroque podio siliceis columnis superinduceret, & utraque pontis capita singulis propugnaculis muniret: arx demum in supercilio declivis urbis ad Boream exstructa, condecorataque eximiis picturis, ita spectantium oculos ad admirationem convertit, ut Petrarcha nihil adulatus Galeacium, eo incomparabili ædificio, quum cæteris operibus vel maximos Europæ Reges anteiret, seipsum superasse perscripserit: spacium enim quadratæ formæ ducentorum fere stadiorum perpetuo muro circumplexus opportunum ad omne genus venationis addiderat, fundis nunquam antiquis possessoribus iniquo pretio ademptis, usque adeo impotenter, ut Bartholus è Xysta familia, quum paterno agro pelleretur, injuriam frustra deprecatus, equitanti Galeacio ventrem cultello perfoderit, levi quidem insincto vulnere, quod magno casu in ipsam balthei fibulam cuspis incidisset. Cæterum in fronte arcis supra portam ad viridaria perducentem hoc vel rude carmen in marmorea tabula legebatur, anteaquam tormentis Gallicis ea muri pars cum inscriptione perfracta concideret: exstabant & lata insignia gentilitiæ viperæ insculpta scuto, uti moris est, superstante galea cum frondoso cono ad similitudinem ejus, qua in præliis uti erat solitus. Id autem eo libentius ne periret apposuimus, quod Galeacius temporario ligneoque tumulo conditus, dum ad nobile sepulchrum fero marmora pararentur, epitaphio caruerit:

*Hac galea Galeaz castrum defendit & urbem,
Et ferus oppositos violenter comprimit hostes,
Inque fugam vertit timidam mucrone potentis:
Tractavitque suos ut fratres frater amicos,*

A

*Et sibi subjectos cultu pietatis, & omnes
Defendit populos, sibi quos divina potestas
Credidit, & longam dabit his per tempora pacem:
Pra cunctisque piam mens est servare Papiam.*

B A R N A B A S,

MEDIOLAN. PRINCEPS IX.

Habes hic ejus effigiem, qualis cernitur Comi in aede Divi Juliani, domoque antiqua Rusconorum; equestrisque marmori incisa ac imposita sepulcro, quod sibi vivens exstruxerat Conchano in templo D. Joannis.



ARNABAS materni avi nomen tulit, eo quidem eventu ut ab Auria gente nabilibus victoriis incluta, atque innatae virtutis nomine maxime superba, feroces atque indomitos spiritus accepisse diceretur: imperiosus enim, immitis & asper evaserat, plane majores Aurias æmulatus, Brancham, Paganum, Lambam & Lucianum, qui juxta rei navalis disciplinam naturali conditione præduram atque atrocem, cruentis exercitati præliis crudeles apparuissent. Sed qui tantopere severus existimari poterat, infracto quodam corporis atque animi vigore, uti semper armatus ac avidè pugnavit, unaque ea, quæ cuncta vitia præclare contegit, & studia militum parat, insigni liberalitate, cæteris ejus ætatis Ducibus præcellebat. In toto vitæ cursu, quum bella continenter gereret, nunquam conquievit, quod bella ex bellis fererentur, neque pax stabilis, neque induciæ diu vigerent, inter suspectantes atque hostilia ex obliquo molientes. Id enim unum ei non iniquæ ambitionis, verum maxime odiosæ pertinaciæ consilium fuit, ut Bononiam Olegiani perfidia sibi ereptam, interceptamque demum fraude Egidii Legati, in potestatem redigeret: qua si semel potiretur, Florentini, Lucenses, Pisani, & vicini Principes nequaquam diu se tutos fore providebant. Factum est ex ea contentione, ut cum Pontifice conjurarent, conjunctisque maximis viribus pellendos excindendosque Vicecomites arbirarentur; propterea conducti sunt communi ære in Italiam Angli & Britones ex Armorico Oceano, Hispanique Albornocio Duce, & Hungari demum ex Pannonia Simone Præfecto; & postremo iterum accitus in Italiam Carolus quartus Imperator. Sed bellum, varia fortuna utrinque gestum, cum finem habuit, ut Barnabas non longe à Bononia ad Raphaelis templum profligatus, victusque iterum ad Guastallam, detrimenta accepta novis victoriis ingenti animo refarciret. Navali enim certamine in Pado infra Vitellianam hostes superarat, constructaque insigni munitione ad Burgum fortem, ita locum adversus præsentem Cæsarem defenderat, ut perruptis demum Padanis aggeribus, totum pene profluentem in Mantuanos agros effunderet. Quibus detrimentis illatis, omnibusque jam plane fessis, & pecunia exhaustis, necessaria pax, sed non plane stabilis, cum Pontifice cæterisque foederatis facta est, non abnuente Carolo, qui Ariovisto Bajorio Vindeliciæ Regulo, Barnabæ propinquo, interprete, quum belli tædio in Germaniam vocaretur, accepta pecunia, & confirmata vetere cum Vicecomitibus amicitia, non multo post domum rediit, sic ut ab ea pace Barnabas tota spe recuperandæ Bononiæ decidisse videretur: verum eo minore cum dolore, quod ad solatium irriti conatus Rhe-

gium Lepidi à Feltrino Gonzaga præsentem pecunia coemptum in potestatem redegit. Incredibile dictu est quantum utrique fratrum appetita oppugnatæ Bononia constiterit, quæ novem bella ex hisdem causis redidit, cum summo anittendi imperii periculo, paucis annis adduxerat. Ferunt enim in bellicos sumptus supra trecentas myriadas signati auri expensas, ita ut mirum videri possit tantas pecunias ex urbibus imperio subjectis imperari atque exigi potuisse, quum ambos fratres pari atque insatiabili mutæ æmulationis libidine ad insaniam ædificantes, multo majorem pecuniam in calcem & lateres contulisse videamus.

C

Inter nobilia opera Barnabæ præstantissimum fuit, Tritianæ arcis pons admirabili unius tantum fornici structura anni Abduæ impositus, usque adeo in altum exurgens, ut tribus superædificatis transitoris aditibus, infimo currus cum machinis & impedimentis, medio equites, summo peditatum uno tempore transmitteret. Construxit quoque arcem ad Romanam portam, quæ Conchanæ domui jungebatur, ponte pensili supra tecta privatarum ædium perducto, instar longissimæ porticus, cujus adhuc aliquot intercisa membra supra Crassorum domus spectantur. Brixianæ arcem condidit, quæ ex molli clivo urbi imminet. In suburbanis autem Modætiæ, Majorum opus luculenter imitatus, ad Lambri amnis ripas Melenniano in vico, domum peramplam munitæ arcis persimilem cum lateritio ponte construxit; & quod egregiæ pietatis opus adhuc existat, laxos carceres Mediolani instituit, in quo egestatis ultimæ debitoribus, & extra capitalem poenam damnatis alimenta gratuita præbentur. Sed vel imensas ærarii divitias uni dotales sumptus exhaurire facile potuerunt, quum numerosam prolem nobilissimis Europæ Principum domibus infereret: Viridem enim Leopoldo Austrio Norici Regulo, Thadeam Stephano, Magdalenam Federico, Bajoariis Vindeliciæ Principibus, & Valentinam Federico Cypri Regi collocavit, quum Agnetem Francisco Gonzagæ, Catharinam Joanni Galeacio fratris filio, atque item Antoniam & Anglesiam Conrado & Federico Vindenbergensibus Sueviæ Regulis nuptui dedisset; Lucia subinde Edemundo Britannicæ Regis filio tradita, ut in remoto etiam Oceano sobolem propagaret. Ex filiabus autem nequaquam ex Regina uxore susceptis, generos sibi adscivit bellica virtute clarissimos, quum Joanni Auctho Britanno Dominia, & Lucia Lando Germano ad Brigantium lacum illustri traderentur. Quorum omnium dotes cum luculento mundi muliebris apparatu, vicies centena millia aureorum nummum ex excessu constat. Nec tot sumptus tamque immodici Barnabam deterrebant, ut quicquam de splendore vitæ remitteret, quin filios diversis ornatis in domibus, cum frequenti & liberaliter ornata familia alendos arbitraretur. Erant legitimæ proles Marcus, Ludovicus, Rodolphus, Carolus & Martinus, quibus imperii urbes atque oppida per æquas


D

E

F



BARNABAS
Vicecomes.



æquas partes diviserat; quum totidem ex damnato coitu susceptis latifundia & domos, honestosque redditus, donationis jure tribuisset. Erant ii, Ambrosius, Eustorgius, Palamedes, Lancelottus & Sacramorus, cujus stirpis se esse fatentur ii Vicecomites, qui præcipuam nobilitatem à Matthæo Magno repetunt, quum legitima soboles in Philippo Principe defecerit: ex his autem Ambrosius tanta militaris ingenii indole supra cæteros omnes emicuit, ut eo Duce, Britannisque militibus præfecto, Barnabas cum Romano Pontifice, Joannaque Apuliæ Regina, Florentinisque item atque Liguribus vario eventu bella gesserit. Sed Ambrosius in Bergomatibus montibus quum avide rebelles persequeretur, præceps datus in insidias, ab agrestibus est interfectus, tanto patris dolore, ut montani, vindicante irato patre, supremæ cladis poenam subierint.

Cæterum hæc divisi imperii fortitio eum habuit eventum, ut unusquisque eorum dolore nimis angustæ ditionis, Joanni Galeacio patrueli multo opulentioris imperii fortunam invideret, & de eo cuncti sæpe contemptum & criminose loquerentur. Regina siquidem mater, ambitiosa superbaque mulier, juvenes suoapte ingenio elatos & supra censum sumptuosos quotidianis sermonibus impulerat, ut immoderata percuperent, audendoque & moliendo aliquod insigne facinus, ad præalta, uti generosos deceret, adspirare condiscerent; sic ut non obscure indicare videretur, sublato patruuele, hoste verius quam propinquo, ipsos confestim ex opulenta hæreditate potentes & plane beatos evasuros. Cæterum non multo post Regina fato functa, Barnabas cum liberis eadem spectare cœpit, utpote qui tot filios ærario suo graves, prætenui atque ob id infirma ditionis conditione, regnatos prospiceret. Sed dum scelestæ consilia miscet, & diri odii cogitationes extendit, Joanni Galeacio cuncta produntur. Is gravi callidoque ingenio audita explorataque diffimulat, & adversus insidias sese domi & foris præmunit; intimi officii ministeria coarctat; abdicatoque luxu, mensam certis dapibus adstringit: custodiam vero corporis ex fideis veteranis adauget, nec arcis limine pedem effert, nisi explorato, præcuntibus scilicet armorum turmis, & prætoriam cohortem circumfusa: ante omnia porro ad struendum ex longinquo dolum, suburbana templa supplicabundus sæpe invisens, conceptæ religionis & demissi paventisque animi signa præbet. Quibus artibus usque adeo in contemptum venit, ut nihil virile, vel ab astuto patruo sene cogitare putaretur, & patrueles nonnunquam dictarent, aliquanto eum opimo sacerdotio, quam tanto imperio digniorem videri. Itaque communicato cum paucis consilio, edicens se Mariæ Virginis templum (quod est in monte supra Varese oppidum, multis miraculis atque donariis venerabile) solvendi voti causa profecturum, è Ticino Mediolanum contendit. Nec differt Barnabas quin venienti honoris causa occurrat; quanquam improviso adventu perturbatus, pudore metum vincente, paululum cunctaretur. Nec multo post Vercellensi porta prodeuntem, dato signo armati equites inermem & mula vectum comprehendunt, & in proximam portæ Jovis arcem cum Marco atque Rodolpho filiis deducunt. At Joannes Galeacius continenter armata agmina in urbem introducit, domosque capti fratris tanquam hostis ad excitandam plebem, opportuno astu diripiendas populo præbet. Fit maximus in urbe tumultus, punctoque temporis memorabili Fortunæ ludibrio tantæ opes everuntur: nec quisquam omnino repertus est qui opem ferret; quum amici pariter atque hostes in opulentissimæ gazæ acervos avide grassarentur, & maledictis Barnabam uti crudelem Tyrannum incesserent: nec in ea licentia publicanos & quæstores, uti populo

A invisos, ullæ vel in sterquiliniis latebræ diu tegunt: arx quoque ipsa attonitis custodibus paucas post horas deditur, è qua septem plaustra elaborato argento, & pretiosa supellectile onusta, signatæque item aureæ monetæ septingenta millia educta fuisse referuntur. Nec tanta calamitas prodigio caruit: domus enim Palatina septimo die ante cladem adeo vehementer de cælo tacta est, ut intimi cubuli peristromata deflagrarent, & Vipera marmoreæ fastigio superstantes fulmine frangerentur. Vates quoque domesticus cognomento Medicina, ut Nonas Majas eo anno trium siderum coitu infauistas caveret, multo ante prædixerat, & tum in fata sua properantem retentare fuerat conatus: occulta enim vis fati tum maxime urgebat, quum misero mentis arbitrium eriperet. Evaferat paulo ante Barnabas ad inexpiabile odium populi, seipso acerbior & sævior, durum & atrox ejus ingenium fenestra nihil molliente; quippe qui inopia rapax, infamis avaritiæ nomen immani crudelitate cumaret. Nam præter perpetua inclementer imperatæ atque exactæ pecuniæ detrimenta illata populis, nova etiam atque atrocissima lege promulgata, inquiri comprehendique eos jussit, qui quinquennio ante contra vetus edictum apros occidissent, aut ex his vel in aliena mensa comedisissent, usque adeo inexorabili damnatione, ut supra centum ex miseris agricolis laqueo suspenderentur, reliqui universa substantia multati, exilio solum verterent: diviserat enim per pagos venationibus opportunos multa millia venaticorum canum, gravissimo incolarum sumptu alenda curandaque; quum vicatim per familias distribuissent, & præfecti venatorio apparatu multis cum ministris passim regiones circumirent, tremendo superbæ censuræ instituto, singulos canes ex indicis volumine inspectantes, ut insolenti judicio quos vellent verberibus pecuniaque punirent, quum pari multa damnerentur, qui strigosos & graciles tanquam inedia maligne enervatos, & contra obesos tanquam nimia pinguedine inertes factos, aut impexis villis male curatos produxissent.

At Barnabas in Tritianam arcem ab se ædificatam deductus, septimo carceris mense, quum regnasset annos triginta, vixisset sexaginta sex, veneno fæolis indito (ut fama tum fuit) exstinguitur; eo quidem æquiore animo tolerata calamitate, quod in manibus Dominiæ Porra adamatæ antea concubinae, in ipsa extrema vitæ sorte non plane miser exspiravit. Hæc Joannis Aucuthi Britanni focus fuit, quæ calamitatis ultro consors, supremum in tantis ærumnis misero seni solamen attulerat. Cadaver Mediolani Conchano in templo tumultatum est: statua equestri ex marmore Lunensi superstante, in eo ipso armorum cultu, expressique oris habitu, quo bella gesserat; nullo tamen epigrammate addito, quum juxta cubans Regina uxor marmoreo sepulchro tale carmen meruisset:

Italia splendor Ligurum Regina Beatrix

Hic animam Christo reddidit ossa suo:

Quæ fuit in toto rerum pulcherrima mundo,

Et decor, & sanctæ forma pudicitia,

Laurea virtutum, flos morum, pacis origo,

Nobilibus requies, civibus alma quies.

Quam patris extollunt Mastini gesta potentis,

Verona nuptiam magnificique Canis.

Barnabas armipotens Vicecomes gloria Regum,

Natura pretium conspicuumque decus:

Qui Mediolani frenos & lora superba

Temperat Ausonia, quem timet omne latus:

Hac consorte tori felix consorte laborum

Exegit longa prosperitate dies.

Hanc Deus elegit: secum periturus & inde

Spiritus atherci regnat in arce Poli.

JOANNES GALEACIVS,

MEDIOLAN. PRINCEPS X.

Galeacius Comes Virtutum, qui primus Dux Mediolani à Ladislao Cæsare appellatus est, uti videre licet ex multis pictis calatisque imaginibus, præprimis ex ea, quæ conspicitur in templo Carthusiæ Ticinensis, tale frontis decus præfererat.




In Joanne Galeacio à primis statim pueritiæ initiis usque adeo mira gravitatis atque prudentiæ species enituit, quum in eo supra captum ejus ætatis, solertia, judicium, memoriaque vigerent, ut eum plerique ex ratione physica citissime morituum crederent, neque unquam tantas præcocius ejus ingenii dotes ad opimæ frugis maturitatem perventuras arbitrarentur. Ferunt enim, sicuti in *Petrarchæ Vita* legimus, Galeacium patrem, quum ex consuetudine consilium advocasset, multique insignes togati viri in intimum conclave admissi confedisent, à puero tum forte intentis oculis Procerum ora atque habitum contemplante, per jocum quævisse, *quisnam sibi ex eo numero sapientior videretur*: tum vero puerum, qui tum erat quinquennis, suspensio vultu consideratis singulis demum accessisse ad Petrarcham, quem nunquam antea viderat, & blande arrepta toga eum orasse, ut se ad patris sellam sessum perducere pateretur; statimque magnum cum admiratione omnibus risum obortum, quod puer perspicaci judicio, omnium longe clarissimum ea tempestate poetam delegisset. Nec eum per omnes ætatis gradus summa cura à lectissimis præceptoribus atque nutritiis educatum, quin in eundem judicii morumque tenorem incumberet, natura destituit: à pueritia enim ad integram ætatem provectum in tanta actionum varietate tale semper ingenii specimen edebat, ut ejus opinionem naturæ præsidio firmatam, corroboratamque, multa historiarum lectione, atque usu rerum, nemo falleret, atque omnia vel plane fortuita præstiens, consilio Fortunam regere videretur. Nec id hercle mirum erat, quum inveterata consuetudine multum ipse solus deambulando meditari, cum peritissimis in omni negotio deliberare, exempla rerum ex Annalibus repetere, instituta Majorum, quæ eventus belli comprobasset, diligenter imitari esset solitus. Nullæ enim cum voluptates venationis aut aucupii, non aleæ ludus, non illecebæ muliebres, non sannionum aut scurrarum fabulæ à negotiis avocabant: exercebat corpus modice ad rationem tuendæ valetudinis; animum remittebat eruditorum colloquiis & frequenti lectione, secretisque item commentationibus ad justitiam & pietatem revocatis. Conduxerat liberalibus stipendiis omnium disciplinarum Professores, qui in Gymnasio Ticinensi, à patre condito, juventutem docerent. Bibliothecam porro erecto juxta delubro, in quo Divorum & Martyrum reliquiæ pretiosis distinctæ loculis servabantur, rarissimis codicibus refererat. Ex ordine profitentium celeberrimi tum fuere, qui monumenta ingenii posteris reliquerunt, in Jure Civili Baldus, & duo Raphael, Fulgosius atque Comensis, & Segnorolus Amadeus: in Philosophia Ugo Senensis, & Blasius Pelacanis à Parma, cujus etiam exstant in Astronomicis, disciplinaque optices, subtilissimæ quæstio-

B nes. Tres quoque Medici, Marsilius à Sancta Sophia, Syllanus Niger, & Antonius Vacca, quorum commentarii in Scholis hodie præleguntur. In tradendis autem Græcæ linguæ præceptis eminebat Emanuel Chrysoloras Byzantius. Sed supra Doctores omnium disciplinarum erat conspicuus Petrus Philargus Cretenensis, Sacrarum Literarum Interpreter, qui postea Pontifex evasit, & Alexander quintus est appellatus.

C Ex hoc præsertim lectissimo genere hominum, & ex iis, qui usu rerum & prudentia valerent, consiliarios uberrimis honestatos stipendiis adsciverat, ut non plane mirum videri posset, postquam ipse illustri judicio polleret, si in consilio exactissime deliberata discussaque ex voto plerunque felix eventus sequeretur. Cuncta sub eo officia, quæ tanti imperii administrationem respicerent, admirabili ordine constabant: nihil enim in toto humanarum rerum negotio, domi & foris, ipso ordine esse præstantius disserere erat solitus, quo uno & ipsa in primis res militaris, & actio civilis omnis, & domestica disciplina, veluti certissima compagine regerentur. Imperia autem jussaque in maximis minimisque rebus de scripto exhibant, & rerum omnium sumptuariæ rationes amplissimis codicibus mandabantur; ex quibus ministrorum fidem & diligentiam exigebat, & per censores quidem spectatæ probitatis, qui singula pro meritis ad poenam & præmium revocarent. Erant autem in ejus aula infiniti prope librarii, amanuenses atque notarii, qui per singula officia rationum præfectis operam navarent, tanta cura religioneque, ut non modo totius imperii urbiumque statim redditus, & custodiarum sumptus, sed si quid in publica ludorum spectacula impenderetur, & quot fercula figillatim in solennibus conviviis venirent, & quid claris hospitibus donaretur, ad exemplum atque ad memoriam scriberentur. Vidimus in Archivorum ejus armariis admirandos codices in membranis, qui in singulos annos Ducum & Præsectorum, veteranorumque militum nomina, singulorumque stipendia, & alarum ac turmarum indices continebant, descriptaque item exempla literarum, quæ in gravissimis gerendi belli & conficiendæ pacis negotiis, aut ipse ad Principes scripsisset, aut ab illis accepisset: ut si quis justam historiam condere velit, non aliunde uberiores certioresque materiam desideret; quando ex his bellorum causæ, consilia & rerum gestarum eventus facillime deprehenduntur.

F Apud patrem patruumque Barnabam Germanorum & Britannorum adventu rudimentum militiæ posuit: nec multo post quum vigesimum tertium ætatis annum impleisset, à patre commentitio nomine mancipatus est, in patrimonii partem Novaria, Vercellis, Asta, Alexandriaque ei traditis; ut inde Othoni Montisferrati Regulo semper hosti, nec unquam quieto, dissimulante patre arma inferret. Sed dum in eo bello versaretur, prodentibus Guelphis Vercellas amisit. Allobrogum enim Regulus, quanquam ei esset avunculus, & Flisci Ligures periculi sui admoniti, Othonis sibi finitimi





timi injurias defendebant; acciverantque auxilia Pontificiarum copiarum, arcemque Joannis Galeacii praesidio custoditam circumvallarant, usque adeo validis circumpositis stationibus, ut Joannes Galeacius non semel obsessio praesidio opem ferre conatus, quod hostes castra castris contulissent, plane circumventus obsideretur; tandemque praesidium urgente fame, & desperato commeatu, ex conditione arcem dederet. Sed aliquanto infelicius Britannorum adventu arma tractavit: nam à Joanne Aucutho Britannorum clarissimo Duce, qui ab amicitia Barnabae discedens, Pontifici & Florentinis adhæferat, in Brixiano agro acie victus profligatusque est, usque adeo gravi accepto detrimento, ut ejus Duces ferme omnes cum vexillis caperentur; & ipse celeri fuga è manibus hostium ægre sese eriperet.

Ab his infaustis susceptæ militiæ initiis, quum fatis superque cum virtutis, tum fortunæ suæ periculum fecisse videretur, mortuo demum patre, per Legatos bella gerere constituit, quod unicus patris hæres, extra infesti Martis discrimina sibi omnino parcendum, alienaque virtute, quæ pecuniæ mercede pararetur, subeundam præliorum aleam existimabat: rebaturque uti natura cautus exacteque prudens, & uti mox apparuit, consilio quam manu validior, se domi quam foris felicior evasurum; pollicentibus præsertim ex genitura Mathematicis, maximas opes, adauctum imperium, hostium calamitates, summamque gloriam, si armorum pericula devitaret. Neque fatidici vates, aut ipse naturæ genius humanæ voluntatis arbitri, fidem fefellerunt. Paucis enim annis admirabiles adeptus victorias, ita inimicos perdidit, cæcidit hostes, imperii fines protulit, ut aridentis Fortunæ fiducia subnixus, totius Italiæ regnum affectaret. Jam enim cum Ladislaus Cæsar novo honoris titulo honestarat, quum ex solennibus codicillis primum Mediolani Ducem, sceptro piloque ejus dignitatis insignibus per Legatos transmissis, appellasset. Formidandæ ambitiosi Principis erant opes, & quod longe omnium amplissimæ, & quod ultra summam prudentiam veterano milite, strenuisque & præclare fortunatis Ducibus niterentur. Scaligeris Veronam atque Vincentiam ademerat, Carrariensibus vero Patavium, Francisco Seniore in Modætanum carcerem conjecto: præterea Tarvisium, Feltrium, Bellunum, montanaque oppida cum Tridento in potestatem redegerat: Perusini & Assisates ad eum à Pontifice defecerant: Senenses tædio incertæ libertatis ad ejus auctoritatem, finitimos Pisanos secuti, se contulerant; quum nec Lucenses imperium ejus abnuerent: propterea Florentini non obscuro perculsi metu, potentissimi hominis vim suspectantes, ei undique circummissis per omnem Europam legationibus, grave bellum concitabant; Roberto præsertim Cæsare in Italiam evocato, & Gallis Duce Armeniaco cis Alpes perductis. Sed eos externarum gentium conatus ita sustinuit, ut Gallos virtute Jacobi Vermii ad Alexandriam ingenti pugna superatos, interfecto Duce, deleverit, Cæsaremque à Brixianis Alpibus se demittere ausum, opposito Facinio Cane, primas Germanorum alas profligante, in Germaniam retruserit. Exinde ad vindicandas injurias pergens, Franciscum Gonzagæ Mantuæ obsessum, derivatis Pado atque Athesi per emissarios, & pene summersa urbe, pacis conditiones accipere cogit. Novissime ad Casalecium juxta Bononiam, Pontificis, Florentinorum & Bononiensium ingentem exercitum, Bernardo Aquitano fortissimo Duce capto, collata acie profligavit, ab eaque statim victoria, urbe Bononia potitus est, pro qua ab excessu Joannis Antistitis per quinquaginta fere annos fuerat dimicatum.

Nec multo post victricibus copiis in Etruriam

A per Apenninum tantum terrorem Florentinis intulit, ut demissi animo cives, nequaquam in domesticis praesidiis, sed in una tantum impotentis atque irati hostis morte salutem reponerent. Nec eorum votis Fortuna defuit: in arce enim Melethniani Romana via supra Lambrum pestilenti febre correptus excessit è vita, pridie Nonas Septembris, anno à partu Virginis supra millesimum quadringentesimo secundo, quum ætatis annum quinquagesimum quintum attingeret; imperasset autem annis viginti quatuor. Duos ex Catharina, Barnabæ filia, impuberes filios Joannem & Philippum reliquit: quum autem ex Isabella, Caroli Galliarum Regis filia, priore uxore nullam prolem suscepisset, ad instaurandam cum Gallo Rege propinquitatem, Valentinam, ex eadem Catharina primo partu genitam, Ludovico Aurelianorum Principi, Regis filio, nuptui dederat. Quo conjugio Asta Colonia dotis nomine Valentinæ obvenit; ad liberos vero ejus, hæreditatis titulo, Mediolanensis imperii jura transierunt, quod Valentinæ fratres sine legitima prole decessissent, sinistro quidem omine ac insigni detrimento Italiæ Galliarumque, quod in repetenda ea hæreditate diuturnum & atrox bellum sit exortum, cujus adhuc nullum omnino certum finem videmus. Arsit per aliquot dies ante ejus mortem cometes ingens, lurida & funebri oblongaque cauda, versus eam cæli plagam, quæ in Corum ventum obvertitur. Nec eo cælesti prodigio indignus videri potuit, quum nemo Principum in Italia, à Gothicis usque temporibus repetita memoria, imperii magnitudine & vitæ splendore eo clarior atque potentior existerit: quod si victorias inter Fortunæ munera numeremus, nemo certe ei vel innatæ gravitatis atque prudentiæ opinione, vel ipsa oris ac corporis dignitate, vel exornandæ virtutis studio, ad censum veræ gloriæ comparandus est: quanquam tanti nominis famam prægravasse videatur patruus Barnabas exutus regno, in Tritianoque demum carcere necatus; atque illa immensa proferendi imperii cupiditas. Sed hanc quisque non iniquus, neque immoderatus Tyrannus, Caji Cæsaris exemplo, facile excusaverit, si regnandi causa jusjurandum omnino violandum esse existimet; & ipse Joannes Galeacius in exercenda sævitia, tempestivus Barnabam, pares atque immeritas fruuentem insidias, recte præoccupasse censetur. Contraxit tamen invidiam ejus animo gravem, uti sæve rapax & immitis, atque perpetuus urbium suarum expilator, quum à subjectis imperio concepta odia detegi exercerique nequirent, quæ demum in morte ejus per singulas urbes eruperunt. Neque enim perpetuo imperatæ pecuniæ onere fessis, fatis digna tolerandæ injuriæ causa videbatur, accersita sæpe ultro gerendi belli necessitas, quod nunquam ex bello pacem expeteret, sed ex pace semper alia atque alia bella quærentur. Nec mirum, quum serendis bellis viginti millia equitum & totidem peditum perpetuo alenda suscepisset; nec ullis omnino sumptibus parcendum arbitraretur, modo fortissimum quemque ex omni militari ordine invitatum uberioribus stipendiis, ob idque facile detractum hosti, sibi adscisceret. Profiti enim erat solitus, *Nihil esse ea mercatura nobilius, qua viri insignes pararentur.* Objeçit & ei probrosas libidines in *Historiis* Antonius Florentinorum Antistes, inepto & improbo maledicendi genere in hostem patriæ insolenter invecus. Nullum autem ejus ædificium paulo luculentius existat, quum Majores ejus usque ad insaniam domi & foris, curias, arces, prætoria sumptuosissime condidissent. Singulari tamen pietatis & magnificentiae studio, Carthusiæ templum construxit ad quartum lapidem à Ticinensi paterna arce, ubi ferarum septa terminantur; additis in alimenta sacerdotum latifundiis. In eo templo humari voluit; spectaturque

turque post aram maximam cælati operis admirabile sepulchrum, subscriptis ad historias rerum gestarum, quæ marmoreis imaginibus decentissime figurantur, his carminibus, non omnino indignis ut alibi quam Carthusiæ perlegantur:

*Quum Ducis Anguigeri variis divisa sepulchris
Membra cubent: sic jussit enim: nam viscera servat,
Antoni, tua sancta domus celebrata Vienna:
Cor Ticinensis Michael, Carthusia corpus:
Hic quoque ad æternum populi patriæque dolorem,
Vexilla, & clypei, & lachrymose insignia pompa,
Exequialis honos, monumentum flebile pendent:
Instar & hoc tumuli semper memorabile nostris
Impositum signum est oculis. Lege Principis ergo
Hic etiam titulos, nomenque, genusque supremi
Cujus ab Angleria primus quos protulit olim
Natus ab Ascanio Trojani sanguinis Anglus
Comitibus, si prisca petas primordia clari
Nominis, atque domus Vicecomitis exstat origo.
Talibus exortum proavis dixere Joannem
Hunc Galeaz, quo non fama vulgatus ullum
Nomen in orbe fuit, factis ingentibus Heros.
Ille quidem Anguigeram super aurea sidera gentem
Extulit, & sese virtute æquavit Olympo.
Dux Ligurum, patriæque pater, Comesque Papiæ,
Virtutumque fuit: quantum splendebat in illo
Imperiosa oculis vis majestatis, & alta
Frontis honos, tantum specie mortalibus ibat
Altior, ut dominum sola esse doceret imago.
Quantum lux animi specioso in corpore fulsit,
Cognita per varium testantur plurima casum
Consilia alta Ducis: cujus pietasque, fidesque,
Sacraque justitia, & clementia sanguinis experts
Innocuam fecere animam. Nec dulcior alter
Eloquio, nec magnificis præstantior alter,
Nec fuit in totis Europa finibus unquam
Aptior imperiis Princeps, nec sanctior alter
Religione fuit, nec pacis amantior illo:
Hanc propter sæpe auspiciis iusta arma secundis
Induit, & claros superato ex hoste triumphos
Cepit, & ultrices (qua nulla est gloria major,
Nullaque composita major constantia mentis)
Ipse sui victor, de pectore depulit iras,
Permisitque pius victis ad sana reverti
Consilia, & mediis pacem quæsit in armis.
Ipse graves populis cruda de sede Tyrannos
Dejecit, fregit tumidos, stravitque superbos.
Hic erat unde quies magnorum certa laborum
Italia speranda foret: Duce lata sub isto
Illa sibi antiquos jam promittebat honores:
Nanque videbatur calo demissus ad unum
Natus, ut indeptis componeret aurea terris
Sacula, & afflictio tandem daret otia mundo.*

*A At Deus Ausonia dederat quod sydus agenti,
Transtulit ad superos, sive illo ornare beatos
Angelicosve Choros voluit, seu lumine tali
Indignam est ratus Italiam, mundumque nocentem,
Consilii ratio alta latens & causa superstat:
Sed nos ô miseri, quorum ille piissimus Heros
Destitit optata nunquam vigilare saluti:
Flete Ducem Ligures, talem lachrymate parentem
Vosque urbes vidua, Princeps quas ille sub altis
Felices sceptrisque suis cum pace fovebat.
Eternas oculis lachrymas effundite vestris:
Ante alias Mediolanum patria inclita magnum
Principis atque caput tanta ditionis, & olim
Longobardorum domus augustissima Regum,
Magnanimoque Duci nuper gratissima sedes
Papia, illustris titulis quas fecerat urbes:
Et vicina sequens matris vestigia Laude
Urbs Pompejani de laude vocata triumphi:
Brixia civili nec enervato duello,
Funde pares lachrymas, quibus alta Verona, sororque
Ingeniis ornata bonis Vicentia, duris
Cognita temporibus, parvæque in montibus urbes
Bellunum, Feltrumque adeant, & pulchra feraci
Planitie Cremona sedens, memoresque laborum
Vercella, antiquis tellus agitata procellis,
Et cum Derthona sæcunda Novaria pingui,
Piscesumve Comum, populoque animosa superbo
Bergoma, & occiduus quas nunquam victor adivit,
Nomen Alexandri retinens urbs fertilis oris:
Quæque tot egregios in prælia mittit alumnos
Parma potens animos, & opima Placentia campis,
Et Bovium, & vicina malis urbs ducta priusquam
Sub Ducis imperium, & juga non metuenda veniret.
Te quoque Lucensis regio, licet obruta Luna
Mœnia sint, reliquis plorantibus urbibus addas,
Quas inter magno est lacerata Bononia fleu
Et gemitu, & lachrymis proprium confessa laborem,
Quæ sibi sydereos subito mors improba vultus
Principis eripuit, nec passa diutius illam
Majestate frui, dulcis & dulcedine sceptri.
Ite simul, sic fata jubent, sociare querelas
Urbs Pisa, quondam Tyrrheni Roma profundi,
Massæque Gorsetum manu vebat inclita secum,
Et cum vicino turrata Perusia ploret
Assiso, & mœsta saliant ad sidera voces.
Romanum gemat Imperium, Romanaque plangat
Ecclesia, hi lachryment oculi duo lumina terra
Raptus uterque pugil, Latiis quo major in oris
Non erat: ex Italis Germanos depulit hostes
Finibus, & Gallos bello confixit acerbo,
Ante Quirinalem posset quam cernere Romam,
Mille quater centum atque duos quum duceret annos
Sol, hunc atra dies Septembris tertia ademit.*

JOANNES MARIA, MEDIOLAN. PRINCEPS XI.


*Effigies istius crudelis Principis cæлата conspicitur in templo Carthusiæ Ti-
cinensis cum illa Antonia Malatestæ ejus uxoris.*



MORIENS Joannes Galeacius ad testamentum antea rite conditum additis codicillis, Joannem Mariam maximæ partis imperii, novique tituli hæredem instituit, ea conditione, ut Philippus Papiam urbem obtineret, Novaria, Alexandria, Asta, Vercellis atque Derthona adjunctis, Papiæ Comes appella-

Fretur: Gabrieli autem ex Agnete Mantegatia spurio, qui erat legitimis ætate superior, Pisas, Cremonamque legavit: atque ita Joannes Maria desumpto Ducis nomine, susceptique paternæ dignitatis ornamentis, ad imperium evectus est, funestis utique auspiciis: nam illico civile bellum exarsit, Gibellinis & Guelphis inter se vecordi imperu concurrentibus: æ siquidem diræ Factiones, contempto adolescente Principe, vetera civium odia refricarant, quæ superiorum Principum virtute, sublata videbantur. Is longe gravissimus & summe





STANDARD

me lugubris tumultus, non urbibus modo atque oppidis, sed pagis agrestibusque familiis, eodem insanix morbo correptis, vastitatem attulit; quum cædibus incendiisque grassari, cognatis & affinibus ultimam vim afferre, sacra denique non secus ac profana violare fas putarent, virtutisque & gloriæ loco ducerent, si ad ostendendum insigne factionis studium, maxime crudeles evasissent.

Sed dum Mediolani per singulas regiones cruento eventu alternante fortuna certaretur, eadem pestilentis mali lues reliquas Imperii civitates celeriter invasit, insigni perfidia Præfectorum & Ducum, qui orientes tumultus quum facile opprimere possent, turbidis rebus magnopere gauderent: ii enim modo his, modo illis faventes, altera partium expulsa, altera vero attritis festis viribus, subnixi validis præsiidiis, urbium dominatus arripere è medio cogitant. Per hunc modum nullo pudore violati militaris sacramenti, Pandolphus Malatesta Brixiam & Bergomum occupavit; cuius factum infame scelestumque subsecuti Gabrinus Fundulus Cremonæ, Facinius Canis Papiæ atque Alexandriæ, Joannes Vineatus Laudi Pompejæ, Cremæ Benzones, Placentiæ Arcelli, Othobonus Tertius Parmæ, Franchinus Rusca Comi, Brusati & Tornielli, quondam exules, Vercellis atque Novariæ dominatum invaserunt. Qua foeda & repentina Ducum atque urbium defectione consternatus Princeps, docente & hortante matre, consilium suscepit de creando Governatore, qui militari cum imperio urbem regeret, & salutem dignitatemque Principis præsentibus armis tueretur. Veteres enim consiliarii amicique, quos pater in tutelam adolescentis reliquerat, diverso æstu turbulentæ tempestatis jactati, aut securi colla præbuerant, aut exauctorati, adversariis locum occupantibus, metu mortis longe diffugerant. Itaque Mediolanum accersitur Carolus Malatesta: is introductis copiis, factionis audaciam coercet, præclarum restituendi imperii & parandæ quietis studium ostendit, fratrisque filiam Principi in matrimonium collocat. Sed non multo post, quod Guelpharum partium nomen præferret, urgentibus Patritiis Mediolano excedere cogitur. Evocatus subinde est in ejus locum Facinius Canis bello Dux impiger, sed impense rapax & vehementer factionis. Verum is multis expeditionibus prospere confectis, quum parum æquus & Reipublicæ utilis foret, quod Gibellinarum partium se defensorem & Ducem profiteretur, Guelphorum insidiis petitus, atque urbe usque adeo violenter exactus est, ut cum circumfusus in eum conjuratis, ne caperetur per averfam Actianæ curiæ portulam adacto equo in fugam se proriperet, confusa vehementer fronte in valvarum angustis, relicto coccineo capitis integumento, continenti cursu Rosatum usque percurreret. Tum vero Guelphi Antonio Turriano cohortante, qui apud Principem quamquam nomine familiæ odiosus esse deberet, tamen plurimum gratia valebat, Joannem Mariam perpulerunt, ut in Facinii locum cum eadem imperii potestate Bucicaldum Gallum acciret. Is tum à Rege Galliæ deditis ultro Liguribus præpositus Genuæ Præsidem agebat, vir corpore pariter & ingenio vastus. Itaque stipatus Gallis equitibus quum Mediolanum venisset, ante omnia infido consilio, ut arce potiretur, custodis animum oblata pecunia tentavit. Id facinus maligne susceptum quum minime ex sententia processisset, cuncta ad superbum arbitrium revocanda ratus, edictis propositis & percussis sub nomine suo moneta, ita impotentis animi libidinem nudavit, ut non Joanni Mariæ modo, sed utriusque

A etiam factionis civibus in suspensionem affectati Principatus venerit. Sed dum Mediolani hac inani spe immodicos spiritus alit, atque odium sibi ingens parat, illudente Fortuna votis ejus, Gallica præsidia, occiso à Spinulis Serratone Præfecto, Genua pelluntur, Theodorusque Montisferati Marchio, strenue operam navante Facinio, Genuæ Princeps acclamatur: quo nuncio perterritus, nec ab re sibi timens, priusquam tanti accepti incommodi fama vulgaretur, simulata expeditione in Ticinenses, copias Mediolano eduxit: quem Facinius evadentem ad Novium oppidum adortus, adeo opportune commissa pugna profligavit, ut Bucicaldus amissis copiis, Genuæ & Mediolani præfectura uno tempore exutus, per asperos Alpium tramites in ulteriorem Galliam perfugerit. Hic est ille Bucicaldus, qui Gabrielem Joannis Galeacii filium avaro truculentoque judicio Genuæ securi percussit, ut prae grandea pecunia potiretur, quæ illi obvenerat, quum Pisas Florentino Senatui vendidisset.

Per id tempus Joannes matrem amisit, tantis curis, ut erat corpore imbecillo, facile succumbentem: cujus perverso consilio non multo ante, ut propinquas urbes facilius tueretur, aut occupantibus Tyrannis eriperet, cæteras, quæ remotæ ditionis erant, Bonifacio Pontifici tradendas censuerat, scilicet ut eo insigni munere inanem promereretur amicitiam, & tutelare foedus afflitis & plane perditis rebus impetraret. Per hunc modum Bononia tantis impensis atque laboribus parta, itemque Assisium atque Perugia Umbriæ urbes Mediolanensi imperio adjectæ, quum ex calamitate levitateque Joannis, Fortuna eodem pertinaci vestigio nixa, alienæ felicitati adspiraret, in ditionem Pontificii imperii concesserunt. Pari quoque ignavia aut desperatione Senensibus obruncato Corregio Præfecto desciscientibus, libertatem cruentis admodum seditionibus implicatam reliquit.

D Cæterum nihilo secius Mediolani certabatur, recrudescuntibus civium odiis per mutuas cædes, quod neque victi vindictæ cupiditate pacem vellent, neque victores victis inducias, tanquam successu damnosas, dandas putarent: quibus rerum difficultatibus adductus Princeps, quod unum omnino remedium in tanta civitatis perturbatione tranquillitatem afferre posse videbatur, Facinio, datis obsidibus, sese reconciliat, eumque iterum accersit, & bellicarum civiliumque rerum moderatorem cum suprema potestate creat: ejus adventu Guelphi, qui sub Bucicaldo insolentes evaserant, arma posuerunt: quiescentibusque demum Gibellinis atque urbe pacata, Facinius Bergomatibus bellum inferre jussus, trans Abduam ducto exercitu, rebellantis urbis agros omni belli clade vastavit. Sed cum Bergomates consumptis hostili igne suburbanis tectis, ne extrema paterentur, se dedere decrevisissent, Facinium articularis morbi renunquæ dolores usque adeo graviter invaserunt, ut abscedere irritum incepto, Papiamque deferri cogeretur. Is morbus, qui Facinio supremus fuit, novandis rebus occasionem præbuisse fertur: summæ nanque audaciæ turbulenti cives in necem Principis conjurarunt: in queis eminebant Baucii fratres Andreas & Paulus ex intimis familiaribus, itemque duo Pusterlæ pernobiles, & Franciscus Mainus, Bertonus Mantegatus, & Acontius Trivultius. Hos tanquam Duces ex utroque factionis ordine alii supra triginta sequebantur: neque fuit quisquam è tanto numero, qui in summa spe amplissimi præmii fidem prodendo fallere voluerit, quum in vitæ periculum ex suspecta consociorum multitudine subiret: oderant enim eum omnes tanquam inusitatae immanitatis Tyrannum, quod in tanta per novem annos

ærumnosi imperii rerum omnium asperitate, infan-
næ feritatis morbum concepisset, usque adeo hor-
rendum, ut iracundia in rabiem verſa, damnatos
aut ſibi invifos voraciſſimis canibus laniandos obji-
ceret, eoque atroci ſpectaculo magnopere lætare-
tur, haberetque in delitiis Squarciam Giramum,
alioqui honeſta ortum familia, inhumanæ ſævitæ
miniſtrum, qui ad eam carnificinam ingentes mo-
loſſos humana carne alendos ſuſcepisset. Diis ita-
que atque hominibus tale monſtrum abominantibus,
poſtridie Idus Majas ſacrorum cauſa in templum
divi Gothardi deſcendentem Baucii fratres, reli-
qua conjuratorum manu incumbente, duobus vul-
neribus confecerunt, diſciſſa uſque ad oculos fron-
te, & dextro crure ad ſuram detruncato. Exa-
nimem & aliquandiu ab omnibus deſertum pauci
ex infimo familiæ ordine in templum maximum
detulere. Ibi quum ſœdis vulneribus & multo
crudore deformatus non ſine ludibrio ſpectaretur,
inſimæ ſortis meretrix tempeſtivæ pietatis officium

A uſurpans, totum cadaver multa recenti roſa con-
textit. Inde poſtea à Philippo ſucceſſore opulentam
dotem, ut honeſte nuberet, ingenuæ charitatis no-
mine habere promeruit. Eodem die Giramus ſce-
leſtus carnifex concuſſu populi latebra extractus,
quum vivus unco traheretur, pro janua damnatæ
& mox ad ſolum æquatæ domus, horribili meri-
toque ſupplicio affectus eſt. Ipſe quoque Facinius
copiarum imperator, quum ei inſuperabilis mor-
bus vitæ finem aſſerret, nunciata cæde Principis,
Duces militeſque ſuos obteſtatus eſt, ut percullo-
res perſequerentur, Philippoque ad Principatum
hæreditatis jure contendenti fortem atque fidelem
B operam præſtarent: paucas poſt horas exſpiravit,
magno quidem conjuratorum commodo, qui ne-
mine Principis cædem vindicante, Haſtorem Bar-
nabæ ex concubina filium bello ſtrenuum, pater-
noſque ſpiritus gerentem, magnis acclamationibus
ad Principatum extulerant.

P H I L I P P V S,

MEDIOLAN. PRINCEPS XII.

*Conſpicitur ejus effigies variis in nummis, eximiaque celatura ex Lanenſi
marmore Mediolani habetur apud Jo. Baptiſtam Bidelli.*



IOANNE Maria interfecto,
atque eodem die exſpiran-
te Facinio, Philippus, qui
captive perſimilis incer-
tuſque ſalutis in arce Pa-
piæ ſupremum urgentis
Fortunæ impetum exſpe-
ctabat, inopinato Facinii
dudum hoſtis munere ſub-
levatus, animum erexit
ad non dubiam ſpem recuperandi Principatus, co-
hortantibus Facinianis Ducibus, qui quum in ſu-
premam morientis imperatoris ſui voluntatem per
conjunctas dextras fidem datam fallere nefas eſſe
putarent, uti viri militares etiam gerendo bello
materiam quærebant. Deerat pecunia, exercen-
dæ virtutis nervus, ſed ea ſubitario proventu à
Beatrice Tenda uxore Facinii celeriter impetratur,
propoſitis cum novo Principe nuptiis, quas ipſe
Facinius in extremo vitæ actu ſuaſiſſe ferebatur.
Nec eas abnuir Philippus, quanquam ætate for-
tunæque impares. Itaque levis mulier intempe-
ſtivæ libidinis & majoris imperii avida, vix de-
terſis lachrymis inauſpicati conjugii torum ſubit,
quaterque centena millia aureorum nummum do-
tis nomine dinumerat. Nec mora, inſtructo exer-
citu Philippus Mediolanum contendit: obſidebat
arcem Haſtor circumvallatam magnis operibus:
ſed ductu Franciſci Carmagnolæ Caſtellinique Bec-
carie, Philippi milites munitiones perrumpunt,
Haſtoremque ad Comenſem portam acerrime re-
ſiſtentem proſſigant. Tum vero Philippus urbem
ingreſſus per præcones in compitis pronunciari ju-
bet, *Se nemini, exceptis fratris percufforibus, hoſtem*
ſuturum: ſtatim acclamatus Princeps ſingulari to-
tius populi ſtudio in curiam Actianam deducitur.
In eo tumultu Paulus Baucius & Franciſcus Mai-
nus, principes conjurationis & cædis, intercepti
teterriſimo ſupplicio admiſſi ſcleris pœnas dede-
runt.

Exinde Philippi Duces ad oppugnandam Mo-
doetiam, quo ſe receperat Haſtor, proſecti ſunt:
nec multis inde diebus id oppidum in poteſtatem
devenit, & Haſtor, qui in arcem refugerat, quum

ad puteum ſederet, tormenti in incertum emiſſi
lapide coxam ictus interiit. Exſtincto gravi æmulo,
& propter ſtudia Guelpharum partium magnopere
metuendo, Philippus auctis opibus Tyrannos ad-
ortus incredibili felicitate, aliquot urbes paterni
imperii recuperavit; Pandulpho imprimis Malate-
ſta Bergomo Brixiaque depulſo, Joanne Vignato
Laudenſium Tyranno capto, & latronum more
in furca ſuſpenſo, Arcellis Placentiæ necatis, aut
in exilium pulſis, & Franchino Ruſca, qui Co-
mum occuparat, certa præmii conditione ea urbe
ejecto. Verum incredibili lætitia Philippum affe-
cit Gabrinus Fundulius, Cremonenſium Tyrannus,
felici aſtu captus. Is quum medio in foro Medio-
lani conſpecta ſupplicii machina cervices ſecuri ſub-
dere cogeretur, hortarenturque cum de more cu-
cullati ſacerdotes, ut ex diſciplina Chriſtiana com-
poſito animo vitæ exitum ferret, patratorumque
ſclerum, ſperata inde à Deo maximo venia, rite
pœnitere vellet, contortis atrocibus oculis, *Deſi-
nite*, inquit, *mihi indigne perſidioſeque prodito moleſti*
*eſſe: nam tantum abeſt, ut me jure belli factorum pœ-
niteat, ut maxime etiam doleam, quod Papam ſimul ac*
que Caſarem, ad immortalē clariffimi facinoris famam,
e mea turre minime præcipitarim. Paucos enim ante
annos Balthaſarem Coſiam, Joannis XXIII. nomi-
ne Pontificem, & Sigifmundum Imperatorem ho-
ſpicio exceptos, ſtudioque peramœni atque admi-
rabilis proſpectus in ſummam celeberrimæ turris
coronam invitatos, inceſſente atrocem animum dira
libidine, in ſubjectum forum provolvere cogitarat;
neque alius omnino vel graviſſimæ rei reſpectus
duo totius orbis lumina ſervavit, quam in nefario
F Tyranno non ignobilis obortus pudor, ne hoſpitalis
menſæ religionem, cui ipſe honoris cauſa conviva
adhibitus eo die fuerat, non crudelis quidem, ſed
ingrati animi piaculo ſœdaſſe videretur.

Cæterum Philippus & fraternam cædem & Ty-
rannos probe ultus, fretuſque mirifica virtute
clariffimorum Ducum Carmagnolæ & Nicolai Pi-
cinini, ad recuperandas remotiores paterni impe-
rii urbes animum adjecit: Veronam enim Vene-
ti, Piſas Florentini, & Bononiam Pontifex Ro-
manus ademerant. Sed ab eo conſilio non iniquo
jure



PHILIPPVS MARIA
Vicecomes.



jure suscepta bella, gesta que demum per triginta & septem annos aliquanto majore virtute quam fortuna, totius Italiæ urbes gravissimis cladibus affecerunt: cumque postremo belli eventum Philippus tulit, ut conspirantium inter se liberarum civitatum consilio atque opibus impar, Bergomum & Brixiam amitteret, & Genuæ dominatu polleretur, quum ipse domi sederet, paternoque exemplo, sed nequaquam pari fortunæ conditione, gerenda bella per Legatos arbitraretur. Verum in hac perpetua & semper ancipiti difficillimarum rerum agitatione, maximæ constantiæ & generosi consilii laudem tulisse videri potuit, quum septies terrestri aut navali acie victor, sed sæpius victus, eisdem semper spiritus indomitæ virtutis gesserit. Intentus enim & erectus ad tuendum nominis decus quum sæpe fortunæ aleam subiret, nullo sumptu, nulloque periculo deterri poterat, quamquam natura esset pertimidis usque adeo, ut vel mediocri tonitru audito formidine quateretur, & subterraneas latebras amenti similis quæriraret: secreto cubiculo maxime gaudebat, & in id paucissimos admittere, arcere salutantes, negocia tractare per interpretem, & denique reformidare cœtus hominum solebat: hebetata enim oculorum acie quod aduentum facies non plane discerneret, assiduo nomenclatore & monitore dissimulanter utebatur, ne omnino captus oculis à minus familiaribus putaretur. Oblectabat autem ocium historiarum lectione, quarum Antonius Panhormita, litterarum nomine præcipuo in honore habitus, aliquandiu fuit anagnostes. Verum incolumi adhuc oculorum lumine, libentissime adolescentium pilaludentium aut luctantium certamina, obducto ad fenestram speculati vitro despectabat, ut ludentes eum spectare nescirent, quum tamen adesse crederetur. Inde enim eorum formæ decus, explicatos artus, animique vigorem inspicere, & quos ex ejus exercitationis indole maxime probasset, ad mensæ cubiculique ministeria deligere erat solitus. Sed eam voluptatem Candidus December, illius ætatis Scriptor, iniquo felle turgidus, quum omisissis laudibus, quæ in Philippo celebrandæ fuerant, vitia notaret, ad suspensionem libidinis revocavit. Erat utique Philippus in flexu præsertim ætatis, ingenio suspicaci, fervido, mobili, sæpeque sævo, quum teneræ ejus aures delatorum aculeis figerentur. Nec deerant ex intimis amicorum factiosi, alienæque laudis obtrectatores, qui recte sentientem sæpissime depravarent: inter quos Oldradus Lamponianus, ab adolescentia cubiculis assuetus, gratia auctoritateque tantum valuit, ut Carmagnolam summum Ducem magno Philippi incommodo alienare atque extrudere potuerit. Adiiit & grave salutis periculum ipse Franciscus Sfortia jam adscitus gener, falsis scilicet criminibus oneratus, quum uno innocentiae præsidio à multis benevolis ægerrime defenderetur.

Verum Philippus ingrati sævique animi infamia sese turpiter fœdasse visus est, quum Beatricem uxorem adulterii cum Orumbello Citharædo admisisseam, nec in tormentis quicquam contra pudicitiae decus consistentem, securi percussit, imparis, ut ferunt, conjugii pertæsus, cujus tamen non dubiis opibus ad imperium pervenisset; ut demum Amadei Sabaudii filiam eventu sterilem duceret, non sine dote modo confectis nuptiis, verum ut fœderi societatem promeretur, ultro traditis Vercellis. Id quoque famam ejus vehementer premit, quod alioqui in amore odioque instabilis, tum maxime firmus atque inexorabilis evaderet, quum veteres injurias novis beneficiis nequaquam pensandas arbitraretur, ut in Castellino Beccaria mox apparuit, non ob aliam causam in carcere necato, quam quod recentis operæ fideliter strenueque præ-

stitæ oblitus, veteris perfidiæ, qua is Papiam Facinor prodiderat, meminisset.

Sed uno memorabili inusitata virtutis præconio Philippus vitiorum labes præclare aut deterfit, aut operuit, quum Alphonsum Regem navali prælio ad Pontiam superatum & captum, incredibili benignitate magnitudineque animi non custodia modo liberavit, sed excultum eximiis muneribus, & prægrandi pecunia instructum, ad repetendam Neapolim dimiserit: rarissimo quidem & incomparabili generosæ clementiæ exemplo, si in decerpandæ gloriosæ laudis proventu, superiorum atque eorum, qui postea toto orbe regnarunt, Principum animos nobili censura metiamur. Superavit etiam Majores suos domestici splendoris munificentia, quum clarissimos hospites acciperet, in quibus fuisse Martinum Columna Pontifex maximus, cui marmoream statuem posuit, & Sigismundus Imperator ingentibus donis cum universo comitatu liberaliter expletus.

Excessit è vita nondum sexagenarius ex atroci febre, & in multam bilem soluta repente alvo, pridie Idus Augusti, anno à partu Virginis quadragésimo octavo supra millesimum & quadringentesimum, quum circumventus Venetis armis, & Mediolani fere obsessus, Franciscum Sfortiam generum diu antea pro hoste habitum, opportuneque in gratiam receptum, è Togata Gallia evocandum curasset, ut gravissimis hostibus summæ virtutis atque felicitatis imperator opponeretur. Ferunt eum iusto odio contra Venetos æstuantem, diu agitasse animo an Alphonsum Regem genero præferret, imperiique hæredem relinqueret; ut eo inclyti opulentissimique nominis propugnator, ambitiosæ & præpotentis Venetæ gentis audacia frangeretur: sed amore Blancæ filiæ, quæ jam Galeacium Sfortiam ad spem imperii in agro Piceno pepererat, generum eundemque solenni adoptione filium prætulisse, præcipuis supremi decreti suasoribus Andrea Birago & Petro Pusterla: quum diverso studio Brocardus Persicus & Franciscus Landrianus pro Alphonso contententes, victique suffragiis, ab sententia popularis invidiæ plena discessissent, multis civium indignantibus, quod pro homine longe omnium humanissimo atque fortissimo, qui jam adoptione filius, Blancæque unicæ Philippo genitæ maritus, atque obiter Vicecomitum stirpi insertus esset, externi sanguinis, ignotæque linguæ, suspecti denique ingenii vir, itulissimo paucorum consilio ad patriæ dominatum vocaretur; quo consilio, brevi colonis Hispanis urbem Mediolanum, totamque Insufram regionem, ad non dubiæ calamitatis eventum esset repleturus. Fama tamen in vulgus emanavit, exaratum fuisse codicillum, quod priori testamento subderetur, sed exspirante Philippo priusquam testibus adscriptis obsignaretur, fuisse discerptum: quod usque adeo graviter Alphonsum tanquam maligne & perinique exclusus tulit, ut ea suppressi codicilli jura Alphonsum nepos ætate nostra respiciens, ut sibi totique Italiæ clades pararet, intemperanter adspiravit. Caruit marmoreo sepulchro Philippus, quum in arca lignea aureo contenta panno conderetur: eam in sublimi fornicis intercolumnio sustentibus tignis supra aram maximam suspicimus: sed in infimo pariete affixum tale carmen legimus:


*Clementissimus atque liberalis
Insufram Dominus, Philippus hic est,
Victis Regibus unico duobus
Qui bello, manicasque compedesque
Levari jubet, in suasque abire
Donatos opibus Lucullianis
Sedes, & sua regna, liberatos
Tetro carcere. Discite hinc Tyranni:
Sunt hac munera Principum, superbos
Debellare, pios & esse victis.*

A R G V M E N T V M

DEVOLVTAE HAEREDITATIS MEDIOLAN.

AD AVRELIANORVM PRINCIPVM DOMVM,

breuissima narratione ex historiis explicatum.



PHILIPPO vita functo, quod in eo Vicecomitum Principum vetusta progenies à Matthæo Magno ducta defecisset, Mediolanenses in libertatem sese vendicarunt. Nam Barnabæ Principis legitima virilis proles, ex tot liberis atque nepotibus, præter quosdam spurios, tota perierat. Neque Joannes Maria à conjuratis propere sublatuſ è Malatesta, neque Philippus ex Beatrice Tenda, nec demum ex Maria Sabaudia plane sterili, inauspicatis uxoribus liberos susceperant. Relinquebatur Blanca, quam Philippus ex Agnete Maina nobili concubina susceptam, Francisco Sfortiæ concessa in dotem Cremona collocarat. Verum hæc, quod spuriae nomen præferret, quamquam adscititio jure legitimam pater fecisset, paterni imperii hæreditate minime digna putabatur. Ita ut tota ea directo jure possessio Valentiam Philippi sororem omnino respiceret. Hanc Joannes Galeacius pater Ludovico, Caroli quinti Galliae Regis filio, nuptui dedit, Asta urbe dotis nomine concessa: ad id quoque superaddita conditione, ut si fratres novæ nuptæ sine liberis decederent, ipsius demum Valentinae filii legitimiſque successores Insubrum Principatu potirentur. Sed tabulis eo modo confectis Romani Cæsaris auctoritas deerat, cujus muneris esset appellare Principes, Regna dono dare, in clientelam Regulos adsciscere, & translatis hæreditatibus assentiri. Itaque ut Valentinae ejusque liberis rite caveretur, quod nullus tum ex interregno certus Cæsar exstaret, altercantibus in Comitio Germaniæ Proceribus, ad Romanum Pontificem est decursum. Is præclare assensu suo Cæsaris vices implevit, quod supremæ potestatis jure rite præstari posse videretur, à summo scilicet sacrorum principe, præcipuoque humani atque divini juris interprete, & conditore legum: quandoquidem Cæsar ipse, qui antiquo Romani Pontificis beneficio, in media Germania septemvirali suffragio crearetur, inungendus demum ab eo, appellandusque Augustus, & denique aureo diademate coronandus foret. Cæterum confirmatis eo modo dotalibus tabulis, nonnulli ex ordine Jurisconsultorum Cæsareo nomini impense faventes reperi sunt, qui dissentire viderentur, ut Pontificem auctoritate spoliarent, interposita scilicet subtiliore quadam legis interpretatione, quod nullum omnino jus Pontifici esse videretur in transferendis adjudicandisque Regnorum feudis, tametsi peramplum foret in his litium controversiis, quæ a præſenti judicio festinatae decisionis remedia flagitarent. Verum hæc aliquanto cavillosos, quam probum Juris professorem deceret, inducta, vel hoc uno vividæ rationis exemplo falsissima Aureliani censere, quum & Delphinatus perampla veterum Allobrogum ditio, & Arelatenſis Provinciæ Regnum, auctoritate Pontificia non dubio tum, sed certo jure translata atque adjudicata fuisset constet. Itaque Valentiam Ludovicum con-

Bjugem, insidiis Joannis Burgundiæ Ducis apud Lutetiam immaniter interfectum, suo fato subsecutam, filiis susceptis Galliae Cisalpinæ principatum certissimo hæreditatis jure reliquisset. Quamquam alios prioribus Jureconsultis nihilo doctiores, sed pudentiores tamen, quod causam prioris quæſtionis, de Pontificia facultate, tanquam rejectam passim & explosam deserant, adinventio diverticulo obliqui tramitis in causæ caput deferri; ut in dubium revocare non dubitent, an Valentinae pater legitimi verique Cæsaris munere Mediolanensis ditionis Princeps & Dux fuerit appellatus: quasi Ladislaus insigni studio maximæ partis suffragantium Germaniæ Procerum Cæsar salutatus & acclamatus, id liquidissima potestate præstare æquiverit, quoniam à Roberto Bajoario pseudo-Cæsare seditiosis armis ex infelici æmulatione peteretur. Id igitur quum facile, tanquam inanem commentitii juris argumentum, ab omnibus refellatur, Valentinae sua jura probe defensa relinqui.

CPeperit autem Valentina tres mares, Carolum scilicet, qui in Aurelianorum Principatu Ludovico patri successit, & Joannem Angolismorum Regulum, qui hujus Francisci primi, Galliae Regis, bellica laude & optimorum studiorum amore valde inclyti, paternus avus fuit; & Philippum Virtutis oppidi Comitem, in quem ditionis titulum, Joannes Galeacius ducta Isabella, Caroli sorore, nomine dotis vocatus antea fuerat. Tribus quoque fratribus accessit soror, quæ (quod minime prætereundum videtur) Fusio in Aquitania nobilissimo Regulo nupta, Gastonem inusitatae virtutis adolescentem protulit: illum, inquam, antea imperatorem quam militem, terrificum belli fulmen, in ipsa partæ victoriæ gloria Ravennae exstinctum. Cæterum ex Carolo, qui Britannico bello captus multis annis Londini in custodia fuerat, Mariaque Clevenſi, Menapiorum Principis filia, natus est Ludovicus, Rex Galliae, ejus nominis duodecimus. Is Carolus, audita Philippi avunculi morte, occasione minime defuit, quin transmissio in Italiam cum justis copiis Raynaldo Duce, hæreditatem vindicaret: verum à Raynaldo strenuo hercle Duce, sed valde præpropere, Fortuna nequaquam stetit: Alexandria enim ferme tota ultra Tanarum capta, quum oppidum Castellacium oppugnaret, eo eventu cum Bartholomæo Colcone, Astoreque Faventino Mediolanensis Reipublicæ Ducibus, prælio decertavit, ut profligatis ejus copiis, fortiter, sed postremo frustra repugnans caperetur.

Eo tempore Veneti invalidum adhuc incertæ libertatis statum invaserant, ita ut singulae imperii civitates, quum Mediolanensibus civibus parere subesseque indignarentur, novos sibi Dominos quarerent. Placentini & Laudenses sese ultro Venetis dederunt; Papienses & Derthonenses Franciscum Sfortiam recepere; Novarienses Vercellis proximi ad Sabaudium inclinabant. Sed Franciscus Sfortia Mediolanensium auspiciis Venetos adortus, expugnata Placentia, Laudeque recepta, ita eorum vires memorabili prælio ad Caravagium condit

tudit, ut Veneti maximi periculi metu, & felicitate tanti Ducis perterriti, cum Sfortia pacisci cogerentur; ea tum insidiosè oblata conditione, ut si in Mediolanenses arma converteret, ad parandum ex fœderi testamento Principatum, ipsi in id bellum validas copias prægrandemque pecuniam conferrent. Itaque Sfortia detergo pudore, in hanc spem à Fortuna sublevatus, quum alienati animi causas prætenderet, illico diremit amicitiam, armaque intulit. Nec multo post, votis ejus vehementer adspirante victoria, Veneti ab eo pari impudentia ad Mediolanenses defeecerunt. Sed Mediolanensibus turbide & cruentè Rempublicam administrantibus, invicti Ducis virtuti Fortuna comes fuit: nam brevi Mediolanenses armis fameque perdomiti, frustra adjuvantibus Venetis, Sfortia se dediderunt. Idem fecere reliquæ civitates: pacatisque demum rebus, Franciscus, ut imperium armis partum Cæsaris auctoritate stabiliret, per Legatos postulavit à Cæsare, ut quod adoptionis jure consecutus esset, Augustali diplomate confirmaretur. Verum quod id multo majore pecunia quam putarat, coemendum foret, Cæsaris munus generose contempsit. Vir enim magnitudine virtuteque animi nemini secundus, ineptum & ab ærarii tenuitate prorsus alienum existimabat, eum dignitatis titulum ex venali membrana ceraque Cæsaris præferre, quem spectata bello virtus & invicta arma detulissent. Galeacius quoque ejus successor paternum secutus exemplum, in ea re comparanda ne mediocrem quidem sumptum faciendum putavit; ita ut primus Sfortianæ gentis Ludovicus id Cæsaris diploma à Maximiliano, quater centum millibus aureis nummis impetratum, ambitiose quæserit, excluso Galeacii fratris filio: quoniam ipse Francisco patre dominante, hæreditateque potito, natus esset, secus ac fratri Galeacio, apud Firmum Piceni agri nato, educatoque, in privata patris fortuna contigisset; qua natalitii juris prærogativa, ex *Historiis* Cornelii Taciti repetita, fratrem, ejusque liberos, & nepotes antecedere videretur. Ea diplomata impetrata sunt, quum Carolus octavus, Galliarum Rex, ad repetendum ex antiquo jure Andegavenfis hæreditatis Neapolitanum Regnum, superatis Alpibus Papiam venit, ut Joannem Galeacium inviseret biduo post moriturum: quo, non sine suspitione veneni, vita functo, Ludovicus patruus desumptis insignibus, Mediolani Dux & Princeps acclamatur. In eo autem diplomate, tanta scilicet pecunia coempto, diserte appositum fuerat, ut ipse, liberique ejus, & successores legitime procreati, Mediolani Duces appellarentur. Subjungit quoque Corius, historiarum Scriptor, huic diplomati ad unguem transcripto, insertoque *Historiarum* volumini, codicillos appositos fuisse, aliqua, ut credi par est, superaddita pecunia, quo benignus ac apprime liberalis Cæsar ad nothos & spurios, si legitima proles interisset, eadem Principatus jura transferebat. Sed horum solemne exemplar non comparuit, suppressum utique, si existit, (quod non affirmaverim) à Ludovico, demum à Maximiliano Franciscoque liberis: at mox extincto Francisco, in manus Cæsarianorum à Maximiliano Stampa arcis custode ex scriniis Sfortianis traditum; quanquam is, ut nonnulli Sfortiano nomini faventes prædicant, exempli copiam Joanni Paulo, Ludovici ex concubina filio, benigne, sed occulte, fecisse dicatur.

Cæterum non toto vertente anno quum Rex Carolus ex incruenta celerique victoria, ejectis Aragoniis, formidandus evasisset, propterea non mani metu ad arma consternati Principes à Carolo discessissent, Ludovicus Aurelianus ab Asta sua urbe promotis regiis copiis Novariam occupavit, ut inde fretus occasione novi belli, cernendæ hæ-

reditatis iter aperiret. Jamque Insubres trepidante Sfortia, ad defectionem animos inclinabant. Sed is conatus ad recte exploratam facilemque victoriam secundo eventu caruit: quum Ludovicus ingenti fœderatorum hostium exercitu post Parrensem pugnam oppugnatus & obsessus, Novaria excedere cogeretur, Carolo Rege cunctantius atque tepidius, quam oporteret, opem ferente. Verum triennio post, Carolo sine liberis vita functo, Galliarum Regnum consecutus, inito cum Venetis fœdere, Sfortiam vehementi impetu expulit, reversumque demum ex Germania ad Novariam vivum cepit. Eo modo sine vulnere Insuorum Principatu potitus, quanquam nihil sibi ullo tempore timendum putaret, uti erat eximie prudens, & utramque fortunam probe expertus, quod hæreditate legitima & justis armis vendicatum arbitraretur, auctoritate Cæsaris corroborandum existimavit. Igitur cum Maximiliano Cæsare, qui ex Tridentinis Alpibus ad Benaci lacus fines pervenerat, numerata pecunia transactum est, procurante ejus negotii tabulas Georgio Ambrosio Rothomagensi Cardinale in hanc formulam, *Ut Ludovicus ejusque gener ex Claudia filia, Franciscus Angolsmorum Regulus, liberique demum ejus & posteræ successores beneficiario jure, Mediolani Duces appellarentur.* Verum Germani Cæsaris Consilarii in ipso concepti diplomatis contextu particulam trium verborum inferebant, quæ concessionem sine præjudicio alieni juris factam ostenderet, quod Cæsar pudore incolumi prioris diplomatis septennio ante Ludovico Sfortia ejusque liberis concessi penitus oblivisci non posset. Aderat tum Georgio Cardinali Giofredus Carlius Senatus Mediolanensis Præses, juris intelligentia clarus. Is ad avertendas ferendæ litis occasiones egregie cautus, eam trium verborum sententiam nequaquam ex usu Regiæ petitionis esse diserebat, quod non extincta omnino, sed rediviva Sfortianorum jura, non obscure denunciaret. Sed Georgius, ut quoquo modo transigeretur, constantibus in id Cæsaris Consiliariis, ea verba generose contempsit, quum diceret, ipso Ludovico Sfortia patre in Locensem carceris caveam conjecto, filios impuberes, qui apud Belgas in hospitali diverforio inopem vitam traducere, potentissimo Regi sero litem moturos.


Neque Giofredus in præsentienda lite falsus omnino vates fuit, quando ea demum ambigui ac ideo funesti juris particula non Italiam modo, sed Europam omnem invecito exitiali bello maxime conturbarit. Siquidem Ludovico duodecimo post subactos Ligures, Venetosque terrestri imperio penitus exutos, ad convellendam Juliæ Pontificis auctoritatem Concilium Pisis indicente, non aliunde Julius Pontifex quam ex his tribus verbis tuendæ dignitatis occasionem arripuit, ut Maximilianus Sfortia in paternum Principatum reduceretur. Sicuti & Leonem Pontificem octo post annos, eandem belli causam secutum, ut Parmam Placentiamque reciperaret, Mediolano Gallos depulisse meminimus. Non defuere tamen summæ gravitatis Jurisconsulti, qui ea verba tanquam obscure dissimulanterque prolata & descripta in solennes codicillos non perinde valere judicarent, ac si diserte expresseque ad declarandam sinceri sensus sententiam apposita fuissent, præsertim in gravissimis (ut ajunt) feudorum concessionibus, in quibus aperte & plane scienter ad non dubiam æqui juris intelligentiam cavisse oporteat. Sed hujusmodi controversias vel eruditissimi legum Interpretes nunquam tempestive definiunt, quum magnæ lites non in foro, sed pro castris Marte judice dirimantur. Dedit itaque Franciscus Rex non gravate multis obtestationibus Clementis & totius Italiæ precibus (quod non aliter gravissi-

mo bello finis imponi posset) ut tantisper de jure suo decederet, & Sfortiam regnare pateretur, quem à Cæsarianis Majestatis reum factum, ac impotentibus circumventum armis, paulo ante transmissis auxiliis adjuvarat; ipso præsertim Carolo Cæsare magna tum æquitate moderati animi Franciscum Sfortiam Bononiæ in gratiam, Augustique Imperii clientelam recipientem. Sed Sfortia eo Cæsaris beneficio & Francisci Regis indulgentia diu uti non potuit: repentina enim & inexpectata populis morte sublatu est, ut novas fatalis belli causas aperiret, quo iterum Europa vastaretur.

Igitur Rex Franciscus Sfortiana stirpe penitus extincta, tota ejus ambigui juris suspicione liberatus, à Cæsare, qui tum ex Africa nobili parta victoria reversus, Neapolim Romamque pervenerat, postulavit, ut Mediolanensis Principatus redderetur, qui sibi & liberis præclaro hæreditatis jure, & Maximiliani demum Cæsaris legitima concessione, in non dubiam ditionem obveniret. Verum Cæsar, qui Regiis Legatis aliquam propinquæ, sed nondum maturæ, liberalitatis spem dedisse videbatur, ubi Romæ fuit, opinione Gallorum durior est inventus, usque adeo averso obfirmatoque animo, ut quum Legati Regii inanibus promissis se circumduci, & Franciscum suo legitimo jure fraudari quererentur, Carolus ad Pontificem, Senatunque omnem, & Legatos Principum, orationem haberet, luculentam hercle, sed æquo amariorem; quum pro tuenda dignitate, avertendaque invidia veteris odii memoriam refricasset. Cæterum exitus orationis fuit, ut negaret quicquam se fa-

cturum ex voto Regis, nisi Subalpina oppida cum Taurino, Gallicis armis Carolo Sabaudio nuper adempta, redderentur. Agnovere tum plures id esse Cæsariani animi decretum, ut quamdiu arma valerent, ab Italia Gallos arceret; ipseque opportuno atque opulento Insubrum Principatu potiretur. Atque ita non multo post auctus viribus, terra marique Narbonensem Provinciam uno simul tempore Belgicis armis Galliæ inferioris fines invasit, scilicet ut Franciscus domestico oppressus bello, Subalpinæ regionis præsidia deducere, Italicarumque rerum penitus oblivisci cogeretur. Sed Gallis utrinque fortiter suos fines defendentibus, ex eo bello, quod tum frustra susceptum fuit, alia atque alia summæ calamitatis secuta sunt bella; quum violatis induciis & desperata concordia, post afflictas nostras opes, barbaro hosti aditus ad occupandam Pannoniam sit patefactus. Nec hercle sperandum videtur, ut ille fatali nostra socordia factus ingens hoc anno, qui est ab excessu Francisci Sfortiæ, hujus diri belli duodecimus, omnino conquiescat, quin reliquas Pannoniæ Noricique urbes novis illatis cladibus perturbet; nisi Cæsar ad victorias de Barbaris natus, pio generosoque animo recenter icti ad Sueffionum urbem foederis conditiones respiciat, patremque tuum orbatum præstantissimo filio, dejectumque obiter spe pacis, benigne consoletur, adinventam scilicet tolerabili aliqua æqui juris conditione, ut Christianus orbis pace tandem vel sera, ipsius maxime immortalis beneficio, perfruatur, & veræ demum summæque laudis & gloriæ trophæa barbarico in solo defigantur.

F I N I S.



JO. ANT. CASTELLIONAEI,

J. C. SACRAE THEOL. DOCT. ET VICARII PER-
PETVI ABBATIAE S. VINC. IN PRATO,

MEDIOLANENSES
ANTIQUITATES,

EX VRBIS PAROECIIS COLLECTAE,

Ichnographicis ipsarum tabulis, recentibus rerum memoriis,

Variis Ecclesiasticis ritibus auctae & illustratae.

AD

ILLVSTRISSIMVM ET REVERENDISSIMVM,

DD. CAROLVM CARAFFAM,

*Episcopum Aversanum, Commendatarium Abbatiae S. Vincentii in Prato Me-
diolan. & Prioratus D. Albini Viglevan. Apostolicumque
Nuncium apud Caesarum Majestatem.*

ILLVSTRISSIMO AC REVERENDISSIMO,
D. D. CAROLO CARAFFAE,

Episcopo Aversano, Abbati D. Vinc. Mediol. Præposito S. Albini Viglevanen. & S. Sedis Apostolicæ Nuncio apud Cæsaream Majestatem, &c.

JO. ANTONIVS CASTELLIONAEVS

S. P. D.



AM diu animo versavi meo, Illustrissime ac Reverendissime Præsul, quam potissimum ratione tot, tantisque tuis erga me meritis, meæque erga Te propensissimæ voluntati satisfacere possem. Una scilicet ea me cogitatio angebat maxime, quoque me Dominationi tuæ debere plus sentiebam, eo iniquius ferebam imbecillitatem meam. Ecquis enim unquam vel Te de facie novit, vel sermones suos tecum contulit aliquando, vel à Te beneficium aliquod postulavit, aut quæ de tua incredibili humanitate circumferuntur ex aliis audivit, quem non sibi statim aut tuus nobilissimus adspectus, aut orationis suavitas, aut singularis munificentia, aut rerum à Te præclare gestarum repetita memoria, totum devinxerit; summo plane beneficii ducentem loco, quod Te intueri, tecum loqui, à Te vel levidense munusculum reportare, de Te dignissima persona illa, quam summa cum dignitate sustines, audire contigerit aliquando? Quale igitur tanto Præsuli decus asferre poterit aliorum obscuritas, quale ornamentum inopia cæterorum? Nemo est omnium, qui nesciat, quibus Majoribus ortus fueris, quibus cum principibus Italiæ familiis affinitatem inieris, quænam ipsemet pro Reipublicæ Christianæ incolumitate, dignitateque gesseris, quo loco perpetuò fueris, non tam apud sanctiss. feliciss. recordationis Pontificem Paulum V. qui Te ad honorificentissimos dignitatum gradus evexit; & apud beatissimum faustissimæ memoriæ GREGORIVM XV. qui Te Cæsareæ FERDINANDI supremi totius Orbis Christiani Principis Majestati, Apostolici Nuncii Titulo affidere voluit; quam apud sanctissimum, vereque summum sacrorum nostrorum Antistitem VRBANVM VIII. à quo approbata prædecessoris Pontificis mente, in eadem, quam probe semper administraſti, Provincia permanere jussus es, ut sperem Te, re bene gesta, brevi tuos dudum humeros ambiente purpura decorandum. Nihil ego sane aliud habeo, quod Amplitudinis Tuæ meritis, ac virtuti, præter vota publica, ardentius exoptem. Quibus denique clarissimæ CARAFFAE Gentis splendorem muniis in omnibus, tum privatis, tum publicis in amplissima Terrarum Orbis Urbe, atque adeo toto fere in Orbe factum tectumque defenderis, & defendas. Ea re quo altius tua Te virtus, morum tuorum integritas, summorum Pontificum gratia, Majorum splendor attollit, eo magis Tibi addictorum vires debilitantur, conatusque franguntur. Sed enim ingeniosus Amor, & efficax grati animi vis, quod sibi in nobis ad Te extollendum deesse intelligunt, in Te uno reperiri dum vident, tua Tibi sufficere judicantes, studium ut Tibi suum, suamque observantiam aliis destituta præsidiis probent, tuum Tibi splendorem, Honores, Titulos, Gloriam, decora, & ornamenta omnia offerunt, summisque à Deo Opt. Max. precibus enixe contendunt, ut

D E D I C A T I O.

ut eadem Tibi perpetuo felicitet, ac fortunet, dum hos qualescunque labores nostros in honestandis Sacerdotiis tuis, eorumque Memorabiles Antiquitates è tenebris oblivionis quodammodo vindicandis hilariter exantlatos, Immortalitati Clarissimi Nominis tui consecrant, ac sub augustissimis auspiciis tuis lucem in apertam mittunt. FLORILEGIUM nempe istud est tui VINCENTIANI PRATI, quod ut ea fronte, & humanitate excipias, qua res tibi charissimas, & Tuas, etiam atque etiam rogant. Ac ne Amplitudo tua rebus se longe minoribus offendatur, antequam oculos ad alia conferat in ipsa operis fronte nominis nempe Tui splendore consistat. Ita fiet, ut Te ipsum intuens, nostra non intueri non possis, & uti nos amas non amare, ut nostra. Utrumque mihi nunc votum solemne est, cum quo ut felix vivas, bene valeas, ac perannes, vitæ, incolumitatis, & immortalitatis summum largitorem veneror. Mediolani Kalendis Augusti an. MDCXXV.

J O. A N T. C A S T E L L I O N A E I I N F L O R I L E G I U M A N T I Q V I T A T V M P A R O C I A E D. V I N C E N T I I I N P R A T O P R A E F A T I O A D L E C T O R E M.



DEMANDATA mihi jampridem Provincia fuit ab eo, cujus nutus habeo pro mandatis, ut Nomina Martyrum Trium, quorum sacrosancta Corpora in inferiori D. Vincentii in Pratis Aede lapideæ arcæ commissa, præcipua quadam Mediolanensium religione coluntur, inquirerem, necisque genus, quod Athletæ fortissimi post alia multa pro Christi fide suscepta certamina subiere: Martyrii præterea locum, & diem: Prætores ad hæc, Proconsules, vel Tyrannos, sub quibus laude præclaræ confessionis illustres æternæ gloriæ præmia sunt adepti: modum tandem, ac tempus; quo sacram illam in Basilicam pervenire ab obsita pene situ memoriam vindicarem, & quod ejus fieri pro ingenii modulo posset, conatus hac in parte nostros publici juris esse vellem majoris excitandæ pietatis ergo in animis hominum religiosorum. Gravis una quidem ex parte Provincia, & humeris nostris impar: at ex altera talis, ut nisi illam sæpe, ac sæpius constantissime, detrectatam tandem aliquando suscipere decrevissem, inuri mihi jure posse prospicerem non levem pertinaciæ notam, brevique fore, ut frigida nimis erga tam eximios cœlites pietatis nomine vapularet is, quem minime, pro ea persona, quam sustinet, decuisset. Quamobrem, eos ut scopulos declinarem, admovi statim operi manum, ac omnia monumenta Patriæ, totamque Ecclesiasticam Antiquitatem conturbare cœpi. Cumque legenti mihi multa, eademque summa animadversione dignissima occurrissent, quæ ad Vincentianam Basilicam facere videbantur, statuebam apud animum meum initio, muneri me satisfacturum meo, si unum illa tantum in corpus suo quæque loco, & ordine redegissem, redactaque misissem ad eum, cujus id urgente imperio præstitissem, eo tantummodo consilio, ut parerem, daremve typis, ac luci eam tantum ob causam ne perirent. Absit enim, ut mihimet ipsi conscius tenuitatis, & imbecillitatis meæ, tantam me Provinciam aggressum esse profitear, quod inde paratam labori meo laudis alicujus adoream arbitrarer: & si quidem ea me cupiditas incessisset, laudi mihi satis superque duxissem fore, Viro omni genere laudis abundanti morem ea in Sparta gerere potuisse, quam ut adornare pro dignitate nequissimè, satis fuisset in ea quippiam voluisse.

Verum enim vero cum isto perfunctus munere pro virili, probataque opera nostra per literas ei, cui perspectam esse maxime cupiebam, meminissem alia præterea me legisse, quæ non tam Basilicam ipsam Vincentianam attingerent, quam ad sacras alias Aedes Parociæ pertinerent, operæ pretium me facturum duxi, si singula veluti FLORES quosdam hinc

P R A E F A T I O

inde collectos ex confusis illis priscae memoriae monumentis digerere in peculiares locos, quinaribus admoti Piorum, si non eas recreare, saltem excitare possent ad alios, iis suaviores, in posterum decerpandos in iisdem Hortis.

Placuit ob id igitur Opellam quoque nostram FLORILEGII titulo decorare, collectosque FLORES per FASCICULOS potius, quam per CAPITA, reiecto trito nimis, atque decantato vocabulo, dispertiri. Brevitas enim, cujus amantissimi semper fuimus, & ordo rerum simplex, ac liber, quem lubentes amplectimur in scribendo, oeconomiam ejusmodi jure sibi suo quodammodo vindicabant; nec aliud sumministrare poterat Nobis adjacens D. VINCENTIO PRATVM, à quo cognomen cepit, nisi pulcherrimos GLORIAE Sacrae pariter, & Prophanæ FLORES, quibus & olim abundavit uberrime, & nunc etiam in dies magis ac magis affluit ad commendationem loci. Quid quod Historiam nullam mihi mens fuit conatibus hisce nostris exiguis Posteritati dare; sed iis potius, quibus majores ingenii vires, majoremque copiam facultatemque dicendi Natura largita est, materiam justis ferti Historici contexendi quoquomodo per gravissimas curæ & sollicitudinis animorum occupationes possem, subcestivo otio comparare; nec isto ex mustaceo tam lauream quærere, quam aliorum laborem, ne ista quærerent, levare studui, ac ne in furto deprehenderer, quorum etiam lectione profecerim verecundia quadam ingenua profiteri. Ideo quaecunque animadversa Nobis in hoc excursu sunt EX FIDE non tam BONA, quam OPTIMA referemus. Ac primo quidem, & secundo loco, quæ de BASILICA VINCENTIANA reperimus, ut quæ sacris aliis totius Viciniae Templis Antiquitate & Majestate præstet, oratione persequemur. Tertio loco Divorum ipsorum exuvias & segmina. Postremo, quæ de antiquo Monachorum Cænobio, Prædiis ejusdem, & Fructibus, Sacerdotiis, Reditibus, & Jurisdictione literarum beneficio supersunt, & hæc quidem omnia in primæ Sectionis Fasciculis. Ea vero quæ se mihi reliqua de Paræciæ ipsius Prato, cæterisque Sacris ejusdem Aedibus obtulere in secunda Sectione, & sequentibus hac concepta spe, quod etsi magna non erunt, aut usquequaque recondita, tamen ut humiles myricæ interdum, reptantesque per humum lascivi hederarum pampini, & in tabernarum fronte promptæ merces magis quam in penetralibus interioribus, & hypothecis abditæ resciant intuentes; sic studiosi Ecclesiasticæ Antiquitatis, nec obtrectandi livore suffusi quaecunque in lucem è tenebris evocata REI SACRAE BONO cum aliis communicamus, æqui, bonique consulturi sint, ac si forte fortuna majora cupientibus sua non placebunt mole, grata certe ipsa rerum varietate futura sint. Reperiet enim passim in his Lector non contemnendas venerandæ Antiquitatis Inscriptiones, lapides non vulgares, Elogia clarissimorum Hominum, Tumulos Majorum Cineribus excitatos, & alia ejusmodi priscae memoriae monumenta, quæ neminem unquam pœniteat reperisse. Quod si quis adhuc subductioris supercilii Cato eadem parvi facienda duxerit, ut aliunde emendicata; norit is à nobis nullam in hoc opere ingenii, nullam eloquentiæ commendationem quæri, sed aliquod specimen tantum noscendarum Antiquitatum Patriæ nostræ cupidis exhibere, ne dormire in utramque, quod ajunt, aurem videamur. Ita scilicet facti & instituti sumus, ut alienis rerum memoriis potius quam nostris elucubrationibus oblectemur, scientes majoris semper ponderis ac fidei fuisse monumenta Priscorum, quam novas Recentiorum commentationes, modo illæ fideliter (ut certe fiet à nobis) in medium ex ipso veritatis aditu proferantur. Nullam porro afferimus excusationem crassioris styli, cum Historiæ præcipua virtus sit Veritas, cujus sermonem brevem esse decere, nudum, simplicem, & apertum Euripides docet. Nativo siquidem illa suo candore contenta, satis ipsa sibi, superque est, nec peregrinis admodum vestibis delectatur: lenocinia vero verborum, fucorumque pigmenta mirum quantum nervis suis omnibus aversetur, detestetur, damnet. Ecquis sana mente præditus non irriserit eum, qui reiectis rerum ponderibus, ac momentis, malit atramento malo chartis suis illinire ea, quæ solo sono detineant aures otiosas, quam quæ sua majestate impleant, & solentur. Medulla sane mihi rerum pluris semper fuit, quam inanis cortex: nec ullus unquam qui saperet fructus habere cum posset, decerpere recusavit, annosa licet ex arbore, flosculorum amans.

Veniam certe speramus ab æquis aestimatoribus Digressionum frequentium, ac justo fortassis etiam longiorum. Neque enim scribendi cachoetes nos extra oleas (quod ajunt) adduxit, nec otio abutendi libido nos tenuit: atqui id præstitimus non inviti, ut operi verborum inconcinnitate displicituro, rerum varietate gratiam aliquam conciliaremus, Naturæ rerum ipsarum Parentis exemplo, quæ res ipsas mira quadam inter se varietate distinxit, ut quæ multitudine sua, ac copia fastidio esse potuissent, ipsa varietate placerent. Prævidebam enim fore, ut solius Vincentiani Templi res jugi serie descriptæ tedium omni proculdubio parerent, quod hujusmodi rerum dissimilium narratiunculis sublatum iri magna ex parte confidimus. Fuit mihi quoque non uno in loco à proposito tramite desectendum, ut controversas aliquot cum Amicis amice subortas de medio tollerem, quas sub judice relinquendas esse diutius non putabam. Habebunt mihi quidem certe pro hujusmodi prolixitate gratiam non vulgarem ii, qui res à memoria nostra longe distitas, ac remotas obviis ulnis excipere consueverunt. Multa enim antiqua, vetusta, semisepulta in hisce digressionibus luci dedimus, quæ circum se fusis è tenebris, tempore nullo fortassis in posterum emerfissent; nisi ex illis nostra nunc industria emerfissent.

A D L E C T O R E M.

*His igitur veluti præsidiis communitum FLORILEGIUM nostrum lucem in apertam pro-
dit hilari & serena fronte, qua si, BENEVOLE LECTOR, idipsum exceperis, prope
diem fortasse, accipies alia in argumento non dissimili collecta ex eadem manu. Sin aliter
evenerit, ipsa nos conscientia juvandi quamplurimos recreabit. Legas Tu tantum velim,
quæ præsentī damus EA LEGE, QVA INTER BONOS BENE AGIER OPORTET; EX AEQVO
scilicet ET BONO antequam florum nostrorum ex numero quemquam censeas, judices, velex-
pungas Majorum more. Interim bene vale; & æternum vive, ut Majores ipsos in studio
Pietatis, cujus attingendæ studio labor iste noster totus inservit, longo intervallo vincas.*

C E N S V S

A V C T O R V M,

Qui hic citantur, illustrantur, emendantur.

A. A bbas Panormitanus. Achilles Mutius. Acta Ecclesiæ Mediola- nensis. Ado Viennensis. Ælianus Spartianus. Afflicat. J. C. Albericus de Rosate. Aldus Manutius. Alexander da Imola. Alphonfus à Castro. S. Ambrosius. Andreas Alciatus. Andreas Monachus Val- lis Umbrosæ, M. S. exstat apud Jo. Jaco- bum ab Ecclesia. Andreas Palladius. D. Anselmus. Antonius Augustinus. Antonius Lazar. Arnulphus, M. S. in Bi- bliotheca DD. Cano- nicorum Ordinatio- rum Metropolitanæ Ecclesiæ. Audovenus. D. Augustinus. Aurelius Prudentius. Aufonius.	B. Bagnaræ Episcopus. Baldus J. C. Bartholomæus Socinus. D. Basilus. Beda Venerabilis. Benvenutus, M. S. apud hæredes Donati Cuppæ. Bernardinus Arlunus, M. S. in Bibliotheca Ambrosiana. Bernardinus Corius. D. Bernardus Abbas. Beroldus Major in Bi- blioth. Metropolitana. Bonaventura Castellio- neus. Ejusdem M. S. de xi. Episcopis Mediola- nensibus in Bibliothe- ca Metropolitana. Bonvicinus, M. S. apud hæredes ante dicti Cuppæ. C. Cardinalis Zabarella. Carolus Sigonius. Carolus à Basilica Petri. Catullus Poeta.	C. Cattillianus Cotta, M. S. apud DD. Archintos. Cæsar Baronius. Cæsar Franciotus. Clemens Alexandrinus. D. Clemens Pontifex Max. D. Chrysostomus. Concilium Aquisgranen- se. Concil. Cameracense. Concil. Colonienfe. Concil. Provincil. VII. Mediolan. Concil. Tridentinum. D. Didacus Lopez. Didacus Stella. Dio Historicus. Dominicus Amfossius. Donatus Boffius. E. Epistolæ Decretales. Epistolæ Ducales, M. S. in Cancellaria Senatus Mediolanensis. Eusebius Cæsariensis. F. Felinus J. C. Festus. Franciscus Bernardinus Ferrarius. Franciscus Cicereius, M. S. in Bibliotheca Am- brosiana. Franciscus Petrarcha. Fulvius Ursinus. G. Galeotus Martius. Gratianus. Gaspar Bigatus. Gaudentius Merula. Georgius Merula. Gottifredus historicus Viterbiensis. D. Gregorius Magnus. D. Gregorius Nyssenus. Gregorius Turonensis. Gretserus. Gruterus. Guidus Vaninius. Gulielmus Duranti. H. Hieronymus Bursarius. Hieronymus Magius. D. Hieronymus. Hieronymus Vida. Horatius Poeta. I. Jacobus Andrevetius.	J. Jacobus Galvaneus, M. S. in Bibliotheca Am- brosiana. Jacobus Guala. Jacobus Menochius. D. Ignatius Episcopus. Joannes Cuspinianus. Jo. Maldonatus. Jo. à Cartagena. Joannes Molanus. Joannes à Monte, M. S. D D. Vicecomitum Sexti Calendas. Joannes Baptista Vico- mercatus. Jo. Franciscus à Basilica Petri. Jo. Paulus Lomatius. Joannes Tortellius. Jo. Vitalis. Josephus Hebræus. Josephus Ripamontius. Isidorus. Justus Lipsius. Juvenalis Poeta. L. Landulphus à S. Paulo, M. S. Bibliothecæ Metropolitanæ. Laurentius Justinianus. Laurentius Surius. Leander. Lilius Gyraldus. Lucanus Poeta. Ludovicus Romanus. M. Martialis Poeta. Martiniana Chron. M. S. Mascardus J. C. Matthæus Raderus. Metellus Poeta. Mombritius. Moyfes. M. T. Cicero. M. Velfet. M. Vitruvius. N. Natta J. C. Nicander Historicus. O. Onuphrius Panvinus. Optatus Milevitanus. Ovidius Naso. P. S. Paulinus Nolanus. Paulus Diaconus. Paulus Morigius. Peraldus. Paulus Palacius. Persius Poeta.	P. Petrus Breconius. Petrus Episcopus. Petrus Galefinus. Petrus Casoratus. Platina. Plato Philosophus. Plautus Poeta. Plinius Cæcilius. Plinius. Plutarchus. Polydorus Ripa. Polydorus Virgilius. Polybius. Propertius Poeta. Prudentius Poeta. Philippus Decius. Philippus Diez. Philippus Ferrarius. R. Rainerius Suoygonda- nus. Ripa J. C. Rodobaldus Ticinensis. Rolandus à Valle. Ruinus J. C. S. Sabellicus. Seneca. Servius Honoratus. Sicardus Historicus. Sozomenus. Speculator Summistæ. Statius Poeta. Stephanardus Dominica- nus. Stephanus Vinandus Pi- ghius. Strabo Geographus. Suetonius Tranquillus. T. Theodoretus Cyrenensis Episcopus. Tibullus Poeta. T. Livius. D. Thomas Aquinas. Thomas Cajetanus. Tristanus Calchus. Trithemius. Turnebus. V. Valerius Maximus. Varro. Vasæus Chronographus. Venantius Fortunatus. Vincentius Cartarius. Virgilius Maro. Vsuardus. Waldensis. Z. Zonaras.
---	--	--	--	---

SYNOPSIS FASCICVLORVM FLORILEGII PRATI VINCENTIANI.

FASCIC. I. Templi D. Vincentii antiquitas, & origo. Dedicatum initio Jovi. Mentio S. Johannis Quatuor Facierum, Bifrontis, & Quadrifrontis Jani; Probi Cominii, formulae dedicationis ex voto. Conditores ejusdem, & habitatores primi. Deipara post dicatum. Primam Evangelii sementem inibi à S. Barnaba videri factam. A quibus, & quando inter Urbis Paræcias numeratum. Inscriptiones ejusdem, & tumuli, qui supersunt, à tenebris vindicati sublato Cotta diffidio cum Alciato. Unum è XII. principis Mediolani Basilicis esse.

II. Varia Templi Forma. Rotunda-ne fuerit an Quadrata. De aliis quæstum ordine, præcipue de postrema, in qua Ara Maxima, Confessio, Sacella Minora duo, Baptisterium, Sacra Turris, & campana, sacrarium, Pictura Nova, ac Veteres. Novenarii Minorumque ejus ergo Numerorum aliquot Mytheria recensita, appictaque ad finem totius Templi, & Paræcialis domus Ichnographica tabella.

III. De Sanctis Martyrum trium Quirini, Nicomedis, & Abundii corporibus. Arce eorundem primus, & postremus locus. De Confessionibus, & Cæmeteriis obiter. Descriptio Arce, & figura. Latentes in ea Martyres jussu Federici Borr. Card. & Archiepiscopi Mediol. visi. Martyrium eorundem, ac palma multiplici carmine celebrata.

IV. Rationum momenta x. de Translationibus SS. Quirini, Nicomedis & Abundii Mart. Primus ex Pannonia delatus initio Romam, inde Mediolanum ad D. Vinc. Templum. Angilberti tres. Quorsum Crux in Tumulo Gisilberti. Jo. Molani sententia ea de translatione, & alterius de tribus Regibus ad DD. Tumulum, repudiata. Nicomedes ad Romana mœnia tumultatus, in Urbe mox ad Catacumbas, ad D. tandem Vincentii Mediolani. Philippi Ferrarii lapsus in eo Cathedrali Parmensi temere tribuendo. D. Abundii & sociorum translatio Mediolanum. Verisimilitudinum vis, & locus. Fama, Traditione, Scriptis publicis, M. S. Codicibus, Diplomatis, Apostolicis, Picturis, Visitationum Actis, Reliquiarum ipsarum inspectione res omnis evidentissime comprobata. Admirabiles putei ad Sepulcra Sanctorum. Munificentia Longobardorum Regum in S. Adibus exstruendis. Epilogus verecunda Scriptoris excusatione conclusus.

V. Sacra alia Corpora Basilica Vincentiana. Insubrum antiqua sedes ubi primo condita. Urbes olim ad amnes. Ticinensis Porta commendatio ab accessu D. Barnaba, Cittadella, publicis locis. Sanctorum sepulcra in hortis. Adeodati plures. Horum quis in D. Vinc. Templo, Quisve Gallianum translatus. Festus ejusdem dies, Tumulus, & sacellum. S. Vinc. reliquie, & earum virtus. Inde Templo nomen. Templum ejusdem aliud ad Garumnam. Venantii versus expensi. Illustriora quadam alia D. Vincentii Tempia apud Gallos, Hispanos, & Mediolanenses. Vera de Corpore D. Vincentii historia. Sanctorum aliorum Reliquie in D. Vincentii Templo. Laus earundem, & Vincentiani Prati. De cultu, & veneratione Sanctorum, nec non, & Reliquiis, & præsidis eorundem.

VI. Ex occasione Monachorum Cœnobii D. Vinc. Monachalis instituti antiquitas, etymon, Principes, Regule, Lupercorum gens Fabia apud D. Vinc. Cœnobium habitare solita. Sepultura genera duo, ritus sepeliendi plures. Lupercos post Evangelii lucem solitarios, Heremitas, Monachos tandem dictos. Vincentianum Templum Beatissima Virgini quis dicarit,

Cœnobium à quo conditum. Benedictinorum apud Mediolanenses initia, & incrementa. Qui lapsi in assignando Monasterii Monialium S. Vincentii conditore. Vincentianorum Monachorum laus, regule, mores, & instituta. Historia de dente, & aureo Altari S. Ambrosii, deque sanctis ejusdem Protasii, & Gervasii Martyrum corporibus, & Heriberto Archiepiscopo quadam. Mediolani exscidium à Rubrobarbo.

VII. Cœnobii D. Vincentii opes. Paræcia fines. Viria origo, cursus, nomina. Cloaca. Nero. Canosa. Clusis. Cantarana. Coriariorum, & Capucinorum nova, & antiqua sedes. Burgationum jus, ars, rivus. Vipera Vicecomitum. Vetre antiquitas. Vecchiabia. Tributarii D. Vincentii. Fabiorum Vicus, & Porta, eorumque adventus Mediolanum. Sarcophagi nomen vetus. Sepulcra rosis spargi, & orari solita. Molliter ossa quiescant, formula sepulcralis. Hymenai ad Pontem Fabium statua declarata. Nuptiarum ritus. Vera de eadem statua auctoris sententia. Alia Cœnobii Vincentiani jura. De Præpositura D. Albin, S. Vincentii Vicariatus perpetuo, sacerdotiis SS. Viti, & Xisti, Delubris D. D. Christophori, Catherina, Caloceri, & amentium Xenodochio, scitu pleraque non indigna.

VIII. Paræcialis Muneris Dignitas, & Origo. Paræcia cur divisa, suisque singula terminis definita. Urbium, & Provinciarum cura Præsulibus: minorum locorum minoribus Sacerdotibus. Mediolanensium Paræciarum numerus major, & minor. Latens juris Paræcialis campus, sed à Religiosis Mendicantibus usurpatus. Parochorum nomen multiplex dignitatis plenum. Onus eorundem, conditio calamitosa. Vincentiana Paræcia fines undequaque dimensi, & descripti Ichnographica in Tabella. Catholici olim solis in Paræciis humari soliti. Paræcia Vincentiana laus variis ab adjunctis, ac præcipue ab artibus auri cudendi, filis superinducendi sericis, ejusdemque ab argento sejungendi.

IX. Delubrum S. Christophori ubi, quando, & à quibus conditum ordine quæstum. In angustiore formam ex voto à Civibus Mediolanensibus redactum. Qua causa sint dies duo festi apud Mediolanenses in honorem S. Christophori, & in eis civium concursus ad Templum, ubi Sancti Reliquie, & imagines plures. Quadam de ejusdem Sancti die festo, & Templo apud Landenses, in quo serpentis spina posita. Imago S. Christophori qua de causa in suburbiis, viis publicis, & extra Tempia frequenter picta. Sub titulo D. Christophori Hospitalis domus primum, deinde societas ex nobilibus præcipue viris instituta. Quantitas reddituum ejus societatis examinata. Jus Abbatie, & Parochi D. Vincentii decreto Archiepiscopalis Vicarii confirmatum in ade S. Christophori, & ejusdem Aedis forma explicata.

X. Fani D. Caloceri antiquitas, & fama; primum ex mira fontis inibi scatentis origine declarata; tum Regii diplomatis testimonio confirmata, illustrata deinde ex baptismo D. Secundi peracto in eo ab SS. Martyribus Faustino, & Jovita. Fontis ejusdem situs, Civium frequentia ad illum, sacrum olim ibi Religiosarum mulierum septum. Imaginis antiqua Beatissima Virginis Maria ad Servatoris Crucem stantis, prodigii anno MDXIX. successi, munerumque ejus occasione datorum descriptio. Procedente ævo societates variae sub diversis nominibus ibidem erectæ. Postrema Sanctissimi Crucifixi nomine nuncupata adhuc durat, & floret.

Illustrissimo & Reverendissimo,

D. CAROLO CARAFFAE,

Episcopo, Abbati, ad Cæsarem Nuncio Apost. Principi, &c.

Ad Florilegium Mediolanensium Antiquitatum à M.R.D. Jo. Antonio Castillionao illi dicatum.

CHLORIDIS ROSA NIGRA.

C A R M E N

AVGVSTINI TERZAGI,

S. T. D. Protonotarii Apostolici, Canonici Mediol.

ACCIPE collectos muscoso in margine Flores,
Quos fecunda tibi, CAROLE, fundit humus.
Num illos Oreades glomerata in montibus altis
Virginea in calathis composuere manu?
Naiades aut facto circum vaga flumina ludo
Collegere, levi cum tetigere pede?
Quo¹ Cephisi natus captus dulcedine forma
Baotias moriens nobilitavit aquas.
Pallentes violas ferulas junxere rubentes,
Dantes puniceis plena canistra rubis.
Florida luteolis vel pinxit janthina calibis
Depicta auratas Anthia funo genas?
Aut² CHLORIS Zephyro³ vincolo sociata jugali
Vimineos miscet lilia per calathos?
Illa potestatem florum donante marito
Exercens, aura flante virere jubet.
⁴ Versicolorato tergens circumdata panno
Portendit varium floribus esse decus.
Qualem Praxiteles⁵ Pario in marmore duxit,
Et coluit donis Castoris ara frequens.
Circumstant pictis incincta vestibus Hora⁶,
Queis alacri prestant ducere fronte choros.
Flora Quirinali veniens è culmine circum
Deserit insigni munere plena manus.
⁷ Dextra cicer, floremque faba fausto omine spargit,
Atque ait, Ædilis nunc mihi sacra facit.
Quos igitur ferat illa tibi, si, CAROLE, Flores,
Dat pubes, molles & nova origo crocos?
Germina si florent, mulcet si semina Titan,
Pastana exornant si tuaserta rosa?
Irriguis vernant si candida lilia pratis,
Purpureis & hiant mixta papaveribus?
Non tibi pompa deest decussa cydonia ramo,
Et sibi verbenis Virgo sacella tegit.
Lucifer, & castum culmis aurora ruborem
Inducit, risum non negat orta dies.
Vernat humus, flores & mollia pabula trudit,
Exspiratque modis purpura verna novis.
Non rosa, non Tyrias imitata papavera lucet
Desunt, aut Ida quas Venus alma fovet.
Mollia fuderunt blandos cunabula odores,
Hac Nympha calathis dona tulere suis.
Aura CARAFFAEI hos aluit fecunda Favonii,
Antiquum ornavit his suaserta genus.
Sat quoscunque ferunt campi, traxere colores,
Thessala quos magnis montibus ora creat.
⁸ Teutonicis ut primum transplantata viretis,
Experta est Italos frugibus aucta scrobes.

1. Narcissi in florem mutatio.
2. Pausanias in Corinth. Latine Floridam vertit, & ejus templum celebrat.
3. Ovid. in Fastis, Catullus, Horatius in Odis, Floram Chloridem vocant, & Zephyro nuptam fingunt.
4. Versicolor Flora, quia floribus est omnis color.
5. Floræ simulacrum à Praxitele factum in æde Castoris & Pollucis cultum tradit Plutarchus.
6. Floræ comites Gratias facit Ovidius Fast. v.
7. In Floræ manu flores ciceris & fabarum, quales Ædilis spargebat in populo in Floralibus ad lætitiā, copiam, & munerum largitatem indicandam. Ita Porphyrius relatus Greg. Gyrals. Syntagm. 1.
8. Familia Caraffa à Germania Neapolim deducta, Ferdinando I. Regi Neapolit. chara.

Cui simul ac varii affulsit clementia cæli,
Spem mæsis juvit credere, mite solum.
Quippe insigne aliis jussit caput esse tiaris,
Illustres aliis fascibus esse manus.
Accinctis aliis laudem quasivit in armis
Impellens rancis Martia signa tubis.
Fulminat hic bello, hic discordia pectora sedat,
Paceque concordi dissociata ligat.
Imperiis assueti omnes, qui legibus orbem
Instituant, terras qui ditione premant.
Inter tot Proceres series censetur avorum
Plurima, qua fastos pratereat memores.
Spirat adhuc magni gravitas, & gloria Pauli⁹
Quo duce non ultra gliscit iniqua lues:
Hic Phlegetontæam jussit secedere Erynnim,
Deforme & Stygio condere in amne caput.
SED quo Musa ruis? melioris carminis auctor
Hac canat, hac alius audeat ore loqui.
Quamquam ô coccineum cum inducet Roma colorem,
CAROLE, jam vates incipio esse tuus.
Qua sol cumque suis, me vate, it cursibus, ibis,
Teque immortalem posthuma fama canet.
Nunc quem Flora offert non dedignabere florem,
Phœbeas fas est vinciat ille comas.
Indorum flos NIGRA ROSA¹⁰ est, qua condita sulco
Externo patrias vincit odore Rosas.
Quin teneram sensim detrudens cortice gemmam
Virgulto fructum luxuriante parit.
Hac tibi sed Zephyris quando melioribus halant,
Singula sub foliis, CAROLE, signa nota.
Flos subter fibras inscriptas nomina regis,
Flos, regale apicem cui diadema premit.
Quippe Caraffæum cognomen origine avita
Ducitur, & titulis nobile stemma probat.
Assuetum imperiis, Augusto colla triumpho
Subdere, clamoris tradere jura foris.
Aptum armis, pacique genus, quod terreat hostem,
Fœdere concordi dissociata liget.
Versicolor Flori frons est, natura colores
Quotquot producit, tot ROSA NIGRA nitet.
Illis purpureum tunicis ridere ruborem,
Vellera Phocæjeo murice cotta vides.
Insigni hic numeras proavos, quos induit ostro,
Queis rerum summam maxima Roma dedit.
Sanguineus micat inde color, Mavortia censes
Pectora, pro patria qua voluere mori.
Janthina Romuleos reffert in fronde Quirinos,
Queis pressit niveas sacra tiara comas.
Luteolis connubia, & egregios Hymenæos,
Queis funo accensas subdidit alma faces.
Spem viridis culmus, frons innuit alba pudorem.
Robur carulei, qua fluit unda maris.
Florida per varios quot fingitur Hybla colores,
Tot micat, hic totidem nomina scripta legis.
Alta Caraffæa procedit stirpis origo,
Neve virere suo stipite dumus amat.
Ingeniis fecunda domus, pietatis asyllum,
Marte potens, Musis inclita, chara Jovi.
Stipitibus tua vis, tua vis, gratissima truncis,
Flos monet, ut de te, CAROLE, vaticiner.
Mixa ostro, violæque solens inolescere libro,
Prominet, illa tuum, perlege, nomen habet.
Tu Regum sanguis¹¹ certissimus, ignea virtus
Romuleis junctum patribus esse dedit.
Janthina consilio adscivit, dubiisque Quirinis¹²
Censuit, immensis censibus auxit opes.
Fecit ut insulea penderet tania vitta,
¹³ Præsul, quem flexo poplite turba colat.

9. Paulus IV. Pont. O. M. fidei Catholicæ propugnator acerrimus.
10. Achilles Statius lib. 11. Rosam nigram describit, & illius materiam.
11. Carolus Caraffa è domo Aragonia ex parte matris.
12. Paulo IV. & Paulo V. gloriosissimis Pontificibus.
13. Abbas S. Vincentii in Prato Mediol. Prior S. Albini Viglevani Commendatarius, &c.

¹ Vellera sed Tyrios tibi mox incocta rubores
De Capitolio culmine Roma parat.
² Mitteris Augusto patris ut mandata reportes,
Et discat dociles nuntia virga manus.
Socraticis pollens studiis, multoque redundans
Eloquio, Ausonii fama secunda fori.
Pieris fervens opibus, quem candida Pallas
Fertur Cecropios edocuisse sales.
Qui sedare queat, savas si exerceat iras
Cæsar, qui dictis aspera corda domet.
Cujus possessio mens est opulentior auro,
Nec cui munificas arca negavit opes.
Par donis, librisque manus, cui Cynthia compsit
Formam oris, similis cætera Mercurio.
Debueram florem, Florem accipe, CAROLE, sertis
Insere nunc, CHLORIS claudere vireta, sat est.

1. Episcopus Averfæ in Agro Neapolitano à Paulo V. Pontifice.
2. Nuncius ad Cæsarem missus à Gregorio XV. confirmatus ab Urbano VIII.

IN FLORILEGIUM
MEDIOLANENSIVM
ANTIQUITATVM

ERUDITISSIMI VIRI,

D. JO. ANTONII CASTILLIONAEI.

Ad Illustrissimum & Reverendissimum,

D. CAROLVM CARAFFAM,

Ad Cæsarem Nuncium, &c.

AVGVSTINVS TERZAGVS,

S. T. D. Canonicus Mediolanensis.

ERIPIS obscuris tumultata arcana sepulchris,
Et mansura pio carmine Tempa canis.
Marmora, aqueductus, collegia, fana, colossos,
Pegmata, Divorum busta, theatra, vias.
Expandis veteres ritus, miracula recludis,
Et nova quas moles, quas vetus urbs coluit.
Exegit liber hic monumentum firmitus ære,
Inque labore tuo fama perennis erit.
Auspice te æternum pubescent, CAROLE, Flores,
Quod tibi nec Lethe, sæcla nec ulla nocent.

Ad Illustrissimum & Reverendissimum,

D. D. CAROLVM CARAFFAM,

Episcopum Averfanum, & apud Ferdinan-
dum Cæsarem sanctæ Sedis Aposto-
licæ Legatum.

VIRTUTVM Flos alme, Virum Flos, alme CARAFFA,
Gentis honos, Fama gloria, pompa soli.
Orbis uterque tue dudum circumdare fronti
Serta parat lecti quidquid utique legens:
Lectius at nusquam nil quam quod floret in Hortis
VINCENTI cernens, hinc tibiserta legit.
Seligit & lectos lectis è floribus omnes
Antoni culta sedula cura manu.
Quidquid id est Pater alme tibi sine tempora circum
Nunc eat, & magni muneris instar eat.
Hæc tibi nata domi debentur: Florea sertas
Par erat, & floris fronte locare novi.
Roma tibi majora parat, te suspicit illa,
Teque vehunt gemina jam super astra Aquila.

Clariff. Vir Felix Ofius S. T. D. & Artis
Orat. Interpres Pub. in Gymnasio Patavino.

A D
JO. ANTON. CASTILLIONAEVM
V. R.
Amicorum suorum antistitem,
ET FLORILEGII
MEDIOLANENS. ANTIQVIT.
eruditissimum Auctorem.

QVALIS apes æstate nova per florea rura
Ducit amor mellis, mellis amore labor:
Vincenti talis te per florentia Prata
Ducit amor laudis, laudis amore labor.
Floribus hinc fidens variis, populatus amœni
Veri opes dio nectare plenus abis.
Florens Antoni sis omnis, melleus omnis.
Mel sedet hinc scriptis, flos nitet inde tuis.
Mella sed ipsa tibi, tibi se flos subjicit omnis.
Tu mage melle places, tu mage flore nites.
Idem Ofius in amoris & observantiæ tesseram.

Clarissimi & eruditissimi Viri,
LAVRENTII PIGNORIAE,
Historici Patavini,
Antiquitatum omnium peritissimi,
EPIGRAMMA,
Ad eundem
CASTILLIONAEVM.

INCLYTA qua Patria profers monumenta Joannes
Antoni, cæcis eruita de tenebris;
Nunc tandem augusta per te dum luce fruuntur,
Hæc minime mutis vocibus ingeminant:
Dii facite, ut præsens plausu quod comprobat atas,
Hoc amplectetur candida posteritas.

Clarissimi Viri,
HIERONYMI BOSSII
TICINENSIS,
ET
ROMANI PATRICII,
ATQVE
In Palatina Mediolanensi Academia Regii, &
Primarii Eloquentiæ Professoris,
S T M B V L E V T I C O N,
A D
JO. ANTONIVM CASTILLIONAEVM,
J. C. Philosophum, & Theologum Mediolanensem,
Ut suum edat Florilegium
MEDIOLAN. ANTIQVITATVM.

NIL juvat, ANTONI, patriæ decus, inter amicos
Moribus & genio semper habende meos,
Nil juvat è tenebris ANTIQVOS VRBIS HONORES
Eripuisse tua, si tua scripta latent.
Quin ea dum celas, obscura in nocte videris
Cum proprio patrium contumulare decus.
Inque tuos Cives, & publica commoda, peccas,
Sic uno factò, sic tibi & ipse nocet.
Quare age, rumpe moras, quasunque Modestia nectat,
Somnia confingens vel timor ipse struat.
Jam sine, terrarum cunctas cum Sole recurrant
Ut scripta, Aonio melle referta, plagas.
Neve tibi æterno florentem nomine Famam
Invideas, nomen ne tibi, quæso, neges.
Si tua tam variis sunt sparsa volumina rebus,
Tam culti eloquii lumine sique micant,
Quam mihi, judicio præstans, SOLARIVS olim
Prædixit librum sæpe nitere tuum,
Quam simul, ingenio florens, BELCREDIVS acri
Testa.

Testatus vero non semel ore fuit,
 Quam Phœbi & demum Claris firmavit ocellus,
 OSIVS, est Charitum qui decus ore trium:
 OSIVS ille meus, censura maximus aqua,
 De cuius dictis est dubitare nefas;
 Cur differs tantum doctos emittere fœtus?
 Ac jam cur potius mittere non properas;
 Instar Phidiaci signi tua scripta placebunt,
 Nec carbonis erit cur vereare notas.
 Si iam præclare solers monumenta polivit
 Ars tua, & ingenii Dadala cura tui,
 Archilochi poteris dentatam spernere sannam;
 Nam Momo facies tu, mihi crede, satis.
 Nec nisi mirari poterunt te, spargere semper
 Qui sale nigranti facta aliena solent,
 Invidia ac stimulis rumpentibus ilia, morem
 Mutus erit contra Zoilus ipse suum.
 Teque viri eximia tollent ad sidera laude,
 Qui in studiis nasum Rhinocerotis habent.
 Eja age, rumpe moras: jam tardum dicere, mittam,
 Esse puta; tardum dicere, mitto, puta.
 Hoc cupio dicas: emisi in luminis oras,
 Inque manus hominum, quo relegatur, opus.
 Sed retices? chartas nec vis proferre loquentes
 Clare adeo patria secula cana tue?
 Excudi has CIVES rogitant, VRBS optat in iisdem
 Prisca videre sui qualis imago fuit.
 Si vero lepidi communis gloria scripti
 Est tecum patria, Civibus atque tuis:
 Tertia si POPULO pars, VRBI tertia iure
 Etsi debetur, tertia sola tua est.
 Unus nanque potes iuste pugnare duobus,
 Supprimere ac CIVES quod, simul VRBSque petunt.
 Tu tamen injustus patriæ (mihi parce) severus
 Ac in te nimium, tu dare scripta fugis.
 Eja age, quæso, rogo, nobis monumenta liquore
 Oblita nectareo jam dato, quæso, legi.
 Flectere si nequeo at precibus te, carmina mentem
 Immotam ac nequeunt flectere nostra tuam,
 Voce quiritabo, feriet qua sidera cœli,
 Atria quæque sono Cæsaris alta petet.
 Audiet inde meas voces CARAFFIVS, heros
 Herculeum ducens ab Jovis arce genus,
 GREGORII qui sancta Patris dum iussa capeffit,
 FERNANDO retinet vocibus ora suis.
 Is VINCENTIANI coget decora inclyta templi
 Te vulgare sui, te dare & illa typis:
 Quæ quum sint Operis pars magna, & prima, resurgent
 Conjuncta his Patrii tempora prisca soli.
 Divina sed mentis opus si nobile volvi
 Doctorum manibus tu patiere virum.
 Ipsa recognoscet Veteris Vestigia Formæ
 Urbs, Circum, Herculei magna Lavacra Lacus,
 Duplicis & Muri speciem cum mole Theatri,
 Atque PALATINAE testæ sacrata Scholæ.
 Mox quoque majorum cognoscent splendida cives
 Facta, per eximios concelebranda modos,
 Quæ simul & cupient iidem renovare, parentum
 Se dignam ut sobolem laudis honore probent:
 Et qui scripsisti, quæ non Bugacius acer,
 Quæ non Murigius, Calchius atque, notant:
 Quique Operi titulum Lecto de Flore dedisti,
 Per quod majorum FLORIDA gesta refers,
 Aternos fructus, aterna premia laudis,
 Dum relegetur Opus, non moritura leges.

EJVSDEM BOSSII
 AD EVNDEM CASTILLIONAEVM
 EPIGRAMMA.

MITTIT Flora suis quotquot fragrantibus hortis,
 Ipsa legat Flores perniciofa Venus.
 Nam minio quoties ornant hi tempora, fœdo
 Illicio turpant corda pudica virum.

Quos pia sed Flores, ANTONI, cura paravit,
 Mnemosynes ductu, CIVIBVS, & PATRIAE.
 Latus utraque manu carpat, qui secula nosse
 Cana studet, priscis moribus atque frui.
 Improba quando Venus cinget sibi Flore capillos,
 Florea scripta legens is bene cinctus erit.

IN FLORILEGIVM
 CLARISSIMI VIRI
 JO. ANTONII CASTILLIONAEI,
 BENEDICTI SOSSAGI
 ELEGIA.

O Mihi perpetuo memorandum Patria nomen,
 Virtutum celebrat quam veneranda cohors,
 Cujus opes avidum stimulant descendere Gallum
 Alpibus, expertus nostra sed arma tremis,
 Cujus agri Sicula valeant contendere gleba,
 Et Libyca vincant fertilitate soli,
 Quæ faciles Marti populos, facilesque Minerva,
 Pectoraque ingenuis artibus apta creas,
 Quamque triumphale submissis fascibus urbes
 Finitima accepto jure fatentur heram,
 Emula Romanis fueras, quæ viribus olim,
 Emula nunc vera religione magis,
 Ut Divum cultu cœli mereare favorem
 Addita cœlitibus numina vera probant.
 Tu belli sortita Duces, tu lumina pacis,
 Tu felix olea, laurigerisque comis,
 Accipe dilecti lectissima munera civis,
 Cui fons Castalius nomen habere dedit.
 Ille tuos Orco veteres avertit honores,
 Eripuit tenebris nomina multa Virum.
 Quid non annorum fatalia vulnera sentit?
 Ipsa sibi fati tempora lege nocent.
 Cetera dum vastat tacitis perit idibus ætas,
 Dumque mori properat, cetera mole trahit.
 Nec parcit gemmis Indo de littore vectis,
 Dumque damnofo marmora dente vorat,
 Ipsa vorat rerum consumptrix æra vetustas.
 Exaquatque humili mœnia celsa solo.
 Heu veteris funus Romani ducite Roma?
 Exstincta cineres Urbis ubique jacent.
 Quid loquor ah demens? vestigia nulla supersunt;
 Si quæ tamen restant: dissipat illa dies:
 Ac nisi docta manus reparasset damna, ruina
 Vix sonitum audires, nullaque Roma foret.
 CASTILIONAEVS cæca nisi nocte sepultam
 Vindicet, infelix patria nulla fores.
 Ipsa renascuntur Divorum templa per illum,
 Et vivunt tumulis nomina sculpta suis.
 Ipsi nobilium manes, vulgusque silentium
 In lucem illius nunc revocantur ope.
 Cerberus Alcide vacuas cogente per umbras
 Miratus triplici dicitur ore jubar,
 Ipsa regustavit fugituras luminis auras
 Carminibus blandi conjugis Eurydice,
 Et duro implicitus somno post fata, recepit
 Amissum medica Virbius arte diem.
 CASTILIONAEVS Veterum miracula vicit,
 Res tenebris mersas qui latitare vetat.
 Certe illi fatum semel evasere, sed omnes
 Rursum egit Stygius trans Acheronte senex,
 Ast hic, nobilibus nomen quo reddidit umbris,
 Casurum nullo tempore fecit opus.

AD EVNDEM
CASTILLIONAEVM
JACOBI PHILIPPI OPICELLI,
Canon. Theologi Cathedr. Dertonensis,
EPIGRAMMA.

QVAE dudum vasto conduntur in aequore merces,
Per summas rursus nare tueris aquas.
Artus belua norat, partem satiata relinquit
Intactam, cujus vita diurna manet.
Sed quae lethifero consumunt tempora morsu
Morte sub aeterna, contumulata jacent.
Tempus edax rerum, cum rebus nomina mandit
Ingluviem vincens aequoris atque fera.
Tu priscos cineres extractos faucibus Aevi,
Ad lucem revocans, Hercule num minor es?

Ad Virum Clarissimum,
JO. ANTONIVM CASTILLIONAEVM
DE FLORILEGIO,
PETRI JACOBI
Arrigonii Theologi
CARMEN.

AEMVLA Caestes imitatur Subria partes,
Persimilique suas mutat honore vices.
Nox simul umbrarum tentoria fixit Olympo,
Oceanoque ruens abstulit omne decus.
Illa tenebrarum species horrenda minatur
Rursus in antiquum cuncta abitura Chaos.
Stellantes Titan educit in aethere Flores,
Sydereae in tenebris tunc reteguntur opes,
Conciderantve comis nimio quae arentibus astu
Florea terra Idem sydera rore fovet.
Sol facit hoc absens aliis dum lumina terris
Spargit; obire una munus utrumque potest.
Floribus Insuibrum offusa caligine, eorum
Vix ullus splendor conspiciendus erat.
Jam decora anguigera tempus protriverat Urbis,
Squaluerat patrium jam sine flore solum,
Obruerat decus omne umbris oblivio cecis,
Primus ut haud Lasso surgere posset honor.
Tu decus, Antoni, rerum, calique sacerdos,
Idem flos Hominum, floribus Almus ades.
Tu reparas melior patrii ornamenta nitoris,
Optataque iterum luce micare jubes:
Summorum quamvis tenearis mole laborum,
Vt te sacrorum plurima cura premat.
Non pateris tu nocte rapi, tu lumen eisdem
Fundis, & inflammas splendidiore face.
Non Phaetontea hi paveant incendia flores,
Non trepidentve ipsas Deucalionis aquas.
Ergo tota canit proprium te Subria solem,
Sole coruscanti non minor ipse micas.
Quod tua mortali solertia vindicat avo
Aere magis stabit, pyramidumque situ.
Hoc Jovis, hoc rabidi violenta temporis ira,
Hoc majus fati, astra tuentur opus.

IN
JO. ANTONIVM CASTILLIONAEVM
PRAESBYTERVM
DE SVO FLORILEGIO
MEDIOL. ANTIQVITATVM,
R. V.
D. AVGVSTINVS LAMPVGNANVS.

DITARVNT auri quosdam nova pondera fulvi,
Et fit dives opum, qui modo pauper erat.
Tu longe, ANTONI, tibi nobiliora metalla
Effodis, & ditas teque, laresque tuos.

Eruta terrarum sunt imis illa fodinis,
Sed tua Pieridum flumine ducta nitent.
Hac parit ingenium, Natura sed illa ministrat,
Corpus ut illa ornant, sic animum ista beant.
Fluxa illa, & variis semper subiecta periclis,
Hac firma, & nullo diripienda dolo.
Ocyus illa vorat tempus, rapiuntque latrones,
Hac tuta, & semper non moritura vigent.
Hinc tibi divitiae cedant Cræsiq; Mydaeq;
Divite quippe omni ditior unus abis.

AD EVNDEM.

AVIA quum legeret Siculos Proserpina flores,
Tartareo cessit prada repente Jovi.
Vincenti legis in pratis dum quidquid ubique
Florum est, non raperis; corda sed ipse rapis.
Longe alios flores, alia tu colligis arte,
Meme alia, atque alio Numine cura Deum.
Maeste. Tui rapiunt si flores corda Virorum,
Quas Superum pradas fructibus auctus ages?

Vincentius Castellionæus è Mediolanensi
selektorum Caufidicorum Collegio.

AD EVNDEM
CASTILLIONAEVM,

Vicarium perpetuum Abbatiae S. Vincentii in Prato vigilantissimum.

LVCIDA ne pereant Urbis monumenta paterna,
Castellionæus stemmata clara novat.
Quod patriam repares descripta volumina monstrant,
Nobile narrat opus temet avosque tuos.
Equis enim tua ferta legit, qui necesse plenum
Et dulci Ambrosia non fateatur opus?
Cælestinus oves ut cali ad pascua duxit,
Purpurea cinctus chlamyde Branda fuit.
Ut posuit toti leges Guarnerius Orbi,
Insuibrum sedes sic Bonatura dedit;
Tu Castellionæus eorum germine natus
Tot simul, & patriam lucida imago refert.

JO. BAPTISTA GVALA,
Artium & Med. Doct.

AD EVNDEM
HISTORICVM, ET POETAM.

HISTORICIS fecunda domus, fecunda Poetis
Jam redit in priscum te duce lata decus.
Historicum tu quemque prais, tu quemque Poetam,
Queis tua se quondam vexit ad astra domus.
Sic veterum monumenta legis, sic carmina condis,
Quisque tibi ut Vates cedat, & Historicus.

SEBASTIANVS MARTIGNONVS;
P. S. Sebastiani.

Ad Illustrem perque Reverendum,
D. JO. ANTONIVM CASTELLIONAEVM,
S. T. ac J. V. D.
VINCENTIANAE BASILICAE
Laudes typis mandantem,
EPIGRAMMA.

OSSIBVS imposita extollit miracula Memphis,
Non quia busta premunt, sed quia celsa micant:
Ossibus hac sacris, quae laudas, templa resurgent,
Pignus honos illis; non quia celsa micant.
Ossa tamen vivant, vivat tamen hocce volumen,
Non fuit hac major gloria pyramidum.

HIERON. PYSTERIA.
JO.

JO. BAPTISTAE SITONI
I N
FLORILEGIUM ANTIQV.
MEDIOLANENSIVM
D. JO. ANTONII CASTLELIONAEI
L V S V S.

Ad tempus Epigramma.

IMPERII retines Insignia seua rapacis?
Nil poterunt posthac: abjice cane Senex.
Castalio docti lapsus de vertice Montis
Numina magna gerens Castilioneus adest,
Urbis qui solers nostra, & monumenta Parentum
Prisca legens cecis eripit è tenebris,
Qua tacitum lenta consumere morte parabas.
Sic Heros vires deprimit iste tuas.

Ad Mediolanenſes Tetraſtichon.

GAVDETE, Insubres, festivos tollite plausus;
Vivit adhuc vestra rarus honos Patria:
Hunc celebrate Virum, dignas & solvite grates,
Hac luci Veterum qui monumenta dedit.

De Veritate dictorum Distichon.

Ipsè suos ladat Vetereſne Zoilus audax,
Conticet: incolumis Castalionus abit.

Tetraſtichon.

Naturam hic hominum prudens dum percipit unus,
Natura instinctu noscere quod cupiant,
Egregium hunc mundo Florem patefecit aventi,
Quo licet antiquum scire decus Patria.

Aliud.

Quo te Castalidum decus a quo nomine dicam
Castilione magis, quam Pater ô Patria,
Qui Patria clemens antiquos Urbis honores
Erigis, & calamo, ne pereant, vigilas?

Aliud.

Majorem, Antoni, dicam te jure Camillo,
Gallorum è manibus sustulit ille semel
Romam: sed Patria sexcenta per æva manebit
Per te mundivagum Castilione decus.

Epigramma.

Trucia Germani quondam arma, iraque feroces
Induperatoris quid potuere feri?
Quid nostram Victori evertere profuit Urbem?
Quidve solum sterili mox operire sale?
Fulgida adhuc vivunt veterum monumenta Parentum,
Splendidiorque nitet priscus honos Patria.
En solus reficit calamis Antonius Heros,
Armis Germanus perdere quod studuit.

JOANNIS VILLAE,

ſ. V. Doctoris,

A D

L E C T O R E M

C A R M E N.

FLORIBVS intextum radiantibus undique, Lector,
Tradimus, ecce, tibi CASTILIONIS opus.
Miraris? frons ipsa docet, si vera loquuti.
Collige: nec pigeat: plurima ferta dabit.
Aurea Prata colit Magni VINCENTIS Iberi:
Hinc tibi tot flores CASTILIONVS habet.
Qui licet arescant hyberno frigore passim;
Hos tamen irriguos versa tenet PHIALA.

TYPOGRAPHVS LECTORI.

IN hisce Carminibus digerendis, ne locus ullus esset reliquus quærimo-
niis eorum, qui sibi primas non deferri ægre ferunt, ex literarum serie,
ac forte, ea digerenda censuimus. Quod si quædam postremo, quæ prio-
re loco erant collocanda, excusa vides, ea non ut deteriora, sed ut minus
opportune exhibita posthabita fuisse noveris.

JO. ANT. CASTELLIONAEI
 FLORILEGIUM
 ANTIQVITATVM
 PAROECIAE
 D. VINCENTII IN PRATO.
 S E C T I O I.

FASCIC. I.

Templi D. Vincentii antiquitas & origo. Dicitur initio Jovi. Mentio S. Johannis Quatuor facierum, Bifrontis, & Quadrifrontis Jani; Probi, Cominii. Formula dedicationis ex voto. Conditores ejusdem, & habitatores primi. Deipara post dictum. Primam Evangelii sementem inibi a S. Barnaba videri factam. A quibus, & quando inter Urbis Paroecias numeratum. Inscriptiones ejusdem, & tumuli, qui supersunt, à tenebris vindicati, sublato Cotta dissidio cum Alciato. Unum è XII. principis Mediolani Basilicis esse.



ACTVRI de Basilica Vincentiana principe, quemadmodum nos facturos esse ostendimus in Praefatione, loco, divinam, uti par est, opem implorabimus, sic edocti, esse à Deo Opt. Max. actionum nostrarum omnium primordia capienda. Hoc igitur uno auspice scriptio-

nis ducemus initium ab eo, cui conditi Templi debetur honos, ne tantæ rei memoriam oblivio debeat, magnis actionibus ut plurimum inimica. Et licet quinam primus omnium Templum DIVO NVNC VINCENTIO LEVITAE AC MARTYRI nuncupatum extruxerit, ignoremus, cum nihil omnino ea de re certi prodiderint veterum Historicorum libri: illud sane uti verissimum constat, Templum hoc (si primam ejus originem recolamus) Jovis olim cultui dedicatum, locum inter cætera principem tenuisse, non solum ex communi fama mentiri nescia, verum etiam ex antiquissimis monumentis. Ejus autem conditorem Patricium Virum aliquem Romanum fuisse crediderim, sive cum Regiones nostræ subactæ armis in Populi Rom. potestatem redactæ sunt, ibi forte parta de Gallis victoria: sive cum Urbs nostra, viribus alienis oppugnata, succubuit dicato Jovi Templo ex eorum Voto, qui vicerant; cum ancipitibus in præliis Romanos olim Temppla sæpissime vovere solitos fuisse, testis sit passim locupletissimus Romanæ parens Historiæ T. Livius: sive cum eadem Regiones accepta Provinciæ forma Proconsulis mox, vel Proprætoris alicujus imperium exceperet. Fieri nempe potuit, ut tum Proconsul, vel Proprætor aliquis isthuc cum imperio missus, Templum hoc JUVANTI NVMINI consecraverit ad novi Imperii firmamentum contra Transalpinos Gallos, ad ornamentum Urbis, & decus, ad imitationem, & exemplum Patriæ suæ Dominæ Gentium, ac Terrarum. Quemadmodum enim Principes Romanæ Reipublicæ Viri Mediolani labentibus annis loca quædam publica oblecta-

C tioni scenicæ, vel honestæ Juvenum exercitationi intra Urbis ambitum extruxerunt, cujus argumento sunt Capitolium, Circus, Amphitheatrum, Comitum, & alia ejusmodi Romanæ Majestatis amplissima monimenta, quorum nunc prisca nomina sub nova Templorum specie latent: ita temporum illorum usus obtinuit, ut extra Urbis mœnia sacras divis ædes conderent, quos sibi in Tutelares & Præsides eligebant. Idcirco Jani Fanum juxta veterem mœniorum Urbis circumscriptionem foris erat ad Novocomensem Portam, ubi nunc Ædes S. Joannis cognomento Quatuor facierum, Jani nomine abolito, non figmento. Neque enim Bifrontem tantummodo Janum Antiquitas gentilitatis oppressa tenebris venerata est, qualem in Fonteorum antiquis formatum Denariis videmus, quorum ecce tibi nunc speciem repræsentō, cum ipsa vulgata Denarii nota ✱, nec non aliis similibus, valoris, & ponderis unciarum o o o o, & pro Q. li-

D

E

F



tera Magistratus, quem C. Fonteus gerebat cum hujusmodi cudi jussit. Litera T, quæ Trientis ibidem est nota, juxta interpretationem Stephani Vinandi Pighii in charactere lib. VIII. *Annalium Romanorum*.

Sed etiam Quadrifrontem; ac Bifrontem quidem ob causas non vulgares; vel enim propter exitum veteris Anni, & ingressum novi, qui in Jani tutela credebatur esse, pingebatur Bifrons, cujus ergo non solum primo Anni Mensi nomen Januarii dedit ex Ovidii mente lib. *Fast.* I. sed etiam *Fastorum Genitor*, & *Parens* ab Epigrammatario lib. VIII. epigr. II. dictus est, quod Fasti per annos singulos scriberentur, initio ab ipso primo Mense ducto, à quo subinde nomen Annus alius, atque alius capiebat: *Fastorum Genitor*, *Parensque Janus*.

Et lib. X. epigr. XXVIII. *Annorum Sator*, & *Mundi: Annorum*, nitidique *Sator pulcherrime Alundi*, *Publica quem primum vota, precesque canunt*. Et ab Ovidio:

— — — *Anni tacite labentis Origo.* Vel

Vel ne Cœli Janitor, qualem illum esse Romani sibi persuaferant, Janum suum in primo Mobili collocantes ex Aboriginum religione prisca tanquam Deorum Deum, ac Principem motuum, & actionum, quemadmodum ipse de se sic memorat apud Ovidium in supra laudato loco:

*Me penes est unum vasti custodia Mundi,
Et jus vertendi cardinis omne meum est.*

Et paulo post:

*Præsideo foribus Cœli cum mitibus Horis,
Et redit officio Juppiter ipse meo.*

Ne, inquam, Cœli Janitor in ipso Cœli limine consistens flexu cervicis tempus perderet: sed cernere non moto corpore bina simul, præterita scilicet, & futura; ortus, & occasus; fines, & exordia; quæ intus, quæ foris fierent; Eoas partes, & Hesperias posset, ut ipsemet *ibidem* subdit his versibus:

*Utque sedens primi vester prope limina tecti
Janitor egressus, introitusque videt;
Sic ego prospicio cœlestis Janitor aula
Eoas partes, Hesperiasque simul.
Ora vides Hecates in tres vergentia partes,
Servet ut in ternas compita secta vias.
Et mihi, ne flexu cervicis tempora perdam,
Cernere non moto corpore bina licet.*

Idque adeo persuasum Romanis illis fuit cœca, veræque lucis orba superstitione seductis, ut nefas esse ducerent quid serii, magnive, sacrificium etiam aliquod inchoare non prius invocato Jano, quasi is factu facilia redderet, fortunaretque facienda quævis. Hinc Tullius lib. II. de Nat. Deorum sic ait: *Cumque in omnibus rebus vim habeant maximam prima, & extrema, principem in sacrificando Janum esse voluerunt, quod ab eundo nomen est deductum. Ex quo transitiones pervia Jani, foresque in liminibus profanarum adium Janua nominantur.* Hæc ibi Tullius. Cui eleganter admodum apud supra celebratum Vatem Janus ipse adstipulatur, cum roganti Poetæ cur primis Anni novi Kalend. Januariis scilicet ab eo dicti, læta cuique verba faustaue precari invicem solerent:

Omnia principis, inquit, adesse solent.

Vel demum propter focietatem conjunctionemque duorum populorum, quam ob causam bifrons illi simulacrum Romulus, & Tati, pactis inter se foederibus, confecerunt primi; Numa vero Templum circa Argiletum imum, juxta Theatrum Marcelli, cujus Portæ duæ, quas legitimum erat aperire cum bellum esset, in pace vero claudi, ut apertis, in armis esse Civitatem; clausis vero, pacatos circum omnes esse significarent inter duo Fora. Ac de Templo quidem, & ejusdem Portis testes sunt Plinius lib. VIII. ubi de Silii Consulatu cum ait: *Erat sacellum totum ex ære constitutum quadrata quidem dimensione; tantaque amplitudinis, quanta Jani integri statua poterat aenea quinque pedalis capi, capite dumtaxat Bifrons, porta utrinque aenea, quæ pacis tempore clauderentur, instante autem Bello aperiebantur, vocabaturque Janus Geminus.* Et Ovidius in Fastis:

*Omnis habet geminas hinc atque hinc Janua frontes;
E quibus hæc populum spectat, & illa Larem.*

Quam ob causam etiam Janum ipsum paullo ante induxerat se modo Patulcium, modo Clusium appellentem:

Nomina ridebis: modo namque Patulcius idem,

Et modo sacrificio Clusius ore vocor.

Scilicet alterno voluit rudis illa vetustas

Nomine diversas significare vices.

De duplici vero Foro adjacente Templo idem *ibidem* Tomitanus Vates non multo post ea de re Janum interrogans:

Cum tot sint Jani, cur stas sacratus in uno,

Hic ubi Temppla foris juncta duobus habes?

A Uti ex responso Jani de Templi conditi causa, & Tatio conditore:

*Ille manu mulcens propexam ad pectora barbam,
Protinus Oebalii rettulit arma Tati, &c.*

B Atque his quidem de causis Bifrontem effingebant Janum veræ fidei lumine destituti. Subdam nunc causas quadruplicis faciei, ac præcipue duas. Una fuit ob quatuor Elementa, quæ ab illo extitisse putabantur, cum prius omnia Chaos essent: Altera propter quatuor Anni tempora Ver, Æstatem, Autumnum, Hyemem, quorum omnium vicissitudines moderari credebatur unus, uti medocuit Marlianus lib. IV. cap. VIII. Albericus de Imaginibus Deorum, & ipse præcipue Janus se cum Chao unum & idem initio fuisse testatus his verbis:

*Me Chaos Antiqui (nam sum res prisca) vocabant.
Tunc ego, qui fueram globus, & sine imagine moles.
In faciem redii, membraque digna Deo.
Nunc quoque confusa quoniam nota parva figura est,
Ante quod est in me, postque videtur idem.
Accipe quasita, qua causa sit altera forma,
Hanc simul ut noris, officiumque meum.
Quidquid ubique vides, Cælum, Mare, Nubila,
Terras,*

C *Omnia sunt nostra clausa, patentque manu.*
Et quæ sequuntur, antiquissimis Physiologiæ illius priscae Mysteriis plena, quibus populum tunc Civitatum Rectores in religionis cultu continebant. Quamobrem Janus ille Geminus juxta Theatrum Marcelli conditus à Numa cum foribus geminis inter duo fora, translatus consequentibus annis fuit ad Transitorium forum à Domitiano coemptum, perfectum vero, & suis fere omnibus numeris absolutum à Nerva, causam hujusce translationis aperitissime proferente his verbis Servio Honorato: *Captis Faliscis civitate Tuscia inventum est simulacrum Jani cum frontibus quatuor. Fuerit enim Bifrons apud Theatrum Marcelli. Unde, quod Numa instituerat, translatus est ad forum Transitorium, & quatuor portarum Templum institutum.* Atque ut Janus Geminus inter duo fora fuit, ita hic Quadrifrons medius inter fora quatuor cernebatur, Romanum scilicet, seu Vetus, Julium, Augustum, & Transitorium inter Capitolium, & Quirinalem Collem, sic dictum, quod per illum in alia opportunus veluti transitus esset, vel certe (quod Cicero insinuassee videtur de Jano Gemino loquens in supra laudato loco) ob ipsum Jani Quadrifrontis Templum, cui quatuor Portæ, quæ Jani transitiones pervia dicebantur, quod passim transeuntibus paterent, neque enim aliter capiendus Martialis lib. X. epigr. XXVIII. cum canit:

*Pervius exiguos habitabas ante Penates,
Plurima qua medium Roma terebat iter:
Nunc tua Casareis cinguntur limina donis,
Et fora tot numeras, Jani, quot ora geris.*

F Quam de quatuor illis foris, de quibus paullo ante meminimus, quæque à J. Lipsio præclare, ut omnia, in Admirandis suis lib. III. cap. VII. describuntur, ad quem hinc Lectorem remittimus non inviti, ne in re apertissima diutius immoremur, sicuti ad Vinctorem etiam, & Marlianus ablegamus cum, qui quot, & ubi fuerint Jani alii Quadrifrontes scire desideret. Nimii enim fortasse fuimus in hac parte, & si forte non nimii, ut aliquid amici hominis gratiæ tribueremus, imo fortasse pauci, aut certe nulli, si quæ de Jano ab Ethnicis accepimus satis nobis fuerit in memoriam posteris revocare, ea vero quæ Janum Idolum olim Mediolanense propius attingunt præterire taciti voluerimus? Janum, inquam, illum, cui densis adhuc circumsepti tenebris Mediolanenses divinos honores exhibuere ea in Urbis regione, in qua nunc ædes sacra visitur D. Joannis cognomento Quatuor facierum: non enim

enim aliunde id illi cognominis adhæsit, quam ex eo quod in Jani Quadrifrontis locum ædes illa successit, qua de re Galvaneus à Flamma, cujus verba rudia licet & inornata adjicere non gravabor, major ut antiquitatum monumentis fides accedat ex ipsamet priscorum verborum antiquitate. Siquidem autem nummi adesis jam & fugientibus notis, lamellæ, sigilla, troncæ statuæ, & frustra marmoris quo vetustiora è ruderibus & cadaveribus oppidorum à nobis effodiuntur, eo nos majori voluptate profundunt, cur ipsa nos verborum antiquitas afficere molestia debeat, causam esse plane nullam video. Quod si qui forte fortuna fuerint, quorum aures isthæc offendant, his adeo mollibus ac delicatis culcitra subterni jubebimus, & pulvinos rosis & violis plenos, imo precabimur, ut quidquid calcaverint rosæ illico ac violæ fiant, calicem, inquam, aliquem mulsi misceri mandabimus, quo contractam ex hujuscemodi verborum asperitate molestiam levent: nos vero nihilo secius ab his ad alia progrediemur, ad si nihil inde hauserimus asperitatis. Ait igitur in Opusculo ad calcem *Chronica* suæ posito Galvaneus: *Primum templum sive Fanum, quod fuit in civitate Mediolanensi, constructum fuit in loco, qui dicitur Ecclesia S. Joannis ad quatuor facies: ibi Idolum militis in aquo, quod erat arcum futile deauratum. Caput militis fuit quadrum in modum trabis quadrata, in primo quadro erat sculpta imago pueri juvenis; in alio facies hominis; in alio facies senis; in alio facies viri decrepiti. Et hoc significat, quod Janus apud Subres distinxit annum in quatuor tempora: in Ver, ecce pueritia; in homine Æstatem: in antiquo, sive sene, Autumnum: in decrepito Hyemem. Item est sciendum quod primum diem Veris dixit januam Veris, & primum diem Æstatis, dixit januam æstatis, & sic de aliis. Huic Idolo jam consecrata sunt omnia principia humanorum actuum. Et ista est ratio, quare primo die Januarii, qui est primus dies anni, datur strena. Illud Idolum fuit dedicatum astro Solis, quia facit in anno CCCLXV. dies. Et istud Idolum habebat in manu dextra numerum CCC. & in manu sinistra numerum LXV. qui numerus anno Solari competit. Habet in manu clavem cum virga, quia omnium portarum & viarum rector existit, & custos. Unde aliqui dixerunt, quod inde dicitur locus ad Mazzam. Et forte fuerunt duo Idola ejusdem stemmatis, quorum unum fuit ubi est Ecclesia S. Joannis ad quatuor facies; aliud positum fuit ubi est Ecclesia S. Domnini ad Maziam. Hæc ille; quæ ex fide bona, uti sese habere comperimus in illo Opusculo, recitare maluimus, quam ea, verborum aliorum adhibita formula, in dubium revocare.*

In viam itaque redeamus, à qua non abs re defleximus aliquanto, & quia Jani Quadrifrontis Templum extra Mediolanensis Urbis ambitum fuisse conditum initio dicebamus, id ipsum aliorum exemplorum appositione firmemus. Fuit igitur Bacchi quoque Templum, sicut & Æsculapii foris extra Vercellensem portam, ubi nunc Ambrosiana Basilica frequentatur, Martis pariter extra eandem portam, ubi Basilica Portiana adhuc S. Victoris Martii nomen retinet: & Apollinis fanum extra Romanam portam, ubi nobile Monasterium sacrarum Virginum S. Apollinaris nunc floret: atque ne prophanitatis ejusmodi delubra singula numeremus, extra Ticinensem Herculis, ubi nostra memoria Divi Laurentii Templum pari liberalitate Civium, & operum artificio restitutum ab ipsis propemodum fundamentis summam in admirationem trahit.

Nititur porro nostra hæc opinio, qua D. Vincentii Templum à Viri Romani Patritii liberalitate ortum & originem habuisse contendimus duplici, eoque in rebus hujuscemodi firmissimo, fundamento. Ac pro primo quidem habemus fragmenta

A quamplurima Columnarum, Bassum, Peristylorum, & marmorum aliorum speciem Romanæ antiquitatis & Architecturæ præ se ferentia ex Idolorum ruinis (ut par est credere) posteris conservata: Pro altero vero Characteres Romanum in morem lapidibus iisdem incisos. Templum hoc igitur à Cive Romano conditum, & dicatum Jovi una Inscriptione, vel altera confirmemus. Una est in Pario marmore, in qua hæc clare legimus, & distincte:

S. IOVI ET PROBO V C. C O N.

Altera in stylobate, qui dexter occurrit adscendentibus ad Aram principem Templi cum aliqua notarum jactura, sed quæ nobis hac in parte negotium non facessant:



E Atque hinc factum, ut Hieronymus Borserius cap. 1. sui nuperi supplementi ad Pauli Morigii de Mediolanensi Nobilitate librum, primus quidem ex iis, quos hæcenus videre potuerim, ea de re scribentibus asseruerit, Templum hoc Jovi conditum à Cominio, levi admodum (quod pace dictum sit amicissimi & eruditissimi hominis) conjectura, siquidem hac sola Inscriptione nitatur, cum, & forma filicei stylobatis ad usum ignobilis aræ, uti videre est, post Templum ipsum jam conditum accommodati; aut certe in jam ante dicato Jovi Templo positi ex voto pro memoria accepta beneficii alicujus à Numine propaganda; aut demum in monumentum aliquod efformati; quam in sententiam non imus, licet quidam id colligant ex postremis notis solitis à Veteribus inscribi non aris solum ac templis recens exstructis, sed etiam tumulis mortuorum, uti mox ostendemus, cum nostram de Templi Conditore sententiam afferemus, si non apertioribus, validioribus quidem certe firmamentis innixi, in tanta rerum hujuscemodi caligine, & librorum reticentia maxime deploranda. Templum hoc igitur sacrum initio fuisse Jovi, & Probo, factis aperte demonstrat Inscriptio prima.

F Ac Probo quidem simul, & Jovi, sive quod tanti viri liberalitate ornatum, sive quod civitas, & populus, aut alius quispiam, ob illustre beneficium aliquod in se collatum à Probo grati animi ergo, Templorum honorem unis cælitibus deferendum, Probo quoque Viro clarissimo, & consulari (id quod

quod declarant postremæ Inscriptionis notæ) communicandum esse censuerit. Quod enim fecisse Græcos Sabellicus refert, ut post Philippum Regem à T. Flaminio victum civitatesque omnes, quas summus ille Macedonum Imperator libertate exuerat, in pristinum Flaminii victoris decreto, & clara voce præconis, ac libera restitutas, nulli Deorum templa, nisi Flaminii nomine apposito, dedicarent, ita ut Herculi, Minervæ, Neptuno, Numinibus aliis, & Flaminio simul inscriberentur: idipsum Mediolanenses quoque eodem plane jure facere potuerunt.

Probi porro nomen Romanum esse multo nos ante docuit Pighius, qui se illud in AEMILIIS, FALONIIS, ET VALERIIS reperisse testatur lib. III. *Annalium Rom.* & vetus Inscriptio Aquilejæ:

D M
T. FLAVIO. SATVRNINO
QVI. VIXIT. ANNIS. XVIII.
MENSIBVS. V. DIEBV. VIGINTI.
FECIT. TI. FLAVIVS. PROBV.
EVOCATVS. AVGVSTORVM. NN.
FRATRI PIENTISSIMO.

Nos igitur Inscriptionem alteram repetamus, eamque obscuriorem paullo prima, quod ejus fieri poterit, explicemus. Id autem facilius fiet, si juxta Valerii Probi Grammatici mentem in libello *de Romanorum Notis* observaverimus usu quodam publico, & observatione communi receptum apud Veteres fuisse, ut quædam verba, atque nomina ex communi consensu primis tantum literis notarentur, & singulæ quid significarent in promptu esset. Hinc enim ipsa meridiana luce clarius innotescit, tres primas Inscriptionis hujus, quam nunc illustratum imus, literas I. O. M. JOVEM OPTIMUM MAXIMUM indicare, cui Templo condito perfolutum votum. V S syllaba, medium quasi locum obtinens, nihil habet reconditi; sed absolvit SEVERIANI nomen in recto. Syllabæ aliæ duæ C O. & M I. diversis in versiculis exaratae, num Severiani cognomen aperiant, an ejusdem Tribuni, jure dubitant eruditi. Absit enim ut Comum Urbem iis prodi literis affirmarim, quod sine fundo visum est aliquibus suspicari. COMINII siquidem cognomen in PONTIIS, & POSTHVMIIIS reperias. L. quoque Cominii cujusdam Tribuni Militum, qui sub Q. Fabio Maximo Rulliano magistro Equitum prospere pugnavit, vis, & industria commendatur à Livio lib. VIII. quemadmodum & ejusdem Tribunatum Plebis extollit Valerius Max. ni nos forte memoria deficit antiquitatis custos. Quin imo passim habes celebrem Cominiorum aliorum memoriam in Veterum monumentis:

Romæ in Aedibus olim Attilii Delphinii,
Aldo Manutio Paulli F. collectore:

CVRTIA. M. L.

EVROPA.

EX TESTAMENTO. HS. CcLXX.

M. POPILLIVS. M. L. SOTERICVS.

SIBI. ET LIBERT. LIBERTAB. POSTERISQ. EIVS.

HVIVS. MONVMENTI. SIVE. SEPVLCRVM. EST.

PARS. TERTIA. EST.

COMINIVS. LL. DIOGENES. SIBI. ET LIBERT.

LIBERTAB. POSTERISQ. EIVS. HVIVS. MONVMENTI.

SIVE. SEPVLCRVM. EST. PARS. TERTIA. EST.

Canusii:

S. P. Q. NEAPOLITANVS

D. D. L. BAEBIO L. F.

GAL. COMINIO PATRONO
COLONIAE.

Anagninæ ad D. Angeli:

L. COMINIO L. F. L. N. PAL.

FIRMO PRO. AER. ET. ALIM.

OPPIAE. SEX. ET. C. L. EVNONIAE &c.

Vulsiniis:

L. COMINIVS. L. F. AN.

T. TVLLEVS. T. F. KANVS.

C. CANVLEIVS. L. F.

L. HIRRIVS. L. F. LAT

INVS

III. VIR. THEATRVM. ET. PROSCAENIVM. DE.

SVA. PECVNIA. FACIVNDVM. COERAVERVNT.

Cominios vero Mediolanum migrasse ex Urbe Roma, ibique fixisse vestigia, & vero etiam cineres reliquisse, monumenta hæc, quæ subdam, satis superque declarant:

Ad S. Nazarium Mediolani in quadam arca:

POLLIAE COMINIAE
LVCILIVS ARTHEMIDORVS
CONIVGI INCOMPARAB.

In limine januæ majoris Sanctæ Crucis in Ticinensi Porta olim erat & hoc monumentum, quod locum mutasse arbitror, cum mihi illud perquirenti nusquam apparuerit; habetur tamen inter antiquas Patriæ memorias Alciati:

C. COMINIVS SECVNDVS

C.....N COMINIVS

PRISCVS FRATER

SIBI ET OCIMO ABINAE

C. COMINIVS

COMINIO OCIMO

IN AGR. P. XXXX.

IN FRON. P. XXI.

Omitto cætera monumenta, ut ad nostrum, à quo paulisper defleximus, revertamur. Subest hæc itaque vis, ut arbitror, quatuor notis illis, quibus absolvitur, V. S. L. M. VOTVM SOLVIT LVBENS MERITO. Erat enim ea formula, vel certe non ei dissimilis, admodum apud Antiquos frequens in ejus generis Epigrammatibus claudendis. Ac quidem illa sic claudabant aliquando, VOTO SVSCEPTO. D. D. id est, DEDICAVIT, vel DONO DEDIT. Qualis illa fuit, quam olim legebamus in Aedibus Romanæ Cancellariæ:

SOLI. SACR.

C. IVLIVS HELIVS ERARIVS VOTO.
SVSCEPTO. D. D.

Aliquando VOTO SVSCEPTO L. S. LVBENS SOLVIT, ut in illo in D. Agnetis templo:

FORTVNAE PRIMIGENIAE

Q. LOLIO POLLOHANES

PATER ET FILIVS ET

ALIA ARCHELAIS

VOTO SVSCEPTO. L. S.

Aliquando EX VOTO. D. D. L. M. C. hoc est, DIGNVM DEO LVBENS MERITO CONSECRAVIT, cujusmodi notæ erant in illo, quod Romæ pariter viscebatur in Palatio Ursinorum in Jordano monte:

P. AELIVS. P. F. SER. APOLLINI. NICOP. FACTVS. MIL.
AN. XXI. MISSVS. HONESTA. MISSIONE. AN. XXXVI.
EXCOH.

VI. PR. T. VITANI. CORNELIANI. EX. VOTO. IO-
VI. CONSER.

ET. COMM. SVIS. ET. FVT. SIGNVM. CVM. BASE.
D. D. L. M. C. BELLICIO TORQ. P. SALL. CONSS.

Aliquando VOTVM MERITO tantum, ut apparet ex illo, cui Cn. Pompejus rerum à se in Oriente gestarum breviarium inscripsit hoc modo, posuitque in delubro à se Minervæ ex hostium manubiis dedicato. Recitat enim ipsissima illius verba Plinius lib. VII. cap. XXVI.

CN.

CN. POMPEIVS CN. F. MAGNVS IMPERATOR.
BELLO. XXX. ANNORVM. CONFECTO. FVSI.
FVGATIS. OCCISIS. IN. DEDITIONEM. ACCEPTIS.
HOMINVM. VICIES. SEMEL. CENTENIS. LXXXIII.∞.
DEPRESSIS. AVT. CAPTIS. NAVIBVS. DCCCXLVI.
OPPIDIS. CASTELLIS. ∞. D. XXXVIII. IN FIDEM.
RECEPTIS. TERRIS. A. MAEOTI. LACV. AD.
RVBRVM MARE SVBACTIS.
VOTVM. MERITO. MINERVAE.

Quæ formulæ omnes, quia dedicationum erant, ut plurimum, non tumulorum, idcirco minime paulo ante probavimus eorum sententiam, qui monumento notas hasce inscriptas fuisse volunt, & interpretandas hoc pacto, VIVENS SIBI LOCVM MONVMENTI, verbo LEGIT, vel alio quopiam ejusmodi, prætermisso. Frustra enim id esse commenti hoc loco satis ex se ipsis intelligent eruditi. Illud autem miror, duas istas Inscriptiones Andreae Alciati, Jurisconsultorum suæ memoriæ Principis, & indagatoris acuratisissimi Monumentorum omnium patriæ Urbis, diligentem adeo fuisse solertiam, quinimo (quod est mirandum magis) eas nuspiam offendisse eruditissimum Civem ejusdem Urbis alterum Franciscum Cicerejum, qui se adeo studiose prætermissa ab alijs, atque ab ipso potissimum Alciato in eo genere collegisse professus est.

Quamquam nec miror cum Inscriptio prima ibi loci sita sit, ubi videri, nedum legi, difficulter possit, deletis fere literis omnibus incessu pedum assiduus, cui patent: Stylobates vero alterius ita collocatus est, ut præpostere literas omnes inversas exhibeat, & ita calce oblitus, ut nobis illac quotidie transeuntibus non nisi post annos decem sese præbuerint inspectandas. Visas itaque statim non minori cum labore, quam gaudio excerpimus perinde ac si oricum quempiam thesaurum invenissemus, cumque hæreremus in earum aliquibus expiscandis, quod rebus in ejusmodi plerumque contingit, aliudque tum forte fortuna nacti essemus exemplar Inscriptionum omnium Alciati longe distinctius, & elegantius eo, cujus videndi facultatem habueramus in Musco Bibliothecæ Ambrosianæ, en inter alias nostræ similem quandam invenimus, imo nostram ipsam, ut ex facta ipsius collatione diligenti cum lapide patuit manifeste. Voluimus vero ista paucis aperire, ut & quantum nos de illa meriti simus Posteris scirent, & una testaremur alijs quanta exstiterit monumentis in omnibus indagandis Jurisconsultorum, & Eruditorum optimi Alciati nostri solertia, quam nuper immerito requirebamus.

Addam hic tertium nuper à me inventum fragmentum candidissimæ Inscriptionis, ut quod hujus maxime sit loci in has notas in ligno incisus, reliqua desiderantur, sed facta in eo DE IOVE, mentio nostram conjecturam, immo sententiam, firmat.



Atque ex his quidem non obscure colligitur tempus, quo sacrum illud Jovi Templum conditum, collique coeptum. Siquidem enim tempus illud spectamus, quo Romani victores Gallorum Cisalpi-

A norum copias profligarunt, multasque ex iisdem victorias re bene gesta feliciter adepti sunt: sive ad illud, quo Provincia nostra Galliæ Cisalpinæ Metropolis in Populi Romani ditionem, ac potestatem venit: id absque ullo dubio contigisse fatendum est sub ipsum ab Urbe Roma condita quingentesimum & trigessimum annum; tum scilicet, cum Marcellus is, qui Consul quinquies fuit, Annibalem in acie vicit, Viridomarum Gallorum Regem occidit, deque Gallis Insubribus triumphans in Provinciæ formam subactam eorumdem Galliam redegit.

B Sed enim ex eodem fonte præter Annum conditi Templi, conditoris etiam nomen possumus haurire. Cum enim eodem plane tempore, quo Marcellus in hanc Provinciam venit, eo quoque L. Furius ejus in consulatu collega se recepisset, ac Furius quidem ejusdem ante Provinciæ Prætor, ut habemus in Livio, & magistratu fungens ædem vovisset Jovi, si quando sibi contigisset, ut Gallos Insubres vinceret, & vicisset; creditus is idcirco fuit voti non immemor statim ac in eandem Provinciam rediit, ut ea, qua se Prætor obstrinxerat, religione solveret, Templum hoc inibi condidisse Jovi, licet eidem alterum erexisset in Capitolio Romæ.

C Habemus jam primum, eundemque clarissimum Templi, de quo loquimur, conditorem non tam Patritium, quam consularem virum, & hunc si non certis, probabilibus certe conjecturis erutum ex ultima illa quodammodo memoria antiquitatis. Verum enimvero cum ducentis propemodum annis Gallos à Romanis acerrimis, gravissimisque bellis exagitatos fuisse constet, nemini mirum esse debet nonnullorum circa tempus hoc calculos variare. Polybium nos, Plutarchum, Zonaram, & alios viros gravissimos secuti sumus, cum quibus hac in parte satius errare ducimus, quam bene cum alijs sentire, aut ea de re nostro Marte tantummodo divinare. Communes enim veterum scriptorum lapsus justam aliquam excusationem habent, quia jam recepti; privati vero hominis, & in re literaria novi, quia publicæ invidiorum criminationi, severiorique Criticorum censuræ expositi, statim ac emanant in lucem, exsibilantur ab omnibus, & exploduntur.

D Ut ut sit eorum, quæ de hoc Templo scripsimus, opinatores potius haberi volumus, quam assertores. Nam haud nos fugit inibi locorum, ubi nunc Templum ipsum adspicitur, viros quosdam amantes solitudinis, tanquam in sacro aliquo & religioso secessu degisse multis ante sæculis, quam Romani Regiones istas sibi subigerent, ut à nobis infra fusius ostendetur *Fascic. vi.* cum de ejusdem Templi Monachis disseremus. Et sane rationem omnem temporum melius subducentes constantissime asseverare possumus, jam tum Templum istud fuisse cum Populus Romanus adversus Annibalem summum Carthaginensium Ducem in summa rerum omnium trepidatione, cum videlicet jam crederet ipsum ad portas cum infestis signis post duplicem jam partam victoriam ad Trebiam, & Thrasymenum, Dictatorem dixit Fabium illum Maximum, qui prudenti cunctatione quadam Romanam rem universam, aliorum Imperatorum temeritate graviter labefactatam, jacentemque propemodum, restituit, & erexit, unde & CUNCTATOR dictus est, & sedendo vicisse potius, quam pugnando. Vetus enim istius Fabii monumentum, hoc in templo positum, quod allatum inferius exponemus, nullum plane relinquit ea de re dubitandi locum.

E Cæterum, ut ad ea quæ propius nos attingunt festinet oratio, credere par est, à Christi Domini Victoria de Morte, & Humani Generis hoste gloriosissime reportata, eademque in orbem terrarum universum ab illius Præconibus Apostolicis disseminari cœpta, idem omnino Templo isti divinitus con-

contigisse, quod eadem tempestate delubris aliis superstitiosæ nimis, & obsecratæ Gentilitatis evenit, ut scilicet abdicato Idolorum cultu, avitisque erroribus profligatis, veri & æterni Numinis honos, veraque Christi Religio in illud inducta sit, rite prius ab Sancto Barnaba expiatum, Magnæque Mariæ Matri simul, & Virgini dedicatum. Factum id ab Apostolo ut credamus, adducimur ex eo, quod non statim ac is Mediolanum attigit, Urbem ipsam ingressus est, coactus ab illius portis alio se conferre, vel certe subsistere extra ipsius moenia, quo fartam tectamque conservaret eam, quam à Christo Magistro, ac Domino suo hauserat disciplinam. Admonitus enim nemini in Urbem aditum patere, nisi ei, qui prius adorasset Idola in valvis Portarum illius singulis excitata, in agro Ticinensi præcipue constitit, ibique moratus est, donec remoto impedimento illo cultus inanibus Numinibus exhibendi, debilitatisque magna ex parte conatibus hostium nominis Christiani, opportunum tempus esset nactus pedem in Urbem ipsam cum fide Catholica inferendi. Cum igitur eo in loco divini flaminis igne succensus Barnabas non posset non in animis mortalium eisdem, quibus æstuabat ipse, divinæ propagandæ veritatis igniculos excitare, minime abhorret à vero, cum toto moræ illius suburbanæ tempore in evellendis lethalium dogmatum fibris, & nova Christo sobole procuranda, muneris Apostolici partes naviter obeuntem, lustrantemque singula diligenter ad hanc se Jovis Ædem etiam contulisse, non tam pratorum circumadjacentium viriditate plectum, aut majestate Templi, quam commotum eo, quo flagrabat assidue, studio pietatis, ut solitudinis illius incolas sanctioribus à se monitis institutos, ablutosque lustralibus aquis Christiano ritu ad monasticam Deo liberius operandi consuetudinem invitaret. Hinc factum, ut Templum illud superstitiosæ vanitatis nomine viduatum sacrae Primi Numinis parenti secundo loco dicaverit, cum alterum, in quo non multo ante primam Euangelii sementem fecerat, ex Chronographorum aliquorum sententia, à simulachrorum insania ad ipsius Christi Servatoris cultum, ejusdemque caste exercenda dogmata traduxisset. Id autem à divini Verbi legato factum asseruimus ex Chronographorum aliquorum sententia, quod ii, qui res illorum temporum persequuntur, non tam inter se diffideant in assignando loco, qui primus cœlestis doctrinæ sementem excepit, quam in nominando Templo, quod Apostolo dæmones profligante in nomen & honorem Servatoris cessit, quamvis una eademque omnium de rebus ab eo gestis historia in sacris illorum temporum Annalibus referatur. Aliquorum enim sententia fuit, locum, ubi sacrosanctæ Legis interpretes, antequam urbem ipsam ingrederetur, insedit, salutis nostræ primordiis & mysteriis inclutum, fuisse fontem illum proximum Eustorgiano Templo, & sacram Ædem primam ab Apostolo consecratam Salvatoris tantummodo nomine decoratam. Alii vero extra Novam urbem Portam, ubi nunc magnificum & amplum D. Dionysio Cœnobium exsurgit, primam divinæ veritatis lucem Mediolanensibus affulxisse narrant, eodem Apostolo Barnaba Christianis illic ritibus animos imbuyente, & Templum primum Salvatoris, Præcursoris, & Prophetarum nomina recepisse fortia trium magnorum Numinum majestate. Ac prima quidem sententia non in mentibus Eruditorum solum radices altissimas egit veterum Inscriptionum testimoniis fulta, sed etiam creberrimis Patrum nostrorum sermonibus usurpata, & veluti per manus ad nos usque transmissa, infantium æque ac rudium mulierularum animos occupavit: ita ut operam ludere putaretur is, qui pluribus eam confirmare vellet. Nam, & Annales vetustissimi, & fama, quæ de Eustorgiano fonte percrebuit, & Ædes Aposto-

A lo Barnabæ, ejusdemque discipulis duobus Anataloni, & Cajo, quos & in Episcopatu successores habuit, Federici Cardinalis Archiepiscopi, & totius Populi Mediolanensis studio vota, dicata, & inibi ædificari cœpta, jamque simulacris Divorum ipsorum pulcherrimis exornata, sacrisque complurimis vestibus locupletata, & novorum Pontificum Ecclesiæ Mediolanensis honoris sacri primordia capescendi in Eustorgiana Æde, antequam sua pastoralis Provinciæ munia ulla obeant, satis illi superque conciliant firmamenti. Aliorum opinionem vero sequuti sunt etiam Eruditi, adducti testimonio lapidis non vulgaris, qui stratus in medio pavimento Templi D. Dionysii de nomine nuncupati, ad hunc usque diem aperte testatur, Barnabam ibi Crucis vexillum primitus defixisse, æternum devictæ à Christo Mortis, & Satanæ monumentum.

Antiquo lapidi adjacet Inscriptio recens his verbis concepta:

IN HOC ROTVNDO LAPIDE ERECTVM FVIT VEXILLVM SALVATORIS A SANCTO BARNABA APOSTOLO MEDIOLANEN. ECCLESIAE FVNDATORE VT SCRIPTORVM AVCTORITATE ET VETVSTA POPVLI HVC CONFLVENTIS XIII. MARTII TRADITIONE COMPROBATVR QVEM DEVOTIONIS AVGENDAE GRATIA IVSSVM EST EXORNARI MDCXII.

C Accessit huic opinioni fides è Manuscripto veteri ferrea olim capsulæ consignato, repertoque forte fortuna in eadem D. Dionysii Æde, cujus partem hic afferam non invitus ad Monasterii illius decus, quod è Vincentiano nostro manasse dicitur, ratione non admodum discrepante ab ea, qua liberi ex parentum suorum sanguine procreantur. Hæc igitur Manuscripti illius verba ipsissima perhibentur: *Ea tempestate, cum Beatissimus Barnabas Apostolus, & Mediolanensis Pontifex primus ad hanc, qua tunc secunda Roma appellabatur, Urbem attigisset, ut ibidem secundum Domini præceptum salutis verbum predicaret, & gregem sibi commissum æterna felicitatis portui consignaret, supra Urbis valvas Idolum proprium pro qualibet habebatur, in cujus rei memoria hodiernis temporibus nomen Porta Jovis retinetur: edictumque exierat à Cesare, quod quicumque ingrederetur moenia Urbis secunda Roma, aut diis immolaret, aut capite plecteretur. His taliter impugnantibus Beatus Barnabas protunc urbem ingredi distulit, ut cum fructu agonem suum consummaret, & pro populi sui salute in sacro loco Monasterii S. Dionysii brevi præterito tempore Basilicam ad honorem Salvatoris, Præcursoris, & Prophetarum dedicavit, in qua primum post Lateranum Roma Sancti Joannis Baptista Altare, & Baptisterium consecravit, mentumque primi Joannis à Clavigero Apostolorum Principe Petro transmissum summa devotione & reverentia in Altari suo recondidit, fama & opinione antiquitatis fidelissima testantibus. Nam non absque maximo mysterio, & causa, secundum quod evidentissime elicitur libro consuetudinum & ordinationum Ecclesiæ Mediolan. Reverendiss. Dominus Archiepiscopus, Ordinarii, & Clerus dictæ Ecclesiæ in vigilia & festo Beatissimi Baptista Joannis processionally cum canticis & laudibus ad memoratam Ecclesiam annuatim divina officia celebraturi debent, & consueverunt devote accedere. Porro Imperatorum sævitia contra Catholicos crescente dicta Ecclesiæ à Barnaba fabricata, tum propter inhabitatorem, tum ex perfida infidelium temeritate in magna parte exstitit dirupta. Adveniente itaque tempore, quo Beatissimus Antistes Dionysius hujus almae Urbis Episcopus, & Ambrosii præcessor, qui ob Christi fidem in Armenia partibus à Constantio Cesare exulatus, & artissimo carceri mancipatus, in quo acerrima patiens Domino gloriose spiritum feliciter tradidit.*

Retulimus Manuscripti verba, quæ ad rem præsentem facere videbantur, quæ enim postea subdit de translatione Corporis D. Dionysii ex Cappado-

cia Mediolanum, non hujus esse loci censuimus, ut hic afferenda essent. Quamquam iis mox lectis attentius, & adhibita melius in consilium ratione, ea quoque nobis adscribenda duximus, antequam ad alia veniremus, ne dormitare potius, quam scribere videremur. Ut enim, quod de ea sentimus libere fateamur, neque ut obelo Censorem agamus, à quo munere quam longissime absumus, sed ut ingenue veritatis ipsius patrocinium suscipiamus, duo ea Manuscripti pars continet si non omnino falsa, abhorrentia quidem certe plurimum à vulgari communique sententia, ut quæ asserat quod nemo sacrorum Scriptorum hactenus affirmavit. Eam nos igitur initio afferamus; mox in quibus ab aliis discrepat ostendemus: *A predictis partibus cum ad hanc Urbem Corpus deduceretur, Gloriosus Ambrosius divina revelatione edoctus, quod Sanctissimi Antecessoris sui Dionysii Corpus ipsius studio, & diligentia ac hortatu, Legatorumque Mediolanensium instantia per Beatum Basilium Armenia Primatem transmitteretur statutis die, & hora, convocato, & subsequente Clero, & populo Mediolanensi, ad Portum Abduæ fluminis, quod alio nomine quam Cassianum tunc nominabatur, cum processione solemniter devenerunt. Nec mora, navis sacrum Corpus deferens Portui appropinquavit, & ecce cum Ambrosius reverenter, & devoto Capsam, in qua jacebat, voluit amplecti, permissione divina Corpus benedictum à Capsa exurgens Ambrosium fuit amplexatus. Ave frater proferendo, deindeque à portu usque ad locum ubi nunc Ecclesia S. Dionysii prope ripam portus in testimonium premissorum est fabricata, pergentes de fide & Christi divinitate adinvicem contulerunt. O miraculum inauditum, o quanto praconio extollendum! Suspiciente vero Ambrosio quod dignissimus Pontifex Dionysius in humanitate, cognito tam mirabili Dei speculo, divina potentia permanere deberet, incunctanter exorsus est Prasul Dionysius ad Ambrosium; Corpus meum in Basilica Salvatoris, & Prophetarum irades sepultura. His expletis in capsam rediens quievit in pace. Admirantibus & stupentibus cunctis adstantibus laudes immensas omnipotenti devotissime reddiderunt, & abinde citra appellatus est Portus Cassiani à capsâ ob miraculum Dionysii Confessoris eximii, quod prediximus ad laudem, & gloriam Domini Nostri Jesu Christi, fideique Catholica corroborationem. Postremo gloriosus Prasul Ambrosius cum Clero, & Populo capsâ cum tam pretioso thesauro supra currum imposita versus Urbem iter ceperunt, & cum juxta memoratam Basilicam Salvatoris pervenerunt, currus stetit adeo fixus, ut nec equi calcaribus, & aliis flagellis stimulati ab immobilitate eam possent revocare. Spiritu Sancto repletus Ambrosius Dionysii recordatus hortatu indagatur si forsitan ibidem locus esset à Domino sacratus, facta diligenti inquisitione benedicta Salvatoris Ecclesia arboribus, hederâ, & vepribus repleta nutu Dei inventa est, lectisque antiquis codicibus, illam esse Basilicam à S. Barnaba Apostolo, & Pontifice Mediolanen. dedicatam indubie cognoverunt. Ambrosius vero laudibus Deo porrectis immensis, populos iis verbis exorsus est. Etenim dignum, & justum est, ut is, qui pro fide certavit in hac Basilica, quæ ex fidei fervore noviter extitit dedicata, digno condatur honore. Fama per Urbem diffusa ad stupendum miraculum Populus undique confluit. Nec mora, Ecclesia purgatur, & reparatur, & in parvo tempore decentius reficitur, & readificatur. Igitur restaurata Ecclesia dignus Dei sacerdos Ambrosius gloriosum Dionysii Corpus celeberrima devotione in Confessione dictæ Basilicæ recondidit, & ultra titulum primi Pontificis Barnabæ, hanc sacrosanctam Aedem ad honorem Beatissimi Dionysii, & Confessorum omnium consecravit, & dedicavit, ad cuius sepulcrum mirabiliter multa infirmorum corpora sanitati fuerunt restituta, & continue Jesus Christus Dominus Noster, qui in sanctis suis mirabilis est, precibus sanctissimi Confessoris*

A sui languentibus medicinam præstat, & infirmis salutem, qui vivit, & regnat in sæcula sæculorum Benedictus. Hæc alia Manuscripti pars. In quibus autem variat, hæc sunt. Unum, quo in loco asserit Beatissimum Ambrosium, Urbis nostræ Antistitem, & Patronum, advexisse Mediolanum Sancti Dionysii corpus ex oppido Cassiani, illudque collocasse in Templo ejusdem nunc divi sub nomine frequentato, id quod mirum quantum à sacris omnibus Urbis nostræ historiis distet. Pignus enim illud à S. Aurelio Ecclesiæ Reditianæ Episcopo delatum ex Cappadocia Cassianum ad confluentem Abduam ibidem D. Ambrosius in Aede sacra condidit, uti nos quodam in opusculo, quod luci publicæ dedimus Mediolani anno à Virgineo partu millesimo sexcentesimo decimo septimo, multis rationum momentis innixi, conati sumus ostendere, ac probare. Ea vero ratio princeps nobis inter alias est visa, quæ Mediolanum sacris D. Dionysii Pontificis artubus ab Sancti Ambrosii tempestate ad annos usque Archiepiscopi Heriberti caruisse contendit, cariturum iisdem in posterum, nisi Heriberto ipso auctore, Cassiano Mediolanum advecti, in templo prope monasterium prius ab eodem Archiepiscopo conditum, quievisset. Statim ac enim propagandæ religionis, & Divorum cultus ampliandi desiderio flagrare Pastor ipse coli dignissimus coepit, & animum adungere sacris Divorum cultui sedibus erigendis, non autem sibi satis esse facturum duxit, quam quæ Templâ divitiis amplissimis honestaret, eorumdem etiam majestatem ac gloriam, illatis eo sanctorum cineribus & thesauris ossium, cumulasset. Ea certe fors utraque D. Dionysii templo divinitus obtigit, Mediolanensium Antistite Heriberto, cui nemo est omnium vel mediocriter in Eccles. antiquitate versatus, qui non Aedem illam, & inibi fervatum D. Dionysii corpus referat in acceptum.

D Discrepat secundo loco à sacrorum Scriptorum omnium sententia Manuscriptum illud, cum subdit, post Lateranam Aram, quæ prima Romæ consecrata est, proximam Mediolani ab Apostolo Barnaba consecratam cum Baptisterii fonte fuisse ea in parte Urbis, in qua Divi Dionysii Cœnobium hodie florere visitur, cum aliud omnino sentiant Historici fide dignissimi Joannes à Monte, Jacobus Galvaneus, Donatus Bossius, Tristanus Calchus, Bigatus, & alii propemodum infiniti, scribantque hæc omnia ab Apostolo gesta ad Eustorgianum fontem, ubi, & rem divinam uni Trino immortalis Deo fecerit, quæ non ante alibi in Italia facta, & multos non è vulgo solum, quod aliorum exemplo plerumque ducitur, sed è primariæ quoque nobilitatis flore, quæ ad honesti semina recipienda vulgo longe semper paratior fuit, fontis illius laticibus expiarit.

E Duplici hac in parte desiderata fuit à nobis hactenus veteris illius Manuscripti fides, licet in postrema minor, quam prima. Quod enim ad postremam attinet, quantum conjectura & existimatione fas est assequi, nemo plane negaverit fieri potuisse, ut Apostolus utrobique Aras, & fontes Christianis sacris initiarit, & apud D. Dionysium quidem abdito, palam vero & publice ad Eustorgianum fontem admittentibus jam libere plerisque Mediolanensium Apostoli disciplinam, & Christianæ religionis sacra frequentantibus animo hilariter erecto. Quemadmodum & consentaneum vero duxerit, quæ in parte D. nunc Dionysio dicata statædes, Templum occulto conditum Salvatori, ut & nostrum initio Salvatoris Matri, antequam scilicet Apostolus jactis altius Catholice fidei fundamentis, multis traductis ad Christum, in Urbem ipsam studiis exceptus alacribus, introiret. Verum enim vero in rebus hujuscemodi tam longe remotis à memoria nostra, si quid simile vero adducitur pro vero, ex

Patris Latinæ Historiæ sententia, capitur. Simillimum autem vero esse, quod affirmabamus modo de D. Vincentii Templo ab Apostolo Barnaba Deiparæ Virgini dedicato, vel ex eo coniecimus non obscure, quod multo postquam Cælo Barnabas donatus est, eo ipso tempore, quo Monachi apud D. Vincentium degebant in Cœnobio, simul Templi illius, ut inscripti Deiparæ, mentionem fecit Innocentius Pontifex in Apostolico diplomate, quod alibi commodius afferemus, ne hic cœptarum rerum series abruptatur.

Memoriæ proditum est ab aliis, qui aliam Templi nostri originem indagarunt, non esse illius natalia ab ultima usque prophana Gentilitate posteris repetenda, quod superstitiosa nimis ea esse causâ videretur; neque à felici Apostolorum ævo, quod ob vetustatem parum eadem habere certitudinis putaretur; longe minus à primis Pontificibus Ecclesiæ Mediolanensis, quod ob Scriptorum illius temporis inopiam nimis ea quoque recondita censetur; sed ab Apostolorum successoribus iis, qui illa in tempora inciderunt, quibus Imperatores fidei Christianæ dogmata tandem aliquando complexi, facultatem sacris Præsulibus indulgere prophanas Aras, & Tempia, quæ Generis humani hostis retinebat adhuc ut sua, sanctioribus doctrinæ nostræ ritibus expiandi, & ad cultum unius ac veri Numinis traducendi. Horum autem in Præsulum numero recensentur DD. Archiepiscopi duo, Monas, & Mirocles, quorum ille ob Burriæ gentis splendorem virtutibus suis auctum, & paternas opes, sub optimo Imperatore Philippo facile potuit obtinere, ut non tam prophana Tempia Dæmonis imperio subducta Christi sacerdotibus daret, sed novas Ædes etiam frequentioribus fidelium cœtibus aperiret. Alter vero cum & paribus opum subsidiis abundaret, & ingentes à pietate magistra spiritus hausisset, sua sponte ad collapsa pene templa veterum Cæsarum odiis in Christianos erigenda rursus, & nova etiam imperante Constantino Ecclesiæ Catholicæ studiosissimo construenda, toto animi impetu ferebatur, aliquid eo quotidie de suo conferens, quod & sacris ædibus accederet ornameto, & ovium signo Christi obsignatarum in dies magis ac magis commodis inserviret. Hinc igitur factum huiusce sententiæ auctores censent, ut cum Vincentianum Templum ob loci situm, qui primis temporibus extra muros fuit, & auctam ædificiorum suburbanorum frequentiam, peculiarem curam deposceret animorum, unus Archiepiscoporum laudatorum novis illud & augustioribus titulis decoravit: sive is Monas fuerit, qui primus Urbem in Parœcias, suo unicuique assignato templo, partitus est, injuncta eidem salutis hominum procurandæ provincia, qua carebat: sive Mirocles, qui statim ac sacras Ædes lustrare cœpit, ut quæ à primo illo cultu ab Apostolis accepto, defluerant ob temporum corruptelas, illud ipsum auxerit, & ad commodiorem indigenarum usum effecerit ampliorem.

Sententiam alii aliam amplexi sunt, inter quos Galvaneus in *Chronicis Majoribus*, quibus est titulus, NOVA POLITIA, cap. CXCII. & in *Minoribus* ad Joannem Vicecomitem gladii & pedi potestatem in Urbe summam habentem tunc temporis, anno scilicet à Christo nato M. CCC. XXXIX. perspicue narrat, Templum hoc à Desiderio, Longobardorum Rege, anno à Salute humano generi restituta DCCCLXXX. conditum ad perennem D. Vincentii gloriam, sacrisque ejusdem Reliquiis, ac cineribus venerandis addictum. Visum est aliis, cum illuc magnus undique concursus hominum fieret, ob S. Vincentii ossa nuper eo loci translata, multique in difficillimis rebus, & variis humani corporis aegritudinibus, oratu Martyris divinam

A) opem experti, læti & incolumes reverterentur domum, B. Virginis nomen Templo prius inditum, crescente Miraculorum D. Vincentii fama, in consuetudinem paulatim, ut assolet, abiisse; nec multo post factum, ut cum unusquisque se ad D. Vincentii, non ad B. Virginis ire diceret, cum eo se aliquid supra hominis facultatem impetrandi gratia conferret, vulgo D. Vincentii Basilica diceretur. Nec mirum: cum idipsum aliis quoque Templis accidisse non ignoremus in hac ipsa Urbe, quam incolimus, ac ipsi in primis Templo Maximo, ut est posteritati eleganter admodum consignatum ab Alciato Epigrammate lepidissimo, quod inter Emblemata ejus Viri cætera commendatur. Ait enim is, quod revera contigit Templum olim Minervæ dicatum fuisse illud, in quo deinceps incalcentibus ad religionem animis D. Teclæ numen coli cœperit à Populo Mediolanensi, quod idem Teclæ quoque ipsi contigit, cujus templi religio, cultus canonici, parietinæ statim ac in Ædis maximæ corpus & sinum translata sunt, B. Virginis tantum Ædes illa audit, Teclæ nomine silentio involuto.

Affirmat tale quippiam omnino consensus Historicorum omnium de Basilica Ambrosiana, quam cum initio D. Ambrosius Patronus urbis magno veri Dei nomine consecrasset, delatis postmodum illuc corporibus SS. Gervasii & Protasii Martyrum, eorundem Ecclesiæ appellavit. Ipsodemum inibi D. Ambrosio honorifice condito, Ambrosianam Basilicam Posterii nominarunt. Philippi quoque Ædes nomen habuit initio Redemptoris, Naboris deinde ac Felicis simul ob illatos eo cineres amborum Martyrum, inibique piissime conservatos, D. Francisci tandem cum qui divi ejusdem è disciplina sunt Conventuales Fratres maluerint eam Institutoris sui nomine nuncupare. Horum opinioni suffragati sunt Historici utriusque memoriæ multi, qui nostrum hoc Vincentianum Templum inter Urbis antiquas Ædes sacras disertissime numerarunt, utpote Clariss. Jo. Franc. à Basilica Petri Novariensis olim Episcopus, deque omni Ecclesiastica Antiquitate Ambrosiani præsertim instituti optime meritis in opusculo de *Mediolanensibus Templis*, in quo post exstructum D. Georgii Templum in Palatio, anno Christi nati DCCXXXVIII. nostrum statim anno scilicet DCCCLXXX. pari religione conditum existisse refert, & Morigius, qui lib. II. cap. XXV. *sua Historia*, Templum hoc ipsum D. Satyri Ædi præfert, utpote quæ conditorem habuerit Aspertum Confanonerium Archiepiscopum anno salutis humanæ octingentesimo sexagesimo octavo tantum. Eam ob causam à nonnullis eam in sententiam facillime ventum est, ut censuerint, Templum hoc sub ipsa nascentis Ecclesiæ incunabula Deiparæ quidem Matri ac Virgini dedicatum, sed postea Desiderii Regis imperio, adducto eidem Monachorum Cœnobio reparatum & amplificatum fuisse, nec non ab eodem novo D. Vincentii titulo decoratum. Licet antiquitatem hanc colligere non obscure ex veteri Hilderamni, & Saginrudæ conjugum Monumento, quod in hujus Templi parte superiore, quasi in arce, ut olim illa Minerva Phidiæ, collocatum, annum Incarnationis Dominicæ subscriptum habet Inscriptioni, nongentesimum secundum cum Indictione sexta. Siquidem enim tunc temporis inibi Christiano ritu Christi sectatorum ossa condita reperimus; omni procul dubio fatendum est, jam tum Vincentianum Templum sacro Dei Opt. Max. Divorumque vere Cælestium cultui deservisse. Monumentum hoc ipsi vidimus, legimus, descripsimus, quoque legi commodius ab aliis possit, idipsum benevoli Lectoris oculis hac in parte subijciemus, rude licet, & ut illa ferebant tempora, non ad omnes leges suas, pedesque dimensum:

HOC RECUBAT TVMVLO NVPER CONFOSVS IN ISTO
 VIR HVMILIS FORMAQVE MICANS DVM VIVERET AEVO
 INGENII FLORVIT VARIISQVE DECORVS IN ARTE
 HILDERAMNVS ERAT PROPRIO DE NOMINE DICTVS
B QVEM DOMINVS VALLIS DE NOCTE VOCAVIT AD ASTRA **M**
 AETHERIA FELIX IVDEX IN ARCE LOCATVS
 IVSTVM IVDICIVM LEGEMQVE TENEBAT IN AVLA
 HVIC FVERAT CONIVX ALTA DE GENTE CREATA
 SAGINTRVDA FORET PROPRIO DE NOMINE DICTA
 ANTE PEDES TVMVLATA VIRI CVM PACE QVIESCIT
 O FACTOR HOMINVM HIS NVNC MISERERE ALVMNIS
 ANNO INCARN̄S D̄ N̄ I X̄ DCCCC II INDIC VI.

Subdemus huic aliud antiquum magis, & hoc loco dignum, nec frustra:

✠ B PROVIN, ✠ ♪ INNOCINII. M.

QVI VIXIT IN SAECVLO ANN. VII. **M**. IIII. D. XI.
 GERONTIVS ET ROBINA FILIO PIENTISSIMO.
 IN PACE POSVER IND F P IIII. IDVS FIB.

Non frustra, inquam: cum enim monumentum hoc minus accurate legisset vir aliqui doctus, in ejus prima litera B. interpretanda toto (quod ajunt) aberravit cœlo, conjiciens ex ea Tumulum eum esse Beati Proveni Episcopi Novariensis. Perperam omnino, & male. Cæcutiens enim ad literam M. e regione positam primi illius elementi B. videre nec potuit, quam ambæ illæ notæ sententiam contineant. Literæ enim ejusmodi, eoque pacto in uno eodemque versiculo collocatæ, apud veteres monumentorum scriptores habebant notionem illam, ut BONAE MEMORIAE, vel BENE MERENTI significarent, noto & vulgari more. Nam, ut inquit Alcizus in suo *Antiquario*, *Diis Manibus veriti dicare tumulos Christiani in D. locum B. supponebant, hoc est, Bene merenti: videlicet ut minus à Veterum usu discederent*. Hi siquidem tam bonis, quam malis Manibus dicare tumulos consueverant, quod in eorum Inscriptionibus passim occurrit. Sed enim, ut non omnis fert omnia tellus, teste maximo Poetarum, sic non omnes omnia vident, nec videre, etiam si velint, possunt. Porro Provinum hunc Christianorum sacris imbutum fuisse non modo duo hæc elementa B. & M. sed etiam duo alia X. & P. media inter primum versiculum collocata facile evincunt. Siquidem hæc elementa postrema hunc in modum

✠ copulata, atque connexa, Christi nomen sine ullo dubio referebant: sive appingerentur vexillo militari, quod ante Imperatorem de more gestabatur, auro gemmisque intermicantibus intextum, ut Cardinalis Baronius observavit *ad Ann.* 420. & 423. Tom. v. sive in Epistolarum, aliorumve scriptorum fronte prænotarentur, uti nos perpulchre docuit Franc. Bernardinus Ferrarius, Ambrosiani Collegii Doctor eruditissimus, lib. III. *de Antiquo Ecclesiasticarum Epistolarum genere*, cap. II. sive defunctorum sepulcris inciderentur, quod à nobis animadvertum multis in marmoribus, tum Romæ, tum Mediolani, & cum Amico Antiquitatum hujusmodi peritissimo, non sine laudis præfatione infra commodius nominando, communicatum; sed in marmore illo potissimum, quod in Ædis Ambrosianæ facello maximo Ludovico Cæsari Caroli Magni pronepoti, hisce notis Epitaphio præmissis, inscriptum vidimus, nec descripsimus, quod in omnium oculos adhuc etiam ultro incurrat: sive demum lapidibus incisa parietibus affigerentur Ædium vero Deo sacrarum, quod à me pariter duobus ex aliis vetustissimis lapidibus observatum, quorum alter superstes adhuc in fronte fastigii delubri D. Martini in Compito visitur, alter olim ad ostium sacrarii metropolitani, ubi nunc senes illi can-

C didati & cucullati panem & vinum sacerdoti solemni ritu celebranti apparant, positus apparebat. In quibus illud amplius observavi præter elementa illa duo X. & P. juxta præmonstratum modum inter se nexa, duo alia Græca prope posita sese ad spectandum exhibere, & scilicet & ω, involuta circulo, ut quemadmodum illa prima Christum Servatorem rerum omnium principium & finem, juxta Apocalypsis vaticinium, esse demonstrant, sic is circulus Christum Deum principio, sineque carere, juxta Ægyptiorum mysteria, declararent. Atqui ne primum lapidem notis prænotatis insignitum indicium esse certissimum ædis sacræ dicatæ Christo Domino Servatori, protulisse videar sine fundo, neminem latere debet, vel ab ipsis Ecclesiæ nascentis incunabulis usu laudabili receptum fuisse, ut sacræ fidelium ædes certo Christi signo notarentur, tum ut ab Infidelium delubris internoscerentur: tum ut sanctiori cultu celebrarentur. Et licet juxta varietatem temporum diversis illæ signis fuerint insignitæ (ut varia sunt hominum ingenia, capitaque diversa) cruce tamen, & Christi nomine frequentius exornabantur ex Gulielmi Duranti nota lib. I. *Rationalis Divin. sacrarum literarum*, & Baronio passim Tom. I. & II. *Annalium*, à quibus tum testimonia locupletissima, tum variarum Ecclesiarum exempla appositissima recensentur. Hinc factum, ut memoratum & descriptum à nobis signum (quod Antiquitas *Labarum* appellabat) non multo post à fidelibus adhiberi cœperit, atque adeo frequentius in marmoribus incidi in sacris ædibus consignandis, dicandisque Generis humani vindici, ac servatori Christo, unum scilicet duorum loco, quod hujusmodi signum, tum Crucis formam, tum Christi ipsius nomen admirabili quadam ratione connectat. Firmatur itaque vel hoc signo maxime nostra sententia, eoque firmius, quo ex ejusdem situ liquidius apparet, illud eo loci positum, non ut in vexillo, tumulo, aut epitaphio, sed ad solam Ædis ipsius nuncupationem Christo Domino declarandam. Hæc de primo lapide.

Secundum nunc juvat expendere: in eo siquidem desideratur linea illa, quæ in primo P. secans ad angulos rectos Crucem effingit. Atqui ejus circulus longe laxior, ambiensque omnes illas notas subscriptis his versibus, tum circuli, tum notarum ipsarum mysteria referantibus:


*Circulus hic summi comprehendit nomina Regis,
 Quem sine principio, & sine fine vides.
 Principium cum fine simul tibi denotat, α, ω,
 X. & P. Christi nomina sancta tenent.*

Porro tabulam ipsam marmoream, in qua versus hos

27 12
1891

THE
LIBRARY
OF THE
UNIVERSITY OF
CHICAGO

THE
LIBRARY
OF THE
UNIVERSITY OF
CHICAGO



UNIVERSITY
OF CHICAGO
LIBRARY
STAMP

THE
LIBRARY
OF THE
UNIVERSITY OF
CHICAGO

THE
LIBRARY
OF THE
UNIVERSITY OF
CHICAGO

Fig. 1.

ITIPIRLNI
RYCIVSD
NVXIPO II

TAB. I.

Fig. 2.

SI BR
FRVNIINI

Fig. 3.

D PATRI NEAE H

D M
ARRIAE
RISTVIAE
MAELIVS
EMAVG
FV IAM
A AR
O
A III

Fig. 5.
I. SYRVSEVO
VS. SIBI. ET
O. SE. ABIYCHI
CECIANO. I
IVRIA. LA. AA
INFRONTE
INACR. P. XVI.

Fig. 6.

I. O. M
M. TELLON
ATILIANVS

A. M
SCR
L. PHI.

Fig. 7.

Fig. 8.

D. M. S
PATRI.
MA. IO
S. E. D

hos incisos vidimus, antequam in Templo maximo locaretur, frontispicium antiquæ Ædis D. Theclæ, cum staret, exornasse credunt Beneficarii nonnulli natu majores ejusdem Templi, quibus ultro adstipulor. Et hæc occasione signi, sive Labari nostri, de quo qui plura sciendi desiderio flagrat, legat is Aldum Manutium Pauli filium in suo *de notarum explanatione* libello, Gruterum in vasto illo & laborioso *Inscriptionum* totius Orbis opere, Jacobum Gretserum Tom. III. lib. I. cap. IX. x. & XI. Antonium Augustinum ubi de nummis Labaro insignitis, J. Lipsium lib. III. *de Cruce*, & Alciatum in *C. super tit. de Præpositis Labororum*, Lilius Gyrardus quoque *dialogum* ea de re conscripsit, at in quo nihil super eruditionem Ferrarii, aut nihil præter dicta videtur in medium attulisse. Alciatum vero cum damnat in *tit. de Præpositis Labororum*, recte id fecisse censeretur, si quid ipse melius literis consignasset. Nunc ad rem nostram.

Tab. I.
fig. 1.

Addamus igitur duobus illis monumentis tertium, ut allatis antiquius, & è Romano penu. Quis hic injurias temporis non queratur vel in ipsa clarissimorum virorum marmora sævientis. Ut enim hujus monumenti partem perpetuus hostis ille memoriæ reliquerit posterorum famæ, literas ejus certe multas nobis invidit, sine quibus nunquam ejus sententiam assequemur, nisi quis nobis Delius nator adsit. Verum enim vero, cum in eo superstites Romani pronomini reliquias habeamus, operæ pretium fuit illud qualecunque esset adducere, quod ad indicandam Templi nostri vetustatem facere videretur. Eandem jacturam passa sunt alia ejusdem Ecclesiæ monumenta, ac in primis illud, quod non procul ab eo, quod proximo loco descripsimus visitur in hunc modum.

Tab. I.
fig. 2.

Videre quoque est in pavimento Sacelli Majoris tabulas aliquot lapideas non vulgares, literis antiquissimis insignitas; sed hæc pedum attritu ita consumptæ, & deformatæ sunt, ut ne minima quidem earum pars dignosci vel ab oculatissimis possit. Subdemus nihilominus unam hic aliis omnibus perfectiorem, quam habemus in ipso limine Parochialis Ædis, imo quæ ipsum est limen grandioribus hifce literis exarata.

Tab. I.
fig. 3.

Ea fere sunt monumenta, quæ ad D. Vincentii visuntur hodie, fidemque Antiquitatis illius facient in posteritatem omnem, si perenniora nostra hæc erunt marmoribus monumenta. Alia enim, quæ vel Alciatus primus ipse collegit, vel Cicerejus supplevit, nusquam reperire potuimus, sive quod inde manus aliquorum invida ea suas in ædes detulerit; sive profusa nimis aliorum liberalitas juris esse voluerit alieni; sive quod ad veritatem propius accedit, magnam eorum partem cæmentariorum inscitiæ penitus occultarit, Procuratorumve Abbatæ parsimonia nimis vetustis illis parietibus minori quoad ejus fieri sumptu possit reficiendis intenta, parietibus ipsis incluserit, nulla tam nobilium marmorum, basium, stylobatum, ac ne columnarum quidem, quas nunc nulli parentes sumptui quæreremus, habita per summam antiquitatis injuriam ratione. Lapidem unum à Cicerejo repertum ea in agri parte, quæ Templum ipsum attingit, à tergo nunc adhuc superstitem haberemus, mecum ipse sæpissime dubitavi. Jacet enim lapis in stylobatis formam effectus ad imum sinistri lateris gradum, per quem ad Aram maximam pervenimus, similis ei, cujus in tabula verba ista legisse testatus est Cicerejus lib.

1. *Antiquitatum, Monumento XVI.*

IVSSV
IMPERIOVE
CAEL. DIANAÆ AVG
CAVIA SECONDVVS CVM
VALERIA ATILIANA
CONIVGE.

A Quamvis enim modo laudatus lapis ea in parte, quæ januam Ecclesiæ spectat, nullas admisisse literas videatur, partem illam tamen, quæ in scalarum parietem obversa est, eundemque fulcit, characteribus aliquibus inscriptam fuisse vel ipsa mihi forma lapidis indicabat, & lineamenta cætera in antiquis stylobatibus usitata. Id autem eo mihi facilius in animum inducebam, quod hujus è lapidis regione ad easdem scalas, alter eidem simillimus lapis inventus est cum Inscriptione Jovis, licet difficulter admodum literæ singulæ legerentur ob inversam ejus collocationem, & situm, ut innuimus supra. Sed enim me tum deceptum sensi, cum nimia veritatis indagandæ cupiditate succensus curavi lapidem ipsum amovendum loco, ut ab eo de re omni plenius erudirer. Diversos enim omnino characteres ab iis, quos animo mecum ipse conceperam, continebat, & aliam quam DIANAÆ vel CAVIAE mentionem, quorum tamen aperte fiebat in allato nuper ex Cicereji *Antiquitatibus* monumento. Quare ne posteris tum omnem luisse nos operam videremur, descripsimus quæcunque potuimus diligenter, ne elementa cætera cum his, quæ desiderabantur, paterent injuriæ temporis, descriptaque retulimus in hunc locum, ut ignota hæcenus, gratissimaque futura iis, quos nobile jucundumque studium antiquitatis tenet.

Tab. I.
fig. 4.

B Ea stylobatis à nobis reperti est Graphis, hæc notæ: cæteras, quibus agre caremus, vis frigoris, aut certe calcis abrasit. Contenti his itaque sumus, ac ne quis in posterum nobis modicæ fidei notam inurat eo lapide non reperto. Sciat is post ejus à nobis descripta lineamenta singula diligenter cum literis omnibus, quæ supererant relatum eundem fuisse statim in pristinam suam sedem, ac locum, tum ne Templi scalæ ornamento suo, fulcroque carerent, tum ut eleemosynarum capsulæ firmiter haberent, cui ut antea firmiter inhærent. Quamvis autem ejus explicationem afferre velle non necessarium videri possit iis, qui divinationes hoc in genere, vel conjecturas in minimis habent, placet nihilominus quid ea in parte possimus pro viribus experiri, ut si minus ejus germanam sententiam assequi valuerimus, laudemur saltem quod voluerimus in tanta non visi prius caligine Monumenti. Quid literæ D. & M. sibi appositæ prima in fronte lapidis velint, notum est adeo quam quod notissimum vel mediocriter eruditis, ne lippis ac tonforibus dicam. Eæ siquidem passim inscribi solebant Veterum monumentis, ut inde DOMVS MORTVI LOCVSVE DIIS MANIBVS SACER distingueretur à cæteris, quæ nulla religio consecrat. Quamobrem qui sepulchra demoliebantur, ii DEOS MANES LAEDERE EORVMQVE JURA violare putabantur. Hinc illa lex in XII. Tab. exarata, de qua Cicero; DEORVM MANIVM. JURA. SACRA. SVNTO. MOS. LETO. DATO. DIVOS. HABENTO. Corrige (ut hoc obiter moneamus) MOS. LETHO. DATOS. DIVOS. HABENTO. meliori sensu. Ea causâ Majorum sepulchra cum Deorum aris & templis plerumque conjuncta sunt, & pro iis non justa solum, sed etiam necessaria bella suscepta; nec unquam maximis ingeniis præditi sepulchrorum cæremonias Pontificio jure sanctas tanta sibi cura colendas persuasissent, nec violatas tam inexpressibili religione sanxissent, nisi eorum sanctitatem animis imbibissent. In ARRIAÆ nomine gentem Romanam agnoscimus, plebejam illam quidem, sed consularem, & ipsam præterea rectam, atque germanam orthographiam vocis: ARRIAÆ siquidem, sicut & ARRIVS, geminam liquidam amat, contra Recentiorum quorundam nimisque elaboratum scribendi usum, quem ut ita facile non receperimus, repugnante in primis Inscriptionis hujus, aliorumque gravissimorum hominum, &

Codicum M. S. auctoritate, à qua justa potissimum orthographiae ratio petenda est; ita non omnino damnaverimus, ut alii nimis libere facere consueverunt, quibus longe facilius est carpere, quam litteram exarare. Nam & apud Græcos nomen ARRII, Philosophi Nicomediensis, qui Vitas Epicteti, & Alexandri Magni luculenter conscripsit, duplici scriptum invenimus, sicut & apud Latinos ARRIAE uxoris Papinii Poeti, ad quem M. Tullius Cicero plures Epistolas dedit, quæ leguntur in iis, quæ ad *Familiares* inscriptæ vulgo circumferuntur. Advocat huc etiam Manutius Festum, cujus illa sunt: *Torum, ut significet torridum, aridum per unum quidem R. antiqua consuetudine scribitur: sed quasi per duo RR. scribantur, pronuntiari oportet. Nam Antiqui nec mutas, nec semivocales literas geminabant, ut fit in ENNIO, ARRIO, ANNIO.* Advocat & Isidorum rationem in medium afferentem, cur unica R. quandoque ARIA vel ARIVS scriberetur, nempe ob scilicet à Veteribus poni supra literas consuetum, cui cum oculos non adjecissent, facile decepti sunt; sic enim ille libro *Etymologiarum* l. cap. xxvi. *Veteres non duplicabant literas; sed supra scilicet apponebant, qua nota monebatur lector geminandam esse litteram.* RISTVIAE five nomen, five cognomen, familiæ apud nos clarissimæ antiquitatem docet florentis etiam num inquam meritis, & virtutibus Mediolani, RESTIAE scilicet, qua non alia priscam illam RISTVIAM perfectius refert, si bene utraque conferatur. Atque hæc quidem literæ patentes apertissime, neminem latent, non ita quæ in area stylobatis, quas tanto quis acumine poterit inveniri, qui eas legere, lacunasque earum omnes explere se posse confidat. Satius utique fuerit hic aliud agere, quam inter tot ejus monumenti Harpocrates somnia comminisci.

Erat in animo inversam hujus stylobatis faciem, uti nunc se habet, hoc ipso in loco delineatam graphice repræsentare; sed quia nihil aliud ab ea præter literas paullo ante descriptas afferebatur, eruditorum hominum lectione, vel admiratione dignum, idcirco laborem istum nobis consulto prætermittendum esse duximus, ne rebus non necessariis paginas impleremus. Occupabit igitur illius locum Graphis altera lapideæ Basis, cujus sedes olim fuisse traditur prope Xenodochium Templo nostro conterminum, ut est ab Antiquariis aliquibus literis consignatum. Neque enim antiquam ea nunc sedem obtinet, nec ejus apud nos vestigium apparet ullum; quin laborem non nisi post improbum exantlatum reperta tandem à nobis est in Horto Palatii, quod non minori sumptu, quam studio exstruere, atque instruere aggressus est, Tabulisque & Inscriptionibus antiquissimis exornare, clarissimus antiquitatis vindex Prosper Vicecomes è regione sacri septi Vestalium D. Bernardini, non tam ad familiæ suæ commodum & opportunitates, quam decus & ornamentum universæ Gentis, quæ non tam sago clara, quam Toga, literas pari cum laude coluit domi, & arma tractavit foris, alumna mitis utrobique, ac sæva Musarum, & Martis. Id autem eam ob causam libentius faciemus, quod labore nostro, laborem ejus inquirendi reliquis minuemus, ac fortassis etiam literas ejusdem singulas colligendi. Pleraque enim omnes exesæ laborem requirunt Herculeum, ut legantur, atque ut legi commode possent integro marmore, fracta ejus certe parte maxima, legi nunc minime possunt, nec sat scimus injuria temporum an virorum? Quod igitur à nobis colligi ea ratione potuerint, quam subdemus, referri in acceptum Paulo Morigio debet, quem non dissimulamus faciem nobis in hisce tenebris prætulisse. Sic enim illas præeunte nobis illius Historia, in qua lib. iv. cap. xvii. cum aliis marmoribus multis à se repertis in eodem Horto, stylobatem

A hunc quoque descripsit, inoffenso, uti arbitramur, oculo legebamur. Tab. I. fig. 1.

B Stylobatum hujuscemodi notas non persequar, nec figuram. Usus enim eorum ad Tumulos ita frequens Patrum nostrorum memoria fuit, ut recentioribus etiam vel mediocriter in hisce studiis institutis familiaris hodie quoque sit ejusdem cognitio formularum. Adde tot huic affinium monumentorum exempla in hac ipsa nostra Urbe collecta suppeditari, eaque integra & perfecta ab optime de Antiquitate meritis Alciato, Merula, Bonaventura Castillionæo, & novissime (ut Gruterum interim, & alios eruditissimos, ac amantissimos antiquitatis reparandæ viros sub alio Sole degentes tacitos omittamus) Hieronymo Burserio Novocomensi, nulli hac in parte secundo, meique studiosissimo, in augustissimo *Insuetica Magnificencia Theatro*, cui primum Tomum jam editum gratulamur; quamvis illum adhuc in Germania exfulare indoleamus, ut nostrum hoc velle post acceptum à tot Reipub. litterariæ syderibus lumen, illustrare denuo, bonas esset horas pessime collocare.

C Quid quod adsportatum extra nostræ ditionis fines operam nostram exposcere non videtur, contentum ostensione Scriptoris, & loci, apud quos legi & intelligi per otium possit. Eandem plane fortunam experta est Basis tertia silicea, quæ suis è sedibus alio, nescio cujus opera, translata in Æde nunc Parœciali sacra Vigentini ad imum scapum columnæ visitur cum Epigrammate ad nostrum Jovis olim Templum apte adeo, quam quod aptissime, pertinere. Licet id colligere tum ex primis ejus elementis: tum ex Atiliani cognomine, quo prima Basis nostra (Valeriæ scilicet) insignitur. Quam ecce tibi, candide Lector, animo hic candido exhibemus, ne quid à nobis hic fingi existimes. Tab. I. fig. 6.

D Habemus nihilominus alia, quibus antiquitatis & posteritatis gratiam colligamus. Lapidēs hi tres sunt antiquissimi reperti nuper ab Aloysio Castillionæo, cujus in indaganda pleraque monumentorum Basilicæ Vincentianæ parte, quæ nostro in opere cernitur, solertiam eximiam commendare nostræ partes essent, nisi nobis is frater esset, & charissimus frater. Primus in Abbatiae Horto repertus hic est, quem, ne characteres ejus plures injuria temporum interirent, aut cæmentariorum imperitorum opera rursus ædificiorum latebris involverentur, exteriori parieti Templi, qui ad Meridiem spectat, idem Aloysius frater affigendum curavit rei antiquariæ bono. Tab. I. fig. 7.

E Alter figuræ non dissimilis, coloris dissimilis licet, & characteris, paullo post primum inventus, nec procul ab eodem inibi collocatus cum explanatione subscripta legitur ad hunc modum: Tab. I. fig. 8.

DIIS. MANIBVS. SACRVM.
PATRI.
MACVVIO. IOVIS.
SACERDOTI. FLAMINI. DIALI.

Tertius siliceus, & integer prope duos alios superiores positus, parietem eundem exornat hac forma:

D. M.
ERIVS P.
MITIVS IER.
IE CONIVG
BENEMERI
TISIME.

F Quartus marmoreus confractus ex parte quadam, & parergis non inveniustis ornatus, ac politissimarum litterarum forma, cæterorum omnium pulcherrimus, & maximus eorundem. Hæret nunc juxta

juxta alios in aduerso Januæ pariete, & legitur in hæc verba:

V. F.
L. PVLLIVS
ESTVTVS
IBI. ET
NIAE

IGI
IAE

Ex his igitur omnibus apparere nunc demum liquido judicamus, à doctis minime probandam esse sententiam Scriptorum illorum, qui disertè negarunt Templum hoc nostrum conditum ante Christi Domini Servatoris adventum; sed eorum potius, qui multo ante conditum, & Jovi summo dicatum à Romanis in has oras summo cum imperio, & potestate missis, Desiderii deinde conatibus restitutum, & auctum sacrorum Monachorum Cœnobio, prodidere. Nam & Alciatus, (quem hic libenter sequor) patriarum antiquitatum peritissimus scriptor, in hac ipsa sententia fuit, ut aperte colligimus ex *Oratione*, quam pro restituendis publicis Mediolanensibus ædificiis habuit, minime contemnenda fragmentorum, & lapidum antiquissimorum auctoritate commotus, quos à se in hoc ipso Urbis tractu visos diligenter exscripsit, non opinione vulgi, quod illi falso attribuit Catellyanus Cotta in suo ad ejusdem Alciati Antiquarium supplemento, ita de eo scribens pagina 141. *Alciatus Sancti Vincentii Basilicam simpliciori ductus vulgi traditione Jovis Templum fuisse arbitratus est: ego tamen Templum Jovis erectum olim in ruinis Sancti Victoris vulgo Maximi extra Urbis mœnia ob Inscriptionem ibi nuperrime repertam adnotavi, siquidem ipsamet Inscrip- tio habet literis prioribus I. O. M. Quod item colligitur, & ex sequenti:*

I. O. M.
C. VALERIVS C. L. FORTVNATVS
IVD ET VA...VS...M.

Ceteris ob vetustatem ablati.

Quinimo etiam atque etiam miror, tale inter Cottam & Alciatum diffidium existisse, cujus ergo placuit ejusdem verba ipsissima hic referre. Cum alioqui Cotta Jurisconsultorum illum Principem, & Concivem suum, arguere se voluisse non scriptione solum, verum etiam auctoritate apertis (quod ajunt) tibiis professus sit. Quamquam illud etiam admiror magis, virum alioquin ingenuum, qualis haberi vult Cotta, dolo malo subticuisse rationem illam, quæ Alciatum perduxit in sententiam nostram, quo somnia sua scilicet patentiore in animis imperitorum aditum invenirent. Neque vero tanti apud me sunt Inscriptiones illæ duæ, quas se reperisse jactitat, ut ab Alciati partibus me divellant. Nam præterquam quod mutilæ, & imperfectæ sunt, ac fortassis etiam commentitiæ, cum nullibi locorum appareant; inter omnes constat, non Jovis, sed Martis Templum ad S. Victoris antiquitus existisse, cujus ergo cognomen adhuc retinet Victoris Martii apud sane loquentes & probe. Vulgus enim, cujus est omnia permiscere, missa M. consonante, T. in consonantem proximam commutata, ARSIVM corrupte profert pro Martio, antiquitatis & eruditionis hujus prorsus ignarum. Eam ob causam Alciatus Monumento Patriarum Antiquitatum xxxvi. sic illam esse voluit posteritati testatam: MARTIS TEMPLVM apud Ma- jores nostros celeberrimum fuit, quod subsequens ætas priori nomine VICTORI MARTYRI nuncupavit, dedicavitque. Quis fieri potuit igitur, subdet aliquis pro Cotta pugnans, ut Jovis mentio fieret in hoc Templo? Potuit, & facti rationem afferemus

A in medium non inviti. Sciendum est igitur, positum olim apud Ethnicos in more fuisse, ut hæcce literas I. O. M. inscriberent omnibus fere memoriis defunctorum, non aliter ac Christi Domini sectatores alias hæcce præponerent D. O. M. id quod fuit à paucis hætenus observatum. Nihil ob id aliud Inscriptiones Cottæ, quales illæ cunque sunt, docent, quam eo in Templo positum fuisse Viro Ethnico monumentum, non Templum Jovi Optimo Maximo dedicatum; aut certe Jovi Optimo Maximo persolutum votum ob literas tres illas postremas V. S. . . M. quibus si quartam addideris L. quæ sola nostro judicio desideratur, VOTVM aliquod SOLVISSE Virum illum Ethnicum LVBENTEM MERITO deprehendes. Quid quod liberti opes, qualis fuisse dignoscitur ex ipsamet inscriptione VALERIVS FORTVNATVS, tantas fuisse vix credam, ut Templo Jovi suffecerint exstruendo. Accedit huc illud etiam majus nostræ sententiæ firmamentum, Veteres, Deorum inanum cultui mancipatos, quotiescunque Templum Deorum suorum alicui dedicabant, solitos fuisse in ipsis dedicationis tabulis inscribere Dei illius nomen, suis omnibus literis explicatum, iisdemque grandioribus nomine dedicantis, ut ex iis, quas libet apponere, colligetur. Romæ enim in S. Alexio ista sic legitur in honorem Jovis:

IOVI OPTVMO MAXIMO
DOLOCHENO. T. FLAVIVS COSMVS
IVSSV DEI FECIT.

Et alibi in ædibus Marcelli:

IOVI DOLICHENO
M. AVERONIVS KARICVS.
D. D.

D

In honorem autem Herculis hæc in ejusdem templo:

HERCVLI INVICTO. M. CASSIVS
HORTENSIVS PAVLINVS PR. XR.
VIR. SACRIS FACIVNDIS DONVM
DEDIT.

HERCVLI INVICTO. M. JUNIVS
CESONIVS HICHOMACHVS ANI-
CIVS FAVSTVS PAVLINVS. CN. PR.

E

Vel ut alii, & nos ipsi Romæ observavimus:

HERCVLI INVICTO
M. CASSIVS HORTENSIVS PAVLI-
NVS PR. VRB. XV. VIR. SACRIS
FACIVNDIS DONVM DEDI.

DEO HERCVLI INVICTO
M. IVN. CAESONIVS NICHOMA-
CHVS ANICIVS FAVSTVS PAVLI-
NVS C. V. P. V. D. D.

F

Et in Capitolio:

HERCVLI SAC.
ALCIDAE SACRI GENERIS DECVS
HOC TIBI PRAETOR. ET IOVIS
ANTISTES DEDICO PERPETVVS.

Ubi & hoc aliud marmor, effossum olim in ejusdem Templo juxta scholam Græcam, & Circum maximum:

DEO

DEO HERCVLI INVICTO

C. IVL. POMPONIVS PVDENS SE-
VERIANVS V. C. PRAE. VRB.Sicut & hoc aliud quadratum, & in omnibus suis
partibus scriptum: in prima sic:

HERCVLI INVICTO

T. FLAVS IVLIANVS QVADRATIA-
NVS V. C. PR. VRB. XV. VIR. S. F.
DONVM DEDIT.

In secunda:

DEO HERCVLI

M. NVM. M. IO. CEIONIO ALBINO
PRAETOR. VRB. AN. V. C. DEDI-
CANTE.

In tertia:

DEO HERCVLI

IVL. FESTVS V. C. PR. VRB. ANN.
D. D.

In ultima:

HERCVLI INVICTO

POMPEIVS APPIVS FAVSTINVS V.
C. PR. VRB. N. D. D. FELICITER.Faciunt huc aliae duae eidem Numini posita in eo-
dem loco, quas si cum aliis non afferremus, inju-
riam antiquitati maximam faceremus. Una est in
rotundi lapidis fragmento carminibus in fine muti-
lis exarata:HERCVLES INVICTE CAVTIVS HOC TVO
DONVNVMINI SANCTO DICAUIT PRAETOR
VRBISCVM PIA SOLEMNE MENTE RITE FECISSE
TRADIDISTI QVOD PRO POTITIIS EVAN-
DREOADMINISTRANDVM QVOD ANTIIS HIC
ADE.

Altera vero ejusmodi:

HERCVLI VICTORI POLLENTI POTENTI
INVICTO D. D. L. M.C. VLPIVS FRONTO VIATORQVE DEDIC.
III. K. IVL.

L. VETTIO PAVLLO.

T. IVNIO MONTANO COSS.

Eandem scribendi rationem retinent aliae dedicatoriae
tabellae Numinum aliorum in eadem urbe, ut
illa NEMESIS in Trajani foro:VIRGINI VICTRICI SANCTAE DEAE NE-
MESI. M.AVRELIVS ROMANVS OPTIO KARC. CHOR.
XII. VRB. GORDIANAE D. D.

DED. KAL. IAN.

SILVANI in regione Tricerii olim in Capitolio:

SILVANO SANCTO SACRVM

PHILEMON. P. SANCTI ELEVTheri D. D.

Et in Haranulae Regione:

SILVANO DENDROPHORO SACRVM
M. PBLICIVS HILARVS MARGAR. QQ.
PP. CVM LIBERISMAGNO ET AMONIANO DENDRO-
PHORIS

M. D. M. DE SVO FECIT.

A LIBERI quondam in domo Jo. Ciampolini:

LIBERO PATRI SANCTO SACR.
SEX. COELIVS PRIMITIVS ET PVBLI-
CIA ANTVLLA VOTO SVSCEPTO
D. D.

SERAPIDI DEO

M. AVRELIVS ANTONINVS PONTIFEX
MAX. TRIBVNIC. POTE. X. AEDE. CV.APOLLINIS ibidem in aedibus Custodis Cancel-
lariae:

B

APOLLINI

Q. LOLLIVS VRBICVS PRAEF. VRBIS.

SOLIS in eisdem aedibus Custodis Cancellariae:

SOLI SACR.

C. IVLIVS HELIVS EERRARIVS VOTO
SVSCEPTO
D. D.

SOLIS

C

A. RA. L. SPEDLVS QVADRATVS
D. D.

D

Pluribus ultro supersedemus, ne lucernam in so-
lis luce clarissima accendamus. Illud monuisse con-
tenti, eam nos ob causam Inscriptionem Templi
nostri primam affirmasse dedicatorem esse ob no-
men Jovis grandioribus omnino literis explicatum:
secundam vero negavisse Epitaphium esse, seu Ti-
tulum monumenti, sed esse voti tabulam, conje-
cisse ex eo, quod in votorum Inscriptionibus, se-
cus ac in Templorum dedicationibus fieri consue-
verat, Deorum nomina primis, ut plurimum, lite-
ris inscriberentur, & caractere plerumque simili
characteribus sequentium versiculorum, ut haec
ipsa nostrae similis palam ostendit in Ecclesia Apo-
stolorum Romae:

I. O. M.

CAELIVS BARO VOTVM SOL. L. M. N.

I. O. T.

ET DIIS DEABVSQVE MANELLIA VA-
LERINA. S. L. M.

E

Et eae Cottae Mediolani, quae si quid probant, hoc
probant. Possemus hic alias hujusce generis Tabu-
las ex reliqua antiquitate eruere, nisi putaremus sa-
tis esse ad Alciatum à Cottae calumnia vindican-
dum, ostendisse eas ipsas, quas attulit Cotta, nihil
omnino probare contrarium Alciato, ipsamque pra-
terea communem hominum famam, quam idem il-
le contra Juris & Antiquitatis peritissimi Viri sen-
tentiam adducere non dubitavit, sibi adversari po-
tius, quam favere. Nescio quod enim veritatis pon-
dus & momentum famae communi inest, quod
ita facile non infringas, & cum majora Scriptorum
testimonia defunt, per manus accepta traditio plu-
rimi fieri consuevit, quin immo in rerum antiqua-
rum veritate probanda primum ea sibi locum vin-
dicat inter ea, quibus tum utimur, ne labamur.
Sed quoniam sententia, quam de Basilica nostrae
antiquitate protulimus non tam communi famae, aut
traditioni Majorum innititur, quam testimoniis
eorum, qui soli constituere Remp. antiquariam
possunt, & Inscriptionibus iis, quae nostram longe
aetatem superant, & Parentum avum, supervaca-
neum erit ea in parte diutius immorari. Quan-
quam possemus etiam, si vellemus, subicere fra-
gmenta singula, quae pro se nobisque apud nos ob-
servasse commemorat Alciatus, cum is quænam il-
la

F

la sint omnia persequi neglexerit sigillatim. Nobis enim, qui in re præsenti quotidie sumus, unumquodque eorum percensere facile esset, & nostram solidius inde sententiam confirmare. Exceptis enim Stylobatum, Spirarum, & Peristyliorum fragmentis, quos Fasciculi hujus initio repræsentare voluimus, & Columnis duabus de triginta commodius alibi recensendis, quæ nostrum adhuc Templum exornant, & aliis duobus lapidibus in usum sacri Laticis excavatis, duos præterea truncos prægrandes habemus columnarum aliquot varii marmoris, & alia fragmenta duo marmorea coronarum, quarum forma, denticulus, folia ipsa non negligenter è saxo ducta, aliaque omnia Corinthii nobis operis symmetriam exhibent intuendam, quam uti principem inter alios Ordines simplices Architecturæ Jovi ipsi Deorum olim maximo tribuebant, ut est à M. Vitruvio, & post ipsum ab Andrea Palladio lib. iv. cap. xviii. monitum, & servatum: eam ob causam opere Corinthio conditum fuisse Romæ Jovis Statoris Templum, & Jovis Tonantis ibidem ad Capitolii radices, quorum in sententiam it ipse quoque Burserius lib. xiv. supra laudati Theatri Insubrica Magnificentia pag. 77. ubi symmetriæ paris marmor expendit, quod olim erat in ædibus Marlianorum in hac nostra Urbe cum Aquilæ sacrae Jovi sculptura, & Scriptores alii de Romana antiquitate meritissimi, nec spernendi. Mensæ porro qua candidi, qua rubentis, qua subobscuri marmoris tot ac tantæ sunt, ut eorum nos omnium summam posse subducere vix speremus. Sed neque, quam multæ species, nec nomina quæ sunt lapidum coloratorum (ut hoc mihi de suo commodet Mantuanus Vates)

Est numerus: neque enim numero comprehendere refert:

Quem qui scire velit, Libyci velit aquoris idem

Discere, quam multa Zephyro turbentur arena;

Aut ubi navigiis violentior incidit Eurus

Nosse, quot Ionii veniant ad littora fluctus.

Referremus etiam, si vacaret, hunc ipsum in locum candida saxa permulta & magna Templi nostri parietibus passim inserta, vel alibi otiose jacen-

tia, in quibus variæ quædam inter se fasciæ ventuste connexæ eum in morem, qui non certe minus quam clare marmora illa non ignobiles Templi aliqujus Idoli reliquias esse doceat, ac omnino talia, qualia contendit esse Ripamontius lib. v. *Historiarum Ecclesiæ Mediolanensis*, ornamenta illa, quæ imas arcuum extremitates ambiunt ejus porticus, quæ ante faciem Basilicæ Ambrosianæ excurrit, quum ea nos cum nostris contulerimus aliquando, & ejusdem prorsus esse materiæ, ne dum formæ simillimæ, viderimus, quam quæ non mente sed oculis usurpamus. Subderemus his etiam confertam aciem quodammodo lapidum aliorum, vasorumque fictilium, quibus æque foris abundamus, ac domi, nisi vereremur ne longius Fasciculus hic primus excurreret, quam debet. Sed erit eam commodior instruendi locus, & in apertam planitiem deducendi, cum verba faciemus aliquot de Lupericis. Nam & in superstitiosæ nimis antiquitatis marmoribus indagandis studiosiores æquo videri fortasse voluimus, & esse animo nimis infenso iis, qui suam Templo nostro vetustatem adimunt, quasi ex ingenio Cottæ restiterimus, affuerimus Alciato, quamquam unum me defendendæ veritatis studium ex illa veterum fragmentorum observatione succenderit, non cacoethes aliquod conceptum virus in civem nostro magno cum dedecore profundendi. Maneat igitur D. Vincentii Templum vetustissimum esse, ac inter præcipuas Urbis nostræ Basilicas referendum. Ac licet ob accolarum distantiam, aut propter nimiam Ambrosianæ Portianæ, Laurentianæque Basilicæ propinquitatem in septem illas præcipuas numerari nequiverit; inter duodecim tamen, quas Insigniores vocant, tum ob antiquitatem, tum ob Sanctorum Reliquias, & Indulgentiarum Thesauros, jure semper ac merito numeratum: cujus ergo factum est etiam, ut primis illis temporibus, quibus majori pietatis igne fidelium animi æstuabant, summas ad opes pervenerit, & uberrimam reddituum terrenorum messem. Id autem, quod attigimus de Basilicis duodecim, adeo notum est ex trito libello de sacris adibus Mediolani, ut confirmatione non egeat clariore.

JO. ANT. CASTELLIONAEI

F L O R I L E G I V M

A N T I Q V I T A T V M

P A R O E C I A E

D. VINCENTII IN PRATO.

S E C T I O I.

F A S C I C. II.

Varia Templi Forma. Rotunda-ne fuerit, an Quadrata. De aliis quaestum ordine, præcipue de postrema, in qua Ara Maxima, Confessio, Sacella minora duo, Baptisterium, Sacra Turris, & campana, sacrarium, Pictura Nova, ac Veteres. Novenarii, minorumque ejus ergo Numerorum aliquot Mystéria recensita, appictaque ad finem totius Templi, & Paræcialis domus Ichnographica tabella.



ORDINE facturi nunc esse videmur, ac loco, si Templi nostri præstantiam ductis ad historiæ veritatem, quoad ejus fieri poterit, lineis adumbremus. Ac licet per se quisque possit eam sibi proponere contemplandam vel ex ipsa præstantia conditorum, quales illicunque fuerint, sive Romani viri nobiles, ac Senatores, sive pri-

B b mms

mus apud nos divini verbi nuntius, & interpres Barnabas, sive quis alius ejus in Archiepiscopali provincia successor, sive Desiderius Longobardorum Rex æque pius, ac potens, (solet enim ædificiis omnibus decus ingens adjicere non tam Architecti peritia, quam conditoris, illustri loco sati, vel aliquo dignitatis fastigio collocati splendor) eam nos tamen hoc capite ex ipsa forma potissimum colligemus, juxta quam primitus conditum & ornatum fuit. Ac ne Lectorem diutius immoremur. Ea sane præcipua Templorum forma semper est habita, quæ rotunda fertur in orbem à seipsa incipiens, seque in ipsam definens ac recurrens. Testantur hoc Romanorum Tempia quamplurima Diis Majorum, ut ita loquamur, Gentium passim in urbe condita, ac inter cætera Pantheon sic dictum, quod rotunda quædam esset, cæloque per-similis sedes, ac eam ob causam Deorum omnium domicilium existimata, ut ejus adhuc ex parte superstitis vestigia docent, retento nunc etiam cum D. Mariæ nomine, cognomine *ad Rotundam*; nec non cella ipsa Herculis Mediolani ad Romani Pantheonis similitudinem primitus efformata, restituta deinde fidelium opera, Divoque Laurentio Martyri consecrata. Idcirco nemini nos ambigendum duximus talem fuisse primævam Templi nostri speciem, ac figuram; tum quia sacrum illud fuisse docuimus IOVI, qui à Majoribus, teste locupletissimo Cicerone, OPTIMVS propter beneficentiam, MAXIMVS propter vim dictus, summo sibi jure suis deposcebant in Templis optimam & maximam figurarum, quam ex mente Platonis Geometræ omnes uno ore existimarunt esse rotundam: tum quia lapideas mensas quasdam habemus è ruinis antiquis crutas nostri Templi, fragmentaque plurima marmorum rotundorum, quæ de orbiculari ejus structura neminem dubitare sinunt: tum demum, quia Jacobus Andrevetius in exemplaribus Templorum ab Ethnicis exstructorum, quæ typis æneis elegantissime descripta, Mediolanumque delata ex Belgio, apud Amicum vidi, Jovis Tempia rotunda quondam fuisse testatur, appositis Ichnographiis aliquot eorundem. Quod si quis alia sentiens Templum nostrum quadrata quoque forma condi potuisse contenderit, hujus nos conjecturæ, quæ in vetustissimis rebus cuique libera est, non vehementer admodum reluctabimur in præsentem; siquidem quadratis in Templis etiam cultum fuisse Jovem accepimus, ac in ipsa potissimum Insula Tyberina, & juxta Palatium Romæ, ac templum quidem illi positum, in Insula Tyberina ea symmetria fuisse, quam Græci *Πρόσολον* dicunt: quod autem juxta Palatium habuit, Jovisque Statoris Delubrum appellabatur, proportionem periptericam retulisse, quæ de M. Vitruvii sententiâ libro *Architectura* VIII. cap. I. stantes columnas sex in fronte, totidem in postico, novem in utroque latere requirebat. Ac isto quidem ex numero columnarum delubro Jovis Statoris simillimum fuisse nostrum, conjiciunt ii, qui quadratam illi figuram adscribere voluerunt. Habet enim columnas in Æde inferiori decem, in superiori vero duodeviginti, quibus arcus & fornices innituntur. Supersunt ad hæc peristylia duo ejusdem omnino formæ, quæ in usum labri lustralis aquæ annis ab hinc aliquot concessere, quemadmodum & in alios usus truncæ partes aliquot columnarum, quarum omnium numerum, qui subducet, totidem esse reperiet, quot olim fuisse prodidit in Jovis Statoris Templo Vitruvius, nec non ordinis, ut erant illæ Corinthii, nostrumque Templum à nostris, ut Jovis illud à suis extrinsecus circumseptum.

Ut ut sit Rotundæne Quadratæve structuræ nostrum initio fuerit, parvi refert, cum priscam il-

lius præstantiam vel columnæ solæ spirantia majestatem illam, ac marmora fateantur amplissimam vetustatis, quam iis visis alibi frustra desideres ac requiras. Cæterum quam primo figuram accepit, retinuisse credimus post natum humani generis vindicem, ac Servatorem, post ipsum quoque adventum Barnabæ, ipsumque adeo recens acquisitæ Christo sobolis incrementum. Nondum enim eo processerant nostræ religionis vires, ut antiqua Tempia restituere, ne dum nova condere, auderent. At ubi robur illa cœpit, ac vires, radicesque altius egit in animis virorum æque nobilium, ac matronarum, instauratum idipsum fuisse, & novam assumpsisse speciem, arbitramur, columnis omnibus, quæ foris prius exstiterant, ejusdem in laxiorem sinum ac pectus, Ecclesiastico more, translatis, ut aliis tum in Templis fieri consuevit. Consecuta sunt ævo progrediente tempora Longobardorum Regum: utque ii barbari penitus, & agrestes, sic ipsis regnantibus Romana Templi nostri facies, venusta illa scilicet, & vetusta, cum rudi & impolita protinus est mutata, indeque profecta illa capita columnarum, quæ barbaram adhuc ipsam barbariem signant, & alia pleraque artis omnis expertia monumenta. Injuria tandem ævi confectum, consumptumque propemodum vetustate restituit, & in augustiorem & ampliorem formam redegit Benus Petronius, summo vir ingenio præditus, & Abbas illius insignis, summa erga Deum & reliquos Cælites pietate, anno à Virgineo partu millesimo tercentesimo octuagesimo sexto, quo Metropolitanæ quoque Mediolanensium Basilicæ jacta sunt altissime fundamenta ab eorum Duce tunc temporis Joanne Galeacio Viccomite, cujus tum nomen ac laudes interibunt, cum moles ipsa tantæ Basilicæ corruebat vel fatisceret. Hinc factum est, ut cum opere Gothico summa Basilicæ moles fuerit excitata, ejusdem architecturæ retulerint, ac etiamnum referant, picturæ vetustiores aliquot nostri Templi, summi uti potuere præstantiam æmulate. Ac ne gratis instaurationis hujus auctorem factum quis à nobis existimet Benum, notum id omnibus, ac perspectum facit ipsius præ Templi foribus Inscriptio, quam hic afferre placuit: tum ne quis ea, quæ diximus, in dubium vocet, tum ut inde lucem aliquam accipiant, quæ de Templi ejusdem Monachis afferemus.

Venerabilis Pater egregius constantis animi, & devotus. Dominus Frater Benus de Petronis de Bernaregio generis nobilitate præclarus. moribus & vita decoratus. in divino officio excellentissimus. olim Abbas istius monasterii Sancti Vincentii. cujus gubernationem cum multis tribulationibus & angustia regulavit annis decem octo. mensibus decem. cum magna diligentia. Sic quod bona dicti monasterii reliquit in bono statu diligenter conservata. Hanc Ecclesiam S. Vincentii quæ tempore suæ Abbatix vetustate ruerat reparari facere inchoavit. eandem multo plus quam primitus erat decorando. Verum quia eam morte præventus ad-

adimplere nequivit. in ultimis constitutus talem ordinem apposuit. quod de denariis pro dicta Ecclesia reparanda cum immensis vigiliis per eum addunatis, & conservatis. Infra duos menses post ejus mortem extitit reparata. Vixit enim in tribulatione decessit in tempore. quo poterat quiete vivere cum honore. Set tunc Deus vocavit eum ad se & forte profuit ejus animæ. quæ divina misericordia interveniente requiescat in pace. Amen.

Diem suum enim clausit extremum milleximo trecenteximo octuageximo sexto die quinta decima mensis Augusti.

Ex his adeo veram quam quæ verissima eorum esse sententiam arbitramur, qui Templum nostrum multo ante Desiderii Longobardorum Regis tempora conditum scribunt. Siquidem enim illud sub Annum millesimum trecentessimum octuagesimum sextum ævi vetustate confectum consumptumque corruisse Inscriptio mox allata docet, Benique Petronii diligentia restitutum & auctum, multis sane seculis ante Desiderii sceptrum exstructum idipsum fuisse fatendum est, cum Ambrosiana, Laurentiana, & aliæ Basilicæ Mediolanenses ante Longobardorum Regum imperium conditæ stent adhuc, salva prisca operis forma, perinde ac si illas nostræ memoriæ Proceres condidissent; aut certe à Desiderio Rege minori quam Regem deceret impensa reparari cœptum, Petronii tandem Abbatis opera perductum ad culmen, & eam, quam nunc etiam oculis intuentium mirandam obijcit, majestatem.

Mirandum ad hæc in modum etiam situs Ædem hanc nostram exornat ac locus. Media enim prata inter ridentia, amœnos hortos, feraces vineas, fruteta lætissima, sedem obtinet perennibus aquarum hinc inde manantium complexibus irretitam. Quem oculorum parerga ista non recreant? Quem non in amorem sui pelliciant? Quem non in admirationem protrahant vel nolentem? Sed ipsam nos hic Ædem potius ingrediamur, ejusque penitioris & interioris faciem contemplemur. Ea satis illustris ac magna, quæque possit piorum quemvis allicere, ac morari. Ecclesiasticam quoque symmetriam exprimit, & illam sacrarum ædium majestatem, quam non commendare summo opere, non queas. Tres enim latos in sinus expanditur in morem Crucis, suumque unicuique laqueare imminet opere non ejusdem. Medium duobus aliis sublimius, iisdem artis præstantia longius antecellit. Summa id in parte fastigiatum attollitur, tandemque in angulos definit subnixum transtris & tignis, Basilicarum Romanarum ritu non à sacris omnino Mysteriis alieno. Hujus ad latera laquearia duo sunt alia æquabiliter inter se dimensa, tabulato puro quidem ac simplici, sed non angusto minus primo illo medio, & sublimiori, licet angustioris locum obtineant, & humilioris sedem. Fulciunt hæc columnæ duodevinti lapideæ teretes, & rotundæ, distinctæ inter se paribus intervallis, & à Templi foribus recta ad Aram usque Maximam derivatæ, quarum

A epistylia qui viderit & expenderit diligenter, jurabit esse Corinthia non coactus. Eadem fulcra sunt Arcuum octo, reliquique parietis ab his ad summum usque tecti fastigium pertinentis, in quo fenestræ totidem arcibus ipsis, suo non tam numero, quam ordine respondentes. In iis autem aperiendis ratio illa est inita, ut hemicycli formam exprimerent in superiori parte; à lateribus vero latiores intrinsecus, quam extrinsecus forent, mysteriorum eorum causa, quorum Patres Sanctissimi meminerunt, eademque structura ab illis templa præcipua condita, quale illud fuisse memorat Prudentius, quod juxta D. Hippolyti Cœmeterium magna celebritate fidelium colebatur, Hymno XI. Περὶ τῆς ἐκκλησίας :

*Stat sed juxta aliud, quod tanta frequentia Templum
Tunc adeat, cultu nobile regifico,
Parietibus celsum sublimibus, atque superba
Majestate potens, muneribusque opulens.
Ordo columnarum geminus laquearia tecti
Sustinet, auratis suppositus trabibus.
Adduntur graciles tecto brevior recessus,
Qui laterum seriem jugiter exsinuent.
At medios aperit tractus via latior alti
Culminis, exsurgens editiore apice.
Fronte sub adversa gradibus subinde Tribunal
Tollitur, Antistes predicat unde Deum.*

Quis hæc legens in D. Hippolyti Templo descriptam Basilicam Vincentianam non videt, aut hanc in illo? Neque vero prætereundum à nobis hoc loco, quod est de summo Templi nostri culmine multorum antea Scriptorum monumentis ac literis celebratum, Divum nimirum Ambrosium, Mediolanensis Ecclesiæ Pontificem, & Patronum irato per similem, ac furenti, gladioque districto minitantem Imperatori Conrado, visum eo quondam in culmine, feri Ducis pectus & animam consternasse. Cum enim Donato Bossio referente Conradus Anno salutis allatæ Mortalibus millesimo centesimo quarto Mediolanum pertinacius obfideret, Grisolaumque illius Archiepiscopum ad necem inquireret, ut Ambrosium nescio quem, Mediolanensis tum Ecclesiæ Cardinalem æmulum Grisolai, ejusdem in locum sufficeret ac subrogaret, tot ac tanta de coelo repente tonitrua exaudita sunt, tot taliaque fulgura micavere, qualia nulla unquam prior ætas meminerat se vidisse. Inter hæc Bremoni cuidam Archiepiscopo, nostro hoc in Templo solemnia facienti, & aliis duobus Imperatorii Consilii Præsidibus, quos E Adstantes vocant, ejus è summo tholo Ambrosius videndum-ne, an pertimescendum, obtulit, ea forma, quam antea paucis ivimus adumbratum. Quo viso Bertantus unus ex iis, qui Consilio intererant, metu simul ac facti conscientia perterritus & exanimatus suam in Provinciam illico se recipit; postera vero die reliqui cum Imperatore ipso turpissima sese fuga, alii alio palantes ac trepidi, proripuerunt. Ita rem plane gestam accepimus à Scriptoribus iis, quorum frustra fidem elevant, qui narrant illam aliter accidisse. Eminent è summo Templi culmine Sacra F Turris exstructa de more, in qua Campanæ duæ; major una ab Turrense olim Vincentiani Cœnobii Abbate Anno MDXV. à Christo nato inibi collocata, & VI. Idus Mart. Hieronymi Buscæ præstantissimi horum instrumentorum opificis industria sic efficta, ut sonitum inter alia Urbis æra celebriora perfectissimum edat: Altera minor nuperrime, hoc ipso nimirum anno M. DC. XXIII. quo hæc scribimus, nostra & Paræcianorum aliquot impensa conflata, librarum Bb 2 mille

mille ducentum pretium excedens, quo piis ægrotantium usibus, & ipsi potissimum societati Domini Corporis inserviret. At quoniam hoc ipsum instrumentum sacrum est, nosque sacra potissimum in lucem damus, nec pauca me de illius antiquitate, usu, nominibus observasse memini, institutum servabo meum, faciamque libentissime, ut ea cum Lectore pio, benevoleque communicem.

Campana igitur nomen accepit (si Waldensi cap. v. *De rebus Ecclesia credimus*) à Campania regione, quod in ejus Urbe præcipua Nola grandiores olim fabricari coeptæ sint, licet alii minores tantum *Noleas* appellari velint. Quo vero tempore coeperit in lucem dari, minime omnium convenit inter Scriptorum cœtus. Baronius enim Tom. x. *Ann.* factum id censet anno DCCCLXV. quod ego vere dictum arbitror, si de Græcis accipiat, hoc est, de tempestate illa, qua Græcis Campanæ aliquot dono missæ sunt à Venetis, quibus ante caruerant Turcarum lege, quod earum sonus nimiam securitatem & auctoritatem præ se ferat, & valde ad conjuratorum, aut seditiosorum animos, quamvis longe, lateque dispersos, contra Turcam de improvviso congregandos existat idoneus. Siquidem id ipsum Historiæ Venetorum tradunt. In eam vero sententiam idcirco libentius trahor, quod idem ille sacrorum *Ann.* Scriptor Tom. i. multo ante, quinquagesimo nimirum & octavo anno prius, Campanas in usu fuisse testatur, tum scilicet cum pax Ecclesiæ data. Nam ante Constantini tempora fideles in unum per Cursores & Diaconos cogeantur, uti memoriæ proditum est à D. Ignatio, qui anno XCIII. ab Orbe redempto vixit, in *Epistola* XI. & XIII. quarum verba & sententiam apud ipsum Baronium leges. Neque enim tum ob acerrimas Gentilium persecutiones, quibus habebantur miserrime, Christiani omnes cogi tuto poterant palam, cum sub illa Christianæ fidei initia, ac succedentibus etiam temporibus Christianum nomen invidiæ tantæ esset, ut JUDAICA SUPERSTITIO, fides nostra in *Pandectis* à Jureconsulto Ethnico (quod Andreas Alcuius adnotavit optime) diceretur, ac ob id clam oporteret in Ecclesias convenire, non pulsatis tintinnabulis, quod ea res amplioris securitatis & auctoritatis non parum (ut diximus) præ se ferret. Ob id Plinius Cæcilius in *Epistola* ad Trajanum Imperatorem, ubi de Christianis, & Christianorum conventu & communione agit, cum omnia, quæ facerent Christiani, exsequeretur diligentissime, nullam hujusmodi tintinnabulorum mentionem facit, alioqui, si fuissent in usu, cum res esset momenti non parvi, silentio non transmissurus. In eadem itaque sententia, qua Baronius, fuit Magius libello singulari *de Tintinnabulis* cap. II. non alio scilicet tempore tintinnabula editis locis ac turribus à Christianis imposita, atque suspensa, quam cum Ethnicorum Principum odia refrixerant, ac Piorum Ecclesia caput Martyrum sanctorum cruore non tam fœdatum quam exornatum coepit extollere. Mentionem fecerunt & alii Campanarum, inter quos Audovenus, qui anno DCL. *Vitam S. Eligii Episcopi* conscripsit, Venerabilis Beda, DD. Anselmus & Bernardus, Concilia Colonienſe & Aquisgranenſe, anno Domini DCCCXVI. celebrata. Sed enim licet quoque altius Campanarum primordia ducere, non tam, inquam, ab annis DCCCXVI. DCL. aut DCVI. quo floruit Fabianus, cui instrumenti hujus inventum adscribit Polydorus Virg. lib. *de Inventoribus Rerum* VI. Franciscus Petrarcha, Onuphrius Panvinus in *Epitome SS. Pontificum*, & alii, sed etiam anno CDXXII. ex D. Hieronymi verbis, qui ea ætate vixit. Is enim in *Regulis Monachorum* cap. XXXIII. ubi de Matutino loquitur, & modo divinum officium persolvendi, meminit Campanæ sonitus in hæc verba: *Ad matutinas excubias media*

A *nox vos præparet, nullam ex vobis dormientem reperiat Campanulis sonitus.* Hæcibi Hieronymus, ejusdem mentionem repetens cap. XXXVIII. ejusdem *Regula*, ubi de ejusdem Campanæ sonitu disserit, *Sorores ad Ecclesiam vocate post cœnam.* Quinimo, qui Campanæ usum à Paulino Nolano Episcopo sanctimonix laude præstanti manasse contendunt, id ipsum affirmare necesse habent, cum is SS. Augustini & Hieronymi coetaneus fuerit, sicut Epistolæ invicem exaratae docent, atque adeo S. Augustini discipulus fuerit, ut Trithemius scribit. Meletiani quoque Hæretici, contra quos acerrime pugnavit S. Athanasius An. CCCLX. tintinnabula tractare dicuntur, Theodoreto Episcopo Cyrenensi teste, qui vixit An. Domini CDL. lib. IV. *Hæreticarum Fabularum* cap. *de Meletianis Hæreticis in Aegypto.* Ibi siquidem inter ceteros eorum perridiculos ritus recenset illum, quod inter Hymnorum cantum multa tintinnabula funi appensa movere solerent. Neque vero Lucianus tantum, qui vixit circa annum Domini centesimum, Hippix Balneum describens de duobus illic Horologiis verba facit, uno per Solem, altero per aquam, & sonitum; aut Augusti memoria tantum, cujus XLII. Imperii anno natus est Rex Regum, & Dominus Dominantium, Humani generis servator, ac vindex, tintinnabula in usu fuisse ostendit Suetonius in *ejus Vita*, & Dio lib. LIV. Sed poetæ quoque præstantissimi duo Tibullus & Ovidius, qui scripsere anno XVI. ante Christum natum, de tintinnabulis meminere, vel Campanis, quæ æra, pelves, & lebetes, ut tum illa ferebant tempora, vocabantur. Et Strabo, qui circa eundem annum floruit, XIV. *Geographiæ* libro, ubi rem non fictam, sed factam, festivam tamen, ac jucundam narrat, quæ in Jaso Cariæ Insula contigit inter Citharœdum, & Surdastrum quemdam, Citharœdum scilicet canentem in ea urbe homines non paucos circumstisse, eos è re nata universos præter Surdastrum statim discessisse, Citharœdum ad Surdastrum conversum illi gratias agere coepisse eo nomine, quod cum ad tintinnabuli sonum reliqui omnes cum reliquissent, solus ille auditor perstitisset, qua re Surdaster cognita vale homini dixerit, quod sonus ille jam vendi pisces indicaret. In ea siquidem lepida narratiuncula hæc habentur: *Nam ceteri, quam primum tintinnabulum increpuit, abierunt. Ille. Quid vis, inquit, nam jam tintinnabulum sonuit?* Adde his apud Polybium Historicum Græcum, qui vixit CC. anno ante Christum natum, ejusdem instrumenti fieri locupletissimam mentionem, ut ejus antiquissima plane origo censenda sit, ac quamvis Ecclesiasticus, vel sacer Campanæ usus potius, quam ejus inventum, S. Paulino Episcopo communiter adscribatur, prophanum tamen ejus usum ante Christum natum multis annorum centuriis coepisse libere confitendum, cum olim Campanarum usum, non solum ad homines ad mercatum convocandos, (ut ex Strabone demonstratum est) verum etiam in Thermis, & aliis urbium locis ad varia munia apud Ethnicos, & Gentiles receptum fuisse constet, quidquid contra senserit Joannes Torsellius Aretinus, negans Campanarum usum fuisse apud Antiquos, ac ob id non immerito Galeotus Martius cum miserum, & somniorum interpretem vocet.

Hinc factum est, ut quibus Ecclesia usum earundem referre debeat in acceptum, non una sit Auctorum inter se dissidentium sententia. Cum enim supra laudatus Polydorus Virgilius III. *de Rerum Inventoribus* libro, cap. VIII. quis Campanæ inventor exstiterit, omnino se ignorare libere fateatur, id ipsum profecto in causâ fuit, ut diversi diversa ea de re senserint, scripserintque, dicentibus aliis mo-

morem hunc ab Hebræis ortum, qui (ut habetur *Exodi* xxviii.) confueverant ad populum convocandum tubis canere, tintinnabulis vero uti ad ornatum tunicæ Sacerdotis summi. Quamobrem Josephus *Antiquitatum Judaicarum* lib. iii. cap. viii. sermonem habet de Tintinnabulis, & cap. xi. de Tuba, Campanula, & Buccina, cornu scilicet incurvo Tubæ instar inflari solito, & in sacrificiis adhiberi consueto, cujus os tantum (verba ipsius Josephi sunt) patebat quantum ad inflandum sufficeret, desinebatque in extremitatem Campanulæ similem, quemadmodum Tuba, eaque plebs ad concionem vocabatur, Principes ad consultandum de Republica exciebantur, universus Populus convocabatur, & movebantur Castra. Campanula vero illa Græce dicebatur *κώδων*. Josephus enim etsi Hebræus, Græca tamen lingua scripsit *Judaicas Antiquitates*, ut aliis nationibus res Hebraicas promulgaret. Atque hæc communior nonnullorum sententia fuit. Altera eorum, qui ritum hunc (ut alia pleraque) ab Gentilibus ad instituta Christi fidelium derivarunt, quod hi tintinnabulis uterentur, tum in Deorum Templis ad sacrorum suorum tempora vicinis populis declaranda, tum ad operas, ad thermas, & labores reliquos convocandum, uti inuimus supra, & aperte colligimus ex illo carmine Juvenalis *Sat.* vi.

*Tot pariter pelves, & tintinnabula dicas
Pulsari. — — —*

Nec non & Plautino illo¹:

Nunquam adepol temere² tintinnabulum:

Nisi qui³ transeat, aut movet, mutum⁴ tacet.

Pro quibus scribit quoque Plinius, cum *lib.* xxxvi. pependisse ait in labyrinthi Italici fastigio tintinnabula catenis excepta, quod ipsum Dodonæ factum legimus apud Epigrammatarium vatem in *Apophoretis* sive *lib.* xiv. epigr. clxiii. disticho hujuscemodi subiecto:

Redde pilam: sonat as thermarum: ludere pergis?

Virgine vis sola lotus abire domum.

Vel, ut alii legunt,

Sonat as thermarum, ponite pilam.

Licet enim sint, qui illud, *As*, ad clypeum referendum putent, qui catena penderet ex orbiculari fenestra fornicis Laconici, per cujus reductionem, ac deductionem nunc augeretur, nunc imminueretur calor, ut est apud Vitruvium, eos tamen sic sentientes erroris convincit facile Magius eo in libro, quem de *Tintinnabulis* conscripsit, cap. iii. ut quin de tintinnabulis capiendus sit Martialis, nullus relinquatur dubitandi locus, cum præsertim *Æl. Spartianus* scriptum reliquerit, nescio quem Romanum Imperatorem è Thermis tintinnabulum amovisse, & *Suetonius* in *Augusto* cap. xci. *Cum dedicatam in Capitolio Ædem Tonanti Jovi assidue frequentaret Augustus, somniavit queri Capitolinum Jovem, cultores sibi abduci: & seque respondisse, Tonantem pro Janitore ei appositum: ideoque maxime tintinnabulis fastigium Ædis redimivit, quod ea fere Januis dependebant. Et Dio lib. liv. Augustus orto die tintinnabulum Jovi Tonanti appendit, his enim tintinnabulis Bannitores nocturni utuntur, ut si quid usus sit, significare possint. Quorum quidem verborum causa nonnulli censuere primum omnium Augustum Romæ Campanam in turri templo Jovis Tonantis finitima posuisse. Sed contra horum sententiam pugnant Neoterici omnes, qui Campanas è turribus horariis pependisse testantur ante facta Romanæ Reipubl. fundamenta, Græcorum scilicet instituto, apud quos multo ante fuerint in*

A usu horologia quædam Pelcinon, & aliis hujusmodi nominibus appellata, Vitruvio teste *lib.* ix. cap. ix. quo in capite eorundem Inventores pariter recensentur. Verum enim vero, ut negare non ausim fuisse olim Horologia quædam in usu, quibus horæ per aquam & sonitum commonstrarentur, quale fuisse non nescio illud, quod in *Hippiæ balneo* describit *Lucianus*, & graphice admodum ac diligenter expressum in tabula repræsentatur oculis ab Hieronymo Magio in laudato libello de *Tintinnabulis* cap. vi. ita mihi horum opinionem non arridere pronuntio, cum in hujusmodi Horologiis, quæ ab illis Pelcinona nominantur, horæ tantum dignoscerentur ex lineis descriptis in securis formam, quam *Pelcis* Latine significat, aut certe arborum folia, animalium formas, & alias hujusmodi rerum naturalium, & artificialium imagines referentibus, cujusmodi fuisse constat Horologium Achaz Ezechiae tempore ex *iv. Regum* cap. xx. teste Jo. Baptista Vicomercato in *Dialogo de Praxi Horologiorum Solarium conficiendorum more veteri & novo*: in aliis vero quibusdam Horologiis aquæ, de quibus non rara, neque obscura apud veteres scriptores mentio reperitur sub nomine Clepsydræ, solo indice dici horæ indicarentur nullo tintinnabuli sono, ut ex supra laudato Vitruvii loco apertissime liquet, & *Plinio lib.* vii. cap. lx. quod operæ pretium fuerit percurrere, longius enim est, quam ut in eo paginas implere debeat, cum præsertim *Plinius* omnibus, qui hæc literas profitentur, in manu sit, quæque ab illo traduntur eo loci possint vel à medio-criter instituto per otium suis cum lubuerit ponderibus examinari. Testatur id ipsum, & narrat disertissimis verbis *Tristanus Calchus lib.* v. *Historia Patria*, quæ cum hæc scriberemus manuscripta tantummodo legebantur nondum publici juris facta, futura tamen brevi publico Urbis decreto & impensa, ut abs re minime futurum putem hic totidem verbis afferre, quæ vir ibi gravis in hanc sententiam scripsit: *Cum deinde subiisset annus dcccvi. Legati ex Oriente redierunt, cum quibus Abdela Regis Persarum, & Georgius, ac Felix missi ab Thoma Hierosolymitano Patriarcha in Sinum Adriaticum delati, per Tarvisos, Tridentum, & inde Aquigranum ad Carolum pervenere, obtulereque munera exotica, balsamum, unguenta, odoramenta, & vestientis parietibus auleæ, & castrensis usus tentoria, quas papiliones vocari Divus quoque Hieronymus auctor est. Quæ omnia spectanda magnitudinis byssina fuisse Reginon Scriptor tradit; & insuper vestes holosericas, & duo candelabra miranda proceritatis, & Horologium ex auricalcho mechanica arte fabricatum, quo rotis quibusdam sese circumagentibus ad clepsydram duodecim horæ vertebantur, & totidem area pilula super cymbalo cadentes sonoris ictibus easdem pulsabant. Ea mirifica rei novitas fuit: quippe cum olim syderalis scientia periti umbris tantum solaribus, & interim lapsu aqua oculis spectandam horarum distinctionem fecissent: nunc sonitu aris obstrepente auribus percipi, & núbilo etiam, ac mediis noctis tenebris, sensu altero numerari cœpere. Cujus rei novitate captis ingeniosorum hominum animis, complura ad ejus exemplar fabricata sunt, & in Italia ampliatis machinamentis quatuor & viginti horarum circuitus die ac nocte factus est. Ad ornatum vero hujus, de quo loquimur, duodecim areæ equites additi erant, qui totidem portis erumpebant ad singula horarum momenta, & rursus condebantur. Quæliæ etiam nunc multa exstant. Quibus Aquensi Ecclesia dedicatis, Legatos ampliter donatos Carolus dimisit. Cæterum ut, quid in tanta sententiarum varietate ego censeam, hic aperiam, cum iis libentius fense- rim, qui Græcis hujus instrumenti usum deberi fatentur, quod apud illos resonarint æramenta quædam multo ante, quam nationibus reliquis in-*

¹ *Trin. Act.* iv. Sc. ii. v. 161.

² Supple vocem *tinnit*, quæ excidit.

³ Restitue, *illud tractat*.

⁴ Adde voculam *est*.

notuerint, ac in illo præcipue vetustissimo Apollinis Delphici Templo, in quo Tripus & Cortina, quibus subterpositæ Phœbades Sacerdotissæ Delphicæ vaticinabantur, siquidem res ejusmodi ex ære fuisse notum est omnibus, ac exploratum. Quamobrem licet ejus rei testes quamplurimos ac locupletissimos possem adducere, unus mihi tamen omnium instar erit Plinius *lib. xxxvi. cap. iii.* in hæc verba scribens: *Ex ære factitavere & Cortinas Tripodam nomine Delphicas.* Sed enim fuit & his LEBES THESPROTAEVS, de quo Clemens Alex. in *Oratione adhort. ad Gracos.* Quin ex usu lebetes nobilium vasa, eaque ænea fuisse testantur Poetarum Princeps Epicorum Virgilius *Æn. v.* ubi de donis ab Heleno Æneæ discedenti de morte datis:

Tertia dona facit geminos ex ære lebetes.

Elegiarum Ovidius in *Epist.* cum ait:

Viginti fulvos ex ære lebetes.

DODONAËVM quoque Æs fuit in Jovis Dodonæi Templo, quod Tintinnabuli genus fuisse diu notuque crepitans innunt Aufonii illa:

Nec Dodonæi cessat tinnitus æni.

Ex quo etiam factum, ut proverbialiter de hominibus garrulis vel justo loquacioribus etiamnum efferatur *Dodonaum æs*. Erant & PELVES SACRAE quibusdam in templis, ut Fauni, Panis Lycæi, & aliorum Monstrorum hujuscemodi verius quam Deorum, quorum quidem tinnitus præcedebant Idolorum responsa. Sed hæc omnia tandem conticuere Christi Domini Servatoris adventu, & victoria, disseminata Euangelii luce, id quod non invenuste cecinit hisce versibus Poeta Bergomas*, quos non abs re fuerit adduxisse:

Numina vana inter tunc creditus expiravit

Pan deus Arcadia, silvicularumque favor.

jam non respondet calcanti vellera Faunus:

Æs resonum, & Pelves conticuere sacra.

jam non Phœbeas cortina remugit ad aras,

Vatum finis adest, quæque Sibylla tacet.

Nos igitur his de campanis & turri sacra adnotatis, reliquam Templi nostri descriptionem, ut facimus, persequentes ab ejus ad alia vertice dilabamur. Habet enim è solido pavimento surgentia facella quatuor, quorum in omnibus Aræ, sacræ rei causâ faciendæ, decenter admodum collocatæ. Ara Maxima sacello principe continetur Januæ maximæ ex adverso, itaque supra pavimentum eminet laxioris sinus, ut novem ad eam gradibus ascendantus. Posterior facelli pars Orientem æquinoctialem juxta sacrorum Canonum leges & instituta spectat. Tegitur idipsum hemisphærico indiscreta pene Cœli similitudine orbiculato, quo magis ad Deum colendum excitentur ii, qui divini Domicilii simulacrum illud oculis intuentur. Ad hæc æterni Dei Patris imagine probis delineata coloribus, novem beatorum Spirituum Choris, sive agminibus circumsepta, sacrisque parergis aliis quamplurimis aureis convestita sic fulget, ut in ejus expolitione picturam ars, artem & picturam ingenium superarit. Quam enim visu jucundum ac gratum cernere cœtus illos cœlestium animorum, quos ab omni contagione materiæ separatos summus ipse rerum omnium Opifex è nihilo procreavit, coronas eidem inducere, seque nobis videndos objicere, qua inter cœli nubila rutilantes, qua micantes in auro, qua genu flexo supplices, qua cantibus hilares, qua musicis aliis instrumentis diversimode modulantes, multaque alia divini cultus & officii munia peragentes? Quam venuste cœtus istos divinis usibus procreatos SS. Levitarum corona tota ex auro, musivoque perfecto radians circumambit? Quam pulchre sub his spectantur effigies

* Achilles Mutius in prima Parte *Theatri Bergomatis*.

A alia sex Martyrum præcipua religione, & acerbissimorum cruciatuum patientia celebrium, avitis quatuor Mediolanensium familiarum nobilium & antiquarum insignibus interjectis? Quam blando, suavique spectaculo fasciam extimam semicycli variant Infantuli sex pariter genuflexi, suis omnes in cellulis, ac inter serpentina florum ornamenta varia Gothicæ symmetriæ dispositi propter gentilitia sex alia stemmata marmorea vetustissimæ vetustatis? Quid multis? Sacelli frons ipsa exterior superiorque Icone Deiparæ Virginis ab Angelo salutata, seque superfundente ejus pectori vi Sancti Spiritus, cœlestis flaminis impetu recreata, lineamentis mirum in modum optimis exornatur. Hujus veluti tempora recti pars utrinque ultima contingit, ac finit cæruleo colore suffusa, stellisque hinc inde auro fulgentibus illustrata. Pulchrum sane opus, sed (quod ægerrime feras) magna ex parte mutilum, nec suis numeris omnibus absolutum. Cæterum ejusdem pavementum omne marmoreis stratum ubique mensis, ac tabulis, clatris quoque ferreis circumseptum ab ea parte, qua per lapideos gradus patentem ad Aram summam aditum & ingressum habet, blanditur sibi ipsi quodammodo, nec ornamentis facelli reliquis de dignitate concedit.

C Subest huic ipsi pavimento locus, quem CONFSESSIONEM vocant, fornice triplici concameratus, columnisque decem marmoreis fultus, cubitus longitudinis habens viginti quinque, uncias sex: Latitudinis uncias totidem, cubitus quindecim: Altitudinis vero quinque cubitus: Ædes ingens ipsa potius, quam sacellum. Nam & Ara in ejus medietate sita SS. Quirino, Nicomedi, & Abundio Martyribus dedicata cernitur, & inibi Martyrum eorundem corpora arcae lapideæ credita conservantur, & sacra ad ea votiva, nec irrita, sapissime sunt pro febris, morborum omnium pessima, depellenda. Ea vero omnia ferrei cancelli cingunt ac muniunt; ac in pariete quidem arcae sacrosanctæ proximo Martyrum ipsorum imagines vides sacrorum munerum vestibus exornatas, cum Inscriptione sacros singulorum Ordines, tumulum, & nomina commonstrante:

HIC REQUIESCUNT CORPORA
SANCTORVM MARTYRV M QVIRI-
NI EPISCOPI, NICOMEDIS PRESBY-
TERI, ET ABVNDII DIACONI.

E Porro Arca pignoribus his illustris, variis insuper Emblematis est distincta. Area vero, Altare, Parietes, Itus, Ambitus, reliqua omnia sic se habent, ut animos sacro quodam horrore complentes religionis in iisdem imperium propagent, recreentque mirum in modum curarum aliarum fluctibus agitados. Puteus tandem est maximus, & perennis, sacer ipsis Martyribus & conjunctus, cujus & ea vis esse præcipua, magistra rerum experientia declaratur, ut aquæ illius haustu febris cujusvis æstus penitus exstinguatur.

F Præterissemus hic omnino locum magnæ venerationis & cultus, nisi egredientibus nobis ex hujus Ædis infimæ tenebris ad superioris lucem, sese videndum protinus obtulisset. Jacet is angustus quidem, at augustus magis sub novem scalarum gradibus ad Aram superiorem Maximam perducentibus, patetque in eundem aditus ex Confessione. Ingressis speciem ipsissimam exhibet sepulchri Hierosolymitani, (ne quæ vel minima Templi nostri pars sua religione caret) cujus ad imaginem pie nuper effectus ac conformatus est totus. Fornix, quo regitur, multorum pulchritudinem vincit, lucidissimique

que hinc inde parietibus sustinetur. Intus statuae sunt lignae illae quidem, at auro & coloribus dites, iustamque staturam hominis exaequant, MORTVI CHRISTI scilicet & MARIAE MATRIS supra filii monumentum extensae, dolenti similis & ubertim lachrymas profundenti, prope quam ALIGERI DVO pari dolore perculsi, paresque in lachrymas abeuntes. Ostium neque altius, neque latius est eo, per quod in speluncam itur Dominicae sepulturae, totaque ipsa Cellula speluncae ipsi respondet ad punctum, ut qui locum utrunque viderunt, & mensi sunt diligentissime, asseverant. Exterior parietum pars picturis non injucundis pictatis igniculos exfuscitat, vel exfuscitatos jam & flagrantem magis accendit. Antiquae enim artis sunt, & ab architectura Romana minime discrepantes, quibus accedunt clypei venustissimi duo suis inscripti lemmatibus, quae cujus id sepulcrum sit docent. Siquidem haec in uno verba legere est, SEPVLCRVM CHRISTI VIVENTIS. In altero ista, GLORIA RESVRGENTIS.

Verum enimvero nos hic tempus admonet, ut cujusmodi sint alia facella duo superiora rudi Minerva (quod facimus) delineemus. Horum unum dextrum facelli principis latus obtinet, sinistrum alterum, amborumque par esse dimensio cernitur, forma quoque eadem, & structura. Ac istud quidem Deiparae, Divo illud Carolo Mediolanensem Archiepiscopo, dedicatum jampridem istud, illud vero nuper impensa clariss. pientissimique nunc Templi nostri & Ecclesiae Aversanae Praefulis Caroli Caraffae Neapolitani, literis ac monumentis omnibus ubique à me decorandi. At cum,

Maonio possent hujus praeconia cantu

Vix dici, valeat quid mea lingua puta?

Acta Viri, laudesque magis tacuisse juvabit,

Dicere quam brevibus maxima velle notis.

Laudibus & nostris nec eget vel carmine. Fama

Concinet aurato Praefulis ore decus.

Quamobrem unius in tabula Icon Beatae Virginis in discreta pene verisimilitudine pigmentis artis expressa spectantium oculos pascit insatiabili voluptate: medius in alia Carolus Sydus aequae Antistitum, ac Purpuratorum Patrum, divique hinc inde alii duo Nicomedes & Abundius Martyres ea stant forma, quae nativum decus mentita felicibus penicillis, nihil aut naturae solertia, aut colorum adminiculo fieri posse praestantius asseverant. Ac ne interim tantam Caraffae Praefulis Illustrissimi pietatem erga cognominem suum Carolum oblivio deleret ulla, visum est eam ipsam hoc carmine summo in Iconis ipsius fastigio propagare, vel ipso recusante Praefule, qui laudanda praestare mavult assidue, quam laudari:

HANC MERUIT NOSTRO DE NOMINE CAROLVS ARAM.

Paucis nihil praeter animam desideres in utriusque Sacelli Numinibus fallentibus subtilitate colorum acies, quas morantur. Quamquam ad ornatum ipsum quod attinet, tabularum venustior est illa, quae D. Caroli, Martyrumque Nicomedis & Abundii ora vultusque referens, dubitandi relinquit locum, cujus in effigie major artificis manus industria defudarit. Siquidem illius parerga, trophaea sunt ipsa praecipua Pontificiae, nec non & Cardineae Majestatis coloribus, & auro fabre, sciteque adeo variata, vi ut non insuavi extra omnem sensum, mentemque rapiant intuentes. Accedunt ad haec Argumenta duo petita è stemmate Borromeo, quibus dotes Divi totidem, fortitudo nimirum, ac pietas adumbrantur. Quamobrem uno hinc Camelus in latere oneri nulli succumbens erigitur, cum lemmate NATVS ONERI, Unicornis inde caelum in altero cum notis hujuscemodi con-

templatur, VRGET AMOR CAELI. Sed enim memores brevitatibus cogimur tot, tantarumque rerum summos quasi apices, aut lacinias aliquas adumbrare, ut pictores solent, qui ad hunc fere modum in angustam tabulam congerunt infinita.

Agamus nunc igitur ordine quod agendum, & sacellum, uti par est, aliud describamus. Quo enim alio potius nomine nominemus Baptistarii locum ac sedem è solido lapide ad laevam minoremque Templi Januam juxta ritus. Eiusdem quoque pictus est fornix, paries item fonti oppositus insignitur Imagine S. Joannis Baptistae Christum Dominum baptizantis. Alia inibi similia decora & ornamenta passim. Legere ibi quoque est carmina testantia vehemens & accensum Illustrissimi Caraffae studium erga sacras Aedes. Quale enim ac quantum totum hoc Sacellum est, ejusdem est egregium profusae in sacros usus liberalitatis atque beneficentiae monumentum, quibus auctoribus jussit illud à fundamentis erigi, ornari, pingi, ne quid suo deesset in Templo, quod ad procurandam salutem proximorum fidelium commode pertineret. Ea vero carmina sic se habent:

FONS FONTEM CARAFFA LEVAT, LA-

VAT, AVGET VTERQUE

ILLE ANIMAS, SACRAM PRAESVL AT

ISTE DOMVM.

Longius caput hoc excurreret, quam deceret, si vellemus singularum Templi nostri partium ornamenta praecipua persequi sigillatim. Quid hic igitur addemus amplius? Quid? Alia longe majora, quae suppetunt, & nobilissimum satis à seipso locum sua nobilius efficiunt dignitate. Quorsum enim initio nascentis in Urbe nostra religionis, & fidei Deiparae Virginis honori ac cultui dicatum illud fuisse ostendimus, nisi ut honos ei major, ac cultus quam Templis in eadem Urbe reliquis exhiberetur? Cum Numen illud ejus in Aedibus coleretur, cui nullus par honos in terris ab ullo deferri Mortalium potest. Quorsum ejus in collocandis membris, ac partibus digerendis eam servatam agnovimus rationem, ut novem in illo Arcus, Columnas novem, totidem in ejus superiori parte fenestras, ac totidem omnino alias patentes & apertas in inferiori, novem insuper ostia, novem item scalarum gradus antequam ad Aram Maximam adscendamus, novem Angelorum Choros, sacella quinque praeterea, quibus si aras quatuor copules, in novenarium incides; & alia pleraque eodem plane numero comprehensa cernimus, nisi ut plenum illum esse sciremus Majestatis, Religionis, ac mysteriorum locum. Ut enim paullo rem istam altius repetamus, constat novenarium numerum alios inter numeros sic nitere; ut eorum nemo mysteriis pluribus affluat silentio neutiquam involvendis. Aut enim è monade & octonario novenarius fit: aut è binario & septenario: aut è senario & ternario: aut demum ex quinario & quaternario comparatur: utramque harum malis originum diligenter expenderis, nullum alium Numerum esse fateberis mysteriis tot refertum, ut illi comparari, ne longo dicam aequari valeat intervallo. Monas enim, quae cum octonario parere novenarium potest, ut à Philosophis fons & origo dicitur omnium numerorum, sic apud divinarum rerum Interpretes, quos Graece Theologos nominamus, Deum ipsum optimum primum rerum omnium fontem & originem ultimam notat. Quid quod monas initium cum sit, finisque omnium numerorum, principium ipsa nescit, ac finem, non aliter, ac suprema illa substantia è nullo nata, vicibusque nullis temporum subiecta, in uno semper, quod adest, consistit aëvo: cumque numera-

merabilis non sit, utpote suapte natura una, triplices tamen Divinas intra se Personas continet, innumeratque rerum species extrinsecus creat, atque producit. Divina enim (ut ore loquamur Patrum) essentia omnino aliena à multiplici substantiæ ratione simplicissimum Naturæ fortitur modum, & cum se Personis Divinis communicat, nullam tamen init cum suæ Naturæ unitate divortium, sed ubique integra, & semper individua perseverat. Prædicatur Monas ipsa præcipue de ternario parte novenarii componente prima, ut quod repetitum ter novenarium sine dubio gignat: nec ulli magis apte, vel intime Monas æternæ substantiæ jungitur, & immiscetur; quam Ternario Divinarum Personarum nuperrime laudato. Neque vero suis octonarius, cujus nexu cum uno novenarius exit, arcanis mysteriis caret, quæ quidem omnia persequi liberi nimis esset otii, & fortassis etiam arguendi in eo, cui sit ad alia festinandum. Unum illud igitur scire de eo sufficiat, octonarium è numerorum omnium cœtu, qui intra denarii ambitum continentur, præstantissimum esse, quippe qui suis omnibus ex partibus constet, dimidia scilicet, ejus quarta, & octava parte. Fieri quoque potest, ut à binario, sive dyade, quæ primus est numerus, & septenario novenarius exeat: atqui dyas illa quoque post Monadem primam (ut ab æterna illa solitaria, & intelligibili substantia ad Divinas Personas iterum delabamur) à Patre per Generationis modum defluxit ad Filium, & per spirationem (ne à Theologorum formulis recedamus) ad Sanctum Spiritum ab utroque: Pater enim per intellectus actum (ut hoc ipsum purum putum eorundem è fontibus in nostros hortulos derivemus) seipsum intuens, ac cognoscens generat Filium patria scilicet virtute, ac majestate pollentem, quem alio verbum, sive Dei sermonem vocabulo nominamus: per actum autem divinæ Patris & Filii voluntatis divinus Amor utrique consubstantialis, & æqualis existit, sanctiori quadam alia Sanctus appellatione Spiritus nuncupatus. Ea est binarii dignitas, exceptis potestatibus aliis, quibus inter numerorum gregem excellit, ut unus divinas emanationes geminas complectatur. Latentia nunc in Monade divinæ naturæ mysteria, nec non Divinarum in Dyade Personarum sanctissimæ Trinitatis, ceu quodam in fidei Symbolo comprehensa, divinitusque magno Gregorio Thaumaturgo demonstrata sunt, ex *Oratione*, quam de ejus Vita alter Gregorius cognomento Nyssenus habuit, verbis Latine redditis, ostendemus; tum ut quæ dicta sunt à nobis hæcenus de rebus eximiis nullam ullo unquam tempore venire in dubitationem possent: tum ut gravissimorum Patrum auctoritate firmata, & orthodoxæ fidei convenire, & retinenda esse tenacius appareret: *Unus est Deus Pater Verbi viventis, sapientia subsistentis, & Potentia, figura æterna, Perfectus Perfecti genitor, Pater filii unigeniti. Unus Dominus, solus ex solo, Deus de Deo, figura & imago Deitatis, Verbum efficax, sapientia constitutionis rerum universalium comprehensiva, & Potentia totius creatura effectrix, Filius verus veri Patris; visum effugiens, visum effugientis; & corruptioni non obnoxius, non obnoxii mortis; & Aternus Aterni. Unus Spiritus Sanctus ex Deo ortum, & existentiam habens, quique per Filium apparuit, videlicet hominibus: imago filii perfecti perfecta, vita viventium causa, fons sanctus, sanctitatis sanctificationis suppeditatrix, per quem manifestatur Deus Pater, qui est super omnia, & in omnibus, & Deus Filius, qui per omnia permanet. Trinitas perfecta, quæ gloria, atque æternitate, & regno non dividiatur, neque abalienatur.*

Quænam autem septenario mysteria insint, sa-

A tis aperte Deus olim habitus Philosophorum Plato prodidit in *Timæo*. Siquidem cum ad numerum totius Universitatis molem à summo Rerum Artifice conditam, Mundanamque divinus idem ille Philosophus Animam generatam tradit. Inerrantes ad hæc orbis stelligero illi, cujus in amplexu reliqui continentur miro septenarii ordine sunt subiecti eo fine, ut motus illius rapidissimi temperarentur, inferioraque omnia melius regerentur. Luna quoque ultima Cœlo extima terris luce nobis aliena collucens septenis quibusque diebus varios vultus induit invariabili lege, ac ubi sic quater illuserit, Zodiaci totius ambitum conficit & absolvit. Quid hic de superioribus seu sphaeris aliis dicemus, aut quæ potius non dicemus? Ut enim astra cætera, quibus ab errore nomen est inditum, omittamus, Sol ipse quoque, princeps luminum reliquorum septimum signum Zodiaci, cum attingit vices suas, variat, à brumali solstitio scilicet ad æstivum septimo perveniens signo, & à verno (quod ajunt) tropico ad autumnale, signo quoque septimo peragrato. Quinimo Christianus vir, undequaque sapiens, ac perfectus, vir, inquam, ejusmodi, qui juxta tritum illud sermone dictum, non inerrantibus modo, sed fixis etiam astris omnibus dominaturus sit, ex septem mysteriorum usu, concentuque perficitur & conflatur. C Hominis enim Natura primorum Parentum labe in omnes posteros lethali contagione transfusa, deformata penitus, ac depravata, adhibitis salutaribus septem sacramentorum remediis, sanitati suæ restituitur, & decori. Quid mens hominis ejusdem, & Animus, quo nihil ab optimo & sapientissimo genitore melius est procreatum? An non humanis in rebus septem à liberalibus artibus expolitur; in divinis vero septem Spiritus Sancti donis ad omnia Christianæ pietatis officia, salutareque actiones omnes alacriter peragendas impellitur, & inflammatur? Quid voluntas? An non ipsa quoque (humanas quod ad affectiones, sive D coercendas, sive moderandas attinet) septem moralium virtutum præfidiis informata dirigitur, & à capitalibus vitiis totidem, lethiferisque criminibus avocatur? Quid demum virtutes illæ, quibus æterna salus ab homine comparatur, an non illæ eodem plane inclusæ numero continentur? Quorum Theologicæ tres, Fides, Spes, Charitas, & aliæ cardinales quatuor, Prudentia, Justitia, Fortitudo, ac Temperantia, præcipua juvandarum animarum instrumenta dicantur, & re ipsa sunt, ut quod assequi per nos ipsi non possumus, earum divino munere consequamur.

E Sequitur novenarii complexio tertia è ternario pariter, & senario fluens, cujus si mysteria taceremus, non tam in sacræ, quam in literariæ Reipublicæ commoda peccaremus. Ternarius enim Trinitatem Divinarum Personarum constituit increatam, novenariumque vice tertia repetitus numerum parit, solus infra denarium impar partibus ex imparibus æquabiliter satus, non aliter ac senarius numerus ex omnibus intra denarii terminos circumseptis, suis constat ex partibus, medietatem cum tertia parte nactus, & sexta. Superest novenarii connectio quarta, & ultima, quinario, quaternarioque ex numero mystice procreata, quæ reliquis non inferior dignitate commendationem à nobis efflagitat non postremam. F Quaternarius enim medietates duas primus adeptus est, quas & sapientissimus Mundi totius Opifex in conciliandis inter se pugnantibus Elementis adhibuit, binas unicuique sua prius in sede posito qualitates attribuens, ut eorum unumquodque in altero, cui junctus esset, cognatam sibi qualitatem unam ac similem reperiret. Quinarius autem licet impar sit, denarii tamen paris omnino numeri, numerorumque

que omnium superiori medietas est, sola sui multiplicatione partem centenarii quartam efficiens, aliaque sub se arcana continens non reticenda, nisi nova nos ad se novenarii mysteria revocarent, cujus ergo numerorum aliorum laudes cursim attingimus, ut ostensa partium dignitate Totius longe majorem esse præstantiam nosceremus: & si currenti ista calamo persequimur, ne Lectori benevolo molestiæ simus amplius non ferendæ. Ad rem igitur.

Novenarii pariter præstantia hinc elucet, quod inter omnes constat novem menses humano partui perficiendo statuisse Naturam, Cœlestes eodem Orbes numero comprehendi; Choros totidem esse Spirituum beatorum, qui ævo sempiterno fruenter omne suum studium, atque ingenium eo conferunt, ut non solum perpetuo quodam cantu, & carmine alterno in divinarum laudum assidua celebratione versentur: sed etiam Deo ipsi adsint ut fidi ejus milites ac ministri, quorum opera, non modo ad Ecclesiæ suæ, sed etiam ad reliquarum rerum gubernationem utatur admirabilibus gratiæ potestatisque suæ muneribus ornatorum. Totidem præcipuas divinæ Naturæ dotes, quas attributa Theologi dicere maluerunt, ad capita revocari. Quo nescio possitne quidquam de novenarii numeri dignitate fingi, vel exegitari præstantius? Sed istis non illa tantummodo naturæ sive fragilis & terrenæ, sive immortalis & cœlestis, finibus tenetur inclusa. Alia quoque multa reperit, in quibus se videndam exhibet, ac in ipsa potissimum Ecclesiastica Hierarchia. Quotus enim est adeo mysteriorum illius ignarus ac rudis, cui non in ea primo novem dignitatis gradus occurrant, quibus ad Ecclesiasticæ majestatis fastigium pervenitur; Sacra Tonsura scilicet, Ordines Minores quatuor, tres Majores, omnium demum maximus & ultimus Episcopalis apex, in summo Ecclesiæ vertice divinitus constitutus? Offerent hic illi præterea sese res aliarum novem, sine quibus nemo rite sacræ liturgiæ solemnia divinæ peregerit Majestati: sacræ nempe vestes sex, Minister, Calix, & liber. Requiritur res totidem in Altari, quo decenter Agnum in eo cœlestem, qui Mortalium omnium scelera abluit, immolemus, Mappæ tres, lumina duo, Pallium simplex, Ara sacra, (vulgo consecratus lapis) Candelabra denique duo luminibus sustinendis. Ecquis unquam divini cultus ardore succensus, ac bene peritus Ecclesiasticæ disciplinæ, placare cœlestes iras Missæ sacrificio poterit sine Calice, Patena, Purificatorio, Corporali, Palla, Sacculo corporalis, Velo Calicis, Pane, & Vino? Cur hic ultra provehimur, cum nemo rem divinam faciens Romano ritu non nesciat ejus Introitum consequi Invocationes novem, quibus Deum nobis reddimus propitium & placatum; Ambrosiano vero (ut dicitur) feriali, Populi salutationes novem, totidemque genuflexiones, antequam sacrificiorum illud maximum absolvatur. Novies etiam signo se Crucis sacerdos munit, antequam Populum præmissa benedictione demittat, toties Hostiam salutarem ante consecrationem signat, idemque post eam semel, ac iterum facit. Tundit sibi quoque pectus eodem in sacro sacerdos ictibus novem, cumque Consecrationi de more præfatur novem Cœlitum Choros enumerat clara & elata voce. Ac ne notos omnibus Missæ ritus ac cæremonias colligamus, idem cum sacerdos ter SANCTVS, ter AGNVS, ter NON SVM DIGNVS enunciat, an non is novenarium numerum, qui inter ternas partes æqua proportionem digeritur, clarius exprimit, quam ut ei orationis nostræ indicio sit necesse? Ita sane censemus, ac ob id etiam numerum istum vere cæteris prælatum imus, Majorumque nostrorum prudentiam non admirari non possumus, quod in Vincentianæ Basilicæ partibus restituendis, numero isto frequen-

tius quam ullo alio usi sint, quo laudabili æmulatione quadam in ejus veluti sinu ac gremio Naturæ omnis, Ecclesiæ, Divinitatis ipsius etiam (quoad fieri humana posset industria) mysteria omnia copularent. Templo jam utcumque adumbrato, ductisque quodammodo lineis, ob oculos Lectorisposito, tum quoad exteriorem & interiorem corporis universi faciem, tum quoad mysteria in eadem inclusa penitus cognoscenda, jure sibi suo deposcere videtur Sacrarium ipsum Templo conjunctum, neque postrema reliqui ædificii pars, ut hic stylo nostro pariter describatur. Ut igitur rem ipsam ducto paulo altius exordio persequamur, ab ejus nominibus ordiemur.

Sacrarium, quod vulgo *Sacristia* dicitur, ab antiquis sacrarum rerum scriptoribus aliquando *Camera*, *Secretarium* nonnunquam, à prophanis vero *Adytum*, & *Vestiarium*, aliisque hujuscemodi fere vocibus appellatum legimus, estque locus is, in quo sacra supellex omnis, sacer omnis ornatus reconditur & asservatur. Eum plane ob finem sacrarium nostrum est conditum, ibique loci situm, unde solem orientem spectet, cujus lucem duabus fenestris excipit hinc inde patentibus, una scilicet ad dextrum, altera ad sinistrum latus juxta sacrarum sanctorum leges. Sepiuntur geminæ illæ fenestræ clavis ferreis, & vitreis pellucidis illustrantur, nec aliud quippiam eis ad decus, vel ornatum deest. Pavimentum sternitur lateribus operis non vulgaris, fornicatum subtus late & ample in modum magnæ cellæ vinariæ, ne quem humorem, aut uliginem contrahat sacris æque vestibibus noxium, Aedituis, ac celebraturis sacrum. Commendat eundem locum fornix altera duas in partes arcu medio discriminata, additque universo operi gratiam & leporem. Vestiarium parietum unus excipit nuceis è tabulis affabre ductum, & insigne valvis ex tesserulis ligneis coloris varii concilis in minutissimas partes, itaque connexis, ut concisas neges. Quatuor in eo partes numerare est, quarum superiori sacrarum Reliquiarum thecæ & arcule creditæ sunt, argenteis imaginibus & Angelorum statuis inclusæ. Alteri huic ex diametro respondenti, sed laxiori multo, Calices, Patenæ, Corporalia, Sacculi, Vela, Purificatoria, & reliqua ejus generis supellex necessaria operaturo divinæ rei suo quæque loco rite & ordine collocata. Tertia capsulas ductiles satis patentes habet, in quibus Indumenta sacra juxta colorum varietatem dispertiuntur decore admodum, ac venuste. Inferiori cæteris, ac postremæ pulvinaria diversa infunt addicta Missalibus libris in augustissimo Missarum sacrificio sustinendis. Armari inibi alia videre est supellectilem Ecclesiæ reliquam, Ararum Antipendia, Mappas, Candelabra, Cereos, & alia hujuscemodi continentia, quæ longum esset omnia percernere. Hærent parietum alteri Repositoria in Lectoralium morem sustinendis Missarum, Antiphonarum, Psalmorum, rituum, & sacramentorum libros, & quasdam pensiles Indulgentiarum ac Sanctorum tabellas, nihil ut in eo desideres, quod vel usus Ecclesiæ, vel ejusdem regulæ, vel sanctiones Præsuminibi jubeant asservari. Hæc est interior Sacrarum nostri forma; neque vero quidquam habet humanus oculus, quod possit amplius exoptare, sive parietum structuram spectet lateribus inter se mirifice absque ullo glutino compactis opere, quod Græci *ισόδομον* vocant, sive parerga & ornamenta reliqua, tum ea in parte, supra quam tectum ipsum excurrit, tum in ea, quæ fenestras ambit, & Parastadibus superstat.

Verum enim vero oculos intuentium mirum in modum ad se rapit tecti fastigium, quod quatuor columellis pyramidalibus exurgit altius, quarum in summo vertice totidem Cruces ferreæ defixæ sunt,

sunt, cum nive ipsa candidius columellarum marmor eniteat. Accedit illud quod æque in admirationem intuentes trahit, tectum ipsum ita productum excurrere ad dimittendos imbres, ut lumini nequaquam officiat fenestrarum juxta Vitruvii monita *capitulum tertio lib. vi.* Quod si quis ipsum quoque sacrarii nostri parentem avet agnoscere, non erit ejus satisfacere voluntati difficile ex Gentilitiis Insignibus in summa illius parte sculptis; inde scilicet facile est colligere Balthasarem Corium Abbatem, qui Cœnobio D. Vincentii præfuit annis multis antequam sacrarium ipsum conderetur, & multis aliis post anno reparata salutis MCCCCXLIX. cœptum simul, & numeris fere suis omnibus absolutum fuisse, eo ipso anno, quo vita functus Dux Philippus Maria Vicecomes sine virili prole, imperio Vicecomites reliquos exuit, & amplissimum dignitatis gradum secum extra familiam abduxit; Cives vero sese in libertatem pristinam vindicarunt, & formam Reipublicæ receperunt. Subdam autem hoc loco Gentilitii Coriorum stemmatis formam, ne quid Lectorem lateat, quod scire percipiat.



En ut dissectus in eo Leo aureus erectus, & dexter in orbe purpureo superiorem stemmatis partem obtinet, inferiorem vero candido colore nitentem litera C characteris exotici, ac perantiqui, coloris ejus, quem cælestem dicunt. Nec immerito: cum enim Leo fortitudinis, ac vigilantiae Hieroglyphicum habeatur; dissectus vero sit virtutis atque concordiae simulacrum; color item aureus Imperium notet; Fidem & Clementiam albus; Justitiam & Vindictam purpureus; cœlestis, Ætheris ab omni corruptione semoti tessera sit; C. demum absolutæ perfectionis imago, ac typus, quemadmodum, & centesimus numerus ultimus, & perfectus, eadem litera designatur: ita Coriorum stemma non tam innuere, quam aperte declarare videtur, Coriam gentem natura quidem ipsa mitem, alioqui scelerum vindicem acerrimam esse, demandata sibi à Principibus Urbium, & Populorum imperia pervigili cura gessisse; rerumque maximarum, atque difficillimarum munia publica, non tam fortiter & fideliter obuisse, quam privata infracta æquitatis moderatione tractasse; civesque discordes nexu solidissimo Concordiæ copulasse. Ac possem quidem hoc loco facili negotio ex mysteriis Ægyptiorum, Aristotelis, Plinii, & aliorum Naturalis Historiæ scriptorum monumentis elicere, tum Leonis proprietates omnes, tum colorum sensus reconditos & latentes ad indicandum Coriæ familiæ Robur, Virtutes, Dignitates, Merita, ni vererem, ne res omnibus notas, & à quamplurimis notatas hæcenus, pertractasse, existimer actumque agere,

*Immo me populus rideat, multumque torosa juvenus
Ingeminet tremulos naso crispante cachinnos.*

A Quod videar lucernam in meridie accendere voluisse. Atqui ut ejus de familiæ Heroibus priscis taceam, unum præterire sine piaculo non possum ævi nostri decus, ita notis stemmatis omnibus suis virtutibus respondentem, ut ab uno noscere possimus & reliquos: Petrum scilicet Franciscum Senatorem amplissimum Mediolanensem, cujus in tractandis gubernaculis communis salutis, & vitæ ea vis existit, ut divina quadam virgula è cælo dimissus in terras bono publico omnia gerere videatur; cumque omnes illum virtutes exornent, quæ singulos divisa beatos reddunt, tum illud in primis sibi gloriosum putat, non tam præesse cæteris, quam prodesse, & quod plane divinum est,

Discordes animos conciliare simul.

B Unde decus æternum, famamque sibi immortalem parit, ne quid de summa ejusdem dexteritate dicam in æternis alioqui futuris litibus amputandis, quæ familias plerumque funditus evertere consueverunt. Gradum igitur ad alia facientes, videre quoque est in vitreis fenestrarum Gentis alterius stemma, idque Jacobi Antonii Turriani suffecti in locum Corii Abbatis esse liquido apparet, eoque ex tempore ibi videri cœptum, quo novo Sacrarii ædificio à prædecessore suo Corio constructo fenestras illas Turrianus Abbas adjecit. Ego vero næ hic etiam de clarissima Turrianorum familia plura libens, lubens asserrem honoris & amicitiae ergo ergamagnas soboles alterius magni Jacobi Antonii Turriani maximis nuper honoribus cum vita defuncti, nisi Fasciculi finis calamo moram injiceret, ac vetaret extra terminos excurrere præfinitos.

C Quamobrem stemma ipsum, quod subdam, subscriptique versus vicem nostram explebunt, ejus Gentis antiquitatem, honores & fortunam variam angustis finibus complectentes. Stemma enim hujusmodi est.

D



E

Versus vero isti:

Illius Turris sceptris munita duobus

Est Gentilitium nobile stemma vetus.

Robore quo fuerit Turris designat, & illa

Imperium in populos sceptrum habuisse notant.

Nam Mediolani, & socias dominata per urbes,

Est gens officiis, & vice functa Ducis.

Anguigeri Proceres armis, opibusque potentes,


Senserunt quantis viribus illa foret.

Fortuna varii casus, Martisque tumultus,

Inter Turritos, Anguigerosque patent.

F

Eandem plane ob causam quid sacristia mystica significet apud eos, qui sacra Ecclesiæ mysteria tractant, indagandum relinquo, neque enim id latere poterit, qui hosce Scriptores legerit, ac in primis *Rationale divinorum* Gulielmi Duranti lib. 1. ut cæteros ea describentes ad manus habere non possit, sic enim ille laudato in loco, cui si forte is quoque Scriptor desit, lecturo aliquando nota: *Sacrarium, sive locus, in quo sacra reponuntur,*



THE
MUSEUM
OF
THE
CITY OF
NEW YORK




PLATE

THE
MUSEUM
OF
THE
CITY OF
NEW YORK



TABVLA
ICHTNOGRAPHICA VINCENTIANI TEMPLI
ET PAROECIALIS DOMVS.



sive in quo sacerdos sacras vestes induit, utrum Sacratissima Maria significat, in quo Christus se sacra veste carnis induit. Sacerdos a loco, in quo vestes induit, ad publicum procedit, quia Christus ex utero Virginis procedens in Mundum venit.

Sed facimus imprudenter, qui toti hujuscemodi rebus intenti in sola Templi nostri structura mystica commendanda sumus, & quibus illud ipsum amplissimis Apostolicæ Indulgentiæ thesauris summi Romani Pontifices honestarint; quam opimis donariis, ac spoliis potentissimi Reges idipsum auxerint, & ornarint; quibus Divorum præcipua religione fulgentium, & acerbissimorum cruciatuum patientia nobilium, sive corporibus integris, sive membris Archiepiscopi religiosissimi locupletarint,

A eodemque præcedentibus Clericorum ordinibus omnibus supplices imitarint, quæ omnia longe copiosiores requirunt orationem, penitus reticemus. Verum enim vero quoniam hic æquo diutius Lectorem remorati sumus, & figillatim iis de rebus singulis est agendum, nos hic scribendi, Lectorem audiendi, molestia levabimus non rogati, vel potius Ichnographica Tabella Vincentiani Templi, & Parœcialis domus eidem proxime adjacentis ad intuendum proposita recreabimus, quo dicta superius omnia, sicubi forte aliquid tenebrarum acceperint, è crasso stylo, clarius illustrentur, oculis subjecta fidelibus à Cribello nostro, cui cum æterna beneficii memoria debemus monumentum æternum benevolentiae sempiternæ.

JO. ANT. CASTELLIONAEI
FLORILEGIUM
ANTIQUITATVM
PAROECIAE
D. VINCENTII IN PRATO.
SECTIO I.

FASCIC. III.

De sanctis Martyrum trium Quirini, Nicomedis, & Abundii corporibus. Arca eorundem primus, & postremus locus. De Confessionibus, & Cœmeteriis obiter. Descriptio Arca, & figura. Latentes in ea Martyres jussu Federici Borromæi Card. & Archiepiscopi Mediol. visi. Martyrium eorundem, ac palma multiplici carmine celebrata.



GEMVS nunc itaque primo de Sanctorum Martyrum exuviis, quas in Æde Templi nostri subterranea summa religione conditas asservari certum omnino est, ac inibi publica populi Mediolanensis veneratione coli nemini non ignotum. Ita fiet, ut de præcipuis ejus Thesauris loco principe disseramus, & tritam docendi viam ingressi, quæ est à notioribus & certioribus ad ea, quæ ignotiora & incertiora sunt, Scriptorum optimorum vestigiis insistamus. Adeo verum est igitur quam quod verissimum sacra illa tria corpora fortissimorum Christi militum QUIRINI, NICOMEDIS, & ABUNDII principio fuisse condita in illa marmorea & ingenti Arca, quæ nunc adhæret Aræ Confessionis, cum hodie quoque nostro in Templo picturæ aliquot perantiquæ exstent, ipsissima Arca illius similitudinem cum ipsismet trium Martyrum corporibus exprimentes, ut à nobis alibi pluribus ostendetur. Notum hoc, inquam, omnibus, & perspectum illud non item; Arca illius sacrosanctæ sedem initio non fuisse in illo subterraneo loco, nec ibi ubi nunc est, cum nullum ejus loci

D vestigium antiquitus appareret. Scire enim volumus eos omnes, qui nostras hæc commentationes aliquando legent, locum illum non nisi post instaurationem Templi nostri novissimam conditum & exstructum, ornamentum maximum parietibus ejusdem reliquis accessisse, cujus apertissimo nobis argumento sunt Columnæ ipsæ parietibus ipsorum laterum interjectæ, vel intextæ potius & innixæ: Arcus ipsi præterea parietibus eisdem inclusi ad necessarium totius illius Ædis subterraneæ sepimentum. Credere par est igitur initio Arcam illam juxta Aram Templi maximam in æqua planitie collocatam confluentium ad se fidelium animos suo adspectu mirifico recreasse, pavisque mentem suavi commentatione rerum à Viris illis sanctissimis pie, fortiterque gestarum; sed ævo labente postea Ædem in peculiarem cultui suo tantummodo dedicatam, & in penitiorem locum, ubi religiosius Christianæ pietatis officiis, rebus gestis, & laboribus à Sanctis Martyribus pro fidei propagatione susceptis mente secum & animo tacite recolendis operam dare quilibet posset, ex antiquo Ecclesiæ divinitus institutæ usu fuisse translatam, eum nimirum in locum, qui à nobis CONFESSIO, à priscis MARTYRIUM, aut Κοιμητήριον (DORMITORIUM Latini dicunt) appellatus fuit, quod in eo Piorum corpora requiescerent non omnino mortua, sed potius dormientia, & expectantia diem illum, in quo gloriosa in Cælum ascendent cum Christo magnifice regnatura: sive quod Piorum mors somnus sit, & quies, de qua excitationem expectent & sperent. Eas certe ob causas (ut Viro eruditissimo placet) Germani pulcherrimo AGRIDEI nomine Cœmeterium vocant, quod scilicet in eo Deus suam sementem ac segetem habeat, quam sub finem Mundi tanquam messi jam maturam

ram demetet, & in caeleste horreum invehet, zizaniis omnibus in ignem inextinguibilem missis.

Operæ itaque pretium erit hoc loco de Cœmeteriis & Confessionibus cursim attingere, quæ legimus à paucis hætenus observata, & aliis majori, quoad ejus fieri poterit, modio impertiri. Quidquid enim hac in parte valemus (quodquam fit exiguum non nescimus) aliorum certe quidem commodis & utilitati valemus. Confessiones æque ac Cœmeteria nata recens Ecclesia (eorum ut antiquitatem initio declaremus) exstrui cœpisse auctor est B. Clemens sacrorum princeps antiquissimus, & integerrimus Scriptor, ante scilicet quam illæ Basilicæ essent, aut ulla Tempia exædificarentur, persecutionis ergo, qua grassante, non modo nullæ Basilicæ conditæ, nullaque Tempia, sed etiam Cœmeteria ipsa servandis, tegendisque viventibus potius quam piis mortuorum excipiendorum usibus inserviebant, quæ demum pace Ecclesiæ reddita Templis & Basilicis illustribus sunt ornata. Asyla tum itaque fidelium erant hujusmodi loca, sacra illis sedes erant hæc Tempia, in quibus Clerus ac Populus Christianus anniversarios sanctorum Martyrum dies natales, ac felices in vitam illam beatam & æternam introitus, ac sacra cætera perageret, quæ veri Dei cultum attingerent; stationes etiam in iisdem, & Synodos haberet; Sacramenta à Christo Domino Salvatore nostro, ad communem omnium salutem proposita frequentaret; aliaque plena sanctitatis mysteria non solum ad fidem excitandam spectantia, & effrenatam humanarum rerum libidinem coercendam, sed etiam ad eam charitatem in animis inflammandam, cujus quasi gradibus propius ad Deum accedimus, nos inter nos amamus, totaque à rebus humanis evocata mente ad cœlestium & divinarum studium accensa voluntate ferimur. Quæ quidem omnia possemus hic pluribus confirmare, nisi ab Onuphrio in *Appendice ad Platinam* ea res jam pridem esset explicata. Immo B. Petrus Apostolorum Princeps, & Christianæ militiæ dux in Cœmeterio Ostriano (quod fuit Via Salaria ad tertium ab Urbe Roma lapidem) cœlesti lavacro non semel veræ salutis avidos expiavit. Neque vero cum Ecclesiæ Catholicæ res habere se melius cœptæ sunt, & data facultas discipulis veritatis Ædes sacras & Basilicas erigendi, primis illis Basilicis affinia Cœmeteria fuerunt, sed ab illis distincta penitus, & remota; siquidem hæc olim extra muros erant, quemadmodum & sepulturæ, Romæ potissimum, ubi intra Urbem pauculis exceptis, neminem fas erat mandare terræ, nisi id occulte forte & insciis aliis fieret. Idque disertè fatetur illustrissimus *Sacrorum Annalium* Scriptor Baronius, Tomo secundo ad annum ab Orbe redempto cccxvi. num. vii. in hæc verba: *Imprimis liquet lege duodecim Tabularum vetitum fuisse, defunctum intra mœnia sepelire; quamvis Spartani, instituente Lycurgo, intra civitatem juxta templa sepulchra fieri voluissent. Roma autem etsi omnes extra Urbem sepeliri solerent, qui tamen triumphum egissent (ut auctor est Plutarchus) intra Urbem poterant sepeliri. Cogebantur his legibus Christiani etiam suos mortuos extra mœnia sepelire; nisi forte quis clanculum (quod sæpius accidit) cadaver martyris sustulisset, ac in domo propria sepelisset, quam quidem legem usu contrario antiquam Theodoricus Rex Italia restituit, sed Leo Augustus postea penitus abrogavit.*

Tempia vero in ipsa Urbe, ut plurimum, condebantur, ac sicubi contigisset, ut Templum aliquod locum Cœmeterio proximum ac conterminum fortiretur, cessabat tum Cœmeterii nomen, quemadmodum & ante condita Basilica, si quod ei Cœmeterium addebatur, nomen suum pristi-

num amittebat. Postquam enim emollitis Tyrannorum cordibus, qui è Christi schola erant Tempia sua in urbibus tuto condere potuerunt, etiam Cœmeteria proximo Templis loco religiosa quadam affectione constituerunt, corpora ibi forte melius quietura rati, quemadmodum & de Valerio quodam ossa sua prope Templum Æsculapii collocante testatur Inscriptio Hispaniensis:

MORTE. ME. VALERIVM. M. F. AD-
SEQUENTE. IN. VLTIMA. TERRA.
NVLLO. CREDIDI. LOCO. OSSA. NO-
STRA. POSSE. MELIVS. ADQVIESCE-
RE. QVAM. PROPE. TEMPLVM. Æ-
SCVLAPII. ITAQVE. EX. TESTAM.
AD. X. PEDES. A. TEMPLO. VOLO.
CONDIER. VOS. NATI. JVCVNDISS.
AB. VRBE. ROMA. HVC. CONCEDE-
TE. AD. SEPVLCHRV. NOSTRV. DEMETVR.
DOLOR. PIETE. VESTA. SI. MANES. SENTIENT. VOS. ME-
Mores. NOSTRI.

Ex quo ritu nostris hodie temporibus spacia quælibet juxta templa mortuis sepeliendis destinata, Cœmeteria dicuntur à nobis, ab aliis *TEMPLO-
RVM ATRIA PROXIMORVM*, in quibus præter illos, qui suos in Ecclesiis tumulos habent, sepulturæ mandantur corpora Christianorum. Immo patrum memoria cum quidam ea nequaquam Templorum vicinitate contenti, qua illis Cœmeteriorum spacia jungebantur, in ipsis quoque templorum penetralibus condi vellent, cautum est *l. ult. C. Theof.* 17. ne quis in Ecclesiis, sed in Cœmeteriis proximis mortuum sepeliret. Quod ipsum inter leges Caroli Magni exstat *lib. i. cap. clxx.* Sanxitque Concilium Braccarense *i. Can. 36.* hisce verbis, quæ subdam: *Item placuit, ut corpora defunctorum nullo modo intra Basilicam Sanctorum sepeliantur, sed si necesse est, de foris circa murum Basilicæ det. Nam si firmissimum hoc privilegium usque nunc retinent Gallie Civitates, ut nullo modo intra ambitum murorum cuiuslibet defuncti corpus sit humatum, quanto magis hoc venerabilium Martyrum debet reverentia obtinere.* Hinc & sacra semper sunt habita Cœmeteriorum loca, utpote sacris Templis affinia, & Deo certis quibusdam ritibus dedicata, & iisdem fere, quibus ipsæ Ecclesiæ, privilegiis & immunitatibus potita. Quod ut Germani planum, apertumque reddant, Cœmeterium *FERIATAM AVLAM*, seu *VILLAM* nominant, hoc est, *IMMUNEM* ac *LIBERAM*, appellatione ducta à Latino vocabulo *FERIATVS*, sive (ut alii volunt) *FERIA*, quasi *FERIAT*.

Differunt tamen Confessiones à Cœmeteriis, nec una tantummodo ratione. Confessiones enim omnes sub terra non supra terram sunt, utpote sub majoribus sacrarum Ædium Altaribus sitæ: Cœmeteria non semper: illæ ad Apostolorum, Martyrum, & aliorum Sanctorum sepulturam, hæc ad cæteros etiam fideles humandos potissimum præparata. Potissimum, inquam, cum illud nos hic minime fugiat initio veritatis Evangelicæ nuntiata in Cœmeteriis Sanctorum quoque corpora tumulata, quod vel ex uno Calixti Cœmeterio apertissime constat, in quo recondita fuisse narrat Xistus Tertius sanctorum Martyrum corpora, ac primo quidem Romanorum Pontificum Aniceti, Soteris, Pontiani, Antheri, Fabiani, Corneli, Lucii, Stephani, Xisti, Dionysii, Eutychiani, Caii, Eusebii, & Milciadis; deinde SS. Sebastiani, Cæcilie, Tertullini Presbyteri, Nemesii Diaconi, Lucillæ, & aliorum plurimorum, qui pro Christi fide gloriosæ vitæ finem sortiti sunt, in fidelium reliquorum tumbis: quemadmo-

admodum & fideles aliqui prope Apostolorum & Martyrum sedes condi etiam atque etiam voluerunt, fenestram ad id aperiuntibus Constantino Magno, & Honorio Impp. quorum hic Romæ in SS. Petri, ille Constantinopoli in porticu Templi Apostolorum humatus legitur. Invaluitque adeo mos ille vulgo, ut legibus fuerit coercendus à Gratiano, Valeriano *, & Theodosio Impp. quos ad Pancratium Præf. Urbi super hac re ita rescripsisse testatur l. i. i. C. de Sacrosanct. Eccles. NEMO APOSTOLORVM, VEL MARTYRVVM SEDEM HVMANIS (humandis forte) CORPORIBVS EXISTIMET CONCESSAM. Non dissimulaverimus igitur interdum nihil inter Confessiones & Cœmeteria discriminis intercessisse, tum scilicet, cum Cœmeteria etiam ipsa sub terra condita Sanctorum æque ac Confessiones corpora recipiebant, Hebræorum more, qui in speluncis sepelire consueverant suos, loculis in earum recessibus excavatis, quem ob finem Abraham Genes. xxiii. speluncam ab Ephron duplicem emit, & sepulchrum Redemptoris nostri in petra, seu in spelunca petrae fuit excisum. Ac ne ullus ea de re cuiquam relinquatur dubitandi locus, libet hic oculis subijcere Calixti supra laudati Cœmeterii Catacumbas in terræ profundo defossas, insignesque sepulchris Apostolorum & Martyrum, ipsissimis D. Hieronymi verbis, qui cum illas die quodam Dominico sedulo peragrasset, talem earundem imaginem transmissit ad posteros, Commentariis editis in Ezechielem capite quadragesimo examussim: Dum enim essem (is inquit) Roma puer, & liberalibus studiis erudirer, solebam cum ceteris ejusdem ætatis & propositi diebus Dominicis sepulchra Apostolorum & Martyrum circumire, crebroque Cryptas ingredi, quæ in terrarum profundo defossæ ex utraque parte ingredientium per parietes habent corpora sepulchrorum, & ita obscura sunt omnia, ut propemodum illud Propheticum compleatur: DESCENDANT IN INFERNVM VIVENTES: & raro desuper lumen admissum, horrorem temperet tenebrarum, ut non tam fenestram, quam foramen demissi luminis putes: rursumque pedetentim acceditur, & cæca nocte circumdatis illud Virgilianum proponitur,

Horror ubique animos, simul ipsa silentia terrent.

Hæc D. Hieronymus de Romanis Cœmeteriorum Cryptis, à quibus non abeunt illa Prudentii præclare admodum describentis, Hymno xi. Περὶ τῶν σπηλαίων, Cœmeterium Cyriacæ in Agro Verano positum, his versibus:

Haud procul extremo culta ad pomœria vallo

Mersa latebrosis Crypta patet foveis:

Hujus in occultum gradibus via prona reflexis

Ire per anfractus, luce latente, docet:

Primas namque fores summo tenus intrat hiatu,

Illustratque dies limina vestibuli:

Inde, ubi progressu facili nigrescere visa est

Nox obscura, loci per specus ambiguum,

Occurrunt cæcis immensa foramina tectis,

Qui jaciunt claros antra super radios.

Quamlibet ancipites texant hinc inde recessus,

Arcta sub umbrosis atria porticibus:

Attamen excisi subter cava viscera montis

Crebra terebrato fornice lux penetrat.

Sic datur absentis per subterranea solis

Cernere fulgorem luminibusque frui.

Talibus Hippolyti corpus mandatur opertis

Propter ubi apposta est † Arca dicata Deo.

Illæ Sacramenti Donatrix mensa, eademque

Custos fida sui Martyris apposta,

Servat ad æterni spem †† Judicis ossa sepulchro,

Pascit item Sanctis Tybricolæ dapibus,

Mira loci pietas, & prompta precantibus ara:

Spes hominum placida prosperitate juvat.

Quæ omnia libentes ac lubentes attulimus; tum

* Repono, Valentiniano. † Alii legunt, Ara. †† Alii, Vindicis.

A quia nobis dignissima visa sunt, quæ hic in eorum gratiam exscriberentur, quibus Prudentii versus non essent ad manus; tum quia persequuntur Cœmeteriorum usus, de quibus nos supra meminimus; tum demum quia Aram Martyris Hippolyti corpori appositam docet, id quod in Confessione nostra factum proxime superiori capite est ostensum. Magni postremam ob hanc certe causam, & assidui concursus fiebant undequaque piis à populis ad Cœmeteriorum cryptas, eodem supra laudato Prudentio teste, qui confluentium ad Sancti Hippolyti corpus frequentiam eodem in Hymno xi. sic descripsit:

B Mane salutatam concurritur: omnis adorat

Pubes; eunt, redeunt solis ad usque obitum:

Conglobat in cuneum Latios simul: ac peregrinos

Permistim * religionis amor,

Oscula perspicuo figunt impressa metallo,

Balsama diffundunt, fletibus ora rigant.

Jam cum se renovat decursis mensibus annus,

Natalemque diem passio festa refert:

Quanta putas studiis certantibus agmina cogi,

Quæve celebrando vota coire Deo?

Urbs angusta suos vomit, effunditque Quirites,

Una & Patricios ambitione pari.

Confundit plebeja phalanx umbonibus aquis

Discrimen Procerum, præcipitante fide.

Nec minus Albanis acies se candida portis

Explicat, & longis ducitur ordinibus.

Exultant fremitus variarum hinc inde viarum,

Indigena, & Picens, plebs & Etrusca venit.

Concurrit Samnitis atrox habitator, & alta

Campanus Capua, jamque Nolanus adest.

Quisque sua lætus cum conjuge, dulcibus & cum

Pignoribus rapidum carpere gestit iter.

Vix capiunt patuli populorum gaudia campi,

Hæret, & in magnis densa cohors spatiis.

Angustum tantis illud specus esse caterois

Haud dubium est, ampla fauce licet pateat.

D Et paulo post de Templo Cœmeterio proximo:

Plena laborantes agre domus accipit undas

Arctaque confertis aestuat in foribus,

Maternum pandens gremium, quo condant alumnos,

Ac foveat fœtos accumulata sinus.

Usque adeo ut Imperatores Ethnici Christianos etiam edictis propositis inde arcerent, uti videre est apud Eusebium lib. vii. c. x. & xi. ea de re pluribus differentem. Idque honorandi gratia Martyres ibi positos; aut venerandi divinum Numen, cujus immensam amplitudinem Sanctorum vita, mors & gloria maxime ostendit; aut gratiam coelestium benedictionum sibi vel aliis à Deo bonorum omnium largitore Sanctorum ob merita postulandi; aut sese totos in sacris commensationibus superumque deliciis occupandi. Quamobrem eorum nonnulla tantæ magnitudinis & amplitudinis existeret, ut quandam præ se ferrent speciem oppidorum. Tale illud Priscillæ fuisse non ignoramus, quod Baronius diligenter à se lustratum descripsit egregie Tomo ii. ad annum ab Orbe redempto cxxx. in hæc verba: Mirabile dictu, vidimus, sapiusque lustravimus Priscilla Cœmeterium, haud pridem inventum atque refossum via Salaria tertio ab Urbe lapide; quod nullo magis proprio vocabulo dixerimus præ ejus amplitudine, multisque atque diversis ejusdem viis, quam subterraneam civitatem: quippe quod ipsius ingressu primaria via ceteris amplior pateat, quæ hinc inde vias diversas habeat, easdemque frequentes, quæ rursum in diversos viculos dividatur, & angustior: rursus, ut in civitatibus, stans locis velut fora quadam, ampliora sint spatia ad conventus sacros agendos, eademque sanctorum imaginibus exornata; nec desinit, licet nunc obstructa, ad lumen recipiendum desuper excisa foramina. Obstruxit Urbs, cum in suis suburbiis abdita se novit ha-

* Abest rō populor.

bere Civitates, Christianorum tempore persecutionis olim colonias, modo autem sepulchris tantum refertas: & quod legebat in chartis, vel videbat ex aliis Cœmeteriis aliqua solum ex parte reclusis, tunc plenius intellexit: quæ enim de iisdem apud S. Hieronymum, vel Prudentium legerat, suis ipsius oculis intuens, vehementer admiranda spectavit.

At neque Mediolani defuerunt olim amplæ Cœmeteriorum substructiones, quarum Galliæ totius Cisalpinæ Metropolis admiratione defixa teneretur, nec Roma recensitas hætenus invideret. Ac licet earum memoria vetustate perierit, manet tamen hodie, vigetque, nonnullorum nomen, volitatque adhuc per Mediolanensium ora Specus Cœmeterii, quod PEREGRINORVM vocant, via Romana, in quo Castritianum sepultum fuisse commemorant Ecclesiasticorum Annalium monumenta: quamvis veteri nunc Cœmeterii Peregrinorum appellatione penitus antiquata, novo ex Martyrio D. Evangelistæ Joannis ad Concham nomine vocitetur; manentibus tamen adhuc illius vestigiis non obscuris, licet obscuro in specu, quod nunc Ædi illi sacræ pro Confessione subest, & in latebrosa via, per quam è Templo in Cœnobium ingressus patet, arctus ille quidem initio propter angustias fores: at qui patentior & laxior in progressu ducens in patentiorem sinum leviter asurgentem, qui tandem in aperta lucidis fulta porticibus atria nos emit. Locus omnino similis (solam si magnitudinem excipias) Cœmeterio Priscillæ, quo de nuper egimus ex Baronio; cum & obscurissimus sit, quæque in eo sunt visu & admiratione digna non nisi adhibitis accensis facibus videri queant. Veteres inibi quædam apparent substructiones, Atria columnis multis innixa, latæ hinc inde viæ, angiportus aliquot antiquitatis priscæ, & alia permulta habitandi, vel certe latendi usibus accommodata. Siquidem fama percrebuit D. Castritianum, grassante gravissime Domitiani sævitia in Christianos, eo loci, ut occulti & abditi, convocasse fideles, tanti ut Imperatoris barbariem declinarent, ac quod nunc publicis in Ecclesiis fieri consuevit Christiana Republica dominante, cælestibus illic divini verbi, & Mensæ sacrosanctæ dapibus aluisse. Docent hoc perantiquæ inibi descriptæ hujusce historię monumenta: nam ibi videre est non uno in loco D. Castritiani imaginem, sedentes & utrinque egenos, peregrinos, & hospites ad mensas cum notis indicantibus Divi nomen, & cujus ergo egeni illi peregrini, & hospites assiderent, & alia multa, quam simillima descriptis jam veteribus Cœmeteriis Romanorum.

Fuit & aliud isto Peregrinorum longe præstantius & antiquius in eadem Urbe, quod Caji nomine vocabatur, dono datum Ecclesiæ à Philippo Oldano, viro non tam splendore clarissimi generis, quam virtutum maximarum ornamentis longe conspicuo, & à Cajo III. pientissimo Urbis Antistite ad usum sepulturæ fidelium consecratum. Erat hoc ea in Urbis nostræ parte, quæ Templis DD. Ambrosii, Francisci, & Valeriæ cedit, primævamque sui faciem (quod est à perpauis admodum observatum) ad usque D. Simpliciani, qui D. Ambrosio in Episcopatu Mediolani successit, tempora conservavit. Variis hoc ipsum nominibus appellatum invenimus, ne quis plura fuisse existimet, ejus cum diversas appellationes, vel ex aliis auditione accipiet, vel ipse leget in sacrorum Scriptorum paginis aliquando. Divus enim Ambrosius illud HORTVM IRRIGVVM nuncupavit, ob copiam aquarum saluberrimarum, ad quas hauriendas eo magni non tam fidelium, quam infidelium, concursus undequaque fiebant: B. Paulinus AGRVM EVANGELICVM, IN QVO THESAVRI OMNI VEL PERSICA GAZA PRETIOSIORES CONDERENTVR:

A Bonaventura denique Castillionæus noster Polyandriion appellatione Græca ob multitudinem eo in ambitu sepulcorum: siquidem πῶλονδρον Græcis significat populosum. Quam vero multa eo in loco sanctorum Martyrum corpora sepulta fuerint, vel ex his versibus colligere licet, qui marmoreæ tabulæ consignati in ipsius adhuc D. Francisci ædē integri perseverant:

ALMA NITET RENOVATA PIIS CVLTORIBVS AVLA,

Tempore quam modico Fratres statuere Minores.

Hortus erat quondam locus iste, domusque Philippi,

Corpora martyrium pro Christo passa recondens.

Hortus secundus dictis domus unde repletur.

B Fructibus immensis totus generaliter orbis

Barnabam huc perhibent translatus scripta vetusta.

Fama refert isti cineres, & plumbea tumba,

Hic Nabor, hic Felix, hic Fortunatus habetur,

Et cum Materno Caius, dictusque Philippus,

Nec non Savina sancta venerabile corpus.

Ambrosio Paulus cælos hinc mente petente

Protasium cum Gervasio pandendo revelat,

Sanguine sanctorum totus locus iste sacrat

Multipotens factus delere piacula plebis.

C Atque unum ex pueris Sanctis, quos dira necavis

Ambitio Herodis pro Christo continet hujus

Sacristia adis, quo tota hac patria gaudet.

Quam bene nudipedes loca hac sacratissima servant

Cernere cum Moyse, Josueque ierarchica digni.

Perpetuo ritu feria redeunte secunda

Plebs prius Ambrosii meritum, templumque requirens

Huc venit, & domini verbis impleta resedens

Lata Deum laudat tantis dotata patronis.

Accedit huc proxime laudati Bonaventuræ nostri calculus in *Vitis M. S. Episcoporum Mediolanensium*, qui ante D. Ambrosii tempora exstiterunt, ac in ipso Cajo potissimum, in quo memoriæ prodidit multos inibi Christianorum illustrium tumulos integros permanisse usque ad eam diem, qua major illius Cœmeterii pars à Fratribus, qui è D. Francisci familia sunt, suum in Cœnobium est translata. Siquidem hi partim ad tecta, partim ad Templum, partim ad subterraneam quandam viam, qua ex Cœnobio in Odeum itur, suis commodis exstruendam, ita venerandam illam antiquitatis imaginem deformarunt, sursum deorsum omnia permiscentes, ut ne levissima quidem nunc ejus Cœmeterii vestigia deprehendantur, vel ab oculatissimis viris. Quare non immerito vir omnis antiquitatis studiosissimus Bonaventura tantam adeo præclari monumenti jacturam deplorat in eodem Cajo, graviterque invehitur in Cœnobitas illos, qui primi privata commoda publicæ antiquitatum utilitati præferre minime dubitarunt. Sed aliud quoties Polyandriion, & aliorum quidem omnium longe vetustissimum, Mediolani fuit ad nostri Jovis. Quod enim ad ejus antiquitatem attinet, ante Christi natalitia fuisse fertur, & Jovis Polyandriion dicebatur. Quod vero prope Jovis nostri Templum esset, id infra non tam verisimilibus conjecturis, quam gravissimis rationum ponderibus ac momentis comprobabimus. Illud hic tantum in lucem è tenebris vindicabo, eo in Polyandriio situm fuisse Galienum Imperatorem, teste Galvaneo cap. xcvi. *sua Chronica*, cujus testimonio pondus addit communis Historiographorum omnium consensus, qui Galienum Mediolani commorantem, inibi lucis hujus usura defunctum, terram terræ reddidisse narrant. Ejusdem porro formam volens, libens hic apponerem, si quis mihi idoneus Scriptor illam, rudi saltem Minerva, ob oculos posuisset, quod non invitatus supra feci, cum alia Cœmeteria descripsi, quorum lineas mihi aliquas D. Hieronymus, Prudentius, & alii vel leviter adumbrarunt. Neque vero labori ulli pepercì, ut sicubi aliqua ejus vestigia, vel leviter impressa, reperire possem, illud

illud exhibere possem, eoque sine Chronographorum nostrorum omnium monumenta pervolvi, sed frustra. Quare ne (quod ab Historico procul abesse debet quam longissime) aliquid ex ingenio, aut lubidine commentus fuisse judicaret, aut vana somniasse potius, quam vera literis consignasse, volui eam præterire libentius, quam effectam dare.

Ad horum igitur antiquorum Cœmeteriorum exemplar, quas specus quasdam subterraneas fuisse tradidimus, succedente ævo fideles suas construxerunt CRYPTAS, easque peculiari nomine CONFSSIONES appellaverunt, quandoque etiam ab obscuritate vocabulo, vulgique sermone corrupto, SCVROLA, id est, obscura loca, tum ad reponenda his in locis Sanctorum Corpora, tum ad peragendas in iisdem procul à strepitu & hominum prophano commercio remotis stationes, vigiliis, & alias hujusce generis sanctiores conventus, quales ab Sanctis Apostolis Christo duce & auspice derivati in primitiva Ecclesia frequenter habebantur, incalcentibus tum mirum in modum animis ad pietatem: sed clam in abdito ob immane Gentilium odium, & oppugnationes creberrimas, quæ recens natæ Christo soboli parabantur; atque adeo principio quidem in terræ specubus & caverinis, mox in Cryptis & substructis Cœmeteriis, ac demum traductis ad lenitatem animis Barbarorum, apertis in Confessionibus, aut publicis Templis. Quibus conditis cessarunt non multo post fidelium studia in Cœmeteriis adeundis, delatis inde scilicet intra Urbem, quæ ibi sita erant Corpora Sanctorum Martyrum, & honorificentius sacris in diversis Ædibus collocatis.

Porro tales olim conventus magno pietatis ardore Mediolani quoque agi sua tempestate solitos testatur Ambrosius, sacrorum ejus Urbis Antistes maximus, & ii omnes, qui sacras historias ediderunt. Verum enim vero cum corruptelæ non paucae in eas coepissent irrepere, non tam ex opportunitate peccandi occasione noctis & tenebrarum, quam ex callido vaserrimi Draconis astu, qui se Christi cruciatu atque morte perculsum & confectum sentiens, quantum suis artibus connti poterat, tantum ei de possessione sua tentabat eripere, vel bona semina ad æternæ vitæ fructus

A à Christo jacta mentibus ex humanis eruere, vel adulterare contrariis seminibus occulte dispersis, intermissi sunt, & ea Confessionum loca sacris dumtaxat Divorum Reliquiis asservandis in posterum reservata. Quamobrem deinceps à nostris Confessiones una cum Basilicis ac Templis conditæ iisdemque conjunctæ sunt, quod usum nullum ab iis sejunctum haberent ex certa quadam & peculiari Ecclesiæ sacrosanctæ lege. Atque hæc de sacris subterraneis ædibus non abs re præsentī penitus dicta sufficiant, ut hujus tempestatis homines Majorum nostrorum pietatem, & accuratam in conservandis primis Ecclesiæ ritibus diligentiam noscent, quantique iisdem illi sanctissima Divorum Corpora facerent, quorum sacris Reliquiis venerandis peculiare hujusce generis ædes tanto quandoque sumptu & apparatu conditas legimus, ut de Hippolyti Cœmeterio sic iterum à nobis, ac nunc etiam tertio laudandus Prudentius cecinerit ad stuporem:

Ipsa illas anima exuvias, quas continet intus,

Ædicula, argento fulgurat ex solido.


Prefixit tabulas dives manus æquore levi

Candentes, recavum quale nitet speculum.

Nec Pariis contenta aditus obducere saxi,

Addidit ornando claro talenta operi.

Ac nos quidem de Confessionis nostræ pulchritudine, dimensionibus, columnis, ac omni fere ornatu reliquo, satis superque disseruimus supra: nunc Arcam illam lapideam describemus, cujus in sinu tres illi Sancti Martyres continentur. Lapidæa illa tota, ac ingens satis, inter supra laudatam Aram, & fontem Confessionis excurrit, natæ longitudinis pedes quinque, latitudinis duos, altitudinis unum, post Aram, inquam, illam de more, quo Sanctorum tumulis assignatum spatium, post altaria, ut in plerisque aliis tum nostræ, tum urbium aliarum locis. Levigati intus est operis juxta sacrarum constitutionum formam, extrinsecus vero sculpti, cæsq; cultu religioso pariter, & insigni duorum Angelorum manibus hinc inde tenentium Martyrii lauream in Arcæ ipsius meditullio sitam. Quocirca plane uti sese habet appingendam hic illam esse putavimus diligenter, ne quid non è veteribus Templi nostri monumentis protrahamus in lucem, appingi, vel spectari dignum.



Porro Divi, quorum Arca Reliquiis insignita colitur, sunt **QVIRINVS SISCIANVS** Episcopus, & Martyr, **NICOMEDES** Presbyter, **B. Petri** Apostolorum Principis Discipulus, & **ABVNDIVS** Diaconus, ambo fidei confessione pariter, & Martyrio clari. Horum ossa & cineres Federici Cardinalis Borromæi vigilantissimi Mediolanensium Archiepiscopi præsentis jussu visa, recognitaque sunt ix. Kal. Feb. anni mdcix. sepulchro eorundem, quamplurimis ex Canonicis Ordinariis Ecclesiæ Metropolitanæ spectantibus, referato. Nos ipsi quoque (quod votis omnibus optaramus, sperabamusque aliquando fore, ut vivis nobis contingeret) non sine sensu voluptatis eximio intuiti tum hæc ipsa sumus, & enixe, quod piis eorum adjuti precibus è diuturnæ febris incommodis salvi & incolumes evaserimus, venerati. Visis iis Archiepiscopus statim in mandatis dedit peritioribus Ecclesiasticæ antiquitatis viris, ut quo primum tempore commode posset, & quam diligentissime perquirenda curarent antiqua Instrumentorum (ut vocant) exempla, patria historiarum omnium monumenta, veteres Inscriptiones omnes, tum nostræ, tum Patrum nostrorum memoria consignata literis, scripta publica, & privata, aliaque id generis documenta, ex quibus certe ac liquido colligi possent Martyrum inibi quiescentium nomina, genus necis, ac tempus, Principes insuper, vel Tyranni, quibus imperantibus innocentissimi Viri vitam pro Christo cum sanguine profudissent; ratio tandem, & modus, quo in Vincentianam nostram Basilicam pervenissent. Ac ut sine ulla cunctatione protinus pientissimi Præfulis voluntati mos gereretur ab iis, quorum id intererat maxime, Ticinensis Portæ Præfecto negotium datum est, non eum quidem ob finem antiquitatem omnem patriam excutiendi, quo certa inde rei totius cognitio peteretur, sed eum, cui munus impositum fuerat, describendi quæcunque ad eam facere viderentur, urgendi naviter ac morose, quo citius quale istud cumque opus esset maturaretur. Juvit igitur ista Præfecti strenui & impigri viri sedulitas paratum obsequi, immo difficultates procul amovit quamplurimas, quæ moras ingentes necere poterant ea de re scribere festinanti. Itaque Deo Opt. Max. non abnuente, cujus immensam amplitudinem Sanctorum vita, mors, & gloria maxime ostendit, factum est brevi temporis intervallo, ut omnia fere invenerimus, quæ istud ad negotium pertinerent, nec multo post nullo cum labore digessimus in rationes decem, quas proxime sequenti Fasciculo complectemur. Accesserunt iisdem postmodum non pauca juris utriusque testimonia, auctoritates aliquot Sanctorum Patrum, Ecclesiasticarum Historiarum pleraque monumenta, eruditorum denique Virorum placita non contemnenda, ne quid omisisse consulto videremur in susceptæ provinciæ partibus obeundis. Ac licet supervacaneum videri fortasse possit aliquibus Martyris uniuscujusque facta, veluti lectissimos flores, inferere Fasciculo, quem æternæ uniuscujusque memoriæ necimus in præsentī: cum Sacrosancta Romana Ecclesia omnium Christianorum benignissima parens ac nutrix unumquemque horum, **QVIRINVM** nempe Episcopum, **NICOMEDEM** Presbyterum, & **ABVNDIVM** Diaconum, ut qui per insignia tormenta & acerbissimos cruciatus effuso sanguine suam in præpotentem Deum fidem illustri confessione testati sunt, cum in veteri ac recenti Martyrologio, tum in pervagatis illis ac contritis Catalogis (vulgo *Kalendaris*) inter facrorum Martyrum, atque adeo Cælitum ipsorum numerum retulerit, nullus jam ut alicui relinquatur dubitandi locus, quin hi sanctissimi Viri omne vitæ suæ curriculum honestissime, integerrimeque confecerint, ac tandem immani diræ necis genere

A gravi corporis custodia liberati in Beatarum Mentium sedes recepti, plurimos gravissimorum morborum tabe confectos pristinae valetudini restituerint, ab obsessorum animis Dæmones ejecerint, oculis, auribus, ac membris omnibus debilitatos ad optatam sanitatem perduxerint, ac alias res multas admirabiles, quarum nulla fieri poterat sine divinæ ostensione virtutis supra naturæ vim & ordinem, perpetrarint; quibus sanctitatis suæ fama toto jam pridem Terrarum Orbe, totoque Cælo diffusam clarissime nituerunt: non abs re tamen omnino fore duximus, Breviarium veluti quoddam necis uniuscujusque, ac vitæ conficere, locum, in quo eorum uniusquisque cæsus occubuerit, annotare, quo cruciatus genere, contempta temporaria morte, coronam vitæ æternæ perceperit, aperire, quot demum ad id usque tempus anni à Christo nato fluxerint, demonstrare, tum ut mandatorum partem hanc non minimam exauriamus, tum ut quæ de illorum corporibus dicentur in posterum clarius innotescant.

Ut igitur à Sancto Quirino, quippe qui SS. Nicomedem & Abundium dignitate præstitit, ordiamur, Episcopalem Siscienis Ecclesiæ clavum is tenuit, non ejus quidem, quæ est in Umbria Urbe D. Francisci natalibus clara, sed ejus, quæ in Illyrico juxta Sabarim fluvium esse sita, de qua Venantius Fortunatus eo in carmine lib. vii.

Africa Cyprianum dat, Siscia clara Quirinum. donec jussu Maximini cognomento Galerii adductus est neci, non, inquam, Maximini ejus, qui sub Valeriano Principe vixit, ac Proconsul Africae præfuit, Sanctumque Cyprianum Carthaginensem Episcopum extremo supplicio mactavit, ut aliqui memoriæ prodidere, sed alterius, qui in Asia, Illyrico, & Oriente in Diocletiani locum allectus, Præfecturæ munereungebatur tunc temporis, quo liberius bacchante ipsius Diocletiani in Christi discipulos & alumnos, anno scilicet ab ipsomet natali Christi Domini die cccviii. juxta Baronii mentem in *Annal.* juxta vero Galefii & aliorum calculos, cccx. & ab eodem Principe in societatem adscitus Imperii, insigni Cæsaris titulo decoratus, edicta de Christianorum interitu æreis in tabulis proponebat. Multos tunc sanctissimus Episcopus pro Christi fide dolores exhaustit, multas exorbuit acerbitates, plurima, variaque tormenta pertulit, ac demum ingenti ad collum alligato saxo, præceps in Sabarim fluvium (quem *Gunsionem* hodie nominant) est dejectus. At hic (dictu mirum) supernatante lapide ex undis, cum Christianos, qui tum forte fortuna spectaculo illi teterrimo præsentem forte fortuna spectaculo illi teterrimo præsentem aderant, in proxima ripa rei totius exitum intuituri, diu fuisset hortatus, ne suo supplicio, neve ullis Barbarorum minis, nullis periculis, nullis cruciatibus se de recto Orthodoxæ fidei tramite dejici paterentur, cælestibus præmiis inhians, fuis ad Deum precibus impetravit, ut obrutus aquarum vorticibus in altiori fluvii gurgite mergeretur, afflicurus inde gloriosam illam tandem aliquando lauream, quæ nullis temporum intervallis suam viriditatem exuit, quamque paratam norat iis esse certissime, qui in hisce corporis inclusi compagibus pro Christo, ejusque salutaris disciplinæ propagandæ studio contumeliis affici, plagis contundi, vulneribus peti, jugulari denique voluissent. Ejus res gestas, si qui sunt, qui pluribus explicatas videnti desiderio flagrent, hi Mombrinium civem, & Historicum Mediolanensem adeant *Tom. ii.* Beadam, Ufuardum, Adonem, Martyrologium Romanum, & Ambrosianum Breviarium nostrum, in quibus præclara de rebus ab eo gestis mentio fit pridie Non. Junii, & alios Scriptores ejuscemodique quos ultro missos facimus in præsentī, solo Aurelii Prudentii *Hymno* contenti, qui septimus est inter eos;

eos, quos libro *Peri Stephanon* inclusit, Quirino ipsi Sisciano Illyrico dictus: egregie siquidem is Scriptor de Martyre nostro est meritus, cum ejus hæc in laudem scripsit:

Insignem meritis virum
 Quirinum, placitum Deo,
 Urbis mœnia Siscia
 Concessum sibi Martyrem
 Complexu patrio fovent:
 Hic sub Galerio Duce,
 Qui tunc Illyricos sinus
 Urgebat ditionibus,
 Fertur Catholicam fidem
 Illustrasse per exitum.
 Non illum gladii rigor,
 Non incendia, non fera
 Crudeli interitu necant,
 Sed lymphis fluvialibus
 Gurgēs, dum rapit abluat.
 Nil refert vitreo aqore,
 An de flumine sanguinis
 Tingat passio mariyrem:
 Aequē gloria provenit
 Fluctu quolibet vrida.
 Summo pōntis ab ardui
 Sancta plebis Episcopus
 In praeceptis fluvio datur,
 Suspensum laqueo gerens
 Ingentis lapidem mola.
 Dejectum placidissimo
 Annis vertice suscipit,
 Nec mergi patitur sibi,
 Miris vasta natatibus
 Saxi pondera sustinens.
 Spectant eminus & solo
 Ductorem pavidi greges:
 Nam Christi populus frequens
 Riparum sinuamina
 Stipato agmine sepsit.
 Sed Quirinus ut eminens
 Os circumtulit, heu suos
 Extemplo trepidos videt,
 Nil ipse proprii memor
 Inter stagna periculi.
 Confirmat pia pectora,
 Verbis mirificis rogans,
 Ne quem talia terreant,
 Ne constans titubet fides,
 Aut pœnam putet emori.
 Dicentem fluitantibus
 Annis terga vehunt vadis,
 Nec substrata profunditas
 Saxoque, & laqueo, & viro
 Audet sponte dehiscere.
 Sensit martyr Episcopus
 Jam partem sibi præcipi
 Palmam mortis, & exitus,
 Ascensumque negarier
 Aeterni ad solium patris.
 Jesu cunctipotens, ait,
 Haudquaquam tibi gloria
 Hæc est insolita, aut nova,
 Calcare fremitum maris,
 Prona & flumina sistere.
 Scimus Discipulum Petrum,
 Quum vestigia tingeret
 Mortali trepidus pede,
 Dextra subsidio tua
 Subjecisse salum solo.
 Jordanem quoque novimus
 Tortis vorticibus vagum,
 Dum fertur rapido impetu,
 Ad fontem refluus retro
 Confugisse meatibus.

Hæc miracula sunt tua
 Virtutis, Domine, ut modo
 Suspendar, leve prænatans
 Summo gurgite fluminis,
 Cum collo scopulum traham.
 Jam plenus titulus tui est,
 Et vis prodita nominis,
 Quam gentilis habet stupor.
 Absolve, precor, optime,
 Hujus nunc anima moras.
 Quid possis, probat amicus
 Qui vectat silicem liquor.
 Hoc jam quod superest cedo,
 Quo nil est pretiosius,
 Pro te, Christe Deus, mori:
 Orantem simul halitus,
 Et vox deserit, & calor;
 Scandit spiritus ardua:
 Fit pondus grave saxum:
 Corpus suscipiunt aquæ.

Quod si quis prolixitatem Hymni hujus fastidiverit, legat is ejusdem epitomen paucis nuperrime versibus comprehensam à Matthæo Radero, sacerdote è Societate Jesu, & hic à me positam non augendæ molestiæ gratia, sed tollendæ:

Immanis saxi moles à Præsule pendet,
 Sed ne mergatur, sit lapis ipse ratis.
 Ut mergi posset, saxumque ut pondus haberet,
 Rex maris, & terra voce precandus erat.
 Scilicet & tellus virtutem sensit, & unda
 Pontificis sacra parcere jussa mitra.
 Quem non hauserunt fluctus, non fragmina montis
 Presserunt, cogis, sæve Tyranne, mori?

Quibus licet contenti possemus esse; ne qua tamen D. Quirino injuria fiat, omisissis præconiis delatis ab aliis ejusdem eximiis meritis, ac virtuti, visum hic etiam mihi illa ipsa reponere ex publica scriptorum Neotericorum fide, Lectoris animum ipsa fortasse novitate rei, si minus ipsius orationis suavitate poterimus, refecturi.

Ferunt enim isti innixi auctoritati M. S. Vitæ S. Ruperti, quam vi. *Antiq. Lect.* volumen inclusam habet, (neque enim recentiores sine testimonio loquentes laudare libet in re nova, & antehac nostris fortassis etiam inaudita) D. Quirinum non Siscianum tantum Pontificem, sed Laureacensem quoque Archiepiscopum, & Aquilejanum Patriarcham, nec non & Philippi Majoris Romanorum Imperatoris filium existisse. Verba enim ipsissima M. S. sunt: Quirinus illustris Philippi Senioris filius, qui primus Imperator fidem Catholicam ad prædicationem Origenis recepit. Quirino tandem in Primatum Aquiliensem sublimato, Sanctus Maximilianus ex Celeja civitate nobilibus parentibus ortus, Laureacensem Ecclesiam optime rexit, qui post multos agones in Vineâ Domini habitos, locum nativum adiit. Confirmant idipsum Metelli Poetæ non obscuri versus, quibus & antiquitas, (cum anno à Christo nato MLIII. vixerit) & Monastica vitæ genus, quod caste semper & integre professus est in Benedictina familia, fidem adstruunt non vulgarem. Sic enim ille de D. Quirino canens ode 1.

O flos purpureus, tu rosa nobilis,
 Martyr conspicuus, testis idoneus
 Stirpis Casarea germen amabile
 Aula fiderea clarus in ordine.

F Et ode altera:

Horum sceptrigera de stirpe resedit aureos flos
 Quirinus, infans septimum sub annum, &c.
 Adstipulari videtur his Leander in *Catalogo Pontificum Aquilejensium*, undecimam Quirino sedem adscribens, ut nihil veritati magis congruere videatur. Alii tamen alia sentiunt, quorum in numero esse video Matthæum Raderum in *sua Bavaria sancta*, eo maxime fundamento innixi, quod nullibi apud Historiographos graves Romanorum Imper.

Genealogias enarrantes legere sit, Philippum Seniore præter Philippum Juniore filium, nullum alium suscepisse Quirini nomine nuncupatum: neque id à Prudentio prætermisum iri, ab eo Scriptore scilicet, qui majori quam cæteri diligentia vitam ejus, & Martyrium persecutus esset, ejus si filius exstitisset ob majus decus, quod sancto Martyri conciliare isto quoque nobilitatis Regiæ titulo potuisset, cum tamen nullum is ea de re verbum fecisse dicatur. Conati sunt igitur aliqui duas hæc sententias, inter se pugnantes adeo, conciliare, & opinionum diffidia tollere, si qua ratione possent. Ea re cum Baronio Quirinos primum quinque numerant, qui pro Christo testimonium sanguine dixerint, quos dein ad tres cum Radero & sectatoribus redigunt, ac tandem ad duos tantum cum M. Velfero II. Viro Augustano, Quirinum scilicet illum, qui Romæ sub Claudio Gothico passus gloriæ in Christo perseverantiæ titulo illustratus est, & hunc Tegernseensem à Metello Cœnobii Tigrini, prope quod nobilissimum ei templum dicatum est, Monacho laudatum Poematio Quirinali. Alterum vero Siscianum Episcopum, & hunc in Illyrico Amantii Præfidis jussu capitali sententia sub Galerio Maximino (sive Maximo) Principe cæsum, & à Prudentio *Hymni* sacri præconio decoratum.

Hac itaque distinctione præmissa, componi has ita sibi invicem adversantes sententias posse contendunt Scriptores isti, si nimirum Quirinos istos à supra laudatis Auctoribus sine ullo discrimine celebratos, ac unum pro altero (ut amat quandoque fieri cum incuriosius scribitur) sumptos esse dicamus. Meum sane non est lites hæc tantas componere inter tales Viros, neque statuere quamnam harum opinionum amplecti libentius debeat Lector veritatis amans: penes ipsum igitur jus & optio sit, quam ipse maluerit amplectendi. A me quidem certe muneri satis superque meo fieri arbitror, cum nihil eorum prætereo, quæ ad Divi nostri laudem facere videantur, & uti vera communi fere omnium consensu recipi, ac probari. Illud enim Martyri ipsi perhonorificum, istud vero sacræ cuiusvis historiæ Scriptori non injucundum fore arbitror, quemadmodum neutri displiciturum, quod medicam nunc adhibiturus sim manum *Oda* III. Metelli alicubi laboranti, sublati errorum aliquot maculis extra ordinem versus in ora ex autographo deprehensis. Erratum itaque primum in eo situm est, quod asserit anno I. Philippi Quirinum natum, & anno ætatis XXVII. passum sub Claudio. Cum enim Triodia Sanctorum, & Martyrologia fere omnia, Quirinum Siscianensem Episcopum, & Martyrem sub Galerio Principe statuunt, qui anno post C. N. CCCIV. ad Imperii gubernacula accessit; Philippum vero ad Imperii fastigium adscenderit anno CCXLV. mendum in eo certissimum esse fatendum est, quod anno ætatis XXVII. sit passus, cum anni quinquaginta novem inter Philippi & Galerii Imperia intercessisse constet: aut certe sine fundo dici, Quirinum natum anno I. Philippi, aut sub Galerio vita mortali functum, martyrii lauream accepisse. Verum enim vero cum postremum hoc affirmare non audeam contra communem Scriptorum Ecclesiasticorum consensum, facilius adducor ut credam, primum illud damnandum esse crimine falsitatis. Quod si quis rursus contenderit, Quirinum sub Claudio passum, in alterum is mendum incidat necesse erit; aut fateatur, Quirinum annos viginti tantum & quatuor vixisse, cum abisse plures à Philippo ad Claudium non legamus. At qua ratione tandem, quove jure firmabimus tot honorum insignibus, tot titulis, Episcopali scilicet, Archiepiscopali, & Patriarchali dignitate, clarum

A fuisse Quirinum nostrum adeo brevem lucis hujus usuram homini tribuentes. Quo siquidem ille pacto viginti tantum & quatuor, imo & viginti septem annos natus in sacerdotum album adscribi tempestate illa, qua sero admodum sacris mysteriis fideles initiari mos erat? Quid plura? Totam hanc primi erroris molem funditus evertemus arietate firmiori, quem illi nunc admotum inus è sacra Divi ipsius Historia, quam Mombritus scripsit. Mombritus enim gravissimus *Vita Quirini* scriptor Tom. II. *Sanctuarii*, disertissimis verbis asserit illum ætate gravi, imo senio prope confectum, una cum Martyrii laurea ad æternæ vitæ præmia commigrasse. Siquidem hæc apud illum Amantius dixisse fertur cum Martyrem alloqueretur in fidei prædicatione constantissime persistentem: *Ætatem tuam dolemus jaculari verberibus: tamen sensum tuum optamus emendari sermonibus, & premio promissa vite corrigere, ut reliquum senectutis tua tempus juxta legum Imperialium sanctionem Deus serviens perfuaris.* B. Quirinus dixit. *Quid de ætate dubitas? quam fides involata reddere potest omnibus suppliciis fortiolem, &c.* Quibus idem ille verbis eundem alloquitur in v. Lectione publicæ liturgiæ, quæ palam in anniversaria D. Quirini memoria legebatur in Collegiata cognomine nobilis oppidi Corrigiæ ante reformatum Rom. Breviarium jussu Pii V. Pontificis Maximi, ut ex *laudato Mombratii loco* videantur exscripta, licet quæ de Translatione Sacri Martyris in VIII. & IX. Lectione ejusdem Corrigiensis Ecclesiæ recensentur, nullatenus cum Mombratio congruant, cujus tamen Scriptoris auctoritas magni semper apud Viros doctos ponderis ac momenti fuit, ac in primis apud illustrissimum Baronium, à quo laudatur passim in *suis ad Martyrologium Notis*, ibi, inquam, ubi totus est in confirmandis facinoribus à sanctis Viris fortiter ac strenue perpetratis. Atqui de D. Quirini Translatione commodior nobis erit agendi locus in proxime sequenti Fasciculo, cum illic de sacris Corrigiensium Reliquiis apposite, loco suo scilicet, ac proprio, differemus. Cætera pariter, quæ ex Radero confuse de Claudio, imo & mendose, uti mea fert sententia, de Quirino protulit Scholiastes *ad Odam* III. Metelli, haud ignarus ad rem præsentem parum admodum facere, rejiciam alio commodius expendenda, ne meo quodam ex genio censorem potius obelo agere velle videar, quam veritatis studio monere Lectorem, ut ex recepta Ecclesiasticorum Annalium supputatione inter legendum juxta observationes nostras, aliorum errata corrigat, ac emendet.

E Dignitate secundus, at antiquitate primus, à D. Quirino Episcopo D. NICOMEDES Presbyter fuit, ut qui B. Petri Apostolorum Principis Discipulus, & S. Petronillæ ejus filiæ, ac Feliculæ Virginum à sacris confessionibus exstiterit, earumque corpora sepulcro crediderit, teste Surio Tom. III. *Flor. Sanctorum*, die XIV. Septembris, & aliis; siquidem is eandem ob causam à Domitiano Imperatore comprehendi jussus, ductus est in vincula, squallorem ut ibi carceris pateretur. Eo igitur in loco Christianum se eum esse disertissimis verbis apertissime fateretur, atque commentitiis illis, fictisque Deorum inanum simulachris sacra nefaria facere constantissime recusaret, plumbatis diutissime cæsus tandem ad coelestia capescenda præmia migravit è vinculis Romæ via Nomentana, anno à Virgineo partu tertio supra octuagesimum juxta communiorum Chronistarum illorum temporum opinionem. Hujus porro sacras anniversarias ferias colit Ecclesia XV. Kal. Octobris, deque eo mentio perhonorifica habetur in Conc. I. Romano coacto sub Reipublicæ Christianæ Pontifice Maximo Symmacho, quemadmodum & de illius

illius Cœmeterio in lib. de Rom. Pontificibus in Bonifacio V. legimus non contemnenda.

Agre hic admodum ac permolestè fero, Vatis nullius insignis carmina reperiri, quibus (quod sciam) Divi Nicomedis vitam, aut Martyrium illustrare possim, id quod à me nuper est factum in D. Quirini laudem, satis, ut arbitror, cumulate, facem mihi liberaliter admodum qua Prudentii Hymno, qua Metelli Ode, qua Raderi Epigrammate præferente. Verum enim vero ne strenuissimus Dei Opt. miles alter Nicomedes jure sibi suo debitis omnino præconiis fraudetur, quin imo paribus, quoad ejus fieri poterit, gradibus incedat cum Quirino, cum & ambobus laurea par obtigerit, par sepulchrum, Ecclesia eadem, amboque domus nostræ, atque adeo Parœciæ totius, ac totius Urbis sint lumina, columinaque firmissima, rectè me atque ordine facturum arbitror, si quid humili saltem avena depromam è penu meo, quod cultum, reverentiamque meam eximiam adversus magni nominis Martyrem, testatum apud posteros relinquat. Libuit igitur Hymno sacro vitam illius, vitæque exitum complecti paucis, sacris benevolentibus Musis, quibus illum referimus in acceptum, ad eorum morem, quos ab Ecclesiæ nostræ Parente Ambrosio decantatos accepimus, orationi solutæ, quam adstrictæ numeris propriiores. Eo vero libentius id mihi sumpti, quod is forte fortuna (modo tanti sit) ad ejus Divi festum diem inferi poterit Breviario nostro, cujus editionem novam, & ampliorem adornant religiosissimi Viri jussu illustrissimi Archiepiscopi Borromæi: aut certe testis esse perpetuus meæ nunquam erga Cœlitem de me optime meritum observantiæ intermorituræ. Quid quod Apostolorum Discipulum, Presbyterum nascentis Ecclesiæ numeris suis omnibus absolutum, Unigenæ Dei Filio charum, cujus & adspectu fructum illum esse, dum adhuc in terris degret, non temere suspicari possumus, ac ob id Ecclesiastici ordinis tutelarem præcipuum meis me præconiis extulisse nullo unquam possit me tempore poenitere. Dabunt alii fortassis alia, ac in primis ii,

Queis meliore luto finxit præcordia Titan.

Nos humiles juvat humi serpere, & aliquam-fminus, quod non potuerimus, saltem quod voluerimus à Divo Nicomede gratiam promereri.

Hymnus in laudem D. Nicomedis Martyris.

Apostolorum Principis

Sanctum vere Discipulum.

NICOMEDEM PRESBYTERVM

Tollamus omnes laudibus.

Is PETRONILLAM Virginem

Sobolem Petri nobilem

Sua fatentem crimina

Audiebat sedulus.

Alter Tobia dum studet

Humare corpus Virginis

FELICVLAE pro nomine

Christi passæ, comprehenditur.

Domitiani mox feri

Jussu adolere cogitur

Aris nefandi Damonis

Thura sacerdos ætheris.

Sed adolere pernegat

NICOMEDES, quotidie

Uni Deo se victimam

Litare sacram predicans.

Tyrannus illum protinus

Squallore mulctat carceris:

Nil sed Tyrannus proficit

Durante semper Martyre.

Pœnas parat statim novas

Putans Athletam vincere,

Sed vana cedunt omnia

Superna Christi gratia.

Fortiter namque pertulit

Plumbatos ictus asperos,

Ac illibatum reddidit

In illis cœlo spiritum.

Artus verendos Tyberi

Demergunt Gentes impia;

Eductos sed ad mœnia

JVSTVS sepelit CLERICVS.

Nec multo post hinc supplices

Ad Catacumbas transferunt

Christi fideles Martyrem

Ingenti cum letitia.

Has tenuit Martyr sedes

Donec ad Urbem appulit

HERIBERTVS EPISCOPVS

Mediolani strenuus.

Hic à supremo Præsule

Sacro donatus corpore

Mediolanum detulit

Sancto repletus gaudio.

Deditque mox Cœnobio

Vincentii nunc pignore

Tanti potitur Martyris

Ædes sacra Vincentii.

Atqui ut quantum debitis D. Nicomedi præconiis Hymni nostri brevitæ & tenuitate styli deperit, tantum eisdem accedat cumuli ex copia versuum seorsim complectentium Vitam ejus, Merita, & Virtutes, quæ subdam ea de re Epigrammata Lector humanissime percurrere ne graveris.

Allusio ad Apostolorum Principem Petrum D. Nicomedis Instituto-rem, & D. ipsius Nicomedis Discipulam Petronillam.

EPIGRAMMA I.

FELICEM ne tuo dicam NICOMEDE Magistro
Te magis, alme tua Discipulave magis,
Ambigo, Divorum Dux exstitit ipse Magister,
Discipula ipsa Chori gloria Virginæ.
Utroque ô vere felix? felicior aique
Virtute, & Meritis vivis in Axe tuis.

Quam ob causam Nicomedes detrusus
in carcerem.

EPIGRAMMA II.

DISCIPULAE in tumulto dum frigida membra reponit
Martyris, & largis fletibus ora rigat,
Romani mavult contemnere jussa Tyranni,
Quam sacrum in nuda linguere corpus humo.
Invicti hac animi Virtus, hanc palma moratur
Æternis nunquam palma obiura comis.
Prisca fides taceat, nam post hac facta, priores
Fama tacere Duces nescia, conicit.

De D. Petronilla D. Nicomedis Discipula,
Virgine & Martyre.

EPIGRAMMA III.

PETRONILLA Polum Duce te sortita triumphat
Virgines inter lucida tota faces.
Calicolas tales Calo parit, inclutus actis
Qui prius in terris, quod docet ore, probat.

In Domitianum Tyrannum.

EPIGRAMMA IV.

MONSTRVM horrendum, ingens, quo nullum im-
manus atris
Dira habitata feris Tartara nigra tenent,
Tu fera, tu feritas ipsa es, Tu immanior ipsa
Es feritate, Tibi qui fera bellua places.
Tu Divum Divam tumultantem funere mergis,
Exstincta tumultat corpora bellua fera.

Tolerantia Martyris Tyrannum vincit.

EPIGRAMMA V.

VINCERE nituntur telis & viribus hostes,
Ira quibus praeceps imperat atque furor.
Non ita divino Nicomedes percitus aestro,
Sola cui pietas imperat atque fides;
Ast ira quavis sublimior atque furore
Vicit nulla timens vulnera, multa ferens.
Regis ad exemplum Christi se finxit. Ille
Vincere sic Hostes, vincere & Astra docet.

Constantia ejusdem ad Gentiles.

EPIGRAMMA VI.

VT libet insani poenas geminate recentes,
Membraque vulneribus dilaniate novis;
Numinibus nullos vestris indicet honores,
Non Aris supplex impia thura dabit.
Ac quid enim possunt animis inventa malignis
Numina, mentiti quid simulacra Dei?
Christicola est eadem mens semper, pectore firmo
Ille colit veri Numen ubique Dei.
Ille colit Christum, qui crimina quaque piavit,
Quem peperit salva virginitate Parens.
Ut libet insani poenas geminate recentes,
Christicola est quercu firmior, & scopulo.

Poenae ejusdem in carcere, & vitae exitus.

EPIGRAMMA VII.

LANGVIDA colla feris constrictus, & ossa catenis,
Sternere humi vix dum corpora fessa potest,
Dum furvis septus tenebris, & carcere caeco
Agra nequit vetito membra levare cibo,
Dumque movere pedes, quos ferrea vincla coercent,
Dum vincitas nequit, ah, tollere ad astra manus:
Attollens Caelo mentem, non limina Regum
Optat, non molli membra locare toro,
Non epulas dulces, non Massica vina requirit,
Unius ardescens totus amore Poli;
Quin & amor Poli pro luxu vulnera anhelat,
Proque epulis poenas inter obire feras.
Affuit optanti Divum Rex talia, poenis
Constituitque feris ponere ab Axe modum.
Plurima sic inter ponentem vulnera vitam
Posse dedit vita nobiliore frui.
Scilicet athereis post tot discrimina rerum
Posse frui iussit sedibus, atque bonis.
Exitus hic illum, felix sors ista beatis
Intulit: hac itur sidera ad alta via.

Vetante Domitiano honore tumuli decoratur.

EPIGRAMMA VIII.

HVC agite o Gentes mentiti Numinis, & vos
Dura quibus tenebra pectora & ora premunt,
Consilia adspicite o tandem, quibus audit ab alto
Vota hominum, superum Rex, Pater atque Deus.
Quod Petronilla tumularit corpora Martyr,
Cogitur extremo claudere fata die,
Cogitur & tumuli (si qua est ea gloria) honore
Destitui rapidis praeda relictis feris.
Non ita. Ferre suos superum Rex talia amantes
Non patitur, probis invenit ille modum.
Scilicet & sacri tumulantur Martyris ossa.
I nunc & tumulum save Tyranne nega?

Ad Heribertum Episcopum Mediolanensem,
a quo Martyris Corpus Mediolanum
delatum, & ad Nicomedem ipsum
Actio Gratiarum.

EPIGRAMMA IX.

QUOD tuleris nostram caelesti Numine in Urbem
Divini Corpus Martyris almae Pater,
Solvimus haud dignas tanto pro munere grates
Heriberte tibi, solvet at ipsa dies.
Ast tibi Dive tuo nostrum quod corpore Templum
Dignaris mentem solvimus, atque animum.
Illius est voluisse suam te ducere in Urbem;
Ast colere Templum hoc te voluisse tuum est.

A Ego inter arctissima curae & sollicitudinis animorum (ut ita dicam) vincula paucillum laxamenti nactus, haec Epigrammata nuper recudi, & Divo Nicomedi libentissime adscripsi.

B Tertium locum obtinet B. Dei Martyr ABUNDIUS Diaconus, quem una cum Carpophoro non Hispali in Hispania, ut volunt Beda & Vassæus in Chron. Petrus in Catalogo lib. i. cap. iv. Flos Sanctorum, Thesaurus concion. Tom. ii. & alii; sed Spoleti, ut ex nostris animadverterunt probe inter ceteros Mombritius Tom. i. & Galefinus secuti Martyrologium Cremonense, & aliorum fida manu exaratorum codicum auctoritatem. Illustrissimus quoque Scriptor Annalium Ecclesiasticorum Baronius rem ita se habere in manuscriptis Ecclesiae Spoletanae vetustate fere consumptis, quae vidit, testatur suis in Notis ad Martyrologium litera B. die 10. Decembris: modis immanibus excarnificatum effera Martiani Judicis rabies interemit anno salutis nostrae ducentesimo, ni fallimur, supra nonagesimum, quo rerum potiebantur immanissimae generis humani belluae Diocletianus, & Maximianus, qui Catholicam religionem tanto persequerentur odio, ut in eos, qui se Christianae militiae dedisse nomina profiterentur, non solum vivos, sed etiam mortuos, teterrimam crudelitatem suam pertinaciter exercerent, ac in eorum vexandis, dilaniandisque corporibus cum effrenatam animorum rabiem aliter satiare non possent, oculos saltem suos pascere, & suorum. Enimvero saevissimi Judicis illius iussu Abundius tot ac tantis verberibus est affectus, ut juges e visceribus ejus omnibus rivi sanguinis emanarint. Conjectus nihilominus iterum semimortuo corpore in ergastuli tenebras, cibo, potuque subducto, fuit, ac postmodum in equuleo tortus, postremo cruribus abscissis in confessione ac defensione veritatis cursum beatæ vitae martyrio complevit 14. Idus Decembris, quo die in antiquo Missali Ambrosiano ejus in honorem **D** Missa legitur, & in Bedæ Martyrologio, Ambrosiano ritui nostro accommodato, ejusdem officium recensetur.

Quod adornare facile posset (modo tanti esset) Hymnus a nobis ejus honori nuperrime concinnatus. Qualis illecumque tamen ab ingenio & pietate nostra profuxit, hic eo libentius adscribetur, quo liquidius constet pari nos cultu & honore tres nostros Caeli Purpuratos Patres, & Ecclesiae Sacrosanctae Proceres venerari:

ABUNDIO DIACONO

E Dicamus omnes laudes,
Qui fide Christi nobilis
Athleta fudit sanguinem.
Is MARTIANI Judicis
Iussu nefanda traditus
Carnificum licentia
Affectus est verberibus:
Sed more ledunt vulnerum
Ictus Athletam verberum,
Juges abundant sanguinis
Rivi perenni gurgite.
Plus at abundat sanguinis
Rivis Athleta nobilis
Fides, Amor, Cultus, Decus,
Zelusque summi Numinis.
F Acceptus hisce pessime
In vincla modis traditur,
Exsanguis, & inedia
Torquetur, & equuleo.
Hac passus alto pectore
Martyr recis cruribus
Victor, triumphator sui
Devicit Hostem perfidum.
Hinc regna calcas aetheris
Crines decorus laurea,

Quam gerunt Christi milites
 Agone victo Demonis.
 Hinc sacer exit tumulto
 Latex salutis. Ebibit
 Quem quisquis, abit protinus
 A febre sospes torrida.
 Lac quoque cum nutricibus
 Desit frequentes hac volant,
 Statimque sacro latice
 Epoto lacte dissuunt.
 Hinc quisquis optat copiam
 Messis Lyei, serici,
 Habet, quod optat, Martyri
 Grates rependens debitas.
 Nos ergo tanti Praesidis,

A

Quos prope corpus assidet,
 Latemur. Ille precibus
 Nos, & tuetur Numine.
 Rogemus inde supplices,
 Ut ille nobis impetret,
 Ut abundemus gratia,
 Secumque tandem gloria.

B

Hæc erant illa, quæ de SS. Ecclesiæ nostræ Mar-
 tyribus videbantur à nobis hic esse necessario quo-
 dammodo præmittenda: de sacra nunc eorundem
 corporum translatione non tam in Urbem, quam
 Basilicam nostram, decem illa momenta ac ponde-
 ra rationum, de quibus paullo ante meminimus,
 novum in Fasciculum colligemus.

JO. ANT. CASTELLIONAEI FLORILEGIUM ANTIQVITATVM PAROECIAE

D. VINCENTII IN PRATO.

SECTIO I.

FASCIC. IV.

Rationum momenta x. de Translationibus SS. Qui-
 rini, Nicomedis & Abundii Mart. Primus ex Pan-
 nonia delatus initio Romam, inde Mediolanum ad D.
 Vincentii Templum. Angilberti tres. Quorsum Crux
 in Tumulo Gisilberti. Jo. Molani sententia ea de
 translatione, & alterius de tribus Regibus ad DD.
 Tumulum, repudiata. Nicomedes ad Romana mœ-
 nia tumultus, in Urbe mox ad Catacumbas, ad
 D. tandem Vincentii Mediolani. Philippi Ferrarii
 lapsus in eo Cathedrali Parmensi temere tribuendo.
 D. Abundii & sociorum translatio Mediolanum. Ve-
 rismilitudinum vis, & locus. Fama, Traditione,
 Scriptis publicis, M. S. Codicibus, Diplomatis,
 Apostolicis, Picturis, Visitationum Actis, Reliquia-
 rum ipsarum inspectione res omnis evidentissime com-
 probata. Admirabiles putei ad Sepulcra Sanctorum.
 Munificentia Longobardorum Regum in S. Aedibus
 extruendis. Epilogus verecunda Scriptoris excusatione
 conclusus.



LEVVM prorsus & operam
 perdidissemus, nisi quod
 universo Operi causam de-
 dit, persequeremur hoc lo-
 co, quibusque possemus
 rationum ponderibus ac
 momentis sanctorum trium
 Martyrum QVIRINI, NI-
 COMEDIS, & ABVNDII cor-
 pora Vincentianæ nostræ

Basilicæ vindicaremus. Has igitur denario, hoc
 in Fasciculo, numero complexi sumus, quod eum
 inter alios numeros supremum esse, nec nisi ex il-
 lius repetitione partium augeri posse, vel crescere
 non ignoremus.

Ac primo quidem quod ad primi Martyris Cor-
 pus attinet, supra laudatorum Bedæ & Adonis sen-

D

E

F

tentia fuit, Romam illud fuisse delatum non mul-
 to post quam Barbari Pannonias devastarunt, statim-
 que ad D. Sebastiani reconditum in Catacumbis;
 inde vero per Angilbertum Mediolanensem Ar-
 chiepiscopum Mediolanum fuisse translatum, Mar-
 tyris ejusdem Acta testantur, in nostra denique Ba-
 silica D. Vincentio sacra perhonorifice collocatum ab
 eodem Archiepiscopo Mombritius asseverat, cujus
 verba ex Tomo illius Operum 11. quod mira sit
 exemplorum ejus paucitas ubique locorum, mi-
 hique non alibi eum scriptorem videre contigerit,
 præterquam in Bibliotheca Ambrosiana. Hæc igi-
 tur sunt, quæ de Quirino Martyre is scribit: San-
 ctus Quirinus postea per Dominum piissimum Angilber-
 tum venerabilem Archiepiscopum Mediolanensem hono-
 rificentissime apud Monasterium B. Levite Vincentii si-
 mul cum Sancto Nicomede Presbytero summa cum re-
 verentia est reconditus. Suffragatur eidem Petrus
 Galestinus in Annotationibus ad Martyrologium suum
 pridie Non. Junii, ubi de Sancto Quirino loquens
 hæc habet: Ejus corpus nonnulli sunt, qui Romam ad
 Catacumbas; alii ad eadem Sancti Vincentii Mediolanum
 translatum esse testantur; ut nos quoque perspeximus ex
 literis Pontificiis, & Litanis Ambrosianis. Extant
 præterea de eodem Sisiciano Martyre monumenta peranti-
 quæ historia. Eadem fere legere est in duobus vetu-
 stissimis Manuscriptis Martyrologiis, quorum u-
 num est Monachorum Sancti Hieronymi, vulgo
 del Castellazzo in Urbis nostræ suburbiis, ubi nunc
 summa cum laude Præfectum agit Balthasar Suda-
 tus, spectatæ probitatis & integritatis Vir, gravio-
 ribus olim in studiis sodalis & popularis (mihi quod
 gloriari liceat) meus. Quam ante Provinciam lon-
 ge majorem sustinuit bis Monachorum totius Or-
 dinis Generalis, religiosæ politices adeo peritus,
 ut omnium animos facillime pertrahat in amorem,
 admirationem, cultum, & obsequium sui. Alte-
 rum Cœnobitarum D. Francisci in eadem Urbe.
 Siquidem in uno legitur: Pridie Nonas Junii, apud
 Dd 3 Illy.

Allyricum in Civitate Siscia natale B. Quirini Episcopi, qui pro fide Christi, ut Prudentius scribit, ligato ad manum molari saxo in flumen precipitatus est, cujus corpus tandem translatum est Mediolanum in Ecclesia Sancti Vincentii. In altero: Corpus Sancti Quirini translatum est Roma Mediolanum in Ecclesia S. Vincentii, die IV. Junii, quo festum ejus agitur. Assentitur his omnibus Cardinalis Baronius in Notis ad Martyrologium Romanum ibidem litera B. Nec longe ab iisdem abit Breviarium nostrum Ambrosianum, quamquam ex eo S. Quirini corpus non per Angilbertum Archiepiscopum Mediolanensem, ut Mombratio placuit, sed per Heribertum ejusdem Urbis Archiepiscopum Mediolanum delatum fuisse constet. Verum enimvero hic error manasse videtur ex similitudine nominum propemodum germanorum, ANGILBERTI scilicet, & HERIBERTI, qui tamen gravissimus est, cum horum alter anno Incarnationis Dominicae DCCCXXXV. vixisse dicatur, alter vero post annos ducentos in eadem illi provincia successisse, ut ex Ecclesiasticis Annalibus apertissime liquet. Si quis igitur nostram hic sententiam roget, ac utrum Translationis hujus auctor Angilbertus exstiterit, an Heribertus, libenter assentiremur doctissimo Viro Petro Galesino, qui Heribertum mavult legendum, quam Angilbertum, nisi forte dicere velimus delatum quidem fuisse Martyris Corpus ad Urbem Mediolanensem ab Heriberto Archiepiscopo, sed per Giselfbertum Abbatem, illum scilicet, à quo non multo ante Cœnobium S. Vincentii in Prato Mediolani conditum, ornamentis auctum, locupletatumque redditibus, ut ejusdem apud nos Tumuli monumenta testantur his literis marmoreæ tabulæ, appositæ figuræ insculptis.



- A Verum et si hoc minus fortasse probabile videatur ob Episcopi vocem appositam Angilberto, qui Martyris corpus transtulisse dicitur Mediolanum, Abbatis autem alteri Angilberto, seu Giselfberto, ut hic depicta marmorea tabula habet; vero tamen esse similis apparebit illud, quod à nobis in medium est allatum cogitanti vitæ utriusque tempora non admodum discordare. Siquidem enim Heriberto Mediolanensis Ecclesiæ Pontifice summo, Monachos Cœnobii Vincentiani floruisse maxime ob commoda & opportunitates sibi Giselfberti Abbatis opera, studio, & labore partas, atque adeo (quod plerumque in secundis & ad voluntatem fluctantibus rebus accidere consuevit) sese supra ceteros extulisse, ac vel ipsius Archiepiscopi jugo colla subtrahere conatos esse, notum est iis, qui *Manipulum Florum* Joannis à Monte manuscriptum inspexerint accurate. Quæ cum à disciplina illius Monasterii vetere plurimum abhorrerent, iisque medicinam aliquam facere decrevisset summus Mediolanensis Antistes Heribertus, ne suis defuisset partibus videretur, votique compos ad saniores illos mentem & animum reduxisset; non male opinabitur quisquis inde conjecerit Giselfbertum Abbatem, cujus beneficiis aucti Monachi defecerant ab optima disciplina, & Heribertum Archiepiscopum, à quo succrescenti illorum licentiæ frænum injectum est, iisdem fere temporibus exstitisse. Sed hæc pro quorundam opinione potius, quam pro nostra sententia, visum est hic paucis aperire. Nam re paulo diligentius examinata, inter laudatos Giselfbertum Abbatem, & Heribertum Archiepiscopum Mediolanensem, longum intervallum temporis intercessisse reperimus, observatione diligenti adhibita ad Crucis sacrosanctæ signum incisum tabulæ marmoreæ humi stratæ, sub qua Giselfbertus jacet. Notum est enim omnibus Jurisprudentiæ non ignaris, non nisi ante Herium & Ardaburum, quorum consilatus incidit in annum communis salutis ccccxxviii.
- D Crucis sacrosanctæ signum humi stratis in marmoribus incidere licuisse, cum iis Consulibus ne id in posterum ullo modo fieret caverint Imperatores piissimi lege sanctissima, quam ipsismet Imperatoris verbis subdimus ex *l. cum sit, C. Nemin* licere signum Salvatoris: cum sit nobis cura diligens per omnia superni Numinis religionum tueri, signum Salvatoris Christi nemini licere, vel in solo, vel in silice, vel in marmoribus humi positis insculpere, vel pingere, & quocunque reperitur tolli (gravissima pœna multando eos, qui contrarium statutis nostris temptaverit) specialiter imperamus. Ita rescripserunt Imperatores Theodosius & Valentinianus, Eudoxio Præfecto Prætor.
- E Hierio & Ardaburo Cosl. Cum igitur Heribertus Benedicto VIII. Pontifice Mediolanensis Ecclesiæ Archiepiscopus renuntiatus federit annis septem propemodum & viginti, Joanne XIX. & Benedicto IX. Pontif. hoc est, exordio sacre suæ provinciæ ducto ab anno salutis Dominicæ MIX. usque ad MXXXXV. vel ex hac annorum diversitate apertissime constat, Giselfbertum Abbatem quam longissime ab Archiepiscopi Heriberti temporibus abfuisse. Itaque frustra non est observatio nostra: imo ut hæc, & aliis in rebus hujuscemodi frustra esset, antiquitatem certe Vincentiani Cœnobii non declarare non potest, cujus administrationi multo ante latam ab Imperatoribus legem Crucis humi non incidendæ, præfuit Giselfbertus.
- F Isto sane in loco non damnare non possumus, antequam ad alia progrediamur, (ita nos admonente Imperatoria lege) pravam consuetudinem aliquorum, qui Cruces non humi tantum in lapidibus, sed etiam parietibus & angulis viarum aliquot prophanis omnino usibus expositarum inconsulto ac temere (ne dicam impie) appingere non verentur contra placita gravissimorum Patrum, quibus sex-

centa fere Concilia, ac nostra præcipue Mediolanensi referta sunt. At hæc pluribus persequi, neque negotii præsentis est, neque muneris, quod sustinemus. Certum sit igitur Mediolanum S. Quirini corpus fuisse translatum, quicquid contra sentiat Joannes Molanus in *Adnotationibus ad Usuardum*, ductus levibus admodum (ut tribus in ejus exemplaribus videre potuimus) conjecturis, præsertim si de postrema translatione loquatur. Quod enim ad secundam attinet, non negamus fieri potuisse, ut tempore Pipini Regis in Austriam ad Tigurinum Monasterium delatum ad tempus, Mediolanum demum inde translatum fuerit per aliquem ex Regibus, qui post Pipinum Italiæ finibus imperitarunt, ut ex perantiqua pictura trium Regum ad Sepulchrum Martyris adstantium inter utrasque Templi nostri januas fumus aliquoties cum erudito Viro, (ut infra videbimus in v. Ratione) nec fortasse temere, opinati. Nemini vero mirum videri debet ista Molanum procul à nobis ultra montes dissitum latuisse, cum præsertim Annales solum is antiquos legerit, nec ullam de postrema translatione, sibi fortassis ignota, fecerit mentionem.

Nec mirum eundem prorsus errorem de Translatione eadem animo imbibisse Jo. Cuspinianum in *sua Austria*, cumque novis aliis, atque adeo gravioribus, erroribus cumulasse, cum præcipue scripsit, Bojariorum regionem conterminam hoc cælesti Thesauro ditatam usque ad ætatem suam, si aliam ad nos translationem non admittat. Sed enim falsus est, lapsusque gravissime Cuspinianus, cum ibidem scriptum reliquit, D. Quirinum sub Claudio in Tyberim notissimum Romæ flumen jactum, mersumque, agonem martyrii pertulisse, indeque eductum in Cœmeterio Pontiani fuisse perhonorifice tumulatum. Quibus enim ducibus in hosce errores prioribus longe graviores abduci se passus sit Cuspinianus, accuratissimus alioqui Scriptor, prorsus ignoro, cum è contra non nesciam ab Historiographis omnibus sacris utriusque memoriæ unanimi fere consensu proditum, D. Quirinum nostrum non in Tyberim Romæ, sed in Sabarim in Illyrico præcipitem datum: neque sub Claudio, sed sub Galerio passum: nec unquam in Cœmeterio Pontiani conditum, sed Calixti, quod ante dicebatur Cœmeterium vetus, postea vero substructis Catacumbis, ad Catacumbas audiit, ibique ad ea usque tempora quievisse, quibus Mediolanum ab Heriberto Pontifice translatum fuit. Quantis porro partibus, quamque longissimo intervallo, quæ de D. Quirini Translatione Roma in Bojariorum regionem Cuspinianus commentus est, distent ab iis, quæ nuper recensuimus ex Molano, nemo non intelliget, cum is velit, Quirinum post annos à Martyrii laurea cccc. tempore Pipini Regis Bavariam ad Tigurinum Monasterium esse translatum; ipse vero Cuspinianus sub Zacharia Pontifice Max. ad Cœnobium Deegrenense per Albertum Ducem Baviaræ, & Ottharum Ducem Burgundiæ germanos fratres. Quin imo longe quoque minus ista conveniunt cum his, quæ in M. S. Codice Læctionum Ecclesiæ Collegiæ Corrigiensis habentur, à nobis non multo post attentius expendenda: siquidem eo in Codice legitur per viros nobiles & potentes de Corrigia, scilicet per Conradum Corrigiæ Comitem delatum fuisse D. Quirini corpus ad oppidum Corrigiense an. dcccxxviii. dono acceptum à Gregorio Rom. Pont. tunc temporis Oecumenicam Ecclesiam moderante. Minus ob id etiam mira videri debebunt, quæ scripta sunt ab ultra montes degentibus de ejusdem Martyris & Episcopi translatione, siquidem ab illis est proditum sacras hujus D. Exuvias Romæ conditas fuisse anno cccclxxxii. inde vero

A translatas in Noricum, inibi quievisse annis cccvii. qui cum xxvii. quibus Quirinum vixisse asserunt, dcccxvi. efficiunt, quorum omnium una cum aliis cccxviii. quibus à C. N. juxta Baronii mentem Quirinus martyrii laurea redimitus è Mundi fluctibus molari saxo, quasi tuto quodam vehiculo, salutis æternæ portum attingit, ratione subducta mcccxiv. annum eum reddunt, quo Mediolani Pontificem agebat Heribertus, à quo S. Quirini corpus Roma Mediolanum translatum fuisse, non multo ante docuimus. Verum enim vero, ut hos annorum calculos rite atque ordine subductos æquare non negem tempus, quo Romæ & alibi S. Quirini corpus jacuit, donec Mediolanum ab Heriberto Pontifice delatum est. Locorum certe & translationum ordinem pervertunt ii, qui cum primo in Basilica Scarabatenfi (ut sacra ejusdem testatur Historia) conditum fuerit, deinde translatum in Noricum, inde Romam, postremo denique Mediolanum, nihilominus cum supra laudato Scholiaste ad *Odem illam* iii. Metelli probare contendunt, conditum primo fuisse sacrum D. Quirini corpus Romæ, inde translatum in Provinciam Noricorum, quam Bojariorum populus habitat, ut cum Molano Cuspinianus etiam sentit. Atqui Scriptorum hujuscemodi pondus parvificandum est nobis, qui pluribus, atque adeo gravioribus Historiographorum nostrorum testimoniis abundamus, quibus major ob id etiam habenda est fides, quod firmiorum rationum ponderibus innituntur. Accedit demum ad hæc calculus Viri religione pariter, & eruditione longe clarissimi Matthæi Raderi Bojorum (ut arbitror) popularis in *sua Bavaria sancta* ibidem edita, & Bavaro Duci dicata, in qua de Quirini corpore scriptum ita disertissime reliquit, non sine aliqua præfatione laudis Basilicæ Vincentianæ nostræ: *Corpus D. Quirini Romam, inde Mediolanum transvectum, in S. Vincentii eade positum hodie magna religione colitur*. Quin illud etiam addit idem Scriptor, in Boica regione, Tegorii scilicet, habere nostrum Divum nobilissimum & celeberrimum templum.

Neminem quoque à nostra sententia dimovere debet, quod in recenti Sanctorum Italiæ Catalogo scriptum reliquit Philippus Ferrarius de Sancti Quirini corpore, nimirum id esse Tibure in Cathedrali. Ferrarius enim de alio sancto Quirino à Sisciensi nostro longe diverso loquitur ex Baronii mente, qui quidem festum ejus cadere prodidit in eundem quartum Junii diem, at inter simplices, ut ajunt, Martyres numerari: Ferrarius vero eum, de quo loquitur, Martyrem vel Episcopum fuisse diserte neget, ac inter Confessores tantum ab Ecclesia Catholica recenseri, colique vult proxime consequenti die, ut ex Tabulis, sive Catalogis Sanctorum, qui Tibure coluntur, præclare probari posse contendit.

Eodem plane modo S. NICOMEDIS corpus Mediolanum ad nos divinitus fuisse delatum, non est cur admodum ambigamus, cum in veteri Missali Ambrosiano habeatur Missa in horum duorum Sanctorum Martyrum translatione peculiaris ac propria, uno eodemque die, valdeque probabile videatur S. NICOMEDIS corpus in Tiberim, teste Marcello Petri Apostoli discipulo, præcipitatum, ac inde subductum à Christianis, prius quidem ad muros Urbis à Justo Clerico in sepulchro via Nomentana conditum, postea vero ad Catacumbas eo in loco, in quo aliquando SS. Apostolorum corpora, & nobilissimi Martyris Sebastiani mortalis exuvia conquievit, ab iisdem fidelibus tumulatum, quod ibi prius illis temporibus permulta Sanctorum corpora (uti supra retulimus) conderentur, ac demum delato Sancti Quirini corpore ex Pannonia Romam una cum illo Sancti quoque Ni-

Nicomedis corpus ibi diu reconditum, Mediolanum fuisse deductum, ut paullo ante Mombritii & aliorum Scriptorum Ecclesiasticorum testimoniis innixi docere ac dicere non verebamur. Quamobrem putandum est temere, vel certe gratis supra laudatum Ferrarium in Nomenclatura Sanctorum Italiae adscripsisse D. Nicomedis corpus Cathedrali Parmæ. Idem enim in Indice peculiari Sanctorum, quorum corpora singulis in locis, vel urbibus conquiescunt, Parmæ Sanctos sex tantum attribueris missum D. Nicomedem fecit, quod certe facere minime debuisset, si verum fuisset, quod aliàs scripserat, illud esse reconditum in urbis illius clarissimæ Cathedrali. Quod apertissime convincitur gratis id à Ferrario dictum, cum in opere à se de Sanctis illis edito, quorum solemnitas in diem xv. Septembris incidunt, quoque D. Nicomedis anniversaria celebritas agitur, ejusdem quidem Sancti præclare gesta describat, at nullum omnino verbum habeat de loco, in quo sacræ illius exuviae sitæ sint. Atque hæc de Sanctorum Quirini & Nicomedis Martyrum translatione Roma Mediolanum fatis superque scripta sint.

Nunc quod ad S. ABUNDII corpus attinet, res hæc est densissimis profecto tenebris involuta. Siquidem, & illi cognominum multitudo, & varietas opinionum de Martyrii loco difficultatem hanc pene inexplicabilem reddunt. Utigitur ex his etiam salebris, uti poterimus, evadamus, dicere non veremur Abundium nostrum esse Diaconum illum, qui una cum Carpophoro Martyrii laurea coronatus Christianorum sacra profusi sanguinis sui testimonio comprobavit. Nec temere: nam in antiquo Missali Ambrosiano festi ejus diei memoria recolitur iv. Idus Decemb. quo ipso die nostro in Templo ex prisca Majorum consuetudine celebratur cum certa delictorum indulgentia à summo sacrorum Antistite pie Templum nostrum adeuntibus assignata. Quæ quidem à Mediolanensi Ecclesia non aliam ob causam fieri consueverunt, nisi ob cultum, quoad ejus fieri possit, maximum Sanctorum Reliquiis, aut corporibus, quæ sua in Urbe vel Diocesi servantur, impensius exhibendum. Cujus ergo Summi quoque Pontifices aliquid Apostolicæ indulgentiæ fidelibus impertiri solent, ut quod ævitate sacris Divorum artubus reliquum sibi fecit, majori mentis & animi religione prosequantur.

Cæterum nos Abundium (ut locum aperiamus Martyrii) non in Hispania apud Hispalim, sed in Umbria apud Spoletum, glorioso peracto pro Christi confessione certamine, palmam adeptum esse Martyrii minime dubitaverimus affirmandum. Castrum enim ad Fidardum (pagi nomen est Lauretanae Diocesis) à Spoletum passuum fere sexaginta milibus distans ad hæc usque tempora fulget Ædes D. Abundio sacra, in qua festum ejus diem anno vertente omnibus Christianæ pietatis officiis peragunt accolæ ex recenti decreto Sacrae Congregationis S. R. E. Cardinalium, qui ritibus Ecclesiasticis præsentantur iv. Idus Decembr. sibi que hanc ædem jure patronatus vindicant honestæ familiæ Gherardellorum, & tres aliæ ejusdem pagi. Quare non procul ab pago Sanctum Martyrio coronatum cum ædis illius sacræ antiquitas, in qua eodem plane die, quo apud nos Martyrii illius dies solemniter agitur: tum via Spoletum Romam versus compendiaris, facilis & perexpedita, si non liquido convincunt, saltem penitus persuadent. Facit hoc ipsum facilius, ut credamus, ejus Divi corpus primo Romæ depositum ad Catacumbas, (id quod fieri solitum primis illis Ecclesiæ temporibus nuper observavimus) indeque labentibus sæculis cum aliis duobus Sanctis Martyribus Mediolanum advectum, ut ipse quoque Mombritius censeret, patetque ex memorato supra vetustissimo Martyrologio Manu-

A scripto Monachorum D. Hier. quos de Observantia dicunt, cujus verba nobis idcirco duximus adducenda: *Idibus Decemb. &c. Beatus Abundius translatus fuit Mediolanum ad sanctum Vincentium, & cum sanctis Nicomede & Quirino conditus jacet altario.* Vetustiss. plane, si verba expendas, sed ea nobis fideliter recitanda fuerunt, ne quis hac in re fucum factum esse diceret veritati. Quid quod constanter nos id de Sancto Abundio quovis pignore contenderimus affirmare, non tam ob allatas hactenus rationes, quam ob unius illius pondus, quæ usus est Dominicus Amfossius J. C. in *Tract. de Sacris Reliquiis* §. 5. num. 19. ad demonstrandum B Sanctorum Corpora Luxorii, Cifellei, Camerini, Marci, Robustii, & Appiani Episcopi Papiam una fuisse translata cum corpore nobilissimi & sanctissimi Ecclesiæ Doctoris Augustini ex Sardinia Insula, quo prius delata fuerunt ab Episcopo Hipponensi, ibique sepulta, ob hanc, inquam, unam maxime rationem, quod simul conquiescerent in eodem loco, licet in *Epistola* Oldradi Mediolanensis Archiepiscopi ad Carolum Magnum Imperatorem missa, de Sancti Augustini translatione tantummodo mentio fiat, ut qui inter Sanctos reliquos emereret: ut ob id etiam minime mirandum sit, rerum nostrarum Scriptores, ac præsertim eos, qui de singulis Sanctis nostris Martyribus meminisse debebant, sigillatim eorum translationem litteris consignantes, suppressis aliquando duorum minorum Martyrum nominibus, Quirinum solummodo nominasse, quod is honore sacro insulæ decoratus princeps inter illos esse quodammodo desunt, ad id deveniendum est tandem, quod magis ad verisimilitudinem accedit, in hoc præcipue negotio Translationum, quod & Baronius fecit, qui ad afferendam veritatem tertiæ & ultimæ Translationis Sacrarum Reliquiarum B. Ignatii Martyris Episcopi Antiocheni Romam, sola contentus verisimilitudine conquievit, nihil se habere de ea compertum, aut exploratum ingenue libereque testatus. Cum igitur pari propemodum ratione B. Abundii membra non procul ab Urbe Roma pro Christi confessione cruciatibus acerbissimis exantlatis, primo ad Catacumbas, ad quas Divi quoque Nicomedis corpus translatus initio fuisse diximus, humata sunt, eodemque postmodum delata D. Quirini Reliquiæ, ac ob id uno omnes in loco conditi fuerint, ac sepulti: cur non etiam nos simul omnes hos Martyres Mediolanum advectos nostram in Basilicam fuisse vero proximiori ratione constantissime fateamur.

E Secundum sententiæ nostræ firmamentum est, tria Sanctorum nostrorum corpora alibi reposita fuisse, præterquam in nostro hoc D. Vincentii Templo, in quo ex communi hominum fama & constanti traditione coluntur, neque constare, nec legi, ut ea de re amentis pene sit, vel impii dubitare. Siquidem hujusce ratiocinandi genus in rebus morali methodo comprobandis multum habere ponderis & momenti Juris utriusque consultissimi Viri censent, Bald. *conf.* 265. & *conf.* 267. in princ. vol. 2. Ruin. *conf.* 50. n. 1. tit. si de feud. fuerit controvers. inter Dom. & Vassallum, per l. si arbit. ff. de probat. l. Antiqui natura. §. cum me absente. ff. de negot. gest. & l. inditum C. de rei vendicat. Natta *conf.* 235. n. 15. & sequent. vol. 2. Mascard. de probat. *conf.* 474. num. 10. Bart. Socin. *conf.* 89. n. 3. vol. 1. per c. Cum causam, de probat. Dec. *conf.* 109. n. 2. & Card. in Clem. 1. de probat. qui omnes illud unum, asserunt in laudatis locis, traditionem, famam, nec non etiam opinionem vulgi rei alicujus existentiam maxime perantiquæ, cujusmodi nostram esse nemo non videt, satis superque probatam, testatamque relinquere. Et quid aliud ingens mul-

tis ex locis hominum utriusque sexus, variis ex morbis laborantium concursus ad puteum juxta Sanctorum nostrorum Arcam positum in silentio loquitur, nisi verissimam esse famam sacrorum ibi conditorum artuum pervagatam? Ut enim ingenue fateamur, nescire nos originis ultimæ tempus, quo puteus hic frequentari cœperit ab ægrotis, ante-ne sanctorum Martyrum corpora Arcæ proximæ consignata, an postquam in ea condita, varia morborum genera profligare divinitus institerunt ab iis, quorum erga se præcipua pie-

tas elucebat. Factum id quidem ante, suspicari possumus ex subjicienda mox Inscriptione vetustissima, non procul ab hoc puteo nuper reperta, quæ tum ex Characteribus ipsis, tum ex prisca formula, sapere videtur antiquissimam antiquitatem, forte ob vim nescio quam admirabilem lymphis illis jam tum inditam, impertitamque cœlitus Agrytio, qui illam grati animi ergo posuerit, dedicaveritque: litteræ vero Inscriptionis hæc sunt:

F O N T I P E R E N I A G R Y T I V S D D O N V M P O S V I T

Atqui credere probabilius est divinitus vim fontis hujuscemodi communicari statim ac sacras Martyrum Reliquias proximam habuit, ut quemadmodum illi aquarum mersi vorticibus ad regna cœlestia protinus evolarunt, sic aquarum illarum haultu, ope sanctorum eorundem Martyrum accedente, quamplurimi variis morborum fluctibus agitati emergant inde protinus, & convalescant. Ut aperte non minus quam vere indicant carmina in putei ipsius commendationem, memoriam, & honorem conscripta, quæ idcirco subdimus non inviti.

In Aquas Putei ad Sepulchrum trium San-
ctorum nostrorum Martyrum,
quibus abiguntur morbi.

QUID juvat accensas undas extinguere flammæ,
Exstinctasque simul vivificare faces?
Quid juvat in lapides virgas mutare virentes,
Auditque undas tollere ad astra sono?
Quid juvat insanis amissam reddere mentem,
Quid juvat hanc sanis demere posse viris?
Munere Natura dona hæc data fontibus illis,
At febrim ægrotis pellere corporibus,
Expulsoque viris morbo dare posse salutem,
Munere caelesti perficit hic Puteus,
Qui scatet exultant sancti Nicomedis ad Arcam,
Qua sacras servat marmore Reliquias.

Nec mirum, cum etiam in Insula Chio in Basilica Sancti Isidori Martyris dicatur esse puteus, cujus aqua sæpius haulta sanitati pristinae restituantur ægroti, ut auctor est Gregorius Turon. de Gloria Martyrum cap. cii. & Cæsareæ in Cappadocia fons scatens ad locum, ubi B. Julitha vidua martyrium passa & sepulta est, qui instar lactis fluens mirum in modum ad se accedentes juvat; ejusque meminit non sine laudis præfatione S. Basilii in Oratione de ejusdem B. Julitha Martyrio. Fluit & fons alius Turoni in Gallia apud tumulum S. Martini, cujus solam vel guttulam vino mixtam vinum ipsum mirifice augere affirmat Gregorius idem Turon. in Historia Francorum lib. v. cap. xxi. Facit huc etiam fons ille alius apud Nicopolim Palæstinæ urbem, qui vim medendi morbis jamdudum est consecutus ex solo contactu pedum Apostolorum Christi Domini, teste Sozomene Historiarum lib. v. cap. xx. non aliter ac noster ille puteus ex proximis Sanctorum nostrorum pignoribus, uti paullo ante docebamur, aliique multi, de quibus passim Baron. in Annalibus. Quinimo flores, frondes, velamina, & aliâ ejusmodi

facris sepulchris admota, pulvis ipse, ac sepulchrorum situs ex fide D. Gregorii Magni *Dialogorum* lib. iii. cap. xvi. & Gregorii Nysseni in *Oratione de Laudibus Magni Theodosii*, vim innumera miracula perpetrandi consecuta sunt ob sacrorum ipsorum corporum attactum, vel propinquitatem, ut alii quoque literis prodidere. Quod igitur communis jam hominum usus, & fama in re nostra obtinuit, asserendum est etiam id ipsum à Majoribus nostris ad nostra usque tempora fidelissime pervenisse, licet nullis nunc ex publicis documentis ejus veritas constet. Et jure cum traditioni Ecclesiarum, tum maxime acquiescendum esse doceat Baronius in *Notis ad Martyrologium Roman.* Idib. Maji, cum acta Translationum de aliquibus SS. Martyribus non habentur. Quod si quis memor eorum, quæ supra attulimus ex Ferrario, contra nos insurgat, & objiciat alibi quoque mentionem fieri Sanctorum nostrorum, facili illi negotio occurremus, revocantes nominatim eum ad allata superius argumenta, nonnullasque rationes alias inferius adducendas, quibus diserte, ne libere concludamus Ferrarium ibi vel de Sanctis longe diversis à nostris agere, vel temere (quod ejus pace dixerimus) & absque ullo solido fundamento aliqua scriptitasse. Occurrimus eadem responsione iis, quibus vel scrupulum aliquem possent injicere, quæ de Sancto Abundio idem Ferrarius scripsit, ob hujuscemodi controversiarum exiguam habitam cognitionem. Is enim Abundius Martyr, & Diaconus, de quo Ferrarius, non Spoleti cum Carpophoro, sed Romæ cum Abundio Presbytero & aliis xxiii. ad fidem conversis capite damnatus est, non Idibus Decembris, ut noster, sed xvi. Kal. Octobris, idemque Gregorio XIII. Pont. Max. demolita æde Sanctorum Cosmæ & Damiani in postico reperiuntur, Pontificatus illius anno xi. & illustri celebritatis pompa, ac solemnibus supplicationum apparatu ad Basilicam Societatis Jesu translatus, ejusque sub Ara maxima honorifice collocatus, ut *Divi ipsius Vita* à Societate Jesu edita nos docet.

Unum dumtaxat, quod ab celebri Corrigiæ oppido nuper accepimus liberali opera & propensio in nos studio Julii Cæsaris Tirellii, Civis & Beneficarii Bononiensis, infirmare non mediocriter posset secundum hujus nostræ sententiæ firmamentum, nisi diligentiam pro eo fulciendo maximam adhibuissimus. Cum enim Mediolani Tirellius moraretur, gravioribus distentus negotiis Alphonsi Estensis Viri Principis fama, natalibus, & omnium virtutum splendore longe clarissimi,

*Quem si sancta pios respectant Numina, si quid
Usquam justitia est, & mens sibi conscia recti*

*Premia digna manent Virtuti debita tanta,
Premia , quæ nemo valeat numerare canendo
Cælicolæ sedes inter , quas tramite recto
Inde adiisse solo demissum , credere dignum est.*

per litteras rogavit Herculem Raperiam Rectorem Parœcialis Sancti Blasii ditionis Corrigiensis, ut quæcunque posset de Sancto Quirino, ejusque mortalibus exuviis cognoscere, eademque sibi summo studio perscribere niteretur. Dudum enim, ac sæpe perlatum ad nos fuerat sermone non dubio, vel obscuro, quinimo ex certa numismatum cælatura, Quirinum Martyrem, & Episcopum Corrigiensium Patronum, ac Divum Tutelarem esse. Quamobrem non levis nostrum subierat animum dubitatio, quidnam in causâ fuisset, ut eo in oppido Quirinus hisce nominibus coleretur. Sed enim hanc nobis dubitationem omnem penitus abstulit absolutum Tirellio responsum ab amico datum, ejusdemque scripta nobis opportune redita ab eodem. Intelleximus enim ex Raperiæ litteris, partem tantum aliquam cinerum ejus Sancti Corrigiæ reperiri, cujus ergo summa Corrigiensium omnium religione præ cæteris coleretur. Eos porro cineres una cum non parva segminum parte Sanctorum Tiburtii, & Hermetis Martyrum, Veronicæ pariter, ac Reparatae dono accepisse Conradum Corrigiæ Comitem sub annum DCCCXVIII. ab Gregorio IV. Romano Pontifice, acta in ejus oppidi Collegiata legi solita ante promulgationem Breviarii Romani, festo ipso die Sancti Quirini, quæ nos ipsi vidimus ad nos transmissa, aliquot etiam marmorum inibi existentium Inscriptiones, & Pontificia quædam diplomata clare, dilucidæque testantur. Quamobrem cum hinc tantum appareat S. Quirini Reliquias non Corpus Conrado Corrigiæ Comiti dono datas, suum adhuc robur obtinet secundum hujus nostræ sententiæ firmitatem. Adde, quod licet illud insuper fatemur, (quod jerit inficias nemo) partem hujus quoque Divi aliquam ab eodem Pontifice datam Corrigiæ tum Comiti, non inde tamen posset quis jure suo contendere, integrum Sancti Quirini corpus Corrigiam esse delatum, adversante sibi vel ipsa prisca summorum Pontificum consuetudine, qui in Sanctorum Reliquiis largiendis eum morem servabant, ut Fratribus Archiepiscopis tantum, Regibus bene de Ecclesia meritis, ac Imperatoribus ejusdem propugnatoribus (etsi nec semper) integra Sanctorum corpora largirentur: minoribus vero Principibus, aut Præsulibus rarissime, uti nos Eusebius distincte docuit in sua *Ecclesiastica Historia*, & Baron. Tom. II. & IV. *Annalium*, & in *Notis ad Romanum Martyrologium* passim. Accedit huc Innocentii II. Diploma plurimi faciendum, ex quo tantummodo liquet Corrigiensibus dono datam à Pontifice fuisse non modicam Sanctorum ibi nominatorum partem, quam paulo ante Reliquiarum nomine comprehendit. Reliquiarum autem nomine non integra corpora, sed particulas eorum tantum significari, ut sonat ipsummet Reliquiarum nomen, & Doctorum pleraque pars interpretatur: nemo est vel leviter imbutus his litteris, qui non intelligat ex usu communi loquendi, qui Sanctorum Corpora à Reliquiis discriminat ac distinguit. Cum igitur res hæc omnis Apostolicæ Bullæ verbis innitatur, eorum partem ad præfens negotium facientem subdemus hoc loco, ne quid à nobis amplius desiderari possit: *Innocentius Episcopus servus servorum Dei, Dilectis filiis Lenducio Preposito Collegiata Ecclesia Beate Mariæ Virginis, Sanctorumque Michaelis, & Quirini, suisque Canonicis, tam presentibus, quam futuris Canonice substituendis in perpetuum de Corrigia Rhegiensis Diocesis, apud Rhegium Civitatem olim in Emilia, nunc in Longobardis partibus. Vicum Sancti Michaelis*

lis, ubi nunc oppidum Corrigia, in quo constructam Basilicam sub vocabulo Sancti Michaelis, ingentibus & assiduis postulationibus quondam Conradi Comitis Corrigiæ, Sanctæ Romanæ Ecclesiæ filii, & defensoris perpetui, felicitis memoria Gregorium Quartum prædecessorem nostrum pro benemeritis, pro statu Sanctæ Romanæ Ecclesiæ, per dictum Comitem multipliciter impensis, ab eodem reparatam, magnisque donariis mirabiliter dotatam in Prepositura Dignitatem scimus erexisse sub titulo Beata Maria, Sanctorumque Michaelis & Quirini, ipsam dicti Comitis intuitu Reliquiis Sanctorum Martyrum Quirini, Tiburtii, Hermetis, Veronicæ, & Reparata pro non modica ipsorum SS. corporum parte illustrasse, Comitemque dictum in dicta Basilica eas honorifice collocasse, in ipsaque duodecim Canonicos, cum pluribus clericis, qui una cum Preposito die nocturne ad laudem omnipotentis Dei, Beata Maria, Sancti Michaelis, & Sanctorum Martyrum horas Canonicas decantarent, instituisse, &c. Dat. xv. Kal. Junii, Inditione tertia, Incarnationis Domini anno MCXL. Pontificatus vero Domini Innocentii Papa secundi anno II. cum sigillo plumbeo, & subscriptione 22. Cardinalium, &c.

En, ut perspicue ex recitatis hujus Diplomatis verbis habetur, non corpus Divi Quirini, sed ejusdem sicut & aliorum Sanctorum Tiburtii, Hermetis, Veronicæ, & Reparatæ Reliquias tantum Corrigiam illustrare. Quinimo si forte fortuna contingeret, ut in aliquibus scriptis, aut marmoribus Sancti alicujus nomen usurparetur, pro parte illius tantum, sive Reliquiis, maxime cum aliunde constat ejusdem Divi Reliquias alias alibi coli, ut in re nostra contigisse doccimus in decima ratione, figurata illa esse locutio putanda erit, quæ frequens est in vetustioribus quarundam Ecclesiarum lectionariis, in quibus sæpe totum pro parte capitur, monente id ipsum Ferrario in *Præfatione Catalogi Sanctorum Italia*, & ante eum Baronio *Annalium* Tom. I. anno LV. num. 15. cujus verba, quoniam valde ad rem præsentem facere videntur, hic subtexam: *Cum igitur eandem virtutem in exigua parte Reliquiarum Martyris, quæ in toto sit corpore, inesse, experimento ipse testatur: (loquitur hic de Gregorii Nazianzeni testimonio) inde evenit, ut corpus unius Martyris in plures interdum partes dividi solet, recondique in diversis altaribus, quæ sepulcra sunt Martyrum, ut auctoritate divina Scriptura constat: indeque fortasse accidit, ut cum unius ejusdemque Martyris diversis in locis Reliquia condita haberentur, & æque ac si integrum corpus ubique horum locorum conditum esset, eadem miracula sint operata, unius ejusdemque Martyris corpus diversis in locis haberi dicatur. Tolerabilis error, cui non hominum impostura, sed exuberans divina largitas præbuit occasionem: dum quod ob virtutis præstantiam diversis in locis sit unius ejusdemque Martyris erecta memoria, vel excitatum sepulchrum, (quod esse consuevit sacrum altare) quisque apud se corpus illius haberi est opinatus. Hæc ille. Ut ob id etiam minus reprehendendi sint, immo ex modo laudati Baronii sententia, excusandi Corrigienses, si forte eo loquendi more (quod pro certo non habemus) usi fuerint aliquando. Adhuc addimus, si caput Sancti Quirini nostra in Arca marmorea collocati à capitibus aliis Divorum Nicomedis & Abundii distinctum apparuit tunc temporis, quo jussu illustrissimi Federici Cardinalis & Archiepiscopi, nobis & aliis Viris pluribus Ecclesiasticis fide, nomine, & dignitate clarissimis adstantibus, & aperte recognoscantibus ossa permulta, triaque diversa capita perspicue discernentibus, referata fuit: vel hinc constare liquido poterit præcipuam hujus sancti corporis partem haud esse Corrigiæ, sed in Vincetiana Basilica reperiri, hocque tanto erit certius, quanto magis à recepto jam pridem Ecclesiarum usu abhorret, brachia thecis argenteis includi, Christi-*

stique sectatoribus in Aris sacris intuenda proponi, cum ossa capitis adsunt, quod isto aptari modo præcipue consuevit. Quod quia notum est omnibus, ac perspectum fieri Romæ, Mediolani, aliisque primis in Urbibus Italiæ ex solemniritu, neque oratione nostra, neque maioribus indiget firmamentis.

Neque vero ob ea, quæ literis mandare recens aggressi sumus hoc capite, quidquam detractum in honori ac cultui delato jam pridem sepulchro Nostorum Martyrum arbitramur: quemadmodum neque minores ad limina Beatissimorum Apostolorum Petri & Pauli populorum concursus facti sunt, nec pristinus illorum imminutus est cultus, licet Sanctissimus Urbis nostræ Patronus Ambrosius aliquas horum Apostolorum Reliquias in Basilica à se Mediolani in honorem eorundem Sanctorum constructa perhonorifice collocarit: quibus B. Simplicianus Divi tum Ambrosii Archidiaconus, cum dissidentes inter se Romanos causâ Religionis ad concordiam suavi quadam eloquentia reduxisset, à Sancta sede donatus fuerat, Mediolanumque eas transtulerat. Quarum delationem divo Pastori divinitus significatam, ac peculiare ejus ceremonias, scire qui pluribus ac distinctius velit, consulat exemplar vetustissimi ea de re Manuscripti, quod in Archivis ejusdem Basilicæ reperitur: & Desiderius Longobardorum Rex, teste Galvano, B. Petri dextera, & concreto Coepostoli ejus Pauli cruore eum in modum, quo à recisa morientis gentium Doctoris cervice profluxit, dono sibi ab Adriano Pontifice missio, Clivatesem Basilicam in Agro Mediolanensi, ex Aldehisi filii voto, à se constructam cohonestavit amplissime. Aliæque demum Ecclesiæ Sacrosanctis eorundem Apostolorum segminibus gloriantur. Quinimo sicut partium honos ad totum, & artuum singulorum pertingit ad caput, ita D. Quirini corporis cultus, ac reverentia, quæ apud nos maxime viget, ex honore, quo duo brachii illius ossa Corrigienses afficere voluerunt, thecis eadem argenteis includentes, ex dicato Divo ipsi Collegiato Templo, ejusdemque in Divum Patronum Oppidi adoratione, magis, magisque illustrabitur, & accrescet in dies.

Lubet, ut hoc facilius fiat, succedatque felicius, rem hic admiratione dignissimam, quæ anno MDLXXXIII. in Oppido ipso Corrigiæ contigit, narrare paucis, & aliquam apud divini cultus amantes gratiam promereri. Nefarii quandoque fures nocte nescio qua intempesta clam in ipsa Corrigiensis Ecclesiæ adyta penetrarunt, in quibus pretiosæ vestes, argentea vasa, omnisque sacræ ædis supellex reliqua continebatur. Erat inter has opes argenteum brachium magnitudinis non vulgaris, neque vulgaris pretii annulis exornatum, in quo ossa illa gemina brachii S. Quirini Martyris, omni alia gaza pretiosiora, composita delitescabant. Accingunt itaque se nefario operi perditii homines ac profligati, præclaram se nactos occasionem rati, lustrant, rimantur, depopulantur omnia, ac cætera quidem omnia furati, uno excepto brachio Martyris, abeunt triumphantes. Verum enim vero, ut sacrilegos divini semper Numinis ira persequitur, donec admissi sceleris poenas luant, à satellitibus comprehensi in custodiam Corrigiam pertrahuntur. Habentur illico de admissis ab illis criminibus quæstiones, nec mora, cuncta detegunt, seque inter alia, quæ nefarie & impie perpetrarant, sacras argenteas thecas Adyti Collegiatæ Corrigiensis nescio qua nocte expilasse libere confitentur. Cumque percunctarentur Judices quæstionis, quam ob causam reliqua potiti præda argenteum S. Quirini brachium non abstulissent; Responderunt illi, se re vera semel, iterum, ac sæpius id ten-

A tasse, sed quoties D. Martyris illius ossa ab theca extrahere conabantur, ut eadem ibi relinquerent cum Martyrum aliorum Reliquiis, quas nullo fere negotio argenteis suis ex arcubus extraxerant prius, tanto se toties artuum tremore correptos obriguisset, ut vix stare, nedum S. Martyris ossa loco suo movere possent: eadem fere in Criminalibus (ut ajunt) Corrigiæ Actis illius anni continentur, & in Incolarum omnium ore versantur. Fures vero sacrilegi criminis rei laqueo mulctati, eorumque cadavera in partes secta, extra Oppidi mœnia è regione Templi D. Rochi sacri in antiquis patibulis appensa sunt. Mira sane res ista, & animadversione digna, ut quæ S. Quirini gloriam augeat, cujus ergo hic illam adscribere visum est, non ossibus illius tantum, sed ipsomet argenteo illorum brachio à sacrilegis impiorum manibus vindicato, & antiquam miraculorum ejusdem (quorum multa supra naturæ vim, atque ordinem divina vi suffragante edidit, tum in Pannonia, tum in Basilica Scarabatenfi quandiu in ea jacuit, ac tum demum Romæ positus in Catacumbis, ut ejus manuscripta Acta testantur) famam alat, nutriet, & confirmet. Ut non immerito hic acclamare possim Sanctissimi Quirini honori ac immortalitati:

C *Cetera quid fando miracula mille retexam?
Sive tuis olim precibus, dum vita maneret,
Seu mundi evecto te post melioris ad arces,
Qua patrata fuere, hodieque stupenda patrantur:
Signatis equidem tabulis, & testibus illa
In luce, inque oculis hominum versantur, & ore.
Hæc omnis templi paries, postesque sacrati,
Undique picturis fulgentes, undique signis,
Quæ suspensa tholo, variis è partibus Orbis
Votorum posuere rei, donaria monstrant.*

Nec erit hic à proposito alienum, undenam mos Tabellarum hujuscemodi Divorum Templis & Tumulis affigendi ad nos usque devenerit, paulo altius investigare negotio sane perfacili & expedito: Andreas enim Alciatus in opusculo de D. Eustorgii Templo, de sepulchro D. Petri Martyris scribens, narrat nostros consuetudinem hanc ab antiquis Gentilibus accepisse. Nec falsus est Alciatus; existant enim hæc de re Scriptorum gravissimorum apertissima testimonia, quæ nullum relinquant dubitationi locum. Tullii lib. III. de Natura Deorum: Nonne animadvertis ex tot tabellis pictis, quam multi votis vim tempestatis effugerint, in portu salutisque pervenerint? Et ad Attic. lib. IV. epist. XII. Hæc enim me una ex hoc naufragio tabella delectat. Nasonis, ut mendose habet Alciati codex, sed Tibulli, ut nos infra emendate reposuimus:

E *— nam te quoque posse mederi
Picta docet Templis multa tabella tuis.*
Horatii lib. I. ode V.

*— me tabula sacer
Votiva paries indicat uvula
Suspendisse potenti
Vestimenta maris Deo.*

Et satyr. I. lib. II.

*— quo fit, ut omnis
Votiva pateat veluti descripta tabella,
Vita senis.*

F Virgil. lib. XII. Aneid.

*Forte sacer Fauno foliis oleaster amaris
Hic steterat, nautis olim venerabile lignum:
Servati ex undis ubi figere dona solebant
Laurenti Divo, & votas suspendere vestes.*

Ibi enim dona Tabellæ sunt, & vota vestes, non nota, ut vulgo legitur, quæ uvula vestimenta Principi Lyricorum. Tibulli el. III. lib. I.

*Nunc Dea, nunc succurre mihi; nam posse mederi
Picta docet templis multa tabella tuis.*

Virgilii iterum in Catalectis :

*Non ego thure modo, aut picta tua templa Tabella
Ornabo, & puris erta feram manibus.*

Solebant enim prisci tam Romani quam Græci aliquo ingenti periculo, metu, vel labore pressi vota Diis suis Præsidibus nuncupare, quæ postmodum periculo illo, metu, vel labore defuncti dissolvere dicebantur, cum in eorum templis, vel alibi Tabulas votivas hujusmodi suspendebant, quo scilicet exstaret aliquod insigne, tum suarum miseriarum, tum grati erga servatores Deos animi monumentum, quod etiam Turnebum observasse video lib. vi. *Adversariorum* cap. ix. Pari de causa Gladiatores arma Herculi, Duces, ac milites consecrabant. De Gladiatoribus Horatius lib. i. epist. i.

————— *Vejanius armis*

*Herculis ad postem fixis, latet abditus agro,
Ne populum extrema toties exoret arena.*

De Ducibus Virgilius i. *Æn.* vers. 246.

*Antenor potuit mediis elapsus Achivis
Illyricos penetrare sinus, atque intima tutus
Regna Liburnorum, & fontem superare Timavi:
Unde per ora novem vasto cum murmure montis
It mare præruptum, & pelago premit arva sonanti.
Hic tamen ille urbem Patavi, sedesque locavit
Teucorum, & genti nomen dedit, armaque fixit
Troja; nunc placida compostus pace quiescit.*

De militibus Ovid. lib. iv. *Trist.* eleg. viii.

*Miles ut emeritis non est satis utilis armis
Ponit ad antiquos qua tulit arma Lares.*

Statius ii. *Thebaid.*

————— *figamque superbis*

*Arma tholis, quaque ipse meo quasita revexi
Sanguine, quaque dabis captis Tritonia Thebis.*

Pugiles etiam id præstabant. Virgilius de Entello *Æneid.* v.

————— *Hic victor castus, artemque repono.*

Pueri quoque virilem togam sumpturi bullas Penatibus dabant. Persius sat. v.

*Cum primum pavido custos mihi purpura cecit,
Bullaque succinctis Laribus donata pependit.*

Servi catenas iisdem, & annulos ferreos Saturno.

De catenis Horatius sat. v. lib. i.

————— *donasset jam ne catenam*

Ex voto Laribus quarebat.

De annulis Martialis, lib. iii. epigr. xxix.

*Has cum gemina compede dederat * catenas,
Saturne, tibi Zoilus priores.*

Innuptæ nupturis pilas cum puppis, & strophilis Veneri. Varro *Sesquiulysse*, *Suspendit Veneri marinas pilas, reticula, ac strophila.* Omnes denique omnis ordinis & ætatis homines arma professionis suæ, præsertim cum illis feliciter usi fuissent, in Templis collocabant eorum Numinum, quibus tamquam artis suæ tutoribus, Præsidibus, & adiutoribus, victoriæ acceptam referebant felicitatem suam. Horatius de sua barbita ode xxvi. lib. iii.

*Vixi puellis nuper idoneus,
Et militavi non sine gloria:
Nunc arma, defunctumque bello
Barbiton hic paries habebit.*

De Venatoribus Virgilius lib. ix. *Æneid.*

*Tu dea, tu præsens nostro succurre labori,
Astrorum decus, & nemorum Latonia custos,
Si qua tuis unquam pro me pater Hyrtacus aris
Dona tulit, si qua ipse meis venatibus auxi,
Suspendive tholo, aut sacra ad fastigia fixi.*

Et Egloga vii.

*Setosi caput hoc apri tibi Delia parvus,
Et ramosa Mycon vivacis cornua cervi.*

De Pastoribus idem ibidem:

Hic arguta sacra pendeat fistula pinu.

Sic Tibullus lib. ii. elegia v.

* Alii, *dedicat.*

A *Pendebatque vagi pastoris in arbore votum,
Garrula sylvestri fistula sacra Deo.*

Sic Timon dives repente factus apud Lucianum Pani ligonem & sagum suspendit; sic Sappho in *Heroidibus* Ovidii Phœbo Lyram dedicat. Sic Propertius lib. iii. eleg. xiv.

Magna ego dona tua figam Cytherea columna.

Sic tandem Laïs speculum Veneri in Græcorum Epigrammatum *Florilegio* lib. vi. aliique inibi cujuscunque artis ac disciplinæ, cui mori quid tam simile, quam id, quod passim nostris videmus in templis, ubi Tabellæ, enses, scuta, galeæ, signa suspensa, quorum occasione à proposito digressi, hæc pauca de more piorum Christi fidelium à Gentilibus priscis accepto, Operi nostro inferre placuit, veluti flores peregrinos nostratibus venustiores & lectiores, Fasciculo domesticorum & communium Prati flosculorum.

Non hinc igitur (ut jam ad miraculorum gloriam Divi nostri, unde digressi sumus, revertamur) primævi sui cultus jacturam ullam patietur S. Quirini corpus apud nos existens, sed majus in dies singulos capiet incrementum, cum non apud nos tantum, sed apud alias etiam nationes ejus ossa vel pauca, miraculorum gloria fulgeant, & coruscent. Gradum ob id ad alia faciamus, & tertium causæ nostræ firmamentum in medium afferamus.

Neque vero id alte admodum petendum, nec procul: nam in vetustissimo Missalis Calendario Mediolani edito an. à Christo nato mccccclxxxii. habentur in ipso die festo trium nostrorum Martyrum, SOLEMNITAS AD S. VINCENTIUM IN PRATO, & in margine Missalis alterius antiquitatis ejusdem, & notæ, quod adhuc in dicti Templi facello summo studio conservatur, manuscripta hæc verba leguntur, HORVM CORPORA SVNT IN SCVROLO S. VINCENTII IN PRATO. Quemadmodum igitur notæ illæ primæ apponi consuevere in Calendariis non nisi ad festos Sanctorum illorum dies, quorum corpora in sacris aliquibus Aedibus re vera obdormiunt & quiescunt, ita putandum est non frustra fuisse notas illas alias manu ad oram Missalis antiquissimi scriptas. Nec mirum hic à nobis manu exaratam scriptionem firmamenti loco produci ad Sanctorum Corpora nostræ Basilicæ vindicanda, cum observaverimus non semel eruditissimum & illustrissimum Sacrorum Annalium Scriptorem hoc ipsum sæpissime factitasse, ac præsertim in *Annotat. ad Martyrologium* pridie Non. Decemb. litera H. vii. Idus Julii lit. B. v. Idus ejusdem mensis lit. C. v. Kal. Decemb. xii. Kal. Novembr. & alibi passim. Verba sane illa AD S. VINCENTIUM IN PRATO, quæ in perantiquo Missalis Codicis Calendario legi diximus, & nunc etiam novis Ambrosianis nostris Diariis quotannis apponi solent ad Dies horum Sanctorum festos, mirum in modum nostram hanc assertionem firmant.

Prodeat jam è tenebris Pontificium Diploma Innocentii Pontificis Maximi, quod in hoc ipso Templo Sanctorum nostrorum corpora quiescere plane convincit: Innocentius Episcopus servus servorum Dei, &c. Dilectis filiis Abbati, & Conventui Monasterii S. Vincentii Mediolanen. ordinis sancti Benedicti salutem & Apostolicam benedictionem. Licet is de cujus unitate venit, ut sibi à fidelibus suis digne & laudabiliter serviat de abundantia pietatis suæ, quæ merita supplicum excedit, & vota bene servientibus multo majora retribuat, quam valeant promereri: nihilominus tamen desiderantes Domino reddere populum acceptabilem, fideles Christi ad complacendum, & quasi quibusdam illectivis muneribus, Indulgentiis scilicet, & remissionibus invitamus, ut exinde reddantur divina gratia aptiores. Cum igitur, sicut asseritis, in vestro Monasterio, quod in honore Assumptionis B. Virginis Ma-

ria, & B. Vincentii est constructum, Sanctorum Quirini, Nicomedis, & Abundii Martyrum corpora requiescant. Nos cupientes illud congruis honoribus frequentari, omnibus vere poenitentibus & confessis, qui Monasterium ipsum in festiuitatibus Sanctorum ipsorum, & usque ad Octavas eorum venerabiliter visitaverint, annuatim de Omnipotentis Dei misericordia & BB. Petri & Pauli Apostolorum, cujus auctoritate confisi, quadraginta annos de iniuncta sibi poenitentia, misericorditer relaxamus. Data Roma, &c.

Has ego Pontificias literas illas esse arbitror, quas se vidisse testatur Galestinus in Martyrologio suo, ita ut de illarum veritate nullus esse possit reliquus suspicioni locus. Quinimo illud quoque verissimum putandum est, Summo Pontifici plane, probeque compertum ac probatum fuisse, Sanctorum nostrorum corpora nostra in Basilica reperiri, antequam Monachorum petitioni satisfaceret, ne qua illi posset in re gravissima nota levitatis inuri. Sed aliud Apostolicæ Indulgentiæ donum in sacris Sanctorum eorundem Martyrum diebus felicitis recordationis Clemens Papa VIII. eidem Ecclesiæ concessit annuens precibus amplissimi S. R. E. Cardinalis Simonis de Terra nova, tituli sancti Hieronymi Illyricorum tunc Abbatis, & perpetui Commendatarii sancti Vincentii. Quod amplissimum novissime reddidit Paulus Papa Quintus, & libenter ac liberaliter admodum indulgit illustrissimo & reverendissimo DD. Carolo Caraffæ supra laudati Cardinalis optimo successori, & omnibus numeris absoluto Episcopo Aversano, cujus auspiciis non tam Templum ipsum in amplio-rem & augustiorem formam restitutum, quam Abbatiae bona omnia ejus fidei commendata, aucta & locupletata sunt. At quoniam Caraffei sanguinis est digna laude præstare malle, quam laudari, & impares huic provinciæ, vel disertissimi quilibet Oratorum & Historicorum forent, nostrarum virum consilii, quod agendum suscepimus, peragamus.

Declarant igitur hoc ipso in templo Sanctorum Martyrum Corpora reperiri picturæ illorum aliquot perantiquæ, tribus in ipsiusmet Templi locis, ut prisca ferebant tempora, delineatæ cum lemmatibus, in quibus de illis mentio fit non obscura. Siquidem in ipsa fronte Januæ majoris una harum imaginum visitur vocibus his adscriptis :

SANCTORVM MARTYRVVM QVIRINI
EPISCOPI NICOMEDIS PRESBY-
TERI ABVNDII DIACONI IN ALTA-
RI SVBTERRANEO HVIVS ÆDIS
SACRÆ CORPORA REQUIESCUNT.

Altera juxta sepulchrum ipsorum Martyrum in hæc verba :

Hic requiescunt corpora SS. Marty-
rum Quirini Episcopi, Nico-
medis Presbyteri, & A-
bundii Diaconi.

Tertia longe cæteris antiquior in interiore pariete, qui inter utramque Templi Januam intercedit, ut quæ videtur eodem omnino tempore delineata coloribus, quo ducta stylo fuit Inscriptio illa vetustissima, quæ se videndam objicit in marmore extra Templi fores posito An. Incarnationis Dominicæ MCCCCLXXXIX. Ac licet hujus Imaginis Inscriptio vetustate perierit, Martyrum tamen nostrorum imaginem illam esse clare confirmant tria illic expressa corpora, unum Episcopi, alterum Sacerdotis, tertium Diaconi, quæ non solum semet suis in oculis intuenda ponunt, sed etiam à

A Monacho nescio quo, vel Anachoreta sene, tribus inibi depictis Regibus digito commonstrantur, quos quidem Reges, visum est cuidam haud inrudito viro, è Longobardorum Principibus fuisse, Italiam ea tempestate Regio dominatu tenentibus, quorum tum summa erga Sanctorum Reliquias ferebatur esse religio, si credimus Paulo Diacono, Carolo Sigonio in *de Longobardorum gestis*, Rodobaldo Ticinensi Episcopo in *Chronicis* editis anno salutis humanæ MCCVI. & Jacobo Gual-
læ in *Sanctuario*, viris utique summa fide & auctoritate dignis. Omnes enim hi uno ore testatum posteris reliquerunt, Longobardorum Reges, qui prius veluti belli fulmina universam Italiam imperio suo subdiderant, ob suam in Regnorum suorum sedes amoris ingentem flammam, Reliquias illas omnes, quas Summi Pontifices & Christiani Imperatores ex universo terrarum Orbe collectas, summo studio Romam detulerant; eorum etiam, quos Romæ gloriosi Martyrii laurea primis illis Ecclesiæ Catholicæ sæculis coronatos acceperant, quorum in numero Quirinum fuisse monuimus ex Pannonia delatum Romam, Nicomedem in ipsamet Urbe passum, Abundium apud Spoletum dire pro Christi confessione supplicii casum, Romamque pariter asportatum : Roma Mediolanum, Ravennam, & Papiam præcipuas imperii sui sedes, quo primum potuere tempore, detulisse, Basilicasque præcipuas, & sacella ab eisdem exstructa, magnoque prædiorum dotata reditu, divinis hujusmodi pignoribus decorasse.

Patebunt ista planius laudatos Historicos pervolventi, aut certe memoratas Longobardorum sedes mecum hic animo perlustranti. Nam Papiæ, quæ diuturnior eorum Regum sedes fuisse dicitur, visuntur adhuc permulta, eademque præclara, Longobardorum Regum monumenta pietatis erga Deum & Coelites, quorum primum est sacrum D. Joanni Templum in Burgo Italice nuncupatum, quod Rotharius Longobardorum Rex VII. condidit, tot opibus, ac tantis Divorum illustrium ossibus cumulavit, ut merito olim per se inclytum, nunc demum universo Orbi notissimum factum sit ob furtivam & clandestinam Sanctorum corporum Jobi, Thobiæ, & Thobioli subreptionem, quæ universum Ticinensem Populum maximopere commovit, & ingenti dolore perculsit. Templum quoque D. Petri in Cælo Aureo constructum fuisse legimus à Luitprando, qui præter ingentes divitias ei dono traditas, & augustissimum D. Augustini Episcopi, & Ecclesiæ Sacrosanctæ Doctoris corpus eo transferendum curavit laboribus & sumptibus vere maximis, una cum aliis superius recensitis corporibus Patriarcharum. Est & inibi sedes alia D. Marino ab Aistulpho condita, dicata, & xx. Sanctorum corporibus decorata. Fanum item D. Michaelis opus est à singulari Longobardorum Regum pietate profectum, in eoque SS. Episcopi Aenodius & Eleucadius perhonorifice conquiscent. Aedes etiam, quæ Sanctæ Agathæ cultui assignata est, Partharim Regem Parentem suum & Patronum agnoscit, à quo & SS. Primi & Feliciani corporibus illustrata. Divi sane Ambrosii templum à Grimoaldo : Servatoris, in quo & D. Felicis Reliquiæ, ab Ariperto : S. Mariæ ad Catias à Rachisio inibi cum S. Epiphania tumulto : D. Joannis Donarum, ut vocant, ubi S. Blasius cum septem Mulieribus Martyribus pie colitur, à Godimberga celeberrimæ Reginæ Theodolindæ F. & Regina (ut interim omittamus alia, quæ pietatis suæ illustria monumenta apud Ravennam, & alias Italiæ Civitates procul à nobis distantes, Longobardorum Reges ad omnem posteritatis memoriam reliquerunt) ex eodem omnino fonte manarunt. Sed quorsum externorum

exemplis utimur, cum proximis ac fere domesticis abundemus? Tria sane ad hanc usque diem præcipua Dioecesis Mediolanensis templa Regum illorum liberalitatem, munificentiam, & pietatem egregiam loquuntur, & loquentur tamdiu, quamdiu pietas in animis mortalium inhærebit, nimirum Christi Domini Præcursoris Templum à Theodolinda, summæ probitatis & integritatis fama toto terrarum Orbe conspicua, regio plane sumptu Modetiae conditum, ditissimis auri, argenti que ponderibus locupletatum, sacris Divorum exuviis illustratum; Monasterium S. Petri Clivatenfis ab Aldechisio Desiderii F. exstructum, ditatum, & Sanctorum Apostolorum Petri & Pauli, & aliorum Divorum Reliquiis egregie cohonestatum, Divi tandem Vincentii nostri Cœnobium, quod Mediolani ad Ticinensem Portam fundasse Desiderium Longobardorum Regem sæpe laudatus Galvaneus, & alii permulti Chronographi veteres prodidere.

Ex hac igitur altius fortasse, quam par videretur esse, at non frustra penitus, repetita pia ac liberali Longobardorum Regum in sacras Divorum ædes ab iisdem conditas, munificentia, adductus est facile vir eruditus ille, cujus paullo ante meminimus, ut Reges illos, quibus in Icone tertia Sanctorum nostrorum corpora commonstrantur, Longobardos fuisse diceret, BERNARDVM scilicet, ALDECHISVM, & GHISLAM, ejus Desiderii filios, quem Roma Mediolanum tres ipsos Sanctos Martyres transtulisse opinatus idem aliquandiu fuerat, eadem ex conjectura liberalitatis & pietatis, qua erga Deum & Cœlites alii Longobardorum Reges mirifice nituere; & sane videbatur hoc illi minus à veritatis tramite aberrare, quo certius ex historiarum monumentis patet, Desiderium à gravi Saracenorum obsidione Romam, Hadrianumque Summum sacrorum Antistitem liberasse, maxima de eis Victoria reportata. Is enim captis viginti duobus Regibus Saracenorum, reliquas innumerabiles copias fugavit, disjecit, ac omnes eventu felicissimo pene delevit. Ob quam adeo insignem victoriam, adeoque præstans servati ac liberati Pontificis beneficium, cum præter triumphum & perpetuam gloriam, quam è præstanti facinore sibi ipse pepererat Longobardorum Rex, admirabiles etiam Indulgentiarum & amplissimarum gratiarum thesauros, multasque sacras Reliquias à Pontifice beneficii in se, atque adeo in Christianam universam Rempubicam, collati memore, dono consecutus esset, earum in numero nostrorum quoque Martyrum Reliquias fuisse, haud improbabile videbatur Amico illi nostro, & antiquitatis indagandæ studio Viro. Nobis autem idipsum ille facillime persuasisset, nisi temporum ipsorum ratio obtaret, & ratiocinationem ejus everteret, ac improbaret. Nimirum nos ipsi supra Translationis ejus, qua Sancti nostri Martyres ad nos Roma delati sunt, auctorem præcipuum fecimus Heribertum Archiepiscopum Mediolanensem ex mente gravissimorum hominum, quibus non sine gravi piaculo possumus adversari, cum præsertim nuper idipsum legerimus in vetustissimo Codice M. S. Joannis de Monte Mediolanensis Sacerdotis, quem quidem non secus ac Gryphes aurum in Riphæis montibus cum avita hæreditate nobilissimi Fratres Vicecomites Sexti Kalendarum Comitès servant. Siquidem in eo sic habetur pag. 139. *Heribertus Archiepiscopus subjectionem Monasterii S. Vincentii, quod se exemptum dicebat, à Papa obtinuit, in cujus rei testimonium, Papa corpora Sanctorum Martyrum Quirini, Nicomedis, & Abundii eidem Archiepiscopo donavit.* At Heribertus vixit anno centesimo quadragesimo supra millesimum, coque amplius; Desiderius vero, & tres ejus filii multo ante regna-

runt, anno scilicet septingentesimo octuagesimo, ita ut nullo modo potuerint Regii illi Juvenes Sanctorum nostrorum corpora quatuor post sæcula delata Mediolanum, sua illic tempestate vidisse. Nec alios sibi potest Amicus noster Longobardorum Reges fingere, post Desiderium & filios, quibus Translationem hanc referat in acceptum, cum postremum totius Flaviae Gentis Regem Desiderium existisse sciamus. Eam ob causam, & Amici nostri conjecturam improbare, & Viros illos sepulcro Sanctorum Martyrum assidentes alios omnino fuisse à Longobardis, opinari cogimur, eorum, inquam, è numero, qui vel Heriberti temporibus, vel annis non multo post proximis imperarunt. Possemus eosdem suis etiam nominibus, freti conjecturis haud inanibus, appellare. Sed quoniam haberi hac in parte nolumus conjectores, Lectorum id omne captui permittimus indagandum.

Ad ipsas igitur Sanctorum Imagines redeuntēs contendimus, ex iis satis superque probari Sanctorum illorum existentiam, in D. Vincentii Templo. Nam illud in confessio est apud Jurisconsultos omnes, ea, quæ sunt difficilis probationis, aut de quorum auctoritate ob temporum antiquitatem, aut Scriptorum incuriam plane non constat, satis idonee probari ex tabulis, picturis, & signis aliis ejusmodi, muris adnexis, ut omnium optime vidit & docuit S. R. E. Cardinalis Baronius Tom. vii. *Annalium* Ann. dxxxiv. Num. xiii. vers. Hispania in loco ubi dicitur *Alcala del Rio*, ex picturis in parietibus depictis, Tom. ix. An. dcccxiv. Num. ii. vers. Apud quod, Tom. x. An. m. Num. viii. vers. Porro coegit, & Tom. xi. An. mclii. Num. ii. vers. Nos ergo, ubi disertissime tradit, summum Pontificem ad confirmandam existentiam Sanctorum corporum sculpturis & picturis, tanquam certissimis veritatis indicibus & argumentis solidissimis usum. Quod si de sculpturis & picturis omnibus affirmare licet, quanto id firmius asseremus de picturis illis, quæ cæteris antiquitate præstant, qualis est sine dubio nostra posterior, cum Deci. Conf. 199. Num. v. Afflic. decis. 305. Num. xiii. Rol. à Val. Conf. 99. Num. xxiv. Vol. 2. Mascar. de probat. concl. 108. in princ. Fel. in c. ex parte il primo sub Num. XLIX. de Rescript. Baron. Tom. ii. Ann. cclxx. Num. xv. vers. Sed plane, fol. 448. & in *Notis ad Martyrologium* iv. Idus Februarii, vers. Zotici. Magnam ob id certe Cicero de Amicitia, Magnam inquit esse vim vetustatis. Et in libris de Oratore scriptum id ipsum reliquerit in hæc verba: *Habet autem, ut in ætatibus auctoritatem senectus, sic in exemplis antiquitas: quæ quidem apud me ipsum valet plurimum: quæ in libris quoque de Legibus exaravit.* Ob id vero maxime picturæ publicæ, ac in primis illæ, quæ in Aedium sacrarum parietibus sunt expressæ, veræ censentur: soletque non dubitanter Ecclesia ex iis certissimam elicere veritatem, quod juxta Sanctæ Matris Ecclesiæ ritum jam inde à primis Christianæ religionis temporibus receptum, & in Concilio Tridentino nuperrime laudatum, approbatum, & restitutum, nullibi novæ pingi imagines possunt, nisi prius id Episcopo constiterit, ab eoque pingendi facultas fuerit impetrata. Hinc Alphonsus à Villega Hispanus in novo, ut appellant, *Legendario Sanctorum* in Præfatione Vitæ S. Christophori Martyris, maximam picturæ tribuit auctoritatem ad ea comprobanda, quæ nullis Chronicis, nulla alia authentica scriptura, nullove auctoris classici testimonio definiri possunt. Quod ante ipsum Baronius observaverat ad *Martyrologium Romanum* vi. Kal. Junii, Tom. iii. *Annalium* An. cccxii. Num. xxvi. vers. Porro ipsa Labari forma, & Tom. viii. Anno dclv. Num. xxxix. vers. Quod vero alias venerandas imagines,

gines, & Anno DCXXVII. Num. XXIX. vers. Carinus scripturis.

Nec mirum à sapientibus ac peritis tanti fieri Sanctorum ac aliorum imagines, cum ipsimet imperiti tantum eis tribuant, quantum libris ipsis: habent enim isti imagines librorum loco, à quibus eorum veritas apertius declaratur, quæ de Sanctis dicuntur, ab Ecclesiæ credenda fidelibus proponuntur. Quis hic igitur existimare audeat, aut Vincentiani Templi, pariter atque Cœnobii Moderatores primos, aut vigilantissimos Archiepiscopos Mediolanenses pati voluisse, tres illas Sanctorum imagines sacris in Templi nostri parietibus cum appositis lemmatibus pingi, aut ante se pictas, suis illic temporibus fartas tectasque servari, nisi intra parietum illorum limites sacra eorundem corpora servarentur? Quod quidem si se aliter habuisset, Populum ipsum tantis auctoribus deceptum fateri necesse esset, eoque deceptum magis, quo in ipsius conspectu imagines ipsæ apertius stabant ex sententia Castrensis. in *l. Si sepulchrum* Num. 6. *C. de relig. & sumpt. funerum*, Specul. de probat. vers. *Videndum restat*, Num. 12. vers. 9. Bal. conf. 310. A patronatus Vol. 5. Dec. conf. 135. Alb. conf. 64. Num. 27. Quo etiam faciunt Bar. in *l. 1. ff. si certum pet.* Felin. in *c. inter dilectos col. 8.* & ibi Abb. de probat. Mascard. de probat. dicta concl. 108. Num. 1. Menoch. de præsumpt. lib. VI. præsumpt. 37. Num. 7. Ut ob id jure ac merito Galesinus summam semper fidem habuerit ultimæ, hoc est, vetustiori nostræ imagini, ut ipsemet in *Martyrologii sui Notis* scriptum reliquit.

Accedit his firmamentum sextum. In Archiepiscopalium Visitationum Actis, recognita sæpe corpora Sanctorum nostrorum fuisse, & approbata, ut ex *Sanctuario Pauli Morrigii* constat. Quantum autem ponderis ac momenti habeant Acta Visitationum, quemadmodum & scripturæ publicis in pluteis asservatæ ad probandam existentiam Sanctorum corporum, videre est apud Jurisperitos, Decium in *l. 1. ff. si cer. petat.* Num. 21. ubi probat generaliter ab iis in judicio plenam fieri fidem: jure id omni testante. Tex. in *c. Ad audientiam extr. de præscript. l. Censur*, & ibi Glos. ff. de probat. auct. ad hac *C. de fide instrum. glos. c. Peruenit.* vers. Archivii. 30. q. 1. Corn. conf. 333. num. 7. vol. 1. de probat. & D. P. Anton. Lazar. in aureis addit. ad Compend. Navarri, in verb. *scriptura*, num. 6.

Ac quoniam de scripturis publicis hoc in loco fecimus mentionem, ex iisdem firmamentum nostræ sententiæ septimum hauriemus. In quodam igitur Indulgentiarum ac Sanctorum Corporum libro Mediolani edito Anno MCCCCLXXXVIII. hujusmodi fere verba leguntur: *In ade D. Vincentii in Prato P. Ticin. Sanctorum NICOMEDIS PRESBYTERI, QVIRINI, & ABUNDII DIACONI, & MARTYRIS, & D. ADEODATI, qui à S. Simpliciano lustralibus aquis ablatus traditur, & multorum aliorum corpora sepulta quiescunt, & etiam multa reperiuntur Reliquia sine nomine.* Quinimo tot huic Templo Indulgentias impertitas, easque Plenarias adducimur, ut credamus, non tam quod antiquitate, nobilitate, multisque privilegiis auctum, & decoratum inter XII. Mediolanensis Urbis Basilicas jure ac merito numeretur, quam quod suo felici gremio multorum Sanctorum ossa & cineres complectatur. Idem fere asserunt de primis tribus Sanctis toties laudatus Galvancus duobus in *Historia sua* locis, Beroldus in *Kalendario*, Jo. Franciscus à Basilica Petri Novariensis Episcopus in *Opusculo antiquitatum quarundam Mediolanensium Ecclesiarum*, & nuper celebratus Morrigius in *Sanctuario*, antiquiores ut alios omittamus. Quantum autem recensitis à nobis Scriptoribus detulerit sanctæ & æternæ memoriæ Cardinalis & Archiepiscopus Mediolanen-

sis integerrimus Carolus Borromæus, vel ex eo licet agnoscere, quod cum sanctissimus oculatissimus Præsul sibi in animum induxisset, ut in pulchro Metropolitana Basilicæ Odeo Divorum omnium, quorum in Urbe Mediolanensi corpora reperirentur, sculptæ imagines cernerentur, nostros quoque tres Sanctos Martyres inibi cerni voluit in illustri loco cum epigraphe, quæ sacra illorum corpora in Sancto Vincentio ad Pratum adesse cernentibus testaretur. Quid quod exploratissimi juris est Chronicorum, Historiarum, & librorum omnium volumina, præsertim ea, quæ Typographorum industria publici juris fecit, vim in se habere maximam ad probandum, si quæ fides habenda placitis Jurisperitorum Bart. Alex. Dec. Ripæ, & aliorum in *l. 1. ff. si cert. pet.* Mascard. de probat. concl. 287. vers. Chronicorum, Ludovic. Roman. conf. 524. *quod est ultim.* num. 12. Textus enim elatus est in *l. In questionibus. ff. ad l. Julianam Majest.* ubi Pomponius J. C. sententiæ suæ firmamenta ex Crispi Sallustii *Historia* petit. Validius istud profecto cæteris argumentum, ut quod minime de Sanctorum nostrorum corporibus dubitare permiserit sapientissimum & vigilantissimum illum Mediolanensis Ecclesiæ Protomystam: sed alia nobis aliunde suppetunt argumenta, quæ nostram orationem magis augeant & confirment.

At unde? nisi ex ipsismet nostræ Ecclesiæ Catacumbis. Cum enim Mediolanensium pietas, quæ cæteris in Urbibus eo in genere norat excellere, semper imitari studuerit, atque ita Romanæ religionis, quæ in Catacumbis Sanctorum Martyrum corpora humare consueverat, vestigia persequens, vel in ipsis nascentis apud se pietatis incunabulis, subterraneas ædes construere cœperit, quibus Sanctorum suorum pignora eam ob causam maxime condere, ut illis in locis ab omni strepitu remotis Christiani majori mentis adfectu possent ad Sanctorum sepulchra preces suas fundere, & consuetis in vigiliis pernoctare, D. Augustino teste, qui contra *Faustum* lib. XX. cap. XXI. & lib. XXII. cap. VIII. de *Civitate Dei*, docuit suo id tempore à Christianis fieri consuevisse: nisi in subterraneis D. Vincentii sedibus horum Sanctorum corpora vere quiescerent, frustra illæ sane fuissent à Christi fidelibus ædificatæ. Quemadmodum & aliæ multæ, quas nostra in Urbe passim videre est, quæ tamen frustra fuisset constructas nemo auferit affirmare. Ut enim omittamus de Catacumbis iis, quæ tum olim Mediolani exstiterant, quod de iis satis superque meminerimus in Fasciculo hujusce Operis tertio, incurrunt in omnium oculos nunc maxime in Metropolitana Ecclesia Catacumbæ sacris condendis artubus quamplurimorum Martyrum & Confessorum inibi quiescentium, quos omnes percensere numerando non vacat, cum ipsorummet nomina in Tabellis eidem appensis impressa legantur. In Ambrosiana vero Basilica quis ignorat Catacumbas esse juxta sepulchrum Beatissimi Mediolanensium Præfulis & Patroni, nec non & amborum Fratrum Martyrum, qui eum circumstant, Marcellinæ quoque ejusdem sororis ac Virginis tumulum exstructas. In sacris ædibus etiam aliis subterraneis ejusdem Urbis, nimirum Sancti Victoris Martii, D. Calimeri, S. Sepulchri, D. Joannis, aliorumque Sanctorum, quæ notæ sunt omnibus, Sanctorum variorum Corpora liquido constat esse condita eundem prorsus ob finem, ob quem in nostra jacere trium nostrorum Martyrum pignora: qua de causâ & nulli dubitandi locus debet esse relictus.

Sed nos ad se vocant jampridem S. M. E. Rogationes, quæ ad Divinum Numen nostris sceleribus ac flagitiis graviter læsum, jamque poenas de illis acerbissimas sumere cogitans, Sanctorum in-

intercessione placandum, institutæ fuerunt, non ut opinantur aliqui à D. Gregorio Magno, sed multo ante ex Baronii fide Tom. VIII. *Annalium*, & in *Annotationibus ad Martyrologium Rom.* VII. Kal. Maji, monentis ibidem Latinorum aliquos, cum dicunt institutas à S. Gregorio Litanias, sic intelligendos esse, non quod ipsas Majores Litanias S. Gregorius primus instituerit, sed quod ad S. Petrum eas primus indixerit VII. Kal. Maji, quemadmodum minores nostræ initio hebdomadæ Christi Domini adscensum ad Cælum proxime consequentis, fieri consueverunt. Cum enim singulis in Templis, quæ singulis harum Rogationum diebus Clerus ac Populus universus pie ac sedulo frequentat, præter auxilium, quod à Tutelaribus Templorum illorum Numinibus enixe contendit, eorum etiam Sanctorum opem imploret, quorum in illis corpora, aut aliquæ Reliquiæ præcipua religione coluntur; primo die, quo Templum D. Vincentii frequentatur, habentur inibi Litaniae, cum præcipua sanctorum horum trium Martyrum invocatione, ut ex veteribus codicibus & Beroldo liquet, vocari jam ut in dubium nullo pacto possit assertio nostra. Siquidem & rationibus iisdem petitis è subterraneo loco, è Litanis, & Precibus fundi à Populo solitis in sacris Aedibus, usi sunt Jurisperiti Papienses in controversia aliquot ab hinc annis orta in causa sanctorum Corporum Jobi, Tobiae & Toboli, & Saræ, ut probarent ea in Templo S. Joannis in Burgo suæ Patriæ quiescere, & Judicibus ad id decernendum electis visæ sunt non parum in se ponderis habuisse, illam vero postremam de Litanis amplexus est Galestinus, cum ait, quod nos asserimus, constare ex Litanis Ambrosianis.

Claudat nunc tot rationum agmen ea, quam stulti plane, vel impii fuerit oppugnare. Nos enim ipsimet vidimus, quæ subdemus, ac nostræ manus propemodum contrectarunt. Placuit aliquando S. M. E. Cardinali Archiepiscopo Martyrum ipsorum Arcam consulere, ut repertis in ea corporibus honores amplissimos procuraret. Factum id IX. Kal. Februarii anni MDCIX. resecratumque marmore tria in eo capita reperta sunt, quorum unum magnum & integrum; alterum antiquius paullo, & ob id aliquantulum etiam imminutum; tertium tandem aliqua ex parte capitis adhuc humani speciem referebat. Præter hæc ossa quoque plurima perspecta sunt, brachia scilicet, costæ, crura, & alia diffusa late in tumulo, & confusa, facile ut unicuique spectantium esset, trium illa esse corporum, suspicari. Nec arduum fuisset illa, meo judicio, cum antiquitate colore & magnitudine trium illorum capitum diligenter conferre, eademque sic inter se collata recognoscere ac segregare, si tum per otium licuisset. Duo simul hic lignea vasa deprehensa sunt cæruleis medicata pigmentis, auroque distincta, continentia materiem quandam combustæ, aut certe uligine, seu vetustate consumptæ chartæ simillimam, eademque confracta ex parte, ex parte cremata paululum videbantur. Credimus in iis horum Sanctorum scripta, aut aliquas eorundem Reliquias à piis Majoribus collocatas. Lucis adhuc usura fruuntur Viri fide dignissimi, qui narrent annis ab hinc sexaginta casu nescio quo factum, ut candelula honoris ergo ad horum Sanctorum sepulchrum

A accensa de more, ac in superiorem illius lapidem per foramen, quod etiam num, sed clausum, spectatur, immissa, decideret in sepulcrum, fericamque vestem absumeret, qua lignea velabatur Arca Sanctorum cum arcæ ipsius parte, ita ut ad conceptam flammam extinguendam necesse fuerit loco suo Sanctorum ossa movere, atque adeo (ut in rebus hujuscemodi amat fieri) perturbare. Id ipsum semivestis sane illius arcæ tabulæ in ipso nunc etiam Sanctorum Tumulo sitæ plane testantur. Auctor hujuscæ Visitationis præcipuus S. R. E. Cardinalis & Mediolanensis Archiepiscopus Federicus Borromæus Magno Carolo non tam generis splendore, Ecclesiasticaque dignitate, quam morum & virtutum imitatione par. Quamobrem eo præsentem facta, aliisque Viris amplissimis, & religiosissimis Alexandro Mazenta Archidiacono Basilicæ Metropolitanæ, Alexandro Maggiolino, & Ludovico Besutio Portæ Ticinensis Præfecto, Canonicis Ordinariis ejusdem Basilicæ Metropolitanæ, nec non & Horatio Casato tunc ceremoniarum Magistro, nunc ejusdem Basilicæ Canonico Ordinario Diacono, permultisque aliis, cum sanctione decreti de transferendis pompa & apparatu solemnium horum Sanctorum Corporibus in locum ejusdem Templi honestiorem, & delegatione Præfecto Portæ, ut eandem translationem, & pleniorum eorundem Sanctorum notitiam procuraret.

Libuit hæc uti gesta sunt exponere, quod nullum aliud argumentum possit Sanctorum horum trium Martyrum corpora nostræ Ecclesiæ firmius vindicare. Nullam enim probationem aliam fingi, vel afferri posse solidiorem tradit Azo in *Rubrica ad l. Aquiliam*, Bal. in *l. contra negantem*. C. eodem, quod aspectus loci derogat unicuique generi probationum, & in *l. Deo nobis* col. II. vers. *Uterius nota*. C. de *Episcopis & Cleri*, quod omnis alia probatio vincitur, & in *Rubrica C. de probation.* quod est optima, & superlativa probationum, Jalon in *l. Admonendi* col. 17. vers. ex superscripta, & doctores alii ff. de *Jurejur.* quos omnes consulto prætermittimus, ne testimoniis tantum in re aperitissima paginas impleamus. Potuissent hic alia pleraque in hanc tandem sententiam adduci. At quoniam satis superque probatum ac demonstratum esse censimus, sancta Quirini, Nicomedis, & Abundii Corpora in Templo D. Vincentii reperiri ex tot verisimilibus conjecturis, scripturis privatis & publicis, Kalendaris, libris Misalibus, Chronicis, Historiis veterum & recentiorum, tabulis, picturis, & Inscriptionibus, communi traditione Visitationum Actibus, literis Apostolicis: ex ipsamet tandem Sanctorum Corporum inspectione, maluimus ulterius progredi, quam lucernam stulte (quod ajunt) accendere in meridiana luce. Potuissent allata quoque pondera rationum elegantiori calamo perpoliri, nisi animadvertissemus in legum sanctionibus, & Jurisperitorum deductionibus afferendis tantum de auctoritate detractum iri, quantum addidissemus styli. Qualicumque igitur nostra primum ex officina manarunt, passi sumus venire eandem in partem Operis inchoati, studiosi rerum potius, quam verborum, quo fides nobis major ab omnibus haberetur, nec fucus nostro in Opere quæreretur, sed pondera rationum, ea mens nostra fuit initio, semperque fuerit, quoties ad aliquid scribendum animum adjungemus.

JO. ANT. CASTELLIONAEI
 FLORILEGIUM
 ANTIQVITATVM
 PAROECIAE
 D. VINCENTII IN PRATO.
 S E C T I O I.

F A S C I C. V.

Sacra alia Corpora Basilica Vincentiana. Insubrum antiqua sedes ubi primo condita. Urbes olim ad amnes. Ticinensis Porta commendatio ab accessu D. Barnabae, Cittadella, publicis locis. Sanctorum sepulcra in hortis. Adeodati plures. Horum quis in D. Vinc. Templo, quisve Gallianum translatus. Festus ejusdem dies, tumulus, & sacellum. S. Vinc. Reliquia, & earum virtus. Inde Templo nomen. Templum ejusdem aliud ad Garumnam. Venantii versus expensis. Illustriora quadam alia D. Vincentii Tempora apud Gallos, Hispanos, & Mediolanenses. Vera de Corpore D. Vincentii historia. Sanctorum aliorum Reliquia in D. Vincentii Templo. Laus earundem, & Vincentiani Prati. De cultu & veneratione Sanctorum, nec non, & Reliquiis, & praesidiis eorumdem.



FIRMATA jam igitur adeo validis rationum ponderibus existentia trium Sanctorum Corporum in Cryptis Basilicae Vincentianae, id, quod praecipuam a nobis operam requirebat, operae nunc pretium erit de Sanctorum aliorum corporibus verba facere; quorum multa in eadem Basilica reperiri, quamvis eorum nomina nesciamus, cum aliorum Reliquiis ignotis pariter & incertis, docuit nos Joannes Petrus Casoratus harum rerum scriptor minime contemnendus. Cum enim extra Urbis moenia Templum hoc esset, nec longe abesset a primis antiquis Insubriae sedibus, credere par est, multa Sanctorum corpora eo fuisse delata. Atqui ut quod de sedibus hisce diximus, non sine fundo dictum sit: sive Tubal ex Japhet Noemi filio genitus eas condiderit primus, ut quidam antiquitatis studiosi magis quam veritatis in Urbis nostrae origine indaganda Chronographi voluerunt: sive Hetrusci, qui suo late patenti imperio tenuerunt eam regionem omnem, quam nos hodie Longobardiam dicimus, conditis in ea XII. Urbibus, ac inter illas omnium maxima Mediolano uti principe Regionis: sive Transalpini Galli, qui pulsus Hetruscis Duce Belloveso ab Regione nostra, foecunditate pellecti eadem potiti sunt, ut alii locupletissimi Historici memoriae consecrarunt. (liberum enim esse volumus unicuique quam malit harum sententiam sequi, sive primam minus sane certam, sive secundam satis probabilem, sive tertiam communi jam quodam assensu receptam) Illud nos ex vetustissimis Annalibus M. S. exploratum habemus, has Insubrum

C sedes primo sitas fuisse ad margines aquarum ex Ticino, Atheſi, & Olona fluminibus in hanc Basilicae Vincentianae conterminam, quae solem orientem spectat, planiciem derivatarum, atque adeo ad Portae Ticinensis Templo nostro proximam Regionem, ad quam, utpote humiliorem & declivior, majorem aquarum vim sine dubio confluere necesse erat.

D In sententiam non dissimilem, stylo licet ac oratione dissimili, pedibus ivisse video Bonaventuram nostrum Castellionæum in M. S. *Vitis* XI. Episcoporum, qui D. Ambrosium praecesserunt. Siquidem in Castritiano haec habet, quae nos, quod ad rem nostram facerent, Latio donavimus in haec verba: *Diligenter alias observavi, nec absque praevio rationis lumine eam in sententiam veni, ut existimarem Romanos olim, subacta Insubria, curam huic Urbi amplificandae, atque adeo exornandae praecipuam impendisse. Quamobrem quotiescumque illorum alicui ob aeris temperiem, opportunitatemve bellorum, ob Gallorum, Germanorumve defectionem, Mediolani mora longa trahenda erant, eam illi Porta Ticinensis partem incolere, quam hodie moeniorum ambitus excludit ob crebras ibi fontium perennitates.putei siquidem nondum apud Romanos in usu esse coeperant, in hac Urbe praecipue, qua tunc temporis longe crassioribus obducta paludibus, quam nostra ista memoria, tenebatur, earundem ob rationum pondera, qua per me alibi sunt allata.*

E Enimvero ad loca aquis ubertim irrigua Majores nostri nescio quo genio sedes suas condere gestiebant, quo facilior esset illarum aquatio, auctore Festo. Non hinc igitur male nos conjicimus, primas Insubrum sedes fuisse non longe a sacris nostris aedibus collocatas. Accedit huc illa altera conjectura D. Barnabam ad Ticinensem Portam primitus pervenisse, & ad Eustorgianum fontem aliquandiu commoratum, Christo plurimos acquisivisse aquis caelestis lavacri vitalibus expiatis, non aliam ob causam, quam quod in hac Agri Mediolanensis parte primum condita fuerat Civitas, in eaque frequentiores conventus hominum habebantur. Eandem putamus ob causam per Ticinensem Portam in Urbem ingredi solere Pontifices novos, indeque solemni pompa progredi ad sacros honores infulae capefcendos, quasi per antiquiorem Urbis nostrae partem, & reliquis, ob jacta inibi primo Catholicae fidei semina, sanctiorem. Quid quod adhuc haec Urbis nostrae pars nomen *Cittadella* retinet, quod parvam civitatem sonat, ut sciamus hoc Urbi nostrae nomen initio fuisse antequam adveniente frequentia Mediolanum meruit appellari.

Ff Firmant hoc ipsum plura publici Juris & exercitationis

tionis loca non pauca, eadem tum in Urbis regione conspicua, Arena scilicet, quæ hodie *Viarena* dicitur, Thermæ, & Templum Herculis, ubi nunc D. Laurentii sedes, Circus & Palatium, ea in parte, quam nunc obtinet Collegiata S. Georgii etiam nunc in Palatio nuncupati situm, vel certe (quod magis ad rem nostram attinet, aridetque maxime Bonaventuræ nostro, in loco nuper à me laudatò) nostræ in Basilicæ Vincentianæ tractu. Pergit ille scilicet in hæc verba, eadem à nobis opera Latinitate donata: *Trajanus Nerva successit par Christianorum hostis, & fama notum satis ac celebre Mediolani Palatium condidit, non tot ac tantis, quantis aliqui fabulati sunt, pretiosis lapidibus dives, nec eo in loco, qui Collegiatum Templum D. Georgii in Palatio proxime attingit, uti vulgi sermonibus circumfertur. Ea siquidem illud in parte condidit, in qua sese nobis nostris hisce temporibus videndum obijcit D. Vincentii Majoris Templum extra Ticinensem portam cum Xenodochii situ, & reliquo via illius tractu. Altera vero pars, in qua nunc sacra D. Calocero Martyri ades, & ejus ad latus fons est, media tum ejusdem Palatii pars erat.* Hæc Bonaventura: à quibus mirum quantum ponderis ac momenti sententiæ nostræ accedat. Neque enim ea sine fundo prodita fuisse putandum est ab eo, qui veritatis cultor, æque ac patriarum antiquitatum peritus semper est habitus ubique Gentium ac terrarum. Neque tralaticia, aut fabulosa rebus à Mediolanensibus Episcopis sancte, pieque gestis intexere debuisset eum, qui Ecclesiasticæ dignitatis fastigium (*Præposituram* vocant) in Ambrosiana Basilica consecutus, cum omnem procul à se commenti, aut mendacii suspicionem arcere rebus in aliis omnibus tenebatur: tum vero maxime in historiis ad majestatem universalis Ecclesiæ Ambrosianæ pertinentibus historico calamo describendis.

Ego sane mecum hæc animo sæpissime reputans non possum à Bonaventura nostro non sine gravi lapsu aliquo dissentire, putoque non obscura antiqui hujusce Palatii vestigia fuisse illa, quæ duobus jam elapsis annis in Vineto sacram D. Caloceri ædem, & Vincentianam Basilicam interjacentem, reperta sunt, cum altius glebæ illius aliquot effoderentur. Basis tum scilicet prægrandis, varique marmoris, ac peregrini deprehensa cubitorum duorum latitudinem excedens, ita ut altiore columnam superpositam habuisse credatur illis, quas nos hodie ad D. Laurentii superstites intuemur, potiusque Palatium illud à Trajano Imp. Max. conditum sua illa magnitudine decuisse, quam Jovis Templum unius Patritii Romani impensis (quod Operis initio docuimus) excitatum. Nec procul ingens & quadratus lapis eodem fere tempore defossus est, eum in modum situs, ut magnam fuisse partem fundamenti, cui magni illius ædificii moles inniteretur, vel jurejurando quilibet affirmasset. Repertum etiam est novissime inibi marmor ingens elaboratum affabre, variisque parergis tum florum, tum frondium exornatum, quod Artificis insignis manum refert, & Romanorum operum præstantiam æquat. Quamobrem idipsum in Hortis nostris medium collocari jussimus intra duos supra in Fasciculo primo laudatos Cippos, ut apertius fidem rei faceret in aliena sententia mordicus obfirmatis, ne contra solem amplius loqui audeant, ac nobiscum, velint, nolint, sentiant aliquando. Cuinam vero Palatii parti marmor illud exstiterit ornamento (ut hoc amplius addam) facile est, vel ex ipsius figura & lineamentis inspectis attentius, divinare. Aut enim exornasse credendum est spatium illud, quod excurrit medium inter coronas, & superliminaria, (Græci ζωφόρον, ἡ) πρυτανεύουσι vocant) Latini Fasciam dicerent exornatam, Italicæ voci *Freggio* respondentem: aut

A certe ad epistylia, five superliminaria modum januam ipsam Palatii maximam & principem ambiisse, ut ex coronula, quam incisam habet, (Echinum alii nuncupant) meridiana luce clarius innotescit. Ornatus porro januæ marmoris nostro persimilis, etsi minori foraminum cælatura, hodie quoque visitur in ingressu rotundæ Cellæ ad D. Laurentii, quam olim Placidiam Gallam Reginam Magni Theodosii F. opere plane regio condidisse Historicorum consensus unanimis tradit. Jovis porro Templum, quod in eadem regione fuisse testatissimum, valide admodum suspicionem, five conjecturam, nostram firmat. Romani siquidem Palatia prope Jovis, vel alterius Dei, Tempa condere consueverant. Cujus ergo Romæ olim cum in Capitolio geminum erat Templum Jovis Opt. Max. & Monetæ, tum in Palatino Monte affinis Romuli Palatio Jovis Statoris ædes, de qua Ovidius in *Fastis*:

Templum idem Statoris erit, quod Romulus olim Ante Palatini condidit ora jugi.

Nec non & Mediolani Capitolium ad Minervæ cellam, & Maximiani Palatium cum Thermis ad Herculis delubrum fuit. Quem morem posteris subinde sæculis ipsi quoque Christi fidelium Principes amplexati Ædes sibi sacras, five facella, suis in Palatis crexerunt, ne pii minus Ethnicis ipsis Principibus haberentur. Neque vero consensus Historiographorum aliorum sententium Trajani Palatium ad D. Georgii fuisse, eaque de causâ Templum illius in Palatio dictum, fidem ullam iis, quæ diximus, abrogavit. Nam præterquam quod Scriptores alii summa fide digni cum Bonaventura sentiunt, Palatium, quod D. Georgii Templo cognomen sua vicinitate indidit, non Trajani, Romanive alterius Cæsaris fuit, sed Vicecomitum, penes quos olim summum Urbis imperium, testantibus id argumentis aliquot eodem in Palatio superstitibus non obscure. Summo nempe in Januæ principis fastigio Vipera, peculiare Vicecomitum insigne, marmoris incisa visitur, formaque parietum talis est, quæ illis tantum temporibus conveniret, quibus Vicecomites imperabant, non quæ ætate Cæsarum in more esset. Quinimo sese diligentius intuenti puram putam quandam barbariem à Gothis relictam, priscamque artis ejus ævi inscitiam repræsentant, vel ipsis imperitissimis artificibus deridendam, & Imperatoria Romani Cæsaris majestate prorsus indignam. Periti siquidem viso Trajani Palatio Romæ ad ejusdem nominis forum, ubi nunc etiam Columna illa insignis æque, ac multorum ob materiæ, formæque præstantiam nobilitata præconiis, aut Romanorum Antiquitatibus lectis, vix sibi in animum inducent, Palatium illud, cujus ad D. Georgii vestigia exstant, Trajani munificentia convenire. Nostræ opinionis haud dubium ad stipulatorem habeo Tristanum Calchum lib. v. *sua Historia*, de Palatio ad D. Georgii hæc narrantem: *Palatium Mediolani duabus turribus insigne, & adhuc nomine Maximiani celebre: & hoc dixerim illud, ex quo regioni Urbis ad Palatium ducit, quod Merula vulgarem imperitiam secutus Trajano adscripsit. Quin imo ejusdem auctorem præcipuum, ac disertissimum assertorem nuper offendi Andreæ Alciatum lib. ii. Rerum Patriæ, cum animi gratia ejus Historias recognoscerem. Sic enim ille de Trajano agens: Cum quandoque Mediolanum venisset, mira magnificentia Palatium construxisse auctores nostri prodiderunt; eamque opinionem secutus est elegantissimus Scriptor Merula, nihilo diligentior, ut video, hac in re aliis. Conjectura præsertim hæc movetur, quod hodie exstet D. Georgii sanum, quod in Palatio nuncupatur: exstitisseque aliquando illi Trajani Palatinas ades ex eo existimant, argumento certe futile. Fuit in eo loco Luchini Vicecomitis palat-*

palatium, conspiciunturque adhuc fundamenta, muri-
que aliqua pars. Ab hoc sumpsisse cognomen delubrum
illud potius crediderim. Nam quod hodie Palatium
quoque media in urbe vulgo dicitur, recenti opere ni-
hil antiquum habet. Ex hoc Palatio nihil decernes,
quod ad Trajanum possit referri. Quod si de re cum
aliis sentiam, de loco certe est, eritque mihi, donec
certioribus signis id exploravero, controversia. Hæc
Alciatus: qui quidem si præjacta nostræ sen-
tentia firmamenta vidisset, aut sibi in animum
inducere potuisset, omnem à se controversiam abe-
gisset.

Adde his, mirum cuique visum iri, in Urbe
nostra Maximiani Templum dicatum Herculi in-
cursionibus hostium & minis temporum perpetuo
patens tot adhuc insignes Columnas, Arcus, &
alia ejuscemodi pulcherrima monumenta parum
imminuta præ se ferre; Trajani vero Palatium in-
minus aperto ac pervio rerum vicissitudinibus loco
situm (siquidem ad D. Georgii, Urbis, inquam,
ipsius in visceribus, fuit) deteriore expertum
esse fortunam, nec plures illius, quam Herculei
Templi, reliquias ad hæc usque tempora pervenisse.
Quamobrem fatendum nobis est libere, bona cum
Historiographorum aliorum venia, Trajani Pala-
tium ad D. Georgii non fuisse, cum ejus nullum
apud nos hodie vestigium extet; quin imo eandem
prorsus ob causam in alia urbis parte proposita ma-
gis minis hostium, depopulationibus, demolitioni-
bus, ac minis, qualis ea profecto planities fuit,
in qua Vincentianum Templum Gallorum Pede-
montanorum potissimum incursiones diuturnas
nimis & crebras experta. Nec longe à regione
nostra Ticinensi aberant Curia, Theatrum, &
extremi supplicii locus, qui ad Ulmos erat, ubi
nunc S. Victoris ædes ad Capucinos. Eo scilicet
Christiani trahebantur ad necem, ibi feris imma-
nibus objiciebantur, non tam mundi spectaculum
facti, quam Dei, aut à peritis Gladiatoribus cru-
deliter ludis in publicis cæsi, aut diris modis aliis
trucidati jacebant, ut plurimum insepulti barbar-
orum Imperatorum jussu. Ex quo libet illud
etiam assequi conjectura sacris illorum corporibus
ne diu justo honore sepulturæ carerent, à Christi
fidelibus clam inde sublati in proximo Prato, in
eo scilicet, in quo Templi nostri moles attollitur,
levem humum injectam. Paulinus enim hoc ipsum
de sacris Corporibus Nazarii & Celsi disertissime
refert, cum narrat illa primo in horto extra Ur-
bis moenia occulte fuisse sepulta, ibique latuisse,
donec ab S. Ambrosio divinitus inventa, ad
Apostolorum Basilicam sunt translata. De Sanctis
quoque fratribus Gervasio & Protasio Martyribus
illud Sanctus ipse Pater Ambrosius prodidit, eos
primo sepultos una fuisse in Philippi horto, dein-
de inibi à se divino repertos afflatu, summa cum
populorum lætitia in Basilicam Ambrosianam, ubi
etiam num jacere creduntur, illatos. Neminem
enim fugere debet apud fideles initio nascentis
Ecclesiæ positum illud in more fuisse, ut sanctos
pro Christi confessione mactatos clam in ædibus
quandoque privatis ad exemplum Tobia, aliquan-
do vero in hortis, ac in pratis etiam sepelirent,
gratiam se putantes aliquam ob id à Sanctis Marty-
ribus inituros.

Maneat igitur tum ex his, quæ diximus, tum
ex Casorati fide, quæ maxima putanda est, cum
is auctor non nisi antiquis literarum monumentis,
ut ipsemet in fronte Operis profitetur, vel rece-
ptissima Majorum traditione munitus scripserit, in
D. Vincentii Templo anonyma Sanctorum multo-
rum Corpora reperiri. Atque ne à tanto Scriptore
longe abeam, nominatim alia ille Sanctorum duo-
rum Corpora monet in Ecclesiæ nostræ gremio con-
tineri, ac unum quidem B. Adeodati, quem D.

A. Simplicianus aquis lustralibus ablutum, Christianis
mysteriis initiari, licet quis ille Adeodatus fuerit
jure dubitari possit: Adeodatus-ne ille Nolanus,
ac Presbyter, qui S. Paulino in Episcopatu succe-
ssit, & Sicardo Principe Longobardo Beneventum
translatus est, uti Philippo Ferrario placet in
Catalogo Sanctorum Italia die xxvii. Junii; an al-
ter ille, qui Probo Juniore ix. Kal. Julii migra-
vit è vita, ac ut idem Ferrarius asserit die xi. Ju-
lii ad aliud S. Vincentii templum, quod est Gal-
liani Diocesis Mediolanensis, delatus est tempo-
ribus Heriberti Intimiani; an demum Adeodatus
ille, qui à S. Ambrosio una cum D. Augusti-
no & Alipio Mediolani sacro latice ablutus est.

B. Quamobrem nec meam hac in parte sententiam
ab ullo desiderari patiar: non ego frustra censue-
rim B. Adeodatum in nostra Ecclesia quiescen-
tem cum esse, qui à S. Simpliciano non batisma-
te, sed Catechismo una cum BB. Augustino &
Alipio initiatus est, ac cum iisdem à Sancto Am-
brosio baptizatus, ac cum forte Mediolani dece-
ssisset è vita, sepulchrum ad D. Vincentii in Prato
nactus, ibidem cum ad diem usque quievit, quo
sedente Heriberto Archiepiscopo, ejus Sancti
Corporis partem translata Gallianum ferunt eo
ipso tempore, quo SS. Quirini & sociorum corpo-
ra ab eodem Archiepiscopo Mediolanum delata
sunt, ut est memoriæ proditum in Breviario Am-
brosiano jussu Sancti Caroli Cardinalis, & Ar-
chiepiscopi Mediolanensis recognito, & ab aliis
supra laudatis scriptoribus fidei non vulgaris. E-
jusdem plane translationis, quæ anno communis
salutis MLVI. contigisse legitur, meminit In-
scriptio sepulchralis ipsiusmet Sancti non Galliani,
sed apud Vicum Canturium existentis, ut ante
nos scripsit antiquitatum peritissimus Carolus à
Basilica Petri Episcopus Novariensis in fragmen-
tis manuscriptis *Historia Mediolanensis*, ubi agit
de corporibus SS. Innocentii, Adeodati, & alio-
rum, quæ Canturii esse dicuntur: & quamvis eo-
rum aliqua anno MDLXXXIX. Kal. Septembris se-
vidisse testetur, Sancti tamen Adeodati sepul-
crum, & duas tantum Inscriptiones rudi in lapi-
de, atque exoticis characteribus incisas, de eo se
legisse commemorat, monuit eruditissimus Burs-
erius in *Theatro Insulari Magnificentia* appposito In-
scriptionis ipsius testimonio, quod nemo est, qui
magnum non censeat, eademque nostrum hunc
esse Adeodatum docet. Ac licet hujusce translatio-
nis dies anno vertente Canturii celebretur vi. Non.
Julii, alio nempe ab ejus sancti viri obitu, qui in
ix. Kalend. Mensis ejusdem incidit die. Cum
hoc tamen stat, ut major ejus sancti corporis pars
in Templo nostro remanserit. Usus enim ex pia
quadam licentia jam pridem obtinuit, ut qui san-
cti alicujus corporis Reliquias, sive ossa, sive ci-
neres, habent, ii corpus ipsum habere dicantur,
neque par erat tam celebre Templum, ad quod
nova quotidie Sanctorum Martyrum corpora defer-
rentur, antiquis, hoc est, sui quodammodo juris,
Reliquiis penitus viduari. Nec obstat in omnium
fere ore versari, duobus in locis ejusdem Sancti
Corpus existere, cum id ipsum apud gravissimos
Auctores passim de aliis sacris Corporibus affir-
metur, puta de corporibus S. Apollinaris Episcopi
& Martyris, meique præcipui Patroni & Tutela-
ris, quod non tam Ravennæ in proprio Templo,
quam Papiæ in æde D. Thomæ sacra coli scribi-
tur: Sanctorum Cantianorum, quæ & Aquilejæ
in proprio Templo, & Veronæ in æde B. Ma-
riæ in Organis, & Mediolani in Metropolitana
quiescere constans est fama: atqui non proprie, sed
ex more nescio quo figurate loquendi, hac in par-
te præcipue ob singularem & propensam nationum
omnium pietatem erga Cælices, quorum apud se

Reliquias habent, usu recepto, quo pars pro toto frequentissime capitur, & in ejusdem fundum quodammodo, & possessionem migrat, uti possemus exemplis sexcentis propemodum confirmare. Nisi, ut inquit Alciatus rerum Patria lib. III. hac Christiana legis Caestium par conditio esset, dum qualibet civitas sibi aliquid arrogare contendit. Innumera Divorum Reliquia, & plerumque eadem ubique gentium reperiuntur, & rumor falsis auctoribus principio vulgatus, ita demum animis nepotum insidet, ut verissimum esse vel jurati affirmant. Ecquae Christianorum, ne dicam Italia, urbs est, quae ex Salvatoris nostri Corona spinas non habeat? tametsi tot fuisse dictu credibile non sit. Nemo tamen hunc honorem patriae suae non vindicandum putavit. Accedat his, quod & plures Persarum more à profanis cultoribus sepulchro illati aromatibus conditi, quod post tot annos incorrupti integrique sint, tanquam Caestes hoc explorati miraculo, vulgi opinione existimantur. Haec Alciatus in commune dicta esse fatetur: nam quod ad illas sacras Reliquias attinet, quae à Praefulis sunt approbatæ, procul dubio nobis, & Alciato ipsi, in confessio est veras esse.

Verum enim vero quomodocumque tandem ista sese habeant, illud est certissimum, corpus S. Adeodati Confessoris, cujus festus dies alicubi agitur die XXIII. Junii ex antiqua traditione, in maxima nostri Templi Ara conditum credi, & inibi sine dubio coli. Cum enim sacerdos is esset, & in Altari Domini Hostias Deo Patri vivens offerret, mortuus sub illo, uti Sanctissimus Pater Ambrosius in Epistola ad Marcellinam sororem, (quod æquum & justum erat) debuit sepeliri. Aderat & peculiare sacellum hujusce Sancti Numini consecratum in ea nostri Templi parte, in qua nunc ad Christianam Doctrinam sexus sequior informatur, ejusdem nunc etiam aliquot vestigia supersunt: nec sat scimus utrum vetustate collapsum, nempe,

Mors etiam saxi marmoribusque venit.

An vero quod esset impedimento conventui mulierum celebrando ad festas illic exercitationes in Catholicis dogmatibus obeundas. An demum quod de Adeodati sanctitate non usquequaque constaret, sponte sublatum esse desierit, nec ab alio fuerit restitutum. Ut enim mihi non ignotam esse fatear controversiam subortam aliquando de sanctitate Adeodati Canturii quiescentis vel ex ipsius Inscriptione tumuli, ea me tamen ab affirmante Adeodati sanctitate sententia non abducit, cum pro illa stare videam Martyrologiorum aliquot pondus, quibus in Catalogo suo Ferrarius, & alii non vulgaris notæ Scriptores omnibus calculis suffragantur, præter communem famam & Majorum traditionem; quæ duo mirum in modum laureolæ Adeodati favent, ne quid interim dicamus aliud de supra laudato ejus facello, quod insignem ejus apud nos memoriam olim fuisse testatur, eumque tum illic debitis Sanctorum virtuti præconiis, & honoribus cultum. Quibus libenter addemus testimonium illius vetustissimi manuscripti Martyrologii Cœnobarum D. Francisci supra laudati, cum de S. Quirino nostro. Cujus hæc sunt verba: XXXI. Junii translatio Venerabilis Adeodati presbyteri, & Confessoris. Hic obiit die IX. Cal. Julii, & jacet in Ecclesia S. Vincentii de Canturio Galliani, hic erat annorum XXXV. de hoc est legenda gloriosa. Hanc perquisivisse nec invenisse testatur laudatus Episcopus Novariensis, qui Deodatum appellat Sanctum, duarum Inscriptionum auctoritate fretus; quarum prima est hujusmodi:

HIC REQUIESCIT IN PACE S. M. ADEODATVS. PRESBYTER, QVI VIXIT IN SAECVLO ANN. PLVS M. LXXXV. D. P. SVD. VIII. CAL. IVLII.

A Altera ita se habet:

VI. NON. IVLII TRANSLATIO S. ADEODATI ET DEDICATIO IPSIVS ECCLESIAE ET IBI REQUIESCUNT IN PACE B. M. ECDESIVS, ET MANIFREDVS PRESBYTERI, ET SAVINVS DIACONVS, QVI FVERVNT INVENTI IVXTA SEPVLCVRVM IPSIVS S. ADEODATI ANNO DOMINI INDICATIONE VI. TEMPORE, DOMINI ERIBERTI DE ANTIMIANO SVBDIACONI S. MEDIOLANEN. ECCLESIAE, ET CVSTODIS ISTIVS ECCLESIAE SEV TEMPORE ENRICI REGIS.

Quod si fecus Sancta Mater Ecclesia unquam sentiret, aut aliis sentiendum esse declaraverit, ejus nos placita uti obsequentes filii libentissime complectemur.

Sancti præterea Levitæ & Martyris VINCENTII corpus in hac sacra æde conditum reperiri idem Casoratus scribit; atqui hoc ob ejus partem ab eo scriptum par est credere, non quod in ea corpus illius integrum revera insit. Nam cum olim fideles, suppresso B. Virginis nomine novum Templo nostro Divi, nempe Vincentii, nomen indiderint (quod in primo Fasciculo aliis quoque Mediolanensium Basilicis ob solam Sanctorum translationem contigisse diximus) credendum est ob hanc ipsam alio Templum nostrum novissime nomine nuncupatum, nimirum ob sacras & insignes ejus Divi Reliquias eo vere translata, ejus, inquam, Divi, cujus in perferendis pro Christi confessione suppliciis fides, & constantia mirum in modum eluxisset, victique Tyranni barbarie præclaræ sibi victoriæ auctor, atque adeo sui sibi parens quodammodo nominis existisset, non dubie, nec inornate ea de re loquente Augustino in Sermonibus de hoc Martyre & Levita habitis: de cruciatibus quidem, & suppliciis cum ait: *Terret videre invictam Martyris animam contra insidias antiqui hostis, contra saviitiam impii Datiani, contra dolores mortis, carnis acerrima conflictatione certantem, & in auxilio divino cuncta superantem. Nam Datianus ipse Sanctissimum hominem in equuleo primum levatum toto corpore distendi fecit: distentumque diversis vulneribus cruciari: cruciatum etiam pectinibus lacerari: carni-ficesque ad crudelius saviendum verberibus fecit urgeri. Ejusdem deinde corpus in craticula positum uncinis ferreis aperiri, & ardentes laminas insigi, ac sale ignito aspergi, ac laceratum in teterrimo carcere fecit includi, atque ibi testas acutissimas congeri, in lignoque pedes ejus affigi, & sine humano solatio derelinqui. Ad nomen autem alludens dum inquit: Beatus Vincentius vere Vincentius fuit, quod fortissime omnia mortis pericula vicit. Vicit, inquam, in verbis, vicit in pœnis, vicit in confessione, vicit in tribulatione, vicit exustus, vicit submersus, vicit vivus, vicit mortuus, quod eo mortuo, ut ejus sacra habet historia, Angelos ei dixisse ferunt, Agnosce, ô Vincenti, quod pro cujus nomine viriliter decertasti, ipse tibi coronam præparatam servat in cœlis, qui te victorem fecit in pœnis. Haftenus D. Augustinus.*

Neque eadem de re adscribere gravabor lepidum fane Epigramma Guidi Vanninii J. C. Lucensis, quamquam sub prælo esse audiam:

Mergeris in flumen, prodis, transigere frustra

Ladere nil ferro, nil nocet unda minax.

Tygribus exposito mitescant Tygrides ante

Ora tibi volucres carmina dulce canunt.

Quam merito bellum vincis Vincentius omne?

Pro Christo pugnas, militat ille tibi.

Ob tot ac tantos cruciatus constantissime superatos D. Vincentius inter celeberrimos Martyres relatus uno

uno ferme omnium Latinorum Patrum antiquorum ore celebrari meruit, quos quisque per se consulere poterit, ne nos vel à proposita brevitatis concinnitate, vel ab ejus Reliquiis nostro in Templo repositis longius abeamus. Ac licet quonam tempore, quaque ratione S. Vincentii Reliquiæ Mediolanum translatae fuerint pro comperto non habeamus, conjecturis tamen non dubiis consequi possumus, id non multo post ejus Martyrium accidisse. Cum enim S. Vincentius Valentiae in Hispania gloriosam Martyrii palmam adeptus sui nominis famam innumerabilibus prodigiis, & maximis miraculis longe lateque diffudisset in posteritatem omnem, fieri facile potuit, ut Mediolanenses aliqui rebus æternis, aut etiam caducis, puta commutandis mercibus, aut aliis hujusce generis negotiis inibi operam dantes, quo patriam insigni aliquo thesauro locupletarent, Sancti illius Martyris membris aliquot ditescere voluisse, sive tunc temporis, quo piæ nescio cujus mulieris opera ad Valentiae moenia sepulta sunt, sive cum ab Alphonso Rege translata sunt Ulyssiponem, eademque secum ad patriam detulisse, cumque illis, sive è terra, sive è mari reducibus Templum nostrum, uti vicinius occurrisset, in eo Reliquias collocasse, ne pretiosæ adeo sacræque merces honore suo diutius privarentur. Cumque rei fama percrebuisse, eoque frequentissimi populi concursus undequaque fierent, cum ut Sancti Levitæ Reliquias venerarentur, iisdemque dona generis omnis offerrent; tum ut intercedente pro se Martyre convalescerent è gravissimis morbis, ac ipsis in primis doloribus articulorum, & ægrotudinibus iis, quas frigidi humores creant. Cum enim Sanctus hic Martyr media rigente hyeme cruciatus acerbissimos prunis ardentibus, candentibusque laminis ambusto corpore, & fragmentis lancinantium testarum in ipsis præcipue membrorum articulis & nexibus passus sit, pie credendum est eorum intuitu à præpotenti Dei Opt. Maximi Numine, cujus ut gloria manaret in dies latius ac latius, tot ac tanta tormenta pertulerat, impetrasse, ut quisque ad ejus ossa colenda, certa divini auxilii spe fretus, accederet, ab hujusmodi morbis omnibus liber abiret.

Quamobrem, ut à Majoribus nostris accepimus, ex quo S. Vincentii Reliquiæ Templo nostro illatae sunt, nullum unquam tempus existit, quo non Mediolanenses, atque etiam exteri cœlestem opem in hisce ægrotudinibus imploraturi ad nostrum Templum non venirent, devote rem inibi sacram hujusce Sancti Votivam (ut ajunt) audituri, & eidem vota pro commoda recuperanda valetudine persolventuri. Faciunt hoc ipsum ii, quos alio atque alio mente non sana traduci contingit, eamque ob causam maxime vicinum Xenodochium mente captis excipiendis patet, quo facilius ad sese ope proximi Numinis revertantur. Licet igitur in Urbe Mediolanensi aliæ quoque huic Divo sacræ ædes existant, nullus tamen nisi imprudens ad illas divertitur ad dandam stipem pro re sacra ad opem implorandam Martyris facienda, ea in dies magis ac magis invalescente in animis opinione eam in nostro Templo ob existentes in eo Divi Reliquias, fieri consuevisse. Et sane communis hæc hominum opinio allatis conjecturis innixa apud Eruditos etiam magni esse ponderis debet, ut qui non semel legerint eodem fere pacto alias Divorum Reliquias ad plura loca delatas, ut de ossibus inclyti Martyris Ignatii habetur in *Chron. Eusebii*, & in *Sermonibus* D. Jo. Chrysostomi Tom. v. Ab iis enim est traditum hujus Sancti Reliquias Roma Antiochiam delatas à Syris, qui cum ad Urbem fuerant comitati furtim sublatis, vel certe pecunia redemptas, ut mavult Baronius Tom. i. Anno c. num. 6. illic perlatis ad portam Daphniticam in cœmeterio

fuisse depositas. Eisdem adstipulatur S. Hieronymus de *Scriptoribus Ecclesiasticis* in *Ignatio*, ibique multis cum miraculis & concursu populi nitaesse testatum idem aliquando Chrysostomus reliquit. Unde Baronius in *laudato loco* non sine admiratione inquit: *Videas ex his quanti fecerint Christiani hujus temporis (omnes haud dubium Apostolorum Discipuli) Reliquias Sanctorum Martyrum: dum saviente licet persecutione, nihil veriti invidiam, savitiamque Gentilium, nec viarum pertasi difficultates, & longitudinem, Roma Antiochiam usque, eas magna veneratione & letitia retulerunt, & loco honestissimo collocarunt.* Quæ libuit hic afferre, quod aperte exprimant usitatum modum, quo D. Vincentii Reliquias ad nos pervenisse diximus innixi non dubiis conjecturis.

Cæterum, ut ad eorum vim & potestatem, à qua discessimus, redeamus, eam plane maximam existere necesse est, cum ex solo S. Levitæ Vincentii Tunicae contactu, quamplures ad mentem, relicta phrenesi, & insaniae furore deposito, rediisse ferantur, multaque alia supra naturæ ordinem ob eandem in Galliam deportatam contigisse memorent Gregorius Turonensis in *Historia de gestis Francorum* lib. iii. cap. xxix. Ado Viennensis in *Chronico*, Anno dxxvii. & Sigibertus ad Annum dxxlii. Narrant enim hi Scriptores omnes, quo tempore Childebertus Rex in Hispaniam iit, ac una cum Clothario Cæsaraugustanam civitatem obsedit, cives ejus omnes timore perculsos indutos ciliciis, ac à cibis & poculis abstinentes ad præpotentem Deum supplices confugisse. Delata B. Vincentii TUNICA cum psalmis & hymnis circum moenia civitatis, adhibita sancti ipsius Martyris invocatione, atque ita ab obsidione illa fuisse divinitus liberatos. Illud unum addit ex Metaphrasæ Alphonso à Villega in *Vitis Sanctorum*, Clotharium Francorum Regem, ut civitatem obsidione liberaret, dono accepisse à Civibus STOLAM S. Levitæ, eamque in Galliam asportasse, ac Templo ultra Garumnam in honorem Sancti ipsius perhonorifice condito collocasse, eo, inquam, in Templo, quod Venantius Fortunatus lib. i. *sacrorum Poematum* hisce carminibus commendavit:

*Tempore vita brevis meritis fit longior almis,
Augustosque dies tendit honore fides.
Post finem sine fine manet mens dedicata Christo
Linquens turbam hominum stat sociata Deo.
Hac ope suffultus VINCENTIVS exstat in ævum
Gloria Martyrii cujus optima vires.
Vertice succiso rapuit qui ex morte triumphum,
Et nova de terris proles ad astra volat.
Credidit unde necem, Sancto dedit hostis honorem;
Percussorque magis morte perenne jacet.
Vicerat ille miser, hunc si jugulare nequisset;
Nam abstulit unde caput, contulit inde polum.
Hujus amore novo pia vota Leontius explens
Quo sacra membra jacent stagnæa tecta dedit.
Et licet eniteat meritis venerabile templum,
Attamen ornatum præbuit iste suum.
Premia succedant operanti longa salutis,
Hujus ut obsequiis culmina sancta micent.*

Quamquam Venantii versus suis si ponderibus expendamus, non de Templo D. Vincentio Cæsaraugustano sacro is loqui videbitur, sed de alio multo ante condito, quam D. Vincentii Cæsaraugustani Martyris tunica in Galliam deferretur, dicatque S. Vincentio Diacono, & Martyri Aginnensi, si fidem habendam esse ducimus Gregorio Turonensi. Quod enim asserit Fortunatus de Divi illius Vincentii, cujus Templum Garumnense laudat, martyrio loquens eum reciso capite Martyrii lauream adeptum esse, minus id Divo nostro Vincentio Cæsaraugustano convenit, qui cum immortalitate mortalitatem diverso plane lethi genere commutavit. Confessius idipsum est ingenue Baronius

in *Martyrologii Notis*, licet in VII. Tom. Ann. ad ann. DLXI. paulo aliter fuerit opinatus, ac cum eo Villega in prima impressione sui Operis de *Sanctorum Vitae*, Garumnæ Templum in honorem D. Levitæ Vincentii Hispani conditum asseverans, studio gentis suæ potius quam veritatis in medium proferendæ; quæ tamen apud illum plurimi esse debebat, ut vere fuit in secunda ejusdem Operis editione. Idcirco nos, qui unam illam sequimur pro virili, cum laudata Venantii carmina recitarem, eo in carmine, in quo apud mendosos codices Clotarius habebatur, Leontium pro Clotario reposuimus, ut qui Templum illud multo ante Clotarii tempora, atque adeo ante se conditum exornarit, eoque potissimum nomine Venantii carminibus extollatur, cum inquit:

*Et licet eniteat meritis venerabile Templum,
Attamen ornatum præbuit iste suum.*

Neque enim aliud sacro Vati propositum eo in Poematio, quam singula Leontii opera commendare, ac Tempia ab Episcopo illo religiosissimo condita numeris quibus possit amplissimis celebrare. Cæterum ex delatis in Galliam D. Vincentii Cæsaraugustani Reliquiis, (quali illæcunque tandem tempore eo delatæ sint) non negarim factum, ut ejus passim beata pignora colerentur, Templaque alibi ejusdem Numini ingentia collocarentur. Cujusmodi illud sine dubio fuit, quod Parisiis Childebertus Francorum Rex VI. opere plane regio puro puto ex marmore condidisse traditur, in eoque D. Vincentii Cæsaraugustani TVNICAM, sive ut alii volunt STOLAM, non in Garumnensi illo, de quo aliquando Baronius, non minoribus pietatis argumentis, quam sumptibus collocasse. Itaque ejus sibi laudes minime prætereundas idem Fortunatus censuit lib. II. Poematio II. in hæc verba:

*Si Salamoniaci memoretur machina Templi,
Arte licet par sit, pulchrior ista fide.
Nam quacunque illic veteris velamine legis
Clausula fuere, prius hic reserata patent.
Floruit illa quidem vario intertexta metallo,
Clarius hic Christi sanguine tincta nitet.
Illam aurum, lapides, ornarunt cedrina ligna,
Huic venerabilior de Cruce fulget honor.
Constitit illa vetus, ruituro structa talento,
Hæc pretio mundi stat solidata domus.
Splendida marmoreis attollitur aula columnis,
Et quia pura manet, gratia major inest.
Prima capit radios vitreis oculata fenestris,
Artificisque manu clausit in arce diem.
Cursibus aurora vaga lux laquearia complet,
Atque suis radiis & sine sole micat.
Hæc prius egregio Rex Childebertus amore
Dona suo populo non moritura dedit.
Totus in affectu divini cultus adherens,
Ecclesia juges amplificavit opes.
Melchisedech noster merito rex atque sacerdos,
Complevit laicus religionis opus.
Publica jura regens, & celsa palatia servans,
Unica Pontificum gloria, norma fuit,
Hinc abiens, illic meritorum vivit honore,
Hic quoque gestorum lande perennis erit.*

Fuit & aliud augustum D. nostri Vincentii Templum in Gallia ejusdem supra laudati Leontii Episcopi Burdegalensis opus, cui *Vermetis* ob id cognomentum. Neque enim aliud ea vox Gallice, quam rem ingentem sonat, eodem ejusdem Templi encomiaste, & ejusdem cognominis interprete Fortunato, cum scripsit:

*Cultoris Domini toto sonus exiit orbe,
Nec locus est ubi se gloria celsa neget.
Sed cujus meritum scimus percurrere mundum,
Hujus ubique viri surgere templa decet.
Ecce beata nitent Vincentii culmina summi
Munere Martyrii, qui colit alta poli.*

A
Promptus amore pio, quæ Papa Leontius olim
Condidit eximio consolidata loco.
Nomine Vermetis voluit vocitare vetustas,
Quod quasi sanum ingens Gallica lingua refert.
Auspicii præmissa fides erat ante futura,
Ut modo celsa domus staret honore Dei.
Hic etiam sanctus, Domini suffultus amore,
Virtutis summa signa tremenda dedit.
Nam cum Tempia Dei Prasul de more dicavit,
Martyris adventu Damonis ira fugit.
Redditur incolumis quidam de parte maligna,
Cui vidisse pii templa, medela fuit.
Emicat aula potens divino plena sereno,
Ut merito placeat hic habitare Deo.
B
Nunc specie suadente loci, ac virtutis honore
Evocat hic populos, hinc decus, inde salus.
Qui plebem, accendit veneranda conditor arcis
Talibus officiis præmia juxta metit.

C
Plures eidem Hispano Martyri Basilicas in Gallia constructas recenset Gregorius Turonensis in *Commentario de gloria Martyrum*, appositis miraculis in iisdem solitis perpetrari, quas quilibet in eo per se commode poterit contemplari, ne nos illæ, quam par sit, diutius remorentur. Quot igitur, quamque majora Tempia eidem ab Hispanis posita fuisse credendum est in natali solo, cum tot illi tamque magnifica è nationibus exteris fuerint collocata. A nullo certe nemini Divorum cultu & religione secunda Italia in sancto nostro Vincentio Levita & Martyre Templis ac delubris amplissimis commonestando suas partes desiderari voluit, passim in Oppidis suis ac Urbibus sacras illi sedes erigens, ac in primis in hac nostra aliarum omnium principe Civitate, in qua XXVI. olim ejusdem Martyris Ecclesiæ ex Galvani fide cap. CCCCI. *sua Chronica* numerabantur, ad quas mira populi celebritas confluebat, plane ut nesciam, mirari, an dolere debeam ad pauciores ævo nostro redactas, quo pietas calere deberet ardentius, non frigere, ad quatuor scilicet, si eis unam tamen Paroecialem suppressam demas. Nostra hæc appposito cognomine Abbatia, Paroecialis altera, tertia, quæ Monialium Cœnobium attingit, quarta ad Xenodochii mente captorum domum. Nec illud nobis hoc loco prætereundum est, quod honores D. Vincentio debitos auget mirum in modum. In urbe quoque Bergomi excelsa (ut cæteras interim humiliores, tum excelsiores Italiae urbes prætereamus) Templum ejus urbis maximum D. Vincentio sacrum esse, & cultu præcipuo Fidelium celebrari. Cujus ergo carmina D. Alexandri ejusdem urbis Patroni ore prolata libenter afferam ex prima *Theatri Bergomatis Parte*:

E
*Hispanus simili mecum VINCENTIVS Urbem
Observat martyr numine, amore, prece:
Templum illi Cives ideo erexere togatis
Conspicuum Patribus, redditibusque grave.*
Et in quinta ejusdem *Theatri Parte* hujusce Templi magnificentia commendatur his versibus:
*Ædes Augusta VINCENTII, & limina Divi
Saxorum ingenti mole parata patent.
Ambitus magni, sublimis verticis, auctum est
Reliquiis, cœtu conspicuumque Patrum.
Quod si tantarum peragi primordia rerum
Contingat: formam compleat utque labor,
Hoc erit illustre, immensum, memorabile Templum,
Hoc videant utinam tempora nostra decus.
Quæ bene de Divis meruit Respublica semper
Stare imperfectum non patietur opus.*

F
Cæterum his omisissis fatemur eam de corpore S. Vincentii historiam verissimam esse, quæ S. Martyris alligato ad collum molari saxo in mare præcipitis dati corpus ab Angelis revocatum ad littus, & in arena leviter & decore compositum fuisse narrat,

narrat, ibique à pia muliere divinitus in fornix admonita repertum, juxta Hispanienſis Valentia mœnia tumulatum, nec multo poſt inde tranſlatum in ædem eidem Martyri conſecratam, in qua ad id uſque tempus quieverit, quo à Saracenis univerſa fere Hispania devaſtata eſt, everſis urbibus, deletis oppidis, Sanctorum corporibus propemodum omnibus immaniſſime ab Kabdorgne Cordubæ Rege Barbaro redactis in cinerem, & abſumptis. Nec effugiſſet incendium illud & rabiem Sancti Vincentii corpus, niſi loci incolæ communi calamitate præviſa navigio quamprimum impoſitum per vaſtos Oceani tractus Cimmerium Boſphorum verſus ad Promontorium, quod ex ejus nomine poſtea nuncupatum eſt, divina favente aura conſtituiſſent, ibique in exiguo ſacello ſacroſanctum pignus arcæ ſub altari lignæ credidiſſent, addictis ſacello ſedibus, in quibus à ſe Barbarorum injurias propulſarent. Sed accidit, ut horum ſucceſſores & poſteri multis poſt annis capti in Albohacen Mauritanie Principis ditionem poteſtatemque veniſſent, & anno ſalutis MCCCXXXIX. Alphonſus Luſitanie Rex deſbellato Iſmace Aliendæ Rege, inter captivos eorum aliquos reperiret, qui jam pridem ab Albohacen capti fuerant, ab iſſique victor Alphonſus rem omnem, uti geſta fuerat, de S. Vincentii corpore plane cognoceret. Quo nuntio mirifice recreatus Rex optimus, miſit peritos loci, qui diruptæ Capellæ veſtigia diligenter explorarent, quibus deprehenſis arcam inibi ligneam cum S. Viri corpore invenerint, ſecumque quam diligentiffime cuſtoditam tranſtulerint ad Regem, à quo fuerit in Ulyſſiponæ Cathedrali perquam honorifice collocatum. Hinc clare patet illos longe minus audientes eſſe, qui corpus ipſum B. Vincentii nullis freti rationum ponderibus tranſlatum in Gallias, & illic apud cœnobium Benediſtinorum Monachorum, cui nomen Guiana, poſitum contenderunt: cum vel ſola Stola, vel Tunica illuc ad ſummum delata ſit, ut ex antiquorum Scriptorum auctoritate Villega teſtatur, non tam ut ditius hujusce Divi Reliquiis natale ſuum ſolum redderet, majoremque regionibus ſuis gloriam impertiret, quam ut pro veritate ſtaret. Neque idcirco à vero diſcrepat, noſtra quoque in Baſilica Mediolani aliquas hujus Sancti Reliquias aſſervari, cum & Sanctorum Petri & Pauli Apoſtolorum corpora Romæ in Vaticano liquido eſſe conſtet, quorum nos tamen Mediolani Reliquias inſignes in Baſilica S. Nazarii publice veneramur. Quid quod ejuſdem Levitæ ac Martyris Vincentii caput in Eccleſia Cænomanenſi collocatum à S. Damnolo Epifcopo ejuſdem acta fuiſſe teſtantur, ſubſcribente quoque Baronio in *Notis ad Martyrologium* in natali Sancti, jam ut nemini dubium eſſe poſſit, alias ejuſdem Divi partes aliquas noſtrum in Templum antiquitus ejuſdem Numini, Majeſtatiſque dicatum, fuiſſe divinitus importatas.

Verum enim vero de Sanctis noſtris Corporibus ſatis ſuperque diſſeruiſus. Quamobrem inſtituti noſtri memores ſtylum ad minutiores aliorum Sanctorum Reliquias dirigendus, & ad eas maxime, quæ celebrioribus feſtis anni diebus in Altari principe colendæ fidelibus proponuntur. Ut hinc igitur exordiamur in Reliquiarum theca in modum arboris ex ligno olivæ gracillimo opere tornatili affabre facta horum Divorum Reliquiæ continentur, SS. Joannis Baptiſtæ Dominici Præcurſoris, Cornelii Papæ, & Mart. Flori Mauri, Eugenii, Caſſiani, Conſtantini Martyrum; Abundii pariter Martyris Romæ ſub Diocletiano paſſi, qui & Abundantius dictus, cujuſque corpus in Romana Societatis Jeſu Baſilica requieſcit; quod idcirco placuit adnotare, ne quis eundem illum eſſe putet, quem ſub Altari Confeſſionis noſtræ ſupra oſtendimus reperiri. Continentur in eadem arbore fra-

A gmenta quatuor ſacrorum oſſium ignotorum, oſſium item Sancti unius Martyris ex Cœmeterio Calixti, atque adeo complurium aliorum Sanctorum ſercula, nempe SS. Benediſti, Melanti, & alius Sancti cujuſdam incogniti, veſtis Deiparæ pars, & Tumbæ B. Staniflai Koſtæ. Pulcherriſimum hunc ego theſaurum Reliquiarum ſuos in loculos eleganter admodum diſpoſitum crediderim à Monachis hujusce Cœnobii, procuratum ad hæc uſque tempora ſartum tectum, non ſine operis admiratione perveniſſe, præterquam ea in parte, quam nos omni adhibita diligentia reſtaurandum curaviſus, ne quid amplius caperet detrimenti.

B Ad hæc capſula apud nos plumbea celebratur, cujuſ illuſtriores Reliquiæ ſunt DD. Stephani Protomartyris, Marci Euangeliftæ, Laurentii Martyris ac Levitæ, Jo. Chryſoſtomi Eccleſiæ Doctōris, & Urbani Papæ, quæ quidem cum Sanctorum illorum, quos cum Deo ævo perfrui ſempiterno certo certius eſſe ſciſus, pignora ſint omni veneratione colenda, operæ pretium eſſet eas honeſtiori in vaſculo collocare, ne diutius honore merito privarentur, quem illis fideles commodius, atque adeo religioſius exhibere poſſent, ſi ſuis in natalibus præſtantioribus in oculis expoſitæ cum aliis publice ſpectarentur. Horum ego Divorum oſſa, ut à fide dignis jam pridem accepi, noſtrum in Templum detulit Vir unde quaque pius, neque tam honorum inſignibus, quam omnium ſcientiarum ornamentis illuſtris, qui vere cum illud adeo præſtanti munere cumularet, dicere poterat,

*Sacros cineres venerandaſque ſegmina Divum
Accipe Paraſo munera miſſa polo.*

Sunt & in Altari B. Virginis quorundam Sanctorum Cineres ſerico panno viridi convoluti, quemadmodum & qui in tribus aliis aris continentur, ſed carentes notis, quibus eorundem nomina declarantur. Atque hæc quidem minorum Sanctorum ſegmina ſunt, quæ in florido D. Vincentii PRATO, qua roſarum inſtar Martyrum illuſtrium ſanguine purpuraſcentia, qua liliorum nitore fidei ſanctis in confeſſoribus albeſcentia, qua violarum omnigena colorum varietate ob diverſimodas Sanctorum aliorum virtutes diſtincta, gratæ ſuavitate, gratiarum ſcilicet, & ſanitarum odores hæcenus effudere, variis & innumeris ab ægritudinibus languentia mortalium pectora liberantes. Quare non immerito cum noſtri, tum exteri horum interceſſione Sanctorum divinam opem frequenter experti, noſtrum ad Templum confluunt, nec inde niſi poſt ſerta mira ſorum varietate ſacrorum pignorum loculis implicata, habitasque Deo Opt. Max. gratias pro perceptis muneribus divelluntur.

E Ac ſicut olim Romani veteres primas agricolationis partes tribuebant Prato, ſic hi PRATVM hoc noſtrum jure vocare poſſunt hortorum decus, viridarium gloriam, vinearum lumen, camporum ſplendorem, univerſorum agrorum ornamentum, immo & humanis omnibus auxiliis deſtitutorum aſylum, languentium portum, cæterorum omnium ope divina egentium præſidium & tutamen. Quæ par eſt igitur pietate eo ſe mortales recipere Sanctis honorandis, ſacriſque eorum corporibus, Reliquiis, atque cineribus venerandis? Quæ inibi moeſtia commorari, qua mentis ad eorum aras ac ſedes intentione precari? Ut enim Deum Opt. Max. Sanctosque omnes ubique colere debemus, ſic illos præcipuo quodam cultu ac veneratione proſequi neceſſe eſt, quorum Reliquias poſſidemus, iſſique præſertim in Templis, in quibus illas Chriſtiana religio voluit aſſervari, D. Maximo teſte in Serm. de natali SS. Octavii, Adjutoris, & Solutoris Martyrum die, ubi ait: *Cuncti Martyres devotiſſime percolendi ſunt, ſed ſpecialiter ii venerandi ſunt à nobis, quorum Reliquias poſſidemus. Illi enim nos orationibus adju-*

adjuvant, isti etiam adjuvant passione, cum his autem nobis familiaritas est: semper enim nobiscum sunt, nobiscum morantur: hoc est & in corpore nos iuvantes custodiunt, & de corpore recedentes excipiunt, hic ne peccatorum nos labe assumat, ibi ne inferni horror invadat. Addo & elegans D. Ambrosii testimonium, quia huc maxime pertinet; Luca enim IV. sic ait: *Martyres obsecrandi, quorum videmur nobis quodam corporis pignore patrocinium vindicare. Possunt pro peccatis rogare nostris.* Eam nos certe unam ob causam maxime laborem hunc suscepimus, ut quos Sanctos nostro in Templo quilibet fidelium colere & invocare, quorum, inquam, in eo corpora, Reliquias, & cineres venerari deberet, nostra quoque opera sciret. Quamquam ne rudes ac simplices in hoc aberrarent, visum est etiam promuneris nostri partibus, cum nemini dubium sit ex communi dogmate ad nos ab Apostolicis usque temporibus derivato, à sacris Conciliis Generalibus sancito, à Patribus omnibus approbato, Sanctos esse colendos & exorandos, paucis hoc in loco nonnulla pro eorum captu subicere de veneratione & invocatione Sanctorum, deque cultu sacris eorundem Reliquiis exhibendo. Quod ut commodius fiat, rem omnem duo veluti in capita dividemus, ac in uno quidem, quid in Sanctis colendis non conveniat, in altero vero quid conveniat, ostendemus; ac ut certa ab incertis penitus secernamus, quæ omnino certa sunt, initio præmittemus.

Illud igitur certum est primo unum præpotentem Deum complectentem in se ipso præstantiam atque dignitatem omnem, summum rerum omnium principem & auctorem, donorumque omnium, Gratiæ scilicet, Gloriæ, aliorumque ejusmodi omnium, quæ orantes præcipue petimus, largitorem, invocandum esse; atque adeo humani generis Servatorem Christum, ut qui non tam verus est Homo, quam Deus æterno Patri par in omnibus, oratione, quæ sit vere ac proprie sacre Religionis actus, oratione, inquam, ejusmodi, qua ei, quem invocamus, divinus plane cultus exhibeatur, opem ab eo petendo, tamquam à summo bonorum omnium Auctore: siquidem ad alium præterquam ad Deum preces ea ratione fundere, manifesta esset Idololatria, cum hic orandi modus adorationis Latriæ sit, cujus honos soli Deo Opt. Max. tribuendus. Ad hæc certum illud est etiam, Sanctis non cum honorem solummodo tribuendum esse, qui cæteris Viris alioqui præstantibus, ob aliquos virtutes, dignitatis, & honoris gradus, quibus hominibus reliquis antecellunt, tribui consuevit, siquidem id fieret, Sanctorum cultus ab humana observantia neutiquam discreparet. Pari nempe ratione Parentibus à liberis, Præceptoribus à Discipulis, à subditis ei, qui sibi cum imperio præest, Principi demum à Civibus exhiberetur.

Alio quodam igitur cultu, qui neque Latriæ sit, neque civilis observantiæ, sed inter hanc & illum medius intercedat, qui quidem Dulxi à Doctoribus Scholasticis appellatur, colendi & invocandi sunt. Itaque primum eos Ecclesia in album Sanctorum adscribit, deinde jubet eosdem ab omnibus inter Cœlites coli, tum precibus ad eorum opem implorandam publice fufis, cum sacris ad eorundem memoriam, nec non & ad sepulchrorum ornatum aris & ædibus consecratis. Quatenus enim ædes, & aræ sacre ad sacrificia spectant, eæ soli Deo dicantur, cui soli sacrificium debetur, & à Latinis templa proprie nuncupantur. Sed ipsum quoque tum Eucharistiæ, tum laudum, sive precum quotidianarum sacrificium (vulgo *Horas Canonicas* vocant) in Sanctorum honorem offerri Deo publice solet, dies etiam festi quidam eorundem

A causâ celebrantur, pinguntur & eorum imagines, ad quas moris est cereas faces & lychnos pensiles crebros accendere cum perpetui luminis alimentum. æternæ, qua perfruuntur, gloriæ monumentum. Ejusdem plane cultus gratia Sanctorum Reliquiæ pretiosis loculis includuntur, ac publicis honoribus illustrantur. Adduntur his votorum nuncupationes crebræ cum longinquis peregrinationibus ad eorundem Basilicas, Oratoria, Memorias, & Sepulcra, ibique vigiliæ, & pia rerum ab iis sancte admirabiliterque gestarum commentatio ad animos cœlestibus virtutibus excolendos. Cum enim Divorum animæ corporeis exutæ spoliis, non ad Campos Elysios, ut olim Poetæ fabulabantur, sed ad cœleste domicilium, uti Christiana religione imbuti vere sentiunt, evolarint, ubi bonis omnibus potiuntur, ibique sejunctæ nunc quidem à corporibus, quæ extremo volventium sæculorum die, quo genus humanum universum in vitam revocabitur, rursus induent, uti procul ab humanis sensibus distitæ, coli pro dignitate non possint: eorum apud nos sanctissima corpora, uti res subjectæ sensibus, qui tantum in id, quod adest, quodque præsens est, feruntur, divino Numine conservantur, ut illis honores, quos in hac imbecillitate possumus maximos, habeamus. Quamvis autem Sanctorum corpora, sacreque Reliquiæ eorundem, uti res rationis expertes, & ideo honoris omnis & injuriæ (Peripateticorum Principe locupletissimo teste) recipiendæ minus idoneæ videantur; nihilominus ex eo quod nescio quam habitudinem & ordinem dicunt ad res participes rationis, eandem illam scilicet habitudinem, qua actus à potentia, (ut de re in scholis agitata, scholastico more loquamur) forma à materia, animus à corpore respicitur, ratione conjunctionis, tum præteritæ dum vitam mortalem viverent, tum futuræ post horribilem & pertimescendum novissimi judicii diem, inter hujusmodi partes, quæ viva olim Christi membra, & Spiritus Sancti templa fuerunt in terris dum viverent, ac etiam num sacra sunt pignora nobis in hac lacrymarum valle degentibus à Deo salutis, nostræ spei, vitæque solatio relicta, ejusdemque instrumenta præsentissima ad innumera pro Reip. Christianæ propagatione miracula perpetranda, nostræ, inquam, militantis Ecclesiæ lumina solem ipsum luminum reliquorum principem vincentia, decora nominis Christiani, propugnacula fidei, Religionis insignia, cœlestis ærarii thesauri, opes nullis propositæ casibus, nullis vicissitudinibus temporum reservatæ, trophæa pro Christi confessione triumphantium animorum, præsidium nostrum, decus, & gloria, vasa tandem æterni decoris, & æternæ gloriæ, tum futura, cum decorem omnem induent, ac supra firmamentum splendidius emicabunt in æternitatem omnem, coli jure suo possunt, & debent.

Neque eam tantum ob causam Sanctorum Reliquias veneramur, sed ob illam etiam, quod sacra eorum pignora contemplantes in Sanctos ipsos, eorumque virtutes attentius animum intendentes, ut res ab iis præclare gestas, quoad fieri possit, vita & moribus exprimamus. Sunt enim Reliquiæ Sanctis ipsis proximiores imaginibus eorundem, quemque illis cultum religiosi animis & ritibus exhibemus, referimus ad eosdem. Quamobrem eodem plane more Sanctos, & ipsorum Reliquias veneramur, modo id habeant, ob quod veneratione dignæ censendæ sint. Duo siquidem ad id necessaria judicamus. Primum ut sub illis formis & qualitatibus conserventur, ob quas ex communi hominum sententia Reliquiæ censeantur esse, & ad Sanctum aliquem pertinere, quod utique non contingit cum ob transmutationes aliquas in vermes, vel aliud quid hujusmodi, commutatae sunt.

sunt. Secundum ne sint partes suppositi, ut ita loquamur, alicujus indigni cultu, cujusmodi sunt impiorum manus, quæ se sanctorum virorum cæde & sanguine contaminarunt, nec coluntur licet Sanctos tetigerint, ne ipsa coli impietas videatur. Veneramur autem Sanctorum vestes & instrumenta Martyrii propter contactum & piam memoriam eorundem, ut crucem, clavos, lanceam, & alia generis ejusdem propemodum infinita, quæ vesana Tyrannorum sævitia reperire potuit, propter contactum Christi, ac alia ejusmodi propter contactum Martyrum aliorum. Veneramur etiam alia propter significationem, uti sacramenta, & voces sacras, sive illæ sacris in paginis scriptæ sint, sive piorum ex ore prolatae, uti nomen Jesu: alia quoque propter cultum Dei Opt. Max. & Sanctorum, ad quem potissimum referuntur, ut aedes ipsas sacras, & vasa. Cæterum Sanctorum audito nomine aperire caput, pectus coram ipsorum imaginibus tundere, genua flectere, Litanias, & alias hujusce generis preces iisdem fundere, donaria largiri, vota persolvere, anniversaria sacra præpotenti Deo in eorundem honorem & memoriam offerre, aliaque præterea constantissimo usu Ecclesiæ recepta præstare, pium & æquum semper habitum fuit apud Christianæ religionis dogmatibus institutos. Quin imo fidelibus ipsis perutile semper idipsum fuit, tum ad sacrarum & aliarum rerum etiam conservationem, propagationemque majorem in dies, tum ad impetrandam ex morbis innumeris sanitatem. Ecquid enim aliud testatum reliquit S. Paulinus Nolanus Episcopus in *Carmine*, quod in Natali S. Felicis Martyris Nolani die conscripsit apposita serie miraculorum, quæ Deus Opt. Max. ad Sancti Reliquias perpetrabat, nisi ad hæc maxime valere Sanctorum patrocinium & tutelam? Audiamus ipsum, si lubet, neque enim ejus me versus unquam pigeat adscripsisse:

A

*Cernere sæpe juvat variis spectacula formis
Mira salutantum, & sibi quæque accommoda votis
Poscentum; videas etiam de rure colonos
Non solum gremio sua pignora ferre paterno,
Sed pecora agra manu sæpe introducere secum,
Et Sancto quasi conspicuo mandare licenter:
Moxque datam sua confisis ad vota medelam
Experio gaudere Deo; & jam credere sana,
Et vere plerumque brevi sanata sub ipso
Limine, lata suis jumenta reducere testis.*

B

Quid S. Leo Serm. 1. in sacrum Apostolorum pariter principum Petri & Pauli diem, cum inquit: *Sicut & nos experti sumus, & nostri probavere majores; credimus atque confidimus inter omnes labores istius vite ad obtinendam misericordiam Dei semper nos specialem patronorum orationibus adjuvandos, ut quantum propriis peccatis deprimimur, tantum Apostolicis meritis erigamur.* Pertinent huc etiam illa D. Basilii verba *Homelia* in quadraginta Martyres consignata: *Qui aliqua premitur angustia, ad hos confugiat; qui rursus latatur, hos oret. Hic ut à malis liberetur, ille ut duret in rebus latis. Hic mulier orans pro filiis auditur; peregrinanti viro redditum incolumem, egrotanti vero salutem implorat, &c.* Sed Fasciculum hunc Eusebii Cæsariensis verbis, quasi rastro quodam, involvam ac cumPLICabo, facit enim mire ad hanc rem, quam habemus præ manibus, concludendam: *Hæc nos, inquit lib. XIII. de preparatione Evangelica cap. VII. quotidie facitamus; qui veræ pietatis milites ut Dei amicos honorantes, ad monumenta quoque illorum accedimus, vota quoque ipsis facimus, tanquam viris sanctis, quorum intercessione ad Deum non parum juvari profitemur.* Hæc erant, quæ de Sanctorum cultu, & sacrarum Reliquiarum veneratione, nobis quam brevissime perstringenda duximus eorum in gratiam, qui se nostrum ad Templum conferent oraturi. Nunc ad Cœnobium & ejusdem Monachos veniamus, res eorum vetustissimas percensuri, ne quid consulto videamur omittere voluisse.

C

JO. ANT. CASTELLIONAEI
FLORILEGIUM
ANTIQUITATVM
PAROECIAE
D. VINCENTII IN PRATO.
SECTIO I.

FASCIC. VI.

F

Gervasii Martyrum corporibus, & Heriberto Archiepiscopo quadam. Mediolani exscidium à Rubrobarbo.



DE Cœnobio & ejusdem Monachis hac in parte dicturi, rem omnem paullo altius repetemus. Ac illud in primis uti certum supponimus, Monachorum institutum recens non esse, neque ab ipsis dumtaxat nascentis Ecclesiæ Christianæ primordiis vigere cœpisse cum Philone Hebræo teste, qui de Jesuæ scribens ait, multos ab iis Monasticæ vitæ formam;

G g

suum

Ex occasione Monachorum Cœnobii D. Vinc. Monachalis instituti antiquitas, etymon, Principes, Regula, Lupercorum gens Fabia apud D. Vinc. Cœnobium habitare solita. Sepultura genera duo, ritus sepeliendi plures. Lupercos post Evangelii lucem solitarios, Heremitas, Monachos tandem dictos. Vincentianum Templum beatissima Virgini quis dicarit, Cœnobium à quo conditum. Benedictinorum apud Mediolanenses initia, & incrementa. Qui lapsi in assignando Monasterii Monialium S. Vincentii conditore. Vincentianorum Monachorum laus, regula, mores, & instituta. Historia de dente, & aureo Altari S. Ambrosii, deque sanctis ejusdem Protasii, &

suum desumpſiſſe exordium, vero verius putaviſſe, inter quos eſt Epiphanius *Hæreſi* xxix. E cujus hæc ipſa ſunt verba: *Reperies autem ſtudioſe etiam hoc argumentum in Commentariis Philonis, in libro de Eſſais ab ipſo inſcripto: qui horum converſationem & laudes eorum exequens, & monaſteria ipſorum in vicina circa Mariam paludem recensens, non de aliis quibusdam narravit, quam de Chriſtianis.* Quo loco Epiphanius inſinuat Philonem de Eſſæis, hoc eſt, de Jeſſæis eſſe locutum, non de Eſſenis; Jeſſæos enim à Jeſu, ſive à Jeſſe, ex quo Chriſtus ſecundum carnem, affirmat nominatos eſſe Chriſtianos ipſo exordio naſcentis Eccleſiæ, & Dionyſius Areopagita ubi de Nazaræis & Monachis aliis ſermonem habet, ſed ab ipſa prima incuntis Mundi ætate originem deſumpſiſſe. Cum enim Monachus à Græca voce ΜΟΝΟΣ, quæ ſolitarium Latine ſonat, apertiffime derivetur, fuerintque aliqui in ipſo pene Mundi exordio, qui ſolitariam vitam egerint, ac præſertim Seth, & Enos, ut ex *Gen.* cap. iv. colligitur, à quibus & Sethini ſacris in hiſtoriis filii Dei appellati, & ex Joſepho Hebræorum Hiſtorico confirmatur lib. de *Antiquit. Judaicis* i. cap. iv. Ex Patriarchis antiquis etiam alii nonnulli rationem eandem vivendi amplexi ſint, ut Jacob tum cum ſibi irati fratris minas & odia declinavit, & ante ipſum Iſmael cum Agar in ſolitudine Berſabee, & in deſerto Pharan procul ab arbitris omnibus commorantes ex *Gen.* capp. xxi. & xxviii. & ſupra laudato Hiſtorico lib. i. cap. xxvii. Moyſes etiam ſive cum Pharaone ſibi necem ac perniciem moliente ſeceſſit ad focerum Jetrum in regione Madian, ibique pavit illius gregem in intima deſerti parte non procul à Monte Oreb, in qua & ardentis rubi, nec in ignes confidentis, ſpectaculo recreari; & Deum ſibi ex illo loquentem audire meruit, ſive cum Sinai montem ſolus adſcendit, in eaque ſolitudine quadraginta dierum ſpatio commoratus lapideas Legis tabulas Dei ipſius digito exaratas accepit; Samuel tum cum Populi celebritatem atque frequentiam declinabat; David tum cum ſe Regi Sauli ſubducens & abdens, in ſylvas & nemora ſerarum in luſtris & ſpecubus latitabat; Elias Theſbites, qui cum diu zona pellicea cinctus ſibi nimis adverſæ Reginæ Jezabellæ furores metuens magnis itineribus per invia loca ſuſceptis, angelico inter fugiendum pane, potuque cæleſti donatus eſſet, ut in illius fortitudine, demum in vaſtis ſolitudinibus ac horridis montium cacuminibus ſolus ut plurimum habitavit. Cujus veſtigiiſ inſiſtentes alii, ac ipſe potiſſimum Eliſæus, qui filiis Prophetarum ab Elia magiſtro collectis in ſolitudine præſuit, non ſecus ac ſi quis eorum Abbas eſſet, Iſajas, & Jeremias, & alii Prophetæ Minores quamplurimi, quos longum eſſet omnes ac ſingulos percenſere, magnum Anachoreticæ vitæ decus & gloriam pepererunt, ingentesque ad eam amplectendam cum ſuis, tum poſteris, amoris & ardoris igniculos reliquerunt. Libet itaque inſignem hic D. Hieronymi locum ad *Paulinum* adſcribere, qui huc maxime ſpectat: cum enim de Elia, Eliſæo, & filiis Prophetarum hæc dixiſſet: *Noſter princeps Elias, noſter Eliſæus, noſtri filii Prophetarum, qui habitabant in agris & ſolitudinibus, & faciebant ſibi tabernacula ad profluenta Jordanis, ſtatim ſubdit: De his ſunt & filii Rechab, qui vinum & ſiceram non bibebant, qui morabantur in tentoriis, qui Dei per Jeremiam voce laudantur, & promittitur iis, quod non deficiat de ſtirpe eorum vir ſtans coram Domino.* Repetit idem ipſum alibi ad *Ruſticum* Monachum ſcribens, filioſque Prophetarum, quod ad rem noſtram mirum in modum facit, Monachos appellavit: *Filii Prophetarum, inquit, quos Monachos in Veteri Teſtamento*

A *legimus, adificabant ſibi caſulas juxta fluenta Jordanis, & turbis Urbium dereliſtis, polenta & herbis agreſtibus viſcitabant.* Quam in ſententiam paria propemodum Ambroſius libro i. de *Virginibus*, eaque pluribus, ut ob id à nobis, brevitati ſtudentibus, omittenda ſint, D. Hieronymi teſtimonio jam contentis. D. ſane Auguſtini verba prætermittenda non ſunt, qui Monachaliſ inſtituti antiquiſſima primordia ſuſpiciens & admirans *Traſt.* xcvi. in *Joannem*, ſic ſcripſit: *Monaſteria & Xenodochia poſtea ſunt appellata novis nominibus, res autem ante ſua nomina erant, hoc eſt qui ſolitariam vitam traducebant, antiquiores erant: ſed novis his nominibus minime nuncupabantur.* Sicut autem inter Prophetas Joannes Domini Præcurſor major cæteris exſtitit, ita magis atque magis ad vivum ſolitariam cum in cibo, tum in potu, ac veſtibus, vitam expreſſit. Quod pulchre nos etiam docuit S. Jo. Chryſoſtomus *Homil.* i. in *Marcum*, cum inquit: *Sicut ſacerdotum principes ſunt Apoſtoli, ita & Monachorum princeps Joannes Baptiſta.* Et iterum in altera *Homilia*: *Conſiderate, inquit, Monachi dignitatem veſtram; Jo. princeps veſtra eſt dignitatis, ipſe Monachus, ſtatim ut natus in eremo vivit, in eremo nutritur.* Subſcripſit eidem Hieronymus *epiſtola* xxii. ad *Euſtochium* in hæc verba: *Hujus vita auctor*

C *Paulus, illuſtrator Antonius, & ut ad ſuperiora contendam, princeps Joannes Baptiſta.* Fatentur hæc eadem Iſidorus, & alii luculentiffimi Scriptores Catholicæ veritatis, quos ſi cui videndi eſt otium, videre commodè poterit apud Petrum Caniſium, qui eruditiffimo Opere teſtimonia ea de re omnia propemodum eſt complexus.

Cæterum hanc eandem vivendi rationem ad omnis poſteritatis exemplum ipſemet etiam Chriſtus Dominus, humani generis Servator ac vindex, ſacroſancto illo quadraginta dierum jejuni in deſerto peracto conſecrare voluit, & probare. Ex quo factum eſt, ut ipſe quoque Princeps Apoſtolorum Petrus magiſtri ſui exemplo commonitus in ſpeluncam ſeſe receperit ad delendum lachrymis & dolore abnegationis ſcelus, quod admiferat in eundem: & Euangelista Joannes in Pathmos Inſulam relegatus ſolitariam ibi traducens vitam, divinam Apocalypſin inſtinctu, afflatuque cœleſti conſcripſit: & Euangelista Marcus Alexandriæ in Ægypto primus Monachos inſtituerit tanta ſapientia præditos, ut de eorum laudibus ſcripſerint Philo Hebræus, eam ob cauſam inter Eccleſiaſticos Scriptores à D. Hieronymo recensitus in libro ejus tituli cum dixit: *Philo Judæus, natione Alexandrinus, de genere Sacerdotum, idcirco à nobis inter*

E *Scriptores Eccleſiaſticos ponitur, quia librum de prima Marci Euangelista apud Alexandriam ſcribens Eccleſiam, in noſtrorum laude verſatus eſt: non ſolum eoſ ibi, ſed in multis quoque Provinciis eſſe commemorans, & habitacula eorum dicens Monaſteria.* Ex quo appareat, talem primam in Chriſto credentium fuiſſe Eccleſiam, quales nunc Monachi eſſe nituntur, & cupiunt, ut nihil cujuſquam proprium ſit, nullus inter eoſ dives, nullus pauper, patrimonia egentibus dividantur, orationi vacetur, & psalmis, doctrina quoque ac continentia, quales & Lucas refert primum Hieroſolymis fuiſſe credentes. Flavius Joſephus, Petrus Damianus, Joannes Caſſianus, & alii, Diſcipulorum decem Chriſti Domini veſtigia vel longe ſecuti cæteri miros in ſanctimoniam & ſalutis via progreſſus habuerint, ac inter illos Maria potiſſimum Magdalena cum ſociis. Ea ſiquidem apud Maſſiliam in ſolitudine, quo ex Judæa incolumis divinæ Providentiæ aura nullis velis, aut remigio, deſecta fuerat, permultis annis ſola vixit & flevit. Qua de vectione cum nuper legerim lepidum Epigramma, hic apponendum curavi:

*Parva domus, mea cura, feris committitur undis,
Fors bona; nescio quo navigat, Eure, fave.
Hei mihi ne rapido minitetur vertice pontus,
Et pereas media parvule linter aqua.
Massilia ignotas ô si te errare per undas
Sciret? quotquot habet, mitteret illa rates.
Tu mare, vos venti, trepida succurrite cymba,
Nullus in imbelli navita puppe sedet.
Exiguum est pondus, facilis via, poscitis, & vos
Si pretium, pretium est grande, tulisse pios.*

Eaque nostra nunc etiam tempestate spelunca visi-
tur & frequentatur. Ad quam cum aliquando de-
votionis ergo pervenisset Etruscorum Poetarum
longe clarissimus Franciscus Petrarca, elegantis-
simainibi hæc carmina, perpetuum susceptæ suæ ad
illam peregrinationis monumentum, expressa re-
liquit, quæ postmodum ab exemplari in Oratorio
illic appenso, & propemodum oblitterato, Ludo-
vicus Vivaldus è familia Prædicatorum exscripsit,
& ad nos transmisit, ut ipsemet fatetur in Ope-
re, quod de veritate contritionis emisit:

*Dulcis amica Dei, lachrymis inflectere nostris:
Atque meas intende preces, nostræque saluti
Consule, namque potes: neque enim tibi tangere frustra
Permissum, gemituque pedes perfundere sacros,
Et nitidis siccare comis, ferre oscula plantis,
Inque caput Domini speciosos spargere odores,
Nec tibi congressus primos, à morte resurgens,
Et voces audire suas, & membra videre,
Immortale decus, lumenque habitura per ævum,
Nequicquam dedit atherei Rex Christus Olympi.
Viderat ille cruci hærentem, nec dira paventem
Judaica tormenta manus, turbaque furentis
Iurgia, & insultus, æquantes verbera linguis:
Sed mœstam, intrepidamque simul, digitisque cruentos
Tractantem clavos, impletem vulnera fletu,
Pectora tundentem violentis candida pugnīs,
Vellentem flavos manibus sine more capillos:
Viderat hæc, inquam, dum pectora fida suorum
Diffugerent pellente manu: memor ergo remisit
Te primam ante alios, tibi se prius obtulit uni,
Te quoque digressus terris, & ad astra reversus,
Bis tria lustra cibi nunquam mortalis egentem
Rupe sub hac aluit, tam longo tempore solis
Divinis contenta epulis, & rore salubri.
Hæc domus arcta tibi stillantibus humida saxīs,
Horrisco tenebrosa situ, tecta aurea Regum,
Delicias omnes, ac ditia vicerat arva.
Hic inclusa libens longis vestita capillis,
Veste carens alios ter denos passa Decembres
Diceris, hic non fracta gelu, nec victa pavore:
Namque famem, frigus, durum quoque saxa cubile,
Dulcia fecit amor, spesque alto pectore fixa,
Hic hominum non visa oculis, stipata catervis
Angelicis, septemque die subvecta per horas,
Cœlestes audire choros, alterna canentes
Carmina corporeo de carcere digna fuisti.*

Libuit omnia nostro quoque in Opere recensere,
licet eorum pleraque pars minus ad rem nostram
faciat: tum ut aliquo testimonio declararem me
hanc Divam, clarissimum pœnitentiæ speculum,
summopere venerari, mihique in Advocatam &
Patronam præcipuam delegisse; tum ut adeo cul-
tis venustissimi Poetæ carminibus tantæ scœminæ
laudes, & merita fierent notiora. Verum enim ve-
ro alia pleraque huic non dissimilia Sanctorum alio-
rum solitudinis amantium exempla passim inveniet
pius & studiosus Lector in gestis Patrum Eremita-
rum, ne nos hac in parte longiores simus. Ne-
que enim aliunde tot ac tanti Eremitæ, Anacho-
retæ, & Monachi in vastis illis Ægypti recessibus
existiterunt, Pauli, Antonii, Macharii, Arsenii,
& alii hujuscæ vitæ homines, qui usque ad S. Ba-
sili tempore sine ullis certæ disciplinæ regulis vi-

A xerunt. Is enim primus duriora illa antiquorum
Monachorum instituta, quæ à S. Pachomio, qui
vixit sedente in Apostolica Petri Cathedra D. Syl-
vestro, & imperante Constantino Magno, ab O-
rieio & Theodoro conscripta fuerant, uti nos mo-
nuit S. Hieronymus in *Præfatione eorundem Instituto-
rum* à se Latio donatorum, quorum & meminit
Gennadius, ubi de viris illustribus agit, ad me-
liorem & certiore formam redegit: quamvis
D. Benedictus post ipsum eam Monachorum re-
gulam luculenter admodum, sancteque conscri-
pserit, quam à S. Gregorio I. Pontifice laudatam
& cultam omnes postmodum occidentales Mona-
chi complexi sunt. Sed quorsum hæc tam alte,
tam longe ducta de Monachis à nobis hic in me-
dium afferuntur; & ex antiquitatis, ut ita dicam,
latebris eruuntur? nempe ut longe facilius ad
credendum Lector adducatur ea, quæ mox non tam
de Cœnobii nostri Gentilibus Lupercis religiosis
alioqui viris, & vetustissimis sacerdotibus subjun-
gemus, quam quæ de Christianis ejusdem Cœnobii
Monachis sub D. Benedicti regula eo in loco de-
gentibus loco & ordine afferemus.

B De Lupercis igitur ut scribamus, Faunum Re-
gem omnium Latii vetustissimum primum Abori-
ginibus imperasse, homines ferarum more viven-
tes ad mitiorem vitam traduxisse, lucos sacrasse,
C sua locis & urbibus nomina imposuisse, ardes ad
arcendas temporum injurias ædificasse, Tempa con-
didisse, quæ idcirco fana dicta sunt, Lupercos &
Augures instituisse: Lupercos vero rem ei divi-
nam fecisse, Lupercalæ ludos suo de nomine ce-
lebrasse, apud antiquitatis bene peritos constat.
Panem eundem Lycæum, & Sylvanum anti-
quitas nominavit, eique hujusmodi Sacra ab
Euandro Rege, qui ab Arcadia pulsus ac pro-
fugus in Latium venerat, ac arc demum Roma-
næ præfuit, celebrata primum, & ad nos de-
lata, una voce Scriptorum perhibetur. Ac per
D Italiam quidem initio disseminata, deinde cum
per alias regiones, quæ certatim imitari Romanos
cum in ædificiis publicis exstruendis, tum in sa-
cris peragendis, eorumque sacerdotibus instituen-
dis conatæ sunt: ita factum est, ut antiquitus
Mediolani (quod ex bona Galvanei fide supra re-
tulimus) non tam ædificia publica fuerint, verum
etiam Deorum templa & fana, eorumque sacrifi-
culi & sacerdotes. Neque mirum sit ad nostrum
PRATVM, cui contermina quondam erat Syl-
va illa, quam ad Ulmos consueverant appellare,
ut supra docuimus, priscis illis temporibus Lu-
perci sacerdotum omnium, teste Jo. Rosino lib. III.
E *Romanarum Antiquitatum* cap. II. antiquissimi mo-
rati sint, ut qui ex propria disciplina loca hujus-
modi adamarent, in quibus & humana cadavera
conderentur. Siquidem Lupercula sacrificia ad
expiandos Manes fiebant, auctore Pomponio Læ-
to, ubi de sacerdotiis Romanorum à Græcis Λυ-
καία dicta, nomine à Pane Lycæo Numine Ar-
cadico derivato, quem Romani vocabant Junum,
eundemque putabant esse cum Fauno sylvarum
& agrorum Deo. Porro Lupercos hic commo-
rantes ex Fabiorum ordine fuisse assequor conje-
ctura, quod adhuc adjacens Prato nostro vicus
nomen Fabiorum obtinet à Fabio ordinis præfecto
ductum, ut infra suo loco commodius ostende-
tur, licet ab imperitis, corrupto vulgi errore
vocabulo, Fabrorum vicus soleat appellari. Nam
& Propertius Lupercorum Fabianorum eo carmi-
ne meminit:

Unde Licens Fabius sacra Lupercus habes.

Et Ovidius illis:

*Risit, & indoluit Fabios potuisse, Remumque
Vincere, Quintilios non potuisse suos.*

Ex quo quidem Ovidii loco meridiana luce clarius liquet, ex Lupercis fuisse quosdam, qui Fabii, alios, qui Quintilii dicerentur ex supra laudati Rosini animadversione, illud insuper observantis, Fabianos Lupercos in Romuli, Quintilianos in Remi partibus exstitisse. Idem ibi plura Rosinus, quem, qui volet, leget. Eo vero magis nostra nobis conjectura placet de Lupercorum sede Prato nostro proxima, quod in extero urbis angulo situm esset, nec procul ab eadem Urbe, ita ut facili negotio eo loci deferri possent cadavera de more committenda terræ, more, inquam, veteri, nec apud Judæos tantum, qui suos extra urbem in hortis & speluncis humare soliti; sed etiam apud Græcos, apud quos religionē cautum erat, sicut etiam apud Romanos, imo apud hos gravissimis etiam poenis lege xii. Tabularum, senatusconsulto ac edictis Adriani, Antonini, Diocletiani, & Maximiani Imperatorum vetitum, ne quis in Urbe sepulchrum haberet, vel ab ipsis Urbis incunabulis, ut multis, & omnium quidem disertissime probatum est à Joanne Kirchmanno lib. ii. de Funer. Romanorum cap. xx. & deinceps usque ad xxv. cui profecto gratias immortales debent antiquitatis studiosi omnes pro argumento hoc adeo dilucide posteris explicato, ut ego certe debeo, habeoque jure & merito, ac ut alii mecum habeant, rogo. In agris etiam, pratis, & hortis sepulcra olim Veterum exstitisse idem auctor colligit ex Martialis epigr. XLIII. lib. x. ubi de sepulcro uxoris Phileros:

Septima jam, Phileros, tibi conditur uxor in agro:

Plus nulli, Phileros, quam tibi reddit ager.

Suetonio cap. LIX. testante, Caligulae cadaver in hortis Lamianis ambustum, Julio Capitolino Adria-

num apud Bajas mortuum in hortis Domitiae collocatum tradit. Quamquam Plato vetaret defunctos in agro culto, eove, qui coli posset, humari, docente idipsum nos Cicerone lib. ii. de Legibus his verbis: *Ut mortuorum corpora ea agri pars tantummodo recipiat, qua sine detrimento vivorum compleatur: qua autem terra fruges ferre, & ut mater, cibos suppeditare possit, eam ne quis nobis minuat, neve vivus, neve mortuus.* Ex quo Ciceronis loco illud quoque colligimus in Pratis humare præcipue licuisse, quippe quæ nec colantur, nec fruges ferant, imo sine ullo herbarum inibi adolescentium detrimento cadavera recipere possunt, quod vel ipsa nunc experientia comprobari facile potest, qua duce videmus, licet in Cœmeteriis juxta sacratas Aedes positæ, mortuorum corpora ex sepulchris extracta, terra passim conduntur. In iisdem tamen herbas virescere, immo & alicubi quoque liberius luxuriare late succrescente fœno, ut non immerito à plerisque Cœmeteria Ecclesiarum ipsarum prætulerantur. Duo tandem cum præcipui sepeliendorum mortuorum modi in usu apud Romanos fuisse ferantur, Humatio scilicet ac Combustio, eorum utrumque in nostro Prato viguisse, qui dixerit, haud aberrabit à vero. Ac combustos quidem ibi fuisse quamplures, evincunt Urnæ pene innumeræ olim apud Templi nostri Cœnobium reperiæ, ac præcipue tres nuper à me defossæ cum ejusmodi notis, quæ dicta de Lupercis Dei Sylvani sacerdotibus mirum in modum firmant. Quocirca in antiquariorum gratiam eas adpingendas curavi; tum ut antiquam formam suam exhibeant, tum ut ea ratione characteres, quos habent, injuriæ temporum subtrahantur.



Literæ siquidem aliæ minusculæ, quæ ex antiquorum figulorum usu peculiari sigillo imprimi consueverant ad earum opificum memoriam, propemodum evanuerunt non sine deploranda jactura, quod in iis libenter agnovissemus earundem opificis nomen. Solliciti nimirum erant artifices cujuscunque operæ, ut inquit Cicereius lib. ii. *Antiquorum Monumentorum*, Mon. viii. de nominis perpetuitate: quin imo, ut auctor est Cicero lib. i.

Tusc. Questionum, post mortem etiam nobilitari volebant. Quo sane consilio etiamnum videmus statuarios, pictores, & alios cujuscunque generis opifices & architectos nostros nihil habere antiquius, quam ut nomen proprium suis operibus inscribant.

Harum Urnarum occasione Lectorem monuerim mihi admodum non placere, quod aliquando placuit eruditissimo Viro, cum eas mecum apud me re-

cogno-

cognosceret, eas scilicet non esse mortuales Urnas, sed earum ex numero, quæ in sacris Deæ Vestæ solemnibus adhibebantur, futiles à fundendo dictas, ut Festo placet; aut certe ab antiquo verbo futio, ut alii censuerunt, eo quod liquorem sibi commissum non satis fideliter custodirent ob patuli oris hiatum & fundi nimis acuti lancinatum acumen, ut ex descriptione ejusdem patet apud Donatum *ad scen. v. actus III. Andria Terentiana*. Utebantur enim hoc vasis genere in sacrificiis Deæ Vestæ, quod aquam ad ejus sacra haustam ex Junturæ fonte in terram effundere non licebat, quod si fieret, piaculum ac triste omen erat. Quamobrem ejus formæ vas ad ea sacra rite peragenda excogitatum fuit, quod stare non posset, sed statim ac humi positum esset sua sponte concidens, ac veluti se prosternens receptam aquam emitteret, ut aliam ejusdem copiam ad eadem Vestæ sacra haustam admittere ac recipere posset, ac Deæ sacrificulos omnis culpæ piaculo liberare, vel admissam in se transferre quodammodo, & derivare. Ita siquidem Lucatius *ad lib. VIII. Theb. Futile*, inquit, *vas est quoddam lato ore, fundo angusto, quo utebantur in sacris Deæ Vestæ, quia aqua ad sacra in terra non ponebatur, quod si factum esset, piaculum erat. Unde excogitatum est vas, quod stare non posset, sed si positum esset statim funderetur, unde & homo commissa non retinens futilis dicitur, & contra non futilis bonus consiliis. Licet quidam eruditi hoc vas Cadum, & Scyphum dixerunt, illudque manibus tenere oportebat, quod quidem Flaminica Virgines sacrorum ministra, aut Vestalium famula, & nonnunquam pueri Flaminum ministri, quos Camillos appellabant, ut dictum est alibi, patrimi & matrimi omnes coronati tenebant manibus. Utebatur autem Vestæ sacerdos ea dicendi formula, cum aquam in vas hujuscemodi infundebat, Ego te statuo, uti ex sacrorum illorum religione cautum erat, licet ex ipsa vasis ad lapsum facti forma sciret aquam protinus omnem, quam in se receperat, effundendam. Et quidem his & aliarum ejuscemodi rationum ponderibus Vir eruditissimus suam nitebatur sententiam confirmare.*

Contra quem adnitebar ego valide, & pro Urnis nostris, quod Mortuales essent, uti pro focis & aris sedulo decertabam. Pro me primo Donatus erat, qui Vas futile latissimi oris esse disertissime testabatur, quo nihil minus Urnis nostris convenit, ut quæ collo sint gracili admodum & orificii perangusti, quales se ipsas produnt suo ipso vultu, & collo, cujus ergo volumus earum figuram uniuscujusque oculis objici ad contemplandum. Cineres ipsi præterea, quibus Urnæ nostræ plenæ repertæ sunt carbonibus intermixtis, qui eam ob causam maxime conservantur, sententiam nostram mirum in modum confirmabant. Eandem illud magis ac magis etiam confirmabat, repertas in iis fuisse particulas aliquot lucernarum fictilium, quarum usus ad funera pertinebat, ut vel ex iis apertissime pateret, eas Mortuales esse, non Vestæ sacrificiis, ut ille nervis contendebat omnibus, destinatas. Sed ejus opinio minus probabilis fiebat ex eo, quod nullum hic Vestæ Templum existisse legeram, cujus vasa illa fuisse quis posset sine erroris suspitione censere: cum altera ex parte mihi penitus exploratum esset, Jovem eo in Templo cultum, & proximam illi planitiem humandis hominum cadaveribus sub nomine Polyandri Jovis patuisse. Itaque major earum etiam numerus repertus est, quam esset sacris unius Deæ tantummodo usibus opportunus. Addebam illud insuper, me nescire, quorsum sacrificiorum suorum vasa sepelire solet antiquitas, & eo quidem ordine, qui magis mortalibus Urnis, quam Vasis aliis conveniret, integra præsertim & plena cinerum & carbonum.

A Siquidem enim vasa Deæ Vestæ fuissent, & attrita fuissent manibus ministrorum, & vacua, cum solam aquam exciperent, & exceptam protinus effunderent in propinquum solum. Poterant hæc obfirmatum cujusvis animum è sua sententia dimovere, sed promovebam nihil. Cum ecce Urnas ipsas arripio, & incisas in iis notas ostendo, quæ propriæ funebrium Urnarum, quarum frequens apud Priscos usus. Vidit, legit, abiit, nec qua mente scio. Quamobrem quovis ego pignore contenderim, Urnas nostras mortuales esse, earum, inquam, ex genere, in quibus crematorum cineres condebantur, quarumque crebra mentio apud Scriptores omnes veteris & profani ævi. Propertius enim *lib. II. eleg. XIII.* sic earum meminit:


*Deinde ubi suppositus cinerem me fecerit ardor,
Accipiat manes parvula testa meos.*

Ita & Cicero *Tuscul. I.* carmen illud priscum adducens:

Aspicite Cines Ennii imaginis Urnam.

Et alii, quos omitto, satis ex his probatum putans cremationem apud nos quoque olim fuisse Veteribus usitatam.

Ut igitur ad alterum sepulturæ genus in nostris quoque Pratis Jovis Polyandri appellatis, usurpatum antiquitus accedamus, humatos inibi etiam fuisse non obscure probant veterum marmorum Inscriptiones in primo Fasciculo laudatæ, quibus hic addemus alias duas recens repertas, neque meo judicio contemnendas. Una est hominis sine dubio Ethnici, uti patet ex formula loquendi vetustissima, marmore candido incisa his notis:



Altera ejus candoris tabulæ consignata his aliis notis:

B M
HIC REQUIESCIT IN
PACE CONSTANTIA
QVAE VIXIT IN SE-
CVLO NI IIIX. ANI

Fateor tamen apud antiquos Romanos & alios per Italiam sparfos atque diffusos populos morem illum cremandi cadavera maxime invaluisse, repudiatis ritibus aliis gentium aliarum, ut qui crudelem quandam barbariem sapere viderentur, eos sic complectente, atque describente Silio Italico, *lib. XIII.* quem audiamus licet:

*tumuli & cinerum sententia discors.
Tellure (ut perhibent) is mos antiquus Ibera,
Exanima obscænis consumit corpora vultur.
Regia quum lucem posuerunt membra, probatum est
Hyrcais adhibere canes: Egyptia tellus
Claudit odorato post funus stantia saxo
Corpora, & à mensis ex sanguinem hand separat umbram,
Exhausto instituit Pontus vacuare cerebro
Ora virum, & longum myrrhata reponit in ævum.
Quid qui reclusa nudos Garamantes arena*

*Infodiant? Quid, qui sevo sepelire profundo
Exanimis mandant Libycis Nasamones in oris?
At Celta vacui capitis circumdare gaudent
Ossa (nefas) auro, & mensis ea pocula servant.
Cecropida ob patriam Mavortis sorte peremptis
Decrevit simul communibus urere flammis.
At gente in Scythica suffixa cadavera truncis
Lenta dies sepelit, putri liquentia tabo.*

Illud hic addam etiam de sepulcris, ea semper habita fuisse religiosa apud mitiores gentes, adeo ut inexpressibile quoddam scelus esset sepulchrum aliquod violasse, lege sanxerint sacrum illum locum esse, ubi cadaver jaceret humatum,isque diceretur in patrios cineres immixisse, cui adversa omnia caderent, & præter expectationem omnem. Apud nos quoque Christianis moribus institutos ecclesiasticis damnantur caerimoniis, qui aut lotium in sepulchris egresserint, aut quid aliud immundum adjecerint, vel admorint. Verum enim vero de sepulchris satis.

Ad Lupercos redeo, qui cum Sylvani Sacerdotes essent, solaque, & amœna loca ex proprio incolerent instituto, locaque humanis cadaveribus destinata religiosa essent, multas eos annorum centurias ibi ante Christi Servatoris adventum mansisse credendum est, ac forte iisdem ibi degentibus à Romanis rerum victoribus Templum Jovi Opt. Max. dicatum, de quo nos supra egimus accurate, adventante demum illuc Apostolo Barnaba, primo Urbis nostræ Antistite, miris eisdem signis & prodigiis ad Christiana dogmata fuisse conversos, aquisque lustralibus proximis Eustorgiani fontis ablutos superstitionem omnem Fauni ac Jovis inanum omnino Numinum exuisse, veramque vitam Monachorum more ad Christi Domini exemplum, cui non absimilem ad ea usque tempora vixerant, traduxisse. Quemadmodum enim apud Gentes ante Christum natum, D. Augustino teste *de Civitate Dei* lib. 11. fuisse feruntur Flamines, Protoflamines, & Archiflamines, quorum dignitates, diffeminata per Apostolos toto terrarum Orbe Christi Domini disciplina, in vera Ecclesia retentæ sunt, solis eorum nominibus commutatis, ita ut qui Flamines, Protoflamines olim appellabantur, Episcopi postmodum, Archiepiscopi, & Patriarchæ dicerentur varia iisdem auctoritate in populos divinitus impertita: ita credere par est, Lupercis illis ad meliorem frugem adductis nomen quoque aliud, non illud, quod nunc est proprium Monachorum, utpote novum tunc temporis, nec multis, uti paulo ante docuimus ex D. Augustino, notum, sed solitariorum, aut Heremitarum inditum fuisse consilio non humano. Ducunt in eam sententiam perantiquæ illius picturæ, sive historiæ monumenta, quæ prope Templi nostri fores interiores existunt. Videre scilicet est in illis senem quendam adspectu venerandum non Monastico, qui tunc haud fortassis vigeat, sed Heremitico habitu digito commonstrantem tribus ibi præsentibus Regibus, tria Sanctorum corpora rite suis in oculis collocata. Is enim habitus tum proprius veterum Monachorum erat, ut ex D. Athanasio habetur in *Vita S. Antonii*, cum ait, D. Antonium indutum tunica saccea & palliolo incessisse. Quamquam & vestimenta hæc in usum fuisse apud Monachos omnes Ægypti testis oculatus dicere poterit Cassianus in *de institutis Monachorum*, ubi hæc habet: *Sunt præterea quadam in ipso Ægyptiorum habitu, non tantum ad curam corporis, quantum ad morum formulam congruentia, quo simplicitatis, & innocentia observantia etiam in ipsa vestitus qualitate teneatur.* Cætera, quæ longiori serie idem ibi Cassianus prosequitur de Habitu Monachorum Ægypti, consulto omitimus, ne in re apertissima Lectorem diutius detineamus. Quicumque tamen

A de eodem Habitu plura scire desiderat, adeat Baronium *Annal.* Tom. II. anno CXCII. & Petrum à S. Andomaro lib. III. cap. II. *Illustrationum Religionis Monastica*, qui hoc ipsum argumentum alatis quamplurimis gravissimorum Scriptorum testimoniis pertractat, ac fuscè explicat.

Cæterum Heremitas nostros Ædem illam ipsam, vel Fanum illud Fauno dedicatum initio, & ævo succedente Jovi, Beatissimæ Servatoris nostri Matri ac Virgini dedicasse, propius accedit ad verum, quod propter Tyrannorum sibi tum modis omnibus obfistentium feritatem, suamque ac Christi sectatorum inopiam à fundamentis erigere potuisse credimus difficulter: easdem ob causas Capitolium Servatori Christo à Sancto Barnaba consecratum Galvaneus, Herculis vero Templum S. Laurentio Martyri & Levitæ Carolus à Basilica Petri Novariensis Episcopus docent. Quin immo aliquot annorum spatio apud Ædem hanc nostram B. Virgini dedicatam nonnullos ex iis Heremitis ad patrum usque nostrorum memoriam perdurasse notum est Historicis omnibus, & perspectum. Hæc & alia pleraque sacræ vetustatis illustria monumenta ad nos usque veluti per manus & traducem derivata adeo bona, quam quod optima à nobis fide narrata sunt, quamquam prodiga nescio qua facilitate credi videbuntur alia sententibus, & hujus antiquitatis rudibus ac ignavis. At qui ista sentiunt, sciscitentur, quæso, Desiderium Longobardorum Regem, atque is ultro affirmabit suis se vidisse oculis hujuscemodi solitarios homines, hoc in agro degentes, eisque ne in posterum sub dio pernoctarent, commodius, inquam, ut possent Numen supernum colere, proque sua & filiorum suorum salute preces assidue fundere, satis amplam Ædem extruxit, quam postea Cœnobium ex solo illorum conventu apposite nominarunt. Magnis hanc ipsam Ædem Rex ille censibus locupletavit, fructuosos fundos adjecit, redditibus auxit, ne stipem amplius Cœnobitæ illi hostiatim colligere cogerentur. Porro ne temporum diuturnitate regularis disciplinæ cultus una cum antiquis illis Monachis interiret, alios iisdem Monachalis disciplinæ peramantes viros suffecit recentes ac novos, quibus subsequens ætas nomen Benedictinorum dedit. Per id enim tempus jactis jam pridem Monasticæ disciplinæ fundamentis in Italia à D. Benedicto, Monachorum in Occidente patre ac Patriarcha, in monte Cassino majora in dies ejus Ordo incrementa capere consueverat, ita ut adduci facile quivis ad credendum possit, per varios ejus Alumnos huc atque illuc deductas fuisse colonias, eorumque professionem, habitum, & nomen latissime propagatum, à nostrisque Heremitis facili negotio susceptum.

Jecit itaque Cœnobii nostri fundamenta Pius Longobardorum Rex post aliud à se D. Benedicto conditum, dicatumque Cœnobium, in Leno agri Brixiani vico, filiamque Anfilbergam divino cultui Virginem consecratam in Monasterio à se quoque ad urbem Brixiam Christo Servatori, & S. Julii Martyri dedicato summam approbante Regis pietatem, & operam Summo Pont. Paulo anno DCCLXII. Ex Sigonio *de Regno Italia* lib. III. & Alberto Miræo in suis *Originibus Benedictinis* cap. II. cum Mediolanum victor rediisset anno Domini DCCLXX. aut certe non multo post ex veterum Annalium fide: & primo quidem ad Carrubium Ticinensis Portæ, ubi nunc sacra D. Xisto stat ædes, ex qua mox in suburbia ad S. Vincentium est translatum, cum ipsum in locum ubi nunc viget, vigente perpetuo penes hujuscæ Monasterii Præfules jure eligendi Rectorem sacræ Xisti ædi præficiendum, eo plane tempore, quo teste Nicandro vetustissimo Chro-

Chronographo, Cœnobium Cisterciensium, quod prius ad D. Satyri visebatur intra Romanam Portam foras in ampliorem Ambrosianæ Basilicæ planitiem, veluti novam in Coloniam est deductum. Ac ipsi quidem Ambrosiani Monachi perantiquam huiusce facti memoriam sancte quotannis recolunt sacro ipsi Satyri die ejus ad Templum sacrum illic solemne facturi recte & ordine prodeuntes. Monasterium quoque D. Simpliciani, quod initio cernebatur juxta S. Victorem ad Quercum, qui nunc commutato nomine S. Prothasius ad Monachos nuncupatur, cujusque Parœciæ moderatorem ex antiquo patronatus jure Monachi ipsi eligunt, ad D. Simpliciani templum delatum est, à quo nomen habet. Nec temere Monasteriorum sedes alio commigrarunt. Nam in interiore Urbis parte, succrescente in dies singulis cive, laxiori opus eidem erat ambitu ad domicilia collocanda. Quamobrem alio se recipientes Monachi suarum illi sedium copiam, ne dum potestatem, ultro fecerunt, quo juxta vitæ Monasticæ institutum relicta frequentia populi in suburbiorum recessibus, soli viverent, silentiumque sibi commissum perfectius observarent.

Ex his toto cœlo constat aberrasse nostrates non ignobiles Chronographos duos, qui obsequendi fortasse Virginibus Vestalibus desiderio ducti, temere (uti par est credere) prodiderunt Monasterium à Rege Desiderio conditum fuisse illud, quod nunc incolunt D. Vincentii Moniales in Maynorum via non longe ab ea posita, quam Mirabilium vocant. Cum enim Monasterium hoc alio translatum fuisse nusquam legatur, nec aliunde sciatur diversum illud esse ab eo, quod Longobardus Rex condidit, credere necesse est. Quid quod D. illius Vincentii Monasterium Novum etiamnum dicitur, ut à nostro, quod antiquitas à Longobardorum Rege conditum Vetus appellabatur, apertissime distingueretur hac nota. Et sane hallucinatum hac in re fuisse par Scriptorum alioquin oculatorum valde miror, cum eos legisse constet Benvenutum in *Chronicis*, qui fol. 15. sic inquit: *Monasterium S. Vincentii Porta Ticinensis fundavit Desiderius Longobardorum Rex, similiter & Monasterium S. Peiri de Clivate Diœcesis Mediolanensis anno Domini DCCLXXX. Joannem à Monte in Manipulo Florum, qui ait: Desiderius fuit Rex vigesimus Longobardorum & ultimus, qui regnavit annis xxv. & fuit miles Curia, & Mediolanensis natione, qui dum pergeret ad locum electionis in via super scutum dormiens, serpens caput ejus circumdavit, qui excitatus dolore capitis gravatus à scutifero suo didicit, quod serpens ei fecit, quod pro bono augurio habuit: ideo in vexillo viperam portavit, qui tandem factus Rex per electionem, Monasterium Monachorum S. Vincentii fundavit.* Jacobum Galvaneum Chronicorum minorum titulo x. ubi hæc habet: *Desiderius anno DCCLXI. mortuo Aistulpho Rege Rachisius Monachus frater ejus derelicto Monasterio voluit arripere regnum, & pugnavit contra Desiderium, qui regnum obtinuit annis xxv. hic natus ex Comitibus Angleria, & genuit Bernardum, Aldechisum, & Ghislam, & anno DCCLXX. in civitate Mediolani ad Carrubium Porta Ticinensis, ubi nunc est Ecclesia Sancti Sixti, fundavit Monasterium S. Vincentii.* Et Chronicorum majorum cap. cxcii. ubi hæc (post factam scilicet mentionem Desiderii conditoris Monasterii Clivatenfis) scribit: *Construxit etiam Mediolani Monasterium S. Vincentii in loco, ubi nunc est Ecclesia S. Sixti ad Carrubium Porta Ticinensis, Christi anno DCCLXX. & alios priscos auctores omnes ab iisque sua fere omnia desumpsisse: ii vero omnes una voce testantur non alibi, quam ad Carrubium Ticinensis Portæ Cœnobium à Desiderio Longobardorum Rege fuisse conditum, & inde ad D. Vincentii in Prato planiciem*

A annis labentibus deportatum, Monachis item non Monialibus brevi temporis spatio locupletatum. In hoc itaque Cœnobio Monachalis religio sic diu fulsit, adeoque fulsit, ut ejus Alumni non solum multis Italiæ locis, verum etiam in toto fere Europæ ambitu Monasteria quamplurima condiderint longe lateque disseminata virtutis & integritatis fama. Vigiliis namque, & orationibus, rerumque divinarum contemplationi mirum in modum dediti, ita res humanas despiciebant, ut vitam in terris Cælestium imitarentur. In Odeo frequentes erant, ibique psalmodiis plano cantu modulatis utebantur assidue, ut ex vetustissimis eorum chromaticis codicibus, qui nunc etiam nostro in Sacrario visuntur, non obscure liquet. Monachos enim nostros minime fugiebat Canonicas preces, cantica, laudes, psalmodiam, quibus in Odeo frequentissime vacant Monachi, plurimum lucis ac utilitatis adferre Monasticæ disciplinæ, uti nos monet D. Augustinus scribens contra *Hilarium* quemdam hæreticum psalmodiam damnantem: *Canticis enim, teste Isidoro in de summo bono, tristes consolantur, gratiores efficiuntur mentes, fastidiosi oblectantur, inertes exsuscitantur, peccatores ad lamenta invitantur. Nam quamvis dura sint corda carnalium, statim ut psalmi dulcedo insonuerit, ad affectum pietatis animum eorum inflectit, dum Christianum non vocis modulatio, sed tantum verba divina, que dicuntur, debeant commovere, nescio tamen, quo pacto modulatione canenti major nascitur compunctio cordis. Multi enim reperiuntur, qui cantus suavitate commoti, sua crimina plangunt, atque ex ea parte magis fleuntur ad lachrymas, ex qua psallentis insonuerit dulcedo suavissima.* Cujus argumento est apertissimo Augustinus ipse, qui multas se fuisse lachrymas ad cantus Ecclesiæ sæpissime testatus est, quem, qui de hac Monachali psalmodia plura desiderat, adeat otiosus D. quoque Basilium sub Psalterii Davidici initium ea de re plurima disserentem.

D Lectorem tamen cupidum sciendi undenam originem traxerit consuetudo canendi responsa in Monachorum choris haud libentes amandaverimus ad disidentes inter se auctores hac de bipartita psalmodia disidentes: eos enim tres in longe diversas inter se sententias abiisse comperio.

E In prima sunt, qui cantum hunc Ecclesiæ primitivæ inventum autumant, qui tamen in assignandis tempore & inventoribus inter se non parum dissident. Horum aliqui scilicet, ut Philo Hebræus in *de Vita Contemplativa*, & legitur apud D. Hieronymum *de Scriptoribus Ecclesiasticis* in *Philone*, volunt morem alternis choris persolvendi divinas preces viguisse Romæ vivente Principe Apostolorum Petro: inquit enim Philo: *Conveniebant oriente sole Essai (hoc enim nomine Christi fideles appellabat Philo) unum in locum, quem Cœnaculum tunc nuncupabant, in duosque dividebantur choros, quorum alter ex viris, alter ex mulieribus constabat, horum uterque peculiarem habebat magistrum ac moderatorem, qui cantus non quidem profano flexuum vocis artificio, sed gravi & plana harmonia modulabatur.*

F Advocant iidem in testem Plinium lib. ii. epist. xcvi. qui à Trajano missus ad regendam Bithyniam, hanc consuetudinem ibi viguisse apud fideles testatur. Idem affirmant Justinus in *Oratione ad Antoninum Pium*, Tertull. *ad uxorem* lib. ii. cap. vi. & Cyprianus *de Oratione Dominica*. Alii, inter quos est Basilus *epist. lxi.* prodiderunt in Ægypto, & utraque Libya apud Thebanos, Palæstinos, Arabes, Phœnices, & Syros, ævo Apostolos consequente, receptam eam canendi in Odeo consuetudinem, quam nostri Monachi retinent. Alii plures ex fide Socratis lib. x. *Historia Tripartita* cap. ix. tradunt modum alterne psallendi à D. Ignatio in Antiochensem Ecclesiam primitus introductum, indeque sensim in totum Orientem sese propagasse. Caus-

Causam dedit huic instituto visio quædam cœlestis, in qua Angelos Sanctam Triadem *ἀντὶφώνως*, id est, alternis vocibus, collaudantes audivit: quam visionem innuere videtur Fortunatus his versibus:

*Cœtibus Angelicis hominum sociata propago
Reddit honorificum laudis amore sonum.
Alternis vicibus divina poemata psallunt,
Atque Creatori mystica verba canunt.
Lucida Sydereæ calis strepit aura tumultu,
Laudibus, & Domini concutit astra fragor.
Et Davidicis resonant alterna camœnis
Pulpita.*

Alii, ut Gulielmus Durantus lib. v. *Rationalis divi-
norum officiorum*, scriptum reliquerunt, id factum esse à Damaso Papa, suadente Theodosio Imperatore, dataque provincia D. Hieronymo, linguarum & cæremoniarum peritissimo, officium divinum digerendi suas in partes, & eo modo, quo nunc in Ecclesia Romana legitur, contrahendi, quod ut ab universis Ecclesiis reciperetur, sancitum deinde jussu est, *l. tanta C. de vet. jur. enucl.* Verum enim vero successu temporum plures accessiones & mutationes admisit.

Secundam sententiam amplexi sunt ii, qui cantus hujus auctores agnoscunt Gentiles, quorum in numero est Alcuius noster in *Opusculo M. S. de D. Eustorgii templo* ad hunc modum scribens: *Ceterum nihil novi est, à priscis gentium sacris nostra quondam traxit similitudinem, ut in responsis, qua inter choros concinunt nostri sacerdotes. Nam ea in Cybelis Deorum matris cultu dici solita locupletissimus testis est Ausonius:*

Dindymaque Idaeo respondent cantica Luco.

Quo allusisse quibusdam videtur Ovid. *II. Fastorum*, cum ait:

*Dum canimus sacras alterno pectine Nonas,
Maximus his Fastis accumulatur honos.*

At meo quidem iudicio non satis scite. Ex antiquis vero Plutarchus in opusculo *de Musica*, Macrobius lib. *II. in Somnium Scipionis*, ubi ait: *In Hymnis Deorum per stropham & antistropham metra canoris versibus adhibebantur.* Et Dicæarchus libro *de musicis certaminibus*, ubi de Scolio, Pæane, & Hymnosodia. Primi cantus meminit Clemens Alexandrinus lib. *II. Pedagogi cap. IV.* dum ait: *Apud Græcos quoque veteres, in conviviiis ad compotandum comparatis, & distillantibus poculis, ad Hebræicorum Psalmorum similitudinem, canticum, quod appellabatur σκολιόν, id est, obliquum, canebatur, communiter omnibus voce simul Pæana clamantibus, & nonnunquam etiam per cantici vices propinationem circumagentibus.* Secundi Virgilius lib. *VI. Æneid.*

*— — — — — latumque choro Pæana canentes,
Inter odoratum lauri nemus — — — — —*

Et lib. *x.*

Conclamant socii letum Pæana secuti.

De tertio Plut. in supra laudato loco, & ejus interpres in *Præfatione* eam camœnam Gymnopodiam vocans.

In tertia sententia, quæ magis nobis arridet, video fuisse Philonem eundem Hebræum lib. *III. de Moyse*, asserens usum hunc Moyfi in acceptum ferri debere, tum cum Hebræi se duce Mare Rubrum siccis pedibus transmiserunt, Pharaoque eos insecutus una cum ingenti Ægyptiorum exercitu in eo demersus est. Tantæ enim victoriæ triumphum celebrantes carmen hoc cecinere, *Cantemus Domino gloriose*, &c. duos in choros partiti, quemadmodum & mulieres, Maria sorore Moyfi præeunte, fecisse Sacrarum Litterarum monumentis est proditum. Hinc mos apud Hebræos invaluit, ut non modo viri, sed etiam feminae palam in choros divisæ canerent divinas laudes, ut Genebrardus recte colligit ex *Psalmo Davidico LXVII.* & liquido constat legentibus cap. *II. lib. I. Esdrae*, & cap. *XXV. lib. I. Paralipomenon*, ubi ex *XXIV. familiis* cantores Templi designantur. Jam explicata Monasticæ psalmodiæ origine, qua Deus in Ecclesia publice colitur, ad privatum corporis cultum nostrorum Monachorum transcamus.

A Illud quoque nostros Monachos non latebat non modo usum vestium pretiosarum, sed abusum etiam comarum nimis comptarum dedecere eos, qui in Cœnobiiis vivunt, monente eos apertissime Paulino in *epistola VII. ad Severum*: *Nos adeant & revivant conservuli & compallidi nostri, non vestibus pictis superbi, sed horrentibus ciliciis humiles: nec chlamyde curtalini, sed sagulis palliati: nec baltheo, sed veste succincti: nec improba attonsi capitis fronte criniti, sed casta informitate capillum ad cutem cæsi, & inæqualiter semi-tonsi, & destituta fronte prærasi, & ornatu pudicitia inornati.* Erant itaque Monachi nostri juxta D. Paulini mentem in victu parci, pullis in vestibus verecundi, in crine comati, in barba rasi, in omnibus omnino corporis & animi sui partibus ad religiosæ vitæ pulchritudinem & speciem conformati. Quamobrem vel ad novos alios Monachos instituendos, vel ad veteres in jam susceptæ disciplinæ officio continendos, aut si forte ab eo defecissent improvide, reducendos in viam, sæpissime vocabantur. Monasterium sane omnium celeberrimum inter ea, quæ Urbi nostræ gratiam conciliant non vulgarem, sive divitias, sive operis magnificentiam spectes, ut alia pleraque prætereamus, Monasterium, inquam, Cisterciensium sancti Ambrosii Mediolani, integritatem illam Monasticæ disciplinæ, qua nunc etiam sibi placet, maxime Monachis nostris in acceptum refert. Hoc enim C Monasterium, quod jure præstans Urbis nostræ decus & ornamentum esse fatemur à nostris Monachis auctore Angilberto Archiepiscopo, qui & Gaudentium, spectatæ in Cœnobio D. Vincentii nostri præfectura moderationis & probitatis virum, Abbatem illi dedit, instructum, & ad optimam Monachalis disciplinæ rationem institutum fuisse ad hanc usque diem apertissime constat ex publicis documentis.

Quorum illud est præcipuum, quod adscribam, nihil ut præterea ad ejus illustrationem desiderari possit: *In nomine Domini, Angilbertus beata Mediolanensis Ecclesiæ humilis Archiepiscopus. Cumque Domino juvante gererem sollicitudinem de mea Parœcia monasteriis, & ea ad tramitem sanctæ conversationis corrigendo, atque construendo prout valui perduxissem, verti me ad monasterium beatissimi Ambrosii Christi confessoris, ubi ejus humanum corpus quiescit, quatenus necessitate cogente ibidem Abbatem ordinare debuisssem. Cumque per hoc diutius quem Abbatem illius constituere debuisssem, quia ibi non reperiebatur talis, eo quod ob negligentiam ordo regularis valde maneat corruptus, per hoc diutius cœpisssem cogitare cum meis sacerdotibus divinam clementiam postulando. Tunc Domino favente, consulentibus etiam sacerdotibus nostris, abstuli Gaudentium Abbatem monasterii sancti Vincentii. Quem etiam ego ibi Abbatem jam dudum ordinaveram, & in præfato monasterio sancti Ambrosii Abbatem constitui. Nunc autem ut ipsi Monachi valeant Deo deservire, & ei jugiter laudem & gratias referre exclusa indigentia, tam ob stabilitatem Regum nostrorum invictissimorum Imperatorum Lodovici, quam ob pacem immaculatæ matris Ecclesiæ, per hoc præceptum confirmo Ecclesiam, & altare quod ibi novit mirifice edificavi ab nimio amore confessoris Christi Ambrosii in tutela, & omni custodia supra taxati Gaudentii Abbatis, & in ejus ditione perenniter suisque successoribus permaneat sine fine. Et ita omnes possessiones, atque res ipsius monasterii diversis in locis constitutas, quorum vocabula hæc sunt, Oleoductus, Campellione, Ceresiolla, Grate, Lucusinterani, Casteniade, & Catenacla, seu omnes res, quas nunc possidere videntur, vel ab hinc Domino largiente eidem venerabili Ecclesiæ Deum timentium liberalitate quoquoque modo fuerint adita, excepta Curte Dubini, quam nos juxta conventionem commutare volumus. Placuit nobis ob Dei & beati Ambrosii amorem pro consensu sacerdotum nostrorum constituere per hanc nostram institutionem: ut neque nos, neque aliquis successorum nostrorum jam prædicto Abbati Gaudentio, aut successoribus ejus, de prædictis rebus ullam contra*

contra rationem ingerat molestiam, vel in rebus diminutionem. Eo videlicet modo, ut sub nostra nostrorumque succedentium consistentes ordinatione atque dispositione patrum, nobisque etiam prout decet parendo, liceat eisdem perfrui, & quietam sub sancta degentes regula ducere vitam; statuentes etiam per hoc nostra auctoritatis minime ut cujuscunque ordinis homo tactus supremo amore inibi suis cum rebus voluit sacra norma sua submittere colla, ex nostra amplissima largitate sine ullo obstaculo habeat facultatem. Verum etiam, & hoc concedimus, ut quocunque tempore Abbas ipsius Monasterii de hoc seculo migraverit, ut de ipsis sibi met eligant pastorem, si talis inibi persona reperta fuerit, qui juxta regulam eorundem, & vite statum regulariter quieverit regere ex nostra tranquillissima concessione habeant facultatem. Et ut hoc praeceptum mea concessio inconvulsum, & inviolatum perpetuo permaneat, Abroxiu notarium Sanctae nostrae Mediolanensis Ecclesiae scribere jussimus, & propria manu subscribere confirmavimus annorum dominorum nostrorum confirmantium hoc Ludovici, & Lotharii Imperatorum 18. & 16. Calend. Mart. Indictione 13. Angilbertus indignus Archiepiscopus in hoc praecepto subscripsi, Adoaldus Penio, Ermenfredus Dominus dedit, Ermenaldus, & alii quamplures Sacerdotes, & Diaconi not. subscripserunt.

Ea vero tempestate Mediolanenses Archiepiscopi tum ob potestatem acceptam à Principibus, quos in Reges Italiae terreo diademate coronabant, tum ob suas in Urbe opes, imperium, & dignitatem suo quoque jure quodammodo Abbates transferre, ac eorundem Ecclesiis quoscunque viros alios facri ordinis & instituti praeficere potuisse, colligere facile est, non modo ex allato publico documento Angilberti, verum etiam ex fide Tristani Calchi lib. v. *Historia Patriae*, consignata his verbis: *Sub idem tempus* (quod ut ad oram libri adscriptum est incidit in annum DCCCVI.) *Mediolani Oldperus, qui in Archiepiscopatu Petro successerat*, (quam tamen in re ab aliorum Scriptorum sententia longe abit Calchus, eorum, inquam, qui Oldipertum, five Oldobertum, five Oldibertum, ut alii malunt, eum praecessisse prodiderunt) *donat Arigauso Abbati eadem Divi Vincentii in Prato, ut jam tunc vulgo nuncupabatur*. Illud etiam hinc colligimus non obscure Templi nostri cognomen antiquissimum esse, & ibi Monachorum Cœnobium perspicue floruisse.

Sed enim ante Calchum id ipsum scriptum alii quamplurimi reliquerunt, quorum è numero Arnulphus in sua *M. S. Historia de gestis Urbis Mediolan.* cap. III. in hæc verba scribit: *Cum Archiepiscopus* (Guido scilicet, cujus elationis annum in Archiepiscopalem sedem idem auctor asserit incidisse in MXLVI. à Christo nato, cum alii in MXXXVI. incidisse contendant, alii in MXLIV. qui Archiepiscopum etiam ipsum voce ad Latium propius accedente non Guidonem, sed Vidonem vocant) *defuncto Abbate S. Celsi, alterum more praedecessorum provideret ordinandum, penitus interdixit, spreto illo, alterum jam consecratum omnino contemnit, armans contra illum Monachorum cum famulis, conspirationem. Alterum vero à Cœnobio Sancti Vincentii eodem modo repulit, Simoniacae ordinationis arguens illos.*

Accedit huic Landulphus à Sancto Paulo in *Historia* pariter *M. S. Urbis ejusdem* fol. 10. ubi ait: *Grosolanus* (quem alii longe melius & elegantius *Chrysolanus* vocant) *statim, ut vidit se à quadam magna multitudine vulgi, & nobilium conclamatum, & ab Abbate illo plaudatum, Archiepiscopalem sedem ascendit, & sedit, & sedens illum Arialdu Abbatem* (scilicet monasterii D. Dionysii) *de Abbazia in Abbazia majorem* (Clarevallensem nimirum ditiolem) *transulit.*

Andreas quoque Monachus Vallis Umbrosae in *M. S. passione B. Arialdi* (licet de eo Beato nulla in Martyrologio, quod hæctenus viderim, mentio

A fiat) pagina 18. sic scripsit: *Eo tempore Archiepiscopus* (Vido scilicet supra laudatus) *defuncto Abbate S. Celsi alium ordinavit, quem Herembaldus expulit. Alium à Cœnobio S. Vincentii eodem modo repulit, illorum Simoniam damnans.*

B Alii demum complures adhuc inediti ejusdem notæ, quorum cupiditate flagrant, ne nos plus æquo prolixiores simus, aut aliorum scrinia compilare velle videamur, adeant Museum clar. & eruditissimi Viri Jo. Jacobi ab Ecclesia Mediolanensibus à secretis, studiosissimi simul ac peritissimi antiquitatum Mediolanensium. Ut enim verus is Musarum pullus & legitimus Gratiarum foetus est, ita nihil fere usquam est eruditorum monumentorum, quod non avidissime conquirat, & ut olim Darius Persarum Rex Homeri carmina, suis una cum thesauris non recondat in penitiori elegantissimæ Bibliothecæ sinu. Atqui æmulus principis illius luminum reliquorum non ita recondit, ut premar, sed ut ille æque omnibus lucet, sic ejus in omnes humanitas ubertim effunditur; nec ullis opes eas invidet, sed cunctis lubens, libens impertit bono rei tum publicæ, tum literariæ totus quotus est factus; nec aliud sibi tempus perire dolens cum Augusto, quam quod sine beneficio in alios collato, sibi fluxisse senserit. Cogit hic me veritatis studium exclamare,

C O Virum monumentis omnibus, ac literis decorandum?

Quam multa, quæ adhuc Cimmeriis in tenebris delitescunt, haurirent eam, quam diu merentur & expectant, lucem, nobisque facem ostendendo prælucere ad eruendam multarum, magnarumque rerum latentem & abditam in profundo veritatem, si plures hujuscemodi de antiquorum MS. monumentis optime meritos haberemus.

D Adeant igitur hujus Museum hilares quotquot voluerint: ejus enim in Bibliotheca (quod ad rem nostram attinet) unius industria, unum in locum contractum adspiciet quidquid MSS. Codd. vel Episcopus Novariensis à Basilica Petri conspexit, vel Ambrosiana Bibliotheca MSS. omnis generis refertissima late patenti suo gremio complexa fovet, in Urbis nostræ meditullio Literatorum omnium commodo collocata. Servent hunc interim multorum instar æterna Numina, quæ in Antiquitatis & literarum gratiam veneramus, & longissima ac felicissima statione mortali fungi concedant:

— nec tarda senectus

Debilitet vires animi, mutetque vigorem.

E Erant enim nostri Monachi, tum vitæ sanctimoniam conspicui, tum scientiis, ac omni disciplinarum genere illustres. Hi vero, ut eorum mores & vitam paulo uberius persequamur, ex peculiari Monasterii instituto viginti quatuor juvenes aiebant, & disciplinis omnibus imbuebant, erudiebantque, quorum ex numero in demortuorum Monachorum locum, alii atque alii subinde subrogabantur, ac præsertim ii, qui instituti illius & regulæ studiosiores esse, eamque adamare affectu quodam præcipuo viderentur. Qui quidem mos cooptandi alumnos in proprium Monachorum Collegium fortean ductus fuerit ab illo antiquissimo Lupercorum, qui non in Comitibus à Magistratibus, vel à populo, sed à collegis cooptabantur in sacerdotes, ut erudite docet Nicolaus Gruchius lib. 1. *de Comitibus Romanorum*, judicio prudentis Lectoris relinquitur æstimandum, maxime vero ejus qui meminerit eorum, quæ paulo ante diximus de sacra metamorphosi Lupercorum in Christianos Monachos D. Barnabæ sacra prædicatione conversos. Quod vero in hoc nostro Cœnobio juvenes illi omni literarum genere imbuerentur, vero similis etiam redditur ex eo, quod vetera Monachorum Cœnobia eruditif-

fima Collegia fuisse nos monet Claudius Espencæus lib. III. *Digressionum in Epistolam D. Pauli ad Timotheum*, in quibus Abbates doctissimi divinas æque Literas ac humanas non tam Monachos quam alios juvenes Monasterio oblatos docuerint magno cum utilitatis fructu. Possum & oculatum testem advocare D. Gregorium, qui lib. XI. *Dialogorum* aperissime scripsit, Romanos tradidisse S. Benedicto suos filios educandos. Ob id etiam recentioribus in Canonibus sancitum fuisse legimus, ut in Cœnobiis omnibus magister aliquis esset, & doctor, qui juniores erudiret: ac ut ingenio majore præditi gravioribus disciplinis Monasterii ipsius sumptibus accuratius imbuerentur. Viguit hic idem mos apud Monachos etiam recentiores. Nam in Germania potissimum Monachos eleemosynis & prandis adjuvare solitos juvenes liberalibus disciplinis operam dantes Jacobus nos Meddendorpius *Historia sue Monastica* cap. VI. clarissime docet. Hinc factum, ut juvenes, qui majores in studiis progressus fecerant, quique excellentioris ingenii nolcerentur esse, in Monachorum ipsorum numerum reciperentur. Cæteri porro cum in humanioribus litteris, tum in scientiis aliis, quæ vel in sola cognitione veri, vel in actione consistunt, artibusque cæteris equitandi, digladiandi, ducendi choreas, & alia hujusmodi peragendi, quæ virum ingenuum decerent, in partem honorum & munium publicorum assumebantur. Ea vero cum & institutio non alterius, quam Monasterii ipsius impensis fiebat, nulloque sibi proposito præmio, mercede nulla. Immo quidquid Monachorum è mensa supererat à prandio, vel à cœna, ad vicinum Xenodochium subito mittebatur in victum pauperum & egenorum, satisque hoc illis erat ad vitam commode traducendam, ut fusius infra demonstrabimus, cum de Xenodochio ipso loco suo & ordine disierimus.

Monet me educationis Nobilium horum Adolescentum facta mentio, ne tacitus prætermittam commentitiis, inanibusque rationibus ductos non infimæ notæ Viros, hallucinatos esse gravissime, cum putarunt Activam vitam nequaquam prius usu & exercitatione parandam, quam Contemplativæ dulcedine perfruamur. Hi siquidem omnem recte institutionis ordinem pervertunt, quem non ignoramus à Majoribus nostris perfectionis attingendæ causâ fuisse perpetuo, sancte, & integre custoditum. Non ea Monachorum nostrorum mens fuit, qui tanto studio Alumnos suos sibi multo ante moralibus in Virtutibus exercendos, iisque disciplinis & artibus, quæ Virum ingenuum ac liberalem decerent, excolendos esse senserunt, quam ad Monasticam vitam, divinarumque rerum contemplationem admitterentur, ut ad sanctissimorum hominum laudem & gloriam pervenirent. Hanc enim rectissimam viam recte instituendæ Juventutis ad æternæ felicitatis fructus uberrimos consequendos ab ipsismet Monasticæ disciplinæ parentibus didicerant, arripuerant, hausserant, ac in primis à vere Magno re æque, ac nomine Cœnobiarcha Gregorio laudato nuper, & ex Monachorum septis fidelium omnium ductore ac Doctore, summoque totius Ecclesiæ Catholicæ Pontifice renunciato divinitus, ne tantus virtutum splendor, quo cæteros evincebat, inter abdita Cœnobiolorum claustra detineretur inclusus. Is enim non uno in loco suis in scriptis solo auro compensandis testatus est, Vitam eam, quæ in actione consistit, priorem esse tempore illa, quæ in rerum divinarum contemplatione versatur, quod ex bono opere tendatur ad Contemplationis gradum, planeque oportere eum, qui ad Deum convertitur, in labore prius, hoc est, vitæ Activæ contentione, desudare cum Lea, quo tandem ad videndum principium in Rachel amplexibus requiescat: & quidem *Homelia III. ad Ezechielem* in hæc verba

A scribens: *Dua autem sunt Sanctorum predicatorum vita, Activa scilicet, & Contemplativa: sed Activa prior est tempore, quam Contemplativa; quia ex bono operetenditur ad contemplationem.* In *Homelia* vero XIII. ad eundem Prophetam in hæc alia verba: *Quia videlicet omnis, qui ad Deum convertitur, Contemplativam vitam desiderat, quietem æternæ patriæ appetit: sed prius necesse est, ut in nocte vitæ præsentis operetur bona, quæ potest, desudet in labore, id est, Leam accipiat, ut post ad videndum principium in Rachel amplexibus requiescat.* In VI. autem *Moralium* libro cap. XVII. ita concludit: *Prius ergo mens appetitur gloria temporalis, atque ab omni carnalis concupiscentiæ delectatione tergendæ est, & tunc ad aciem contemplationis est erigenda.* Hæc Gregorius, cui succinit & adstipulatur egregie Ildorus in *de Summo Bono*, lib. III. cum inquit: *In Activa vita prius per exercitium boni operis cuncta exhausti sunt vitia, ut cum Contemplativa jam pura mentis acie ad contemplandum divinum lumen quisque pertranseat.* Cum his conspirasse diceret D. Bernardum *Sermone* XLI. in *Cantic.* *Vide quomodo illa (scilicet sponsa) aliud cupit, & aliud accipit, & nitenti ad contemplationis quietem, labor predicationis imponitur; & sitienti sponsæ præsentiam filiorum sponsi pariendorum, alendorumque solitudo injungitur.* Et in *Apologia ad Gulielmum Abbatem Cluniacensem*: *Neque hoc dico, quia hæc exteriora negligenda sint, aut qui se in illis non exercuerit, mox ideo spiritualis efficiatur, cum potius spiritualia (quamquam meliora) nisi per ista, aut vix, aut nullatenus vel acquirantur, vel obtineantur, sicut scriptum est, I Cor. XV. Non prius quod spirituale, sed animale, deinde spirituale. Sicut nec Jacob, nisi prius cognita Lea, desideratos Rachelis amplexus meruit obtinere.* Unde rursus in *Psalmo* LXXX. *Sumite psalmum & date tympanum. Quod est dicere, sumite spiritualia, sed prius date corporalia.* Quæ *Psalmi* verba ad rem nostram mirum in modum facere facilius is cognoscet, qui attentius ad omnes tympani & psalmi qualitates expendendas animum suum contulerit. Illud enim vitæ Activæ conditiones omnes ad vivum exprimit, & proprietates omnes ob oculos ponit: iste vero vitam Contemplativam aptissime & apertissime repræsentat. Tympano scilicet utimur ad ordinandas cohortes in re bellica: Vita Activa ad moderandos homines in Rep. Tympano milites acrius excitantur ad hostium impetus reprimendos: Vita Activa propriæ passionum omnes & rebellantes contra rationem carnis motus facillime compescuntur. Tympanum nisi baculo percutiatur sonum nullum edit: Vita Activa proximos non instruit, nisi baculo abnegationis (mortificationis alii dicunt) reluctantes rationis imperio sensus & carnem feriat. Tympani pars superior percussa in causâ est, ut inferior etiam resonet, ac moveatur: Prælatus quilibet, aut Princeps sua in semetipso vitia plectens, inferiores suos ad eadem profiganda impellit. Tympani usus belli quam pacis tempore major est: Vita Activa præsentis sæculo, in quo scilicet, *Vita hominis militia est*, ut inquit Job, adminiculatur magis, quam futuro, in quo pace homo perpetua perfructur. Tympani sonitus perennis non est, ac permanens, sed transit: pari ratione perpetuo duratura non est Activa Vita, sed in cælesti patria desitura. Tandem ut rem omnem verbo absolvam, quidquid præstat Tympanum, ut instrumentum sonorum, id ipsum efficit Vita Activa in morali hominum disciplina. Quamobrem in Sacris Literis habetur scriptum: *Incipite Domino in Tympanis*, quia ab operibus vitæ Activæ Deo servire cupientibus capiendæ sunt exordia. Et Maria illa Prophetissa soror Aaron, ut legitur *Exodi* XV. *Sumpsit Tympanum in manu sua, in qua nimirum pleræque vitæ Activæ operationes perficiuntur.* Et in *Psalmo* CXLIX. dicitur, *Laudate Deum in Tympano & Psalterio*, ut sciremus prius in Tympano vitæ Activæ esse Deum laudandum, quam in Psalterio Contemplativæ vitæ fruamur dulcedi-

cedine. Psalmo autem (ut hoc etiam comprobemus rationum suarum ponderibus & momentis) quis non videt convenire proprietates omnes Contemplativæ vitæ adscriptas à Sacris tum Literis, tum Magistris. Hæc enim illa vita est, quæ sita dicitur in actionibus mentis & spiritus, quod insidens in animo sedato & æquo, circa Deum versetur, & perficiatur in futura vita. Quæ quidem omnia in Psalmum egregie cadunt. De hac enim legitur prima ad Corinth. XIV. *Psallam spiritu, psallam & mente. Jacobi v. Equo animo est, psallat. Ad Ephesios similiter v. Psallentes in cordibus vestris Domino. Et Habacuc III. Dominus fortitudo mea, & ponet pedes meos, quasi cervorum, & super excelsa deducet me victor in Psalmis canentem.* Sed hæc, quæ pluribus subobscurè prophetico more protulit Habacuc, clare D. Gregorius sobrii interpretis modo, in *Commentariis ad Ezechielem* scripta reliquit in hæc verba: *Contemplativa hic incipit, ut in caelesti patria perficiatur.*

Ab hac Psalmi expositione, à nobis fufius jam explicata, non longe abiisse videtur Raynerius Suoygondanus in *Psalmorum Paraphrasi* ad eum Psalmum ubi inquit, *Sumite Psalmum*, devotam scilicet orationem, & date, id est, offerte ultro, *Tympanum Deo*, scilicet carnis mortificationem, *Psalterium jucundum* in verbo Dei, cum cithara bonarum operationum.

Hæc pauca auctoritati D. Bernardi subnectere placuit, non ut ei fidem, qua non eget, adstruerem, aut pondus nostro labore adderem, sed ut ejus gravitas & momentum magis ac magis à Candidato Scripturæ Lactore perpenderetur.

Ac clarius (ut ad alios Patres transeamus) cum aliis jam supra laudatis conspirasse pariter diceret Venerabilem illum Presbyterum Bedam in caput x. *Luca* sic scribentem: *Maria secus pedes Domini sedisse describitur, quia vita Activa laboriose desudat in certamine, Contemplativa vero pacatis prius vitiorum tumultibus, optata jam in Christo mentis quiete perfuitur.* Sed eisdem & nobis mirifice applaudit rursus D. Bernardus, dum inquit: *Sed quid est, quod intrantem eum (scilicet Jesum) Martha excipit, discurret, ministrat: Maria vero secus pedes sedens ingressi, in ejus verbum cor suum suspendit, nisi quod prius Activa, postea vero Contemplatio subsequitur?* Eadem fere verba ego à D. Bernardo sum aliquando mutuatus idem prorsus asseverando, Activam nimirum vitam prius exercitatione parandam, quam Contemplativæ dulcedine frui liceat: de eis tamen injecta dubitatio auditoribus an vera. Sed enim in nostram omnino sententiam eunt plerique veterum & meliorum Patrum, quos nimis longum esset omnes ac singulos percensere. Quos deinde secuti sacræ Theologiæ mystæ omnes suis id ipsum suffragiis & calculis comprobarunt. Inter quos reliquorum veluti princeps & coryphæus Doctor Aquinas duas ea de re Quæstiones instituit in plures Articulos distributas, quorum in postremo sic inscripto, *Utrum vita Activa sit prior, quam Contemplativa*, adductis suo de more tribus in contrarium argumentis, decernit tandem ac statuit, Activam vitam Generationis viam, & quoad nos priorem esse Contemplativa, eadem illa D. Gregorii ratione ductus, quod ad Contemplativam vitam Activa dispositus; dispositio vero Generationis via præcedit formam. Quæ ut illustrius appareant in aperta luce, Cajetani, doctrinæ ejusdem approbatoris & interpretis summi, verba adducere non gravabor. Mirum enim in modum mihi ad hanc controversiam sedandam facere semper visa sunt. Sic igitur ille ad Art. 1. *Quæst. CLXXXII. secunda secundæ: Notent tamen, qui alios in via Dei instruunt ad profectum spiritualem, & diligenter efficiant, ut prius in vita Activa exerceri faciant, quos edocent. Oportet siquidem prius passiones domare habitibus mansuetudinis, patientia, &c. & sedare, quam ad Contemplativam vitam ascendere.*

A *Et ob defectum hujus multi non ambulantes, sed saltantes in via Dei, postquam multum temporis vita sua Contemplationi dederunt, vacui virtutibus inveniuntur impatientes, iracundi, superbi, si in hujusmodi tangerantur. Et propterea tales nec Activam, nec Contemplativam, nec ex utraque compositam habuerunt, sed super arenam fabricaverunt. Et utinam non sit frequens defectus iste. De hujusmodi instituentibus tyrones spirituali disciplina cum Beato Laurentio Justiniano in de disciplina & perfectione Monastica cap. XII. jure merito dicere possumus: O quot, qui jam inter astra nidos suos collocasse credebantur, occasione hujus præpostere institutionis in lutum carnalis concupiscentia turpiter corruerunt. Qui B. Justinianus in de oratione cap. v. jam recitatam & receptam unanimem sanctorum Patrum sententiam non tam suscipiens, quam suspiciens, hoc docentibus & discentibus æque utile documentum statuit: Quicumque ad Arcem orationis & contemplationis pulchritudinem attingere desiderant, prius semetipsos in campo per exercitium operis probent, quam ad quietem transeant; quatenus sciant, an illata convitia à proximis æquanimiter portant; an oblatis temporalibus bonis, mens letitia solvitur; an sublatis, vehementi dolore sauciantur; an cum ad se introitus redeunt, in eo, quod spiritualia rimantur, secum umbras transeuntium rerum ferunt, vel fortasse tractas à mente manu discretionis abigunt. Quisque igitur antequam vitæ Contemplativæ idoneus sit, in Activæ operibus exerceri debet. In eadem fere verba, eandem certe sententiam loquuntur cæteri omnes, qui sine fūco & fallaciis veram ipsi Christiane vivendi rationem tenuerunt, tenendæque cæteris rationem recto ad æternam salutem tramite perscripserunt. Ii scilicet omnes, qui vitæ salutaris præceptis fideles instituunt editis Opusculis Meditationum (ut vocant) & exercitium sacram, aliarumque hujusmodi divinarum rerum.*

Quod si quis perotium, quo afflueret, Sacrarum quoque Literarum testimonia nosse cuperet nostræ sententiæ pondus adjicientia, non ea indicare gravabor. Exstant enim prompta & parata omnibus, & quidem unum velut in corpus redacta apud Neotericos Scriptores quamplurimos; sed horum alios dumtaxat in iis colligendis diligentiores indicasse suffecerit. Agmen mihi ducat Joannes à Carthagina lib. XIV. in *Evangelia* ab Homelia 19. ad 25. Tom. 3. sequantur Philippus Diez in *Summa*, verbo *Contemplatio*, & in conc. II. Dominica v. post Pentecosten, & conc. II. Dominica XVII. post Pentecosten, Jo. Vitalis in *Speculo morali* fol. mihi 44. Paulus Palatius in *Matthæum* fol. 72. Peraldus *Sum. Virt.* Parte 1. Petrus Breconius in *Reduc. morali* cap. xx. Jo. Maldonatus in cap. x. *Luca* Tom. 2. Cæsar Franciotus in prima Parte feria 6. post quartam Dominicam *Quadragesima*, Didacus Stella in cap. 1. *Luca*, Jacobus Alvarez de *vita spirituali* lib. XI. Partis secundæ cap. XVI. Tom. 1. & Didacus Lopez in *sua Mensa spiritualium ciborum*, verbo *Vita Activa, & contemplativa*, num. 5. 6. 11. & 12.

Quod autem ad nobilium adolescentium educationem attinet, (ut ad rem nostram, facta forte justo longiore de Vita Activa digressionem, revertamur) ejus monumenta non obscura ad nostra usque tempora permanferunt. Nam, qui in commemorato Sacelli inaximi vertice delineati pueri gentilitiis quoque suis insignibus marmoreis innixi cernuntur, ex eis fuisse dicuntur, qui in hujusce Monasterii septis educabantur tum, cum Sacellum ipsum picturis illis ac insignibus reliquis, de quibus alio loco meminimus, est ornatum. Horum adeo piorum institutorum intuitu, quorum fama non urbes vicinas modo, verum etiam totum penetrarum Orbem pervasit, quandiu eo in Cœnobio Monastica disciplina floruit, omnes tum Summi Pontifices, ac Imperatores, tum Reges & Archiepiscopi Mediolanenses, non tam opulenta vectigalia

Cœnobio quotannis perfolvi solita sarta tecta mordicus confervarunt, verum etiam peculiari nescio quo studio cumulatissime locupletarunt, adeo ut Gregorio IV. Summo sacrorum Principe, & Ludovico Pio Imperatore, Angilberti Pulterlæ Archiepiscopi opera prædia ac proventus omnes Cœnobii Sancti Petri in pago Mandelli monasterio nostro accesserint anno à Virgineo partu DCCCXXXIII. teste fidelissimo & antiquissimo veritatis hujus Galvano Flammaitulo XI. *Chronica minoris* nondum in lucem datæ, quo quidem tempore teste Galefino multæ Mediolani sacre sunt ædes Angilberti supra laudati, non tam cohortatione, quam consilio, & ope sedula in honorem cœlestium Numinum ædificatæ, ac præcipue tres Beatissimæ Mariæ ac Virgini consecratæ. Una scilicet à Falcoreno Comite, quam suo de nomine S. Mariam Falcorenæ nuncupare voluit, quaque in æde B. Pater Franciscus Assisii in Umbria natus initio cum aliquot ex suæ familiæ sociis aliquandiu commoratus est, donec eo confluentibus aliis in dies magis ac magis eam vivendi rationem amplexandi studio divinitus inflammatis, inde abscessit, ac Basilicam SS. Naboris & Felicis Martyrum in loco laxiori sitam adiit, commutatis cum Præposito & Canonicis ejus Basilicæ Laribus, & Templo. Enimvero nunc etiam utrobique Canonici & Cœnobitæ Franciscani vigent. Illi quidem suis sub titulis beneficiorum Canonicalium, suis quoque fundis ac vectigalibus gaudentes, concessio patrum nostrorum memoria Falcoreniani Templi usu quibusdam Disciplinatis sodalibus S. Rochi: quos tamen audio eum usum nunc cedere eisdem Canonicis divinas preces inibi juxta primævum eorum institutum in Choro deinceps recitaturis, addiæto eum in finem novo Canonicorum & distributionum censu: hi vero ad Basilicam SS. Martyrum amplificato in Cœnobio nuper majorique Templo honorificentius excitato. Sed ut ad alia Tempia Angilberti consilio condita veniamus: Alterum ædificavit Comes Peto, quod etiam nunc vulgus ex conditoris nomine S. Mariam Pedonem appellat. Tertium extruxit istorum piorum Comitum ancilla nomine Secreta; quamobrem & S. Maria Secreta dicitur, piæ mulieris cognomine non mutato.

Nec mirum Angilbertum Ambrosiani Cœnobii curam gessisse præcipuam, ut ei Vincentianum Abbatem præficeret, cum erga Sanctum Ambrosium præcipuo semper cultus & observantiæ studio flagraverit, eumque sibi in præcipuum Patronum & Præsidem in Archiepiscopali provincia elegisset. Is enim ille Angilbertus fuit, qui ex ore D. Ambrosii, dentem, cum ejus corpus inviseret, sibi extraxit, extractumque devotionis ergo in aureo annulo alligavit, ac cum de more ad Basilicam D. Laurentii Majoris die Dominico Palmarum procederet pontificalibus infulis ornatus, in via se amisisse cognovit, cum forte extractis pontificiis chirothecis gemmam loco suo motam animadvertit. Qua re commotus graviter, omnia viæ, per quæ processerat, loca spatiaque diligentissime perlustrari jussit, quo dentem amissum reperire posset. Sed frustra; nusquam enim, omni licet adhibito studio, potuit inveniri, donec probatæ sanctitatis anus Archiepiscopi sollicitudine cognita, eum statim convenit, jussitque bono esse animo, quod dens eo in loco existeret, unde dimotus fuerat. Quod ita re ipsa esse plane comperit; siquidem D. Ambrosii sepulcro subito referato dentem in pristina sua maxilla repositum adinvenit. Ibi rei novitate, quæ sibi mira videbatur omnino, & supra rerum humanarum ordinem, & naturæ vires, percul-

A
sus Archiepiscopus Angilbertus divino sibi factum id esse consilio persuasit, ne S. Patroni corpus imminueretur, aut sui parte ulla quantumvis minima privaretur. Idcirco ne illius sepulchrum ullo in posterum tempore patere cuiquam posset, eidem aureum Altare pretiosis utrinque gemmis, lapillisque distinctum, figuris etiam variis exornatum imposuit: Arcam vero sacri corporis quatuor catenis appensam in altum puteum, eam ipsam ob causam effossum, demisit, ita ut videri vix posset. Quæ res etsi unanimi veterum Mediolanensium Historicorum consensu firmata sit, vetustate tamen obsolevit adeo, ut ex ævi nostri memoria omnino fere fuerit oblitterata, quin imo à plerisque ætatis nostræ hominibus dubitatur, num hæc præclarissima DD. Patriæ nostræ Tutelarium pignora in Basilica Ambrosiana nunc etiam reperiantur, contra sentientibus aliis ea reperiri in Basilica Sancti Victoris Martii, ubi & corpus S. Satyri germani D. Ambrosii fratris cum nonnullis aliis incognitis Divorum Episcoporum & Martyrum corporibus à sanctæ memoriæ Carolo Cardinale Archiepiscopo collocatum fuerit, eo pacto, ut à nullo videri posset in posterum, idque Virum integerrimum sub dirarum & execrationis obnuntiatione cavisse; aliis Colonia Agrippinæ; aliis Bavariz, unde & Cœnobitæ quidam sacras Divi Patroni nostri Reliquias se accepisse contendunt à Federico Barbarubro una cum tribus Sanctorum Magorum corporibus, eo post acerbissimam illam Urbis nostræ everfionem eodem imperante delatis: Aliis demum aliis in locis eadem Sanctorum corpora suo Marte ponentibus contra veritatis fidem. Siquidem quæ dicunt isti, nullo solido traditionis, rationum, aut scripturarum testimonio nixi effutiant potius, quam probent. Ego enim, qui à teneris, ut Græci dicunt, unguiculis hortatu parentum, qui ut præcipua voluntatis & animi propensione erga hanc Basilicam ferebantur, ita me ad eandem secum frequentissime deducebant, D. Ambrosii Basilicam adulta jam ætate frequentare ac venerari consuevi: non semel nescio quos inter se obloquentes non sine justa animi indignatione hisce, quod ajunt, auribus audiui, nec semel gravissimis eos verbis accipiens tam palmarem audaciam, ne execrandam impudentiam dicam, retudi, refutavi, convici. Atque ut eam controversiam sedarem omnino, quoad ejus fieri per modicas ingenioli mei vires posset, ipsiusmet sepulcri diligenter considerandi, hisceque luminibus expendendi, ardentissimo flagrare desiderio cœpi. Nec defuit mihi benevolentia Præpositi, & Canonicorum ædis illius, penes quos claves Altaris D. Ambrosii positi servabantur, ut voti compos evaderem. Itaque mihi primo licuit per horum humanitatem Altare ipsum aureum, opus Urbis nostræ præcipuum, contemplari, & expressa in eodem præcipua salutis nostræ mysteria in ejus fronte studiosissime venerari. In lateribus quoque gemmas omnis generis, & pretiosos lapillos inclusos argento admiratus sum, tum propter nitorem & varietatem, tum propter magnitudinem & multitudinem eorundem. Sed posterior ejusdem Aræ pars pari opere assabre elaborata me præ cæteris maxime delectavit, cujus ergo versus illam utrinque miro quodam artificio circumambientes, & dividentes in medio, describere volui, eoque libentius, quod iisdem non obscure declarabatur illo sub Altari jacere divorum Tutelarium ossa, & ob honorem S. Ambrosii ab Angilberto Archiepiscopo fuisse constructum. Ii porto versus hi sunt, & is eorum ordo:

Ut hos-
ce versus
diversas in
Altaris fas-
cias dis-
tributos
esse Lector
agnosce-
ret, lineis
distingui-
mus.

EMICAT ALMA FORIS RVTILOQVE DECORE VENVSTA
ARCA METALLORVM GEMMISQVE CVMPTA CORVSCAT
THESAVRO TAMEN HAEC CVMPTO POTIORE METALLO
OSSIBVS INTERIVS POLLET DONATA SACRATIS
EGREGIVS QVOD PRAESVL OPVS SVB HONORE BEATI
INCLITVS AMBROSII TEMPLO RECVBANTIS IN ISTO
OBTVLIT ANGILBERTVS OVANS DOMINOQVE DICAVIT
TEMPORE QVO NITIDAE SERVABAT CVLMINA SEDIS
ASPICE SVMME PATER FAMVLO MISERERE BENIGNE.

Verum enim vero posticam hanc ejus Altaris par-
tem præter recensitos versus, tabellæ aliquot ar-
gentæ suis parergis & lemmatibus illustrabant,
quibus S. Patroni vita & miracula opere anaglypto,
hoc est, sculptura leviter eminente, intuitum
oculis proponuntur, illudque memoriæ proditum
accepimus hunc ornatum impensam viginti mille
aureorum excessisse, qui juxta Galvanci mentem
octoginta librarum auri pondus exæquant, ejus-
que opifex fertur Magister Vuolinus Faber, ut
patet ex literis in una tabellarum ab ipsomet opifi-
ce exaratis. Aperiantur in hac eadem parte fores
perangustæ duæ, per quas ostiolum in partem Al-
taris interiorem patet, siue quis illam intueri, si-
ve ingredi malit. Ac fores quidem istæ intus orna-
tæ sunt serico panno figuris diversi coloris dis-
tincto, extra vero præcipuis Angelorum beato-
rum imaginibus, suis cum apposis nominibus,
illustrantur. In Aræ sinu duo magni lapides con-
tinentur, quorum unus rotundus, & porphyreti-
cus est, habetque diametrum unciarum novem:
alter vero marmoreus ad quadratam formam ac-
cedens, feruntque eam illic ob causam detineri,
quod Sanctorum uterque sanguine Protasii & Ger-
vasii Martyrum sint adpersi: Pavimentum hujus-
ce sinus porphyreticum est, habetque rotunda fo-
ramina, siue concavitates orbiculares quinque scro-
buloz instar, unam in medio, in angulis vero
quatuor reliquas excavatas. Ara ipsa tota porphy-
reticæ mensæ innititur, ita ut non ante loco suo
dimoveri possit, quam ei superposita mensa dimo-
veatur. Quorsum autem quinque illi scrobuli sic
effecti fuerint, non aliunde, quam ex observatione
aliarum ejusmodi marmorearum mensarum, col-
ligi potest. Solebant enim antiquitus hujusmodi
mensæ Altaribus inservire, erantque tunc tempo-
ris sepulcra Martyrum ex Baronii fide Tom. 1. ad
ann. LV. Num. xv. ut à nobis etiam supra fusus de-
monstratum est, eademque consecrabantur chris-
matis unctione à Præsulibus, canonicis Sanctioni-
bus id præcise disponentibus, ut habetur duobus in
canonibus, titulo de Consecratione, distinctione 1. du-
plici in c. Altaria. In priori quidem sic: *Altaria si non
fuerint lapidea chrisomatis unctione non consecrantur.* In po-
steriori vero hoc modo: *Altaria placuit non solum un-
ctione chrisomatis, sed etiam sacerdotali benedictione sacrari.*
Quæ autem altaris partes inungerentur à Præ-
sule distincte explicat Gulielmus Duranti in suo
Rationali divinorum officiorum, ubi agit de Præsule
Altare consecrante, cum ait: *Faciens primo super il-
lo quinque crucez ex oleo infirmorum secundum ordinem
Romanorum, secundum quasdam vero alias Ecclesias de
utroque oleo unam in medio, & quatuor in cornibus:
postea eodem modo totidem ex chrismate.* Causas au-
tem cur tot fierent unctiones paulo post subdit his

verbis: *Ter ergo Altare inungitur, bis oleo, tertio
chrismate; quoniam Ecclesia fide, spe, & charitate,
qua major est ceteris, insignitur.*

C Alias quoque hujusce consecrationis ceremonias
ibidem recenset. Verba ejus hæc sunt: *Post unctio-
nem adoletur incensum, quod devotionem orationis si-
gnificat: in quinque autem locis adoletur, videlicet in
quatuor angulis, & in medio: quia sic quinque sensus
exercere debemus, ut fama boni operis nostri usque ad
proximos extendatur.* Et mox concludens: *Ultima
Altaris benedictio significat illam finalem benedictionem,
quando dicitur, Venite benedicti Patris mei, &c. dein-
de Altare limbo candido extergitur ad notandum, quod
cor nostrum castitate mundare debemus.*

D Hunc fere in modum Aræ sacrificiorum legis
Mosaicæ victimarum sanguine sacerdotis ipsius di-
gito tingi solebant in ipsismet angulis siue corni-
bus, ut hostia in medio Altaris cremata, juxta
ritum legitimum, Deo esset accepta ex præcepto
Levitici iv. longe enim omnium gratissimæ Deo
victimæ Martyris ipsius erant, ideoque erant eo-
rundem aræ mystico ipsorum sanguine, qui chris-
ma ab Ecclesia dicitur, intingendæ. Præsulibus
vero ejusdem Ecclesiæ visum est operæ pretium
fore, si unctiones illæ sacrosanctæ in iis quinque
partibus fierent, ne paterent expositæ ministris
ipsis inferioribus, siue clericorum ordinis cujus-
cunque contactui, siue aram illam sacris vestibus
spoliarent, siue novis induerent, ac multo magis
ne Hæreticorum manibus abradi possent, quod
factum à Donatistis asserit Optatus Milevitanus lib.
vi. aliique multi. Quamobrem lapideas hujusce-
modi tabulas alias, cum ejusmodi scrobulis, in
hac ipsa Urbe nostra vidi & observavi. Ut enim
præteream mensam arcæ marmoreæ nostrorum
Martyrum suppositam, in qua visuntur totidem
concavitates ad singulos ejusdem angulos, sed qua-
dratæ, aliam ei persimilem contemplatus sum in
Basilica Ambrosiana ad septentrionale latus, aliæ-
que non dissimiles aliis in templis sese offerent id
ipsum per otium inquirenti. Nobis certe non abs-
re visum est observationem hanc nostram paucis
aperire, quod ejus ignorance Vir quidam æque
pius ac diligens in inquirendis sacris Archiepisco-
porum Mediolanensium exuviis, eorundemque pri-
mordiis, hallucinatus est, putans ex scrobulo illo,
quem in meditullio ejus mensæ porphyreticæ vi-
deri diximus, quasi ex foramine introspecti posse
arcam ipsam D. Ambrosii sepulchralem, imo per
immissam in illud faciem cognosci, quo modo sub
ea mensa nunc se haberent tria illa Sanctorum Pa-
triæ Tutelarium corpora, in arca scilicet catenis
appensa, ut voluit Galvaneus, an humi strata, ut
Historiographi nostri alii prodiderunt. Is opinio-
nem hanc suam mihi non semel aperuerat, & ex-
orat,

orarat, ut sedulo agerem cum Præposito & Canonicis Ambrosianis, uti sibi mecum liceret locum illum inspicere, id quod ab amicis facile potuimus impetrare. Sed manu probe tentata concavitate illa, ubi nullo modo eam in subiectum locum penetrare reperimus, statim Virum illum deceptum, nosque nimia facilitate ductos frustra Viros alios eruditissimos & nostri amantissimos illuc nobiscum adduxisse cognovimus non absque sensu doloris aliquo & mœroris. Quod si viri illius indicium communi desiderio & opinioni respondisset, unum id proculdubio omnem ex animis nostris dubitandi occasionem de existentia Sanctorum illorum eo in Altari penitus sustulisset.

Negantem partem qui sequuntur, pro se, præter commentationes superius explicatas, illud in medium afferunt, urbes quamplurimas ac Regionem sibi hæc ipsa sacrosancta Divorum pignora vindicare, seque habere hujusce rei auctores non ignobiles, qui constanter asserant reperiri variis in Provinciis sacras ædes, & ingentia Tempia in honorem sacrarum Reliquiarum SS. Gervasii & Protasii martyrum illic existentium ædificata. Atque, ut ab Urbium Domina ducant initium, eam sibi horum Divorum ossa vindicare ostendunt ex eo, quod eorundem Sanctorum Titulum erectum habeat à Vestina nobili ac prædivite fœmina, qui Titulus postea ab Innocentio Papa fuit dedicatus, uti legere est in libro *de Romanis Pontificibus*, gravissimorum scriptorum fide receptus & approbatus. Fundana quoque Basilica à S. Paulino erecta horum Martyrum Reliquias habere se asserit & gloriatur, ipsomet D. Paulino teste in *epistola XII.* quam adire quilibet vel mediocriter otiosus potest. Brixie item adesse in Basilica, Concilium Sanctorum appellata, sacras eorundem Divorum exuvias S. Gaudentius Episcopus Brixienfis disertè testatur in *Sermone*, quem in ejusdem dedicatione habuit, quique apud omnes existat. In Gallias etiam delatas fuisse Reliquias Martyrum eorundem, sacrasque illis memorias inibi excitatas Gregorius Turonensis affirmat libro *de Gloria Martyrum* cap. XLVII. & lib. X. cap. XXXI. *Historia Francorum.* In Africam quoque pervenisse, sunt qui perspicue scribant, dicantque in Victorina villa trigesimo ab Hippone lapide collocatas, ubi & Sanctorum ipsorum nomine erectam fuisse Ecclesiam, ex Augustino liquet libro *de Civit. Dei* XXII. cap. VIII. Quin etiam ad Noricos eadem pervenisse dicuntur, uti scriptum reliquit Eugipius in *S. Severini Actis.* Ex quibus, qui contra nos sentiunt, sic loquuntur: Si Beatissimorum germanorum Reliquias tot ad Urbes delatas, tot ex monumentis constat, cur non etiam corpus S. Ambrosii una sepulti potuit in loca eadem una cum ipsis transferri? At quoniam hujus argumenti pondus quale quantumque sit, vel ex primo pro nostris Martyribus supra posito firmamento patet, illud in præsentia refellere non conabor.

Quid quod pro veritate existentiae sanctorum
istorum corporum in Ambrosiana Basilica Medio-
lanensi contra ipsos pugnat agmen ingens firmissi-
morum argumentorum, inter quæ nec invicti no-
bis Achilles defunt. Offert enim sese primo pha-
lanx veteranorum militum, hoc est, antiquarum
traditionum, ob quas ea in Basilica semper existi-
tisse tria Sanctorum pignora, non tam Majores
nostri firmissime censuere, sed etiam posteri vel-
uti per manus & traducem id ipsum ad alios trans-
miserunt. Prima hanc, ut sic loquamur, aciem
cohortes levis armaturæ validissimæ consequuntur.
quarum prima est perantiquarum aliquot in ejus-
dem Ecclesiæ parietibus picturarum, in quibus vi-
dere est, Sanctum Episcopum jacentem inter duos
juvenes hinc inde stantes, iisque indutos tunicis,
quibus in somnis sibimet ipsi apparuisse testatur Am-

A
profius, quæque vulgo Colobia nominantur. Proxima, quæ succedit, conflata est ex pluribus Rubricis, Calendariis, Breviariorum, Missaliumque codicibus, in quibus ad horum Sanctorum festa solemnia sic habetur: AD BASILICAM AMBROSIANAM, AD QUAM FIT PROCESSIO, MISSA PONTIFICALLIS, ET OBLATIO CIVITATIS. Quæ notæ collocantur, cum iisdem diebus recolitur eorum Sanctorum memoria, quorum corpora in sacris illis ædibus re ipsa obdormiunt & quiescunt. Nec aliam ob causam solent Magistratus publici commodi, & Universitates, siue Collegia opificum Mediolanensis Urbis, statas & anniversarias oblationes quasdam peragere ad Sanctorum ædes, nisi ob Urbis ipsius vota publica, vel peculiarem ejusdem cultum Divorum illorum corporibus impendendum, quæ illis in Templis esse pro comperto habent.

Aliae cohortes hujusmodi his adjungi possent ex tabellis, libellis, litaniis, confessionibus, & altaribus, & ædificiis reliquis ad sacras Sanctorum exuvias conservandas exstrui consuetis. Sed quorsum tot Velitibus, Rorariis, & Elaphris opus est in una hac concertatione tantum, cum nobis abunde suppetant copiae Cataphractorum equitum, Triariorum, ac Primipilorum. Hi nempe Chronographi ac Historici celeberrimi sunt, quos nunc producam in campum totis nervis ac viribus pugnatos, ut, quoad ejus fieri possit, Ambrosianæ Basilicæ asserant sacra trium Patronorum nostrorum pignora omni dubitatione sublata. Ducet vero universam hanc aciem Jacobus Galvaneus à Flamma, vir summæ religionis & fidei, quem uti antesignanum agnoscent cæteri non inviti. Is enim rem omnem, uti à primis Historiographis, qui temporum injuria postmodum perierunt, acceperat, ad hunc fere modum, quo supra à nobis paucis narrata est, scriptum reliquit *capp. cxxiii. & cciv.* Eam quoque prodiderunt veterum M. S. auctores, ac præcipue Mediolanenses aliquot, Joannes à Monte, Gotifredus, Stephanandus, Bonvisius, Sicardus, Bonvicinus, Chronographia Martiniana, & alii permulti, quibus adstipulantur ii, qui vel Patriam Historiam typis mandarunt, vel qui Chronographias & gesta Sanctorum Mediolanensium Archiepiscoporum, quos omnes figillatim laudare velle nimis otiosi esset, cum præsertim ad manus sint omnium fere studiosorum Ecclesiasticæ vetustatis. Ac inter Auctores quidem in lucem editos, sciat Lector nos eos tantummodo numerare, qui vel post Federicum Rubrobarbum, vel nostra hæc tempestate scripserunt: neminem enim horum hæc controversia latuit, licet eorum nemo eam de medio tollere sit aggressus. Probe nempe norant, ita parum fuisse firmatam à contra sentientibus, & probatam; ut nullius gravis Viri confutationem, ne dum censuram suam aliquam mereretur. Sed antequam receptui canamus, prodeat in apertam plañitiem tandem aliquando Achilles noster, unusque adversariorum omnium imbelles copias proterat & proffiget. At quis hic tandem alius quam Ambrosius ipse, qui se disertissimis verbis sub Ara ejusdem Basilicæ maxima condidisse fatetur corpora Beatissimorum Martyrum, seque in ea condi vehementer etiam atque etiam cupiisse. Sic enim is *ad Marcellinam sororem* de inventionem horum Sanctorum Martyrum scripsit: *Succedant victima triumphales loco ubi Christus est hostia, sed ille super Altare, qui pro omnibus passus est, isti sub Altari, quia illius redempti sunt passione. Hunc ego locum prædestinaveram mihi. Dignum est enim, ut ibi requiescat sacerdos, ubi offerre consuevit. Sed cedo sacris victimis dexteram portionem, locus iste Martyribus debebatur. Condamus ergo Reliquias Sacrosanctas, & dignis sedibus invehamus, totumque diem fida devotione celebremus.*

Cæterum non tantum Sancti illi duo Martyres inibi sunt sepulti, sed ipse quoque D. Ambrosius, nec sine Divûm numine, ut patebit. Cupientibus enim Clericis Mediolanensibus juxta pii Patris votum, cum in Basilica ante à se condita, & sub Altari, quod sibi vivens elegerat in sepulcrum, condere, feruntur sancti illi duo fratres sese paululum contraxisse, locumque inter se medium D. Patrono Ambrosio concessisse, perinde ac si accepti beneficii memores eam inire à Domino suo gratiam exoptarent. Hinc illud commune dictum omnium fere ora pervasit, medium inter SS. Gervasium & Protasium Martyres Ambrosium confidere. Verum enim vero eum, qui funeri ipsi interfuit, B. Paulinum scilicet, qui & *Vitam S. Ambrosii* scriptor oculatus literis consignavit, testem adducam. Sic enim inquit ad finem Vitæ: *Sed lucescente die Dominica, cum corpus ipsius peractis Sacramentis divinis de Ecclesia levaretur, portandum ad Basilicam Ambrosianam, in qua positus est, ita ibi demum turba clamabat, se ab illo torqueri, ut ejulatus eorum ferri non posset.*

Suffragatur mirum in modum Paulino Jo. Franciscus à Basilica Petri Novariensis Episcopus, & sacrarum historiarum peritissimus auctor in libello, in quo de *Basilica Ambrosiana* agit, siquidem is adeo magnum est ætatis nostræ decus & lumen, ut hujusce rei idoneus testis jure merito sit habendus, & cum supra productis testibus copulandus. Is enim recitatis ea de re D. Ambrosii verbis non multo ante descriptis, hæc subdit sic à nobis Romana civitate donata: *At ii pariter, & ille locum suum obtinere, ac etiam nunc obtinent, scilicet sub ara maxima Ambrosiana Basilica.*

Sed posset horum duorum Episcoporum testimonio tertium quoque Cardinalis Baronii jure suo subijci, cum & is amplissima dignitate sit, & Tom. *Annal.* IV. Ann. CCCLXXXIII. disertè testetur, D. Ambrosium apud SS. Martyres Gervasium & Protasium, sepultum in Ambrosiana Basilica, ad quam ipsemet eorum Martyrum corpora transfulerat, reperiri. Eam ob causam trium hisce Divorum prope se positorum imaginibus Mediolanenses aliquot Archiepiscopi sigilla sua obsignatoria insignire voluerunt, ut ex ipsorummet literis vel hodie commonstratur, eisdemque D. Carolus imitatus, auctoritate Gregorii XIII. summi Pontificis, eorundem Divorum imagines in proprium & peculiare sigillum Mediolanensis Ecclesiæ suscepit. His tot ac tantis rationum & auctoritatum ponderibus victos jam ac profligatos adversarios non terga tantum, sed & manus daturus esse putabamus, cum ecce conferti magis & in cuneum coacti, quasi sese ipsos pro aris focisque devoverent, tela contra se missa in nos ad hunc fere modum contorquent.

Argumentationibus nostris probari tantummodo primam collocationem horum victicium corporum in Ambrosianæ Basilicæ templo ab ipsomet D. Ambrosio factam, quod etiam ipsi facile concedunt, atqui eosdem nunc etiam in eadem Basilica reperiri nequaquam. Cæterum cum Magorum sacris pignoribus nostris è Templis ab Imperatore Henrico surreptis, eadem cum illis nobis erepta fuisse convincere, ac multo magis Reliquias S. Patroni nostri, quas Colonia & Bavaria Mediolanum translatas esse, dixerunt aliquot Cœnobitæ, id ipsum apertissime comprobare. Addunt in Basilica D. Victoris Martii Mediolani saltem gloriosum D. Ambrosii corpus apud S. Satyrum fratrem nunc temporis reperiri vel ex illa dirarum obnuntiatione à D. Carolo profecta, qua cavit ne quis sepulcra illa referare in posterum auderet, ea fortasse ratione permotus, ne solitus cultus, & antiqua veneratio Basilicæ Ambrosianæ antiquitus conciliata ob

corpus in ea tanti Doctoris & Urbis Patroni existens, imminueretur.

Verum quam parum adversarios hæc nova contentio juvet, quamque casto vulnere eorum tela in nos illata sint, cuicunque liquido constabit, qui nos illamet rursus in eosdem, ac validiori ictu retorquentes spectare voluerit. Nam ut extremum leve prorsus & hebes primo loco infringam. Negare non ausim Satyrum, qui ante D. Ambrosium fratrem mortem obiit, juxta S. Martyris corpus in ejus Basilica, quæ Porciana dicebatur, fuisse ab ipsomet Ambrosio tumulatum, à quo & epitaphium accepit, quod ex Dulingo, non ignobili suorum temporum scriptore, eo libentius adscribo, quo veluti obsignata tabella, dissidium nescio quod omnino tollatur inter Cistercienses & Olivetanos Monachos temere subortum pridem, quod si assequar, næ ego gratiam mihi inibo maximam apud Angelum Mariam Alchisium nobilis Cœnobii Olivetanorum Basilicæ D. Victori sacræ Abbatem tali munere longe dignissimum, cui me debere plurimum sentio, fateor, gloriorque, cum ob patrociniū perpetuo susceptum existimationis meæ, pariter & amicorum meorum: tum ob præstantes & eximias animi ejus & ingenii dotes, quibus non aliter ac magnete ferrum, principum etiam Virorum voluntates ad sese facillime allicit, & allectas mirum in modum detinet defixas penitus in admiratione, cultu, & obsequio sui, nihil ut non illius causa velint omnes, nihil non moliantur affectu & studio singulari. Epitaphium hujusmodi est:

Uranio Satyro supremum frater honorem

Martyris ad levam detulit Ambrosius.

Hæc meriti merces, ut sacri sanguinis humor

Finitimas penetrans adlucet exuvias.

Post quem, & Ambrosium, mortua cum esset eorundem soror Marcellina, sepulta est à D. Simpliciano, tum Mediolani Archiepiscopo, in Confessione Basilicæ Ambrosianæ, ubi ejus quoque tumulus hodie visitur juxta Ambrosium fratrem, Epitaphium nacta, quod ex codice Bibliothecæ Vaticanæ ejusdem in gratiam & Patroni nostri laudem excipit: notata varia lectione alterius exemplaris, quod reperitur apud Alciatum in *Antiquario*, ubi monumento xx. de auctore hujus Epitaphii hæc habet: *Marcellina tumulus insigni superscripto carmine illustris prætermittendus non fuit: tum ob ejus Virginis sanctitatem, qua divorum Ambrosii, Satyrique soror fuit: tum in ejus gratiam, qui carminis auctor creditur: receptum enim est, eique sententia & ipse accedo, Simplicianum, qui Ambrosio in Episcopi dignitate successit, id pudicissima & in Sanctorum album descripta mulieri Epitaphium condidisse:*

Marcellina, tuos cum vita resolveret artus,

Sprevisti patriis corpus sociare sepulcris,

Cum pia fraterni speras consortia somni,

Sanctorumque cupis cara requiescere terra.

Nil longinqua domus casto decerpit amori,

Affectus nec morte perit, nam munere lethi

Rursus tacta soror, fraterna redderis aula.

Quamvis magna pio suspiret Roma dolore,

Tertia quod sacris patitur jam damna sepulcris,

Nec tamen angusta sedem quis dixerit aula.

Corporis hæc domus est, nam te, pia Virgo, supernum

Accipit Imperium, placideque ad munera vita

Æterna Christus pretium tibi destinat aula,

Pramia dans castis intacta matris honore.

Te Juli medius transcendit fervide cursus,

Et te, Virgo, tuus transvexit ad athera sponsus.

Ea nempe aula, quæ fratris nomine appellatur, & in qua sepulta Marcellina, Ambrosiana est. At (quod ad rem nostram attinet) si in ea Marcel-

1 Dum legit Alciatus. 2 Vincita. 3 Umbre. 4 Sacri.

5 Sepulcri. 6 Angustam. 7 Placida post munera mortis.

8 Honorem. 9 Te medius Juli transcendit.

lina ad nostra usque tempora permansit, credere quoque par est Ambrosium fratrem, apud quem perpetuo quiescere optavit, inibi permansisse; neque transferri ad fratrem Satyrum voluisse, sed eum sorore sanctissima commorari. Quid quod nusquam legimus, aut ex Majorum traditionibus accepimus, ea de sede amotum Ambrosium alio commigrasse. Illa porro dirarum & execrationis obnuntiatio à D. Carolo facta referantibus sacra illa Portianæ Basilicæ monumenta, commentitia prorsus & inanis à plerisque censetur, non aliter ac eidem innixum adversantium argumentum. Quin imo aliqui bonæ fidei Monachi Olivetani S. Victoris Cœnobium incolentes, inter quos aliqui adhuc vivunt, qui D. Carolo monumenta invisenti interfuerunt oculati testes, profitentur ingenuè nihil prorsus à D. Carolo de corpore D. Ambrosii dictum, nihilve sub dirarum obnuntiatione vetitum, sed sepulcrum illud ab eo tantum remotis arbitris omnibus inspectum, statimque clausum fuisse, nihilque præterea factum.

Urget me profecto magis objectio tertia, quæ alio delata testatur Patronorum nostrorum corpora à Federico Rubrobarbo in illa acerbissima Urbis nostræ everfione, una cum corporibus Magorum. Sed illi facili negotio occurreretur ex concessis. Ultro enim admiserunt, D. Ambrosium cum duobus aliis Martyribus sub Ara maxima Basilicæ Ambrosianæ conditum ibidem permansisse, non modo usque ad tempora Angilberti Pusterlæi, qui sedit Archiepiscopus anno Domini DCCCXL. & DCCCLX. sed ipsius etiam Federici, qui anno MCLIII. * usque ad MCXC. imperavit, quo in Sara Armeniæ flumine demersus periiit. Atqui cum Angilbertus aureum illud Altare ita condidisset ac collocasset, ut mensa illa porphyretica Aræ Sanctorum corporum superposita superexstructi ab eo Altaris basis ac fundamentum esset, fieri nullo pacto potuisset, ut Arca illa aperiretur, ne dum sacra inde corpora extraherentur, nisi prius diruto ac everfo Altari, quod factum minime fuisse etiam num patet. Quod si ita est, ut esse re vera comperiet quilibet ejus inspicendi studio permotus, eo se conferet, quæ fieri potuit, ut Federicus Altari integro & immoto corpora illa sacrosancta, ac non potius Altaris superexstructi aurum, & preciosas gemmas, quibus credere par est avarum Imperatorem inhiasse, potius quam sacris pignoribus abducendis, extraheret & auferret? Eadem ductum ratione nostræ sententiæ adstipulari video Tristhanum Calchum, qui lib. x. finem excidii Urbis Mediolanensis commemorans ita inquit: *Cessationis, quietisque concedenda instans dies Palmarum, Olivarumque ceremonia religiosus admonuit, qui eo anno Kal. Aprilis contigit: tulitque sacros ramos Federicus è Templo Ambrosiano, à quo sacrilegam manum abstinnisse hostes, indicio est Argilberti Archiepiscopi Lamina aurea, argenteaque multis ante seculis Altari circumdata.*

Satis hæc, ut arbitror, nostram sententiam firmant, & adversariorum inanes conjecturas arguunt & condemnant. Sed contra nos quoque pugnant à simili, alio translata dicentes nostrorum Patronorum corpora cum tribus Magis. Sed frustra, neque enim à Translatione Magorum argumentari licet ad Tutelares nostros, cum receptissima sit apud omnes nationes fama tres Magos translatos fuisse Mediolano Coloniam Agrippinam ab Rainaldo Colonæ Archiepiscopo in illa Rubrobarbi clade: de his vero vix levis, ac ne levis quidem percrebuerit apud imperitos rumor, illorum translationem adstruant plurimorum Chronographorum scripta: de hac ne verbum quidem faciat vel ignobilis Scriptor, unum si excipias nostratem, qui ta-

* Anno 1151. aut 1152. electum Federicum putat Tristhanus Calchus lib. vii. & interfuit in anni Salepheneum an. 1190.

men solo scripturæ simplicis & exoticæ, ac (ut credere par est) apocryphæ, testimonio nititur. Illos nunc etiam Colonæ in Cathedrali coli, palam in confessio sit apud nationes omnes: isti quæ in Urbe, quæve in æde alia sacra reperiantur, præterquam in Ambrosianæ Basilicæ templo, nullibi constet: sepulcrum tandem illorum adhuc inane visatur in Eustorgiano templo: istorum Basilicam & sepulcralem Aram nemo non hodie colat, ad eamque se conferat in votis tum publicis, tum privatis, nec non & in supplicationibus peragi solitis pro rebus majoris ponderis ac momenti, ad eodem opem enixius implorandam, quod ibi sacra illorum corpora reperiri certo certius credat. Dispar itaque ratio, & argumentatio dissimilis hæc omnino, & ob id nostræ sententiæ nil repugnans. Illud unum adjecerim appendicis loco, sanctos Magos everfionis illius initio ex Basilica Eustorgiana ad Collegiatam S. Georgii Uberti Pirovani tum Archiepiscopi Mediolanensis iussu delatos, & in sacra ejusdem turri abditos, paullo post innotuisse armatæ hostium multitudini pretiosa quæque sibi occurrentia rapienti, mirum ut esse nequirit, eosdem inde sine ullo labore fuisse surreptos, & alio deportatos, id quod Tutelaribus nostris in subterraneo specu latefcentibus, loco advenis militibus prorsus ignoto, multisque aliis præfidiis circumsepto, quis adeo rerum humanarum ignarus putet accidere potuisse? Verum enim vero objectionibus nunc brevioribus reliquis brevius occurramus.

Bavariæ corpus esse S. Ambrosii satis idonee non probatur, ex eo quod inde aliquot ejus Reliquiæ ad nos aliquando fuerint asportatæ: tum quia nullas ea de re publicas assertiones habemus: tum quia Reliquiæ, quæ hoc nomine apud D. Ambrosii Cœnobitas exstant, ac ob id dubiæ & suspectæ, egentisque potius rationum, quibus fulciantur, ponderibus & momentis, quam aptæ per se ad D. Ambrosii corpus alienis provinciis, vel urbibus adstruendum.

Jam ad varia Tempia quod attinet, diversis in provinciis jamdudum erecta ob Sanctorum Gervasii & Protasii Martyrum ossa inibi collocata, & si recte ratio perpendatur, ad veterumque scriptorum mentem accommodetur, nostram nullo modo sententiam, qua sacra illorum corpora ad hanc usque diem existere diximus in Ambrosiana æde, debilitant, vel infringunt. Apud veteres enim Christi cultores talis ac tantus existit Reliquiarum Sanctorum Martyrum cultus, ut vel exiguarum earundem particulæ tantum honoris tribuerent, quantum integro corpori deberetur. Unus hæc D. Gregorius Nazianzenus firmabit hoc loco, supra siquidem alia nos de re Patrum testimonia meminimus protulisse: Est adeo frequens horum lustræ certaminumque veneratio, ut exigui pulvis, aut reliquia veterum ossium, totius ad honorem sufficiant: & nonnullorum saltem appellationem reliquiarum omnino expertem, scio locis certis inditam esse pro toto Martyre, qua tamen eandem vim obtinuerit. O rem gloriosam salutem affert sola recordatio. Et alibi: Quorum vel solum sanguinis gutta, atque exigua passionis signa idem possunt, quod corpora.

Hinc fit, ut licet aliis in locis esse dicantur aliquæ Martyrum horum particulæ, nihilominus in Basilica Ambrosiana eorum ferme integra corpora reperiri, fateri possimus, cujusmodi se illa invenisse atque adeo condidisse ipsemet Ambrosius fassus est ad Marcellinam scribens, cum inquit: *Invenimus mira magnitudinis viros duos, ut prisca ætas ferebat, ossa omnia integra.* Et paulo post: *Condidimus integra ad ordinem transtulimus vespere etiam nocte, & mane ad Basilicam Faustæ, ibi vigilia tota nocte, & manus impositio.*

Ac particulæ quidem illæ forte fortuna contragationis & translationis ipsius tempore à sacris illis corporibus sejungi ab ipsomet D. Ambrosio potuerunt, eam ob causam, ut pio & ardentissimo aliarum Ecclesiarum aliquam earum expentium desiderio satisfaceret, Sanctorumque cultum, quoad ejus fieri poterat, latius propagaret. Sentire Baronius id videtur Tom. IV. *Annal. Ann. CCCLXXXVII. num. XLII. ubi sic inquit: Absoluta igitur Ambrosius concione, sacra pignora, ut dicebat, suo loco recondidit; ita tamen, ut ex eis partem aliquam sibi servaret, erogandam in diversas Ecclesias, quæ ardentissimo studio eorundem Sanctorum Martyrum reliquias ex diversis locis expeterent, ut in eorum honorem basilicas vel erigerent, vel in jam edificatis reponerent.*

Porro eam Reliquiarum partem, quam sibi retinuisse D. Ambrosium Baronius opinatur, non illam ego fuisse crediderim, quam opinatur ipse, sed sanguinis tantum, aut panniculi eo perfusi, coactus gravissimorum virorum auctoritate à Viro illustrissimo dissentire. Ac in auctoritate quidem D. Ambrosii nuperrime recitata, si non apertum, magnum certe momentum inest ad probandam nullam partem sanctorum corporum integritatem defuisse, tum cum in Ambrosianæ Basilicæ Ara maxima condita fuerunt.

Altera vero Gregorii Turonensis, disertissima omnium quotquot adduci possent, adeo me movet, ut in aliam me à Baronio sententiam pertrahat non invitum. Præcise enim in *de gloria Martyrum* cap. XLVII. hujuscemodi ea de re historiam narrat: *In hac Urbe DD. Martyrum Gervasii Protasique victricis corpora retinentur, quæ beato Ambrosio revelata, atque ab eodem reperta in Basilicam, quam ipse proprio edificavit studio, ostensis miraculis sunt sepulta. Et quæ super his quodam referente audivi, absurdum non putavi inferere lectioni, quia non continentur in historia passionis. Aiebat enim quod quando hæc gloriosa corpora translata in Ecclesiam illam fuerunt, dum in honore ipsorum Martyrum missarum solemnia celebrarentur, cecidisse è camera tabulam unam, quæ illis capitibus Martyrum, rivum sanguinis elicit. De quo infecta linteamina, vel pallula, sive vela Ecclesiastica, beatus cruor collectus est, qui usque adeo confluisse fertur, quoadusque linteamina, quæ susciperent, sunt reperta. Ex hac enim eorum Reliquia assatim collecta per universam Italiam, vel Gallias sunt delata. Ex quibus & S. Martinus multa suscepit, sicut Paulini beatissimi narrat epistola.*

Pari fere modo beatus Inventius, sancti Syri discipulus, & in Episcopatu Ticinensi successor, Mediolanum missus, ut piam sepulturæ operam Sanctis tunc pro fide Christi demortuis præstaret, intinctum sacro sanguine linteum, à quadam pia muliere Mediolanensi accepit, magnæque reverentia Ticinum detulit. Quin imo Divus ipse Syrus solam vestium particulam magno procuravit studio, Laurentio Surio auctore, cujus è tertio *sacra Historia* Tomo, die XII. Septembris, ipsa verba ponam: *Post aliquod dehinc temporis intervallum, cum Sanctorum Protasii & Gervasii apud Mediolanum finita essent certamina, beatissimus Syrus à Lyberto Christi fidele particulam sanctarum exuviarum, munus longe gratissimum, obtinuit, quod signis & virtutibus coruscans, varia sanitatum genera conferebat variis: adeo ut eorum mirabilium magnitudine permotus Antistes, templum haud procul ab Urbis moeniis extra civitatem exstruxerit.* De Urbe Ticinensi antiqua Surius loquitur hic: quia hujusmodi Templum intra Urbis moenia nunc clauditur, Urbe ipsa jam olim transcendente antiquos fines opulentia tum recenti Longobardorum Regum, qui eam sibi in sedem elegerant.

En ut adversarios profligavimus, & omnia eorundem tela, vel comminuimus, vel certe con-

A jecimus in eosdem. Conticescant igitur tandem aliquando victi, nec amplius contra nostram sententiam audeant obgannire, quin potius nobiscum, imo cum universo Clero & Populo Mediolanensi, Patronos & Tutelares suos, non modo in Ambrosiana Basilica etiam num exsistere fateantur, sed studio quodam præcipuo pietatis, uti par est, venerentur ac colant. Interim nos ad sacrum Archiepiscopum Angilbertum, à quo piæ ejusdem contentionis æstu divertimus, revertamur. Eluxit ejusdem Angilberti pietas erga Sanctos tum etiam cum ex Albingauni oppido corpus S. Caloceri Martyris in Clivatensem ædem ab Aldechisio conditam, summo studio transtulit, ratus, illud ibi cultum iri religione & sanctiore ritu.

B Sed ut ad nostrum Coenobium redeamus; tot ex eo, Benedictinaque familia, Viri disciplinis & moribus probatissimis clari, tanquam ex Equo Trojano, singulis ætatibus prodierunt, ut ii non Italiam solum, sed ipsam quoque Germaniam, Hispaniam, Galliam, Angliam, Scotiam, cæterasque Christiani Orbis Provincias doctrinæ sanctitatisque suæ fama, superstitionibus involutos homines ad fidei veritatem, unitatemque traduxerint; eos etiam, qui Romani Imperii jugum excusserant, Romanæ Ecclesiæ potestati subegerint, ejusdemque in obsequio continuerint non invitos. Mitto intra Monasterii nostri septa nutritos & educatos fuisse Reges æque ac Monachos, Sigibertos, Alfredos, Inas, Ceoluulphos, Etchibidas, Chenridos, Offas, Egebartos. Mitto fortissimos Duces, Chilianum, Ewaldum, Lambertum, Stephanum, & Ablonem ex Ordinis nostri Benedictini castris in solem, in aciem, in pulverem prodiisse. Siquidem primi illi Monachi omni virtutum genere antiquis illis Lupercis longe superiores, non Fauni nescio cujus inanis numinis patrocinio fulti, feras ac lupos, ut illi arcere à stabulis credebantur, sed hæreticorum lupis ipsis deteriorum incursum, Dei veri ope, à grege Dominico propulsare.

C Atque uti se res humanæ habent, quæ instabili nescio quo fluxu, seu potius præcipiti volubilitate, ad interitum sua sponte ruunt, suumque terminum ac certam durationis periodum fortiuntur, huic quoque Monasterio nostro, non longo temporum decursu, finis adfuit deplorandus. Anno siquidem MXX. à Christo nato, Heribertus tertius Gualardi, seu (ut quibusdam ex nostris magis arridet) Gerardi Antimiani Canturiensis, & Berlendæ acris ingenii scæminæ filius, ac postea à Benedicto VIII. Mediolan. Archiepiscopus renunciatus, ut erat animi magnitudine singulari, præclara quæque facinora aggressus, Monasterium S. Dionysii condidit; Templum D. Satyri consecravit; Corpus S. Monæ Archiepiscopi Mediolanensis in æde D. Vitalis transtulit; corpus S. Quirini Episcopi & Martyris cum aliis duobus nostrum in Templum invexit; Episcopum Papiensem in conventu Rocaliensi crucem deponere jussit; Ambrosium Ecclesiæ Mediolanensis ordinarium Episcopum civitatis Laudensis instituit; Henricum Imperatorem Romam deduxit, ut à Benedicto Pontifice coronam acciperet. Cumque se in Basilica D. Dionysii sepeliendum jussisset, majoribus Monasterium illud à se fundatum provenitibus augeri voluit, ac ob id magnos nostri Monasterii census ita imminuit, ut S. Vincentium phlebotomasse Galvaneo diceretur, ex ejusque sanguine S. Dionysii Coenobium construxisset. Quin imo his non contentus, an. MXXIII. tam nostri quam Ambrosiani Monasterii Præsules, qui ab omni Archiepisc. jurisdictione sese vindicaverant, Heriberti jura potestatemque penitus subierunt, annuente Summo Pontifice Benedicto, à quo præterea sanctorum nostrorum Martyrum Quirini, Nicomedis, & Abundii corpora dono acceperat, ut alias meminimus supra.

Fuit is pusillo corpore, ac instar alterius Macedonis parvo, sed animi magnitudine adeo ingens, ut multorum tam prædecessorum, quam successorum Archiepiscoporum in rem Christianam merita superarit: ut qui semper vincendi rationem apertam secutus est, ac maximum rerum gerendarum momentum in celeritate posuit, palam fuffis hostibus gaudens, belli magis quam pacis amans; periculorum contemptor; metui magis cupiens, quam amari; literis apprime excultus; magnæ liberalitatis & fidei viri; subjectis æque parcendi cupidus, ut ipsa libidine dominandi; fortuna tandem non tam vinci nescius, quam concuti, vel moveri. Plures idem Lombardiæ Urbes magna militum copia domuit, Arduinum, Berengarium, & Ugonem Comitem bello superavit, quamplures Episcopos, & insignes Præfules sibi obfistentes vicit, & subditos in officio perpetuo continuit, aliaque pene innumerabilia præclare gessit, ob quæ à Benedicto VIII. Pontifice Maximo magni semper habitus, donariis opulentissimis cumulatus, titulis ac honorum insignibus decoratus est.

Tandem vita functus in æde D. Dionysio sacra, & ab eodem instaurata conditus, adscriptis hisce versibus, qui & id ipsum testantur apertissime, Lapidis incisi, & stylum ejus ævi mirum in modum repræsentant:

HIC JACEO PVLVIS, CVI QVONDAM
CLARVIT ORBIS,
TVNC HERIBERTVS ERAM, NIMIO-
QVE DECORE VIGEBAM
OFFICIO PLACIDI FVNGEBAR PRAE-
SVLIS ARCHI,
NVNC TVMVLOR SERVVS SERVO-
RVM CHRISTE TVORVM
PRO MERITIS HORVM TIBI DIGNE
COMPLACITORVM.
SANGVINE QVAESO TVO MIHI TV
MISERERE REDEMPTO
HVC VENIENS LECTOR SIBI DIC I-
GNOSCE REDEMPTOR,
VT VIVENS VITA REQUIESCAT SEM-
PER IN IPSA.

OBIIT ANNO DOMINICAE IN-
CARNAT. MIL. XLV. XVI. DIE
MEN. JAN. INDICT. XIII.

In Arca lapidea Epitaphio isti subjecta, ac proxima suspicatus olim fueram Heriberti ossa quiescere, nec temere ob utriusque vicinitatem maximam. Nec defuit mihi rem paulo diligentius inquirere cupienti Cœnobarum Ædis illius proluxa humanitas, ut voti compos evaderem. Nam ea de causâ animum meum invaserat cupiditas ossa illa propius intuendi, ut ex fidelissimo oculorum testimonio certior plane fierem de forma corporis Heriberti, parvumne re vera fuerit, (quod ex probatorum Chronographorum fide testatus ante fueram) an procerus. Facile siquidem vel ex ipso ossium exilium, magnorumve conspectu, id quod scire avebat animus, dignosci posse mihi persuadebam. Immissa igitur in sepulcrum face ossa Præfulis omnia diligentissime recognovi, & grandiora longioraque deprehendi, quam ut homini parvi corporis convenire possent. Quamobrem quid hic

A mihi sentiendum esset, statim ambigere cœpi. Nimirum aut falsitatis insimulare debebam Scriptores illos, qui Heribertum statura pusillum literis, quasi coloribus, expressissent, aut certe fateri ossa in Arca illa composita Heriberti non esse. At primum, ne quam gravitati & auctoritati Historicorum, qui parvam staturam huic Archiepiscopo tribuerant, injuriam inferam, asserere libere non audebam; alterum præter ipsam ossium inspectorum fidem suadere non obscure videbatur Galvaneus non obscurus Scriptor c. ccxlv. *Chron. Mediolanensium*, ubi de Heriberti corpore sic scribit: *Heriberti corpus in monasterio S. Dionysii, quod ipse fundaverat, tumulatur extra Ecclesiam, quia terra erat interdicta: post decem menses translatus fuit & sepultus apud sepulchrum Valvassorum de Bussero: & inventus est oculis apertis, corpore integro baculum pastoralem cum summo vigore gerere.* Quibus ex Galvanei verbis aperte liquet Heriberti sepulchrum olim extra D. Dionysii Ecclesiam exstitisse, cum hodie in ipsamet Ecclesia videatur; aut si motum inde fuisse concesserimus tunc temporis, quo D. Dionysio Templum instaurari cœpit, tunc certe ad Valvasores de Bussero commigrasse, nec inibi amplius constitisse. Quid quod fieri potuit, ut Heriberti tum Epitaphium, tum sepulchrum sine ipsius Heriberti corpore, casu, vel errore aliquo, unum in locum coaluerint, cum ante inter se maxime diffiderent. His accedit (quod ejusdem templi ædituus affirmavit) lituum in eo sepulcro repositum fuisse litteris hisce exoticis in ære deaurato incisis:

Aluysius. de Carchano. Abbas. Sancti
Dionysii Mediolani &c.
MCCCC. XXXX. Madii.

Quæ quidem, cujus illic ossa quiescant, planissime docent, nec ullum amplius ea de re dubitandi locum relinquunt. Lituus autem hisce notis inscriptus apud eundem Ædituum diligentissime custoditur. Quibus fit, ut illud Heriberti sepulchrum esse constantissime negem. At ne multus in hac re sim, parvam ipsius Heriberti effigiem ex ære ductam à rudi quidem & impolita manu, sed ut illa ferebant tempora non invenisse, ad pedes positam imaginis alterius grandioris, quæ Cruci affixum humani generis Servatorem ex ære pariter refert: quæque in ejusdem Templi cœnobio visitur, benevoli ac prudentis Lectoris oculis ad intuendum subjiciam: tum ut ipsemet allata rationum momenta perpendens, controversiam hanc pro suo arbitratu dirimat: tum ut Imago ipsa, antiquam vestium Archiepiscoporum formam exhibens, memoriam tanti Præfulis posteritati consacret & propaget in æternitatem omnem. Propagabit autem, si quam ejusdem Lectoris favorem ætatem his scriptis dabit, quod rogatum imus. Nos interim ne injurii simus iis, à quibus ista nobis humaniter monstrata sunt, eorum isthuc memoriæ consulemus, grati colemus memoria sempiterna nomen & humanitatem D. Matthæi Valerii è celeberrima Cartusianorum Ticinensium familia Cœnobarum, ejusdemque familiæ apud Mediolanenses Procuratoris integerrimi, deque omni Antiquitate literaria optime meriti, quod eas nobis præfati ævi reliquias non inviderit, sed ultro pri-



Operæ pretium duxi de Heriberto paucis hæc libare, quod is non tam male meritis de Cœnobio nostro videatur esse ob annua illius vectigalia imminuta, quam bene ob auctam Vincentiani Templi gloriam & splendorem, illatis in illud thesauris Sanctorum Martyrum. Nimirum hoc monumentum unum,

are perennius
Regalique situ Pyramidum altius:
Quod non imber edax, non Aquilo impotens
Possit diruere, aut innumerabilis
Annorum series, & fuga temporum.

Magni namque sunt, ut inquit Paulinus in Vita D. Ambrosii, Martyrum thesauri, quos non arugo, neque tinea exterminet, neque fures effodiant, & furentur. Quia custos eorum Christus est, & locus eorum aula celestis, quibus vivere Christus fuit, & mori lucrum.

Divorum enim corpora cum suis jungentur animis durabunt in æternitatem omnem: at illa volubilis fortunæ bona nunc mihi nunc alii benignæ fluminis

Ritu feruntur nunc medio alveo
Cum pace dilabentis Hetruscum
In mare, nunc lapides adefos,
Stirpesque raptatas, & pecus, & domos
Volventis una, non sine montium
Clamore, vicinaque sylva
Cum fera diluvies quietos
Irritat amnes.

Minus hæc igitur deploranda fortunæ commodorum, prædiorumque jactura, quamvis illam ægre tulerit D. Vincentii Cœnobium, coactum eam ob causam non pauca intermittere ad ejus peculiare vetus institutum spectantia non sine sensu doloris & damni. Hinc prima mutationis illius origo, & causâ promanavit: sed alia subinde, nec leviora, damna perpeßum est, summam rerum Mediolanensium tenente Corrigii Domino, nostrisque Ci-

vibus jus dicente: is enim non modicam uberrimorum fundorum Monasterii nostri partem Præposituræ Carrugati adjecit extra Portam Novam, opulento ibi Sacerdotio constituto, nostro interim Cœnobio per potestatem nescio, vel per injuriam, ad extremam propemodum inopiam redacto. Quamobrem tum primum à suscepto jampridem instituto viginti quatuor illorum adolescentum ad omnem virtutem educandorum recessit, piumque Xenodochii proximi subsidium non mediocriter imminui cœpit. Quin imo rerum ille status Monachos nostros coegit quidvis, & facere, & pati, nedum pristinae virtutis officia deferere, Monachorum inde numerus, & regularis disciplinae majestas, cæteraque omnia de pristino illo statu decidere, & in pejus ruere cœperunt. Suborta sunt eadem fere tempestate per universam pene Italiam bella, quæ ita postea exarserunt, ut regiones ipsæ vastatæ, urbes direptæ, cætera loca omnia pessime sint accepta, nostrumque Cœnobium etiam in partem cladis illius venerit, sæpe Barbarorum immanitatis obnoxium, sæpius fortunis omnibus spoliatum, ferro etiam flammaque petiit aliquando, & non eversum tantum. Quippe Monachi inde per summam injuriam exturbati, tribus tantum vel ad summum quatuor superstitibus, obierunt. Itaque Romani Pontifices, ne defunctis Monachis, Monasterii quoque prædia & census annui deperirent, ea fidei præstantium Ecclesiæ Præsulorum commendarunt, & in illustrium virorum potestate quodammodo posuerunt, & Abbatia Commendatarios (hoc enim illos peculiari nomine afficiunt Jurisconsultorum libri) voluerunt esse. Commendatarios igitur jussu Monachi illi superstitibus in Monasterio retenti sunt, ac frugali mensa accepti usque ad annum MDXX. succedentibus interim in demortuorum locum aliis à superstitibus subrogatis. Summa apud ipsos dignitas Prioris erat, qui à Commendatario &

Monachis ipsis electus, eos in claustralis disciplina muneribus continebat: ac illi quidem obedientiam, reverentiam, & observantiam Priori debitam pollicentes, ille vero cervicibus novi Prioris Monachalem cuculam imponendo, eum in Priorem instituebat, cui reliqui parere deberent. Ex mente eorundem quatuor Monachorum, quasi ex voto pleni Capituli, negotia universa Cœnobii ad Abbatis nutum expediebantur. Verum cum hi nec sibi ipsis, neque Commendatario multum prodesse, neque Monasterio ipsi satisfacere viderentur, abeundi facultate impetrata, cum annuo sibi assignato censu quandiu viverent, ad privatos lares se contulerunt: tumque Commendatarii eos alendi, & in rebus hujusce sacerdotii consulendi, onere liberati sunt, finis Monachis inclyti olim D. Vincentii Cœnobii factus.

Unum illud scitu dignum, & ad idem Cœnobium spectans, antequam inceptum Fasciculum absolvam, tacitus præterire non possum quod Donatus Bossius res patrias concisa quidem brevitate, sed vere juxta & accurate scribens, memoriæ consignavit: in illa octava hujusce Urbis cæterarum omnium longe dirissima à fundamentis everfione, crudelis æque ac inhumani Imperatoris Federici, Rubrobarbi cognomine, jussu facta anno à Christo nato MCLXII. Alexandro summo Romæ Pontifice, Mediolani vero Archiepiscopo Urbano Pirovano, Cives omnes, qui tunc temporis incolebant Ticinensem Portam, ad nostrum D. Vincentii extra Urbis moenia positum Cœnobium, ceu ad asylum tutissimum confluisse, ibique confedisse, extremum Patriæ suæ excidium spectaturos. Quia vero major horum pars fabrorum ferrariorum, lignariorum, sutorum, cerdonum, cæmentariorum, & aliorum hujusmodi opificum erat, quorum ex genere nunc etiam pars est pleraque degentium in eadem Porta, idcirco Vico illi, qui nostro Cœnobio Urbem versus extendebatur, exstructis hinc inde casis, Fabrorum nomen est datum: quamvis aliorum sententia improbanda non sit, qui longe antiquiorem, nobilioremque hujusce nominis originem, ut ostendemus infra commodius, indagarunt.

Verum enim vero, cum tuguria festinanter exstructa, capere tantam multitudinem non possent, eorum aliqui, ut exonerarent vicum, concesserunt ad Vigentinum pagum, præstantibus id ipsum reliquarum Urbis Portarum civibus, ut est literarum monumentis inscriptum. Nam qui Portas Orientalem & Novam, ante cladem illam, habitare solebant, ad Monasterium S. Dionysii protinus adierunt, inde ad Lambrati villam; qui Romanam ad D. Celsum, inde ad Nucetam; qui Vercellensem ad D. Victoris Cœnobium, inde ad S. Joannem ad Vipriam, & S. Syrum; qui Comensem ad S. Simplicianum, inde ad Carreriam ordine commigrarunt. E propria quippe tum, & communi patria ad unum omnes, nulla sexus aut ætatis habitata ratione, nulliusque discrimine, abire jussi sunt, hostis immanissimi Federici decreto jubentis Urbem nostram, falis semente super injecta, æquari solo penitus, & everti, ne quo in posterum tempore habitari possit clarius indicaret, omnemque spem Civibus auferret ex ea radicitus evulsis quodammodo, & extirpatis, novam ejus in solo sobolem procreandi, aut principio vitæ sale quodammodo extincto, ad pristinae Urbis instaurationem, post ulla intervalla temporum, renascendi. Ejus itaque Urbis, quæ inter reliquas locum fere principem obtinebat, demolientiæ penitus, & delendæ negotium Sepriensibus atque Martefanis datur, qui Mediolanensibus inimici, insensique nimium erant. Sed eam Patriæ ruinam, domorum exitium, ejectionem Civium, ac cætera ejusmodi mala persequi horret mihi animus, & refugit: abhorruit enim is fem-

A per à cogitatione, nedum à narratione gravium calamitatum, (id quod sæpissime sum expertus) id eoque me id aggredi invita, quod ajunt, Minerva, & adversantibus Musis non placet. Eos casus spectare qui cupit, Latinorum is poetarum præstantissimum Virgilium adeat, & attente legat. Is enim II. *Æn.* libro extremos Troiæ casus enumerans & describens, Patriæ nostræ excidium, & infandos civium dolores, in illa miseranda suis ex ædibus ex-turbatione, ad vivum exprimit, remque ipsam omnem oculis ipsis subjicit usurpandam. Nempe,

— crudelis ubique

Luctus, ubique pavor, & plurima mortis imago.

B Cæterum funestus Imperator, capta Urbe, Civibusque suam in potestatem, ditionemque redactis, in murorum propugnaculis præsidia militum collocavit, qui ad omnes eventus expediti essent, dum alii partim in expilandis ædibus, suisque ex iisdem habitatoribus exturbandis; partim in scrutandis latebris, indeque absconditos cives eruendis; partim in reliqua populi multitudine ex Urbis limitibus ejicienda occupati penitus distinebantur. Quocirca feri illi ac barbari, ex Martefana & Sepriensi regione conflati, præclaram occasionem nacti, capitale odium, quod in Mediolanenses jamdiu conceperant, exercendi, direptionis initium fecerunt à supremis ædium tectis, quorum tegulas tanto furore & impetu præcipientes ad terram dabant, ut ex eorum insolenti fragore ac strepitu plerique Civium timore insolito perterriti, alii corpore ipso hæsitantes mortuorum simillimi, alii subito animis conciderent semivivi. Hinc luctus ille crudelis, hinc pavor, & plurima mortis imago. Patres quoque nostros pertinaciter negantes è communi Patria pedem efferre à filiis, & nepotibus, enixe rogatos, ut iræ Barbarorum, furentique Cæsaris satellitio cederent, divinum Vatem descripsisse putabit Lector ea cum legerit, quæ sequuntur:

*Est ubi jam patria perventum ad limina sedis,
Antiquasque domos; genitor, quem tollere in altos
Optabam primum montes, primumque petebam,
Abnegat excisa vitam producere Troia,
Exsiliumque pati. Vos ô, quibus integer avi
Sanguis, ait, solidaeque suo stant robore vires,
Vos agitate fugam.*

*Me si cœlicola voluissent ducere vitam,
Has mihi servassent sedes: satis una superque
Vidimus excidia, & capta superavimus Urbi:
Sic ô sic positum affati discedite corpus.*

E Sed ipsos quoque stridores ac strepitus Mediolanensium sceminarum cum ob hostium timorem ostia pulsantium, ac etiam dejicere molientium, tum ob rerum, quæ supererant, familiarium & domesticarum curam, visus est idem Vates illas carminibus adumbrasse:

*At domus interior gemitu, miseroque tumultu
Miscetur: penitusque cava plangoribus ades
Fœmineis ululant: ferit aurca sidera clamor.
Tum pavida tectis matres ingentibus errant,
Amplexæque tenent postes, atque oscula figunt.*

F Instabant hostes ipsi effractis ædium foribus, easque cogeant egredi: contra illæ negantes pertinaciter obsistebant, qua studentes comprehendere columnas, qua januas complecti, qua limina retinere; sed frustra. Vi nempe omni inde avulsæ miserando sane ac deplorando spectaculo extremum eis vale dicere coguntur, passisque crinibus & incompositis, decurrentibus hinc inde uberrime lacrymis, ac ejulantibus liberis divelluntur ad prædam. Quis sine lacrymis satellites illos carnificibus ipsis immaniores videre potuisset tardiores, aut minus expeditas non probris tantum laceffentes, sed ferro & armis, perinde ac si bruta essent immania fodientes. Fœminas, viri æque, ac juvenes dimissis verticibus inermes, ac mœsti, sine ordine, sine

sine discrimine sequebantur: adeo Barbari illi ficiarii spoliaverant universos omni supellectili, & pretiosa veste, vix ut eis necessaria, eaque vilia reliquerint ad tegendum corpus. Claudebant lugubre agmen senes, & cæteri infirmo corpore & adversa valetudine impediti, iique pallidi & exsangues: nec obætatem tantum, quam ob pavorem totis artubus contremiscentes. Expulsis Civibus urbs sola relicta penitus, & deserta, nulli privatæ domui parcitum, direptæ omnes & æquata solo, quod demum sale satum & tectum. Matres igitur cum natis, viri pubi permixti, ac reliquum omne senum vulgus ad recensita paulo ante Monasteria, quæ extra muros erant, suis quique ex portis sese ordine receperunt, adjacentia illis domicilia occupantes, ut illic si minus patria, saltem patrii soli conspectu fruerentur, extremumque Patriæ suæ exitium, quoad ejus fieri poterat, propius intuerentur. Ex his, qui mercibus, artibus, vel scientiis dediti erant, otio contabescere nescientes ad alias urbes Italiæ cogitaverunt tandiu esse, quandiu saltem abesse è Patria cogerentur. Quod ipsum idem Virgilius initio III. *Æn.* adumbravit: sed quia rem longe diversam sibi ad narrandum proposuerat, eam nobis clarius exprimendam reliquit: suis nobis quodammodo coloribus præparatis, hoc est, vocibus quibusdam, ac leporibus ad rem hanc nostram pingendam maxime accommodatis. Quod licet non ita facile sit, longeque difficilior sit usurpare numeros Maronianæ Musæ, quam ejus lepores & flosculos legere: juvat me tamen proprio ingenio indulgere, quidquid contra sensuri sint Mommi, & in hac Mediolanensi direptione Vatem ipsum iisdem fere numeris canentem audire, conatu, uti arbitror, non reprehendendo:

*Res postquam Insubrum, Latiiqve evertere gentem
Immeritam visum Superis, ceciditque superbus*

A *Illorum vertex, & fumat humo Italia tellus:
Diversa exsilia, & diversas quarere terras
Fatis incerti Cives, miserisque tenentur,
Quo ducat fortuna illos, ubi sistere detur.
Ast ubi convenere animis, opibusque parati
Innumeri in cunctas tandem contendere terras.
Dulcia tum Patria plorantes mœnia cuncti,
Et caros olim quos jam coluere Penates,
Rursus, & armentis omnes delubra, patentes
Atque lupis campos linguunt, ubi Patria quondam
Cara fuit cunctis (miserum) nunc exsulis instar
Civis per Latium sparsis datur urbibus hospes,
Artibus hinc multis effloruit Italia tellus,
Commune, & cunctis dictum fuit inde sequutum.
Is condet reliquas unam hanc, qui everterit urbem.
Sic deserta diu crudeli exercita castu,
Et natis orbata suis miseranda ferarum
Exstitit eheu sedes, pecudumque est facta cubile.*

B *Conatus sum veteres Patriæ nostræ miseras hoc in
loco subicere, quo felicitatem eam, qua nunc Deo
dante fruuntur nostri Cives, eidem in acceptum
ferrent, caverentque sedulo, ne suis eum criminibus
sibi infensum redderent, ansamque novis infortu-
niis darent. Annus, dies, & hora, quibus tum Me-
diolanenses ex urbe in suburbia commigrarunt,
versibus aliquot indicantur apud Galvaneum cap.
CCLXXXV. Chronica, quos hic adscribere non gra-
vabor:*

*Exiit Aprilis bis quatuor ante Kalendas
De muris Urbis plebs tristis, Mediolanum
Mille centum datis annis sexaginta duobus
Vacua fuit cive, Virgo salutatur ab Ave.*

C *Ad hunc fere modum & stylum tempora & rerum
casus exprimere solebat vetus Chronographorum
diligentia, de quibus satis; ne quis me alienorum
scriniorum expilatorem putet.*

JO. ANT. CASTELLIONAEI FLORILEGIUM ANTIQUITATVM PAROECIAE

D. VINCENTII IN PRATO.

SECTIO I.

FASCIC. VII.

Cænobii D. Vincentii opes. Parœcia fines. Vitria origo, cursus, nomina. Cloaca. Nero. Canosa. Clusia. Cantarana. Coriariorum, & Capucinatorum nova, & antiqua sedes. Burgatorum jus, ars, rivus. Vipera Vitecomitum. Vetra antiquitas. Vecchiabia. Tributarii D. Vincentii. Fabiorum Vicus, & Porta, eorumque adventus Mediolanum. Sarcophagi nomen vetus. Sepulcra rosis spargi & ornari solita. Molliter ossa quiescant, formula sepulchralis. Hymenai ad Pontem Fabium statua declarata. Nuptiarum ritus. Vera de eadem statua auctoris sententia. Alia Cænobii Vincentianijura. De Præpositura D. Albini, S. Vincentii Vicariatu perpetuo, sacerdotiis SS. Viti, & Xisti, De-

lubris DD. Christophori, Catherina, Caloceri, & amentium Xenodochio, scitu pleraque non indigna.



F *CÆNOBIVM* hoc, ut ex Galvaneo jam antea sum præfatus, initio adeo opulentum fuit, ut ex latis illius prædiis tantum ei quotannis reficeretur, quantum non modo ad optimum vitum, statusque splendorem & dignitatem satis esset, sed etiam ad affluentiam supereslet. Enimvero cum Desiderii potentissimi Longobardorum Regis munificentia, tum fortuna ipsa cum

cum præclara Monachorum hujus Cœnobii religio-
sa disciplina ac sanctimonia, in eo opibus, omni-
que copiarum genere cumulando certasse videban-
tur. Hanc fructuum copiam, nimiumque redun-
dantes Monasterii divitias, diligentius animadver-
tens, & acutioris nescio cujus ingenii trutina per-
pendens Heribertus Mediolani Archiepiscopus, ea-
rum partem novo S. Dionysii Cœnobio extruendo
jussit adscribi. Hinc factum ut illud in ore o-
mnium versari cœperit, *Heribertum venam Divo
Vincentio secuisse, sanguinemque misisse, atque hoc vi-
tali succo D. Dionysii nomen, ac monasterium, à mor-
tuis excitasse.* Pertingebant tunc temporis Cœnobii
nostri prædia, si non à Carrubio Ticinensis Portæ,
saltem à Fabiorum Ponte, quem Fabiam Pusteru-
lam Antiquitas appellavit, nunc vero vulgus cor-
rupta (ut opinor) voce Fabrorum Pontem, usque
ad ædem D. Christophori in libera nostrorum Mo-
nachorum ditione. His in prædiis, cum civitas post
illam maximam ab Imperatore Federico illatam Pa-
triae cladem, instauraretur à S. Galdino Cardinali
sacrum imperium Mediolani tenente, & viciniore
suburbia cingerentur, ne in posterum barbaris, ex-
terisque gentibus essent adjumento: varia exstructa
fuere ædificia, eorum prædiorum fundis quibusdam
Civibus in emphyteusim concessis, ut infra pluribus
ostendemus. Sed & aliis in locis tum Mediolanensis,
& Viglevanensis, tum Comensis, & Novariensis
agri amplissima frumenti, vini, & aliarum rerum
vestigalia Divi Vincentii Cœnobium exigebat.

Ac ne quæ de prædiorum fructuum & reddi-
tuum hujusce Cœnobii ubertate univèrse diximus,
à vero discrepare videantur, speciatim attingemus
ea, quæ publicis documentis & integerrimis lite-
ris continentur, ut veritatis amantes potius, quam
Poetæ, in explicandis Ecclesiasticis antiquitatibus,
habeamur. Ac quoniam prædia, quæ media inter
Carrubium, sive Corrivium Ticinensis Portæ, &
loca delubro D. Christophori proxima jacent, in
Monachorum nostrorum jus atque ditionem majori
saltem ex parte, Regia munificentia concessisse
initio Fasciculi diximus, eam rem nunc clarius ex-
ponemus. Neminem igitur hujusce veritatis attingen-
dæ cupidum latere debet, egressis olim è veteri
Ticinensi Porta obviam fuisse perennem quen-
dam aquæ rivum decurrentem ad fines usque no-
stræ Parœciæ spectantis orientem solem. Is post-
ea Vipriæ nomen accepit, ac tum agri quidem aper-
te lymphis illius, & prata finitima irrigabantur,
quæ nunc veluti per cuniculos fornicati operis oc-
culte profluunt ad peculiare usus Vicum eorum de
nomine incolentium: & nostra memoria quidem
limpidissimos rivus is latices promebat viatoribus
palam, hodie delitescit, nec se inspicendum præ-
bet, nisi post aliquod intervallum, quo latior ubi
Ticinensis excurrit via, Coriarios contingat, qui
Vetraschi, ut ipsemet ibi rivus Vitria nominatur.
Undenam igitur rivus is nomen & initium traxerit,
operæ pretium, ut locus me ipse admonet, aperire.
Nam hodie quidem videmus illum ex Urbis fossa
juxta Pontem Fabium proficisci: sed olim ex remo-
tiori fonte manasse non desunt, qui audeant affirma-
re. Nos igitur re sic hortante superiora, quantum in
nobis erit, tempora repetemus, ac primum ejus
fontem, lucerna Cleanthis adhibita, requiremus.

Ignari locorum & antiquitatum varias de eo sen-
tentias attulerunt. Siquidem aliqui censent Vetræ
ex eodem fonte atque principio promanare, ex quo
rivus ille, qui è prædio urbano Breguntia, non
procul à Cœnobio Cucullatorum S. Victoris ad Ul-
mos primum erumpit, statimque sese fornicato sub
ponte abdit, inde Monachorum Olivetanorum,
Collegii Calchii, & Ambrosiani Xenodochii con-
terminos & amœnos hortos irrigando discriminat:
mox exiens per canalē filiceum ad Conchettam

A Parœciæ Vincentianæ terminum, aquis fossiæ Civi-
tatis auctus, secus viam Lesinorum excurrit, ac
majori Xenodochii Amentium parte circum obita,
medium Abbatiae nostræ vinetum interfuit, per-
curritque, donec navigero aquæductu apud Tom-
bonem exceptus alieno in alveo conquiescit: ab eo-
dem, inquam, fonte & principio censent isti rivum
illum promanare, à quo promanabat Vetræ, an-
tequam Urbs mœnibus cingeretur à Ferdinando
Gonzaga Mediolanum pro Carolo Quinto Cæsare
moderante.

B At hi non minus inscitiae locorum, quam erro-
ris temporum arguuntur, illius quidem eo cla-
rius, quo notius est rivum hunc alterum non extra
Urbis mœnia, unde Vetræ nostra quondam profi-
cisciebatur, sed intra è parvo fonte prope Vercellen-
sem Portam effluere, & ad Breguntiam modico al-
veo derivari: istius vero quod multo ante mœnio-
rum Urbis instaurationem aquæ Vetræ, quas longe
emendatius Veteres diceremus, decurrebant in Ur-
bem: rivus autem ille paulo supra nostram memo-
riam, nempe tunc temporis, quo mœniorum fun-
damenta poni cœpere, ex fonte effossio arte non na-
tura prodiit ad privatos usus vestigalia ac rerum
portoria exigentium in vicina Porta.

C Ferunt alii aquas istas Veteres per aquæductum
pensilem Urbis mœnia transcendentem influere,
deducto in agros Monachorum sancti Victoris Mar-
tii alveo ad irriganda prata nobilium Raynoldo-
rum, indeque fontanis nescio quibus aquis admix-
tas lavandis & purgandis pannis lineis inservire,
eorum demum ambitu munitis prius ac septis
quodammodo vinetis Abbatiae nostræ, nec non &
contermino Majoris Monasterii agro, navigabili
rivo conjungi.

D Verum enim vero hi quoque licet propius anti-
quum Vetræ principium attigisse videantur, ejus
tamen verum & primævum fontem, quemadmodum
etiam auctorem, tempus, & locum, unde primo
deductæ fuerint, penitus ignorasse ex his, quæ di-
cemus, meridiana ipsa luce clarius apparebit. Con-
stat enim aquas ejusmodi nostra ætate à Præside
Raynoldo magna impensa ex loco D. Petro in Sa-
la proximo, derivatas è capite fontanarum aqua-
rum inibi ejusdem opera repurgato, ac novo pariete
communito nasci: Vetræ vero prope Fanum D.
Joannis ad Vetræ una cum ipso nomine caput ex-
tollere, olimque Orona permixtam nostrum S.
Vincentii Templum versus fluxisse, nunc conditis
Urbis mœnibus, obstructo sibi in eandem aditu in-
terclusam ægre admodum juxta ejusdem mœnia la-
bi, demumque navigabilem rivum ingredi ad pri-
marium ejus ostium, Tombonem à nobis superius
appellatum.

E Aliorum sententia fuit Coriarios aquas Vetræ per
occultos Urbis meatus aliunde deductas illuc, qua
nunc defluunt, coegisse.

F Ac veritatem isti quidem magna ex parte contin-
gunt, sed clare minus & expedite loquuntur.
Quamobrem horum ego mentem explicare conten-
dam, quod ut commodius præstem ab eo usque se-
culo ducam exordium, quo Romani Mediolanum
redactum in potestatem suam mœnibus munierunt.
Tunc enim iidem ut humiliora nostræ Civitatis lo-
ca circa forum aliasque præcipuas Urbis vias im-
bribus plus æquo quandoque madentes, & inter-
dum invias exsiccarent cloacas quatuor, quarum
Paulus Morigius lib. 1. *sua Historia* cap. 11. me-
minit, ad Romanæ Urbis imitationem substructis
fornicibus effoderunt. Ac quemadmodum Tarqui-
nius Priscus earum primus auctor Romæ, quod
infima Urbis loca (verba Titi Livii sunt lib. 1.)
circa forum aliasque interjectas collibus convalles,
quia ex planis locis haud facile evehebant aquas è
cloacis fastigio in Tyberim ductis siccat: ita Romani
Medio-

Mediolano potiti, ut Urbis & civium fordes inde facilius eveherentur, rivos perennium aquarum in cloacas ex fossis ipsius Urbis, aliisque ex jugibus fontibus derivarunt: neque vero id tantum commodi ex aquis hujusmodi Urbs cepit, sed utilitatum aliarum quamplurimarum fructus, quos nostri instituti non est pluribus aperire. Illud sane non aperire non possum, hujusmodi subterraneos aquæductus tres præcipue fuisse, eosque omnes in Vetram seu Veterem confluisse. Primo à confluenta navigabili Martesana caput erat, excurrabatque nostra memoria patenti & aperto alveo juxta Jovis arcem usque ad D. Joannis ædem, cui cognomen supra Murum, non quod ejus Divi imago olim in pariete picta fuerit, ut sciolus nescio quisdam, literis ad me datis, scite parum sensit, sed quod trans, sive ultra murum Urbis vetustum initio esset, qua significatione Virgilius usurpavit hanc ipsam propositionem, cum cecinit de Augusto Cæsare lib. VI. *Aeneid.*

— *Super Garamantas, & Indos*

Proferet imperium.

Et Apulejus cum inquit: *Jam enim supra oppidum profectus, nos citra reliquerat.* Ejus ædis nunc præfecturam obtinente Antonio Curtio, qui veluti cum Ambrosio Borronio Lateranensis apud Mediolanenses Basilicæ dignissimo olim Parocho in laboriosis Philosophiæ ac Theologiæ castris mecum strenue defudavit: ita in utriusque facultatis laurea referenda tertius à nobis fuit, quod eo libentius à me dictum, quod alteri me devinctiorem esse non credam, nec alias hisce duabus candidiores alibi animas reperiri. Ab hoc igitur D. Joannis Fano primus is aquæductus non visus Vercellensem Patriæ regionem clam interfluit, mox ad Ticinensem divertens descendit in Vetram. Cognomen, quod idem à vulgo, sed corrupte, traxit, Niro est, rectius enim Nero dici deberet à Nerone Cæsare, quo imperante sunt qui illum per Urbem primo ductum velint, nisi quis, meo quidem judicio, malit, prima N. in R. litera commutata, Rivonem dicere, voce ob aquarum copiam crescente. Quamobrem rivos is cloacas memoratarum regionum satis commode putridis ac restagnantibus aquis levabat, uliginisque ac fordes cæteras imo fundo firmitus adherentes penitus eradebat.

Alter is erat, qui hodie quoque è confluentibus Lambri aquis extra Urbis mœnia juxta Orientalem Portam initium ducit, ingressusque primum ejus regionis vicum aperto & patente alveo ad pannos maxime lineos abstergendos, & usus alios acolarum excurrit, hinc ad Urbis fossam se sub ponte condens ad interiores Civitatis regiones occulto meat, perque Orientalem, Tonsam, & Romanam Portas meridiem petit, nec ante se olim aperte conspiciendum exhibebat, quam Canosam attigisset, locum non procul à Monasterio Vestalium S. Augustini Portæ Ludovicæ situm, ubi denuo sese oculis subtrahebat, ac demum ad S. Michaelis nescio quibus claustris interclusus, quæ Clusiam dicunt, ne totus simul fluere, ac ob id Coriariis impedimento esset, sensim excipiebatur à Vetrâ. Hujusce rivi interclusionem proximæ D. Michaelis ædi cognomen dedisse credimus, etsi recentem ejus Rectorem FRANCISCVM PORTAM è coelo delapsum ad divinum in ea cultum, exquisito in primis sacrarum omnium rerum nitore, restituendum, ædis ejusdem famam obscuratam propemodum illustrasse, & sua industria ferme abditam patefecisse, doceant vel ipsius tum sacræ ædis, tum rectoris nominibus, & cognominibus, arcana mysteria comprehensa. Ad ejus enim usque tempus clausa Parœcialis majestas, non nisi hac patente PORTA in publicum prodiit, atque ut ab Archangelo Michaeli clarissimam denomina-

A tionem suam ædes assumpsit, sic is nomine clarissimo Seraphici numinis meruit appellari. Nemo sane hoc uno melius candore, vel suavitate morum, Parochum omnibus suis numeris absolutum expressit, nemo clarioribus argumentis utile honesto miscere cupientibus, non modo mortuam, sed ferme sepultam familiarem inter animorum Curatores consuetudinem, atque Parœcialibus in muniis mutuas tanta cum majestate officiorum vicissitudines persuasit. Hinc facili negotio factum est, ut quem magnum virtutis & communis necessitudinis desiderium idoneum suaforem Parochialis dignitatis ultro fecerat, communis quoque Curatorum consensus veluti magistrum sua secutus sit sponte, & uti Virum bono natum publico amplexatus. Ea mente, & pietate, eo concordiæ studio, domi, forisque diu optatum in Mediolanensis Ecclesiæ templâ sacrarum functionum decorem sua cum majestate Pastor vigil ac sedulus vindicavit. At quoniam pelagus immensum laudis ingressus videor, è quo vix egredi poterunt, etiam si maxime velint, qui ulterius abripi patientur, ad litus me recipiam, ex quo solvi, ne quam invidiæ, aut adulationis notam incurram, imo ad rivum illum, qui me in hoc mare duxit, ut reliqua de eo mihi dicenda prosequar, antequam ad alia progrediamur.

C Secundus is igitur rivos, quem vulgo Cantaranam vocant ob ranarum ejus in limosis aquis coarctantium, & garrulis inter se modulibus obtreptantium, copiam, statim ac è claustris erumpit Vetræ fluvium parit ob eam, quam supra diximus, purgamentorum admixtionem majori ex parte subnigrum.

Tertius ob id rivos est Vetrâ, cujus præsentem cursum paulo ante descripsimus, antiquum vero suo mox loco commode subjiciemus, ubi hanc tertiam opinionem planius explicaverimus.

D Ex dictis igitur propius vero est aquarum Vetræ partem tantum, non omnem, per occultos Urbis meatus fluxisse modo, quo narravimus supra: siquidem aquæ nostra ex Parœcia recto tramite decurrentes ab aliis discretæ primitus erant, exque solæ nomen toti rivo dabant, eo, qui consequitur, meantes modo.

E Ante Urbem mœnibus circumseptam paulo nempe ante memoriam nostram Olonæ flumen, aliæque in illud confluentes aquæ prope D. Joannis Fanum, cui cognomen ad Vetram, ambitu leni labentes aliquantulum confidebant, perinde ac si ibi morarentur, metamque sui cursus attingerent consistentes. Eam ob causam Coriarios aquarum illarum opportunitate ductos scenofactoriam ibidem artem primitus exercuisse, à Majoribus nostris accepimus fide bona, ac eo fortassis etiam fine, ut animalium male olentium coria procul à civibus curarentur, cujus ergo illic habitare jussi sunt à Provisoribus communis commodi & urbanæ incolumitatis imperio, publico quoque decreto Principis accedente, ne qua inde contagio crearetur, si apud frequentem populum curarentur. Hoc certum ex Veterum monumentis, licet procedente ævo, longioris viæ incommodum, & artis eorum necessitas ad eum, ubi nunc degunt, locum eosdem (permittente Magistratu) coegerit commigrare. Hæc ipsa itineris longitudo, cum civium animos retardare & avocare quodammodo videretur à concursibus, & pio quovis officii genere erga familiam Capucinatorum, quæ ædem illam D. Joannis ad Vetram primo habitatum venerat, in causâ fuit, ut ad vetus Monasterium S. Victoris ad Ulmos concefferint, quod prius incolebant Moniales, quæ nunc in æde S. Catherinæ ad Clusiam divino cultui mancipatæ perhonorifice degunt, quibus Capucini loco, & vice nuper acqui-

quisiti loci, primum nimis ab Urbe distans reliquerunt, in earundemque Monialium jure ac ditio-
ne ad hunc usque diem Aedes sacra à Capucinis de-
serta, & eidem adjacentes agri perseverant.

Hac una de re tantum inter se digladiantur acer-
rime Mediolanensium antiquitatum studiosi, num
illa, quæ hodie quoque visitur, sacra D. Joanni
ædes extra Vercellensem portam ad Meridiem fi-
ta, ædes illa sit, quam Mediolanenses Duces in-
staurarunt, duobusque sacerdotiis honestarunt, an
illa, quam æquasse solo dicuntur Mediolanenses,
cum Urbem mœnibus communirent. Cæterum in
eo conveniunt omnes, primam ejus nominis ædem
vel ab ea tempestate, qua Federicus Rubrobarbus
Mediolanum evertit funditus, existisse, cum post
ad illam ii, qui ad Monasterium S. Victoris pri-
mo confugerant, commigrarint, uti supra nos
quoque notavimus ex Donato: recentem vero ejus-
dem nominis ædem non admodum antiquam esse,
idque tum ex sacræ turris forma, quæ nupera est,
tum ex ædificiis aliis apparere. Ut ut hac de con-
troversia sit, quæ parum ad rem nostram facit,
nisi qua verum esse confirmat prope illam D. Joan-
nis ædem restagnantes aquas per alveum arte efflo-
sum in illum fuisse rivulum derivatas, qui nunc
dementium Xenodochium ambit, rectoque decur-
su postea Burgationum domum versus meat, ubi
olim molendis rebus ad novæ artis inventum
segregandi aurum ab argento, spectantibus, ma-
gno usui erat; ac mox sub ædium Burgationum ra-
dicibus permeabat, è quibus egressus per illam pa-
tentem tumbam, quæ nunc etiam vilitur, fossam
Urbis intrabat, statimque exceptus ostio inibi po-
sito è regione, viam primo Vitram Cittadinorum,
à proximis & frequentibus earum familiæ domici-
liis nuncupatam, per aquæductum subterraneum
interfluebat, donec Coriariorum Vetra modo,
quem ante descripsimus, exciperetur. Eum nos an-
tiquum Vetræ cursum eam primam illius originem
existisse censemus prioribus, uti potuimus, sen-
tentiis confutatis, posterioribus vero partim ex-
plicatis clarius, partim diligentius comprobatis,
non tam edocti rationibus jam adductis, quam
Majorum, à quibus eadem sæpe accepimus, au-
doritatem, vestigiisque pervetustis arcuum, alveo-
rum, aliorumque ædificiorum & rerum, quæ vi-
sæ à nobis acuratissime nostram ita sententiam fir-
mant, ut infirmari non possit. Haud tamen in-
ficias ierim, improbatas à nobis sententias alio-
rum videri dignas excusatione aliqua ob vicini-
tatem loci, à quo tamquam à fonte & principio
aquas à se falso Vetræ creditas, deducere studue-
runt: ac multo magis propter Vetræ veteris alveum
communem, per quem has etiam num aquas præ-
terfluere animadverterunt; maxime denique pro-
pter unum prorsus & eundem harum aquarum &
Vetræ ingressum in Urbis fossam. Adde his an-
sam, immo justam causam, variandi datam fuisse
post condita mœnia Civitatis, quæ aquas illas à suo
fluxu veteri, sua mole interposita abducentes, mi-
grare alio coegerunt. Burgationum Virorum tunc
è vita discessus, & superstitum ex eadem familia
mulierum incuria in retinenda sibi aquarum illarum
possessione, sive insectia in antiquo illo molendi ju-
re sibi (ut decuerat) vendicando, in causâ fuerunt,
ut obstructa mœnibus via, per quam aquæ illæ gra-
diebantur, nunquam in posterum sit aperta. Exsti-
terunt re vera decursu temporis è Burgationum fa-
milia furculi & hæredes aliquot, qui facti gran-
diores, suarumque rerum æque ac aliorum statum
edocti, in procurandis domesticis commodis navi-
ter defudantes, de jure aquarum illarum sibi sub-
lato coram Mediolanensi Principe graviter questi
sunt, suæque sibi reddi etiam atque etiam petie-
runt, tantoque studio, tanta contentione animi &

A nervorum rem suam ad unum omnes administra-
runt, ut aquarum illarum loco concessum iis fue-
rit ejus rivuli jus, qui ex supra laudato illo fonte
juxta Vercellensem Portam perenniter fluens pri-
mum ad Breguntiam, dein manat Hospitalem san-
cti Ambrosii domum, mox dementium Xenodo-
chium circumfluens, demum ad fines horti Sero-
norum patente delatus alveo per subterraneum a-
quæductum eorundem Burgationum ædibus ad usum
molendi sese ingerit & immiscet. Cæterum quem-
admodum veterum Burgationum res, non modo
artis peritia, & industriæ nescio cujus singularis
studio, sed etiam Ducum Mediolanensium be-
neficiis ac familiaritate, ob insignem in venando
solertiam, floruerant, sic artis ejusdem neglectu
in posteris reique familiaris, nec non socordia &
nimia ganeæ indulgentia penitus conciderunt, adeo-
que ære alieno oppressi sunt, ut non solum aquarum
illarum possessionem ac molendi usum, vili ac-
cepto pretio, Hospitali concesserint: verum etiam
cum solvendo non essent, in carcerem detrusi vi-
tam exitu clauserunt deplorando, vere ut de Bur-
gatiis illud Poetæ Comici affirmari possit,

O Fortuna, ut nunquam perpetuo es bona.

Ea siquidem sæpissime consuevit, quos initio suo
favore complexa foelices effecerat, sævo post quo-
dam joco quodammodo insectari, & in fecundam
tandem miseriarum omnium pelagus deturbare.
Sed hanc vicissitudinem ipse quoque rivus exper-
tus est, jussus consistere, aut certe pigre admodum
fluere & restagnare ob ulvas & purgamenta plu-
rima congesta ad os cuniculi Burgationum in æ-
des alias deducens. Quamobrem ne illic aquæ il-
læ putrescerent certo cum accolarum, magnoque
discrimine, Majoris Xenodochii præfecti, quos
in jus Burgationum concessisse diximus, circiter
annum sexcentessimum septimum supra mille-
simum, rivum eundem à suo cursu veteri abduxe-
runt, & in Divi Vincentii vinetum fluxu non dif-
ficili deduxerunt, potestate sibi ejus per viam il-
lam Abbatiæ nostræ propriam deducendi libera-
liter à Præfule Vincentiani Templi data, legibus
quibusdam adjunctis, quæ rei non tantum privatæ
quam publicæ commodum spectant. Atque hæc de
antiqua Vetræ origine, & præsentis ejusdem cursu
pro re nata dicta sufficiant: unde tale nunc illi no-
men inditum fuerit, indagemus, rem alioqui diffi-
cilem & perobscuram, cum nulli de ea scripserint,
quod sciamus. Adhibenda tamen nobis pro viribus
ejus indagandi nominis causâ diligentia est, quod
plurimum ad rei totius veritatem, quam aperimus,
magis declarandam attineat, & comprobandam.

E Ut hinc igitur ordiamur, ex antiquorum Scri-
ptorum lectione varie sæpe hocce Vetræ vocabu-
lum usurpari animadverti. Pluribus nimirum in ta-
bulis fide Notariorum, sive tabellionatus, ut ipsi
loquuntur, signis & literis insignitis VEPRIA;
in rescriptis autem aliquibus Senatus Mediolanen-
sis VITRIA; in quibusdam demum Ducum Me-
diolanensium diplomatis VIPERA nuncupatur.
Ac primi quidem, si vocabuli ab iis usurpati no-
tionem attentius persequimur, à voce Latina
Veprium, herbæ notissimæ nomen ad rivulorum
margines enascentis, Vepriam dixisse videntur, quod
forte ejus rivi ripæ magna olim Veprium copia
abundarent. Neque idcirco Senatus clarissimi Or-
dinis Scribæ minus scite locuti putandi sunt, cum
Vepriæ loco Vitriam usurparunt, quod illis per-
suasum esset non alio nomine commodius, quam
ab insita rivuli ejus aquarum perspicuitate, qua
vitro pellucidiores suo de fonte manabant initio,
rivulum ipsum Vitriam appellandum.

At qui Principes Urbis nostræ Vicecomites uti
plus imperii, plus potentiae habebant, ita pluri-
mum auctoritatis & gratiæ nomini à se rei impo-
sito

sito sua afferre præstantia potuerunt, tametsi ab usitato rivi nomine distare longissime videretur. Id enim non nisi optima cum ratione rivo illi nominis imponere voluisse sapientissimos Duces, aut eorum in gratiam Mediolanenses, credere par est, ac cum Vipera peculiare Vicecomitum insigne vetustis in parietibus ædis illius D. Joanni sacre depicta, aut certe sculpta in marmore juxta gentis & temporum illorum morem illac transeuntibus appareret, ob singulare beneficium duorum Sacerdotiorum ea in æde à Vicecomitibus patronatus jure institutorum: rivus vero ille, de quo nunc agimus, propter eandem ædem caput olim attolleret, facile adduci possumus, ut credamus à signo illo, veluti à re Mediolan. Principibus grata, & rivum eundem Viperam, sive ad Viperam appellatum. Nam quod rivus idem statim ac à suo fonte digressus est, viperinum in modum flexuosis mæandris & anfractibus serpat, leve argumentum est nominis illi impositi Viperini. Confirmant id ipsum imagines unius & alterius Joannis in ipsamet eorum æde coloribus olim expressæ, quarum uni Jo. Baptistæ scilicet verba illa cernebantur adscripta, GENIMINA VIPERARVM QVIS VOS DOCEBIT EVGERE A VENTURA IRA? Alteri vero Joannis videlicet, cujus ex calice Vipera prominebat, hæc alia, RIVVLVS, ET ANGVIS, ille quidem humi serpens humilis & labe carens; iste vero divinæ gratiæ dono innoxius factus. Qui enim rivulum puritatis ac humilitatis indicem fuerit imitatus, & eodem elingui doctore quodammodo uti voluerit in emendanda vitæ dissolutæ ac perditæ ratione, is omni procul dubio imminens sibi Christi venturi judicis iram facile declinabit. Quamquam Anguis eidem quoque propositus esse debeat ad imitandum, in ipso nempe veneno scelus evomendo ad pedes sacri alicujus à Confessionibus viri, pravosque humores omnes ac noxios animis expellendo.

Hæc erant, quæ de multiplici hujus rivi denominatione me legisse memini; verum quia nullum harum trium denominationum verum etymon invenio in actis alicujus publici documenti, nec ullum certum earundem auctorem habeo, quem sequar, certi nihil hac in parte audeo affirmare: etsi *Vetra* nomen diutina consuetudine frequentius usurpatum, præ cæteris magis utendum esse, probandumque crediderim loco VETERIS, quod prisca ætas Latinæ linguæ peritior usurpabat, scribebatque semper. Vulgi enim vitio & prava loquendi consuetudine factum est, ut VETER in VETRAM sibi proximior, significatione aptior, magisque inter alias sibi congruentem vocem abierit, ad eum plane modum, quo Pontis Veteris in Cumana Porta Mediolanensi, primum & sincerum cognomen easdem ob causas in Pontis Vetri appellationem, corrupto à vulgo vocabulo, transiisse scimus, & legimus apud omnes. Sed enim dicti ante, res ipsa magno documento est rivum hunc VETEREM, non VETRAM, fuisse antiquitus nominatum, vel ex eo patet, quod ab ea tempestate exstabat, qua Romani ad exonerandam fordibus Civitatem, cloacas Urbis nostræ condiderunt, easdem in hunc *Vetræ* rivum commodè deducentes, nullus fere ut apud nos eo vetustior sit rivus. Quid multis? omnem prorsus difficultatem hanc tollit nominis istius *Vetræ* commutatio in aliud Veteræ apud nostrates simillimum nomen, materno si idiomate proferatur. Rivus is siquidem tum ubi prope cōriarios inflexi cubiti imagine sedens aream illam magnam patibulo fontium famosam, ne dicam infamem, à lævo latere cinxit, tum ubi pergrandi fornice receptus subsedit, fossamque Urbis subterlabens in adversa ripa juxta eam turrim, quam Imperatoris appellant, emergit ad usum molendi frangendo tritico accommodati, *Vetræ* nomine perpetuo vocitatur; at ubi transgressus est Urbis prima mœnia, nomine *Vetræ* de-

A posito laxior & patientior means non exiguis aquarum Urbanæ fossæ auctus incrementis, vulgo VECCHIABIA dicitur: qua voce juxta patrii sermonis usum, Mediolanenses res appellare veteres consueverunt. Hinc igitur, rem ut omnem hanc paucis absolvamus, colligimus Rivum istum primo Veterem appellatum, mox aliis affectum fuisse nominibus pro diversitate capitum & sententiarum; novissime demum à vulgo *Vetram* vocali E. imo in loco sublata, in altero vero cum A. vocalium altera commutata dictum.

B Recte nunc & ordine his præmissis, tum urbanorum, tum rusticorum prædiorum vectigalia nostro Cœnobio debita prosequemur, in ea nempe *Vetræ* parte, quæ Cittadinorum dicitur, duæ adhuc magnæ sunt domus, aliaque hinc & inde usque ad Fabiam portam vasta ædificia conspiciuntur, quæ annum censum, sive tributum, Præsuli nostri Templi persolvunt, adhucque clari hujus *Vetræ*, sive Vici, civis Casati, Petrasanctæ, Caravagii, Vertuæ, Cittadini, Bormii, nostro Cœnobio tributa pendunt, ut ex publicis Notariorum documentis, & antiquis Monachorum tabulis satis constat. Extra Fabiam Portam ad lævam ædes sunt Burgationum, de quibus paulo ante meminimus nos meminisse, & Palatium à fundamentis patrum nostrorum memoria exstructum à Flaminio Saronio, viro hilari, liberali, diti, quod medium Vicum ipsum Fabrorum illustrat. Neque enim pulcherrimo fonte tantum frigidissimas lymphas variis è siphunculis emittente, variisque Deorum statuis ac picturis illustre nitet, & recreat: sed insigni quoque horto diversis arboribus consito perenne viret ad prospectum & oblectationem maximam oculorum. Quamplurimum quoque Europæ Principum hospitio nituit, & celeberrimo Labyrintho, cui Flaminii mors, vita immature functi, finem attulit, cum aliis quamplurimis ornamentis pulcherrimi fontis, alias graviores in curas incumbente in oppido Laudis Pompejæ Julio Saronio, nepote ex fratre, & hærede, ubi uxore ducta patrios lares incolebat. Nitetque nunc maxime domus hæc ingens, sedes effecta clarissimi Alphonsi Ghilien à Carreria Hispaniæ syderis, Magistratusque extraordinarii apud Mediolanenses Præsidis. In quo sibi Charites & Virtutes omnes suum ante domicilium collocarunt. Antecessor enim primarius Academicarum complurium toto terrarum orbe celeberrimum, in iis sic effulgit, ut ad Salmanticensem omnium facile principem accersitus Antecessores illius præcipuos longo post se reliquerit intervallo. Dignitatem sane illam eximiam ac majestatem, qua Præsidis personam sibi nuper impositam egregie sustinet, ordinum omnium amorem sibi concilians, mortalium meo judicio perpauca consequentur. Camilli tandem Comitibus domus nuper à Dionysio Maspero emptæ extremum hunc Vicum à læva claudit. Dexterum ad latus domicilia quatuor ingentia se attollunt, quorum unum est Plantanidarum, alterum hæredum Joannis à Specie, tertium illustrium Fratrum à Petrasanctæ, postremum Caroli Balconii, cujus in locum successit emptionis titulo Joannes Petrus Pratenfis mercator Florentinus: sique omnes annuam pensionem Templo nostro in recognitionem (uti Jurisperitorum vox est) directi Domini solvunt.

F Sed antequam ab hoc Vico cedamus, perlustratis licet ejus ædibus tributis, seu pensionis jure Vincentiano Templo devictis, de nominis ejus origine persequemur, quæ sunt à nobis hæcenus observata, licet obiter aliis in *Fasciculis* attigerimus aliqua spectantia ad eundem finem. Uni siquidem nominis hujus Vici originem unam, alii aliam, & quidem diversam tradunt, veterem aliqui & insignem, novam alii sordidam & obscuram. Quod ego partim ab adulatoribus, partim ab obtrectato-

ribus manasse crederem, quorum primis Vicus is maxime placeret, aliis è contra maxime displiceret: nisi jampridem apud graves Historicos legissem, & hisce etiam, quibus scribimus, oculis adspexissem antiquitatis aliquot monumenta, ob quæ Vicus is potuit nomenclaturas diversas accipere à nobis mox suo loco planius explicandas. Ac ii quidem, qui volunt Vicum hunc traxisse nomen ab insigni fabrica inibi ab antiquis Romanis ad Urbis ornamentum exstructa, vel à sanctæ memoriæ Archiepiscopo Galdino in antiqua mœniorum instauratione ædificari cœpta, quo instar speculæ, nec non & propugnaculi populo Mediolanensi esset nationibus exteris oppositi ad terrorem vulgare: potius ejus nominis etymon respiciunt, quam proprium & Latinum. Adde, nullum firmum probatæ historiæ testimonium suffragari, ex quo hujusmodi illic existisse fabricam constet, sed duas tantummodo, easque leves admodum, conjecturas, quarum alteram ducunt ex vetusta loci appellatione, qua olim Portam hanc Fabricam appellabant; alteram ex antiquis turris nescio cujus, aut arcis vestigiis, quæ etiamnum visuntur in ampla vinaria cella Joannis à Furno. Verum quam levis utraque hæc conjectura sit, nemo non videt. Nam & Fabricæ nomen ex corrupta & barbara illorum temporum lingua manasse, & vestigia illa non altioris, insignisve alicujus Fabricæ, sed portæ, seu mœniorum Urbis vestigia esse rectius meo censi judicio potest.

Alii vero, qui nomen à Fabris Vico datum putant, (quod sane communibus nunc civium omnium sermonibus usurpatur) ut in vocabulo congruunt, sic in ejus origine derivanda valde inter se dissident. Horum enim ex numero sunt, qui illud deducant ab aurificibus, quorum nonnullas antiquas officinas ex curiosa quadam observatione, anterioris scamni parietum rubro intus colore delibutorum ex eorum artificum more, & aliis officinarum ejusmodi formis notatas in hujusce Vici vetustioribus ædibus se agnovisse testantur.

Alii è contra censent non ab aurificibus, licet ii vernacula apud nos lingua Fabri nominentur, sic dictum, (quod aurifices Fabri interiorum Urbem incolerent) sed à Fabris illis, qui ingenti malleorum sonitu auro velatum argentum in tenuiores bracteas deducunt, ac etiam num ad extimos Urbis vicos frequentiores degunt.

Tertii sunt quodammodo ordinis alii, qui quovis pignore contendunt, Vicum hunc, aut à Fabris aurificibus dictum, aut si qui sint, qui id negare audent, longe minus à Fabris aliis appellatum. Primo quod hujusmodi Fabrorum ars Mediolani ipso Vici nomine sit recentior. Deinde quod etymologia ejusmodi nimis obscura ac sordida videatur, nec absque majori fundamento in Mediolanensium animis propaganda. Hujus igitur ordinis viris placet, Mediolanensi Urbe jam à Federico Rubrobarbo eversa penitus & deleta, variarum artium Fabros Ticinensis Portæ in hæc loca, ubi nunc Vicus Fabrorum est, unanimes confluxisse, sedesque ibi, quas tum poterant, posuisse, casis quibusdam exstructis, ut in proxime superiori *Fasciculo* docebamus, Vicumque à Fabris non unius, aut alterius artis, sed ab omnis fere generis opificibus nuncupatum. Favent his Annales Patriæ: sed præter rationes duas contra primæ sententiæ auctores nuper allatas, mirandum in modum pugnat hæc tertia. Non minorem in aliarum Portarum regionibus Fabrorum copiam tum fuisse, quam esset in Ticinensi Porta, nec ob id loca, ad quæ tunc illi confugerant, Vicos Fabrorum dicta, nec dici, nulla ut afferri posse ratio videatur, cur Vicus hic noster à Fabrorum concursu ad se factò ita appellari debuerit, cum ad alios æque concurrentibus Fabris, eorum nullus à Fabris acceperit cognomentum.

A Proferamus igitur nos in medium novam quidem, & ut plerisque videri poterit, inauditam hujusce nominis originem: sed firmioribus rationum momentis innixam, ut ea perpendicularibus facillime apparebit. Ac, ne longius aberremus, antiquorum Scriptorum vestigiis insitemus, quibus datur hæc venia, ut in nomenclaturis locorum ac gentium afferendis, originibusque nominum indagandis, eorum primordia semper augustiora faciant, & ad Deos auctores referant, vel Heroes. Ac ut in præsentia de superstitionis Gentilium Diis uti commentitii nihil dicamus, licet multa de iisdem memoriæ prodita ad rem quoque nostram posse facere viderentur, clarissimam Populi Romani Gentem **FABIAM** nomen huic Vico dedisse sentimus, ratione vel à summo illius culmine, ab ipso, inquam, Fabio Maximo, repetita, ut ostendemus, ubi paucis fuerimus de hac ipsa Gente, majoris Vico splendoris adsciscendi causa, præfati. Gens itaque Fabia divitiis æque affluens, ac familiarum numero referta, tantum olim Romæ una valuit, ut aliquando sola totius belli contra Veientes gerendi provinciam susceperit, sustinueritque. Quamquam adversante fortuna, quæ solet in bellis maxime dominari, eorum sex & trecenti desiderati propter insidias fuerint uno die, sic eorum cædem lib. II. *Fastorum* Ovidio deplorante:

Una dies Fabios ad bellum miserat omnes:

Ad bellum missos perdidit una dies.

Eadem longe plures, quam cæteræ, viros Consulares habuit, quorum magnam partem cum exercitibus in varias expeditiones contra Cispalinos Gallos à Romanis missam ad nos venisse satis ex historiis liquet, ac Fabium quendam in primis Allobrogem cognomento, Q. item Fabium Maximum, ac Fabium Gurgitem, ut aliquibus placet. Quibus cum Ducibus plerosque alios ejusdem gentis una venisse vel ex innata genti cupiditate, qua ad Imperatorum suorum decus ac gloriam concitato quodam impetu rapiebantur, persuasum omnibus esse debet. Legimus enim Fabio Duce contra Allobroges proficiscente tantum eodem proficiscenti libidinem reliquos ejusdem familiæ viros ac juvenes incessisse, nunquam ut exercitus numero unius & ejusdem gentis major, aut generis nobilitate clarior, Romanæ Urbis è mœnibus sit egressus.

Ac ejus splendori quidem eventus non impares responderunt: nam re feliciter ab eo ad Maram flumen gesta Rege Allobrogum interempto, reliquis hostium fufis, & pene omnibus internecione deletis, opimis eorundem spoliis onusti Fabii una cum præstantissimo Duce, à quo jam in hyberna fuerant distributi, redibant in patriam triumphantes, Mediolanensemque jam Urbem attigerant, cum novis rumoribus ab hostibus acceptis, ibi subsidere coacti sunt, ne itinere majori jam ex parte confecto novo cum labore reverti, aut frustra Allobroges repetere viderentur. Quamobrem re variis hostium artibus diu extracta, ancipiti ad deliberandum cogitatione distracti Fabii, inter spem rursus in Patriam redeundi, & metum ad eosdem Allobroges revertendi, novos tumultus acrius excitantes, in stativis ea in Urbis nostræ parte, quæ Allobrogum regionem spectat, quæque viam ad eandem expeditionem habet, novo nunc Sabaudia nomine nuncupatam, commorati sunt, donec spes illis abeundi certior arrideret.

Eandem igitur Urbis nostræ partem cum incolerent Fabii, eorum aliqui cœli clementia, aeris temperie, pratorum viriditate, aquarum salubritate, camporum amœnitate, vinetorum feracitate, sylvarum æque volucris ac mansuetioribus feris referatarum opacitate, frutetorum denique generis omnis specie, & amœnissimorum fontium perennitatibus à diuturno labore militiæ conquiescentes sic affecti sunt,

sunt, ut aliis inde discedentibus pedem ipsi movere noluerint, putantes certam hic sibi domum & patriam divinitus obtigisse. Ab his Fabiis FABIORVM cognomen Vico nostro additum, non Fabrorum, id quod nec probabili ratione caret, & auctoritate historiarum est innixum, licet aliqui rem aliter evenisse autument, dicantque Insu- bres gentem Fabiam ad tutandos suarum Provinciae fines gentili cum exercitu collocasse adversus Transalpinos Gallos, eamque sibi praesidio diu fuisse: atqui ejus tandem progeniem Romam & Patriam longo post intervallo repetiisse una cum ordinis Senatorii gradu, ac ob id Mediolani nullum ejus familiae virum nobili loco natum in posterum constituisse. Opinioni isti suae fundum in hoc habent maximum, quod apud Romanos illud olim usu receptum esset, ut passim praesidia militum collocarent in Provinciis illis, & Urbibus, quae suam in potestatem rede- gissent, tum ad interiores, tum ad exteriores quosvis impetus cohibendos, quam ob causam ajunt Dertonem, seu Derthonam in Apenninos colles Coloniam esse ductam, ne scilicet Insu- bres cum Liguribus convenirent. Hastam item, & Hipporrhodiam, ut est apud Plinium, Polybium, & alios, Colonias ejusmodi fuisse, quae conventum prohiberent inter Salassos & Cisalpinos Gallos; nec non & Augustam Praetoriam, ut media inter Sa- lassos, Veragros, & Allobroges esset. Haec siqui- dem gentes (ut Historicorum peritissimi literis con- signarunt) Romanorum aegre imperium perferebant, quocirca ad levem quemvis strepitum sumptis ar- mis, & praesidiis trucidatis, ab illis deficere consue- verant. Confirmant isti suam sententiam exemplo ducto à simili ex Tranquillo in *Vitellii Vita*: ut enim ibi legere est, Vitelliorum familiam suis tantum o- pibus fretam depoposcisse à Senatu, ut Coloniam ejusdem nominis tutarentur adversus Equicolas: tempore vero Samnitici belli quosdam ex iis Nu- ceriae Civitate Campaniae, de qua eo in versu Si- lius,

Illic Nuceria, & Gaurus navalibus apta,
subfedis: sic cum Vitelliis gentem Fabiam, quae Mediolani remanserat, Romam longo post intervallo rediisse, illicque ad honores pristinos adscendi- se. Novum huic sententiae firmamentum posset ac- cedere ex gemina ferme, ac germana propemo- dum, nomenclatura cujusdam vici in Agro Ber- gomate siti, quem hodie Longolam vocant. Is enim Fabiorum olim Vicus appellabatur, nec aliunde Longolae nomen obtinuit, quam à longo Fa- biorum inibi accolatu, vel certe ab hastarum con- cursu juventutis, quae ibidem exercebatur ad arma, accedente Scriptoris Bergomatis non inveni- sti fide:

Longola villa jacet sub amoenis collibus Urbis,
Cunctantes Fabios quam coluisse patet;
Hinc Fabias ades prisci dixere coloni,
Delicias cives hincque habuisse suas.
Edebant illhic spectacula Martis in umbra
Missilibus, lucta, fustibus, ense, rotis.
Longola ab hastarum concursu ad ludicra bella
Dicitur hinc vicus, qui Fabianus erat.

Cum his recitatis carminibus congruunt mirifice subsequencia antiquiora, de eodem Vico Longola anno à salute communi MCCVII. conscripta:

Præteriturus eram te pratis Longula decus,
Carminibus sed nostro spero per secula vives,
Tu Noti spectas oras, Solisque calores,
Et virides nutris oleas, Bacchique liquores:
Hic fuit, ut perhibent, Fabii celeberrima sedes,
Pergameas missi quondam tutoris ad ades.
Hic Martis juvenes exercebantur ad arma,
Atque feras pugnas, idusque repellere parma.
Martius inde quidem campus locus iste vocatur,
Nulla illic quamvis nisi ludicra pugna geratur.

A Utram hujus nominis interpretationem admittere voluerit Lector, liberum ei esse volumus, & per- missum: nobis certe in eam sententiam ire certum est, quae Fabiis favet. Illud enim unum me maxi- me in eam ducit, imo pertrahit, quod nostro in D. Vincentii Templo hoc elogium in mensa candidi marmoris ad laevum sacelli Aerae maximae parietem, nunc Paroeciali in horto positum cum hujusmodi carminibus videre est:

ABDITA SARCOPHAGO CVM MANIBVS
OSSA SVB ISTO
SVNT FABII DICTATORIS DEFLETA
NEPOTVM.
B SPARGE ROSIS TVMVLVM LEGIS
HÆC QVICVNQVE VIATOR
QVÆQVE IACENT TVMVLO DIC MOLLITER
OSSA QUIESCANT.

Ex hac enim Inscriptione vel apertissime liquet Fa- bii Dictatoris Nepotes in proximis nostro Tem- plo sedibus habitasse, cum haberent sepulcra pe- culiaribus etiam Epitaphiis decorata, ea nempe Ro- mano ex more dominorum in fundis exstuebantur, ut ex Livio lib. VI. & Jo. Kirchmanno lib. II. cap. XXII. de *Funer. Rom.* in Fasciculo nostro proxime superiori demonstratum est. Ac Inscriptionem qui- dem ipsam venustissimam aequae, ac vetustissimam esse, vel ipsa primum scribendi ratio, deinde stili- us, & perantiquae formulæ, ipsa demum versuum dispo- sitio satis indicant. Neque enim versus unus una li- nea claudabatur, sed duplici; cujus exemplo sit al- ter ille versus alterius perveteris Inscriptionis:

C TE. TELLVS. SANCTOSQVE. PRECOR.
PRO. CONIVGE. MANES.

Et alii illi duo in quodam lapide Romano:

OPTO. SI. QVA. FIDES. REMANET.
TELLVRIS. AMICAE.

SIT. TIBI. PERPETVO. TERRA.
D LEVIS. TVMVLO.

Sed enim hic à nobis etiam Vir alioqui magnus, & in praecipuis quibusvis Scriptoribus versatus, dissentire videtur, negans Inscriptionem hanc an- tiquam esse ob Sarcophagi nomen, quod antiquum esse pernegat; sed falso: antiquissimum enim esse *Sarcophagi* nomen vel ex Juvenale discimus, qui in *Satyra* X. de Alexandri Magni sepulcro sic loquitur:

Unus Pellao juveni non sufficit Orbis,
Astuat infelix angusto limine mundi,
Ut Gyari clausus scopulis, parvaque Seripho,
Quum tamen à figulis munitam intraverit Urbem;
Sarcophago contentus erit, mors sola fatetur
Quantula sint hominum corpuscula.

E Et in Epigrammate antiquo Romanae Urbis sic legitur:

Me nunc torquet amor, tibi tristis cura recessit,
Lethaeque jaces condita Sarcophago.

F Docet nos idipsum etiam Epistola Liberti ad A- elium Severum: Rogo Domine permittas mihi in eodem loco in marmoreo SARCOPHAGO ea corpora colligere. Item l. Liberti. ff. De alimentis legat. in l. quoque v. C. Theodos. de sepul. viol. legitur: Omnia, quae su- pra terram sunt, urnis clausa vel SARCOPHAGIS cor- pora detineantur, extra Urbem delata ponantur. Sed elegans in primis ejus rei exemplum exstat in li- bello, qui Severo Principi oblatus est, his ver- bis: Cum ante hos dies conjugem & filium amiserim, & pressus necessitate corpora eorum fictili SARCOPHAGO commendaverim donecum is locus, quem emeram, adifi- cavi, &c. Discimus hoc etiam à Pontano Scripto- re, Viro illi alioqui familiari, qui ad carmen illud elegiae II. lib. I. Tristium,

Et mandare suis aliqua, & operari sepulcri,
inter varia sepulcri nomina, quae ibi recenset, SAR-

COPHAGI quoque meminit, & ultimo loco tanquam nominis ab Antiquis loco habiti non postremo. Hic autem, ut alios sexcentos omittam, concludam deserto loco D. Augustini, qui mire ad hanc rem facit, & sic habet lib. XVIII. de Civit. Dei: *Quia enim arca, in qua mortuus ponitur, quod omnes jam SARCOPHAGVM vocant, σαρκος Graece dicitur, à nostris pro sepulchro usurpatur.* Nimis igitur parvo magnus ille Vir argumento ductus Inscriptionem nostram vetustam esse negavit ob unum Sarcophagi nomen in ea positum, cum ipsum vetustissimum sit. Quamquam ex ipsis quoque formulis se antiquam prodit, qualis est illa, *Sparge rosis tumulum*: Romani enim rosarum adeo studiosi fuerunt, ut, teste saepe laudato Kirchmanno, iis post mortem monumenta sua spargi SUPREMO JUDICIO nonnunquam jusserint, legata ad eam rem ingenti pecuniae vi, ut ea in Inscriptione olim, quam in propylæo Templi D. Ambrosii Alciatus Patricius Mediolanensis in haec verba descripsit, & in *Antiquarium suum* intulit cum aliis multis:

PETRONI. IVCVN. VI VIR.

SENI.

PETRONIA. MIRA. L. F.

PATRONO. QVÆ. HS.

CCCC. LEG. POSSESSORIB.

VICI BERGOMAG. IN HERM.

TVEND. Et ROSA QVOTANNIS.

ORNANDVM.

Facit huc illud etiam Jo. Passeratii, lepidissimi & eruditissimi Viri, in *Rosa*, cum inquit:

Manibus est imis Rosa grata & grata sepulchris.

Causam porro, ob quam Rosis sepulchra Veterum ornarentur, tangit Anacreon in ode de Rosa, cum inquit:

Medicatur haec & agris,

Defendit haec sepultos.

Postrema tandem Inscriptionis nostrae formula, DIC MOLLITER OSSA QUIESCANT, usitatissima, id quod sexcentorum exemplorum appositione facile confirmare possem, nisi ad alia festinarem. Ovidius enim lib. I. *Amorum elegia VIII.* sic cecinit:

— saepe rogabis

Ut mea defuncta molliter ossa cubent.

Lib. III. *Trist. eleg. III.*

At tibi, qui transis, ne sit grave, quisquis amasti

Dicere Nasonis MOLLITER OSSA cubent.

In *Epistola Didius ad Aeneam*:

Et senis Anchisa MOLLITER OSSA cubent.

Et Virgilius *Ecloga ult.* sensu non ab simili:

Tristis at ille tamen, cantabitis Arcades, inquit,

Montibus haec vestris soli cantare periti

Arcades: ô mihi tum quam MOLLITER OSSA

QUIESCANT,

Vestra meos olim si fistula dicat amores.

Quod si quis hisce paucis non contentus plura desiderat, adeat is me consultore V. CL. Felicis Ossii de sepulchris & epitaphiis singulares libros, Romana passim & Graeca eruditione refertos: is enim scitu dignissima aperiet, qua est in antiquis Romanorum & Graecorum ritibus colligendis diligentia infinita propemodum ejus formae exempla congeffit, quae ubi per occupationes licuerit typis rei literariae commodo commendabit. Quot enim ille occupationibus semper districtus fuerit, necesse non habeo persequi. Vix enim confectis Rhetoricae, Philosophiae, Theologiae curriculum, laurea quoque sacrae scientiae parta, praecipuis in Urbis nostrae Collegiis desudare coepit, in iisque gravissima munia qua docendo, qua regendo, summa semper cum laude & dignitate obire. Quocirca fama ejus prudentiae, doctrinae, ac suavitatis morum non ad vicinas tantum, sed ad

remotas etiam urbes delata Academias Italiae principes administrandas suscipere coactus est, quae ejusdem divinam pene doctrinam ardentissimo studio expectabant, ingentibus ad eas stipendiis & honorariis propositis invitatus. Libuit hic paulisper excurrere in hominis laudem mihi ut metipsum quodammodo gratificarer, qui ut illum unice amo, sic glorior eundem mihi Rectorem in suprema moderatione nobilissimi, nostrisque temporibus florentissimi, Collegii Taeggiorum ad D. Simonis jure ac merito successisse, jureque ac merito gloriabor, cum ob eximias Viri virtutes, tum ob arctissimam mihi cum eo initam consuetudinem vita mihi ipsa longechariorem, aliaque multa, quae nos inter nos arctissimo amicitiae vinculo copularunt. Verum, ut ad rem propositam revertamur, vel ex hac Inscriptione nostra liquido colligimus, Fabium Dictatorem, aut ejus Nepotes, ad D. Vincentium habitasse, indeque Vico proximo nomen FABIORVM datum, cujus ergo à nobis in medium est allata.

Sed erit hoc ipso in loco abs re nostra, qui Urbis antiquitates inquirimus, ac quoad ejus fieri potest, in lucem è tenebris vindicamus, neutiquam alienum, expendere marmoreae statuae in summo Fabiae Portae fastigio positae notas, & nomen, & in haud ita perviam omnibus, & vulgatam, ut nostra interpretatione non egeat, oleumque sumus, quod ajunt, & operam, id si conati fuerimus, amissuri.

Ne multis, Hymenaei ea statua est, ut ex forma & notis aliis, quibus à Veteribus effingi consueverat, conjecimus aliquando, praerunte nobis Vincentio Cartario in libro de *praeis Deorum imaginibus*, qui id ipsum acute & accurate prospexit ex Seneca & Catullo, nec non & Jo. Paulo Lomatio in calce operis ab eodem editi de *pictura*. Hi siquidem ad unum omnes Hymenaeum juvenem & imberbem expriment, insigni nescio quo diademate redimitum, cujus sinistrum humerum velamen obtegat ei persimile, quo sponsae ipsae, cum viris tradebantur, velare sibi capita consueverant, quem prorsus in modum statua Portae Fabiae imposita expressa est adjectis literis, quas cum ipsamet statua subjicimus in-tuendas.

Ac primis quidem horum alterutrum fortasse potuit indicari IMAGO OPTIMI REGIS, vel IVSSV OPTIMI REGIS, dicata statua. At ultimis lateris alterius elementis absque dubio demonstratur, cujusnam sit illa effigies, solidumque caput, HYMENAEI scilicet, Uraniae, sive Veneris (in hoc enim inter se dissentiant fabularum architecti) filii; firmat hanc conjecturam nostram consuetudo illa, quae patrum nostrorum memoria, antequam scilicet æternæ, sanctaeque memoriae Archiepiscopus, & Cardinalis Carolus sacrum Mediolanensis Ecclesiae imperium capefceret, apud Mediolanenses plus adhuc nimio Gentium superstitionibus addictos, perseverabat. Hi siquidem tunc temporis cum sponsa tradebatur ad virum, faces quasdam & lampades ad eam statuam accendere consueverant, quo Numen illud futuras perpetuo nuptias fortunaret. Id enim apud Veteres in nuptiarum solemnibus usitatum, Terentio me satis aperte docente in *Adelphis*, ubi sic Æschinus ad Demeam patrem, Act. v. sc. VII.

Uxorem accersis? cupio: verum hoc mihi moræ est

Tibicina, & Hymenaeum qui cantent.

Quibus auditis pater, quasi filius non omnia ad Nuptias rite celebrandas necessaria complexus esset, statim subdit:

Hymenaeum, turbam, lampadas, tibicinas.

His namque uti in nuptiis olim ex veteri religione cautum & perscriptum. Ovidius in *Epistola Medae ad Jasonem* diserte morem hunc aperit, cum ait:

At subito nostras, ut Hymen cantatus ad aures

Venit, & accenso lampades igne micant.

Et in *Hypermen*.

Unde

TAB. II.

IOR HV F



Fig. 3.



Fig. 2.

HAS TA




Fig. 3.

FOR LVI



Fig. 4.



*Undique collucent præcinctæ lampades auro,
Vulgus Hymen Hymenæe vocant.*
Huc illud Plauti facit, *Cas. Act. IV. Sc. III.*
*Age Tibicen, dum illam educunt huc novam nuptam
foras.*

*Suavi cantu concelebra omnem hanc plateam Hymenæo,
Io Hymen Hymenæe! Io Hymen!*

Item illud Veronensis Poetæ:

O Hymenæe Hymen, Hymen ô Hymenæe.

Hi erant apud Antiquos solemnes Nuptiarum ritus à nobis obiter explicati, neque tamen hæcenus, non sine maxima religionis nostræ injuria, penitus antiquati. Quid enim sibi nunc etiam volunt puerorum greges post connubia sacris in ædibus celebrata crebris absonis & corruptis vocibus ALAMINE conclamantes, nisi quod olim Ethnicorum vulgus enunciabat, cum Hymenæum ad nuptias invitabat? Tibicen apud nos etiam adhibetur, aut certe sonantes aliis instrumentis, adhibitis quoque saltibus & choreis cum nuptiæ peraguntur. Lampades autem non multo ante nostram memoriam accendi solitas ad Hymenæi Mediolan. statuam, satis jam ostensum est. Sed tandem mos iste cum aliis ejusmodi idololatriam apertissimam sapiens, sanctissimi Præfatis Caroli vigilantia jure ac merito Mediolanensis è populi mente deletus est, & oblivioni traditus sempiternæ. Nolo esse longior in hac parte; hos enim, & alios propemodum infinitos Nuptiarum ritus propediem, Deo favente, Reipublicæ literariæ bono in lucem dabit Vir eruditissimus Hieronymus Bossius Ticinensis, Reginus & primarius eloquentiæ Professor apud Mediolanenses in Palatinis scholis. Is enim ritus omnes veterum Romanorum, nuperrime Romana civitate donatus, omnium elegantissime collegit, & in *Hymethalium suum de Sponsalibus & Nuptiis* eo stylo transtulit, nihil ut ab ullo præterea desiderari possit.

Quæ hæcenus de Hymenæo prælusimus ex opinione vulgi potius, & Poetarum scriptis, qui fabulis omnia referferunt, orationis variandæ gratia, præmissa sunt, quam ut medullam veri, meamque ea de re sententiam aperirem. Utamque nunc Orbi dabimus, ac siquidem clare minus ex Historiæ fontibus hauriri poterit, ex Antiquariorum certe Theauris, & abditis præcæ memoriæ penetralibus, eruatur, quo me non priorem illam explicationem amplecti posteritas sciat; sed multis ab eadem partibus dissentire. Verum antequam id ipsum præsto, in Theatro, quod olim Gabinus Patricius Rom. ex S. C. Mediolani condidit, paulisper insistam, ejusdemque ornamenta præcipua contemplari necesse est. Fuerunt in illo scilicet (uti me non raro observasse memini) inter cætera illius decora, statuarum urbium Galliæ Cisalpinæ, quæ vel in caryatidum modum Theatri coronas ac mutulos exornabant, quemadmodum apud Latinos passim, & Græcos usus illorum temporum obtinebat, Vitruvio teste libro *Architect.* I. vel certe cujuscumque & peculiaris signi locum habebant, ad quod Urbis Cives & populares omnes confluerent, cujus ergo statuam nostram eo in Theatro positam non temere suspicari possumus, tum cum in Urbe Metropoli publica spectacula edebantur, ac fortassis etiam Comædiæ, Ludi, ac reliquæ Theatrales actiones miro omnium silentio, & sine ulla prorsus spectantium confusione, oblectandis sociarum Provinciarum oculis, agebantur: vel demum (quod ad veritatem propius accedit, & peritissimis antiquorum ædificiorum Architectis arridet magis) ad cuneorum similitudinem accedebant, lapidibus sic effictis, ut in iis cernerentur insculpta pectore tenus sociarum (uti dicebamus) urbium simulacra, tum ad venustatem porticum excurrentium in Theatro, tum ad colligandos arcus in ipsorummet arcuum medullio collocata ad instar *Προσφωγὰς*, ut loquuntur Græ-

A ci, Mensularumve, aut *Modigliorum*, ut Architecti nostri. Nemo siquidem est Architecturæ veteris præceptis vel leviter informatus, quem lateat suprema arcuum triumphalium, quemadmodum & Porticum Theatralium, fastigia hujusmodi mensulis à priscis Romanis ut plurimum exornata, cum id in Theatro Marcelli, quod Romæ condidit Augustus, & in fornicibus eadem in Urbe passim erectis Septimio Severo, Vespasiano, ac Constantino Augg. multisque aliis ob triumphos, & insignes victorias ex hostibus Imperii reportatas, videre facillimum sit.

B Sed antequam ex hoc ipso Theatro egrediar, libet hic illud etiam recensere, quod plerique Historiographorum nostratum literis consignarunt, factum illud tectumque ad ea usque tempora pervenisse, quibus D. Galdinus S. R. E. Cardinalis Mediolanensis Archiepiscopus datus est, cum cæteris publicis ædificiis ejusdem Urbis, quæ ædium privatarum excidium, Federici Barbarubri immanitate decretum, evasisse feruntur. Verum enim vero Galdinus, ut dirutam & everfam Urbem instauraret, ac contra hostes omni immanitate barbaros novis vallatam mœnibus communiret, Theatrum hoc sustulit funditus, & disjecit, ut ab Arluno proditum accepimus in hæc verba: *Priscæ luxuriantis pompæ testimonia peragrantibus nobis, & cuncta relegentibus perhibent, Galdinum Salensem Urbis Pontificem, ut disjectam à fundamentis restitueret Civitatem, Circum, atque Theatrum evertisse lego, ipsamque lapidariam congeriem in fossarum, portarumque munimina translatis opere contulisse: quæ civitatem obambulantibus nobis, nonnulla cum indignatione & stomacho pervisum oculis ingeruntur, siquidem iniquum fuit, quæ Gothorum, Longobardorum, immanumque Barbarorum sæda colluvies non conspurcaverat, ea civem & amicum propolluisse sordibus & disjecisse.*

In eadem plane verba prorupit Georgius Merula, quem his verbis reprehendit Calchus lib. XI. *Historia Patriæ: Ex quo à re ipsa repercutitur Merula noster, qui invidiam in Galdinum colligit: quasi is pulcherrima opera singularia vetustatis monumenta, quibus etiam Barbari & fere gentes pepercissent, demolitus sit. Debit certe Merula rei præsertim ignarus prudentius de Principe tunc religionis nostræ, & postea divinis honoribus affecto, loqui.*

E Eodem respexit etiam Alciatus Antiquariorum Mediolanensium facile princeps, monumento cx. sic locutus: *Cum Urbis mœnia majores nostri fossa circumvallarent, latissimo quoque muro cinxerunt, hujus pinnae, quo visu pulchrior & opere firmiter esset, ingentibus saxis implevere, ex quibus viginti, quæ infra sequuntur, antiqua monumenta esse deprehendi ea in ordinem digerenda duximus, non modicum inde opera pretium facturos nos opinantes.*

F Pauca ista de veteri Mediolanensi Theatro libasse licuit, meam ut sententiam apertius aperirem. Ea siquidem est, Caput illud è solido marmore in modum cunei efformatum non Hymenæi, sed Fori Livii esse, quo nomine sicuti nemo est, qui nesciat, Urbem Bojorum Gallorum dictam, ita quisquis momenta rationum & argumentorum pondera, quæ subdimus, animo reputarit, prioris opinionis levitatem, ne falsitatem dicam, nostræ vero gravitatem, atque adeo certissimam veritatem nullo fere negotio deprehendet. Nostram itaque sententiam primo firmat prioris illius opinionis imbecillitas, quæ solis Poetarum figmentis, vel levibus conjecturis innixa, stare nullo pacto potest. Ut enim non negem ea in statua reperiri multa, quæ possint Hymenæo, juxta Poetarum & Mythologorum placita, convenire, nemo tamen antiquitatis bene peritus existit, qui censeat ad Nuptiarum Deum symbola illius omnia pertinere. Neque corona est, quæ capiti illius insidet, sed murorum

femi-decussæ pinnæ. Neque flammeum repræsentat id, quod humerum ejusdem lævum obtegit, sed vestem superadditam ad ornatum; socchos præterea, & alias germanas magis ac proprias Hymenæi notas, nemo illic non desiderat, nec videt. Pinnæ vero illæ vel solæ, femi-decussæ licet, satis superque declarant, non illud coronati Numinis caput esse, sed urbis alicujus, vel oppidi simulacrum, quod adeo notum, non modo pictoribus oculatis, quam lippis ac tonforibus, esse censeo, nulla ut alia probatione indigere possit. Ob hanc nempe causam turritam Cybelen Deorum & Dearum Matrem, urbiumque omnium Præsidem finxit Antiquitas, quique primus vi & armis hostium mœnia transcendisset in urbem, murali corona ex auro conflata in formam muralium pinnarum ab Imperatore exercitus donabatur. Exstant hodieque denarii argentei cum inscriptione M. LEPIDVS. PONT. MAX. TVTOR. REG. in quorum parte versa capiti turrito subscriptum est ALEXANDREA, quorum

TAB.
II.
fig. 2.

unum hic diligenter expressum formis æneis exhibemus. Sed enim libet eidem subdere Græcum nummum alterum Philippi patris, & filii Cæsarum, tertium quoque solius Philippi patris cum parte aduersa aliquot characteribus dissimili secundo huic appicto. Superfedeo pluribus hujuscemodi numismatibus afferendis, quæ quidem cum turritis imaginibus Urbium ac Provinciarum, titulisque prisorum Augg. videre per otium qui voluerit, adibit Fulvium Ursinum, & Antonium Augustinum, vel certe Scipionis Tonfi Patricii Mediolanensis, & Equitis longe clarissimi, Museum, Musarum domicilium, & virtutum. Explebit ibi scilicet studiosus quilibet antiquitatis vel ardentissimam sitim, tot illud insignibus numismatibus scatet, tot pulcherrimis tabulis, tot signis pretiosissimis est refertum, nihil ut amplius eo viso desiderare humanum ingenium possit. Quidquid enim humana nuper industria finxit, quidquid humani acumen ingenii adinvenit, uno loco nobilissimi Viri industria conclusit, nullis sumptibus, nullis laboribus, nulli diligentia parcens.

Quid multis? una illius Tabula novis nuperrime

coloribus animata cujusvis pulcherrimarum rerum cupidissimi animi vota potest explere. Omnes enim in illa conatus Artis expressi, omne præstantissimorum ingeniorum acumen, omnis pigmentorum vis & potestas, omnis trium toto terrarum orbe fama probatissimorum Pictorum ævi nostri, & Patriæ, Cerani, Procacini, Morazonii virtus, & industria angustis circumscripta limitibus, mirum in modum elucescit. Hujuscemodi vero inventum non alterius, quam summæ ejusdem Scipionis Tonfi Viri clarissimi, & Equitis nobilissimi prudentiæ in acceptum referet grata nostrorum, posterorumque memoria, qua factum est, ut uno in opere spectaretur pulchri

Quidquid habet tellus, quidquid habere potest.

Duæ scilicet in ea Divæ Rufina, & Secunda, post obitum pro Christo mortem Virginitatis & Martyrii gloria illustrem, vivæ adhuc spirant, & quæ olim triumphantes animis ad superos evolarunt, redivivo nunc corpore de hostium immanitate triumphanter iterum, & retroactis sæculis inaudito victoriæ genere potiuntur. Nil mortalibus arduum est. Nul- lum ad hanc usque diem opus suis numeris omnibus absolutius mortales oculis usurparunt. Quidquid enim divisum hætenus tabulis aliis per se decus ac pretium afferre potuit, una hæc in se Tabula comprehensum & expressum habet penicillis felicibus ad stuporem. Nimirum Ars ipsa secum in hac una certare voluit, ut Naturam aliquando vinceret non ante victam, & spectaculum omnium pulcherrimum præstantiæ suæ mortalibus exhiberet, provocatis tribus Pictorum Antistitibus ad cer-

tamen eo in stadio, in quo sibi quisque & vinci, & vincere gloriosum duceret, nec alia, quam se ipsos vincendi proposita sibi gloria decertaret. Vere jam Divum ipsorum genus licebit homines appellare, cum nostræ memoriæ homines divinis suis operibus Divorum potestatem propius æmulentur. Quam libenter ego hic Phœbum ac Musas D. Memoriam filias advocarem, ut Tabulam hanc immortalibus suis carminibus æternarent, si mihi vox talis esset, quæ posset ad abdita & celsa earum domicilii culmina pervenire. Conabor sane quantum eniti poterō, & ejus in Herois gratiam dudum disiectas fides ad modulos provocabo, cujus ergo Pictores ante præstantissimi defudarunt, & siquidem eorum præstantiam assequi nequivero in Poesi, Picturæ finitima & affini, laudabor omnino, quod, ut ad eam accedere propius possem, contenderim pro virili. Accedam autem aliquo modo, si Poesis uti lingua Picturæ femina illa divinæ mentis ex Phœbi & Musarum horreo depromat: quod non invenuste innuit Poeta Neotericus his versibus:

Nulla ars est similis magis ut Pictura Poesi,

Utraque divina femina mentis habet.

Est Pictura tacens historia, aperta legendi

Ignaris lingua, sancta Poesis opus.

Tunc enim Poesis mutam Picturam, elingues colores, tacitum linteum effari jubebit. Advocare igitur Phœbum & Musas majori & altiori, qua poterō, voce conabor, Phœbe veni: En ut ad primum vocis sonitum,

Protinus Aonio descendunt vertice Musæ,

Lunati Phœbus dux erat ipse chori.

Permixta Charites Nymphis numerosa Dearum

Hic præter Febrim turba Varonis erat.

Hinc procul agrestes Fauni Satyrique sequaces

Multifores taxus, cornua, fistra sonant.

Fieri silentium statim jussit Phœbus; ego inde cum, divasque ejus filias veneror, precor, atque implo-ro, ut divinum trium illorum celeberrimorum Pictorum opus immortalibus suis carminibus, ut exoptabam, æternitati consecrarent: datum mihi hoc responsum: Heliconiades cum Phœbo adeo impeditas esse in concelebrandis virtutibus heroicis Gabrieli Tonfi, nuper inter Cœlites translati, ut hanc Provinciam laudibus celebrandi eam Tabulam demandatam velit earum assæclis & cultoribus, eosque ut audirem monuit me Phœbus. Multa cecine-re illi, ut obsequerentur divi sororibus, ego tamen duo Epigrammata tantum memoria tenui, ca-que, ne perirent, scripsi.

De Tabula trium præstantissimorum Pictorum

EPIGRAMMA,

Alludens ad illud commune dictum, quod
cacus non judicat de colore.

VNA est in tabula pictorum dextera triplex,
Quævis arte sua conspicienda nitet.

Queris, amice, magis mea nunc quæ lumina pascat,

Difficile est circa hoc, credito, judicium.

Primam dum specto, divertit amice secunda,

Hanc lustrans, celeres tertia vult oculos.

Qui lustrare nihil potis est, non vincere cacum

Dices, at cacus qui statuisse potest?

A L I V D

in eandem Tabulam,

Alludit ad Paridis judicium pro Venere pronunciatum.

TRES invitasti pingendi ad bella magistros,
Inque una tabula ars debet inesse trium,

Ævi, non fallor, tria sunt miracula nostri,

Quodlibet insigne est pulchrius, at quod erit?

Nullum: jam disces æquales jungere, Poma
(Nam Venus est triplex) sunt tria danda viris.

Ad

Ad nos Phœbum, Musas, earumque cultores libentissime quidem advocavimus, sed amice illos consulturi, ut Muscum clarissimi Tonfi, pulcherrimamque in primis trium excellentissimorum Pictorum tabulam æternis versuum præconiis celebraremus: ne quam tamen ex longiore mora in Poësi invidiæ, aut adulationis notam contrahamus, ad id, quod dicebamus de sententiæ nostræ firmitatis pro statua in pontis Fabii fastigio collocata, revertemur.

Addit nihilominus sententiæ nostræ pondus per-
similis omnino statua nunc existens in ædibus Ludovici Tabernæ Comitæ & Senatoris, in ea regione Urbis, quæ *Mons Fortis* dicitur inter Portas duas, Orientalem scilicet & Tonfam, sita, summoque P. Cantonii, non minus Juris utriusque consultissimi Mystæ, quam antiquitatis & eruditionis omnigenæ peritissimi Philologi studio delineata anno c100cx. mihiq; pro magno munere ab eodem data, cujus ut in partem veniat amicus Lector, ut & gratiarum agendarum Viro de Republica literaria optime merito partes mecum ineat, eandem hic illi cum adscriptis characteribus, quæ HASTAE urbis simulacrum illam fuisse testantur, à manu optima repræsentato.

Quis hanc quæso cum nostra nunc propter de industria rursus appicta conferens non affirmarit, utramque simillimam esse ob notas ejusdem fere generis, materiam eandem, & formam, & artem, & artificis manum? Ob hanc unam certe similitudinis affinitatem duo Civilis Prudentiæ & Patriæ antiquitatis peritissimi Viri insigniter decepti sunt, putantes nostrum hoc Fabiæ Portæ superpositum simulacrum Hastæ omnino, nec Urbis alterius, esse, quos tamen excusatione aliqua non indignos puto, quippe quos loci distantia distincte videre, ne dum legere, prohibuerit adscriptas statuae literas, quas vix tandem ego in Solis clarissimi luce rem omnem proximioribus è fenestris oculis, & manu tentans assecutus sum; tum quia characteres propemodum omnes vetustatis vitio aciem quamlibet acutissimam fugiunt; tum quia eorum pleraque pars tormentorum ictus in ipsam statuum ab hostibus ex industria collimatos experta, cum ipsomet statuae lapide violata, vitiata, tot adeo damnis & maculis affecta est, ut magno vix ab Argis & Lynceis negotio dignosci possit. Hisce tamen ex characteribus, quales illi-
cunque tandem ad hæc usque tempora post tot injurias pervenere, argumenti postremi vis elicitur, quo probatur statuum Portæ Fabiæ impositam Hymenæi nullo pacto esse, sed Urbis, vel Oppidi non obscuri, FORI LIVII scilicet, vel LICINII, cum primæ literæ non IOR, sed FOR, apertissime repræsentent, postremæ vero non HVE, sed LIVI, ut oculate nostra industria deprehendit, aut LICINI, ut mecum præ cæteris suspicatus est JACOBVS VALERIUS, acerrimi judicii Vir, nec in ipsa tantum litteraria Rep. Confularis, sed omnis Mediolanensis antiquitatis peritia, Historiæ utriusque cognitione, omni disciplinarum genere, ut si quis maxime mortalium, triumphalis. Hujus enim ego tum amicitia utens, tum suavissima consuetudine in hac lucubrationum mearum parte non mediocriter adjutus, illud assecutus sum, ut qui in Patria selectorum Judicum Mediolanensium veri & æqui facem non postremam gerit, eandem mihi prætulit ad conjecturam istam; tum ipsis ex characteribus, quibus ex mutilis id fieri non dubie conjectavit: tum ex vetusta LICINI Oppidi nobilitate, & propinqua cum Urbe Mediolanensi sede. Bonaventura siquidem Castellionæus noster eo in opere, quod de *Antiquis Gallorum Insularum sedibus* transmisit ad posteros, eo de Oppido verba faciens, quo de Plinius ante

A meminerat, illud ipsum fuisse testatur quod à posteris Incinum, amisso veteri cum prisca nobilitate nomine, fuerat appellatum. Incinum vero Mediolanum attingere vel infantes norunt.

B Non multis ab Incini partibus procul, paulo nimirum inferius ad Lambri fluvii ripas forum fuisse, quod olim Forum Populi diceretur, nunc Moguntia, ex antiquis marmorum monumentis nos docuit Andreas Alciatus lib. II. *Rerum Patriarum*; Forum etiam aliud prope eundem fluvium existisse Forum Diuguntorum dictum, alii prodiderunt, ut hæc fori vox nostris in regionibus adeo frequens eam nobis opinionem injiciat, ut suspicemur Forum etiam aliquod Livii cognomento in Mediolanensi ditione fuisse, diversum à duobus illis, quorum unum prope Ravennam; alterum juxta Adriaticum sinum antiquam Coloniam celebrata scimus, ut quæ à nostris regionibus dissiderent longissimis interval-
lis.

C Hæc volui, quod gratum hominem semper beneficium delectat; estque animi plane magni, ingenui, ac liberalis, per quos profeceris, etiam cum aliqua legentium voluptate, libere profiteri. Sed utrum affirmare satius sit statuum nostram FORI LIVII, an LICINI esse, curiosius inquirere, ne multus hac in parte fuisse arguar, prætermittam, permittamque rem omnem integram iis, quibus, & otium, & acumen oculorum, & ingenii majus obtigit ad hæc conjecturas dirimendas. Sed qui videre plus, quam cæteri hac in parte volunt, adhuc ab Hymenæo stantes nostram ex eo sententiam in dubium trahunt, quod apud Mediolanenses jampridem inveteravit opinio illa, neque tam vulgi sermonibus, quam Historicorum propemodum omnium scriptis longe, lateque percrebuit, in Portis Mediolanensis Urbis, non aliarum Urbium, sed Deorum inanium simulacra posita fuisse tum, cum infelix Civitas Romanorum sacris initiata, eorum in tenebris versabatur. Ita-
D que longe minus ab Historiæ veritate recessurum eum, qui dixerit Hymenæi statuum in Portæ Fabiæ fornice collocatam, quam qui Urbis alterius simulacrum.

E Video quorsum hæc spectent, sed scrupulum hunc istis etiam eximam, nec, ut arbitror, difficulter. Vera sunt, quæ de simulacris illis Deorum inanium Mediolanenses Historici prodiderunt, Galvaneus inprimis hujuscemodi rerum solertissimus indagator, idque nos etiam testati sumus aliàs, cum Antiquitates D. Dionysii Cassanensis erueremus luci publicæ datas Mediolani an. MDCXVII. Atqui docendi mihi sunt ii, qui contra nos sentiunt, Portas olim Mediolanensis Urbis duplicis quodammodo generis existisse, Majores scilicet & Minores. Ac Majores quidem septem, Minores vero quatuordecim, cum harum binæ singulis Majoribus, utroque nimirum illarum ex latere responderent. Ob id illas Principes, & Laterales istas visum est aliquibus appellare, existantque hodie prope nos Laterales hujuscemodi Portæ duæ Majori uni deservientes, Fabia scilicet & S. Crucis, quarum una dextero lateri Ticinensis Portæ, lævo altera, ultro citroque meantium commodis, adhærescit. Majores porro Portas tantummodo simulacris Deorum Romana superstitione decorarat, ac cum septem essent septem illas Planetarum Numini consecravit; Zobiam, quæ nunc Castro Jovis includitur, Jovi; Vercellensem Veneri; Romanam Marti; Orientalem Soli; Comensem Lunæ; Novam Saturno; Mercurio denique Ticinensem. Harum igitur in numerum cum Fabia Porta non venerit, amentis plane sit affirmare positum in illa fuisse Romanorum Deorum aliquod simulacrum. Quid quod Majores Portas Romanorum opus (M. enim Marcellus eas condidisse fertur ex S. C.) ad Divi tantum Ambrosii
tem-

tempora pervenisse, quibus & Portæ illæ cum magna mœniorum parte dirutæ, nec Imperatorum tantum, sed ipsorum quoque Deorum Romanorum statuae dejectæ sunt, & lumi stratae, Hunnorum Rege Attila destructore, id quod in annum cccclv. incidit, cum nihil ille magis agitare animo, quam ut Romanæ superstitionis majestatem opprimeret, & Imperii toto terrarum Orbe clarissimi splendorem & amplitudinem funditus aboleret. Restituit re vera subinde labentibus annis mœnia, & eorundem Portarum sanctæ memoriæ Vir Eusebius Archiepiscopus Mediolanensis, sed ut ille veri Dei Opt. Max. cultum propagare totis nervis ac viribus nitetur, restitutis Portis, statuas suas reddi vetuit, quin imo sicubi eorum fragmenta superfuerant, sacrosanctæ Religionis amore succensus ea penitus excidi iussit, ne quid superesset usquam in expiata Urbe, quod posset fidelium mentes ad cultum Deorum inanum revocare. Quamobrem cum Hymenæum nulla in Porta Mediolanensis Urbis Romani coluerint, nec ullum in Porta Fabia Numen habuerint, quin imo longe nunc aliæ sint Majores & Minores Portæ aliis, quæ Romanorum stante florentesque Rep. visebantur, multis post superstitionem illam sæculis, simulacrum illud, quod expendimus, Portæ nostræ Fabiæ impositum fuisse fateri possumus nemine reclamante.

Ad rem nos nostram igitur redeamus. Atque ut exeamus è Fabiorum Vico, inde progredientibus quacunq̃ illi tandem voluerint via, vastum D. Vincentii Vinetum occurrit, longe lateque patens ab ipsis Urbis mœnibus usque ad aquas navium patientes, rivulis perennibus, ac densis sepibus circumseptum, grandi colonis mercede quotannis persolvenda à nostri Præsulis procuratore locatum. Arva illa quoque frugifera, quæ nostro Templo opposita ad Septentrionem excurrunt, ac partim contermino Xenodochio, partim Monasterio sancti Victoris Martii concessa sunt, tributa nostro Cœnobio pendunt. Eiusdem nostri Templi facies Biragorum domum, & alia subinde submœniana loca Vesperis adversa spectat, & Biragi quidem ratione fundi sibi dati ad domum illam ædificandam: Respublica vero Mediolanensis, occasione soli in condendis Urbis mœnibus occupati, ne quid inde damni Cœnobium nostrum acciperet, singulis annis pecuniæ vim certam Abbati Vincentiano solvunt. In hac ipsa Urbis Mediolanensis parte arva illa omnia, quæ mœnia transgressis inter ipsa mœnia, & sacram Divo Christophoro ædem occurrunt, censui nunc (ut ajunt) libellario eidem Abbati solvendo, subjecta sunt, quique illum solvunt isti potissimum recensentur, Moniales S. Bernardi, Angelicæ D. Pauli, sodales præfecti delubro S. Christophori, Cittadini fratres Canturii, Canobii, Barbavaræ, Comites, Putei, ut ipsamet Mediolanensium Notariorum fide subsignata publica documenta clare demonstrant. In his enim legitur supra recensitis censum solventibus, certas quædam & suis limitibus definitas eorum arborum partes, in emphyteusin (ut iidem Notarii loquuntur) à nostri Monasterii Præsulibus datas. Hæc pauca de prædiis illis, quæ Urbi proxima, oculis ipsis omnium subsunt, ne prorsus abirent intacta, fideliter perstrinximus. In ea nunc, quæ majora sunt, minusque nota, stylum & animum intendamus, eademque paribus, hoc est, levibus vestigiis persequamur.

Illud igitur primo haud ita notum est, Abbatem Cœnobii nostri in Mediolanensi ditione latissimos olim campos de Romano dictos pleno (ut cum Juris Consultis loquamur) jure possedisse: at anno fere mccccxc. à Christo nato, agros illos, qui ad duo fere millia jugerum excurrerant, Jacobum Antonium hujus Abbatiae Commendatarium, accedente auctoritate Innocentii Papæ VIII. Gaspari Tur-

A riano Comitis Francisci F. cum annui census librarum 800. solvendi onere addixisse.

B Secundo illud loco etiam est sciendum, Cœnobium nostrum in Pago Serenii amplos olim agros habuisse, ut publicis documentis constat, quorum in partem venisse crediderim Julium Cæsarem Serenium annuo sibi canone constituto. Idem in Treni Plebe quos habebant fundos, Fratribus Maynis, certa injuncta pensione annuatim sibi solvenda, reliquit. Nonnullorum quoque prædiorum fructus in agro Berrateni antiquitus colligebat, quos Paulo Turrensi, præscripta peculiari lege emphyteotica, concessit, qua quoque lege bona Busnati pago adjacentia Fratribus à Comite, & quæ in Aliateni Plebe erant, Bursanæ Familiæ tradiderat possidenda. In ea vero, quæ ad Vicum Cusanum in Plebe Severi possidebat Franciscus Arcusius, Hieronymus Bernarigius, & Bernardinus Cabiatus, iisdem ferme acceptis legibus immissi sunt. Paulus quoque & Fratres à Curte anno mccccxxix. à D. Vincentii Monasterio in emphyteusin accepere domum insigni horto & areæ latissimæ adjacentem, necnon & feracissimo agro perticarum centum quinquaginta septem ad omnem amœnitatem circumdatam, utilem, & incolarum usibus mirum in modum opportunam. Aliam item & majorem bonorum Barnerii & Cazani possessionem Alvissii Carati filii, & nepotes sub annum mdx. ab eodem Monasterio nostro, una cum pactis libellariis consuetis, adepti sunt. Anno vero mdxiii. opulentissima prædia ad Naritium trans Lambrum in Aliateni agro Lanfrancus Regna consecutus est cum onere persolvendi Cœnobio nostro annui census nomine libras 340. anno quoque mdxiv. Thomas Brasca aratri patientes perticas 330. in Bolatidione sitas, certa cum emphyteotica lege positus est.

D Denique possessio illa ingens, quæ Vincentiani Cœnobii erat in Aliateni Plebe trans Lambrum ad locum Caloe nuncupatum, anno mdxvi. amplo canone superimposito, Bartholomæo Homato & Fratribus cessit, quorum in locum postea Jo. Baptista Niguarda subrogatus est. At amplissimas possessiones Senaghi, Senaghini, Capfinarum Matæ, & Novæ, nescio quis ejusdem Cœnobii Commendatarius prius Coriæ familiæ in emphyteusin tradiderat ea lege, ut quotannis Monasterio libras mille sexcentum quinquaginta penderet, ut publicis adhuc literis indicatur. Bona reliqua, quæ supersunt in Gratiago pago Plebis Pontiroli, antiquæ Moronæ familiæ cum annuo librarum biscentum octuaginta censu concessa sunt.

E Prata in Lambrensi agro Sigismondus Vicomercatus eadem fere cum lege accepit: Vinetorum generosissimi vini feracium in pago Vernati Rizardus Villanus in possessionem venit. Alia permulta rustica prædia non solum pratis, vinetis, & arbutis læta, sed pomariis, hortis, & viridariis pulcherrimis, cum herbarum & florum varietate, tum pecudum pastu & apium examinibus referta, aliaque urbana non pauca diversis familiis variis temporibus ea conditione distributa sunt, ut annuam aliquam fructuum portionem Monasterio Vincentiano darent. Inter has vero nobis adhuc tributarias familias istæ potissimum in quodam vetusto codice fructuum Cœnobii nostri manuscripto sigillatim & ordine recensentur, Trivultia non minus ubique terrarum clara, quam inter antiquas Urbis Mediolanensis jure ac merito recensenda; Moronæ nobilissima nostræ Patriæ, Gens Lampugnana, Madia, Mayna, Puteobonella, Ferraria, Porra, Decia, Stanga, Ghilia, nobiles omnes, ac primariæ familiæ Mediolanensis Urbis, Barbavarium item Castellorum, Pighettorum, Cotiorum, Cortesiorum, Soresinarum, Syrturorum, Vicomercato-

catorum, & Pissinarum. Hodie certe earum ex numero, quæ Cœnobio D. Vincentii census libellarios pendunt quinquaginta quatuor, iis exceptis, qui Monasterii fundos ficti simplicis nomine (liceat mihi communi tabellionum loquendi formula uti ad rem apertius explicandam) solent conducere.

Verum enim vero, ut rerum humanarum vicissitudo fert, Cœnobii nostri bona, prædiaque tum urbana, tum rustica, modo hæc, modo illa, alia scilicet aliis suffecta fuerunt, quemadmodum & in tributariis modo hi, modo illi numerati sunt, id quod Lectorem benevolum eam ob causam monitum volui, ne majori, quam par est, capiatur admiratione, si forte legerit aliquando certas Familias inter nostro Cœnobio tributarias recenser, quæ tales hodie re vera non sint, aliquando etiam quorundam prædiorum mentionem fieri, quæ olim ejus ditionis fuerint; nostra vero hac tempestate non sint, nec esse jure ullibi reperiuntur: neque enim hoc errori nobis, aut tabellionibus culpæ, aut Monachis negligentiae tribuendum, sed frequentibus prædiorum commutationibus & successivis emphyteutarum variationibus adscribendum. Missos facio in præsentia fructuosos fundos, quos Cœnobium Sancti Petri de Mandello nuncupatum in Comensi ditione possidebat, sibi que Divi Vincentii Cœnobium miscuisse supra ex Galvano demonstratum est, cum nihil ea de re certi compertum habeamus, neve odium, offensionemve dominorum viventium incurramus. Illud sane, utpote certissimum, silentio mihi transeundum non est, sed apertissime absque ullius offensa, vel injuria proferendum, deceptos egregie fuisse illos, qui Præposituram sancti Albini Diocesis Viglevanensis ad oppidum, quod Mortariam dicunt, Cœnobio nostro Apostolica auctoritate adscriptam, & justo legitimoque vinculo cum eodem adstrictam perpetuo crediderunt. In eam enim forte sententiam adducti sunt ob diutinam successionem unius, ejusdemque personæ diu in utriusque sacerdotii possessione durantis.

Nam primum falsam hanc opinionem esse plane convincunt Pontificia diplomata cum antiqua, tum nova: dein diversitas personarum, quibus uno eodemque tempore duo hæc sacerdotia seorsim concessa sunt, ni nos memoria fortasse fallit, aut rerum hujuscemodi monumenta publica mentiuntur. Sub Paulo Quarto Pontifice Max. Asca-

A nius Sfortia Cardinalis Tituli Sanctæ Mariæ in Via Lata Præposituram hanc obtinebat, & fructuum exigendorum, sicut & negotiorum omnium ejusdem Præposituræ curandorum, provinciam publici mandati literis demandavit Pompeo Birago, eodem plane tempore Cœnobii Divi Vincentii Abbati. Hinc factum, ut Abbas viam sibi sensim aperiret ad eam Præposituram resignatione, decursu temporis obtinendam certa cum fructuum pensione cedenti addicta, de qua in dati & accepti codice Biraghiano, qui apud nos est, crebra fit mentio, & aperta. De sede Divo Albino sacra Joannes quoque Franciscus à Basilica Petri Novariensis Episcopus lib. 1. *sua Ecclesia*, narrat eam Præposituram fuisse cum Collegio Clericorum Regularium, & redditibus satis amplis, sua vero tempestate Clericorum Collegio sublato, Commendæ nomine uni tantummodo tradi consuevisse, principioque Regalem sancti Eusebii dictam, ut quæ à Magno Carolo Galliarum Rege ac Imperatore condita esset, at Albini Episcopi corpore illuc allato, sancti Eusebii nomine deposito, cognomentum Albini sumpsisse. Addit idem Episcopus in hac ipsa æde sepultos olim Amicum & Amulium vitæ sanctitate conspicuos, furto inde sublato, quæ quidem omnia, sicut & alia pleraque hujuscemodi, libenter admitto, non solum quia cum Historiographis nostris consentiunt, verum etiam quia minus abhorrent à vero. Inter illos enim convenit Carolum Magnum cum Desiderio Longobardorum Rege conflixisse ad eum locum, qui tunc Bella sylva dicebatur, ibique Longobardis fere omnibus internectione deletis, Regem eorundem paulo post Papiæ obsecum, & captum, locum ipsum ob magnum illic cæcorum & mortuorum numerum, *Mortarii* nomine suscepto, desisse veteri nominari. Quamobrem non tam veritati quam pietati liberalis Imperatoris congruere videtur, eum ob perpetuam tot ibi sepulcorum suffragationem, ædi à se sacræ conditæ opulentum sacerdotium addicere voluisse, & addixisse re ipsa, ea in re nemine discrepante. Illud unum à publicis documentis, Apostolicis literis supra recensitis, & à nobis, longo dissidet intervallo, quod in illis nullius Clericorum Regularium Præposituræ, aut Collegii mentio fit aperte, sed Præposituræ tantum Ordinis S. Augustini. Ac ne quid hic fictum à nobis fuisse posteris videatur, lapidea tabula, quæ ad D. Albini adhuc legitur, horum ex parte meminit in hæc verba:

HANC DIVI ALBINI AEDEM A CAROLO
MAGNO OB PARTAM VICTORIAM EX
DESIDERIO LONGOBARDORVM REGE DITI-
ONIS ECCLESIAE V. ADRIANI I. PONTIFIC.
ANNO OCCVPATORE ERECTAM VETVS-
TATE COLLAPSAM PETRVS ANTONIVS BIRAGVS
SACRI HVIVSCEM. LOCI PERPETVVS COMMENDAT^s. IN MELIVS
RESTITVIT AN. SAL. DOMIN. MDXXXXI.

Biragus vero, à quo Ædes hæc augustiori cultu restaurata, non Abbas S. Vincentii fuit, sed Fidentiae in Parmensi Agro, non tam opibus potens, quam clarus trium totius Orbis Christiani potentissimorum Principum simul exceptorum hospitio, ne quid de splendore Gentis Biraghæ dicam, quæ à Scriptoribus non contemnendis, non tam Urbis nostræ, quam inter nobilissimas totius Italiæ Familias recensetur. Albinæ quoque Præfecturæ prædia, quæ decem octo millia perticarum excedunt, & annuos pendunt pecuniæ census novem millium, iisque plurium librarum absolutissime descripsit Jo. Angelus Cribellus, præstantissimus Architectus, &

F artissimo mecum amicitiae vinculo copulatus, cuius solerti opera Præsul noster utitur, & alii clarissimi Cives in prædiorum suorum juribus discutiendis, controversiisve, si quæ forte inde suboriuntur, penitus amovendis, quo in utroque munere mirum in modum excellit. Nec mirum: adolescens enim bonæ indolis Romam à patre missus, ut literariæ militiæ nomen daret, indeque mox in Patriam incommodæ valetudinis causa revocatus, præcepta liberalium disciplinarum ornamenta, Picturæ scilicet, Arithmeticæ, Geometriæ, Astronomiæ, & cæterarum Mathematicarum artium ad Architecturam pertinentium à peritissimis,

doctissimisque magistris praecepta hausit, sedulam, semperque talis ut Architectus evaderet qualem Vitruvius efformavit, operam dedit, ut ob id jure ac merito ephebus adhuc in Reipublicae Mediolanensis Architectorum numerum nullius suspensio calculo sit adscitus. Hæc habui, quæ meus erga te amor effunderet, mi Cribelle, cujus quod virtutum primordia tantum attigerimus, veniam ab ingenita tibi humanitate speramus, quod à sacra Cœnobii nostri dictione ad amicitiae perpetuo inter nos cultæ memoriam recolendam, ab æquis rerum æstimatoribus laudem & amorem. Alias de te alia perscribemus, quæ vel immortalitati amicitiam nostram consecrent, vel cum antiquis illis amicorum paribus, quorum elogiis plena est omnis antiquitas, conferant & anteponant. Vocant enim post bonorum Cœnobii enumerationem ad sese scriptionem meam ejusdem juris dicundi potestas, & sacerdotia, quæ jurispatronalia nuncupantur, ac licet de jurisdictione multa scribi possent, tamen quia non libet, ne dum studiosus Ecclesiasticarum antiquitatum esse eupio, odium alicujus incurram verum asserens, nunc vel vetustate abolitum, vel contrario usu, vel jure novo aliquo commutatum.

De Sacerdotiis jurispatronalibus tantum agam, eaque proferam quæ minus dubia, vel controversa sunt, à nostro, cui sollicitudo æternæ animarum salutis imminet, exordio ducto. Vicarium olim erat sacerdotium nostrum ad Cœnobiarchæ nutum, quod esse perpetuum coepit jussu & imperio summi sacrorum Antistitis Clementis VIII. annuente, immo precante Simone de Terra Nova amplissimo S. R. E. Cardinali. Primoque in Pompejum Siccum, virum ingenuum, & insigniter eruditum, quo aulico Romanæ Curiae non inurbano Cardinalis ipse diu & perquam familiariter usus fuerat, est collocatum. Eo mortuo Vicaria eadem mihi dignitas est delata ex electione & designatione nominatim facta ab illustrissimo Carolo Carafa, in supra laudati Cardinalis locum jure ac merito subrogato. Is enim unum me non solum præter spem & competitorum omnium opinionem, verum etiam cum nulla mea in illum merita exstarent, Curatum secundum esse voluit, pro quo beneficio cum parem gratiam referre me nunquam posse certissime sciam, grata saltem illud mentis significatione, sempiternaque memoria colam, semperque plus me externo Principi, & nobilissimæ Balborum familiae debere fatebor, quam nostratibus viris quibusdam primariis, ac potentibus, eorumque ministris, qui cum se mea causa velle omnia profiterentur, nihil denique voluerunt. Hominem igitur suum in Vicarium designat Commendatarius, mox Archiepiscopo Mediolanensi exhibet, qui facto prius ejus doctrinæ periculo, diligentique vitæ & morum inquisitione habita, ubi illum aptum esse reperit, ad ejusmodi provinciam sustinendam per Bireti impositionem Vicarium in perpetuum creat: nam ut primum illud ad Commendatarium jure suo spectat, ita hoc alterum Archiepiscopalis juris est ex Pontificio erectionis diplomate ad præscriptum in Conc. Tridentino, & in Bulla Pii V. sanctiss. Pontificis normam.

Nemini quoque dubium erat Parochiale sacerdotium D. Xisti, olim patronato jure pertinuisse ad Commendatarium nostrum, tum in habendo personæ delectu, tum in beneficii ipsius titulo electorum uni conferendo, ut est ex antiquioribus beneficiariorum literis patentibus & agitatibus in Archiepiscopali Curia manifestum. Erat enim olim S. Xisti templum in ditione Monachorum Cœnobii nostri, quod illic moram traxissent initio, ut ostendimus in *Fasciculo* VI. licet mox exortis controversiis aliquibus inter Ordinarium & Monasti-

A cos ordines, ad quos eligere, aut ex electis selectos quarundam vacantium Parœciarum beneficiarios instituere pertinebat, ut paulo ante de S. Maria, cui ad Circum, male ad Circulum, cognomen est, contigisse diximus, D. Xisto turbari jus illud coeperit, ac permisceri, sed enim sedatae sunt tandem controversiæ omnes, & amputatae sine ullo præjudicio partium lites.

B Fuerunt etiam, qui non leviter dubitarunt, num parochiale sacerdotium S. Viti, quem ad Corrivium dicunt, ad nostri jus Monasterii pertineret, ea ratione ducti, quod ibi Monachorum hospitium olim fuerit, in quo fortasse Novitiorum grex degeret ad prima Regularis disciplinæ primordia capefcenda, ut quam vivendi rationem ibi didicissent, in Monachorum Cœnobia postea profiterentur. Ad quod etiam respexisse contendunt D. Carolum Cardinalem, & Mediolanensem Archiepiscopum, novo Clericorum Seminario ibi instituto: licet eo aliqua post temporis intervalla alio deducto Hospitium idem tenuerint Parochi, & nostra etiam memoria Religiosi Camaldulenses, quasi id loci antiquam Religionis sementem adhuc retinens, nova disciplinæ Monasticæ germina producere niteretur, quæ tamen hodie crudeliter terrenæ molis aggeribus ob novam ædem honorificentius exstruendam, penitus interierunt, vel ad ferventissimos solis radios ita exsiccata sunt, ut nulla spes illis sit reliqua renascendi. Non levem ea de re dubitandi ansam nobis quoque præbet illud, quod subdam: Rectori S. Viti certam grani & pecuniarum vim quotannis ad hanc usque diem à nostro Monasterio pendi solere, quod & cum S. Xisti Parocho ab eodem fieri consuevit: eo pacto, quo Vestales Monasterii Majoris idipsum præstare cum Curato S. Mariæ ad Circum, aliisque plerisque cum Parœciis Monachos alios eodem modo pendentes, usu veteri introductum scimus, ac nunc etiam cernimus observari. Facit huc etiam D lis olim ea de causâ orta inter Beltrandum Præalorem Abbatem Cœnobii nostri, & Rupertum Alciatum ejus tum Parochialis Rectorem, quæ si res aliter se habuisset, orta profecto non esset, diciturque ea de controversia sententiam Jacobus à Trivisio Generalis Archiepiscopi Mediolanensis Vicarius anno à Christo nato MCCCLXXXV. quæ publicis adhuc in documentis legitur, quorum videndorum potestas cum aliis multis exaratis in pergamenâ charta mihi facta, permisso & liberalitate erga me singulari Bartholomæi, ex antiqua & nobili Marchionum Malaspinarum gente oriundi, majoris nunc æditi Metropolitane Mediolanensis Ecclesiæ pii non minus, quam docti, generalisque tam fructuum, quam pecuniarum Abbatæ Vincentianæ Procuratoris, ab ipfomet nostro Cœnobiarcha jure ac merito instituti.

F In nostrum sane jus à prima sua origine concessit Delubrum D. Christophoro sacrum, quippe quod in solo nostrorum Monachorum excitatum fuerit, & intra nostræ Parœciæ terminos collocatum, ea lege, ut ejus fodales annuum librarum quinque ceræ candidæ ad usum Altaris elaboratæ tributum nostrum in Templum inferrent. Exstant apud nos hujusce concessionis ab Ambrosio Bernadigio Abbate sodalibus istis factæ, nec non & ceræ census, pastorumque conventorum tabulæ fide publici Notarii subsignatæ. Quamquam nunc cereorum loco certam pecuniæ summam Cœnobiarchæ quotannis pendunt Patritii nonnulli Mediolanenses ædi Christophorianæ præfecti. Jurisdictio, & plena potestas hac in æde sanctiora nostræ religionis sub sensum cadentia signa populo imperiendi, funera ducendi, justa defunctis perfolvendi, & solemniore sacras res alias peragendi, penes unum D. Vincentii Vicarium semper fuit. que

que cum libuerit aliorum sacerdotum opera uti potest, nulla vel exigua Parœcialium emolumentorum jactura facta. Ita certo tempore & annuo præfinito censu nobis visum est Religiosis Monachis Camaldulensibus facultatem aliquando dare anniversaria dierum festorum D. Christophori solemnia

A in æde eidem sacra rite & ordine peragendi. Eodem nos quoque jure utimur in ædibus D. Catherinæ ad Fabium Pontem, & S. Calocero sacris, & minore paulo olim in vicino Dementium Xenodochio, qua de re suis in locis alibi sigillatim, hisce nunc contenti, agemus.

JO. ANT. CASTELLIONAEI
FLORILEGIUM
ANTIQUITATVM
PAROECIAE
D. VINCENTII IN PRATO.
SECTIO I.

FASCIC. VIII.

Parœcialis Muneris Dignitas, & Origo. Parœcia cur divisa, suisque singula terminis definita. Urbium, & Provinciarum cura Præsulibus, minorum locorum minoribus Sacerdotibus. Mediolanensium Parœciarum numerus major, & minor. Late patens juris Parœcialis campus, sed à Religiosis Mendicantibus usurpatus. Parochorum nomen multiplex dignitatis plenum. Onus eorundem, conditio calamitosa. Vincentiana Parœcia fines undequaque dimensi & descripti Ichnographica in Tabella. Catholici olim solis in Parœciis humari soliti. Parœcia Vincentiana laus variis ab adjunctis, ac præcipue ab artibus auri cudendi, filis superinducendi sericis, ejusdemque ab argento sejungendi.



QVONIAM hucusque in sacerdotiis & juribus Abbatiae nostra desudavit industria, non abs re fuerit nunc, quæ de jurisdictione Parœciali ad primum post Abbatiam Sacerdotium, quod Vicariam dicunt, attinente legimus, mandare chartis, leviter adumbrata prius ipsius Parœcialis muneris dignitate. Munus hoc igitur suam primam originem à Christo Domino Redemptore nostro per Apostolos divini afflatu Spiritus in varias Terrarum orbis partes, summo cum imperio, missos ad Gentes veræ fidei dogmatibus imbuendas, Provinciis aliis quot eorum unicuique datis, ne qua in Euangelii disseminatione confusio suboriretur, duxisse, quamplurimis Sanctorum Patrum testimoniis indicatur apud Baronium, qui illa collegit Tom. I. *Annal.* An. XLIV. Verum enim vero quia Parochorum & Episcoporum jura sub illa nascentis Ecclesiae primordia miscebantur interdum, hinc factum est, ut decursu temporis, urgente necessitate, vigilantissimorum ejus sæculi Præsulum cura distinguerentur. Neque id respectu Urbium & Provinciarum, quibus Primates & Episcopi præsidere debebant, ut est à Lucio Papa dictum, teste Gratiano in *Decret. distinct.* LXXX. can. 1. Hæc siquidem cer-

C tis Præsulibus ac primariis sacerdotibus assignatæ sunt ab ipsismet Apostolis, & à B. Clemente Apostolorum legitimo successore, nec non & à Dionysio summo Pontifice, qui S. Xisto successit, cum eadem multo jam ante Christi adventum ita distributæ, atque descriptæ forent ex collocatione prisca Flaminum & Archiflaminum Ethnicorum, ut aperte declarat *distinct.* LXXX. can. II. verbis illis: *Urbes, & loca, in quibus Primates præsidere debent, non à modernis, sed multis ante adventum Christi statuta sunt temporibus, quarum primates gentiles etiam pro majoribus negotiis appellabant. In ipsis vero Urbibus post adventum Christi, Apostoli, & eorum successores, Patriarchas, & Primates posuerunt, ad quos Episcoporum negotia (salva tamen in omnibus Apostolica auctoritate) & majores causæ post Apostolicam sedem, sunt referendæ. Et can. III. sic habetur: In illis vero civitatibus, in quibus olim apud Ethnicos primi Flamines eorum, atque primi legis Doctores erant Episcoporum Primates, vel Patriarchas B. Petrus poni præcepit, qui reliquorum causas Episcoporum, & majora negotia in fide agerent. In illis autem, in quibus dudum apud prædictos Ethnicos erant eorum Archiflamines, quos tamen minores esse tenebant, quam memoratos Primates, Archiepiscopos institui præcepit. In singulis vero reliquis civitatibus singulos, ac plures Episcopos constitui præcepit, qui Episcoporum tantum vocabula sortirentur: quoniam neque inter ipsos Apostolos par fuit institutio: sed unus præfuit omnibus. Et distinct. XCIX. can. II. Provincia multo ante Christi adventum tempore divisa maxima ex parte sunt, & postea ab Apostolis, & B. Clemente prædecessore nostro ipsa divisio est renovata. Alia subsequencia hujus Canonis verba præcedentibus persimilia omitto, ne vel Lectori tædium pariant, vel mihi ipsi in ea exscribendo laborem.*

F Non, inquam, respectu Urbium, vel Provinciarum, ut jam diximus, sed privatorum, minusque communium locorum, in quibus Parochi & minores sacerdotes degerent ac residerent, uti melius & oportunius Reipubl. Christianæ consultum foret, quæ se cunque necessitas obtulisset, ut habetur 13. *quæst.* 1. cap. 1. Certi limites unicuique sacerdoti perscripti sunt, ita ut nullus in alterius fines pedem inferret, aut jus illius in re nulla, vel minima

violaret, sed suis tantummodo finibus contentus esset, id quod Anacleti quoque decreto sancitum, uberiusque declaratum ab Urbano, aliis subinde summis Pontificibus fuit, ex animadversione Baronii Tom. II. *Annal.* ad calcem An. CCLXX. cum inquit: *Sed considerandum est, non à Dionysio Papa primum, verum ab aliis antecessoribus Romanis Pontificibus, suis limitibus distinctas fuisse parochias, presbyterisque divisas. At quod in persecutione Valeriani (ut dictum est) ab Ecclesiis essent avulsi presbyteri, & in cœmeteria Christiani omnes etiam convenire vetiti; illo sublato de medio, & à Gallieno restituta Ecclesia pace, & cœmeteria adeundi ab eodem libera facultate concessa; illarum Ecclesiarum presbyteris compluribus martyrio vita functis, easdem iterum dividere, ac pro ratione distribuere, cœmeteriaque singulis consignare, Dionysii opus fuit.*

Jam quod ad nostram Mediolanensem Urbem attinet, D. Monas Archiepiscopus ejus Ecclesiæ VI. Burreæ perillustis apud nos familiæ decus, & clarum tum Philosophiæ scientia, tum vitæ sanctimonia, lumen, in centum quindecim Parœcias distinxit, ac certis quibusdam limitibus definivit, ut ex vetustiss. MS. Ecclesiæ Ambrosianæ colligit Galestinus, & in suo *Martyrol.* adnotavit ad IV. Idus Octob. ubi sic inquit: *Mediolani S. Monas Episcopi, & confessoris. Hic, quo tempore Episcopus renunciatus est, celesti lumine circumfusus, patrias opes, quas satis amplas habebat, Ecclesia donavit; Mediolanum Parochiis distinxit; quinquagintaque novem annis in maxima persecutionis tempestate munere Episcopali sancte perfunctus, multa fortiter, atque ex præscripto Evangelii egit: quibus clarus obiit in Domino.* Et ante Galestinum scriptum reliquit Tristanus Calchus lib. I. *Historia Patriæ* his verbis: *Mox cessante metu, habitis in Portiana aede comitiis, nobilis & consularis vir Monas ex Kalimeri schola sacrorum Antistes creatur, qui beneficio longa ætatis multa ad incrementum religionis contulit, ætateque est adeo multitudo eam profitentium, ut jam non sufficeret nominatim quemquam, & per cognomina denotare, sed per vicos, & regiones Urbis, in quibus habitarent, designari Christiani Cives cœperint, quas Parochias dixere, ab antiquo fortasse verbo Parocho appellatione sumpta, qui præbenda publice Magistratibus expediebat, ut apud Horatium,*

Et Parochi, quæ debent, ligna, salemque.
Quod etiam verbum ætate nostra vir doctissimus Hermolaus Barbarus, cum Patavii ararium publico nomine curaret, mutuatus est, & præceptor Merula concessit. Quidam tamen primam Parochiarum mentionem in Maternum transferunt. Vixit autem Monas quam diutissime: nam cum octogenarius esset, unde sexagesimum Episcopatus annum attigit.

Sed multo ante laudatos hujuscemodi geminos Auctores hæc ipsa literis consignavit Galvaneus cap. XCIV. in Mona, à lectore videndus. Quamquam harum numerus ætate hac nostra minor, idque propter adjunctionem Parœciæ unius, vel plurium ad alias sibi proximas. Quo pacto cum Metropolitanæ Parœcia olim conjunctæ sunt aliæ plures, ut S. Theclæ, Divorum Zenonis in Pasquirolo, Clementis, Galdini etiam, & Michaelis sub Domo memoria nostra; cum Basilica Apostolorum Parœciæ SS. Stephani & Joannis ad Fontes, & Lantassii; ad Parochialem quoque S. Joannis supra Murum jampridem illa D. Petri Linti, nuper vero illa S. Vincentii Monasterii novi accessit; quemadmodum Parochiali D. Petri in Caminadella, duæ aliæ S. Carolo auctore additæ sunt, Divorum Bartholomæi scilicet & Vitalis; ad illam demum S. Mariæ Secretæ Divorum Nazarii ad Petram Sanctam, & Cypriani, ne Parœcias singulas, cum quibus aliæ patrum nostrorum memoria copulatæ sunt, numerando percenscam: nam & nostra fere

memoria aliæ quoque aliis uti proximis adjunctas legimus Fidelis, Simpliciani minoris, Thomæ in Siccariorum arce, S. Mariæ Vallis, S. Sepulcri, S. Alexandri in Perizio, S. Stephani ad Murigiam, S. Laurentii in Turigio, Sanctorum omnium, S. Damiani in Carrubio, Sancti Protasii in Campo Amollorum infra, S. Petri in Curte, Sancti Martini in Compito, S. Victoris ad Puteum, & si quæ sunt aliæ, quarum nomina deleat oblivio, vel vetustas. Altera minoris hujusce numeri causa fuit concessio sacrarum quarundam ædium, quibus initio animarum cura commissæ fuerat Religiosis aliquibus novis, quam ob causam ædis D. Naboris Franciscanis Cœnobitis data; Lantassii vero, S. Mariæ Vallis, S. Margaritæ, S. Benedicti, Monialibus, S. Sepulcri Oblatis Sacerdotibus D. Ambrosii Ecclesiæque nostræ maximis firmamentis; D. Fidelis Sodalibus Societatis Jesu uberrimis scientiarum omnium fontibus additæ sunt. Nostra quoque ætate ad commodiorem recentium ædificiorum descriptionem, dimensionemve, Parœciæ multæ veteres sublatae sunt, solo æquatis templis, D. Michaelis sub Domo, S. Vincentii ad Monasterium novum, SS. Theclæ, Galdini, Joannis ad Fontes, Joannis ad Monachos, Vitalis, & Sanctorum omnium, ut Annales docent.

Quod si quis nunc causam ex me roget, ob quam sapiens æque, ac pius Mediolanensis Archiepiscopus Monas plures tunc Parœcias esse voluerit, cum Civitas minor erat, & incolæ pauciores, quam nunc sint, longe aucta cum ipsismet civibus Civitate?

Non negarim id prudenter quæri; sed conferenti inter se tempora, & hujusce mutationis causas, quas attulimus, secum animo reputanti, quærendi locus nullus propemodum relinquetur, vel eos, qui numerum illarum contraxerint arguendi. Cum enim eo felici seculo vigilantissimus Ecclesiæ Mediolanensis Pastor animadverteret, fidelium gregem sibi creditum divino amore flagrantem quotidie magis magisque divina mysteria frequentare, ne sacrarum ædium distantia, Rectorumve paucitas, tantam animorum concitationem ad omnia pietatis officia retardare notiores subditorum mores, ac ægritudines animi essent, quo plures Parochos, hoc est, animorum medicos, haberent, adeo multas voluit esse Parœcias Mediolani. Verum enim vero cum labentibus annis Mendici Religiosi suborti nuper in Ecclesia Dei sibi Parochorum partes & munia vindicare, quodque vetustiores Monachi ante non fecerant, obire cœpissent, non solum divinæ populo doctrinæ pabula suppeditantes, verum etiam ægrorum æque ac sanorum sacris audiendis confessionibus assidentes, sanctissimam quoque Eucharistiam ministrantes, ægrotos, ac eos in primis qui morti proximi decumberent, sæpe ac sæpius invisentes, funera quoque & exequias Christiano de more ducentes, & alia ejusmodi religiosissime peragentes, frequentari desierunt Parœciæ multæ, earumque Rectores parum necessarij summis à Præsulibus habiti, suo sunt numero imminuti. Quin imo cum Mendici iidem Religiosi extraordinariam, eamque satis amplam, stipem universam ad se propemodum studiosissime traduxissent posthabitis solis pecuniarum redditibus, Parœciis antiquitus attributis, relictisque pastoribus earundem, iique vix ad sacrarum ædium instaurationem, Ecclesiasticæ supellectilis innovationem, victum, & vestitum Pastorum ipsorum necessarium sufficerent, Parochi tum ipsi pauperibus ignavis ac desidibus similes victitabant, eam ob causam Mediolanensis Ecclesiæ Præsules, tum ut ab hujuscemodi Parochis otium, pestem animorum certissimam, propulsarent, tum ut eorumdem inopiam sublevarent, tenuioribus Pa-

roeciis suppressis, earundem fructus & redditus superstitibus aliis assignarunt. Quamobrem brevi temporis intervallo minorem ad numerum sunt redactæ.

Verum hic ex me fortasse quispiam sciscitabitur, si Religiosi Viri, quibus à mendicitate nomen est, tot ac tanta jura solis olim Parochis concessa sibi vindicarunt, quæ robur suum habere potuerunt Summorum Pontificum decreta Parochorum ergo edita, tum antiqua, tum nova?

Non frustra res hæc in disceptationem venit, nec est à præsentī Fasciculo aliena, monetque me uti per singula juris Paroecialis capita brevi discurrem, quod facere non gravabor.

I. Primum igitur juris Paroecialis caput illud est, quod Populum ad sacrum in Paroeciali Ecclesia audiendum disponit, uti videre est in Clementina, *Religiosi de Privilegiis*, ubi in virtute S. Obedientiæ, & sub interminatione maledictionis æternæ (textus ipsius verba sunt) omnibus Religiosis viris præcipitur, ne qua arte, vel ingenio laicos ab Ecclesiarum Parochialium frequentia, vel accessu retrahant, & cap. *de paroc. & alien. paroc.*

II. Alterum, ut Parochis Decimæ solvantur, 16. q. 1. c. *questi*, & tota, II. item toto Titulo *de Decimis*.

III. Tertium, ut oblationes ejusdem fiant, 10. q. 1. c. *Quia sacerdotes*, cap. *Sanctorum*, & c. sequenti, & *de cons. d. 1. c. omnis Christianus*. Quæ quidem jura Parochorum tria, licet ab œcumenica Synodo Tridentina *Seff. 22. 24. & 26.* ubi de Reformatione, fuerint populis sæpissime laudata, Episcopis ipsis maximopere commendata, & ut perenne robur contra quorumcunque injurias obtinerent cautum & sancitum. Utrum tamen ita se nunc habeant, nec-ne, ii viderint contra quos diræ & execrationes in ipsomet juris corpore etiamnum militant non revocatæ.

IV. Nuptiarum jus, quod quarto loco ponimus, factum tectum ab omni extraneorum contactu, omnique commixtione sincerum ad nostra usque tempora pervenit: nec satis compertum, utrum metu-ne futura matrimonia forent irrita pedem populo ad se referente, an poenarum formidine, si quis alius, præter Parochum, ausus esset pedem in istam functionem inferre, ut habetur apertissime xxx. q. 5. cap. 1. & sequentibus xxxv. q. 11. cap. *Nulli*, & in cap. *Cum terra de Elect.* & alibi in Tit. *de Consuet. de Censibus*, *de Simonia*, & *Usu pallii*, quæ quidem juris antiqui decreta gravioribus etiam poenis adjectis inviolabiliter servari Concilium Tridentinum *Seff. xxiv. cap. 1. de Matrimonii reformatione* præcepit.

V. Jus omne fatendorum criminum sacerdoti ad eorum à Deo Opt. Max. veniam impetrandam penes olim solos Parochos erat, ut vel ex uno illo celeberrimo cap. *omnis utriusque sexus*, Tit. *de poeniten. & remissionibus* constat. Atqui nunc plena idem præstandi facultate Religiosis aliis viris concessa, in ipsorum pene potestatem totum migrasse videtur, solis pueris, aniculis, inopibus, & egenis necessitate potius quam voluntate confluentibus ad Rectores.

VI. Jus etiam Parochorum illud, quod sacramenta amplectitur, ipsorumque tantummodo Parochorum erat ex Juris Canonici sanctione XIII. q. 11. cap. *Placuit*, unam si solemnem Baptismi, & Extremæ Unctionis celebrationem excipias, jam pridem ad eosdem transiit, & juris esse communis coepit, quod peculiaris erat.

VII. Postremum quoque Parochialis jurisdictionis caput, quod inferias, funera, parentationes, & anniversaria pro defunctis respicit, & utilissimum ipsis quondam Parochis erat, laborumque præmium aliquod in eorum curandis animis exan-

tlatorum, proprium Parochorum erat. Verum enim vero labentibus annis ad eorundem Religiosorum scopulum ista quoque Paroecialis juris navicula appulit, sex illis ventis prioribus agitata, ibique naufragium deplorandum fecit, re omni submersa, verius ab hiantis absorta Syrtis vorticibus, vel Carybdis.

Ex his factum arbitror satis propositæ quæstioni, satisque fiet magis ac magis, si jura non antiqua modo, quæ recensuimus, sed nova quoque à sancto Carolo tum in Conciliis Provincialibus, tum in suis Pastoralibus literis ea de re pie & accurate conscriptis exposita, & in Actorum Ecclesiæ Mediolanensis Volumen, unum veluti in corpus, relata, nec non & privilegia ipsa Mendicantium Religiosorum amplissima perpendantur. In Conciliis enim illis & literis Parochi, Rectores, Moderatores, primarii sacrorum dispensatores, ac ministri proprii, item Paroecianorum Sacerdotes, & Pastores apertissime nominantur: in privilegiis vero Mendicantium Religiosorum Parochialis quidem muneris partes conceduntur iisdem, sed uti Parochorum adjutoribus, suffraganeis, ministris, mercenariis, delegatis, in partem demum Parochialium ipsorum onerum accersitis. Quamobrem, ut tandem aliquando quæsito satisfaciamus, Summorum Pontificum decreta Parochorum ergo edita habere robur suum, affirmare possumus, quæ Parochi sacrorum ordinarii & principales sunt dispensatores, ut diximus, Religiosi vero delegati & adjutores tantum. Unde licet utrorumque par pro modo administratio videatur, non tamen jurisdictio ordinaria, quæ penes Parochos incommunicata adhuc perseverat, & de hac loquuntur laudata Pontificum decreta, tum antiqua, tum nova.

Cæterum gloriosum sit, ut ait Bernardus, esse coadjutorem Dei, onus tamen istud Paroeciale angelicis ipsis sit humeris, ut idem asserit, formidandum, æquiori animo ferendum est, alios Parochis ipsis fortiores ac validiores viros majorem sibi hujusce oneris partem quandoque assumere: quin etiam atque etiam exoptandum, votis etiam ac precibus contendendum, ut assumerent crebrius, modo id charitatis ardore succensi facerent, non emolumenti dulcedine deliniti, ac non etiam jure improbo usurparent. In eorum enim fide & religione gravissimo procurationis æternæ onere deposito, paulisper respirare quoque Parochis liceret, recuperatisque viribus alacrius demandata sibi in Provincia desudare. Verum enim vero res omnino aliter se nunc habet, itaque se habere liquido comperiemus, si quæ nunc testamenta Paroeciis minus utilia conduntur, solemniore etiam exequiæ magna ex parte in privata sacra, quorundam artificio propriis omnia commodis metientium, commutata, reputabuntur animo diligenter. Quin imo cum id unum quarundam Sodalitatum Confratres aggressi cuniculis essent, ne res nostræ in pejus ruerent, sibi iis opportune admodum occurrendum censuerunt sapientissimi Provinciae Mediolanensis Antistites in *Conc. vii. excommunicationis latæ sententiæ poena*, cum ipsis quodammodo oculis usurparent Paroecialia jura, laxissimis Regularium privilegiis, plus æquo imminui, profligari, perdi. Misera conditio Parochorum, quibus solum pene nomen est reliquum, aut si quid aliud, cura tantum, & labor, onus, inquam, solum honoris olim amplissimi loco. Licet enim huic malo vigilantiores quique Mediolanensis Ecclesiæ Præfules obviam ire præ viribus conati sint, nihil tamen sive decretis generalibus Conciliorum, sive privatis & publicis Synodorum assequi potuerunt, nimis aucta Regularium illorum potentia, ita ut Paroecialis juris restitutio suum in primævum locum sit à nobis in posterum desperanda. Perpenderent hoc

saltem attentissime, qui deberent, scirentque nostro è lapsu suum quoque pendere exitium & ruinam. Sed alio querelas istas, justas licet ac debitas, amandemus, nostræque Parœciæ fines, quod nostri est instituti, potius exponamus.

Erat hic mihi in animo, antequam Parœciam suis terminis circumscriberem, Breviarium adscribere decisionum, tum earum, quæ in Juris corpore, tum earum, quæ apud auctores typis excusos sparsim positæ continentur, de controversiis ad dicta septem juris Parœcialis capita spectantibus, ut Parochos, in quorum gratiam hæc scribimus, levaremus, tum sumptibus, tum labore perquirendi, emendi, legendique tot ac tantos hujus argumenti scriptores. Verum quia huic nostro desiderio cumulate satisfactum esse accepimus à Hieronymo Carrato Mediolanensis Diœcesis Parocho, meique studiosissimo, satius esse duxi à me de hac ipsa re collecta Amico tradere, quam actum agere, & chartas inanis atramenti illinire. Ad hujus igitur Scriptoris non contemnendi librum, qui lucem propediem adspiciet, Lectorem ea discendi cupidum remittimus non inviti. Ac eo libentius intermissum est à me jam cœptum opus de jure Parœciali, quo studiosius alios quoque graves Viros hoc idem argumentum ad frequentes in primis funerum causas componendas nunc pertractare audio. Satis enim superque nobis est desiderium hoc nostrum Parochorum commodis inserviendi perpetuo; illis ipsis & posteris, hac veluti syngrapha, paucis indicasse, satis illis superque facturi, nisi nos prudentissimi & gravissimi jam laudati Viri levassent onere ac labore; quamvis non toto & omni, cum & ipsi communi commodo aliqua saltem ex parte inserviverimus, materiam à nobis jam comparatam eisdem subministrando.

Collegium ipsum Taegiorum, quod & S. Simonis dicunt, nobilium adolescentum hospitium, in quo scilicet probis ad honestatem moribus, & politionibus ad humanitatem literis imbuuntur, ad lævum ad nos ab ortu venientium latus per nobilem S. Simonis viam primus Parœciæ nostræ limes est: ad dexteram autem in eadem via Balborum nobilium domus è regione modo laudati Collegii sita.

Quam, dum hæc scribimus, incolit clarissimus Heros Hippolytus Bondelmontius Florentinus, Magni Ducis Hetruriæ legatum apud Mediolani Proregem agens, Vir morum suavissimorum cando- re omnibus æque charus ac gratus; prudentia vero, usuque multarum & magnarum rerum nemini secundus, munificentia ac magnificentia vere maximus; vitæ demum integritate ac in Deum pietate tanta,

*Illius ut si quis conetur dicere laudes,
Is dare Phœbeis lumen amet radiis.*

Eandem D. Simonis viam terentibus duæ hinc inde Domus aliæ sese intuendas offerunt, non minus mole sua celebres, quam incolarum nobilissimorum fama virtutis illustres. Illustratur una scilicet clarissimæ Senatoriæ dignitatis face Ludovico Vignate pulcherrimo Laudensis nobilitatis flore, quem Romana Curia Advocatum præstantissimum ante suspexit, quam in Senatorum Mediolanensium Ordinem cooptaretur, cælique nostri speciem suo lumine collustraret. Quamquam non ob id virtutes ejus, ac merita nitentes in Urbe Romana radios spargere desiere, dignus, qui eidem ornameto & præsidio sit in illustriori loco positus, sacræ scilicet Episcopalis, aut Cardinalitæ dignitatis fastigio propositus omnibus ad imitandum. Utinam eorum albo inscriptus sit, quos Sanctissimus Pontifex Urbanus VIII. cui eximia ejus merita ac virtutes perspecta plane sunt, atque cognita, proxime renuntiaturus est Purpuratos, Ducesque Christianæ militiæ sanctioris,

*Nestoream donent illi pia Numina vitam,
Quo late meritis sospite crescat honos.*

Ad alteram venio, quam Eques insignis nobilitat Carolus Arconatus, ejus familiæ germen, prolesque certissima, quæ splendoris sui fama Mediolanensium finibus non contenta proximas urbes & nationes, totumque ferme terrarum Orbem, brevi complevit. Tot enim Heroas una protulit, quot Viros in lucem extulit, omnes omni laude majores, quorum in numero principem sibi locum nostra memoria vindicavit Franciscus Eques B. Virg. Annuntiata, Legationibus sane multis apud ple- rosque Europæ Principes summa cum dignitate semper obitis longe clarissimus; atqui non celebrandus minus Eruditorum linguis ac litteris, quod rebus aliis quamplurimis præclare gestis, bonorum publico, tum privato virtutum suarum gloriæ latissime propagarit. Redonarent hunc utinam terris sydera, quibus invida rapuere, patronum enim mihi longe charissimum redonarent. Sed aliò ab hoc æstu pertrahor, ne laudum tanti Viri campum latissime patentem ingressus finem dicendi nullum inveniam. Nullius enim tanta dicendi vis, aut ubertas orationis existit, quæ vel minimam earum partem attingere, ne dicam exornare, se posse confidat. Missas itaque eas faciam non invitus, eoque libentius, quod virtutes ejus æque fulgeant in J. Consultorum integerrimo Joanne Baptista fratre, per omnium fere Patriæ suæ dignitatum gradus jampridem ad immortalitatem evecto, Judiciorum scilicet tribunalibus primariis caste semper & integre assedit; Vicarium Provisionis pro dignitate & boni publici ratione semper habita, suisque commodis prælata, egit; Justitiam Capitaneus administravit spectato solius Justitiæ candore; nunc vero Quæstoris Ordinarii Magistratus partes ita sustinet, ut omnibus admirationi sit, ob eamque causam dignus habitus, qui non semel Regum maximo Philippo IV. proponeretur in comitiis Senatorum Mediolanensium, ut ad ejus honoris apicem eveheretur, ad quem ac serius ocus (si quid ex maximis ejus in Rempublicam meritis, & præstantibus virtutibus veri divinat animus) sine ullo dubio evehatur. Egregie adeo publica munia omnia sustinuit semper, & sustinet, ut omnibus se honoribus dignum præstet, veramque ac redvivam imaginem repræsentet Francisci Aurati Equitis Annuntiata, cui nullus esse par honor poterat, nulla satis digna laus fingi, omni honore, omni humana laude majori.

Inde sese recta Parœcia nostra porrigit per Fabiorum, sive Fabrorum Vicum usque ad sancti Christophori ædem, & Zanchorum domum, quam *Dorsum* nominant, ubi postremis limitibus, quasi cancellis inclusa, consistit ulterius non excurrens.

Hos inter limites major Parœciæ nostræ longitudo ad quatuor mille septingentos passus effunditur, ac fortassis etiam plures. Mensura autem passus, qua hic utimur, est ejusdem longitudinis cum brachio Mediolanensi unciarum 12. Ab Urbis quoque mœnibus cum recedit, plurimum latitudinis habet, à navigabilibus ipsis aquis ultra Olonam fluvium se protendens, triginta tres casas, seu rusticana tuguria, complexa, in quibus Communionis, ut ajunt, animæ bis centum degunt. E contra cum propius ad interiorum Urbis partem accedit, spatium perangustum habet; sed accolarum tantum, ut adulti sacrorumque mysteriorum participes plusquam mille sint, exceptis infantibus, pueris, & puellis. Sex aliis hæc una Parœciis cingitur: quaque Orientem spectat præstantiorem Parœciæ sancti Laurentii Majoris partem attingit. In via quidem sancti Simonis Collegio Taegiorum ad lævum latus, ad dexteram autem ipsa Balborum



SECUNDA TABULA ICHNOGRAPHICA

Partem Urbanam Paroeciae D. Vincentii in Prato Portae Ticinensis Mediolani
puncti simplices in medium lineae continuati terminant, ab alijsq; adiacentibus
Paroecijs, ad complementum angustae Tabulae applicatis, discriminant.
Decursum Vetus antiquum indicant puncti duplices a litera A. ad B. produci: a
B. vero ad C. eiusdem cursum sub fornice nunc latentem: a C. autem per
Vetustos patentem, et apertum usque ad Navigeram Urbis fossam.
Solum cui aedificia superposita sunt tenuiorum linearum adumbratione signatur.



Scala brachiorum 300 Legnaminis Medial.
D. Stoppendaal Fecit.

P. vander Aa, Exc. Supt. Batav. cum Privilegio.

borum domo : in Vetræ vero , seu Viperæ vico , cum ex parte domo , quæ quondam Claræ Petrasanctæ , seu mariti ejusdem Hieronymi à Basilica Petri erat , nunc est Pauli Nicolai Cafati , viri tam frugi , quam ditis , ac inter primarios nostræ Parœciæ viros merito numerandi , secuta ejus alienatione permissu Commendatarii nostri : ex altera vero domo Fontanæ familiæ , quæ modo in ditionem venit Ludovici Cittadini , pietate , multarumque aliarum virtutum splendore conspicui & illustris viri.

Est & via , quam *Terratium* dicunt , in eaque à janua , quæ à tergo est domus supra modo laudati Viri , inchoat Parœcia nostra , & ad oppositam eidem domum Softram Vanzaghellam dictam definit ad postremas metas.

Alterâ Parœciæ nostræ pars , quæ ad Septentrionem vergit , uno ex capite cum viridario Monialium S. Bernardini : ex altero cum perillustrium Fratrum Vicecomitum , Comitum , & Feudatiorum , magnæ soboles Magni Coriolani , domo jungitur , quæ est Parœciæ S. Petri in Caminadella , hærente grandiori & potentiori æde , quæ templum S. Catherinæ ex adverso respicit , & adhuc Monasterium appellatur , quod olim ibi sub institutis religiosæ disciplinæ degerint Virgines illæ , quæ postea ad sanctam Catherinam ad Rotam , amplioris Monasterii gratia , sunt translatae . Ejus nunc dominus est Joannes à Furno ferici filii infector , ex Liguria oriundus , nulli sua in arte ex multis nostræ Parœciæ infectoribus ingenio , industria , rei familiaris augendæ solertia , judicio meo secundus . Ea domorum hujuscemodi , quæ diversarum Parœciarum sunt , affinitas in causâ fuit , ut inter S. Petri in Caminadella Parœciam , & Vincentianam nostram summa semper ac reciproca quædam , Parochialibus in muniis obeundis , suffragatio intercesserit , ac deficiente unius Parocho , Rector alterius vices ejus obeat cumulate . Separantur hæc porro Parœciæ duæ , extra dextrum Portæ Fabiorum latus , ab ipsomet Navali fluvio ad Conchettam Hospitalis D. Ambrosii : quemadmodum idemet in Urbem fluvius recto ad lævam alveo irrumpens ab ostio , quod Tombonem dicunt , Parœciam nostram ab ea , quæ S. Laurentii est in extrema fere ejusdem regione , sejungit .

Ubi in labro navigabilis rivi eo loci , quo vestigal exigitur , & Concha vocitatur , in pergrandi siliaceo saxo incisa sequens Inscriptio visitur , quam hic ut in loco proprio apponendam censuimus :

**MATILIO SABINO
CONIVGI**

**L. AEBVTIO CARPO
AEBVTIAE CRISPÆ**

**ACILIAE HELIADI SODALI
NOVELLIO DECVMO
HILINO EROTI T. F. I.**

**Q. NOVELLIUS DECVMVS
GN. VIRGINIVS AQVILO
L. AEBVTIVS CARPVS**

PRO EA PARTE QVA HEREDES SVNT

F

C

A Caterum si ab eodem illo ostio linea recta ducatur usque ad Francisci Magantiæ , nobilis æque ac elegantis viri , domum , Mariolam dictam , domum , inquam , primam Parœciæ nostræ , qua se ad Meridiem vertit , ibique rectum in angulum detorta , obliquo mox ulterius aliquanto tramite protrahatur Moniales Capucias versus , ubi numerosa Cacciabullæ coloni familia degit , ripas ejusdem fluvii statim attinget . Huc autem secundum earum riparum marginem à dorso Zanchæ familiæ domo perpetuo decurrentes Navilii aquæ Parœciam nostram à Parœciis primum S. Gotardi , deinde S. Nazarii Baronæ dividunt , qua Meridiem spectat . Qua tandem solem occidentem videt , ab eo dorso nostræ Parœciæ fine ducto circuitu , ea cum Parœcia , quæ S. Petri in Sala dicitur , se conjungit , donec perveniat ad ferri malleatorum moletrinam , quæ clausa mœnibus civitatis ab hac extrema parte limes ejus est . Ac licet ibi porta nulla sit , per quam extra Urbem aditus pateat , Parocho Vincentiano tamen per portatiles scalas ad id exstructas , semper patuit , in obeundis muniis omnibus , quæ ad curam animarum spectant . Quod si hinc recto tramite progrediamur ad Conchettam Hospitalis S. Ambrosii , primo nobis occurret vasta quædam Antonii Raynoldi Viri clarissimi vinea ; mox Antonii Sormani viridarium , cui satis opportuna humanis usibus domus adjacet , quemadmodum & Raynoldi vineæ palatium ingens , sed imperfectum ; postremo hortus vitibus , arboribusque variis confusus , quo nunc Grimaldi Paulus Camillus pater & filii potiuntur , hisque nostra Parœcia limitibus clauditur in hac occidentali parte contermina S. Martini Parœciæ , quem ad Corpus vocant . Hi sunt ipsissimi nostræ Parœciæ fines , eaque verisimilis mensura longitudinis & latitudinis eorundem . Quod si circuitus universi spatium metiri quis per otium velit , octo centum quinquaginta supra decem milia passuum erit , ut ex Tabula tertia geographica ad calcem Operis apponenda ad amussim patebit .

D Ex quo colligi facillime potest quam sit hujus Parœciæ provincia difficilis , ardua , laboriosa , quamque dignus sit ejus operarius mercede sua , quæ tamen si , qui foris vitam ægre trahunt , terræ cultores spectes , perexigua est ; si qui vicum Fabiorum incolunt , minima , & aliquando etiam nulla , propter eorundem inopiam & egestatem , nostris plerumque opibus & eleemosynis sublevandam : si qui in civitate sunt ob diversitatem status , diversa pariter , & incerta . Hæc enim tria Rusticorum , Burghesiorum , & Civium genera Parœcia nostra complectitur . Primi generis & secundi homines Templum & Parochum suum frequentes in vita adeunt , eodemque mortui deferuntur : at tertii cum incolumes sunt , rari apparent , cum defuncti , nulli : eo quod apud Monasteria Regularium in primis recentum se humandos mandant , nescio quibus eorundem lenociniis irretiti contra vetus Ecclesiæ Catholicæ institutum , quo Parochianorum corpora suis in Parœciis mandabantur humo , non tam , ut Parochi suis eos precibus & solemnibus officiis prosequi commodius possent , quam ut affines ipsi in ejusdem Parœciæ templis preces pro se suisque Deo Optimo Maximo fundere consueti , defunctorum suorum manibus quietem precarentur æternam , & sempiternam pacem . Sed hæc , quæ delicatas aliquorum aures fortean mordeant , etiam omittamus , ut universum Vincentianæ Parœciæ spatium non tam ipsis legentium mentibus , quam oculis intuendum subjiciamus in jam promissa Tabella , quam diligenter admodum & ad fidem nostræ historiæ accomodate mihi confecit mei studiosissimus Architectus Joannes Angelus Cribellus , cui me eam ob causam debere plurimum non ignoro . Nam & in ea Basilicæ Vincen-

tiane

tianæ Ichnographiam, & varium Vetrae cursum antiquum, & novum cum aliis multis, videre erit in Tabula secunda Ichnographica Parœciæ Vincetianæ ad finem libri posita, id quod lucem non exigam afferet *Fasciculo* secundo, & septimo.

Monet me nunc ipsa nobilitas ejusdem Parœciæ, ut de ea aliqua differamus. Fulget enim hæc ipso met nobilissimo & antiquo D. Vincentii Templo, & multo magis trium SS. Martyrum, Quirini, Nicomedis, & Abundii, aliorumque Reliquiis, quibus Templum ipsum abundat, ut loco suo ostendimus, & aliis quamplurimis præstat. Quatuor hæc ipsa sacris ædibus intra fines suos conditis, sanctorum scilicet Christophori, Caloceri, Catherinæ, & insigniter per omnium ora vulgati Hospitalis Amentium juxta nos positi, mirum in modum illustratur. Quibus in ædibus Parochianorum commodo, defunctorum suffragio, publicæ utilitati ad Dei Opt. Maximi gloriam quovis non festo die decies, festo vero duodecies, res sacra de more fieri consuevit.

Ac numerus quidem Missarum, quas obiri solere diximus, sic accipiendus est, ut is eas Missas tantummodo comprehendat, quæ olim obiri consueverant, sive ut legatis defunctorum, sive ut sacerdotiorum oneribus rite & ordine fieret satis: nam quæ extra ordinem, ita poscentibus Piorum elemosynis, in dies ob eam rem datis, ut res sacra quotidie fiat, eæ recensitum aliarum numerum excedere jam inde ab anno MDCXVII. quam longissime cœpere, ita prorsus, ut sacerdos quilibet paratam sibi stipem adventitiam semper habeat, si rei divinæ quotidie voluerit operari, ut in II. *Florilegii* nostri Parte, sectione II. Deo favente commodius & uberius ostendemus, stylo ad vernaculum propius accedente, ne quæ tum dicuntur rudes ac ignaros Latinæ linguæ latere possint, quorum tum in gratiam differemus. Accedunt his Oratoria duo publica, quorum unum in medio fere Fabrorum Vico visitur eo in loco, ubi prius sola Crux picta, nunc autem pia Dionysii Masperi orationis Vespertinæ præfæcti opera Christi cruci affixi, aliæque sacræ imagines divinis ad pietatem facibus mentes accendunt: alterum intra Portam ipsam Fabiam in trivio, ubi lapidea columna Thufci Ordinis, cujus in epistylis aurata Crux, quæ fere quattuordecim ab hinc annis statis de more precibus à me Parocho benedicta, debita veneratione coli cœpit, adhucque concursu colitur non vulgari. Solet enim ad hanc strata vicinia sub occasum solis litanias ac alias hujuscemodi sacras preces exsolvere, indeque singulis sextis feriis Metropolitanam Basilicam cruce præeunte adire ad audienda de superiore loco passionis Dominicæ Sacramenta. Ibi siquidem sanctissimæ Crucis Sodalitas instituta est, quemadmodum & ad alias Cruces in Urbis & suburbiorum triviis positas, quæ esse octo & triginta numero perhibentur, quibus singulis cum certum Redemptionis nostræ mysterium assignatum sit, nostræ quod obtigit, Descensum Christi Domini ex Pilati scalis exhibet intuentum. Cæterum in iis omnibus, quæ esui, potui, cultui corporis, neque tam ad vivendum, quam laute & opipare vivendum homini necessaria censerent, fingi, vel excogitari possunt, Parœcia nostra nemini alteri concedit. In ipsis enim propemodum ædibus nostris ob ubertatem soli triticum optimum, variaque leguminum genera producit, vitium inibi copia, lectissima vina, & æstivo maxime tempore gustui gratissima, satis superque suppeditat; frugiferarum eadem arborum multitudine felix est, & pinguibus glebis ad olera, reliquasque cujuscunque generis sativas herbas copiose gignendas mirum in modum opportuna. Nascuntur in ejusdem qua fontium, qua fluminum perennitatibus suavissimi pisces. Ab Urbe

etiam cum recedit loca sylvis opaca, collibus molliter acclivibus aprica, declivia vallibus, latioribus camporum intervallis distincta, gratissimo oculis spectaculo repræsentat, in quibus feræ cujuscunque generis & volucrum omnium varietas non ingrata.

Jam intra ejusdem ambitum interiorem quæcunque ad corporis cultum spectant variarum artium opifices abunde suppeditant, scilicet in ea frequentes degunt fullones, infectores, textores eorum numero maxime, qui serica licia necunt, ex quo fit, ut sericis pannis, holosericis, & subsericis magis quam aliis levioris materiæ, minorisque pretii vestibus abundet Parœcia nostra. Illuduntur hic etiam serica tenuiora velamina auro & argento, ut inquit Julius Solinus, in usum publicum damno severitatis admittit, & quo sua potius ostentare corpora, quam vestire primo fœminis, nunc etiam viris persuasit luxuriæ libido, quæ jam omnes modestiæ terminos longe lateque est transgressa. Nec absunt hinc fœminæ, quæ linum, bombatium, seu gossipium, & sericum, lanamque neant, ac carminant.

Sed unica in primis in nostro Fabiorum viget ars illa, quæ sub auri malleatorum nomen generale venit, licet magis proprie Bractearia nuncupari posset. Quamobrem hic à nobis ejusdem ratio pluribus explicanda videtur, eoque libentius, quod eam ante nos nullus vel leviter adumbravit. Initio magna vis argenti, molis ad instar funditur, quæ mox certam in formam redigitur, post extrinsecus uno tantum in latere auro levissime obtegatur, dein argento igne pluries emollito magnis id ipsum malleis tunditur, post in miræ tenuitatis laminam, seu bracteam in ligneo canali substrato distenditur, quæ demum æreis quibusdam involucris obtegeta, tam diu latioribus percussis malleis cuditur, donec ad perfectam latitudinem, tenuitatem, ac subtilitatem pervenerit, idque fabri principis judicio, qui solus manum extremam operi imponit. Hujusce vero auri mercatores, qui subministratis auro, argento, cæterisque opificum sumptibus, has tenuissimas laminas auro obductas cudendas mandant, ubi sic cusæ fuerint, recte complicatas mulieribus tradunt, à quibus primo longis forficibus tenuissima secantur in fila, mox sericis staminibus protensis in longum, annuloque suspensis, eadem non levi pollice, sed dextera tota vola cum ipsomet auro decore superinducto torquent, donec fila ipsa aurea esse penitus videantur. Hujusmodi auri commutatio cum mercibus gentium aliarum, Mediolanenses cum nationibus exteris omnibus copulavit, ac fecit, ut quidquid ubique terrarum esset, ad eodum etiam perveniret, ob nimiam una merce commutata comparandæ uniuscujuscunque alterius rei procul à se positæ facilitatem inde profectam. Fœminarum vero aurum hujusmodi nentium greges habet Parœcia nostra. Cæterum si quæ auri frustula, vel segmenta hisce fœminis, Mercatoribus, aut etiam Bracteariis ipsis supersunt, Partitoribus quibusdam industriis dantur eam ob causam, ut aurum, quod argento permixtum habent, ab eodem purum putum facillime sejungatur. Sed enim Partitorum hujuscemodi mira Mediolani paucitas est, duoque in ejus latissimo ambitu tantummodo reperiuntur, quorum alter in nostra Parœcia degit, eratque unus tantum initio, cui ob id satis ampla res familiaris erat, non aliam ob causam postmodum imminuta, quam quod ejus alumnus quidam artem eandem probe callens ad Imperatoris turrim alteram ejuscemodi officinam, vel Ustrinam potius, quod in ea præcipua metallorum genera candescant, & ad partitionem flammis ardentibus adurantur, in eadem Ticinensi Porta aperuerit cum ingenti lucro. Ideo nec ab incepta horum artificum narratione fuerit alienum, artis eorum

rundem prosequi rationes omnes, cum una tot ac tantis aliis artibus solent inservire.

Partitores igitur primo segmina illa auri, vel fragmenta fundunt, & in massam redigunt, quæ mox iudicio eorum, qui auri bonitatem explorant, subtiliori trutina perpenditur, ut quantum admixtum habeant auri, vel argenti ea, qui ad se detulerint, sciant. Eo facto periculo, certioribusque redditis singulis de suo auri pondere, vel argenti, plurium massas una cogunt, & fornaculæ orbiculari fundi paulisper concavi, & marginis per circuitum leviter deficientis immittunt, ut igne supposito liquefiant. Eiusdem fornaculæ labra, summa in parte concava, uno ab latere apertius patent, ut inde viliora metalla quælibet æs, stannum, plumbum facilius educantur: id quod paulatim fit adunco & oblongo ferro metallis iis omnibus supernatantibus, auro vero metallorum omnium gravissimo cum ipsomet argento, cui mixtum est, in imo fundo formulæ subsidente. Quod si forte fortuna contingat, ut leviora metalla illa (quod interdum accidit) ignis calore deficiente, aut scorix expurgandæ gratia aliquando descendant, ita ut ex orificio fornaculæ nullo modo fluant, tum eidem plumbi tantum infunditur, quantum ad illa, quodam quasi vehiculo, educenda sufficiat, succrescente materia sensim aliquid è summo illo orificio ferro illò iterum abradendo, quo metalli gravioris descensus faciliior & expeditior sit. Superadduntur interdum aliquot aluminis facis particulæ, quæ aurum purgare & in absolutissimum nitorem redigere perhibentur. Apparente mox argento in ipsa fornaculæ concavitate à vilioribus metallis aliis sejuncto prorsus, ac puro (quod tum aperte liquet, cum metalla alia ad instar olei in ipsamet argenti superficie fluitare amplius non videantur) subtrahitur fornaculæ ignis, ut in massam argentum iterum coalescat, dure scatque citius, cujus ergo aqua quoque tepida perfundi solet. Ad hæc, argenti sic purgati massa liquatur iterum, mox cochleari magno accepto in aquam ferventem effunditur, eaque ratione in particulas granorum instar distinguitur, & separatur. Ea porro grana in olla grandiori (*Bozzam* ipsi Partitores vocant) rite locantur, quibus aquæ fortis mensura ex alumine & nitro confata suffunditur cum lento igne, eadem ut grana aqueum in humorem solvat, auro in ollæ fundo, rubenti terræ simillimo, residente. Aqueus hinc ille humor ubi refrixerit, & in ollam aliam haud dissimilem transfusus, iterum admovetur igni, clauso orificio ollæ vitreo quodam operculo, oblongam fistulam porrigente in ollam alteram sibi similem, receptaculum dictam alio simili operculo clausam, ad ejusdemque formæ vas tertium paricum fistula pertingentem. Ita fit ut exsicceetur argentum ab eodem, aqua illa forti educta per sublimationem (ut cum Partitoribus ipsis loquamur) distillatoriam ab ignis fervore profectam, fractoque vase, argentum cum gypso, aut calce de candore certans, ejus in fundo cernatur. Hinc ferreo in vase, quod iidem Partitores *Crofolum* vocant, sicut & aurum ipsum solvitur, cum hoc uno discrimine, quod argentum in grana, ut supra exposuimus, extracto prius supernatante nitro, distinguitur; aurum autem in virgas oblongas effingitur & efformatur. Rebus tandem omnibus his peractis, Partitores unicuique mercatori, aliisve, à quibus segmina illa auri, vel argenti acceperint, portionem suam, juxta bonitatem & pondus, deducta laborum mercede & expensis, reddunt.

Metalla vero alia viliora, mixtim ex illa fornaculæ superiore extracta, liquantur in alia peculiari

fornace manicæ brachii recurvi persimili, ac inter se, educta aliqua ex parte terrestriori materia, fercernuntur, quæ pars terrestrior una cum reliqua scoria metallorum, purgamentisque aliis, quæ ex officinis aurificum efferuntur, dantur viris quibusdam terræ lavatoribus appellatis, quorum ingens etiam numerus est in vicinia nostra, ut eadem faxeam in pilam immittant certa argenti vivi quantitate prius admixta, pluries lavent, ac subtilissime molant, donec admixti argenti vivi beneficio conglobetur in pilæ fundo quicquid argenti, vel auri cum illis purgamentis terrestribus compertum fuerit adhæsisse. Hæc humana adinvenire industria potuit, ne minimum quid auri, vel argenti, tanto studio ab inexplebili mortaliū cupiditate, ne execrabili avaritia dicam, suam ad perniciem, ex ipsis effossi terræ visceribus, interiret. Sed hæc domi nostræ nata quodammodo relinquamus, veniamus ad alia, quæ nostram Parœciam ditant; scilicet per hanc maxime nostram in Urbem invehuntur fere commeatus omnes, cæteraque humanis usibus accommodata, tum ex vicinis regionibus Verbani lacus, ac fluminum Ticini & Padi; tum ex remotis Provinciis, non quidem itinere terrestri, magis autem Pado ipso ab Adriatico mari ad nos usque deducta, quæ longum nimis esset singula percernere. Hinc late dictum illud manavit in vulgus; *cum, qui commeatum per hanc Parœciam Mediolanum invehit solitum interceptisset, universam Urbem non tam rerum omnium copia privaturum, quam obsidione famis gravissima oppressurum.*

Somnia porro sunt, & rabularum nugæ, quæ de aere nostræ Parœciæ insalubri vulgo circumferuntur ob aquas illic stagnantes, crassiores fontium scaturigines, & puteos parum altos, ideoque æstatis tempore, sæviente Syrio, parum admodum frigescentes: multa enim sunt, quæ natura sua salubrem esse nostræ Parœciæ situm cœlumque ejus clemens ac temperatum arguant non obscure. Indigenarum primò vita satis diuturna ad ipsam usque canitiem, & effœtæ senectutis metas. Funera paucorum, quæ aliis in minoribus Parœciis crebiora. Accolarum demum natura appetentium crassiores cibum, coloris non mali, vegetis sensibus, hilari animo, robusto corpore præditorum. Quibus argumentis aeris ubique temperies ostenditur & probatur.

Hos mihi è Vincentiano PRATO flores præcipue legere hac tempestate visum, adnascentes Basilicæ ipsi, locum inter sacras Aedes reliquas nostræ Parœciæ principem obtinenti: eosdemque octo in FASCICVLOS dispertitos, ac in priori FLORILEGII sectione uno veluti in calathò collocatos benevoli Lectoris naribus admove, ea spe ducti, fore ut ipsorum sive pulchritudine, sive odore perculsi antiquitatum studiosi, laborem qualemcunque nostrum approbent & commendent.

Secundæ sectioni FLORILEGII PRATI nostri nunc accedet eadem manus lectura raptim (non tantum enim otii in hac secunda sectione habemus, quantum in prima ad commodè scribendum nobis contigit) alios flores, quos in Parœcia Vincentiana aedes Divo Christophoro sacra produxit, ut in peculiarem ac simplicem Fasciculum, recisis digressionum frondibus plus nimio inolefcentibus, & insuavibus deductionum Juris, ac Peritorum foliis luxuriantibus amputatis, disponam; ac rudi, paupereque in fiscella, uti agrestes, & extra urbem procreatos, colloce, sua fortassis rusticitate Lectorem recreaturos.

JO. ANT. CASTELLIONAEI
 FLORILEGIUM
 ANTIQVITATVM
 PAROECIAE
 D. VINCENTII IN PRATO.

SECTIO II.

FASCIC. IX.

Delubrum S. Christophori ubi, quando, & à quibus conditum, ordine quasitum. In angustiore formam ex voto à Civibus Mediolanensibus redactum. Qua causa sint dies duo festi apud Mediolanenses in honorem S. Christophori, & in eis civium concursus ad Templum, ubi Sancti Reliquia, & imagines plures. Quadam de ejusdem Sancti die festo, & Templo apud Laudenses, in quo serpentis spina posita. Imago S. Christophori qua de causa in suburbiis, viis publicis, & extra Tempia frequenter picta. Sub titulo D. Christophori Hospitalis domus primum, deinde societas ex nobilibus praecipue viris instituta. Quantitas reddituum ejus societatis examinata. Ius Abbatiae, & Parochi D. Vincentii decreto Archiepiscopalis Vicarii confirmatum in aede S. Christophori, & ejusdem Aedis forma explicata.



AM extra Urbem spatium licebit, si ad D. Christophori Delubrum pergere velimus, ut ex nostro instituto res ejus veteres ac recentes scrutari & explicare possimus. Juxta profluentem navigabilium aquarum Ticinensi porta egredientibus ad dextram positum est hoc Delubrum, intra fines nostrae Paroeciae ad tertium ejusdem profluentis trajectionis pontem. Domus hinc inde adjacent, habitatoresque frequentes visuntur. Esse antiquum, & structura, & pictura ostendunt. At stemmata & gentilitia Vicecomitum Mediolani Ducum insignia, Reipublicae item Mediolanensis, ac Praefulis nostri Cœnobii Vincentiani rem apertius declarant, omnem quoque ambiguitatem de medio clarius tollunt literae quaedam prominentes in marmore Pario in aedis hujus fastigio inscriptae. Duæ nunc sacrae ædis cernuntur copulatae atque connexae, quarum altera, quæ Aquilonem spectat, antiquior apparet, dictaque est D. Christophoro, ut cum ejus Sancti imagines, tum ara major liquido ostendunt: altera vero, quæ ad Meridiem vergit, vicinioremque habet rivum navigabilem sub B. Virginis numine & quatuor aliorum Sanctorum, videtur condita, & ex pictis Matris Dei imaginibus, & iconica ejusdem statua aræ primariae superposita. Hæc recentior cognoscitur ex marmorea tabula supra januam ejus locata, cujus insculptæ sunt à dextro latere victa Vicecomitum gentis singulare insigne, à sinistro crux alba rubro in scuto Reipublicae Mediolanensis peculiare signum; & Viperæ quidem adscri-

Cpti sunt hi duo characteres G. & M. denotantes (ut credere par est) hanc ædem conditam anno Joannis Mariae, filii Jo. Galeatii, fere quarto post acceptum patris imperium, vel certe paulo post. Cujus rei non solum illarum duarum literarum conjecturam, sed & testes locupletissimos habemus literas quaedam Ducales ad Vicarium generalem Curiae Archiepiscopalis Mediolani, & ejusdem ad eas responsionem, quarum exemplar in testimonium, depromptum hinc inde, subjiciemus. Dux Mediolani, &c. Venerabilis Doctor nobis dilecte; Intelleximus Illustrissimum q. D. Ducem Philippum Proavum nostrum edificari jussisse Ecclesiam sancti Christophori extra muros istius inclita Urbis nostra ob devotionem & cultum, quem erga eum sanctum gerebat, eamque in Capellam erigi facere instituisse, in qua quotidie celebraretur, & ad eam rem conficiendam ex eleemosynis ejus bona quaedam coempta fuisse, sed morte praeventum peragere non potuisse, quod animo destinaverat: Bona vero dicta Ecclesia relicta, & compartita ex eleemosynis Excellentiae suae, à Laicis quibusdam usurpari & detineri audimus, & quoniam cupimus certiore & clariorem hujus rei notitiam habere, hortamur & oneramus vos, ut opportunas & diligentes informationes sumere velitis, de his, quæ superius narrata sunt, & nobis deinde rescribere quidquid pro mera veritate competentum habueritis, & hoc facietis, quo celerius fieri potest. Papiæ die primo Augusti 1401. J. A. Antiquarius. A tergo, Venerabili Doctori Domino Vicario Archiepiscopatus Mediolani nobis dilecto.

Haecenus Ducales literæ: sequitur responsum Vicarii ad eas: Illustrissime & Excellentissime Princeps: Excellentia Vestra dignata est mihi scribere, intellexisse Illustrissimum q. DD. Ducem Philippum edificari jussisse Ecclesiam sancti Christophori extra muros Urbis hujus, eamque in Capellam erigi instituisse, in qua quotidie celebraretur, & ad eam rem conficiendam eleemosynis ejus quaedam empta, sed morte praeventum peragere non potuisse, bonaque dicta Ecclesia à quibusdam Laicis detineri, jussitque Excellentia Vestra ut diligentes informationes sumam, deindeque rescribam quid pro veritate comperuerim: habitis Excellentiae Vestrae literis, infrascriptas assumpsi informationes: Reperio namque ipsam Ecclesiam edificatam fuisse anno Domini millesimo quadringentesimo octavo per quosdam Laicos, qui supplicaverunt Illustrissimo tunc & Excellentissimo Duci, quod dignaretur ejus Excellentia concedere, ut ibidem possent congregationem Sclolarum facere, & quod possent condere inter ipsos Sclares statuta, praefatus Illustrissimus Dux scripsit Vicario provisionum Communitatis Mediolani quod super his se informaret & rescriberet. Vicarius scripsit esse concedendam licentiam scola, & Sclarium congregationem, sed quod statuta facere non possent, sed tantum ordina-

tiones inter ipsos, & ita Princeps concessit dicto anno 1408. In ipsis literis non nominatur nomen Ducis, sed quia millesimo quadringentesimo octavo data sunt suprascripta litera, arbitror quod Illustrissimus q. Dux Philippus adhuc non esset Dux. Comperio quoque ex relatione plurimorum prefatum Illustrissimum q. Ducem multas elemosynas in pecunia numerata dicta Ecclesia perstitisse, sed quod instituisse in Capellam erigi, in qua quotidie celebraretur, nec per scripturas, nec per testes constare mihi potuit: volui tamen videre libros, & scripturas, & Instrumenta ipsorum Scolarum, per quae mihi constat, quod ipsa Ecclesia habet in redditibus annuis libras ducentum viginti septem, & solidos duodecim, vel circa, Imper. quos annuos redditus acquisiverunt, ex elemosynis maxime prefati Illustrissimi Principis, & ex elemosynis etiam aliunde habitis, ac etiam ex legatis factis per alios Laicos, quos redditus expendunt pro uno Capellano, qui celebrat omni septimana quatuor missas in ipsa Ecclesia sancti Christophori, & duas in Ecclesia S. Satyri Mediolani; item alii Sacerdoti solvunt, qui longo tempore servivit dicta Ecclesia, senio confecto, faciuntque omni anno elemosynam decem modiorum panis cocti in Ecclesia sancti Michaelis ad Gallum Mediolani. Reliquum quomodo expendant Excellentia Vestra suspicari facere poterit in lista his inclusa, quam ab ipsis Scholaribus habui. Hac sunt quae pro veritate comperio, & Excellentia Vestra humiliter me commendo. Mediolani die octavo mensis Augusti 1491. Excellentissima Dominationis Vestra servulus Jo. Baptista Ferrus Vicarius Archiepiscopalis Mediolani. Illustrissimo & Excellentissimo Principi & Domino Domino meo observantissimo Domino Duci Mediolani.

Ex his duabus Epistolis facile colligitur, & hanc aedem Meridionalem magis novam, & illam Aquilonarem vetustiore; Ducemque, sub quo recens condita est, fuisse non Philippum proavum Jo. Galeatii Sfortiae, cujus iussu ac nomine haec primae conscriptae sunt ad Vicarium ante dictum literae, sed illius fratrem Jo. Mariam, qui novem annos Insulanicum, parum quidem feliciter, rexit Imperium, cui successit idem Philippus Maria, & die 25. Maji, qui est sacer D. Dionysio, publice renunciatus Mediolani Dux anno communis salutis 1412. ut recte censuit praedictus Vicarius, veram temporum vitae Ducum Mediolani supputationem fecutus. Jo. enim Galeatius Vicecomes Melegnani moritur anno 1402. eique succedit Jo. Maria ejus primogenitus, qui Imperii insulas atque Ducalia insignia accepit 29. die Octobris anni 1402. & anno 1412. die 16. Maji ob nimiam in subiectos populos saevitiam à quibusdam nobilibus conjuratis civibus occiditur, cujus successor post nonum diem declaratur à militum ducibus, publica quoque acclamatione juxta priscam Romanorum consuetudinem, pro Principe Philippus Maria salutatur. Igitur cum haec aedes ante annum 1408. jam esset constructa, ut compertum est ex supplici libello porrecto Galeatio Sfortiae Duci praedicto, quibusdam ejusdem Principis literis inserto, & ad Vicarium, ac duodecim viros nobiles publici commodi provisores datis, quas hic exscribere ad verbum placet.

Dux Mediolani, &c. à tergo nobilibus, & Sap. Locumtenenti, Vicario, & Duodecim Provisionum Communitatis nostrae Mediolani. Vitis literis vestris responsivis ad nostras super continentia supplicationis nonnullorum Civium nostrorum Mediolani requirentium inter cetera, posse quacunque bona immobilia acquirere nomine Scola Sanctorum Jo. Baptista, Christophori, Jacobi, & Christine extra Portam Ticinensem hujus nostrae Civitatis Mediolani, &c. per quas vestrum expremtes judicium scribitis videri vobis respectibus, & motivis in dictis vestris literis recitatis, ut concessio per eos requisita possendi emere bona immobilia, ut praefertur, non sit eis praeiudicium, sed quod hoc stet in dis-

A positione Juris, & statutorum, decretorum, & ordinamentorum Communis nostri Mediolani: ad factum autem confirmationis statutorum, dicta Scola quam requirunt dictis vobis videri, quod ipsa Capitula ad modum statutorum compilata, quae vobis nonnisi rationabilia videntur, pro hujusmodi Scola regulanda per nos sint affirmanda, dummodo statuta non appellentur, sed ordines inter eos facti tantummodo nuncupentur, ad hoc ut ipsi Scholares se possint convenire & eligere valeant Priorem, Consiliarios, Syndicos, Procuratores, & alia facere, quae in dictis ordinibus continentur. Respondemus quod dictum vestrum judicium utique nobis placet, volentibus ut juxta illud effectualiter exsequi faciatis, & proinde fieri litteras, & scripturas quaslibet opportunas. Dat. Mediolani die primo Martii 1408. Ubertus. Et volentes eas litteras prout ad ipsos ex debito sui officii pertinet & spectat exsequutioni mandare etiam vigore arbitrii & basilica eis virtute dictarum litterarum per prefatum Dominum concessarum ut supra, ac omni alio modo, jure, via, & forma, quibus melius potuerunt, & possunt, praedictos ordines, de quibus supra sit mentio, qui sunt in capitulis quindecim compilatos prologo eorum excluso, quorum primum incipit, In primis statuerunt, & ordinaverunt, & finitur, Penes notarium eligendum ut infra, & ultimum incipit, Item quod dictis Prior, qui taliter electus fuerit, & finitur, Ne fraus aliqua valeat committi de dictis bonis, quod tantummodo ordines, & non statuta declaraverunt, & declarant nuncupari debere, tenore praesentium approbaverunt & confirmaverunt, ac approbant & affirmant in quantum non sint contra formam ordinamentorum Communis Mediolani, vel aliqua ex eis. In margine Joannes Locumtenens subscript. Ego Ambrosius de Clericis de Lomatia Notarius Officio Provisionum Communitatis Mediolani, praedictorum ordinum confirmationi praesens fui, & in testimonium praemissorum subscripsi, &c.

Certe minime potuit haec aedes à Philippo Maria aedificari, qui nondum imperabat, sed teterrimo carcere emancipatus Papiæ ultimum infelicis fortunae casum expectabat. Remanet ergo firmum & stabile, quod, etsi hanc recentiore aedem postmodum Philippus Maria in fratris locum successus, non tam piorum hominum elemosynis, quam suis pecuniarum & reddituum largitionibus auxerit, quod in exscripto supra libello recensebatur, eam tamen primo conditam circa annum quartum imperii Jo. Mariae, quod nos asseruimus, & dictus Vicarius bene animadvertit. Hoc tempore pestilentiae vis Mediolani maxime saeviit, ob eamque causam cives id templum D. Christophori ad cultum augustiorem reformare, & nova sacrae aedis fabrica S. Patrocinium in praesentibus pestilentiae malis magis promereri voluerunt. Ceterum de tempore, quo altera Aquilonaris hujus aedis pars, in jam recitato libello vetus nuncupata, nemini dubium potest esse; cum propter characteres illos prominentes, quibus exprimitur annus millesimus quadringentesimus, diesque primus Septembris; tum propter Jo. Galeatii Vicecomitis nomen, ibi tribus expressum literis, qui vere tunc temporis dominabatur, & rerum potiebatur Mediolanensium; quo pariter anno vertente pestis insignis fuit in multis Italiae partibus; exortaque fertur ex Barbarorum turba, & colluvione Romam petente ob Jubilaeum, quod illic cum plenissima delictorum condonatione ex Summi Pontificis in Christi fideles indulgentia & benevolentia celebrabatur, ibique ex contagione ducenta hominum millia perierunt: Florentiae amplius trecenta millia; Mediolani vero supra viginti millia; increbuisse etiam nostra in Patria defunctorum numerus, nisi citius de piorum hominum sententia populus ad Deum confugisset, opemque instantius petiisset à S. Christophoro, ut justam Patriae infensi Dei iracundiam, & suis precibus mitigaret & averteret: at

voto publice pro salute nuncupato de construendo ei templo, ejusque die festo quotannis perpetuis futuris temporibus feriendo, gratiam mitigationis divinae irae optatam exoravit, & beneficium salutis, incolumitatisque Patriae impetravit: pestilentiae enim vis statim conquievit, & cives pariter grates & vota reddentes sancto communis salutis Deprecatori sacram hanc aedificarunt aedem, pro cuius foribus signum Reipublicae Mediolanensis proprium posuerunt, hinc indeque stemmata duo, unum Ducale Jo. Galeatii, alterum nostri Praefulis, qui tunc eo loci, ille mundanum, hic Ecclesiasticum tenebat imperium. Verum multo ante haec tempora ibi adfuisse delubrum D. Christophoro sacrum, & fama est, & aliqui memoriae proditum reliquerunt; quod profecto tanto facilius credere par est, quanto rationi congruentius apparet, Mediolanenses peste affictos noluisse Sanctum extra Urbem loco à publico commercio seposito & distante honore sacrae aedis prosequi, nisi urgenti de causa, summaque ratione; quam certe aliam fuisse, vix excogitari potest, quam quod peculiare delubrum jam olim Sancto sacrum ibi praexistit: non quidem tantum ab aqua illic decurrente, qua apud Antiquos, ut religio exigebat, sacrificuli manus abluebant, ita nuncupatum, (quod tamen minime improbabile videbitur, si hujus delubri existentiam ad tempora ante Christi Salvatoris adventum referamus, quibus conditum etiam, statim saltem obiter dicemus) sed forte etiam à simulacris Deorum falsis Gentilium religionibus ibi forte antiquitus dedicatis: in quorum locum, disseminato postea apud Mediolanenses per Apostolum Barnabam Christi Domini Evangelio, suffectae sunt Servatoris nostri, beatissimae Virginis ejus matris, ac aliquorum Sanctorum statuæ, quemadmodum & nunc in eo simulacrum D. Christophori ligneum visitur. Nam simulacra ex ligno delibrato, hoc est, decorticato, olim fiebant, locaque, in quibus ponebantur, Delubra dicebantur. Cæterum quomodo cunque res hæc se habeat, nec incredibile, aut absurdum erit affirmare Delubrum hoc ex situ, & nomine, usque ab Idolorum cultoribus suum habuisse principium. Meo autem judicio dixerim tempore Galeatii Vicecomitis Populum Mediolanensem præcipue ob sacras D. Christophori Reliquias, quem in primis colere cupiebat, ad perpetuam tanti beneficii memoriam, ibi novam aedem, antiqua diruta, Sancto consecrassse. Hanc rem tanto mihi facilius persuadeo, quanto evidentius constat hujusmodi ibi adesse Reliquias, cum ex antiquis monumentis, de quibus infra, tum ex illo magno dente Sancti, qui cum fuerit statura gigantea, ut unus fere omnium habet consensus, liquido probat quoque tales esse ejus Reliquias: tenetque Civitatem opinio hæc eas ibi esse. Huc venire bis in anno apud nostrates religio est, scilicet die 7. Januarii, & 25. Julii, quorum ille quidem miraculo, vel (ut aliis placet) voto, quos & nos supra secuti sumus: hic vero Sancti martyrio publice colitur, ac plene dedicatus, & feriatu habetur ex ritu nostrae Ambrosianae Ecclesiae; quibus item duobus festis diebus D. Christophori Reliquiae palam in Altari exponuntur, à populo pie coluntur, & reverenti deoscultatione, omnique alio honore venerantur: alio autem tempore asservantur in loco juxta aram fenestellæ instar, ferreo clathro decore obstrueto, certisque clavibus ocluso, quas viri quidam illustres nostrae Urbis delubri hujus regimini praefecti diligenter asservant, ac penes se custodiunt. Præcipuas hujus sancti Martyris Reliquias Toleti in templo ejus nomini dicato asservari, & summo coli honore, auctor est Cardinalis Baronius in *Notis ad Martyrologium*, propriumque ac peculiare de eo in Ecclesia Toletana, sub-

A dit, haberi officium, ex cuius hymno effigies Sancti facile colligitur: in eo enim hæc leguntur verba:

*Elegans statura, mente elegantior,
Visu fulgens, corde vibrans, & capillis rutilans,
Ore Christum, corde Christum Christophorus insonat.*

De hujus tamen imagine & pictura plura scribit Joannes Molanus lib. II. *Historia Sanctorum Imaginum* cap. xxxv. & lib. III. cap. xxvii. & de ejus vita, ea, quæ manuscripta circumferuntur, magna ex parte cum Martyrologio Græco convenire testatur Galestinus, illaque complexus est brevi quidem, sed non ineleganti, *Hymno* Hieronymus Vida Cremonensis Poeta, in quo quia adfert mysticas rationes, ob quas D. Christophorus depingi consueverit extra templa, Christum ferens, statura procerus, baculumque manu, ad instar palmæ floridum, tenens, placuit hoc loco cum adnotare:

*Christophore, infixum, quod eum in corde gerebas,
Pictores Christum dant tibi ferre humeris.
Quem gestans quoniam multa es perpassus amara
Te pedibus faciunt ire per alta mari.
Id quia non poteras, nisi vasti corporis usu,
Dant membra immanis quanta Gigantis erant,
Ut te non capiant, quamvis ingentia, templa,
Cogeris, & rigidas sub Jove ferre hiemes.
Omnia quod victor superasti dura, virentem
Dant manibus palmam, qua regis altus iter.
Quod potis, ars tibi dat, nequeat confingere vera,
Accipe cuncta bono tu bonus ista animo.*

Hic monitos vellem pios Lectores, me minime ignorare narrationem hanc gestorum D. Christophori semper fuisse controversam, & plenam disensionis inter doctissimos, inter rudes vero ac homines simplices, tanquam pervulgatam receptissimam. Historiam-ne, an cogitationem pii hominis fuisse, nos non affirmamus, magnam certe habere probabilitatem putamus, & nisi aliunde erroris vincatur, pie credendam. Ad explicandas autem allegoricas sancti Christophori picturas jam vulgo receptas, & in *Hymno* ex Vida modo recitatas, non ineleganter se habet Laurentius Xerifanus in libris, quos restituit, *de ratione studii Theologici*, quamvis cum nequaquam sequamur in eo, quod de martyrio hujus Divi dubitare videtur, ut quam possumus longissime à Philippo Melancthone pessimo hæresiarcha discedere judicemur, qui impudentissime asseruit hoc vanum imperiti alicujus Monachi commentum, cum re vera nullus hujus nominis Sanctus Martyr in Ecclesia Dei unquam extiterit: quod falsum omnino esse probat fuisse citatus Molanus, & D. Ambrosius in *Prefatione Missæ*, ut martyrem luculenter celebravit, & eum talem fuisse convincunt divinum officium ab Ecclesia in ejus honorem persolutum, Basilicæ constructæ, & sacrae ejusdem Reliquiæ, non apud nos tantum auguste, atque sancte semper habitæ, sed apud alias quoque Italiae civitates, ut nunc Laude Pompeja, ubi jam ab hinc annis tercentis, & templum, & Reliquiæ hujus Sancti habentur, & coluntur, ut ex probatissimorum Scriptorum auctoritate mox subjiciemus: & olim item viguit Basilica D. Christophori circiter annum 743. ad quinquagesimum à Ravenna lapidem, de qua meminit Sigonius lib. III. *de Regno Italiae*.

Quare autem in nostro Delubro numini hujus Sancti dicato Populus Mediolanensis binas exco-

de causâ pari cultu celebretur, non est undique manifestum. Scio plerosque existimasse talem à Mediolanensibus diem festum excogitatum æmulatione Laudensium, qui non sine admiratione hujus Sancti precibus aliquando eam civitatem ab infestatione ingentis Serpentis liberarunt, alias ut conterminas regiones, quibus immincebant, nostri alicujus insignis honoris ac reverentiæ fama ad hujus Divi ampliorem augustioremque cultum excitarent. Sed avum meum narrantem, referentemque sæpius patrem puer audiebam, causam hujusce festi à Senioribus proditam, quod Archiepiscopus Mediolani, anxio de pestilentia Urbis Principe, affirmasset, non prius eam pestem cessaturam, quam sancto Christophoro à Civibus novum templum, & festum dedicatum fuisset. Rem hanc totam in opinione positam non inficior; ingenue tamen fateor, Laudensium consuetudinem hunc diem feriendi illic primo introductam anno salutis trecentesimo supra millesimum, quo dirus ille Serpens hujus Divi ope est necatus. Nec esse commentitiam fabulam, sed veram historiam ex hoc publico Laudensium scripto, ac monumento nunc subjungendo liquido constabit. Laude Pompeja in æde Divo Christophoro dicata appensa visitur tabella, vernacula lingua conscripta in hanc sententiam Latinis verbis hic expressam, ut æquabilis styli tenor continuetur.

Circa Laudis Pompejæ oppidum anno trecentesimo supra millesimum, lacus subsederat, qui ob vastitatem, & copiam restagnantium in unumque confluentium aquarum Gerondi maris nomen obtinuerat. In hoc lacu magno apparuit portento dira & virulenta Serpens, horribilis forma monstri, habitum adeo foetidum ac venenosum spirans, ut vicinum oppidum ferme totum inficeret, ac misere affligeret. Hinc fiebat, ut multi civium perirent odoris illius dumtaxat intolerabili foeditate. Verum cum animadverterent cives hujusmodi morbum ac pestem in dies magis invalescere, pariterque cætera increbescere mala; è contra vero incolarum atque habitatorum numerum quotidie magis ac magis imminui, & quod pejus erat, timerent quoque civitatem ipsam ex frequentiori turbidarum aquarum colluvione obruendam, ac penitus submergendam, in acerbissima versabantur sollicitudine, & eo gravior fiebat dolor, quo certior erat expectatio extremorum malorum, ignotiorque ratio, qualabenti ac penitus cadenti patriæ opem ferre possent: spem enim abjecerant plane omnem, ægra corpora ad pristinam valetudinem revocandi, & redundantes plus nimio aquas coercendi, nedum in lacu siccandi, aut ex parte exhauriendi. Quare exclusa spes omnis videbatur interemptionis illius immanis belluæ eas innatantis aquas.

His nimirum malis Laudenses ad extremam pene desperationem adducti, ignari penitus, quid ultra facerent, cum humanæ vires omnino impares essent præsentibus infortuniis, divinam opem implorare, certissima freti spe æternum Numen ad se sincero affectu confugientes exaudire sæpe, spernere nunquam. Et ut facilius impetrarent, quod toto cordis desiderio exoptabant, Bernardinus Talentinus tunc Laudensium Episcopus, congregata Cleri & populi multitudine, de suggestu piam habuit ad eos concionem, miserabili deprecatus voce omnes, ut Deum tota mentis intentione exorarent, ac precarentur, ne moestam civitatem perire pateretur, sed solita miseratione ex tantis eriperet miseris, exitiumque tandem averteret. Quapropter statuit primum habendas triduum solemnes supplicationes, deinde votum una à civibus nuncupandum in hunc modum, ut si quando Numen haberent propitium, præsentiumque urbis malorum commiserans, atque occisione Serpentis finem

A eis faciens, sacram ædem Sanctissimæ Trinitati, & glorioso Martyri Christophoro ponerent. Nec eorum spes fuit inanis, aut vanum consilium: nam tribus supplicationibus rite gestis, & voto pro urbis salute nuncupato, eodemmet die, qui in Kalendaris Januariarum incidit, duo magna & memorabilia evenerunt miracula: Serpens enim statim periiit, & lacus exsiccatus est. Quamobrem pii Cives hujus singularis beneficii non immemores, magnificum, prout voverant, exstruxere templum, quod postea Deo favente Monachi Olivetani anno 1563. magis amplum reedificaverunt, & ad cultum augustiorem reformarunt, qui & nunc eodem in templo divina munia eximio decore & honestate obeunt, ac proprium Cœnobium huic templo adjunxerunt. Apud Divi Christophori aram hodie etiam suspensa spectatur pergrandis illius Serpentis spina, ossis instar bubulini adservata illic usque ab illo ævo, tamquam ejus infelicitissimæ calamitatis monumentum. Verum quia hic dies ferri debuerat in ipsis Januarii Kalendis, ut præfati jam sumus, quibus celebratur Christi Servatoris circumcisio, anno 1319. hæc solemnis & jucunda recordatio à Plantino Ordinis Minorum sancti Francisci Laudensi Episcopo translata est in diem post Epiphaniam sequentem. Hactenus tabella Laudensis.

C Igitur unde fuerit prima origo diei festi D. Christophori, qui septimo Idus Januarii à Laudensibus celebratur, vel ex hoc monumento jam satis est clarum; quomodo vero ad nos transierit, non item: certissimum quidem illud, & toto Mediolano notissimum, quod ille septimus Januarii dies in honorem ejus Divi ferietur, & ante S. Carolum Borromæum Archiepiscopum celebris tunc habebatur in divinis precibus anniversaria gratulatio, quam is Sanctus, sicut & aliorum quorundam Sanctorum abstulit, ac prorsus abrogavit, ut Basilio Episcopo sanctissimo aliquem inter fastos Ambrosianos concederet locum; populus tamen eundem diem ad Sancti honorem atque reverentiam agere festum nunquam destitit: isque celebris est in nostro Delubro, cum propter populi frequentiam, tum propter musicos concentus in eo fieri solitos. Quæ sane res argumento est, illum diem VII. Idus Januarii D. Christophoro celebrem, ut mox asseruimus, multo ante Jo. Galeatii Ducis Mediolani tempus alibi ferri solitum, tunc pestilentia cessante, penitusque extincta, & Mediolani voto Numini hujus Divi nuncupato, coeptum esse ferri. Hinc manifeste deprehenditur simul stare posse, ut is festus dies primo alibi introductus, prodigiosa Serpentis nece, postea nostræ Patriæ voto fuerit inter feriatos receptus. Si quis autem curiosus quæreretur, cur ad D. Christophorum Mediolanenses confugerint, ut à peste liberarentur: ita respondere possemus: Primo hoc divino afflatu factum esse; deinde, ut majori honore Sanctus iste martyr, ac ejus Reliquiæ à nobis colerentur; & tandem ne plerasque alias divinare videamur causas, hanc unam rationi non incongruam subjiciamus. Christi fideles ex antiquissimo usu consueverunt eos Sanctos in iis implorare malis, in quibus & ipsi viventes, vel morientes versati sunt, ut in pestifero morbo, ne longius ab re digrediamur, D. Rochum, qui eodem laboravit; in adversa mammarum valetudine S. Virginem Agatham, cui mamilla à Quintiano Tyranno abscissa est; in diris dentium doloribus Apolloniam, cui ob Christi confessionem Decio Imperatore dentes omnes excussi ac convulsi sunt; in oculorum ægritudinibus Luciam, cui Pascasius Præfectus in Diocletiani persecutione oculos effodit; in gravedine, aut aliis capitis morbis, Petrum Martyrem, qui à sicario in capite percussus, martyrii coronam ac nomen adeptus est; in articulorum cruciatibus, &

aliorum corporis membrorum langoribus ex frigida intemperie præcipue ortis, sanctum Levitam Vincentium, qui à Datiano Hispaniæ Provinciæ Præfide in toto fere corpore, igne, ferro, & cæterorum tormentorum immanitate excruciatum, omnia vincens tormenta, sævientem bruma, ad Cælum evolans sui auctor existit nominis; & in plebisque aliis malis & infortuniis, alios, atque alios pro ratione morbi invocare Divos, qui eadem perpassi sunt. At pestilentia grassante, Deus mortalium delictis ad justam iracundiam excitatus, sagittas iræ, furorisque sui in homines vibrare dicitur, contagioque illa non secus ac vulnera à sagittis inflicta divinis prosternit quotquot sua lue inficit. Quo etiam modo Christus Dominus in picturis antiquis hujus delubri cernitur delineatus minitans scilicet Urbi, & sagittas contra eam vibrans, quamvis sancto Christophoro deprecatore tandem remittat furorem, & Urbi parcat. Cum vero D. Christophorus sagittis confixus fuerit, ut narrat Surius, qui volumine IV. brevi complexus est quicquid Latine & Græce de hoc Martyre scriptum reperitur: profecto meruit, ut qui in se ipso expertus est sagittarum vulnera, aliis subvenire posset ad se recurrentibus, ut infectæ pestis sagittas declinare & evitare valerent. Eadem de causa, ut auctor est Paulus Diaconus, Romani gravi cum præmerentur peste ad sanctum Sebastianum confugerunt, eique in Basilica D. Petri, quæ ad vincula dicitur, ara excitata mirabiliter per illius intercessionem à tam funesto morbo liberati sunt. Hos imitati sunt Mediolanenses, suadente D. Carolo Cardinali Archiepiscopo in præterita ultimo loco peste, qui non aram tantum, sed integrum templum, illudque honorificentissimum à fundamentis fabricati sunt in honorem S. Sebastiani, quod non tam ratione rotundæ figuræ, quam ratione singularis structuræ inclytum habetur, cui ultimam manum imposuit Respublica Mediolanensis nostro ævo Sebastiano Martinione, hujus templi Rectore, viro æque pio ac studioso, mihi que in primis charo.

Igitur cum hi Sancti veluti scopus in præsentia vita degentes existierint, in quem hostes Christiani nominis sagittas direxerant, ac ad necem conjece- rant, jure etiam optimo potuerunt eidem irato Christo se, ceu scuta in illa æterna beatitudine, opponere, & miseros mortales pestiferis jaculis petitos protegere, ne ab illis funestis telis à Cælo tangerentur. Quamvis enim adhuc mortales essent ita sagittarum scopus, ut ab illis lædi possent, & re ipsa iis sæpe confoderentur, tamen postquam ex communi mortalitate excessere, omnis doloris & afflictionis inexpertes redditi sunt ad instar scutorum ænorum: quare sicut tunc pati, ita nunc protegere jure & merito se in eorum clientelam, tutelamve conferentes, possunt. Unde Populo Mediolanensi vere inculcabitur hoc Davidicum, *Scuto circumdabit te veritas ejus, non timebis à jaculo volante per diem*: Et D. Christophorus tamquam ex Odeo illud Trenorum alternabit, *Quia posuit me quasi signum ad sagittas*. Ecce qua permoti ratione Mediolanenses ad Divum Christophorum in tantis pestilentiae calamitatibus auxilii gratia confugerunt, quos patres nostri ultro sunt consecrati in deligendo sanctum Sebastianum in præcipuum propugnatorem contra vim ejusdem contagiosi morbi. Paulo magis ab hac diversam assignant alii causam, secuti, ni fallor, Surius, & Villegam in *Vita hujus Sancti*, qui affirmant, Divum Christophorum sagittis confixum antequam capitis abscissione martyrium compleret, Deum exorasse, ut se invocantes in locis, ubi asservarentur sui membra corporis, incolumes & ipsi fervarentur sui membra corporis, perturbati aeris infortuniis. Hac de causa (quæ

A certe historiam magis, quam ut præcedens allegoriam, redolet) pingi assolet hic Sanctus in suburbis ac viis publicis frequentissime, ut si minus ad hujus Divi Reliquias pateat aditus, saltem ad ipsius imaginem facilis sit accessus, cum talia imminent mala. In Alemannia multis in locis pictum esse D. Christophorum extra templa circa ingressum, aut in exteriori templi parte, testatur citatus Molanus: hujusque rei causam asserit indicare quibusdam locis scripta carmina hujusmodi:

*Christophori sancti speciem quicumque tuetur,
Ista nempe die non morte mala morietur.*

B Nos vero si consideremus sigillatim imagines hujus Sancti depictas in faciebus ac parietibus utriusque nostræ Christophorianæ ædis, ad quadraginta fere numerabimus, quibus singuli hujusce templi fabricæ ac regimini forte præfecti singularem Sancti tutelam exposculabant, atque deprecabantur in illis pestilentiae sævientis calamitatibus, è quibus crepti incolumesve servati fuissent. Hanc tamen illorum virorum erga Sancti imagines pietatem admirari atque laudare potius, quam imitari existimarim oportere, in eo præcipue, quod fortassis viri isti populari simplicitate pro certo crederent ex sola hujusce Divi imaginis inspectione tutos sese omnino futuros à quocunque infortunio; unde illud vulgo usurpatum,

Christophorum videas, postea tutus eas.

Quinimo penitus in animum inducerent omnia feliciter casura eo die, quo talem vidissent imaginem, juxta illa duo carmina, quæ in ore omnium tunc temporis versabantur:

*Christophore sancte, virtutes sunt tibi tanta,
Qui te mane vident, nocturno tempore ridet.*

D Et enim Synodus Cameracensis de Sanctis, cap. VI. tanquam absurdam vanitatem damnat superstitionem eorum, qui certo pollicentur non ex hac vita migraturos sine Ecclesiasticis sacramentis, qui hunc puta ex Divis ita coluerint. Sacræ vero Theologiæ, ac rerum in primis moralium peritissimi, quique ex Patrum & summorum Pontificum placitis asseruerunt minime id licere: Sanctæque Oecumenica Synodus Tridentina sess. 25. præcepit quidem Sanctorum imagines in templis habendas & retinendas, eisque debitum honorem & venerationem impertiendam, vetuit tamen credendum inesse eis aliquam divinitatem, vel virtutem, propter quam sint colendæ, & ab eis petendum aliquid, vel in eis fiduciam figendam. Ex his non obscure apparet, quænam fuerit causa, cur ad D. Christophorum Mediolanenses in tam magno pestis morbo confugerint.

F Nunc adnotandum restat aliquando apud hanc novam D. Christophori ædem quosdam cives ex nostris huic sacræ ædi addictos ad honorem & gloriam beatissimorum Jo. Baptistæ, Jacobi, & Christophori, ac Christinæ, & inopum miserorumque auxilium, ac subsidium & hospitalitatem exercuisse: postea vero mutato consilio, sodalitatem sub iisdem Sanctis tutelaribus instituisse, fierique rem ibi sacram procurasse ex oblationibus piorum hominum, & in primis Philippi Mariæ Ducis egentibus elargiendo quicquid ex redditibus annuis, quos possederant, superesset: petiisse quoque à Principe confirmationem sodalitatis, & quorundam ejusdem legum. Ex hac Philippi Ducis munificentia, & inditum novæ ædi jam fabricatæ nomen Ducalis Sacelli, & ipse idem ejus auctor habitus & nominatus: quamvis & illius nihil publico elogio testatum, & illius nihil veritate fundatum reperiatur, ut vel ipsis prælibati Archiepiscopalis Vicarii litteris supra apertissime paruit. Fuisse

Fuisse tamen tunc temporis pinguiore hujus delubri redditus annuos, cum ex Ducali liberalitate, adjunctis maxime aliis uberrimis piorum civium subventionibus; tum ex quantitate proventuum, qui temporis decursu pendebantur huic religioso loco, in quo præter ministros, tot alebantur pauperes, ad justum instar Xenodochii, facile est conjicere. Verum succedentibus variis patriæ nostræ, tam belli, quam sterilitatis infortuniis decrevisse, ac imminutos esse redditus clare constat ex antedicta *Epistola* Vicarii Archiepiscopalis, in qua legitur hanc ædem Divi Christophori habere annuis in redditibus libras 227. & solidos duodecim imperiales. At sub annum millesimum quingentesimum excrevisse hujusmodi redditus usque ad libras 312. s. 9. imperiales, & bona immobilia, ex quibus percipiebantur, fuisse æstimata libris octo millibus & ducentis nonaginta: verisimileque est exinde semper auctos, quemadmodum & cæterarum rerum pretia. Cura, & munus exigendorum reddituum, sicut & in varios usus erogandorum societati sancti Christophori jam diu erectæ incubuit, ac Duce Mediolani prædicto approbante demandatum est. Hujus societatis sunt honesti cives numero duodecim, quem in numerum aliqui Equestres & Senatorii etiam Ordinis adscripti sunt. Distribuant quotannis certas elemosynas pauperibus, adventante nostri Servatoris natali die, loco fortasse alimentorum, quæ in illo olim Xenodochio egentibus præstabantur. Domus è regione hujus sacræ ædis collocatæ, quæ binæ sunt, una ad usum sacerdotum inservientium religiosis templi altaribus: altera inquilinis locatur; illi adjacet vinea, huic hortus, & area. Adest item à parte posteriori ædis sacræ agellus, ex quo annuus census percipitur, quæ omnia cum in ditione ac potestate essent nostri Vincentiani Cœnobii, concessa fuerunt principio titulo locationis sodalibus sancti Christophori prædictis ab Ambrosio Bernadigio Abbate, certa annua pensione injuncta & imposita, quæ & nunc solvitur, sed emphyteotica. Dant quoque isti sodales annum in pecunia tributum Abbati nostro loco librarum quinque ceræ, ut vocant, laboratæ, quam offerebant & præsentabant in recognitionem juris mancipii, & nexus soli, in quo hæc Divi Christophori ædes constructa est, ut membrum Parochialis nostræ. Est Ecclesiastico more rite consecrata, ut testantur acta sancti Caroli eam lustrantis, longitudinemque habet cubitorum xxiv. latitudinem vero xxiii. In duas item partes erat divisa ac dispartita pariete, & ferrea craticula interpositis olim, nunc autem iis de medio remotis atque sublatis ad instar unius amplioris ædis redacta & restituta.

In hac sacra æde patrum nostrorum memoria in ædícula lignea, coloribus ac auro ornata atque distincta, sanctissima asservabatur Eucharistia à festo Paschatis Christi Domini ab inferis excitati ad festum diem sancti Martini ob seduliorum forte custodiam, & validiorem conservationem frugum, fructuumque terræ contra grandines & reliquas acris tempestates, eratque in ara sancti Christophori reposita, ardebatque jugiter ante eam lampas expensis hominum quorundam pauperum, qui se in sodales sanctissimi Corporis Christi sponte dedebant, & inter sese elemosynas quasdam in tertio cujusque mensis die Dominico colligebant, in primis quidem ad eum finem, postea vero ad stipendium, honorariumve Concionatoris pro diebus in Quadragesima festis. Instituuntur quoque & erudiuntur in hac æde mares ac fœminæ feriatis diebus primum ad Dei cultum, deinde ad cætera Christi præcepta, tum ad modestiam & reliquas Christianas virtutes. Non ab re esset hoc loco repetere ex *Fascic. VII. ea*, quæ de Abbatæ Vin-

centianæ antiqua ditione, & potestate in alias sacras hujus Paroeciæ ædes, supra generatim attulimus, ut quænam jura eidem Abbatæ in hoc Divo Christophori Delubro speciatim conveniant, atque debeantur, distinctius cognoscatur: sed commodius forte erit prætermissa tantum ibi nunc referre, & statim inchoata proseguere, ne plura quam sit necesse congeramus.

Sub Pompejo Birago olim nostri Cœnobii Præsule lis est in judicio mota contra omnia ferme jura, quibus quiete ac pacifice utebatur Curatus sancti Vincentii in hac S. Christophori æde tam in emolumentis funerum usitatis, quam in officiis & sacris solemnibus obeundis; in quæstionemque permulti tum sacerdotes, tum laici vocati sunt, qui omnes antiquam ditionem & perennem jurisdictionem pro Curato sancti Vincentii in eo delubro semper stetisse testati sunt. His incorruptis atque integris testibus nonnullis aliis productis permotus Generalis Archiepiscopi Mediolanensis Vicarius suo irrevocabili edixit decreto, ut Curati sancti Vincentii per tempora futuri retinerentur, defenderentur, ac protegerentur in ea jurium omnium possessione, quam antea & posthac in eo habuere delubro. Ex eoque tempore omnia pacata & quieta fuerunt spectantia ad Parochialem jurisdictionem, quæ una & eadem est, atque illa, quæ in cæteris Paroeciæ sacris ædibus, nisi quod istic habet hoc præcipuum ac peculiare, ut sacrificus ad rem sacram faciendam mercede conductus requisitus præstare Curato sancti Vincentii obsequium teneatur in deferendo ad ægrotos Christi corpore, & in iisdem postrema sacri olei unctione corroborandis ad ultimum illud agonem in hac nostræ mortalitatis palæstra. A difficultate has exercendi functiones, tum propter loci distantiam à Parochiali, tum propter urgentes & inopinatos casus, potius quam ab ulla Curati, aut accolarum voluntate, hujus consuetudinis ac peculiaris juris initium ductum fuisse facile crediderim, ob eamque causam sacrosancti ejus olei vas ibi in templi adyto ad omnes repentinos eventus paratum asservatur.

Supereft modo pro hujus capitis absolutione, ut sacras Reliquias, quæ illic sunt, singillatim perensemus. Primo in quadam lignea Cruce reconditæ sunt particulæ quædam ligni S. Crucis Christi Domini; de vitta ejusdem, sive fasciola dicere mavis, fragmenta aliquot columnæ, sepulchri, & Calvarii montis; ex ossibus quoque sanctorum Apostolorum Pauli, Matthæi, & Simonis; Divi item Hieronymi, & ex xi. millia Virginum. Deinde in quodam majusculo tabernaculo inaurato asservatur mandibula S. Christophori; colitur postea in lignea capsella inaurata lac B. V. Mariæ. Ultimo visitur in tabernaculo ex aurichalco dens ille magnus sancti Christophori, qui dono datus est sodalitati sanctorum Jo. Baptistæ, Jacobi, Christophori & Christinæ, sub certis legibus ample, lateque digestis in quodam publico elogio inter acta Joannoli Piscinæ tabellionis relato, sexto Idus Novembris anno mcccc. Ante dictæ omnes sacræ Reliquiæ fuisse antiquitus in hoc delubro palam factum est, tunc maxime cum D. Carolus visendi causâ huc venisset, ex compluribus vetustis indicibus, & ex nonnullis etiam publicis documentis fide Notarii munitis, easque jure & merito approbavit idem S. Archiepiscopus, omnique honore dignas laudavit. De mandibula D. Christophori, quæ ibi multis ante annis fuerat, & de illo magno dente, qui post liberali munere illuc concesserat, illud libenter notarim, quod mirabilis quidem Deus in Sanctis non tam in rebus magnis & mirificis, verum etiam in parvis & minus portentosis. Quis enim non miretur divinam providentiam,

tiam, & altissimum ejus consilium in reponendo dente ejusdem Sancti apud propriam mandibulam? Hinc profecto utriusque Reliquiae veritas eo clarius eluxit, quo evidentius locus, capsulae ejus dentis molaris in maxilla magnitudini ejusdem adaequate respondebat, & eam is complebat, ac justissime metiebatur; unde & ex dente illam esse hujus Sancti maxillam, & ex hac eum esse ejusdem Divi dentem certo compertum est. Hic si revivisceret D. Christophorus, cum beata Agata merito exclamare posset, *Qui restituit dentem meum maxilla mea, ipsum invoco Deum meum.* Caeterum etsi re vera hoc mirum sit, tamen quia ex quadam propensione ipsius consultricis, & providae Naturae hoc fit: sicut enim materia naturaliter appetit formam, & corpus animam, ita partes suum totum quadam vi ingenta exquirunt: minus Lectores mirari debent, cum viderint naturae Auctorem innatum creaturae conatum saepe sua bonitate ante tempus explere atque satiare, partes loco distantes ex commissura jungendo, & in suismet locis reponendo, ut mirabiliter factum esse de maxilla & dente D. Christophori ingenue fateor. Dixi ante tempus, quia in illo horrifico ultimi Judicii die explebitur perfecte insita illa omnis membrorum appetentia ad colligationem & naturalem partium juncturam.

Casum paulo diversum evenisse Angilberto Mediolanensi Archiepiscopo, hujus nominis secundo, narrant Historici quidem antiqui, sed nequaquam

A poenitendi: quos me quoque supra esse secutum memini, dum eundem plane casum referrem, quem, quia ad rem valde facit, hic repetere placet. Nam cum hic Angilbertus ob pietatem & reverentiam, quam erga S. Ambrosium gerebat, abstulisset ab ejus capite dentem, reposuissetque ceu pretiosissimum lapillum in annulo, ut eum assidue secum ferret, forte, vel ut melius dicam divino miraculo, dum supplicationes ad Basilicam S. Laurentii perageret, amisit, de qua amissione valde anxius & sollicitus nihil non egit, ut illum inveniret ac reciperet, sed omnia frustra tentavit; jam tandem à pia muliere vetula certior factus est, dentem in proprio loco repositum apud Sancti gingivam, ac proinde monitus ne ultra plus diligentiae & laboris infunderet in eo perquirendo, quandoquidem ex sepulchri inspectione statim res fieret perspectissima; sepulchro enim reurato, in maxilla, à qua primum excussus fuerat dens, mox repositus apparuit, magna Archiepiscopi admiratione, divinam voluntatem recognoscentis, & approbantis; & ne idem futuris unquam temporibus accideret, ex argento, & auro, gemmisque innumeris aram super ipso sepulchro ita construxit, ut nusquam postea ausus sit aram eximiae dignitatis, & tanti pretii demoliri, ut D. Ambrosii corpus inviseret, aut tangeret. De hujus Christophoriani delubri origine, cultu, & sacris reliquiis suffecerit haec ex antiquis litteris, atque monumentis retulisse.

JO. ANT. CASTELLIONAEI
FLORILEGIUM
ANTIQUITATVM
PAROECIAE
D. VINCENTII IN PRATO.
SECTIO III.

FASCIC. X.

Fani D. Caloceri antiquitas, & fama; primum ex mira fontis inibi scatentis origine declarata; tum Regii diplomatis testimonio confirmata, illustrata deinde ex baptismo D. Secundi peracto in eo ab SS. Martyribus Faustino, & Jovita. Fontis ejusdem situs, Civium frequentia ad illum, sacrum olim ibi Religiosarum mulierum septum. Imaginis antiquae Beatissimae Virginis Mariae ad Servatoris Crucem stantis, prodigii anno MDXIX. successi, munerumque ejus occasione datorum descriptio. Procedente aeo societates varia sub diversis nominibus ibidem erectae. Postrema Sanctissimi Crucifixi nomine nuncupata adhuc durat & floret.

E **N**unc sequitur necessario, (ne longius latiusque vagemur) ut de viciniore quoque D. Caloceri Fano (si hac profanae Gentilitatis voce, bona cum eruditissimi Baronii venia uti liceat) dicere incipiamus, cui non antiquitas tantum, sed fama etiam apud Cives incredibilis, cum ex antiquis prodigiis, tum ex frequentia recenti piorum hominum attributa est. Ejus quidem mira vetustas jure optimo comprobatur. Primo ex modo originis aquarum fontalium inibi antiquitus scatentium, ut aliqui dicunt, ad preces D. Caloceri, qui cum esset Mediolanum productus, ut Christi fidem abnueret, in tormentis atque cruciatibus positus obtinuit divinitus, ut fons emanaret perennis & perpetuus, & hoc factum esse

esse circiter annum à Christo nato trigessimum supra centesimum, eo in loco ubi Adriani Imperatoris iussu ad caudas sylvestrium taurorum alligatus eum sanctis Jovita & Faustino, ut ita ab illis feris & immanibus belluis per sylvas carduis & tribulis obstitas raptatus necaretur, vinculis ab Angelo resolutis liberatus est, bestiisque ita edomitis & mansuefactis, ut Sanctorum dicto audientes non modo essent, sed eos civitatem ejusdem Angeli admonitu ad Cæsarem Adrianum rursus ingredientes, non secus ac si canes forent domestici ac familiares, & veluti fida custodia sequerentur magnatius populi admiratione ob rei novitatem frequentissime confluentis. Qua autem de causa, fontem hunc D. Calocerus Deum deprecatus impetravit, non satis constat, creditu tamen facile est hanc fuisse causam, ut propriam vel sedarent sitim, vel certe concitarum & anhelantium ferarum, vel (quod & rationi magis consonum est) ut hoc etiam miraculo adstantes Gentiles ad Christum converterent, in coque, cum aliunde aqua non suppeteret, baptizarent. Convenit sane inter omnes antiquitus fuisse in hujus Paroeciae suburbanis prata & sylvas; siquidem ad nostra usque tempora cognomen sancti Vincentii inter prata remansit, ut habent perantiqua scripta, & nomen sylvae, quæ diu ad Ulmos vocitata est, & à D. Victore Capucinatorum, ad locum, ubi nunc jacet Xenodochium Dementium, pertinebat. Comprobant hoc idem non obscure *Acta* sanctorum Faustini & Jovitæ lib. II. Brixiae impressa anno 1588. quæ meminerunt fontis divinitus producti circa sylvas, & eos campos, ad quos abire iussu sunt ursi & tigres ad eorum internecionem Adriani iussu emissi, ut in eodem vitali tingerentur latice populi, qui eam rem stupentes Christi fidem susceperant.

Hæc à nobis quia non nova dicuntur, sed tradita repetuntur, fidem publica scripta vindicent, & nostrum sit solum facientia ad rem nostram, huic inferuisse operi, & proinde ac vana non respuisse. Illud quidem unum nostris recentibus monumentis consecratum æternitati fuerit, firmissimamque dictis fidem adstruet nostris; fontem hunc Calocerianum principio divinitus prodisse: eritque hoc non leve popularis hominis testimonium, sed Regiæ Majestatis gravissimum incorruptæ veritatis verbum. In diplomate enim Francisci Francorum Regis, & Mediolani Ducis, dato Nonis Octobris, an. 1519. habetur, D. Caloceri fontem non natura, aut humana arte, sed divino miraculo prorupisse ante annos jam 1390. ad preces S. Caloceri, ut ex ejus cælesti unda, Mediolanenses, qui repudiatis falsis Gentilium superstitionibus, veram Christi fidem amplexabantur, spiritualiter renati æternam auspicarentur vitam: habuisseque D. Ambrosium, Urbis nostræ Patronum, horum omnium plenam notitiam, ut ex Annalibus Ecclesiasticis liquido constare ibi asseritur.

Ex his de hujus fontis origine satis Lectori persuasum esse arbitror, modus nunc originis clarius nobis explicandus superest. Ego fontem insequenti modo suum habuisse divinitus principium, sacras, magisque receptas secutus historias crediderim. Cum D. Calocerus Astæ ob Christianam religionem esset in custodiam datus, ingentibus editis miraculis virum quendam, Idolorum præcipuum cultorem, nomine Secundum, ad Christi fidem convertit, sacrisque imbutum dogmatibus, Mediolanum ad sanctos Faustinum & Jovitam destinavit, quorum ille Sacerdos, hic Diaconus erat, ut aquis ablueretur lustralibus. Secundus optimo duce Dei Angelo, comite, licet pessimo, Sapritio quodam, infestissimo Christianorum hoste, statim est iter ingressus, in quo ita ab illo clavis vocibus de divinis

A præceptis firmiter retinendis sapius est admonitus, quemadmodum ab isto de Idolorum cultu pertinaciter defendendo frequentissime commonitus: tamen cum ipsi iter una facerent Sapritius Derthonæ remansit; Secundus vero ceu anhelans cervus sitiens baptismi aquas, via Ticinensi Mediolanum divergit, & eam Urbis portam, qua venientibus Ticino ingressus patet, adiit, monitusque ab Angelo ad locum extra eam portam ad dexteram confedit, expectans jam jamque adventantes Faustinum & Jovitam à carcere ab Angelo eductos, ut eum baptizarent. At cum aqua ibi pura desideraretur, sive ad preces D. Caloceri absens, sive Sanctorum ibidem adstantium, illico nubes adfuit formam columinæ præ se ferens pertingentis ad terram, ex qua fluxerunt aquæ, factusque est fons, in quo Secundus cælesti est tinctus latice: advolavitque statim columba de Cælo Christi Domini Corpus & Sanguinem afferens, & in manus Faustini reposuit, ut eis divinis dapibus novum athletam Secundum communiret, ad agonem pro vera fide confirmaret, & ad longum, quod illi restabat, ad æternam felicitatem iter corroboraret, quam felicitatem eum brevi martyrio adipisci debere pronuntiavit atque prædixit, ut postea re vera ejusdem Sapritii Præfecti iussu in Urbe Astensi capitis abscissione factum est 14. Kal. Maji anno Christi Domini 134. Adriano Imperatore, Augurino & Sergio Consulibus. Hanc ita narrant historiam Petrus in *Catalogo in Vita sancti Secundi*, & Mombricitus Tom. 2. in *Vita sancti Martiani Episcopi Derthonensis*, quos citat Baronius in *Annotat. ad Martyrologium* die 18. Aprilis, & in Manuscriptis Ecclesiæ Mediolanensis plura de D. Calocero exponi asserit Galefinus in *Notis ad suum Martyrologium* 14. Kal. Maji, quos etiam refert & sequitur Philippus Ferrarius in *Catalogo Sanctorum Italia*, in ejus die festo.

Cæterum, quod locus ille exeuntibus Ticinensi Porta ad dextrorsum positus, ad quem Secundus se conferre, statim ac Mediolanum attigit, iussus est ab Angelo, sit iste, ubi nunc scatet Calocerianus fons, magis rationis necessario probantis vi coacti asseverare cogimur, quam quod certissimos auctores (si unum excipiamus Mombricitum) repererimus, qui locum hunc nostrum aperte notarint, aut expresse. Et ut melius Lector probationis vim percipiat, præmonendus est, haud aliam esse potuisse Urbis portam, qua egressus est beatus Secundus, quam Ticinensem, cum & illa primo occurrat venientibus ex urbe Ticinensi, & statim egredientibus vicinior & accommodatior sit Derthonam petentibus, ut inde vere peregit Secundus, vadens salutatum D. Martianum illius civitatis Episcopum jam neci religionis causa destinatum à Sapritio, ac pro ejus salute divinum Numen supplicatum, ut in agone fortitudinem & constantiam, atque in excessu à vita præmium & æternam beatitudinem largiretur.

Illud quoque erit præmittendum circa fontis locum, & Urbis antiquæ situm, quod Trifstanus Calchus in primo *sua Historia* libro, loquens de antiqua Urbis Mediolani positione, scribit perennem fontem via Ticinensi ad lævam non longe à moenibus ortum nunc quoque perdurare, & Eustorgianum dici, & alterum ad dexteram eadem via pergentibus adeste non ita antiquum, & hunc pariter extra Urbis moenia fuisse, cum tunc porta circa Corrivium existeret ante dixerimus.

Ex jam dictis, & nunc particulatim prænotatis, rationem formabimus (ni fallor) necessario demonstrantem fontem, qui divino prodit miraculo ad expiandum cælesti lavacro Secundum, illum esse, cui nomen est D. Caloceri; hoc itaque argumentabimur pacto: Secundus Ticinensi Porta egressus

N n dexte-

dexteram statim adiit partem, ibique, quemadmodum ei Angelus mandaverat, sanctos Faustinum & Jovitam praestolatur, qui paulo post Angelo eodem comitante adventantes, aqua è caelo delapsa, illum baptizarunt; jam alius ab hac Urbis ora fons haudquaquam reperitur, praeter nostrum Calocerianum: fateri igitur necesse est in eo B. Secundum aquis esse lustralibus ablutum. Conclusionem, cum ex ipsa ratiocinationis forma valide sequatur, nemo negare potest: Major propositio ex his, quæ modo sum præfatus, satis videtur probata atque persuasa. Sola ergo Minor argumenti assumptio restat latius nunc confirmanda. Duo insignes fontes in hac nostra Urbis regione jam pridem vigent, alter, ut ante dixi, lævam tenet, & Eustorgianus à vicina D. Eustorgii Basilica vocatur: hujus aqua primos Mediolanenses Christo Servatori nomina dantes tinxit sanctus Apostolus Barnabas, indeque cum antiquitate majorem quoque famam sibi fons vindicavit: Ad dextram alter, qui multis post annis veluti è caelo per nubem in columnæ modum formatum est ad nos demissus, servatque in hunc diem cum antiqua religione non impari gloriam. Præter hos duos in hac australi plaga facer fons nullus adest. In illo quidem antiquiore Eustorgiano nemo vel mediocriter in sacris versatus historiis affirmabit baptizari potuisse B. Secundum, quippe qui in fonte novo, & modo prodeunte, ut Actæ justestantur, sit lotus: in isto autem nostro expiatum cælesti lavacro non temere, sed jure ac merito asseruerit quis, tum ob cognomen D. Caloceri, cujus ætate vixit beatus Secundus, ad huncque locum ab eodem Actæ in custodia detento est destinatus, tum ob hujus fontis situm dexterum ab Urbe viâ Ticinensi abeuntibus, ad quem divertisse Secundum diserte scripsit unus Mombritius, & pleno ore asseruit in *Vita S. Martiani* memorati, vel ex auctoritate Manuscriptorum Ecclesiæ Mediolanensis, in quibus plura de S. Calocero exponi testatus est Galestinus, vel testimonio illorum Ecclesiasticorum Annalium, quorum mentio fit in jam adducto Regio diplomate, quos tamen etsi alieno etiam usi studio avidè perquisiverimus, haud invenire hæcenus potuimus. Historia hæc, ut nunc est à nobis narrata, picturis non inveniatis jamdiu fuit expressa juxta Calocerianum fontem, cum hisce literis adscriptis: S. MARTYR SECUNDVS A D. CALOCERO FIDEI MYSTERIIS IMBVTVS AB SS. FASTINO ET IOVITA BAPTIZATVR IN HOC FONTE DIVINITVS AD PRECES SANCTI ENVBEE IN FORMAM COLUMNÆ DEMISSO.

Nunc dabitur aliquid loci paucis monstrandi errata veterum quorundam scriptorum emendanda, qui, ceu pecudes improvidæ unus post alium gregem sequentes, eadem ferme exscripserunt verba, parum mehercule solliciti de temporum diversitate ac annorum supputatione, nimisque profecto oscitanter legentes scripta cujusdam Landulphi de S. Paulo circiter annum communis salutis 1133. publice edita, quorum exemplar etiamnum visitur in Bibliotheca Canonorum Ordinariorum Metropolitanæ Mediolanensis. Is enim cæterorum familiam duxit, & quod per errorem, vel certe dormitans, memoriæ prodidit, alii veluti studiose & de industria dictum excipientes posteritati tradiderunt. Inter alia ab iis perperam scripta illud est, Sanctos Gervasium, & Prothasium, atque Secundum in Eustorgiano fonte esse baptizatos, quod quam intolerabile mendum sit, & à nobis de S. Secundo modo commemorata satis indicant, & ratio temporum aperte convincit, atque ea, quæ inde sequuntur, absurda manifestissime coarguunt. Etenim si tempora supputemus,

A liquido apparebit ab ea tempestate, qua germani illi fratres cælesti latice expiati sunt, in eo fonte, ad quem primo D. Barnabas Christum Mundi Servatorem nostris civibus annuntiavit, annos fere centum fluxisse, antequam fons ille, in quo baptizatus est Secundus, divinitus eruperit. Qui igitur fieri potuit, ut in hoc, qui nondum erat, fonte mergerentur Gervasius & Prothasius? Atqui minus verum erit Secundum in nostro fonte primum omnium accepisse salutare animi lavacrum: aut fatendum erit, sanctos illos fratres post Secundum baptizatos: aut, quod etiam pejus est, Eustorgianum fontem Barnabæ temporibus non existisse; aut certe martyrum Faustini & Jovitæ historiam jam sæpius editam esse falsam; quæ omnia tanto absurdiora esse constat, quanto à vero magis abhorrentia. Igitur pertinax cujusdam amici opinio illis antiquis consona scriptoribus corrigenda, vel ut omnino improbabilis, quin & falsissima penitus abjicienda & deponenda.

Non desunt tamen alii, qui hunc fontem longe diversum à veritate principium habuisse opinantur: putant enim D. Calocero Mediolani decollato evenisse, quod Romæ S. Apostolo Paulo, cujus caput, ubi à corpore dissectum est, ter per humum profiliens, tres itidem fonticulos, qua saliendo terram contigerat, scaturire fecit, qui in hunc usque diem extra Urbis Romæ mœnia visuntur, & accurate servantur. Ita exiliens D. Caloceri obtruncatum caput, locum ad quem primum dedit saltum, fontem admirabiliter effecerit, isque fit ille, qui nunc apparet. Hæc opinio quamquam plures patitur difficultates, ita tamen illam ejus auctores apparentibus exornant argumentis, ut non modicam videatur habere probabilitatem ac verisimilitudinem. Etenim primo adducunt communem Ecclesiasticorum Annalium consensum perhibentium D. Calocerum Mediolanum Acta deductum, hic multa, eaque teterrima, cruciamenta pro Christi confessione perpeßum, mox testimonium Surii To. I. in *Vita SS. Faustini & Jovite*, asserentis ex Alpibus Cottis & Acta Mediolanum revocatum, ibi martyrio demum coronatum; quod profecto videtur contrarium auctoritati universorum fere Martyrologiorum, in quibus legitur Albengauni, quod oppidum in Liguria vulgo *Albenga* nuncupatum, S. Calocerum cursum martyrii capitis obtruncatione complevisse; post ex Actis eorundem Sanctorum ostendunt ab Augustali Palatio, quod erat Mediolani, ad Thermas Herculeas (ubi nunc est Basilica S. Laurentii) extra Urbis mœnia Ticinensis portæ propinqua deductum facile in hujus nostri fontis loco, ut quondam moris erat apud Gentiles, decollatum fuisse. Commiscuntur denique veterem picturam juxta fontem hunc olim existentem, historiamque hujusmodi ut præfertur exprimentem.

Verum ne diutius in hujus Caloceriani fontis origine immoremur, simulque videamur potius mentis commenta nostræ, quam veritatis commentaria conscribere, his omisissis, nunc oratio procedet nostra ad antiquam populi venerationem erga hunc fontem. Hanc magnam atque eximiam fuisse primis temporibus illis ob mirum & prodigiosum originis modum hujus fontis, qui pro certo habere poterit, si accurate animadvertat ingenita quadam reverentia mortales prosequi res hujusmodi principiis divinitus datas, ut fontem olei, qui eo die, quo Virgo Christum peperit, Romæ in Transiberina regione erupit; tres jam dictos fonticulos ab S. Apostoli capite productos; Lauretanam domum ad nos ab Angelis transportatam, & pleraque hujusmodi alia, quæ non tantum accolæ, sed etiam exteræ nationes & gentes semper summo opere coluerunt, &

& summis profectæ sunt honoribus. Crevisse autem magis magisque quotidie honorem ac loci reverentiam minime est ambigendum, cum & cultus veri Dei, abjecta Idolorum superstitione, & religio Christiana emollitis vitæ fidelium innocentia, Tyrannorum immanibus animis, magna successu temporis receperint incrementa. Porro complures in Christi fidelium numerum nominibus datis, ab antiquo infectionis parentum crimine his nostris fontanis abluebantur aquis: ad hunc enim peculiarem usum videbantur è cælo delapsæ per illam nobis columnam in locum hunc à publico hominum commercio sepositum, extra Urbem, ac à Ticinensi porta parum distantem, ut studiose præter cæteros Chronistas notavit Trifanum Calchus 1. *Histor. patriæ* libro, per illud enim tempus ob gravia & funesta Imperatorum edicta contra Christianæ religionis cultores, in Urbe, aut palam, hoc peragere non licebat. Magnum sane ac validissimum præfæ hujus fontis reverentiæ auctæ, nedum conservatæ, est argumentum, quod sacris historiæ monumentis proditum esse commemorant præfæ Francisci Francorum Regis literæ, quarum autographa Regio sigillo obsignata nos ipsi vidimus in nostræ Calocerianæ ædis tabulario quam diligentissime custodita, scilicet quod S. Ambrosius Urbis Patronus, ac Patriæ nostræ Parens, prædicta omnia probe sciens hunc fontem pie adamavit, diligenter custodivit, ornamentisque auxit. Nam ea loca, in quibus jacta fuisse nostræ religionis fundamenta noscebantur, frequentabat, ut Hortum Philippi, in quo sæpissime in oratione pernoctabat; Basilicas Faustinianam & Portianam, in quas cum ad declinandum Faustinae Augustæ, ob strenuam Arianorum oppugnationem ab eo susceptam sibi iratæ, furorem, tum ad recreandum animum in contemendis spiritualibus concionibus, aliquando secedebat.

Quibus vero ornamentis hunc auxerit fontem Divus Ambrosius, non ita constat; credere tamen est, fuisse quosdam parietes fontem ab occidente solis cingentes in modum facelli picturis fortasse decoratos. Hujusce rei nec leve præstat argumentum, quod paulo supra patrum nostrorum memoriam circa fontem visebatur ædícula quædam ruinosa, semicircularis, formam conchæ marinæ in fastigio præ se ferens, vetustissimisque depicta imaginibus. Igitur, cum in Christi nomine iis tincti aquis ab omni prorsus animi ægitudine liberi semper evaderent, & aliquando etiam integram corporis sanitatem consequerentur cum Sancto Spiritui undam hanc sanctificantem utrumque tribuebatur, quippe qui hanc corporis non minus mirabiliter, quam illam animi incolumitatem facile concedere soleat.

Itaque cum ad hos sanctos latices tanta, tamque multa ederentur miracula, ut in recitatis asseveratur literis Regiis, ibidem à fidelibus est constructa ædes S. Calocero sacra, suadente D. Ambrosio, vel alio certe successore Episcopo, in qua & Cathecumeni commodius instituerentur, & baptizati Ecclesiæ sacramentis reficerentur, vel (quod & magis cum ratione ac temporum conditione congruit) ut oblationes Christi fidelium in honorem Dei atque commodiorem populi usum infunderentur. Porro ædes ita eo sita erat loco, ut ejus janua occidentem, altare vero orientem solis, juxta sacras sanctorum Patrum sanctiones, spectarent: tantæque longitudo erat vetus, quantæ nunc latitudinis est novum sancti Caloceri templum, illaque formæ quadratæ ad instar ostii nostræ Vincentianæ ædis; hoc unicum adhærens facello concavo ad ejus formam, quod jam pridem circa fontem existisse diximus. Huc ex civitate multi ex suburbiis plures festis maxime diebus ventitabant; alii animi gratia; alii vota persolutori; alii sanctis precationibus, & lau-

A dibus, atque sacris quibusdam ritibus, locum veneraturi, quæ cum vicinæ, tum Monachis nostris in primis grata erant, quorum auspiciis fanum erectum, nutuque eorum atque arbitrio gubernatum fuerat. Hæc nihilominus parum sibi constabant; nam, qui horariis precibus assidue incumbere, desiderabantur, sæpe enim pauci, aliquando nulli, aderant. Censuerunt ergo Monachi, & ut vicinæ rem gratam facerent, & ut divinus cultus eo loci augesceret, piarum quarundam mulierum agere conventum, in quo aliquot vitæ & moribus probatæ seligerentur, quæ hujusmodi obirent munera religiosa, ac cætera, quæ ad cultum divinum spectabant, diligenter pertractarent. Per id tempus parietis hujus antiqui fani in Aquilonem obverso annexa sunt nova templi culmina, ut populus à præfatis mulieribus divina officia audire, ac reliqua peragere posset. Verum etsi religiosa disciplina harum mulierum, quæ sub numine D. Mariæ Magdalene in hoc vivebant domicilio, ob acrem curam, præcipuamque Monachorum diligentiam aliquot viguerit annos, Barbarorum tamen frequentioribus incursionibus, hanc nostram Italiæ partem misere vastantium & diripientium, coactæ sunt tandem ex suburbiis in civitatem se recipere, ne ferocioribus illis nationibus prædæ essent. Quod hæ religiosæ foeminae olim hic commoratæ sint, præterquam quod ex longa habetur traditione, liquido etiam constitit, cum solo æquarentur parietes hujus fani ob novam oratorii constructionem anno 1615. inchoatam, cujus primarium lapidem de more benedictum nos jecimus 14. Kalendas Junii: ibi enim apparuerunt indicia, & antiqua quædam monumenta ac vestigia fenestellarum loci colloquio destinati, Rotæ quam *turnum* vocant, & aliorum ad Moniales pertinentium, & aliquot item solida ex filice sepulchra ossibus mulierum (quantum ex certis signis & notis judicare licebat) oppleta.

D Possumus quoque hoc loco ad prædicta confirmanda in medium proferre id, quod superius in allegatione pro Sanctis Martyribus nostris 14. *Fascic.* adduximus, ad rem propositam maxime faciens, ex monumentis illius perantiquæ historiæ in nostro D. Vincentii templo inter utramque januam depictæ, ubi sese oculis offerunt amictu Monachali mulier stans, manumque sursum tenens, & vir senex Heremitico habitu, quem fuisse Monachum nostri Coenobii supra meminimus, quippe cum ante D. Francisci & Dominici tempora nullum certum induerunt amictum Monachi, illam vero mulierem, quam vestis & imago ipsa sanctimoniam declarant, fuisse ex vicino sancti Caloceri domicilio, eo facilius creditu redditur, quo & propinquius degebant, & arctiori vinculo Monachis inserviendi tenebantur religiosæ mulieres ibidem commorantes. Hoc interius templum, in quo orabant, officiumque divinum recitabant istæ mulieres, vocatum est postea vetus scriptis in antiquis ad differentiam exterioris, quod novum appellarunt, & erat ex prima sui constructione parvum atque angustum, vixque à loco primarii altaris ad sacella lateralia nunc existentia pertingens, ita ut illud non venustate, sed necessitate ipsa divina audiendi fabricatum esse meherele diceret. In hac exteriori æde sacra visebatur antiqua imago B. Virginis Mariæ adstantis Christo Domino cruci affixo, una cum aliis sacris imaginibus sanctorum Joannis Evangelistæ, & Mariæ Magdalene, ac beatorum Caloceri, & Bernardini Senensis in veteri pariete pictura expressis anno 1474. die 10. Novembris: non quidem in eo, quo nunc est, loco, sed paulo propinquiori sacrario.

Hæc B. V. Mariæ imago anno à Christo nato 1519. die xi. Mensis Julii lacrymas sanguinis pro-

digiose coepit effundere, eodemque modo toto tri-
duo flere perseveravit. Portentum autem istud in
hunc modum evenisse narratur. Transibat forte
illac Gallicana mulier, (tunc temporis enim Gal-
li arbitrato suo cuncta Mediolani moderabantur)
quæ cum imaginem prædictam pie salutaret, ani-
madvertit, guttas sanguinis ab oculis B. Virgi-
nis decurrere: dubia tamen de rei veritate oculos
ad imaginem curiosius intendens, nec satis certa
sanguis-ne, an aliud quidquam humoris deflueret,
candida manica grandiori, quam juxta nationis
suæ consuetudinem ab humero pendentem porta-
bat, manu apprehensa guttas tentat, experitur-
que ex colore esse sanguinis, tunc admirabilis rei
novitate obstupescens magnas coepit attollere vo-
ces; accurrentesque ad tantum clamorem vicini
valde mirabantur; re autem vulgata, momento
temporis adfuit hominum frequentia, ut eos lo-
cus minime capere posset. Jacobus autem Anto-
nius à Turre Mediolani illustri familia natus, sancti
Vincentii Abbas; de novo prodigio monitus ad-
venerat cum aliquot religiosis viris, inter quos
erat Thomas Suardus Prior nostri Cœnobii, qui
rem diligentissime considerantes, manicam pri-
mum Gallicæ mulieris à veste abscissam decenter
reponi curaverunt, sanguinemque deinde ab oculis
imaginis stillantem condecienti vase recipientes cu-
stodierunt. Interim Superiores Ecclesiasticos de
prodigio reddunt certiores, illique diligenti in-
quisitione de rei admirabilis veritate facta, locum
commendarunt auctoritati, & fidei, & pruden-
tiæ Præfulis monasterii nostri, qui quosdam pios
viros custodiæ imaginis ac loci constituit, ac de-
putavit. Confluebant undique viri ac mulieres fre-
quentissimi, cum ut prodigiosam imaginem vide-
rent, simulque venerarentur, tum ut gratias fa-
nitatum postulerent, atque obtinerent, inter quos
multi morbis ac ægritudinibus variis affecti atque
distenti pristinam valetudinem recuperarunt. Quam
obrem multæ, tam pecuniarum, quam & alia-
rum rerum oblationes quotidie fiebant, ita ut sin-
gulo fere die obvenirent amplius aurei nummi
ducenti. Hoc prodigium certe portendebat futu-
ra mala, non solum Gallis, qui ea tempestate
superbissime dominabantur: honestas enim mulie-
res opprimebant, virgines deflorabant ac viola-
bant, nobiles tetrus carceribus emancipabant,
diris tormentis cruciabant, & crudeliter necabant:
sed etiam Mediolanensibus, qui postea fere per
decennium tot tantaque passi sunt incommoda, ut
potius vivere, quam mori tæderet: nam primo
cariori annona laborarunt, post luporum rabie
petiti misere devorati sunt multi; mox latronum
rapinis domi & foris vexati: exinde militum vio-
lencia varie spoliati: tandem an. 1524. pestifera
lue & contagioso morbo pene deleti; spatio enim
quatuor duntaxat mensium ab Urbis Conservato-
ribus centum millia hominum peste perempto-
rum numerata sunt. Tunc profecto hæc Maronis
carmina *Aneid.* III. nostris civibus mirifice con-
gruissent,

— cum tabida membris
*Corrupto cœli tractu, miserandaque venit
Arboribusque satisque lues, & lethifer annus.
Linquebant dulces animas, aut agra trahebant
Corpora: tum steriles exurere Sirius agros;
Arebant herba, & victum seges agra negabat.*

Nec Galli minoribus sunt afflicti malis; etenim
ineunte anno 1521. turris major & pulchrior Ar-
cis Mediolani, in quam coegerant vim magnam
sulphurei pulveris & pilarum, de Cœlo fulmine
maximo tacta, tantum excitavit incendium, tam-
que magnam invexit ædificiorum ruinam, ut com-

A plures percussisset & occiderit Gallos, ita ut Cœ-
lum ipsum videretur idem curasse fœdus, quod
inter se prius fecerant Adrianus Pontifex maxi-
mus, Carolus V. Imperator, Franciscus Sfortia,
& alii Italiæ Principes, contra ipsos Gallos, qui
postea usque ad annum 25. obsidionibus non paucis
pressi sunt; rerum fere omnium penuriam, ne
dicam necessitatem, sustinuerunt, clades maxi-
mas acceperunt, ut fuit illa ad Bicoeam, in qua
perierunt 23. millia virorum, & viginti duo stre-
nui Duces Galli desiderati sunt; & illa inprimis,
quæ prope Papiam, ubi ceciderunt omnes fere
B Galli Principes, & totus fere deletus exercitus,
quinimo Rex ipse captus est, & Ticinum in cu-
stodiam productus; & tandem ubique pessime ha-
biti, omnibusque infortuniis vexati, è tota Italia
per vim ejecti & exturbati fuerunt. Quid mi-
rum, si fœmina ejusdem gentis, nationis, &
linguæ nuncia futurorum facta malorum, prima
vidit nostram B. Virginis imaginem sanguinis la-
crymas profundentem, quandoquidem gens ista
Gallorum principalem tantorum malorum causam
dederunt, unde cunctas supra narratas calamitates
unis ipsis acceptas referre debeamus.

Cæterum religiosus cultus hujus sacræ imaginis,
& populi concursus simul cessarunt adveniente,
C invalescenteque ante dicta pestis contagione, qua
crudelius grassante, Urbs propemodum inhabita-
ta & derelicta fuit, quare & templa clausa, &
viæ desertæ, atque herbis, frondibus, & vir-
gultis interclusæ, ut speciem solitudinis potius
quam Civitatis referrent. Unde multa hujus ædis
ornamenta dono à piis viris data, non tam hujus
temporis vitio, quam hominum, periere una cum
miraculorum memoria. Vigebat ea tempestate,
antequam hæc B. Virginis Imago prima ederet mi-
racula, in hoc nostro delubro civium societas, in
qua nonnulli viri nobiles annumerabantur sub nu-
mine D. Mariæ & S. Caloceri, qui cum & lo-
cum maximo in honore haberent, & summo pere-
D venerarentur, labori, aut sumptui, non parce-
bant, ut ejus honorem ac decus augerent atque
amplificarent, & ideo novo sanguinis prodigio
magis, magisque excitati, omni studio ea, quæ
utilitati ac commodo loci erant, curare coeperunt.
Eodem namque vertente anno 1519. mense Octo-
bris apud Christianissimum Regem procurarunt ad
majorem fontis puritatem ejus scaturigines in navi-
gabilem rivum derivare, & ab eodem Rege, no-
bilissimis Urbis civibus id postulantibus, impetra-
runt, ut ex Regio apparet diplomate, in quo
E multa tunc miracula nuperrime extitisse eviden-
tissima ad hanc B. Virginis Imaginem commemo-
rantur. Altare pretiosa veste & lauta suppellectili
ornarunt; Ædis pariter aulaeis serico admixto auro
contextis obduxerunt, & magnificum construere
templum statuerunt & deliberarunt. At pesti-
fero adveniente anno vigesimo quarto supra mille-
simum quingentesimum, ut diximus, facta qui-
dem conservari, nedum infecta perfici valuerunt:
adeo enim morbus desævire coeperat, ut nemo unus
rebus publicis studeret, & vix privatis propriis ac
necessariis usibus, quantum satis erat, incumbere-
F ret. Quare Ædes sacra derelicta, & societas ex-
stitit dissipata, nec non hoc intermedio tempore
res societatis magnam passæ sunt jacturam, ut ex
actibus publicis controversiarum in judicio jacta-
rum, ut ex aliis coram Magistratu extraordinario
Mediolani agitatæ cognoscere licet.

Conquiescente autem pestilentia vi, cætera ma-
la minime cessabant, aut minuebantur, quinimo
in dies magis progrediebantur & augecebant ob
diuturna bella inter adversas nationes ad asseren-
dum unaquæque sibi Mediolanense imperium, cu-
jus

jus omnis salus adeo jam desperata erat, ut anno 1529. Nobiles fere nulli, mercatores pauci, & alii cujusvis generis cives rari in publicum prodirent. Vnde misera civitas à propriis pene destituta Civibus, omnem pristinam gloriam exuisse, & novam squalentis solitudinis ac deserti speciem, expressamque imaginem induisse videbatur. Virgulta enim & herbae quasi in saltu in viis ac plateis creverant, templa erant occlusa, Cœnobita tam virorum, quam mulierum, militum rapinis (quorum permulti hæresi Lutherana erant infecti) exinanita atque exhausta: & cum nullus locus tutus miseris Civibus esset relictus, omnes cujusvis generis, ætatis, ac sexus expositi fuerunt ferorum injuriis Barbarorum, & penitus dejecti sp̄e tanta finiendi mala in majora se libere conjecerant: nam aliqui veneno, alii laqueo, alii præcipitiis, alii suffocatione se occiderant, alii aliis diris modis sibi ipsis necem consciverant. Minima ergo quisque capi debet admiratione, cum audierit D. Caloceri sodalitiū funestis illis temporibus dissolutum ac dissipatum, fano ejus sacrilegas militum manus allatas, sacrarium penitus expilatum, ac cætera sacræ ædis jura prorsus deperdita, cum neminem Dominum haberent, qui illa tueretur atque defenderet.

Verum anno, qui à partu Virginis fuit trigessimus supra millesimum quingentesimum, favente præpotenti Deo, cum Clemens septimus Bononiæ commoraretur, & Carolus Quintus illuc venisset, ut Imperii diademate à Pontifice juxta veterem Cæsarium Christianorum consuetudinem insigniretur, Cives Mediolanenses respirasse videbantur, nondum re, sed sp̄e pristinæ libertatis recuperandæ: aderat namque Franciscus Sfortia eorum Dux sub fide publica à Cæsare in Pontificis gratiam data, fueratque ad illius colloquium paulo post admissus ejusdem Pontificis studio, in quo non tam à falsis calumniis se expurgavit, quam & suspiciones de se omnes apud Cæsarem ortas dimoverat. Quare & ab eodem Imperatore facile impetravit confirmationem Ducalis prærogativæ, & bonam ejus gratiam ac stabilem amicitiam sibi conciliavit. Pro hisce rebus Insulicis fœliciter compositis à Cæsare toti Provinciæ Mediolanensi vacatio data est molestissimi contubernii Cæsarianorum militum, ac cæterorum illius militiæ sumptuum. Quo uno maxime Civitas emeruisse è fluctibus barbaræ servitutis, & revixisse putavit. Unde cum viri pii frequentiores quam ante in templis jam apertis per id tempus esse inchoarint, etiam in nostro Caloceriano viciniae homines sæpe aderant, & consuetudinem divini officii recitandi paulatim instaurare cœperunt, ac procedente tempore sodalitiū renovarunt, & post aliquot annos sub nomine obedientiæ nuncuparunt. Huc primo pii illi viri, qui jamdiu in antiquissima sancti Vitalis Basilica, Faustianiana olim appellata, fuerant, se contulerunt cum rebus suis, inter quas (sacra excepta suppellectili) erant statuæ illæ D. Joannis, & quatuor Mariarum lignæ juxta Christi crucem stantes, opus certe artificis industria non ingratum, quæ etiam nunc visuntur in sacello occidentali, quod Passionis nuncupatur. Alia item societas, quæ prius fuerat in S. Stephano Rugabellæ, & exinde in S. Michaeli ad murum ruptum, deinceps reportata est ad S. Calocerum. Verum ob consociationem, & aggregationem ad Sanctissimam Trinitatis Archiconfratram Urbis Romæ anno 1581. initam, nomen & vestem mutavit, ad exiguumque tempus in nostro commemorata est hæc societas fano; sed voto recedendi à suburbanis in intimiora Urbis loca commigravit, scilicet ad S. Jo. Baptistam in Arca nuncupatum conterminum Basilicæ sanctorum Apostolorum, ut urbaniori & frequentio-

ri fortasse uteretur populi commercio, quod tamen aliter ac optatum erat successit.

Tunc incolæ nostræ hujus viciniae, qui in eam societatem conscripti fuerant, ne laudabilis Calocerianæ ædis frequentia imminueretur, & ipsi devotionis ac pietatis gratia à propriis domiciliis longius discedere cogerentur, novum sodalitiū nomine Mortis assumpto in veste nigra instituerunt, Romanæque Archiconfratriæ Mortis adnixa sunt, ut amplissimo diplomate Romæ dato sub anno 1582. 17. Maji liquet. Cujus sodalitiū institutioni atque erectioni ut plus auctoritate spiritali firmitatis ac roboris accederet, à Joanne Fontana Archiepiscopi Mediolanensis Generalis Vicario approbationis decretum fuit interpositum, de quo exstant literæ testimoniales. Cæterum cum ejusdem nominis & instituti aliud vigeret sodalitiū apud illa ampla S. Gregorii septa ad seponendos tempore contagii pestifera lue infectos jamdiu constructa, orta est inter utrumque lis, & controversia magna, quam ut sedaret, vel potius componeret Gaspar Vicecomes Mediolanensis Archiepiscopus alterutrum Mortis institutum relinquere jussit, & illud, quod sponte deponeret Mortis nomen, curavit adjungi Archiconfratriæ sanctissimi Crucifixi Urbis Romæ, quæ tunc temporis à Summo Pontifice amplissimis donata fuerat Indulgentiarum prærogativis. Hanc nominis repudiationem sodalitati D. Caloceri magis convenire visum est, quia illi ad S. Gregorium jam existenti, & ratione loci, quo mors ingruente pestilentia mortales falce sua copiosius emetere consuevit; & ratione peculiaris nomenclationis, vulgo *Fopponi*, in quo præmortuorum cadavera humari solent; & ratione legum societatis, quibus defunctos ad sepulturam deferre constituitur, & præscribitur, nomen Mortis magis congruebat: isti vero nostræ Christi Crucifixi agnomen mirifice quadrabat, multis quidem rationibus, ea tamen imprimis, quod haberet simulacrum Crucifixi iconicum jamdiu miraculis superius commemoratis inclytum, ad primariam delubri aram collocatum.

Hujus Confratriæ nomenclatura magnam mihi movet admirationem cogitanti, & veteres denominationes brevi durasse tempore, & novas vix impositas evanuisse; hanc vero sanctissimi Crucifixi quasi cælitus datam consistere, ac tam longo processisse ævo, ejus verum typum tot tantisque in hoc fano miraculis illustrem: quo Crucifixi vero nostræ religionis trophæo nihil honorificentius apud fideles, illustrius in Ecclesia Dei, amabilius Religiosis, charius Principibus ac Regibus, gloriosius penes Imperatores atque Monarchas, gratius Sanctis, Cælitibusque cæteris, & ipsi Præpotenti Deo jucundius ac intimius. Quamobrem non immerito primariam nuncupationis prærogativam hæc nostra sodalitas sibi vindicare videtur, in qua, qui sanctissimi Crucifixi non signum salutare tantum, sed & vestigia & sancta doctrinæ præcepta sequuntur, cælestis Regni gloriam, fide creditam, sp̄e concupitam, verique amoris ardore adamatam, procul dubio obtinebunt. Hanc salutarem instituti rationem recte perpendentes cum plurimi cives Mediolanenses, tum viri, tum feminae nomina dabant, ut simul magnum Indulgentiarum à Summis Pontificibus elargitum thesaurum ad suorum expiationem scelerum participarent, adeoque numero processerunt & propagati sunt, ut conscripti Cives ab anno 1591. usque ad 1604. fuerint octies mille quinque centum septuaginta; exinde illis adjuncti sunt alii mille sexaginta quinque, in diesque magis ac magis auctus est Confratrum numerus, ut ex indicibus Confratriæ compertum ac manifestum est. Verum quod

tam numerosæ hominum huic sodalitati accessiones factæ sint, minime mirum videbitur, si in mentem venerit Servatoris nostri oraculum, quod non Obedientiæ, aut Morti, aut cuiquam alterius societatis nuncupationi adaptari & accommodari perspicuum est, sed soli Christo, cruci affixo, à quo nostra Confratria suam traxit denominationem. Ipse enim vaticinatus est, *omnia ad se ipsum allicere, & attrahere velle, cum à terra in crucem sublatus fuisset.* Quid ergo si virtus Crucifixi hic nuperrime erecti ad sodalitiū tot tantosque utriusque sexus homines non modo invitavit atque allecavit Indulgentiarum blandimentis, verum etiam vi quadam secretiori sibi propria adduxit atque protulit?

Cæterum cum Carolus Cardinalis Borromæus sanctissimæ recordationis à Pio Quarto fuisset renunciatus Mediolani Archiepiscopus, & primum Urbis splendidum ac egregium sui ingressum anno Christi nati 1565. mense Septembris populo dederit, rebusque Ecclesiasticis in quibusdam Comprovincialium Episcoporum conventibus in meliorem formam compositis, aggressus est Urbis primum lustrare templa, inter quæ fuit etiam nostrum Calocerianum, quod cum cognovisset tanta antiquitate præditum, tali hominum frequentia cultum, tot tantisque miraculis celebre, instaurandum, amplificandumve suo sancivit decreto, certamque Architecti iudicio probatam præscripsit formam, & novæ structuræ speciem. Hoc S. Caroli decretum primo quoque tempore sodales executi sunt, piis vicinæ hominibus sumptus suppeditantibus. Ac cum cuperent ad majus aræ primariæ decus atque ornamentum prodigiosam illam imaginem Crucifixi & B. Virginis Mariæ aliquantulum è terra elevatam collocare in eo, quo nunc sita est, loco, necesse fuit ingentem parietis molem funibus alligatam machina apposita attollere: funibus vero nimio pondere perfractis certa Mechanicis impendebat ruina, qua simul omnes inevitabiliter obruendi erant: cum ecce tota moles (evidenti B. Virginis prodigio) in proprium, quo reponenda erat, locum statim concidit, sine ulla sacræ Imaginis, aut succumbentium ministrorum, læsione, aut jactura. Ex iis, qui huic admirabili casui interfuerunt, & præsentis viderunt, aliquos ego ipse allocutus sum, qui & adhuc mortalem agunt vitam, & hujus negotii eventum etiam nunc stupefunt.

Constructioni hujus templi finis impositus est à sodalibus sanctissimi Crucifixi tertio Kal. Junii 1590. & ad hanc formam, qua nunc visitur, redactum. Istud dicebatur templum exterius & novum, sicut alterum interius & antiquum, & hæc duo simul concessit dictis sodalibus Pompejus Biragus S. Vincentii Abbas, certis quibusdam pactio-nibus in instrumento fide Notarii firmato contentis, quæ ne aliquo unquam tempore obsolescerent, renovatæ fuerunt anno 1608. die 3. Junii, ut ex publico documento, quod rogatus confecit Martinus Cavana Curia Archiepiscopalis Notarius, perhibetur. In eo documento antedictus Præful Biragus, extra ea, quæ ad jus spectabant parochiale, ut sibi & successoribus integrum esset, reservavit, eos sodales si deliquissent, vel præstare, quæ tenebantur, omisissent, ex sacris illis ædibus liberaliter concessis expellere atque exturbare. Verum hucusque omnia tam ad Abbatiam, quam ad Paroeciam pertinentia illibata in summa pace & tranquillitate continenter habuerunt & conservarunt: ita ut nos hos sodales potius benevole protegere, & amice fovere optemus, quam ullo unquam tempore hinc abire, ne dicamus abigi, passuri simus. Imaginem illam Christi in crucem suffixi fere sub id tempus ligneis ornamentis affabre

A inauratis decorarunt, & ut icona justam, debitamque haberet proportionem, venerationem, ac reverentiam in parte superiori Imaginis, (certam cæli turbati additis Sole & Luna obnubilis ob patientis Creatoris commiserationem) adjunxerunt portionem nuperrime depictam. Huic eidem sacræ Imagini exinde à non paucis vota persolvi, à multis donaria argenti imaginibus convalescentium signata afferri, & à compluribus multa alia donari compertum habemus, ob beneficia sanitatum ibidem divina affluente gratia, & sancta B. Virginis precatōne impetrata. In hoc quoque templo aliqui ita meritam eis sacris imaginibus gratiam justis honoribus, & memori mente persolverunt, ut voluerint semel, aut bis, pluriesque per hebdomadam, & aliqui etiam quotidie rem sacram eorum in pensis fieri, ut fuit Hieronymus à Petrasancta, qui hoc quotidianum munus detulit certa data pecunia S. Francisci Cœnobitis, & alii, qui frequentibus largitionibus effecerunt, ut sodales una cum aliis templo obvenientibus sacerdotem alerent intra proprias hujus templi ædes degentem, qui & confessiones audiret, & missæ sacrum quotidie obiret. Huic ad-dixerunt ædituum custodem sacrarum suppellectilium, piarumque oblationum; nec non & clericum, qui eidem domestico sacerdoti atque aliis rem sacram facientibus inferviret. Sacella duo lateralia, unum Passioni Christi Domini, alterum Divo Lucae Evangelistæ sunt dicata. Apud fontem antedictum in interiori templi pariete adest Imago sanctissimæ Virginis, quæ creditur antiquitus ibi picta, nuper vero in templi instauratione nova arte perpolitā: quemadmodum & fons ipse fornicato opere est contactus, filicisque scalis ac scamnis ad sedendum & descendendum accommodatis, quem hic non tam Lectori describere, quam spectatori monstrare his paucis metro prolatis ad hujusce nostri insulsi sermonis tedium paulisper levandum placuit:

*Quisquis ades, partemque pius partiris in omnem
Lumina, cernè memor divini flumina fontis,
Corporis unde salus miseris mortalibus exit.
Intus aqua dulces, prono quas hauserit ore
Nectaris oblitus mensis accumbere Divum,
Cui datur, invitant medicis ad pocula lymphis,
Stant pario circum, vivoque sedilia saxo
Marmoreis vallata vides, quæ candida septis
Grata oculis species similisque precantibus aræ.
Namque ubi prima dies primo se tollit Eoo
Prævia, quæ Christo redeunti in luminis auras
Postibus effractis Erebi, luce omnia complet
(Sabbata sancta sua dicunt non voce Latini)
Templaque campani resonant concentibus aris
Illicet, & testis certatim effusa juvenus,
Matres atque Viri, Pueri, innuptaque Puella;
Quæ sanie caput, & fœda porrigine sordet,
Et gaudent sacras manibus contingere lymphas,
Agmine fervet iter venientum, templa laborant,
Fit via vi, rumpunt aditus, vix se capit ager,
Infantum grex intus, inops ex ubere pendens.
Cedere mirantur Matres è vertice labem
Fluminis attactu mira dulcedine lata,
Osculaque æternum mansura in marmore figunt.
Fama volat, properant alii, quos nulla medentum
Cura, laborque juvat, non dextra Machaonis ulla,
Non ulla Maris quasita in montibus herba.
Septa laborantum complentur utrinque catervis,
Nec numero è tanto quisquam non sanus ad ades
Carpit iter geminas tollens ad sidera palmas,
Ore salutiferum tollens ad sidera FONTEM.*

Pluribus elegantioribusque carminibus hunc Calocerianum fontem celebrare atque illustrare iis relinquam, quibus cum Musis major amicitia, & familiaritas intercedit. Ego enim ab eis sum tam alie-

alienus, ne dicam averfus, ut vix de faciē illas no-
verim. Igitur eo sabbati die ad hunc fontem occur-
rit, ut dicebamus, maxima multitudo male se ha-
bentium, ac inter eos in primis, qui adversa oculo-
rum valetudine utuntur, quorum plures his loti
aquis, pro spei & fiducia ratione, è morbis eva-
dunt, ut contigit anno 1616. 15. Kal. Maji, qui
fuit idem dies sabbati sancti, quo adolescentula fe-
re nubilis, nomine Hieronyma Radaelia, Parœciæ
S. Stephani ad Nuxigiam domi Alexandri Sicci de-
gens, non minus fama miraculorum (si hoc tamen
nomine licet appellare gratias) quam efflatu permota
divino huc venit manu matris ducta; jam enim
annos quatuor oculis capta erat, quæ statim ac eos
lavit hujusmodi unda, videre cœpit, & ad octavæ
Paschatis finem rediit, pristina oculorum acie inte-
gre recuperata, ut si minus in referenda pari bene-
ficio accepto gratia, in prædicanda saltem B. Vir-
gini habenda, satis videretur fecisse. Induta autem
albis vestibus subter, supraque cæruleis ob hono-
rem sanctissimæ Virginis, à qua sospitem se venisse
sciebat, ad eam gratias, & vota persoluta reversa
est, & illam ego ipse vidi firma oculorum valetu-
dine utentem. An res hæc divino facta fuerit mi-
raculo meum non est judicare; sed Ecclesiastico-
rum Judicium, quibus nostram subijcimus delibe-
rationem, eorum judicio stamus non inviti. Si quis
vero curiosius conquirat, atque investiget causam
rationemve, ob quam ad fontem hunc pridie illo
Paschatis, ea hora, qua sonant campanæ, cætera-
que sonora in ecclesiis pulsantur, tam magnus fiat
concurfus eorum, qui prædictis ægritudinibus pre-
muntur, majorque numerus puncto temporis eo-
dem convalescat & sanetur: consideret primo, quis-
quis ille est, divina consilia adeo recondita esse, ut
vix indagari possint: mox non incongruæ rationes
eidem inquirenti, ingenique acie contemplanti
miros hujusmodi effectus, sese ostendent & occur-
rent. Etenim Piscina illa, quæ Hierosolymis vige-
bat Probatica nuncupata eo duntaxat tempore sana-
bat variis languentes morbis, quo cælicola descen-
dens ejus commovebat aquas: ergo & fons noster
haud ab simili ratione potuit eandem dimissam è Cæ-
lo vim habuisse pro eo tantum tempore: nam quem-
admodum ea quinque illis porticibus præfigurabat,
ac referebat, non tam Christum Servatorem per
quinque vulnera mortuum, sed illum quoque glo-
riosum magno terræmotu resurgentem, quinimo
& sacrum Baptismum ab eo institutum: ita hic fons
ab illa Piscina præsignificabatur, quia & Sancto-
rum baptismate sacratus, & ex eo Christi passi se-
pulturam per immersionem, & ejusdem gloriosam
resurrectionem per emersionem prænuncius liqui-
do apparet juxta illud Apostoli ad Romanos VI. *An
ignoratis, fratres, quia quicumque baptizati sunt in Chri-
sto Jesu, in morte ipsius baptizati sumus? Consepulti
enim sumus cum illo per baptismum in mortem: ut quo-
modo Christus surrexit à mortuis per gloriam Patris,
ita & nos.* Si ergo illa ægris medelam præstabat cor-
poribus solo Angeli aquas commoventis ministerio:
cur non magis hic fons, qui animi & corporis simul
abluit maculas, conferre corporibus poterit salutem
Angelo testamenti, ut loquuntur sacræ Scripturæ,
Christo Domino, tunc magno edito terræmotu,
resurgente? Ea tandem de causâ Ecclesiarum Præ-
sules in Sabbato Sancto solemne Baptisma consue-
verunt ministrare, campanæque pulsari ea hora ob
gaudium Dominicæ resurrectionis sacrum Bapti-
smum præfigurantis, qui non præterito tantum
tempore, sed semper animas sanare valet ægras, ut
major vis, & virtus figurati super figuram Probati-
cæ Piscinæ omnibus clarius ostenderetur. Ex his
judicare pro suo arbitrio quisque poterit, an con-
veniat rei veritati, nec ne, propositæ nunc quæ-

A stionis per causam probabilem, ejusque rationem
verisimilem jam allatam, dissolutio. Unum tamen
libenter notarim ex multiplici tabellarum numero,
in quibus visuntur miracula depicta, non obscure
colligi posse apud fontem hunc non semel, aut ite-
rum, sed sæpe ac sæpius divinam bonitatem ad pre-
ces beatiss. Virginis variis temporibus elargitam esse
hominibus infirmæ atque agræ valetudinis salutem
ac corporis bonam habitudinem.

B De hoc fano finem dicendi faciam, si pauca prius
de hac Confratria (ut vulgo dicunt) coloratorum,
& de Sanctorum Reliquiis, quæ hic reperiuntur,
dixero. Has laicorum sodalitates coloratis vestibus
utentes recentiores Disciplinatorum Confratriis esse
nemo ambigit, cum ex dictis in secunda Decuria
Disciplinatorum satis aperte constiterit Disciplina-
tos saccis indutos primos fuisse ad publicam poenit-
entiam introductos atque institutos: post aliquot
vero annos excrecente horum sodalitiarum nume-
ro ad distinctionem & varii instituti rationem dis-
colores usurpasse habitus, ita, quod prius erat do-
loris & poenitentiae signum, postea differentiae &
discriminis cœperit esse argumentum, & tandem
pompe atque luxus non leve tulerit indicium. Ha-
bent nostri Confratres diversam à Disciplinatis re-
gulam, aliquanto tamen latiore: amictum, quod
C insigne Confratriæ est, prius sortiti sunt rubrum,
sub sanctissimæ Trinitatis cognomento; post ni-
grum sub Mortis nuncupatione; postremo, ami-
ctu eodem retento, Mortis nomen cum cognomine
sanctissimi Crucifixi commutarunt, quod optimo
factum esse consilio ego quidem arbitror, ut si unum
mortis odiosum nomen amittere viderentur, alte-
rum retinerent, nobiliorem & gratiorem nuncupa-
tionem adepti. Et hæc de Confratria satis.

D Nunc sacras tantum subnotare Reliquias super-
est. Hæc multæ sunt, conditæ quidem prius in ara
antiqua interioris veterisque delubri, nunc vero ho-
neste repositæ in fenestella juxta altare majus ver-
sus sacrarium, suntque partim in lignea capsella ro-
tunda, partim in arca marmorea operculo item
marmoreo rite contexta: in illa quidem præter in-
numera ossium fragmenta, visitur os longitudinis
digitorum trium: in hac vero, quatuor parvis te-
gumentis papyraceis distincta, cernuntur varia os-
sium segmenta, & alia plurima confuse sparsa, in-
ter quæ tria ossium frustra non parva, scedulæ etiam
comminutæ apparent, quæ minime legi possunt,
una tantum excepta. Fuerunt ab Ecclesiasticis Su-
perioribus aliquando hæc visa, ac pro sanctis Reli-
quiis approbata.

E Hæc habui, quæ de antiquitatibus Fani D. Ca-
locero sacri litteris consignarem. Nam quod atti-
net ad dona cœlestia, quibus affici consuevere fi-
deles ad D. Caloceri undique confluentes, jam tum
cum ageretur annus MDCXVII. & etiam num hodie
afficiuntur in dies magis ac magis, ea me commo-
dius persecuturum arbitror in altera FLORILE-
GII nostri Parte, in qua præterea, Superioribus
Ecclesiasticis bene volentibus, complectar celebri-
tatem assiduam populi frequentissimi, qua Ædes
illa quotidie colitur, nec non & ingentem stipem
Deiparæ oblatam, cujus inibi effigies gratiis innu-
meris nitet, siquidem votis Deus annuerit, & otium
concesserit, quod optamus.

F Styli porro, quo duos postremos Fasciculos exa-
rare libuit, ut Operis forma justa esset, veniam ro-
gamus à Lectore nostro: cum enim Typographi
properarent ad metam, mihi quoque festinandum
fuit, ne desisterent ab incepto. Ea re factum illud
est etiam, ut minus esse debuerimus eruditi, quam
in primis octo Fasciculis extiterimus, ac ob id etiam
Scriptorum testimonia sine verbis eorundem in me-
dium attulerimus, quod aliàs non egeramus, ut
rem


rem ageremus, ubicunque deceret, tabellis, quod asserunt, obsignatis. Hæc igitur æqui boni consullet noster Lector, ut voluntatem erga se propensam & bonam, si minus res ac stylum, probare poterit.

Finem hic scribendi faciam, & primæ Parti FLORILEGII PRATI PAROECIAE VINCENTIANAE coronidem imponam, occupationum novarum turbinibus abreptus alio, ne alteram ejusdem FLORILEGII Partem in lucem simul edam. Ac licet queri mecum graviter videatur Paraphodochion nobis proximum, & annexum historico plane calamo dignum, quod se tacitum præterire silentio velim, de me tamen nullus ei erit expostulandi locus, si operæ novæ nunc parcens ea, quæ de eo hæcenus observavi, posterorum memoriæ transmittam, & in secunda FLORILEGII Parte peculiari *Fasciculo* includam.

A Aliarum Urbis Paroeciarum ANTIQVITATES singillatim scribere est in animo, si hæc D. Vincentii Paroeciæ benevolis Patriæ saltem civibus placere cognovero, stylo tamen alio ad vernaculum propius accedente, ut omnibus etiam Latinæ linguæ ignaris facere satis, vel certe aliquo modo inservire me velle apertum sit atque perspicuum. Quamobrem cum ad decimum *Fasciculum* pervenerit hæc prima Pars *Florilegii* nostri, veluti pari numero æquata duabus jam excusis Decuriis de honoribus Ecclesiasticis,

B *Contiseo tandem, factoque hic sine quiesco.* Præpotenti Deo in sempiterna sæculorum æternitate sit laus, & gloria, sanctissimæ Virgini Matri purissimæ beatitudo perennis, ac magnificentia, atque beatissimo Levitæ & Martyri Vincentio hujusce Paroeciæ tutelari Divo honor, decusque immortale.

F I N I S.



BERNARDI SACCI,
PATRITII PAPIENSIS,
HISTORIAE TICINENSIS
LIBRI X.

IN QVIBVS MVLTA SCITV DIGNA RECENSENTVR,
DE ITALIAE POPVLORVM VETVSTATE, DOMINIO,
ET MVTATIONE:

ITEM
DE PROVINCIARVM PROPRIETATE, ET ROM.
ECCLESIAE AMPLIFICATIONE, &c.

Quorum elenchum versa dabit pagina.

IN HOC OPVSCVLO HAEC PRAECIPVE REFERVNTVR.

SITVS ITALIAE, PARTES, ET PROPRIETATES.
ANTIQVIORES POPVLI EX TRANSPADANIS.
LIGVRVM VETVSTAS, ET GENTIS PRAESTANTIA.
LIBERTAS ET DOMINIVM CIVITATVM ITALICARVM.
CHRISTIANAE RELIGIONIS PRIMORDIA.
ITALIAE DEPRAEDATIONES, ET SVBJECTIONES.
REGNA ITALICA IN EXTERNIS CONSTITVTA.
LONGOBARDORVM ORIGO, ADVENTVS, ET REGNVM.
DVELLI INTRODVCTIO, ET CAVSAE OLIM ADMISSAE.
DOMINIVM ROMANAE ECCLESIAE IN ITALIA.
BONONIAE ET FERRARIAE INCREMENTA SVB ECCLESIA ROM.
REGNVM LONGOBARDORVM IN CAROLVM MAGNVM TRANSLATVM.





CLARISSIMO AC PRAESTANTISSIMO J. V. CONSULTO
D. POLICTONIO MEDIOBARBO,
REGIO DVCALIQUE SENATORI ILLVSTRISSIMI
MEDIOLANENSIS CONSESSVS,
HIERONYMVS BARTOLVS
S. D.



INDVXIT nostra ætas morem, Vir celeberrime, ut liceat Impressoribus in prima uniuscujusque novi operis editione labores suos amicis, summisque viris dedicare: quem morem artis meæ jure observare cupiens, quæsi diu, nec inveni, quod dignitati tuæ aptum foret: nunc tandem excusso à me opere Ticinensis Historiæ, cujus copiam etsi Auctor ipse Romæ olim pluribus peritis viris fecit, præcipue Reverendiss. Bernardino Cocio Cardinali Trannensi, & Antonio Massæ Galefio Romanorum Advocatorum primario, ac Marco Lauredano Veneto patritio, Episcopoque eruditissimo, minime tamen opus ipsum Typis Impressorii subjecit, existimavi negotium istius impressionis meæ opportune tibi dedicandum fore, tum quoniam Patriæ tuæ primordia longe apertius explicata, & quasi à vetustatis consumptione eruta agnosces, tum etiam quoniam Austriæ nobilissimæ gentis originem, à materno deductam genere, repeti iis scriptis ac nobilitari antiqui Regni elogio senties: cujus quidem Austriæ gentis, nobis imperantis, cum tu, genusque tuum semper obsequens esse, ac illi inviolata fide subservire studueritis, gratum similiter tibi futurum censui præfens munusculum, in quo ipsius gentis comprobatur Imperium, Regnumque, ab antiquis Patribus divinitus prævisum. Sume igitur prompto animo, quod tibi pro artis nostræ primitiis destinatur munus, & in clientulorum tuorum cœtu me colloca, ac serva. Vale. Papiæ, Januario mense incipiente, M D LXV.

BERNARDI SACCII
DE DIVINAE RELIGIONIS
CONSTITVTIONE ET AMPLITVDINE
P R A E F A T I O.



NULLA major virtus, ac honorabilior optari ab homine potest, quam mentis Religio, qua divini boni initium, & pars præcipua est, erigens nos ad paranda nostræ infirmitatis adminicula, quibus anima immortalitas salutem & claritatem habeat, nec in divina ultionis periculum hic versando incidat. Quam quidem virtutem contemplatus, minime me idoneum ad scribendum de ea pro ipsius dignitate putavi, quoniam Divina virtus altiore, quam meo, ingenio atque eloquio celebranda esset. Verti itaque animum, viresque seniles, ad leviora onera meis humeris imponenda, scribereque institui de loco, & gente, ubi primum apud nos Religionis cultus & splendor enituerit, suoque fulgore innumeros populos illustrarit, & in eandem Religionem fidemque pellexerit, clarum illum Principem imitatus, qui Dei Maximi numen perhorrescens, ipsius Dei Templum subire ac revereri dignum censuit, sic etiam canens:

Domine dilexi decorem domus tuæ,
Et locum habitationis gloriæ tuæ.

Locus autem Divina Religionis apud nos Roma in primis fuit, & gens ipsius urbis incola, à qua in Occidente & Septentrione diffusa passim Sacrosancta Religio est, nostris olim ignota majoribus. Quod mirabili rerum ordine factum apparet, ut qua prior civitas Imperii caput fuerat, priorque vivendi leges ediderat, ac sua amplitudine communis patria effecta erat, prior etiam lucem Divinitatis adpiceret, teneret, ac finitimis gentibus communicaret; & ipsius communicationis gratiâ communis pariter statio omnium Christianorum, qua Ecclesia Grace, Latine Congregatio est, fieret, ut tandem Orientalium Imperatorum excusso jugo facta est. Ad quod denique opus convertens, ut dixi, animum, sentio me infuero oneri subisci atque alligari, ne ab aliis scripta & vulgata aliquorum exemplo rescribam, sed ut nova omisissaque depromam, & qua vetustate quasi consenuerant, novo cultu expolire incipiam, quod an perficere queam, dubitare magis libet, quam promittere.

Summam autem, Deo auspice, initium ab Italia descriptione ac quinquipartitione, referens situm, Regiones, & proprietates à natura insitas, item antiquos Populos tam Italia originarios, quam peregrinos, quorum initia rescire Præscorum sedulitas nequivit; addensque subinde, quibus modis ab illis antiquioribus, isti qui vigent, prodierint: qua omnia in prioribus quinque Libris Operis mei complectar. Ad quos quidem legendos si quis accesserit, unum hoc sciat. Cum ego Gispadani, vel Transpadani agri, & populi mentionem fecero, [referre prospectum oportere ad urbem Romam, Italia & Christiani ovilis caput, ubi hac scribebam Julio Tertio sedente, & Paulo Caraphæo subeunte, Marcello Cervino vix viso, cerva velocius illius effugiente vita. Colligam denique in posterioribus quinque Libris tempora & res præclare gestas in Italia, præcipue circa Religionis nostræ constitutionem ab Apostolorum obitu usque ad Caroli magni Francorum Regis adventum, à quo Longobardorum Regnum Francia adjectum ea ætate fuit; relatis ex ordine civitatum eversionibus, ac gentium multitudine ac varietate ipsam Italiam tunc affligente: qua deinde gentes uno & altero vix exacto seculo esse desierunt, nostra semper repullulante fide ac Religione.

Quibus explicatis finis aderit, hoc ex meo labore commodo lectori oblato, quod intelliget, nullam prorsus Regnis ac principatibus subesse stabilitatem Divino adversante numine; Divinumque adversari numen plerumque illis Populis, à quibus justitia, atque Religio rejecta fuerit: & ne mihi in iis colligendis nomen arrogarem, modestiam sequens, Ticinensem Historiam, id est, Ticinensis hominis scriptionem librum nuncupavi, Patria potius quam mihi laboris mei præmia impendens. Valeat quisquis hæc lætitaverit; in quibus si quid fortasse minus aptum deprehenderit, illo omisso folio gratiora excipiat, memineritque nullum tam opportunum demitti e cælo imbrem, qui alicui imparato gradienti caput non madefaciat, atque displiceat: difficillimumque esse in opere texendo ac componendo unicuique morem gerere, ingeniorum concordia raro emergente, discatque ex ipsius naturæ operatione segeti sæpe immixta gramina inviti colono ex agro sponte prodire. Roma, anno M D LVII.

BERNARDI SACCI,

PATRIITII PAPIENSIS,

HISTORIAE TICINENSIS

LIBER I.

CAP. I.

De Italia situ, & diversitate.



OMNIS Italia in quinque partes hodie à natura divisa conspicitur, quarum altera plana est, interlabente Pado, partim montibus, partim Adriatico sinu circumsepta: alia pars huic finitima Montana, sive Apenninica, dici ab Apennini montis vastitate & ambagibus potest; qui ab Alpium lateribus in Ligustico tractu incipiens, & per Etruriæ & Umbriæ oram insurgens, immensisque flexibus Picenos à Septentrione, & Latinos à Meridie pertingens, bicipiti cornu porrigit sese in Apuliam, altero quidem cornu ad Mare Adriaticum in agro Sipontino, sive Manfredonico, desinente, & altero in Calabriam tendente. Tertia pars Cisapenninica appellatur, relatione habita ad urbem Romam, olim Europæ caput. In qua quidem parte, magna pars Etruriæ, Latium, Campania, & regni Neapolitani regiones, citra Apenninum sitæ, continentur, Mediterraneo mari à Meridie exteriora latera ambiente: & quibus demum in regionibus minime omnia plana sunt, sed montosa plurima fructiferis passim collibus, speciosisque vallibus conspicua. Quarta pars orientalis est inter Apennini cornua & mare posita, Apuliæ & superioris Calabriæ circuitum colligens, & Adriaticum à Septentrione attingens. Quinta & postrema pars insularis est, ut Sicilia, & cæteræ insulæ Italiæ vicinæ, quæ tametsi situ ab Italia divisæ sunt, moribus tamen, institutisque, & lingua, Italicæ perhibentur. Nunc, quæ similitudo ac dissimilitudo inter has partes vigeat, videamus.

CAP. II.

De Insulis.

INSVLAE, tanquam in Meridiem atque intra pelagus porrectæ, æstibus etiam magis subesse quam Italiæ continens videntur, argumentoque est ignis in Sicilia, & in altera proxima Insula continuo à terra exhalans: attamen quoniam ipsæ insulæ ventorum flatibus circumquaque patent, nonnihil interdum aura ab aliquo latere spirante refrigerantur, qua cessante, caloribus æstate urgentur, præcipue ii, qui æqualia & humilia loca colunt. Hyeme vero omnia Insulana tepidiora sunt, & plana ipsa longe calidiora, quam in alto sita iccirco probantur, quia à ventis minus perflantur.

CAP. III.

De Cisapenninica Italia parte.

IN Italiæ continenti duo sunt à natura constituta discrimina, quibus singulæ partes inter se differre probantur: unum est à cæli climate, alterum à terræ, marisque situ. Cæli enim climate Cisapenninica pars à Liguriæ montibus usque ad Rhe-

Bgium, Calabriæ urbem, tota fere spectat in Meridiem, & meridionali plagæ directius ac propius subjacet, quam Apenninica, & plana Italia: quod non solum orbis descriptio à peritissimis viris facta, sed ipsius Solis, umbræque dimensio probat: nam sub Meridie æquinoctialem umbilicus sive obeliscus longitudinis novem unciam, ad Solis radios Romæ expositus atque directus, octo tantum uncias terræ adumbrabit. In altitudine itaque novem unciam sub æquinoctium, Sol in hac parte spaciosius terram occupat una uncia, quam in aliis duabus partibus, in quibus eadem mensura parem Solis & umbræ portionem refert, præcipue Venetiis, ut Plinius affirmat, libro ii. *Naturalis Historia*, cap. LXXII. & libro vi. cap. xxxiv. de Roma & Venetiis diversa enarrans. Si ergo æqualitas, alibi deprehensa, probat inæqualitatem mensuræ in hac parte esse, ac majorem Solis quam umbræ occupationem fore, nemini dubium est, inæqualitatem ipsam à majori hujus regionis propinquitate, quam ad Meridiem habet, procedere: & cum sit propinquior, necessario etiam est caloribus subjectior. Quam quidem subjectionem multo amplius augeat vicini maris Mediterranei apricitas, qua patet aditus Austro meridionali vento, vulgo *Marino* appellato, à Solis itinere, unde exit, irruendi in hanc regionem: ille enim pelagus transiens, natura commutata, humiditatem à mari attrahit, planisque locis Latii & Tusciæ, quocunque illabitur, caliditatem à Sole conceptam cum suscepta à mari humiditate infert, ut auctor est Hippocrates libro ii. *de Dieta*, his verbis scribens: *Ubi vero pelagus transit, &c.* Qua ex re maritimi populi meridionalis oræ, plana loca incolentes, plerumque morbofi fiunt: & morbo etiam non subeunte, lividi tamen, & pallidi, aut fusco colore adspiciuntur, & ante tempus senio conficiuntur, ut in Liburno, Plombino, Orbetelloque oppidis, & Civitate vetula, Portu, Ostia, Portiano, Porciliano dicto, Antio, Neptuno, & similibus. Altiora autem loca, pari rectitudine ac propinquitate in Meridiem porrecta, minime eo modo, ex hujus ventu incesu, morbosa fiunt, quia, ut idem docet auctor, situ ipso sicciora sunt, quam plana & campestria, cum sint elevatiora, ut est montana, maritimaque Liguria, Cajeta, Neapolis, & aliæ, quæ loci altitudine à mari eminent, pendentque situ, nec imbres, caliginemque, nec subvectam ab Austro humiditatem retinent: & ex qua demum eminentia ac declivitate contingit, ut facilius à Sole & aliis circumambientibus ventis perlustrari & purificari possint, quam humilia & depressa oppida. Quiescentibusque etiam ventis, ac vigente æstu, sublimia loca puriorem aerem à natura sentiunt, nocturnumque umbris magis refrigerantur, quam loca æqualia: & propterea fructus arboreos elegantiores etiam ac sapidiore emittunt; ut ipsa Cajeta probat: & è contrario Ostia vix paucos melones ex se præbet, quibus tamen longe præstantiores sunt Sarmonetæi. Item à mari remota loca & collibus, ab Austro tuta minus, ab ejus incesu læduntur, etiam circumeunte flatu, ut probat pars Romæ post montem Tarpejum, sive collem Capitolium, ja-

jacens, ubi Divi Marci templum, inchoatæque ædes manent; in quas commigrare Romani Pontifices, Vaticano relicto, ætū appetente solent. At earum amplitudinem in probato rei commodo nemo perficit.

Minime vero idem evenit Transiberinæ regioni, aliisque urbis vicis, Austro expositis, ubi pauperiores habitant: pallent enim, quasi morbo vexatæ inquilinorum facies, filiique impuberes squalidi, & decolorati, in ipso ætatis flore cernuntur, Austri malitia aperte eam oram facessente: hinc Plinius libro II. de natura ventorum, scribit, eo flante accidere, ut animantes minus esuriant; cujus sententiæ ratio apertius patefacienda est. Flante Austro hyeme, & æquinoctiali tempore, aer humidi & calidi qualitatem fumat, ex qua in eo conflatur crassitudo: quæ quidem aeris crassitudo, per anhelitum attracta, replet plerumque corpora humido, calidoque superfluo: (nisi magna siccitas alicui à natura insit, is enim minus ab ea lædatur) superfluitate igitur corpori invecata cessat cibi appetentia, ipso videlicet stomacho repletionem humoris aerei præter naturæ rationem laborante: nam puritas aeris nobis apta est à natura, cujus contrarium est impuritas, vel crassities. Doctiusque nostro Plinio Græci scripsere, spirante Austro impurum aerem effici, quo per ora & nares attracto fit læsio in cerebro, ejus constitutione ad intemperiem versa. Quod non solum hominibus, sed etiam pecudibus, caprisque contingere, inquit quidam peritus vir, qui de morbo sacro librum composuit, Hippocrati adscriptum, cujus negatur esse: (alio enim modo scripsit de eo morbo Hippocrates in postrema parte libri *de flatibus*) æstate vero Austro raro die noctuque spirat, sed à meridie tantum usque ad noctem, ideoque nubes non movet, sed molestum, gravemque calorem infert. Ab eadem etiam aeris crassitudine, vel impuritate, ore vel naribus excepta, & in pulmonem demissa, fit tumor in ventre, morbi que creantur, quos referre longum esset, & ab historia alienum. Nunc alterum discrimen explicare aggrediar.

C A P. IV.

De Apennino monte, & ejus objectu.

ALTERVM discrimen positum à natura in Italia, est Apennini jugum in cælum tendens, verticeque nubes scindens, & brachiorum anfractibus plures regiones includens, excludensque, atque dispartiens, & incurva latera tum ad Aquilonem, tum ad Meridiem, tum ad Orientem diversimode locata habens, atque ex sese hinc & illic rivos, torrentesque, ac vasta flumina fundens, gignensque, sua altitudine pluribus in locis perpetuas umbras, à quibus frigora manant, & quibus demum exceptæ nives hærent rupibus, & diuturnæ fiunt, & in aquas, glaciemque, versæ, caniculares dies expectant, & sese efferri ad Principum convivia in spectaculum sinunt. Quo quidem discrimine fit, ut Cisapenninica, de qua scribebam, pars minus aquilonaribus ventis pateat, minusque ab eis æstate pertingatur, quam si ipsius montis cacumina non intercederent, omniaque plana essent: raro enim ii venti, quando urgente æstu leni aura spirant, in hanc partem permeant, ipso videlicet Apennino auræ lenitatem excipiente. Cum itaque meridionalis pars Italiæ Aquiloni æque non subjaceat, sicut subjacet Meridiei, multiplici causa calore torretur; cæli, ut dixi, climate ad æstum inclinante, marisque vicinitate à Meridie Austrinos turbines admittente, item Apennino Aquilonares auras sæpissime intercipiente: postremo ipso similiter Apennino, aliisque conjunctis montibus, Solis æstum, & meridionalis venti flatum, in subiectam planitiem Latii & Etruriæ retrudentibus ac

comprimentibus. Qua idem ex re majores in ea fervores æstate excitantur, quam si apertis & æqualibus campis sine ullo montium objectu venti utrinque cominearent: repercussio enim caloris tam à Solis radiis quam ab Austri tempore emissi, montium objectu facta, auget caliditatem aeris in regione, intra quam æstus compellitur: hinc gigni sulphur & alumina intra montium viscera prope mare Mediterraneum clarum est. Ignem quoque è terra emissos nostra ætate prope Neapolim omnibus constat, natura scilicet conceptum fervorem intra terræ concava diutius continere nequeunte, & igneos aliquando flatus evomente, quod in aliis montium lateribus, ad Adriaticum & Septentrionem versis, in continenti Italiæ æque non contingit. Fontes quoque non alia causa quam insiti caloris ratione sulphureum odorem & acetosum prope Romam ebulliunt, & pluribus in locis calore fervent. Quid memorem naturæ miracula ad Ostiæ stagnum edita, anno à partu Virgineo, millesimo quingentesimo quinquagesimo primo, quo quidem anno flante mense Augusto fere continuis diebus Austro à meridie usque ad noctem, nimio æstu stagnum in circuitu maxima ex parte exaruit, limusque, ab aquis paulatim secedentibus destitutus, per viginti dies salem edidit, rore videlicet falso sub matutinam lucem in candidum salem verso, cujus vel magnam quantitatem Porcianenses, me spectante, legerunt, servaruntque. Solius enim caloris vehementia, marisque vicinitas, hoc efficit.

C A P. V.

De Orientali Italia parte, in qua præstantes equi gignuntur.

ORIENTALIS pars Italiæ regno Neapolitano adscripta, ubi Apuliæ & superioris Calabriæ opes late patent, majore æstu ac siccitate urgetur, quam Campania & Latium, quia Orienti propinquior est, præcipue Apulia, quæ magis sinuoso litore orientem Solem æstivum & hibernum excipit, quam Calabria, & Aquiloni quoque ab Adriatico patet, quod ejus siccitatem interdum auget. Utraque vero mare ab Oriente, & montium rupes ab Occidente habet, qua ex re orientis Solis radii in montium altitudinem inflexi, similem caloris repercussionem edunt, sicut in Meridionali diximus. Quid, quod etiam in Apulia montium cornua, brachiave in Orientem extenta, longe majorem caloris rejectionem in ejus planitie excitant, quam in Latio, Sole videlicet in meridiem adscendente, ac matutino, æstivoque calore cum meridionali æstu per montium reverberationem conjuncto & continuato: à qua continuatione, æstiosa, sitibundaque fit Apulia, universa planitie ante finem mensis Maji pene exusta. Additurque aliud siccitati malum, innumerabilium muscarum infestatio, quod suis carminibus noster testatus est Virgilius, *Georgicorum* tertio:

Est lucos Silari circa, ilicibusque virentem

Plurimus Alburnum volitans, cui nomen asilo.

A qua re manasse popolare proverbium constat, *Quisquis inferni pœnas subire tentat, æstatem in Apulia, hybernum circa Aquilam agat.* Flanteque æstate in ipsa regione Austro vina in vasibus mutata bonitate resident, passimque flaccescunt. In tanta tamen rerum molestia, pabuli præstantia celeberrima est, vinique, & olei, ac tritici, & amygdalarum, & aliorum fructuum copia, tum à soli fecunditate, tum à situ Orientalis oræ maxima provenit; qui quidem oræ respectus in Orientem maxime probatur ab Hippocrate in libro *de aere & aquis*. Hujusque regionis pabulum, hac ipsa ratione, equino armento est aptissimum, tam ad pulorum proceritatem, quam ad robur constitutum, ideoque ejus provinciæ equi, optimi bellato-

tores sunt, ævoque diuturniores aliis Europæ equis. Nam septimo ineunte anno finem corpori incrementi recipiunt, ut Plinius etiam *libro VIII.* de natura equorum innuit, & quartodecimo anno labori probe sufficiunt, ac diligenter curati vigesimum annum excedunt, præcipue ii, qui albi ac maculosi sunt, vulgo à muscarum similitudine, *Muscati* appellati: albos enim, vel albicantes, nigrosque unicolores, plerique improbant, nisi pede, fronteve, aut juba, lineaque à dorso ad caudam tendente, aut alio modo diversam à reliquo corpore notam habeant: magnoque in precio rubri insigniti præter alios censentur, quos Virgilius *Spadices*, equorumque magistri *Bajos* vocant. Sed cum de equis quæritur, probatio in domito signis est præferenda: in indomito autem alia sunt potiora spectanda, quam signa, quorum conjectura sæpe fallax probatur: quæ quidem potiora sex videntur, corporis aptitudo, sive proportio, sanitas partium, edendi promptitudo, & emittendi oportunitas, cujus contrarium est facilitas, hebetes corporis vires indicans, & agilitas gradiendi, quæ corporis aptitudini antefertur, & mansuetudo in pertractando, nam nimia & insueta feritas domino, aut servo, infesta erit. Pascuntur autem equi in Apulia æstate in vallibus opacis, & montium lateribus in Septentrionem versis, & ad algida Apennini juga traducuntur; hyeme vero in planiciem descendunt, & per campestria, sive per apricos colles, sine stabulis & tecto, die noctuque vagantur, separatis inter se gregibus, quibus pulli à matribus, femellisque, longe ablegantur, ne, sexus agnitione percepta temere, in amores ruant, & libidine enervati, frustra deinde inter armenta torpeant: quæ omnia ut servari oporteat, primus inter Latinos Varro, in libris *de Re Rustica*, doctissime scripsit. Ingruente autem per hyemem procella sub ilicibus sese recipiunt, quarum copia & proceritate Orientalis ac Meridionalis plaga referta est. Est autem ilex glandifera arbor, durior quercu, & ramis extensior, patula cacumina formans, foliis semper virentibus ac duriusculis, ita ut eorum densitate ac firmitate pluvia ab arboris caudice procul arceatur, ac guttatim per foliorum ordines in circuitu margine decidat: insuetoque nonnunquam frigore, aut pruina, exustis herbis, pastores ab ilice pro pecoribus alimenta petunt, aut glandibus excussis, aut detractis frondibus, gregique subministratis, tantisperque hoc alimenti genere turmas nutriunt, donec adveniente vere aer tepescat, herbasque reponat. Tegmen itaque hæc arbor & cibum glande, & frondibus, cogente procella, aut gelu, animantibus præbet, una cum aliis pluribus arboribus, atque fruticibus, quæ hyeme virent foliis, nec brumæ gelu comas amittunt, ut suber, myrtus, lentiscus, Marci Tullii versibus decorata, oleaster, & unedon, cerasus marina vulgo habita, atque in dubio à scriptoribus relicta, sit ne mas, an foemina. Et quæ quidem arbores, fruticesque, à nostris regionibus sunt alienæ.

Quid de Calabria scribam, cujus pars sicut prior omnium Græcum genus nomenque recepit, ita etiam postrema retinet, Græcis adhuc ritibus, institutis, literisque, utens, Divina celebrando sub Divi Basilii religione & cultu, nomenque Calabriae solam Græcitatem repræsentat. Hæc provincia aere puriore fruitur quam Apulia, pabuloque ac omnium fructuum genere feracissima est, suavesque laudes in pecoribus, equitioque armento, non inferiores habet, quam Apulia, nisi quod staturae magnitudine Apuli Calabris supererminent, sed itineri faciendo Calabri aptissimi sunt. Estque ipsa provincia minus æstuosa quam Apulia, minusque etiam, & muscarum frequentia, ac volitatione, infamis. Quamvis enim Orienti directo pateat, minus tamen flexuosum littus maris ad Orientem

A habet quam Apulia; & Sole insuper meridiano ad occasum declinante Calabria æstu æque non premitur, ipso videlicet Sole post meridiem montium vertices transcendente, & magnam ipsius regionis partem, superiorem nuncupatam, pomeridiano occiduoque descensu levius adurente, à quo Solis occasu percoqui homines ac infirmari, notat idem Hippocrates in eodem libro *de aere & aquis*. Hinc puto evenire, ut in Calabriae superioris vallibus ex innocuo calore roris perfectio fiat, mannaque gignatur, quod omnibus præfertur. Ros, aeris ficitatem caliditatemque puram concipiens, facile à natura condensatur, mannaque efficitur, ac collectum servatur; purique aeris indicium in Calabriae parte Apulis finitima Croto exhibet, aeris puritate à scriptoribus commendata, tametsi urbs ipsa mare vicinum ab Oriente habet. Ventus enim Orientalis, sive Subsolanus, (ut naturæ ratio pateat) nubifer quidem est, sicut Auster, attamen caliditate differt ab Austro, quia Subsolanus exit ab oris, ubi Soli perpetua statio esse nequit, ipso quidem Sole ex naturæ ordine accedente, recedenteque ab Orientali meta æstiva, & hyberna, & per oram meridianam continuum transitum faciente, & ideo pluviam cum frigore effundere Orientalis ventus solet, Auster vero contra, in his, de quibus scribo, regionibus.

C A P. VI.

Communia utriusque Regionis & Roma propria.

PLURIA esse tam Meridionali quam Orientali Italiae parti communia, pluraque etiam alteri tantum, & non utrique propria, clarum est: quæ tamen propria cum communibus simul colligam. Aeris inprimis tepor sæpius quam frigus in hyeme per diem, calor in vere & autumnus, humorque noctium in his regionibus ad planitiem tendentibus durat, raroque frigoris vis potest esse diuturna: quod uno carmine noster complexus est Virgilius*.

Hic ver assiduum, & alienis mensibus æstus.

Imbres hic pro nivibus sunt, lenes tardæque pruinæ vix in fine mensis Novembris terram operiunt, conspectæque defluunt. Nix si contingat, pro insueta habetur, nec omnino diu in planis moratur, stupent animantia, ea visa, agnoscuntque per pabuli operimentum, sibi ipsis in victu impedimentum à natura fieri, ideo sese invicem mirantur, moerentque similiter, ac vagantur incerta, inquirentque longo itinere, num ipsa terræ facies eodem operimento alibi etiam lateat. Sole deinde perlucante, aut flante Austro, nix simul ac pecorum moeror uno tempore, unoque die, plerumque solvitur, repetuntque sua pascua oves, bovesque: sed caprarum alia est ratio, nihil ipsæ nivis adventum pertimescunt, invadunt scilicet frutices, & super incurva arborum brachia saliant atque contendunt, frondesque & lenta genimina mandunt, famemque depellunt, cæteris pecoribus tum frustra albicantem terram pedibus oreque tentantibus. Grando etiam, & tonitrua, fulguraque frequentissime hic hyeme è cælo emissa audiuntur, quæ in aliis Italiae partibus aliorum temporum, non ipsius hyemis, propria sunt. Denique ab autumnus, usque ad æstatis ingressum, omnia in his partibus læta tibi atque suavia arriident, nisi cum flante Aquilone vis frigoris infertur, aut atra caligo tenebras effundit, lucemque adimit: frondosæ hic arbores virent, in quibus olentes gratique flores, deinde sub frigore rubentia poma è ramis pendent, quæ te non legente sponte decidunt, puerisque pro jaculis sunt: avicularum turmæ, à montibus in hanc planiciem evolantes, cantu & volatu myrteta petunt, lu-

* Georgic. lib. II. v. 149.

dunt.

duntque sub frondibus, ac colludendo & cantando in laqueos incidunt, prædæque ac voluptati dominis sunt.

Confluuntque undique Romam Italici populi, suæque armenta, greges, & opestaro gressu simul trahunt, locantque per agros. Galli quoque, Germani, Hispani, Lusitani, Britanni, Anglice, & Belgæ, sive Flandri, Poloni, & alii externi viri Romam adeunt, & in unum populum coeunt, sedesque implent. Judæa quoque suam regionem ac Synagogam habet, angusta tum apparet Urbis amplitudo, ex populorum frequentia, strepunt passim artifices, suæque negocia exercent: dissonæ ubique voces, linguæque exaudiuntur; Græcum ille vinum, ab Hithia, aut Soma evectum, hilariter bibens, Germanice subinde alta voce canit: alter jampridem pransus Gallicum carmen edit, pulsant alii nervos, levique manu ac cantu cœtum convocant, ac plebejis hominibus pro certis incerta affirmant, stipeque exacta vendunt inania verba: omnis hic natio, & omne hominum genus, sua collegia, sua loca & conciliabula, suoque Rectores habet, & una demum Roma plures tibi uno adspectu gentesque moresque repræsentat, omnesque in ea, tanquam in patria, suis legibus & ritibus vivunt, ludunt, effundunt, inopes fiunt, ditantur, & appetunt, infaniunt in tempore nonnulli, temporeque resipiscunt: panduntur tum curiæ, & judicia, cancelli, & tribunalia aperiuntur, vigiles scriptores ad subsellia redeunt, scriptitantque Regesta. Divina & humana statim quæque diebus celebrantur, Romano Pontifice pro Throno sedente, ac Purpuratis fratribus una circumfidentibus, & Regum, ac Rerumpublicarum, Principumque Legatis ex ordine dignitateque consistentibus, unde *Consistorii* nomen manifeste dicitur. Venus quoque sub hæc tempora suas vices, suæque spectacula, habet, & sine amore esse Roma nullo modo potest. Curiales itaque sese ostentant, foeminæ corporis venustate ac ornatu comptæ, quæ visæ ignotos simul ac notos alliciunt, nugisque & illecebris raptos detinent, & longa sæpe expectatione frustrantur, aut bonis expilatos pilis quoque denudant, pluresque interdum ex stultis insanos faciunt. Et vice versa, illa quæ inter alias sese providam & cautam censet ac proficitur, prima omnium nonnunquam effluit & implicatur: & dum eludere adolescentes cogitat, ipsa prior cluditur ac deridetur.

His igitur, aliisque varietatibus referta Roma, gratam plerisque stationem tam insipientibus quam sapientibus hoc anni tempore exhibet, sive quis urbem colere, ac in foro curiæque versari, ociumque, vel negocium sequi, sive in agro, aut pascuis, vineisque opus facere maluerit. At ubi æstas advenerit, messisque triticea ab agro abducta fuerit, & terræ facies, operimento denudata, Solis radios perceperit, tum mutari pleraque ac in contrarium verti videas. Omnia jam nimio calore æstuant, aer quasi igneus fervet, aquarum rivuli languent, calentesque, & insuaves fiunt, terra scissuris confracta viscera pandit, hiatque calore ac siti: nulla tum in agro jocunditas, nulla voluptatis species relicta est, ipsaque operariorum frequentia dilabitur, ardor vehementius invalescit, & urbis vicos tectaque incendit, pulvisque infertur ab aura, aut ab Austro in orbem sublatum, longoque turbine everfus. Jamdudum tum sunt ab agris abacta pecora, & in Apennini valles transmissa: Nursini, Aſculani, Peligni, Aquilani, Reatini, Sabini, Umbri, alique, montana & transmontana colentes, in sua sese rura oppidaque recepere, Romam, Neapolimve, nulla jussione, nullaque ratione, invisuri, nisi subeunte autumnino, crocoque prius è suis agellis collecto: Volsci tantum (durum hominum genus) in agris remanent,

A explicatisque equarum catervis trituræ seminudi ac femiusti à Sole incumbunt. Justitium in urbe publica lege litibus indicitur, silent tantisper caufidici, manusque ociosi continent: Gymnasia clauduntur, nemo fere in Campofloreo, aut in Pontis quinquivio, sub meridiem apparet, subtrahunt sese omnes à meridiano æstu, simulque etiam à labore declinant, & opaca loca quærant, cœtusque in eis ac fermocinationes celebrant, ocium tum passim quiesque probatur, à qua quidem quiete Physici notant, corpori frigiditatis lenimentum, æstate innocuum, induci, ac naturam juvari. Inſectæ tum exsurgunt muscæ, aperta que invadunt atria, ac dominarum facies importunæ petunt, & flabro etiam abactæ redeunt, ac invisæ, pullæque per angulos circumvolant. Cicada quoque, ex arbore lugubre carmen rauco stridore sonans, molestiam nobis auget, & dum illa per noctem stridula voce filet, aliud sese nobis tædium longe majus exhibet. Prodeunt in tenebris infensæ Cicindulæ, vulgo *Cicinfula* dictæ, quas ego vel *ſucindulas*, à fugendo, vel à vocis *zincino* stridore *cincinulas* scribendas putarem; hæ enim insectæ vix cubili illato lumine simul adsunt, ac summiſſo sibilo improbo osculo nobis dormientibus insident, inflictoque fronti vulnere, humano cruore saturæ, sub lucem abeunt, latentque rursus, nocte reversuræ.

B Gloriare nunc rerum tuarum magnitudine, Roma, quando tantillum animal noctes tibi tuisque Patriiis infestas facit, bellumque sine telo ciet. Monet nos naturæ auctor Deus per infirmiora ipsius naturæ discrimina, infirmitatis humanæ in ipsa honorum serie ac majestate meminisse oportere. Major insuper molestia huic tædio adjicitur, aerisque gravedinem auget, stipularum & pascuorum ambustio, quæ in agro Romano Augusto incunte fit, ut æstivæ herbæ à Sole arefactæ incendio absumantur, locumque renascentis sub autumnum herbulis uberiores præbeant, pascuaque pinguiora ac lætiora fiant. D Æther tum simul ac terra flagrat, ignis pernecitate longe lateque vagante ac ventorum impulsu à meridie invalescente. Nimbibus tum etiam fumi in altum tollitur ac spargitur, urbis sæpe tecta obumbrans, foedoque spectaculo ac foetore vicos fumigans. Quisquis ergo salutem studet, ac sibi suisque prospicere pro opibus potest, Roma excedere ante has molestias debet; quemadmodum plerique nobiliores, Neapoli degentes, faciunt, qui urbe relicta ad suburbanos colles, & opaca rura, aquis fluitantia, æstate divertunt. Corporis enim virtus, quæ temperie constat, satis superque lassatur æstu ac premitur. Alio itaque postea ei superadjecto incommodo in aperto discrimine ponitur.

C A P. VII.

De Agri Tusculani differentia à Romano.

F INTER naturæ propria hoc etiam præcipuum est, plurimum differre locum à loco ex situs diversitate: quod non solum in regionum amplitudine, sed etiam in locorum angustia intra stadii spaciū, verum esse docuit Hippocrates in libro de aere & aquis. Ego itaque naturæ propria inquirens, inesse Latio aeris diversitatem perspicio, atque ut Tiburtinum agrum & alios omittam, Romanis campis finitimos, aereque longe præstantiores, ab uno Tusculano tantum naturæ experimenta petam, ubi Frascati olim vicus, nunc oppidum, & elegans Cripta ferrata jacent, in quo Monasterio Græco sermone & ritu Divina celebrantur. Distant ab urbe hæc loca decem millia passuum, & à planitie Romani agri duo millia. Inter planitiem, & Criptam ferratam, Frascatamque, exstat Burgetum oppidum, hac ætate desertum, una tantum

taberna, eaque infelicissima, superstita: quod quidem oppidum mille passus à Cripta ferrata distat. Situs autem utriusque ita se habet: Cripta ferrata in eminenti planitie posita Orientem spectat; Burgetum situm est in clivo, ad Occidentem verso, prope planitiem agri Romani: inter Burgetum & Criptam ferratam antiqua sylva per stadii latitudinem clivum occupat; ab ipsa sylva Burgetum versus, id est, ab Occasu, aer, & aqua est insuavis: cujus rei causa oppidum destituere omnes inquilini, assiduo morbo perciti, jam diu coacti fuerunt. E contrario autem à sylva ipsa Criptam ferratam versus, hoc est, ab Oriente, & à montis regione, aer ibi amoenus, innocuusque die ac noctu patet. Aqua etiam à fonte in medio pratorum saluberrima manat. Rationem hujus diversitatis in eodem clivo admiratus Paulus Tertius Pont. Max. in rem præsentem profectus nullo modo reperit; quam ego quoque inquirō. Burgetum sulphureum foetorem haurit ab infami & perniciofa fovea exhalantem, quæ *Sulphurata* dicitur, & in planitie agri Romani sita, parum ab ea distat. Qui quidem foetor, spirante occidentali vento, directo flatu in Burgeti oram infertur; sed minime ipse foetor sylvæ locum, clivumque transcendit, quod experimento unicuique patet: nam si ab hac sylva egressus in prata Criptæ ferratæ, Monasterio propinqua, gradum feceris, orientalis plerunque aura à monte perflans obvia tibi erit, ac recreabit euntem. Quæ quidem aura, tum quod orientalis est, tum etiam quod ab innocuo monte prodit, ubi Roccapapia insidet, sana est. Si qua igitur foetoris pars, malitiaque, in sylvam à Sulphurata irreperet, aut si qua æstivi caloris molestia à Romana planitie fursum evaderet, illa ipsa orientalis aura, ab alto validiuscule prodiens, omnem aeris impuritatem facillime deorsum pelleret, ac in Burgeti situm longe inferiorem juvenis descensu omnino detruderet, malumque malo in ipsius infelicis oppidi perditionem adderet, Cripta ferrata ab aeris impuritate semper illæsa. Hæc mihi diversitatis ratio esse videtur.

Magna quoque omnino, ut alia simul pateant, varietas est agri Tusculani à Romano in aere, in ventis, pluvia, nive, tempore, & fructibus. Aere primum differunt: quod si ineunte Martio in agro Romano egeris, calor aderit, si in Cripta ferrata fueris, algebis, vestemque vesti addere necesse erit. Venti etiam vim à montana Regione in Criptam ferratam descendere sereno die sæpe senties, quæ nullo modo agrum Romanum attingit: & è converso ab occidentali flatu planitiem Romani agri ambiri sæpe animadversum est, Tusculano agro ab eo intacto. Adeo etiam ventis præstituti à natura limites sunt, sicut Soli, Lunæ, marique, quos præterire nequeunt: & quemadmodum equi certo spacio, cursu peracto, viribus lassæ sponte subsistunt, ita status aeri sua spacia emensi, juxta naturæ metas, finitis viribus hebescent. Imbribus quoque madefieri Tusculanos colles videmus, Romano agro in pulvere permanente, & è contrario. Nives quoque in Tusculano supercilio sedem firmant urgente frigore, in agro vero Romano non ita. Ab agro Tusculano sub antelucanam horam Romam spectanti caliginosa propemodum urbis planities, ubi ædificiorum frequentia est, sæpe apparet, ipso Tusculano tunc caliginis experte. Idem etiam tibi interdum videbitur, si ab urbis collibus locisque editioribus in subjectam Romam ad Tiberis fluentia sitam oculos intenderis, quod à tectorum altitudine, & viarum angustia, planitieque, evenire puto, luto scilicet, aut humore, diu in inferioribus partibus immorante, & Sole eas partes hyeme & æquinoctiali tempore raro ac parum perlustrante, ex qua luti vel humoris mora nubeculæ caligini

A similes in noctis dieique crepusculo frequenter exfurgunt, urbisque tecta operiunt. Discere ergo unusquisque ex his potest, non à solo cœli climate, ut quidam opinantur, sed ab aliis quoque partibus aeris salubritatem constitui.

Temporibus pariter sationis, ac messis, vindemiæque uterque ager differt: prior est messis, ac vindemia facienda circa Romam, quam in Tusculano, & è contrario in jaciendis autumnis seminibus, prior Tusculanus ferendus est, quam Romanus, ne frigore urgente in Tusculano semina ægre è terra gelu contipata enascantur: ac in Romano agro etiam Novembri mense projecta semina inter Romam & mare adolefcunt; quia aeris calore, eo etiam mense, in maritimis oris herbæ foveantur. Vitium etiam putatio, & effusio tardior in Tusculano agro est, quam in Romanis collibus, (colles enim, ubi antiqua Roma erat, in vineas plerique versi sunt) pullulat enim promptius unaquæque arbor Romæ, quam in Tusculano, ideo tempestivius etiam curanda est. In fructibus similiter magna est utriusque regionis varietas. Linum Cripta ferrata speciosum ac lene emittit, Roma vero minime: carduos olitorios Roma quam maximos fert, quibus Cripta ferrata caret. Ficus habet Roma in maxima copia, & præstantia, Tusculana & Criptæ ferratæ prædia contra: at Tusculanae vites longe sapidiore uvas faciunt, quam Romanæ, uno, aut altero colle excepto: vinaque similiter Tusculana Romanis sunt in universo præstantiora, ac durabiliora. Meritoque omnino commendandæ Tusculanae vineæ sunt ob situs & culturæ elegantiam, qua inter primas ac præcipuas Latii vineas celebrantur; è quibus quidem vineis Cripta ferrata palmam obtinet, ubi vinea illa speciosa enitet, regio cultu confita, omnique vitium & pomorum genere refertissima, quam admirari potius quam commendare pro ejus elegantia ac amplitudine possumus. Poma quoque & pyra autumnalia colore, sapore ac magnitudine insignia Tusculana prædia copiosius emittunt, quam Romana: quæ omnia indicant aeris temperiem majorem eo loco æstate inesse, quam Romæ. Sed ne diutius Roma, agerque Tusculanus, meipsum in suis contemplandis detineat, ad Apennini juga, vertexque, gradum facio.

C A P. VIII.

De Apenninica Italia parte.

E MAJOR montium occupatio, quam agrorum latitudo, in hac parte discernitur, atque ab Apulia & Calabriae oris incipiendo, colligendoque Picenorum, Apprutinorum, Sabinorum, & aliorum Populorum juga usque ad Ligurum fines, Italiae postremos, plures montium circuitus ac præcipitia, quam agrorum jugera, existant: qui quidem montes in rupes & colles dividuntur, altiores enim ac scopulosos montes rupes appellamus, humiliores vero, culturæ aptos, colles dicimus. Rupes itaque umbris ac frigoribus aptiores sunt, quam frugibus: oriens enim Sol, occidensque, dum alterum montis latus circum, & calefacit, alterum latus adumbratur, atque ab umbra gratum frigus herbis, fruticibusque, ac arboribus æstate percipit. F Itaque aut mane, aut vespere, rupes semper aliqua umbrarum diuturnitate potiuntur. In meridie etiam Sole sub æstivum solstitium adscendente minime omnia montana, scopulosaque, perlustrantur, montium videlicet anfractibus ac volutionibus meridiano Solis prospectum in pluribus locis declinantibus, ac ab eo per situs diversitatem tergiversantibus. Hinc fit, ut Sole ex omni parte montium latera ambire una & eadem hora nequeunte, ac pluribus etiam in regionibus radios nusquam in Septentrionales prospectus immittente, nives glaciesque in eis ab æstu incorruptæ inveniantur, loca

caque ipsa sub caniculares fervores pabulosa, aut frondosa reperiantur. Qua opacitate ab antiquo agnita, pastores Apennini incolæ, præcipue Tuscæ, & Umbri, atque Apprutini, annum & regiones in tempora pastionibus apta diviserunt, septem quidem mensibus, quibus in ipsis montibus frigora durant, id est, ab initio Septembris usque ad Aprilis ingressum, à patriis regionibus abscedendo & pecora sua in orientali & meridionali planitie continendo, pascendoque: item quatuor mensibus, quibus dictæ planities nimio calore æstuant, eadem pecora intra Apennini rupes & umbracula deducendo, unoque ferme mense in deducendi & reducendi itinere consumpto.

Pecora autem, quæ postremo loco à montibus in planitiem Autumno traducuntur, sunt porcorum turmæ, quas non nisi decussis in sylvis glandibus, castaneisque partim lectis, partim depastis, deducere à montanis saltibus Apprutini solent. Hæc montium ubertas, ac commoditas est, in quibus neque feri vites, neque arari terra potest: à qua quidem re hoc beneficium populis maniat, quod sine stabulorum, & fœni secandi labore impendioque, ac sine palearum vel stipularum consumptione, omnia fere pecora hyeme, æstateque, in saltibus pascuntur, loco tantum commutato: fructusque lactis, casei, carni, & pellium, lanæque simul, & equini pulli usus per temporum vicissitudines, modo iis populis, modo illis communicantur: pascunturque proprie ea ipsa, quæ servando servari nequeunt, (ut Jurisperiti scribunt) nullo enim modo ex rupibus colligi herbæ possent, situs lubricitate hominis vestigia parum apte ferente, nullaque etiam industria in Meridionali & Orientali ora servari hyeme herbæ à corruptione, atque à pruinis possent usque ad Veris initium. Aliæque etiam sequitur major utilitas, quod quibus mensibus agri à cultura vacant, ut quiescente solo vires terra recipiat, iisdem mensibus campi ipsi pastionis fructum dominis ferunt, ignibus prius, ut diximus, purgati. Terra enim (ut scias) in Orientali ac Meridionali regione alterno saltem bienio cessionem appetit. In Circumpadanis autem campis anno tantum quiescit. Quiescere enim & ociosi terram à seminibus necesse est: & sicut animalia, pondere onusta atque defessa, ponderis detractatione quiescunt & recreantur; ita terra ipsa amota cultura ociosa reficitur. Novalesque hinc dicti sunt agri, quia post annorum cessionem, quasi fructificandi novitate lati seminibus susceptis cultori suo arident, faventque.

Hujusmodi ergo hominum studiis, pecorumque traductionibus, crevere in immensum istorum populorum opes, fructibus scilicet ex locis inviis sine pecuniæ erogatione perceptis, & agris, pratibusque, durante frigore greges & armenta pascuntibus. Colles quoque æveni & fœcundi, amplius intercedentibus vallibus, in hac parte spectantur: in quibus cultura summo studio exercetur. Olearum hic sylvæ perpetuis frondibus albicant; alibi vineæ densis ordinibus distentæ nitent. Surgunt alio loco ante viatoris oculos superba oppida, situ ipso à natura munita, quæ tibi iter facienti prope esse, cum longe absint, contemplando apparent, defessoque laborem addunt. Virorum passim robur hic in opere exercendo frequentiaque conspicitur: mitior iis in collibus aer, ac lenior, quam in montium jugis, clare deprehenditur, sole regionis declivia melius explorante, & rupium circuitu vim ventorum ab inferioribus monticulis avertente: & propterea nives esse in eis diuturnæ sicut in summis rupibus nequeunt, sed sub Aprilis ingressum liquefactæ abeunt. Læta tum ibi floribusque conspersa terræ facies sese aperit, viget cœli temperies, paulatimque jucunda æstas apparet.

Nundinæ tum passim statim diebus suo quæque

A loco ac oppido celebrantur, fiunt sub mercatus nomine populorum conventus, artes, negocia, & mercimonia in unum locum conferuntur, venduntur ista, permutantur illa, pluraque emptoris verbo fideique creduntur. Incedit palam Prætor, quem alii *Vicarium*, quidam vero *Capitanum* vocant, tumetque juris dicendi potestate, & satellitum comitante turba tribunal adscendit, populisque jus dicit, volumine secum perlato, in quo oppidorum jura descripta leguntur. Circumstant tum populi, & judicis verba, moresque mirantur. Ille vero interdum exlex, ut terribilitatis famam quam primum acquirat, spargatque per ora vulgi, insontem hominem criminis suspectum, frequenti foro plecti ac torqueri jubet, ut unius infortunati supplicio fontes perterreat, & ad fugam, vel ad æris solutionem poena commutata compellat: quod Bartholum Saxoferratæum in primis factitasse ajunt, maleque ab initio perpenis legibus, in reum similiter male animadvertisse, suisque quæstionibus mandasse iudicibus, ut seipsos populis terrificos exhibeant: at Populi contra hujusmodi, aliisque interdum vexati injuriis, ferre diu inepti hominis imperium nequeunt. Primi itaque Nursini, Asculanique, jus dicentem, suæ civitatis jura temnentem, à foro & urbe, vivum ne, an mortuum, nescio, sede vacante exterminarunt. Montiregalenses inter Apprutinos noti, Commissarium impudenter se habentem obruncarunt: Cantalitiis etiam superiore anno Reatinis agricolis vim inferentibus, ipsi Reatini Prætorem suum, cujus iussu arma deposuerant, (miserabile visu) è fenestra præcipitarunt. Interampenses, Perusinique, Præfectos sæpe ejecerunt. Quid scribam præfectos? immo vero ipsos dominos ejectos, depulsoque ab oppidanis, civibusque, ob immoderatum regimen audivimus, vidimusque. Aspera & Roccifundia Sabinorum oppida id ipsum attestantur, quorum vis dominorum potestati palam obstitit.

Plura possem exempla subicere, sed satis nota sunt horum populorum ingenia, qui aut modestia pertractandi, aut evitandi sunt; suis cuique honos, etiam egeno habendus, suum cuique jus, si ve bono, si ve malo, æqua lance librandum est. Plerique enim sunt natura arguti, suspiciosique, laboribus & periculis apti, meritum & demeritorum memores, retributoresque, atque ad audendum non minus quam ad dicendum prompti. Arx olim Italiæ, tutumque propugnaculum hæc pars montana fuit, externis populis plana loca invadentibus, ac deprædantibus. Pluraque in ea exstant Castella, jamdiu ab alienorum vi usque in hunc diem intacta servata, quæ situs natura, adeundique difficultate à periculis seposita, in summis rupium verticibus consistunt: quæque expugnari nullo modo possunt, nisi ipsorum incolentium prodicione, ac dolo, ignaviave, aut seditione: atque hæc ipsa loca delicias humano generi æstate præbent, corporaque nimio æstu laborantia innocuo algore juvant & recreant: excedereque ab iisdem locis, & Romam, Neapolimve æstate adire perniciosum plerisque, & mortiferum est, ob repentinam diversi aeris mutationem, qua natura concutitur. Itaque Autumni initium in Latium profecturis omnino expectandum est ad ægritudinis pericula evitanda.

C A P. IX.

De Circumpadana Italia parte.

F **P**LANA nobis sese pandit Italiæ pars, nobilissima quæque continens, Terram, Aerem, Aquas, Urbes, Oppida, Populos, Opes, Greges, Armenta, Metalla, omniaque humano usui à natura apta, atque jucunda: de cujus situ ornatissime scripsit Polybius libro II. his verbis: *Huius late-*
Pp ri,

ri, quod *Alpibus terminari dicimus*, &c. Parique orationis dignitate eandem complexus est Strabo, libro v. ita scribens: *Ante omnia de subiecta Alpibus regione dicemus. Est autem foelix admodum campus*, &c. Indignius utroque scripsit Plinius, in ea natus, exili quodam ac confracto sermone, & ordine pauca tantum quasi per transfennam attingens, ac decimo capiti undecimum anteponeus, quod numero nonum est, & Istriæ descriptioni subdens multa ab ea aliena, atque remota, veluti Mantuam, Veronam, Rhætos, Adduam, & Ticinum, amnes, lacusque, è quibus ipsi amnes superfluentes prodeunt, quod sive scriptorum, vel impreforum incuria, sive ipsius Auctoris transpositione contigerit, ita esse in libro tertio manifeste apparet. Præclarius sane ipso Plinio posteriores de ea disseruerunt, quorum Opera in maternam linguam versa circumferri ac lectitari audio.

Ego autem eorum omiſſis vestigiis, alio ordine ac exemplo mea scripta instituam, huiusque partis situm, non tam triangulari formæ, quam humano corpori terræ procumbenti, brachiis super caput extensis, assimilabo: cujus pedes in Occidentem Alpese, caput autem, & brachia in Orientem porrigantur, quæ similitudo, tametsi rerum qualitate differt, imaginem tamen similiorem in situ describendo refert, quam triangularis angulus. Atque ab Alpibus incipiendo, à perangusto angulo in Orientem verso, ubi oppidum Nebulosa imminet, planities initium sumit, quam humanis pedibus comparo, sicut etiam incolæ ipsi Pedemontani appellantur, incrementumque ipsa latitudo accipit, montibus hinc inde secedentibus; ampliaturque hæc ipsa latitudo in Ticinensi agro è regione Vicqueriæ oppidi; ibi enim ab Apennino ad Alpium radices Novariensibus proximas latior est planities, quam in superioribus oris, à qua latitudine latera hic esse huius imaginarii corporis videbuntur. Restrungitur deinde planities in Ticinensi agro ad Stratellam oppidum, ubi Apennini radices Pado appropinquant, & Alpium pariter brachia ex opposito in Mediolanensium fines magis inferuntur, comprimuntque hinc inde, quasi ad cinguli speciem, ipsius regionis latera, & quasi corporis umbilicum hoc loco effingunt. Secedunt postea utrinque montes, & latiore situm edunt in Brixienſi agro ab uno latere, & in Rhegiensi ab altero, Mantuano agro Cremonensibus finitimo, ac Brixillo oppido intercedentibus: ampliaturque successive hæc latitudo per montium secessus in corporis figmentum, usque ad Adriatici maris sinum, ubi elegans, magnaue Venetia ab undis surgit, ac sese in altum ferens, nostro huic corpori rerum gestarum gloria, gentisque antiquitate ac dignitate caput exhibet, humerosque, & brachia in Forojulienſes & Istros ab uno, & in Romandios, sive Flaminios, ab altero latere extendit, Adriatico mari inter brachiorum intervalla ex parte recepto. Hæc mea descriptio est ab ipsa natura, ut infra ostendam, sumpta, atque terra descripta, aerem quoque agnoscere optimum est.

C A P. X.

De ejusdem regionis aere, & proprietate.

DIVERSO cœli climate Italiam discretam esse omnes orbis descriptores probant. Liguriæ enim, & Hetruriæ partes maritimæ, Latium, Campania, & Neapolitana ora, Meridionali subsunt, Apulis & Calabris etiam in Orientem spectantibus sub eodem climate comprehensis: quarum quidem partium situs medium ferme tenent inter circulum Arcticum, & Tropicum Cancræ. A qua cœli plaga, sive Zona, aliæ Italiæ partes discernuntur, & elongantur, ut Ligures inter Apenninum & Padum positi, & alii Circumpadani po-

A puli, collectis etiam Adriatici maris accolis planis colentibus: quæ quidem regiones, etsi per situs sui prospectum videntur in Meridiem versæ, utpote quia Transpadani colles in Meridiem vergant, & eorum similiter aquæ versus Meridiem descendant, proprie tamen Meridionales non sunt, sicut est Genua, Roma, & Neapolis, sed cœli, terræque ratione à Meridie manifeste distant, & cum distare à Meridie arguantur, pari etiam argumento magis appropinquare Septentrioni probantur, quam supradictæ. Nec Septentrionales propterea esse videntur, cum pari fere intervallo tanquam in medio positæ, tam à Septentrionalibus terris, quam à Meridianis distare agnoscantur. Ex qua quidem distantia proportionem, utrinque habitam, oritur illa mirabilis cœli aerisque clementia, quæ omnium scriptorum consensu vigere in Circumpadana Italia dicta est, ipso quidem aere à Meridiana regione caloris teporem, & à Septentrionali frigoris acumen sentiente, atque per utriusque communicationem, conjunctionemque temperiem assumentem, humilioribus locis exceptis, ubi à situs naturæ humiditas temperiem minuit: & quam etiam temperiem adjuvat, augetque, montium circuitio, ab omni parte præterquam ab Oriente planitiem claudens, amovensque, sive emolliens ventorum vehementiam, ne singuli juxta propriam naturam à Septentrione, Occidenteque, ac Meridie exeuntes in nostros campos integris viribus irruant, ac nos ipsos, nostraque simul, nimia pernecitate lædant; repens enim aeris immutatio nulla ex causa fit potius quam ex ventorum incessu ac violentia: & qua demum aeris clementia minime æque potiuntur Piceni, & alii populi maris accolæ, montanique sub eodem climate siti, quoniam majore ventorum impetu agitari eorum regiones necesse est, tam ex maris vicinitate, ac vastitate, quam ex montium altitudine, ventorum furorem aperte recipiente.

Atque ab hac naturali temperie, quæ longe diversa à Romanæ & Neapolitanæ regionis caliditate est, diversa similiter inter nos & illos nascitur temporum & rerum proprietas & variatio. Hyems illis lenis, ac tepore immixta esse solet, qua durante pecora, perinde ac si ver inciperet, virentia pascua saltusque perquirunt, ut supra retuli; atque ea vagandi licentia efferantur, bubalique, & boves ferarum ritu insurgunt, & viros aggrediuntur. Nobis contra glaciale frigus plerumque advenit, uritque prata pruinis, densaque sæpe insequitur nix cuncta operiens; magnisque iccirco stabulis recepta armenta fœno aluntur, ac humano fere cultu curantur, eaque assuetudine benigna homini ac familiaria efficiuntur, & cornupeta bos pro monstro habetur ac cæditur. Et ex diverso æstas nobis suavis, atque opportuna laboribus, illis vero contra vehemens, atrox, omnibusque molesta esse solet: ex qua caloris vehementia corrumpi Romæ frumenta, vinaque exinaniri, & præter annum raro conservari patet: at nostra vina, frumentaque, non solum alterum annum, sed biennium quoque, & triennium, expectant, & in naturali bonitate durant, Mantuano & finitimis vinis exceptis, quæ leviora habentur. Et quæ quidem conservatio, tam ab aeris temperie, quam à rerum bonitate provenit. Lina insuper apud nos, legumina, milium, panicum, aliaque trimestria grana, nobilisque oriza, eadem æstate sata atque collecta affluunt, peregrinisque ab immensa ubertate venum eunt. Apud Meridionales non æque, æstatis ardore ac ficitate obfistente, sed citrea illis mala, lauri, pinus, cupressi, aliæque hiberni caloris amicæ arbores in hortis virent, quæ apud nos rarissimæ habentur, vixque coalescere summa accedente cura in urbanis locis possunt; paucis tantum exceptis oris, in Solis apricitatem versis, minusque ventis obnoxiiis, veluti in Benaci lacus

angulo, & in infima Adriatici sinus regione: nam in aliis partibus cognatum humorem caloremque minime habent ipsæ arbores ex terra, à qua juxta earum proprietatem in singula anni tempora, tam hiberna, quam æstiva alantur, ut docet Hippocrates libro IV. *de Morbis*, Romaque ipsa minus quam Cajeta harum arborum vegetationi apta probatur.

Quid ipsa humana specie variabilius? Nam plerique Meridionales, maris accolæ, colore sunt fusco, moribus severi, & graves, criticique, diserta in plerisque, & suaviloqua vox, & oratio viget; vafra ingenia, callidaque, & in omnem occasionem prona, omnia, quæ quis novit, quæque audit, in promptu habet, ac composita voce effatur. Nostri autem ab eis diversi, aut albi, aut subrufi, paucique fulvi visuntur, facie jucundi, sermone familiares ac simplices, nihil in verbis severitatis, nihil ambitionis habent, cute & corporis habitudine æque nitent, benefacere magis quam benedicere student, peregrinis, perinde ac notis, sociales se, & officiosos exhibent. Ipsa tibi hospitalitas, à rerum initio, nostris innata hominibus, ut Polybius antiquitatis testis, præsensque etiam consuetudo probat, fatis indicant, quales sese nostrates in rerum commercio ubique locorum habeant. Interroga è converso eos, qui remotiora à nobis Italiae loca sæpe adeunt, quam à nostris dissimiles, rarique, & immundi hospites, quam truces & inexorabiles reperiantur, ita ut inhospitales potius quam hospites suis moribus arguantur. Tamen hæc morum diversitas ab institutis potius quam ab origine manare videtur: neminem enim natura ad actum compellit, neminemque etiam ab actu repellit, agere, & abstinere ejusdem arbitrii est. Diminuitur hæc temperies in Adriatici maris regionibus, ubi ex reciproco maris æstu fit aer infestior, ut infra aperiā.

C A P. XI.

De Venetia, & Aquilonari Ventō.

EXORDIRI à Venetia in hujus partis descriptione compellor, Jurisconsultorum præcepta secutus, mandantium à dignioribus inchoandum: atque cum præcipua pars humani boni aer sit, ut naturæ interpretis Hippocrates in libro *de Flatibus* clarissime docet; videamus qua aeris puritate impuritateve, tam Venetia regio, quam urbs ipsa in mari posita, perfruatur. Relatum enim supra capite tertio ex Plinii sententia à me fuit, æqualem in hac regione umbræ solisque mensuram sub æquinoctii meridiem esse, à qua æqualitate aeris temperiem gigni clarum est: regiones itaque istæ à marisurbatione remotæ aeris puritate potiuntur, ut Histria, Forojulienensis patria, Patavini campi à stagnis longinqui, & Flaminiae pars inter Padum & Ariminum posita: quæ vero mari adjacent, minime omnes æque salubri aere potiuntur; aliæque aliis ex situs diversitate plus minusve à maritimo aere læduntur.

Sed quoniam in singulis immorari, ac propria quæque disquirere longum est, Venetiam urbem repeto, cui tria naturæ auxilia adversus maris impuritatem, ipsius naturæ auctor Deus tribuisse videtur: Aquilonis venti, *Ultramontani* vulgo appellati, vicinitatem, ac frequentationem, orientis solis prospectum, & occidui venti lenitatem: Aquilo enim à vicinis Alpium jugis descendens facili ac celeri meatu, parvaque aeris traiectione, in urbem pervolat, pellitque repente malitiam à mari exhalantem, & singulos urbis vicos ingressu explorat, nec in eis aeris malitiam diuturnam esse finit. Illa enim ex maritimis rivulis per urbis vicos divisus surgit: ipse vero adveniens surgentem verrit, & quicquid aeris humoris elatum reperit,

A sicco flatu dissipat, sparsumque attenuat; atque eo modo urbem ab humiditate frequenter purgat, & ad aeris salubritatem retinendam parat. Hoc nobis ita evenire noster Virgilius ipsius venti natura descripta *Georgicorum* tertio eleganter innuit his verbis:

*Qualis Hyperboreis Aquilo cum densus ab oris
Incubuit, Scythiaque hyemes, atque arida differt
Nubila; tum segetes alta, campique natantes
Lenibus horrescunt flabris, summaque sonorem
Dant sylva, longique argent ad littora fluctus:
Ille volat, simul arva fuga, simul aquora verrens.*

B Frigidus enim, & siccus Aquilo tam in Circumpadanam planitiem, quam in Adriaticum illabitur, & cum sine Subsolani venti commercio perflat, serenitatem aperit, nullamque circa littora ab Alpium lateribus sita tempestatem (quam *fortunam* vocant) in mari excitat, sed in opposita littora Flaminiae, Anconitanæque oræ, & aliorum vicinorum, fluctus impellit, turbatque omnia suo impetu, navigationem, piscationemque, & importuosam stationem in unoquoque portu ad Septentrionem spectante suo adventu parat. Idem etiam superato Apennino in Campaniæ, Latii, Hetruriæ, Liguriæque maritimis oris facit tranquillam navigationem ac piscationem, serenum tempus Italicis littoribus præstans, & opposita Africae littora passim infestans, atque perturbans. Contrarium autem molitur Auster (diversa natura compositus) in eisdem Mediterranei & Adriatici maris littoribus, sed minus tamen ille caliditatis in Venetos aliosque populos fundit, ob Apennini transcendum, in quo caliditatem ex parte exiit, nivibus in ejus transitu montem operientibus, à quibus nonnihil frigiditatis attrahit, temperatque caliditatem, atque eo modo temperiore plerumque flatu in Flaminiam & vicinas regiones descendit. Ventorum itaque vicissitudines natura cœlo, terræ, marique prospiciens in tempora statuit ad animantium commoda, ut hinc & illinc in suo quæque genere singula transmigrationi apta suo tempore, suoque ordine, atque opportunitate, transmigrarent, ventis opulantis, & prope vehementibus: rursusque temporis vicissitudine commutata, converso navigationis actu, volatue, ipsa priora loca repeterent: ad quam quidem ventorum operationem diversa molientem in Africanis littoribus à Latii oris, alulit aptissime suo carmine idem Virgilius libro IV. *Aeneidos*:

Littora littoribus contraria fluctibus undas.

C A P. XII.

De orientis Solis prospectu.

QUID oriens Sol Venetiæ urbi, ac universæ Circumpadanæ planitiei conferat, in quam ipse nullo interveniente objectu, æquinoctiali tempore terris apparens, radios statim immittit, singulaque perlustrat; nihil occultum in hujus terræ superficie à suo calore & lumine esse sinens, doctissime docet Hippocrates in libro *de aere & aquis*, in hæc verba scribens: *Quæ ad orientem solē sita sunt, salubriores iis esse constat, quæ ad Septentrionem vergunt, & iis quæ ad calidos ventos sita sunt, etiamsi stadium solum intersit. Primum enim moderatior est caliditas, ac frigiditas, deinde aquas, quæ ad Solis ortus sunt, omnes splendidas esse necesse est, mollesque, & odoratas amabilesque oriri, quia emergens Sol eas illustrat, corrigitque: matutinum enim tempus ipse aer, ut plurimum semper occupat. Item hominum forma boni coloris sunt, & quasi adpectu florida, (nisi aliquis morbus subsit) claraque voce præditi sunt, & ad iram, & intelligentiam præstantiores Septentrionalibus, & fœmina ipse valde fecunda sunt, & facile pariunt: verique simile tempus ei inest juxta caliditatis & frigiditatis moderationem,*

morbique pauciores, ac debiliores, &c. Varro quoque de *Re Rustica* libro I. à Catone dissentiens approbat Villarum situs ad æquinoctiales Solis exortus spectantes, potius quam ad meridiem. Quæ quidem omnia ad universam pene Circumpadanam planitiem montibus undique, præterquam ab Oriente, conclusam pertinere, nedum ad ipsam Venetiam urbem videntur, quæ præter cæteras urbes, & Orienti, & Meridiei in hac regione apertius patet, à terræ scilicet continuatione seposita, & inter marinos fluctus erecta. Oriens enim Sol ipsam quam primum lumine suo petit, insurgensque miratur, vicosque, & tecta ingreditur, & altius paulatim conscendens vias, rivulosque metitur, ambiens civitatis molem à meridie non minus, quam à matutina ora, plusque caloris suo ambitu in eam oram infert, etiam hiberno tempore, quam in Circumpadanis urbes: qua ex re siccitas aeris in ipsa augetur, maritimorum rivulorum humiditatem sua contrarietate temperans: & qui quidem rivuli per urbis vicos divisi, tum ob insitam aquis à natura falsedinem, incorruptibiliores sunt palustribus aquis, tum etiam ob reciprocum maris æstus, quo fluente mutantur aquæ, unda undam impellente, alteraque simul subeunte; adeo ut si qua etiam in aquis per immundiciarum projectionem colluvio excitetur, illa ipsa pariter ab eisdem refluentibus aquis abluatur, nisi ex inquilinorum ignavia, excrementa in unum congesta fluctuationem inhiabant, & aquarum incrementa, sub caniculares æstus subsidientia, vicorum rivulos minus pertingant: quo casu infestari aerem non natura, sed accidente, inquinatis aquis foetorem emittentibus necesse est. Prudentissime igitur Veneti specularibus fenestris utuntur, quibus lucem excipere suspecto aere excluso solent, eoque claro ac salubri elucente, illas pandunt, quas vulgari lingua *Vireatus* appellant.

C A P. XIII.

De Occidentalis & Orientalis Venti flatu.

MIRABILI lenitate Occidentalis ventus in Gallia nimbofus, Alpes trajiciens purificatur, puraque qualitate Circumpadanos persians in Venetos fertur, repellens nubes ab Subsolano vento contra effusas, pluviasque compescens, quæ interdum, Aquilone & Occidentali vento quiescentibus, adeo infestare Patavinorum regiones solent, ut pluviae frequentiam pertæsus aliquis, rem in proverbium verterit, *Pluit ne adhuc Padua?* existimans in agro Patavino imbres à natura frequentiores fore. Sed differt annus ab anno, pluvia, ventis, annona, fructibus, salubritate, & statu, atque in pari temperie differt Patavium à Venetia urbe circa imbrium subjectionem. Rectius enim atque apertius verrit Venetiam Occidui ventus, quam Patavium, Pado scilicet alvei sui latitudine aditum ad ipsam urbem apertius patefaciente, quam ad Patavii sedem, à maris apricitate, Padique ostio distantem. Qua ex re minus diuturna, minusque frequens fit pluvia circa Venetias, quam circa Patavium, Occiduo Subsolanum facilius arcente, & Aquilone etiam circa Venetias liberius persilante. Subsolanus etiam ex adverso nubifer in Italia ad Alpium juga, relictis nubibus, purus similiter in Galliam transvolat, Occidentaliaque nubila summovens, serenitatem ac jucunditatem parat, mutisque vicissitudinibus Occidens Galliae imbres, & nobis Solem reddit, & Oriens contra pluviam nobis, & serenitatem Galliae tribuit. Retinacula itaque interdum nubium sunt Alpium cacumina Solis ibicibus pervia: nam super montium dorso, quo ab Italia in Sabaudiam, vel Allobroges, iter facimus, insident procul à nostro itinere, ad aenei tormenti jactum, immanes & inaccessibiles ru-

Apes; ad quarum summitatem nunquam adscendere quadrupedes, minusque homines, ut ab accolis accepi, nivibusque æstate sæpe contactæ invisuntur. Nubila autem Occidentalia, & Orientalia, æstate ipsa citra, aut ultra montis juga, ubi semita frequentatur, plerunque firmantur. Vidi-que ego ipse Julio mense Alpes transcendens, flante Occidentali vento, nubes mihi à tergo in Gallia remanere, atque hæere Alpibus: postremo in planitiem evadens, quæ perexiguo intervallo monti insidet, ac Italiam viatori patefacit, cœli serenitatem reperi, quæ universæ Italiae communis erat. Agnoscere ergo ex his naturæ occulta licet, quod eodem anno penuria in Gallia, & ubertas frugum in Italia fieri potest; & è contrario, juxta imbrium copiam, vel inopiam, aut in Italia, aut in Gallia ex Dei nutu contingentem. Interdum etiam in utraque provincia eodem tempore pluviae fiunt Austro efflante.

C A P. XIV.

Quomodo Venetia Transpadanis jungatur, & de ipsius Populi antiquitate.

Si quis meam descriptionem deridendam putaverit, quod caput Venetias finxerim, à terræ continuatione divisas, dixeritque me corpus formasse abscisso capite, longeque transposito: Respondebo; Mare, ubi ipsa civitas eminet, Italicum esse; itaque quod in ejus tractu ædificatum est ab accolis, Italicum est, jureque gentium, ac ditione propinquieribus pertinet; & cum propinquiores Transpadani sint, jure gentium ipsa Venetia Transpadanis jungitur, sicut etiam ipsius Transpadani generis funiculus est. Et quamvis per terræ superficiem atque juncturam continenti non cohæreat, eidem tamen potioribus modis, nodisque, à natura editis conjuncta, atque communis est, gentis origine, lingua, ritibus, & aliis naturæ & generis indiciis. Quis enim nesciat inter Transpadanos populos, Venetos maris accolæ antiquissimos fuisse, Romanoque collabente Imperio continentem deseruisse, finitimisque evocatis, præcipue Aquilejensibus, ad evitandum alienorum jugum atque sævitiam, in propinquas Insulas commigrasse, sedesque ibi suo jure locasse, prisca Venetiæ appellatione retenta ac propagata. Qua quidem in re si gentis originem, & antiquitatem in ipsa Provincia habitam, ac continuatam, spectare libet, ante Romam conditam, Venetam viguisse gentem suo jure & auspiciis, facile inveniemus: Livio aperte attestante, libro v. ab Urbe condita, ante Romanum Imperium Tuscos emissis coloniis Transpadana loca passim occupasse, Venetorum angulo excepto. Venetis ergo prius quam alteri genti in Transpadano agro circa sinum Adriaticum statio fuit: qua quidem statione, nuncupationeque, in alterum locum ejusdem regionis jurisque translata, eadem manent in gente antiquitatis jura ac monumenta, tamquam propagine transmissa. Nemini enim terræ summitatem contemplanti vitis palmes, terram hic subiens, alibique exsurgens à materno stipite traductus, postquam adoleverit, apparet, propaginis industriam vetustate abolente: sed diversum esse palmitem à stipite unusquisque rei ignarus, imprudensque, existimabit: at si propaginis summisionem, naturamque, resciverit, ejusdem generis esse antiquum stipitem, ac novum palmitem dixerit, agnoscatque prudens contemplator eadem esse in utroque ligno internodia, similes gemmas, frondes, pampinos, racemos, atque uvarum speciem, vel qualitatem, loco tantum in sua regione & genere mutato. Simili etiam ratione Veneti populi Italiae antiquissimi, à Patavio & finitimis oris in Insulam sui juris tractusque delati, non novum, sed priscum genus gentis suæ propagatione re-

præsentant, loco tantum in suamet regione commutato; statumque præsentem suo jure ad priscam originem, potius quam ad Insulæ incolatum referre probantur: maris interpositione situm tantum, non jus eorum, possessionemque, dividente, quod juris argumento probatur: Jure enim diffinitum est, *dominium a prædio remotum per colonos suos possidere*. Si ergo jus mihi ipsi à re mea diviso possessionem servat, pari ratione in insula agenti populo per Reipublicæ administratores continentis possessio servatur. Qua quidem possessione servata maris interpositio pro nihilo putatur, Jure Civili, Naturalique, ad dominii & possessionis vim potius, quam ad loci interpositionem, spectante, & ad absentem dominum rerum dominia, durante possessione, referente. Minime ergo ridicula, sed juridica potius, mea descriptio censenda est; Venetorum origine cum continentis dominio & possessione conjuncta, & cui etiam origini ac possessioni alii postea adjecti atque supervenientes populi, tanquam accessoriae partes, adhæserunt, in unumque populum coalluere, principalis dominii substantia, ex adjectis partibus aucta, & non immutata; Jure enim diffinitum est, *accessoria principalis naturam sequi, & imitari*, non è contrario; dictaque accessoria, ex eo quod accedant alteri principali, digniorique, videntur; ex qua ratione, alia etiam vulgata Juris regula nascitur, *dignius ad se trahere, elicere minus dignum*: digniores enim primi insulæ incolæ posterioribus omni jure censentur: in quam quidem dignitatem traxisse alios postea populos publico dominio constituto videntur, antiquitatis & dominationis communicatione per continuationem diversa in se tempora conjungente, & communicationis vinculo posteriora prioribus quasi alluvionis adjectione, incrementoque, in unam formam componente: & de quo quidem dominio, in Reipublicæ ordines magistratusque disposito, multa mihi scribenda supersessent, quæ libenter referrem, ut illius clarissimæ Urbis instituta ritusque paterent, sed peritorum virorum censuram veritus, monentium ab ipsius Urbis patriciis luculentius quam à me peregrino homine patria jura enarrari posse, subsisto.

C A P. XV.

De Mantua.


ORDO naturæ ac rationis poscit, ut quæ prior regio ab hominibus coli & habitari cœpta sit, priorem etiam locum in historia habeat. Mantua itaque cum post Patavium citra Adduam prima condita fuerit, primum quoque locum post Patavium, aut Venetos, in mea Historia habebit. Quæ quidem civitas triplici ornamento sese suffultam inter Transpadanas urbes aperte probat, gentis origine, situ, & dominii proprietate. Origine gentis, quia ante urbis Romæ incrementa condita à Tuscis fuit, qua ex re & antiquitatem, & nobilitatem simul assumpsit. Sola enim hæc civitas ex Transpadanis oppidis, ab ea gente ædificatis, à Gallorum impetu inviolata remansit, Plinio attestante lib. III. cap. XIX. *Nat. Hist.* his verbis: *Mantua Tuscorum trans Padum sola reliqua*; innuens tacite, alia Tuscorum oppida à Gallis, Italiam ingressis sub Prisci Tarquinii regno, pulsus colonis occupata fuisse.

A se. Quod Livius summatim retulit libro V. ab Urbe condita, ita incipiens: *Tuscorum opes ante Romanum Imperium longe lateque patere*, &c. Quo quidem in loco animadvertendum est, quod Livius de antiquissimis Italiæ oppidis, ante transitum Gallorum conditis in Transpadano agro, nullam prorsus ibi mentionem fecit, ut de Patavio, Mantua, & Ticino, sed de iis tantum scripsit, quæ tum à Gallis ædificata fuerunt, tanquam de novis ea ætate rebus, ab ipsis Gallis in Italia gestis post Romam conditam. Ante vero Romam conditam gesta, in Transpadano agro nusquam complexus est Livius, minusque Trogus, Justinusve in historica auctoritate non magnificiendus ob deprehensam in ejus scriptis plurium rerum varietatem. Si quis tamen à Livii omissione arguendum putaverit, Mantuam eo tempore non fuisse ædificatam, quia de Brixia & Verona scribens Livius, nihil de Mantua dixerit, in rerum antiquarum ignorance versabitur, Livii narratione ac intentione male percepta, qui Gallorum sedes in Italia ab initio occupatas, conditasque, stricta oratione perstrinxit, & Transpadana oppida Gallicis urbibus antiquiora silentio prætermisit, tanquam ab ejus historiæ propositione, ac subiecto ordine, & tempore aliena. Insuper Plinii sententia, quod Mantua sola ex Tuscorum oppidis trans Padum relicta fuerit, nullo modo aptari, concordarique Livianæ historiæ poterit, nisi fateamur Mantuam ante Gallorum adventum à Tuscis ædificatam, situsque opportunitate adversus eosdem Gallos defensam postea, atque retentam fuisse. Quo quidem situ nihil in Transpadana planitie probatur tutius Mincio amne, circa urbem lacum stagnumve formante, quo universæ civitatis ambitus cingitur, & ab oppugnationis aditu amovetur: tutissimaque fit statio, parva militum manu excubante: à qua re Mantua rectissime dicta videtur, quasi *manu tuta*, manu, hoc est, gente. Idem Mincius Pado influens subvehendarum navium commodum præstat, ac piscandi simul voluptatem, & oculis & gutturi incolentium parat. Additæ quoque naturæ commodis fossæ ingentes sunt, operaria manu erectæ atque formatæ, quibus à Mantuano agro actuali lembo in Patavii valles per aquarum rivulos descenditur: rursusque eisdem in redeundo parvo labore adscenditur, pedite funem puppi annexum humeris trahente. Auget civitatis dignitatem dominii proprietates, ipsi civitati jamdiu indita ac continuata: potiri enim dominio populus videtur, cum Patricii viri publico jure & nomine principatus administratione fungantur. Gonciaca enim familia, à populi Conciione ab initio dicta, Patricio nomine ac jure Mantuæ præest, gens antiqua, bello & pace, domi, forisque conspicua, dominii amplitudinem etiam citra Padum Marchionali olim, nunc Ducali sceptro protendens, Cardineoque sæpius insignita atque illustrata galero, quam politiori nomine *Gonciacam*, potius quam *Gonzagam* appello, ne tam insignis civitas, unde Latinitatis lumen prodiit, sine Latinitatis ratione, clarissimam ejus familiam, vulgari ruditate conscriptam, in mea Historia deprehendat. Atque cum inter Mantuæ terminos & Adduam incertum sit, apud probatos scriptores, quæ oppida ante Gallorum adventum sita essent, ubi nunc Cremona est, ad antiquiora transeo, mox ad Cremonæ initia suo tempore reversurus.

BERNARDI SACCI,
PATRITII PAPIENSIS,
HISTORIAE TICINENSIS
LIBER II.

CAP. I.

De Insubria, aliisque Circumpadanis partibus, & ipsarum habitatoribus.



PRIMA trans Adduam Regio Insubria est: in qua describenda posteriores scriptores ab antiquis dissenserunt. Prisci enim Insubriam appellant regionem trans Adduam, ejusque fines in superioribus oris trans Ticinum fluvium extendunt, ubi nunc exstat Novariensis ager, ut Polybius probat libro II. his verbis: *Consules igitur adveniente Vere copiis in Insubres ductis Acerram urbem, qua est inter Padum & Alpes, obsedere.* Acerra enim trans Ticinum est, non longe ab ipso fluvio, opinorque Acerranum oppidum, quod Novariense est, fuisse Acerram. Livius etiam libro I. tertiae Decadis, Polybium ad verbum in pluribus secutus, ita scribit: *Ponte perfecto, traductus Romanus exercitus in Agrum Insubrum fuit.* Agrum trans Ticinum situm in superioribus oris Insubrum fuisse affirmans. Posteriores vero scriptores, nulla temporum & gentium distinctione facta, confinia Insubrum inter Adduam & Ticinum fuisse tradiderunt, à quibus ego dissentio: sequi enim in antiquis antiquorum attestaciones jure compellimur. In altero quoque errore posteriores deprehenduntur: Insubria ab Antiquis superior regio, juxta vocabuli sonum, appellata fuit, non autem inferior pars circa Ticinum amnem, Pado finitima, ubi flumina ipsa in unum coeunt. Quæ quidem inferior pars ab antiquis auctoribus, & præsertim à Livio, Lævis Liguribus adscripta fuit, libro V. ab Urbe condita, referens enim breviter ipse auctor Gallorum transitum in Italiam, ait: *Libuos Salvios Alpes transgressos consedisse prope Lævos Ligures (antiquam gentem) incolentes circa Ticinum amnem.* Primæva ergo Insubria fuit omnis regio à Gallis occupata in superioribus oris inter Adduam & Siccidam amnes sita; in inferiori autem ora, ab Addua usque ad Lambro fluvium, Insubrum pariter ager fuit. A Lambro fluvio usque ad Siccidam prope Padum, Lævorum Ligurum antiqua sedes, atque possessio fuisse probatur. Nulla ibi Tusci, Umbrique, nulla Gallis statio patuit, quod pluribus argumentis paulo inferius clare apparebit. Atque hæc regionum gentiumque distinctio, ac nominatio, à primo Gallorum adventu usque ad Gnei Pompeji Strabonis tempora perduravit, ut suo loco referam, antiquis prius ex ordine propositis. A Siccidam autem amne usque ad Duriam flumen Libui Sallii, quos memoravi, incolere, (Sallii enim, & Salvii ab Antiquis scripti fuere) & à Duria flumine ad Alpium fauces, quas perlustravi oculis, Taurini populi, eodem Livio referente, tenere, ut patet libro I. tertiae Decadis, priscumque etiam gentis nomen in civitate Taurinorum Metropoli hac ætate viget. Tres itaque tantum Italici nominis populi in Transpadano agro sub Prisci Tarquinii regno, Gallis Italicam planiciem occupantibus,

B fedes suas retinere, Lævi Ligures, Mantuani, & Veneti, inter quos Venetos, Patavini censentur, Livio attestante libro X. ab Urbe condita. Citra Padum vero Boji & Senones Galli, pulsus Umbris & Tuscis, à Trebia usque ad Apennini latera Tusciæ & Umbriæ finitima omnia occupare. Ab ipsa autem Trebia usque ad Alpes Ligurum gens rerum dominio potita fuit, nec appropinquantia Gallorum arma perhorruit, stetitque suo robore, suæque confinia ab alienis gentibus eâ ætate inviolata servavit, nomenque ipsi regioni suo jure dedit: Liguria enim omnis ea ora dicta fuit. Qua igitur antiquitatis dignitate hæc gentes inter Italos emineant, clarissime patet, cum eis exceptis reliqua Circumpadana loca Gallorum potestati, nuncupationique, concesserint, dictaque propterea tunc Gallia Cisalpina fuerit. Atque cum de Venetis & Mantuanis, quæ ad eorum antiquitatem ac dignitatem pertinent, retulerim, Ligurum similiter gentes ac dominia hoc loco colligere consequens est; præsertim cum ex Gallorum vicinitate propinquiore invasione periculo fuerint, nec tamen eorum imperio, aut armis, quibus tot populi eâ ætate cesserunt, ipsi succubuerunt.

CAP. II.

De Ligurum origine, & populis.

QUAE Ligurum antiquitas fuerit, ignorata à priscis scriptoribus, gentis origo arguit, præsertim à Plinio vetustatis perquisitore. Dionysius quoque Halicarnasæus eorum vetustatem probans libro I. hæc de Liguribus retulit, quod longe antiquior gens ipsa fuerit populis Aboriginibus, de quibus M. Cato scripsit: addens, antea quam Italiæ nomen celebre esset, quæ prius Oenotria dicta fuit, Liguriam notam fuisse poetis, scripsisseque de ea Sophoclem in *Triptolemo*, qui, Plinii testimonio, floruit centum & quadraginta quinque annis ante Alexandrum Magnum, anno ab Urbe condita nonagesimo supra ducentesimo. Nota itaque priscis ac peregrinis scriptoribus suapte fama & nobilitate Liguria fuit. Sive ergo Ligures à leguminum satione, ut quidam ait, sive à linguæ vel sermonis asperitate, quasi linguæ durioris, sive à ligatis utribus, quibus inveci supernatasse aquis diluvii ad Alpium cacumina perhibentur, sive ab alia causa appellati fuerint, ipsa sane appellatio antiquissima est, nullo unquam immutata sæculo. Nunc ipsius circuitum referam.

F Liguria à Meridie Mari Ligustico appellato, à Septentrione partim Pado, partim Apennini lateribus clauditur, ab Oriente partim Tusci, quorum fines olim occupavit, partim Placentino agro, qui quondam Bojorum fuit, jungitur, ab occiduo in provinciam usque porrigitur: & est tripartita situ, aere, & populis: Situ, quoniam alia pars maritima, alia montana, alia clivosa ex parte, & ex parte plana est: Maritima à finibus Tuscorum Genuam usque in Meridiem vergit: à Genua autem versus Occasum littora spectant æquinoctialem Orientem, à qua flexione Genua dicta fuit,

fuit, quasi in genu curvato sita. Atque hæc pars circa littora declivia frequens est oppidis & vicis, montana horrida ferme est tota, altissimis discreta rupibus Apennini latera occupans, atque ejus juga, aut saltibus, aut silvis possidens. Tertia pars Circumpadana, vel Aquilonaris appellari potest, quoniam & Padus ab Aquilone alluitur, & suis collibus Aquilonem spectat, à Meridie juga Apennini habens: in quo hoc mirabile opus natura edidit, quod exteriora ipsius montis latera in Meridiem versa, glabra ubique sunt, & scopulosa, præcipitio quam itineri aptiora, sine vepribus, sine fruticibus, ac sine plantarum regimine destituta. Contraria vero latera, in Padum conversa, opaca sunt, silvis ac arboribus referta: descendunt in hac parte, quasi ab Apennini utero, aprici ac distincti colles, rivulos per concavas vales in planitiem effundentes, qui demum in unum cocuntes, torrentes formant, ac citato lapsu in Padum ruunt; Padum fortasse inde dictum; quasi patentem aquarum aditum: Padus vero intumescens aquarum mole ambit Liguriæ oram, promptoque obsequio vicinis Liguribus navigationis opportunitatem offert, ferens quæcunque onera, nullo à Liguribus pro evectione exacto precio, adeo etiam elementa Ligusticæ regioni sunt propitia.

Hæc de situ diximus, & quemadmodum situ inter se Liguriæ partes differunt, ita etiam aeris temperie diversæ sunt. Maritima est calidior, & propterea, ubi sese valles pandunt, adsunt Oleæ sive Olivetæ, Myrtetæque semper virentia, Citrea in istis collibus: Poma maternos incurvant ramos, atque in humum deprimunt: flores bis in anno olent, odoremque in mariis intima fundunt, fluctusque demulcent. Ficus quoque olitoris ora atque ingluviem implens ac tumefaciens raro domini mensam primo tempore occupat, nebulone famulo, ac Sycophanta, præcocia quæque poma furtim decerpente. Montana est gelida, hyeme rigens, æstate grata, quæ invalescente æstate, nobiliores viri ex oris maritimis discedentes, montana loca petunt, ut opacas umbras, ac montium refrigeria excipiant; rursusque abeunte æstu, ad maritima redeunt, hyememque sæpe tanquam autumnum in aeris temperie transigunt, iisque aeris ac locorum vicissitudinibus Ligures longævi fiunt, ac salubres vivunt, & qui in victu frugaliore sunt, senectutem quasi juventam sine morbo, sine tussi, sine excreatu degunt. Circumpadana pars in planitie æstuosa est, terraque ipsa sub caniculares dies finditur, & hiatus passim aperit; in collibus autem aer est temperior, quoniam Aquilonares flatus oppida in alto posita facilius captant, ac refrigerantur, quam loca depressa. Vineæ in ipsis collibus sunt feracissimæ, albi ac rubri vini æque copiosæ, ita ut interdum utriusque anni vindemia exuberante, vasa vinaria dominorum usui sufficere nequeant: pruinaque mense Aprili plana loca urente, quod nostra ætas sæpius perpessa fuit, Ligustica vineta salva manent, frigore scilicet à ventis illato ocus ab Alpibus in planitiem descendente quam in eminentes à plano colles.

Sed jam de populis scribere opportunum est; quorum antiquissimi in maritimis sunt Genuenses, olim etiam *Genuates*, & non *Januenses*, dicti, ut quidam somniant, quorum incitiam probati auctores Livius & Plinius detegunt: eorum autem antiquitatem indicat tabula ahenea venerandæ vetustatis, olim effossa ad radices Apennini, sive jugi, in valle Porcoberæ, vulgo *Porciferæ* dictæ, anno millesimo quingentesimo septimo, quæ collocata inspicitur Genuæ, in Divi Laurentii templo, à me lecta & descripta: si quis vocabula & scriptionem spectaverit, facile agnoscat, linguæ ruditatem eo tempore adhuc in Latinis viguisse, cum tabula ipsa formata fuit, quæ continet Genuensium & alio-

rum populorum fines, ab arbitris discretos, anno centesimo post initium belli Punici: nominanturque in ea Langatii, Viturii, Odiates, Dectunines, Cavatunines, Mentovines, & alii. Celebres in maritimis fuere Intemelii, à quibus Intemelium, vulgo *Vitimillium*, & ab Occasû sedes habent: item Ingauni, sive Albingauni, Alpibus finitimi. Livius illam oram Alpinam putat libro viii. secundi belli Punici. Savone similiter, sive Savona, civitate, ubi Sacca familia insignis est, inter Alpina oppida relata: trans Alpes etiam sedes habuerunt Ligures Salvii, sive Salii, quos celebrant Strabo & Plinius. Livius, prior utroque, Salvios populos maritimam oram incoluisse inter Savoniam & Massiliam refert. Deridendique profecto sunt ii, qui omisso Savonæ nomine, ut scire aliquid videantur, Sabbatia vada scribunt; quasi vero necesse scribenti sit repetere prisca nomina, in desuetudine & oblivione posita & antiquata. Utere quæso notis nominibus, & in usum deductis, & obsoleta ac deserta desere; quæ enim antiquata sunt, perierunt, vivereque tantum illa videntur, quæ frequentantur.

Ab Oriente incoluere Ligusticam oram Apuani Etruriæ finitimi, & infesti, ut colligit Livius libro ix. belli Macedonici. Item Garuli, Hercates, & Apicini, fortasse à montium apicibus, in quibus pagos habuere, dicti: nam Suismontium & Balistam, præaltos montes, eos tenuisse, scribit eodem libro Livius, quod repetit in fragmentis quintæ *Decadis* libro v. Friniates quoque Ligures coluere Auginum montem, qui an sit is, qui *Augovius* hodie dicitur, discere potius vellem quam affirmare. Sunt & alii plures, quos prætereo, ut nostris Circumpadanis locum statuum; ex quibus memorantur Vagienni, sive Batienni, in quorum finibus Padum intumescere Plinius tradit, Eburriates, & Statielli, sive Statielienses, superiorem oram Tanaro finitimam incolentes, usque ad militarem viam; à via autem militari Padum usque circa Tanarum Marici populi coluere, à Plinio celebrati: juxta Maricos ad Orientalem plagam Iluates Ligures sedes habuere, de quibus Livius verba facit libro ii. belli Macedonici, quæ male videtur percepisse quidam Topographus in Lombardia describenda. Sed dubium suboritur, an sit corrupta lectio Liviana, scribique *Litnates* potius conveniat, à Litubio oppido, quod hodie suum statum ac nomen retinet, L. in R. mutata; *Riturbium* viri periti, populares vero *Riturbium* vocitant: in cujus finibus tepidæ aquæ ebulliunt, variis languoribus aptæ. Illis etiam populis alia adscribuntur oppida, ut Clastidium & Cællela, quæ hodie domini Papiensium sunt. Hæc de populis attigisse, quæ ab antiquis scriptoribus accepimus, satis est: de rebus gestis, & virtute eorum antiquiora referam.

Fide & hospitalitate Circumpadani insignes habiti sunt, eaque ratione, militaris via à Gallia, Hispania, & Anglia Romam tendens, quam vel militarem, vel Romanam, vel magistram vocant, in eorum finibus posita & frequentata conspicitur. Fide similiter maritimi enituere, peregrinos, nautas, & mercatores portu excipientes, foventesque, qua re gentium diversarum benevolentiam, amicitiamque inivere. Fide montani in socios stabiles, fortesque fuere, periculis etiam ob eam causam sponte susceptis. Primi enim Apuani, suis sociis à Tuscis violatis, arreptis armis Etruriam ingressi sunt, ejectisque colonis agrum occupaverunt inter Pisas & Romam, ipsosque Pisanos, eorum possessioni reluctantes, intra civitatis suæ muros compulerunt, obsederuntque, ut Livius passim enarrat, præcipue libro iv. & v. de bello Macedonico. Item cum Pisanis opem ferret Quintus Minutius Consul Romanus, sistere castra in loco, quo obviam

viam factus est Liguribus, Apuanorum urgente vi coactus est; comitiisque evocatus nusquam referre pedem, Ligurum arma pertimescens, ausus fuit. Bononia quoque suorum agrorum vastationem, & Mutina prædam & cædem fieri intra sua moenia, à Liguribus perpeffæ sunt. Placentia vero sua etiam tecta incendio conflagrari Ligustica manu sensit, desperatoque Romanorum auxilio, à suis colonis destituta fuit. Sed longe prudentius Cremona colonia agros suos impune vastari patiens, muris tuta Ligurum tela evitavit.

Nec terra solum, sed mari etiam Ligures enitueri, Massiliensibus Romanorum sociis classe sæpius conculcatis, & in fugam versis. Unde non immerito Livius antiqua eorum in pugnandi discrimine spectata virtute, hæc scripsit libro VIII. belli Macedonici: *Is hostis, velut ad continendam in Romanis disciplinam, natus erat, nec ulla provincia magis militem ad virtutem acuebat.* Idem alibi: *Hostis levis, velox, & repentinus, qui nullum usquam tempus, nullum locum tutum esse sineret, &c.* Deficiet calamus, manusque simul, si Martium saltum memoravero, à Romanorum clade nuncupatum, solis Apuanis circumvenientibus, quid si universi Ligures in unum convenissent, unoque consilio ac Duce bella gessissent, nonne invicti in præliis visi fuissent? Præclare igitur Strabo libro VII. scribit, solos Ligures in Italia diutissime Romanis obstitisse, tempora recensens, quibus eorum bella vigerunt. Ego vero Straboni hoc addo, Ligures Romano populo adhæsisse, non tam armis devictos, quam pellectos insigni Romanorum lenitate ac liberalitate, qua Romani usi sunt in Apuanos Ligures, quos in agrum Samnitum suo sumptu traduxerunt, diviseruntque in colonias, & quibus etiam dedisse centum quinquaginta millia argenti pondo Romanos ad reficiendas ædes, Livius notat, libro X. belli Macedonici. Hac enim tam immensa liberalitate in alios populos, in colonias deducendos, nusquam Romanos usos fuisse constat, præter quam in Ligures. Nec omnino eos fefellit fides habita Liguribus ipsis enim in agro Samnitico colonis constitutis, concidit inveterata illa Samnitum contumacia in populum Romanum, Apuanorum fide, ac vicinitate confracta. Quid memorem Genuæ refectioem, olim Romanæ Reipublicæ sumptibus procuratam, ut Ligurum gens, quæ armis subigi ægre poterat, beneficio devincta conquiesceret, Romanorumque amicitiam sua sponte susciperet? Nec ingrata illa Romanis fuit, multis in Jugurthino bello à Ligurum cohortibus præclare gestis, ex quibus quam maxime memorabilis expugnatio Castellum ad Mulucam fluvium fuit, quod desperatione fractus Marius erat deserturus: sed longe memorabilior Italica pugna fuit, in qua idem Marius contra Cimbros & Teutones dimicaturus Ligurum aciem in fronte collocavit, & Germanorum vim, antea Romanis formidolosam, Ligurum periculo atque virtute excepit, illamque gentium nubem fregit, fugavitque, ut Plutarchus in *Mario* refert.

Sed quid virorum miramur constantiam ac magnanimitatem, quando etiam in foemineo sexu, & in Ligustica muliere virtus animi enituit. Nam in educandis & servandis in periculo filiis studium unius Liguris matris Cornelius Tacitus admiratur, libro II. *Hist.* cap. XIII. quæ in præsentis vitæ discrimine posita, nefarios militum cruciatus constanti animo pertulit, ne filium, quem occultaverat, illis proderet: rogataque ubi filius lateret, in ventrem, ait, unde exierat, rediit; perdereque se ipsam quam indicare filium improbis militibus maluit. Prodeant hoc loco in medium, suæque maledicta pandant isti, qui Ligures calumniati sunt, & fallaces appellant, ut M. Cato Porcius, cujus naturæ asperitas, ne dicatur rusticitas, non tam Porcia, quam Canina deprehensa fuit, atque impro-

bata, quando etiam Scipionem Africanum civem optimum indigno latratu infecutus fuit: suis enim qui maledicere insueverit, multo magis alienis maledicturus erit, tandemque si alterum, cui maledicat, non habuerit, in sese, geniumque suum, maledicta vertat necesse erit. Noster quoque Virgilius, qui poetica licentia prorupit in ea verba, *vane Ligur*; mox dicacitatem suam retractans, alibi Ligurem, ut virum fortem, commendavit, illo carmine*, in quo Italiæ laudes celebravit, quasi sine Ligurum fortitudine, clara esse Italia nequirit:

Affuetumque malo Ligurem, Volscaumque verutum.

Malo enim ferendo assuescere proprium est virorum, ut ipse Poeta alibi † hoc carmine docuit:

O socii (neque enim ignari sumus ante malorum)

O passi graviores, dabit Deus his quoque finem.

Malo quidem assuescere ignavi & imbecilles nequeunt, fortitudine ac patientia opus est, quæ animi firmitatem mobilitati contrariam probat. Si itaque Virgilius Ligurem virum fortem appellat, quem alibi vanum dixerat, nonne sibi ipsi contradictionem implicavit, & posteriore approbatione priorem opinionem, utpote erroneam, abolevit? Indigne ergo, atque adeo improbe facit, qui Ligurum genti volubilitatis notam, aut dicendo, aut scribendo impingit, arguiturque antiquorum virorum testimonio ex animi livore ac scurrilitate potius, quam veritatis studio, in maledicta ruere, cum nusquam apud probatos scriptores pateat, gentem ipsam à fide publica defecisse; quod si unus, aut alter aberrasse, aut casu, aut culpa, visus fuerit; publica semper causa à privatorum nota discernenda & segreganda est, non autem tota gens paucorum vitio foedanda, ut præclare Rhodiorum Legati in Romanos elocuti feruntur Livio auctore: cuius hæc sunt verba: *Nulla nusquam gens tam modesta, tam morigerata reperta fuit, qua non aliquando improbos homines ediderit; Romaque ipsa non unum, aut alterum scelestum civem, sed nefariorum hominum catervas in unoquoque fere seculo à suis laribus emisit; nec tamen perditorum numerus bonorum cæterum ideo foedavit: culpa semper auctorem sequitur, & ignominia culpam, innoxius vero minime notatur.* Ergo si quis Ligur inconstantia lapsus, (ut est humana fragilitas in errando prona) & ex lapsu fallax deprehensus sit, non est propterea Liguria ex privati casu vaniloqua existimanda, publica constante fide, ac auctoritate, ut constat. Unde quæso crevere parentum nostrorum ætate Ligurum opes, honoresque, nisi ex eorum publica fide? quam populatim custodientes, res terra marique gessere historia dignas, non solum circa Italiam, sed etiam in Oriente multis subactis populis & ingenti præda in Italiam advecta: pacifque similiter temporibus, ubi quæso præclarius mercatorum fides spectata est, quam in Liguria: sed quid mercatorum negocia, permutationesque rerum, ac pecuniæ trajectionem, repræsentationemque, confector; quasi in his tantum popularibus actis eniteat Liguria.

Altius sese mea jam tollit oratio. Quot enim clari viri, à Liguria oriundi, ad summum Christiani orbis pontificatum evecti sunt, fidei & probitatis ergo? Quis Fliscæ gentis viros, virtutem, & amplitudinem nesciat? quis Cibuos ignotos habeat longa annorum serie, fidei præstantia pontificatu potitos? quis in Italia angulus exstat, quo Ruverie familie fama non pervaserit, à Ruvere vel Quercu dictæ? quæ quidem arbor cum plantæ proceritate, firmitateque, & comæ amœnitate excellat, ita ipsa gens rerum gestarum præstantia, non solum Liguriam obumbravit, sed urbem Romam Orbis caput, & alias Italiæ partes implevit gloria, firmavit fide, & structuris decoravit: innato scilicet Ligurum animis hoc studio, ut non solum suas regiones, sed alienas etiam ædificiorum magnificentia

* *Georgic.* II. v. 168. † *Æneid.* I. v. 202.

exornent; in qua quidem re unus nostra ætate Thomas Marinus mirabile opus exorsus fuit: ille enim Mediolani civis adscitus, cum domum non reperisset sibi ac suis satis aptam familiaribus, in urbis medio, disiectis domibus, ingentem molem erexit, Arci ac Palatio similiorem, quam domui. Sed dum insignes, antiquasque familias mente concipio, ut Spinulas, Adurnios, Frigosios, Aurias, Riaros, Cicadas, Salvios, Saulosve, & alios; illum virum silentio involvo, qui ignotas priore seculo orbis partes, Africæ à tergo litas, primus universo extra priscos limites circumvoluto pelago adivit; primus sermone, ac fide, rerumque commercio conciliavit, primusque Christianis regnis aggregavit: & ne sibi ipsi gloriam tanti laboris & periculi arrogaret, sed Deo soli tribueret, Christophori Columbi nomine substracto, opera tantum sua nota fecit.

Nec mihi hoc loco Genua omittenda est: Genua, inquam, olim à genu, nunc autem à virorum genere, quasi genitrix conspicui generis suorum merito appellanda, illo præcipue longævo atque insigni viro Andrea Auria ab ea genito, quem nostri seculi Reges, Imperatores, Pontificesque admirati in honore habere & consulere dignum putarunt. Tu illa civitas es, quæ CAROLI QUINTI Romani Imperatoris suffulta præsidio atque favore, per imminentes olim Italiæ procellas evadens, priscam libertatem consequuta es, alienoque à te summoto imperio, caput Liguriæ facta es, atque inter Italiæ sex principes urbes, minime tu postrema sedes. Rudem olim & effrenem gentem, novis legibus, novisque ritibus, in unum quasi corpus componens; nec tuæ solum genti, sed alienæ etiam vivendi legem tuo jure præscribens. At quæ me sententia, quæ ratio ab antiquis ad præsentia tempora traxit? lapsus sum (fateor) Ligurum studio, ad ea quæ mei instituti non sunt: corrigam itaque me me, ad antiquos Ligures scriptionem vertens.

C A P. III.

De Liguribus Ticini accolis.

CISPADANI tractus accolæ, inter Apenninum & Padum positi, primi omnium gentium, ut dixi, Ligures fuere; à quibus Pado cognomen adjectum scripsit Polybius lib. II. Plinio in ejus sententiam eunte, libro III. quod nomen Bodincum fuisse uterque tradit, id est, fluvium fundo carentem. Clarius autem Ligustica lingua *Vodincum*, quasi *vadium iniquum* dicitur. Hi igitur antiqui populi vicinitate freti ac hominum copia, Pado è regione trajecto, infudere sese in Transpadanam oram, fedesque suas citra & ultra Ticinum amnem prope Padum posuerunt, tempore scriptoribus incognito: quod libet probare, ut excludantur à suis opinionibus illi, qui diversa prodiderunt. Primum itaque dico, quod antequam Gallis nota fieret Italia, jam ab antiquo Ticinensis ora à Lævis Liguribus habitata erat: quod clarissime refert Livius libro v. primæ Decadis: cujus hæc sunt verba: *De transitu in Italiam Gallorum hæc accepimus. Prisco Tarquinio Romæ regnante, &c. Subdens inferius: Libui confidunt, post hos Saluii*: id est, post hos, quos retulit in Italiam descendisse, Gallos, Libui Saluii confidunt in Italia, locum indicans Livius, in quo sedem posuerunt, per hæc verba: *Qui scilicet Saluii petiere Italia loca prope antiquam gentem Lævos Ligures, incolentes circa Ticinum amnem, &c.* Colligendo Livii sententiam, verborum transpositione in constructionis ordinem redacta, probat Livius Gallorum transitum in Italiam diversis temporibus factum, regnante Tarquinio Prisco, qui triginta & octo annos imperavit: sed quæro, cur antiquam Gentem appellaverit Livius Lævos Ligures, incolentes circa Ticinum amnem. Necessè est respondere juxta Georgii Merulæ viri periti interpretationem, positam lib. VI. antiquitatis

A *Vicecomitum*, ubi de Vercellis sic inquit: *Hieronymus in quadam Epistola Ligusticam urbem Vercellas scribit, qui nisi de Lævis Liguribus intellexit, Gente veteri atque potenti, ut Livius tradit, & à quibus conditum Ticinum fuit, non video, cur ad Ligures Vercella pervineant.* Superior ergo propositio, quod antiquior fuerit circa Ticinum amnem prope Padum incolatus Lævorum Ligurum, quam Gallorum adventus in Italiam, manet inconcussa, & per consequens cum à Gallis ædificatum fuerit Mediolanum, prior Mediolano, longeque antiquior, incolatus, & possessio Lævorum Ligurum fuit.

B Sed videamus secundo loco quidnam significare censeatur illa appositio, *antiqua Gens*: non enim à tantæ eruditionis scriptore, temere dicta est Gens antiqua Ticini accola. Respondere oportet, quod cum Tarquinii Prisci ætate, Ligustica Gens Ticini accola antiqua habita fuerit ex historici Romani attestazione; certe illa antiquitas ad tria refertur, ad originem Gentis, ad tempus originis, & ad nobilitatem Gentis. Ad originem Gentis, quod non ab externis, sed ab Italicis parentibus, enata Gens illa fuerit, tempore videlicet, cujus initii memoria nulla exstet, antiquitate ipsius Gentis hominum scripta, memoriamque, superante, sicut de Aboriginibus Latii scripsit Cato, id est, de populis suapte vetustate ignotæ originis. Cui quidem antiquitati jure & merito à probatis auctoribus nobilitas adscribitur, ut à Virgilio nostro*:

Nos Troja antiqua (si vestras forte per aures Troja nomen iit) &c.

Et alibi†:

Est locus, Hesperiam Graji cognomine dicunt, Terra antiqua potens armis, &c.

Quibus quidem in locis uno ore Interpretes antiquam, & ad temporis vetustatem, & ad nobilitatem referunt: atque ita Virgilii, & aliorum scriptorum, suffragio, Livii attestatio suffulta permanet, quod & ad vetustatem Gentis, & ad nobilitatem, relata illa appositio fuerit. Videndum insuper est, num à Livio alii scriptores differant, præcipue Polybius Italicarum rerum diligens scriptor, & longe antiquior Livio. Ille enim de populis scribens, qui inter Padum & Alpes habitant prope Ticinum fluvium, sic inquit libro II. *Inter Padum & Alpes habitant Lævi*: quos enim Lævos dixit Livius, Interpretes Polybii *Lajos* in Latinum vertit, nominis proprietate minime percepta, atque observata, ut infra patebit: quod tamen nomen ad idem tendit. Nam exordiens Polybius à Lævorum habitatione, antiquiores eos Insucribus Italica possessione probat, juxta Livii attestatem. Strabo quoque Livio consentiens libro v. *Geographiæ* inquit: *Transpadanam oram circa Ticinum amnem tum à Liguribus, tum à Gallis habitatam, &c.* Ligurum possessione præmissa juxta temporis vetustatem, origine tamen habitationis Ligurum præ vetustate non prodita. Unde si quis curiosior scire cupit annorum numerum, quo diffinitur antiquitas, difficile scitu esse inveniet propter varietatem scriptorum; Juris enim scriptores antiquum tempus censent spacium unius seculi, quo longævi hominis vita finiri solet, id est, centum annos, vel centum viginti. Historici vero, qui Gentis, aut Regni, aut Republicæ, aut Principatus tempora colligunt, plures annos requirunt ad statuendam antiquitatem Gentis quam centum: ratio in promptu est, quoniam universitas Gentis antequam adolescat, atque accrescat ad populi speciem ac frequentiam, tria plerunque attingit secula, Judææque natio quartum seculum in Ægypto peregit. Nam aut bello à finitimis moto, aut seditione, aut clade divinitus immissa populo, minuuntur cives, cum se putant civitatis formam affecuti, reciduntque rursus in plebis modicitatem, donec sequens generatio numerum virorum, ac præstantiam

* *Æneid. I. v. 379.* † *Ibid. v. 534.*

suppleat. Nostros igitur Lævis Liguribus five ducentorum, five plurium, annorum spacium quis tribuerit ante Prisci Tarquinii regnum, clarum est, quod eorum incolatus antiquior bello Punico quingentis annis fuit. Item quod Itali origine, quod plures populi, non unus populus. Item quod liberi, ac sui juris, dominiique fuere, non autem coloni alterius gentis: quæ tria si ignoravit aliquis scriptor, ignoratio ignorantem sequitur, veritas autem è tenebris eruitur, atque probatur: sed transeamus ad alia.

C A P. IV.

De Lævorum nuncupatione, & Ticino condito.

CVR Lævi Ligures appellati Ticini accolæ fuerint, scire oportet, ne quis eos à Tribu Levi dictos putet: nam Lævi nuncupati fuere ad differentiam aliorum Ligurum, in Cispadana regione sedes habentium: quoniam ipsi Lævi populi juxta Padum à læva manu relinquuntur, nobis secundo flumine navigantibus, aliis Liguribus Cispadani tractus ad dexteram dimissis. Lævique postremo dicti fuere, Ligurum mentione omiſſa, ut apud Livium libro III. belli Macedonici, quia diuturna eorum possessio, sicut eisdem ab antiquo paternæ originis solo, ita ab ejus originis nomine abdicavit, & in Lævorum nuncupationem transiit. Hi ergo populi, occupatis citra & ultra Ticinum campis, proprium sibi ipsis dominium ac regimen statuerunt, pluribus ædificatis oppidis, à quorum pluritate Lævi generali, five regionali nomine dicti fuere: & inter quæ quidem oppida Ticinum fuit ipsius regionis caput, non procul à Pado conditum, ut Plinius ait, relatione habita ad antiquum Padi alveum, de quo infra dicetur: cujus quidem Ticini ædificatio ab initio magni ambitus non fuit, ut patet ex antiquo circuitu, ruinis pene deformato: quatuor enim spectantur priscae circuituionis latera, quorum primus angulus Orientem spectans, & etiam in Septentrionem vergens, situm habuit juxta ædes sancti Olderici, quæ conjunctæ sunt Collegio Mariliano. Alterius lateris angulus ab Occidente erat prope Monasterium sancti Fœlicis. Inter utrumque angulum porta exstabat juxta turrim rotundi ambitus, Boetii nuncupata, ab ejus viri carcere: cujus portæ fragmenta superioribus annis disjecta fuere, ut platea longior fieret ad exercendum equitum spectacula, ubi antiqui muri adhuc monumenta cernuntur. Alius angulus Occidentalis, flectens etiam prospectum in Meridiem, erat super clivo Monasterii sanctæ Agathæ, situ quidem inexpugnabili: inter quem angulum & superiorem remansit in sua prisca ruditate porta Occidentalis, Marica appellata, de qua alibi dicam. Quartus angulus Meridionalis, Orientalisve, exstabat non longe à templo Divi Alexandri, inter quos duos angulos à Ticino fluvio distantes ad lapidis jactum, plura supersunt vetustatis monumenta, tam circa Divi Theodori ædes, quam etiam circa domum publicam, Salariam dictam, à falis repositione.

Ab hujusmodi angulo Divi Alexandri ad superiorem angulum sancti Olderici, duæ intercedebant portæ, quarum altera Quinquivia appellatur, cujus situs ex parte superest in Orientem, spectans juxta Monasterium sancti Christophori, non longe à vico Quinquivio, à quinque viarum concursu, five conjunctione, nuncupato. Altera porta est paulo inferius, marmorea mole constructa, olim Portoria, id est, porta Orientalis dicta: extra quam portam divi Laurentii templum situm est, (templa enim tanquam magis nota memoro) intra oppidi ambitum, duo summæ vetustatis monumenta in tanta temporum ac rerum evolutione cernuntur, cloacarum ordo, mirabilisque structura, sub terris abdita, quibus civitatis excrementa

A excipiuntur; & aqua pluvia vicatim ingrediente, ad Ticini amnis fluentia depelluntur, ipsis cloacis passim sine humano labore emundatis: pluvialis enim aquæ impetus, atque decursus pro emundatore habetur, cloacarum situ in Ticinum fluvium prono atque pendente, & quod mihi mirabilius in eis videri solet, est ipsa laterum magnitudo, (universæ enim ex lateritio opere constant) quæ longitudinis est fere duorum cubitorum, latitudinis unius cubiti, altitudinis quatuor digitorum. Alterum nobilius monumentum est, turrium altitudo ad solam nobilitatis ostentationem ædificata, Romanorum exemplo, qui in agris quisque suis turres erexerunt, ut sui juris possessionisque in omnem ævum attestationem facerent. Magna autem turrium frequentia in antiquo civitatis ambitu ab Orientali tantum latere comperta, indicat, non eodem, sed diverso tempore oppidi partes ædificatas fuisse, & Orientalem partem, Occidentali longe antiquiorem esse; cujus rei inquisitionem hoc loco omitto, vertoque animum ad declarandum, cur Plinius scripserit, Ticinum non procul à Pado conditum fuisse.

C A P. V.

De Pado, & Ticino fluminibus.

CTICINVS amnis è lacu Verbano effluens, per Insubrum & Lævorum agros in Padum olim totus confluebat, sine ulla aquarum diminutione, ac diversione: de qua quidem diversione, à Principibus postea facta, alio loco dicendum erit. Cum itaque in unum flucret Ticinus amnis, Pado conjungebatur non procul ab ipso oppido, ubi nunc existat veteris alvei forma, *Rupia* populari lingua appellata, quam parva inundatione tumescens Paddus, hac quoque ætate, suo jure repetit, turbatque undis: quæ quidem forma antiqui alvei ipsius Padi distat à civitate quatuor stadia, à Ticino fluvio incipiens, tendensque versus Summum vicum: (dividitur enim Ticinus amnis ex parte alluens Ticinum urbem, & ex altera parte secedens ab urbe per quatuor stadia, ubi Padi erat cum Ticino antiqua copula: cujus rei ignari nonnulli mirantur illa Plinii verba, *Ticinum conditum non procul à Pado*: ad quorum admirationem tollendam, referre utriusque fluminis diversitatem, conjunctionemque, ac secessum institui) Ticinus in primis clarissimus fluvius raro ex nostris imbribus tumescit, sed aut liquefacta ab æstu nive, aut assidua Alpibus ingruente pluvia augetur aquis, auctusque minime cito detumescit Padi exemplo, sed viginti & amplius dies tumidus vagatur, replet valles undis, valliumque lacunas, prata & pascua ineunte æstate gelidis aquis invadit, uritque herbas virore absterſo, ac diuturna mora arva emacerat, arida arecula sparsim in recessu suo non dono, sed damno, demissa. Paddus è contrario singula excipiens, hinc atque illinc flumina, torrentesque, five ab Apennini jugo quisquis humor defluat, five ab Alpium cacumine undæ decidunt, statim turbatur, assurgitque elatus aquis, atque in vicinos agros præceps fertur, suoque murmure ac impetu, omnibus naufragium minatur: fugiunt jumenta illo insequente, strident nautæ unda puppim vertente; agri, villæque merguntur. Ille autem suo more spumans ac fremens, tecta, templaque vicina fluctibus impune petit, atque undarum impulsu, interdum ab imo subruit, ac præcipitantia vorat, simulque dominos, domumque, & collabentia tabulata immani aquarum vortice quasi hiatu excipit, cunctaque ingurgitat, ac subvehit, nunquam nostro apparitura seculo. In tanto tamen rerum motu, gentiumque discrimine, ac pavore, unius diei effulgente luce, ac unius noctis spatio efflante Occidentali vento, quem nostri accolæ *Alpinum* vocant, concidit repente ille, suosque



- | | | | | | | | | |
|------------------------------|---------------------------------|---------------------------------|-----------------------------------|--|-----------------------------------|--|------------------------------------|------------------------------------|
| 1. Ecd. S. Andreae. | 9. Hospitale familia Decanibus. | 17. Ecd. S. Mar. in Canepanova. | 25. Ecd. S. Zeni. | 33. Colleg. Griforum. | 41. Monaster. Monial. Pusterle. | 49. Monaster. S. Austiale. | 57. Hospitale Eypesitorum. | 65. Ecd. S. Mar. Magdal. |
| 2. Ecd. S. Augustini. | 10. Ecd. S. Epiphani. | 18. Monast. Nov. Monial. | 26. Ecd. & Mon. Annuntiat. | 34. Ecd. Spir. Sancti. | 42. Statua Regis Solis. | 50. Monaster. S. X. fori. | 58. Monaster. S. Cathor. de Senis. | 66. Ecd. S. Bartholomaei de Ponte. |
| 3. Salla magn. Ludor. Ducal. | 11. Ecd. S. Martini. | 19. Ecd. S. Eusebii. | 27. Ecd. S. Mar. Consoloni. | 35. Ecd. S. Gervasi. | 43. Ecd. S. Iosephi. | 51. Orator. B. M. V. in Mont. S. Clar. | 59. Ecd. S. Anth. de Padua. | 67. Ecd. S. Mariae Capella. |
| 4. Ecd. S. Clarae. | 12. Ecd. S. Mar. de Cacijs. | 20. Hospitale magn. S. Matthei. | 28. Turris Boctii dirut. A. 1586. | 36. Ecd. S. Mariae vnn. Sanctior. | 44. Ecd. S. Marini. | 52. Ecd. S. Blasii. | 60. Ecd. S. Marci. | 68. Ecd. S. Theodori. |
| 5. Ecd. S. Francisci. | 13. Palat. & Colleg. Pontific. | 21. Gymnasium. | 29. Ecd. S. Rochi. | 37. Monaster. S. Gregorii. | 45. Ecd. S. Mar. Peroni. | 53. Monaster. S. Clarae. | 61. Ecd. S. Mar. de Curte Cremona. | 69. Monaster. S. Agathae. |
| 6. Ecd. S. Sebastiani major. | 14. Platea Nigorum. | 22. Ecd. S. Martini. | 30. Ecd. S. Mariae Carmelitar. | 38. Ecd. S. S. na. Fructatis. | 46. Ecd. S. Andreae. | 54. Monaster. S. Franchae. | 62. Ecd. S. Simonis. | |
| 7. Colleg. Casilianor. | 15. Ecd. S. Cuniforti. | 23. Ecd. S. Pantaleonis. | 31. Ecd. S. Joh. donar. | 39. Ecd. S. Georgii in Monte. | 47. Ecd. S. S. Philippi & Jacobi. | 55. Ecd. S. Trinit. S. Luc. | 63. Ecd. S. Mar. de mille virtut. | |
| 8. Hospitale Incurabilium. | 16. Ecd. S. Romani. | 24. Colleg. Marianorum. | 32. Monaster. S. Benedicti. | 40. Ecd. S. S. na. S. S. na. S. S. na. | 48. Monaster. Dalmatii. | 56. Ecd. & Hospit. S. S. Trinit. | 64. Ecd. S. Michaelis majoris. | |

P. vander Aa. Excudit. Batav. cum Privilegio.

fluctus raptim colligit, ac evulsas passim arbores dimittit, atque intra riparum anfractus biduo desiliens, quasi alienus ab hesterno ambitu ac furore profluit, neque in recessu hospitam tellurem sine suæ moræ indicio relinquit, omnia quippe udo pinguique limo alluens quasi visco illinit; quo quidem humore ditantur pascua, herbis feracius inde profilitibus, sicut ex adverso à Ticini aquis exuruntur prata, atque exiles herbæ prodeunt, gelida aquarum vi terram inficiente.

Alio quoque insigni discrimine hæc flumina inter se differunt, quod Ticinus nulla fere aliarum aquarum ope adjutus, suapte tantum violentia agitur, nec repente, sed paulatim, terra alluvione congesta alvei sedem mutat: Pado contra sæpe totus ab alveo profiliens, alium sibi extemplo alveum sine fossilibus eruit. Ea enim hujus fluminis natura est, ut si ab Apennino tantum aquarum copia irruat, fluctus in adversam ripam torqueat, si vero ab Alpium latere tantum aquarum impetus fiat, in alteram ripam impellat undas, agrique sine modo, sine mensore, sine precio dominis, ubivis impetierit, adimuntur: quod si ab utroque latere concurrant sub idem tempus aquæ, effertur ab alveo vis fluminis, quo minus cogitas, infestior ruitura, ventisque interdum agitur, non minus quam undis. Mutare itaque sedes suas Pado, aliaque vada quærere ac retinere promptius est, quam Ticino. Quæ quidem promptitudo, atque facultas, minime illi perpetua est: hæc enim potentia inest ei ab ostio Tanari, ubi elegans Bassinania eminet, usque ad Mantuani agri limitem, ubi Burgifortium jacet, à vulgo *Burgiforte* dictum, distans à Bassinania centum millia passuum. In qua demum regione definit Pado ripis infestus esse, leniorque manat, quam in superioribus oris, aggeribus utrinque vallatus; quibus tamen nonnunquam effractis, omnia in agris, villisque rapit: sed cessante inundatione illæso riparum limite elabitur, ac in Ferrariensem agrum bicipiti cornu invehitur. Cur autem à Burgifortio infra ripis, aggeribusque, facilius quam in superioribus oris coerceatur, cum major aquarum moles inferius colligatur, quam superius, duplex subest causa: Prima est montium ac collium longinquitas, è quibus dilabuntur amnes, torrentesque Padum efficientes: qua longinquitate ac distantia interveniente, minus præcipiti lapsu undæ defluunt: Altera est agri planicies longe æquabilior in inferioribus, quam superioribus oris, cui fit similis fundus alvei; in qua quidem planitie lenius manant à natura aquæ, quam in pendenti & clivoso solo.

Hac igitur fluminum potentia ac dissimilitudine prope Ticinum oppidum coeunte, Padoque suapte natura sæpius intumescente, eveniebat, ut quamvis Ticinus sine alieno aquarum auctu deflueret, Padi tamen tumore & undis fursum versus repelli videretur, ejus fluctibus à Pado redundantibus, sive retrocedentibus: ex qua quidem redundatione Ticinus intumescens per aquarum effusionem universam oram alluebat, quæ ex adverso oppidi ad Meridiem sita est, ab ipsius amnis effusione, vallis Ticini appellata; multo etiam latius inundatio invalescebat Ticino ipso simul sua vi intumescente. Obnoxia itaque tum Padi, tum Ticini aquis, ob nimiam vicinitatem fluminum, omni fere tempore ea regio erat, solisque navigiis ac piscationibus patebat. Jungi propterea ponte Ticini ripæ prope oppidum nullo modo poterant, fluminis divisione, & ambitu tripartito regionem interluente, ac lacunis stagnisque, ab ipso amne inundante factis, passim intercedentibus; quæ quidem aquarum spacia, sicut à Meridie Ticino oppido magno tum munimento erant, appropinquareque exercitum ab ea ora vetabant, ita ex adverso magnum etiam incommodum incolis afferebant, cum omnia hinc inde essent navium remigatione longo tractu trajicienda. Rece-

A dere exinde posterorum ætate à prisco alveo Pado coepit, subjectam Apennino planitiem alluens, atque ad tria passuum millia à Ticino secedens: cuius secessu, ac longinquitate, Ticinus fluvijs, qui antea prope urbem Pado conjungebatur, procul ab ipsa urbe conjunctionem transtulit, simulque destitit oram urbi proximam, quibus assueverat, aquarum effusionibus infestare. Subsistere itaque ea causa aquæ, purgarique lacunæ, & vallis Ticini pascuis, pratibusque lætissimis, virere coeperunt, fluereque postea Ticinus eo loco bipartito alveo satis habuit, ut etiam hodie fluit Insula inter utrumque alveum interposita, ubi suburbanus vicus ædificatus est. Altera quoque regio omnium feracissima trans Ticinum amnem eodem Padi abscessu nostris Ticinensibus per alluvionem accessit, *Sicomaria* appellata, ea ratione, quod, sicut maria, olim aquarum latitudo ibi pateret. Iis igitur urbis Ticini patefactis initiis, inquirendum est, quo tempore fuerit ipsa urbs à Liguribus condita.

CAP. VI.

De tempore adificationis Ticini.

TICINUM à Lævis Liguribus ædificatum fuisse M. Cato tradidit: cuius scripta non habentur, sed à variis scriptoribus membratim referuntur, præcipue à Plinio libro III. de Transpadana Italia, ubi de Catone, & Ticino mentio fit. Tempus autem C ipsius ædificationis non exprimitur: attamen ante bellum Punicum conditum Ticinum plura argumenta probant, & in primis Varro libro II. de Re Rustica scribens, *Publium Ticinium Menam ex Sicilia Romam tonsores primum adduxisse, anno post Urbem conditam quadragesimo quinquagesimo quarto*: cuius Varronis verba Plinius retulit libro VIII. Ego hoc loco Ticinii cognomen à Ticino oppido fluxisse puto, sive ille Publius Ticini ortus, sive inde oriundus fuerit. Si itaque cognomina virorum inde fluxerunt, anno quadragesimo quinquagesimo quarto ab Urbe condita, ergo Ticinum antea conditum erat. Si quis tamen à Ticio potius quam à Ticino Ticinium deductum putaverit, ut est humana mens contentionis avida, respondebo, à Ticio diminutive Ticilium & Ticilinum derivari, à Ticino vero Ticinium, sicut à Rhodo Rhodium, à Corintho Corinthium, & ab Ægypto Ægyptium; Varroque ille Latinitatis fons maluit Ticinium dicere virum oriundum à Ticino oppido, ipsius Latinæ linguæ concinnitatem secutus, quam Ticinensem: cuius auctoritatem secutus Donatus Actialeolus, vir peritus, in *Caroli Magni Vita* describenda, agrum Ticinium dicere quam Ticinensem maluit. At uno argumento in hac re inniti, & tanquam sublata anchora uno remige in altum evehi, ex patriæ meæ dignitate minime esse puto, quare alia suggeram ad ostendendum Ticinum conditum fuisse ante Prisci Tarquinii regnum.

E Primum enim constat Lævos Ligures antiquos Ticini accolae fuisse ante adventum Gallorum, ut supra retuli tertio Capite. Item constat eosdem Lævos Ligures Italos fuisse, natione, lingua, moribus, ritu, & disciplina diversos ab ipsis Gallis, tum populatim in Italiam irruentibus, à quibus ejecti ab Insubria Tusci fuere. Si ergo diversi à Gallis Lævi, item si vicini fuerunt, quonam modo se, suaque, tueri sine munito oppido potuerunt à tam populo- F sæ, validæque, ac vicinæ nationis impetu atque concursu; cui neque Tusci, Romanique simul, neque Græciæ atque Asiæ populi resistere aliquando armis valuerunt? Nam si longinquæ atque abditæ gentes vi subactæ Gallis cessere, multo sane magis ipsa Lævorum regio eorum armis cessisset, cum sit vicinior, nisi oppidis simul, ac virorum robore, eo tempore firmata fuisset. Nec mea argumenta quis dejiciet respondendo, Lævos populos Gallis fortasse amicos, foederatosque fuisse, quia replicatur, de foedere nusquam

constare, liquere vero claris experimentis diversarum gentium amicitiam diuturnam esse omnino non posse.

Sed ut pertinaciam, quæ propria imperitorum est, tandem retundamus, fingamus amicitiam intercessisse. Ego rursus ab amicitiae capite argumentationem retorqueo. Si amici & foederati fuerunt, quam ratione inire amicitiam foedusque sancire cum Gallis Lævi potuerunt sine urbe, aut oppido, gentis capite, ubi populares conventus fierent, statuerentque quid è re communi esse discernere? sive igitur amicitia, sive inimicitia fuerint, oppidum habuisse Lævos eo tempore necesse est dicere: ex cuius quidem oppidi situ atque opportunitate digni amicitia, vel inimicitia, fuerint, aliter expugnati potius, Tuscorum exemplo, à Gallis quam amici adsciti fuissent. Bicipiti ergo ratione firmata conclusio est, oppidum omnino suæ regionis caput Lævos habuisse ante Gallorum transitum in Italiam, quod si oppidum habuerunt, necesse est pariter fateri illud ipsum fuisse, de quo mentio à scriptoribus facta fuerit, potius quam aliud, de quo scriptum non sit. Porro igitur cum à plerisque antiquis scriptoribus referatur ipsum Ticinum à Lævis conditum, ergo ab initio incolatus eorum conditum fuit. Et magnum profecto est antiquitatis ejus argumentum, quod Livius de Gallorum rebus, ac Insubria occupata, scribens *lib. v.* nullum de eo oppido verbum fecerit, sicut fecit de Mediolano, Brixia, & Verona, tum à Gallis ædificatis, tanquam de novis ea ætate rebus, quia cum Ticinensis ora, Pado vicina atque conjuncta, ab Italica gente jam diu habitata esset, nullamque scriptoribus novitatem ex possessorum mutatione attulisset, nihil etiam de ea differendum ab Historicis circa illud tempus fuit, sicut fuit de aliis scribendum, quibus rei novitas contigerat. Parique ratione idem Livius neque de Patavio, neque de Mantua, Mutinaque, eo loco verba fecit, quæ tamen jamdiu conditæ erant. Et quamvis Livius nominatim eo loco de Ticino oppido mentionem non fecerit, breviter tamen dixit, Lævos Ligures, antiquam gentem, Ticini accolæ fuisse: ex quibus quidem verbis major nobis significatio ingeritur, quam si Ticinenses dixisset, quia si nominatim Ticinenses scripisset, cives tantum ipsius oppidi demonstrasset, & ad unius oppidi limites, Lævos perstrinxisset: sed cum scripserit Lævos Ligures, universos regionis incolas, à Pado usque ad Insubriam collegit, sub qua universitate Ticinum oppidum, ac Læumellinus ager, aliaque, comprehenduntur, quæ juris Lævorum erant, & qua quidem universitate expressa partis adjectio nusquam fuit necessaria: quod non solum dialectica ratione, sed etiam ipsius Livii stylo docemur. Ille enim gentes enumerans, per quas ab Hispania ad Insubres Annibal iter fecit, omnis civitatum nominibus, provinciales pro ipsa provincia, & in ea contentis scripsit, ut Illergetes, Bargusios, Aufetanos, Aquitanos, Allobroges, Tricastinos, Vocuntios, Tricorios, Taurinosque, inter quos expugnatam à Poenis civitatem memorat gentis caput, cujus nomen omittit. Nimis quidem ille vir Romanis rebus illustrandis addictus, & ab aliis populis alienus fuit, ideo strictim aliena attigit, quæ non erant rei gestæ ratione cum Romanis conjunctæ, ut ipsemet profitetur *libro iii.* belli Macedonici iis verbis: *Non opera est prosequi, ut quæque acta sunt in his locis, &c.* Et paulo post *lib. v.* ait: *Abstulerunt me velut de spacio Græcia res immixta Romanis, non quia eas opera precium esset persequere, &c.* Nulla itaque mihi insuper aggreganda argumenta puto, cum non ex oppidi antiqua structura, sed à virorum virtute quærenda præstantia sit, ut infra referam.

C A P. VII.

Cur in Romanorum fuga à Ticino, de oppido mentio nulla fiat.

RESPONDERE me oportet iis, qui ut videantur scire antiqua, arguunt, opinione, non ratione, imbuti, atque inquirunt, cur de Ticino oppido mentio nusquam fiat in fuga P. Cornelii Scipionis, qui Ticino, Padoque, eadem (ut ajunt) nocte trajecto, ad Trebiam perrexit, hincque suo arbitratu, historia non inspecta, sumunt conjecturam Ticinum nondum fuisse conditum: quoniam, ut ajunt, aut uni, aut alteri Duci, atque exercitui situs sui opportunitate commodo usuique fuisset; quæ quidem dubitatio à Francisco Philelpho excitata fuit, cujus exstat *Epistola* de ea re Catoni Sacco gravissimo Jurisconsulto inscripta, qui fuit frater Rosii Sacci atavi mei, floruitque in Ticinensi Gymnasio anno à partu Virginæo quadringentesimo quinquagesimo præter millesimum. Philelphum etiam secutus est Flavius Blondus, à quibus dissensere celebres viri, Sabellicus, Georgius Merula, & alii plures, qui de Italiæ situ Latina maternaque lingua conscripserunt. Insecuti sunt deinde Cremonenses scriptores, qui omnem studiorum suorum vim in hanc quæstionem effuderunt: quibus ex adverso respondeo, cur fieri mentio debuit, si circa Ticinum oppidum nihil memorabile & relatu dignum à Romanis eo tempore actum fuit? cur quæso debuit historiæ scriptor insectare? atque ut hæc insana opinio tandem à vulgi auribus abigatur, particulatim singulas colligam ambiguitates, atque refellam.

Primum enim quod de ponte dicitur, nihil potuit ineptius proponi, cum nusquam constet sub Annibalis adventum Ticinum amnem prope oppidum ponte junctum fuisse, vel jungi potuisse, Padi & Ticini aquis late ex adverso oppidi regionem olim occupantibus, ut retuli quinto *Capite*: si leant itaque qui à pontis commodo argumenta sumperunt; quia pons lapideus, qui hodie spectatur, olim non erat, & à non ente, id est, ab eo quod tunc non fuit, inanis est argumentatio. Altera ambiguitas proponitur circa opportunitatem oppidi. Quocirca videamus, quam in regione Romani trajecerint Ticinum amnem, castraque locaverint, quia Ticinus fluvius alvei longitudine à lacu Verbano ad Padum quinquaginta millia passuum excedit: cujus quidem longitudinalis pars inferior Lævorum, superior autem Insubrum fuit. Polybius, Liviusque scripserunt eos trajecisse in agro Insubrum, non ergo Lævorum. Sed quonam in loco ipsius agri Insubris quæro. Polybius *libro iii.* locum expressit iis verbis: *Postridie ejus diei uterque Dux per ripam fluminis Ticini ad partem Alpium cum exercitu procedit, &c.* Notandum est verbum *ad partem Alpium*, id est, versus regionem Alpibus vicinam, quæ Novariensis est regio, ipsis Alpibus propinqua, & à Ticino urbe longe seposita, qua quidem Novariensi ora semper recta & militaris patuit via, à Taurinis ad Insubres proficiscentibus, ut Annibal ipse tum proficiscebatur, Polybio, Livioque testibus, & Cornelius Scipio ex adverso obviam prodibat. Quam igitur ratione digredi Polybius, aut Livius, debuit ab Insubrum agro, ubi utraque castra erant, ad describendum Ticinum oppidum positum in Lævorum angulo, & in inferiori Ticini ora procul à Romanorum castris viginti millia passuum? ad quod quidem Ticinum oppidum, neque pro Romanis, neque adversus eos quicquam tunc gestum, vel tentatum fuit.

Amovenda nunc tertia dubitatio est, quæ in hoc versatur, cur Romani in fuga ad ipsum potius oppidum sese non receperint, quam ad Trebiam amnem, una sane nocte eo itinere confecto. Hoc loco historiarum ratio, quæ ignota Philelpho Blondoque fuit, al-

altius eruenda est. Respondeo igitur, quonam gentium jure vertere ad Ticinum oppidum iter Romanus exercitus debuit, cum ejus oppidi dominus minime tum Populus Romanus fuerit: evoluite, si libet, Veterum volumina, nusquam probari vel scripto, vel conjectura potest, Lævos populos sub Romanorum ditione fuisse durante bello Punico, vel Macedonico; amici quidem fuerunt, ut suo loco referam, subjecti vero minime: vertere ergo iter ad oppidum, quod Lævorum ditionis erat, nulla ratione Romani debuere, potuerunt. Nonne omnem belli molem in Lævorum fines convertissent, si tum instante Annibale Romani ad Ticinum oppidum substitissent? quod minime ex amicorum officio fieri potuisset, minusque Lævi ipsi perperissi fuissent. Lævorum igitur agris ac Ticino oppido ad dexteram dimissis, Romani itineris compendium legentes per Insubrum agros ad ostium Lambri amnis Padum trajecerunt; quod quidem iter brevius decem millibus passuum est, quam si Ticinum oppidum adiissent, vel in præfenti adeas. Summa autem ratione à Romanis matura traductio exercitus citra Padum fuit, ne Placentia eorum colonia, tum militari præsidio destituta, ob fugam triumvirorum occupari à Bojis posset, tum ad arma excitatis, ut Livius refert: qua quidem ex re interclusus aditus fuisset Sempronio Consuli, tum ab Arimino advenienti, ne suas legiones cum Scipionis exercitu conjunxisset, sicut conjunxit: Annibali quoque Ticinum oppidum usui non fuit, minusque esse potuit, duplici ratione; tum quia cum Lævi Romanis amici essent, minime hostem eorum intra oppidum admisissent, quod eis ipsis longe perniciosius, quam Romanis fuisset, tum quia ipsi Annibali magis è re militari fore videbatur, Romanum exercitum jam antea pugna perterritum ac diffidentem eodemmet itinere, quo fugam ceperat, insequi, ac lacescere (ut omnino ad Padum, nondum toto ponte à Romanis soluto, fecit) quam ad oppugnandum oppidum ab itinere suo sepositum subsistere, & moram spei suæ facere; quoniam fractis Romanorum viribus, omnia deinde victoris potentiae, aut vi, aut metu accessura videbantur. Supervacuum autem puto singula Polybii & Livii verba ad hanc rem facientia scribere: *Hinc confestim Scipio jussis militibus silentio insequi, &c.* & apud Livium libro I. secundi belli Punici, ubi ita habetur: *Hoc primum cum Annibale prælium fuit, quo facile apparuit campos patentes, &c.* Et quod vera sint quæ retuli, ecce quod Pado trajecto Romanus Consul Scipio, Sempronio collega superveniente, minime intra Placentiæ mœnia delituit, sed positus ad Trebiam castris totis viribus dimicatum fuit. Egregium vero facinus edidisset, si, ut isti opinati sunt, sese cum exercitu intra Ticini oppidi angustias condidisset; cum intra Placentiam Ticino ampliore subsistere erubuerit: quare iis, qui militaris rei, rationisque expertes sunt, arguereque ab ignotis audent, Annibalis responsum aptissime conveniret, quo Philosophi, de re militari temere differents, vaniloquentiam repressit. Neque enim satis esse studio viro videtur agnoscere ab historia, quid, à quo, & quo tempore, ac loco gestum sit, nisi etiam causa, ratioque, cur illa ita geri contigerit, recte percipiatur, ut doctissime Polybius monet.

Supereff ut respondeam eis, qui post bellum Punicum, conditum fuisse Ticinum opinati sunt, ita arguens. Quomodo post bellum Punicum ædificari oppidum potuisset prope Placentinorum & Cremonensium fines à Liguribus, sine Romanorum consensu, & decreto, nusquam habetur mentio, & quos etiam Romanos post bellum prædictum in Insuores Gallos arma movisse sæpissime constat. Rursus etiam arguo. Quomodo ædificari oppidum potuisset in finibus Insuorum post bellum Puni-

A cum, si Insuorum nationem ingentem tum fuisse Polybius inquit; quam quidem gentem verisimilius est occupaturam potius fuisse Ticinios campos, suis contiguos, si possessore vacassent, quam Liguribus permissuram: quoniam si ferre Romanorum coloniarum vicinitatem Insuores recusabant, atque ob eam causam in illarum agros, colonosque irruebant, Romanorum sprete potentia, multo quidem minus novum oppidum condi juxta viros suos à Liguribus, Romanis longe inferioribus, perperissi fuissent, bellumque omnino in conditores excivissent, de quo nihil constat. Omnis ergo ratio, omnisque antiquorum scriptorum approbatio, huc refertur, conditum Ticinum fuisse ab initio incolatus Lævorum Ligurum, quos antiquos Ticini accolos fuisse Livius dixit, dum de Gallorum transitu in Italiam libro V. verba fecit.

C A P. VIII.

Antiquitatis dignitatem à gente statui potius, quam à structura oppidi.

Nemo mea scripta legens existimet me rerum temporumque argumenta colligere, ut Patriæ meæ nobilitatem à structura vetustate adstruam: sola enim veritas eruere me antiqua compulit; quibus nunc patefactis, recedere ab hac ipsa ædificationis vetustate libet, atque alia scriptorum ratione nobilitatis viam inire. Retexo igitur hoc loco omnia, quæ superiori pagina contexui. Abscedat quæso tua antiquitas Papiæ, Ticini oppidi vetustas sileat, lateant turrets, & tanquam tuguria habeantur, portarum illa immobilis atque indelebilis antiquitas recondatur, fiantque nova omnia mœnia, clivus, & structura, sitque ipsa civitas post juniorem Africanum condita, Lævis tamen Liguribus, qui eam condiderunt, nusquam fraus fiat, illi ipsi surgentis oppidi auctores habeantur, quid tum mihi dictura erit Blondi & Philippi secta, cui orationem verto, rogoque unde nobilitas petenda & statuenda videatur, ab oppidi ne structura ac lapidea materia, an vero ab ipsius materiæ auctoribus? Clarum enim est urbium ædificationes ab hominibus ipsorum hominum causa fieri, ideo ab hominibus pariter nobilitatem statui, non autem ab ipso oppido, ante Homerum (ut ajunt) condito, quod de Roma ipsa monet Cornelius Tacitus ex Othonis persona, libro XVII. his verbis: *Quid vos pulcherrimam hanc urbem domibus & tectis stare creditis, muta ista & inania intercidere, ac reparari promiscue possunt, &c.* Sacro etiam volumine, ubi Macabæorum fratrum gesta memorantur, testatum est, locum propter gentem, non è converso, Deum elegisse: rerumque ipsarum experimento moneamur, non à loco simpliciter in gentem, sed à gente in locum etiam humilem decus inferri.

E Petamus ab antiquis hujus rei documenta: Romanorum alter sub vili tecto insidens, aurum suis oblatum pedibus renuit, decusque constantiæ subfello, foculo, tectuloque communicavit, à persona igitur in locum ignobilem, non à loco ipso honor fluxit. Alter in agro agens rudis, atque imundus, nunquam optatam dictaturam inivit: inivit autem, immo vero assumptus ille potius ab agello ad dictaturam, ob virtutem fuit: ille ergo ager, non sua fecunditate, aut specie, sed solius domini præstantia celebris fuit. Saulus primus Hebræorum Rex, ejusque gener, & æmulus, ac successor David, alter ab asinarum perquisitione, alter à caulibus ovium, ad regnum evehctus est. Moses quoque à saltu pene ignoto, & pecoribus, ad populi regimen, liberationemque, & ad leges sanciendas, Dei voce & imperio evocatus est. Quid Elisæus? nonne calvo capite, ab aratro similiter ad sacerdotium unius Eliæ nutu monitus prodii? Ille ergo ager, ille saltus, illi colles, illa deserta,

eremive, illaque etiam pecora honoris famam ab illis hominibus, non homines ab eis, deduxere, decusque ab ipsis summis viris, non ab eorum turgiis, casulisque manavit. Eadem igitur ratione, nobilitas populi ab ipsa gente, non ab antiqua, vel nova oppidi ædificatione statuitur. Locorum enim opportunitas ad homines, non è contrario homines, rerum domini, ad muta loca referuntur.

Fuerit igitur Ticinum oppidum à Lævis Liguribus, post Africæ (ut dixi) subjectionem, conditum, non mihi à structuræ tempore, sed à Lævorum Ligurum origine in eadem regione constituta, antiquitatis argumenta fumo, qui cum sint ex antiquissimo Italicæ gentis genere, antiquitatis jus non mutant per novam oppidorum ædificationem, in sua regione factam, sed manet pristinum naturæ jus immutabile atque imminutum, sicuti ipsa etiam antiquissima Judæorum gens originis suæ vetustatem à priscis parentum natalibus, possessioneque, non à Hierosolymæ ædificatione deduxit. Tuscorum quoque nobilis atque antiqua natio, dicendi scribendique magistra, non à Fluentia eorum ornatissima Metropoli, hodie *Florentia* dicta, sed à suo antiquissimo genere Etruriæ innato, originis nomen ac dignitatem habet: simili ratione ac jure Lævi Ligures, non à Ticino oppido, ab eis condito, sed Ticinum ab eis, & ipsi à suo genere circa Padum ac Ticinum enato, originem deduxere, ac antiquitatis suæ jura sumpsere, nobisque eorum posteris Ticini innatis tribuere. Tolle igitur à nostra civitate antiquæ structuræ fucum, amove tuo arbitrato ædificationis annum, manet tamen nobis immota dignitas gentis, ab antiquissimo genere propagata, manet incorrupta possessio nostræ regionis ante Prisci Tarquinii regnum, à nostro genere inchoata, & per tot secula continuata: qua quidem antiquitate, atque continuatione, nulla altera in Circumpadano tractu gens nostris originariis incolis anterior probari potest; quod Divinæ providentiæ acceptum ferimus: terrarum enim amplitudo æterni Dei est: dante itaque illo, aramus, ferimus, ædificamus, cunctaque molimur, eaque ipsa ad Dei nutum sub rerum ac temporum vicissitudine retinemus.

C A P. IX.

De Maricis Populis.

POSTREMA hujus libelli pars Maricorum erit; de quibus duo nobis inquirenda videntur, unde exierint, & quomodo Lævis sese conjunxerint: Marici à Plinio memorati libro III. regione undecima *Naturalis Historia*, à quibus & à Lævis conditum fuisse Ticinum inquit, Ligures fuerunt, Tanari amnis accolæ, quorum antiquum oppidum, ad Tanarum situm, non procul aberat à loco ubi nunc est Alexandria, inter Tanarum & Burmidam amnes, ut attestatur Merula libro sexto *Historiarum*, scribens eos posterorum ætate *Maringos* Ligustica voce dictos: cujus attestationem veram puto. Nec defunt alia probabilia circa Maricorum gentem, sedesque ad Tanarum habitas,

A & postera ætate in Alexandriam translata, Marico oppido destituto: cujus adhuc exstant monumenta, quod etiam probat Blondus *libro quinto secunda Decadis*. Sed præter Maricum oppidum destitutum, & vetustate collapsum, exstat etiam hodie Castellum prope Tanarum in collibus situm, distans à Pado & Bassinania quatuor millia passuum, vulgo appellatum *Petra de Maricis*, à peritioribus *Petra Maritia*. Quod quidem tam vetustate situs, quam nominis continuatione, probat veram esse eorum sententiam, qui Maricos fuisse Tanari accolæ scripserunt: è contrario autem idem Blondus immemor (ut interdum evenit) scriptorum suorum in Lombardiæ descriptione, inquit Lævos & Maricos à Plinio memoratos fuisse, Transalpinos populos: ergo ex Blondi sententia, qui ad Tanari ripas citra Alpes prope Padum habitabant, distantes ab Alpibus quinquaginta millia passuum, Transalpini videntur, perbella sane annotatio fuit; sed danda est plura scribentibus venia: nam dum multa colligunt & disponunt, aliqua interciderè & elabi è manibus facile est. Blondus purgatis oculis non perspexit Livii verba à me exposita, Lævos Ligures circa Ticinum amnem incolentes, & cum *Lævos* scripserint Livius, Pliniusque, *Lævos* inepte Blondus dixit, sui que erroris successores Cremonenses reliquit, merito quidem vel maximo, cum Joannem Balistarium Cremonensem præceptorem ipse habuerit, à quo haustum errorem gentis jure eis ipsis legavit.

Ligures igitur Germani, Itali, & Tanari accolæ, Marici fuere; nec minuitur fides historiæ ex varietate verborum Livii & Plinii; quorum alter Lævos Ligures, alter Lævos & Maricos scripsit, quia Liguribus à Livio generaliter expressis, Marici tanquam pars sub genere, vel natione, continentur. Itaque Maricorum adjectio à Plinio facta, & à Livio omiſsa, historiæ fidem non abrogat, quoniam tam Marici, quam cæteri Ligures, qui Padum trajecerunt, communi nuncupatione *Lævi* appellati fuerunt. Quomodo autem Marici sese cum aliis Liguribus, qui primi Ticinum condiderunt, aut quo tempore conjunxerint, & in qua urbis parte confederint, rei vetustas, ac scriptorum inopia, vetuit me scire. Hoc tantum habeo, Maricos indidisse nomen occidentali portæ Ticini oppidi, ipsa porta *Marica* appellata, quæ populari lingua, regnantibus Longobardis, *Marica* fuit appellata, ut notat Paulus Diaconus libro IV. cap. XVII. deinde *Maringa* dicta est, usque ad Galeacii Vicecomitis tempora, quod etiam ex statutis civitatis apparet; & quæ demum porta, civitate postea amplificata, priscum nomen, formamque retinuit. An vero ab iis Maricis oriunda fuerit Marica Nympha, Regis Latini mater, de qua Virgilius libro VII. *Aneid.* scripsit,

*Majus opus moveo: Rex arva Latinus, & urbes
Jam senior longa placidas in pace regebat:*

*Hunc Fauno & Nympha genitum Laurente Ma-
rica*

Accipimus, &c.

Ego minime asserendum puto.

BERNARDI SACCII,

PATRIITII PAPIENSIS,

HISTORIAE TICINENSIS

LIBER III.

De Roma Principatu Scriptorum variatio.



PATEFACTA Lævorum origine ac sede, de dominio eorum videndum est: quæ quidem in re magno nobis adjumento forent Livii monumenta secundæ *Decadis*, si exstarent, quibus Romanorum bella Gallis, tum Senonibus, Bojisque, tum Insubribus illata, amicitiaque aliorum populorum continebantur: quæ quidem amissa ejus viri scripta, suo simul interitu plurimarum rerum notitiam peremerunt. Et quamvis vir peritissimus M. Antonius Sabellicus summo studio annixus sit, illorum temporum res gestas ordine referre atque subtexere, collectis undique Græcorum & Latinorum scriptis, ac per tempora divisus, longe tamen meo judicio differt, quod circa antiqua petimus ab ipsis antiquis, ab eo, quod à nostris scriptoribus accipimus. Ille enim quo propiores priscis fuerunt, eo certiores facti de antiquorum rebus scripserunt, siue memoria rerum ipsarum per auditionem ab uno ad alium translata, siue etiam plurimorum notulis, libellisque adjuti. Nostri vero temporis scriptores eo adjumento caruere, rerum præsertim antiquarum commentariis in Italiæ vastationibus ad nihilum fere redactis. Incedimus itaque per ambigua, dum antiqua ab aliis quam ab ipsis antiquis quærimus: cujus rei sumere clarum documentum ab ipso Sabellico possumus, qui libro ultimo quartæ *Enneadis* scripsit, Romanos Italiæ principes fuisse eo tempore, quo bellum in Siciliam adversus Carthagenenses translatum fuit, id est, anno quadringentesimo & nonagesimo ab Urbe condita. Ego autem Veteres secutus animadverto, minime quidem eo tempore Romanos totius Italiæ principes, hoc est, dominos fuisse, ut indicant verba Romani foederis à Polybio relata *libro III.* ubi inita foedera cum Carthagenensibus memorantur non Romanorum tantum nomine, sed etiam sociorum. Si ergo Romani ipsi socios populos se in Italia, atque adeo in Latio habuisse eo tempore professi sunt, constitutaque foedera pro sociis etiam leguntur, profecto socios ipsos subjectos nuncupare atque existimare valde injurium est, & à veritate alienum. Principes quidem, id est, primos inter socios Romanos fuisse dicerem: Dominos vero sociorum minime affirmarem; nimis enim differt socius à domino. Sabellici igitur sententia de Romanorum principatu ab Antiquorum attestazione atque à veritate diversa est: quod etiam aliis rationibus patet; quia post prædictum tempus plura bella in Italia, præsertim in Liguria, viguere, pluresque amicitia à Romanis contractæ cum reliquis Italiæ populis fuere: ex quibus liquet, eos neque universæ Italiæ dominos, neque etiam principes tunc fuisse. Quod etiam *libro V.* affirmat Strabo, feriatim referens, quo tempore, & quo Imperatore singula bella suscepta & confecta fuerint; memorans inter cætera Liguriam, usque ad Cæsaris Augusti tempora, ex parte adversus Romanorum Imperium reluctatam fuisse: nosterque Virgilius,

B qui sub eodem Cæsare Romanos, rerum dominos, cecinit, ad sua potius, quam ad Punica tempora alludit: à quo tamen Poeta historia parce petenda est, ut de Didone conficta probant. Aut ergo ab Antiquis antiquitatis notitia quærenda est, aut rationibus & conjecturis insinuanda est veritas. Quare ut sine Italicarum civitatum injuria, Romanæ dignitatis ratio habeatur, divisionem subjiciam de Italicarum civitatum statu, in qua quidem divisione Lævorum libertatem, dominiumque, colligam.

C A P. I.

De Statu Urbium & Populorum.

ANTE Romanum Imperium à C. Julio Cæsare constitutum, Italiæ civitates, aut sui publici juris, vel domini erant, aut alieni, aut mixtim, partim sui, partim alieni. Sui juris erant liberi populi; qui quadrupliciter distinguuntur, aut enim erant liberi simpliciter oppidi, vel civitatis, & territorii sui, tantum dominium habentes; aut erant liberi & domini, non solum oppidi, & territorii sui, sed etiam aliorum dominium habentes: aut quasi liberi, & domini, aut quasi liberi simpliciter. Et primo liberi simpliciter fuerunt, Campani ante secundum bellum Punicum, Nolani, Tusculani, Pisani, Cænomani, Veneti, Lævi Ligures, & alii, quos supervacuum est enumerare. Ii enim suorum oppidorum & agrorum dominium habuerunt, aliis autem civitatibus non imperarunt. Liberi & domini aliis etiam imperantes fuerunt interdum Brutii, qui plures Græcos populos ex Italiæ oppidis ejecerunt, aut suo jure subegerunt: item Ligures, qui Transalpinas oras & Etruriæ partes sæpe invaserunt, ac per sæcula retinuerunt: & præcipue regionem, ubi nunc Luca nobilis civitas exstat: quæ Livio referente *libro I.* quintæ *Decadis*, fuit Romanorum colonia, deducta in agro de Liguribus capto, qui ante Tuscorum fuerat; detinentque etiam hac ætate Ligures partem Etruriæ circa Macram suis finibus contiguam, ubi Sergiana civitas est. Romani autem non solum in Italia liberi & domini fuerunt plurium civitatum, sed etiam extra eam dominium suum porrexerunt, ut in Sicilia, Sardinia, Hispania, Gallia, Asia, & Græcia, sed num suo tantum nomine ac Imperio, an etiam sociorum id effecerint, remotior est quaestio. Quasi liberi & domini fuerunt populi ex civium Romanorum numero in colonias emissi, quibus jus Urbis & suffragii ferendi perpetuum cum Romanis fuit: ii enim tanquam Romani Populi membra & pars originis suæ jure participes erant libertatis, & universalis domini ipsius Romani populi: domini tamen universales ipsi plane non remanebant, quia post coloniae incolatum tanquam emancipati & segregati ab Urbe, & Romano Populo, per incolatum videbantur. Quo quidem in Populo Romano universalis domini, vel Imperii vis atque auctoritas tanquam in eorum capite & parente fixa erant.

Animadvertendum autem hoc loco est, non omnibus coloniis jus civitatis ferendique suffragia perpetuum fuisse; quædam enim defectionis crimine

mine ab eo jure exciderunt, ut apud historicos. Magnæ tamen auctoritatis hæ coloniae erant ex Romanis civibus deductæ, quamvis proprio coloniae jure liberæ & dominæ non essent, ut plerique scriptores probant; quia ab ipso Romano Populo exierant, illique ipsi sese referebant, ac participes universalis Imperii fiebant: quamvis per incolatum ab ipsa urbe emissæ, & quasi filiorum exemplo emancipatæ essent. Differt enim privatum jus à publico: privato enim jure emancipati sui juris fiunt, publico autem jure emissi in colonias dominium universale emittentis populi non minuunt, imo augent; quia ex uno populo principali plures fiunt, qui suo numero principali populo dignitatem addunt. Emissorum vero utilitas in eo versabatur, quod ipsi coloniae suæ jurisdictionem, administrationemque, & agrorum dominium habebant, universali dominio, vel imperio ad Romanos tanquam eorum auctores relato. Quasi liberi populi simpliciter erant ii, qui ex gente Latina aliave in colonias jerant: isti enim universalis domini Populi Romani regulariter participes non erant, quamvis socii essent, quia jus civitatis Romæ non habebant, ut probat Livius libro iv. belli Macedonici iis verbis: *Novum jus eo anno à Ferentinatibus tentatum, ut Latini, qui in coloniam Romanam nomina dedissent, Cives Romani essent. Senatus judicavit non esse eos Cives Romanos.* Civitate igitur Roma Latinis coloniis specialiter non attributa per coloniae incolatum nullo modo Populi Romani imperio communicabant, Romanorum civium exemplo, ut diximus: hinc falso asservisse plures scriptores, & nominatim Cremonenses, constat, quod omnes coloniae jus civitatis Romæ & ferendi suffragia similiter haberent: quod reprobare à superiore Livii sententia patet: distinguere enim tempora ab aliis scriptoribus debuerant, ut quo referenda eorum sententia esset, clare pateret. Tempora enim rerum mutationem ac varietatem continent, afferuntque, unde humanis rebus inesse vicissitudinem dictum fuit. Differebant itaque Latinae & aliae coloniae à Romanis, quamvis vulgata nuncupatione Romanorum Coloniae appellarentur, quod Latinae coloniae jus civium Romanorum per incolatum non assequerantur, nisi eis expresse data civitas fuisset, sicut nonnullis data fuit; quo casu differre illæ à Romanis coloniis sola origine, non autem civitatis jure, & universalis domini communicatione videbantur.

Alieni juris, vel domini universalis, erant populi subjecti, quibus inesse dominium universale nulla ratione potuit: quod enim alteri subjectum habes, etsi tuum demonstrationis causa dicatur, quia in tua civitate hujusmodi dominium versatur, civitatis tamen, vel populi tui, proprium illud dominium esse non potest, durante subjectione: repugnat enim subiectio proprietati, ac naturæ universalis domini, sicut servitus libertati, suntque inter se directo opposita, libertas & servitus, dominatio & subiectio: quam non immerito Ezechiel in sacro volumine *jugum* appellat; ego quasi sarcinam esse censeo gradienti impositam, quæ quoquo modo incedas, sive lento, sive accelerato gradu, humerum premit, quo sublata est. Duplici autem modo plerumque fit subiectio, aut universaliter, aut conditionaliter; universaliter, cum nihil excipitur, ut in deditioe, quæ à Collatino populo facta est populo Romano, referturque à Livio libro i. ab Urbe condita illis verbis: *Estis ne vos Legati, Oratoresque, missi à populo Collatino? ut vos populumque Collatinum dederetis?* Responde, *Sumus.* *Est ne populus Collatinus in sua potestate?* Responde, *Est.* *Deditis ne vos, populumque Collatinum, Urbem, Agros, Aquam, Terminos, Delubra, Utensilia, divina, humanaque omnia in meam, Populi que Romani ditionem?* Responde, *Dedimus.* Et ego recipio. Universalis enim

A hæc subiectio est, in qua nihil exceptum fuit; similisque etiam videtur ea Campanorum deditio, quæ Romanorum arbitrio facta fuit, ut Livius narrat libro vi. belli Punici: nam quod victoris arbitrio subicitur, nostrum esse non videtur, nisi ex dominantis voluntate; cujus est dimittere, & demere, ac rapere: possetque hujusmodi subiectio etiam *arbitraria* appellari, eo quod dominantis arbitrio deditio fiat. Conditionalis subiectio est, in qua non deduntur omnia, sed propositis hinc inde conditionibus, publica que pactioe sancitis, fit deditio, quæ foederis vim habet; ut Campanorum deditio Annibali facta, in qua plura excepta, pauca vero servata fuerunt.

B Causæ vero subjectionis plerumque tres esse videntur: Violenta, cum vis imminet: Libera, cum sine vi nos Regi, aut Reipublicæ, regendos aliqua ratione credimus, quod ad tollendas interdum populi sectas, factionesque, fieri solet: Impulsiva, cum in medio potentiorum constituta civitas prævidens vicinitatis periculum, alteri dedit sese, ut tutior ab alterius potentia fiat: nam qui potentiori hæret, inexpugnabilior est eo, qui in sua duntaxat infirmitate subsistit. Mixti juris partim sui, partim alieni populi, municipes erant, quia suis antiquis patriisque institutis ac legibus vivebant, liberius quidem (initio inspecto) quam Romanorum coloniae; attamen ea, quæ ad imperii universalis statum pertinebant, soli ipsi decernere non poterant, sed Romanum Populum, in quo tanquam in capite imperium inerat, consulere necesse habebant, ut Paulus innuit libro v. *Digestorum*, ad municipales, iisdem verbis: *Ea quæ Imperii potius sunt, quam jurisdictionis, magistratus municipalis facere non potest.* Hic ergo status, atque hujusmodi differentia Italicarum civitatum fuit ante secundum bellum Punicum: quo quidem tempore Romani plures populos in Italia socios & amicos, non autem subiectos habuere: atque ut Latinos omittam, socii Romanorum à Livio referuntur in fine libri ii. tertiæ Decadis his verbis: *Quanto autem major hæc clades, &c.* Socii etiam Romanorum adversus Insubres Cænomani fuerunt Brixianorum progenitores, ut auctor est Polybius libro ii. eorumque fidem & constantiam sub idem tempus probat Livius libro i. belli Punici. Ligures quoque Circumpadani è regione Ticini amnis Lævorum vicini adversus Insu-bres socii Romanorum probantur ab ipso Polybio, eodem libro ii. iis verbis: *Dum Romani Aceram urbem Insu-brum obsident, Insu-bres, ut eos ab obsidione averterent, copiarum parte trans Padum emissæ, Clastidium oppidum sociorum populi Romani invadunt, &c.* Cujus quidem Polybii verba referens Sabellus libro ix. quartæ Enneadis in fine, sociorum nomen omisit, ab historica veritate sine ratione excidens: differt enim quod dicas Populi Romani tum fuisse Clastidium, an sociorum. Acerra autem diversa est ab Acerris, Nolano agro finitimis, opinorque Acerram in Insu-bria esse hodie Aceranum oppidum in Novariensi agro, ut alibi retuli.

F Romani igitur (ut diximus) ante secundum bellum Punicum Italiae principes minime fuerunt, nec universæ (ut ille ait) Italiae imperarunt, sed socios in Republica, bello ac pace administranda, plures Italiae populos ac etiam peregrinos habuerunt, ut Massilienses in Gallia, & Saguntinos in Hispania. Secundo postea bello Punico in Italia invalescente, Romani adversis præliis fracti, non solum onerare socios, præcipue vicinos, coloniasque coepere, sed longinquiores etiam deseruere, ut Petellinos, qui ex Brutiis fideissimi amici Romanorum erant, ut narrat Livius lib. iii. belli Punici. Jubendo itaque sociis vicinioribus, coloniisque, & imperando, quæ bello necessaria videbantur, potius quam rogando, Romani rempublicam administra-

coeperunt. Ex cuius quidem imperii ac iussionis usu formula edita fuit, quæ vim perpetui edicti habuit; in qua quid unaquæque sociæ civitas præstare ad bellum limitata esset, sigillatim continebatur, ut aperte scribit Livius libro II. tertiæ Decadis iis verbis: *Dictator ex auctoritate patrum dictus M. Junius, &c. Addens: Item ad socios, Latinumque nomen ad milites ex formula accipiendos, mittunt, arma, tela, alia parari jubent, & vetera hostium spolia detrahunt templis, porticibusque.* Jubere enim imperii est, non societatis, ut Jurisconsulti notant libro II. *Digestorum de Jurisdictione omnium Judicum,* lege quarta. Quæ deinde iussio, atque imperitatio, multorum sociorum animos, Cannensi maxime clade insecuta, ad defectionem provocavit. Nimis enim gravati socii contemni prope se à Romanis opinati, ac publice etiam conquesti sunt, ut de Latinis apud Livium legitur libro septimo tertiæ Decadis iis verbis: *Ceterum transportati milites in Siciliam, &c.* Quodque sprete sæpius à Romanis focii Latini nominis fuerint, plura apud eundem Livium argumenta exstant libro tertio & septimo ejusdem tertiæ Decadis; ubi de non recipiendis in Senatorium Ordinem fociis, nec de consulendis circa Campanorum supplicia agitur: ex quibus probari clarissime videtur, quod cum Latini nominis focii publicis consiliis admissi non fuerint, minus etiam coloni ab eis oriundi adhibiti fuerunt, ut supra retulimus, Cremonensium opinione rejecta; coloniis quoque tam Romanis, quam Latinis, non dissimili iussionis formula imperatum fuit, ut apud eundem Livium dicto libro septimo. Quarum quidem coloniarum pars renuit imperata facere, audacter respondendo, non esse quod daretur, & scriptum à pluribus ita ferme responsum fuisse legitur; *desinerent tandem imperare, discerentque rogare, &c.* Pars vero imperium pertulit, ut Cremona, inter colonias à Livio eo loco postrema posita. Imminuta igitur eo tempore, siue Romanorum Imperio, siue ipsorum populorum consensu, in multis Italiæ civitatibus originalis illa libertas, de qua dixi, fuit: quod ne quis veritati reluctando ita esse neget, Livii verba, interpretationemque, subjiciam, ad ipsarum coloniarum subjectionem apertius demonstrandam, & Cremonensium retundendam opinionem, qui se Populo Romano communicasse in Imperio asseruerunt.

C A P. II.

De Coloniarum subjectione.

LIVII verba hæc sunt: *Triginta tum Colonia Populi Romani erant, ex iis duodecim cum omnium legationes Romæ essent, negaverunt Consulibus esse, unde milites, pecuniamque, darent, &c.* Sequitur paulo inferius idem auctor: *Consules pertentatis prius aliarum decem & octo coloniarum animis, citaverunt Legatos, quasieruntque ab iis, Ecquid milites paratos ex formula haberent: pro duo de viginti coloniis, Fregellanus respondit, & milites ex formula paratos esse, & si pluribus opus esset, plures daturus; & quicquid aliud imperaret, velletque Populus Romanus, enixe facturos, &c.* Colligere hoc loco verborum vim ac sensum decet. Citaverunt Legatos, non enim accersiti, ut focii, ut amici, ut affines, sed citati, ut inferiores, atque subiecti sunt; quasierunt, non rogaverunt: at quibus verbis? *Ecquid* (nihil potuit imperiosius dici) *habetis paratos milites ex formula, idest, ex iussione vobis indicta?* Responsum fuit, *se imperata, imperandaque Populi Romani arbitrio facturos.* Imperium iis verbis in Romanis statui, coloniasque ei subdi, palam est. Nec ego propterea improbo, quod factum fuit, sed liberius fieri potuisset: requiri enim tanquam Urbis Romæ membra, vel focii ipsi coloni, non tanquam mancipia, urbanus poterant. Duo autem imperata fuerunt, milites, &

A pecunia; quorum alterum personale onus esse, alterum patrimoniale constat: addi itaque ad imperii vim nihil majus potuit, quam ut milites & pecuniam darent. Si numerum militum & genus quæras hoc loco, non invenes; Livius ipse alibi similem iussionem factam fuisse alio tempore declarat, libro IV. *Fragmentorum* quintæ Decadis, scribens, Cremonenses cohortem peditum dedisse, Placentinos turbam equitum exhibuisse: ergo ea etiam ætate ex militiæ genere discreti, prælatique Cremonensibus Placentini viri Romanorum judicio fuere, cum isti equis, illi pedibus militare iussi essent; quo quidem militiæ genere nihil esse ægrius, molestiusque, Ludovicus Ariostus celebri carmine suis rhythmis cecinit, quem omnes uno ore probant. Et adimere equum militi antiqui Romani pro supplicio, vel nota, consueverant, ut apud Livium libro VII. tertiæ Decadis.

B Vide igitur nunquid major potuerit esse Cremonensium subiectio, cum etiam militandi facultas illis sine equorum commodo indicta fuerit. Minime quidem mirum est, si aliæ duodecim coloniæ imperium detrectarunt, malentes in sua libertate persistere, etiam Romanis exosæ, quam eorum arbitratui se suæque summittere. Pro quibus quidem coloniis hæc veritatis studio dicere jure compellor, cur sequi Romanorum iussa debuerunt, si C à civitatis jure arcebantur: verbis fane à Romanis filii & membra, urgente re, appellabantur, sed transacto rei periculo à civitatis honoribus repellentur, risu sæpius elusi, ut plerique scriptores testantur. Pristina itaque, ut dicebam, libertas in multis Italiæ populis, qui sese Romanis non subjecerunt, immutabilis remansit, duravitque usque ad C. Marii tempora, de quibus alio loco & ordine dicendum erit. Aliæ etiam postea coloniæ tum ex Romanis, tum ex Latinis constitutæ fuere, ut Mutina, Bononia, Pisaurum, Rhegium, Parma, Aquileja, & cæteræ, non minus quam prædictæ nobilitate insignes, de quibus in præsentia præscribere mei instituti non est, cum de gentis meæ libertate disserendum sit.

C A P. III.

De Lævorum Libertate, ac Dominio.

M A X I M E populi dignitati convenit, habere in se ipso oppidi sui regimen atque dominium; cui rei Itala gens semper à natura prona fuit, nec quidem immerito: quia pars humani boni & decoris est libertate frui, quando sine civitatis perniciæ illa recipi & retineri potest. Quod divinum munus esse, plerique Sacrarum Literarum scriptores tradunt: Dei enim providentia alieno imperio gentes subigi, Deique providentia erui à subjectionis iugo, sæpius testatum ac probatum est. Lævi igitur à rerum suarum initio liberi fuerunt: quod ipsa natura probat; quia subiectos eos alteri populo fuisse, Romana stante Republica, nusquam patet: Libertas enim sicut naturalis facultas hominis est, ita etiam à natura hominibus inesse præsumitur, ut Jurisconsulti ajunt, libro primo *Digestorum de statu hominum*; servitus vero ac subiectio non sunt à natura, sed à Jure gentium, contra naturam introductæ: ideo non præsumuntur inesse, ut dicitur in *Lege* quarta & quinta ejusdem tituli, quia servitus & subiectio est quid facti, à natura alieni, quod factum jure non præsumitur, nisi F probetur. Lævorum igitur subjectione non probata, liberi fuisse censentur; censere enim Latine, & præsumere Legislatorie dicitur. Cum itaque liberi fuerint, annexum etiam libertati universale dominium civitatis ac regionis suæ eadem ratione habuerunt: quod quidem Lævorum dominium in Transpadana tantum regione fuisse Livius docet libro III. belli Macedonici, ita scribens: *In*

Ligures deinde traductus Romanus exercitus fuit. Boji autem negligentius coactum Romanorum agmen, quia ipsi procul abesse viderentur, improvise aggressuros rati, per occultos saltus secuti sunt: quibus non compertis, Pado repente navibus trajecto, Lævos, Libuosque vastarunt, redeuntes deinde Ligurum extremo fine cum agresti præda in Romanum agmen incidunt, &c. Ex his Livii verbis colligo, Lævorum fines in Transpadano agro fuisse è regione Cispadanæ Liguriæ, cum ex sola Padi traiectione referat Livius, Bojos in eorum agros transisse, & inde etiam rediisse, ac in Ligurum extremo fine Romanos obviam habuisse. Fines ergo tam Cispadanorum Ligurum, quam Lævorum, Pado interluente dividebantur: Dominium igitur ipsorum Lævorum longitudine regionis eo tempore patuisse videtur circiter quadraginta millia passuum; incipiendo à finibus Læumellini agri trans Ticinum positi, usque ad agros Lambro amni finitimos: latitudo autem minor citra Ticinum, quam trans Ticinum fuit; nam citra Ticinum duodecim millia passuum à Pado exstat amplitudo, trans Ticinum duplo major, ut ingens adhuc vallum probat, *Fossa Ticinensis* dicta, quæ Novariensium oram (olim Insubribus adscriptam) ab agro Ticinensi determinat: universa autem regio ambitu circiter centum millia passuum circumagitur. Is scriptis scio adversari sententiam Georgii Merulæ Alexandrini historici, qui libro vi. affirmavit Lævorum ditionem longe ampliorem fuisse, quam à me perscriptum sit: sed ego malo vetusta colligendo modestiæ redargui, quam commentitius censer: recenseo itaque confinia, quæ ab initio Lævorum erant, non quæ postea ampliata fuerunt, ut temporis ordo cum ipsa scriptio- ne conveniat. Nunc ad eadem Livii verba rediens, demonstrare necesse habeo, quæ Lævorum amicitia, fidesque, erga Populum Romanum fuerit.

C A P. IV.

De Lævorum amicitia cum Romano Populo, & Cremonensium captivitate.

QUÆRERE hoc loco ex Livii verbis, Academicorum doctorum exemplo, institui causam, cur Boji, Romanos non adepti, Padum trajecerunt in Lævorum perniciem; & locum ubi trajecerint? In primis traiectionis causa nulla alia fuit, nisi Romanorum amicitia jam diu cum Lævis contracta ante adventum Annibalis; cujus amicitia odio perciti Boji, Romanis infensi, eis non repertis è vestigio Lævos, Libuosque, Romanorum amicos, infestis armis petiere: & cujus quidem Romanæ amicitia, vel societatis, initium me nescire fateor, sed rescire videor, Lævos populi Romani amicos repertos fuisse sub Annibalis adventum, ut hæc verba Livii indicant libro i. belli Punici: *Pœnus opere occupatis hostibus Maharbalem cum ala Numidarum ad depopulandos sociorum populi Romani agros mittit, Gallis parci quam maxime jubet, Principumque animos ad defectionem sollicitare, &c.* Hinc arguo, quænam ager tum trans Ticinum erat, vicinus Carthaginensium castris, qui apte vexari à Pœnis posset, nisi ager Lævorum, Læumellinus nunc appellatus, maxime cum Gallis parcendum esset: soli quippe Lævi Italici generis in eo tractu exstabant, reliqui vero trans Ticinum agri, aut Gallorum, aut Libuorum populorum erant. Amici ergo Romanorum fuisse Lævi Ligures ex Livii demonstratione probantur: nihilque referre videtur, quod nominatim expressi non fuerint in dicto primo libro tertiæ Decadis, quia certa loci designatio ad gentem indicandam parem expressionem, ac si nominatio fieret, habet.

Subnectere hoc loco biceps argumentum libet, ad repellendam multorum scriptorum infcitiam, super Ticini oppidi & Ticinensium antiquitate ac dignitate mustitantium, de qua libro secundo, & capite sexto late scripsimus. Si Lævi populi Roma-

A norum amici sub belli Punici ac Macedonici tempora reperti sunt, ergo ante ipsorum bellorum initia oportuit amicitiam contractam fuisse; consequens igitur est, ut ea gens, & oppidorum præsidio, & populi frequentia, opibusque, in ejusmodi statu fuerit ante amicitiam constitutam, ex quo statu digna Romanorum amicitia visa fuerit: aliter non fuisset in amicitiam recepta, sed potius armis subacta: amicitia enim civitatum ex populorum qualitate ac dignitate, potius quam ex ignobilitate constituuntur. Si itaque digni Romanorum amicitia visi fuerunt, ergo civitatem, & oppida, & opes, libertatem, & dominia pro gentis nobilitate habuerunt, quæ non repentino actu congeri in unum potuerunt, cum ab Annibalis adventu, ad istorum Bojorum traiectionem, vix viginti anni intercesserint. Verte nunc quæso tuo arbitratu argumentum; Nega Lævos populos amicos Romanorum fuisse; ego vero respondebo; Si Romanorum amici non fuerunt, majore honore digni sunt, quia Insubribus, Bojisque subactis, ipsi soli à Romanorum amicitia & imperio immunes, solutique vivere, atque ita utroque casu dominium & libertatem sine aliorum ope obtinere: nusquam enim constat, quod eo tempore, aut Romanis, aut aliis subiecti fuerint.

C Superest declarare locum, quo Boji Padum trajecerunt: quia dubitari ratione posset, an infra Ticini amnis oram Padum trajecerint; sed transisse eos supra Ticini ostium, & in agrum Læumellinum irrupisse patet, Ticino amne ad dexteram dimisso, ut Livii sententia per ea verba indicat: *Lævos, Libuosque pervastarunt.* Libui enim trans Ticinum amnem agrum tenuerunt Læumellinæ regioni finitimum: una itaque traiectione Boji, unoque depopulandi ordine ac successu, Lævorum primo, mox Libuorum agros conterminos devastarunt, quod facillime effecerunt: Ager enim Læumellinus eo tempore apertis plerisque pagis, vicisque, colebatur, satisque tutus videbatur fluviorum ambitu, quo tribus ex partibus cingitur. Non solum igitur ex prædictis probata Lævorum amicitia cum Populo Romano fuit, sed fides etiam rei experimento explorata est, cum amicitia causa agrorum direptionem à Romanorum hostibus perpessi sint. Nam qui amicitia gratia rerum detrimento affecti in fide perstant, nullaque animorum alienatione ab amicitia labefactantur, digni amicitia nomine atque honore censentur. Hæc autem direptio agrestis prædæ, ut Livius scribit, facta à Bojis Gallis fuit in Lævorum & Libuorum agris, L. Furio Purpurione, & M. Claudio Marcello Consulibus, anno ab Urbe condita, juxta Livii supputationem, quingentesimo & quadragesimo quinto, præcedente tum Consulatu Cornelii Cethegi, & Q. Minutii Ruffi. Quo quidem tempore, Cremonenses, Romanorum coloni, anno ab eorum incolatu vigesimo primo, non solum agrorum depopulationibus affecti fuerant, sed oppressi etiam obsidione, ac plurimorum captivitate, à Gallis erant. Denique fufis Romanorum viribus Gallis ipsis, captivorum Cremonensium turba, una cum reliqua præda in Romanorum potestatem venit, perductaque Romam fuit, ubi Cornelio Consule triumphum pro more agente, Cremonenses illi pileati, post currum traducti in spectaculum per Urbem fuere, ut cunctis pateret, eos non sua ope, sed Romanorum virtute, è Gallorum vinculis ereptos & liberatos fuisse: cujus rei causa actæ etiam gratia ab ipsis Cremonensibus Consuli fuere, ut idem refert Livius dicto libro iii. belli Macedonici, iis verbis: *Gn. Cornelio omnium consensu decretus triumphus, &c.* Et paulo post scribit: *Caterum magis in se convertit oculos Cremonensium colonorum turba, qui pileati secuti sunt currum, &c.* Cur autem turbam potius quam multitudinem Livius scripserit, ambigo:

go : quæ tamen inquisitione rejecta , illud potius expendere dignum puto , cum in idem fere tempus , dempto anno , utriusque gentis historia incidat , direptione scilicet in Lævorum & Cremonensium agris à Gallis pariter facta : quo antiquitatis discrimine , rerum inspecto initio , alter populus ab altero differat. Nam Cremonenses scriptores , nullo adscito auctoris nomine , temereque improbata Taciti Cornelii auctoritate , ac detorta pariter Polybii sententia , adstruere sibi civitatis antiquitatem ante bellum Punicum exoriri sunt ; conversisque rerum subinde argumentis , vicinos populos , tanquam à Gallis & Liguribus (ut ipsi ajunt) oriundos , ac contemptibiles , risu fere scriptis inserto , subfannarunt ; quod jure an injuria factum sit , ex historiæ lege decernere necesse est. Magno enim vero labore me levassent , si sua tantum primordia culta oratione illustrando , ut decet , in aliena non irrupissent , nec deprimere maledictis conati essent : nam ego similiter , quæ mea sunt , retulissém , Cremonensium rebus omisissis , quibus semper ab ineunte ætate studui. Sed quid historiæ ratio poscat , videamus.

CAP. V.

De Cremonensium colonorum origine.

OMNES , qui gentis , aut populi dignitatem explicare student , exponere in primis ejus originem ac principia debent , ut quo tempore clari , aut obscuri nominis fuerit , sine fraude pateat. Nam etsi nostra proprie non videntur illa , quæ à nostris majoribus gesta sunt , publico tamen jure ac successionis ratione ad nos pertinent , cum de publica gentis dignitate agitur : quia populus , vel civitas (ut peritiores sentiunt) est hominum universitas , in unum quasi corpus , collegiumve , coacta ; cui penitus refertur quicquid tam à nobis , quam etiam à nostris majoribus publico nomine gestum dicitur : quæ vero privatim aguntur , minime semper ad publicam causam porriguntur. Non inepte igitur hoc loco quæritur , quo antiquitatis gradu differre visi fuerint primi Cremonæ coloni à Lævis populis , à quibus nos ipsi regionem , genusque nostrum , Deo propitio , per naturæ propagationem , successionemque , recepimus. Qua quidem in re quatuor præcipua tanquam historiæ capita spectanda sunt : Primum , qua ex gente exierint , ad quam regionem transmigraverint , quo tempore , & quo titulo , aut jure ; hæc enim videntur esse principia in civitate constituenda. Lævi igitur , ut docuimus , à Cispadano tractu oriundi , in Transpadanum commigrarunt ; proprio ipsius gentis nomine , tempore scriptoribus ignoto , sed ante Gallorum transitum in Italiam , ut secundo libro docuimus cap. tertio , vel sexto. Coloni vero , qui Cremonam primum deducti fuerunt , unde egressi sint , dubitatur. Polybius libro III. ait , oppidanos undique coactos loco non expresso , iis verbis : *Oppidanis ut intra triginta dierum spacium adessent mandatum.* Livius libro I. belli Punici , vel tertiæ Decadis scribit , immisiam fuisse agrestium turbam , cujus verba sequuntur : *Itaque Boji armis repente arreptis , in eum ipsum agrum impetu facto , tantum terroris ac tumultus fecerunt , ut non modo agrestis multitudo , sed ipsi Triumviri , qui ad agrum assignandum venerant , diffisi Placentia mœnibus , Mutinam confugerint.* Colligi enim ex hac sententia necesse est agrestem multitudinem tum convenisse ad agrorum divisionem , quam Triumviri facturi erant. Cum ergo Polybius oppidanos , Liviusque agrestes scripserit , neuter Romanos cives in Cremonam coloniam emissos fuisse probat. Mos enim Livii præcipuus fuit , Romanos nominare , cum ex Romanis coloniarum constituebantur , ut apud eundem libro IX. quartæ Decadis : *Patres illud agitabant , uti colonia*

A *Aquileja deduceretur , nec satis constabat , utrum Latinam , an civium Romanorum deduci placeret ; postremo Latinam potius deducendam censuerunt.* Idem ait : *Eodem anno Mutina , & Parma , colonia Romanorum civium deductæ sunt.* Idem alibi : *Saturnia colonia civium Romanorum in agrum Calethranum deducta est.* Cum itaque ex civibus Romanis deductam Cremonam coloniam nusquam à probatis auctoribus relatum sit , nec etiam à quibus oppidis exierint ipsi coloni , nominatim scriptum fuerit : jus civitatis Romæ primi illi coloni non habuerunt , ut supra ex Livii sententia de Ferentinatibus retuli : quæ scripta est libro IV. belli Macedonici , vel quartæ Decadis , per ea verba : *Novum jus eo anno , &c.* B Nulla ergo Cremonæ conjunctio , nulla necessitudo , nulla affinitatis species per illos oppidanos cum Romanis esse potuit. Romanorum sane colonia , id est , à Romanis ædificata & constituta , atque in eorum dominio & ditione posita : minime tamen ab eis tum habitata civitas fuit , nullumque jus in urbe Roma illi primi coloni habuere , sive à Sabinis , sive ab Umbris , sive aliunde illi ipsi prodierint.

Nunc de eorum ingressu in Transpadanam regionem videamus ; inquirendo prius , quæ gens eum locum tenuerit , ubi condita à Romanis Cremona fuit. Primi quidem Galli post Tuscos , Umbrosque , fugatos à Circumpadana provincia , tenere agrum , ubi postea Cremona condita fuit ; ager , inquam , ille erat , non vicus , aut pagus , ut scriptor ille Cremonensis opinatus est , fuitque Gallis ademptus à Romano exercitu anno ab Urbe condita ferme quingentesimo & trigésimo : quo quidem anno apud Livium notat L. Florus libro XX. *Epitomatum* , tum primum Romanas acies Padum trajecisse , captumque de Gallis agrum citra & ultra Padum fuisse , in quo Placentia & Cremona coloniarum deductæ fuere : & ne curiosi viri Livii verbis careant , adscribo ejus auctoris sententiam , sumptam ex libro I. tertiæ Decadis : *Interim in Italiam nihil ultra quam Iberum transisse Annibalem à Massiliensium Legatis Romam perlatum erat , cum perinde ac si Alpes transisset , Boji sollicitatis Insucribus defeecerunt , non tam ob veteres in Populum Romanum iras , quam quod nuper circa Padum Placentiam & Cremonam colonias in agrum Gallicum deductas agre patiebantur.* Collige , quæso , hæc verba , *Colonias nuper in agrum Gallicum deductas.* Idem fere scripserat Polybius libro III. *Dum Roma milites subibuntur , &c. Romani omni studio ad perficiendas colonias incumbunt , quas circa Padum in Gallia nuper inchoaverunt , jam ædificata erant oppida , &c.* Declara hoc modo oppida nuper inchoata , jam erant ædificata , id est , ad finem ædificationis perducta , cum coloni ire in colonias jussi sunt. Novum ergo oppidum , novaque colonia , in agro Gallico , sive Gallis adempto , Cremona fuit , initio secundi belli Punici , in quam deducti auspicio Romanorum oppidani illi , collocatique in oppido ac tectis fuere , quæ nuper Romani populi nomine ac sumptu ædificata fuerant. Esse itaque hoc tempore Cremonæ nomen ac populus primum coepit , agro & oppido in Transpadana provincia à Romanis accepto. Cujus quidem Cremonæ probatis initiis refelluntur honestissime singula , quæ per longas ambages contra probatos auctores à nonnullis Cremonensibus conficta fuere , pertendentibus , se Romanorum genus ac sobolem esse , habereque agnationem , gradus , familias , cognomina , linguamque , & alia Romanis propria ; cum omnia sint diversa , & penitus dissimilia , ac dissimilia. Videamus nunc quo dignitatis discrimine Transpadani populi ab ipsis tum Cremonensibus colonis fuerint distinguendi.

C A P. VI.

De antiquioribus Populis Transpadana Provincia.

TRANSPADANI populi, Romanæ Reipublicæ initio, alii genere Itali fuere, ut Rhæti Alpium accolæ, Lævi Ligures, Mantuani, & Veneti, inter quos Livius suos Patavinos colligit libro x. primæ *Decadis*; alii Galli, partim Taurini, Insubresque, partim Cænomani: qui cum jam diu Italiam coluissent, ædificatis civitatibus, soboleque suscepta, Italici omnino juris effecti fuere, per gentis generationem in ipsa provincia continuatam. Libui autem ab Alpinis orti, qui Vercellas condidere, Ligures quidem lingua fuere, quamvis in Galliæ finibus, id est, in monte Salvio, ubi hodie Nicæa est, majorum suorum sedes fuerit. Hoc itaque modo differre inter se Transpadani probantur: quod antiquiores populi, ut Patavini, Mantuani, Lævi Ligures, & Rhæti, sua & majorum suorum origine Transpadani erant, Galli vero Cisalpini origine sua duntaxat erant Transpadani, sed ex majorum suorum personis oriundi è Gallia, unde majores ipsi exierant, videbantur: omnes tamen uno nomine Transpadani genere, quia geniti in Transpadano tractu fuerant, dicebantur. Qua distinctione admissa, quæritur, An Romanorum coloni, Cremonenses nuncupati, & in Transpadanum agrum deducti, ex sola deductione ac habitatione Transpadani effecti fuerint: Respondeo, deductio, & habitatio, novum incolatum facit ex sui actus novitate: novi itaque & adventitii incolæ in agro Transpadano illi coloni erant, non autem originales, ut priores populi: si itaque novi & adventitii erant, ergo sine dubio indigniores inter Transpadanos fuerunt, ipsorum tantum Transpadanorum statu diligenter inspecto; quia priores populi, sua & patrum suorum origine ac possessione antiquissima, Transpadani erant, Cremonenses autem minime, quia & ex Transpadanis oriundi non fuerant, & incolatus sui possessione juris, factique antiquitate carebant, vixque eo tempore jus provinciale inchoabant; quod quidem jus jam in illis prioribus populis perfectum erat: tantum ergo differre provinciæ dignitate Cremonenses à dictis populis visi sunt, quantum imperfectum differt à perfecto. Perfectum enim est, quod omnes partes absolutas habet, cui nihil addendum est; imperfectum vero videtur, quod inchoatum fuit, cuique ad perfectionem consequendam substantiæ pars desit. Perfectio igitur juris & tituli (ut ita dicam) provincialis jamdiu in antiquis Transpadanis erat, cum in Cremonensibus initium habere cœpit: quo initio habito, perfectio tamen statim non subsequitur, ad quam assequendam longum & continuatum tempus cum origine & incolatu requiritur. Cum itaque perfectionis pars in illis colonis defuerit, dicimus partem postea acquisitam nullo modo tollere posse prioritatem, dignitatemque, antiquioris perfectionis juris & tituli reliquorum Transpadanorum. Minus ergo digni, minusque præferendi inter Transpadanos Cremonenses videntur, cum de dignitate provincialium quæritur, quam Lævi Ligures, aliique antiquiores: quod Juris etiam definitione probatur libro ultimo *Digestorum*, tit. *de Albo scribendo*; ubi antiquissimum quemque præferri in gerendis honoribus, tam in municipio, quam in provincia dicitur. Sed quid leges scriptas inquiri? spectare potius naturam decet legibus antiquiorem, firmioremque: quæ enim prior civitas, aut populi constitutio in rerum natura esse cœpit, prior etiam in civitatis, aut populi nomine effecta, prior in celebratione, priorque in natura rerum in ea ora fuit, ubi esse cœpit: quæ naturæ prioritas arceri à loco suo ab altero postea populo, in eandem oram commigrante, non potest: quoniam à natura exorta jura, naturæ perpetuita-

tem imitantur, & tam diu durant, quam diu populus durat in statu suo: neminique dubium est, quod civitas, vel populus ex sua prioritate honorabilior à natura factus, in eodem honoris statu suos cives continet, quamdiu populus est, tanquam ab eodem gentium genere, & in ejusdem provinciæ gremio conceptos.

Insurgant hoc loco docti aliqui, arguantque, si possunt, à nobilitate loci, unde primi Cremonenses educti fuere, sive illi Sabini, sive Latini fuerint, quos in suis regionibus antiquitate enituisse scio; attamen respondebo: Antiquitas gentis, vel patriæ, à tractu Transpadano longe sepositæ & diversæ, nihil Cremonensibus conferre potuit ad insinuandum in jus antiquitatis alterius provinciæ, quia omnis dignitas, ab origine & incolatu sumpta, tempore & loco, in quo concepta est, circumscribitur, transferrique extra limites, intra quos constituta fuit, non permittitur: quoniam quod tibi à tuo genere antiquum in Sabinis fuit, in Sabinis viget ac celebre est, ubi genus tuum in lucem venit, & ab antiquo versatum fuit. Sed cum à Sabinis in Transpadanum agrum Romanorum ductu commigraveris, statuenda tibi in Transpadano per incolatum, generationemque, antiquitas erit, ad hoc ut posterius tui origine Transpadani efficiantur; alioquin novi incolæ in Transpadanis, & non antiqui erunt. Populus itaque Cremonensis (ut initia repetamus) fieri per incolatum tunc Transpadanus cœpit, cum collectis undique oppidanis, ut Polybius notat, & in Transpadanam regionem deductis, colonia Romanorum Cremona constituta fuit: non autem ante, quando oppidani illi, agrestesque homines, ut Livius refert, in Sabinis, vel Latio sparsi, nondum in futuri populi cœtum congregati fuerant, & qua congregatione populi in Transpadanos deducta ac constituta, Transpadanus factus est ipse populus, nomine ab incolatu sumpto, & non ab origine. Et quod quidem jus provinciæ nostræ cum in eodem Cremonensi populo fuerit postremum tempore, postremum etiam esse ipsum populum ordine, gradibus, & juris accessionibus clarum est: atque hac quæstione soluta, ad quartam propositionem me verto.

C A P. VII.

De Ticinensium & Cremonensium antiquo Dominio, & Statu.

Quo jure, vel titulo, Cremonenses coloni in Transpadano agro positi ab initio fuerint, explicare oportet, sicut à me superiore *Capite* propositum est: Romanos quidem constat jure gentium Transpadanum agrum Gallis ademisse, Cremonamque ibi condidisse, & in possessionem colonis postea Cremonensibus nuncupatis tradidisse. Jure gentium igitur Cremonenses coloni per alterius populi acquisitionem, & traditionem, sedes & agros assecuti fuere: sed quo dominio id assecuti fuerint, scire cupio; Jure ne domini universalis, liberique, an vero domini supposititii: differt enim supposititium à libero. Clare mihi constare videtur, Cremonensium dominium non tam liberum, quam supposititium fuisse, (de universali quidem sentio, in quo consistit jus dominandi) quia ad Populum Romanum, tanquam ejus civitatis auctorem & principem, referebatur: quod enim ad alterum teipso majorem refertur, illius juris directi dominium esse probatur. Dominium enim universale civitatis, alteri non obnoxium, est proprie principatus populo insitus, qui Imperii speciem repræsentat: Dominium vero obnoxium, Jurisdictionem potius, quam Imperii speciem in se habet, indigniusque probatur. Quo quidem obnoxio dominio præditi Cremonenses, longe meo judicio abfuisse à Lævorum, vel Ticinensium, digni-

gnitate, inspectis utriusque populi initiis, aperte videntur; quod sigillatim refero.

Prima Cremonensium virtus, vel fortuna, fuit, quod in alienum agrum, oppidumque, sine eorum negotio partum atque paratum, Romanorum ductu, sumptu, & auspicio, imperioque deducti & collocati fuere: quo quidem in negotio nulla inesse dignitas potuit, ut aperte visus est sentire Alexander Macedo, cognomento Magnus, qui Philippi patris audita victoria multis circumlætantibus solus ingemuit, atque in eam vocem erupit: *Minime me ex patris victoria exsultare deset, cum nihil fere mihi mea virtute expugnandum à patre relinquatur.* Egere ferebat magnanimus adolescens, indecorumque censebat, adire & recipere regna, patris periculo, & non ejus ipsius virtute, subacta. Quanto ergo præclarius ex illius magni regis sententia nostra sese habuere Lævorum exordia, qui sua quidem ope atque virtute, non autem alieno auspicio, primi nostram regionem adierunt, suisque viculis occuparunt: primi nomina regioni, cui vestigia impresserunt, terrisque dedere, primique Italicae linguae sonum in ea infudere, atque ad nos ipsos transmissere. Læumellina enim regio dicta ab initio, quasi *Lævomellina*, à Lævorum nostrorum incolatu & nomine, fuit. Læumellum quoque antiquum atque insigne oppidum, prope Agoniam amnem conditum, non à Romanis, aut Gallis, sed à nostris majoribus formam, nomenque recepit: sive eum à Læumellina, sive Læumellinam ab eo nomen traxisse, quis dixerit, utrumque enim à Lævis pariter fluxit, quasi Lævomellum dictum. Viclævanum similiter à nostris majoribus nomen susceptum, præsentem etiam fide inviolatum servat, nobisque repræsentat. Viclævum enim primo, quasi *vicus Lævorum* appellabatur, postea Viclævanum vulgo nuncupatum fuit, quod celeberrimum oppidum Læumellinae, & Ticinensis agri est, atque ob ejus dignitatem assentientibus Ticinensibus, civitas constituta fuit: quæ res honorem nostris civibus addidit, cum ejus membra civica constitutione publico judicio digna censeantur. Finitimum Viclævano Campolævum est, antiquum, & urbanum, elegansque oppidum, ita appellatum, quasi *Campus Lævorum*, quod hodie corrupta, ut vulgo evenit, antiquitate, pro campo, *Gambolævum* populariter dicitur. Aulævanum etiam Castellum prope Agoniam fluvium est, ubi sedes gentis nostræ fuit, nobilisque Aulævana familia inde prodiit. Aulævum ab initio à Priscis dictum, quasi *Aula*, id est, locus, *Lævorum*; Aula enim idem apud nostros antiquos significabat, quod locus, vel insignis statio, scriptumque etiam in nostris Annalibus legitur, Guidonem Languscium electum fuisse Episcopum ex nobili Aula Comitum Læumelli. Ticinum denique oppidum illi ipsi Lævi majores nostri sua stipe, suoque opere, condidere, & incoluere, atque posteriorum ætate Lævorum nuncupatione omissa, Ticinenses suo jure atque arbitrio appellati fuere. Nostri itaque progenitores gentis nostræ ductores, auspicesque, in nostris regionibus existere, nomina ipsi suis Oppidis, Castellis, Vicisque indidere, nihil nobis Latini, Sabinique, aut Trojani, à suis turpiter fugati sedibus contulere: dedecus illi amissæ Patriæ habeant, nostri non amissæ dignitate gaudeant.

Age vero, quantum alter populus ab altero domini dignitate discrepare videatur, in medium adducamus. Cremonenses, sub Romani Populi mandatis, jussionibusque, constituti, quasi jugo pressi imperium, ut supra retulimus, tanquam subjecti pertulere; militavere pedibus, aurum & argentum in annos singulos pro vestigali eorum agro & oppido pensitavere. Nostri vero alia honoris ratio, alia vivendi institutio ab origine affuit: dominio illi universali, liberoque potiti, nulli censum, nul-

li tributum, nulli vectigal persolverunt; suis ipsi legibus, atque dominio, institutisque vixerunt. A qua quidem libertate & dominio statui proprie ingenuitatem in gente plures existimant: hac maxime freti ratione; quia sicut naturalis libertas hominem à natura ingenuum facit, & servitus servum, simili etiam ratione, publica & originalis populi libertas ac dominatio ingenuum, nobilemque, populum ab origine efficit, & subjectio subjectum & humilem. Qua quidem subjectione populum invadente, inesse illa decora & clara ingenuitas, nobilitasque, in eo non potest, quæ libero populo inest: quia originis & domini universalis qualitas dissimilis ac diversa in utroque est, cum publica alter libertate & dominio potiatur, alter vero ipsam publicam libertatem una cum dominio subjectam habeat. Nobiliores ergo majores nostri Cremonensibus colonis tam publici domini dignitate, libertateque, quam originis ac possessionis antiquitate, in Transpadana provincia probati sunt.

C A P. VIII.

De utrinque Populi Fide.

N VLLA unquam præclarior virtus vigere atque eminere in gente potuit, quam fides: quæ non solum eo modo accipitur, quo fides à me alteri per pollicitationem obligatur, & quam obligationem colligens Cicero in *Officiis* scripsit, *Fidem exinde dictam, quod fiat quod dicitur.* Sed latiore spacio fides à nobis illa intelligitur, quæ solius etiam naturæ ratione implenda est. Fides sane dicta, quod fiat, quod fieri debet, decetve, nedum quod dictum est: paria enim existimo facere quod decet, & facere quod dictum est, decusque dicto, ac promissioni sæpe antefendum est. Fides igitur non solum versatur circa officia agnoscenda, implendaque, ad quæ per pollicitationes, aut alio juris nexu, tenemur, & de quibus Juris compositores late scripserunt, sed ad alia multa porrigitur; quibus sine verborum enunciatione naturæ ratione obstricti sumus, veluti ad Dei religionem & cultum, ad patriæ & parentum observationem ac tutelam, ad connubia sobolis causa contrahenda, ad liberorum ac puerorum curam, & institutionem tam nostrorum, quam alienorum, necessitudinis ratione ad nos attinentium, & ad alia plura, quæ nobis Juris volumina patefaciunt, & partim à Jure gentium, partim à civili prodeunt, ut in *Digestorum* libris, de *Justitia & jure*, & de *sponsalibus, deritu nuptiarum, de liberis agnoscendis, & de Tutelis.* In quibus quidem muneribus agnoscendis, implendisque, non tam pollicitatio, quam naturæ ratio valet: & quæ quidem officia à natura manantia Juris conditores justitiæ adscripserunt, antiquarum legum rationem secuti, quam Christianæ veritati convenire puto: nam agnoscere, quæ tibi à natura incumbunt, officia, eaque meditari, initium fidei est; facere autem quod agnovèris, est finis; in quo individuo actu inest justitia, quæ videtur fidei perfectio. Inseparabiles itaque inter se sunt fides & justitia, intellectu tantum, notioneve, distinctæ, opere autem conjunctæ, ita ut altera sine altera esse nequeat: nam fides sine justitia desinet esse fides, atque evanescet, quia nuda officii meditatio, ab actu vacans atque refugiens, abesse potius ab homine fidem, quam inesse probat, ut prudenter in *Epistola* Jacobus Apostolus enarrat, docens, actione, nedum cogitatione, fidem exhibendam esse, quia utraque virtus eundem ortum & finem per individuum operationem respicit, colligitque. Quod Paulus etiam Apostolus aperte probat in *Epistola ad Hebræos* illis verbis repetitis: *Inustus autem meus ex fide vivit: quod si subtraxerit se, non placebit anima mea.* Subtrahit enim se ille, qui agnita fidei officia non perficit actu voluntario,

qui agnita fidei officia non perficit actu voluntario, qui actus iustitiæ est ipsius fidei consummatio. Si quis igitur ex legum coercionem potius quam ex voluntatis sinceritate operatus iustitiam fuerit, veluti tutela, aut cura, iudicis iussione suscepta, torpuisse eum in fide potius quam viguisse censebo, actu ipso ad jurisdictionis auctoritatem relato: fecit enim quod debuit ex necessitate, non ex fidei actione, in qua à nobis ipsis ad alium porrigendam esse iustitiam docet Aristoteles libro v. *Ethicorum*, perfectam ejusmodi virtutem censens. Et Paulus Apostolus similiter Euangelicum dogma explanans, quod ad proximi nostri dilectionem pertinet, per charitatem, id est, voluntario actu, nos operari oportere, in *Epistola ad Galatas* monet. Idemque Joannes Apostolus in prima *Epistola* docet.

Ad historiam igitur sermonem stylumque vertens, fidem in populo eo tempore fuisse circa tria quam maxime animadverti. Primo, circa divinæ religionis cultum; de quo nihil mihi hoc loco scribendum est, quoniam prisca illa ætas rectum fidei lumen nondum acceperat, ut suo loco explicabo. Secundo, circa civitatis, quæ nobis patria est, decus, statumque tuendum. Tertio, circa aliorum populorum amicitiam, societatemque, servandam. Quibus quidem in rebus inviolato studio majores nostros præstitisse constat. Fide illi in patriam prompti, constantesque fuere, tum ejus possessione rerum Italicarum initio probe retenta, atque administrata, tum etiam ipsa patria nunquam prorsus destituta, quamvis ea bellis attrita sæpius atque exhausta esset: neque in patriam solum, sed in Italiæ etiam decus eorum fides clarissime enituit, dum inter efferas & Transalpinas gentes, in Italiam irruentes, soli ipsi Itali generis in eo tractu sedes suas Italico nomine linguaque tenere, reliquis Italis à Ticini fluminis oris Gallorum impetu ejectis, nullo illi Romanorum, aut Latinorum, auxilio, nulla aliena ope, sed suis gentibus, suis se viribus intra viculos ac oppidula sua continuare; eaque ipsa, interdum hostium irruptione incensa atque consumpta, sua industria ac facultate refecere: nunquam illi hostili pavore ac tædio affecti regiones suas deseruere. Fide etiam perpetua, constantique, Populi Romani amicitiam, ejus vigente Republica, coluere, vexatique assiduis Bojorum & Insubrum procellis, nunquam ab amicitiae fide defecere. Quid dicam amplius? proprium gentis nostræ est, fuitque, etiam in extrema rerum attritione atque inopia, fidem colere, fidem præstare, fidemque saluti anteferre, pro fide dura pati, ac in fidei decorem, vitam cum morte commutare. Nulla nobis historicorum attestazione, nullis Poetarum salibus fidei defectio, aut nota inuri, minusque obijci potest.

Nunc quo sese honore ac gloria ex majorum suorum fide Cremona claram probet, disserere opus est; cui certe operi minime par est mea scribendi industria, sed historiam scribenti quoquomodo veritatem explicare Veterum auctoritate permisum est. Primi itaque Cremonæ coloni oppido à Romanis pro patria in fidem accepto, decennioque possessio, magnum fidei indicium præbuere, Romanis auxilium, ut jam diximus, promittentes. Sed ecce tibi, Cremona, quam levi rerum momento populus tuus fidei studia invertat, distrahatque in diversa animos, atque priora merita posterioribus demeritis palam obruat. Illi, qui Romano Imperio salutem suis viribus promiserunt, patria postea eorum intra triennium in discrimine posita, patriam, inquam, turpi fuga deseruerunt, Gallorum incurfantium pavore; quibus quidem Gallis incurfantibus agro cedere, & in oppidum se recipere, minime Cremonensibus vitio datum fuisset: oppida enim ea ratione condita esse constat, ut ad illa ipsa

A opis causa nobis receptus in quocunque casu pateat; sed deferere oppidum hoste non adveniente, neque oppugnare incipiente, summæ imbecillitatis ac ignominia fuisse videtur: cujus quidem desertionis reos, tanquam prodicionis culpa pollutos, Romani illa ætate infamia notabant, & majoris ignominia causa equis privabant, ut in L. Cæcilio Metello, aliisque, Livius notat lib. vii. tertiæ *Decadis*. Atque in libro viii. fugam ipsorum Cremonensium enarrat iis verbis: *Moverant autem hujusce rei mentionem Placentinorum & Cremonensium colonorum legati, querentes agrum suum ab accolis Gallis incurfari ac vastari, magnamque partem colonorum suorum dilapsam esse, & infrequentes se urbes, agrum vastum ac desertum habere. Manlio Prætori mandatum, ut colonias ab hoste tueretur: Consules L. Veturius, & Q. Cæcilius ex Senatusconf. edixerunt, ut qui cives Cremonenses & Placentini essent, ante certam diem in colonias redirent.* Hæc Livius. Quartusdecimus ferme annus agebatur incolatus Cremonensium, cum illud memorabile Senatusconsultum super eorum fuga & reductione promulgatum fuit: ex qua quidem promulgatione tum Romæ, tum in provincia, celebrata obstupere omnes, inquirentes, nonne ii sunt illi Cremonenses, quos Senatus Romanus populo produci ac laudari pro concione, una cum aliis colonis, voce Consulibus paulo ante jussit? respondebatur, sunt illi ipsi, qui obices hostium, atque Imperii Romani propugnacula fore sperabantur. Augebatur admiratio, quoniam eo anno nullus hostium instructus exercitus in Transpadano agro existisse ferebatur; Placentinos vero excusabiles faciebat, tum Cispadanus situs, Liguribus & Bojis ex tribus partibus obnoxius, patenque ad eos recta, plana, & militaris via: tum etiam præcedens Hasdrubalis Carthaginensis transitus; qui priore anno Placentia oppugnata in agros, villasque, conversus, omnia incendiis, ruinisque, contriverat. Iis igitur, aliisque rationibus, purgatis Placentinis, una omnium voce, unaque sententia prædicatum per Italiæ civitates fuit, ad quas fama edicti devenerat, Cremonenses illos ex fugæ, desertionisque, ignominia coloniarum possessione indignos, immeritoque effectos esse, atque à fidei constantia & honore, in qua sese antea jactaverant, excidisse: exprobratum insuper illis (ut fertur) redeuntibus clara voce fuit, cum non sponte sua, sed per Manlii provincie Prætoris inquisitionem, coercionemque, reducerentur. Ecquid pudet ne vos vestræ coloniarum, non civium ritu, sed potius fugitivorum fervorum more, militari manu deducendos & restituendos esse? Omnis denique desertionis ignominia in Cremonenses solos, qui non expectata vi aufugerant, rejecta fuit, illisque ipsis inhæsit, abigique ab eis nulla ratione potuit. Quo enim rerum eventus, eodem etiam populi

E sententia suo jure vertitur. Hanc tam infamem patriæ desertionem, reductionemque incolarum nemo ea, aut postera ætate conspectum in Lævis, sive Ticinensibus, fuisse scripsit: vastatos quidem Gallorum direptionibus Lævorum & Libuorum agros, ut dixi, Livius retulit, sed deserta oppida, effugatosque prorsus à sua provincia viros, nusquam dixit.

F Si quis igitur hæc Cremonæ primordia cum Ticinensium, vel Lævorum, initus conferenda putaverit, à rationis tramite aberraverit: nemo enim sanæ mentis inter se prorsus dissimilia comparat, ut hæc ipsa, non solum dissimilia, sed omnino contraria, apertissime probantur; fides & fuga; constantia & imbecillitas; item libertas & captivitas; dominatio populo insita, & subjectio perpetuata; frequentia virorum in agro, atque in oppido, & in tectis; & solitudo interna, externaque, una cum vastitate, ac rerum omnium inopia. Quæ quidem tum Cremonæ mala si nostrorum majorum bonis

bonis conferas, infernorum lumen, horroremque, ac tenebras supernæ luci ac jocunditati comparabis. Quocirca, nescio, qua animi alienatione nonnulli, qui sese historiarum gnaros putant, prolapsi in hanc opinionem sint, ut præsentem Cremonensem populum existiment ab illis primis colonis traxisse originem. Quod verum ne, an falsum sit, nihil mea refert. Sed si eorum opinio recipienda est; ergo à fugitiva & pene infami colonorum turba magnifica civitas originem habuisse videbitur;

A & ut fictitiam antiquitatem assequatur, in illius priscæ gentis indignitatem collabatur. Petenda igitur aliunde vestra origo, viri Cremonenses, est, quam à vestrorum scriptorum nebulis atque commentis, quæ ego, vestra, & veritatis causa, Deo favente, aperiam, longeque abesse à vero alio loco ostendam: redire enim me ad institutum opus hoc loco necesse est, & de Insubriæ statu quod superest referendum.

BERNARDI SACCI,

PATRITII PAPIENSIS,

HISTORIAE TICINENSIS

LIBER IV.

C A P. I.

De Insubria in Provinciam redacta.



INSUBRES populi, teste Polybio, nobilitate & hominum frequentia insignes fuere, compositisque post gravia & diuturna bella rebus cum Populo Romano, in unam Provinciam cum finitimis suis coivere. Gneo Pompejo Strabone Proconsule in Transpadanis imperium exercente: cuius Provinciæ termini à fronte Padus, à lateribus Addua & Durias amnes erant, à tergo Alpes. Qua regione in Provinciam constituta, appellati postea Insubres omnes populi, inter prædictos limites contenti, communi nomine fuere: quamvis origine singuli non essent Insubres, ut Lævi Ligures, Ticinenses, & Laudis Pompejæ coloni, Libuique. Nec ab re Insubriæ appellatio indita Provinciæ fuit, situ ejus inspecto, qui latior est agris finitimorum. Et ipsa Laus Pompeja Latina colonia in Insubrum antiquo agro condita est. Insubriæ autem caput sub Romanis Consulibus Mediolanum fuit, ubi & Magistratuum sedes posita, & forum Provinciale constitutum est: cuius quidem Provinciæ habita deinde quam maxime ratio à Populo Romano memoratur: nam jus Latinarum coloniarum veteribus provincialibus in primis tributum fuit, ut Asconius Pædianus apud Ciceronem notat in *Oratione pro Pisone*: ex quo quidem jure pares in urbis Romæ muneribus assequendis, obeundisque, Insubres Latinis efficiebantur, antequam jus civitatis Romæ Italicis populis indultum foret. Alterum, in quo honestati Insubres à Romanis sunt, hoc est, quod sumpti ex Insubribus clari viri sæpe fuere ad supplendum numerum Ordinis Senatorii: ut meminit Cornelius Tacitus *libro XI*. Desit postmodum esse Provincia jure civitatis Romæ à populis sumpto: quoniam unaquæque civitas jure suo, quod *Italicum* vocabatur, ad urbis Romæ Imperium, omnibus commune, referebatur. Corruente deinde Romana Republica, provincialis administratio rursus in usum rediit, mutatique provinciæ fines ac nuncupatio fuere. Nam Valentiniano imperante, Ambrosius Liguriam habuisse provinciam fertur, in qua Mediolanum erat. Idem etiam sub Theodosio fuit. Qua quidem varietate non perspecta, aliqui de Insubria scribentes in errores inciderunt. Ego igitur de Transpa-

C dana tantum, ac nostra Insubria, five regione, hoc loco scripturus, à naturæ bonis, quæ ei à Deo æterno orbis conditore collata sunt, exordiar, ut illius patefactis donis, ad illius solius gratiam scripta mea contexuisse videar.

C A P. II.

De Insubria Situ, & Partibus.

OMNIA, quæ humano generi propagando, luendoque, apta sunt, huic regioni à natura insunt, quæ inter Siccidam & Adduam amnes continetur, quæque à Meridie Pado, & à Septentrione Alpium jugis clauditur: à quibus quidem Alpibus exordiendo, spectare Italiæ claustra atque repagula licet. Illæ enim in cælum elatæ nobis supereminet, & ab Aquilone circumstant; ut nonnisi per arctas ac pene invias semitas evadere quis à nobis, aut nos invadere, quoquo modo queat. Natura enim ipsa, five potius naturæ artifex Deus, tam nostræ, quam Germanæ nationis quieti prospiciens, edita locorum præsidia in alto ac sublimi posuit, quæ unius egregii viri virtute & robore parva peditum manu contracta ocludi adversus magni exercitus vim facile possunt. Flumina quoque ipsa circumlabentia nusquam tuto vado omni tempore peti ac trajici possunt: confluunt plerumque aquarum mole & impetu turgidæ undæ, eruuntque ab imo humum, ac profundos & immanes vortices passim fodiunt, quibus sese inferens audax miles è vestigio labitur, lapsusque in obliquum vehitur, & fluctibus frustra reluctando in profundum rapitur. Naturæ itaque propugnaculis tuta ipsa provincia esset, nisi incolarum pullulante discordia, externarum gentium vires nostris nominibus in mutuas nostri generis clades excitarentur, atque ad nostram perniciem traducerentur. Concordia enim nobis subsistente, pax & humana felicitas nobis adest; illa vero à nostris pectoribus exultante*, nostri incolæ sibi ipsis hostes sunt, & alienos ad suorum internecionem accersunt, pereuntque humana bona, virorum amore, ac unanimitate sublata; quæ, heu, heu! nimium ab Italicis oris abscessit, nostrisque acciti atque admissi littoribus Christianæ religionis hostes, intima Europæ regna deturbarunt, Christianis Principibus illorum successibus ad alterius consternationem conniventibus.

Intersecat ferme medium hujus regionis Ticinus fluvius, Novarienses à Mediolanensibus dividens, & Ticinensium agros in duas partes scindens; qua-

* Legendum videtur, *exultante*.

& postea Vicobianum fuit : cui vicina est infausta Feraria, villa magni nominis & nullius rei, agris ipsis ad dominos, & non ad colonos, spectantibus, & Albinea rivulo naufragium interdum campis minitante, quo quidem secuto naufragio, rapere vicinorum segetes Ferariæ villicos nocturno aditu ac labore necesse est; dictaque exinde Feraria, per simplex R, à ferendo fuit : Ferariaque à tergo relicta patet ad Meridiem pagus nobilissimus, portis, valloque, & aggeribus circumseptus, sancti Nazarii nomine, festoque, celeberrimus, in quo quadringentæ & amplius familiæ degunt. Gens urbana, jocunda, atque hospitalis, vici ampli, recti, mundi, frequentesque, forum patens, campi latissimi, apertissimique, ac uberissimi, ornata vineæ filis ad longum prospectum distentis, sylvæ opportunæ volucris, ferisque gratissimæ, à quibus phasianorum cantus facile audiuntur, lacus, stagnaque innocua, Persici piscis, & anguillarum vivaria. Occupat is pagus supercilium vallis Padi mille fere passus ab eo distans : hinc oriunda fuit nobilis Sanazaria familia, olim Vicecomitum æmula, quæ per orbem dispersa prope modum evanuit, paucaque hoc in loco nobilitatis monumenta retinuit tanquam testimonia primæ originis, sedisque, ut castellum, molendina, piscationes, rivum Albeneæ, templique patronatum in plures divisum. Hic etiam Antonius Fregosius dominium loci habens senectutis suæ amores materno carmine celebravit, quod deinde dominium in clarissimos Malaspinas fratres, Franciscum & Octavianum, transtulit.

A sancto Nazario ad Orientem pergenti præsto est egregia villa Plebs Albeneola, distans à Deturbio torrente mille passus : cujus quidem alvei ambages adverso flumine sequens Caldisolum Castellum à sinistra manu spectas, quod olim nobilissimæ gentis Picæ Mirandulæ sedes fuit, posteaque doti, sive successioni, Tadeæ Picæ, Jacobo Malaspinæ nuptæ, cessit, recidens successionis jure in eisdem Franciscum & Octavianum fratres, ex quibus, me hæc scribente, Octavianus superest prole conspicuus, Padi etiam trajectionem domini jure habens. Paulo ante Turris eminet, egregium tibi oppidum sua mole, altitudineque promittens; ubi vero appropinquaveris infamis Alagnia apparet, à languore appellata : languent quippe incolæ ex vinearum defectu, puteumque potus causa frequentius adeunt, quam torcular, aut vasa vinaria : oritur enim in Alagnia finibus ineunte æstate à tellure edax eruca, volitansque vites invadit, depascitque folia, quibus ablatis arescunt jam exiles & immaturi racemi, sine umbra relicti. Desinente postea æstate eruca rursus tellurem ingressa foetus edit, & recondit, deinde vertitur in vermiculum annulari digito minorem, quem aratrum agentes bubulci sæpe detegunt, ac perimunt; at minime tamen foetus disquirere ac perimere possunt : nam æstate adveniente renascuntur iterum erucæ, alataque in turmas edito stridore prodeunt, infestantque Alagnia fines, ac etiam in Valigii ditionem ruunt, coguntque incolas sine vinearum ornatu ac commodo vitam ducere. Compertum autem mea ætate experimento fuit, quod omiſsa telluris cultura eruca simul perit, quia omiſsa cultura, dureſcit terra in superficie, qua durante duritie erucæ generatio vetatur : sed ipsa deinde terra ad culturam reducta, refurgit à natura foli hæc vinearum pestis. Cur autem in hac regione potius quam alibi eruca vigeat, dicam : viget sane alibi, sed non tam perpetuo ordine, ac copia : telluris superficies hoc loco urgente gelu parum premitur, quia humiditatem non habet, subest enim arenula, quæ humiditatem fugit : qua humiditate consumpta, crustula tantum terræ modicæ crassitudinis ge-

A lu corripitur ; inter quam crustulam & arenam condit suos foetus eruca in elaborato solo, atque ab hyemis rigore salvos facit. In pinguioribus vero agris major inest humor, majorque insequitur, crassiorque à gelu glebarum correptio, & per consequens statio erucarum in superficie minime tuta est, quia quicquid in ea est, gelu dureſcit una cum solo, & contipatur. Perditio autem erucarum est sturnorum copia : illi enim uvarum cupidi, gulosique, turmam erucarum uvis perniciosam agnoscentes, coacto agmine, in eas convolant, rostrisque exenterant, sibique, & dominis vites ab earum injuria vendicant. Est autem eruca in Læumellino agro similis cantharidi, rutilantibus alis, & corpufculo crassiore, à vulgo materna lingua *Garuva*, sive *Garivola*, à garritu, quem volitando edit, dicta, quæ cantharidum fere species existimatur : ad quas à vitibus arcendas Plinii remedia vana probantur.

B Ad Alagnia latus patet Valigium turrium ambitu circumseptum, quod à Sanazaria gente ædificatum in Albonesios, postremo in Arcimboldos clarissimos viros translatum, mirificeque ornatum fuit ; & in quo etiam Picus Mirandula olim sua studia exercuit. Ambiant Valigium jocunda nemora modico intercedente spacio, ubi ferarum sedes, atque deambulatio inspicitur. Hinc abest ad tria millia passuum *Trumellum* vulgo, Latine vero *Trimellium*, appellatum, ex eo quod tria recta itinera intra oppidi circuitum coeant, sive Mediolanum, sive Vercellas, sive Papiam pergas : cujus oppidani à natura sapiunt, & ideo ad opus rurale plerique litteras edocti prodeunt atramentario, libelloque secum allato, & si quid scribendum contigerit, in agro scriptitant, in agro alter alteri causam narrat, arguunt ad partes, sciscitantur sententiam, ac tanquam judices silentio bubulcis indicto, per sententiosa verba sensa sua explicant : à qua re *Trumellini judices* nuncupantur. Sursum versus prope Novariensium fines Vasta Turratia patet, domino quam agro nobilior ; Julius enim Salerna vir peritissimus hanc possidet. Inter Deturbium & Ticinum amnem Novariensi agro finitima Parona apparet, deinde pulchra nobis Cœlavenia arridet, quasi à cœlo veniens, adpectu grata, sed incolarum moribus & urbanitate gravior. Ab ea recedentes Viçlævanum petimus ; cujus situs varietatem mirari licet : nam suo ambitu clivum & planiciem occupat ; patens forum in medio habet, ornatum porticibus ; Ædes regiæ in clivo eminent : Arx munitissima in promptu est ; populus pacis studiosus mercaturam passim exercet, lanificio celebrer, & ædificiorum apparatu longe celebrior ; viridarium in Episcopali domo elegantissimum habet, fonte seu piscina in centro ejus per aquæductum manante, fructibusque insigni ordine constitis, Galeatii Petræ Ticinensis patricii studio, qui primus illius Ecclesiæ Episcopus præfectus fuit, & vitæ diuturnitate ac salubritate omnibus æqualibus antecessit. Rivuli vero aquarum à Ticino deducti oppidum ambiunt, ac jocunditate & commodo Viçlævanenses exorant.

E A Viçlævano versus Meridiem, ut cœpi, pergens, regio ipsa in cunei formam, diametrumque, protenditur ; nam hoc loco parum distat Deturbius à Ticini valle : in Meridiem vero pergenti latior exstat regio. Ecce tibi ad dexteram Campolævum patet, à quo Campolævini oppidani vafri, arguti, ingenio ac viribus præditi, militiæ, agriculturæ, mercaturæ, venationis, piscationis, aucupii, fraudisque periti, decipi ab eis, quam eos decipere, ni caveas, facilius est ; à qua re proverbium manavit ; *Campolævinus non erit, qui de alieno suum non fecerit*. Si tamen cum eis liberaliter egeris, liberaliores eos dixeris : vinci in bono,

aut malo, nullo modo volunt. Ad finistram in supercilio vallis Ticini Sfortiaca adest, latissima prae-rivulis aquarum irrigabilia pandens. Vicinus Sfortiacae est Burgus sancti Syri, vini optimi fama notus, cujus bonitas in septimum durat annum, magisque perficitur. Ad dexteram rursus prospiciens, Carilassium oppidum habes, ubi mirabilis mulierum sollicitudo viget: exeuntes enim ad opus campestre, catervatim incedunt, unaquaeque colum defert, pergensque fuso deducit fila, & deducta colligit, nodoque cuspidi circumnEXO alia vicissim deducit, nullum sine opera, dum iter facit, tempus omittens. Catervam puella insequitur, operaria instrumenta deferens, ut ligones, rastros, cistulas, peram, panes, cantharum, & alia eis necessaria. Relicto Carilassio, Durnum ad eandem dexteram spectas, asparagi ferendi ac colligendi promptitudine notum; ubi ilignea septa Deturbium excipiens spectanda est, miro fabrefacta opere Albonesiae familiae sumptibus. Septa haec transversum alveum claudit, pluribus instructa portis: quæ omnes panduntur hyeme, aquis libere dimissis, æstate vero clauduntur, divertunturque aquæ ab alveo, & in prædia immittuntur.

A Durno distat Grupelium tria millia passuum, quod in crepidine vallis Ticini situm est. Rupelium potius à rupe dictum, clarissimorum Vicecomitum Castellum, rubri vini præstantia notum, à quo vallis Ticini villæ prospiciuntur, ut Casellæ, Sancta Sophia, Limes, & Parasaccus vicus, Carbonaria, & alia loca. Ab eodem etiam Durno oppido, ad Padi vallem tendens, ante oculos habes Zinascum vicum, longo tectorum ordine ædificatum, Seranumque, & Summum à Summitate dictum, ubi finem Læumellina habet. Qui quidem pagi alto prospectu Padum mirantur, mirantur autem, imo vero verentur, ne volubili undarum raptu Montisvelleris exemplo petantur ac subruantur: is enim nobilis pagus trecentis & quinquaginta quinque transactis annis Jordanæ gentis patrimonialis erat; Padoque irruente collisus funditus ab undis fuit: est autem Jordana gens, familia hodie Eustachia dicta, ab Eustachio Petri filio viro clarissimo, unde mihi genus maternum est: minimeque familiae suæ decori Blanca mater mea defuit, vitæ honestate ac rerum familiarium cura, quæ me Romæ agente, defunctis longa ætate corporis viribus (nam nonagenaria erat) è nobili pectore nobiliorem emisit animam, meque ipsum sæpius in humanis casibus, rerumque discrimine, versantem, valere iussit. His igitur Læumellinae oppidis, pagisque descriptis, superest referre fructuum præstantiam, ab ipsa Campania proveniente.

C A P. IV.

DE LAEVMELLINAE FRUCTIBVS.

De Asparago.

INCIPIT ab asparago hujus Campaniæ fructus ineunte Vere; cujus quidem asparagi culturam prisca Romani diligenter exercuere, ut Cato docet in libro de Re Rustica; posterius vero, Ravenatibus exceptis, despexere, ut fatetur Varro de Lingua Latina libro iv. ita scribens: *Asparagique ex asperis virgultis leguntur*, &c. Nostri ergo Læumellinae asparagi sationem à silvis & saltibus ad hortulorum formam & elegantiam summo studio transfudere, undique conquisitis post autumnum ejus radicibus, tenuique sulco dispositis, ac fimo equino terræ summitate conspersa, eademque tellure, desinente hyeme, rastris leviter attrita & emundata, ne alienæ herbæ, ac præsertim gramina, simul cum asparago terræ coalescant: compertumque experimento fuit Læumellinum fundum inter Ticinum & Agoniam asparago aptissimum esse,

A uliginosa arena multo promptius solis tepores Veris initio percipiente, quam fecundum ac densum solum: promptius itaque etiam, ac maturius, profilire à Læumellinae humo asparagi hac ratione solent, quam à Cispadanis hortis: celebresque in hac re sunt in primis Cælavenii, Campolævini, Tromellii, Durnini, alique Deturbio vicini, ubi tempestivi asparagi succisio præcipua viget. Nec solum horti, sed vineæ, & campi referti asparagis in locis circumspiciuntur, qui ascendente aurora sub Veris initium è terra prodeunt, ac per myriades mane succrescunt, crassique ac sublimes in horas fiunt, & nisi eadem die succidantur in semen defiliunt, atque obdurescunt. Quare non solum nobis, nostrisque, vesci hoc olere, sed finitimis etiam transmittere compositos in cistulis fasciculos amicitiae gratia necesse est, nimia exuberante copia. Surgit vero apud nos biennali industria virens fere totus, tumensque etiam ex succi copia, & superbe nitens, mollis tactu, gustuque suavis, ut interdum crudus edatur, levique coctione conficitur: probi autem nutrimenti est, tum quia naturæ vires temperata caliditate fovet, tum etiam quoniam meatus aperit, somnumque conciliat, & cientes urinæ aptus est, maxime si ante cibum edatur: atque si generationis studio subministrare rei Venereæ materiam libet, copiose ede, & in tempore age.

C A P. V.

De Fungis.

TRVDITVR eodem tempore à terra in Læumellinae tractu saluberrimus fungus, à spongiæ similitudine *spongiolus*, sive *spongiculus*, vulgo appellatus; qui in pascuis ac saltibus minime palustribus nascitur, & ad pugilli magnitudinem nocte crescit, manequè tollitur, & modica coctione purgatus, farinaque respersus, frixorio affatur, ac sine noxa editur. Dissimiles ab iis spongiculis sunt fungi æstivi, autumnalesque, sive boleti, sive pratenses sint, & quorum copiam vel maximam Læumellina habet, atque autumnales probans, eos solos legit, nec statim coquit, ut Plinius docet libro xxii. sed ebullitione defæcatis atque emollitis tactu secernit: & purgato humore sale in vasibus condit, servatque ad alia tempora: fungos vero æstivos tanquam perniciosos odit. Cur autem æstivi mali, & autumnales innocui habeantur, referam. Minus plerunque excrementicii humoris terra autumnii initio habet, quia ex præcedente æstu omnis fere superfluitas in terræ superficie consumpta est, qua consumpta minus etiam ex terrea malitia attrahere in ortu suo fungum necesse est, & per consequens minus lædere vescentes solet. Contra vero æstate apparentes fungi, plerique ab opacis locis, nondum æstus diuturnitate purgatis atque exsiccatis, prodeunt, insitamque propterea terræ malitiæ superfluitatem habent, quæ stomacho recepta obruit naturæ vires, ac nisi ocius evomatur, hominem suffocat, intercepto meatu, quo spiritus emittitur. Hac ipsa etiam ratione æstivi fungi, boletive, in montibus, collibusque nati, sæpe innocui esse probantur, quia minus humoris lubricitas collis, minusque excrementiciæ malitiæ, à natura propter declivitatem recipit, quam ipsa planities. Ex fungis autem autumnalibus minus superfluitatis habere Læumellinae in sylvis ac saltibus perceptos clarum est, quia sylvæ, saltusque, in ipsa regione in locis aridioribus sunt, minus culturæ aptis, & cum ab arido solo gignantur, minus excrementiciæ materiæ contrahunt, quam ii, qui in fecundis campis concipiuntur.

C A P. VI.

De Moris, & Bombycibus.

INCALESCENTE tempore alius sese nobis offert fructus ab esu alienus, sed natura conspicuus; quem tibi patula morus affert, distinctis ordinibus in Læumellina confita. Alba enim apud nos arbor, quam Romani Celsum vocant, in usu est, quia citius adolescit: hanc adscendens villicus adolescens rapida manu defrondat, virentia folia facco ingerens, ac festino gradu domum properans, ut reptantibus per tabulas bombycibus, sive bombylibus, caputque fame attollentibus, pabulum suggerat, quo pleniore alvo albescens quisque vermiculus sericeum globulum præstantius componat, seseque in eo texat ac recondat; mox operis sui precio interiturus, globulis ipsis ad Solis ardore expositis, paucis tantum sobolis causa in umbra dimissis: ex quibus contracto corpusculo bombyces papilionis forma exeunt, alatique coeunt, strepuntque, denique emissis ovis, atomis similibus evanescunt. Collecta ovicula mulier involvit lineo panno, servatque procul à calore ad insequentis Veris initium: quo appropinquante, visaque simul morus arboris pullulatione, ova sinu excipit, fovetque calore, quo biduo animata repunt, auctisque paulatim esca corpusculis formnum capiunt, atque à nigro colore, quo ab initio præditi erant, in bombyceum transeunt, ac nobis operantur. Mirabilis quidem naturæ vis, solo Dei nutu instituta: semen est quasi pulvis, à quo serpit ab initio pene invisibile animal, & Regum ac Principum indumenta tantillo tempore ac labore molitur. Pascunt bombyces, sive bombycas, in Latio & Orientali Italia frondibus nigræ morus, ut etiam in Hispania, quia hæc in calidioribus locis tempestive adolefcunt. Nostra vero regio, cum algore magis vigeat, quam æstu, nigras morus tantum in hortis & viridariis, fructus & deliciarum causa, habet, utpote sero crescentes, & sero etiam mora emittentes. Probatae autem maxime ad sericeum vellus plantæ Læumellinæ sunt ex locorum apricitate & siccitate: superat enim Læumellinæ planicies, situs sui altitudine, omnes fere Circumpadanos tractus, patensque est tam ad Solis tepores, quam ad ventorum flatus recipiendos. Item, quod est ejus præcipuum, si terram infra ulnam effoderis, sabulum passim invenies, à quo humor inferior naturali ariditate desiccatur: hinc est quod plantæ ad arenosum fundum radices promittentes, minus humiditatis contrahunt, foliaque propterea tum duriora, tum etiam angustiora, & ideo præstantiora, faciunt: reprobant enim serifices lata & mollia folia, ajuntque ab eorum esu vermiculos tumescere ac perlucere, & ex nimia humectatione putrescere: & è contrario à ficcis & durioribus foliis bene nutriri, ac operosiores formari; quod verum esse patet.

Plura me de iis scribere duo clari Viri vetant, Jacobus Sannazarius, & Hieronymus Vidijs; quorum alter candidam Morum lepidissimo Carmine celebravit, alter plenior tuba Morum & Bombycem, Sericumque cecinit. Monere autem Lectores libet; Bombyces ab initio dictos fuisse vermiculos à Bombycis inventionem, quod refert Plinius libro xi. de Bombycibus, Bombycinam vestem ex hujusmodi vellere contextam asserens. Nostra vero ac majorum ætate clarum est, Bombycem, vel Bombacem prodire ex minuto semine, quod sub autumnum terræ mandatur, & vere colligitur, cottonusque à Calabris appellatur, apud quos hujus seminis fatio, & perceptio in usu est, præcipue in territorio Bissiniani & Castrivelluri; oriturque ex hoc semine frutex ad cubitalem altitudinem, baccam, vel coccum, in summitate ferens,

A ad avellanæ nucis magnitudinem, intra quam baccam bombax ac grana seminis enascuntur, & maturitate adveniente panduntur. Idem etiam in Hispaniæ regione, quæ Bætica olim, & hodie Granata dicitur, nasci patet. Quo autem modo apud Antiquos sericum in usum & artem deductum fuerit, vermiculisne operantibus, an arboribus vellera à se ferentibus, disceptant Neoterici apud Virgilium, libro ii. *Georgicorum* ita scribentem:

Quid nemora Æthiopum molli canentia lana?

Velleraque ut foliis depestant tenuia Seres?

Quæ verba nullam indicant vermiculorum operationem, sed arborum tantum lanificium, ut etiam **B** Plinius memorat libro vi. ubi de Scytharum gente scribit; inter quos eosdem Seres populos sylvarum lanificio celebres refert: idemque Plinius postea libro xi. de Bombyce Coa scribens, apud Græcos vermiculorum curam & lanificium in usu fuisse testatur. Incerta itaque inquisitio videtur.

C A P. VII.

De Fragis, & Serpillo.

DVM curant bombyces, foliaque legunt pueri, fraga illis juxta sepes, & in campestribus, incultisque locis, sub foliculis rubent, quibus **C** conspectis accurrunt ad ea illi promptius quam ad morus folia, pronique alter alterum dejiciens in terram ruunt, socioque rejecto, fraga manipulatim præripiunt: quibus demum absumptis, serpillum legunt, quod passim in agris, ubi intermissa cultura est, à natura serpit, terræque summitatem sparsis radicibus continet, nec ad inferiora tendit, ac sole viret, soleque languet, & virore amisso sole rursus recreatur ac nitet. Lectum serpillum spargunt per tabulas, ut odore bombyces excitentur, atque abigatur foetor ex incluso aere, & eorum stercore proveniens. Si vero etiam ægre accescenti vino addere acrimoniam tibi curæ est, contusum serpillum vasi immittito, atque obturato, & septima die acetum habeto.

C A P. VIII.

De Fœni diversitate.

NVSQVAM majore studio quam in Læumellina fœnificia fiunt, tripartito semper fœni genere, usuque: quod enim mense Majo in pratis eminentibus refecatur, bobus labori assuetis reponitur, & *Majale* vocatur: quod vero ab humilioribus locis colligitur, ubi asperior tactu herba insurgit, equis viatoribus destinatur; quibus innocuum esse dignoscitur: (nam militares equi paleis potius quam fœno aluntur) bobus autem noxium tale fœnum est, quia ventres eorum lubriciores facit, qua ex re lassati viribus ægre ac perniciose labori subjiciuntur. *Augustanum* deinde, sive *Augustale*, fœnum dictum ab Augusto mense, in quo secari solet, juvenis, vaccisque, servatur: & quod equino generi, ut dixi, ex Augustano aptum est, equitio reponitur. Nullas ipsa regio pecudes, nullasque capras alere solet, sed armentis tantum, quibus maxime excellunt, incolæ delectantur. Bobus quoque alia pabula suo quæque tempore præbent, ut viciam adhuc virentem, dum tenera grana thecis insunt, ut avenas; & Septembrio adventante cum seminandi labor prope est, panicum ab imo succisum fasciculatim exhibent. Afellos autem vix centum in universa ora reperies; abstinent enim ab alendis asinis ob luporum, quibus abundant, insidias: exsurgunt illi catervatim ex sylvis afelli ruditu audito, & bipartito agmine incautos excipiunt, ac indefensum animal, fugæque ineptum, in diversa

lacerant, sæpeque occurrenti puero districtis dentibus obviam infensi eunt, prædamque horrido visu ac ore tuentur.

C A P. IX.

De Messis varietate & copia.

S V B I I T jam me scribentem operosa messis, cuius mirari varietatem ac ubertatem æquum est. Hordea sese primo messoribus parant, quæ nisi cito metas, jacturam postea in metendo facies, quia maturitate nimia spicæ levi motu franguntur, passimque grana decidunt, tibi que non avibus pereunt. Siligo insequitur alba, altaque arista emiens, tutoque maturitatem ferens, nec falcis ictu lenta grana dimittens. Instant tertio loco frumenta alba & ruffa, sinelolio coalescentia, quæ immatura potius quam præmatura secanda sunt; ne invalescente simul vento, æstuque, grana è spicis sæpe agitata decident. Alba granis numerosiora & speciosiora sunt: ruffa turgent spicis hispidioribus: qua ex re nebula, sive caligini æstate insurgenti, minus sunt obnoxia, sed granis non sunt æque præstantia; nam singulæ ruffæ spicæ pauciora grana, quam albæ reddunt. Item singula quæque grana, ruffa mola subacta, minus farinæ, & plus fursuris quam alba edunt. Cura tamen utrisque pariter est adhibenda: quoniam non semper utrisque, sed sæpius alterutri tantum, anni ratio favere, & alteri infesta esse solet. Succedunt farra nomine spicæ, & proprietate diversa, alia in siccioribus arvis, alia in humidioribus ad frugem provenientia: quæ ex siccioribus metunt, farra dicuntur, molaque confracta potius quam pistillo liquidis eduliis destinantur, quibus etiam vesci febricitantibus Physicorum consensu permissum est: quæ vero ex humidioribus campis colliguntur equorum cibo aptiora sunt. Tertium far Antiqui candidum, nostri *candilium*, & corrupto vocabulo *Scandelea*, Reatini vero *Arga* appellavere, quod quidem far latiore spica coalescit. Quarta farris species trimestris à Collumella scripta, nostris est ignota colonis, quibus tria tantum usui sunt trimestria, imo verius quadrimestria, semina, Hordeum, quod à Martio mense, quo seminatur, *Martiolum* dicitur: Siligo similiter *Martiola*, ac etiam avenæ; omitto viciam, & reliqua, quæ paleis non coalescunt.

Iis igitur messis generibus in unum coactis, ac in prælongam pyram compositis, incipit tritura labor: ibi nullus jumentis, nullus equis, aut bobus tritandi locus est, agendum hominum ac mulierum validitate & cura est: omnia hic humana sunt terenda atque versanda manu. Priscis olim colonis, scriptoribusque, ut Catoni, Varroni, Virgilio, & Collumellæ, ac Palladio, & Plinio ignota hæc ratio fuit, quam nostræ exercent gentes ad industriæ apicem suo ingenio evectæ. Accinguntur ii nostrates operi rejectis indumentis, & explicatis aristarum manipulis, soleque lustratis, arreptisque fustibus in aream facto agmine prodeunt, incuntque laborem, & tanquam adversa acie dispositi sensim in latum incedunt terendo atque versando. Terunt autem sublatis in altum fustibus, ictuque demissis strident tum in descensu virgæ humano robore actæ, resonant ordine ac tempore geminati ictus: sequuntur ictus rurales voces sese alternatim ad opus incitantes: franguntur passim aristæ, granaque profiliunt, tandemque exinanitæ spicæ, fessisque labore & calore areatoribus tritura perficitur. Areatores enim ab arearum industria ii viri, mulieresque, sive viragines, appellantur: est autem virga, instrumentum ex binis fustibus compactum, & volubili nodo junctum, quod ad incutiendum ictus utraque manu adhibita aptissime circumagitur, atque demittitur: ex quibus quidem fustibus, alter manibus continendus

A est longiorque, alter vero, quo triticum cæditur, est gravior & brevior. Nullaque gens in Europa uti longioribus virgis visa est, quam Circumpadana. An autem Tribula, & Virga idem sit, non contendo, quamvis à terendo quasi *tribula* dicta à Virgilio videatur, Servio aliter sentiente, cui cedo.

B Excussis probe spicis amoyentur ab arcis paleæ, longoque ordine in pinnam componuntur, ne corrumpantur ab imbris: occupant autem hujusmodi palearia extremas partes curtis, à veteribus chortis dictæ, ut incendii periculis minus pateant: surguntque in medio arearum immensi frumentorum acervi, atque ab arcis in horrea referuntur, ab horreis quippe semina exierant, redire itaque eorum germina ad horrea decet: relata in horreum longe lateque panduntur, ne coacervata caleant, accorumpantur. Abigendæ insuper frequentiamotione papiliolæ sunt, ne super eis cocant, germinetque; hæ enim insectæ aviculæ cocuntes super granis ova minuta araneo filo hærentia pariunt, è quibus tinca calore percepto nascitur tritico perniciofa. A loco igitur frumentis sæpe mutatis, papilionica generatio inhibetur. At si pluviosa æstas aristarum manipulos frequentius madefecerit, coloni diligentia æque non proderit: gigni enim intra granum corruptionem farinæ, & ab ejus humore & calore vermiculum enasci etiam in paleis clarum est. Orandum itaque est, ut Deus omnipotens tempora nobis opportuna tribuat, ne simul cum labore res ipsa pereat, atque ut oratio Deo placeat, vitæ integritas præstanda est.

C Ex hujusmodi igitur tritici, frugumque ubertate, ac diversitate, copia fere semper in nostris agris adest: fallenti enim Siligini, aut Hordeo, aut Avenæ, Frumenta, Farraque plerunque suppleant, & è converso, raroque utraque messis colonum fraudat, & alterutra sive etiam utraque parte reddente, Milio, & Panico largius in semina emissio, agricolæ sese adjuvant, pelluntque penuriam. Qua demum industria, ac coeli solique largitate, non solum ipsis agricolis, dominisque, ac cæteris incolis, sed finitimis etiam nostra regio alimenta suppeditat, ut Helvetiis, ac Liguribus, quibus antiquæ societatis jure nostræ areæ nostræque horrea in ubertate patent. Cujus autem præstantiæ frumenta Læumellinæ sint, accipe: Mediolanensis populus in foro triticario, viros publica auctoritate præficere solet, qui Læumellinæ frumenta venum importata, oblato precio ad Pristinum panis albi deducant, nec cuiquam privatum vendi sinant: est autem Pristinum furnus publicus in medio urbis constitutus, ubi optimus panis semper in magna copia populo venalis patet: & quia ex Læumellinati frumento panis candidior, ac etiam venustior, conficitur, præferri in comparandi optione ipsius Pristini conductorem publica auctoritate placuit. Itaque ex Mediolanensium judicio, illa frumenta cæteris anteferenda esse probantur, quod autem frumenta inter se differant, clarum est, ut peritissimus vir in libro *de Affectionibus*, Hippocrati adscripto, docet iis verbis: *Frumentum & vinum differunt inter se ipsa ex natura*, &c.

C A P. X.

De Lini præstantia.

L I N A ejus regionis optima esse in primis Ligures probant, qui ea in comparatione cæteris præferunt, majore etiam adjecto precio, & Ligurum judicium probans Plinius libro xix. de Lino, hæc ipsa lina inter præstantiora refert, minime quidem nominatim Læumellinum scribens, sed descriptione hoc ipsum colligens per hæc verba: *Inter Padum, Ticinumque amnes*, &c. Plinium deinde secutus Blon-

Blondus in *Descriptione Italia* hæc lina celebrat, pro
 Læumellina *Læumellinam*, vitio impressorum potius
 quam proprio errore, scribens: quorum virorum
 sententia vera est. Sunt enim hæc lina subtilissi-
 mo ac firmissimo filo, telæque ex eo contextæ du-
 rabiliores sunt cæteris, quamvis sint tenuissimæ:
 sed quemadmodum lini præstantia ager Læumelli-
 nus celebratur, ita etiam lini copia ager Brixianus,
 Cremonensis, Laudensisque omnibus Italicis regio-
 nibus antefertur, quorum lina telæque non solum
 jumentis, sed curribus, ac navibus abducuntur.
 Egregium autem est utriusque lini differentiam ag-
 noscere, quam explicabo. Postrema fere Martii
 mensis hebdomada Læumellinates lini semina ter-
 ræ mandant; Sartirana & ejus finitimis exceptis,
 qui exeunte Februario seminant. Crescit itaque
 linum æstivo calore ac imbre, & iccirco tam à so-
 li natura, quam à cœli temporisque proprietate fit
 linum, planta folioque gracile & firmum, & de-
 ficiente imbre deficit linum, semine tantum super-
 stite: nam nisi ad ulnæ, seu pedis altitudinem ad-
 leverit, inutile habetur. Brixiani vero, & eorum
 finitimi, tempestivius semen lini ferunt, quia eo-
 rum regio ab occiduis Alpibus & à pruinarum in-
 vasionibus longe est remotior, quam ager Læumel-
 linus. Crescit itaque maturius linum in Brixiano
 agro tum Veris imbribus, tum etiam aeris tepo-
 re. Insuper etiam siccitate urgente addunt fluviales
 aquas, omniaque undis rigant, quibus ex rebus
 mollis planta, crassaque, adolescit, utpote terræ
 cœlique temperie, & aquarum fluvialium pingue-
 dine, educata antequam æstus adveniat.

Qua quidem naturæ varietate evenit, ut ipsa
 quoque Brixianorum & finitimorum lina molliora
 sint, ac per consequens laboratu faciliora quam
 Læumellina, & ideo ab eorum fœminis, alta vo-
 ce canentibus, ac labore & amore lætantibus, ela-
 borantur. At Læumellina lina, cum duriora sint,
 filoque sicciore à natura producta, à validis tan-
 tum viris (ut etiam scripsit Plinius) die noctuque
 laborantibus, ac magna vi tum lignea, tum ferrea
 scutula, vulgo *spatula*, lina concutientibus, ver-
 fantibusque, ægre fiunt, à quo labore nomen ha-
 bent: linarii enim operatores, à nostris incolis ex-
 cussiores, & populariter *scussoreoli*, ab excussionis
 industria & arte appellantur: & inter Italæ opera-
 tores Læumellinates palmam obtinent; Plinio et-
 iam annuente, qui lini artem diligenter expressit,
 hac tantum parte omiſſa, quam addo, non ut do-
 ctissimi viri scriptis ferta appendam, sed ut nostra-
 tium artem, laboremque, in hac re aperiam. Se-
 mine à lino excussio immergitur linum in fascicu-
 los dispartitum aquis tepentibus, triduoque sub a-
 quis pondere imposito continetur, à quibus ex-
 tractum statim in acervum componitur, ut co-
 cervatione ocus caleſcat: madidum itaque calet,
 saltem biduo, quæ calefactio appellatur macera-
 tio, vel populari verbo *massatio*: conficit enim ea-
 res plantæ duritiem, ac separabiliora ipsa fila ab
 alterutris facit, quam si omiseris, majus tibi opus
 frustra paraveris. Soli postea exsiccandum tertia
 ferme die, solutis fasciculis manipulatim explica-
 tur, exsiccatum fasciculatim religatur, ac reponi-
 tur: contusio deinde sub æquinoctium ligneo mal-
 leo perficitur, atque interjectis diebus sequitur
 utriusque spatulæ lignæ, ferreæque, concussio,
 quæ duo sunt inter se diversa re, opere, & tempo-
 re: postremo additur expectinatio, quæ fit lino
 ipso ferreo pectine, ultro citroque deducto, pro-
 beque depexo: sed cum lini præstantiam perce-
 peris, agnoscenda est etiam, si placet, ipsius se-
 minis vis.

C A P. XI.

De Lini Semine, & ejus Oleo.

LINI semen à Læumellinatibus ad tripartitum
 Lufum destinatur, aut semini, aut oleo facien-
 do, aut Draconis herbæ generationi. Semini, cum
 ad linum germinandum sive autumno, ut in Fla-
 minia, & Cispadanis agris, sive vere feritur. Dra-
 conis herbæ generationi cum raphano inclusum ter-
 ræ plantatur; sed hujus oleris copia adeo inolevit,
 ut ex propagine tantum plantæ fiant, & interdum
 etiam ejus frustula terræ commissa sponte coale-
 ſcant. Est autem Draco herba à peritis viris Pyr-
 rethrum dicta, esu gratissima, caliditate stomacho
 vim addens & appetitivam virtutem excitans, ha-
 bens follicula, lino similia, & nullum semen fe-
 rens: quæ æstate tantum usque ad solstitium vi-
 get, postea obdurescit, hyeme vero virorem amit-
 tit, radice supervivente, verisque tempore germi-
 nante. A lini autem semine fit oleum, ejus primo
 granulis mola subactis, deinde torcularis machinæ
 suppressioni suppositis; fluit enim ex prælo purum
 prius oleum, postremo impurum, lucernæ potius
 quam cibo aptum. Puri sive primarii olei virtus mi-
 rabilis est ad vermes, sive lumbricos, perimendos:
 concisum enim in partes panem, & leviter assatum,
 matres poculo imponunt, superinfuso hoc oleo, &
 cum panis oleum ebiberit, vinum album pueris spe-
 ctantibus addunt, blandisque verbis ac materno le-
 nocinio ad panem jejuno stomacho edendum infan-
 tes eliciunt, vino etiam exhibitio; hoc enim cibo
 lumbrici à ventre pueri ad secessum repelluntur:
 atrox enim lumbricis tam genitis, quam ex corrup-
 tione gignendis, hoc oleum præ omnibus est, quod
 ex manifesto ac populari experimento patet: ungunt
 enim caesarii hoc oleo ingentes casei formas ad cor-
 ruptionem evitandam, vetaturque ejus contactu à
 carnibus corruptio, parsque etiam incuria tabefacta
 eodem oleo illinitur, probeque curatur. Pueris au-
 tem lumbrici sunt infesti, ac nonnunquam inter-
 neciosi usque ad septennium, quo exacto, remo-
 tiores à corruptionibus, & firmiores fiunt, ut doc-
 cet Hippocrates in libro *de Carnibus*, ubi magnam
 naturæ vim insitam esse septennio innuit, & septi-
 mo figurarum numero contingi notitiam homini-
 bus à natura probat, libro primo *de Dieta*. Idem-
 que libro *iv. de Morbis*, nasci etiam in utero pue-
 ruli, dum materno alvo includitur, lumbricos doc-
 cet: Avicenna autem notat, etiam ex dentium
 emissionem corripere dolore infantulos, ac vermibus
 subinde infestari. Ego vero etiam ex diversis aeris
 mutatione idipsum accidere animadverti. Denique
 sive illi nimis dulcia edant, sive horarios fructus,
 quos cupide & furtim rapiunt, immoderate co-
 medant, sive etiam tristitia, aut improvise pavo-
 re, perculsi, in languores incidant, facillime à lum-
 bricis, nisi prævideas, torquentur.

Ad olei autem virtutes rediens, impetiginem à
 capite frequenti unctione prohibet: haſtas quoque,
 & tabulas, opportune illinitas, à vetustate servat.
 Utinam similiter posset ab hominibus vetustatem
 avertere; plures enim ungi se ab imo ad summum
 circumquaque paterentur. Expresſo oleo remanent
 in torculari reliquiæ oleosæ materiæ, quas nostri
Paneolos vocant, sive quod quasi panes oleosi vi-
 deantur, sive quod à pannis, quibus obvoluti e-
 rant in olei expressione, extrahantur. Hos igitur *Pa-
 neolos*, sive *Panillos*, tollunt, servantque, donec
 exsiccantur, siccos autem autumno exacto fran-
 gunt, & tritant, ac pinguefaciendis jumentis fur-
 furi commixto pro bestiarum edulio proponunt.
 Tumescit pinguedine bos ejusmodi esca saginatus,
 carnisque mole excreſcente, pene immobilis effici-
 tur. Invaſcente gelu, Decembrio exeunte, in
 publicum educitur: dominorum hæc gloria est,
 præcipue macellariorum; nam qui pinguioreſ bo-

ves pro macelli usu ad publicum decorem ma-
verit, honorificentior est cæteris. Bobus in pu-
blicum deductis, inclamant admiratione juvenes
singulorum magnitudine conspecta. Illi pinguedi-
ne onusti, artubusque trementes, ægre attollunt
pedes, ac testudineo incessu lenti, gravesque, per-
gunt, hedera ornatis cornibus, ac famulis hinc inde
circumsistentibus, ne gelu lubricitate prolabantur,
ac corruant. A quo spectaculo boves Papienses per
Italiæ urbes tanquam mirabiles fama celebrati sunt,
uno præcipue ex his, & eo quidem spectatissimo, à
nostris oris Ferrariam navi advecto, cujus rei causa
Bos Papiæ Ferrariensibus, tanquam aliquid visu mi-
rabile, hodie etiam in proverbio est. Et Attestii
insuper Duces, viri illustrissimi, locatis sæpe Co-
macli lacubus, stagnisve, Papiensibus, bovem etiam
Papiensem saginatum mense Decembrio importari
Ferrariam præter locationis precium pacti sunt.

C A P. XII.

De Vitibus, & Labrusca, Vinoque.

Ad vites conversus, dubito quid magis pro-
bem, vites ne quadrato ordine ac spacio in
agminis speciem dispositas, palisque subnixas? aut
opulis, ut Varro ait, conjugatas? an viles, & in
sylvis abditas, neglectasque labruscas? Vites enim
sicut fructu longe excellunt, ita etiam magni im-
pendii, & in Læumellina fallaces sunt, triplici
vexata malo, aut pruina, aut uredine, aut gran-
dine: & à pruina incipiens, illa alienis mensibus,
scilicet æstatis initio, Læumellinæ faciem operit;
Apennino maxime nivibus onusto, ac cæli sere-
nitate infecuta, ventoque noctis initio increbrescen-
te: qua quidem effusa pruina infelices pampini
gelu torridi è palmitibus pendent, soleque inva-
lescente arent, evanescitque spes vindemiæ. Prui-
næ etiam transacto periculo, uredo à nivosis mon-
tibus æstate timetur, quæ vento spirante frigore
acinos perstringit, inficitque, nec finit ad matu-
ritatem verti: itaque cum uvas cernas, frustra vin-
demiæ expectas. An vero ita etiam gignatur uredo,
ut Plinius notat *libro xviii. cap. xxviii.* du-
bito, vario temporis casu acinos afficiente: nam
& à maritimis oris interdum uredinem efflas-
se Læumellinates observarunt. Quid horribilius gran-
dine? oritur ab Aquilone sæpius cæli obtenebra-
tio, fragor insequitur, corruscant fulgura, incre-
brescunt tonitrua, adsunt jam jam, capiti immi-
nent, malumque minantur, tandem ruit sine imbribus
ingens grando, ac præcipiti casu vites petens, fru-
ctum excutit, antequam in fructu sit, sternitque
in vineis omnia, racemos, frondes, pampinosque,
ac palmites etiam ictibus comminuit. Raro tamen
universam regionem conterit sicut pruina, quæ
interdum quicquid vitium in Læumellinæ dorso
patet, totum verrit, perimitque futuros fructus.

His igitur cæli casibus subjectæ Læumellinæ
vites incertum fructum dominis promittunt: con-
tra vero labrusca sine ullius cura, aut labore, tu-
ta in sylvis latet, expers pruina à terræ humili-
tate arborum adminiculo ac porceritate elata, sper-
nit tonitrua, ac grandinis ictus eludit, arborum
frondibus, ramisque contexta, uredinem non sen-
tit munita situ: quoniam vel ab Aquilone, vel ab
Occasu Aquiloni proximo, frequentius uredo Læu-
mellinam aggreditur: quo quidem in latere raro
labrusca adolescit, sed aut ab Oriente, aut à Me-
ridie in altum surgit, sylvasque complexa demittit
palmites, uvarum pondere depressos, quos oppida-
ni vinearum fructu amisso populatim spoliunt, le-
ctosque botros pedibus calcant, & premunt præ-
lo, folique labruscæ vindemiæ nomen honorem,
laudesque canunt. Oh ingrati viri! cur non eidem
culturam, putationes, aliaque opera impenditis,
ut gratior ac uberior fructus vobis à natura fiat?

A Minime ergo despicienda labrusca est, cum fructus
ab ea certior quam à vite prodeat. Attamen si vi-
ni præstantiam spectas, non est quod Læumellinæ
vites, etiam tot casibus obnoxias, cum labruscæ
ruditate conferas: excellunt quippe Læumellinæ
vina, alba, rubraque, claritate, odore, sapore, ac
statu, omnibus finitimis, & Circumpadanis vinis:
Mediolanense semper excipio, approbante Varro-
ne, quod alio loco à me fortasse commodius refe-
retur. Ipsius autem vini præcipue gloriam habent vi-
neæ in Læumellinæ summitate sitæ juxta vallem
Ticini, inter Grupelium & Burgum sancti Syri,
ubi levis ac fabulosa tellus in superficie patet, sub
qua exstat jocunda, udaeque arena, tactu mollis ac
uliginosa, vitibus alendis ac probo vino ferendo
apta. Hic neque assidue pluviae obesse vitibus pos-
sunt, arenæ siccitate superfluum humorem sensim
adimente; neque urgente æstu tellus ipsa dure-
scit, cum sit suapte natura resoluta ac levis: pro-
deuntque ex hujusmodi solo vites ligno subrusto,
gemmis densis, brevibusque internodiis, ac foliis
pene angustis. Uvæ autem ipsæ graciles sunt, ac
duriusculæ, quibus nihil fere aquei humoris, sed
vinolentus liquor inest, tactu ipso quasi applica-
bilis: vinumque ab hoc liquore confluit, præstan-
tia ac diuturnitate præcipuum, de quo scribere mi-
hi nota operæ præcium puto.

C Quod album est, *Vernaculum* appellatur, & in
septennium aucta potius quam diminuta bonitate
durat: septimi enim anni vinum Vernaculum, mi-
rabilis potentiae delibavi, mihi allatum ex cella
vinaria Xenodochii Divi Matthæi, quod vulgo
Hospitale infirmorum Papienses vocant: rogatusque
à me Præfectus Hospitalis, cujus esset vinum à
Burgum sancti Syri, respondit, servari pro infirmis
nimio morbo languentibus, ad nares & pulsus ma-
defaciendos, & sensus excitandos, irruente synco-
pe, id est, defectu animi; *Vernaculumque* opinor
appellari hac ratione, quod verno tantum tempo-
re bibere eo liceat: nam si æstate biberetur, aqua
non infusa, præcordia sane nimio calore incende-
ret. Rubrum autem vinum ejusdem loci ad trien-
nium tantum servari accepi. Post Burgum Divi
Syri, Grupeliumque, non modicam vini rubri lau-
dem, Plebs Alboneola, & Caldifolium, ac Vico-
bianum habent, quorum coloni summa diligentia
curant suorum dominorum vineta, in mobili ac
lato solo elegantissime consista. Hæc ea potissimum
causa retuli, ut multorum incertam detegerem,
qui Læumellinam regionem despiciendam ex soli
(ut ajunt) ariditate putant. Ego vero è con-
verso nullam terræ partem parvi faciendam censeo,
ubi enim frumenta, farraque ad frugem pervenire
non poterunt, ibi avenas & milia serere aptum erit:
vineæ etiam plantari, morusque poterunt, atque
inter vitium ordines addi asparagos utile erit. Po-
stremo, si neque tibi rei rusticæ peritia, neque fa-
cultas suppetit, sine quæso jejunum agrum in sal-
tum, sylvamque converti, omiſſa cultura: quer-
cu enim sese sponte vestit, ac passim ornat Læu-
mellinus ager, ferisque & avibus nidos & latebras
breviævo parat: à qua re, venationis & aucupii ob-
lectatio, regio viro digna, in eo exercetur, de qua
mihi scribendum est.

C A P. XIII.

De Venatione, & Aucupio.

NULLA in Europa regio aptior est aucupii ac
venationibus, quam Læumellinæ tractus, in-
ter Ticinum & Agoniam positus: sylvæ enim hic
spaciøsæ atque antiquæ sunt, apricis campis finiti-
mæ, quas etiam sub hyemem, pluvia ingruente,
sicco vestigio adire licet, æstate vero umbris opa-
cæ & gratæ, tam viatori, quam villico, esse so-
lent. Quercus hic ingentes intactis à ferro ramis
bra-

brachia tendunt, simulque implicantur, ac solis radios frondibus excipiunt; lustraue ferarum hic adsunt, quæ temere interdum quærens imprudens venator intima sylvæ petit, & amissa semita, errabundus per obliquos calles huc & illuc se trudit, ratusque interdum se viam inire, alio pergit, longiusque aberrat, & frustra tandem errore cognito, cornu ora laceffit, ut dispersos canes revocet, & in cœtum cogat, comitesque conversi itineris habeat. Alter vero peritior capturæ satagens, circumspicit in primis sylvarum aditus, ferarumque vestigia, dum terra adhuc rore madet, catulis, oculisque perlustrans indagat: ubi autem earum latebras perscrutatus fuerit, abdita quæque & suspecta loca pertentat, ac infestis catulis latentes feras ab occultis sedibus depellit: illæ in apertum campum actæ fugam tentant, insequitur venator, celeresque canes, quos *leviores* appellant, dimittit, dimissicursu certant, fera laceffit circumcursans huc atque illuc, ac refugium quærens; instant ardentius canes, dominique circumstant, cursu, clamore, minisque proripitur, tandem illa moribus sternitur, dilanienda catulis: superveniens autem cursu lassus, & vix anhelans puer feram semilaceram tollit, canes voce magistra increpans, eamque exenterat, viscera canibus pro prædæ lenocinio dividens.

Cautior iis omnibus villicus operator insidias molitur feris, fraudeque agere, non virtute, cogitat; prona enim ad fraudem plerumque est rusticitas: sollicitus ergo sylvam petit, aditus explorat, ubi plagas funibus intextas, laqueosque suspendat, suspensos observat, fingens opus facere, paululumque à tendiculis secedens noctem exspectat, præstolaturque feræ casum, quæ ubi sese doli ignara præcipitem in funes dederit, rapitur extemplo villici manu, ac premitur, ne vocem edat, atque dolum detegat, frustra que reluctans, ac pedes jactitans, retibus obvolvitur, & furtivo gradu illius boni viri humeris, quasi vehiculo, nocte exportatur. (nox quidem ipsa villici facinoris hora est, tenebras illi adesse suis rapinis cupiunt, votisque precantur) Atque hoc fraudis genere non solum innocui Cervuli, ac Damæ, Capreoli, Herinacei, Lepores, ac Cuniculi, quorum copiam Læumellina vel magnam habet, sed etiam Vulpes, decipere assuetæ, decipiuntur ac pereunt, nihilque eis calliditas à natura tributa prodesse ad evitandas vafri villici artes prodest: superat ille ingenio vulpes, & earum pellibus sibi pro gloria indumentum fuit, defertque hyeme, & suis gloriatur artibus.

Alio etiam deceptionis genere ferociora animalia, ut Lupum & Aprum, sine periculo captare Læumellinates solent: funibus enim hi nostri retia texunt in fasci formam ac longitudinem, orique vincula circumponunt, *busamque* à facilitate claudendi atque aperiendi hoc rete vocant: aptatur huiusmodi bursa funicularis in sylvarum egressibus, lupis, aprisque perviis, aptataque tegitur frondibus, ne à fera discernatur; procul deinde invigilat insidiator, attenditque feræ ingressum: ubi enim illa priores pedes intulerit, levi motu vincula contrahuntur, ipsaque fera irretita manet; casum agnoscens nititur evadere, & dum retia tentat à dorso excutere, vincula arctius comprimuntur ac tenent, tum ferro agendum est, promptaque manu necandum inclusum animal, ne mora interveniente, dente aut agitatione funes conterat, atque evadat. Scrobem etiam altiore alii fodiunt, angusti oris & latioris fundi, atque egestam terram longius exportant, ne lupus dolum resciscat: os scrobis leviter tegunt stramentis, aut frondibus; cui ignobile catulum, aut anserem, constrictis nodo pedibus superimponunt, querulam ille vocem emittens excitat ad prædam lupos, vulpesque. Lupus quidem, natura avidior, voracitate

A percitus, invadit ocus catulum, ruitque in profundum una cum stramentis & catulo; tum catulo omisso periculum agnoscit, & circumagitur suspiciens an pateat refugium. Accurrit è vestigio strenuus venator, atque ab alto immanem voratorem cavea deprehensum ludens, venabulo interimit: raro huiusmodi arte vulpes fallitur, cavet illa sibi ab exposito de industria cibo, fraudemque subesse suspicatur: videt, ut ille ait, & abstinet, vertitque prædandi studium ad animantia, quæ sua sponte vagari, non autem nostra arte compererit, cuniculosque temere à fovea egressos, longiusque aberrantes ac colludentes, ipsa vepribus latens observat, exspectans locum, tempusque, insultandi, & ubi eos abesse à suis latibulis perspicit, prodit ex insidiis statim, ac intercepto fovearum aditu imbecilliores rapit. Lepusculos quoque, aut cubantes herbarum cespitibus, aut Solis radios excipientes, simili dolo circumvenit. Phasianos etiam ac Perdices ad se spectare sua calliditate probat: dum enim ova pariunt, dum incubant, & dum implumes pullos, semipennatosque, per prata, saltusque, clocitando deducunt, vulpium dolis ac rapinis patent. Quid, quod etiam ipsos parentes phasianos interdum dolo rapit: illi quidem rore madidi è sylvis sæpe in apertum locum prodeunt, & ad Solis radios humi jacentes alas extendunt, & sensim calorem percipientes pennas desiccant, pulveremque unguibus ac rostro è terra excitant, ac sese volutando pennis converso ordine erectis quatunt. Vulpes autem à tergo jocum spectans gradus gradatim movet, ventre terræ tenus inclinato, & sæpe etiam gradum sistit, & insidiosa latet, tandemque vicinitatem adepta incautum opprimit, prædam ferens catulis, quos è latebris agnita voce evocat, & alitem expennare docet, suisque gnatos imbuit dolis. At si præda onusta vulpes lupum fortasse obviam exire adspexerit, dimittit illico helluoni prædam, ac volucris gressu fugam parat: ille vero jejuni ventris causa per fas & nefas dimissam rapit, escamque, quam non meruerat, improbe deglutit, atque vulpem interdum imitatus per sepes & saltus cubantes cervulos perquirat, ut morfu tantum, non autem cursu, opus perficiat; dumque vasto corpore ac gravi incessu stationes explorat, strepitu catulos à somno excitat, & in fugam vertit: atque irrita captura incassum errat, caudaque lassitudine demissa turpi inedia actus foetida morticina ad amnis ripas petit, voratque.

Quid innumera volucrum genera referam, in quibus aucupia diversis studiis exercentur. Ille Bubenem volatucolludere docet, ejusque spectaculo, retibus in altum explicatis, garrulas Corniculas, Graculosque, decipit. Falco etiam, Accipiterque, eadem deceptione irretitur, & uterque hominis consuetudine ac blandimento postea familiaris factus, à nobis evolare, rursusque revolare ad nos instituitur: neque nobis tantum, sed etiam nostris catulis obsequitur, à quibus excitatæ è terra aves in prædam Accipitri, dominoque feruntur. Falco autem alia magnanimitate fretus domini manu in altum commissus, alarum remigio ad cœlum tendit, atque ab alto despiciens in emergentem ab aquis alitem extemplo ruit, contractis in umbonem ad percutiendum alis, præcipitemque anserem, sive anatem, ictu alarum in intum deiecit, quæ terram moribunda versans apertis alis, edocti catuli ore excipitur. Quid mirabilius, jocundiusque, Gruum captura? petunt illæ agmine facto medios campos, atque à viarum frequentia & à sylvis procul insident; quibus appropinquare sagittarius studens, instructo ad fallendum equo in campum exit, latensque ab equi latere, equum obiter per circuitum ad Grues impellit: quæ equum sine incessiore spectantes nihil suspicatas perstant, pascuntque per agrum:

agrum : ubi vero is satis se vicinum agnoscit , si-
sit equum , ac emissis è balista jaculis incautas ster-
nit ; similique dolo & arte anseres & olores exci-
pit. I nunc tu , & disquire , an possint pennata ani-
mantia ab hominis astu usquam tuta fore.

Iis aliisque majores nostri capti oblectationibus
Præfectum aucupii ac venationibus in Læumel-
lina constituerunt , qui venatui locum , tempus ,
legemque præscribit , vetatque pedicas ac laqueos
in mitiores feras tendi. Vulpes autem , & Lupos ,
utpote dolo agentes , pariter decipi fraude ac dolis
finit. Is itaque Præfectus , vulgo *Capitanens* appel-
latus , custodes passim disponit , & prohibitoria edi-
cta oppidis affigit , curamque agit , ne venatoriæ
legi fraus fiat , deprehensusque transgressor jamdu-
dum poenas subit. Qua quidem ex re crevit in im-
mensum apud nostrates aucupii & venationis glo-
ria , ejusque oblectationis studio majorum nostro-
rum memoria Reges maximi Læumellinam invi-
sere , suæque manu venari , atque aucupium exer-
cere , Cyri exemplo , Regium putarunt. Franciscus
Galliarum Rex , Insubria armis recepta , in Læu-
mellinæ agris admirabilem venatorem sese præbuit.
Carolus Quintus Imperator Mediolano solvens ,
curis oppressus Læumellinam petiit , ibique captus
falconum volatu , atque aerea cum gruibus pugna ,
seclusit à mente curas , atque hilaritate , quæ ra-
rissima ei inest , perfudit animum , jussitque fines
præscribi , intra quos venatio Regum ac Principum
voluptati servaretur. Huc si tu sine catulo-
rum caterva tardo gressu concesseris , spectabis in
sylvarum limine cuniculorum agmina solem de-
missis auriculis captantia : qui ubi tete adventare
sentient , insurgent confestim , atque alternis pedi-
bus supplodent , periculum adesse gregi suo indi-
cantes. Longe vero securius quiescunt sub sylvæ
umbra cervorum armenta , teque venientem
ad teli jactum expectant , mirantur , nec timent :
atque si juxta eos tendens iter aliorum perrexeris ,
te abeunte cervuli post terga gement , & humano
adpectu sese oblectare muta voce cient. Candida
hic cerva Antonio Fregosio apparuit , Sertorii
cerva non inferior : at longe quidem felicior cer-
va Marcelli Cervini , quæ , me hæc scribente , heu
jam inanes depascit aristas , ejus domino tertia ex-
acta hebdomada in Pontificia sede expirante , men-
se Aprili , anno à partu virgineo quinquagesimo
quinto , supra millesimum & quingentesimum. A-
ge nunc tu futurorum scrutator , & Marcelli exem-
plo prædictionibus , quibus ille mentem imbuerat ,
crede. Ego vero sylvas repetens præsentia sequar.

Non solum voluptatem nobis sylvæ afferunt ,
sed etiam fructus nostris villicis multiplices publi-
co fere jure tribuunt. Arida inprimis ligna è sylva
cedere , glandes legere , fungosque ac labruscas

A populatim licet , nihil sibi ex his sylvarum domi-
ni arrogant : Romanosque derident , qui tanti glan-
dem fecerint , ut edictum de glande legenda pro-
posuerint , ac antiquis legibus inferuerint. Nimis
sane rerum curiosa illa ætas fuit , quæ ad glandis
perquisitionem oculos adjecit. Nostri autem libe-
ralius agentes , hujusmodi omnia sinunt esse com-
munia , glandem , spicilegia , racemationes , nuces
deciduas , arida ligna , stipulam , & alia plura , qui-
bus ali pauperiores æquum est.

C A P. XIV.

De fatali aquarum illuvie.

B **O**CCULTVM naturæ opus referre hoc loco ne-
cessè est. Surgit in Læumellinæ dorso (mira-
bile visu) ingens interdum aquarum illuvies , non
solum ab imbrium assiduitate , sed etiam ab aqua-
rum scaturigine , quæ præcipue fit in locis fabu-
lofis , veluti circa Tromellum , & alibi : fit , in-
quam , certis tantum annis , tempore à Deo natu-
ræ domino constituto , ut septimo quoque anno ,
interdum nono , interdum alio : & quæ quidem
scaturigo aquarum ob ejus vehementiam in plura-
li numero prolata à nostris majoribus fuit : Vora-
gines enim prius dictæ , postea *Vargine* , vel *Bargi-
ne* , à popularibus nuncupatæ hæ aquarum ebulli-
tiones fuere : videre enim tum licet flumina quæ-
que , ac rivulos , & fontes aquarum copiam evo-
mere , suosque alveos passim evadere , & per via-
rum longitudinem defluere , vallesque inundare ,
& sublimes sæpe occupare agros. Item , quod est
mirabilius , cessante pluvia , terra tamen madet , ce-
ditque jumentorum vestigiis , voratque incautum
equitem , ipso equo usque ad alvum , terræ ac la-
tenti aquæ simul immerso : item in fabuloso loco ,
ubi nulla exstat in superficie aqua , maderque ran-
tum terra humore , si eodem loco infixeris hastam ,
vix fundi duritiem attinges , aqua statim proficien-
te ex foramine terræ , ubi hastam fixeris. Merito
igitur *voragines* dictæ sunt à vorando , quia devo-
rantur aquarum hiatu jumenta in locis , in quibus
illo transacto anno , quamvis altius terram effodias ,
nulla tamen ibi aderit aquæ gutta : nec solum cam-
pis , aut vallibus infesta hæc moles aquarum est ,
sed etiam domibus : nam me puero Castellum ,
quod Mariciorum erat , situm in extrema parte
pagi sancti Nazarii , irruente hujusmodi aquarum
illuvie , familia vix effugiente , disjectum à clivo
fuit , lapidea materia nusquam reperta , pauloque
post Maricia familia , quæ antiquissima erat , defi-
ciente sobole , finem habuit : finemque ego simi-
liter meo libello faciens , ad pinguiora arva de-
scribenda , relicta à tergo Læumellina , descen-
do.

BERNARDI SACCII,
PATRITII PAPIENSIS,HISTORIAE TICINENSIS
LIBER V.

C A P. I.

De Sicomario tractu.

INTER Læumellinæ rupem & Ticini
oppidi clivum humilis jacet planicies ,
Sicomaria appellata , ut retuli *libro* se-
cundo *capite* quinto. Quæ quidem pla-
nicies sicut Padi secessu amplificata

F fuit , ita eo etiam retrocedente , & priora , ut so-
let , interdum repetente , coarctatur , & languet ,
abducique vi fluminis tecta ac viridaria videt. Al-
labitur huic regioni Padus à Meridie , sed cum fle-
xuoso ac vasto ambitu ruat , sede sæpe mutata cœ-
li regionem sua mobilitate non servat : hodieque
tuo prædio ab Oriente vicinus erit , & uno , aut
altero intercedente anno à Meridie tibi aderit. Ti-
cinus

cinus vero à Septentrione Sicomarium pertingens, Pado hoc loco conjungitur, discretis ab initio mirabiliter alterutrius aquis. In hoc itaque tractu frequentes adsunt viculi, pluraque suburbana rura, regio fere ornatu condita, de quibus nihil scribendum puto, ad ea, quæ naturæ propria & potiora sunt, orationem vertens. Est enim ipsa regio situ humili inter Læumellinæ & Ticinensis agri altitudinem abdita, atque depressa, neque Aquilonari, neque Occidentali vento prorsus exposita: nam ipsum Aquilonem Ticinensis campania, & Occidentem Læumellina excipit, Sicomaria valle innoxia plerunque servata: qua ex re pomis ferendis aptissima videtur; venti enim florentes arbores sæpe in apricis Læumellinæ locis, aut flatus violentia, aut pruinis infestant, fructuumque genituram vetant: quo periculo ac detrimento Sicomarium abest, dicique Pomarium à pomorum ubertate ac varietate potius quam Sicomarium deberet.

Tellus etiam ejus insulana (ut incolarum utar vocabulo) prorsus est, ex argilla & limo constans per antiquum Padi recessum: cujus quidem terræ pinguedine brevi ævo adolescunt arbores, ac mira & incredibili copia fructificant. Cingitur aggeribus ex parte, ubi situs est paulo humilior, ad Padi inundationes coercendas: consitaque est passim aut vitibus, aut pomiferis arboribus: de vitibus pauciferum vinum elicitur, Mantuano, ac Ferrariensi, & Ravennati simillimum. Si quis igitur valetudinarius Galeno annuens vinum pauciferum appetat, ex Sicomario bibat, nec ebrietatis periculum pertimescat, sed tempestive potius à bibendo minctum eat: insitus enim huic terræ succus plus humiditatis vitibus infert quam oportet: ex qua superfluitate fit mollis & crassa uva, & ab ea aquosum vinum, cui evanescere sub caniculares æstus, nisi provideatur, facile est. Ipsa autem humiditas Sicomario solo inest à natura tribus ex causis, primo à situs humilitate; item à planicie; tertio à circumlabentibus fluminibus. Fatali igitur siccitate ab anno contingente vinum ipsum minus aquosum percipitur, ac probe servatur. Vitium itaque, & vini hujus regionis mentione omissa, referam quæ soli ubertas in aliis fructibus ferendis videatur: incipiamque ab iis, quæ à semine in herbas, deinde in fructus prodeunt.

Primum hic tibi adest æstatis initio gratum sua immaturitate Ervilium, à nostratibus *Herbilium* nuncupatum, à Varrone autem *Ervilia* foeminini generis; cujus non solum grana edere, sed thecas etiam fugere libet. Comes Ervilix succedit, ac præferri vellet Faba, quæ dum tenella est, coctione non eget, & cujus mira videtur proprietas: floret enim uno & altero mense, sed non omnes flores fructus ferunt; flores enim tantum fructus fiunt, qui sub una & eadem luna concurrunt, id est, florent & fructificant: flores vero sub una luna emissi, veluti circa finem ejus, sub altera subsequenti luna non vertuntur in fructus, quamvis tenues thecas assument, sed evanescunt: nisi itaque sub eadem luna floruerit, fructificaveritque faba, spes ejus annonæ irrita est: quod ab anni temperie, quæ sub divina providentia posita est, evenire necesse est. Qua ratione vel observatione recepta, apparet fabam sub una & altera luna florere, ac alios fructus ferre posse, si sub uniuscujusque lunæ evolutione florum & fructuum generatio simul contingat & conjungatur, nec ad insequentis lunæ tempus ipsa generatio rejiciatur.

Subsequitur triplici colore cicer, album, rufum, nigrumque, quod dulce est dum viret, gratum adolescentibus, sed scabiosis gratius ex rore falso, in quo nuda volutari corpora ad ulcera

A emundanda ridiculum est visu, sed dictu mirabile. Ajunt enim post æstivi solstitii noctem ex cicerei roris madefactione scabiem depelli, quam quidem noctem Beatissimi Joannis Baptistæ natali adscribunt, quod sive divini illius viri numine, majora emeriti, sive naturali operatione eveniat, quia ros ciceribus eo tempore falsior per occultam solstitii vim inesse soleat, atque ipsa falsedo matutino algore acrius impellente, morbum excutaneum penitus comprimat, perimatque, doctioribus judicandum relinquo. Clare quidem constat ab ea foeditate plures emundari: foeditatem enim potius quam morbum scabiem appellari doctissimo viro placuit, qui de *Affectionibus* librum conscripsit, inter Hippocratis opera relatum: & recte sane sensit, nam scabies plerumque immundo & pigro corpori hæret, suoque pruritu domino exercitationem præbet, & dum ille putat scabendo & scalpendo pruriginem tollere, materiam auget, ac majus sibi ipsi negotium unguibus facescit. Rufum vero cicer calori ac salubritati pennatorum animantium aptissimum est; qua ex causa pascere ciceribus gallinas ova foventes villicæ solent: idem etiam cicer equo vescendum datur ad tollendam oris inflammationem in superiori parte natam, quam à palato *palatinam* vocant. Æquari ciceribus vellet impudens Cicercula, quam Sicomarii cultores è suis prædiis ejecerunt, quia ciceris nomine assumpto ab eodem abhorret, & dum viret, nullam edulii jocunditatem habet: at lentibus contra duplicem honorem tribuunt: rufam hic, albam illi seminant, & utramque nascentem mulierculæ manibus, levibusque sarculis, sive ligonibus, terra admota, curant. Ridiculus sese in medium effert Fasellus, de quo scribere non audeo, ne me Cremonenses præripuisse eis sui leguminis præconium putent, à quo inter Transpadanos uno ore celebrantur, quod fasellos cum pipere edere abunde soleant: habeant itaque ipsi ejus describendi curam, qui & voluptatem, & satietatem ab illius esu quarunt.

D Adest nobis post solstitium ingens Melo humo incumbens, latisque opertus foliis, adspectu gratus, sed bonitate sæpe fallax: hunc enim nisi in tempore tollas, actum est, aut immature sublatus cucumerino subolebit odore, aut mora maturitati facta, aquosus & insipidus fiet: agendum ergo non solum in tempore, sed etiam in temporis momento, interdum est, ne præter temporis detrimentum, operam simul, fructumque perdas: terræ novitatem ipse melo, ac subversionem, quam maxime appetit, est autem nova tellus, quæ vel ex saltu, aut prato, vel ex sylva, vel ex Padi adjectione in campum vertitur. Subvernatio vero fit, cum terra ante hyemale tempus aratro scinditur, aut dolabra eruitur, subigiturque: impinguari enim solum hujusmodi eversione hyeme subeunte constat. Suavis est autem ante cibum melo, corporique æstu oppresso refrigerium inducit, ac succulento humore sitim sedat, & leve nutrimentum præbet, urinam ciens: si vero post cibum edatur, natat in stomacho, & vomitum excitat. Duo sunt melonum genera, album, & rubrum interius. Albi melones formæ rotundioris sunt, & *muscati*, sive *muscatuli*, à nostris appellantur. Rubri vero sunt oblongiores ac crassiores, & sæpe finduntur, tum maturefcunt, & in cibo solidiores & gratiores sunt, si à planta ad prandium transferantur. Prosper Columna, Vir belli peritia clarissimus, dum in Insubria ageret, melonum maturitate adveniente, Ticinum adire consueverat, ut hujus fructus bonitate opportune frueretur, laudemque rubro statuebat. Jason etiam Maynus Jureconsultus, rubro melone optimi saporis delibato, quem Sicomarius detulerat, dixit, *Si in*

Terrestri Paradiso essem, ac vesi melone prohiberer, in discrimen fortasse transgressionis, Ada exemplo, deducerer.

Habet etiam in Sicomario suas partes Cucurbita; cujus similiter duo sunt genera, Æstiva, & Autumnalis: Æstiva duas species fert, alteram longam, & alteram orbicularem, utraque unius est alimenti, frigefacit, & humectat, atque præcedere in cibo debet, somnum conciliat, & ventrem exonerat per secessum: ex orbiculari autem cucurbita transectæ maturitatis, ventris filiquas extrahunt, & ventre interius purgato ac exsiccato cantharum formant, quo vinum operatores deferunt: ipsa itaque Sicomaria Cucurbita ligni duritiem maturitatis diuturnitate suapte natura assequitur, quod proprium esse cucumeris tantum Plinius existimavit libro XIX. cap. IV. de hortorum cura. Autumnalis Cucurbitæ tres sunt species, Alba, Crocea, & Viridula in nigrum tendens: quæ omnes frigore maturescere, ac etiam sub frigoris diuturnitates servari solent. Legenda postremo est terrulenta rapa tenui subnixa radice, quam elegantissimæ villicæ molli manu evellunt, atque emundant, servantque à gelu illæsam: à quibus sane rapis, illudentes Romani, Plinio assentiente, nos Transpadanos *Rapiphagos* vocant. At tu Roma neque in tuo agro ejusmodi rapas, finitimis exceptis, neque rapilegas mulieres habes. Horrent enim urgente æstu agri tui, sulphureoque putore ab Oriente infestantur, qua ex molestia cultores afflictis sæpe tabescunt; & nisi à planicie ad montium umbracula confugiant, æstu & siti conficiuntur, ac languent. Nostra ergo non est spernenda, sed probanda Rapa, nostra præsertim coctione adhibita, quæ adjectis fassamentorum frustulis fieri debet, & ut rapæ nobilitatem teneas, accipe quæ Physici de ea scribunt. Aperit illa probe cocta meatus corporis ex insita penetrandi vi, & urinam provocat, ac somno virtutem addit, & præcordia calefacit simul, & humectat, ac melancholiæ adversatur, conaturque eam ab intimis sedibus evellere. Ideo quartanariis propinatur: generationi etiam non est inepta: quid tibi plura referam? fama apud populares est, Evam cum à Paradiso pelleretur, humo inclinatam, rapam raptim rapuisse, rapamque dictam exinde, potius quam à ruapa, ut Varro scribit, fuisse.

Est præterea ipsa Sicomaria Regio divisa in prædia: singula autem prædia suas domos, sua vineta, suaque pomaria discreta habent. Pomaria vero duplicia sunt, vivaria quæ vocant alia, & alia confita. Vivarium appellant locum, in quo novellæ plantæ & præsertim sylvestres denso ordine positæ curantur, & grandiusculæ factæ secus terram feruntur, deinde biennio saltem exacto alio transferuntur: arisque summa istic viget circa hujusmodi plantaria constituenda, ut venales plantæ in singulos annos adeuntibus Vere, vel Autumno, pateant. Confitum pomarium est, ubi pomiferæ arbores spaciose ordine dispositæ, generatimque discretæ ad rei perpetuitatem continentur. Quod capaci intervallo fieri solet, ne planta plantæ alimentum rapiat, neve alterutri umbra officiat. Et nusquam isthic arbores, quæ alterius generis sunt, in aliarum filo ordine collocantur, veluti inter Prunos Persicæ, vel inter Cerasos Pirus, sed singula genera singulis ordinibus disposita conspiciuntur: de quorum arborum fructibus alio loco & tempore scribendum erit, satis enim trans Ticini oram versatus sum; opportunumque videtur me citra Ticinum quæ scribenda sunt, colligere, capitulatimque referre.

CAP. II.

De planicie inter Ticinum & Adduam sita.

ELEGANS sese hoc loco aperit atque aprica planicies, intra Ticinum & Adduam sita, quæ quadrata ferme positione patet; à Ticino enim ad Adduam, & à collibus Insubriæ ad Padum, quadraginta fere millia passuum intercedunt; quæ universo ambitu centum sexaginta millia passuum colligunt: à collium vero prædictorum initio ad Alpium juga, & terminos, olim Insubriæ proprios, Helvetiis finitimos, triginta ad summum millia passuum interfunt; quæ omnia in unum collecta, ducenta & viginti millia passuum, aut paulo amplius, suo circuitu perficiunt. In superioribus itaque oris lacus amplissimi pelago simillimi in alto à natura locati, ab utroque latere regionis supercilium tenent, pluribus quidem minoribus lacubus, & rivis, inter utrumque lacum interjacentibus: ex quibus quidem duobus lacubus is, qui ab Orientali ora patet, Larius olim, nunc Comensis, dictus est, à Como insigni urbe civium & incolarum nobilitate clara, quæ illi ipsi insidet, ac antiquo patrioque jure dominatur. Exiens à montibus Addua hunc lacum invadit ac præterlabitur, celeri ac levi meatu alveum sibi formans, & inferiora petens, alluitque aquarum copia Laudis Pompejæ fines, ejus amœnitatem augens: deinde in Cremonensium agros imperiosa fluit, tumetque irata aquarum hospitio, ac inferiora loca, viaque, sæpe infesta occupat, Padumque tandem petit, Placentinorum agris simul contactis. Alter Lacus ab Occasu eminens Verbanus olim, nunc Major, appellatus est, ex quo elabens quomodo Ticinus aquarum ubertate furit, ac citatis fluctibus Mediolanensium fines ingreditur, Novariensibus ab altero latere relictis. Mediolanensemque ingressus agrum Ticinus non suapte natura, sed humana arte, dividitur, antiquo à Turrianis olim Mediolani principibus effosso atque formato alveo, quo tertia fere aquarum pars à vestusto Ticini utero extrahitur, ac per aggeres & repagula egregie communita, campisque supereminentia, miro ordine Mediolanum perducitur. Quam quidem Ticini derivationem, *Navigium* à navigandi usu incolæ vocant, scriptores vero *Emisarium* appellant. Circuit hoc navigium ex parte Mediolani ambitum, onerarias naves à superioribus oris in civitatem ferens: effunditurque postea ab urbis fossa in partes, quarum altera gradatim descendens per portarum obices, passim in aqueductus locatos, Ticini rursus restituitur, ut subvehendis ab ipso amne navibus ab inferioribus oris, ac Mediolanum traducendis, deserviat. Altera pars per rivulos accolarum usibus distribuitur, hortos suburbanos reticenda pinguedine irrigans. Deinde per prata agrosque dilabens, omnia finitima urgente æstu humectat. Altera vero major Ticini pars, antiquo continuato alveo, à Mediolanensium & Novariensium finibus in Ticinenses properat, Padoque illapsa claritatem turbiditati sociat, & passim etiam à Padi aquis suos fluctus segregat, datque clarum potum nautis Pado invito.

Inter hæc nobilissima flumina, egregii amnes à lacubus & fontibus formantur, atque à collibus (divisis à natura spaciis) in planum elabuntur, speciosamque suo statu regionem, speciosiore faciant: ex quibus quidem annibus, ii celebriores sunt, Olona, Lambrus, & Martisamnis; Olona ex Mediolanensibus collibus, vallibusque, dilapsa, Circiatum ac Castaneatum petens, ipsis primum Mediolanensibus usui est, quibus potu exhibitum, Ticinensem oram magnis circuitibus ambit, rigatque undis, tandemque Padum petit, inter vicum Spis-

Spiffiæ & Divi Zenonis, longe à Ticino urbe decem millia passuum : cui quidem Olonæ publico jure Præfectus est jus dicens, qui curare amnis aquas habet, ut suo quisque tempore, ac loco, modoque, sine alterius injuria ac damno, aquarum quotam in suum traducat. Major Olona est Lamber, sive Lambrus amnis, ortum habens ex fonte ab antro manante, quod ad Pedep Plumbei montis radices patet, & sub Plebis Alcini collibus præterfluit, Bubea aqua recepta, à qua paulo post dividitur. Ipsa quidem Bubea in Eupilim Lacum descendente, quem hodie *Monguti*, sive *montis acuti*, Lacum vocant, & Lambro amne ad Modætiæ oppidum elabente, quam *Montiam* vulgus appellat; quæ fortasse *Montia*, quasi montium initia attingens, dicta fuit. Illabitur deinde Lambrus Mediolanum versus, aquarum parte civitati transmissa ad naves ferendas, referendasque, aptissima; & reliquis undis Laudenses & Ticinenses alluit, Pado se immergens prope Cuneolum pagum, ubi nobiles Cusani insignem arcem ac ditionem habent. Scio hæc scribendo me dissentire à nonnullis scriptoribus, qui Lambrum, Umbro nem inaudito nomine appellavere, ortu ei aliter attributo: sed qui situs norunt, minime à me dissentient. Martisamnis quoque descendens ex Mediolanensium, Comensiumve, collibus, Laudensis agri totus efficitur, tenuique & exili rivo in Padum ætate illabitur, universo pene humore in terrarum irrigatione absumpto, hyeme vero collectis in unum aquis tumide ac superbe confluit, viatoribus nonnunquam infestus: distatque Martisamnis ab Addua circiter decem millia passuum, vulgoque *Martisana* dicitur, cui fluvio, sicut Olonæ, præfectus judex publica lege fuit, ut nostris constitutionibus patet.

C A P. III.

De Irrigationis commodo.

His igitur fluminibus distincta Insubria, humilia quæque loca subiecit aquis, deductis per prædia rivulis, ex quibus saliant per villici curam aquæ, demissis passim statò loco ac tempore per incilia portis, quibus inhibentur undæ, lætoque spectaculo in arva traducuntur. Virentia hic patent sub æstivum solstitium prata, pascuaque, per quæ effusæ versicolores juvenæ late vagantur: rubent illæ igneo colore, aliæ fulvæ apparent, coruscant sparso candore aliæ, variasque ostentant in vasto corpore maculas, replentur omnes virenti pabulo post Solis ortum; saturæque demum tardiore gressu in turmas coeunt, mugiuntque vicissim, ac Sole in meridiem vergente rivulos & umbras petunt, procumbuntque per herbas, & ut noster cecinit Virgilius, opaca frigora captant, aut lætis undis immergunt ventres, æstusque depellunt. Vitulorum ex iis copia nobis superfluit, quorum carnibus, tam ignobiles, quam nobiles parva stipe saturi fiunt. Quod si alantur ad opus vituli, ingentes validique boves post triennium fiunt, binisque jugis trahunt immensa plaustra, binique etiam instructa aratra volvunt, telluremque ab imo altius versant. Lac tibi hæc nostrates boves non solum ad mensuram, sed præter mensuram effundunt, redundantque spumantia vasa. Lacte leni mulctra ab ubere exsiliante, moraque noctis secuta, insurgunt sedulæ villicæ, ac panacem lenta manu ex lactis summitate legunt, formantque butyrum, quod olei vicem in pluribus obrinet, longeque substantialius est, ac educandis infantibus aptissimum. Post butyrum vero caseo formando accinguntur, componuntque ingentes formas, à quibus *Formacei* nomen proprie noster caseus sumplit, tanquam formæ magnitudine aliis potior atque præstantior: cujus bonitatem admi-

A rantes Romani idem in suis pascuis facere conati, nostris abductis armentis, sæpius à natura elusi sunt. Natura enim hoc proprium nostris Circumpadanis tribuit, ex quibus Insubres palmam obtinent, & ex Insubribus Laudenses, quibus majorem lactis, quam vini copiam, suppeditare probatum, ac in proverbium versum est. Brixiani secundum locum haberent, nisi à formis ad formulas declinarent: Parmenses copia, Placentini cura gloriantur, quæ nisi assidua adhibeatur, male cum caseo etiam rite formato agitur. Tumescunt enim intimis velsis formæ, atque in insuavem saporem ac male olentem recidunt, suæque improbitatis causa à casearia sede rejectæ conficiendo glutino relegantur.

B Atque omisissis pratis, pascuisque, pullulat hic similiter ab aquis campo diffusis, virenti calamo oriza, pedali aggere circumsepta, quæ uno sane tempore natat aquis, terrisque coalescit: & post maturitatem ad areas delata, occupat aristarum cumulis terram, & tritatur autumnò: attritaque ab arcis ad pistrinum transvecta rursus pistillo aquarum casu sublato, demissoque, contunditur, donec rudi excussa thecula, granis niteat. Tum demum subacta pilo, atque contusa, mundatur cribro, eduliisque servatur. Principium itaque, & medium, finemque, hujus olim peregrini grani habetur ab aquis, quas si interdum libeat à fossa divertere, nudoque pede fundum premere, & pisciculos disquirere, aderit tibi in limo latens, ac sese torquens, retorquensque, lampetra forma exigua, sed chymi bonitate magna, quæ longe probabilior in cibo est Romanis lampetris, anguillisque, suapte viscositate ac superfluitate stomacho infestis. Multa simul aderunt pisciculorum genera in aquarum reliquiis destituta, quæ manu capere tuo arbitrio sine nassa & excipulo poteris. Aderit etiam in tempore, aut rubeus, aut nigrescens cancer, rubet sane priore exsuto tergore, ac Veris initio renovato, mox nigrescit, vastusque nunc in nostrorum rivorum secessibus latet, nunc obliquis gressibus apparet, natatque sub aquis, quarum diversione agnita obstupet, & festinus regreditur, quæritque riparum foramina, quibus sese obstruat atque recondat. Illisque non compertis hæret virgultis, & fugam parat, apprehensusque manu reluctatur, & conversis in viri manu chelis quasi forcipibus certat, & fugæ ineptus effugium tentat. Coax quoque, ut ille ait, Rana, sive Ranarum chorus, hic infestis vocibus aderit, quæ subductis aquis, è fossa profiliunt, herbisque latentes ignaro pede prementur, nimia earum in pratis exuberante copia: quarum magnitudine pellectus Camillus Borromæus Mediolanensis patricius, ut admirationem rei adderet, in Ticinensi agro vivaria ranis ingenti vallo, tanquam Ranipiscinam munivit, ac pullorum more aluit, veruque aslari & condi tanquam aviculas, atque in ciborum elegantiam referri voluit: easque Alphonso Avalo Viro splendidissimo in cœna apponi jussit, ut ex re antea ingloria, communique, primus ipse sibi in epulis gloriam exciret, ut omnino excivit. Sed in tanta fontium, anniumque, varietate & frequentia, nulla palus, nulla infesta stagna patent, aut aerem inficiunt, sed fluunt suis rivis aquæ jucundæ, tenues, claræ, ac temperatæ, quæ neque facile gelu rigent, neque fervent æstu: temperies in aquis non minus quam in terris, & aere passim inest, cujus quidem temperiei causam aperio.

C A P. IV.

De salubritate Regionis.

TENET ferme medium hæc planicies inter Adriaticum mare & Alpium fauces, Galliarum finitimas.

mas. Itaque five ab Oriente & mari exant venti, quos nubiferos esse *libro 1.* retuli, five ab Occidente & nivosis Alpibus descendant, leviori impetu nostram regionem perflant, quam vicinos maris Adriatici tractus, aut subjectos Alpibus Taurinos populos: ex qua re fieri in ipsa regione aërem temperatiorem, docet Hippocrates *libro 11. De victus ratione, vel diæta.* Quoniam spirantes è mari vel montibus venti nequeant è vestigio in ipsam oram infracto impetu irruere, sicut in viciniores solent: cujus sententia vera est. Quemadmodum enim ferreæ pilæ ictum ab aheneo tormento, five bombarda, emissæ, loci distantia infirmiores facit: ita ingruentem à quocunque loco ventorum turbinem, ipsa longinquitas suo intervallo emollit & invalidiorem facit, quod *libro 1.* attigimus. Exemplum utrinque manifestum habes: exurgens ab Adriatico subsolanus ventus imbribus ac procellis inferiores agros Adriatico vicinos infestat: at minime eadem imbrum continuatio nostram regionem occupat. Item flantes ab Occiduis Alpibus venti Pedemontanos sæpe gelu & pruinis perstringunt; at minime eadem vis frigoris agros cis Ticinum sitos corripit, rariusque nostra vineta morosque decoquit: distans enim medium ab extremis, temperamentum juxta intervalli proportionem consequitur; quod quidem temperamentum paulo minus abest ab æstu quam à frigore: plura tibi possem exempla referre, sed uno, aut altero proposito ad alia convertar.

Quercus arbor septem diebus ante frondet cis Ticinum amnem, quam in Læumellinæ dorso. Item flavescunt aristæ maturius inter Lambrum & Olonam amnes in campis superioribus, quam alibi. Unde quæso hæc varietas? ab aere, & situ; quoniam ii campi in pari situs altitudine positi, propinquiore Orienti sunt, & mitius ab Occidentali vento attinguntur, quam Læumellinates, & ideo plus caloris ab Oriente, & minus frigoris ab Occiduo sentiunt, citiusque propterea ficcantur, arantur, feminantur, & maturitatem naturæ & culturæ suo ordine assequuntur. Minime tamen eadem maturitate ac promptitudine Placentini, Parmensesque, sua frumenta metunt, minusque Mantuani & Ferrarienses Orienti viciniore, quia scilicet eorum campi situ sunt inferiores, & per consequens longe etiam humidiores; ad quam humiditatem exsiccamdam major ac diuturnior Solis decoctio requiritur, quam ad altiores agros: & ideo eorum frumenta tardius quam nostratia Solis potentiam ad maturitatem assequendam expectant, situs humilitate ob nimium humorem segnius orientem Solem percipiente. Hinc etiam evenit, ut urgente siccitate, ipsi inferiores campi lætiores remaneant quam superiores, eorum humore sata uberius nutriente, & in superioribus campis humore ipso, ob minorem quantitatem, minus etiam æstui resistente.

Clarius quoque discernitur aeris differentia inter Læumellinum, & cis Ticinum agrum, ex Ficu & Maligranati planta, ut alia omittantur: utraque enim arbor probe cis Ticinum fructificat, in Læumellina vero ægre, tardeque adolescit, & male fructificat, fructusque exiles & insuaves parit, frigore scilicet majore vi Læumellinam corripiente: sed quo frigidior Læumellina est cis Ticinensi ora, eo calidior probatur nobilis regio citra Adduam in superioribus oris sita, Glarea Adduæ appellata, ubi Crema oppidum munitissimum, & insigne Charovagium, claris refertum viris, superbe eminent, ac suo tantum honore fulgent, pluribus civitibus eorum dignitati ac famæ frustra invidentibus: hacque ipsa ratione vigent oleæ uberrimæ in Brixienfi colle, præcipue circa lacum Benacum; quæ in nostris collibus, Mediolano finitimis, pari felicitate coalescere nequeunt, majore videlicet æstu

A circa Benacum montibus oclusum, quam in Infubribus vigente. Spectare tibi in hac planitie elegans naturæ opus licet: surgit enim prope Lambrum amnem, in Laudensium & Ticinensium finibus, egregius tumulus vitium, & ficuum ubertate, & præstantia amœnus, longitudinis quinque millia passuum, & latitudinis trium milliarium, cui ab Oriente Sancti Columbani insigne oppidum adjacet, & ab Occidente Miradolum cohæret: ita porro appellatum à miradolorum, quibus vina infunduntur, magnitudine. Vina etenim præcipua vetustatis expertia, *Moscatula* vulgo dicta, ex eo colle percipiuntur, quæ ob magnam copiam, magnis pariter vasibus, ferreis circis communitis, reconduntur: quo quidem excepto tumulto, reliqua omnia fluviorum, alveis omiſſis, plana videntur. Flumina enim interlabentia aquarum latitudine magna spacia occupant, quæ quidem spacia valles appellantur.

In medio istorum fluviorum Mediolanum situm est, planitici centrum, quasi corporis umbilicum, occupans, parique ferme intervallo viginti milliarium à Ticino, & Addua, Padoque distans, à qua re nomen accepisse arguitur: nam à medio amnium ad Mediolanum translatum nomen dicitur: quam quidem magnificentissimam urbem nonnulli Astrorum contemplatores Meridionalem esse scribunt; à quibus dissentio, existimans potius eam Orientalem videri, cum ex situs aptitudine hyberno, æstivoque Solis exortui apertissime pateat, portaque ipsius urbis Orientalis appellata nullum obiectum habeat ad Solis ortum excipiendum. Item quia plures aquarum rivuli, à civitatis regione in Laudensium oram defluentes in Orientem pergunt, & Clarævallis prata deinde Vicoboldoni convalles suis undis alluunt. Laus quoque Pompeja in vallis Adduæ crepidine sita, Orientalis videtur, quæ distat à Mediolano viginti millia passuum, & in Orientem elegantissime vergit. Dissimilis à Mediolano & Laude est Ticini situs, qui nunc amplificata civitate cernitur, de quo quidem situ capitulatim scribam. Sed dum à Mediolani amplitudine ad Ticinum vertor, abstrahit me ab itinere non longe à civitate, nova rerum moles, cogitque admirari Carthusina tecta in cœlum usque porrigenda: quorum altitudinem atque structuræ elegantiam suspiciens, rogito, cujus hæc mirifica statio erit? Principis ne, an summi alicujus Antistitis? Responsum fuit, solius Dei, cujus honori, quicquid hic cernis, dicatum est, & cujus summi Dei majestas, atque potentia, sicut æterna est, ita hæc ampla sedes ejus perpetuo est instauranda ac renovanda decore, ne unquam vetustatem sentiat, nunquamque similiter finem habeat. Viri autem religiosi in ea degentes sacris incumbunt studiis, ac parentum opibus honoribusque rejectis, in solitudine vitam agunt, uno cuncta moderante Præfecto, five Priore, Damiani illius olim magni Viri, qui postea Generalis fuit, successore. Perge nunc, quo coeperas itinere, ac Ticinum tuo arbitrio pete.

C A P. V.

De Ticini urbis situ, & amœnitate.

F P O R R I G I T U R ad Ticinum amnem non longe à Pado mollis ac ferme semirotundus clivus extra planitiem in Meridiem procurrans, super quo urbs Ticinum ab antiquo condita fuit: qui quidem clivus ex parte in Orientem spectat & pendet, veluti à sancti Olderici ædibus, usque ad hortos inferiores sub Divi Epiphaniî monasterio in valle positos. Idem vero clivus à Foro Linario, ubi Hieronymi Sacci, olim viri clarissimi, antiquior domus exstat, Ticinum fluvium versus in Meridiem declivis est, nihil fere Aquilonares flatus

tus sentiens, qua ex re ficus & malus Punica mirabiliter in iis hortulis adolefcunt, fructificantque. Item à templo sancti Georgii in monte Falcone Occidentem versus, paululum etiam in Occiduum civitas vergit. Ab eodem autem Foro Linario (quod *Mercatum* vocant) Septentrionem versus, ubi Arx, vel Castellum, eminet, plana est civitas, & Aquilonari vento apertissime patet. Ex qua quidem situs varietate in omnem oram versa, tenuitatem aeris urbs ipsa à natura assequitur longe præstantiorem quam si tota plana esset: perflantur enim facilius vici & domus à circumambiente aere ob situs acclivitatem atque apricitatem, quam si universa urbs æqualis esset: quia pars plana altior est situ, quam partes declives, ex qua altitudine liberius ab aere exploratur. Quos itaque sanos recipit nostra urbs, sanos plerunque servat, nisi ipsi sese, aut fatali casu, aut suo arbitrio ventri indulgentes, ante naturæ diem atterant, atque conficiant, aut summus Deus nostra non ferens crimina, temporum rationem convertat atque confundat. Quos vero minus bene habentes suscipit, solo aeris intuitu, halituque, sæpe recreat, infirmæque ac prostrata natura, si ullo aeris commodo usquam erigenda est in Italia, nostro juvatur aere, nostrisque attollitur oris. Raro hic obesa nostrorum hominum corpora conspiciamus, raroque, podagrosi fimus: inest enim acri puritas, à qua excitari etiam ad prudentiam ingenia ipsa, puritate ad cerebrum permeante, docet Hippocrates in libro *de Flatibus*. Hinc animi promptitudinem vigere ait, faciliusque adjecto studio homines sapientiam consequi, quam in diverso aere ac situ. Senectus quoque non ingrata, neque morbosa, sed sine dolore subire, ac finem asserre per annorum seriem solet; adjuvatque quam maxime puritatem aeris ipsa tellus, quæ non solum in civitate, sed etiam foris, præcipue ab Oriente usque ad quintum lapidem, fabulosa est, vineis potius quam novalibus à natura apta, ob innatam siccitatem, quam notat Plinius libro XVII. cap. IV. de qualitate regionum scribens, sabulum album in Ticinensi agro esse infœcundum: cujus sententiæ applaudens, dico hujus partis infœcunditatem aeris salubritati aptissimam esse, quia assidua ingruente pluvia, ventisque ab hac ora afflantibus, neque nubila nobis valde officere, neque caliginosæ tenebræ diu increbrescere possunt, arida humo confestim pluviam fugente, nullumque humorem à se emittente; quod si fœcunda tellus esset, modica humiditate suscepta, lutulenta atque cœnosa fieret, limoque putrescente emitteret oriente Sole nubeculas, quarum adscensu matutinus aer caliginosus fieret, turbaretque suapte impuritate, aeris sinceritatem, & morbiferam vim accolis inferret. Prospexit igitur natura nobis longe accuratius per soli ariditatem, quam prospexisset, si fœcundum campum civitati propius adjecisset.

Nec propterea nobis suburbana prata æstate irrigua, atque elegantes & spaciosi horti deficiunt, quibus undique cingimur, præterquam à Meridie, ubi Ticinus labitur. Vicit nostrorum virorum ingenium, sollicitudoque, terræ infœcunditatem, atque ipsius terræ naturam cura & cultura perdomuit, vertitque in solum lætum, singulis fere glebis equino fimo impinguatis, gravique ligone sæpius everfis atque subactis. Qua ex re sapidissima olera passim succrescunt, onerantque dominorum mensas novis atque inemptis dapibus. Primum hic tibi lactuca foliis conferta adest, quæ renovato in menses semine perpetua æstate durat, atque deliciosa sapit, non solum Galeni scriptis, sed Gordiani quoque Imperatoris celebrata præconio; & quæ quidem lactuca præstantior cæteris in Ticinensi solo finitimorum testimonio probatur. Alia quoque semina hic primum in herbas pullulant, promptius-

A que maturant, oleraque non solum nostratibus, sed etiam alienis, in dies ac in horas suppeditant, & bonitatis famam inter vicinos populos publico consensu captant: quos demum si spectaveris hortos, Maronis tibi & Columellæ musa præ rerum varietate, atque admiratione, posthabenda videbitur: nam etiam frigore urgente, ac nivium appropinquante casu, spectare licet eximiam olitorum curam; ramis enim terræ faciem, ubi olera vigent, operiunt, superstrata palea, duraque frigora arcent, folliculis ea industria sub nivis tegmine virentibus, qua rejecta nive, apparet tibi Ver adesse in hortis, cum longe absit, aerque jamdudum gelu horreat. Quid, quod etiam in pratis nungente cœlo villici nives prohibent; immittunt illi altius in prata aquarum rivulos, clauduntque meatus, ne aliorum aquæ defluant; cadens autem nix in aquis liquefcit: ubi vero nungere desit, demittuntur subinde à pratis aquæ, rivulique in suos alveos averuntur, patent tum miro prospectu nuda prata, cæteris omnibus circum nive ac gelu albicantibus.

B Trudit sese huc sereno meridie læta juvenus, curisque soluta suos ludos ciet, movetque risu ac voluptate plena rerum certamina. Æstate etiam in eis subeunte sole, jucunda nobis deambulatio patet, sessioque gratissima est, molli te recipiente herba. Somnia in istis pratis sæpe lassus viator capit, stertitque sub umbra, mox resectis sopore artubus resurgit ociosus, ac iter suum repetit, promptiusque graditur. Nulla tibi in his locis infesta animantia quietem impediunt, aut interturbant, si-
C ve noctu, sive interdiu æstate recumbas, soporque etiam sub aere, urgente æstu, videtur innocuus: absunt ab his locis exosæ Cincidulæ, à nostris *Cincisula* dictæ. Tarantula nusquam in his terris visa fuit. Silet infœlix Cicada, timetque sibi, ne stridulo clangore prodita, rostratis avibus præda fiat. Musca etiam infrequens est, Alpinis sæpe ejecta flatibus, insurgunt passim modulatæ avium voces, passimque compositi à natura concentus audiuntur, strepunt aera cantu, volatuque. Age vero, si libet, secede aliquando ab urbe, & suburbanis prædiis, nostraque flumina pete.

C A P. VI.

De Fluminibus.

Hic tibi aquarum puritas alto gurgite patet, editque leviamur murmura, & ad moram invitatur, allicitque morantem, atque allectum oblectat, & plura naturæ commoda uno in loco ostentat. Triplici hic sese meatu nostra flumina pandunt, trivioque aditu, tam peregrinis, quam nostratibus, navigationem aperiunt: nam sive Adriatico mari solvens adverso Pado Insufram, aut Liguriam, petas, sive à Taurinis oris recedens secundo Pado delatus Insuabres adeas, sive Ticino evectus ad Helvetios pergas, aut ab eorum angustiis exiens in Padum descendas, Ticinensis tibi omnino attingenda regio est. Trivium tibi iter suaditione claudit, aperitque, Ticinum, aquis ipsis ex diversis effluentibus oris, & in Ticinensi regione tanquam pelago corrivantibus, & in Orientem postea decurrentibus. Cujus rei causa, scribens de Insufram dominio, & rebus, Georgius Merula libro I. *Historiarum* in fine, Ticinum urbem interlabentium fluviorum dominam appellat, ut omnino suo jure domina est, ac antiqui domini jure navigationis præfecturam & tribunal obtinet, de quo alio loco scribendum erit.

F Primus itaque Ticinus fluvius magnis potitur naturæ bonis. Claritate in primis eximia, qua colludentes pisces, etiam in imo fundo, cernimus, hamoque captamus: quos quidem pisces ea ratione saluberrimos esse, ac nulla humiditate noxia superfluitare constat, præcipue Temulum, Lucium, &

& Strigulos; Ocellulosque fama notissimos, temperie anni vicissitudini aptissima: hyeme enim nunquam ad rigorem alget; nunquam etiam gelu corripitur, ut Padus, sed fontium passim manantium natura adjutus fumantibus plerunque undis profluit; æstate vero gratissima frigiditate viget. Quæ quidem frigiditate pellecti equi, bovesque immisi fluvio diu subsistunt, jucundumque frigus post potum ab aquis hauriunt. Item purgatione & curatione: solvuntur enim tumores, circa ventrem & juncturas enati, assidua aquarum lotione ac mora. Item legumina natura durior eisdem aquis imposita emolliuntur, ac coctibilia fiunt. Telæ etiam, ac linea stamina, eadem aqua purgata, adeo albescent, ut nihil videatur candidius: unde *candidatrix* mulier hujusmodi curæ assiduo vacans dicta fuit; quæ quidem mulier, etsi candida raro conspicitur, Sole faciem exurente, nitore tamen, ac munditia, ita fulget, ut amore digna habeatur. Petrarum quoque genere celebris est Ticinus: nam convulsa à montibus speciosa saxa, solus evolvit undis, nulloque alio operante in Ticinensem oram deducit, sistitque ripis. Quæ quidem saxa vitrearii artifices colligunt, navibusque excepta Venetias important, vasque ex eorum materia igne soluta celeberrima conflant, auro circumlinita, & variis resperfa coloribus, quæ ob eorum elegantiam Regibus usui ac in deliciis sunt: merito quidem, ut humani regni infirmitatem vitreo, aut crystallino calici similem esse ob rerum vicissitudinem, mobilitatemque, agnoscant: quod plerique minime cogitant; deinde urgente fato animis æstuant. Longe etiam celebrior est aurifera arena, quam seminudus operator sub Solis fervore perquirat, confertque in acervos, ac viminea crate secerit, rejectis ab arena lapillis, & quæ demum arena rudi panno leniter injecta collucent, panno hærentia aurea minutula, visu quidem vix conspicabilia. Vide quo se obruat studio hominum cupiditas, quæ interdum auro inhians, auram pro auro capat, & in casum laborat.

Padus autem ipse limosus, turbidusque fluens per Ligurum & Taurinorum oras, in Septentrionalem plagam Orienti proximam fluctus suos vertit: ubi vero Ticinenses campos inivit, tum sinuoso anfractu fluctus in Orientem torquet Ticino recepto, indignum ferme sese Orientali prospectu sua turbulentia attestans, sine Ticini amnis claritate & copula. Adeo etiam flumina edere aliquid memoratu dignum in nostra regione à natura coguntur, ut à naturæ actu ipsa etiam illustrior fiat. Sylvis quoque, & arboribus circumseptus est Ticinus amnis, surgunt enim sua sponte hinc inde densissimæ sylvæ, quercusque ingentes alto cacumine in cælum tendunt, ex quibus lignorum strues nostris atque alienis suppetit: si ve quis fornacibus flammam subdere, si ve materiam fabro lignario, aut architecto parare velit, succisio hic facilis est, facilisque similiter extractio, Ticino navigationem apte ferente. Ferraria insignis civitas testis est: quæ cum Padi ripas eminente ponte, me puero, jungere vellet, ex Ticinensi sylva trabes evexit, elegantissimumque pontem construxit. Atque ex eadem materia currus & alveos aheneis tormentis subjecit, quibus ipsa civitas Principum suorum cura munitissima est. Omisissæ sylvis, ubi ferarum ac venatorum statio & exercitatio est, adest tibi ad Ticini ripas flexibilis buxus foliis hyeme virentibus, viridarium magistro suapte flexibilitate gratior quam villicis. Adest Tamarix grata apibus, & æquinoctium suis floribus indicans, exornansque, Myricæ etiam dicta, cujus raritas in Italia nota est, notiorque virtus, præsertim spleneticis, qui poculis ex eo ligno fabrefactis bibunt, comescuntque tumorem. Surgit paulo altius ad Ticini fluentia

A spinosa potius quam frondosa juniperus, hyeme quam æstate gratior, præbens cibum turdis, qui ejus semine saturi fontes circumvolant, & in aciem dispositi simul collidunt, colludendoque in occultos laqueos incidunt. Hoc lignum majores nostri Deo optimo sacrum esse voluerunt, tum quoniam neque cariem, vel vetustatem sentiat, tum quod gratum odorem ejus incendio emittat. Appropinquanteque solemnī die Nativitatis Domini nostri JESU CHRISTI, ædium postes buxo hederæque exornantur; penetralia vero Majoris honoris gratia junipero operiuntur. Nullum enim apud nos lignum aptius explicat Divina mysteria, quam juniperus: nam virore perpetuo æternitatem indicat Domini nostri JESU CHRISTI: spinarum autem acumine, quæ idem Deus & Homo passus fuerit, repræsentat, præcipue cum spinæ corona elusus pro Rege fuerit ab iis, à quibus pro Deo coli debuerat: odoris emissionem admirabilem resurrectionem ejus testatur; sicut enim ex ignito ligno odor manat, ipso paulatim conflagrante ligno, ita per interitum Domini nostri secuta est gloria resurrectionis ejus, quæ cælum, terramque, & tartara Divinitatis Majestate ejus Humanitati sociata implevit atque concussit.

Sed ad Ticinum redeo. Augent ipsius fluminis undas duo vicini amnes, ab Oriente & Occidente civitatem ad teli jactum ambientes; à Navigio Mediolanensi rivo defluentes: aquæ, aliis conjunctæ rivis, fontibusque, *Navigii*, si ve *Navilii*, nuncupationem retinent, & ab Occidente suburbana prædia alluunt, magnæque septæ repagulo atque munimine Caronam insignem rivum in civitatem transmittunt. Carona autem, quam ab auctore aliqui *Cadroniam* vocant, urbis fossam per fistulam transgressa, manat per vicos, plura parans, præstansque, civibus commoda: nam rotarum machinas suis undis impellens, molendina passim exercet. Fullo quoque & Coriarius, aliique opifices eisdem aquis intra tecta derivatis singuli operi suo incumbunt, laboremque labori addunt. Contra garrulæ ancillæ ripas circumstant, & pro rerum ablutione, nugas se-runt, ac dominas supplantant, amatoribusque locum & tempus voluptati aptum condicunt. Reliquæ vero Navilii partes, præcipiti lapsu ac fragore ab alta & præcipiti septa ruentes, antiquum alveum replent, aliisque exceptæ septis atque obicibus alia opera movent. Ingentes hic mallei rotarum furore in altum elati, demissique, duris ictibus strident, teruntque ferrum, atque contundunt. Alibi autem dispari sonitu ac pene tremore fremunt ilignæ clavæ, unius trabis circumvolutione summotæ, pinguentque liquorem, ex quo molli addito glutino papyrus componitur: decidunt deinde ab alto aquæ, & sinuoso anfractu prætæ Sancti Salvatoris adeunt, ubi in orbem derivatæ duo jucunda spectacula parant; egregiam piscinam, ex qua per vertebra ora captare pisces sine negotio licet; quod quidem vertebra rete longiusculum est, à quo egredi pisces semel ingressi nequeunt, funicularis converso ordine exitum impediens: piscina autem insulam suam circuitu format, in qua tuta statione cuniculorum greges degunt aquis circumvallati, ita ut neque subterraneo meatu evadere, neque à feris sicco vestigio invadi possint. Subdolis hic sæpe catus circumstat torquens oculorum aciem ad cuniculorum gressus, atque aquarum fluctus fallere saltu tentat, ac frustra tandem insidiatus jejuno ore prædam inhiat.

Minore aquarum impetu Vernacula amnis ab Oriente labitur, speciosam vallem ambiens, in qua molendina passim firmata strepunt: quo vigenre strepitu, molendinarii surreptioni student, nulla-que lege arceri à fraudibus possunt. Imminent

huius

huic valli humiles tumuli, vineis undique amicti, ex quibus clarissima vina, mireque fragrantia, rubra atque cœrulea percipi solent, quæ hausta ex vasibus splendent in poculis, saliantque, teque invitum ad potum alliciunt; epotaque hærent stomacho, & leniter permeant, foventque naturæ vires, & pituitam extenuant: nullos illa capiti vapores, aut ori ructus, nullum ventri tumorem, aut vesicæ impressionem faciunt, sed cibo sese commiscentia facile conquiescunt, absterguntque mordaces curas humanis mentibus infestas, ac mollia inducunt somnia ægris aptissima. Hoc gustato vino Boethium Severinum, Romanum Patricium, carceri inclusum, ac seminecem, resipuisse ajunt, succlamasque, *Oh fœlicia hujus regionis vina, quæ labantem mœrore animum, curisque depressum modico haustu erigunt, firmantque nutantem!* Atque his dictis ad scribendum de Consolatione librum viribus instauratis conversus est: cujus rei fama multi ea vina mirantur. Sed ad aquas rediens, quæ in suburbanis prædiis circa Ticinum defluunt; proditum à majoribus nostris memoriæ fuit, eandem aquas frequenti ablutione impetiginem in pecudum corporibus compescere, eaque mundare, & rutilantes pilos jumentis circumenatis plerunque inducere.

C A P. VII.

De Fontibus.

ABSIMILIS à rivulis, amnibusque, comperta est fontium & puteorum aqua, tam urbana quam suburbana. Alio enim loco oritur aqua potu saluberrima à natura coctionem nacta, præcipue illa, quæ ex fonte celeberrimo manat, qui intra hortos Monasterii Divæ MARIÆ scatet, ubi Longobardorum Regum olim venatio esse consueverat, cujus adhuc nuncupatio durat. Contra autem alibi adest aqua ab ea diversa, nimioque algore jumentis perniciofa; qua quidem epota, jumenta confestim horrescunt, villis ac rigore torpent, ideoque ab ea arcentur, propriæque ad indurandum vis & natura ejus prona esse discernitur, præsertim in duobus, videlicet in ferri acie perstringenda, & in sale obdurando, dealbandoque: can-

Adens enim sive ignitum ferrum his aquis immersum fit durius, & acie pene irrefragabili, quod agnoscetes fabri ferrarii apud nos magno studio cultellos excudunt, quos hujusmodi aqua, aliis commixta liquoribus, ferventes iterato imbuunt, eaque (ut ajunt) temperatione acutiores ac durabiliores reddunt. Sua quoque industria nostri Salinarii sallem nigerrimum ac turpem liquefaciunt, purgantque aquis, liquefactum deinde lento igni deficcant, formantque ex eo pyras, seu pinnas, quas vulgo *Panes* vocant: quibus edoctus pictor nobiliorum insignia levi manu imprimere, donoque eos Principibus transmittere egregium putat, illoque munere suam ostentans artem compositi salis gloriam, albedinemque, Ticinensibus aquis tribuit.

BDisquire nunc tuo arbitrato, prudens Lector, num altera in Circumpadanis civitas suo situ tot elementorum commoda tam facili ac copioso aditu incolis præbeat, aeris (ut dixi) clementiam, terræ benignitatem à noxiis rebus alienam, aurum etiam perquisitoribus offerentem, aquas cibum in piscibus, fructus in irrigatione, commodum in navigationibus, industriam in decursu, ac voluptatem solo intuitu exhibentes? Quid memorem opaca frigora urgente æstu sub caniculares dies ab iis aquis manantia? instaurantur animi & corporis vires te **C**lento gradu Ticini ripas adeunte. Ignis quoque materia ad manum est posita cædvis sylvis hic passim sua loca occupantibus, succisæque ligna triennio, aut quadriennio, reponentibus. Deus has majoribus nostris sedes, hæc naturæ bona, atque ejusmodi opportunitatis commoda summa benignitate contulit, prævidens (ut existimo) hanc urbem religionis stationem aliquando futuram. Nec Divinam mentem fefellit rei eventus: prima enim ex Circumpadanis Christianam religionem stabili fide suscepit; prima sibi Episcopum suo jure adscivit; prima Ecclesiam, id est, populi conventum, Christiano nomine adunavit; prima delubra ac templa eo jure statuit; prima denique regiones, sive tribus, sive Diœceses, in unum quasi Collegium composuit, sibi conjunxit: quod infra aperiam. Atque hoc modo à situ scribendo, ad incolarum dignitatem, atque ad Divina Sacramenta explicanda adscendam.

BERNARDI SACCI,

PATRITII PAPIENSIS,

HISTORIAE TICINENSIS

LIBER VI.

C A P. I.

De Syri adventu & concione.



ADVERSANTE ubique gentium Christiano nomini Romano Imperio, inibenteque, ne Divina Fides, jam promulgata, latius ferperet, incessit Dei religio Ticinensium animos, uno apud eos sermocinante Syro Aquilejensi, qui Ticinum ingressus anno ab ortu D. Jesu Christi ferme quinquagesimo, Petro Apostolo Romæ agente, spectantique populum idolorum cultum prisco more sectantem, palam illico concionari, cum ignotus & peregrinus esset, noluit: civium deinde aliquorum notitiam

E asssecutus, de fide Christiana differere cœpit. Nulla tum civitas in eo tractu Christianam Religionem noverat. Primus igitur Syrus in ipsam oram, gentemque, delatus, Evangelicam institutionem aperuit, posuitque apud nos fundamenta fidei, nullo unquam interitura seculo. Familiarum ille conventu habito, hæc dixit:

Quo quaso amici vos traducit is error, ut simulacra pro Diis colatis, quæ sine sensu & potestate sunt? Quæ demum ratione signa ista manu facta Deos vobis representare existimatis? Erratis certe, & DEI cognitionem non habetis, quam nuper nobis aliqui præclari viri ab Oriente Romam devecti aperuere. Unus est Deus, unaque summa, invisibilisque, Majestas, Cælo, Mundo, & Inferno imperans, cui omnia parent. Luminaria Cæli ac Stella statim ab illa ordine moventur, stantive: nubes evocate ad illius nutum prodeunt, terramque obumbrant. Excita tonitrua illa jubente insurgunt, fragore-

que edito terrestria tremefaciunt : eademque permittente conquiescunt, ac sua receptacula repetunt. Illa vero ipsa Divinitas, qua suo nutu cuncta commovere potest, immota & sempiterna est, coeloque, & non istis vestris iligneis, fictilibusque, statuis infidet : omnia sub oculis, sive praesentia, sive futura sint, habet, omnes rerum eventus praevidet. Regna, ubi regni nomen spesve non erat, constituit, auget, dividit, atque cum vult, dissipat, aera mutat, vetat imbres, terra faciem ignea vi exurit, arefacit plantas, & animantia perimit. Illius ergo Dei quaerenda nobis, & expetenda notitia : atque Religio esset, qua non auro & argento, sed fidei virtute quaeritur, ac propagatur. Ille quidem summus Deus fidem habenti atque habituro fit obviuus, credentemque spiritu occupat ipse prior, atque illustrat. Non credituros autem praecites ruere in perditionem sinit, sui arbitrii potestate unicuique permitta : ad quem Deum agnoscendum, si vobis mentes erigere atque excitare libet, omnis mihi subeundus est labor, ut voti compotes vos efficiam. Annuere Syri dictis Ticinenses, dieque, ac loco statuto, aliis accitis civibus, concionantem cum audire, cujus haec ferme oratio fuit.

C A P. II.

Syri Aquilejensis oratio De Deitate.

QUI visibilem rerum magnitudinem, varietatemque, mirantur, unum esse Deum tot mirabilium auctorem, compositoremque testantur, una maxime nos ratione monente. Quis enim tam excors est? quis tam iudicii expers, ut cum coelum, ejusque luminaria, videat, simul etiam non intelligat supernam omnino unam exstare ac regnare potentiam, qua sidera suo imperio & ordine regat, disponat, & in tempore lucem emittere, ac tempore etiam abdere & occultare, rursusque resurgere faciat? Quis porro, Ticinenses viri, Solis & Luna ambitus, adscensus, descensus, terminos, solstitia, aequinoctia, defectusque in supernis illis constituisset, nisi una summa potestas (ut dixi) Caelo superesset, ipsisque caelestibus signis ordinem atque successum praefixisset? Si ergo majorem exstare potestatem in Solis ac Luna motore & domino, quam in ipsis & aliis sideribus agnoscitis, cur non potius illam supernam potestatem, quam istas inferiores caeli virtutes ipsius Divinitatis famulas excolitis? Servo enim honorem impendens multo impensius cognito domino tribuere dignitatem debet : sic etiam caelestia contemplantes, multo accuratius super caelestia mirari & perscrutari debent, qua majora istis, qua cernuntur, existimanda videntur. Cum itaque agnoscenda nobis superna potestas sit, scire nos oportet unum esse Deum tanta potestatis auctorem, dominum, ac possessorem, qui Deus ab aeterno est, neque principium habens, neque finem habiturus, quique principium us, qua principio constant, ipse dedisse probatur : cujus quidem Dei celsitudo tam eximia, tam prapotens est, ut elementorum omnium atque caelestium naturam superet, propriamque sibi naturam statuatur, hoc quo referam ordine. Deus ab aeterno ex se Verbum suum gignens, idem Verbum sibiipso consubstantiale atque aequale facit. Deum de Deo genitum, quod Verbum proprie censeatur esse Dei conceptus, distans significatu ab eo Dei verbo, quod pro eloquio ac sermocinatione ad praesens Hebraeos facta per vocem dicitur, ut innuere videtur ipsorum Hebraeorum Psalmus cxviii. per illa verba: In aeternum Domine verbum tuum permanet, &c. Permanet videlicet, ut ens, & substantia ipsi Deo coaeterna & inseparabilis : a qua quidem una substantia Dei genitoris, & Dei a Deo geniti, procedit ab aeterno unus Spiritus Sanctus, genitori, & genito Deo consubstantialis, coaqualis, & coaeternus Deus : nominatione tantum & significatione discretus, sed Divinitate unitus & inseparabilis. Deus igitur est genitor, Deus est Verbum genitum, Deus est Spiritus Sanctus, in una & eadem Deitatis substantia & aequalitate consistentes. Cujus unitatis ratione Deum appellare unum, & trinum possumus, unum quidem ratione unius, & ejusdem substantiae, in qua Deitas a sese consistit, trinum autem ratio-

A ne trium nominum, ac personarum, quibus eandem Deitatem significamus: quod David, Hebraeorum Rex, doctissime fecit Psalmo xxxii. his verbis trinitatem in unitate consistere clare ostendens:

Verbo Domini Caeli firmati sunt,
Et spiritu oris ejus omnis virtus illorum.

Congregans sicut in utre aquas maris, &c.

Tribus enim veluti personis, nominibusve, Deo adscriptis, videlicet Domino, Verbo, & Spiritu, singularem numerum eis adjecit, dicendo, Congregans, ut per singularitatem numeri unitatem substantia in trinitate demonstraret. Quod & in formatis a natura rebus fere similiter cernimus. Trifolium herba notissima, suapte natura tria follicula inter se pediculis conjuncta ex tenui caule emittit, eaque tria follicula, non Trifolia, sed Trifolium, ut unum ens, usus appellavit. Linum quoque unicam plantam a terra divulsam, plures in se habentem fibras, vel filula, usus hominum singulari numero ab unius substantia causa dixit, fibrarum pluritate non attenta. Si ergo in minimis discernimus unam substantiam discretas res in se a natura habere, quanto amplius in Deo natura opifice trinitatem personarum esse probabimus, aternitatis maxime etymologiam spectantes : qua aternitas cum soli Deo jure tribuatur, solutis ab alterutra unaquaque vocali, ac syllaba, trinam unitatem Deum esse attestabitur : hoc modo, A & E diphthongo diviso, per A, Alpha dicitur, id est, principium, quod est Deus, per E, Est, per Ter, terna, per nitas, unitas, qua colligendo dicimus, Deus est terna, vel trina unitas, indeque fluxit aternitas. Plura me de Deitatis unitate in trinitate personarum distincta differere tempus non patitur. Referam nunc a quibus gentibus habitata Dei notitia, & celebrata, & nobis etiam tradita fuerit.

Divinam Majestatem primi omnium coluere antiqui Hebraei, cujus rei gratia aliquis eorum Deum suis oculis cernere, eloquium audire, leges vivendi ab eo capere, alii cibum & potum indies sine labore sumere, multaque mirabilia facere, Divina eis opitulante potentia digni fuere. Promissaque iccirco eis fuit Divini regis generatio ex stirpe David, minimeque vana illa promissio fuit ; (ut quanti faciat Deus gentis religionem Ticinenses agnoscatis, discatisque hoc exemplo huic uni Deo honorem impendere) pluribus post dictam promissionem evolutis seculis, orta est Virgo Hebraea Maria nomine patre Joachimo, & matre Anna, Augusto Caesare imperante : qua quidem puella illa ipsa est, qua illius Divini regis mater fieri meruit. Descendit quippe in illius virginis uterum ordine natura ignoto, Verbum Dei, ut dixi, ex Deo genitum, ipsa Virgine humili assensu tanti conceptus annunciationem per Angelum suscipiente, conceptumque sine virili semine Dei Verbum, Virgo permanens in tempore peperit : qua pariente, Caeli Regis sui ortum reverentes, novam ac mirabilem stellam edidere, annuntiavereque extremis mundi nationibus, sidera observantibus, unum enatum hominem, qui in Caelo imperium haberet, novaeque natura, omnium naturarum dignitatem transcenderet, natusque sub postrema Caesaris Augusti tempora est. Iste igitur Mariae Virginis Filius Deus, & Homo natus est, duas substantias in se habens, Divinam, & Humanam : Divinam, quam Deo Patri consubstantialem ante secula habet ; Humanam, quam a matre humanitas assumpsit : qua quidem naturarum, substantiarumque diversitas, uniri in uno corpore a nullo praterquam a Deo potuisset, nascique ab ea Virgine & educari voluit ; quam non solum Judaeorum parentes, sed Italica etiam Sibylla paritaram Regem Orbis terrarum predicavere : nosterque Virgilius, sive eas secutus, sive vaticinio prater hominis captum scribendo insusus, prope esse hoc carmine est attestatus :

Jam nova progenies Caelo demittitur alto.

FDemitti enim e Caelo in terras nova progenies, si humana tantum esset, nullo modo potuisset : Divinam igitur naturam e Caelo descensuram, ac humanitatem assumpturam, novamque progeniem ex illa unitate affuturam Virgilius pradixit, spiritum quidem, qui a Deo agitur, post se futura complectens. Atque hoc tanto Rege enato Judaea

sceptri dejectionem inaniter suspicata expavit, molitque insidias in puerulum fuit, quas prudens Joseph eo in Ægyptum delato evitavit: Judæa vero furens omnes illius ætatis infantes perdidit. Jesus igitur vocatus nomine, ac gentilitio ritu circumciscus, crevit mirabiliter, & in Judæam reversus plura edidit miracula à natura aliena, quibus sese Dei filium in humana specie constitutum probavit: cæcis visum, mutis sermocinationem, claudis re-
 editudinem, vesanis emundationem, sui verbi potestate contulit, defunctos etiam foetente carne ad pristina vita statum revocavit. Idem in elementa conversus imperium in eis exercuit, aqua in vinum commutata, ingressusque mare sicco pede aquarum vertices pertransiit, & fluctuantes undas suis discipulis infestas increpavit, ventosque silere jussit: illi vero siluere, procellaque in auram commutata lati ejus jussioni acquievere. Neque sibi soli maris fremitum, vastitatemque subegit, sed uni etiam Petro, olim rudi & ignaro viro, dum fideret, stabile iter super aquas præbuit, & idem Petro mox dubitanti stabilitatem ademit, & dubitationem tanquam fidei labem increpavit. Idem postremo (ne singula enarrem) ad Divinam sui ipsius figuram Petro, aliisque amicioribus, patefaciendam, secessit in montem, ubi magno fragore intonante cælo facie humana transfigurata Divinus illuxit, rursusque ad suam humanitatis speciem rediit.

Hoc ergo Domino JESU Deo per multa argumenta, & hominum peritorum testimonia comprobato, ac vobis ipsis, Ticinenses, per me denunciato, evigilandum, & animadvertendum est, ne iste vester error colendi pro Diis signa, quæ Deitate carent, fiat inexcusabilis, ac tanti Dei ira in vos tanquam Divinitatis contumaces excitetur. Ante enim quam ego vobis veritatem aperirem, subesse excusatio vestra ignorationi videbatur, quod colebatis ea, quæ parentes vestri coluere; nunc vero parentum nube à vestris depulsa oculis excusatio cessat: quæ cessante, quero à vobis, quis honore ac cultu dignior est, Sol ne, aut Luna, Venusve superna Majestatis famula, an Deus ipse, à quo terra firmamentum, aquæ motum, ignis vim, aer puritatem, cæli virtutes, tempora vicissitudines receperunt? à quo homines formam, corporisque lineamenta, ingenii aciem, mentis vim, animæque immortalitatem susceperunt? At quid dixi immortalitatem? corrigendum est verbum, immortalis sane anima constituta fuit, ut Deum hunc ipsius auctorem agnosceret, suamque immortalitatem ejus Divinitati applicaret, eo-
 que actu compos Divini boni fieret. Sed si in contrarium anima perrexerit, & Dei agnitionem aversata tenebras pro luce speculari maluerit, nihil ei immortalitas proderit, imo oberit, quoniam æterna damnationis rea facta anima, in tartara ruet, & pro immortalitatis dono immortales cruciatus recipiet. Agnoscere ergo nos Deum, illicque honorem impendere, aut ab immortalitatis bono nobis oblato excidere, & in malum decidere, si illum non agnoverimus, necesse est.

Stetere immotis oculis Ticinenses, Syro contem-
 cente, miratique hominis gravitatem, novitatem religionis, ac ejus sermonis vim, hæsitavere, quid illi responderent: seniorum tandem consilio magnas gratias agere Syro, lautioris hospitio suscepto, rogareque ut altera die grave non cense-
 ret, referre quo ritu, quo initio hæc nova religio accipienda esset, quod condito tempore Syrus, ut exponam, effecit.

C A P. III.

De Christiana religionis primordiis
 Syri Oratio.

DIVINAE Majestatis gratiam, agnitionemque, habituros, prius fidem ac reverentiam erga Deum habere mundo corde oportet, quoniam arcana Dei iis, qui ab illo alieni sunt, grata & intelligibilia esse nequeunt, Deo ipso malos, ac pertinaces, incorrigibilesque, homines aversante. Fides autem nostra, est virtus credendi ea, quæ Dominus JESVS docuit, ac suis discipulis edocenda mandavit, quaque suis scriptis unusquisque

A Apostolorum ac sociorum collegit: quorum omnium principium est Baptismus, qui Latine intinctio, sive ablutio appellatur, & ab unoquoque Christiano futuro Trinitatis nomine suscipitur. In quo suscipiendo duo actus eodem momento efficiuntur. In primis homo Deum se agnoscere, & Dominum suum eum esse confitetur: ex quo actu fides, & confessio nostra, in Dei honorem extollitur, alterque hoc cernens nostro exemplo ad eundem Deum honorificandum commovetur. Item homo eo actu offerre Deo sui ipsius sponsonem videtur, qui actus iustitia pars vel maxima est, implens mandatum Domini JESU, edicentis: Qui me confessus fuerit coram hominibus, confitebor & ego eum coram patre meo: quasi dixerit, honorificantes me honorificabo, quod
B per Baptismi Sacramentum fieri decet: nam si olim Romana militia adscribendis nomen edere, & militare Sacramentum subire mos erat, ut Catonem scripsisse Cicero monet, quanto præstantius Deo militaturos decet Baptismo se insignire, simulque Deo nomen suum edere ac vovere, Deo ipso hoc deposcente: Nisi quis renatus fuerit ex aqua & Spiritu sancto, inquit, non adscendet in regnum DEI. Denique sicut priscis Judæis circumciscio mandata fuit, ut scirent se tali ritu discretos ab aliis gentibus esse, ac propterea DEO gratiores; ita Dominus JESVS ad suos populos secernendos ab alienis, sibi-
 que fœderandos pro circumcissione Baptismum sancivit, seque illo insigniri voluit, ut tanto excellentior Baptismus ejus approbatione fieret, quanto ipse major Abraham primo circumcisorum erat. Circumciscio enim, ut Paulus Apostolus suis Epistolis notat, perfectione carebat, & Judæorum maribus tantum adhibita, fœminas eorum relinquebat intactas. At noster Baptismus Divina æquitate constitutus, utrique sexui adhibendus est, ad utrumque similiter sexum Spiritus Sancti virtute purificandum, Deoque acceptabilem faciendum, à cujus gratia uterque simul deciderat. Exciderat enim, ut sciat, humanum genus ab æterni Dei gratia suapte lubricitate & fallacia, suoque lapsu sese infecit, posterosque similiter carnis suæ contagione ex carnis copula concipiendos labefecit, originalis delicti macula, pregnantis matris, aliquidque concupiscentis, more in nos transmissa: à qua labe emundatur homo, fœminæque, Baptismi virtute, divina scilicet gratia in humana anima operante, & corpore tantum ipso sub vetusti ponderis gravitate versante, à qua levari, eximique, non potest, nisi valida, constantique, virtute carne subacta. Hoc ferme modo anima nostra corporis consors, post receptam Baptismi gratiam, fit habilis & idonea ad erigendum & juvandum corpus contra carnis suæ depressio-
 nem, & ad recuperandam originalem innocentiam, quæ ante Adæ lapsum generi nostro inhaeserat. Divina providentia ita nobis prospiciente, ut quod primi parentes resupino actu in corpore amiserunt, nos contrariis successibus, id est, virtute non solum anima, sed etiam corporis, recuperemus: corpusque ipsum quasi spirituale, ut Paulus innuit, efficiamus, ac reformemus. Quo quidem innocentia bono corpore nostro recuperante, fit homo in vita tanquam beatus, ac pene Angelicus, carne sua subacta, & ab omnibus vitiis seclusa. Aditus igitur ad innocentiam, introitusque, & ab innocentia ad excellentiam humanitatis nostra ex Dei indulgentia consequendam Baptismus est, fidei virtute in eo spiritualiter operante, à quo initiari unumquemque Christianum futurum oportet. Et quamvis Cornelius Centurio, Italus genere, & alii ejus amici in Cæsarea Palestina Spiritu Sancto afflati ante Baptismum fuerint, minime tamen alii tanti se facere debent, ut sua opinione elati Baptismum respuant, quando eundem Cornelium, amicosque suos, constat de Petri Apostoli manu postmodum Baptismum sumpsisse, & in omni virtutis actione arrogatio, sive arrogantia, vitanda sit.

F Atque ut ad Baptismi virtutem majorem gratiam & dignitatem Dominus JESVS adjiceret, per sacerdotes suos Baptismum conferri voluit. Primusque Joannes Baptista nuncupatus istius Sacramenti annunciator à Deo emissus, & postea minister fuit, qui Dominum JESUM, ad se Baptismi gratia venientem, à longe adspiciens ex-

clamavit, Ecce Agnus Dei; aliaque mirabilia dixit, tam Divinitatis, quam Humanitatis ejus amplum testimonium perhibens. Post quem Joannem Dominus JESVS Baptismi potestatem multo ampliorem, gratioremque, discipulis tribuit, misitque eos in regionem gentium, ad gratiam suam credituris impartiendam, & à JESV CHRISTI discipulis successive plures viri sacris initiati, emissi sunt ad Baptismum predicandum, & pradicatum conferendum. Ego etiam indignus minister ad hujusmodi opus obeundum institutus ab Hermagora, Marci Evangelistae socio, fui. Nemo itaque Baptismum tribuere cuiquam potest, (necessitatis causa excepta) nisi sit Christianus sacerdos. Sed videte, quaso, quanta sit Domini JESV clementia in nos ipsos; agnosciteque nos, non tam nostris meritis, quam ejus gratia & miseratione salvandos fore: providens enim ipse, quod homo licet Baptismi fide purificatus, facilis tamen suapte imbecillitate ad relabendum in desideria carnis futurus esset, adhibere etiam nostris erroribus veniae remedium, atque solamen, per sacerdotum manus dignatus est. Oh nimis pie, nimisque nostri generis curiose Pater, & Domine, qui ut nos salvos faceres, nobis ignota sacramenta aperuisti! Quisquis igitur post Baptismum in errorem humana fragilitate inciderit, resurgere ab erroris macula, atque emundari poterit, poenitentia in primis animum subeunte, cui bene vivendi in posterum conjuncta voluntas adsit. Ab hac enim mentis excitatione humana vita correctio atque emendatio initium sumit, cui Dominus JESVS adjumentum addidit, non solum ipsam emendationem perficiens, sed etiam restituens eundem hominem poenitentem ad priorem innocentiam, gratiamque, Baptismi. Quod quidem adjumentum est spontanea confessio sacerdoti facta, errorisque deprecatio ad Dei majestatem, clementiamque, relata. Quo humili actu premissa, sacerdos Divina potestate, in ejus verbis operante, poenitentem à confessi erroris noxa solvit, poenitentia nomine adjecto onere toties supplicandi, vel alterius operis in Dei gloriam efficiendi: qua absolutione secuta, ac poenitentia peracto negotio, in Divina gratia statum, à quo aberraverat, homo restituitur.

Christiana itaque religionis primordia, qua exquiritis, Ticinenses, hac sunt qua dixi, quaque summam colligo: Fidem DEO aeterno in unitate ac trinitate consenti ex corde habere, ejusque trinitatis nomine Baptismi signaculum, strenni militis more, suscipere, ac innocentem vivere, quod ex fidei lege praestandum est: si vero nostra infirmitate prolapsi ab innocentia exciderimus, ad eandem innocentiam, poenitentia duce, redire, ac per confessionis sacramentum receptum habere, debemus. Ad qua quidem Religionis sacramenta tria vos evocant, tria vos hortantur, ac monent, ratio, necessitas, & gloria, sive dignitas. Ratio enim humana menti insita est, qua vera sunt querere, quasita sectari, consecuta servare. Dei ergo omnipotentiam jam patefactam, religionemque, & querere vos, & sectari, & consequi, & observare, ac revereri jus est. Necessitas quoque, ut ita faciat, urget, quoniam cum unam omnino supernam ac supercoelestem potestatem adorare nos oporteat, nec sine unius Deitatis numine stare genus humanum, & orbis regimen, queat, quemnam Deum esse existimabimus, si illum excelsum Deum omnium constitutorem, rectoremque, non adoraverimus? Aut quem demum alium in nostris angustiis, ac perturbationibus, qua huic saeculo imminet, implorabimus, si illum, quem Deum esse coelestia, terrestriaque, contestantur, non invocaverimus? Dignitas praeterea vestra movere animos, atque impellere ad hoc videtur, qua nullo alio actu acquiri, retineri, aut augeri potest, quam Christiana religione, sive gloriam querere, sive beatitudinem aliquis maluerit. Gloria enim homini est, Christianum se, id est, Domini JESV CHRISTI Dei, & hominis sectatorem, ac militem profiteri, cujus imperium aeternum erit, & ista, qua cernitis, imperia, illi adversantia, sua potestate delebit, ignotis pene gentibus ab extremis mundi partibus excitis, ac in Italiam (quod pradicere tader) traductis. Beatitudo autem, quam aliqui felicitatem appellant, summa est, statuere sibi ipsi gratiam apud Deum aeternum. Cu-

A jus merito soluta à corpore anima, divini boni compos fiat, quod hujus Religionis susceptione ac observatione fieri demonstratur, qua sola virtutibus adspirans, vitia respuit, fugat odia, pietatem colit, servat concordiam, concupiscentiam frangat, fovet modestiam, & in omni actione, ac ritu, humanae societatis jus custodit, & auget. Quare si rationem sequi, si suae salutis providere, si dignitatem querere, si gloriam sibi adjicere, si denique aeterna beatitudinis fruitionem assequi hominis proprium esse existimatis, huc animum intendite, ad hanc Religionem properate, in qua inesse hac omnia aperte cernitis: mihi quoque, antequam ad alia Sacramenta edocenda converterar, voluntates vestras patefacite.

C A P. IV.

De Ticinensium conversione.

D I S S I D E N T hoc loco scriptores: aliquis enim affirmat, populum post Syri Orationem in universo ad Christianam religionem fuisse conversum. Alter vero magis probatus scriptor, qui, sine nominis editione, antiquorum Patrum Vitas collegit, ait, partem populi Syro assensisse, ac fidem habuisse. Ille igitur in credentes conversus: O felices, inquit, animas, quas non mea Oratio, sed divina ad se pellexit gratia. Plebs eris tu singularis, ac praecipua, in qua fidei candor elucescet. Cujus quidem fidei documenta, qua scire in praesentia vos oportet summam attingam. Disseruit subinde Syrus perstricto, summisque sermone, quomodo Dominus noster JESVS CHRISTVS, per Judaeorum sectam reprobatus, traditusque morti fuerit, Coena prius cum suis celebrata, in qua corpus suum & sanguinem eisdem sub cibi & potus figura communicavit, & qua ratione ille ipse sese Judaeis deridendum & crucifigendum permiserit, cum posset sola voluntate supplicium evitare, & omnia illorum consilia, viresque subvertere. Quomodo deinde ad eorum impietatem contestandam & eludendam irritis naturae legibus suapte potentia surrexerit, corporaliter apparens, & vascens cum discipulis suis, mandansque praecepta servari, ne quis per passionis ejus mysterium solutam esse vivendi rationem legibus praescriptam existimaret. Quomodo etiam eisdem discipulis resurrectionis gloriam ad sui ipsius imitationem, omnibusque fidelibus suis promiserit, ceteris vero à fide averfis perhorrescendum judicium interminatus sit. Quomodo demum firmatis in mutua benevolentia & fidei unitate amicis suis, illis videntibus Coelum conscenderit, & decimo postea die Spiritus Sancti gratiam & vim in eos effuderit. Unde repens illa atque mirabilis tot linguarum peritiam, ac varietas momentaneo dogmate discipulorum pectora imbuat: qua freti, egressi è Judaeorum finibus universum orbem perlustrarunt, Deique notitiam singulis nationibus, ad quas patere aditus videbatur, annunciarunt, ut ab Idolorum errore cavere gentes possent, veramque Deitatem ex Apostolorum verbis atque miraculis agnoscerent. Et quomodo inter Apostolos, unus Petrus ex verbo Dei sedem Romae fixerit, ac primum in ea statuerit, firmataque apostolica potestas in terris fuerit, ad quam sese humana divinis immixta verterent, atque referrent, Petrusque pro Deo in terris esset, clavesque in signum coelestis, nedum terrenae, auctoritatis in manu haberet: declaravitque quid sit claves in manu habere, hoc est, se ipsum in primis, deinde alios sibi creditos ad clavium rectitudinem & regulam componere, nihilque decernere, quod ab earum ordine & circumferentia aberret: quoniam divina lege illae ipsae claves demissae Petro fuerunt. Quibus omnibus explicatis, Baptismo singulis nominatim accedentibus collato, fidei Christianae lucem Ticini erexit, constitutusque à fidelibus locus in civitate fuit, in quo familiae convenirent, & concionantem Syrum de

de fidei præceptis ac sacramentis audirent : quem locum *Atrium Divi Syri* post ejus obitum cives appellarunt. Cives autem , qui ab initio Christianæ religioni non acquieverunt , visis aliorum operibus prorsus in virtutem declinantibus , ac miraculis à Syro editis , multorum languoribus solo Dei verbo , nomineque , curatis , tandem veritati adhæserunt , Syroque Episcopo constituto paruerunt.

Decipitur hoc loco quidam scriptor , narrans Syrum post Ticinensium conversionem Genuam profectum fuisse ; cujus errorem corrigo. Genuenses ab alio Syro , non autem ab hoc nostro Pontifice , multis post annis , Christianam doctrinam audierunt , ut in *antiquorum Patrum Vitis* distincte scriptum legimus , quem librum mihi sæpe Divi Michaelis Canonici , honorabiles viri , exhibuerunt. Compositis igitur Ticinensibus in Christiana religione Syrus , domum tamen ipse in civitate non habuit , sed in suburbio extra Maricam portam , quæ Occidentalis est : sacra autem fecit eo in loco , ubi templum vetustate collapsum hodie cernitur , quod domum vocant , cui postea crescente religione , & populo , ac persecutione sublata , adjecta pars templi longe major apparet , quæ turri conjungitur : excitataque in Syrum à Magistratibus , qui Romani Imperii nomine Mediolani præsidebant , inquisitio fuit , quam ratione atque auctoritate religionem introduxisset à Romano cultu , ritumque diversam ? ille respondit , veritatis causa , multaque luculenter dixit ac scripsit , quibus Domini nostri Jesu Christi divinitatem , humanitatemque , probavit : dimissus itaque fuit , publice tantum concionandi ac sacra faciendi potestate sublata. Ille ergo (ut poterat) in privatis , abditisque sacellis , sacris incumbens , populum continebat , erudiebatque : firmatosque cernens in religione cives , secessit in Ligures , quibus ea qua potuit cura per fermocinationes Christi religionem aperuit , ut enarrabo.

C A P. V.

Contra Suetonii in Christianos dicacitatem.

NERONE Imperatore , Christianorum carnifice , Romæ extincto , minor in Christianos sævitia vixit , non tam Romanorum Principum ac magistratuum pietate , quam necessitate : tribus videlicet Imperatoribus post Neronem citra biennium mutatis , Galba , Othone , & Vitellio ; cui successit Vespasianus. Dum enim Principes imperio acquirendo vires intendebant , & dum provinciales magistratus mutationes pertimescerent , Christiani minus periculi ab illis circa alia occupatis sentiebant , suæque religioni liberius incumbabant. Nec veneficia exercebant , ut notat Suetonius Tranquillus in *Neronis Vita* cap. xvii. his verbis : *Afflicti supplicii Christiani , genus hominum superstitionis novæ ac maleficæ*. Cui respondetur ; scribenti historiam genus maleficii , in quo versari Christianos audivit , enarrandum fuit : quo omisso calumniantis ac mentientis est opus , & non historici. Nec omnino ipse foedus homo , ob adulterii suspensionem ab Adriani Imperatoris aula summotus , bene sentire de nostra Religione poterat. Si enim moribus corruptus Sabinæ Imperatoris uxoris inire thorum (ut modeste scribam) fas putavit , quod merito facinus leges detestantur , ille legum observatores Christianos maleficos scripsit , maleficum existimans , suum adulterium Christianorum continentia improbatum iri : mali quippe viri contrarios mores , sibi que dissimiles , improbant ; sic etiam Suetonius suo ingenio malus bonos improbat. Quod vero *novæ superstitionis homines* dixit , indoctius fuit : novam sane religionem non profitemur , cum Deum æternum , quo nihil est prius , confiteamur : cujus Uni-

geniti incarnatio , si cuiquam nova res visa est , minime tamen novum est , Unigenitum à Deo esse genitum ante omnia secula. Neque similiter novum erat , Sibyllas Italicas illius Unigeniti conceptionem , nativitatemque , verbo , scriptisque prænuñcialle. Quibus quidem Sibyllis , si in minimo quoque rerum tumultu ac discrimine fidem habuerunt , multo equidem æquius in tanta re credere , ac veritatem incarnationis perscrutari , magistratus debuerunt , ut certiores fierent , superstitione , an veritas , tot hominum millia ad Christianum nomen convertisset : quod cum omiserint imprudenter illi , prudentissimeque Christiani veram religionem insecuti sunt , illi maledicendo , nostri colendo. *Genus præterea hominum* Christianos appellat Suetonius , quasi gentem ab aliis gentibus diversam : recte sane ; genus quidem hominum Christiani sunt , sed boni & humiles , non autem turpes : à quorum moribus , ac virtutibus , dignitateque , ipse longe absuit. Sed ne videar cum mortuo larvarum more luctari , ejus rejecto judicio , ad Syrum redeo.

C A P. VI.

De Ligusticorum Oppidorum conversione.

ANNO igitur ab ortu Domini Jesu Christi ferme septuagesimo tertio , Neronis , ut dixi , prostrata tyrannide , Syrus in Ligures profectus , Tanari amnis accolæ primum adivit , ratus gentem ipsam antiqua consuetudine Ticinensibus conjunctam , facile ad Ticinensium imitationem fidem suscepturam : initiumque prædicandi in oppido Bassignana fuit. Est autem Bassignana (ut vulgato verbo utar) antiqua nobilisque colonia , quam Georgius Merula libro vi. *Historiarum* inquit Augustam Batiennorum olim nuncupatam : sed si Plinii lectio vera est libro iii. cap. v. *Vagiennorum* , & non *Batiennorum* , legendum est. Quomodo autem ab Augusta ad Bassignanam translata nuncupatio fuerit , neque ipse Merula aperte narrat , neque Blondus in Italiæ descriptione regione septima satis memorat. Passinavia quidem olim appellata fuit à passu navis eo in loco perpetuo ordine destinata , ad Padum trajiciendum , ubi commodissime trajicitur , ita ut interdum etiam urgente diuturno æstu , tuto vado transiri equitando possit : quod tamen raro contingit. Ponte deinde iligneo Pado super ædificato , de quo & Blondus , & Merula , & Acta Episcopi Papiensis mentionem faciunt , navis opus cessavit , & Passinaviæ nominatione in Bassignaviam pertransiit , cui vulgus interposito *Bassignana* nomen tribuit : mihi tamen *Bassinianam* scribere Latine placuit.

Isthuc ergo delatus Syrus non se oppidum , sed civitatem , intueri dixit : aderant viri ætate , ad spectu , moribusque conspicui , juvenus frequens ac permodesta , matronæ ornatae , artifices seduli ac curiosi : qui ubi adesse Syrum Ticinensium Episcopum conspexerunt , populatim accurrunt , hominem hospitio recepturi ; nam si hospitalitas in ullo viget loco , isthic viget , famamque munificentiae Bassinianitæ habent. Ille hospitio laute receptus , adventus sui causam enarrat ; auditur semel atque iterum , tandemque pro parente ac institutore suscipitur. Opportuna autem maxime ea profectio Syro fuit , Vespasiano mitissimo Principe imperium ineunte , minusque ad Christianorum perniciem studente : usufque temporis commodo diu circa Padi accolæ Tanaro amni finitimos ad fidem vertendos moratus est , nulloque se opponente magistratu perfecit opus , & triangularem regionem , quam Padus à Septentrione alluit , ab Oriente Tanarus , à Meridie vero Statienses campi attingunt , ad Christianam

religionem traduxit, & sub istius sanctæ fidei vinculo cum Ticino conjunxit: omniaque illa oppida & pagi usque in præsens tempus Syri religionem ac nomen celebrant, & Ticinensis Diocesis se esse asseverant, ut Valentia olim Valentium insigne oppidum, Pizetum, Ticinetum, Pomarium, Mugaronium, Monscastellius, Riparonium, Petra Maritima, Pavonium, & alia. Fama autem illius viri latius diffusa, impulit Ligusticos populos citra Tarnarum positos ad eum audiendum, & ut commodius audirent accersendum, primosque Pioperanos ferunt, fortasse à pio opere tunc effecto postea nuncupatos, (ante enim Maricorum pagus erat) Syrum accersitum studiose audivisse, coluisseque, & fidei dogmata tenuisse. Quid memorem Saleum nobile oppidum, cujus viri mulieresque accedenti Syro obviam prodire, reveritque illum sunt, solo hominis adpectu ac gravitate commoti? ubi vero eum audierunt, dicto confestim omnes assenserunt. Est autem Saleum frequens oppidum situ suo munitum inter Padum & Frascheiam positum: Frascheia autem, sive Fraschelia, dicta ex eo est, quod humiles arbusculæ è terra, quæ arida & sabulosa est, insurgunt, foliis tantum ferendis aptæ, quæ folia Ligustice *frasche* dicuntur; & quoniam cubitales, aut paulo longiores, arbusculæ manent, foli ariditate idoneum humorem non habente ad proceritatem formandam: ideo *Frascheia* appellata est campania recondendis lepusculis grata, sed venatoribus hyeme gratissima. Durum enim est solum, minutis lapillis obductum, solidum iter sine luto præbens. Excurrere itaque per eam sicco vestigio, & venatores, & catuli hyeme solent; nec lepores similiter ad fugam ineundam signum expectant: lento primum cursu densiora virgulta petunt, cursitant paululum, mox flectentes gradus in latera divertunt, & evadunt. Videre tum licet infantem venatorem ob lepusculum salvum factum socios, canes, arbustaue increpantem. Quid si ille imprudens lepusculum cepisset, quasi de leonis, aut urfi captura gloriatus esset: cum igitur ex captura periculo vacante gloria quæretur, nimirum ejusmodi venatio aptissima ociois videtur.

Habet autem ipsa campania sub æquinoctium passionem pecudineo gregi saluberrimam, salsedine quadam herbis innata, qua & humoris superfluitatem in herbis corrigi, & gratiorem paltum pecudibus fieri dicitur. Et quoniam Saleum illius campaniæ partem suo territorio colligit, à salsedine pascui nomen inditum regioni, deinde oppido plures arguunt: inter quam regionem & Padum humiliores agri, sed longe fertiliores jacent, glasto ferendo apti: est autem herba, vulgo *Gnaldum* à nostratibus, ab Etruscis *Guà* appellata, orta ex tenui grano in subacto solo, pinguique, Veris initio sato: quæ herba quinquies æstate decerpitur, decerpta in acervum congeritur, congesta calescit, calescens putrefit, putrefacta mola subigitur, subacta colligitur, Solique exponitur, & in pilas ad manuum rotunditatem componitur, molestum passim emittens foetorem. Pilæ super viminea crate collocatæ ad solis adpectum desiccantur, desiccatae in pulverem solvuntur. Soluta igitur hoc ordine herba in pulverem, tinctorio operi, fullonicoque in precio est: de quo glasto parce veteres rei rusticæ scriptores verba fecerunt, cum tamen Flaminia, sive Romandiola, Piceni, & Etrusci, alique Italici in eo grano ferendo studium habuerint, quod fortasse apud Veteres minus vixit.

Sed ad Syrum redeo, qui ratus illius temporis tranquillitatem Christianis diuturnam non fore, regressus ad pagos & oppida, in quibus fidei nostræ disciplinam seminaverat, populos in religione firmavit, diuque Bassinaniæ sedens circumvicinos populos in religione continuit. Quorum tamen omnium religionem Bassinania superavit, non

A solum in ipso Syro, dum in humanis fuit, liberaliter recipiendo ac observando, sed illo etiam mortuo in bonis suis ejus Ecclesiæ conferendis, eademque bona Ticinensi Ecclesiæ supponendo, ac censuaria constituendo: cujus religionis causa Deus Omnipotens ipsius Ecclesiæ princeps, quamdiu religio in populo vixit, tandiu ei rerum suarum successum ac quietem tribuit, floruitque Bassinania viris, quos neque Roma in suis Magistratibus, neque Apostolica sedes dedignata fuit: quos quidem si recensuero viros, scientia ac religione conspicuos, præsens historia Bassinania fiet, ipsorum numero volumen occupante. Tu tamen Gerardia familia scriptorum meorum tarditatem non aufugies; Gerardia plane dicta quasi *gerens ardua*, & quæ nobis, potiusquam tibi ipsi præstantes ingenio & eruditione viros sæpe effudisti: ex quibus adhuc eminet in civium oculis atque observatur Joannes Michael Gerardius, qui toga assumpta inter Ticinenses patricos atque Juris peritos sedem obtinet. Dum itaque Syrus rerum eventu usus Christianam religionem prædicat, repetit, ac firmat, exacta sunt Vespasiani & Titi tempora, Imperiumque Romanum ad Domitianum transiit, sub quo quid evenit, referam.

C A P. VII.

C De Christianorum persecutione, sub Domitiano facta, & Syri Episcopi obitu.

C O M P O S I T I S in Ligustico tractu rebus, ac Sacerdotibus pro oppidorum opportunitate in locis dispositis, dum Syrus longius ire, & Evangelica præcepta patefacere in mente haberet, continere se in sua Diocesi, ac Ticinum regredi necesse habuit. Invaluerat enim atrox Christianorum inquisitio ex Domitiani Imperatoris jussu anno ejus Imperii tertio, & Natalis Domini octogesimo sexto, majorque in annos singulos illo nefario vivente futura videbatur: quare tueri quod quæsierat noster Episcopus sua præsentia, suisque monitis, atque constantia, statuit potius, quam latius ea durante procella evagari: quam persecutionem perpetuo ferme durasse omnes scriptores tradunt usque ad ipsius Imperatoris interitum, cubicularii sui insidiis interemptum, anno fere salutis nostræ nonagesimo octavo, & Imperii sui quintodecimo: in quo temporis intervallo Syrus gravis annis, curisque gravior, excessit ab humanis, Cleo Pontificæ (ut plerique scribunt) Romæ vivente. Flevit Syri obitum Ticinensis populus, flevere Campaniæ incolæ, Læumellinatesque, & ipsa Circumpadana Liguria patrem suum ingemuit. Divina (ajebant omnes) *bona amisimus, hoc uno viro summi Dei nuncio ac deprecatore amisso.*

E Compescuit populi luctum Jubentius, sive Juventius, Syri sacerdos & comes, apta oratione, demonstrans tria præcipue homini præstituta esse: Primum est, patienter ferre ea quæ nostræ infirmitatis & subjectionis sunt, de quibus sentiens Dominus noster dixit, *Abnega te ipsum, id est, affectus tuos comprime, & tolle crucem tuam, id est, onus vitæ tuæ, & sequere me, id est, mea vestigia, mea præcepta atque instituta.* Alterum est mori, quæ mors finis & solutio corporeæ compaginis est, nullum in ipsa anima imperium habens, sed ea tantum solvens, quæ à natura sunt separabilia. Morti subsequitur judicium, ut Paulus in *Epistola ad Hebræos* affirmat iis verbis: *Et quemadmodum hominibus statutum est semel mori, & post hoc judicium, &c.* Nisi enim mortis judicium appositum fuisset, nobisque immineret, à recto tramite plerique deviarent, ac naturæ illecebras secuti animum à bonis moribus & virtutibus averterent. Retinacula itaque humani ingenii, humanæque ambitionis, sunt mors & judicium; quibus dem-

demptis natura inficeretur, ac in sese perniciofa rueret. Perstare insuper in hoc seculo omnes homines impossibile esset, si nasci, & non mori à natura contingeret; quia incapax esset orbis terrarum tot gentium ac populorum multitudine, quæ jam diu infinita & innumerabilis effecta esset: ideoque sicut in diversorio abeuntes illi, istis advenientibus locum cedunt, ita nos ipsos in hoc orbis hospitio commoratos has sedes, olim ab aliis per nos acceptas, aliis demittere æquum est, ut aqua remaneat priorum, posteriorumque, conditio. Atque eo ordine & tempore, quo in naturam venimus, ac adolevimus, similiter ordine & tempore, à natura præscripto, minui nos viribus, sensumque deficere, necesse est, corpusque hoc nostrum, quod elementorum virtute & temperamento compactum constat, iisdem elementis à compagine secedentibus, & in suam naturam abeuntibus, dissolvi naturale est: & quicquid denique ex rerum accessu natum ex corruptione appareret, in corruptionem redire ex earundem rerum decessu oportet, quæ corruptio mors ipsa est. Nemo igitur vestrum Syri patris præsentiam appetat, nemo affectus suos Divinæ naturalique legi præferat, sed necessitati acquiescat. Discedendum patri nostro à corpore jam diu infirmo & languenti fuit, ut languori finem faceret, & corporea mole solutus ipse deinde spiritu in æternum viveret, nobisque faveret, nostrasque supplicationes Deo offerret: cujus rei gratia si vobis consultum iri vultis, omittite confestim lachrymas, ac virili prudentia luctum cohibete, Deoque æterno mecum simul gratias agite, quod nullo antehac vobis cognito viro in cœli fastigia recepto, hodie Syrus noster illuc evectus sit, nobis semper pater, patronusque futurus, nostrasque aliquando peccatorum sordes suis precibus diluturus, atque ante Dei thronum pro nobis adstiturus.

Dixit longe ornatius ille sacerdos quam à me scriptum sit, populosque verborum vi ac ratione à luctu avertit, & in fide, constantiaque, firmavit. Curare tum Syri funus magno honoris ambitu civitas aggressa est, iustitio per triduum indicto, atque ut tanti viri memoria à posteris pro vitæ ejus dignitate celebraretur, tria publico consensu edita fuere. Primo, ut nona dies Decembris, in qua ipse obiit, sancta ac festa in perpetuum esset, quæ hodie etiam colitur. Secundo, ut ahenea statua Episcopali habitu paludata in templo cathedrali erigeretur, quæ elegantissime conflata, & in eodem templo postea statuta fuit. Tertium, ut singuli civitatis ordines cereum hominis statura longiorem conficerent, & pro Syri memoria Deo offerrent catervatim omnes divinis ordinibus incedentes, & cereum suum in sede erectum in templum deferentes octava die ejusdem mensis: ut altera die festa singuli cerei in alto collocati, incensique lumen ederent, sacrisque faciendis honorem adderent: quam Cereorum delationem, non solum summo studio Ticinenses hodie faciunt, sed nisi prohibeantur, addunt pugnorum certamen. Nobilioribus enim ordinibus præcedentibus, subsequuntur artifices. Quidum properato gradu præcedere alii aliis conantur, per mutuas impulsiones in concursantium agmina ruunt, atque è loco alii alios trudent, tandemque pugnis pugnam ineunt, ceduntque infirmiores, & victores in pugna cereum victis præmio auferunt, suoque cereo in templum prius delato cereum devicti ordinis cuiuspiam ignominie causa pignori tradunt, deluduntque devictos. Augetur spectaculum, si lutum in viis inesse ex diuturnis imbribus contingat: nam sine discrimine in luto figentes vestigia pugnant, decidentemque aliquis luto obvolvitur ac fœdatur, assurgensque resperfus limo, turbam ad risum excitat: nemo tamen cadentem cædit, cedere enim cadentem nefas pu-

tant, quia ludicra pugna est, in qua ad perditionem non certatur: sed satis est pugili dejecisse pugilem, nullumque ex hac pugna odium oboritur.

Obiit autem Syrus in suburbanis ædibus prope civitatem sitis, ubi sacellum Divis fratribus Prothasio & Gervasio occultò dicaverat, ad quos quidam fratres sibi ipsi amicos antequam Mediolani paterentur, dum in vinculis essent, in memorata Domitiani persecutione Juventium suum destinaverat, ut ejus historia probat. Sedata deinde post multos annos Christianorum procella, translatus Syri funus ab eo sacello intra civitatem fuit, & in Cathedrali templo egregie collocatum, sacellumque illud in ampliorem formam instauratum, receptum est intra civitatis ambitum in postrema ejus amplificatione, Gervasii & Prothasii nuncupatione perdurante. Syrique imago in fornice templi portæ superfixa, ob ejus rei monumentum, etiam in præsentem cernitur, & translationis dies à Papiensibus pro festo habetur.

C A P. VIII.

De Ticinensibus Episcopis post Syrum constitutis.

PROCURATO Syri funere Ticinenses abstinent dum tantisper ab Episcopi electione censuere, donec Domitiani Imperatoris furor deferbuisset, dimissisque ea ratione Læmellinatibus ac Liguribus, civitas sine Episcopo quievit usque ad Domitiani interitum, cui succedens in Imperio Nervæ anno (ut dixi) nonagesimo octavo, nullo odio Christianos infectatus est. Securitate igitur sub hujus imperio Christianis oblata, creatus à Ticinensibus Episcopus Pompejus fuit, cui non opes, aut genus, sed probati mores, populi suffragium conciliaverant. Is anno salutis humanæ centesimo & quarto sacerdotibus assumptis, universam Dioecesim peragravit, adjecitque Ticinensi Ecclesiæ alia Liguriæ castella, quæ post Astam civitatem conditam in ejus finibus comprehensa fuere, sed Ticinensis interim Dioecesis, jurisque remansere, ut Costileola, in qua hodie Asinaria familia antiqua nobilitate dominatur, Cortasonium, ubi Pelletæ gentis splendor viguit, Tegulæ etiam ejusdem juris, sed amplioris dignitatis, sunt, ut suo loco patebit; in quibus insignis claraque Montaphia familia magnificam sedem habet. Omitto alia, in quibus ditionem tantum (ut ajunt) spirituales Ticinensis Ecclesiæ exercet: crevitque in immensum ea ætate Christiana religio. Quod quidem incrementum nonnullum postea Christianis detrimentum attulit, suspitione sub Trajano, Nervæ successore, oborta, ne quid ipsi per sectæ conspirationem adversus Romani Imperii majestatem molirentur. Qua invalescente suspitione, tertia edita fuit Trajani jussu Christianorum clades, in qua Anaclethus Romanus Pontifex supplicio affectus interiit. Compescuit deinde Christianorum cædem Trajanus lege lata, ne Christiani ex solius Judicis imperio inquirerentur, sed ab accusatore delati, aut Diis sacrificare Christi religione rejecta, aut capitis pœnam subire cogerentur.

Moderator adversus Christianos Adrianus Imperator Trajano successit, permisitque ut accusati Christiani, convictique, duntaxat capitis rei essent, nullo alio adhibito supplicii genere, quo antea interdum vivi ad impietatem cruciabantur. Nec destitit propterea mali viri Romanos Pontifices religionis crimine reos facere, quasi religio ipsa crimen esset, traditique morti sunt sub Adriano Evaristus & Alexander Romani Pontifices. Diversa apud Ticinenses ratio fuit, nemine Christianum dogma impugnante, nemineque etiam religionis cultores deferente: quod quidem delatoris nomen, ac munus in quacunque causa, infame apud Ticin-

cinenfes habetur. Curata igitur fua Diocefi Pompejus, ab humanis exceffit anno à partu Virginis centefimo & decimo feptimo; cui fucceffit in Ecclefia moderanda Juventius, (de quo diximus) doctrina confpicuus; eoque facra curante inferior Liguriæ pars, Placentino agro finitima, ab Arena oppido ufque Ruviscallam in Apennini latere fitam, una cum pluribus vicis, caftellisque, Chrifti fidem fufcepit, ac Ticinenfi Ecclefia & ditioni fe conjunxit. Eft autem Arena oppidum juxta Padum infra Ticini oftium, ubi Padi trajiciendi opportunitas fumma adest, feruntque adverfus Juventium, in Ticinensibus oppidis erudiendis occupatum, Porphyrium Ducem cum militum manu prodiiffe, ut Epifcopum è medio tolleret, ne ipfa religio latius ferperet. Exivit Juventius obviam advenienti Duci, mollique oratione allocutus hominem, animi ferociam primo congressu delinivit, mox dixit, fe non fua, fed Dei, præcepta edocere. Porphyrius autem, viri modestia ac innocentia longo fermone perfpecta, Epifcopum fine injuria dimifit, interdixitque tantum ne in pofterum ad populos (ut jam cœperat) concionabundus prodiret. Veritus igitur Epifcopus, ne per ejus prædicationem perfecutio & cædes in populos excitaretur, abstinuit concionibus, & familiari tantum fermone in abditis locis bonos in fide continuit. Secutique ejus veftigia funt alii Ticinenses Epifcopi, fucceffive creati poft annum centefimum & quinquagefimum quartum, quo deceffiffe Juventius fcribitur, nullo alio confecto negotio, nifi populis in fufcepta fide & religione firmatis: quibus quidem temporibus sæpe Imperatorum juffu Romæ, & alibi in Chriftianos sævitum eft, præcipue Severo imperante: circa cujus imperium Crifpus Niger Ticinenfis Epifcopus conftitutus fuit; qui aperte concionari vetitus, alio labore ac ftudio Ticinenses fovit: nam rerum publicarum adminiftrationem complexus, populum ad civitatis ornamentum excitavit, fuafitque in primis oportuna fore vias civitatis lapide fternere, fluminis ripas infixis altius palis munire, ne facili incremento, ac raptu evadere ab alveo effractis ripis poffet, docuitque juxta fluminis latera in locis humilioribus aggeres formari, tellure in altum congesta, ut intra aggeres conclufa, prædia tuta effent fluvio inundante, ac preciofiora fierent. Ponte infuper Ticinum omnino jungendum effe ad civitatis decus & commodum dixit: ejusque dicto populus audiens fuit, & opus perfecit, ut fequenti Capite referam.

C A P. IX.

De Ponte Ticino impofito.

CRISPO Epifcopo, hujus nominis primo, hortante, populus Ticinenfis lapideum pontem in Ticino fluvio ædificavit, circa annum ducentefimum à Natali Domini. Distabant eo tempore muri civitatis à ponte & à fluminis ripa ad jactum lapidis, exftantque ipsius antiqui muri monumenta in domo Salaria, & apud ædes Divi Theodori, & Divæ Agathæ, diftantiam, quam fcribo, attestantia. Addere etiam ad rei confirmationem liber, quod Gothi Ticinum occupantibus Bellifarii milites Ticini fluminis pontem ab urbe separatam tranfierunt, Felice Mediolanenfi equite eorum ductore à tergo relicto: quem poftea fufecutum Gothi, ab urbe egreffi citra pontem, id eft, inter fluvium & urbem, interfecerunt: quod omnes *Gothica Hiftoria* Scriptores referunt. Quæfitum hoc loco à peritis hiftoriarum fuit circa pontis structuram, derivatæ ne Ticini aquæ in alterum alveum, quem vulgus *Gravalonum* vocat, prius fuerint, ad majorem operis facilitatem, an vero in ipsis aquis locata pontis fundamenta fint. Refpondeo ex iis,

Aquæ mea ætate vidi; Derivari, avertique, Ticini aquæ ab antiquo & urbano alveo in suburbanum alveum, *Gravalonum* dictum, prorsus nequeunt, quod tentatum magnificentiffimo apparatu à Francisco Gallorum Rege, anno millefimo quingentefimo & vigefimo quinto fuit, hyeme Ticini aquas eo tempore quam maxime cogente, ferena enim hyeme Ticinus à natura anguftior fuit. Ille igitur fummus Rex desperata civitatis expugnatione, urbem obfidione cinxit, naviculari ponte fluvio fupra urbis fitum prope Sanctum Salvatorem composito, ut commeare hinc inde milites poffent, binisque deinde exactis menfibus, civitateque obfidionem conftanter ferente, aggreffus eft **B** Rex fluminis diverfionem, ratus averfo flumine facilius fibi ab eo latere expugnationem patere, ubi muri in plano fiti, nullius foffæ munimine præcinguntur: ita ut muris prostratis, armati equites invadere urbem per ruinas poffe viderentur. In numero itaque columnarum numero triplici ordine defixo atque firmato, urbanum fluminis alveum obstruxit telis lineis, cannabeisque, liquefacta cera imbutis, in fingulis columnarum ordinibus, mirabili arte difpofitis, atque conjunctis. Averfus quidem illo opere curfus fluminis in alterum alveum fuit; verumtamen non funt exinanitæ aquæ ab urbano alveo; redierunt fcilicet aquæ ab inferiori parte, ubi uterque alveus ante civitatem in unum coit, redierunt, inquam, & redundarunt in urbanum alveum, & durante civitatis longitudine, & amplius alvei fundum operuerunt, ita ut ad civitatem expugnandam ab eo latere minime Regi, ut opinatus fuerat, patuerit aditus, aquarum altitudine aggreffuram impediente.

Aquarum igitur exinanitio in ponte construendo fieri ab Antiquis non potuit, alvei fundo fuapte æqualitate ab inferiori ora aquas refumente. Alia itaque ratione, alioque opere, quam per deficcationem alvei, pilarum fundamenta locata fuerent, quam quidem rationem, artemque, à peritis fcriptoribus perquifitam, & non agnitam, aperio. **D** Acuuntur in cuspide ab uno capite altæ rectæque columnæ, & ab eodem capite torrentur igni, ut durior cuspis fiat, fingulis deinde columnis in duobus lateribus per longitudinem infecatur scalpro rectiffima incifura ad tabulas, five afieres recipiendos apta. Figuntur poftea hæ columnæ fuo ordine tabularum menfura quam maxime obfervata, ita ut inter fingulas duas columnas tabulæ committi in laterali columnarum inflectione poffint, figunturque columnæ navali machina adhibita, in qua ingens malleus *Hircus* vocatus, fune deductus, demiffusque figendi opus perficit. Inter fixas columnas committuntur tabulæ fuo quæbre factæ funt, tabulæque à fummitate columnarum per incifuras demiffæ infra impelluntur: quibus tabulis, fub aquas descendantibus, aliæ fuperimponuntur, quæ malleo aut clava adactæ inferiores tabulas feriatim inferius detrudent & ad fluminis fundum comprimunt atque diftrungunt, uno videlicet & eodem ictu fuperiori tabulæ admoto fingulas tabulas per compaginem concutiente. Atque hoc modo à quatuor lateribus periti fabri caftellum ex trabibus & tabulis in flumine componunt, eo in loco, ubi pilæ pro pontis fundamento locandæ funt. Quo caftello composito terram poftea introconjiciunt juxta tabulatum ad obstruendum intervallum, fi quod exiftaret inter fundum fluminis, & infimas tabulas, quod evenire poffet ex fundi inæqualitate. Hoc opere perfecto plures tubas five fiftilas ad extrahendum aquas in caftello collocant; quæ tuba eft instrumentum ex quatuor tabulis quadrato conjunctis compactum, cui immittitur tabella haftæ confixa, quæ per impulfionem &

& deductionem prompta manu factam educit aquas ex castello per tubæ meatum ab imo sursum, perinde ac si quis aquam ex vase per sufflatorium extraheret: sufflatorium, vel conflatorium, appello instrumentum longiusculum in cuspidem desinens ex electro fabrefactum, deductile lignum continens: cujus quidem ligni deductione aqua per cuspidis foramen sive fistulam ab imo sursum trahitur per spiritus obstructionem. Hæ enim tubæ, sive fistulæ, aquæ immisæ ex parte, & ex parte super aquam inclinatæ per immisilis tabellæ traductionem evomunt exceptam interius aquam, aliamque recipiunt statim evomendam, usque ad castelli exinanitionem. Intra quod castellum ad stare viros oportet brevi cymba insidentes, qui aquis exeuntibus explorent juncturas tabularum, & ubi penetrare aquam per rimas deprehenderint, stupæ, aliave materia rimis immisæ obturare meatus necesse habent, ut aquarum exinanitio intra castellum fiat: sed Angelus Taliata Mirandulæus mihi in eo oppido agenti formas parvularum tubarum ostendit, quibus putabat fieri posse, ut spiritu tantum attraherentur aquæ atque defluerent, hominis manu semel tantum operante: quod an perfecit, ignoro, nota enim visaque scribo.

Exinanito castello si humus altius egerenda fuerit, erit architecti judicium: sed nostrates palos præacutos, igneque ambustos, in fundo figunt, & solo æquant; postremo superædificant quadrato marmore, aut saxo superlocato: opereque castelli summitatem superante, intervallum implent humo, intervallum videlicet, quod est inter castellum & pilam, ne excrecente flumine, aquisque, castellum superantibus, muri juncturæ detrimentum ante obductionis tempus sentiant: quo enim diutius castellum circa pilam duraverit, & pertingi ab undis pilas prohibuerit, eo durabilior muri compago erit. Hæc est ratio ædificandi in flumine, in qua Antonius Gallus Ticinensis, me puero, quam maxime excelluit. Minime tamen pons Ticini, quem hodie videmus, ille ipse est, qui ædificatus sub Crispino Episcopo fuit, sed diversus ab eo tempore & auctoribus. Nunc redeo ad ea, quæ fidei firmamenta sunt.

C A P. X.

De invicta Christianorum fide.

MAJOR semper Christianorum fides atque constantia, quam clades & perturbatio, in unoquoque seculo probata est, præcipue in hoc, de quo scribimus, tempore, quod à Severi Imperio ad Flavium Claudium fluxit, quem constat Imperatorem factum anno ab ortu Domini ducentesimo & septuagesimo primo, Maximo Episcopo, viro innocentissimo & eximio, Ticinensibus præfidente. In hoc enim septuaginta annorum intervallo, à tribus Imperatoribus Christiana Ecclesia, sive congregatio, acerrime exagitata fuit, aliis Imperatoribus Alexandro, Gordiano, & utroque Philippo minus acerbè in Christianos sævientibus. Primum enim post nefarias Severi & filiorum leges in Christianos latas, tetrum illud exivit Decii Imperatoris edictum, mandans Christianos ubique gentium sine Judicis decreto impune tolli, atque aboleri. Valeriani deinde impietas in Christianos excitata multa virorum millia funeri dedit, ceciditque postremo ipse in Persarum manus ex divina ultione, ut ab Imperii majestate & fastigio corruens, captivitatis probrum, dedecusque subiret. Galieno quoque, Valeriani filio, improbe imperante, nusquam circa Romam, Mediolanumque, & alias Metropoles urbes, tuta sedes Christianis patuit: rapti passim ad supplicia miseri & innocentes fuerunt, uno proposito liberationis remedio, ut Deum abnegarent, fide ac religione rejecta: illi contra

A in tot constituti angustiis, per mortis aditum, atque contemptum, fidem ac religionem observare, & in fidei confessione occumbere maluerunt: quorum constantiam admirata posteritas didicit in fide stare, tormentisque resistere; non quidem corporis viribus reluctando, sed patientia, animique magnitudine, quam Paulus merito *longanimitatem* appellat, supplicia perferendo.

B Claudio deinde Imperium administrante, minui atrocitas in Christianos coepit, crevitque major credentium numerus quam antea in persecutione decreverat, sive quod morte præventus Claudius sævire in Christianos nequirit, sive ex alia causa Christianorum perturbatio cessaverit: constat enim Dionysium summum Pontificem sub Claudio Romæ diem suum obiisse, nec antecessorum suorum exemplo neci affectum fuisse. Duravit autem tantisper credentium incrementum, etiam sub Aureliano, Claudii successore, quoad ille bellis occupatus ab Urbe absuit. Ex quibus quidem bellis, quod in Italia tantum circa Padum gessit, referam. Aureliano in Germania adversus Suevos & Sarmatas bello occupato, Marcomanni, qui non longe à Danubio sedes habuere, quique Marco Antonino imperante excitis finitimis Pannoniam infestaverant, repulsique ab eo intra suos limites conquieverant, coacto in unum agmine per Helvetiorum fines Insubriam petiere, & usque in Flaminiam evagati, C Aurelianus à Germania in Italiam evocare: qui triplici congressu eos fregit, fugavitque: Primo ad Metaurum fluvium; altero ad Placentiam; tertio in Ticinensi agro: belloque in Germanos confecto Aurelianus, & capta in Asia Palmyra urbe, Zenobiaque, ejus regina, in triumphum deducta, ex prospero rerum successu elatus, ad ocium, & ad Christianorum cædem conversus est, Felicemque Romanum Pontificem, Dionysii successorem, & alios interimi jussit.

D Minor deinde impietas in Aureliani successoribus fuit usque ad Diocletiani imperium, qui omnem animi atrocitatem in Christianos fudit; nam Imperator factus circa annum octogesimum septimum supra ducentesium coli pro Deo voluit: à qua re cum Christiani refugerent, per viginti ferme annos eos cladibus affecit, templa solo æquavit, libros cremari & incendiis perimi jussit, fideique monumenta labefactare atque abolere conatus fuit: obstitit tamen ejus furori atque nequitiae bonorum virtus, qui ab illa clade evadentes ab hominum cœtu exsularunt, dispersique per solitudines & horrida loca huc atque illuc intrusi, reconditque, vitam morti simillimam traduxerunt. Quo quidem in discrimine recensendo, meditandoque, E dissentio prorsus ab iis, qui scripserunt ex divina ultione eam cladem Christianis illatam ob tyrannidis ambitum, qua sacerdotes eo tempore laborabant. Ego vero contra respondeo; Quisnam ambitus, quamnam tyrannis fingi in sacerdotio potuit, in quo appetendo & exercendo apertum vitæ discrimen plurimorum exemplo versabatur? Item quid peccarunt delubra, quid libri, quid sacerdotii expertes homines, quid denique imbecilles sceminae ad supplicia abstractæ? Sed heu nimis à pietate aberrarunt Platina, & alii, qui hæc temere scripta retulerunt! Dissimilitudo morum, non autem Christianorum ambitio, in causa fuit; viguit scilicet in illius temporis Principibus impietas, ambitioque, divini nominis sibi ipsis arrogandi: nam adorari, & pro divinis vocari, etiam viventes voluerunt, eaque de causa divinos honores Christo Deo & Homini deferri vetuere, Christianosque iccirco F nefaria jussa abnuentes necavere. Qui enim Dei cultum & religionem odit, odissetiam bonos tanquam sui dissimiles suapte immanitate solet, præcipitque arbitrio bonorum perditioni studet: talis Diocletianus, unusque & alter ejus successor fuit:

fuit: sed ne singulorum improbitatem efferam, ad alia tempora properabo.

Persecutionis licentiam, impunitatemque, compescuit lex lata à Maximino Imperatore, Christianorum carnifice, qui morbo correptus, corruptusque, desperata salute statuit Christianis licere in posterum suis ritibus, suisque institutis, impune vivere. Contulit securitatem legi, Christianisque, Constantinus, Helenæ filius, Imperio potitus anno (ut quidam ajunt) trecentesimo & trigésimo nono, potiores scriptores notant, trecentesimo & quartodecimo, Sylvestro in Petri sede, inopiaque versante: quo quidem anno quievit à suppliciis Christiani viri, ac fidei confessionem in sua quisque provincia extulere. Fluctuavit igitur Christiana classis, non pelagi procellis, aut fluctibus, sed humano, id est, suo sæpe foedata ac demersa cruore, annis ducentis ferme & octoginta à Domini nostri JESU CHRISTI obitu, usque ad Constantini Imperium: ex quibus quidem annis postremi Christianis super humanas vires exitiales fuere, omnibus pene hujus nominis viris ac mulieribus ab oppidis & urbibus procul exsulantibus. Latuere tum etiam Ticinenses Episcopi, Sacerdotesque, ac populares, deterritique suppliciorum genere, atque atrocitate, pars Alpium juga Comensibus finitima petiit, pars in Apennini lateribus è regione ubi Stasua amnis, *Staphora* vulgo dicta, fluit, abditas mansiunculas posuit: exstataque hodie ingens lucus montis supercilium, ab Oriente, & ab Occidente tegens, sub quo est specus vastæ amplitudinis, mira diverticula ac latebras continens, ubi latitasse Ticinenses Sacerdotes, aliosque, montani perhibent, qui *Cacimani* vocantur.

Vicit ergo tandem Romanorum Imperatorum sævitiam ac potestatem Christiana virtus, atque per patientiæ diuturnitatem fidei suæ vexillum in alto statuit, Deoque æterno religionis trophæum contractis idolis erexit. Tempia tum maxime sublimia, Dei imperium ac gloriam attestantia, Romæ, & in universa Europa & Asia ædificata fuere, in quibus crux olim probro habita, converso dedecore divini honoris gratia locata fuit, ut memoria Domini nostri, qui in ea pependit, in sacris ædibus conspectior haberetur. Illis insuper summis viris, qui per diversa supplicia antea vitam duxerant, egregium honorem rependere posteritas non destitit, eorum patientiam, atque constantiam, tum picturis, tum etiam literarum monumentis recensendo ac repræsentando: firmataque tandem tam longa temporum serie, totque virorum angustiis ac cladibus, Dei optimi religio in orbe fuit, Italia ipsa, Romaque præcipue persecutionum acerbissimam quam maxime subeunte. Lætare igitur Europa, quoniam æterni Dei sedes, atrium, atque delubrum tuorum virorum præstantia effecta es. Luge, tu Judæa, atque Ægypte, quæ Divinitate non agnita ejecisti Regem apud te natum atque versatum, Regique ipsi insignem latronem prætulisti. Lugeant, fremantque, tartara, quoniam nostra fide atque constantia conculcata jam diu sunt idola, & summi Dei majestas mortalibus patefacta. Qua quidem in re animadvertendum tibi ipsi Europa est, ne temere aliquando amittas, quod tanto nostrorum majorum studio & labore, ac etiam sanguine, paratum habes.

C A P. XI.

De Ecclesiæ vultu post Constantinum.

QUIEVIT Christianum genus, crevitque incommensum annis triginta, quibus Constantinus imperavit, quo quidem tempore extulit sese extra bonorum cœtum Arius sacerdos Alexandrinus, turbatoque Ecclesiæ statu post Constantinum

A in Romanum Pontificem; aliosque cum eo benesentientes irrupit: negans Dominum JESUM CHRISTVM Deo Patri consubstantiali in Divinitate esse: eoque errore imbutis, commotisque pene universis Orientalibus, dissensionem inter Christianos fecit Ariana secta in Græcia & Asia constituta: quo quidem Ario miserabiliter defuncto, secta tamen suscitata invaluit, eoque progressa est, ut super triginta annos partim sub Constantio, partim sub Juliano Imperatore, Christianos variis cladibus affecerit, Felice secundo Romano Pontifice in exilium misso, mox interfecto. Divisa itaque illo errore Christiana Ecclesia fuit, alique Ariani dicti sunt, alii Orthodoxi, id est, *Rectificii*. (longe enim præstantius appellari *Rectificius* quis recte sentiens potest, quam *Orthodoxus*: *doxa* enim opinio est, quæ differt à scientia, ut notat Hippocrates de Arte, iis verbis: *Duo sunt, scientia, & opinio, quarum altera scire facit, altera ignorare*) Duravit hæc miserrima temporum ac religionis calamitas usque ad Valentinianum Imperatorem, qui Rectificius fuit, & undecim annis imperavit. Valente deinde fratre solo imperante Ariana opinione infecto repullulavit ejus favore excita eadem hæresis, diffusaque per Græciam & Asiæ partem, & Italiam, Mediolanum etiam tabefecit: qua demum latius serpente hæresi, nullo tum Principe tantam erroris labem compescente, aliæ quoque hæreticorum sectæ insurrexere, bonisque rejectis ac in exilium depulsis, Christianum gregem deterritis pastoribus, id est, Episcopis, invadere, Gothis etiam in eum errorem traductis, Athanarico eorum Rege bonis adversante, mortemque ex ea causa suis inferente. Illa igitur tempestate afflictis plures egregii ac clari viri atque perempti fuere: alii dilapsi ab urbibus solitudines petiere, solis Hæreticis in Ecclesia dominantibus, & sacra profanis suo arbitrio commiscentibus. Modum huic Hæreticorum licentiæ atque furori attulit ejusdem Valentis Imperatoris poenitentia, pavore potius quam religione inducta, qui Gothis in Thraciam tum irruentibus occursurus Orthodoxæ fidei viros ab exilio revocavit: eoque deinde Valente in eadem Thracia Gothica pugna occiso, fugatoque exercitu, & Græcia à Gothis direpta, simul etiam Hæreticorum favor una cum Græcorum opibus desit, restitutaque recte sentiendi ac dicendi libertas religiosis fuit, (Hæreticis tamen in suis sedibus, moribusque, manentibus) anno à partu Virginis octogésimo primo supra trecentésimum, Gratiano in Occidente Imperium administrante, cujus mater Justina Græca fovere pro viribus suis Arianos non destitit: vide quo adigatur Orientalis dominatio, quando Græca scemina Ecclesiam Dei infestat, atque deturbat.

E Arianis igitur & religiosis hominibus sub Christiano nomine diversa sentientibus, & in eisdem urbibus confuse versantibus, exorta est nobis tandem Valentiniano imperante humana lux tenebras repellens, ac ignitionis caliginem à credentium mentibus, oculisque, detergens, Ambrosius Mediolanensis Antistes, à quo depulsa primum in Occidente Ariana doctrina, atque contrita fuit, illeque tanti operis ergo, aliisque meritis clarus, non solum inter Divos, sed etiam inter quatuor Catholicæ, id est, universæ, Ecclesiæ Doctores re-latus est. In Oriente quoque plura lumina ea ætate enituerunt, ut Gregorius Nazianzenus, & Euphraphius Cyprius Salamine Episcopus, alique, qui Hæreticorum nebulas, & dicendo, & scribendo pluribus in locis dissipavere quidem, minime tamen Ambrosii exemplo funditus eradicavere. Orientalibus multis in fidei rectitudine titubantibus. Ad unitatem itaque Christiana Ecclesia redacta in Italia tantum ea ætate fuit magnorum virorum laboribus atque periculis, anno ferme nonagesimo su-

supra trecentefimum Theodosio imperante, ac Christianam fidem optime colente, cum antea circiter quinquaginta annos in fluctuatione, dissensioneque, jactata fuisset. Meminerint, qui hæc norunt, Antistites, antiquorum Patrum exemplo, religionis nomini, vitæ integritatem & literarum peritiam addere: nihil enim efficacius adhiberi ad errantium correctionem, conversionemque, potest, quam magni viri perspecta probitas cum doctrina conjuncta, inepteque ad alterum emundandum composito sermone accedit, quisquis moribus immundus fuerit.

C A P. XII.

De Mediolanensis Ecclesiæ dignitate.

NEMO Mediolanensibus majorem dignitatem attulit, quam Ambrosius ex Proconsule Antistites constitutus. Quamvis enim urbs ipsa populi nobilitate, ac frequentia, & rerum fere omnium copia & varietate, insignis esset, sedesque Proconsulis, & interdum Imperatoris, fuisset; ea tamen omnia sæpe humanis casibus comminuta, & funditus etiam eversa fuere, ipsa semper Ecclesia tam in maximo quam in minimo civium suorum cœtu, ad nominis sui amplitudinem repullulante, ac aliis finitimarum civitatum Ecclesiis præsidente, una tantum excepta Ticinensi Ecclesia, in qua Mediolanensis Antistes nullam auctoritatem habet. Cæteræ itaque finitimæ Ecclesiæ, cum Mediolanensem superiorem haberent, juraque plurima, & præcipue appellationes, ad eam referrent, certoque limite Apostolica lege præscripto, ejus Antistitem quam maxime observarent; polluto tamen Ariano errore Mediolanensi Antistite, una cum plerisque nobilioribus, valde ab antiqua existimatione Ecclesia ipsa prolapsa est, jacuitque infirmia languente capite usque ad Ambrosii electionem: quo demum viro in Arianos (ut retuli) insurgente, erroremque à civium mentibus discutiente, restituta in pristinum illius virtute ac doctrina dignitas Ecclesiæ fuit, ac etiam in majus crevit. Ille enim summus vir horas canonicas ad æterni Dei gloriam indies recensendam hymnis & canticis interpositis, ac sacrosanctum matutinum sacrificium, quod *Missam* vulgus nuncupat, tam religioso ritu ac ordine instituit, ut nullus Romanus Pontifex ejus instituta abrogare, aut commutare, tentaverit, cum omnes aliæ Cathedrales & Metropolitanæ Ecclesiæ celebrandi morem postea à Romana Ecclesia traditum passim susceperint, solo Mediolanensi Clero in Ambrosiano ritu permanente.

Ab Ambrosio igitur in Mediolanenses hæc gloria ac dignitas Ecclesiæ emanavit, quæ mille & centum quinquaginta annos usque ad præsentem diem in usu fuit. Quibus quidem seculis clarissimi viri antiqui generis atque splendoris ipsi Ecclesiæ præfuerunt, præcipue ex Turriana ac Vicecomite familia: quarum altera, videlicet Turriana, triginta ferme annos Mediolani dominio ex populi assensu potita fuit; eoque deinde per aliquorum prodicionem amissio, à Patria profuga in Venetos & Forojulienses domicilium transtulit, ubi nunc etiam prisca nobilitate pollet. Vicecomes autem quomodo ab Archiepiscopatu per Othonem administrato circa annum millesimum ducentefimum & octogesimum ad urbis dominationem irrepperit, & quibus initiis atque artibus conjunctum tunc cum Ecclesia dominatum ab ea separaverit, atque in Ducatus nuncupationem transtulerit, repetito Romani Imperii nomine atque suffragio, ea ætate apud plurimos Italiæ populos in oblivionem verso, & ipsa Ecclesia à dominatu civitatis dejecta, longa est historia, in aliud tempus, locumque, rejicienda. Sed omnium priorum Pontificum tempora una Attestia gens, vulgo *Estensis* dicta, Ferrariæ domina, transgressa fuit, Archiepiscopali dignitate supra septuaginta annos ab utroque Hippolyto perpetuata. Iis igitur amplitudinibus illustrata Mediolanensis Ecclesia, tanquam Principum sedes effecta est, recenserique inter clarissimos

A Principes Mediolanensis Præsul suapte honorificentia solet. Cur vero ejusmodi dignitate præditus ipse Præsul in Ticinensibus jus non habeat, quemadmodum in plerisque aliis finitimis Ecclesiis, explicabo.

C A P. XIII.

De Mediolanensis & Ticinensis Ecclesiæ, sive Præsulis, contentione.

ELATI Ambrosii dignitate nonnulli Mediolanenses Antistites ab Ambrosii moribus longe dissimiles, subjicere sibi Ticinensem Præsulem, gregemque, constituere, existimantes, ea ratione, qua aliæ finitimæ Ecclesiæ Mediolano suberant, similiter etiam nostram Ecclesiam gregario jure subigendam esse: quorum conatibus restitit Ticinensis Episcopus, reque in litem traducta coram summo Pontifice, Mediolanensi Archiepiscopo in hanc ferme sententiam responsum fuit, quod mihi Jacobus pater, civilium rerum curiosus, lectitasse se in antiquis patriæ libris ante Gallicam depopulationem retulit, repetensque senili more sæpius, quæ mihi adolescenti jam edixerat, omnia ferme ea verba memoriæ meæ impressit: si Mediolani dignitas, atque amplitudo, rerumque opulentia, spectanda est, non solum Ticinensis populus, Ecclesiæve, sed quicquid inter Apennini & Alpium juga cœlo subest, Mediolanensium nobilitati adjiciendum est. Verum enimvero cum Ticinensium religio in Dei gloriam & R. Ecclesiæ decus prior enituerit, priorque suis oppidis lucem dederit, ac per omnes fortunæ casus, rerumque angustias, fidei constantiam exhibuerit; nulla unquam polluta hæresi, fallaciisque seducta, dejici à loco & sede sua Ticinensis Ecclesia non debet, ob immensam postea Mediolano superadditam dignitatem: cui temporis ordo ac natura legem præscripsit, ut ad futura, & non ad præterita, porrigi & extendi dignitas, ejus Ecclesiæ postea attributa, possit. Porro igitur, cum Ticinenses R. Ecclesiam ab origine religionis suæ pro capite & principe habuerint, solo civitatis suæ Episcopo intermedio, cur nunc, quæso, Mediolanensem Antistitem interponi sibi, seseque ab Ecclesia Romana suo gradu amoveri sine causa patiantur? quod minime quidem passuri sunt; quia quod ejus Ecclesiæ per antiquissimi temporis continuationem publico jure adhæsit, evelli ab ea repentino motu ad alterius dignitatem amplificandam, nulla ratione decet, & quod fieri non decet, à Pontificio actu quam maxime abesse oportet. Quare aut Ticinensibus jus Ecclesiæ servandum in suo statu est, sola Romana Ecclesia ei præsidente, aut retexere ab institutis suis populum, atque à religione & fide revocare necesse est, quam ergo sacrosanctam Petri Sedem hæcenus habuit, ut uni tantum Mediolanensi Præsuli mos geratur; qui si forte antecessorum suorum exemplo in hæresim relabere-
 tur, pollueret omnino Ticinenses, utpote viciniore, eadem ambitione conaretur. Quod quam indignum dictu, audituque, futurum videatur, ipsa Romana Ecclesia judicare dignetur. Commotus iis rationibus Constantinus, Romanus Pontifex, Cardinalium annuente Collegio, Mediolanensem Antistitem curare, quæ sui juris erant, censuit; Ticinenses porro subesse tantum suo Episcopo ac Sedi Apostolicæ jure suo permittit. Quo quidem jure Sedis Romanæ adeundæ absque alicujus Metropolitanæ interpositione hodie etiam Ticinenses utuntur, tam in suo quam in Ligustico tractu eis conjuncto, aliis finitimis civitatibus una cum Cremonensi Ecclesia Metropolitanæ subjacentibus. Atque hac sane in re si civitatis dignitas, cujus est Ecclesia, ad Rom. Sedem relata, spectanda est, dignior omnino ipsa civitas probatur, quæ sui tantum Episcopi interventu Romano Pontifici jungitur, quam illa quæ præter proprium Episcopum etiam Metropolitanum superiorem patitur, distans à summo Pontifice per alterius interpositionem. Finis hic nostræ contentions fuit, de qua alibi. Nunc quæ quinto seculo secuta sunt, id est, post annum cccc. quo R. Imperium in Italia corruit, referenda sunt.

BERNARDI SACCI,

PATRITII PAPIENSIS,

HISTORIAE TICINENSIS

LIBER VII.

CAP. I.

De Italia Excidio.



LUGVERIS mihi oratio in-
eunda esset, flebilique stylo
repetendum Italiae exci-
dium, quod non tam hu-
mano consilio, aut casu, quam
divina providentia hoc secu-
lo patratum fuit, Italicis jam-
diu animis, moribusque,
ocio luxuque corruptis, ni-
misque iccirco, nimis in re-
ligione & virtute labantibus. Sed cum divina à no-
bis pro dignitate ornari nequeant, meaque scriben-
di facultas, humilitati assueta, humi tantum serpat,
commodius existimavi nudo, patrioque sermone
rem aggredi, tria ab aliis Scriptoribus parum scite
explorata inquirendo. Primum, qua ex causa, quo-
ve majorum nostrorum tanto scelere, ira Dei in
Italiae exitium adeo exarserit, ut universa ferme,
invis exceptis locis, tradita hostili ferro, aut fu-
rori, fuerit? Alterum, quibusnam modis Italia ipsa,
olim potentissima, eo tempore viribus hebetata &
denudata, ad ea mala patienda ita suo statu parata
fuerit, ut ignobilis uniuscujusque gentis injuriis,
direptionibusque, patuerit? Tertium, cur ignoti
pene populi, ab extremis oris commoti ad eam
invadendam sese effuderint potius quam illustres
Reges, ac nationes, antiquarum rerum gloria lon-
ge celebriores?

A primo itaque exordiendo, animadverto, un-
um præcipuum præceptum humano generi à na-
tura adscriptum esse, quod est, **UTERE** tibi ipsi
insita ratione: ratio autem est mentis rectitudo,
bonum, malumque discernens, quo quidem bono
agnito, aut hæere illi, aut ab eo declinare, nostri
arbitrii & potestatis est. Suadet quidem ipsa natura
bonum rationem proponens: dissuadet contra no-
stra mortalitas, sive infirmitas, carnis onere de-
pressa, ipsum bonum, vel laborem pertæsa, vel
concupiscentiæ illecebris ac voluptatibus seducta.
In hujusmodi igitur naturæ & carnis colluctatione
ac dissensione positus homo, propriæ voluntatis
arbitrator & moderator, si ratione usus fuerit, bo-
no adhærens, humanæ naturæ munus fasque im-
plevit, consummavitque fidei & justitiæ actum.
Quæ quidem justitia fidei conjuncta, dicta à Ju-
ris scriptoribus fuit *constans, perpetuaque hominis vo-*
luntas tribuendi unicuique quod suum est. In quam sen-
tentiam Paulus etiam Romanis scribens, idem præ-
cipit iis verbis: *Reddite ergo omnibus debitum, cui*
tributum, tributum, cui timorem, timorem, cui ho-
norem, honorem. Quisquis igitur alteri jus suum
tribuerit, usus ratione erit. Porro autem cum hu-
mana natura à divina formam, statum, atque ele-
mentorum communicationem sumpserit, ergo Di-
vinitati referre honorem & gratiam status sui de-
bet. Recte sane debet, sed quis, quæso, honor?
quæ demum digna gratia haberi, reddique à mor-
tali viro, Deo æterno univerforum Domino pote-
rit? unus scilicet supremus adorationis honos, una-
que Divinæ majestatis reverentia atque confessio:
quam antiqui Juris scriptores *Religionem* vocant
& Juris Gentium, id est, ipsorum hominum, pro-

Bpriam esse, probant in libro primo *Digestorum*, De
Justitia & Jure, lege secunda.

Cum itaque Deo religionis honos ac reverentia
humanæ naturæ jure, vinculoque, debeatur, vi-
deamus an hæc religio ab Italicis populis præstita
Deo fuerit. Respondeo, quam minima quidem in
eis fuit, quod ex temporum ratione probabo: qua-
dringenti exacti erant anni ab ortu Domini nostri
JESU CHRISTI, cum imperare Arcadius & Hono-
rius, defuncto Theodosio, cœperant: qui quidem
anni à Petri, Paulique, & Joannis adventu in Ita-
liam, trecenti & quinquaginta erant, quibus pa-
trefactum palam Dei verbum, atque Apostolica
tuba populis annunciatum fuerat, ut omnes ho-
mines prisca ignoratione ommissa scirent unum es-
se Deum, tam Christianorum attestazione quam
etiam suis miraculis clarum. In his igitur trecen-
tis & quinquaginta annis, si tempora recensueris,
quibus habitus in Italia publico cultu Deo honor
fuit, vix sexaginta annis viguisse religionem diver-
sis collectis temporibus invenies: reliquis seculo-
rum partibus publico contemptu in Dei dedecus
ac detestationem versis, bonisque omnibus, qui
adspirare religioni deprehensi fuerant, in exilium,
aut in vincula conjectis. Non solum itaque boni,
malique, mensura impar erat, prægravante malo,
sed longe etiam dispar, triploque major populo-
rum iniquitas, in tanto annorum spacio succre-
vit. Atque, quod est detestabilius, adorationis ho-
nor, qui soli Deo impendendus erat, nefario Prin-
cipum ac populorum assensu, ipsis Principibus at-
tributus fuit, Divique illi non solum post fata, sed
etiam dum in scelerum sceditate viverent, appella-
ti sunt, Deo ipso palam posthabito. Quam quidem
transgressionem nequaquam excusabilem facit ipsa
olim Imperatorum potestas ac dominatio in ter-
ris habita; quoniam cum populis, militibusve,
collibuit, vel levi ex causa plures Imperatores, aut
veneno, aut ferro, perempti sunt; veluti Nero, Do-
mitianus, Aelius Verus, Commodus, Aelius Pertinax,
uterque Antoninus, Severi filius, Alexander,
Maximus, Gordianus, uterque Philippus, Galie-
nus improbitate notus, & alii: qui fere omnes pa-
ri actu, aut casu, excipi & mactari tuendæ religio-
nis causa jure & merito potuissent, si religio po-
pulis cordi fuisset. Ingrata igitur Deo illa tempo-
ra, ingrati quoque populi, ingrati Duces & milites,
ac religionem pertæsi claris rationibus probantur.
Quibus plura adjicere argumenta possem, eandem
impietatem ac irreligionem attestantia: sed ne in re
clara superflua conferam, duo tantum attingo ex-
empla ab aliis Scriptoribus relata.

FCum sub Honorio ludi gladiatorii Romæ fie-
rent, Thelematius Monachus, rei feritatem à Chri-
stiana pietate abhorre cernens, admonere popu-
lum spectaculo intentionem cœpit, increpatione
etiam religionis causa adjecta: quam ægre ferens po-
pulus uno impetu hominem contrivit, nemine
quidem in tanta turba ab integræ vitæ viro pe-
riculum arcente. Contra Symmachus insignis Rhe-
tor in Christianam fidem temere insurgens, pu-
blice concionari in populo ausus fuit, nostram omni-
no religionem tollendam, & idololatriam repeten-
dam, pluribus etiam editis Epistolis; cujus vesania
à Romanis magistratibus impune perlata fuit. Addo
etiam

etiam aliud à Scriptoribus relatum, præsertim à Paulo Diacono libro III. *rerum Romanarum*: audita Romæ Gothorum in Italiam irruptione infremuisse in Deum turbas, horribili voce ipsum execrantes, & à CHRISTI cultu ad inania simulacra abeuntes: quem quidem à religione in idololatriam relapsum longe graviolem Beatus Petrus existimat, quam si quis prorsus ab initio Deum non agnovisset, iis verbis in secunda *Epistola* scribens: *Si enim refugientes mundi inquinamenta per cognitionem Domini nostri, iis rursus implicati succumbunt, facta sunt in eis posteriora deteriora prioribus. Melius sane erat illis non agnoscere viam justitiae, quam post agnitionem retrorsum converti.* Paulus quoque ad Romanos scribens, inexcusabiles probat esse Gentes circa Dei agnitionem, dicens: *Quod cum cognovissent Deum, non sicut Deum eum glorificaverunt; aut gratias egerunt, sed evanuerunt in cogitationibus suis.* Hac ergo à Deo prævisa in Italia publica religionis rejectione, jure ille quidem ac merito succensuit nostris majoribus, triaque eis bona, in quibus excelluerant, lenta manu ac potestate adimit, atque hæc ipsa tria externis gentibus in nostrum improprium contulit: Virilis proles multiplicationem atque præstantiam, Imperii sedem ac potestatem, & Principum prudentiam ac magnanimitatem: quibus quidem tribus subtractis bonis, simul etiam gentis decus concidere necesse est. Et in primis virilis proles defectus sub Marco Imperatore visus fuit, dum Marcomannis tumultuantibus militum delectus in Italia habitus esset, frustra Imperator Italos milites conquissivisset: cujus defectus causa servitia & gladiatores armare, & extra Italiam milites conscribere necesse habuit: transferrique paulatim ex virorum inopia belli gerendi ratio & exercitatio in peregrinos Duces & milites cœpit: denudataque eo modo suis auxiliis, suoque antiquo robore, ac militari disciplina, Italia fuit. Et sicut olim ante patefactum mortalibus Christianæ fidei lumen, Italicum genus innumerabiliter crevit, pluresque colonias & urbes condidit atque replevit, Deo ipso antiquorum simplicitati, ignorationique, non adversante, sed potius errantium infantium more paterna ratione miserante, (nisi enim nostri erroris misertus fuisset, quomodo à nobis ipsius erroris caliginem abstulisset?) ita ex adverso postea fidei sinceritate agnita, eademque rejecta, illa virorum multiplicatio atque præstantia destitit, Italiaque ab incremento in declinationem versa, divino numine irritato, procubuit, magni fluminis exemplo; quod arefacta cœlesti indignatione terræ facie, fontibusque aquarum ubertate exinanitis, in exiguum cogitur, ripisque relictis per medium alveum exili unda elabatur, nomenque tantum sine aquarum copia habet. Et quod olim jumenta à vado & transitu fluctuum violentia arcere assueverat, nunc durante ariditate pecudibus etiam tutum ingressum atque egressum pacatis fluctibus præstat, ac sine murmure filet; similiter fere Italia cervice deflexa ab antiquo honore ex virorum inopia cecidit.

Alteram deinde plagam ab Imperii sede mutata accepit: dum enim Imperatorum statio Roma fuit, magistratus, præfecturæ exercituum, aliique honores, aut Italicis viris, aut iis, qui omnino Italici juris erant, deferebantur: hinc rerum publicarum peritia, hinc potestas, dignitasque, hinc imperii majestas, ac firmamentum in ipsa Italia erat, tuerique sese Imperator in Imperio nulla ratione poterat, nisi Italia simul ejus armis in tuto posita. Quo quidem postea Imperatore in Orientem sedem transferente, exuta illis honoribus, illisque præfidiis, infelix Roma fuit: illaque olim Senatoria amplitudo, multiplexque virorum numero Equestris Ordo, item Tribunitia potestas, insignisque Jurisprudentium præfectura, & omnis denique fori auctoritas, atque frequentia, quasi

A) exauctorata jacuit, atque elanguit, & pro negotio & exercitatione, turpe ocium atque desidia forum, urbem, maritimamque, ac mediterranea passim occupavit. Nullus tum in Italia militiæ locus, nullum fortitudini relictum præmium, nullum virtutis incitamentum patuit, creditaque sæpe Roma uni, aut alteri Duci, sive Præfecto, tanquam provincialis urbs, quæ provinciarum domina erat, temere ab Imperatoribus fuit. Quam quidem translationem minime ille inconstans animi, vitæque, Constantinus fecisset, si suos Roma Fabios, Metellos, Cornelios, Scipiones, Marcellos, Gracchos, Catones, Claudios, Brutos, Cassios, aliosque similes in vita, statuque, habuisset. Sed divino hæc numine (ut dixi) Imperii administratio, sedesque Italiæ adempta fuit. Atque ut ipsa translatio nobis etiam infeliciores foret, nec omnino Assyrii Regis somnium in somnum recideret, secuta post translationem ejusdem Imperii divisio fuit: quam olim Julia prudens mater Bassiano & Getæ filiis lachrymis elocuta inturbavit; Occidentalisque Italica pars appellata fuit, sola nuncupatione finem Italico dominio minitans atque portendens, quasi ad Occasum verti atque detrudi indicaret, quicquid Italiæ conjunctum esset; & ex qua demum divisione contigit, ut utraque pars infirmior ex alterius detractone ac separatione remanserit; eoque modo infirmior facta, concuti etiam C) facilius, labefactarique potuerit, quam si utraque pars in antiqua rerum suarum mole ac unitate constitisset, ut antea invicta constiterat. Caruitque nihilominus Roma post eam divisionem plerumque sui Imperatoris præsentia, & cum Occidentalis Imperii caput esset, ipsius Imperatoris sessione raro potita est.

Supremum tertio loco bonum in malum commutatum ad Italiæ profligationem refero, Principum solertiam in imprudentiam ac socordiam versam: quam quidem imprudentiam si explicavero, longe fortasse imprudentior ero, cum plura pateant de ea re volumina: sed colligam tantummodo rei eventum. Residebant post Theodosium in Imperio Arcadius & Honorius, uterque impubes, uterque rerum expers, atque ætatis lubrico suis Ducibus atque Præfectis contemptibilis, longe ab Italia atque à provinciis, in quibus rebellandi periculum versabatur, agentes. Octavo igitur anno eorum imperii, Gothi, olim Visigothi nuncupati, Romani Imperii stipendiarii, stipendio eis temere subtracto, necessitate acti in Thracia rebellaverunt, & nonnullis Imperatorum Ducibus è medio sublatis Alaricum sibi Regem constituerunt; Pannoniamque ingressi, nullo Duce, nulloque exercitu obviam facto, Danubium flumen trajiciunt, & per Noricum iter ac prædam facientes, Illyricum petunt. Jamque Italiam sine sanguine & pulvere manu tenent, atque hospitio premunt, E) Padoque trajecto circa Ravennam consistunt.

Quid referam hoc loco immisum postea in Italiam Stiliconem, infido exercitu longe perfidiorum: qui fraudibus studens remorando potius quam præliando in triennium bellum distulit, ut Italiæ exitio potius quam auxilio esset: una sententia singula perstringam, nihil in tempore, nihil mature ab Imperatore actum fuit. At opportune quidem Gothi sibi ipsis, & importune nobis profligato Imperatoris exercitu, Italiaque potiti, Romam semel atque iterum diripuerunt, anno ab ortu Domini JESU CHRISTI quadringentesimo & duodecimo. Romanorum ergo potentia mille centum & septuaginta annorum diuturnitate in tanta rerum amplitudine constituta, unius anni spacio Gothis succubuit: magno quidem æterni Dei consilio, ut nostri illi majores divini numinis contemptores, contemptibilibus olim gentibus, suisque stipendiariis, subicerentur: & qui divinæ fidei ac justitiæ legem à natura sancitam detrectaverant,

mercenariorum hominum iussa, & direptiones, jugumque subirent. Mirabiliorque illa Italiae subactio, Gothico tumultu perpetrata, visa fuit, quam si praeclari atque antiqui nominis Reges Romani Imperii sceptrum dejecissent: quoniam humana fortasse potentia, & arte, prosperoque belli eventu devictam Italiam ab eximiis Regibus unusquisque censuisset: quæ quidem opinio in Gothorum gente, victoriaque, cessavit, illius inopia atque novitate perfecta. Ignoti quippe illi, innominatique, extra suas regiones, circa Caji Julii Cæsaris Imperium fuere: ignotaque similiter antiquis Scriptoribus causa fuit, cur, aut quo tempore Gothi ipsi, sive Daci, sive Getæ, fuerint, appellati sint, quod quidem verbum Germanice bonos significat: primumque eorum celebritas fuit post Christianam fidem promulgatam; quam ii maxime, qui Visigothi nuncupati sunt, ab initio egregie tenuere, rerumque tandem successibus, & virorum numero ac robore freti, suis egressi finibus, variis casibus, & stipendia (ut dixi) & alimenta ab Imperatoribus recipere. Electi igitur illi viri, immisque fatali numine ad Romanorum consternationem fuere, ut unde minus ab initio pertimescendum fuerat, inde postea exorta vis, divinæ providentiæ nutu, concisas Romanas vires ab infirmioribus præter naturæ ordinem comprobaret, & devicti Imperii gloria Deo ipsi potius quam Gothorum inopiæ cederet, ut omnino cessit: & nisi aliquando Romanorum imperitatio concidisset, sceptri quidem æternitatem sibi soli Roma, & non divinæ potestati, arrogasset. Duravit autem in Italia Gothorum evagatio, atque licentia, circa triennium, deinde pactione cum Constantio Honorii Duce facta, Italica præda onusti in Galliam abjere.

C A P. II.

De Hunnorum, aliorumque in Italiam eruptione, & Venetia urbis initiis.

SITVDEANT, qui provinciis præsunt, externos Sarma circumferentes à suis finibus procul arce-re, ne intra terminos admissi incolis detrimentum ferant: neve etiam exauctorata provincia abeuntes, aliis finitimis audendi suo exemplo, ac diripiendi facultatem præbeant: quo quidem exemplo incitari quam maxime prædæ inhiantes constat, quod nobis Gothorum recessus ab Italia probat: quorum depopulationibus fama pervulgatis erexere sese in diripiendi studium eorum exemplo Hunni, qui circa ea tempora numeroso diversarum gentium exercitu in unum coacto Galliam invaserant, Aetique Imperatorii Ducis virtute repulsi in Pannonia fractis viribus constiterant. Anno itaque trigesimo quinto, postquam Gothi Italia excesserant, Attila, sive Attilius, Rex Hunnorum, contractis undique Ostrogothorum, Herulorum, Gepidarum, & aliarum Septentrionalium gentium auxiliis, Italiam, Duce ac milite destitutam, invasit, Valentiniano Imperatore tunc Romæ trepidante: primoque impetu Foro-Julien-ses populos dissipat, Aquileja longa obsidione capta atque prostrata, & omni Circumpadana regione direptionibus exhausta. Quæ quidem secunda Italiae plaga contigit circiter annum quadringentesimum & quinquagesimum, duravitque supra triennium, gentibus illis etiam in Etruriam impetum vertentibus. Sed compescuit Attilæ feritatem Leo Pontifex, humili oratione ac prece elatum Regis animum demulcens, ac religioni summittens: relicta igitur in vastitate & luctu Circumpadana Italia, illi gentium nimbi incruenta victoria, prædaque, potiti in Pannoniam, ab eorum incolatu Ungariam dictam, rediere.

Sub idem tempus, quo Hunni, alique Septentrionales, in Italiam sese effuderunt, Venetiæ ur-

A bis initia Blondus Foroliviensis reponit, in libro singulari *de origine ipsius urbis*, à quo dissentit Sabellicus libro primo octavæ *Enneadis*, scribens ejus urbis initia fuisse sub annum quadringentesimum & vigesimum primum: quæ quidem quæstio levissima est; cum urbis structura ad gentem, gens vero ad originem in ipsa regione habitam apertissime referatur, ut secundo libro explicavi. Nec Veneti solum, alique finitimi Adriatico, eam urbem amplificaverunt, sed etiam Vicentini, Veronenses, Mantuani, Brixiani, Mediolanenses, & Ticinenses, ut idem Blondus enarrat, nulla Cremonensium mentione facta; cujus viri fidem secutus hoc tantum attingo; magno honori illis omnibus civitatibus adscribendum esse, quod eorum cives tantæ urbis ac Reipublicæ incrementa una cum Venetis populis erexerint: Italiae enim libertatem, quantum in eis fuit, decusque, & amplitudinem antiqua virtute atque auctoritate Deo propitio firmasse, non solum in terra, sed in ipsius maris supercilio mirabiliter videntur. Indicium quoque ea res & idem Scriptor facit, eos populos inter Circumpadanos nobilitate & virtute quam maxime fuisse conspicuos, cum recepti à Venetis eo tempore in ipsius urbis communionem fuerint: cujus quidem honoris nulla Cremonæ pars competit, quæ subdita diu Venetis, domini autem particeps nunquam fuit.

C Atque ad historiam rediens, Leo Pontifex Romanam reversus haud diuturna urbis tranquillitate potitus est: nam hæreses in primis plures in Clero, deinde nobilium dissensiones in populis Romæ & Ravennæ, quæ se Romanæ Ecclesiæ æquandam existimabat, pullulavere: quibus invalescentibus Valentinianus Ravennæ, ubi stationem firmaverat, occisus fuit, Maximo ejus cædis impulsore subinde Romanam ditionem occupante: & quod inhumanum fere fuit, violentis nuptiis Eudoxiam Valentiniani uxorem sibi conjungente: quo quidem homine foede imperante, longe foedior à Vandalis consecuta plaga fuit.

C A P. III.

De Vandalorum rapinis.

VANDALI, Germanici generis viri, innumabili multitudine Galliam ingressi, in Hispaniam etiam penetravere. Deinde magno rerum successu sub Genferico Rege, Ariano dogmate infecto, in Africam trajecere, Romanique Imperii provincias tum ferro & obsidione, tum etiam dolo & fraude, atque perfidia subegere: acceptisque sub hoc tempus nunciis de Maximi tyrannide, in Italia occupanda, & de violentis Eudoxiæ Regiæ matronæ nuptiis, ac Italicorum inter se Principum æmulatione, magna rerum celeritate Vandali classe delati in Italiam ruunt, Leone Pontifice nequiquam illis, Genfericoque illorum Regi, obviam eunte: sprexit impius Rex Summi Pontificis congressum, atque imparatam urbem aggrediens omnia diripuit, sacra profanis miscens, involvensque, & captivos cives non solum ex urbe, sed ex Latio & Campania, excisa Capua, populatim abducens, ipso in primis Maximo in Tyberim dejecto, quem Ursejus Romanus in eo tumultu occiderat, adeo sine Italicorum consilio, aut manu raro Italia excidium patitur. Tanta igitur ac tam insigni præda onusti Vandali, Roma desolata, in Africam redeunt. Tertia autem hæc Italiae illata plaga fuit circa annum CCCCLVI. à partu Virginis: qua quidem in re mirari licet, quibus rerum vicissitudinibus Italiae opes consumptæ fuerint: Attila enim Circumpadanos depopulatus, Romanis, aliisque eorum finitimis, pepercit, unius Leonis oratione commotus; Genfericus contra, Leone rejecto, Romanos, finitimosque, laceravit, & Circumpadanos, quos Attila spoliaverat, intactos reliquit: &

& ita alternis depopulationibus atque excidiis infelix Italia fatali ordine per partes lacerata & deformata fuit: tantæ adeo ejus opes erant, ut à pluribus nationibus diripi eas semel atque iterum eodem seculo oporteret.

C A P. IV.

De Alanis ab Italia depulsis, & Richimeris facinore.

AMISSIS sub idem ferme tempus plerisque Occidentalibus provinciis, Romani Imperii pars Occidentalis dicta, à rerum amplitudine & frequentia ad angustiam & solitudinem redacta fuit: minimeque tot attrita malis Italia requievit: sed Vandalis abeuntibus in Alanorum manus, qui Biorgum Regem secuti per Athesis fluminis anfractus & vallium fauces in Italiam evaserant, recidit; adeo uni inflictae plagæ altera confestim adjecta fuit. Hæ autem gentes in Transpadanis regionibus inter Adduam & Histriæ fines agros depopulantes, sedis diuturnitate caruere, Richimere Duce cum Severiani Imperatoris exercitu obviam facto, ac prælio circa Benacum lacum commisso: in quo, Rege amisso, Alani una cum auxiliariis copiis dissipati effugere circa annum Domini nostri sexagesimum supraquadringentesimum. Quiescenteque tum Italia ab externorum insultibus, tumultuari suorum Principum ac Ducum dissidiis in Romano Imperio coeptum est, Richimere Circumpadanorum Præfecto in Anthemium, Romanum Imperatorem, ejus focerum, arma movente: quorum Principum motus Epiphanius, Ticinensis Episcopus, morum præstantia insignis, utrique gratus, paci studens, in pacis fœdera conciliavit. Nec tamen ea pax diuturna fuit, Richimere regnandi ambitione pellecto, affinitate posthabita: bellum exinde adversus eundem moliente, in quo victor focerum, jam abdicato Imperio privatam vitam Romæ agentem, neci dedit; ac deinde ipse morbo correptus, parricidii poenas divina ultione pertulit. Perpende hoc loco rerum successus, brevique sententia singula in unum collige. Repulit Alanos Richimer, ut Romam liberam ab externis gentibus, ipse deinde focerum sui sanguine fœdaret, ac postrema ejus impietas fraternæ neci, urbis initio patratæ, sceleris immanitate responderet, aliquisque etiam in eum illud satyricum aptissime verteret:

*Paterno extremi maduerunt sanguine muri,
Cum patris loco focer habendus erat.*

C A P. V.

De Italico tumultu ab Epiphanio Episcopo sedato.

PRÆCIPITI hoc tempore lapsu Romana res ad interitum declinavit, divisione in Italia circa Imperatorem eligendum inter populos exorta. Ravenna enim, Exarchatus titulo magnificata, pluribus finitimis excitis in Romæ dignitatem cornua impulit, invitisque Romanis Lucerium, sive Glycerium, olim Senatorem suum Imperatorem edixit, Gundibare, sive Cunthibaro, Italici exercitus Duce, eis favente. Quod indigne ferens Leo Constantinopolis Imperator per Nepotem Patricium, Romanos tuentem, Glycerium ab Imperio dejectum, ad sacerdotium detrussit: qua ex re commotus Cunthibarus pro Ravennatibus adversus Romanos copias eduxit: stetit ex adverso Nepos Romanis fretus. Succensi ira utrinque Itali arma parant, atque ad sua excidia satagunt: quod audiens Epiphanius Ticini agens iis verbis ingemuit: O nimium tui oblita, & futuri nescia, Italia natio, quæ de Imperio brevi tempore abolendo contendis, & in arma ruis. Exfurgensque extemplo navi delatus Ariminum petit, deinde ad locum in Flaminia finibus,

ubi castra erant, adveniens, ab utroque Duce precibus impetravit, ut statuto loco ac tempore pacifici ad eum audiendum pro communi re & dignitate adesse vellent. Quibus condito die, una cum proceribus suis convenientibus, Epiphanius omnibus prius salutatis ita effatus dicitur.

Epiphanii Oratio.

Nunquam magis alieno tempore, aut casu oriri in Italia contentio, ac belli provocatio potuit, quam in præsentī, Principes clarissimi, Italia ipsa recenti adhuc strage languente, ac hominum & rerum inopia laborante. Quo quidem in malo curando atque leniendo, cum magna recreationis spes in vestra virtute ac prudentia sita esset, nunc vobis Principibus dissidentibus, vestrisque exercitibus ad mutuam perniciem irruentibus, omnis nostra spes evanuit, recedereque à nostris urbibus illa optata recreatio visa fuit: contraque pro spe, desperatio pro hominum salute, perditio: & pro rerum nostrarum instauratione, suprema attritio atque calamitas pertimescitur: quoniam tam ex vestra utriusque Ducis, gentisque præstantia, quam ex incerto belli eventum exploratum est, neutrum adversus alterum sine suorum cade configere, & neutrum omnino incruentia victoria potiri posse. Quod quidem malum à vobis, vestrisque gentibus, amoliri DEO propitio cupiens, supplex ego utrique amicus ad vos veni, supplexque utrumque oro, per Italia salutem, quæ vestro consilio, & non dissidio, credita fuit, per vestrorum parentum, conjugum, & nativorum lachrymas, qui in vos solos spectant, elatisque ad cælum palmis pacem implorant, & suis fletibus desolationem ex futura pugna reformidant: denique per summi atque aeterni Dei iussuionem, pacem mandantis, vos compello, simul obsecroque, ut vestra corpora & bona à ferro & vi servetis intacta, viribusque, & armis omis-
Csis, quicquid inter vos statuendum est, ex jure & æquo statuatis. Communis enim hæc causa est, ex qua contentio circa Imperatorem eligendum oritur: in qua quidem communi causa communem pariter & æquam esse oportet populorum conditionem, quibus ferendi suffragii jus est. Neque ergo Romanis in Imperatore eligendo aliarum civitatum suffragia per earum Oratores delata repellere, neque etiam Ravennatibus sibi ipsis Romanorum jura arrogare permissum est. Quæ quidem Romanorum jura sunt, ut Roma, & non Ravenna, electio fiat. Ius enim, & æquitas suadet, ut communia populorum jura eo in loco in communione habeantur, in quo à partium quota vel discrimine in unum coaluerunt. Qui locus Roma est. Nulla itaque ratione, nullo gentium jure evelli ab urbe Roma Imperatoris electio, & Ravennam transferri solo Ravennatum arbitrio debet, si jam probata atque antiqua consuetudinis lex servanda est: quoniam Roma, & non Ravenna, communis omnium patria constituta est. Quam quidem patria communionem si dissolveritis, aut ab aliis Italicis populis separaveritis, heu mihi, dimidiati antea per priorum Imperatorum divisionem, Romani Imperii partem in alias rursus particulas dissecabit, Romæque Romani, & Ravenna Ravennates electionem facere, Italiamque dividere contendunt, fietque Italica partis sectio. Quæ quidem sectio, & bipartitio, quam perniciofa omnibus populis futura sit, præterita tempora ac bella probant. Nam si universi Imperii amplitudo in duas tantum partes divisa, magna ex parte comminuta externorum insultibus, & in angustum coacta cernitur, quanto facilius si ad minutiones partes redacta fuerit, ab alienis labefactabitur? Qui quidem alieni, si libere affari licet, nimis avidè, nimisque impie nos circumspiciunt, lynceoque intuitu nostros tumultus observant atque expectant, & reliquiarum nostrarum direptioni leonina feritate inhiant, ut oblata occasione repente nos invadant, obruantque. Et quorum denique externorum insidiis una vobis Italia Proceres via obstruenda est, unusque præcludendus aditus, videlicet, ut seditio à vobis absit, & unio, atque consilium subsit. Hæc ergo tam clara ac manifesta salutis vestra ratione in pace atque unionem consistente, & multorum malorum
X x 3 cum-

cumulo ex vestra dissensione orituro, flectere vos animos ab odio ad amicitiam, à contentione ad concordiam, & à virium vestrarum separatione ad unionem, opportunum est, ne contraria sectando, tot oblata bona communi culpa amittatis, & simul etiam in vita, salutisque, discrimen incidatis. Quod si neque salus vestra, Italiaque, neque mea oratio, atque deprecatio avertere vos à ferri violentia, manibusque conferendis, potest, ferrumque distringere, ac vires experiri in humana corpora decretum est: unum saltem corpus offerri vobis pro omnibus sinite. Ecce me ipsum, vertite in me tela, Itali, memine, inquam, ferro petite, atque perimite, vosque omnes salvos facite, ut unius amici vestri funere, una tantum familia lugeat, & non tota Italia vestro sanguine funesta fiat. Dixit postrema verba Epiphanius lachrymas ferme emittens, & in utrumque Ducem honoris gratia caput summittens: quo conticente stetero immoti omnes, silentiumque tenuere.

Tandem Cunthibarus in Epiphanium versus, sicut prior arma moverat, prior etiam Epiphanio assensit, pacemque cum Nepote & Romanis iniit. Actæ subinde gratiæ à Ducibus & militibus Epiphanio fuere, unoque ore celebrare ejus pietatem atque eloquentiam, una voce laudare officium, ac ejus præsentiam revereri, admirarique, quod duobus exercitibus ad mutuam cædem paratis, & in conspectu positis, ille solo sermone arma è manibus utrisque excussit. Divina, agebant, potius quam humana vis in ejus verbis fuit, ita nos à belli sententia ad pacem repente deduxit. Hæc de Epiphanio exili ac perfractio stylo scripsit Paulus Diaconus libro VI. cap. I. & II. quæ serius retulit Flavius Blondus libro II. primæ Decadis; Sabellicus quoque, ne suas Enneades inanes hujus viri celebritate esse fineret, eadem probat libro II. octavæ Enneadis. Sed nulla tam præclara unquam virtutis actio in homine enituit, quæ invidiæ, odiique, aculeos evitare potuerit, ita malum bono humana malitia suo sæpe consilio infundit; pro pace enim odium Epiphanius in patriam retulit, ut infra aperiam.

C A P. VI.

De Ravennatum similitudine in Epiphanium.

Cum omnes Italiæ civitates circa Adriaticum & Padum sitæ pace recepta Epiphanium commendarent, sola Ravenna pacis causam ægre ferre visa fuit, aliquorum suasionibus imbuta, quod si Epiphani officium non intercessisset, eligendi Imperatoris jus ab urbe Roma omnino abstulisset. Hoc igitur sermone ab uno ad alterum perlato, vulgus sibi opinionem formavit, inclinasse Epiphanium in Romanos potius quam in Ravennates, pacemque sollicitasse: quoniam superiores in bello Ravennates futuri videbantur. Addebant sermoni alii in foro ociosi: quid mirum si Romanis amicior quam nobis in pace suadenda fuit? Ticinensis genere est, cujus patria neque nostro principatui unquam adhæsit, neque Archiepiscopo Mediolani, cui finitima est, conjungi potuit: sed sola esse, solaque videri sui juris, semper studuit. Increbuit rumor iste inter Ravennates ab ætate in ætatem, tandemque non solum Epiphanium odisse, sed omnes Ticinenses ejus causa cœpere, odio etiam in posteros transmissio. Itaque pro pace Ravennatibus parata, Epiphanius eorum similitudinem in Ticinenses detulit, meritoque in hanc sententiam arguens aliquis scripsit: *In vanum plerumque laborat, qui aliena civitati obsequium præstat.*

C A P. VII.

De Odoacris adventu, & Romano Imperio sublato.

Post conciliatos ab Epiphanio Italiæ populos pax triennium ferme duravit, Cunthibaroque

ab Italiæ recedente, Nepos, audita Leonis Imperatoris morte, & Zenonis cum Basilisco circa Orientis Imperium contentione, Romanis faventibus Imperator factus est: studensque illis Galliæ provinciis prospicere, quarum partes in Romani Imperii fide perstiterant, Orestem exercitui, ad eam expeditionem comparato, præfecit, instructumque dimisit. Orestes Ravennam ingressus, pertentatis civium animis, ab Exarchatu ad Imperium adspirantibus, copias sistit: Augustuloque filio Ravennatum tumultu Imperatore declarato, Nepotem inermem, improvidumque, repentina defectione invadit, fugatque ab Italia, & Imperii sedem Ravennæ figit, Vandalis, à quibus metuebat, foedere conjunctis. Quæ quidem sedis mutatio novitatis perturbatione, tanquam ignis scintilla, in incendium crevit; & Italici imperii perdendi origo ex parte fuit: Romani enim ab Imperatoris electione ac sede ab Oreste & Ravennatibus elusi, occulto consilio nuncios ad Nepotem in Dalmatiam mittunt, renunciantes se indigne ferre, Ravennates sibi ab Oreste prælatos, & seipsos contemptui habitos esse. Rogare igitur, ut quoquomodo suam & eorum injuriam simul ulcisci studeat; ei rei se minime defuturos. Nepos nihil spei in Orientalibus Principibus inter se dissidentibus esse cernens, ad Septentrionalium vires in Italiam pronas, promptaque animum vertit, atque eosdem nuncios cives Romanos, ut Blondus innuit, in Pannoniam ad Odoacrem, Herulorum Ducem, fama conspicuum, ire jubet, eademque illi renunciare suo nomine mandat, quæ sibi ipsi retulerant: addens etiam literas ac preces, ne Romanorum postulata abnuat, neve potiundi Imperii occasionem intentatam relinquat: cum puero Imperatore, Duceque proditore, Italis invisso, non tam bello quam itineris atque adventus celebritate dimicandum esse. Odoacer, cui in adolescentia apud Athilam militanti nota Italia fuerat, nunciis benignè receptis, auditisque, in Imperii spem erectus est: sollicitatisque Herulis ac Tulingis, apud quos auctoritate pollebat, in Pannoniæ finibus magnas copias parat, ac sese Ducem ad invadendum Italiam illis gentibus præstat. Itur in Germaniam nemine obistente, deinde in Italiam per Aquilejæ fines irrumpit: Panduntur Transpadanarum urbium portæ Herulis, ab Aquilejæ, jamdiu destitutæ, muris usque ad Adduam amnem, omniaque eorum rapinis sine contradictione, aut incolarum murmure, patent. Illi longo agmine Adduam in Laudens agro trajiciunt, auditoque Orestis adventu, prope Lambrum amnem castra ponunt. Imprudens Orestes, qui aut Herulis ad Adduæ ripas obviam ire, aut subsistere citra Padum, hostemque in transitu prohibere, debuit, temere sese Odoacri in Ticinensium finibus cum novo exercitu obtulit, non longe à collibus Divi Columbani hodie nuncupatis: Odoacer ex adverso Lambrum amnem in superiori regione vado trajiciens, copiam dimicandi explicato exercitu Oresti fecit, & immisso equitatu ad pugnam provocavit. Ille militum numero & exercitatione inferior, suorumque pavere hostium multitudinem & equitatum sentiens, castris se continuit; quibus insecuta nocte relictis, intra Ticinum oppidum tumultuoso incessu sese recepit, magna copiarum parte in diversa dilapsa: sub lucem Heruli vacua Italorum castra invadunt atque evertunt, à qua re nomen incolæ indiderunt, *Campum Ruinatum* agresti sermone regionem, ubi castra fuerant, appellantes; deinde circa Ticinum urbem excurrentes Heruli, oppidum, quod à flumine tunc ad teli jactum distabat, corona cingunt, atque quadraginta dierum labore ac certamine oppugnant. Itali, consumptis missilibus telis, muros tueri non destiterunt. Tum Odoacer incendio crematis portis, scalis muros conscendere pedites jubet, equitesque portas in-

invadere, singulis turmis phaleratis equitibus præmissis: hoc igitur ordine atque impetu pugnam ineunt, repelluntur à muris Heruli, sed in portis pugnant atrocius equites, ingeminatque prælium Odoacer multitudine fretus, ac militum vicissitudine suos recreat, pediteque equitatu immixto civitatis portas in Septentrionem versas, quæ latiores erant, ingredi tentat, pugnaque usque ad noctem perdurante rejectis ab equitatu ex portarum limine Italiam, Ticinum capitur, diripitur, atque incenditur, anno septuagesimo supra quadringentesimum, Oreste simul capto, atque ad necem abstracto. Hæc Blondus, & Platina, & Sabellicus, alique probant, ab Aretino Procopii traductore dissidentes.

Cujus autem momenti Ticini expugnatio, atque excidium, fuerit, accipe: Omnes Italiae urbes, Venetia excepta, terrore concussæ, Odoacris adventu non expectato Legatos ad eum & munera ultro deditioe facta emisserunt: & Augustulus infamis Imperator abjecta tunica delituit, Ravennatibus ejus Imperii fautoribus non expectato nuncio Odoacri se submittentibus. Roma vero ultionis, quam sollicitaverat, compos facta, gratulabunda venientem Odoacrem excepit, Regemque Italiae corona in Capitolio ornatum appellavit, Romani Imperii nomine eo actu abrogato atque sublato. Populus itaque Romanus, qui pullulante olim Patriciorum virtute regum nomen in suis civibus invisum habuit atque abolevit, ut populare sibi regimen constitueret, nunc mutato studio, eademque virtute torpente, idem nomen in Herulo Duce instauravit: atque hoc modo Roma ipsa Italici Imperii erigendi, ac etiam perimendi, origo fuit, Ravennatum irritata injuriis. Tuque infelix Italia, tuarum civitatum ambitione divisa, antiquo honore amissa, alienum jugum subis, ac tu te perdendam ac devorandam externis gentibus sciens, videntque, tradis. Quanto autem satius fuisset, aut Romam, aut Ravennam forte, vel aliorum populorum suffragio, Imperium retinuisse potius quam utramque simul libertatem ac dominium amisisse: quæ quidem Imperii amissio, atque abolitio, Odoacris adventu patrata, multorum malorum seriem in posterum Italiae advexit: nam neque Heruli postea sine Gothorum armis, neque Gothi sine Longobardorum viribus, evelli ab Italia, depellique, potuerunt; adeo pede semel illato Septentrionalis vigor sedem sibi in nostris urbibus communierat. Disce ergo, Italia, præteritis edocta casibus, futura mala prævidere, & si potes, evitare.

C A P. VIII.

De Italico tributo, & Ticinensium restitutione.

SV B A C T I S plerisque Italiae populis Odoacer Regio jure imperavit, ut tertiam partem fructuum in annos singulos Herulis pro alimentis penderent, Romanis exceptis. Quo promulgato edicto, Ticinenses, qui urbis suæ excidio superfuerant, convocato nobiliorum concilio, Epiphano suadente, de mittendis ad Odoacrem Legatis una cum ipso Epiphano statuerunt, ut scirent, an ille, quem in expugnationis ardore inexorabilem senserant, nunc ne restinctis iræ incendiis placabilior post victoriæ gloriam effectus esset. Adeunt itaque Odoacrem Regem tunc Ravennæ agentem Ticinenses, atque Epiphano verba faciente, hoc ferme modo alloquuntur: *Illam infelix civitas, olim Ticinum dicta, quæ desinit esse civitas, eximie Rex, ut per ejus excidium tu ipse Italia Rex fieres, hæc ad te populi sui reliquias, atque hos suos mœnore attonitos viros, misit, ut te Regem saluaret, supplicisque oraret, quod cum tibi fata tua virtutis merito victoriam, Regnum, pacemque contulerint, tu quoque victoria meminisse velis: cujus*

A lex est, capta servare, minimeque eos perdere, quibus belli fortuna pepercit: jacet adhuc nostra urbs (ut scias) in eadem tectorum ruina, quæ te spectante facta fuit, nemo refectionem aggredi, nemo sua curare usque in præsentem diem, tuam veritus indignationem, tentavit. Nunc vero cum Italia Rex sis, nostraque omnia cum nobis ipsis tua ditioni subsint, præclarior tibi futurum est unius urbis instaurata quam eversa dominium habere. Quod enim militaris manus demolita fuit, nostra calamitati & tuorum fortitudini adscribetur: quod autem in posterum te permittente instaurabitur, tuum dicetur, tuæque gloria atque animi magnitudini attribuetur, quod in Regni solio constitutus instaurare urbem, quam deleveras, tuapte pietate jusseris. Oramus itaque, ut placeat clementia tua, nos nostra excisa tecta sarcire, domusque, in quibus nati sumus, repetere, atque civitati nostræ formam, nomenque, restituere. Ad quod opus faciendum altera etiam à munificentia tua nobis indulgenda est gratia, ut ab Italico tributo tamisper immunes simus, quoad nostræ urbis refectionem ad statum perduxerimus. Dixit Epiphanius, cæteris civibus eodem actu in Regem, honoris causa, terræ tenus genua inclinantibus. Surgere jussis Odoacer respondit: *Permittitur vobis vestra civitatis resectio una cum publicarum ac privatarum rerum cura, immunitas quoque in quinquennium tribuitur, ut civitatis instauratiōi commodius impendatur. Ite lati, & res vestras bono auspicio curate.*

C Habuit gratiam Odoacri Epiphanius civium suorum nomine, solvensque Ravenna, Ravennatibus invisus, prope Ticinum rediit, congregatisque Ticinensium reliquiis, in diversa dispersis, publica supplicatione peracta sacrificium celebravit, ac diem condixit, quo populatim omnes convenirent, ac patriæ suæ ruinas reviderent. Dies fuit vigesimus quartus mensis Aprilis anni septuagesimi secundi supra quadringentesimum, post Christum natum, quando Epiphanius exili populo comite in Patriam suam ruinis ac situ deformem rediit, templumque pollutum in primis purgare ac reconciliare sacris rite peractis aggressus est, Deo holocaustum offerens in testimonium majestatis ejus ac infirmitatis nostræ: sua deinde singulos tecta ruderibus munda & reficere, vicinosque juvare, edixit. Opere inchoato fama in finitimos evolavit, Ticinum refici, civesque immunitate potiri: tum Padi accolæ, in Ticinensium finibus prædia habentes, magno concursu affuere, ultro operas suas subvectis navibus præstare, succisam in silvis materiam importare, oppidique instauratiōi incumbere non destiteret, plures etiam ex populi consensu destituta loca, & sine domino, aut hærede relicta, occupare, resectaque tertio anno pars civitatis, atque habitata fuit: sed sub Odoacris Regno instaurari tota civitas non potuit, Epiphano finitimos ad incolatum evocante, quod alio loco aptius demonstrabitur.

C A P. IX.

De Ticini nomine in Papiam commutato.

F E R V E N T E instaurandæ urbis opere, rumor increbuit civitatis nomen ob ipsius instauratiōis memoriam mutari debere: satis diu (quis dixit) Ticini nomen nostra urbs mille jam diu exactis annis habuit, in quo meditando nimis rudes, ignarique, majores nostri fuisse arguuntur; qui à prælabente æmne nomen mutati sunt, quasi illis rerum vocabula defuerint: me si audieritis, nomen invenimus; quod nostræ pietatis officia in Patriam restituendam paucis syllabis, posteritati attestabitur, & Ticini nomen aquis restituetur. Dic, sodes, nomen, alter respondit, Papia, piorum virorum patria, sive pia ipsa, id est, religionis studiosa, patria elegantiorē demonstrationem refert, quam Ticinum: atque hoc nomen antiquo honore refer-

tum est: fuit enim olim (ut audiui) à Romanis condita lex Papia. Renuntiat alter alteri inventum nomen aptissimum, quo civitas in posterum nuncupari debeat: referunt significatum Epiphanio, patribusque advenientibus: illi, rei novitate attoniti, nec assensere prorsus junioribus, quibus labore oppressis morem gerere in re communi æquum putabant, nec etiam aperte dissensere. Juniores autem rati partes tacite eis acquiescere, cum aperte non contradicerent, uno tempore voce sublata, *Papia* civitas nostra est vocanda, exclamant: subdidit Epiphanius: *Cum vestro labore civitas ruinis vindicata formam assumat, vestro etiam arbitrio hoc nomen, Deo propitio, in futurum habeat*; appellataque exinde *Papia* à civibus, ab externis vero, finitimisque, dicta promiscue & *Ticinum*, & *Papia* fuit: difficile enim est in populis vetus nomen, longo usu menti impressum, repente abolere.

Dubitat hoc loco Cremonensis Scriptor, idem ne sit *Papia*, & *Ticinum*, addens nullum existare hujus rei probatum Scriptorem: sed ne istius dubitatio lucem veritati adimat, Scriptores addo, perlege Flavium Blondum in tertio libro *Decadis* primæ scribentem, Symmachum & Boetium *Papiam* relegatos fuisse circa Gothorum tempus, ac Regnum civitatis nostræ nuncupationem commutatam ostendens: & Leonardus Arctinus, Blondo longe antiquior, libro II. idem sensit per hæc verba: *Hi ut amici Gothorum Ticinum annem apud Papiam, &c.* Inepte igitur ille Scriptor, ne dicam inscite, *Ticini* commutationem à Longobardis factam innuit. Sabellicus similiter libro II. quintæ *Enneadis* inquit: *Est Ticinus maximus omnium fluviorum, qui Padum influunt, deditque olim vicine urbi nomen, quam nunc mutata voce Papiam nominant.* Idem libro VII. *Enneadis* septimæ ait: *Quidam ad Placentiam postremo dimicatum ferunt; alii ad Ticinum, quæ nunc Papia est.* Tertia autem hæc civitas fuit, quæ in plana Italia nomen commutavit. Bononia olim *Felsina* dicta; deinde *Padua* olim *Patavium*; tertia *Papia*, quæ quidem nominis mutatio in civitate liberi juris est, ut innuunt Juris interpretes libro ultimo *Codicis, de mutatione nominis.*

C A P. X.

De Theodorici adventu, & Regno, & Papia amplificatione.

PERTVLIT Italia Odoacris Regis jugum annos quatuordecim, in quibus militaris disciplina longa defuetudine in Italica exolevit: quod etiam ipsi Odoacri postea detrimentum attulit. Perlata enim ejus Regni fama in Orientis oras circa fines *Pannoniæ*, ubi Gothi, ab *Ostrogothia* oriundi, sedes habebant, sollicitatus Theodoricus, eorum Rex, Theodimeri filius, spectatæ virtutis vir, Gothorum vocibus de invadenda Italia consilium inivit, accedensque ad Zenonem, tum Orientis Imperatorem, magnis precibus impetravit, Italiam sibi, suisque Gothi, in Regnum designari. Declaratus igitur Italici Rex Theodoricus, fractis Gepidarum & aliorum populorum iter impediendum obstaculis, in Italiam magnis instructus copiis evasit, Odoacremque uno atque altero prælio ex *Transpadano* agro fugavit. Datur hoc loco à plerisque Scriptoribus vitio Italici militibus, qui à *Circumpadano* tractu *Ostiliæ* finitimo sub Odoacre militabant, quod in secundi prælii ardore in *Veronensi* agro *Herulos* deseruerint: quorum desertionem nequaquam probans, addo, Odoacrem nota dignum fuisse, qui tyronem militem, ex vicina domo repente eductum, nulla præmissa militari exercitatione, in aciem statuerit adversus Gothorum copias, diuturna militia ac itineris longinquitate, recentique victoria, animatas: si itaque ipse Dux, imprudentia lapsus, sine belli ratione decertandum importune putavit, Ducis errorem tyronem fuga auxisse

A consentaneum ejus imprudentiæ fuit:

Odoacre *Cispadanam* regionem suis præfidiis circa *Padum* tuente, Theodoricus *Transpadanis* urbibus receptis in *Insubria* cum exercitu hyemavit: spectatoque *Ticini* urbis situ, ad propugnaculum constituendum aptissimo, ac civium animo in *Herulos* ob urbis suæ excidium infenso, & propterea sibi ipsi tanquam *Herulorum* hosti propitio, urbem novis munitionibus firmavit, matre & sorore una cum *Gothorum* familiis ac rebus in ea collocatis: quæ res amplificandæ à duobus lateribus ac instaurandæ civitatis subsidium fuit, *Ticinen*sibusque insuper perpetuam agri sui immunitatem tribuit, Epiphanio Episcopo in Regis amicitiam, familiaritatemque, recepto, omnia procurante, ut omnes Scriptores probant. Ecce autem, quod Theodoricus in *Transpadanis* circa *Ticinum*, & Odoacre in *Cispadanis* circa *Flaminiam* se continente, *Condibaldus* *Burgundiæ* Rex, à plerisque Scriptoribus *Gundobaldus* dictus, cum exercitu per *Helvetiorum* confinia *Italiæ* finitima in *Insubriam* descendit, ratus inter duorum Regum, gentiumque, contentiones se opportune prædam facturum, quod impune fecit: nam Theodoricus inferiora oppida suis præfidiis muniente, caventeque ne ab Odoacre eo tempore motus fieret, *Condibaldus* superiora *Insubriæ* loca præfidiis vacua, ab *Addua* amne usque ad *Taurinos*, sine discrimine diripiens, hominum, pecorum, ac rerum prædam tuto gressu in *Burgundiam* abegit.

Liber igitur à *Condibaldi* suspicione Theodoricus, sciensque Romanos ab Odoacre jam abalienatos esse, solosque *Ravennates* una cum finitimis in ejus fide stare, in Odoacrem arma vertere ac belli eventum experiri statuit: *Transpadanis* itaque populis in fide firmatis, instructo exercitu *Padum* trajecit, omnibusque urbibus à *Placentia* usque ad *Bononiam* per deditionem receptis, circa *Ravennam*, ubi Odoacer aderat, castra posuit. Quo demum Odoacre, & dimicationibus, & triennali obsidione fracto, ac *Ravennam* sub pactionibus domini dividendi dedente, Theodoricus rerum positus est anno ferme octogesimo octavo post Christum natum præter quadragesimum, Odoacremque, Regni æmulum, ne quid moliri in futurum posset, irritis pactionibus, una cum suis proceribus è medio abstulit, *Herulorum* turba servata, ac supra *Taurinorum* fines circa *Alpium* fauces relegata. A quibus, post attritas Gothorum vires, conditum in planicie oppidum *Herulencum*, hodie *Verulenghum* fertur.

Collige, quæso, Lector, rerum eventus: Orestes, qui Nepotem exercitu ab eo in fide accepto prodiderat, in Odoacris manus incidit: Odoacer vero, qui Orestem captivum præter jus gentium *Placentiæ* occiderat, pari fere impietate præter fidei legem à Gothi occisus est: adeo mali attributio, simili interdum fato, in suum auctorem regredi, aliena etiam manu, solet, facinorisque eventus, & vicissitudo, aptissime in ipsos malos perunque reflectitur. Illud quoque hoc loco memorabile est, Italiam Gothi, ex *Visigothia* Occidentali parte oriundis, anno duodecimo post quadragesimum succubuisse; eandemque Italiam anno duodecimo ante quingentesimum, Gothorum jugo, ab *Ostrogothia*, Orientali parte, translato, colla subdidisse, suoque fato in exitiale nomen genus, tempusque, recidisse, ut suis omnino stipendiariis *Romana* majestas subjaceret, ac subjectionis dedecore spretæ religionis poenas rependeret.

C A P. XI.

De Italia statu sub Theodorico, & divina Urbis Roma electione.

QUAE bene gesta sub Theodorici Regno fuerunt, rerum Scriptores late & diserte retulerunt,

runt, atque orationis gratia illius Regis acta exa-
quarunt: quæ vero minus perbelle perpetrata
sunt, nudis, paucisque, verbis perstringunt, rati
longe præclarius esse commendanda commendare,
quam abhorrenda in memoriam revocare. At mea
diversa est sententia: bonum enim & malum æ-
qua lance in historia perpendo, plurimique facio,
ut mala ipsa nostris majoribus illata patefiant, si-
mulque etiam eorum causæ appareant, ne illius-
modi erroris deceptione capta posteritas præceps
ruat. Nam malorum causas scire, & earum qua-
si anteceffiones mente colligere, summæ pruden-
tiæ est: monemur enim aliorum periculo illa no-
bis præcavenda fore, quæ præteritorum malorum
initia & fomenta fuerunt, quæque anteceffores no-
stros in rerum detrimenta pepulerunt. Potitus igitur
Regno Italico Theodoricus, Roma quam ma-
xime applaudente, Ravennam sedem Regni elegit,
ipsa Roma minime quidem spreta, imo exornata:
quod latissime Aretinus & Blondus explicant, quos
secutus Sabellicus mutatis verbis volumen con-
fecit.

Quærent hoc loco Scriptores, cur Ravenna Ro-
mæ in Regia statuenda à Theodorico prælata fue-
rit? quorum sententiis adscribens, meam quoque
addere historiæ aptum puto: Fato potius quam hu-
mana ratione Theodoricum impellente Ravenna
electa fuit, ut Italicum Regnum jam ad externos
translatum à Roma secederet; ejusque secessu Ro-
ma ipsa liberior, ut ita dicam, aptiorque paulatim
fieret ad divinum, humanumque, imperium in
Petri Apostoli Sede ac Pontificatu conjungen-
dum, stabiendumque: quod quidem Pontifica-
le Imperium nunquam in eam auctoritatis magni-
tudinem sese extulisset, si Italici Reges Romæ
confedisent: Divina enim tantum, & non hu-
mana, potestas Pontifici permisa fuisset, ut præ-
teritorum temporum & Principum historia pro-
bat. Dominus igitur Jesus Deus omnipotens, qui
olim fugientem Petrum ab Urbe Roma suis ver-
bis Romam redire compulit, indicans illis ver-
bis, illoque actu, Romam suo Vicario sedem fu-
turam Italiæ Reges Spiritus sui virtute à Ro-
ma abalienavit, ut ipsa tandem Urbs, quæ di-
gnitate alias antecefferat, sacerdotalis Imperii tri-
bunal aliquando fieret, ut facta est.

Regia Ravennæ collocata, Theodoricus agro-
rum divisionem, quam Odoacer in multis Italiæ
regionibus fecerat, & suis Herulis pro tertia par-
te fructuum in possessionem tradiderat, Gothis
veteranis viritim distribuit: cujus rei auctor est
Procopius libro 1. quem Aretinus sequitur. Quibus
autem in regionibus hujusmodi agrorum ademp-
tio Italicis populis ab Odoacre facta fuerit, aut
quo servato ordine, minime patet. Unum tan-
tum monumentum in Cispadano agro juxta Ti-
cinenfium fines superest, Castronovum oppidum
à Gothis conditum in iis agris, qui Gothis post
Herulos designati fuerant, ut eorum culturæ com-
modus vacarent: qui quidem Castronoveses agri
inter Cispadanos optimi sunt, & Ticinenfium fines
à Dertonensibus dividunt. Non solum itaque uni-
versali dominio, quod Regno continetur, sed
etiam particulari, quod in proprietate consistit,
Italiæ populi ex parte privati sunt. Militum quo-
que hospitio atque onere planam Liguriam idem
Rex exhaustit, cui deinde pro damni restitutione
immunitatem indulgit. Armorum insuper usui Ita-
lis omnibus summo studio interdixit, telis è do-
mibus ablati; quod post Blondum notat Sabellicus,
ut militiæ defuetudine Itali prorsus imbelles
fierent, ac imbecillitate torpentes Gothicum jugum
patientius ferrent, minimeque ad Imperium adspi-
rarent. Nullus itaque sub eo Italus miles, nullus
armiger militavit, & bellica re cogente Gepida-
rum copiis Gothorum phalanges adjuvit, Hilba

A Duce usus. Item Italiæ fines, Alpibus vicini-
ores, suis proceribus in possessionem dedit, clausit-
que Italiæ aditus, oppidis etiam communis, præ-
cipue Tridento, ita ut neque vicinitas Italici cum
externis gentibus, neque familiaritas constitui
posset. Quos præterea viros, aut ingenio, aut
potentia suspectos habuit, aut ex suis civitatibus in
remotiora loca relegavit, aut carceribus indicta cau-
sa, aut etiam morti destinavit, Symmacho &
Boethio Severino, Romanis Patriciis ac Confularibus,
è medio sublatis: de quo Boethio alibi
scribam. Nunc, quæ bona ab eodem emanave-
rint, referam.

B

C A P. XII.

De Italarum Civitatum instauratione.

STVDUIT civitatum instaurationi Theodoricus
Svariis artibus. Primum armato milite Italiam in
pace continens, sine quo milite tuta esse Regio
rarissime potest. Item finitimos Reges & Principes,
à quibus moveri bellum facile potuisset, sua-
rum matronarum nuptiis sibi conjungens, & præ-
cipue Claudium Francorum Regem, quem po-
steriores Scriptores, Gallicam vocem secuti, *Clodo-
veum* vocant, Galli enim *Clodo* Claudium materna
lingua appellant. Franci autem nobilissimi Galliæ
populi sunt à Germania oriundi, tenentes mediam
Galliæ partem, in qua Parisium, Regia urbs,
amplissima ac populosissima, eminet, nulli hac
ætate civitati opibus, atque hominum, & re-
rum copia inferior. Refectione quoque collapsorum
ædificiorum non solum Romam, Spoletum,
Ravennam & alias nobiles urbes ornavit, sed nova
structura plura condidit, & præcipue arcem
munitissimam in urbe Papiæ prope Ticini ripam
in eo loco, ubi nunc domus publica est, *Salaria*
dicta, à salis repositione: exstant enim ibi adhuc
vestigia ac monumenta ipsius arcis, à qua flumen,
& pons flumini impositus, facile prospicieba-
tur, arce ipsa clivo mediocri, qui versus flu-
men porrigitur, insidente: ita ut & ad securi-
tatem, & ad navigationis commodum, & ad
amoenitatem statio ipsa opportuna esset. Civium
quoque, & oppidanorum perquisitione ac redu-
ctione, Insubriam ac Taurinos populos quam
maxime juxit, non solum iis, qui in villis & pa-
gis vitam suo arbitrio agebant, à ruribus in ur-
bes evocatis, & hyemare jussis, ne civitates prorsus
defererentur; sed alio quoque ordine longe
munificentiore regiones replens, quod uno ore ab
omnibus Scriptoribus relatum est. Rogavit enim
Epiphanium Papiæ Episcopum, sanctitatis fama
conspicuum, ut nomine suo Condibaldum Bur-
gundiæ Regem pro captivorum, quos ab Italia
abduxerat, redemptione adiret, auro eidem ad
legationem perficiendam pro captivorum numero,
quorum notitiam habuerat, tradito; quod qui-
dem legationis munus quam prudenter, ac po-
tius admirabiliter, obierit, sequens caput indica-
bit.

E

C A P. XIII.

De Epiphanii legatione ad Regem Burgundia.

PROFECTVS in Galliam Epiphanius, ætate ac
viæ longitudine lassus, triduum Lugduni quie-
vit: quæ civitas distat à Papiæ quadringenta I-
talica milliaria, atque à porta Occidentali uno
aditu plura itinera aperit, quorum medium in
Franciam tendit, proximum à dextera in Bur-
gundiam, alterum in Germaniam: arrepto igitur
suo itinere Epiphanius in Burgundiam perre-
xit: quæ fecundissima atque amplissima pars
Galliæ est, ut Cæsar in *Commentariis* docet, à
Gallis Hæduis & Sequanis habitata: deinde à
Yy Bur-

F

Burgundionibus ex Germania oriundis, qui bellica virtute eam provinciam Gallis ademerunt, & incolatus diuturnitate se ad Gallicos ritus ac sermones conformarunt, Gallicque effecti sunt. Natura enim hoc effecit, ut unaquæque regio proprium sermonem effingat, ad quem omnino declinare peregrinos viros, eam incolentes, temporis tractu necesse est. Quod in Rhætis populis evenisse Livius præclare notat, scribens libro v. eos Alpium incolatu Tusculum sermonem efferasse. Constat autem ad Condibaldi Regis conspectum Epiphanius in Divione oppido, Gallice* Digione dicto, expositaque summam Regi adventus sui causa, mandatum negotium Regio Quæstori fuit, ut accepta pecunia, quam viritum captivi Itali pro libertate pepigerant, singuli dimitterentur. Captivorum itaque numero & pactionibus in summam relatis, pecuniaque ab Epiphanio Thefaurario numerata, compertum est, alios exstare in captivitate Italos, plerosque Insuæres, quorum notitiam Theodoricus nullam habuerat: liberatis igitur iis, pro quibus pecuniam attulerat, de aliis etiam liberandis cogitare cœpit: impium fere facinus censens Italorum parte redempta, aliam partem in captivitate relinquere: conversusque ad Quæstorem precibus obtinuit iterum à Rege audiri: ad quem in atrio cum suis Primoribus sedentem, statuto tempore, Latine in hanc sententiam locutus est.

Epiphanii Oratio ad Regem pro captivis Italis gratis dimittendis.

Magno Dei aterni consilio evenisse puto, Rex amplissime, quod longe major captivorum numerus repertus apud te sit, quam pecunia à me delata, ad eos redimendos satis fuerit: ut deficiente in me redimendi facultate, una tantum spes captivis superesset, qua in tua sola animi magnitudine posita esset: quam quidem animi tui magnitudinem si ad eos liberandos convertes, major tibi gloria futura est, quam fuerit, aut esse possit eorum captivitas, atque detentio: capti enim isti dicuntur fuisse fortuna casibus, ac militum tuorum manibus: qua gloria, etsi magna videtur, minime tamen solius Regis est, sed Regis & militum, atque ipsius fati communis censetur: qua tria in bello gerendo ita conjuncta sunt, ut dividi nequeant: liberare vero eos, quos sub tua manu habes, neque fati, neque exercitus tui, sed virtutis tantum tua opus est. Quod quidem opus si nunc effeceris, gloriam præclarissimi facinoris solus obtinebis: eos etenim viros liberabis, a quorum atavis, sive majoribus, olim hac nobilis provincia, & libertatem, & honorem assecuta fuit. Florentibus enim Italicis rebus, ac Romano Imperio Gallia dominante, Burgundia jus Italicum, ac etiam immunitatem agri sui, ab Italis impetravit, ut in Digestorum legibus, titulo de censibus, pro rei attestatone scriptum fuit, qua Italorum in vestram gentem beneficentia nullo casu, aut merito aptius rependi, quam istorum dimissione potest. Divulgabitur scilicet in omnes Gallia, Italiaque, regiones, tuam majestatem uno actu, unoque verbo, exequasse universa Italia merita, in tuam gentem antiquitus collata. Et quo antiquior Italorum beneficentia fuit, & quasi oblivioni tradita, eo potior ac gloriosior tua remuneratio, vel rememoratio, existimabitur: cum vetusta etiam officia, perinde ac si recentia essent, presenti animo ac liberalitate excipias atque rependas. Nullaque unquam atas, aut rerum mutatio, hanc tibi immensam benignitatis gloriam adimere, aut à Burgundia nomine dividere poterit: sed quemadmodum Pyrrhus Rex captivos Romanis gratis remisit Ennii Poeta & Marci Tullii scriptis celebratur, tu quoque populorum præconio ac vocibus Insuæres patriis laribus restituisse tuapte liberalitate diceris, atque huiusmodi pietate super omnes nostra atavis Reges animi magnitudine excelluisse videberis. Egoque indignus Sacerdos non desinam pro mea humana infirmi-

* Vel potius Dijon.

A tate tuum hoc munus inter Italia Principes & Gothorum Duces magnificare, & ut par est meis verbis, scriptisque, extollere: futurumque tandem reor, ut pro tuo beneficio Insuæribus indulto Deus Omnipotens Burgundia generi longe majores honores in Italia post nostra secula aliquando tribuat. Exstare enim Sanctorum hominum vaticinia audio, dominaturum in Italia per annorum diuturnitatem Regium genus, nomenque, quod à Burgundia oriundum erit, Imperiumque non solius Italia limite, sed Oceano etiam mari, aliisque finibus terminabit, ac linguarum varietates sub unius sceptri regimine, non vi & armis, sed æquitatis moderamine continebit. Quare ne tanto tibi, Regnoque, aut generi tuo futuro honori impedimentum fata interponant, flecte, obsecro, Rex eximie, fata ipsa pietatis opere, nostrosque Italos gratis Deo dimitte, ut Deus ipse supremus Rex pro Insuærum liberatione majus tibi, aut posteris tuis, dominium tribuat, tuamque gratiam sua divinitatis potentia in tuum genus cumulatus referat atque reflectat. Grata fuit Regi Epiphanii Oratio, & quamvis ferus à natura Rex esset, acquievit tamen Epiphanii votis, omnibus captivis eidem dono traditis: & quibus demum liberatis, Epiphanium familiariter rogavit, ut aliquid memorabile pro sui nominis recordatione eo in loco ederet, se scire cum Deo acceptum esse. Respondit Epiphanius, una tantum mihi superest facultas, in qua Deo, & non mihi, memoriale statuam, quod per Sacrificii oblationem te adstante crastina die faciam.

C A P. XIV.

De Sacrosancta Eucharistia in Divionis templo ab Epiphanio collocata.

ALTERA die celebravit Epiphanius in Divionis templo Sacrificium, quod Missam vocant, Rege & populo spectante, ac iis captivis, qui gratis dimissi fuerant, nudis pedibus incedentibus, consecravitque duas Eucharistias, una in communicatione sumpta, & altera servata. Finito Sacrificio, Sacrosanctam Eucharistiam dextera manu sustulit, conversusque ad Regem & populum hæc dixit: Hanc immaculatam Hostiam, sub qua divina potentia latet corpus Domini nostri JESU CHRISTI, ego vobis, Rex optime, ac Principes Illustrissimi, & Divionenses viri, relinquo ob memoriam pietatis Regia, qua in Italos gratis dimittendos Rex hic præsens tui sua benignitate dignatus est. Et sicut pietatis opus ad Deum pietatis fontem referri debet, ita ego in divino Sacramento Deo ipsi huius rei memoriam statuo: quod sacramentum perpetuum erit, amoverique à Burgundia finibus nunquam impune poterit. Atque iis dictis Eucharistiam in tabernaculum super altari collocatum reposuit atque dimisit: quam Eucharistiam hodie etiam in Divione oppido intra templum, Sancta Capella nuncupatum, Divionenses habent, & incorruptam ostendunt in die Natalitio Domini nostri JESU CHRISTI. Post repositam Eucharistiam, Rege ac Proceribus salutatis, Epiphanius collecta captivorum turba, quæ quindecim millia capitum fuit, Lugdunum rediit: vigesimoque exinde die omnes suis regionibus restituit, anno nostræ Salutis octogesimo nono supra quadringentesimum. Quæ quidem de Epiphanio scripta à pluribus auctoribus approbata leguntur, & in primis à Paulo Diacono libro vi. & à Blondo libro iii. brevius à Platina in Vita Gelasi Pontificis, latius à Sabellico libro secundo octavæ Enneadis, religiosius à Burgundiis, apud quos versatus in Gallia didici, quæ retuli.

C A P. XV.

De Epiphanii Episcopi obitu.

SUPREMVVS ille labor nostro Epiphanio fuit, qui Ravennam profectus, ac legationis successu Theo-

dorico relato, utrumque Regem in amicitiam conciliavit, reversusque in patriam Epiphanius consumpta ætate exspiravit. Tum vexata civitas tanti viri jactura, publico mœrore & luctu funus extulit: in quo efferendo increbuerunt ex tectis matronarum voces lachrymis immixtæ: *Oh tetra nimis, nimisque infesta dies, qua te à nobis abstrahit, optime Pater ac Domine! cui, quaso, nos infelices in tanta rerum novitate relinquis? cui committis hanc turbam, per teipsum intra hæc semi-collapsa mœnia traductam? Oh vere luctuosam patriam tam præclaro atque amabili amisso Patricio, parenteque! Siccine demum uno Epiphanio auctore instaurata fuisti, ut eo nunc decedente tu simul concideres? Siccine tibi priscum nomen illo avveniente mutatum fuit, non ut omnino insignior fores, sed ut tandem tanto Patricio, patreque, sublato, tu quoque simul decus, specimengue, tui nominis exsueres? Luge igitur nobiscum antiqua tellus, tuo à te avulso colono: luge te turres, tectaque resecta, vestro nunc instauratore defuncto: luge te nobiscum Padi & Ticini accola, quoniam qui vestra quieti ac saluti studuit atque prospexit, nunc vos sine Duce & protectore relinquit. Finem luctui funeris depositio vix attulit, civium corda publico mœrore altius premente. Conditum autem sepulcrum Epiphanio fuit in Divi Vincentii templo, quod ab inde citra à Papiensibus sub Epiphanii nuncupatione celebratum fuit, Gelasio Romano Pontifice eo tempore sedente.*

Nullas Epiphanius opes, nulla alia prædia, nisi quæ à Mario patre acceperat, sororibus reliquit: ex quibus quidem sororibus Honorata religione & moribus celeberrima fuit: cujus ossa in sacello Monasterii veteris, vulgo *Historiarum* appellatum, collocata sunt: cumque ab eo loco exportari tentatum esset, ut in eminentiore delubro conderentur, amoveri nulla humana industria exinde potuerunt. Scio scriptis meis in hac parte adversari Blondi opinionem, existimantis, Epiphanium Aquilejensem fuisse, quod minime verum esse omnes alij Scriptores & Episcoporum annales probant, decipique facillime Blondus potuit Syri primi Episcopi origine, qui Aquilejensis fuit: post cujus Syri tempora ante Epiphanium Aquilejæ destructio insequuta est, ita ut esse Aquilejensis Epiphanius nullo modo potuerit, ipsa civitate jam antea solo æquata, & nondum sub Epiphanii ortum instaurata.

C A P. XVI.

De Burgundiæ Regis amicitia cum Theodorico.

Post Epiphanii obitum viguit summa benevolentia inter Condibaldum, Regem Burgundiæ, & Theodoricum, quæ etiam affinitate firmata fuit, ornatissimis inter eosdem muneribus transmissis: ex quibus spectatissima fuere duo horologia mirabili artificio Romæ fabricata, Boethio Severino auctore, ad quem extat ipsius Theodorici Regis *Epistola* à Cassiodoro relata, cujus verba in parte refero.

Boethio illustri Patricio Theodoricus Rex.

Burgundiorum Dominus à nobis magnopere postulavit, ut horologium, quod aquis sub modulo defluentibus, & quod Solis comprehensa illuminatione distinguitur, cum magistris rerum ei transmitteremus: quasi ei miraculum esse videretur, quod quotidianum apud nos esse ex Legatorum suorum relationibus intellexit. Hoc te multa eruditione præditum ita noscere didicimus, ut artes, quas vulgo literarum ignari exercent, tu in ipso disciplinarum fonte potaveris. Quare cum vos ornet mirabilium rerum notitia, horologia nobis publicis expensis sine vestro dispendio destinate. Primum sit, ubi stylus diei index per umbram exiguum horas distinguat. Secundum sit, ubi præter Solis radios hora dignoscatur, noctes in partes dividens. Prædicta horologia nobis quanto ocius transmitt-

tere maturabis, ut extera gentes tales nos habere nobiles auctores, quales leguntur, agnoscant: minimeque audeant se nobis aequales esse existimare, cum tales sapientes apud nos esse, taliaque mirabilia scire excogitare cognoverint.

Subsequitur altera *Epistola*, ex qua patet Boethium opus egregie curasse, ac ipsa horologia gratissima Theodorico fuisse, moxque ab eodem Theodorico ad Burgundiæ Regem destinata fuisse.

Condibaldo Regi Burgundiorum Theodoricus Rex.

Amplectenda videntur munera, quæ expetita fuisse probantur, ut per præciosa opera cupientis animus expleatur. Quapropter salutantes vos gratia consueta per harum latores præsentia vestra duo delectabilia horologia cum suis dispositionibus destinamus. Unum, in quo humana solertia, arteque, colligitur, quicquid totius cæli spaciis noscitur pervagari: alterum, ubi Solis meatus sine ipso Sole cognoscitur, & aquarum guttis horarum spacia terminantur. Habeatis itaque in vestra patria quod aliquando vidistis in urbe Roma: dignum est enim, ut his bonis vestra gratia perfruat, qua nobis etiam affinitate conjungitur.

C A P. XVII.

De Horologiis.

Non ab re erit, referre hoc loco, Horologia, quibus hodie utimur, ignota fuisse antiquioribus, ut indicant scripta à Plinio libro ii. cap. lxxvi. & libro vii. cap. ultimo, *Naturalis Historia*, ubi de Horologio fit mentio. Dignusque propterea celebritate Boethius fuit, qui primus illa memoranda Horologia Romæ componi curavit: post cujus viri interitum diu Italia ejusmodi opificio caruit. Dominante deinde in Transpadanis Joanne Galeatio Vicecomite fabricatum fertur ejusmodi Horologium, non solum horarum, sed etiam siderum expressis notis, atque temporibus, ac Solis, Lunæque, meatibus; cujus operis auctor ignoratur, collocatumque illud Horologium in arce, vel Castello, Papiæ fuit: ubi defuncto Principe tam mirabile opus despectum jacuit circulis etiam à suo loco sublatis. Exacto postea sæculo anni millesimi & quingentesimi circa annum vigesimum nonum, quo CAROLVS QVINTVS Bononiæ Imperialem Coronam suscepit, allatum eidem Imperatori illud Horologium incompositum, (ut erat) situ ac rubigine fœdatum fuit, quo conspecto, machinam admiratus, curari tanti operis instaurationem fabris undique evocatis jussit: quibus circa opificii restitutionem frustra laborantibus, unus accessit Joannes Cremonensis, cognomento Janellus, adpectu informis, sed ingenio clarus, qui tantum opus speculatus refici posse machinam dixit, sed nequicquam profuturam ferris rubigine attritis, exefisque, nisi novum instrumentum ad illius vetusti similitudinem ac symmetriam componatur: aggressusque opus, sive priorem artificem imitando atque æmulando, sive exæquando, diuturno labore opificium absolvit, quod deferri in Hispaniam Imperator voluit, magistro Janello simul deducto. Mirari igitur nostra ætas non minus quam antiqua suos artifices potest, proffiterique Hispaniæ licet, quod sicut olim Burgundiæ Regi, ita etiam suo Regi, à Burgundia avia genus trahenti, affluere artifices Italici, cælum ferme intra Horologii metam effingentes.

Nec omitendus hoc loco est vir bove capitosior Bernardinus Carovagius, oculis emissitiis, ore exporrecto, linguaque blasus, qui Horologicam artem Papiæ discens, mirabilia fecit: inter quæ illud memorabile fuit, quod ut Andreæ Alciato eximio Jurisconsulto morem gereret, Horologium composuit; in quo per æris sonitum, quam quisque sta-

tuisset horam exaudiebat, atque eodem ictu ignis scintilla ab inserto filice in subjectum sulphur excussa in flammam ibat; quæ repente ardentis sulphuris ministerio ac continuatione accendebat appositæ lucernæ fila, lucemque reddebat: ita ut composito Horologio, ad quam dominus destinasset noctis horam, & à somno excitari, & lumine juvari solius Horologii ope, unusquisque accubans posset: quæ similiter Horologii compactio, per æris crepitum pulsans ac notans horas, Plinii temporibus in usu non fuit.

C A P. XVIII.

De Boethio Severino.

PRAETERMITTENDVS minime à me est tanti viri casus: qui cum summæ auctoritatis & existimationis apud Teodoricum esset, ut plures ejus *Epistola* ab Aurelio Cassiodoro relatæ declarant, mox ab ejusdem Regis gratia decedens in præceps ruit, ex sola suspitione, quod patriæ libertatem affectaret. Relegatus itaque Papiam turri inclusus diu retentus est, quæ turris sita est prope Monasterium Beatæ Annunciationi dicatum; nomenque à Boethio sumptum hoc tempore servat, vulgo *Turris Boethii* nuncupata. Quo denique viro Theodorici jussu interempto, conditum ejus corpus honestissime à Papiensibus fuit in templo Sancti Petri in Cælo aureo, quod nunc Divi Au-

A gustini dicitur, ejusque sepulchrum ornatis verbis inscriptum adspicitur, qui & defuncti viri præstantiam, casumque, & Theodorici injustitiam attestantur. Caveant igitur, qui magnorum Principum aura elati honoribus funguntur, ne levi rerum motu aura in procellam versa, à sedibus dejiciantur, quod mea ætate Romæ, & Parisiis, pluribus contigisse memini, qui utrique Curie aliquando imperantes, tandem in curialis calamitatis casus demersi sunt.

De Burgundia Regno digressio.

MAGNI interesse puto Burgundiæ Dominos, qui nunc Archiducis titulis funguntur, olim Regum stemmate fuisse celebriores: quoniam Regno etiam exciso, Regiam fuisse provinciam honorabile est. Cur autem titulus fuerit immutatus, non satis teneo: sed in conjecturam eo, quod quando Burgundia uno dominio continebatur, nec alterum superiorem agnoscebat, tandiu Regio nomine insignis fuit. Dominio deinde ipsius provincie in partes diviso, quod post Condibaldi tempora primum contigit, Claudii Francorum Regis filiis materno jure ac jussu Burgundiam invadentibus, ac pro parte ad Crothochilidis matris putum sibi ipsis adjicientibus, imminuta provincie potestas, simulque Majestas fuit, ac temporis tractu Regia nominatio in alium titulum transmissa.

BERNARDI SACCI,

PATRITII PAPIENSIS,

HISTORIAE TICINENSIS

LIBER VIII.

C A P. I.

De Annodio, Episcopo Ticinensi, ad hæreticum Imperatorem misso.



ALTERA lux post Epiphanium in Italiæ decus, ac Romanæ Ecclesiæ propugnaculum, à Papiensibus tumultis emerfit, Ænnodius Juvenalis, genere inter Ticinenses claro atque antiquo, sed rerum peritia ac dicendi acumine ipse præclarior. Is patriæ Episcopus constitutus tanquam biceps gladius, aut quasi coluber in Orientales Principes hæresi pollutos insurrexit: destinatusque Legatus ab Hormisdæ Romano Pontifice ad Anastasium Constantinopolitanum Imperatorem in hæresim collapsum, una cum Fortunato, Venantio, & Vitali, audacter, constanterque, Pontificis jussu Imperatorem increpando exsecutus est, ut refert Paulus Diaconus libro VII. & Platina in *Vita Hormisdæ*. Iratus itaque Imperator eos viros puppi, naufragio faciendi aptissima, collocari, ac sine veli, clavique regimine maris periculo committi jussit; adjecto interdicto, ne Græciæ littora attingerent. Sed major Dei virtus, ac bonorum virorum fortuna, quam Anastasii impietas fuit: navicula enim miraculo servata in portum omnes evasere: cujus viri merita studens Romanus Pontifex omnibus testata facere, Ticinensi Pontifici plura indulgit privilegia,

D quibus nihil fere ab Archiepiscopo dignitate differet. Insuper etiam primum sessionis locum illi ipsi, à sinistra Romani Pontificis, certis casibus inter alios Episcopos tribuit. Vixit in Episcopatu Ænnodius annos circiter viginti sex, ab anno quadringentesimo & nonagesimo, usque ad annum quingentesimum & sextum decimum: in quo tempore colligendo accuratus fuit Paulus Diaconus: contra autem quidam meus civis, temporibus minus rite collectis, apertos errores scriptis inseruit.

E Notant hoc loco Scriptores, primam hanc animadversionem fuisse, quam Romanus Pontifex in aberrantem Imperatorem exercuerit, cum lenitate verborum potius quam anathematis potestate anteacti Pontifices usi in Principes fuissent: in qua potestate exercenda cum Ænnodius, ejusque collegæ inermes, Imperatorem furore ac telis armatum adierint, & Romanæ Ecclesiæ nomine corripuerint, præclarum facinus, longeque memorabilius, ediderunt, quam si armata manu in hostili acie conflisissent; quoniam ad certum pene vitæ discrimen sola animi virtute freti in alienas vires sese conjecerunt, nullis ipsi viribus dimicaturi, sed ratione tantum Christianam religionem adversus Imperatoris furorem asserturi; quæ quidem animi virtus major quam humana, riteque divina, visa fuit. Prohibet me plura de Ænnodio scribere ejus sepulchri inscriptio, quæ in Divi Michaelis templo Papiæ inspicitur, literarum figuris ferme vetustate exesis: quod templum ante Gothorum incolatum ædificatum fuisse constat: ipsius autem sepulchri carmina subscripta;

En-

*Annodius vates lucis rediturus in ortum,
Hoc posuit tumulo corporis exuvias.
Clarus prole quidem, generosior ipse propinquis,
Quos functus laudum jussit habere diem.
Reddidit hos cœlo vivacibus ille figuris;
Cum fecit fama vivere colloquiis.
Quid mirum, si morte caret post busta superstes,
Qui consanguineos restituit superis?
Quantis ille foret mundi celebratus in oris,
Nec silet occidui cardinis oceanus.
Schismata conjunxit dudum discordia legi,
Atque fidem Petri reddidit Ecclesiis.
Pollens eloquio, doctrina nobilis arte,
Restituit CHRISTO innumeros populos.
Largus, vel sapiens, dispensatorque benignus,
Divitias credens, quas dedit ipse * suas.
Templa Deo faciens, hymnis decoravit & auro,
Et paries functi dogmata nunc loquitur.*

DEPOSITVS SVB D. XVI. KAL. AVGVSTAS,
VALERIO V. C. CONSVLE, Anno 516.

Monere Lectorem libet me scripsisse verba, omiſſa priscæ ſculpturæ ruditatē, in qua *b* pro *v*, veluti *exubias* pro *exuvias* scriptum est, & *i* pro *e*, ut *vatis*, & *superstis*, pro *vates*, & *superstes*, & alia, quæ indicant viguisse in nostris regionibus ea ætate ruditatem priscorum populorum. Familia autem Juvenalis ipsa fuit, à qua fuit ædificatus pagus non longe à Carthusio Monasterio Papiensi celeberrimo, *Juventianus* appellatus: quæ quidem nobilis familia centum ferme ab hinc annis desit esse in humanis, Juventiano pago, vulgo *Giovenzano*, in diversos distracto. An autem Juvenalis familia à Latio, Sabinisque, & finitimis oriunda, conjuncta nostris Ticinensibus agnatione fuerit, divinare potius quam scire possem: agnovi enim Romæ Latium Juvenalem virum præstantem: quare illis omiſſis ad meum opus redeo.

C A P. II.

De Pontificia Imperatoris coronatione, & unione.

MAGNA hoc tempore accessio Christianæ Religionis in ipso rerum humanarum turbine facta est, Anastasio in primis Orientali Imperatore, pessimo homine, fulgure interempto: cujus loco succedens Justinus modestus Princeps in hæreticos insurrexit. In Occidente quoque Claudius Francorum Rex, qui Crothochilidis genere Burgundiæ nuptiis & religione ad Christi fidem devenerat, in hæreticos ea ætate Gothos, Galliæ partem Pyrenæis finitimam incolentes, arma exercuit, atque intra Vasconiarum terminos magnis cladibus compulit. In Meridie pariter Hildericus à Vandalis oriundus, & in Africa natus, omnes Christianos ex antea parentum suorum persecutione ab Africa profugos in sua restituit, & hæreticos confestim à suis finibus fugavit. At non similis tibi successus, infelix Italia, fuit: Theodoricus enim Rex à recto tramite fidei torquens oculos, fovere hæreticos contra Justiniani Imperatoris institutum aggressus est: itaque Joannem Romanum Pontificem, aliosque claros viros, ad se evocatos, minisque terrefactos Constantinopolim pergere jussit, ut Justinum Imperatorem, qui hæreticos ab Ecclesiis ejicere cœperat, ab incepto revocarent. Perrexerunt mitissimus Pontifex, ac sua dignitate posthabita Italicæ salutis causa Legatus Constantinopolim ivit, ne hæreticorum gratia in iram percitus Theodoricus, adversus Italos (quod jam minabatur) insæviret. Sed fregit ipsius Regis rabiem factorum series, atque potentia, & quo major Pontificis summissio fuit, eo dignior effecta est legatio atque proſectio. Justinus enim, Pontifice & Comitibus honorificentissime receptis, ejus monita secutus, hæreticos ad tempus

* Alii legunt *esse*.

A ferre minus malum censuit, quam Italiam Theodoricō subjectam ejus furori prodere, ac furentem magis irritare: recte quidem, veluti si quis invadente incendio tecta, partem, in qua furit ignis, demoliatur ac separet, ut quod corrumpi cœptum est, tantum pereat, reliqua parte servata; sic tolerare eo tempore malos, bonosque eodem actu à perniciē servare, prudentius fuit, quam hæreticos expellendo, Italos simul perditioni dedere.

Sed aliud longe majus decus, aliudque excelſius honoris culmen in ea proſectio, Romanæ Ecclesiæ, Deoque æterno nostro Principi, adjectum fuit. Pronus in Pontificis majestatem Imperator Imperii Coronam solemnī pompa & reverentia de manu ejus sumere ac gestare dignum putavit. **O** felix, faustumque, regnum, quod non impia, aut inquinata manus, sed Divina Majestas in terris sanxit, sui que Vicarii auctoritate firmavit! ut alter ab altero Princeps firmamentum sumeret, ac religionis dignitatem sociā potestate custodiret. Joannes enim Pontifex tanquam summus Dei Sacerdos Imperatoris consensu, ipsi Imperatori eo actu prælatus est: Justinus vero Imperator, tanquam ejusdem sacerdotis, sacerdotique miles, & Christiani gregis custos ac propugnator Apostolico stemmate insignitus & approbatus est. Conjuncta itaque divinitus, ac connexa inter se, hæc munera sunt: quæ si quis dividerit, aut Christiano ovili periculum, aut sibi ipsi labem contraxerit. Verumenimvero illa tanta dignitas non sine ipsius Pontificis molestia acquiri Romanæ Ecclesiæ potuit: adeo honoris magnitudini appositā plerumque hominum invidia, & obſectatio est. Audita enim hujusmodi coronatione Theodoricus, expavit, & mutatis, siue præcipitatis moribus in sacrilegium ruit, Joanne Pontifice una cum sociis, à legatione reversis, carceribus inclusis: ubi diu male habiti (impium dictu) defecerunt, tertioque exacto mense Theodoricus, divina ultione ex pavore in languorem versus, illorum virorum funus secutus est.

C A P. III.

De Gothici Regni variatione.

DECLINARE mortuo Theodorico Gothicum genus in Italia, & Regnum cœpit, quod ab ejus adventu circiter septem & triginta annos duraverat. Primaque Gothis plaga illata à Gallis fuit, Provincia, quæ juris Italici erat, Athalarico Regi puero ab ipsis Gallis adempta. Quo puero mortuo Amalifuntha matre, prudenti Regina, superſtite, & Theodato in Regni administrationem adſcito, recuperata postea eadem Provincia à Gothis fuit, Italis militibus eo primum tempore adversus Theodebertum Metensium Regem conscriptis, ipsisque Gothis in bello gerendo conjunctis: stetitque tantisper in Principum existimatione hoc Regnum, quoad ipsa Amalifuntha Theodorici filia illud rexit; qua sublata Theodati consilio atque facinore, labare simul Regni auctoritas ejus detectis flagitiis cœpit, inter quæ Arianam perfidiam, ingratitudinem, avaritiam, & ebrietatem, siue violentiam, ei præcipua fuisse omnes Scriptores tradunt. Contemptibilis itaque morum suorum vitio Theodatus effectus, contemptibile similiter Regnum suum Principibus fecit: irritavitque valde Justiniani Imperatoris animum, qui Justino avunculo in Orientali Imperio successerat, hoc maxime facinore, quod Agapeto Romano Pontifice defuncto, Theodatus ipſe antiquo ritu, Silverium Summum Pontificem eligi sine Imperatoris approbatione jussit: excanduit tum in Gothos Justinianus, bellumque dissimulato apparatu, quasi in Africam classem transmissurus, Gothos in Sicilia intulit, qua subacta Sicilia, Belisarius Justiniani Dux in Italiam copias trajecit, ac Neapolim & Campaniam

niam simul subegit. Sed dum facile putat eodem militum apparatu Theodatum imbellem hominem, ac suis odibilem, è Regno pellere, eoque consilio Belisarius in Latium tenderet, Gothi è contrario Vitigio Rege constituto, & Theodato occiso, omnem belli rationem mutant, atque in quinquennium sub ipso Vitigio adversus Belisarium vario rerum eventu bellum gerunt. Quo quidem in quinquennio plura Italici populi, quam Gothi, illata detrimenta fuere, præcipue Neapoli, Romæ, & Mediolano, dum nobiles civitates, aut uni, aut alteri parti adhærere student, ac sub ejusdem partis præsidio se tutiores futuras opinantur, mox destitutæ ab eo, cui sese dederant, sub alterius sibi infensæ gentis potestatem recidunt, ac direptionibus lacerantur: quod omnino malum, sive nimia Belisarii audacia, cuncta præter vires suas aggredientis, sive affectata populorum credulitate, sive fato evenit, satis superque constat, plures populos tam à Justiniani Ducibus, quam à Gothis consumptos fuisse. Quinto anno Belisarius sæpe, & virtute, & dolis præcipue sub induciarum tempus usus, Vitigium Regem intra Ravennam obsessum, variis promissionibus ad deditionem traduxit: quo Rege recepto, classemque cum thesauro imposito tanquam victoriæ compos Constantinopolim ad Justinianum navigavit, Italia suis Ducibus, militibusque, commendata. Illi autem Græca ac militari rapina imbuti, post Belisarii recessum ad perniciem Italicorum populorum intenti solis exactionibus ac tributis animum adjecerunt: quod Justiniani etiam jussu, jam ad avaritiam declinantis, factum fuisse omnes Scriptores ajunt, & in primis Procopius in principio tertii libri; Leonardo Aretino tertio similiter libro idem scribente. Blondus quoque libro quinto primæ Decadis idem ait, Sabellico, & Merula, aliisque assentientibus. Bellum itaque, quod ad delendum in Italia Gothicum Regnum à Justiniano susceptum initio fuerat, verum postremo ad Italiæ expilationem ejus jussu manifesto apparuit. Gothi itaque in hac Orientalium Præfectorum ac militum avaritia & segnitie excitati, resumptis animis, viribusque, plures Italiæ populos, præsertim Transpadanos, à Græcis aversos, sibi conjunxerunt, creatoque Ildovaldo Rege, & exercitu contracto Orientales Duces à Circumpadana Italia ejecere. Atque eo modo Gothicum Regnum, quod pene interierat, ante biennium, gentis virtute & Orientalium incuria & avaritia, instauratum fuit, circa annum Salutis nostræ quadragesimum secundum præter quingentesimum.

C A P. IV.

De Regia sede Papiæ constituta.

INSTAURATO in Italia Transpadanorum ope Gothico Regno, Justinianique militibus in inferiores oras circa Flaminiam depulsis, sedes ipsius Regni Papiæ omnium assensu constituta fuit. Cur autem in ea potius quam in alia civitate locata Regia fuerit, varia est Scriptorum sententia, alio aliam causam recensente. Blondus, in *Italia descriptione* regione septima, situs amoenitati & aeris salubritati hoc tribuit. Merula lib. 1. *Historiarum* alias plures causas refert: in primis quod civitas sit fluviorum præterlabentium domina: item, quod illis intersecta fluminibus regio ipsa sit munitior, & per consequens urbs ipsa, & ad expugnandum, & ad obsidendum difficilior, fluviorum scilicet tripartitione castrametationis divisionem necessario exigente; cujus rei impendio omnes Principes æque non sufficiunt, urbe ipsa, si ab una tantum parte oppugnata, vel obsessa sit, ab altera sine

A discrimine auxilium recipiente, hostemque remorante: item, quod fructuosis (ut ait) campis, & præcipue frumentariis, circummunita sit, quorum annona & populi, & exercitus copiose alii possunt, ipsis fluminibus commodiorem ac promptiorem importationem facientibus, maxime cum tripliciter, ut superius retuli, in unum flumina coeant ab Occidente, ac Oriente, & Septentrione: Siccida etiam & Tanaro carinas à Liguriæ & Læumellinæ finibus in Padum deferentibus: clarumque Papiensis annonæ ac ubertatis documentum ad hujus rei approbationem sumere ex eodem Blondo licet, libro III. primæ Decadis, ubi notat, sub Theodati regimine tributa fuisse Liguriis & Æmilienfibus populis alimenta ex Papiensi & Derthonensi horreo, Italia tum in summa penuria constituta.

B Magna igitur Deo naturæ Domino habenda à vobis, Ticinenses, gratia est, quod ejusmodi facultatem vestris agris, colonisque tribuerit, ut aliorum sublevare egestatem in publica Italiæ inopia vestra annona licuerit; quod & aliis temporibus contigisse Scriptores memorant, & mea ætate evenisse anno illo insuetæ penuriæ millesimi quingentesimi & quadragesimi, memorabile fuit, in quo mille & amplius colonorum familiæ, collectis sarcinulis, famem fugientes à Bononiensi, Mutinensi, & finitimis agris in Papiense solum, frugibus refertum, commigrarunt, exemptaque apud nos fame, & rerum penuria fugata, nostrates effecti sunt, ac soluti inopiæ curis nostris imperant arvis, & frumenti acervos suo labore in nostra rura conferunt, alienisque, nedum nostris, incolis victum tribuunt, quasi in nostri territorii copia, vel inopia, fatalis aliorum etiam Populorum saturitas, vel indigentia, sita sit. Quod autem ad Regiæ sedis constitutionem pertinet, sive aeris puritas & clementia, sive situs munimen atque aptitudo, sive annonæ varietas, ubertasque, sive perspecta ex præteritis rerum periculis, & casibus, civium fides ac integritas, sive potius, ut ego arbitror, Dei providentia, Papiensium religioni tunc maxime vigenti favens, in causa fuerit, satis mihi est dicere, Urbem, ac Populum dignum illa ætate existimatum fuisse, apud quem Sedem suam locarent illi ipsi Principes, qui Italiæ imperitabant. Quam quidem ex re, etsi Regii nominis honor in Papiensibus tunc constitutus non fuit, Regiæ tamen familiaritatis, sessionisque, compos ac digna effecta civitas ipsa eo actu fuit: & qui demum honor quanti faciendus sit, Regno etiam abolito, ahibi patebit. Nunc ad Gothos redeo.

C A P. V.

De supremo Gothorum bello, & Longobardorum dimissione.

E GOTHICI Regni sede Papiæ locata, ac Totila viro pugnacissimo Rege constituto, crevere mirum in modum Gothorum vires. Ille enim ex Duce Rex effectus, redeuntem è Thracia Belisarium militari virtute deterruit, Roma ipsa in ejus prope conspectu, & in Justiniani Imperatoris contemptum excidio tradita. Quo demum Gothorum invalescente robore, & Græcorum sive Orientalium flaccescente vigore, ac Belisario intra quinquennium nihil in Italia præclare gerente, Justinianus sive rebus suis timens, sive verecundia motus, Italico bello conficiendo animum adjecit. F Revocato itaque Belisario, Narseum Ducem, ab aliis *Narsetem* appellatum, cum magnis, variisque copiis gentium, apertis illi Græciæ thesauris ad exercitum traducendum in Italiam destinavit. Quo quidem Narseo impigre ac prudenter res gerente Gothicum Regnum quatuor ferme certaminibus egregie com-

commisiss deletum fuit. Primum certamen navale fuit apud Anconam urbem in Adriatico mari, Narseo nondum Italiam ingressō, ubi triginta septem naves ex Gothica classe periere. Alterum terrestre fuit ad Brixillum oppidum Pado finitimum, quo in loco Totila Rex praelio incumbens à Longobardis equitibus, qui in Justiniani auxilium ad quinque millia è Pannonia venerant, interfectus fuit, Narseo tum in Flaminia agente: quod quidem praelium subobscurè Aretinus libro iv. Procopium minime hac in re secutus enarrat, Blondus autem late explicat libro vii. in cuius sententiam concessere reliqui Scriptores, praesertim Platina in *Vita Pelagii*, & Sabellicus libro iv. *Enneadis* octavae: ita ut Procopii historia in libro iii. à nullo videatur approbata. Addendo ex Pauli Diaconi & aliorum attestationibus, Longobardos equites post Brixillianam victoriam magnis muneribus ornatos à Narseo confestim dimissos fuisse: cuius repentinæ dimissionis causam, Gothico adhuc vigente bello, Sabellicus paulo infra ex Tejae Gothici Regis oratione aperit his verbis: Enimvero Longobardi post Brixillianam pugnam, quia suspecta erat illorum fides, tanquam sibi potius vellent vincere quam Græcis, continuo ex Italia dimissi sunt, docens veritum fuisse Narseum, ne Longobardorum manus nimis in eo bello invalesceret, quandoquidem in primo campestri certamine tam feliciter Totilam virum acerrimum cum suo exercitu superasset: cuius Narsei suspicionem subsecutus postea Longobardorum in Italiam adventus apertissime comprobavit. Totila igitur Rege cum exercitu à Longobardis cæso nono Regni sui anno, fractæ Gothorum vires secundo loco fuere. Insurgentiam Tejas, vir genere Gothus, in Italia natus, Regno suscepto, Gallos sibi fœdere junxit, ac instaurato in Transpadanis urbibus exercitu bellum renovavit, & Narsei victoriam vario rerum eventu præter biennium remoratus fuit. Denique in Nucerinis montibus Brundusina prodicione amissa classe, quæ ejus exercitui victum suppeditabat, Narseo congressus ipse Tejas fortissime dimicando usque ad noctem protracta: quæ quidem pugna tertio loco commissâ memorabilis fuit Gothi Regi amissâ, & commeatu deficiente, nusquam pedem referentibus. Luce insecuta supremum sine Rege Gothi certamen renovant, aut mortem, aut pacem ferro assecuturi. Pugnatur utrinque acerrime, stant invicti animi, corporibus inedia, praelioque, defessis: denique Gothorum constantiam admiratus Narseus, pacis potius condiciones admittere, quam suos in incerto praelii eventu, atque discrimine periclitari statuit, signoque edito pacis ineundæ suos à cruento certamine retraxit; paxque inita fuit, Gothici Regni mentione ab Italia sublata, & Gothi ipsis sine Romani Imperii subjectione, pristina libertate retenta, cum suis rebus ab Italia recedere permissis.

Pace confecta anno septuagesimo secundo, quo Gothi in Italia regnare cœperant, & anno quinquagesimo quarto supra quingentesimum à partu virgineo, Narseus Romam rediens religionis causa, ut bene institutum virum decuit, supplicationes publico ordine ac conventu Deo solvit ob Gothicam victoriam, ut memorat idem Platina in *Pelagii Vita*: quod post Theodosium Imperatorem raro factum observavimus; adeo divini numinis honor illis Ducibus ac Regibus parum cordi fuit. Recedentibus autem ab Italia iis Gothi, qui, ut dixi, apud Nuceriam pacem pepigerant, minime quievit ab armis aliæ Gothorum reliquæ per Italiam dispersæ: sed conjunctis cum Gallorum copiis suis turmis varios tumultus excitavere, quos partim Narseus, partim Dagisthæus compescere, Italia ipsa ab externorum dominatu liberata,

A & Orientali Imperio restituta. Finis is Gothici regni, bellique, in Italia fuit. In quo describendo omnes Auctores uno consensu Gothorum gentem in bello gerendo, & viribus, & disciplina enituisse tradunt. Præcipue Aretinus in fine operis sui, & Blondus libro vii. Sabellicusque, cuius hæc sunt verba: *Nec deleri poterant Gothi, cum animum morti despondissent, sine insigni cæde eorum, qui victores futuri essent.* In qua quidem gentis commendatione, tot clarorum Scriptorum testimonio approbata, unus post mille annos Rhetor repertus fuit, qui in Gothorum ossa & cineres convitia suscitavit, latrones eos ac prædones inscribens, & Papiam urbem non Principum Regiam & sedem, sed illarum belluarum infame lustrum, ac latrocinii haram, & receptaculum fuisse, minimeque Gothi Regem habere licuisse, ac subsequenter etiam nullam civitati, quæ illius gentis Regia fuerit, dignitatis memoriam impendi oportere: cum serva potius alienorum, quam Regia statio visa fuerit. Addens idem Scriptor Ostrogothorum gentem, Longobardorumve, irrupisse in Italiam anno à partu Virginis quingentesimo sexagesimo octavo, Justino secundo imperante: cuius viri scripta cum Ostrogothorum adventum Longobardis immisceant, satis superque indicant, parum scite eum scripsisse, qui eas nugas effudit, cum diversi inter se Gothi, sive Ostrogothi, & Longobardi fuerint gente, lingua, regno, atque adventus tempore: octogintaque & sex anni intercefferint inter utriusque Regni initia in Italia habita. Ne igitur tam impudens succlamatio notæ insignia impingat atque inurat illis ipsis, qui notæ expertes & à calumnia mundi sunt, hujus declamatoris scripta abesse à veritate ostendam.

C A P. VI.

Abolutio nota in regiam Papiæ sedem confecta.

D O M N E S sui juris gentes Regem sibi constituere posse Jure Naturæ, quod etiam Gentium dicitur, receptum esse patet, in lege quinta libro primo *Digestorum, de Justitia & Jure*, his verbis: *Ex hoc Jure Gentium fuerunt discreta gentes, regna condita, dominia distincta, bellaque introducta, &c.* Quæ constituendi Regis potestas permixta in primis à Deo est, ut Samuelis *Historia* probat libro primo *Regum*, octavo capite, ubi ad populi postulationem invitatus Samuel regium jus sancire ac contestari Dei monitu jussus est. Idemque aliis gentibus tributum Divina permissione Isaias Propheta in Cyri Regis persona notat capite quadragesimo quinto. Paulus insuper Gentium Doctor passim in suis *Epist.* Regium jus prædicat atque observat. Cum itaque unaquæque gens alteri non subiecta Regem sibi adsciscere queat; ergo etiam Gothi, sui juris effecti, Orientalis Imperatoris dominio, stipendioque, rejecto, Regem sibi statuere Gentium Jure potuerunt. Item cum habere Regem suo jure potuerint, eodem simul Gentium Jure bellum indicere atque inferre aliarum nationum ritu & exemplo potuerunt. Etenim si Assyrii, Persæ, Medii, Scythæ, Parthi, Galli, Macedones, Afri, Romani, & alii, suis egressi finibus aliena regna evertere, bellaque de imperii dignitate gerere, præclarum existimarunt, laudemque in ea re assecuti sunt, quis plane dubitet, hoc itidem aliis nationibus, sive Gothi, sive Longobardi, adversus illos populos, quibus cum imperii contentio exstiterit, licuisse? quis, inquam, bellum gentibus ex causa inferre, referre, vicesque fato rependere, ac victorem olim populum sibi virtute subigere, lege naturæ inhiberi dixerit? cum in privatorum etiam contentionibus idem ferme Romano jure constitutum sit, ut quod quisque juris in alium statuerit, ipse eodem jure utatur: lege-

que etiam divina caveatur, eadem mensura remediendum unicuique fore, qua ipse aliquando mensus fuerit?

Naturæ igitur ratione probatum est, ut quod unaquæque natio sibi licuisse in alteram censuerit, illi alteri similiter idem in seipsam licere casu eveniente consentiat. Si itaque dominari atque imperare Gothis Romanis Imperatoribus interdum licuit, pari ratione Gothis Italiam suo dominio adjicere fato permissum fuit: fatoque omnino, ac divino ordine hujusmodi humanarum rerum & regnorum volubilitas ac vicissitudo constituta videtur, ne à nobis ipsis stare ac perdurare in sceptri semper dignitate existimaremur, sed ut standi & cadendi, resurgendique, causam ad summi Dei providentiam referre cogeremur: nullaque meo iudicio facilius, aut aptior causa ad mortalium mentes, moresque, in religionis officio continendos introducta fuit, quam regnorum diversitas atque æmulatio, ut unaquæque gens in imperio constituta perspiceret, ab alterius gentis Rege, vel regno, periculum sibi oriri à vicinitate & æmulatione posse, eoque periculo edocta sciret, unum esse Deum, omnium regnorum compositorem, eundemque destructorem, à quo potestas uni adimi, & alteri accresci, unus erigi, & alter è solio dejici ad ipsius Dei votum, nutumque, posset. Clarumque nobis hujus rei experimentum Hebræa gens per Prophetarum suorum historias præbet; & præcipue per Zachariam cap. II. ita differentem: *Ecce ego levo manum meam super eos, & erunt præda iis, qui serviebant eis.* Apertius etiam cap. VII. ait: *Et dispersi eos per Regna, quæ nescierunt, &c.* Quæ demum Hebræa gens, quamvis à Deo electa fuisset, attamen in Regni dignitate posita post Salomonem sæpe Regum suorum errores secuta, à Dei cultu aversa est, Regnoque dejecta, interdum resipuit. Instant heu nimis humanas mentes perpetui honores, & à religionis tramite seducunt, nisi manus Dei continuo nobis adsit, abigatque ambitionis nubem, aut per dejectionis, depressionisque, pudorem nos cohibeat, & ad officii legem ac rectitudinem redigat. Quisquis ergo uni tantum genti jus Regni constituendi ex Imperatorum scitis ac constitutionibus suis scriptis asseruit, nimis sane ab humani & divini Juris agnitione recessit: quoniam quod Jure Gentium constitutum fuit, multo firmitus est, quam quod Imperatorum promulgationibus edicitur, quæ mutari una cum Imperatoribus, usuque abrogari, sæpe contigit. Jus vero Gentium minime eo modo mutabile est, sed omnium gentium consensu perpetuatur ac durat.

Ex quibus quidem gentibus cum Gothi & Longobardi fuerint, Jure etiam Gentium potitos illos fuisse: eodemque Jure, & Regem, & Regiam habuisse suo arbitrio, suæque potestate, clarum est. Ridiculus iccirco magis quam argutus ille Scriptor probatur, qui transacta seculis, silentioque sepulta, Gothorum jura, in Regibus olim constituendis hac ætate retexere, vertereque retrorsum aggressus est: longeque ridiculosior ejus convitiatio in mortuos jactata videtur, qui dum *latrones* Gothos appellat, latrones Patriæ suæ in primis imperasse affirmat: cujus ego honori vicinitatis causa impensius studens, Reges fuisse in Italia Gothos legitimis titulis præter id, quod dixi, Gentium Jus, ostendo. Primum, Imperiali concessione à Zenone Theodorico facta, quam Procopius, Paulus Diaconus, Aretinus, Blondus, & alii referunt. Secundo, Jure possessionis: neque enim Gothi Italiæ Regnum per Italarum injuriam, aut privationem, adepti sunt, sed per Odoacris Heruli Regis dejectionem, à quo Italia occupata fuerat. Tertio, populorum admittance & consensu; constat enim Odoacrem ab Urbe Roma exclusum fuisse, Theodorico subinde sponte recepto, & Italiæ Rege sa-

lutato. Si itaque Roma & Italia Gothicum Regnum sibi constituit, minime igitur latrones Gothi, sed Italiæ Reges, Ducesque, fuere: neque Papiæ *latronum*, ut ille mentitur, *hara*, sed Regia sedes, si-
daque Regum Italiæ statio fuit.

Verumenimvero ut hac etiam in re, in qua ille disertus Scriptor sese jactitat, suasque sine causa & ratione ostentat maledicendi vires, ut in hoc ipso pateat, quam procul ille ipse à ratione secesserit, ac in sese, suosque majores, ignominia labem verterit, fingamus, quæso, veritate semper excepta, Gothos sicarios ac immanes viros, Neronesque, fuisse: quid tum turpius, quid ignominiosius objici universæ Italiæ ab hoc Scriptore potuit, quam quod hæc nobilissima Regio per annorum spacia latronibus subjecerit? Nonne potius cogente fato honestis clarisque viris subjecisse, quam per nostrum dedecus & ignominiam ignobilibus servitutem præstitisse dicendum esset? Nonne nos ipsi subjectionem nostram eo turpiorem facimus ac confitemur, quo improbiore atque indigniores fuisse nostros Principes attestamus? Latronibus porro Gothis nuncupatis, in Italos, qui eos pro Regibus receperunt, convitium transmittitur: in primisque illa Italiæ pars convitio afficitur, quæ prior ipsos Gothos advenientes excepit: quæ quidem pars illa ipsa fuit, quæ inter Adduam amnem & Aquilejenses campos sita est, ubi fugatis Herulis primum consedissee Gothos palam est; & qua Italiæ parte subacta, Adduam postea trajecisse Gothos relatum est, Ticino urbe, Papiæ, eo tempore ab Heruliano excidio, quod perpessa fuerat, caput vix attollente, & in suis adhuc ruinis ægre versante. Si itaque inuri culpa, notaque ulla, Italicis populis ob Gothicum jugum (ut ille ait indigne perlatum) potest, ipsa certe Papiæ ab ea nota quam maxime abest, quoniam excusabilem languentis urbis deconditionem recens populi clades atque calamitas fecit; quam quidem excusationem minime in Cisadduanis civitatibus temporis & belli ratio æque admittit; quas antea à depopulationibus & ruinis intactas fuisse constat, & integras repugnandi opes sub Gothorum adventum verisimiliter habuisse patet. Aut igitur Gothos Dominos, Principesque, in Italia fuisse nostris progenitoribus turpe fuit; quo quidem casu omnis turpitudinis labes in eos recidit, qui Gothorum dominio prius quam Papienses assensere. (quos quidem Papienses postremo tempore & loco Gothis adhæsisse itineris ratio, omnisque historia, probat, cum omnia jamdudum Transpadana; quæ inter Adduam amnem & Liburniam jacent, eorum armis cessissent) Aut Gothos Italico Regno potitos fuisse, Italis turpe non fuit; cum fato potius quam casu, hujusmodi rerum commutatio eveniat: quo quidem casu nimis sane inepta, nimisque insolens, illius Rhetoris convitiatio fuit, qui rabidi canis ritu in Regum sepulchra infremuit, fœdaque simul oratione proavos & majores suos, olim Gothorum receptores & subditos, eodem impetu momordit; quos tueri potius, quam prodere, rebus jam oblivioni traditis, rationis officio omnino debuerat.

Indignius quoque est, quod objicitur, servam alienorum ex Regiæ sedis constitutione Papiam fuisse: cui respondeo; quænam civitas Italiæ, una excepta maritima, Gothis ea ætate non subjacuit? imo vero si supposita Gothi Papiæ fuit, subjectissima prior eisdem hujus Scriptoris gens & patria fuit: longeque illi ipsi civitati inhonestius fuit Gothorum ministris, servisque, subesse, quam Papiensibus, ipsorum Gothorum Reges & Duces hospitio recipere; cum nobiliorum familiaritas ac præsentia honori, ignobiliorum vero contubernium oneri & molestiæ, esse soleat. Item, quæ porro civitas regia intra Italiæ fines sita est, quæ semper gentis suæ Reges, aut Principes, in solio habue-

rit, ipsa nobis Roma rerum olim domina testis sit. Quoties enim illa Afros, Græcos, Hispanos, aliosque externos sibi imperantes etiam invita sensit? quoties nefarios & infames homines, ne dicam turpia passos, in Imperio pertulit? quoties immites, sacrilegosque, viros pro Dictatoribus, Imperatoribusque, salutavit, atque in Italiæ exitium recepit? qui non solum Italiæ partes & membra, sed urbem ipsam proscriptionibus, incendiis, cædibusque fœdarunt. Si igitur alieni generis virum Principem recipere, si immitte imperium perferre indignum fuit, nostram indignitatem suo exemplo Roma honestiorem facit: quæ non solum alienos pro Imperatoribus, sed suos etiam longe turpiores diu sustinuit, & quam demum Romam iste Scriptor pro suæ gentis genitrice observat, simul notatque, ac sibi ipsi contradictionem parat.

Ut ergo nostra digressio finem habeat, una sententia singula perstringam. Si Italia, ejectis (ut dixi) Herulis, Gothos pro Regibus recepit, habuitque, ergo urbes ipsæ regię constitutæ sub Gothorum dominio, Italico jure regię fuere, cum Italicum jus Gothis Regibus tributum fuisse manifestum sit: & quamvis postea humanarum rerum more Regnum illud evanuerit, ipsas tamen civitates regali sede potitas fuisse, honorabile est: Consulibus atque Prætoribus exemplo, qui finito Magistratu, Consularis, vel Prætorius dicitur, & à præteritæ dignitatis functione honoris elogium in civitate, vel provincia, ubi magistratum gessit, perpetuum habet, quamvis sine magistratu postea vitam ducat. A qua similitudine sequitur, quod si quis civitatem, vel provinciam, regali sede olim ornatam, nullo honore dignam duxerit, quoniam regnum ejus finierit, perinde versari in honoris distinguendi ignoratione videbitur, ac si Consulare, vel Prætorium virum, gestæ dignitatis nomen retinere nullo modo arbitretur, quod retineri palam est. Consularis enim à Consulatu præterito, & Prætorius à Prætura dimissa dicitur; sicque etiam Regalis civitas à regali sede habita appellatur: & quemadmodum unusquisque civis Consulari, vel Prætorio viro, æquari honoris ratione non potest, nisi pari dignitate functus sit; ita unaquæque civitas æquari Regali civitati in dignitatis existimatione non debet, nisi in æquali honoris gradu aliquando fuerit, vel libertatem assecuta sit, quo casu anteferenda etiam erit. Differuntque inter se hæc ipsa, civitatem regiam olim fuisse, & aliam civitatem hodie Regiam fieri posse, sicut differt actus à potentia, & constitutus à constituendo. Actus enim est, quicquid fuit, aut est, potentia vero in spe, aut in expectatione, actus futuri est; ad quem sane actum semper non deducitur, sed interdum impeditur. Dicit itaque Regia urbs ex solo statu, quod apta Regno videatur, quælibet civitas nulla ratione potest, regia sede nondum in ea locata: & cum existimari Regia, antequam fiat, nequeat, Regali pariter civitati æquari nequit, quamvis ipsa Regalis urbs functa regio honore jamdudum arguatur: quoniam regni substantia finita, minime tamen videtur finita memoria dignitatis habitæ, quam vigere, & honorem post functionem exhibere demonstravimus.

Nec convenit hoc loco objecta similitudo de Rege sumpta, qui regno ejectus in alieno solo sine dignitate versatur, ut suo etiam argumento Cremonensis Scriptor refellatur: nam cum Rex diademate amisso profugus vagatur, peregrinus & hospes est in alieno solo. Itaque cum peregrinus sit, nullum jus civitatis, aut provinciæ ubi moratur, habet, quia externus est. Quare neque Patriciis, aut Decurionibus, neque aliis provinciæ, aut civitatis, magistratibus præferri ea ratione, quod Rex olim in Libya, aut Scythia fuerit, potest: quoniam nullum jus patrium in eo loco habet, nulla-

A que dignitatis insignia possidet, ex quibus honorem sibi ipsi æqualem provincialibus eo in loco suo jure assumat. Sed diversa ratio est in civitate olim regia existente, nunc vero regia esse desinente, quia stat suo loco civium universitas, quamvis regali solio careat, priscæque dignitatis memoriam in eodem loco quoquomodo suo statu repræsentat. Stant Arces, Prætoria, Atria, Sepulchra, Insignia, & alia plura monumenta, & scripta, regni sedem attestantia, quæ nusquam in altera civitate, ubi regni statio nunquam fuerit, visuntur: & quæ quidem omnia arguunt, quicquid honoris civium universitati contigerit, in ejusdem semper universitatis decus, nomenque, referri, quia perpetua universitas est, suoque loco perstat, nec mortis casum unius Regis more subire potest, cum prole sua civitas sese muniat, atque decedenti alteri alterum in universitate repræsentanda sufficiat: quod clare Juris Scriptor Modestinus explicat, dicens, tam diu civitatis jus durare, quamdiu ipsa permaneat, *Dig. quib. mod. ususfr. amittatur. l. si ususfr. civitati*, &c.

C A P. VII.

De Justiniano Imperatore, & Romana Ecclesia jure.

C INDIGNE facere viderer, si Justiniani acta memoratu digna, mihi ante oculos posita, prætermitterem. De quo illud præcipue commemorare decet: quod ab initio Imperii sui Romanæ Ecclesiæ, atque ejus Pontificis, quam maxime studiosus fuit, promulgata constitutione, in qua ipse Imperator declarat, Romanam Ecclesiam esse Matrem, & Principem, caputque omnium aliarum Ecclesiarum, tam Orientalium, quam Occidentalium, & Romanum iccirco Pontificem omnibus præesse. Summittens idem Imperator Romano Pontifici dictæ constitutionis suæ decretum: qui Pontifex, Joannes nomine, recepta Justiniani Epistola, auditisque Hippatio & Demetrio ejus Legatis, respondit ut infra:

Gloriosissimo & clementissimo filio,

D J U S T I N I A N O
JOANNES EPISCOPVS
VRBIS ROMAE
Sal. dicit.

E INTER claras sapientie & mansuetudinis vestre laudes, Christianissime Principum, puriore luce tanquam sydus irradiat, quod amore fidei & charitatis studio docti, Ecclesiasticis disciplinis Romane Sedis reverentiam conservatis, & ei cuncta subjecitis. Cætera collige ex ipsa Epistola relata quarto loco, libro primo Codicis, De summa Trinitate, & fide Catholica. In qua Epistola inserta est Justiniani constitutio in hæc verba: Nos reddentes honorem Apostolica Sedi, & vestra Sanctitati, &c. Cui deinde adjecta est approbatio Romani Pontificis per hujusmodi verba: *Liquet igitur, gloriosissime Imperator, ut lectionis tenor, & Legatorum vestrorum relatio patefacit, vos Apostolicis conditionibus studere*, & reliqua. Quæ quidem omnia in unum collecta probant, Justinianum pluris fecisse Romanam Ecclesiam, quam sui ipsius Imperium: quandoquidem non sit ausus edere legem à se conditam, circa fidei nostræ prædicamenta, nisi impetrato prius Romani Pontificis, quem patrem appellat, decreto: aperte consentiens, Romanum Pontificem Petri vices, Petrum vero Domini JESU CHRISTI potestatem in terris repræsentasse, ut etiam hoc tempore repræsentat. Is autem Joannes Pontifex secundus hujus nominis fuit, Romanus genere, de quo Platina & alii breviuscule scripsere, prædicta historia omiſſa: quæ mihi pluris facienda visa est, quam declaratio multis post annis à Phoca Imperatore edita, in Romanæ Ecclesiæ

sæ honorem, quoniam dum Justinianus Pontificis decretum per suos Legatos circa legem suam firmandam petit, superiorem Imperio in ea re Sedem Apostolicam facit, qua superiore existente, Phocæ declaratio parum necessaria fuit, cum divina, & non Imperatoria, potestate Sedes ipsa statuta in terris sit, à qua qui aberraverit, Deum illius auctorem & Dominum vindicem habebit.

Duravit autem hæc Justiniani religio usque ad Agapeti Pontificis tempora: deinde refrigerare cœpit ipso Imperatore in fidei rectitudine sæpe titubante: lege Platinam, & alios: qua quidem animi inconstantia etiam in ferendis legibus, latisque abrogandis, usus est, ut à plerisque notatur. Nec illa juris compositio, quam aliqui mirantur & celebrant, digna commendatione est: ordo enim rerum omisus in componendis legibus fuit. Realia passim cum Personalibus, Civilia Jura cum iis, quæ Juris Gentium sunt, Prætoria cum aliis, & è contrario, immiscentur. De acquirendo rerum Dominio, & possessione, quæ sunt prima hominum Jura, in extremis ferme Digestorum partibus translata leguntur. De rerum divisione titulo præposito, longeque collocato. Item quod uni titulo, sive inscriptioni, subjiendum erat, procul ab eo alibi refertur. Pacta, quæ contractibus interponuntur, ante contractuum notitiam ac traditionem collocantur. Publica Jura, veluti de Jure Fisci, de re Militari, de Decurionibus, & alia, privatorum obligationibus postponuntur, quæ multo aptius conjungenda videbantur cum juribus ad publicas personas referendis, ubi tractatur de Senatoribus, de Officio Consulibus, Præfecti Urbis, Quæstoribus, Prætoribus, & aliorum Magistratuum. Denique ut agnoscas inconditum atque inordinatum opus in ipso Digestorum limine, inspicere licet Titulum primum de Origine Juris, §. Juris Civilis scientiam: ubi cum proponuntur enumerandi Juris Scriptores, quinquaginta viri mittuntur, à quibus major Digestorum pars confecta fuit. Quos quidem hic recenseo:

Aristo,	Ostavenus,
Arianus,	Priscus Jabolenus,
Archadius,	Priscus Neratius,
Africanus,	Priscus Marcellus,
Annelius Maximus,	Priscus Fulcinius,
Celsus Julius,	Papinianus Æmilius,
Celsus Subentius,	Puteolanus,
Celsus Marcellus,	Paternus Valerius,
Claudius Hermonianus,	Paternus Terentius,
Coccejus Campanus,	Rutilius,
Cajus Flaccus,	Ruffinus,
Callistratus,	Sextus Pedius,
Flavius Mella,	Sextus Pomponius,
Florentius,	Scævola,
Furius,	Saturninus Claudius,
Haburnius Valens,	Saturninus Mutius,
Hermogenes,	Saturninus Vennulejus,
Herennius Modestinus,	Triphonus,
Julianus,	Tertullius,
Junius Gratianus,	Terentianus,
Justus Papirius,	Valerius Severus,
Julius Paulus,	Vindius,
Julius Tertullianus,	Volusius Matianus,
Mauritianus,	Ursejus,
Martianus,	Ulpianus,
Marcus Blandua,	Valentinianus,
Macer,	Et alii.

Istorum enim virorum mentio habenda in illa enarratione fuerat, ut eorum industriæ ac disciplinæ ratio exigebat.

Plura alia referre possem ad indicandum operis Justiniani incompositionem: à qua demum effectum est, ut fuerit necessaria posterorum cura, atque sedulitas in conjungendis Codicis & Authenticorum innovationibus cum Digestorum Juribus, in multis abrogatis, & in distinguendo casus, sive

A propositiones, aut similitudine pares, aut ex parte dissimiles: & in iis conciliandis, in quibus vis contradictionis inesse apparuit. Quo quidem in negotio Actius Bononiensis, vulgo Azo dictus, diligens Scriptor fuit, & sese Triboniano, & aliis collegis ejus, doctiorem in eo munere obeundo probavit. Sed heu infelix nimis seculorum status Juris Scriptoribus fuit! Mille enim, vel paulo minus, anni intercesserunt à Justiniani Imperio ad Carolum Quintum Imperatorem, in quibus vix quisquam ex Imperatoribus in Juris communis volumina detergenda oculos vertit, sed suo quisque arbitrio in subjectis provinciis leges tulit Juri communi adversantes. Hinc Scriptorum copia crevit, crevitque simul dissensio, casuum etiam varietas ac multitudo excrevit. Rerum deinde, & personarum, Principatum, ac Regnorum immutatio subsecuta, multa ademit, vertitque in diversum. Pontificum quoque Romanorum scita, canones, interdictaque plura subverterunt, aliaque immensa introducere volumina. Populorum denique Jura, quæ municipalia vocant, suam similiter copiam ac variationem effuderunt. Quæ quidem omnia Juris peritiam in opinionum certamina deduxerunt. Unde communis opinio dicta illa est, quæ numero, non quæ sensu, præstantior apparet. Hinc etiam consilia peti, scribi, edique necesse fuit. Tandemque Juris facultas atque peritia ab artis similitudine in dissimilitudinem ac difficultatem traducta est. Dolere itaque vicem istius confusæ artis non solum Justiniani causa, sed etiam successorum possumus, qui expurgandis defunctis, antiquatisque juribus, peritos Viros sua quisque ætate non adhibuerunt. Sed Imperatorum culpam leviolem facit Pontificum incuria, qui suum Jus Pontificium in simili fere rerum commixtione passi sunt versari.

Nemo tamen hæc legens, deterreatur à Juris facultate agnoscenda, quoniam ingenio præditis, studiumque adhibentibus scientiæ, etiam confusæ, in lucem vertuntur, & quamvis plurima circumferantur Jura Regnorum & Populorum, Juri communi adversantia, attamen ad istius Juris fontes peritiæ causa descendere oportet. Ab eo enim rerum, & personarum, obligationum, actionum, exceptionumque capita, sive argumenta, elicimus. Ab eo petimus regulas contractuum, successionum, substitutionum, legatorum, dotium, alimentorum, & cætera ad impuberes spectantia. Ab eo divisiones bonorum facere, servitutes constituere, & communionem inter sociosnectere discimus. Quisquis igitur istius facultatis penetralia adire optat, minime difficultates à me enarratas pertimescat, subeat laborem virtute duce: labor enim virorum est, quem sequitur oblectatio cognitiæ disciplinæ; disciplinæ autem cognitionem sequitur præstantia animi, qua quis honorificentia dignus efficitur: cum unus peritus plura scire videatur, quam universa civitas, illum unum omnes adeunt, consulunt, audiuntque

Ludovicus olim me puero Gallorum Rex, & Mediolani Dux, Jafonis Maini fama commotus Papiæ moram fecit, ut tantum virum Jura legentem audiret: ingressusque auditorium manu silentium indixit, vetuitque scholasticos juvenes loco cedere. Sedit itaque Rex quasi unus ex illis, centum illic adstantibus nobilissimis Proceribus. Auditum deinde Jafonem commendavit, sociumque sibi adesse à latere operto capite in egressu honoris causa coegit: Togæque auratæ, id est, aureo filo contextæ, munere ipsum honestavit. Vide igitur quid unius viri præstantia in orbe possit, quando Regi Francorum in Italia Jurisperitum audire jocundum sit. Commode quoque Juris facultas adhibito ordine percipi poterit, scribendi cura adjuncta, de qua alibi fortasse aptius.

Revocat nunc me ad historiam prosequendam Longobardorum genus; cuius originem Paulus Diaconus, qui Longobardus fuit, & Sigibertus ad Uvinulos refert: quod ridiculum & fabulosum puto, præsertim quod de Gambarà muliere fertur. Longe quidem antiquior Longobarda gens est, quam censeant Neoterici, sive posteriores Scriptores: quod apertissime probat Cornelius Tacitus *Langobardos* eos appellans, cuius Cornelii auctoritatem sequens, referam sequenti Capite quæ ad eosdem attinent, Cornelii verbis similiter recitatis.

C A P. VIII.

De Longobardis, & eorum reditu in Hungariam.

REVERSI in Hungariam Longobardi, qui Brixillensi victoria insignes, à Narseo dimissi fuerant, Regi, & Proceribus, ac suis quisque familiaribus referre, quæ regio Italia sit, quæ planities, quæ flumina, quæ oppida, urbes, opeque illius sint, qui victus, qui mores, quæ hominum ingenia, aliaque explicare, & in populi cœtum sæpe enarrare rogati sunt. Vicit tamen omnium relationes unius Landulphi Ducis oratio, Alboino Regi, & Proceribus, Italiæ situm in Circumpadano tractu describens. Ampla, ait, planities est illa pars Italiæ, quam perlustravimus, montium corona ab omni latere præterquam ab Oriente circumclusa, à quo Oriente Adriatici Maris sinu regio circumvolvitur. Medium ferme planitiei latissimus fluvius interfecat, ab aliis fluminibus aquarum incrementa sumens, & ab ipso montium Occidentalium limite in Adriaticum Mare divisus partibus fluens: Padus is dicitur, quasi omnia sibi finitima aliquando pandens, undisque subiciens. Utraque regio Cispadana & Transpadana fluminibus & rivulis aptissime discreta ac referta est, quibus facili aquarum meatu humiliora loca irrigantur, passimque etiam molendina evolvuntur. Patent ibi ad prospectum dispositæ suo ordine arbores, aquarumque ductus circumstant, & virentia prata in medio excipiunt: hæc autem prata durante æstate alternis mensibus secantur, & ipsa denique abeunte æstate pascuntur. Longa nimis oratio erit, si referam campos, vineta, pascua, saltus, colles, nemora, venationes, aucupia hyberna, æstivæque, lacus, piscationes, navigationes, & alia commoda: quid dicam majus? Aurum & vitrum flumina, olei materiam innumeræ arbores, fruticesque, ferunt. Salem quoque, & ferrum, montes, incolis inquirentibus, pluribus in locis evomunt. Adeo omnia in rerum opulentiam à natura veniunt. Incolæ ipsi benigni & hospitaes sunt, & agrorum culturæ quam maxime incumbunt, gregesque & armenta per catervas sine numero alunt: sed equitio parum delectantur; cuius rei causam inquirens à senioribus accepi, ex herbarum luxuria, à plano solo cœlique clementia proveniente, equorum artus molles & enerves fieri, parvoque labore & æstu plerosque lassari, quamvis quam diu pulli sint, probe adolescant, & corporis habitudine conspicui evadant: ideoque Circumpadani ipsi, aut ex propinquis montibus, aut ex aridis & lapidosis saltibus equos petunt. Celebrari igitur eo tempore, & Longobardis in desiderio esse, tum primum Italia cœpit. Annunciatur deinde, bellum Gothicum in Italia finitum esse, parte eorum ab Italia dimissa, & parte in Italicum nomen, moresque, recepta: fertur eodem ferme tempore Justinianus Imperator vita functus, Justiniano Secundo Imperii successore relicto: cuius ingratitude in Narseum Ducem insignis fuit, Sophia maxime insolentissima scœmina convitia suggerente, & quem demum Narseum, ab Italica præfectura amotum, per epistolæ & internuncios te-

mere infectata scœmina fuit. Ille igitur injuriarum impatiens, audito Longini Italiæ præfecti adventu, Roma secedens Neapoli se continuit, fatalique indignatione percitus, Longobardos ad Italiam invadendam excitavit, literis ac nunciis ad Alboinum Regem sibi amicissimum emissis, quibus adesse tempus ajebat, quo sedem sibi aptissimam ac ornatissimam suis viribus comparare possent, nullo tum idoneo Duce, nulloque valido exercitu Italiam custodiente. Auderent itaque in tempore facinus memorabile, aggredierenturque regionis dominium ultro eis quasi fato oblatum. Animati igitur Longobardi ad Italiam occupandam profectionem parant. Nunc, quæ gens ea fuerit, aperiam.

C A P. IX.

De Longobardorum origine.

OMNES, qui de Longobardorum origine hætenus scripsere, à Scandinavia, ut ajunt, insula oriundos, in Pannoniam commigrasse tradidere: nihilque aliud de Scandinavia, quam Plinii verba referunt, posita in libro IV. cap. XII. de insulis Ponti. Ego vero ab eis dissentiens puto Longobardos habuisse originem à peninsula, quæ inter Saxoniam & Scandinaviam sita, utrique proxima est, hodie *Langland* nuncupata, cujus peninsulæ sinus à Plinio *Lagnus* dicitur, & in Orientem vergens mare pertingit, Cimbrorum promontorium ab altero latere habens: in illo itaque Lagno sinu, continenti ferme applicato, istius Gentis origo fuit. Primumque *Lagnoandri*, id est, viri à Lagno, postea composito vocabulo *Langobardi*, quam diu patrias tenuere sedes, Romana voce appellati sunt, ut peritissimus vir Cornelius Tacitus memorat libro XI. cap. XVIII. referens Italum Flavium à Romano Imperatore Regem datum Cheruscis Germaniæ populis, eorum deinceps factionibus Regno pulsum, Langobardorumque postea opibus resectum, res Cheruscas bello afflixisse. Quæ quidem Cornelii verba apertissime probant antiquam Gentem eam fuisse, & opibus instructam, cum Regem Regno, à quo pulsus erat, restituerint. Arguuntur autem ineptiæ illi, qui à *barbis* longiusculis, vel à *Barbis*, denominatam Gentem scriptitarunt, quasi ipsi soli barbati fuerint: quid, quæso, *Lango*, cum *longo*, quid *Bardi* cum *Barbis* similitudinis habent? Estto etiam quod Longobarda inventa ab eis, & usui habita sit: attamen illud teli genus rationabilius à suis auctoribus nomen sumpsisse videtur, quam ipsi ab illo; cum inventor nomen rei imponat potius quam inventa res ipsi inventori. Sed danda est prioribus Historicis venia, qui Cornelii libros postremos, nuper tantum repertos, & in lucem emissos, videre non potuerunt, Mediolani enim me puero reperti sunt.

Excedentes itaque suis finibus Langobardi post Rugilandiæ vastitates, diu ab eis possessas, Pannoniam occupavere, sive à Justiniano Imperatore adsciti, foedereque conjuncti, ut Procopius innuit libro III. sive alio modo; Gepidasque populos, in ipsa Pannonia Regni nomen ac potestatem habentes, funditus delevere, ut Blondus narrat libro IV. Gepidarum exciso Regno, Gens Langobarda in Italiam spectare, in Italiam pedes inferre, in Italia postremas figere sedes optabat. Tandemque proficiscuntur, Saxonum adscitis copiis, quibus cum & prisca vicinitate & societate conjuncti erant, viri, mulieres, nati, armenta, gregesque longo itinere Italiam petunt, anno à partu Virginis quingentesimo & sexagesimo octavo. Sed, quis tum fuerit Italiæ status, aperiam.

CAP. X.

De Italia statu sub Justino Secundo.

Nullo fere antea Romani Imperii tempore versata magis in regiminis discrimine Italia fuit, quam sub postremos Justini Secundi Imperatoris annos: in quibus, ejectionis Narseo & Dagisthæo Ducibus, Longinum infauti nominis virum Italiæ præfecit, ipse in primis Imperator à recto religionis calle ad hæresim mentem vertens: avaritia etiam atque inscitia animum imbuerat, sine idoneo Duce & exercitu Italia relicta. Item ne singulis Italiæ regionibus provinciarum more suos magistratus constituere necesse haberet, ad evitandum impendia, unum tantum Longinum Exarchum Italiæ, id est, Summum Magistratum, fecit, à quo Exarcho singulæ civitates Prætores acciperent, Roma excepta, cui Præsidentem dedit. Nullus itaque Longino administrante Senatorius ordo, nullaque provincialis præfectura, aut in Umbria, Hetruriæ, aut in Liguria, Neapolive, aut alibi in Italia, ut assueverat, fuit: ad quam majorum rerum pondus, quod à Iudicantibus explicari nequit, referri posset: ipse deinceps Longinus Italici regiminis expers, neque ubi de Magistratu providendum, neque unde amovenda potestas esset, satis noverat: neque si novisset, solus omnino, ut homo erat, tanto oneri sufficisset: ex qua quidem fatali Imperatoris ac Præfecti imprudentia, rerumque novitate, evenit, ut recedente ab Italia Dagisthæo, qui Transpadanis præfuerat, plures civitates Exarchatus insolentiam exosæ, magistratus à Longino petere neglexerint, suosque sibi Rectores ac Iudices populi auctoritate constituerint: præcipue Mediolanum, Papiæ, Brixia, Verona, Vicentia, & Tarvisium, quod etiam Blondus retulit libro viii. primæ Decadis.

In hac igitur gubernaculorum novitate, collabante Italia, appropinquant Aquilejensibus campis Longobardorum agmina, sedemque in planitie figere statuunt: præmissisque equitatu conjuges suas, familiasque, & armenta, longo & diuturno itinere à Pannonia traducta in Italia explicant, & instaurant, Deoque pro adventu vota suo ritu solvunt. Et explorato demum ab accolis civitatum statu, per superiora loca deducunt copias, Tarvisio, Vicentia, Verona, Brixiaque receptis, in quibus magna familiarum parte locata, cum reliqua turba instructo exercitu Mediolanum petunt, subductoque comæatu populum fame laborantem ad deditionem compellunt, ac diripiunt, implentque sua gente urbem, regionemque, veteribus incolis Longobardo furori manus dudentibus. Hoc successu auctis brevi tempore Longobardorum rebus, Longinus Ravennæ pavens, militum præsidia in civitates inferius juxta flumina sitas immisit, Papiamque, Cremonam, Mantuam, & Patavium, in Transpadanis quam maxime munivit. Divisa itaque Transpadana Regio erat, pleraque superiora loca, Como & Vulturria exceptis, tenentibus Barbaris, & inferiores urbes tuentibus Italis: nullo tamen campestri exercitu in tanti temporis spatio, quo Longobardorum profectio duraverat, in Italia comparato; quam quidem profectionem triennium durasse Scriptores affirmant. Longobardi, refectionis militibus, omnem regionem inter Adduam & Ticinum sitam quam primum sibi subicere parant, & Papiæ urbis oportunitatem speculati in ipsam civitatem belli molem vertunt, rati, è Mediolani casu perterritos Papienses statim deditionem facturos. Contra Papienses prævisum jam antea Longobardorum adventu, impetuque, præter prædarios Longini milites, duo millia hominum ex Ligustico tractu cum ingenti comæatu in urbem deducunt, & propugnacula muniunt. Adeunt Longobardi infestis signis & vocibus urbem, insul-

tant mœnibus, ac subire tentant: minantur incendia, ac repetita sæpius oppugnatione, clamore, & ululatu, civium & militum animos, viresque, perterritant. Illi vero telis ab alto conjectis tuentur urbem, arcentque à portis & mœnibus hostes, atque ignitas faces, sulphure, piceque illinitas, in acies torquent. Exarsit tum iracundia Alboinus Longobardorum Rex, ac civitati alta voce excidium ac everfionem est comminatus; cernensque frustra oppugnatum iri oppidum situ, ac virorum robore, fideque, firmatum, obsidere urbem aggressus est.

CAP. XI.

De Papiæ obsidione, & deditione.

TRIENNALEM fuisse Papiæ obsidionem apud omnes Scriptores constat, Platina etiam hoc attestante in *Vita Joannis tertii*, Alboino Rege cum exercitus parte urbem acerrime premente, ac die noctuque infestante; & ne de civitate liberanda cogitare Longinus, aut Imperator posset, alteram exercitus partem Alboinus Padum trajicere, & in Æmilienfes & Tuscos populos arma vertere iussit: uno itaque tempore, unaque gente, exagitata tribus in regionibus Italia fuit, nullo Duce atque exercitu Longobardico furori castra opponente. Papienses igitur longa obsidione exhausti, nulla- que futuri auxilii spe freti, de deditione facienda regiones nuncios audire compelluntur. Erat in civitate Dalmatius Sigæus insignis sacerdos, qui civium nomine ad Regem ire ac redire pro deditione curavit, ac deditionis pactiones sub hujusmodi legibus composuit: *Primum, quod omnibus tam civibus quam peregrinis, militibusque, corpora & bona intacta & libera essent, sive in urbe consistere, sive abire malissent. Item, quod Papiensibus suis institutis & ritibus vivere sub Regis dominatu impune liceret, sicut olim sub Romano Imperio ac Gothico Regno vixerant, fide tantum Regi circa Regni potestatem servata. Tertium, quod Ligustica oppida à Placentino agro usque ad Tanari colles sita, olimque à Gothis Regibus Papiensibus adscripta, Papiensia censerentur, & forent. Postremum erat, quod Regi tantum, ejusque consilio, vel Ducibus, & non aliter civitatis magistratui, subjecta Papiæ esset.*

Delatis in urbem pactionum tabulis à Rege sub- signatis, Dalmatius altera die cum senioribus populi Regem recepturus, ut condixerat, constitit in porta Orientali, supplexque advenienti Regi omnes seniores obvios pia oratione obtulit: ille truculenta facie cives miratus, hostilem animum patefecit, simulatasque perfidias pactiones ad urbis perditionem detexit, torvo scilicet vultu imitem animum aperte prodente: concidit tum repente in ipsius portæ limine Alboini equus Rege insidente, quem erigere conati adstantes fato dejectum utrumque, immotumque, sensere, casumque admirati Regem monuere, ut iram, quam in Papienses delendos occulto fovebat, ab animo dimitteret, urbemque servare constitueret. Invasit illico perpetrandi sceleris poenitentia Regis animum, mutataque sententia sensit simul fata commutari, hujusmodique emissâ voce, *Salva sint civitatis jura, & quæ spon- di sunt*: eodem actu, quo vocem emisit Rex, surrexit sine impulso equus. Rex igitur læta fronte civitatem ingressus, quæ pepigerat, præstitit, divinitusque profecto editum in Rege miraculum fuit, ne Dalmatij viri optimi fides in ludibrium cederet, ut omnino cessisset, si in irritum pactiones ab eo cum Rege composita ivissent: quod quidem miraculum à claris Scriptoribus celebratum legimus, & in primis à Paulo Diacono libro ii. de Longobardorum gestis, & à Blondo libro viii. primæ Decadis: quem sequitur Sabellicus libro v. octavæ Enneadis.

Hac tam nobilium Scriptorum auctoritate suf-

fultus, vertere in Cremonensem oratorem sermonem cogor, cujus verba excipio, & refero: *Ticinenses post paucorum dierum obsidionem facile se hostibus dedidere, Italia libertate prodita, pro qua oportebat non solum muros, sed etiam corpora opponere, &c.* Quasi vero sola murorum immobilitas arcere subeuntes hostes potuerit sine virorum tutela, civitate maxime in planicie posita. Item quasi etiam Ticinenses non subiverint salutis suae periculum. Disce igitur rectius belli jura, quae fortasse olim claustro astrictus non percepisti: quisquis adveniendi exercitui oppidi postes objecerit, sive populus, sive Rex, Jure militari hoste ingrediente salutis discrimen, vel saltem libertatis, subit. Non solum itaque Ticinenses portarum prohibitione, sed obsidionis expectatione in periculum salutis inciderant, nullo postea eis transmissio subsidio, nisi optimi Dei nutu salvi facti fuissent, ut enarravi. Cur ergo, quæso, tam petulanter in mortuos insiluisti, dicens, *oportuisse eos subire pericula, &c.* si subiisse eosdem proprium pene exitium omnes historiae luculenter probant? Sed videre exacte oportet, quam probe omnis hujus hominis sententia a veritate dissentiat, vertique ad veritatem ejus os nullo modo queat. Primo, trium annorum obsidionem paucorum dierum appellat: cujus opinioni plura adversantur: nam decem dies in publicis judiciis, sub modici temporis limitatione, enumerantur. Triennium vero cum mille & amplius dies colligat, quantum à modico differat etiam pueris patet. Triennium insuper tanquam longum tempus Jus Civile mobilium usucapioni praescripsit. Triennium idem Jus Civile Judiciis finiendis, tanquam magnum intervalum, praefixit: à quo triennalis instantia dicta fuit. Triennium Romana Ecclesia praediis suis locandis, tanquam diuturnum tempus, limitavit. Triennium denique infantulo ablactando, & ad incessum firmando, ac equino pullo domando, natura constituit. Ille vero homo, tanquam à natura & ab Ecclesia profugus, modicum tempus esse scripsit, triennii obsidionem, quam nunquam fortasse per mensem publici honoris causa passus fuit: cujus sententia non solum corrui, sed in ejus ingenii labem recidit, cum temporis discrimina (etiam imperitis nota) ipse magnus Scriptor non noverit.

Excutio alterum quod scripsit, *Ticinenses facile se dedidere*: facile fieri id videtur, quod sine labore, aut mora, aut molestia fit; sed obsidionem diu, ac duriter, atque periculose perpeti, nunquid sine labore ac indigentia? nunquid sine maxima molestia ferri potuit? Sicut igitur primo loco modicum esse triennium censuit, similiter secundo loco facile fieri, quod facilitati contrarium est, putavit: viatoris more, qui devians ab itinere, quanto promptius graditur, tanto longinquius à viæ rectitudine fertur. Tertium addit sophisma *de Italia libertate prodita*. Væ Ticinensibus, si iste Judex eorum aliquando adscitus fuisset: urget sane hujusmodi accusatio, quam uno verbo elido: nego Italiam libertatem tunc habuisse. Tu, qui Italiae libertatem sub illud infelix tempus collocas ac praedicas, proba quod dicis, Auctoresque deprome. Videamus insuper quid sit prodicionem facere: nam qui nulla vi, vel necessitate urgente, creditam sibi civitatem hosti tradit, prodicionem committit: à cujus nota abest, qui per diuturnitatem obsessus, auxilii expers, deditionem facit, ut eo casu Ticinenses fecere, nequicquam jam in tertium annum à fociis, vicinisque, civitatibus, & praecipue à Cremona expectato subsidio: dedidereque Ticinenses suam civitatem, & non alienam, ut iste insulsus Scriptor commentitia oratione ait: cujus suppositio si vera fuisset, videlicet quod in Ticinensium subsistentia constituta tunc Italiae libertas esset, redarguendae omnes Italiae civitates fuissent, quae Longobardorum non premebantur Im-

perio, quod in tam diuturno spatio pro Italiae salute Ticinensibus nullam opem tulissent, minusque ferre tentassent: inter quas longe culpabilior ex vicinitate Cremona esset: commendandaque ex adverso Papia est, quod suo pene, ut dixi, excidio tam constanter pro universa Italia obsidionem patiens, Regis potentissimi victoriam remorata fuisset. Cujus quidem obsidionis impedimentum, si non intercessisset, Alboinus Rex integro exercitu in Flaminiam, Umbriam, Etruriam, Romamque irruisset, profligataque Italia, eo tempore milite denudata, Longobardorum armis facilius fuisset, Longino Exarcho in Ravennae stagnis, latebrisque, delitescere, qui non solum Longini infantum nomen, sed detrimentum ac perniciem, Italiae intulit. Vide ergo, & agnosce, Lector, quo ingenio, quo judicio, qua mente iste Cremonensis Scriptor imbutus sit: quando in iis, in quibus Ticinensium virtus omnium virorum approbatione quam maxime enituit, in iis ipsis labem meditari & componere non erubuerit, atque dum aliis probra, infamiamque, adstruit, ipse sese mendacem, falsumque, prodit, ac in se, suosque, eadem probra retrudit.

C A P. XII.

De Papiensium jure sub Longobardis.

PAPIA à Longobardis in potestatem redacta, nulla vi affecti cives fuere, publicumque regimen à Rege constitutum fuit, quo & Papiensibus juxta Romanas leges, & eorum instituta, & Longobardis secundum ipsorum ritus jus diceretur. A quo quidem juris dicendi discrimine introducta distinctio fuit, ut in obligationibus, vel contractibus à Tabellione scribendis, unusquisque profiteretur, cujus gentis, cujusque Legis, aut Juris esset, hoc modo: *Julius Ritus, qui profitetur se vivere lege Romana, & Clotharius Astulphus, qui profitetur se vivere lege Longobarda, fecerunt inter se infrascriptas obligationes, &c.* Has enim obligationum formulas in membranis descriptas legere licet in Archivo Episcopatus Papiæ, à quo civitate bello flagrante pleraque monumenta exportata fuerant, paceque secuta anno millesimo quingentesimo & trigesimo, omnia, quae à me conquiri & recuperari potuerunt, suo loco restituta fuerunt, sub Hieronymo Rubeo insigni viro, ipsius civitatis Episcopo. Ex qua quidem formula obligationum plane discernitur, Romanas leges Papiensibus sub Longobardo Rege usui permittas fuisse, non solum cum inter Papienses ex utraque parte contraheretur, sed etiam cum inter Papiensem & Longobardum obligatio constituebatur. Cur vero illae obligationum formulae à Notario, vel Tabellione Episcopi conscriberentur potius quam ab altero, ratio patet, quoniam omnia monumenta, quae in Archivo Episcopatus relata comperiuntur, edi ab Episcopi Tabellione, vel Scriba, in publicam formam ob Archivi auctoritatem & dignitatem possunt, editaque fidem habent: quod perpetuo usu ac jure observatum fuit. Et qua demum auctoritate cæteri Notarii & Scriptores in ipsa civitate æque non potiuntur, civitatis, sive Decurionum Scriba excepto, à quo publica acta describuntur, fideque digna habentur.

C A P. XIII.

De juramento Papiensium, & Longobardorum successu.

CONVENISSE Papienses coram Alboino Rege in Palatio olim à Theodorico Rege constructo, deditionemque juramento firmasse, apud Scriptores constat. Quo autem in loco situm illud Palatium esset, minus patet. Ego veriores puto Scriptores affirmantes hujusmodi Palatium fuisse

Domum; ex qua postea novum Monasterium constructum est; ubi Divi Boniforti sacellum adest, à quo Palatio *Palatina* primum, deinde vulgari verbo *Palacensis* fuerat appellata civitatis porta, in Laudensem oram versa: supersuntque adhuc in ipso Monasterio duæ Turres antiqui Palatii monumenta, quarum alteram ingens hederæ ab imo ad summum vestit, à Septentrionali parte, suo ferme virore loci nobilitatem attestans, exornansque, cum ex regia domo religiosarum Virginum statio ibi effecta sit. Prope ipsum Palatium, ut obiter antiqua attingamus, aderat ab Orientis ora forum magnum, nobilium olim Gothorum conventui patens, cujus adhuc mentio in scripturis reperitur: nam sancti Jacobini in foro magno hodie etiam Parochia nuncupatur. Alterum præterea exstabat ea ætate Palatium inter viam prædictam & forum Linarium, vulgo appellatum communis Papiæ, eo quod civium Papiensium negotia in ipso gererentur: in quo quidem Palatio à Carolo Magno Imperatore Scholæ publicæ constitutæ fuere, quæ deinde sub Sfortianis in locum, ubi nunc sunt, translata cernuntur. Veruntamen illa Palatia tam speciosa non erant, ut celebrari scriptis à me debeant.

Turres quoque frequentiores, quæ eandem civitatis partem occupant, aperte arguunt, nobiliores viros ipsam partem incoluisse, ubi aer purissimus est, & solum eminens ac declive; in qua declivitate passim exsurgunt fontes conspicui, gratique, præcipue in ædibus infra quinquivium sitis, ac etiam in avita & antiqua domo Rogerii Sacci avi mei. Alboinus igitur urbis situ atque opportunitate circumspecta, tam ad belli casus quam ad pacis ocia ac negotia aptissima, dimittere Procerum suorum partem in ea statuit, ut propugnaculum in Circumpadanis haberet: quæ quidem Procerum suorum dimissio ac collocatio initium ac firmamentum fuit Regni postea in ipsa civitate constituendi, ut alibi patebit. Reversus deinde Veronam, ubi Rosimundam conjugem natione Gepidam reliquerat, Alboinus, triennium regnavit Etruriæ, & Flaminiae, ac Æmiliæ regionibus magna ex parte suorum armis, direptionibusque, subactis. Quo exacto triennio per conjugis infidias impudice patratas à duobus familiaribus occisus est, conjugem ipsa & interfectores Ravennam profugientibus, ubi finem vitæ per veneni poculum tam adultera quam adulter uno momento receperunt: quæ omnia seriose in unum collecta elegantius quam cæteri retulit Sabellicus *libro v. octavæ Enneadis*; ita ut addere ejus scriptis hoc loco superfluum videatur.

Non destitere Longobardi ex Alboini interitu in reliquas Italiæ partes, præsidio minus firmatas, arma vertere, Clephium Regem secuti; quem Papiæ conventu habito Regem sibi constituerant, eoque Rege viro sævissimo intra biennium à suis occiso sub Ducibus Longobardicum regimen per decennium fuit, in quo tempore atrocius quam antea sævitum in Italiam est, Roma ipsa post Neapolis direptionem ad pactiones compulsæ. Quarum summa fuit, ut quicquid eorum armis cessisset, ipsorum Longobardorum dominii esset, & quicquid eo tempore illis non cessisset, in futurum etiam liberum, tutumque, ab ipsorum armis foret. Dissidet hoc loco Platina ab aliis Scriptoribus, Ducum regimen viginti annos durasse affirmans, in *Pelagii secundi Vita*, cujus sententia minus probatur. Compositis igitur Italicis rebus Longobardi Duces confestim in Gallos, Italiam ingressos ad Hipporediam, quam hodie *Juream* vocant, impetum faciunt, propelluntque eos ab Italia, & direptionibus etiam semel atque iterum infestata Gallia in sua reversi quieverunt. Nunc, quo imperio, quove regimine, usi sint, referam.

CAP. XIV.

De Longobardorum regimine.

QVOD plerique Scriptores circa Longobardorum regimen membratim referunt, ego in unum colligo, ut appareat fortuna ne, vel casu, (ut vulgus ait) an cura & regimine, introductum in Italia regnum illius gentis fuerit. Primum omnium societas inter eos pene inviolabilis fuit ab initio, ut iis verbis attestatur P. Diaconus *l. III. c. VII. Erat sane hoc mirabile in regno eorum, quod nulla fiebant violentia, nulla struebantur insidia, non audiebantur furta, aut latrocinia, tuta quæque unicuique erant, sive in suo stare, sive alio proficisci volebat.* Cujus Viri sententia ad Longobardos tantum, & ad eos, quibus cum pacifice debebant, referenda est: nam in alios immites eos fuisse, atrocesque, idem Auctor testatur, præcipue in Romanos & eorum finitimos; quos sibi tributarios ac pene colonos effecisse refert, tertia parte frugum singulis annis ab eis exacta. Assentiri quoque Pauli Diaconi verbis videtur Pelagii Secundi Pontificis *Epistola* Gregorio scripta, quam Blondus ad verbum retulit *libro VIII. primæ Decadis*, Longobardorum in se, Romanosque, atrocitatem ac perfidiam enarrans. Hac ergo feritate in alienos, & fide ac societate in suos, usi Longobardi, antiquorum Hebræorum exemplo, regnum sibi constituerunt, ex communi concordia Regem eligendo, electumque etiam, si minus juste imperasset, reprobando ac occidendo, ut Clephium, de quo supra, & ad xxx. postea Ducum regimen ipsius Regni formam convertendo, rursusque ad Regis electionem, Ducum regimen pertæsi, redeundo; quæ variatio gentis libertatem, feritatemque, ac concordiam indicat: stareque omnino in Italia illi diu nequivissent, ipsa Italia reluctante, & Gallis ex alio latere infestantibus, ac Imperatore Tiberio, Mauritioque successore, bellum apparantibus, nisi concordia, ac societatis vinculum, illos in rerum periculis unanimes eo tempore, stabilesque, fecisset: à qua demum concordia & societate oriri consilium, à consilio regiminis actus & obedientia solent, quæ tria firmamenta videntur regni erigendi, tuendique: quoniam concordia à mutuo amore initium sumens, cogitare quæ ad mutuum commodum spectant, unumquemque impellit; quæ cogitationis vis eruit intimam uniuscujusque negotii à nobis gerendi, vel rejiciendi: concordia itaque gentis, recti regiminis, regni quoque constituendi pars potissima est, divina semper potestate prælata.

Alterum, in quo cura illorum vixit, fuit in alendo equitatu: greges enim præstantissimarum equarum habuisse eos, atque ab Hungaria in Italiam traduxisse præter boum armenta constat, ut scribunt Blondus *libro VII. primæ Decadis*, & Paulus Diaconus *libro II. cap. VII. in fine.* Cujus quidem equitatus copia, atque præstantia, celeritateque, plura confecisse eos unius anni spatio bellica negotia in Italia quam credibile sit, Sabellicus notat *libro v. octavæ Enneadis.* Equitatu itaque illis suppeditante equitum copiam atque exercitationem, simulque equestris disciplinæ peritiam in eis fuisse necesse est, quæ maxime Regno tuendo aptissima probantur: quemadmodum è contrario cum aliunde petendi equi elegantes sunt, precia eorum ac translationis impendia nobis plurimum obstant, coguntque plerumque militem à voto desistere, aut equo minus idoneo ad bellandum sese committere, animo fortasse ad prædandum quam ad præliandum promptiore, quod hac ætate frequentissime evenisse perspeximus. Loca autem præcipua, in quibus equarum armenta collocata primum à Longobardis perhibentur, Aquilejenses, sive Foro-Julienenses saltus fuisse accepimus: equique illius tractus, ac etiam Hipporedienfis, in

inter Transpadanos hodie etiam valde probantur, tanquam agiliores, durabilioresque.

Tertium, in quo belli gerendi impendia confitebant, fuit tributorum quota, æqua lance ab omnibus Ducibus Regi persoluta; dimidium enim æris sui unusquisque Regi pependit. Quartum est, quod nusquam in Italia post dimissos Saxones, quos malo eventu dissipatos fuisse constat, alio milite quam Longobardo initio rerum suarum usi sunt, habuisse equitatum viginti millia virorum, & septuaginta millia peditum, sæpe referuntur. Primosque eos composuisse ferreas series ex orbiculis confectas, quas maculas, & materna lingua *malias*, vocant, aliquis putat, ex quibus tegi pectus ac brachia nostrates hodie tutissimum & ornatissimum putant. De Longobarda etiam immani telo, postea in *Alabardam* redacta, auctores feruntur Longobardi. Sed jam ad Regni continuationem mea sese vertit oratio.

C A P. XV.

De Authari & Agilulphi Regno.

A NNO ab humani generis Redemptore octogesimo septimo supra quingentesimum, & ab adventu Longobardorum XIX. Gens Longobarda sentiens in Gallia exercitum parari, & à Constantinopoli Smaragdum Ducem à Mauritio Imperatore in Italiam cum copiis destinari, Papiæ conventu habito, Autharum, Clephii olim Regis filium, Regem elegit, quo arma movente, Smaragdi vis Ravennæ compressa est, pactæque inter eos induciæ, Brixillo prius oppido ab Autharo recepto, & excisis mœnibus destituito. Galli autem tunc per legationes ab Italia averfi, paucis post annis repetita semel & iterum Italia, vario eventu cum Longobardis bella gessere, præda tantum abacta, & nulla Italiæ parte subacta atque retenta. Continuit enim se Rex Autharus intra Ticinum in postrema Gallorum irruptione, subductis ab agris, villisque, omnibus ad victum pertinentibus, & intra oppida, ubi præsidia firmaverat, collocatis. Galli itaque inanem provinciam perquirentes, & fame, & æstu afflicti, captivos villicos abducentes, Italiam deserere coacti sunt, imminente etiam metu, quod Longobardi milites, qui in maritimis Neapolis, & Calabria, Campaniæque atque Umbriæ oris erant, maturare reditum ad Regem ferebantur.

Theodelindam Rex ipse uxorem duxit ex prole regia, sed moribus longe regioribus, religiosioribusve: quæ ipso Autharo septimo anno Regni sui vita functo, ex procerum auctoritate nupsit Agilulpho Duci strenuissimo, in Læumello Ticinensi oppido nuptiis celebratis: de qua Theodelinda natione Bavara, ejusque patre Garibaldo, à Gallis è Baviaræ Regno pulso, deinde restituito, nihil hoc loco mihi scribendum superest, Blondo curiose singula recensente *libro VIII. primæ Decadis*, & Pauli Diaconi scripta repetente. Crevit sub Agilulpho Rege Longobardorum Ducum numerus, tumultusque eorum, qui jam antea vivente Autharo ab ejus Regno dissidere cœperant: crevere simul Italiæ mala, detrimentaque, non solum ab hominibus, sed etiam ab elementis, divina ultione in nostrum genus concitata.

Primum Romana Ecclesia à Constantinopolitano Antistite, quem *Patriarcham* vocant, vexata est, illo scilicet sibi ipsi Oecumenici nomen arrogare conante, & Mauritio Imperatore ejus conatui adversus Romanum Pontificem aperte opitulante: quibus tamen restitit Gregorius primus, R. Ecclesiæ praelatione servata; à qua re Mauriti Imperatoris indignatio adversus Romam, Romanumque Pontificem, succensa est: cernens enim suos conatus in irritum cecidisse, copias militum, quas in urbis præsidium adversus Longobardorum insultus con-

A tinuerat, subduxit, Roma prorsus destituta, ac in Longobardorum excursiones, quas ab Etruria in Romanorum agrum exercebant, dimissa. Quam quidem partem historiæ à Paulo Diacono prætermisissam, exacte collegit Blondus *libro VIII. primæ Decadis*, subdens hujusmodi verba: *At Mauritius Imperator non solum rei Romanæ, aut Italiæ, nullam curam suscepit, sed Gregorio Pontifici supra vires providenti adversabatur, &c.* Concors Blondo est Platina in *Gregorii Vita* his verbis scribens: *Nequaquam vero iis malis contentus Mauritius, &c.* Utrumque Scriptorem sequitur Sabellius dictæ octavæ *Enneadis libro quinto*, ubi hæc ad sunt verba: *Novi enim belli causa inde orta est, quod Joannes Constantinopolitanus Antistes, &c.* **B** *Roma igitur una cum finitimis, & aliis Italiæ partibus, à Mauritio Imperatore derelictis, ac in externarum gentium direptionem conjectis; quæ Romani Imperii majestas, quæ regiminis ratio in eo fuerit, quodque Imperii jus sibi in iis, quæ à sese abjecit, urbibus retinuerit, agnoscendum est: quod alio loco commodius exquiretur.* Ravennæ similiter & Aquilejæ Antistites ea ætate in Romanam Ecclesiam cornua vertere ausi sunt, pluribus fuscitatis Episcopis à Paulo Diacono nominatim relatis *libro III. cap. XII.* Qui demum omnes Romanæ Ecclesiæ oppugnatores una cum eorum sectis evanuerunt, Petri navicula per pelagi profunda super undarum vertices enatante. **C** Ducum quoque Longobardorum seditiones atque defectiones ab Agilulpho partim conciliatione, partim ferro, suppressæ sunt. Invaluit etiam eo tempore semel & iterum fames in Italia ex frugum penuria, invaluerat atri imbres, atque aquarum profluvia, terras urbesque inundantia. Invaluit denique lues mortalium sævissima, pestilentia suborta. De cælo quoque signa Italiæ mala comminantia visa sunt, nec fulgura solum viros necantia, ædesque subruentia, sed stella crinita sæpius, & ignitæ in cæli fastigio hastæ, nocte vibrari à divina ultione prospectæ sunt: quæ longa serie per diversa capita retulit idem Paulus Diaconus *libro III. & IV.* ab omnibus approbatus.

D Inter hæc autem mala, nonnulla etiam bona emeruisse Scriptores ajunt. Gens Longobarda hoc primum tempore in rectam religionem, fidemque, prospexit, Agilulphi Regis conversionem secuta, quem à Theodelinda uxore retractum ab impietate ad mitiorem vitam scribunt. Theodelindam vero à Gregorio Pontifice fidei firmitatem edoctam ferunt, ad quam exstant ejusdem Gregorii scripta; atque ab hujusmodi conversionis tempore restitutos fuisse multos Episcopos in sua loca, bonaque eisdem permissa fuisse omnes Scriptores tradunt: quod mecum cogitans exclamare compellor: O incomprehensibilis Dei sublimitas! ô excelsum judicium! **E** quando Constantinopolitanus Patriarcha, atque Imperator, in Dei Ecclesiam, servumque ejus Gregorium, conspiravere, quando Ravennates, Aquilejensesque, ab eadem Ecclesia defecere, quando cælum, terra, aer, aqua, fulguraque omnem vim in miserrimam Italiam effudere, Deus mortalium inscitiam, fragilitatemque, misertus, Barbarorum feritatem demulcens, aberrantem gregem in viam salutis vertit, alterique gregi suo unius matronæ opera, monitisque, copulavit, infirmiores videlicet sexum eligens ad firmandam fidem infirmioribus. Nec tamen propterea destitit Longobardi post receptam fidem ab incursionibus, Roma cum exercitu repetita, ac per annum ferme obsessa, Gregorio, Romanisque, suis se viribus ægre tuentibus. **F** Bello enim assueti viri, etsi religionem teneant, quicquid tamen ex usu belli esse spectant, licere etiam sibi jure naturæ judicant, eaque imbuti opinione, debellandi facultatem tentant, & divinitus fere sibi permissam rerum everfionem sæpe

pe autumant, à qua re perpetranda cum sponte abstinere debeant, vim tamen suam repelli expectant. Ita Longobardi Romæ obsidionem, imbrium assiduitate rejecti, solvere coacti sunt. Mauritius similiter Imperator occisus à Phocæ militibus finem persecutionum suarum recepit anno à Christi ortu sexcentesimo & tertio, quem Platina opinatus est, fuisse sexcentimum & trigimum tertium, à quo alii dissentiunt. Roma itaque dimissa, Longobardi in Transpadanos Orientali Imperio suppositos acies vertunt.

C A P. XVI.

De Patavii & Cremona excidio.

AGILULPHVS Rex cernens tres munitas civitates in Transpadanis Ravennæ Exarcho conjunctas esse, unamquamque in suam potestatem redigere conatus est. Exercitu itaque Patavii muris appropinquante sub dimicationis specie ignitas facces conjici in civitatis tecta & tabulata jussit: nobilissimaque tandem urbe conflagrata, pene in Ravennatum & Exarchi oculis, adjecto sibi Slavorum agmine, recto itinere Cremonam petit, ac repentino adventu imparatos Cremonæ præsidarios occupat. Fama enim erat Mantuam prius, utpote Patavio viciniorem, expugnandam fore, quam Cremonam: quæ opinio incautiores Cremonenses atque Exarchi milites in periculo prævidendo effecit. Cingitur ergo ab Oriente hostium castris Cremona, frustra emissis ad Exarchum nunciis pro auxilio impetrando: oppugnatur civitas, Slavis etiam ab aliis lateribus mœnia circumeuntibus: stat illa in fide tam suis sua tuentibus, quam etiam Græcis militibus ab initio egregie pugnantibus: ubi vero viginti dierum spatium exactum fuit, nulla auxilii spe subsecuta, & infesto ac truculento hoste assiduo urgente, concidit ex parte defensorum animus, atque ægrius tueri mœnia invadente hoste coeptum est. Trigesimo tandem adveniente die Agilulphus evocatis circumquaque ab urbibus Longobardis militibus, aucto exercitu, & instructis ante solis ortum copiis, Cremonensibus, nisi deditioem faciant, minatur excidium, nullaque intercedente mora à tribus lateribus urbem aggreditur. Pugnatur acerrime, Græcis tamen in certaminis periculo nonnihil labantibus. Tum alio loco Longobardi equites, ab equis desilientes, urbem fubeunt paucis obsistentibus, atque admotis scalis conscendunt muros, terroreque civitatem replent, una voce passim effusa, hostes ingressos: turbantur milites, Cremonensesque suorum fuga ac trepidatione cedunt loco, hostibus ex adverso ferocius insultantibus. Tum clamor insurgit barbaris conflatus vocibus, capta est civitas. Irruunt itaque in urbem hostili feritate Slavi suapte natura immites, Longobardique, diripiunt sine discrimine bona omnia, obvios cives inermes compertos capiunt, armatos vero occidunt, nec tamen per cædis & captivitatis ultionem deponunt iras, sed summissio etiam incendio urbem absumunt, urbem, inquam, qua ea ætate nulla erat in Padanis oris elegantior.

Excisa miserabiliter Cremona, Longobardi summa celeritate in Mantuanos tela vertunt. Illi vero vicinorum casibus deterriti, per urbis suæ deditioem, Agilulphum Regem intra mœnia receperunt, parueruntque Longobardis Ducibus. Anno igitur quinto super sexcentimum Transpadana planities Longobardorum possessioni ac dominatui cessit, Longino infausti nominis Exarcho longe à periculo agente, nihilque adversus Agilulphi motus in Transpadanis moliente, imo turpiter oppida, quæ in fide steterant, per destitutionem prodente.

Digressionis Excusatio.

VEXARE me hoc loco rursus Cremonensis Scriptor non desinit, dicens, Ticinenses ad Cremonæ expugnationem tela & alia bellica instrumenta Longobardis subministrasse: cui respondere necesse est. Tu, cum Cremonensis sis, in causa tuæ civitatis pro re, tempore, & actu à te minime viso, audito, vel lecto, testimonium dicere nulla ratione potes, omnisque tua assertio, relata ad tempus, in quo nondum in rerum natura eras, vera existimari non potest, nisi probati Auctoris sententia firmata sit: quæ hac in re prorsus deficit, Platina præcipue, qui Cremonensior teipso, ac prior fuit, de hujusmodi subministratione nullum verbum faciente. Sed fingamus subministrasse, ne tua oratio inanis fiat: apte quidem & opportune nobiscum agitur. Tu enim in omni orationis tuæ angulo istud tentas ac conaris, ut Ticinenses pauperes, egenos, miserabiles, pannosos, ac mendicos à seculo effingas. Si ergo tales fuerunt, quomodo tela & arma idonea ad exercitum instruendum comparare, aut servare, gens inops & mendica potuit, præsertim ad expugnandam urbem in Padi ripa sitam, cui fluminis altitudo tutissimum est propugnaculum, saltem à Meridie? Nonne potius ad egestatem suam (quam repetis) sublevandam Papienses triticum emissent, quam arma bellica? Emissent profecto, si laborassent inopia. Si itaque Longobardorum copias equestres, pedestresque, ut fatentur, armarunt Papienses, ergo inopes non fuerunt, ut tuis scriptis declamasti. Si vero egentissimi, sine re, sine spe, ut ais, fuerunt, arma habere apta exercitui instruendo non potuerunt, atque hoc modo dum labem aliis vis impingere, te ipsum contradictionis labe inficis, ac fallacem prodis. Quantum autem deceat peritum hominem in contrarietatem labi, tu magis scire potes, præcipue cum te solum dignum censeas ad scribendum res nostra ætate gestas, tam à

CAROLO QUINTO Romanorum Imperatore domino nostro adversus Turcas, quam alibi: in qua quidem re minus fortasse fidei scriptio tua habitura esset, iis, de quibus verba feci, fallacis detectis, quam si vera de Papiensibus aliorum Auctorum exemplo retulisses. Nihil enim historiarum aptius est quam veritas, nihilque è contrario alienius quam exquisita ac commentitia dicacitas, quæ in tuis scriptis passim comperta & reprobata fuit.

Sed neque illud longe abesse à dicacitate hoc loco probandum est. Gloriaris enim plures habuisse Cremonam milites, quam habuerit Papiæ cives. Ego vero animadverto, vestram militum multitudinem multo minus commodi atque honoris civitati vestræ attulisse in Longobardorum obsidione, quam Papiæ intulerit suorum civium paucitas: triginta enim dies Cremona oppugnationem & obsidionem sustinuit, succubuitque miserrimum excidium perpeffa: triginta & sex menses, nedum dies, aut hebdomadas, Papiæ oppugnationem & obsidionem pertulit, & suorum civium virtute, cui Deus Optimus quam maxime favit, salva fuit. Non ergo in militum, civiumque, turba salus civitatis, sed in virorum præstantia posita est: gloriarique propterea in militia vestra, quæ nunquam saluti hætenus, sed perditioni patriæ suæ fuit, inanis potius jactantia est, quam militaris virtus: nam ad regni, vel civitatum, tutelam comparata militia est, atque honori habita: qua quidem non suscepta postea, præstitaque tutela, dedecus & detrimentum sequi illos milites necesse est. Nemini itaque in solo militum nomine ac numero gloriari licet, nisi etiam rerum bene gestarum fides atque attestatio simul adsit, in qua quidem re sine Dei nutu gloria omnino diuturna esse nequit. Sed ad rem redeo, Cremonæ casum misertus, de cujus instauratione suo loco scribam.

BERNARDI SACCI,
PATRIITII PAPIENSIS,
HISTORIAE TICINENSIS
LIBER IX.

CAP. I.

De Romana Ecclesia sui juris effecta.



ROMA, Romanaque similiter Ecclesia, Imperatore, ut retuli, utramque deferente, ac ferme prodente, libera effecta fuit. Deserens enim regionem, vel oppidum, Jure Gentium in re destituta dominium habere facto suo definit; quoniam desertio pro expropriatione habetur: quod verius etiam probatur, quando ea deferuntur, quæ minime sunt propria eorum, à quibus derelinquuntur, sed in fidem, vel protectionem, recepta. Qualitas quoque desertionis, in qua sit perfidia, & non necessitas, multo magis indignum dominio rei desertorem facit, quoniam æquari proditori hujusmodi facinus rectissime potest. Mauritius ergo Imperator, cujus proprium erat Romam tueri, cum eam deferuerit, atque præsidio denudatam Longobardis propemodum in prædam objecerit, illis simul ad eam invadendam suis literis incitatis, proditorem, desertionemque, perpetrasse, Romæque Imperium amisisse, Jure Gentium convictus est. Quo quidem amisso Imperio, suo juri, suæque libertati restituta Roma eodem Gentium Jure fuit. (nam liberam fuisse Romam per annorum centurias ante L. Syllæ dictaturam constat, oppressaque demum Imperatorum armis ac dominatu, sicut libertate caruit, ita dominatu amoto ad antiquam libertatem rediit) Libera itaque effecta Roma suo jure applicari ac conjungi suæ Ecclesiæ atque Pontifici potuit: nam Deum ipsum implorasse, sibi que Principem adscivisse, existimanda est, cum Gregorium Domini nostri JESU CHRISTI Vicarium pro Principe suo elegit: quo electo dividi à Dei Ecclesia, quod ei conjunctum, copulatumque, fuit, nulla ratione potest: quoniam ipsius Ecclesiæ caput Deus est, irruereque in ejus honores, juraque, videretur, qui violare hujusmodi connectionem quoquomodo auderet. Si igitur Romana Ecclesia nullum prorsus jus ac ditionem in Roma, Latio, & aliis finitimis antea habuisset, certe hoc, quod ex R. Populi consensu Mauritio deferente assecuta videtur, magni momenti existimandum fuisset.

Verumtamen cum tantæ auctoritatis Gregorius esset, ut arrogare sibi Romæ Imperium posset, prospicere quidem Romæ, perinde ac si Imperium habuisset, curavit; retinere vero dominatum Mauritio extincto recusavit. Phocæ itaque Imperatori humanissimas literas dedit, quibus illum ad Italiæ protectionem, liberationemque, invitavit; quam tamen ille ipse Imperator minime suscepit, hocque solo actu memorabilis erga Romanam Ecclesiam fuit, quod eam Occumenicam, matremque (ut ita dicam) omnium Ecclesiarum promulgata constitutione declaravit, quod Romæ similiter in fronte porticus Lateranensis Templi sculptum legitur: longe tamen probabilior fuit Justiniani declaratio, relata à me octavo libro, capitulo octavo; quoniam declarasse eo loco Imperator videtur statum Ecclesiæ juxta ipsius Dei constitutionem, quæ potior est Imperatoria promulgatione: quid enim Dei potestati in terris positæ addat Imperator, qui & Deo, & ejus Vicario, inferior est? Dignior enim à minus

B digno auctoritatem non recipit, sed consensum: cuius rei claram attestationem habes, quod primus Justinus Imperator, ut suo loco enarravi, coronari à Romano Pontifice tanquam à digniore maluit. Concessisse etiam Phocas memoratur Bonifacio Pontifici, hujus nominis quarto, Pantheon, quod hodie *Templum rotundum* Romæ nuncupatur: à qua re apertissime conjicitur, nihil sibi ea ætate adscribere voluisse Pontifices in dominio Urbis, quamvis semoti ab Italia, & fere exauctorati Italico dominatu Imperatores essent. Nec tam adspirasse illi ad Constantini donationem, quam ad Christianam institutionem visi sunt: felix quidem ac præclara modestia, Petri successore digna, quod enim Jure

C Gentium sumere potuit, impetrare maluit, ut impetrandi humilitas ambitionis notam ab actione depelleret; oh digni contemplatione mores à nostra ætate dissimiles! Pantheon ille Populo Romano sacra-
vavit, aperuitque, & in eo ipse Pontifex sacra peregit: contra, me Romæ agente, Pantheon despectum ac prope destitutum visum fuit.

Sed parva fortasse hæc censentur inspectis aliis longe horridioribus, quæ nollem heu, nollem, inquam, spectasse oculis, ea quæ miserrima vidi. Staret quidem Beatæ Virginis Mariæ templum ad portam Populi, suis ornatum atque instructum ædibus, starent in via lata recti vici, suis referti familiis, starent in propinquis collibus alta & elegantissima tecta, quæ omnia unius, aut alterius diei ipatio erui à culmine, impioque fragore perimi vidimus, anno salutiferi partus millesimo quingentesimo quinquagesimo septimo, Paulo Quarto Pontifice sedente. Nec discedendum tamen à Romanæ Ecclesiæ institutione hujusmodi ex causa est; prædixit enim nobis Dominus JESVS futura scandala, eorumque auctoribus comminatus, nos crucem tollere monuit. Cujus sequentes præcepta, sequi similiter rectos ipsius Ecclesiæ calles, tramitesve, necesse est, eundemque Dominum exorare, ut Pastorem nobis tribuat, qui nos, ovibus similes, spiritali esca pascat, & non ex nostro adipe, vel vellere, se, suosque, depascat, refarciatve. Patent quippe Majestati tuæ, Optime Deus, nostra ulcera, patet nostra infirmitas, atque ignoratio, dum sapientes nobis ipsis esse videmur, insipientes efficimur, & nostra ambitione seducimur atque confundimur: nostraque imbecillitate ab utero aberravimus, hoc est, à tua institutione, in qua enati sumus, omnisque ferme lingua perperam in te auctorem & Dominum fremuit. Sed poenitet nos male peracti & consumpti oculi, negotii, studii, errorisque; redire in viam cupimus: iccircoque Ducem, sive Pastorem, cupimus, humanoque destituti auxilio ad te confugimus, tuamque celsitudinem imploramus, ut respicias Europæ populos, olim tuæ fidei firmamenta & scopulos, tuoque adhuc nomine insignita: Pastoremque eis tribuas, Gregorio similem, qui morum integritate fulgeat; qui Gregi tuo prævius lupos, vulpesque, procul arceat atque dispergat; qui bonos accersat, & ad tuas aras admoveat; qui tua illa ampla Urbis templa diuturno situ & solitudine squallentia, ac fere sordida, tandem circumspiciat, nec diutius rectorum excidio ac ingruentibus imbribus labefactari sinat: qui versari inter sacra, sacrisque incumbentes viros studeat; quique etiam morum coercionem ac rectitudini animum intendat:

quibus quidem moribus in religionem versis obmutescere insanos, scriptaque multorum evanescere necesse est; ejusmodique aliquando nobis constituto Pastore, aut nos ejus exemplo atque auctoritate resipiscere, aut à Divinitatis tuæ indulgentia nostris demeritis ac pervicacia excidere oportebit, quamquam si nostra spectas merita, si denique humani generis nunc vigentis opera vis perpendere, nihil agis. Perimus scilicet, votisque excludimur, nullo nobis subsistente actu, nulloque à nobis tentato opere, quod tibi pro tua in nos gratia rependi possit, aut æstimatione dignum sit, tua nos semper obruente, nimisque excedente, natura. Quare aut ea, qua tu majores nostros evocasti à gentilitio, gratia respicere nos ac misereri decet: aut si non misereberis, heu infelix genus! perdis, Domine, humanum opus, perdis, inquam, nos, tuis ab initio manibus tanta arte compositos, tuoque Spiritu in tanta gentium varietate ac multitudine constitutos. Destrues denique tuipse speciem humani generis, quod ne aboleatur, tuæ solius Divinitatis & gloriæ interest. At quo me infusum, impurumque, hominem provexit oratio, quo me impulit ipsa cogitatio: vertere in Deum mea scripta audeo, perito quidem indigna viro, Deo autem indignissima. Erravi miser, poenitensque audaciæ veniam imploro ac conticesco.

C A P. II.

De Heraclii Imperatoris præstantia & mutatione.

PHOCA Imperatore occiso, Heraclius Imperium assilutus mirabilis Princeps fuit: conversus enim in Persas, eos fudit, fregitque, religiose semper bello confecto, in quo Crucem Domini receptam, Hierosolymamque delatam, ipse nudis pedibus in Calvarium montem pertulit; Imperatorium proprie munus existimans tam insigne onus subire ac bajulare. Qui quidem vir foelix profecto fuisset, si se in eo religionis statu continuisset, nec ab initiis mentem avertisset. Ecce autem quomodo è converso mutato studio, sese turpi ocio, lenocinio, avaritiæque corruerit; omissoque militiæ decore ac rerum gerendarum cura, in fœcordia & dedecore contabuerit. Ecce quomodo Isacio in Italia Exarcho constituto, per illius profanas manus Lateranensis templi penetralia referaverit, aureaque, & argentea vasa, cruces, calices, candelabra, & alia Deo dicata, vi publica arripuerit, verteritque in profanos usus. Ecce quomodo ille obœcata mente in neptis suæ incestum turpissime exarserit, atque à malo in malum delatus, in hæresim quoque prolapsus sit. Itaque sicut antea Deum colens in magno rerum eventu atque amplitudine versatus est; ita postea à Deo aversus, adverso similiter rerum successu consenuit & interiit: sed quo mortis genere, pudet referre, quamvis circa morbum dissentiant Scriptores. Pomponius Lætus, & Egnatius, obsceno morbo; Sabellicus, intercutaneo defunctum tradunt; Platina, ut dispar esset contentio, in *Theodati Vita*, quem, *Deus dedit*, inscripsit, à Saracenis oppressum ait, trigesimo & altero imperii sui anno. Sed qui sint Saraceni, nonnulla contradictio est.

C A P. III.

De Saracenis.

RECENTIORES, quos memoravi, Scriptores Saracenorum tumultum, Maumethique artes & sectam, sub postrema Heraclii tempora collocant post Scenitarum equitum seditionem; qui ab Heraclio secedentes ob stipendia non soluta, Orientales provincias excitato aliorum tumultu invaserunt: & illi ipsi nostri Scriptores sub Saracenorum nuncupatione tria nomina colligunt, Scenitas, de quibus Plinius, Agarenos, & Imaelitas, tanquam iidem populi esse videantur. Sed, an ita sit, dubito propter priorum Historicorum auctoritatem. Nam Flavius Vopiscus in *Aureliani*, & Trebellius

A Pollio in *Zenobia Vita*, & Ammianus Marcellinus libro xiv. ubi plura etiam ridicula de Saracenis recensuit, nusquam eos vel *Scenitas*, vel *Agarenos* appellatos fuisse ajunt, ut Pomponius Lætus, & Sabellicus, Egnatiusque scripserunt; quos etiam viros redarguunt posteriores Topographi, siue regionum descriptores, dividentes in Arabiæ circuitu Saracenos à Scenitis, & utramque gentem in Arabia ponentes citra sinum Persicum, qui sinus Persicus postea Saracenis cessit, Persarum nomine in Saracenos abeunte. Improbat præterea opinionem eorum, qui Agarenos dici posse Saracenos putant, liber *Paralipomenon*, (de Agarenis à suis sedibus interdum pulsis Judæa gente urgente mentionem faciens) & *Psalmus* etiam octogesimus secundus, *Deus quis similis erit tibi*, &c. in quo de Moabitibus & Agarenis mentio incidit. Si itaque antiquissimi Agareni fuere, Saraceni vero à Marci Antonini Imperatoris principatu citra celebrati tantum sunt, quomodo iidem Populi esse videri possunt, præsertim cum Divo Hieronymo in Palæstina agente Agareni nomen suum retinerent, Saracenis tum etiam satis superque notis? Attamen ne temere illorum peritissimorum scripta videar redarguere, posthabitis iis, mihi ipsi nihil arrogans, eruditiores consulendos censeo.

C A P. IV.

De Maumethi secta.

AD MIRARI periti aliqui Scriptores videntur, quod Maumethi secta, à Saracenis aucta, tantum invaluerit. Ego vero minime hoc mirum esse censeo. Si enim Constantinopolitani Imperatores, Antistites, Duces, Milites, Præfecti Urbium, Populique, ut jam legimus, plerique Deum, & ejus mandata, gentiumque jura, ac humanam societatem, exosi, uno & altero seculo ruere in hæresim, in sacrilegia, violatis Pontificibus, sacrificiis delubris, pulcrum putarunt; si uno consensu in hujusmodi & alia scelera conspirarunt; si perpetrandi facinoris ansam priores posterioribus tradiderunt; si sibi subjectas gentes per nefarias administrationes, per avaritiæ opera exhaurire, expilare, deglubere non destiterunt; si leges venales, venaliaque judicia, ac etiam ipsa sacerdotia habuerunt; item si tum Christiani Principes, qui insurgere in eos debuerant, eorum abominationibus & iniquitatibus acquieverunt: nonne oportuit Deum totius Orbis Dominum hæc ulcisci? Saracenosque, & Turcas olim seculo ignotos, à terræ visceribus erueri, erigere, & ad abolenda istorum Dominia, Regna, Imperiaque excitare; meritoque illi pseudo-Christiani Principes, Antistitesque dejecti à suis sedibus, Cathedrisque, fuere, Maumethanorum vi & armis, ut omnes intelligerent, odibiliores eos Deo fore, qui Deum norunt, & non colunt, quam illos, qui Deum non colunt, quia ignorant.

C A P. V.

De Theodelinda Regno.

PUDEAT Græcos viros male administrati Imperii, neglectæque religionis, ac susceptæ hæresis, quando una inter Longobardos mulier in regno suo, pace & religione firmando, præstantior orientalibus Imperatoribus comperta fuit. Nemoque miretur, si prostratis Imperii Romani fascibus externa gens evecta ad Italicum Regnum aliquando fuit, illis olim nostratibus Principibus regno ipso indignis. Hæc autem clarissima mulier Theodelinda fuit, primum Divi Gregorii monitis, scriptisque, imbuta, deinde usu & exercitatione in Christiana institutione firmata; quæ sui nominis significatio *Deum* & *delinire* indicat, quasi Dei delineta spiritu. Hæc igitur ipsa, Agilulpho marito defuncto, post vigesimum quintum regni sui annum confirmata in regno fuit, Aldovaldo filio adhuc impubere, & regni curis inepto. Pace itaque cum sanctimis firmata, ad Dei religionem augendam animum

mum adiecit, magnificaque templa passim ædificavit, & instruxit opibus, præcipuumque honorem Divo Joanni Baptistæ impendit, his ferme verbis muneribus inscriptis: *Sancto Joanni patrono suo offert Theodelinda Regina cum Aldovaldo Rege filio suo pro se, & cunctis Longobardis Italianis.* Italianes scripsit suorum idioma secuta: *Italianes* enim materna lingua Germani & Galli Italum appellant, dixitque Italianes eos, pro quibus templa voverat, quoniam nati in Italia erant: quinquaginta enim & amplius anni exacti erant ab Alboini adventu ad Theodelindæ regnum postremo susceptum.

Furit hoc loco quidam Scriptor ægre ac moleste ferens, Longobardos Reges, Italicos, Papiensesque, appellari: sed cur insaniat in re jamdiu transacta & irrevocabili, non video: Jure enim Gentium, scriptisque legibus, patet, quod sola origo civem facit, etiamsi quis in Gallico, vel Germanico, utero conceptus fuisset. Si itaque post Agilulphum plerique Reges Longobardi nati in Italia sunt, nonne ab origine Italicam naturam assumpserunt, alique Papienses, & aliqui etiam Mediolanenses fuerunt. Agnoscenda igitur illi Scriptori prius erant Jura naturæ, antequam inania verba eo modo effunderet, dicendo, *si Longobardi Reges, nunquid Papienses Reges?* Cui respondetur, Reges Papiæ natos, Papienses, & origine, & natura fuisse, quamvis Longobardi à gentis suæ stirpe & cognomine nuncuparentur; Papiamque patriam plurimorum Longobardorum Regum hac ratione fuisse, regiumque honorem suorum civium origine obtinuisse: superfluo itaque labore iste consumitur, qui hodie revocare se posse putat, quod jam diu Jure naturæ quasi in judicatum transmissum & approbatum fuit. Differt enim originarius ab oriundo, ut periti Grammatici notant: quos sequentes dicere possumus, Reges prædictos oriundos quidem à Longobardo genere, originarios autem Italos fuisse, quam differentiam etiam pueri norunt. Sed ad Historiam redeo.

Theodelinda igitur ædificatis pro civitatum & oppidorum commodo, instructisque, templis, idoneos, probatosque moribus & peritia, viros sacris faciendis adhibuit; Nobilibus etiam præfectis, qui curam haberent, ne quid divino cultui deesset; summumque ipsa studium semper in divinis posuit, rata, & regia instituta populos facilius imituros, & ex imitatione gratiores Deo futuros, atque ex ea gratia majorem amplitudinem ac tranquillitatem in Regno habituros: in qua quidem sententia Cyrus, olim Persarum Rex, apud Xenophontem libro octavo *Padia*, fuit, constituisseque Magos ejus lingua sacra facientes in divinum honorem hoc ordine dicitur, ut simul atque dies illucesceret, divinæ confestim laudes concinerentur; perpetuatoque ordine diei initium pariter, & finis, mediumque divinos semper honores referrent; diemque transactum insequens etiam nox humanis canticis similiter exciperet: quod nulla alia ratione ille gentilitius Rex instituisse scribitur, nisi quod feliciores populos fore perspexerit, qui ad divinos honores propensiores essent: quod & priscos Hebræos observasse, & nostros etiam sacerdotes observare oportere constat. Nec Theodelindæ spem, fidemque Deo habitam, fecellit casus: stetit enim tamdiu gentis regnum atque libertas, quamvis molesti sæpe finitimis Longobardi essent, quamdiu religio ac sacrorum celebratio eisdem curæ fuit. Ubi vero post longa tempora flaccescere in illis divini cultus honorificentia coepit: ubi denique in templis, sanctisque delubris, pro frequentia populorum, solitudo, & pro sacrorum cura, negligentia introducta fuit, simul etiam desolatio eos affixit; quam Dominus JESVS CHRISTVS discipulis suis olim iis verbis prædixit: *Cum videritis abominationem stantem* (hoc est, durantem) *in loco sancto,*

(id est, Deo dicato) &c. *Tunc qui legit, intelligat prope esse manum Dei.* Testimoniumque perhibet Paulus Diaconus, labare cœpisse Longobardorum regnum, eorumque libertatem subactam sua ætate fuisse, quo tempore neglecta religio à populis, creditaque improbis ac scelestis sacrorum cura fuit. Væ igitur illis populis, ubi hujusmodi negligentia jam diu constituta, usuque firmata sit, nisi aliquis bonorum grex, & aliquis bene precantium numerus deprecari divinam iracundiam ab illis studeat ac mereatur.

C A P. VI.

De Cremona instauratione atque incremento.

FLORENTIBVS igitur pace ac religione Longobardorum rebus, Theodelinda, Cremonensium casus miserata, quos mariti jussu atque imperio urbis exitio multatos noverat, conqueri eos, accersirique, curavit, iisque verbis allocuta fuit: *Si mihi Agilulpho Rege marito meo vivente licuisset, calamitatem vestram libenter sublevassem; sed cum mihi sexus ratio, & mariti voluntas, & imperium (qua semper maximi feci) impedimento essent, distuli in hunc diem facere, quod à principio factura fuisset. Nunc ergo quod gentis nostra arma vobis olim luctuoso casu abstulerunt, ego simulque gens nostra vobis restituere meliore fato aggrediemur: Ite igitur, curate vestra tecta, urbem emundate, colite vestra rura, lares replete, & ego publicos sumptus ad civitatis vestre refectionem suppeditare studebo.* Civibus itaque, qui urbis excidio superfuerant, in sua jura restitutis, confluere ad Cremonæ vastitatem curandam certatim populus coepit, Longobardis simul vacuas sedes eorum, quos belli casus aboleverat, jure suo occupantibus: invitabat etiam vicinos populos ad civitatem incolendam opportunitas situs, qui Pado aptissime imminet, ac ferme infidet. Et quod denique flumen coactis in unum diversorum amnium aquis, civitatem à Meridie circumambit, & aquarum amplitudine ac profunditate pene immensa onustissimas, maximasque, naves ab Adriatico sinu recipit commode, commodiusque remittit: cujus importationis facilitate mercium externarum copia civitas affluit; à qua fortasse priscum nomen deduxit; Crema enim materna lingua Sabini *copiam* indicant.

Nec agri Cremonensis proprietas inferior urbis situ existimari potest: nam latitudine sua ab Ollio amne ad Padum, & à Pado ad prædia Appiæ Viæ (quam *Romanam* vocant) finitima porrigitur: cujus rei causa pagi & oppida illustrium Palavicinorum hodie etiam Cremonensis Diocesis nuncupantur, ut Buxetum, Lilibellum, vulgo *Zibellum*, Vitalentium, & alia Cremonensibus posterorum ætate adempta. Longitudine etiam erat insignis ager, ab Addua amne usque ad Mantuæ territorium tendens in Transpadano tractu, ubi est terra ferax, felixque: nam sive æstu laborante solo, sive influente pluvia, tellus Cremonensis parvo negotio arari, ferique, unius noctis serenitate solet, terrarum glebis levi tactu aratro, rastrove, cedentibus, & sese in lutum, vel pulverem, solventibus: hacque sibi innata qualitate lætus ager Cremonensis quanto frequentius subigitur, tanto uberior videtur, receptoque semine sulcos autumnno segete operit, & appetente solstitio jam jam flavet aristas, comamque demittit, ac pollicetur copiam avaris, qui horreis includere frumenta inhiant, ut pluviam humana necessitas posset, urgente re, mutuum in duplum credant, unoque aut altero (quod meminerim) tantum anno Cremonenses exili percepta à suis prædiis annona, triticum aliunde expetiverunt, præcipue anno quinquagesimo nono supra millesimum & quingentesimum, quo Paulus Carapha Pontifex Quartus, à luce subtractus, inanem sedem dimisit; quo quidem anno valida vigente penuria Læumellina tritici copiam Cremonensibus, divina largiente manu,

nu, impartita fuit. Vinearum quoque ordine conspicua regio ipsa est, amplo intercedente spatio cultura aptissimo, & vini copia dominum, colonumque, obruente: ita ut interdum recondi vasibus multum nequeat, nisi veteris vini pars quoquomodo effundatur, & cum pruinis uri Insubriae vineta æstatis initio interdum contingat, Cremonenses vineæ, tanquam sub tepidioris coeli parte positæ, & à Gallia Alpibus magis remotæ, minus infestantur. Adde vero quod nulla, meo iudicio, civitas Pado adjacet, quæ facilius instauratu quam Cremona sit, creta, sive argilla, circa civitatem sita, quæ tam ad lateritium comparandum, formandumque, quam ad murorum compaginem aptissima est.

Quibus quidem instructa atque firmata bonis civitas, plures finitimos nobilitate conspicuos ad se incolendam, ornandamque, pellexit, magnoque postea rerum incremento ac virorum præstantia sub Longobardis enituit. Si quis autem hæsitaverit hoc loco, unde oriunda censeatur Cremonensium nobilitas, nostra ætate insignis atque conspicua, à Longobardis, qui post veteris urbis excidium eam incoluerint instauratis ædibus, an vero ab antiquorum civium reliquiis, civitatis exitio superstitibus: ego hujus rei inquisitionem curiosis puto relinquendam: victos enim in victoris transire potestatem atque coloniam Jure Gentium constitutum est: qui vero ex victis originem posteritati præbuerint, & an major vel minor copia Longobardorum, vel antiquorum Cremonensium, fuerit in populo propagando, aliis definiendum remitto: hac una sententia tantum probata; quod Cremona instaurata, habitata, & ad incrementa virorum & opum perducta à Longobardis fuit, Romani Imperii viribus in Italia hebetatis, & ad contemptum redactis. Si quis potiora novit, referat, & relata probe Scriptorum auctoritate deprompta.

C A P. VII.

De Theodelinda successoribus, & Legibus Longobardorum.

DECENNIO in Regno transacto Theodelinda Dannosa obiit, Aldovaldo ignavo filio è regno ejecto: cui Ariovaldus successit, qui duodecim annos in pace regnavit: suscepit deinde regnum Rotharus, à suis Rotharis dictus, à quo primum leges gentis suæ, quæ memoria tantum tenebantur, in scriptis redactæ sunt, anno, ut ipse notavit, LXXVII. ex quo in Italiam venerant; compositio autem ipsarum legum partim Latinis verbis, partim maternis, ut *camera*, & *casa*, & partim Longobardicis, partim etiam mixtis facta, vel potius confarcinata fuit: exstatque liber nuper editus legum Longobardorum; in quo illud passim servatum animadverto, *Langobardos* nusquam sese in Italia, sed *Longobardos* conscripsisse: licet ab initio, teste Cornelio Tacito, *Langobardi* appellati fuissent: quos ego similiter secutus Longobardos in Italia positos vocavi. Gentis autem ipsius feritas in causa fuit, ut posthabitis omnium nationum legibus, propria sibi Jura ipsi per consuetudinem sanciverint, atque à consuetudine ad Regum, Ducum, & Judicum memoriam transfulerint: inter quas quidem leges, consuetudine ac memoria celebratas, Monomachia usus continebatur, de qua capitulatim verba facere æquum est.

C A P. VIII.

De Monomachia, vel Duello.

CUR Monomachia usus introductus inter Longobardos per consuetudinem fuerit, triplex mihi videtur causa. Primum, ex legum suarum defectu, quibus omnes ambigui & contentiosi casus non colligebantur, & cum neque ad Romanas, neque etiam à principio ad divinas leges se referre vel-

lent, in pendenti controversia consistebat: ad quam tollendam, illud, quod hodie etiam vulgo dicitur, eveniebat, *Si non sufficiunt jura, veniamus ad arma*. Secunda causa fuit militaris conversatio atque licentia: impossibile quasi erat, armatam gentem, quæ quinquaginta circiter annos evagata ab originali solo in Rutilandiam, Pannoniamque, fuerat, ferroque in Italiam postea viam fecerat, adeo compefcere, ut interdum alter in alterum re, vel causa aliqua, non excandesceret, iraque concepta insurgeret, ac manum conferere vellet: quo casu turpe ac perniciosum alteri videbatur, aut insultum perpeti, aut gradum referre; decorumque potius ex adverso, ac militare censebatur, insurgentem armis repellere, & quod natura cuncta animantia docet, insultantem retundere ac summovere. Ad frænandam itaque aliquo modo digladiandi promptitudinem ac licentiam, & ex parte etiam ad evomendum, exhalandumque, utriusque affectum hostiliter conceptum, quem evellere à militari animo durum est, nisi manus conserant, decertatio certa consuetudine ac norma admixta fuit. Tertia causa à secunda aperte provenit: irritati enim ad controversiam, odiumque, viri, agnatorum & amicorum catervas ciebant in sui favorem, & adversarii consternationem: ex qua re contentiones virorum numero in mutuam perniciem augebantur, & pro duobus hominibus decem & plures agitantur. Quapropter ad comprimendum & extenuandum plurium periculum, permixta Monomachia fuit, cunctis existimantibus, minus periculi fore in duorum quam in plurium decertatione ac discrimine. Constituta igitur in certis casibus per consuetudinem Monomachia, Rotharus Rex, vel Rotharius, gentis suæ consuetudines scriptis colligens, hanc etiam Monomachia pestem legibus inserere necesse habuit, quod etiam invitum se fecisse inquit. Monomachia itaque introductione enarrata, videndum est quibus in casibus admixta ex lege fuerit.

C A P. IX.

De Monomachia casibus.

TRIBVS in casibus permixta à lege olim decertatio singulorum fuit, aut pro salute & fama; aut pro re; aut pro fama tantum sua, vel alterius obtinenda, vel evincenda. Pro salute & fama: veluti si quis reus factus fuisset, quod contra Regem molitus esset, solo accusatore hoc attestante, ad sese liberandum reus singulari pugna decertare adversus delatorem ex lege poterat; in titulo *de scandalo commisso*. Insignior est is, qui sequitur, casus à Paulo Diacono relatus libro IV. capite XVI. Gondibergera Regina uxor Rodoaldi Regis, qui Rothari filius fuit, & Theodelindæ filia, adulterii rea facta, quod cum Charello familiari Regis se commiscuisset, carceri mancipata fuit: quod ægre ferens, Beato Joanni Baptistæ innocentiam suam supplex commendavit; Charellus autem in vinculis positus Regem exoravit, ut quod lege permixtum aliis erat, sibi quoque Regia clementia permitteretur, videlicet singulari pugna salutem suam, famamque, & Reginae decus ac dignitatem tueri: exstat enim lex titulo *de crimine adulterii*. Annuit Rex Charelli supplicationi, pugnaque Papiæ, Rege ac populo spectante, admittitur, in qua accusator occiditur, Charello securitatem recipiente. Regina vero voti compos, Regique conciliata, ob rei monumentum templum ædificavit, instruxitque opibus, quod *Sancti Joannis Dommarum* in sexus sui honorem nuncupavit, ubi corpusculum ejusdem Reginae loculo conditum cernitur. Quod quidem templum Platina Terracinæ fuisse ædificatum in *Joannis quarti Viti* scripsit, quem sequitur Sabellicus, & ut in proverbio est, *Cacis*

cacum ducens, uterque simul errat: quid enim cum Terracina commune habuit Regina ipsa in Transpadanis vivens à Terracina remotissima, & quæ demum Terracina Romanis tunc conjuncta Principibus erat. Sed redeo ad historiam.

Lex erat, ut si quis puellam fornicatam, aut mulierem in adulterio deprehensam proposuisset, pugnandi pro ea, aut criminis complex, aut pater, aut frater mulieris contra accusatorem posset; in titulo *de injuriis mulierum*. Simili etiam modo si mulier de mariti interitu accusata fuisset, patri, vel fratri, permissum erat, per singulare certamen filiam, vel sororem, à judicii poena liberare accusatore prostrato; in titulo *de muliere maritum occidente*. Quod si pugnans pro muliere succubuisset, ipsa criminis rea remanebat, perinde ac si judicio damnata fuisset. Pro rebus quoque vel bonis permissa decertatio erat, veluti pro Principatu: exemplumque impietatis fraternæ ponit Paulus Diaconus libro iv. capite v. ubi duo Faroaldi Ducis filii certamine inter se decreto, quis dignior principatu esset, Theodelapius fratrem superavit. Nostra quoque ætate inter fratres ex leviori causa quam Principatus inferri lethalia vulnera audivimus. Item si de ambigua duorum possessione incertitudo in judicio resultasset, posterior possessor possessionem suam tueri singulari certamine proposito ex lege poterat; in titulo *de emptionibus & præscriptionibus*. Filius etiam post mortem patris si pro paterno debito conventus in judicio fuisset, ambiguitate super debiti veritate exorta, solutione fortasse sine ullo teste à patre facta, pugnae discrimen probationis loco offerre creditori, vel actori, ex lege poterat; in titulo *de debitis patris mortui*. Pro fama tantum hoc casu & ordine pugnam permitti legimus: Si quis alterum *Arga* appellasset, id est, *ignavum*, aut mentiri in judicio per juramentum cogebatur, his verbis: *Juro me per furorem ita dixisse, & talem eum non cognovisse*; solutis statim poenæ nomine solidis duodecim. Quod si revocare, quod dixerat, nolebat, turpe fortasse ducens sibi ipsi contradicere, singulari decertationi sese committere ex lege cogebatur. Possem alios annumerare casus à prædictis parum dissimiles, ut de actu ad pugnam compellato, in quibus pugna probationis loco actori permissa erat, sed satis puto retulisse prædictos.

Cæterum si quis ad pugnandum idoneus non fuisset, quærere pugilem jubebatur, quem *Campionem* à campo appellare consueverant, qui se pro altero in discrimen committebat. Quibus quidem à me relatis constat, quod ad duellum committendum quatuor principalia requirebantur, Causa contentione digna, Judicialis necessitas & auctoritas, probationis, vel reprobationis, impossibilitas, ultimo consuetudinis, vel Legis, permissio, extra quas leges nemini licebat imperioso actu, atque citra judicii auctoritatem (ut nunc fit) alterum ad certamen provocare: quod doctissime improbat Antonius Massa Galefius, plura congerens scitu præclara; quæ si sequi vellent ii, qui certamina ad alterutrius viri internecionem, perditionemque, proponunt, laudabile opus facerent: sed cum invitis legibus, Regibusque, plures sua opinione inflati, ruant in fata, impediri istorum fata peritorum argumentis nequeunt. Itaque cum Duelli causas, quæ frequentiores erant, exposuerim, ordinem etiam pugnae referre consequens est.

C A P. X.

De ordine pugnae.

CERTAMINE à Judice decreto, Rex statuere tempus & locum pugnandi utrique consueverat; qui locus *Campus* vocabatur, undique tabulis circumseptus, quibus aditus tantum, & non pro-

A spectus adstantium impediabatur, Campoque custodiendo milites præficiebantur. Arma pugnaturi paria afferebant, videlicet gladium & scutum in ea forma, qua uti in bello mos erat, & si quæ alia ferre utrique tela collibuisse, ferebantur. Prodeuntibus ad pugnae locum focii aderant, qui certandi periti monita suo quisque pugili repetebant, quo actu se tueri, quo ictu inimicum lædere, se salvo posset; qui socius *Parentis* nomen ab officio obtinebat, hodieque etiam *Patrinus* dicitur; aderat etiam alter socius, vel comes, arma ferens, qui *Collibertus* appellabatur. Pervenientibus ad locum certaminis, si suspicio contigisset alterutrum maleficis artibus instructum esse, inquisitio ad judicem Campi spectabat; in titulo *de Campionibus*, cujus verba refero: *Nullus Campio adversus alterum pugnaturus audeat super se habere herbas, nec res ad maleficia pertinentes, nisi tantum arma sua, qua conveniunt; & si suspicio fuerit, quod eas occulte habeat, inquiratur per judicem, & si inventa fuerint, projiciantur. Post quam inquisitionem extendat manum suam ipse in manu parentis, aut Colliberti sui, ante judicem, dicens, se nullam rem talem super se habere, deinde ad certamen prodeat.* Cujus quidem certaminis finis frequenter erat vulnus alterius, si ne mortis casu, arbitrio Judicis, ut Lythprandi posteriores leges indicant in titulo *de Monomachiis*.

C Hæc à me relata sunt, ut pateat quam immaniter nostra ætate decertandi cupidi in sese sæviant, cum alter ad interitum alterius tendat, illaque etiam inventa novitate, videlicet, quod pugil veritate fortasse agnita, qui manum dedat, alterius pugilis captivus fiat: quod neque Longobardi in usu habuere, neque ulla ratione statui inter privatos posse video: manum enim dedere, est victorem alterum esse, & se ipsum victum declarare: quæ declaratio proprie pertinet ad confirmandam intentionem, vel sententiam, vincentis in confusionem ipsius victi, non autem ad mutandum ejusdem statum, ut per illam declarationem ex libero servus fiat; cum super libertate non sit commissæ pugna, nec quæstio proposita. Sed transeamus ad potiora.

C A P. XI.

De Monomachia desuetudine.

CVM Rotharius gentis suæ consuetudinem scriptis legibus collegisset, Monomachia similiter comprehensa, ad ipsam Monomachiam abolendam, vel saltem restringendam, animum adjecit, titulo legibus inserto, *Quibus de causis pugna vitatur*. In quo titulo expositis casibus, in quibus pugnae propositio fieri ab Actore, vel Reo, potuisset, dirimi per juramentum controversias jubet, censens apertissime injuste Monomachiam in privatis judiciis admitti, usus his verbis: *Injustum videtur, ut qualibet causa sub uno scuto committatur*, &c. Apertius autem Monomachiam improbavit Lythprandus Rex, qui secundus à Rothario post Grimoaldum leges edidit, titulo nonagesimo primo *de Monomachiis*: *Incerti sumus de judicio Dei, & multos audivimus per pugnam sine justa causa perdere causam suam: attamen propter consuetudinem gentis nostræ impiam legem vitare non possumus.* Si itaque Reges ipsi hujusmodi digladiandi actum tam clare improbarunt, cum eorum leges in usu essent, nemo sanæ mentis hoc tempore, in quo antiquatæ illæ leges sunt, probare actum, ab ejus Auctoribus improbatum, & à nobis detestandum, nova ratione poterit, ut quidem est aggressus facere: & quamvis multi ferino ritu in pugnam ruant, minime tamen illi suis nefariis ausibus legem statuere adversus Divina & humana jura possunt, sed seipsos tantum suis legibus, quas *Duellares* vocant, inficiunt ac perdunt.

C A P. XII.

De Rotharii Regno.

ERANT tunc sub Longobardis plures Provinciae, & in primis Transpadana planities, Ligures quoque maritimi, qui à monte Salvio usque ad Lunæ portum subacti à Rege Rothario memorantur, Viæ Æmiliæ oppida, pars Flaminiae, & Etruriæ, item plerique Umbri, Piceni, & Samnites sub Beneventi Ducatu comprehensi, ac etiam Campani, & Sipontini. Legibus itaque à Rege promulgatis, omnes illi populi iisdem legibus vivere jussi sunt, eis tantum exceptis, quibus Romano jure uti antea indultum fuerat, ut Papiensibus. Illa igitur promulgatio magnam cladem attulit Juris scientiæ, quæ quasi contemptui habita fuit, plerisque ex necessitate illa Jura sectantibus, quæ tum in promptu magis, & in usu erant, ægreque studium Romanis legibus impendentibus, Romano Imperio jamdiu à Majestate Italica declinante, sine qua legum observatio esse nequit. Altera etiam deterior labes populos infecit: nam Rege ipso Arianæ sectæ adhærente, dissensio in unaquaque civitate & Ecclesia exorta est, Catholicis suis institutis, Arianis vero suis ritibus, à nobis alienis, viventibus: qua dissensione infestati, jactatique, Ticinenses, Anastasio eorum Episcopo Ariano effecto, conventu habito resipere, & converso Episcopo sanctæ Romanæ Ecclesiæ acquievere. Mortuo tandem Rothario anno sui regni sexto decimo, Ariana hæresis Regis fomento destituta evanuit: à quo tamen Rege constructum fuisse constat Templum Divi Joannis Baptistæ in Ticini suburbio, quod postea in civitatis amplificatione unitum ei fuit, ubi Rex ipse conditus dicitur, ita ut penitus Arianus fide censeretur ex vitæ ratione non potuerit, miraculo etiam quodam in ejus commendationem à pluribus relato, quod omitto.

Monere Lectorem cogor, Platinam, in *Joannis quarti Vita*, Rotharii regnum & obitum conscripsisse; deinde ejusdem Regis bella in Romanos, Ravennates, & Theodorum Exarchum gesta retulisse sub Martini Pontificatum; qui Martinus sexto anno à Joanne prædicto sedit. Quoniam, quæso, ordine geri bellum sub posteriore Pontifice potuit à Rege præmortuo? corrigenda ergo lectio est, ne in errorem lapsum Platinam temere existimemus. Mortuo Rothario successit Rodoaldus ejus filius, & Gondibergæ, de qua scripsi, maritus: qui inter suos male & impudice versatus, occisus fuit quinto regni sui anno, Gondiberga uxore in vitæ sanctitate mirabiliter degente: de qua plura exstant scripta, quæ tanquam trita & popularia prætermitto. Rodoaldi, sive Rodovaldi, regnum subsequitur Aripertus, qui religione clarior quam armis fuit, ut sequens caput declarabit, tributumque divinitus videtur, ut hujus nominis familia, Mediolano oriunda, clara adhuc habeatur, *Ariperta* dicta, sive illa à Rege, sive à regio nomine, cognomen sumpsit.

C A P. XIII.

De Ariperti Regis Religione.

ARIPERTVS insignis vir Regnum suum probitate rexit, sive Theodelindæ nepos, ex Conivaldo fratre, qui uxorem Longobardam acceperat, sive alius fuerit. Pacis autem & justitiæ cultor factus ædificavit Divi Salvatoris templum, procul à Papia quingentos ferme passus extra portam Maricam, quam Paulus Diaconus Longobardicam vocem scribendo reddens, populari nomine *Marencam* scriptitat, *libro IV. cap. XVII.* clivus enim conspicuus isthic eminet, & extra civitatem angulum faciens, duplicem prospectum exhibet: unum à Meridie, qua Ticinus amnis allabatur, al-

terum ab Occidente, ubi amœna vallis patet, prætis operta, quam interfecat amnis, cui Navilium, sive Navigium, nomen est: constructum in isto est sublime & decorum templum, vineta ac viridaria regio ornatu confita, ab Oriente versus civitatem habens; inter quod templum & vallem ipsam exstant ædes eleganter compositæ, & opportunis porticibus circumseptæ, in quibus degunt religiosi viri Ordinis beati Benedicti.

Moram me hoc loco facere in scribendo necesse est, & ad Lectorem orationem vertere; sive quis templum isthic, templique cultores & ornamenta, sive mores, institutionesque, conspicatus fuerit, mirabitur loci, hominumque, dignitatem; mirabitur coenacula, cellulas, & alia suo quæque ordine distincta; mirabitur lautitiam rerum sacrarum, quæ sese spectanti lætissime exhibent, ac divinum honorem spectatæ augment, spectantemque in spectaculo detinent, prohibentque discessum. Si quis etiam ingenio politior, aut sermocinationes inire, aut lectionibus lactare animum concupiverit, aderunt isthic graves & periti viri, qui minime te inanem, otiosumque, relinquent; inter quos viros Honoratus Exerniensis olim primam sedem, primumque nomen eruditionis, habuit; deinde Romam petens insulanæ Ecclesiæ Antistes factus fuit. Adest etiam luculenta Bibliotheca, præclaris & antiquis referta codicibus, quibus & legendo oblectare mentem, & meditando sapientiam haurire, & curas interdum excludere, pectusque exhilarare, poteris. Quid referam errantium ege-
 norum, peregrinorumque, solamen; qui statutis diebus catervatim isthuc se conferunt languidi, claudi, cæci, seminudi, tremulique, ac moribundi, postibusque contactis funiculo æra concitant, sonituique flebilem ejulatum addunt, & panem implorant. Mox intra exterioris curiæ clathros, septave, recepti, pane, & vino, edulioque saturi fiunt, & lurida fugata oris macie Deo benedictes exinde abeunt.

Hæc tam præclara opera, ab Ariperto Rege instituta anno à partu Virginis sexcentesimo & sexagesimo, in præsentem etiam perstant, Rege similiter ipso isthic ossa sua habente, ut cui honorem vivus impenderat, mortuus etiam fidem per ossa ipsa repræsentaret; mortuusque fertur post nonum regni sui annum: de quo Rege scribens Sabellicus *libro VI. octavæ Enneadis*, in manifestum errorem lapsus est his verbis: *Fuit Aripertus Romana Ecclesia observantissimus, cui etiam Coccias Alpes & Ligustica ora tractum attribuit; justitiæque adeo studiosus fuit, ut ignoto interdum habitu per Regni sui oppida vagaretur, sciscitando, explorandoque, ecquid de sese, suisque judicibus, populi sentirent.* Hæc enim non de isto primo, sed de altero Ariperto, Aribertove, scribenda fuerunt, de quo Paulus Diaconus *libro VI. capp. X. & XII.*

Sed quanto laudabilior Ariperti religio in Deum fuit, quantoque præclarior liberalitas, tanto criminiosior atque iniquior Cremonensis investiva in Longobardorum memoriam agnoscitur, qui tribus criminibus omnes eorum Reges, Principes, Ducesque notat. Primo, quod Romano Pontifici semper infesti fuerunt; Secundo, quod Arianæ hæresi adhæserunt; Tertio, quod Romano Imperio contemptui habito Italicas urbes olim Imperio conjunctas occuparunt. Ad quæ tria uno verbo tollenda, quæro; Quis es tu, qui Ecclesiæ & Imperii nomine, in quibus jus non habes, controversiam in defunctos excitas? quam si fortasse ut delator proponis, nihil stultius dici aut excogitari potuit; quia de statu defunctorum quinquennio exacto quæri non licet: quæ Juris sententia hanc vim habet, ut qui Rex, vel Princeps, in suo Principatu decesserit, Regis, vel Principis, dignitate functus censeatur, retractarique ejus status nequeat;

queat; quod si exacto quinquennio retractari alterius dignitas non debet, multo quidem minus post octingentos annos Regum Longobardorum titulos, diademata, sceptraque in controversiam revocare iste Orator suo arbitratu potest: eoque actu se juris humani expertem, imprudentemque, probat: sed longe imprudentius est, eum, qui de Imperio atque de Pontificatu illorum temporum verba facit, ea, quæ illius temporis fuerunt, ignorare. Nonne ea ætate Martinus Romanus Pontifex injectis vinculis detentus Romæ fuit, atque in Græciam latronis more abstractus iussu Constantii hæretici Imperatoris, quem *Constantem* Egnatius nominat? ubi ipse infelix Pontifex vitam miserrime finivit, ut omnes Scriptores attestantur. Tunc igitur hæretici Imperatoris, ac Pontificis parricidæ, Romanæque Ecclesiæ, & Urbis spoliatoris hoc tempore causam tueri, illique honorem Italici Regni, quod in Longobardis erat, decernere atque adscribere conaris? Sed minime quidem mirum: probare enim Imperium in hæretico, & Pastoris parricida, Romæque sicario, quid est aliud quam à Jure naturæ atque ab Ecclesia Romana recedere, & hæretico facinori ac parricidio assentiri, teque ipsum consensus, applaususque, tui reum proderet? Quod vero Italicas civitates sub dominio suo ducentis & amplius annis, invitis Orientalibus Imperatoribus, Longobardi possederint, Longobardorum id decus & virtus Deo favente fuit, Orientalium vero dedecus & improbitas, qui Imperii Romani majestate indigniores successive facti, tandem Turcarum feritate ejecti à sede sunt, Deo ipso istorum barbariem æquius ferente, quam illorum flagitia. Vides-ne igitur, ut tua oratio ad deteriora fluat, quoniam dum Imperatores Orientales Italicis Longobardis anteferre studes, Pontificum Romanorum carnifices, & Italiæ ac Siciliæ expilatores à seculo infames, in memoriam revocas, nobisque repræsentas; in quibus quidem scelestissimis Orientalibus Imperatoribus seriatim recensendis doctissimus Egnatius in hæc verba prorupit: *Nunquam major impietas Principum, majorve socordia, &c. Idem alibi, Obscuritatem generis cum aliis sceleribus, tum vero impietate in Deum, &c. Potuitne quid deterius de Imperatore scribi? Adde aliud: Impio patri scelestissima proles successit, &c. Item alibi: Non Imperii solum, sed paterni sceleris hæres successit Leo, &c. Alibi quoque: Piget plane, ac pariter me pudet, tot portentis verius quam Principibus referendis immorari, &c. Hi sunt illi impuri & flagitiosi homines, quos Italiæ maluisset dominari Cremonensis Scriptor, quam Pontificum, aut Longobardorum, ordines, in quos quidem scelestissimos Principes omnino Italia incidisset, nisi Longobarda virtus illos nefarios, jam Romam exuentes, ejecisset, ut tibi subsequens historia Grimoaldi Regis enarrabit, quam *Salvatoris* capiti subijciam.*

C A P. XIV.

De Salvatoris nomine.

CONTENDUNT plerique linguæ Latinæ Scriptores *Servatorem* dici potius quam *Salvatorem* oportere; à quorum sententia summa ratione abhorreo, *Salvatoremque* scribi Latine, id est, salutis auctorem, puto, ipsius nominis vi altius excussa; differt enim *Servator* à *Salvatore*; *servator* videtur esse cujusvis rei diligens custos, vel repositor; quod nomen minime convenire amplitudini summi Dei potest; quoniam hoc nomen *servator* repræsentans suapte significatione hæc, quæ inferiora sunt, nulla proportionem referre nobis superna & divina potest, propter diversitatem rerum, quod explicare libet: *servamus* quidem ea, quæ jam suum esse habent, veluti mulier anulum, vel speculum,

A miles captivum, à quo actu *servum* nuncupatum Jurisconsulti putant; qui quidem *servationis* actus non est formator essentiae illius speculi, vel servi: jam enim erat utrumque corpus in sua forma constitutum, in qua *servatum* est. At longe dissimilior est actus nostri *Salvatoris* in salute nobis tribuenda, quoniam omnium hominum animæ ante agnitionem Dei æternæ salutis expertes sunt, salutisque aditum & principium per Baptismi gratiam & fidem assequuntur. Salutis ergo formam animæ, & non *servationem*, à Deo accipiunt, quoniam ante agnitionem ejus nullam, ut dixi, salutis formam, aut essentiam, habuerant, sicut *servus* & anulus habebant. Itaque qui Deum *Servatorem* dixerit (veritate inspecta) inferiorem à *Salvatore*, id est, salutis auctore eundem fecerit.

B Absurdum præterea est, ut mediator Dei & hominum *JESVS CHRISTVS* communi ac populari *Servatoris* nomine nuncupetur, qui suapte natura omnem significationem humanæ conditionis excessit, & ad vocabuli novitatem formandam ex dignitatis suæ majestate per necessitatem nos traxit. Prudenter igitur Cicero in humanis agens ante Virginis conceptum, componere *Salvatoris* nomen erubuit, nondum scilicet tanto enato homine, cui nomen ipsum suo jure adscribi posset: *CHRISTO* vero post Ciceronem ex Virgine orto, natura & usus, fractis merito Grammaticorum compedibus, **C** *Salvatorem* dixit, quemadmodum antea audax Græcia, teste Cicerone, *sotera* scripsit: in qua quidem sententia non solum Augustinus, sed etiam Hieronymus, Ambrosius, & Leo exactus Scriptor, alique fuere; Sabellicus quoque Ariperti historiam referens *Salvatorem* scribere, quam *Servatorem* doctius putavit, fidei proprietatem sequi, quam Grammaticorum opinionem malens. Quorum ego virorum auctoritatem recipiens, *Salvatorem* similiter à nostræ salutis formatione ac constitutione scribere æquum & Latinum censui, sive quasi salutis auctorem, sive quod nos salvos faciat. His meis scriptis addidit Beltramus Culeus, Vir Græce, Latineque, peritus, suavius sonare, magisque aures implere, *Salvator*, quam *Servator*: dulciusque etiam & longe jucundius in animo sentiri, cum *Servator* nescio quid asperius & inclementius præ se ferat, quod verum est, imo illud *serv.* reboat duritiem verbi, *sal.* autem jucunditatem. Nemoque etiam in amicorum *salvatione* dicturus est loquendo, vel scribendo, *servationem* pro salute, ut Cicero Curioni *servationem* dicit, quod esset ridiculum, sed in *salutatione* salutis nomine utimur tanquam aptiore, ac majorem significationem habente. Unde elici argumentum decet ampliora, dignioraque, nomina ad Deum potius esse transferenda, quam indigniora, angustioraque: ut ipsius nominis proprietates aptitudinem & proportionem habeat ad nominati essentiam atque naturam, popularia vocabula suapte magnitudine respuentem. Acquiescant igitur periti viri Sacrarum Literarum studiosis, discantque novis uti vocabulis, exempla majorum sequentes in his, quæ minime prisca ætas novit.

C A P. XV.

De Grimoaldi Regno.

ARIPERTO patri successerunt Condibertus & Partharitus, discordes in Regno administrando fratres; quibus sese obtulit ad odium fovendum Garibaldus Taurinorum Dux, ad prodicionis artes à natura imbutus, excitatoque à Benevento Grimoaldo Duce, belli perito, cum suis & amicorum copiis in Parthariti exitium, eundem Grimoaldum, Ticinum ingressum, in Condiberti necem per utriusque fallaciam suis artibus impulit: quo Condiberto Ticini occiso, regnoque à Grimoaldo

moaldo occupato, Partharitus Mediolano diffusus in exilium abiit. Garibaldus vero Taurini occubuit, alieni servi ferro in domini ultionem percussus: quæ quidem à me breviuscule relata, seriose narrat Paulus Diaconus *libro v. primo*, secundo, & aliis *capitibus*, Sabellico ei subscribente *libro v. octavæ Enneadis*: ab isto famoso Garibaldi nomine fluxisse vocabulum puto, obliquo ferro impositum, ex cuius versione referari adulterino actu clausuræ solent, quod ferrum vulgo *Gariboldellum* dicitur, Aribaldusque etiam populariter nuncupatur aliquis scelestus; sive hæc nomina ab illius sceleribus, sive aliter usus nostratium formaverit.

Rex itaque constitutus Grimoaldus bello aptior quam religioni, pacique fuit: nam Gallos in primis à Claudio secundo Francorum Rege in Italiam missos ad Rivulum oppidum inter Taurinum & Alpes fregit, delevitque; quo quidem in loco quasi tumulis circumsepta elegans pater planities. Alterum longe præclarius bellum confecit adversus Constantium, vel Constantem, Imperatorem, qui Italiam direptionibus ac latrocinis vexans, Beneventum obsidere aggressus erat. Ubi Romoaldus, Grimoaldi filius, Dux cum præsidio aderat, qui patre adventante solventes obsidionem Græcos valido exercitu insequutus contrivit, Roma & Italia ab eorum deprædationibus liberata, quas enarrare non est operæ pretium, *Blondo libro ix. primæ Decadis*, & Sabellico *libro vi. octavæ Enneadis*, eas recensentibus, & Imperatorem ipsum nefarium ac sordidissimum appellantibus. Platina quoque in *Vitaliani Pontificis Vita*, inter istius Constantii detestanda facinora, illud dictu horrendum refert, filios ex materno gremio abstractos pignoris nomine fuisse ad exsolvendum tributum, Italicis civitatibus, quæ sub Imperio erant, impositum. Surge, tu, hoc loco, surge, Cremonensis Scriptor, & discere, quis tibi Italiæ aptior, quis dominio dignior visus sit, Orientalisne iste Imperator hæreticus, parricida, sacrilegusque, an Longobardus, quem tu Regulum vocas! At si Transpadanus Regulus Orientalem Imperatorem in fugam vertere, & ab Italia pellere à Scriptoribus probatus est, probatior ergo ille noster Regulus tuo Imperatore fuit, præstantiorque, qui fugat alterum, quam qui fugatur, omnino est. Reliqua Grimoaldi gesta in Foro-Julienfes, Romandiolosque, collige à Paulo, Sabellico, Blondo, cæterisque. Mortuus est nono Regni sui anno, sepultusque Papiæ in templo Divi Ambrosii ab eo antea ædificato.

C A P. XVI.

De Parthariti Regis restitutione.

MAJOR ne in isto Rege virtus, an rerum eventus, fuerit, dubitari potest; profugus enim semel & iterum à patria, primo Germaniam petiit, deinde in fidem à Grimoaldo receptus, cognita ejus perfidia, ne deciperetur, fugit in Galliam, mox in Britanniam, sive Angliam, pergens, ignota voce ad patriam, Regnumque, revocatur: quod Regnum post Grimoaldi obitum, non armis, sed populorum benevolentia, consensuque, recepit: memorque periculi, quod evitaverat, cum Grimoaldi infestas manus elusit, monasterium Divæ Agathæ in civitatis clivo, ubi Ticini moenia antiquissima exstant, ædificavit, quod scilicet ab eo loco per funem demissus, in die festo illius beatæ virginis, subeunte nocte discrimen evasisset, ut in posterum Deo æterno beneficii monumentum constitueret: vixitque in Regno decem & octo annos sanctior quam regali, pace semper cum finitimis servata, populisque subjectis benignitate præstita, quod late explicant Paulus Diaconus *libro v. Blondus libro ix. Sabellicus vi.* (ut jam dixi) octavæ

A *Enneadis*, & Platina in *Donni Pontificis Vita*, Partharim eundem Regem appellans; quos quidem Auctores referre libet, ut pateat, me veritatem potius quam assentationem sequi: & eos, qui diversa scriptitarunt, impudenter mentitos esse, nulla eisdem opitulante historia.

B Concors etiam mariti votis Rodelinda Regina fuit, honorabili templo ædificato, quod Beatissimæ Virgini MARIÆ dicavit; quod quidem templum ea ætate extra Ticini moenia adjectum lapidis situm erat, hodie vero in civitatis ambitu Septentrionem versus continetur, Perticæ nuncupatione retenta; ubi pia posteritas collectis circumquaque defunctorum ossibus, quibus perticæ affixæ aderant, inscriptos titulos ipsorum defunctorum habentes, struem congeffit, amplo loco ad contigenda ossa superædificato. Decedens ab humanis Partharis, vel Partharitus, Gunipertum filium in regno reliquit, cuius vitam enarrat Paulus Diaconus *libro v. cap. xiv.* & sequentibus, regnavitque annis duodecim, habitans in Palatio olim Theodorici Regis, juxta templum Divi Romani, ubi hodie exstat monasterium, de quo alibi verba feci: à quo Palatio Palacensem portam potius dictam illam puto, quæ Orientem spectat, quam eam, quæ olim in Septentrionem vergebat, ubi eminet Turris Boetii.

C A P. XVII.

De Damiano Ticinensi Episcopo.

C INTERCIDENDA mihi Regum continuatio est, I ut Damiano Ticinensi Episcopo, cui aliquando cessere Reges, locum statuam. Floruit isto seculo vir ille pari religione atque eruditione insignis, sub Parthariti Regnum Episcopus constitutus, cui Partharito, filioque Guniperto, superstes fuit, duoque secula attigit, annum videlicet sexcentissimum & nonagesimum, & subsecutum seculum anni septingentesimi; in quibus quidem supputandis nonnulli Scriptores decepti sunt, *Blondo & Platina* ab eis dissentientibus, in *Agathonis Pontificis Vita*, quos sequitur Sabellicus, singula quæque in suum volumen conferens. Invaluerat autem Damiani ætate inter Orientales Monothelitarum hæresis; ad quam sedandam sæpe accincti R. Pontifices, nequiquam operati fuerant, sive ipsis Imperatoribus eadem labe contactis, sive Constantinopolitano Antistite, vel Patriarcha, nimium præpollente, sive gente illa suo ingenio ad ea prona, quæ Romanæ Ecclesiæ, sive Occidentali, directo adversantur, & quæ demum Occidentalis Ecclesia, divino semper numine erecta, fidei veritatem usque in præsens tempus secuta est.

D In illa igitur Orientalium fluctuatione AgathoRomanus Pontifex religiosus Concilium indixit; quod E Constantinopoli celebratum fuit, Constantino Constantii, sive Constantis, filio imperante, ac ipsi Concilio assistente: ad quod quidem Concilium cum omnes Occidentales Antistites pergere non possent, aliis ætate, aliis morbo, itinerisque difficultate, deterritis. Mansuetus Mediolanensis Archiepiscopus, pluribus convenientibus finitimarum civitatum Episcopis, scribere ad Concilium excusationis causas, simulque etiam quid ipsi Insuabres sentirent de articulo proponendo, æquum censuit, uno tantum Episcopo Constantinopolim epistolam perferente. Curam itaque componendæ epistolæ Archiepiscopi & ipsius conventus nomine Damianus Ticinensis vir peritissimus suscepit, præstititque. F Qua quidem lecta epistola Concilium ejus sententiæ acquiescens damnavit Monothelitarum sectam: adeo ille argute docuit, quod in Domino JESU CHRISTO, sicut dux exstant naturæ, Divina à Deo Patre ab æterno genita,

genita, & Humana à Beata Virgine in seculo sumpta, similiter etiam duæ exstant Voluntates. Verba Epistolæ ad articulum facientia retulit Paulus Diaconus libro vi. cap. ii. latius Platina in *Vita Agathonis* scribens: *Plurimum valere litera Damiani Ticinensis, &c. quem sequitur Sabellicus more suo paucis mutatis lib. vi. octavæ Enneadis: exemplum, quo manifeste patet in Domino id ita fuisse eodem tempore, demonstro Sanctorum Doctorum scripta secutus: in Domino enim JESU CHRISTO duæ voluntates uno tempore existere, cum dixit, Pater transfer à me calicem, &c. Hæc enim verba humanæ voluntatis mortem perhorrescentis fuere, subsequuntur verba Divinæ voluntatis ipsi humanitati imperantis hoc modo: Attamen non mea voluntas, sed tua fiat.* Divina enim natura divinam voluntatem extollens, humanam voluntatem suppressit: subdiditque divinæ voluntati; dedens sese passioni, quam humanitas ejus perhorrescebat, quod uno factum est momento. Commodius tamen mea sententia Christiani sibi, aliisque, prospicerent, si iis omiſſis perscrutationibus in Dei honorem & mandata servanda sese verterent, scire Dei essentiam, naturam, & operationem volunt, facere autem illius voluntatem, quam noverunt, minime eo modo volunt. Insuper disceptare super Ecclesiæ institutis non desunt, operari vero quod rectum sit, subsistunt. Sed ad Damianum redeo, qui vixit in Episcopatu annos triginta, multaue doctissime conscripsit, quæ ab Historicis, vel ignorata, vel prætermiſſa, fuerunt. Dabit ergo mihi veniam Longobarda nobilitas, si ejus intermissis Regibus, scriptisque, aliquid hoc loco de Damiano scribam.

C A P. XVIII.

De Morte, & Resurrectione Domini JESU CHRISTI, Damiani Sententia.

ARGVENTI cuidam fortasse Hebræo, non fuisse ex Dei dignitate mortem subire Dominum JESUM CHRISTUM, Damianus audaciam hominis admiratus in hujusmodi sententiam respondisse dicitur: *Potior ad fidem in suis Discipulis probandam atque firmandam Domini mors & resurrectio quam vita fuit. Item potior ad contestandam judaicam impietatem, irreligionemque, Domini permissio, Crucisque patientia, fuit, quam tanti probri evitatio esse potuisset, quoniam vivere & mori singulorum hominum est, reviviscere autem post mortem suapte potentia superhumanum esse necesse est, id est, solius Dei in humana natura se nobis offerentis, tantum enim*

A opus solus Deus & homo operari potuit, quod ipse prius fuerat de se ipso attestatus his verbis: *Potestatem habeo ponendi animam meam, & resumendi.* Consequens igitur & dictis, & natura sua, & gentis ejus impietati convincenda fuit, quod Dominus JESUS corporis sui excrucians potestatem illis faceret, mortemque subiret, ut subinde post mortem reviviscendo eosdem eluderet, & eo modo gloriam suam in divina potestate exercenda omnibus patefaceret, suos quidem firmando, alienos autem à fide miraculi magnitudine convertendo, aut, si reprobi esse maluissent, refellendo & confundendo; quæ quidem operationes sine mortis permissione esse nullo modo potuissent, quia reviviscere nemo potest nisi moriatur. Item committendum morti corpus suum Domino nostro fuit, potius quam per fugam, aut disaritionis, refugium, tam modico dierum intervallo vivendum; duplici ratione, tum quia omnino noverat ipse se esse resurrecturum, tum etiam ut irreprobabili argumento nobis contestaretur, suos mores, institutiones, ac disciplinam, mortis ipsius atrocitate neglecta à fide dignis recipienda esse, moriensque ille apertissime in doctrina sua confirmationem posteris omnibus immobilitatem mandatorum suorum suo sanguine, suaque nece sancivit; quoniam si ipse legis auctor pro lege sua sustinenda, quam Judæa improbat, mortem optetere non perhorruit, certe legis observationem ipse primus præstitisse, & suo exemplo à ceteris esse præstandum, manifeste probavit. Deora igitur, & salutifera patientia, & mors Domini nostri fuit, cum pro sua & suorum fide, & religione fundanda, suscepta fuerit, modico temporis spatio abolenda: ut omnino abolevit per resurrectionis actum; cujus dignitas & amplitudo aeterna est, suaque gloria momentanea mortis probrum obumbravit, elusitque. Quod si mortis declinationem Dominus noster per fugam, aut disaritionem quaſſet; primo humanam imbecillitatem tantum, & non divinam constantiam præ se tulisset; item legis suæ dignitatem ac existimationem turpitudine fugæ exinanisset: tertio, resurrectionis admirationem non excitasset; qua potissima probatio divinitatis ejus fuit humanitati conjunctæ. Plura alia Damianus & voce, & scriptis, documenta Ticinensibus suis præbuit, præsertim vitæ suæ innocentia, sed ejus scripta temporum & hominum incuria è medio abstulit, viri tantum virtute ac memoria superstitæ; ad quam celebrandam si parem Damiani dignitati scriptionem non adhibeo, nec adhibere quæo, parata mihi optima justificatio est, tanti viri præstantia, & amplitudine, meæ scriptionis tenuitatem obruente: solis enim fulgori objecta lucerna quamvis eluceat, luce carere clario-re circumfusa lumine facile videtur.

BERNARDI SACCI, PATRIITII PAPIENSIS, HISTORIAE TICINENSIS LIBER X.

PRAEFATIO.



VARIA atque mirabilis rerum mutatio circa finem seculi sexcentissimi anni fuit: Pontifex in primis Romanus, Domini JESU CHRISTI in terris Vicarius, olim à Græco Imperatore, vel ejus Exarcho, confirmari solitus, mutata lege solutus ab Orientalium suppositione fuit; non solum sanctione à Constantino Imperatore lata, quod Pontifex Romanus à Clero, Populoque Romano, eligendus esset, sine ulla Constantinopolitani Principis approbatione, sed

F ipſus etiam Imperatoris auctoritate ab Italia postea rejecta. Prima itaque Pontificis electio post illam sanctionem fuit Benedicti secundi Romani Pontificis. Respexit enim Deus humilitatem gregis sui, amotaque potestate alienorum, Pastores suos sui juris, sui que moderaminis, esse voluit. Gratia ergo divina clementiæ ab occiduis nationibus habenda est, ac vocis præconio extollenda, quod Dominus noster JESUS CHRISTVS in Oriente natus, patriam, provinciamque, humanitatis suæ propriam posthabuerit, ut nostras regiones Vicario suo sedes constitueret. O eximia nimis Dei dignatio! o præstans, excelſaque, benignitas! gentis tuæ loca deseruisti, in quibus ossa jacent eorum, unde caro tua, genitricisque tua, oriunda est, et nostra tecta ac latebras Petro ac successoribus præligeres, atque firmares? At quid ego impru-

dens dixi nostra, (mentior nostra esse aliqua) cum tui, tuaque fini viri, testis, & elementa, singulaque ex eis composita. Hac ita esse circa Romanum Pontificem eligendum narrat Blondus libro IX. Decadum suarum; affirmat Platina in Benedicti secundi Vita, quem Sabellicus sequitur, & laudat libro VI. octava Enneadis.

Altera mutatio est, quod collabente sensim atque ruente Orientali Imperio, perfidia atque impietate polluto, contra in Occidente prodiit ab Austria generosa proles Pipinia, religione atque armis clara, qua à Francorum Regis & Regni rebus administrandis, virtute ac jure ad Regni dignitatem evecta fuit: denique Romanum affecta Imperium Aquileas alas longe lateque tetendit. De qua gente, gentisque virtutibus ac gestis, alta patent volumina Antonini Archiepiscopi Florentini, Blondi libro X. Platina, atque Sabellici libro VII. à quibus tertia quoque rerum fluctuatio relata est: quod Saraceni Græciam, Africam, & Hispaniam invadentes, adeo populos afflixerunt gentis sue copia ac praliis, ut in aliquibus provinciis Christianum genus ferro prorsus conciderit. Longobardi etiam Duces in suos Reges conversi, & è contrario Reges in rebelles insurgentes, mutuis detrimentis sese, provinciasque suas, confecerunt, Slavici quoque è Dalmatia in Italiam irruentibus praelio concisus. Sustulitque tandem caput inter Longobardos Aripertus hujus nominis secundus, de quo Paulus Diaconus libro VI. scribit cap. VI. VII. & X. b. pro p. posito: & quem Aripertum, Regni gubernacula sedulo moderantem, deiecit è Regno Asprandius; cui intra trimestre morienti successit Lytprandus filius ante annum septingentesimum, literarum quidem adeo ignarus, ut suum nomen scribens, ita scriberet Lytprand, Germanam ruditeratem prisca lingua sua sequens. Qui minime tamen in ea ruditate Regni sui amplitudini ac decori defuit: de quo tam exacte Paulus Diaconus scripsit in postrema parte VI. libri, ut magnam suis successoribus, historiam colligentibus, facultatem præstauerit, Blondo præcipue eadem clartus distinguente libro X. Post Lytprandum secuta Regni declinatio, ac demum perditio est. Mens ergo labor erit in iis explicandis, quæ minus aperta videbuntur, ne ab aliis relata transcribens, frustra versatus esse in historia censear, atque temporis ordinem (quod ad fieri poterit) sequar.

C A P. I.

De Ticinensis & Mediolanensis Antistitis contentione sublata.

ANTEQUAM ad Regum acta progrediar, meminisse me contentionis oportet, quæ inter Mediolanensem Archiepiscopum & Ticinensem Præsulem diu viguit; de qua verba feci libro VI. capite ultimo hujus voluminis. Illa igitur contentio ante Lytprandi Regnum finem habuit, Constantino Summo Pontifice sedente, ut Platina in ejus Vita colligit, causam judicati omittens, quam refert Paulus Diaconus libro VI. capite X. Quoniam, inquit, Ticinenses Episcopi à priscis usque temporibus à Romana tantum Ecclesia fuerunt consecrati, æquum ergo non est visum Pontifici, quod Papiensis Ecclesia, quæ septem secula transegerat in antiquitatis sua jure ac possessione, tum deicienda esset ob Archiepiscopi dignitatem augendam. Quis autem eo tempore Papiensis esset Episcopus quæro & ambigo, & nisi Animentanus fuerit, hærito quis esset. Quisquis tamen ille fuerit, & Ecclesiæ suæ, in qua populus est, & Dei æterni honorem quæsit, quoniam nostro exiguo populo olim è gentilitio evocato, prius quam Mediolanenses nostram religionem agnoscerent, humilitatem nostrum majorum prælegisse Deum, atque in evocationis tempore ac ordine prætulisse Mediolanensium multitudini constat; qui quidem omnis honor in Deum evocantem redundat, & non in nos evocatos, qui gratis & nihil emeriti evocati fuimus. Humanæ igitur gloriæ fuco à tergo relicto, dignitatis nostræ honorem Deo im-

pendamus; caveamusque, ne gratiam, quam gratis consecuti sumus, ingrati amittamus, à recto scilicet itinere averfi atque abalienati; quoniam sicut olim parentes nostri in humilitate viventes evocati fuerunt, ita nos ipsi fortasse ab eorum statu revocabimur, deiciemurque, si ab ipsorum humilitate defecerimus.

C A P. II.

De Lytprandi Regno, & Divi Augustini translatione.

LYTPRANDI Regnum quam maxime conspicuum ac memorabile facit Divi Augustini corporis translatio à Sardinia Papiam: nam omiſſa Augustini, quod Episcopus fuerit, honorificentia, quismam post Apostolorum & Martyrum tempora fuit, cui æque debeat nostra gens, ætasque: ille enim ab Africa ad nos delatus nostram linguam suæ prætulit, seseque nostris literis exercens, CHRISTI Domini nostri doctrinam suis vigiliis propagavit; ille quasi succrescens fermentum ab Italia, in qua profecit, egressus, in Orientem ac Meridiem suæ eruditionis vela expandit, purgavitque utramque oram, hæreticorum labe infectam. Ille denique quasi Aquilo in Austrum perflans errorum nubes depulit, sui que ingenii vires ab Africa in Europam fudit: rursus ab Europa in Africam refudit. Admirata est prisca vetustas Alexandrum Philippi filium, orbis latitudinem animi sui magnitudini angustam visam: nostri quoque mirentur homines unius Augustini peritiam Africam, Europam, Asiamque occupasse; nec terram solum, sed maria, cælum, ac cœli firmamenta, ad Limbique claustra, pervasisse. Tanti igitur viri corpus, Italia, habes, claudisque nostræ civitatis ambitu, illius Lytprandi Regis munificentia, cujus memoriæ hæc mea scripta, etsi inania sunt, impendo.

Sed quo major nostri Longobardi, Italicique, Regis devotio in divini hominis ossa fuit, eo immanior Leonis Imperatoris truculentia in Græcia efferbuit: qui tolli, qui aboleri, qui disperdi Sanctorum figuras, simulacra, atque etiam ossa nefario jussu conatus fuit, cujus imperium Italia non pertulit; sed ejus jussa rejiciens, antiqua instituta secuta fuit, ratione & religione freta. Tollere enim Sanctorum imagines, nihil aliud est, quam abolere memoriam illorum, qui de religione nostra benemeriti sunt: & quorum denique Sanctorum patientiam, virtutemque, facilius ac promptius unicuique etiam imperito pictura repræsentat, quam series Scriptorum; quoniam picturam quilibet visu colligit, miratur, movetur exemplo, atque si rei peractæ ordinem nescit, peritiores rogat, audit, mentem imbuunt, aliorum suspiciens virtutes: quæ omnia tam facile ex historia perspicere nequeunt, cum plures sint literarum expertes quam periti. Vesana ergo & profana figurarum abolitio est, tacitoque actu ac subdolo ad deturbandam Dei religionem finem suum dirigit: & sub velamine adorationis corrigendæ ipsius adorationis initia atque incitamenta perimit. Quoniam Divi (exempli gratia) Augustini simulachro inspecto, cogito qui vir fuerit, quibus moribus, qua vitæ continentia, moveorque ad ejus sectanda vestigia, atque hoc modo ad religionem incendor, qui omnino segnior forem alterius præeuntis non comperto vestigio: omnes enim in quacunque re gerenda exemplis præcedentium fidentiores sumus, qui fortasse, si exempla non exstarent, diffidentiores essemus, & quorum exemplorum speciem ipsa viri sancti imago repræsentat. Sed dicere de iis plura desino, de quibus alibi.

C A P. III.

De Divi Augustini Tumulo.

CONSEQUENS Augustini translationi est scribere, quo in loco conditum corpus ejus fuerit. Ædificaverat Lytprandus Rex insigne templum, quod Divo Petro dicaverat, monasterio adjecto, ut Paulus Diaconus narrat *lib. vi. cap. xvii.* quem locum ab aeris salubritate appellavit *sanctum Petrum in Cælo aureo*, non autem *in Cellula aurea*, ut scribit Blondus: quod monasterium ea ætate situm extra Papiæ mœnia erat; hodie autem intra civitatem receptum. Is enim locus eminet situ, in Aquilonarem oram vergens ex parte, atque ex parte æstivos solis ortus excipiens. Itaque urgente æstu Septentrionis auras captat, sumitque aeris temperiem; hyeme autem porticibus circumfultum imbres arcet, ac specularibus fenestris ventorum vi rejecta à cœnaculis & cubiculis frigora excludit. Adsunt præterea æstate aquarum rivuli per fistulas in urbem ac monasterium traducti, viridaria hortosque irrigantes, ac terræ sata plantasque lætificantes, ita ut solo virore atque plantarum ordine regium tibi opus repræsentetur, sacra statutis horis hodie duplici sacerdotum agmine in templo fiunt. Hic Canonici Regulares ordine, temporeque, priores; ibi Eremitani fratres lata corrigia præcincti sedes habent; diversi habitu, facie, & opibus, concordēs vero canticis, ac cæremoniis. Duo itaque hodie monasteria uno ambitu continentur. Pro alendis autem Regularibus Canonice & sacerdotibus latos agros Rex legavit, procul à civitate quinque millia passuum juxta Olonam amnem ab Orientali plaga, ubi regia Domus, sive Palatium, exstat, *Lardiragum* vulgo nuncupatum, quod Antiqui *Latiagrum* ab agrorum latitudine olim appellarunt: quæ quidem regia domus me puero ruinis ac situ deformis diu jacuit; postea vero ab Hectore Rubeo, viro insigni, ipsius Monasterii sive Abbatiae Commendatario, pristino ornatui atque decori restituta fuit; cui successit Federicus ex fratre nepos, nobilitate ac eruditione conspicuus. In templo itaque Divi Petri à Lytprando ædificato conditum Augustini corpus fuit, & ne facile resciri posset, quo loco corpus esset, ferunt Lytprandum tribus locis effossis, structisque, sepulchris, alibi deinde nocte paucis operi adhibitis jussisse corpus condi, omnibus simul sepulchris eadem nocte oclusis, ut certa corporis sede ignorata difficilior in ævum fieret occasio ejus perquirendi, rapiendique. Constructum deinde alio seculo sacellum Divo Augustino fuit juxta templum Divi Petri, in quo sacello arca illa marmorea ac celebris composita est, Augustini sepulcrum repræsentans.

C A P. IV.

De Petro Ticinensi Episcopo.

Ab Augustino Episcopo, nostræque religionis Doctore, vertere scriptionem ad Petrum Ticinensem Episcopum regii sanguinis virum, qui translationem Augustini summo studio curavit, æquum est. Is olim Ariperto secundo Regi ob nobilitatem, Asprandique affinitatem, suspectus, relegatus in Etruriam fuit, ubi patientia ac fide insignis cælibem juventutem agens, in Aretino agro quam maxime versatus est, studensque solitudini, quæ socia religionis est, Divi Sabini ædem in monticulo sitam frequentavit; quo in loco hodie oppidulum exstat fama conspicuum, *Mons Sancti Sabini* vulgo nuncupatus, à quo Antonius Monteus Cardinalis, deinde Jo. Maria similiter Cardinalis, postremo etiam Pontifex Julius tertius prodire, una cum pluribus aliis peritis viris: inter quos meus

A Franciscus Contrinus, à Transpadanis oriundus, locum obtinet. Ab exilio igitur, vel relegatione, liber Petrus, Lytprando regnante Ticinensis Episcopus constituitur: regiae enim civitati regii sanguinis Episcopum decerni aptissimum fuit. Memor itaque Episcopus religionis in Etruria habitæ, Divo Sabino in Orientali civitatis suburbio fanum construxit, quod mea deinde ætate (ô infelices dies) bello Gallico invalescente disjectum & solo æquatum fuit, una cum propinquo Sancti Apollinaris Monasterio. Sed an Sanctus Sabinus ille ipse fuerit, cui Romæ juxta montem Aventinum ad portam Viæ Ostiensis, Sancti Pauli nuncupatam, ædificatum templum ac monasterium fuit sub Divi Sabæ nomine, ut quidam opinatur, ego non affirmo, sed diversum existimo.

B Petri igitur Episcopi nostri humilitatem, ac vitæ specimen, plurimum commendant civitatis annales, traduntque ejus monitu atque exemplo Lytprandum Regem commotum fuisse ad Summi Pontificis observantiam: accedente maxime eo tempore ipsius Romani Pontificis religione cunctis perfecta; nam si minimus quisque sacerdos, probatis moribus, sit ex vitæ integritate inter nos conspicuus, amabilisque, quanto esse honorabiliorem Summum Pontificem decet, vitæ integritatem suis moribus præ se ferentem: bonis enim moribus adjecta dignitas tanti viri reverentiam augeat necesse est. Quemadmodum à contrario mali hominis actiones, ne ipsam dignitatem polluant, ac pene contemptibilem faciant, verendum est; cujus rei periculum sæpe legimus atque agnovimus: Julius enim secundus, dum bello in Venetos movendo, atque amovendo, & in alios retorquendo, plus quam religioni animum intenderet, Gallica in sese arma excitavit, olim Romanæ Ecclesiæ propitia, aliquotque etiam Cardinales adversari jussionibus suis sensit; Leo Medicæus epulis, cantionibus, ac voluptatibus immerfus, plura suscitavit murmura, quæ in scandalum progressa Romani Pontificis honorificentiam & decorem comminuerunt. Sed ista ab instituto meo aliena sunt. Illud ego affirmare nullo modo desinam, magnorum Antistitum vitam, sine labe traductam, maximo adjumento esse Regum Consiliariis atque Aulicis ad Regem impellendum, ut ipsos Antistites in honore habeat, studeatque eorum religioni ac bonis institutis & ritibus obtemperare; & è contrario improbata vita improbatos etiam eos faciet, qui in folio sedent, tam apud Reges quam apud populos; quoniam veritas ipsa omnia in tempore aperit, & altaria nudat, ut in proverbio est; & bonis benedicere, malisque maledicere, usus obtinet, qui usus famam augeat, fama opinionem, opinio cogitationem hominis, cogitatio decretum animi, sive deliberationem, à qua actio oritur, vel contemnendi, vel existimandi, & in honore habendi Episcopum juxta famam ejus bonam, aut malam; & ita mala Antistitis fama serpit tanquam virus inficiens Regum & populorum mentes, & ab ipsius Antistitis observantia procul avertens. Atque hoc modo illi, qui corrigi & reformari bonis exemplis deberent, abalienantur mala ipsius Antistitis vita, ac fama hominum affectus perimente. Quis autem eo tempore Romæ Summus Pontifex esset, ambigitur, Scriptoribus inter se nimium dissentientibus, alii Stephanum secundum, alii Gregorium similiter secundum perhibent: de qua dissensione alibi verba faciam, uterque tamen Gregorius ac Stephanus moribus & religione enituisse pariter celebrantur.

CAP. V.

De Lytprandi humilitate in legibus promulgandis.

Non videtur alienum ab opere nostro referre, qua animi modestia, qua in Deum reverentia, Rex iste leges suas tulerit, cujus hæc præfatio est: *Leges, quas Christianus & Catholicus Princeps instituere disponit, non sua prudentia, sed Dei nutu & inspiratione animo concipit, mente pertrahat, & salubriter opere complet, quia cor Regis in manu Dei est, attestante sapientissimo Salomone, qui ait, &c. Idem in fine præfationis sic scribit: Ob hoc in Dei omnipotentis nomine, Ego Lytprand Christianus & Catholicus Rex dilecta gentis Longobardorum, anno Regni mei primo, Deo protegente, die Calend. Martii, indictione XI. una cum iudicibus tam de Austria & Neustria partibus, quam de Tuscia finibus, & cum reliquis fidelibus meis Longobardis, & cuncto populo assistente, hac communi consilio juxta Dei timorem atque amorem adscribenda censui.* Deinde sequitur edictum: *In Nomine Domini Dei, & Salvatoris nostri, incipit edictum gentis Longobardorum, quod adjunxit Dominus Lytprand Rex tempore suo, &c.* Possent alias etiam addere præfationes, quibus ipse Rex humili semper sermone Deo invocato scriptiones legum suarum instituit: diversus penitus à Justiniani jactatione, cujus dicendi vanitatem imperiti admirantur eo loco, *Imperatoriam Majestatem, &c. & se Gothicum, Alanicum, & cætera, inscribens in sui ipsius glorificatione evanuit.* Hujusmodi igitur religione imbutus Lytprandus tam in ferendis legibus, ac suorum Procerum, Ducumque, cohibendis excessibus, quam etiam in Romano Pontifice observando, eique monenti obtemperando, Regni sui fines auxit, quod Blondus accurate colligit libro x. Decadis primæ.

CAP. VI.

De Exarcho fugato, & Ravenna capta, & Equestri Statua.

A quo capta Ravenna fuerit, fugatusque ab Italia Exarchus, varia est Scriptorum sententia. Blondus primo Astulphi Regis anno captum narrat libro x. Platina in Gregorii Secundi Vita refert à Lytprando Rege obsessam, captamque, civitatem; deinde in Stephani Secundi Vita ait fuisse expugnatam ab Astulpho Rege. Sabellicus longas ambages ferens de Venetorum gestis circa Ravennam libro vii. in fine, & libro viii. Enneadis octavæ, tandem à Ducibus Longobardis vi captam & direptam urbem refert, & Exarchum ab Italia exterminatum. Imperii ergo Romani potestas Longobardorum armis ejecta ab Italia fuit, & Ravenna subacta. Quod cum ita esse pateat, ergo Ravennates, & eorum finitimi, ac etiam Orientales Duces impares virtute & militari præstantia Longobardis fuerunt; victus enim victori palmam cedat necesse est. Hac igitur præcipua gloria insignes Longobardi effecti sunt, quod Ravenna olim Romæ æmula, Exarchi sedes, summissa eorum jugo fuit, depulsique ab Italia Orientales Duces. Hincque arguere aptissime licet, impudenter nonnullos ex Romandioliis facere, qui Longobardis obrectare non desinunt; suum enim dedecus repetunt ac produnt, dum Longobardorum nomini ac gloriæ detrahunt, quibus majores eorum suppositi fuerunt, quoniam in subjectionis casibus minus improbabilis videtur subjectio eorum, qui claris Regibus, aut Ducibus, succubuerunt, quam illorum, qui obscuris gentibus manus dederunt. Itaque dum Longobardorum honorem suis maledictis extenuant, præteritæ subjectionis notam turpiorem faciunt, si bique ipsis ignominia successionem impingunt, quoniam ex eorum genere sunt, qui Longobardis servierunt; & à qua quidem servitute licet postea liberati fuerint, nulla tamen eos gloria liberationis sequitur, quoniam non sua virtute, sed Francorum ar-

A mis Romandiola erepta à servitute Longobardorum in servitutem Romanæ Ecclesiæ conjecta fuit, quo casu Carolo Magno Francorum Regi, & non ipsis subjectis, liberationis honor & meritum cessit.

Quod vero de Regisfolio olim ab Urbe Roma Ravennam translato Regis Theodorici jussu scriptum Platina, non dissentio ab eo; facilis enim fuit translatio, quoniam equestris statua composita est per partes, quæ solvi ab alterutris possunt, resecatis claviculis, qui vermiculato opere volubiles sunt, & forcipe circumaguntur, ipsisque claviculis singuli artus equi in unum corpus coaptati firmantur elegantissime, ita ut compactum totum corpus uno opere videatur. Sed quod ipsa statua cum infessore exportata à Ravenna Papiam fuerit in dicta expugnatione Longobardica, non assentior Platina, nec aliis referentibus, Caroli Magni jussu, cui statua mirabilis visa fuit, ablatam fuisse: nam omnes decipiuntur; quoniam post Caroli Magni tempora contentione exorta inter Papienses & Ravennates, exportata à Papiensibus Ravennam ingressis statua fuit, & è converso à Ravennatibus sublata fuerunt clathra ærea Portæ Palacensis Papiæ, quæ olim Partharis Rex fabrefieri miro opere curaverat: neutra tamen civitate in ea contentione civium bona invadente, sed publici honoris causa publica tantum arripiente, de qua quidem re leguntur adhuc Papiæ insculpta carmina infra scripta:

*Milite cum quondam terrestri freta Ravenna
Ticinum irrueret, populus Papiensis in hostem,
Classe armatus adit, belloque illabatur undis;
Adventare hostes (sic fors tulit) infcius alter
Alerius fidens animis inimica petebat
Mœnia: Regalem valvis insignibus Urbem
Ille hanc expoliat, mirandus Regisfol inde
Huc aufertur Eques: sic victor victus abiit.*

Statua autem fuit Antonini Pii, ut peritiores sentiunt, quam Ravennates *Mirasolem* nonnulli, alii vero *Regisolem* appellabant; quoniam Orientem versus faciem conversam habebat: contra Papienses faciem Equitis vertentes in Septentrionem, & terga in Meridiem, Statuam *Regisfolium*, id est, solum, vel sedem Regis appellarunt, dixeruntque Regium potius esse cavere à Septentrione, unde Hunni, Gothi, Heruli, Alani, alique erupere in Italiam, quam in Meridiem, vel Orientem respicere, ubi Italia mari cingitur, & nisi magno classis apparatu petatur, suo situ tutissima est. Sed ad Historiam redeamus.

CAP. VII.

De Lytprandi obitu.

Quo anno Lytprandus humanis decesserit, vix scribere audeo ob Auctorum varietatem; Blondus, qui Romæ mortuus est sub Pii secundi Pontificatu, post annum mccccxlx. scribit libro x. Lytprandum Zacharia Pontifice sedente obiisse, Zachariæ Pontificatum ponens ante Gregorium tertium: quod si ita fuisset, Lytprandus mortuus esset anno quinquagesimo post septingentesimum, vel circiter Platina vero, qui eodem Pio sedente Romæ versatus est, potuitque & Blondum, & ejus scripta videre, si eum cura tetigit, collocat Gregorium tertium ante Zachariam, Blondi historia tacite rejecta, si tamen eam vidit: quod si ita esset, Lytprandus vixisset præter sexagesimum annum supra septingentesimum ab ortu Domini JESU CHRISTI, quod supputatis temporibus probabile non videtur. Sabellicus autem existimat Blondum deceptum, & Platinam sequitur, à quo tamen sæpe variatum fuit: nam Lytprandi profectionem ad Urbem Romam, & Vaticanum, & alia etiam Lytprandi gesta collocat sub Gregorio secundo: quæ similiter repetit sub Zacharia Pontifice, duplicans acta, semel tantum facta,

cta. Ex ipsius autem Regis sepulchro probatur defunctus Anno dcccxxii. Mortuo itaque Lytprando, qui triginta & altero regnaverat anno, successit Inglorius nepos vix semestri Regno potitus, cui successit Rachis, sive Rachisius, Dux prius eximiae fortitudinis nomine celebratus, praecipue à Paulo, Blondo, & Sabellico. Quo Rachisio ad religionem transcunte Regno fratri relicto, anno septimo pluribus ante piis operibus praestitis, praesertim in Ecclesiis, Monasteriisque, aedificandis, quorum maxime memorabile est monasterium Sanctae Mariae ad Cacias, Astulphus frater Regnum tenuit, de quo infra.

C A P. VIII.

De Astulphi Regno.

LABARE sub Astulpho Rege res ac gens Longobarda coepit: nam à priorum Regum fide & religione declinans, initio Regni sui Astulphus fregit foedera, bella intulit finitimis, Pontificem ac populum Romanum injuste laceffivit, diripuit agros & oppida Romani juris, sacra loca spoliavit, unoque verbo Romanum Pontificem ad rerum desperationem adactum eo compulit, ut Francorum implorato auxilio ab Italia excesserit, ac Pipino Francorum Regi sese & Ecclesiae Romanae res supplex commendaverit. Recepit summa usus humilitate Pipinus Pontificem, sive ille Gregorius tertius, ut Blondus scripsit, sive Stephanus secundus fuerit, ut plerique sentiunt, & Romana etiam notat historia: susceptum fovit opibus, atque exercitu contracto in Italiam descendens fregit Longobardorum vires, (longa est historia à pluribus repetita) denique Astulphum Regem ad restitutionem provinciarum compulit, quae juris populi Romani & ejus Ecclesiae antea fuerant. In qua quidem restitutione Ravenna, olim tumens Imperatorum favore ac sede, sub Romanam ditionem atque Ecclesiam, in quam calcitraverat, rediit. Instabat magnopere Romanus Pontifex, ut simul etiam restituerentur Sanctorum corpora atque reliquiae, ab oppidis Populi Romani Longobardorum manu exportata; cujus petitioni finem fecit ornatus ipsis Sanctorum corporibus & reliquiis Papiæ adhibitus cum magna populi veneratione, templo etiam Divi Marini una cum Monasterio à Rege ipso ad majorem aliquarum reliquiarum honorificentiam in urbis medio eleganter constructo. Qua re perspecta Pontifex Ticinensium religionem restitutioni praetulit. Pie posthac & sancte Astulphus vixit, Theodoro Papiensi Episcopo viro summae religionis quam maxime addictus, (vide Platinam in *Pauli I. Pontificis Vita*, ejus Regni finem ac moderationem approbantem) regnavitque annis septem.

C A P. IX.

De Domini libertate Romanis restituta.

MVLTA sciens cogor omittere, ne singula quaeque colligens rerum serie impediar referre ea, quae potiora videntur. Deus, humani generis auctor & rector, ex bellorum turbine ac rapinis, à Longobardis in Italia editis, duo summa bona nobis elicere ac parare visus est. Primum fuit, quod Exarchus Ravennae, & Ducatus Romae, qui duo Magistratus Orientalis Imperatoris fuerant, annis centum septuaginta quinque: item, qui saepius in Pontificum Romanorum ac sacrarum aedium violationes ac prophanationes ad Imperatoris nutum conversi fuerant, uterque ab Italia Longobarda vi ac manu determinatus est; quoniam Ravenna capta, ejusque Exarcho fugato, sive occiso, ut aliquis notat, Dux ille simul, qui ab Exarcho Romae praeficiebatur, evanuit, Romaque juri suo restituta fuit. Quo itaque juris ordine, vel actu, Graeci Imperatores Romani Imperii dignitatem ar-

Aripuerunt, eodem juris vinculo soluto, atque ab Italia summoto, Imperii jus amiserunt; jure ipso ad Italicos populos suapte natura redeunte: & quaedum Imperii amissio non solum manu militari, sed jure optimo etiam perpetrata adversus Orientales fuit, Summi Pontificis ac universae Romanae Ecclesiae anathemate in ipsos Orientales Imperatores saepe prolato, ob spretam nimis aperte Christianam religionem, & haeresis labem illis inlitam. Addo etiam ipsorum segnitiam in tuendis provinciis Italicis ab alienorum vi. Et quibus quidem provinciis destitutis, aut reverti dominium ad provinciae populos necesse est, natura quod suum fuit refumante; aut transire ad eos, quibus sese populi suo consensu dedunt. Peropportune igitur Italicum jus & dominium, quod primus Constantinus Byzantium transtulit anno ab ortu Domini trecentesimo & quadragesimo sexto, vel nono, ejusdem nominis altero imperante, amissum fuit post annum septingentesimum, Longobardorum virtute Orientalium vires superante.

BAlterum bonum est, quod Longobardis plura oppida, quae olim Orientalis Imperii fuerant, suis armis capta, detinentibus, atque Pipino Rege suis similiter armis eadem Jure Gentium vendicante, restitutio à Longobardis facta est Pontifici, Populoque Romano, Orientalis Imperatoris postulatione rejecta, qui nimis impudenter petierat, sibi à Pipino restitui Italicas provincias, quas jam pridem sua indignitate, suaeque incuria, amiserat: cui sapientissime ab eodem Pipino responsum dicitur: *Arma ego semel atque iterum pro Summo Pontifice, Ecclesiaeque, & Populo Romano cepi, ut meo, meorumque labore, atque periculo hoc obsequium Deo aeterno Domino nostro impenderem. Quoniam igitur jure conferre in Constantinum Imperatorem debeo, quod Dei & Pontificis nomine gero? Desistamne ego ab incepto Imperatoris verbis, ac desinam Deo & ejus Ecclesiae dicare, quod meum est, videlicet belli apparatus, eventumque, mihi in manu positum? minime quidem faciam; valeat potius Imperator, & quod sub manu habet, rectius custodiat. Dimissis itaque Graecis Legatis, restitutio facta est Pontifici, Populoque Romano; in qua restitutione non solum capta ab Astulpho, sed etiam ab ejus antecessoribus, dimissa fuerunt: quae omnia Blondus lib. 1. secundae Decadis descripsit, Petrum, ut ipse ait, Lateranensem Bibliothecarium secutus, & cui Blondo concors est Sabellicus libro VIII. Enneadis octavae. In quo, inquam, Blondo corrupta passim lectio est, praecipue ubi scribitur *Castellum Sancti Martini*, legendum est *Marini*, & non *Martini*: quod quidem Castellum hodie etiam suam libertatem servat in arduo situm; finitimi ejus Pinnae Sancti Marini apicem montis, ubi aedificatum est, ab altitudine appellant. Nec defuerunt Itali milites, qui sub Paulo tertio insidias incolis tendere ac inhiare oppidanorum rebus conati sunt, frustra semper eorum rapiditate cedente: nam à Septentrione planitiem Arimino finitimam spectat; ab aliis lateribus valles profundas in circuitu habet, jungiturque Apennino, montis pinna utrumque copulante. A quacunque igitur petatur, sive adeatur, parte, praevideatur viator à longe necesse est; ubi vero appropinquaverit, locum non habet, in quo lateat, jacereque quietis gratia queat, angusta tantum eum recipiente via.*

C A P. X.

De Dominio Romana Ecclesia.

DELETO in Italia Exarcho, rejectoque simul Jugo Orientalis Imperatoris in scelera ruentis, Longobardi Pipino compellente provincias Romani Imperii, quas annis prioribus ceperant, Pontifici Populoque Romano restituerunt. Ex quo quidem restitutionis actu, non solum antiqua Populi

Romani jura refurgunt, sed longe majora fiunt quam antea ex Pontificis interventu : qui cum Petri successor sit, & Domini JESU CHRISTI in terris Vicarius, sumens restitutionem de Longobardorum manu Ecclesiae R. nomine, & ipsius populi, cujus est caput, sine dubio dominium & possessionem Ecclesiae acquisivit, in qua Ecclesia populus Romanus continetur. Nemo enim dicturus est Deo acquiri jus provinciarum, cum sit dominus omnium, cui nihil addi potest : sed dicimus Ecclesiae acquiri, quam congregatio fidelium repraesentat; & quae ad Dei cultum & sacerdotum alimenta ex rerum necessitate temporanea bona dispensat. Hac ergo acquisitione domini & possessionis ab Ecclesia conjunctim facta, una cum populo Romano, per Pontificis interventum dominium provinciarum, quod olim humani juris erat, sive juris gentium, ex Ecclesiae adjunctione, sive interpositione, factum esse videtur juris divini, inspecto nexu, quo sancta mater Ecclesia Domino JESU CHRISTO per sacrosancta mysteria copulata est. Conjunctio enim facti, juris conjunctionem parit, ita ut dominium, quod simpliciter antiquo jure ad populum Romanum reverteretur videbatur, si soli populo restitutio facta fuisset, ad eundem populum rediens, Romana Ecclesia ipsius domini consorte facta, dignius per Ecclesiae conjunctionem omnino factum sit, divinique juris esse videatur. Crevit insuper istius domini amplitudo ex multitudine gentium, sanctam Ecclesiam Catholicam constituentium, quae non solum ex populo Romano, qui est principalis in ipsa Ecclesia, sed ex omnibus gentibus Ecclesiae credentibus sit, Deoque conjungitur. Quaecunque enim natio, Christianam fidem tenens, Romanae Ecclesiae pars est, indeque Catholica, id est, universalis, Ecclesia, sive congregatio, dicta est. Prudentissime igitur Pipinus restitutionem in Pontificem, Populumque Romanum, conjunctim contulit, ut Ecclesia una cum Populo Romano domina constituta, ipse similiter Rex Francorum & posterius ejus, tanquam Ecclesiae filii, illius domini participes essent, cujus constituendi auctores existissent. Plura fortasse dicenda essent pro dignitate Ecclesiae, illorum praecipue repetita memoria, qui eam suo sanguine dedicaverunt : sed mea me aliorum vela, puppilque, ferunt.

C A P. XI.

De Bononia, & Ferraria.

ROMANA Ecclesia per Exarchi dejectionem, & Longobardorum coercionem, ad Imperium evecta, Ravennatum quam maxime res diminutae sunt, tum ob acceptam paulo ante à Longobardis cladem hominum, opumque, tum ob jugum Romanae ditionis suis cervicibus repositum, quibus etiam aliud accessit detrimentum, aquarum secessus; ex quo licet tellus acquisita sit, majus tamen detrimentum populo navigatio ab urbe summotam attulit, quam tellus fructum. Contra autem Bononia insignis civitas inter Aemiliam & Flaminiam sive Romandiolam posita, ac Etruriae finitima, florere coepit, tribus praecipue subnixa commodis. Primo, fertilissimorum collium propinquitate, quos urbe egressus à Meridie in promptu habes, ubi pinguis, crassaque, oliva adest, antiquo ignota seculo, nostrisque tantum celebris facta temporibus, Bononiensem enim oleam apud Veteres nusquam legimus. Carabilia quoque Pyra rubigineo confersa colore adsunt, quae sive à saporis gratitudine chara sint habita, sive à pretio, in quo habentur, fuerint cara dicta, suavissima sunt. Nux etiam ipsa atque castanea tantae magnitudinis hic exstant, ut praemagnitudine utraque nomen mutaverit: à Nuce enim *Nucones*, & à Castanea *Marones*, qui grandiusculi fructus sunt, vulgo appellantur. U-

varum proceritas & copia, palmites pondere suo premens, terram passim libat, sustinerique, nisi furcillas supponas, onus à palo nequit. Quid irriguos hortos referam, piscinas, praediola, prata, lacunas, molendina, ac fullonica & alia plura suburbana commoda? Spectanda magis atque magis civitas est artificum instructa serie, flumineque per septa & aggeres intra urbem deducto, cujus operanificia exercentur, quotidiano quaestu plebem replentia. Tertium istius urbis commodum est viarum coitio, sive concursus, in civitatis fere medio conveniens à diversis oris, viaeque ipsas similiter in diversa dispartiens; cujus rei causa festus saepe viator Bononiam petere lassus etiam equo festinat, urbis pellectus hospitio, atque lautitia. Crescente igitur indies Romanae Ecclesiae nomine, ex optimorum Pontificum virtute ac maiestate, crevit simul multitudine virorum religionis gratia Romanam euntium, indeque redeuntium, praecipue ex Gallia, Germaniaeque, Galliae finitima, quibus iter facientibus Bononia semper patuit, atque hospita fuit. Iis itaque aucta Bononia bonis, *bona* Bononia appellari meruit, tanquam suis, alienisque, bona sua pandens, praebensque.

Ferraria quoque, non à ferro dicta, crevit sub idem tempus, quo à Ravennatum subiectione ad Romanam Ecclesiae moderationem trajecta formam habere civitatis, mores, & regimen coepit: unde fere aurea ab ornatu appellata Ferraria fuit: auctaque ipsa similiter viris & opibus, Pado imperare suo jure ausa est, ponte constructo, quo utraque Padi ripa circumplexa, jugum ferre flumen coegit. Ille igitur Padus potens, voraxque fluvius, qui onera saepe navium, ac jumenta, viros, domos, & villas suis fluctibus excutere atque dejicere consuevit, ille ipse unius ilignei pontis opificio pati currus, equosque, ac pecudes, & catulos, pullosque super se ambulantes hoc loco cogitur; & quamvis interdum fremat, spumans minarum plenus, atque intumescat, pontemque elidere undarum impulsu tentet ac tremefaciat, solers tamen Ferraria perstat, trabesque supponit, ut adeptum sua industria fluminis imperium, eadem industria sustineat. Hac itaque rerum ac temporum vicissitudine, decrecente Ravennatum auctoritate, excrevere contra viciniae civitates, Romana praecipue Ecclesia ditionem mitioribus legibus exercente.

C A P. XII.

De Bedae sanctitate.

FLORUIT hoc seculo sanctorum virorum copia; ex quibus Beda, natione Anglus, multis nominibus celebris est: nam vitae modestia ac gravitate studio literarum, & scribendi peritia, denique vivendi diuturnitate super omnes illius seculi homines insignis fuit; à gravitate enim morum & modestia *Venerabilis* nuncupationem, à peritia scriptorum suorum approbationem consecutus fuit. Aetatis longitudinem à Deo vitae auctore obtinuit. Venit in Italiam ille vir, cujus contemplatus miseris fluctuationes, ac bellorum turbines, preces Deo pro Italiae pace die noctuque fudit: Deus autem optimus nostra perspicuens opera, & vota pace indigna, & à mutua charitate, pietateque aliena, Bedae, ut ajunt, soporoso, somniantique, vocem cordi infudit, haec verba referentem, *O Beda tace, tace, Italia diu non erit in pace*; minimeque mentitam eam vocem fuisse, insecuta Longobardorum Regum perditio, aliaque rerum everfio, comprobavit.

C A P. XIII.

De Desiderii Regno, & exitu.

TVRBAVIT Italiae quietem Astulphi obitus, Desiderio Etruriae Duce, qui copiis praerant, Regnum invadente, & Rachisio olim Rege ad fratris

tris successionem, posthabito religionis habitu, contractisque militibus, ex adverso adspirante: sustulit belli ulterius gerendi causam Romanus Pontifex, Rachisio ab armis evocato, religionique restituto. Atque ita Desiderius, favente Romano Pontifice, qui ejus fidem ac jusjurandum erga Romanam Ecclesiam receperat, regnum est assecutus; in quo tamdiu quievit, quamdiu Pipinus Rex Francorum, quem Romanæ Ecclesiæ studiosum atque devotum noverat, in humanis fuit: Pipino autem defuncto, quem sub Pontificatu Pauli primi Auctores obiisse senio confectum scribunt, Desiderius inhiare regno augendo jurisjurandi religionem neglecta cœpit: secutaque Pauli Pontificis morte, quo tempore Sedes Pontificia vacabat, (nam vacavit præter annum) illico invasit oppida & civitates, quæ annis superioribus ab Astulpho Romanæ Ecclesiæ, populoque, restitutæ fuerant, plura capiens, prædamque hostiliter agens, quasi Ecclesia sine Pontifice futura.

Creatur in hoc rerum tumultu Stephanus III. qui per Legatos à Desiderio restitutionem captorum locorum poposcens, verbis in spe positus, re autem delusus est, bello interea tantum omisso. Iis etiam aliud addere facinus Desiderius cogitabat: perhorrescens enim Caroli Regis Francorum potentiam ac fidem, qui Pipino patri, non solum in Regia majestate, sed multo magis in virtute ac integritate, successerat, variis artibus referre in Italiam Constantini Orientalis Imperatoris vires, dominatumque, tentavit, factiosis passim hominibus præcipue in urbe fuscitatis; ratus, Constantini viribus sibi conjunctis, ac in Italiam restitutis, tutiora omnia regno suo futura, quam si suis tantum opibus & copiis substitisset, Francorum Rege Romanæ Ecclesiæ apertissime favente: quo quidem facinoroso commercio atque consilio imbutus Desiderius, ruere indies à malo in pejus cœpit, adeo à religione abalienatus, ut nulla ejus extant monumenta, ex quibus suorum antecessorum exemplo se Christianum fuisse atque vixisse indicaverit.

Stephano igitur tertio Pontifice defuncto, creatur Adrianus, divino numine in Desiderii exitium tandem prospiciente: quid moror rei eventum? Pontifex Desiderii perfidiam ac rapinam perspectam habens, nihil ejus verbis credere, sed sibi & Ecclesiæ rebus cavere cupiens, Carolum Regem precibus & legatione exorat, ut in Italiam oculos vertat. Ille magnanimus, piusque, Rex, præmissis semel atque iterum precatoribus, qui Desiderium à proposito vexandæ Romanæ Ecclesiæ averterent, auro etiam oblato, re tandem ad belli necessitatem redacta, Italiam instructo exercitu petit, fregitque Desiderii apparatus, homine ipso intra Ticini munimenta circumsepto. Vide igitur quibus se ulciscatur modis divina potestas, quibusque plectantur angustiis transgressores fidei: Longobardorum Reges, qui Orientalis Imperii Duces atque exercitus ab Italia ejecerunt, floruerunt in Regno; iste vero Desiderius, sive potius Desinerius, contraria operatus, neque omnino, quod conabatur, effecit, neque Regno diu potitus fuit. Accingitur Papiæ oppugnationi Carolus, subeunt fortissimi viri civitatis muros, tentant conscendere, postes impellunt, trabibus, vocibusque intonant, quasi coelum suo impetu capturi. Attamen illa tanta Francorum vis, ille Gallicus impetus, illa omnis terribilitas in irritum cessit, una victorem ac Regem remorante Papiæ, virosque & vires à muris summovente: cujus quidem civitatis expugnatione desperata, Carolus in obsidionis remedia oppugnationem vertit. Nemo igitur tam amplo præconio commendare Francorum vires poterit, quin etiam Papiæ, quod suum fuit, tribuat: quæ sola ea ætate sustinere ingentem Caroli exercitum, & à muris repellere, & longa ex-

A spectatione frustrari tam diu valuit, quam diu barbariorum copiam intus habuit. Deus in mediocri civitate hoc operatus fuit, ut loci angustia commemorata, peractæ rei famam auctori adjiceret.

CAP. XIV.

De Romana ditionis incremento ex Longobardorum fide & deditione.

DESIDERIO Rege Papiam se recipiente Longobardi Duces, qui ex suis quisque provinciis evocati in auxilium Regis iverant, copiis collectis ad suas regiones reversi sunt, & Concilio indicto consulunt quid facto opus sit, bellone an paci hæreant? B Duces, qui ex antea Lytprandi & Rachisii disciplina Romanum Pontificem revereri assueverant, improbare Desiderii irreligionem, qui spreto jurejurando Romanæ Ecclesiæ infestus fuisset, & pacem turbasset, in Concilio coguntur: conveniuntque in hanc sententiam, eundem omnino communi nomine ad Pontificem, supplicique oratione agendum, ut Sanctæ Romanæ Ecclesiæ gremio recipiantur. Itur ergo ad Pontificem, supplicatur, impetraturque, ut omnes à Longobardis oriundi, Piceni, Umbri, sive Spoletini, Beneventani, Samnitesve, & Reatini, Tusci, Romanæ Ecclesiæ in posterum filii, dedititque sint, & in suis oppidis, regionibusque, & possessionis juribus permaneant, suprema ditione, sive Imperio soli Romanæ Ecclesiæ competente, cui sese Longobardi sua sponte dedidere. Non est operæ pretium singula quæque referre à Blondo, Platina, cæterisque repetita, de Vaticani regione Longobardis pro incolatu adscripta, & de Aldiprando, Duce Longobardorum nobilissimo, Spoleti & alibi constituto, quem *Hildebrandum* aliquis scripsit; hoc ego tantum repeto, Romanæ ditionis incrementum ab ea Longobardorum deditione emanasse, antequam Carolus ad Pontificem iter faceret. Illi ergo rerum ignari, qui viginti librorum revolutione inflati latrant in Longobardos, Barbaros eos, ferros, impiosque scriptitantes, sua sese ignorance produnt, dum ignorasse illa probantur, quæ retulit serio ordine Blondus lib. i. secundæ *Decadis* iis verbis: *Eam deditionem in hanc formam invenio factam*, &c. Platina similiter in *Adriani Vita* sic notat: *At Spoletini, Reatini, ac Longobardi omnes*, &c. Sabellicus quoque libro VIII. *Enneadis* octavæ hæc refert: *Spoletini primi omnium, Reatinique*, &c. Unde ergo barbaries in illis argui, qui in Italia nati erant, potuit? unde, quæso, feritas dici potuit illorum virorum, qui ad sanctæ Romanæ Ecclesiæ pedes, vel limina, supplices iverunt, ac sese ei dediderunt. Unde tandem impietas fingi in illis, atque impingi potuit, qui Italicarum provinciarum dominia, Ducatusque, ducentos annos possessa, sponte in Romanam Ecclesiam contulerunt? Garula ergo atque inanis istorum scriniariorum latratio atque obtrectatio est, cani ad Lunæ cornua ululanti ferme assimilanda: ululant quidem illi ipsi, ut audiantur potius quam ut dixisse, scripsisseve, aliquid ratione intelligantur. Aldebrandi etiam Longobardi Ducis constitutio ab Adriano facta, tam amplo, latoque Ducatu eidem attributo, quid aliud indicat, quam gentis fidem ac probitatem Pontifici notam? Vaticani item regio genti designata, nunquid indignitatem Longobardorum arguit? an vero dignos eos fuisse Urbis incolatu probat? Inapte igitur quidam Scriptor Caco latroni Regnum Longobardorum, imo Italicum, comparat, sola garrulitate contendens: sed multo aptius ipse Cerbero assimilandus est, Stygio ore rictus & latratus fundens in umbras defunctorum, à quibus oriundus est, uno actu simul & ingratum animum, & à veritate prorsus aversum suo pte ingenio, moribusque, pandens.

C A P. XV.

De Caroli Regis profectione ad Pontificem, & reditu.

CAROLVS Rex, dispositis circa Papiam obsidentem gentibus, Veronam cum copiarum parte profectus in deditiorem recepit, nepotibus ex fratre sese eidem credentibus: receptaque fere omni Transpadana regione, Romam petit, atque ad Pontificis pedes procumbens, Christiano ritu Sedem Apostolicam in honorem Dei quam maxime veneratus fuit: iurejurando etiam sese sponte sua adigens, quod Romanæ Ecclesiæ defensor Regni sui nomine futurus esset: quod mirabili virtute ac constantia præstitit; unde & Magni cognomentum nomini suo adjicere solus ipse inter Christianos meruit, & successoribus suis Francorum Regibus Christianissimi epithetum coronæ affixit. Quod Christianissimi vocabulum effingere voce sua materna Franci nesciunt, nequeuntve, sed pro eo Transchristianum, sive Très-Chrestien, dicunt: Trans enim præpositio positivo nomini adjecta superlativum Gallice elegantissime ac brevissime format: sic etiam Très-bien, sive Transbene, pro optime, Francia loquitur. Omitto hoc loco ea repetere, quæ cæteris Scriptoribus ter quaterque relata sunt; peracta scilicet inter Adrianum Pontificem & Carolum Regem de Ecclesiæ dominio.

Reversus ad Ticini Castra Carolus Desiderio per internuntium significat, non esse unde sibi auxilium ferri ulterius expectet; Veronam ab Aldigisio filio suo destitutam, una cum plerisque Transpadanis urbibus in sua potestate esse; Forojulianos aversos jam pridem ab eo ad Pontificem respicere; cæteros Italicos Longobardos res suas composuisse, eo intra Papiæ angustias derelicto; prospiceret itaque sibi, & quandoquidem de Regno actum esse cerneret, saluti saltem suæ & civitatis consuleret: hoc etiam adjecto, si in septimum usque diem deditiorem distulisset, omnem se licentiam ac feritatem exercitui suo in obsessos permittendum. Jussit subinde una cum internuntio Veronensem civem genere Longobardum subire muros, coramque referre rerum ipsarum seriem, ut certo nuntio commotus Desiderius promptior ad deditiorem fieret. Nuntio igitur accepto Desiderius præstolari responsum nuntium jubet, abstractumque ab ejus adpectu Veronensem rogat, *quis sit rerum publicarum status? quæ suorum fortuna? quæ spes subesse possit?* Ubi vero disjectas opes, amicitiasque solutas, & filium profugum ab Italia accepit, vehementer ingemuit: *Hec quo me mea depulit concupiscentia! Dux eram in Etruria, Regnum volui, & habui: vivebam in pace ac majestate, solus in Italia Rex eram, solusque regnarem, nisi ego ipse ambitione elatus fractis legibus Dei Ecclesiam lacecesssem: rogabar olim & dedignabar, nunc vero circumseptus hostium globis, regnum, quod augere putaveram, cogor dimittere; mea simul libertate, una cum regno, hostili arbitrio summittenda. Oh saltem mihi vilis servi conditio hoc tempore adesset, qua fugam tentare, ac filii mei exsilium subsequi liceret! Quid agam? immo eo redactus sum, ut nihil agam, mea jam potestate subacta: dedam igitur me, dedam hoc infelix atque infansum Regnum, quod in me Regnum esse desinet: dedam hanc urbem, quam nec ferro, aut igne, hostis capere, nec jam sexto exacto mense obsessam frangere sua mora potest: dedam certe omnia omnibus mihi hoc tempore adversantibus, & pene à Regia deficientibus. Evocato deinde nuntio, ait: Renuntiate Carolo Regi crastina die me rectores civitatis ad eum emissurum, qui meo nomine transigenda component, velit propterea, dum hujusmodi tractanda erunt, ab injuria & vi milites suos continere, quod ego similiter faciam. Dimissoque utroque nuncio edici jussit, ne à muris missilia in hostes torquerentur, Carolo similiter à civitatis accessu & læsione suos prohibente.*

A

C A P. XVI.

De Desiderii Regis deditiione.

Si ulla unquam nox infesta Desiderio in vita fuit, hæc ipsa omnino molesta ei visa est, quam inops consilii Rex insomnis exegit, orta que luce adeuntibus civitatis rectoribus, qui pridie moniti fuerant, affuit, atque hoc sermone eos allocutus est: *Ego satis cerno, me in rerum nostrarum desperatione ad Carolum Regem vos emittere, ut ab eo potius conditio accipiat, quam transigatur. Attamen si nos rerum desperatio ac pestilentia, quæ ut videtis jam serpit vehementius, urgent, Carolum quoque Regem torquent mora obsidendi, sumptus, belli incommoditas, & periculum regni sui à finitimis invadendi: itaque in dispari rerum eventu nos & ille constituti, singuli tamen tadio & incommodo affecti sumus. Ite igitur fidentes animis, & nobis vobisque consulite, dissimulate mala, in quibus versamur: sed nihil tamen statuite, nisi meis præmonito: unus vestrum redeat, aliis interim in Castris præstolantibus. Itur ad Carolum Regem, in Salvatoris Monasterio, sine Monachorum molestia, hospitium habentem: recipiuntur humaniter, audiuntur, impetrantur petita, una tantum propositione rejecta: dimitti enim se Desiderius postulaverat; contra Carolus ajebat, regium jus esse personale, & ideo, qui Regem in manu habet, & dimittit, Regnum periculo subjicit: quod ipse Carolus evitare cupiens, Regem penes, se habere, non in vinculis, sed in honore ac commodo omnino velle. Accipit conditionem, conditione cogente, Desiderius, deditiione facta mense septimo inchoato ab obsidionis die, & pestilentia tunc obsessos infestante, ut notat Sigebertus in *Caroli gestis* anni DCCLXXV.*

C

D

E

F

Is igitur finis Italici belli & Longobardi Regni in ipsa gente fuit, anno, ut plerique notant, septingentesimo & septuagesimo quinto ab ortu Domini, & ab adventu Longobardorum ducentesimo & quinto: qua tamen in re variatur à Scriptoribus, quibusdam Papiæ deditiorem factam affirmantibus post annum octogesimum supra septingentesimum. Qua deditiione secuta, Papiæque sub Caroli Regis potestate constituta, Longobardæ leges rejectæ fuerunt: Regni enim potestate amissa, transferri legum potestatem ad victoris arbitrium necesse fuit; illisque ex desuetudine abrogatis, redire Italici populi, alii ad Romana jura, iis tantum non receptis, quæ Justiniani inconstantia male condiderat; alii Pontificum decreta pro legibus susceperunt, quæ in volumine congesta Decretales postea appellarunt; alii sua sibi jura componentes, statuta ediderunt, juri communi publica auctoritate derogantia: quibus quidem statutis Italica civitates in Circumpadanis utuntur, illis nonnunquam suo jure reformatis. Nec tamen propterea omnes Longobardos Italicos Carolus subegit, nam Forojulienenses & alios finitimos in statu suo intactos dimisit: in Galliamque profecturus, peditum & equitum Longobardorum agmina exercitui suo adjecit; quorum opera in Hispanico bello & Saxonico strenue usus fuit, ut Blondus & Sabellicus referunt. Prudenter autem Carolus Rex, rei bellicæ peritissimus, robur Longobardorum militum ab Italia deduxit, ne ipso discedente bellaces viri in Italia dimissi, & gentis suæ imperio assueti, tumultus cierent, & ad amissum Regni decus respicerent. Atque hoc ordine & tempore bello confecto, pacataque Italia, præfectisque provinciis Italiciis, quæ sub Desiderio erant, suis Ducibus, Carolus in Galliam est reversus.

C A P. XVII.

De Scriptorum ambiguitatibus.

MVLTA circa Papiæ deditiorem, & finem Longobardi Regni, congerunt Scriptores, quæ ambigua videntur. Sabellicus inprimis, Veneti honoris

noris studiosus, viginti naves Venetas affuisse Caroli praesidio notat; secutus, ut ait, quendam Justinianum: cui respondeo, onerarias naves cibaria invexisse Caroli exercitui clarum est, sed navibus oppugnatam fuisse civitatem à vero abest, moenibus ipsis à flumine ea aetate procul sitis; ita ut navali pugna peti muri nequicquam possent, civitate procul à Ticino ad teli, vel lapidis, jactum in alto sita, & alveo fluminis in imo posito. Fingant ergo decus Venetis aliunde Scriptores quam ex Longobardi Regni exitu, qui solius Caroli virtuti cessit.

Alter popularis Scriptor Desiderium religiosum fuisse asserit, templaque construxisse, ac pro Christiana Republica multa confecisse bella; quæ omnia sine probato auctore referens, inania facit, & se circulatori similiorem esse quam, Scriptori demonstrat. Probabilior autem videtur Pauli Diaconi Longobardi Historici attestatio, scripta ab eodem libro v. de gestis Longobardorum capite iv. ubi narrat praedictionem religiosi viri comminantis excidium Regni tempore, quo Dei honorificentia defectui genti esset, subdens hæc verba: *Quod nos ita esse probavimus, qui ante Longobardorum perditionem, eandem Beati Joannis Baptista Basilicam per viles personas gubernari conspeximus, ita ut indignis & adulteris, non pro vita merito, sed pro datione praemiorum idem venerabilis locus tribueretur.* Et quem Paulum Desiderii familiarem fuisse, & in Galliam una profectum, Platina refert in *Vita Adriani*, viri probitatem ac literaturam probans his verbis: *Paulum quoque Longobardum, &c. Spreta ergo Dei reverentia, non solum à Rege Desiderio, sed etiam à gente fuit, cum Caroli Regis potentia in ipsam gentem conversa est. Hacque fortasse causa Paulus Diaconus gentis suæ historiam texens usque ad Lytprandi tempus perveniens, omisit subsecuta tempora Astulphi, & Desiderii, ne utriusque Regis facinora, à Christianæ fidei institutis declinantia, in gentis suæ dedecus referret; stricte tantum de Astulpho scribens libro xxii. de gestis Romanorum, quod non destiterit Pontificem Romanum vi opprimere per hæc verba: Inter hæc autem Stephanus Papa Romanus multa mala ab Astulpho Rege perpeffus ad Francos confugit sub Pipino, &c. Et paulo infra ait: Predictus namque Papa Stephanus vi pressus, & crudelitate coactus Astulphi, in Franciam ivit, &c. Sileant ergo popularium virorum scripta, quæ religionem viguisse in Desiderio narrant, & alia pro fabulis habenda: stetque hæc sententia immutabilis, spreta Dei majestas tandem in contemptorem vertitur.*

Tertia sequitur ambiguitas de filiis Desiderii, quos duos fuisse idem Scriptor commentitius retulit. Ego unum tantum Aldigisium natum à Desiderio accepi, non autem duos, qui Verona relicta ad Constantinopolitanum Imperatorem confugit, ut notant Paulus Diaconus libro xxiii. in fine de gestis Romanorum, & Sigebertus, quos Blondus & Platina secuti sunt. Idemque Aldigisius in Siciliam trajiciens cum Græcis Ducibus Longobardiæ majoris Regem sese inscribens, bellum infelicitate movit, & occisus est, ut ipse Paulus scribit libro xxiii. his verbis: *Anno nono Imperii sui Irenen, &c. Et paulo infra: Interea Irene misit Joannem, &c. Exstinctaque hoc modo Desiderii proles masculina fuit, à qua originem Vicecomitum fluxisse nonnulli temere ac inepte arguunt, nullo prorsus argumento ab aliquo probato Auctore deducto, ut in tanta re decuit.*

Quarta dubitatio versatur circa Divi Theodori Papiensis Episcopi tempus, quem virum nonnulli cives mei scribunt vixisse sub Desiderio, & à Leone tertio Pontifice sacra suscepisse: quod non probo hac ratione: nam Petrus Episcopus Longobardus Lytprandi consanguineus vixit in Episcopatu

annos quatuordecim, decessitque ab humanis superstitite Lytprando; cui Petro succedens Theodorus, qui vixit annos quatuordecim, nullo modo pervenisse ad Desiderii tempora potuit, in quibus obsessa Papia fuit: quoniam post Lytprandum regnavit Rachis, sive Rachisius, annos septem, deinde Astulphus frater alios septem, quibus si addas annos duos, vel unum, quo creatus Episcopus Theodorus sub Lytprando fuit, necesse est fateri ipsum sanctum virum à vita emigrasse ante Desiderii obsidionem factam anno decimo septimo regni ejus. Et quod nostri narrant, sanctum virum precibus suis hostium acies avertisse à portis civitatis, Deo illi favente, probo quidem evenisse sub Astulphi Regno, quando civitas Pipini Regis agmina propinquari sensit. Item, quod de Leone Pontifice dicitur, vixisse Theodorum sub ejus Pontificatu, non abnuo, sed electum prius Episcopum puto. Verumtamen meam sententiam tanti non facio, ut niti hac in re contentione velim: scribens enim antiqua, minime à me visa, tam decipi possum ego, quam priores, qui similiter non visa prodiderunt. Scribuntur alia plura à veritate semota, quæ omitti à me decet, ne reprobandum potius quam scribendo studium adhibuisse censear.

C A P. XVIII.

De Regni Italici mutatione, & Longobardorum gloria, Pontificaliue dominio.

Quæ Italicarum rerum eventus à prima Gothorum irruptione usque ad Caroli Magni adventum contemplatus fuerit, mirari multorum exemplo & dubitare poterit, cur in trecentorum & sexaginta quinque annorum intervallo, exterarum fere semper gentium regna, vel imperia, Italicis provinciis dominata fuerint, nemoque ex nostra gente in lucem venerit, qui dominia ab alienis eripere, sibi que vendicare ausus sit, cum prioribus, ut accepimus, seculis floruerint in Italia viri, non solum suæ, sed aliarum etiam nationum libertatis vindices & assertores? Dixerit hoc loco aliquis, divina voluntas fuit, cujus sunt regna & imperia. Respondeo, sunt omnino Dei regnorum potestates; sed ego quæro, cur dominia olim in Italiæ potestate constituta, ablataque postea, nunquam Italiæ restituta fuerint ab anno quadringentesimo & decimo ab ortu Domini, usque ad annum (ut dixi) septingentesimum & septuagesimum quintum? Illa enim superna voluntas, cui justitia ab æterno inest, nullo modo abolere regna, sine Regum, vel Populorum, demerito atque excessu solet. Cujus quidem Justitiæ causam quærito: dicere ergo ingenue ac humaniter necesse est, indignam dominio ac libertate, quibus olim potita fuit, Italiam tunc Deo æterno visam: causam autem indignitatis inquirere hoc tempore difficile est, tot jam transactis seculis in magno Scriptorum silentio, qui referre rerum successus potius quam causas studuerunt. Duplicem tamen esse causam regni mutandi plerunque reperio, unam humanam, alteram divinam. Humana causa Regna mutantur, à gente in gentem propter unius gentis injustitias, longo tempore sine impunitate ac sine poenitentia perpetratas, quæ, ut dicitur, foetent in conspectu Dei, ejusque iram excitant in transgressores, alterius gentis manu à Regno dejiciendos; quæ quidem humana causa pendet à divina. Divina vero causa multiplex est & incomprehensibilis propter altitudinem divinæ mentis ac sapientiæ, divinique judicii, quod nostræ infirmitati inscrutabile est: nam si terrena, quæ miramur, vix tenemus, quomodo divina, à nobis remota, immo abscondita, percipimus? Verumtamen visum interdum est divinæ potestati, per servos suos causas eventuum ac mutationum populis indicare, ante-

tequam fiant, ut corrigantur, aut postquam facta sunt, ut ceteri intelligentes absterreantur.

Causam ergo Italici domini ad externos transferendi modestè agendo, dicemus fuisse divinæ mentis arbitrium, ut uno actu duos effectus operaretur: primum, quod Italia, quæ olim in Imperii tantum glorificatione exultaverat, per illius amissionem desineret in sese gloriarī, ac aliis simili modo populis (ut ipsa imperaverat) obtemperaret, & pro antiqua ambitione novam humilitatem suscipere, atque per humiliationem Deum imperii dominum, & non seipsam, esse agnosceret: alterum, quod aliæ nationes ex eo actu intelligerent, uno tam sublimi Romano Imperio dejecto, quo nullum majus unquam in terris fuit, sua similiter Regna, eodem jubente Deo, alterius gentis manu fore dissolvenda; erigerentque iccirco animos in Deum, tanquam Regnorum Principem agnoscendum, colendum, & solum Dominum existimandum. Quo quidem Deo à quavis gente pro Domino habito & glorificato, gentem simul ipsam gloriam à Deo recipere, sive per Regnum, sive alio decore necesse est, ita nobis antiquo Propheta ejus nomine attestante libro I. Regum capite II. *Quicumque honorificaverit me, glorificabo eum, qui autem contemnunt me, erunt ignobiles.* Et alibi idem fere à Samuele dictum fuit, capite XVIII. ejusdem libri: *Si timueritis Deum, &c.* Et ne humanæ mentes, quæ nodum sæpe in scirpo quærunt, & à veritatis luce recedunt, existimarent Romanum Imperium casu, aut natura collapsum, annunciatorem & vatem mille & amplius annis ante præmisit Deus, nostræ perditionis indicem, qui prospiciens ab alto Judæorum turmas & castrametationem, coactus spiritu in hæc verba prorupit: *Heu heu quis victurus eo usque erit, quando ista faciet Deus? venient in triremibus de Italia, qui superabunt Assyrios, vastabuntque Hebræos, & ad extremum etiam ipsi peribunt.* Quæ verba habentur in libro Numeri, capite XXI. in fine; & quæ demum prædictio facta est quintæ & amplius annis ante Romam conditam, quo tempore nondum Itala militia in honore & fama apud externas gentes esse poterat. Adimpletaque tandem fuit Romanis, sub Vespasiano & Tito, Judæam una cum finitimis subigentibus, & Herulis deinde, Gothisque, & Longobardis Italos & Græcos superantibus. Dixitque ille longævus vates, Deum illa omnia esse facturum, ut ostenderet regnorum potestates in manu Dei esse, quamvis humanis viribus constituantur, pariterque evertantur, quæ hominum operatio Dei voluntati famulatur. Nam quemadmodum faber in officina fabrilis suo arbitratu collocat, amovetque, & malleo ac cote gladium format, acuitque, deinde acutum retundit ac infirmat; multo quidem majore potestate ac sapientia Deus hominum opera pro sui arbitrio instrumento utitur adversus alios homines sibi infestos, Regna hic figens ubi non erant, & illinc reficiens, ubi olim conspicua erant.

Hinc gentes olim ignobiles in tempore à Deo constituto multiplicari legimus, nascique ex eis viros animis, viribusque, conspicuos, & ad bella gerenda suapte natura pronos, qui divino infusi, impulsive, judicio irruerunt in alios populos, Regnaque everterunt, ac suis nominibus dominia constituerunt, ut Gothi, Hunni, Alani, Vandali que fecere; quorum initia vix memoratu digna videntur. Hinc etiam eodem jubente Deo, defecisse postea in illis gentibus multiplicationem virorum & præstantiam, ac ferme in nihilum recidisse accepimus, alia insurgente gente, & quasi malleo Dei priorem contundente, ut hoc loco etiam omnis patefacit historia. Nam Longobardi Italia potiti, ab ea sæpe Gallos repulerunt, Græcos ejecerunt, & Orientalis Imperii dominium, immo Romanum, (ut vocabatur) in Italia extinxerunt, Avars, sive Bava-

A ros, Sclavos, sive Dalmatas, item Saracenos Italiam ingressos, telis confecerunt: nullusque in Europa gladius intra ducentos annos præstantior atque validior, quam Longobardus fuit. Ecce autem Deo ab eis faciem avertente, languere ac deficere ipsorum fortitudo, contraque invalescere Francorum robur ac præstantia visa sunt, Longobardo Regno incruenta victoria confracto, sibi que subiecto. Quibus quidem mutationibus circumspicis, nihil aliud esse Regnum, vel Imperium, existimare possumus, quam humanam potestatem, hominum opera à Deo in terris positam, & ad ejus pariter nutum deponendam; & qua demum potestate à Longobardis in Francos delata, quicquid honoris, decorisque, Francis accessit, ex Dei providentia illis operantibus accessit, (operari enim homines, ac labores & pericula adire in rebus eximii necesse est, etiam Deo eis favente) & quicquid ex adverso dedecoris ac indignitatis Longobardis accessit, illis similiter adversante Deo contigit. Tuque, infelix Italia, particeps illius indignitatis effecta es, quoniam Italicum illud Regnum erat, tum quia in Italia, tum quia in gente Italica positum erat, quamvis antiqua agnatione Longobarda esset. Quo quidem Italico Regno à te in Galliam, Franciamve, translato, indignam Regno Italiam, dignam vero Franciam Deus illa translatione fecit, nec per Italarum manus, ne ulla honoris pars eis contingeret, sed per alienigenas ipsam mutationem fecit, ut ipsis tantum Francis devicti Regni famam tribueret, Italiamque penitus Regia honorificentia exueret. Ademit itaque Carolus Italiæ Regni honorem, eundemque tanquam eximium, clarissimumque, sibi adscripsit, iis postea usus titulis, *Carolus Francorum & Longobardorum Rex*, &c. Quæ inscriptio in ejus legibus præposita legitur. Nec propterea gentem Longobardam Carolus victoriam consequutus despectui, sed honori habuit: nam Longobardiam contracto nomine, tam ipse, quam Romanus Pontifex, & Populus appellavit omnem Circumpadanam oram inter Alpes & Apenninum sitam: quam appellationem secuta est posteritas, Romandiola tantum Romanæ Ecclesiæ aggregata. Vicum etiam in Vaticano pro Longobardorum incolatu Roma cessit, quem vicum posteri commutarunt, sedibus intra Urbem prope viam latam sibi statutis, Lombardiæ nomine vico imposito in antiquæ gentis honorem; exstatque etiam Bononiæ verus agnatio Lombarda appellata. Nullum denique discrimen viguisse inter Italos & Longobardos ea ætate omnes Scriptores tradunt, origine scilicet ab utrisque pariter ab Italia deducta, quamvis aliqua cognomina suapte enunciatione Longobardos referrent, veluti Eolpertos, Landulphos, Grimoaldos, (hodie Grimaldos) Oldovinos, Caripertos, Chiserios, similesque vocis sono ab Itala lingua dissonos. Nec in Italia solum dignos honorificentia Longobardos Carolus existimavit, publico omnium scientiarum Gymnasio Papiæ constituto, ut Sabellicus notat, quod hodie etiam celebre est, & à provincialibus frequentatur, nostratibus in eo Doctoribus primas sedes obtinentibus: sed in Francia etiam eidem genti magnum honorem & commodum impendere Regia majestas curavit, insigni & amplo collegio Parisiis constructo & Longobardorum nuncupato, quod hodie etiam tanquam celeberrimum visum à me in Gallia versante fuit. Petrus quoque Lombardus, vir peritissimus, in gentis suæ decus à Francorum Rege olim Parisiorum Antistes electus, à Sede similiter Apostolica approbatus est, peritiæque causa *Magister Sententiarum* appellari meruit, ejus scriptis à Catholica, sanctaque Romana Ecclesia publice receptis, & in Academiis palam lectis ac recitatis.

His ergo honoribus decorata gens Longobarda post

post amissum Regnum, Pontificum, Regum, ac illustrium nationum iudicio, semper in existimatione fuit: ex qua quidem re vaniloqui atque dicaces arguuntur singuli, qui eis obrectare infano sermone ausi sunt; Regno eorum tam ex diuturnitate approbato, quam ex Caroli susceptione, qui si latronum Regnum esse illud perspexisset, ut quidam falso atque infulse scripsit, ac etiam Senatus Consulto reprobatus fuit, abolevisset potius Regni nomen Carolus, quam crexisset ejus titulo assumpto. Nec omnino cujusquam dicacitas tollere à Longobardis honorem extincti Orientalis Imperii, & erectæ Romanæ Ecclesiæ ditionis in ipsa Urbe, Latio, Campania, Etruriaque poterit, quam constat, non à Constantini primi donatione, quæ in irritum cessit, sed ab Exarchi ejectione Longobarda manu facta initium habuisse: antea enim Romanus Pontifex nullam ditionem in Urbe, minusque in Italia exercuit, iis exceptis regionibus, quas Platina & Sabellicus donasse Aripertum, & alios Reges Longobardos, Romanæ Ecclesiæ scribunt: nec etiam ipse Pontifex satis liber sub illis scelestis Orientalibus Romæ imperantibus esse potuit. Piget ad hoc demonstrandum transacta repetere. Quoties Romanis Pontificibus Imperatorum jussu vincula injecta fuisse legimus? Quoties violenta manu interitum illatum accepimus, aut exilium indictum? Quoties retractata, revocataque, electio Pontificum fuit, ac divina jura nefario ausu temerata? Hæccine igitur Ecclesiæ libertas; aut donationis auctoritas ad actum possessionis perducta fuit? Hæccine ditio Romanæ Ecclesiæ, an subjectio, famulatioque censenda erat? Omnis ergo origo Romani domini in Ecclesia constituti, ab Exarchi ejectione initium habuit: Exarchi autem ejectio à Longobardis; ergo Longobarda manus viam, aditumque ad dominium consequendum Romanæ Ecclesiæ aperuit, potius quam Constantini largitio: quem quidem aditum Pipinus Rex perfecit, Carolusque filius amplificavit. At si Orientalis potestas ejecta ab Italia Longobarda manu non fuisset, nullo modo Francorum Rex in Italiam descendisset, subjectaque Exarcho Romana jurisdictio, & minime in Pontifices collata fuisset. Is ergo aditus Romanæ ditionis à Longobardis patefactus, paratusque, necessario Longobardorum virtuti ac viribus referendus est, Dei semper prælata honorificentia; istudque Romani Pontificis Imperium in Italia constitutum, quod miramur, constitutum nunquam fuisset, si Orientale venenum expugnatum ac fugatum à nostris aris non esset. Gratiam igitur habeamus divino numini, quod amissio Longobardo Regno, ac in Carolum translato, aliud nobis Regnum Pontificale contulit, quod Romano Imperio eo præstantius est, quo animi dignitas corporæ moli magis præstat. Romanum enim Imperium provincialibus jus dicere atque imperare tamdiu potuit, quamdiu in eos potestatem habuit, qua amissa potestate Imperium simul evanuit. Pontificalis autem auctoritas tamdiu in honore atque observantia erit, quamdiu Christianæ religionis fides, & Pontificum sanctitas, in orbe duraverit: quæ duo summa bona faxit Omnipotens Deus, ut in perpetuum vigeant, conjunctaque maneant, ne uno labante, aut titubante, alterum comminuetur, comminutumque temnatur.

C A P. XIX.

De rerum discrimine.

Si mei instituti fuisset ad Caroli Magni tempora descriptionem extendere, de Francia, & ejus Provinciis, & Regno aliqua memoratu digna, à

A me cognita retulissim, quæ cogor omittere: quoniam ea tantum hoc volumine colligenda censui, quæ Italicis rebus conjuncta erant, ac probare poterant Romani Imperii potestatem in Occidente prorsus eo tempore Longobarda manu fuisse dejectam, vigintique & amplius annis ejus nomen inter Occidentales conticuisse, uno tantum Adriano Romano Pontifice, ac Leone tertio post Adrianum ditionem moderante. Cujus quidem Imperii interitus in Occidente, quid operatus fuerit, in posteriore Imperii potestate à Pontifice erecta, alio loco excutiendum esset: cum dissimile posterius à priore Imperio in pluribus discernatur, præcipue in electione, constitutione, ac imperitatione: qua diversitate attentata, diversum esse istud nostri temporis Imperium, diversique juris à priore Romano Imperio dubitari ratione potest: qua tamen omissa dubitatione, consummare Opusculum meum hoc loco statui, imitatusque eos, qui longum iter emensi respiciunt montes, oppida, & flumina à tergo relictæ, ita ego respectans Regna olim dejecta, prostrata Imperia, perditas civitates, provinciarum mutata nomina, gentesque funditus deletas, in meme versus cogito; ô insensati, qui tot ac tanta ad Dei nutum everfa, confracta, atque extincta legimus, ac etiam vidimus, quid miramur nostra? quid cupimus? quid expetimus? si ea, quæ habere videmur, vix habemus, alienis in nostra bona sæpe irruentibus. Quicquid congeritur, quicquid in terris acquiritur, quicquid nostris viribus firmatur, amissionis discrimini subjicitur, atque à nobis aliquando avellitur, conferturque in barbarum (ut ille notat) militem, immo potius accipitrem, si ve raptorem: nullo ergo modo fidere humano consilio, humanisque rebus, tutum est, singula suo nutu versantē Deo; periit Romanum Imperium olim in Italia, periit etiam patrum nostrorum memoria in Græcia; periit similiter in Francia, alibique, ubi quondam in admiratione atque amplitudine visum fuit. Nec tamen in tanti domini interitu satis digne, matureque, expergiscimur, ac meditamur, quo nostra consilia, actusque dirigamus. Ille CAROLVM QVINTVM composito ad gratiam verborum, plausu rebusque male gestis silentio involutis, vivens viventem celebrat. Alter in faciem Romanum Pontificem beatissimum appellat: à quo tandem nihil consecutus, secedens à nostris oris ruit in dicteria, eundemque virum, quem suis scriptis probaverat, mox lacerat maledictis, atque ingratum appellat: quidam alius Regem Francorum suis carminibus in cælo collocat, divisque comparat: mox ab eo semotus contraria fatur, hostique blanditur, versipellis in moribus, in habitu, ac in dicendo efficitur. At quanto præclarius esset Deum Regum Dominum celebrare, à quo quicquid ad nos manat, longe stabilius est, quam quod manat à Principe, humanis casibus obnoxio? Nostra ergo consilia, nostræque actiones in hujusmodi rerum humanarum turbine ad Dei æterni venerationem essent dirigendæ, quod minime facimus. Sicut itaque nos à terrestri potestate potius quam à Deo nostra acta auspicamur, ita nostra acta una cum mortali Principe collapsa sæpe miramur ac deploramus, ipso nos eludente Deo, nostraque vota contrario eventu sapissime fluctuante. A quo quidem errore si mihi abesse mea imbecillitate licuerit, nescio (sum enim homo sicut cæteri, altiusque fortasse cæteris infixus limo) si tamen ab eo errore me procul esse contigerit, quod cupio, gaudebo audacter Deum me potius invocasse, quam Reges terræ, atque ita ad ipsius Dei glorificationem labores meos referens finem *Ticinenſi Historia* impono.

Ego Hippolytus Rubeus, Episcopus Papiensis, visa D. Inquisitoris subscriptione, subscripsi.

Ego Frater Dominicus Pusterla, Inquisitor Papiæ, subscripsi, & merito comprobavi.

I N D E X

L I B R O R V M & C A P I T V M.

L I B E R I.

- CAPUT I.** De Italia sua, & diversitate.
II. De Insulis.
III. De Cisapenninica Italia parte.
IV. De Apennino monte, & ejus obiectu.
V. De Orientali Italia parte, in qua praestantes Equi gignuntur.
VI. Communia utriusque Regionis & Roma propria.
VII. De Agri Tusculani differentia à Romano.
VIII. De Apenninica Italia parte.
IX. De Circumpadana Italia parte.
X. De ejusdem regionis aere, & proprietate.
XI. De Venetia, & Aquilonari Veneto.
XII. De orientis Solis prospectu.
XIII. De Occidentalis & Orientalis Venti statu.
XIV. Quomodo Venetia Transpadanis jungatur, & de ipsius Populi antiquitate.
XV. De Mantua.

L I B E R II.

- I.** De Insubria, aliisque Circumpadanis partibus, & ipsarum habitatoribus.
II. De Ligurum origine, & populis.
III. De Liguribus Ticini accolis.
IV. De Laborum nuncupatione, & Ticino condito.
V. De Pado, & Ticino fluminibus.
VI. De tempore adificationis Ticini.
VII. Cur in Romanorum fuga à Ticino, de oppido mentio nulla fiat.
VIII. Antiquitatis dignitatem à gente statui potius quam à structura oppidi.
IX. De Maricis Populis.

L I B E R III.

- I.** De Statu Urbium & Populorum.
II. De Coloniarum subjectione.
III. De Laborum Libertate, ac Dominio.
IV. De Laborum amicitia cum Romano Populo, & Cremonensium capivitate.
V. De Cremonensium colonorum origine.
VI. De antiquioribus Populis Transpadana Provincia.
VII. De Ticinensium & Cremonensium antiquo Dominio, & Statu.
VIII. De utriusque Populi Fide.

L I B E R IV.

- I.** De Insubria in Provinciam redacta.
II. De Insubria Situ, & Partibus.
III. De Leumellina situ, & populis.
IV. De Asparago.
V. De Fungis.
VI. De Moris, & Bombycibus.
VII. De Fragis, & Serpillo.
VIII. De Fœni diversitate.
IX. De Messis varietate & copia.
X. De Lini praestantia.
XI. De Lini Semine, & ejus Oleo.
XII. De Vitis, & Labrusca, Vinisque.
XIII. De Venatione, & Ausupio.
XIV. De fatali aquarum illuvie.

L I B E R V.

- I.** De Sicomario tractu.
II. De planicie inter Ticinum & Adum sita.
III. De Irrigationis commodo.
IV. De salubritate Regionis.
V. De Ticini urbis situ, & amœnitate.
VI. De Fluminibus.
VII. De Fontibus.

L I B E R VI.

- I.** De Syri adventu & concione.
II. Syri Aquilejensis oratio de Deitate.
III. De Christiana religionis primordiis Syri Oratio.
IV. De Ticinensium conversione.
V. Contra Suetonii in Christianos dicitatem.
VI. De Ligusticorum Oppidorum conversione.
VII. De Christianorum persecutione, sub Domitiano facta, & Syri Episcopi obitu.
VIII. De Ticinensibus Episcopis post Syrum constitutis.
IX. De Ponte Ticino imposito.
X. De invicta Christianorum fide.
XI. De Ecclesia fluctuatione post Constantinum.
XII. De Mediolanensis Ecclesia dignitate.

- XIII.** De Mediolanensis & Ticinensis Ecclesiae, sive Praesulis, contentione.

L I B E R VII.

- I.** De Italia Excidio.
II. De Hunnorum, aliorumque in Italiam eruptione, & Venetia urbis initiis.
III. De Vandalorum rapinis.
IV. De Alanis ab Italia depulsis, & Richimeri facinore.
V. De Italico tumultu ab Epiphania Episcopo sedato.
VI. De Ravennatum similitudine in Epiphanium.
VII. De Odoacris adventu, & Romano Imperio sublato.
VIII. De Italico tributo, & Ticinensium restitutione.
IX. De Ticini nomine in Papiam commutato.
X. De Theodorici adventu, & Regno, & Papiæ amplificatione.
XI. De Italia statu sub Theodorico, & divina Urbis Roma electione.
XII. De Italarum Civitatum institutione.
XIII. De Epiphania legatione ad Regem Burgundia.
XIV. De Sacrosancta Eucharistia in Divionis templo ab Epiphania collocata.
XV. De Epiphania Episcopi obitu.
XVI. De Burgundia Regis amicitia cum Theodorico.
XVII. De Horologiis.
XVIII. De Boetio Severino.

L I B E R VIII.

- I.** De Anmodio, Episcopo Ticinensi, ad haereticum Imperatorem misso.
II. De Pontificia Imperatoris coronatione, & unione.
III. De Gothici Regni variatione.

- IV.** De regia sede Papiæ constituta.
V. De supremo Gothorum bello, & Longobardorum dimissione.
VI. Abolitio nota in regiam Papiæ sedem confecta.
VII. De Justiniano Imperatore, & Romana Ecclesia jure.
VIII. De Longobardis, & eorum reditu in Hungariam.
IX. De Longobardorum origine.
X. De Italia statu sub Justino Secundo.
XI. De Papiæ obsidione, & deditio.
XII. De Papiensium jure sub Longobardis.
XIII. De juramento Papiensium, & Longobardorum successu.
XIV. De Longobardorum regimine.
XV. De Authari & Agilulphi Regno.
XVI. De Patavii & Cremona excidio.

L I B E R IX.

- I.** De Romana Ecclesia sui juris effecta.
II. De Heraclii Imperatoris praestantia & mutatione.
III. De Saracenis.
IV. De Maumethi secta.
V. De Theodelinda Regno.
VI. De Cremona institutione atque incremento.
VII. De Theodelinda successoribus, & Legibus Longobardorum.
VIII. De Monomachia, vel Duello.
IX. De Monomachia casibus.
X. De ordine pugnae.
XI. De Monomachia desuetudine.
XII. De Rotharii Regno.
XIII. De Ariperti Regis Religione.
XIV. De Salvatoris nomine.
XV. De Grimoaldi Regno.
XVI. De Parthariti Regis restitutione.
XVII. De Damiano Ticinensi Episcopo.
XVIII. De Morte, & Resurrectione Domini JESU CHRISTI, Damiani Sententia.

L I B E R X.

- I.** De Ticinensis & Mediolanensis Antistitis contentione sublata.
II. De Lytprandi Regno, & Divi Augustini translatione.
III. De Divi Augustini Tumulo.
IV. De Petro Ticinensi Episcopo.
V. De Lytprandi humilitate in legibus promulgandis.
VI. De Exarcho fugato, & Ravenna capta, & Equestri Statua.
VII. De Lytprandi Obitu.
VIII. De Astulphi Regno.
IX. De Domini libertate Romanis restituta.
X. De Dominio Romana Ecclesia.
XI. De Bononia, & Ferraria.
XII. De Beda sanctitate.
XIII. De Desiderii Regno, & exitu.
XIV. De Romana ditionis incremento ex Longobardorum fide & deditio.
XV. De Caroli Regis profectione ad Pontificem, & reditu.
XVI. De Desiderii Regis deditio.
XVII. De Scriptorum ambiguitatibus.
XVIII. De Regni Italici mutatione, & Longobardorum gloria, Pontificali-que dominio.
XIX. De rerum discrimine.

F I N I S.

JO. CHRYSOSTOMI ZANCHI,
BERGOMATIS, CANONICI ORD. D. AVGVSTINI,
DE
OROBIORVM,
SIVE
CENOMANORVM,
ORIGINE,
AD PETRVM BEMBVM,
LIBRI TRES.

JOANNIS CHRYSOSTOMI ZANCHI,

BERGOMATIS, CANONICI ORD. D. AVGVSTINI,

DE

OROBIORVM,

SIVE

CENOMANORVM,

ORIGINE

LIBER I.



QVAM magna fit rerum omnium, quæ cœli terræque ambitu continentur, atque imprimis quidem hominum, Petre Bembe, diversitas, licet aliis quoque rationibus haud difficile colligas, tamen hinc quam facillime cognosci posse judicari: quod quemadmo-

dum è terra tam variæ herbarum, fruticum, atque arborum species, tamque disparia bestiarum, vel cicurum, vel ferarum, cæterorumque animantium omnium genera prodeunt: sic diversæ etiam animorum propensiones, applicationesque, aliis atque aliis cum artibus, tum studiis exercendis, pro varia principiorum qualitate ac mixtura proveniunt. Nam sicut apud Aristophanem¹ senex ille loquitur Chremylus:

Ο' μὴ γὰρ αὐτῶν σκντολομεῖ καθήμεν.

Ἐτέρῳ δ' ἡ χαλκιδέει πρὸς τὸν τεκταίνετα.

Ο' γὰρ χρυσόχορὸς γὰρ, χρυσίον ὡρεῖ σὲ λαβών.

Ο' γὰρ λαποδυτεῖ γὰρ νῆ Διὶ· ο' γὰρ πιχωρυχεῖ.

Ο' γὰρ κναφύει· ο' γὰρ πλύνει κώδιαν.

Ο' γὰρ βυρσοδεφεῖ γὰρ· ο' δὲ γὰρ πωλεῖ κρώμνα.

Quibus è rebus genus hominum (ut paulo ante posui) ita variatur, ut ex ea ipsa varietate, rectissime profecto à primis illis naturæ rerum indagatoribus dictum fuisse ac creditum existimem; hominem ipsum minorem quandam mundum esse, quem Græci μικρόκοσμον dicant: quippe qui totius universi perspicuam quandam imaginem referre videatur. Quod quidem ita esse, docent tot arbores, tot herbæ, tot animantia, tot denique diversæ res, quas terra gignit, tot item contra ingeniorum propensiones, tot studia, tot artes, atque inventa, quæ nobis sunt à natura Dei dono, munereque, concessa: ut non minus fortasse innumerabiles ingeniorum sint, quam arborum, quam frugum, quam animalium, cæterarumque rerum varietates.

Quocirca sæpe ego mecum, Petre Bembe, nonnullos tam nostri temporis, quam à remotissimis etiam seculis non indifertos plane viros admirari soleo, qui speciosa, sed plane falsa, quadam hallucinati ratione, totam hanc & artium, & studiorum dissimilitudinem tam constanter reprehendant & damnent, ut quicquid operæ ac studii cuiusvis alii ab ea, quam ipsi profiteantur, disciplinæ impertiat, omnino supervacaneum ac minus utile esse contendant, vulgatumque illud quasi oraculum quoddam subinde ingerant: proinde miserandi sunt, qui tanquam abjecti, demissique animi, aut certi loci naturam, aut unius urbis situm, aut fluminis magnitudinem, aut montis amoenitatem,

¹ Plut. AÆ. I. Sc. II. ² Illud γὰρ redundat. ³ Dictio τις excidit. ⁴ Lege κρώμνα.

accurate nobis describunt: quod nonnullos fecisse constat, memoriæ prodentes tum Ossam, tum Nyssam, tum specum Corycæum, & quamvis aliam rem nominati: quum rerum levissimarum admiratione obstupesci videantur, & nomine explanationis rei parvæ sibi plurimum sumant & arrogant: quod quidem propterea eisdem uluvenit, quod ad res potiores contemplandas nunquam se converterint; mundi, inquam, & eorum, quæ in mundo maxima sunt. Nam si (ut res ferebat) hæc observassent, nihil omnino studii in reliquis admirandis posuissent: imo hæc ipsa omnia levia fuissent visa, & ad illorum præstantiam nulla penitus laude digna. Ego vero hujuscemodi sciolos non modo deriderem: sed & eum, quem sequi se prædicant, Aristotelem, (si modo is sit Aristoteles, ac non potius, quod nonnulli quidem asserunt, ejus discipulus Theophrastus, cujus ad Alexandrum Macedonem *ἐπὶ τῇ κέσμῃ* liber est editus) non sine irrisione demirarer talia dicentem, si de minorum artium professoribus, ac non potius (quod mihi quidem magis fit verisimile) de iisce loqueretur, qui spretis penitus, quæ ad animum ac mores spectant, disciplinis, levissimas tantummodo res, ac prorsus inutiles persequuntur, in hisque totum infumunt vitæ curriculum: alioquin si homines ipsi una omnes aut philosophiæ tantum (quod isti velle videntur) aut Juri Civili, aut si malueris Medicinæ, vel cuiusvis uni, quamvis necessario, artificio, natura essent, ingenioque suo, addicti, obstrictique, quanam obsecro via, aut ratione, civitates ipsæ, cœtusque hominum jure congregatorum conservari possent? ne dum augescere? pessime profecto, ne dum inutiliter, cum hominum genere actum esset.

Itaque, ut pedem pressius demum conferam, quam hæc mecum ipse tacitus sæpenumero cogitarem, simulque vetus illud M. Catonis elogium memoria repeterem, *Nihil agendo homines male agere discere*, facturum me rem neque ætati meæ alienam, neque patrii splendoris amatoribus penitus injucundam existimavi, si eum sermonem custodirem litteris, quem *de Orobiorum sive Cenomanorum origine* tres illi non solum sanguine, verum etiam ingenuarum artium doctrina, germani fratres, M. Marsilius, L. Petrejus, ac C. Julius Zanchi, apud M. Mauricium Annæum, qui tibi, eo tempore, quo apud nos degebas, Bembe, & familiaritate, & bonarum artium studio conjunctissimus fuit, inter se quondam habuissent: ut vel falsa illa opinio, quæ jampridem inolevisset, Orobios nimirum aut à Græcis, aut à Gallis ortum duxisse, tolleretur, expungereturque: vel mehercule etiam ut eorum virorum, à quibus patriæ nostræ origo est, memoriam jam prope senescentem, ac potius intermortuam (si modo possem) ab oblivione hominum

num atque à silentio vindicarem. Quod quidem scribendi genus, etsi nimis læti & quasi luxuriantis ingenii nonnullis forsitan videri potest, nescio tamen quo pacto in adolescentibus, tanquam in herbis, significare consuevit, quæ virtutis maturitas, & quantæ fruges industriæ sint futuræ: quamvis (ut verum fatear) nequaquam intelligo, cur me tandem pudeat in colendis hisce levioribus studiis aliquantulum operæ temporisque consumere: in quibus non pauci sane viri cum nostra, tum patrum nostrorum memoria, non mediocri cum laude sint versati. Parvarum namque rerum curam non defuisse Græcis Auctoribus, atque etiam Romanis, quis est qui nesciat? quum memoriæ proditum sit, Lucianum ac Favorinum, clarissimos plane Scriptores, id fecisse? quorum alter Muscam, & Parasiticam, Therpsiten alter, & quartanam febrem scriptis celebravit suis. Quid? nonne apud Platonem Erexymachus ille Medicus legere se aliquando solitum meminit sapientis cujusdam viri librum, in quo sal miris præconiis extolleretur? ut interea fileam & Synefium Cyrenæum, & Dionem Chrysostomum: è quibus prior *calvitii*, posterior vero *coma laudes* fertur conscripsisse: at vero nostri generis quot summi, fortissimique, homines levissimis quibusdam in studiis atque artibus pauculas horas collocare non dedignati sunt? quales (ut inquit Columella) fuere M. Ambivius, & Menas Licinius, tum etiam C. Mutius: quibus studium fuit pistoris, & coci, nec minus cellarii diligentiam suis præceptis instruere.

Et ut ad ceteriora tandem ac notiora nobis domesticæ virtutis exempla perveniam: Te nunc, Petre Bembe, Te, inquam, clarissimum atque ornatissimum virum appello; qui quum in omni & litterarum, & virtutum genere jamdudum ita profeceris, ut vel in eloquendo, vel scribendo pares quidem paucos, superiorem certe habeas neminem, mansuetiora tamen hæc studia nunquam aut improbaveris, aut omnino contempseris; quippe qui & *Ætne montis descriptionem* edideris, & in Virgilianos etiam lusus, ac Terentianas fabulas nonnulla cum jocunda, tum scitu quoque dignissima, litterarum monumentis commendaris: quæ profecto præclara ingenii tui facinora (ut præfagire mihi ipse jam videor) ita vigeant memoria seculorum omnium, atque ita posteritas alet, ut de tuis summis laudibus nulla unquam ætas tacitura sit. Quare sibi habeant illi, vel sapientiæ, vel philosophiæ nomen, obscurum quidem illud (ut scite admodum inquit Cicero) & invidiosum: mecum sane optime actum iri existimabo, si in iis tribus, quos *de Orobiolorum origine* scripturus sum libris, cum nostræ ætatis ac instituti adolescentibus, tum antiquitatis etiam observatoribus, non ingratum quid, nec prorsus inutile conficere potuero. Quanquam haud scio, (ut tuis nunc, Bembe, utar verbis) an etiam sit hoc ipsum philosophari; quid est enim magis philosophi, quam perscrutari veritatem? quacunque in re autem qua de agitur, quid sit verissimum scire, vel verissimillimum saltem, mea quidem sententia pulcherrimum semper fuit. Verum ne longiores fortasse simus, quam res ipsa postulat, instituti tandem laboris opus aggrediar.

Igitur quum in omni amicitia nihil omnino, quod quidem in terris fiat, acceptius, nihil ad bene beateque vivendum accommodatius, inveniri queat, quam jucunda illa honestaque studiorum ac vitæ communitas, atque animorum remissio, quæ maxime sermone efficitur familiari, qui est in conviviis dulcissimus, quo ita ipsi sese homines concordiam quadam benevolentia & charitate complecti solent, ut vix unquam, aut certe non admodum facile dissolvi possint: ob id solebat mihi L. Petrejus memoriter ac jocunde narrare, (cui vel propter hominis virtutes, vel etiam propter stu-

A dia communia eram amicissimus) nonnunquam una cum Marfilio ac Julio ad M. Mauricium convivendi & disserendi aliquid gratia ipsius rogatu accersituque convenire solitum: ubi quamvis multa & inter epulas, atque item post sublatis mensis, de poeticis, deque oratoriis studiis, plura & iis de rebus, quæ ad eam Philosophiæ partem spectant, quam Græci *ἠθικὴν*, nostri *moralem* vocant, invicem collata essent, ac disputata, plurima tamen aiebat, saneque recondita, à Marfilio de principe Orobiolorum ortu exposita fuisse ac commemorata: è quibus ea duntaxat, quæ eo referente didicimus, quæque & ad sciendum digniora, & ad audiendum jocundiora videbuntur, ob amorem patriæ debitum, cujus nobilitatem falsis opinionibus obscurari æquo animo nunquam ferre potui, tum etiam ut nostrorum ingeniis viam faciam, quasque exemplar aliquod de conscribendis rebus antiquis proponam, in medium afferre constitui: neque enim non intelligo nihil nos magis niti decere, quam ne quid privatis studiis de publica opera detrahamus: in quo quidem non modo nosmetipsos hebescere, & languere nolumus, sed etiam, ut aliis exemplo profimus, enitmur.

Itaque (ut ad rem redeamus) dicebat mihi idem ille Petrejus, quum aliquando apud M. Mauricium convivendi gratia unâ omnes convenissent, plurimisque inter discumbendum familiariter admodum, urbaneque, delitteris, quarum erat summum in omnibus studium, sermo fuisset habitus; tum demum secundis mensis post epulas jam remotis, sese omnes in politissimam M. Mauricii bibliothecam contulisse; ubi quum omnes pariter assidissent, tum Marcum ipsum alacriter admodum, ut ipsius ferebat usus, ita fuisse exorsum: Ulyssæm illum Homericum probe nostis, ornatissimi juvenes, quum discerpta navi enatando ad Phæacas appulisset, honorificeque ab Alcinoos, tum eorum rege, hospitio fuisset acceptus: tandem post epulas hujuscemodi verbis regem allocutum *:

Ἀλκίνοε κρείον πάντων δριδείκετε λαῶν,
Ἡπὶ μὲν τὸ δὲ καλὸν ἀνέμεν ἐστὶ αἰοῖδῃ
Τοῖς δ' οἷον ὁ δ' ἐστὶ θεοῖς ἐναλίγκιος αὐδῶ.
Οὐ γὰρ ἐγὼ γέ π' Φημὶ τέλει χαρίεσσον εἶναι,
Ἡ δ' ἄν' ἀφροσύνη μὲν ἐχῇ κατὰ δῆμον ἅπαντα,
Δαιτύμονες δ' ἀνὰ δώματ' ἀνυάλλοντες αἰοῖδῃ
Ἡ μὲν οὖν ἐξείης ποτὶ δὲ πλὴθυσιν τράπεζαι
Σίτῃς καὶ κρείων μέθυ δ' ἐν κρητῆρι ἀφύσσων
Οἶνοχόῃ φορέῃσι δ' ἐγχεῖν δεπάρουσιν.
Τὸ τοῖς ἡμῶν καλίσσον ἐνὶ φρεσὶν εἶδεται εἶναι.

Nunquid censendum est poetam illum, (ut fertur) poetarum omnium eruditissimum, in immoderatis epulis, exstructisque mensis, vel frequentibus poculis, aut musicis denique cantibus voluptatem constituisse? minime gentium: nam qui opiparis dapibus affluenter appositis, ac vino in crateras large diffuso, convivas præterea inducit inter hujusmodi voluptates Poetæ cantu suavissimo demulceri, honestum proculdubio nobis convivium narrat: cujusmodi qui sapit sibi imitandum proponat, transferens nimirum voluptatem à turpibus rebus ad decoras, atque ab escis corporeis ad spirituales. Quid enim aliud arbitramur, Ulyssæm illum, vel Homerum, hisce verbis significare voluisse, quam lauta proborum animorum alimenta in liberalibus colloctionibus consistere? minime autem in alterationibus, quales sunt in judiciis lites, contentiones, rixæ, captiones, cæteraque his similia. Quæ quum ita sint, quibusnam jucundis, honestisque, sermonum illectionibus nunc nos peracta jam cœna corporea oblectari par sit; quid vos singuli judicetis audire cupio.

Tum L. Petrejus, qui eo forte data opera, ut de principe Orobiolorum origine disputatio institueretur, advenerat: Etsi, inquit, sumus & ad scientiam, &

* Apud Homerum *Odyss.* I. v. 2.

ad actionem in lucem editi, naturaque ipsa sic nos instituit, atque formavit, ut nulla quidem è parte nobis defuisse videatur, five ad ea, quibus opus est ad agendum, five quibus & ad sciendum; attamen quum ipsa naturæ munera, quibus hominem maxime honestatum voluit, ipse mecum reputo, facile adducor ut existimem, nullum majus reperiri posse, quam studium, vel cupiditatem potius sciendi, quam ita eximiam & præstantem nobis indidit, ut omnia scire expetamus, atque ea, quo magis scitu difficiliora sunt, eo vehementiori studio, curaque, indagare conemur. Itaque, ut præclare scribit Cicero, quum sumus necessariis negotiis, curisque, vacui, tum avemus aliquid videre, audire, ac discere, cognitionemque rerum aut occultarum, aut admirabilium, ad bene beateque vivendum necessariam ducimus. Enimvero (si Maximo credimus) Alexandrum illum Macedonum regem ferunt, quum ad Ammonis templum pervenisset, salutatusque esset ab ipso Ammone filius, fidem habuisse Deo, juxta Homeri testimonium, qui Jovem deorum atque hominum patrem appellavit, dicens:

Τὴν δὲ ἡμέραν ἐπειγὼ πατρὸς ἀνδρῶν τε θεῶν τε.

Admisso igitur oraculo, non illum Darii fugam, non futuræ exitum pugnae, utrumve infortunium Græciæ impenderet, an Asiæ misceri res & conturbari deberet, sed quasi hæc omnia recte procederent, curiose potius de Nili fluminis ortu percuratum fuisse ex Deo; quoniam scilicet loco ille fluendi exordium sumens in Ægyptum decurreret? quasi hoc unum ad constituendum Alexandri imperium deesset. Verum ita natura (ut diximus) comparatum est, ut omnes ad veri cognitionem & scientiæ cupiditatem ducamur, atque inviti etiam trahamur; in qua nimirum, ut idem inquit Cicero, excellere, pulchrum quidem censeamus, labi autem, errare, nescire, & decipi, & malum, & turpe arbitremur. Quamobrem (ut desiderium meum vobis exprimam) quum omnis cogitatio, motusque animi, aut in consiliis capiundis de rebus honestis, aut in studiis scientiæ, cognitionisque, versari debeat: porro, quum & pauci de numero eorum, qui priscis temporibus in describendis gentium originibus versati sunt, de *principio Orobiorum ortu* pauca disseruerint, alii vero nihil omnino retulerint, nonnulli autem, etsi eam susceperint provinciam, tamen minus recte, quam par est, senserint: nequaquam mihi vitio dari velim, si de re tam difficili, tamque ardua, disceptationem à nobis ipsis habendam putem: quæ enim major potest esse ignavia, quam ortus sui certa omnino nescire principia? quid vero stultius excogitari potest, quam incerta pro certis habere, falsa pro veris? Quas ob res hortor vos, ac potius oro, atque obtestor, ut ad hujus quæstionis tractationem, (etsi perdifficilis est, & obscura) ingenii tamen atque animi vestri vires excitetis; ut & certa gentis nostræ origo aperiatur, & ab istis Galliæ partibus excellentis ejus nobilitatis in toto orbe terrarum lumen eluceat.

Tum Julius, Quum in iis, inquit, quibus eadem studia, eademque insunt voluntates, (quales sumus nos) fieri soleat, ut æque quisque alterius delectetur ac sui ipsius desiderio, efficiaturque (quod Pythagoras vult in amicitia) ut una omnium sit voluntas; profecto petitioni tuæ contradicere, nemini fas esse judicarem, nisi Scriptores illi, qui de *Orobiorum ortu* nonnulla litteris mandarunt, tanta essent, & in varietate, & dissensione constituti, ut nulla adhuc (quod sciam) de *vera Orobiorum origine* certa manarit, aut omnino probata sententia. Sunt enim nonnulli, (quod te tamen minime latere arbitror) qui Orobis ortum à Græcis Tyrrheno Duce, alii à Trojanis adjunctis Henetis sub Antenore exstitisse velint: plurimi vero contra, Gallis

A Senonibus ductore Brenno (quamvis quidam indocti Bellovesum malint) eam Orobiorum originem tribuant: quarum opinionum quæ vera sit, Deus ipse viderit: quæ autem verisimillima, magna quæstio est. Nunquid igitur inter has tam inter se discrepantes sententias, nos ipsi, L. Petrei, dijudicabimus? quum præsertim suos quæque habeant Auctores, & quidem locupletissimos, & quibus (ut inter homines eruditos constare video) maxima etiam fides in historicis monumentis haberi solet: porro nec defint ex recentioribus complures sane viri nec ineloquentes, nec ineruditi, à quibus varia maximique roboris argumenta pro hisce opinionibus intenduntur: quæ quidem non ejus generis sunt, ut dissolvi facile queant.

B Imo vero, inquit Marsilius, facillime solvi possunt: quin dicam audacius quod sentio, tam vera temporum supputatione, quam probatissimorum Scriptorum auctoritate ita queunt refelli, ut illorum error facile fiat omnibus manifestus.

C Tum Marcus, Hoc ipsum, inquit, quod mihi semper cum ad differendum sane difficile, tum ad cognoscendum non ingratum prorsus, nec inutile vitium sit, hodierno in confesso ac sermone (si modo liceat) ex vobis intelligere magnopere optarim, studiosissimi juvenes. Nam quum propter varias discrepantesque doctissimorum hominum ea de re sententias, id mihi vix optandum videretur, facile memoria atque animo jampridem exciderat. Nunc autem quoniam insperante sane me, sed valde equidem optante, in hanc de *Orobiorum ortu* controversiam pervenistis, gratissimam mihi profecto rem feceritis, adolescentes, tuque inprimis, optime Marsili, si ea mihi, quæ hisce de rebus summo vos studio, curaque, pervestigasse non me latet, exposueritis.

D Tum Marsilius, Pervulgatas res, inquit, requiris, Marce, tibi que non incognitas. Quis enim nostrorum hominum de his plurima non invenit? non etiam docuit? non denique scriptum reliquit? attamen ne si forte defugerimus, causam tibi aliquam demus recusandi; nequaquam gravabimur more nostro (etsi nos intelligo & sylvarum ligna, & mari undas addere) hac de re ea duntaxat, quæ cognita nobis sunt, quam diligentissime ac brevissime fieri poterit, explicare. Nam quemadmodum vulgo dici consuevit, κόρη εἰδὲς τὴν καλῶν. Verum enimvero quoniam probabiliora omnino videri solent, quæ laceffiti dicimus, quam quæ priores, idcirco disceptationem hanc inter nos ita instituentem censeo, ut unusquisque vestrum, fratres optimi, ex iis Veterum opinionibus, quæ antea commemoratæ sunt, eam nimirum, quæ maxime placuerit, (sunt enim libera omnium judicia) defendendamumat: jam vero ista conditione, dum mihi non solum libere ab Antiquorum sententia disciscendi, verum etiam eos (si res ita postulaverit) non argumentis modo, sed certis etiam testibus refutandi tribuatur facultas: ego enim, & refellere sine pertinacia, & refelli sine iracundia paratus sum. Hæc namque (ut scitis, & Cicero scriptum reliquit) vetus est, & Socratica illa ratio, contra alterius opinionem discerendi; qua facillime, quod verisimillimum esset, inveniri posse Socrates ille, Philosophorum facile princeps, arbitrabatur: licet igitur vestro arbitratu percunctemini.

E Tum Marcus, Ingenue vero, inquit, atque ex sententia exhibes te jam nobis, Marsili. Quapropter tuæ primum, Petrei, partes sunt, quam præcipue Antiquorum opinionem probes, edicere.

F Et ille, Quoniam, inquit, auctoritatem tuam negligere, Marce Mauriti, fas mihi esse non puto; quibus sane verbis potero, primam earum opinionum, quas modo Julius recensuit, tueri conabor: hanc enim cæteris probabiliorē esse non est cur ambigam: quum & ratio ipsa, & probatissi-

morum Scriptorum auctoritas id ita esse facile convincant. Principio namque quum maximam argumenti vim in rebus antiquis nominum interpretatio asserere soleat; quumque Oroborum nomen (ut quisque, qui Græcas litteras vel primoribus, ut ajunt, labiis gustaverit, vel extremis digitis attigerit, judicare facile queat) Græcam sequatur, ut Græce dicam, ἐτυμολογίαν, quam Cicero *veriloquium* Latine dici posse censuit, omnino necessitas præscribit, ut vel inviti Oroborum originem Græcam esse fateamur. At vero si Græca, igitur à Tyrreno orti sunt Orobi; id enim recte sequi perspicuum est; quum is primus è Græcorum Ducibus in Italiam colonias duxerit, quemadmodum ab eruditissimis rerum gestarum Scriptoribus memoriae proditum est. Quamobrem C. Plinius haud immerito (mea quidem sententia) Catoni illi, quicumque is fuerit, ignorantiae crimen impegit, quod Oroborum ortum nescire se scriptum reliquerit: quum à Græcis (ut aperte demonstratum est) dubio procul effluerit: testimonio quoque Cornelii Alexandri, viri sane, quantum conjectura consequi possum, eruditissimi, cujus sententiam idem Plinius lib. III. cap. XVII. his verbis refert: *Orobiorum*, inquit, *stirpis esse Comum, atque Bergomum, & Lici- niforum, & aliquot circa populos auctor est Cato. Sed originem gentis ignorare se fatetur: quam docet Cornelius Alexander ortam à Græcia, interpretatione etiam nominis, vitam in montibus degentibus. In hoc situ interit Orobiorum oppidum Bara, unde Bergomates Cato dixit ortos, etiamnum prodentes se alius, quam fortunatus sitos.* Hæc ille. Cæterum hoc quidem loco, Marsili, multiplices possem ac varias ad ea, quæ diximus, probanda, confirmandaque, non veterum modo, sed recentium quoque Scriptorum rationes asserere; ni his jam ferme nihil opus esset, quum ea, quam proposuimus, ratio tam valida sit, ac stabilis, ut quicumque illam vel parum refutaverit, cæteras omnes labefactasse videatur. Quare exspecto quid ad hæc respondeas, Marsili.

Tum ille, Tametsi pervulgata hæc, inquit, sunt, Petrei, ac perinfrima potius argumenta, attamen ne à cæpto perquirendæ veritatis studio desistamus, quæ in contrariam partem plurimum mihi facere videntur opponam: tuoque primum argumento ita resistam, ut id, quod tu concludere conatus es, nec esse consequens, nec ex propositis sequi facile omnes exploratum habeant. Oroborum namque originem Græcam esse ob id præsertim asseris, quod eorum quoque nomen Græcum sit, vel, ut rectius loquar, esse possit: verum id ex eo nequaquam effici, aut deduci posse, quis non satis videt? quis non intelligit? quum siquidem plura inveniantur gentium nomina, Græcam etymologiam sive notationem adsciscere, quarum tamen populos barbaros semper fuisse Strabo, Plinius, alique nonnulli probatissimi Auctores tradidere. Quis enim est qui nesciat, Himantopodum, Phœnicum, Æthiopum, Hamaxobiorum, Troglodytarum, Anthropophagorum, Ichthyophagorumque nomina Græca esse, quum tamen hi omnes populi natura barbari semper extiterint, longeque ab ipsa Græcia remotissimi? nam *Ichthyophagorum* quidem genti nomen piscium in victu usum dedisse, *Struthiophagis* vero è struthiis cibum, *Anthropophagis* autem, quod carnibus vescantur humanis, neminem ferme arbitror esse qui non exploratum habeat: at vero quis ignorat, *Troglodytas* ab eo quod cavernas subeant, *Hamaxobios* autem quod in plaustris vitam agant, fuisse nuncupatos? ut omittam interim & *Æthiops* à nigris oculis, & à rubro colore Phœnicas, nec non & à flexis crurum nisibus *Himantopodas*, quasi loripedes appellatos: has ob res nos quoque pro Orobiis nostris responsum hoc volumus, quod quamvis eorum nomen ad Græcum etymon trahi possit, non continuo tamen eorum

A originem Græcam fuisse, sed potius barbaram, id est, Hebræam, ut postea probabimus. Non est igitur tam explorata ista ratio, ad id quod volunt isti confirmandum, quam videtur: unde quum Cornelius Alexander asserit Orobios à Græcis ortus sui principium omnino nactos fuisse, negandum est: quumque id ille à Græca nominis interpretatione, quod est validissimum in historia argumentum, probat; protinus dicerem non esse causam, quin verius dicamus eam Oroborum originem barbaram esse, quam Græcam. Quid enim est hoc illo evidentius? nempe quum ipsum Oroborum nomen incertæ, ambiguaeque sit originis, ut scite admodum Cato docuit, quippe quod tam B Hebræam quam Græcam etymologiam sequatur: porro quum lingua barbaræ antiquior sit, quam Græca, ut auctor est Plato in *Cratilo*, dicens: Nunquid potissimum nobis hic sermo? an ille? quod ipsa à Barbaris quibusdam accepimus? (nobis quippe antiquiores sunt Barbari) vel ob vetustatem ita ea discerni nequeunt ut & barbaræ: tum vero maxime Hebræa, utpote primo humani generis ortu mortalibus tradita, quemadmodum D. Augustinus aliique plurimi Sacrarum Litterarum enarratores eruditissimi tradunt: haud sane intelligo, cur non confiteri omnino necesse sit, Oroborum nomen prius Hebræum quam Græcum, itemque eorum originem prius barbaram, id est, Hebræam fuisse, quam Græcam. Id enim recte sequitur, quod ubi nomen prius fuerit barbarum, ibi origo etiam prior extiterit barbaræ; quamvis id nomen postmodum effluerit in Græcam Latinamve linguam.

Non dubito, inquit Petrejus, quin barbaræ lingua, præsertim vero Hebræa, vetustior sit quam Græca; nec id nunc agitur; verum an Oroborum nomen Hebræum esse possit à te probari velim.

Et ille, Concedis igitur, inquit, frater optime, Hebræam linguam antiquiorem esse Græcæ?

Prorsus, inquit Petrejus, concedo, Marsili. Tu autem Oroborum nomen Hebræum esse nunquid probare potes?

Quid ni possim, respondit Marsilius? Nam, ut D scis, ab ineunte protinus adolescentia Hebræam linguam ac litteras didici; atque quum hoc probatum fuerit, profligata jam hæc peneque ad exitum adducta erit quæstio. Quamobrem scias velim, quod quemadmodum apud Græcos ὄρος est *mons*, & βίος, *vita*, è quæis ὀρέσιοι Græce sint *vitam in montibus degentes*, ut ait Plinius: ita quoque apud Hebræos, quemadmodum ii, qui Hebræas dictiones interpretantur, apertissime tradunt; הָרֹת *HOROTH* sunt *montes*, בָּנִים *BANIM* vero *fili*, quibus, seclusa tantum è priori verbo postrema *TH* littera, simul junctis, effectum est nomen compositum הָרֹבֵנִים *HOROBANIM*, quod *montium filios*, sive, ut ita loquar, *montigenas*, Latine significat: qui postmodum à Græcis, ut antea diximus, ὀρέσιοι, id est, *monticola*, sunt appellati: quapropter quum Oroborum nomen, ut demonstratum est, Hebræam primum notationem sequatur, quam Græcam, quis non intelligit, eorum etiam originem prius Hebræam fuisse quam Græcam? At vero, si non à Græcis orti primum fuere Orobi, igitur neque à Tyrreno primum Mæone, aut Antenore Phrygio: neque rursus ab Asiaticis Henetis, Paphlagonibusve: quia Hebræi non sunt, sed ab ipsa potius Judæa longe remotissimi. Cæterum his ita consideratis probatisque non possum non vehementer admirari C. Plinium, hominem omnium sententia doctissimum, M. Catonis verba tam parum fideliter retulisse: neque enim Cato unquam (qui ego sciam) nescisse se Oroborum originem confessus est, quod ei tam parum ingenue à Plinio objectum est; sed incertam esse, & ambiguum asseruit: quod vel ex ipsius verbis facile quisque judicare potest: sic enim in quibusdam eorum,

quæ Catonis feruntur; *Originum fragmentis*, scriptum invenio: *Olanum*, inquit, ante à *Thuscorum Duce*, qui cum *Orobiis* colonis ibi primus insedit: quorum origo incerta, uti *Comi*, *Bergomi*, *Licinifori*, & aliquot circa populorum: inde ab *Insubrum* Principe nomine *Medo* adaucta *Mediolanum* nomen servat. Hæc Cato: è queis perspicui facile potest diligentiore adhibita observatione, illud à *Plinio*, *Catonem Orobiorum* ortum ignorasse, non recte affirmari, quum aliud quidem sit, longeque diversum, nescire verbi alicujus gentisve originem, aliud vero incertam & ambiguam asserere. Qui enim ignorat, nullam omnino novit originem: qui autem ambiguam & incertam esse dicit, aut duas, aut plureis esse posse exploratum habet: verum ambigit, quænam potissimum ex his eligenda sit. Quapropter, meo quidem judicio, potius esset affirmandum, *M. Catonem* ob id nequaquam dixisse *Orobiorum* originem incertam esse, quod eam ipse penitus nesciret; sed quod idipsum *Orobiorum* nomen incertam omnino & ambiguam etymologiæ rationem posset adsciscere: quippe quod tam è barbara, id est, *Hebræa*, quam *Græca*, ut *Quintiliani* utar verbo, originatione non incommode, nec admodum difficile deduci posse perspiceret. Nam quis obsecro adeo vecordi est animo, ut *Catonem* illum talem, tantumque virum, quid *Græci*, quidve *Latini*, apud *Græcos* significant ignorasse censet? nemo profecto, nisi insanus quis, sine humanitate, sine ingenio, sine litteris: quum & ipsius *Catonis* scripta, & *Ciceronis* auctoritas *Græcis* litteris, doctrinisque, eum apprime eruditum fuisse clarissime ostendant. *Ius*, inquit Cato apud *Ciceronem* de *Senectute*, *augurum*, *pontificum*, tracto: multum etiam *Græcis* litteris utor. Quamobrem hac in re *Plinio*, viro alioquin eruditissimo, minime assentiendum esse, ipsius quoque testimonio facile existimarim. *Neminem enim*, ait in initio secundi *Naturalis Historiæ* libri, unum sequor, sed quemcumque veriorem perspexero: stultum est enim propterea quod quis quadam vera scribit, etiam in erratis eum sequi: legamus ergo *rosas*, *spinas* vitemus.

Tum *Petrejus*, Recte, inquit, *Marfili*, isthæc abs te dicerentur, atque aliter sentire propemodum furor esset: si libellum illum de *Originibus urbium Italia*, qui sub *Catonis* nomine passim circumfertur, ipsius *Catonis* genuinum esse demonstrare posses: quum & multorum auctoritate constet, *M. Catonem* plura, quam nunc habeantur, *Originum* volumina conscripsisse. Nam apud *M. Tullium* de *Senectute*, idem ipse Cato, *Septimus*, inquit, mihi *Originum liber* est in manibus: omnia antiquitatis monumenta colligo: tum etiam quod non pauca earum *Originum* verba & à *Terentio Varrone*, in libris de *Re Rustica*, & à *Cicerone* in *Oratione pro Cn. Plancio*, nec non & in quarto *Tusculanarum Questionum* volumine, aliisque pluribus in locis citari soleant: quæ nihilominus in pervulgato isto *Catone* nusquam gentium reperiri possunt. Quo negotio intelligi par est, aut falsum, aut commentitium, aut certe vanum esse *Catoni* libellum illum unicum, imperfectum, atque omnibus modis obtruncatum, minimeque sibi constantem, adscribere.

Tum *Marfilius*, Vera, inquit, & apertissima sunt, quæ commemorasti, *Petrei*, dicique aliter nequaquam potest: itaque assentior tibi, *Catonem* illum plures de *Originibus* libros edidisse, multaque eorum verba ab *Antiquis* recenser, quæ tamen in eo opusculo, quod præ manibus habetur, minime inveniantur scripta. Verum hæc, frater optime, nihil ad nos: fallaci enim admodum ratiocinatione deciperis. Non enim liber ille *Originum* integer est, ut opinaris, & subsisivus, sed sunt potius, ut necessitas cogit ac ratio, fragmenta quædam, ita ut cernimus, in unum quoddam corpus redacta, quæ ex illis non paucis *Originum*

A libris, quos scripsit Cato, vel sola remanserunt: quemadmodum omnibus, illa nescio quæ *Gulielmi Mantuani Collectanea* legentibus, perspicuum esse potest. Quapropter mirari te haud sane decet, si plura & à *Varrone*, & à *Cicerone*, & à *Macrobio* verba citari consueverint, quæ tamen in hisce pervulgatis *Originum* fragmentis nequaquam scripta reperiantur: quando, uti dictum est, libellus ille *Originum* truncus admodum est ac mutilus, ex quo præter quædam de *Italicarum* urbium origine fragmenta, nihil penitus superest: atramen quod hæc, quantulacunque sunt, ipsius *Catonis* nativa ac genuina censenda sint, antiquorum virorum probat auctoritas: ac primum quidem *Dionysii Halicarnassæi*, quem *M. Varronis* libertum fuisse constat: is enim libro primo *M. Catonem* & *C. Sempronium* temere nimium, ne dicam insolenter, arguens, eorum de *Ligurum* origine sententiam ita recensuit: *Ligures*, inquit, multa *Italia* loca incolunt, atque etiam *Gallia* quædam possident: utra vero sit eis terra patria incertum est: nihil enim ulterius de his certi dicitur: doctissimi autem *Romanorum* scriptorum, in quibus est *Porcius Cato*, qui urbium *Italia* origines diligentissime collegit, & *C. Sempronius*, & alii plerique, *Græcos* eos fuisse dicunt, ex iis qui *Achajam* aliquando incoluerunt, multisque commigrarunt etatibus ante *Trojanum* bellum. Non ulterius tamen diffiniunt; neque *Græci* generis cujus fuerint, neque urbem ex qua profecti, neque tempus, neque migrationis ducem, quæve nisi fortuna sedes patrias reliquerint: verum *Græca* nisi fabula, ne unum quidem eorum, qui *Græca* scripserunt, auctorem certum adhibuerunt: veritas igitur in occulto. Hæc hic. *Cajus* quoque *Plinius* libro III. sæpenumero *Catonem* citare solet: præsertim vero capite XVIII. *Venetos*, inquit, *Trojana* stirpe ortos, auctor est Cato. Itemque capite XIII. ait, *Catonem* scribere *Ameriam* urbem ante *Perseum* bellum annis ferme nongentis fuisse conditam. Quæ quidem omnia in iisce *Catonis*, quæ passim feruntur, fragmentis scripta reperies: quibus illa quoque, quam antea commemoravimus, ejusdem *Plinii* de *Orobiorum* ortu sententia non incommode (ut opinor) addi potest. Nam etsi parum fideliter eam retulerit, ab iis tamen, de quibus nunc loquimur, pervulgatis *Originum* fragmentis depromptam fuisse manifestum est. Quas ob res si quid es factururus, *Petrei*, nova aliqua conquiras necesse est: isthæc siquidem *Cornelii Alexandri*, ac sectatorum ejus, quantum valeat vel ratio, vel auctoritas, satis jam perspicue (ni mea me fallit opinio) demonstravimus.

Tum *L. Petrejus*, Solet, inquit, *Marfili*, & subtilius, & fusius his singulis à nonnullis responderi: sed ea, quæ perspicua sunt, ut ait *Cicero*, longa esse non debent. Quid enim iis, quæ à te tam multa dilucide, copioseque, dicta sunt, apertius? quid enodatius? quid denique verius dici potest? itaque quoniam & ea, quæ dixisti, omnem (ut dici solitum est) fidem sensibus, id est, incorruptis, atque integris testibus, adsciscunt, & eadem mihi valde probata sunt, quod & istis puto; omittam profecto contra omnino amplius aliquid velle dicere. Verum nunc *Julium*, si ipsi commodum est, audiamus: studet enim noster hic audire *Mauritius*, quænam sit tua, *C. Juli*, (suo enim quisque studio maxime ducitur) de *Orobiorum* origine sententia. Quamobrem aggredere, quæsumus; est enim is tibi proprius disserendi locus.

Tum ille ridens, Nunquid oblitus estis, inquit, quod vobis initio dixerim? me propter varias, discrepantesque, doctissimorum hominum opiniones, quid de *Orobiorum* ortu sentirem explicare vix posse: quis enim ea probare queat, quæ percepta, quæ comprehensa, quæ cognita non habeat? attamen, quoniam ita vultis, geram vobis morem; totamque eorum, (non ignorantibus tamen vobis quid sim dicturus) qui *Gallis* *Senonibus* *Duce* *Brenno*

no Oroborum originem tribuunt, sententiam, quoniam ociosi sumus, explicabo: & agam quidem quam brevissime potero: etenim devictis Cornelii Alexandri, Pliniique, erroribus, longa de meo sermone detracta oratio est. Brennum namque illum Gallorum Ducem plerasque Orobiorum civitates condidisse, non equidem ratio ulla, aut disputatio, ut credam, impellit; sed nobilitas summorum, tum antiquorum, tum recentium Scriptorum, & auctoritas. Præsto enim mihi sunt præ cæteris tres magnæ apud Latinos existimationis viri hujusce opinionis quidam quasi duces ac principes: Trogius scilicet Pompejus, sive is potius Justinus sit, Paulusque Diaconus, ac Joannes Saresberienensis; qui omnes uno quasi ore tradunt, Brennum in Transpadana Gallia urbes plurimas condidisse: verum si placet, nec alienum putatis, singulorum verba proferam.

Perplacet vero, inquit Marfilius, nec alienum suscepto operi videri potest.

Tum ille, Quæso igitur, inquit, attendite: principioque Trogi Pompejum de Gallis, qui ductore Brenno in Italiam venerant, lib. XXI. cap. V. ita dicentem auditote: *His autem, inquit, Gallis causa in Italiam veniendi, sedesque novas quærendi, intestina discordia, & assidua domi dissensiones fuere: quarum tadio, quum in Italiam venissent, sedibus Tuscos expulerunt, & Mediolanum, Comum, Brixiam, Veronam, Bergomum, Tridentum, Vincentiamque, condiderunt.* Hæc ille. Paulus vero Diaconus, libro Longobardica Historia secundo, hunc ferme in modum scribit: *Antiquissimo, inquit, tempore Brennus rex Gallorum, qui apud Senonas urbem regnavit, cum trecentis millibus Gallorum Senonum ad Italiam venit, eamque usque ad Senogalliam, quæ à Gallis senioribus vocitata est, occupavit: causa autem, cur Galli in Italiam venerint, hæc fuisse describitur: dum enim vinum degustassent ab Italia delatum, aviditate vini illecti ad Italiam transferunt: horum centum millia non longe à Delphis insula properantes Græcorum gladiis extincta sunt: alia vero centum millia in Galatiam ingressa, primum Gallograci, postea vero Galata appellati sunt: & ii sunt, quibus Doctor gentium scripsit Epistolam Paulus. Centum millia Gallorum, qui in Italia remanserant, Ticinum, Mediolanum, Bergomum, Brixiamque construentes, Cisalpina Gallia regioni nomen dedere: isti sunt Galli Senones, qui olim urbem Romuleam invaserunt.* Hæc autem & plura alia Joannem Saresberiensem sexto Polycratici volumine differentem accipite: *Tradunt, inquit, historia, Brennum Ducem Senonum, qui exercitum Romanorum apud flumen Alliam confecit, ipsamque urbem Romam irruit, cepit, & caesis patribus, & subacta Italia invasit Græciam, vastans omnia, universisque terribilis, usque ad Delphici Apollinis templum, quod situm est in monte Parnasso, processit, ipsiusque Apollinis appetens spolia, scurriliter jocatus ait, locupletes deos largiri hominibus oportere: hunc, inquam, tradunt de majori Britannia, quæ ab adventu Saxonum in insulam vocatur Anglia, oriundum.* Apud Trogi Pompejum in XX. reperitur, quia Senones Galli commilitones Brenni quum in Italiam venissent, Tuscos à suis sedibus expulerunt: in ea condiderunt urbes egregias, Mediolanum, Comum, Brixiam, Veronam, Bergomum, Tridentum, atque Vincentiam: mansit autem exercitus ille Brenno Duce triumphator, & semper invictus, donec insurgere ausus est in Deos, ipsum Apollinis Delphicum invadens templum, ubi quum incolæ, Dei opem suppliciter implorarent, juvenem supra humane conspexerunt, auditus est etiam in delubri culmine armorum, subito etiam terræ motu pars montis abrupta Gallorum stravit exercitum: insequentia deinde tempestas est, quæ grandine & frigore saucios absumpsit. Dux ipse Brennus, quum dolorem vulnerum ferre non posset, pugione vitam finivit. Hæc hic. Quod igitur fundamentum hujus quæstionis est, id præclare jactum videtis: quod

A quoniam fere constat inter omnes non Veteres solum, quos recensui, sed etiam Recentiores haud paucos, quos data opera prætermitto, fateamur necesse est, Orobios à Gallis Senonibus Duce Brenno ortos fuisse: exclusa namque Cornelii Alexandri ac C. Plinii sententia, quum præterea nulla sit alia, isthæc Trogi Pompeji, & cæterorum Latinorum opinio maneat necessum est.

Tum Marfilius, Enumerasti, inquit, optime Juli, memoriter quidem ac distincte quorundam de Orobiorum ortu sententias: adversus quas, tamen multa nunc cum vere, tum vehementer dici ac copiose etiam afferri possint, tamen dicere prætermittam: absurdum est enim, de tam perspicuo istorum errore, pluribus, quam opus est, verbis velle contendere. Sed ego nunc omisissis iis omnibus, quæ negari facile queant, (ne contentiosè rem agere videamur) quæ & certissima & clarissima mihi videbuntur, opponam. Principio igitur rationem eam, quam adfers, Juli, non satis firmam puto: quod enim plurimis cum antiquorum, tum recentium Scriptorum hominibus ita videatur, ut tu dixisti, id satis magnum esse argumentum ratus es, cur Brennum Orobiorum civitatum conditorem fuisse fateamur. Quod quam leve sit, tum etiam falsum videamus. Ac primum quidem quum Scriptores illi temporum, quos Græce Chronographos appellare consuevimus, quosque tuæ opinionis quasi duces adduxisti, hallucinati Græcorum fabulis ac mendaciis inveniantur: quis non intelligit, illorum testimonium nullius ferme vel ponderis, vel fidei esse, vel auctoritatis?

Atqui, inquit Julius, si istud obtinueris, traducas me ad te totum licebit.

Tum Marfilius, Facillimum id quidem est, inquit: nam quum Italiæ origo splendidissima existerit cum tempore, tum origine gentis, (coepit enim aureo seculo, ut inquit Cato, quem Cicero religiosissimum testem vocat) sub principibus Diis Jano, Chameſe, Saturno, gente Phœnicea & Saga, quæ post inundationem terrarum per orbem prima colonias misit: porro quum Trogi Pompejus, quem quasi ducem posteriores Historici sequuntur, libro XX. universam Italiam à Græcis ortus sui initium sumpsisse fidenter scribat, quis eum Græcorum fabulis ac commentis, qui à se principio emanasse Italiam existimant, non nisi deceptum, adeoque hallucinatum censeat, ut publicam probatissimorum Scriptorum fidem aut ignorasse, aut contempsisse, aut saltem Fabium Piclorem, M. Catonem, Cajumque Sempronium, viros plane eruditissimos, nequaquam legisse videatur? Cur autem ad ea Græcorum mendacia, quæ Antiquorum judicio, & eorum maxime, quos modo nominavimus, nota occurrunt & illustra, in sole caligarit, non satis equidem intelligi potest: nisi eum fortasse, quæ de Græcorum mendaciis M. Cato ac C. Sempronius scripta reliquerunt, non accepisse sentiamus. Siquidem Cato in Originum suarum principio: *Graci, inquit, tam impudenti jactantia effunduntur, ut quoniam his dudum nemo respondit, ideo libere à se ortam Italiam, & eandem spuriam, & spurcam, atque novitiam nullo certo Auctore, aut ratione, sed per solam insaniam fabulentur.* Itemque C. Sempronius: *Hæ, inquit, sunt vera tam prisca Italia, quam urbis Rome antiquitates & origines: quibus quoniam plures Graci postremis temporibus in Italiam commigrantes mixti fuerunt, ob id à se principio emanasse Italiam falso existimavit Græca cum levitas, tum fabulositas. Quis enim ex antiquissimis non scribit à Jano Janiculum, & Hetruscos veteres Gallos conditos? & tamen plures Græcorum tradunt à Tyrrheno Lydo, qui fuit nuper & heri, positos. Quin & Turrhenam Tuscorum regiam non puduit eos Romam asserere: tanta videlicet impudentia cum eorum jactantia est, ut omnium gentium, & imperiorum, atque urbium præclarissimarum se conditores esse apertis sæpe mendaciis con-*

scri-

scribant. Hæc ille. Verum hæc ratio minime congruerit, quandoquidem hi à Latinis non modo Scriptoribus, sed à Græcis etiam sæpenumero citari consueverint. Quid igitur? Ego mehercle, tametsi vereor in hoc loco, quid hac de re sentiam, exprimere, dicam tamen; ne qua forte refellendi pars in tam accurato sermone præterita esse videatur. Nemo fere vestrum est, quin clarissimum illud M. Catonis vaticinium sæpe audierit, nonnunquam etiam in Antiquorum monumentis legerit, quod olim in Græcos ab eo tanquam ex oraculo editum fuisse C. Plinius libro xxix. cap. i. testatur, dicens: *Quod clarissime intelligi potest ex M. Catone: cujus auctoritati triumphus atque censura minimum conferunt, tanto plus in ipso est. Quamobrem ipsius verba ponamus. Dicam, inquit, de istis Græcis suo loco, Marce fili, quid Athenis exquisitum habeam: & quod bonum sit illorum litteras adspicere, non perdiscere: vincam nequissimum & indocile genus illorum; & hoc puta vatem dixisse: Quandocunque ista gens suas litteras dabit, omnia corrumpet; tunc etiam magis, si Medicos suos huc mitteret: jurarunt inter se barbaros omnes necare medicinâ: sed hoc ipsum mercede faciunt, ut fides his sit, & facile disperdant. Nos quoque dictitant barbaros, & spurcius nos, quam alios opicos, appellatione sedant. Atque hic Cato sexcentesimo quinto anno urbis nostra obiit, LXXXV. suo, ne quis illi defuisse publice aut privatim vite spatia ad expendendum arbitretur. Hæc Plinius. Quare non alia de causa inficias irem, Trogum Pompejum Græcorum fabulas ac figmenta fuisse persequutum; nisi ne qua in parte divinum illud, quod diximus, M. Catonis oraculum evanesceret. Quocirca tua illa ratio, Juli, ex Trogi Pompeji auctoritate deducta, nihil tibi proderit: quippe quod Trogum ipsum, qui tue rationis quasi fons & fundamentum est, Græcorum commentis captum fuisse, atque hallucinatum, aperte probatum sit: sed hæc hæc.*

Nunc vero sit, necne, eidem Trogo, recentioribusque iisce Chronographis, quos nominasti, in historicis monumentis omnino fides adhibenda, expendendum est: ad quod præstandum, ex antiquissimo Persarum historico Metasthenes optimum capi potest exordium: is enim in initio statim de indicis annalium Medorum, atque Persarum, qui Auctores (ut Græce loquar) in chronographia recipi debeant, scite admodum his verbis docet: *Qui de temporibus dicere parant, necesse est illos, non solo auditu & opinione chronographiam scribere: ne quum per opiniones scribunt, uti Græci, cum ipsis pariter & se & alios decipiant, & per omnem vitam aberrant. Verum absque errore fiet, si solos annales duarum monarchiarum secuti, ceteros omnes ut fabulatores rejecerimus: in his enim tam liquido atque vere digesta sunt tempora, Reges, & nomina, quam apud eos splendidissime regnatum est: neque tamen omnes recipiendi sunt, qui de his regibus scribunt; sed solum sacerdotes illius regni, penes quos est publica & probata fides annalium suorum. Qualis est Berofus: nam is Chaldaeus omne tempus Assyriorum digessit ex Antiquorum annalibus, quem solum, vel maxime unum, Persa nunc sequimur. Ex hac igitur perspicua Metasthenis præceptione, qui Auctores in describendis temporibus accipiendi, rejiciendive sint, facile intelligi, judicarique potest. Sufficiendos namque eos omnes absque controversia censeat, qui publica probataque fide scripserunt: quales sunt cujusque imperii sacerdotes, penes quos antiquitus publica annalium fides habebatur. Eos siquidem publicos rerum gestarum ac temporum scriptores fuisse, præter Metasthenem, Cicero quoque noster libro de Oratore secundo confirmat his verbis: *Erat, inquit, Historia nihil aliud, nisi annalium confectio; cujus rei, memoriaque publica retinenda causa, ab initio rerum Romanarum usque ad P. Mutium Pontificem maximum res omnes singulorum annorum mandabat litteris Pontifex maximus, efferebat-**

*que in album, & proponebat tabulam domi, potestas ut esset populo cognoscendi, ii, qui etiam nunc annales maximi nominantur. Hanc similitudinem scribendi multis secuti sunt: qui sine ullis ornamentis monumenta solum temporum, hominum, locorum, gestarumque rerum reliquerunt. Itaque qualis apud Græcos Pherecydes, Hellanicus, Acusilas fuit, alique permulti, talis noster Cato, & Pictor, & Piso, qui neque tenent quibus rebus ornatur oratio, (modo enim huc ista sunt importata) & dum intelligatur, quid dicunt, unam dicendi laudem putant esse breviter. Hæc ille. Cæterum hujuscemodi publicæ probatæque fidei Scriptores ii sunt, qui quatuor maxime illustrium regnorum res gestas ac temporalia litterarum monumentis commendarunt. In his autem facile mea quidem sententia cæteris antecellunt, inprimis quidem inter externos Berofus, patria quidem Babylonicus, dignitate vero Chaldaeus: Chaldaei siquidem, Diodoro teste, eum locum in Babyloniæ republica obtinent, quem sacerdotes & Prophetæ apud Ægyptios: dehinc Metasthenes Persa, Manethon sacerdos Ægyptius, nec non & Philo Judæus: è Græcis autem Myrsilus Lesbios, Archilochus ac Xenophon: porro è nostris, Fabius Pictor, M. Cato, C. Cæsar, Crispus Salustius, C. Semonius, T. Livius, & si qui sunt alii, qui à Beroso ac publica quatuor monarchiarum annalium fide non desciscant. At Græcum istud quidem Monarchia verbum est: sed dabitis profecto, ut id quoque mutuemur, dicaturque tam Latine Monarchia, quam sæpe apud Ciceronem *Tetrarchia* dicitur: verum mehercule enitar, ut Latine loquar, nisi in hujuscemodi verbis, quibus, ut & aliis multis, consuetudo jam utitur pro Latinis. Cæterum nihil vos perturbet, viri ornatissimi, Metasthenem Persam duarum solum monarchiarum, Assyriæ scilicet ac Persicæ, annales comprobasse: nam hujusce rei causa illa mihi magis probanda videri solet, quod Metasthenis tempestate nondum duarum aliarum monarchiarum acta (faciamus enim tractando hoc verbum usitatus & tritius) descripta essent: Græcæ nimirum ab Alexandro Macedonum rege usque ad Philippum, novissimum Syriæ atque Asiæ regem; nec non & Romanæ, à Romulo usque ad Cæsarum tempora: quippe qui vel ante Alexandri Macedoniæ regis imperium, vel ejusdem potius temporibus floruerit, quemadmodum ex ipsiusmet verbis facile cognosci potest, ait enim: *Nostra ætate Arses annis quatuor regnavit, Darius ultimus, sex. Magnus Alexander, qui imperium in Græcos transtulit, annis duodecim. Seleucus Nicanor, qui nunc agit annum tricesimum, successit toti Asiæ, ac Syriæ. Ex quibus sane verbis licet intelligere, in initio Græcæ monarchiæ ab Alexandro primum cœptæ Metasthenem ipsum floruisse. Quocirca credamus necesse est, de Græcæ monarchiæ annalibus, quid ipse sentiret, eum litteris mandare nequaquam voluisse. De Romanorum vero annalibus filuisse Persam hominem minime mirum est: aut quod Latinæ linguæ rudis esset, aut quod ejus ætate Romanorum annales nondum publicum accepissent. Nos vero harum etiam duarum monarchiarum, Græcæ scilicet ac Romanæ, annales & historias, nequaquam proprio freti iudicio, adjecimus, sed antiqui pariter ac diligentissimi Hebræorum historici Philonis auctoritate apponendos curavimus: is enim scribit in historiis suis tempora quadrasse ad veros annales quatuor monarchiarum, qui soli emendatissimi habentur: quos soli, vel maxime primi retulerunt ex Chaldaeis Berofus pro monarchia Assyriorum, & Metasthenes Persa historicus, in annalium indicis: pari forma ait ex Græcis eos se sequutum, qui annales Græcorum sequuti sunt. LXXII. seniores Interpretes usque ad Ptolomæum & Hasmonaim, id est, Machabæos; & inde Romanos, qui tempora sua diligentissime conservaverunt. Quapropter, ut aliquando**

do totam hujus generis rationem concludam ac definiam, quum & Metasthenis Persæ, & Judæi Philonis testimonio satis admodum manifeste probatum sit, iis tantum, qui quatuor monarchiarum res gestas conscripserunt, præsertim vero ac magis teste Myrsilo Lesbio, iis, qui consentiunt in eorum patria historia, quam quibusvis aliis eruditissimis, credendum esse: ecquid causæ erit, cur quisquam Trogum Pompejum, & eos, qui cum sequuntur, non penitus in ea disputatione, quæ est de Italiæ & Orobiolorum nostrorum origine, rejiciendum censeat? quippe qui neque alicujus regni sacerdos extiterit, nec ex publica aliqua, probataque annalium maximorum fide, sed solo ex auditu & traditione Græcorum, qui nihil non in historia audent, *Historiarum* libros ediderit: quod facile vel ex ipso Justino discas: Trogus enim, inquit¹, Pompejus Græcas & Latinas² orbis historias Latino sermone composuit: ut quum nostra Græce, Græca quoque nostra lingua legi possent, prorsus rem magnam³ & animi, & corporis aggreffus. Itemque: Et quæ historici Græcorum, prout commodum cuique fuit, inter se gregatim occupaverant, omiſſis quæ sine fructu erant, ea omnia Pompejus divisa temporibus & serie rerum congesta composuit, & cætera, quæ sequuntur: è quæis illud recte sequi perspicuum est: Quidquid Trogus Pompejus de Italiæ atque Orobiolorum ortu scriptum reliquerit, tamen si aliqua ex parte veritatis laudem assequatur, hac tamen in re fide penitus carere, uti à Græcis acceptum, quibus testimoniorum religionem nunquam habitam fuisse Cicero affirmat, dicens: *Veruntamen hoc dico de toto genere Græcorum: tribuo illis litteras, do multarum artium disciplinam, non adimo sermonis leporem, ingeniorum acumen, dicendi copiam, denique etiam si qua sibi alia sumunt, non repugno. Testimonium, religionem, & fidem nunquam ista natio coluit, totiusque hujusce rei qua sit vis, qua auctoritas, quod pondus, ignorant: unde illud est, Da mihi testimonium mutuum: num Gallorum? num Hispanorum putatur? totum istud Græcorum est: ut etiam qui Græce nesciunt, hoc quibus verbis à Græcis dici soleat, sciant.* Hæc ille, & quidem satis superque. Quare ultra non proferam orationem meam: etenim posset esse infinita, si mihi libeat hujusce gentis in testimoniis dicendis explicare vanitatem. Quanquam profecto nec ea quidem, quæ in Græcos pariter ac Latinos quosdam effudi, eo consilio à me dicta sunt, quo Scriptoribus his ego unus maxime fidem derogem, sed ut veritatis causam agam, hæc tamen aut publice, aut in concione dixisse, perabsurdum fortasse videri potuisset: sed in hujuscemodi familiari sermone & confesſu nequaquam. Sed vereor ne aut molestus sim vobis, viri optimi, aut ingeniis vestris videar diffidere, si de tam perspicuis rebus diutius disseruero.

Tum Julius, Non equidem, inquit, facile negaverim ea esse omnino certissima ac clarissima, quæ à te præclare modo & erudite dicta sunt, Marſili: sed tamen aut nostram, aut Antiquorum de Orobiolorum origine sententiam non multum aut infirmasse, aut labefactasse facile admodum ostenderim. Quid enim si doceo, si planum facio, ex Berosi quoque tui sententia, Brennum ipsum à Trogo Pompejo, aliisque nonnullis, nec perperam, nec incommode fuisse Orobiolorum conditorem cognominatum? Quid si unico verbo repellaris?

Quale vero, inquit Marſilius, est illud?

Et ille, Brennum, inquit, mediusfidius Orobiolorum civitatum conditorem, non alia de causa aut ratione à Trogo Pompejo appellatum fuisse censeo, quam quod earum extiterit instaurator & amplificator. Non enim te fugit juvenem inprimis diligentem ac studiosum, quæ Berofus ille Chal-

A dæus, cujus in nomine facile soles acquiescere, de Semiramide, quam Strabo & alii nonnulli Babyloniam condidisse affirmant, litteris mandarit: ea, si recte memini, sunt: *Quarto, inquit, loco regnavit apud Babyloniam uxor Nini Ascalonita Semiramis annis XLII. Hæc antecessit militia, triumphis, victoriis, & imperio omnes mortales, ipsa hanc urbem maximam ex oppido fecit, ut magis dici possit illam adificasse, quam ampliasse.* Ex quibus facile potest intelligi Strabonem, Ovidium, Trogumque Pompejum, & alios nonnullos dixisse Babyloniam à Semiramide conditam, pro eo, quod erat, auctam, instauratam, amplificatamque: neque enim Semiramis illa Atergatis Deæ, quam Plinius, Athenæusque *Δερκετῶν*, Hebræi vero, ut fama est, *Dagon*, id est, *Pisces*, vocant, filia, Ninique primi Assyriorum regis uxor: sed Nimbrotus ille Saturnus Babylonicus Chuseo patre Chameſis filio natus, primus omnium Babylonice urbis fundamenta jecit, si modo vera sunt, ut profecto sunt, quæ Hieronymus, Augustinus, Josephusque, & ante eos Berofus, ac Moses litterarum monumentis prodidere. Hinc etiam apud complures gestarum rerum Scriptores legimus à Romulo Romam fuisse conditam, cognominatamque, quum tamen & Fabius Pictor, & C. Sempronius apertissime contraria scribant, Romam scilicet non à Romulo, sed à Roma Itali filia longe antea fuisse ædificatam; verum à Romulo multis sæculis post fuisse auctam & ampliatam: ita enim Fabius: *Suscepto, inquit, Italus Italia imperio, tum filiam suam Romam nomine Siculis & Aboriginibus in Latio præfecit. Quæ relicta Capena medium Palatinum tenuit, & in vertice, ubi hæret Exquilino, Romam oppidulum condidit, quod Valentiam sonat: post ejus obitum ob paludes neglectum oppidum fuit usque ad adventum Evandri, qui cum oppido simul restituit nomen.* Et paulo post: *Denique Romulus potitus rerum Albanorum, & usus maxima familiaritate regum Heſturia, & rex primus è regulis Italiae creatus, in Latio Romam oppidulum in regiam Tetrapolim vertit, inque Palatino colle fundavit: adscito enim ex Heſturia vate atque sacerdote Olympum fecit, pomeriumque sacravit: & aratro ab Olympo in vico Thusco per Palatium circumducens, ab imo callis ad verticem, quadratam urbem signavit: & in vertice collis hærente Exquilino Romam oppidulum ampliavit. Et ita Romulus ex regulo primus rex à Thuscis declaratus est. Quam rem per occasionem acceptam Mithridates Rex Asia pro ignominia Romanis opposuit, quod verne fuissent Thuscorum.* Hæc hic. C. vero Sempronius: *Non igitur, inquit, à Romulo Roma, sed contra ab ipsa potius Roma, cujus adeo est occulta derivatio, Romulus nomen habuit: quæ ante ipsum Romulum capta legitur coli annis paulo minus octingentis ab Italo in Aventino, & filia ejus Roma in Palatino colle, & ante hos plusquam trecentis annis, aureo sæculo à Saturno; ubi nunc Saturni ades ad radices Capitolini collis. At Romulus solum eam ex oppidulo Roma, in Palatino colle quadratam & regiam reddidit.* Hæc ille. Itaque minime in dubium venire debet, quin Trogus Pompejus, Paulusque Diaconus, & qui eos sequuntur, scriptitarint, Brennum illum Gallorum regulum plerasque Gallie Cisalpinæ civitates condidisse, loco ejus, quod erat, ampliasse, aut restituuisse, seu potius cultiores ac munitiores reddidisse: ac demum, ne multis vos morer, adsunt testes locupletissimi, & quidem è recentioribus rerum gettarum ac temporum scriptoribus permulti, qui asserant (quod me tamen in Bossianis potissimum *Chronicis* memini legere solitum) Brennum Gallorum Ducem, quum in Galliam Cisalpinam transcendisset, pulsus ex ea Heſtruscis, plurimas hujusce regionis civitates, & quidem perveſtutas, diruisse, ac solo æquasse: easdemque non ita multo post ab eisdem Gallis, ad hæc ipsa loca, M. Furi Camilli consilio ac virtute ex Roma, quam vi irruperant, postmodum ejectis, expulſis, fugatisque, iterum instauratas, nec non & fortioribus præſidiis, propugna-

¹. In sua Præfatione. ². Scribendum totius. ³. Alii legunt, magni.

culisque, ad propulsanda Romanorum arma, circumunitas ac septas fuisse. Qua in re, ut me fert opinio, Marsili, Brennus ille non immerito, nec injuria, cunctarum ferme Galliae Cisalpinæ civitatum à Trogo atque aliis conditor appellari meruit.

Tum Marsilius, Quamvis, inquit, Juli, quæ dixisti, quasi quodam ex oraculo attulisse videaris; scito tamen, nullam ex his ad id, quod quærimus, responsionem tuam esse. Ut enim isthæc omnia, quæ abs te modo dicta sunt, tibi ita esse concedam: quid ad rem? principem Orobiourum auctorem ac parentem investigamus, non amplificatorem, instauratoremve. Sed illud forte (ut opinor) statim repones, quod initio tibi jam sumpseras, nempe quum jam penitus C. Plinii, aliorumque tam Græcorum, quam Latinorum, de Tyrreno, atque Antenore, exclusa fuerit opinio, quumque præterea nulla alia possit inveniri, tuam omnino manere necessum esse. Quis tibi hoc daturum putas, Juli? primum enim unde tibi notæ sunt omnium opiniones Scriptorum & nationum? perlustrasti ne tu omnia Ægyptiorum, Chaldæorum, Syrorumve monumenta litterarum? leve profecto, ac potius nullum, id quidem argumentum est. Verum definamus aliquando ea refellere, quæ cum inania sunt, tum vero adeo aperta ac manifesta, ut mehercule nec egere quidem oratione videantur: quid enim potest esse tam apertum? tam perspicuum? quam, quum Brennus Orobiourum civitates instauraverit & auxerit, eas utique vel oppressas, vel direptas reparasse, vel parvas saltem atque humiles amplificasse? non igitur primum à Brenno conditæ Orobiourum urbes. Sed tamen illud minime silentio præterierim, (vide autem quam tecum agam liberaliter, Juli) eos omnes, qui suppressio Brenni nomine, Gallos tantummodo multas Cisalpinæ Galliae civitates condidisse affirmant, si non plane defendi, certe vel excusari posse: atque ad id quidem obtinendum, confirmandumque, auctoribus uti optimis possumus, quod cum in omnibus causis, ut auctor est Cicero, & debet, & solet valere plurimum, tum vero primum in omni antiquitate. Verum enimvero ne aut forte cuiquam postea videar plura de istorum sententia dixisse, quam vel causa postularet, vel necessitas ipsa cogeret: aut ne dum huic (Julium intuens) obsequi studeo, tibi, Marce, atque aliis sim molestus, paulisper conquiescam: quum præsertim sermonem bene longum habueritis adolescentuli utinam non impudentis, illud quidem certe, non nimis verecundi: qui præsentem te, Marce doctissime, tam multa & adversus Plinium, Trogumque Pompejum, atque eorum assecclas, de Orobiourum ortu disputaverim, nec sane perrecondita, aut multum difficilia.

Tum Marcus, Mihine, inquit, molestus sis? qui te idipsum maxime rogaverim. Sed neutrum istorum fiet, nam & à te perfici dissertationem hanc (si modo possum) volo, nec tua mihi oratio longa videri poterit. Perge itaque obsecro, sequentur enim quæ tu ingenue polliceris.

Et ille, Quoniam, inquit, si Diis placet, ipsi fontes jam sitiunt, quid de Gallico hocce Orobiourum ortu cognitum habeam, tua jam pene coactus, Marce, humanitate, quam brevissime potero, exponam. Dicimus igitur sinceriores illos gestarum rerum scriptores, qui circumcisiss tam Gallicorum quam Græcorum Ducum nominibus, Gallos ἀπλῶς (uti Græca utar voce) plerasque Cisalpinæ Galliae urbes ædificasse tradunt, ob id vel facillime expurgari posse, quod ipsum Gallorum nomen ambiguum est, & ut Græci vocant ὀμόνυμον, id est, ut nostri verunt, *aquivocum*. Quæ profecto ὀμόνυμα plurimus sane eruditosque viros, potissimum tamen Græcos, aberrare quam sæpiissime compulit. Cæterum de ambiguitate nominis Gallorum, hæc sunt, quæ apud Xenophontem legi: Ogyges, inquit, plures fuere: primus

A supradictus atavus Nini, quem Babylonii Gallum cognominant, quod in inundatione etiam superstes alios eripuerit, & genuerit: hinc Saga, apud quos navigio servatus est & ereptus, ratem vocant Gallerim, quod ab undis servet: verum Græca lingua candidum & lacteum significat: Phrygia exsectum testibus; Latina gallina maritum: & Celtas, qui sunt Galatae, veteres à Galanthe filio Herculis, à quibus Galatae in Asia, & Gallogræci in Europa: fuit autem priscus Ogyges in prima inundatione terrarum: alter vero Atticus in tertia. Hic hæc: è quæis facile apparet, Gallum, non solum eos populos, quos nunc communi vocabulo *Francos* appellamus, significare; sed generatim quoque, ac rectius omnes, qui à fluctibus atque aquarum eluvionibus servati sunt: quod hercle appositum, vel ut Græci dicunt, ἐπιγενεῖν proprium fuit Noe, quem Berofus Chaldæus, & in hoc etiam loco Xenophon, atque alii quidam, Ogygem priscum, ac Janum patrem vocant. Cæterum in Gallorum genere tres discretas esse species, veteres Chronographi tradiderunt. Prima namque eorum species est, qui ante omnes alios Alpes Italiae transcenderunt: quosque Celtas fuisse T. Livius in v. ab urbe condita auctor est. Hos namque Tarquinii Prisci temporibus, ab Arunte Clusino, in ultionem stupratæ à Lucumone uxoris, accersitos ex Gallia, in Italiam commigrasse M. Cato, Cajusque Sempronius prodiderunt. Altera vero eorum Gallorum est, qui aliquot seculis post, superato Apennino in Thusciam descenderunt, ac Romanam urbem incendio consumpserunt: hi autem fuere Boji, Senones, atque Insubres, quemadmodum iidem Cato & Sempronius scribunt: de quibus abs te satis multa, Juli, ex Trogo, Paulo, Joanneque nuper allata sunt: hosce autem Senonas, prioresve Celtas, nequaquam reor Orobiourum conditores (principes, inquam) ab Antiquis habitos fuisse, aut appellatos, sed instauratores tantum, amplificatoresque: quos tamen etiam conditores dici posse non incommode abs te, Juli optime, supra demonstratum est. At vero tertia, eademque & vetustior, & magis propria illorum sane fuit, quos *κατὰ μετεωρίαν* ab inundatione Gallos cognominatos fuisse scriptum reliquit Xenophon, eo quod Hebræi, Chaldæique, sacris in Litteris *undæ & fluctus גלים GALLIM* dicant: quemadmodum apud regium vatem Psalmo XLII. legimus: כָּל מְשֻׁבֵּר וְגֵלִיד עָלָיו עֲבָרוּ, id est, *Col Misvaracha Vegallaacha Halai Havaru*, hoc est, *Omnes gurgites tui & fluctus tui super me transierunt*. Hi autem exstiterè prisci illi Aramæi, qui Scythæ Sagæ vocantur à Beroso, Catoneque, in Armenia statim post Diluvium geniti: à quibus postmodum in Italia, Solino teste, manarunt Umbri. Sed de his alias fortasse copiosius. Ab istis ergo Gallis Umbrorum progenitoribus, qui etiam Janigenæ, id est, à Jano geniti dicuntur, non alienum, aut absurdum judicarem priscos Auctores intellexisse Orobios fuisse primum genitos. Habetis igitur, viri ornatissimi, explicatas omnes ferme (ut arbitror) de Orobiourum origine sententias: quibus de rebus quoniam satis à nobis dictum est, nunc, ut est in adagio, aliam quercum excutite. Atque ego te, Marce, hisce de rebus quid exploratum habeas, audire vehementer optarim.

Et Petrejus, Ego quoque, inquit, & Julius, Marce, id abs te petimus: scimus enim te non solum, ut dici solet, ad Aristophanis lucernam, sed etiam Cleanthis non pauca magnifica sane & perrecondita investigasse.

At ille, Ut ita, inquit, ista esse concedam, quæ sunt longe secus, (nam & pervulgata sunt, vobisque non incognita) ego mehercule eundem malletm Marsilium audire; ut qua eloquentia & eruditione falsos Orobiourum Auctores sustulit, eadem veros inducat: quamobrem nisi forte jam es defessus, Marsili, & si tibi non graves sumus, ea nobis ut edisseras, obtestamur: censemus enim hæc te fac-

cillime explanare posse, quod & Hebræum sermonem jam pridem didiceris, & complures jam menses ea ipsa te ex Berofo videmus exquirere.

Tum ille ridens, Age, age, inquit, satis enim scite, me nostri sermonis principium & finem esse vultis, hisce de rebus aliquid vobis, si modo possumus, (sum enim, ut Græci dicunt, *ὡς πολλοὶς ἐν παῖσι μέσαις*) explicemus. Verum enimvero, quia vetustas ipsa, rerumque remotissimarum obliteration, earumque cognoscendarum cupiditas, ita postulat, altius quædam recensebo, & perquisita longo studio, & eruta multa antiquitatum peruestigatione, & cura: neque enim alienum suscepto operi, aut importunum, ut arbitror, videri poterit, si ante-

A quam veram Orobiolorum originem pandam, totius pene Italiæ res à remotissimis etiam seculis explicavero, & qui, & quales eam populi, regesque initio, aurea nimirum ætate, tenuerint, in memoriam revocavero. Quibus ut satisfaciam, crastinum in confessum dictionem hanc omnem rejiciendam censeo: nam & satis multa à nobis hodie disputata sunt, & sol ille jam ad occasum properat.

B Tum Marcus, Rectissime profecto hæc, inquit, à te censentur, Marfili: proinde hoc in loco (quando id tibi placere jam video) ad ea, quæ restant, singillatim nobis explicanda convenies; totum enim tibi crastinum dicamus diem: quæ quum essent dicta, discesserunt.

JOANNIS CHRYSOSTOMI ZANCHI,

BERGOMATIS, CANONICI ORD. D. AVGVSTINI,

DE

O R O B I O R V M,

SIVE

C E N O M A N O R V M,

O R I G I N E

L I B E R II.



PLATONEM illum, quem Pænætius *Philosophorum Deum* nuncupavit, dicere solitum accepimus, à *Jove reges esse atque philosophos*. Ego vero non reges modo, atque philosophos, sed optimos quosque liberalium ac ingenuarum artium scriptores à Jove, id est, Deo, vel

maxime prodiisse contenderim: nam quum omnium rerum optimarum principia à Deo optimo maximoque duci & *θεοδιδαντοῦ καὶ παμμέγας* Arcopagita Dionysius scite admodum docuerit: profecto neque artem, neque virtutem ullam, neque eam, quæ ad scientiam maxime spectat, veri indagacionem, quempiam adipisci posse absque illius summi, consummatique boni consensu manifestum est. Quæ quum ita se habeant, indoctorum proculdubio quorundam, vel obrectatorum potius linguam me haud evasurum plane confido: quippe qui & Trogum Pompejum, & C. Plinium, Romanarum alterum Græcarumque, naturalium alterum ac reconditissimarum historiarum scriptorem diligentissimum priori volumine acius fortasse, quam operæ precium fuerat, oppugnaverim, viros, inquit, veritatis, quæ non nisi à Deo esse potest, & amantissimos, & indagatores quoque solertissimos: clamabuntque nonnulli eo me consilio, eaque de causa, eos vexasse, quo omnem illorum in tradendis rebus antiquis fidem penitus everterem, labefactaremque. Quibus ego illud primum haud temere forsitan objecerim; licere mihi quod & omnibus ferme tum vetustis, tum recentioribus hominibus semper licuit, contra aliorum opinionem disserere: præsertim vero in re tum controversa, tum multorum seculorum vetustate obliterationa. Quis enim est qui non intelligat, quam & in physicis perscrutationibus invicem dissentiant Democritus, & Empedocles, Aristoteles, & Plato? Et in morborum curationibus dicant omnino diversa Heraclitus, Hippocrates, Asclepiades, Galenus, & Avicenna? At vero in historicis monumentis mirum est, quam inter sese

C de rebus si non singulis, certe vel primis, vel maximis, cognituque dignioribus altercentur, qui antiquitus & regum illustrium, & imperiosorum populorum res gestas, & memoriæ veteris ordinem tradidere: atque adeo, ut præcipuum inter eos studium extitisse videatur, quo alter alterum incesseret; & qui posterior esset, eos, qui ante se scripsere, vexaret. In quantis enim, inquit Josephus Judæus, locis Hellenicus ab Agesilao de genealogiis discrepat? & in quantis Herodotum corrigit Acusilaus? aut quomodo Ephorus quidem Hellenicum in plurimis ostendit esse mendacem? Ephorum vero Timæus? Timæum qui post illum fuisse?

D Herodotum vero cuncti? sed neque de singulis cum Antiocho, & Phillisto, aut Callia Timæus concordare dignatus est: neque rursus de Atticis ii, qui Attidas conscripserunt, aut de Argolicis ii, qui de Argis historiam protulere, alterutros consecuti sunt. Et quid oportet dicere de civitatibus, brevibusque rebus, quando de militia Persica, & iis quæ in ea sunt gesta, tantum viri probatissimi discordare noscuntur? in multis autem etiam Thucydides tanquam fallax accusatur, licet scrupulosissimam secundum se historiam conscripsisse videatur. Hæc

E ille. Mirum igitur si nos quoque Trogo, Plinioque, contraria dixerimus? quasi non & ipsi de Orobiolorum, deque Italiæ ortu diversa omnino, & vetustissimorum quoque Scriptorum fidei contraria penitus sentiant ac scribant. Itaque viderint illi quam honeste negari id possit mihi, patriæ splendorem, ac gloriam, veramque non Orobiolorum modo, sed totius fere Italiæ originem peruestiganti, quod profanis, barbarisque gentium Scriptoribus gratis concessere. Etenim si præceptorum suum Platonem Aristoteli in pluribus vexare, si Aristotelem Epicuro contumeliosissime calumniari, si denique Leontio meretriculæ contra Theophrastum, Dioni Chrysostomo adversus Homerum, Cæsari contra Catonem, & patrum nostrorum ætate, Laurentio Vallenfi adversus omnes scribere licuit; cur me ipsum quoque non æquo animo ferent contraria nonnulla Trogo, Plinioque, nec non & cæteris, qui vel ex inscitia, vel desidia, vel antiquissimorum annalium, patrumve fide neglecta, calumniose quædam de Orobiolorum & Italiæ ortu litteris mandarunt, edifferenter?

Sed ne fortasse longius quam par est progrediamur, iis demum, qui me eo consilio Trogum Pompejum, ac Plinium, & eorum sectatores impugnasse dicturi sunt, quo eis omnino fidem derogarem, eorumque doctrinam inanem penitus ostenderem, responsum hoc statim velim, tantum id vero convenire, quantum, ut inquit Lucianus, convenit *μόλυβδος δ' ἀργύρου, καὶ χαλκὸς χρυσοῦ, καὶ ἀνεμώνη ῥόδου, καὶ ἀνθρώπων πίδης*. Ea si quidem contradicendi facultas, qua omnes ferme, ut dixi, usi fuere, tantum ab evertendarum disciplinarum consilio abest, ut jactis firmioribus fundamentis, eas magis, magisque stabilire videatur. Quid enim illa antiquorum philosophorum tanta dissensio, quantam diximus, quid tandem effecit? nulla ne omnino ut esset naturalium rerum cognitio, sive disciplina? nequaquam: nam eo ipso plures multo & incensi olim fuere, & nunc passim ad perscrutanda naturæ abdita incenduntur. Nullus ne item erit Medicinæ, Astrologiæ, Dialecticæ, Grammaticæ, cæterarumque liberalium artium usus? nulla ne cognitio? quoniam & hæ totidem pene habent vel altercatores & quidem vehementes, vel rixatores potius cum primis acerbos, quot disciplinarum magistros. Minime gentium: sunt enim hisce de rebus à complurimis præcepta cum in universum tradita, tum etiam in artem redacta, ac disciplinam. At vero quid unquam obfuit Aristoteli, quod ne Platoni quidem magistro suo pepercerit? sed contra ejus dogmata non pauca sane diligenter, & scripserit, & ut quidam volunt, acute disputaverit? nihil penitus. Tantum enim Aristotelis potuit nomen, & auctoritas, ut non maximos solum virtutum præcones habuerit, disciplinæque, ac viæ suæ sectatores, qui certa omnia apud illum, firma, & inconcussa arbitrarentur: sed multo etiam plures, (ô indignum facinus) qui se magis Aristotelicos, Peripateticosve, quam Christianos dici mauerint. Memorare etiam hoc loco possem non solum veterum, sed & horum etiam recentium, vel Philosophorum, vel Theologorum, vel Mathematicorum, Grammaticorumve, aut Dialecticorum nominatim quosdam vel maxime celeberrimos, qui eorum, qui ante se hisce de rebus scripserant, opiniones perquam strenue quidem & coarguerunt, & labefactarunt: qui tamen à posteris neque neglecti, neque repudiati fuerint; sed contra plurimi in laudandis, extollendisque, ingenii eorum viribus ipsos honestaverint, ni ea res longius nos ab incœpto traheret.

Proinde idipsum nostra hac in causa dijudicari velim: neque enim nos Veterum fidem, aut doctrinam, vel evertere, vel labefactare ullo modo nitimur; sed veram gentis nostræ originem absque ulla contentione, si fieri potest, indagare cupimus; idque summo studio, curaque, peruestigamus. Tribuant itaque illis alii quicquid velint, vel ingenii acumen, vel elegantiam, vel multarum rerum peritiam, per me sane cuique liberum sit, ego certe veritatis causam egi, agamque, dum vita comes fuerit: Berofoque Chaldæo, & vetustissimo, & eruditissimo viro, ut qui à Mose sacrarum Litterarum scriptore certissimo, probatissimoque, nulla ferme in re dissentiat, libentius fidem præstiturus sum, quam quibusvis aliis, quamvis aliis, ut inquit Myrsilus Lesbios, & eruditissimis, & eloquentissimis. Sed hæc satis, superque. Quamquam ne opus quidem fortasse fuerat nobis ista dixisse, nisi eorum gratia, qui totum hoc negotium, in quo tota hæc versatur quæstio, nequaquam intelligunt. Eos si quidem, qui Hebræas, Chaldæasque, aut Græcas saltem litteras vel primoribus, ut ajunt, labris degustarunt, quique demum cum in peruestiganda certa gentis nostræ origine, tum in vetustissimis illis, doctissimisque, rerum gestarum, temporumque scriptoribus, Mose Judæorum legislatore sapientissimo, Berofo Chaldæo, Metasthene Persa,

A Philone Judæo, Fabio denique Pictore, Marcoque Catone versati sunt, nihil prorsus dubito ingentes mihi habituros gratias, etsi, quod conatus sum, parum assecutus fuero. Quocirca libet mihi una cum Tullio antiquum illud exclamare:

Pro Deum, popularium omnium adolescentium

Clamo, postulo, obsecro, oro, ploro, atque imploro fidem, non levissima de re, ut queritur ille, fieri in civitate facinora capitalia;

Ab amico amante argentum accipere meretrix non vult.

Sed ut adsint, cognoscant, animadvertant omnes; quæ de Italiæ, quæque de Cenomanorum, sive Orobiorum nostrorum ortu splendidissimo à nobis disseruntur, scriptisque mandantur, utrumnam sint vera, an falsa, certa, an incerta, illustria, an ignobilia, gloriæ ne tandem inanis, an veritatis indagandæ gratia, scripta videri queant.

Cæterum his forte quam opus fuerat pluribus affari te, humanissime Petre Bembe, volui, antequam ea, quæ restant, aggredior. Te enim studiorum meorum æquissimum non æstimatorem solum & judicem, atque in primis amantissimum, verum etiam gentis nostræ defensorem & maximum, & acerrimum esse, satis scio, & compertum maxime ob id habeo: quod olim adolescens patre tuo Bernardo viro gravissimo, atque integerrimo, omnique doctrinarum genere spectatissimo, summa cum laude prætorium munus apud Bergomates (nostros ne dicam, an tuos?) gerente, talis ac tanta fuerit apud omnes tui expectatio; ut non præclarum modo ob ingenium, doctrinamque, & litterarum peritiam, quæ omnia in te summa sunt, verum candidissimos potius ob animi tui mores cunctorum, vel eruditorum maxime, oculos in te unum patrum virtutum quasi imaginem quandam ita converteris, ut te nunc etiam tanto post in oculis ferant universi, humanitatem, modestiam, miram denique probitatem agnoscant omnes, & prædicent. Sed hæc alibi, & copiosius, si quando majoris otii tempus nacti fuerimus: nunc vero, si placet, ad institutum sermonem revertamur.

Postero igitur die, quam ea fuerant ab illis satis probe doctis adolescentibus, L. Petrejo, M. Marfilio, ac C. Julio, de Orobiorum origine disputata, quæ superiore Libro scripta sunt, cum iidem apud M. Mauritium ad constitutum convenissent, agebat mihi idem ille Petrejus sese ab illo ingenti alacritate exceptos fuisse: ac demum cum amicissime inter se consalutavissent, tum Marcum hilari vultu ac soluto, ut solebat, arridentem ita cœpisse. Quid tu tandem, Marfili? Nunquidnam ea disserere paratus es, quæ superiorem post confessum traditurum te nobis hodie promissisti?

Tum ille, Timide, vel verecunde potius, præsto, inquit, sum promissa servaturus, quorum debitorum hesternum me disputatione constitui: de principe videlicet Italiæ, atque Orobiorum, sive Cenomanorum, ortu disserterus: re sane quam difficili atque perardua, nostrisque à majoribus aut non satis dilucide explicata, aut omnino parum diserte pertractata. At vero utinam nos ii simus, qui & desiderio vestro, & quam de me jam pridem concepistis, opinioni, parte saltem ex aliqua respondeamus: nam aliis satis ut faciamus, qui hæc ipsa audituri fortasse à vobis sunt, id vero prorsus futurum diffidimus, & ingenue quo vobiscum agam, etiam desperamus. Tamen ut consuevere qui periculosa tranant atque ignota flumina, quibusdam quasi contis tentabundus amnem aggrediar: nam, ut inquit Cicero, tardi omnino est ingenii rivulos cunctari, & fontes rerum non videre: etiam ætatis est, usque nostri, à capite quod velimus arcescere, & unde omnia manarint videre.

Perge vero fidenter, inquit Marcus, sequentur enim quæ tu scientissime aggressus es.

Vultis ne ergo, inquit ille, principem Italiæ ortum

ortum à fonte repetamus? quo invento, non erit dubium quo sit Cenomanorum nostrorum origo referenda, quam quærimus? Quum omnes responderent nihil aptius, nihil ad rationem instituti sermonis commodius dici posse.

Tum ille, Absolutissime, inquit, viri ornatissimi, principem Italiæ originem à M. Catone illo & rerum gestarum, & memoriæ veteris indagatore solertissimo, studiosissimoque, hisce verbis traditam diu arbitratus sum, quæ etiam pridem in gentis nostræ gratiam edidici, & nunc libenter referam, ea sunt: Italiæ splendidissima origo fuit tum tempore, tum origine gentis. Cœpit enim aureo sæculo sub principibus Diis Jano, Chamefe, Saturno, gente Phœnicea & Saga, quæ post inundationem terrarum per orbem prima colonias misit. Qui vero eam populi ac reges primum tenuerint, vere atque enucleate Q. Fabium Pictorem virum sane eruditissimum tradidisse existabam, cujus verba sunt: Italiæ imperium penes duos populos principes exstitit: posterius Romani, principio Thulci sub Jano cœperunt in aureo sæculo. Aurea ætas primo ortu generis humani fuit sic dicta, quod posterioribus seculis comparata æque atque aurum inter metalla effulset, eam cœpisse sub Ogyge ante Ninum annis circiter ducentis & quinquaginta, Xenophon atque majores prodiderunt. Is Janus sub initium aurei seculi lævum latus Tyberis Hetruriam tenuit; Chamefes vero ac Saturnus circa finem ejusdem ætatis dextrum incoluerunt. Nunc autem in ostendendis, explanandisque, Italiæ ac Cenomanorum principiis, non dubitabimus remotiora quædam significatioraque sciscitari, ac quærere: quorum ex indagatione ipsa hæc Italiæ & Cenomanorum origo clarior appareat, sitque illustriore in loco posita.

Nos quoque, inquit Petrejus, ita faciendum esse existimamus.

Tum Julius, Me quoque, inquit, Petrei, adscribito sententiæ: verum tu ipse jam ad loquendum, nos autem ad audiendum accingamur.

Tum Marfilius, Principio, inquit, satis constat, post insignem illam terrarum inundationem, qua universus periit orbis, in majori Armenia, quam Berosus & Cato Scythiam Sagam vocant, renatum fuisse genus humanum: ita enim Cato: De mundi quidem, inquit, origine auctores non paria sentiunt: nam Chaldæi sibi sempiternitatem persuadent, Phœnicibus vero, ac Sagis magis placeat origo: inter utrosque convenit, ante Ninum circiter annis quinquaginta & ducentis, quibus duravit aureum seculum, terras fuisse inundatas, & in Scythia Saga renatum mortale genus. Sive enim ab æterno mundum existimes, & ignis principio cuncta tenuerit, & sensim in sua loca elementa coeuntia homines produxerint, sive, ut fertur, ante aureum seculum terras subrutas inundatio possederit, & exsiccata humo apparuerint homines, equidem principatus originis semper Scythiis tribuitur, à quibus auctis colonias per orbem missas ferunt. Verum quoniam ea omnia apertius atque enucleatius sacra primum Litteræ, deinde & Berosi, Chaldæi historici, monumenta continent, idcirco iis ducibus erit nobis omnis nostra explicanda traditio: quod vestrum quoque esse consilium, de vultus vestri assensu, hilaritateque, plane intelligo.

Rectissime vero, inquit Marcus, istis enim duobus errari nullo modo potest.

Tum Marfilius, Datis ne hac mihi vos quoque fratres? nam Marci hujusce nostri jam novi sententiam.

Tum illi, Damus sane, inquiunt, si postulas. Et recte quidem atque optime, inquit Marfilius. Quid enim sacris sanctisque divinarum rerum Scripturis sanctius? quid divinius? quid denique certius

A aut esse, aut excogitari potest? quum earum auctor Deus ipse optimus, maximusque, & vere quidem sit, & ab omnibus, qui recte sapiunt, esse censetur? At vero quid antiquius? quid probatius? quid denique eruditius inter externos Beroso illo inveniri posse judicamus? quippe qui publica, probataque, Scythicorum ac Babylonicorum annalium fide, totius fere memoriæ veteris ordinem, & imperiosorum populorum origines, & regum maxime illustrium res gestas, antea penitus incognitas, ac in tenebris reclusas atque abditas aperuerit. Conservatis siquidem notatisque omnium Assyriorum regum temporibus, nihil quum illustre prætermiserit, MCCCCLXXXIII. annorum memoriæ multis voluminibus colligavit: ut merito quidem gloriari queat, sua per investigatione & cura, suisque demum vigiliis, ea se investigasse, tradidisseque, quæ Græcorum, aut Latinorum quisquam, vel Ægyptiorum, Persarumve, aut aliarum gentium (præter Mosen tamen, à quo nihil ferme desciscit) nullus omnino esset antea consecutus: quod quidem ob meritum eum Ægyptii omnes, Persæ, Medi, Chaldæique, atque alii quam plures magni nominis populi suspexerunt, supraque hominem & admirati, & venerati sunt: quandoquidem Athenienses, ut auctor est Plinius, propter ingenii excellentiam, clarissimasque rerum antiquarum traditiones publico in gymnasio inaurata lingua statuat illi collocarunt. Verum ad ea, à quibus digressi fortasse videmur, redeamus. Quod igitur in Armenia Saga principio reparatum fuerit hominum genus, vel illud satis admodum declarare potest, quod Moses ille Historicorum omnium, ut Græci dicunt, ἱστορικῶν, scriptum reliquit: *Requievit, inquit, arca mense septimo decima septima die mensis super montes Ararat.* Quod Interpretum eruditissimus Hieronymus explicans: *Est, inquit, Ararat regio in Armenia campestris, per quam Araxes fluit incredibilis ubertatis, ad radices Tauri montis, qui usque illuc extenditur: ergo & arca, in qua liberatus est Noe cum liberis suis cessante diluvio, non ad montes generaliter Armenia delata est, quæ appellatur Ararat, sed ad montes Tauri altissimos, qui Ararat imminent campis.* Hæc ille. Quæ omnia ἐν τῇ τῇ φωνῇ ἱστοροῦ Archilochus, & ex Mnasea Phœnice, & ex Mose Judæo pulcherrime collegit, ita dicens: *Mnaseas Phœnix Damascenus libro xcvii. Historiarum asserit ante Ninum ferme ducentis quinquaginta annis fuisse inundationem terrarum, & quendam, cui testimonium perhibet Mosens antiquissimus Historicus, liberatum circa struvium Araxim, ad montes Caspios: tumque recentem calo & rudi humano genere vixisse auream vitam, in qua nullo ferente legem natura ipsa vivebatur, quousque Ninus & Semiramis arma populi inferentes primi vitam vitare coeperunt humanam.* Verum (ut hoc nunc πρὸς ἡμᾶς agam) nequaquam vos conturbet, quod mons ille, ad quem arcam delatam ferunt, à Hieronymo quidem Taurus, ab Archilocho autem Caspius, à Beroso vero Gordiens nuncupetur: nam unus atque idem est mons, quamvis diversis in locis, variisque à gentibus & Scriptioribus diversa sibi adscribat nomina, ut potissimum videri video C. Julio Solino, cujus verba in præsentiarum omittere incuriosum plane videretur: est enim ejus de Tauro monte & clarissima, & illustris oratio: *Mons, inquit, Taurus ab Indico primo mari surgit: deinde à scopulis Chelidoniis inter Ægyptium & Pamphylium pelagus objectus Septentrioni dextro latere, lævo meridiana plaga, Occidenti obversus fronte profusa, sed modo intercluditur Phœniceo, modo Pontico sinu, interdum Caspio, vel Hyrcano: quibus renitentibus subinde fractus contra Mæoticum lacum flectitur, multisque difficultatibus fatigatus, Riphæis se jugis annectit, pro gentium & linguarum varietate plurifariam nominatus: apud Indos Imaus, mox Paropamisus, Cohatrās apud Parthos, post Niphates, inde Taurus, atque ubi in excelsissimam sublimitatem Caucasus, interea etiam à populis appellationem trahit: ab dextro latere Caspius dicitur, vel Hyrcanus, à lævo*

Amazonicus, Moschicus, Scythicus: ad hæc vocabula habet alia multa. Hæc ille.

Nos vero, ut instituimus, ad reliqua pergamus; quæ tametsi possint à me & ornate, & electissimis quoque verbis recenseri, attamen quo & clariora vobis ipsis appareant, & summa cum delectatione orationi quoque nostræ auctoritatem afferant, & fidem, ea omnia Berofianis, Catonianisque verbis, quibus libenter admodum uti soleo, pertexam: ea sunt: *Itaque necesse est, inquit Berofus, nos ex præmissis confiteri quod & Chaldaei & Scythæ scribunt, siccato ab aquis orbe non fuisse nisi tantum octo homines in Armenia Saga, Noach scilicet cum tribus filiis Samo, Japeto, & Chamese, & uxoribus Titea magna, Pandora, Noela, & Noegla, & ab iis omne hominum genus in terris seminatam: exsiccata namque humo & torrefacta terra, quum, ut par erat, è Gordiao monte in subjacentem planitiem cadaverum plenam descendissent, quam usque ad hanc ætatem appellant Miri Adam, id est, evisceratorum hominum, continuo congressi conjugibus perpetuo geminos marem & faminam edidere: qui adulti, & conjuges effecti, & ipsi binos partu liberos semper ediderunt. Neque enim unquam Deus, aut natura defuit necessitati, qua ad universi orbis spectat opulentiam. Eo pacto brevi in immensum adaugeto humano genere, omnique Armenia completa, quum eos inde recedere, atque novas sibi sedes conquirere necessitas compelleret, tum senissimus omnium ac sapientissimus pater Noach, qui & Janus, adhortatus est homines principes ad comparandas novas sedes, & communem cœtum inter homines agendum, & edificandas urbes. Designavit itaque tribus filiis suis, ante diluvium genitis, tres illas orbis partes, Asiam, Africam, & Europam, ut ante Cataclysmum viderat: singulis autem his principibus singulas partes, ad quas irent, partitus est: illud in primis maxime precipiens, ut nomina sua locis, qua tenuerint, montibus scilicet ac fluviis, urbibus ac populis, quorum essent imperium obtenturi, imponerent in signum expeditionis à Jano patre sibi commissæ, & ad monumentum posteris, ut scirent quis eorum conditor fuerit: ipse vero per totum orbem colonias se traducturum pollicitus est. Quapropter ex ea Scythia Saga, quam Berofus & alii Armeniam vocant & Aramæam, (Scythas enim populos, ut inquit Plinius, Persæ universos Sagas appellavere à proxima gente Saga, antiqui vero Aramæos) Janum patrem sive Noach cum coloniis primum transfretasse, præter Berofum ipsum, qui cuncta Jani gesta immortalitati scriptis suis consecravit, Cato quoque noster eruditissime admodum, succincteque, asserit, dicens: *Ex his Scythis tradunt venisse Janum cum Dyrim, & Gallis progenitoribus Umbrorum, rateque cum colonis per Tyberim vectum ad lavum Tyberis Hetruriam tenuisse locum: ubi colonias in continente primum exposuit, & ipsum Deum simul Vaticanum habitum dictumque fuisse, & regionem Vaticanam, id est, Vagicanam, dictam, quod ibi Janus quasi in cunis natam primum, vagientemque Italiam exceperat: & quæ sequuntur.**

Quocirca hisce omnibus ita consideratis, facile licet intelligi, de principe Italiæ ortu ita statui oportere, quemadmodum & Fabius Pictor & M. Cato monumentis testantur suis: aurea scilicet ætate natam Italiam gente Phœnicea & Saga, quam posteriores Armeniam Aramæamque dixisse, ex iis, quæ recensuimus, plane quidem compertum habemus. Sub universi vero terrarum orbis principe Noach, quem prisci Scythæ cum Ogygem Sagam, id est, ut Berofus exponit, illustrem sacrorum pontificem, tum ob inventæ vitis, vini, & beneficii, Janum patrem appellavere, (Aramæa namque, Hebræaque lingua vinum יין *Jain* dici nemo est qui nesciat, qui vel prima Hebrææ linguæ rudimenta perceperit) atque hinc Italiam primum à Jano Janiculam cognominatam fuisse

A Cato scriptum reliquit: *Italia, inquit, complura à Diis & ducibus sortita fuit nomina: à Jano quidem Janicula, quem quidam Oenotrium dictum existimant, quia invenit vinum & far. Itaque, ne longius à proposito aberremus, qui primi Italiam tenere populi, hos Scythas Aramæos sive Armenios Sagas existisse, neminem vestrum ignorare jam arbitror: qui primum à Jano patre, ut dictum est, in Italiam deducti, à fluctibus quidem, à quibus aquosæ cladis tempore navi erepti sunt, Syro, Hebræoque sermone Galli Umbro- rum progenitores, & ab ipso patre Jano Janigenæ sunt nuncupati: quos deinde Romani Hetruscos, Græci vero à sacrorum peritia Thufcos, & à Tyrrheno Tyrrhenos appellarunt, quemadmodum & ex iis, quæ hesternæ die recensuimus, & ex Manethone Ægyptio, Myrsiloque Lesbio facile licet intelligi: ita enim Manetho: Secundo, inquit, Menophis Ægyptiorum regis anno, Tarchon Priscus regnat apud Razennos Janigenas, qui nunc dicuntur Tyrrheni, & Thufci, ob Tyrrhenum & peritiam divinarum, quæ à Jano didicerunt. Myrsilus autem: *Ipsi quoque, inquit, Romani fatentur, Hetruscos esse vetustissimos, & aureo seculo natos, à quibus aras, ritus, divinationes, colonias, & disciplinas habuit prisca Italia, initio sumpto à prima eorum tetrapoli dicta Hetruria, à qua illos Romani Hetruscos cognominarunt. Hæc illi.**

C Sed nos his cum inquirendis, tum explicandis nimii fortasse sumus: ea enim tantum attigisse, quam membratim disseruisse consultius fortasse fuerat: verum quoniam hæc ipsa sunt hujusce indagationis nostræ principia, ob id permisum mihi fore arbitratus sum in hoc confesso licentiore uti posse, sive auctoritate, sive exemplis hominum sane doctissimorum. Quamobrem jactis hisce fundamentis, ad illa statim transeo, quæ secundo loco videntur ex Mose, Berofoque recensenda. Scribunt namque Noævum illum, quem rerum gestarum magnitudo olim inter deos exterarum gentium retulit, quemque Hebræi patria lingua Noach, Metasthenes vero Persæ, & Archilochus, & Xenophon, & Fabius Pictor, & Solinus, alique nonnulli Ogygem priscum, Janumque nuncupant, principique terrarum inundationi præfuisse, atque universo orbi tradunt imperasse, ante Cataclysmum, quum quingentos annos natus esset, tres filios genuisse, Samum scilicet, Chamesem, ac Japetum: qui Hebraica lingua Sem, Cham, Japheth, appellantur: à quibus post diluvium procreata sit omnium hominum multitudo, ab eisque è prisca Armenia centesimo primo post inundationem anno egressis, regna, gentes, linguas, ac primarias mundi partes coeptas, habitatasque fuisset: quas fama tenet fuisse duas & LXX. quemadmodum & ex ix. *Geneseos* capite, & ex his etiam E Hori Apollinis Niliaci verbis facile licet cognosci: *Lunam autem, aut terrarum orbem, aut litteras, aut sacerdotem, aut iram, aut stagnum describere volentes, Cynocephalum pingunt: ac Lunam quidem primo, quoniam, &c. Deinde non multo post hæc subdit, dicens: Orbem terrarum vero, quia duas & LXX. regiones principales orbis terrarum esse ajunt, & quæ sequuntur. Eo autem anno, quem diximus, orbis terræ divisionem à Jano patre factam fuisse, Peleg, Heber filii, nomen aperte admodum arguit: nam illi ex eventu Peleg, quod divisionem sonat, nomen impositum fuisse, Hebræa hæc Moysi verba significant: וְעֵבֶר יֶלֶד שְׁנֵי בָנָיו *ulhebar jallad scene banim. scem haachad Peleg, chi bejamas niplegagh haarez.* hoc est: *Et ipsi Heber nati sunt duo filii, nomen unius Peleg, quoniam in diebus ejus divisa est terra. At vero natum fuisse Peleg anno post aquarum eluvium centesimo primo, quisquis apud Mosem annos vitæ, Sem, Arphachsad, Selach, &**

& Heber computaverit, facile prorsus intelligit. His itaque temporibus, ut Philo Judæus alique Hebræorum interpretes de multiplicato humano genere tradunt, Noxus ille, sive Janus pater, una cum tribus liberis ac coloniis nonnullis in Pontum venit, ratibusque æquor omne Mediterraneum circumlustravit, ostendens primo Sem littus omne Asiaticum à Tanai, ut scribit Arnobius, per Bosphorum usque ad Nilum Ægypti: Cham vero, sive Chamefi, à Nilo littus Africæ usque in angustias Oceani & Gadum: Japheth autem (quem Japetum Græci dicunt) omne littus Europæ à Gadibus usque ad Tanaim: & singulis provinciis, præsertim vero littoralibus, dimisit primas colonias. Verum hanc orbis terræ divisionem Græcus quidam sacrarum Litterarum interpres, cujus quod fuerit nomen aut patria nondum accepi, hunc in modum absolvit, dicens: Ο ὅς δὲ καὶ τῷ Νῶε διαμερίζει πάντα τὸν κόσμον οὕτως τοῖς τέσσεσιν υἱοῖς αὐτοῦ ἀπὸ κλήρου, διελθὼν ἐκάστω μερίδα, κατὰ κλήρον ἐκάστω δόσιν εἰμας. καὶ τῷ μὲν πρῶτῳ υἱῷ Σὴμ ὤρετοσε κλήρον δὲ τὸ Πέρι δὲ, καὶ Βάκτων ἕως Ἰνδικῆς· μέσῳ δὲ κλήρῳ ἕως Ῥινοκέρας· καὶ τῷ αὐτῇ ἢ Ῥινοκέρας ἀνὰ μέσον Αἰγύπτου καὶ Παλαιστίνης, ἀντικρὺ δὲ Ἐρυθρᾶς θαλάσσης. Χαμ δὲ τῷ δόσιν εἰμας δὲ τῷ αὐτῇ Ῥινοκέρας ἕως Γαδείρων τὰ πρὸς νότον. Γαφὲθ δὲ τῷ τριτῷ δὲ τὸ Μηδάς ἕως Γαδείρων καὶ Ῥινοκέρας τὰ πρὸς βορρᾶ. τῷ δὲ Σὴμ παῖδες καὶ παίδων παῖδες ἕως δὲ αἱ γλώσσαις διμερίσθησαν, καὶ εἰσὶ διασπαρμένοι ἐν γλώσσαις· καὶ ὁ νόμος αὐτῶν εἰσὶ.

Ex his igitur tribus Jani filiis, LXXII. coloniarum duces prodiisse, tam Mosaica quam Berosiana loquuntur monumenta, è quibus, LXXII. (ut diximus) primariæ orbis terrarum regiones ortum pariter ac nomen habuerunt. Ast ego ex his tantum eos referam, per quos Cenomanorum nostrorum manavit origo: seclufis iis omnibus, qui ad hanc rem minime pertinent. Itaque primo Chamesem Jani filium, quem Hebræi Cham, Ægyptii vero Chem & Chemefenum, Zoroastremque, ac Saturnum suum nominant, quattuor filios genuisse Moses quidem ipse, & Hebræi omnes asserunt: quorum apud Hebræos propria hæc sunt nomina: Chus, Mesraim, Chanahan, Phut, è quibus priorem Chus (qui à Beroso Chur appellatur) Æthiops ac Curetes genuisse præter Berosum Josephumque auctor quoque ille Græcus, cujus supra mentionem fecimus, ita scribit: filii Cham Chus, à quo Chusæi Æthiopes. Hinc & à Semiramide Chus Saturnum Æthiopem nuncupatum fuisse percepimus, in columna, quam Nino regi eam crexisse Xenophon tradit: in qua subscripta excisa erant verba, quibus Ninum maritum ita loquentem induxerat:

MIHI PATER IVPPITER BELVS

i. Nimbrotus

AVVS SATVRNVS BABYLONICVS

i. Chus

PROAVVS CHVR SATVRNVS ÆTHIOPS

i. Cham

ABAVVS SATVRNVS ÆGYPTIVS

i. Noach

ATAVVS COELVS PHOENIX OYGES

AB OYGE AD MEVM AVVM

SOL ORBEM SVVM CIRCVMLVSTRAVIT

i. Fluxerunt anni C. XXXI.

SEMEL AC TRICIES ET CENTIES

i. LVI.

AB AVO AD PATREM, SEXIES ET QVINQVAGIES

i. LXII.

A PATRE AD ME, BIS ET SEXAGIES

COLUMNAM, TEMPLVM, STATVAM,

IOVI BELO SOCERO, ET MATRI RHEÆ

IN HOC OLYMPO SEMIRAMIS

DICAVI

A Mesraim vero alterum Chamefis filium initio Ægyptum tenuisse, & ab eo Ægyptios fuisse cognominatos, Josephus, Hieronymus, Augustinus, alique omnes tam Hebræi quam Græci, Latini-que sacrarum Litterarum Interpretes constantissime tradunt: in sacris siquidem Litteris Ægyptum ubique *Mesraim* appellari solitam neminem ignorare arbitror, qui vetus saltem Hebraice legerit Instrumentum: sed & Auctor ille ἀνάμνησις: *Mesraim*, inquit, à quo *Mesrai* Ægyptii: & Suidas: *Meferem*, inquit, est Ægyptus. Verum multa hoc loco de Mesraim hoc Chamefis filio scitu nequaquam indigna sese nobis offerunt, quæ jampridem ex priscorum monumentis magno labore pervestigavimus: quibus explicandis, quoniam haud est satis idoneum nunc tempus, cum sit res ipsa multiplex, ac majoris otii, multumque etiam laboriosa, non equidem invitæ ea prætermittam. Vereor autem ne etiam fortasse vobis nimis antiqua & jam obsoleta videantur.

B Tum Marcus, Ita ne nos, inquit, Marsili, cum in summam adduxeris expectationem, deferis? Atqui hæc minime vetusta, aut obsoleta nobis videri poterunt, qui te hisce de rebus ut discereres, præsertim rogaverimus: quæ autem fieri potest, ut ea nobis obsolescant, (de me saltem loquor) quæ nihil dum audierimus? aut ab aliis (qui sciam) scripta legerimus? quamobrem perge obsecro; multum enim (ut opinor) ad eam priscarum rerum cognitionem, quam quærimus, explicatio tua ista profecerit.

C Et ille, Et si hæc, inquit, sunt, ut Græci dicunt, τὰ ἐγὼν, ne non tibi tamen, Marce, vel petenti, vel jubenti morem gefisse videar, ejus attingam, vel magis feligam eam partem, quam memoratu aut cognitione digniorem esse perspexero.

Tu vero, ut videtur, inquit Marcus: sed aveo audire quæ polliceris.

D Tum Marsilius, Complures, inquit, à me, viri optimi, tum firmissimæ rationes, tum locupletissimæ quoque doctissimorum hominum auctoritates in medium afferri possent, & unaquæque earum multis etiam argumentis confirmari, quibus facile admodum ostenderem Mesraim istum, de quo nunc loquimur, Osridem illum Ægyptium existisse, quem & Apim, & Serapim, & Dionysium Libycum, & Jovem justum Olympicum, appellari solitum accepimus: ni; quum brevitati studeamus, ea res longius nos ab instituto traheret. Proinde hac una, quam nunc referam, ratione, eaque omnium vel firmissima, vel clarissima, contenti erimus. Principio satis vos existimo ex his, quæ supra diximus, intellexisse, Cham illum, sive Chamesem, Jani filium à priscis Saturnum Ægyptium fuisse cognominatum: quod & Semiramis in columna, & Berosus quoque noster hisce verbis eruditissime expressit, dicendo: At vero Cham, quum publice corrumpere mortale genus, asserens, & re ipsa exsequens, congregiendum esse; ut ante inundationem, cum matribus, sororibus, filiabus, masculis, brutis, & quovis alio genere, ob hoc ejectus à Jano piissimo, & castimonia, atque pudicitia refertissimo, sortitus est cognomentum Chemefenua, id est, Chem infamis, & impudicus, incubus, propagator: est enim Essem apud Scythas Aramaeos infamis, & impudicus, Enea vero tum impudicus, tum propagator. Eum inter homines hujus dogmatis secuti fuerunt Ægyptii, qui sibi illum suum Saturnum inter Deos adolescentiorem fecerunt, & civitatem illi posuerunt dictam Chemmin: à qua ad hanc ætatem omnes cives illius appellamus Chemmenitas: verum posteri hoc vitiosum dogma neglexerunt, retento quod fuit primi moris, ut inter fratres & sorores conjugium iniiri posset. Hæc ille. Quum autem is Ægyptiorum Saturnus ex sorore pariter & conjuge Rhea filium suscepisse Osridem nomine, una omnium voce prædicetur, eumque totius Ægypti imperium tenuisse

nuisse contendant universi, ecquid causæ esse potest, cur non eundem censeamus esse Osirim, qui & Mesraim est? quem jam supra demonstravimus, & Cham, sive Chamesenui filium, & Ægypti regem existisse? quum itidem ex Chamesenuo Rheaque natum fuisse ac generatum Osirim, ejusque sororem Isidem (ut interea fileam & Diodorum Siculum, & Plutarchum, nec non & Osirianam columnam, quam tamen, si tempus suppetet, non multo post referam) cum primis clarissime doceat idem ille Berofus; quem ego auctorem vehementer sequor: cujus è quinto volumine, diversis tamen in locis, verba hæc sunt: *Eodem, inquit, tempore Triton reliquit filium Hammonem regem Libya, qui accepit conjugem Rheam sororem Chamesenui Saturni Ægyptiorum, sed tamen ex Almanthea adolescentula, clam Rheam, Dionysium sustulit, & in Nysam urbem Arabia educandum misit.* Deinde paulo infra: *At apud Libyam lis orta est inter Rheam & Hammonem ob stuprum admissum cum Almanthea: quarebatque Rheam ubi Dionysius esset, ut eum perderet: & diu lis ista, rixaque perseveravit.* Et iterum: *Interea cum Italia discessisset Chamesennus; ad illum Rheam venit, & illi nupta, ambo contra Hammonem cum Titanibus pergunt: ibique bello commisso, pellunt regno Hammonem, & in Cretam cogunt, quum in Libya Chamesennus regnat, parit ex Rheam sorore Osirim, quem cognominavit Jovem.* Et paulo post iterum: *Eadem tempestate Dionysius Hammonis filius armis sumptis Rheam & Chamesennum regno paterno pellens & secum Osirim retinens, in filiumque adoptans, eum à patre suo Hammonem Jovem cognominavit, uti à magistro Olympo Olympicum: eique totius Ægypti regnum tradidit.* Et rursus: *Hujus, inquit, (scilicet Semiramidis) primo anno oritur ex Rheam & Chamesenuo in Ægypto Juno Ægyptia, cognominata Isis, maxima, frugifera, legisera soror, & uxor Osiridis, & quæ sequuntur.* Quæ cum ita sint, perspicuum omnino est, quamvis nondum quisquam (qui sciam) id aperte dixerit, scriptumque reliquerit, eundem penitus fuisse Mesraim, qui & Osiris dicitur: cujus adeo multa ac diversa fuerunt nomina atque cognomina, (quot enim sunt hominum linguæ, tot esse Deorum nomina scite admodum apud Ciceronem Cotta loquitur) ut plerique eum tum Solem, tum Liberum patrem, ac Dionysium existisse crediderint: quemadmodum clarissime videri potest apud Diodorum Siculum, Eusebiumque, ac Macrobius, tum etiam apud Ausonium vatem, apud quem illud est epigramma XXIX.

Ogygia me Bacchum vocant:

Osirim Ægyptus putat:

Mystra Phænecem nominant:*

Dionysium Indi existimant:

Romana sacrum Liberum:

Arabica gens Adonium:

Lucaniacus Pantheum.

Verum hanc nominum confusionem ob id præcipue accidisse contenderim, quia Græci, ut sæpe jam diximus, non tantum ritus & sacra veterum Deorum, sed etiam nomina eorum ac cognomina suffurati sunt: quorum princeps Orpheus, ut Demosthenes asserit, hujus Osiridis sacra ac ceremonias, nec non & cognomina, ex Ægypto advexit in Græciam, & in Jovis ac Dionysii Orgia transtulit. Quamobrem varias discrepantesque antiquorum Scriptorum de Osiridis nomine sententias Plutarcho Cheronæo insinuante didicimus eo in libro, qui ab eo de Osiride ac Iside ad Cleam mulierem editus est: quo quidem opusculo omnia ferme, quæ veteres Historici ac Philosophi de his tradiderunt, elegantissime complexus est: ubi illud in primis refert, Ægyptios credere, Osirim illum ex Saturno & Rheam natum fuisse, eumque, tanquam Ægyptiorum omnium Deorum ac Regum principem, oculo & sceptro in sacris eorum litteris, quæ ἱερογράμματα nuncupantur, inscribi solitum: ac in ocu-

* Alii Phænecem.

lo quidem providentiam numinis, in sceptro autem potentiam declarari. Nomen vero Osiridis quosdam interpretari *multioculum* inflexione ducta, quod verbum OS, quod prima est hujus vocabuli syllaba, lingua Ægyptiaca idem significet quod *multum*; reliqua autem hujus nominis pars, quæ est IRIS, idem sit quod *oculus*: alios tamen dicere nomen Osiridis, *Ὁσίρις ὁ ὁσίος, ὁ ἱερός*, id est, *à sancto, & sacro* compactum fuisse: quia communis ratio sit rebus cœlestibus & inferis, quarum priores sacræ, posteriores sanctæ à Veteribus appellarentur. Et post multa, quæ sub copiosa verborum ac rerum occultissimarum densitate luculentissime tradidit, quæque ob hoc solum nobis prætereunda sunt, ne usque ad fastidium sermo protrahatur, hoc postremo adjungit: Ægyptios recte dicere Osirim & Liberum patrem eundem fuisse, mox Osirim natura mortali exfuturum, Apim ac Serapim appellatum, (consueverunt enim gentes, ut auctor est Lactantius, immutare nomina hominibus post mortem consecratis) per hæc Serapim Deum esse omnibus communem, qualem & Osirim norunt, qui ejus sacris initiati sunt: hinc Heraclitum physicum putare Serapim esse Ditem, sive Plutonium, ac Liberum patrem: præterea non recte affirmare Philarchum, Liberum patrem primum fuisse, qui ex India in Ægyptum duos boves adduxerit, quorum alter Apis, alter Osiris vocaretur: sed commodius Ægyptios sacerdotes existimare, duo nomina Osirim & Apim in unum Serapim coisse, coaluisseque, ac si *Osirapim* diceremus. Apidem porro ut speciosam imaginem Osiridis credi. Hæc atque alia complura facundissimus ille, eruditissimusque, Philosophus tradit: quibus si ea quoque, quæ de Osiridis præclarissimis rebus gestis Berofus ac Diodorus Siculus scriptis mandarunt suis, quam brevissime fieri poterit, adjunxerimus, (quamquam id à me minime exigeritis) satis me veltris fecisse votis existimabo.

Ferunt igitur regnante Osiride, quem Moses *Mesraim* vocat, inopem vitam & ferinos mores ab Ægyptiis depulsos fruge monstrata, ac legibus constitutis, publicatoque Deorum cultu: cum præterea Osirim scriptitant tanquam virum optimum, famæque cupiditate adductum Ægypti regno constituto, ac rerum omnium cura Junoni Isidi forori, conjugique, tradita, coacto ingenti exercitu, universum peragrassè orbem, domuisseque, ac curofocuisse hominum genus, non armis & bello compulsus, sed sermone blando magna ex parte adductus, suavisque cantilenis illectus: quumque agriculturæ rudes adhuc essent homines, & pastoritiam tantum vitam agerent, docuisse eos & ferere arbores, & putare vites, & arare terram: unde illud præclare apud Tibullum*:

Te canit, atque suum pubes miratur Osirim

Barbara, Memphitem plangere docta bovem.

Primus aratra manu solerti fecit Osiris,

Et teneram ferro sollicitavit humum.

Primus in experta commisit semina terra,

Pomaque non notis legit ab arboribus.

Hic docuit teneram palis adjungere vitem,

Hic viridem dura cadere falce comam.

Illi jucundos primum matura saporis

Expressa incultis nova dedit pedibus.

Hujus igitur tot & tam ingentia merita ita Ægyptii remuneranda censuerunt, ut cum Apim ac Serapim cognominantes, sacrosque eidem tauros dicantes, hunc quidem Apim, alterum vero Memphitem nominatos, præclarum ejus nomen ac memoriam perpetua veneratione celebrarent: tametsi non sum nescius Diodorum scribere, alia quoque de causa tauros Osiridi dicatos fuisse: nempe quod hæc præcipue animantia frugum inventoribus Isidi videlicet, atque Osiridi maximo usui, adjumentoque, & ad ferendum, & ad communem agro-

* Lib. I. eleg. VII.

rum culturam existisse commemorantur : unde Eustathius in *Dionysium Libym* refert , Tauros populos ab animali quadrupede tauro cognominatos , propterea quod ibi junctis bobus Osiris terram araverit . Ob id consuevisse priscos homines in numismatibus altera quidem ex parte regem , altera vero bovis effigiem extundere , auctor est doctissimus Homeri Interpres : *Ἐκατόμβοι* , inquit , *ἑκατὸν βοῶν πμῖς ἀΐει* , ἡ ἑκατὸν χρυσῶν νομισμάτων . οἱ δὲ δῆχαιοι πμῶνται τὸ ζῶον τὸν βοῶν , *Διὰ ποτὰ μὲν* , καὶ ὅπ δὲ ἔργον ἐστὶν ἐνεχάεσθαι τῷ μὲν ἐν μέρει τῷ νομισματὶ βοῶν , τῷ δὲ ἐτέρω , τὸ τῷ βασιλέως προσωπον .

Cæterum his rebus ita gestis , illud postremo Berofus & alii tradunt , Osirim ipsum devictis , sublatisque in toto orbe terrarum infestissimis gigantibus , ac tyrannīs , in Italiam demum anno post diluvium *DXLIX.* pervenisse , ejusque imperium annis ferme decem cum obtinuisset , & à suo cognomine Apeninam in triumphum appellasset , posthæc in Ægyptum reversum columnam erexisse ; octavoque supra vigesimum imperii sui anno cessisse vitæ , sepultumque in Olympo monte una cum Ifide conjuge : qui mons est in Æthiopia Ægypti secundum mare Erythræum : quod quidam à colore (sed an recte nescio) Rubrum vocant , non procul ab Heliopoli : hunc ajunt nonnulli ab ortu Solis ad quartam usque diei horam flammam emittere . Plerique tamen scribunt Osirim non in Olympo monte , sed in Memphi civitate fuisse conditum , quod Memphim nonnulli portum boum , alii Osiridis tumultum interpretentur .

Cæterum his ita traditis (ut & aliquantulum vager , & ne qua ex parte nostra desideretur oratio) illud minime inexplicatum præterierim , Italiam scilicet , ut & antea leviter attigimus , ab hoc Osiri , sive Api , quem Antiochus Taurum , Cicero sanctum Ægyptiorum bovem interpretatur , Apeninam , id est , Taurinam fuisse cognominatam : id enim Berofus & Cato vel soli (quod meminerim) apertissime scriptitarunt : è quæis Berofus , *Vigesimo* , inquit , nono Belochi decimi Assyriorum regis anno apud Celtiberos Lomnini florebat , & edificaverunt à suo nomine urbem magnam Lomniniam . Anno autem sequenti Itali oppressi à tyrannis gigantibus in tribus Palensanis , advocaverunt Osirim , qui cum coloniis ad Histri vicinos fontes pervenerat . Osiris vero tota Italia potitus , decem annis illam tenuit , & à se nominavit in triumphum : & sub ditione positis gigantibus , regem Janigenis reliquit Lastrigonem gigantem , sibi ex filio Neptuno nepotem . His rebus gestis in Ægyptum reversus columnam , qua permanet , inscripsit in monumentum expeditionis sue per totum orbem . Hæc hic . Quum ergo Osiris rex , Italiæ nomen dederit , utique eam à cognomine suo *Apiam* , sive *Apeninam* , appellasse consentaneum est : à quo antea & Peloponesum *τὴν Ἀπίνω γαίῳ* , ut est apud Homerum , cognominaverit . Ita enim Antiochum Syracusanum (ut video nostrum Catonem scribere) affirmare solitum accepimus : *Italia enim* , inquit ille , *complura à Diis & Ducibus sortita fuit nomina : à Jano quidem Janicula* , quem quidam Oenotrium dictum existimant , quia invenit vinum & far : *Chamesena vero à Chamese* , & à Saturno *Saturnia* , *Saleumbrona quoque à gentilibus* . Duravit Saturnia nomen totidem ferme annis , quot aurea ætas usque ad Apim Deorum Italiæ ultimum , ut Antiochus Syracusanus scribit : à quo Apenina , quam Taurinam idem interpretatur : etsi Græci de more quidam à bobus Hercules , quas opimos gignit Italia , ut ait Hellanicus ; aut à vitulo egresso , ut ait Herodotus , vel quod quidam Græci boves vocant Italos , ut fabulator Timæus , dictam existiment . Inde à duobus fratribus , altero Hesperia , altero Italia , postremum nomen retinuit . Hæc Cato . Præterea ab eodem Api in Italia Taurisum civitatem , quam corrupte Trivisum dicunt , nec non & Taurisanos populos (quos etiam Tauriscos Strabo appellat , dicens : Quoniam à Polybio proditum est , sua ætate apud Aqi-

A *lejam* , maxime vero in Tauriscis & Noricis inventum fuisse aurum) conditos fuisse , idem Cato testatum reliquit : *Taurisanos* , inquit , *Persæ gentem ab Apendice conditam asserunt* . Quare hinc & Taurisum urbana nomen traxisse quis est qui dubitet ? & montes quoque Taurisanos , de quibus erudite Plinius . Venetia , inquit , *cujus fluvius Silis è montibus Taurisanis* . Sed hæc satis . Nunc quoniam quæ de Osiride postulasti , Marce , jam absolvimus .

Tum Marcus eum interpellans , Verum , inquit , profecto dicis , Marsili , sed si eam quoque Osiriana columnæ inscriptionem , cujus Berofus meminit , & quam antea promissisti , reddideris , tum mehercule confecta res isthæc ex mea penitus erit sententia : existimo enim te in ea referenda , explicandaque , novi aliquid , ut soles , allaturum .

Tum Marsilius , O miram , inquit , memoriam , Marce , tuam ! at ista mihi jam exciderant . Itaque ut tibi omni ex parte morem geram , ad Diodori Siculi me nunc libros convertam : cujus hæc sunt ex priori volumine de ea Osiriana inscriptione , quam requiris , verba : *Hand vero* , inquit , *inscissum* , à nonnullis scriptoribus tradi horum Deorum sepulchra in Nysa Arabia sita , à qua Nysæum Dionysium appellant , esse autem utrique dicatam columnam sacris sculptam litteris tradunt . Inque columna Osiridis hæc scripta dicuntur .

C
MIHI PATER SATVRNVS DEORVM OMNIVM JUNIOR. SVM
VERO OSIRIS REX, QVI
VNIVERSVM PERAGRAVI ORBEM VSQVE AD DESERTOS INDORVM FINES: AD EOS QVOQVE SVM PROPECTVS, QVI ARCTO SVBJACENT VSQVE AD HISTRI FONTES. ET ALIAS QVOQVE ORBIS ADII VSQVE AD MARE OCEANVM PARTES. SVM SATVRNI FILIVS ANTIQVIOR: GERMEN EX PVLCHRO ET GENEROSO ORTVM: CVI NON SEMEN GENVS FVIT. NEQVE VLLVS EST IN ORBE, AD QVEM NON ACCESSERIM, LOCVS, DOCENS EA, QVORVM INVENTOR FVI.

D
E
F
Quo quidem in Osiriano Epigrammate illud inprimis scitu quam pulcherrimum atque optimum judicamus , Janum patrem , quem supra in Semiramidæa columna Cælum fuisse nuncupatum audivimus , eundem nunc doctissime ab Osiride , *Non semen* , id est , castratum appellari , (Janum autem sive Noach patrem fuisse Chameis Saturni Ægyptiorum , Chamesem vero Osiridis , jam satis supra demonstratum est) quo profecto cognomine historiam mehercule perreconditam de Jano & Chamese pauculis admodum verbis attigit : quam tamen nuper apud Berofum Chaldæum copiose ac diligenter explicatam reperi : cujus verba , quia memoria teneo , non illibenter expromam : Cæterum , inquit , Noach antequam discederet ab Armenia , docuit illos simplicem agriculturam , magis curans religionem & mores , quam opulentiam & divitias , quæ ad illicita & libidines provocant , & cælestium iram nuper induxerant . Primus tamen omnium invenit vires , atque plantavit , & vinum conficere docuit : cujus vim expertus , & vapore ebrius effectus , minus pudice in terram cecidit : erat autem illi , ut diximus , filius ex tribus primis adolescentior Chem , qui semper magica & venefica studens , Zoroastri nomen consequutus erat . Is patrem Noach odio habebat , quia alios ultimo genitos ardentius amabat , se vero despici videbat . Potissime vero idem insensus erat patri ob vitia . Itaque nactus opportunitatem , quum Noach pater madidus jaceret , illius

virilia comprehendens, taciteque submurmurans, carmine magno patri illisit: simul & illum sterilem perinde ac castrum effecit: neque deinceps Noach femellam aliquam facundare potuit: ob beneficium tamen inventa vitis, ac vini, dignatus est cognomento Jano, quod Aramais sonat vitifer & vinifer. Quocirca illud Græcorum impudentissimum sane furtum, apertissimumque mendacium, non satis digne mirari queo, qui (ut sunt genus hominum, auctore Plinio, in sui gloriam effusissimum) rem hanc tam inconcinne, tam etiam fabulose ad Saturnum Cretensem transtulerunt. Nam, ut inquit Cicero, vetus hæc opinio Græciam opplevit, exsectum Cælum à filio Saturno, vinctum autem Saturnum à filio Jove. Sed de his disseruerunt & subtiliter, & copiose, Diodorus ac Lactantius Firmianus, & alii complures rerum gestarum scriptores, quos propter rationem brevitatis ac temporis prætereundos arbitror: tempus enim me citius, quam oratio deficeret, si ea omnia, quæ hisce de rebus non incommode dici possent, enumerare velim: etenim in singulis rebus ejusmodi materies est, ut dies singulos possim consumere: quanquam & hæc uberius fortasse diximus, quam aut ipse decreveram, aut historicorum usus plane desideret. Sed cum ea essent vel nova, vel recondita, ac taceri ullo modo nequirent, strictim omnia, ac summam, ut putaram, afferri pro dignitate non potuerunt. Itaque ad tertium Chamefis filium redeamus. At vero Chanahan tertius Chamefenui filius, quem Phœnicem Græci dicunt, omnem Phœniciæ partem, quæ initium capit à Damasco, protenditurque usque ad Gazam extremam Palæstinorum urbem, tenuisse Berofus refert: Chanahan, inquit, posuit colonias à Damasco usque in extrema Palæstina. Itaque totam illam regionem, quæ & Damasceam, & Galilæam, & Samariam, & Judæam, & Palæstinam, & Idumæam complectitur, à Chanahan isto sive Phœnice Chananaam & Phœniciam nuncupatam ferunt divinarum Scripturarum interpretes. Phut autem postremum Chamefis filium, qui ab Ægyptiis quidem Phet, à Liguriis vero Pheriton, à Græcis autem, Latinisque Phaethon cognominatus est, in ea Mauritania parte, quam Libyam incolæ vocant, initio colonias posuisse, & à se Phutensem, sive dicere mavis Phaethonteam, nuncupasse, præter Josephum Judæum, Hieronymus quoque noster aperte scriptum reliquit. Phut, inquit, est Libyes: à quo & Mauritania fluvius usque in præsens Phut dicitur, omnisque circa eum regio Phutensis: multi Scriptores, tam Græci quam Latini, hujus rei testes sunt. Hæc ille. Hinc & Græcus ille auctor ἀνώνυμος: Phut, inquit, à quo Phutæi Libyes. Is itaque Phaethon quom regnum in Phaethontæis, qui postea à Libyco Hercule devicti, in imperantis nomen, gentemque concessere, multos annos obtinisset: tandem una cum filio Ligure, & nepotibus, & coloniis ex Africa & Ægypto in Atticam, & ex Attica in Italiam, ante Græcos omnes, colonias navibus transvexit, posseditque omnia ferme Transpadana loca, ac totum Eridanum, anno, teste Beroso, post diluvium ccccl. ita enim ille: Anno, inquit, penultimo Aralii septimi Assyriorum regis, classe venit ad Maloth Tagetem Janigenam Razennum Phaethon cum suis: qui inveniens omnia ab Ausoniis occupata ab Oriente, & montana à Gallis & Aboriginibus possessa, planitiem vero à Razennis Janigenis habitatam, donatus fuit parte Occidentali, posseditque cum sua posteritate montes, & totum Eridanum usque in regionem proximam Istris, relinquens nomina locis. Ex hoc loco Catonem ac Sempronium auctoritatem sumpsisse perspicuum est, dum asseverant, Phaethontem primum ex Attica in Italiam cum coloniis transfretasse; quamquam Dionysius Halicarnassæus eos acriter admodum vexet, cujus verba hesternæ in disputatione retulimus. Verum ei Plinius scite admodum pro Catone, Sempronioque, respondens: Pudet, inquit, à Græcis Italia rationem mutuari: nempe quia propriam omnino nesciunt, & de ea invicem altercantur. Sed de his alias fortasse plura etiam di-

A cemus. Cæterum, ut inquit Livius, quum Thufci omnia loca, quæ trans Padum sunt, primi tenuerint, excepto Venetorum angulo, qui sinum circum incolunt maris, primus omnium Phaethon Venetos fundavit, totumque illum Venetorum angulum tenuit: quemadmodum Cato ac Sempronius tradunt. Venetis, inquit Cato, prima origo Phaethontæa est, quæ Græcis occasionem mentiendi de Phaethonte & Eridano præbuit: posterius mixta his nobilis stirps Trojana: à quibus Patavium suo conditore inclutum. Sempronius autem: Nam usque Adriaticum fluvium, qui limes est Volturrhenorum & Venetorum, tenere Hetrusci. Et Venetiam principio quidem Phaethontæi, postea Trojani eisdem mixti coluerunt. Hinc ergo perspicuum est principio quidem Phaethontæam à Phaethonte, postea vero Venetiam à Veneto ejus abnepote appellatam fuisse; uti postmodum enodatus explicabimus.

Ceterum hujus Phaethontis filium fuisse Ligurem Berofus, & Cato, & alii tradunt: à quo & Ligures populi, & Liguria Hetruriæ regio maritima nomen habuere, dicente Catone: Hetruria olim Italiæ princeps ab eorum Metropoli regia sic cognominata, à Tyberi in Macram diffunditur. Gens prima illorum maritima Ligurum, dicta à filio Phaethontis Ligure, quem montani Ligures Pherithon nuncupant: post Tyberina ostia Pheregenæ primum Hetruriæ oppidum in vicino littore, dictum à Genio Jano, qui primus ibi colonias posuit, & à Pherithone, id est, Phaethonte, qui colonias adjecit, uti in Liguria montana, ubi à Genii coloniis, Genua oppidum; & ab adjectis Pherethianis ad idem coloniis, amni proximo & regioni Pherethianæ nomen reliquit. Primus omnium Græcorum Phaethon ex Attica solvens cum Ligure filio, multis ætatibus & sæculis ante Oenotrium Arcadem, colonias adjecit Italico littori ab Ostiis Tyberinis usque ad Nicæam Massiliensium: & in medio portum Ligurinum à filio nuncupans, ultro citroque littus omne Liguriam dixit. Hinc & Sempronius: Ligures, inquit, dicti sunt à Ligure Phaethontis filio, qui omnium primus, multis sæculis ante Græcos, ex Attica colonias in Italiam transportavit: adjecitque atque miscuit antiquissimis Italiæ populis, ab Ostiis Tyberinis usque Nicæam: hinc Veteres omnem maritimam dixerunt Liguriam. Fuit itaque Ligur Ligurum rex ac conditor, ac Hetruscorum regulus, quandoquidem Liguriam Hetruriæ principem maritimam regionem esse, scribit Cato, atque alii omnes tradunt. Unde & diversa variis in locis sibi Ligures adscivisse nomina C. Sempronius scribit. A Nicæa enim ad Macram, inquit, tenent Ligures montani, origine Phaethontæi: à Macra item ad Arnum, & portum Ligurinum incolunt Hetrusci cognomine Ligures Apuani: quos sequuntur Ligures Hetrusci Populonii à Ligurino portu ad caput Hetruriæ, à quo ad Tyberim sunt Hetrusci Ligures Tyrrheni, in quibus sunt campi completi lapidum, clari pugna Herculis, adhuc Lamones dicti, ab ipsius filio Lamone. Regnavit autem Ligur apud Ligures Hetruscorum populos, anno ferme à diluvio cccclxxx. ita enim Berofus: Hujus, inquit, Balei Xerxis octavi Assyriorum regis temporibus, apud Ligures Phaethon relicto filio Ligure regressus est in Æthiopiam. Genuit vero Ligur iste, uti idem Berofus in genealogiis auctor est, filium, quem Syro, Chaldæove sermone Cydnum appellavit. Quicquid enim candidum est, ut Solinus scribit, Syri gentili lingua Cydnum vocant. Unde & amni Ciliciæ nomen inditum asserit: de quo illud est apud Tibullum*, poetarum suavissimum:

An te, Cydne, canam? tantis† qui leniter undis
Carulens placidis per vada serpis aquis?
Tametsi non sum nescius & Lycophronis interpre-

* Lib. I. eleg. VII. † Alii legunt tacitis.

tem, & Theocriti enarratorem, tradere, id Cydno nomen piscatores quosdam indidisse, quum illum è mari sustulissent, Cynis plurimis circa eum volantibus. Cæterum is Cynus à patre Ligure, Ligurum Hetruscorum rege, cum coloniis missus, omnem Transpadanam Galliam, quæ spectat inter occasum Solis & Septentriones, proximam Venetis, qui trans Attrianum flumen incolunt, initio tenuit, in eaque civitates multas montanis præsertim in locis exstruxit: à quibus Orobiolorum cognomen adepti sunt ii populi, qui tum ab auctore, conditoreque, Cydno Cydnomani dicebantur: ejus tamen liberi, ut postea demonstrabimus, usque ad Istrum imperii ac regni sui fines protulerunt. Quibus è rebus judicare ipsi facile quidem ac recte potestis, Orobiolorum nostrorum, sive Cenomanorum, originem (ut hesternæ die dicebamus) à Janinæo, Hebræoque fonte ita defluxisse, quemadmodum,

Ionium mare ex Aegeo, Aegeum ex Helleponto, Hellepontum ab Euxino, Euxinum è Maotide palude,

Maotidem vero demum ab Oceano omnium parente,

Εξ ὧ περ πάντες ποταμοί, ἢ πᾶσα θάλασσα,

Καὶ πᾶσαι κρήναι, ἢ φρεῖατα μακροὶ νάεσσι,

oriri multorum testimonio proditum est. Cydnum siquidem Cydnomanorum patrem ex Ligure, Ligurem ex Phaethonte, Phaethontem ex Chamefe, Chamefem vero ex Jano omnium patre, ortus sui initium traxisse, enucleate jam satis ostendimus. Sed tamen idcirco ad Janum illum supremum quasi quoddam mortalium omnium caput, à quo hominum genus omne processerit, principem Cydnomanorum originem referre maxime placuit, ne cui fortasse vestrum lutulenta Chamefis vitia, (si eum Cydnææ originis auctorem ac principem constituissem) quæ à Mose, quæque à Beroso referuntur, stomachum facerent: nimirum illud sibi vitio ac probro verti existimans, quod ab homine post homines natos turpissimo, sceleratissimo, omnium denique immanitatum ac libidinum maculis notatissimo, ortum traxisse contigerit: quamquam (ut mea fert sententia) nulla ejusmodi ortus ratio sit habenda: nam ut viris temperatissimis, sanctissimisque moribus ac virtutibus præditis, ad felicitatem comparandam nihil obest insolens ac facinorosa majorum vita, sic etiam hominibus sine ulla bona arte, sine litteris, humanitate, ingenio, moribus, quid tandem arbitramur avorum nomina parentum virtutes, quid generosum omnino prodesse genus? quum præsertim, auctore Sallustio, quanto vita majorum præclarior est, tanto posterorum socordia sit flagitiosior. Itaque, ut multa nunc exempla Veterum præteream, quemadmodum Chamefi illi nihil penitus ad optimos mores adsciscendos sapientissimi prudentissimique patris sui Jani eximiae virtutes, quibus illum maxime cæteris præstasse Berosus scribit, profuerunt: nec contra Jovi justo Osiridi hujusce Chamefis filio, quem, ut antea disserui, præclarissimo Ægyptiorum regno, vel orbis potius imperio, quamdiu vixit, præfuisse, obque ingentia ejus in omnes mortales merita inter Deos referri, ac divinos honores meruisse veteres historici memoriæ prodiderunt, nequaquam teterrima patris facinora obstiterunt, quin & clarissimus imperator, & felicissimus rex habitus sit: sic ego existimo Phaethonti, aut nepoti Cydno, minime dedecori, aut vitio dandum, quod ex impurissimo, contaminatissimoque, Chamefe originem duxisse contigerit. In his enim, quæ non à consilio, aut voluntate, sed ab eventibus potius quibusdam causis proveniunt, nulla omnino laus posita est, aut vituperatio. Quum autem vel ex probo, vel improbo nasci genitore in nostra minime situm sit potestate, sed magis casui atque eventui adscribi soleat; omnino perspicuum est, eos, quibus impuri, flagitiosique parentes obtigerint, ab omni penitus dedecore alienos esse: alioquin non modo Cenomanis, verum etiam cæteris triginta duobus populis, qui eodem è Chamefe pro-

A cesserunt, inurenda hæc esset ignobilitatis, infamiæque cicatrix: è quibus celebriores ferme fuerunt Æthiopes, Ægyptii, Taurisani, Phaethontæi, Libyci simul & Italici, Chananæi omnes, ac Phœnices, Assyrii, Babylonii, Tartessii, Arabes, Lydii, Afri, Veneti, Ligures, aliique complures, de quibus vós videritis, qui Mosen, Berosum, ac Josephum legitis: quos tamen populos à priscis rerum gestarum scriptoribus non nisi maximis semper laudibus ab antiquitate, ab incolarum moribus, institutis, legibus, à Deorum cultu, sacrorum peritia, à maximis denique rebus gestis ornari solitos, nemo est qui non exploratum habeat.

B Quamobrem, mi Marce doctissime, vosque fratres optimi, nihil vos paterna, nihil avita ostendant vitia; sed spretis his omnibus, quæ sicut nec felicem præstant hominem, sic nec à felicitate quenquam deturbare possunt: eia agite illud, quo nihil est nobis solidæ laudis ac veræ nobilitatis præstantius, nihil optabilius ad immortalitatem gloriæ, nihil denique ad memoriam nostri nominis sempiternam excellentius potest accidere, virtutem scilicet, qua, ut inquit Isocrates, nulla neque gravior est possessio, neque stabilior, nec non & præclaram optimarum artium doctrinam ac sapientiam, quæ sæpe in amplissimo & dignitatis, & laudis gradu locare homines consueverunt, amplectamur: ita enim fiet, ut obscurum illud, atque improbum majorum nomen, quod quidem immerito posteris obrectatores probro & crimini dare solent, virtutum ac morum splendore, veluti quodam clypeo, facile admodum possimus obtegere. Verum intelligo me in causa aperta, minimeque dubia, multo fortasse & plura, & pluribus etiam dixisse, quam res ipsa postularet: sed id factum est, non ut vobis rem tam perspicuam dicendo probarem, sed ut malevolorum omnium, invidorumque, voculas ac reprehensionem frangeremus: qui eo sæpe negotio posterum famam ac splendorem maculari posse arbitrantur: ignari quid gravitas, quid integritas, quid magnitudo animi, quid denique virtus valeat, quæ, ut præclare inquit Cicero, in tempestate quieta est, & lucet in tenebris, & pulsa loco, manet tamen, atque hæret in patria, splendetque per sese semper, neque alienis unquam fordibus obsolescit. Sed jam ad Cydnum, à quo longe egressa est, referat se oratio.

C Est igitur annus ille, quo à Cydno illo Liguris filio orti sunt Cydnomani, quemadmodum ex Beroso computari facillime potest, à mundi quidem exordio MCLVII. à diluvio autem novimestri DI. atque ante clementissimi Servatoris nostri Jesu Christi natalem diem MDCCCIII. ita enim apud illum scriptum est: *Anno vigesimo Armavritis IX. Assyriorum regis, Ligur mist filium Cydnum, & Eridanum cum coloniis & fratribus, & nepotibus; & occupaverunt usque Istrum in Italia.* At vero ne quis forte dubitet qua in Italiæ regione Cydnus confederit, Pausanias, inter Græcos historicos doctrina, aut ingenio (ut mihi quidem videtur) nemini secundus, eo in libro, cui titulus est, *Ἐκείνη Περιήγησις*, id aperte admodum explicans† tradit Cydnum *Ἐλιδανῶς πέρεσιν ὑπὲρ γῆς τῆς Κελπικῆς βασιλείας*: id est, *In Gallia, quæ trans Padum est, regiam potestatem obtinuisse.* Ejus autem omnia Pausaniæ verba, quæ ad rem pertinent, in extrema hujusce dissertationis nostræ parte citabimus: nunc vero ad id quod instat. Hisce igitur rebus omnibus & quæ ad Italiæ, quæque ad Cenomanorum ortum, spectant, generatim ita traditis, consideratisque, nunc demum (si vobis videtur) non probabili modo argumentatione, verum etiam necessaria historicorum ratione concludere velim, Cenomanos ipsos à nemine alio, quam à Cydno, Liguris filio, fuisse genitos: res enim postulare videtur, ut eorum expectationi, qui audiunt, quam celerrime occurratur.

† In *Atticis* cap. xxx.

Atqui, inquit Petrejus, locus iste est tibi, Marfili, etiam atque etiam confirmandus: quem si obtineris, non modo nos, qui praesentes sumus, traducas ad te totos licebit, sed absentes quoque, & qui post aliis erunt in annis, si sic mihi loqui permittis.

Tum Marfilius, Quum praeclarissimarum, inquit, gentium, civitatum, locorumque vetustatem, atque ortum ab impositis nominibus periti rerum gestarum scriptores comprobare maxime consueverint, (uti Livius*: *Mari, inquit, supero & infero, quibus Italia insula modo cingitur, terra marique, Thufci quantum potuerint, nomina sunt argumento: quod alterum Thufcum communi vocabulo gentis, alterum Adriaticum ab Adria Thufcorum colonia vocavere Italica gentes. Graeci eadem Tyrrhenum, atque Adriaticum vocant*) ecquid causae esse potest, cur non Cenomanos à Cydno illo conditos appellatosque fuisse confiteri necesse sit? quum auctore Berofo certum illud sit, atque perspicuum, priscos omnes coloniarum duces nomina sua gentibus ac locis, quibus imperabant, duabus maxime de causis indidisse; quas dicam eisdem quibus ille verbis scripsit: *Hi sunt, inquit, qui egressi sunt post Nimbrotum singuli cum familiis & coloniis suis, relinquentes nomina sua locis in signum expeditionis à fano patre sibi commissa, & ad monumentum posteris, ut scirent quis eorum fuerit conditor.* At vero ab his nequaquam dissimilis ratio illa est, quam Lactantius Firmianus refert: *Saturnus, inquit, quum potentissimus esset rex, ad retinendam parentum suorum memoriam, utriusque nomina caelo & terra indidit: quum haec prius aliis vocabulis appellarentur. Qua etiam ratione montibus & fluminibus nomina sunt imposita, & mari: ut mare Icarium, Aegaeum, Hellespontus, & in Italia Aventinus, & Tyberis, ita Saturnus natus est ex homine, cui nomen fuit Urano, sive Caelo: quod esse verum Trismegistus auctor est, qui cum diceret admodum paucos existisse in quibus esset perfecta doctrina, in his Caelum, Saturnum, & Mercurium nominavit.* Hic haec. Itaque quum & ex Berofo, & Pausania satis constet, Cydnum in Transpadana Gallia Hetruscas, sive Ligusticas colonias posuisse, illud primum à vobis, viri ornatissimi, libenter admodum quaesierim, cuiam genti, cuive populo nomen suum indidisse Cydnum existimetis? An fortasse Insubribus? num Venetis? num Istris? num Volturrhenis, aut Libycis? minime gentium. Etenim vos tam exili ingenio praeditos haud esse arbitror, quin facile admodum vosmet ipsi, neque Cydni nomen hisce earum gentium nominibus congruere, neque illorum etymon ab eo ullo pacto trahi posse, animadvertatis. Itaque reliquum est, non aliis quam Cydnomanis ipsis Cydni nomen omnino fuisse impositum: idque quo firmius etiam credamus, F. Pictoris viri sane eruditissimi facile, ut mihi videtur, cogit auctoritas. Is enim priori volumine auctor est, apud Veteres denominandi, aut imponendi gentibus, aut locis nova nomina, tantum regum illustrium jus ac potestatem existisse: neque tamen omnium, sed illorum praecipue, qui essent aut Thufcorum reges, sive reguli, aut in fano, Hetruiae regni insignia à Thufcis Lucumonibus, aut regibus accepissent, si verissimo vati velut oraculo ita dicenti† credimus:

Templum augustum, ingens, centum sublime columnis,

Urbe fuit summa, Laurentis regia Pici,

Horrendum sylvis, & religionem parentum.

Hic scepra accipere, & primos attollere fasces

Regibus omen erat: hoc illis curia templum.

Ad hanc autem Veterum consuetudinem demonstrandam, illud arbitror non parum conferre, quod & F. Pictor, & Trogus Pompejus asserunt, & nos hesterno die declaravimus, Romulum scilicet ex Hetruscorum regulo principem Romanorum regem à Thufcis regibus ac Lucumonibus initio fuisse declaratum: hancque ob rem ab eodem illo Fabio memorie proditum, Mithridatem illum Ponti atque Asiae

A regem, quem vel solum mortalium omnium certum est (ut Valerius & Quintilianus scribunt) duabus & viginti gentium linguis, quibus imperitabat, optime loquutum, Romanis ignobilitatem generis objecisse; quod videlicet eorum reges, vernae prius, regulique Thufcorum existissent. Tenet enim fama praeter Romulum illum, Numam quoque Pompilius Curibus parvis, & paupere terra missum in imperium magnum. Haec autem est huiusce rei ratio, quod nemo illis temporibus rex, aut regulus, in Italiae partibus esse poterat, nisi quem Thufci Lucumones elegissent, misissentque. Unde illud vos haudquaquam praeterit, quod Solinus, & alii tradunt: *Cacum Marfyae regis legatum, quod circa Volturnum & Campaniam absque Thufcorum regum assensu regnum occupasset, à Tarchone eorum rege, duce Hercule, qui tum forte aderat, oppressum, in vincula coniectum.* At vero contra quum Cydnus noster, à patre Ligure, Ligurum Hetruscorum rege, in eam Italiae, sive Galliae Transpadanae, partem missus fuerit, quam olim Phaethonti avo, ejusque posteritati Maloth Thufcorum regem dono dedisse antea declaravimus, omnino necessitas cogit, ut Cenomanos ipsos non nisi à Cydno editos, appellatosque, fuisse censeamus: quemadmodum etiam docent pervetusta quaedam tum urbium ac familiarum, tum montium quoque & fluminum nomina, quae adhuc apud Cenomanos ipsos in antiquissima illius Aramaeae, Scythicaeque, originis monumentum perseverant: è quibus ea nunc quam paucissimis absolvam, & quae mihi tenuis memoria suggererit, quaeque vel cognitione, vel memoratu digniora videbuntur: nam ut membratim percurram omnia, neque vos à me exigitis, & laboris esset infiniti. Itaque primum Catullianos illos versus attendite, quibus apertissime admodum Cydnæam originem innuit, dicens:

Atqui non solum hoc se dicit cognitum habere

Brixia Cynea supposita in specula.

Quo dicto declarare nobis voluit poeta lepidissimus, principem illius arcis, summo in collis cacumine positae, fundatorem ac conditorem fuisse Cydnum illum Liguris filium, quem Graeci Cynum vocant, ut postea docebimus: quippe quae ad C. usque Caesaris tempora, quibus Catullum floruisse plane compertum est, proprio nomine ab auctore Cynea specula cognominaretur, ut habent nonnulla haud contemnendae vetustatis exemplaria, non autem *Cichonia*, aut *Chinnea*, quod in libris minus accurate scriptis reperiri solet: atque id maxime in causa existisse video, cur Catullianus interpret, vir alioquin meo iudicio apprime eruditus, ridicula quaedam in hunc scripserit locum: quae, quoniam & in huiusmodi nugis invitus admodum facio iacturam temporis, & ad rem minime pertinent, expendenda doctioribus relinquo.

Verum ne de nostratibus Cydnæae originis monumentis nihil retulisse videamur, venit ecce perveteris illius in mentem Cednorum familiae, quam huiusce quoque temporibus apud Bergomates nostros extare, neminem fugit: ex qua qui nunc sunt antiquo Hetruscorum more expuncta è veteri verbo D littera, ut paulo post dicam apertius, Ceni appellari maluerunt. Addam illud etiam, in intima Bergomatis agri valle, quam nostri populariter *Serianam* dicunt, antiquum adhuc superesse ejusdem nominis oppidulum, quod prisco, proprioque nomine cultores ejus loci, ut omnes probe scitis, *Cenum* vocant. Quamobrem ex iis omnibus, quae à nobis sunt antea non aperte modo tradita, sed validis quoque (ut arbitror) argumentis comprobata, facile quidem perspexeritis, Cenomanos ipsos non aliunde quam à Cydno illo nomen & originem traxisse. Quamvis autem haec ita exposita, probataque sint, illud tamen non spernendae difficultatis contentionem merito excitavit, quam ratione Cenomanis à Cydno inditum nomen videri queat: quum etymologiae ratio postulet, ut vel à Cydno Cydnomani, vel à Cycno Cy-

* Lib. v. cap. xxxiii. † Virg. Aeneid. vii. v. 170.

cnomani; non Cenomani nuncupari debeant? Illud etiam quæstionem non parvi momenti affert, quod jam antea sæpenumero diximus, Orobios eisdem omnino esse, qui & Cenomani, quum nonnulli velint Cenomanos Narbonensis Galliæ populos esse, quos olim juxta Massiliam confedisse Plinio referente didicimus.

Quamobrem ne quid intentatum relinquamus, de utraque re paucis dicendum existimamus. Et fortasse Strabonis, Ptolomæique, testimonio posterior hæc controversia facile dissolvetur. Nam Ptolomæus quidem in iis, qui orbis terræ situm accuratissime descriperunt, nullo inferior, libro III. eam Italiæ partem sejungens, quæ trans Padum sita est, in Venetos, Cenomanosque, atque Insubres ita dividit, ut præcipuas tamen Cenomanorum civitates Bergomum, Brixiam, Comum, & alias nonnullas constituat: quas Orobiolorum quoque urbes esse manifestissime in *O-riginibus* Cato scriptum reliquit. Amasæus vero Strabo Cenomanos censet esse Transpadanæ Galliæ populos supra Venetos, ita dicens: *Regionem*, inquit, *Transpadanam incolunt Veneti, & alii usque Polam: super Venetos Carni, & Cenomani, & Medoaci, & Sym-bri: è quibus nomini Romano hostes exstiterunt nonnulli: verum Cenomani, Venetique socii junxerunt arma, &c.* Quas ob res necesse est, eisdem esse Orobios atque Cenomanos: quamvis ego medius fidiis existimarim, ut ex iis etiam, quæ pristino die disputavimus, intelligi facile potest, Cenomanorum nomen ipsius quidem gentis proprium esse, ac genuinum, Orobiolorum vero potius appositum, quod Græci vocant *ἐπι-γενον*, ita ut Cenomani sint Orobii, id est, *filii montium*, sive *montigenæ*: quemadmodum Janigenas quoque à fluviis quidem Gallos, & à divinarum rerum peritia *Thuscos* appellatos fuisse supra didicimus: adde his & Peloponnesum, quam Homerus Apiam, & Argiam, alii vero Pelasgiam & Æmoniam nuncuparunt; qua de re Lycophronis Interpres hæc scribit*: *Ὅ δὲ Πέλας εἰς ὠκεανὸν ἐλθὼν, ἔβριση ἀγρίαις, λαβὼν Πίαν, & Οἰνομάχου βασιλείαν, ἔτ' Ἀπίαν, Πελασγίαν λεγομένην, Πελοπόννησον ὠνόμασε.* Et de his quidem hæc satis. Cur autem à Cydno non Cydnomani, sed Cenomani appellati fuerint, facillime id quidem ostendam, eos siquidem populos, qui Syro sermone Cydnomani, vel Cednomani, Græca autem denominatione tam Cydnomani, quam Cynomani, Latina vero Cygnomani merito, mea quidem sententia, dici deberent, veteres Itali, præsertim vero Hetrusci, extrita è Chaldæo verbo D littera, Cenomanos appellarunt: quandoquidem Cydnum illum, à quo originem duxere Cenomani, quemque Latini *Cygnum*, Græci vero cum *Cygnum*, tum *Cydnum* dicunt, (nam apud eos, ut ait Hesychius, idem omnino sunt *κύων* & *κύδων*, Aramæi autem, id est, Chaldæi, sive Syri *Cydnum* pariter, ac *Cednum*, utroque enim modo proferunt, vocant) priscos illos ac principes Italiæ populos, quos antea ex Fabii Pictoris sententia Hetruscos fuisse demonstravimus, per concisionem Chaldææ vocis *Cenum* dixisse memoriæ proditum est. Quamobrem iidem penitus sunt, & qui Chaldaica Lingua Cydnomani, sive Cednomani, & qui ab Hetruscis Cenomani nominantur; tametsi secundum diversarum linguarum varietatem aliter atque aliter proferri consueverint: nam quemadmodum in libro *ἑρμηνείας* auctor est Aristoteles, sicut, neque litteræ omnibus eadem, ita neque voces eadem omnino sunt: quam tamen litterarum varietatem haudquaquam ab iis præsertim, qui docti videri volunt, expendendam esse, præclare admodum à Socrate illo Philosophorum sapientissimo apud Platonem hisce verbis probatum arbitror: *Variare autem*, inquit, *licet per syllabas, ut videantur hominibus quæ sunt eadem esse diversa: quemadmodum pharmaca medicorum coloribus, aut odoribus variata, sæpe quum eadem sint, nobis diversa videntur: medico autem vim pharmacorum consideranti, eadem judicantur; neque cum addi-*

* Comment. in Cass. ψ. 156.

A tamenta perturbant: similiter forte & is, qui est in nominibus eruditus, vim illorum considerat; neque ejus turbatur judicium, si qua littera addita est, vel transmutata, vel dempta, vel in aliis litteris, ac permultis vis eadem nominis reperitur. Cæterum quamvis tam apud Græcos quam apud Latinos rerum gestarum scriptores auctoritas jampridem obtinuerit, ut Cenomanos potius dicamus, quam Cydnomanos, sive Cednomanos: ego tamen (si liceret) hac potius recta Chaldæorum, quam concisa illa Hetruscorum appellatione uti mallet: verum hac de re alii postmodum subtilius viderint: nos vero ad reliqua pergamus.

B Iis igitur, quæ ad Cydnum principem Cenomanorum auctorem spectant, hunc in modum traditis, deinceps nonnulla quoque de liberis ejus recensenda sunt. Itaque apud Berosum in genealogiis scriptum invenio, ex Cydno genitos esse filios duos, Eridanum alterum, alterum vero Venetum. Et Eridanum quidem nomen dedisse amni Eridano Cato scribit his verbis: *Padus*, inquit, *à duce coloniarum Eridanus, sed à profunditate Botigon ab Hetruscis, & Botigum à Liguribus, & à circa arbore picea Gallice Padus nuncupatur.* Oritur vero Eridanus, Plinio teste, à Vesulo monte, labiturque ad mare superum: quæ res fingendi occasionem Græcis Scriptoribus dedit, ut dicerent Eridanum inferorum esse fluvium, & inde ad superiores scaturire: quod & Virgilius innuere videtur, dum canit†:

C *Inter odoratum lauri nemus, unde superne
Plurimus Eridani per sylvam volvitur amnis.*

D Ferunt autem nonnulli Eridanum exceptis in alveo suo septem fluminibus, septeno gurgite in mare demergi: quemadmodum nuper (ut me quandoque ab antiquis illis Auctoribus sejungam, & ad viros nostræ memoriæ doctissimos pariter & eloquentissimos revocem) luculente admodum decantatum legi ab homine tum singulari doctrina & ingenio, tum summa etiam virtute ac dignitate prædito, Petro Bembo æque omnium nostrum amantissimo: quem proximis superioribus annis à Leone X. Pont. Max. ut illi esset à secretis, honorificentissime accitum fuisse, nemo fere vestrum est qui non audierit: ejus de Eridano versus (si recte memini) hi sunt:

E *Tum rapidus, fluvioque Athesis spectandus ameno,
Populiferque Padus, genitor qui flumina centum
Ipse suo accipiens vasto latissimus alveo,
Ubera terrarum cursu per pingua lapsus
Portat: seque mari septenis amnis infert.*

F Venetum autem Venetos à se nuncupasse, quum prius à Phaethonte Phaethonthæi dicerentur, ipsum equidem Venetorum nomen magno est argumento: tametsi nonnulli contra affirmant ab Asiaticis Henetis, qui post Trojanum excidium cum Antenore in Italiam commigrarunt, appellatos fuisse. Ab iis enim, qui id asserunt, libenter quæsierim, quinam fuerint illi Venetiæ Padique accolæ, quos Dionysius Halicarnasæus priori volumine *Barbaros* vocat, à quibus vetustissimos illos Pelasgos ad Spineticum Padi ostium adnavigantes expulsos fuisse, idem auctor est Dionysius. Eos siquidem neque Græcos, neque Henetos existisse, quis non intelligit? quum ab eo & Barbari nuncupentur, & antiquissimos Pelasgos, quos multis ante Trojam sæculis in Italiam adnavigasse manifestissime tradunt Myrsilus Lesbios & Xanthus Lydius, depulsi dicantur. Verum sive à Veneto Cydni filio, sive ab Henetis illis Asiæ populis, dicti fuerint Veneti, equidem principem Venetorum originem à Phaethonte, Cydni avo, initium sumpsisse, ex iis, quæ sunt supra à nobis ex Beroso, Catone, Sempronioque de Phaethonte tradita, satis aperte probatum est. Hujusce vero Venetæ regionis civitates quidem complures de antiquis Cosmographis illustrissimus quisque connumerat: sed has inter inclytam Venetiæ urbem primatum obtinere nemini est ignotum: quam Latini Scriptores *Italia emporium* appellaverunt, ac scripserunt de ejus origine dignita-

† *Æneid.* VI. ψ. 658.

teque permulta. Cæterum ex eodem Venero, Cydni filio, natos fuisse Tylam ac Ventum Berosus est auctor: quos quidem regioni, quæ Istro proxima est, quamque posteriores historici, & ab Japide Ætoli filio Japidiam; & à C. Julio Cæsare Forumjulium appellarunt, nomen dedisse affirmant. Huic autem rei satis magno esse indicio asserunt tum Tylaventum fluvium, tum Tylaventanam etiam regionem, de quibus apud Plinium, Ptolomæumque, fit mentio: quamvis recentiores nonnulli locorum Scriptores flumen ipsum perperam *Tiliamentum*, & ejus incolæ vernacula lingua *Tajamentum* nuncupare consueverint. Sed hæc de his hætenus. Habetis itaque, viri optimi atque ornatissimi, quæ ex me de principe Orobiolorum live Cenomanorum ortu voluistis audire: de quibus etsi accuratius atque ornatiùs dicendum fuerat, feci tamen hoc eo libentius, quod de his satis diligenter scriptum à nemine ad hunc diem videbam: quamquam multa quoque à me præterita esse intelligam, quæ post alii & peruestigaturi ipsi acutius, & apposite magis sint explicaturi.

Cæterum quod hic hodie convenerimus, te præfertim, Marce, auctore, relinquendus est suus cuique dicendi locus.

Ad hæc ille, Quoniam, inquit, quod difficillimum nobis videbatur, Orobiolorum scilicet originem, abs te intelleximus, de reliquo jam nostra culpa fuerit, si te, nisi & pauca, quæ supersunt percunctanda, explicaveris, dimiserimus. Nam ex his, quæ verissime sunt de Orobiolorum ortu à te tradita, mira incessit audiendi cupiditas, ecquæ causa fuerit, cur Ovidius Cynum illum non Liguris, ut placet Beroso, sed Stheleni Mycenarum regis filium fuisse referat, atque in avem sui nominis conversum? refera igitur arcas, mercemque nobis hanc selectiorem explica: quod te per ipsos Cydni manes, à quo cuncti ortum ducimus, obtestatus rogo.

Tum Marfilius, Percalluisti, inquit, Marce Maurici, qua me esles arte ad eam rem tracturus, quæ fuerit à nostris hominibus hætenus omnino aut incognita, vel parum certe animadversa, dum per ipsos me Cydni conditoris manes obtestaris: gemitur itaque à me tibi mos; nihil est enim ad quod penetrare ingenii vis nostri queat, quantulacunque ea est, quod non in gratiam simus patriæ & præstituri libenter, & habituri etiam iis gratiam, qui ad illam nos exornandam, honorandamque, invitarint. Primum itaque quum plurimi & à rerum gestarum Scriptoribus, & à Poetis, Cydni commemorantur, operæ pretium fore arbitror, si eos, qui recte disputant, sequutus, ambiguum illud Cyni nomen prius distinxero, quam describam: ut ea obscuritas tollatur, quam æquivoca nomina, nisi distinguantur, etiam excellentissimi ingenii hominibus offundere, indagandi sollertissimus, & præcipiendi optimus magister Aristoteles hisce verbis, in priorum *de celo & mundo* volumine, scite admodum docuit: Πολλὰ γὰρ τὸ λεγόμενον καὶ μηδὲν ἀφ' ὧν πρὸς τὸν λόγον, ἀνάγκη τὴν ἀλήθειαν ἀορίστως ἔχειν, ἀντὶς τῷ ἀκριβέστερῳ πολλὰ γὰρ ὡς ἀδιαιρέτῳ χρεῖται, ἀδήλον γὰρ κατὰ πᾶσαν φύσιν αὐτῷ συμβαίνει τὸ λεχθέν. Plures igitur existisse Cynos tradunt nobis ii, qui interiores scrutantur, ac reconditas litteras: quod nuper quoque tuis in *Epitheton* commentariis, Petrei, scriptum legi, è quibus antiquissimus ille est Ligure natus, de quo multa ex Beroso à me nuper allata sunt. Alter fertur Stheleno patre natus, Mycenæus, de quo plura & Phanocles in *Cupidinibus*, & Naso in secundo *Metamorphoseos* libro ita cecinit:

Affuit huic monstro proles Stheleneia Cynus,
Qui tibi materno quamvis à sanguine junctus,
Mente tamen Phaethon propior fuit: ille relicto
(Nam Ligurum populos, & magnas rexerat urbes)
Imperio, ripas virides, amnemque querelis
Eridanum implebat, sylvamque sororibus auctam:
Quum vox est mutata viro, &c.

A Eiusdem etiam meminit nostri temporis poeta haud ignobilis, his versibus:

Nunc Genuam repetens sese hinc ad dulcia transferi

Musta Padi, curas genti pulsura sequaces:

Huc ubi rex Ligurum celebr confinia Cynus

Protulit imperii quondam, cœloque ruentem

Deslevit Phaethonta, rogi post tristia busta,

Seque nova miserum stupuit canescere pluma.

Tertius is est, quem Martis filium fuisse, atque ab Hercule interemptum, priscis in Græcorum litteris invenimus: de quo & Lycophron, & ejus Interpres: Quemadmodum, inquit, & Ætheus, & Evenus, & Phormas, & Dionysius Thrax, & Cynus ab Hercule interemptus.

Quantum vero ex Scamandrodice Neptunoque natum accepimus, quem Hellanicus Ἰστρον, id est, invulnerabilem, dixit, quemadmodum & apud Dictym Cretensem, & Homerum, atque Palæphatum legimus: ex eo Tennen & Leucotheam genitos fuisse, hisce verbis Homeri Interpres asserit: Tenedus autem insula est juxta Trojam sita: ita vero primum hoc nomen habuit: ex Cycno namque Neptuni filio Tennes & Leucothea geniti sunt. Hunc autem ab Achille Trojano in bello interfectum fuisse, una cum Pindaro ejus quoque testatur Interpres: ita enim in *Olympiacis* Pindarus:

Κύνον τε θανάτῳ πάρον.

C Interpres vero: Παρὰ δὲ δὴκε τὸν Ποσειδῶν & ἡ Σκαμάνδρῳ δὴκε· οἱ δὲ, Ἀργείων. Κύνον δὲ δύο, ὁ μὲν Ἀρεῶ, ὁ δὲ Ποσειδῶν. Καὶ τὸν μὲν Ἀρεῶ κακῶς τὰ περὶ Θεσσαλίαν ἀφ' ἧν ἡ Ἑρμιόνη ἀπέκτεινε· τὸν δὲ Ποσειδῶν Ἀχιλλεύς σπῆρτο σάμῳν & συμμαχῶν τοῖς Τρῶσιν.

Fuerunt igitur quattuor, ac fortasse etiam plures Cyni: quorum primum Cenomanorum conditorem existisse jam satis aperte probavimus: tamen quidam velint Stheleni filium: sed qui ita ajunt, videntur Beroso pugnantia referre: quum ille Cynum Liguris filium, ac Phaethonti paterno sanguine junctum dicat: hi vero Stheleno Mycenarum rege natum, maternoque à sanguine Phaethonti proximum asserant. Sed hoc malum, ut inquit Lactantius, à Græcis ortum est: quorum levitas instructa dicendi facultate & copia, incredibile est quantas mendaciorum nebulas excitaverit. Nam ut omnium gentium, & imperiorum, atque urbium clarissimarum se conditores ostenderent, veterum ferme omnium regum ac populorum, nec non & regionum maxime illustrium nomina, ut auctor est Josephus, immutarunt, & præclaras antiquorum res gestas, ad recentiores suos duces transfulerunt: quemadmodum de Cycno quoque Liguris filio actum fuisse nequaquam ambigimus: cujus res gestas posteriori Cycno, Stheleni filio, Græci aperto adscribere mendacio: quum id, quod ipsi produnt, neque perspicuum quidem sit, neque ulla probatissimorum annalium fide probare queant, nisi confirmet duos quoque Phaethontas existisse, quorum prior fuerit vetustissimus ille Libycus Chamefis filius, Cydnique nostri avus, ut antea diximus; posterior vero ac recentioribus temporibus Græcus ille Solis ac Clymenes filius, quem fabulantur Jovis fulmine paterno è curru dejectum, in Eridanum amnem exanimatum decidisse; cui junctus materno à sanguine Cynus ille Stheleni filius, post priscum illum Cynum Liguris filium principem Cenomanorum conditorem, in Transpadana Gallia Ligusticarum coloniarum ductor existiterit. Quod sane discrimen mihi mehercule non admodum displicet: quum non desint probatissimi quidam rerum gestarum Scriptores, qui asserant antiquissimum illum Phaethontem, non in Italia, sed in Æthiopia excessisse è vita, idque Berosus inprimis, cujus hæc sunt verba: Hujus, inquit, Balei Xersis temporibus apud Ligures Phaethon relicto filio Ligure regressus est in Æthiopiam. Quin C.

quoque Plinius: Theophrastus, inquit, in Liguria cle-

* Ode II. v. 147.

Etym

*Et*rum effodi dicit, Phaethontemque in *Aethiopia* *Hammōnis* obiisse, ob idque delubrum ibi esse, atque oraculum, & electrum gigni. Quocirca hoc esse jam satis constat, ad quod omnes talis controversiae disceptatores praecipite & lubrico errore quovis modo offendunt: propterea quod unum tantum, eundemque Phaethontem existisse opinantur; & eum scilicet, quem principio in Italiam ante omnes Graecos cum coloniis venisse cognovimus, & illum, quem multis post seculis finxit sibi mendax Graecia ē Sole, sive Helio, ac Clymene Oceani filia genitum: quum tamen necessitas cogat, ac ratio, aut duos vere fuisse Phaethontas, aut posteriorem illum (quod mihi magis fit verisimile) fictum omnino judicandum, quemadmodum & Sacerdotem illum Aegyptium in *Timeo* Platonis ita interpretari solitum accepimus. Tunc ex sacerdotibus quendam grandem natu dixisse, o *Solon*, *Solon*, *Graci pueri semper estis*, nec quisquam ē *Gracia senex*: cur istud diceret percunctante *Solone* respondisse Sacerdotem? *Quia juvenis semper vobis est animus*, in quo nulla est ex vetustatis commemoratione prisca opinio, nulla cana scientia: quod ideo vobis contigit, quia multa & varia hominum exitia fuerunt, eruntque maxima quidem aut ignis conflagratione, aut aqua inundationibus provenire necesse est, minora vero aliis quibuslibet calamitatibus fieri. Nam quod apud vos fertur, Phaethontem quondam, Solis filium, currus adscendisse paternos, nec patris aurigatione servata exussisse terrena, ipsumque flammis caelestibus conflagrasse, quamvis fabulosum videatur, verum quodammodo esse putandum est: fit enim longo temporum intervallo caelestis circuitus permutatio quadam, quam inflammationis vastitas necessario sequitur: tunc hi, qui edita & arida incolunt loca, magis pereunt, quam mari fluviisque vicini: nobis porro Nilus cum in plerisque rebus salutaris est, tum hujuscemodi a nobis arcet exitium. Verum omittis fabulis, hujusce rei veritatem facile intelligemus, si *Berosum* ita dicentem attenderimus: *Eo*, inquit, tempore (quo scilicet Phaethon in Italia regnabat) Italia in tribus locis arsit multis diebus, circa *Istros*, *Cymeos*, & *Vesuvios*: vocataque sunt loca illa a *Janigenis Palensana*, id est, regio conflagrata. Hæc ille. Itaque quum hæc fabulosa sint, quæ hunc in modum de Phaethonte poetæ confinxerunt, non magnum est negotium intelligere, mythica quoque illa esse, quæ iidem de Cycno referunt: Cycnum videlicet Phaethontis avi obitum

*Populeas inter frondes, umbramque sororum
Dum canit, & maestum musa solatur amorem,
Canentem molli pluma duxisse juventam.*

Quod aperte admodum *Pausanias*, cujus supra meminimus, in *Atticis* declarat, dicens: *Non procul ab Academia Platonis exstat monumentum, cui Deus protendit Philosophia præstantiam, atque id sane hunc in modum. Socrates superiore nocte quam Plato sibi futurus erat disci-*

A pulus, Cycnum in sinum sibi advolasse per somnium vidit: musica autem palma Cycno tribuitur: nam ultra *Eridanum* in *Gallia*, Cycnum virum musica peritum, *Ligurum* regem fuisse narrant, post obitum *Apollinis* voluntate in Cycnum avem conversum: ego in *Liguribus* Cycnum recognasse non negarim: sed indignum fide arbitror quod avis ex homine factus sit. Hæc ille.

B Verum hæc de Orobiis, sive *Cenomano*rum, origine, deque *Cydnō* illorum parente dicta sufficiant: quanquam fuimus explicandis his fortasse, quam par est, longiores: sed, ut ipsi scitis, & juvenus ipsa loquacior est, & vos me ad hæc multis etiam precibus invitastis, dum a priscis hæc Latinis intractata esse dicitis, & a recentioribus rerum gestarum ac temporum scriptoribus tam insigniter neglecta, tamque & incomposite aut disputata, aut perplexe tradita, ut illi ipsi, de his qui disseruerunt, vel parum ea intellexisse videri queant, vel ignorasse quibus essent auctoribus tradenda, aut quibus etiam verbis Latine explicanda. Cui parti etsi scimus a nobis exacte nullo modo satisfactum, nec munus hoc qua decet ubertate atque verborum dignitate adimpletum, juvabit tamen & morem gessisse vobis studiosissimis viris, & viam præmonstrasse illis etiam, qui & auspicius, & eruditus, majoreque cum ornatu hoc ipsum indagandi munus post nos (quos equidem non paucos fore arbitramur) prosequendum susceperint. Sed hæc nunc missa facientes, quoniam & advesperascit, & jam satis multa hodie dicta sunt a nobis, nostrum hunc ipsum dicendi, vestrumque audiendi laborem, alium in diem, confectumque in alium reservemus:

Tum *Marcus*, *Ego vero*, inquit, *Marsili*, neque te ipsum, neque istos hodie a me discedere æquo animo feram, nisi prius a vobis impetraro.

Quidnam, inquit *Marsilius*?

D Tum ille, *Ut cras*, inquit, prima luce, aut peracto jam prandio, vel quando vobis erit gratum, hoc in loco iterum sitis: nam quum generatim de *Cenomano* hodierna die multa admodum sint & perquisita diligenter, ac tradita, reliquum est, ut simili quoque ratione singillatim de præcipuis *Cenomano*rum civitatibus, & urbis *Bergomi* rebus antiquis nonnulla inter nos studiose ac sedulo differantur.

Ad hæc *Marsilius*, *Geretur*, inquit, tibi mos, *M. Maurici*: quod enim difficiles præstare nos tibi, præsertim amicorum omnium suavissimo atque officiosissimo, operæ pretium est, quo minus crastino die tecum simus, quo cum vel semper vitam agere felicissimum nobis duceremus?

Tum *Marcus*, *Comis es nimium ac lepidus*, inquit, *Marsili*. Sed quid vos moror amplius? itaque abitate felices: quo dicto statim omnes discesserunt.

JOANNIS CHRYSOSTOMI ZANCHI

DE

CENOMANORVM SITV,

AC

BERGOMI REBVS ANTIQVIS,

L I B E R III.

INTER omnes ferme ingenuarum artium scriptores, *Petre Bembe*, ii mihi non minori laude digni videri solent, qui aut excellentium regnorum, aut clarissimorum hominum res gestas memoriae commendarunt, quam qui leges, vel præcepta vivendi tradidere. Hi enim per documenta compen-

F diarium quoddam iter ad instituendos optimis moribus animos ostenderunt: at illi salutaria nobis exempla repetendis antiquitatibus, revocandis memoriis, extollendis præclaris facinoribus, accusandaque improbißimorum hominum ignavia, protulerunt: quibus & juniores tum ad virtutes capeffendas, tum ad bene beateque vivendum, redduntur instructiores:

&c

& majores natu viri plus inde doctrinæ ac eruditionis hauriunt, quam quantum longissima hominis ætas afferre vix queat. Ab his denique ad comparandas ingenuas disciplinas, leges, atque instituta prodierunt: ab illis autem quædam quasi faces ac stimuli subjecti sunt ad virtutem, quibus nobiles præsertim animi ad gloriæ atque immortalitatis studium vehementer accenduntur. Verum & hisce de rebus eos quoque egregie meritos non temere (ut opinor) affirmaverim, qui clarissimarum nationum origines, locorum regionumve situs, aut vetustissimarum civitatum antiquitates ita litteris illustrarunt, ut nulla eas unquam oblivio obscuratura, nulla eorum recordationi allatura finem æternitas videatur: quum siquidem eorum opera & cura effectum sit, ut adversus edacis rerum temporis injuriam, Vulcaniis quasi quibusdam armis muniti, res fere universas præscis seculis præclare atque excellenter gestas tum memoria teneamus, tum cognoscamus etiam, qui primi exstiterint in orbe reges, qui illustrium populorum atque inclytarum urbium conditores, quæve origines, quibus denique temporibus; è Græcis, an ex Barbaris, clarissimè an humilibus parentibus nati fuerint. Quæ profecto omnia, aliaque complura seculorum acta nisi ab illis essent mandata litterarum monumentis, quænam, obsecro, esset mortalium vita, in tanta obscuritate, ac rerum præteritarum ignorantia, nullaque cognitione veri, minima generis sui, ac stirpis, aut conditorum memoria, eaque anili tantum & fabulosa? Etenim si præstantissimi rerum gestarum scriptores ad earum gentium, quas exorandas sumunt, ex prisca rerum nobilitate, laudis & honorum accessionem petere consueverunt, quoniam dolore, qua verecundia eos censeas occupari, in quos ea solent dici, cœlo patre, aut tellure matre nati sunt? aut è quercubus & saxis ortum traxerunt? Qui autem avi nomen dicere haud possunt, imo ne patris quidem, quo animo sint, ex eo facillime cognosci potest: quod qui Romano è sanguine manarunt, Æneam ac Romulum; qui Hetrusco, Janum patrem; qui Veneto, Phaethontem & Antenorem; qui Phrygio, Dardanum; qui Babylonico, Nymbrotum ac Semiramidem; qui Assyrio, Ninum; qui Ægyptio, Chamesem & Apim: atque ita complures alii magni nominis populi, suos quique præclarissimos auctores ac parentes gloriabundi proferre soleant. Eosne igitur non diligendos? non admirandos? non denique omni ratione defendendos existimamus? qui plurimis tum rerum, tum verborum ornamentis, monumenta non solum temporum, civitatum, locorum, gestarumque rerum reliquerunt; verum etiam virorum sæpe fortium atque excellentium ancipites, variosque casus, vel memorabiles temporum varietates, vel fortunæ vicissitudines, accurate nobis descripserunt: quæ profecto jacerent in tenebris omnia, nisi clarissimis quibusdam quasi luminibus litterarum ab eis essent illustrata divinitus.

Verum enimvero, ne & omnia eorum præconia conquirere ambiciosius videar; & eos laudando, memet de meis studiis quis existimet aliquid prædicare, finem tandem dicendi faciam: neque enim (ut arbitrator) insignes illi temporum & antiquitatum scriptores nostra vel laude, vel patrocinio, indigent: apud te præsertim, Bembe doctissime, qui plurimum semper veterum hominum, non imaginibus solum, ac statuis, verum etiam multo magis annalium monumentis, tanquam incorruptis virtutum illorum testibus, oblectari soleas. Non enim te fugit hominem omni liberali doctrina politissimum, quam ea litterarum studia sint honorifica, immortalia, atque divina, quam denique vigeant memoria sæculorum omnium. Nam quum cæteræ quidem res, neque temporum sint, neque ætatum omnium, neque locorum, hæc tamen studia quantum & adolescentiam agant, & senectutem oblectent, secundas res ornent, adversis profugium ac solatium præsentent, de-

A lectent domi, nec impediunt foris, haud hercle facile dixerim. Quis enim, obsecro, cohortari ad virtutem ardentius? quis à vitiis acrius revocare? quis vituperare improbos asperius? quis denique laudare bonos ornatus potest, quam iidem illi, à quibus illud maxime tanquam ab hominibus longe in posterum prospicientibus provisum fuit, ne egregia majorum nostrorum exempla atque facinora aut hominum interitus obrueret, aut oblivio posteritatis exstingeret? *Est enim historia, ut magnifice admodum apud Ciceronem M. Antonium illum dicentem legimus, testis temporum, lux veritatis, vita memoria, magistra vite, nuncia vetustatis.* Quid plura? nonne ex rebus præclare gestis, eam egregiis viris in pectore flammam accendi solere, à summis eruditissimisque viris accepimus? quæ haudquaquam prius sedari consuecat, quam illorum virtus, superiorum famam ac gloriam adæquarit?

At vero quamquam post eximios illos felices priscaeque ætatis Historicos, quibus nihil aut jocundius, aut elegantius, aut divinius inveniri, excogitarive potest, nullus sit ad hanc diem aut rerum gestarum, aut temporum, aut locorum Scriptor inventus, (cujus quidem scripta constant: de his enim qui nondum ediderunt, existimare haud sane possumus) qui historiam recte scripserit: tu tamen; vel una omnium voce, unus è nostris es, Petre Bembe, quo illam tractante brevi tempore doctissimi homines futurum sperant, ut in hoc etiam genere, neque verborum copia, neque ullo orationis ornatu prisca Latinis nihil cedamus: & merito, mea quidem sententia, si modo mihi de summo, præstantissimoque viro judicare fas est: tanta est enim tua ista incredibilis ac propemodum divina eloquendi facultas, quantum ex tuis elegantissime scriptis *Dialogorum* libris, qui jam maxima cum tui nominis laude in manibus hominum versantur, intelligi potest, ut id dubio procul, aut te, aut alium certe hisce temporibus neminem feliciter exsequi posse, exploratum omnes habeant. Plura nunc etiam mehercule de tua singulari vel doctrina, vel eloquentia dicere possem, si aut tuæ plurimæ virtutes longiorem orationem exspectarent, aut id fieri tua humanitas pateretur, aut denique res verba desideraret, ac non etiam silente me pro seipsa clarissime loqueretur. Quid est enim, per Deos immortales, quod quisquam aut dignum te, aut nostris, exterisve nationibus, aut cuiquam inauditum possit afferre? Quamobrem, ut & ineptiarum crimen effugiam, & ne videar, ut Græci dicunt, velle τὸ φῶς ἡλίου δανίζειν, redeo ad id, unde huc nostra declinavit oratio. Te igitur auctore, te duce, Petre Bembe, qui mihi unus instar es omnium, tertium, ac postremum hujusce laboris nostri volumen aggrediar; quod profecto nunquam attigissem, reprehensionem quorundam paulo severiorem reformidans, qui totum hoc scribendi genus tamquam inutile, minimeque necessarium adspernantur, nisi tibi hortanti, & patriæ memoriam mihi caram sæpius excitanti, non parere nefas esse duxissem. Sed malo, ut inquit Tullius, quum studio tuo atque amoris sim obsecutus, desiderari ab his prudentiam, quam si id non fecerim, benevolentiam in te meam. Quamobrem sermonem M. Marfilii de Cenomanis reliquum, ac pene postremum, sicuti à L. Petrejo utriusque nostrum amantissimo accepi, memoriæ prodam: cujus cum domum sæpenumero ventitarem, horasque multas sermone suavissimo consumerem, hæc, quæ nunc de *Cenomanorum situ*, ac *Bergomatum rebus antiquis* referam, quæque antea de *Orobiorum*, sive *Cenomanorum*, ortu commemoravi apud M. Mauricium, cui vel primas doctrinæ patrum nostrorum tribuebat ætas, quam diligentissime à Marfilio tradita atque exposita fuisse narrabat. Verum multa prætereo, quæ temporibus illis, inter nos familiarissime admodum dicta, communicataque sunt, quæ vix verbis exsequi possem. Nam cum immatura M. Marfilii mors, tum ipsius quoque Pe-

treji ac C. Julii discessus, vitæque dissimilitudo, non est passâ voluntates nostras communibus studiis ac consuetudine amplius conglutinari. Sed hæc hæcenus.

Ut igitur sequenti die apud M. Mauritium inclinato jam in postmeridianum tempus die reverterunt; in primis offendisse sese dicebat Petrejus spectantem eum in tabula pictam Italiam: quem cum salutassent, simulque in subfelliis confedisissent; tum Marcum ita locutum: Jam dudum sedens exspectavi vos, viri amicissimi, ut ad constitutum conveniretis: sed & nunc quidem non importune quidem advenistis. Quærebam enim hac in tabula, quænam esset Italiæ salubrior regio atque jocundior. Tu ergo, Petrei, qui complures perambulaſti Italiæ partes, quam cultiorem Gallia (ut nostri dicunt) Transpadana vidisti?

Ego vero, inquit ille, nullam arbitror esse, quæ tam tota sit culta. Primum enim quum in divisione orbis terræ, Europam plerique salubriorem esse censeant, quod ad Septentriones vergat, quam Africa, quippe quæ ad Meridiem spectet, (quæ autem salubrior, ut inquit Varro, ea & fructuosior) dicendum mihi videtur, Transpadanam Italiam, sive Galliam, cæteris Italiæ partibus salubriorem esse, ac cultiorem. Primum, quod sita est in Italia, omnium Europæ provinciarum fertilissima ac temperatissima: Secundo, quod ibi omnia ferme montana sunt loca, è quæis Orobios *monium filios* appellatos fuisse, Marfilio auctore dicimus: quæ quidem loca, ut idem scribit Varro, quia leviora sunt, ideo salubriora, cultiora, ac fertiliora: quo fit, ut ea regio, quam diximus, totius ferme Italiæ pomarium jure optimo nuncupari queat. Sed plane video, cur hunc sermonem in medium adduxeris: nempe velles (ut opinor) nos ad priores sermones relabi, in primisque illud quoad contenebrabit, quam paucissimis absolvi, quod noster Marfilius hesternæ die, te decernente, de præcipuis Cenomanorum civitatibus, deque urbis nostræ dignitate ac rebus antiquis referre instituit.

Tum Marcus, Id ipsum, inquit, est, Petrei.

Et ille non gravatus, Ego vero, si ita vultis, inquit, ac potius quia vultis (video enim vos velle) non diffugio, quin dicam duntaxat, quod est *ισοεπὶ* de duabus rebus primis, quæ accepi, de Cenomanorum urbibus, ac patriæ nostræ dignitate: de tertia vero parte, ubi est de rebus antiquis, tu ipse, Marce, suscipies, ut hæc, quæ apud te sunt occulta atque recondita, in medium proferas: nemo enim, ut dici solet, omnia potest scire. Quum accepisset eam conditionem Marcus, ut suæ partes essent secundæ.

Tum statim Marfilius, Duobus, inquit, superioribus diebus de Orobiorum ortu cum adversus antiquorum recentiorumque quorundam opiniones disputavimus, tum etiam quæ esset doctissimorum ac vetustissimorum de ea re sententia demonstravimus. Nec vero tantum Orobiorum certam ac veram originem ostendimus: sed etiam totius pene Italiæ, qui fuerit princeps ortus, qui reges primum ejus imperium obtinuerint, quique principio eam populi possederint, enucleate satis (ut arbitror) explicavimus. Nunc autem consentaneum mihi videtur, singillatim de ipsis Cenomanorum, sive Orobiorum, civitatibus explicatius disserere: quas ordine suo tum demum persequar, cum præfatus fuero, quæ reor in universum ad eos maxime pertinere: ita enim vel sentit, vel docet Aristoteles ille non præcipiendi solum, sed etiam dicendi gravissimus auctor & magister, lib. *φυσικῆς ἀκροάσεως* primo, hisce verbis: *Διὸ ἐν τῶν καθόλου ἐπὶ τὰ καθεκαστα δὲ προϊέναι, τὸ δὲ ὅλον κατὰ τὴν αἰσθησιν γνωριμώτερον· τὸ δὲ καθόλου ὅλον πῶς ἐστὶ πῶς δὲ περικυβάνει αἰσμερὸν τὸ καθόλου.*

Verum ad nostra. Omnes igitur, qui de Geogra-

A phia priscis temporibus, tam apud Græcos, quam apud Latinos scriptitarunt, Italiam in Europa tertia orbis parte sitam esse confirmant: eam apud Alpes incipere, sequæ mediam perpetuo Apennini montis jugo attollentem inter Adriaticum & Thuscum mare procurrere, C. Sempronii viri sane eruditissimi, cujus meminit Dionysius Halicarnassæus, breviter ac summatim verba hæc ostendunt: *Ὑνὶversa, inquit, Italia à jugis Alpium oritur; & in Leucopetram, fretumque Siculum terminatur: cingitur Supero & Infero mari, & secatur Apennino: qui à jugis Alpium ortus, per mediam Italiam, à Liguribus ad Anconam porrectus, inde paulatim usque Venuſiam reflexus, ibi ex transverso dividit Italiam, ex altera parte Brun-*

B *duſum, altera Veliam attingens circum sinum Tarentinum. Porro antiquitus Italia in medium Apenninum & in Cisapenninum ad inferum mare, & in Transapenninum ad superum pelagus: & in Alpes à Rhætiis ad Ligures dividebatur. Hæc hic. Itaque Italia est omnis, ut supra demonstratum est, divisa in partes treis; in Alpes scilicet, Cisapenninam, Transapenninamque: è quibus Transapenninam, quam postmodum à Gallis victoribus Cisalpinam Togatamque Galliam, & à Longobardis Longobardiam appellarunt, Eridanus fluvius, qui Gallice Padus dicitur, duas in partes disjungit, quarum altera Cispadana, altera vero Transpadana Gallia cognominata est. Verum*

C *quoniam hæc omnia Cato, ac C. Sempronius, & Strabo doctissime tradunt, non alienum videtur hoc loco eorum verba recensere. Itaque Cato: Omnia, inquit, sub Alpibus Transpadana loca prisci convena Thusci missis coloniis tenuere: ab hisque multa loca nomina retinent; plura deleverunt Galli: qui primi Arunte Clusino duce Alpes transcenderunt, & sensim ab omni Gallia Cisalpina Hetruriam pepulere, ab hisque nomen sortita retinet Gallia Cisalpina, qua Mantua suo conditore. Ocnio Bianore Thuscorum rege illustris. Penetravere trans Alpes Boji, Senones, Insubres, & alia Gallia Transalpina gentes. Gallia Cispadana olim Bianora à Victore Ocnio, postea Felsina dicta, usque Ravennam: nunc Gallia Arelia & Emilia à Romanis ducibus nomen habet. Sempronius autem: Cisapenninam, inquit, Italiam flumina dividunt: & itidem Transapenninam Padus amnis Galliam Cisalpinam primo discrevit. Et paulo post: Senonum, inquit, Gallia Togata dicitur ab iis, qui duce Arunte primi in Italiam transcenderunt Alpes: a quibus sensim pulsi Hetrusci à Cispadana & Transpadana regione, qua nunc Gallia nomen habet. Et quidem omnem*

D *Transpadanam regionem Thuscorum prolem fuisse, inter omnes auctores convenit. Porro Strabo: Ante omnia, inquit, de subjecta Alpibus regione dicemus: est autem felix admodum campus, & fructuosus collibus variis; hunc medium fere Padus dividit, eaque regio hinc Cispadana, hinc Transpadana dicitur. Cispadana Apenninis quidem montibus adjacet, atque Liguria: reliqua vero Transpadana est: ea vero loca tum Ligurum, tum Gal-*

E *lorum gentes inhabitant, tum in montibus, tum in campis commorantium, hinc Gallorum, hinc Venetorum, &c. Hi hæc. Cæterum eam Italiæ Transapenninæ partem, quam à Pado flumine Transpadanam appellatam fuisse demonstravimus, incoluere Insubres, Veneti, atque Cenomani, cognomento Orobii, alique nonnulli, qui tum à Ptolomæo, Plinioque, tum à Strabone, cæterisque Geographis commemorantur: de quibus quoniam multi multa scripserunt, hoc sermone de Cenomanis separatim ea tantum referam, & quæ ipse apud præstantissimos Scriptores animadverti & legi, & quæ à peritis harum rerum percepi ac didici.*

F *Cenomani itaque, quos & Orobios appellamus, Transpadanæ Galliæ populi sunt inter Insubres ac Veneros Alpibus finitimi, spectantque inter occasum Solis & Septentriones. Eos à Cydno Liguris filio editos fuisse atque appellatos hesternæ disputatione tum firmissimis (ut arbitror) rationibus, tum vetustissimorum quoque Scriptorum testimonio comprobavimus: ii initio editis in locis oppida*

habuere, urbesque permultas excelsis in collibus condidere, è quæis Orobiorum nomen illis inditum fuit; earum tamen civitatum perpaucae admodum superfunt; nam illarum quædam brevi multum auctæ antiquum pariter nomen atque ortum conservaverunt, uti Bergomum, Brixia, Comum, Liciniforum, reliquæ vero vel crebris Barbarorum incurfionibus deletæ sunt, vel in alterius gentis nomen atque imperium concessere. Sed quoniam de communi Cenomanorum situ satis multa jam diximus, nunc demum singulas eorum civitates recensere: quæ tametsi habeant rerum suarum tum antiquarum, tum præclare quoque gestarum, & laudatores, & scriptores accuratissimos, non incommode tamen me facturum arbitror, si è multis pauca nunc explicavero, & quæ ex veterum ac recentiorum quorundam scriptis accepimus, & quæ etiam nostro studio, curaque pervestigavimus.

Itaque ex iis Cenomanorum urbibus, quas antea commemoravimus, sit sane nobis prima Liciniforum: quam verum ac vetus nomen amisisse, valido satis argumento esse potest recens ipsum à Licinio Imperatore nomen impositum, quemadmodum & aliis quoque multis civitatibus sæpe contigit: quis enim nescit Corneliiforum ac Liviiforum, Æmiliæ olim urbes opulentissimas, à Cornelio, Livioque clarissimis Romanorum Ducibus, sicut & Juliforum à C. Julio Cæsare fuisse nuncupatas? Quod autem fuerit Licinifori priscum nomen, nondum mehercule reperi: quæ res omnino haud parvam recentioribus historicis altercandi ansam præbuit: nam sunt nonnulli, qui velint Liciniforum id nunc esse Bergomatis agri oppidum, quod *Leucum* vocant incolæ: aliis placet Liciniforum eam esse civitatem, quæ secundum littus Larii lacus sita est, quamque vernaculo sermone *Lecen* dicunt. At vero contra non desunt è doctis multi, qui secus sentientes tradunt, Liciniforum oblitterato priori nomine, nostra ætate ab accolis pagum *Incini* nuncupari, quod oppidum à Como decem millium intervallo abesse commemorant. Quarum opinionum quæ vera sit, alii viderint: illud certe inter omnes auctores convenit, Liciniforum urbem ab eruditissimis, probatissimisque, priscarum rerum Scriptoribus, inter Orobiorum civitates fuisse connumeratam. At vero Comum in Larii lacus, qui est apud Alpes, ripa positum esse, nemo est qui nesciat, qui vel Historicos legerit, vel Geographos perlustrarit: hujusce autem civitatis vetus nomen, quanquam jamdudum excidisse nonnulli censeant, ego tamen id ipsum Comi nomen (quod obstrigillandi gratia minime dictum velim) verum ac genuinum esse facile contenderim. Quum enim aliquando mecum ipse tacitus cogitarem, unde hæ Cenomanorum sive Orobiorum urbes, quas enumeravimus, nomina traxissent; illud in mentem veniebat, si Orobiorum ac Cenomanorum nomina essent barbara, ut pridie ac nudius tertius aperte demonstravimus, Comum quoque ac reliquas Orobiorum civitates barbaro nomine appellatas credi oportere: earumque etymon, non ex Græca, aut Latina, aut Celtica lingua, sed ex omnium vetustissima Hebræa querendum esse. Nemo enim (si Hieronymo credimus) in altera lingua quempiam vocans, etymologiam vocabuli sumit ex altera. Itaque, quum me diu atque anxie torissem, tum demum veteris illius Hebræorum linguæ peritia, quantulacunque ea est, adjutus, quod jam pridem optaveram, (ni fallor) sum consecutus. Siquidem auctore doctissimo hujusce eloquii viro, Davide Chimchæo Hispano, apud Hebræos **קומ** *Comah*, ædificii altitudinem significare didicimus, ut est apud præclaros vates Ezechielem *capite* XL. & Esaiam *cap.* X. quo loco nonnulli ex Interpretibus **קומ** *Comah* excelsas trabes interpretantur. Quamobrem non temere fortasse dixerim, Comum ab Hebræico ver-

A bo *comah*, id est, ab altitudine fuisse nuncupatum, quasi excelsum ædificium, utpote in colle situm; quandoquidem non alia de causa Cenomanos Hebræico sermone Orobios, id est, *montigenas*, sive Græco *monticolas* cognominatos fuisse antea probavimus, quam quod montuosis in locis vitam agerent: adde quod & Græci, oppidum, vicum ac pagum, *κωμόπιον* vocant: quæ tamen nomina ab Hebræis ducta fuisse quis neget?

At dicet aliquis, quum Comum non in monte, aut colle, sed potius in ima duorum montium planitie, hac præsertim tempestate, positum videamus, omnino perspicuum esse, inter Orobiorum civitates immerito à Geographis connumerari. Huic ego illud non incommode forsitan responderim: Consueisse priscos coloniarum duces ac principes, attestante Beroso, juxta Jani patris mandatum editis natura locis oppida, ac potius arces quasdam loco urbium munitissimas, quas Græci *ἀκροπόλεις* dicunt, construxisse: hac maxime de causa, (ut eruditus Homeri enarrator asserit) ne iterum vehementissimis illis terrarum eluvionibus obruerentur: ejus verba sunt: *Ἰστέον, ὅτι οἱ παλαιοὶ οἱ κτίζοντες τὰς πόλεις ἐν πρὶν ὑψιλοτέροις τοῖς ἀκροπόλεις ἐποίησαν, ἀλλὰ τὸ ἐκείσιν προσφύσαν δὲ τῶν κοιλοτέρων τόπων τὰς ἐνοικούντας ἐν τοῖς καὶ ταχυδρομῶς.* Cæterum quum nemo fere vestrum sit, quem nescire existimem, Comi exstare arcem quandam munitissimam in colle summo, admodum edito loco collocatam, adeoque difficili ascensu, atque perarduo, ut nisi obsidione expugnari non posse videatur, ecquid causæ tandem esse potest, cur non credamus hujusce arcis, ac potius urbis, (priscis namque temporibus arces & oppida loco urbium censebantur) verum ac vetus nomen fuisse Comum, id est, excelsa atque sublimis civitas? eaque maxime de causa ab antiquis locorum scriptoribus inter præcipuas Orobiorum urbes computari? inferiorem namque civitatem, quæ prope Larii lacus ripam jacet, posterioribus sæculis Romanos Imperatores condidisse, ac Novumcomum cognominasse neminem latere arbitror, qui Strabonem saltem ita dicentem legerit: *Huic propinqua Verona est, amplissima & hæc civitas: his inferiores Brixia, ac Mantua, & Rhegium, & Comum: hæc mediocris erat colonia: cæterum Pompejus Strabo, Pompeji magni pater, colonos in eam restituit, quam antea Rhati incumbentes vastaverant: inde C. Scipio tria hominum millia insuper adjecit: postmodum divus Cæsar quinque inquilinorum millia ad inhabitandum deduxit, & quæis quingenti illustrissimi fuere Græci: hos etiam civitate donatos in habitatorum numero descripsit: haud tamen ibidem domicilium habuere, sed oppido nomen relinquentes, & Novumcomum appellantes, Novocomenses oppidanos vocavere.* Hæc ille. Quanquam autem hæc ratio satis firma sit, ac stabilis: potest tamen etiam illa afferri, non solum incolas, verum etiam accolæ montium montanos vulgo dici: & quamvis, si, quos accolunt, montes respiciamus, non tam alto, quam depressio loco sedes sibi delegisse videantur, Cremonesibus tamen comparati, Mantuanisque, in edito atque excelsio loco habitare sine controversia deprehenduntur. Quibus de rebus Comum inter Orobiorum civitates non injuria à Priscis annumeratam fuisse, nemo jam amplius (ut ego quidem arbitror) recte dubitaverit. Sed jam quæ de Como dicta sunt, hunc habeant terminum: neque enim ego nunc hujusce clarissimæ civitatis universa priscarum rerum monumenta conor asferre: nam neque oratione complecti omnia possumus, neque opus est, quum præsertim Benedictum Jovium Comensem, hominem summa & doctrina & ingenio præditum, ea omnia litterarum monumentis tradidisse, à viro ejusdem civitatis ornatissimo Francisco Mario Fabro oppido quam libenter acceperim.

Quare agite jam illa quoque ostiatim videamus, quæ me de cæteris duabus Cenomanorum civitatibus,

bus dicturum pollicitus sum. Harum igitur tertiam, quam posteriores Brixiam appellarunt, antiquissimis temporibus à Cydno Ligurum filio fuisse conditam, superiori in consensu ex Catulliano carmine satis aperte demonstravimus: non tamen totam à Cydno conditam asseruimus, sed eam duntaxat civitatis partem, quæ in collis molliter adscendentis capite posita est, quum eam ipsam Catullus à conditore Cycneam speculam cognominavit, & prisca etiam Auctores tradant (ut antea de Como jam diximus) fuisse hoc in more positum, institutoque majorum, ut veteres illi coloniarum duces editis in locis urbes maxime conderent, atque eas quidem adeo parvas atque humiles, ut acro poles potius, vel oppida viderentur, quam civitates, quas nunc cernimus amplissimas ac locupletissimas: quemadmodum latissime paret ex iis, quæ de Roma, Neapoli, Florentia, Mediolanoque, tam Græci, quam Latini Auctores litterarum monumentis prodidere. Quocirca non incommode fortasse dixerim, reliquam ejusdem civitatis portionem, quæ ad radices collis illius plano in loco sita est, pulcherrimisque mœnibus circumsepta, quamque idem ille poeta Cycnea in specula suppositam dixit, subcisivis deinde temporibus, diversis à regibus, exterisque nationibus, sensim auctam fuisse, atque amplificatam: quod quidem ipsum Brixiae nomen aperte satis admodum indicat, quemadmodum facile intelligi potest ex iis libris, quos de rebus Brixianorum proximis hisce diebus Helias Capreolus, vir & totius antiquitatis, & bonarum litterarum studiosissimus, in lucem edidit. Nos autem missa hæc facientes, ne dum hisce in rebus, quæ jam penitus ex aliorum scriptis clara sunt, ac manifesta, diutius immoremur, aut vobis molesti simus, aut certe tempus parum suppetat, ad ea pertractanda, quæ de Bergamo quarta Cenomanorum urbe dicere institui: quando de Brixianorum rebus gestis, vel antiquitatum monumentis, aut situ, aut opibus, aut copiis, cæterisque hujuscemodi rebus ipso Helia afferre in præsentia melius quid possim, haud quamquam intelligam.

Itaque jam demum me ad dulcissimum patriæ nomen totum convertam: de quo si occultiora nonnulla, ac fortasse etiam plura dixerò, quam de aliis antea fecerim, facile vos id mihi condonabitis: neque enim mihi est patria jocundius quicquam, nec charius, juxta illud Homericum*:

— αἶψ' ἀγαθὴ κερτορέφθ', ἔπ' ἐργα
ἦς γαίης δύνανται γλυκερώτερον αἶψο ἰδέσθ'.

Itemque paulo post:

ὦς ἔδδεν γλυκίον ἦς πατρίδθ', ἔδδ' ἐπικύων
Γίνεται.

Verum enimvero quia complures nostri generis viri sane doctissimi de hujusce civitatis situ, deque maximis rebus gestis permulta jam & conscripserunt, & nunc quoque nonnulli eisdem de rebus haud pauciora, sed prorsus ornatiores, scriptorum monumentis tradere, nec obscuro, nec vario sermone, sed & clarissima, & una omnium voce prædicantur: ob id & temporis brevitati, & instituto meo facturum me satis arbitror, si circumcisus iis omnibus, quæ mehercule etiam ex sese apertissima sunt, & manifesta, de Bergomæi nominis origine, interpretationeque, abditiore quædam persequar, vel non ita saltem pervulgata, ut merito cuiquam à nobis aut contemnenda, aut prætermittenda fuisse videri queant. Quam enim hæc ipsa nostra civitas loci quidem & natura, & situ, ædificiorum autem cum descriptione, tum pulchritudine sit nobilis, quamque præcelso in colle, atque conspicuo, inter duos saluberrimos amnes Serium ac Brembum condita, quis vestrum hoc ignorat? Nam quantum præterea sint ejus agri fertiles, quam jucundi, quantaque in his existat vel frugum bo-

* Odyss. l. ψ. 27.

nitatis, vel hominum frequentia, aut quot umbrosi nemorum saltus, quotve colles fecundissimis vitibus consiti, aut quot denique campi suapte natura terrenos, arboreosque fetus benignissime subministrantes, equidem non modo vos, qui isthæc cotidie contemplamini, sed nec ullos etiam nostri orbis populos longissimis licet locorum intervallis à nobis disclusos, latere puto, ad quos saltem nostræ vel urbis, vel regionis fama pervenerit. Verum, ne aliter, atque ostenderam, agere videar, pergam ad instituta.

Principio igitur, quum tres præsertim diversæ (quod vos quoque minime ignorare arbitror) & antiquorum, & nostrorum hominum discrepantesque de recta Bergomæi nominis interpretatione & origine, vel, ut significantius Græci dicunt, ἐτυμολογίᾳ, sententiæ passim circumferantur, è quibus alii quidem affirmant à *Bara*, pervetusto Bergomatis agri oppido, Bergamo nomen inditum: quidam vero, à nescio quo Gallorum duce *Pergamo*, Celtica lingua *Pergamum*, id est, (ut Galeotus interpretatur) montanam urbem fuisse cognominatam: aliis vero placeat à *Pergamo* Asiæ urbe ortum duxisse: quis non satis videt? quis non intelligit, earum opinionum vel primam, vel nullam esse veram? Quid enim tam aut falsum, aut fide indignum, aut denique commentitium judicari debet, quam quod & incertum est, & summa in sententiarum varietate ac disensione constitutum? Primum namque illud objecerim, Chronica illa, ex quibus id se deprompsisse affirmant, ἀνώνυμα esse, planeque incerta; quibus non esse credendum superiori disputatione ex Metasthene Persa latissime demonstratum est. Quid autem est, obsecro, tam insulsum, rudique homine dignum, quam quod non satis explorate perceptum sit, à nulloque certo Auctore traditum, sine ulla dubitatione (quod isti faciunt) velle defendere? Huc accedit, quod in Bossianis *Chronicis*, in quibus de Bellionenſe quodam Mediolani Duce, cujus temporibus ferunt Pergamum illum Bergomum condidisse, nescio quid scribitur, nulla prorsus hujusce Pergami fit mentio: postremo repugnant apertissime his opinionibus Cato, Plinius, Ptolomæus, alique nonnulli, cum Græci, tum Latini rerum gestarum scriptores eruditissimi: quædam præterea perantiqua urbis epigrammata, in quibus omnibus *Bergomum* ubique, non *Pergamum* scriptum annotavimus.

Verum, adversus postremas hæc recentium maxime historicorum opiniones (nam de priori ostendam equidem paulo post qui sit meus sensus) ut simplici quadam, ac pingui potius perſcrutatione, vel, ut majores nostri dixerunt, Minerva explicatas, nihil fortasse afferri nunc debuit, nisi etiam indoctis satisfacere optarem, qui quod semel in *Chronicis* quamlibet rudibus & indocte scriptis legerunt, mordicus retinent. Itaque ex Hebræorum quasi quodam sancto, augustoque fonte, ex quo Cydnum etiam illum, principem Cenomanorum auctorem, ortum duxisse, hesternò sermone clarissime demonstravimus, nostra omnis, de recta Bergomæi nominis interpretatione, manabit oratio. Quid enim tam consentaneum, ratum, firmumque videri debet, quam cum Cenomanorum atque Orobiorum nomina (ut superioribus diebus ostendimus) omnino sint Barbara, id est, Hebræa, Bergomum quoque, cum sit Cenomanorum Orobiorum civitas, Barbaro prorsus, id est, Hebræo nomine fuisse nuncupatam? ejusque ἐπὶ nequaquam ex Græca, aut Latina, aut Gallica, sed ex omnium vetustissima ac sanctissima Hebræorum lingua querendum esse? quod cum à nobis in præsentiarum sit explicandum, video mihi necesse esse, ut quam sæpiissime insuetas Latinis auribus, asperimasque Barbarorum (ita enim Hebræos appellare libet) voces proferam: verum, id vos ut æqui ac boni consulatis, operæ precium est: neque enim

ego accusandus sum, sed aut ipsa factorum vis, eventusque, aut ipsa potius rerum humanarum conditio improbanda: quippe quæ vel eum sermonem barbarum nobis effecerit, vel civitati saltem nostræ nomen illud non Græcum, aut Latinum, sed Barbarum penitus indiderit. Conabor tamen pro rerum ac verborum obscuritate, quoad fieri poterit, ut ea dicam distincte atque dilucide. Sed jam demum rem ad ipsam veniamus.

Bergomi igitur urbis nostræ nomen, quum omnino Barbarum sit, non aliunde profecto, quam ex his tribus Hebræis vocibus, **ברד** **גון** **מון** *Beradim, Gon, Mon*, compactum fuisse plane mihi videtur, ex quibus nimirum qualis ipsa vel initio extiterit civitas, declarari nobis quam facillime queat, ni ea me ratio penitus fallit, quam Plato Philosophorum omnium (ut mea quidem opinio fert) & eloquentissimus & eruditissimus, ex Cratyli sententia eo in libro assert, qui est *de recta nominum impositione*: nomina scilicet adeo perspicuas esse rerum imagines, atque adeo rebus ipsis esse similia, ut quum ea quis enucleate intellexerit, res quoque ipsas statim agnoscat: unde quum Bergomum quoque priscis temporibus, ut pervetusta quædam loquuntur annalium monumenta, regia civitas fuerit, facile est intellectu, non incommode à conditore Bergomum, id est, Gallorum regiam urbem, fuisse nuncupatam: quandoquidem apud Hebræos prima ejus nominis dictio, quæ est *Ber*, à **ברד** *Barad* ducta est, quæ sane vox apud eos, quemadmodum Hebraicis institutionibus eruditi apertissime tradunt, idem omnino significat, quod apud Babylonios & Assyrios *Gallim*, id est, *undas*, ac *fluctus*: à quibus, ex Xenophontis sententia, Janum patrem *Gallum*, ejusque omnes posteros epitheto paterno, *Gallos*, id est, *inundatos*, vel ab undis, aut aquarum illuvionibus superstites, fuisse cognominatos, nudius tertius clarissime demonstravimus. Cæterum hujusce Hebraici verbi *Barad* multitudinis numerus est **ברדים** *Beradim*, à quo ablatis duabus postremis *Adim* syllabis remansit prior *Ber*: quæ est earum dictionum princeps, ex quibus Bergomæum nomen coalitum fuisse supra declaravimus: in quo certe eandem obtinere significationem existimamus, quam *GALLIM* apud Hebræos pariter & Assyrios habere supra docuimus: cui sane rei maximam argumenti vim asserere potest illud saltem earum, quæ ab hisce Gallis emanarunt, gentium nomen, quod Hebraice **עמברדים** *Himberadim* rectius (mea quidem sententia) dici potest, quam aut Græce *Ομβροι*, aut Latine, *Umbri*: est enim apud Hebræos **עם** *Him* populus: porro *Beradim*, ut dictum est, idem quod *Gallim*, id est, *inundati*, sive à fluctibus, aut aquarum eluvionibus servati: de quibus ita apud Solinum: *Gallorum*, inquit, *veterem propaginem Umbros esse M. Antonius asseverat: eosdem, quod tempore aquosa cladis imbris superfuerunt, Ομβρους* *Grace nominatos: unde & M. Cato: Ex his, inquit, tradunt venisse Janum cum Dyrin & Gallis progenitoribus Umbrorum.* Ex his omnibus facile intelligi potest, illam M. Catonis, quam Plinius refert, de Bergomæi nominis origine sententiam, aliqua ex parte defendi posse. Nam si ad hunc sensum asseruit, Bergomates ab eodem nomine, à quo *Bara* quoque vetustissimum *Orobiorum* oppidum sibi nomen adsciverit, fuisse cognominatos, recte eum sensisse quis neget? quum id ipsum etiam *Baræ* oppidi nomen, quod Gallicum interpretatur, ab eadem Hebraica voce *Barad*, ex qua Bergomi quoque nomen compactum fuisse, demonstravimus, deductum fuisse liquido pateat. At vero si secus eum sensisse quis affirmarit, nequaquam medius fidius intelligo, qua ratione, aut via eam tueri opinionem facile possit: sed hæc alii postea viderint: nolo enim in iis, quæ perspicua mihi videntur, confirmandis longior videri, quam res ipsa postulet.

Altera autem Bergomæi nominis pars, quæ est

A *Go*, haudquaquam (ut opinor) incommode regia poterit interpretari: namque **גון**, *Gon*, apud Hebræos verbum est, *protegere* significans, à quo **מגן** *Magen*, id est, *Clypeus*, aut *scutum* ductum est, quod priscis regibus, ac ducibus, regni atque imperii tutamen erat: quemadmodum *Naso* innuere videtur his verbis:

*Atque Ancile vocat, quod ab omni parte recisum est:
Quemque notes oculis, angulus omnis abest.*

*Tunc memor imperii sortem consistere in illo,
Consilium multa calliditatis init.*

B Hinc effectum arbitror, ut ad hæc usque tempora usus obtinuerit, ut procedentibus regibus ac ducibus, vel urbium præfectis, scutum, tanquam insigne quoddam imperii, præferatur: Quocirca ea Bergomæi nominis particula, quæ est *Go*, recte (ut ego quidem existimo) dici potest aut *Scutata*, aut *Clypeata*: quo quidem verbo usus est Virgilius, qui ait*:

*Insequitur nimbus peditum, clypeataque totis
Agmina densantur campis.*

Unde est etiam apud Solinum civitas *Clypea* Africa: verum, ut magis sensum exprimam è sensu, regiam, sive regalem (utroque enim modo Latine dicitur) interpretabimur.

C At vero postrema Bergomæi nominis portio, quæ est *Mum*, apud Hebræos **מון** *Maon*, & *Mon*, scribi solet, ac proferri: significatque, cum *oppidum*, tum *civitatem*, & *habitaculum*, quemadmodum facile intelligi potest ex Psalmo LXXXV. & LXXXIX. Quamobrem hisce tribus Hebraicis dictionibus *Beradim, Gon, Mon*, per concisionem duarum syllabarum, uniusque litteræ, in unum redactis, oritur dulcissimum illud atque pulcherrimum patriæ nomen **ברגומון** *Bergomon*, quod Latine rectissime interpretari potest, *inundatorum Clypeata civitas*, vel *Gallorum regia urbs*, quæ à Græcis *Αρχέμυς*, à recentioribus autem Latinis, cum *princeps*, tum *ducalis* civitas, appellari solet. Cæterum hisce ego pluribus nominibus unam rem declarari volo, ac definiri: sed utor, ut quam maxime significem, pluribus; quam perobscura quidem multa ex iis, quæ diximus, existisse video: quæ tamen à me non ita dicta sunt de industria, sed inerat & in rebus ipsis jam obsoletis, quibus ubertas orationis adhiberi vix potest, & in verbis illis incognitis, inusitatisque, isthæc omnis obscuritas. Quapropter quoniam ex his quibuscumque quasi è scopulis nostra jam enavigavit oratio, quod reliquum est, quam paucissimis absolvam.

D Quum igitur Bergomum regalem veterum Gallorum urbem existisse, nomen ipsum manifestissime doceat; porro nomina rebus adeo similia esse Plato affirmet, ut simulac quis nomina scierit, res quoque ipsas statim agnoscat, facile intelligimus ei aliquando civitati regiam potestatem, sive, ut vulgato more loquar, ducalem principatum præfuisse. Verum enimvero, quia eorum temporum historiam, quæ ante Romanam Rempublicam fluxere, antiquitas abolevit, illud restat, ut quæ hujus rei, quam diximus, nomine ipso significari, possumus, monumenta explicemus. Constat itaque ex antiquorum monumentis atque historiis, quæ à Græcis *Chronica* nuncupantur, urbem nostram regibus quondam, sive ducibus, aut regulis paruisse: quod & adsignificant tum antiquorum statuarum atque numismata, tum permulti quoque elogiis excisi lapides: de quibus tum dicturum te, Marce, pollicitus es, cum ego Cenomanorum civitates persolvissim. Hic autem, viri optimi, nolite expectare, ut ego nunc universos Bergomatum duces, omniaque illorum facta, commemorem, vel si quid memoria dignum gesserint, aut certe dixerint, explicem; neque enim opus est, neque pudoris est mei, Francisco Bellafino viro doctissimo, & utraque lingua optime prædito, tum vero maxime scriptori harum rerum diligentissi-

* *Æneid.* VII. v. 793.

mo, vivo & incolumi, me aut auctorem, aut prædicatorem monumentorum nostrorum profiteri.

Sed tamen ad confirmandam eam Bergomæi nominis interpretationem, quam modo declaravimus, quatuor tantummodo duces, quos quidem memoria teneo, referam: nam qui cæteros scire optarint, eos ad disertum atque eruditum Bellasini opus de *Bergomatium rebus antiquis* demittam. Id enim facile poterit, abundeque eis suppeditare quod requirent. Itaque prior ex iis Bergomæis ducibus, quos mihi quidem nunc tenuis memoria suggerit, Crotatius ille est, quem, cum esset regia atque illustri è familia, nobilissimisque è parentibus genitus, tradunt historiæ, tam multa, tamque præclara rei militaris facinora fecisse, ut imperio, virtute, victoriaque, totius Venetæ regionis principatum obtinuerit. (nondum enim præclarissimum Venetorum imperium coeperat) Quibus rebus adducti Bergomates, permotique, ut hujus fortissimi, invictissimique, Ducis rerum gestarum gloriam, ac memoriam virtutis sempiternam, futurorum hominum proli commendarent, defuncto monumentum quam amplissimum faciendum curarunt. Itaque erecta eo in tumulo marmorea columna, simulacrum illi quoddam egregie factum statuerunt, quod quidam *Plotatium*, alii autem *Crotatium*, Bellasinus vero noster *Plutonem*, appellatum fuisse commemorat. Posterior autem Bergomi Dux, hujusce Crotatii filius, fuit Lupus nomine: qui generis nobilitatem, gestarumque rerum gloriam, atque imperii majestatem, quas à patre acceperat multis in Rempublicam meritis, constantissimisque atque optimis actionibus, non modo confirmavit atque retinuit, verum etiam mirum in modum auxit, ampliavitque: fuit enim cum continentia, fortitudinis, ac pietatis, tum divini quoque cultus, ac moralium virtutum omnium exemplum quasi quoddam & specimen. Eo siquidem Duce, auctoreque, Bergomates nostri Christi optimi, maximeque, cultum ac leges, auspiciis tamen ac meritis divi martyris Alexandri, Thebææ Legionis significari, primum suscipere. Quæ quidem ob merita, uno omnium consensu, inter Divos relatus est, maximeque ei honores post mortem decreti, in testimonium scilicet vitæ, pie sancteque institutæ. Superfunt cæteri duo Bergomæi Duces, Gandulphus scilicet ac Rhotaris: qui aliquot sæculis post Crotatium Lupumque principes florere: de quibus quoniam tum apud Bellasinum, tum etiam apud Paulum Diaconum accuratissimum eorum temporum Scriptorem in quarto ac sexto *Longobardica Historie* libro latissime scriptum est, prætermittam hoc loco ea velle dicere, quæ & vobis notissima sunt, & mihi ad commemorandum minime necessaria: cum præsertim memoria teneam, non ita pridem hæc vobis demonstrata fuisse, atque ostensa à Jovita illo Rapicio, homine & summo dicendi studio, & peracri prorsus ingenio ac singulari doctrina prædito: quem scire omnes facile potestis, tum multis civibus nostris, tum nobis præsertim & ad suscipienda, & ad ingredienda, isthæc politioris humanitatis atque ingenuarum artium studia principem, & auctorem, & magistrum existisse.

Sed jam satis multa de Bergamo verba mihi fecisse videor, quæ tamen & inventa à nobis sunt acutius, & dicta etiam fortasse subtilius quam ut quivis ea possit agnoscere, tamen fretus intelligentia vestra disserui brevius ac strictius quam causa desideraret: nam me Sol ille præcipitans admonebat ne essem longior, ut tu quoque, Marce doctissime, provinciam tuam hodierno die explere posses atque perficere. Non sum tamen nescius plurima in hunc sermonem non esse collata, quæ & Bellasinus, & alii nonnulli diligentissime persequuti sunt: illis namque propositum fuit de his singillatim scribere, nobis vero abunde satis fuit, brevi hac disertatione, nonnulla perstringere, quæ & vobis non injucunda penitus forent, cæteris vero non admodum pervulgata vi-

derentur. Quamobrem, quoniam ego pensum jam absolvi meum, si sine tua molestia fieri potest, M. Mauriti, non modo petimus, verum etiam rogamus, atque exposcimus, ut ea antiquitatum monumenta, quæ te allaturum spondidisti, antequam Sol occidat, nobis exponas.

Imo vero, inquit ille, jubeatis; si quid possum, id totum vobis devoceo: nam qui potest esse molestum tempus, quod philosophiæ, quodque eruditio hisce colloctionibus impenditur? atqui si subciviva hæc nobis disserendi tempora sæpius darentur, nihil profecto esset quod ad perfrundum studiorum nostrorum voluptate præoptandum mihi fore existimarem. Verum facis tu quidem, Marsili mi, abundantia quadam humanitatis tuæ, ut ea etiam à me roges, quæ prætermitti absque nefario ingratitude nomine nullo modo posse videntur. Nam cum diebus istis meo quidem rogatu & impulsu de principe Orobiorum ortu, descriptioneque, nec non & singulis eorum civitatibus plurima & distincte, & abundanter, & illuminate, tam rebus, quam verbis explicaveris, ingratis omnino fecerim, si meum erga te, fratresque tuos, studium ac voluntatem, iis præsertim in rebus, quibus vel maxime possum, declarare disjugiam: quanquam multis jam argumentis ea spero vobis non esse incognita. Itaque nunc pervetusta quædam hujusce civitatis ac regionis monumenta percurram: quibus & vobis, optimi adolescentes, quoad fieri potest, morem geram, & Bergomæa quoque nobilitas, etsi per se sit satis clara, tamen his etiam quasi quibusdam luminibus illustretur. Cæterum, ut id quam commode agatur, & ne qua forsitan excidant, proferam in medium haud contemnendæ vetustatis libellum, quo omnia ferme non modo nostræ urbis, sed exterarum quoque regionum omnium, ac civitatum epigrammata pervetustis marmoribus incisa breviter, & ut mihi quidem videtur, perdiligenter collecta sunt. Quum id dixisset Marcus, arrepto statim volumine, ac ea tantum oculis collustrans, quæ ad Bergomates spectabant, hunc in modum effari cœpit. Divi martyris Alexandri, optimi juvenes, templum est non longe ab ea urbis parte, quam nostri *Citadellam* populariter vocant, editissimo in loco situm, sane sanctum apud nostrates, ac religiosum: ibi complura sunt vetustatis monumenta: è quibus illud in primis exstat P. Marii elogium marmoreo quodam, quadratoque lapide, grandioribus litteris exsculptum: quo non facile dixerim unquam me aliud vidisse aut pulchrius, aut elegantius: tamen non tam multum in istis rebus intelligo: hujusce vero lapidis talis est inscriptio:

P. M A R I O
V O T.

E L V P E R C I A N O
E Q. R. E Q. P V B. O M N.
H O N O R. M U N I C I P A L.
A D E P T. J V D I C I D E S E L E C T.
S A C E R D. C A E N I N E N. C O L L.
F A B R. C E N T. D E N D. M. B. P A T R O N.
C V J V S E X I M I A L I B E R A L I T A S P O S T
M V L T A S L A R G I T I O N E S H V C V S Q V E
E N I T V I T. V T L V C A R I I I I N A E
R E D E M P T V M A R E P. S V A V N I V E R S I S
C I V I B V S S V I S I N P E R P E T V V M
R E M I T T E R E T. H V J V S T O T E T T A M
I N G E N T I A M E R I T A I T A
R E M V N E R A N D A C E N S V E R V N T:
F V T E F F I G I E M I I I V. P E R P E T V A
V E N E R A T I O N E C E L E B R A R E N T.

L. D. D. D.

Quo equidem epigrammate, cum sit vetustissimum, apparet, ut inquit Bellasinus, priscis temporibus

Bergomum Romanorum municipium existisse: nam cum postremæ illæ quattuor epigrammatis notæ L. D. D. D. *locum datum decreto Decurionum* auctore Probo significant, porro ii, qui in municipiis publicam rem agebant, Ciceronis testimonio *Decuriones* appellarentur, eaque dignitate pollerent qua Romæ Senatores, facile est intellectu, urbem hanc, quod Decurionum dominatu quondam paruerit, municipali jure priscis illis Romanorum seculis viguisse. Id vero an prorsus verum sit, non est nunc dissendendi tempus, sed cum vestro, tum aliorum iudicio discutiendum relinquamus: illud tamen non importune (ut opinor) affirmaverim; ex vicorum, oppidorumque nominibus, quæ in Bergomati agro sita sunt, non antiquitatem modo Bergomatum, verum quam gratus etiam Romanis hic ager olim fuerit, quam facillime ostendi posse. Siquidem Marianum, Catianum, Statianum, Mutianumque non nisi à Mario, Catio, Statio, Mutioque deducta fuisse, nemini ignotum esse arbitror: in quæis fortasse non incommode & Actianum, quod nunc *Alzanum* vocant, & Albinum adnumeraverim: quorum alterum ab Actio, alterum vero non minus ab Albo, quam à Sp. Albino, aut ab A. Albino deduci posse manifestum est. Sed de his alias: hæc enim admonendi modo causa volui dixisse: tu quanti id facias, Marfili, postea videris. Est aliud etiam præ foribus templi non indecorum epigramma, sed tamen mutilum & fractum, tale quippe est:

NTIO. SEX. F. VOT. ALPONI
AE. M. F. SECVNDÆ.
IO. M. F. VOT. MACRO. PONTIFICI.
M. F. VOT. MONTANO. llll. VIR. lll. VIR.

Exstant præterea eo in loco tres alii miræ cujusdam venustatis & antiquitatis lapides: è quæis primus hoc elogio est insignis:

ATESTIA I. D. L.
ATESTIAE
TERTIAE. PATRON.
BENEMERENTI. ET
CAPITONI BINETAE.
ET MARTIAE, ET PRIMVL.
DELICATIS. ET
TELAMIO CELERI
AMICO CARISSIMO.
ET ATESTIAE EGNATIAE.

In secundo autem ita scriptum est:

V. F.
L. BLANDIVS C. F.
VOT.
lll. VIR. ET
AVGVSTALIS. ET
FLAMINALIS
SIBI ET
VALERIAE L. F.
RVSTICAE
VXORI.

Tertii vero hujusmodi est inscriptio:

SPONSOR. L.
C. STATIO. C. L.
FAVSTO
NEGOTIATORI
ET
VITVLLIAE. SEX. F.
TERTIAE VXORI

In quo monumento obiter illud annotandum censeo, consuevisse Veteres otium & negotium per T scriptitare: quod secus multi nunc faciunt. Sed hæc alii viderint. Cæterum non procul ab ea divi Alexan-

A dri æde, quam diximus, sacellum quoddam est divo Petro Apostolorum principi dicatum, cujus in parietibus non inelegans elogium hoc inspicitur:

C. CORNELIO
C. F. VOT.
MINICIANO
PRAEF. COH. PRIM.
DAMASC. TRIB. MIL.
LEGIONIS III. AVGVST.
PRAEF. FABR. CVRATORI
REIP. OTESINORVM
III VIRO I. D. PONTIFICI
FLAMINI DIVI CLAVDII
BERGOMI PATRONO
FLAMINI DIVI TRAIANI
MEDIOLANI
PLEBS VRBAN.

Quæ quidem inscriptio apertissime declarat consuevisse majores nostros, reclamante tamen recentiorum, quotidianaque consuetudine, *Bergomum* per B scribere, quod ego aliis quoque in nonnullis Veterum inscriptionibus scriptum animadverti, cujusmodi illa est, quam nuper, Brixiae cum essemus, excrispsimus: cujus hæc sunt verba:

C P. CLODIOP. F. FAB. SVRAE Q. FLAMINI
DIVI TRAIANI PONTIF. II VIR. QVINQVE TRIB.
LEG. II. ADIVTRI. PIAE FID. CVRATOR. REI. P.
BERGOM. DATO. AB. IMP. TRAIANO. CVRATOR.
REI. P. COMENS. DATO AB. IMP. HADRIANO
COLLEGIA. FABR. ET CENT.

D Quibus ex epigrammatibus quis non videt? quis non perspicit quam facile commentitiæ illæ recentium Historicorum opiniones refelli possint qui asserunt hujusce urbis nomen non *Bergomum*, sed *Pergamum* dici debere? quippe quod vel à Pergamo Asiae oppido, vel à Pergamo Gallorum duce emanarit, atque etymon duxerit: sed ô magna vis veritatis! quæ contra hominum ingenia, calliditatem, solertiam, contraque fictas hominum insidias, se per se ipsam facile defendat: quam enim tota hæc recens fabella? quam est sine argumento? quam nullum invenire exitum potest? nam sive ex Antiquorum elogiis petantur signa, quibus maxime veritas illustrari solet, quænam illis ipsis, quæ antea exposui, aut clariora, aut venustiora inveniri tandem possunt? sive patrum auctoritas quærat, quænam obsecro major? quæ sanctior? quæ præclarior afferri unquam potest, quam M. illius Catonis, quem Cicero studiosissimum philosophiæ, justissimum virum, optimum judicem, religiosissimumque testem nuncupare solet? ut interea dissimulem Plinium, Ptolemæum, Trogumque Pompejum, atque è recentioribus complures, apud quos ubique *Bergomum*, non *Pergamum* scriptum invenitur: nec non & antiqua Bergomatum aurea numismata, in quibus ita scriptum est, *Lupus Dux Bergomi*. Sed ineptum omnino est, de tam perspicua istorum impudentia pluribus verbis disputare; quasi aut res ipsa dubia sit, vel obscura, aut ea, quæ hisce de rebus subtiliter, & ornate à M. Marfilio disputata sunt, nostræ vel confirmationis, vel approbationis indigere videantur. Quare redeamus ad id, unde divertimus. Visuntur igitur eisdem in parietibus alii quoque duo lapides; quorum alter hisce verbis ac literis incisus est:

F M. CAECILIUS M. F.
FIRMVS.
BENDROPHORIS
LEGAVIT

Alter vero est hujusmodi :

L. MAVESI

L. CORN.

Q. STATI

L. POMPO.

Aliud quoque non longe à foro scimus esse fanum, nobilissimum quidem, ac sanctissimum, divo Vincentio martyri dicatum: quod templum in oculis, quotidianoque adpectu Populi Berg. est positum: ejus itidem parietibus monumenta nonnulla posita sunt; quorum prius tale est:

PVPIA. M. F. SECVNDIA. V. F.

Q. SVLPICIO. Q. F. RVFO.

IIII VIR. Q. VIRO

Q. SVLPICIO. Q. F. SEDATO.

IIII VIR. I. D. FILIO.

Posterius autem hunc in modum se habet :

L. CLVVIENVS. L. F. ANI
CILO

BALNEVM. ET.

AQVAS. DEDIT.

Sed tamen ea, quæ ad ædem divæ Agathæ sunt, epigrammata nulli aliorum vel antiquitate, vel pulchritudine, cedunt: nam in altero ita scriptum est:

P. RVBRIVS

THEOPHILVS

PAEDAGOGVS

RVBBIAE. SIBI. ET. SV.

In altero autem hi quam pulcherrimi leguntur versus:

PVDENS M: LEPIDI. L. GRAMMATICVS.
PROCVRATOR ERAM LEPIDAE MORESQ.
REGEHAM

DVM VIXI MANSIT CAESARIS ILLA
NVRVS.

PHILOLOGVS DISCIPVLVS.

Est alia etiam apud divum Michaellem, quem nostrates dicunt *Putei albi*, pervetus hæc inscriptio:

IOVI

O. M. ET. DIS.

DEABVSQVE

IN MORTALIBVS.

C. VALERIVS

VALENS

L. M.

Alium quoque lapidem memini me quondam in ædibus splendidi ac nobilis viri Joannis Jacobi Ulmæi in hanc sententiam legere solitum:

D M

VIBIAE

VARIAE

CAETERIS

Et hæc quidem sunt antiqua hujusce civitatis monumenta: quæ vero in Bergomatis agri villulis atque oppidis continentur (quoniam Sol ad occasum properat) quam brevissime potero, expediam. Itaque primo ab urbe lapide, eo in pago, qui *Adhaste* dicitur, epigramma quoddam litterulis quidem corrossis, senioque nutantibus, sed tamen eruditissime scriptum, ita legitur:

M. CABARSVS

PATIENS DEDIT

XXX ET PRO FVNDI

DE VSVRIS XIII. QVOT

SI IVVENATES EIVS

NEGLEXERINT FILIO

EIVS RETERE DEBE

BVNT XXX. AVT

SI QVIS HERES

FVERIT

POSIT FILIVS

A Quo in elogio permulta profecto notatu ac cognitione digna sunt: quæ nihilominus propter angustias temporis, tum etiam quod ea Bellafinus noster, vir & doctus, & harum rerum explorator diligentissimus luculente admodum, ac diligenter exposuit, prætermittam, pergamque ad reliqua. Albini igitur talis est inscriptio:

P. FVRIVS P. L.

HILARVS VIVIR:

VIVOS SIBI FECIT

ET FVRIAE. P. L.

A L. C E.

B Itemque apud Mutium, five rectius Mutianum, insigne hoc epigramma conspicitur:

CAPITONI SPIRATIO

RVSTIAE P. F. MAXIMAE

MATRI. Q. CALLIDIO L. F.

MAGIO FRATRI. SEX.

CALLIDIO L. F. FRATRI

DVLCISSIMO.

Rurfus apud Bulgarum duo hi exstant lapides: unius talis est scriptura:

NEPTVNO SACRVM.

M.

DVNILIVS. HOMO.

C

Hæc autem alterius inscriptio:

PONTIVS CORNELIVS

CRIPONIVS

T. F. I. S.

Præterea apud Crassobium hujusmodi è marmore exstat lapis:

C. CORNELIVS C. F. VOT

CALVOS. VIVOS. SIBI

ET L. CORNELIO C. F.

D VOT. FRATRI H. M. H.

N.

S.

Lurani quoque in facello divi Lini tale est epigramma:

D.

M.

BAELIO TAVRO QVI VIXIT

ANN. XXI. DIES XXXV.

FANNIA SEVERA MATER

FILIO PIENTISSIMO ET

SIBI ET AELIO LVCIO

MARITO RARISSIMO

V.

F.

E Itemque hoc apud Martinengum:

MINERVAE

L. LONGINVS

MAXIMVS

EX PERMISSO

AELIORVM

S. S. L. M.

Sacellum præterea quoddam est divi Pauli, altissimo in monte admodum edito loco positum; quem locum vulgus *Argon* nominat: ibi duo hæc sunt monumenta; quorum alterum hac inscriptione insignitum est:

F

HADRIAN.

L. PRISCVS. SI.

T. L. HADRIANO

L. HILARIO PATR.

NO. TESTAMENT.

SCRIPSIT FIERIQ.

IVSSIT.

Hac

Hac vero ornatum est alterum :

M. SERTORIUS
M. L. FAVSTVS
SIBI ET
SERTORIAE. M.
BENIGNAE.

Barrianum quoque, vetus oppidum & nobile decimo ab urbe lapide, scitis esse plenum clarissimorum monumentorum : id enim complures è nostris antiquum illud Orobiolorum oppidum Barra esse arbitrantur, à quo Bergomates fuisse cognominatos, Catonem scriptitasse auctor est Plinius : sed de eo satis superque dictum est à te, Marfili : in eo loco nuper nonnulla veterum monumenta reperta sunt, atque in primis lapis quidam marmoreus, mancus tamen, ac mutilus, cujus in extrema tabella caelatum erat armentum, pastoremque haud pauci tauros naribus atque auriculis trahentes ; apparet autem nunc epigramma hoc exesis prioribus partibus versiculorum, ac dimidiatis fere hunc in modum :

P. R.
IIII VIR
Q. R. VERECVNDQ VR.
ET VIBIAE. Q. L.
VERECVNDAE
T. F. I.

Exstant eodem in loco alii etiam duo lapides ; ac in primo quidem scriptum est :

MARTI MINERVAE.

In secundo autem ita legitur :

DOMITIO. L. F.
VOT
MONTANO.

At vero postremum omnium monumentorum, quae quidem ad manus meas pervenerunt, illud est, quod nuper in agro Atezanii inventum est tale :

L. QVINCTIO
L. L.
ORESTI

Haec igitur sunt, ornatissimi juvenes, egregia illa veterum monumenta, nostraeque ornamenta civitatis, quae hodierno in conspectu ex me voluistis audire : quibus rebus tametsi haec ipsa urbs satis clara atque admiranda videri potest ; ego tamen neque hac re, neque originis nobilitate, neque imperio, neque frequentia clarissimarum familiarum verius, praecleariusque, ac magnificentius tam illustrari arbitror, quam quod optimis artibus atque ingeniis omni studiorum genere perpolitis, & quod prope caput est omnium, religione, moribus, ac Dei optimi, maximi cultu, omni quidem tempore ita floruerit, & nunc etiam maxime viget, ut jure optimo possit cum quavis illustrium civitatum ex aequo contendere. Enimvero quam multos è nostris civibus patrum memoria, quam multos nostra, cum rei militaris gloria, tum divinarum quoque humanarumque rerum omnium cognitio, atque eloquentia, in amplissimo & laudis, & dignitatis gradu collocarint, non hercle facile dixerim : nam quum innumerabilia ferme habeamus hujuscemodi clarissimorum hominum exempla, quanam tanta potest esse dicendi vis, tan-

A taque copia, quae rem tam magnam, tam variam, possit, aut ingenio & viribus sustinere, aut memoria & oratione complecti ? proinde ut haec omnia praetermittam, quae & audistis saepe, & (ut arbitror) etiamnum tenetis animis ; quanam unquam, obsecro, civitas, aut propriis civibus, aut patriae suae benevolis praecipue, atque insigniter diligendis magis pia grataque existit ? Quae vero aut venientibus malis fortius obstitit ? aut quae jam aderant, patientius toleravit, pertulitque ? nulla unquam profecto, mihi credite, in rebus publicis, domesticisque, prudentior ; nulla ad rectissima optimarum artium studia propensior ; nulla denique erga Deorum immortalium curam ceremoniamque religiosior inventa est : testes sunt locupletissimi ac certissimi utriusque sexus pene innumerabiles, vita ac moribus sanctissimi ex hominum genere in coelum recepti : qua de causa effectum arbitror, ut nostri homines, de numinibus ac patria pie meriti, ad omnes artes ingeniosissimi evaserint : quale Pindarus olim Rhodius à Pallade, ob exhibitos sibi primum nascenti ab eis divinos honores, concessum fuisse canit.

Sed quorsum haec tam longae, & non sine invidia, ac fortasse etiam quorundam contemptu, si apud alios, quam apud vos loquerer, repetitae patriae laudes ? nempe ut vos adolescentes, quos ut filios diligo, qui & nobiles estis, & rectissimis quoque studiis, atque optimis artibus dediti (adhuc enim patitur vestra humanitas me quid sentiam libere dicere) ad majorum vestrorum imitationem excitem : novi enim vos, novi patrem, cujus paucos pares haec civitas tulit ; novi domum nomenque vestrum ; studia denique generis, ac familiae vestrae ; virtutis, humanitatis, plurimarum artium, atque optimarum, nota sunt mihi omnia. Itaque faciam ut imperatores instructa acie solent, quanquam paratissimos milites ad praeliandum vident, ut eos tamen adhortentur ; sic ego vos ardentes & erectos non cohortor solum, sed plane etiam rogo atque obtestor, ut tota mente omnique animi impetu in virtutem, doctrinam, patriaeque vestrae gloriam ac honorem incumbatis : nihil est enim quod vobis majori fructui splendorique esse possit, nec quicquam ex omnibus rebus humanis est praeclearius, aut gloriosius, quam de Republica, ut inquit Cicero, bene mereri : nam cum omnia breviter sint, fugacia & caduca, virtus tamen est una altissimis defixa radicibus, quam nulla vis eripere, nulla fortunae procella impellere in scopulum potest. Haec maxime illustratur magnis in patriam meritis, hanc omnes appetunt, amplectuntur universi, qui sese patriae, qui suis civibus, amicis, qui laudi, qui gloriae, non qui somno, & convivii, & delectationi natos arbitrantur. Hanc igitur retinete, quaeso, juvenes, quam vobis tanquam hereditatem majores vestri reliquerunt : namque sic habetote, omnibus, qui patriam suis consiliis, laboribus, litterarum monumentis defenderint, conservarint, illustrarintve, certum esse in coelo, (ut doctiores ac sapientes loquuntur) ac definitum locum, ubi beati sempiterno aëvo fruuntur. Quas ob res pergite, ut coepistis, ornatissimi adolescentes, ut eam ingenii facultatem, quam complexi estis maximam, teneatis, perficiatque : qua & vobis honori, & amicis utilitati, & patriae tandem huic nostrae, totique Christianae Reipublicae emolumento aliquando esse possitis. Verum jam satis superque usus sum vestra humanitate ; itaque, quoniam jam advesperascit, surgendum censeo. Quumque id dixisset, surrexerunt omnes pariter, & simulac vale dixerunt (erat enim extrema jam diei hora) domum continuo laeti atque alacres recta concesserunt.

F I N I S.

JOANNIS BAPTISTAE VILLANOVAE,
NOBILIS LAVDENSIS,

LAVDIS POMPEIAE,
SIVE

LAVDAE (nunc LODI) Urbis
HISTORIA.

DEDICATA

ILLVSTRISSIMIS EJVSDEM VRBIS DECVRIONIBVS.

Ex Italico in Latinum sermonem transtulit

ALEXANDER DUKERVS.

VIRI ILLVSTRISSIMI.



EX se ipsa hæc patriæ nostræ *Historia* sapientissimorum ejus Decurionum brachiis illabatur, certo confidens, se illorum benignitate receptum, & auctoritate protectum iri. Verum quidem est, calamum meum non valuisse eam illa venustate exornare, propter quam illa mereri possit eorum favorem atque benevolentiam: veruntamen cum in hisce paginis multa legantur & singularia, tam virtutis bellicæ, quam civilium artium exempla, à majoribus nostris edita, quorum virtutes ad Vos, illustrissimi Viri, multosque alios nostrorum civium feliciter propagatas videmus; credere juvat, non ingratum iis fore, si heic, rudi licet stylo, illa viderint delineata, quæ ipsi pulchre adeo & ad vivum repræsentant heroicis factis suis. Quod si Latinæ eloquentiæ princeps illis, qui pro patria sudorem aut sanguinem profuderint, estimavit esse paratam gloriæ sedem in cœlo, ubi in *Somnio Scipionis* ita dixit: *Omibus, qui patriam conservaverint, juverint, auxerint, certus est in cœlo & definitus locus, ubi beati ævo sempiterno fruuntur*; & ipse spero, me hoc labore locum aliquem in cœlo, id est, in vestra, illustrissimi Viri, gratia comparaturum, quod ego ex hujus vitæ felicitate primum numero omnium, ut qui me Vobis, illustrissimi Viri, devotissimum profiteor.

JOANNES BAPTISTA VILLANOVA.

AD LECTOREM.



NON hoc animo, Lector benevole, hunc libellum publico, ut gloriam inde aut splendorem nomini meo conciliem: nam ignorantia mea non tantas menti tenebras offundit, ut non cognoscam, me illud non mereri, adeoque injustum fore, si id postulare velim. Sed amoris affectus erga patriam, qui una cum homine nascens, pro ætatis incremento semper & ipse magis magisque invalescit, mecum natus est, nescio quo facto, statim ingens incredibilem in modum: ita ut credam, cum infans primum babuisse inciperem, me ante nomen urbis pronunciavisse, in qua lucem vidi primum, quam patris, cui ipsam debeo vitam. Ipse intendi etiam hunc insitum animi affectum: & adeo, si non valui patriæ commodis inservire, curavi tamen illa novisse, quibus ea poterat illustrari: typis editos auctores & monumenta manuscripta pervolvi, in quibus aliquam de ea notitiam me inventurum sperabam. Sed cum Laudam urbem usque adhuc suum non habuisse particularem Historicum, quæ prærogativa tot gaudent aliæ, multum ipsa civitates inferiores, mihi doleret sane; ut ipse meo satisfacerem desiderio, variis ex scriptis illa selegi, quæcunque ad verum quam proxime accedere videbantur, atque ita hanc, si non perfectam Historiam, at saltem non interruptam composui narrationem. Atque eam cum communicavissem cum amico quodam, qui magna cum laude quasdam urbis nostræ rei gestas particulares in lucem emisit, ille nimio forsân affectu meam complectens ingenii tenuitatem, mihi persuasit, ut typis eam vulgarem. Nolim in tuam, benevole Lector, incurrere reprehensionem, quasi nimium promptus & facilis aliorum amicis auscultaverim exhortationibus. Sane enim certus esse potes, me eadem facilitate tuas amicas, queis erudiri percipio, admonitiones accepturum. Denique te illud, quod dici solet, in magnis voluisse sat est, meminisse, & plurimum valere jubeo.

NOS ACADEMIAE PATAVINAE REFORMATORES.



QUM ex fide Reverendi Patris, Generalis Vicarii Patavini, cognoverimus, in libro, cui titulus *Historia Laudæ urbis*, auctore Joanne Baptista Villanova, nihil contineri, quod sanctæ fidei Catholica adversetur; & item ex testimonio Secretarii nostri, nihil illi inesse Principibus adversum, aut quod contra bonos sit mores; typis eum publicari concedimus, ita ut leges observentur hoc in negotio receptæ, & duo ejus exemplaria in publicas Academiæ, Venetam & Patavinam, inferantur.

Datum v. Augusti MDCLVII.

Lunardus Emus Reformator.

Zuannes Pesarus. K. Proc. Reformator.

FRANCISCVS VERDIZOTTVS Secret.

JOAN.

JOANNIS BAPTISTAE VILLANOVAE,
NOBILIS LAVDENSIS,
LAVDIS POMPEIAE,

S I V E

LAVDAE (nunc LODI) Urbis
HISTORIA.

LIBER PRIMVS.



LAUS POMPEIA, sive LAUDA urbs, cujus historiam describere est animus, adeo est antiqua, ut Scriptores ad investigandam ejus originem à temporibus admodum remotis ejus initia repetant. Ex variis de ejus ortu opinionibus maxime recepta hæc est, eam à Gallis Bojis fuisse conditam, qui, ut Titus Livius *lib. v.* scribit, in Italiam hoc modo transcenderunt. Tarquinio Prisco Romæ regnante Ambigatus, qui tertiam Galliæ partem imperio tenebat, quam populi, *Celtarum* nomine dicti, incolebant, ipse gravis annis regnum suum exonerare constituit superflua hominum multitudine, qui in tantum numerum excreverant, ut patriæ sedes capere illos commode nequirent amplius. Duos itaque fororis filios, quorum alteri Belloveso, alteri Sigoveso nomen erat, magni animi roborisque juvenes, novas sibi sub alio cælo sedes quaesitum ablegavit. Et ut resistere etiam, sicubi opus foret, possent illis, qui forte ipsorum inceptis vi obviam ire vellent, potestatem illis dedit, quantum vellent, abducendi secum ex sedibus avitis hominum numerum. Placuit juvenibus, suam utrique forte assignari orbis partem, in quam ituri essent. Ita Sigoveso Sylva Hercynia, quæ in Germania est, Belloveso felicissima Italiæ regio obvenit. Atque huc ille Taurinis montibus, Alpibusque Juliis superatis, denique penetravit, innumeram secum trahens hominum multitudinem, Biturigum, Arvernorum, Senonum, Æduorum, Ambarorum, Carnutorum, Aulercorum. Contigit hoc anno Tarquinii Prisci regis primo & vicesimo, ut vult Bernardinus Corius *Historia Mediolanensis* P. I. qui incidit in annum ab Orbe condito quater millesimum sexcentessimum tertium, ex computatione Eusebii Cæsareensis in *Chronico*. Fama horum hospitem, qui recens in Italiam advenierant, cum ad Etruscos perlata esset, qui temporibus istis incolebant, aut potius imperio regerant illam regionem, quæ hodie *Longobardia* nomen tenet, hi ab novorum populorum incremento suo imperio metuentes damnum armis sese ad Ticinum flumen opposuerunt Belloveso: sed post longum certamen fusi fuerunt & fugati. Cumque victores audivissent, istas esse populorum Insubrium terras, memores in Ædvis quoque pagum esse, *Insubriam* nomine, & bonum inde capientes augurium, situ, quem maxime judicabant opportunum, novam condiderunt urbem, eamque **MEDIOLANVM** appellaverunt. Ille novæ expeditionis successus & Bellovesi fortuna mox alios à Gallia populos allexit, qui illo adjuvante & ipsi

A paulo post per montes in Italiam transcenderunt, variisque confederunt in regionibus. Novissime omnium Alpes transierunt Boji, ad quos ortum **LAVDIS POMPEIAE** referunt Plinius, *Historia Nat. lib. III. cap. XVII.* Andreas Alciatus *Rerum Mediol. lib. I.* alique celebres Auctores. Imo & ipsa civitas nostra iisdem suam adscribit originem, dum in quadam *Inscriptione*, facta Pompejo Straboni, quæ hodieque legitur in porticu basilicæ publicæ, ita dicit:

GN. POMPEIO STRAB. ROM. COS.
OB VRBEM A BOIIS OLIM CONDITAM
NOBILITATE, AC AMPLITVDINE
CONSPICVAM

S. P. Q. R. DECR. IVRE LATINAE COLON.
AC PROPRIO NOMINE DECORATAM
LAVDENSES POMPEIANI
NOMINE, AC ORNAMENTIS
AVCTI

GRATI ANIMI MONVMENTVM
P.

ANNO DOMINI MDCXV.

C Nihilominus arridet mihi Isidori Majani, Laudensis Physici, sententia, qui in libro *De origine Laude veteris* autumat hanc urbem ab Etruscis seu Tuscis fuisse conditam, à Bojis autem instauratam. Quod si Scriptores illi, quos supra allegavimus, eam à Bojis conditam scripserunt, forte ejus instauratorem dicere voluerunt, cum nonnunquam hæc vocabula confundantur, ut pluribus locis bene observavit Leander Albertius in *Descriptione Italiae*, & idem Majanus in *libro citato*, alique. Et tanto magis illam probo sententiam, quia in antiquissimo quodam libro manuscripto Auctoris anonymi, in quo multa nostræ urbis monumenta continentur, illa esse condita dicitur **DCCCLII.** ante nativitatem nostri Servatoris annis. Quod si non legitur illic, à quo sit exstructa, omnino tamen temporum calculus aperte demonstrat, eam Tuscorum fuisse opus, qui ipso illo ævo Longobardiam tenebant, ut satis cum ratione plurimi testantur gravissimique Auctores. Hic igitur Boji, sive conditores, sive instauratores nostræ urbis, venerunt ex Gallia Lugdunensi, ut affirmat Plinius *Historia Nat. lib. IV. cap. XVIII.* & fuerunt in illa regione, ut alius quidam liber manuscriptus *De urbe Laude veteri* testatur, flos nobilitatis, ab eorumque nomine quidam volunt *Bojam* hanc urbem fuisse dictam. Alii *Alanda* nomen illi inditum volunt ab legione quadam eorundem Bojorum, quæ Gallico sermone & ipsa appellata fuerit *Alanda*. Sed auctor libri manuscripti, quem supra citavimus, forte probabilius arbitratur, à laude, quam Bojorum populi ex militari virtute ge-

istisque eximiis sibi comparaverant, nomen *Laudis* ad ipsam eorum urbem fuisse derivatum.

Hanc itaque novam patriam tenuerunt hinc populi summa cum potestate, & illis legibus, quas ipsis placuit sibi constituere, electo, qui cum imperio civitatem regeret, illo, quem præter ceteros dignum esse principatu censerent: usquedum Romani viribus suis non tantum Bojos, sed omnes adeo Gallos, qui in Italia dominabantur, oppresserunt, ut adeo alii alio digressi, meliorem sibi fortunam circumspicere cogerentur. Et Boji quidem, ut Ambrosius Calepinus in *Dictionary* docet, in illam Germaniæ partem concesserunt, quæ ab ipsorum nomine *Bojohemia*, & inde *Boëmia* dicta est: at pauci alii, qui remanserunt in Italia, imperio se Romanorum submisserunt. Arrisit Romanis patria nostra, civitasque Laudensis. Atque ita illa, non missis eo colonis aut novis habitatoribus, jure coloniæ Latinæ est donata, & instaurata à Cn. Pompejo Strabone Consule, à quo etiam *Pompeja* cognominata est. Post hunc Julius Cæsar Dictator Romana civitate Laudenses ornavit, eosque descripsit in tribu Papinia, & Ufentina, cujus rei indubitata fidem faciunt antiquissimæ Inscriptiones: ut adeo nostri quoque cives sua haberent suffragia in creandis magistratibus, & ad dignitates illas atque honores adspirare possent, qui civibus Romanis patebant.

Occiso Julio Cæsare, Romanorum Imperatore, cum ad Octavianum Augustum rerum summa devenisset, anno ejus Imperii XLII. qui ex calculo Eusebii Cæsarensis in *Chronico* erat annus ab Orbe condito quinquies millesimus centesimus nonagesimus nonus, natus est Filius Dei, Jesus Christus, Servator noster, ex Maria Virgine.

Octaviano Augusto successit Tiberius, cujus imperii anno XVIII. crucifixus est Servator noster, cum innocentissimæ vitæ suæ annum ageret XXXIV. Tum Apostolis atque discipulis ejus per totum orbem sparsis, ut sacrosancam & veram religionem Christianam prædicarent, antiquissima traditio est inter Laudenses, quæ confirmata est auctoritate sexti provincialis Concilii Mediolanensis *De diebus festis*, & item Francisci Bossi, Novariensis Episcopi, & in hac urbe Visitatoris Apostolici anno MDLXXXIV. *De festorum dierum cultu*, Laudenses prima accepisse Christianorum sacrorum lumina ex S. Barnabæ prædicationibus, qui illustis fuit nostri Servatoris Apostolus. Idem constanter asserunt Franciscus Scottus, *Itin. Ital. P. I.* Casparus Trissinus cap. I. *Actorum S. Savina*, Joannes Jacobus Gabianus *Laudiad.* lib. III. alique. Deinde in sacra religione Christiana magis confirmati sunt Laudenses prædicationibus & miraculis Syri & Juventii, Sanctorum, ita ut tempore gravissimæ persecutionis, quam contra Christianos moverunt Diocletianus & Maximianus Imperatores, crudelissimi Servatoris nostri ejusque sectatorum hostes, illorum ad MCCCCLXXXVI. ut narrat Philippus Ferrarius in *Catalogo SS. Italia* XXIV. *Jul.* ob constantem ejusdem religionis confessionem gravissimum subierint supplicium, jussu Marciani præsidis cremati in templo, in quod cum Episcopo suo conveniant ad sacra officia obeunda. Princeps illustrium horum martyrum fuit miles quispiam, S. Julianus, (nam Episcopi nomen usque adhuc ignoratur) tum quia ille sermone suo plurimum animavit illos confessores Christi, tum quia superstes incendio una cum aliis aliquot, quos flammæ vis non consumpserat, fortiter jugulum gladio præbuit. Irrigatum horum martyrum sanguine templum Laudense, & adeo tanto magis gratia divina fecundatum, aliis etiam temporibus istis protulit fructus pretiosissimos, cum illud juxta atque ecclesiam diligentissime sancti ejus Episcopi excole-

rent, & maxime S. Bassianus. Hic ex revelatione divina vocatus fuit ad sacrum hujus ecclesiæ regimen, cum, ut fugeret Sergii patris idololatæ, qui præfectus erat Syracularum, persecutionem, S. Joannis Evangelistæ monitu Ravennam se recepisset. Quod ad reliqua attinet, devotum & curiosum lectorem remittimus ad Scriptores, qui prolixè sancti hujus Episcopi electionem, vitamque sanctissimam, ut & miracula ab ipso edita, exposuerunt.

Ceterum ab hoc tempore nihil apud Scriptores invenio, quod referri mereatur in hanc *Historiam*, quæ ad patriam solummodo nostram spectat, usque ad quintum à Christo seculum, quo illa subiecta fuit flagello, quod Deus multis etiam aliis Italiæ urbibus immisit. Nempe Attila, Hunnorum è Scythia rex, qui exercitum habebat, non minus truculentum aut barbarum quam ipse dux erat, Aquilegiæ, Patavium, Vincentiam, Mediolanum, & Laudam destruxit anno partæ salutis CCCCLII. quo tempore Laudensium animas excolebat Cyriacus Episcopus, vir, tum ob vitæ sanctitatem, tum ob doctrinæ præstantiam maximus. Post multas strages editas Romam progressus est Attila, ut illam quoque communem patriam iisdem affligeret malis. Sed cum illi obviam processisset, ubi Mincius in Padum se exonerat, S. Leo, qui summus tunc temporis erat Pontifex, tantum valuit ille divina sua eloquentia, adjunctus à S. Petro & Paulo Apostolis, ut Attilæ ferociam mitigaret, atque hic ab illo persuasus in Pannoniam regrederetur, quæ nunc Hungaria est, ubi anno CCCCLIV. in matrimonium ducta Indicone, seu Ildicone, nobilissima pulcherrimæque puella, cum in convivio nuptiali nimio hausto vino capite supinus dormiret, ipse suo sanguine misere suffocatus est, ex capite in fauces diffuso.

Post ejus mortem Herulorum & Thuringorum populi, qui una cum ipso fuerant in Italia, nunquam non memores ejus regionis deliciarum, adeo ferebant moleste se earum tam brevem percipisse voluptatem. Igitur Italiam repetere constituerunt, pristinis denuo fortunis frui gestiætes, & creato sibi rege Odoacro, natione Rugo, sive, ut alii eum appellant, Russo, intraverunt eam anno CCCCLXXV. Romæ imperante Augustulo. Mox Aquilegia ad sinistram relicta, Tarvisium & Vincentiam petierunt: & per Veronensium Brixianorumque fines denique in Laudense pervenerunt territorium. Sed Augustulus Imperator, metuens, ne hinc novi prædones pro sua barbarie solitas ederent strages, Orestem Patricium, patrem suum, illis justo cum exercitu opposuit. Hic cum ad hostem accessisset, collatis castris atrox prælium est commissum, quo cum victoria iterisset penes barbaros, Orestes fuga evasit in Ticinum, seu Papiam urbem. Scivit uti victoria Odoacer, & ad Ticinum progressus eam urbem occupavit, captumque Orestem, & Placentiam abductum, vitæ privavit, sic ut mortem tamen ejus cohonestaret, dum ipse cædis illius minister fuit toto inspectante exercitu suo, cui Papiam diripiendam quoque exposuit. Neque subfirit heic fortuna Odoacri: nam totius Italiæ potitus imperio, spreto Imperatoris titulo, gloriosius duxit Romæ Italiæque rex saluari. Interim Augustulus sponte se imperio abdicavit, aut, ut alii volunt, ab Odoacro in Campaniam, seu *Terram laboris*, abductus est, & castello *Lucullano* inclusus anno CCCCLXXVI. quo tempore Laudensem ecclesiam regebat S. Titianus, natione Alemannus. Circiter annos quatuordecim regnavit in Italia Odoacer, semper inimicus nobilium familiarum, & maxime illarum, quæ Romanorum Imperatorum partibus faverant.

Hæ igitur cum ab ipso aliisque suorum durius tractarentur, accidit, ut multæ illarum relictis patriis sedibus, alieno sub cœlo meliorem sibi fortunam quæsitum irent. Inter has Tressena, non præcipua solum inter Laudenses, sed inter omnes adeo Italiæ familias admodum conspicua, ut barbarorum dominorum vexationibus liberaretur, in Græciam remigravit, veterem patriam, unde, ut testatur Reverendus Pater, D. Casparus Trissinus, Vincentinus, *Aetorum S. Savina* cap. i. in Italiam illa migraverat. Et in Græcia tam diu illa comorata est, donec una cum Belisario, Justiniani, Græci Imperatoris, Duce, Italiam & pristinas sedes repetiit.

Ceterum etsi nequiquam meum est institutum, origines referre nobilium patriæ nostræ familiarum, ut nec illos, qui eas præter ceteros illustraverunt, illud tamen non est prætermittendum, ex Tressena gente prodiisse S. Savinam, cujus matronæ nomen semper erit in hominum memoria ob insignem pietatem, qua ipsa prosequuta est Christianos, qui tempore persecutionis, ab Imperatore Maximiano motæ, religionis Christianæ veritatem suo sanguine confirmaverunt. Nam illorum corpora conquisivit illa diligentissime, & sepulturæ honore affecit, quanto maximo poterat. Inter hæc numerantur SS. Naboris & Felicis cadavera, qui suo ad *Silerum* annum martyrio terras nostras consecraverunt: quæ Mediolanum secum abducta honeste condidit in templo Philippi de Oldanis, quod dedicatum fuit Servatori orbis. Neque ab illis non uberrimam accepit remunerationem, cum ad illorum sepulcrum preces effundens, tranquille obiit, animamque Deo reddidit anno secundum Patrem Trissinum, in ejus *Vita*, cccxi.

Gemebat Italia, ut nostræ orationis filum repetamus, sub iugo servitutis & Odoacri dominatione, cum Zeno, Orientis Imperator, ad eam sublevandam Theodoricum Amalam eo, Gothorum regem, misit, eique regnum Italiæ concessit anno cccclxxxix. Sed Theodoricus, bellicoso licet atque satis amplo exercitu secum adducto, protinus tamen Odoacrum debellare non potuit, quamvis eum vi armorum possessione cujusdam partis Italiæ exuisset. Denique autem victo eo atque occiso, quod accidit anno cccclxiii. Gothus ille sine exceptione, totum Italiæ regnum obtinuit. Atque hic novus rex cum multum delectaretur nostra urbe, teste Majano *De origine Lauda veteris*, apprime studuit eam munire, & publica reficere opera, quæ diruerant Heruli. Et ut ea cum magnificentia, quæ magno regi convenit, nostræ frui posset deliciis urbis, sumptuosam in ea regiam extruxit, quæ ab ipsius nomine *Theodorici Castellum* vulgo dicebatur; & mille extra urbem passibus munitam turrin erexit, sive castellum, in loco, cui *Salarani* nomen est.

Obtinuit Italiæ imperium Theodoricus ad annum usque dxxvi. & cum nulla relicta prole mascula vita functus esset, post varios multosque reges denique ad Vitigem illud pervenit. Hic cum Italiam tyrannico imperio regeret, Justinianus, Orientis Imperator, Belisarium, belli Ducem eximium, contra illum misit, qui post varios bellis casus captum Vitigem abduxit Byzantium. Tum per aliquod tempus Mediolanum aliæque vicinæ civitates paruerunt Imperatoris Justiniani præfectis, qui cum intolerandum in modum vexarent populos, eo necessitatis illos adegerunt, ut denuo se regno submitterent Gothorum, qui post Belisarii ex Italia abitum regem sibi constituerant Ildoaldum, post hunc Araricum, tum Totilam, & deinceps Teiam, quorum hi duo insignes erant belli Duces. His Justinianus Imperator Narsetem eunuchum cum exercitu opposuit, celeberrimum for-

tissimumque bellatorem, qui primo Totilam, nec multo post Tejam, duobus præliis ingentibus superatos occidit, atque ita anno dliii. imperium & nomen in Italia Gothorum funditus exstinxit.

Pro egregia hac opera, quam Imperatori suo navaverat, Italiæ regimen obtinuit ad annum usque dlxvi. quo tempore Justinus, qui Justiniano successerat, cum Sophiæ uxoris impulsu, quæ apud maritum omnia poterat, Constantinopolim revocavit, & in ejus locum Longinum substituit cum *Exarchi* titulo, quæ vox primum & summum magistratum denotabat. Dolebat Narseti, quod amoenam Italiæ regionem relinquere, & locum dare deberet successori, æmuloque fortasse suo: sed multo magis exacerbavit ejus animum Augusta, quæ contra eum inexpiabile conceperat odium, cum per literas illi significaret, se eum in aula expectare, ubi ipsi hoc munus destinavisset, ut latinam exercendam dispensaret inter vilissimas aulae famulas: nam hoc personæ ejus, quandoquidem ipse eunuchus esset, apprime convenire dicebat. Sed ille Sophiæ ingeniose respondit, eique significavit, se, quandoquidem ab Augusta judicatus esset idoneus ad istud exercitium, ocyus illi ejusmodi telam orsurum, quam ipsa per totam vitam retexere nunquam posset. Nec dicta res morata. Nam ille neglecto in Orientem atque aulam reditu Neapolim se contulit, ubi plurimos habebat sibi faventes atque addictos, & inde ad Alboinum, Longobardorum in Hungaria regem, legatos misit, eumque invitavit, ut horridam istam atque infœcundam regionem cum deliciis amoenissimi fertilissimique Italiæ soli commutaret. Et ut rebus ipsis comprobaret, quod verbis illi offerebat, magnam illi copiam præstantissimarum pretiosissimarumque rerum misit, propter quas hæc regio super omnes alias est expetenda. His allectus Alboinus, postrid. Cal. Apr. anni secundum Paulum Diaconum, *De gestis Longobardorum* lib. ii. cap. vii. quingentesimi sexagesimi octavi excessit ex Hungaria, ubi duo & quadraginta annos egerat, & in hæc terras movit cum amplissimo Longobardorum suorum exercitu, qui insuper auctus erat viginti Saxonum millibus, comitantibus agmen uxoribus, liberis, ac re familiari.

Et quoniam hæc gens diu magnam Italiæ partem in potestate habuit, non alienum ab instituto nostro arbitror, illud indicare, Longobardos, ut idem scribit Paulus Diaconus *De gestis Longobard.* lib. i. cap. vii. primum ex Scandia, seu Scandinavia insula, cum majorem in numerum excrevisset, sedesque tenere cuperent ampliores, prodiisse auspiciis ductuque Iboris atque Aionis, qui fratres erant germani; & postquam diversas regiones pervaserant, atque armis plus semel fortitudinis suæ ediderant documenta, denique in Hungariam, & inde sub Alboino, decimo rege suo, in Italiam, ut diximus, concessisse. Qui plura cupit, apud citatum Scriptorem prolixè legere poterit de origine, progressibus, moribus, habitu, & adco de omnibus aliis rebus, quæ ad hosce populos pertinent, qui *Longobardi* vulgo dicuntur à longis barbis, quas promittebant.

Alboinus itaque cum suis per Liburniam ingressus Foro-Juliensem ditionem, cum eam occupavisset, & ad regimen regionis illius admovisset Gisulphum cognatum suum, ipse per Tarvisianorum fines perrexit ulterius. Et tum quidem nihil omnino curavit ista expugnare loca, quæ munitionibus firmaverat Longinus Exarchus, qui Ravennæ sedem habebat, cuique non satis aut animi, aut virium erat ad resistendum tanto hostium ingruenti numero, maxime quia multum hominum ex pestilentia perierat, quæ paulo ante totam fere Italiam misere affligerat. Ita Longobardi in eam de-

nique regionem pervaserunt, cui *Longobardia* nomen ipsi fecerunt, & anno DLXX. Brixiam, Bergomum, Mediolanum, Comum, nostramque Laudam ceperunt urbes. Multo difficiliorem expertus est Alboinus Ticini seu Papiæ expugnationem, quæ inter præcipuas erat urbes, quas Longinus Exarchus firmioribus instruxerat munitionibus. Nihilominus ad ultimum post triennii obsidionem & ipsa in victoris concessit potestatem. Sed & hinc domini novi non minus graves aut odiosi fuerunt populis Italiæ, quam Gothi fuerant. Atque hinc jam factum est, ut plurimi homines, quo illorum sese vexationibus eriperent, & suarum rerum possent esse securi, cum facultatibus suis in loca quædam palustria & aquis undique cincta se conferrent, ad quæ, nisi navigiorum præsidio, penetrari non posset. Inter hos multi Laudenses fuerunt & Cremonenses, qui inter quosdam lacus, quos Addua, Ollius, & Serius amnes formabant, cum se primum communivissent, & mox opportuna extruxissent domicilia; eodem anno DLXX. ut Alemani Finus in *Historia Crema urbis* lib. I. Carolus Sigonius *De regno Italia* lib. I. alique asserunt, novæ urbi dederunt initia, quam CREMAM esse dictam volunt à Creme quodam, sive Cremete, qui ipsorum quasi Dux & caput fuerit. Et cum exsiccatis deinde, quæ eam undique obsidebant, paludibus solum factum fuisset firmum ac habitabile, adeo crevit illa, ut fuerit, & hodieque sit satis opulenta & incolis frequens urbs.

Sed dum Itali securitatem suam in nova urbe & alibi locorum quærunt, Alboinus eam in ipsa domo sua non reperit. Cum enim in Verona urbe solenni quodam convivio Rosimundam uxorem bibere coëgisset ex poculo, quod confectum erat ex Cunimundi regis cranio, quem ipsius Rosimundæ patrem ille prælio victum occiderat; regina tanta in virum exarsit ira, ut muliebribus artibus Perideum quendam ad interimendum Alboinum perduceret. Post hujus necem Longobardi, habito Papiæ concilio, quam urbem caput esse regni sui voluerant, regem sibi Clepham constituerunt, suæ gentis virum nobilissimum, qui octodecim post mensibus manu cujusdam familiaris sui regnum simul cum vita amisit. Ex barbaris & feris hujus Clephæ moribus factum est, ut Itali, & ipsi etiam Longobardi, adeo abhorrerent nomen regium, ut hi in urbibus aliisque locis præcipuis præfectos constituere Ducum titulo decreverint. Inter urbes, quas novis Ducibus assignaverant Longobardi pro sedibus, à Scriptoribus nostra quoque Laudanumeratur. Verum, sive nova hæc regiminis forma successu caruerit, sive aliis de causis, certe post decennium, ut affirmat Paulus Diaconus *De gestis Longobardorum* lib. III. cap. XVI. rerum summam denuo regum imperio subjecerunt, & anno DLXXXV. Autharem, Clephæ filium & egregium juvenem, regem sibi creaverunt. Post Autharem multi alii reges fuerunt, sub quibus nihil quicquam memorabile accidit, quod ad nostrum facere possit institutum. Denique cum hæc gens in Italia regnavisset ducentos & sex annos, anno DCCLXXIV. Desiderius, rex Longobardorum ultimus, debellatus captusque est à Carolo Magno, Franciæ rege, quem in Italiam evocaverat Hadrianus Pontifex, ut insolentiam comprimeret istius Longobardi, qui ipsi etiam ecclesiæ Dei multas urbes & castella ademerat. Igitur Leo III. Pontifex Carolum solenniter renunciavit Occidentis Imperatorem, & regnum Longobardorum, quod ipse armis occupaverat, ad ipsum ejusque successores transtulit. Sed Imperio deinde ad Germanos delato Itali, & maxime Longobardiæ populi, cum illorum non ferrent dominationem, per annos aliquot sibi reges creaverunt Berengarios, Hugo-

nem, Lotharium, Albertum, & Ardoinum, qui cum Imperatoribus plurima habuerunt certamina. Et quia apud Scriptores, qui illa exponunt, nihil invenio memoria dignum, quod ad nostrum pertineat argumentum, ad eosdem Auctores remittimus lectorem, qui de illis cognoscere cupit.

Deinde cum ad Imperii fastigium Conradus, Dux Franconiæ, sive, ut alii dicunt, Saxoniæ, evectus esset ab Electoribus, à Gregorio V. Pontifice confirmatus, penes quos hodieque est dignitas Electoralis, Heribertus ab Intimiano, Archiepiscopus Mediolanensis, ex antiquo jure decessorum suorum *Roncalliam* concilium multorum episcoporum principumque convocavit, in quo multis actum fuit de producendo ad Italiæ regnum illustri quodam viro, qui cum auctoritate sustinere posset adeo magnificum sceptrum. Sed cum per sententiarum varietatem nihil constitui hac de re posset, Heribertus in Germaniam transiit, & privata auctoritate sua novum Cæsarem Conradum salutavit Italiæ regem. Atque huic adeo fuit gratum istud Mediolanensis episcopi factum, ut, cum antea decessores Heriberti consecrarent solummodo episcopos Laudenses, Imperator singulari privilegio hoc ipsi juris addiderit, ut iisdem dare quoque posset annulum & baculum pastorale, ut accurate narrat Sigonius *De regno Italia* lib. VIII. Rediit in Italiam Heribertus, & cum anno partæ salutis MXXV. obiisset Nucerus, episcopus Laudensis, ille, qui à Conrado hoc se juris obtinuisse asserbat, ut episcopos nostros non ornare tantum pontificalibus insignibus, sed & ipse eligere pro arbitrio posset, misit ad nos Ambrosium Arlunum, patria Mediolanensem, & ejusdem ecclesiæ Canonicum, ut vocant, ordinarium, ut nostri secundum electionem ab ipso factam, pro pastore suo cum reciperent. Sed quoniam hæc postulata contra inveteratam illam consuetudinem pugnabant, qua nostri cives suos ipsi soliti erant episcopos eligere, fortiter illi sese Heriberto opposuerunt, & Ambrosium coegerunt ad suum reverti Archiepiscopum, qui hanc ob rem vehementer exacerbatus, per vim sibi vindicare, quod pactionibus consequi non potuerat, constituit. Et quia temporibus istis in rebus etiam civilibus Archiepiscoporum Mediolanensium summa erat auctoritas in ista magna urbe metropoli, ita tamen, ut una eam obtinerent duodecim alii nobiles, qui *Consules* dicebantur, narrante Carolo Sigonio *De regno Italia* lib. VII. in proclivi illi fuit validum colligere exercitum: quem cum ad moenia nostra admovisset, neque nostri tantis viribus possent resistere, cedere potentiæ adversarii, & eundem Ambrosium episcopum admittere visum fuit. Hoc amplius jusjurandum fidelitatis ab Laudensibus obtinuit Heribertus, quanquam illi satis probaverunt, se omnia hæc fecisse vi & necessitate coactos. Deinde enim, ut ex sequentibus apparebit, cives Laudenses perpetuos se & capitales Mediolanensium hostes sunt professi. Sed ad altiora etiam adspiravit Archiepiscopus Heribertus, & à Mediolanensium ducibus ac præfectis castellorum portarumque (*Valvassores* vulgo dicuntur) idem jusjurandum fidelitatis & homagii postulavit. Verum illi non tantum illi obedire sunt indignati, sed etiam ipsius nece liberare se ab ejusdem insolentia constituerunt. Sed hoc consilium cum exsequi non possent, eorumque molitiones detectæ essent ab Archiepiscopo, hic eos feudis, dignitatibus, & nobilitate spoliatos patria expulit. Tum novis præfectis ac ducibus constitutis, quibus portas Mediolani tuendas demandavit, multos conduxit milites extraneos, eosque cum suis copiis conjunxit, imperio totius exercitus ad Eliprandum Vicontium delato, magnæ auctoritatis virum, & rei militaris peritissimum. Mediolanen-

nenſes exſules cum ad noſtram ſe urbem recepiſſent, benigniſſime à noſtris ſunt accepti, cum hi eorum opera poſſe ultionem exigere ab Heriberto & Mediolanenſibus ſperarent. Igitur illis ſubminiſtraverunt, quæ opus erant ad exſtruendum caſtellum inter Laudem Pompejam & Mediolanum, quod MOTTÆ nomine dictum fuit. Huc illi habitatum migraverunt, &, quia nobilitate jam ſpoliati erant, ut diximus, ut ſe à vulgo tamen ſegregarent, quod nomen nimis eſt odioſum honeſto loco natis, *Mottenſes* ſe dixerunt. His itaque cum ſe fœdere inito adjunxiſſent noſtri, ut & *Seprianis* & *Martefanis*, qui & ipſi veteres erant Heriberti hoſtes, utrinque multæ contigerunt & atroces pugnæ. Harum una infeliciter occiſus eſt Oldericus, quem noſtri epiſcopum elegerant & oppoſuerant Ambroſio, quem ipſis dederat, ut diximus, Heribertus Archiepiſcopus.

Hic bellator Archiepiſcopus primus invenit *Carrociū*, cujus frequentem faciunt mentionem horum temporum Scriptores. Erat hoc ingens vehiculum, cui ſolum inſiſtebat, rubro panno contectum. Ex hoc iterum magnus inſurgebat malus, qui à multis hominibus, qui circa erant, ita ſuſtinebatur, ut recta ſemper emeretur. In ſummo malo crux aurea conſpiciebatur, infra quam vexillum album rubra cruce intexta emicabat. Trahebant hanc machinam quatuor boum paria, qui & ipſi à parte dextra rubris, à ſiniſtra albis integumentis operti erant. Præſto erat ad regimen *Carroci* vir illuſtris, & in armis exercitus, qui ad hoc munus ob-eundum electus erat à Republica: ejuſque imperio certus militum numerus & octo tubicines erant addiſti. Præterea ſacerdos quidam ad hoc delegatus erat, ut quotidie ſacram *Miſſam* ante *Carrociū* celebraret. Potiſſimum autem hunc in finem Heribertus hoc inventum commentus eſt, ut milites iſto conſilio à fuga inhiberet. Nam cum tarde moveretur hæc machina, magnumque dedecus eſſet eam in hoſtium poteſtate relinquere, & pro eodem haberetur *Carrociū* amittere, & prælio inferiorem eſſe, milites obſtinatius pugnaturi videbantur.

Cum hac itaque machina magnoque cum exercitu Heribertus profectus eſt contra Laudeniſes, & Mottenſes, alioſque eorum ſocios, ſpe eos debellandi. Sed ſefellit eum opinio, & poſt varias pugnas pugnatæ denique ingenti prælio, quod commiſſum eſt in loco, qui dicebatur *Campus Malus*, referente Sigonio *De regno Italia* lib. viii. ita male habiti ſunt & proſtrati Mediolanenſes, ut, cum ne quidem ſufficeret illis animus ſociorum viribus reſiſtere, nedum illos opprimere, ut putaverant; Heribertus ad Imperatorem Conradum ſeſe receperit, qui motus ejuſ precibus in Italiam perrexit anno MXXXVII. & ſuis Archiepiſcopique viribus conjunctis ſudit fugavitque Mottenſes, eorumque ſocios. Sed deinde Imperator, cum tollere vellet novarum contentionum inter Laudeniſes & Mediolanenſes occaſionem, Heriberto non competere privilegium iſtud pronuntiavit, ut epiſcopum in urbe noſtra conſtituere poſſet, quæ præcipua omnium turbarum fuerat cauſa. Egerrime hoc tulit non Heribertus ſolum, ſed ipſa adeo Reſpublica Mediolanenſis. Atque inde inter eam & Conradum deinceps atrociffima bella ſunt orta, quorum caſus referre lubens prætereo, quia nihil ad noſtram pertinent hiftoriam. Denique in Germaniam regreſſus eſt ille Imperator, ubi vitæ finem fecit anno MXXXIX. quo, ut ſcribit Bardus *Chronologia* ſuæ Parte IV. nocte quadam in urbe noſtra auditi ſunt ingentes terribileſque per aërem clamores. Arnulphus, Scriptor Mediolanenſis, qui non multo poſt hæc tempora vixit, in libro quodam manuſcripto narrat, inter Mediolanenſes & Laudeniſes, indies factos invicem ſibi i-

nimiciores, tot hoſtilia bellorumque certamina contigiſſe, ut, qui ea deſcribere cuncta vellet, multorum voluminum, ut ipſius verbis utar, contexturus eſſet hiftoriam. Sed cum earum rerum narrationem neque apud Arnulphum, neque apud alios Scriptores inveniam, neque ego meis lectoribus benevolis illas exponere poſſum. Bardus quoque *libro citato* mentionem facit, nescio cujus belli, anno MCIV. inter cives noſtros & Cremenſes geſti, quo de nihil tamen ſcriptum reperio apud alios Auctores.

Floruit his temporibus celeberrima ſanctitatis eximiae fama Joannes, nobilis Laudeniſis, quem Ugellius, *Italia ſacra* T. I. *De Epiſcopis Eugubinis*, Grammaticum appellat. Hic cum omnibus ſe negotiis ſubduxiffet, quæ in itinere, quod accelerare ſtudebat, ad perfectionem Chriſtianam morari ipſum poſſent, exiguum ſibi, ſed ſanctiſſimum exſtruxit ſacellum, ut majore copia divina frui gratia & favore poſſet. Deinde autem eum de Petri Damiani Sanctitate audiviſſet, qui poſtquam raro continentiae exemplo Cardinalem renunciaverat dignitatem, & monaſterium condiderat in loco, cui nomen *Fons Avellana*, in *Eugubino* territorio; exemplo ſuo doctrinaque magnum monachorum numerum ad ſummam veræ virtutis metam ducebat, Joannes noſter & ipſe relicta patria ad Petrum Damianum profectus eſt, & in ejuſ diſciplinam receptus. Hic brevi tantos fecit progreſſus, ut ſanctus ille magiſter ad ſacerdotalem dignitatem evectum adeo judicaverit in virtute perfectum, ut magna ex parte cum illo ſacrum hunc locum regendum communicaret, cujus poſt Damiani mortem ipſe etiam præſes, ſeu *Prior Generalis*, ut vocant, eſt factus. In hoc munere obeundo tanta virtutum ejuſ enituit excellentia & ſplendor, ut ejuſ vitæ enarratio, quam concinnavit reverendus Pater, Silvanus Raciſ in *Vitis Sanctorum & Beatorum Camaldolenſium*, non minus admirationem lectoribus, quam religionem incutiat. Deinde epiſcopatu Eugubino vacante cum de novo epiſcopo non conveniret illis, qui eju� eligendi poteſtatem habebant, ab Joanne Cardinale, qui Paſchalis II. Pontificis nomine hanc diœceſin cummaxime viſitabat, ad multiplices clericorum populique preces ex monaſterio, ſeu potius eremo, protractus eſt Joannes noſter. Inde cum nihil proficeret ſubmiſſa, licet admodum pertinaci reſuſatione, in ſede epiſcopali illius eccleſiæ eſt collocatus, & ipſius ſummi Pontificis manu conſecratus. Hanc cum per unum ſolummodo annum rexiſſet, & brevi illo tempore veriſſimum reliquiſſet omnibus numeris abſoluti paſtoris ſacri exemplar, denique eju� anima benediſta anno MCVI. a. d. VII. Id. Sept. in cœlum evolavit, ut ibi meritorum ſuorum fruere præmiis. Poſt mortem vero cum eju� ſanctimonia illuſtraretur à Deo miraculis clariſſimis, ſicut, dum viveret, admirabilis fuerat ob ſingularem virtutem, ab eodem Chriſti Vicario in numerum Sanctorum eſt relatus. Mentionem eju� faciunt Ferrarius in *Catalogo Sanctorum Italia* ad diem 7. Septembris, Ludovicus Jacobillus in *Vitis Sanctorum & Beatorum Umbria*, aliiſque. Mortuum vero acerbe luxit populus: & cadaver, quod hodieque ſervatur incorruptum, honorifice conditum eſt in cathedrali templo Eugubino, hoc addito epitaphio:

D. O. M.

D. IOANNI LAVDENSI EVGVBINAE ECCLESIAE

PONTIFICI, QVI OB VERAM, INVICTAMQVE PIETATEM, ET SPLENDIDISSIMAS ANIMI SVI

DOTES AN. CHRISTI MCVI. IMMORTALITATE DONATVR AETATIS SVAE ANNO LXXX.

Sed ut redeamus ad nostrarum rerum narrationem, cum anno insequenti, id est, MCVII. inimicitia essent ortæ inter Papienses atque Dertonenses, & hi valida auxilia petissent & impetravissent etiam à Mediolanensibus, Papienses se quoque confirmaverunt, inito cum nostra civitate foedere. Atque illa tantum iis subsidii misit, ut, cum ad manus ventum esset, fufis fugatisque Dertonensibus, urbem eorum arcta obsidione Papienses clauderent, & plus semel repulsis auxiliariis copiis, quas Mediolanenses ad liberandos obsessos emiserant, incensisque mense Augusto Dertonæ suburbis, domum redirent. Non multo post, nimirum ex sententia Sigonii, *De regno Italia* lib. x. anno MCIX. nostri à Cremonensibus fuerunt novis bellis impliciti. Hi enim cum Brixianis contendentes de finibus, cum non alia via consequi postulata sua possent, quam vi armorum, belli societate nobiscum inita, & Ollio amne superato, conjunctis copiis, Brixianorum fines ingressi sunt. Hos late depopulati ipsam urbem obsidione cinxerunt, & ut nonnulli volunt, etiam occupaverunt. Sed breve illis hoc fuit gaudium. Nam Mediolanenses cum venissent auxilio Brixianis, Cremonenses nostrique, quæ occupaverant, relinquere, & hostium subita impressione facta recedere coacti sunt. Cum igitur in receptu salutem sibi quærentes ad Ollii amnis ripam pervenissent, tanta illorum strages edita est, ut testante Corio in *Historia Mediolanensi* P. I. amnis ille deformaretur cæsum sanguine. Ceterum exinde Brixiani gravissimum conceperunt odium contra Laudenses, & sociis Mediolanensibus adeo nostræ urbi supervenerunt ex improvise, ut eam defensoribus nudatam facile in potestatem redigerent prid. Non. Jun. ejusdem anni MCIX. Sed nequaquam ingrati Cremonenses, cum satis scirent, Laudenses non sua, sed ipsorum causa tantam pati calamitatem, ita nostros adjuverunt, ut mox urbem hostium manibus iterum eriperent. Tum vero Cremonenses, quia nostris succurrerant, novis multantur malis à Mediolanensibus, qui una cum Brixianis & Dertonensibus crudelem in modum eorum patriam laceraverunt. Omnia enim, quæ in agris erant, cum prorsus devastavissent, vi in ipsam Cremonam urbem perruperunt, & diversis in locis igne injecto magnam ejus partem cremaverunt a. d. iv. Id. Aug. ejusdem anni.

His in Longobardia turbis motus Imperator Henricus IV. ex Germania in Italiam venit, & *Roncallia* conventum habuit, cui interfuerunt præcipuarum in Longobardia urbium Oratores, ut cum ipsis ageret de modo, quo tandem aliquando sopiri & extinguui possent bella illa, quæ illi regioni ultimum videbantur exitium allatura. Hæc Joannes Mostus in *Chronico Laudensi*, quod hodieque manuscriptum servatur Mediolani in bibliotheca Ambrosiana, gravissimas narrat fuisse contentiones ortas inter nostros & Mediolanensium Legatos levissima de causa, id est, quod Mediolanensium famulus quidam male multaverat nostrum quendam ex plebe hominem, cumque hominum utrinque concursu facto ad manus ventum esset, nostri male accepti erant, & leviter vulnerati. Hoc vero cum nostri Oratores vidissent, adeo sunt exacerbati, ut protinus consensu equis subito Laudam pergerent, & cum exposuissent populo, quod gestum erat, injuriamque à Mediolanensibus acceptam amplius justo exaggeravissent, plebis animos orationis vehementia ita concitaverunt, ut hæc modis omnibus vindicandam esse armis injuriam succlamaret isti privato factam, in cujus persona dicebant violatam esse Reipublicæ dignitatem, cujus-anxios admodum custodes se nostri semper probaverunt. Mediolanensium Legati cum nostrorum animos adeo esse exacerbatos cognovissent, vene-

runt & ipsi Laudam, populique mitigare iram studuerunt, non esse æquum monentes, ob levem adeo & privatam causam turbare publicam pacem, & utramque civitatem novis bellorum calamitatibus exponere. Sed furdi ad has aliasque Mediolanensium rationes nostri, ocyus illos finibus suis expulerunt parum honeste, addita etiam verborum contumelia. Hoc cum displiceret nobilitati, Oldradus Tressenus, qui cum generis nobilitate civilis prudentiæ scientiam conjunxerat, validis & opportunis rationibus multitudinem placare molitus est. Sed cum illa effectu plane contrario adhuc ferocior intumesceret, ipse vincit duris compedibus & in carcerem conjectus, ædes ejus dirutæ, interempti etiam per summum nefas innocentes ejus liberi. Tum alii nobiles, qui subscribere volebant tumultuario isti decreto populi, ex patria profugi Mediolanum se contulerunt. Hic cum per aliquod tempus perpeffi essent incommoda illa, quæ comitari solent exilium, sollicitaverunt Mediolanenses, ut arma caperent ad vindicandam popularium suorum insolentiam, & nobiles in patriam restituendos: quod ipsis non admodum difficile factum fuit. Mox enim Cæsare per Alpes in Germaniam regresso, Mediolanenses tum ob causam, quam modo diximus, tum quod veterum cum Laudensibus contentionum adhuc memores erant, aut propter foedus, quod nostri paulo ante cum Cremonensibus inierant, aut denique quod ipsi Longobardiæ regnum affectantes consiliis suis opportunum esse judicabant, primum nostram sibi patriam subjicere; omnia illa, quam poterant occultissime, præparaverunt, quæ opus sunt ad urbem occupandam. Tum mense Majo anni MCXI. cum sociorum suorum copiis conjuncti, adeo ex improvise nostræ supervenerunt urbi, adeoque illam arcta obsidione clauferunt, ut in eam sociorum subsidia penetrare non possent, cum ipsa peræque à militibus, quam ab annona prorsus esset imparata. Atque ita cives

infortunati, ne fame perirent, adacti fuerunt urbem dedere hostibus Cal. Jul. ejusdem anni. Ita Sigonius *De regno Italia* lib. x. Laudam in potestatem Mediolanensium redactam refert. Sed Joannes Mostus in *Chronico Laudensi* manuscripto, quod, ut haud ita multo ante diximus, in bibliotheca Ambrosiana servatur, quam maximo studio sumptuque collegit Fridericus Borromæus Cardinalis, qui viveret in æternum gloria, multo aliter multoque disertius exponit res inter Mediolanenses & Laudenses gestas, quæ in horum desierunt exitium.

Secundum ejus igitur narrationem Mediolanenses cum copiis suis Laudensium fines ingressi ad Silerum amnem castra posuerunt, quibus cum fortiter sese obiecissent nostri, prælium commissum est satis animose, & magna utrinque jactura. Sed cum hostes progressus istos, quos animo conceperant, frustra tentavissent, furore suo in ædificia, humilia juxta atque magnifica, quæ prope urbem nostram erant, effuso, abierunt & in fines suos se receperunt. Sed nostri cum non satis haberent fortiter hostibus restitisse, publico etiam decreto bellum indixerunt Mediolanensibus, & belli ducem sibi sumpserunt Georgium Tinctorium, magnæ famæ virtutisque virum. Inde omnibus, qui arma ferre poterant, tam intra, quam extra urbem, ad signa evocatis, dum hostes eorum fines repetunt, ut denuo belli fortunam tentarent, & nostri validationibus aliquot hostem tenent occupatum, interim Tinctorius ab altera parte hostibus iter intercludit. Ita factum, ut turbatis ordinibus in fugam darentur, relictis cæsum millibus duobus, magnoque captivorum numero. Hæc fortuna tantum animi Laudensibus addidit, ut postero die cum omnibus copiis Mediolanensium fines ingrederentur. Ibi cum multis ab urbe passuum millibus ad ho-

hostem accessissent, qui victoribus obviam egressus erat, atrox praelium est commissum, quo utrinque ad duo millia militum perierunt, mille fauciati sunt. Sed cum victoria penes Laudenses stetisset, animose hi intra sua moenia hostem compulerunt, & ad urbem castris admotis cum à Papiensibus & Cremonensibus petissent impetravissentque auxilium, viginti millium habebant exercitum. Hinc imperatori Laudensi in proclivi fuit totum deprædari Mediolanensem agrum, in quo ita tamen moderate, ut Auctor ille dicit, & humaniter sese gessit, ut neminem lædi magnopere permiserit, ut ipsi etiam homines illi, qui in urbem refugerunt, constanter testati sunt. Egressi sunt ex porta Ticinensi Mediolanenses, ut obidentes magna eruptione invaderent, sed nostrorum virtute intra urbis munimenta protinus se recipere compulsi sunt. Ad hanc capiendam Tinctorius inter portam Ticinensem & Romanam castellum extruxit, & complanata hostili fossa, cum murorum quoque partem disjecisset, vi in urbem perripit, & ad templum usque S. Euphemiae pervasit. Hic cum superare non posset munitissima propugnacula, quæ exstructa ibi erant, antequam tamen à Mediolano recederet, ædem istuc locorum tropæi loco voluit erigi, titulo *S. Petri in campo Laudensi* insignem.

Sed deinde Mediolanenses, adeo graviter à nostris perculsi, quod vi non poterant, consilio affecui constituerunt. Igitur per clandestinas consultationes Gothardum Abbonem in suas partes pertraxerunt, qui consilii conficiis fecit, sociosque sibi assumpsit Bernardum Saccum & Hubertum Aciarum. Hisce tribus, qui ex principibus apud Laudenses viris erant, cum magnifica fecissent promissa Mediolanenses, convenit, ut in horum potestatem Lauda traderetur. Proditio cœpta est in templo, S. Michaëli dedicato, & perfecta die Dominico ad hunc modum. Per fraudem occiso Alderico, arcis apud Laudenses præfecto, conjurati occupato castello, & acceptis in eam aliquot militibus Mediolanensibus, qui eo loci se contulerant ex constituto, haud difficile postea fuit, omnibus mox hostium copiis supervenientibus totam urbem occupare. Sed hoc non possum, quin heic addam, Defendentem Lodum in *Dissertationibus historicis* Diss. vii. diligentissimum antiquitatum Laudensium investigatorem, etsi non omnino rejicit hanc narrationem, negare tamen trium illorum hominum, quos diximus, prodicionem. Utut acciderit nostræ urbis occupatio, in eo consentiunt omnes omnino Historici, Mediolanenses, cum moenia ejus essent ingressi, incolas sine ulla commiseratione rebus omnibus fuisse ab iis spoliatos, multos occisos, ædificia omnia, tam publica, quam privata, solo æquata, & ut uno verbo dicam, omnia barbarum in modum fuisse cremata atque desolata. Inter has ruinas omnium maximo damno fuit publici Archivi aliorumque privatorum monumentorum incendium: unde postea factum est, ut exiguum adeo notitiam habeamus antiquiorum patriæ nostræ rerum gestarum. Conati etiam sunt hostes pretiosissimis privare nos S. Bassiani, episcopi quondam nostri & Patroni, reliquiis, sed dum temerarias manus arcæ sacræ admovent, divino miraculo repulsi inde fuerunt, & humi strati. Etiam sanctus pastor cum ipsis se hostium oculis obtulisset, habitu episcopali summaque pulchritudine insignis, quod omnium animis magnam admirationem religionemque incussit; visus est, relicta tantum non cineribus suis sepulta patria, in vicinum se collem recipere, qui, ut nonnulli volunt, mons ille est, quem veteres *Egecionem* dixerunt, ubi hodie Lauda nova est. Hunc exitum habuit Laus Pompeja vetus, qua de huc usque diximus.

A Sita illa erat in planitie late patente, & firmissimis muris cincta, qui, ut Majanus vult *De origine Laude v. teris*, jussu Pompeji Strabonis ornati fuerunt pinnis ex solido saxo elegantissimis, & mirabili artificio elaboratis. Præter hosce muros munita illa etiam erat ampla profundaue fossa, ut & affabre constructa arce, quæ omnibus istis propugnaculis instructa erat, quibus loca munita temporibus istis tantum non inexpugnabilia censebantur. Non destituta erat infelix patria superbis ædificiis, & vetustorum monumentorum ornamentis, quæ insculpta erant marmoribus præstantissimis, quorum plurima à victoribus alio fuerunt asportata. Ab Oriente illa Silero amne alluebatur, ab Occidente Lambrus fluvius non longe ab urbe profluebat, a quo Laudenses, ut nonnulli volunt, *Lambrani* fuerunt dicti. In proclivi nostris fuisset desolatam instaurare patriam, nisi victores Mediolanenses eos hoc incepto prohibuissent: quare multi relicto solo patrio in varias Italiæ urbes commigraverunt, alii autem, qui pauci numero remanserunt, durissimis ab hoste legibus acceptis, sex suburbia seu castella prope dirutæ urbis suburbia condiderunt, in iisque confederunt. In horum uno, ut refert Otho Morena in *Historia rerum Laudensium tempore Friderici Anobarbi Caesaris*, quod dicebatur *suburbium Placentinum*, & omnium erat maximum, statum mercatum sive nundinas instituerunt, quas singulis diebus Martis celebrarent, ut & soliti fuerant in urbe facere. Ad has cum vicinorum locorum homines concurrerent, & in Laudensium diverterent domos, multum inde emolumentum ad hos redundabat. Sed cum ægre ferrent Mediolanenses, nostros paulatim & numero & opibus augeri, miseris hominibus illo mercatu interdixerunt, & eos in aperto incultoque campo illum habere coegerunt. Atque ita Laudenses cum isto etiam subsidio nudati essent, multi eorum ad extremam inopiam sunt redacti.

D Cum ad hunc modum nostri homines languerent summis oppressi miseriis, interim anno MCLII. rex Romanorum electus est Fridericus, Sueviæ Dux, qui à barba comaque rubra *Barbarossa* cognomen accepit, Scriptorum consensu Princeps sane egregius. Hic in urbem Constantiam totius Imperii concilium indixit, quo omnes fere præcipui Germaniæ Principes convenerunt. Ad hoc concurrerant omnes ex toto Imperio homines, injuste ab aliis oppressi, quorum causas ex justo & æquo confectum expediebat Caesar. Hoc comperto duo Laudenses humili conditione, quorum alter, ut Otho, Morena, scriptor Laudensis, libro paulo ante citato dicit, Albernardus Alamanus, alter Homobonus dicebatur, cum illo ipso tempore forte Constantiæ essent negotiorum causa, quæ ad ejus urbis episcopum pertinebant, & hanc esse opportunam occasionem judicarent ad querelas suas exponendas, seque liberandos ab injuriis, gravissimisque malis, quæ ipsi & omnes adeo Laudenses passi fuerant, & eummaxime patiebantur à Mediolanensibus, templum quoddam intraverunt, & cum ingentem uterque crucem humeris sustulisset, in Cæsaris aliorumque Principum, qui in concilio aderant, conspectum prodierunt, & nihil aliud, quam flentes ad Cæsaris se pedes prostraverunt ipso die sacrorum cinerum anni MCLIII. Motis admiratione Principibus istis ad ejusmodi spectaculum, cum Fridericus eos consurgere jussos interrogaret, quam ob causam ad istum modum se ipsi obtulissent, Albernardus, qui optime linguam Teutonicam callebat, in hunc modum respondit:

Sacratissime rex & domine, miseri nos cives Laudenses Deo tibi que nostras de Mediolanensibus querelas exponimus. Hi injuste patria nos expulerunt, majores nostros, ne quidem sexui imbecillo parcentes,

tes, bonis spoliaverunt, fortissimos optimosque nostrorum interemerunt, ipsam urbem diruerunt, & paucos istos, qui mortem effugerant, gravissimo iurejurando obstrinxerunt, se non amplius in urbe ejusve suburbiis habituros. Hinc alii extorres per diversas orbis partes vagantur, alii, qui patriis in finibus remanserunt, alia sex extruxerunt suburbia priscis vicina, & in eorum uno, quod dicitur suburbium Placentinum, pristinas instituerunt nundinas, quas singulis diebus Martis soliti fuerant in urbe diruta celebrare. Ad has cum multi homines ex vicinis terris convenirent, & in Laudensium domos diverterent, multum his lucri atque utilitatis illi afferebant. Hoc invidis oculis videntes Mediolanenses, cum moleste ferrent, nos paulatim à pristinis resurgere calamitatibus, & metuerent, ne patria nostra forte pristinum recuperaret splendorem, denuo nos prohibuerunt celebrem istum & lucrosam mercatum in prædicto habere suburbio, nosque cogunt eum in desolato campo habere. Ob hanc vero incommoditatem cum eo non conveniant solito numero populi vicini, nos, servi tui, omni privamur emolumento subsidioque: unde plurimi infelicium Laudensium ad extremam deplorandamque calamitatem rediguntur. Quare majestatem tuam, rex sacratissime, Vosque, Principes ceteri, supplices oramus; vos quidem, ut pro nobis apud regem intercedatis; te vero, rex sacratissime, ut populo Mediolanensi per literas & legatum imperare digneris, ut pristinum mercatum nobis restituant, nosque sinant eum habere in loco consueto.

Qui in concilio aderant, non sine commiseratione Albernardi sermonem audierunt, & omnium animis ad miseros Laudenses sublevandos inclinatis, constitutum est, ut Cæsar Mediolanum mitteret Sicherium, illustrem virum, cum edicto Imperatorio, quo Mediolanenses jubebantur nostris veterem mercatum restituere secundum petitionem duorum istorum Laudensium. Hi lætantes de gratia impetrata, protinus quam velocissime domum perrexerunt, ut cum oppressis Laudensibus communicarent, quod à clementia Cæsaris erant consequuti. Sed hoc cum intellexissent Consules aliique viri sapientes, cum hinc non omnino crederent illorum verbis, inde metuerent, ne, si hoc publicaretur, Mediolanenses irritati crudelius adhuc secum agerent, sub capitis pœna Albernardo & Homobono interdixerunt cum quoquam ista de re colloqui. Deinde in Longobardiam Sicherius ille cum regiis literis advenit, & cum ad suburbia se contulisset, in quibus nostri agebant, in publico conventu Consulium & Sapientum Cæsarem optime erga nos affectum esse, nobisque sublevandis studere, exposuit, seque propterea ab eo missum ad Mediolanenses cum literis ac mandatis, eam in rem opportunis. Sed Laudenses, cum hinc illa Cæsaris ingenti clementia confusi essent, inde metuerent, ne literæ ejus effectum sortirentur plane contrarium ejus erga nos benevolentia, Sicherium admonuerunt, duos istos homines, qui ad Imperatorem supplices accesserant, fecisse id suo pte consilio & arbitrio, nullo mandato publico interveniente. Satis enim manifestum esse dicebant, se, ut qui sine armis, sine muris, aut munimentis essent, semper expositos esse Mediolanensium, hostium suorum, libidini: qui hoc duntaxat comperto, Laudenses cogitare de sua à præsentibus calamitatibus & miseriis liberatione, eos funditus oppressuri exstincturique essent. Orabant igitur legatum, ut ad Cæsarem regrederetur, atque ipsis literas ejus redderet, si forte sibi prodesse quandoque possent, aut Cæsare in Italiam transgresso, aut alia occasione opportuniore. Denique æternum se Friderico obstrictos testabantur ob ejus incomparabilem erga se benignitatem.

Sed nihil valuerunt hæc Laudensium preces. Di-

cebat enim, se non posse non obtemperare mandatis Imperatoris. Ita Mediolanum profectus, convocatis Consulibus publice sui adventus causam exposuit, literasque reddidit Cæsareas. Atque hinc jam illud ipsum contigit, quod nostri præviderant. Perlectis enim literis adeo sunt exacerbati Mediolanenses, ut humi projectas, majoris contumelia causa pedibus etiam conculcarent. Ipse Sicherius magno labore furorem eorum ægre evasit: & egressus noctu Mediolanum festinus Laudam venit, narratoque, quod acciderat, perturbatus admodum ad Imperatorem suum revertit, miserosque Laudenses multis reliquit suspicionibus turbatos, & maximo terrore consternatos, ut qui se videbant expositos hostium suorum libidini atque impotentia, per casum hunc recentem gravius exacerbatorum. Igitur quidam illorum in remotiores terras abierunt, alii in vicinas se receperunt, noctu tantum & furtim ad miserabiles domos nonnunquam redeunt.

Atque hæc sicut non temere metuebant Laudenses, ita re vera Mediolanenses ultimum ipsis machinabantur exitium, quod ipsis imminere certissimum, nisi innotuisset, Fridericum constituisse cum ingentibus copiis in Longobardiam venire. Hæc fama sicut non leviter Mediolanenses perculit, ita ad magnas spes erexit Laudenses, qui ingentem ex auro purissimo clavem fabricarunt, eamque per Guilielmum, Montisferrati Marchionem, qui se illis patronum obtulerat, donum Friderico obtulerunt, orantes ut se suaque in tutelam recipere Imperatoriam dignaretur. Accepit donum Cæsar, nostrisque suam abunde pollicitus est opem. Atque hæc ejus erga nos benevolentia confirmata etiam est ad preces Cremonensium & Papiensium, qui illi munera obtulerunt splendidissima, quo eum nostris amicis, adversum autem redderent Mediolanensibus, quorum etiam recusavit munera Fridericus. Denique Cæsar, cum episcopis aliisque primoribus Imperii mandavisset, ut festo S. Martini die anni MCLIV. cum omnibus copiis suis præsto essent ad Roncalliam Longobardiae, ipse mense Novembri ejusdem anni fines nostros intravit, & ipsa Vigilia S. Andreae Apostoli divertit ad S. Viti & Castionem. Hinc eodem die Germani, quos penes se habebat, sive quod rei cibariae penuria laborarent, sive, ut alii dixerunt, prædæ cupidi, armis invaserunt suburbium Placentinum, in quod unum relictis aliis Laudenses concesserant. Sed Laudenses nequaquam pristina sua virtute destituti, invasoribus fortiter restiterunt. Postero die Imperator cum aulico comitatu & exercitu ad Roncalliam se contulit, ubi Mediolanenses præsto fuerunt, tantaque Imperatorem cum prudentia tractaverunt, ut promissis illi quatuor marcarum argenti millibus, tunc quidem in gratiam ejus se insinuarent. Ex Roncallia Fridericus quendam Sacellanum suum misit ad Laudenses, qui ab illis iusjurandum fidelitatis exigeret. Hoc tamen ille non ante obtinuit, quam nostris hoc facere permisissent Mediolanenses, in quorum potestate tunc temporis erant. Et illi quidem gratias nostris egerunt, quod ad hunc modum cum ipsis egissent. Interim Imperator ad nostra suburbia se contulerat, & in quo maneret, Placentinum suburbium elegerat, quo facto Laudenses confirmati ad suas domos redierunt, quas metu Germanorum deseruerant. Deinde Fridericus, Roncallia conventu procerum finito, cum Mediolanensibus constituit, ut se copiasque suas per commodissimam tutissimamque viam ultra Ticinum flumen perducerent. Sed hoc illi non præstiterunt Mediolanenses. Quare cum post longum iter & gravissima suorum, qui ab annona destituti erant, incommoda denique fluvium illum superavisset, accipere ab illis noluit quatuor illa marcarum argenti millia, quæ ipsi, ut supra dictum est, ad Roncalliam promiserant.

rant. Imo se hostem eorum professus, in posterum non habiturum se verbis eorum fidem pronuntiavit, nisi ipsi extemplo cederent omni illo jure, quod ipsi in Laudenses & Comenses sibi vindicabant. Sed hoc cum illi facere recusarent, hostes Imperator eos declaravit, & quædam etiam loca diruit, quæ in Mediolanensium erant ditio. Deinde post alias in Longobardia factas expeditiones Romam profectus est Cæsar, & ab Hadriano IV. Pontifice solenniter ornatus Imperatoria corona, Augustusque salutatus. Deinde cum feudorum, id est, Apuliæ, Marcæ, & Romanæ nomine Pontifici satisfacisset, in Germaniam regressus est anno MCLVI.

Deinde, cum Cæsar superatis Alpibus in Germania esset, Mediolanenses victoriis à Papiensibus reportatis, quarum nihil ad nos pertinet narratio, inflati, desiderio flagrant opprimendi etiam Laudenses, qui indies & numero & opibus augebantur. Itaque in publico consilio sub exilii & publicationis bonorum poena sanciverunt, ne Laudenses aut vendere, aut alienare quid, aut alio habitatum migrare possent ipsis inconsultis. Et per hanc calumniarum occasionem nostris ultra trecenta pondo auri, si pretium æstimeretur, abstulerunt. Insuper mense Novembri sequentis anni ipsi Consules Mediolanenses Laudam venerunt, & ab Laudensibus exegerunt tributum, quod illis temporibus *fodri* nomine appellabatur, sub interminatione exilii, nisi statim illud representavissent. Itaque multi illorum, quia Mediolanensium fortasse postulatis satisfacere non poterant, domos suas deseruerunt: alii præstito tributo remanserunt, quo graviores à se calamitatem averterent. Deinde mense Januario anni MCLVII. iidem Consules redierunt Laudam, atque ab omnibus Laudensibus, qui annorum quindecim & amplius erant, postulaverunt jusjurandum, quo se illorum dominio subjectos fore promitterent, seque iis in omnibus obtemperaturos, quæ ipsis libuisset imperare sibi. Atque hoc faciebant, ut prætextum aliquem haberent, quo eos patria ejicere, eorumque bona occupare possent. Post longam consultationem responderunt ad hanc petitionem Laudenses, se hoc jusjurandum præstituros addita hac exceptione: *Salva Imperatoris fidelitate*. Nam, ut supra dictum est, jam Imperatori fidem suam nostri jurejurando obstrinxerant, ipsorum etiam, quod majus est, Mediolanensium consensu. Sed cum Consules postularent jusjurandum sine exceptione, nostris malum minati Mediolanum repetiverunt infensissimis erga nos animis. Itaque Laudenses novarum calamitatum metu Lanfrancum, qui ex Comitum Cassinensium gente erat, patritium & episcopum Laudensem, una cum Lanfranco, ecclesiæ majoris *Preposito*, multisque aliis episcopis, sacerdotibus, & primoribus urbis, Mediolanum miserunt, qui in ædibus Huberti Pirovani, Archiepiscopi Mediolanensis, quo Consules alique Mediolanensium magistratus convenerant, enixe petierunt, ne fidem semel Cæsari datam violare, atque ita manifestum admittere perjurium cogerentur. Sed utcumque hæc Laudensium desideria justissima niterentur ratione, iisque ipse etiam Pirovanus Archiepiscopus plurimum faveret, nihil omnino nostri impetraverunt, ægrisque animis domum sunt regressi.

Interim Deo ita volente in Longobardiam venerunt duo Cardinales, Hadriani IV. Pontificis, de quo non multo ante diximus, legati, Arditius de Rivoltella, & Otho de Brixia, qui in mandatis habebant, ut omnibus modis pacem componere studerent inter Longobardiæ civitates, quæ contentionibus inter se & discordiis laborabant. Hi itaque à nostris edocti de violentia & injuriis, quibus eos exagitabant Mediolanenses, & justissimæ causæ nostræ æquitate commoti, cum Mediolanum venissent, neque rationibus ad officium reducere Medio-

lanenses potuissent, denique illis Dei & sanctæ Sedis Apostolicæ nomine imperaverunt, ne ob causam adeo iniquam nostris ullum omnino damnum aut malum inferrent. Paruerunt Mediolanenses imperio legatorum, quamdiu illi in his terris morabantur. Sed post abitum eorum protinus ipso ante Pascha die Martis sub acerbissimi exilii poena omnes Laudenses ante primum diem Jovis post Pascha sibi præstare jusjurandum fidelitatis jusserunt ad istum modum, ut ipsi volebant, id est, sine ulla exceptione. Stupefacti steterunt aliquandiu nostri, cum se eo redactos viderent, ut aut perjurium admittere deberent, aut patriam simul atque omnia sua relinquere. Ad ultimum vero, cum, ut ejusdem Othonis Morenæ *lib. citato* verbis utar, plus Deum timerent, quam Mediolanenses, eumque non rebus tantum suis, sed & sibi ipsis anteponerent, prorsus istud jusjurandum recusaverunt. Itaque Mediolanenses necdum elapso tempore præscripto, die Mercurii post Pascha magno numero armati Laudam accesserunt, & vi domos infortunatorum civium ingressi, qui oculis quidem intueri atque deplorare hanc suam extremam miseriam, manibus autem aut viribus tueri se suaque non poterant; omnes exspoliaverunt, infelicibus illis cujuscunque sexus atque ætatis extrema minantes, ni confestim se proriperent. Quare illi sub vesperam insequentis diei domos suas ceterasque facultates relinquere sunt coacti, & abire, quo quemque consilium, aut fortuitus animi ferebat impetus. Plurimi illorum per totam istam noctem maximis cum incommodis itinere continuato Picigitonem pervenerunt, castellum ad Adduæ fluminis ripam: ubi cum ad tantam multitudinem capiendam non sufficerent hospitia, multi ex his, oppressi malis istis, quæ facile quilibet lector cogitare potest, misere sunt extincti.

Per hanc occasionem multi Laudenses per varias urbes sunt dispersi, inter quos Cadamosti Venetias se receperunt, ut de hac familia Victorius asserit in *Historia* patriæ suæ, qua conscribenda cum maxime est occupatus. Eodem die, quo Laudenses vixdum deseruerant penates suos, denuo reversi Mediolanenses, postquam diripuerant, quicquid ex rebus Laudensium adhuc supererat, igne injecto cremaverunt, quæ secum ferre non poterant, excisis vitibus atque arboribus, & Laudensibus istis, qui pauci numero aut ob infirmitatem, aut alia de causa, fugæ comites esse non potuerant, captis & Mediolanum abreptis.

Hæc altera patriæ nostræ desolatio post priorem contigit anno XLVII. quo temporis intervallo Laudenses in sex habitaverunt suburbiis prope veterem urbem, ut supra dictum est, extructis. Sed illorum nomina apud Scriptores non invenio, excepto duntaxat illo, quod *Placentinum* dicebatur, & omnium erat primum. At in archivo quidem episcopatus nostri mentio fit cujusdam ex illis, quod *S. Naboris*, & adhuc alterius, quod *Mediolanense* fuerit dictum. Item in archivo ædis nostræ cathedralis alterum invenio in *Carea* dictum, in quo episcopus cum Clero suo per idem tempus habuit sedem, prope ædem, Beatae Virginis dedicatam. Hæc autem suburbia cum aperta essent, & prorsus nullis firmata munimentis, nostrique armis, aliisque rebus, quæ ad fortiter se tuendum requiruntur, essent destituti, nihil mirum est, eorum domos levi negotio fuisse dirutas, ipsosque dissipatos, & tantum non penitus extinctos ab adeo potente validoque hoste, ut illo tempore Mediolanenses erant. Porro autem hi æstivo ejusdem anni tempore in agris nostros redierunt, & frugibus, quæ aderant, avectis, turre Monticelli, Castionis, S. Viti, & Camaragi sunt demoliti. Sed cum in tractum Cavacortæ venissent, sub signis obviam sibi tendentes viderunt paucos istos Laudenses, qui Picigitonem se receperant.

rant. Hi insita animi generositate ac virtute incitati, adjutique ab aliis quibusdam istius castelli, ut & paucis equitibus Cremonensibus, cum prope ad hostem essent, adeo se pugnandi avidos ostenderunt, ut Mediolanenses, non numero, sed audacia & animi magnitudine nostrorum conterriti, pugnam detrectarent, & in castra sua ad Castilionem regressi, Mediolanum inde redirent.

Ejusdem hujus anni mense Julio Fridericus Imperator validissimo cum exercitu denuo venit in Longobardiam, una cum rege Bohemiae, multisque archiepiscopis, episcopis, aliisque proceribus. Hic cum multis damnis multavisset Brixianos, qui ejus se copiis opposuerant, & Adduam amnem transiisset nequicquam obsistentibus Mediolanensibus, qui magnis viribus eum isto transitu prohibere conati fuerant, cumque per vim occupato Trecio ca-

A stello, prope flumen Lambrum versus Salaranum venisset, accesserunt ad illum praecipui ex Laudensibus, qui, post civitatem suam à Mediolanensibus desolatam, in vicina loca illa concesserant. Hi cum verbis eam in rem aptis Friderico oppressionem suam exposuissent, atque injurias, quas acceperant, & cum maxime patiebantur à Mediolanensibus, supplices eum oraverunt, ut locum ipsis assignare vellet, ubi novam condere urbem, & securi suarum rerum possent agere. Has preces cum ille benevolo accepisset animo, & ex iis intellexisset, hoc ad consilium arridere ipsis Egecionem montem, quod illud est exiguum promontorium, quod in peninsulae formam ad Adduæ amnis ripam exsurgit; se postero die abiturum eo promisit, sique locum eum ipsorum desideriis cognovisset opportunum, lubentem illis ejus copiam facturum. His promissis læti Laudenses ad sua se hospitia receperunt.

FINIS LIBRI PRIMI.

JOANNIS BAPTISTAE VILLANOVAE LAUDIS POMPEIAE,

S I V E

LAUDAE (nunc LODI) Urbis HISTORIA.

LIBER SECVNDVS.



ON defuit promissis Fridericus Imperator, & a. d. III. Non. Aug. qui forte dies erat Dominicus, anno MCLVIII. una cum multis suorum, proceribusque Laudensium, consensu equo ad montem se contulit Egecionem, ut istuc novæ urbi condendæ locum assignaret Laudensibus. Cum eo pervenisset, hoc, quod omnes faustissimi ominis loco habuerunt, accidit. Coelo admodum sereno subito ingens decidit imber, qui cum exiguum tempus duravisset, denuo coelum effulsit pulcherrimum, nulla omnino nebula obtectum. Itaque cum Fridericus accurate loci situm perspexisset, eumque judicavisset opportunum novæ urbi exstruendæ, delineavit eam, præscriptis illis terminis, qui ipsi videbantur esse idonei. Hinc cum Laudensibus Consulibus, qui isto tempore erant Cosmus Morena, Archimbaldus Summaripa, Lotterius de Abbonis, alique, vexillum in manus tradidisset, solennitate illa novæ se illis patriæ possessionem tradere, eamque inaugurare dixit. Hanc deinde Imperatorio diplomate confirmavit, quo cum etiam contineantur privilegia illa, quæ pro benignitate sua Fridericus Laudæ ac Laudensibus concessit eximia, illud de verbo ad verbum huic inscribere *Historia* visum fuit.

PRIVILEGIUM CONCESSVM NOVÆ CIVITATI LAUDAE.

In Nomine Sanctæ, & Individuæ Trinitatis, FEDERICUS Divina favente Clementia Romanorum Im-

C perator Augustus. Quamvis omnibus, qui Imperatoria libertatis filii esse dignoscuntur, tutela Imperialis jure debeamus presidium, quadam tamen speciali prerogativa dilectionis, & brachiis consolationis, illi à nobis sunt amplectendi, quorum ex devotione, in argumentum fidei, magis est cognita fidelitas ipsa, ad exaltandum Imperialis nostræ Coronæ gloriam, amplius est operibus comprobata. Notum sit igitur omnibus Imperii nostri, tam futuris, quam presentibus, qualiter nos divino nutu compuncti, & super miserabili destructione Laudensis Civitatis, necessaria miseratione miserti, fidelibus nostris Civibus Laudensibus novum locum habitationis in Monte videlicet Ghezzone à ripis Abduæ quantum sufficiat ad ambitum Civitatis, & Suburbia construenda super Abduam flumen nostrum, Imperiali auctoritate, & Vexillo designavimus, & veterem Urbem à Mediolanensibus destructam, ad titulum nostri nominis, & Imperatoria Majestatis in novam transulimus; has commoditates, sicut seriatim in sequentibus exponuntur, ex gratia nostra eis indulgentes.

E Primum igitur hanc facultatem concedimus, quantum ad numerum nostræ Civitatis, Muros, & Fossata, & cetera Propugnacula contra impetum Inimicorum construant; Ad majorem quoque nostræ Urbis utilitatem eis indulgemus, ut super Flumen Abduæ, & alias Aquas in Episcopatu Laudensi decurrentes ad commoditatem transeuntium Pontes faciendi liberam habeant potestatem; sed eorundem Pontium, pensationes, Tolonea, Pedadia, Regali Fisco reservamus; Statuentes etiam precipimus, ut prædicta Civitas Portum Generale, & Communem Navium stationem, remota omnium contradictione, semper habeat, & Mercatorum Naves per Abduam superius ascendentes, vel in-

inferius descendentes ad eundem portum secure confluant, vendendi vel emendi habita libera facultate; Nec aliquis alius Portus ad Naves arrivandas in toto Flumine Abdua ordinetur sine nostro Imperiali praecepto, nec minus ipsi Laudenses per omnes Aquas Lombardiæ navigabiles, liberum habeant navigandi arbitrium, soluti ab omni toloneo, illo tantum excepto, quod ad Fiscum Imperiale pertinere dignoscitur. Quia vero nulla Civitas via publica de Civitate ad Civitatem, de loco ad locum pro communi usu carere potest, vel debet; Imperiali edicto nostro, nova Laudensi civitati donamus liberas vias, & liberos transitus ex omni parte usque ad publicas, & communes vias, quæ ducunt ad singulas Civitates in circuitu adjacentes. Præterea Decreto nostro prorsus interdiximus, ne toto Laudensi Episcopatu Castrum aliquod, vel Turrim, vel aliam Fortitudinem, aliquis edificare, vel destructa restaurare præsumat. Ad augmentum quoque gratia nostra Civitati supra memorata Zerbo, & alias terras arabiles ex utroque latere jacentes ad communem usum Pascuorum ita deputamus, ut ab illis Dominis, quibus de jure pertinent, tali prætio comparentur, quo ante annum unum, priusquam Civitas nostra fundaretur, poterant comparari; quorum Pascuorum termini ex uno latere Castrum Episcopi, sicut via sunt, usque ad Pontem veterem de Fanzago versus Abduam protenduntur; ex alio autem latere, sicut Costa Pulignani, & Costa Isella, & Costa Juvenici veteris, & Costa Juvenici novi, & Costa Civitatis versus Abduam clauduntur. Quia vero Mediolanenses ante guerram, & tempore guerra multa bona prædictorum, Laudensibus violenta usurpatione abstulerunt, hanc eis potestatem donamus, ut bona sibi ablata possint repetere, nulla præsumptione temporis obstante. De cætero præfatam Laudensem novam Civitatem, & universa jura, tam in Civitate, quam per totum Laudensem Episcopatum in nostra jurisdictione, & propriam jurisdictionem ita libere vendicamus, & penitus ascribimus, quatenus ad nullam potestatem, nullamque personam aliquem respectum habeat, nisi ad solam nostram Imperialem Majestatem, & nostros successores Reges Romanos Imperatores; Aliud quoque adjacentes præcipimus, ut sicut Communis nostra per medium veteris Civitatis ibat, ut nihilominus per Novam Laudensem Civitatem nostram libere, expedite transeat. Ut autem hac omnia inviolabiliter observentur, præsentem cartam, & auctoritatis nostra sigillo confirmamus.

S. Signum Domini Federici Romanorum Imperatoris Inviictissimi.

Ego Rainaldus Cancellarius vice Federici Colonienfis Archiepiscopi auctoritate Cancellarii recognovi.

Anno Dominice Incarnationis M. C. LVIII. Regnante Domino Federico, Romanorum Imperatore gloriosissimo, anno Regni ejus VII. Imperii vero quarto. Acta sunt in Vigueria III. Non. Decembris.

Denique placitum est Friderico, primum, ut in vetustissimo libro manuscripto legitur, quem supra citavimus, ponere lapidem in nova hac urbe extruenda: quo brevissimo tempore Laudenses, qui per vicinos tractus erant dispersi, undique ingenti cum gaudio concurrerunt, atque ocyus ibi sacras ædes, excellentes domos, aliaque publica & privata ædificia exstruxerunt.

Interim Fridericus, dum patria nostra resurgere incipit, ultionem à Mediolanensibus exigere constituit. Itaque eodem mense Augusto, postrid. Non. una cum rege Bohemiæ exercitum ad Mediolani moenia admovit. In hanc expeditionem præter Cremonenses & Papienses multi etiam nostrorum Laudensium sequuti sunt Imperatorem, & per varias occasiones strenuissime rem gesserunt. Inter hos præcipue memorantur Joannes Judæus, & Petrus Pufferla, qui cum natalium splendore eximiam virtutem atque animum invictum habe-

bant conjunctum: sed dum retro in urbem compellunt hostes, qui ex porta Arcus Romani eruptionem fecerant, mortiferis sunt affecti vulneribus. Sed ad scriptores rerum Mediolanensium ablegamus, quicumque figillatim cognoscere desiderant res in illa obsidione gestas, cujus denique secundus Friderico fuit eventus. Nam consilio Vidonis, Blandratæ Comitis, & apud Mediolanenses viri principis, obsessi per Legatos pacem ab Imperatore petierunt, eamque impetraverunt certis conditionibus; quarum prima hæc fuit, ut Laudenses & Comenses penitus exempti essent Mediolanensium potestati. Ita motis castris, cum aulicorum quosdam reliquisset, coram quibus jusjurandum fidelitatis Mediolanenses præstiterunt Friderico, ipse cum aulico comitatu copiisque militaribus Moguntiacum (hodie Monza dicitur) se contulit, & inde perrexit Roncaliam. Huc cum multos Principes, proceres, Consulesque convocasset, celeberrimi quidam doctores, quibus eam curam delegaverat, multas expedite controversias de jurisdictione atque dominio diremerunt, quæ ipsi Imperatori cum Principibus istis atque civitatibus intercedebant. Et ibidem serio ille Mediolanensibus imperavit, ut pacem cum vicinis, & maxime cum Laudensibus colerent. Inde profectus Bononiam abiit, postquam nonnihil contentionum inter Legatos ejus, & Placentinos, atque Cremenenses acciderat, & ipse Laudæ aliisque in urbibus, Longobardiæ præfectos constituerat, qui eas suo nomine regerent. Veruntamen hoc juris ille vindicare sibi non potuit in urbe Mediolanensi, ubi magna cum Cæsaris contumelia male habiti fuerunt Rainaldus, Cancellarius Imperatoris, & Otho Falgigranus, qui nomine Friderici eadem de causa Mediolanum se contulerant. Ita Mediolanenses ejus contra se iram provocaverunt, quæ magis etiam adaucta est, cum ille cognovisset, eos armorum vi occupavisse Trecium castellum, in quo ipse Germanorum suorum collocaverat præsidium. Sed quamquam Imperator his novis turbis auditis venerat Laudam, tamen protinus abiit denuo nulla re gesta Bononiam.

Interim vero dum civitas nostra renascitur, etiam in animis Mediolanensium pristinum contra Laudenses odium recruduit. Hinc a. d. VII. Cal. Jun. ipso Pentecostes die festo anni MCLIX. magno numero advenerunt, ex improvviso nostram opprèssuri urbem. Sed parum prospere hoc illis consilium cessit. Nostris enim obviam hosti progressis, prælioque commisso, licet ipsi amplius quinque millia haberent equitum, turpiter & confusis ordinibus fugam arripere coacti sunt, multique eorum capti à Laudensibus. Hoc cum missis illico nunciis ad aures Cæsaris esset perlatum, eximiis inde laudibus & applausu nostri fuerunt ornati. Et ipse etiam Fridericus Laudam deinde cum venisset, eadem repetiit encomia in publica quadam alloquutione, donoque Mediolanenses istos accepit, qui eodem prælio capti fuerant, eosque Papiam abduxit. Neque tamen adversa hac fortuna abducti sunt hostes à consilio novæ hujus urbis opprimendæ. Quin etiam cum Cremenensibus contra nos inita belli societate, ita rem præparaverunt, ut hi a. d. v. Id. Jun. magnis cum copiis nos invaderent ab ista parte Adduæ amnis, quæ versus Cremam est, ubi eodem tempore pontem nostri ædificabant. Sperabant enim Mediolanenses, dum nostri heic Cremenensium armis distinerentur, interim ipsis in proclivi fore ab altera parte intrare atque occupare Laudam. Sed neque his coeptis successit. Nostri enim ab utraque parte à solis ortu ad medium usque diei contra geminum hostem pugnando, utrosque ægris animis domum redire coegerunt, nullo prorsus urbi nostræ damno illato.

Ob hoc factum Cremenenses, simul etiam quod

urbis suæ muros dejicere fossasque complanare noluerant, ut mandaverat Cæsar, non levio- rem, quam Mediolanenses, ejus in se iram concitave- runt. Igitur ille castigaturus utroque, Cremonensibus negotium dedit, ut obsidione cingerent Cremen- ses, veteres hostes suos, quod & prompte illi sunt exse- cuti a. d. vii. Id. Jul. ejusdem anni. Octo post diebus cum ad obsidionem accessisset cum exercitu suo Fridericus, ad eamque urgendam tantum copiarum reliquisset, quantum satis ipsi videbatur ad eam perficiendam, ipse a. d. xiii. Cal. Aug. cum Germanis equitibus trecentis Laudam perrexit, suisque Laudensium equitatum cum addidisset, cum opportunis ad consilium suum exsequendum copiis ad *Landrianum* processit. Hinc cum Papiensium copias quasdam versus Mediolanum emisisset, & Mediolanenses magno numero urbe egressi, ut se iis objicerent, jam eosdem persequerentur, longeque superiores illis, victores domum redirent; ab Imperatoris Laudensiumque copiis, quæ in tempore ex insidiis prodierunt, intercepti sunt, victique victores. Amplius trecenti ex fortissimis Mediolanensium capti fuerunt à Cæsare: hostium equi quadringenti in ejusdem venere potestatem.

Post hanc expeditionem denuo ad obsidionem Cremæ Fridericus accessit, quo non multo post etiam uxor ejus, Beatrix nomine, profecta est. Sed illa quidem cum inter arma agere fastidiret, cum venia mariti Laudam venit, ibique à primis nobili- um, magnoque matronarum numero, eo cum gaudio & honore, qui tantæ Principi debebatur, est accepta. Inde, cum apud nos per aliquot dies esset commorata, per Bergomum se contulit Vene- tias. Cum interim Imperator obsidionem Cremæ prospere ad finem perducere cuperet, nostri officiose illi ducenta dolia aliamque materiam subministraverunt, quibus post varias res gestas, quæ nihil ad nos pertinent, completa fossa, denique Cæsar potitus est urbe a. d. vii. Cal. Febr. anni mclx. hac conditione, ut excederent Cremen- ses urbe, asportatis, quæ semel secum ferre possent. Me- diolanenses autem & Brixiani, Cremen- sium socii, exarmati sunt, atque ita dimissi. Tum urbe direpta, incensa, dirutaque Imperator in præmium navatæ sibi à nostris in ista obsidione operæ, ex hostium spoliis trecentas loricas cum totidem galeis, scu- tisque, & multa insuper crurum tegmina dono illis dedit. Hinc ille Laudam venit, & inde cum exer- citu Papiam profectus est.

Mortuo autem anno præcedenti Hadriano IV. Pontifice, in ejus locum à duobus & viginti Car- dinalibus sublectus est Rainaldus, patria Senensis, qui Alexandrum III. se dici voluit. Sed hujus ele- ctioni cum non affuissent tres alii Cardinales, hi Papam, vel potius Antipapam, creaverunt Octa- vianum, civem Romanum, & ad S. Clementis Cardinalem, qui se Victorem appellavit. Cumque Alexander in ipsis initiis hoc tolli schisma cuperet, missis legatis Fridericum Imperatorem rogavit, ut auctoritatem suam interponeret. Hic itaque cum & verum, & supposititium Pontificem Papiam venire vellet, ut ibi decerneretur, uter illorum verus esset Pontifex; hoc autem minime arrideret Alexandro, hic Anagniam, Victor Signiam se recepit. Hoc cum aggre ferret Imperator, duos episcopos ablegavit, qui Alexandrum, ut privatum & Cardinalem, ad Concilium Papiæ celebrandum citarent. Sed hi ab illo rejecti Signiam ad Victorem perrexerunt, qui statim lubens Papiam cum ipsis est profectus, ubi eum Fridericus, congregatis multis Archiepiscopis, Episcopis, aliisque proceribus ecclesiasticis, ut ve- rum Pontificem, solennibus hoc in negotio ceri- moniis est veneratus. Non destitit quidem Alexan- der Fridericum Imperatorem & Victorem Antipa-

pam admonere officii, sed quia hoc sine fructu erat, utrumque cum multis aliis Principibus atque populis, inter quos & Laudenses erant, excom- municavit, eorumque episcopos dignitate sua pri- vavit, quod Imperatoris impulsu Antipapam se- querentur & adjuvarent. Hinc securitatis causa in Franciam transgressus, Clermontiam Concilium in- dixit, in eoque omnia conciliabuli Papiensis acta rescidit, & denuo excommunicavit Victorem, ut & Fridericum, qui Papiam Dertonam profectus est.

Interim ex insito Mediolanensibus contra Lau- denses odio, ceu ex mala radice, semper & mala germina proveniebant. Itaque cum vixdum surge- ret hæc nova urbs, protinus eam opprimere studue- runt, & ipso ante Pascha die Martis ejusdem anni mclx. magno cum peditum equitumque numero su- bito advenerunt, Laudamque acerrime oppugnare sunt aggressi. Sed nostri hostium impetum non so- lum fortiter sustinuerunt, sed multi etiam Laudensium militum magno animo eruptione facta, vulne- ribus & morte plurimos hostium multaverunt, etsi deinde nostris, utpote numero multum inferioribus, primum in fossam, inde in urbem retrocedendum fuit, paucis aliquot suorum amissis captisque. Verun- tamen multo majus damnum passi sunt hostes, qui recollectis copiis suis Mediolanum redierunt, non victi solum, sed delusi etiam & exsibilati. Gratissi- ma Friderico Imperatori hujus certaminis accidit fortuna, cum eam ex Laudensium Legatis cogno- visset, maximo omnium collaudata nostrorum au- dacia, quibus tam paucis numero & animus fuisset, & favisset fortuna ad tantam hostium multitudinem superandam. Cumque deinde cum copiis suis Lau- dam venisset, gratias agere civibus dignatus est, quod adversus suos Imperiique hostes tam strenue rem gessissent; paterna tamen admonitione addita, ne temere adeo ex urbe erumperent, ut ne virtus illorum quandoque ab nimio hostium numero op- primeretur. Satis enim Laudensibus dicebat esse debere, si tueri novam patriam possent. Postea Imperator illorum copias militares ab illis petiit, & ad *Pontiorolum* profectus, ubi Mediolanenses pontem in Addua flumine maximis sumptibus crexerant, capto incensoque ipso castello, solutoque & in flu- men dejecto ponte, Laudam regressus est. Inde cum iisdem copiis, auctus insuper Cremonensium aliquot equitibus, denuo ad *Pontiorolum* venit, ibi- que templum quoddam diruit, quod affatim instru- ctum omnibus illis, quæ ad se tuendum erant opus, Mediolanenses adhuc tenebant. Mox cepit diri- puitque Farræ castellum, & paulo post Mediola- nensium fines depopulatus, cum suis uberrima præ- da locupletasset, Papiam rediit, atque ibi militibus Italicis veniam dedit ad sua redeundi.

Digresso Imperatore statim Mediolanenses hac occasione sunt usi ad urbem nostram denuo armis infestandam, & a. d. vii. Id. Jun. usque ad Vil- lam Corneliam progressi, quæ hodie *Cornelianum* dicitur, non amplius mille quingentis ab urbe Lau- da passibus, quidam eorum cum ad ipsam usque ur- bem facerent excursiones, ab Laudensium quibus- dam non tantum repulsi fuerunt, sed & multi illo- rum, antequam ad suos recipere se possent, occisi captique: etsi deinde omnibus hostium copiis ad- ventantibus, nostri, qui pauci numero erant, cum resistere tantis viribus non possent, ad urbem refu- gerunt; atque hostes eorum vestigiis inhærentes, & captos ex suis recuperaverunt, & ex Laudensibus ceperunt Vitum Tressenum, Bernardum Bannio- lum, Arberium Lomellinum, Ottobellum Cadamo- stum, Othonem Meciapirentum, aliosque. Verunta- men manserunt in potestate nostrorum quidam etiam præcipui ex Mediolanensibus, inter quos fuerunt Codeguerra Vicontius, Monachus Palatinus, Bruno Concoregius, filius quidam Borri à Burris, Joannes

Salerius, Ambrosius Palliarus, Joannes Feroldus, Hugo Camerierus, Otho Bellabucca, & Obicius Paganus. Sed neque hac sinistra fortuna confusi Mediolanenses, postero die magnum denuo armorum numerum contra nos emisunt, iisque mandaverunt, ut ad urbem usque nostram progredientes, cum prodiissent nostri ad manus cum ipsis conferendas, fugam simularent, & per fines se Laudensium reciperent. Sperabant enim, sibi interim in proclivi fore, ab alia parte ex improvviso supervenire urbi, eamque occupare. Verum sicut praeterita eorum consilia fuerant irrita, ita & hoc stratagemata fefellit. Nam stationes nostrorum cum è longinquo hostium adventum speculati essent, adeo opportune Laudensium milites, qui necdum longe erant dispersi, de eo admonuerunt, ut illi in tempore praesto essent ad urbis defensionem, & ad portam Cremonensem acie directa hostes expectarent. Sed hi cum prope ad urbem constitissent, ac nostrorum ordines instructos, animosque & consilium perspexissent, fortunæ loco duxerunt, nihil ulterius tentato incolumes ad sua redire.

Inde inexpiabili contra nos odio conciti, denuo patriæ nostræ experiri excidium constituerunt. Itaque a. d. xiv. Cal. Aug. ejusdem anni ingentes pedum equitumque copias ad urbem admoverunt, adducto secum etiam *Carrocio*, multisque carpentis, ballistis, arietibus, aliisque machinis bellicis, quæ temporibus istis erant in usu, arctaque eam obsidione clauserunt, castris ab illa parte positis, quæ à palude ad portam Imperialem ad portam usque Cremonensem protenditur. Mox inter Mediolanenses nostrosque, qui ex urbe eruperant, ingens exorta est pugna, qua multi utrinque cæsi fuerunt. Inde cum in castra se hostes recepissent, omnibus Ducibus suis ad *Carrocium* convocatis certum disposuerunt atque constituerunt ordinem, quo omnis undique exercitus impetu facto urbem esset oppugnaturus, divisis copiis, prout maxime videbatur opportunum, singulisque cohortibus suo loco assignato, quem oppugnarent. Ita illis, qui inter portam Vercellinam & Ticinensem tendebant, ista pars urbis est assignata, ubi *S. Vincentii Posterna* erat: qui inter portam Orientalem & Romanam, pars urbis ad Sylvam Græcam: qui inter portam Comacinam & Novam, porta Imperialis una cum Papiensi & Cremonensi. Atque hinc etiam ignem per machinas bellicas in urbem destinaverant injicere. Omnibus ad hunc modum præparatis, deinde cum opportunum ipsis tempus esse videretur, ingenti clamore tubarumque sonitu fecerunt impetum, quem non modo sustinuerunt nostri, sed etiam fortiter repulerunt ab omnibus undique partibus, cæsis vulneratisque multis oppugnantium. Sed ad Sylvæ Græcæ portam, cui nomen *Seravallis*, difficilius nostris certamen fuit cum Mediolanensibus, qui magna facta impressione tanto ardore nostros in urbem compulerunt, ut hi cum se magno labore recepissent, feliciter tamen clausa urbe hos oppugnatores excluderent. Tum vero hi in *Collinam* tantum fecerunt impetum, ut, cum isto tempore urbs nostra non muris, sed paludibus solummodo ac fossis vallisque & situs altitudine munita esset, denique *Collinam* magno propugnatorum terrore intrarent, quorum multi fugientes ad alteram interioremque se fossam receperunt. Sed alii audaciores, qui vitam amittere, quam patriam in Mediolanensium potestate positam videre præoptabant, tanto cum ardore ac virtute se illis objecerunt, ut eos expellerent urbe, quibusdam cæsis, aliis in Adduam amnem, qui vicinus ibi currit, præcipitatis. Tum ad expugnandam urbem nonnulli hostium ultimam tentare fortunam, & primum Sylvæ Græcæ palude, inde fossa superata, in illam urbis partem escenderunt, ubi Henrici domus erat, dicta *Sertosani*. Sed neque

A hi meliorem ceteris experti sunt fortunam, ocyus ab Laudensibus repulsi & in fugam acti. Itaque non superati solum, sed dolore & ignominia confusi hostes, cum magnam diei partem frustra pugnassent, signo receptui dato, in castra sua redierunt. In patria tuenda multorum civium summa virtus enituit, & inter hos Theobaldi Bardonis, qui fortissime pugnans honesta morte occubuit.

B Sed deinde cum vererentur Laudenses, ut soli tantis Mediolanensium viribus resistere possent, qui post hanc pugnam magna Placentinorum militum subsidia acceperant, & ipsi ad Imperatorem Legatis Papiam missis, & item ad Cremonenses, socios suos, valida protinus impetraverunt auxilia. Hinc nostri multum confirmati, animose ad prælium Mediolanenses provocaverunt cum Placentinis conjunctos. Sed non satis illi habuerunt animi ad manus cum nostris conferendas, & contractis omnibus copiis suis, castrisque motis, cum suo *Carrocio* in fines suos regressi sunt. Sed crebræ hæc contra urbem nostram Mediolanensium molitiones, qui civitatis hujus erant hostes inexpiabiles, in causa fuerunt, ut Laudenses securitatis suæ causa urbem firmare muris, fossis, castellis, aliisque munimentis omnibus, quæ temporibus istis erant in usu, constituerent. Itaque hanc in rem utentes opera Tincti Musæ, patria Cremonensis, qui cognomine *Gattus* dicebatur, & primi nominis erat architectus, a. d. iii. Non. Aug. primum novis muris lapidem posuit Albericus Merlinus, nobilis, & isto tempore episcopus Laudensis. Ita illa cum abunde propugnaculis instructa esset, deinde novis ædificiis, & civium numero, opibusque indies est aucta. Nobile hoc oppidum forma rotunda est, & duorum millium passuum ambitu. Cives ejus, qui temperato salubrique cœlo fruuntur, multum valent ingenio, non minus ad armorum, quam literarum tractationem idonei; & ad negotiationes exercendas attenti, paternis domibus magnas accessiones adjecerunt. Territorum autem Laudense celebre est ob fertilitatem, magna frugum fructuumque cujusque generis ubertate præstans. Præter cetera pascuis abundat amplissimis, ubi magno numero armenta non Longobardiæ tantum, sed magnæ parti Italiæ caseum suppeditant præstantissimum. Non procul ab ipsa urbe flumen satis celebre currit, quod ab Addua monte altissimo & nomen habet, & natales.

D Sed dum urbs nostra munimentis firmatur, non cessatum interim fuit ab actibus hostilibus. Nostri enim cum aliquot Cremonensium equitibus conjuncti, qui tum forte Laudæ erant, ad *Cropellum* sunt profecti, ubi Mediolanenses denuo pontem in Addua flumine exstruxerant: quo prospere occupato dirutoque, multis secum captivis abductis, læti domos suas redierunt. Non æque secunda fortuna fuerunt usi Laudenses isti, qui cum ducentis Cremonensium equitibus versus castellum Carcanum abierunt, à Mediolanensibus obsessum, militibus comitatibusque Fridericum Imperatorem sublevaturi, qui istum eximere obsidioni nitebatur locum, ut qui ipsius partibus addictus egregie se tuebatur. Nam cum ante adventum nostrorum Imperatorem inter & Mediolanenses prælio pugnatum esset acerrimo, quo Cæsar inferior cum reliquiis copiarum suarum Comum se receperat; nostri, cum non in tempore advenissent, nequicquam fortissime pugnantes cum Mediolanensibus, quippe nimium quantum numero hostibus inferiores, in fugam sunt acti, multique eorum, etsi alii incolumes Comum evaserunt, capti. Utilius fuit auxilium illud, quod nostri Friderico tulerunt, cum ille profectus Como, & Cremonensium, Papiensium, Laudensiumque copiis militaribus auctus, adversus Placentinos movit, pontemque ex navibus confectum disjecit, quem illi è regione Placentiæ in Pado flumine ædificaverant.

Postea

Postea autem Imperator, cum malis illis, quæ meditata erat, afficere eos non posset, Cremonam abiit. Tum Placentini, qui cum Mediolanensibus sepe in nostra conspirabant damna, recens irritati contra Laudenses, quod hi Cæsari contra ipsos tulissent auxilium, a. d. iv. Id. Mart. anni MCLXI. nostros fines sunt ingressi, & in quosdam ex militibus nostris inciderunt, qui nocte præcedenti eodem locorum excurrerant, quæ Placentini faciebant iter, si forte damnum aliquod inferre hostibus possent. Cumque surgente Aurora Placentini animadverterent, nostros non idoneis instructos esse armis, magno cum ardore eos aggressi fugam arripere cogerunt, multis suorum in hostium potestate relictis, licet hi quoque non omnes domum redierint, eorumque nonnulli una cum equis suis ab nostris fuerint capti. Mox alteram itidem in agrum nostrum fecerunt excursionem eorundem Placentinorum equites, & usque ad *S. Mariam in via* sunt progressi. His cum obviam prodissent Laudenses, pugna exorta in hostium potestatem cum aliis aliquot pervenit Tricafolia Pusterla, prætor isto tempore Laudensium, & vicissim occisus Jacobus Vildominus, nobilis Placentinus.

Morabatur his temporibus in Longobardia Fridericus Imperator, & ut in urbe nostra, quando cunque ipsi libitum foret, agere posset illo cum splendore, qui majestati ejus conveniebat, magnificentum in ea palatium exstrui voluit prope monasterium *S. Joannis*. Principes autem Germaniæ, cum Imperatoria majestate indignum esse judicarent, Fridericum diutius in Longobardia morari sine idoneis ad subjugandos debellandosque suos hostes viribus, qui jam subtrahere se ejus imperio etiam vi armorum audebant, ultro in hanc transire regionem constituerunt cum tantis copiis, quæ perdomandis rebellibus sufficerent. Ex horum Principum numero fuerunt Lantgravius, cognatus Imperatoris; Conradus, Comes Palatinus, & ejusdem frater; Fridericus frater Conradi regis, qui fuit Cæsaris avunculus; Rainaldus, electus Colonie Archiepiscopus; regis Bohemiæ filius, præter alios principes viros procuresque ecclesiasticos. His viribus, ut & multarum Longobardiæ civitatum, interque eas Laudæ nostræ militibus Imperator auctus, a. d. iiii. Cal. Jun. fines Mediolanensium ingressus, omniaque, quæ in agris erant, depopulatus, castra à *Cassina Gnacini de Aliate* ad *Morsengiam* usque extendit, deinde mutato loco ad *S. Dionysii* castra posuit hoc animo, ut tandem aliquando Mediolanum urbem occuparet, semper Imperio, eique addictis inimicam. Egressi urbe sua Mediolanenses, cum Papiensium aliisque Longobardis militibus, qui in Imperatoris exercitu erant, animose manus conseruerunt, ac post longum & pertinax certamen, quo multi utrinque aut libertate, aut vita sunt privati, ad mœnia sua se receperunt. Sed ex his Mediolanensibus omnium sortitus est vitæ finem infelicissimum Adamus Palacius, nobilis Mediolanensis, qui captus ab Imperatoriis, jussu Friderici in conspectu civium suorum suspendio necatus est. Postero die cum obsessi iterum ex urbe erupissent, nova exorta est pugna. Sed ab Laudensibus, aliisque Longobardis itidem militibus, qui se illis objecerant, multis suorum amissis in fugam hostes acti sunt. Veruntamen multi etiam Laudensium cæsi captique sunt, quod certe non accidisset, si Germani, nimium solliciti mandatorum Cæsaris observatores, qui edixerat, ne cum Mediolanensibus certamen inirent, illis opportunum, ut debuerant, tulissent subsidium. Deinde Fridericus mutato loco ad portam Vercellinam cum exercitu movit: & interim dum castra ponebantur, Mediolanenses eruptione facta eum sunt aggressi. Hic cum anceps aliquandiu certamen fuisset, multis utrinque

A cæsis ac vulneratis, denique Mediolanenses, cum resistere hostium numero non possent, intra urbis portam sunt compulsi, multique tum eorum ob loci angustiam in fossam præcipitati.

Sed tunc quidem Mediolani obsidio intermittenda Friderico fuit, quo adesse posset in conventu, seu conciliabulo, quod primum Papiam, inde Cremonam fuerat indictum. Sed novissime in Laudam urbem jussu Imperatoris convenire hoc tempore cœperunt procures ecclesiastici, alique Principes a. d. xiii. Cal. Jul. Hic maxime actum fuit de Victore Antipapa, cujus supra mentionem fecimus, pro vero Pontifice agnoscendo, quod & antea jam factum erat Papiæ anno MCLX. & nunc denovo factum est. Præter Imperatorem ac Victorem, multosque alios procures ecclesiasticos atque principes, interfuerunt huic Concilio Dux Bohemiæ; Peregrinus, patriarcha Aquilegiensis; Guido & Rainaldus, hic Treverorum, ille Ravennæ Archiepiscopus electus; & Viennensis Archiepiscopus. Alii vero, qui illi non interfuerunt, veluti Daniæ, Norvegiæ, Hungariæ, & Bohemiæ reges, & Archiepiscopi aliquot alique clericorum principes, cum se excusavissent quod ipsi ad hoc Concilium venire non possent, per Legatos tamen sunt testati, se Victorem pro vero successore Petri agnoscere, & omnia ejusdem Concilii acta rata habere. Excommunicati autem in eo fuerunt Hubertus Pirovanus, Mediolanensis Archiepiscopus, & una Consules Mediolanenses, tum Placentiæ & Brixie urbium episcopi & Consules, eorumque consiliarii, multique alii. Tum postea cum de nonnullis adhuc aliis rebus fuisset actum, dimissus est conventus ipso *S. Jacobi* die festo.

Sed Fridericus, qui inter hujus acta conciliabuli nequitiam deposuerat iram suam atque odium contra Mediolanenses, denovo cum omnibus copiis ad Mediolanum venit, & castra posuit ad locum, cui nomen *Cerrum*, denovo minitans urbi excidium. D Tum perculsi timore Mediolanenses Lantgravio, ac Duci Bohemiæ, Comitique Palatino, ipsius Imperatoris fratri significaverunt, se percupere, ut Consules urbis suæ cum ipsis in colloquium venirent, dummodo illis fides daretur, se tuto id facturos. Hoc cum facile impetravissent, & Consules ad constitutum se locum conferrent, quidam, qui circa *Cancellarium* erant Imperatoris, prorsus inscium istius conventionis, cum procul eos vidissent, quasi hostes, jure belli ceperunt apud Bannioli monasterium. Sed dum inter hosce Germanos & Mediolanensium milites, qui suos liberare Consules nitentur, pugnatur acriter, parum absuit, quin principes illi, qui eos fore securos promiserant, *Cancellarium* vita privarent. Sed ille cum ad Imperatorem confugisset, eique suam exposuisset innocentiam, ab illo, quam desiderabat, securitatem impetravit. Posthæc Cæsar à toto exercitu Mediolanenses impetu facto voluit oppugnari, & ipse, prout maxime sibi videbatur opportunum, instruxit aciem. Hic cum Mediolanenses undique se hostibus viderent circumdatos, nec tantis resistere posse viribus sperarent, maxime cum bonam equitum suorum partem in urbe reliquissent, fugam ad mœnia sua arripuerunt. Sed Imperatore cum copiis ad pontem usque fossæ eos insequente, præter ingentem cæsum numerum multi equitum pedumque Mediolanensium capti fuerunt, & Laudam abducti, inque carceres conjecti. Inter hanc pugnam magno fuit in periculo Fridericus, & dum in ipso ponte urbis fortissime pugnat, equus ejus hostium telis est confossus, ipse vulneratus: sed à suis alium in equum impositus, vespere superveniente in castra rediit. Tum, ut nunquam alias, Mediolanum urbem in suam redigendi potestatem cupidissimus, eam arctissima clausit obsidione, ita ut

ut nulli omnino in eam penetrare commeatus possent, & infelicibus illis, qui fame compulsi ex ea egrederentur, alteram praecidi manum iussit. Inde toto Mediolanensi agro devastato, & obsessis omni spe annonam in urbem introducendi praecisa, Papiam se contulit. Sed cum videret, se istic agentem, non posse Placentinos atque Brixianos, Mediolanensium amicos, impedire, quo minus obsessis nonnullum ferrent subsidium; hyemandi causa Laudam, tanquam ad maturandam expugnationem locum opportunissimum, venit una cum Beatrice uxore, multisque Principibus & proceribus ecclesiasticis, ibique diligentissime attendit ad omnes in urbem aditus intercludendos, ne ulli omnino in eam pervadere commeatus possent.

Inter hanc obsidionem cum Fridericus aliquando Lauda Cremonam se contulisset, amplius quingenti Mediolanenses, qui temporibus istis extra Mediolanum urbem erant, Laudensium fines sunt ingressi, ut nostros, quanto maximo possent, damno afficerent; & cum se maiorem partem in nemus abdiderent, quod S. Joannis dicitur, ubi hodie Capucini sunt, centum ex illis ab reliquo se agmine segregantes, ad *Lavandarium* usque *Puliniani* excurrerunt, magnasque praedas egerunt. Hoc comperto Laudenses una cum Duce Rotenburgenfi multisque Germanorum militum urbe egressi, adeo hostes invaserunt, ut turbatis illorum ordinibus, nonnullos hostium caperent, praedamque recuperarent. Sed hoc cum alii illi cognovissent, qui in insidiis erant, opportune ex illis progressi suis auxilio venerunt, & denovo nostris adempta praeda, multos Laudensium Germanorumque ceperunt, pertinaci prope Cassatorum aedem S. Martini certamine, & pari fere fortuna.

Denique Imperator Laudam reversus est, ut tandem aliquando ad finem perduceret obsidionem istam, & adeo arte occlusit aditus illos, per quos nonnunquam Brixiani & Placentini aliquid rei cibariae in urbem Mediolanum inferebant; adeoque severe castigavit, qui obsessis annonam suppeditare conarentur, ut infortunati Mediolanenses eo miseriarum redigerentur, ut sextarius salis duodecim denariis, frumenti sextarius duobus solidis veniret, quod istis temporibus pretium erat carissimum. Igitur illi cum hinc considerarent, se vitam sustentare non posse, tantisper dum novi prodituri fructus essent, inde autem obstinatum Caesaris animum viderent non solvendae hujus obsidionis, donec urbem in suam rede-gisset potestatem, in consilio suo satius esse duxerunt pacem quibuscunque conditionibus, utut gravissimis accipere, & Imperatoris implorare misericordiam, quam diutius in tantis vivere calamitatibus. Quare Legatos miserunt Laudam, ubi ille agebat, eique significaverunt, se paratos esse in ejus honorem muros sex diversis partibus urbis dejicere, fossasque complanare, & ab auctoritate Imperatoria praefectum accipere. Sed Fridericus cum Principes Imperii, & Laudenses aliosque socios suos convocasset, iisque exposuisset, quae Mediolanenses attulerant, ex consilii sententia respondit, se nunquam alias pacis conditiones Mediolanensibus concessurum, quam quas ipsi clementia humanitasque sua dictavisset. Quare admodum aegris animis Legati Mediolanum redierunt, ubi cognito Caesaris responso Mediolanenses metu atque dolore admodum perturbati fuerunt. Denique autem cum abunde cognoscerent, se prorsus resistere viribus Imperatoris non posse, misericordiae se ejus permittere constituerunt, ad eamque impetrandam supplices ad eum Legatos miserunt.

Inter haec ipsis Cal. Mart. anni MCLXII. conflatum, nescio quomodo, incendium in Vallicella Laudensi, & vento, qui vehemens flabat, propulsum atque adauctum, fere dimidium ejus consum-

psit. Cremata est aedes S. Mariae Magdalenaë, una cum templo monacharum S. Joannis, multisque aliis aedificiis. Postero die, id est, a. d. vi. Non. Mart. Laudam venerunt Consules Mediolanensium, Otho Vicontius, Amicius de Porta Romana, Anselmus Mandellus, Godofredus Mainerus, Ardericus Cassina, Anselmus Ortus, Aliprandus Judex, & Ardericus Bonates cum octo aliis Mediolanensium optimatibus. Hi cum in palatium & conspectum Caesaris essent adducti, traditis illi maxime actu habituque supplici gladiis nudatis, quod temporibus istis solenne signum erat, victum se prorsus arbitrio ac potestati victoris permittere, sese una cum urbe sua dederunt Friderico, dato, ut ille volebat, jurejurando, se in perpetuum obtemperaturos mandatis ejus, & insuper promisso, se curaturos, ut idem jusjurandum praestarent omnes etiam alii Mediolanenses. Proximo die Dominico itidem venerunt, ut Imperatoris potestati se submitterent, trecenti Mediolanensium milites, inter quos sex & triginta signiferi traditis vexillis pedes ejus sunt exosculati. Praesto fuit etiam Quintelinus, celeberrimus architectus militaris, quo plurimum fidebant Mediolanenses, & ad Imperatorem detulit claves urbis, eique perpetuam fidem atque obedientiam suam jurejurando addixit. Voluit etiam Fridericus, ut omnes illi, qui Mediolani consulatum gesserant intra proximum triennium, Laudam venirent cum parte copiarum militarium. Itaque sequenti die Martis mille pedites cum *Carrocio* quatuorque & nonaginta signis militaribus praesto fuere: quae omnia una cum duabus buccinis, Rempubli- cam Mediolanensem representantibus, in manus tradita sunt Imperatori. Postero, qui Mercurii erat, die Fridericus Mediolanenses exemit proscruptioni Imperatoriae, aliosque centum & quatuordecim Mediolano venire milites iussit, qui cum aliis istis, de quibus supra diximus, quadringentorum militum efficiebant numerum, eosque apud se retinuit obsidum loco: aliis autem militibus veniam dedit ad sua cuique redeundi. Deinde ad unamquamque urbis portam tantum compleri fossarum, tantumque murorum dejici mandavit, qua ipse comode intrare cum exercitu suo posset. Praeterea sex homines Longobardos, totidemque Germanos delegit, iisque Mediolanum missis, voluit, ut ipsi suo nomine a Mediolanensibus omnibus jusjurandum fidelitatis & obedientiae exigerent. Inter hosce Longobardos fuit Acerbus Morena, patria Laudensis, & Othonis Morenae filius, ut ipse de se testatur in *Historia* paternae continuatione, & illo ipso tempore praetor, seu praefectus Laudensium, qui una cum Friderico de Asia, Imperatoris cubiculario, Mediolanenses circa portam Novam habitantes Caesaris nomine sacramento obstrinxit.

His ista gestis, Imperator Lauda Papiam se contulit una cum Augusta, omnibusque proceribus ecclesiasticis & principibus Imperii, ut & copiis militaribus obsidibusque Mediolanensium. Itaque cum jam sperare possent Mediolanenses ad obsequium Caesaris reducti, se respirandi tempus habere a praeteritis calamitatibus, tum vero secum animo considerans Imperator, Mediolanum urbem semper fuisse majestati suae inimicam, & fere semper suis adversam consiliis, ab eaque semper illos populos atque civitates oppressas, quae se Imperio probaverant addictas, cum postrid. Id. Mart. ejusdem anni in aedibus episcopi ad consilium convocasset praedictos Principes atque proceres ecclesiasticos, exposuit illis, hoc, quod ceperat, ingentem illam urbem funditus diruendi atque extinguendi consilium. Cumque rationes istas attulisset, quibus ad id perductus erat, in consilio omnia approbata collaudataque sunt. Igitur ad illud exsequendum proximo die Lunae Mediolanensium Consulibus mandavit Frideri-

ricus, ut intra diem octavum extra urbis moenia curarent egredi omnes incolas, tam mares, quam foeminas. Et ita factum istis cum ejulatibus atque lamentis, quæ Lector quilibet humanus facile concipere animo potest. Abierunt infelices isti, alii Papiam, alii Laudam, alii Bergomum, aliasque vicinas urbes. Plurimi tamen ad fossas relictæ urbis confederunt, spe impetrandæ à misericordia Cæsaris gratiæ, ut patriam repetere urbem possent. Sed Imperator a. d. v. Cal. Apr. cum ad Mediolanum accessisset una cum Principibus Imperii, ac Laudensibus aliisque populis amicis, totam urbem dirui soloque æquari iussit, Laudensibus illa parte assignata, quæ pertinebat ad portam Orientalem, cui vulgo *portæ Rencia* nomen, & aliis itidem populis assignatis aliis partibus urbis. Atque hi omnes tanto cum furore iussu Cæsaris sunt exsecuti, ut paucis diebus tantam ederent stragem, quantam nemo fieri posse ab omnibus illis hominibus crederet totis duobus mensibus. Intacti tamen manserunt urbis muri, circiter centum turribus instructi, & ex ingentibus pulcherrimis lapidibus erecti: item ad campanarum usum interveniens turris templi majoris, ob altitudinem magnitudinemque admirabilis, licet hæc quoque iussu Imperatoris deinde solo fuerit æquata, & lapsu suo magnam ipsius templi partem humi prostraverit.

Ceterum Laudenses, vexationum memores, quas à Mediolanensibus perpeffi erant, præter omnes alios in eorum urbe evertenda, quæ semper ipsis fuerat adversa, conspicui fuerunt. Referunt autem historici, mala ac miseras, quibus hoc tempore Mediolanenses fuerunt afflicti, immane quantum superavisse omnes alias, quas antea toleraverant, calamitates. Et est hæc Scriptorum constans opinio, pro sua justitia Deum hæc ita voluisse fieri, quo poenam ab illis exigeret vexationum, quibus antea afflixerant ipsi Papienses, Laudenses, Comenses, aliosque.

Ad hunc modum diruta Mediolano cum Imperator Papiam, Laudenses Laudam, & ita alii quoque domos suas rediissent, ipso Paschatis die festo in eadem urbe Papiam, quo Imperator præter Principes Imperii præcipuos etiam Italiæ proceres, omniumque Longobardiæ civitatum præfectos convocaverat; ille una cum Beatrice Augusta in templo majore solenniter coronatus fuit corona Imperatoria. Neque enim hoc antea factum erat, quia constituerat Fridericus Imperatorium diadema capiti non imponere, quamdiu Mediolanum non cepisset urbem. Peractis his solennibus Imperator in episcopi Papiensis ædibus convivio excepit proceres ceterosque principum, una cum illarum civitatum Consulibus, quæ ipsi erant addictæ, inter quos & fuit Acerbus Morena, cum maxime præfectus patriæ suæ urbis Laudæ.

Sed inter hæc pompas & pacis actus adeo non relanguit bellicosus Friderici animus, ut proximo Martis die ipso coram episcopi, Marchiones, Comites, proceres Longobardiæ, & Laudæ aliarumque civitatum Imperio parentum præfecti juramento se obligarent ad Placentiæ urbis obsidionem, quæ cum everfa Mediolano foedus inierat. Hoc comperto Brixiani, cum & ipsi Cæsaris iram metuerent, quippe qui ejusdem cum Placentinis culpæ erant rei, ad Fridericum Consules suos & una multos ex militibus suis miserunt, qui die Dominico post octavam Paschatis in conspectum ejus adducti, solenni cum actu nudatos porrigendi gladios, totam se urbem in potestatem ejus tradere dixerunt. Benigne fuerunt accepti à Cæsare his conditionibus, ut dejicerent muros atque turres urbis suæ, & Cæsaris arbitrio præfectum acciperent, eique præter aliud ingens argenti pondus omnem illam pecuniam repræsentarent, quam ipsi à Mediolanensibus acceperant, quo

A se Imperatori opponerent: præterea ut omnes arces atque castella, quæ in ipsorum finibus erant, ducibus Cæsareis traderent, ipsique in perpetuum fidem suam jurejurando obstringerent. Hoc cum intellexissent Placentini, qui jam belli contra ipsos decreto, quod juramento confirmatum erat, ut supra diximus, erant conterriti, quibuscunque possent, artibus uti constituerunt, ut imminem ab se averterent patriæ ruinam. Itaque Conradi opera, qui ipsius Imperatoris erat frater, à Cæsare veniam impetraverunt iisdem fere, quibus Brixiani, conditionibus.

B Eodem hoc tempore Fridericus instituit *Cattaneos* & *Valvassores*, ministrorum aulicorum genus quoddam, iisque aquilam pro insigni dedit. *Cattanei* erant, qui vasorum quorundam habebant curam, in quibus aqua ad mensam Imperatoris continebatur, quæque vulgo *cattinorum* nomine dicuntur. *Valvassores* appellabantur, qui ad januæ custodiam, seu ad *valvas* Imperatorii cubiculi stabant. Insuper Brixianis Marcoaldum de Gambara, Bergomatibus Anguinolfum, Placentinis Arnoldum de Barbavaria, Ferrariensibus Comitem Conradum de Balamite, Comensibus Magistrum Paganum, aliisque civitatibus alios præfectos dedit, qui *Podestæ* dicebantur, ut hodieque dicuntur, à *poteestate* & auctoritate, quæ illas regebant urbes, in quibus erant constituti. Verum Laudensibus, Cremonensibus, Papiensibus, aliisque sibi addictis civitatibus ut gratum probaret animum, nullis omnino præfectis eas subjecit, sed suo modo suisque legibus regi eas iussit à Consulibus suis.

C Ad hunc modum Longobardiæ rebus ordinatis, mense Julio Imperator versus Bononiam se contulit, quæ nondum penitus ipsi subjecta, neque satis dicto audiens erat. Bononienfes tanti Principis victoris contra se adventu cognito, cum ad resistendum ipsi idoneis destituerentur viribus, ut imminentes à se calamitates averterent, quas Mediolanensium malis non inferiores jure timere poterant, si belli fortunam experiri cum Friderico voluissent; satius esse duxerunt inservire tempori, & paulo diversis, quam Placentini & Brixiani, conditionibus ejus se imperio submiserunt. Bononia subacta, Forum quoque Corneli, (nunc *Imola* est) & Faventia, aliæque civitates omnes atque castella, non Longobardiæ solum, sed totius adeo Italiæ, ad obsequium ejus præsto fuere: excepto duntaxat Garda castello, quod istis temporibus insuperabile censebatur, situm ad lacum, qui inde *Lago di Garda* (olim ille *lacus Benacus* dicebatur) vulgo appellatur. Tenebat hoc illis temporibus nobilis quidam ex gente Turisendorum, & ipse Turisendus nomine, sed novissime illud in deditionem accepit, & Bergomatium, Brixianorum, & Veronensium copiis pro Imperatore expugnavit Marcoaldus Comes. Eodem anno Fridericus una cum uxore Germaniam repetiit, & inde in Italiam summa cum potestate misit Rainaldum, electum Colonia Archiepiscopum, & postea Hermannum, Verdensen in Saxonia episcopum, qui multos populos, discordiis inter se laborantes, in pacem & concordiam redegerunt, Principum & civitatum illarum commodo, quæ bene affectæ erant erga Cæsarem. Idem Colonia Archiepiscopus anno MCLXIII. Montis Mali castellum in Laudensium finibus refici atque instaurari curavit.

F Eodem anno, a. d. v. Cal. Nov. Imperator una cum Augusta in urbem Laudam rediit e Germania, magno episcoporum Principumque comitante numero: eodemque Victor Antipapa una cum suæ factionis Cardinalibus ad eum accessit postrid. Cal. Nov. Biduo post cadaveris S. Bassiani translatio ex urbe vetere in novam facta est maxima cum pompa, humeros supponentibus arcæ sacræ, dum illa ex

ex templo efferretur, Victore, Friderico, Patriarcha Aquilegiensi, & Cluniacensi Abbate, identidem altero in alterius locum succedente. Adeo gloriae ducebant & contendebant hinc ecclesiastici politicique principes isto honorari sacro munere obeundo. Ad exstructionem aedis cathedralis, in cuius inferiore *Choro* hodie quiescit & adoratur hoc sacrum corpus, ipse Imperator triginta denariorum Imperialium pondo obtulit, Beatrix Augusta quinaque. Semper apud Laudenses propagata continuataque est in suum hunc sanctum Patronum & quasi deum tutelarem religio, ut praeter multa alia indicia manifestum est ex solennibus illis, quibus dies festus, ejus honori dicatus, quotannis celebratur. Neque enim quidpiam publicae rei geritur triduo ante, & item triduo post illum diem: neque ipso die festo quidpiam venum exponitur: & adeo fiunt omnia, quaecunque isti solennitati magnificentiam atque religionem possint addere. Antiquitus etiam ad voluptatem illorum populorum, qui magno numero ex vicinis urbibus ad hoc festum confluebant, ludi edebantur seu venationes eximiae ferorum taurorum, luporum, aliarumque ferarum. Sed cum petulans juvenus eo proterviae procederet, ut signa quaedam, quibus insculptae erant duae literae S. B. quibus S. Bassiani nomen significabatur, extraneorum frontibus, qui ad festum hunc diem convenerant, etiamsi illi altioris conditionis, primique loci homines essent, auderent imprimere, se eos hoc actu inter clientes S. Bassiani referre dicentes; atque inde tumultus ac turbae orerentur, quae festivitatem hanc in funestos tragicosque mutabant actus, a majoribus nostris prohibita fuerunt spectacula illa profana.

Peracta corporis S. Bassiani translatione, Imperator a. d. xvi. Cal. Dec. cum exercitu suo Papiam se contulit, ibique totam illam hyemem egit. Tum ut affectum, quo prosequeretur Laudenses, ostenderet, simul & aliquod magnitudinis suae monumentum illis relinqueret, in territorio nostro castellum S. Columbani iterum exstrui curavit, & ipse Cal. Apr. anni MCLXIV. Laudam venit. Inde Papiam de novo regressus, Veronensium, Patavinorum, Vicentinorum, aliorumque Marchiae Tarvisinae populorum rebellionem intellexit, qui nimis premi se querantur oneribus à Comite Palatino, cui Imperator Gardam castellum donaverat, aliisque praefectorum ejus. Parum ipsi gratum accidit hoc novi, & ut in ipsis principiis tantas opprimeret turbas, ad eos misit quosdam Laudae, Papiæ, Cremonæ, Novariae, & Comi urbium legatos, qui cum Veronam venissent, convocatis hujus urbis totiusque Marchiae Tarvisinae proceribus sententiam Imperatoris exposuerunt, iisque nomine ejus asseveraverunt, si durius ab ejus essent tractati praefectis, ipsum protinus illis ex justo & aequo subventurum, atque ita facturum, ne unquam poeniteret eos ipsi fidos addictosque esse. Hic legati à Veronensibus eorumque sociis hoc impetraverunt, ut quidam illorum una cum ipsis irent Papiam, quo ibi cum ipso Imperatore de rebus componendis posset agi. Sed post longas disputationes tum quidem nihil aliud ipsi, quam verba & promissa acceperunt. Quarta feria post octavam Paschatis anni ejusdem in urbe Luca decessit Victor Antipapa, & in ejus locum à Cardinalibus, aliisque factionis istius ecclesiasticorum principibus, inter quos & numeratur Albericus Merlinus, Laudensis episcopus, sublectus est Vido de Crema, Sacerdos, Cardinalis titulo S. Calixti, qui Paschalem III. se dici voluit.

Sed Imperator, rebellionem punire Veronensium aliorumque Marchiae Tarvisinae populorum cupiens, cum exercitu suo paucorum aliquot Germanorum & illorum militum, quos ipsi nostra aliaque addictae urbes subministraverant, Veronensium fines ingres-

sus est, multosque in isto tractu vicos atque castella devastavit. Sed cum Veronensium validas admodum vires offenderet, quas magnam partem aliae sociæ civitates illis suppeditaverant, & valde dubitaret de secunda fortuna, si quando praelium cum illis confereret, maxime cum civitatum Longobardiae milites parum videret inclinatos, ipsius ad hoc bellum castra sequi; tum quidem consultius ipsi visum est evitare praelium, & in Germaniam regredi ad novas vires colligendas, ut & fecit mense Septembri, relictis tamen in Longobardiae civitatibus, quæ ipsius imperio parebant, praefectis suis & procuratoribus. Itaque apud Laudenses hunc honorem adeptus est Lambertus Viniatus, nobilis Laudensis, cui etiam Cremenensium subjecit civitatem. Sed dum Imperator in Germania commoratur, praefecti illi & procuratores ejus in muneribus suis obeundis adeo se barbare crudeliterque gesserunt, ut ipsorum tyrannide potius, quam regimine omnes omnino populi opprimerentur, magni juxta atque exigui, nec minus ecclesiastici, quam politici ordinis homines. Omnium maxime sub hoc gravi servitutis iugo gemeabant Mediolanenses, quibus ex omnibus agrorum suorum fructibus nonnisi tertiae partis pars tertia fiebat reliqua. Et ne sigillatim enumeremus omnes rapinas atque mala, quibus in tota Longobardia ministri illi Imperatoris & facultates hominum, & ipsos adeo homines affligebat, neque lectori faciamus tedium, sed rem in pauca conferamus, certe illa prorsus intoleranda fuissent, ni spes illa solatio fuisset ipsis, Imperatorem, quem ignarum esse vexationum illarum rebantur, cum in Italiam venisset, extracturum ipsos ex tantarum miseriarum voragine.

Denique igitur mense Novembri anni MCLXVI. Fridericus una cum Beatrice uxore in Longobardiam rediit, comitantibus, ut fieri solebat, multis principum Germanorum; & cum Laudam venisset, in alloquutione quadam ad suos, multosque Longobardiae proceres, quod ceperat, Romam cum exercitu proficiscendi consilium, illis exposuit. Hic praesto fuerunt ecclesiastici politicique illarum civitatum legati, quæ adeo erant male habitæ ab ejus procuratoribus, & magno cum doloris sensu querelas suas exposuerunt, ab eoque supplices praesentaneum & efficax remedium petierunt. Ad hæc Imperator maximam inde animi molestiam præ se ferre, re ipsa nullum omnino afflictis malorum ferre remedium. Itaque infelices illi nullum adepti solatium, omnia, quæ ipsi toleraverant mala, ipsius Imperatoris consensu sibi accidisse suspicabantur, & in futurum majores adhuc subeundas sibi calamitates suspicabantur. Præterito sanctissimo nostri Servatoris die natali, Fridericus a. d. xvii. Cal. Febr. anni MCLXVII. cum uxore & exercitu versus Bononiam abiit, Romam eundi consilio. Petiit impetravitque à Bononiensibus xxx. obsides, ut de fide eorum posset esse securus, eosque Parmam misit, ibique ut diligentissime custodirentur, mandavit. Bononia digressus ad *Imolam* (olim Forum Cornelii erat) accessit, & isti urbi minitans excidium, magnas ejus incolis pecunias abstulit. Eodem modo egit cum Faventinis, Forolivianis, & Foropopilianis, quorum in terris usque ad S. Petri diem festum commoratus est. Deinde exercitum ad Anconam admovit, quam tamen vi atque uno occupare impetu, ut cogitaverat, non potuit. Nam urbem eam admodum permunitam Anconitani aliquandiu strenue defenderunt, quamquam deinde & ipsi denique factionibus cum Imperatore transigere debuerunt, & illi se obligare ad satis magnam vim pecuniarum solvendam, datis obsidibus, ut illarum securus esse posset.

Cum ad hunc modum Imperator ad urbem Romam pergeret, Longobardiae populi crudelius adhuc, quam antea, tractabantur opprimebanturque

à præfectis, quos Imperator illis reliquerat. Atque adeo nihil intentatum relinquere constituerunt, quo à cervicibus suis adeo intolerabile jugum excuterent, sub quo prorsus vivere amplius non posse videbantur. Itaque Mediolanenses, qui præter ceteros, ut dictum est, acerbius affligebantur, ut conventus indiceretur, effecerunt, ad quem legati Crëmonæ, Bergomi, Brixia, Mantuæ, & Ferrariæ civitatum convenirent, ut & factum est a. d. vii. Id. Apr. in æde S. Jacobi de Pontida, in finibus Bergomatium. Hic alii cum aliis inhumanam præfectorum suorum, qua ipsi misere obtrebantur, sævitiam communicaverunt, & omnia experiri constituerunt, quo illi se eximerent: fatius esse dicentes, semel honeste mori, quam duris adeo legibus imperii torqueri diutius. Convenit itaque, ut altera civitas, quancunque in auxilium vocata esset, subveniret alteri, si quæ se præfectis opponere haberet opus: ita tamen, ut diserte omnes testarentur, sibi propterea non esse animum violandæ fidei, quam alias Imperatori obstrinxerant. Præterea constitutum est, ut omnes illæ civitates certo tempore copias suas Mediolanensibus auxilio mitterent, ad fossas antiquæ urbis expurgandas, & pristinas sedes iterum occupandas. Atque ita factum etiam a. d. iv. Cal. Maji magno Mediolanensium gaudio, qui firmata sibi patriæ possessione, fociis suis ex animo gratias egerunt, eosque domos suas dimiserunt.

Sed cum perpenderent Mediolanenses, res suas, nisi auxilio & amicitia Laudensium, stare non posse, negotium Cremonensibus dederunt, qui veteres erant nostrorum socii, ut eorum sibi amicitiam conciliarent. Itaque Laudam profecti Cremonensium legati, à Republica Laudensi petierunt, ut foederi se adjungeret, quod cum Mediolanensibus inierant civitates illæ, quas supra diximus, cum hoc fieri posse non violata fide, quam obligaverant ipsi Friderico; ut & paratas ad suam defensionem semper ipsis fore Mediolanensium ceterorumque sociorum vires asseverarent. Sed cum hinc legati nihil à Laudensibus impetravissent, qui se vitæ potius, quam fidei atque devotioni erga majestatem Imperatoriam renunciaturus dicebant, agris animis domum redierunt. Sed cum vel sic Cremonenses in istius foederis societatem pertrahere nostros sperarent, novam & magis solennem miserunt ad Laudenses legationem, qui in sententia sua persistentes, eos eodem dato responso dimiserunt. Deinde cum legatis earundem civitatum sociarum denuo in consilium convocatis omnia Cremonenses exposuissent, quæ incassum annexi fuerant ut à Laudensibus obtinerent, parum sibi profuturum novum foedus omnes existimaverunt, nisi ad illud Laudenses quoque accederent. Belli enim temporibus Mediolanenses ab re cibaria non satis instruere se posse videbantur, nisi ab agrorum nostrorum fertilitate & com meatibus adjuvarentur: simul etiam, quamdiu inter Imperatorem & Laudenses tum arte, tum ipsorum ingenio, firma perduraret amicitia, difficulter tota Longobardia contra Cæsaris potentiam tueri se posse videbatur. Constituerunt itaque collectis viribus suis, quantis maximis possent, Laudenses adigere ad societatem cum ipsis ineundam, & communem omnium salutem tuendam. Sed antequam armis invaderent eos, denuo missis omnium sociarum civitatum nomine legatis, nostrorum expugnare animos tentaverunt, sed frustra. Igitur ad arma ventum est, & a. d. iv. Id. Maji ejusdem anni MCLXVII. foederatarum urbium, id est, Mediolanensium, Bergomatium, Brixianorum, Mantuanorum, Cremonensium, Ferrariensium, & Cremensium copiarum hostili animo fines nostros intraverunt, multis secum advectis machinis bellicis, & item per Adduam flumen multis navibus apertis testisque. Inde hostes ad urbem castris admotis, ob-

A fidione eam cinxerunt, sic ut Cremonenses ad Sylvam Græcam Addua flumine tenus multis una cum navibus oppugnationem urgerent; Mediolanenses autem cum reliquis omnibus, Bergomatibus duntaxat exceptis, à loco, cui nomen *la Corte d'Isola*, usque ad nosocomium S. Blasii, quod ad Sylvæ Græcæ paludem est, castra ponerent, simul etiam se extenderent ad portam usque Imperialem, Papiensem, & Cremonensem; & denique Bergomatium pedites aliquot post diebus ab altera parte Adduæ amnis urbem oppugnarent. Exortæ sunt inter obsidentes obsessosque plures pugnae, eaque sanguinolentæ semper & atroces, varia partium fortuna.

B Mox foederati, ut majore incommodo turbarent obsessos, ex navibus pontem in Addua flumine prope portum exstruxerunt, atque inde continuos dies noctesque saxa aliaque tela in urbem conjecerunt, quibus male multabantur propugnatores, qui nihilominus plus semel feroces hostium impetus magnis animis ac virtute repulerunt. Sed ad ultimum Laudenses, cum penuriam perpenderent annonæ, quæ non sufficiebat alendis in urbe militibus, civibus, hominibusque rusticis, qui intra mœnia obsessæ patriæ se receperant; cumque viderent, se non diu posse resistere tantis hostium copiis, postquam gravissimis damnis malisque & facultatum & corporum suorum erant multati, pacem cum foederatis civitatibus fecerunt, cujus conditiones à Sigonio recensitæ De regno Italia lib. xiv. ita habent: *Fœderata civitates; &c. Fœderata civitates agrum Laudensem ab omnium injuria tutum præstabunt: urbem, si bellum ingruet, mille amplius armatis propriis sumptibus tuebuntur: muri attolendis ac construendis auxilio erunt. Mediolanenses post hac decimam ab eis non exigent, libera commercia a vetigalibus civitatum, liberam Padi navigationem permittent, pacemque eis à Pontifice impetrabunt. Contra Laudenses nemine foederatorum nocebunt. Venetos, Veronenses, Vicentinos, Patavinos, Mediolanenses, Tarvisinos, Mantuanos, Ferrarienses, Parmenses, Placentinos, & si qui alii huic foederi se adjunxerint, bello paceque jurabunt, salva fide, Friderico Cæsari data.*

Ad hunc modum pace facta, sociorumque copiis dimissis, urbs nostra obsidione liberata est. Eodem hoc tempore Paschalis Antipapa, qui Viterbii commorabatur, denique ab Imperatore, ut Romam veniret, impetravit, ad quod iter ille jam pluries eum sollicitaverat, auxilio se Alexandrum III. Pontificem ejusque sectatores oppressurum speraret. Sed illa quidem, quæ tum in urbe Roma contigerunt, quia nihil ad nostram pertinent *Historiam*, & apud alios videri possunt scriptores, ut omittamus, nostramque persequamur narrationem; Imperator multis contra illos, qui in Alexandri partibus erant, victoriis partis, in æde S. Petri solenni ritu ab Antipapa ornatus est diademate Imperatorio, & itidem coronata ejus uxor. Dehinc multos suorum Principum & majorem exercitus partem amisit ex pestilentia, quam Deus forte ipsi immisit, ut eum castigaret, quod Paschalis Antipapæ partes tuebatur. Inter illos post longam infirmitatem mortuus est etiam Acerbus Morena, patria Laudensis, & præfectus aulae Imperatoris (*Majorem domus* vulgo dicunt) in urbe Senensi. Itaque visum fuit Imperatori, quo majorem suorum effugeret cladem, in Longobardiam redire. Ibi cum in itinere Pontremulenses eum transitu prohiberent, quos armis invadere non poterat, propter imminutas plurimum copias suas, & infirmitatem illorum, quos exiguo numero secum habebat; per terras istas, quæ in ditione erant Obicii Malaspinæ, Marchionis, denique a. d. iii. Id. Sept. ejusdem anni MCLXVII. Papiam pervenit. Hic ipso S. Matthæi die festo in publico concilio omnes illas civitates, quæ, ut supra dictum est, foederis societatem contra ipsum

inici-

inierant, Imperatoriæ proscriptioni subiecit præter Cremonam & Laudam, cum edoctus esset, hæc duas civitates, & maxime quidem nostram se aliis illis adjunxisse, necessitate illa, quam supra exposuimus, coactam. Mox Imperator exercitum suum auxit equitatu Papiensium, Novariensium, Vercellensium, ut & Gulielmi, Montisferrati Marchionis, & Marchionis Obicii Malaspinæ, Comitisque Blandratæ, qui tum apud ipsum erant Papiæ. Cum his copiis Mediolanensium fines intravit, & Rosate, Abbiategrassum, Macentam, Corbettam, aliaque loca deprædatus est, edita ubique strage, & ingenti præda abducta. Itaque Laudenses, ut fœderis conditiones, quas supra retulimus, implerent, adacti fuerunt, una cum aliis sociorum auxilio Mediolanensibus accurrere. Et subito tantæ sociorum convenerunt copiae, ut Imperator ocyus Papiam se reciperet. Inde, sic ut ne quidem descenderet equo, ad S. Petri in *Cælum aureo* se contulit, atque hic cum paucis se cibo refecisset, celeriter cum omnibus copiis per pontem, quem ex navibus confecerant Papienses, transgressus Padum flumen, aliquot in Placentinorum finibus loca devastavit, magnasque inde prædas abstulit. Sed neque heic magnos facere progressus potuit, subito concurrentibus eo sociarum urbium copiis: atque adeo utile ipsi visum est, cum agmine suo in Papiam se urbem recipere.

Ceterum nostri his ipsis temporibus à Papiensium militibus multis sunt affecti damnis, qui in eorum fines factis excursionibus, magnas inde prædas auerunt. Sed deinde, cum Laudenses missis Papiam legatis, qui se ab ipsis sine causa infestatos esse conquererentur, cum antea semper inter se fuissent amici, seque paratos esse dicerent, istam porro etiam conservare amicitiam, recuperare sua non possent, & nequiquam ex æquo responsum acciperent; pulchre illi par pari retulerunt Papiensibus, & in eorum fines cum bene armati excurrissent, magnas inde prædas domum auerunt. Sed Fridericus, cum in Longobardia non istis potiretur victoriis, quas speraverat, ejusque vires multum essent imminutæ, postquam totam hyemen Papiæ, Novariæ, Vercellis, Montisferrati, atque Astæ egerat, fere ut privatus mense Martio sequentis anni MCLXVIII. in Germaniam regressus est. Post ejus abitum S. Galdinus de Sala, Archiepiscopus Mediolanensis, & Alexandri III. summi Pontificis legatus in Longobardia, Mediolano misit Abbates S. Ambrosii & S. Vincentii, ut Albertum de Casano, *Præpositum* majoris templi Laudensis, aliosque clericos omnes, ut & Consules Laudenses admonerent, ut relictis Paschalis & Friderici partibus, Alexandrum pro vero Pontifice agnoscerent, & ex officio illi satisfacere animum inducere ob injuriam illi factam, quod Antipapæ & Imperatoris, inimici sui, partes fovissent. Hoc amplius mandaverunt illis, ut ocyus episcopi catholici electionem aggredierentur. Quod si his parere mandatis recusarent, pœnas illis & censuras ecclesiasticas denunciabant, quibus subijci solent illi, qui in sanctam Ecclesiam sunt contumaces. Hac legatione plurimum conturbati sunt Laudensium animi, quippe qui tum maximam partem jurejurando Paschali jam & Friderico se obstrinxerant, tum autem veri Pontificis timebant indignationem. Denique autem post varias longasque consultationes vero Pontifici Alexandro obedire constituerunt, ejusque se partibus adungere, quippe cujus causa nitebatur justitiæ tibi. Itaque ante Pascha die Jovis, id est, a. d. iv. Cal. Apr. ejusdem anni MCLXVIII. Clerus episcopum Laudensem elegit Albertum de Quadrellis, qui isto tempore *Præpositus* erat templi in Ripa alta, homo ista bonitate ac religione, quæ requirebatur ad hoc, quod ipsi munus injungebatur, quique hanc ecclesiam tanta

A deinceps cum virtute rexit, ut post mortem suam Sancti honores titulumque meruerit. Sed cum ille hoc tempore Bergomi ageret, omnes ordines Laudensium eo concurrerunt, magnaque cum pompa Laudam accitum ipsis Idibus Apr. ingenti cum gaudio ad ecclesiæ suæ possessionem capeffendam deduxerunt, inter frequentes applausus & lætissimas omnium acclamationes.

B Postquam Imperator Italia excefferat, ut supra dictum est, sociis Longobardiæ urbibus se adjunxerunt Vercellenses, Aitenses, Comenses, Obicius Malasпина Marchio, aliique. Itaque illæ multum auctæ viribus, bello oppugnare Papienses & Montisferrati Marchionem constituerunt, qui partes adhuc Imperatoris sequebantur. Quod ut eo facilius exsequi possent, eodem hoc anno ad ripam Tanari amnis, inter Dertonam & Astam, novam exstruxerunt urbem, ejusque mense Majo ineunte feliciter jecerunt fundamenta. In hanc ex vicinis urbibus & nostra etiam Lauda brevi tempore tantus hominum numerus confluit, ut Scriptorum testimonio intra vertentem annum quindecim millia incolarum illa haberet, & vallo cincta, & castellis fossisque satis profundis munita flaret, quod tota non sine admiratione cognovit Italia. Et ut ægre facerent Imperatori, nomen eam habere voluerunt à summo Pont. C Alexandro, & ALEXANDRIAM dixerunt: quanquam Papienses aliique Cæsari faventes *Cæsaream* eam appellaverunt, & si quando *Alexandriam* dicerent, contumeliæ causa vocem *palea* (*della paglia*) addebant, quod cognomen illa hodieque servat: ut scilicet eam parum tore durabilem significarent. Dehinc civitates sociæ legatos suos miserunt Laudam, ibique denuo confirmatum est fœdus illud, quod jam antea inter se inierant, additis nonnullis conditionibus, ad communem omnium securitatem & publicæ pacis conservationem opportunis. Ita igitur pax denique multos in annos duravit, Longobardique respiraverunt à bellorum calamitatibus, quibus tanto tempore fuerant afflicti. Anno MCLXX. è vivis excessit D Paschalis Antipapa, inque ejus locum à sectatoribus ejus substitutus est Joannes, natione Hungarus, & Abbas Sirmienfis, qui se Calixtum III. dixit.

E Fama dehinc in Germaniam ad Imperatorem perlata, omnes fere Longobardiæ urbes ab ipso descivisse, quantum in Italiam transire constituit, ut à rebellibus contra se populis pœnas exigeret. Itaque a. d. iv. Non. Oct. anni MCLXXIV. per *Moncenos* profectus, protinus cepit evertitque Segusium urbem, (nunc *Susa* est) & pactis conditionibus Asta potitus, infesto animo ad expugnationem novæ urbis Alexandriæ se accinxit. Verum illa ita erat instructa ab omnibus illis rebus, quæ ad diuturnam obsidionem sustinendam requiruntur, ut quarto mense, postquam eam arcta obsidione clauserat Imperator, elusis omnibus ejus consiliis atque viribus, feliciter illa liberaretur armis Imperatoriis, & Imperator Papiam se recipere prorsus re infecta deberet. Tum quia sociæ urbes in armis habebant ingentem validumque exercitum, peritissimis ducibus additis, qui proinde terrore percellere poterat animum Friderici, primum ille prædictis civitatibus quasdam induciarum, mox & certæ pacis conditiones proposuit. Sed ille nonnisi hoc responsum tulit, socios nihil omnino hujusmodi cum ipso agere velle, nisi prius ea de re certior redderetur summus Pontifex Alexander. Sed intermissum est hoc negotium, cum Imperator nuncium accepisset de quorundam in Germania Principum rebellionem. Itaque in Germaniam sibi celeriter abeundum ratus, ita declaravit animum suum atque consilium, ut ex sola fama adventus ejus tumultus isti sedarentur, & rebelles ad officium redirent.

Quare tum illi commodum fuit sextum Italiam petere, quo secum adduxit una cum Augusta ma-

gnas peditum equitumque copias, viamque ingressus est Comensem. Nihil adventu Cæsaris conterriti sunt Mediolanenses & Laudenses, alique sociorum, quin ocyus conjunctis copiis, cum agros Papiensium, aliorumque terras, qui in Cæsaris persistebant partibus, devastavissent, magnisque cosultavissent damnis, in apertum campum procederent, expectantes Imperatorem, eique pugnandi copiam facientes. Lætus ad hunc nuncium Cæsar, ut qui magni erat atque audacis animi, jam oblatam sibi occasionem sperabat, unico prælio de civitatibus illis, quas ipse pro rebellibus habebat, poenas exigendi, quas sæpius illis comminatus fuerat. Itaque cum exercitus ad invicem accessissent, atrox confertum est prælium, inter equites primum, mox & inter pedites. Sed dum utrinque pertinaciter pugnatur, signifer, qui aquilam Imperatoriam ferebat, cum nimium temerarius in confertissimos se hostes immisisset, protinus misere periit, aquila in hostium potestate relicta. Hoc cum vidisset Imperator, adeo commotus est ira & furore, ut nullo habito personæ suæ respectu, ad istam se partem aciei stricto gladio conferret, ubi Mars erat atrocissimus, quocunque accederet, non vulgaribus fortitudinis suæ atque audaciæ documentis editis, multisque suapte manu in ipsa acie aut occisis, aut vulneratis. Denique autem tanto ille hostium numero est obrutus, ut ejus equo collapsio uterque exercitus eum in ista turba vita privatum opinaretur. Atque hoc sicut prorsus fregit animos Germanorum, ita Italicos ad spem plenissimæ victoriæ evexit, quam & adepti sunt feliciter, ingenti hostium numero cæso, præter illos, qui in Ticino amne perierunt, juxta quem commissum est hoc prælium. Affixit hæc clades tum quidem vehementer omnes illos, qui in partibus erant Cæsaris, tum vero maxime omnium Friderici calamitatem delevit Beatrix Augusta, quæ Comi substiterat. Hæc cum cum jam esse mortuum crederet, & cadaveri illa pietatis officia præstare cuperet, quæ solet uxor erga maritum optime affecta, protinus lugubri veste induta, quam fieri posset diligentissime, quæri illud jussit inter reliqua cæsorum infelici prælio cadavera: quod cum frustra fuisset, missis ad Mediolanenses eorumque socios legatis, illud ut sibi redderetur, petiit. Sed dum funus apparatur Friderico, ille non tantum vivus, sed valens etiam & intactus, Imperatoriaque chlamyde ornatus, quinque post dies Papiam venit. Huc ocyus etiam convenerunt una cum exultante Augusta copiarum suarum reliquiæ, earumque duces, alique Principes, qui ipsi adhærebant. Ab his serio admonitus, hoc, quod ipse Antipapam tueretur, & opprimere studeret Alexandrum III. verum Pontificem, ac successorem Petri, esse illud grave peccatum, quo Dei contra se iram provocaret, ideoque adversam experiretur belli fortunam; denique animum induxit, prorsus Antipapæ partibus relictis, obedientiam, ut justum erat, Alexandro præstare, conspicuo Christi ecclesiæ capiti. Coeptum est agi primum hac de re per legatos, deinde tota res expedita est Venetiis, ut plerique Scriptorum tradunt. Huc postquam se Pontifex contulerat, eodem & Imperator profectus est, atque ibi una cum suis notæ ecclesiasticæ exemptus, ut apud diversos Scriptores videre potest, quisquis hæc cognoscere cupit. Mox induciæ armorum in sexennium constitutæ sunt inter Cæsarem & foederatas Longobardiæ civitates, quas deinde, ut in sequentibus dicitur, diuturna pax excepit, quæ anno MCLXXXIII. facta est in urbe Constantia. Tum Venetiis Romam Alexander, Fridericus in Germaniam abiit, & Calixtus Antipapa falsus errorem suum, depositoque habitu Pontificio, veniam rogavit impetravitque à vero Pontifice. Atque ita sublatum est Schisma, quo per multos jam annos sancta Ecclesia fuerat afflicta.

A Tum vero Laudenses, ne inde, quod novam sibi urbem exstruxerant, aut æmuli eorum, aut quicunque alii turbarent eorum jurisdictionem, prærogativam, aut privilegia, quæ in vetere patria ipsi obtinebant, petierunt impetraveruntque ab Alexandro III. Pontifice, dum ille Venetiis ageret, sequens diploma Apostolicum, quod non ingratum fore lectoribus arbitror, si hic de verbo ad verbum oculis eorum subjicere voluimus.

CONFIRMATIO FACTA PER SUMMVM
PONTIFICEM NOVÆ CIVI-
TATIS LAUDENSIS.

B Alexander Episcopus Servus Servorum Dei Dilectis, Filiis Consulibus, & Populo Laudensi Salutem, & Apostolicam Benedictionem.

Cum Civitas Vestra de loco, ubi constructa fuerat ab antiquo, ad alium locum sit translata: Ne occasione hujus Civitatis quicquam de his, quæ prius habebatis, vobis possit subtrahi, vel auferri, postulastis Statum Civitatis vestræ, Apostolica Sedis munimine roborari. Nos itaque postulationibus vestris benignius annuentes, & attendentes devotionem, quam circa nos, & Romanam Ecclesiam exhibetis, statum Nova Civitatis Vestræ cum omnibus bonis, & Possessionibus Vestris, & cum omni Territorio, quam intus, vel foris Civitatem veterem contingebat, ratum habemus, & firmum, ipsumque auctoritate Apostolica confirmamus presenti pagina, statuentes, ut possitis liberos homines, qui fuerunt de Crema, vel de locis aliis, se ad vos transferentes, sine contradictione recipere, & receptos tenere, sicut nuper inter vos, & Rectores Lombardiæ rationabiliter noscitur esse statutum. Datum Venetiis in Rivoalto XVII. Kal. Julii 1177.

A Tergo

Dilectis Filiis Consulibus, & Populo Laudensi.

D Anno MCLXXIX. prid. Non. Jul. è vivis, id est, ex miseriarum in exhausta voragine ad cœlestem patriam migravit S. Albertus, episcopus Laudensis, postquam hanc ecclesiam sancte rexerat undecim annos cum mensibus tribus. Cadaver ejus insigni cum pompa elatum est ad templum cathedrale, ibique conditum in sepulcro lapideo sub altari, in ejus honorem erecto. Deinde Ludovicus Taberna, Laudensis itidem episcopus, anno MDLXXXVIII. transfudit illud in subterraneam ejusdem templi partem, & majore cum decore sub altari Sanctissime Pietatis è regione S. Bassiani reposuit. Venerabile tamen S. Alberti caput argento vinctum honorifice servatur in vicina fenestella, & quotannis ipsius die festo civium oculis exponitur, qui grato animo tum illa beneficia, quæ ab eo, dum viveret, hæc civitas accepit, tum illa singularia, quæ post mortem suam continuo ad nos demisit ex Paradiso, agnoscere, eum advocatum & patronum suum esse voluerunt, & quotannis festum felicitis decessus ejus diem celebrari constituerunt. Hic S. Albertus Laudæ primus instituit Cleri Consortium, atque illud magnis locupletavit facultatibus, quæ in optima pietatis opera impenduntur.

F Sed Fridericus Imperator cum in Germania, ut dictum est, commoraretur, gravis annis, fessisque tot molestiis bellicque laboribus, quos per quinque & viginti annorum spatium pertulerat, atque adeo quietis jam cupidus, in publico concilio, quod Magontiacum indixerat anno MCLXXXI. quo eodem anno fato functus est etiam Pontifex Alexander III. quinque, quos habebat, filiis prospexit. Interque eos paternam divisit hereditatem. Henricum, natu maximum, regem Romanorum eligi curavit: Secundo, id est, Friderico, Sueviæ Ducatum legavit: Othoni, qui tertius erat, Ducatum Burgundiæ: reliquis, Conrado & Philippo, oppida quædam

dam redditusque satis amplius assignavit. Denique cum conditionibus potius, quam armis pacem firmare cum foederatis Longobardiae civitatibus cuperet, quibuscum constitutae Venetiis armorum induciae adhuc durabant, aliud concilium indixit Constantiam, & ad illud legatos etiam suos ut mitterent, eas invitavit, quo amice omnes utrinque controversiae dirimerentur. Itaque cunctae lubentes eo suos Oratores ablegaverunt, & inter ceteras Laudensis civitas Ufentium Fissiragam, & Anselmum Summaripam eodem misit. Sopitae sunt hoc in conventu omnes omnino veterum contentionum offensa: fecit potestatem praedictis civitatibus Imperator suam cuique Rempublicam administrandi suis legibus moribusque: restituit illis pristinam jurisdictionem, civilem juxta & criminalem, ut & potestatem suos sibi Consules & praefectos eligendi: denique voluit eas omnium illorum recipere possessionem, quae inter praeterita bella amiserant. Contra autem sibi suisque posteris à quibusdam judiciis ad suum tribunal provocationem reservavit, eumque pro Principe suo atque Imperatore agnoverunt eadem civitates, quae & fidem illi suam atque obedientiam jurejurando obstrinxerunt. Ita mutuo utrinque cum gaudio vera certaque & perpetua pax est publicata anno MCLXXXIII.

Dehinc fida aliquandiu inter nostram urbem atque Mediolanensem amicitia duravit. Quin & anno MCIX. inter duas hasce civitates sollemniter pax est renovata, sic ut Mediolanenses liberam Laudensibus Cavacortae, Montis mali, S. Columbani, Gratinianae, Somasani, Gardellae, Roncadelli, aliorumque locorum jurisdictiones relinquerent.

Idem hic annus memorabilis est morte Friderici Imperatoris, cognomento Barbarossae, qui summi Pontificis jussu cum ingentibus copiis in Asiam profectus, Christianis in ea parte orbis laturus opem, quo & multi eum sequuti sunt ex fortissimis Laudensium; dum, ut nonnulli volunt, urente quondam solis aestu ad lavandum, ut consueverat, quoddam Minoris Armeniae flumen ingreditur, vi torrentis abreptus misere periit a. d. VII. Id. Jun. anno Imperii sexto & trigesimo. Magnanimi hujus Principis liberalitati nostra civitas multas praerogativas, immunitates, & privilegia accepta refert. Quin & in privilegii cujusdam, quod ille nostris episcopis concessit, diplomate, scripto Papiae a. d. VIII. Cal. Oct. anni MCLXIV. *sacri Romani Imperii principum* titulo eisdem ornat. Veruntamen omnium maximum nostris praestitit ille beneficium, cum hanc ipsis novam conderet urbem, in cujus exstrukione promovenda, ut Radevicus Frisingensis testatur *De rebus gestis Friderici I. Rom. Imp. lib. I. cap. XLVI.* liberalitas ejus vere Imperatoria magnifice enituit. Quare & Laudenses, haudquaquam in tantum ingrati benefactorem, una cum ejus effigie marmorea posuerunt illi in curiae porticu ad majorem basilicam hanc inscriptionem:

FRIDERICO I. AENOBARBO AVG.
OB LAVDEM E BELLICO CINERE
VINDICATAM
IN HOC EDITIORI LOCO
FOELICIORIBVS AVSPICIIS ERECTAM
AC CIVIBVS EXPLETAM
DEC. POP. Q. LAVDENSIS
ANTIQUI SPLENDORIS, AC DIGNITATIS
RESTITVTORI
MARMOREVM SIGNVM, AC ELOGIVM
P.
ANNO DOMINI MDCXV.

Friderico successit Henricus, filiorum natu maximus, quo auctore anno MCXCI. ut scribit Antonius Campus, historicus Cremonensis, in *Historia*

A *Cremona urbis lib. II.* Laudenses inita cum Cremonensibus, Comensibus, Marchione Montisferrati, Papiensibus, & Bergomatibus societate, & Mediolanensium fines ingressi, sive ut novo Caesari gratum facerent, sive quacunque alia de causa, quam apud scriptores non invenio; incendiis illos multum deformaverunt. Deinde cum anno MCXCIII. sive, ut alii volunt, MCXCIV. nostri fossam à Lauda urbe ad amnem usque Lambrum duxissent, quae plurimum ipsorum usibus inserviebat, Mediolanenses cum Brixianis, Cremensibus, Placentinis, & Mantuanis eo profecti, omnia moliti sunt ad eam obstruendam. Sed cum progressi illis obviam Laudenses, eorumque focii, agros Mediolanensium essent depopulati, prid. Cal. Jul. praelium est commissum, quo hostes fuerunt superiores. Capti sunt nonnulli milites Laudensium, & plures Cremonensium una cum suo *Carrocio*, & item alii sociorum, praeter multos, qui in Addua flumine infelici morte perierunt. Tum Mediolanenses & Brixiani victoria utentes, Cavenagum expugnaverunt, incenderuntque Zovanengum, in Laudensium ditioe loca, & eodem infortunio multaverunt quoque Caravagium & Soncinum, loca Cremonensium. Deinde anno MCC. pax inter nostros & Mediolanenses est restituta, ita ut in horum ditioe manerent Melenianum, Calvenfagum, Cerrum, Vigifolum, & Aniarellum.

C Florebat his temporibus magna prudentiae fama Saccus de Saccis, nobilis Laudensis, quem proinde, cum non vulgaris esset ejus auctoritas, arbitrum delegerunt magnarum quarundam inter se contentionum Mediolanenses, qui in plures factiones distracti, uno eodemque tempore plures civitatis suae praefectos creaverant, quae res huic Reipublicae haud leves minabatur turbas. Sed opportune illas sopivit Saccus, eamque ob causam adeo gratus acceptusque fuit Mediolanensibus hic vir sapiens, ut ipsorum postea praefectus ille fuerit anno MCCIII. & item anno MCCXXI.

D Etiam nostra civitas anno MCCXI. magno belli intestini periculo est defuncta. Plebs à nobilitate dissidebat, & ingentes videbantur tumultus imminere. Sed in tempore efficax remedium agro corpori additum est, studiaque partium sublata opera Achillis Belloti, Pellegrii Fissiragae, Fossadi Summaripae, & Gualteri Gavacii, civium Laudensium, ut & Hugonis Prealonis, patria Mediolanensis, & cum maxime Laudensium praefecti.

E Eximia erat his temporibus Gualteri Garbani sanctimonia, patria Laudensis, qui hereditate paterna inter egenos divisa, infirmorum servitio se addixit in nosocomio S. Raimundi, quod in quodam Placentinae urbis est suburbio. Post biennium in patriam regressus, eadem pietatis officia continuavit in S. Bartholomaei nosocomio extra Laudam, & insigni erga infirmos charitate aliud nosocomium addito etiam sacello exstrui curavit non longe ab eadem urbe nostra in via, quae Mediolanum fert. Hoc cum deinde ampliavisset Henricus Settara, Archiepiscopus Mediolanensis, & Gualtero amicissimus, primo *nosocomium Misericordiae*, deinde à conditoris nomine *S. Gualteri nosocomium* est dictum. Et quoniam probitatis exempla multo magis faciunt ad aliorum animis religionem incutiendam, quam meri duntaxat sermones, multi popularium suorum utriusque sexus ad ipsius imitationem in loca se deferta contulerunt, vitamque sectati sunt monasticam. Incedebat hic servus Dei nudis pedibus, etiam in longissimis itineribus. Cibi adeo parvus erat, ut vix tantum fumeret, quantum sustentandae vitae sufficiebat. Vestitu itidem sordido vilique utebatur. In precibus ad Deum fundendis adeo erat assiduus, ut re ipsa exsequeretur, quod ille mandat Apostolus: *Sine intermissione orate.* Multas ille sus-

cepit peregrinationes religionis causa, ex quibus magnum ad morbosos redundabat commodum, cum ille ad sublevandos eos diversis in locis opportuna nosocomia curaret exstrui, ex quibus illud ad Vercellas, item aliud ultra Dertonam, in via, quæ Genuam fert, iterum aliud ad Cremam, & denique illud prope Melenianum maxime fuerunt celebrata. Atque hæc ipse subinde visitare solebat, cura ægrotantium fociis suis delegata, præscriptisque utilibus, ut bene curarentur, præceptis. Denique ætatis anno circiter quadragesimo, plus meritis, quam annis gravis, a. d. xi. Cal. Aug. anni MCCXXIV. ut vult Ferrarius in *Catalogo Sanctorum I-*

B talia, feliciter Deo reddidit animam, qui defunctum tantundem illustravit miraculorum gloria, quantum viventis sanctimonia admirationi fuerat omnibus. Corpus ejus honorifice humatum est in prædicto *Misericordia* templo, ibique multos per annos quievit, donec inde à quibusdam furtim ablatum est in templum nosocomii S. Blasii, quod est in suburbio portæ Cremonensis, & inde in vicinum S. Pauli templum. Sed hinc paullo post iterum translatum est cum solenni pompa in idem *Misericordia* templum, atque ibi mansit, usque dum in cathedrali templo honorifice reconditum est.

FINIS LIBRI SECUNDI.

JOANNIS BAPTISTAE VILLANOVAE
LAUDIS POMPEIAE,

SIVE

LAUDAE (nunc LODI) Urbis
HISTORIA.

LIBER TERTIVS.



NON ita sane durabilis fuit, ut sperabatur, pax illa recens inter nostros constituta, quin non multo post de novo factiones in urbe non leves orerentur, quarum altera cum opprimere studeret alteram, manifesti belli civilis Laudenses experti sunt mala. Prævalebat inter alias gens Overniagorum, quæ plebis erat caput. Contra ex nobilibus gens Summariparum satis illustris, caput erat nobilitatis. Sed cum numerus, ut fieri sæpe videmus, dignitatem superaret, ut plurimum in magistratibus eligendis, & in tota adeo Reipublicæ administratione plebs nobilitate superior erat. Itaque anno MCCXXIII. Summaripæ, ut suarum partium haberent præfectum, Arnoldum Fissiragam, & itidem plebei ex suis Castellani Boloniam elegerunt. Et ita quoque sequenti anno MCCXXIV. duo præfecti fuerunt constituti: unde quilibet sanæ mentis homo facile colligere potest miserrabiles Laudensium, adeo pertinaciter inter se dissidentium, calamitates. Denique autem cum Mediolanenses se interponerent, & nobiles plebemque Laudensem in concordiam reducere studerent, a. d. v. Id. Nov. anni MCCXXV. in curia Mediolanensi, quo capita & legati partium convenerant, omnium controversiarum dirimendarum arbitrium ad præfectum ejus urbis est delatum. Ita non multo post ab iudicibus & assessoribus istius præfecti, interposita etiam publici consilii auctoritate, constitutum est, ut positis armis, præteritisque injuriis invicem condonatis, partes ad perpetuam inter se pacem colendam sacramento se obligarent. Overniagi per quinquennium in urbe Mediolano habitare jussi sunt, & præfectus Mediolanensis arbiter constitutus, si quædam forte quocunque tandem casu difficultates orerentur, quæ novam turbare pacem possent. Atque adeo Guacinus Rusca, præfectus Mediolanen-

C fis, a. d. ix. Cal. Apr. anni MCCXXVI. mandavit, ut cives rusticique Laudenses impensas illas refundarent, exsolverentque debita, quæ occasione prædicti belli civilis erant facta, & ad duodecim millium pondo summam excurrerant, non connumeratis usuris. Præterea constituit ille, ut Overniagi, quinquennio suæ relegationis in Mediolanum urbem elapso, Laudam quidem redeundi, sed non item in pristinis domibus suis habitandi potestatem haberent, verum in illis, quas magistratus Mediolanenses ipsis essent assignaturi: item, ne turres, aliæ ædium munimenta sibi exstruerent, neque plus octo homines Laudam secum deducerent, venderentque possessiones illas, quas ad *Barganum* habebant, ut Summaripis nimium vicinas: liceret illis tamen, quotannis bis venire Laudam, ibique viginti dies commorari, quo facultatum suarum redditus exigere possent: contra, ut Summaripæ in perpetuum unam urbis portam nomine Mediolanensem in sua tenerent potestate: denique, ut pax tanto durabilior esset, conditionesque ejus exactius observarentur, transgressoribus mille denariorum multam recens percussorum irrogavit.

E Hoc eodem anno cum in Italia esset Fridericus II. Imperator, in Honorii III. Pontificis indignationem ille incurrit, & graves adeo contra sanctam Ecclesiam offensas exercuit, ut à Pontifice excommunicatus etiam fuerit, Imperioque privatus. Hæce inter Pontificem atque Imperatorem contentiones in causa fuerunt, ut multæ Longobardiæ vicinarumque regionum civitates ad communis salutis defensionem foedus inter se inirent, & suam tueri libertatem statuerent viribus omnibus, easque conjungere contra quoscunque, qui labefactare eam conarentur: imo & ipsi se Imperatori opponere, si forte ille armis ipsas invadere aut turbare studeret. **F** Maxime enim ille contra Veronenses aliosque nonnullos erat exacerbatus, ob injuriam quandam ab illis acceptam, cum in Germaniam transcenderet. Hujus foederis sociæ fuerunt hæc civitates: Medio-

lanum, Lauda, Bononia, Brixia, Verona, Mantua, Placentia, Vercellæ, Cremona, Bergomum, Augusta Taurinorum, Alexandria, Vicentia, Patavium, & Tarvisium. Omnium hanc in rem maxime frequens actus est conventus ad S. Zenonis in Veronensium Mantuanorumque confinio. Deinde in urbe Mantua leges hujus foederis solenni scripto confirmatae sunt, ut & jurejurando illorum legatorum, qui aderant. Idem deinde factum in multis aliis illarum urbium, quas modo retulimus: & Laudæ quidem civitatis nomine hoc jusjurandum praestiterunt Carbo de Aqua & Oldradus Tressenus. Factum est hoc foedus in annos quinque & viginti, ita tamen, ut prorogari illud posset, si ita visum foret majori parti sociorum. Atque adeo per hanc occasionem usi sunt Longobardi potestate illa atque auctoritate, quam concesserat illis in Constantiensis conventu Fridericus I. Imperator, nempe ut societatem & foedera cum aliis inire populis possent, confirmatam deinde ab Henrico V. Othone IV. & Friderico II. cum maxime imperante. Sed non levem hoc foedus, quod *Longobardia societatis* nomine dicebatur, scrupulum iniecit animo Friderici, qui ut illud dissolveret, aut saltem viribus immueret, Mediolanenses ab reliquis avellere molitus est. Verum illi nihili facientes ejus promissa, & minus etiam comminationes, constanter in foederis societate cum reliquis perstiterunt.

Deinde Fridericus cum se Pontifici submisisset, & ad subsidium Christianorum cum exercitu in Asiam profecturum jurejurando illi promississet, benigne veniam ab illo accepit. Sed cum ad Mediolanum pergeret, quo istic, ut moris est, corona ferrea coronaretur, & ad castellum S. Donnini pervenisset una cum Cardinali Portuensi, Pontificis legato, malum sibi metuens ab urbium sociarum armis, quæ ne quidem à proposito suo abduci poterant per censuras ecclesiasticas, quo eas notabat idem legatus, consultius ipsi visum est retrogredi. Neque nos etiam hic ulterius esse pergendum arbitramur in illarum rerum narratione, quæ postea inter Gregorium IX. qui Honorio in Pontificatum successit, & Fridericum acciderunt; aut in illarum, quæ gestæ sunt in Asia, ut quæ prorsus ab nostra *Historia Laudensis* sunt alienæ.

Itaque ut illuc revertamur, Mediolanenses anno MCCXXXIII. Lauda urbe acciverunt, & praefectum sibi, qui temporibus istis summus erat magistratus, constituerunt Oldradum Tressenum, de quo supra diximus, summa prudentia virum, & in primis catholicorum sacrorum cultorem vindicemque severissimum, ut satis manifeste probavit, cum ingentem hæreticorum numerum ad flammam damnaret, qui temporibus istis multas urbes atque oppida peste sua inficiebant. Et ut tanto sinceriores in urbe Mediolano conservaret sanctam fidem, & Christianas virtutes, operam dedit, ut in eam induceretur Seraphica S. Francisci religio, & ipse prima dedit initia templo sumptuosissimo, quod hodieque isti Sancto dedicatum visitur, cum antea istic loci fuisset exiguum sacellum, in honorem S. Naboris & S. Felicis constructum. Denique tanta cum laude omniumque applausu praefecturam gessit, ut sibi posterisque suis honestos promeruerit à publico reditus, & item satis nobile monumentum in *Broletti* curiæ, quam ipse curavit extrui, frontispicio, ubi hodieque statua ejus equestri ex marmore visitur, hisce versibus additis:

*Atria qui grandis Solii regalia scandis
Civis Laudensis fidei tutoris, & ensis
Praefidis hac memores Oldradi semper honores
Qui solum struxit Catharos, ut debuit assit.*

Inter hæc Fridericus II. Imperator, cum maximam adhibuisset diligentiam, ut Henricum filium legitimum (habebat enim & alium ejusdem nominis

A filium, sed spurium) ad regnum Romanorum promoveret, in Italiam misit copiarum ducem regium, (*Marescallum* vulgo dicunt) qui Anselmus Intigenfis dicebatur, una cum Valcherio Januembro, Herbipolis urbis Archidiacono, ut novi Cæsaris nomine jusjurandum fidelitatis ab Longobardiæ civitatibus exigere. Verum hinc homines, subornati forte à quibusdam, qui parum favebant Friderico, a. d. xv. Cal. Jan. Mediolanum nomine Henrici, novi Cæsaris Romanorum, concilium indixerunt, ad quod præter Mediolanenses etiam Marchio Montisferrati, Brixiani, Bononienses, Novarienses, nostrique cum venissent, omnes uno ore se hostes Friderici sunt professi, ut & Cremonensium & Papiensium, qui partes ejus sequebantur. Potissimum hoc in concilio constitutum fuit, ut prædictæ civitates in fide erga Henricum, regem Romanorum peristerent, semperque abhorrent ab omni fraude & malignitate contra ipsum, sique sibi de malis aliorum consiliis contra ejus majestatem innotuisset, aperirent illi, omnibusque viribus ea facere irrita atque disturbare studerent: præterea ut eadem civitates exemptæ essent omnibus tributis regi solvendis, neque obligatæ ad milites extra Longobardiam mittendos, aut obfides dandos, aut denique aliud aliquid promittendum; utque foedus suum, *Longobardia, Marchia, & Romania* dictum, integrum maneret ac saluum. Contra obligatus esset Henricus rex ad sociorum urbes finesque, ac populos & facultates, ut & omnes illos, qui ipsorum foederi se essent adjuncturi, defendendos à quibuscunque hostibus, & sigillatim à Papiensibus & Cremonensibus: utque cum his ipse nunquam pacem facere, aut armorum inducias constituere posset, nisi Mediolanensium consensu.

Deinde mense Februario anni MCCXXXVI. Fridericus Imperator in Italiam venit, sed mox cognita ejusdem Henrici filii rebellione, qui res novas & patri periculosas moliebatur, ocyus in Germaniam revocatus est, relictis tamen in Italia præfectis duobus. Cum in Germaniam venisset, filium regno privatum in Apuliam relegavit, quanquam alii eum patris jussu clandestina morte multatum volunt. Inde denuo in Italiam venit Imperator, & ad Brixiam oppugnandam profectus est. Ibi cum Mediolanenses, & Placentinos aliosque sociorum ingenti cum exercitu invenisset ad *Aulam novam*, (*Corte nuova*) hoc animo, ut eum à Brixia urbe repellerent, facta ipsis pugnandi potestate, sociisque in aciem progressis, post atrox & cruentum certamen victoria penes Cæsarem stetit. Sociorum alii cæsi, alii fugati fuerunt, multi etiam capti, inter quos præfectus Mediolanensium, & Petrus Tiepolus, Jacobus, Venetiarum Ducis, filius, qui elephanto impositus, atque ita per Cremonam & Laudam deductus, & inde in carceres Apuliæ compactus, ex ærumnis doloribusque periit.

Tanta parta victoria Fridericus, quem jam excommunicaverat, tanquam libertatis ecclesiasticæ violatorem, Pontifex; cum omnibus copiis, ut in *Annalibus Cremonensibus* narrat Ludovicus Cavigellius, movit contra Laudenses, quibus auxilio profecti sunt Mediolanenses una cum aliis Longobardiæ populis, Pontifici addictis. Per tres menses armis Imperatoriis restiterunt nostri: sed ad ultimum urbem dedere Friderico sunt coacti, non tam alia quadam necessitate, quam quorundam civium suorum perfidia, ut *Antiquitatum Vicec.* lib. iv. dicit Georgius Merula. Atque illos in *Dissertationibus Hist. de Lauda urbe*, *Dissert.* vii. Defendens Lodov. fuisse Overniagos addit, qui temporibus istis Gibellinorum Laudensium erant capita. *Gibellini* hoc ævo dicebantur omnes illi, qui partes Imperatoris sequebantur; *Guelphi*, qui fidi erant & addicti summo Pontifici. Et in omnibus adeo Italiae

urbibus hæc factiones & partium studia fervebant, aliis cum Pontifice, aliis cum Imperatore sentientibus. Per hanc occasionem misera urbs Laudensis subire debuit crudelitatem hostium, qui male multaverunt Guelphos, inter quos Summaripæ, qui ex illorum præcipuis erant, ab Imperatore in Apuliam fuerunt relegati, unde postea ipso mortuo ad patrios lares redierunt. Sed Fridericus, iram suam in politici ordinis homines evomere non contentus, contra ecclesiasticos etiam insævere cœpit, & ut ex Innocentii IV. Pontificis mandato quodam Apostolico ad Bonjoannem Fissiragam, nostræ urbis episcopum, colligitur, fuit quondam (ut verbis ejusdem summi Pontificis utar) à ministris impietatis publice crematus monachus quidam ex ordine *Minorum* S. Francisci, non aliud ob crimen, quam ob fidem, quam erga Romanam Ecclesiam servare inviolatam volebat. Itaque aut expulsis, aut sponte ex urbe digressis monachis istis *Minoribus*, patria nostra auxiliis illis cœlestibus, quæ hic ordo Seraphicus affatim subministrare solet populis, tantisper orbata fuit, dum idem ille Pontifex ipsorum rogatu Fissiragæ episcopo mandavit, ut locum illis aut monasterium assignaret, & ipsorum ad habitationem & civium ad usum opportunum, quod & factum est anno MCCLII. Veruntamen Fridericus partium studium & affectum suum erga Gibellinos urbis nostræ probavit abunde, eosque fortune & honoribus auxit modis omnibus. Insuper castellum satis munitum exstruxit ad portam Cremonensem, & sequenti anno Laudensibus cudendæ pecuniæ, ut Tristanus Calchus affirmat *Historia Mediol.* lib. XIII. facultatem concessit, quod istis temporibus privilegium erat non sane vulgare, propter exiguam, quæ tum erat, auri argentique copiam. Deinde Reipublicæ administratione in Gibellinorum potestate relicta, Lauda profectus Imperator abiit Papiam. Fuit hic Imperator, ut dictum est, hostis Ecclesiæ, summorumque Pontificum; ideoque cum sæpius ab illis excommunicatus esset, etiam nostra urbs anno MCCXXXIX. interdicto subiecta fuit, ut in *Dissertatione* VII. notat Defendens Lodus, à Gregorio IX. Pontifice, nostraque ecclesia episcopali dignitate privata, quia Imperatoriorum militum præsidio tenebatur.

Atque hæc forte causa fuit, ut Mediolanenses, quanquam tempus foederis inter Longobardiæ civitates initi necdum effluerat, anno MCCLIII. arma moverent contra Laudenses, quorum in fines, cum se illis Marchio Montisferrati, Novarienses, & Vercellenses junxissent, factis excursionibus, magnam per agros ediderunt stragem. Sed gravius damnum patria nostra experta est à pertinacibus & implacabilibus inter se Guelphorum & Gibellinorum factionibus, quæ eam per multos annos misere distraxerunt. Quoniam autem Guelphi viribus inferiores erant Gibellinis, qui à Friderico adjuti contrarias partes opprimebant, Aciarorum, Abbonum, & Saccorum familiæ, quæ Guelphorum erant capita, opem petierunt à Consulibus Mediolanensium, quo idoneas ab illis vires impetrarent, quarum auxilio non solum opponere se, sed & prævalere Gibellinis possent. Hinc exacerbati contra illos non tantum Masnerius de Burgo, qui eodem tempore ex mandato Imperatoris Laudensium præfectus erat, sed & Consules Laudensium & *Paratici* constituerunt, ut gentibus illis in posterum nunquam liceret in castello Brembio ejusve finibus habitare, aut ullas ibi comparare sibi possessiones: quin etiam, si forte quidam ex illis ex aliorum hereditate quasdam istic locorum possessiones acciperent, sive mares, sive foeminæ; eas ut intra proximum mensem Reipublicæ Laudensi vendere deberent, cujus ditioni & ipsum castellum est adjectum, ut & præfectos istic constituendi, & jurisdictionem exercen-

A di potestas. Omnia hæc solenni scripto sunt confirmata: & ne temporis tractu hoc decretum paulatim in defuetudinem unquam abire posset, constitutum insuper est, ut omnes illi, qui à Laudensibus ad præfecti munus eligerentur, jurejurando ad ejus exsequutionem se obligarent.

B Anno MCCXLV. Innocentius IV. Pontifex, Lugduni in Gallia Concilio celebrato, omnium, qui aderant, consensu imperium Friderico abrogavit, multis de causis, quas brevitatis ergo non lubet referre, eumque insuper excommunicatum pronuntiavit. Sed ille adeo contra Mediolanenses exarsit ira, ut eversum se Mediolanum urbem juraret, & neutiquam cum illa benignius acturum, quam fecisset avus ipsius. Itaque hanc in rem Laudensium, Bergomatium, Cremonensium, Dertonensium, & Alexandrinorum copias militares, quantas maximas colligere possent, auxilio petiit, quas illæ civitates etiam lubentes ipsi suppeditaverunt. Jam vero, quæ inter Imperatorem deinde ejusque socios & Mediolanenses fuerunt gesta, huic insere *Historia* nostræ nihil attinet.

C Toto quinquennio proximo nihil quicquam memorabile accidit, quod ad nostrum facere possit argumentum. Sed æstivis anni MCCL. mensibus denovo Mediolanenses armati totum fere Laudensem agrum depopulati sunt, & maxime in Zinidam, Barganum, & Fissiragam castella sævierunt, eaque funditus devastarunt, cum nostri, ut debuerant, parati non essent, aut viribus idoneis instructi ad resistendum hostibus. Sed deinde longe aliter res est gesta, cum Mediolanenses in loco quodam castra posuissent, qui profundis fossis erat munitus, in quas Lambrum etiam annem immiserant. Tum enim nostri Papiensium copiis aucti cum castra castris hostium contulissent, per multos dies egressu ex munimentis castrorum eos prohibuerunt. Mox cum non advenirent milites Placentini, quorum subsidium frustra hostes expectabant, adacti fuerunt incensis castris Mediolanum repetere. Ibi cum in itinere Zinidam inter & Barganum nostri, quibus se adjunxerant Cremonenses, se illis objecissent, ad fossam Panisperditi (*Panperduto*) deflexerunt, & cum nostri inhærent eorum vestigiis multos suorum amiserunt. Sed longe majus detrimentum utrinque copiis accessit ab æstu solis, qui adeo fuit ista tempestate vehemens, ut ad tria millia hominum misere ex eo perierint. Sed procul dubio Mediolanenses, cum quibus una erat etiam Gregorius de Monte longo, Pontificis legatus, gravius adhuc vulnus à nostris accepissent, ni iter Mediolanum tutum illis præstitisset Spinella de Medicis, quem magnis cum copiis Cremenenses illis auxilio miserant.

F Anno sequenti civilium bellorum contentiones in urbe Lauda, sic ut nunquam alias, exarserunt vehementissime inter Vistariorum aliorumque exsulum factionem, & Averciagorum; quorum hi Bosium Dovaram, Cremonæ principem aliosque, illi Mediolanenses in auxilium vocaverunt. Hic utrumque partium auxiliares cum in urbem intravissent, ipso S. Laurentii die ad manus ventum est, sic ut ad ultimum Cremonenses urbe cogerentur excedere per illam ipsam portam, quæ *Cremonensis* dicebatur. Tum vero Mediolanenses, ne istac iterum in urbem pervadere Cremonenses possent, admodum firma istic munimenta exstruxerunt: & illi quidem adducto secum *Carroccio*, omnibusque suis amicis focisque collectis, omnes intenderunt vires, quo in urbem perrumpere iterum possent, sed murorum parte disjecta cum superare tamen vires Mediolanensium nequirent, qui & ipsi una cum *Carroccio* suo valida acceperant auxilia, incensis castris domum regressi sunt. Mediolanenses autem cum armis expulissent Cæsareos ad eandem portam castello, quod istic

istic Fridericus exstruxerat, ut supra dictum est, atque illud diruissent; vetere agitati odio, quo semper illi nostros sunt persecuti, omni hostilis insolentiae genere miseram nostram patriam vexaverunt. Quare nostri, ut ultimum ab sese exitium averterent, cum his temporibus mortuus esset Fridericus II. cujus ipsi semper in partibus fuerant, toto animo & cogitatione in illud incubuerunt, ut suos in concordiam reducerent, tam illos, qui in urbe erant, quam etiam exsules. Itaque duos hanc in rem procuratores elegerunt; Gratium Grespiaticam, qui civium, Oldradum Cotticam, qui exsulum causam ageret. Hic post longas disputationes denique controversiarum arbitrium detulerunt ad Accursium de Nigdarda & Vertusium Marionum, quos & civitas Mediolanensis eam in rem legatos esse iudicesque voluit, & arbitrium istud ad se delatum recipere. Hi itaque inter utraque partes pacis conditiones quasdam, & inprimis illud constituerunt, ut perpetuo silentio obliterarentur offensae illae atque injuriae, quae tam publice, quam privatim, factae utrinque erant: item ut urbe ejecti, patriam repetere possent; & alia nonnulla, quae ad pacis securitatem spectabant.

Præfectus populi Laudensis in decennium creatus est Sucius Vistarinus, ita ut prorogari illi posset imperium, quodcumque populo ita visum foret. Et quoniam civitas nostra Friderici II. ut dictum est, hostis Ecclesiae, partes sequuta, ideoque etiam censura ecclesiastica una cum ipso notata, summorum Pontificum contra se indignationem concitaverat, quae res omnium ipsi malorum, quae per tot annos pertulerat, causa fuerat & origo; efficere nostri his temporibus studuerunt, & impetraverunt etiam, ut in Pontificis Innocentii gratiam restituerentur. Atque adeo ille cum dignitatem episcopalem, qua privaverat eam, ut supra dictum est, Gregorius nonus, nostrae urbi restituisset, omnes quoque sacerdotes & ecclesiastici pristinam dignitatem receperunt. Dehinc plurimum emolumenti ex ista pace patriae redditae redundavit ad urbem Laudam, quae ab hoc tempore commodis ejus & fructibus eximiis satis diu gavisae est.

In urbe Mediolano his temporibus quasi regnum exercebat summa cum potestate Martinus de Turre, sive Turrianus, frater Pagani, qui in *Valsasinam* benigne receperat copiarum Mediolanensium reliquias post cladem illam, quam ad *Aulam novam*, ut supra exposuimus, à Caesareis acceperant. Quare non ingrati Mediolanenses Paganum suam in urbem deduxerant, eique suae Reipublicae administrationem magna ex parte permiserant. Sed post cum Martinus paulatim oppressis illis, qui ipsi se opponebant, & iidem maxime ex nobilibus erant, tantum non prorsus absolutam apud Mediolanenses potestatem obtinebat, in qua ut se confirmaret, multos ex principibus urbis patria expulit; quorum nonnulli cum Laudam se recepissent, humanissime accepti tractatique fuerunt ab Laudensibus, & maxime à Summariparum gente. Hinc verens Martinus, ne quandoque illi propter hanc vicinatem res novas contra ipsum molirentur, eumque regno illo deturbarent, quod sibi vindicabat apud Mediolanenses; cum auctoritas ejus atque vires multum jam cepissent incrementi post suas ad Cassianum Adduae fugatasque Ecelini, qui Patavium tenebat, aliorumque sociorum ejus copias; ingenti cum exercitu Laudensium fines ingressus est anno MCCLIX. Hic cum omnia igni esset depopulatus, excidium urbi minitatus est, ni suspectos ipsi Mediolanenses protinus ejicerent nostri. Exemplo ita factum: neque hoc solum, sed patefactis etiam portis in urbem acceptus est Turrianus, ejusque potestati ipsa urbs subiecta, sive pleno jure, ut Calchus narrat *Historia Mediol.* lib. xv. sive in quinquennium duntaxat, ut

vult Corius in *Historia Mediolani urbis*, Parte II. licet neque per hoc annorum spatium ille eam tenuerit. Nam cum anno MCCLXIII. Laudae in morbum incidisset, Mediolanum inde abductus, a. d. XII. Cal. Dec. ejusdem anni vitam finivit, summa rerum ad Philippum fratrem translata. Sed cum hic quoque anno MCCLXV. repentina morte extinctus esset, perpetuus Mediolani aliarumque urbium praefectus constitutus est Napus, sive Napoleo, ut alii eum appellant, filius Pagani, qui ejusdem Philippi Turriani frater fuerat.

Sed ut ad nostra redeamus, cum usu deprehensum esset, magnae utilitati Longobardiae civitatibus esse confociationem illam, cujus supra mentionem fecimus, anno MCCLXVII. in urbem Mediolanum convenerunt, ut suarum civitatum nomine de integro sancirent eam jurejurando, legati Vercellarum, Novariae, Comi, Bergomi, Brixiae, Mantuae, Ferrariae, Vicentiae, Patavii, Parmae. Et nostra quoque civitas legatos eo misit Sucium Vistarinum, Hubertum Summaripam, Gulielmum Fissiragam, & Albericum Carnesellam. Præter haec civitates Atestinus quoque, sive *Estensis*, & Montisferrati Marchionis se foederi adjunxerunt. Deinde apud Laudenses novae turbae sunt exortae ab Overniagorum gente, quae cum diu fuisset in exilio, quod Gibellinis partibus nimium fuerat addicta, denique anno MCCLXIX. in patriam revocata erat. Tum vero sive ad ultionem exigendam, sive alia quapiam de causa cum res novas illi molirentur, excitatae sunt inter cives, ut narrat Calchus, scriptor Mediolanensis, *Historia Mediol.* lib. XVI. tantae seditiones atque discordiae, ut Mediolanenses, quo hoc incendium in ipsis restingerent initiis, copias suas in fines nostros emitterent. Sed haec cum ad urbem ire deberent ad discordias sedandas, agris depopulandis sunt immorati, & nulla re alia gesta, hyeme adventante domum praeda onusti redierunt.

Sed anno insequenti cum primum per tempestatem liceret, majoribus cum copiis, utpote Novariensium, Bergomatium, Placentinorum, & Cremonensium, sociorum suorum militibus aucti, de novo fines nostros ingressi sunt, duce exercitus Napo Turriano. Tum iterum vastatis direptisque agris, urbem arctissima obsidione clausurunt, & ut eo facilius invicem auxilium ferre possent, sicubi opus foret, pontem ex navibus, quas Cremonenses subministraverant, in Addua flumine construxerunt. Interim Summaripae, qui è patria exsulebant, Paganum Terciagum, magna auctoritate virum, sibi quoque amicissimum, ad Raimundum Turrianum miserunt, cum maxime Comensem episcopum, atque hujus arbitrio permiserunt omnes controversias, quae ipsis cum Napoleone Turriano aliisque hujus familiae intercedebant. Non recusavit hoc episcopus, & a. d. IX. Cal. Jul. pacem inter utrosque & praeteritarum injuriarum aeternam oblivionem publicavit his conditionibus, ut Summaripensium partium homines, qui in urbe Laudae erant, efficerent, ut Albertus Cataficus, praefectus isto tempore Laudensium, & Bosius Dovara, nec non Cremonensium, Placentinorum, & Mediolanensium exsules intra sextum diem Lauda urbe ejusque finibus excederent; & Napoleoni nostrae urbis praefectura deferretur, ita ut sibi, quemcunque vellet, vicarium substituere posset. Ad hunc modum inter Turrianos & Summaripas pace facta, Napus urbem nostram acius obsidere institit, quam a. d. III. Non. Jul. cum in potestatem suam redegisset, magna cum pompa eam ingressus, magnoque cum gaudio & applausu populi exceptus est. Sed dum Napoleo cum praecipuis suorum sumit prandium, interim inter Overniagorum & Summariparum familias pugna est exorta. Et expulsi sunt urbe Summaripas eorumque aedificia Overniagi à Vistarino.

starinis adjuti, nisi honestiores ex Mediolanensibus protinus in forum procurrissent. Horum auxilio Summaripæ confirmati tantum in adversarios fecerunt impetum, ut ad quadraginta illorum morte multaverint, inter quos & perijt Succi Vistarini filius, cujus ædes una cum Overniagi ædibus, ut grassari solet licentia militaris, direptæ fuerunt atque exspoliatæ. Ipse autem Succi cum altero filio non aliud sibi quærere refugium commodius potuit, quam in Napoleonis Turriani hospitio, qui ocyus indutus armis, iisque copiis collectis, quas in isto temporis articulo poterat, primo ad forum se contulit, inde per urbem circumvectus, & nemine invento, qui se ipsi opponeret, feliciter composuit hæc turbas. Sed Mediolanenses cognitis, quæ Laudæ gesta erant, Napoleoni tria millia peditum subsidio miserunt, qui cum mane diei in tempore Laudam venissent, ita vires animosque Turriani auxerunt, ut Laudenses fidem suam ipsi addicere jurejurando postularet. Inde cum Vistarini una cum filio Mediolanum misisset, duorum castellorum ordinavit structuram, ut de urbis possessione securus esse posset, quæ eodem Julio mense cœpta sunt extrui, unum ad portam, quæ Mediolanensis dicebatur, ad Regalem alterum. Atque ita ille, cum Fissiragarum gentem, Vistarinis æmulam, opibus honoribusque auxisset, victor Mediolanum rediit.

Memorabilis est Laudensibus annus MCCLXXXIII. in Laudam urbem adventu Gregorii X. Pontificis, patria Placentini, & ex gente Vicontiorum, cui, antequam ad summam dignitatem provectus esset, *Theobaldo* nomen fuerat. Huc Raimundus Turrianus, Comensis episcopus; Manfredus, summus sacerdos majoris templi Mediolanensis; alique ex gente Turriana ad eum accesserunt una cum legatis sexaginta, qui splendidissimum comitatum apparatusque secum ducebant. Pontifex per aliquot dies Laudæ commoratus, Lugdunum in Galliam abiit, ubi Concilium est celebratum, in eoque consultatum de sublevanda *Terra Sancta*, quæ misere affligebatur à Turcis.

Anno MCCLXXVII. gens Turriana, quæ favore populi summam potestatem & quasi regnum obtinebat in urbe atque ditione Mediolanensium, quæque ut prorsus se confirmaret in hoc imperio, id agebat, ut nobilissimas quasque familias opprimeret, ipsa fortunæ vicissitudinem est experta. Æmuli enim eorum, quorum caput erat Otho Vicontius, Mediolanensis Archiepiscopus, cum multas copias militares contraxissent ad Turrianos oppugnandos, Napusque Turrianus & reliqui gentis suæ fere omnes *Decium* se contulissent, locum decem millibus passuum à Mediolano distantem, ibique majorem expectarent copiarum suarum partem, quas una cum *Carrocio* celeriter Mediolano exire jusserat Napoleo, quo illas Archiepiscopo aliisque exsilibus opponere posset; Turriani proditi sunt ab iisdem *Decianis*, qui in Othonis, apud ipsos quondam *Canonicis*, partibus erant. Itaque hostibus ex improviso in *Decium* receptis facile fuit una cum suis assedis opprimere Turrianos, ex quibus Comenses, qui Vicontium adjuvabant, ceperunt ipsum Napum, tum præterea Carnevarium, Henricum, Lombardum, Muscam, & Vidonem, qui Comum abducti, ibique in arce Baradello barbarum in modum caveis quibusdam fuerunt inclusi, quæ ex validissimis trabibus erant compactæ. Reliqui Turrianorum fuga evaserunt, alius Cremonam, alius alio. His ita prospere gestis Vicontius Archiepiscopus una cum aliis viris nobilissimis ovans ingressus est urbem, ibique exceptus non tantum inimicis Turrianorum, sed toto adeo applaudente populo, qui victoris fere sequi fortunam solet.

Hæc mutatio rerum apud Mediolanenses in nostra quoque urbe turbas excitavit. Anno enim se-

quenti, id est, MCCLXXVIII. Overniagi, Vistarini, alique, qui his temporibus è patria exsulabant, sive Vicontii Archiepiscopi, cujus in partibus ipsi erant, sive aliorum in Mediolanensi Republica potentium hominum auxilio, armis Barganum castellum, quod in Laudensium ditione erat, occupaverunt. Hoc Laudæ cognito, cum omnes tantam rem, tamque novam, Reipublicæ Mediolanensis voluntate ac mandato factam, ac proinde concordiam illam atque pacem violatam esse arbitrarentur, quæ sibi cum Mediolanensibus aliquandiu jam intercesserat; Laudam acciverunt Cassonem Turrianum, qui in Cremonensium finibus satis magna Germanorum militum, aliorumque sociorum atque amicorum cum manu morabatur, ut adeo hisce novis auxiliis rerum suarum possent esse securi. Plurimum sibi Vicontius ab hac nostrorum cum Turrianis consociatione metuere cœpit, nostramque debellare urbem, si res ita ferret, constituit, ut in ipsis principiis mala ista opprimeret, quæ ipsi ab vicinis adeo hostibus inferri quandoque possent, quorum fortitudinem magnosque animos sæpius jam experti fuerant Mediolanenses. Itaque copias militares, quantas maximas poterat, collegit, & Papiensibus, Novariensibus, Vercellensibus, Comensibusque in auxilium vocatis mandavit, ut ad veterem Laudam præsto essent, quo eodem Albertum Fontanam, Mediolanensium præfectum una cum *Carrocio* jam præmiserat. Sed hinc apparatus longe alium, quam speraverat Otho, sortiti sunt exitum. Cum enim ejus copię aliquandiu circa Laudam veterem subsistissent, multa quidem damna locis agrisque vicinis intulerunt, sed mox inter eas exortæ sunt discordiæ atque seditiones adeo infestæ, ut nihil omnino sperari posset iri gestum, quod in rem erat. Quin imo cum multi militum signa relinquerent, & totis simul manipulis Vicontii partes defererent, exercitus adeo numero est imminutus, ut non abs re esse Vicontio videretur *Carrocium* in locum tutum reducere. Et prudenter ille hoc consilii cepit, quandoquidem nox exiguo nostrorum numero superveniente, fortunæ loco hostibus fuit, fuga se intra fines suos recipere, quamvis multi eorum, ut Corius dicit in *Historia Mediolani*, Parte II. ab nostris fuerint capti.

Interim Casso Turrianus, dum in urbe nostra morabatur, valida & opportuna accepit auxilia ab Raimundo de Turre, sive Turriano, patriarcha Aquilegensis, qui cognitis vexationibus, quibus suæ gentis homines à Vicontii aliisque Mediolanensium nobilibus opprimebantur, in Longobardiam se contulit, Laudamque illis auxilio venit, trecentis hastatis multisque sagittariis equitibus secum adductis. Huc cum multi etiam alii convenissent ex illis, qui olim cum Turrianis steterant, decretum est, Cassonis & Forojulianorum viribus, additis etiam Laudensium copiis, armis Barganum castellum repetere, quod & ad primam statim denunciationem sese illis dedit. Inde in hosticum agrum factis excursionibus, opimas prædas abduxerunt, & quædam loca igne injecto cremaverunt, ruptoque ponte, quem hostes in Addua amne tenebant, populabundi ad ipsam usque Mediolanum urbem excurrerunt. Tum denique hostium copiis ex urbe eductis, quo victori se exercitui objicerent, atrox & pertinax utrinque prælium est commissum, quo Turriani, priorum fortunarum amissione, simul & spe illarum recuperandarum animos illis addente, Laudensium copiis firmati adeo strenue rem gesserunt, ut hostes misere terga vertere, & fuga salutem sibi quærere cogerentur. Edita est hoc certamine strages non vulgaris, & captivorum quoque, qui in victorum potestatem pervenerunt, præda fuit insignis, non ipso numero tantum, sed multo magis etiam dignitate eorundem. Ultra centum ex nobilissimis apud Me-

Mediolanenses familiis capti numerantur, inter quos nominatim referuntur Mucius Sorelina, Casparus Vicontius, Antefossa Vercellinus, unus ex Lampuniana, alii duo ex Prealeonum gente, duo Pontiroli, Antonius de Carnisio, duo ex familia De Cruce, Balsarinus Lita, Landrianæ gentis unus, & Remus Rhò. Hujus victoriæ quasi torrente Turriani *Cassanum*, *Trecium*, *Vavarum*, *Montem Briancia*, *Brinianum*, *Trivillum*, *Caravacium*, & adeo omnia alia loca, quæ Vicontii præsidii firmaverant, occupaverunt, ipsamque etiam Cremam urbem, quæ cum maxime Vicontii parebat, expugnaverunt incenderuntque. Hinc ad urbem Mediolanum abierunt, & usque ad portæ Ticinensis suburbia progressi, omnibus modis aut seditiones ac tumultus inter Mediolanenses concitare, aut in campum eos & prælium perlicere conati sunt: sed cum utrumque frustra fuisset, Addua iterum amne superato se receperunt. Respiravit Archiepiscopus Otho, cum hostem procul esse videret, & cum suis copiis in campum progressus, ocyus *Cassanum* recuperavit, qui & multæ opulentia, & maximi momenti locus erat. Sed dum materiam huc artificesque ex proximis undique locis arcessit ad reficiendum in Addua flumine pontem, quem, ut antea diximus, labefactaverant Turriani, denuo hostium multitudo obrutus, consilio non perfecto ocyus Mediolanum urbem se recepit. Turriani non multum curantes fugibundum longe persequi Archiepiscopum, cum denuo *Cassanum* castellum valido præsidio firmavissent, circumjacentes, ut moris est, depopulati sunt agros.

Labefactatis Vicontii viribus, at non item animi constantia ingenique calliditate, ad peregrina auxilia animum convertit, & Gulielmum Montisferrati Marchionem Mediolanum invitavit, summa urbis potestate ad eum delata, luculentoque stipendio pacto in quinquennium. Accepit conditionem Marchio, & primo Papiam, inde Augusto mense Mediolanum venit comitantibus voluntariis trecentis, & cum applausu populi exceptus, in forum cum pervenisset, pro concione verba facientem audivit Jacobum de Moncia oratione ejusdem, ad temporum conditionem accommodata, non dux solum, sed dominus quoque Mediolani appellatus. Contra Marchio pollicitus est, dato etiam jurejurando, se novum munus obituro, non ista tantum cum fide, ut magnos viros par est facere, sed omnibus etiam rationibus initis, quascunque ipse Mediolanensi Reipublicæ maxime utiles cognovisset. Confirmatus Otho Archiepiscopus adventu Marchionis, qui satis validas in ejus auxilium vires contraxerat, copiis, quantas maximas poterat, comparatis, ultimas contra nostros Turrianosque vires intendere decrevit. Itaque Rainero Zeno, nobili Veneto, & cum maxime Laudensium præfecto, ac Simone de Locarno comitibus, quibus paulo post Zaninus Beccaria, qui Papiensium præfectus erat, Gulielmus Preda, copiarumque Comensium se adjunxerunt, cum ex urbe *Carrociū* eduxisset, omnis exercitus ad Laudam veterem in castris confedit, & brevi tempore *Mombrioncio*, *Fossa alta*, & Bargano castello occupatis, quod cum aliquantisper defendissent, consuetis bello conditionibus dederunt obsessi hostibus; hi nemine obvio Laudensium agros sunt deprædati, ubique locorum solitis nimiumque funestis cladum vestigiis relictis. Deinde autem cum tueri se posse diffiderent, quæ occupaverant, munimenta demoliti sunt, rupto etiam ponte, qui in Lambro amne erat. Quin & cognito, nostris auxilio venire Parmensium Cremonensiumque copias, ne quidem conspecto hoste, celeriter cum omnibus copiis bellicque apparatu in urbem se Mediolanum receperunt.

Veruntamen Otho, quantumvis afflictus minus

A prospero armorum successu, non mutavit denuo belli fortunæ contra patriam nostram experiundæ consilium, quam ut tanto arctiore ac faciliore obsidione cingere posset, rem aggressus est non minus difficilem, quam utilem cœptis suis, si perficere eam potuisset. Cursum Adduæ amnis alio avertere, & totum flumen in Lambrum amnem derivare conatus est, ut Adduæ alveo, qui Laudam præterfluit, aquis vacuo, continenti undequaque urbem nostram & arctissima obsidione claudere posset. Itaque necessarios ad tantum opus fossiles emisit, ad eosque tuendos exercitum duce Zeno, urbis præfecto. Sed dum omnes in tractu Melciano (*di Melzo*) incastrum hærent per integrum mensem, visum est Othoni Archiepiscopo ad Gorgonsolam semet conferre, ut ipse præfens acrius urgeret opus. Cum de hac ejus abitione Laudenses Turriani cognovissent, hi opportunam sibi occasionem oblatam rati, Vicontio in Gorgonsola vices referendi illarum cladum, quibus ille in castello Decio ipsos antea affecerat, quantas colligere subito poterant, Lauda urbe copias eduxerunt, & cum citato agmine noctu ad Gorgonsolam accessissent, ex improvviso impetu facto, pluribus locis momento temporis ignem injecerunt, ut consternati hostes, quid fugerent potissimum, aut quo se verterent, nescirent. Nec cessavit consilium, Vicontii copiis strepitu & improvviso tumultu confusis, majoremque partem una cum incolis loci misere trucidatis. Othoni autem hætenus fortuna favit, ut in turriculam se abderet sacelli cujusdam, quod incogitantes Turriani, secus ac reliqua ædificia, diruere, aut flammis mandare neglexerunt. Quod si ille aut libertatem ibi, aut vitam amisisset, in proclivi fuisset Turrianis suas recuperare fortunas, & forte etiam pulchre stabilire. Vix dum nostri cum Turrianis, præda onusti, magnoque captivorum cum numero, quos inter quinquaginta fuere Novarienses, domum redierant, cum Otho, evitato istoc extremo periculo

D lætus, valens ac salvus Mediolanum venit, & ad salutis suæ fortunarumque securitatem attendens animum, denuo Bonifacium Pusterlam, S. Celsi Abbatem, ad Marchionem Montisferrati misit, qui munere suo se abdicaverat, in quinquennium solummodo illud sibi delatum indignatus; factis illi promissis ingentibus, si redire Mediolanum, sibi que ferre auxilium vellet.

Othonis res adversæ ad magnas spes evexerunt Marchionem, qui frigore licet intensissimo, in continenti Mediolanum abiit, quo cum advenisset, se neque copias educturum, neque rei quicquam pro Mediolanensium Republica acturum pronunciavit, nisi liberum ipsi summumque imperium ac potestas decerneretur, ut adeo quibuscum ipsi & quocunque tempore libitum foret, & pacem & bellum facere posset. Duodecim dies tanta auctoritate Marchioni decernenda sunt absumpti, cum nonnullis damnosum nimis atque periculosum esse libertati publicæ videretur, res suas ac fortunas omnes potenti atque extraneo Principi in manus tradere. Denique autem cum convenisset, ut per proximum decennium summum ille imperium obtineret, utilius ipsi visum est, inter Vicontios, Turrianos, ac Laudenses pactionibus componere certamina, quam ferro atque armis transigere. Itaque illis significavit, in sua manu positum esse, dummodo ipsi præteritis injurias oblivioni mandare vellent, pacem illis restituere. Sed cum apud Laudenses Raimundi patriarchæ aliorumque gentis ejusdem animos parum ad pacem inclinare videret, Marchio contractis copiis una cum Henrico ex Lamelli Comitum familia, qui tum temporis Mediolanensium præfectus erat, ad Moguntiacum (hodie *Monza* est) se contulit prid. Cal. Jan. ejusdem anni MCLXXXVIII. ibique per octo dies commoratus, nihil aliud quam

vires hostium exploravit, qui capto *Vicomercato* non amplius quinque millibus passuum ab ipso aberant. Hinc cum exercitu ad *Trecium* movit, quod cum frustra occupare conatus esset, motis castris Vavarum castellum aggressus est. Ibi cum variis pugnis multos suorum amisisset, dum huc illuc movet, incertus quid ageret potissimum, rumor sparsus est, sed vanus, castellum illud desertum esse ab hostibus. Hoc cum ipsi nimium faciles credidissent, dum magno cum ardore munitiones superare & castellum intrare contendunt, à victoribus non tantum repressi sunt, sed repulsi etiam, plurimis suorum cæsis ac vulneratis. Itaque omni spe illius occupandi abjecta, Marchioni visum fuit receptui signum dare, & ut tutum inde regressum haberet, pontem in Addua flumine prope *Trecium* reficere.

Dum hæc geruntur, Bergomatium civitas, sive metuens, ne hujus belli incendium, adeo ipsis vicinum, latius serperet, & suos quandoque fines corripere, sive alia quapiam de causa, duos legatos miserunt, Bertramum Græcum & Albertum Rivolam, cum mandatis, ut pacem inter partes componere studerent. Et tantam horum intercessio vim habuit, ut nostri Turrianique generositate atque animi magnitudine non vulgari constituendæ ejus arbitrium ad ipsum Montisferrati Marchionem deferrent, summum Vicontii Mediolanensiumque ducem. Itaque S. Agnetis die festo anni MCCLXXXIX. armorum induciæ sunt publicatæ, atque ita cum ab armis cessaretur, ultro citroque comitatus est ab militibus in utraque castra. Sed cum Marchio multorum Mediolanensium magnam erga Turrianos, veteres dominos suos, benevolentiam deprehenderet, ne turbæ inde aut impedimentum paci oreretur, Turrianos voluit ultra Adduam amnem se recipere, ut extemplo etiam factum est. Non multis post diebus in Melenianum castellum convenire jussit Turrianæ gentis principes, interposita, quod ad hanc rem opus erat, fide publica pro ipsorum salute: & ipse quoque eodem se contulit una cum Conrado Castilione, magnæ auctoritatis viro. Heic post longas disputationes constituit denique Marchio, licet illud impedire conarentur Vicontii, Pusterlæ, Sorefinæ, Mandelli, & Crivelli, ut præteritæ omnes injuriæ oblivioni perpetuæ mandarentur, captivi sine pretio utrinque redderentur, Turrianis bona restituerentur, quibus erant spoliati, arces & munimenta communium utrinque amicorum præfidiis militaribus firmarentur, & denique in patriam exsules restituerentur, quanquam Comenses pertinaciter recusaverunt istos liberare Turrianos, quos in arce Bardello captivos tenebant. Tractata etiam & composita est in eodem hoc conventu pax inter Laudenses ac Papienses.

Sed parum fuit pax durabilis inter Turrianos & Vicontios, Laudenses, ac Mediolanenses. Nam cum utrinque apud partes, quarum in animis cruda adhuc & recentia erant præteritarum injuriarum vulnera, omnia suspicione ac timore plena essent, ideoque Turriani Laudam, tanquam in asylum suum, iterum se recepissent, Mediolanenses urbem nostram obsidione cingere deliberaverunt. Verum nostri capientes arma & ex improvise urbe egressi, ad ripas usque Ticini amnis factis excursionibus, multa Mediolanensium opulenta loca sunt deprædati, interque ea *Abbategrasium*, *Albairatum*, & *Macentam*, occisis, quoscunque hostium in agris habebant obvios, inter quos etiam periit Gulielmus Pusterla, ex nobilissimis Mediolanensium. Sed dum victores nostri agros istos depopulantur, Marchio Montisferrati exercitu versus Adduam amnem educto, quo hostem ex Mediolanensium finibus abstraheret, postquam invaserat ceperatque vi armorum *Trecium* castellum, mox flumen transgressus, levi negotio totam oram Addua amne tenuis occupavit.

A Post tot ruinas etsi pax denuo publicata est inter Vicontios & Turrianos, Mediolanenses, atque Laudenses, & ita constituta observataque, ut illorum civitates, dicente Corio *Historia Mediol.* Parte II. communes esse viderentur, nihilominus anno MCCLXXXI. nescio quo casu, denuo bellum exarsit, in quo nostris auxilium tulit Raimundus Turrianus, patriarcha Aquilegiensis, & Laudam quingentos Forojulianos adduxit, quorum unusquisque minimum tres equos secum habebat. Etiam nostris se adjunxerunt ducenti Cremonensium milites, Manfredus Turrianus, Moguntiaci (*Monza*) summus sacerdos, Casso, Gothofredus, Salvinus, ceterique omnes Turrianæ factionis, una cum multis Brixianorum, Papiensium, & Vercellenium. Ex his hominibus atque Laudensibus exiguo, sed firmo exercitu contracto, omnes excepto Raimundo patriarcha, qui Laudæ substitit, a. d. xv. Cal. Jun. ad Vavarum se contulerunt, quod in Mediolanensium finibus castellum Adduæ amni imminet. Hoc cum Mediolanenses intellexissent, præfectus eorum atque dux cum omnibus copiis profecti, quæ Comensium quoque manu & Novariensium auctæ erant, a. d. xi. Cal. ejusdem mensis in castris ad Gorgonsolam castellum confederunt. Hinc cum triduo post movissent ad Vavarum, pugnaturi cum nostris, hi cognito hostium adventu, illis obviam sunt progressi, cum in exercitu suo non amplius duo equitum, totidemque peditum millia; contra autem hostes triginta millia peditum haberent, cum tribus, aut, ut alii dicunt, sex equitum millibus. Prælio commissò cum non accideret, quod speraverant Turriani, nempe Mediolanenses, quorum ipsi tanto tempore fuerant principes, contra se non pugnatos, paucorum virtus obruta est hostium multitudine, quibus tamen, ingenti suorum numero cæso, magno constitit hæc victoria; etsi & ex nostris pauci domum redierunt, fere omnibus aut in flumine submersis, aut captis, aut occisis.

D fuit Porta Scurta, patria Parmensis, & idem præfectus Laudensium, Cassoque Turrianus, qui cum aliis Turrianis capite truncatus est. Sed omnium gravissimum vulnus hoc prælio Laudenses, Forojuliani, & Cremonenses acceperunt.

E Hæc victoria multum auxit Mediolanensium animos, qui ad majora adspirantes, & ab Laudensibus severiorem sumere ultionem avidi, mense Augusto, Marchione Montisferrati duce, qui trecentos milites Hispanos totidemque sagittarios apud se habebat, magnasque insuper Comensium, Novariensium, Vercelleniumque manus, fines nostros ingressi omnia devastaverunt, multisque castellis occupatis, cum nostri intra urbis mœnia se continerent, denique mense Octobri Mediolanum regressi sunt. Inde pacis mentio quædam facta, sic ut Novembri atque Decembri mensibus ad eam promovendam legati Laudensium Mediolanum, & vicissim Mediolanensium Laudam irent. Sed tunc quidem nihil aliud potuit effici, quam ut captivorum præteritis bellis utrinque permutatio fieret. Deinde autem anno MCCLXXXII. cum jam armorum induciæ constitutæ essent, legatis Laudensium, Ottobello Carnesella & Bassiano Catenago Mediolanum profectis, & in conventum admissis, in quo Gulielmus, Montisferrati Marchio dominusque Mediolani, (sic enim jam palam appellabatur) tum Rufinus Gutuerius, Mediolanensium præfectus, & Giralduus Castellus, militarium copiarum dux, alique insuper octingenti homines aderant, quod Mediolanensis civitatis majus erat consilium, pax facta est his aliisque conditionibus, ut Mediolanenses Vistarinos & Overniagos Mediolano, nostri Turrianos eorumque affeclas, nec non omnes alios Mediolanensium, Comensium, & Novariensium exsules Lauda ejicerent, ceterique Laudensium socii po-

potestatem haberent, huic se pacis foederi, quancumque ita visum illis foret, adjungendi.

Sperabant post tantas calamitates jam denique longum otium nostri, cum spes illorum turbavit Matthæus Vicontius, anno MCCXCIV. Vicarius Imperatoris ad totam regendam Longobardiam constitutus. Hic admonitus, Turrianos denuo reditum parare Laudam, ut ibi se confirmarent, ingentem collegit exercitum, cum eoque ad Laudam profectus, vi armorum occupare urbem conatus est. Sed obsessi cum fortiter sustinerent impetus hostium, re infecta eos ad sua redire coegerunt. Liberati obsidione Laudenses, multis suorum militum socio- rumque collectis, versus *Pontiliatum* abierunt, ultionem sumpturi à Mediolanensibus, sed neutiquam ex voto hoc illis consilium cessit. Ex improvise obruti magno equitum numero, qui apud Mediolanenses stipendia faciebant, nostrorum circiter ducenti ab hostibus capti fuerunt, quos inter præcipui fuere Imbaralus Turrianus duoque Huberti de Ocino filii. Imbaralus una cum alio quodam, qui Lupus Potentianus dicebatur, in imam turrem castelli Trecii compactus est; Ocini cum alio quodam ex Patavinorum præfectis militaribus (*Connestablios* vocant) carceri inclusi in castello Setteciano.

Sed Matthæus Vicontius, cum non posse com- mode & tranquille sua frui potestate sibi videretur, ni subiecisset sibi aut evertisset urbem nostram, nocte dieque consilia meditabatur, quibus istud ex- plere desiderium suum posset. Itaque proximo an- no MCCXCV. magno cum exercitu ad veterem Lau- dem Pompejam accessit, validoque præsidio ad S. Petri templum relicto late hoc patente fossa cinxit, castellumque ibidem ædificavit ligneum, validis un- dequaque munimentis firmatum. Inde Mediolanum regressus, novisque copiis collectis, cum triginta armatorum millibus Laudam veterem repetiit, at- que hinc cum universo exercitu ad S. Columbani profectus, denique ad nostræ urbis mœnia accessit mille & quingentorum passuum intervallo, magnam- que agri nostri partem ipsaque suburbia est depopu- latus. Sed ipsam urbem nostram neque hoc impe- tu capere potuit, nostris magnas illas hostium vi- res majore animo sustinentibus. Itaque copiis re- tro Mediolanum abductis, cum hujus belli perpen- deret difficultatem, ad salubrem firmamque pacem convertere animum coepit. Et adeo post longas consultationes, missis Laudam & ad *Montem Co- lumbæ* Mediolanensium legatis, denique pax consti- tuta publicataque est magno non tantum Lauden- sium, sed & ipsorum adeo Mediolanensium gau- dio. Inde inter nostros ac Mediolanenses adeo ob- tinuit pax sincera, ut hi anno MCCXCIX. ex Lau- densibus duos sibi præfectos constituerent, Bisacam Ricardum, & mox Fridericum Summaripam.

Tum vero post longum hoc atque difficile bellum jam in eo erat, ut Laudenses ultimum patriæ suæ vide- rent exitium, nisi pro misericordia sua Deus eos mira- bili modo respexisset. Prope urbem tanta aquarum co- pia ex vicinis amnibus nimium intumescens coierat, ut amplissimus inde lacus existeret, cui *Maris Gerundi* nomen est inditum. In hisce stagnantibus aquis natus est, nescio quomodo, draco sive serpens immanis, qui foetorem exhalabat intolerabilem & virulentum adeo, ut multi inde infeliciam civium misere perierint. Cumque reliqui jam sarcinas col- legissent patriam deserturi, quo periculum istud ef- fugerent, Bernardinus Talentinus, patriæ Lauden- sis, idemque episcopus urbis, alique procerum, nescientes quodnam humanum remedium imminen- ti desolationi exitioque patriæ adhiberent, & indies incolarum stragem ingravescere videntes, denique sano consilio ad opem divinam confugerunt. Ita- que bonus ille episcopus cum torpentes metu cives in concionem convocasset, & efficacibus rationibus

A adhibitis, ut in misericordia divina spem suam re- ponerent, exhortatus esset, certa cum fiducia, hu- miles infimasque preces suas ab ea rejectum non i- ri; persuasit illis, ut Deo solenne votum facerent, se magnificum in honorem sanctissimæ Trinitatis & S. Christophori templum exstructuros, si tanto ipsos liberare malo numini summo placuisset. Deinde sa- cris quibusdam & solennibus pompis, (*Processiones* vocant) devotisque precationibus institutis, & re- cens confirmato voto, non diu cessavit Deus sup- plicem sibi submissamque patriam nostram benigno vultu respicere, ita ut uno eodemque die geminum ederet miraculum. Exstinctus est pestilens draco, & una lacus ille, sive palus exsiccata ipsis Cal. Jan. anni MCCC. Usque in hunc diem in prædicto S. Christophori templo, quod hodie Patres Olivetani magnificentius à se resectum tenent, visitur os e- jusdem serpentis sive draconis ingens, & una quo- que ipsa historia legitur in tabella, quæ hodieque in S. Christophori sacello suspensa apparet.

B Mensē Majo anni MCCC. novis bellorum moti- bus exortis, nostri ad obsidendum S. Florani ca- stellum sunt profecti, quod tum in Treslenorum potestate erat, & proximo mense Julio una cum Cremonensibus, Cremenensibus, & Bergomatium ex- fulibus ad *Romanum* se contulerunt, quod in Ber- gomatum erat ditione, ac non ipsum modo oppi- dulum, sed & castellum occupaverunt. Inde ad Bergomum perrexerunt urbem, hoc consilio, ut vi in eam reducerent exsules, sed cum ipsis obviam processissent Bergomates & Mediolanenses, quorum in urbe Bergamo præsidium erat, post longum cer- tamen victi fuerunt nostri, multique eorum capti.

C Jam Matthæus Vicontius ad magnam dignitatem ac potentiam processerat, suspiciendus non ob affi- nitates modo multarum ex primis Italiæ familiarum, sed & terrarum, quas possidebat, amplitudinem. Hinc à prospera fortuna animis inflatus, licere sibi putabat promissorum violare fidem in rebus etiam gravissimis. Ita Zacharinam filiam, quam despon- derat Richardino Langosco, mox animo, nescio qua de causa, mutato, in matrimonium dedit Octo- rino Ruscæ, Comensi. Hoc vehementer indigna- tus Langoscos, animum appulit ad opportunam oc- casionem circumspiciendam, quo efficere posset, ut Vicontium facti sui poeniteret, eumque docere, quanto dedecori damnoque viris principibus esse so- leat non servare fidem datam. Primum itaque in partes suas & consilii societatem pertraxit ex Lau- densibus Antonium Fissiragam, qui isto tempore patriæ suæ præerat, tum anno MCCCII. Gulielmum Brusatum, Novariensem, & Vercellensium Advoca- tos, Joannemque, Montisferrati Marchionem, quibus se ocyus adjunxit Albertus Scottus, qui & ipse exacerbatus erat ob similem injuriam à Vicon- tio acceptam. Deinde Turriani quoque ab exsilio revocati protinus Cremonam & Laudam venerunt, promissa illis in veterem patriam restitutione ab omnibus his, quos diximus. Matthæus aut igno- ravit, aut certe non credidit hanc ingentem contra se conspirationem, usque dum hostes in tractum, cui *Lavanis* nomen, exercitum adduxissent, qui- bus ut resisteret, quam poterat celerrime Medio- lano urbe egressus cum omnibus istis copiis, quas illo temporis articulo colligere poterat, castra po- suit ad *Piostellum*, ad regendam urbem relictis Ga- leacio & Huberto, quorum hic frater, ille filius ipsius erat. Mox ab arce Besentrato Mediolanum abduci & in carcerem conjici jussit Petrum Vicon- tium, cognatum suum, cujus fides ipsi suspecta e- rat: inde iterum in Settecianum castellum, ubi ad- huc in vivis erat Oliverius Turrianus, eum trans- ferri ibique custodiri voluit, tanquam in loco tu- tiore. Hæc in Petrum Vicontium acerbitas non parum detrimenti Matthæi rebus attulit. Statim An-

Antiochia Crivella, Petri uxor, irritata mariti captivitate eique illatis injuriis, plusquam muliebri animo ad Seprium profecta, ibique suae gentis hominibus amicisque collectis, & praeter ceteros Conrado Rufca, genero suo, brevi tempore ad decem millia militum contraxit, praeter quos multi etiam alii homines, sedibus suis ejecti, se illi adjunxerunt.

Haec nova cum Turrianis innotuissent, & Fissiragae Laudensi, Scottoque Placentino, qui & ipsi, ut dictum est, contra Vicontium conspiraverant, multum illis auxerunt animos, eosque ad spes majores erexerunt. Itaque à Lavania motis castris ad *Besenciatum* confederunt, utpote suis consiliis locum opportuniorem. Contra Matthaeus à *Pioltello* digressus, inter *Melcium* & *S. Erasmi* castra posuit, locis quibusdam vicinis commeatus, qui opus erant, suppeditantibus, quia è Mediolano urbe, ubi Galeacius filius ejus parum securus agebat, non submittebantur ipsi alicujus momenti subsidia. Quin etiam populus, dominationi se Vicontii subtrahere cepit, & in omnibus se ipsi proderè inimicum. Insuper Moguntiacum quoque oppidum repente Langosci Turrianorumque partibus se adjunxit. Tum vero Matthaeus tantis undique malis oppressus, cum undequaque se hostibus cinctum, auxilia autem longe adhuc abesse videret, quae Atestinus, sive *Estes* Marchio ipsi destinaverat, non minus belli viribus, quam animo deficere. Interea Venetorum legati quatuor, qui aderant, identidem in utraque castra ultro citroque commeabant, pacis componendae causa. Itaque ad ultimum Matthaeus, pene ab omnibus desertus, cum ad *Pioltellum* quatuor istorum Venetorum fide interposita se contulisset, quo etiam convenerant Laudensium, Cremonensium, Papiensium, aliorumque legati, constitutum est, ut omnes controversiae, quae Turrianis eorumque partibus intercedebant cum Vicontis eorumque sociis, Alberti Scotti permitterentur arbitrio. Hic cum Venetorum legatis omnibus compositis, mandavit, ut oblivioni mandarentur omnes antea actae offensae, & Turriani eorumque affectae Mediolanum revertendi, pristinaeque domos suas & bona, quibus nudati erant, repetendi potestatem haberent. Matthaeus autem Mediolanensium ducatu eidem Scotto cedere coactus, in castello Melcio aliquandiu commoratus est, quod in ipsius Scotti erat potestate, & inde postea digressus, extorris alio locorum abiit. Turriani Mediolanum patriam urbem cum reverterentur, in itinere praeter multos alios Laudensium, praefectum eorundem & Antonium Fissiragam comites habuerunt, quem Mediolanenses praefectum urbis suae creaverunt anno MCCCIII.

Interim vero dum Turriani rebus utuntur prosperis, quae paulatim ipsos ad absolutam fere Mediolanensis urbis potestatem evexerunt, Matthaeus Vicontius patria profugus, sed nequitiam pristina animi magnitudine destitutus, semper illud meditabatur, qua ratione amissas fortunas non recuperare tantum, sed etiam augere posset. Itaque trecentis equitibus, quatuorque peditum millibus collectis ad Varesium, Belincionam, & Luganum castris occupanda profectus est, quod nec multum ipsi difficile factu fuit ob veteres, quas istis locorum contraxerat, amicitias. Quin etiam viribus auctis ad Comum urbem accessit, ejusque fines depopulatus, ipsam urbem in periculum salutis adduxit. Sed Turriani, qui aemulum suum atque hostem aut opprimere, aut hisce saltem terris expellere constituerant, cum Fissiraga Comum versus abierunt, contractis multis fociorum copiis, qui valida undique ipsis auxilia miserant. Tum vero Vicontius, vir non minus prudens, quam fortis, cum non posse se viribus hostium resistere videret, egre-

gia cum disciplina militari Comensium finibus excessit, & cum omnibus copiis Placentiam abiit, ibique humanissime est acceptus.

Deinde anno MCCCIV. Bergomates cum intellexissent, exsules suos Mantuanorum, Brixianorum, Veronensiumque auxilio vi reditum in patriam parare, petierunt & ipsi à multis civitatibus auxilia, inter quas & Lauda magnam illis armatorum manum subministravit. Itaque cum exercitus Bergomatium usque ad viginti millia hominum excrevisset, exsulum auxiliariis consultus visum est retro ad sua abire, quam armis experiri.

Jam in Germania Henricus Lucemburgensis fuerat Imperator electus, qui cum anno MCCCX. in Italiam transgressus Astae moraretur, Vido Turrianus, Mediolani dominus, satis sciens, quanto ille studio Gibellinis esset addictus, diu incertus haesit, utrum Caesarem in urbem reciperet, an vero se illi opponeret. Denique autem ex consilio multorum suae factionis hominum, qui nonnullas urbes in potestate sua habebant, interque eos Antonii Fissiragae, Laudae domini; & cum praeter ea videret, Mediolanensium animos ad Caesaris partes inclinare; Philippum Langoscum & Antonium Fissiragam, hunc Laudae, illum Papiam dominum, ut in Asta urbe Henricum suo nomine salutarent quam officiosissime, misit, eumque in urbem Mediolanum invitarent, addita asseveratione, eum quanto maximo fieri posset cum honore atque reverentia à principe Turriano acceptum iri. Excepit hos legatos Caesar admodum hilari in speciem vultu, quamvis probe conscius esset de Vidonis Turriani in se malevolentia.

Sed Matthaeus Vicontius Imperatoris adventu cognito, spes animosque ad meliores fortunas, pristinasque recuperandas opes ac potentiam erexit. Itaque mutato habitu perque devia facto itinere, ne facile cognosci posset, aut in manus hostium incideret, Astam se contulit, ibique cum non difficile ad Imperatorem admissus esset, ad pedes ejus prostratus infimis precibus cniæ ab eo petiit, ut se ex miserabili rerum suarum fortuna, quacum conflictabatur cum maxime, sublevaret. Gratum tulit ab Imperatore responsum, ut sui homines, sibi & fidei ab inimicorum suorum potentia opprimerentur: tum humo levatum multa cum benignitate atque clementia tractavit. Aderant forte huic sermoni Mediolanensium principis, Vidonis Turriani legati, Langoscius & Fissiraga, quos dum Vicontius amplexurus adiret, Fissiraga manu eum repulit, dixitque: *Tu, Matthae, semper fuisti pestilentia similis, qua primum contagione sua homines inficit, mox occidit. Per totum enim vita cursum semper discordiarum inter alios sparsisti semina: ubique, si posses, bella semper concitavisti: publicam turbavisti quietem, omniumque malorum causa fuisti: & nunc quoque, ut nunquam alias, praeteritas calamitates referre nobis paras.* Ad haec Matthaeus in speciem nihil omnino turbatus, ita respondit: *Taceamus quaso turbas antea actas, & omnibus litibus nostris atque controversiis arbitrio Henrici, benignissimi Imperatoris nostri, permittis, ab ejus justitia tranquillitatem ac pacem expectemus.* Interposuit auctoritatem suam Caesar, & imposito utrique silentio effecit, ut Turriani legati cum Vicontio omnes controversias componerent. Inde constituit, ut Matthaeus & una Turriani in urbe Mediolano habitarent, singulique suis aedibus, redditibus, dignitatibus, privilegiisque fruerentur, ut antea factum fuerat, quam discordiae inter ipsos & inimicitiae erant exortae. Omnia quidem agebat Imperator, ut erga utrasque partes perinde se proderet affectum, attamen illud facere tanta cum prudentia non poterat, quin legati Turriani satis animad-

verterent, ejus animum ad Vicontii partes inclinare: quamobrem ægri admodum animis erant, Vicontii in integrum restitutionem, suamque hinc calamitatem prævidentes. Itaque ut in rem suam temporis beneficio possent uti, variis excusationibus rationibusque allegatis persuadere Cæsari studebant, ut iter Mediolanum differret, cum Cæsaris animum in suas partes se interim pertracturos sperarent. Hoc cum animadvertisset sagacissimus Vicontius, admonuit Imperatorem, Langosci & Fissiragæ verba non ex sincero, sed ex versipelli malignoque derivari animo, ideoque modis omnibus protinus ipsi recta Mediolanum esse pergendum.

Non opus habuit multum fumere molestiæ Vicontius, ut hoc, quod ipse cupiebat, persuaderet Cæsari: qui proinde egressus Asta, Mediolanum petiit, comitantibus aulicis, aliisque viris principibus. Obviam illi ex urbe progressi sunt multi ex Mediolanensium nobilibus, postque illos cum ingenti procerum ex Guelphica factione comitatu Vido Turrianus, qui cum ad Cæsarem accessisset, ut honorem illi haberet, equo descendit, dextrumque ejus pedem est exosculatus. Videbatur primo Imperator benigne eum excipere, mox autem magna cum severitate ad hunc modum eum alloquutus est: *Tempus adest, Vido, quo te nobis submittere, supremamque auctoritatem nostram ac potentiam agnoscere debeas: nam certe nunc quidem, crede mihi, adversus stimulum calcitrare non poteris.* Aliud non multum fere loquutus, suumque prosequutus iter, Mediolanum intravit, ibique Epiphaniæ die festo anni mcccxi. corona ferrea, qua coronari solebant Imperatores, solenniter ornatus est à Cassone Turriano, qui isto tempore Mediolani Archiepiscopatum tenebat, præsentibus, dum hæc solennia fierent, Treverorum Genuæque Archiepiscopis, una cum episcopis harum urbium: Patavii, Veronæ, Brixiae, Bergomi, Laudæ, qui isto tempore erat Ægidius de Aqua; multisque etiam aliis ecclesiasticorum proceribus Principibusque, & omnium fere Italiæ civitatum Legatis. Veruntamen pronunciavit Imperator, se nolle hunc actum solennem temporibus insequentibus unquam esse præjudicio Moguntiaci (*Monza*) oppido, ubi alioqui coronatio ista fieri consueverat.

Post hæc Imperator mense Februario, cum à rebus novis sibi metueret in urbe Mediolano, quippe civibus ejus urbis oppido parum ipsi faventibus, quod magnam iis auri vim extorserat; Romam secum specie honoris abducere deliberavit centum ex primis nobilium Mediolanensium, interque eos ipsum quoque Matthæum Vicontium, ejusque filium Galeacium, præter multos alios partium Vicontiarum; ex gente autem Turriana Vidonem, ejusque filios, & itidem multos alios Turrianæ factionis. Hoc vulgato Franciscinus, Vidonis Turriani, & Galeacius, Matthæi Vicontii filius, extra portam Ticinensem in colloquium venerunt, cumque segregassent se ab affeclis suis, diu multumque soli consilia contulerunt. Jam licet eorum non essent auditi sermones, ex crebra tamen mutuaque manuum compressione, & item ex dicto quodam, quod Franciscino forte exciderat, pro certo creditum fuit, eos in perniciem Cæsareorum conspiravisse. Itaque Germani cum suo equitatu urbe perlustrata, ut cognoscerent, an re ipsa contra se conspiratio esset inita, quibusque armorum virorumque viribus, cum ad Matthæi domum accessissent, & hic in secretissima ædium suarum parte arma hominesque abdidisset, vultuque fere no Germanos acceptos vino epulisque largiter invitasset; hi neque in animo Vicontii aliquid mali, neque in ædibus bellici apparatus contra se aut Imperatorem suspicantes, abierunt. Hinc ad Tur-

rianorum progressi ædes, multos invenerunt homines armatos: cumque per totam undique urbem ad arma conclamaretur, ferreturque fama, Vicontios ac nobilitatem ipsis adhærentem se cum Turrianis populoque in perniciem conjunxisse Germanorum, multi utriusque factionis homines ad portam novam concurrerunt, prope quam habitabant Turriani, promiscue se ad Germanorum excidium invicem exhortantes, quos barbarorum atque avarorum hostiumque communium nomine appellabant. Sed dum hic atrociter pugnatur inter Mediolanenses ac Germanos, quibus una cum suis fortiter resistebant Turriani; nobiles atque affeclæ Vicontiorum, cum neminem inter illos viderent principum suorum, adeoque se deceptos esse putarent, domos suas redierunt. Hinc Germani superiores, illorum, qui una cum Turrianis remanserunt, ingentem ediderunt stragem. Franciscinus autem & Simo periculo evaserunt, & extra urbem se contulerunt, quo & Vido pater eorum, qui morbo decumbebat, ab amicis est translatus.

In hoc tumultu Matthæus Vicontius, homo callidissimus, per ædes illas, ubi episcopus Tridentinus hospitium habebat, ad Imperatorem accessit, Germanis fidum optimumque Cæsaris amicum eum salutantibus. Imperator magno eum cum gaudio accepit, interrogavitque, cur tanto tempore ad se venire superfedisset; & num verum esset, Galeacium ipsius filium cum Turrianis in suam conjuravisse perniciem. Matthæus adventus sui tarditatem excusavit, allegato per istas turbas in publicum procedendi periculo, & enixissime sanctissimeque asseveravit, se & esse, & una cum suis & vivere & mori velle fidum addictumque Cæsari. Interim Galeacius quoque, Matthæi filius, opera Boscini Mantegaciæ cum Germanis se conjunxerat, totamque per urbem volitabat, & solo æquabat Turrianorum domos, nec non illorum, qui ipsis addicti erant atque amici. Quin & multi, qui neutrarum erant partium, cæsi fuerunt, eorumque domus dirutæ, ædesque Vidonis Turriani crematæ, nequicquam obsistente precibus etiam additis Galeacio. Hoc in tumultu primum audita Mediolani fuerunt *Guelphorum Gibellinorumque* nomina: & Cæsarei, eorumque amici, qui *Gibellini* dicebantur, cum se invicem ad Guelphorum exhortarentur perniciem, multi eorum misere fuerunt extincti; & nihil proficiente præsentia atque auctoritate Matthæi Vicontii, qui cum bona Cæsaris gratia per urbem circumvehebatur tumultus sedandi causa, per sex continuos dies direptæ sunt vastatæque Guelphorum domus non tantum in ipsa urbe, sed & in oppidis locisque circumjacentibus. Denique rebus compositis Henricus Imperator, cum Vidonem Turrianum, & filios ejus, aliosque, istius conspirationis fuisse auctores crederet, quosdam illorum varios in locos urbesque relegavit, alios, qui parere huic denunciationi recusabant, ex imperii sui finibus in exilium ejecit. Hinc etsi postea Turrianæ gentis homines redire studuerunt, nihilque reliquerunt intentatum, ut in integrum restituerentur, nunquam tamen illud effici potuit: adeoque illi, ut historici dicunt, per varias Italiæ urbes, Veronam, Cremonam, Genuam, Bergomum, aliasque fuerunt dispersi; quam eandem fortunam & multi alii magni viri sunt experti.

Ceterum Antonius Fissiraga, qui isto tempore Laudam imperio regebat, cum se in patriam recepisset urbem, parum amice erga Imperatorem affectus, ex consilio Sabaudia Comitis, qui inter præcipua erat factionis Guelphicæ capita, omnibus viribus efficere conabatur, ut ne Henrico in Mediolanum urbem commeatus submitterentur. Sed cum pericula consideraret, quibus tanti Prin-

cipis ira provocata se patriamque exponebat, Mediolanum ire una cum Bassiano fratre, Antonio de Aqua, aliisque suarum partium hominibus constituit. Hic cum se Imperatori submisisset, eique claves tradidisset urbis, etsi eum nequiquam benigne aut cum aliqua gratiae specie Caesar accepit, tamen pro eo intercessit Augusta: & Imperator nonnihil remittens de pristina severitate, cum Antonio nimiam in tuendis Guelphorum partibus contra Gibellinos pervicaciam exprobravisset, eumque gravem commeritum poenam pronunciavisset, Mediolani eum apud se retinuit. Sed ejus fratrem Bassianum & Antonium de Aqua cum primo copiarum duci, seu *Marescallo* suo, Henrico Flandriae Comiti dedit, quo ipsorum opera ipse in Laudam urbem acciperetur; clausas invenit portas, & muros vallumque optime ad defensionem instructum, quum una cum ipsis magnaue armatorum manu ad eam accessisset. Quare motus ira Caesar proximis arboribus suspendi eos jussit, prorogata tamen, cum jam spoliati essent, sententia, concessaque illis potestate, ut in urbem mittere quem suorum possent, qui nunciaret, ipsos & Antonium Fissiragam, omnesque alios Guelphicarum partium, qui in Imperatoris erant potestate, crudelem in modum cruciatibus & denique morte multatum, finesque Laudensium devastatum, omniaque flammis ignique extinctum iri, nisi protinus hominibus Caesaris aperirent portas urbis. Hoc cum in urbem relatum esset primum ad Fissiragas, mox ad publicum consilium, ut cives suos servarent, patriamque vindicarent ab imminentibus periculis, Laudenses a. d. xv. Cal. Apr. liberum Germanis in urbem fecerunt aditum, quo eodem deinde quoque post celebratum Pascha una cum Augusta venit Imperator, comitante magno nobilium numero. Ceterum ille erga Laudenses vere Imperatoriam exercuit clementiam, fuissentque nostri abunde gavisi cumulatque ejus gratia, nisi Valerianus, frater Imperatoris, levi de causa multos crudelem in modum vita privavisset, alios meliore bonorum parte exuisset. Lauda Henricus abiit Cremonam, ita tamen, ut de urbis possessione satis posset esse securus, valido copiarum praesidio Gibellinis relicto, qui ipsius favore in patriam restituti omnia sua receperant. Cremonam secum abduxit Antonium Fissiragam, sive ut Guelphos adeo potenti capite orbaret, sive ut ejus consiliis, si usus veniret, uteretur, ut ipse dicebat.

Cremonenses in eadem cum Laudensibus sententia fuerant, sed cum ipsi suam infirmitatem cum Caesaris potentia conferrent, quanto maximo cum honore possent, excipere eum constituerunt. Itaque multi eorum extra urbem multis illi passuum millibus obviam progressi habitu (verba sunt Campi, scriptoris Cremonensis, in *Historia Cremona urbis*, lib. III.) miserabili, capitibus apertis, nudis pedibus, & laqueis colla revincti, cum in ejus conspectum venissent, genibus flexis subinde misericordiam expostulabant magnis vocibus, additis etiam lacrymis ac lamentis, quibus se patriamque victoris clementiae commendarent. Sed cum nihil prodesse eorum preces atque lamenta, Caesar omnes in custodiam dari jussit, quod cum ocyus factum esset, mox pene omnes misere trucidati fuerunt: & nihil his victimis placatus Caesar Cremonam intravit, adspersus arcuum tropaeorumque apparatus, quem, ut introitum ejus solennitate quadam celebrarent, adnoverant Cremonenses. Inde Cremonae aliquandiu commoratus, denique Romam perrexit, quo cum advenisset, anno MCCXCII. corona aurea, ut solent Caesares, coronatus est à summo Pontifice.

Interim Comes Vernerius Hombergius, quem in Longobardia praefectum Henricus summumque

A copiarum suarum ducem reliquerat, vi armorum multos populos rebelles ad obedientiam Caesari praestandam reduxit, & male multavit multos Guelphicarum partium principes. Tum Antonius Fissiraga, quem saepius nominavimus, in patriam redeundi potestate ab Imperatore impetrata, cum castella pagosque Laudensis agri ad rebellionem concitavisset, eosque in fide Guelphorum contineret non contra Caesarem tantum, sed & contra Laudenses Gibellinos, qui in urbe erant; Vernerius ille magno cum exercitu advenit, quem magnam partem ipsi subministraverant illae civitates, quae pro Caesaris partibus foedus inter se inierant, & brevi tempore totum agrum Laudensem recepit, multosque captos Laudam in carceres misit. Deinde dum Guelphi terras infestare hostium moluntur, subito Vernerius, qui ingens agmen militum secum trahebat, obviam illis est factus, tantoque eos cum ardore invasit, ut ocyus acie rupta in fugam agerentur. Hinc Vernerius cum versus Placentiam movisset, & eodem Antonius quoque Fissiraga & Philippus Langosus, qui Placentiam urbem ad rebellionem contra Imperatorem concitare studebant, tenderent magno validoque cum exercitu, quo consilium suum perficerent; utrinque ad arma ventum, tantaque fortitudine pugnatum est, ut diu prorsus anceps fuerit praelium, quo tamen Caesarei denique superiores evaserunt, & Fissiraga ac Langosus suis fugatisque copiis suis capti & Mediolanum abducti sunt in potestatem Matthaei Vicontii.

Sed Henricus Imperator dum hoc eodem ferme tempore debellare molitur Robertum, Siciliae regem, & hostem suum capitalem, atque ingens Guelphicae factionis columnen, eumque in finem maximas terra marique vires contrahit, vehementissima febris correptus è vivis excessit anno MCCXCIII. Erecti sunt hoc casu Guelphi ad spem melioris fortunae, maxime cum à Clemente V. Pontifice & Roberto Siciliae rege adjuvarentur, qui etiam Praefectus seu Vicarius Imperii in urbibus Italiae constitutus est. Sed ocyus haec eorum spes concidit morte Pontificis, ex qua Matthaeus Vicontius tantum sibi, ut nunquam alias, animorum sumpsit, factio autem contraria maxime metuere coepit ejus potentiam. Clementi V. successit Joannes XXII. qui adversissimus fuit Matthaeo Vicontio, adeo ut eum excommunicaret una cum liberis sociisque suis. Idem, quo facilius eum opprimeret, egit cum Henrico Flandriae Comite, qui tum temporis cum bona venia Imperatoris Laudam urbem tenebat, ut eam sibi traderet, ingentibus illi pecuniis muneribusque oblatis. Comes facile ad Pontificis se accommodavit voluntatem, maxime illud considerans, quandoquidem Lauda tanto intervallo remota esset à Flandria, ubi ipse possessiones suas terrasque habebat, admodum sibi difficile fore copias eo in subsidium mittere, si quando illa ab hostibus invaderetur. Itaque cum in Longobardiam magno cum militum numero advenisset, antequam Laudam pergeret, Mediolanum se contulit, ibique magna cum honoris specie à Vicontio est acceptus.

Sed dum hac de re Comitem inter & Pontificem agitur, Vistarini, qui Matthaei Gibellinorumque partes sequebantur, Laudae occupandae consilium inierunt, & feliciter perfecerunt. Cumque arce etiam potiti essent, ejectis urbe omnibus illis, quos Comiti favere suspicabantur, protinus Matthaeum per legatos certiores fecerunt omnium, quae gesta erant, eumque rogaverunt, ut ipsis significaret, qua potissimum ratione parta tueri possent. Et ille collaudatis Vistarinis protinus in subsidium pecunias copiasque lubens obtulit. Contra Henricus Comes, maximopere offensus, dolensque Laudae jacturam, graviter cum Vicontio de Vistarinis con-

querebatur. Sed ille, qui ab ineuntibus annis optime didicerat simulare, magnam quidem ea de causa doloris atque ægritudinis speciem præ se ferebat, multis tamen rationibus adductis persuadebat Comiti, pro re nata omnia ipsi esse dissimulanda, quandoquidem ad recipiendam Laudam, validis munimentis præfidiisque firmatam, non haberet vires idoneas.

Ita anno MCCCXXI. Bassianus Vistarinus princeps Laudæ factus est, eique Jacobus & Sucijs filii successerunt. Sed Henricus Laudæ recipiendæ anxie cupidus, ad Canem Franciscum de Scala respexit, qui cum maxime Veronam urbem summa cum potestate tenebat, eumque rogavit, ut Marchionem Spinettam Malaspinam, virum nobilissimum, mitteret Laudam, ubi ille multas habebat amicitias ac familiaritates, utque ita res istic componerentur, quo ipse in pristinam restitueretur possessionem. Venit Marchio Laudam, atque ibi à privatis simul & principibus urbis perhonorifice quidem acceptus est, sed consilium tamen suum perficere non potuit: adeoque Flandriæ Comes omni spe abjecta Mediolanum regressus est, ubi eum Matthæus Vicontius in speciem honorifice semper & amicissime habuit. Mediolani integrum illum annum Comes exegit, & deinde Montisferratam abiit, ibique adventum legati Pontificii expectavit. Ceterum varii acciderunt memorabilesque casus Matthæo Vicontio, qui præter cetera denuo etiam excommunicatus est à Pontifice: sed quia illi nihil magnopere ad nostram faciunt *Historiam*, exponere eos alienum esse ab instituto nostro arbitramur, adeoque lectorem, qui de iis cognoscere forte cupiat, ad illorum temporum historicos ablegamus. Decessit hic vir magnus, qui in vita sua expertus est variam fortunæ vicissitudinem, contra cuius malignitatem semper ille se prudenter munire scivit, anno MCCCXXII.

Successit illi in principatum Galeacius filius natu maximus, virtute atque animo non inferior patre, ut inter ipsa imperii sui initia fatis probavit. Nam voluntariorum duo millia & quingentos, militumque decem millia collecta ad liberandum Bassinianam castellum cum misisset, quod post obitum patris occupaverant Guelphi, in eoque collocaverant cum præsidio Raimundum Cardonam, qui jam constitutus erat Vicarius Pontificis in Longobardia; commisso prælio Vicontii exercitus Cardonæ copias fudit fugavitque, & castello hostes expulit. Hujus rei gestæ fortuna animis auctus Galeacius, cum Placentiam ab hostibus suis occupatam comperisset, adeo non turbatus est, ut constanti vultu suis faceret animos, iisque se ocyus eam urbem recuperaturum polliceretur. Sed cum aliud fere ex alio venire malum soleat, Galeacius paulatim ab suis est desertus, & postea adeo manifesta proditione circumventus, ut fuga salutem quærere consultum sibi videretur. Itaque Mediolano Laudam se recepit, ibique cum Vistarini, qui Laudam tenebant, quam poterant humanissime atque amicissime acceperunt, donec ille denuo ad Mediolani principatum revocatus est, quo etiam rediit eodem anno MCCCXXII. magno comitante militum agmine, quod securitatis & honoris causa ipsi addiderant Vistarini.

Florebat his temporibus Oldradus de Ponte, ex nobilissima apud Laudenses familia Jurisconsultus celeberrimus, qui primum Bononiæ, inde Patavii tanta omnium cum laude & applausu jurisprudentiam professus est, ut glorioso *Patris legum* cognomine ornaretur, & Romam etiam vocaretur ad eandem doctrinam, in quam egregios commentarios composuit, publice docendam. Hic cum causidicus Ecclesiasticus, seu *Consistorialis*, ut vocant, & causarum cognitor (*Auditores* vulgo dicuntur) factus

A esset, tantum gratia atque auctoritate valuit, maxime apud Joannem XXII. Pontificem, ut hic ipse potissimum uteretur opera in gravissimis Christianæ Reipublicæ negotiis componendis. Multa ille reliquit opera, manu sua conscripta, ex quibus hodie nihil aliud superest, quam doctissimum *Consiliorum* volumen, quod typorum beneficio in lucem editum est. Ad ultimum accitus Avenionem ad ejusdem scientiæ professionem publicam, vitam istic finivit a. d. vi. Id. Apr. anni MCCCXXXV. Sepultus est ante portam templi Patrum Prædicatorum sive Dominicanorum, ejusque sepulcrum duobus epitaphiis insignitum, quorum alterum temporum vetustate consumptum legi amplius non potest, alterum vero ita habet:

*Hic jacet Oldradus Dominus de Ponte vocatus
De Laude natus laus hujus, & ab omnibus notus
Fuit in jure doctus eximius vere pro cuius
Anima quisque Deum velit orare
Qui obiit an. 1335. die Luna Idus Mensis Aprilis
sexto.*

C Anno MCCCXXIV. parum absuit, quin Raimundus Cardona, qui, ut dictum est, Pontificis erat Vicarius in Longobardia, nostram urbem improvise impetu oppressisset. Subornaverat ille piscatores quosdam, qui cum aliud agere se, & per Adduam amnem piscari simularent, qui moenia urbis nostræ præterfluit, quidam eorum subruta murorum parte aditum in urbem aperuerunt: cumque mox à Cardona missi duces quidam cum copiis militaribus, & una ipsorum Laudensium aliisque Cremenensium exsulibus, per eundem aditum in urbem jam pervaderent, quasi miraculo quodam, ut ait Corius *Historia Mediolanensis* Parte III. detecti fuerunt à civibus, qui cum celerrime eodem loci concurrissent, certamine cum hostibus conferto, multos eorum interemerunt, interque eos quendam Barbaranum *Connestabulum*, & item alium ex Ecclesiæ ministris, qui *Maximi* dicuntur, præcipuos ducum. Alios autem cum cepissent, qui supererant, fortunæ loco duxerunt fuga salutem tueri: atque ita nostra urbs insidiis hostium est liberata.

D Anno MCCCXXVII. Mediolani, ubi adhuc in custodia asservabatur, fato functus est Antonius Fissiraga, pluries in hac *Historia* memoratus, qui, præterquam quod nos de eo narravimus, legitur etiam fuisse Florentinorum dux militaris. Corpus ejus translatum est Laudam, ibique sepultum in magnifico S. Francisci templo, quod ipse condiderat una cum monasterio: sicut Flora Treffena ipsius uxor religiosam S. Claræ ædem condiderat. Ad sepulcrum Antonii hoc legitur epitaphium:

E *Corde time Christum, corde, qui conspicias istum,
Servans jussa Dei, spem munda progeniei,
Nam jacet hac arcta fulgens ANTONIVS
Arca*

*De FISSIRAGA, moriens pro lege beata,
Nobilis, & Clarus, nec egenis Crux, nec avarus,
Militia præsul cunctis laudibus exul,
Urbis Curator, patria Laudensis amator,
Cui tu posce Deum veniam Cæloque trophaum.*

F Anno MCCCXXVIII. mirabili funestoque casu in urbe nostra sunt afflicti Jacobus & Sucijs Vistarini, Laudæ urbis principes. Hi inter ceteros ministros suos habebant quendam Petrum Temacoldum, cognomento *Seniorem*, patria Laudensem, & ex Castione castello oriundum, obscuro quidem genere natum, sed magni ingenii animique hominem, qui proinde tantum gratia valebat apud patronos suos, ut eum quæstorem palatii, sive *Cancellarium* suum constituerent, & ad præfecturam quarundam copiarum militarium promoverent, quin & ipsius fidei committerent ipsam portarum urbis custodiam: ut adeo ille juxta apud cives atque extraneos in magna esset auctoritate. Sed cum Sucijs Vistarinus, ut

Corius scribit *Historia Mediolanensis* Parte III. cujusdam Temacoldi cognatæ pudicitiam violavisset, tanta homo ille contra patronos suos exarsit ira, ut clanculum in urbem introductis mille quingentis hominibus, cum nocte quadam se ducem illis adjunxisset, per urbem discurreret armatus, magna-que voce una cum suis clamitans, *Vivat populus*. Hinc cum ad Vistariorum ædes accessisset, atque hi ingenti illo strepitu excitati eum interrogarent: *Quidnam, fili, hoc tumultus est?* ille nihil aliud, quam uni urbi unum sufficere dominum respondit, & verbo non addito protinus duorum principum manibus post terga religatis, eos una cum quatuor aliis suæ gentis in carceres abripuit, reliquis, interque eos Soncino omnium minimo, fuga elapsis. Sed Temacoldus, ipsos patronos suos libertate privavisse non contentus, mox variis modis excruciatos tormentis gravissimis misere fame enecavit. Atque hic providentiam justitiamque divinam mirari subit. Hic infelices nimiumque acerbi domini iisdem cruciatibus affecerant multos alios, audire gaudentes lamenta & miserabiles multorum miserorum voces, neque finentes illis quicquam omnino cibi porrigi, ut adeo fame illi misere languerent, & denique exspirarent. Itaque Deus, iudex justissimus, eadem ipsos etiam tormenta sustinere voluit, eodemque supplicii genere finire vitam, idque iussu hominis vilissimi, qui ipsorum quondam servus fuerat. Tum autem hicce homo, patriæ nostræ principibus sublatis, se proclamari Vicarium S. Ecclesiæ curavit. Sed deinde mutato animo Mediolanum ad Comitem Gulielmum de Monteforte, Imperatoris Vicarium, misit, eique significavit, sibi animum esse Laudam urbem in obedientia ac fide erga Imperatorem continere, Vistarinos se vita privasse testatus propter consilium, quod ipsi cepissent, legato Pontificis tradendi urbem. Veruntamen non admodum diu duravit hujus novi hominis tyrannis, si nullam aliam ob causam, at saltem ob natalium sordes intoleranda Laudensibus, qui cum ipsi patriæ regimen sibi vindicassent, a. d. ix. Cal. Oct. anni MCCCXXXV. consensu eam subjecerunt potestati Azonis Vicontii, Mediolanensium principis, & Galeacii filii natu maximi.

Hic cum anno MCCCXXXIX. decessisset nulla relicta prole mascula, Mediolanenses in ejus locum substituerunt duos patruos ejus, Lucinum & Joannem, quorum hic regimine ecclesiastico contentus, (erat enim Archiepiscopus Mediolanensis) totam potestatem administrationemque Reipublicæ Lucino fratri concessit, belli pacisque artibus principi præstantissimo. Sed nostris perniciofa admodum fuit hæc principatus mutatio. Cum enim Lucinus filium spurium haberet, nomine Brucium, eumque ad præfecturæ dignitatem apud Laudenses promovisset, in hoc munere obeundo ut superbum dominum sævumque hostem ille se gessit. Ut immensis sufficere sumptibus posset, quos una cum uxore facere consueverat, multos Laudensium possessionibus suis exuit, quibus deinde tractu temporis collocupletatum est majus nosocomium Mediolanense. Non aliam sequebatur in omnibus rebus normam regulamque, quam corruptissimos immoderatofque affectus suos. Ædes ipsius, quasi portus & asyllum flagitiosissimo cuique & sceleratissimo patebant. Denique quod à patre impetrari nequibat, lubens largiebatur filius: neque ab Lucino opem implorare, ac ne hiscere quidem saltem ad dolorem populò expulsum est urbe. Sed cum anno MCCCXLIX. hujus novi Neronis decessisset pater, ipse à furente populo expulsus est urbe, coque redactus, ut in Patavinis montibus misere moreretur in tugurio quodam.

Lucino in imperium Reipublicæ Mediolanensis successit Joannes frater, ejusdem urbis Archiepiscopus, qui anno MCCCCLV. Joanni Galeacio cognato

A castellum S. Angeli, quod in Laudensium finibus erat, item Montem bonum & Mairanum, quæ olim Mutius Vistarinus tenuerat loca, dono dedit. Sed non diu Mediolani imperio potitus est Joannes, & a. d. III. Non. Oct. ejusdem anni MCCCCLIV. fato functus est, Stephani fratris filiis, Matthæo, Bernabone, & Galeacio, heredibus relictis. Hi divisim inter se oppidis castellisque, quæ isto tempore ad Mediolanensem principatum pertinebant, Matthæo Lauda, Placentia, Bononia, Lugum, Massa, (olim *Herculis fanum* fuisse creditur) Bobium, Pontremulum, & castellum S. Donnini obvenierunt: Bernaboni Cremona, Crema, Soncinum, Bergomum, Brixia, Camuni, (nunc *Vallis Camonica*) Lona una cum tractu ad Lacum Benacum, (hodie *Lago di Garda*) Ripa alta, & Caravacium cum Ponte Vavari: Galeacio Comum, Novaria, Vercellæ, Asta, Alba, Alexandria, Dertona, Castellum novum, Bassiniana, Viglevanum, Pons Ticini, Castellum S. Angeli, Mons bonus, & Mairanum: Mediolanum & Genuam ab omnibus teneri conjunctim placuit.

Anno MCCCCLVI. decessit Matthæus, unus ex trium viris istis, non relicta prole mascula: adeoque ditionem ejus inter se diviserunt Galeacius & Bernabo fratres, sic ut huic Lauda nostra obveniret, ubi deinde anno MCCCCLXX. civitatis consensu arcem ille extruxit. Cumque multos ille haberet filios, & unumquemque eorum parte quadam imperii ac terrarum, quæ ad ipsum redierant, ornare cuperet, Marco dimidiam urbem Mediolanensem concessit: Ludovico Laudam & Cremonam: Carolo Parmam, Castellum S. Donnini, & Cremam: Rodolpho Bergomum, Soncinum, & Giarum Addux: Martino omnium minimo Brixiam assignavit & Camunos, (*Valle Camonica*) una cum tractu circumjacente, ejusque infirmæ ætati matrem subvenire sua prudentia voluit. Non minus erga uxorem suam, Reginam Scaligeram, munificum se probavit Bernabo, eique donavit Somalliam, Castellum novum ad Adduæ ostium, Roncalliam, Majanum, Montedradum, aliaque Laudensis agri loca. Sed dominabatur in suos ille Bernabo tanta cum acerbitate atque sævitia, ut eum abominarentur, non tantum qui ipsius imperio subjecti erant, sed & exteri remotique populi, adeo ut ad nomen ejus inhorrescerent omnes. Et filii quoque ejus nihil à patre degeneres, oppida illa, quæ, ut supra dictum est, cum imperio ipsi regebant, adeo affligebant vexationibus inauditis, ut eorum prorsus intolerabilis esset modis omnibus dominatio. Quin & contra Joannem Galeacium illi conspirationem inierunt, patrelem suum, qui Papiæ sedem habebat, ut eo sublato ipsi ditionem quoque illius ad se traherent. Sed detexit eorum consilia Joannes Galeacius, & ut salutis suæ prospiceret, in speciem totum sese religioni dedit, ita ut visitandis templis, aliisque ejusdemmodi rebus intentum, Bernabo ejusque filii contemptui ac ludibrio haberent, & ut pusilli abjectique animi hominem tractarent. Joannes propinquorum erga se contemptum callide dissimulans, cum satis longo post tempore opportunum ipsi videretur, religionis causa ad sacrum beatæ Virginis templum, quod vulgo *Montis* dicitur, & juxta Varense castellum est, se ire finxit, & Papiæ digressus cum armatorum manu, Mediolanum petiit, se hac opportuna occasione Bernabonem patruum ex itinere invadere velle dictitans. Hic itaque cognati sui adventu cognito, honoris causa Ludovicum & Rodolphum filios illi obviam misit, & mox ipse etiam, licet fidissimi suorum eum ab hoc consilio abducere studerent, profectus est, ut illi occurreret, eumque tanto majore honoris atque affectus specie reciperet. Sed cum ad nosocomium S. Ambrosii extra portam Vercellinam accessisset Bernabo, & eodem quoque Joannes Galeacius, cognatus ejus, loco

loco amicarum invicem gratulationum Joannes Bernabonem & una duos filios ejus comprehendi jussit prid. Non. Maj. anni MCCCLXXXV. & castello portæ Giobbiae, quod ipse Joannes custodia tenebat, & inde Trecio castello inclusit. Hic infelix Bernabo reliquum vitae captivus exegit, & veneno, ut nonnulli volunt, sublatus est a. d. xv. Cal. Jan. ejusdem anni. Postea Joannes Galeacius Mediolanum intravit, & summo in urbem potitus imperio, reliquis filiis Bernabonis fuga elapsis, multisque ejus aulicorum ac ministrorum in custodiam datis, plerosque vicinorum Principum his de rebus certiores fecit.

Nostra civitas, cognito Joannem Galeacium in Mediolanensi Principatu plenissime confirmatum, & ipsa se tertio post die ejus imperio subjecit, dato, ut moris est, fidelitatis jurejurando ipsis Cal. Maj. anni MCCCLXXXVIII. quo multae Italiae urbes, interque eas & nostra, atrocissima sunt afflictæ pestilentia. Deinde Joannes Galeacius, tantarum terrarum felix dominus, petiit & impetravit etiam ab Venceslao Imperatore coronam titulumque Ducis, atque hanc in rem amplissimum diploma Cæsareum ad eum detulit Benefius, Cunsingii Comes, pro quo eum Cæsari centum millia florenorum aureorum repræsentavisse nonnulli dicunt. Deinde ipsis Non. Sept. anni MCCXCV. ut vult Corius *Historia Mediolanensis* Parte iv. in urbe Mediolano novi Ducis coronatio peracta est insigni cum pompa, apparatuque & magnificentia.

Anno MCCXCIX. variis in locis, veluti Mediolani, Papiæ, Laudæ, & vicinis tractibus prodigia in cælo visa sunt insolita. Per plures horas sol clarus parum aut nihil fere splendoris emittere visus est: interdum ignem & scintillas micantes misto fumo ad instar fornacis evomere: nonnunquam cæruleum, mox alium iterum assumere colorem. Atque hæc portenta Antonius Meravillia Jurisconsultus se ipsum vidisse scribit, cui Laudæ Vicarii munere fungeretur.

Defuncto Joanne Galeacio, cum novum Ducis titulum & coronam rebus satis prosperis obtinuisset per septennium, filii ejus secundum divisionem ab ipso factam in paternas ditiones successerunt. Natus maximus Joannes Maria Mediolani Ducatum, tum præterea Laudam, Cremonam, Comum, Placentiam, Parmam, Regium seu Forum Lepidi, Bergomum, Brixiam, & quæ hinc ad amnem usque Mincium sunt, accepit: alter Philippus Maria Papiam, Novariam, Vercellas, Dertonam, Alexandriam, Veronam, Vicentiam, Feltriam, Belunum, Bassanum una cum tractu Tridentino ad eundem usque amnem: Gabriel, & ipse Joannis Galeacii filius, sed non legitimus, Pisas accepit & Cremam. Sed Joannes Maria quidem non modo parum prudenter suum administrabat imperium, sed & adeo invisa miseris populis cum acerbitate, ut multæ civitates ab ipso deficerent, & diversis earundem principibus viris subjicerentur. Ita Cavalcabi Cremonam sibi vindicaverunt, Suardi Bergomum, Rusca Comum, Arcelli Placentiam, & alii alias urbes, ut videri potest apud illorum temporum scriptores. Et nostra quoque civitas non ex ultimis fuit illarum, quæ nimium grave servitutis jugum, quo eas premebat Joannes Maria, cervicibus suis excusserunt. Gravissimis enim inter Guelphos & Gibellinos, quorum partes Joannes Maria sequebatur, contentionibus exortis, cum Guelphi prævalerent, & ex Gibellinis præter ceteros oppressi essent Vistarini, quorum nonnulli publice cremati fuerunt, eorumque domus dirutæ; quidam Antonius Fissiraga, diversus ab illo, quem supra sæpius memoratum, anno MCCXXVII. fato fuisse functum diximus, inimicus Vistariorum, & Guelphicarum partium caput, per aliquot menses Laudæ urbis tenuit imperium.

A Sed & vexatus est Joannes Maria Vicontius iidem hisce temporibus à Bonifacio IX. Pontifice, qui ad Ecclesiæ imperium retrahere studens urbes illas, quas ejus pater Joannes Galeacius occupaverat, geminum contra Joannem Mariam strinxit telum. Cumque populos exhortatus esset, ut se ejus dominationi eximerent, nostri quoque missis legatis ad Balthasarum Cossam, Cardinalem & legatum Apostolicum, qui cum maxime Bononiæ commorabatur, ab eodem soluti sunt jurisjurandi religione, quo fidem suam Joanni Mariæ obtrinxerant, & exempti quoque aliis notis omnibus, quæ ipsis possent infligi olim, quod se Ducis imperio subtraxissent. Quin & idem legatus copias Pontificias ad Parmam usque deduxit, quo nostris, si usus veniret, subsidium ferrent ad consilium suum perficiendum. Sed ille Fissiraga quomodo vitam finierit, de eo non consentiunt inter se scriptores. Corius in *Historia Mediolani urbis*, Parte iv. eum veneno sublatus vult opera Joannis Viniati Laudensis, qui ex tenui fortuna, & natalibus satis obscuris, ut idem Corius dicit loco citato, eo jam provectus erat, ut se Fissiragæ in Laudæ urbis imperium sperare posset successurum, ut & factum est. Veruntamen Defendens Lodus, harum rerum scriptor accuratissimus, in *Dissertationibus Historicis*, Dissert. x. rejicit opinionem Corii, & Viniatum jam istis temporibus ex primis & potentissimis nobilium Laudensium fuisse asserit, cumque ad imperium patriæ non aperuisse sibi iter tanto scelere, ut veneno decessorem suum interciperet; sed Fissiragam, sive quod urbem subjicere iterum Joannis Mariæ, Mediolani Ducis, dominationi studuerit, Laudensibus omnino invitis & adversis, sive quacunque alia de causa, ab ipsis civibus non imperio tantum, sed & libertate, & forte etiam vita privatum: eaque occasione Joannem Viniatum, quod virtute & ingenio plurimum valeret, Laudæ imperium suo sibi Marte quæsisset, quod factum est a. d. ix. Cal. Dec. anni MCCCCIII. Quidam addunt; inter quos idem Defendens Lodus loco citato, & *De rebus gestis Joannis Viniati, principis Laudensis*, eum Vercellis quoque & Alexandria potitum. Florentinæ Reipublicæ magistratus, cum Viniatum ad Principatum Laudæ provectum comperissent, sive ex faina, sive ex ipsius literis, legatos ad eum miserunt, qui illi suo nomine gratularentur. Etiam in epistola quadam, a. d. xvii. Cal. Jan. ejusdem anni ad eundem Viniatum lingua Latina conscripta iidem magistratus Principi nostro multa dant consilia atque præcepta, quibus diu, ut illi Florentini dicunt, magnaue cum gloria partum tueri posset imperium. Non defuit fortunæ suæ Joannes, & ut tanto magis se confirmaret in recenti potestate, externa circumspexit auxilia, Margaretha sorore sua data in matrimonium Octavio Rusca, qui una cum Francino fratre Comum urbem imperio regebat: item filiam suam Carolo Cavalcabo, qui in Cremonæ Principatum Ugolino successerat.

Anno MCCCCIV. Viniatus cum Comensi principe, eodemque affini suo, consilium iniit occupandæ Mediolani urbis: & cum ita convenisset, ut Rusca multis cum copiis per portam novam intraret in urbem, Viniatus per Romanam, prior quidem recte partes suas est exsequutus, sed nimium cunctatus est cum suis advenire copiis Viniatus. Itaque Joannes Maria cum subito accurrisset ad tumultum, non tantum Comensium sustinuit impetum, sed & repulit eos, ita ut Rusca & Viniatus, qui sero accesserat, fortunæ loco ducerent, ad fossas urbis, & inde domos suas se recipere posse. Atque adeo hoc consilium successu caruit, quem alioqui scriptorum testimonio prosperum sine dubio habuissent, nisi per Viniati cunctationem Jo-

ni Mariæ, Duci Mediolanensi, tempus superfuisset ad multos nobiles militesque colligendos, hostemque repellendum. Quanquam autem consilium suum non perficere potuerunt Viniatus & Rusca, tamen adeo arduam suscepisse expeditionem, multum eorum famam atque auctoritatem auxit: adeo ut in rem suam esse videretur Duci Mediolanensi, cum Laudæ principe inducias pacisci mensium quatuordecim. Quin & tantum cepit incrementi apud alios Principes ejus existimatio, ut Michaël Stenus, Venetorum Reipublicæ Dux, una cum ejusdem civitatis majore consilio eum anno mccccvi. posterosque ejus omnes in nobilium Venetorum adscisceret numerum, quem honorem ista Respublica potentissimorum Principum familiis, & ipsis etiam dignitatis regiæ personis solet impertire. Inde Gabrini Fondulli conjuratione patefacta, qui in convivio quodam occiderat Carolum Cavalcabum in Macastorma castello, Viniatus sibi mortem generi ulciscendam ratus, ac hostem se Gabrini professus, justo cum exercitu contra eum movit: & protinus occupato Macastorma castello, armis processurus erat ulterius, nisi Venetiarum Dux se interposuisset, qui se controversiis inter Viniatum & Gabrinum intra biennium dirimendis obtulit arbitrum, ita ut prorsus interim cessaretur utrinque ab armis. Quin & induciis, quæ inter Ducem Mediolanensem & Viniatum constitutæ erant, in alios menses quatuor prorogatis, Laudæ dominus, cum secure ac tranquille suo frui imperio, & itidem cives suos pace otioque beare cuperet, lubens cum Philippo Maria Vicontio, Mediolanensis Ducis fratre, armorum pactus est inducias, quæ ad solennem buccinarum sonitum publicatæ sunt a. d. vii. Id. Jan. anni mccccviii. Mox a. d. xiii. Cal. mensis ejusdem novæ sunt induciæ constitutæ in triennium duosque menses inter eosdem: id est, Joannem Mariam, ejusque fratrem, Papiæ Comitem, & Viniatum, Laudæ Principem. Sed hæc quidem novis contentionibus intervenientibus non diu duraverunt: & adeo Viniatus utile sibi ratus illas rumpere, denuo Mediolanensi Duci bellum indixit, gessitque prospera primum fortuna. Nam cum anno sequenti Melenianum oppidum una cum castello occupasset, iterum positis armis induciæ inter duos istos principes sunt publicatæ, ab viii. Cal. Jun. anni mccccx. usque a. d. iii. Non. Jul. anni sequentis duraturæ.

Eodem anno Joannes Viniatus Antonium fratrem amisit, suarum copiarum ducem summum, qui diem supremum obiit a. d. xi. Cal. Oct. Sed auxit quoque feliciter imperium suum Viniatus, Laudæ, quam tenebat, adjecta Placentia, non ex infimarum numero urbem, quam pecunia sua emit ab Antonio, Hostenduni domino, & Francorum duce militari, qui eam Philippi Mariæ Vicontii, Papiensis Comitis, nomine tenebat. Abunde hoc probant nummi argentei, qui hodieque supersunt, & ab una parte impressa habent Viniatæ gentis insignia, ab altera effigiem S. Bassiani & S. Antonini, quorum hic Placentiæ, ille Laudæ urbis patronus five genius tutelaris est. Præterea publicum & authenticum superest instrumentum, ab Ludovico Abbone confectum, quo idem Hostenduni dominus plenissime sibi testatur satisfactum pretii nomine, quod ipsi pro urbe Placentia debebat Viniatus. Ceterum idem hic Joannes adeo abundabat auro, ut anno mccccxi. a. d. xv. Cal. Oct. Rufino Recannino, patria Mantuano, monacho, & ex ordine S. Joannis viro nobili, gratis commodaret duo aureorum ducatorum millia, quæ pro istorum temporum conditione ingens erat pecuniæ summa.

Ceterum non satis prospere ad ultimum Joanni cessit coeptum cum Duce Mediolanensi bellum, qui ipsi iterum ademit oppidum castellumque Melenia-

num. Atque hæc victoria solenni festivitate celebrata est in urbe Mediolano, ineunte Januario mense anni mccccxii. Sed non diu hoc gaudium constitit Joanni Mariæ Duci, qui postrid. Id. Maj. ejusdem anni misere vita privatus est à multis conjuratis, inter quos & nonnulli ex ipsius aulicis ac familiaribus erant, ut Corius *Historia Mediolanensis* Parte iv. alique prolixè narrant. Successit illi in Ducatum Philippus Maria frater, Papiæ Comes, inter quem & Joannem Viniatum induciæ mensium octodecim sunt constitutæ, adjecta conditione, ut uterque interim eosdem amicos inimicosque haberet. Effectum hoc est per Ludovicum, Joannis filium, qui Lauda Mediolanum se ea de causâ contulerat.

Anno mccccxiii. mense Januario, Leonarda, Joannis filia, in matrimonium juncta est Bartholomæo Malaspinæ, Nicolai filio, ex cujus sponsi sponsæque, ut & parentum utrinque titulis, quibus illi in sponsalibus ornantur, cognosci potest, quanta temporibus istis fuerit harum duarum familiarum potentia. Sed cum Joannes urbem Laudam tenere cuperet Imperatoris etiam voluntate & consensu, qui tunc temporis erat Sigismundus, a. d. xvii. Cal. Febr. anni ejusdem procuratores, qui à Cæsare amplissimam in Laudensi principatu confirmationem sibi impetrarent, constituit, idque singulos plena cum potestate, sive *in solidum*, Brandam Castilionem, S. Clementis Cardinalem, & Placentiæ episcopum; Jacobum Arigonem, patria Laudensem, & ejusdem urbis episcopum; Comitem Piponem Ocioram, summum Cæsarearum copiarum ducem; Abbatem Safforiensem, & Hugonem de Hertfort, virum nobilem, & natione Germanum, qui Cæsaris in Italia legati erant: tum Matthæum Visdominum, patria Placentinum, & causarum inter ecclesiasticos patronum, sive *Advocatum*, ut vocant, *Consistorialem*; Jacobum & Ludovicum, filios suos; Massæum Mucianum, Ludovicum, seu Aloisium Bocconem, & Betinum Vitalem, nobiles Laudenses. Et adeo Cæsar fuit pronus in ipsius favorem, ut eodem anno talem ab illo confirmationem in nova potestate acciperet, ut ampliorem aut prolixiorum ne votis expetere quidem posset, quemadmodum satis apparet ex ipso diplomate Imperatorio, dato *Mirembergi* prid. Non. Mart. quo Sigismundus apertis verbis primum Viniati virtutes commemorat, ejusque erga Imperium fidem, ut & facta ad utilitatem ejusdem, & deinde eum confirmat in Principatu Laudæ ad hunc modum: *De tuis justitia & fidelitate confisi, & ut evellas, destruas, dissipas, & disperdas, adifices, & plantes, sicut justitia & rationis ordo requirunt. Te, liberosque tuos legitime descendentes, & heredes tuos, animo deliberato, propriique nostri motus instinctu, non per errorem, aut perinde, &c. Sacro Principum, Comitum, Baronum, nobilium, & fidelium nostrorum accedente Consilio, ac Romana Regia potestatis plenitudine, ac de certa nostra scientia, & nostri Imperii Sacri, &c. Civitate Lauda, ac ejus districtu, Episcopatu, & Diocesi, cum totis fluminibus Abdua, & Lambri, undequaque ubique sint, vel decurrant, ac cum omnibus aquis, & aquarum ductibus decursum habentibus vel habere solitis per dictum Episcopatum Lauda, Diocesi, & districtu, & pertinentiis, Dominum, & Dominos ordinamus, facimus, creamus, & constituimus per presentes. Dantes ex nunc & concedentes tibi, heredibusque tuis plenam, liberam, & omnimodam auctoritatem, jurisdictionem generalem, & specialem, ac gladii potestatem, merum, ac mixtum Imperium: & quæ sequuntur.*

Schismate his temporibus laborabat orbis Christianus quoniam tres infimul erant, qui se veros esse Petri successores Christique vicarios asserbant: nempe Petrus de Luna, Hispanus, qui se Benedic-

etum XIII. Angelus Corrarus, Venetus, qui se Gregorium XII. & Balthazarus Cossà, qui se Joannem XXIII. dici volebat. Ad liberandam hoc pernicioso diffidio Ecclesiam in Laudam urbem Joannes XXIII. & Sigismundus Imperator convenerunt, quorum hic splendido Joannis Viniati, Principis Laudensis, utebatur hospitio, ille Jacobi Arigonis, civis Laudensis, & ejusdem urbis episcopi. Celebravit in majore five cathedrali, ut vocant, templo nostro, ad S. Bassiani aram, infra *Chorum* sitam, natalem Servatoris nostri noctem Pontifex, & ipse Imperator in ista *Missa* solenni munus obiit diaconi, cecinitque euangelium, *Exiit Edictum à Cesare Augusto*, &c. Novissime hinc duo supremi principes constituerunt, ut in urbe Constantia Concilium celebraretur, ad quod Ecclesiae divinae proceribus convocatis totus populus Christianus ad obedientiam unius capitis Christique Vicarii revocaretur. Hic conventus ecclesiasticus cum Laudae quoque publicatus esset a. d. v. Id. Dec. ejusdem anni, Pontifex & Imperator, qui in eadem urbe per duos menses Viniati Principis & Arigonis episcopi hospitio fuerant usi, antequam inde abirent, monumento quodam relicto testari voluerunt, sibi grata acceptaque esse benevolentiam illam atque honorem & officia, quibus eos prosequuti erant Laudenses. Itaque Pontifex aram S. Bassiani, ad quam ipse *Missam* celebraverat, plenaria & perpetua indulgentia, five remissionis peccatorum potestate ditavit. Imperator autem a. d. iv. Cal. Jan. magna cum pompa in templo cathedrali, eodem summo Pontifice, multisque Cardinalibus & Principibus proceribusque Imperii coram, Viniatum nobilitate armisque eam in rem solennibus suapte manu ornavit, renovata insuper Principatus Laudensis confirmatione, Comitisque titulo ipsi addito.

Sequenti anno mccccxiv. ineunte mense Januario, Pontifex & Imperator Lauda Placentiam abierunt, quo se contulit etiam, ut ex Cavitellii *Annalibus Cremon.* colligitur, Viniatus, Laudae Comes, eosque serius ipso eodem advenientes maximo cum honore excepit quam officiosissime, oblati etiam Sigismundo clavibus urbis, ejusque praesidio Caesareis militibus demandato. Neque tamen verum est, quod Corius dicit in *Historia Mediol.* Parte iv. jure refutatus à Defendente Lodo, nobili & erudito scriptore Laudensi, in *Dissertationum Hist. decima*: nimirum Placentiam urbem omnino donatam fuisse Imperatori. Nam, ut idem Lodus observat, Viniatus Comes paulo post interveniente scriptorum fide Jacobo & Ludovico filiis potestatem concessit, fidei & obedientiae jusjurandum exigendi à praefecto, rectore, ducibus militaribus, aliisque, qui erant, quique futuri essent magistratus Placentinae urbis arcis, portarum, aliarumque munitionum intra fines ejusdem. Atque hanc in rem solenne instrumentum manu Ludovici Abbonis est confectum prid. Cal. Mart. anni mccccxiv. Quin etiam ex publico quodam scripto, quod Cremonae datum est Idib. Jan. ejusdem anni, manifeste idem colligitur: quandoquidem in eo se obligat Sigismundus, se Placentiam una cum omnibus munitionibus ad eam pertinentibus Joanni Comiti restitutum intra anni spatium, aut etiam ante, quam primum ipse in Germaniam regressurus esset. Certe igitur nihil aliud quaesivit Imperator, quam ut tutum sibi suisque haberet receptaculum, mansionemque commodam, quamdiu ipse in Italia commoraretur.

Deinde Placentia Imperator profectus est Constantiam, ut istic Concilio interesset, de quo supra diximus. Refert Corius *Historia Mediol.* Parte iv. ante abitum ejus inter ipsum & Viniatum Comitem convenisse, ut Mediolani Ducem armis deprime-

rent. Itaque Jacobus, ejusdem Comitum filius, (ut Georgius, à Lodo citatus in *Dissert. Hist.* & idem Corius loco allegato testantur, licet non consentiant in eundem annum) ad Melenianum profectus est hoc animo, ut castellum illud ex improvviso opprimeret ex pacto, quod inter ipsum & Carmaniolam, summum Mediolanensis Ducis copiarum praefectum convenerat. Sed in fraudem inductus est miser ille, & captus ab eodem Carmaniola, atque ita in potestatem Duci traditus a. d. xiv. Cal. Sept. anni, ut proxime ad verum accedere videtur, mccccxv. Sed in diversa abeunt Scriptores in hujus infelicitis juvenis captivitate referenda. Alii eum in ipsa urbe Lauda fuisse captum volunt, ibique non ipsum tantum, sed & patrem ejus ac fratrem Ludovicum proditione circumventos fuisse. Alii vero, eum per insidias extra portam Regalem ejusdem urbis deductum, tum postea comprehensum, & Mediolanum in captivitatem abreptum. Mihi maxime omnium illud fit verisimile, quod supra dictum est ex Georgii Corii auctoritate. Jam quanto cum gaudio Philippus Maria, Dux Mediolanensis, hunc acceperit captivum, colligi potest ex odio isto implacabili, quod primo inter decessorem suum, deinde inter ipsum & Joannem Comitem, Jacobi patrem, intercesserat. Quin & cogitavit ille filio uti ad ipsum patrem, Joannem Comitem, in potestatem suam redigendum, quo istis eum multaret infortuniis, quae post exponentur. Hunc itaque in finem mota anno mccccxvi. controversiarum componendarum mentione, denique inter duos hosce principes pax facta est, maxime opera Comitum *de Virtù*, natione Galli, cognati sui, Astaeque domini, his conditionibus:

Ut Dux Joannem Comitem in imperio Lauda finiumque ejus urbis confirmaret cum omni solita jurisdictione ac prerogativa, hac tamen lege, ut ipse haecenus Duci subjectus esset, ut ex sola voluntate aliis bellum faceret, aut pacem induciasve constitueret.

Per biennium ad servitium Ducis paratos haberet trecentos & quinquaginta hastatos, isque eorum opera posset uti per sex menses utroque anno.

Gratis in libertatem restitueret Jacobum Lonatum, Seccum de Montaniana, & Antonium Cornacianum, una cum uxore liberisque Joannis de Cremona.

Ab omnibus, Ducis imperio parentibus, nonnullis istud vectigal posset exigere, quod illi solvissent jam temporibus patris sui, primi Ducis Mediolanensis.

Juxta ecclesiastici & politici ordinis homines, eidem Duci subjecti, sine controversia possessiones & praedia tenere possent in agro Laudensi.

Eidem Duci omnia restituerentur, quae primus Dux Mediolanensis in eodem agro possedisset.

Liberum per urbem finesque Laudensium pateret inter omnibus Ducis copiis militaribus, easque tum Viniatus Laudensium hospitibus exciperet.

Omnes haec conditiones à consilio majore Laudensis ratæ haberentur.

In manus Ducis traderetur scriptum illud Imperatoris, sive literarum obligatio, ad Placentiam urbem spectans.

Civibus Mediolanensibus temporis mora nullo esset damno in negotiis istis, quae Lauda ipsi haberent, à morte primi Ducis ad hanc usque pacem compositam.

Sed omnium maxime illud urgebat Philippus Maria, ut Joannes Viniatus polliceretur se Mediolanum iturum, quo istic confirmarentur rataeque haberentur pacis conditiones, atque ipse Duci jusjurandum fidelitatis praestaret. Contra autem Dux spondebat, se filium Joanni Comiti restitutum, ita tamen, ut per proximum adhuc biennium ille maneret Astae in potestate Comitum Virtutum, (*di Virtù*) qui istam urbem imperio tenebat: sique isto temporis spatio Viniatus pactorum fidem violavisset, Comes filium ejus denuo captivum in manus tra-

tradere Ducis cogeretur : contra autem , si Dux foederis leges non impleffet , Jacobus protinus liber esset , & ad patrem remitteretur. His itaque conditionibus firmata pace , Laudæ princeps Alexium , qui ipsi à Secretis erat , Mediolanum legati loco misit , ut ibi nomine suo iusjurandum præstaret , pactisque subscriberet , ut & factum est prid. Id. Oct. ejusdem anni mccccxvi. Comite Virtutum coram. In solenni pactorum libello hæ subscriptiones apparent : *Philippus Dux* , & paulo infra : *Comes Virtutum* , tum denique : *Franchinus* , *Urbanus* , *Alexius Orator*. Ceterum ad implendas prædictas pacis leges scribit Antonius Campus *Historia Cremonensis* lib. III. hoc eodem anno foedus fuisse factum inter Ducem Mediolanensem , Viniatum Comitem , Ruscum , Comi dominum , aliosque , ad Fondullum , Malatestam , aliosque principes bello petendos.

Interim Joannes Comes cum ferre amplius non posset Jacobi filii orbitatem , neque suapte prudentia in consilium adhibita , neque monitis & sapientibus amicorum , & maxime Florentinæ Reipublicæ , consiliis auscultans , motus amore patrio Mediolanum se contulit , ut ibi Philippo Duci fidem suam jurejurando obstringeret , ab eoque in principatu Laudæ Comitatus titulo confirmaretur , & imprimis , ut filium videret , eumque Philippi Mariæ manibus eriperet. Acceptus ille fuit Mediolani insigni cum magnificentia , habitusque splendidissime , ut asserit Georgius , à Defendente Lodo citatus loco allegato ; deditque ipsi Philippus Maria tanta benevolentiae atque amoris indicia , ut nihil ultra posset desiderare Viniatus. Renovata fuit pax , prædictæ conditiones ejusdem ratæ habitæ , fides juramento obligata Philippo Mariæ , & Joannes solenniter confirmatus in principatu Laudæ. Sed dum gaudia & mutua utrinque amoris fiducia in summo esse fastigio videntur , Viniatus parum cautus à Philippo Duce in arcem ad portam Giobiam deductus est , ibique in coenaculo quodam solus relictus , & mox comprehensus & in carcerem abreptus ab Oldrado Lampuniano , primo aulicorum , intimoque Ducis , eodem anno mccccxvi. Non desunt Scriptores , qui , ut Vicontium proditoris infamia librent , Viniatum asserunt illis ipso tempore , quo fidem illi suam obstrangebatur , contra ipsum conspiravisse cum ejus inimicis , & imprimis cum Malatesta , ut eodem tempore fama fuit in aula Ducis , interque Mediolanenses. Sed parum hoc est verisimile : neque enim Viniatus , si talium rerum conscientia fuisset oneratus , videtur adeo imprudenter tantoque tempore se ultro commissurus fuisse tam potentis principis potestati. Atque adeo non ita res nova aut mira foret , si ipse Dux , ut famæ suæ consulere , ex suo cerebro in vulgus emisisset hoc , quod diximus. Addunt nonnulli Scriptorum , post Viniati Comitatus captivitatem multas misisse Ducem copias ad Laudam urbem occupandam , & eodem ipsum quoque captivum abductum , ut Laudenses , si principem suum in ista viderent calamitate , tanto facilius suis cedere armis animum inducerent ; sed Laudenses urbe egressos fortiter quidem cum hostibus pugnasse , ultimaque expertos , quo illum eorum manibus eriperent , ad ultimum tamen adactos urbem suam & una Joannis Comitatus filium natu secundum ipsis dedere. Utcunque tandem hæc sint , in eo omnes consentiunt , capto Comite Laudam urbem in Philippi Mariæ Ducis potestatem concessisse , & item secundum , quem diximus , ejus fi-

lium Ludovicum. Ad hunc modum ex improvviso Mediolani captum infelicem Comitem Viniatum Corius dicit *Historia Mediolanensis* Parte iv. & iussu Ducis Papiam fuisse abductum , ibique in caveam ligneam conclusum ; cumque contumeliosam in publico mortem parari sibi vereretur , ad desperationem adactum ita caput allisisset ad ejusdem caveæ trabes , ut misere exanimaretur a. d. v. Cal. Sept. ejusdem anni. Hoc comperto Dux mortui cadaver omnino Mediolanum voluit advehi. Hoc facto cum illud in eum locum esset deductum , ubi damnatorum sententiæ publicari solebant , habito judicio pronunciatum est , Viniati corpus publice suspendendum infami patibulo , & ita quoque factum est , multis præterea aliis indignis contumeliis eidem corpori illatis. Hunc infelicem vitæ finem denique tantus ille vir habuit , per tredecim annos secundam semper fortunam expertus , & ad eam dignitatem ac potentiam proventus , quam in hac *Historia* exposuimus. Quod si verum esset , quod Corius alique narrant , nosque supra refutavimus , nimirum eum ad potentiam sibi iter aperuisse per Antonii Fissiragæ mortem , eumque veneno sustulisse , agnoscendæ in hac Viniati calamitate forent illæ , quibus Deus vindex iustissimus persequi malefacta solet , poenæ. Filii hujus infortunati patris eadem hac fortunæ clade periisse credi possunt , quia post hoc tempus nulla amplius eorum mentio occurrit. Neque tamen interiit in urbe nostra gens Vinatorum , quin è contrario semper illa floruit , & floret hodieque , semperque egregios dedit & in literarum armorumque tractatione viros excellentes. Sicut multis ante annis , quam Joannes principatum Laudensem obtineret , Cilius , seu , ut alii eum vocant , Ægidius Viniatus anno mccccxxiv. Laudis Pompejæ veteris fuit episcopus , & deinde anno mxxi. Ardericus Viniatus eadem sede episcopali potitus est ; ita Ambrosius Viniatus , vir nobilis & Comes , inter Jurisconsultos primum locum tenuit , ut abunde apparet ex doctissimis libris ejus manuscriptis , & typorum beneficio publicatis , ut & ex eo , quod in Academiis publice jurisprudentiam docuit Augustæ Taurinorum , Bononiæ , aliisque in urbibus. Multi quoque alii nobilissimæ hujus gentis principes muneribus functi sunt amplissimis , togisque senatoriis , atque aliis titulis honoribusque eximii ornati , quos lubens prætereo , cum non sit nostri res instituti nobilium familiarum Laudensium claritatem exponere.

Paruit Philippi Mariæ Vicontii , Ducis Mediolanensis , imperio nostra civitas , quamdiu ille vixit , hoc est , ad annum usque mccccxlvii. Et toto hoc temporis spatio , quo nostris pace profundoque otio frui licuit , nihil quicquam apud Scriptores reperio gestum fuisse memoria dignum , quod ad nostram patriam pertineat , præterquam quod ad Martinum Garratum , patriam Laudensem , attinet. Hic floruit anno mccccxxviii. & sequentibus , tanti nominis famæque Jurisconsultus , ut in æternum gloria sit victurus per eximios libros ab ipso conscriptos , quibus merito inter eruditissimos jurisprudentiæ doctores locum ille habet. Memorabile etiam est , quod Pater Innocentius Biniamus Laudensis in *Annotationibus Hist. de Lauda urbe* scribit accidisse anno mccccxlv. nempe Adduam annem adeo immodicum intumuisse aquis , ut præter gravissima alia damna , vicinis terris illata , ipsum quoque torrente suo pontem superaverit , in eodem flumine exstructum extra portam illam , quæ *Adduæ* dicitur.

JOANNIS BAPTISTAE VILLANOVAE LAUDIS POMPEIAE,

S I V E

LAVDAE (nunc LODI) Urbis HISTORIA.

LIBER QVARTVS.



A NNO MCCCXLVII. ipſis Id. Aug. poſt mediam noctem hora fere ſecunda, è vivis exceſſit Philippus Maria Vicontius, ultimus ex hac nobiliſſima familia Mediolani Ducum: cumque ille nullam omnino prolem legitimam reliquiſſet, incertum erat, quis potiſſimum illi ſucceſſurus eſſet in imperium. Videbatur jure ad Imperatorem pertinere Ducatus Mediolanenſis, tanquam beneficium ſeu feudum coronæ Imperatoriæ. Contra alii putabant, à defuncto Alphonſo, regem Neapolitanum, fuiſſe heredem inſtitutum: & in urbe Mediolano jam præfecti quidam aliique viri militares prompti erant ad aſſerendum jus cauſamque regis illius. Tum Franciſcus Sfortia, qui in matrimonio habebat Blancam Mariam, Philippi Mariæ filiam ſpuriam, & ab eodem quoque adoptatus erat; ad dominium terrarum adſpirabat, quas focer ipſius tenuerat, & armorum vi, quibus multum ipſe valebat, illarum ſibi poſſeſſionem vindicare deſtinabat. Etiam Carolus, Dux Aurelianenſis, qui ex Valentina, Joannis Galeacii Vicontii, primi Mediolanenſium Ducis, filia natus erat, jure ſibi hunc nobiliſſimum Ducatum deberi credebat. Hinc cum omnia in ipſa urbe metropoli eſſent perturbatiſſima, præfectis militariſus ac nobilibus, & toto adeo populo, in varias partes diſtractis, poſt varias turbas, quæ nihil ad nos attinent, denique Mediolanenſes nulli ſe in poſterum principi ſubjicere, ſed ad Reipublicæ modum ſuam adminiſtrare civitatem conſtituerunt, & urbes illas, quæ antea ſubjectæ fuerant Ducibus, perinde in ſuam poteſtatem quaſi jure ſucceſſionis aſſeruerunt. Veruntamen hoc quidem penitus conſequi non potuerunt, multis populis in hac confuſione maximaque rerum mutatione in libertatem ſe vindicantibus.

Sed noſtra civitas, in qua prævalebant Guelphi, ſubjicere ſe conſtituit Venetæ Reipublicæ poteſtati, quæ multas urbes terrasque imperio regebat moderatiſſime. Itaque noſtri militibus illis, quorum defunctus Dux præſidium Laudæ collocaverat, expulſis, quod non difficile factum fuit per ducum abſentiam, Caroli Gonciagæ & Vidonis Antonii de Faventia; legatos miſerunt ad Michaëlem Attendolum, cum maxime ſummum belli ducem apud Venetos, ut veniret Laudam, urbiſque poſſeſſionem adiret. Hoc cum mox factum eſſet a. d. xvi. Cal. Sept. ejusdem anni MCCCXLVII. Jacobus Antonius Marcellus, præfectus, ſeu *Proviſor*, ut vocant, Venetiarum, ſatis magnam manum militum Laudam adduxit, ut de urbiſ poſſeſſione ſecurus poſſet eſſe Senatus Venetus, in cujus poteſtatem iſſdem fere diebus etiam urbs Placentia conceſſit, quæ, cum itidem in ea Guelphi præva-

A lerent, imperium novæ Reipublicæ Mediolanenſis adſpernata, ultro ſeſe Venetis dedit, & ab eodem Marcello valido præſidio fuit inſtructa. Veneti Laudam potiti, mox etiam caſtellum S. Columbanii omniaque fere Laudeniſis agri loca in poteſtatem ſuam redegerunt, expulſis militibus, qui ea præſidio tenebant. Sed Mediolanenſes, Venetorum potentiam metuentes, qui tanta ipſos ditionis ſuæ parte multaverant, quo illorum reſiſterent armis, ſummum copiarum ſuarum ducem creaverunt Franciſcum Sfortiam, magni nominis imperatorem, qui brevi tempore Venetis adem it Placentiam urbem, Papiamque etiam recepit, quanquam hæc illi ſe dedit hac conditione, ut privatim in ipſius, non vero in Mediolanenſium ipſa poteſtate eſſet, eumque Papiæ Comitem appellavit.

B Hoc tempore, quo urbs noſtra Venetorum paruit imperio, tranſlatio corporis S. Danielis eſt facta. Hic natione Gallus, cum Carolo Magno in Italiam delatus, & pro vera religione pugnans contra hæreticos in loco quodam prope Laudam, qui tunc temporis *Roccabruna* dicebatur, hodie ædes habet Comitis Caſſini, lapidis ictu perierat, & raptim una cum aliis cæſorum ſepultus erat. Sed cum divinitus Carolo Magno revelata eſſent ingentia hujus militis Chriſtiani merita, ut & ipſe locus, ubi corpus ejus erat humatum, adeoque hoc juſſu Imperatoris erutum eſſet; tam eximium illud ac fragrantem ſpirare odorem viſum eſt, ut ſatis appareret, quam carus ille Chriſti miles vixiſſet Domino, & quanta ipſius eſſet gloria in paradiso interque Sanctorum choroſ. Itaque ſolenni cum pompa ac religione honorifice illud eſt collocatum in templo, quod ibidem loci dedicatum erat Mariæ virgini. Sed temporis tractu & per varias rerum mutationes deperdita fuit hæc ſanctarum reliquiarum memoria, quæ deinde tamen novo miraculo iterum repertæ ſunt, & in templum illud tranſlatæ, quod in honorem S. Baſſiani extra Laudæ moenia extructum erat. Sed cum deinde paulo ante hæc, quæ narramus, tempora per bellorum cauſam noſtri una cum ſuburbis ædem quoque iſtam diruiſſent, anno MCCCXLVIII. a. d. vi. Cal. Apr. ſolemniter illi eaſdem reliquias in urbem tranſtulerunt. Affuerunt huic tranſlationi Baſſianus Veggius, qui *Præpoſitus* erat S. Michaëlis & *Vicarius Generalis* Antonii Bernerii, patria Parmenſis, Laudæque episcopi, qui tum forte aberat, tum etiam clerus univerſus, politicus & eccleſiaſticus, ſecularis & regularis, & Bernardus Contarinus, nobilis Venetus, qui Reipublicæ Venetæ nomine *Proviſor* erat, ſive præfectus urbiſ noſtræ, comitantibus una cum toto populo Laudeniſi multis nobilibus præfectisque militariſus Laudeniſium, inter quos in *Hiſtoria tranſlationis* illius, quæ legitur in veteri quodam manuſcripto monumentorum Laudeniſium, nominatim referuntur Arn-

noldus Fiffiraga, Jacobus Villanova, Petrus Cadamo-
stus, David de Aqua, Joannes Viniatus, Bartholo-
mæus Cadamoſtus, Batacinus Garratus, Orinus Ri-
cardus. Finita eſt pompa ſacra ſive *Proceſſio* in *cathedra-
li* ſeu majore templo, ubi collocatum fuit iſtud
ſanctum corpus, & hodieque ſervatur.

Sed parum diu Senatus Venetus urbem ditionem-
que Laudensem tenuit. Noſtri enim à militariſus
copiis Reipublicæ Mediolanensis obſeſſi, iſſique urbem
atque arcem dedere coacti ſunt. Tum vero
Franciſcus Sfortia, qui Mediolaneniſibus relictis
cum Venetis ſœdus amicitiamque junxerat, Me-
diolanensem ſibi Ducatum comparare percupidus,
animoque conſiderans, quantum ſibi hanc in rem
poſſet urbs Lauda uſui eſſe, & quantum ex ea
damni levi negotio ipſi urbi Mediolano poſſet in-
ferre, ejus occupandæ conſilium iniit, & perfecit
etiam. Ipſe venit cum lectiſſimis militum, qui ſub
ipſo ſtipendia merebantur, cum tamen jam an-
tea de urbis traditione inter ipſum & legatos Lau-
denſium conveniſſet, qui à Sfortia obtinuerunt,
quæcunque deſiderabant. Itaque anno MCCCCLIX.
novus princeps Laudam eſt ingreſſus, ibique ex-
ceptus ingenti omnium cum gaudio atque applau-
ſu. Tum callidiſſimus Sfortia ex vicinis undique
& remotis etiam urbibus ingentem frumenti vim
coëmit, atque illud omne Laudam transferri, ibi-
que, ut in loco opportuno, ſervari voluit, ut in
tempore ſuis copiis ſubminiſtrare annonam poſſet,
prout uſus olim poſtulare. Sed ægris oculis hoſte
progreſſus Sfortiæ intuebantur Veneti, qui ani-
mi magnitudinem ejus ac virtutem cognitam ha-
bentes, pro ſolita prudentia ſua eum ad nimiam
forte potentiam proceſſurum, atque ipſorum forte
imperio olim aliquid turbarum concitaturum ſu-
ſpicabantur. Itaque cum Mediolaneniſibus inita ſo-
cietate, inſurgentem Franciſci potentiam reprime-
re conſtituerunt. Sed ille, nihil omnino horum po-
tentiffimorum populorum contra ſe ſœdere inito con-
territus, copiis ſuis viribusque auctis Lauda exceſſit,
& non modo in fines Mediolaneniſium victor perrexit,
ſed ipſam quoque metropolin adeo arcta clauſit obſi-
dione, ut illa ad extrema ex penuria cibi redacta,
victoris potentiæ cedere deberet, qui triumphans
eam ingreſſus eſt a. d. iv. Cal. Mart. anni MCCCCL.
& dominus ſalutatus in hac principe nobiliſſimi Du-
catus Mediolaneniſis urbe. Fuit ille primus ex gen-
te Sfortia, qui hanc nobiliſſimam regionem impe-
rio rexit, quod ſane ſatis debebatur virtuti ac me-
ritis tanti viri, cujus res geſtas, exceptis duntaxat
illis, quæ ad urbem Laudam pertinent, ſi quis ſci-
re cupit, eum ad illorum temporum Scriptores ab-
legamus.

Paulo poſt varii bellorum motus hinc inter Ve-
netorum Rempublicam & Sfortiam Ducem exſti-
terunt, inde inter eundem Ducem & Gulielmum,
Montiſerrati Marchionem. Denique tamen poſt
varios bellorum caſus hi ſedati ſunt opera Renati
Andegavenſis, qui ex Gallia venerat in Italiam;
illi induſtria Petri Barbi, Venetorum legati, qui
deinde in eccleſiaſticorum ordinem adſcriptus, &
ad ſummum Pontificatum promotus, ſe Paulum II.
dixit. Compoſita eſt hæc pax a. d. v. Id. Apr.
anni MCCCCLIV. in urbe Lauda, quo ſe contulerat
Dux Franciſcus, qui prudentia ſua & juſtitia ita
felicitè rexit Laudenses, ut ſummo illi fruèrentur
otio & quiete. Quin & noſtros ille homines ex
merito quemque ſuo promovebat: unde in exerci-
tu iſto, quem ille contra Gallos miſit auxilio Ge-
nueniſibus, militavit etiam Carolus Cadamoſtus
Conneſtablii titulo, cujus, ut & aliorum ducum
militumque Sfortianorum virtute fugati victique
ſunt hoſtes.

Anno MCCCCLIX. ſervæ Dei ex S. Franciſci ordi-
ne tertio, quæ quinque & viginti numero habita-

A) bant in domo, quæ dicebatur *S. Maria Eliſabetha*,
Hungarorum regis filiæ, & intra urbem quidem
Laudam, ſed proxime ad mœnia ejus erat; quod
eadem domus ob loci ſitum incommoda admodum
& parum ſalubris eſſet, ex auctoritate Pii II. Pon-
tificis, qui optime edoctrus erat de harum virginum
virtute & probitate, meliorem & ampliffimam ha-
bitationem adeptæ ſunt iſto in loco, qui hodie di-
citur *S. Clara*. Harum cum in dies augetetur ſa-
ma diſciplinæ, uſque ad centum numerus earum
excrevit, ſed deinde alimentis tantæ multitudini non
ſuppetentibus, uſque ad quinquaginta numerus ea-
rum eſt contractus. Vivebant autem ex ſolis elee-
B) moſynis, & ejuſdem S. Claræ *regulam* ſive diſcipli-
nam profitentes, pietatis exemplo erant univerſo
populo. Ex his in æternum gloria vivet Soror
Manſucta, quæ, ut ſcribit Franciſcus Gonciaga
De origine Seraphica Relig. Franc. p. II. de Mon. S.
Clara Lauda, ſacroſanctam euchariftiam ex manu
Angeli accepit: & item ſoror Veronica Summari-
pa, quæ plus ſemel cum Domino noſtro Jeſu Chri-
ſto familiariter colloquuta eſt.

Eodem anno MCCCCLIX. Maphæus Veggius de-
ceſſit, nobilis Laudensis, & ex hac caduca, ut
ſperari fas eſt, ad meliorem vitam tranſiit. Hic
vir doctrina & moribus adeo fuit excellens, ut elo-
C) gia atque encomia multorum celebriſſimorum Scriptorum
meruerit, inprimis laudatus à modestia ſingulari,
& Martino V. Pontifici à diplomatibus ac manda-
tis Apoſtolicis. Inde promotus ad Canonicatum S.
Petri, factuſque *Datarius*, ut vocant, qua in di-
gnitate confirmatus etiam eſt ab Eugenio IV. &
Nicolao V. opimum epiſcopatum reſutavit, quem
ipſi humaniſſime offerebat ſummus Pontifex. Sin-
gularem erga S. Auguſtinum, patrem literarum,
profeſſus eſt devotionem, & pretioſa S. Monicæ,
matris illius, oſſa transferri curavit Oſtia Romam,
& pro dignitate in ciſtam componi magnificam,
condique in nobiliſſimo ſacello, quod ipſe in ejus
D) honorem ſua pecunia exſtruxit in templo ejuſdem
ſancti doctoris. Vivit & vivet in æternum tanti
viri memoria, per inſignes libros typis ab ipſo re-
lictos, quorum catalogus partem in tomo xv. *Bi-
bliotheca veterum Patrum* exſtat, partem in quo-
dam ipſius voluminum, præter libros manuſcrip-
tos, qui pretioſi theſauri loco in bibliotheca Va-
ticana aſſervantur. Sepultus fuit in eodem ſacello,
quod ipſe exſtruxerat, ejuſque memoria à poëtis
illius temporis celebrata multis carminibus, ex qui-
bus Ghilius in *Elogiis doctorum virorum*, Parte II.
hoc reſert:

Maphæi Veggii tumulus.

E) *Lauda tibi lucem Vrbi, munera, & oſſa reli-
quit:*

Et ſi quaris, ubi eſt Spiritus? aſtra tenet.

Et hoc aliud Caroli Aretini:

Hic, Maphæe, jaces inimica morte ſolutus,

Quem ſibi præceptum lingua Latina dolet.

Non laſciurus eras, quales ſunt ſæpe Poëta:

Mens tibi cum caſto corpore ſancta fuit.

Edita teſtantur centena volumina per te,

Ingenii fuerint ſumma quanta tui.

Vrbs te Laudensis Vegiorum è ſanguine clare

Edidit: extinctum Roma vetuſta tenet.

F) Anno MCCCCLXVI. poſtrid. Non. Mart. Franci-
ſcus Sfortia, poſtquam per annos ſedecim potitus
erat Ducatus Mediolaneniſis imperio, in ſumma po-
tentia atque exiſtimatione poſitus, quam prudentia
& virtute ſua ſibi alios apud principes comparave-
rat, anno ætatis quinto & ſexageſimo repentina
morte deſunctus eſt in imperii ſui urbe metropoli.
Laudes magni hujus principis ſi quis ſcire deſide-
rat, eum adire horum temporum hiſtoricos jube-
mus. Blanca ejus uxor, tanto orbata marito, poſt-
quam modis omnibus, quos ejus animi magnitudo
poſtu-

postulabat, testificata erat dolorem, quo ipsa ex irreparabili isto damno erat affecta, de morte ejus certiores fecit principes vicinos, & simul auxilium eorum, quando illo opus esset habitura, petiit, quo filii sui sine controversia in paternas ditiones succederent. Sed protinus per literas domum revocavit Galeacium Mariam, filium natu maximum, qui tunc temporis in Gallia agebat, dux exercitus fortissimi, quem Franciscus pater auxilio miserat Galliae regi Ludovico XI. qui insigniter vexabatur à multis Galliae principibus, qui foedus contra ipsum inierant. Galeacius Maria, patris morte cognita, Petrum Franciscum Viconium ad regem Galliae misit, ut illi hunc casum significaret, & ipse protinus Mediolanum perrexit, postque superatas aliquot difficultates, quae in via se ipsi obtulerant, a. d. XIII. Cal. Apr. urbem intravit per portam Ticiensem, fauste acclamantibus, cumque salutantibus Ducem civibus, quos tanto cum amore atque iustitia pater ejus imperio rexerat. Tum novus Dux legatos ab omnibus fere principibus Christianis accepit, qui illorum dolorem ex morte Francisci Ducis testificarentur, simul & ipsi gratularentur de successione. Veneti autem quia prorsus nullo officii genere eum prosequerentur, suspecta habens eorum contra se consilia, fines suos, quatenus ipsorum terris imminebant, validis firmavit praesidiis, & milites veteranos, qui sub patre suo stipendia meruerant, novo sacramento obstrinxit. Jam vero cetera, quae in Imperio Galeacii Mariae acciderunt, referre nobis non est animus, cum nihil ille sigillatim rei gesserit, quod ad Laudam urbem pertineat. Ceterum non omnino ille Blancam matrem imperii regimine exclusit, quin contra omnium rerum cum illo summam participaret. Deinde autem discordiae femine inter eos sparso ab hominibus malis, matrem filius prorsus ab omni rerum administratione removit: atque adeo illa, vehementer indignata, Mediolano urbe excessit, Cremonam abeundi animo, quam ipsi urbem Philippus Maria pater in dotem dederat, sique ibi Galeacius quadam forte molestia ipsam turbaret, porro Venetias petendi, quamvis alioquin ex insita animi indole haberet odio Venetos.

Haec ejus consilia cum persentisceret Galeacius, iisque obviam ire meditaretur, fati providentia hanc illi curam exemit. Blanca enim cum Melenianum venisset, quo animi causa se ire finxerat, medio fere Octobri mense anni MCCCCLXVIII. adeo gravem in morbum incidit, ut medici de ejus salute desperarent. Sed cum nemo esset, ut plerumque magnis principibus accidere solet, qui eam admonere sustineret de vitae periculo, quo ipsa cum maxime laborabat, parum aberat, quin illa è vivis excessisset sine *Sacramentorum* aliarumque divinarum rerum viatico. Veruntamen Deus ita voluit, ut monachorum *Observantium* S. Francisci, qui solennem conventum egerant in urbe Lauda, (hanc enim potissimum ad hoc elegerant, ut quae insigni cum pietate hominibus religiosis affatim elemosynas aliaque omnia suppeditat, quae istiusmodi occasionibus illi habent opus) uno eodemque tempore duo & septuaginta paria, ita ut alteri de alteris nescirent, Melenianum, decem millibus passuum à Lauda urbe distitum, convenirent Ducis Blancae visitandae causa, quae eximiae pietatis princeps, istos Dei servos lubens in conspectum suum admisit. Inter hosce erat frater Michaël de Carcano, qui ex virtutibus suis deinde Beati nomen accepit, ita ut corpus ejus pro Sancto hodieque colatur Laudae in templo S. Francisci. Hic sacerdos intellecto morbi periculo, ea arte se Blancae Duci insinuavit, ut eam permoveret ac praepararet ad sanctissima Sacramenta recipienda, quod illa cum fecisset magna cum reverentia ac religione, postmodum, id est, a.

A d. x. Cal. ejusdem mensis feliciter vitam finivit, etsi quidam eam veneno sublatam suffitaverunt.

B Galeacius filius maximum ex ejus morte dolorem praese ferens, protinus valido praesidio Cremonam firmavit, & corpus matris Mediolanum deferri, ac in S. Gothardi templo collocari jussit, unde biduo post rhotum, & maxima cum pompa funebri prope mariti sui cadaver conditum est in majore templo. Ceterum Galeacius Maria cum se multis invisum reddidisset libidine sua & crudelitate, quae multum obscurabant ejus virtutes, alioqui vere principe dignas; in templo S. Stephani, ipso ejusdem Sancti die festo, infeliciter interfectus est anno MCCCCLXVI. à multis conjuratis, inter quos & nonnulli ex suis erant familiaribus, graviter contra ipsum exacerbati, quod nimis familiariter cum ipsorum egerat uxoribus.

C Successor ipsi datus est, & Dux Mediolanensis salutatus Joannes Galeacius filius, nullis magnopere turbis aut rebus novis intervenientibus. Sed quoniam ille adhuc puer erat, rerum administrationem suscepit Dux vidua, eademque mater pupilli, *Bona* nomine, & re civili atque militari, prout securitas atque utilitas imperii postulare videbatur, ordinata, à secretis primo loco constituti Cicum Simonettam, natione Calabrum. Verum hic homo adeo se efferre coepit, ut caput ipse fieret consilii cujusdam sanctioris, quod in arce habebatur, & quibuscunque majoris momenti rebus ordinandis interserviebat, ut adeo ab ipsius arbitrio dependerent omnia. Hoc cum ægerrime ferrent impuberis Ducis cognati, & inprimis patruus ejus Ludovicus Sfortia, cognomine *Maurus*, alique viri principes, multae inde contentiones ortae sunt, sed sopitae tamen opera legatorum illorum, quos varii principes Mediolanum miserant ad solennia officia praestanda, primum luctus, deinde gratulationis. Sed cum Simonettæ æmuli ferre prorsus non possent, illum, qui extraneus erat, ipsis in rerum administratione antepositum, seque tutela Ducis exclusos, quam ratione consanguinitatis ad se pertinere putabant; dum in omnibus obtinere contendunt, quaecunque sibi deberi postulabant, praevaluit auctoritas Simonettæ, ac patria ipsi pulsi, & in exilium ejecti sunt. Ad postremum autem post varios casus, quos referre nihil ad nostram *Historiam* attinet, anno MCCCCLXXIX. in patriam reversi, ita omnia praeparaverunt, ut nullis fere majoribus turbis exortis, Ludovicus Sfortia Simonettam comprehenderet, eumque in arcem Papiensem abductum, & Bonae, viduae Ducis, consensu habito, mox judicio culpae mortisque reum pronunciatum capite truncaret, a. d. III. Cal. Nov. anni MCCCCLXXX.

E Tum Ludovicus tutela Ducis rerumque administratione sibi vindicata, omnia ad arbitrium agebat. Joannes Galeacius etsi jam in matrimonium duxerat Isabellam Arragonensem, Calabriae Ducis Alphonsi filiam, & neptem Ferdinandi, regis Neapolitani, quae insigni cum pompa Mediolanum deducta est, prorsus tamen solus Ludovicus gerebat imperium, non ut tutor, sed quasi justo titulo dominus, adeo ut pro lubitu de pecuniis quoque & redditibus principalibus statueret. Hoc cum prorsus ferre non possent Joannes Dux ejusque uxor, haec per literas certiores de eo fecit Alphonsum patrem, qui eas cum patre suo, rege Neapolitano, communicavit. Hi juvenum principum infelici conditione deplorata, postquam frustra per legatos ista servitute eximere eos tentaverant, denique armis efficere, quod alio modo non poterant, constituerunt. Tum vero Ludovicus Maurus, timens ne regno suo excideret, cui semper ambitiosissime inhiaverat, ut se muniret contra Arragonensium potentiam, in auxilium vocavit Carolum VIII. Galliae regem, qui validissimo cum exercitu in Italiam venit an-

no mccccxciv. cumque Astam venisset, obvium habuit Ludovicum Maurum. Ab Asta rex una cum Ludovico Papiam progressus est, ibique Joannem Galeacium Ducem visitavit, qui morbo decumbebat, ita ut rex Placentiam profectus nuncium acciperet, eum è vivis excessisse, magnumque inde dolorem præ se ferret. Ludovicus autem quo rumorem exstingueret, nimirum qui in vulgus emanaverat, se in tempore fratris filium veneno sustulisse; per biduum mortui cadaver omnium oculis exposuit, in eoque nullum omnino veneni signum apparuisse Scriptores affirmant. Egit quidem Ludovicus cum populo de Francisco, defuncti Ducis filio natu maximo, successore ipsi designando, ut consanguinitatis ratio postulabat. Sed cum ille adhuc puer esset, & quidam succlamarent, forte ab ipso Mauro subornati, *Non illud esse tempus, quo Mediolanensis Ducatus sceptrum puerili manu sustineretur, sed opus esse viro, atate, prudentia, ac virtute conspicuo*, ipse Dux Mediolani salutatus est eodem anno mccccxciv. & in Ducatu amplissime confirmatus ab Imperatore Maximiliano, cui anno præcedenti Blancam Mariam, cognatam suam, & Joannis Galeacii sororem in matrimonium dederat. Pro solenni autem confirmationis diplomate, quod sequentis anni mccccxcv. mense Majo ad ipsum delatum est à *Brisani* episcopo & Conrado Strucina, fama est eum Cæsari trecenta millia scutorum aureorum persolvisse. Deinde Ludovicus a. d. vii. Cal. ejusdem mensis corona solennibusque Ducatus insignibus ornatus est insigni cum pompa ac magnificentia.

Jam vero Gallicorum armorum in Italia progressus, ut qui nihil ad nostram faciunt *Historiam*, cum sigillatim exponere non sit nostrum, illud solummodo indicare lectorum commodo sufficiat, Carolum regem Etruriam ingressum, intra paucissimos dies Pisanos in libertatem vindicavisse, victorem in urbem Florentiam acceptum, nullo obsistente Romam perrexisse, ibique cum Alexandro VI. Pontifice controversiis quibusdam diremptis, in gratiam cum eo rediisse. Inde cum exercitu regni Neapolitani fines intravit, & primum Alphonso fuga elapso, mox & Ferdinando, Alphonso Arragonensis filio, qui florentissimum istud regnum tenebant, intra diem tertiumdecimum, ex quo advenerat, occupavit illud rex Carolus. Hæc fortuna bellicæ gloria ejus adeo perturbavit Italiæ principes, ut Pontifex & Veneti, & ipse etiam Ludovicus Sfortia, qui cum ex Gallia in Italiam contra Arragonenses evocaverat, eodem timore percussus, nimirum, ne Carolus ad totam sibi Italiam subjiciendam adspiraret, & Neapolis ad tam ardua coepta exsequenda iter ipsi aperiret, belli societatem inter se inirent ad Italiæ libertatem tuendam. Præcipuus hujus foederis auctor fuit Pontifex, qui missis legatis non solum Venetos & Sfortiam in ejus societatem pertraxit, sed auxilium etiam ab Imperatore Maximiliano & Hispaniæ rege petiit. Quin & Carolum in regno Neapolitano confirmare recusavit, aperte se hostem ejus professus, & crudelitatem ac libidinem Gallorum execratus, qua de causa ipsi etiam in maximum jam venerant odium Neapolitanorum.

Itaque brevi tempore Caroli vires in regno Neapolitano adeo sunt imminutæ, Galliæ adeo facti sunt invisi Neapolitanis, ut rex, metuens ne ipse forte majore quodam infortunio aut clade afficeretur, firmo præsidio in urbe metropoli, aliisque locis, ubi opportunum videbatur, relicto, regredi in Franciam constitueret, & relicta Neapoli cum flore exercitus Romam peteret. Huc cum advenisset, summum Pontificem, ut ipsius evitaret occursum, inde abiisse comperit, & militarium copiarum præsidio, quas Veneti auxilio ipsi mise-

rant, Centumcellas, (*Civita vecchia*) & inde Perusiam petiisse hoc animo ut Anconam, & porro etiam Venetias pergeret, si ita in rem esse videretur. Ad hunc modum rex à Pontifice delusus, sanctam urbem tamen prorsus intactam reliquit, eaque egressus, in itinere Florentiam non attigit, quoniam parum sibi fidebat à Florentinis, ob libertatem Pisani datam ipsi infensis, atque ita per viam Pontremulensem nullo obsistente in Longobardiam venit. Sed jam copiarum foederatorum, id est, Venetorum, qui egregium validumque exercitum collegerant Francisco Gonciaga, Mantuæ Marchione, aliisque fortissimis viris ducibus, & Ludovici Sfortiæ, qui suis Joannem Franciscum Sanseverinum ducem addiderat, quibus se nonnullæ quoque Pontificiarum copiarum addiderant, in hæc se contulerant loca, quo regi se objicerent. Et adeo Carolus, postquam rei periculo motus per legatos frustra liberum iter à sociorum ducibus, & maxime à Venetis, petierat, ad Tarum amnem prælium cum ipsis inire necesse habuit, quod cum utrinque cruentum paulo amplius horæ spatio duravisset, utrique victoriam ejus ad se traxerunt. Foederati enim castris hostium & impedimentis, aliaque opima præda potiti sunt. Contra autem rex paulo post militari dolo hostibus delusis, eorum manibus elapsus est, & exercitum incolumem in urbem Astam deduxit, quam Ludovicus Aurelianensis tenebat. Erat hic princeps tum temporis in urbe Novaria, quam ipse Ludovico Sfortiæ ademerat, contra quem eum in arma concitaverat rex Carolus, cum primum occupata Neapoli eundem Ludovicum ab se esse abalienatum deprehenderet.

Interim foederati Novariam urbem vi armorum restituere in Sfortiæ Ducis potestatem constituerunt, eamque obsidione clausam ad extrema adegerunt, postquam obsessi frustra auxilium expectaverant, à Carolo rege iteratis vicibus promissum. Sed cum jam in eo esset, ut urbs se dederet obsidentibus, Carolus quasdam conditiones pacis cum Sfortia Duce proposuit, quas brevitatis causa referre non lubet, & denique aliquot pactationibus constitutis, Novaria Aurelianensis excessit, eaque urbs in potestatem rediit Ludovici. Rex autem Carolus magnis itineribus in Galliam contendit, ibique paulo post adversam audivit armorum suorum fortunam in regno Neapolitano. Ferdinandus enim Arragonensis à Messana, quo se receperat, in ejusdem regni fines regressus, & post varios casus Neapolim deinde delatus, foederatorum, & maxime Venetæ classis, auxilio brevi tempore omnia recepit, quæ ipsi ademerant Galli, ut fusius legere potest, quisquis de his cognoscere cupit, in *Historiis* Neapolitanorum & aliis etiam Scriptoribus.

Anno mccccxcv. nova perniciosissimi belli occasio in Italia exorta est, Florentinis, qui Pisanos se ipsorum imperio subtraxisse, & in libertatem se vindicavisse, ferre non poterant, bellum contra eos moventibus; Pisani autem, qui Florentinorum potentiam metuebant, auxilium petentibus à Ludovico Sfortia, qui non aperte quidem se illorum amicum professus Lucium Malvecium tamen ad illos misit, magni nominis ducem. Hic pecuniis ab ipso Duce acceptis tantum effecit, ut Pisani satis resistere possent validis Florentinorum viribus, quas vel sic nimium suspectas cum habarent, urbis suæ imperium Sfortiæ Duci obtulerunt. Sed ille pro conditione illorum temporum omnibus rite perpensis, Pisas recusavit in deditionem accipere, quod ægre ferentes Pisani, claves urbis per legatos ad Senatum Venetum miserunt. Sed neque Veneti aperte voluerunt accipere, quod offerebatur, attamen magnum militum numerum cum quodam præfectorum suorum Pisani auxilio miserunt.

Hoc

Hoc cum admodum invito ad aures accideret Ludovico, qui, ne hac occasione Venetis aliquid potentiae accederet, metuebat, foederatis principibus consilium proposuit de Pisanorum defensione ac tutela conjunctis viribus suscipienda, & Maximiliano quoque Imperatore in Italiam evocando. Verum hic jam lectorem ablegamus ad illos auctores, qui latiores & prolixiores conscripserunt *Historias*, ne illarum rerum narratione obruamur, quae nimium à nostro proposito sunt alienae. Sufficiat dixisse, Maximilianum ab Ludovico persuasum in Italiam venisse, & cum eo colloquutum fuisse primum ad *Malsum* in Germaniae finibus, deinde ad *Bormium* anno MCCCXCVII. ab eoque acceptum habitumque insigni cum pompa ac magnificentia; ut & factum est, cum Imperator à bellis Etruriae non sine damno rediens, per Mediolanensem ditionem iter fecit in Germaniam regressurus.

Hoc eodem anno è vivis excessit Beatrix Estensis, dilectissima Ludovici Sfortiae Ducis uxor, cum mortuum infantem infelici partu eniteretur. Dux ob talem uxorem, quae virtutibus ornata erat non vulgaribus, amissam insolabili dolore percussus, funus illi & exsequias tanta cum pompa ac magnificentia celebravit, quanta forte nunquam alias in urbe Mediolano fuit cujusquam funeris, atque idem fieri voluit in omnibus urbibus atque oppidis sui Ducatus; & ne cives isto premerentur onere, ipse pecunia sua omnes cum in usum impensas exsolvit.

Sed Florentini, urbi Pisanae occupandae avidissime inhiantes, cum valido Venetorum militum praesidio firmatam armis subigere frustra tentavissent, inter ipsos Venetosque convenit, ut Hercules Estensis dijudicaret, uter duorum populorum Pisas imperio suo adjiceret. Hercules autem ex publica sententia ita pronunciavit, ut Veneti a. d. VII. Cal. Maj. anni MCCCXCVIII. Pisis omnes suos milites educerent, & propterea centum millia ducatorum à Florentinis acciperent, ut adeo Pisani, Senatus Veneti auxilio nudati, in potestatem venirent Reipublicae Florentinae. Sed ista sententia effectum fortita non est, cum Pisani prorsus abhorrerent ab imperio Florentinorum. Itaque receptis armis, Florentinorum copiae levi negotio Pisas occupassent, nisi Paulus Vitellius, summus eorum belli dux, qui deinde ea de causa Florentiae capite truncatus est, ab Ludovico Sfortia corruptus, non ex fide navasset operam patriae. Ceterum ex eo, quod Sfortia semper Venetorum Reipublicae impedimenta objicere moliebatur, ne illa Pisarum urbem potestati suae subiceret, tantum Senatus contra eum concepit odium, ut deinde semper ejus ruinam animo voveret, sicut contra etiam Sfortia suis rebus non deerat, & omnia agebat ad Venetos deprimendos. Itaque hanc in rem per Galliae proceres quosdam aliosque viros auctoritate praestantes reconciliare sibi Carolum Galliae regem, cum eoque foedus inire studuit certis conditionibus, inter quas ipse ab rege petebat, ut Joannem Jacobum Trivultium sibi dederet, indicato ipsi modo, quo salva personae regiae existimatione, ut ipse dicebat, facere illud posset. Contra ipse regi ad Venetorum Rempublicam oppugnandam, regnumque Neapolitanum recipiendum valida offerebat auxilia. Et forte perfectum fuisset hoc foedus, nisi Carolus Ambrosiae in Tuionibus, dum pilae lusu festus ad recipiendum spiritum cancellis porticus cujusdam innititur, infelici casu prolapsus fuisset & exanimatus anno MCCCXCVIII.

Successit Carolo Ludovicus Aurelianensis, cognatus ejus, & a. d. VIII. Cal. Jul. ipso S. Joannis Baptistae die festo, solenniter Parisios urbem ingressus est, ibique coronatus, & salutatus Galliae rex Christianissimus. Senatus Venetus protinus legatos misit ad Ludovicum, non tantum ut illi gra-

A tularetur de novo regno, sed vel maxime, ut eum in Italiam pelliceret ad Mediolanensem Ducatum occupandum, quem ab Ludovico aliisque Sfortiis assererat nunquam justo titulo fuisse possessum, sed ipsi deberi dicebat, ut qui natus esset ex Carolo, filio Ludovici & Valentinae Vicontiae, unicae Joannis Galeacii, Ducis Mediolanensis, filiae. Neque contentus Venetorum Senatus Galliae regem contra Sfortiam Ducem incitavisse, Alexandrum quoque Pontificem multis rationibus induxit ad foedus cum Ludovico Venetisque jungendum, eundemque Sfortiam opprimendum. Itaque rex Christianissimus belli societate cum Pontifice ac Venetis inita, cum B regni sui fines per pactiones nonnullas tutos praestitisset à molestiis & vexationibus, quae ab Imperatore ac Hispaniae rege, ut & Burgundiae Duce ipsi metuendae erant, denique anno MCCCXCIX. in Italiam misit Joannem Jacobum Trivultium, ut ille Aetiae regii praefecti munere fungeretur, & Bellimontium (*Monsignor di Beaumont*) Venetias, ut Venetos contra Sfortiam extimularet. Hic itaque ut imminentem à se calamitatem averteret, frustra primum belli societatem cum Helvetiis inire studuit: mox Trivultio per amicos, quos ad eum in Aetiam urbem miserat, cum Ludovico rege pacis conditiones proposuit, quae forte etiam composita fuisset, nisi Sfortia mutato animo recessisset ab illis conditionibus, persuasus ab Imperatore, qui prompta ipsi & ingentia pollicebatur subsidia ad Mediolanensis imperii, tanquam feudi Caesarei, defensionem.

Denique igitur Ludovicus ingentes peditum equitumque copias in Italiam misit extremo mense Julio ejusdem anni MCCCXCIX. quae Aetiam venerunt Obinio, Comite Linii, & Joanne Jacobo Trivultio ducibus. Et hic quidem, natione Italus, & partium Guelphicarum, multas variis in urbibus castellisque habebat opportunas amicitias ad belli consilia feliciter exsequenda. Sfortia summam belli Galeacio Sanseverino genero commisit, qui Aracium arcem non procul ab Aetia urbe omnibus quidem necessariis instruxit, quam fieri poterat diligentissime, sed Galli tamen ab Aetia moventes eam occupaverunt, defendente Augustino Maneria, Genuensi. Post Aracium expugnatum victores ceperunt quoque *Annonem*, Valentiam, Dertonam, multaue alia loca, & Alexandriam obsederunt, cum interim Veneti ab alia parte magnos progressus facerent in *Ghiara Addua*, & victores ad Laudam usque urbem populationibus excurrerent. Inter haec tantis damnis Dux animo consternatus, in consilium vocavit tres Cardinales, Ascanium fratrem, Fridericum Sanseverinum, & Hippolytum Estensem, cognatum suum, eundemque Archiepiscopum Mediolanensem, aliosque amicorum intimos, iisque exposuit, hujus belli incendium sibi conflatum esse à Republica Veneta, quae per suum exitium viam sibi aperire ad totius Italiae imperium conaretur: & in summa cum illis ob oculos posuisset ingens periculum, in quo cum maxime ipse constitutus erat, consolati eum sunt illi, qui aderant in consilio, quaecunque in sua potestate essent, in auxilium ipsi offerentes. Praeterea ad eum delati sunt quindecim hominum nomina, qui ab ipso ad potentiam & opes provecti cum hostibus conspirabant: sed Dux quadam quasi abundantia benignitatis nihil aliud, quam per totam urbem homines ad armorum tractationem idoneos describi iussit, ut in extremis periculis eorum opera posset uti. Et cum omnium maxime ab isto sibi bello metueret, quo ipsum Galli persequerentur, Joannem Franciscum Bernardinum Vicontium, & Joannem Franciscum Sanseverinum, Galeacii Sanseverini fratrem, ab istis imperii finibus revocavit, quos ipsi contra Venetorum arma tuebantur, ut pontem in Pado flu-

mine exstructum transgressi subsidium ferrent Alexandriae, quam Galli obsidebant, ut supra dictum est. Sed Joannes Franciscus Sanseverinus, qui clanculum cum hostibus conspirabat, usque eo exercitus iter protraxit, ut Galeacius Sanseverinus, frater ipsius, & summus Sfortianarum copiarum belli dux Alexandria excedere, eamque in potestate hostium relinquere cogeretur. Galeacio Mediolanum adveniente, cum Alexandriam esse captam comperitum esset, magnus inter cives tumultus est exortus, in eoque Simon Rigo vulneravit Antonium Landrianum, præcipuum illorum, qui circa Ducem erant, cujus fidei ac virtuti regimen ac securitatem imperii magnam partem ipse Dux commiserat: quibus ex vulneribus, etsi mortifera non erant, ut crediderat Rigo, tamen biduo post mortuus est Landrianus.

Hinc vehementer Dux consternatus, &, ne toto excideret imperio, metuens, de sua filiorumque salute cogitare, & in Germaniam meditari fugam coepit. Itaque primoribus urbis convocatis miserabilem & sui ipsius, & totius adeo imperii, quæ cum maxime erat, fortunam exposuit, à Maximiliano Imperatore subsidium se expectare dictitans, qui è Germania cum ingentibus auxiliis adventaret, seque illi honoris causa filios suos obviam mittere constituisse. Inde omnes ad fidem principi suo servandam exhortatus, omnibusque, quæ ad urbis defensionem necessaria esse videbantur, quam diligentissime ordinatis, & arcis custodia Bernardino de Corte, patria Papiensi, commissa contra omnium fere prudentiorum sententiam, qui eum parum ipsi fore fidum asseverabant; ipsaque arce, in quam & pecunias suas magnam partem recondidit, omnibus illis instructa, quæ ad longam obsidionem sustinendam requiruntur, prid. Cal. Sept. Comum versus dimisit Maximilianum & Franciscum filios, quorum ille natu maximus novem annos, hic septem habebat natu secundus, comitantibus Ascanio & Friderico Cardinalibus, & Camilla, Alexandri Sfortiæ, Pisauri principis, vidua, aliisque viris illustribus, ut & immensi pretii thesauris, ingentique pecuniæ summa. Tum vero quisnam fuerit Ducis infelicis dolor, cum sibi filiis abeuntibus quasi à visceribus suis divelli videretur, facilius animo concipi, quam verbis exprimi posse arbitror. His ita gestis Dux illos sequi certus, viros aliquot elegit, qui adhuc alios octo cooptarent, ut illi conjunctim Reipublicæ administrationem in se susciperent: Ducatum Barientem Isabellæ, Joannis Galeacii uxori, concessit: multa loca primoribus quibusdam viris restituit, & arcis omniumque aliorum Liguriæ castellorum curam Joanni Augustino Adorno demandavit, ut is pro lubitu suo de illis statueret. Inprimis autem Bernardino de Corte, cui ne quidem alium addere collegam voluit, licet id ab eo peterent Ascanius frater & Galeacius Sanseverinus, qui Bernardini fidem admodum suspectam habebant, impense commendavit arcem Mediolanensem, eique de omnibus signis edocto, quibus editis significare ex ipsa arce posset, quæcunque usus exigeret, ad ultimum promissit, tertium intra mensem procul dubio eum ab omni hostium vi molestiaque liberatum iri: quod si secus accideret, potestatem ipsi fecit de arte Mediolanensi pro arbitrio statuendi.

Ad hunc modum rebus ordinatis Ludovicus, cum suorum intimis magno cum amoris affectu valedixisset, & templum Mariæ virginis Gratiarum religionis causa visitavisset, rediit inde, ut sequentem noctem in arce ageret, & proximo mane circa horam undecimam una cum Hippolyto Estensi & Hermete Sfortia, cognatis, ut & Galeacio Sanseverino, & Galeacio Alexandroque Sfortiis, multisque peditibus equitibusque, qui numerum ad quater mille hominum conficiebant, Mediolano egressus

A Comum petiit. Hoc cum intellexissent Comenses, convocatoque consilio deliberavissent, an in urbem acciperent Ludovicum, an vero eum ejus ingressu prohiberent, visum fuit, principem suum, etsi adversa fortuna afflictum, non esse excludendum illa urbe, quæ per tot annos in fide erga eum perstiterat. Itaque in urbem receptus est à Comensibus, multum ejus calamitatem commiserantibus, & in episcopi aedes deductus. Proximo mane civibus ad se convocatis, qui magno numero convenerunt, Dux exposuit, istæc infortunia, quibus cum maxime conflictabatur, non accidere sibi, quod officio suo defuisset, sed ex hostium suorum perfidia: B & Comenses exhortatus est, ut Gallis se subicerent, neque tamen affectum erga legitimum principem suum dimitterent, & ut adeo parati essent, se reversum, quod ocyus sperabat esse futurum, denovo ut principem suum recipere. Comenses Duci magna cum fidei ac reverentiæ testificatione responderunt, & arcem sive castellum urbis sibi tradi petierunt, quod & concessit illis, primum licet non nihil reluctatus. A Como Dux per Vallem Tellinam iter fecit, & quondam nocte in specu quadam, comites autem ejus sub dio plurimis maximisque cum incommodis pernoctare debuerunt. Denique ille cum suis Oenipontem venit, ubi mox Imperator C Maximilianus, per affinitatem ipsi conjunctus, eum invisit, summaque cum humanitate ac benevolentia tractavit, & inprimis se ipsi ocyus idoneas vires subministraturum pollicitus est, quibus imperium suum pristinamque potentiam recuperaret.

Ceterum post Ludovici abitum ex urbe Mediolano, totam occupare Mediolanensem ditionem, & ipsam quoque urbem metropolin, Gallis in proclivi fuit, ipsis etiam populis cum applausu eos excipientibus. Sed quod magis adhuc dolendum fuit, & vehementer afflixit Ludovicum Sfortiam, cum illud audiret ad *Maranum*; Bernardinus de Corte, principi suo infidus, & æternam sibi contrahens infamiam, Joanni Jacobo Trivultio dedit arcem Mediolanensem, quam satis diu defendere potuisset contra multo majores etiam, quam Gallorum erant vires. Ludovicus rex, qui Lugduni erat, armorum suorum in Italia successu cognito, gaudii plenus excessit è Galliis, & superatis Alpibus magnis itineribus in Italiam contendit, ovanque Mediolanum urbem est ingressus, ibique multos reditus terrasque nobilitati Mediolanensi, & præter ceteros Joanni Jacobi Trivultio, à quo sibi egregiam operam esse navatam dicebat, *Viglevanum* aliaque loca donavit. Populo quoque à multis oneribus immunitatem concessit, etsi ille quidem pro more vulgi imperiti parum contentus erat, & majores adhuc perpetuasque ab rege postulabat immunitates. Tum multi principes Italiæ Mediolanum gratulabundi ad Ludovicum regem venerunt, alii præter Fridericum, regem Neapolitanum, legatos ad eum miserunt. Dum ad hunc modum rex integri fruitur Mediolanensis Ducatus possessione, excepta *Ghiara Adduæ*, & Cremona urbe, quæ portio Venetorum accesserant imperio ex foederis legibus, quibus illi cum Ludovico rege belli societatem contra Sfortiam inierant, ex quibus etiam Pontifex filio suo, Duci Valentino, Forum Corneli, (*Imolam*) Forum Livii, (*Forli*) aliaque loca acquisierat; interim vero in Germania Ludovicus Sfortia suis rebus intentus, Constantinopolim usque tres legatos misit, separatim singulos, ut saltem unus eorum ad aulam Turcicam perveniret, iisque literas & mandata dedit exactissima, quo Turcarum Imperatorem ad bellum Venetæ Reipublicæ, cui omnem calamitatem suam acceptam ferebat, movendum perducerent. Deinde cognito Ludovicum regem in Galliam rediisse, & populos imperio ipsius, ejusque præfectorum, & maxime Joannis Jacobi Trivultii, parum acquie-

scientes, sapius Sfortiae nomen invocare; cum praeterea à multis nobilibus invitaretur, ut pristinum recuperare tentaret imperium; non amplius expectare auxilia Imperatoris, plus semel ipsi promissa, sed re ipsa nunquam subministrata; & cum fratre Ascanio suo Marte rem gerere, bellicque tentare fortunam constituit, & sua pecunia octo Helvetiorum millibus, & quingentis Burgundionibus conductis, versus Comum profectus est. Trivultius, cui rex ex Italia abiens summam rerum commiserat, cognito adventu Sfortiae, ad Venetos misit, ut copias suas ad Adduam amnem admoverent; Allegrumque à Duce Valentino ad se revocavit una cum Helvetiis Gallisque, quibus ille imperabat, duplicato militum numero, quod Comi praesidium erat, ad primum Ludovici impetum excipiendum. Sed Ludovicus cum una cum Cardinale fratre & parte militum conductorum ad Comum accessisset insigni celeritate prudentiaque usus, & Galli Comensum animos ad Sfortias inclinare cum viderent, hi excesserunt urbe, quæ protinus veteri se domino submisit.

Comum occupatum fere totius imperii recepti Ludovico principium fuit, quoniam hoc novi cum audivissent, adeo tumultuati sunt Mediolanenses, ut Trivultius spe servandæ regi suo urbis abjecta, in arcem se reciperet, atque inde noctu digressus, cum copiis militaribus Novariam peteret. Post ejus abitum primum Ascanius Cardinalis Mediolanum ingressus est, mox & Ludovicus anno MD. maximo totius populi gaudio. Post Mediolanum urbem Pappia quoque & Parma in potestatem Ducis redierunt, quod idem certe etiam facturæ fuissent Lauda & Placentia, nisi eo Veneti misissent partem copiarum illarum, quas ad Adduam amnem contraxerant.

His lætis principiis Ludovicus animo recepto, omnibusque, quos poterat, militibus collectis, & enixe rogato Cæsare, ut celeriter sibi mitteret toties auxilia promissa; cum omnes amicos in auxilium vocasset, & ipsum quoque Senatum Venetum, cui amplissimas condiciones offerebat, sed frustra, tentavisset, denique Mediolano excessit, cujus urbis castellum, quod adhuc tenebant Galli, obsidebat Ascanius Cardinalis; & satis magno cum exercitu Ticinum amnem transgressus Viglevanum cum occupavisset, ad urbem Novariam exercitum admovit, eaque feliciter potitus, ad arcem expugnandam se accinxit. Sed Ludovicus rex tanto rerum suarum detrimento audito, protinus in Italiam misit Tremolliae dominum, qui cum se cum Trivultio & Linio conjunxisset, adductis secum copiis nonnullis, quæ recens superaverant Alpes, ut & illis, quas alii duces regii habebant, inter quas decem erant Helvetiorum millia, ad urbem Novariam castra posuit. Hic infelix Ludovicus Sfortia proditus est ab Helvetiis illis, quos ipse in Italiam deduxerat, dum hi pugnare contra populares suos recusant, qui in Gallorum erant exercitu. Et cum misero principi, neque quod suam pecuniam inter ipsos diviserat, neque preces additis etiam lacrymis quicquam prodesse, jamque se una cum Novaria urbe in Gallorum potestate fore prævideret, eodem Helvetios oravit, saltem concederent sibi mutato habitu, & ipsorum more armatum, per ipsorum stationes urbe egredi & salutis suæ prospicere. Idem Galeacius etiam Sanseverinus, duoque alii viri primores cum fecissent, & hoc novo habitu Novaria egressi per medium Gallorum exercitum incederent; sive agniti à quodam, cui hoc muneris demandatum erat, sive ab iisdem Helvetiis indicati, certe omnes quatuor correpti fuerunt & in custodiam dati. Ludovicus in Franciam abductus, & cum impetrare non potuisset, ut in conspectum regis admitteretur, in turrim *Loccessiam* conclusus est,

A ubi captivus reliquum vitæ, id est, decennium circiter exegit, princeps multis sane virtutibus praeditus. Veruntamen, quia cognatis debitum praeripuit imperium, & Turcas contra Christianos concitare studuit, non est deplorandus vitæ finis ejus miserabilis. Mediolani captivitate Ludovici nunciata cum undique trepidaretur, Ascanius Cardinalis, frater ejus, & una alii propinqui amicique Sfortiarum profugerunt urbe. Ascanius *Rivoltam* se contulit ad fines Placentinorum, quem locum Conradus Landus, cognatus ipsius amicusque, tenebat, ibique dum salutis suæ securus esse credit, ab ipso Lando proditus, ducibusque Venetis in potestatem traditus est una cum aliis aliquot comitum. Hoc intellecto rex Galliae adeo vehementer, additis etiam minis, à Senatu Veneto petiit Ascanium sibi dedi, ut Veneti, ne sibi forte magnum aliquod malum conciliarent, denique eum regi dederent. Tum illum in Franciam abductum rex vidit, majore erga ipsum, quam erga fratrem ejus, humanitate usus, & in turrim compegit in urbe Bituricensi (*Bourges*.) Sed Mediolanenses, non expectato victorum adventu, ad quibus resistendum neque vires ipsis, neque animus suppetebat, legatos miserunt ad Cardinalem Rhotomagensem, (*de Rouen*) qui citra Alpes vicarius erat, seu praefectus regius, veniamque ab eo petierunt, quod regis imperio se subtraxissent, & Sfortiae potestati se iterum subjecissent. Cardinalis civitatem in fidem suam accepit, irrogata tamen illi trecenties mille ducatorum multa, quæ deinde majorem partem Mediolanensibus humanissime remissa est ab clementia regis.

Mediolani exemplum sequutæ sunt aliae civitates, quæ itidem ab rege desciverant, & peraeque etiam multatæ fuerunt quæque pro facultatibus. Ditio Mediolanensis paruit imperio Ludovici Gallorum regis ab anno MD. ad annum usque MDXII. quo Julius II. Pontifex, successor Pii III. qui tantummodo septem & viginti post Alexandrum VI. diebus gessit Pontificatum, foedere cum rege Hispaniae Venetisque inito, quibus anno MDIX. Galli Cremonam ademerant, constituit Maximilianum Sfortiam, Ludovici Mauri filium, in paternum restituere imperium. Itaque Maximilianus relicta Germania, quo pater eum ablegaverat, ut antea diximus, & copiis secum adductis, quas ipsi Cæsar dederat, maxime Helvetiorum auxilio, quos ipsi adjunxerat Pontifex, feliciter recuperavit Mediolanum urbem, protinus sine certamine relictam à ducibus copiisque Gallorum. Lauda nostra inter primas fuit illarum urbium, quæ se Maximiliani imperio subjecerunt; & una cum arce militibus se foederatorum dedit, qui sociorum principum nomine possessionem ejus adierunt. Idem fecerunt reliquæ urbes Ducatus Mediolanensis, in cujus imperio confirmatus ab Cæsare, eaque de causa magno populorum gaudio, qui vehementer desiderabant Italicum & Sfortianæ gentis principem habere, solenniter Mediolani coronatus est Maximilianus a. d. iv. Cal. Jan. anni MDXII. Supra modum regi Galliae molesta accidit hæc repentina Mediolanensis Ducatus amissio. Veruntamen cum adhuc in potestate sua haberet Mediolani, Cremonæ, & Genuæ urbium arces, atque has ipsi posse adjumento esse ad recipiendum Ducatum putaret, opportuna mandata dedit ad numerosissimum exercitum conscribendum, iterum belli fortunam in Italia tentare certus. Mox inter Pontificem, Imperatorem, & Venetos, qui jam belli societatem contra ipsum inierant, multis contentionibus & simulatibus exortis, artibus ille penitus eos divellere studuit, suisque viribus quempiam adjicere foederatorum. Igitur ad postremum foedus iniit cum Senatu Veneto hac conditione, si Ducatus Mediolanensis reciperetur, Cremona tunc & *Ghiara* Adduæ

duæ ad eundem Ducatum pertinere intelligerentur, præter multas alias, quæ legi possunt in *Historia Veneta* Pauli Parutæ, lib. 1.

Postea regis copiae in Italiam venerunt ad viginti millia militum numero, & Alexandria capta Novariam petierunt, quo se Maximilianus Dux contulerat hoc animo, ut se hostibus opponeret maxime Helvetiorum opera, quorum magnam apud se manum habebat. Hoc eodem tempore Bartholomæus de Alviano, dux Venetorum, Mediolanensem ditionem ab ista parte aggressus, qua *Ghiara* Adduæ est, facile occupaverat Cremonam urbem; Laudaque nostra, ejus exemplum sequuta, sponte sese dederat eidem Bartholomæo. Itaque rebus undique turbatis, & fluctuante adhuc Maximiliani fortuna, populus Mediolanensis aliarumque urbium, insita plebi levitate, quæ semper novarum rerum solet esse cupida, mussitare coepit, ita ut jam præ Duce suo exterorum iterum dominium probare videretur, quos paulo ante adeo fuerat exosus. Verum denique Gallorum duces, inter quos primum locum obtinebant Joannes Jacobus Trivultius & Tremollia dominus, cum Helvetios corrumpere, qui sub Maximiliano Duce militabant, atque ita ipsum Maximilianum in potestatem suam, sicut olim Ludovicum patrem ejus, redigere frustra tentavissent, de belli victoria armis decernendum fuit. Itaque ad Novariam pertinaci & cruento prælio commisso, virtus fidesque Helvetiorum victoriam Maximiliano Duci peperit, Gallorumque copiae gravi vulnere accepto, celeriter superatis Alpibus in Galliam redierunt.

Per hujus prælii fortunam cum Sfortia Dux pristinam apud suos existimationem atque auctoritatem recepisset, Mediolanenses ex præcipuis suorum missa legatione petierunt ab eo, & impetraverunt quoque veniam, quod ad primum quasi tumultum Gallicorum armorum in Italia ab obedientia ipsi debita recessissent. Idem fecerunt etiam reliquæ urbes Mediolanensium ditionis, quæ Como & Novaria exceptis, Sfortiani imperii jugum excusserant, à quibus collatas multæ nomine pecunias maximam partem Helvetii optime de Sfortia Duce meriti acceperunt. Maximilianus imperium recuperatum aliquandiu rerum suarum securus obtinuit, præfecto regni Neapolitani (*Viceregem* vulgo dicunt) partes ejus amplexo, qui in Longobardia erat cum multis Hispanorum aliarumque gentium copiis, & post commissum prælium valida illi auxilia Novariam submiserat. Præterea Alvianus, summus Venetorum belli dux, cum exercitu in Veronensium fines recesserat, quo facto Hispani Cremonam diripuerunt, quia Cremonenses Venetorum copias in urbem acceperant. Interim Galliarum rex Ludovicus, qui neutiquam ex animo ejecerat cogitationem illam in Italia se confirmandi & amissa recuperandi, dum ad consilia sua exsequenda magnos facit apparatus, & Venetorum legati de belli ratione cum eo constituturi in Galliam proficiscuntur, Parisiis fato functus est ipsis Cal. Jan. anni MDXV. nulla relicta prole. Itaque in Galliæ regnum successit illi Franciscus Valesius, regio sanguine satus, & proxima defuncto cognatione conjunctus, qui magni animi altissimi-que spiritus princeps, cum decessoris sui consilia vehementius etiam agigaret animo, simulac ad regnum accessisset, omnium primum cogitationes suas in illud intendit, quomodo recipere posset regnumque suo adiacere Ducatum Mediolanensem. Cumque ad hoc Veneti quoque acriter eum incitarent, denique ad illud consilium exsequendum belli fœdus inter eos est initum iisdem conditionibus, quibus antea inter eosdem Venetos & Ludovicum XII.

Itaque ingenti utrinque cum apparatu eodem tempore rex per insuetas vias Alpibus superatis Mediolanensium ditionem ingressus est magno cum

A exercitu, & itidem Venetorum duces cum quindecim millibus militum in eundem penetraverunt Ducatum. Mox Novaria & Papia occupatis hinc ad *Marinianum* rex castra posuit, inde Veneti Lauda substituerunt, quam urbem cum ejusdem anni MDXV. mense Julio cepisset Rentius Cerius ex præcipuis Venetorum ducibus, ut dicit Alemanius Finus *Historia Cremonensis* lib. VIII. eademque mox ab eo relicta in potestatem venisset Helvetiorum, qui sub Sfortia Duce stipendia merebant, atque hi desperantes de ejus contra vicinos Gallos defensione, in tutiora se inde recepissent, iterum occupaverat Alvianus. Tantis ut resistere viribus posset Dux B Maximilianus, belli cum eo societatem inierunt Leo X. Pontifex, qui Julio II. successerat, Hispani, Florentini, & Helvetii, ex quorum sola gente ad quadraginta millia peditum numerabantur. Postea cum rex cum exercitu ad S. Donati movisset prope Mediolanum, ibique posuisset munissetque castra, Helvetii optime instructis ordinibus in aciem processerunt: atque adeo a. d. xv. Cal. Oct. ejusdem anni MDXV. prælio commisso tanta utrinque virtute pugnatum est, ipso Francisco rege eximia fortitudinis suæ documenta edente, ut sola nox dirimere certamen posset. Itaque dum proximo mane denuo eodem undique cum ardore pugnatur, cum adhuc prorsus anceps esset fortuna prælii, superveniens Alvianus Venetorum dux, qui à Lauda cum lectissimis voluntariorum ducentis regi in auxilium profectus erat, una cum Gallorum equitatu impressione facta, satis magnam edidit Helvetiorum stragem, qui ordines suos aliquantum laxaverant. Veruntamen hi dextre conglobata iterum acie, intra Mediolanum urbem servatis ordinibus se receperunt, ut adeo videretur non satis dijudicari posse, penes quos victoria steterat. Sed dum rex, etsi non parum afflictus morte quorundam ex suis principum virorum, ad urbem Mediolanum occupandam, quæ tanto tamque fortium virorum, id est, Helvetiorum præsidio munita erat, instruit consilia, hi postero die insita animi levitate relictis signis urbe egressi sunt, & domos suas abiierunt, mille tantum & quingentis in arce remanentibus, in quam se Maximilianus Dux receperat. Itaque Galli superiores, & jam sine exceptione victores, cum præterea etiam abiissent Pontificis Hispanorumque copiae, inter quas æmulatio & similitas erat exorta, sine certamine Mediolano urbe facile sunt potiti. Quin imo legati Mediolanensium protinus ad Franciscum regem iverunt, & præteritorum veniam petentes, inque futurum exactissimam illi obedientiam pollicentes, urbem illi dederunt. E Veruntamen ipse Mediolanum intrare noluit, non convenire majestati suæ ratus in ista morari urbe, cujus arcem tenerent alii. Itaque missio in eam Carolo Borbonio, mandataque arcis oppugnatione, in qua Petrus Navarra cuniculorum agendorum inventionem eximiam navavit operam, Maximilianus post unius mensis obsidionem dedit eam regi, & in Galliam abductus est, ibique ex pacto percepit annua triginta scutatorum millia, quoad vixit. Ad hunc modum rex arce in potestatem suam redacta, Mediolanum intravit tanta cum pompa ac magnificentia, ut triumphi potius, quam simplicis ingressus speciem exhiberet. F Paulo post Franciscus cum à Senatu Veneto missos legatos quatuor aliquandiu apud se retinisset magna invicem cum amicitiae non vulgaris & humanitatis specie, Venetisque multas suarum copiarum subministrasset, Lautrecii domino, magni nominis duce addito, ut illarum auxilio recipere sua possent, quæ præteritis bellis amiserant; in Galliam rediit anno MDXVI. Carolo Borbonio Ducatu Mediolanensium, & omnium adeo rerum, quæ in Italia ad Galliæ regnum attingebant, summa commissâ.

Sed Maximilianus Imperator, res suas in Italia promovere vehementer cupiens, ipse eo proficisci constituit, ut se confirmaret in illarum urbium possessione, quas istic tenebat, & Gallos, si fieri posset, Ducatu Mediolanensi, Imperii feudo, expelleret.

Itaque multis copiis collectis, magnaue Helvetiorum manu conducta, per viam Tridentinam cum exercitu Veronensium fines attigit eodem anno MDXVI. & hinc in Brixianum agrum profectus est. Inde *Asole* expugnatione tentata, quem locum valido praesidio firmaverant Veneti, Adduaque amne transito, cum Galli, qui eodem advenerant, quo illi se objicerent, Mediolanum se recepissent, in Caesaris potestatem concesserunt, quaecunque Athesin & Padum fluvios interjacent, exceptis Crema & Cremona. Hinc animis auctus Imperator ad sextum ab urbe Mediolano lapidem progressus est, civibusque, quorum juxta atque militum magna erat trepidatio, significari jussit, se in Italiam venisse, ut more majorum coronaretur Mediolani, Gallosque inde expelleret, injustos Ducatus illius possessores, quem esse partem & feudum Imperii dicebat. Proinde ipsi, ut principi suo, ocyus portas aperirent, omniaque a se bona expectarent, contra vero ultimum exitum, si parere his mandatis recusarent. Mediolanenses ex Gallorum voluntate Ducatum istum jam ab Imperio divulsus esse responderunt, aliisque concessum ingentium pecuniarum mercede Imperatoribus perfoluta, jamque eum hereditatis jure aliisque titulis juste ad Galliae reges esse translatum, iisque jure debita tueri certum sibi esse. Interim vero dum Imperator armis tentare urbis expugnationem cunctatur, quatuor in illam venerunt Helvetiorum millia, quos Galliae rex conduxerat, quo facto sicut oppidani confirmati sunt, ita non parum perturbatus est Imperator. Itaque ille maxime metuens, ne Helvetii sui, quibus parum exacte stipendia solvebantur, conspirarent cum aliis suae gentis, qui inter Gallos militabant, & pecunia corrupti forte semet ipsum hostibus proderent, aliam praetendens abitus causam cum ducentis equitibus in Germaniam rediit, reliquo exercitu in Italia relicto, qui ipso digresso ocyus est dilapsus. Helvetii autem cum Laudam nostram ingressi crudeliter diriperent, & omnia, quae circa erant, depopularentur, alii illi, qui Mediolani erant Gallorum mercenarii, admonuerunt eos, ut ab illis injuriis abstinerent, addita interminatione, si porro ita pergerent, se Mediolano urbe egressuros, ipsosque vi armorum expulsiuros Italia. Itaque ne manus civili sanguine foedarent, Helvetii Caesarei, nihil praeterea hostile ausi, cum per aliquot dies in urbe agroque Laudensi substitissent, domos suas abierunt.

Dehinc nihil magnopere aliud novi contigit, quod ad nostram faciat *Historiam*, usque dum defuncto Maximiliano Imperatori anno MDXIX. Carolus V. successit, cujus principis virtutem ac prudentiam & fortunam noverunt omnes. Hic Mediolanensem Ducatum Gallorum manibus eripere studens, foedus iniit cum Leone X. Pontifice, hac inter alias conditione, ut Ducatus ille, si receptus esset communibus viribus, Francisco Sfortiae daretur, Maximiliani fratri, qui in Gallia captivus detinebatur. Cumque Venetos etiam a societate Francisci regis divellere Carolus frustra tentavisset, denique in Italiam misit ingentem exercitum, in quo multa Helvetiorum millia militabant Prospero Columna duce, nec non copiae Pontificiae, quibus imperabat Fridericus, Marchio Mantuanus. Contra hunc exercitum profectus cum Gallorum copiis Lautrecus, cum Adduae amnis transitu prohibere hostes frustra tentavisset, adeoque Mediolanum se recepisset, Prosper ad suburbia usque ejus urbis progressus, magis ut armorum periculum faceret, quam quod magnopere aliquid amplius speraret, impetum in illa fieri jussit. Hunc cum sustinisset Theodorus Trivultius, qui istic cum Venetorum manu praesidio relictus erat, sed eodem Helvetii, etsi illis a Lautreco imperatum erat, accurrere nollent, seroque advenirent Vascones, Caesarei primum in suburbia, mox in ipsam quoque urbem perruperunt, & promiscue omnibus direptis, Gal-

lisque fuga elapsis, brevi tempore totam urbem in potestatem suam redegerunt. Lautrecus Mediolano cum equitatu profugit, eumque ante omnia servare incolumem studens, primo Comum, inde mox per viam Laudensem in Venetorum fines deduxit. Sed voluntarii milites Venetorum, dum Lauda urbe digressi, ubi Lautrecus in receptu Mediolanum cum parte copiarum ac tormentis alioque belli apparatu praefectum reliquerat, Mediolanum pergunt ad auxilium Lautreco ferendum, a Caesareis intercepti omnibusque exuti fuerunt.

Mediolano occupata multae aliae civitates sese Caesareis dediderunt, interque eas non postremo loco Lauda. Lautrecus & Veneti, magna Helvetiorum manu aucti, postea quidem Mediolanum urbem & reliqua, quae amiserant, recuperare tentaverunt, sed dum Novariam urbem illi expugnant, Columna Francisci Sfortiae Mediolanum introducendi occasionem arripuit. Hic pecuniis a Mediceo Cardinale acceptis, Tridento digressus cum sex Germanorum peditum millibus, per Veronensium Mantuanorumque fines primum Placentiam, inde Papiam se contulerat, iter illi tutum praestante Marchione Mantuae cum trecentis militibus Pontificiis. Papia itaque clam noctu profectus, ut inter ipsum & Columnam convenerat, & ad *Sextum* usque progressus, idem Columna, qui ibi eum expectabat, cum valido militum praesidio Mediolanum deduxit, ubi quanto cum gaudio & applausu exceperint eum Mediolanenses, qui in ipso omnes antiquos Sfortias suos recipere sibi videbantur, verbis exprimi satis non potest. Lautrecus occupata Novaria ad Papiam expugnandam se accinxit, sed copiae ejus, dum impetu urbem invadere cunctantur, quod acriter, sed nimium forte praepropere postulabant Helvetii, a Prospero Columna, qui cum exercitu suo Mediol. excesserat, a Papia recedere coactae sunt. Veruntamen mox Gallorum Venetorumque duces, cum resistere amplius Helvetiis non possent, qui omnino pugnare volebant, jamque tumultuabantur ob non soluta stipendia, Columnam in ipsis castris suis invadere constituerunt, ad locum, cui *Bicoca* nomen, a Mediolano non amplius quatuor passuum millibus distantem, sed antea Laudam urbem, quam receperant, munimentis firmare voluerunt, ut in omnem eventum tutum receptum haberent. Itaque atroci praelio commisso, quo ingens utrinque fuit caesorum numerus, Caesarei tamen pelli nequaquam potuerunt. Inde Helvetii per tumultum stipendia poscentes, neque auscultantes salubribus ducum consiliis, eos cum omnibus copiis recipere se *Trecium* ad Adduam amnem coegerunt, unde mox Helvetiis dilapsis, Lautrecus cum aliis Gallorum ducibus, ut regem de statu rerum in Italia certiores faceret, in Galliam abiit, parte copiarum in Cremonam urbem dimissa, & item parte Laudam, quam Fridericus a Bozolo & Bonavallis cum sex equitum centuriis alioque peditum firmo praesidio intraverunt. Sed ocyus accurrerunt Caesarei ad urbem nostram Gallis eripiendam, & eodem die, quo hi eam sunt ingressi, isti ab altera parte, praecedente cum Hispanorum peditatu Aвали Marchione, ad eandem accesserunt. Itaque hi urbem aggressi, antequam Galli praesidia & custodias disposuissent, aut se praeparavissent ad defensionem urbis, cum necdum omnis peditatus Gallorum in eam pervassisset, facile inde eosdem expulerunt, qui cum tumultuaria fuga ad pontem in Addua flumine se reciperent, ab insequentibus eos Hispanis nonnulli eorum capti fuerunt. Hispani autem mox infelicem in urbem regressi, totam expoliaverunt anno MDXXII. Paulo post Prosper Columna ad Cremonam castra posuit, eamque certis conditionibus in deditionem accepit ab Lescuno, Lautreci fratre, qui eam praesidio tenebat.

Neque tamen adversae Gallorum res in Italia magnum Francisci regis animum fregerunt, quin ille denuo constitueret in Italiam redire cum viribus istis, quas sua majestas tamque arduum bellum postulare videretur, quod ipsi eo difficilior erat futurum, quia Veneti, qui antea ipsius fuerant amici, nunc novum foedus inierant cum Hadriano VI. Pontifice, qui Leoni X. successerat, & Im-

peratore, ac Francisco Sfortia, multisque aliis principibus, ad Italiam, & maxime etiam ad Franciscum Sfortiam in Mediolanensis Ducatus possessione tuendum. Denique autem Franciscus, cum tunc quidem aliis rebus impeditus ipse in Italiam abire non posset, Boniveti dominum, primum Galliae belli ducem, (*Admiralium* vocant) eo misit, & una duo hastatorum, & XII. peditum millia, ex variis gentibus collecta, quibus deinde multae aliae copiae accesserunt. Sed Prosper Columna cum non multum curaret hasce Gallorum copias, usque eo illae progressae sunt, ut Ticino amne superato ad Mediolanum castra ponerent. Tum vero Prosper cognito, quod erat, periculo, magnopere petiit à Venetis, ut ex foederis legibus copias suas, quibus imperabat Dux Urbini, summus ipsorum praefectus belli, mitterent ad imperium Mediolanense tuendum. Insuper ille, quantum poterat, copias suas undique contraxit, Laudamque nostram praesidio, quod habebat, nudavit, quo illo uteretur ad illorum locorum defensionem, quae ipsi majoris esse momenti videbantur. Itaque Galli anno MDXXIII. Laudam occupaverunt & egregie communiverunt.

Ceterum per hasce in Italia turbas maximis afflicti sunt Laudenses incommodis, cum illorum urbs toties mutaret dominos, atque adeo multi eorum alio locorum concedere opus haberent. Si enim illa aliquem ex Guelphica factione dominum habebat, Gibellinis ex urbe fugiendum erat: & contra Guelphi se proripiebant, si quis eam Gibell. teneret. Sed commodum Laudensibus perfugium fuit Crema urbs, in qua per hasce occasiones saepe aliquot centeni nostrorum conspecti fuerunt, Cremenfis eos humanissime excipientibus istius effugii memoria, quo multi illorum in urbe nostra saluti suae consuluerant anno MDXIV. quo illorum urbs misere infestabatur atroci pestilentia. Tumque itidem illi Cremenfis, qui Guelphicae factionis erant, clanculum in Lauda urbe commorari debebant, quia illis temporibus apud nos praevalabant Gibellinae partes. Sed Gallorum dux Bonivetus non multum proficere potuit in terris Mediolanensium, & post varios casus magna parte copiarum ejus dilapsa, retro per Alpes in Galliam recedere magno cum damno coactus est. Tum Alexandria, nostraque urbs Lauda, quae sola in Gallorum potestate remanserant, ocyus sese foederatis dederunt; Alexandria Aterni, sive *Pescara* Marchioni, Lauda Duci Urbinati. Neque tamen Fridericus de Bozolo antea dedere Laudam voluit, quam certus esset, Bonivetum jam superavisse Alpes, quo eodem deducta fuerunt sine ullo impedimento quinque millia peditum Italorum, qui in duabus illis urbibus stipendia inter Gallos merebant.

Sed Franciscus rex nihil conterritus tantis infortuniis, neque ab incepto depulsus rebellionem Caroli, Ducis Borbonii, qui regii sanguinis princeps cum Angliae rege clanculum res novas magnosque tumultus in Gallia concitare molitus, detectis mox ab rege consiliis ejus, Caesaris se partibus adjunxerat; ingentibus viribus collectis citius omnium opinione secundum in Italiam venit, & recta Mediolanum petiit.

Statim Caesarei, qui non ordinaverant, ut oportebat, ad defensionem necessaria, urbe excefferunt, & Franciscus Sfortia, regni Neapolitani praefectus, Duxque Borbonius, quem Imperator supremum in Italia praefectum suum constituerat, *Soncinum* abierunt, *Pescara* Marchio Laudam: atque adeo Francisco fuit in proclivi Mediolanum urbem occupare Caesaris vacuum. Haec res non mediocriter Clementis VII. Pontificis Senatusque Veneti perculit animos, qui suspectam quoque habentes Imperatoris potentiam, cum illi non in animo esse suspicarentur Franciscum Sfortiam in Ducatu Mediolan. confirmare, sed illum Ducatum suo imperio adjicere; relictis partibus Imper. cum Francisco rege foedus fecerunt, hac tamen conditione, ne Veneti auxilium illi ferre ad eundem Ducatum occupandum tenerentur. Sed rex exercitum ad Papiam urbem admovit, in qua ex Caesareis erat Antonius Laeva, celeberrimus peritissimisque belli dux, cum trecentis equitibus, & quinque Ger-

A manorum Hispanorumque peditum millibus, veteranis omnibus, totiusque flore exercitus. Sperabant illi quidem, si Papiam in obsequio fideque erga Caesarem continerent, vana fore omnia regis consilia, verum hic eam obsidione clausam, cum alimenta jam deesse obsessis inciperent, adeo ad extrema redegit, ut Caesar. copiarum duces aut subsidium, quod satis esset, illi submittere, aut hostem ad praelium compellere, & ultimam experiri fortunam decernerent. Itaque illis Lauda urbe egressis, & versus Papiam contra Gallos profectis, celebre illud commissum est praelium anno MDXXV. cujus singulos casus quicumque cognoscere cupit, apud alios legere poterit scriptores. Victoriam ejus adepti sunt magna cum gloria Caesarei, quae maxime fuit insignis Francisci Galliae regis captivitate, qui cum aliquandiu in Picigitone arce in finibus Cremonensium fuisset in custodia, deinde in Hispaniam abductus est.

Tum vero quomodo fuerint affecti Pontifex & Venetorum Senatus, ipsum lectorem facile judicare posse credimus. Itaque illi metuentes, ne Caesar non solum Mediolanensem Ducatum sibi vindicaret, sed & totius Italiae tentaret dominium, belli contra eum societatem ad communem libertatem tuendam inierunt Pontifex, Veneti, & Florentini, pro quibus sponddit Pontifex pro potestate illa, quam ipsi ad eum hujus rei causa derulerant. Contra Imperator isto contra se principum Italico-
C rum animo cognito, omnia agebat, ut in hoc fortunarum suarum fastigio sane quam moderatissimum se illis probaret. Itaque per Ducem Sueffanum significavit Pontifici, se fidam firmamque cum omnibus pacem facere cupere, atque ultro Francisco Sfortiae Mediolanensem restituere Ducatum velle, si ille culpae non convinceretur ob traditam Venetis ex conventione Mediolani urbis arcem; sin aliter, se in eodem Ducatu confirmaturum Maximilianum fratrem ejus, qui in Gallia erat. Sed cum hisce Friderici promissis praeter ceteros exiguum fidem haberet Senatus Venetorum, dum foederati denuo parant arma, inter Caesarem Galliarumque regem pax facta, geminique matrimonii vinculo firmata est, & Franciscus in libertatem restitutus, interque alias pacis conditiones hoc quoque constitutum, ut Mediolanensis Ducatus Borbonio Duci daretur, atque hic Reneam, cognatam regis uxorem duceret.

Verum non diu pax duravit inter hosce principes, dumque alter contra alterum clanculum omnia moluntur, Imperator Pontificem Venetosque in suas pertrahere partes conatus est, iisque per Hugonem de Moncada significavit, se nihil aequae, quam firmam atque stabilem undique pacem expetere, non hostium metu, sed Christianae Reip. bono. Responderunt illi, eum hoc re ipsa comprobaturum, si Mediol. arcem, in qua Franc. Sfortia erat, obsidione liberaret, eique Mediolani restitueret imperium. Interim post multas disputationes inter Pontificem Galliaeque regem & Venetos foedus ictum est in hoc, ut Imperatorem armis adigerent ad restituendos Galliae regi filios, quos hic illi dederat obsidum loco, cum liberaretur captivitate, utque Sfortias in Ducatum Mediolanensem restituerent, suaeque viribus communibus defenderent. Ad hasce foederis leges implendas cum focii copias suas in Mediolanensem terras misissent, Ludovicus Vistarinus, nobilis Laudensis, ut patriam insolentia & crudelitate militum Neapolitanorum liberaret, qui mille & quingenti numero Laudae praesidio erant, Fabricio Maramaldo, itidem Neapolitano, duce, ad Urbini Ducem, Venetorum imperatorem, se contulit, cum eoque de Lauda occupanda constituit. Itaque a. d. VII. Cal. Jul. ejusdem anni MDXXV. Dux Urbini, ut convenerat, Malatestam Ballionem cum aliquot millibus peditum ad nostram urbem misit, qui cum ad moenia & munimentum quoddam accessissent, dum Vistarinus in urbe cum aliis aliquot hominibus sex milites Neapolitanos, qui ibidem loci custodiam agebant, aggressus, ad hunc tumultum commilitonibus eorum accurrentibus laborare jam inciperet, opportune munimentum istud scalarum beneficio conscenderunt, & Vistarino liberato in forum ur-

urbis progressi sunt, militibus Neapolitanis partim una cum duce suo in arcem fuga elapsis, partim captis & spoliatis. Cognita hujus expeditionis fortuna Dux Urbini mox ipse Laudam accessit, Ollium atque Adduam amnes admirabili celeritate transgressus, atque urbi reliquit quantum satis erat praesidii ad tuendam eam contra molestias, ab hostibus, qui in arce erant, metuendas. Hoc nuncio Mediolanum delato Vasti Marchio, eam esse rem magni momenti ratus, cum equitibus aliquot, tribusque peditum Hispanorum millibus ad recipiendam Laudam est profectus, quod in proclivi sibi fore putabat, primum in arcem, quam tenebant adhuc Caesarei, inde in urbem digressus, quae tamen cum frustrata spes est. Nam post longam inter Caesareos Venetosque in ipso foro pugnam, illi in arcem suam repulsi sunt, & Marchio re infecta Mediolanum repetiit. Mox Venetorum tormentis impetrante Urbini Duce ad arcem admotis, milites, qui eam praesidio tenebant, cum defendere se eam posse diffiderent, clanculum inde exceperunt: atque adeo urbs una cum arce in potestatem Venetorum concessit, qui tamen Francisci Sfortiae nomine eam se tenere sunt testati. Quam damnosa Caesareis Laudae amissio habebatur, quae urbs modis viribusque omnibus tuenda ipsis esse videbatur, tantum existimationis atque utilitatis ejus occupatione fociis accessit, cum urbs nostra ob ipsum loci situm in istis turbis plurimum commodi domino suo afferret.

Interim cum Franciscus Sfortia omnium rerum penuria laboraret in arce Mediolanensi, foederati conjunctis copiis suis Mediolanum petierunt hoc animo, ut subsidii aliquid illi submitterent, non sine spe ipsius quoque urbis occupandae, cum pro amplitudine sua non satis validum illa haberet praesidium, civesque insolenter ac superbe tractarentur à militibus Caesareis. Sed utraque spe destituti foederati à Mediolano urbe receperunt, & licet mox secundo eodem pergerent ad ferendas Francisci suppetias, etiam tunc vana fuerunt eorum consilia, quia duplici vallo ipsam arcem clausuram Caesarei, quibus denique eam dedere Sfortia coactus est hac conditione, ut ipse ex ea Comum abiret, eaque urbs in ipsius potestatem restitueretur. Sfortia primum ad castra sociorum se recepit, & non auscultans ducum consiliis, ut in sociorum maneret exercitu, qui maxime eam ob causam in armis erat, ut in paterno ipsum tueretur imperio, & Comum profectus cum impetrare non posset, ut Caesareorum praesidium ex pacto ea excederet urbe, ocyus inde abiit, & foedere cum Pontifice Venetisque confirmato Laudam urbem ingressus est, quam protinus ipsi tradiderunt foederati, ibique commoratus est, usque dum Cremonam urbem receptam ab hostibus sedem sibi elegit.

Accidit his temporibus celebre illud certamen singulare inter Ludovicum Vistarinum, cujus supra mentionem fecimus, & Sigismundum Malatestam, patria Ariminensem, & in Caesaris exercitu copiarum ducem. Hic Vistarinum violatae fidei inculpaverat, quod ipse miles Caesaris cum Urbini Duce de tradenda ipsi Lauda urbe, ut supra exposuimus, conspiravisset. Vistarinus, homo nobilis, qui honoris sui atque existimationis non exiguam habebat curam, graviter ferens hanc injuriam, seque illud fecisse asseverans eo tempore, quo ipse jam missionem ab Imperatoris habebat militia, ut satis etiam constaret ex ipsius epistola quadam, quam in margine citavit Franciscus Guicciardinus *Historiarum* lib. xvii. scripta ad eundem Urbini Ducem, in qua ante expositam ipsi Laudae occupandae rationem affirmat, se deposuisse munus illud, quod à Caesare acceperat, atque illud iniisse consilium, ut patriam liberaret ab intolerandis molestiis, quibus milites Caesarei Laudenfes nostros affligebant; Malatesta significavit, se paratum singularem cum ipso certamine suam defendere causam, obiectique se purgare criminis. Malatesta provocatus accepit conditionem, & utroque, id est, Caesaris & sociorum exercitu inspectante cum armati in campum processissent, Vistarinus Malatestam, qui magno cum ardore congeminebat ictus, quos admodum tamen dextre ipse avertebat, ita ut ipsius equus tantum vulneraretur, arte tractatum, atque ita fatigatum, ut vix respirare posset, mox ipse tam fortiter

A tamque perite aggressus est, ut in manu validiore viceratum ad armorum tractationem redderet inutile, atque adeo Malatesta dexteritate atque velocitate e plus semel sine certamine per campum circumvesto, perveniente mox nocte victor ipse salutaretur.

Dehinc per aliquod tempus in Mediolanensem tunc ris nihil accidit memorabile, quod ad nostram faciat *storian*, ut quidem multa & magna contigerunt alibi eorum. Ita Romam diripuerunt Imperatoris copiae Carolo Borbonio duce, qui iusto Dei judicio ad muros fidei urbis sclopeti ictu vulneratus infelicitate vitam finivit. Mox Clementem VII. Pontificem Caesarei in a S. Angeli captivum tenuerunt, ad quem liberandum nuncio Galliae rex Senatusque Venetorum inita belli foedere se obstrinxerunt.

B Sed ut haec missa faciamus, & ad nostra revertamur Veneti persistentes in Sfortiae restituendi consilio, anno MDXXVII. pecuniis sublevatum perpulerunt, ut Laudam veniret, quo facilius cum ipsorum se exercitu conjungere posset, quem in hac loca deduci jusserant. Eadem ob causam cum viribus ingentibus in Italiam venit Lautrecus, à rege Galliarum missus, qui arctissime ut nunquam alias, foedere cum Venetis se junxerat Pontificem in libertatem & Franciscum Sfortiam in Mediolanensem Ducatum restituendum; quamvis Lautrecus, qui aliquot locis occupatis Alexandriae inprimis ubi suorum militum imposuerat praesidium, nulla faciente mentione Sfortiae eam tradendi, suspicionem concitavit quasi Galli non ista cum sinceritate agerent, quae parat. Mox Lautrecus, nullos ultra progressus, ut facere potuisset, facere conatus, ex Longobardia Romam Neapolim profectus est.

C Deinde anno MDXXVIII. ex Germania in Italiam venit Dux Brunsvicensis, missus à Ferdinando, fratre Imperatoris, cum duodecim millibus militum, qui postquam exiguo cum fructu Venetorum quasdam urbes expugnare tentaverat, & ipse Mediolanensem ditionem ingressus, cum Antonii Laevae copiis se conjunxit, qui ipse praefectus erat Imperatoris, atque una cum iis ad Laudam urbem castra posuit hoc animo, ut eam expugnaret, cum hanc urbem rerum Caesaris in Longobardia ingens fore pondus & momentum crederet. Itaque Laevae protinus, ut urbem sibi dederet, postulavit ab Joanne Paulo Sfortia Francisci Ducis fratre, sed spurio, quem frater ad urbem tuendam reliquerat cum tribus millibus militum, additis ducibus fortissimis: quod nisi ille contra festim traderet urbem sibi, minabatur Hispanus se ipso omnibusque suis saevissimi belli calamitates acerbissimas illaturum. Sed respondit Joannes Paulus, neutiquam sibi in animo esse ad nudas duntaxat minas urbem hostibus dedere, suae fidei commissam ab illo, qui legitimum quoque titulo ejus esset dominus, seque primum auxilio Dei, iustarum causarum patroni atque vindicis, tu suorum militum armis fidere, atque urbem se fratri sperare servaturum. Itaque Laeva & Brunsvicensis, cum verba nihil proficerent, vim adhibere coeperunt, cumque muros ab ista parte, qua parum firmi erant, tormentis bellicis labefactavissent, & tantum illorum decisissent, quantum satis erat ad impetum faciendum, Germani in oppugnanda urbe facile primas concesserunt peditibus Hispanis, qui parvis, quantum fieri potis erat, contra propugnantium tela se munientes, per disiectam murorum partem in urbem perirumpere conati sunt. Sed cum semper repellerentur, multique eorum caderent, & inprimis fortissimus quisque atque audacissimus in ipsa fossa aut occideretur, aut vulneraretur, atque etiam bipennibus hastisque signiferi quidam transfixi, qui nimium progressi erant intra moenia, signaque eorum in urbem asportata essent; Antonius Laeva tamen neutiquam suos revocabat à certamine, sed contra eos, ut imbelles timidosque, increpans, denuo impetum facere jussit, nimis durum fore ratus, si suae gentis milites, qui se in ejusmodi occasionibus repelli non posse gloriari consueverant, nunc à militibus Italicis retro agerentur. Veruntamen denique Brunsvicensis cum tantam Hispanorum videret stragem, Laevam perpulit, ut receptui signum


gnum daret, atque ita Lauda urbe hoc à furentibus hostibus periculo liberata, Joannes Paulus ultra modum lætus ducibus suis militibusque gratias egit ob rem tam bene fortiterque gestam. Sed Læva & Brunsvicensis cum impetu Laudam occupare frustra tentavissent, fame domare eam constituerunt, atque adeo obsidione clauferunt. Sperabant enim, quoniam illud ipsum tempus erat frugum ex agris colligendarum, ideoque parum annonæ in urbe supererat, obsessos coactum iri, ne fame perirent, portas ipsis aperire. Sed neque hoc consilium successit felicius primo Cæsareis. Etsi enim adeo laborabat fame civitas, ut solis militibus panis appenderetur, civibus autem vix superesset, quo misere vitam sustentare possent, tanta tamen fuit obsessorum constantia, ut totum fere mensem in extrema perdurarent inopia. Interim inter Germanorum copias, quas Dux Brunsvicensis adduxerat, grassante pestilentia, quæ plurimos eorum abstulit, adeo illi languere ac torpere cœperunt, ut à ducibus jussi denuo impetum facere ad urbem expugnandam, parere nollent, tumultuantes etiam ob non persoluta stipendia. Itaque cum à mœnibus recessissent hostes, tormentaue bellica abduxissent, dimisso exercitu nostra urbs obsidione liberata est. Læva Mediolanum rediit, eamque urbem annona ceterisque necessariis instruxit, quo eam ab hostibus defenderet.

Franciscus enim, Galliarum rex, cui necdum cogitationes de Italia exciderant, multum sollicitatus à Venetis, denuo S. Pauli dominum cum viribus ingentibus ad persequendum bellum miserat, quam eandem ob causam Veneti quoque jam cum exercitu miserant Urbini Ducem in terras Mediolanensem. Hic Laudam nostram quam diligentissime firmari præsidio munimentisque suadebat, quoniam foederati, hanc urbem in potestate habentes, non tantum Bergomatium Cremenisiumque finibus prohibere hostes, sed & ad ipsas usque Mediolani urbis portas excursions facere poterant, resque Francisci Ducis semper ulterius promovere. S. Pauli dominus cum in Longobardiam venisset, & ad *Monticulos* cum Duce Urbini colloquutus, post varias consultationes potissimum Neapolim ad ferendum suis auxilium pergendum sibi censeret, denique constitutum est, ut dilata Mediolani urbis oppugnatione Papiam tentaretur. Itaque cum hanc vi atque impetu feliciter cepissent foederati diripuissentque, & statim quoque Novaria, aliaque aliquot loca se illis dedissent, S. Pauli dominus loco promovendi arma in Ducatu Mediolanensi, se à Venetis sejunxit, & ad ferendum Trivultio auxilium profectus est, qui nomine Francisci regis arcem Genuensem defendebat, quod cum frustra fuisset, Alexandriam regressus est. Inde cum propter anni tempestatem ad finem jam decurrentis utiliter in bello persisti non posset, S. Pauli dominus Alexandriam se recepit, Franciscus Dux Papiam, Dux autem Urbini Laudæ & circa hyemare parans, cum parum id esse gratum Francisco Duci videretur, mutato consilio copias suas trans Adduam amnem abduxit.


Anno MDXXIX. variæ conditiones pacis inter Cæsarem & Franciscum regem ejusque socios propositæ fuerunt, sed cum Cæsar non adeo paratus esset, ut quidem desiderabant ceteri, Sfortiam in Mediolanensem restituere Ducatum, quod ante omnia postulabant Veneti, tum suæ securitatis, tum libertatis Italiæ causa, nihil illis effectum est. Itaque cum ad arma undique rediretur, S. Pauli dominus, Dux Urbini, & Franciscus Sfortia Mediolanum & Comum occupare destinabant, quæ ex majoris momenti locis duæ duntaxat urbes à Cæsareis adhuc tenebantur. Sed mox Gallus ille, dum infelici consilio denuo versus Genuam convertere vult arma, in itinere victus est ab Læva, exercitus ejus disiectus, ipseque captus: quæ etiam causa fuit, ut Urbini Dux *Cassanum* ad Adduam amnem se reciperet, ibique castra probe communiret. Interim Venetorum Senatus suspicari cœpit Franciscum Sfortiam id agere, ut cum Cæsare in gratiam rediret, atque adeo ut ab illo securus esse posset, Urbini Ducem cum exercitu in urbem Laudam mittere

A meditabatur, quod tamen effectum non est, cum Venetis mox accurrendum esset ad arcendos Veronensem finibus Germanos, qui illos invadere parati erant. Deinde inter Cæsarem Galliæque regem pace facta Cameraci, Imperator maximis cum viribus in Italiam venit, Genuamque profectus est, quo ad eum accesserunt de adventu gratulantes omnium Italiæ principum legati Venetis exceptis, qui tamen Francisco Duci, ut suos eo legatos mitteret, non dissuaserunt, quoniam Mediolanensis Ducatus Imperii feudum erat. Genua Carolus Imperator Bononiam abiit, quo paucis ante diebus, id est, a. d. VIII. Cal. Nov. jam advenerat Clemens VII. Pontifex. Hic cum ad certam firmamque pacem componendam in conventu procerum omnes essent controversiæ dirimendæ, quæ in Italia erant, ipse quoque Franciscus Sfortia eo profectus est, cum ante liberam veniendi abeundique potestatem diplomate sancitam ab Imperatore impetravisset, quo hac erga eum reverentiæ ac submissionis specie res suas promoveret. Itaque cum ad eum accessisset, primum gratiis actis de facta sibi Cæsarem visendi potestate, humi projecit diploma istud, satis se esse tutum suæ innocentia inquiens, quandoquidem certus esset, Cæsarem nihil quicquam suæ culpæ deprehensurum, quod ipsius mereret offensam, ex quo tempore à Marchione *Pescara* arcis Mediolanensi fuisset inclusus. Admodum Cæsari placuit ingenuitas Francisci, qui post varias disputationes superatis denique maxime Pontificis opera omnibus impedimentis, inauguratus est sive confirmatus in Ducatu Mediolanensi, hac conditione, ut istius beneficii nomine fisco Imperatoris persolveret quingenta ducatorum millia, & insuper alia trecenta ad sumptus belli explendos. Voluit etiam Imperator affinitatis vinculo Franciscum sibi Ducem adjungere, data illi in matrimonium Christerna, Daniæ regis & Isabellæ Austriacæ, sororis suæ, filia, quæ primum Bruxellis cum Comite Maximiliano Stampa, quem ille ad hoc procuratorem sibi constituerat, solennia nuptiarum exsequuta est, & deinde anno MDXXXIV. Mediolanum deducta, quanta cum maxima fieri poterat pompa atque magnificentia.

D Sed non diu duraverunt Ducis ac Mediolanensium gaudia, quia ille sequenti anno MDXXXV. oculi dolore laborans & febre correptus è vivis excessit extremo mense Octobri, sepultusque fuit solenni funere apud alios gentis suæ Duces. Sed quod sine liberis decesserat Franciscus, qui ipsi succedere in imperium possent, illud vero diverse affecit animos principum Christianorum. Cæsar exinde gravissime videbatur afflictus, maxime cum Dux vidua, cognata ipsius, Neapolim ad ipsum veniret: Francisci regis sopitæ cogitationes de imperio Mediolanensium occupando iterum expergiscebantur: Veneti impense metuebant, ne aut novum in Italia conflaretur belli incendium, aut Ducatu in Cæsaris potestatem redacto expeditius illi pateret iter ad ipsorum libertatem opprimendam. Variæ conditiones propositæ fuerunt, per quas satisfieri posset illis, quorum intererat. Actum fuit de Medioli. imperio aut ad Aurelianensem Ducem deferendo, ut volebat pater ejus, rex Franciscus, aut ad Engolismæ Ducem, itidem Francisci filium, sed natu tertium, ut volebat Imperator, ita ut ille viduam viro Christianam uxorem duceret. Sed cum omnia frustra essent, novi bellorum motus exspectabantur. Deinde anno MDXLIV. inter Imperatorem regemque pace facta, præter multa alia hoc quoque pactum est, ut Dux Aurelianensis uxorem duceret filiam Ferdinandi, fratris Imperatoris, cum eaque dotis nomine Ducatum Mediolanensem acciperet. Sed cum anno MDXLVI. Dux Aurelianensis decessisset, perfici hoc pactum non potuit. Denique sine ulteriore armorum strepitu in Imperatoris potestatem totus Ducatus concessit. Cumque Deus eum voluerit esse quasi splendidam gemmam potentissimorum & invictissimorum regum Catholicorum coronæ, deinde ille feliciter à Carolo V. Imperatore ad ejus filium Philippum II. Hispaniarum regem, & inde ad reliquos ejus serenissimos successores devenit, sub quorum imperio Lauda nostra & totus adeo Ducatus felici otio fruitur.







209

ANTIQ
ITALIÆ

COM. III

92